


Tnúhu ní cáháⁿ yă
ndiöxí xito cùu uú



New Testament in Mixtec, Peñoles (MX:mil:Mixtec, Peñoles)

Tnúhu ní cáháⁿ yă ndiõxí xito cùu uú

New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

872f7754-0986-5ecd-a059-925a708a6939

Contents

| | |
|---------------------------------|-----|
| SAN MATEO . . . | 1 |
| SAN MARCOS . . . | 104 |
| SAN LUCAS . . . | 167 |
| SAN JUAN . . . | 265 |
| LOS HECHOS . . . | 330 |
| ROMANOS | 419 |
| 1 CORINTIOS . . . | 460 |
| 2 CORINTIOS . . . | 502 |
| GÁLATAS | 529 |
| EFESIOS | 543 |
| FILIPENSES | 558 |
| COLOSENSES . . . | 568 |
| 1 TESALONI- CENSES | 577 |
| 2 TESALONI- CENSES | 585 |
| 1 TIMOTEO | 590 |
| 2 TIMOTEO | 602 |
| TITO | 610 |
| FILEMÓN | 615 |
| HEBREOS | 617 |
| SANTIAGO | 650 |
| 1 PEDRO | 659 |
| 2 PEDRO | 670 |
| 1 JUAN | 677 |
| 2 JUAN | 686 |
| 3 JUAN | 688 |
| JUDAS | 690 |
| APOCALIPSIS . . . | 694 |

TNÚHU NÍ CHÍDÓ TNÛNÍ TÉ MÀTEÚ

Nchaa cue téé ní xíndecu ndéé sanaha cùtnàhá vátá quíxí-gǎ Xítóhó Jesucrístú

(Lc. 3:23-38)

1 Te ñaní tnáhá Xítóhó Jesucrístú ní cuu ndíi Dàvíi ndihí ndíi Àbrahám, cue téé ní xíndecu ndéé sanaha vîhi-gǎ ñuyíú-a. Te duha nduu cuendá dava-gǎ cue téé ní cuu ñaní tnáhá-gǎ ní xíndecu ndéé sanaha.

2 Ndíi Àbrahám ní xóo ìⁿ déhe ndíi, te ndíi-áⁿ ní xínani ndíi Isàác. Te déhe ndíi Isàác-áⁿ ní cuu ndíi Jàcób, te déhe ndíi Jàcób-áⁿ ní cuu ndíi Jùdá, te diu-ni ndíi Jàcób-áⁿ ní cuu tǎtá dava-gǎ cue ñaní ndíi Jùdá-áⁿ. 3 Te déhe ndíi Jùdá-áⁿ ndihí ñadìhí ndíi, ndíi Tàmár ní cuu ndíi Fàrés ndihí ndíi Zàrá. Te déhe ndíi Fàrés-áⁿ ní cuu ndíi Èsróm, te déhe ndíi Èsróm-áⁿ ní cuu ndíi Àrám.

4 Te déhe ndíi Àrám-áⁿ ní cuu ndíi Aminàdáb, te déhe ndíi Aminàdáb-áⁿ ní cuu ndíi Nàsón, te déhe ndíi Nàsón-áⁿ ní cuu ndíi Sàlmón. 5 Te ñadìhí ndíi Sàlmón-áⁿ ní xínani-aⁿ Ràháb, te ní xóo ìⁿ déhe-yu ní xínani-dě Bòóz. Te ñadìhí ndíi Bòóz-áⁿ ní xínani-aⁿ Rùt, te ní xóo ìⁿ déhe-yu ní xínani-dě Òbéd, te déhe ndíi Òbéd-áⁿ ní cuu ndíi Isàí. 6 Te déhe ndíi Isàí-áⁿ ní cuu ndíi Dàvíi téé ní xíndaha ñàha xii cue ñáyiú isràél. Te déhe ndíi Dàvíi-áⁿ ndihí ñadìhí ndíi ní cuu ndíi Salòmón. Te díhna-gǎ ndíi

Ùriás ní cándeca ndíi ñadìhí-áⁿ te dàtnùní ní naqueheⁿ ñaha ndíi Dàvíi-áⁿ.

7 Te déhe ndíi Salòmón ní cuu ndíi Ròboám, te déhe ndíi Ròboám-áⁿ ní cuu ndíi Àbiás, te déhe ndíi Àbiás-áⁿ ní cuu ndíi Àsá. 8 Te déhe ndíi Àsá-áⁿ ní cuu ndíi Josáfát, te déhe ndíi Josáfát-áⁿ ní cuu ndíi Jòrám, te déhe ndíi Jòrám-áⁿ ní cuu ndíi Ùziás. 9 Te déhe ndíi Ùziás-áⁿ ní cuu ndíi Jòtám, te déhe ndíi Jòtám-áⁿ ní cuu ndíi Àcáz, te déhe ndíi Àcáz-áⁿ ní cuu ndíi Ezèquiás. 10 Te déhe ndíi Ezèquiás-áⁿ ní cuu ndíi Manàsés, te déhe ndíi Manàsés-áⁿ ní cuu ndíi Àmón, te déhe ndíi Àmón-áⁿ ní cuu ndíi Jòsiás. 11 Te déhe ndíi Jòsiás-áⁿ ní cuu ndíi Jecònias. Te diu-ni ndíi Jòsiás-áⁿ ní cuu tǎtá nchaa dava-gǎ cue ñaní ndíi Jecònias-áⁿ. Te dàvá-áⁿ ní quide yica cuè téé ñuú Babiloniá ndécá-güedě ñáyiú isràél cuáháⁿ ñuú-güedě cuendá yàcáⁿ cundecú-yu.

12 Te sátá ñí yáha ducaⁿ ní cuu, te ndíi Jecònias ní xóo ìⁿ déhe ndíi ndihí ñadìhí ndíi, te téé-áⁿ ní xínani-dě Salàtiél. Te déhe ndíi Salàtiél-áⁿ ní cuu ndíi Zorobàbél. 13 Te déhe ndíi Zorobàbél-áⁿ ní cuu ndíi Àbiúd, te déhe ndíi Àbiúd-áⁿ ní cuu ndíi Eliàquím, te déhe ndíi Eliàquím-áⁿ ní cuu ndíi Àzór. 14 Te déhe ndíi Àzór-áⁿ ní cuu ndíi Sàdóc, te déhe ndíi Sàdóc-áⁿ ní cuu ndíi Àquím, te déhe ndíi Àquím-áⁿ ní cuu ndíi Èliúd. 15 Te déhe ndíi Èliúd-áⁿ ní cuu ndíi Eleàzár, te déhe ndíi Eleàzár-áⁿ ní cuu ndíi Mátán, te déhe ndíi Mátán-áⁿ

nĩ cuu ndii Jàcób. ¹⁶ Te déhe ndii Jàcób-án nĩ cuu ndii Chèè tée ní cuu yii tá Màriá xíchí nĩ cuu nǎná Jèsús Yaá ní tendaha Dütú Ndiöxí ní quixi ñuyíú-a.

¹⁷ Te sa ní cuu úxúú tnàhá cue tée cùu ñaní tnàhá ndii Àbrahám ndécú dàvǎ-án, te dàtnùní ní cacu ndii Dàvií diu-ni ñaní tnàhá ndii. Te núú tnàhá méé ndii Àbrahám ndihi ndii Dàvií ní cuu úxícúmí tnàhá-güedé. Te ducaⁿ te sa ní xínu úxícúmí-gǎ tucu-güedé ní cacu, te dàtnùní ní tñii ñaha cuè tée ñuú Babiloniá xii ñáyiú isràèl ndécá ñaha-güedé xii-yu cuáháⁿ ñuú-güedé cuèndá yàcáⁿ cundecú-yu. Te sátá nĩ yáha sá dúcáⁿ nĩ cuu, te ní cacu úxúú tucu cue tée ní cuu ñaní tnàhá ndii Àbrahám ndihi ndii Dàvií, te dàtnùní ní cacu Xítóhó Jesucristú ñuyíú-a. Te núú tnàhá méé-gǎ ní cuu úxícúmí tnàhá-güedé.

*Ní cacu Jèsús
(Lc. 2:1-7)*

¹⁸ Te duha ní cuu cùtnàhá ní cacu Xítóhó Jesucristú, chi dàvǎ-án nĩ xíndecu ìⁿ xíchí cuéchi nĩ xínani Màriá. Te xíchí-án sa ní cundáá tnúhu sá tnándaha-xi ndihi ìⁿ tée nani Chèè. Te cùmání-gǎ tnándaha-xi ndihi tée-án te Espiritú Yǎ Ndiöxí ní quide ní ngúhuⁿ déhe-xi. ¹⁹ Te té Chèè tée cùní candeca ñaha xii xíchí-án nĩ cutnùní iní-dé sá ñúhú dèhe-xi. Te cùu-dé ìⁿ tée quide ndáá, núu xǎⁿ duuⁿ duuⁿ ní sanj iní-dé sá vǎ tnándaha-gǎ-dé ndihi-xi, te dicó-ni sá ñà túú ní cǎháⁿ-dé chi ní cuini-dé sá vǎ cǎháⁿ cuèhé cǎháⁿ duha ñáyiú cuèndá-xi. ²⁰ Te sátá

dúcáⁿ nĩ sani iní-dé te ní ngáva-dé ní xídí-dé, te núú sàní-dé ní sáháⁿ ìⁿ espíritú xínu cuèchi núú Yǎ Ndiöxí ní xáhaⁿ-xi xii-dé:

—Yòhó té Chèè tée cùu ñaní tnàhá ndii Dàvií, yúhú cǎchí tnúhu-í xii-n sǎ ñà túú nǎ cani iní-n, tnándaha nahi-ni-n ndihi tá Màriá cuèi ñúhu déhe-xi, chi mee Espiritú Yǎ Ndiöxí ní quide-xi ducaⁿ nĩ ngúhuⁿ déhe-xi. ²¹ Te na cǎcu déhe-xi-án te danàni-n-dé Jèsús. Te ducaⁿ cùnani-dé, chi tée-án cada-dé cuèndá sá vǎ cùndecu-gǎ cue ñaní tnàhá-dé ñáyiú isràèl ichi cuèhé ichi duha —duha ní xáhaⁿ espíritú-án xii té Chèè-án núú sàní-dé.

²² Te ducaⁿ nĩ cuu chi ní quee ndáá-xi nàcuáa ní xáhaⁿ Yǎ Ndiöxí xii ìⁿ tée ní cǎháⁿ tnúhu-gǎ ndéé sanaha. Te tée-án nĩ chídó tnùní-dé núú tütú-gǎ nàcuáa ní xáhaⁿ-gǎ xii-dé, te duha ní xáhaⁿ-gǎ:

²³ Cundecu ìⁿ xíchí cuéchi ndéé cuèé-gǎ.

Te òré ndécú ìⁿ-xi vátá ñihí-gǎ yii-xi te ngúhuⁿ déhe-xi.

Te òré ná cǎcú dèhe-xi te danàni ñahá-yu Emànuél.

Duha ní xáhaⁿ-gǎ xii tée-án nĩ chídó tnùní-dé núú tütú-gǎ. Te tnúhu Emànuél-án quée-xi: Yǎ Ndiöxí ndécú ndihi-o. Núu xǎⁿ ducaⁿ nĩ cuu vitna.

²⁴ Te òré ní ndiquíú iní té Chèè-án te ní quide-dé nàcuáa ní xáhaⁿ espíritú-án xii-dé chi ní tnándaha-dé ndihi tá Màriá. ²⁵ Dico ndi díⁿ ní xíndecú-yu ndéé ní sáá nduu nĩ cacu déhe-xi. Te òré ní cacu déhe-xi-án te ní dánani ñaha-dé Jèsús.

2

Cue tée cuángoto ñaha xii Jesús

1 Te Jèsús ní cacu-gá ìⁿ ñuú nání Bèlén, te ñuú-áⁿ yíndèhu-xi distritú Jùdeá. Te dàvá-áⁿ cùnùu té Hèrodés yíndàha-dé ñáyiu. Te ñuú Jerusálén ní quexio cue tée véxi ndàa xio nacuáa quène nchíanchii, cue tée túha dàcuaha cuendá nchaa sá ndèé andiu. ² Te ndùcu tnúhu-güedé núú ñáyiu ñuú-áⁿ, te xáhaⁿ-güedè:

—¿Vá cündèe iní-ndó càchí tnúhu-ndo ndèé ndécú tée quindaha ñaha xii ñáyiu isràél-áⁿ? Chi ní xiní-ndí ní quene chódíní-dé ndàa xio nacuáa quène nchíanchii, núu xiáⁿ véxi-ndí chi cuíní-ndí quíní-ndí-dé te chiñuhu-ndí-dé —càchí-güedé xáhaⁿ-güedé xií-yu.

³ Te òré ní níhí tée cùnùu naní Herodés tnúhu sá ndúcú tnúhu cue tée-áⁿ ndèé ndécú tée quindaha ñaha xii ñáyiu isràél, te ñá túú tnàhí ní cùu váha iní-dé, te diu-ni ducaⁿ ñà túú ní cùu váha iní tnàhá nchaa ñáyiu ñuú-áⁿ.

⁴ Te ní cana-dé cue tée cùu dútú cùnùu, ndihí cue tée dàcuaha ñaha xii ñáyiu nchaa tnúhu ní chídó tnùnì ndí Moisés, te ní xicáⁿ tnúhú-dé núú-güedé núu xiní-güedé ndèé cacu Crístú tée tendaha Yá Ndiöxí quixi ñuyú-a. ⁵ Te ní xáhaⁿ-güedé xii-dé:

—Hⁿ ñuú yíndèhu distritú Jùdeá cacu-dé, te ñuú-áⁿ nání-xí Bèlén, chi quee ndáá-xi nacuáa ní xáhaⁿ Yá Ndiöxí xii ìⁿ tée ní xóo cáháⁿ

tnúhu-gá ndée sanaha. Te duha ndùu tnúhu ní chídó tnùnì-dé núú tütú-gá:

⁶ Ñuú Bèlén cúu-xí ìⁿ ñuú líhli yíndèhu distritú Jùdeá, te ío-gá cùnùu-xi dacúúxí dàva-gá ñuú cùnùu yíndèhu distritú-áⁿ,

chi diu ñuú-áⁿ quee ìⁿ tée ío cùnùu.

Te tée cunuu-áⁿ quindaha-dé ñáyiu cùu cuendá-í ñáyiu isràél.

Duha ní xáhaⁿ-gá xii tée ní xóo cáháⁿ tnúhu-gá, te ducaⁿ ní chídó tnùnì-dé núú tütú-gá —càchí-güedé xáhaⁿ-güedé xii té Hèrodés.

⁷ Te sátá dúcáⁿ te té Hèrodés dayuhu ní cana-dé cue tée ndùcu tnúhu núu ndèé ní cacu tée quindaha ñaha xii ñáyiu isràél, te ní xicáⁿ tnúhú-dé núú-güedé ná nduu cùu-xi nduu díhna nuu ní xiní-güedé chódíní. ⁸ Te sátá dúcáⁿ te ní xáhaⁿ-dè xii-güedé:

—Chí cuáháⁿ ñuú Bèlén te nducu tnúhu váha-ndo núu ndèé ní cacu tée ducaⁿ quindaha ñaha xii ñáyiu isràél. Te òré ná naníhí-ndó-dé te quixi-ndo càchí tnúhu-ndo cuendá quíhíⁿ-í tnàhá-í chiñuhu-í-dé —càchí-dé xáhaⁿ-dè xii-güedé.

⁹ Te sátá dúcáⁿ ní xáhaⁿ té Hèrodés-áⁿ te ní xica-güedé cuáháⁿ-güedé. Te chódíní ní xiní-güedé ní quene ndàa xio nacuáa quène nchíanchii-áⁿ yòdo nuu-di núú-güedé cuáháⁿ. Te ní ngüíñí chódíní-áⁿ, te núú ní ngüíñí-di-áⁿ yíndáá núu ndécú Jèsús. ¹⁰ Te

òré ní xíní cue téé-áⁿ nǐ ngüíñí chódíní-áⁿ núú yíndáá ndécú-gǎ, te ní cudíí víhí ìní-güedé. ¹¹ Te ducaⁿ te ní quexìo-güedé ndéé núú cáá vehe ndecu Jesús. Te òré cuánguihu-güedé xítí vehe te ní xíní-güedé Jèsús ndécú-gǎ ndihi nǎná-gǎ Màriá. Te ní ngüíñí xítí-güedé, te ní ngüíta-güedé ní cachí-güedé sá ìo càhnu cuu Jesús. Te dàtnùní ní nacaáⁿ-güedé càjá xínehe-güedé, te ní tava-güedé díhúⁿ cuááⁿ, ndihi dúsa sá ìo váha sàháⁿ tnámí nàni insiensú, ndihi yúcú sǎ nání mìrrá ní taxi ndecu-güedé núú Jèsús cuèndá cuu-xi ìⁿ táhú sǎ cúú-xí-gǎ. ¹² Te Yá Ndiòxí ní cáháⁿ-gǎ núú sàní-güedé, te xáhaⁿ-gǎ xii-güedé sá vǎ náyáha-gǎ-güedé cáháⁿ ndihi-güedé té Hèrodés. Núu xiǎⁿ cue téé-áⁿ cuánuhú-güedé ìngá ichi, te ñá túú-gǎ ní náyáha-güedé núú ndécú tē Hèrodés.

Cuáháⁿ-yu ndihi Jèsús nàcióⁿ Ègiptú

¹³ Te sátá nǐ yáha cuánuhú cue téé ní sángoto ñaha xii Jesús, te ní quexìo ìⁿ espíritú xínú cuèchi núú Yá Ndiòxí núú sàní té Chèé, te xáhaⁿ-xi xii-dé:

—Véxi-í càchí tnúhu-í xii-n sǎ ndácóo-n, te ndee-n ñuú-a ndihi Jèsús, ndihi nǎná-gǎ cunu-ndo quíhíⁿ-ndó nàcióⁿ Ègiptú, chi té Hèrodés tendaha-dě cue téé quixi nanducu ñaha xii Jesús cuèndá cahni ñaha-güedé. Te yacáⁿ

cundecu-ndo ndéé cachí tnúhu-í xii-n ndùu ndixi-ndo —cachí espíritú-áⁿ xáhaⁿ-xi xii té Chèé núú sàní-dé.

¹⁴ Te té Chèé-áⁿ nǐ ndácóo-dé, te niú ní xica-dé ndihi tá Màriá ndécǎ-yu Jèsús cuáháⁿ nàcióⁿ Ègiptú. ¹⁵ Te nàcióⁿ Ègiptú-áⁿ ndécú-yu ní xíhí té Hèrodés. Te ducaⁿ nǐ cuu chi ní quee ndáá-xi nàcuáa ní cachí ìⁿ téé ní xóo cáháⁿ tnúhu Yá Ndiòxí ndéé sanaha ní quide-dé núú-gǎ ní cáháⁿ-dé yuhu-gǎ, te duha ní xáhaⁿ-gǎ ní cáháⁿ-dé: “Nàcióⁿ Ègiptú ndécú Dèhe-í ní cuu, te ní xáhaⁿ-í xii-dé sá ndéé-dě ñuú-áⁿ vǎ cùndecu-gǎ-dé”, duha ní xáhaⁿ-gǎ xii téé ní cáháⁿ tnúhu-gǎ ní quide-dé núú-gǎ.

Té Hèrodés ní táuchíuⁿ-dě cahni-güedé cue landú

¹⁶ Te cue téé ní sángoto ñaha xii Jesús ní dándàhú-güedé té Hèrodés, chi ñá túú ní náyáha-güedé cúñaha-güedé sá nǐ naníhí-güedé Jèsús. Te sátá nǐ cutnùní ìní té Hèrodés sá nǐ dándàhú ñáhá-güedé xii-dé te ní cudééⁿ víhí-dě, te ní tendaha-dě cue téé cuáháⁿ ñuú Bèlén, ndihi nchaa dava-gǎ ñuú cáá yàtni xiáⁿ cuèndá cahni-güedé mee-ni cuè landú téé. Te ndéé cue landú íchí nǐ cacu, ndihi ndéé cue landú sa ní nútnahá úú cuíá-xi nchaa-güexi cahni-güedé ní xáhaⁿ-dé. Te ducaⁿ nǐ quide-dé chi ní quide cuèndá-dé nàcuáa ndùu tnúhu ní xáhaⁿ cuè téé ní sángoto ñaha xii Jesús nduu ní xíní-güedé chódíní, núu xiǎⁿ ducaⁿ nǐ táuchíuⁿ-dě ní quide

cue téé-án. ¹⁷ Te ducaⁿ nĩ cuu chi ní quee ndáá-xi nàcuáa ní cachí ndíi Jeremiás téé ní xóo cáháⁿ tnúhu Yá Ndiöxí ndéé sanaha, te duha ní cachí ndíi: ¹⁸ Ní tecú ndáhí víhí ñáyiú ñuú

Rámá sá ndihú iní-yu, te ñáyiú xĩndáhyú-án cúú-yu ñaní tnáhá tã Ràquél, te ndàhyú-yu cuendá sá nĩ xihí déhe-yu.

Te ñáyiú-án ñà túú ní cuení-yu dañá-yu sá ndihú iní-yu cuendá sá nĩ xihí déhe-yu.

Duha ní cachí ndíi Jeremiás.

¹⁹ Te sátá nĩ xihí té Hèrodés te ní sáháⁿ tucu espíritú xínú cuèchi núú Yá Ndiöxí núú sàní té Chèé òré ndécú-dé nàcióⁿ Ègipítú, te ní xáhaⁿ-xi xii-dé:

²⁰ —Véxi tucu-í càchí tnúhu-í xii-n sã ndácóo-n, te núhú-n ndihí Jesús ndihí nãná-gã ñuú cue ñaní tnáhá-n ñáyiú isràél cundecu-ndo, chi sa ní xihí cue téé cuení cahni ñaha xii Jesús ní cùu —cachí espíritú-án xáhaⁿ-xi xii té Chèé núú sàní-dé.

²¹ Te té Chèé-án nĩ ndacóo-dé, te ní ndee-dé ndihí Jesús ndihí nãná-gã cuánuhú-yu ñuú cue ñáyiú isràél ñáyiú cùu ñaní tnáhã-yu.

²² Te té Chèé ní níhí-dé tnúhu sá tẽ Arquelaú ní nucúnutnĩ-dé núú tãtã-dé té Hèrodés distritú Jùdeá yĩndàha-dé ñáyiú. Te ní yùhú té Chèé-án, te ñà túú ní cuení-dé quihíⁿ-dé cundecu-dé distritú-án. Te Yá Ndiöxí ní cáháⁿ-gã núú sàní-dé, te ní xáhaⁿ-gã xii-dé sá quihíⁿ-dé distritú Galileá, núú xíãⁿ yàcáⁿ cuáháⁿ-yu.

²³ Te òré ní quexió-yu distritú Galileá, te ní sáháⁿ-yu ñuú ñaní Nàzarét ní xĩndecú-yu. Te ducaⁿ nĩ cuu chi ní quee ndáá-xi nàcuáa ní cachí cue téé ní xóo cáháⁿ tnúhu Yá Ndiöxí ndéé sanaha sá Jèsús cuu-gá téé ñuú Nazàrét.

3

Té Juàá téé dàcuandute ñaha xii ñáyiú càháⁿ-dé tnúhu Yá Ndiöxí xití yucu

(Mr. 1:1-8; Lc. 3:1-9, 15-17; Jn. 1:19-28)

¹ Te ní xica nduu sá dúcáⁿ nĩ cuu, te téé nani Juàá téé dacuandute ñaha xii ñáyiú ní quexio-dé yucu distritú Jùdeá càháⁿ-dé tnúhu Yá Ndiöxí núú ñáyiú xití yucu-án. ² Te xáhaⁿ-dẽ xií-yu:

—Chí dándixi túu iní sá ñà túú quide váha-ndo ndècu-ndo, te dañà-ndo nchàa ichi cuehé ichi duha, chi sa ní cuyatni nduu ndíhu ndaha ñàha Yá Ndiöxí xii-ndo —càchí-dé xáhaⁿ-dẽ xií-yu.

³ Te diu cuendá té Juàá-án nĩ chídó tnùnĩ ndíi Chàíá téé ní xóo cáháⁿ tnúhu Yá Ndiöxí ndéé sanaha, te duha nduu tnúhu ní chídó tnùnĩ ndíi cuendá-dé:

Tècú càháⁿ níhi ñuú téé yihí xití yucu, te càchí-dé:

“Chí dáñá nchàa ichi cuehé ichi duha ndècu-ndo, te tñi-ndo ìchi váha,

Te ducaⁿ càda-ndo cuendá cundecu túha-ndo chi véxi Yaá ío cùnuu”, duha quesaha tẽe-án.

Duha nduu tnúhu ní chídó tnùnĩ ndíi Chàíá-án cuendá té Juàá.

4 Te té Juàá-áⁿ nǐ xóo cuihnu-dé dóó idi càméyu, te ìⁿ ñì ní cuu pàñú xití-dé, te ní xóo caxi-dé tíca làngóstá ndihi ndudí ñúñú cuéchi. ⁵ Te ñáyiu ñúú Jerusàlén, ndihi ñáyiu nchaa ñúú yíndèhu distritú Jùdeá, ndihi ñáyiu nchaa ñúú cáá yàtni yúte Jòrdán ní sáháⁿ-yu ní xíndedóho-yu nàcuáa ní cáháⁿ té Juàá. ⁶ Te ní ngúíta-yu ní náhmá-yu nchaa cuéchi-yu núú Yá Ndiòxí. Te òré ducaⁿ nǐ náhmá-yu te ní dácuañdute ñaha té Juàá xií-yu yúte Jòrdán.

7 Te vài cue tée cùu fariséú ndihi cue tée cùu saducéú cuáháⁿ-güedé núú ndécú tē Juàá cuìní-güedé dácuañdute ñaha-dé xii-güedé. Te òré ní quexìo-güedé núú ndécú-dě, te ní xáhaⁿ-dě xii-güedé:

—jNchaa nchòhó cúú-ndó dàtná ìⁿ cóó dēéⁿ chi ío cuihna ìní-ndó! ¿Te nása ní cuu núu tñahá nchòhó ndúcú-ndó nàcuáa cada-ndo càcu ni-hnu-ndo núú tñundòho cahnu vihi ta cuyatni ñaha xii-ndo véxi-i? ⁸ Te chí cáda vaha vitna cundecu-ndo cuèndá ducaⁿ cùnuni sá nǐ dáñá-ndó nchaa ichi cuehé ichi duha ndècu-ndo. ⁹ Te vá càchí-ndó sǎ ìo càhnu cuu-ndo cuendá sá cúú-ndó ñaní tñahá ndii Àbrahám. Chi cuèi ndéé yúú te ndacu Yá Ndiòxí ndada-gá ñáyiu te cuú-yu ñaní tñahá ndii Àbrahám. ¹⁰ Te caá chi ndècu túha-xi sá quèhndé-xi nchaa yutnu sá dúcáⁿ ñà túú càváha sávidí-xi-áⁿ, chi nchaa yutnu-áⁿ tēhndé-xi te cuágee-xi núú ñùhú càyú-xi.

Te duha sǎtnàhá-xi ndoho nchaa ñáyiu ñà túú quide váha-áⁿ chi nchaa ñáyiu ñà túú quide váha cùú-yu dàtná nchaa yutnu sá ñà túú càváha sávidí-xi. ¹¹ Te na càchí tñuhu ndáá-í xii-ndo sǎ yùhú dácuañdute-í mee-ni ñáyiu ní dáñá nchaa ichi cuehé ichi duha. Dico nchicúⁿ tucu ingá téé véxi, te téé-áⁿ taxi-dé Espiritú Yá Ndiòxí cundecu ndihi-ndo. Te cùu-xi datná ìⁿ ñùhú, chi ndada ndoo ndada nine-xi ìní-ndó. Te téé-áⁿ ìo-gá cùnùu-dé dácúúxi yùhú, chi yùhú cùú-í ìⁿ téé duuⁿ duuⁿ ñà túú tàú cuita nehe ní chàú-dé dico quide-í chiùⁿ-dé. ¹² Te téé-áⁿ sa véxi túha-dé sá cáda òⁿ ñaha-dé xii-o dàtná quidé ñáyiu ndàda ndoo triú, chi ñáyiu-áⁿ sa nèhe túha-ná-yu yaxíⁿ-yu òré náñani cuèndá ndada ndoo-yu. Te òré ndádá ndoo-yu triú-áⁿ te dàquee òⁿ-yu mihi-xi, te tàxúha-yu mee-nǎ triú-áⁿ te sàhmí-yu mihi-xi-áⁿ. Te dàtná quidé-yu mihi triú-áⁿ ducaⁿ sǎtnahá-xi cada ñaha téé-áⁿ xii nchaa ñáyiu ñà túú quide váha, chi daquihíⁿ ñahá-dě xií-yu núú ñùhú núú càyú, te ñùhú-áⁿ ñà túú tñahí ndàhvá —càchí-dé xáhaⁿ-dě xii-güedé.

Sàndute Jesús

(Mr. 1:9-11; Lc. 3:21-22)

¹³ Te Jèsús ní quee-gá distritú Galileá cuáháⁿ-gá yúte Jòrdán núú ndécú tē Juàá cuèndá dácuañdute ñaha-dé xii-gá. ¹⁴ Te òré ní quexìo Jesús núú ndécú tē Juàá, te ñà cuìní-dé dácuañdute ñaha-dé

xii-gá ní cùu, te ní xáhaⁿ-dě xii-gá:

—Yúhú tàú-í sá dácuaⁿdute ñaha-n xii-í, te ñá díú dà yúhú dácuaⁿdute ñaha-í xii-n — cächí-dé xáhaⁿ-dě xii-gá.

¹⁵ Te Jèsús ní xáhaⁿ-gã xii-dé:

—Queheⁿ daña, chi dacuití xini ñuhu-xi ducaⁿ cada-o nacua^a cundáá-ó nũú Yã Ndiõxí —cächí-gá xáhaⁿ-gã xii-dé.

Te té Juáá-áⁿ ñí sáháⁿ uuⁿ-dé tnúhu ní xáhaⁿ Jèsús xii-dé. ¹⁶ Te ní dácuaⁿdute-dé Jèsús. Te òré ní nene-gá xití ndute te ní xiní-gá nchí andiú, te ní quee Espiritú Yã Ndiõxí véxi cuuⁿ-xi ngúndecu ndihi ñaha-xi xii-gá, te dàtná cáá ñⁿ lómá cáá Espiritú-áⁿ véxi cuuⁿ-xi. ¹⁷ Te òré-áⁿ ñí tecú ní cáháⁿ Yã Ndiõxí ndéé andiú, te xáhaⁿ-gã xii Jèsús:

—Yòhó cúú-n Dèhe-í tée ío cùu iní-í te ío cùdí iní ñáhà-í xii-n —cächí-gá xáhaⁿ-gã xii Jèsús.

4

Sácuíhná quidé yìca-xi cada Jesús sá ñà túú tàú-gá cada-gá ní cùu

(Mr. 1:12-13; Lc. 4:1-13)

¹ Te Espiritú Yã Ndiõxí ndécá-xí Jèsús cuáháⁿ ñⁿ xití yucu cuèndá yàcáⁿ cundecu tnaa-gá, te yàcáⁿ quexìo sácuíhná coto ndéé ñáhá-xí xii-gá te núu ndisa sá vã cádá-gã ñⁿ sá ñà túú tàú-gá cada-gá.

² Te Jèsús ñá ní xèxi-gá údico nduu údico niú, te ducaⁿ te dàtnúⁿ ní xicáⁿ iní-gá caxi-gá. ³ Te sátá dúcáⁿ te ní

quexìo sácuíhná quidé yìca-xi cada Jesús ñⁿ sá ñà túú tàú-gá cada-gá, te xáhaⁿ-xi xii-gá:

—Te núu ndisa sá cúú-n Dèhe Yã Ndiõxí te cuñaha xii yúú-a na nduu-xi paá — cächí-xi xáhaⁿ-xi xii-gá.

⁴ Te Jèsús ní xáhaⁿ-gã xii-xi:

—Núú tütú Yã Ndiõxí cächí-xi: “Ñá díú mèe-ni paá candeca-xi iní ñáyiú ñuyíú, chi tñhá nchaa tnúhu cáháⁿ Yã Ndiõxí candeca-xi iní-yu”, duha cächí-xi núú tütú-gá — cächí-gá xáhaⁿ-gã xii-xi.

⁵ Te dàtnúⁿ sácuíhná-ãⁿ ndécá ñaha-xi xii-gá cuáháⁿ ñuu Jerusálén, te yàcáⁿ ní xáhaⁿ-xi xii-gá cuásaá-gá díquí véñúhu càhnu sá ío cùnuu núú ñáyiú israél, ⁶ te dàtnúⁿ ní xáhaⁿ tucu-xi xii-gá:

—Te núu ndisa cúú-n Dèhe Yã Ndiõxí te cuandèe ndava núú ñúhú cuèndá quee ndáá-xi nacua^a cáháⁿ-xi núú tütú-gá núú cächí-xi: “Yã Ndiõxí tendaha-gã cue espiritú xínú cuèchi núú-gã quixi-xi cuèndá coto ñaha-xi xii-n, te núú ndáhá-xí càundodo-n cuèndá sá vã dánicuèhé yúú sáhá-n”, duha cächí-xi núú tütú-gá —cächí sácuíhná-ãⁿ xáhaⁿ-xi xii Jesús.

⁷ Te Jèsús ní xáhaⁿ-gã xii-xi:

—Te cächí tucu-xi núú tütú Yã Ndiõxí: “Vã cání iní-n còto ndéé-n Dùtú Ndiõxí Yáá cúú Ndiõxí-n cuèndá-ni sá cuini-n sá dácacu nihnu ñaha-gã xii-n ñⁿ sá sání iní-n càda-n”, duha cächí-xi núú tütú-gá — cächí-gá xáhaⁿ-gã xii-xi.

⁸ Te sácuíhná ndécá tucu-xi Jesús cuáháⁿ ñⁿ núú tĩndúú dúcúⁿ, te uuⁿ-ni ní dánèhé núú

ñáhá-xí xì-gá nchaandi túhú nacióⁿ cáá ñúyú, ndihí nchaa sá vaha íó ñⁿ ñⁿ nacióⁿ-án. ⁹ Te ní xáhaⁿ-xí xì-gá:

—Te núu yòhó ngüñí xítí-n ñù-í chiñuhu ñaha-n xì-í ñá, te taxi cuendá-í nchaa sá ñí dánèhé ñáhà-í-a cuu cuendá-n —càchí-xí xáhaⁿ-xí xì-gá.

¹⁰ Te Jèsús ní xáhaⁿ-gã xii-xi:

—Xocuñí yòhó sácuihná núu ndécù-í-a, chi vá cúu càda-í nàcuáa càchí-n, chi núu tütú Yá Ndiõxí càchí-xi: “Chiñuhu-ndo Dütú Ndiõxí Yáa cúu Ndiõxí-ndó, te diu-ni-gá cada-ndo nchàa nacuáa càháⁿ-gá”, duha càchí-xí núu tütú-gá —càchí-gá xáhaⁿ-gã xii-xi.

¹¹ Te dātnūnī sácuihná ñí dáñá-xí Jèsús ní xica-xi cuáháⁿ-xi. Te sáta dúcáⁿ te ní quexio cue espíritu xínú cuèchi núu Yá Ndiõxí ní xinu cuechi-xi núu Jèsús.

Distritú Galileá ní chisaha Jèsús chiūⁿ ní táhú Tātá-gã Dütú Ndiõxí cada-gá

(Mr. 1:14-15; Lc. 4:14-15)

¹² Te òré ní níhí Jèsús tnúhu sá ñí ngava té Juáa téé dàcuandute ñaha xii ñáyiú vecaá, te ní xica-gá cuáháⁿ-gá distritú Galileá. ¹³ Te ní ñà túú ní xíndecu-gá ñuú Nazàrét, chi ní yáha-gá cuáháⁿ-gá ndéé ñuú Capèrnaúm yacáⁿ ní xíndecu-gá, te ñuú-án cáá yàtni yuhu lagúná, te yatni xiáⁿ cáá ñuhu nani Zabulón, ndihí ñuhu nani Neftalí. ¹⁴ Te ducaⁿ ñí cuu chi ní quee ndáá-xi nàcuáa ní chídó tnùní ndíi Chàíá téé ní xóo cáháⁿ tnúhu Yá Ndiõxí ndéé sanaha núu tütú-gá núu càchí-xi:

¹⁵ Ñuhu nani Zabulón, ndihí ñuhu nani Neftalí, ñuhu-án yíndèhu-xi distritú Galileá,

te xiáⁿ xíndecu cue ñáyiú ñá túú cùu ñáyiú isràél, te càa-xi yatni yuhu lagúná te ndàa ingá xio yúte Jòrdán cúu-xí.

¹⁶ Te cue ñáyiú-án ndécü-yu ñⁿ núu néé chi ndécü-yu ichi cuèhé ichi duha, te sáá nduu te cada iní-ndó sá ñáyiú-ánⁿ queé-yu núu dító chi vá cúndecu-gá-yu ichi cuèhé ichi duha.

Te diu-ni ñáyiú-ánⁿ cúu-yu ñáyiú ta xíta nihnu duuⁿ cuáháⁿ,

dico sáá nduu te vá cuíta nihnu-gá-yu.

Duha ní chídó tnùní ndíi núu tütú-gá.

¹⁷ Te dàvá-án ñí ngüíta Jèsús ní dánèhé-gá ñáyiú, te ní xáhaⁿ-gã xií-yu:

—Chí dándixi túu iní sá ñà túú quide váha-ndo ndécü-ndo te dañá-ndo nchàa ichi cuèhé ichi duha, chi sa ní cuyatni nduu ndíhu ndaha ñàha Yá Ndiõxí xii-ndo —càchí-gá xáhaⁿ-gã xií-yu.

Jèsús càháⁿ-gá cúmí tnàhá cue téé tnèi chácá

(Mr. 1:16-20; Lc. 5:1-11)

¹⁸ Te Jèsús ñúhú-gá ichi cuáháⁿ-gá tá yáha-gá yuhu làgúná Galileá, te ní xiní-gá úú tnàhá cue téé xídáquèe-güedé ñunu-güedé xítí ndute tnèi-güedé chácá, chi quití tnàhí-ánⁿ cúu chiūⁿ-güedé tnèi-güedé-di. Te ñⁿ-dé nání-dě Xímú, àdi Pelú

chi úú ðiù-dé, te ñaní-dé cúú ìngá téé ndihi-dé te téé-án nání-dě Ndríxí. ¹⁹ Te Jèsús ní xáhaⁿ-gã xii-güedé:

—Chí dáña chiùⁿ quide-ndo-ánⁿ te quixi-ndo chitnahá ñáhá-ndó xii-í, te taxi-í ìngá núú chiùⁿ cada-ndo chi quíhíⁿ-ndó dàcaháⁿ-ndó ñáyiú cuendá tuha ñàhá-yu xii-í — càchí-gá xáhaⁿ-gã xii-güedé.

²⁰ Te òré-ni-ánⁿ ñí dáña cuè téé-ánⁿ ñunu-güedé, te ní tuha-güedé Jèsús.

²¹ Te ní xica tucu Jèsús cuáháⁿ-gá luha-gá, te ní xiní tucu-gá úú-gá tnahá cue téé tñì chácá. Te ìⁿ téé-ánⁿ nání-dě Jàcobó, te ñaní-dé cúú ìngá téé ndihi-dé te téé-ánⁿ nání-dě Juáá, te ndi ndúú-güedé cúú-güedé déhe té Zebèdeú. Te xixínucóo-güedé ndihi tátá-güedé xití bàrcú xinatícu-güedé ñunu-güedé, te Jèsús ní cana ñaha-gã xii-güedé.

²² Te òré-ni-ánⁿ ñí dándóo-güedé bàrcú-güedé, ndihi tátá-güedé, te ní tuha ñaha-güedé xii-gá.

Jèsús dánèhé-gá cuéhé víhí ñáyiú

(Lc. 6:17-19)

²³ Te Jèsús tá xica ndodo-gá ñihí distritú Galileá cuáháⁿ tá dánèhé-gá ñáyiú tñúhu váha tñúhu sá sánú ìchi ñaha xii-yu nàcuáa ndíhu ndaha ñàha Yá Ndiõxí xii-yu. Te ndi tnahá ìⁿ ìⁿ ñuú sàá-gá te ducaⁿ cuãnguihu-gá xití veñúhu dánèhé-gá ñáyiú tñúhu-ánⁿ. Te ndi ðíⁿ ndi ðíⁿ núú cuéhé tnahá ìⁿ ìⁿ ñáyiú dico nchaa-ní-yu ta quide

tátna-gá cuáháⁿ. ²⁴ Te ndéé nchaa ñáyiú yìndehu distritú Sìriá ní ñíhí-yu tñúhu nchaa nàcuáa quide Jèsús. Te ní queé-yu ñuú-yu te ndècá-yu nchaa ñáyiú tnahá ndi ðíⁿ núú cuéhé cuáháⁿ núú ndécú Jèsús. Te cuèi ñáyiú xiyíhí, ndihi ñáyiú ñá túú-gã càndá nihnu, ndihi ñáyiú yìhí ñaha espíritú cùndihí yucu ñávàha ndècá-yu cuáháⁿ núú-gã, te ncháa-yu ní quide tátna ñaha-gã xii-yu. ²⁵ Te ío vài ñáyiú ní chinchícúⁿ ñáhá xii Jèsús, chi ní chinchícúⁿ ñáhá ñáyiú distritú Galileá, ndihi ñáyiú nchaa ñuú xíndáa Dècápolis, ndihi ñáyiú ñuú Jerusalén, ndihi cue ñáyiú nchaa ñuú yìndèhu distritú Jùdeá, ndihi ñáyiú xíndecu yatni yúte Jòrdán ndàa xio quene nchícanhii.

5

Jèsús núcõo-gá ìⁿ núú tìndúú dánèhé-gá ñáyiú

¹ Te sátá ní xiní Jèsús sá cuéhé víhí ñáyiú nchicúⁿ ñáhá xii-gá, te ní xica-gá cuásaá-gá ìⁿ núú tìndúú te xíáⁿ ñí ngóo-gá, te cue téé xica cuu ndihi-gá ní nadúcúⁿ ndéé ñáhá-güedé xii-gá. ² Te ní ngüíta-gá dánèhé ñáhá-gã xii-güedé ndihi cue ñáyiú-ánⁿ, te xáhaⁿ-gã:

Cuendá ñáyiú ío váha táhú-xi (Lc. 6:20-23)

³ —Váha táhú nchaa ñáyiú cùtnuní iní-xi sá ío-gá cùmãñí-yu cudíu-yu núú Yá Ndiõxí, chi ñáyiú-ánⁿ nduu

táhũ-yu ndíhu ndaha ñaha-gá xií-yu.

4 'Váha táhú nchaa ñáyiú ndàhyú sá ndíhú iní-yu, chi Yá Ndiõxí cuañaha-gã tnúhu ndee iní cundecu ndihí-yu.

5 'Váha táhú nchaa ñáyiú ndàhú iní-xi, chi ñáyiú-áⁿ nduu táhũ-yu cundecú-yu ñⁿ xichi núu cuañaha Yá Ndiõxí xií-yu.

6 'Váha táhú nchaa ñáyiú ío cuiní cada nchaa nàcuáa càháⁿ Yá Ndiõxí, chi ñáyiú-áⁿ ío nduu vétú iní-yu.

7 'Váha táhú nchaa ñáyiú cundahú iní tnàha ñáyiú-xi, chi ñáyiú-áⁿ ñiú-ni ducaⁿ càda ñaha Yá Ndiõxí xií-yu cundahú iní ñáhá-gã.

8 'Váha táhú nchaa ñáyiú ní nduu ndoo ní nduu nine iní-xi, chi cue ñáyiú-áⁿ nduu táhũ-yu cundecú-yu ndihí Yá Ndiõxí.

9 'Váha táhú nchaa ñáyiú càháⁿ dóho tnàha ñáyiú-xi nàcuáa cundecu ndihí váha tnàhá-yu, chi cùtnuní sá ñáyiú-áⁿ cuú-yu déhe Yá Ndiõxí.

10 'Váha táhú nchaa ñáyiú ío ndòho ndecu ñuyíú-a sá cuèndá sá quidẽ-yu nàcuáa càháⁿ Yá Ndiõxí, chi ñáyiú-áⁿ nduu táhũ-yu ndíhu ndaha ñaha-gá xií-yu.

11 'Te cùu-ndo ñáyiú ío váha táhũ-xi te núu na cùcuèhé ñáhá ñáyiú, àdi cada úhú ñáhã-yu xii-ndo, àdi daciaa díquí ñáhã-yu nándi cuéchi neñùú xii-ndo sã cuèndá-í. 12 Te òré ducaⁿ na càda ñahá-yu xii-ndo te cudíí víhí-ní iní-ndó cundecu-ndo,

chi ío váha càa sá ndécú àndiú nduu táhũ-ndó cundecu ndihí-ndo nduu na saa-ndó yàcáⁿ cundecu-ndo, chi ñiú-ni ducaⁿ ní xóo cada ñaha cuè ñaní tnáhã-yu xii cue téé ní xóo càháⁿ tnúhu Yá Ndiõxí ní xíndecu ndéé sanaha.

Cuèndá ñíí ndihí cuèndá ñuhú

(Mr. 9:50; Lc. 14:34-35)

13 'Te nchòhó cada iní-ndó sã cúu-ndó dàtná ñíí cuèndá ñuyíú-a. Te ñíí chi nàndíhi-xi dico núu na nduu víxiⁿ-xi, te ñá túú-gã nándíhi-xi chi dǎngoyo-ná-ó, te yãha ñáyiú xèihnú-yu. Te ducaⁿ sǎtnahá-xi cùu nchohó chi cùu-ndo datná ñíí vãha te núu na càda váha-ndo, te núu vá càdá vãha-ndo te quee tíhú-ndó.

14 'Te nchòhó cada iní-ndó sã cúu-ndó dàtná ñíí sá dáyéhé ndécú ñuyíú-a, chi sànu ichi-ndo ñáyiú ichi váha. Te nchòhó xini-ndó sã ñuu ñíí ñuu cáá ñíí núú tìndúú te vá cúú càchí-ó sã nguivãha-xi.

15 Te ñá túú xini-ó ñíí ñáyiú teñuhú-yu ñíí linterná te chiváha-yu xití ñíí càjá, chi tàxi ndecú-yu núú ñinu cuèndá cutnùní núú nchaa ñáyiú ndècu vehe. 16 Te ducaⁿ càda nchohó cada váha-ndo dàtná quidé ñíí ñuhú dayèhe-xi núú ñáyiú, te ducaⁿ quini ñáyiú nàcuáa quide-ndo ndecu-ndo, te tnàhá-yu cachí-yu sá ío càhnu cuu Dútú Ndiõxí Yaá cúú Tãtã-ndó ndècu àndiú chi quini-yu sã quidé vãha-ndo ndècu-ndo.

Cuèndá tnúhu ní chídó tnùní ndíi Moisés

17 'Te vá cání iní-ndó sã yũhú véxi-í xocani-í tnũhu ní chídó tnũní ndii Moisés, te ni vá cání iní-ndó sã véxi-í xocani-í tnũhu ní chídó tnũní cue téé ní xóo cáháⁿ tnũhu Yá Ndiõxí ndéé sanaha, chi yũhú véxi-í sá cádá-í nãcuáa cáháⁿ nchaa tnũhu-áⁿ. 18 Te na cãchí tnũhu ndáá-í xii-ndo sã tnũhu ní chídó tnũní ndii Moisés io ndáá cáháⁿ-xi, chi dacuití cùu nchaa nacuáa cáháⁿ-xi. Te yáchí-gá naa andiu ndihí ñuyúu dàcúuxí sã quèe cáva ìⁿ tnũhu-áⁿ. 19 Núu xiãⁿ nchaa ñáyiu na cãchí sá dává tnũhu ní chídó tnũní ndii Moisés ñá túú xini ñuhu-xi chi ñá túú cùnũu-xi, te ñáyiu-áⁿ diu-ni ducaⁿ dãnéhé-yu nchaa dava-gá tnàha ñáyiu-yu, te sá dúcáⁿ quidé-yu te vá cùnũu vihi-yu núú ndécú Yã Ndiõxí táxí tnũní-gá, chi cuú-yu dàtná ìⁿ ñáyiu nchicúⁿ cuii-nã. Dico nchaa ñáyiu nchicúⁿ nihnu quide nchaa nacuáa cáháⁿ nchaa tnũhu-áⁿ, te diu-ni ducaⁿ dãnéhé-yu nchaa dava-gá tnàha ñáyiu-yu, te ñáyiu-áⁿ io cunúu-yu núú ndécú Yã Ndiõxí táxí tnũní-gá. 20 Te na cãchí tnũhu-í xii-ndo sã io xini ñuhu-xi cada-ndo nchaa nacuáa cáháⁿ Yã Ndiõxí, te vá cádá-ndó dàtná xiquide cue téé dãnéhé ñáhá xii ñáyiu nchaa tnũhu ní chídó tnũní ndii Moisés, ndihí dàtná xiquide cue téé cùu fariséu, chi núu na cada-ndo datná xiquide cue téé-áⁿ ñá, te vá ndúú tãhú-ndó ndiũ ndaha ñàha Yá Ndiõxí xii-ndo.

Jèsús cáháⁿ-gá cuendá ñáyiu

cudééⁿ

(Lc. 12:57-59)

21 'Te nchòhó sa xini-ndó sã ncháá ñáyiu ní cuu ñani tnáhá-ndó ní xindecu ndéé sanaha ni nihí-yu tnũhu sá vá cúu càhni-yu tnàha ñáyiu-yu, chi núu ducaⁿ na cádá-yu te nacháhu-yu cuéchi-yu. 22 Dico vitna na cãchí tnũhu-í xii-ndo sã núu ndédani càa-ndo na cudééⁿ-ndó núu tnàha ñáyiu-ndo, te nacháhu-ndo sã dúcáⁿ quide-ndo, àdi núu na cùcuèhé-ndõ-yu te núu chítú núu tàcá cundáa cuéchi-ndo te núu ducaⁿ na cáda-ndo, àdi núu nã cúu-ndo tnàha ñáyiu-ndo ìⁿ tnũhu véé vihi, te cucuéchi vihi xii-ndo chi quihíⁿ-ndó núu ùhú núú ndáhú.

23 'Te xiãⁿ núu nchòhó òré ndécú ndihí-ndo ìⁿ sá cuini-ndó cuãha-ndo Yã Ndiõxí nduu táhú-gã, te òré cuáháⁿ-ndó cuãñaha-ndo xii-gá, te òré ní quexio-ndo núú dúcáⁿ cuãñaha-ndo xii-gá sá ndúú tãhú-gã, te ní ndacu iní-ndó sã ndécú ñáyiu ñá túú cùu váha iní ñáhá xii-ndo cuendá ìⁿ sá ni cumání núú tnáhá-ndó. 24 Te dandóo-ndo sã dúcáⁿ nèhe-ndo cuáháⁿ nduu táhú Yã Ndiõxí, te dihna-gá quihíⁿ-ndó nãcáháⁿ cáhnu iní tnáhá-ndó ndihí ñáyiu ñá túú cùu váha iní ñáhá xii-ndo-áⁿ, te dàtnũní ducaⁿ te quihíⁿ-ndó cuãha-ndo Yã Ndiõxí sá ndúú tãhú-gã.

25 'Te núu ió ìⁿ-ndo ni sáháⁿ ñáyiu núú tèe cùchiuⁿ ní sacáⁿ cuéchi-yu cuendá-ndó cuendá ìⁿ sá ni quide-ndo, te òré ní nanihí tnáhá-ndó

ndihí-yu cuáháⁿ-ndó nũu tẽ cùchiuⁿ-án, te nacáháⁿ cáhnú ìní tnáhá-ndó ndihí-yu cuèndá sá vã cuãha cuèndá ñáhá-gã-yu xii-ndo nũu tẽ cùchiuⁿ, chi núu ducaⁿ na càdá-yu te tée cùchiuⁿ-án cuãha cuèndá ñáhá-dẽ xii-ndo nũu cuè tée cùu poleciá, te cue tée-án chihi ñaha-güedẽ vecaá xii-ndo. ²⁶ Te na càchí tnúhu ndáá-í xii-ndo sã vã càcu-ndo te núu na ngáva-ndo vecaá ndéé nacháhu-ndo nchãa sá tãu-ndó.

Cuèndá cue ñáyiu ñá túú quide váha

²⁷ Te nchòhó sa xìní-ndó nãcuáa ndũu tnúhu ní cáháⁿ cue tée ní xíndecu ndéé sanaha, te duha ní cachí-güedé: “Nchaa cue tée vá cúú cãháⁿ ndihí-güedé ñadihí te núu ñá díú ñadihí-güedé cúũ-yu, te díu-ni ducaⁿ tucu nchaa cue ñáyiu dihí vá cúú cãháⁿ ndihí-yu tée te núu ñá díú yĩ-yu cùu-güedé”, duha ní cachí-güedé. ²⁸ Dico yúhú càchí tnúhu-í xii-ndo sã ndéda-ni càa cue tée na cundehe ìⁿ ñadihí te núu na càni iní-güedé cundecu díí ìní-güedé ndihí-yu te cada iní-ndó sã dàtná sá sã ní cáháⁿ ndihí ñaha-güedẽ xii-yu sá dúcáⁿ ñí sani iní-güedé.

²⁹ Te núu ìⁿ xio tinũu-ndo quide-xi quide-ndo nándi sá cuèhé sá dúhá te tava-ndo, chi váha-gá sá ná cuíta te ñá díú ñihí ní ndúú yiqui cuñú-ndó quĩhíⁿ-xi núu ùhú núu ndàhú. ³⁰ Te núu ìⁿ xio ndaha-ndo quide-xi quide-ndo nándi sá cuèhé

sá dúhá te quehdé-ndó, chi váha-gá sá ná cuíta ìⁿ xio ndaha-ndo te ñá díú sã ñihí ní ndúú yiqui cuñú-ndó quĩhíⁿ-xi núu ùhú núu ndàhú.

Jèsús càháⁿ-gá cuèndá cue ñáyiu dàña tnaha

(Mt. 19:9; Mr. 10:11-12; Lc. 16:18)

³¹ Te nchòhó sa nãha tucu-ndo nacúaa ní cáháⁿ tucu cue tée ní xíndecu ndéé sanaha, te duha ní cachí-güedé: “Te núu ìⁿ tée na dàña tnaha-dé ndihí ñadihí-dé, te xini ñuhu-xi cadúha-dé ìⁿ tutú cuãñaha-dé núu càháⁿ-xi sá ñí dáñá ñaha-dé”, duha ní cachí-güedé. ³² Dico yúhú càchí tnúhu-í xii-ndo sã cúú dàña ìⁿ tée ñadihí-dé, te núu cùtnuní ndáá iní-dé sá càháⁿ ndihí-aⁿ ingá tée. Dico núu ñá túú dùcaⁿ quide-aⁿ te ñá túú ndũu váha-xi dàña ñaha-dé. Te núu ñá túú dùcaⁿ quide ñadihí-dé, te cada iní-ó sã méé-dẽ ní sanu ichi ñaha-dẽ xii-aⁿ cáháⁿ ndihí-aⁿ ingá tée te núu na dàña ñaha-dé. Te tée na ñaqueheⁿ ñaha xii ñaha ní dáñá ñaha yĩ-xi-áⁿ, te díu-ni ñá túú ní quide váha-dé sá dúcáⁿ ñí ñaqueheⁿ-dé ñaha-áⁿ.

Ñáyiu càcunehe ñaha xii Yá Ndiõxí cuèndá cutnùní iní tnàha ñáyiu-yu sá ndàá cadá-yu ìⁿ sá sání iní-yu cadá-yu

³³ Te sa nãha tucu-ndo nacúaa ní cáháⁿ tucu cue tée ní xíndecu ndéé sanaha, chi cue tée-áⁿ ñí cachí-güedé: “Te núu càcunehe-ndo Yá Ndiõxí núu tnàha ñáyiu-ndo

nàcuáa cutnùní iní-yu sá ndàá cada-ndo ìⁿ sá sání iní-ndó càda-ndo, te cada-ndo”, duha ní cáháⁿ dóho tnàha-güedé. ³⁴ Dico yúhú cächí tnúhu-í xii-ndo sã ñà túú nã cacunehe-ndo sã ndàá cada-ndo ìⁿ sá sání iní-ndó càda-ndo. Te ni vã cácu nèhe-ndo andiú chí yácáⁿ cúu-xí nũú núcõo Yã Ndiõxí táxí tnùní-gá. ³⁵ Te ni vã cácu nèhe-ndo ñuyiú-a, chí tnàhá ñuyiú-a ndècu-gá, te ni vã cácu nèhe-ndo ñuú Jerusalén chí ñuú-áⁿ cúu cuendá-gá, te diu-gá cúu-gã Yaá ío cùnuu. ³⁶ Te ni vã cácu nèhe-ndo díquí-ndó chí nàha-ndo sá nì ìⁿ idi díquí-ndó ñã ndácú-ndó ndàda cuixíⁿ-ndó àdi ndada tnuu-ndo. ³⁷ Te váha-gá sá nũu ìⁿ sá sání iní-ndó càda-ndo, te cachí-ni-ndo: “Cuu cada-ndí, àdi vá cúu càda-ndí”, cachí-ni-ndo. Chi nchaa dava-gá sá chídó-ndó càháⁿ-ndó òré ducaⁿ sàni iní-ndó càda-ndo ìⁿ sá cádá-ndó cùu-xí sá dácàhu iní ñáhá yùcu ñávãha.

Cuendá ñáyiu nàchinaa sá quidé ñàha tnaha ñáyiu-xi
(Lc. 6:29-30)

³⁸ Te sa nàha tucu-ndo nacuéa ní cáháⁿ tucu cue téé ní xíndecu ndéé sanaha, chí cue téé-áⁿ nĩ cachí-güedé: “Ñáyiu na càda ñaha tnaha ñáyiu-xi ìⁿ sá ñà túú vãha, te nanchòcáva-yu nachinaá-yu sá nĩ quide ñaha tnàha ñáyiu-yu”, duha ní cachí-güedé. ³⁹ Dico yúhú cächí tnúhu-í xii-ndo sã ñà túú nã cada-ndo nchàa cue

ñáyiu cuihna iní-xi te núu quíde ñahá-yu ìⁿ sá ñà túú vãha xii-ndo. Te núu ní canihá-yu ìⁿ xito te cuíni tucú-yu canihá-yu ingá xito te dañà-ndo na cànihá-yu. ⁴⁰ Àdi ní sacáⁿ cuéchi-yu núu cué téé cùchiuⁿ cuendá-ndó, te cuíni-yu quendeé-yu dúhnú-ndó te dañà-ndo na cànehé-yu quíhíⁿ, te tnàhá-ni dóó ndíxí ndòdo-ndo dañà-ndo na canehé-yu quíhíⁿ. ⁴¹ Te núu quíde yicá-yu caca-ndo dàtná úú kilómetrú cuido-ndo ndàchiúⁿ-yu ña, te chido-ndo úú-gá tucu kilómetrú cuido-ndo ndàchiúⁿ-yu. ⁴² Te núu ío ìⁿ sá xicáⁿ-yu núu-ndó te cuañaha-ndo, àdi ío ìⁿ sá sánũu-yu núu-ndó te cuañaha nũu-ndo.

Cuu iní-ó nchàa ñáyiu cùu úhú iní ñáhá xii-o
(Lc. 6:27-28, 32-36)

⁴³ Te sa nàha tucu-ndo nacuéa ní cachí tucu cue téé ní xíndecu ndéé sanaha, chí cue téé-áⁿ nĩ cachí-güedé: “Cuu iní-ndó cué ñáyiu ndècu ndihí váha-ndo, te cuu úhú iní-ndó cué ñáyiu cùu úhú iní ñáhá xii-ndo”, duha ní cachí-güedé. ⁴⁴ Dico yúhú cächí tnúhu-í xii-ndo sã cúu iní-ndó cué ñáyiu cùu úhú iní ñáhá xii-ndo, te cáháⁿ váha-ndo cuendá cue ñáyiu càháⁿ úhú ñáhá xii-ndo, te cada-ndo sã vãha sá cúu-xí cué ñáyiu cùu úhú iní ñáhá xii-ndo, te cáháⁿ ndihí-ndo Yã Ndiõxí cuendá cue ñáyiu xícuéhé ñáhá xii-ndo, ndihí cuendá cue ñáyiu quíde úhú ñáhá xii-ndo. ⁴⁵ Te núu

na càda-ndo nchaa nacuáa cãháⁿ-í-a, te ducaⁿ te cutnùnì sá cúu-ndó dēhe Tãtã-ndó Dútú Ndiõxí Yaá ndécú àndiũ. Te ñiu-gã cúu-gã Yaá quidé quène nchíanchii, te ñiu-ni-gã cúu-gã Yaá dácùuⁿ dáu ñuyíu-a, te ducaⁿ quide-gã cuendá cuu-xi sá vãha sá cúu-xí cuè ñáyiu quide vãha, ndihi sá cúu-xí cuè ñáyiu ñã túú quide vãha. ⁴⁶ Te núu nchòhó ná cúu ìní-ndó mèe-ni ñáyiu na cùu ìní ñáhã xii-ndo, te vá càchí-ndó sã Yã Ndiõxí taxi-gã sá ndúú tãhú-ndó sã dúcãⁿ quide-ndo, chi cuèi cue tée cuihna ìní-xi quide cobrá ñáhã xii cue ñáyiu cuendá impuèstú ducaⁿ xíquide-güedé. ⁴⁷ Te núu mee-ni ñáyiu ndècu ndihi vãha-ndo ïo vãha cãháⁿ ndihi-ndó-yu, te vá càchí-ndó sã ïo vãha quide-ndo sã dúcãⁿ quide-ndo, chi cuèi ndéé nchaa ñáyiu ñã túú xini ñã dãna cuendá Yã Ndiõxí ducaⁿ xíquide-yu. ⁴⁸ Te duha ndùu tnúhu cãháⁿ-í cuendá sá nchòhó cada ndãá-ndó cùndecu-ndo datná quidé ndãá mée Tãtã-ndó Dútú Ndiõxí Yaá ndécú àndiũ — duha ní dãnèhé ñáhã Jèsús xii cue tée xica cuu ndihi-gã ndihi nchaa ñáyiu.

6

Jèsús dãnèhé-gã ñáyiu nãcuáa cadã-yu sã vãha

¹ Te Jèsús ndécú-ni-gã dãnèhé-gã cue tée xica cuu ndihi-gã ndihi nchaa ñáyiu, te xãhaⁿ-gã:

—Te òré quidé-ndó sã vãha te vá cadã-ndó núú ñáyiu

cuendá-ni sá cuini-ndó cãháⁿ vãha-yu cuendá-ndó, chi núu núú ñáyiu ducaⁿ na càda-ndo te Dútú Ndiõxí Yaá cúu Tãtã-ndó vá taxi-gã sá ndúú tãhú-ndó. ² Te xíãⁿ núu nchòhó òré chindèe-ndo ñáyiu ndàhú, te vá cũñaha-ndo xii cue ñáyiu sá chindèe-ndo cue ñáyiu ndàhú-áⁿ dàtnã xíquide cue ñáyiu dãndahú mée-xí sã quidé ndãá te ñã ndãá sã quidé ndãá-yu, chi ñáyiu-áⁿ ducaⁿ xíquide-yu òré sãháⁿ-yu veñúhu, chi dãtecú tnúhu-yu nchaa ñáyiu òré ducaⁿ chindeé-yu ñáyiu ndàhú. Te ñiu-ni ducaⁿ quidé-yu xãháⁿ-yu xii cue ñáyiu sá chindèe-yu cue ñáyiu ndàhú-áⁿ nchaa núú xicã cúu-yu, te ducaⁿ xíquide-yu cuendá cuini-yu cãháⁿ vãha ñáyiu cuendá-yu. Te yúhú na càchí tnúhu ndãá-í xii-ndo sã ñã túú nã nduu tãhú ñáyiu-áⁿ núú Yã Ndiõxí sã dúcãⁿ quidé-yu chi mee-ni núú tnãha ñáyiu-yu cùdiú-yu. ³ Te nchòhó òré chindèe-ndo ñáyiu ndàhú, te cuèi ñáyiu ío-gã vãha ndècu ndihi-ndo dico vá cũñaha-ndo sã dúcãⁿ chindee-ndo cue ñáyiu ndàhú-áⁿ, te ni cuèi dava-gã ñáyiu vá cũñaha-ndo. ⁴ Chi vãha-gã sã ìní mée-ni-ndó ná cùhuⁿ sã dúcãⁿ chindee-ndo cue ñáyiu ndàhú-áⁿ. Te núu ducaⁿ na càda-ndo ñã, te Dútú Ndiõxí Yaá cúu Tãtã-ndó taxi-gã sã ndúú tãhú-ndó chi ñiu-ni mee-gã ndèhé-gã nãcuáa quide-ndo ndecu-ndo.

Jèsús dãnèhé-gã ñáyiu nãcuáa cãháⁿ ndihí-yu Yã

Ndiöxí

(Lc. 11:2-4)

5 Te nchòhó òré càháⁿ ndihi-ndo Yă Ndiöxí, te vá cádá-ndó dàtná xíquide cue ñáyiú dândahú méé-xí càchí sá quidé ndáá te ñá ndáá sá quidé ndáá-yu, chi ñáyiú-áⁿ tnàhá iní-yu cunutñi-yu càháⁿ ndihí-yu Yă Ndiöxí òré yihí-yu veñùhu. Te ñiú-ni ducaⁿ xíquidé-yu nchaa núú xícá cùú-yu, te ducaⁿ quidé-yu cuendá sá cuení-yu quini ñáyiú nàcuáa xíquidé-yu. Te na càchí tnúhu ndáá-í xii-ndo sã ñà túú nã nduu táhú ñáyiú-áⁿ núú Yă Ndiöxí sá dúcáⁿ quidé-yu chi mee-ni núú tnàha ñáyiú-yu cùdiú-yu. 6 Te nchòhó òré cuení-ndó càháⁿ ndihi-ndo Yă Ndiöxí, te ndihu ndedí nihnu-ndo xití vehe-ndo, chi ñiú-gá cúú Tătá-ndó te ndècu ndihi ñaha-gá xii-ndo, te ñiú-ni mee-gã ndéhé ñaha-gá xii-ndo nàcuáa quide-ndo, te núú ducaⁿ na càda-ndo te taxi-gá sá ndúú táhú-ndó.

7 Te òré càháⁿ ndihi-ndo Yă Ndiöxí te vá sũúni cuendá-ni dacáá-ndó tnúhu cáháⁿ ndihi-ndo-gã dàtná xíquide cue ñáyiú ñá túú xini tnúhu-gá, chi ñáyiú-áⁿ sání iní-yu sá tédõho ñaha vñhi-gá Yă Ndiöxí xii-yu sá dúcáⁿ sũúni dàcaá-yu tnúhu càháⁿ ndihi ñàhá-yu xii-gá dico ñáhá. 8 Dico nchòhó, vá cádá-ndó dàtná xíquide cue ñáyiú-áⁿ, chi mee Tătá-ndó Dütú Ndiöxí sa ñaha-gá ná cúú nchaa sá xini ñùhu-ndo cuéi òré vátá càcáⁿ-gá-ndó núú-gã. 9 Te duha cáháⁿ-ndó

òré càháⁿ ndihi-ndo Yă Ndiöxí:

Yòhó Tătá-ndí Dütú Ndiöxí Yáá ndécú àndiú, nchaa ñáyiú na càháⁿ-yu sá cúú-n Yáá ío yifñùhu.

10 Te xícáⁿ táhú-ndí núú-n sã ná sàá nduu ndihu ndàhá-n-yu.

Te cada-n dàtná càchí iní-n ñúyíú-a dàtná quidé-n àndiú.

11 Te xícáⁿ táhú-ndí núú-n sã táxí-n sã cóhó-ndí sá cáxí-ndí ñⁿ nduu ñⁿ nduu.

12 Te cada càhnu iní-n nchaa yícá cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.

13 Te vá dáñá-n dàcaháⁿ ñáhá yùcu ñávãha xii-ndí cada-ndí sá ñà túú vãha, chi coto ñaha-n xii-ndí cuendá sá vã dúcáⁿ càda ñaha-xí.

Te ñiú-n cùu-n Yáá ío cùnuu nchaa nduu nchaa quíú, te ío càhnu cuu-n, te ñiú-ni-n quindaha ñaha-n xii-ndí ni caa ni quíhíⁿ. Te ducaⁿ na cùnduu.

Duha dānehé ñàhá-í xii-ndo càháⁿ ndihi-ndo Yă Ndiöxí.

14 Te núú nchòhó quidé càhnu iní-ndó nchaa sá quidé ñàha tnaha ñáyiú-ndo, te ducaⁿ te Tătá-ndó Dütú Ndiöxí Yáá ndécú àndiú cada cahnu iní-gá nchaa sá ñà túú vãha quide-ndo tucu.

15 Dico núú nchòhó vá cádá càhnu iní-ndó nchaa sá quidé ñàha tnaha ñáyiú-ndo ña, te ni Dütú Ndiöxí Yáá cúú

Tătă-ndó vǎ cádá càhnu iní-gá nchaa sá quidé-ndó tùcu.

Cuèndá ñáyiú ñá túú tnàhí ná xéxí ãma càháⁿ ndihí-yu Yá Ndiõxí

¹⁶ Te nchòhó, nduu ñá túú tnàhí ná xéxí-ndó càháⁿ ndihí-ndo Yá Ndiõxí, te vǎ cùndìyí-ndó dàtná xíquide nchaa ñáyiú dándahú méé-xí càchí sá quidé ndǎá te ñá ndǎá sá quidé ndǎá-yu, chi ñáyiú-áⁿ ducaⁿ xíquidé-yu cuèndá sá cuíní-yu cutnùní iní ñáyiú sá ñá túú tnàhí ná xéxí-yu càháⁿ ndihí-yu Yá Ndiõxí. Te yúhú càchí tnúhu-í xii-ndo sǎ sà dúcáⁿ quidé-yu te ñá túú ñǎ chindee ñàha-xi xií-yu cuèndá níhí-yu ñⁿ sá ndúú tǎhú-yu núú Yá Ndiõxí. ¹⁷ Dico nchòhó, nduu dùcaⁿ quide-ndo ñá túú tnàhí ná xéxí-ndó càháⁿ ndihí-ndo Yá Ndiõxí, te váha váha naquete-ndo núú-ndó, te váha váha chihi-ndo cǔcǎ ¹⁸ cuèndá sá vǎ cutnùní iní ñáyiú sá ñá túú ñǎ xéxí-ndó ndúu ducaⁿ caháⁿ ndihí-ndo Yá Ndiõxí. Te Dútú Ndiõxí Yáá cúú Tătă-ndó ndècu ndihí-ndo ñiú-ni mee-gǎ ndéhé-gǎ nàcuáa quide-ndo ndècu-ndo, te ñiú-gǎ taxi-gǎ sá ndúú tǎhú-ndó.

Cuèndá nchaa sá vǎha nduu tǎhú-ó
(Lc. 12:33-34)

¹⁹ Te vǎ cání ñí-ndó cùu-ndo ñáyiú cuica nǎndi sá cùndècu ndihí-ndo ñuyíú-a chi vǎ cúdii-xi, chi dava quee tíquidi, te dava caxi cudi ñùhu, àdi quíhu ñadúhú vehe-ndo te duhu-güedé. ²⁰ Te váha-gǎ chí ndúcú

nàcuáa cada-ndo cuèndá ducaⁿ ngündecu sá ndúú tǎhú-ndó àndiú, te xíáⁿ cudii-xi cundecu ndihí-ndo ñi caa ñi quíhíⁿ, chi yácáⁿ vǎ quéé-gǎ tíquidi, te ni vǎ cǎxí-gǎ cudi ñùhu, te ni vǎ quíní-gǎ-ndó ñadúhú duhu-güedé ndachíuⁿ-ndo. ²¹ Te núu cùu-ndo ñáyiú cuica ndècu ñuyíú-a, te ñiú-ni nchaa sá ndécú ndihí-ndo ñuyíú-a ñùhu iní-ndó. Àdi cuu-ndo ñáyiú quide nacuáa ngündecu sá ndúú tǎhú-ndó àndiú, te ñiú-ni sá ndúú tǎhú-ndó ndècu andiú-áⁿ ñùhú ñí-ndó.

Núú-ó cùu-xi datná ñⁿ ñuhú
(Lc. 11:34-36)

²² Te cada iní-ndó sǎ núú-ndó cùu-xi datná ñⁿ ñuhú. Te núu núú-ndó càváha te cutnùní iní-ndó ñǎ cúú sǎ ndécú núú-ndó. ²³ Dico núu cùhú núú-ndó ñá túú cutnùní cundehe-ndo ña, te ñá túú cutnùní iní-ndó ñǎ cúú sǎ ndécú núú-ndó. Te sá dúcáⁿ cùhú núú-ndó te cada iní-ndó sǎ ndécú-ndó dàtná ñⁿ núú néé. Te duha ndúu tnúhu càháⁿ-í chi núu sàni váha iní-ndó cuèndá Yá Ndiõxí ñá, te cùu vii cùu váha iní-ndó ndècu-ndo. Áⁿ te núu ñá túú sàni váha iní-ndó cuèndá-gǎ ñá, te ñá túú tnàhí cùu váha iní-ndó ndècu-ndo. Te sá dúcáⁿ ñá túú sàni váha iní-ndó cuèndá-gǎ te cada iní-ndó sǎ ndécú-ndó dàtná ñⁿ núú néé.

Vá ndácú ñⁿ téé cunu cuechi-dé núú úú patróóⁿ
(Lc. 16:13)

²⁴ Te ñi ñⁿ téé xìnu cuechi vǎ ndácú-dé cunu cuechi-dé núú úú patróóⁿ, chi téé-áⁿ cuu váha iní-dé núú ñⁿ patróóⁿ-dè

te tñii-dé nchaa tnúhu càháⁿ patróoⁿ tée cùu váha iní-dé núu-xi-áⁿ. Te núu ìngá tucu patróoⁿ-dë vá cúu váha iní-dé, te ni vǎ tñii-dë tnúhu càháⁿ ìngá tée-áⁿ. Te ducaⁿ sǎtnahá-xi cùu nchohó chi vá ndácú-ndó cùnu cuechi-ndo núu Yǎ Ndiöxí te cuhuⁿ iní-ndó nchaa sá ìo ñuyíu-a.

Yá Ndiöxí xító-gǎ nchaa ñáyiu cùu déhe-gǎ
(Lc. 12:22-31)

²⁵ Te na càchí tnúhu-í xii-ndo sǎ vá ìo cani iní-ndó nùu nása níhí-ndó sǎ cóhó sǎ cáxí-ndó, te ni vǎ ìo cani iní-ndó nùu nása níhí-ndó dǎo cuihnu-ndo, chi cùnuu-gǎ méé-ndó dàcúúxí sǎ nchító-ndó, te ducaⁿ cùnuu-gǎ yiqui cùñú-ndó dàcúúxí dǎo sácúñhu-ndo. ²⁶ Te chí cádá cuèndá sá ncháá quiti ndava ñá túu tnàhí ná xítú-güedi, te ni ñá túu ndèé cuáháⁿ-güedi nàtahu-güedi, te ni ñá túu nǎ nàtǎxúha-güedi, te ni ñá túu ndèé cáá yàcá-güedi, chi mee Tǎtá-ó Dütú Ndiöxí Yaá ndécú àndi u xito ñaha-gǎ xii-güedi níhí-güedi sá xéxí-güedi. Te núu cue quiti-áⁿ ducaⁿ xito ñaha-gǎ xii-güedi, jte uuⁿ-gǎ xító ñaha-gǎ xii nchòhó, chi nchòhó ìo-gǎ cùnùu-ndo dacúúxí cuè quiti-áⁿ! ²⁷ Te cuèi nándi sá sání vihi iní-ndó ndècu-ndo, dico ñá ndácú-ndó càda-ndo nacuaa cuehnu-ndo cuèdicó ìiⁿ yiqui-gǎ.

²⁸ Te vá ìo cani iní-ndó nùu nása níhí-ndó dǎo cuihnu-ndo. Te chí cádá cuèndá nàcuáa sàhnu nchaa itá ìo yucu, chi nchaa itá-áⁿ ñá túu quide chiuⁿ-xi, te ni

ñà túu quèheⁿ-xi idi. ²⁹ Te na càchí tnúhu-í xii-ndo sǎ ndíi Salómón cuèi ìo vii ní xinduu dǎo ní xóo cuihnu ndíi, dico ñá túu nùtnahá-xi nàcuáa càa nchaa itá, chi ìo-gǎ vii càa nchaa itá. ³⁰ Te nchaa itá ìo yucu tnaa-ni cùdíi-xi, te yìchí-xi te sàhmi ñáyiu. Te cuèi ducaⁿ dico mee Yǎ Ndiöxí quidé-gǎ ìo vii sácúnduu-xi. Te núu nchaa itá-áⁿ ducaⁿ quide-gǎ xító-gǎ sácúnduu vii-xi, te xǎⁿ cùtnùní sá ìo-gǎ coto ñaha-gǎ xii-ndo, dicó-ni sá ñà túu sàndáá váha iní-ndó-gǎ.

³¹ Te xǎⁿ nùu ñá túu xini ñuhu vihi-xi cani iní-ndó nùu nása níhí-ndó sǎ cóhó sǎ cáxí-ndó, àdi nása níhí-ndó dǎo cuihnu-ndo. ³² Chi nchaa ñáyiu ñá túu xini nàcuáa càháⁿ tnúhu Yá Ndiöxí mee-ni nchaa xǎⁿ ñuhú ìni-yu. Dico nchòhó chi mee Tǎtá-ndó Dütú Ndiöxí sa naha-gǎ ná cúu sǎ xini ñuhu-ndo. ³³ Te xǎⁿ nùu ìo xini ñuhu-xi sá cùhúⁿ iní-ndó sǎ Yǎ Ndiöxí yindàha ñaha-gǎ xii-ndo, te ducaⁿ càda-ndo nchaa nacuaa cùni-gǎ, te ducaⁿ te taxi-gǎ nchaa sá xini ñuhu-ndo.

³⁴ Núu xǎⁿ vá ìo cani iní-ndó nása cundecu-ndo ndùu tneé, chi cani iní-ndó nàcuáa cada-ndo cundecu-ndo vitna, chi nduu tneé-áⁿ te òré-nǎ te cutnùní nùu nása cada-ndo cundecu-ndo. Chi nchòhó sa naha-ndo sá ìo titní núu sǎ quidé-xi ìiⁿ nduu ìiⁿ nduu — duha ní dánèhè ñáhá Jèsús xii cue téé xica cuu ndihi-gǎ ndihi nchaa ñáyiu.

7

Vá càháⁿ cuèhé-ó cuèndá

tnàha ñáyiu-o

(Lc. 6:37-38, 41-42)

¹ Te Jèsús ndècuu-ni-gá dánèhé-gá cue téé xica cuu ndihi-gá ndihi nchaa ñáyiu, te xàhaⁿ-gá:

—Vá, càháⁿ cuèhé-ndó cuèndá tnàha ñáyiu-ndo, te ducaⁿ te Yá Ndiöxí ñá túú ná tnúhu cúñaha-gá xii-ndo.

² Chi núu na càháⁿ cuèhé-ndó cuèndá tnàha ñáyiu-ndo, te Yá Ndiöxí ío ìⁿ sá cádá ñàha-gá xii-ndo. Te núu nchòhó ná càháⁿ cuèhé víhí-ndó cuèndá tnàha ñáyiu-ndo te Yá Ndiöxí ío-gá dandòho ñaha-gá xii-ndo. ³ ¿Te ná cuèndá

ndéhé-ndó ìⁿ sá ñà túú vâha quide tnaha ñáyiu-ndo te mee-ndo vîhi-gá quidé-ndó-í? Te sá dúcáⁿ quide-ndo te cada iní-ndó sã ndéhé-ndó dàtná ìⁿ mihi líhli ñùhu núú tnàha ñáyiu-ndo te mee-ndo ñùhu ìⁿ mihi cahnu-gá núú-ndó te ñá túú quide cuendá-ndó.

⁴ Te núu na nàcanu ichi-ndo tnaha ñáyiu-ndo cuèndá sá ñà túú quide váha-yu ndècú-yu, te mee-ndo vîhi-gá quidé-ndó ñá, te cada iní-ndó sã xàhaⁿ-ndo xii tnaha ñáyiu-ndo sã nátàva-ndo mihi líhli ñùhu núú-yu sá dúcáⁿ quide-ndo, te mihi cahnu ñùhu núú mée-ndó ñà túú quide cuendá-ndó.

⁵ Te sá dúcáⁿ quide-ndo te ío dandahú-ndó mée-ndo sá quidé ndáá-ndó te ñá ndáá sá quidé ndáá-ndó, te xini ñùhu-xi díhna-gá dañà-ndo nchàa sá ñà túú vâha quide-ndo, te dàtnùnì ducaⁿ te cuu nacanü ichi-ndo tnàha ñáyiu-ndo cuèndá nchaa sá ñà túú vâha quidé-yu.

⁶ Te nchaa ñáyiu ío sàá iní-xi, te vá cádá yica-ndó-yu cundedòho-yu tnúhu Yá Ndiöxí, chi núu na càda yica-ndó-yu te ngóo-yu cuu úhú iní ñáhã-yu xii-ndo. Te ñáyiu-áⁿ cúú-yu dàtná iná chi quitì-áⁿ núu na cuãñaha-o ìⁿ sá cuãñaha-o, te núu ñá túú cùtnunì iní-di ná cúú xíãⁿ te tnã ñaha-di xii-o. Te cùu tucú-yu dàtná cùchí chi quitì-áⁿ núu na chùcu-o núú-di yúú vâha sá ío vii càa nani pér lá, te dicó-ni cunu sáhã-di chi ñá túú cùtnunì iní-di sá cúú-xi yúú vâha.

Cácáⁿ-ó núú Yá Ndiöxí núu ná cuiní-ó

(Lc. 11:9-13; 6:31)

⁷ Te na càchí tnúhu-í xii-ndo sã cácaⁿ-ndó núú Yá Ndiöxí te núu ná cuiní-ndó te taxi-gá, te vá dáñá ndèé-ndó cácaⁿ-ndó núú-gá núu ná cuiní-ndó te ducaⁿ te ñihí-ndó. Te cada iní-ndó sã ní quexio-ndo vehe ìⁿ tnaha ñáyiu-ndo te ní cáháⁿ-ndó, te ñáyiu-áⁿ ní tedóho ñahá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndiöxí tedóho ñaha-gá xii-ndo, te taxi-gá sá ná cácaⁿ-ndó núú-gá. ⁸ Chi

nchaa ñáyiu ducaⁿ xíquide, te Yá Ndiöxí tedóho ñaha-gá xií-yu te ñihí-yu sá cuiní-yu. Te diu-ni ducaⁿ tùcu nchaa ñáyiu na cácaⁿ núú-gá ìⁿ sá cuiní-yu, chi sãñaha-gá sá xicáⁿ-yu núú-gá. Te diu-ni ducaⁿ tùcu nchaa ñáyiu ñá túú dàña ndéé xicáⁿ núú Yá Ndiöxí sá cuiní-yu chi ñihí-yu.

⁹ Te nchòhó cue téé cùu tátá, ñá túú cùndee iní-ndó

cuñaha-ndo xii cue déhe-ndo ìⁿ yúú caxi-güexi òré xicáⁿ-güexi ìⁿ paa núú-ndó caxi-güexi. ¹⁰ Te ni ñà túú cùndee iní-ndó cuñaha-ndo ìⁿ cóó caxi-güexi òré xicáⁿ-güexi ìⁿ chácá núú-ndó caxi-güexi. ¹¹ Te nchòhó cuèi ndèé dau-na sàá iní-ndó dico sãha-ndo cuè déhe-ndo sã vãha xèxi-güexi oré ná cúú sã xicáⁿ-güexi núú-ndó caxi-güexi. Te núu nchòhó ducaⁿ quide-ndo, jte uuⁿ-gá ducaⁿ quide Tátá-ndó Dütú Ndiõxí Yáá ndécú àndiu, chi taxi-gá sã vãha sã cúú-xí-ndó te núu na càcáⁿ-ndó núú-gá!

¹² Te nchaa sã vãha cuiní-ndó càda tnaha ñáyiu-ndo, te cada-ndo tnahá-ndó ndihí-yu, chi ducaⁿ sànu ichi ñaha tnúhu ní chídó tnùnì ndíi Moisés, te diu-ni ducaⁿ sànu ichi ñaha tucu nchaa tnúhu ní chídó tnùnì cue téé ní xóo càháⁿ tnúhu Yá Ndiõxí ndéé sanaha.

Yuyèhe cuiñi
(Lc. 13:24)

¹³⁻¹⁴ Te xini ñuhu-xi nducu-ndo nacuaa cada-ndo tñi-ndo ichi Yá Ndiõxí. Te ichi-gá-án cúú-xí dàtná ìⁿ ichi cuiñi, àdi datná ìⁿ yuyèhe cuiñi. Te duha càháⁿ-í chi ío úhú xínu iní-ndó tñi-ndo ichi Yá Ndiõxí, te sacú-ni nchòhó cue ñáyiu ndècu ñuyúú-a tñi-ndo ichi-gá. Te nchaa ñáyiu ndècu ichi cuehé ichi duha ta xíta nihnú-yu cuaháⁿ. Te ichi ndécú-yu-án cada iní-ndó sã cúú-xí ìⁿ ichi cahnu ichi quehéⁿ, àdi ìⁿ yuyèhe quehéⁿ. Te

duha càháⁿ-í chi ío vai ñáyiu ndécú-yu ichi-án.

Ndi díiⁿ núú yutnu xini-ó nã yutnu cùu-xi cuendá sã sãvidí-xi
(Lc. 6:43-44)

¹⁵ Te càchí tnúhu-í xii-ndo sã ío quihí iní-ndó cùndecu-ndo cuendá sã vã dándahú ñáhá cuè téé càchí sã càháⁿ tnúhu Yá Ndiõxí te ñà ndáá sã càháⁿ-güedé tnúhu-gá. Chi cue téé-án sànuu sã quidé-güedé dàtná quidé mbéé quiti ío vãha iní-xi, dico ñà ndáá chi ñà túú ñuhu vãha iní-güedé, chi quide-güedé dàtná quidé quiti dééⁿ quiti nàni yíhí. ¹⁶ Te òré quexio-güedé núú ndécú-ndó te cada cuendá-ndó nàcuáa quide-güedé cuendá ducaⁿ cùtnunì iní-ndó nã ñáyiu cùu-güedé. Te nchòhó xini-ndó sã ñà túú cùuⁿ ndéhé yoho yàha stilé tnu ñu, te ni ñà túú xini-ndó cùuⁿ ngúxí ìⁿ tnu ñu. ¹⁷⁻¹⁸ Te xini tucu-ndo sã ncháá yùtnu vãha cùuⁿ sãvidí vãha, te nchaa yutnu vãha-án ñà túú cùuⁿ sãvidí sã ñà túú vãha. Te nchaa yutnu sã ñà túú vãha ñà túú cùuⁿ sãvidí vãha, chi mee-ni sãvidí sã ñà túú vãha cùuⁿ. ¹⁹ Te nchaa yutnu sã ñà túú cùuⁿ sãvidí vãha xèhndé-güedé, te cuanguee-xi núú ñuhú càyú-xi. Te ducaⁿ sãtnahá-xi yàha nchaa cue téé dándahú ñáhá càchí sã càháⁿ tnúhu Yá Ndiõxí te ñà ndáá sã càháⁿ-güedé tnúhu-gá, chi quihí-güedé núú ñuhú núú càyú. ²⁰ Te nchòhó cutnùnì iní-ndó nã ñáyiu cùu

cue téé-án cuendá nchaa sá quidé-güedě.

Ñánchaaá ñáyiú ngúndecú-yu núú ndécú Yá Ndióxi táxi tnùní-gá

(Lc. 13:25-27)

21 "Te na cächí tnúhu-í xii-ndo sá ío vài ñáyiú cachí-yu sá yǔhú cúu-í Xítohó-yu, dico ñá ncháá-yu nduu táhǔ-yu cundecú-yu núú ndécú Tàtá-í Dútú Ndióxi táxi tnùní-gá, chí mee-ni nchaa ñáyiú na càda nchaa nacuaá càháⁿ-gá ñáyiú-án nduu táhǔ-yu cundecú-yu núú ndécú-gǎ táxi tnùní-gá. 22 Te na sáá nduu càda ndáá Yá Ndióxi cuéchi nchaa ñáyiú, te vài-yu cúñahá-yu xii-í: "Yòhó Xítohó Jesu-crístú nchúhú cúu-ndí ñáyiú ní cáháⁿ tnúhu-n nàcuáa ní cachí-n, te ñiu-ni-n ní cacunehe-ndí te ní sándáá iní ñáhá nchaa espíritú cundíhi yucu ñávaha xii-ndí ní quee-xi yiqui cùñú ñáyiú, te ñiu-ni yòhó ní chindee ñaha-n xii-ndí ní ndacu-ndí ní quide-ndí titní núú sá vǎ yòo tnàhí ndàcu cada", duha cúñahá-yu xii-í dàvá-án.

23 Dico yúhú cúñaha-í xii-yu: "Ñá túú tnàhí xini ñáhà-í xii nchòhó núu ndéé ñáyiú cùu-ndo, te chí xócuñí nchaa nchòhó ñáyiú quide nchaa sá cuèhé sá dúhá núú ndécú-í-a", duha cúñaha-í xii-yu.

Ín vehe ndècu cimientú-xi ndíhi ñn vehe ñá túú cimientú-xi (Mr. 1:22; Lc. 6:47-49)

24 "Te nchaa ñáyiú sàcúndedóho tnúhu càháⁿ-í te

núu na tní-yu, te ñáyiú-án cúu-yu dàtná ñn téé ío váha cùtnuní iní-xi. Chí téé-án ní dácáá-dé ñn vehe, dico díhna-gá ní xete-dé ndéé ní tnahá-dé yúú cáxiⁿ te dàtnuní ní tava-dé cimientú-xi. 25 Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-án, dico ñá túú ní ndàcu-xi cuidu-xi. Te ní quene tucu táchí ñíhi dico ñá túú ní ndàcu-xi cuidu-xi vehe-án, te ducaⁿ chí téé ní dácáá vèhe-án ní tava-dé cimientú-xi núú yúú cáxiⁿ. Duha sǎtnahá-xi cùu nchaa ñáyiú tní tnúhu càháⁿ-í. 26 Dico nchaa ñáyiú sàcúndedóho tnúhu càháⁿ-í te ñá túú cuini-yu tní-yu, ñáyiú-án cúu-yu dàtná ñn téé ñá túú tnàhí cùtnuní iní-xi. Chí téé-án ní dácáá-dé ñn vehe núú yúú mée-ni ñuhu cúchí. 27 Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-án, te ní quene táchí ñíhi te íi-ni ní xido-xi vehe-án cuendá sá núú ñuhu cúchí ní sáá. Duha sǎtnahá-xi cùu nchaa ñáyiú sàcúndedóho tnúhu càháⁿ-í te ñá túú cuini-yu tní-yu —duha ní dánèhé ñáhá Jèsús xii cue téé xica cuu ndíhi-gá ndíhi nchaa ñáyiú.

28 Te òré ní ndíhi Jèsús sá dúcáⁿ ní cáháⁿ-gá, te nchaa ñáyiú ní xíndedóho nchaa tnúhu ní cáháⁿ-gá ío ní cuñúhu-yu nàcuáa ní dánèhé ñáhá-gǎ xii-yu. 29 Chí ní cáháⁿ-gá dàtná càháⁿ cue téé cùnuu, te cùnuu ndisa-gá, te ñá túú ní cáháⁿ-gá dàtná càháⁿ nchaa cue téé dàcuaha

ñaha xii ñáyiú nchaa tnúhu ní chídó tnùní ndí Moisés.

8

Jèsús quidé tātna-gá ìⁿ téé tnàhá cuéhé sǎ dátèhyú nihnu-xi yiqui cùñú-ó

(Mr. 1:40-45; Lc. 5:12-16)

1 Te Jèsús ní xica-gá cuánuu-gá dǎñi tindúú núú dúcáⁿ nǐ xíndecu-gá ní dánèhé-gá ñáyiú-áⁿ, te cuéhé víhí ñáyiú nchícúⁿ ñáhá xii-gá cuánuu. 2 Te ní quexìo ìⁿ téé tnàhá cuéhé sǎ dátèhyú nihnu-xi yiqui cùñú-ó núú Jèsús, te ní ngúíñí xítí-dé núú-gǎ, te xǎhaⁿ-dě xii-gá:

—Mèstrú, véxi-í càháⁿ ndàhú-í núú-n núu vá cùndèè iní-n càda tātna ñaha-n xii-í, chí cùtnuní iní-í sǎ ndácú-n —càchí-dé xǎhaⁿ-dě xii-gá.

3 Te Jèsús ní dácáà-gá ndaha-gá ní tendaha ñaha-gá xii-dé, te xǎhaⁿ-gǎ:

—Cuu càda tātna ñaha-í xii-n, te vitna ndúha-n —càchí-gá xǎhaⁿ-gǎ xii-dé.

Te òré-ni-áⁿ nǐ xócuíñí cuéhé tnàhá-dé. 4 Te Jèsús ní xáhaⁿ tùcu-gá xii-dé:

—Te vitna cuanùhú te vá yõo ìⁿ cùñaha-n sǎ yùhú ní quide tātna ñaha-í xii-n, núú dütú-ni cuáháⁿ cuèndá sǎ ná quíñí ñáhá-dé xii-n sǎ nǐ ndúha-n, te cuáñaha-n sǎ ndúú tǎhú Yǎ Ndiõxí dàtná ní cachí ndí Moisés. Te ducaⁿ càda-n cuèndá cutnùní iní ñáyiú sǎ nǐ ndúha-n —càchí-gá xǎhaⁿ-gǎ xii téé ní quide tātna-gá-áⁿ.

Jèsús quidé tātna-gá ìⁿ téé xínu cuechi núú ìⁿ téé cùu capitáⁿ

(Lc. 7:1-10)

5 Te Jèsús ní xica-gá cuáháⁿ-gá ñuú Capèrnaúm. Te òré cuánguihu-gá ñuú-áⁿ te ní quexìo ìⁿ téé cùu capitáⁿ càháⁿ ndàhú-dé núú-gǎ, 6 te xǎhaⁿ-dě xii-gá:

—Mèstrú, véxi-í càháⁿ ndàhú-í núú-n núu vá cùndèè iní-n càda tātna ñaha-n ìⁿ téé xínu cuechi núú-í, chí cùhú-dé te càhú víhí tnàhá-dé, te ío ndòho-dé te ní ñǎ cùndèè-gá-dé candá nihnu-dé —càchí-dé xǎhaⁿ-dě xii-gá.

7 Te Jèsús ní xáhaⁿ-gǎ xii-dé:

—Te na quíhíⁿ-ó càda tātna-í-dé —càchí-gá xǎhaⁿ-gǎ xii-dé.

8 Te téé cùu capitáⁿ-áⁿ nǐ xáhaⁿ-dě xii-gá:

—Mèstrú, ñǎ túú tàú-í sǎ quíhu-n ndèè xítí vehe-í, chí cùu-í ìⁿ téé cùtèxínu sǎ cúú-xi-n, te càháⁿ-ni sǎ ndúha téé xínu cuechi núú-í te ndúha-dé. 9 Chí yúhú ndècu cue téé tàxi tnuní ñáhá xii-í, te ducaⁿ yùhú tucu ndècu cue sandadú táxi tnùní-í, Te òré xǎhaⁿ-í xii ìⁿ-dé quíhíⁿ-dé ìⁿ chiúⁿ te cuáháⁿ-dé, te òré xǎhaⁿ-í xii ìngá-dé quixi-dé te véxi-dé, te òré xǎhaⁿ-í xii ìⁿ téé xínu cuechi núú-í càda-dé ìⁿ chiúⁿ te quide-dé. Núu xǎⁿ yòhò càháⁿ-ni sǎ ndúha téé xínu cuechi núú-í te ndúha-dé —càchí-dé xǎhaⁿ-dě xii Jèsús.

10 Te Jèsús ío ní cuñúhu-gá sǎ dúcáⁿ nǐ càháⁿ téé cùu capitáⁿ-áⁿ, te ní xáhaⁿ-gǎ xii

nchaa ñáyiú nchícúⁿ ñáhá xii-gá:

—Na càchí tnúhu ndáá-í xii-ndo sã vátá quíní-gá-í ní ñⁿ ñáyiú isràél, ñáyiú súúní ïo váha sãndáá iní ñáhá xii Yá Ndióxi dátá sãndáá iní ñáhá tée-a xii-gá. ¹¹ Te

na càchí tnúhu ndáá tucu-í xii-ndo sã ïo cuéhé ñáyiú quixi ndaa xio nacuaa quene nchíanchii, te ñu-ni ducaⁿ ïo cuéhé tucú-yu quixi ndaa xio nacuaa quée tucu nchíanchii. Te nchaa ñáyiú-áⁿ naníhí tnáhã-yu ndihi té Àbrahám, ndihi té Isàác, ndihi té Jácób

núú ndécú Yá Ndióxi táxi tnúni-gá te yácáⁿ cundecu ndihi ñáhã-yu xii-güedé. ¹² Te nchaa ñáyiú tàú nduu táhú cundecu núú ndécú Yá Ndióxi táxi tnúni-gá ní cùu, ñáyiú-áⁿ quee tíhũ-yu, chi quíhíⁿ-yu ñⁿ xichi núú néé núú ïo ndohó-yu cundecú-yu, te yácáⁿ ío ndáhí-yu, te ñicó rúhñú-nã cuu núhu-yu sá sätú iní-yu cuendá sá ndohó-yu —càchí-gá xãhaⁿ-gã xii-yu.

¹³ Te Jèsús ní xãhaⁿ tucu-gá xii tée cùu capitáⁿ-áⁿ:

—Yöhó tée ndècu ndihi tée cùhú cuanùhú vehe-n vitna chi ndúha-dé chi ní sãndáá iní-n Yá Ndióxi —càchí-gá xãhaⁿ-gã xii-dé.

Te ñu-ni òré ducaⁿ ñⁿ xãhaⁿ Jèsús xii tée cùu capitáⁿ-áⁿ ñⁿ ndúha tée xinu cuechi núú-dé.

Jèsús quidé tãtna-gá nãná ñadìhí té Pèlú

(Mr. 1:29-31; Lc. 4:38-39)

¹⁴ Te Jèsús ní xica-gá cuáhãⁿ-gá vehe té Pèlú, te

òré ní quexìo-gá vehe-dé te ní xiní-gá cáá nãná ñadìhí-dé cùhú-aⁿ ñùhu vihi-aⁿ cahni. ¹⁵ Te Jèsús ní tñi-gá ndaha ñaha cùhú-áⁿ, te òré-ni-áⁿ ñⁿ nchíco-aⁿ cahni te ní ndacóo-aⁿ ní xinu cuechi-aⁿ núú-güedé ndihi-gá.

Jèsús quidé tãtna-gá vãi ñáyiú cùhú

(Mr. 1:32-34; Lc. 4:40-41)

¹⁶ Te òré ní dáhu nchíanchii te ní quexìo ñáyiú núú ndécú Jèsús, te ndecá-yu vãi ñáyiú yìhi ñaha espíritú cundìhi yucu ñávãha ní sáá núú-gã te ndèca tucú-yu vãi ñáyiú tnáhã dava-gá núú cuéhé. Te ñⁿ-ni tnúhu ní cáháⁿ Jèsús ní tenãá-gá nchaa espíritú cundìhi yucu ñávãha yìhi ñaha xii nchaa ñáyiú-áⁿ, te ní quee-xi yiqui cùñú-yu cuáhãⁿ-xi. Te tnáhã nchaa dava-gá ñáyiú cùhú-áⁿ ñⁿ quidé tãtna-gá. ¹⁷ Te ducaⁿ ñⁿ cuu chi ní quee ndáá-xi nãcuáa ní cáháⁿ ndíi Chàíá tée ní xóo cáháⁿ tnúhu Yá Ndióxi ndéé sanaha, te duha ní cachí ndíi: “Mee-gã cada tãtna ñaha-gã xii-o, chi ñu-gá xocani-gá nchaa sá quidé ùhú yiqui cùñú-ó”, duha ní cachí ndíi.

Ñáyiú cuíní tuha ñaha xii Jèsús

(Lc. 9:57-62)

¹⁸ Te òré ní xiní Jèsús sã ïo cuéhé ñáyiú xixúcu núú ndécú-gã, te ní xãhaⁿ-gã xii cue tée xica cuu ndihi-gá sã quée-gá ndihi-güedé bàrcú cuendá téhndé-gá ndihi-güedé ndaa ingá xio yuhu làgúná. ¹⁹ Te mei òré-áⁿ ñⁿ quexìo ñⁿ

tée dàcuaha ñaha xii cue ñáyi
nchaa tnúhu ní chídó tnúni
ndíi Moisés, te xáhaⁿ-dē xii-gá:

—Mèstrú, cuíní-í canchicúⁿ
ñáhà-í xii-n ndēni ní cuu na
quihíⁿ-n —càchí-dé xáhaⁿ-dē
xii-gá.

20 Te Jèsús ní xáhaⁿ-gǎ
xii-dé:

—Nchaa ñúcuii chi
ndècu yaú cúú vèhe-güedi
saquíhi-güedi, te nchaa cue
quiti ndàva caa tacá-güedi
diquí yutnu. Dico yúhú
Tée cùu ñaní tnáhá-ndó
ncháa-ndo chi ñá túú ndéé
cáá vèhe-í ñuyíú-a ndetatú-í
—càchí-gá xáhaⁿ-gǎ xii-dé.

21 Te ^hn tée ní chitnahá ñáhá
xii Jesús ní xáhaⁿ-dē xii-gá:

—Jèsús, dañá na nùhú-í
cundetú-í cuú tātà-í te
chindúxi-í-dé dàtnúni quixi-í
chitnahá ñáhá dùcaⁿ-ná-í
xii-n —càchí-dé xáhaⁿ-dē
xii-gá.

22 Te Jèsús ní xáhaⁿ-gǎ
xii-dé:

—Daña ñáyiú ñá túú sàndáá
iní ñáhá xii-í ná chindúxi
tnàha meé-yu, chi ñáyiú-áⁿ
cúú-yu dàtná ñáyiú ní xihí
cuēi ndècu-ní-yu núú ñuyíú-a,
te yòhó canchicúⁿ ñáhá-ní
xii-í —càchí-gá xáhaⁿ-gǎ
xii-dé.

*Jèsús ngání-gǎ táchí ndihi
ndute làgúná*

(Mr. 4:35-41; Lc. 8:22-25)

23 Te sátá dúcáⁿ te Jèsús
cuánguee-gá bàrcú ndihi cue
tée xica cuu ndihi-gá, te
ní xica bàrcú-áⁿ cuáháⁿ-xi.
24 Te nini ñuhu barcú-áⁿ ichi
cuáháⁿ-xi núú ndute ní xidí
Jèsús, te ní ngúita-xi níhi vihi
quene táchí, te ta nàdachitú-xi

ndute xití bàrcú cuáháⁿ. 25 Te
cue tée xica cuu ndihi-gá
cuáháⁿ-güedé núú cáá-gǎ
xidí-gá, te xáhaⁿ-güedē xii-gá:

—¡Mèstrú, ndiquíú iní chi
dàcácu ñaha-n xii-o chi quee
naa-o cuíní-xi! —càchí-güedé
xáhaⁿ-güedē xii-gá.

26 Te Jèsús ní xáhaⁿ-gǎ
xii-güedé:

—¿Ná cuendá ndéé ducaⁿ
ío yòhú-ndó? ¿Náa ñá túú
sàndáá iní ñáhá ndisa-ndo
xii-í-áⁿ? —càchí-gá xáhaⁿ-gǎ
xii-güedé.

Te Jèsús ní ndacóo-gá te
ní tenáá-gá táchí-áⁿ ndihi
ndute-áⁿ, te ní ngúíñí táchí-áⁿ
te ní nucúndecu nahi-nǎ
ndute làgúná-áⁿ. 27 Te nchaa

cue tée ñuhu xití bàrcú-áⁿ
ní cuúhu-güedé sá dúcáⁿ ní
quide-gá ní xiní-güedé, te ní
xítñàha-güedé:

—¿Te ná tée cùu tée-a núu
duha ní cáháⁿ-ni-dé te ní
ngúíñí táchí te ní nucúndecu
nahi-ni ndute làgúná-a-í? —
càchí-güedé xítñàha-güedé.

*Cue tée ñuú Gàdará cue tée
yíhi ñaha espíritú cúndihi yucu
ñávàha*

(Mr. 5:1-20; Lc. 8:26-39)

28 Te òré ní quèxio Jesús
ndàa ingá xio yuhu làgúná
yucu cue tée ñuú Gàdará, te úú
tnáhá cue tée quide vehe núú
yíndúxi ndíyí ní quee-güedé
cuáháⁿ-güedé núú ndécú
Jèsús, te ndi ndùú-güedé
yíhí ñaha espíritú cúndihi
yucu ñávàha xii-güedé,
te ío mañá-güedé chi vá
yòo tnáhí dañá-güedé yáha
yatni núú ndécú-güedé.

29 Te cue espíritú yíhi ñàha xii-güedé-án nǐ quide-xi níhi ní cáháⁿ-güedé, te xáhaⁿ-güedé xii-gá:

—¿Ná cuendá véxi-ò Jèsús Déhe Dútú Ndiöxí chidácá ñáhá-n xii-ndí? ¿Áⁿ sàma véxi-n dàndoho ñaha-n xii-ndí? Te vátá sàá-gá nduu dùcaⁿ cada-n —cachí-güedé xáhaⁿ-güedé xii-gá.

30 Te yatni xiáⁿ xixica cuu vai cuchí xixexi-güedi. 31 Te cue espíritú cündihi yucu ñávãha yíhi ñaha xii cue téé-án nǐ cáháⁿ ndàhú-xi núú Jèsús, te xáhaⁿ-xi:

—Te núu vá dáñá-gã-n quíhi-ndí yiqui cùñú cue téé-a, te càháⁿ ndàhú-ndí núú-n sã dàña-n na quíhíⁿ-ndí quíhu-ndí yiqui cùñú nchaa cùchí-ãⁿ —càchí cue espíritú-án xáhaⁿ-xi xii-gá.

32 Te Jèsús ní xáhaⁿ-gã xii cue espíritú cündihi yucu ñávãha-án:

—Chí táquèe yiqui cuñú cue téé-án te quíhíⁿ-ndó nũu ndèé ichi quíhíⁿ-ndó —càchí-gá xáhaⁿ-gã xii nchaa espíritú-án.

Te cue espíritú cündihi yucu ñávãha-án nǐ quee-xi yiqui cùñú cue téé-án, te cuáháⁿ-xi cuánguìhu-xi nchaa cùchí-án. Te cue quití-án nǐ xinu-güedi duha ní queé-güedi ndàa núú dèhvã yuhu làgúná-án, te ní ngaunihnu-güedi xití ndute, te ní ndihi-güedi ní cáhá.

33 Te cue téé xito ñaha xii nchaa cuchí-án nǐ yuhú-güedé te ní xinu-güedé, te ní sáháⁿ-güedé ní caní-güedé cuendú núú cuè ñáyiu ndècu

xití ñuú nchaa nàcuáa ní cuu cuendá cue téé ní xíhi ñaha nchaa espíritú cündihi yucu ñávãha-án. 34 Te nchaa ñáyiu ñuú-án nǐ queé-yu cuáháⁿ-yu núú ndécú Jèsús. Te òré ní quexió-yu núú ndécú-gã te ní cáháⁿ ndàhú-yu núú-gã sá ná queè-gá yucu ñuú-yu núhú-gã.

9

Jèsús quidé tãtna-gã ìⁿ téé cùhú ñã cúú-gã candá nihnu (Mr. 2:1-12; Lc. 5:17-26)

1 Te sátá dúcáⁿ nǐ cuu te Jèsús cuánde-gá bàrcú cuáháⁿ-gá ní natehndé-gá ndàa ingá xio yuhu làgúná. Te xiáⁿ nǐ ndexió-gã ñuú núú quidé ñuú-gã. 2 Te xiáⁿ ndécú-gã ní quexio cue téé nchido-güedé ìⁿ téé cùhú ñã cúú-gã candá nihnu ñũhu-dé xito, te Jèsús ní cutnùní iní-gã sã sàndáá ndisa iní ñáhá-güedé xii-gã nũu ní xáhaⁿ-gã xii téé cùhú-án:

—Yòhó téé cùhú vá ndihú-gã iní-n, chi sa ní quide càhnu iní-í nchaa cuèchí-n —càchí-gã xáhaⁿ-gã xii-dé.

3 Te sã dúcáⁿ nǐ cáháⁿ-gã nũu xiãⁿ cue téé dàcuaha ñaha xii ñáyiu nchaa tnúhu ní chídó tnùní ndí Moisés ní sani iní-güedé: “Téé-a càháⁿ cuèhé-dé cuendá Yã Ndiöxí”, duha ní sani iní-güedé. 4 Te Jèsús ní cutnùní iní-gã nàcuáa sàni iní-güedé nũu ní xáhaⁿ-gã xii-güedé:

—¿Ná cuendá ducaⁿ sàni cuèhé sání dùha iní-ndó? 5 Te sã dúháⁿ nǐ xáhaⁿ-í xii téé cùhú-a sã ní quide càhnu iní-í nchaa yíca cuèchi-dé, te

xíáⁿ nchòhó ñá túú cùtnuní iní-ndó núu ndáá càháⁿ-í àdi ñá ndáá. Dico núu cúu-í-dé sá ndácõo-dé te caca-dé, te cutnùní ndáá iní-ndó núu ndáá càháⁿ-í àdi ñá ndáá, chí cundehe núu-ndó nàcuáa cada-í. ⁶ Te vitna na càda-í nàcuáa cutnùní iní-ndó nchàa-ndo sá yúhú Tée cùu ñani tnáhá-ndó nchàa-ndo ndecu ndihí-í tnúhu ndee iní ñuyú-a sá cáda càhuu iní-í nchaa cuéchi ñáyiú —càchí-gá xáhaⁿ-gã xii-güedé.

Te sátá dúcáⁿ te ní xáhaⁿ-gã xii té cùhú-áⁿ:

—Ndacóo, te ndocani-n xito ñùhu-n véxi-áⁿ te núhú-n vehe-n —cachí-gá xáhaⁿ-gã xii-dé.

⁷ Te òré-ni-áⁿ ñí ndúha té cùhú-áⁿ te ní ndacóo-dé te ní ndocani-dé xito ñùhu-dé ní quexio-áⁿ te ní xica-dé cuánuhú-dé vehe-dé. ⁸ Te nchaa ñáyiú xindecu-áⁿ ïo ní cuñúhu-yu sá dúcáⁿ ñí quide Jèsús ní xiní-yu, te ní cachí-yu sá ïo càhnu cuu Yá Ndiõxí cuèndá sá ñí sáñaha-gã xii Jèsús tnúhu ndee iní cada-gá nchaa sá vã yõo tnàhí ndàcu cada.

Jèsús càháⁿ-gá ñí tée nàni Mateú chitnahá ñáhá-dě xii-gá

(Mr. 2:13-17; Lc. 5:27-32)

⁹ Te Jèsús ní nucúhuⁿ tucu-gá ichi cuáháⁿ-gá, te ichi ñùhu-gá ní xiní-gá núcõo ñí tée nàni Mateú quidé còbrá-dé ñáyiú chí còbrádór impuèstú cúu-dě, te ní xáhaⁿ-gã xii-dé:

—Màteú, néhé chitnahá ñáhá-n xii-í —càchí-gá xáhaⁿ-gã xii-dé.

Te té Màteú-áⁿ ñí ndacuñí-dé ní chitnahá ñáhá-dě xii-gá.

¹⁰ Te ñí xito ndècu Jèsús ñí vehe, te yìhi-gá mèsá ndihí cue téé xica cuu ndihí-gá xéxí ndihí ñaha-gá xii-güedé. Te tnáhá cue téé cuihna iní-xi quide còbrá ñáhá xii ñáyiú cuèndá impuèstú yíhí ndihí-gá mèsá, te tnáhá tucu dava-gá cue téé ndècu ichi cuehé ichi duha yìhi ndihí-gá mèsá. ¹¹ Te sá ñí xiní cue téé cùu fariséú xéxí Jèsús ndihí nchaa cue téé-áⁿ, te ní xicáⁿ tnúhú-güedé núu cuè téé xica cuu ndihí-gá, te xáhaⁿ-güedé:

—¿Ná cuèndá ducaⁿ quide téé cùu mestrú-ndó xéxi-dé ndihí cue téé cuihna iní-xi quide còbrá ñáhá xii ñáyiú cuèndá impuèstú, ndihí nchaa dava-gá cue téé ndècu ichi cuehé ichi duha-í? —càchí-güedé xáhaⁿ-güedé.

¹²⁻¹³ Te Jèsús ní tecú dóho-gá nàcuáa ndùu tnúhu ní xáhaⁿ-güedé xii cue téé xica cuu ndihí-gá, núu ní xáhaⁿ-gã xii-güedé:

—Nchaa ñáyiú ñá túú cùhú chí ñá túú xini ñùhú-yu ñátátná, dico nchaa ñáyiú cùhú chí xini ñùhú-yu ñátátná. Te yúhú véxi-í càháⁿ-í ñáyiú cùtnuní iní-xi sá ndécú cuéchi-xi cuèndá dàñá-yu nchaa sá cuèhé sá dúhá quidé-yu, te ñá túú véxi-í càháⁿ-í ñáyiú càchí sá ñá túú ndècu cuéchi-xi. Te chí cáda cuèndá váha nàcuáa càháⁿ Yá Ndiõxí núu tütú-gá núu càchí-xi: “Yúhú cuèni-í sá cùndàhú iní-ndó cuè tnaha

ñáyi-ndo, te ñá díú mèe-ni sá cáhni-ndó quiti nduu táhù-í", duha càchí-gá núú tütú-gá — càchí Jèsús xáhaⁿ-gá xii-güedé.

Cue tée ndücu tnúhu núú Jèsús cuendá ñáyi ñá túú tnáhi ná xéxi áma càháⁿ ndihí-yu Yá Ndiöxí

(Mr. 2:18-22; Lc. 5:33-39)

14 Te cue tée xica cuu ndihi té Juáá tée dàcuandute ñaha xii ñáyi ní sáháⁿ-güedé núú ndécú Jèsús, te xicáⁿ tnúhú-güedé núú-gá, te xáhaⁿ-güedé:

—Cuini-ndí cachí tnúhu-n ná cuendá nchúhú, ndihi cue tée cuu fariséú ñá túú tnáhi ná xéxi-ndí áma càháⁿ ndihi-ndí Yá Ndiöxí, te cue tée xica cuu ndihi-n ñá túú dùcaⁿ quide-güedé —càchí-güedé xáhaⁿ-güedé xii-gá.

15 Te Jèsús ní xáhaⁿ-gá xii-güedé:

—Nchóhó xini-ndó sá vā cúú cñaha-o xii ñáyi ñuhu vico tnándaha sá vā cúú càxi-yu nini ndècu ndihi ñaha tée tnándaha xii-yu, dico sáá nduu vā cündècu ndihi ñaha-gá tée tnándaha-áⁿ xii-yu, te dàvá-áⁿ te cahni iní-yu vā cáxi-yu cuendá sá ndihú iní-yu.

16 Te ni vā yōo dāndée luha dóó sáá ñⁿ dóó sa ní cuu tühú víhí, chi dóó sáá-áⁿ nāndiyi-xi te uuⁿ-gá ndata-xi dóó sá ní cuu tühú-áⁿ. 17 Te ni vā yōo chihí ndidí sáá xiti ñⁿ lamba sa ní cuu tühú víhí, chi núu yoo ducaⁿ na càda te ndava lamba sa ní cuu tühú-áⁿ chi ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdá-yu,

núu xiáⁿ xini ñuhu-xi quéé ndidí sáá-áⁿ xiti ñⁿ lamba saa cuendá ducaⁿ ñá túú ná cuu cováha-xi —càchí-gá xáhaⁿ-gá xii-güedé.

Cuendá déhe yoco té Jairú ndihi cuendá ñⁿ ñaha ní tnándeé dóó Jèsús

(Mr. 5:21-43; Lc. 8:40-56)

18 Te càháⁿ dúcáⁿ-ní Jèsús ní quexio ñⁿ tée cūnuu núú ndécú-gá, ñⁿ tée tàxi tnuni veñúhu, te ní ngüñí xiti-dé núú-gá càháⁿ ndàhú-dé, te xáhaⁿ-dé xii-gá:

—Véxi-í càháⁿ ndàhú-í núú-n ñuu vā cündèe iní-n quihíⁿ-ó vèhe-í dandòto-n déhe yoco-í chi ní xihí-xi tnáví, te yuhú cūtnuni iní-í sá ñuu quihíⁿ-n tēndaha-n yiqui cuñú-xi te ndoto-xi —càchí-dé xáhaⁿ-dé xii-gá.

19 Te Jèsús ní xica-gá cuáháⁿ-gá ndihi-dé ndihi cue tée xica cuu ndihi-gá. 20 Te ichi ñuhu-gá cuáháⁿ-gá ní sáháⁿ ñⁿ ñadihí ní tnándeé-áⁿ yuhu dóó-gá ndāa sātá-gá, te ñaha-áⁿ sa ní cuu úxúú cuíá sá cùhú-áⁿ ngòyo ñaha níñí xii-aⁿ. 21 Te ducaⁿ ní quide-aⁿ chi ní sani iní-aⁿ sá ñuu ndacu-aⁿ tnándeé-áⁿ cuèdicó luha yuhu dóó Jèsús te ndúha-aⁿ ní sani iní-aⁿ. 22 Te Jèsús ní nchócótó-gá ndāa sātá-gá te ní xini-gá ñadihí-áⁿ, te ní xáhaⁿ-gá:

—Yòhó ñaha cùhú, vā ndihú-gá iní-n vitna chi sa ní ndúha-n, chi ní sándáá iní ñáhá-n xii-í —càchí-gá xáhaⁿ-gá xii-aⁿ.

Te òré-ni-áⁿ ní ndúha ñaha cùhú-áⁿ.

23 Te òré ní quexìo Jesús vehe téé cùnuu taxi tñuní veñúhu-án, te ní xiní-gá xĩndáhí víhí ñǎyiu, te xĩndecu mǔsicú. 24 Te ní xáhaⁿ-gǎ xii-yu:

—Chí táquèe xití vehe-a, chí xíchí-a ñá túú ní xĩhí-xi chí dicó xidí-xi —càchí-gá xáhaⁿ-gǎ xii-yu.

Te ní sácú ndeé ñáhǎ-yu xii-gá sá dúcáⁿ ñí cáháⁿ-gá, chí sá cúú-xí mèè-yu te ní xihí ndisa xíchí-ǎⁿ. 25 Te ñǎyiu-án ñí queé-yu te cuánguihu Jesús núú cándòdo xíchí ñí xihí-án, te ní tñi-gá ndaha-xi te òré-ni-án ñí ndacóo-xi. 26 Te nchaa ñuú cáá yàtni xiáⁿ ñí níhí ñǎyiu tñuhu nàcuáa ní quide Jesús.

Jesús quidé tǎtna-gá núú úú tñáhá cue téé cuàá

27 Te sátá dúcáⁿ ñí cuu te ní xica Jesús cuánuhú-gá, te ichi ñùhu-gá ní chinchícúⁿ ñáhá úú tñáhá cue téé cuàá xii-gá, te níhi cáháⁿ-güedé, te xáhaⁿ-güedé xii-gá:

—Yòhó Jesús, téé cùu ñani tñáhá ndí Daví, cundáhú iní ñáhá xii-ndí —càchí-güedé xáhaⁿ-güedé xii-gá.

28 Te òré ní nasáá Jesús núú quidé vèhe-gá, te cue téé cuàá-án ñí quexìo-güedé ndeé núú-gǎ, te ní xicáⁿ tñuhú-gǎ núú-güedé, te xáhaⁿ-gǎ:

—¿Sàndáá iní-ndó sǎ yùhú ndacu-í cada tǎtna-í núú-ndó-ǎⁿ? —càchí-gá xáhaⁿ-gǎ xii-güedé.

Te ní xáhaⁿ-güedé xii-gá:

—Sàndáá iní-ndí sá díú yòhó Jesús ndacu-n cada

tǎtna-n núú-ndí —càchí-güedé xáhaⁿ-güedé xii-gá.

29 Te Jesús ní dácáá-gá ndaha-gá ní tendaha-gǎ núú-güedé, te ní xáhaⁿ-gǎ xii-güedé:

—Te vitna, ndúha núú-ndó chí ní sándáá iní-ndó sǎ díú yùhú ndacu-í cada tǎtna-í núú-ndó —càchí-gá xáhaⁿ-gǎ xii-güedé.

30 Te òré-ni-án ñí ndúha núú-güedé, te Jesús ní cáháⁿ víhí-gǎ dóho-güedé cuendá sá vǎ cáháⁿ-güedé nàcuáa ní cuu ní ndúha núú-güedé.

31 Te cue téé-án òré ní ndeé-güedé núú ndécú Jesús, te ní ngúíta-ni-güedé ní cani-güedé cuendú núú ñǎyiu nàcuáa ní quide ñaha-gǎ xii-güedé. Te nchaa dava-gá ñuú cáá yàtni xiáⁿ ñí sáháⁿ-güedé ní cani-güedé cuendú núú ñǎyiu nàcuáa ní quide ñaha Jesús xii-güedé.

Jesús quidé tǎtna-gá ñí téé ñíhí

32 Te íchí ñí ndeé cue téé ní ndúha núú-xi-án núú ndécú Jesús, te ní quexìo ñí úú ñǎyiu ndecá-yu ñí téé ñíhí yíhí ñàha espíritú cùndíhí yucu ñávǎha. 33 Te Jesús ní queñuhu-gá espíritú cùndíhí yucu ñávǎha yíhí ñaha xii téé-án, te òré-ni-án ñí cuu ní nacáháⁿ-dé. Te nchaa ñǎyiu xĩndecu-án ño ní cuñúhu-yu, te ní xitñáhá-yu:

—Ñá túú tñáhí xini-ó ñí téé duha cada ñuú nchoo cué ñǎyiu israhél ní cùu —cachí-yu xitñáhá-yu.

34 Te cue téé cùu fariséú ní ngúíta-güedé xitñaha-güedé:

—Tée-a chi sácuíhná chindèe ñaha-xi xii-dé queñùhu-dé nchaa espíritú yíhi ñaha xii ñáyiú te diu-ni sácuíhná-ǎn táxi tnùní-xi nchaa espíritú-ǎn —càchí-güedé xitnàha-güedé.

Jèsús cündàhú iní-gá ñáyiú

35 Te Jèsús cuáháⁿ-gá nchaa ñuú náhnú ndihi nchaa ñuú líhli, te ndi tnahá ïⁿ ïⁿ ñuú sáa-gá te ducaⁿ cuãnguihu-gá ïⁿ ïⁿ veñúhu càa nchaa ñuú-ǎn dánèhé-gá ñáyiú tnúhu váha, tnúhu sá sánú ìchi ñaha xií-yu nàcuáa ndíhu ndaha ñaha Yá Ndióxí xií-yu. Te ducaⁿ-ni ta quide tátna-gá nchaa ñáyiú cùhú cuáháⁿ cuèi ndi dííⁿ ndi dííⁿ núú cuèhé tnàhá-yu ïⁿ ïⁿ-yu. 36 Te sá ñi xini Jèsús sá ïo vai ñáyiú nchicúⁿ ñáhá xii-gá, te ní cündàhú iní ñáhá-gá xií-yu chi ío ndihú iní-yu, te vá yõo nèhe cuendá ñáhá xií-yu, te cùú-yu dàtná cue mbéé cue quiti ñá túú tòli-xi. 37 Te Jèsús ní xáhaⁿ-gá xii cue tée xica cuu ndihi-gá:

—Nchòhó xini-ndó sã òrè ná sáa nduu cùu nchaa sá xitú ñáyiú te ío vai cuu. Te na càchí tnúhu ndáá-í xii-ndo sã dàtná ío vai sá xitú ñáyiú cùu, ducaⁿ ïo vai ñáyiú cùmání cundedóho tnúhu-í, te ío sacú ñáyiú dàcuaha ñaha xií-yu. 38 Núú xíáⁿ xini ñùhu-xi cácaⁿ-ndó núú Yá Ndióxí Yaá cúú Xitohó-ndó ndihí-yu cuendá sá ná dàcaháⁿ-gá iní-yu cáháⁿ-yu tnúhu-gá núú nchaa dáva-gá tnàha ñáyiú-yu cùmání cundedóho tnúhu-gá —càchí-gá xáhaⁿ-gá xii-güedé.

10

Jèsús sãñaha-gá tnúhu ndee iní xii ndi ùxúú cue tée xica cuu ndihi-gá

(Mr. 3:13-19; Lc. 6:12-16)

1 Te Jèsús ní cana-gá ndi ùxúú cue tée xica cuu ndihi-gá, te ní sãñaha-gá xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cündihi yucu ñávaha yíhi ñaha xii ñáyiú, ndihi cuendá sá cáda tátna-güedé nchaa dáva-gá ñáyiú cùhú cuèi nándi núú cuèhé tnàhá-yu.

2 Te duha xñani ndi ùxúú cue tée-áⁿ: tée cùnuu-gá nání-dě Xímú, àdi Pelú chi úú diu-dé, te ñaní-dé cúú tẽ Ndríxi, te tnàhá tée-áⁿ cúú-dě tée xica cuu ndihi Jèsús, ndihi té Jàcobó ndihi ñaní té Jàcobó-áⁿ tẽe nani Juaá, te ndi ndúú cue tée-áⁿ cúú-güedé déhe té Zebèdeú.

3 Te tnàhá té Lìpé xicá cùu ndihi-gá, ndihi té Bartolòmé, ndihi té Mǎxí, ndihi té Màteú tée cùu cobradór impuèstú ní cùu, ndihi té Jàcobó déhe té Àlféú, ndihi té Lèbeú tée dànani-güedé Tàdeú, 4 ndihi té Xímú tée ní cundihí cue tée cananistá, ndihi té Jüdás Iscarioté tée ní sáa nduu ñi sáha cuendá ñáhá xii Jèsús núú cuè tée cùu úhú iní ñáhá xii-gá.

Jèsús téndàha-gá ndi ùxúú cue tée xica cuu ndihi-gá quihíⁿ-güedé cáháⁿ-güedé tnúhu-gá núú ñáyiú

(Mr. 6:7-13; Lc. 9:1-6)

5-6 Te Jèsús ní xáhaⁿ-gǎ xii ndi ùxúú cue téé xica cuu ndihi-gá sá quíhíⁿ-güedé cáháⁿ-güedé tnúhu-gá núú ñáyiú, te cùmání-gǎ caca-güedé quíhíⁿ-güedé, te ní xáhaⁿ-gǎ xii-güedé:

—Na càchí tnúhu-í xii-ndo sǎ méé-ní ñúú núú xíndecu cue ñáyiú isráél quíhíⁿ-ndó cáháⁿ-ndó tnúhu-í, te vá quíhíⁿ-ndó ni ìⁿ ñúú yíndèhu dístrítú Sàmariá, te ni vǎ quíhíⁿ-ndó dàva-gá ñúú núú xíndecu ñáyiú ñá túú cùu ñáyiú isráél. Te cue ñáyiú isráél-áⁿ cúú-yu dàtná cue mbéé cue quítì ní xíta chi ta xíta nihnú-yu cuáháⁿ. ⁷ Te cúñaha-ndo xii-yu sǎ sà ní cuyatni nduu ndíhu ndaha ñàha Yá Ndiòxí xii-yu. ⁸ Te cada tátna-ndo nchàa ñáyiú cùhú cuéi ñáyiú tnàhá cuéhé sǎ dátèhyú nihnu-xi yíqui cùñú-yu, te queñuhu-ndo nchàa espíritú cùndíhi yucu ñávàha yíhi ñaha xii ñáyiú, te dandòto-ndo cue ñáyiú sa ní xíhí, te vá càcáⁿ-ndó yǎhu-ndo núú ñáyiú òré cada-ndo nchàa chiuⁿ-áⁿ, chi sa nàha-ndo sǎ dìcò ducaⁿ ñí taxi-í tnúhu ndee ìní ndécú ndíhi-ndo.

⁹ Te vá cànèhe-ndo díhúⁿ cuu ichi-ndo, ¹⁰ te ni vǎ cànèhe-ndo ñunu cuhuⁿ ndachiuⁿ-ndo, te ni vǎ cànèhe-ndo ingá ichi dóó-ndó nàdáma-ndo, te ni vǎ cànèhe-ndo úú-gá chàu-ndó chi òu-ni chàu yíhí-ndó-áⁿ xíáⁿ-ni quíhi-ndo, te ni vǎ cànèhe-ndo tatnu, te ducaⁿ càda-ndo chi nchòhó sa nàha-ndo sǎ nchàá ñáyiú

quide chiuⁿ te òu-ni cuèndá chiuⁿ quidé-yu ñíhi-yu sǎ xéxí-yu.

¹¹ Te ndi tnahá ñúú ná quèxio-ndo te nducu-ndo ñáyiú cùtnuní ìní-ndó sǎ cúú-yu ñáyiú vǎha, te vehe ñáyiú-áⁿ cundecu-ndo ndèé sǎá nduu ndèe-ndo ñúú-áⁿ. ¹² Te òré quèxio-ndo vehé-yu te cúñaha-ndo xii-yu: “Yá Ndiòxí chíndèe chítúu ñaha-gǎ xii-ndo ndècu-ndo”, duha cúñaha-ndo xii-yu. ¹³ Te núú ní cáháⁿ vǎha ndíhi ñàhá-yu xii-ndo, te cuu-xi sǎ vǎha sǎ cúú-xí-yu cuèndá tnúhu ní xáhaⁿ-ndo-áⁿ, dico núú ñá túú ní càháⁿ vǎha ndíhi ñàhá-yu xii-ndo, te cúñaha-ndo xii-yu sǎ vǎ cúú-xí sǎ vǎha xii-yu tnúhu ní xáhaⁿ-ndo-áⁿ. ¹⁴ Te núú ní sǎá-ndó ìⁿ ñúú àdi ìⁿ vehe, te núú ñá túú ní càháⁿ ndíhi ñaha vǎha-yu xii-ndo te ni ñà túú ní cuímí-yu cundedóho-yu tnúhu càháⁿ-ndó te ndee-ndo ñúú-áⁿ àdi vehe-áⁿ, te naquidi-ndo tìcá chùhmá ñí tñí sáhá-ndó cuèndá ná cùtnuní ìní-yu sǎ ñà túú quide vǎha-yu. ¹⁵ Te na càchí tnúhu ndáá-í xii-ndo sǎ sǎá nduu te ío-gá dandòho ñaha Yá Ndiòxí xii ñáyiú ducaⁿ na càda ñaha xii-ndo-áⁿ dàcúúxí ñáyiú ní xíndecu ñúú Sòdomá ndíhi ñúú Gòmorrá.

Ndoho tnahá-ó cùndecu-o ichi Xítóhó Jesucristú

¹⁶ Te cada ìní-ndó sǎ cúú-ndó dàtná cue mbéé cue quítì cuáháⁿ núú ío yíhí. Te ducaⁿ sǎtnahá-xi cùu-ndo chi yúhú tendaha ñaha-í xii-ndo quíhíⁿ-ndó núú xíndecu cue ñáyiú cuihna ìní-xi, te ío vǎha

cuáha-ndo cuèndá nàcuáa cada-ndo dàtná quidé cõó, dico cunduu váha iní-ndó ñá túú nã cada-ndo dàtná quidé lõmá. ¹⁷ Te quihí iní-ndó chi cue ñáyiu na cùu úhú iní ñáhá xii-ndo, te cuáha cuèndá ñáhã-yu xii-ndo nõú cuè téé cùchiuⁿ, te caniha-güedë xii-ndo xití veñúhu-güedë. ¹⁸ Te dava tucu ñáyiu cuu úhú iní ñáhá xii-ndo candeca ñáhã-yu xii-ndo quihíⁿ núú cuè téé cùnuu yindaha naciõⁿ, àdi núú dàva-gá cue téé cùnuu sá cuèndá-í. Te nchòhó níhí-ndó nàcuáa cada-ndo cáháⁿ váha-ndo cuèndá-í núú-güedë ndihí núú cuè ñáyiu ñá túú cùu ñáyiu isràél. ¹⁹⁻²⁰ Dico òré cuáha cuèndá ñáhã-yu xii-ndo nõú nchàa cue téé-áⁿ, te vá cání iní-ndó nõú nãsa cunduu tnúhu cáháⁿ-ndó nõú-güedë, chi òré-nã te níhí-ndó tnúhu cáháⁿ-ndó. Te ñá díú mèe-ndo cahu iní-ndó tnúhu cáháⁿ-ndó, chi mee Espiritú Yá Ndiõxí Yáa cúú Tãtã-ndó dàcahú iní ñáhã-xí xii-ndo nacuáa cunduu tnúhu cáháⁿ-ndó.

²¹ Te dava cue téé cuáha cuèndá-güedë ñaní-güedë núú cuè téé cùchiuⁿ cuèndá cahni ñaha-güedë, te dava cue téé cùu tátá ñu-ni ducaⁿ càda-güedë déhe-güedë, te ñu-ni ducaⁿ càda ñaha dava cue ñáyiu cùu déhe xii tátã-yu ndihí nãñã-yu, chi cuáha cuèndá ñáhã-yu núú cuè téé cùchiuⁿ cuèndá cahni ñaha-güedë xii-yu. ²² Te nchòhó chi nchaa ñáyiu ngüita-yu cuu úhú iní ñáhã-yu xii-ndo sã

cuèndá-í. Te nõú na càda ndee-ni iní-ndó cànchicúⁿ nihnu-ni-ndo ichi-í cuèi nãndi sá ná càda ñáhã-yu xii-ndo ndèè ná sàá nduu vã cùndecu-gá-ndó ñùyú-a ña, te nduu táhú-ndó cùndecu-ndo ni caa ni quihíⁿ ndihí Yá Ndiõxí. ²³ Te nõú ñuú cuèni-güedë tñi ñaha-güedë xii-ndo càda úhú ñáhã-güedë sá cuèndá-í, te cunu-ndo nõú-güedë quihíⁿ-ndó ñngá ñuú. Te na càchí tnúhu ndáá-í xii-ndo sã cùmání-gã quihíⁿ-ndó nchàa dava-gá ñuú núú xñdecu ñáyiu isràél cáháⁿ-ndó tnúhu-í, te sa quixi tucu yúhú, Téé cùu ñaní tnáhã-ndó nchàa-ndo ñùyú-a.

²⁴⁻²⁵ Te nchòhó xini-ndó sã ni ñuú téé dàcuaha ñá túú cùnuu-dé dàcúxí mèstrú-dé, te nõú mèstrú téé-áⁿ nãndi yãha-dé ndécú-dë te tàú-dé nduu vétú iní-dé te nõú tnáhã-dé yãha-dé dàtná yãha mèstrú-dé-áⁿ. Te ñu-ni ducaⁿ sãtnahá tucu-xi cùu ñuú téé xinu cuechi, chi ñá túú cùnuu-dé dàcúxí pãtróõⁿ-dë, te nchaa sã yãha pãtróõⁿ-dë-áⁿ te tàú-dé nduu vétú iní-dé te nõú tnáhã-dé yãha-dé dàtná yãha pãtróõⁿ-dë-áⁿ. Te nõú yúhú Yáa táxí tnùní ñáhã xii-ndo cachí-yu sá cùu-í sácuihná, te uuⁿ-gá ducaⁿ cññáhã-yu xii nchòhó cue téé cùndihí-í.

Vá yùhú-ó cuèndá nchaa sã cáda ñaha ñáyiu xii-o

(Lc. 12:2-7)

²⁶ Te nchòhó vá yùhú-ndó nõú ñáyiu. Chi nchaa tnúhu sá cúú yùhu ni cuu vá cúú yùhu-gá, chi nchaa dacuití sã

quéé tũu-xi núú ñáyiu. ²⁷ Te nchaa tnúhu sá cächí tnúhu-í xii-ndo núú méé núú ñá-ó, cùu-xi tnúhu sá ndúú yùhu ni cuu datúu-ndo núú cuè ñáyiu cuèi núú chítú núú tàcá. ²⁸ Te xini ñuñu-xi sá vâ yùhú-ndó cuè ñáyiu cuèi na cahní ñahá-yu xii-ndo, chi ñiu-ni yiqui cùñú-ndó ndacú-yu cahní-yu, dico ñá túú nǎgá ndacú-yu cada ñahá-yu xii-ndo. Te tàú-ndó sá Yá Ndiõxí yùhú-ndó chi Yaá-án ndacu-gá danàa-gá yiqui cùñú-ndó, te ndacu-gá daquihí ñahá-gá xii-ndo núú ùhú núú ndàhú.

²⁹ Te nchòhó xini-ndó sá ndéé úú tnàhá tìlaá cùyáhu-di núú ñá-ní dǐhú, te ni ñá-di ñá túú xihí cùtexínu-di chi ndéé núú mee Yá Ndiõxí Yaá cúú Tàtá-ndó ná cächí-gá te xihí-di. ³⁰ Dico nchòhó chi ío-gá néhé cuendá ñahá Yá Ndiõxí xii-ndo chi ndéé idi díquí-ndó yindehu. ³¹ Núú xián cächí-í sá vâ yùhú-ndó chi cùnuu-gá-ndó dàcúúxí tìlaá cuèi vai vihi-güedi.

Nchaa ñáyiu datúu núú tnàha ñáyiu-xi sá ndécú ndihí-yu Xitohó Jesucristú
(Lc. 12:8-9)

³² Te na cächí tnúhu-í xii-ndo sá ncháá ñáyiu na datúu núú tnàha ñáyiu-xi sá ndécú ndihí ñahá-yu xii-í, te ducaⁿ te tnàhá yùhú datúu-í núú Tàtá-í Dútú Ndiõxí Yaá ndécú àndiu sá ndécú ndihí-í-yu. ³³ Dico nchaa ñáyiu na cùñaha xii tnàha ñáyiu-xi sá ñá túú ndécú ndihí ñahá-yu xii-í, te ñiu-ni ducaⁿ

càda yùhú tucu chi cùñaha-í xii Tàtá-í Dútú Ndiõxí Yaá ndécú àndiu sá ñá túú ndécú ndihí-í-yu.

Ñá túú cùu ñánuu ñáyiu
(Lc. 12:51-53; 14:26-27)

³⁴ Te na cächí tnúhu-í xii-ndo sá vâ cání iní-ndó sá yùhú véxi-í ñuyíú-a te cuu ñánuu-gá ñáyiu cundecú-yu, chi da ngüita-yu vâ cúú ñánuu-gá-yu cundecú-yu, te ducaⁿ chi nchaa ñáyiu vâ quindáá iní ñahá xii-í ñáyiu-án ngóo-yu cuu úhú iní-yu nchaa ñáyiu quindáá iní ñahá xii-í. ³⁵ Te dava cue téé xindecu tãtã-xi te ngóo-güedé cuu úhú iní-güedé tãtã-güedé, te ñiu-ni ducaⁿ càda cue ñáyiu dǐhí xindecu náná-xi, chi ngóo-yu cuu úhú iní-yu náná-yu, te ñiu-ni ducaⁿ càda tucu cue ñáyiu cùu sánu, chi ngóo-yu cuu úhú iní-yu náná yí-yu. ³⁶ Te ndi mee-yu vehé-yu ngóo-yu vâ cúú ñánuu-gá-yu cundecú-yu.

³⁷ Te na cächí tnúhu tucu-í xii-ndo sá ncháá ñáyiu ío-gá ná cùu iní tãtã-xi àdi náná-xi dàcúúxí yùhú, te ñáyiu-án ñá túú tàú-yu cundecu ndihí ñahá-yu xii-í, te nchaa ñáyiu ío-gá ná cùu iní déhe ducuⁿ-xi, àdi déhe yoco-xi dàcúúxí yùhú, te ñiu-ni ducaⁿ ñá túú tàú-yu cundecu ndihí ñahá-yu xii-í. ³⁸ Te nchaa ñáyiu vâ cáncñicúⁿ nihnu ñaha xii-í cuendá sá yùhú-yu ndohó-yu dàtná ndoho-í ñáyiu-án ñá túú tàú-yu cundecu ndihí ñahá-yu xii-í. ³⁹ Te

cue ñáyiú na yùhú cuú sá cuendá-í te ñáyiú-áⁿ cuíta nihnú-yu, dico nchaa ñáyiú vá yùhú cuú sá cuendá-í, te ñáyiú-áⁿ nduu táhũ-yu cundecú-yu ni caa ni quihiⁿ ndihi Yá Ndiõxí.

Cuendá sá ndúú tãhú-ó
(Mr. 9:41)

40ⁿ Te nchaa ñáyiú na quèheⁿ cuendá ñáhá xii-ndo te cada iní-yu sá tnàhá yùhú ní queheⁿ cuendá-yu. Te nchaa ñáyiú na quèheⁿ cuendá ñáhá xii-í, te cada iní-yu sá tnàhá Tãtã-í Dútú Ndiõxí Yáá ní tendaha ñàha xii-í véxi-í ñuyiú-a ní queheⁿ cuendá-yu.

41ⁿ Te nchaa ñáyiú na quèheⁿ cuendá ìⁿ téé càháⁿ tnúhu Yá Ndiõxí cuendá sá quidé-dé chiúⁿ-gá, te dàtná-ni càa táhú cuãñaha-gã nduu táhú tée ducaⁿ càháⁿ tnúhu-gá-áⁿ, diu-ni ducaⁿ cùnduu táhú cuãñaha-gã nduu táhú ñáyiú ducaⁿ na quèheⁿ cuendá ñáhá xii-dé. Te nchaa ñáyiú na quèheⁿ cuendá ìⁿ téé quide váha cuendá sá dúcáⁿ quide váha-dé, te dàtná-ni càa táhú nduu táhú tée-áⁿ diu-ni ducaⁿ cùnduu táhú nduu táhú ñáyiú na quèheⁿ cuendá ñáhá xii-dé.

42ⁿ Te nchaa ñáyiú na cuãñaha ìⁿ yaxiⁿ ndute coho ìⁿ ñáyiú cùu cuendá-í cuendá sá ñi tuha ñàhá-yu xii-í cuéi ñá túú cùnuu vihi-yu, te ñáyiú ducaⁿ na cuãñaha ndute-áⁿ ñihí-yu sá ndúú tãhũ-yu núú Yá Ndiõxí —càchí Jèsús xãhaⁿ-gã xii-güedé.

11

Jèsús càháⁿ ndihi-gá cue téé

xica cuu ndihi té Juàá
(Lc. 7:18-35)

1ⁿ Te sátá ñi yáha ducaⁿ ní xáhaⁿ Jèsús xii ndi ùxúú cue téé xica cuu ndihi-gá, te ní xica-gá cuáháⁿ-gá nchaa ñuú cáa yàtni xiáⁿ dánèhé-gá ñáyiú tnúhu-gá.

2ⁿ Te té Juàá yihí-dé vecaá te ní níhí-dé tnúhu nchaa nàcuáa quide Xítóhó Jesu-cristú. Te sátá dúcáⁿ te ní tendaha-dé ìⁿ úú cue téé xica cuu ndihi-dé cuáháⁿ-güedé núú ndécú Jèsús. 3ⁿ Te òré ní quexiò-güedé núú ndécú-gã, te xicáⁿ tnúhú-güedé núú-gã nàcuáa ní xáhaⁿ tẽ Juàá xii-güedé, te xãhaⁿ-güedé xii-gá:

—Véxi-ndí xicáⁿ tnúhú-ndí núú-n ñuú sá díú-n cùu-n Cristú Yáá ní tendaha Yá Ndiõxí véxi ñuyiú-a, àdi sá cùndetu nahi-ni-ndí mei Yáá-áⁿ —càchí-güedé xãhaⁿ-güedé xii-gá.

4ⁿ Te Jèsús ní xáhaⁿ-gã xii-güedé:

—Chí cuánùhú te cani-ndo cuendú núú tẽ Juàá nchaa sá ñi xini-ndó quide-í, ndihi nchaa nàcuáa nduu tnúhu ní càháⁿ-í ní xíndedóho-ndo. 5ⁿ Te cùñaha-ndo xii-dé sá quidé tãtna-í núú cuè ñáyiú cuáá, te quide tãtna-í cue ñáyiú yacua, ndihi cue ñáyiú tnàhá cuéhé sã dátèhyú nihnu-xi yiqui cùñu-yu, ndihi cue ñáyiú doho, nchaa ñáyiú-áⁿ quidé tãtna-í, te ndũha-yu, te ndéé tnàhá cue ñáyiú sa ní xihí dándòto-í cùñaha-ndo. Te cùñaha tùcu-ndo xii-dé sá ndècuu-í dánèhé-í nchaa ñáyiú ndàhú, tnúhu sá sánú

ìchi ñaha xii-yu nàcuáa naníhí tãhú-yu. ⁶ Te cúñaha tùcu-ndo xii-dé sá ïo váha tãhú nchaa ñáyiu ñá túú quide sáa iní-xi nchaa tnúhu càháⁿ-í, duha cúñaha-ndo xii-dé —càchí-gá xãhaⁿ-gã xii-güedé.

⁷ Te sátá ñí yãha-güedé cuánuhú-güedé te ní ngüita Jësús ní cáháⁿ-gá núú ñáyiu cuendá té Juáa, te xãhaⁿ-gã xii-yu:

—Nchòhó ní sãháⁿ ndéhé-ndó ìⁿ tée ndècu xití yucu, te tée-áⁿ ñã túú sãni ìⁿ sani úú iní-dé, chi ñá túú quide-dé dàtná quidé nchaa ité náhnú cuãháⁿ-xi duha cuãháⁿ-xi dàcãⁿ òré quéné tãchí. ⁸ Te ni ñã

túú ní sãháⁿ ndéhé-ndó ìⁿ tée nihnu dóó vãha dóó vii càa. Te nchòhó xini-ndó sã ncháa ñáyiu nihnu dóó vãha dóó vii càa xindecú-yu vehe cue tée cùnuu yindaha ñáyiu. ⁹ Dico nchòhó chi ní sãndéhé-ndó ìⁿ tée càháⁿ tnúhu Yá Ndiõxí, te ndáa sá díú ìⁿ tée càháⁿ tnúhu-gá cúú-dé, te cùnuu-gá-dé dàcúúxí dãva-gá cue tée càháⁿ tnúhu-gá. ¹⁰ Te ñiu cuendá té Juáa-áⁿ càháⁿ-xi núú tütú Yã Ndiõxí nàcuáa ní xãhaⁿ-gã xii Crìstú, te duha ní xãhaⁿ-gã:

Tendaha-ï ìⁿ tée cáháⁿ-dé tnúhu-í codonuu-dé núú-n,

cuendá dàtúha-dé ñáyiu cuendá quíndáa iní-yu tnúhu-n.

Duha ní xãhaⁿ-gã, te ducaⁿ ñí ngódó tnùní núú tütú-gá. ¹¹ Te na càchí tnúhu ndáa-í xii-ndo sã ñí ìⁿ cue tée ñuyíú-a ñá túú cùnuu-güedé dàtná cùnùu té

Juáa tée dàcuandute ñaha xii ñáyiu. Te nchaa ñáyiu sa ta ndíhu ndaha ñaha Yá Ndiõxí vitna cuãháⁿ cùnùu-gá-ni tucú-yu dàcúúxí tẽ Juáa cuẽi cùú-yu ñáyiu ñá túú cùnuu dacúúxí dãva-gá ñáyiu yindaha-gá.

¹² Te ndéé cútnãhá ní ngüita té Juáa tée dàcuandute ñaha xii ñáyiu càháⁿ-dé tnúhu Yá Ndiõxí ñuyíú-a, ndéé dàvá-áⁿ ñí ngüita ñáyiu cuiní-yu sá ndíhu ndaha ñaha Yá Ndiõxí xii-yu te nducu ndeé-yu quidé-yu nàcuáa ndíhu ndaha ñaha-gá xii-yu.

¹³ Te nchaa cue tée ní xóo cáháⁿ tnúhu Yá Ndiõxí ndéé sanaha ñí cáháⁿ-güedé sá díú-gã ndíhu ndaha-gã cue ñáyiu, te ñiu-ni ducaⁿ ñí cáháⁿ tucu ndíi Moisés ní ngódó tnùní núú tütú ndíi. Te ñiu-ni ducaⁿ cùnuu nchaa tnúhu-áⁿ càháⁿ-xi nàcuáa ndíhu ndaha Yá Ndiõxí ñáyiu ndéé ní sáa nduu ñí ngüita té Juáa càháⁿ-dé tnúhu-gá ñuyíú-a.

¹⁴ Te na càchí tnúhu-í xii-ndo sã cáda cuendá-ndó, chi núú tütú Yá Ndiõxí càchí-xi sá ndíxí tẽ Èliás, te ñiu núú tẽ Èliás-áⁿ ñí quide té Juáa. ¹⁵ Te nchaa nchòhó ñáyiu ndédóho nchaa tnúhu càháⁿ-í-a te ío váha chí cuãha cuendá.

¹⁶ Te na càchí tnúhu tucu-í xii-ndo nàcuáa sãtnãhá-xi cùu ñáyiu ndècu vitna. Chi ñáyiu-áⁿ cúú-yu dàtná cue landú sãcõo núú yãhu dàdiqui-güexi te níhi càháⁿ-güexi, te xitnãha-güexi ndi mee landú-güexi: ¹⁷ “Ní tiú-ndí yaá ndíhi vïlu te ñá túú ní cuiní-ndó càta-ndo. Te

ío yica iní ní xita yuhu-ndí te ñá túú ní ndǎhyú-ndó”, cǎchí-güexi xǐtnàha-güexi. Te ducaⁿ sǎtnahá-xi cùu ñáyiu ndècu vitna, ¹⁸ chi té Juàá ío ndàhú ní xóo caxi-dé, te ni ñà túú ní xǎo coho-dé ndudí ndéhé yoho yàha stilé sá sà ní nduu-xi ndidí, te sá dúcáⁿ ñí xóo cada-dé te ní cachí-yu sá ñí xíndecu ndihí-dé espíritú cúndihí yucu ñávǎha. ¹⁹ Te sátá ñí quexío yúhú Tée cùu ñaní tnáhá-ndó nchàa-ndo, te xèxi-í xihí-í quidè-í, te cǎchí-yu sá yúhú cùú-í ñⁿ tée xèxi vihi te xihí vihi, te cǎchí tucú-yu sá cùú-í tée xǐca cuu ndihí cue tée cuihna iní-xi quide cobrá ñáhá xí-yu cuendá impuèstú ndihí nchaa dava-gá cue tée ndècu ichi cuehé ichi duha, duha cǎchí-yu. Te ñáyiu ní tnahá tnúhu ndihí Yá Ndiöxí, ñáyiu-áⁿ quidè-yu sá vǎha nàcuáa cutnùní sá méé-gǎ ío ndècu ndihí-gá sá xíní tnùní-gá —cǎchí-gá xǎhaⁿ-gǎ xii-yu.

Cuendá ñáyiu dava ñuu ñá túú sàndáá iní tnúhu Xítohó Jesucristú

(Lc. 10:13-15)

²⁰ Te Jèsús ní ngüíta-gá cǎháⁿ-gá dóho nchaa ñáyiu ñuu núú ío-gá vai núú sǎ vǎ yǎo tnàhí ndàcu cada ní quide-gá, chi nchaa ñáyiu ñuu-áⁿ ñà túú cuiní-yu ndixi túu iní-yu sá ñà túú quide váha-yu ndècú-yu, te xǎhaⁿ-gǎ xii-yu:

²¹ —;Ndàhú nchòhó cue ñáyiu ñuu Corázín! ;Te ndàhú nchòhó cue ñáyiu

ñuu Bètsaidá! Chi núu dicó ñuu Tírú ndihí ñuu Sídón ní quide-í nchaa sǎ vǎ yǎo tnàhí ndàcu cada datná ní quide-í ñuu-ndó-á ñí xíní-ndó ñá, te sá ndéé ama-gá cuihnú-yu dóo ndàhú te cunu cóo-yu núu yáa cuendá sá ndíxí cuèchi iní-yu sá ñà túú quide váha-yu ni cùu. ²² Dico sáa nduu te ío-gá dandòho ñaha Yá Ndiöxí xii-ndo dàcúúxí ñáyiu ñuu Tírú ndihí ñáyiu ñuu Sídón. ²³ Te nchòhó cue ñáyiu ñuu Capèrnaúm ío quide cahnu-ndo mee-ndo, te quide iní-ndó sǎ sá cuándaa-ná-ndó àndiu, dico ñáhá chi núu úhú núu ndàhú nduu táhú-ndó cùndecu-ndo. Te núu dicó ñuu Sòdomá ní quide-í nchaa sǎ vǎ yǎo tnàhí ndàcu cada datná ní quide-í ñuu-ndó ñí xíní-ndó ñá, te ñáyiu-áⁿ vǎ nǎá-yu chi cundecu-ní-yu ndéé vitna ni cùu. ²⁴ Te na cǎchí tnúhu-í xii-ndo sǎ sáa nduu te ío-gá dandòho ñaha Yá Ndiöxí xii-ndo dàcúúxí ñáyiu ñuu Sòdomá —cǎchí-gá xǎhaⁿ-gǎ xii nchaa ñáyiu ñuu-áⁿ.

Jèsús cuiní-gá sá túhá ñaha ñáyiu xii-gá

(Lc. 10:21-22)

²⁵ Te sátá xǎaⁿ te Jèsús ní ngüíta-gá cǎháⁿ ndihí-gá Tǎtá-gǎ Dútú Ndiöxí, te xǎhaⁿ-gǎ:

—Yòhó Tǎtá-í Dútú Ndiöxí, ío chĩñuhu ñaha-í xii-n chi ñiu-ñ tǎxi tnuní-ñ àndiu ndihí ñuyíú-a, te dànehé-n cue ñáyiu nchaa tnúhu váha, te ñiu-ni ñáyiu-áⁿ cùú-yu ñáyiu ñá túú cùtnuní iní-xi nchaa tnúhu cǎháⁿ cue tée cǎchí sǎ ío túhá, te nchaa tnúhu váha-áⁿ

ñà túú dàtúu-n nùú ñáyiú cächí sá ïo túha te ío váha sàà díquí-xi. ²⁶ Chi ducaⁿ cuení-n cùnduu—cachí-gá xáhaⁿ-gá xii Tàtá-gá.

²⁷ Te xáhaⁿ-gá xii nchaa ñáyiú xíndecu-áⁿ:

—Mee Tàtá-í Dútú Ndiöxí ní cachí-gá sá cùnùu-í nùú nchàandi túhú sá ïó. Te vá yóo ìⁿ-gá xíní nàcuáa sàni iní yúhú Déhe Dútú Ndiöxí, chí ìⁿdii díí-ni mee-gá xíní-gá nàcuáa sàni iní-í, te mee-í xíní-í nàcuáa sàni iní mée-gá. Te nchaa ñáyiú cächí iní-í sá quíní-yu nàcuáa sàni iní Tàtá-í Dútú Ndiöxí te xitnùhu-í-yu, te vá yóo ìⁿ-gá xíní chí diu-ni ñáyiú ducaⁿ xitnùhu-í-áⁿ xíní-yu. ²⁸ Te nchaa nchòhó ñáyiú ñá túú ndècu váha, ñáyiú ñá túú nihí nàcuáa cada cundecu váha iní-xi quixi-ndo túha ñaha-ndo xii-í nàcuáa ducaⁿ cùndecu váha iní-ndó. ²⁹ Te cuu vii cuu váha iní-ndó tñi-ndo nchaa tnúhu càháⁿ-í, te ío dacuàha-ndo, te ducaⁿ càda-ndo chí yúhú ío càhnu iní-í, te ío ndàhú iní-í. Te núu ducaⁿ na càda-ndo te ío váha cuu iní-ndó cùndecu-ndo. ³⁰ Te tñi-ndo nchaa tnúhu càháⁿ-í chí ñá túú cùu-xi ìⁿ sá vèe, chí cada iní-ndó sá cúú-xí dàtná ìⁿ chùuⁿ ñamá—cächí-gá xáhaⁿ-gá xii-yu.

12

Cue téé xica cuu ndihi Jesús sàhnú-güedé yoco triú nduu ndetátú ñáyiú

(Mr. 2:23-28; Lc. 6:1-5)

¹ Te ìⁿ nduu cùu-xi nduu ndetátú ñáyiú ñùhu Jesús ichi ndihi cue téé xica

cuu ndihi-gá, te ta yáha-gá ndihi-güedé ìⁿ xichi núú cáá triú te xixíhí-güedé docó núú xíáⁿ ní ngúita-güedé sàhnú-güedé yoco triú-áⁿ, te ndihi ndaha-güedé quíⁿ-güedé quéé triú-áⁿ tá xèxi-güedé cuáháⁿ. ² Te cue téé cùu fariséú ní xíní-güedé nàcuáa quide cue téé xica cuu ndihi Jesús, núu ní xáhaⁿ-güedé xii-gá:

—¿Ná cuendá ducaⁿ quide cue téé xica cuu ndihi-n sàhnú-güedé yoco triú, te vitna cùu-xi nduu ndetátú-i? Te ñá túú tau-güedé ducaⁿ càda-güedé —cächí-güedé xáhaⁿ-güedé xii-gá.

³ Te Jesús ní xáhaⁿ-gá xii-güedé:

—¿Náa ñá túú dàcuaha-ndo núú tütú Yá Ndiöxí núú càháⁿ-xi nàcuáa ní quide ndí Dàvíí cùtnàhá ní xíhí ndí docó ndihi cue téé ní xica cuu ndihi ndí-áⁿ? ⁴ Chí ndí-áⁿ ní quíhu ndí vehe Yá Ndiöxí ní queheⁿ ndí pàá ní cuu íí ndécú-áⁿ ní xexi ndí ndihi cue téé ní xica cuu ndihi ndí, te ñá túú tau ndí sá dúcáⁿ càda ndí ndihi cue téé-áⁿ ní cùu, chí mee-ni cuè dútú tau-güedé caxi-güedé pàá-áⁿ ní cùu. ⁵ ¿Te náa ñá túú xíní-ndó nàcuáa càháⁿ-xi núú tütú ndí Moisés sá ncháá cuè dútú vā ndetátú-güedé nduu cùu-xi nduu ndetátú-áⁿ? Te ñá díú ìⁿ cuéchi cùu-xi sá dúcáⁿ ñá túú ndetátú-güedé nduu cùu-xi nduu ndetátú. ⁶ Te na cächí tnúhu-í xii-ndo sá yúhú cùu-í téé ío-gá cùnùu ndecu ndihi-ndo dacúúxí veñúhu sá ïo cùnùu. ⁷ Dico nchòhó chí ñá təcú tnúní-ndó

nàcuáa càháⁿ Yă Ndiõxí núú tütú-gá núú cächí-xi: “Yúhú cuíní-í sá cündáhú iní-ndó cuè tnahá ñáyiú-ndo te ñá díú mèe-ni sá cáhni-ndó quiti nduu táhù-í”, duha cächí-gá núú tütú-gá. Te núú òcò nchòhó tècú tnùn-ndó ñá, te vá càháⁿ cuèhé-ndó cuendá nchaa ñáyiú ñá túú ndècu cuèchi-xi. ⁸ Te yúhú Tée cùu ñaní tnáhá-ndó nchaa-ndo, tnáhá-í ndécú ndíhi-í tnúhu ndee ìní sá cùu-í nchaa ñáyiú nàcuáa cada-yu nduu ndetátú-ó-á —cächí-gá xáhaⁿ-gã xii-güedé.

Ïⁿ tée ní yíhí ïⁿ xio ndaha-xi
(Mr. 3:1-6; Lc. 6:6-11)

⁹ Te Jèsús ní xica-gá cuáháⁿ-gá, te cuánguihu-gá xití ïⁿ veñúhu. ¹⁰ Te xiáⁿ ndécú ïⁿ tée ní yíhí ïⁿ xio ndaha-dé. Te dava cue tée xindecu-áⁿ ndúcú-güedé nàcuáa cada-güedé cacáⁿ cuèchi-güedé cuendá-gá núú cuè tée cùnuu, te ní xicáⁿ tnúhú-güedé núú-gã, te xáhaⁿ-güedé:

—Cachí tnúhu xii-ndí nùu cuu cada tátna-o ïⁿ tée cùhú nduu cùu-xi nduu ndetátú-ó ãⁿ ñháá —cächí-güedé xáhaⁿ-güedé xii-gá.

¹¹ Te Jèsús ní xáhaⁿ-gã xii-güedé:

—Te nchòhó òré ná ngàunihnu ïⁿ mbéé-ndó ïⁿ déhvá cùnú te nàtava-ndo-di cuéi cùu-xi nduu ndetátú-ó. ¹² Te ïⁿ ñáyiú ío-gá cùnúu-yu dàcúxí ïⁿ mbéé, núu xiáⁿ tàú-ó sã cadá-ó sã vãha sá cúu-xi-yu cuéi cùu-xi nduu

ndetátú-ó —cächí-gá xáhaⁿ-gã xii-güedé.

¹³ Te dàtnùn-í ní xáhaⁿ-gã xii tée cùhú ndaha-xi-áⁿ:

—Ndacani ndaha-n —cächí-gá xáhaⁿ-gã xii-dé.

Te tée-áⁿ ñi ndacani-dé ndaha-dé, te òré-ni ní ndúha ní nduu-xi dàtná cáá ìngá xio ndaha-dé. ¹⁴ Te cue tée cùu fariséú ní ndee-güedé xití veñúhu, te ní ngúita-güedé ndátnúhu-güedé nùu nása cada-güedé cahni-güedé Jèsús.

Nàcuáa sa ndèé tnuní cuendá Jèsús

¹⁵ Te sátá ñi cutnùn-í iní Jèsús nàcuáa cuíní-güedé cada ñaha-güedé xii-gá te ní xica-gá cuáháⁿ-gá, te ío vãi ñáyiú nchícúⁿ ñáhá xii-gá cuáháⁿ, te tnáhá cue ñáyiú cùhú nchícúⁿ ñáhá xii-gá cuáháⁿ, te ní quide tátna-gá cue ñáyiú-áⁿ. ¹⁶ Te ní xáhaⁿ-gã xií-yu sá vã càháⁿ-yu yoo cùu-gá. ¹⁷ Te ducaⁿ ñi cuu chi ní quee ndáá-xi nàcuáa ní xáhaⁿ Yă Ndiõxí xii ndíi Chaiá tée ní xóo cáháⁿ tnúhu-gá ndéé sanaha ñi chídó tnùn-í ndíi núú tütú-gá, te duha ndùu tnúhu ní xáhaⁿ-gã:

¹⁸ Tée-a cùu-dé tée ní sani iní-í sá cùnú cuèchi-dé nùú-í,

te ío cùu iní-í-dé, te cùdíi iní-í-dé.

Te yúhú cuñaha-í Espiritú-í cundecu ndíhi-dé,

te díu-dé cùñaha-dé xii nchaa ñáyiú ñuyíú sá yúhú ío ndáá quidé-í.

¹⁹ Te vá dácáá-dé tnúhu cáháⁿ-dé ndíhi ñáyiú, te

ni vǎ cána sàa-dé òré
cáháⁿ-dé,

te ni vǎ yǒo níhí tnǔhu nása
cáháⁿ-dé cuhuⁿ-dé ichi.

20 Te ni ñà túú nǎ cada-dé
cue ñáyiú cùu datná ìⁿ
tnu ndóó sá cuìní-xi
tnáhnú, te ñiú-ni
ñáyiú-áⁿ cúú tǔcú-yu
datná ìⁿ mèchá càndíl
sǎ ìo quène ñǔhmá te
cuìní-xi ndahvá.

Te ducaⁿ sǎtnahá-xi cùu
ñáyiú-áⁿ chi ñá túú ñihí
ndéě-yu cundecú-yu
sá cúú-xì-í, te mee-ni
sǎ vǎha cada ñaha-dě
xii-yu,

te ñiú-ni ducaⁿ càda-dé ndéé
sǎá nduu cùnùnì iní
nchaa ñáyiú sǎ ìo ndáá
quidé-dě.

21 Te nchaa ñáyiú ñihí ñuyúú
ìo cundee cùu cahnu
iní ñáhǎ-yu xii-dé.

Duha ní xáhaⁿ-gǎ xii ndíi
Chàíá ní chídó tnùnì ndíi núú
tútú-gǎ.

*Càchí-güedé sá ndécú ndìhi
Jesús espíritú cùndìhi yucu
ñávǎha*

(Mr. 3:20-30; Lc. 11:14-23;
12:10)

22 Te ní quexìo ìⁿ úú
cue téé núú ndécú Jèsús, te
ndèca-güedé ìⁿ téé ñihí te
cuàá-dé, te yìhi ñaha espíritú
cùndìhi yucu ñávǎha xii-dé, te
Jèsús ní queñuhu-gǎ espíritú
cùndìhi yucu ñávǎha yìhi ñaha
xii-dé, te òré-ni-áⁿ ñi cuu
ní nacáháⁿ-dé te ní ndúha
núú-dě. 23 Te nchaa ñáyiú
xíndecu-áⁿ ìo ní cuñúhu-yu
sá dúcáⁿ ñi quide-gǎ, te ní
xítnàhá-yu:

—Váa téé-a cùu-dé ñani
tnáhá ndíi Dàvíí téé tendaha
Yá Ndióxi quixi ñuyúú-a —
càchí-yu xítnàhá-yu.

24 Te cue téé cùu fariséú ní
tecú dóho-güedé nàcuáa ndúu
tnúhu xítnàhá-yu, núu xǎⁿ ní
xítnàha-güedé:

—Téé-a ndèñuhu-dé nchaa
espíritú cùndìhi sácúíhná
yìhi ñaha xii ñáyiú, chi
ñiú-ni sácúíhná-áⁿ chíndèe
ñaha-xi xii-dé te ñiú-ni-xi taxi
tnùnì-xi nchaa espíritú-áⁿ —
duha ní xítnàha-güedé.

25 Te Jèsús ní cutnùnì
iní-gǎ nàcuáa ndúu tnúhu
ní xítnàha-güedé, núu ní
xáhaⁿ-gǎ xii-güedé:

—Te nchòhó xìnì-ndó
sǎ ñuu ìⁿ téé yíndaha ìⁿ
nacióⁿ vá cúú ìⁿnuu-dé
ndìhi cue téé cùndìhi-dé, te
vá cùdíi-dé cunuu-dě. Te
ñiú-ni ducaⁿ sǎtnahá tucu-xi
cùu tucu cue téé cùchiúⁿ
ìⁿ ñuu, chi núu vá cúú
ìⁿnuu-güedé cundecu-güedé,
te vá cùdíi-güedé cun-
decu-güedé taxi tnùnì-güedé.
Te ñiú-ni ducaⁿ sǎtnahá
tucu-xi cùu cue ñáyiú xíndecu
ìⁿ-ni vèhe, chi núu vá cúú
ìⁿnuú-yu cundecú-yu te vá
cùdíi-yu cundecu càhnú-yu.

26 Te núu sácúíhná ducaⁿ
quide-xi queñuhu-xi cue
espíritú cùndìhi-xi yìhi ñaha
xii ñáyiú ña, te ñá túú cùu
ìⁿnuu-xi ndecu-xi te núu
ducaⁿ, te vá cùdíi sácúíhná-áⁿ
cundecu-xi taxi tnùnì-xi te
núu ducaⁿ quide-xi. 27 Te

duha càháⁿ-í chi nchòhó
càchí-ndó sǎ chíndèe ñaha
sácúíhná xii-í queñúhu-í
nchaa espíritú cùndìhi-xi
yìhi ñaha xii ñáyiú. Te núu

yúhú quidé cuendá-ndó sã sácuhlñá chindèe ñaha-xi xii-í, te xini ñuhu-xi cada cuendá-ndó yòo chindee ñaha xii cue tée xica cuu ndihi-ndo queñuhu-güedé nchaa espíritú cundìhi yucu ñávãha yihi ñaha xii ñáyiu. Te mee-güedë cächí-güedé sã nchòhó ñá túú cãháⁿ ndáá-ndó sã dúcáⁿ cãháⁿ-ndó. ²⁸ Dico yúhú chi Espíritú Yã Ndiöxí chindèe ñaha-xi xii-í queñuhu-í nchaa espíritú cundìhi sácuhlñá yíhi ñaha xii ñáyiu, te sã dúcáⁿ chindee ñaha Espíritú-gá xii-í, xíãⁿ cútnùní sã sã ní sáá nduu cuini-gá ndíhu ndaha ñaha-gá xii-ndo.

²⁹ Te nchòhó xini-ndó sã cuè ñadúhú chi vá ndácú-güedé cuendá-ni quíhu-güedé duhu-güedé vehe ñⁿ téé ío ndee, chi díhna-gá xini ñuhu-xi tñi-güedé téé-áⁿ dacùtu ñaha-güedé xii-dé dàtnùní ducaⁿ te ndacu-güedé duhu-güedé nchaa sã ndécú ndihi-dé.

³⁰ Te nchaa ñáyiu ñá túú cundìhi ñaha xii-í, te cùu úhú iní ñáhã-yu. Te nchaa ñáyiu ñá túú chindee ñaha xii-í, te dàquee tíhũ-yu chiⁿ quide-í.

³¹ Te na cächí tnúhu-í xii-ndo sã ncháá ñáyiu quide nchaa sã cuèhé sã dúhá cuu cada cãhnu iní ñáhã Yã Ndiöxí xii-yu, te ñiu-ni ducaⁿ cùu cada cãhnu iní-gá nchaa tnúhu cuèhé tnúhu duha cãháⁿ-yu. Dico cue ñáyiu na cãháⁿ úhú cuendá Espíritú-gá, te ñáyiu-áⁿ vã cadá cãhnu iní ñáhã tnàhí-gá xii-yu. ³² Te nchaa ñáyiu na cãháⁿ úhú

cuendá yúhú Téé cùu ñani tnáhã-yu ncháá-yu, te cuu cada cãhnu iní ñáhã Yã Ndiöxí xii-yu. Dico cue ñáyiu na cãháⁿ úhú cuendá Espíritú-gá te vá cadá cãhnu iní ñáhã tnàhí-gá xii-yu cuèi vitna ndècu vívũ-yu, te cuèi na cùu-yu.

Ndi ñⁿ nũú yutnu xini-ó nã yutnu cùu-xi cuendá sã sãvidí-xi
(Lc. 6:43-45)

³³ Te nchòhó xini-ndó sã ndi ñⁿ nũú yutnu xini-ó nã yutnu cùu-xi cuendá sã sãvidí-xi, te xini-ó sã ncháá yutnu váha cùuⁿ mee-ni sãvidí váha, dico nchaa yutnu sã ñà túú váha te cùuⁿ mee-ni sãvidí sã ñà túú váha. Te duha cãháⁿ-í cuendá cada cuendá váha-ndo nãcuáa nduu chiⁿ quide-ndo ñⁿ ñⁿ-ndo cuendá ducaⁿ cùtnuní ná ñáyiu cùu-ndo. ³⁴ Dico nchòhó cúú-ndó dàtná ñⁿ cóó dééⁿ chi ío cuihna iní-ndó, te vá cání iní-ndó sã ndácú-ndó cãháⁿ-ndó ñⁿ tnúhu váha, chi ío cuihna iní-ndó. Te nchòhó xini-ndó sã ncháá ñáyiu cãháⁿ-yu nãni vèxi iní-yu. ³⁵ Te nchaa ñáyiu váha iní-xi cãháⁿ-yu tnúhu váha, chi ñiu-ni tnúhu váha-áⁿ ñúhú iní-yu. Te nchaa ñáyiu cuihna iní-xi cãháⁿ-yu tnúhu cuèhé tnúhu duha, chi ñiu-ni tnúhu cuèhé tnúhu duha-áⁿ ñúhú iní-yu. ³⁶ Te na cächí tnúhu-í xii-ndo sã ná sáá nduu càda ndáá Yã Ndiöxí cuèchi nchaa nchòhó ñáyiu ndècu ñuyúú-a, te nchaa tnúhu cuèhé tnúhu duha cãháⁿ-ndó cãháⁿ-gá sã ñà túú ní quide váha-ndo sã dúcáⁿ ní cãháⁿ-ndó tnúhu-áⁿ.

37 Te nàcuáa ndùu tnúhu ní cáháⁿ-ndó ìⁿ ìⁿ-ndo, te ducaⁿ cáháⁿ Yá Ndiòxí te núu ndècu cuèchi-ndo àdi ñá túú ndècu cuèchi-ndo. Te núu ñá túú cuèchi-ndo te cácu-ndo, dico núu ndècu cuèchi-ndo te vá cácu-ndo —càchí-gá xáhaⁿ-gá xii cue tée cùu fariséú-áⁿ.

Cue tée cuìní sá cádá Jèsús ìⁿ sá vǎ yǎo tnàhí ndàcu cada (Mr. 8:12; Lc. 11:29-32)

38 Te cue tée cùu fariséú, ndìhi cue tée dàcuaha ñaha xii ñáyiu nchaa tnúhu ní chídó tnùní ndíi Moisés xáhaⁿ-güedě xii Jèsús:

—Mèstrú, cuìní-ndí cada-n ìⁿ sá vǎ yǎo tnàhí ndàcu cada cuendá ducaⁿ cùtnuní iní-ndí sá Yá Ndiòxí chindèe ñaha-gá xii-n —càchí-güedě xáhaⁿ-güedě xii-gá.

39 Te Jèsús ní xáhaⁿ-gá xii-güedé:

—Ñáyiu ndècu ichi cuehé ichi duha ñá túú cuìní-yu tníⁿ-yu tnúhu càháⁿ Yá Ndiòxí, te ñáyiu-áⁿ cuìní-yu cada-í ìⁿ sá vǎ yǎo tnàhí ndàcu cada nacuéa cutnùní iní-yu núu ndáá sá Yá Ndiòxí chindèe ñaha-gá xii-í. Dico yúhú chí ñá túú nǎgá cada-í quiní-yu, chí sa ñihí-yu tnúhu nàcuáa ní yáha ndíi Jónás tée ní xóo cáháⁿ tnúhu Yá Ndiòxí ndéé sanaha, te ñiu-ni ducaⁿ yáha yúhú tucu. 40 Chí ndíi Jónás-áⁿ ní xúhuⁿ ndíi úní nduu úní niú xití ìⁿ chácá cáhnú vihi nani ballená. Te ñiu-ni ducaⁿ yáha yúhú Téé cùu ñaní tnáhá-ndó nchàa-ndo, chí úní nduu úní niú cuhuⁿ-í xití ñuhu. 41 Te na sáá nduu càda ndáá Yá Ndiòxí cuèchi

nchaa ñáyiu ndècu ñuyíú-a, te dàvá-áⁿ cachí nchaa ñáyiu ñuu Nínivé sá ñà túú ní quide ndáá nchaa ñáyiu ndècu vitna, te ducaⁿ cáháⁿ-yu chí mèe-yu ní dáñá-yu ichi cuehé ichi duha cùtnáhá ní sáháⁿ ndíi Jónás ñuu-yu ní cáháⁿ ndíi tnúhu Yá Ndiòxí núú-yu. Dico vitna iha ndècu ndìhi ñaha-ndo xii yúhú, te ñiu-í ío-gá cùnùu-í dàcúúxí ndíi Jónás. 42 Te nduu càda ndáá Yá Ndiòxí cuèchi nchaa ñáyiu, te dàvá-áⁿ quiní-ndó ìⁿ ñadihí ñaha ní xíndaⁿ ìⁿ nacióⁿ cáá ndàa xio datni núú quéné nchicanhii, te ñaha-áⁿ ío xica ní xíndecu-aⁿ te ní sáháⁿ-aⁿ ní xíndedóho-aⁿ nchaa tnúhu ní cáháⁿ ndíi Salómón, chí ndíi-áⁿ ío ní sáá sá xíní tnùní ndíi. Te tnáhá ñaha-áⁿ cáháⁿ-aⁿ sá ñà túú ní quide ndáá nchaa ñáyiu ndècu vitna. Dico vitna iha ndècu ndìhi ñaha-ndo xii yúhú, te ñiu-í ío-gá cùnùu-í dàcúúxí ndíi Salómón.

Espíritú cùndìhi yucu ñávǎha sá nánchòcáva xito cùu uú (Lc. 11:24-26)

43 Te òré ná queé ñaha ìⁿ espíritú cùndìhi yucu ñávǎha xii ìⁿ ñáyiu, te cuáháⁿ-xi ndùcu-xi ìⁿ xichi núú cùndècu-xi te ñá ñihí-xi te ní sani iní-xi: 44 “Váha-gá núhú tucu-í núú ní xíndecu-í”, duha ní sani iní-xi. Te cuánuhú-xi, te òré ní nasáá-xi, te ní xiní-xi sá cáá iní ñáyiu-áⁿ dàtná cáá-nǎ ìⁿ vehe ní ñatíhú ní nduu vií-ná te vá yǎo-gá ndécú. 45 Te sáá dúcáⁿ te ní xica-xi cuáháⁿ-xi cuándúcú-xi úsá tnáhá espíritú cùndìhi-xi

13

sá nèhé víhí-gǎ xǐquide. Te òré ní níhí-xi cue espíritú-án te ndèca ñaha-xi cuáhán cuèndá ngúndecu ndihí-xi ñáyiú-án. Te ñáyiú-án uuⁿ-gá nándi yáha-yu dàcúxí ndèé díhna. Te diu-ni ducaⁿ sǎtnhá-xi yáha nchaa ñáyiú cuihna iní-xi ndècu ñuyíú-a vitna — càchí-gá xǎhaⁿ-gǎ xii-güedé.

Cue ñaní Jèsús ndihí nǎná-gǎ

(Mr. 3:31-35; Lc. 8:19-21)

⁴⁶ Te càháⁿ dúcáⁿ-ní Jèsús ní quexìo náná-gǎ ndihí cue ñaní-gá cuíní-yu cáháⁿ ndihí ñàhá-yu xii-gá, te ní ngúnu tñí-yu ndàa quehé vehe núú ndécú-gǎ. ⁴⁷ Te ñí cue ñáyiú xǐndecu-án ñí xáháⁿ-yu xii-gá:

—Ní quexìo náná-n ndihí cue ñaní-n xǐnutñí-yu quehé, te cuíní-yu cáháⁿ ndihí ñàhá-yu xii-n —càchí ñáyiú-án xáháⁿ-yu xii-gá.

⁴⁸ Te ní xáhaⁿ-gǎ xii ñáyiú ducaⁿ xǎhaⁿ xì-gá-án:

—Te cachí tñuhu yóndi-gá ñáyiú cùu datná nǎná-í ndihí datná cue ñaní-í —càchí-gá xǎhaⁿ-gǎ xii ñáyiú-án.

⁴⁹ Te ní dánèhé ñàhá-gǎ nchaa cue téé xica cuu ndihí-gá, te ní xáhaⁿ-gǎ xii ñáyiú-án:

—Cue téé-a cùu-güedé datná nǎná-í, ndihí datná cue ñaní-í.

⁵⁰ Te nchaa ñáyiú na càda nchaa nacúáa càháⁿ Tǎtà-í Dútú Ndióxi Yáá ndécú àndiu, te ñáyiú-án cùú-yu datná nǎná-í, ndihí datná cue ñaní-í, ndihí datná cue cúha-í —càchí-gá xǎhaⁿ-gǎ xii ñáyiú ducaⁿ ní dáyáha tñuhu núú-gǎ-án.

Nàcuáa quide téé cuángacáⁿ triú

(Mr. 4:1-9; Lc. 8:4-8)

¹ Te diu-ni nduu-án ní quee Jèsús vehe núú ndécú-gǎ, te ní xica-gá cuáhán-gá ní ngóo-gá yuhu làgúná. ² Te ío cuéhé ñáyiú ní tacá núú ndécú-gǎ. Te sá dúcáⁿ ío cuéhé ñáyiú núú ní quee-gá xití ñí bàrcú nùtní xití ndute làgúná-án, te núú xǎⁿ ní ngóo-gá, te nchaa ñáyiú-án xǐxúcu-yu yuhu làgúná-án. ³ Te Jèsús ní ngúíta-gá ní caní-gá titní cuèndú núú-yu nàcuáa tecú tñuní-yu nchaa nàcuáa ndùu tñuhu-gá, te xáhaⁿ-gǎ xii-yu:

—Ñí téé cuángacáⁿ-dé triú, ⁴ te òré ní ngúíta-dé dǎngoyo-dé triú-án, te dava ní quene ndava ní ngava ndéé ichi, te ní xíní cue tílaá te ní nadatàcá-güedi. ⁵ Te dava ní ngava ñuhu yadi núú yíhí vǐhi yúú, te ndíhi-ni ní xínu-xi chí ñá túú càvǐhi ñuhu. ⁶ Dico òré ní nayehe te ñá túú ní cùndee iní-xi chí ní yíchí-xi, chí ñá túú ní níhí quǐhíⁿ cùnú yóho-xi. ⁷ Te dava ní ngava núú yúcu ndíquiⁿ tnu ñíu, te ñínuu-ni ní xínu-xi ndíhi tnu ñíu. Te tnu ñíu-án ní sahnu-xi te ní dánáá-xi nchaa triú sá ní xínu-án. ⁸ Dico dava-gá triú ní ngava núú ndécú ñíu cocó te xǎⁿ ío váha ní cuu, chí núú ñí-ní triú-án te dava yoco-xi ní nguíhi ócó úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ñí cièndú triú-xi. ⁹ Te

vitna nchaa nchòhó ñáiyu ní xíndedóho tnúhu ní cáháⁿ-í-a, te ío váha chí cuáha cuendá — cächí-gá xáhaⁿ-gá xií-yu.

Cue tée xica cuu ndihi Jesús ndúcu tnúhu-güedé núú-gã ná cuendá caní-gã cuendú núú ñáiyu

(Mr. 4:10-12; Lc. 8:9-10)

¹⁰ Te cue tée xica cuu ndihi Jesús ní sáháⁿ-güedé ndéé núú-gã, te xáhaⁿ-güedé xii-gá:

—Ndúcu tnúhu-ndí núú-n núu ná cuendá ducaⁿ mée-ni cuendú caní-n núú ñáiyu —cächí-güedé xáhaⁿ-güedé xii-gá.

¹¹ Te ní xáhaⁿ-gã xii-güedé:

—Nchòhó chí sa cächí tnúhu Yá Ndiõxí xii-ndo ñⁿ sá vátá quíní-gá-ndó, chí cächí tnúhu-gá nacuáa quide-gá ndíhu ndaha-gã ñáiyu, dico dava-gã ñáiyu chí ñá túú nã xáhaⁿ-gã xií-yu. ¹² Te nchaa ñáiyu sa təcú tnùní te uuⁿ-gá cuita tecú tnùní-yu quíhíⁿ, te nchaa ñáiyu ñá túú təcú tnùní te uuⁿ-gá vá təcú tnùní-yu. ¹³ Te xíãⁿ núu duha càni-í mee-ni cuendú núú-yu, chí cuéi na quíní-yu nchaa nacuáa cuu dico ní vã cútnùní iní-yu ná cuendá ducaⁿ cùu, te cuéi na cùndedóho-yu dico ní vã təcú tnùní-yu. ¹⁴ Te ñíu cuendá ñáiyu-áⁿ ñí xáhaⁿ Yá Ndiõxí xii ndí Chàíá téé ní xóo cáháⁿ tnúhu-gã ndéé sanaha ñí chídó tnùní ndí núú tütú-gá núú cächí-xi:

Nchaa nchòhó cund-edóho-ndo tnúhu cáháⁿ-í, dico ní vã təcú tnùní-ndó, te cuéi na quíní-ndó nchaa nacuáa cada-xi, dico ní

vã cútnùní iní-ndó nã cuendá ducaⁿ quide-xi.

¹⁵ Te ducaⁿ chí cùu-ndo ñáiyu ío sáá iní-xi,

te cùu-ndo ñáiyu ñá túú təcú tnùní tnúhu cáháⁿ-í,

te cùu tucu-ndo datná cue ñáiyu cuáá chí ñá túú cuíní-ndó cada cuendá-ndó tnúhu-í,

te ní ñá túú cuíní-ndó cùndedóho-ndo,

te ní ñá túú cuíní-ndó təcú tnùní-ndó,

te ní ñá túú cuíní-ndó nàtuha ñaha-ndo xii-í cuendá cada càhu iní-í nchaa yíca cuéchi-ndo nacuáa ío váha cuu iní-ndó cùndecu-ndo.

Duha ní xáhaⁿ Yá Ndiõxí xii ndí Chàíá ní chídó tnùní ndí núú tütú-gá.

¹⁶ 'Dico nchòhó chí ío váha táhú-ndó chí cùtnùní iní-ndó nchaa nacuáa quide-í, te cùtnùní tucu iní-ndó nchaa nacuáa ndúu tnúhu cáháⁿ-í, ¹⁷ Te na cächí tnúhu ndáá-í xii-ndo sã ío vãi cue téé ní xóo cáháⁿ tnúhu Yá Ndiõxí ndéé sanaha ndíhi nchaa dava-gã ñáiyu váha iní-xi ní cuíní-yu cundehé-yu nchaa sá ndéhé-ndó vitna quide-í dico ñá túú ní xini-yu, te ní cuíní tucú-yu cundedóho-yu nchaa tnúhu ndédóho-ndo vitna cáháⁿ-í te ñá túú ní xíndedóho-yu.

Jesús cáháⁿ-gã nacuáa quèe-xi cuendá téé cuángacáⁿ triú

(Mr. 4:13-20; Lc. 8:11-15)

¹⁸ Te vitna cundedóho váha-ndo na cächí tnúhu-í xii-ndo nacuáa quèe-xi cuendú téé cuángacáⁿ triú ní caní-í núú-ndó. ¹⁹ Te triú sá ñí quene ndava ní

ngava ndéé ichi, xiǎⁿ cúu-xí dàtná ñáiyu ní xíndedóho tnúhu sá càháⁿ nàcuáa ndihu ndaha ñàha Yá Ndiǒxí xii-yu, dico ñá túú ní cuení-yu tnií-yu, chi sácuihná cuǎháⁿ-xi nàdatuhú-xi iní-yu cuendá sá vǎ cǎnchicúⁿ nihnú-yu nàcuáa càháⁿ tnúhu-áⁿ. ²⁰ Te triú sá ní ngava ñuhu yadi núú yíhí vǐhi yúú-ǎⁿ, xiǎⁿ cúu-xí dàtná ñáiyu ní xíndedóho tnúhu Yá Ndiǒxí te díí iní ní tnií-yu tnúhu-gá, ²¹ dico òré ná ngúíta ñáiyu cúcuèhè ñáhǎ-yu xii-yu àdi nándi-gá sá yǎha-yu sá cuendá tnúhu-gá, te ñá cúndèe iní-yu chi dàñá-yu tnúhu-gá cuendá sá ñà túú nihí ndéé-yu. ²² Te triú sá ní ngava núú yúcu ndíquín tnu iñu-áⁿ, xiǎⁿ cúu-xí dàtná ñáiyu ní tecú dóho-xi tnúhu Yá Ndiǒxí dico cuèé cuèé ní nacuanaá-yu tnúhu-gá, chi cuendá mee-ni sǎ ió ñuyúú-a ñuhu iní-yu, ndihí cuendá sá ió sàni iní-yu cuu cuicá-yu, te mee-ni nchàa xiǎⁿ ñúhú iní-yu te ñá túú ñuhu iní-yu tnúhu sá ní xíndedóho-yu-áⁿ nàcuáa cada váha-yu cundecú-yu. ²³ Dico triú sá ní ngava núú ndécú ñuhu cocoⁿ-áⁿ, xiǎⁿ cúu-xí dàtná ñáiyu ní xíndedóho tnúhu Yá Ndiǒxí te quidé-yu nàcuáa càháⁿ tnúhu-gá. Te cada iní-ndó sǎ ñáiyu-áⁿ cúu-yu dàtná triú sá ní nguíhi yoco-xi ócú úxí triú-xi, ndihí triú sá ní nguíhi yoco-xi únídico triú-xi, ndihí triú sá ní nguíhi yoco-xi ìⁿ ciéndú triú-xi. Ducaⁿ sǎtnahá-xi cúu-yu chi ió váha

quidé-yu —càchí-gá xǎhaⁿ-gǎ xii-güedé.

Cuendá nchaa cùhú sǎ ñà túú vǎha xǐnu xití triú

²⁴ Te Jèsús ní cani-gá ìⁿ cuéndú núú ñáiyu nàcuáa tecú tnùnì-yu tnúhu-gá, te xǎhaⁿ-gǎ xii-yu:

—Te vitna na cànì-í ìⁿ cuéndú núú-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndiǒxí xii ñáiyu. ìⁿ tée ió váha triú ní sacáⁿ-dé núú ñúhú-dé.

²⁵ Dico xití niú ní sáháⁿ ìⁿ tée cùu úhú iní ñáhá xii-dé, te ní dǎngoyo-dé ndíquín yúcu sǎ ñà túú vǎha núú ní sacáⁿ-dé triú-áⁿ. ²⁶ Te òré vitna váha váha ní ngúíta-xi quène yoco nchaa triú-áⁿ, te ní xínu coyo nchaa yúcu sǎ ñà túú vǎha-áⁿ.

²⁷ Te cue tée xǐnu cuechi núú tée ní sacáⁿ triú-áⁿ ní xitnúhu ñaha-güedé xii-dé sá dúcáⁿ ní xínu cùhú sǎ ñà túú vǎha-áⁿ núú triú-dé, te xǎhaⁿ-güedé: “Pàtróon, ¿nása ní cuu núu ní xínu cùhú sǎ ñà túú vǎha núú triú-n, te ió váha càa triú ní sacáⁿ-n ní cùu?”, cachí-güedé xǎhaⁿ-güedé. ²⁸ Te tée cùu patróon-güedé-áⁿ ní xáháⁿ-dè xii-güedé:

“Èⁿ tée cùu úhú iní ñáhá nàhi xii-í ducaⁿ ní quide-dé ní sáháⁿ-dé ní dǎngoyo-dé ndíquín cùhú sǎ ñà túú vǎha-áⁿ núú triú-í núu ducaⁿ ní xínu coyo-xi”, càchí-dé xǎhaⁿ-dè xii-güedé. Te cue tée xǐnu cuechi núú-dé ní xáháⁿ-güedé xii-dé: “Te núu cuení-n te quíhíⁿ-ndí tnuhu-ndí nchaa cùhú sǎ ñà túú vǎha ní xínu núú triú-n”, càchí-güedé xǎhaⁿ-güedé xii-dé. ²⁹ Te tée cùu xitohó triú-áⁿ ní

xáhaⁿ-dě xii cue téé xínu cuechi núú-dě-áⁿ: “Ñáhá, vá quíhíⁿ-ndó tnúhu-ndo, chi òré tnúhu-ndo te tnàhá-ni triú quene chi càa vihi cùhú-áⁿ.³⁰ Váha-gá chí dáñá ná cuìhnu nahì ndéé ná cùu triú, te dātnùnì nducú-ĩ cue téé quíhíⁿ-güedé tnúhu-güedé nchaa cùhú sã ñà túú vãha-áⁿ, te dacùtu nuhní-güedé te cahmi-güedé, te dātnùnì nàquehndé-güedé triú nacani-güedé te nataxúha-güedé xití yacá-í”, càchí-dé xãhaⁿ-dě xii-güedé —duha ní cani Jèsús cuèndú núú-yu.

Cuèndá ndíquíⁿ yutnu nàni mostázá

(Mr. 4:30-32; Lc. 13:18-19)

³¹ Te Jèsús ní cani tucu-gá ingá cuèndú núú ñãyiú nàcuáa tecú tnùnì-yu tnúhu-gá, te xãhaⁿ-gã xii-yu:

—Na càni-í ìⁿ cuèndú núú-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndiõxí xii ñãyiú. Ìⁿ téé ní queheⁿ-dé ndíquíⁿ yutnu nàni mostázá te nèhe-dé cuáháⁿ ní sacáⁿ-dé núú ñúhú-dě.³² Te ndíquíⁿ yutnu-áⁿ ìo chàhu, dico òré ná xínu-xi te sãhnu-gá-xi dàcúúxí nchàa cùhú, te cue quitì ndàva núú tàchí cádũha-güedi tacá-güedi núú dité-xi —càchí-gá xãhaⁿ-gã xii-yu.

Nàcuáa quide levadurá

(Lc. 13:20-21)

³³ Te Jèsús ní xáhaⁿ tùcu-gá xii ñãyiú:

—Te na càchí tnúhu tucu-í xii-ndo nàcuáa cada-xi òré ndíhu ndaha ñàha Yá Ndiõxí

xii ñãyiú. Ìⁿ ñadìhí ní chihi-aⁿ levadurá únì arròbá yuchi triú, te levadurá-áⁿ nĩ quide-xi ní ndaa nìhí yusaⁿ-áⁿ —càchí-gá xãhaⁿ-gã xii-yu.

Mee-ni cuèndú ní cani Jèsús núú ñãyiú

(Mr. 4:33-34)

³⁴ Te mee-ni cuèndú ní cani Jèsús núú ñãyiú ndi tnahá òré ní dánèhé ñáhá-gã xii-yu tnúhu-gá.³⁵ Te ducaⁿ nĩ quide-gá chi ní quee ndáa-xi nàcuáa ní chídó tnùnì ìⁿ téé ní xóo cáháⁿ tnúhu Yá Ndiõxí ndéé sanaha núú tütú-gá núú càchí-xi:

Mee-ni cuèndú cani-í núú ñãyiú òré danèhé-í-yu tnúhu-í cuèndá tecú tnùnì-yu,

te nchaa tnúhu sá vãtá yóo-gá cundedóho danèhé-í-yu, te nchaa tnúhu-áⁿ ndúú yùhu-xi ndéé cùtnàhá ní ngáva ñuyiú.

Duha ní chídó tnùnì téé-áⁿ núú tütú-gá.

Jèsús càháⁿ-gá nàcuáa quèe-xi cuendá cùhú sã ñà túú vãha càa xití triú

³⁶ Te Jèsús ní dándácá-gã ñãyiú te cuánuhú-gá vehe, te cue téé xica cuu ndìhi-gá ní xáhaⁿ-güedé xii-gá:

—Cachí tnúhu xii-ndí nása quèe-xi cuendá cùhú sã ñà túú vãha càa xití triú —càchí-güedé xãhaⁿ-güedé xii-gá.

³⁷ Te Jèsús ní xáhaⁿ-gã xii-güedé:

—Téé càchí-í ní sacáⁿ triú cávãha-áⁿ cúú yùhú Téé cùu

ñaní tnáhá-ndó nchàa-ndo.
 38 Te nchaa núú nĩ sacáⁿ
 téé-áⁿ triú cúú-xí ñuyíú. Te
 tatá váha-áⁿ cúú-xí cuè ñáyiú
 yindaha ñaha Yá Ndiöxí.
 Te nchaa cúhú sã ñà túú
 vâha-áⁿ cúú-xí ñáyiú yindaha
 ñaha sâcuíhná. 39 Te téé ní
 dängoyo ndíquíⁿ cùhú sã ñà
 túú vâha núú triú-áⁿ cúú-dë
 mee sâcuíhná. Te nduu
 nâtehndé-nã triú-áⁿ cúú-xí
 nduu ndihí nihnu-ná nchaa
 sá íó ñuyíú-a. Te nchaa
 ñáyiú nâquehndé triú-áⁿ
 cúú-yu mee-ni cuè espíritú
 xínú cuèchi núú Yá Ndiöxí.
 40 Te dàtná cada cue téé
 quíhíⁿ tnuhu nchaa cúhú
 sã ñà túú vâha-áⁿ dacùtu
 nuhní-güedé te cahmi-güedé,
 ducaⁿ sãtnahá-xi yâha nchaa
 ñáyiú cùndihí yucu ñávâha na
 sâá nduu. 41 Te yúhú Téé cùu
 ñaní tnáhá-ndó nchàa-ndo
 tendaha-í nchaa espíritú
 xínú cuèchi núú-í quíhíⁿ-xi
 nadatácá-xi nchaa ñáyiú
 sânu ichi cue tnaha ñáyiú-xi
 ichi cuèhé ichi duha, ndihí
 nchaa dava-gá ñáyiú ñá túú
 quide váha, te nchaa ñáyiú-áⁿ
 xĩndecú-yu nchaa núú ndécú
 cuè ñáyiú yindaha-í. 42 Te
 cue espíritú-áⁿ daquíhíⁿ-xi
 cue ñáyiú-áⁿ núú ñũhú núú
 càyú, te yàcáⁿ ío ndáhyú-yu te
 dicó rúhñú-nã cuu núhu-yu
 sá sätú iní-yu sá ndóhõ-yu.
 43 Te nchaa ñáyiú quide
 nchaa nacuaá cùní Tãtä-yu
 Dútú Ndiöxí, ñáyiú-áⁿ ïo
 cunúú-yu cundecú-yu núú
 ndécú-gã táxí tnùnĩ-gá, chí
 cuú-yu dàtná nchícanhii
 dayèhé-yu cundecú-yu núú

ndécú-gã. Te nchaa nchòhó
 ñáyiú ndèdóho nchaa tnúhu
 càháⁿ-í-a, te ío váha chí cuâha
 cuëndá —câchĩ-gá xâhaⁿ-gã
 xii-güedé.

Cuëndá ïⁿ sá ïo ndèyáhu

44 Te Jèsús xâhaⁿ tùcu-gá
 xii-güedé:

—Na càni tucu-í ingá
 cuëndú núú-ndó nâcuáa tecú
 tnùnĩ-ndó nâcuáa cada-xi òré
 ndíhu ndaha ñaha Yá Ndiöxí
 xii ñáyiú. ïⁿ téé ní naníhĩ-dë
 ïⁿ sá ïo ndèyáhu yĩndúxi ïⁿ xi-
 chí, te ní nachindúxi tucu-dé
 diu-ni núú nĩ naníhĩ-dë-áⁿ, te
 ío ní cudíⁿ ïnĩ-dé sá dúcáⁿ nĩ
 naníhĩ-dë xĩáⁿ. Te ní xica-dé
 cuánuhú-dé te ní nadico-dé
 nchaa sá ndécú ndihí-dé, te ní
 nacuaaⁿ-dé ñuhu núú dúcáⁿ
 nĩ naníhĩ-dë xĩáⁿ.

*Cuëndá ïⁿ sá ïo ndèyáhu nàni
 pèrlá*

45 Te na càni tucu-í ingá
 cuëndú núú-ndó nâcuáa tecú
 tnùnĩ-ndó nâcuáa cada-xi òré
 ndíhu ndaha ñaha Yá Ndiöxí
 xii ñáyiú. ïⁿ téé quide ndáhú
 ndúcú-dé sá nánĩ pèrlá sá ïo
 ndèyáhu. 46 Te ní naníhĩ-dë
 ñáyiú ndècu ndihí ïⁿ pèrlá sá
 ïo-gá ndèyáhu, te ní xica-dé
 cuánuhú-dé te ní nadico-dé
 nchaa sá ndécú ndihí-dé, te
 ní sáháⁿ-dé ní saaⁿ-dé pèrlá sá
 ïo-gá ndèyáhu-áⁿ.

*Cuëndá ñunu tnĩ-güedé
 chácá*

47 Te na càni tucu-í ingá
 cuëndú núú-ndó nâcuáa tecú
 tnùnĩ-ndó nâcuáa cada-xi òré
 ndíhu ndaha ñaha Yá Ndiöxí
 xii ñáyiú. Cue téé tnĩ chácá nĩ
 dáquë-güedé ñunu-güedé xiti
 ndute làmár tnĩ-güedé chácá,

te dàcá nuu dàcá nihnu chácá cuãnguee-güedi xití ñunu-án.
 48 Te òré ní cutnùní iní-güedé sá ñí chítú ñunu-güedé, te ní natava-güedé ní nene yuhu làmár, te ní ngüíta-güedé nácãxi-güedé nchaa chácá-ãⁿ. Te nchaa chácá vâha dàquée-güedé-di xití tídihi, te nchaa chácá nèhé dãngoyo-güedé-di. 49 Te dàtná ní quide cue tée-án ducaⁿ càda cue espíritú xínú cuèchi núú Yã Ndiõxí ná sàá nduu vã cùndècu-gá nchaa sá ìó ñuyú-a, chi cue espíritú-án daquée d^h-xi nchaa ñáyiu ní quide váha tnuú nchaa ñáyiu ñá túú ní quide váha. 50 Te nchaa ñáyiu ñá túú ní quide váha-án daquihíⁿ ñáhá-xí xií-yu núú ñhú núú càyú, te yàcáⁿ ío ndáhyú-yu, te dicó rúhñú-nã cuu núhu-yu sá sàtú iní-yu cuendá sá ndóhõ-yu —càchí-gá xãhaⁿ-gã xii cue tée xica cuu ndihí-gá.

Cuendá cue tée ndècu ndihí sá ñí quee túu díhna ndihí sá ñí quee túu saa

51 Te Jèsús ní xicáⁿ tnúhú-gá núú-güedé, te xãhaⁿ-gã xii-güedé:

—¿Ní tecú tnùní-ndó nàcuáa ndùu nchaa tnúhu ní cãháⁿ-í-ãⁿ? —càchí-gá xãhaⁿ-gã xii-güedé.

Te ní xãhaⁿ-güedé xii-gá:

—Ní tecú tnùní-ndí —càchí-güedé xãhaⁿ-güedé xii-gá.

52 Te ní xãhaⁿ tùcu Jèsús xii-güedé:

—Te núu ìⁿ tée dàcuaha ñaha xii ñáyiu nchaa tnúhu ní chídó tnùní ndí Moisés ná

cùtnuní iní-dé nàcuáa quide Yá Ndiõxí ndíhu ndaha-gã ñáyiu, te tée-án cúú-dé dàtná ìⁿ tée cùu xitohó vehe. Te tée cùu xitohó vehe-án ñí queñuhu-dé nchaa sá ñí quee túu díhna ndècu ndihí-dé, ndihí nchaa sá ñí quee túu saa. Te ducaⁿ sãtnahã-xi cùu tée-án te núu na cùtnuní iní-dé nàcuáa quide Yá Ndiõxí ndíhu ndaha-gã ñáyiu —càchí-gá xãhaⁿ-gã xii-güedé.

Jèsús ndécú-gã ñuu núú ní sahnú-gá

(Mr. 6:1-6; Lc. 4:16-30)

53 Te sàtá ñí váha ducaⁿ ñí caní Jèsús cuendú núú-güedé, te ní xica-gá cuánuhú-gá. 54 Te ní ndexio-gá ñuu núú cúú ñuu-gá, te cuánguñhu-gá xití veñúhu càa ñuu-án te ní ngüíta-gá dánèhé-gã ñáyiu. Te nchaa ñáyiu ndèdóho nchaa tnúhu càháⁿ-gá xicũñúhu-yu, te xitnãhá-yu:

—¿Nása ní cuu núu ío váha cùtnuní iní tée-a nàcuáa cunduu tnúhu càháⁿ-dé, te quide-dé nchaa sá vã yõo tnàhí ndàcu cada-i? 55 Te dicó déhe tée cùu carpinterú ndihí tá Mariá cúú-dé, te ñaní-dé cúú tã Jãcobó, ndihí té Chéé, ndihí té Xímú, ndihí té Jüdás.

56 Te cue cúha-dé ndécú ndihí ñahá-yu xii-o ñuu-a. ¿Te nása ní quide-dé ñuu ndéé dàcáⁿ ío váha cùtnuní iní-dé nàcuáa cunduu tnúhu càháⁿ-dé-i? —càchí-yu xitnãhá-yu.

57 Te ñá túú ní cuíní-yu càháⁿ ndihí váha-yu Jèsús, dico mee-gã ní xãhaⁿ-gã xií-yu:

—Te núu ìⁿ tée càháⁿ tnúhu Yá Ndiõxí ná nàsáá-dé ñuu-dé, te nchaa ñáyiu

ñuú-dé-án ndihi nchaa ñáyiú cùu ndimee-dé ñá túú nèhé-yu sá yíñuhu núú-dě, dico cue ñáyiú nchaa dava-gá ñuú chi nèhé-yu sá yíñuhu núú-dě —càchí-gá xáhaⁿ-gá xii-yu.

⁵⁸ Te ñá túú ní quide Jesús titní núú sá vǎ yǎo tñahí ndàcu cada ñuú-án, chi ñá túú ní cuimí-yu quindáá iní ñáhǎ-yu xii-gá.

14

Nàcuáa ní cuu ní xihí té Juàá tée dàcuandute ñaha xii ñáyiú

(Mr. 6:14-29; Lc. 9:7-9)

¹ Te diu-ni dàvá-án nǐ níhí tǎ Hèrodés tñuhu nchaa nàcuáa quide Jesús, te té Hèrodés-án cúú-dě tée tàxi tñuní distritú Galileá. ² Te ní xáhaⁿ-dě xii nchaa cue tée ndècu ndihi-dé:

—Tée dii cuèndú-xi níhí-ó-án cùu-dé té Juàá tée dàcuandute ñaha xii ñáyiú, tée ní xihí ní cùu te ní ndoto-dé nǎu dàcáⁿ ndácú-dě quidé-dě nchaa sá vǎ yǎo tñahí ndàcu cada —cachí-dé xáhaⁿ-dě xii-güedé.

³ Te ducaⁿ nǐ cáhán té Hèrodés chi mee-dé ní táuchíúⁿ-dě ní tññ ñaha-güedé xii té Juàá, te ní dácútú ñaha-güedé xii-dé, te ní chihí ñaha-güedé vecaá. Te ducaⁿ nǐ quide té Hèrodés-án sǎ cuèndá ñaha nàni Herodiás, ñaha ní cándeca ñaní-dé té Lipé, te ní naqueheⁿ ñaha-dě xii-aⁿ ndèca ñaha-dé. ⁴ Te té Juàá ní xáhaⁿ-dě xii té Hèrodés:

—Ñá túú ní quide váha-n dùha ní naqueheⁿ-n ñaha ní cándeca ñaní-n —duha ní xáhaⁿ té Juàá xii té Hèrodés.

⁵ Te sá dúcáⁿ nǐ xáhaⁿ tǎ Juàá-án xii té Hèrodés, te ní cuini té Hèrodés-án cahni-dé té Juàá-án, dico ñá túú ní cùyii-dé chi ní yùhú-dé núú cuè ñáyiú, chi nchaá-yu ní cutnùní iní-yu sá tǎ Juàá cúú-dě ññ tée cáhán tñuhu Yá Ndióxi. ⁶ Te ññ nduu ní quide té Hèrodés vico vehe-dé ní quide càhnu-dé nduu nǐ cacu-dé. Te ndècu ññ déhe yoco ñaha nani Herodiás-án, te xíchí-ǎⁿ nǐ quíhu-xi xití vehe núú cúú vico-án ní xita saha-xi. Te núcóo té Hèrodés ndihi cue tée ní cáhán-dé ndéhé-güedé, te ío ní cudíí iní-dé nàcuáa ní xita xíchí-ǎⁿ. ⁷ Te té Hèrodés-án nǐ cacunehe-dé ndéé Yá Ndióxi nàcuáa cutnùní iní xíchí-ǎⁿ sǎ ndáa cuañaha-dě nǎu ná cúú sǎ ná càcáⁿ-xi núú-dě. ⁸ Te xíchí-ǎⁿ nǐ dácáhú iní ñáhǎ nǎná-xi xii-xi ná cúú sǎ càcáⁿ-xi núú tǎ Hèrodés, núú xíǎⁿ ní xáhaⁿ-xi xii-dé:

—Cuiní-í quehdé-n díquí tǎ Juàá tée dàcuandute ñaha xii ñáyiú te taxi-n, dico na cùhuⁿ ññ xití cóhó taxi-n —càchí-xi xáhaⁿ-xi xii-dé.

⁹ Te sá dúcáⁿ nǐ xáhaⁿ-xi, te ní cundiýí té Hèrodés, dico ñá túú ní níhí-dě nása cada-dé, chi ndéóho ñáyiú òré ní cacunehe-dé Yá Ndióxi sǎ ndáa cuañaha-dě ññ sǎ ná càcáⁿ-xi núú-dě. Te ní quide-dé nàcuáa ní xáhaⁿ-xi.

¹⁰ Chi ní táuchíúⁿ-dě ní sáháⁿ cue tée ní xehndé-güedé díquí tǎ Juàá òré yíhí-dě vecaá. ¹¹ Te ní chihí-güedé díquí-dě ññ xití cóhó te nèhe-güedé cuánuhú ní sáñaha-güedé xii xíchí-ǎⁿ, te xíchí-ǎⁿ nǐ nacuáñaha-xi xii náná-xi.

12 Te cue tée xica cuu ndihi té Juàá-án nĩ sáháⁿ-güedé ní naqueheⁿ-güedé yiqui cùnú-dé ní chindúxi-güedé, te dätñuní ní sáháⁿ-güedé ní xáhaⁿ-güedé xii Jèsús nàcuáa ní cuu.

Jèsús dácàxi-gá úhúⁿ mĩl cue tée te dñⁿ ñáyiu dñí ndihi landú (Mr. 6:30-44; Lc. 9:10-17; Jn. 6:1-14)

13 Te Jèsús ní níhí-gă tnúhu nàcuáa ní cuu ní xihí té Juàá. Te sátá xĩáⁿ te cuánguee-gá ñⁿ bàrcú cuáháⁿ-gá ñⁿ xichi núú ñà túú ñáyiu ndècu, dico nchaa ñáyiu xĩndecu nchaa ñúú cáa yàtni xíaⁿ nĩ níhĩ-yu tnúhu sá cuáháⁿ-gá, te ní queé-yu ñúú-yu xica sahá-yu cuáháⁿ núú quidě-yu cuendá quexìo Jesús. 14 Te òré ní quexìo Jesús núú cuáháⁿ-gá, te ní quene-gá bàrcú, te ní xiní-gá cuéhé víhí ñáyiu xixúcu-yu xíaⁿ, te ní cundáhú iní ñáhá-gă xií-yu, te ní quide tátna-gá nchaa ñáyiu cùhú ndihí-yu. 15 Te sátá nĩ cuaa te ní sáháⁿ cue tée xica cuu ndihi Jesús núú-gă, te xáhaⁿ-güedé xii-gă:

—Sa ní cuu dandàca-n nchaa ñáyiu-a chi sa ní cuaa, te na quihíⁿ-yu nchaa ñúú cáa yàtni iha cuaáⁿ-yu sá caxí-yu, chi núú ndécú-ó iha ñá túú tnàhí ná ió —cächí-güedé xáhaⁿ-güedé xii-gă.

16 Te Jèsús ní xáhaⁿ-gă xii-güedé:

—Ñáhá, vá dándàca-í-yu, váha-gá mee-ndo chí cuñaha sã ná caxí-yu —cächí-gá xáhaⁿ-gă xii-güedé.

17 Te ní xáhaⁿ-güedé xii-gă:

—Ñá túú năgá ndécú ndihi-ndí, chi úhúⁿ duha-ná pàá ndihi úú-nă chácá ndécú ndihi-ndí —cächí-güedé xáhaⁿ-güedé xii-gă.

18 Te Jèsús ní xáhaⁿ-gă xii-güedé:

—Chí cánèhe paá-án ndihi chácá-ăⁿ táquixi iha —cachí-gá xáhaⁿ-gă xii-güedé.

19 Te Jèsús ní xáhaⁿ-gă xii nchaa ñáyiu sá ná ngõo-yu nchaá-yu núú ité cuíi càa xíaⁿ, te ní queheⁿ-gá ndi úhúⁿ pàá-án ndihi ndi ndúú chácá-ăⁿ te ní ndacoto-gá andiu, te ní ndacáⁿ táhú-gă núú Yă Ndiõxí, te dätñuní ní táhú cuèchi-gá pàá-án te ní sãñaha-gă xii cue tée xica cuu ndihi-gá ní dácãhñu-güedé cue ñáyiu ní xexí-yu. 20 Te nchaá-yu ní xexí-yu ní ndahá xití-yu. Te sátá nĩ túhú cóhõ-yu te ní nadatácá-güedé nchaa sá nĩ quendóo, te ní chítú ùxúú tnàhá tídihí mee-ni sã nĩ quendóo. 21 Te nchaa ñáyiu ní xexi-án nĩ xínu úhúⁿ mĩl mee-ni cué tée chí mee-ni cué tée-án nĩ quíúndehu, te dñⁿ cue ñáyiu dñí ndihi cue landú.

Jèsús xicá-gă núú ndute

(Mr. 6:45-52; Jn. 6:16-21)

22 Te òré-ni-án nĩ xáhaⁿ Jèsús xii cue tée xica cuu ndihi-gá sá quee-güedé bàrcú téhndé-güedé ndaa ingá xio yuhu làgúná, te mee-gă quendóo-gá cada ndee iní tnàhá-gă ndihi cue ñáyiu. 23 Te sátá nĩ yáha ní quide ndee iní tnàhá-gă ndihi cue

ñáyi, te medli-gá ní xica-gá cuasaá-gá ñⁿ tĩndúú cáá yàtni xiáⁿ cuendá cáháⁿ ndihi-gá Yá Ndiõxí, te diu-ni medli-gá ndécú xiáⁿ nĩ cundiquiⁿ. ²⁴ Te bàrcú sá ñũhú cuè téé xica cuu ndihi-gá-áⁿ sa cuáháⁿ-xi ndéé cuádava xití làgúná-áⁿ, te níhi vihi quene táchí ndàa ichi cuáháⁿ-xi, te dàcandau ndeé-xi ndute nchaa diñi-xi. ²⁵ Te tàcuĩhndá váhi-gá tá xica Jesús núú ndute cuáháⁿ tá cùyatni-gá bàrcú-áⁿ. ²⁶ Te cue téé xica cuu ndihi-gá ní xiní ñáhá-güedě xii-gá tá xica-gá núú ndute cuáháⁿ, te ní yuhú-güedé te níhi ní cáháⁿ-güedé te xĩtnàha-güedé:
—jⁿ àlmá! —càchí-güedé xĩtnàha-güedé.

²⁷ Te Jesús ní cáháⁿ-gá, te xàhaⁿ-gã xii-güedé:

—Ñiⁿ cunduu-ndo vã yuhú-ndó, chi yuhú cúu-í — càchí-gá xàhaⁿ-gã xii-güedé.

²⁸ Te té Pèlú ní xàhaⁿ-dě xii-gá:

—Mèstrú, te núu diu-n te tauchiuⁿ sá tnàhá-í ná càca-í núú ndute quixi tnàhá ñáhà-í xii-n —càchí-dé xàhaⁿ-dě xii-gá.

²⁹ Te Jesús ní xàhaⁿ-gã xii-dé:

—Taquixi —cachí-gá xàhaⁿ-gã xii-dé.

Te té Pèlú ní nuu-dé núú bàrcú, te ní ngüíta-dé tá xica-dé núú ndute cuáháⁿ cuátnahá ñáhá-dě xii-gá. ³⁰ Te ní cutnùní iní-dé sá ïo níhi xico táchí, te ní ngüíta-dé yuhú-dé. Te òré-ni-áⁿ tá quëe naa-dé xití ndute cuáháⁿ ní cùu, te níhi ní cáháⁿ-dë xàhaⁿ-dë xii Jesús:

—jMèstrú, vá dáñá-n quëe naa-í xití ndute! —càchí-dé xàhaⁿ-dë xii-gá.

³¹ Te òré-ni-áⁿ nĩ tñii Jèsús ndaha-dé, te ní xàhaⁿ-gã xii-dé:

—¿Ná cuendá ñá túú sàndáá ndisa iní ñáhá-n xii-í sàni ñⁿ sani úú iní-n-í? —càchí-gá xàhaⁿ-gã xii-dé.

³² Te òré cuánguee Jèsús ndihi té Pèlú xití bàrcú, te òré-ni-áⁿ nĩ ngüiñi táchí. ³³ Te cue téé ñũhu xití bàrcú-áⁿ nĩ ngüiñi xití-güedě núú-gã, te xàhaⁿ-güedě xii-gá:

—Sá ndàá sá cuítí sã díú yòhó cúu-n Dèhe Dútú Ndiõxí —càchí-güedé xàhaⁿ-güedé xii-gá.

Jèsús quidé tãtna-gá ñáyi cuhú ñⁿ xichi núú nání Gènesarét

(Mr: 6:53-56)

³⁴ Te ní quexio Jesús ndihi cue téé xica cuu ndihi-gá ndàa ingá xio yuhu làgúná, te núú nĩ quexio-gá ndihi-güedé-áⁿ nání-xi Gènesarét. ³⁵ Te nchaa ñáyi xĩndecu xiáⁿ nĩ cutnùní iní-yu sá díú-gã ní quexio, te ní dátècú tñuhu-yu nchaa dava-gá ñáyi xĩndecu yatni xiáⁿ sã nĩ quexio-gá. Te ndècá-yu nchaa ñáyi cùhú ndécú ndihí-yu cuáháⁿ núú ndécú Jesús. ³⁶ Te nchaa ñáyi cùhú-áⁿ nĩ ngüíta-yu càháⁿ ndàhú-yu núú Jesús sá ná dàña-gá tnàndéé-yu cuèdicó luha yuhu dõó-gã cuendá ndúha-yu, te cue ñáyi cùhú, ñáyi ní tnàndéé yuhu dõó-gã ní ndúha-yu.

15

*Cuèndá nchaa sá quidé-xí
ngündecu cuéchi ñáiyu
(Mr. 7:1-23)*

¹ Te sáta dúcáⁿ te ñⁿ úú cue tée cuu fariséu ní quee-güedé ñúú Jerusalén, ndihi cue tée dàcuaha ñaha xii ñáiyu nchaa tnúhu ní chídó tnùní ndíi Moisés ní quexio-güedé núú ndécú Jèsús, te xáhaⁿ-güedé xii-gá:

² —¿Ná cuèndá cue tée xica cuu ndihi-n ñá túú nàquete-güedé ndaha-güedé òré caxi-güedé nàcuáa ní cachí cue ñaní tnáhá-ó ñí xíndecu ndéé sanaha-i? —càchí-güedé xáhaⁿ-güedé xii-gá.

³ Te Jèsús ní xáhaⁿ-gá xii-güedé:

—Te nchòhó tucu, ¿ná cuèndá ñá túú quide-ndo nacuaa ní cachí Yá Ndiöxí cada-ndo, núu da nàcuáa ta quide cue tée ñuyíú-a quide-ndo-i? ⁴ Te Yá Ndiöxí càchí-gá núú tùtú-gá: “Canehe-ndo sá yíñùhu núú tātá-ndó ndihi núú náná-ndó”, càchí-gá. Te càchí tucu-gá ingá xichi núú tùtú-gá: “Nchaa ñáiyu na càháⁿ úhú tātá-xi àdi náná-xi te cahni ñaha-güedé xii-yu”, duha càchí-gá núú tùtú-gá. ⁵ Dico nchòhó càchí-ndó sá cuè ñáiyu chi cuu cúñahá-yu xii tātá-yu àdi náná-yu: “Vá cúu chindee ñaha-ndí xii-n, chi sá táxí-ndí xii-n ni cuu, xiáⁿ ní nduu cuèndá Yá Ndiöxí”, cuu duha cúñaha ñáiyu xii tātá-yu àdi náná-yu càchí-ndó. ⁶ Te

càchí-ndó sá cuè ñáiyu ducaⁿ na cūñaha xii tātá-xi àdi náná-xi te ñá túú-gá táu-yu chindéé-yu ni tātá-yu ni náná-yu. Te ducaⁿ quide-ndo chi ní dáquée tihú-ndó nàcuáa ní cachí Yá Ndiöxí cada-ndo, te mee-ni nàcuáa ta quide cue tée ñuyíú-a véxi nchícúⁿ nihnu-ndo quide-ndo. ⁷ ¡Te nchòhó cúu-ndó ñáiyu ío dandahú méé-xí, chi càchí-ndó sá quidé ndáá-ndó te ñá ndáá sá quidé ndáá-ndó! Te ní quee ndáá-xi nàcuáa ní chídó tnùní ndíi Chàia tée ní xóo cáháⁿ tnúhu Yá Ndiöxí ndéé sanaha núú tùtú-gá núú cáháⁿ-xi nàcuáa ní cáháⁿ-gá cuèndá-ndó, te duha ní cachí-gá:

⁸ Ñáiyu-a càchí-yu sá ío càhnu cuu-í dico dicó-ni yuhu càháⁿ-yu,

chi duuⁿ duuⁿ ñá túú ñùhu iní ñáhà-yu xii-í.

⁹ Te àúⁿ nã cuu chiñuhu ñahá-yu xii-í chi ñá túú vèdana ndéé nándíhi-xi, chi cue ñáiyu-a dàcuahá-yu cue tnàha ñáiyú-yu nàcuáa cundecú-yu, dico mee-ni tnùhu sá ñí cahu iní cue ñáiyu ñuyíú-a càháⁿ-yu.

Duha ní chídó tnùní ndíi Chàia núú tùtú Yá Ndiöxí nàcuáa ní cáháⁿ-gá cuèndá-ndó —càchí-gá xáhaⁿ-gá xii-güedé.

¹⁰ Te ní xáhaⁿ-gá xii cue ñáiyu:

—Chí táquixi ndehe iha, te cundedóho váha-ndo tnùhu na càháⁿ-í, te ío váha cuáha-ndo cuèndá. ¹¹ Nchaa

sá xéxi-ndó chi ñá túú ná quidé-xí iní-ndó, dico nchaa sá cuèhé sá dúhá sàni iní-ndó càháⁿ-ndó nchaa xiáⁿ quidé-xí ndècu cuéchi-ndo —càchí-gá xáhaⁿ-gá xii-yu.

12 Te cue téé xica cuu ndihi-gá ní sáháⁿ-güedé ndéé núú-gá, te xáhaⁿ-güedé xii-gá:

—Véxi-ndí càchí tnúhu-ndí xii-n sá cuè téé cùu fariséú ñá túú cùu váha iní-güedé cuendá tnúhu ní cáháⁿ-n —càchí-güedé xáhaⁿ-güedé xii-gá.

13 Te ní xáhaⁿ-gá xii-güedé:

—Nchaa ñáyiú ñá túú cùu cuendá Tàtá-í Dútú Ndiöxí cuíta nihnú-yu, chi ñáyiú-áⁿ cúu-yu dàtná nchaa cúhú sá ñá túú nàndíhi te tnúhu ñáyiú.

14 Te vá cádá cuendá-ndó nàcuáa càháⁿ cue téé-áⁿ, chi cùu-güedé dàtná cue ñáyiú cuáá sácuíta nehe tnàha. Te nchòhó xini-ndó sá núu iiⁿ ñáyiú cuáá ná cuíta nèhe tucú-yu ingá ñáyiú cuáá, te ndi ndùú-yu quée-yu déhvá —càchí-gá xáhaⁿ-gá xii-güedé.

15 Te té Pèlú ní xáhaⁿ-dè xii-gá:

—Cachí tnúhu xii-ndí nàcuáa quèe-xi tnúhu ní cáháⁿ-n-áⁿ —càchí-dé xáhaⁿ-dè xii-gá.

16 Te Jèsús ní xáhaⁿ-gá:

—¿Náa tnàhá nchòhó ñá túú ní tècú tnúni-ndó nàcuáa ndùu tnúhu ní cáháⁿ-í núú ñáyiú-áⁿ ñá? 17 Nchaa sá xéxi-yu cuánguee-xi xití-yu, te dàtnúni náyáha ñaha-xi xii-yu. 18 Dico nchaa tnúhu cuèhé tnúhu duha càháⁿ-yu xiáⁿ véxi quene-xi iní-yu, te diu nchaa xiáⁿ quidé-xí ndècu

cuéchi-yu. 19 Te iní-yu-áⁿ cáciú nihnu nchaa sá cuèhé sá dúhá, chi sàni cuèhé sání dùha iní-yu, te sàhní-yu tnàha ñáyiú-yu, te cue téé càháⁿ ndihi-güedé ñáyiú dñí te ñá díú ñàdihí-güedé cúu-yu. Te diu-ni ducaⁿ quide cue ñáyiú dñí càháⁿ ndihí-yu cue téé te ñá díú yíi-yu cùu-güedé, te cuèi téé te cuèi ñàdihí mee-ni ìchi díí iní cúdí iní-yu cundecú-yu, te dùhu ndachiuⁿ tnàhá-yu, te dàcuandehndé-yu, te càháⁿ cuèhé-yu cuendá tnàha ñáyiú-yu. 20 Te nchaa xiáⁿ quidé-xí ndècu cuéchi-yu, dico ñá díú sá ñá túú ndàhá-yu dàtná ní cachí cue téé ndéé sanaha, chi xiáⁿ ñá túú quide-xi cuendá ngúndecu cuéchi-yu —càchí-gá xáhaⁿ-gá xii-güedé.

Íiⁿ ñàdihí ñaha cùu ñaní tnàhá ñáyiú canàneá ní sàndáá iní-aⁿ Jèsús

(Mr. 7:24-30)

21 Te Jèsús ní xica-gá cuáháⁿ-gá ní sáa-gá yucu cue téé ñuú Tirú, ndihi yucu cue téé ñuú Sidón. 22 Te iiⁿ ñàdihí ñaha cùu ñaní tnàhá ñáyiú canàneá ndécú yàtni-aⁿ xiáⁿ, te níhi ta càháⁿ-aⁿ ní quexio núú ndécú Jèsús, te xáhaⁿ-aⁿ xii-gá:

—¡Mèstrú, ñaní tnàhá ndii Dàvií, cundáhú iní ñáhá xii-í cada tátna-n dèhe yoco-í! Chi yíhi ñaha espíritú cündihí yucu ñáváha xii-xi te ío dándoho ñaha-xi —cachí-aⁿ xáhaⁿ xii-gá.

23 Dico Jèsús ñá túú tnàhí ni cǎháⁿ-gá, te cue tée xica cuu ndihí-gá ní sáháⁿ-güedé núú-gǎ, te xǎháⁿ-güedě xii-gá:

—Cúñaha xii ñaha-áⁿ ná nuhú-aⁿ, chi ío níhí cǎháⁿ-aⁿ nchícúⁿ ñáhá-áⁿ xii-o — cachí-güedé xǎháⁿ-güedě xii-gá.

24 Te Jèsús ní xáhaⁿ-gǎ xii-güedé:

—Yá Ndiöxí ní tendaha ñaha-gá xii-í véxi-í mee-ni ñúú núú xñdecu cue ñáyiu isràél, chi ñáyiu-áⁿ cúu-yu dàtná cue mběé cue quití ní xíta, chi ta xíta nihnú-yu cuáháⁿ —cǎchí-gá xǎháⁿ-gǎ xii-güedé.

25 Te ñadihí-áⁿ ní sáháⁿ-aⁿ ndéé núú Jèsús ní ngüíñí xití-áⁿ, te xǎháⁿ-aⁿ xii-gá:

—jMèstrú, chindee ñaha xii-í! —cǎchí-aⁿ xǎháⁿ-aⁿ xii-gá.

26 Te Jèsús ní xáhaⁿ-gǎ xii-aⁿ:

—Vá cúú chindee-í cue ñáyiu ñá túú cùu ñáyiu isràél, chi ñⁿ-ni cùu-xi núu na quèheⁿ-o paá cúú cuendá cue landú te cuáha-o ñná caxi-di —cǎchí-gá xǎháⁿ-gǎ xii-aⁿ.

27 Dico ñaha-áⁿ ní xáhaⁿ-aⁿ xii-gá:

—Ndáá cǎháⁿ-n, dico cue ñná chi nàdatacá-güedi sá ngóyó yùhu cóhó xǐtohó-güedi —cǎchí-aⁿ xǎháⁿ-aⁿ xii-gá.

28 Te Jèsús ní xáhaⁿ-gǎ xii-aⁿ:

—jYòhó ñaha cùhú déhe-xi, ío váha sàndáá ñí ñáhá-n xii-í! Te na càda-í nàcuáa cuíni-n —cǎchí-gá xǎháⁿ-gǎ xii-aⁿ.

Te òré-ni-áⁿ ní ndúha déhe-aⁿ.

Jèsús quidé tǎtna-gá vài ñáyiu cùhú

29 Te sátá dúcáⁿ ní cuu te Jèsús ní xica-gá cuáháⁿ-gá ní yáha-gá yuhu làgúná distritú Galileá, te cuásaá-gá ñⁿ tindúú te xíaⁿ ní ngóo-gá. 30 Te xíaⁿ núcõo-gá ní quexìo cuéhé víhí ñáyiu, te ndécá-yu ñáyiu yacua, ndihí ñáyiu ní yíchí ñⁿ xio ndaha-xi, ndihí ñáyiu

cuáá, ndihí ñáyiu ñihí, te vài dava-gá cue ñáyiu cùhú tnàhá dava-gá núú cuéhé ndécá-yu ní quexìo núú ndécú-gǎ. Te ní taxi ndecu ñáhá-yu núú Jèsús te ní quide tǎtna ñaha-gǎ xii-yu te ní ndúha-yu. 31 Te nchaa ñáyiu xñdecu-áⁿ ío ní cuñúhu-yu sá dúcáⁿ ní xini-yu ní cuu ní nacáháⁿ nchaa ñáyiu ñihí, ndihí cuendá sá ní ndúha nchaa cue ñáyiu yacua, ndihí cuendá sá ní ndúha cue ñáyiu ní yíchí ñⁿ xio ndaha-xi, ndihí cuendá sá ní ndúha núú cuè ñáyiu cuáá. Te nchaá-yu ní cachí-yu sá ío cǎhnu cuu Yá Ndiöxí Yaá cúú Ndiöxí cue ñáyiu isràél.

Jèsús dácàxi-gá cúmí mìl cue tée te dìⁿ ñáyiu dìhí ndihí landú (Mr. 8:1-10)

32 Te Jèsús ní cana-gá cue tée xica cuu ndihí-gá, te ní xáhaⁿ-gǎ xii-güedé:

—Yúhú cùndàhú ñí-í nchaa ñáyiu-a, chi sa ní cuu úní nduu ndecu ndihí ñáhá-yu xii-o ñha, te ñá túú tnàhí-gá sá cǎxí-yu, te ñá túú cuíni-í n-tendaha-í-yu núhú tnámǎ-yu vehé-yu, chi ná ndéé cuáháⁿ cuneé-yu docó ichi —cǎchí-gá xǎháⁿ-gǎ xii-güedé.

33 Te ní xáhaⁿ-güedě xii-gá:

—¿Te ndèé níhí-ó sã cuãñaha-o càxi nchaa ñáyiu-a, te ío cuéhě-yu te ñá túú nã ìo iha chi cùu-xi xití yucu-i? —càchí-güedé xáhaⁿ-güedě xii-gá.

34 Te Jèsús ní xicáⁿ tnúhú-gã núu-güedě, te xáhaⁿ-gã:

—¿Ná daha-gá pàá ndécú ndìhi-ndo-i? —cachí-gá xáhaⁿ-gã xii-güedé.

Te ní xáhaⁿ-güedě xii-gá:

—Ndècu ndìhi-ndí úsá-gã tnàhá pàá ndìhi ìⁿ úú-gá chácá —càchí-güedé xáhaⁿ-güedě xii-gá.

35 Te Jèsús ní xáhaⁿ-gã xii nchaa ñáyiu sá ná ngóo-yu nchaaⁿ-yu, te ní ngóo-yu.

36 Te ní queheⁿ-gá ndi úsá pàá-áⁿ ndi ìⁿ úú-gá chácá-ãⁿ, te ní ndacáⁿ táhú-gã núú Yã Ndiöxí, te dátñuní ní táhú cuèchi-gá pàá-áⁿ ndìhi chácá-ãⁿ te ní sãñaha-gã xii cue téé xica cuu ndìhi-gá ní dácãhñu-güedé nchaa ñáyiu-áⁿ.

37 Te nchaaⁿ-yu ní xexí-yu ní ndahá xití-yu. Te sátá nã túhú cóhõ-yu te ní nadatácá-güedé nchaa sá nã quendóo, te ní chítú úsá tnàhá tídihi mee-ni sã nã quendóo-áⁿ. 38 Te núú ncháá ñáyiu ní xexi te ní xínu cúmí mĩ mee-ni cuè téé chi diu-ni cue téé-áⁿ nã quiúndehu, te dìⁿ cue ñáyiu dìhí ndìhi cue landú. 39 Te sátá dúcáⁿ te Jèsús ní dándácá ñàha-gá xii-yu, te cuánguee-gá bàrcú cuáháⁿ-gá yucu cue téé ñúú Màngdalá.

16

Cue téé cùu fariséú ndìhi cue téé cùu saducéú xáhaⁿ-güedě xii Jèsús cada-gá ìⁿ sá vã yõo tnàhí ndàcu cada (Mr. 8:11-13; Lc. 12:54-56)

1 Te cue téé cùu fariséú ndìhi cue téé cùu saducéú ní sáa-güedé núú ndécú Jèsús xító ndèé ñáhá-güedě xii-gá, te xáhaⁿ-güedě sá ná cadá-gã ìⁿ sá vã yõo tnàhí ndàcu cada cundehe-güedé nàcuáa cutñuní iní-güedé núú ndáá sá Yã Ndiöxí ní tendaha ñàha-gá xii-gá véxi-gá ñuyíu-a. 2 Te Jèsús ní xáhaⁿ-gã xii-güedé:

—Nchòhó chi òré tá cuàa cuáháⁿ te ndàcoto-ndo andi^u, te càchí-ndó: “Ío váha cada-xi tneé chi càa vícò tícuèhé andi^u”, duha càchí-ndó. 3 Te òré dátñéé ndàcòto tucu-ndo andi^u, te càchí-ndó: “Vá cadá vãha-xi nduu vitna chi tícuèhé andi^u, te càa vícò”, duha càchí-ndó. ¡Dico nchòhó cúu-ndó ñáyiu ío dándahú méé-xí sã quidé ndáá te ñá ndáá sá quidé ndáá-ndó! Te cùnñuní iní-ndó nàcuáa quide-xi andi^u, dico ñá túú cùnñuní iní-ndó nàcuáa quèe-xi nchaa sá quidé Yã Ndiöxí vitna. 4 Dico nchaa nchòhó ñáyiu ndècu ñuyíu vitna ío cuihna iní-ndó, te ñá túú cuini-ndó cada ndáá-ndó núú Yã Ndiöxí, te cuini-ndó càda-í ìⁿ sá vã yõo tnàhí ndàcu cada dico ñá túú nãgá cada-í, chi diu-ni nàcuáa ní quide Yã Ndiöxí ndí Jònás diu-ni ducaⁿ càda tucu-gá vitna —càchí-gá xáhaⁿ-gã xii-güedé.

Te ducaⁿ te ní xica-gá cuaháⁿ-gá ndihi cue téé xica cuu ndihi-gá.

Cuendá cue téé cùu fariséu ndihi cuendá cue téé cùu saducéu

(Mr. 8:14-21)

5 Te òré ní quexìo ndihi ñaha-gá xii-güedé ndàa ingá xio yuhu làgúná, te ní ndacu iní-güedé sá ñí cunaa-güedé canehe-güedé pàá quihíⁿ caxi-güedé. 6 Te Jèsús ní cáháⁿ-gá dóho-güedé, te xáhaⁿ-gá xii-güedé:

—Na càchí tnúhu-í xii-ndo sá ìo quihí iní-ndó cùndecu-ndo, te vá cadá cuendá tnàhí-ndo levadurá cue téé cùu fariséu ndihi cue téé cùu saducéu —càchí-gá xáhaⁿ-gá xii-güedé.

7 Te ní ngüíta-güedé xitnàha-güedé:

—Cuendá sá ñà túú ní cãnehe-o pàá quixi xláⁿ duha càhàⁿ-gá —càchí-güedé xitnàha-güedé.

8 Te Jèsús ní cutnùní iní-gá nàcuáa ndùu tnúhu xitnàha-güedé, núu ní xáhaⁿ-gá xii-güedé:

—Nchòhó chi ñá túú sàndáá iní ñáhá vaha-ndo xii-í núu xláⁿ da sá ñà túú ní cãnehe-ndo pàá quixi càhàⁿ-ndó. 9 ¿Te náa ñá ndácú iní-ndó sá núú ùhúⁿ-ni pàá, te ní taxi-í ní dácãhñu-ndo ñí xexi ùhúⁿ mìl cue téé, chi ñiu-ⁿi cue téé-áⁿ ñí quíúndehu, te sátá ñí túhú cóhó-güedé te ní chítú tìtní tídihi mee-ⁿi sá ñí quendóo-ãⁿ? Te ñá təcú tñùní-ndó nàcuáa quèe-xi nacuáa ní quide-í. 10 ¿Te náa ñá ndácú tùcu iní-ndó

sá núú ùsá-ⁿi pàá te ní taxi-í ní dácãhñu tucu-ndo ñí xexi cúmí mìl cue téé, chi ñiu-ⁿi cue téé-áⁿ ñí quíúndehu, te sátá ñí túhú cóhó-güedé te ní nadatàcá-ndó nchàa sá ñí quendóo, te ní chítú tìtní tídihi mee-ⁿi sá ñí quendóo-ãⁿ? 11 Dico

nchòhó chi ñá túú ní quide cuendá-ndó nàcuáa ndùu tnúhu càhàⁿ-í òré ní cachí-í sá vã quéhéⁿ cuendá-ndó levadurá cue téé cùu fariséu ndihi cue téé cùu saducéu, chi ñá díú cuendá pàá ní càhàⁿ-í —càchí-gá xáhaⁿ-gá xii-güedé.

12 Te sátá dúcáⁿ ñí xáhaⁿ Jèsús xii cue téé xica cuu ndihi-gá, te ní tecú tñùní-güedé sá xáhaⁿ-gá xii-güedé sá vã tñí-güedé tnúhu càhàⁿ cue téé cùu fariséu ndihi cue téé cùu saducéu, te ñá díú cuendá levadurá sá quihu yuchi cuáha pàá ní càhàⁿ-gá.

Té Pèlú xáhaⁿ-dè xii Jèsús sá díú-gã cúu-gã Cristú

(Mr. 8:27-30; Lc. 9:18-21)

13 Te Jèsús ní quexìo-gá yucu cue téé ñuú Cèsareá Filipú, te ní xicáⁿ tñuhú-gã núú cuè téé xica cuu ndihi-gá, te xáhaⁿ-gá xii-güedé:

—¿Yoo cùu yúhú Téé cùu ñaní tnáhá-ndó nchàa-ndo cachí cue ñáyiu-va? —càchí-gá xáhaⁿ-gá xii-güedé.

14 Te ní xáhaⁿ-güedé xii-gá:

—Davá-yu càchí-yu sá cúu-ⁿ ndii Juáá téé ní xóo dacuàndute ñaha xii ñáyiu, te davá-yu càchí-yu sá cúu-ⁿ tẽ Èliás, te davá-yu càchí-yu sá cúu-ⁿ ndii Jeremiás téé ní

xóo cáháⁿ tnúhu Yá Ndiöxí ndéé sanaha, àdi cuu-n ingá téé ní xóo cáháⁿ tnúhu-gá ndéé sanaha, duha càchí-yu —càchí-güedé xáhaⁿ-güedé xii-gá.

15 Te Jèsús ní xicáⁿ tnúhú tucu-gá núu-güedé, te xáhaⁿ-gá xii-güedé:

—Te nchòhó, ¿yoo sàni iní-ndó cùu-í-í? —càchí-gá xáhaⁿ-gá xii-güedé.

16 Te té Xímú, àdi Pelú chi úú diu-dé, ní xáhaⁿ-dē xii-gá:

—Yòhó cúu-n Crìstú Yaa ní tendaha Yá Ndiöxí véxi ñuyú-a, te diu Yá Ndiöxí cúu-gá Yaa ndécú nchaa nduu nchaa quiú, te yòhó cúu-n Dēhe-gá —càchí-dé xáhaⁿ-dē xii-gá.

17 Te Jèsús ní xáhaⁿ-gá xii-dé:

—Yòhó té Xímú déhe té Jónás, ío váha táhú-n chi mee Tàtá-í Dútú Ndiöxí ní dácáhú iní ñáhá-gá xii-n nàcuáa cunduu tnúhu cáháⁿ-n, te ñá díú ìⁿ ñáiyu ñuyú-a ducaⁿ ni dàcahu iní ñáhá-yu xii-n tnúhu-áⁿ. 18 Te yúhú xáhaⁿ-í Pèlú xii-n, te tnúhu-áⁿ quéé-xí yúú, chi quèe ndáá-xi nàcuáa nàni-n, chi cuu-n ìⁿ téé vá cání ìⁿ caní úú iní-xi canu ichi-n cuè ñáiyu nàcuáa cundecu ndihi ñáhá-yu xii-í. Te nchaa ñáiyu cùu cuendá-í vá ndácú yùcu ñáváha dacuíta nihnu ñaha-xi xii-yu. 19 Te yúhú taxi-í tnúhu ndee iní cundecu ndihi-n cuendá cunuu-n núu cuè ñáiyu yindaha ñaha Yá Ndiöxí, te nchaa sá ná cáháⁿ-n sá cúu-xí sá váha, te diu-ni ducaⁿ cáháⁿ

Yá Ndiöxí, te nchaa sá ná cáháⁿ-n sá ñà túu cùu-xi sá váha, te diu-ni ducaⁿ cáháⁿ tucu-gá, chi quide-n nacuáa cuini-gá —càchí-gá xáhaⁿ-gá xii-dé.

20 Te sátá dúcáⁿ te ní xáhaⁿ Jèsús xii cue téé xica cuu ndihi-gá sá vǎ yoo cùñaha-güedé sá díú-gá cúu-gá Crìstú Yaa ní tendaha Yá Ndiöxí véxi ñuyú-a.

Jèsús cáháⁿ-gá sá cáhni ñaha-güedé xii-gá

(Mr. 8:31-9:1; Lc. 9:22-27)

21 Te ndéé dàvá-áⁿ ní ngúita Jèsús xáhaⁿ-gá xii cue téé xica cuu ndihi-gá:

—Dacuitíi sǎ quihíⁿ-í ñuu Jerusalén, te yacáⁿ cue téé cùu sacuéhé núu ñáiyu israél, ndihi cue dútú cúnúu, ndihi cue téé dàcuaha ñaha xii ñáiyu nchaa tnúhu ní chídó tnéni ndíi Moisés, nchaa cue téé-áⁿ ío dandòho ñaha-güedé xii-í, te cahni ñaha-güedé, dico nduu úní sá cúu-í te ndoto-í —càchí-gá xáhaⁿ-gá xii-güedé.

22 Te té Pèlú ní cana-dé Jèsús ìⁿ xio, te ní ngúita-dé ténáá ñáhá-dē xii-gá, te xáhaⁿ-dē:

—¡Sá vǎ càchí Ndiöxí sá dúcáⁿ ndòho-n chi ñá túu tau-n sǎ dúcáⁿ ndòho-n! —cachí-dé xáhaⁿ-dē xii-gá.

23 Te ndaa sátá Jèsús nútñi té Pèlú òré ducaⁿ xáhaⁿ-dē xii-gá núu ní nchócuilhnu-gá, te xáhaⁿ-gá xii-dé:

—¡Xocuñí yòhó yucu ñáváha núu-í-a chi dìcò quidé tñènu-n! Chi ñá túu sàni iní-ò dàtná sání iní Yá Ndiöxí chi ìⁿ-ni sàni iní-ò ndihi dava-gá

cue ñáyi ndècu ñuyú-a —
càchí-gã xãhaⁿ-gã xii-dé.

²⁴ Te sátá dúcáⁿ te ní
xáhaⁿ-gã xii nchaa cue téé xica
cuu ndihi-gá:

—Nchaa ñáyi cuení chit-
nahá ñhá xii-í, te xini ñuhu-xi
dañá-yu vá cáda-gã-yu sá
sání íní méé-yu, te ío cada
ndee íní-yu cundecu túha-yu
ndohó-yu cuendá-í, te cuéi
na ndohó-yu dàtná ndoho-í.

²⁵ Te nchaa ñáyi cuení sá
ñà túú tnàhí ná yáha cun-
decu ñuyú-a cuíta nihnú-yu,
dico nchaa ñáyi ñá túú
tnàhí yùhú cuéi nándi sá ná
yáha-yu cundecú-yu ñuyú-a
sá cuendá-í, te ñáyi-áⁿ naníhí
táhú-yu. ²⁶ Te cuéi nchaandi
túhú sá ío ñuyú-a na nihí
ñáyi cundecu ndihí-yu, dico
núu diu nchaa xiáⁿ ná càda
cuíta nihnú-yu te ñá túú
vèdana nàndihí-xi sá dúcáⁿ
ndècu ndihí-yu nchaa xiáⁿ.

Te ni ñⁿ sá ío ñuyú-a vá
chíndèe ñaha-xi xii-yu cuendá
naníhí táhú-yu. ²⁷ Te ndáá
quéé-xí tnùhu càháⁿ-í, chi
na quíxi tucu yùhú Téé cùu
ñaní tnáhã-yu nchaá-yu,
te dàvá-áⁿ quini-yu sá ío
càhnu cuu-í dàtná càhnu cuu
Tátá-í Dútú Ndiöxí, te quixi-í
ndihi cue espíritu xínú cuèchi
núú-gã, te dàvá-áⁿ cuãha-í
nchaa ñáyi sá ndúú tãhũ-yu
nàcuáa ndùu sá ní quidé-yu
ñⁿ ñⁿ-yu. ²⁸ Te na càchí
tnùhu ndáá-í xii-ndo sã ío
dava nchòhó ñáyi ndècu iha
vitna vá cùu-ni-ndo, chi cun-
decu-ni-ndo ndéé quini-ndó
quíxi tucu yùhú Téé cùu ñaní
tnáhã-ndó nchàa-ndo taxi

tnuní-í nchaa ñáyi —càchí-gá
xãhaⁿ-gã xii-güedé.

17

*Ní nadáma dóo Jèsús ndihi
núú-gã*

(Mr. 9:2-13; Lc. 9:28-36)

¹ Te núú ñnú nduu sá
dúcáⁿ ní cáháⁿ Jèsús, te ní
xica-gá cuásaá-gã ñⁿ yucu
dúcúⁿ, te ndèca-gá té Pèlú,
ndihi té Jàcobó, ndihi té Juàá
ñaní té Jàcobó-áⁿ cuásaá.
Te úní tnàhí-ni cue téé-áⁿ
ndécá-gã cuásaá. ² Te yucu-áⁿ
ndécú-gã ní nadáma núú-gã
ndihi dóó-gã, te núú-gã súúní
dátásaⁿ-xi dàtná quidé-xí núú
nchĩcanchii, te dóó-gã súúní
ní nduu cuixíⁿ dàtná cáá
ñùhú cuixíⁿ. ³ Te òré-ni-áⁿ ní
xiní-güedé ndí Moisés ndihi
té Èliás nùtnĩ-güedé ndihi-gá
ndátnùhu ndihi ñaha-güedé
xii-gá. ⁴ Te té Pèlú ní xáhaⁿ-dè
xii Jèsús:

—Mèstrú, ¡váha ní cuu sá
ndécú-ó iha vitna! Te núu
cuení-n, te na dàcaa-ndí úní
tnáhã vehe tnuxixiⁿ, te ñⁿ cuu
cuendá-n, te ñⁿ cuu cuendá
té Moisés, te ñⁿ cuu cuendá
té Èliás —càchí-dé xãhaⁿ-dè
xii-gã.

⁵ Te nini dùcaⁿ caháⁿ
té Pèlú ní quexio ñⁿ vícò
núú ndécú-güedé ní dáðahu
ñaha-xi xii-güedé te súúní
chãhnchí. Te xití vícò-áⁿ ní
tecú ní cáháⁿ Yá Ndiöxí, te
xãhaⁿ-gã xii-güedé:

—Téé-a cùu-dé Déhe-í téé ío
cùu íní-í, te ío cùdí íní-í-dé, te
cundedóho-ndo nchàa tnùhu
cáhã-dé —duha ní xáhaⁿ-gã
xii-güedé.

6 Te sá dúcáⁿ nǐ cáháⁿ Yă Ndiôxí ní tecú dôho cue tée xica cuu ndihi Jesús te ío ní yùhú-güedé, te ní ngüíñí xítí-güedé te ní nuu núú-güedé ndaa núú ñúhú. 7 Te Jèsús cuáháⁿ-gá núú xĩndecu cue tée xica cuu ndihi-gá, te ní tendaha ñaha-gá, te xáhaⁿ-gá xii-güedé:

—Chí ndácuñí, vá yùhú-ndó —càchí-gá xáhaⁿ-gá xii-güedé.

8 Te òré ní ndanehe núú-güedé, te ñá túú-gá ní xini-güedé cue tée úú-áⁿ chi mee-nă Jèsús. 9 Te òré cuánuu ndihi ñaha Jèsús xii-güedé tindúú-áⁿ, te ní xáhaⁿ-gá xii-güedé:

—Vá yô cúñaha-ndo nì ìⁿ sá nǐ xini-ndó núú nì sáá-ó-á, te cuu cáháⁿ-ndó dico ndéé ná yaha ndoto yùhú Tée cùu ñaní tnáhá-ndó nchàa-ndo sá cùú-í —càchí-gá xáhaⁿ-gá xii-güedé.

10 Te cue tée xica cuu ndihi-gá ní xáhaⁿ-güedé xii-gá:

—Cuini-ndí cachí tnúhu-n ná cuendá cue tée dâcuaha ñaha xii ñáyiu nchaa tnúhu ní chídó tnùnì ndí Moisés càchí-güedé sá dǐhna-gá té Èliás quixi, te dàtnùnì quixi Yaá tendaha Yă Ndiôxí quixi ñuyúú-a —càchí-güedé xáhaⁿ-güedé xii-gá.

11 Te Jèsús ní xáhaⁿ-gá xii-güedé:

—Ndáá sá códó nùu ìⁿ tée quixi-dé te cada-dé dàtná ní quide té Èliás te tée-áⁿ cada ndáá-dé nchaa nâcuáa cùu.

12 Te na càchí tnúhu-í xii-ndo

vítina sá sà ní quixi tée ní quide dàtná ní xóo cada té Èliás, te cue ñáyiu ñá túú ní cùtnunì iní-yu sá díú-dé, te ní quide ñahá-yu xii-dé nchaa nâcuáa ní quixi iní méě-yu, te diu-ni ducaⁿ càda ñaha tucú-yu xii yùhú Tée cùu ñaní tnáhá-yu ncháa-yu, chi dandòho ñahá-yu xii-í —càchí-gá xáhaⁿ-gá xii-güedé.

13 Te cue tée xica cuu ndihi-gá ní cutnùnì iní-güedé sá cuendá ndí Juáá tée ní xóo dacuàndute ñaha xii ñáyiu ní cáháⁿ-gá.

Jèsús quidé tãtna-gá ìⁿ tée cuechi tnáhá cuéhé xǐyihí
(Mr. 9:14-29; Lc. 9:37-43)

14 Te Jèsús ní nasáa-gá ndihi cue tée ní sáa ndihi-gá tindúú-áⁿ núú xĩndecu vai ñáyiu, te ní quexio ìⁿ tée núú-gá ní ngüíñí xítí-dé, te xáhaⁿ-dé xii-gá:

15 —Mèstrú, cundàhú iní déhe-í chi tnáhá-dé cuéhé xǐyihí, te ío dândoho ñaha-xi xii-dé, te ní cuu vai xito daquée ñaha-xi núú ñúhú xii-dé, te ní cuu vai tucu xito dangaunihnu ñaha-xi ndute xii-dé. 16 Te sa ndéca-í-dé ní quixi núú cué tée xica cuu ndihi-n dico ñá túú ní ndâcu-güedé cada tãtna ñaha-güedé xii-dé —càchí-dé xáhaⁿ-dé xii-gá.

17 Te Jèsús ní xáhaⁿ-gá xii nchaa ñáyiu xĩndecu-áⁿ:

—Nchaa nchòhó ñáyiu ndécu ñuyúú-a, ío sáa iní-ndó chi ñá túú cuini-ndó quindáa iní-ndó Yă Ndiôxí, te ní cuu vai nduu quide ndee iní-í

nchaa sá quidé-ndó. ¿Te ná ndéé ama vá dúcáⁿ-gã cada-ndo-i? Te chí cándèca tée cùhú-áⁿ táquixi iha — cachí-gá xãhaⁿ-gã xii-yu.

18 Te Jèsús ní tenáá-gá espíritú cúndihi yucu ñávãha yìhi ñaha xii tée-áⁿ, te ní quee ñaha-xi xii-dé, te òré-ni-áⁿ ñí ndúha-dé.

19 Te sáta dúcáⁿ te òré ndécú mée Jesús ndihi cue tée xica cuu ndihi-gá, te ní xicáⁿ tnúhú-güedé núú-gã, te xãhaⁿ-güedé xii-gá:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cúndihi yucu ñávãha yìhi ñaha xii tée-ãⁿ —cächí-güedé xãhaⁿ-güedé xii-gá.

20 Te Jèsús ní xãhaⁿ-gã xii-güedé:

—Te ñá túú ní ndàcu-ndo, chí ñá túú sàndáá ndisa iní-ndó Yã Ndiöxí. Te na cächí tnúhu ndáá-í xii-ndo sã nüu nchòhó quíndáá ndisa iní-ndó Yã Ndiöxí cuèdicó luha líí dàtná líhli ndíquín yutnu nàni mostázá, te ducaⁿ te cuu cúñaha-ndo xii ñí tindúú xocuíñí-xi núú ndécú-xí te xocuíñí-xi. Te nchaa núú sã vãha ndacu-ndo càda-ndo te núu na quíndáá iní ndisa-ndo Yã Ndiöxí. 21 Te xìni ñuhu-xi sá ío cáháⁿ ndihi-ndo-gã te ñá túú tnàhí ná caxi-ndo cáháⁿ ndihi-ndo-gã, te ducaⁿ te ndacu-ndo queñuhu-ndo espíritú cúndihi yucu ñávãha yìhi ñaha xii ñáyiu, dàtná cúú espíritú sá yíhí ñaha xii tée-ãⁿ ní cùu —cachí-gá xãhaⁿ-gã xii-güedé.

Jèsús càháⁿ tucu-gá sá cáhni ñàha-güedé xii-gá

(Mr. 9:30-32; Lc. 9:43-45)

22 Te nini xica cuu Jesús ndihi cue tée xica cuu ndihi-gá distritú Galileá, te ní xãhaⁿ-gã xii-güedé:

—Yúhú Tée cùu ñani tnàhá-ndó nchaa-ndo sáá ñí nduu te cuãha cuendá ñáhá-güedé xii-í núú cuè tée cùu úhú iní ñáhá, 23 te cahni ñaha-güedé xii-í dico nduu úní sá cùú-í te ndoto-í —cächí-gá xãhaⁿ-gã xii-güedé.

Te sá dúcáⁿ ñí xãhaⁿ-gã xii-güedé, te ío ní ndíhú iní-güedé.

Díhúⁿ cuendá veñúhu

24 Te òré ní quexio Jesús ndihi cue tée xica cuu ndihi-gá ñuú Capèrnaúm, te cue tée quide cobrá díhúⁿ cuendá veñúhu ní sáháⁿ-güedé ní cáháⁿ ndihi-güedé té Pèlú, te xãhaⁿ-güedé:

—¿Chãhu mèstrú-ndó úú díhúⁿ sã nání drãcmá cuendá veñúhu ãⁿ ñáhá? —cächí-güedé xãhaⁿ-güedé xii-dé.

25 Te té Pèlú ní xãhaⁿ-dë:

—Chãhu-dé —cächí-dé xãhaⁿ-dë xii-güedé.

Te té Pèlú cuánguihu-dé xití vehe núú ndécú Jèsús, te díhna-gá ní cáháⁿ-gá, te xãhaⁿ-gã xii-dé:

—Xímú, ¿nása sàni iní-n, ná cúú ñáyiu quide cobrá ñáhá cuè tée yìndaha ñáyiu ndècu ñuyíú-a cuendá nchaa sá ndúú yãhu ñuú-güedé ndihi cuendá nchaa díhúⁿ sã ngáútnàha, cue ñáyiu ñuú-güedé ãⁿ cuè ñáyiu véxi

xica quide cobrá-güedé? —
càchí-gá xăhaⁿ-gă xii-dé.

²⁶ Te té Pèlú ní xăhaⁿ-dë
xii-gá:

—Cue ñáyiú véxi xica
quide cobrá-güedé —càchí-dé
xăhaⁿ-dë xii-gá.

Te Jèsús ní xăhaⁿ-gă xii-dé:

—Te núu ducaⁿ te cue
ñáyiú ñuú-güedé ñá túú
nă chăhu-yu te núu ducaⁿ.

²⁷ Dico cuendá sá vă yôo
dasátú-ó ìní-xi, te cuaháⁿ
lâgúná te dàquée-n să tñí-n
chăcá xití ndute, te chácá
dîhnanuu na táva-n te cun-
dehe-n yùhu-di, chi yîhi ìⁿ
dîhúⁿ cuixíⁿ. Te dîhúⁿ-ăⁿ
canehe-n quihíⁿ cháhu-n
cuendá-í ndîhi cuendá-n, chi
dîhúⁿ-ăⁿ sa tnahá quéyăhu
cuendá-ó ndì ndúú-ó —
càchí-gá xăhaⁿ-gă xii-dé.

18

*Cue tée ndücu tñuhu núú
Jèsús yoo ío-gá cúnüu*

(Mr. 9:33-37; Lc. 9:46-48)

¹ Te sátá dúcáⁿ te cue
tée xica cuu ndîhi Jèsús
ní sáháⁿ-güedé núú-gă, te
xăhaⁿ-güedé xii-gá:

—Cachí tñuhu xii-ndí, yoo
ío-gá cúnüu núú cuè ñáyiú
yîndaha ñaha Yá Ndiöxí
—càchí-güedé xăhaⁿ-güedé
xii-gá.

² Te Jèsús ní cana-gá ìⁿ té
lîhli te ní sanutñî ñaha-gă
xii-dé cuádava tnuú-güedé.

³ Te xăhaⁿ-gă xii-güedé:

—Na càchí tñuhu ndáá-í
xii-ndo să nûu vă dáñá-ndó
nchàa sá ñà túú văha
quide-ndo, te nduu ndàhú
íní-ndó dàtná ndàhú ínì té

lîhli-a, te vâ ndúú tãhú-ndó
ndîhu ndaha ñaha Yá Ndiöxí
xii-ndo. ⁴ Te ñáyiú quide

datná quidé tē lîhli-a ndàhú
íní-yu, te ñá túú quide
cahnú-yu mēe-yu, ñáyiú-áⁿ
ïo cunüú-yu núú ndécú
Yă Ndiöxí táxí tñuní-gá.

⁵ Te nchaa ñáyiú na quèheⁿ
cuendá ìⁿ landú dàtná té
lîhli-a cuendá sá cúú ìní
ñáhă-yu xii-í ñá, te cada
íní-yu sá yûhú ní queheⁿ
cuendá-yu —càchí-gá xăhaⁿ-gă
xii-güedé.

*Quihi iní-ó vă cündècu-o
ichi cuehé ichi duha*

(Mr. 9:42-48; Lc. 17:1-2)

⁶ Te Jèsús xăhaⁿ tùcu-gá
xii-güedé:

—Te núu ìⁿ tée na
dàcaháⁿ-dé cue ñáyiú sàndáá
íní ñáhá xii-í cadá-yu nándi
sá cuèhé sá dúhá, te váha-gá
sá ná dàcutu ndeé-güedé ìⁿ
yúú yödó dücúⁿ-dë, te dàquée
ñaha-güedé xii-dé xití ndute
lâmár, te ñá díú să cündècu-dé
ducaⁿ càda-dé. ⁷ Te ndàhú
ní cuu nchaa ñáyiú xîndecu
ñuyúú-a, chi coo cue tée
dacaháⁿ ñáhá xî-yu cadá-yu
nándi sá cuèhé sá dúhá te
dacuití să dúcáⁿ càda-xi! Dico
ndàhú ní cuu cue tée ducaⁿ na
dàcaháⁿ ñáhá xî-yu cadá-yu
nándi sá cuèhé sá dúhá!

⁸ Te núu ìⁿ xio ndaha-ndo
àdi ìⁿ xio sáhá-ndó quide-xi
quide-ndo nándi sá cuèhé
sá dúhá, te quehndé-ndó
ná cuíta, chi váha-gá sá
nánîhí tãhú-ndó cuèi na
cuíta ìⁿ xio ndaha-ndo àdi
ìⁿ xio sáhá-ndó, te ñá díú să
quihíⁿ-ndó ñîhîí ní ndúú-ndó

núú ñùhú núú càyú. ⁹ Te núú ìⁿ xio tìnùu-ndo quide-xi quide-ndo nándi sá cuèhé sá dúhá, te tava-ndo na cuíta-xi, chi váha-gá sá nánihí tãhú-ndó cuèi na cuíta ìⁿ xio tìnùu-ndo, te ñá díú sã ndì ndúú xio núú-ndó quíhíⁿ-ndó núú ñùhú núú càyú.

Cuendá ìⁿ mbéé quiti ní xíta (Lc. 15:3-7)

¹⁰ Te vá dáquèè tihú-ndó cuè ñáyiu cùu cuendá-í cuèi cùú-yu ñáyiu ío ndàhú iní-xi. Te na càchí tnúhu-í xii-ndo sã cuè espíritú xínú cuèchi núú Yã Ndiòxí, cue espíritú néhé cuendá ñáhá xii-yu ñuyíú-a, nchaa-ni nduu nchaa-ni òré ndécú-xí núú Tãtã-í Dútú Ndiòxí Yaá ndécú àndiu. ¹¹ Te ducaⁿ chi yúhú Tée cùu ñaní tnáhá-ndó nchàa-ndo véxi-í ñuyíú-a dàcácu nihnu-í ñáyiu núú ùhú núú ndàhú, ñáyiu ta xíta nihnu cuáháⁿ.

¹² '¿Te nása sàni iní-ndó cuendá ìⁿ tée ndècu ìⁿ ciendú mbéé-xi?, chi núú na cuíta ìⁿ-dì te dàndóo-dé cùmídíó sãhúⁿ cùmí-dì cundecu-dì ìⁿ yucu te quíhíⁿ-dé cúnúndúcú-dé quiti ní xíta-áⁿ. ¹³ Te núú na nánihí-dè-dì, te nchòhó sa cùtnumí iní-ndó sã ìo-gá cudíí iní-dé cuendá quiti ní xíta-áⁿ òré naníhí-dè-dì dàcúúxí cùmídíó sãhúⁿ cùmí quiti ñá túú ní xíta-áⁿ. ¹⁴ Te ducaⁿ sãtnahá-xi quide Tátá-ó Dútú Ndiòxí Yaá ndécú àndiu, chi cuíní-gá sá vã cuíta ni ìⁿ cue ñáyiu cùu cuendá-gá.

Cada càhnu iní-ó sã quidé ñàha tnaha ñáyiu-o (Lc. 17:3)

¹⁵ Te núú ìⁿ ñáyiu ndècu ndìhi-ndo ní quidé-yu ìⁿ sá ñà túú tàú-yu cadá-yu sá cúú-xí-ndó, te cãháⁿ-ndó dõho-yu núú méé núú ìⁿ-ndó ndìhí-yu cuendá sá ná ndìxi cuèchi iní-yu sá ñà túú quide váha-yu. Te núú ní tñí-yu tnúhu ní xáhaⁿ-ndo xii-yu, te ní ndacu-ndo ñí nacanú ichi-ndõ-yu. ¹⁶ Te núú ñá túú ní cuíní-yu tñí-yu tnúhu xãhaⁿ-ndo xii-yu, te nducu-ndo ìⁿ àdi úú tnàhá cue tée canehe núú-güedé cuendá cundedóho-güedé nàcuáa ndùu tnúhu ndàtnúhu-ndo ndìhí-yu. ¹⁷ Te tnàhá cue tée-áⁿ cãháⁿ-güedé dóho-yu, dico núú ni tnúhu cãháⁿ cue tée-áⁿ ñà túú ní cuíní-yu tñí-yu, te dàtúu-ndo núú dàva-gá ñáyiu ndècu ndìhi-ndo ichi Xítóhó Jesu-crístú cuendá cutnùní iní-yu nàcuáa quide ñáyiu-áⁿ. Te núú ñáyiu ndècuèchi-áⁿ ñà túú ní cuíní-yu tñí-yu tnúhu sá ñí xáhaⁿ dàva-gá cue ñáyiu ndècu ichi-gá, te cada-ná iní-ndó sã cúú-yu ñáyiu ñá túú ndècu ichi Yã Ndiòxí dàtná cue tée cuìhna iní-xi quide cobrá ñáhá xii ñáyiu cuendá impuèstú.

¹⁸ Te na càchí tnúhu ndáá-í xii-ndo sã núu nchòhó ná càchí-ndó sã ndécú cuèchi ñáyiu, te diu-ni ducaⁿ cãháⁿ Yã Ndiòxí, àdi cachí-ndó sã ñà túú cuèchi-yu te diu-ni ducaⁿ cãháⁿ tucu-gá, te ducaⁿ chi nchòhó quidé-ndó nàcuáa cãháⁿ-gá.

¹⁹ Te na càchí tnúhu-í

xii-ndo sã nõu úú tnàhá-ndó cùu ìnnu-ndo caháⁿ ndìhi-ndo Tàtà-í Dútú Ndiòxí Yáá ndécú àndiù xicáⁿ-ndó nõù-gã nõu ná cúú sã cuiní-ndó, te taxi-gã nõu ná cúú sã xicáⁿ-ndó nõù-gã.
 20 Te nõu úú tnàhá-ndó àdi úní tnàhá-ndó nĩ natacá-ndó ìⁿ xichi cuendá sã ñúhú ìní ñáhá-ndó xii-í, te xiáⁿ ndécú ndìhi ñaha-í xii-ndo –càchí-gá xãhaⁿ-gã xii-güedé.

21 Te té Pèlú ní sáháⁿ ndehe yatni-dé nõu Jèsús, te xãhaⁿ-dë xii-gá:

–Mèstrú, cachí tnúhu xii-í ná daha xito cada càhnu ìní-í tnàha ñáyi-í te nõu ìⁿ sá ná càda ñahá-yu xii-í. ¿Cuèdicó úsá xito-ãⁿ? –càchí-dé xãhaⁿ-dë xii-gá.

22 Te Jèsús ní xãhaⁿ-gã xii-dé:

–Yúhú càchí-í sã ñà díú-ní úsá xito cada càhnu ìní-n-yu, chi únídico úxí xito ndìhi úsá ndìhi úsá xito cada càhnu ìní-n-yu –càchí-gá xãhaⁿ-gã xii-dé.

Cuendá tée ñá túú quide cahnu ìní tnàha ñáyi-í

23 Te xãhaⁿ tùcu-gá xii-güedé:

–Na càni-í ìⁿ cuèndú nõu-ndó nàcuáa tecú tnùní-ndó nàcuáa cada-xi òré ndìhu ndaha ñàha Yá Ndiòxí xii ñáyi. ìⁿ té yìndaha ñaha xii ñáyi ní sani ìní-dé sá cáda ndáá-dé ndìhi cue tée xinu cuechi nõu-dé cuendá nchaa sá tàú-güedé nõu-dé. 24 Te òré sa ní ngündecu túha-dé te ní quexìo ìⁿ tée xinu cuechi nõu-dé. Te tée-áⁿ tàú-dé cuéhé víhí díhúⁿ nõu-dé, chi tàú-dé úxí mìl díhúⁿ sã nání tàlentú.

25 Te tée xinu cuechi-áⁿ ñà túú díhúⁿ ndécú ndìhi-dé nacháhu-dé sá tàú-dé nõu patróoⁿ-dë-áⁿ, nõu xiáⁿ ní táuchíúⁿ tée cùu patróoⁿ-dë-áⁿ dico ñàha-güedé xii-dé ndìhi ñadìhí-dé ndìhi cue déhe-dé ndìhi nchaa sá ndécú ndìhi-dé cuendá nchaá-yu cuú-yu ñáyi ñà túú tnàhí dàñá quee nõu chíúⁿ patróoⁿ-xi, te ducaⁿ te ndéyáhu sá tàú-dé nõu patróoⁿ-dë. 26 Te tée xinu cuechi-áⁿ nĩ ngüñí xítí-dé nõu patróoⁿ-dë, te xãhaⁿ-dë: “Patróoⁿ, càháⁿ ndàhú-í nõu-n sã ìo ndee ìo càhnu cada ìní-n sã dúhá tàú-í nõu-n, te ñá túú nã cani ìní-n chi nacháhu-í nchaa sá tàú-í nõu-n”, càchí-dé xãhaⁿ-dë xii patróoⁿ-dë. 27 Te tée cùu patróoⁿ-dë-áⁿ nĩ cundàhú ìní ñáhá-dë xii-dé, te ní quide càhnu ìní ñáhá-dë, te ní dàñá ñàha-dé cuánuhú-dé. 28 Te tée xinu cuechi-áⁿ nĩ naníhí-dé ìⁿ tée xinu cuechi ndìhi-dé ichi cuánuhú-dé, te tée ní naníhí-dë-áⁿ tàú-dé sacú-ni díhúⁿ nõù-dé chi ìⁿ cièndú-ni díhúⁿ denàriù tàú-dé. Te ní tni-dé tée tàú nõu-dé-áⁿ dácüèhné ñáhá-dé xii-dé, te xãhaⁿ-dë: “Nacháhu sá tàú-n nõù-í”, càchí-dé xãhaⁿ-dë. 29 Te tée tàú-áⁿ nĩ ngüñí xítí-dé nõu tée dii nõù-xi tàú-dé-áⁿ, te xãhaⁿ-dë: “Càháⁿ ndàhú-í nõu-n sã cáda càhnu ìní ñáhá-n xii-í sá tàú-í nõu-n, te nacháhu cuèé-í nchaa sá tàú-í nõu-n”, càchí-dé xãhaⁿ-dë. 30 Dico tée dii nõù-xi tàú-dé-áⁿ ñà túú ní cuiní-dé cada ndee ìní-dé cundetu-dé nacháhu cuèé tée-áⁿ sã tàú-dé, chi ní chihi ñaha-dë vecáa cuendá yacáⁿ

quihí-dé ndéé nacháhu-dé nchaa sá tàú-dé. ³¹ Te dava-gá cue tée xínu cuechi ní xini-güedé nàcuáa ní quide tée-án, te ní cudééⁿ-güedé núú-dě, te ní sáháⁿ-güedé ní xitnúhu-güedé tée cùu patróonⁿ-güedé sá dúcáⁿ nĩ quide-dé. ³² Te tée cùu patróonⁿ-güedé-án nĩ cana-dé tée ducaⁿ nĩ quide-án, te ní

xáhaⁿ-dě: “Yòhó cúú-n ìⁿ tée ío cuihna iní-xi xínu cuechi núú-í, chí yúhú ní quide càhnu iní ñáhà-í xii-n cuendá nchaa sá tàú-n núú-í òré ní cáháⁿ ndàhú-n. ³³ Te tñahá yòhó tàú-n dùcaⁿ cada-n cada cahnu iní-n tée xínu cuechi ndihí-n núú-í cuendá nchaa sá tàú-dé núú-n dàtná ní quide ñaha-í xii-n nĩ quide càhnu iní-í cuendá nchaa sá tàú-n”, cächí tée cùu patróonⁿ-án xáhaⁿ-dě xii tée ducaⁿ nĩ quide-án. ³⁴ Te tée cùu patróonⁿ-án nĩ cudééⁿ víhí-dě sá dúcáⁿ nĩ quide tée-án, te ní táuchíúⁿ-dě dandòho ñaha-güedé xii-dé ndéé nacháhu-dé nchaa sá tàú-dé —duha ní cani Jèsús cuendú núú-güedé.

³⁵ Te xáhaⁿ tucu-gá xii-güedé:

—Dàtná ní quide tée cùu patróonⁿ-án nĩ dándóhó-dě tée tàú núú-dě-án dùcaⁿ càda ñaha Tàtá-í Dútú Ndiòxí Yaá ndécú àndiu xii-ndo, te núu vá ní yùhu ní iní-ndó càda cahnu iní-ndó sã quidé ñaha tñaha ñáyiu-ndo xii-ndo —cachí-gá xáhaⁿ-gã xii-güedé.

19

Jèsús càháⁿ-gá cuendá cue

ñáyiu dàña tñaha

(Mr. 10:1-12; Lc. 16:18)

¹ Te sátá nĩ yáha ducaⁿ nĩ cáháⁿ Jèsús, te ní ndee-gá distritú Galileá cuáháⁿ-gá ndàa ingá xio yúte Jòrdán yucu distritú Jùdeá. ² Te ío cuéhé ñáyiu nchícúⁿ ñáhá xii-gá cuáháⁿ, te yàcáⁿ ní quide tátna-gá nchaa ñáyiu cùhú.

³ Te ní quexìo ìⁿ úú cue tée cùu fariséú núú ndécú Jèsús xító ndéé ñáhá-güedé xii-gá núu nása cunduu tñuhu cáháⁿ-gá, te xáhaⁿ-güedé xii-gá:

—Véxi-ndí xicáⁿ tñuhú-ndí núú-n, ¿cuu dañá ìⁿ tée ñadhí-dé núu ndédani càa ìⁿ sá ñà túú cùndáá-yu-án? —cächí-güedé xáhaⁿ-güedé xii-gá.

⁴ Te Jèsús ní xáhaⁿ-gã xii-güedé:

—Te nchòhó, ¿náa ñá túú dàcuaha-ndo núú tütú Yã Ndiòxí, te diu núú tütú-gá càháⁿ-xi sá cùtñahá ní cadúha-gá ñáyiu, te tée ñadhí ní cadúha-gá-án? ⁵ Te duha cächí tucu-xi núú tütú Yã Ndiòxí nàcuáa ní cáháⁿ-gá: “Cue tée na nihí ñadhí-xi te dîⁿ-ná cada-güedé tátá-güedé ndihí nãná-güedé, chí ñadhí-nã-güedé cuu cuu ndihí-güedé, te cada iní-ndó sã ìⁿ-nã yiqui cùñú cuú-yu cundecú-yu”, duha cächí Yã Ndiòxí núú tütú-gá. ⁶ Te xiãⁿ núu cada iní-ndó sã cué ñáyiu úú-án ìⁿ-nã yiqui cùñú cúú-yu, te ñá túú-gã ndi dîⁿ ndí dîⁿ yiqui cuñú cúú-yu. Núu xiãⁿ ñá túú nduu váha-xi

daña cuè téé ñadìhí-güedé, chi mee Yă Ndiöxí ní cachí-gá sá cúú ũú-yu cundecú-yu — cächí Jèsús xăhaⁿ-gă xii-güedé.

7 Te ní xăhaⁿ-güedé xii Jèsús:

—Te núu ducaⁿ, ¿te ná cuendá ndíi Moisés ní cachí ndíi sá núu ìⁿ téé cuìní-dé daña-dé ñadìhí-dé, te cuu cadúha-dé ìⁿ tutú núú càháⁿ-xi sá ní dăná-dé ñadìhí-dé, te ducaⁿ te cuu daña ñaha-dé ní cachí ndíi văⁿ? —cächí-güedé xăhaⁿ-güedé xii-gă.

8 Te Jèsús ní xăhaⁿ-gă xii-güedé:

—Te ducaⁿ ní cachí ndíi Moisés sá cúú dăña-ndo ñadìhí-ndó, chi nchòhó ío sáa iní-ndó, dico ndéé díhna chi ní tecú tñuhu nchaa cue téé sá vă dăná-güedé ñadìhí-güedé.

9 Dico yúhú cächí tñuhu-í xii-ndo sá núu ìⁿ téé na dăña-dé ñadìhí-dé te naqueheⁿ-dé ingá ñadìhí te ío nèhé quídé-dé, te núu ñá díú cuendá sá càháⁿ ndihí-aⁿ ingá téé ducaⁿ na dăña ñaha-dé. Te sá dúcáⁿ cuendá-ni na dăña ìⁿ téé ñadìhí-dé, te ìⁿ-ni cuèchi cùu-xi ndihí cuèchi quíde téé ndèca ñadìhí te càháⁿ ndihí-dé ingá ñadìhí — cächí-gă xăhaⁿ-gă xii-güedé.

10 Te cue téé xica cuu ndihí-gă ní xăhaⁿ-güedé xii-gă:

—Te núu ducaⁿ cùu cuendá cue téé ndihí ñadìhí-güedé, te váha-gă sá vă cándèca cue téé ñadìhí —cächí-güedé xăhaⁿ-güedé xii-gă.

11 Te Jèsús ní xăhaⁿ-gă xii-güedé:

—Ñá ncháá ñăyiu ducaⁿ nduu táhú-yu cundecú-yu, chi mee-ni ñăyiu ní cachí Yă Ndiöxí sá dúcáⁿ tñahí nduu táhú cundecu mee. 12 Te ío cue téé ducaⁿ tñahí ní nduu táhú-güedé ndéé òré ní cacu-güedé sá vă cándèca-güedé ñadìhí. Te ío cue téé ñá ndácú-güedé candeca-güedé ñadìhí cuendá sá ní quíde ñaha dăva-gă cue tñaha téé-güedé xii-güedé. Te dăva-güedé ñá túú cándeca-güedé ñadìhí chi cuìní-güedé sá vă dăná ndèé-güedé cunu cuechi-güedé núú Yă Ndiöxí. Te nchaa cue téé ducaⁿ ní nduu táhú núú Yă Ndiöxí cundecu mee, te váha-ni te núu na cundecu mee-güedé — cächí-gă xăhaⁿ-gă xii-güedé.

Jèsús xicáⁿ táhú-gă núú Yă Ndiöxí cuendá landú
(Mr. 10:13-16; Lc. 18:15-17)

13 Te ìⁿ ũú ñăyiu ndècá-yu landú líhli cuáháⁿ núú Jèsús, chi cuìní-yu sá téndaha ñaha-gă xii-güexi, te cacáⁿ táhú-gă núú Yă Ndiöxí cuendá-güexi. Te cue téé xica cuu ndihí-gă ní ngúita-güedé ténáá ñahá-güedé xí-yu, te xăhaⁿ-güedé sá vă dúcáⁿ cadá-yu. 14 Te Jèsús ní xăhaⁿ-gă xii-güedé:

—Chí dăná ná quíxi nahi cue landú líhli-áⁿ núú-í-a, te vá càdí-ndó ìchi-güexi, chi dătná cúú văha iní cue landú líhli-áⁿ ducaⁿ cùu váha iní cue ñăyiu yíndaha ñaha Yă Ndiöxí —cächí-gă xăhaⁿ-gă xii-güedé.

15 Te ní tendaha ñàha-gá xii-güexi, te ní xicáⁿ táhú-gá núú Yá Ndiöxí cuèndá-güexi, te sátá dúcáⁿ ñí quide-gá te ní xica-gá cuáháⁿ-gá.

Ïⁿ téé cuica càháⁿ ndihi-dé Jèsús

(Mr. 10:17-31; Lc. 18:18-30)

16 Te ïⁿ téé cuechi ñí quexio-dé núú ndécú Jèsús, te xicáⁿ tnúhú-dě núú-gá, te xáhaⁿ-dě xii-gá:

—Yöhó Mèstrú, cùu-n téé ío váha iní-xi, te cuiní-í nùu vá cùndèe iní-n càchí tnúhu-n ná cúú sá váha cada-í cuèndá nduu táhù-í cundecu-í ndihi Yá Ndiöxí ñí caa ñí quíhíⁿ — càchí-dé xáhaⁿ-dě xii-gá.

17 Te Jèsús ní xáhaⁿ-gá xii-dé:

—¿Te cùtnuní iní-n nàcuáa ndúu tnúhu càháⁿ-n sá yùhú váha iní-áⁿ?, chi ïⁿdii díí-ñí Yá Ndiöxí ío váha iní-gá. Te núu cuiní-n nàníhí táhú-n te tñi-n nchàa tnúhu càháⁿ Yá Ndiöxí, tnúhu sá sánú ìchi ñàha xii ñáyiú nàcuáa cadá-yu cundecu-yu —càchí-gá xáhaⁿ-gá xii-dé.

18 Te téé cuechi-áⁿ ní xáhaⁿ-dě xii-gá:

—¿Te ndëndida càa tnúhu càháⁿ Yá Ndiöxí cada-í-i? —càchí-dé xáhaⁿ-dě xii-gá.

Te Jèsús ní xáhaⁿ-gá xii-dé:

—Te duha ní cachí Yá Ndiöxí cada ñáyiú: “Vá cáhni-ndó tnàha ñáyiú-ndo, vá càháⁿ ndihi-ndo ñàdihí te núu ñá díú ñàdihí-ndó cùu-yu, te ducaⁿ-ni nchòhó cue ñáyiú dihí tucu vá càháⁿ ndihi-ndo tée te núu ñá díú yíi-ndo cuu-güedé, te vá dúhú-ndó sá ndécú

ndihi tnàha ñáyiú-ndo, vá dácàcu-ndo cuéchi neñúú sá cúú-xí tnàha ñáyiú-ndo. 19 Te canehe-ndo sá yíñuhu núú tātá-ndó ndihi núú náná-ndó, te cundàhú iní-ndó tnàha ñáyiú-ndo dàtná cundàhú iní-ndó mèe-ndo”, duha ní cachí Yá Ndiöxí cada ñáyiú —càchí-gá xáhaⁿ-gá xii-dé.

20 Te téé cuechi-áⁿ ní xáhaⁿ-dě xii-gá:

—Nchaa xíáⁿ ní ngüíta-í quidè-í ndéé cùtnàhá cúú làndú-í, ¿te vitna nágá cúmání cada-í-i? —càchí-dé xáhaⁿ-dě xii-gá.

21 Te Jèsús ní xáhaⁿ-gá xii-dé:

—Te núu cuiní-n cùu-n ïⁿ téé ío váha cada ndáá, te cuáháⁿ dico-n nchàa sá ndécú ndihi-n, te díhúⁿ-n cuáha táhú-n cuè ñáyiú ndàhú, te ducaⁿ te nduu táhú-n ngündecu váha-n nùú ndécú Yá Ndiöxí táxí tnùn-í-gá. Te sátá ná yáha ducaⁿ càda-n te quixi-n chìtnahá ñáhá-n xii-í —càchí-gá xáhaⁿ-gá xii-dé.

22 Te sá dúcáⁿ ñí xáhaⁿ Jèsús xii-dé te ío ní cundiýi-dé, chi ío cuica-dě, te ní xica-dé cuáháⁿ-dé.

23 Te Jèsús ní xáhaⁿ-gá xii cue téé xica cuu ndihi-gá:

—Na càchí tnúhu ndáá-í xii-ndo sá ío úhú quíndáá iní ñàha cuè ñáyiú cuica xii Yá Ndiöxí cuèndá ndíhu ndaha ñàha-gá xii-yu. 24 Te na càchí tnúhu tucu-í xii-ndo sá yáchí-gá yáha ïⁿ caméyu yaú ïⁿ yiqui ticú dácúxí sá quíndáá iní ïⁿ ñáyiú cuica Yá Ndiöxí cuèndá ndíhu ndaha

ñàha-gá xii-yu —càchí-gá xăhaⁿ-gă xii-güedé.

25 Te sá dúcáⁿ ñí cáháⁿ Jèsús, xiăⁿ ío ní cuñúhu cue tée xica cuu ndihi-gá, te ní ngúíta-güedé xitnàha-güedé:

—¿Yoo naníhí tǎhú te núu ducaⁿ vǎiⁿ? —càchí-güedé xitnàha-güedé.

26 Te Jèsús ní ndacoto-gá núu-güedé, te xăhaⁿ-gă xii-güedé:

—Nchaa ñáyiú ñuyú-a chi vá ndácú-yu ná cadá-yu nàcuáa ndíhu ndaha ñàha Yá Ndióxi xii-yu, dico mee-gă chi ndacu-gá ndíhu ndaha ñàha-gá xii-yu chi nchaandi túhú sá vǎha ndàcu-gá quidé-gă —càchí-gá xăhaⁿ-gă xii-güedé.

27 Te té Pèlú ní xăhaⁿ-dě xii-gá:

—Nchúhú ní dándöo-ndí nchaa sá ndécú ndihi-ndí, te ní tuha ñaha-ndí xii-n, ¿te ná cúú sǎ ñihí-ndí nduu táhú-ndí sá dúcáⁿ ñí quide-ndí-i? —càchí-dé xăhaⁿ-dě xii-gá.

28 Te Jèsús ní xăhaⁿ-gă xii-güedé:

—Na càchí tnúhu ndáá-í xii-ndo sǎ ná sǎá nduu, ndüu saa nchaa sá ío andüu ndihi ñuyú-a, te dǎvá-áⁿ cunucóo yúhú Téé cùu ñaní tnáhá-ndó nchàa-ndo ñí núu xilé váha, te nchaa ñáyiú quini-yu sá ío càhnu cuu-í, te nchòhó cue téé ní tuha ñaha xii-í tnáhá-ndó cunucóo-ndo núu ñí caa xilé váha ndí ùxúú tnáhá-ndó, te xiăⁿ cunucóo-ndo càda ndáá-ndó cuéchi ndí ùxúú xichi cue ñáyiú isráél. 29 Te nchaa ñáyiú na dándöo vehe-xi,

àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu ducaⁿ na càdá-yu sá cuendá-í te ío-gá cuéhé sǎ cuǎñaha Yá Ndióxi cundecu ndihi-yu, te ñá díú-ní xiăⁿ chi tnáhá nduu táhú-yu cundecú-yu ndihi-gá ñí caa ñí quíhíⁿ. 30 Te dava ñáyiú cùnnu ndecu ichi Yá Ndióxi vitna, ñáyiú-áⁿ sǎá nduu te vá ío-gá cunúú-yu dàtná cùnúú-yu vitna, te dava ñáyiú nchícúⁿ ñá túú cùnnu vitna, ñáyiú-áⁿ sǎá nduu te ío cunúú-yu —càchí-gá xăhaⁿ-gă xii-güedé.

20

Cuendá cue téé quide chiuⁿ

1 Te xăhaⁿ tucu Jesús xii cue téé xica cuu ndihi-gá:

—Na càni-í ñí cuendú núu-ndó cuendá tecú tnùn-ndó nàcuáa cada-xi òré ndíhu ndaha ñàha Yá Ndióxi xii ñáyiú. ñí téé ní xitu-dé yoho yàha stilé, te ñí nduu ní quee-dé nehé-ñí cuándúcú-dé cue téé cada chiuⁿ núu dúcáⁿ ñí xitu-dé yoho yàha stilé-áⁿ.

2 Te òré ní níhí-dé cue téé cada chiuⁿ-áⁿ, te ní quide ndáá-dé ndihi-güedé sá chǎhu ñaha-dě xii-güedé ñí díhúⁿ denàriú ñí nduu. Te sátá dúcáⁿ te ní tendaha ñàha-dé xii-güedé cuáháⁿ-güedé cada chiuⁿ-güedé núu dúcáⁿ ñí xitu-dé yoho yàha stilé-áⁿ.

3 Te dàtnúni ní xica tucu-dé cuáháⁿ-dé dàtná òré caa ñí dàtnéé cuándúcú-gă-dé cue téé cada chiuⁿ núu ñí xitu-dé yoho yàha stilé-áⁿ, te

ní xiní-dé x̄nutn̄īī ì̄n̄ ũú cue tée núú yáhu te ñá túú nã ch̄iun̄ xíquide-güedé. ⁴ Te ní xáhaⁿ-dẽ xii-güedé: “Ñá túú cùdana cuyáchí-ndó càda-ndo ch̄iun̄-í te cháhu ñaha-ĩ xii-ndo nãcuáa tàú-xi cunduu-ãⁿ”, càchí-dé xãhaⁿ-dẽ xii-güedé. Te cue tée-áⁿ ñí sáha-güedé tnúhu cada ch̄iun̄-güedé te ní xica-güedé cuáháⁿ-güedé. ⁵ Te tée ní xitu yoho yàha stilé-áⁿ ñí xica tucu-dé dàtná òré caúxúú nduu cuándúcú-gã-dé cue tée cada ch̄iun̄-dé, te ní níhí tucu-dé cue tée cada ch̄iun̄. Te ní quee tucu-dé dàtná òré caá úní sacuaa, te ðiu-ni ducaⁿ ñí quide tucu-dé. ⁶ Te ní quee tucu-dé dàtná òré caá úhúⁿ sacuaa cuándúcú-gã-dé cue tée cada ch̄iun̄-dé, te ní xiní-dé x̄nutn̄īī ì̄n̄ ũú cue tée ðiu-ni núú yáhu-áⁿ te ñá túú nã ch̄iun̄ quide-güedé, te ní xáhaⁿ-dẽ xii-güedé: “Sànuu sá nchòhó ní cuu nchàca vitna ñá túú ñihí-ndó ch̄iun̄ cada-ndo”, cachí-dé xãhaⁿ-dẽ xii-güedé. ⁷ Te cue tée-áⁿ ñí xáhaⁿ-güedé xii-dé: “Ñá túú ñihí-ndí ch̄iun̄ cada-ndí chi vá yõ ndùcu ñaha xii-ndí”, càchí-güedé xãhaⁿ-güedé xii-dé. Te ní xáhaⁿ-dẽ xii-güedé: “Yúhú taxi-í ch̄iun̄ cada-ndo, te quíhíⁿ-ndó núú ñí xitu-í yoho yàha stilé yacáⁿ cada ch̄iun̄-ndo, te cháhu ñaha-ĩ xii-ndo nãcuáa tàú-xi cunduu”, càchí-dé xãhaⁿ-dẽ xii-güedé. ⁸ Te sátá ñí dáhu nchíanchii, te tée ðii ch̄iun̄-xi-áⁿ ñí xáhaⁿ-dẽ xii tée tàxi tnuní ñáhá xii cue tée quide ch̄iun̄-áⁿ: “Cúñaha

xii nchaa cue tée quide ch̄iun̄-áⁿ ná quíxí-güedé te cháhu-n-güedé, te díhna-gá cue tée nchícúⁿ cuiⁿ-nã cuánguihu núú chíúⁿ ngüíta-n chãhu-n, te ndéé núú ñí ndihí-ná cháhu-n cuè tée cuánguihu díhna nuu-gã núú chíúⁿ”, càchí-dé xãhaⁿ-dẽ xii tée tàxi tnuní ñáhá xii cue tée quide ch̄iun̄-áⁿ. ⁹ Te díhna-gá cue tée cuánguihu caá úhúⁿ sacuaa ní quexio-güedé cuendá cháhu ñaha-dẽ, te ní cháhu ñaha-dẽ ì̄n̄ caa díhúⁿ denàriú xii ì̄n̄ ì̄n̄-güedé. ¹⁰ Te sátá ñí cháhu-dé dava-gá cue tée ní quide ch̄iun̄. Te ndéé núú ñí ndihí-ná ní cháhu-dé cue tée cuánguihu díhna nuu-gã núú chíúⁿ. Te cue tée-áⁿ ñí sani iní-güedé sá vái-gã cháhu ñaha-dẽ xii-güedé, dico ñáhá chi ì̄n̄ caa-ni díhúⁿ denàriú ní cháhu ñaha-dẽ xii ì̄n̄ ì̄n̄-güedé. ¹¹ Te cue tée-áⁿ ñí queheⁿ cuendá-güedé díhúⁿ-güedé dico ñá túú ní quide váha-xi iní-güedé. ¹² Te ní xáhaⁿ-güedé xii tée ðii ch̄iun̄-xi ní quide-güedé: “¿Ná cuendá cue tée nchícúⁿ cuiⁿ-nã cuánguihu núú chíúⁿ ì̄n̄-ni ñí cháhu ñaha-n xii-ndí ndihí-güedé, te ì̄n̄ ðii oré duha ní quide ch̄iun̄-güedé? Te nchúhú nchàca nchaa ní sahani iní-ndí ní quide ch̄iun̄-ndí, te ní ndoho-ndí cahni, te ì̄n̄-ni ñí cháhu ñaha-n xii-ndí ndihí-güedé”, càchí-güedé xãhaⁿ-güedé xii tée ðii ch̄iun̄-xi ní quide-güedé. ¹³ Te tée ðii ch̄iun̄-xi ní quide-güedé-áⁿ ñí xáhaⁿ-dẽ xii ì̄n̄ tée-áⁿ: “Yòhó,

ñá túú quide-í ìⁿ sá ñà túú tǎu-í cada-í sá cúú-xí-n, chi ní quide ndáá-ó sǎ díú-ní ìⁿ díhúⁿ denàriú cháhu ñaha-í xii-n ìⁿ nduu. ¹⁴ Te vitna queheⁿ díhúⁿ cuendá nduu-n te núhú-n, chi yúhú cuení-í sá ìⁿ-ní cháhu ñaha-í xii-n ndíhi cue téé nchicúⁿ cuíⁿ-ná cuánguⁿhu núú chíúⁿ. ¹⁵ Chi yúhú cuu-ni cada-í nání cuení-í ndíhi díhúⁿ-í, ¿adi dico ñá túú quide váha-xi iní-n sǎ dúhá cundahú iní-í cue téé-áⁿ ducaⁿ cháhu-í-güedé?”, cǎchí téé cùu patróoⁿ-áⁿ xǎhaⁿ-dē xii téé-áⁿ. Duha ndúu cuendú cání-í núú-ndó. ¹⁶ Te duha cǎháⁿ-í chi dava ñáiyu cunu ndecu ichi Yá Ndióxi vitna sáá nduu te vá cunu vihi-gá-yu dátá cunuú-yu vitna, te dava ñáiyu ñá túú cunu vitna sáá nduu ío cunuú-yu. Te ío cuéhé ñáiyu cǎháⁿ ñáhá Yá Ndióxi xii-yu dico sacú-ni-yu nduu táhú-yu cundecú-yu ndíhi-gá –cǎchí-gá xǎhaⁿ-gǎ xii-güedé.

Jésus cǎháⁿ tucu-gá sá cǎhni ñaha-güedé xii-gá

(Mr. 10:32-34; Lc. 18:31-34)

¹⁷ Te ñuhu Jesús ichi cuasaá-gá ñuú Jerusálén ndíhi cue téé xica cuu ndíhi-gá, te ní cana ñaha-gǎ xii-güedé ní naníhí tnáhá-güedé ndíhi-gá, te ta ndàtnúhu ndíhi ñaha-gǎ xii-güedé cuáháⁿ, te xǎhaⁿ-gǎ xii-güedé:

¹⁸ –Vitna ñuhu-o ichi cuasaá-ó ñuú Jerusálén, te yácaⁿ cuáha cuendá ñáhá-güedé xii yúhú Téé cùu ñaní tnáhá-ndó nchàa-ndo núú cué téé cùu dútú cunuú,

ndíhi núú cué téé dàcuaha ñaha xii ñáiyu nchaa tnúhu ní chídó tnúni ndíi Moisés. Te díu cue téé-áⁿ cǎñaha-güedé xii dava-gá cue téé sá cǎhni ñaha-güedé xii-í. ¹⁹ Te cuáha cuendá ñáhá-güedé xii-í núú cué téé ñá túú cùu cue téé isràél, te cue téé-áⁿ cudíqui ndeé ñáhá-güedé xii-í, te caniha-güedé ndíhi ñí, te dátñuní cata caa ñaha-güedé xii-í núú cùrúxí te núú cùrúxí-áⁿ cuú-í, dico nduu úní sá cuú-í te ndoto-í –cǎchí-gá xǎhaⁿ-gǎ xii-güedé.

Nǎná té Jàcobó ndíhi té Juáá cuení-aⁿ sá cunuú-güedé ndíhi Jèsús

(Mr. 10:35-45)

²⁰ Te cue déhe té Zebèdeú té Jàcobó ndíhi té Juáá ndéca ñaha náná-güedé xii-güedé cuáháⁿ núú ndécú Jèsús, te òré ní quexío-aⁿ ndíhi-güedé núú ndécú-gǎ te ní ngüíñí xítí-áⁿ núú-gǎ cuendá cuení-aⁿ ndàtnúhu ndíhi ñaha-aⁿ xii-gá cuendá sá cúú-xí cué déhe-aⁿ. ²¹ Te cùmání-gǎ cǎháⁿ-aⁿ te ní xícáⁿ tnúhú Jèsús núú-aⁿ, te xǎhaⁿ-gǎ:

–¿Ná cuení-n? –cǎchí-gá xǎhaⁿ-gǎ xii-aⁿ.

Te ní xáhaⁿ-aⁿ xii-gá:

–Véxi-í cǎháⁿ ndàhú-í núú-n núu vá cundèe iní-n cùnucóo ìⁿ déhe-í-a xio cùha-n, te ingá-dé cunucóo-dé xio dátñi-n na saá nduu cùnucóo-n núú táxi tnúni-n –cǎchí-áⁿ xǎhaⁿ-aⁿ xii-gá.

²² Te Jèsús ní xáhaⁿ-gǎ xii úú cue téé-áⁿ:

–Nchòhó, ñá túú cùnnumí váha iní-ndó nàcuáa ndúu

sá xìcáⁿ-ndó nùu-í. ¿Te náa cundee ìní-ndó dândoho ñaha ñáyiú xii-ndo dàtná dândoho ñahá-yu xii-í, te cundee tùcu ìní-ndó càhni ñahá-yu xii-ndo dàtná cahni ñahá-yu xii-í-ǎⁿ? —càchí-gá xǎhaⁿ-gǎ xii-güedé.

Te ní xáhaⁿ-güedé xii-gá:

—Cundee ìní-ndí yáha-ndí nchaa nàcuáa càháⁿ-n-ǎⁿ —càchí-güedé xǎhaⁿ-güedé xii-gá.

²³ Te Jèsús ní xáhaⁿ-gǎ xii-güedé:

—Ndáá sá cündèe ìní-ndó ndòho-ndo nchaa nacuáa ndoho-í, dico sá dúcáⁿ cuìní-ndó sǎ ñⁿ-ndó cùnucóo-ndo xìo cuha-í, te ñⁿ-ndo cùnucóo-ndo xìo datni-í, te xíǎⁿ chi ñá díú yǎhú tàú-í cachí-í nùu sá cúú cùnucóo-ndo àdi sá vǎ cúú cùnucóo-ndo, chi mee Tàtà-í Dútú Ndiòxí cachí-gá te núu ná cúú ñáyiú nduu táhú cunucóo dìñi-í dàvá-áⁿ —càchí-gá xǎhaⁿ-gǎ xii-güedé.

²⁴ Te òré ní níhí ùxi-gá cue téé xìca cuu ndihi-gá tnúhu nàcuáa ndùu sá cuìní cue téé úú-áⁿ, te ní cudééⁿ-güedé núu cuè téé úú-áⁿ. ²⁵ Te Jèsús ní cana-gá nchaa cue téé xìca cuu ndihi-gá, te ní xáhaⁿ-gǎ xii-güedé:

—Nchòhó xìní-ndó sǎ cuè téé yìndaha nacióⁿ quidé-güedé sá ïo cùnuu-güedé, te nchaa dava-gá cue téé cùnuu ndihi-güedé quidé-güedé tnàhá-güedé sá ïo cùnuu-güedé. ²⁶ Dico nchòhó chi vá dúcáⁿ càda-ndo, chi núu dava-ndo cuìní-ndó cùnuu-ndo, te xìni ñuhu-xi cunu cuechi núu tnàhá-ndó

te vá cadá-ndó sǎ cúnùu-ndo. ²⁷ Te núu dava-ndo cuìní-ndó quène càva-ndo, te cuu-ndo dàtná cue ñáyiú ñá túú tnàhí dàñá quee núu chíúⁿ pàtróóⁿ-xi cunu cuechi núu tnàhá-ndó. ²⁸ Te cada-ndo dàtná quidé yǎhú Téé cùu ñaní tnàhá-ndó nchaa-ndo, chi yúhú véxi-í ñuyúú-a dico ñá díú sǎ cúnú cuèchi ñáyiú núu-í chi véxi-í sá cúnú cuèchi-í núu-yu. Te cuú-í ñuyúú-a cuèndá vǎi-yu cácu nihnú-yu núu ùhú núu ndàhú —càchí-gá xǎhaⁿ-gǎ xii-güedé.

Jèsús quidé tǎtna-gá núu úú tnàhá cue téé cuáá
(Mr. 10:46-52; Lc. 18:35-43)

²⁹ Te òré ní quee Jèsús ñuú Jericó ndihi cue téé xìca cuu ndihi-gá, te cuéhé víhí ñáyiú nchìcúⁿ ñahá xii-gá cuáháⁿ. ³⁰ Te yuhu ìchi cuáháⁿ-gá xǎnucóo úú tnàhá cue téé cuáá, te cue téé-áⁿ ñí cutnùnì ìní-güedé sá Jèsús ñúhú-gǎ ìchi-áⁿ te ní ngúíta-güedé níhi càháⁿ-güedé, te xǎhaⁿ-güedé xii-gá:

—¡Yòhó Mèstrú, ñaní tnàhá ndíi Dàví, cundàhú ìní ñahá xii-ndí! —càchí-güedé xǎhaⁿ-güedé xii-gá.

³¹ Te cue ñáyiú tènaá ñahá-yu xii-güedé, te xǎhǎⁿ-yu sá ná càdí-güedé yuhu-güedé, dico uuⁿ-gá níhi ní càháⁿ-güedé, te xǎhaⁿ-güedé xii-gá:

—¡Yòhó Mèstrú, ñaní tnàhá ndíi Dàví, cundàhú ìní ñahá xii-ndí! —càchí-güedé xǎhaⁿ-güedé xii-gá.

32 Te ní ngüíñi Jèsús te ní cana ñaha-gã xii-güedé, te ní xicáⁿ tnúhú-gã núú-güedé, te xãhaⁿ-gã:

—¿Ná cuíni-ndó càda ñaha-í xii-ndo-i? —càchí-gá xãhaⁿ-gã xii-güedé.

33 Te ní xãhaⁿ-güedé xii-gá:

—Mèstrú, cuíni-ndí sá cáda tátna-ñ núú-ndí cuèndá cundehe-ndí —càchí-güedé xãhaⁿ-güedé xii-gá.

34 Te Jèsús ní cundàhú iní ñáhá-gã xii-güedé, te ní tendaha-gã núú-güedé. Te òré-ni ní ndúha núú-güedé, te nchicúⁿ ñáhá-güedé xii-gá cuáháⁿ.

21

Jèsús cuánguihu-gá ñuú Jerusálén

(Mr. 11:1-11; Lc. 19:28-40; Jn. 12:12-19)

1 Te òré sa ta cùyatni Jesús ndihi cue téé xica cuu ndihi-gá ñuú Jerusálén, te ní quexìo-gá ndihi-güedé yatni víi-nã ñuú Bètfaqé, te xíáⁿ cáá yùcu nani Olívú. Te ní ndatnúhu-gá ndihi úú cue téé xica cuu ndihi-gá, ² te ní xãhaⁿ-gã xii-güedé:

—Chí cuáháⁿ ñuú cáá yàtni yacáⁿ, te òré quexìo-ndo yacáⁿ te nanihí-ndó ñⁿ búrru dìhí ndètníi-di ndihi déhe-di, te nandaxi-ndo-güèdi te candeca-ndo-güèdi quixi.

³ Te núú ío ñáyiu dàdahaⁿ ñaha xii-güedi, te cúñaha-ndo xii-yu sá yúhú Yaá xicá cùu ndihi-ndo xini ñuhu-í-güedi, te ndíhi-ni natendaha-í-güedi

núhú-güedi cúñaha-ndo — càchí-gá xãhaⁿ-gã xii-güedé.

4 Te ducaⁿ ñi cuu chi ní quee ndáá-xi nàcuáa ní chídó tnùní ñⁿ téé ní xóo cáháⁿ tnúhu Yá Ndiòxí ndéé sanaha núú tütú-gá núú càchí-xi:

5 Chí cúñaha cuè ñáyiu ñuú Sión ná cáda cuèndá-yu, chi véxi téé yìndaha ñaha xii-yu yòdo-dé ñⁿ búrru líhli déhe ñⁿ búrru quiti sa xido,

te cùu-dé ñⁿ téé ío ndàhú iní-xi.

Duha ní chídó tnùní ñⁿ téé ní xóo cáháⁿ tnúhu Yá Ndiòxí ndéé sanaha núú tütú-gá.

6 Te cue téé xica cuu ndihi-gá ní xica-güedé cuáháⁿ-güedé, te ní quide-güedé nàcuáa ní xãhaⁿ-gã xii-güedé cada-güedé.

⁷ Te ní ndexìo-güedé ndécá-güedé ñⁿ búrru dìhí ndihi déhe-di, te ní sacáⁿ ndodo-güedé dóo-güedé sátá-güedi, te dàtnùní cuáasá Jèsús sátá ñⁿ-di ní ngódó ñaha-gã xii-di. ⁸ Te ío cuéhé ñáyiu ta sàcáⁿ-yu dóo-yu ichi cuáháⁿ-gã cuèndá núú dõo-yu-áⁿ yãha-gã ndihi quiti yòdo-gá. Te davá-yu xèhndé-yu ndaha yùtnu ñuú tá sàcáⁿ-yu cuáháⁿ.

⁹ Te nchaa ñáyiu yòdonuu núú-gã ndihi nchaa ñáyiu nchicúⁿ ndàa sátá-gã ní ngüíta-yu níhi cáháⁿ-yu, te càchí-yu:

—Ío càhnu cuu Yaá cúu ñàní tnáhá ndí Dàvíí! ¡Te Yá Ndiòxí ío na chìndee ñaha-gã chi cùu-gá Yaá ní tendaha Yá Ndiòxí véxi quide núú-gã! ¡Te ndéé nchaa sá ío andíu na

càchí-xi sá ïo càhnu cuu-gá!
—duha càchí-yu.

10 Te òré cuánguihu Jèsús ñuú Jerusàlén, te nchaa ñáyiú ñuú-áⁿ ñí ngúíta-yu xícuaá-yu, te davá-yu ní ngúíta-yu xitnàhá-yu:

—¿Yoo cùu tée-ãⁿ? —
càchí-yu xitnàhá-yu.

11 Te davá-yu xitnàhá-yu:

—Tée-ãⁿ cúu-dě Jèsús tée càháⁿ tnúhu Yá Ndiõxí, te cùu-dé tée ñuú Nazàrét ñuú yíndèhu distritú Galileá —
càchí-yu xitnàhá-yu.

*Jèsús ñá túú tnàhá iní-gá
nàcuáa xíquide ñáyiú xití veñúhu
(Mr. 11:15-19; Lc. 19:45-
48; Jn. 2:13-22)*

12 Te Jèsús cuánguihu-gá xití veñúhu càhnu sá ïo cùnuu, te xití veñúhu-áⁿ xíndecu ñáyiú quide ndáhú nádìcò-yu, ndihi ñáyiú xísaaⁿ, te nchaá-yu ní queñuhu ñaha Jèsús xii-yu quehé, te ní dándùá-gá mèsá nchaa ñáyiú dàma díhúⁿ, ndihi nchaa xilé sácõo nchihí ñáyiú dìcò lómá xíndecu xití veñúhu-áⁿ. 13 Te ní xáhaⁿ-gã xii-yu:

—Núú tütú Yá Ndiõxí càháⁿ-xí nàcuáa ní càháⁿ-gá, te ní cachí-gá: “Vehe-í cúu-xí núú càháⁿ ndihi ñaha ñáyiú xii-í”, duha ní càháⁿ-gá càchí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xãhaⁿ-gã xii-yu.

14 Te xíaⁿ ndécú Jèsús ní quexìo cue tée cuáá ndihi cue tée yacua, te ní quide tátna ñaha-gã xii-güedé te ní ndúha-güedé. 15 Te cue

dútú cúnùu ndihí cue tée dàcuaha ñaha xii ñáyiú nchaa tnúhu ní chídó tnúní ndí Moisés ní xini-güedé ní quide Jèsús sá vã yõo tnàhí ndàcu cada, te ndèdóho tucu-güedé níhi xícáháⁿ cue landú xití veñúhu càhnu sá ïo cùnuu-áⁿ, te càchí-güexi: “Ío càhnu cuu Yaa cúu ñàní tnàhá ndí Dàvií”, càchí-güexi. Te ní cudééⁿ-güedé, 16 te ní xáhaⁿ-güedé xii Jèsús:

—¿Ndèdóho-n nàcuáa càháⁿ cue landú-ãⁿ ñã? —
càchí-güedé xãhaⁿ-güedé xii-gá.

Te Jèsús ní xáhaⁿ-gã xii-güedé:

—Ndèdóho-í, te nchòhó náa ñá túú dàcuaha-ndo núú tütú Yá Ndiõxí núú càháⁿ-xí cuendá cue landú-ãⁿ, te duha càchí-xi:

Yòhó ní quide-n sã cuè landú vitna sàdi, ndihi cue dava-gá landú,

chiñuhu ñaha-güexi xii-n nàcuáa tàu-xi cunduu.

Duha càchí-xi núú tütú-gá —
càchí-gá xãhaⁿ-gã xii-güedé.

17 Te xíaⁿ ñí dándõo ñaha Jèsús xii-güedé, te ní xica-gá cuáháⁿ-gá ñuú Bètaniá, yàcáⁿ ní xíndecu-gá niú-áⁿ.

*Jèsús xãhaⁿ-gã xii yutnu
ngúxí sá vã cúuⁿ-gã sávidí-xi
(Mr. 11:12-14, 20-26)*

18 Te nduu tnèé-áⁿ nehé-ni cuáháⁿ tucu Jèsús ñuú Jerusàlén, te ichi ñuhu-gá ní xihí-gá docó. 19 Te ní xini-gá ïⁿ yutnu ngúxí nútñí ïⁿ xio yuhu ìchi, te ní xica-gá cuáháⁿ ndéhé-gã núu ndéé sávidí-xi, dico ñá túú nã ndéé chi

mee-ni ndàha-xi ndeé. Te ní xáhaⁿ-gã xii yutnu ngüxí-áⁿ:

—¡Vitna te vá ñⁿ ndüu-gá cuuⁿ sávidí-n! —càchí-gá xãhaⁿ-gã xii-xi.

Te òré-ni-áⁿ ní yíchí yutnu ngüxí-áⁿ. ²⁰ Te sá dúcáⁿ ní cuu ní xiní cue téé xica cuu ndihi Jesús, te ío ní cuñúhu-güedé, te ní xicáⁿ tnúhú-güedé núú-gã, te xãhaⁿ-güedé:

—¿Ná cuendá ndeé dàcáⁿ ío ndihi ní yíchí yutnu ngüxí-ãⁿ-i? —càchí-güedé xãhaⁿ-güedé xii-gá.

²¹ Te Jèsús ní xáhaⁿ-gã xii-güedé:

—Na càchí tnúhu ndáá-í xii-ndo sã núu nchòhó quíndáá ndisa iní-ndó Yã Ndiõxí, te vá cání ñⁿ cani úú iní-ndó, te ñá díú-ní sã ní quide-í-a ní xiní-ndó ndàcu-ndo cada-ndo, chi ndeé tándúú-a xocuñí-xi núú ndécú-xí te núu cuñaha-ndo sã xocuñí-xi te quíhíⁿ-xi quéé-xi xití làmár. Te diu ñucaⁿ càda-xi te núu na quíndáá iní-ndó. ²² Te ncha sá ná càcáⁿ-ndó núú Yã Ndiõxí òré càháⁿ ndihi-ndo-gã te taxi-gá te núu sàndáá ndisa iní-ndó sã táxí-gã sá xicáⁿ-ndó núú-gã —càchí-gá xãhaⁿ-gã xii-güedé.

Jèsús ndécú ndihi-gá tnúhu ndee iní

(Mr. 11:27-33; Lc. 20:1-8)

²³ Te Jèsús cuánguihu-gá xití veñúhu càhnu sá ío cùnùu danehé-gã ñáyiu, te xiáⁿ ndécú-gã ní quexio cue dútú cùnùu ndihi cue téé cùu sacuéhé núú ñáyiu isráél, te xãhaⁿ-güedé xii-gá:

—Cuñí-ndí cachí tnúhu-n xii-ndí nása ndüu tnúhu ndee iní ndécú ndihi-n núu quide-n nándi sá quidé-n, ¿te yoo ñucaⁿ ní taxi tnúhu ndee iní-áⁿ xii-n-i? —càchí-güedé xãhaⁿ-güedé xii-gá.

²⁴ Te Jèsús ní xáhaⁿ-gã xii-güedé:

—Yúhú tnàhá-í cuñí-í càcáⁿ tnúhu-í ñⁿ sá càcáⁿ tnúhu-í núú-ndó, te núu na càchí tnúhu-ndo te cachí tnúhu-í xii-ndo yòo ní taxi tnúhu ndee iní duha quide-í. ²⁵ Te chí càchí tnúhu xii-í yoo ní táuchíúⁿ ní dácúándùte ndí Juàá ñáyiu, ¿Yã Ndiõxí ñⁿ cuè téé ñuyíú-a ní táuchíúⁿ ñucaⁿ ní quide ndí?, te chí càchí tnúhu —càchí-gá xãhaⁿ-gã xii-güedé.

Te ní ngüíta-güedé xitnàha-güedé:

—¿Nása cuñaha-o? Chi núu na cuñaha-o sã Yã Ndiõxí ní táuchíúⁿ ñucaⁿ ní quide ndí Juàá ñá, te quesaha-dé: “¿Ná cuendá ñá túú ní sàndáá iní-ndó tnúhu ní càháⁿ ndí vàiⁿ?”, quesaha-dé. ²⁶ Te núu na cuñaha-o sã cuè ñáyiu ñuyíú-a ní táuchíúⁿ ñucaⁿ ní quide ndí ñá, te cudééⁿ ñáyiu núú-ó, chí nchaá-yu càchí-yu sá Yã Ndiõxí ní xáhaⁿ-gã xii ndí sá càháⁿ ndí tnúhu-gá núú ñáyiu —càchí-güedé xitnàha-güedé.

²⁷ Te ní xáhaⁿ-güedé xii Jèsús:

—Ñá túú xiní-ndí yoo ní táuchíúⁿ ñucaⁿ ní dácúándùte ndí Juàá ñáyiu —càchí-güedé xãhaⁿ-güedé xii-gá.

Te ní xáhaⁿ-gã xii-güedé:

—Te núu ducaⁿ te ni yǎhú vá càchí tnúhu-í xii-ndo yòo ní taxí tnúhu ndee ìní duha quìde-í —càchí-gá xǎhaⁿ-gǎ xii-güedé.

Cuèndá ìⁿ té ndihí úú déhe-dé

²⁸ Te Jèsús ní xáhaⁿ tùcu-gá xii-güedé:

—Na càni-í ìⁿ cuèndú núu-ndó nàcuáa tecú tnùn-í-ndó tnúhu càháⁿ-í. ìⁿ té ndècu úú déhe-dé, te ní xáhaⁿ-dē xii déhe-dé té sacuéhé-gǎ: “Yòhó

déhe-í, véxi-í càháⁿ ndàhú-í núu-n núu vá cündèe ìní-n cuánùndaha ñaha-n xii-í cada chiuⁿ-o núu ní xitu-í yoho yàha stilé”, càchí-dé xǎhaⁿ-dē.

²⁹ Te ní xáhaⁿ dēhe-dé xii-dé: “Vá quihíⁿ-í cada chiuⁿ-í núu chíuⁿ-n”, càchí-dé xǎhaⁿ-dē xii tǎtá-dé. Dico cuèé ní nacani ìní-dé te ní sǎháⁿ-dé ní quide chiuⁿ-dé núu chíuⁿ tǎtá-dé.

³⁰ Te té-áⁿ ní sǎháⁿ tucu-dé ní xáhaⁿ-dē xii déhe-dé té lihli-gá núu vá cündèe ìní-dé cuánùndaha ñaha-dé, te ní xáhaⁿ dēhe-dé-áⁿ xii-dé: “Cuu cuánùndaha ñaha-í xii-n”, càchí-dé xǎhaⁿ-dē. Dico ñá túú ní sǎháⁿ-dé cada chiuⁿ-dé. ³¹ Te vitna chí càháⁿ núu ndédacàa cue téé úú-áⁿ ní quide-güedé sá cuìní tǎtá-güedé —càchí-gá xǎhaⁿ-gǎ xii-güedé.

Te ní xáhaⁿ-güedé xii-gá:

—Téè cùu sacuéhé-gǎ, téé ní càháⁿ ndihí-dé díhna —càchí-güedé xǎhaⁿ-güedé xii-gá.

Te Jèsús ní xáhaⁿ-gǎ xii-güedé:

—Na càchí tnúhu ndáá-í xii-ndo sǎ ncháá cuè téé cuihna ìní-xi quide cobrá ñáhá

xii ñáyiú cuèndá impuèstú, ndihí cue ñáyiú dìhí xǐndecu ichi díí ìní yáchí-gá ndíhu ndaha ñàha Yá Ndióxi xii cue téé-áⁿ ndihí cue ñáyiú dìhí-áⁿ dàcúúxí nchòhó. ³² Chi ndí Juáá téé ní xóo dacuàndute ñaha xii ñáyiú ní càháⁿ ndí nàcuáa cadá-yu cundecú-yu, dico nchòhó chi ñá túú cuìní-ndó quíndáá ìní-ndó nàcuáa ní càháⁿ ndí, dico cue téé cuihna ìní-xi quide cobrá ñáhá xii ñáyiú cuèndá impuèstú, ndihí cue ñáyiú dìhí xǐndecu ichi díí ìní, chi sàndáá ìní-güedé ndihí-yu tnúhu ní càháⁿ ndí. Te nchòhó cuèi ndèhe-ndo sá sàndáá ìní cue ñáyiú-áⁿ nchaa tnúhu ní càháⁿ ndí, dico ñá túú cuìní-ndó ndixi cuèchi ìní-ndó cuèndá nchaa sá cuèhé sá dúhá quide-ndo cuèndá tñi-ndo tnúhu ní càháⁿ ndí —càchí-gá xǎhaⁿ-gǎ xii-güedé.

Cuèndá cue téé cuihna ìní-xi (Mr. 12:1-12; Lc. 20:9-19)

³³ Te xǎhaⁿ tucu Jèsús xii-güedé:

—Cundedóho-ndo na càni tucu-í ingá cuèndú núu-ndó cuèndá tecú tnùn-í-ndó tnúhu càháⁿ-í. ìⁿ téé ní nacúxi-dé mee-ni yòho yaha stilé núu ñúhú-dé, te ní chidoco-dé cuèndá sá vǎ cúú dàñú, te ní cadúha-dé núu quíhni-dé ndéhé yoho yàha stilé-áⁿ òré ná cùu, te ní cadúha-dé ìⁿ xító dùcúⁿ núu cáúndòdo cue téé coto nchaa yoho yàha stilé-áⁿ.

Te ní sǎá ìⁿ nduu quèe-dé quíngaca cuu xica-dé te ní dándõo ndaha-dé sá ní xitu-dé-áⁿ xii ìⁿ úú cue téé xìní tnáhá ndihí-dé

cuendá cada chùⁿ-güedé, te ní ndatnúhu-güedé sá òré ná cúú te cuu cuendá dava-güedé, te ducaⁿ te ní quee-dé cuáháⁿ-dé. ³⁴ Te sáta ní sáá nduu ní cuu ndéhe nchaa yoho yàha stilé sá ní xitu-dé-áⁿ, te ní xáhaⁿ-dë xii ìⁿ úú cue téé xínu cuechi núú-dë: “Chí cuáháⁿ cácaⁿ-ndó sá cúú cuendá-í núú cue téé ní dándó ndàha-í nchaa yoho yàha stilé sá ní xitu-í”, càchí-dé xáhaⁿ-dë xii-güedé. ³⁵ Te cue téé ní dándó ndaha-dë nchaa yoho yàha stilé sá ní xitu-dé-áⁿ ní tñi-güedé cue téé xínu cuechi núú-dë-áⁿ, te ìⁿ-dé ní cani-güedé, te ìⁿ-dé ní sahani ñaha-güedé, te ingá-dé ní sáñaha-güedé yúú. ³⁶ Te téé ní xitu yoho yàha stilé-áⁿ ní tendaha-dë titní-gá tucu cue téé xínu cuechi núú-dë cuáháⁿ-güedé cuángacáⁿ-güedé sá cúú cuendá-dé núú cue téé ní dándó ndaha-dë sá ní xitu-dé-áⁿ, dico diu-ni ducaⁿ ní quide ñaha cue téé-áⁿ xii cue téé xínu cuechi núú-dë-áⁿ.

³⁷ Te téé cùu xitohó nchaa yoho yàha stilé-áⁿ ní sani iní-dé: “Váha-gá ñuu tendaha-í déhe-í-a núhú-dé, chí òré quiní ñahá-güedé xii-dé te canehe-güedé sá yíñuhu núú-dë”, duha ní sani iní-dé. Te ní tendaha-dë déhe-dé cuánuhú-dé. ³⁸ Dico òré ní xiní cue téé quide chiúⁿ-áⁿ dëhe téé cùu xitohó nchaa yoho yàha stilé-áⁿ, te ní xitnáha-güedé: “Téé-áⁿ téé véxi nduu táhú ñuhu-a ndihi nchaa sá cáá núú-xi, dico cahni-o-dë te mee-o nduu

táhú-ó sá ndúú táhú-dë”, càchí-güedé xitnáha-güedé. ³⁹ Te ní tñi-güedé téé-áⁿ te ndéca ñaha-güedé cuáháⁿ ìⁿ xio yuhu ñuhu-áⁿ, te ní sahani ñaha-güedé xii-dé —duha cuáháⁿ cuendú ní cani Jèsús núú-güedé.

⁴⁰ Te ní xáhaⁿ tucu Jèsús xii-güedé:

—¿Te nchòhó sa cùtnuní iní-ndó ñasa cada ñaha xitohó ñuhu-áⁿ xii cue téé-áⁿ ñá? — càchí-gá xáhaⁿ-gá xii-güedé.

⁴¹ Te cue téé-áⁿ ní xáhaⁿ-güedé xii-gá:

—Téé cùu xitohó ñuhu-áⁿ núhú-dé, te vá cùndàhú iní-dé cue téé cuihna iní-xi-áⁿ chi cahni ñaha-dé xii-güedé, te dándó ndaha-dë ñuhu-dé xii cue téé cùtnuní iní-dé cada ndáá cuendá ndi tnahá cúúⁿ ndéhe nchaa yoho yàha stilé sá ní xitu-dé-áⁿ te cuáñaha-güedé xii-dé sá cúú cuendá-dé —càchí-güedé xáhaⁿ-güedé xii-gá.

⁴² Te Jèsús ní xáhaⁿ-gá xii-güedé:

—Te nchòhó, náa ñá túú dàcuaha-ndo núú tütú Yá Ndióxí núú càchí-xi:

Yúú sá ní dáquéé tñhú cue téé dàcaa vehe, ní cuu-xi yúú cùnù vitna.

Chi mee Dütú Ndióxí ducaⁿ ní cachí-gá cunduu, te cùu-xi ìⁿ sá ïo cùnúhu-o vitna.

Duha càchí-xi núú tütú-gá. ⁴³ Te duha càháⁿ-í chí Yá Ndióxí cada-gá te vá ñihí-ndó tñhu ndee ìní cundecu ndihi-ndo cuendá ndihu ndaha ñaha-gá xii-ndo, chí tñhu ndee ìní-áⁿ cundecu ndihi cue ñáyiu cada ndáá

cuendá ndíhu ndaha ñàha Yá Ndiöxí xii-yu. ⁴⁴ Te yúú sã cúnü-án cúú-xí yǔhú, te nchaa ñáyiú ñá túú tñi tñuhu-í cùú-yu dàtná ìñ ñáyiú ndúá núú yúú-ǎñ te tñahnú duúñ-yu, àdi núu na tàú ñáhá-xí xii-yu, te dacàchi duuñ ñaha-xi —cachí-gá xǎhañ-gǎ xii-güedé.

⁴⁵ Te sá dúcáñ ndüu cuendú ní caní Jèsús te cue téé cùu dútú cúnü-án, ndihí cue téé cùu fariséú ní cutnùní iní-güedé sá cuendá-güedé ní cáháñ-gá. ⁴⁶ Te ní cuiní-güedé tñi ñaha-güedé xii-gá òré-án dico ñá túú ní cùyí-güedé, chí ní yùhú-güedé cue ñáyiú, chí ní cutnùní iní-yu sá cúú-gǎ ìñ téé càháñ tñuhu Yá Ndiöxí.

22

Cuendá ìñ vico tñandaha

¹ Te Jèsús ní ngüita tucu-gá caní-gǎ ingá cuendú núú-güedé, te xǎhañ-gǎ:

² —Na caní tucu-í ingá cuendú núú-ndó cuendá tecú tñiní-ndó nàcuáa cada-xi òré ndíhu ndaha ñàha Yá Ndiöxí xii ñáyiú. ìñ téé yindaha ñaha xii ñáyiú ní quide-dé ìñ vico ní dátñandaha-dé déhe ducuñ-dé. ³ Te ní tendaha-dé cue téé xìnu cuechi núú-dé cuáháñ-güedé cuángana-güedé cue ñáyiú sa ní cáháñ-dé cuhuñ vico, dico ñáyiú-án ñà túú ní cuiní-yu quíhíñ-yu. ⁴ Te ní xáhañ tucu-dé xii dava-gá cue téé xìnu cuechi núú-dé: “Quíhíñ-ndó cǎñaha-ndo xii cue ñáyiú sa ní cáháñ-í cuhuñ vico sá sà ní quide túha-í sá cáxi-yu, te sa ní sahní-í ndicutu ndihí nchaa dava-gá

quiti ní dánucǐhnu-í, te nchaa sa ní quide túha-í, te na quixí-yu cuhúñ-yu vico cǎchí-í cúñaha-ndo”, cǎchí-dé xǎhañ-dé xii cue téé xìnu cuechi núú-dé-án. ⁵ Dico

ní ìñ ñáyiú ní cáháñ-dé-án ñà túú ní cuiní-yu quíhíñ-yu cuhúñ-yu vico. Chí ìñ-yu ní sáháñ-yu ní quide chiúñ-yu núú ñúhǔ-yu, te ingá-yu ní sáháñ-yu ní nadicó-yu núu nándi cùu ndáhú quidé-yu.

⁶ Te dava-gá-yu ní tñi-yu dava cue téé xìnu cuechi núú téé quide vico-án, te ní canihá-yu ndéé ní sahní ñàhá-yu xii-güedé. ⁷ Te téé

yindaha ñaha xii ñáyiú quide vico-án ní cudééñ víhí-dé sá dúcáñ ní quidé-yu, te ní tendaha-dé cue sandádú-dé ní sáháñ-güedé ní sahní-güedé cue ñáyiú ducañ ní quide-án,

te ní sahní-güedé nchaa vehe càa ñuú-yu. ⁸ Te sátá dúcáñ te ní xáhañ-dé xii dava-gá cue téé xìnu cuechi núú-dé: “Nchaa sa ndècu túha, te cue ñáyiú ní cáháñ-í cuhuñ vico-a ní cùu ñá túú-gǎ tàú-yu sá cúhǔñ-yu. ⁹ Te chí cuáháñ ndèni ní cuu te cáháñ-ndó nchaa ñáyiú na naníhí-ndó ichi na quixí-yu cuhúñ-yu vico-a”, cǎchí-dé xǎhañ-dé xii-güedé. ¹⁰ Te

cue téé xìnu cuechi-án ní quee-güedé cuáháñ-güedé, te ní cáháñ-güedé nchaa ñáyiú ní naníhí-güedé ichi, te cuéi ñáyiú váha iní-xi, te cuéi ñáyiú cuíhna iní-xi, te ní chítǔ-yu núú cúú vico-án.

¹¹ Te sátá dúcáñ te téé yindaha ñáyiú quide vico-án

nĩ quĩhu-dé xitĩ vehe ní xindéhé-dě cue ñáyiũ ñũhu vico-án, te ní xiní-dé ìⁿ tée ñũtnahá tnuú-yu te ñá túú càa dóó-dě dàtná cáá dǒó níhnú cuè ñáyiũ ñũhu vico-án. ¹² Te ní xáhaⁿ-dě xii tée-án: “¿Táta, nása ní cuu cuánguĩhu-ǒ iha, te ñá túú càa dóó-n dàtná cáá dǒó níhnú cuè ñáyiũ ñũhu vico tnándaha-í?”, cächí-dé xáhaⁿ-dě xii tée-án. Dico tée-án ñá túú ní nihí-dě tnúhu cáháⁿ-dé. ¹³ Te tée yindaha ñáyiũ quide vico-án ní xáhaⁿ-dě xii cue ñáyiũ xĩnu cuechi núú mèsá: “Chí tní tée-án te dacũtu-ndo-dé, te queñuhu-ndo-dě ná quĩhíⁿ-dé cundecu-dé ìⁿ xichi núú nées núú ío ndoho-dé, te yácáⁿ ío ndáhyú-dé te dicó rúhñũ-ná cuu núhu-dé sá sátú iní-dé sá ndóhó-dě”, cächí-dé xáhaⁿ-dě xii cue ñáyiũ xĩnu cuechi núú mèsá-án. ¹⁴ Te duha ndũu cuendú càháⁿ-í chí ío cuéhe ñáyiũ càháⁿ ñáhá Yá Ndiǒxí xii-yu, dico sacú-ni-yu nduu táhũ-yu cundecú-yu ndihí-gá —cächí-gá xáhaⁿ-gã xii-güedé.

Cuendá impuèstú

(Mr. 12:13-17; Lc. 20:20-26)

¹⁵ Te cue tée cùu fariséú ní sáháⁿ-güedé ìⁿ xichi ní ndatnúhu-güedé nàcuáa cada-güedé daticánuu-güedé Jèsús núú tñũhu càháⁿ-gá cuendá ducaⁿ ñihí-güedé nàcuáa cada-güedé cacáⁿ cuéchi-güedé cuendá-gá. ¹⁶ Te ní tendaha-güedé ìⁿ ũú cue tée cùndihí-güedé, ndihí cue tée cùndihí té Hèrodés cuáháⁿ-güedé núú ndécú Jèsús. Te òré ní

quexio-güedé núú ndécú-gã, te ní xáhaⁿ-güedé xii-gá:

—Mèstrú, nihí-ndí tnúhu sá ío ndáá càháⁿ-n, te càháⁿ ndáá-n nàcuáa càháⁿ Yá Ndiǒxí cundecu-o ñuyú-a, te cuèi nděda-ni càa ñáyiũ ìⁿ-ni càháⁿ-n ndihí-yu chí ñá túú quide cuendá-n cuèi ná ñáyiũ cùu-yu. ¹⁷ Te cachí tnúhu xii-ndí, núu váha-ni quide-ndí sá chãhu-ndí té Cèsár tée ío cùnuu cuendá impuèstú áⁿ ñáhá —cächí-güedé xáhaⁿ-güedé xii-gá.

¹⁸ Dico Jèsús ní cutnùní iní-gá sá xitó ndèé ñáhá-güedé xii-gá, núu ní xáhaⁿ-gã xii-güedé:

—Nchòhó cue tée dàndahú mée-xí sã quidé ndáá te ñá ndáá sá quidé ndáá-ndó, ¿ná cuendá xitó ndèé ñáhá-ndó xii-í? ¹⁹ Chí dánèhé ñáhá xii-í ìⁿ díhúⁿ sã chãhu-ndo cuendá impuèstú núu nása càa —cachí-gá xáhaⁿ-gã xii-güedé.

Te ní dánèhé ñáhá-güedé xii-gá ìⁿ díhúⁿ sã nání dènariú. ²⁰ Te òré ní xiní-gá díhúⁿ-ãⁿ te ní xicáⁿ tñuhú-gã núu-güedé, te xáhaⁿ-gã:

—Chí cächí tnúhu yoo núu-xi ndèé ndihí yoo diu-xi ndèé —cächí-gá xáhaⁿ-gã xii-güedé.

²¹ Te ní xáhaⁿ-güedé xii-gá:

—Núú tẽ Cèsár ndèé ndihí diu-dé —cächí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Te núu ducaⁿ te chí nàcuáha té Cèsár sá cúu cuendá-dé, te sá cúu cuendá mée Yá Ndiǒxí te xiáⁿ

nacuáha-ndo-gă —càchí-gă
xăhaⁿ-gă xii-güedé.

22 Te cue téé-áⁿ ïo ní
cuñúhu-güedé sá dúcáⁿ ní
cáháⁿ-gă, te ní natni-güedé
ichi cuánuhú-güedé.

Cuendá cue ñáyiú ndoto

(Mr. 12:18-27; Lc. 20:27-
40)

23 Te ñiú-ni nduu-ăⁿ ní
quexio ñⁿ úú cue téé cùu
saducéú núú ndécú Jèsús.
Te cue téé-áⁿ ñà túú sàndáá
iní-güedé sá ndótó cué ñáyiú
ní xíhí, te ní xáhaⁿ-güedé
xii-gă:

24 —Mèstrú, ndíi Moisés
ní cachí ndíi sá núu ñⁿ téé
ndècu ñadihí-xi cuú-dé te
quendóo ñadihí-dé, te núu ñá
túú ðehe-dé ní xõ ndihí-aⁿ te
téé cùu ñaní-dé naqueheⁿ-dé
ñaha ní quendóo quèé-áⁿ
cuendá coo ðehe-dé ndihí-aⁿ
cuendá ñaní-dé téé ní xíhí-áⁿ.

25 Te ñuú-ndí-a ní xíndecu
úsá tñàhá cue téé mee-ni ndí
ñaní-güedé. Te téé ðíhna ní
níhí ñadihí-dé te ñá túú ní
cúdíi-dé cundecu-dé chí ní
xíhí-dé, te ni ñⁿ ðehe-dé ñá
túú ní xõ ndihí ñadihí-dé-áⁿ.
Te téé cùu úú ní naqueheⁿ-dé
ñaha ní quendóo quèé-áⁿ.

26 Dico ní xíhí tucu-dé, te ni
ñⁿ tucu ðehe-dé ñá túú ní
xõ ndihí ñaha-áⁿ, te ñiú-ni
ducaⁿ ní yáha téé cùu uní,
te ní xínu ndí ùsá-güedé
ní cándeca ñaha-güedé xii
ñaha-áⁿ dico ñiú-ni ducaⁿ ní
xíhí-güedé. 27 Te ndéé núú
ní ndihí-ná te ní xíhí tñàhá
ñadihí-áⁿ.

28 Te na sáá nduu
ndòto-güedé ndihí ñaha-áⁿ, ¿te
ndèdacàa-güedé ñadihí-güedé
cuu-aⁿ-i? Chi ndí ùsá-güedé

ní cándeca ñaha-güedé xii-aⁿ
—càchí-güedé xăhaⁿ-güedé
xii-gă.

29 Te Jèsús ní xáhaⁿ-gă
xii-güedé:

—Ní xíta nchòhó tñúhu
càháⁿ-ndó, chí ñá túú
xiní-ndó nàcuáa càháⁿ Yă
Ndiõxí núú tütú-gă, te ni
ñà túú cùtnuní iní-ndó sá
ñiú-gă ndácú-gă quidé-gă
nchaandi túhú sá văha. 30 Te
na càchí tñúhu-í xii-ndo sá
òré ná sáá nduu ndòto nchaa
ñáyiú ní xíhí, te ðává-áⁿ vă
yõ-gă dasaⁿ ðehe yoco-xi
chí vá yõ-gă candeca tñàha,
chí cuu-ná-yu ðàtná cue
espíritú xinú cuèchi núú Yă
Ndiõxí. 31 ¿Te náa ñá túú quide
cuendá-ndó nàcuáa càháⁿ
Yă Ndiõxí núú tütú-gă núú
càháⁿ-gă cuendá cue ñáyiú ní
xíhí-ăⁿ? Te duha càchí-gă:

32 “Yúhú cùu-í Ndiõxí tē
Abrahám, ndihí té Isàác, ndihí
té Jácób”, duha càchí-gă núú
tütú-gă. Te cue téé-áⁿ chí cuèi
ní xíhí-güedé núú ñùyíú-a,
dico sá cùú-xí Yă Ndiõxí chí
ndècu vívú-ni-güedé. Chí
ñiú-gă cùú-gă Ndiõxí mee-ni
cué ñáyiú xíndecu vívú, te ñá
túú cùu-gă Ndiõxí cue ñáyiú
ñá túú ndècu vívú —càchí-gă
xăhaⁿ-gă xii-güedé.

33 Te sá dúcáⁿ ní cáháⁿ-gă
ní xii-gă cue téé-áⁿ, te ío ní
cuñúhu nchaa ñáyiú cuendá
sá ïo văha ndùu tñúhu ní
cáháⁿ-gă.

Tñúhu sá ïo-gă cúnùu

(Mr. 12:28-34)

34 Te cue téé cùu fariséú
ní xiní-güedé ní sadí Jèsús
yuhu cue téé cùu saducéú,
chí ñá túú ní níhí-gă-güedé

tnúhu cúñaha-güedě xii-gá, te cue tée cùu fariséu-áⁿ nĩ natacá-güedé te cuáháⁿ-güedé núu ndécú Jèsús. ³⁵ Te ìⁿ tée cùu fariséu-áⁿ ìo váha cùtnuní iní-dé nàcuáa nduu nchaa tnúhu ní chídó tnùní ndíi Moisés te xito ndeé-dé Jèsús, te xáhaⁿ-dě xii-gá:

³⁶ —Mèstrú, cachí tnúhu ndědacàa tnúhu sá nĩ chídó tnùní ndíi Moisés ío-gá cúnùu cada-o —cachí-dé xáhaⁿ-dě xii-gá.

³⁷ Te Jèsús ní xáhaⁿ-gã xii-dé:

—Duha càháⁿ tnúhu sá ìo-gá cúnùu: “Cuu iní-ndó Dütú Ndiöxí Yaá cúu Ndiöxí-ndó nì yuhu nì iní-ndó, te caní iní-ndó càda-ndo datná cùiní mée-gã, te mee-ni tnúhu váha caní iní-ndó nàcuáa cuu vii cuu váha-ndo núu-gã”,

³⁸ duha càháⁿ tnúhu sá ìo-gá cúnùu. ³⁹ Te duha càháⁿ tucu ingá tnúhu cùu uú sá ìo cùnùu, te sa yatni ìⁿ-ni cùu-xi ndíi tnúhu díhna nuu, te cächí-xi: “Cuu iní-ndó tnàha ñáyiu-ndo dàtná cúu iní-ndó mée-ndo”, duha càháⁿ tnúhu cùu uú-áⁿ; ⁴⁰ Te cuendá úú tnúhu-a ní cáa nchaa tnúhu ní cáháⁿ ndíi Moisés nàcuáa cada ñáyiu, te diu-ni cuendá úú tnúhu-a ní cáa tnúhu ní cáháⁿ nchaa cue tée ní xóo cáháⁿ tnúhu Yá Ndiöxí ndéé sanaha —cachí-gá xáhaⁿ-gã xii-güedé.

Yoo cùu Xitohó Jesucristú

(Mr. 12:35-37; Lc. 20:41-44)

⁴¹ Te ndècu ducaⁿ-ni cue tée cùu fariséu núu ndécú Jèsús. ⁴² Te ní xicáⁿ tnúhú-gã núu-güedě, te xáhaⁿ-gã:

—Cùiní-í cachí tnúhu-ndo yòo déhe-xi cùu Cristú Yaá

tendaha Yá Ndiöxí quixi ñuyíu-a —cächí-gá xáhaⁿ-gã xii-güedé.

Te ní xáhaⁿ-güedě xii-gá:

—Déhe ndíi Dàvií cúu Yáa-áⁿ —cächí-güedé xáhaⁿ-güedé xii-gá.

⁴³ Te Jèsús ní xáhaⁿ-gã xii-güedé:

—¿Te nása cächí-tu-ndo sã déhe ndíi Dàvií cúu Cristú Yaá tendaha Yá Ndiöxí quixi ñuyíu-a, te mee ndíi Dàvií-áⁿ nĩ dácáhu ìní ñáhá Espiritú Yá Ndiöxí xii ndíi, te ní cachí ndíi sá Cristú Yaá tendaha Yá Ndiöxí quixi ñuyíu-a cùu-gá Xitohó ndíi? Te duha ní cachí ndíi:

⁴⁴ Dütú Ndiöxí ní xáhaⁿ-gã xii Yaá cúu Xitohó-í:

“Ngóo xio cùha-í, te yúhu cada-í te nchaa sá cúu úhú ìní ñáhá xii-n canehe-xi sá yíñuhu núu-n.”

Duha ní xáhaⁿ Dütú Ndiöxí xii Yaá cúu Xitohó-í, cächí ndíi. ⁴⁵ ¿Te nása cùu Cristú déhe ndíi Dàvií, te mee ndíi ní cachí ndíi sá cúu-gã Xitohó ndíi? —cachí Jèsús xáhaⁿ-gã xii-güedé.

⁴⁶ Te ni ìⁿ-güedé ñá túu-gã ní ñhí-güedě tnúhu cúñaha-güedě xii-gá. Te ndéé nduu-áⁿ ñà túu-gã ní cùyi-güedé ná tnúhu cacáⁿ tnúhú-güedě núu-gã.

23

Jèsús càháⁿ-gã cuendá cue tée cùu fariséu ndíi cuendá cue tée dàcuaha ñaha xii ñáyiu
(Mr. 12:38-40; Lc. 11:37-54; 20:45-47)

¹ Te Jèsús ní cáháⁿ ndodo-gã núu nchaa ñáyiu, ndíi núu

cuè téé xica cuu ndihi-gá, te xãhaⁿ-gã:

2 —Cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi cue téé cùu fariséú ndécú ndihi-güedé tnúhu ndee ìní cáháⁿ-güedé nchaa tnúhu sá ní chídó tnùní ndíi Moisés-áⁿ.³ Te cada-ndo nàcuáa dānehé ñáhá-güedé xii-ndo, dico vá cáda-ndó dàtná xiquide-güedé, chi tucu ndùu tnúhu càháⁿ-güedé, te tucu quide-güedé.⁴ Te quide-güedé dàtná quidé ñáyiú dàcuido ñⁿ tnaha ñáyiú-xi ñⁿ sá ïo véé, te mèé-yu ni lùha ñá túú cuíní-yu cuidó-yu. Te ducaⁿ sãtnahá-xi cùu-güedé chi dānehé ñáhá-güedé xii-ndo nàcuáa cada-ndo, dico mee-güedé chi ni lùha ñá túú cuíní-güedé cada-güedé nàcuáa dānehé ñáhá-güedé xii-ndo.⁵ Te mee-ni ndùcu-güedé nàcuáa quide-güedé cuendá quini ñáyiú sá ïo cùu cahnu-güedé. Te ndèé xindá sá ndèé ñⁿ úú tnúhu Yá Ndiöxí tneé-güedé ndihi ndaha-güedé, te tnàhá ìní-güedé sá ïo-gá cunduu quèhéⁿ xindá-áⁿ dàcúxí xindá dava-gá ñáyiú. Te tnàhá tucu ìní-güedé sá ïo-gá cunduu nàni núú dõó sácũhnu-güedé dàcúxí dõó sácũhnu dava-gá-yu.⁶ Te ndi tnahá òré sácõo vico, òré quihu-güedé mèsá caxi-güedé te ïo-gá cúdí ìní-güedé cunucóo-güedé núú xilé núú sácõo cue téé cùnuu-gá, te diu-ni ducaⁿ quide tucu-güedé cuèi xití veñúhu.⁷ Te

nchaa núú xicá cùu-güedé cuíní-güedé sá ndihi tnúhu yiñúhu cáháⁿ ndihi ñaha ñáyiú xii-güedé, te cuíní tucu-güedé sá cũñahá-yu xii-güedé mèstrú.

8 'Dico nchòhó vá cũñaha-ndo xii ñáyiú sá cũñahá-yu mèstrú xii-ndo, chi nchòhó ñⁿ-ni cùu-ndo ndecu-ndo, chi ducaⁿ ñⁿ-dii-ni yúhú Yaá ní tendaha Yá Ndiöxí véxi ñuyíú-a cùu-í Mèstrú ndécú ndihi ñaha-í xii-ndo.⁹ Te ñⁿ-dii-ni Dútú Ndiöxí Yaá ndécú àndiú cuu-gá Tãtã-ndó, núú xĩãⁿ vá cáháⁿ-ndó sã dāva cue téé ñuyíú-a cùu-güedé tãtã-ndó.¹⁰ Te ni vá cání ìní-ndó càda-ndo nacuáa cáháⁿ ñáyiú sá cùnùu-ndo, chi ñⁿ-dii-ni yúhú Crístú Yaá ní tendaha Yá Ndiöxí véxi ñuyíú-a cùnùu-í.¹¹ Te ñáyiú ïo-gá cùnùu ndecu ndihi-ndo, ñáyiú-áⁿ cúú-yu ñáyiú xinu cuechi núú-ndó.¹² Te nchaa ñáyiú quide cahnu mee-xi ñáyiú-áⁿ vã cúú-yu ñáyiú cùnùu, te nchaa ñáyiú ñá túú quide cahnu mee-xi ñáyiú-áⁿ cùnùu-yu.

13 'Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue téé cùu fariséú, cùu-ndo cue téé ïo dāndahú méé-xí sã quidé ndáá te ñá ndáá sã quidé ndáá-ndó, te ndàhú ní cuu-ndo chi sãdí-ndó ìchi ñáyiú ñá dáñá-ndó ndihu ndaha ñaha Yá Ndiöxí xii-yu, te ni mèe-ndo ñá túú quide-ndo nacuáa ndihu ndaha ñaha-gá xii-ndo, te ni dāva-gá cue ñáyiú cuíní sá

ndïhu ndaha ñaha-gá xii-yu ñá dáñá-ndó.

14 "Te nchòhó cue téé dàcuaha ñaha xii ñáyiù nchaa tnúhu ní chídó tnùnì ndíi Moisés, ndíhi nchòhó cue téé cùu fariséú, cúu-ndó cuè téé ío dándahú méé-xí sá quidé ndáá te ñá ndáá sá quidé ndáá-ndó, te ndàhú ní cuu-ndo chi quèndeé-ndó vèhe cue ñáyiù quèé, te ío naha càháⁿ ndíhi-ndo Yá Ndiòxí cuèndá cuìní-ndó sá vā yōo cutnùnì iní-xi nàcuáa quide-ndo. Te sá dúcáⁿ quide-ndo te ío-gá ndoho-ndo nūú ùhú núú ndàhú dàcúúxí dàva-gá ñáyiù.

15 "Te nchòhó cue téé dàcuaha ñaha xii ñáyiù nchaa tnúhu ní chídó tnùnì ndíi Moisés, ndíhi nchòhó cue téé cùu fariséú, cúu-ndó cuè téé ío dándahú méé-xí sá quidé ndáá te ñá ndáá sá quidé ndáá-ndó, te ndàhú ní cuu-ndo chi sàhni iní-ndó cuáháⁿ-ndó ndèni ní cuu dàcàháⁿ-ndó ñáyiù cuèndá cuìní-ndó tníⁿ-yu ichi ndècu-ndo. Te òré ná xīnu iní-yu tníⁿ-yu ichi ndècu-ndo-áⁿ te uuⁿ-gá cuíta nihnú-yu dàcúúxí mèe-ndo.

16 "Te nchòhó cúu-ndó dàtná cue ñáyiù cuáá, chi ñá cútùnì iní-ndó nàcuáa canu ichi-ndo ñáyiù, te ndàhú ní cuu-ndo chi càchí-ndó: "Íⁿ ñáyiù na càcunehe veñúhu càhnu sá ío cùnūu òré cuìní-yu cutnùnì iní tnàha ñáyiú-yu sá ndáá cadá-yu ïⁿ sá sání iní-yu cadá-yu, te vā cúu cuèchi xii-yu cuèi vā cadá-yu. Dico núu na càcu nehé-yu díhúⁿ cuááⁿ yíhí xítí veñúhu-áⁿ

te cuu cuèchi xii-yu te núu vā cadá-yu sá ñí cachí-yu cadá-yu", duha càchí-ndó.

17 "Íⁿ Nchòhó cúu-ndó cuè téé ío ñí díquí-xi, te cùu-ndo datná cue ñáyiù cuáá chi ñá tècú tnùnì-ndó! Te vā càchí-ndó sá ío-gá cùnūu díhúⁿ cuááⁿ dàcúúxí veñúhu, chi díu cuèndá veñúhu-áⁿ ní cuu íí díhúⁿ cuááⁿ-áⁿ. 18 Te càchí tucu-ndo: "Íⁿ ñáyiù na càcunehe xito núú sácódó sá ndúú tǎhú Yá Ndiòxí òré cuìní-yu cutnùnì iní tnàha ñáyiú-yu sá ndáá cadá-yu ïⁿ sá sání iní-yu cadá-yu, te vā cúu cuèchi xii-yu cuèi vā cadá-yu, dico núu na càcu nehé-yu sá ndúú tǎhú Yá Ndiòxí yódó núú xito-áⁿ te cuu cuèchi xii-yu te núu vā cadá-yu sá ñí sani iní-yu cadá-yu", duha càchí-ndó. 19 "Te cùu-ndo cue téé ío ñí díquí-xi, te cùu-ndo datná cue ñáyiù cuáá chi ñá tècú tnùnì-ndó! Te vā cánì iní-ndó sá ío-gá nándíhi sá ndúú tǎhú Yá Ndiòxí sácódó núú xito núú sácódó tnàhí sá ndúú tǎhú-gǎ-áⁿ dàcúúxí mèe xito-áⁿ. 20 Chi nchaa ñáyiù ducaⁿ càcunehe xito-áⁿ, te tnàhá-ni sá yódó núú-xi càcu nehé-yu òré ducaⁿ càháⁿ-yu. 21 Te nchaa ñáyiù ducaⁿ càcunehe veñúhu càhnu sá ío cùnūu te ñá díú mèe-ni veñúhu càcu nehé-yu òré ducaⁿ càháⁿ-yu, chi tnàhá-ni Yá Ndiòxí Yaá cúu cuèndá veñúhu-áⁿ cǎcú nèhé-yu òré ducaⁿ càháⁿ-yu. 22 Te nchaa ñáyiù càcunehe andíu cuèndá cutnùnì iní tnàha ñáyiú-yu sá ndáá cadá-yu ïⁿ sá sání

iní-yu cadá-yu, te ñá díú mèe-ni andiu cacu nehé-yu chi tnàhá-ni núú núcõo Yá Ndiõxí táxí tnùnì-gá cáci nèhé-yu òré ducaⁿ càháⁿ-yu, te tnàhá méé-gã cáci nèhé-yu òré ducaⁿ càháⁿ-yu.

23 'Te nchòhó cue téè dâcuaha ñaha xii ñáyiú nchaa tnúhu ní chídó tnùnì ndíi Moisés, ndihí nchòhó cue téè cùu fariséú, cúú-ndó cuè téè ío dândahú méé-xí sã quidé ndáá te ñá ndáá sá quidé ndáá-ndó. Te cuèi núú ùxí xichí yúcú mენტá ñihí-ndó, te sãñaha-ndo ñⁿ xichí xii Yá Ndiõxí, te díu-ni ducaⁿ quide-ndo yúcú nání àní, ndihí yúcú nání còminú, dico ndàhú ní cuu-ndo chi ñá túú quide cuendá-ndó nâcuáa càháⁿ nchaa tnúhu sá ïo-gá cúnúu sanu ichi ñaha xii-ndo, te tnúhu-ánⁿ càhí-xi sá ïo xini ñuhu-xi cada ndáá-ndó cundecu-ndo, te cundàhú iní-ndó cuè tnaha ñáyiú-ndo, te quindáá iní-ndó Yá Ndiõxí, te cada-ndo nchaa nacuáa ndúu tnúhu càháⁿ-ndó, te nchaa tnúhu-ánⁿ cúú-xí tnúhu sá ïo cúnúu xini ñuhu-xi cada-ndo nacuáa càháⁿ-xi, dico vá dáñá ndèé-ndó càda-ndo nchaa dava-gá nâcuáa càháⁿ tnúhu sá sánú ichi ñaha xii-ndo. 24 'Te nchòhó cúú-ndó dàtná cue ñáyiú cuáá, chi ñá túú cùnuni iní-ndó nâcuáa canu ichi-ndo ñáyiú, chi quide cuendá-ndó mèe-ni nchaa tnúhu sá ñá túú ïo cúnúu, dico nchaa tnúhu sá ïo-gá cúnúu xini ñuhu-xi cada cuendá-ndó ñá túú quide cuendá-ndó!

25 'Te nchòhó cue téè dâcuaha ñaha xii ñáyiú nchaa

tnúhu ní chídó tnùnì ndíi Moisés, ndihí nchòhó cue téè cùu fariséú, cùu-ndo cue téè ío dândahú méé-xí sã quidé ndáá te ñá ndáá sá quidé ndáá-ndó. Te ndàhú ní cuu-ndo chi cùu-ndo datná cue ñáyiú nâquete sátá-ni tàsáⁿ ndihí sátá-ni cõhó te xití-xi càndehe caduha-ni. Te ducaⁿ sãtnahá-xi cùu-ndo chi mee-ni sã ndécú ndihí tnaha ñáyiú-ndo ñuhu iní-ndó, te nándi dândahú-ndõ-yu te quèheⁿ-ndo sá ndécú ndihí-yu. 26 Te nchòhó cue téè cùu fariséú, cúú-ndó dàtná cue ñáyiú cuáá, chi ñá túú cùnuni iní-ndó nâcuáa ndúu sá quidé-ndó. Te ío xini ñuhu-xi sá cadá-ndó nâcuáa ndúu ndoo ndúu nine iní-ndó cuendá ndacu-ndo càda-ndo sá vâha, te xíáⁿ núu chí cadá dàtná xiquide ñáyiú nâquete ndaa xití tàsáⁿ ndihí ndaa xití cõhó.

27 'Te nchòhó cue téè dâcuaha ñaha xii ñáyiú nchaa tnúhu ní chídó tnùnì ndíi Moisés, ndihí nchòhó cue téè cùu fariséú, cùu-ndo cue téè ío dândahú méé-xí sã quidé ndáá te ñá ndáá sá quidé ndáá-ndó. Te ndàhú ní cuu-ndo chi cùu-ndo datná núú yíndúxi ndíyí núú ní cuáha vii te ní nacáhyú sã cuixíⁿ, dico xití yaú-ánⁿ chi càndehe caduha chi mee-ni yiqui ndíyí ñuhu. 28 Te ducaⁿ sãtnahá-xi cùu-ndo chi sánúu sá cúú-ndó cuè téè vâha dico iní-ndó chi mee-ni sã cuèhé sá dúhá ñuhu, te ío dândahú-ndó mèe-ndo sá quidé ndáá-ndó te ñá ndáá sá quidé ndáá-ndó.

29 'Te nchòhó cue téè

dàcuaha ñaha xii ñáyu nchaa tñuhu ní chídó tñuní ndí Moisés, ndíhi nchòhó cue tée cùu fariséu, cúu-ndó cuè tée ío dāndahú méé-xí sã quidé ndáá te ña ndáá sã quidé ndáá-ndó. Te ndàhú ní cuu-ndo chi càdúha-ndo nchàa núu nĩ nguindüxi cue tée ní xóo cáháⁿ tñuhu Yá Ndiöxí ndéé sanaha, te ío vii quide-ndo nchaa núu sã nĩ cuáha núu yindüxi cue ñáyu ní quide váha ní xindecu ñuyú-a. ³⁰ Te càchí-ndó: “Te núu dicó nchoo ni xindecu-o cùtnàhá ní xindecu cue ñaní tnáhá-ó ndéé sanaha, te vá chítñahá-ó-güedě cahni-o cuè tée ní xóo cáháⁿ tñuhu Yá Ndiöxí dāvá-áⁿ ní cùu”, duha càchí-ndó. ³¹ Te sá dúcáⁿ cáháⁿ-ndó, te xiãⁿ cùtnuní sã ñí-ní cùu-ndo ndíhi cue ñaní tnáhá-ndó cuè tée ní xindecu ndéé sanaha, cue tée ní sahani ñaha xii cue tée ní cáháⁿ tñuhu Yá Ndiöxí dāvá-áⁿ. ³² Te núu ducaⁿ te chí dāxñu cava chiunⁿ ní tausaha-güedě.

³³ ;Te nchòhó cúu-ndó cuè tée ío cuihna iní-xi, chi cùu-ndo datná cóo dēēⁿ! Te nchòhó vá ñihí-ndó nācuáa cada-ndo cācu nihnu-ndo núu úhú núu ndàhú. ³⁴ Te cuendá xiãⁿ núu tendaha-ĩ cue tée cáháⁿ tñuhu Yá Ndiöxí quixi núu-ndó, ndíhi cue tée cùu mestrú danèhé ñáhá xii-ndo tñuhu-gá, ndíhi cue tée ío váha cùtnuní iní-xi cuendá cáháⁿ-güedě tñuhu-gá núu-ndó. Dico nchòhó chí da cùu úhú iní-ndó-güedě, chí dava-güedě cahni-ndo-güedě, te dava-güedě cata caa-ndo-güedě, núu cùrúxí, te dava-güedě cani-ndo-güedě xití veñuhu,

te ndí tnahá ñúú ndí tnahá ñúú quihíⁿ-ndó nānducu-ndo-güedě cuendá cada úhú iní-ndó-güedě. ³⁵ Te sá dúcáⁿ ná càda-ndo, te ndadíquí-ndó cuè tée ní quide ndáá ní xindecu ní xihí ní sahani ñaha cuè ñaní tnáhá-ndó. Te ndéé ndí Àbél tée ío váha ní quide ndáá ní xindecu ní sahani-güedě ndadíquí-ndó, ndíhi nchaa dava-gá cue tée ní sahani-güedě, ndíhi ndéé ndí Zacariá déhe ndí Berèquiás tée ní sahani-güedě ndéé núu nĩ ndíhi-ná ndadíquí-ndó, te ndí-áⁿ nĩ sahani-güedě mei tñúu veñuhu càhnu sá ío cùnuu ndíhi xito núu sácódó sã ndúú tãhú Yá Ndiöxí, te nchaa cue tée-áⁿ ndadíquí-ndó chí datná tñuhu mee-ndo nĩ sahani-ndo cuè tée-áⁿ, chí diu-ni ñaní tnáhá mèe-ndo ducaⁿ ní sahani ñaha xii-güedě. ³⁶ Te na càchí tñuhu ndáá-í xii-ndo sã nchàa cue tée ní quide ndáá ní xindecu ní sahani-güedě, nchaa cue tée-áⁿ ndadíquí nchaa ñáyu ndècu vitna —cachí-gá xãhaⁿ-gã xii-güedě.

Jesús cáháⁿ-gá cuendá ñáyu ñúu Jerusàlén

(Lc. 13:34-35)

³⁷ Te xãhaⁿ Jèsús xii ñáyu ñúu Jerusàlén:

—Nchòhó ñáyu ñúu Jerusàlén sàhni-ndo cue tée ní tendaha Yá Ndiöxí véxi cáháⁿ tñuhu-gá núu-ndó, te mee-ni ndíhi yúú sáhní-ndó dáva-güedě. ;Te yúhú titní xito ní cuiní-í coto ñaha-ĩ xii-ndo datná quidé nchüxi xito-güedi

déhe-güedi sàquíhi-güedi xití ndíxíⁿ-güedi, dico nchòhó ñá túú ní cuíní-ndó, te ñu-ni ducaⁿ sàni iní-í ndéé vitna!
 38 Te na cächí tñúhu ndáá-í xii-ndo sá sáá nduu te ío ndàhú yáha ñuú-ndó, te vá cündècu-gá-ndó. 39 Te na cächí tñúhu tucu-í xii-ndo sá vǎ quíní ñáhá-gǎ-ndó xii-í, dico sáá nduu quíní ñáhá tucu-ndo, te dàvá-áⁿ cachí-ndó: “Ío cǎhnu cuu Yaá ní tendaha Dútú Ndiǒxí véxi”, duha cachí-ndó —cächí-gǎ xǎhaⁿ-gǎ xii-yu.

24

Jèsús cächí-gá sá ngóyó veñúhu

(Mr. 13:1-2; Lc. 21:5-6)

1 Te Jèsús ní quee-gǎ veñúhu cǎhnu sá ío cùnuu, te mei òré ní queheⁿ-gǎ ichi quíhíⁿ-gǎ ñⁿ xichi, te ní sǎndehe yatni cue téé xica cuu ndihi-gǎ ñíhí-gǎ, te xǎhaⁿ-güedě xii-gǎ:

—Cundehe veñúhu-a nǎ ío váha ní sáá —cächí-güedě xǎhaⁿ-güedě xii-gǎ.

2 Te Jèsús ní xǎhaⁿ-gǎ xii-güedě:

—Na cächí tñúhu ndáá-í xii-ndo sá ncháá sǎ ndéhé-ndó-á vitna sáá nduu te vá cündùu-gǎ-xi dàtná cáá-xí vitna, chi ní ñⁿ-gǎ yúú vǎ códó nchìhi tnaha-xi chi ndihi ngoyo —cächí-gǎ xǎhaⁿ-gǎ xii-güedě.

Nàcuáa cada-xi nduu ta cùyatni naa ñuyúu-a

(Mr. 13:3-23; Lc. 21:7-24; 17:22-24)

3 Te Jèsús ní sáá-gǎ ndihi cue téé xica cuu ndihi-gǎ yucu

Òlívú, te xíaⁿ ñí ngóo-gǎ te núú núcòo-gǎ-áⁿ ñí sáháⁿ cue téé xica cuu ndihi-gǎ, te dayuhu ñí xǎhaⁿ-güedě xii-gǎ:

—Cuíní-ndí cachí tñúhu-n nǎ nduu dùcaⁿ cada-xi ngoyo veñúhu cǎhnu sá ío cùnuu, ndihi nǎndí cùu sá cádá-xí òré sa ta cùyatni nduu quixi tucu-n ñuyúu-a, ndihi òré sa ta cùyatni naa-xi —cachí-güedě xǎhaⁿ-güedě xii-gǎ.

4 Te Jèsús ní xǎhaⁿ-gǎ xii-güedě:

—Ío quíhi iní-ndó cündecu-ndo cuendá sá vǎ yǒo dandáhú ñáhá xii-ndo. 5 Chi ío cuéhé cue téé coo ñuyúu, te danani-güedé méé-güedé dàtná nǎni-í, te cachí-güedé: “Yúhú cùu-í Crístú Yaá ní tendaha Yá Ndiǒxí véxi ñuyúu-a”, duha cachí-güedé. Te sá dúcáⁿ cǎháⁿ-güedé te ío vǎi ñáyiu dandáhú-güedé. 6 Te níhí-ndó tñúhu nǎá-güedé nděni ní cuu, dico vá yùhú-ndó chi dacuití sǎ dúcáⁿ càda-xi, dico vátá sǎá-gǎ nduu nǎa ñuyúu òré ducaⁿ càda-xi. 7 Chi cue téé ñⁿ nàcióⁿ nǎá-güedé ndihi cue téé ingá nàcióⁿ, te titní ñuú ngüita-güedé nǎá-güedé, te titní xichi ñuyúu coo tnamá, te titní tucu xichi ñuyúu quixi cuéhé, te titní tucu xichi ñuyúu ío níhi tnáa. 8 Te nchaa xíaⁿ cuu-xi tñúndòho sá vitná váha váha quèsaha sá cùu-xí cué ñáyiu xíndecu ñuyúu.

9 Te cue ñáyiu na cùu úhú iní ñáhá xii-ndo cuáha cuendá ñáhá-yu núú cué téé cùchiuⁿ cuendá caniha-güedě xii-ndo, te dava-ndo cǎhni ñaha-güedé, te nchaa ñáyiu

cuu úhú iní ñáhă-yu xii-ndo sã cuendá-í. ¹⁰ Te dává-án ïo vai ñáyiú dàñá-yu sá sãndáá iní-yu Yá Ndiöxí, te ngóo-yu cuu úhú iní tnáhă-yu, te cuáha cuendá tnáhă-yu núú cuè téé cùchiuⁿ. ¹¹ Te ïo vai cue téé cachí-güedé sá cãháⁿ-güedé tnúhu Yá Ndiöxí te ñá ndáá sá cãháⁿ-güedé tnúhu-gá, te ducaⁿ ïo vai ñáyiú dandáhú-güedé. ¹² Te dává-án cunuu mée-ni nchaa sá cuèhé sá dúhá càdá-yu, te vai-yu vá cúú iní-gá-yu tnàha ñáyiú-yu. ¹³ Dico nchaa ñáyiú na càda ndee-ni iní canchicúⁿ nihnu ñaha-ni xii-í, ñáyiú-án naníhí tãhú-yu. ¹⁴ Te nihí ñuyúú quíhíⁿ ñáyiú cãháⁿ-yu tnúhu váha, tnúhu sá cãháⁿ nãcuáa ndíhu ndaha ñàha Yá Ndiöxí xii ñáyiú, te sátá ná nihí nchaa ñáyiú tnúhu-án te naa ñuyúú.

¹⁵ Te ndíi Damiél téé ní xóo cãháⁿ tnúhu Yá Ndiöxí ndéé sanaha ní chídó tnúni ndíi cuendá ìⁿ sá dáquèe tihú Yá Ndiöxí cundecu ìⁿ xichi núú ní cuu íí, te xiãⁿ cada-xi sá vá cündècu-gá ni ìⁿ ñáyiú xiáⁿ. Te cada cuendá váha-ndo nãcuáa ní cãháⁿ ndíi, chí nduu na quini-ndó xiãⁿ cundecu-xi núú dúcáⁿ ní cuu íí, ¹⁶ te dává-án nchaa ñáyiú xĩndecu distritú Jùdeá xini ñùhu-xi cunú-yu quíhíⁿ-yu xití yucu. ¹⁷ Te nchaa ñáyiú ndáa ndódó díquí véhé-xí vá ndíhu-gá-yu vehé-yu quehéⁿ-yu ìⁿ ndachíúⁿ-yu canehé-yu quíhíⁿ. ¹⁸ Te nchaa ñáyiú cuáháⁿ yucu vá nùhú-gá-yu vehé-yu cúnúquehéⁿ-yu dóo-yu. ¹⁹ ¡Te

ndáhú ní cuu nchaa ñáyiú ñíhí ñúhú dẽhe-xi, ndíhi cue ñáyiú ñíhí xĩndeca déhe vitna sãdi na saá nduu dùcaⁿ cada-xi! ²⁰ Te nchòhó, chí càcãⁿ tãhú núú Yá Ndiöxí cuendá sá vá dúcáⁿ ndòho-ndo yóo quidé víxiⁿ-xi, te ni vá dúcáⁿ ndòho-ndo nduu cuu-xi nduu ndetatu-ndó. ²¹ Chí dává-án coo tnúndòho cahnu vihi ñuyúú, te vátá ìⁿ ndùu-gá coo tnúndòho cahnu vihi-án ndéé cúnahá ní ngáva ñuyúú, chí ñu-ni dává-án coo tnúndòho cahnu vihi-án, te ni núú cuáhãⁿ núú véxi vá cóo-gã tnúndòho-án. ²² Te Yá Ndiöxí cachí-gá sá vá ïo vai nduu coo tnúndòho cahnu vihi-án sã cuendá nchaa ñáyiú ní cãháⁿ-gá cundecu ndíhi-gá. Chí núu vai nduu na coo tnúndòho-án te vá yóo cácu nihnu.

²³ Te núu ïo ñáyiú cãchí-yu xii-ndo: “Chí cündèhe iha, chí iha ní quexio Cristú Yaá ní tendaha Yá Ndiöxí véxi ñuyúú-a”, àdi cachí-yu: “Chí cündèhe yacáⁿ chí yacáⁿ ndécú-gã”, cãchí-yu ña. Te vá quindáá iní-ndó tnúhu cãháⁿ-yu. ²⁴ Chí coo cue téé cachí-güedé sá cúú-güedé Yaá ní tendaha Yá Ndiöxí véxi ñuyúú-a, te dava-güedé cachí-güedé sá cúú-güedé cue téé cãháⁿ tnúhu Yá Ndiöxí dico ñá ndáá sá cúú-güedé cue téé cãháⁿ tnúhu-gá, te cada-güedé titní núú sã vá yóo tnàhí ndàcu cada cuendá dandáhú-güedé ñáyiú. Te cani iní-güedé dandáhú-güedé ndéé cue ñáyiú ní cãháⁿ Yá Ndiöxí cundecu ndíhi-gá. ²⁵ Te duha ndùu tnúhu cãháⁿ-í

dátŭha ñaha-ĩ xii-ndo. ²⁶ Te núu cächí-yu xii-ndo: “Xiti yucu-ãⁿ ní quexìo Yaá ní tendaha Yă Ndiõxí véxi ñuyíú-a”, cächí-yu. Te vá quìndáá iní-ndó quĩhíⁿ-ndó, àdi cachí-yu: “Vehe-ãⁿ ndécú Yaá ní tendaha Yă Ndiõxí véxi ñuyíú-a”, cächí-yu. Te vá quìndáá iní-ndó tnũhu cáháⁿ-yu. ²⁷ Chi dàtná xini nchaa ñáyiu quide-xi oré sáa ndúté dáyehé-xi ni càa xico ñuyíú ducaⁿ càda-xi oré quixi tucu yúhú Tée cùu ñaní tnáhá-ndó nchàa-ndo chi nchaá-yu quini ñáhă-yu xii-í. ²⁸ Te nchòhó xini-ndó sã ncháá núu yúcú yiqui cuñú ní xihí te yacáⁿ tàcá nchaa ndixíí xéxí-güèdi.

Nàcuáa cada-xi òré quixi tucu Tée cùu ñaní tnáhá cuè ñáyiu

(Mr. 13:24-37; Lc. 21:25-33; 17:26-30, 34-36)

²⁹ Te na yãha-ni coo tnúndòho cahnu vihi-áⁿ, te vá dáyehé-gá nchícanhii, te ni vá dáyehé-gá yóó, te ngoyo nchaa chódíní ndéè andiu, te quidi-xi andiu ³⁰ nàcuáa cutnùní iní ñáyiu sá sà véxi yúhú Tée cùu ñaní tnáhă-yu nchaá-yu. Te cue ñáyiu nihí ñuyíú ndăhyú-yu sá ndihú iní-yu òré ducaⁿ càda-xi, te nchaá-yu quini ñáhă-yu xii-í quee-í andiu quixi-í ichi xiti vícò, te quini-yu sá ïo càhnu cuu-í, te quide-í nchaa sá vãha. ³¹ Te tauchìuⁿ-í cue espíritú xínú cuèchi núu-í níhi tiú-xi cútú nadatácá-xi nchaa ñáyiu ní cáháⁿ-í chitnahá

ñáhá xii-í xĩndecu ni càa xico ñuyíú.

³² Te nchòhó sa xini-ndó nàcuáa quide yutnu ngúxí, chi yutnu-áⁿ ndúu yùte núu dité-xi te nàtáhú ndaha-xi. Te òré ducaⁿ quide-xi te cächí-ndó sã sà ní cuyatni nuu cahni. ³³ Te diu-ni ducaⁿ sãtnahá-xi cada-xi ñuyíú-a òré ná quini-ndó càda-xi nchaa nàcuáa ní cáháⁿ-í, te cutnùní iní-ndó sã sà ní cuyatni vii-nã nduu nãa ñuyíú. ³⁴ Te na cächí tnúhu ndáá-í xii-ndo sã òré vátá cùú-gá nchaa ñáyiu xĩndecu ñuyíú-a vitna, te cada-xi nchaa nàcuáa ní cáháⁿ-í. ³⁵ Te andiu ndihí ñuyíú-a chi ndihí nihnu-xi, dico tnúhu-í chi vá ndihí nihnu-xi chi cùu-xi tnúhu ndáá cuiti.

³⁶ Dico ñá túu cùtnuní ná nduu quixi tucu-í, te ni ñã túu cùtnuní ná òré chi vá yõo xini, te ni cuè espíritú xínú cuèchi núu Yă Ndiõxí ñã túu xini-xi ná nduu quixi-í, te ni mèe yúhú Tée cùu Déhe Dútú Ndiõxí ñã túu xini-í ná nduu quixi tucu-í, chi ñndii díi-ni mee-gã xini-gá núu ná nduu quixi-í.

³⁷ Te nduu na quixi tucu yúhú Tée cùu ñaní tnáhá-ndó nchàa-ndo ñuyíú-a te cada-xi dàtná ní quide-xi cùtnahá ní xĩndecu ndíi Nõé. ³⁸ Chi nchaa ñáyiu ní xĩndecu dàvã-áⁿ òré vátá ndáá-gã ndute ñuyíú, te xéxí-yu xihí-yu quidé-yu, te davã-yu ió-yu vico tnãndaha, te davã-yu dàsãⁿ-yu déhe yòcò-yu candeca ñaha tõe, te ducaⁿ-ni xiquidé-yu ndéé ní sáa nduu cuãnguee té Nõé

xití bàrcú. ³⁹ Te ñá túú ní cùtnuní iní-yu nàcuáa cada-xi ñuyíú ndeé ní sáá nduu ní ngúita-xi ní cuuⁿ dáú ní ndaa ndute ñuyíú ní dánáá ñaha-xi xií-yu. Te diu-ni ducaⁿ sãtnahá tucu-xi cada-xi nduu na quixi tucu yúhú Tée cùu ñaní tnáhã-yu nchaá-yu ñuyíú-a, chi nduu ña túú nã yíhí iní-yu te quixi tucu-í. ⁴⁰ Te dāvã-áⁿ nūu úú tnáhã cue tée yíhi-güedé xití yucu, te ñⁿ-dé ndanchita te ñⁿ-dé quendóo. ⁴¹ Adi úú ñáyíu dihí nchicõ-yu ñⁿ-ni vehe, te ñⁿ-yu ndanchita te ñⁿ-yu quendóo.

⁴² Te duha ndūu tnúhu càháⁿ-í cuendá nchòhó cundecu túha-ndo, chi ñá túú xìní-ndó nã òré quixi tucu yúhú Yaá cúú Xitohó-ndó. ⁴³ Te nchòhó xìní-ndó sã nūu ñⁿ tée cùu xitohó vehe xìní-dé ná òré cúú-xí niú quíhu ñadúhú vehe-dé duhu-güedé, te quíhi iní-dé cundecu-dé cuendá sá vã dáñá-dé quíhu ñadúhú-ãⁿ vehe-dé duhu-güedé, dico ñá túú xìní-dé. ⁴⁴ Te duha càháⁿ-í chi nchòhó xìní ñùhu-xi cundecu túha-ndo, chi na cuáháⁿ òré ñá túú nã yíhí iní-ndó quèxio yúhú Tée cùu ñaní tnáhã-ndó nchàa-ndo.

*Cuendá ñⁿ tée xínu cuechi
(Lc. 12:41-48)*

⁴⁵ Te na càni-í ñⁿ cuendú núu-ndó. ñⁿ tée xínu cuechi núu ñⁿ patróoⁿ cúú-dé ñⁿ tée ío váha tècú tnùní, te quide ndáá-dé ndécú-dé. Te ñⁿ xito ní dándõo ndaha ñaha patróoⁿ-dè xii-dé nchaa cue ñáyíu ndècu vehe-dé cuendá coto ñaha-dé

xií-yu cuáñaha-dé sá cáxi-yu òré tàu-xi caxí-yu, te tée cùu patróoⁿ-áⁿ ní quee-dé cuáháⁿ-dè. ⁴⁶ Te váha táhú tée xínu cuechi-áⁿ te nūu ndècuu-dé quidé-dé nchaa nàcuáa ní xáhaⁿ patróoⁿ-dè cada-dé mei òré ní nasáá patróoⁿ-dè-áⁿ. ⁴⁷ Te na càhí tnúhu ndáá-í xii-ndo sã tée cùu patróoⁿ-dè-áⁿ cūñaha-dé xii-dé sá quíndàha-dé nchaa sá ndécú ndíhi-dé. ⁴⁸ Dico nūu tée xínu cuechi-áⁿ ní cùu-dé ñⁿ tée cuihna iní-xi, te ngóo-dé cani iní-dé sá cùyaa patróoⁿ-dè vá násáa ndíhi-dé. ⁴⁹ Te ngúita-dé cani-dé nchaa dava-gã cue ñáyíu xínu cuechi ndíhi-dé, te ngóo-dé caxi-dé coho-dé cada-dé ndíhi nchaa cue tée quíhu. ⁵⁰ Te ñⁿ nduu òré ñá túú yíhi iní-dé nasáá patróoⁿ-dè, ⁵¹ te ío dandòho ñaha patróoⁿ-dè xii-dé, chi daquihíⁿ ñáhã-dé xii-dé núu xíndecu cue ñáyíu ní cachí sá ní quide ndáá te ñá ndàá sá ní quide ndáá-yu. Te ducaⁿ sãtnahá-xi dandòho ñaha Yá Ndiõxí xii ñáyíu, chi daquihíⁿ ñáhã-gã xií-yu ñⁿ xichi núu ío ndohó-yu te yacáⁿ ío ndáhyú-yu, te dicó rúhñú-nã cuu núhu-yu sá sàtú iní-yu sá ndóhõ-yu — càhí-gã xáhaⁿ-gã xii-güedé.

25

Cuendá úxí ñáyíu dihí

¹ Te xáhaⁿ tùcu Jesús xii-güedé:

—Na càni-í ñⁿ cuendú núu-ndó nàcuáa tecú tnùní-ndó nàcuáa cada-xi òré ndíhu ndaha ñaha Yá

Ndiõxí xii ñáyiu. Te úxí tnàhá ñáyiu dìhí ñáyiu cuechi nĩ quehéⁿ-yu lintérnă-yu, te cuáháⁿ-yu ìⁿ xichi núú cóó vico tnándaha cuèndá cundetú-yu quexio téé tnándaha. ² Te úhúⁿ ñáyiu cuechi-ăⁿ ïo váha cùtnuní iní-yu, te úhúⁿ-yu ñáhá. ³ Te ndi ùhúⁿ ñáyiu cuechi dùcaⁿ ñá túú cùtnuní iní-xi-áⁿ ñà túú ní cãnehé-yu sá ndëe lintérnă-yu. ⁴ Dico ndi ùhúⁿ ñáyiu cuechi cùtnuní iní-xi-áⁿ nehě-yu sá ndëe lintérnă-yu. ⁵ Te téé tnándaha-áⁿ cùyaa-dé quexio-dé núú ndétú ñàhá-yu-áⁿ, te nini dùcaⁿ cuyaa-dé ní tni ñaha sàní xii-yu ní xidí-yu. ⁶ Te cùu-xi datná dava niú nihi ní cáháⁿ dava-gá ñáyiu, te cãchí-yu: “Sa véxi téé tnándaha, chí táquèe quehé queheⁿ cuèndá-ndó-dě”, cãchí-yu. ⁷ Te ndi ùxí ñáyiu cuechi-ăⁿ nĩ ndacóo-yu quide túha-yu lintérnă-yu. ⁸ Te ndi ùhúⁿ ñáyiu cuechi ñà túú cùtnuní iní-xi-áⁿ nĩ xáhăⁿ-yu xii cue ndi ùhúⁿ ñáyiu cùtnuní iní-xi-áⁿ: “Chí táxí nùu luha sá ndëe lintérnă-ndó ná ndëe lintérnă-ndí chí ñá cuiní-xi cáyú mee-ni ndàhvá”, cãchí-yu xáhăⁿ-yu. ⁹ Te cue ñáyiu cuechi cùtnuní iní-xi-áⁿ nĩ xáhăⁿ-yu: “Vá táxí nùu-ndí chí vá tnàhá canehe chiúⁿ mee-ndí, te váha-gá chí cuáháⁿ cuaaⁿ-ndo nũú cuè ñáyiu xidícó cuèndá sá vã cúmăní xii-ndo, te vá cúmăní xii nchúhú tucu”, cãchí-yu xáhăⁿ-yu. ¹⁰ Te nini cuáháⁿ ndi ùhúⁿ

ñáyiu ducaⁿ ñà túú cùtnuní iní-xi-áⁿ cuãnguaaⁿ-yu sá ndëe lintérnă-yu ní quexio téé tnándaha. Te ndi ùhúⁿ ñáyiu cuechi cùtnuní iní-xi-áⁿ nĩ queheⁿ cuèndá ñáhă-yu xii-dé, te cuãnguihu ndihi ñàhá-yu xii-dé núú cóó vico tnándaha, te sátá dúcáⁿ te ní nandedí yuyèhe. ¹¹ Te òré ní nasáá cue ñáyiu cuechi ñáyiu ní sãnguaaⁿ sá ndëe lintérnă-xi-áⁿ, te ní ngüíta-yu cáháⁿ-yu xĩnutnií-yu ndàa sátá yuyèhe ndaa quehé, te xáhăⁿ-yu xii téé tnándaha-áⁿ: “¡Tăta, nacaáⁿ yuyèhe na quíhu-ndí!”, cãchí-yu xáhăⁿ-yu xii-dé. ¹² Te téé tnándaha-áⁿ nĩ xáhaⁿ-dě xii-yu: “Na cãchí tnúhu ndáá-í xii-ndo sã nchòhó ñá túú tau-ndó quíhu-ndo vico-a, chí ñá túú tnàhá tnúhu ndihi ñaha-ndo xii-í”, cãchí-dé xáhaⁿ-dě xii-yu —cãchí Jësús xáhaⁿ-gă xii-güedé.

¹³ Te xáhaⁿ tucu Jësús xii-güedé:

—Ío quíhi iní-ndó cùndecu-ndo, chí ñá túú xini-ndó nã nduu, te ni ñà túú xini-ndó nã òré quixi tucu yúhú Téé cùu ñani tnàhá-ndó nchàa-ndo —cachí-gá xáhaⁿ-gă xii-güedé.

Cuèndá cue téé ní ndóo ndaha dîhúⁿ
(Lc. 19:11-27)

¹⁴ Te xáhaⁿ tucu Jësús xii-güedé:

—Na cãni tucu-í ingá cuèndú núú-ndó nãcuáa tecú tnuní-ndó nãcuáa cada-xi òré ndihu ndaha ñàha Yá Ndiõxí xii ñáyiu. Ìⁿ téé sa ñuhu ichi-ná-dé sá cacá-dě

quíngaca cuu xica-dě, te ní cana-dé cue tée xinu cuechi núú-dě cuendá dándõ ndaha ñaha-dé dímúⁿ-dě xii-güedé.

15 Te nàcuáa ndùu chiuⁿ quide ìⁿ ìⁿ-güedé te ducaⁿ dímúⁿ ní sãñaha-dě xii-güedé, te ìⁿ-dé ní sãñaha-dě úhúⁿ tñahá dímúⁿ sã ìo yahu nàni talentú, te ingá-dé ní sãñaha-dě úú tñahá dímúⁿ-ãⁿ, te ingá-dé ní sãñaha-dě ìⁿ dímúⁿ-ãⁿ, te dãtnùní ní quee-dé cuáhãⁿ-dé. 16 Te tée ní queheⁿ cuendá úhúⁿ tñahá dímúⁿ sã nání tàlentú ní quide-dé ndáhú ndihì-xi te ní níhí tucu-dé úhúⁿ-gá tucu tñahá dímúⁿ-ãⁿ. 17 Te ñu-ni ducaⁿ ní quide tucu tée ní níhí úú dímúⁿ sã nání tàlentú-ãⁿ, chi ní quide-dé ndáhú te ní níhí tucu-dé úú-gá tucu tñahá. 18 Dico tée ní níhí ìⁿ-ni dímúⁿ-ãⁿ chi da ní chiváha-dé dímúⁿ pàtróóⁿ-dě, chi ní xete-dé ìⁿ yaú te ní chindúxi-dé.

19 Te ní cuu cuéhé nduu sã ní quee pàtróóⁿ-güedé-ãⁿ ní sãngaca cuu-dé, te ní nasáá-dé te ní ngúita-dé quidé ndáá-dé ndihì-güedé cuendá dímúⁿ sã ní dándõ ndaha ñaha-dé xii-güedé. 20 Te tée ní quendõ ndaha úhúⁿ tñahá dímúⁿ-ãⁿ ní xáhaⁿ-dě xii pàtróóⁿ-dë: “Pàtróóⁿ, náu úhúⁿ tñahá dímúⁿ sã ní dándõ ndaha ñaha-n xii-í-a, te ní sáhãⁿ-í ní quide-í ndihì-xi ndáhú te ní chídó-xí úhúⁿ-gá tucu tñahá, te náu-a naqueheⁿ cuendãⁿ”, cãchí-dé xáhaⁿ-dë xii pàtróóⁿ-dë. 21 Te tée cùu pàtróóⁿ-dë-ãⁿ ní xáhaⁿ-dë xii-dé: “Ío váha ní quide-n, te vitna quide ñaha-í xii-n

ìⁿ tée váha tée quide ndáá, te sã sàcú dímúⁿ ní dándõ ndaha ñaha-í xii-n te ní quide ndáá-n, te sã dúcãⁿ ní quide-n te vãi-gá taxi cuendá ñahã-í xii-n. Te vitna cuu cundecu-n núú ndécù-í, te ío cudíí ìní-ó cundecu ndihì tñaha-o”, cachí tée cùu pàtróóⁿ-dë-ãⁿ xáhaⁿ-dë xii-dé. 22 Te sãtã dúcãⁿ te tée ní quendõ ndaha úú tñahá dímúⁿ sã nání tàlentú-ãⁿ ní xáhaⁿ-dë xii pàtróóⁿ-güedë: “Pàtróóⁿ, náu úú tñahá dímúⁿ sã ní dándõ ndaha ñaha-n-a, te ní sáhãⁿ-í ní quide-í ndihì-xi ndáhú, te ní chídó-xí úú-gá tucu tñahá, te náu-a naqueheⁿ cuendãⁿ”, cãchí-dé xáhaⁿ-dë xii pàtróóⁿ-güedë. 23 Te ní xáhaⁿ tée cùu pàtróóⁿ-ãⁿ xii-dé: “Ío váha ní quide-n, te vitna quide ñaha-í xii-n ìⁿ tée váha tée quide ndáá, te sã sàcú dímúⁿ ní dándõ ndaha ñaha-í xii-n te ní quide ndáá-n, te sã dúcãⁿ ní quide-n te vãi-gá taxi cuendã-í. Te vitna cuu cundecu-n núú ndécù-í, te ío cudíí ìní-ó cundecu ndihì tñaha-o”, cachí tée cùu pàtróóⁿ-ãⁿ xáhaⁿ-dë xii-dé. 24 Te tée ní ndõo ndaha ìⁿ-ni dímúⁿ-ãⁿ ní xáhaⁿ-dë xii tée cùu pàtróóⁿ-dë-ãⁿ: “Pàtróóⁿ, yúhú sa naha-í sã yòhó cúú-n ìⁿ tée ndùcu mee-ni sã cúú-xí mèe-xi te tàhu-n chiuⁿ cuáhãⁿ nchúhú cue tée xinu cuechi núú-n sãcãⁿ-ndí triú, te òré ná nãtaxi tñaha-ndí, te yòhó dicó-nã náquëheⁿ cuendã-n tàxúha-n. 25 Te núu xiãⁿ ní yúhú-í cada-í ndáhú ndihì dímúⁿ-n, te ní sáhãⁿ-í ní xete-í ìⁿ yaú te ní chindúxi-í, te

náu díhúⁿ-n-áⁿ naqueheⁿ cuendáⁿ”, cächí-dé xǎhaⁿ-dě xii téé cùu patróóⁿ-áⁿ. ²⁶ Te téé cùu patróóⁿ-áⁿ nǐ xáhaⁿ-dě: “Yòhó cúu-n ìⁿ téé cuihna ìní-xi xìnu cuechi núu-í te cuhndu-n, te núu yòhó sání ìní-n sǎ cúu-í ìⁿ téé tàuchiuⁿ cuáháⁿ-ndó sǎcáⁿ-ndó triú te òré nátàxi tnaha-ndo, te yúhú dìcò-nǎ náqueheⁿ cuendá-í nátàxúha-í. ²⁷ Te núu sání ìní-n sǎ dúcáⁿ quide-í, te dasaⁿ núu-n díhúⁿ-í te cúñaha-n chǎhu-yu díquí-xi ní cùu, te òré ndexio-í te sa ngódó lùha-gá díquí-xi naqueheⁿ-í ní cùu”, cachí-dé xǎhaⁿ-dě xii téé xìnu cuechi-áⁿ. ²⁸ Te téé cùu patróóⁿ-áⁿ nǐ xáhaⁿ-dě xii dava-gá cue téé ndècu ndìhi-dé: “Chí quéndèé ìⁿ díhúⁿ sǎ nání tàlentú nèhé tée-áⁿ, te cuáha-ndo tée nèhe úxí tnáhá ñu-ni díhúⁿ-áⁿ. ²⁹ Chí cue téé sa ndècu ndìhi te níhí-gǎ-güedé cundecu ndìhi-güedé, te ni vǎ níhí-gǎ-güedé ndèé cundecu nchaa sǎ cündècu ndìhi-güedé. Te cue téé ñá túú nǎ ndécú ndìhi vai, te nchaa sǎ ndécú ndìhi-güedé vá cündècu ndìhi-gǎ-güedé. ³⁰ Te téé xìnu cuechi ñá túú vèdana nàndìhi-áⁿ, chí tnǎ-dě te daquìhíⁿ-ndó-dě ìⁿ xichi núu néé núu ìo ndoho-dé, te yàcáⁿ ndáhyú-dé, te dìcò rúhñú-nǎ cuu núhu-dé sǎ sǎtú ìní-dé sǎ ndóhó-dě”, cächí téé cùu patróóⁿ-áⁿ xǎhaⁿ-dě xii-güedé. Duha sǎtnahá-xi ndoho nchaa ñáyiu ñá túú quide váha — cächí-gǎ xǎhaⁿ-gǎ xii-güedé.

Cuendá cue ñáyiu ní quide váha ndìhi cuendá cue ñáyiu ñá

túu ní quide váha

³¹ Te xǎhaⁿ tucu Jesús xii-güedé:

—Te nduu na quixi tucu yúhú Téé cùu ñaní tnáhá-ndó nchaa-ndo, te quixi-í ndìhi nchaa cue espíritú xínú cuèchi núu-í, te nchaa ñáyiu quini-yu sǎ ìo càhnu cuu-í, te dàvǎ-áⁿ cunucóo-í núu táxí tnùnì-í, te ìo cuñúhu ñáyiu sǎ ìo càhnu cuu-í. ³² Te dàvǎ-áⁿ nataká nchaa ñáyiu xǐndecu ní càa xico ñuyú cundecú-yu núu-í, te cada-í-yu dàtná quidé ìⁿ toli oré táu dìhí-dé nchaa mbéé ndìhi nchaa chivá chi dìhí taxi ndecu-dé nchaa mbéé, te dìhí taxi ndecu-dé nchaa chivá. ³³ Te ducaⁿ sǎtnahá-xi cada-í chi nchaa ñáyiu ní quide ndáá núu-í ñáyiu-áⁿ taxi ndecu-í-yu xio cùha-í, te nchaa ñáyiu cuihna ìní-xi ñá túú ní cuíni cada ndáá núu-í ñáyiu-áⁿ taxi ndecu-í-yu xio dàtni-í. ³⁴ Te ducaⁿ te yúhú téé ìo cùnuu cúñaha-í xii ñáyiu na cündècu xio cuha-í: “Nchaa nchòhó ñáyiu ní quide váha ñaha Tǎtǎ-í Dútú Ndiòxí, chí nèhé chi vitna ní sǎá nduu cündècu-ndo núu ndécú-gǎ táxí tnùnì-gǎ, chí ndéé cùtnáhá ní ngáva ñuyú sa ndècu túha tnàhí núu ndécú-gǎ-áⁿ sǎ nchòhó nduu táhú-ndó cündècu-ndo. ³⁵ Te ducaⁿ chí òré xihí-í docó te ní taxi-ndo sǎ nǐ xexi-í, te òré yìhí-í ndute te ní taxi-ndo ndute ní xihí-í, te òré ñúhù-í ichi te ní taxi-ndo vèhe ní ndetatú-í. ³⁶ Te òré xínì ñúhu-í dóó cuihnu-í te ní taxi-ndo, te òré ní cuhú-í te ní quixi coto ñaha-ndo xii-í,

te òré ní xíhi-í vecaá te ní quixi tucu-ndo ní quixi coto ñaha-ndo xii-í”, duha cúñaha-í xii nchaa ñáyiú-áⁿ. ³⁷ Te nchaa ñáyiú ducaⁿ ní quide ndáá-áⁿ cúñahá-yu xii-í:

“Yòhó Yaá cúú Xìtohó-ndí, ní ìⁿ xito ñá túú ní tàxi-ndí sá cáxi-n òré xihí-n dòcó, te ní ìⁿ xito ñá túú ní tàxi-ndí ndute coho-n òré yìchí-n.

³⁸ Te ní ñà túú ní tàxi-ndí vehe ndetatú-n òré ñùhú-n ìchi, te ní ñà túú ní tàxi-ndí dóó cuihnu-n òré xíní ñùhu-n.

³⁹ Te ní ñà túú ní quixi coto ñaha-ndí xii-n òré ní cuhú-n, te ní ñà túú ní quixi coto ñaha-ndí xii-n òré ní xíhi-n vecaá”, duha quesahá-yu cúñahá-yu xii-í. ⁴⁰ Te yúhú téé cùnūu cúñaha-í xií-yu: “Na càchí tñúhu ndáá-í xii-ndo sã ncháá sã vãha ní quide-ndo sã cúú-xí nchaa ñáyiú xĩndecu ichi-í cuèi ío ndàhú xĩndáa-yu, te sã dúcáⁿ ní quide-ndo sã vãha sã cúú-xí-yu, te cada iní-ndó sã mèe-í ducaⁿ ní quide-ndo ní xito ñaha-ndo xii-í”, duha cúñaha-í xií-yu.

⁴¹ Te dǎtnùní cúñaha-í xii ñáyiú na cùndecu xio datni-í: “Nchaa nchòhó ñáyiú ní xíta nihnu chí xócuìñí núú ndécù-í-a, chí nchòhó ní nduu tãhú-ndó cùndecu-ndo núú ñùhú núú càyù, ñiú-ni núú ní quide túha-í cundecu sácuíhna ndihi nchaa espíritú cùndèhi-xi, te yàcáⁿ cundecu-ndo ní caa ní quíhíⁿ. ⁴² Chí yúhú òré xihí-í docó te ñá túú ní tàxi-ndo sá cáxi-í, te ní òré yìchí-í ndute te ñá túú ní tàxi-ndo ndute coho-í. ⁴³ Te ní òré ní

xúhuⁿ-í ichi ñá túú ní tàxi-ndo vehe ndetatú-í, te ní òré xíní ñùhu-í dóó cuihnu-í te ñá túú ní tàxi-ndo, te ní òré ní cuhú-í te ñá túú ní quixi-ndo quixi coto ñaha-ndo xii-í,

te ní òré ní xíhi-í vecaá te ñiú-ni ducaⁿ ní quide-ndo ñà túú ní quixi-ndo quixi coto ñaha-ndo xii-í”, duha cúñaha-í xii-yu. ⁴⁴ Te ñáyiú-áⁿ cúñahá-yu xii-í: “Yòhó Yaá

cúú Xìtohó-ndí ní ìⁿ xito ñá túú ní xíní-ndí òré xihí-n dòcó cuendá taxi-ndí sá cáxi-n, te ní ìⁿ xito ñá túú ní xíní-ndí òré yìchí-n ndute cuendá

taxi-ndí ndute coho-n, te ní ìⁿ xito ñá túú ní xíní-ndí cuhúⁿ-n ìchi cuendá taxi-ndí vehe ndetatú-n, te ní ìⁿ xito

ñá túú ní xíní-ndí òré xíní ñùhu-n dóó cuendá taxi-ndí dóó cuihnu-n, te ní ìⁿ xito

ñá túú ní xíní-ndí òré cùhú-n cuendá quixi coto ñaha-ndí xii-n, te ní ìⁿ xito ñá túú ní xíní-ndí quíhi-n vecaá cuendá

quixi coto ñaha-ndí xii-n”, duha quesahá-yu cúñahá-yu xii-í. ⁴⁵ Te yúhú cúñaha-í xií-yu: “Na càchí tñúhu ndáá-í xii-ndo sã sã cuendá sã ñà túú ní quide-ndo ìⁿ sã vãha

sã cúú-xí cuè ñáyiú ndècu ichi-í cuèi ío ndàhú xĩndáa-yu, te sã dúcáⁿ ní quide-ndo ñà túú ní quide-ndo sã vãha sã

cúú-xí-yu, te cada iní-ndó sã mèe-í ducaⁿ ní quide-ndo ñà túú ní quide-ndo sã vãha sã cúú-xí-í”, duha cúñaha-í xií-yu. ⁴⁶ Te nchaa ñáyiú-áⁿ

quíhíⁿ-yu núú ùhú núú ndàhú ní caa ní quíhíⁿ. Te nchaa

ñáyiú ní quide ndáá núù-í ní xíndecu ñuyíú-a, ñáyiú-áⁿ nduu táhú-yu ío váha cundecú-yu ni caa ni quíhíⁿ — cächí-gá xáhaⁿ-gã xii-güedé.

26

Cue téé cùu úhú iní ñáhá xii Jesús ndúcú-güedé nàcuáa cada-güedé tñi ñaha-güedé xii-gá

(Mr. 14:1-2; Lc. 22:1-2; Jn. 11:45-53)

¹ Te sátá ñi yáha ducaⁿ ñi cáháⁿ Jèsús, te ní xáhaⁿ-gã xii cue téé xica cuu ndihi-gá:

² —Nchòhó sa xini-ndó sã cùmání úú-gá nduu te coo vico pàscuá, te cächí tnúhu-í xii-ndo sã yúhú Téé cùu ñaní tnáhá-ndó nchàa-ndo tñi ñaha-güedé xii-í, te cuáha cuendá ñáhá-güedé núú cuè téé cùu úhú iní ñáhá xii-í, te cata caa ñaha-güedé núú cùrúxí te núú cùrúxí-áⁿ cuú-í —cächí-gá xáhaⁿ-gã xii-güedé.

³ Te diu-ni òré càháⁿ ndihi Jèsús cue téé xica cuu ndihi-gá ní nataká cue téé cùu dútú cúnùu, ndihi cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi cue téé cùu sacuéhé nùú ñáyiú israhél. Te mei quèhé vehe núú cúú vèchiuⁿ té Calfás téé cùu dútú ío-gá cúnùu ní nataká-güedé. ⁴ Te xíaⁿ ñi ndatnúhu-güedé nàcuáa cada-güedé dandáhú-güedé Jèsús cuendá tñi ñaha-güedé xii-gá, te cahni ñaha-güedé.

⁵ Te ní xitnáha-güedé:

—Váha-gá sá vã tñí-ó Jèsús mei ndùu vico, chi núu ducaⁿ na càda-o te ío dusaⁿ

càda ñáyiú —cächí-güedé xitnáha-güedé.

Íiⁿ ñadihí chíhí-áⁿ àciti díquí Jèsús

(Mr. 14:3-9; Jn. 12:1-8)

⁶ Te ndècu Jèsús ñuu Bètaniá vehe ñiⁿ téé nàni Xímú, téé ní tnahá cuéhé sã dátèhyú ni-hnu-xi yiqui cùñú-ó. ⁷ Te xíaⁿ ndécú-gã ní quexìo ñiⁿ ñadihí néhé-áⁿ ñiⁿ sá ñi cuáha yúú vãha nàni alabastrú, te xití xíaⁿ ñúhú àciti sàháⁿ tnámí sã ío ndèyáhu. Te yíhi Jèsús mèsá xéxí-gã, te ñaha-áⁿ ñi sáháⁿ-aⁿ ní sódó-aⁿ àciti ñúhú xití xíaⁿ díquí-gã. ⁸ Te òré ní xini cue téé xica cuu ndihi Jèsús sá dúcáⁿ ñi quide ñaha-áⁿ te ní cudééⁿ-güedé, te ní ngüita-güedé xitnáha-güedé:

—Ñá túú quide váha ñaha-áⁿ dàcáⁿ quidé-áⁿ dacuíta-aⁿ acití-áⁿ. ⁹ Chi váha-gá nùu cuyáhu acití-áⁿ ní cùu chi ío ndèyáhu, te díhúⁿ cuyáhu acití-áⁿ cuu cuendá cue ñáyiú ndàhú ní cùu —cachí-güedé xitnáha-güedé.

¹⁰ Te Jèsús ní cutnùní iní-gá nàcuáa ndùu tnúhu xitnáha-güedé, núu ní xáhaⁿ-gã xii-güedé:

—Vá dásatú-ndó ñi ñadihí-a, chi sá ñi quide ñaha-aⁿ xii-í cúú-xí ñiⁿ sá vãha. ¹¹ Chi cue ñáyiú ndàhú ducaⁿ-ni cùtnahá ñáyiú-áⁿ tnuú-ndó, dico yúhú chi vá ncháá ndùu cundecu ndihi ñaha-í xii-ndo ñuyíú-a. ¹² Te sá dúhá ñi quide ñaha ñadihí-a xii-í ní sódó-aⁿ àciti díquí-í, te xíaⁿ cada iní-ndó

să sà quide túha-aⁿ yiqui
cuñú-í cuendá nguíndüxi-xi.
13 Te na cächí tnúhu ndáá-í
xii-ndo sã ndëni ní cuu nihí
ñuyú ná cãháⁿ ñáyu tnúhu-í,
te cãháⁿ-yu tnàhá cuendá
ñadhí-a cuendá quiní nchaa
ñáyu nàcuáa ní quide-aⁿ
te ducaⁿ vã nàcuánaá-yu —
cächí-gá xãhaⁿ-gã xii-güedé.

*Té Jüdás ndúcú-dě nàcuáa
cada-dé cuáha cuendá-dé Jèsús
núú cuè tée cùu úhú iní ñáhá
xì-gá*

(Mr. 14:10-11; Lc. 22:3-6)

14 Te sátá dúcáⁿ te té
Jüdás Iscarioté ní sáháⁿ-dé ní
ndatnúhu-dé ndihi cue tée
cùu dútú cúnü. Te núú tnàhá
té Jüdás-áⁿ cúú ùxúú cue tée
xica cuu ndihi Jèsús. 15 Te ní
xáhaⁿ-dě xii cue tée cùu dútú
cúnü-áⁿ:

—¿Ndédau cháhu ñaha-ndo
xii-í te taxi cuendá-í Jèsús
xii-ndo-i? —cächí-dé xãhaⁿ-dě
xii-güedé.

Te cue dútú-ãⁿ ñ
xáhaⁿ-güedé xii-dé sã
cuãñaha-güedé ócú úxí dífúⁿ
cuixíⁿ, te ñu-ni ducaⁿ ñ
sãñaha-güedé xii-dé. 16 Te
ndéé òré ní queheⁿ cuendá
té Jüdás-áⁿ dífúⁿ, te ní
ngúíta-dé ndúcú-dě nàcuáa
cada-dé cuáha cuendá-dé
Jèsús núú-güedé.

*Cùdini Jèsús ndihi cue tée
xica cuu ndihi-gá*

*(Mr. 14:12-25; Lc. 22:7-23;
Jn. 13:21-30; 1 Co. 11:23-26)*

17 Te ní sáá nduu ñ
quesaha vico xexi ñáyu
páá sã ñã túú yíhi levadurá
ñu-ni vico pascuá, te cue
té xica cuu ndihi Jèsús ní

sãndehe yatni-güedé dífú-gá,
te xãhaⁿ-güedé xii-gá:

—Mèstrú, véxi-ndí xicáⁿ
tnúhú-ndí núú-n núu ndèé
cuñí-n càda túha-ndí cuendá
cudini-o sacuaa nduu
vico pascuá —cächí-güedé
xãhaⁿ-güedé xii-gá.

18 Te Jèsús ní xáhaⁿ-gã
xii-güedé:

—Chí cuáháⁿ xití ñuú-ãⁿ,
te yacáⁿ naníhí-ndó ñⁿ té
cùnuni iní-ndó sã sã xiní
ñáhá-dě xii-o, te cuñaha-ndo
xii-dé: “Yaá cúú Mèstrú
cächí-gá sã sã ní cuyatni nduu
vã cündecu-gá ñuyú-a, te
vehe-n cuñí-gá cada-gá vico
pascuá ndihi cue té xica cuu
ndihi-gá”, duha cuñaha-ndo
xii té-áⁿ —cächí-gá xãhaⁿ-gã
xii-güedé.

19 Te cue té xica cuu
ndihi-gá-áⁿ ní xica-güedé
cuáháⁿ-güedé, te ní quide-güedé
nàcuáa ní xáhaⁿ-gã xii-güedé,
te ní quide túha-güedé sã
cudini-güedé ndihi-gá sacuaa
nduu vico pascuá-áⁿ. 20 Te òré
sa ní cundiquíⁿ te cuánguñu
Jèsús ndihi ndi ùxúú cue
té xica cuu ndihi-gá mèsá
cuendá cudini-gá ndihi-güedé.
21 Te ñini xèxi-gá ndihi-güedé
ní xáhaⁿ-gã xii-güedé:

—Na cächí tnúhu ndáá-í
xii-ndo sã díú ñⁿ nchóhó cue
té xica cuu ndihi-í cuáha
cuendá ñáhá-ndó xii-í núú
cuè tée cùu úhú iní ñáhá —
cächí-gá xãhaⁿ-gã xii-güedé.

22 Te sã dúcáⁿ ñ xáhaⁿ-gã
xii-güedé te nchaa-güedé ní
ngúíta-güedé cündiyí-güedé,
te da ñⁿ da ñⁿ-güedé ní

ngüíta-güedé xăhaⁿ-güedě
xii-gá:

—Mèstrú, ¿ñá díú yŭhú
ducaⁿ sàni iní-n càda-í-u?
—càchí-güedé xăhaⁿ-güedě
xii-gá.

23 Te ní xăhaⁿ-gă xii-güedé:

—Tée nacaxi ndihí-í ìⁿ-ni
cóhó caxi-ndí, tée-áⁿ cuăha
cuëndá ñáhá-dě xii-í núú
cuè tée cùu úhú iní ñáhá,
24 Te yúhú Tée cùu ñani
tnáhá-ndó nchàa-ndo ñuhu
ichi-í cuáháⁿ-í yăha-í nàcuăa
càháⁿ-xi núú tùtú Yă Ndiöxí,
dico ndàhú ní cuu tée ducaⁿ
na cuăha cuëndá ñáhá xii-í
núú cuè tée cùu úhú iní ñáhá,
chi váha-gá sá vă cáci tée-áⁿ
cundecu-dé ní cùu, te ñá díú
să ñí cacu-dé te ducaⁿ càda-dé
—càchí-gá xăhaⁿ-gă xii-güedé.

25 Te sátá dúcáⁿ te ní cáháⁿ
té Jüdás tée cuăha cuëndá
ñáhá xii-gá, te xăhaⁿ-dě:

—Mèstrú, ¿te náa sàni iní-n
să yŭhú cuăha cuëndá ñáhá-í
xii-n núú cuè tée cùu úhú
iní ñáhá xii-n-áⁿ? —càchí-dé
xăhaⁿ-dě xii-gá.

Te Jèsús ní xăhaⁿ-gă xii-dé:

—Diu-n —càchí-gá xăhaⁿ-gă
xii-dé.

26 Te ñini cùdini cue tée xica
cuu ndihí Jèsús ní queheⁿ-gă
pàá, te ní ndacáⁿ táhú-gă
núú Yă Ndiöxí, te dătnùní ní
táhú cuèchi-gá te ní ngüíta-gă
dácăhñu-gă cue tée xica
cuu ndihí-gă-áⁿ, te xăhaⁿ-gă
xii-güedé:

—Chí quéhén pàá-a
caxi-ndo, te cada iní-ndó să
yiqui cuñú-í cúu-xí —càchí-gă
xăhaⁿ-gă xii-güedé.

27 Te ní queheⁿ-gă văsú
ñúhú ndüdí ndéhé yoho yăha
stilé, te ní ndacáⁿ táhú-gă

núú Yă Ndiöxí, te dătnùní ní
ngüíta-gă săñaha-gă xii-güedé
cuëndá coho-güedé luha luha
să ñúhú xití-xi, te xăhaⁿ-gă
xii-güedé:

—Chí cóhó nchàa nchohó
ndudí ndéhé yoho yăha stilé
ñúhú xití văsú-a. 28 Te cada
iní-ndó să cúu-xí dătná ñiñi-í
sá cáci òré cahni ñaha-güedě
xii-í, te sá dúcáⁿ cāti ñiñi-í
xiăⁿ çutnùní ndáá sá Yă
Ndiöxí cada-gă ingá núú
să văha sá cúu-xí vâi ñáyiu
dătná ní cachí-gă cada-gă,
te ío vâi ñáyiu cada càhnu
iní-gă cuèchi-yu. 29 Te na
càchí tnúhu-í xii-ndo să
vítná-nă duha xihí ndihí
ñaha-í xii-ndo ndüdí ndéhé
yoho yăha stilé-a, te vá cóhó
ndihí ñaha-gă-í xii-ndo, dico
na sàá nduu nànihí tnáhá-ó
núú ndécú Tătà-í Dútú Ndiöxí
táxi tnùní-gă te dăvâ-áⁿ cada
iní-ndó să dătná sá cóhó ndihí
ñaha tucu-í xii-ndo chi ío
cudí iní-ó —càchí-gă xăhaⁿ-gă
xii-güedé.

*Té Pèlú cůñaha-dě xii ñáyiu
să ñà túú xini-dé Jèsús*

(Mr. 14:26-31; Lc. 22:31-
34; Jn. 13:36-38)

30 Te Jèsús ní xita-gă ìⁿ
ndudú ndihí cue tée xica cuu
ndihí-gă, te dătnùní ní xica-gă
cuáháⁿ-gă ndihí-güedé yucu
Òlívú. 31 Te yácáⁿ ní xăhaⁿ-gă
xii-güedé:

—Na càchí tnúhu-í xii-ndo
să ncháá-ndó dândóo
ñaha-ndo xii-í niú vitna, chi
quee ndáá-xi nàcuăa càháⁿ-xi
núú tùtú Yă Ndiöxí núú
càchí-xi: “Yúhú cuăha-í tnúhu
cahni-güedé tée cùu toli, te
nchaa mběé-dě ndihí-güedi

cuténuu”, duha càchí-xi núú tütú-gá. ³² Dico na ndòto-í te codonùu-í núú-ndó quíhíⁿ distrítú Galileá —càchí-gá xăhaⁿ-gă xii-güedé.

³³ Te té Pèlú ní xăhaⁿ-dë xii-gá:

—Te cuëi nchaa-güedé ná dândóo ñaha-güedé xii-n, dico yúhú chi vá dándóo ñaha-í xii-n —càchí-dé xăhaⁿ-dë xii-gá.

³⁴ Te Jèsús ní xăhaⁿ-gă xii-dé:

—Na càchí tnúhu ndáá-í xii-n să niú vitna cùmání-gă cana ìⁿ líhi, te úní xito cáháⁿ-n núú ñăyiu sá ñà túú xíní ñáhá-n xii-í —càchí-gá xăhaⁿ-gă xii-dé.

³⁵ Te té Pèlú ní xăhaⁿ-dë xii-gá:

—Cuëi na cùú ndihí ñaha-í xii-n dico vá cáháⁿ-í núú ñăyiu sá ñà túú xíní ñáhá-í xii-n —càchí-dé xăhaⁿ-dë xii-gá.

Te nchaa dava-gá cue téé xica cuu ndihí-gá ñu-ni ducaⁿ ní xăhaⁿ-güedé xii-gá.

Jèsús cáháⁿ ndihí-gá Yă Ndiöxí ìⁿ xichi núú nání Gëtsemaní

(Mr. 14:32-42; Lc. 22:39-46)

³⁶ Te Jèsús ní quexìo-gá ndihí cue téé xica cuu ndihí-gá ìⁿ xichi núú nání Gëtsemaní, te xíaⁿ ní xăhaⁿ-gă xii-güedé:

—Chí cúnúcoo iha cundetú-ndo na quíhí-í yacáⁿ cáháⁿ ndihí-í Yă Ndiöxí —càchí-gá xăhaⁿ-gă xii-güedé.

³⁷ Te ndëca-gá té Pèlú, ndihí ndi ndúú déhe té Zebèdeú cuáháⁿ, te ní ngüita-xi súúni ndihú iní-gá. ³⁸ Te ní xăhaⁿ-gă xii cue téé úní-áⁿ:

—Súúni ndihú iní-í dàtná sá cùú-í, te chí quëndóo nchòhó iha te vá cùdú-ndó chi yúhú vá cùdú-í —càchí-gá xăhaⁿ-gă xii-güedé.

³⁹ Te sa ñùnchíí luha ní xica ndehe Jèsús núú ndécú-güedé, te ní ngüíñí xítí-gă te ní nuu núú-gă ndàa núú ñúhú, te ní ngüita-gá cáháⁿ ndihí-gá Tătá-gă Dútú Ndiöxí, te xăhaⁿ-gă:

—Yòhó Tătá mée-í, cáháⁿ ndàhú-í núú-n nùu vá cündèe iní-n tàunihnu ñaha-n xii-í cuëndá sá vá ndòhò-í ná sàá òré, dico vá cadá-n năcuáa càchí iní mée-í, chí cada-n năcuáa càchí iní mée-n —càchí-gá xăhaⁿ-gă xii Tătá-gă Dútú Ndiöxí.

⁴⁰ Te sátá ñí yáha ní cáháⁿ ndihí-gá Tătá-gă Dútú Ndiöxí, te cuánuhú-gá núú ñí dándóo-gá cue téé úní-áⁿ te xixídí-güedé òré ní nasáa-gă, te ní xăhaⁿ-gă xii té Pèlú:

—¿Náa ñă cündèe iní-ndó vá cùdú-ni-ndo cuëdicó ìⁿ òré ñini cáháⁿ ndihí-í Yă Ndiöxí-áⁿ? ⁴¹ Te chí quëndóo tucu te cuhuⁿ iní-ndó vá cùdú-ndó, te cáháⁿ ndihí-ndo Yă Ndiöxí cuëndá sá vá dăcáháⁿ ñáhá yùcu ñávăha xii-ndo càda-ndo sá ñà túú tâu-ndó càda-ndo. Te xíní ndáá-í sá nchòhó cuíní-ndó càda-ndo nchaa năcuáa cáháⁿ-í dicó-ni sá ñà túú ñihí ndéé-ndó —càchí-gá xăhaⁿ-gă xii-güedé.

⁴² Te xito cùu uú cuáháⁿ tucu Jèsús cáháⁿ ndihí-gá Tătá-gă Dútú Ndiöxí, te xăhaⁿ-gă:

—Yòhó Tătá mée-í, te núu vá cündèe iní-n tàunihnu ñaha-n xii-í cuëndá sá vá ndòhò-í, te

cada nàcuáa càchí iní méé-n —
càchí-gá xáhaⁿ-gá xii Tátá-gá
Dútú Ndiöxí.

⁴³ Te òré ní yáha ní cáháⁿ
ndihi-gá Tátá-gá Dútú Ndiöxí,
te cuánuhú tucu-gá núú
xĩndecu cue téé úní xícá
cùu ndihi-gá-áⁿ, te xidí-ni
tucu-güedé òré ní nasáá-gá,
te ducaⁿ nĩ quide-güedé chi
súúni ñùhu saní núú-güedé.

⁴⁴ Te ní dándõo ñaha tucu
Jesús xii-güedé xíaⁿ, te cuáháⁿ
tucu-gá xito cùu úní cáháⁿ
ndihi tucu-gá Tátá-gá Dútú
Ndiöxí, te ñu-ni tnúhu sá sà
ní xáhaⁿ-gá xii Tátá-gá Dútú
Ndiöxí, ñu-ni tnúhu-áⁿ nĩ
xáhaⁿ tucu-gá. ⁴⁵ Te sátá nĩ
yáha ní cáháⁿ ndihi-gá Tátá-gá
Dútú Ndiöxí, te cuánuhú
tucu-gá núú ndécú cuè téé
xica cuu ndihi-gá-áⁿ, te òré
ní nasáá-gá, te ní xáhaⁿ-gá
xii-güedé:

—¿Te náa xidí-ni tucu-ndo?
Te sa ní sáá òré cuáha cuendá
ñáhá-güedé xii-í núú cuè téé
ndècu ichi cuehé ichi duha.
⁴⁶ Dico vitna chí ndácõo na
quihíⁿ-ó, chi sa véxi téé cuáha
cuendá ñáhá xii-í núú cuè téé
cùu úhú iní ñáhá —càchí-gá
xáhaⁿ-gá xii-güedé.

*Ní tñi-güedé Jesús ndéca
ñaha-güedé xii-gá cuáháⁿ*

(Mr. 14:43-50; Lc. 22:47-
53; Jn. 18:2-11)

⁴⁷ Te càháⁿ dúcáⁿ-ní Jesús
ní quexìo téé Jüdás. Te núú
tnàhá téé-áⁿ cúú ùxúú tnàhá
cue téé xica cuu ndihi-gá ní
cùu te ducaⁿ nĩ quide-dé. Te
ndihi-dé vai cue téé ní quexìo
te dava-güedé xĩnehe-güedé
machití, te dava-güedé
xĩnehe-güedé carrutí. Te

cue téé-áⁿ nĩ tendaha ñàha
cue dútú cúnùu, ndihi cue
téé cùu sacuéhé núú ñáyu
isràél. ⁴⁸ Te téé Jüdás téé cuáha
cuendá ñáhá xii-gá-áⁿ sa ní
xitnùhu-dé cue téé-áⁿ nàcuáa
cada-dé cuáha cuendá-dé
Jesús núú-güedé, te duha ní
xáhaⁿ-dè xii-güedé:

—Cundehe-ndo tõe na
tèyuhu-í te téé-áⁿ tñi-ndo-dé
chi téé-áⁿ cúú-dé téé ndèé
iní-ndó —duha ní xáhaⁿ-dè
xii-güedé.

⁴⁹ Te sátá dúcáⁿ nĩ xáhaⁿ-dè
xii-güedé, te ní sándehe
yatni-dé núú Jesús, te ní
xáhaⁿ-dè xii-gá:

—¡Ràcióⁿ Mèstrú! —càchí-dé
xáhaⁿ-dè xii-gá.

Te ní teyuhu ñàha-dé xii-gá.
⁵⁰ Te Jesús ní xáhaⁿ-gá xii-dé:

—Yòhó téé ní chitnahá ñáhá
xii-í, ¿ná cuiní-n núu véxi-n
núu-í? —càchí-gá xáhaⁿ-gá
xii-dé.

Te òré-ni-áⁿ nĩ tñi ñaha cuè
téé ndihi téé Jüdás-áⁿ xii Jesús,
te ndèca ñaha-güedé xii-gá
cuáháⁿ.

⁵¹ Te ñiⁿ cue téé ndihi Jesús
ní tava-dé machití-dé, te ní
xehndé-ni-dé ñiⁿ xio lóho ñiⁿ
téé xinu cuechi núú dútú
cúnùu te ní quendeé duuⁿ
lóho-dé. ⁵² Te Jesús ní xáhaⁿ-gá
xii téé ducaⁿ nĩ xehndé lóho
téé-áⁿ:

—Nachihí machití-n ñiⁿ-xi,
chi nchaa cue téé na nàa
ndihi machití cahni-güedé
tnàha ñáyu-güedé te ñu-ni
ndihi machití cuú méé-güedé
tucu. ⁵³ Te ña càchí tnúhu-í
xii-ndo sã núu yúhú cuiní-í
cácu-í te cáháⁿ ndihi-í Tátá-í
Dútú Ndiöxí, te tendaha-gá
cuehé víhí espíritú xínú
cuèchi núú-gá quixi-xi dàcácu

ñaha-xi xii-í. ⁵⁴ Dico núu ducaⁿ na càda-í te vá queé ndáá-xi nàcuáa càháⁿ-xi núu tütú Tàtá-í Dútú Ndiòxí núu ndéé tnuni sá dācuítí xini ñuhu-xi nāndi ndoho-í — cāchí-gā xāhaⁿ-gā xii-dé.

⁵⁵ Te Jèsús ní xāhaⁿ-gā xii cue tée ducaⁿ nǐ tñi ñaha xii-gā-áⁿ:

—Nchaa-ni nduu ní xini-ndó nǐ xóo cunucóo-í xití veñuhu cāhnu sá ïo cūnuu ní xóo danèhé-í ñāyiu, te ñā tūú ní tñi ñaha-ndo xii-í, ¿te ná cuendá vitna quide ñaha-ná-ndó xii-í dàtná quidé-ndó ñⁿ ñadúhú, nèhe-ná-ndó màchití nèhe-ná-ndó càrrutí ní quexìo ní tñi ñaha-ndo xii-í-i? ⁵⁶ Dico dācuítí sá dúhá càda-xi nacuáa quee ndáá-xi nàcuáa ní cāháⁿ cue tée ní xóo cāháⁿ tñuhu Yá Ndiòxí ndéé sanaha nǐ ngódo tñuni núu tütú-gā — cāchí-gā xāhaⁿ-gā xii-güedé.

Te nchaa cue tée xica cuu ndihi-gā ní xinu-güedé ní dándõ ñaha-güedé xii-gā.

Jèsús ndécú-gā jündá

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Te cue tée ní tñi ñaha xii Jèsús ndécá ñaha-güedé xii-gā cuáháⁿ núu tē Caifás tée cū dútú cūnuu-gā. Te núu ndécú dütú cūnuu-gā-áⁿ sa ní tacá cue tée dācuaha ñaha xii ñāyiu nchaa tñuhu ní chídó tñuni ndí Moisés, ndihi cue tée cūu sacuéhé núu ñāyiu isràél cuendá cada-güedé jündá. ⁵⁸ Te té Pélú xica xica-ni nchicúⁿ ñāhá-dé xii-gā cuáháⁿ ní sáá-dé ndéé quehé vehe núu ndécú tē cūu dútú cūnuu-gā-áⁿ,

te xíaⁿ nǐ ngóo-dé ndihi cue tée cūu poleciá cuendá cuini-dé quini-dé nása cada ñaha-güedé xii Jèsús.

⁵⁹ Te cue tée cūu dütú cūnuu, ndihi cue tée cūu sacuéhé núu ñāyiu isràél, ndihi nchaa dava-gā cue tée xīndecu jündá ndúcú-güedé nàcuáa cada-güedé dācā-güedé ñⁿ cuéchi díquí Jèsús cuéi cūu-xi ñⁿ sá ñā ndáa cuendá níhi-güedé nàcuáa cada-güedé cahni ñaha-güedé xii-gā. ⁶⁰ Te vai cue tée ní ngüita-güedé dācā-güedé cuéchi díquí-gā, dico ñā tūú ní cūndee tñuhu-güedé chi mee-ni tñuhu ndehnde cūu-xi. Te sáta dúcáⁿ te ní quexìo tucu úu tñhá cue tée dācuandehnde-güedé, ⁶¹ te xāhaⁿ-güedé xii nchaa cue tée xīndecu jündá:

—Véxi-ndí cāchí tñuhu-ndí xii-ndo sǎ tēe-a cāchí-dé sá dāngòyo-dé veñuhu cāhnu sá ïo cūnuu núu chíñuhu-o Yá Ndiòxí, te dāndā-dé ingá veñuhu saa, diu-ni núu cáa tñáhi veñuhu-áⁿ, te xití úní-ni nduu sa nadaxīnu-dé, duha cāchí-dé —cāchí-güedé xāhaⁿ-güedé.

⁶² Te tée cūu dütú cūnuu-gā-áⁿ nǐ ndacuíñí-dé, te xāhaⁿ-dē xii Jèsús:

—¿Ná cuendá duha nduu tñuhu cāháⁿ cue tēe-a cuendá-n? Te cāháⁿ núu nása cūduu tñuhu cāháⁿ-n —cāchí-dé xāhaⁿ-dē xii-gā.

⁶³ Dico Jèsús ñā tūú tñáhi ní cāháⁿ-gā. Te tée cūu dütú cūnuu-gā-áⁿ nǐ xāhaⁿ tūcu-dé xii-gā:

—Yúhú, cǎcú nèhe-í Yǎ Ndiǒxí chi cuíní-í sǎ cǎchí tnúhu ndáá-n xii-ndí nũu sǎ díú Crístú Déhe Yá Ndiǒxí Yaá ní tendaha-gǎ véxi ñuyíú-a cùu-n —cǎchí-dé xǎhaⁿ-dǎ xii-gǎ.

64 Te Jèsús ní xǎhaⁿ-gǎ xii-dé:

—Díu Yaá-áⁿ cùu-í dàtnǎ cǎchí-n-ǎⁿ, te na cǎchí tnúhu-í xii-ndo sǎ sǎá nduu te quíní-ndó yúhú Tée cùu ñaní tnáhá-ndó nchàa-ndo cunucóo-í xio cùha Dútú Ndiǒxí Yaá ndácú quide nchaandi túhú sǎ vǎha. Te dǎvá-áⁿ quíní ñáhá-ndó xii-í quee-í andíu quixi-í ichi xití vícǎ —cǎchí-gǎ xǎhaⁿ-gǎ xii-dé.

65 Te dútú cúnúu-gǎ-áⁿ nǐ ndátá-dǎ dóó níhnú-dǎ cuendǎ sǎ ñà túú ní tnáhá iní-dé nǎcuáa ní cǎháⁿ Jèsús, te ní xǎhaⁿ-dǎ xii nchaa cue tée xĩndecu jũndǎ:

—Tée-a cǎháⁿ úhú-dé cuendǎ Yǎ Ndiǒxí, te vitna ñá túú-gǎ xíní ñũhu-xi cue tée cǎháⁿ ndáá nũu ndáá sǎ ndècuéchi-dé àdi ñá túú ndècuéchi-dé, chi sa ní tecú dóho-o nǎcuáa ndúu tnúhu ní cǎháⁿ-dǎ ní cǎháⁿ úhú-dé cuendǎ Yǎ Ndiǒxí. 66 Te nchaa-ndo chí cǎháⁿ vitna núu nása sàni iní-ndó cùnduu cuendǎ tée-a —cǎchí-dé xǎhaⁿ-dǎ xii nchaa cue tée-áⁿ.

Te cue tée-áⁿ nǐ xǎhaⁿ-güedǎ:

—Nchúhú cǎchí-ndí sǎ tàú-xi cuú-dé chí ndècuéchi-dé —cǎchí-güedǎ xǎhaⁿ-güedǎ.

67 Te ní ngüíta-güedǎ ní tíú díí ñáhá-güedǎ xii-gǎ te ní caniha-güedǎ, te tnáhá núú-gǎ ní cani-güedǎ. 68 Te

ní cudíquí ndeé ñáhá-güedǎ xii-gǎ, te xǎhaⁿ-güedǎ:

—Yòhó Tée cǎchí sǎ cùu Crístú Yaá ní tendaha Yǎ Ndiǒxí véxi ñuyíú-a, cǎháⁿ ná còto yoo ní caniha xii-n —cǎchí-güedǎ xǎhaⁿ-güedǎ xii-gǎ.

Té Pèlú xǎhaⁿ-dǎ xii ñáyíu sǎ ñà túú xíní-dé Jèsús

(Mr. 14:66-72; Lc. 22:56-62; Jn. 18:15-18, 25-27)

69 Te nini nùcǎo té Pèlú quehé, te ní sǎháⁿ ìⁿ xíchí xínú cuèchi vehe-áⁿ nũú-dǎ, te xǎhaⁿ-xi xii-dé:

—Yòhó tnáhá-n cùu-n tée xica cuu ndihí Jèsús tée distritú Galiléa —cǎchí-xi xǎhaⁿ-xi xii-dé.

70 Te té Pèlú ñá túú ní nũnuu-dǎ, te ndédóho nchaa ñáyíu xĩndecu-áⁿ nǐ xǎhaⁿ-dǎ xii xíchí-ǎⁿ:

—Yúhú, ñá túú cùtnuní iní-í nása ndúu tnúhu cǎháⁿ-n —cǎchí-dé xǎhaⁿ-dǎ xii-xi.

71 Te ní xica té Pèlú cuáháⁿ-dǎ ndàa nacuáa nchíi yuyèhe vehe-áⁿ, te ní xíní ñáhá túcu ingǎ xíchí xínú cuèchi vehe-áⁿ, te xǎhaⁿ-xi xii nchaa ñáyíu xĩndecu-áⁿ:

—Tée-a tnáhá-dé xicǎ cùu-dé ndihí Jèsús tée ñúú Nazàrét —cǎchí-xi xǎhaⁿ-xi xii-yu.

72 Te té Pèlú ní xǎhaⁿ-dǎ:

—Nchàcùiti Yǎ Ndiǒxí sǎ ñà túú xíní-í tée cǎcunehe-ndo-áⁿ —cǎchí-dé xǎhaⁿ-dǎ xii-yu.

73 Te tna tnaa-ni ní cuu, te dava ñáyíu xĩndecu xíáⁿ ní xǎhaⁿ tucú-yu xii té Pèlú:

—Ndáá sǎ tnáhá-n xica cuu-n ndihí tée ndèca-güedǎ cuánguìhu-ǎⁿ, chí ñáyíhú cǎháⁿ-n —cǎchí-yu xǎháⁿ-yu xii-dé.

74 Te té Pèlú ní xáhaⁿ-dě xii-yu:

—Nchàcuiti Yá Ndiõxí sá yùhú cáháⁿ ndáá-í sá ñà túú xini-í tée càcunehe-ndo-áⁿ —càchí-dé xáhaⁿ-dě xii-yu.

Te òré-ni-áⁿ nǐ cana ìⁿ lìhi.
75 Te ní ndacu iní té Pèlú nàcuáa ní xáhaⁿ Jèsús xii-dé sá cùmání-gǎ cana ìⁿ lìhi te úní xito cáháⁿ-dé sá ñà túú xini ñáhá-dě xii-gá. Te ní quee-dé tnuú ñáyiú-áⁿ cuǎháⁿ-dé ìⁿ xio ní ndáhyú víhí-dě ní ndixi cuéchi iní-dé.

27

Ndèca-güedé Jèsús cuáháⁿ núú tǎ Pilatú
(Mr. 15:1; Lc. 23:1-2; Jn. 18:28-32)

1 Te sáta nǐ túndaá te nchaa cue tée cùú dútú cúnùu, ndihì cue tée cùú sacuéhé nùú ñáyiú isràél ní ndatnúhu-güedé nàcuáa cada-güedé cahni-güedé Jèsús. 2 Te ní dácútú ñàha-güedé xii-gá, te ndèca ñàha-güedé cuáháⁿ núú tǎ Pilatú tée cùú gobiernú.

Ní xihí té Jùdás

3 Te té Jùdás tée ní sáha cuèndá ñáhá xii Jesús ní cutnùnì iní-dé sá cáhni ñàha-güedé xii-gá, te ní ndixi cuéchi iní-dé sá ñà túú ní quide váha-dé sá dúcáⁿ nǐ quide-dé ní sáha cuèndá ñáhá-dě xii-gá núú cuè tée cùú úhú iní ñáhá, te ní xica-dé cuáháⁿ-dé danchòcáva-dé ócò úxí dǐhúⁿ cuixíⁿ núú cuè dútú cúnùu-áⁿ, ndihì núú cuè tée cùú sacuéhé nùú ñáyiú isràél, chi diu cue tée-áⁿ nǐ sǎñaha-güedé dǐhúⁿ xii-dé.

4 Te òré ní quexìo té Jùdás-áⁿ

nùú ndécú-güedé, te xáhaⁿ-dě xii-güedé:

—Yúhú, ñà túú ní quide váha-í sá dúcáⁿ nǐ quide-í ní taxi cuèndá-í ìⁿ tée ñà túú tnàhí cuéchi-xi cahni-ndo-dé —càchí-dé xáhaⁿ-dě xii-güedé.

Te cue tée-áⁿ nǐ xáhaⁿ-güedé xii-dé:

—Nchúhú, ñà túú nǎgá cuèndú cuìnì-ndí cáháⁿ ndihì ñàha-ndí xii-n, te mee-n nàha núu nása sàni iní-n càda-n —cachí-güedé xáhaⁿ-güedé xii-dé.

5 Te té Jùdás ní dǎngoyo-dé dǐhúⁿ-áⁿ xití veñúhu càhnu sá ìo cúnùu, te ní xica-dé cuáháⁿ-dé ní dácüèhné-dé méé-dé.

6 Te cue dútú cúnùu ní naqueheⁿ-güedé dǐhúⁿ-áⁿ, te ní xitnàha-güedé:

—Dǐhúⁿ-a ní quéyǎhu cuèndá sá cùú ìⁿ ñáyiú, núu xiǎⁿ vá cúú nàchihi-o xití càjá núú ñúhú sǎ cúú cuèndá Yá Ndiõxí —càchí-güedé xitnàha-güedé.

7 Te ní ndatnúhu-güedé te ní cuu ìⁿnuu-güedé cuèndá nacuaaⁿ-güedé ìⁿ xichì núú cáá ñùhu danani-güedé Núú Cuǎha Nchaa Sá Cuǎha Ñuhu, te xiáⁿ nǐ saaⁿ-güedé cuèndá xiáⁿ nguǐndǔxi nchaa ñáyiú véxi xica. 8 Te ní nadáma diu ñuhu-áⁿ, te vitna dǎnani-güedé Ñuhu Yáhu Níñí, duha dǎnani-güedé. 9 Te ducaⁿ nǐ cuu chi ní quee ndáá-xi nàcuáa ní cáháⁿ ndí Jeremiás tée ní xóo cáháⁿ tnúhu Yá Ndiõxí ndéé sanaha, te duha ní cachí ndí: “Cue tée isràél ní cachí-güedé sá ócò úxí dǐhúⁿ cuixíⁿ cháhu-güedé cuèndá

h̄n tée quehen cuendá-güedé. Te díhú^{n-ǎn} nàquehen-güedé, ¹⁰ te cuaa^{n-güedé} h̄n xichi núu nání Nũú Cuãha Nchaa Sá Cuãha Nuhu, te ducaⁿ càda-xi chi ducaⁿ nĩ cachí Yã Ndiõxí cunduu”, duha ní cachí ndí Jeremiás-áⁿ.

Jèsús ndécú-gã núú tẽ Pilatú
(Mr. 15:2-5; Lc. 23:3-5; Jn. 18:33-38)

¹¹ Te Jèsús ndécú-gã núú tẽ Pilatú tée cùu gobiernú, te tée-áⁿ nĩ xicáⁿ tnúhú-dě núú-gã, te xãha^{n-dě} xii-gã:

—¿Ndáá sá díú-n cùu-n tée yĩndaha ñaha xii ñãyiú isràél-ǎn? —càchí-dé xãha^{n-dě} xii-gã.

Te Jèsús ní xãha^{n-gã} xii-dé:

—Diu-í yĩndaha-í-yu —
càchí-gã xãha^{n-gã} xii-dé.

¹² Te cue dútú cúnùu ndihí cue tée cùu sacuéhé núú ñãyiú isràél sàcáⁿ cuéchi-güedé núú tẽ Pilatú cuendá Jèsús, dico mee-gã ni h̄n tnúhu ñá túú ní cãhá^{n-gã}. ¹³ Te té Pilatú ní xãha^{n-dě} xii-gã:

—Cãháⁿ, ná cuendá ñá túú càháⁿ⁻ⁿ, te cundehe ñá ndéé duha tĩtní cuéchi dàcaa cue tée-a díquí-n —càchí-dé xãha^{n-dě} xii-gã.

¹⁴ Dico Jèsús ñá túú tnàhí ní cãhá^{n-gã}, te té Pilatú tée cùu gobiernú-áⁿ ïo ní cuñúhu-dé sá dúcáⁿ ñà túú tnàhí ní cãhá^{n-gã}.

Ní quide ndáá-güedé sá cãhí-güedé Jèsús

(Mr. 15:6-20; Lc. 23:13-25; Jn. 18:38-19:16)

¹⁵ Te ndí tnahá nduu víco pascuá dácácu té Pilatú tée

cùu gobiernú-áⁿ h̄n tée yĩhi ve-caá chi ducaⁿ tnàhí quide-dé, te mee ñãyiú càhá^{n-yu} te núu ndédacáa tée yĩhi vecaá-áⁿ cãcu-dé te tée-áⁿ dácãcu-dé. ¹⁶ Te dàvá-áⁿ yĩhí h̄n tée nàni Barrabás vecaá, te tée-áⁿ ïo cuendú-dé sá ïo nèhé ní quide-dé. ¹⁷ Te ní natacá nchaa ñãyiú, te té Pilatú ní xicáⁿ tnúhú-dě núú-yu, te xãha^{n-dě}:

—¿Ndédacáa núú ùu cue tée-a cuíní-ndó dácácu-í-güedé-í? ¿Té Barrabás ǎn Jèsús tée nàni Cristú? —càchí-dé xãha^{n-dě} xii-yu.

¹⁸ Te ducaⁿ nĩ càháⁿ té Pilatú, chi ní cutnùní iní-dé sá dícó sá cuedú iní-güedé ducaⁿ nĩ quide-güedé ní sãha cuendá ñáhá-güedé xii Jèsús núú-dě.

¹⁹ Te nini núcóo té Pilatú núú xèhndé-dé cuéchi ní tendaha ñãdihí-dé tnúhu cuáháⁿ núú-dě, te duha nduu tnúhu ní tendaha-aⁿ: “Vá cãní ïní-n ñà cada-n tée ní taxi cuendá ñáhá-güedé xii-n, tée ñá túú tnàhí cuéchi-xi, chi icuini ïo nèhé ní dácótó ñaha saní-í cuendá-dé”, duha nduu tnúhu ní xãha^{n-aⁿ} xii té Pilatú.

²⁰ Dico cue tée cùu dútú cúnùu, ndihí cue tée cùu sacuéhé núú ñãyiú isràél ní xãha^{n-güedé} xii ñãyiú sá ná cũñhá^{n-yu} xii té Pilatú dácácu-dé té Barrabás te cãhí-dé Jèsús, te ní quidé-yu nãcuáa ní xãha^{n-güedé}. ²¹ Te té Pilatú-áⁿ nĩ xãhaⁿ tùcu-dé xii-yu:

—¿Ndédacáa núú ùu cue tée-a cuíní-ndó dácácu-í? —
càchí-dé xãha^{n-dě} xii-yu.

Te ní xãhá^{n-yu} xii-dé:

—Té Barrabás dácácu-n —
càchí-yu xãhá^{n-yu} xii-dé.

22 Te té Pilatú ní xícaⁿ tnúhú-dě núŭ-yu, te xāhaⁿ-dě:

—¿Te ná cuíní-ndó càda-í Jèsús tée nàni Cristú tée càchí sá Yă Ndiǒxí ní tendaha ñaha xii-dé véxi-dé ñuyíú-a-í? — càchí-dé xāhaⁿ-dě xii-yu.

Te nchaá-yu ní cáháⁿ-yu, te xāhāⁿ-yu:

—Cata caa-dé núú cùrúxí — càchí-yu xāhāⁿ-yu xii-dé.

23 Te té Pilatú ní xáhaⁿ tūcu-dé xii-yu:

—¿Te ná cúú cuěchi ní quide-dé nūu ducaⁿ cuíní-ndó càda-í-dé-í? —càchí-dé xāhaⁿ-dě xii-yu.

Dico nchaá-yu uuⁿ-gá níhi ní cáháⁿ-yu, te xāhāⁿ-yu xii-dé:

—¡Cata caa-dé núú cùrúxí! — càchí-yu xāhāⁿ-yu xii-dé.

24 Te té Pilatú ní cutnùní iní-dé sá vā nihí-dé nācuáa cada-dé, chí uuⁿ-gá ní ngúita ñáyiú xícuáá-yu, te xíáⁿ ní xícaⁿ-dé ndute ní ndáhá-dě núú ncháa ñáyiú, te ní xáhaⁿ-dě xii-yu:

—Tée-a cùu-dé ìⁿ tée ñá túú tnàhí cuěchí-xi, te nchòhó cuíní-ndó sǎ cùú-dé, dico ñu-ni mee-ndo cùido yáhu-ndo-dě chí yúhú vā cùidó yáhu-í-dé —càchí-dé xāhaⁿ-dě xii-yu.

25 Te nchaá-yu ní xāhāⁿ-yu xii-dé:

—¡Diú nchúhú ndihi cue déhe-ndí cuido yáhu-ndí-dé! —càchí-yu xāhāⁿ-yu.

26 Te sátá dúcáⁿ te té Pilatú ní dácacu-dé té Barrábás, te ní táuchíúⁿ-dè ní caní-güedé Jèsús. Te sátá dúcáⁿ nǐ quide ñaha-güedé xii-gá, te ní táuchíúⁿ-dè candeca ñaha-güedé xii-gá quíhíⁿ cata

caa ñaha-güedé xii-gá núú cùrúxí.

27 Te cue tée cùu sandadú té Pilatú ndécá-güedé Jèsús cuánguihu xití vehe càhnu cuu cuendá-dé, te cue tée cùu sandadú-áⁿ nǐ cana-güedé dava-gá cue sandadú núú dúcáⁿ ndèca-güedé Jèsús cuánguihu-áⁿ. 28 Te xíaⁿ nǐ taunuu-güedé dóo-gǎ, te ní dácuihnú ñaha-güedé xii-gá ìⁿ dóo tícuèhé víhí. 29 Te ní cadúha-güedé ìⁿ coróná iñu ní chihi-güedé díquí-gǎ, te ní chitnì-güedé ìⁿ carrutí ndaha cùha-gá, te ní ngúíñí xití-güedé núú-gǎ cúdíquí ndeé ñáhá-güedé xii-gá, te xāhaⁿ-güedé:

—¡Ío càhnu cuu yohó tée yìndaha ñaha xii ñáyiú isráél! —càchí-güedé xāhaⁿ-güedé xii-gá.

30 Te ní tiú díí ñáhá-güedé xii-gá, te ní queheⁿ-güedé carrutí sá nǐ sáñaha-güedé xii-gá te ní ducuⁿ-güedé díquí-gǎ. 31 Te sátá nǐ yáha ní cudíquí ndeé ñáhá-güedé xii-gá, te ní nataunuu ñaha-güedé xii-gá dóo tícuèhé víhí sǎ nǐ dácuihnú ñaha-güedé xii-gá, te ní dándíúnuu ñaha-güedé xii-gá dóo méé-gǎ, te dàtnùní ndécá ñaha-güedé cuáháⁿ núú catá càa ñaha-güedé xii-gá núú cùrúxí.

Sàta caa-güedé Jèsús núú cùrúxí

(Mr. 15:21-32; Lc. 23:26-43; Jn. 19:17-27)

32 Te ñuhu-güedé ndihi-gá ichi, te ní naníhí-güedě ñⁿ téé ñúú Cirené nání-dě Xímú, te téé-áⁿ ñí quide yica-güedě ní xido-dé cùrúxí sá nchídó Jèsús.

33 Te ní sáá-güedé ndihi-gá ñⁿ xichi núú nání Gólgotá, te tnúhu-áⁿ queé-xí: Núú nání yìquí díquí ndíyí, duha quèe-xi tnúhu-áⁿ. 34 Te xíaⁿ sãñaha-güedě ndudí úá coho-gá ní cùu, te ñá túú ní xihí-gá chi dico-ni ní xito ndéé-gá.

35 Te ní sata caa ñaha-güedě xii-gá núú cùrúxí, te sáta dúcáⁿ te cue téé cùu sandadú-áⁿ ñí xito ndéé-güedé núu ndědacàa-güedé cuu cuendá-güedé dóó-gã. Te ducaⁿ ñí cuu chi ní quee ndáá-xi nàcuáa ní cáháⁿ ñⁿ téé ní xóo cáháⁿ tnúhu Yá Ndióxí ndéé sanaha yòdo tnuní núú tütú-gá, te duha càchí-xi: “Ní xito ndéé-güedé núu ndědacàa-güedé cuu cuendá-güedé dóó-gã”, duha ní cachí téé-áⁿ te ducaⁿ ñí ngódó tnuní núú tütú-gá. 36 Te sáta dúcáⁿ ñí quide-güedé, te ní ngóo-güedé ndéé ñáhá-güedě xii-gá. 37 Te ní taxi ndecu-güedé ñⁿ sá ndéé lètrá ndàa díquí-gã. Te lètrá-áⁿ càháⁿ-xi ná cuendá ducaⁿ ñí quide ñaha-güedě xii-gá, te duha càháⁿ lètrá-áⁿ: “Tée-a cùu-dé téé yìndaha ñaha xii ñáyiú isràél”, duha càchí-xi. 38 Te tnàhá úú cue téé cùu ñadúhú ñí sata caa-güedé ñⁿ ní núú cùrúxí tucu, te ñⁿ-dé ní sata caa-güedé xio cùha-gá, te

ingá-dé ní sata caa-güedé xio dàtni-gá. 39 Te nchaa ñáyiú yãha yatni núú táca-gá-áⁿ, te dàcuicó-yu díquí-yu ndèhe ñáhá-yu xii-gá, te xícuèhé ñáhã-yu. 40 Te xãhãⁿ-yu xii-gá:

—Yòhó càchí-n sã dàngoyo-n veñúhu càhnu sá ño cùnuu, te dandàa-n ingá veñúhu saa, te xití úní-ni nduu sa nadaxinu-n, te vitna tanuu núú cùrúxí-áⁿ dàcácu-n mèe-n te núu ndisa sá Dèhe Yá Ndióxí cúú-n —càchí-yu xãhãⁿ-yu xii-gá.

41 Te ñⁿ ducaⁿ cùdíquí ndéé ñáhá cué téé cùu dútú cùnuu xii-gá, ndihí cue téé dàcuaha ñaha xii ñáyiú nchaa tnúhu ní chídó tnuní ndí Moisés, ndihí cue téé cùu fariséú, ndihí cue téé cùu sacuéhé núu ñáyiú isràél, te xitnàha-güedé:

42 —Tée-a ní ndacu-dé ní dàcácu-dé dava ñáyiú, te mee-dě ñá ndácú-dě dàcácu nihnu-dé mée-dě. Te núu ndisa sá cúú-dě téé yìndaha ñaha xii ñáyiú isràél, te na cùndehe-o nuu-dé núú cùrúxí-a cuendá quíndáá iní-ó-dě. 43 Te càchí-dé sá sàndáá iní-dé Yá Ndióxí, te mee-gã ná dàcácu ñaha-gã xii-dé te núu cùndahú iní ñáhá-gã, chi mee-dě càchí-dé sá Dèhe-gá cúú-dě —càchí-güedé xitnàha-güedé.

44 Te ndéé tnàhá cue téé cùu ñadúhú táca xio xio díñi-gá xícuèhé ñáhá-güedě xii-gá.

Ní xihí Jèsús

(Mr. 15:33-41; Lc. 23:44-49; Jn. 19:28-30)

45 Te òré ní cuu cuádava nduu te ní cunee ñihí ñuyíú, te ducaⁿ-ni càa ní cuu caá úní sacuaa. 46 Te òré sa ta cüyatni cuu caá úní sacuaa-án, te ñihí ní cáháⁿ Jèsús, te càchí-gá:

—Èlí, Èlí, ¿láma sabàctaní? — càchí-gá.

Te tnúhu-án quée-xí: Ndiöxí mée-í, Ndiöxí mée-í, ¿ná cuendá ní dáñá ñàha-n xii-í?, duha quèe-xi tnúhu-án.

47 Te dava cue tée xĩndecu yatni núú táca-a-gá-án ñí tecú dóho-güedé ñacuáa ní cáháⁿ-gá, te ní xitnáha-güedé:

—Tée-a càna-dé té Èliás — càchí-güedé xitnáha-güedé.

48 Te òré-ni-án ñí quene cunu ñí cue tée xĩndecu-án ñí queheⁿ-dé luha cáchí, te ní chindóyo-dé xití ndudí íá, te ní chinenu-dé díqui ñí yutnu càni te ní ndocani-dé ní chihi-dé yuhu-gá. 49 Te dava-güedé ní xáhaⁿ-güedé xii tée-án:

—Cundetú tnaa na cundehe-o nacoto núu quixi té Èliás dàcácu ñàha-dé xii-dé —càchí-güedé xáhaⁿ-güedé xii tée-án.

50 Te Jèsús ñihí ní cana saa-gá, te ní xihí-ni-gá. 51 Te sátá dúcáⁿ te ní ndátá dǒo cúú cǒrtiná xití veñúhu càhnu sá ño cǔnuu ní quée dava ndáá, te ndáa núú ñĩnu ní ngúíta-xi ní ndátá, te ní tnáa, te dava cava ñàhnu ní táhú. 52 Te dava yaú núú yĩndüxi ñáyiu ní xihí ní sándáá iní ñáhá xii Yá Ndiöxí ní nacaáⁿ te ní ndotó-yu. 53 Te sátá ñí yáha ní ndoto Jèsús, te cue ñáyiu ní ndoto-án cuãnguihú-yu xití ñúú Jerusalén, te cue ñáyiu

ñúú-án ño vai-yu ní xiní-yu cue ñáyiu ducaⁿ ñí ndoto-án.

54 Te sá dúcáⁿ ñándi ní quide-xi, ndihí sá dúcáⁿ ñí tnáa xíáⁿ ño ní yuhú tée cùu capitáⁿ ndihí nchaa dava-gá cue tée ndècu ndihí-dé ndéé-güedé yiqui cǔñú Jèsús, te ní xitnáha-güedé:

—Sá ndáá ndisa sá díú tée-a cùu-dé Déhe Yá Ndiöxí ní cùu —cachí-güedé xitnáha-güedé.

55 Te xica xĩnutñí vai ñáyiu dihi ndéhě-yu nchaa ñacuáa ní quide ñàha-güedé xii Jèsús, te ñáyiu-án cúú-yu ñáyiu ní chindéé-yu Jèsús, te ndéé distritú Galileá ní chinchícúⁿ ñáhá-yu xii-gá.

56 Te tnuú ñáyiu-án tnáhá tá Màriá Magdaléná, ndihí tá Màriá ñáná té Jàcobó ndihí té Chèé, ndihí ñáná cue déhe té Zebèdeú.

Chĩndüxi-güedé Jèsús

(Mr. 15:42-47; Lc. 23:50-56; Jn. 19:38-42)

57 Te ndècu ñí cue cuica ñàni-dé Chèé te cùu-dé tée ñúú Arimàtea, te tnáhá-dé ní tnáhá tnúhu-dé ndihí Jèsús. Te òré sa ní cuaa,

58 te ní sáháⁿ-dé núú té Pilatú, te xáhaⁿ-dè núu vá cǔndèe iní-dé daña-dé chĩndüxi-dé yiqui cǔñú Jèsús. Te té Pilatú-án ñí sáha-dé tnúhu, te ní táuchíúⁿ-dè sá cuãha cuendá-güedé té Chèé-án yiqui cǔñú-gá.

59 Te té Chèé-án ñí queheⁿ cuendá-dé yiqui cǔñú-gá, te ní chidúcúⁿnuu-dé ñí dóo cuixíⁿ dóo cándǒo. 60 Te sa nchíí ñí yaú sáá ñí caáⁿ té Chèé-án ñí yiqui naha càva te xíáⁿ cúú cuendá-dé, te yaú-án ñí chihi-dé yiqui cǔñú

Jèsús, te dàtnùnì ní sadí-dé ìⁿ yúú cáhnú yúú quèhéⁿ yuhu yàú-án, te ní xica-dé cuánuhú-dé. ⁶¹ Te tnhá tá Màriá Magdaléná, ndihì ingá xíchí nání Màriá ní quexìo-yu ní ngóo-yu yatni núú nchìi yaú-án.

Cue té ndèé yaú núú yìhì yìqui cuñú Jèsús

⁶² Te sátá nì yáha ní quide túha ñáyiú nchaa sá nándìhi-yu nduu tnéé nduu ndètatú-yu-án, te diu-ni nduu ndètatú-yu-án nì sáháⁿ cue dútú cúnùu, ndihì cue téé cùu fariséú ní cáháⁿ ndihì-güedé té Pilatú. ⁶³ Te xáhaⁿ-güedé xii-dé:

—Yòhó téé cùnùu, véxi-ndí càchí tnúhu-ndí sá nì ndacu iní-ndí sá tée ndehnde nì xihí-án càchí-dé òré ndécú-gá-dé sá nduu únì sá cuú-dé, te ndoto-dé. ⁶⁴ Te tendaha-n cuè téé na quihíⁿ-güedé cundeé-güedé yuhu yaú núú nì chihì-güedé yiqui cuñú-dé, chi na cuáháⁿ quihíⁿ cue téé ní xica cuu ndihì-dé duhu-güedé yiqui cuñú-dé, te cúnaha-güedé xii ñáyiú sá nì ndoto-dé. Chi núu ducaⁿ na càda-güedé te ío-gá dandáhú-güedé cue ñáyiú dàcúúxí dàtná ní quide mee tée ní xihí-án —càchí-güedé xáhaⁿ-güedé.

⁶⁵ Te té Pilatú ní xáhaⁿ-dè xii-güedé:

—Náu cue sandàdú-a can-deca-ndo-güedé quihíⁿ, te cadí váha-ndo ndihì-güedé yuhu yaú-án nàcuáa tàú-xi cunduu, te na cundeé-güedé

nàcuáa sàni iní-ndó cunduu —càchí-dé xáhaⁿ-dè xii-güedé.

⁶⁶ Te cue téé-án nì xica-güedé cuáháⁿ-güedé, te ní tee-güedé ìⁿ seña yúú ndèdí yèhe yaú-án, te ní dándòo-güedé cue sandàdú-án ndèé-güedé yaú-án, te ducaⁿ nì quide-güedé cuendá sá vǎ yòo quihíⁿ nacaáⁿ yaú-án.

28

Ní ndoto Jèsús

(Mr. 16:1-8; Lc. 24:1-12; Jn. 20:1-10)

¹ Te sátá nì yáha nduu ndètatú ñáyiú, te ndumìngú nehé víhì-nì nì xica tá Màriá Magdaléná ndihì ingá xíchí nání Màriá cuángotó-yu yaú núú nì chihì-güedé yiqui cuñú Jèsús. ² Te uuⁿi níhi víhi ní tnáa, te òré ducaⁿ nì quide-xi chi ìⁿ espíritú xínú cuèchi núú Yǎ Ndiòxí ní quexìo-xi núú dúcáⁿ nchìi yaú núú nì chihì-güedé yiqui cuñú Jèsús, te ní xócání espíritú-án yúú ndèdí yèhe yaú-án te ní ngóo-xi núú yúú-án. ³ Te dàtná dátásaⁿ-xi òré sàá ndúté dùcaⁿ datásaⁿ-xi núú espíritú-án, te dóo níhnú-xí cuixíⁿ quiyí. ⁴ Te òré ducaⁿ nì quide-xi te cue sandàdú ndèé yaú-án nì quidi ñaha-xi xii-güedé sá nì yùhú-güedé, te ní nduá-güedé, te ní xíta sá xínì tnùnì-güedé. ⁵ Te espíritú-án nì xáhaⁿ-xi xii cue ñáyiú dìhì cuángoto yaú-án:

—Nchòhó ñáyiú dìhì véxi coto yaú-a, vá yùhú-ndó chi yùhú cùtnùnì iní-í sá nchòhó véxi-ndo nànducu-ndo yiqui

cuñú Jèsús Yaá ní xíhí núú cùrúxí. ⁶ Dico Yaá-án chi ñá túú-gã ndécú yiqui cuñú-gá iha, chi sa ní ndoto-gá, te ñu ducaⁿ ñí cachí-gá sá ndótó-gã cútnàhá vátá cùú-gá, te chí táquixi cundehe-ndo núú ñí sacáⁿ-güedé yiqui cùñú-gá ní cùu te quini-ndó ñá ñá túú-gã. ⁷ Te vitna ío ndíhi chí cuaháⁿ núú xñdecu cue téé ní xica cuu ndíhi-gá, te duha cúñaha-ndo xii-güedé: “Ní ndoto Jèsús Yaá ní xíhí ní cùu, te codonùu-gá núú-ndó quíhíⁿ distritú Galileá te yacáⁿ quini-ndó-gã”, duha cúñaha-ndo xii-güedé. Duha ndùu tnúhu ní cachí tnúhu-í xii-ndo —càhí espíritú-án xáhaⁿ-xi xii cue ñáyiú ñíhí-án.

⁸ Te cue ñáyiú ñíhí-án ñí natní-yu ichi, te súúni ndíhi cuánuhú-yu núú xñdecu cue téé ní xica cuu ndíhi Jèsús cuendá nacani tnúhu-yu núú-güedé ñacuáa ní xáhaⁿ espíritú-án xii-yu, te cuéi ní yùhú-yu dico súúni cùdí ñí-yu. ⁹ Te ichi ñíhí-yu cuánuhú-yu, te na ñí-yu ní quexío Jesús núú-yu ní dándácõ váha ñaha-gã xii-yu. Te ñáyiú-án ñí ngüíñí xítí-yu núú-gã, te ní numi ñàhá-yu xii-gá, te ní chiñuhu ñàhá-yu. ¹⁰ Te ní xáhaⁿ-gã xii-yu:

—Vá yùhú-ndó, chí cuaháⁿ cúñaha-ndo xii cue téé ní xica cuu ndíhi-í sá ná quíhíⁿ-güedé distritú Galileá, te yacáⁿ quini ñàhá-güedé xii-í —càhí-gá xáhaⁿ-gã xii-yu.

Ñacuáa ndùu tnúhu ní

nacani cue sandàdú

¹¹ Te ñíni ñíhu cue ñáyiú ñíhí-án ichi cuánuhú-yu, te dava cue sandàdú cue téé ndéé yaú-án ní cùu ní xica-güedé cuánuhú-güedé ñúú cuendá nacani tnúhu-güedé núú cué téé cùu dútú cúnùu nacuáa ní cuu. ¹² Te cue téé cùu dútú cúnùu-án ñí quide-güedé jündá ndíhi cue téé cùu sacuéhé núú ñáyiú isràél, te ní ndatnúhu-güedé ñacuáa cada-güedé, te ní quide ndáá-güedé ndíhi cue sandàdú-án sá cuañaha-güedé vái díhúⁿ cuendá dacuàndehnde-güedé. ¹³ Te ní xáhaⁿ-güedé xii cue sandàdú-án:

—Cúini-ndí sá vã càháⁿ ndáá-ndó núú ñáyiú ñacuáa ní cuu, chí cúñaha-ndo xii-yu sá òré xidí-ndó ñí quixi cue téé ní xica cuu ndíhi-dé ní dúhú-güedé yiqui cùñú-dé néhé-güedé cuaháⁿ, duha cúñaha-ndo xii-yu. ¹⁴ Te núu na ñíhí té Pilatú téé cùu gobiernú tnúhu ñacuáa cúñaha-ndo xii ñáyiú, te nchúhú cada ndáá-ndí ndíhi-dé cuendá sá ñá túú ñá cada ñaha-dé xii-ndo —càhí-güedé xáhaⁿ-güedé xii cue sandàdú-án.

¹⁵ Te cue sandàdú-án ñí queheⁿ cuendá-güedé díhúⁿ, te ní xica-güedé cuaháⁿ-güedé te ní cáháⁿ-güedé ñacuáa ní xáhaⁿ cué téé-án cãháⁿ-güedé. Te nchaa ñáyiú isràél ní níhí-yu tnúhu ní cáháⁿ-güedé-án, te ñíu-ñí tnúhu-án càháⁿ-yu ndéé vitna.

Jèsús xǎhaⁿ-gǎ xii cue téé ní
xica cuu ndihí-gá nàcuáa ndiù
chiuⁿ cada-güedé

(Mr. 16:14-18; Lc. 24:36-
49; Jn. 20:19-23)

¹⁶ Te ndi ùxí ìⁿ cue téé
ní xica cuu ndihí Jèsús ní
xica-güedé cuáháⁿ-güedé ìⁿ
yucu càa distritú Galileá
núú nǎ xáhaⁿ-gǎ naníhí
tnáhá-güedě ndihí-gá. ¹⁷ Te
òré ní xiní-güedé Jèsús te ní
chiñuhu ñaha-güedě xii-gá,
dico dava-güedé sàni ìⁿ sàni
úú iní-güedé nùu diu-gá àdi ñá
díú-gǎ. ¹⁸ Te Jèsús ní sàndehe
yatni-gá ndéé núú-güedě, te
ní xáhaⁿ-gǎ xii-güedé:

—Yúhú ndécú ndihí-í
tnúhu ndee ìní táxí tnùní-í
cuéi andiù te cuéi ñuyíú-a.

¹⁹ Te vitna tàuchiuⁿ-í sá
quihíⁿ-ndó ñihí ñuyíú
cáháⁿ-ndó tnúhu-í núú ñǎyiu
cuendá tuha ñàhá-yu xii-í,
te dacuàndute-ndó-yu. Te
òré ducaⁿ càda-ndo, te ca-
cunehe-ndo tǎtá-ó Dütú
Ndióxi ndihí yúhú Yaá cúú
Děhe-gá ndihí Espiritú-gá.

²⁰ Te cúñaha-ndo xii-yu sá
ná càdá-yu nchaa nàcuáa
sa ní dánèhé ñàhá-í xii-ndo
càda-ndo. Te na càchí tnúhu-í
sá cùndècu ndihí ñaha-ni-í
xii-ndo ñuyíú-a ndéé ná
sàá nduu nàa-xi —cachí-gá
xáhaⁿ-gǎ xii-güedé. Te ducaⁿ
na cùnduu.

TNÚHU NÍ CHÍDÓ TNÛNÍ TĚ MĂCÚ

Té Juàá tée dàcuandute ñaha xii ñáyiú càháⁿ-dé tnúhu Yá Ndiöxí xití yucu

(Mt. 3:1-12; Lc. 3:1-9, 15-17; Jn. 1:19-28)

¹ Duha ní quesaha tnúhu sá càháⁿ nàcuáa naníhí tàhú-ó tnúhu Xítóhó Jesucristú Déhe Yá Ndiöxí.

² Te ndíi Chàíá tée ní xóo cáháⁿ tnúhu Yá Ndiöxí ndéé sanaha ñí chídó tnùní ndíi nàcuáa ní xáhaⁿ Yá Ndiöxí xii Déhe-gá, te duha ní xáhaⁿ-gá: Tendaha-í ñí tée codonúu-dé núú-n, te dàtúha-dé ñáyiú cuèndá tní-yu tnúhu-n.

³ Te tée-áⁿ quihi-dé xití yucu te níhi cáháⁿ-dé cúñaha-dě xii ñáyiú:

“Chí dáñá nchàa ichi cuehé ichi duha ndècu-ndo, te tní-ndo ìchi váha, te ducaⁿ càda-ndo cuendá cundecu túha-ndo, chi véxi Yaá ío cùnúu”, duha cúñaha-dě xii-yu.

Duha ndúu tnúhu ní chídó tnùní ndíi Chàíá nàcuáa ní xáhaⁿ Yá Ndiöxí xii Déhe-gá.

⁴ Te tée dii cuèndá-xi ní ngódó tnùní-áⁿ nání-dě Juàá, te tée-áⁿ ñí xíhi-dé xití yucu ní cáháⁿ-dé tnúhu Yá Ndiöxí, te ní xóo dacuàndute-dé ñáyiú, te duha ní xáhaⁿ-dě xii-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te ducaⁿ te

Yá Ndiöxí cada càhnu iní-gá nchaa yíca cuèchi-ndo —duha ní xáhaⁿ-dě xii-yu.

⁵ Te nchaa ñáyiú distritú Jùdeá, ndíhi ñáyiú ñúú Jerusalén ní sáháⁿ-yu ndéé yúte Jòrdán núú ndécú tē Juàá ní xíndedóho-yu nchaa tnúhu ní cáháⁿ-dé. Te cue ñáyiú ní náhmá nchaa yíca cuèchi-xi te ní dácuàndute ñaha-dé xii-yu.

⁶ Te tē Juàá-áⁿ ñí xíhnu-dé dóo idi càméyu, te ñí ñí ñí cuu pàñú xití-dé, te ní xóo caxi-dé tíca làngóstá ndíhi ndudí ñúúú cuéchi. ⁷ Te ní xáhaⁿ tùcu-dé xii ñáyiú:

—Nchícúⁿ ñí tée véxi, te tée-áⁿ ño-gá cùnúu-dé dàcúúxí yúhú, chí yúhú cúu-í ñí tée duuⁿ duuⁿ ñá túú tàú-í ngúnundeyí-í nandaxi cuèdicó ñí ñí nihu chàu-dé dico quide-í chiuⁿ-dé. ⁸ Te yúhú dácuàndute ñaha-í xii-ndo, dico mee-dě taxi-dé Espiritú Yá Ndiöxí cundecu ndíhi-ndo —càchí-dé xáhaⁿ-dě xii-yu.

Sàndute Jesús

(Mt. 3:13-17; Lc. 3:21-22)

⁹ Te dàvá-áⁿ ñí quee Jèsús ñúú Nazàrét ñí ñúú yíndèhu distritú Galiléa cuáháⁿ-gá yúte Jòrdán. Te yàcáⁿ ní dácuàndute ñaha tē Juàá xii-gá. ¹⁰ Te òré ní nene-gá xití ndute, te ní xíní-gá nchí andíu, te ní quee Espiritú Yá Ndiöxí véxi cuuⁿ-xi ngúndecu ndíhi ñaha-xi xii-gá, te dàtná cáá ñí lómá cáá Espiritú-áⁿ véxi cuuⁿ-xi. ¹¹ Te òré-áⁿ ñí tecú ní cáháⁿ Yá Ndiöxí ndéé andíu, te xáhaⁿ-gá xii Jèsús:

—Yòhó cúú-n Dēhe-í tée ío cúu iní-í te ío cùdí iní ñàhà-í xii-n —càchí-gá xàhaⁿ-gã.

Sácuíhná quidé yica-xi cada Jesús sá ñà túú tàú-gá cada-gá dico ñà túú ní quide-gá

(Mt. 4:1-11; Lc. 4:1-13)

¹² Te Espíritú Yá Ndiòxí ndécá-xí Jèsús cuáháⁿ ìⁿ xití yucu. ¹³ Te xití yucu-áⁿ ío víhí quítì dééⁿ, te xíaⁿ ndécú Jèsús ní ngúíta sácuíhná quidé yica-xi cada-gá ìⁿ sá ñà túú tàú-gá cada-gá dico ñà túú ní sàndáá iní-gá. Te cue espíritú xínú cuèchi núú Yá Ndiòxí ní xínu cuechí-xi núú-gã. Te ní xíndecu-gá údico nduu xití yucu-áⁿ.

Distritú Galileá ní chisaha Jesús chiúⁿ ní táhú Tátá-gã Dútú Ndiòxí cada-gá

(Mt. 4:12-17; Lc. 4:14-15)

¹⁴ Te sátá ñí ngava té Juàá vecaá, te Jèsús cuáháⁿ-gá distritú Galileá dànehé-gá ñáyíu tnúhu váha, tnúhu sá càháⁿ nàcuáa ndíhu ndaha ñàha Yá Ndiòxí xii-yu. ¹⁵ Te xàhaⁿ-gã xii-yu:

—Vitna sa ní cuyatni nduu ndíhu ndaha ñàha Yá Ndiòxí xii-ndo, te chí dáñá nchàa ichi cuehé ichi duha ndècu-ndo, te quindáá iní-ndó tnúhu váha, tnúhu sá càháⁿ nàcuáa naníhí tàhú-ndó —càchí-gá xàhaⁿ-gã xii-yu.

Jèsús càháⁿ-gá cúmí tnàhá cue tée tnèi chácá

(Mt. 4:18-22; Lc. 5:1-11)

¹⁶ Te Jèsús ñúhú-gã ichi cuáháⁿ-gá tá yàha-gá yuhu làgúná Galileá, te ní xiní-gá té Xímú ndíhi ñaní-dé té Ndríxí

xídáquēe-güedé ñunu-güedé xití ndute tnèi-güedé chácá, chí quítì tnàhí-áⁿ cúu chiúⁿ-güedé tnèi-güedé-di. ¹⁷ Te Jèsús ní xàhaⁿ-gã xii-güedé:

—Chí dáñá chiúⁿ quide-ndo-áⁿ, te quixi-ndo chítinahá ñàhá-ndó xii-í te taxi-í ingá núú chiúⁿ cada-ndo chí quíhíⁿ-ndó cãháⁿ-ndó ñáyíu cuèndá dacuàhá-yu tnúhu-í —càchí-gá xàhaⁿ-gã xii-güedé.

¹⁸ Te òré-ni-áⁿ ñí dáñá cue tée-áⁿ ñunu-güedé te ní tuha ñàha-güedé xii-gá.

¹⁹ Te cuáháⁿ-gá luha-gá, te ní xiní-gá té Jàcobó ndíhi ñaní-dé té Juàá ñúhú-güedé xití bàrcú-güedé nátícu-güedé ñunu-güedé, te ndi ndúu-güedé cúu-güedé déhe té Zebèdeú. ²⁰ Te ní cana ñàha-gã xii-güedé, te ní dándöo-güedé tátá-güedé ndíhi cue tée xínu cuechi núú-güedé xití bàrcú, te ní tuha ñàha-güedé xii-gá.

Ìⁿ tée yíhi ñàha espíritú cúndíhi yucu ñávàha

(Lc. 4:31-37)

²¹ Te ní quexío Jesús ndíhi cue tée-áⁿ ìⁿ ñúú naní Càpernaúm, te yacáⁿ ndécú-gã ní tnàhá nduu ndètatú ñáyíu, te cuánguìhu-gá veñúhu ñáyíu isràél dànehé ñàhá-gã xii-yu.

²² Te xícuñúhu víhí-yu nchaa tnúhu càháⁿ-gá, chí quide-gá sá cúu-gã ìⁿ Yaá táxí tnùnì víhí, te ñà túú dàcuaha ñàha-gá xii-yu dàtná dácuaaha ñàha cue tée dàcuaha ñàha xii-yu nchaa tnúhu ní chídó tnùnì ndíi Moisés. ²³ Te xití veñúhu-áⁿ

ndécú tnàhá ìⁿ téé yìhi ñaha ìⁿ espíritú cúndìhi yucu ñávãha, te espíritú-áⁿ ní quide-xi níhi ní cáháⁿ téé-áⁿ, te xãhaⁿ-dẽ xii Jèsús:

24 —¿Te ná cuení yòhó Jèsús téé ñuú Nazàrét cada ñaha-n xii-ndí nũu véxi-n nũú ndécú-ndí-i? ¿Áⁿ vèxi-n dànaa ñaha-n xii-ndí? Chi yúhú xìní ñáhà-í xii-n sã cúú-n ìⁿ téé ñá túú tnàhí cuéchi-xi, chi núú Yã Ndiòxí ní quee-n vèxi-n ñùyíú-a —càchí-dé xãhaⁿ-dẽ xii-gá.

25 Dico Jèsús ní tenáá-gá espíritú cúndìhi yucu ñávãha-áⁿ, te xãhaⁿ-gã:

—¿Cadí yuhu-n, te taquèe yiqui cuñú téé-áⁿ! —càchí-gá xãhaⁿ-gã xii espíritú-áⁿ.

26 Te espíritú cúndìhi yucu ñávãha-áⁿ ní dácũyìhí ñáhà-xí xii téé-áⁿ, te ní dácáná sàa ñaha-xi, te ní quee-xi yiqui cuñú-dé cuáhàⁿ-xi. 27 Te nchaa ñáyiu xĩndecu-áⁿ ïo ní cuñúhu-yu, te ní xitnàhá-yu:

—¿Te nása ndũu-tu sá quidé tẽe-a? ¿Ndudú sá cáháⁿ-tu-dé sánũu? Te quide-dé dàtná quidé ìⁿ téé cunuú vihi, chi cáháⁿ-ni-dé te sàndáá iní ñáhà nchàa espíritú cúndìhi yucu ñávãha —càchí-yu xitnàhá-yu.

28 Te ïo ndìhi ní níhí nchaa ñáyiu dava-gá ñuú yĩndèhu distritú Galileá tnúhu nchaa nàcuáa cáháⁿ Jèsús ndìhi nchaa sá quidé-gã.

Jèsús quidé tãtna-gá nãná ñadìhí té Ximú
(Mt. 8:14-15; Lc. 4:38-39)

29 Te òré ní ndee Jèsús veñúhu cue ñáyiu isràél, te cuáhàⁿ-gá ndìhi té Jàcobó ndìhi té Juàá vehe té Ximú ndìhi té Ndrìxí. 30 Te nãná ñadìhí té Ximú cùhú-aⁿ ñũhu vihi-aⁿ cahni, te ndìhi-ni ní xãhaⁿ-güedẽ xii Jèsús sá cùhú-aⁿ. 31 Te ní sáhàⁿ-gá núú cáá ñaha cùhú-áⁿ te ní tni-gá ndaha-aⁿ ní ndocani ñaha-gã xii-aⁿ. Te òré-ni-áⁿ ní nchico-aⁿ cahni, te ní ngüita-aⁿ xĩnu cuechi-aⁿ núú-güedẽ ndìhi-gá.

Jèsús quidé tãtna-gá vài ñáyiu cùhú

(Mt. 8:16-17; Lc. 4:40-41)

32 Te òré sa cuení-xi cundiquiⁿ te ní quexio ñáyiu núú ndécú Jèsús, te nchaa ñáyiu cùhú ní dátacá-yu ndecá-yu ní sáá núú-gã, te tnàhá cue ñáyiu yìhi ñaha espíritú cúndìhi yucu ñávãha ndecá-yu ní sáá núú-gã. 33 Te nchaa ñáyiu ñuú-áⁿ ní chítú níhnũ-yu yuyèhe vehe núú ní quexio Jèsús. 34 Te Jèsús ní quide tãtna-gá nchaa ñáyiu cùhú cuèi ndí dǐíⁿ ndí dǐíⁿ núú cuèhé tnàhá-yu ìⁿ ìⁿ-yu, te ní queñuhu-gá nchaa espíritú cúndìhi yucu ñávãha yìhi ñaha xii ñáyiu, te ñá túú ní dàña-gá cáháⁿ cue espíritú cúndìhi yucu ñávãha-áⁿ ni ìⁿ tnúhu, te ducaⁿ ní quide-gá chi cue espíritú-áⁿ sa xìní-xi yoo cùu-gá.

Jèsús cáháⁿ-gá tnúhu Yá Ndiòxí distritú Galileá
(Lc. 4:42-44)

35 Te òré vátá tũndaá váha-gá ní ndacóo Jèsús

cuáháⁿ-gá ñⁿ xio yuhu ñúú núú ñà túú ñáyiú ndècu cuendá yàcáⁿ cáháⁿ ndihi-gá Yá Ndiöxí. ³⁶ Te té Ximú ndihi cue tée cündihi-dé nándücu ñaha-güedé xii-gá. ³⁷ Te òré ní naníhí ñáhá-güedé xii-gá, te ní xáhaⁿ-güedé:

—Nchaa ñáyiú nànducu ñahá-yu xii-n —càchí-güedé xáhaⁿ-güedé xii-gá.

³⁸ Te ní xáhaⁿ-gá xii-güedé:

—Chí ná quíhíⁿ-ó nchaa ñuú xindáa yatni-a, chi danèhé-í ñáyiú tnúhu Yá Ndiöxí chi diu chùⁿ-án vëxi-í —càchí-gá xáhaⁿ-gá xii-güedé.

³⁹ Te Jèsús tá xica ndodo-gá cuáháⁿ nchaa ñuú yíndèhu distritú Galileá dánèhé-gá ñáyiú, te ndi tnahá ñⁿ ñⁿ ñuú sàá-gá te ducaⁿ cuànguihu-gá veñúhu-yu dànehé ñáhá-gá xii-yu tnúhu Yá Ndiöxí, te cue ñáyiú yíhi ñaha espíritú cündihi yucu ñávaha ta quèñuhu-gá nchaa espíritú-án yiqui cùñú-yu cuáháⁿ.

Jèsús quidé tātna-gá ñⁿ tée tnahá cuéhé sã dátèhyú nihnu-xi yiqui cùñú-ó

(Mt. 8:1-4; Lc. 5:12-16)

⁴⁰ Te ní quexìo ñⁿ tée tnahá cuéhé sã dátèhyú nihnu-xi yiqui cùñú-ó núú Jèsús, te ní ngüíñí xítí-dé núú-gá càháⁿ ndàhú-dé, te xáhaⁿ-dè xii-gá:

—Vëxi-í càháⁿ ndàhú-í núú-n núú vã cündèe iní-n càda tātna ñaha-n xii-í chi cùtnuní iní-í sã ndácú-n —càchí-dé xáhaⁿ-dè xii-gá.

⁴¹ Te Jèsús ní cundàhú iní ñáhá-gá xii-dé te ní dácáá-gá

ndaha-gá ní tendaha ñàha-gá xii-dé, te xáhaⁿ-gá:

—Cuu cada tātna ñaha-í xii-n, te vitna ndúha-n —càchí-gá xáhaⁿ-gá xii-dé.

⁴² Te òré-ni-án ñⁿ xócuíñí cuéhé tnahá-dé. ⁴³⁻⁴⁴ Te Jèsús ní cáháⁿ víhí-gá dóho-dé, te xáhaⁿ-gá xii-dé:

—Vitna cuanùhú-na, dico vá yõo ñⁿ cúñaha-n sà ní quide tātna ñaha-í xii-n, te núú dütú-ni cuáháⁿ cuendá sá ná quíñí ñáhá-dè xii-n sà ní ndúha-n te cuáha-n-dè sá ndúú tãhú Yá Ndiöxí dàtná ní cachí ndí Moisés cuendá ná quíñí ñáyiú sã ndáa ní ndúha-n —càchí-gá xáhaⁿ-gá xii-dé.

⁴⁵ Te tée ní cuhú-án ñⁿ xica-dé cuáháⁿ-dè, te ní ngüíta-dé xáhaⁿ-dè xii nchaa ñáyiú ta naníhí-dè nàcuáa ní quide Jèsús ní quide tātna ñaha-gá xii-dé. Te sá dúcáⁿ ñⁿ xíté nuu tée-án cuèndú nàcuáa ní quide ñaha Jèsús xii-dé ní quide tātna ñaha-gá ní ndúha-dé, te xíãⁿ núu dayuhu ñⁿ xóo quíhu-gá dava ñuú núú ño vãi ñáyiú ndèhe ñaha xii-gá, te ní xóo cundecu-gá xítí yucu núú ñà túú ñáyiú ndècu. Te nchaa ñuú ní quee ñáyiú ní sáháⁿ-yu núú ndécú-gá ní cáháⁿ ndihi ñáhá-yu xii-gá.

2

Jèsús quidé tātna-gá ñⁿ tée cùhú ñã cùú-gá candá nihnu
(Mt. 9:1-8; Lc. 5:17-26)

¹ Te sátá ñⁿ cuu ñⁿ ùú nduu sã ñⁿ quee Jèsús ñuú Capèrnaúm te ní nasáa tucu-gá, te cue ñáyiú ní níhí-yu tnúhu sã ñⁿ ndexìo-gá

núú quidé vèhe-gá. ² Te ndìhi-ni ní tacá cuéhé víhì-yu, te ní chítú víhì-yu ndéé yuyèhe te ñá ní tnàhá-gá-yu. Te ní ngúita-gá ní dánèhé ñáhá-gá xií-yu tnúhu Yá Ndiöxí. ³ Te òré-án nǐ quexìo cúmí tnàhá cue téé núú ndécú-gã nchídó-güedë ìⁿ téé cùhú ñá cúú-gã candá nihnu-dé. ⁴ Dico ñá túú ní ndàcu-güedé sáá-güedé ndéé núú-gã chi ío cuéhé ñáyiu ndècu. Te xiǎⁿ núu ní sáá-güedé díquí véhé núú yíhí-gã-án nǐ caán-güedé, te ichi ndàa díquí véhé-ǎⁿ nǐ dáquëe-güedé téé cùhú-án, te ñùhu-dé ìⁿ xító ní dáquëe ñaha-güedé ndéé núú-gã. ⁵ Te Jèsús sa ní cutnùnì iní-gá sá sàndáá iní ñáhá-güedé xii-gá núu ní xáhaⁿ-gã xii téé cùhú-án:

—Yòhó téé cùhú, sa ní quide càhnu iní-í nchaa cuéchi-n —càchí-gá xǎhaⁿ-gã xii-dé.

⁶ Te xiáⁿ xǐnucóo ìⁿ úú cue téé dàcuaha ñaha xii ñáyiu nchaa tnúhu ní chídó tnùnì ndíi Moisés, te sá dúcáⁿ nǐ cáháⁿ Jèsús núú cue téé-án nǐ sani iní-güedé: ⁷ “Téé-a cáháⁿ cuéhé-dé cuèndá Yá Ndiöxí duha cáháⁿ-dé, chi vá yóo ìⁿ ndàcu cada cahnu iní nchaa yíca cuéchi ñáyiu chi ìⁿndìi díí-ni Yá Ndiöxí quidé càhnu iní-gá”, duha ní sani iní-güedé. ⁸ Dico òré-ni-án nǐ cutnùnì iní Jèsús nàcuáa sàni iní-güedé, núu ní xáhaⁿ-gã xii-güedé:

—¿Te ná cuèndá ducaⁿ sàni iní-ndó-í? ⁹ Te sá dúhá nǐ xáhaⁿ-í xii téé cùhú-a sá nǐ

quide càhnu iní-í nchaa yíca cuéchi-dé, te xiǎⁿ nchòhó ñá túú cutnùnì iní-ndó núu ndáá cáháⁿ-í àdi ñá ndáá. Dico núu cúu-í-dé sá ndácóo-dé, te ndocani-dé xító ñùhu-dé véxi, te caca-dé, te cutnùnì ndáá iní-ndó núu ndáá cáháⁿ-í àdi ñá ndáá chi cundehe núú-ndó nàcuáa cada-í. ¹⁰ Te vitna na càda-í nàcuáa cutnùnì iní-ndó nchaa-ndo sá yúhú Téé cúu ñani tnàhá-ndó nchaa-ndo ndecu ndìhi-í tnúhu ndee iní sá cáda càhnu iní-í nchaa cuéchi ñáyiu ñuyú-a —càchí-gá xǎhaⁿ-gã xii-güedé.

Te sáta dúcáⁿ te ní xáhaⁿ-gã xii téé cùhú-án:

¹¹ —Ndacóo te ndocani-n xító ñùhu-n véxi-án, te nuhú-n vèhe-n —cachí-gá xǎhaⁿ-gã xii-dé.

¹² Te òré-ni-án nǐ ndacóo-dé, te ní ndocani-dé xító ñùhu-dé ní quexìo-án, te ndèhe nchaa ñáyiu xǐndecu-án nǐ ndee-dé tnuú-yu cuáháⁿ-dé. Te sá dúcáⁿ nǐ quide Jèsús ní quide tátna-gá téé-án, xiǎⁿ ío ní cuñúhu nchaa ñáyiu, te ní xítñàhá-yu:

—Càhnu vihi cuu Yá Ndiöxí, chi ñá ìⁿ ndùu quiní-ó dùha cuu datná ní cuu vitna —càchí-yu xítñàhá-yu.

Jèsús cáháⁿ-gá ìⁿ téé nàni Levi

(Mt. 9:9-13; Lc. 5:27-32)

¹³ Te Jèsús cuáháⁿ tucu-gá yuhu làgúná, te ío cuéhé ñáyiu ní sátnàhá ñáhá xii-gá, te ní dánèhé ñáhá-gã xií-yu tnúhu Yá Ndiöxí. ¹⁴ Te òré ní yáha ní dánèhé ñáhá-gã xií-yu, te ní naqueheⁿ-gã ichi, te ní yáha yatni-gá ìⁿ xichi núú

núcõo ìⁿ tée nàni Leví déhe ìⁿ tée nàni Alfeú quidé còbrá-dé ñáyiú cuendá impuèstú chi còbrádór cúú-dě. Te òrè ní xini ñáhá-gã xii-dé, te ní xáhaⁿ-gã:

—Néhe chitnahá ñáhá-n xii-í —càchí-gã xáhaⁿ-gã xii-dé.

Te té Lèví-áⁿ ñi ndacuíñi-dé, te ní tuha ñaha-dě xii-gã.

15 Te té Lèví-áⁿ cuáháⁿ-dé ndihi Jèsús vehe-dé. Te yìhi Jèsús mèsá xéxi-gã ndihi cue tée xica cuu ndihi-gã, te tnàhá vài cue tée cuihna ìni-xi quide cobrá ñáhá xii ñáyiú cuendá impuèstú, ndihi dava-gã cue tée ndècu ichi cuehé ichi duha núcõo ndihi ñaha-güedé xii-gã xéxi ndihi ñaha-güedé, te ducaⁿ chi ío vài ñáyiú nchìcúⁿ ñáhá xii-gã. 16 Te sá ñi xini cue tée dàcuáha ñaha xii-yu nchaa tnúhu ní chídó tnùnì ndíi Moisés, ndihi cue tée cùu fariséú xéxi Jèsús ndihi nchaa cue tée-áⁿ nùu ní xicáⁿ tnúhú-güedé núú cuè tée xica cuu ndihi-gã, te xáhaⁿ-güedé:

—¿Ná cuendá ducaⁿ quide tée cùu mestrú-ndó xèxi-dé ndihi cue tée cuihna ìni-xi quide cobrá ñáhá xii ñáyiú cuendá impuèstú, ndihi nchaa dava-gã cue tée ndècu ichi cuehé ichi duha-i? —càchí-güedé xáhaⁿ-güedé.

17 Te Jèsús ní tecú dóho-gã nàcuáa ndùu tnúhu ní xáhaⁿ-güedé xii cue tée xica cuu ndihi-gã, núú ní xáhaⁿ-gã xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í

càháⁿ-í ñáyiú cùtnuní ìni-xi sá ndècú cuèchi-xi te ñá túú véxi-í càháⁿ-í ñáyiú càchí sá ñá túú ndècu cuèchi-xi —càchí-gã xáhaⁿ-gã xii-güedé.

Cuendá cue ñáyiú ñá túú tnàhí ná xéxi áma càháⁿ ndihí-yu Yá Ndiõxí

(Mt. 9:14-17; Lc. 5:33-39)

18 Te cue tée xica cuu ndihi té Juáá, ndihi cue tée xica cuu ndihi cue tée cùu fariséú ñá túú tnàhí ná xéxi-güedé áma càháⁿ ndihi-güedé Yá Ndiõxí. Te ìⁿ nduu ducaⁿ xiquide-güedé, te ní sáháⁿ ñáyiú ní xicáⁿ tnúhú-yu núú Jèsús, te xáhaⁿ-yu xii-gã:

—Cuní-ndí cachí tnúhu-n nã cuendá cue tée xica cuu ndihi té Juáá, ndihi cue tée xica cuu ndihi cue tée cùu fariséú ñá túú tnàhí ná xéxi-güedé áma càháⁿ ndihi-güedé Yá Ndiõxí, te cue tée xica cuu ndihi-n ñá túú ducaⁿ quide-güedé —càchí-yu xáhaⁿ-yu xii-gã.

19 Te Jèsús ní xáhaⁿ-gã xii-yu:

—Nchòhó xini-ndó sã vã cúú cùñaha-o xii ñáyiú ñuhu vico tnándaha sã vã cúú caxí-yu ñini ndècu ndihi ñaha tée tnándaha xii-yu. 20 Dico sáá nduu te vã cùndècu ndihi ñaha-gã tée tnándaha-áⁿ xii-yu, te dàvá-áⁿ te cahni ìni-yu vã caxí-yu cuendá sá ndihú ìni-yu.

21 Te vã yõo ìⁿ dandée luha dóó sáá ìⁿ dóó sa ní cuu tùhú víhí, chi dóó sáá-áⁿ nàndiyi-xi te uuⁿ-gã ndata-xi dóó sá ní cuu tùhú-áⁿ. 22 Te ñi vã yõo ìⁿ chihí ndidí sáá xití ìⁿ lamba sa ní cuu tùhú víhí, chi núú

yoo ducaⁿ na càda te ndava lamba sa ní cuu tùhú-áⁿ, chí ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdá-yu. Núu xíáⁿ xíní ñùhu-xi quée ndidí sáá-áⁿ xítí ìⁿ lamba saa — càchí-gá xáhaⁿ-gá xii-yu.

Cue téé xica cuu ndihi Jesús sahnú-güedé yoco triú nduu ndètatú ñáyiu

(Mt. 12:1-8; Lc. 6:1-5)

23 Te ìⁿ nduu cùu-xi nduu ndetatú ñáyiu ñùhu Jesús ichi ndihi cue téé xica cuu ndihi-gá, te ta yáha-gá ndihi-güedé ìⁿ xichi núu cáá triú, te ní nguíta-güedé sahnú-güedé yoco triú-áⁿ. 24 Te cue téé cùu fariséú ní xáhaⁿ-güedé xii-gá:

—¿Ná cuendá ducaⁿ quide cue téé xica cuu ndihi-n sahnú-güedé yoco triú vitna cùu-xi nduu ndetatú-i? Te ñá túú tau-güedé ducaⁿ càda-güedé —càchí-güedé xáhaⁿ-güedé xii-gá.

25 Te ní xáhaⁿ-gá xii-güedé:

—¿Te náa vátá dácuàha tnahi-gá-ndó núu tütú Yá Ndiöxí núu càháⁿ-xi nàcuáa ní quide ndíi Dàvíí cùtnhá ní xihí ndíi docó ndihi cue téé ní xica cuu ndihi ndíi-áⁿ? 26 Te dàvá-áⁿ ñí xíndecu ìⁿ téé ní xínani Abiàtár ní cuu-dé dútú cúnúu, te ndíi Dàvíí ní quíhu ndíi xítí vehe Yá Ndiöxí ní queheⁿ ndíi pàá ní cuu íí ndécú-áⁿ ñí dácáñhu ndíi cue téé ní xica cuu ndihi ndíi ní xexi ndíi ndihi-güedé, te mee-ni cuè dútú tau-güedé caxi-güedé pàá-áⁿ ní cùu — cachí-gá xáhaⁿ-gá xii-güedé.

27 Te ní xáhaⁿ tucu Jesús xii-güedé:

—Mee Yá Ndiöxí ní taxi ndecu-gá nduu ndètatú ñáyiu, te ñá túú ní càchí-gá sá méé-yu náandi cani iní-yu cadá-yu canehe íi-yu nduu ndètatú-yu-áⁿ. 28 Te yúhú Téé cùu ñaní tnáha-ndó nchàa-ndo, tnáhá-í ndécú ndíhi-í tnúhu ndee iní sá cùu-í nchaa ñáyiu nàcuáa cadá-yu nduu ndètatú-ó-áⁿ —càchí-gá xáhaⁿ-gá xii-güedé.

3

Ìⁿ téé ní yíchí ìⁿ xio ndaha-xi

(Mt. 12:9-14; Lc. 6:6-11)

1 Te Jèsús cuánguihu tucu-gá xítí veñúhu, te xítí veñúhu-áⁿ ndécú ìⁿ téé ní yíchí ìⁿ xio ndaha-dé. 2 Te xíáⁿ ndécú cuè téé xito dayuhu ñaha xii-gá, te núu cada tátna-gá téé cùhú-áⁿ nduu cùu-xi nduu ndetatú-güedé ndíhi ñáyiu, cuendá ducaⁿ te níhi-güedé nàcuáa cada-güedé cacáⁿ cuèchi-güedé cuendá-gá. 3 Te ní xáhaⁿ-gá xii téé cùhú ndaha-xi-áⁿ:

—Ndacuíñí te ngúnutnii-n cuádava iha —càchí-gá xáhaⁿ-gá xii-dé.

4 Te ní xicáⁿ tnúhú-gá núu-güedé, te xáhaⁿ-gá:

—Chí càchí tnúhu ná cúu sá cúu càda-o nduu ndetatú-ó, ¿Sá vaha ñá sá cuèhé? ¿Sá cadá tátna-o ñáyiu cùhú ñá sá cáhni-ó-yu? —càchí-gá xáhaⁿ-gá xii-güedé.

Dico ní ìⁿ-güedé ñá túu tnáhi ní càháⁿ-güedé. 5 Te

Jèsús ní xíndéhé vǎha-gá núú nchàa-güedé te ní cudééⁿ-gǎ, te ní ndíhú iní-gá chi ío sǎá iní-güedé, te ní xáhaⁿ-gǎ xii téé cùhú ndaha-xi-áⁿ:

—Ndocani ndaha-n —
càchí-gá xǎhaⁿ-gǎ xii-dé.

Te ní ndocani-dé ndaha-dé, te òré-ni-áⁿ nǐ ndúha. ⁶ Te cue téé cùu fariséú ní xica-güedé cuáháⁿ-güedé ìⁿ xichi núú nǐ naníhí tnáhá-güedě ndihi cue téé cùndihi té Hèrodes cuèndá ndatnúhu-güedé nása cada-güedé cahni-güedé Jèsús.

Cuéhé víhí ñǎyiu ní quexìo yuhu lagúná

⁷ Te Jèsús ní xica-gá cuáháⁿ-gá ndihi cue téé xica cuu ndihi-gá yuhu làgúná distritú Galileá, te ío cuéhé ñǎyiu distritú-áⁿ nchicúⁿ ñáhǎ-yu xii-gá cuáháⁿ. ⁸ Te núú nǐ quexìo-gá-áⁿ nǐ sáháⁿ ñáyiu distritú Jùdeá, ñáyiu ñúú Jerusalén, ñáyiu distritú Idùmeá, ñáyiu xǐndecu ndàa ingá xio yúte Jòrdán, ndihi ñáyiu xǐndecu yatni ñúú Tírú ndihi ñúú Sidón, te ducaⁿ ío vǎi-yu ní sáháⁿ núú ndécú-gǎ chi ní níhí-yu tnúhu nchaa nàcuáa quide-gá. ⁹ Te Jèsús ní xáhaⁿ-gǎ xii cue téé xica cuu ndihi-gá sá cádá tǔha-güedé ìⁿ bàrcú cuèndá caa-gá núú-xi cuèndá sá vǎ dádèhnde ñahá-yu xii-gá chi ío cuéhě-yu. ¹⁰ Te sá dúcáⁿ nǐ níhí-yu tnúhu sá quidé tǎtna-gá ñáyiu cùhú, núú xǎáⁿ nchaa dava-gá ñáyiu cùhú súúní dicó ngónchihí tnáhá-yu cuáháⁿ-yu núú ndécú-gǎ cuíní-yu tnándeé ñáhǎ-yu

xii-gá cuèndá sá cuíní-yu ndúha-yu. ¹¹ Te cue ñáyiu yìhí ñaha espíritú cùndihi yucu ñávǎha ní sanu xiti ñaha-xi xii-yu núú Jèsús òré ní xini ñáhá-xí xii-gá, te xǎáⁿ ní quide níhí ní cáháⁿ-yu, te xǎhǎⁿ-yu xii Jèsús:

—Yòhó cúu-n Dèhe Yá Ndióxi! —càchí-yu xǎhǎⁿ-yu xii-gá.

¹² Te Jèsús ní tenáá-gá nchaa espíritú cùndihi yucu ñávǎha-áⁿ, te ní xáhaⁿ-gǎ xii nchaa ñáyiu ní xíhí-xi-áⁿ sǎ vǎ càháⁿ-yu núú ñáyiu yoo cùu-gá.

Jèsús cǎxi-gá úxúú tnàhá cue téé dacuáha ñaha xii ñáyiu tnúhu-gá

(Mt. 10:1-4; Lc. 6:12-16)

¹³ Te sátá dúcáⁿ nǐ cuu te Jèsús ní sáá-gá ìⁿ yucu, te xǎáⁿ ndécú-gǎ ní cana-gá nchaa cue téé càchí iní-gá. Te òré ní quexìo nchaa cue téé-áⁿ núú-gǎ, ¹⁴ te ní cǎxi-gá úxúú tnàhá cue téé caca cuu ndihi-gá, te diu-ni cue téé-áⁿ tendaha-gǎ quíhíⁿ-güedé cáháⁿ-güedé tnúhu-gá núú ñáyiu. ¹⁵ Te ní sáñaha-gǎ xii-güedé tnúhu ndee iní cundecu ndihi-güedé cuèndá cada tǎtna-güedé ñáyiu cùhú, ndihi cuèndá queñuhu-güedé nchaa espíritú cùndihi yucu ñávǎha yìhí ñaha xii ñáyiu. ¹⁶ Te duha xǎnani ndi úxúú cue téé-áⁿ: Ìⁿ-dé nání-dé Xímú, te mee-gǎ ní taudiu ñaha-gá xii-dé sá cúnàni-dé Pèlú. ¹⁷ Te ingá-dé nání-dé Jàcobó, te ingá-dé nání-dé Juáá, te ñaní té Jàcobó-áⁿ cúu tǎ Juáá te

ndi ndúú-güedé cúú-güedě déhe té Zebèdeú, te ndi ndúú cue téé-áⁿ ñí dánání ñaha Jesús xii-güedé Boànergés, te tnúhu-áⁿ quée-xí: Cue téé ío yáchí cúdeéⁿ, duha quèe-xi tnúhu-áⁿ. ¹⁸ Te duha xĩnani dàva-gá-güedé: Té Ndríxí, té Lìpé, té Bartolòmé, té Mâteú, té Mǎxí, té Jàcobó déhe té Àlfeú, té Tàdeú, té Xímú téé ní cundihi cue téé canànistá ní cùu, ¹⁹ ndihi té Jùdás Iscarioté téé ní sáá nduu ñí sáha cuèndá ñáhá xii Jesús núú cuè téé cùu úhú iní ñáhá xii-gá, duha xĩnani cuè téé ní cáxi Jesús ní xica cuu ndihi-gá.

Càchí-güedé sá ndécú ndihi Jesús yucu ñávaha dico ñá ndàá
(Mt. 12:22-32; Lc. 11:14-23; 12:10)

Te sáta dúcáⁿ te cuáháⁿ-gá ndihi-güedé núú quidé vehe-gá. ²⁰ Te ío vai ñáyiu ní tacá-ni tucú-yu xíaⁿ, te ñí ñá ní ñíhí-gá nása cada-gá caxi-gá ndihi cue téé xica cuu ndihi-gá cuèndá sá ío vai-yu. ²¹ Te cue ñáyiu cùu ndi mee Jesús ní ñíhí-yu tnúhu nchaa nàcuáa cùu, te nchaa ñáyiu ñá cùtnuní váha iní-xi ní cachí-yu sá ñí nduu lúcú-gá nõu xíaⁿ cuáháⁿ ñáyiu cùu ndi mee Jesús núú ndécú-gá cuèndá candeca ñáhá-yu xii-gá núhú ní cùu.

²² Te cue téé dācuaha ñaha xii ñáyiu nchaa tnúhu ní chídó tnùní ndí Moisés véxi ndéé ñuú Jerusalén ní cáháⁿ cuèhé-güedé cuèndá Jesús, chí ní xítnàha-güedé:

—Tée-a ndècu ndihi-dé sácúhná, te diu xíaⁿ chindèe

ñaha-xi xii-dé quèñùhu-dé nchaa espíritú cùndihi-xi yíhi ñaha xii ñáyiu, te diu-ni-xi tàxi tnuní-xi nchaa espíritú-áⁿ — duha ní xítnàha-güedé.

²³ Te Jèsús ní cana ñaha-gá xii-güedé, te ní cani-gá iⁿ cuèndú núú-güedé nàcuáa tecu tnùní-güedé tnúhu-gá, te xáhaⁿ-gá xii-güedé:

—¿Te nása cada sácúhná queñuhu-xi cue espíritú cùndihi-xi yíhi ñaha xii ñáyiu-i? ²⁴ Te nchòhó xíní-ndó sǎ nõu iⁿ téé yìndaha iⁿ nacióⁿ vá cúú iⁿnuu-dé ndihi cue téé cùndihi-dé, te vá cùdĩ-dé cunuu-dé. ²⁵ Te diu-ni ducaⁿ sǎtnhá-xi cùu tucu ñáyiu xĩndecu iⁿ-ni vehe, chí núu vá cúú iⁿnuú-yu, te vá cùdĩ-yu cundecu càhnú-yu. ²⁶ Te núu sácúhná ñà túú cùu iⁿnuu-xi ndihi cue espíritú cùndihi-xi, te vá cùdĩ-xi cundecu-xi taxi tnùní-xi te núu ducaⁿ quide-xi.

²⁷ Te nchòhó xíní-ndó sǎ cuè ñadúhú chí vá ndácú-güedé cuèndá-ni quíhu-güedé duhu-güedé vehe iⁿ téé ío ndee, chí díhna-gá xíní ñùhu-xi tnii-güedé téé-áⁿ dacùtu ñaha-güedé xii-dé dǎtnùní ducaⁿ te ndacu-güedé duhu-güedé nchaa sá ndécú ndihi-dé.

²⁸ Te na càchí tnúhu ndáá-í xii-ndo sǎ ncháá sǎ cuèhé sǎ dúhá quide ñáyiu, ndihi nchaa tnúhu cuèhé tnúhu duha càháⁿ-yu cuèndá Yá Ndióxi cuu cada càhnu iní-gá. ²⁹ Dico cue ñáyiu na càháⁿ cuèhé

cuendá Espiritú Yă Ndiõxí, ñáyi-u-án vǎ cáda càhnu iní ñáhá tnahí-gá xií-yu, chi cundecu-ni cuéchi-yu núú-gǎ ni caa ni quíhíⁿ —càchí-gá xǎhaⁿ-gǎ xii-güedé.

³⁰ Te ducaⁿ ñí cáháⁿ-gá chi càchí-güedé sá ndécú ndihí-gá espíritú cündihí yucu ñávǎha.

Nǎná Jèsús ndihí cue ñaní-gá

(Mt. 12:46-50; Lc. 8:19-21)

³¹ Te ní quexìo náná Jèsús ndihí cue ñaní-gá núú ndécú-gǎ xĩnutnĩ-yu quehé, te ní xáhǎⁿ-yu xii ñí ñáyi-u xĩndecu-án sǎ dáyǎha-yu tnúhu núú-gǎ cuendá quee-gá ndatnúhu ndihí ñaha-gǎ xií-yu. ³² Te cue ñáyi-u xĩnucóo ni càndéé dìñi-gá ní xáhǎⁿ-yu xii-gá:

—Nǎná-n ndihí cue ñaní-n ndécú-yu quehé nándücu ñahá-yu xii-n —càchí-yu xáhǎⁿ-yu xii-gá.

³³ Te Jèsús ní xáhaⁿ-gǎ xií-yu:

—Te cachí tnúhu-ndo yõndi-gá ñáyi-u cùu datná nǎná-í ndihí dàtná cue ñaní-í —càchí-gá xǎhaⁿ-gǎ xií-yu.

³⁴ Te dàtnùní ní xĩndéhé vǎha-gá núú nchǎa ñáyi-u xĩnucóo ni càndéé dìñi-gá-án, te ní xáhaⁿ-gǎ xií-yu:

—Nchaa ñáyi-u-a cùu-yu dàtná nǎná-í ndihí dàtná cue ñaní-í. ³⁵ Chi nchaa ñáyi-u quide nacuáa càháⁿ Yă Ndiõxí, ñáyi-u-án cùu-yu dàtná cue ñaní-í, ndihí dàtná cue cúha-í, ndihí dàtná nǎná-í —càchí-gá xǎhaⁿ-gǎ xií-yu.

4

Nàcuáa quide tée cuángacáⁿ triú

(Mt. 13:1-9; Lc. 8:4-8)

¹ Te Jèsús ní ngüíta-gá dácuaⁿha tucu-gá ñáyi-u yuhu làgúná. Te cuéhé víhí-yu ní tacá xiáⁿ nõu cuásaá-gá núú ñí bàrcú nútñĩ xití ndute làgúná-án, te núú xiáⁿ ní ngóo-gá te ní ngüíta-gá dánèhé ñáhá-gǎ xií-yu, te nchaa-yu xĩxúcu-yu yuhu làgúná-án. ² Te ní ngüíta-gá ní cani-gá titní cuendú nõu-yu nàcuáa tecú tnùmi-yu tnúhu-gá, te xǎhaⁿ-gǎ xií-yu:

³ —Chí cündèdóho vǎha ñí cuendú ná càni-í-a. ñí tée cuángacáⁿ-dé triú. ⁴ Te òré ní ngüíta-dé dǎngoyo-dé triú-án, te dava ní quene ndava ní ngava ndéé ichi, te ní xiní cue tǎlaá te ní nadatàcá-güedi.

⁵ Te dava ní ngava ñuhu yadi nõu yíhí víhí yúú, te ndĩhi-ni ní xĩnu-xi cuendá sá ñà túú càvihí ñuhu. ⁶ Dico òré ní nayehé ñà túú ní cündee iní-xi chí ní yíchí-xi, chí ñà túú ní ñhí quíhíⁿ cùnú yóho-xi.

⁷ Te dava ní ngava núú yúcú ndĩquín tnu ññu, te ñí nuu-ni ñí xĩnu-xi ndihí tnu ññu, te tnu ññu-án ñí sahnu-xi te ní dánáá-xi nchǎa triú sá ñí xĩnu-án. ⁸ Dico dava triú-án ñí ngava-xi núú ndécú ññu cocoⁿ, te xiáⁿ ní xĩnu-xi te ní sahnu-xi te ío vǎha ní cuu, chí núú ñí ní triú-án te dava yoco-xi ní ngüihí ócò úxí triú-xi, te dava yoco-xi ní ngüihí únídico triú-xi, te dava yoco-xi ní ngüihí ñí ciendú

triú-xi —càchí-gá xǎhaⁿ-gǎ xií-yu.

⁹ Te xǎhaⁿ tùcu-gá xií-yu:

—Nchaa nchòhó ñáyiú ní xíndedóho nchaa tnúhu ní cáháⁿ-í-a, te ío váha chí cuǎha cuèndá —càchí-gá xǎhaⁿ-gǎ xií-yu.

Jèsús càháⁿ-gá ná cuèndá ducaⁿ càni-gá cuèndú

(Mt. 13:10-17; Lc. 8:9-10)

¹⁰ Te sátá ñí ndaca ñáyiú-áⁿ te ní quendóo mee-nǎ Jèsús ndihí cue téé xíca cuu ndihí-gá, ndihí ìⁿ úú-nǎ ñáyiú. Te ñáyiú-áⁿ ndihí cue téé-áⁿ ñí xícaⁿ tnúhǔ-yu ndihí-güedé núú-gǎ, núú nása quèe-xi cuèndú ní cani-gá núú-yu ndihí-güedé. ¹¹ Te ní xáhaⁿ-gǎ:

—Nchòhó chí sa càchí tnúhu Yá Ndiòxí xii-ndo ìⁿ sá vátá quíni-gá-ndó, chí càchí tnúhu-gá nàcuáa cada-gá ndíhu ndaha-gǎ ñáyiú, dico dava-gá ñáyiú càni-í mee-ni cuèndú núú-yu. ¹² Chí cuèi na quíni-yu nchaa nàcuáa cuu dico ñí vǎ cútnúni iní-yu ná cuèndá ducaⁿ cuu, àdi cuèi na cùndedóho-yu dico ñí vǎ tècú tnúni-yu. Te ducaⁿ ndòhó-yu cuèndá sá vǎ quíndáa iní-yu Yá Ndiòxí, ndihí cuèndá sá vǎ cádá càhnu iní-gá nchaa yíca cuèchi-yu —càchí-gá xǎhaⁿ-gǎ xií-yu ndihí-güedé.

Jèsús càháⁿ-gá nàcuáa quèe-xi cuèndá téé cuángacáⁿ triú

(Mt. 13:18-23; Lc. 8:11-15)

¹³ Te ní xáhaⁿ tùcu Jesús xii cue téé xíca cuu ndihí-gá, ndihí cue ñáyiú-áⁿ:

—Nchòhó, ñá túú ní tècú tnúni-ndó cuèndú ní cani-í núú-ndó, te núú ducaⁿ, ¿te nása tecú tnúni-ndó dáva-gá cuèndú cani-í núú-ndó-í? Te na càchí tnúhu-í xii-ndo nàcuáa quèe-xi cuèndú ní cani-í núú-ndó. ¹⁴ Te téé cuángacáⁿ triú-áⁿ cúú-dé dàtná ìⁿ téé cuáháⁿ càháⁿ tnúhu Yá Ndiòxí núú ñáyiú. ¹⁵ Te triú-áⁿ cúú-xí dàtná tnúhu Yá Ndiòxí, te triú sá ñí quene ndava ní ngava ndéé ichi, xíáⁿ cúú-xí dàtná ñáyiú ní tnahá iní-xi tnúhu Yá Ndiòxí, dico sácuíhná cuáháⁿ-xi xòcani-xi tnúhu-gá iní-yu cuèndá sá vǎ cánchezúⁿ nihnú-yu nàcuáa càháⁿ tnúhu-áⁿ. ¹⁶ Te triú sá ñí ngava ñuhu yadi núú yíhí víhi yúú, xíáⁿ cúú-xí dàtná ñáyiú ní xíndedóho tnúhu Yá Ndiòxí te díí ìni ní tñí-yu tnúhu-gá. ¹⁷ Dico òré ná ngüíta ñáyiú cúcuèhé ñáhǎ-yu xií-yu àdi nándi-gá sá yǎha-yu sá cuèndá tnúhu-gá, te ñá cùndèe iní-yu chí dàñá-yu tnúhu-gá cuèndá sá ñà túú ñihí ndéé-yu. ¹⁸ Te triú sá ñí ngava núú yúcu ndíquíⁿ tnu ññu xíáⁿ cúú-xí dàtná ñáyiú ní tecú dóho-xi tnúhu Yá Ndiòxí, ¹⁹ dico cuèé cuèé ní nacuanaá-yu tnúhu-gá, chí cuèndá mee-ni sǎ cúú-xí mèé-yu ññu iní-yu, ndihí cuèndá sá ño sàni iní-yu cuu cuicá-yu, ndihí cuèndá sá ño cùdíí ìni-yu nchaa sá ño ñuyíú-a, te ñá túú ññu iní-yu tnúhu sá ñí xíndedóho-yu-áⁿ nàcuáa cada váha-yu cundecú-yu. ²⁰ Dico triú sá ñí ngava núú ndécú ññu cocoⁿ,

xíáⁿ cúú-xí dàtná ñáyiú ní xíndedóho tnúhu Yá Ndiòxí te quidé-yu nchaa nàcuáa càháⁿ tnúhu-áⁿ. Te cada iní-ndó sá ñáyiú-áⁿ cúú-yu dàtná triú sá ñí nguíhi yoco-xi ócò úxí triú-xi, ndihi triú sá ñí nguíhi yoco-xi únídico triú-xi, ndihi triú sá ñí nguíhi yoco-xi ñⁿ ciéndú triú-xi. Te ducaⁿ sátnahá-xi cúú-yu chí ío váha quidé-yu —càchí-gá xáhaⁿ-gá xii cue téé xica cuu ndihi-gá ndihi cue ñáyiú-áⁿ.

Cuèndá iti
(Lc. 8:16-18)

²¹ Te xáhaⁿ-gá xii nchaa ñáyiú:

—Ñá túú ñí ñⁿ ñáyiú tènñuhú iti te chiváha-yu ñⁿ xití quídi, àdi chiváha-yu ñⁿ caha càamá, chí tàxi ndecú-yu ñⁿ núú dùcúⁿ cuèndá cutnùní núú nchaa ñáyiú. ²² Te ñí ñⁿ tnúhu sá ñá təcú tnùní ñáyiú vitna cachí-ó sá vǎ təcú tnùní-yu chí dacuití sá təcú tnùní-yu, te ñí ñⁿ tnúhu sá càchí-ó cùu yuhu vitna vá cúú yùhu chí dacuití sá quée tũu-xi núú ñáyiú. ²³ Te nchòhó cue ñáyiú ní xíndedóho nchaa tnúhu ní càháⁿ-í-a, te ío váha chí ná cuáha cuèndá —càchí-gá xáhaⁿ-gá xii-yu.

²⁴ Te ní xáhaⁿ tucu-gá:

—Ío váha chí cùndedóho tnúhu na càháⁿ-í-a. Te nàcuáa-ñi quide-ndo danehé-ndo ñáyiú tnúhu Yá Ndiòxí, te ñiú-ñi ducaⁿ càda ñaha-gá xii-ndo, te uuⁿ-gá ducaⁿ càda-gá sá cúú-xí-ndó. ²⁵ Te nchaa nchòhó ñáyiú təcú tnùní tnúhu Yá Ndiòxí, uuⁿ-gá

cuita tecú tnùní-ndó tnúhu-gá quíhiⁿ. Te nchaa nchòhó ñáyiú ñá túú təcú tnùní tnúhu-gá, te uuⁿ-gá vá təcú tnùní-ndó —càchí-gá xáhaⁿ-gá xii-yu.

Nàcuáa sàhnu triú

²⁶ Te Jesús xáhaⁿ tucu-gá:

—Na càni-í ñⁿ cuèndú núú-ndó cuèndá tecú tnùní-ndó nàcuáa cada-xi òré ndihu ndaha ñàha Yá Ndiòxí xii ñáyiú. ñⁿ téé cuángacáⁿ-dé triú. ²⁷⁻²⁸ Te sáta ñí yáha ní sacáⁿ-dé triú-áⁿ, te cuánuhú-dé vehe-dé ndétátú-dé. Te ducaⁿ-ñi ta xica nduu cuáháⁿ te ní xínu triú-áⁿ, te nàcuáa ta sàhnu-xi cuáháⁿ te ta quèe ndaha-xi, te ducaⁿ-ñi cùu ní sáá nduu ñí quene yoco-xi te ní nguíhi triú-xi, dico téé ní sacáⁿ triú-áⁿ ñá túú xini-dé nása ní sahnu-xi, chí mee ñùhu ní quide-xi ní sahnu triú-áⁿ. ²⁹ Te òré sa ní ndihi ní cuaaⁿ te ní nguíta téé ní sacáⁿ-áⁿ náquèhndé-dé nátàxi tnaha-dé —càchí-gá xáhaⁿ-gá xii-yu.

Cuèndá ndíquíⁿ yutnu nàni mostázá

(Mt. 13:31-32; Lc. 13:18-19)

³⁰ Te xáhaⁿ tucu Jesús xii-yu:

—Na càni tucu-í ingá cuèndú núú-ndó cuèndá tecú tnùní-ndó nàcuáa cada-xi òré ndihu ndaha ñàha Yá Ndiòxí xii ñáyiú. ³¹ ñⁿ yutnu nàni mostázá cúú-xi ñⁿ yutnu sá líhli vñhi-gá ndíquíⁿ-xi dàcúúxí ndíquíⁿ nchaa cúhú, ³² dico òré ná càcáⁿ-güedé núú ñùhú-güedé, te na xínu-xi te sàhnu-gá-xi

dàcúxí nchàa cùhú, te nchaa dité-xi ío cùu cahnu-xi, te ndéé cue quiti ndàva núú tàchí sácõo-güedi nchaa núú dité-xi xinu ndeti-güedi — cachí-gá xãhaⁿ-gã xii-yu.

Ío titní cuendú ní caní Jèsús núú ñãyiu

(Mt. 13:34-35)

³³ Te ío-gá vài cuendú ní caní Jèsús núú ñãyiu cuendá tecú tnùní-yu tnúhu Yá Ndiõxí, dico dava cuendú ñá túú ní càní-gá núú-yu, chí ní cutnùní iní-gá sá vã tècú tnùní-yu nchaa. ³⁴ Te mee-ni cuendú ní caní Jèsús núú ñãyiu ndi tnahá òré ní dánèhé ñáhá-gã xii-yu tnúhu-gá. Te òré ndécú mèe Jèsús ndihi cue téé xica cuu ndihi-gá, te ní xáhaⁿ-gã xii-güedé nàcuáa quèe-xi ìⁿ ìⁿ cuendú ní caní-gá núú ñãyiu.

Jèsús ngání-gã táchí ndihi ndute làgúná

(Mt. 8:23-27; Lc. 8:22-25)

³⁵ Te ñu-ni nduu-ãⁿ òré sa ta cùndiquiⁿ cuáháⁿ ní xáhaⁿ Jèsús xii cue téé xica cuu ndihi-gá:

—Chí ná quíhíⁿ-ó ndàa ingá xio yuhu làgúná —càchí-gá xãhaⁿ-gã xii-güedé.

³⁶ Te ní quide ndee ìní-gá nchaa ñãyiu xixúcu-áⁿ, te ñu-ni bàrcú sá ñúhú-gã òré ní dánèhé-gá ñãyiu tnúhu-gá ñu-ni xíáⁿ ní dácáca cuè téé xica cuu ndihi-gá ndéca ñàha-güedé xii-gá cuáháⁿ, te tnahá ìⁿ úú-gá bàrcú ní xica-xi nchìcúⁿ-xi bàrcú ñúhú-gã-áⁿ cuáháⁿ. ³⁷ Te ñúhu barcú ñúhú-gã-áⁿ

ichi cuáháⁿ-xi núú ndute, te ní quexìo ìⁿ táchí ñhi, te ta nàdachitú-xi ndute xití bàrcú-áⁿ cuáháⁿ, te sa cuìní-nã-xi quèe naa bàrcú-áⁿ xití ndute ní cùu. ³⁸ Te Jèsús cáá-gã xidí-gá ìⁿ xichi ndàa sáta bàrcú-áⁿ, te yìncihi ìⁿ dóo dǐquí-gã. Te sá dúcáⁿ cuìní-xi quèe naa bàrcú-áⁿ núu ní sáháⁿ-güedé ní ndo-cani ñaha-güedé xii-gá, te xãhaⁿ-güedé:

—ìMèstrú, ndiquíú ìní! ¿Náa ñá túú ndihú ìní-n sã tá quèe naa-o cuáháⁿ-ãⁿ? —càchí-güedé xãhaⁿ-güedé xii-gá.

³⁹ Te Jèsús ní ndiquíú ìní-gá te ní ndacóo-gá, te ní tenàá-gá táchí-ãⁿ, te ní xáhaⁿ-gã xii ndute làgúná:

—ìTnavíí-nã cuhuⁿ, chí ío dusaⁿ! —càchí-gá xãhaⁿ-gã xii ndute-áⁿ.

Te òré-ni ní ngüíñí táchí-ãⁿ te ní nucúndecu nahi-nã ndute làgúná-áⁿ. ⁴⁰ Te Jèsús ní xáhaⁿ-gã xii-güedé:

—¿Ná cuendá ndéé dúcáⁿ yuhú-ndó-í? ¿Náa ñá túú sàndáá ìní ñáhá ndisa-ndo xii-í-ãⁿ? —càchí-gá xãhaⁿ-gã xii-güedé.

⁴¹ Dico mee-güedé chí ío ní yuhú-güedé sá ducaⁿ ñí quide-gá ní xiní-güedé, te ní xitnáha-güedé:

—¿Te ná téé cùu téé-a núu ní cáháⁿ-ni-dé, te ní ngüíñí táchí te ní nucúndecu nahi ndute làgúná-a-í? —càchí-güedé xitnáha-güedé.

5

Ïⁿ téé yìhi ñaha espíritú cúndìhi yucu ñávàha

(Mt. 8:28-34; Lc. 8:26-39)

¹ Te ní sáá Jèsús ndihi cue téé xica cuu ndihi-gá ndàa ingá xio yuhu làgúná yucu cue téé ñuú Gàdará.

² Te òré ní quene-gá xití bàrcú te ïⁿ téé yìhi ñaha espíritú cúndìhi yucu ñávàha ní quee-dé núú yíndüxi ndíyì cuáháⁿ-dé núú-gă. ³ Te mee-ni núú yíndüxi ndíyì-án quidé vèhe-dé, te cuèi dàcutu ñaha-güedé cadená xii-dé dico ñá túú tnàhí ndàcu-güedé núú-dě.

⁴ Te ío titní xito ní dácútú-güedé cadená sáhá-dě ndihi ndaha-dé dico ní dándává-ni-dě, te ní xóo dacàchi-gá-dé nchaa cadená-án, te ñá túú tnàhí ni ndàcu-güedé núú-dě.

⁵ Te cuèi nduu cuèi niú ní xóo cana saa-dé, te váha-ni núu xití yucu ndècu-dé àdi núú yíndüxi ndíyì dico càna saa nahi-ni-dé, te ío ní xóo dánícuèhé-dé méé-dě ndihi yúú. ⁶ Te òré ní xiní-dé Jèsús te xínu-dé ní sáháⁿ núú-gă, te ní ngüíñí xití-dě, ⁷ te espíritú yíhí ñaha xii-dé-án ní quide-xi níhi ní cáháⁿ-dé, te xàhaⁿ-dě xii-gá:

—¿Ná cuendá véxi yòhó Jèsús Déhe Dútú Ndiöxí sádí-n ìchi-í? Te cáháⁿ ndàhú-í núú Ndiöxí yuhu núu-n sã vã dándòho ñaha-n xii-í —càchí-dé xàhaⁿ-dě xii-gă.

⁸ Te ducaⁿ ní cáháⁿ-dé cuendá sã Jèsús ní xàhaⁿ-gă xii espíritú cúndìhi yucu ñávàha

yìhi ñaha xii-dé-án sã quéé ñàha-xi xii-dé.

⁹ Te Jèsús ní xícáⁿ tnúhú-gă núú-dě, te xàhaⁿ-gă:

—¿Nása nàni-n-í? —cachí-gá xàhaⁿ-gă xii-dé.

Te ní xàhaⁿ-dě:

—Vài Sandadú, duha nàni-í chi ío cuéhé-ndí —càchí-dé xàhaⁿ-dě xii-gă.

¹⁰ Te cue espíritú cúndìhi yucu ñávàha-án ní cáháⁿ ndàhú-xi núú Jèsús sã vã téndàha ñaha-gá xii-xi quíhíⁿ-xi ingá xichi. ¹¹ Te ñu-ni yatni yucu núú ndécú Jèsús-án yíhí vài cuchí xixexi-güedi.

¹² Te nchaa cue espíritú-án ní cáháⁿ ndàhú-xi núú-gă, te xàhaⁿ-xi xii-gá:

—Cáháⁿ ndàhú-ndí núú-n sã dáñá-n quíhu-ndí yiqui cùñú nchaa cùchí-án —càchí-xi xàhaⁿ-xi xii-gă.

¹³ Te Jèsús ní xàhaⁿ-gă sã cúú quíhu-xi yiqui cùñú-güedi, te xínu dàtná úú mĩl-güedi yìhi yucu-án. Te nchaa espíritú cúndìhi yucu ñávàha yìhi ñaha xii téé-án ní quee ñaha-xi xii-dé, te cuànguìhu-xi yiqui cùñú nchaa cùchí-án, te nchaa-güedi ní xinu-güedi duha ní quéé-güedi ndàa núú dèhvá yuhu làgúná-án, te ní ngaunihnu-güedi xití ndute te ní ndihi-güedi ní cáhá.

¹⁴ Te òré ní xiní cue téé xito cuchí-án nàcuáa ní cuu te ní xinu-güedé, te ní sáháⁿ-güedé ní cani-güedé cuendú núú cuè ñáyiu ndècu xití ñuú, ndihi núú cuè ñáyiu ndècu xití yucu. Te nchaa ñáyiu ní

níhí tnũhu ní xicá-yu cuáháⁿ ndéhě-yu nàcuáa ní cuu. ¹⁵ Te òré ní quexió-yu núú ndécú Jèsús te ní xiní-yu téé ní xíhi ñaha cuè espíritú cúndíhi yucu ñávãha-áⁿ núcõo-dé núú sahá Jèsús, te ñihnu-ná-dé dóó-dě te nùcõo-ná-dé dàtná ìⁿ ñáyiu váha, te ní yùhú-yu òré ní xiní ñáhã-yu xii-dé. ¹⁶ Te nchaa ñáyiu ní xiní nàcuáa ní cuu ní ndúha téé yíhi ñaha cue espíritú cúndíhi yucu ñávãha-áⁿ ní cùu ní caní-yu cuèndú núú nchaa ñáyiu ní quexìo-áⁿ nàcuáa ní cuu ní ndúha téé-áⁿ ndíhi nàcuáa ní cuu cuèndá nchaa cùchí-áⁿ. ¹⁷ Te sá dúcáⁿ ni níhí ñáyiu-áⁿ tnũhu nàcuáa ní cuu núú nchaa-yu ní ngüita-yu càháⁿ ndàhú-yu núú Jèsús sá ná quèe-gá yucu ñuú-yu núhú-gá.

¹⁸ Te ní xica-gá cuáháⁿ-gá núú ndécú bàrcú, te òré ndée-gá bàrcú-áⁿ nũhú-gá ní ngüita téé ní xíhi ñaha cuè espíritú cúndíhi yucu ñávãha-áⁿ càháⁿ ndàhú-dé núú-gã nõu vá cúndèe iní-gá quíhíⁿ ndíhi ñaha-gã xii-dé. ¹⁹ Dico ñá túú ní sãha-gá tnúhu quíhíⁿ ndíhi ñaha-gã xii-dé, te ní xáhaⁿ-gã xii-dé:

—Cuanùhú vehe-n, te caní-n cuèndú núú cuè ñáyiu sá Yã Ndiõxí ní cundàhú iní ñáhã-gã xii-n, te ío càhnu cuu nchaa sá vãha ní quide-gá sá cùu-xí-n —càchí-gá xãhaⁿ-gã xii-dé.

²⁰ Te téé-áⁿ ñí xica-dé cuánuhú-dé, te ní sáhãⁿ-dé ndi ùxí ñuú nání Dècápolís, te ní caní-dé cuèndú núú

nchaa ñáyiu sá ío càhnu cuu nchaa sá vãha ní quide ñaha Jèsús xii-dé, te nchaa-yu ío ní cuñúhu-yu.

Cuèndá déhe yoco té Jàirú ndíhi cuèndá ìⁿ ñadíhi ní tnãndéé dóó Jèsús

(Mt. 9:18-26; Lc. 8:40-56)

²¹ Te Jèsús cuánde-gá bàrcú, te ní natehdé-gá ndaa ingá xio yuhu làgúná, te ío vãi ñáyiu ní tacá núú ñí quexìo-gá-áⁿ, te xíáⁿ ndécú-gã ²² ní quexìo ìⁿ téé tàxi tnuní veñúhu núú-gã, te téé-áⁿ nání-dě Jàirú, te ní ngüíñí xítí-dě núú-gã. ²³ Te ní ngüita-dé càháⁿ ndàhú-dé núú-gã, te xãhaⁿ-dě xii-gá:

—Ío càhú tnàhá déhe yoco-í cùhú-xi, te ndècu-ná-xi sá cùu-xi, te véxi-í càháⁿ ndàhú-í núú-n nõu vá cúndèe iní-n quíhíⁿ-ó vehe-í tendaha-n-xi cuèndá ndúha-xi, te cun-decu-xi —càchí-dé xãhaⁿ-dě xii-gá.

²⁴ Te Jèsús ní xica-gá cuáhãⁿ-gá ndíhi téé-áⁿ, te ío vãi ñáyiu nchìcúⁿ ñáhã xii-gá cuáhãⁿ, te dàdehnde ñaha-ná-yu xii-gá ni cùu. ²⁵ Te tnuú nchaa ñáyiu-áⁿ ñútnàhá ìⁿ ñaha cùhú, te ñaha-áⁿ sa ní cuu úxúú cuíá sã cùhú-aⁿ ngòyo ñaha ñíñí xii-aⁿ. ²⁶ Te ío ta ndòho-aⁿ véxi, te ío cuéhé ñátátná ñí cuu ta quide tátna ñaha xii-aⁿ, te sa ní ndíhi nchaa sá ndécú ndíhi-aⁿ ní nadico-aⁿ cuèndá ní níhí-aⁿ díhúⁿ ñí queheⁿ nchaa ñáyiu ní quide tátna ñaha xii-aⁿ dico ni ìⁿ-yu ñá túú ní ndàcú-yu ndúha-aⁿ, chi da uuⁿ-gá tá

cùu cahú-aⁿ cuáháⁿ. 27 Te òré ní níhí-aⁿ tnúhu cuendá Jèsús, te ní xica-aⁿ cuáháⁿ-aⁿ núú ndécú-gă. Te òré ní quexio-aⁿ núú ndécú-gă te ní sáháⁿ ndehe yatni-aⁿ ndàa sátá-gă ní tnándeé-aⁿ dóó-gă. 28 Te ducaⁿ nǐ quide-aⁿ chi ní sani iní-aⁿ sá nǔu ndacu-aⁿ tnándeé-aⁿ cuedicó luha yuhu dóó Jèsús te ndúha-aⁿ ní sani iní-aⁿ. 29 Te òré ducaⁿ nǐ quide-aⁿ te ñá túú-gă ní ngòyo ñaha-gă níñí xii-aⁿ, te òré-áⁿ nǐ cutnùní iní-aⁿ sá nǐ ndúha-aⁿ cuéhé tnàhá-aⁿ. 30 Te Jèsús ní cutnùní iní-gă sá ìⁿ ñáyiu ní ndúha sá cuendá-gă, núu ní nchócótó-gă ndàa sátá-gă te ní xícáⁿ tnúhú-gă núú nchàa ñáyiu nchicúⁿ ñáhá xii-gă, te xáhaⁿ-gă xii-yu:

—¿Ndédacàa-ndo ní tnándeé ñáhá xii-í? —càchí-gă xáhaⁿ-gă xii-yu.

31 Te cue téé xica cuu ndihí-gă ní xáhaⁿ-güedé xii-gă:

—Mèstrú, ndèhe-n sá vái ñáyiu nchicúⁿ ñáhá xii-n, te texio texio dàdehnde ñahá-yu xii-n te xícáⁿ tnúhú-gă-n yòo ní tnándeé ñáhá xii-n —cachí-güedé xáhaⁿ-güedé xii-gă.

32 Te Jèsús ní xíndéhé vâha-gă xio xio diñi-gă nǔu ndédacàa ñáyiu ní tnándeé ñáhá xii-gă. 33 Te sá dúcáⁿ nǐ cutnùní iní ñadìhí-áⁿ nàcuáa ní cuu, núu yùhú yùhú-aⁿ ní sáháⁿ-aⁿ ní ngùíñí xítí-áⁿ nǔu Jèsús, te ní xáhaⁿ ndáa-aⁿ xii-gă nàcuáa ndùu cuendá-aⁿ. 34 Te Jèsús ní xáhaⁿ-gă xii-aⁿ:

—Yòhó ñaha cùhú ní cùu, ní sándáá iní ñáhá-n xii-í, núu ní ndúha-n, te vitna cuanùhú te vá ndihú-gă iní-n, chi vá dúcáⁿ-gă ndoho-n —càchí-gă xáhaⁿ-gă xii-aⁿ.

35 Te càháⁿ dúcáⁿ-ní Jèsús ní sáá cue téé xìnu cuechi vehe té Jàirú téé tàxi tnuní veñúhu-áⁿ, te xáhaⁿ-güedé xii-dé:

—Sa ní xíhí déhe-n, vá chíchìu-gă-n Mèstrú —càchí-güedé xáhaⁿ-güedé xii-dé.

36 Dico Jèsús ñá túú ní quide cuendá-gă nàcuáa ndùu tnúhu ní càháⁿ cue téé-áⁿ, te ní xáhaⁿ-gă xii téé tàxi tnuní veñúhu-áⁿ:

—Ñá túú nǎ cani iní-n, quíndáá iní ñáhá-ní-n xii-í —càchí-gă xáhaⁿ-gă xii-dé.

37 Te Jèsús vá yòo-gă ní cuíní-gă canchicúⁿ ñáhá xii-gă quíhíⁿ, chi té Pèlú-ni, ndihí té Jàcobó-ni, ndihí ñaní-ni-dé té Juàá cuáháⁿ ndihí ñaha-gă xii-güedé. 38 Te òré ní quexio-gă ndihí-güedé vehe téé tàxi tnuní veñúhu-áⁿ, te ní xíní-gă sá ìo vâi ñáyiu xíndecu, te súúní dusaⁿ quidé-yu te níhi xícáháⁿ-yu te xíndáhí-yu. 39 Te òré cuánguihu-gă xítí vehe, te ní xáhaⁿ-gă xii-yu:

—¿Ná cuendá ndéé dúcáⁿ ìo dusaⁿ quide-ndo, te ndàhyú-ndó? Te xíchí-a ñá túú ní xíhí-xi chi dícó xidí-xi —càchí-gă xáhaⁿ-gă xii-yu.

40 Te ní sácú ndeé ñáhá-yu xii-gă sá dúcáⁿ nǐ càháⁿ-gă, chi sá cúú-xí mèé-yu chi ní xíhí ndisa xíchí-áⁿ. Te òré-áⁿ

nĩ queñuhu-gá nchaá-yu quehé, te cuánguihu-gá núú cándòdo yiqui cuñú xíchí nĩ xíhí-án. Te ndèca-gá tātá xíchí nĩ xíhí-án ndihí nāná-xi cuánguihu, te tnàhá cue téé úní ndihí-gá-án cuánguihu ndihí-gá. ⁴¹ Te ní tñi-gá ndaha xíchí nĩ xíhí-án, te ní xáhaⁿ-gã:

—Tàlíta, cúmí —càchí-gá xáhaⁿ-gã.

Te tnúhu-án quée-xí: Yòhó xíchí cuéchí yúhú càchí-í sá ndácò-n, duha quèe-xi tnúhu-án.

⁴² Te òré-ni-án nĩ ndoto xíchí cuéchí-án nĩ ndacóo-xi ní nacaca cuu-xi, te ndècu-xi úxúú cuíá-xi. Te ío ní cuñúhu nchaá ñáyiú sá dúcáⁿ nĩ dándótó ñàha Jesús xii-xi.

⁴³ Te Jèsús ní cáháⁿ víhí-gã dóho tātá-xi ndihí nāná-xi sá vã yòo ìⁿ cúñàhá-yu sá nĩ dándótó ñàha-gá xii-xi. Te sátá dúcáⁿ te ní xáhaⁿ-gã xií-yu sá cuñàhá-yu xii-xi sá cáxi-xí.

6

Jèsús ndécú-gã ñuú Nazàrét
(Mt. 13:53-58; Lc. 4:16-30)

¹ Te Jèsús ní ndee-gá ñuú núú nĩ dándótó-gã xíchí nĩ xíhí-án, te cuánuhú-gá núú cúú ñuú-gá, te tnàhá cue téé xica cuu ndihí-gá cuánuhú ndihí-gá. ² Te ndècu Jesús ñuú-gá ní tnahá nduu ndètatú ñáyiú. Te nduu-án cuánguihu-gá xití veñúhu dàcuaha ñaha-gá xií-yu. Te vãi ñáyiú ndèdóho nchaá tnúhu cáháⁿ-gã, te xicuñúhu vñí-yu, te xitnàhá-yu:

—¿Ndèé ní sáháⁿ dáciuáhá tēe-a núú ndéé duha váha cáháⁿ-dé, nása ní quide-dé nũu ndéé duha ío váha cùtnuní iní-dé, te ndàcu-dé quidé-dé nchaá sá vã yòo tnàhí ndàcu cada-í? ³ Te dicó carpintèrú cúú-dé, dicó déhe tá Màriá cúú-dé, te ñani-dé cúú tē Jàcobó, ndihí té Chèé, ndihí té Jùdás, ndihí té Xímú, te ñiu-ni cue cúha-dé cúú ñáyiú ndècu ndihí-o ñuú-a —càchí-yu xitnàhá-yu.

Te ñá túú ní cuíní-gá-yu cáháⁿ ndihí váha ñàhá-yu xii-gá. ⁴ Te Jèsús ní xáhaⁿ-gã xií-yu:

—Te núú ìⁿ téé cáháⁿ tnúhu Yá Ndiòxí ná násáá-dé ñuú-dé dáciuáha-dé ñáyiú tnúhu-gá, te nchaá ñáyiú ñuú-dé-án, ndihí nchaá ñáyiú ndècu ndihí-dé vehe-dé, ndihí nchaá ñáyiú cùu ndi mee-dé ñá túú nèhé-yu sá yíñùhu núú-dé, dico cue ñáyiú nchaá dava-gá ñuú chi nèhé-yu sá yíñùhu núú-dé —càchí-gá xáhaⁿ-gã xií-yu.

⁵ Te ñá túú ní quide tátna Jèsús vãi ñáyiú cuendá sá ñà túú ní sàndáá iní ñàhá-yu xii-gá, dico ní quide tátna-gá ìⁿ úú ñáyiú cùhú ní sàndáá iní ñàhá xii-gá. Te ní tendaha ñàha-ni-gá xií-yu te ní ndúha-yu. ⁶ Te ío ní cuñúhu-gá sá dúcáⁿ ñà túú ní cuíní-yu quindáá iní ñàhá-yu xii-gá. Te sátá dúcáⁿ te ní xica-gá cuáháⁿ-gã nchaá dava-gá ñuú lihli càa yatni xiáⁿ cuendá dáciuáha-gá ñáyiú tnúhu-gá.

Jèsús táuchiuⁿ-gã quíhíⁿ

cue téé xica cuu ndihi-gá cáháⁿ-güedé tnúhu Yá Ndióxi núú ñáiyu

(Mt. 10:5-15; Lc. 9:1-6)

7 Te Jesús ní cana-gá ndi ùxúú cue téé xica cuu ndihi-gá, te ní sáñaha-gá xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cündìhi yucu ñávãha yìhi ñaha xii ñáiyu. Te ní xáhaⁿ-gã xii-güedé sá ndì ndúú ndi ndúú-güedé quíhíⁿ-güedé cáháⁿ-güedé tnúhu Yá Ndióxi núú ñáiyu. 8-9 Te cùmání-gã caca-güedé quíhíⁿ-güedé, te ni xáhaⁿ-gã xii-güedé:

—Vá cánèhe-ndo ñunu cuhuⁿ ndachiuⁿ-ndo, te ni vã cánèhe-ndo sá cáxí-ndó, te ni vã cánèhe-ndo díhúⁿ, chi ìⁿ caa-ni tàtnu canehe-ndo, te chàú yíhí-ní-ndó-ãⁿ xíãⁿ-ni quíhi-ndo, te vã cánèhe-gá-ndó ìngá ichi dóó-ndó chi ðu-ni dóó níhnú-ndó-ãⁿ xíãⁿ tnàhí-ni cuihnu-ndo te ñá túú tnàhí-gá ná canehe-ndo — càchí-gá xáhaⁿ-gã xii-güedé.

10 Te xáhaⁿ tùcu-gá:

—Te òré ná sàá-ndó ìⁿ ñuú, te ió ñáiyu cáháⁿ ñáhã-yu xii-ndo vèhé-yu, te xíãⁿ-ni cundecu-ndo ndèé ná sàá nduu ndèe-ndo ñuú-áⁿ. 11 Te núú ió dava ñuú ñá túú cuíní-yu cáháⁿ ndihí ñaha vãha-yu xii-ndo, te ni ñá túú cuíní-yu cundedóho-yu tnúhu cáháⁿ-ndó, te ndee-ni-ndo ñuú-áⁿ te naquidi-ndo ticáchúhmá ñí tní sáhá-ndó cuendá ná cùtnuní iní-yu sá

ñà túú quide váha-yu. Te na càchí tnúhu ndáá-í xii-ndo sã ná sàá nduu càda ndáá Yá Ndióxi cuéchi nchaa ñáiyu, te cue ñáiyu ducaⁿ na càda ñaha xii-ndo-áⁿ ïo-gá ndohó-yu dàvá-áⁿ dàcüúxí dàtná ndoho cue ñáiyu ñuú Sòdomá ndihí cue ñáiyu ñuú Gòmorrá — càchí-gá xáhaⁿ-gã xii-güedé.

12 Te cue téé-áⁿ ñí xica-güedé cuáháⁿ-güedé te ní ngúita-güedé dácuaⁿ-güedé cue ñáiyu tnúhu Yá Ndióxi, te xáhaⁿ-güedé xii-yu:

—Chí dándixi túu iní sá ñà túú quide váha-ndo ndècu-ndo, te dañã-ndo nchaa ichi cuehé ichi duha ndècu-ndo. —càchí-güedé xáhaⁿ-güedé xii-yu.

13 Te vãi espíritú cündìhi yucu ñávãha yìhi ñaha xii ñáiyu ta queñuhu-güedé yiqui cùñú-yu cuáháⁿ, te vãi tucu ñáiyu cùhú tá quide tátna-güedé cuáháⁿ chíhí ñaha-güedé acití xii-yu te ndúha-yu.

Nàcuáa ní cuu ní xihí té Juáá téé dàcuandute ñaha xii ñáiyu
(Mt. 14:1-12; Lc. 9:7-9)

14 Te nchaa xichi ní níhí ñáiyu tnúhu nchaa nàcuáa quide Jesús, te tnàhá té Hèrodés téé yìndaha ñaha xii ñáiyu ní níhí-dé tnúhu nchaa nàcuáa quide-gá, te ní cachí-dé:

—Té Juáá téé ní xóo dacuàndute ñaha xii ñáiyu ní ndoto núu dàcáⁿ ndácú-dé quidé-dé nchaa sá vã yóo tnàhí ndàcu cada —duha ní cachí-dé.

15 Te dava ñáyiú cächí-yu sá tẽ Èliás tée ní xóo cáháⁿ tnúhu Yá Ndiõxí ndéé sanaha ní nasaa-dé.

Te davá-yu cächí-yu sá cúú-gã dàtná ìⁿ tée ní xóo cáháⁿ tnúhu Yá Ndiõxí ndéé sanaha. ¹⁶ Te tẽ Hèrodés ní níhí-dẽ tnúhu nchaa nàcuáa càháⁿ-yu, te ní cachí-dé:

—Diu tẽ Juáá tée ní táuchíúⁿ-í ní xehndé-güedé díquí-xi ní ndoto —cächí-dé.

¹⁷⁻¹⁸ Te duha ní cuu cútnàhá ní sahani tẽ Hèrodés tẽ Juáá, chi dàvá-áⁿ ñí naqueheⁿ tẽ Hèrodés-áⁿ ìⁿ ñaha nàni Herodiás ndécá-dẽ, te ñaha-áⁿ sà ní cándeca ñaha ñàní-dé tẽ Lìpé. Te tẽ Juáá ní xáhaⁿ-dẽ xii tẽ Hèrodés sá ñà túú ní quide vaha-dé sá dúcáⁿ ñí naqueheⁿ-dé ñaha ní cándeca ñàní-dé, núu sá cuendá ñaha-áⁿ ñí táuchíúⁿ tẽ Hèrodés ní tñii-güedé tẽ Juáá ní chihi ñaha-güedé vecaá, te ní dácútú ñaha-güedé xii-dé, te ducaⁿ ñí quide-dé cuendá sá ndécá ñaha-dé xii-aⁿ.

¹⁹ Te ñaha nàni Herodiás ndécá tẽ Hèrodés-áⁿ ìo ní cuu úhú iní-aⁿ tẽ Juáá, te ní cuiní-aⁿ cahni-aⁿ-dé, dico ñá túú ní níhí-aⁿ nàcuáa cada-aⁿ,

²⁰ Te mee tẽ Hèrodés chi ní cutnùnì ndáá iní-dé sá tẽ Juáá cúú-dẽ ìⁿ tée quide mee-ni sá vaha, te quide ndáá-dé núú Yá Ndiõxí, te ní xóo yùhú ñáhá-dẽ núu xiáⁿ ñá túú ní dàña-dé ná cada ñaha ñaha ndeca-dé-áⁿ xii tẽ Juáá. Te tẽ Hèrodés-áⁿ ìo ní cudíí iní-dé ní xíndedóho-dé nchaa tnúhu ní xáhaⁿ tẽ Juáá xii-dé, dico ñá túú ní sàni iní-dé duuⁿ duuⁿ tñii-dé tnúhu-áⁿ.

²¹ Te ìⁿ nduu ní xóo vico

vehe tẽ Hèrodés ní quide càhnu-dé nduu ñí cacu-dé. Te nduu-áⁿ ñí níhí ñaha nàni Herodiás-áⁿ nàcuáa cada-aⁿ cuendá cuú tẽ Juáá. Te nduu-áⁿ ní cáháⁿ tẽ Hèrodés nchaa cue tée cùchiuⁿ, ndihi nchaa cue tée tàxi tñunì ñáhá xii cue sandadú, ndihi nchaa cue tée cuica ndècu distritú Galileá cuendá cudìni ndihi ñaha-dé xii-güedé nduu-áⁿ. ²² Te ndècu ìⁿ déhe yoco ñaha nani Herodiás-áⁿ, te xíchí-áⁿ ñí quíhu-xi vehe núú cúú vico-áⁿ ñí xita saha-xi mèi oré yíhí tẽ Hèrodés mèsá ndihi nchaa cue tée ní cáháⁿ-dé, te ío ní cudíí iní-dé ndihi nchaa cue tée-áⁿ nàcuáa ní xita xíchí-áⁿ. Te tẽ Hèrodés ní xáhaⁿ-dẽ xii-xi:

—Cácaⁿ núú-í núu ná cuiní-n te taxi-í —cächí-dé xáhaⁿ-dẽ xii-xi.

²³ Te ní cacunehe-dé ndéé Yá Ndiõxí nàcuáa cutnùnì iní xíchí-áⁿ sá ndáa cuañaha-dé núu ná cúú sá ná càcáⁿ-xi núú-dẽ cuèi ndéé cuádava nchaa sá ndécú ndihi-dé, te núu na càcáⁿ-xi. ²⁴ Te sá dúcáⁿ ñí xáhaⁿ-dẽ xii-xi núu ní quee-xi quehé ní xáhaⁿ-xi xii náná-xi:

—Náá, ¿ná cúú sá càcáⁿ-í núú tẽ Hèrodés? —cächí-xi xáhaⁿ-xi xii-aⁿ.

Te náná-xi-áⁿ ñí xáhaⁿ-aⁿ xii-xi:

—Cuaháⁿ cácaⁿ-n díquí tẽ Juáá tée dàcuandute ñaha xii ñáyiú —cächí-aⁿ xáhaⁿ-aⁿ.

²⁵ Te ndihi-ni cuándihu xíchí-áⁿ xití vehe núú yíhí tẽ Hèrodés-áⁿ, te xáhaⁿ-xi xii-dé:

—Cuiní-í sá mèi nduu vitna quehndé-n díquí tẽ Juáá tée dàcuandute ñaha xii ñáyiú te taxi-n, dico na cùhuⁿ ìⁿ xití

cóhó taxi-n —càchí-xi xăhaⁿ-xi xii-dé.

²⁶ Te té Hèrodés ní ngüíta-dé ndihú víhí iní-dé sá dúcáⁿ nĩ xáhaⁿ-xi xii-dé, dico ñá túú ní cùyii-dé cúñaha-dě xii-xi sá vă cúú cuañaha-dě sá xicáⁿ-xi, chi cuëndá sá núú nchaa ñáyiú ní xáhaⁿ-dě sá cúú cuañaha-dě núú ná cúú sá ná cacăⁿ-xi, te ní cacunehe-dé ndéé Yá Ndiöxí năcuáa cutnùní iní-xi sá ndăá cuañaha-dě sá ná cacăⁿ-xi núú-dě. ²⁷ Te té Hèrodés-áⁿ ndihí-ni ní xáhaⁿ-dě xii ìⁿ sandàdú sá quihíⁿ-dé quehndé-dé díquí tē Juàá. ²⁸ Te sandàdú-áⁿ nĩ xica-dé cuáháⁿ-dé vecaá núú yihí tē Juàá-áⁿ, te ní quexìo-dé te ní xehndé-ni-dé díquí tē Juàá, te ní chihí-dé ìⁿ xití cóhó te nèhe-dé cuánuhú ní sáha-dé xíchí xicáⁿ-áⁿ, te xíchí-áⁿ nĩ năcuáha-xi năná-xi. ²⁹ Te òré ní níhí nchaa cue tée ní xica cuu ndihí ndii Juàá-áⁿ tnúhu sá dúcáⁿ nĩ sahni ñaha-güedě xii ndii, te ní sáháⁿ-güedé ní ndocani-güedé yiqui cùñú ndii te ní chindúxi-güedé.

Jèsús dácàxi-gá úhúⁿ mĩl cue tée te dîⁿ ñáyiú dîhí ndihí landú (Mt. 14:13-21; Lc. 9:10-17; Jn. 6:1-14)

³⁰ Te nchaa cue tée ní táuchíúⁿ Jèsús cuáháⁿ cáháⁿ tnúhu Yá Ndiöxí núú ñáyiú ní ndexìo-güedé núú-gă te ní ngüíta-güedé năcàni tnúhu-güedé nchaa năcuáa ní quide-güedé ndihí nchaa năcuáa ní dănèhé ñáhá-güedě xii-yu. ³¹ Te Jèsús ní xáhaⁿ-gă xii-güedé:

—Chí nèhé ná quihíⁿ-ó ìⁿ xichi núú ñà túú ñáyiú ndetatú-ó —càchí-gă xăhaⁿ-gă xii-güedé.

Te ducaⁿ nĩ xáhaⁿ-gă xii-güedé, chi ío cuéhé ñáyiú cuáháⁿ véxi-yu cùú-yu núú ndécú-gă. Te ní ñă nihí-gă nása cada-gă caxi-gă ndihí cue tée xica cuu ndihí-gă. ³² Te Jèsús cuánguee-gă bàrcú ndihí mee-ni cuè tée ní táuchíúⁿ-gă cáháⁿ tnúhu-gă, te cuáháⁿ-gă ndihí-güedé ìⁿ xichi núú ñà túú ñáyiú ndècu. ³³ Dico vâi ñáyiú ní cutnùní iní-yu sá díú-gă ñúhú bàrcú-áⁿ cuáháⁿ ndihí cue tée xica cuu ndihí-gă, te nchaa ñúú cáá yàtni xiáⁿ nĩ quee ñáyiú xixínú-yu cuáháⁿ núú nĩ quidé-yu cuëndá quexìo Jèsús, te sa ndécú-yu xiáⁿ nĩ quexìo-gă. ³⁴ Te òré ní quene Jèsús xití bàrcú, te ní xiní-gă cuéhé víhí ñáyiú xixúcu núú nĩ quexìo-gă-áⁿ, te ní cundàhú iní ñáhá-gă xii-yu chi ndécú-yu dàtná xĩndecu cue mbéé cue quiti ñá túú tòli-xi, te ío vâi núú sã nĩ ngüíta-gă ní dăcuáhá ñàha-gă xii-yu. ³⁵ Te sátá tá cuàa cuáháⁿ te ní sáháⁿ cue tée xica cuu ndihí Jèsús núú-gă, te xăhaⁿ-güedě xii-gă:

—Sa ní cuaa te ñá túú ñáyiú ndècu yatni iha. ³⁶ Váha-gă dandàca nchaa ñáyiú-a chi na quihíⁿ-yu nchaa vehe càa xití yucu-a, ndihí nchaa ñúú cáá nchàa yatni iha cuaáⁿ-yu sá caxí-yu —càchí-güedé xăhaⁿ-güedě xii-gă.

³⁷ Te Jèsús ní xáhaⁿ-gă:

—Mee-ndo chĩ cuãñaha sã ná caxi-yu —cächí-gá xãhaⁿ-gã xii-güedé.

Te xãhaⁿ-güedé xii-gá:

—¿Te nása cada-ndí, chi xini ñuhu-xi datná úú ciendú díhúⁿ denariú cuendá cuaaⁿ-ndí sã caxi-yu? —cächí-güedé xãhaⁿ-güedé xii-gá.

³⁸ Te Jèsús ní xãhaⁿ-gã xii-güedé:

—Chí cuáháⁿ cundehe-ndo nõu ná daha pãá ndécú ndihí-ndo te cachí tñuhu-ndo —cächí-gá xãhaⁿ-gã xii-güedé.

Te ní sáháⁿ ndéhé-güedé nõu ná daha pãá ndécú, te ní xãhaⁿ-güedé xii-gá:

—Úhúⁿ duha-ná pãá ndihí úú-nã chácá ndécú —cächí-güedé xãhaⁿ-güedé xii-gá.

³⁹ Te Jèsús ní xãhaⁿ-gã xii nchaa ñáyiú sã ná nihí tnáhã-yu cuu titní xichí-yu, te ngóo-yu nchaa núú cũhú cuí cãa xíáⁿ. ⁴⁰ Te nchaa-yu ní ngóo-yu, te dava xichí-yu ní ngóo ñⁿ ciendú-yu, te dava xichí-yu ní ngóo údico úxí-yu.

⁴¹ Te sátá ñⁿ ndihí-yu ní ngóo, te ní queheⁿ Jèsús ndi úhúⁿ pãá ndi úú chácá-ãⁿ, te ní ndacacoto-gá andiu te ní ndacáⁿ táhú-gã núú Yã Ndiõxí, te dãtnúⁿ ní táhú cuèchi-gá pãá-ãⁿ te ní sãñaha-gã xii cue téé xica cuu ndihí-gá ní dácãhñu-güedé nchaa ñáyiú-ãⁿ ñⁿ xexí-yu. Te diu-ni ducaⁿ ñⁿ quide tucu-gá úú chácá-ãⁿ. ⁴² Te nchaa-yu ní xexí-yu ní ndahá xití-yu.

⁴³ Te sátá ñⁿ túhú cóhõ-yu te ní nadatãcã-güedé nchaa

sã ñⁿ quendóo, te ní chítú ùxúú tnáhá tídihi mee-ni sã ñⁿ quendóo núú úhúⁿ-ni pãá, ndihí núú úú-ni chácá. ⁴⁴ Te nchaa ñáyiú ní xexi-ãⁿ chi xĩnu úhúⁿ mĩl mee-ni cuè téé chi diu-ni cue téé-ãⁿ ñⁿ quíúndehu, te ñⁿ ñáyiú díhí ndihí cue landú.

Jèsús xicã-gã núú ndute

(Mt. 14:22-27; Jn. 6:16-21)

⁴⁵ Te òré-ni-ãⁿ ñⁿ xãhaⁿ Jèsús xii cue téé xica cuu ndihí-gá sã quèe-güedé bàrcú codonũu-güedé quíhíⁿ-güedé ñⁿ ñuú námí Betsaidá cáá ndãa ingá xio yuhu làgúná núú ndécú-güedé-ãⁿ, te mee-gã quendóo-gá cada ndee ñⁿ tnáhã-gã ndihí cue ñáyiú.

⁴⁶ Te sátá ñⁿ yãha ní quide ndee ñⁿ tnáhã-gã ndihí-yu, te ní xica-gã cuáhãⁿ-gã ñⁿ tindúú cáá yãtni xíáⁿ cuendá cáháⁿ ndihí-gá Yã Ndiõxí.

⁴⁷ Te òré sa ní cundiquíⁿ te bàrcú sã ñⁿúhú cuè téé xica cuu ndihí-gá sa cuáhãⁿ-xi ndéé cuádava xití làgúná-ãⁿ, te mee-gã ndécú-gã ñⁿ núú tindúú.

⁴⁸ Te túu ndèhe-gá sã súúⁿ ndòho-güedé tá dácaca-güedé bàrcú-ãⁿ cuáhãⁿ, chi cuendá ndãa nacuaa cuáhãⁿ-xi-ãⁿ duha véxi táchí te nãtúndaha-xi. Te ingá nduu-ãⁿ tàcuíhndã-gá sa ní cuyatni vií-nã Jèsús bàrcú ñⁿúhú-güedé-ãⁿ, dico núú ndute tá xica-gã cuáhãⁿ te luha-ná te yãha ñaha-gã xii-güedé ní cuu. ⁴⁹⁻⁵⁰ Te

òré ní xiní ñãhá cuè téé ñⁿuhu bàrcú-ãⁿ xii-gá te ní yùhú-güedé ní cana saa-güedé, chi ní sani

iní-güedé sá ñⁿ almá cúu-gã.
Te ní xáhaⁿ-gã xii-güedé:

—ñⁿí cunduu-ndo, vá
yuhú-ndó, chi yuhú cúu-í! —
càchí-gá xãhaⁿ-gã xii-güedé.

⁵¹ Te Jèsús cuánguee-gá
xítí bàrcú ñúhú-güedé-áⁿ, te
sátá cuánguee-gá te òré-ni
ní ngúíñí táchí, te ní cuñúhu
vìhi-güedé. ⁵² Te ducaⁿ chi
cue téé-áⁿ ñà túú ní cùtnuní
iní-güedé nása quíde-gá,
chi ñà túú ní cùtnuní váha
iní-güedé nàcuáa ndúu sá ñí
quíde-gá òré ní nadacàyá-gá
pàá, chi ío ñí ñíquí-güedé.

*Jèsús quíde tãtna-gá ñáyíu
cùhú ñúú Genesàrét
(Mt. 14:34-36)*

⁵³ Te ní yáha-güedé ndìhi-gá
ndàa ingá xio yuhu làgúná,
te ní sáá-güedé ndìhi-gá yucu
cue téé ñúú Genesàrét. Te
yácáⁿ ní dácútú ndéé-güedé
bàrcú-güedé yuhu làgúná.

⁵⁴ Te òré ní quene Jèsús ndìhi
cue téé xica cuu ndìhi-gá
xítí bàrcú, te nchaa ñáyíu
xíndecu-áⁿ ñí cutnùní iní-yu
sá díú-gã. ⁵⁵ Te ñáyíu-áⁿ

ndìhi-ni ní sáháⁿ-yu nchaa
núu xíndecu cue ñáyíu cùhú,
te cue ñáyíu cùhú-áⁿ ñí quée-yu
xító nchido ñahá-yu cuáháⁿ
ndí tnahá ñⁿ ñⁿ xichi núú
nihí-yu tnúhu quèxio Jesús.

⁵⁶ Te nchaa ñúú náhnú ndìhi
nchaa ñúú lìhli núú cuáháⁿ
Jèsús, ducaⁿ xíndecá-yu nchaa
ñáyíu cùhú cuáháⁿ xítí ñúú
sàcáⁿ ñáhã-yu núú-gã cuèndá
cada tátna ñaha-gã xii-yu. Te
diu-ni ducaⁿ xíquidé-yu nchaa
dava-gá xichi núú cuáháⁿ-gá
núú xíndecu cue ñáyíu, te

càháⁿ ndàhú-yu núú-gã sá ná
dáñá-gã tnándeé cue ñáyíu
cùhú-áⁿ cuèdicó luha yuhu
dóó-gã cuèndá ndúha-yu. Te
nchaa ñáyíu cùhú ní tnándeé
yuhu dóó-gã ní ndúha-yu.

7

*Cuèndá nchaa sá quíde-xí
ngúndecu cuèchi ñáyíu*

(Mt. 15:1-20)

¹ Te ñúú Jerusalén ní
quee cue téé dàcuaha ñaha
xii ñáyíu nchaa tnúhu ní
chídó tnùní ndíi Moisés, te
ní quexìo-güedé núú ndécú
Jèsús, te tnàhá cue téé cùu
fariséú ní quexìo ndìhi-güedé.

² Te cue téé-áⁿ ñí xiní-güedé
sá dàva cue téé xica cuu ndìhi
Jesús ñà túú ndàha-güedé
dàtná ndáhá mèe cue téé cùu
fariséú-áⁿ òré caxi-güedé. Te
xiãⁿ núu cue téé ní quexìo-áⁿ
ñí càháⁿ cuèhé-güedé cuèndá
cue téé xica cuu ndìhi-gá.

³ Te ducaⁿ chi nchaa cue téé
cùu fariséú-áⁿ ndìhi nchaa
ñáyíu isràél nchìcúⁿ nihnú-yu
quíde-yu dàtná ní xóo cada
nchaa cue ñaní tnáhã-yu ní
xíndecu ndéé sanaha, chi
nchaa ñáyíu-áⁿ và cáxi-yu te
núu vá ndáhã-yu dàtná ní
xóo ndaha nchaa cue ñaní
tnáhã-yu ní xíndecu ndéé
sanaha-ãⁿ.

⁴ Te ñáyíu-áⁿ ndí
tnahá òré cuáháⁿ-yu núú
yãhu te nàsáá-yu, te ndàhá-yu
nàcuáa sàni iní-yu ndùvétú iní
Yã Ndiõxí, te núu vá dúcáⁿ
càdá-yu te vá cáxi-yu. Te
tnàhá náquèté-yu vàsú sá
sácùhuⁿ sá xihí-yu, ndìhi lítu,
ndìhi cóhó càá, ndìhi càamá.
Te nchaa xéhé náquèté-yu

nàcuáa sàni iní-yu ndùvétú iní Yă Ndiöxí. Te ío-gá titní sá nǐ xóo cada nchaa ñáyiú ní xíndecu ndéé sanaha-ǎⁿ nchicúⁿ nihnú-yu quidé-yu. ⁵ Te cue téé cùu fariséú-áⁿ, ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés-áⁿ nǐ xáhaⁿ-güedé xii Jèsús:

—¿Ná cuendá cue téé xica cuu ndihí-n ñá túú nàquete-güedé ndaha-güedé òré caxi-güedé dàtná ní cachí nchaa cue téé ní xíndecu ndéé sanaha-i? —càchí-güedé xáhaⁿ-güedé xii-gá.

⁶ Te Jèsús ní xáhaⁿ-gă xii-güedé:

—Nchòhó cúú-ndó cué téé ío dándahú mée-xí chi càchí-ndó sá ío quíde ndáá-ndó te ñá ndáá sá quíde ndáá-ndó. Te ní quee ndáá-xi nàcuáa ní chídó tnùní ndíi Chàíá téé ní xóo cáháⁿ tnúhu Yă Ndiöxí ndéé sanaha núú tütú-gá núú càháⁿ-xi nàcuáa ní cáháⁿ-gá cuendá-ndó, te duha ní cachí-gá:

Ñáyiú-a càchí-yu sá ío càhnu cuu-í, dico dìcò-ni yuhu càháⁿ-yu, chi ñá túú ñùhu iní ñáhă-yu xii-í.

⁷ Te àúⁿ nă cuu chiñuhu ñahá-yu xii-í, chi ñá túú vèdana ndèé nándihí-xi,

chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sá nǐ cahu iní cue ñáyiú ñuyíú-a càháⁿ-yu.

Duha ní chídó tnùní ndíi Chàíá núú tütú Yă Ndiöxí nàcuáa ní cáháⁿ-gá

cuendá-ndó. ⁸ Te nchòhó ní dáñă-ndó nàcuáa ní cachí Yă Ndiöxí cada-ndo, te nchicúⁿ nihnu-ndo quíde-ndo nàcuáa ní cahu iní cue ñáyiú ñuyíú-a, chi nàquete-ni-ndo lítu, te nàquete-ni-ndo vasú sácúhuⁿ sá xihí-ndó nàtaya-ndo nàcuáa ní xóo cada ñáyiú-áⁿ nǐ xóo naqueté-yu nchaa xǎⁿ, te nándi-gá nchaa núú sá quíde-ndó —càchí Jèsús xáhaⁿ-gă xii-güedé.

⁹ Te ní xáhaⁿ tùcu-gá xii-güedé:

—Te nchòhó, ñá túú cuíní-ndó càda-ndo nàcuáa cuíní Yă Ndiöxí, chi mee-ni nàcuáa ní cachí cue téé ní xíndecu ndéé sanaha nchicúⁿ nihnu-ndo quíde-ndo. ¹⁰ Te ndíi Moisés ní cachí ndíi sá ncháá ñáyiú canehé-yu sá yíñùhu núú tătă-yu ndihí núú nănă-yu. Te nchaa ñáyiú na càháⁿ úhú cuendá tătă-yu àdi cuendá nănă-yu te cahni ñaha-güedé xii-yu ní cachí ndíi. ¹¹ Te nchòhó càchí-ndó sá núu ìⁿ téé na cūñaha-dě xii tătă-dě ndihí nănă-dě sá sá nǐ sani iní-dé cuañaha-dě xii-yu cùu-xi Corbán, te ñá túú-gă xíní ñùhu-xi sá cuañaha-dě xii-yu, te tnúhu Còrbán-áⁿ quée-xí: Sá cúú cuendá Yă Ndiöxí. ¹² Te sá dúcáⁿ ná càháⁿ ìⁿ téé-áⁿ te nchòhó chindèe tnúhu-ndo-dě cuendá sá vă chindèe-gá-dé tătă-dě ndihí nănă-dě. ¹³ Te ducaⁿ quíde-ndo chi ní dáquéé tihú-ndó nàcuáa ní cachí Yă Ndiöxí cada-ndo, te mee-ni nàcuáa ta quíde cue téé ñuyíú-a véxi nchicúⁿ nihnu-ndo quíde-ndo, te ñu-ni ducaⁿ ta sànu ichi tnaha-ndo

véxi, te nándi-gá nchaa sá cáhú ìní-ndó quide-ndo — cachí-gá xăhaⁿ-gă xii-güedé.

14 Te Jèsús ní xăhaⁿ tùcu-gá xii cue ñáyiú xĩndecu-áⁿ:

—Chí táquixi ndehe iha, te cundedóho váha-ndo tnũhu na cāháⁿ-í-a te ío váha cuáha-ndo cuendá.
15 Nchaa sá xéxi-ndó chí ñá túú nă quidé-xí ìní-ndó, dico nchaa sá cuèhé sá dúhá sàni ìní-ndó quide-ndo, nchaa xiáⁿ quidé-xí ndècu cuéchi-ndo. 16 Te nchaa nchòhó ñáyiú ndédóho nchaa tnúhu cāháⁿ-í-a ío váha chí cuáha cuendá —cāchí-gá xăhaⁿ-gă xii-yu.

17 Te Jèsús ní dándõo-gá nchaa ñáyiú núú xixúcu-yu-áⁿ te cuándihu-gá xití vehe. Te cue téé xica cuu ndihi-gá ní xicáⁿ tnúhú-güedé núú-gă nõu nása quèe-xi cuendú ní cani-gá núú ñáyiú-áⁿ. 18 Te ní xăhaⁿ-gă xii-güedé:

—¿Te náa tnàhá nchòhó ñá túú ní tēcú tnùn-ndó cuendú ní cani-í núú ñáyiú-áⁿ? Nchaa sá xéxi-yu cuánguee xití-yu ñá túú quide-xi ìní-yu năcuáa ngũndecu cuéchi-yu. 19 Chí ñá díú ìní-yu cuánguee-xi chí cuánguee ndáá-xi xití-yu, te nàyáha ñaha-xi xii-yu —cāchí-gá xăhaⁿ-gă xii-güedé.

Te sá dúcáⁿ nĩ cāháⁿ-gá te ní dátũu-gá sá cúú cāxi-o nchaa núú sá cúú cāxi-o. 20 Te ní xăhaⁿ tùcu-gá xii-güedé:

—Nchaa sá cuèhé sá dúhá quide ñáyiú xiáⁿ cācú nihnu-xi ìní-yu, te nchaa xiáⁿ quidé-xi ndècu cuéchi-yu. 21 Te ìní-yu-áⁿ cācú nihnu nchaa sá

cuèhé sá dúhá, chí sàni cuehé sání dùha ìní-yu. Te cue téé cāháⁿ ndihi-güedé ñadihí te ñá díú ñadihí-güedé cúũ-yu, te diu-ni ducaⁿ quide cue ñáyiú dihí cāháⁿ ndihi-yu téé te ñá díú yĩ-yu cùu-güedé. Te sàhni-yu cue tnàha ñáyiú-yu, te mee-ni ìchi díí ìní cúdíí ìní-yu cundecú-yu. 22 Te dùhu ndachiuⁿ tnahá-yu, te xihó-yu cundecu ndihi-yu sá ndécú ndihi tnaha ñáyiú-yu, te ío quide úhú ìní-yu sá cúú-xi tnàha ñáyiú-yu, te ío dāndahú tnáhă-yu, te mee-ni nchaa sá cuèhé sá dúhá cùdíí ìní-yu quidé-yu, te ío cuédú ìní-yu, te ío yiti yùhú-yu, te ío quide cahnú-yu mée-yu, te quidé-yu nándi-gá sá ñá túú tàu-yu cadá-yu. 23 Te nchaa sá cuèhé sá dúhá-áⁿ cācú nihnu-xi ìní-yu, te nchaa xiáⁿ quidé-xi ndècu cuéchi-yu, te ñá túú cùu-xi sá vāha sá cúú-xi ìní-yu.

*Iñ ñadihí véxi ñuú xicá ní sándáá ìní-aⁿ Jèsús
(Mt. 15:21-28)*

24 Te ní xica Jèsús cuáháⁿ-gá ndéé yucu cue téé ñuú Tírú, ndihi yucu cue téé ñuú Sìdón. Te òré ní quexio-gá xiáⁿ te cuánguĩhu-gá ñⁿ vehe te xiáⁿ cundecu-gá, te cuení-gá sá vă quení ñáyiú sá xiáⁿ ndécú-gă ní cùu, dico dai ní níhí-yu tnúhu. 25 Te ñⁿ ñadihí ndécú ñⁿ déhe yoco-aⁿ, te yihí ñaha espíritú cundihí yucu ñávāha xii-xi, te ñaha-áⁿ ío ndihí ní níhí-aⁿ tnúhu sá nĩ quexio Jesús xiáⁿ nõu ní sáháⁿ-aⁿ núú

ndécú-gă, te ní ngüñí xítí-án nũú-gă. ²⁶ Te ní ngüíta-aⁿ càháⁿ ndàhú-aⁿ núú-gă, te xăhaⁿ-aⁿ sã nũu yá cündèe iní-gá queñuhu-gá espíritú cündìhi yucu ñávãha yìhi ñaha xii déhe-aⁿ. Dico ñã díú ñàha israél cúú-áⁿ chi ñaha ñuú Sirofènicíá cúú-áⁿ te tnúhu griégú cúú tnúhu-aⁿ. ²⁷ Te xiãⁿ nũu ní xáhaⁿ Jèsús xii-aⁿ:

—Daña na càxi tnaa nchaa landú chítú xítí-güexi, te dătnùní caxi cue iná, chi ñã túú ndùu váha-xi queheⁿ-o sã xéxí lândú te cuáha-o iná —càchí-gá xăhaⁿ-gă xii-aⁿ.

²⁸ Te ní xáhaⁿ-aⁿ xii-gá:

—Mèstrú, ndáá-ni càháⁿ-n, dico iná chi nàdatacá-güedi sá ngóyó yùhu cóhó lândú —càchí-aⁿ xăhaⁿ-aⁿ xii-gá.

²⁹ Te Jèsús ní xáhaⁿ-gă xii-aⁿ:

—Ío váha ní càháⁿ-n, te cuanùhú te ñã túú-gă ná cani iní-n, chi sa ní quee espíritú cündìhi yucu ñávãha yìhi ñaha xii déhe-n —càchí-gá xăhaⁿ-gă xii-aⁿ.

³⁰ Te ñaha-áⁿ ñi nasáá-aⁿ vehe-aⁿ te càa déhe-aⁿ núú cãmá, dico ñã túú-gă espíritú cündìhi yucu ñávãha yìhi ñaha xii-xi chi sa ní quee ñaha-xi.

Jèsús quidé tátna-gá ñi tée ñã cúú càháⁿ váha te doho-dě

³¹ Te Jèsús ní ndee-gá yucu cue tée ñuú Tírú te ní yáha-gá yucu cue tée ñuú Sidón, ndìhi yucu ndi ùxí ñuú nání Dècápolis, te ní sáá-gá ndéé yuhu làgúná distrítú Galileá.

³² Te xiãⁿ ndécú-gă ní quexìo ñáyiu ndéé núú-gă ndécã-yu ñi tée ñã cúú càháⁿ váha-dé te doho-dě. Te càháⁿ ndàhú-yu

núú-gă sá ná tëndaha ñaha-gă xii-dé cuendá ndúha-dé. ³³ Te Jèsús ní queñuhu ñaha-gă xii-dé tnuú-yu, te ndèca ñaha-gá cuáháⁿ ñi xio, te ní dáquihu-gá díquí ndáhá-gă yaú lóho-dé, te ní dácánùu-gá dí-gá díquí ndáhá-gă, te ní tendaha-gă yàa-dé. ³⁴ Te ní ndacoto-gá andiù te ní sánuu iní-gá, te ní càháⁿ-gá tnúhu mee-gă, te xăhaⁿ-gă:

—ĭĕfatá! —càchí-gá xăhaⁿ-gă xii-dé.

Te tnúhu-áⁿ quée-xí: Nacaáⁿ yòhó lóho. ³⁵ Te òré-ni-áⁿ ñi nacaáⁿ lóho-dé, te ní nduu váha yàa-dé, te ní cuu càháⁿ váha-dé. ³⁶ Te Jèsús ní càháⁿ víhí-gă dóho ñáyiu ndìhi ñaha xii tée ní quide tátna-gá-áⁿ sã vã yòo ñi cùñàhá-yu sá ñi quide tátna ñaha-gă xii-dé, dico uuⁿ-gá ní quidé-yu ní càháⁿ-yu núú ñáyiu sá ñi quide tátna-gá tée-áⁿ. ³⁷ Te nchaá-yu ío ní cuñúhu-yu, te ní xitnàhá-yu:

—Váha vîhi quide-dé, chi nchaa-ni ndàcu-dé quidé-dě, chi quide tátna-ni-dé ñáyiu doho, te quide tátna-ni-dé ñáyiu ñihí —càchí-yu xitnàhá-yu.

8

Jèsús dácàxi-gá cúmí mĩ ñáyiu

(Mt. 15:32-39)

¹ Te ñi nduu tucu ío cuéhé ñáyiu ní tacá núú ndécú Jèsús, te ñã túú tnàhí sá caxí-yu. Te ní cana-gá cue tée xica cuu ndìhi-gá, te ní xáhaⁿ-gă xii-güedé:

2 —Yúhú, cùndahú iní-í nchaa ñáyi-u-a chi sa ní cuu úní nduu ndècu ndihí ñàhá-yu xii-o ìha, te ñá túú tnàhí ná sá cáxi-yu.

3 Te núu na nàtendaha-í-yu núhú tnámă-yu vehé-yu, te cuneé-yu docó ichi, chi davá-yu ío xica ndècú-yu — càchí-gá xăhaⁿ-gă xii-güedé.

4 Te ní xăhaⁿ-güedé xii-gá:

—¿Te ndèé níhí-ó sá cuăñaha-o càxi nchaa ñáyi-u-a, te ìha ñá túú nă ìo chi cùu-xi xítí yucu-í? —càchí-güedé xăhaⁿ-güedé xii-gá.

5 Te Jèsús ní xícáⁿ tnúhú-gă núu-güedé, te xăhaⁿ-gă:

—¿Ná daha-gá pàá ndécú ndihí-ndo-í? —cachí-gá xăhaⁿ-gă xii-güedé.

Te ní xăhaⁿ-güedé xii-gá:

—Ndècu ndihí-ndí úsá-gá tnàhá —càchí-güedé xăhaⁿ-güedé xii-gá.

6 Te Jèsús ní xăhaⁿ-gă xii nchaa ñáyi-u sá ngóo-yu nchaa-yu, te ní ngóo-yu, te ní queheⁿ-gá ndi úsá pàá-áⁿ, te ní ndacáⁿ táhú-gă núú Yă Ndiöxí. Te dătnùní ní táhú cuèchi-gá te ní sãñaha-gă xii cue tée xica cuu ndihí-gá ní dăcăhñu-güedé nchaa ñáyi-u-áⁿ. 7 Te ndècu ndihí-güedé ìⁿ úú chácá lîhli, te diu-ni ducaⁿ nî quide-gá ní ndacáⁿ táhú-gă núú Yă Ndiöxí. Te dătnùní ní táuchíúⁿ-gă ní dăcăhñu ñaha-güedé xii-yu. 8 Te nchaa-yu ní xexí-yu ní ndahá xítí-yu. Te sátá nî túhú còhò-yu te ní nadatàcá-güedé nchaa sá nî quendóo, te

ní chítú úsá tnàhá tídihi mee-ni sá nî quendóo-áⁿ.

9 Te núu ncháá ñáyi-u ní xexí-áⁿ xînu dătná cúmí mîl-yu. Te sátá nî yáha ní dăcáxí ñàha Jèsús xii-yu te ní dándácá ñàha-gá. 10 Te dătnùní cuánguee-gá bàrcú ndihí cue tée xica cuu ndihí-gá cuáháⁿ-gá ndihí-güedé yucu cue tée ñuú Dalmànutá.

Cue tée cùu fariséu xăhaⁿ-güedé xii Jèsús cada-gá ìⁿ sá vă yôo tnàhí ndàcu cada (Mt. 16:1-4; Lc. 12:54-56)

11 Te núu nî quexìo Jèsús xíaⁿ nî sáá cue tée cùu fariséú, te ní ngúita-güedé nándi tnúhu xăhaⁿ-güedé xii-gá xító ndèé ñàhá-güedé. Te xăhaⁿ-güedé sá ná cádá-gă ìⁿ sá vă yôo tnàhí ndàcu cada cundehe-güedé năcuáa cutnùní iní-güedé nūu ndáá sá Yă Ndiöxí ní tendaha ñàha-gá xii-gá véxi-gá ñuyíú-a. 12 Te ní sánuu iní-gá te ní xăhaⁿ-gă xii-güedé:

—Nchaa nchòhó ñáyi-u ndècu ñuyíú-a cuiní-ndó càda-í ìⁿ sá vă yôo tnàhí ndàcu cada nacuáa cutnùní iní-ndó nūu ndáá sá Yă Ndiöxí chindèe ñaha-gá xii-í. Dico na càchí tnúhu ndáá-í xii-ndo sá vă càdà-í sá cuiní-ndó —càchí-gá xăhaⁿ-gă xii-güedé.

13 Te ní dándóo-gá ñáyi-u xîndecu-áⁿ, te cuándeegá bàrcú ndihí cue tée xica cuu ndihí-gá te cuáháⁿ-gá ndihí-güedé ndàa ingá xio yuhu làgúná.

Năcuáa quide cue tée cùu fariséu

(Mt. 16:5-12)

14 Te ní cunaa-güedé canehe-güedé sá cáxi-güedé quíhíⁿ, te ñndiⁿ-ni paá ndécú xítí bàrcú-áⁿ ní naníhí-güedé.

15 Te Jèsús ní cáháⁿ-gá dóho-güedé, te xáhaⁿ-gá xii-güedé:

—Na càchí tnúhu-í xii-ndo sã ò quíhi iní-ndó cùndecu-ndo te vá cádá cuèndá tnàhí-ndo lèvadurá cue téé cùu fariséú, ndihi levadurá cue téé cùndihi té Hérodés —càchí-gá xáhaⁿ-gá xii-güedé.

16 Te ní ngüíta-güedé xitnàha-güedé:

—Cuèndá sã ñà túú ní cãnehe-o paá quixi núu xiáⁿ duha càháⁿ-gá —càchí-güedé xitnàha-güedé.

17 Te Jèsús ní cutnùní iní-gá nàcuáa ndùu tnúhu xitnàha-güedé, núu ní xáhaⁿ-gá xii-güedé:

—¿Ná cuèndá da sã ñà túú ní cãnehe-ndo paá quixi càháⁿ-ndó? Te ñá díú cuèndá paá-áⁿ ní càháⁿ-í, te dicó-ni sã méé-ndó ñà túú quide cuèndá váha-ndo nàcuáa ndùu tnúhu càháⁿ-í, te ni ñã tècú tnùní-ndó chí ío ñi díquí-ndó.

18 Te cuèi ndèhe-ndo dico ñá túú cùtnuní iní-ndó nã cúú nchàa sã quidè-í, te cuèi ndédóho-ndo nchàa tnúhu càháⁿ-í dico ñá cùtnuní iní-ndó nãsa ndùu-xi, te ni ñã ndácú iní-ndó nchàa sã tá quide-í véxi.

19 Te chí dándàcu iní cùtnàhá ní táhú cuèchi-í úhúⁿ-ni paá te ní xexi úhúⁿ mĩl mee-ni cuè téé chí díu-ni cue téé-áⁿ ní quíúndehu. Te chí càchí tnúhu ná daha tídihi ní chítú mee-ni sã ñi

quendóo òré ní nadatàcá-ndó —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Úxúú tnàhá tídihi ní chítú mee-ni sã ñi quendóo —càchí-güedé xáhaⁿ-güedé xii-gá.

Te xáhaⁿ tùcu-gá:

20 —Te cùtnàhá ní táhú cuèchi tucu-í úsá tnàhá paá ní xexi cúmí mĩl ñáyiú, te chí càchí tnúhu ná daha tucu tídihi ní chítú mee-ni sã ñi quendóo —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Úsá tnàhá tídihi ní chítú mee-ni sã ñi quendóo —càchí-güedé xáhaⁿ-güedé xii-gá.

21 Te Jèsús ní xáhaⁿ tùcu-gá xii-güedé:

—Vitna, ¿te sa ní tecú tnùní-ndó tnúhu ní càháⁿ-í áⁿ ñãhá? —càchí-gá xáhaⁿ-gá xii-güedé.

Jèsús quidé tãtna-gá ñi téé cuáa ñuú Bètsaidá

22 Te Jèsús ní sáa-gá ndihi cue téé xica cuu ndihi-gá ñuú Bètsaidá. Te ñuú-áⁿ ndécú-gá ní quexio ñáyiú núú-gá tánèhé-yu ñi téé cuáa, te càháⁿ ndàhú-yu núú-gá núu vá cùndèe iní-gá tendaha ñàha-gá xii-dé cuèndá ndúha núú-dé. 23 Te Jèsús ní tñi-gá ndaha téé cuáa-áⁿ, te ní queñuhu ñaha-gá tnuú-yu, te ndèca ñaha-gá cuáháⁿ ñi xio yuhu ñuú. Te yàcáⁿ ní dácànùu-gá dí-gá núú-dé te ní tendaha ñàha-gá xii-dé, te dãtnuní ní xicáⁿ tnúhú-gá núú-dé, te xáhaⁿ-gá:

—¿Cùtnuní núú-n-ǎn? —
càchí-gá xǎhaⁿ-gǎ xii-dé.

24 Te té cuáa-án nǐ ndonehe
núú-dě, te xǎhaⁿ-dě xii-gá:

—Cùtnuní núú-í ndéhè-í
nchaa cue té-ǎn, dico dà
ndáa yutnu cui ndáa-güedé
te xica-güedé —càchí-dé
xǎhaⁿ-dě xii-gá.

25 Te Jèsús ní tendaha
tucu-gá núú-dě te ní cuu
ní ndacoto váha-gá-dé, te
òré-án nǐ ndúha núú-dě. Te
nchaandi túhú sá ndéhé-dě
ní cutnùní váha núú-dě nándi
cùu nchaa xǎhaⁿ. 26 Te ní xǎhaⁿ
Jèsús xii-dé:

—Vitna te núhú-n, dico
ndáá ichi vehe-n nǔhú-n te
ñá díú dà xití ñuú quíhíⁿ-n, te
vá yõ ìⁿ cúñaha-n sǎ yǔhú ní
quide tátna-í núú-n nǐ ndúha
—càchí-gá xǎhaⁿ-gǎ xii-dé.

*Té Pèlú xǎhaⁿ-dě xii Jèsús sá
díú-gǎ cúú-gǎ Crìstú*

(Mt. 16:13-20; Lc. 9:18-21)

27 Te Jèsús ní xica-gá
cuáháⁿ-gá ndihi cue téé xica
cuu ndihi-gá nchaa ñuú líhli
càa ñuú Cèsareá Filipú, te òré
ñúhú-gǎ ndihi-güedé ichi te ní
xícáⁿ tnúhú-gǎ núú-güedě, te
xǎhaⁿ-gǎ xii-güedé:

—Chí càchí tnúhu nása
cáháⁿ ñáyi cuendá-í. ¿Yoo
cùu-í càchí-yu-va? —càchí-gá
xǎhaⁿ-gǎ xii-güedé.

28 Te ní xǎhaⁿ-güedě xii-gá:

—Davá-yu càchí-yu sá
cúú-n ndii Juáa téé ní xóo
dacuàndute ñaha xii ñáyi, te
davá-yu càchí-yu sá cúú-n
tě Èliás, te dava tucú-yu
càchí-yu sá cúú-n ìⁿ téé ní
xóo cáháⁿ tnúhu Yá Ndiõxí
ndéé sanaha, duha càchí-yu

—càchí-güedé xǎhaⁿ-güedě
xii-gá.

29 Te ní xícáⁿ tnúhú tucu-gá
núú-güedě, te xǎhaⁿ-gǎ
xii-güedé:

—Te nchòhó, ¿yoo sàni
iní-ndó cùu-í-í? —càchí-gá
xǎhaⁿ-gǎ xii-güedé.

Te té Pèlú ní xǎhaⁿ-dě xii-gá:

—Yòhó cúú-n Crìstú Yaa
ní tendaha Yá Ndiõxí véxi
ñuyú-a —càchí-dé xǎhaⁿ-dě
xii-gá.

30 Te Jèsús ní cáháⁿ-gá
dóho-güedé, te xǎhaⁿ-gǎ:

—Vá yõ ìⁿ cúñaha-ndo
yòo cuu-í —càchí-gá xǎhaⁿ-gǎ
xii-güedé.

*Jèsús cáháⁿ-gá sá cáhni
ñaha-güedé xii-gá*

(Mt. 16:21-28; Lc. 9:22-27)

31 Te Jèsús ní ngüíta-gá
xǐtnúhu-gá cue téé xica cuu
ndihi-gá nàcuáa yáha-gá, te
xǎhaⁿ-gǎ xii-güedé:

—Yúhú Téé cùu ñani
tnáhá-ndó nchàa-ndo chí ío
ndoho-í, chí daquèe tihú ñáhá
nchàa cue téé cùu sacuéhé
núú ñáyi israél, ndihi cue
dútú cùnù, ndihi cue téé
dàcuaha ñaha xii ñáyi nchaa
tnúhu ní chídó tnùní ní chídó
tnùní ndii Moisés, nchaa cue
téé-án dàquee tihú ñáhá-güedě
xii-í. Te sáa nduu te cahni
ñaha-güedé xii-í, dico nduu
úní sá cùu-í te ndoto-í —
càchí-gá xǎhaⁿ-gǎ xii-güedé.

32 Te ducaⁿ ní cáháⁿ
Jèsús núú cuè téé xica cuu
ndihi-gá nàcuáa tecú tnùní
váha-güedé tnúhu cáháⁿ-gá.
Te té Pèlú ní cana ñaha-dé
xii-gá ìⁿ xio, te ní ngüíta-dé
ténáa ñáhá-dě xii-gá ní cùu.

33 Dico Jèsús ndihi-ni ní

nchócuĩhnu-gá ní ndàcoto-gá nùú nchàa-güedé chi ndàa sàtá-gã xĩndecu-güedé, te ní ngüíta-gá ténàà-gá té Pèlú, te xàhaⁿ-gã xii-dé:

—¡Xocuĩñí yòhó nùú-í-a, chi dàtná càháⁿ yucu ñávãha càháⁿ-n! Chi ñá túú sàni iní-õ dàtná sàni iní Yã Ndiõxí, chi ìⁿ-ni sàni iní-õ ndihí dava-gá cue ñáyiu ndècu ñuyúú-a — càchí-gã xàhaⁿ-gã xii-dé.

³⁴ Te Jèsús ní cana-gá nchaa cue téé xica cuu ndihí-gá, ndihí nchaa ñáyiu xĩndecu-áⁿ, te ní xàhaⁿ-gã:

—Nchaa ñáyiu cuení chit-nahá ñáhá xii-í, te xini ñuhu-xi vá cáda-gã-yu sá sání iní méë-yu, te ío cada ndee iní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. ³⁵ Te nchaa ñáyiu cuení sá ñà túú tnàhí ná yáha cundecu ñuyúú-a cuíta nihnú-yu, dico nchaa ñáyiu ñá túú tnàhí yùhú cuèi nándi sá ná yáha-yu cundecú-yu ñuyúú-a sá cuendá-í, ndihí sá cuendá tnúhu-í, te ñáyiu-áⁿ naníhí tãhú-yu.

³⁶ Te cuèi nchaandi túhú sá ío ñuyúú-a na nihí ñáyiu cundecu ndihí-yu, dico núu ñu nchaa xíãⁿ ná càda cuíta nihnú-yu te ñá túú vèdana nàndihí-xi sá dúcáⁿ ndècu ndihí-yu nchaa xíãⁿ. ³⁷ Te ni ìⁿ sá ío ñuyúú-a vá chíndèe-xi ñáyiu cuendá naníhí tãhú-yu. ³⁸ Te nchaa ñáyiu na cùcahaⁿ núu-xi càháⁿ váha cuendá-í, ndihí cuendá tnúhu-í núu nchàa ñáyiu dàquee tihú ñáhá xii Yã Ndiõxí, ñáyiu xĩndecu ichi cuèhé ichi duha, te tnàhá

yùhú Téé cùu ñaní tnáhã-yu nchaa-yu cucahaⁿ núu-í núu-yu òré ná quixi tucu-í ndihí cue espíritú xínú cuèchi núu Tãtã-í Dútú Ndiõxí. Te mee-gã cada cutnùní iní nchaa ñáyiu sá yùhú ío càhnu cuu-í.

9

¹ Te na càchí tnúhu ndáá-í xii-ndo sã ío dava nchòhó ñáyiu xĩndecu iha vitna vá cùu-ni-ndo, chi cundecu-ni-ndo ndéé quiní-ndó sáa nduu ndihu ndaha ñàha Yã Ndiõxí xii ñáyiu, te dàvã-áⁿ quiní-ndó sã ndácú-gã quidé-gã nchaandi túhú sá vãha —càchí-gã xàhaⁿ-gã xii cue téé xica cuu ndihí-gá ndihí cue ñáyiu-áⁿ.

Jèsús ní nadama dóo-gã ndihí núu-gã

(Mt. 17:1-13; Lc. 9:28-36)

² Te núu ñnú nduu sá dúcáⁿ ní càháⁿ Jèsús te ní xica-gã cuásaá-gã ìⁿ yucu dùcúⁿ, te ndèca-gá té Pèlú, ndihí té Jãcobó, ndihí té Juàá cuásaá, te úní tnàhí-ni cue téé-áⁿ ndécã-gã cuásaá. Te yucu-áⁿ ndécú-gã ní nadama núu-gã, ³ te ní nadama dóo-gã. Te dóo-gã-áⁿ sũúni ñí nduu cuixíⁿ quiyí te tãsaⁿ, te ni ìⁿ ñáyiu ñuyúú-a ñá túú ndàcú-yu naqueté-yu ìⁿ dóo nduu cuixíⁿ dàtná ní nduu dóo-gã. ⁴ Te ní xiní-güedé té Moisés ndihí té Èliás nútñi-güedé ndihí-gá ndátnúhu ndihí ñaha-güedé xii-gã. ⁵ Te té Pèlú ní xàhaⁿ-dè xii Jèsús:

—Mèstrú, ¡váha ní cuu sá ndécú-ó ìha vitna! Te na dàcaa-ndí úní tnàhá vehe tnuvixiⁿ, te ìⁿ cuu cuèndá-n te ìⁿ cuu cuèndá té Moisés te ìⁿ cuu cuèndá té Èliás —càchí-dé xàhaⁿ-dè xii-gá.

⁶ Te ducaⁿ nǐ cáháⁿ-dé chi ío ní yùhú-güedé, te cuèndá-ní ní cuu yáchí-dé ní cáháⁿ-dé, te ní mèe-dé ñá túú ní cùtnuní iní-dé nása ndùu tnúhu ní cáháⁿ-dé. ⁷ Te òré-áⁿ nǐ quexìo ìⁿ vícò nùú ndécú-güedé ndìhi Jèsús ní dádähu ñaha-xi xii-güedé ndìhi-gá, te xití vícò-áⁿ nǐ cáháⁿ Yá Ndiòxí ní tecú dóho-güedé, te xàhaⁿ-gǎ xii-güedé:

—Tée-a cùu-dé Déhe-í tée ío cùu iní-í, te cundedóho-ndo nchàa tnúhu càháⁿ-dé —càchí-gá xàhaⁿ-gǎ xii-güedé.

⁸ Te òré ní quide cuèndá-güedé, te ñá túú-gǎ ní xiní-güedé cue tée úú-áⁿ chi mee-nǎ Jèsús ndécú.

⁹ Te òré cuánuu ndìhi ñaha-gǎ xii-güedé yucu-áⁿ, te ní cáháⁿ-gǎ dóho-güedé, te xàhaⁿ-gǎ:

—Vá yǎo ìⁿ cúñaha-ndo nchàa sá nǐ xiní-ndó nùú nǐ sáá-ó-á, te cuu cáháⁿ-ndó dico ndéé ná yàha ndoto yúhú Tée cùu ñaní tnàhá-ndó nchàa-ndo sá cùú-í —càchí-gá xàhaⁿ-gǎ xii-güedé.

¹⁰ Núu xiáⁿ cue tée-áⁿ nǐ xúhuⁿ nahi-ní iní-güedé nchaa sá nǐ xiní-güedé núú nǐ sáháⁿ-güedé ndìhi Jèsús te ñá túú tnàhí ní cáháⁿ-güedé, dico ní ndúcú tnúhu núú tnàhá-güedé ná cuèndá ducaⁿ nǐ cáháⁿ-gá sá ndèé ná yàha ndoto-gá sá cùú-gá te dàtnuní cáháⁿ-güedé nàcuáa ndùu

nchaa sá nǐ xiní-güedé. ¹¹ Te ní xícáⁿ tnúhú-güedé núú Jèsús, te xàhaⁿ-güedé xii-gá:

—¿Cuíní-ndí cachí tnúhu-n nǎ cuèndá càchí cue tée dàcuaha ñaha xii ñáyiú nchaa tnúhu ní chídó tnùní ndí Moisés sá dǐhna-gá té Èliás ndixi-dé te dàtnuní quixi Yáá tendaha Yá Ndiòxí quixi ñuyíú-a? —càchí-güedé xàhaⁿ-güedé xii-gá.

¹² Te Jèsús ní xàhaⁿ-gǎ:

—Ndáá sá códó nùu ìⁿ tée quixi-dé te cada-dé dàtná ní quide té Èliás, te tée-áⁿ cada ndáá-dé nchaa nàcuáa cùu. Dico núú tùtú Yá Ndiòxí càháⁿ-xi cuèndá yúhú Tée cùu ñaní tnàhá-ndó nchàa-ndo sá ío ndoho-í, te daquèe tihú ñáhá ñáyiú xii-í. ¹³ Te na càchí tnúhu-í xii-ndo vitna sá sá ní quixi ìⁿ tée ní quide dàtná ní xóo cada té Èliás, te cue ñáyiú ñá túú ní cànehé-yu sá yíñùhu núú-dé, te ní quide ñáhá-yu xii-dé nchaa nàcuáa ní quixi iní méé-yu. Te núú tùtú Yá Ndiòxí sa ndéé tnuní nchaa nàcuáa yàha-dé, te nchaa xiáⁿ sa ní quide ñaha ñáyiú xii-dé —càchí-gá xàhaⁿ-gǎ xii-güedé.

Jèsús quidé tǎtna-gá ìⁿ tée cuechi yíhi ñaha espíritú cùndìhi yucu ñávàha

(Mt. 17:14-21; Lc. 9:37-43)

¹⁴ Te Jèsús ní ndexìo-gá ndìhi cue tée úní-áⁿ nùú xǐndecu dava-gá cue tée xica cuu ndìhi-gá, te vǎi vihi ñáyiú ndècu núú ndécú-güedé-áⁿ, te tnàhá cue tée dàcuaha ñaha xií-yu nchaa tnúhu ní chídó tnùní ndí Moisés xǐndecu, te cue tée-áⁿ nǎndi tnúhu

xãhaⁿ-güedë xii cue tée xica cuu ndihi Jesús. ¹⁵ Te òré ní xiní-yu ní ndexìo-gá, te nchaá-yu ío ní cuñúhu-yu, te xinú-yu ní sáháⁿ ní cáháⁿ ndihi ñáhá-yu xii-gá. ¹⁶ Te ní xicáⁿ tnúhú-gã núú cuè tée xica cuu ndihi-gá nõu ná tnúhu ndàtnúhu-güedé ndihi cue tée-áⁿ. ¹⁷ Te ìⁿ ñáyiu xíndecu xíaⁿ nĩ xáhãⁿ-yu xii-gá:

—Mèstrú, ndèca-í déhe-í véxi nànducu ñaha-í xii-n, chi yìhi ñaha espíritú cùndìhi yucu ñávãha xii-dé, te diu xíaⁿ ní quide ní cuu ñìhí-dé. ¹⁸ Te ío ndòho-dé chi súuní ndèni ní cuu ngòtni ñaha-xi xii-dé, te òré ducaⁿ quide ñaha-xi xii-dé te dànduá ñáhá-xí, te quène tíñú yuhu-dé, te cùrúhñú nõhu-dé, te ndàda ruúⁿ ñáhá-xí xii-dé. Te sa ní xáhãⁿ-í xii cue tée xica cuu ndihi-n sá queñúhu-güedé espíritú cùndìhi yucu ñávãha yìhi ñaha xii-dé dico ñá túú ní ndàcu-güedé queñúhu-güedé-xi —càchí ñáyiu-áⁿ xáhãⁿ-yu xii-gá.

¹⁹ Te Jèsús ní xáhãⁿ-gã:

—¡Nchaa nchòhó ñáyiu ndècu ñuyíú-a ío sàá iní-ndó, chi ñá túú cuiní-ndó quíndáá iní-ndó Yã Ndiõxí, te ní cuu vài nduu quide ndee iní-í nchaa sá quidé-ndó! ¿Te ná ndéé ama vá dúcáⁿ-gã cada-ndo-í? Te chí cándèca tée cùhú-áⁿ táquixi iha —cachí-gá xáhãⁿ-gã xii-yu.

²⁰ Te ñáyiu ndihi ñaha xii tée yìhi ñaha espíritú cùndìhi yucu ñávãha-áⁿ

ndécá ñáhá-yu xii-dé cuáháⁿ ndéé núú Jèsús, te òré ní xiní ñáhá espíritú cùndìhi yucu ñávãha-áⁿ xii-gá, te ní ngüíta-ni-xi sàhni yìhí ñáhá tucu-xi xii-dé, te ní dánduá ñáhá-xí xii-dé, te ní ngüíta-dé xíchí ñùhu-dé, te quène tíñú yuhu-dé. ²¹ Te Jèsús ní xicáⁿ tnúhú-gã núú tãtã-dé, te xáhãⁿ-gã xii-dé:

—¿Ná ndéé ama ní ngüíta-xi duha ndòho déhe-n? —càchí-gá xáhãⁿ-gã xii-dé.

Te tée-áⁿ nĩ xáhãⁿ-dè xii-gá:

—Ndéé cùtnáhá cúú líhli-dé ní ngüíta espíritú cùndìhi yucu ñávãha duha quide ñaha-xi xii-dé. ²² Te ní cùtìtní xito dàngaunihnu ñaha-xi xii-dé núú ñùhú, te ní cutìtní tucu xito dàngaunihnu ñaha-xi xii-dé ndute cuiní-xi cahni ñaha-xi xii-dé. Te ndèca-í-dé véxi núú-n te núu ndacu-n càda tátna-n-dé, te cundàhú iní ñáhá-n xii-ndí chindee ñàha-n —cachí-dé xáhãⁿ-dè xii-gá.

²³ Te Jèsús ní xáhãⁿ-gã:

—Te ná cuèndá càchí-n nõu ndacu-í cada tátna-í déhe-n, chi nchaa ñáyiu na quíndáá iní ñáhá xii-í te nihí-yu sá ná càcáⁿ-yu núú-í —càchí-gá xáhãⁿ-gã xii-dé.

²⁴ Te tãtã tée cuechi-ãⁿ ñhi ní cáháⁿ-dé xáhãⁿ-dè xii-gá:

—Sàndáá iní ñáhà-í xii-n, dico chindee ñàha xii-í cuèndá ná quíndáá iní ñáhá-gã-í xii-n —càchí-dé xáhãⁿ-dè xii-gá.

²⁵ Te Jèsús ndéhé-gã sá ío vài ñáyiu ta tàcá núú ndécú-gã-áⁿ. Te ní tenáá-gá espíritú

cúndìhi yucu ñávãha-án, te xãhaⁿ-gã xii-xi:

—Yòhó espíritú cúndìhi yucu ñávãha, ní quide ñìhì-n nǐ quide doho-n tõe-a, dico vitna yúhú càchí-í sá queé-n yìqui cuñú-dé te vá ndìhu-gá-n —càchí-gá xãhaⁿ-gã xii espíritú cúndìhi yucu ñávãha-án.

²⁶ Te espíritú cúndìhi yucu ñávãha-án nǐ dácáná sàa ñaha-xi xii tée-án, te ní sahnì yìhì ñáhá tùcu-xi xii-dé, te dàtnùnì ní quee ñaha-xi xii-dé cuáháⁿ-xi, dico tée-án chi dacàa-ni ndíyì càa-dé cātùu-dé. Te nchaa ñáyìu xĩndecu xíaⁿ càchí-yu sá nǐ xíhì-dé ní cùu. ²⁷ Te Jèsús ní tñi-gá ndaha-dé ní ndocani ñaha-gã xii-dé, te ní ndacóo-dé ní nucúnutnǐ-dé.

²⁸ Te Jèsús cuándìhu-gá xití vehe ndìhi cue tée xica cuu ndìhi-gá, te òré ndéhé-güedé ñá túú-gã ñáyìu, te ní xicáⁿ tnúhú-güedé núú-gã, te xãhaⁿ-güedé xii-gã:

—Cachí tnúhu xii-ndí ná cuèndá ñá túú ní ndàcu-ndí queñuhu-ndí espíritú cúndìhi yucu ñávãha yìhi ñaha xii tée-án —càchí-güedé xãhaⁿ-güedé xii-gã.

²⁹ Te Jèsús ní xãhaⁿ-gã xii-güedé:

—Na càchí tnúhu-í xii-ndo sã nùu òré cuiní-ndó queñuhu-ndo espíritú cúndìhi yucu ñávãha yìhi ñaha xii ñáyìu dàtná cúu espíritú cúndìhi-xi yìhi ñaha xii tée-án ní cùu ña, te xini ñuhu-xi sá

ìo cáháⁿ ndìhi-ndo Yã Ndióxi tẽ ñá túú tñahí ná caxi-ndo cáháⁿ ndìhi-ndo-gã, te ducaⁿ te ndacu-ndo queñuhu-ndo espíritú cúndìhi yucu ñávãha yìhi ñaha xii ñáyìu —càchí-gá xãhaⁿ-gã xii-güedé.

Jèsús càháⁿ tucu-gá sá cáhni ñaha-güedé xii-gã

(Mt. 17:22-23; Lc. 9:43-45)

³⁰ Te Jèsús ní quee-gá núu ndécú-gã-án ndìhi cue tée xica cuu ndìhi-gá cuáháⁿ-gá ndìhi-güedé distritú Galileá, te cuiní-gá sá vã quini ñáyìu ndèe ichi cuáháⁿ-gá. ³¹ Te ducaⁿ nǐ sani iní-gá, chi mee-gã sa naha-gá sá ndàá cada-xi nàcuáa xãhaⁿ-gã xii cue tée xica cuu ndìhi-gá, te duha xãhaⁿ-gã xii-güedé:

—Yúhú Tée cùu ñanì tñahá-ndó nchaa-ndo sáá iⁿ nduu te cuáha cuèndá ñáhá-güedé xii-í núu cuè tée cùu úhú iní ñáhá, te cahni ñaha-güedé xii-í, dico nduu únì sá cùu-í tẽ ndoto-í —càchí-gá xãhaⁿ-gã xii-güedé.

³² Dico ñá túú tñahí ní tècú tñuní-güedé nása ndùu tnúhu ní cáháⁿ-gá, te ní ñà túú ní cùyì-güedé cacáⁿ tnúhú-güedé núú-gã.

Cue tée ndùcu tnúhu núu tñahá nùu ndédacàa-güedé ìo-gá cùnùu

(Mt. 18:1-5; Lc. 9:46-48)

³³ Te Jèsús ní quexìo-gá ndìhi cue tée xica cuu ndìhi-gá ñuú Capèrnaúm, te òré sa ndècu-gá iⁿ vehe te ní xicáⁿ tnúhú-gã núú-güedé, te xãhaⁿ-gã xii-güedé:

—¿Nándi cùu tnúhu ta xítñaha-ndo véxi? —càchí-gá xãhaⁿ-gã xii-güedé.

³⁴ Dico ñá túú tnàhí ni cãháⁿ-güedé cúñaha-güedé xii-gá nũu ná tnúhu xítñaha-güedé òré ñúhú-güedé ichi. Te ducaⁿ ní quide-güedé chi cuendá tá ndàtnúhu-güedé nũu ndédacãa-güedé ío-gá cúnũu. ³⁵ Te Jèsús ní ngóo-gá, te ní xáhaⁿ-gã xii ndi ùxúú cue téé xica cuu ndihi-gá:

—Chí táquixi iha te cundedóho-ndo tnúhu na càháⁿ-í-a. Te núu ío dava-ndo cuíní-ndó cúnũu-ndo, te cada-ndo sã cúú-ndó ñáyiú nchícúⁿ cuií-nã, te cunu cuechi-ndo núú tnàha ñáyiú-ndo —càchí-gá xãhaⁿ-gã xii-güedé.

³⁶ Te Jèsús ní sanutnii-gá ìⁿ té líhli cuádava tnuú-güedé, te dàtnúni ní nguídèhé ñáhã-gã xii-dé, te xãhaⁿ-gã xii-güedé:

³⁷ —Nchaa ñáyiú na quèheⁿ cuendá ìⁿ té líhli dàtná té líhli-a cuendá sã ñúhú ìní ñáhã-yu xii-í ñá, te cada íní-yu sã yúhú ní queheⁿ cuendá-yu. Te nchaa ñáyiú na quèheⁿ cuendá ñáhã xii-í te ñá díú-ní mèe-í ní queheⁿ cuendá-yu, chi tnàhá Tãtà-í Dútú Ndiòxí Yaá ní tendaha ñàha xii-í véxi-í ñuyíú-a ní queheⁿ cuendá-yu —càchí-gá xãhaⁿ-gã xii-güedé.

Nchaa ñáyiú ñá túú cùu úhú ìní ñáhã xii-o te cùndihi ñáhã-yu (Mt. 10:42; Lc. 9:49-50)

³⁸ Te té Juáá diu-ni ìⁿ téé xica cuu ndihi-gá ní xáhaⁿ-dè xii-gá:

—Mèstrú, ní xiní-ndí ìⁿ téé càcunehe ñaha-dé xii-n, te quèñuhu-dé espíritú cùndihi yucu ñávãha yíhi ñaha xii ñáyiú, te nchúhú ñá túú ní dàña-gá-ndí ducaⁿ càda-dé, chi ñá túú xica cuu ndihi ñaha-dé xii-o —càchí-dé xãhaⁿ-dè xii-gá.

³⁹ Te Jèsús ní xáhaⁿ-gã xii-güedé:

—Daña-ndo na càda nahi-dé ní cùu, chi ñá túú ní ìⁿ ñáyiú ndihi ndihi-ni ndacu cãháⁿ cuèhé cuendá-í te núu càcunehe ñahã-yu xii-í, te quidé-yu sã vã yõo tnàhí ndacu cada. ⁴⁰ Te nchaa ñáyiú ñá túú cùu úhú ìní ñáhã xii-o te cùndihi ñahã-yu. ⁴¹ Te na càchí tnúhu-í xii-ndo sã cuè ñáyiú na tàxi ìⁿ yaxiⁿ ndute coho-ndo cuendá sã cúú-ndó cuè téé xica cuu ndihi-í, te ñáyiú-ãⁿ sãá nduu te dacuèi sã nihí-yu sã ndúú tãhũ-yu —càchí-gá xãhaⁿ-gã xii-güedé.

Cada cuendá-ó vã cùndecu-o ichi cuèhé ichi duha (Mt. 18:6-9; Lc. 17:1-2)

⁴² Te xãhaⁿ tùcu Jesús xii-güedé:

—Te núu ìⁿ téé na dàcaháⁿ-dè cue ñáyiú sãndáá ìní ñáhã xii-í cadã-yu nándi sã cuèhé sã dúhá, te váha-gá sã nũu na dàcutu ndeé-güedé ìⁿ yúú yódó dúcúⁿ-dè, te dàquèe ñaha-güedé xii-dé xítí ndute làmár, te ñá díú sã cùndecu-dé ducaⁿ càda-dé. ⁴³ Te núu ìⁿ xio ndaha-ndo quide-xi quide-ndo nándi sã cuèhé sã dúhá, te quehndé-ndó cuíta-xi, chi váha-gá sã nánihí tãhú-ndó cuèi na cuíta ìⁿ

xio ndaha-ndo te ñá díú sǎ quíhíⁿ-ndó ñihí ní ndúú-ndó núú ùhú núú ndàhú núú dícó sàá ndáhá itá ñuhú ni caa ni quíhíⁿ. ⁴⁴ Chi yàcáⁿ cúú-xí núú ñà túú tnàhí ndàhvá ñuhú, te ío ndoho-ndo cùndecu-ndo xíaⁿ ni caa ni quíhíⁿ. ⁴⁵ Te núú ñⁿ xio sáhá-ndó quíde-xi quíde-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tǎhú-ndó cuèi na cuíta ñⁿ xio sáhá-ndó, te ñá díú sǎ quíhíⁿ-ndó ñihí ní ndúú-ndó núú ùhú núú ndàhú núú dícó sàá ndáhá itá ñuhú ni caa ni quíhíⁿ. ⁴⁶ Chi yàcáⁿ ñá túú tnàhí ndàhvá ñuhú, te ío ndoho-ndo cùndecu-ndo xíaⁿ ni caa ni quíhíⁿ. ⁴⁷ Te núú ñⁿ xio tinùu-ndo quíde-xi quíde-ndo nándi sá cuèhé sá dúhá, te tava-ndo cuíta-xi, chi váha-gá sá cùndecu-ndo núú ndécú Yǎ Ndiǒxí táxí tnùní-gá cuèi na cuíta ñⁿ xio tinùu-ndo, te ñá díú sǎ ndi nduú xio núú-ndó quíhíⁿ-ndó núú ùhú núú ndàhú. ⁴⁸ Chi yàcáⁿ ñá túú tnàhí ndàhvá ñuhú, te ío ndoho-ndo cùndecu-ndo xíaⁿ ni caa ni quíhíⁿ.

⁴⁹ Te dàtná quídé-güedě quiti sǎhni-güedě chíhi-güedě cuñú-di ñí te dàqué-güedě núú ñuhú, ducaⁿ sǎtnahá-xi ndoho cue ñáyiú chi ío ndohó-yu. ⁵⁰ Te ñí chi ío váha nándíhi-xi, dico núú na ndùu víxiⁿ-xi te ñá túú-gǎ nándíhi-xi te ni ñà túú-gǎ nása cada-o ndùu úhá tucu-xi. Te ío váha cada cuèndá-ndó nàcuáa cundecu-ndo cuèndá

cuu-ndo ñáyiú váha, te ducaⁿ te cuu-ndo dàtná ñí sǎ ñà túú ndùu víxiⁿ, te ío váha cundecu ndíhi tnàha-ndo —cachí-gá xǎhaⁿ-gǎ xii-güedě.

10

Jèsús càháⁿ-gá cuèndá cue ñáyiú dàña tnahá

(Mt. 19:1-12; Lc. 16:18)

¹ Te Jèsús ní xica-gá cuáháⁿ-gá ní yáha-gá yucu distrítú Júdeá ní téhndé-gá ndàa ingá xio yúte Jòrdán. Te yàcáⁿ ndécú-gǎ ní tacá tucu cuèhé víhí ñáyiú, te ní ngúíta-ni tucu-gá dánèhé ñáhá-gǎ xií-yu tnúhu-gá chi ducaⁿ tnàhí quíde-gá. ² Te ní quèxio ñⁿ úú cue tée cùu fariséú núú ndécú Jèsús xító ndèe ñáhá-güedě xii-gá núu nása cunduu tnúhu cáháⁿ-gá, te xǎhaⁿ-güedě xii-gá:

—Véxi-ndí xicáⁿ tnúhú-ndí núú-n núu cuu dàña ñⁿ tée ñadíhí-dé ǎⁿ ñáhá —cachí-güedě xǎhaⁿ-güedě xii-gá.

³ Te Jèsús ní xáhaⁿ-gǎ xii-güedě:

—Te nchòhó, ¿nása ní cachí ndí Moisés cada-ndo-i? —cachí-gá xǎhaⁿ-gǎ xii-güedě.

⁴ Te ní xáhaⁿ-güedě xii-gá:

—Ndí Moisés ní cachí ndí sá cúú dàña ñⁿ tée ñadíhí-dé dícó-ni sá cadúha-dé ñⁿ tutú cuañaha-dé, te núú tütú-ǎⁿ codo tnùní sá ní dàña ñaha-dé, te ducaⁿ te cuu dàña-dé ñadíhí-dé —cachí-güedě xǎhaⁿ-güedě xii-gá.

⁵ Te Jèsús ní xáhaⁿ-gǎ xii-güedě:

—Te ducaⁿ ñi chídó tnùni ndíj Moisés cada-ndo cuendá sá ío sáa ini-ndó. ⁶ Dico Yá Ndiöxí cúnahá ní cadúha-gá ñuyíu ndihi nchaa sá ío, chi téé ñadìhí ní cadúha-gá. ⁷ Te xiǎⁿ nũu nchaa cue téé na nihí ñadìhí-xi, te ðíⁿ-ná cada-güedé tātá-güedē ndihi nāná-güedē, chi mee-nā ñadìhí-güedé cuu cuu ndihi-güedé. ⁸ Te cue ñáyiu úú-án ñà túú-gǎ ndí ðíⁿ ndí ðíⁿ yìqui cuñú cúú-yu, chi cada ini-ndó sǎ ðíⁿ-nā yìqui cuñú cúú-yu. ⁹ Te xiǎⁿ nũu ñá túú ndùu váha-xi dañá cuè téé ñadìhí-güedé, chi mee Yá Ndiöxí ní cachí-gá sá cúú úú-yu cundecú-yu ndéé naa ndéé cuú-yu —càchí-gá xǎhaⁿ-gǎ xii-güedé.

¹⁰ Te òré yíhí Jèsús ndihi cue téé xica cuu ndihi-gá vehe, te ní xicáⁿ tnúhú-güedē núú-gǎ nása ndùu tnúhu ní cáháⁿ-gá cuendá cue ñáyiu dañá tnaha. ¹¹ Te Jèsús ní xǎhaⁿ-gǎ xii-güedé:

—Te núu ðíⁿ téé na dàña-dé ñadìhí-dé te naqueheⁿ-dé ingá ñadìhí, te ío nèhé quidé-dē, te ðíⁿ-ni cuèchi cùu-xi ndihi cuèchi quide téé ndéca ñadìhí te càháⁿ ndihi-dé ingá ñadìhí. ¹² Te ðiu-ni ducaⁿ sǎtnahá-xi cùu tucu ñáyiu ðíhí te núu na dàná-yu yíⁿ-yu te naquehéⁿ-yu ingá téé, chi ðíⁿ-ni cuèchi cùu-xi sá quidé-yu ndihi sá quidé cuè ñáyiu ðíhí ndécú yíⁿ-xi, te càháⁿ ndihí-yu ingá téé —càchí-gá xǎhaⁿ-gǎ xií-yu.

Jèsús xicáⁿ táhú-gǎ núú Yá Ndiöxí cuendá landú
(Mt. 19:13-15; Lc. 18:15-17)

¹³ Te ðíⁿ úú ñáyiu ndécá-yu landú líhli cuáháⁿ núú Jèsús, chi cuíní-yu sá téndaha ñaha-gá xii-güexi. Te cue téé xica cuu ndihi-gá ní ngüíta-güedé ténàá ñáhá-güedē xií-yu, te xǎhaⁿ-güedē sá vǎ dúcáⁿ càdá-yu. ¹⁴ Te òré ní xiní-gá sá dúcáⁿ quide-güedé, te ní cudééⁿ-gǎ núú-güedē, te xǎhaⁿ-gǎ xii-güedé:

—Chí dañá ná quixi nahi cue landú líhli-án nũu-í-a te vá càdí-ndó ìchi-güexi, chi dàtná cúú vǎha iní cue landú líhli-án ducaⁿ cùu váha iní cue ñáyiu yìndaha Yá Ndiöxí. ¹⁵ Te na càchí tnúhu ndáá-í xii-ndo sǎ nũu vá quindáá iní ñáhá-ndó dàtná quidé cuè landú líhli sàndáá iní ñáhá xii-í, te vá ndíhu ndaha ñaha Yá Ndiöxí xii-ndo —càchí-gá xǎhaⁿ-gǎ xii-güedé.

¹⁶ Te sátá dúcáⁿ ñi xǎhaⁿ-gǎ te ní nguídèhé-gá cue landú-án te ní tendaha ñaha-gá xii-güexi, te ní xicáⁿ táhú-gǎ núú Yá Ndiöxí cuendá-güexi.

Íⁿ téé cuica càháⁿ ndihi-dé Jèsús

(Mt. 19:16-30; Lc. 18:18-30)

¹⁷ Te òré sa ñúhu ichi Jesús caca-gá quíhíⁿ-gá ingá xichi ní cùu ní quexio cunu ðíⁿ téé ní ngüíñí xítí-dē núú-gǎ, te xǎhaⁿ-dē xii-gá:

—Yòhó Mèstrú, cùu-n téé ío váha iní-xi, te cuíní-í nũu vá

cúndèe iní-n cächí tnúhu-n ná cúú sã cadã-í cuendá nduu táhù-í cundecu-í ndihí Yã Ndiõxí ní caa ní quíhíⁿ — cächí-dé xãhaⁿ-dẽ xii-gá.

18 Te Jèsús ní xãhaⁿ-gã xii-dé:

—¿Te cùtnuní iní-n nãcuáa ndùu tnúhu cãháⁿ-n sã yũhú váha iní-ãⁿ? Chi ñⁿdií díj-ni Yã Ndiõxí ío váha iní-gá. 19 Te yòhó xìní-n nãcuáa ní cachí Yã Ndiõxí cada ñáyiú, te duha ní cachí-gá: “Nchòhó cue tée vá cãháⁿ ndihí-ndo ñàdihí te núu ñá díú ñàdihí-ndó cuú-yu, te ducaⁿ-ni nchòhó cue ñáyiú dìhí tucu vá cãháⁿ ndihí-ndo tée te núu ñá díú yì-ndo cuu-güedé, te vá cãhni-ndó tnàha ñáyiú-ndo, te ni vã dúhú-ndó sã ndécú ndihí-yu, te ni vã dácàcu-ndo cuéchi neñúú sã cúú-xí tnàha ñáyiú-ndo, te ni vã dácùandehnde-ndo, te canehe-ndo sã yíñùhu núú tãtã-ndó ndihí núú nãná-ndó”, duha ní cachí Yã Ndiõxí cada ñáyiú —cächí-gá xãhaⁿ-gã xii-dé.

20 Te tée-áⁿ ñí xãhaⁿ-dẽ xii-gá:

—Mèstrú, nchaa xíãⁿ ní ngüíta-í quidè-í ndéé cùtnàhá cúú lãndú-í —cächí-dé xãhaⁿ-dẽ xii-gá.

21 Te Jèsús ní xíndéhé ñàha váha-gá xii-dé, te ní cuu váha iní ñáhã-gã, te ní xãhaⁿ-gã xii-dé:

—Dico cùmání ìngá núú sã cadã-n. Vitna te quíhíⁿ-n te dico-n nchãa sã ndécú ndihí-n, te díhúⁿ-n cuãha táhú-n cuè ñáyiú ndàhú. Te ducaⁿ, te nduu táhú-n

núcúndecu váha-n nõú ndécú Yã Ndiõxí táxí tnùní-gá, te sátá ná yãha ducaⁿ càda-n, te quixi-n chìtnahá ñáhã-n xii-í cuèi na ndòho-n datná ndoho-í —cächí-gá xãhaⁿ-gã xii-dé.

22 Te sã dúcãⁿ ñí xãhaⁿ Jèsús xii-dé te ío ní cundiyí-dé chi ío cuica-dẽ, te ní xica-dé cuánuhú-dé.

23 Te ní ndacoto-gá ñí cãndéé dìñi-gá, te ní xãhaⁿ-gã xii cue tée xica cuu ndihí-gá:

—Cue ñáyiú cuica chi ío úhú quíndáá iní-yu Yã Ndiõxí cuendá ndíhu ndaha ñàha-gá xii-yu —cächí-gá xãhaⁿ-gã xii-güedé.

24 Te cue tée xica cuu ndihí-gá-áⁿ ío ní cuñúhu-güedé nãcuáa ní cãháⁿ-gá, te ní xãhaⁿ tùcu-gá xii-güedé:

—Nchòhó cue tée xica cuu ndihí-í cächí tnúhu tucu-í xii-ndo sã ío úhú quíndáá iní cue ñáyiú cuica Yã Ndiõxí cuendá ndíhu ndaha ñàha-gá xii-yu, chi sàni iní-yu sã nchãá sã ndécú ndihí-yu dácàcu nihnu ñaha-xi xii-yu núú ùhú núú ndàhú. 25 Te yáchí-gá yãha ñⁿ cãméyu yaú ñⁿ yiqui ticú dácúúxí sã quíndáá iní ñⁿ ñáyiú cuica Yã Ndiõxí cuendá ndíhu ndaha ñàha-gá xii-yu —cächí-gá xãhaⁿ-gã xii-güedé.

26 Te cue tée xica cuu ndihí-gá ní cuñúhu vîhi-gá-güedé sã dúcãⁿ ñí cãháⁿ-gá, te ní ngüíta-güedé xitnàha-güedé:

—¿Te yoo sa ndacu naníhi tãhú te núu ducaⁿ vãiⁿ? — cãchí-güedé xitnãha-güedé.

27 Te Jèsús ní xíndéhé vãha ñaha-gã xii-güedé, te ní xãhaⁿ-gã:

—Nchaa ñáyiú ñuyú-a chi vá ndácũ-yu ná cadá-yu nãcuãa ndíhu ndaha ñaha Yá Ndiõxí xii-yu, dico mee-gã chi ndacu-gá ndíhu ndaha ñaha-gá xii-yu, chi nchaandi túhú sá vãha ndacu-gá quidé-gã —cãchí-gá xãhaⁿ-gã xii-güedé.

28 Te té Pèlú ní xãhaⁿ-dë xii-gá:

—Nchúhú ní dándõo-ndí nchaandi túhú sá ndécú ndíhi-ndí te ní tuha ñaha-ndí xii-n —cãchí-dé xãhaⁿ-dë xii-gá.

29 Te Jèsús ní xãhaⁿ-gã xii-dé:

—Na cãchí tnúhu ndáá-í xii-ndo sã ncháá ñáyiú na dándõo vehe-xi, àdi ñaní-xi, cúha-xi, tãtã-xi, nãná-xi, déhe-xi, àdi ñuhu-xi, te núu ducaⁿ na càdá-yu sá cuendá-í ndíhi sá cuendá tnúhu-í, ³⁰ te ío-gá cuéhé sã cuãñaha Yá Ndiõxí cundecu ndíhi-yu, chi níhi-yu vehé-yu, ñuhú-yu, ñaní-yu, cúha-yu, nãná-yu, déhe-yu, te ñá díú-ní sã nchãa xãã níhi-yu cundecu ndíhi-yu, chi tnãhá nduu táhũ-yu cundecu ndíhi ñãhá-yu xii-í ni caa ni quíhiⁿ ná sãã nduu. Dico díhna-gã ndoho tnãhá-yu núu ñuyú-a sá cuendá-í. ³¹ Te dava ñáyiú cunuu ndecu ichi Yá Ndiõxí vitna, ñáyiú-ãⁿ sãã nduu te vá ío-gá cunúu-yu

dãtnã cúnúu-yu vitna, te dava ñáyiú nchícúⁿ ñã túú cunuu vitna ñáyiú-ãⁿ sãã nduu te ío cunúu-yu —cãchí-gá xãhaⁿ-gã xii-güedé.

Jèsús cãháⁿ tucu-gá sá cáhni ñãha-güedé xii-gá

(Mt. 20:17-19; Lc. 18:31-34)

32 Te ñùhu Jesús ichi ndíhi cue téé xica cuu ndíhi-gá cuásaá ndíhi ñaha-gã xii-güedé ñúú Jerusálén, te yòdo nuu-gá núu-güedé cuásaá. Te cue téé-ãⁿ xicunúhu-güedé sá dúcãⁿ cuãháⁿ-gá ñúú Jerusálén, te dava cue ñáyiú xinchícúⁿ xiyuhú-yu. Te ní taudíⁿ-gá ndí ùxúú cue téé xica cuu ndíhi-gá, te ní ngúita-gá cání-gá cuendú núu-güedé nchaa nãcuãa yãha-gá. ³³ Te xãhaⁿ-gã xii-güedé:

—Vitna ñùhu-o ichi cuásaá-ó ñúú Jerusálén, te yãcãⁿ cuãha cuendá ñãhá-güedé xii yúhú Téé cùu ñaní tnãhá-ndó nchãa-ndo núu cuè téé cùu dútú cúnúu, ndíhi núu cuè téé dàcuaha ñaha xii ñáyiú nchaa tnúhu ní chídó tnùní ndí Moisés. Te díu cue téé-ãⁿ cuñaha-güedé xii dava-gá cue téé sá cáhni ñãha-güedé xii-í, te cuãha cuendá ñãhá-güedé xii-í núu cuè téé ñã túú cùu cue téé isrãél. ³⁴ Te cue téé-ãⁿ cudíqui ndeé ñãhá-güedé xii-í, te caniha-güedé ndíhi ñíi, te tiú díi ñãhá-güedé, te cahni ñaha-güedé xii-í dico nduu úní sá cùu-í te ndoto-í —cãchí-gá xãhaⁿ-gã xii-güedé.

Té Jàcobó ndihi té Juàá càháⁿ ndàhú-güedé núú Jèsús sá cádá-gã ñⁿ sá cuini-güedé (Mt. 20:20-28)

³⁵ Te cue déhe té Zebèdeú té Jàcobó ndihi té Juàá ní quexìo-güedé núú Jèsús, te xàhaⁿ-güedé xii-gá:

—Mèstrú, véxi-ndí càháⁿ ndàhú-ndí núú-n nùu vá cùndèe iní-n càda-n ñⁿ sá cuini-ndí —càchí-güedé xàhaⁿ-güedé xii-gá.

³⁶ Te Jèsús ní xicáⁿ tnúhú-gã núú-güedé, te xàhaⁿ-gã:

—¿Ná cúú sã cuini-ndó càda-í-i? —càchí-gã xàhaⁿ-gã xii-güedé.

³⁷ Te ní xàhaⁿ-güedé xii-gá:

—Cuini-ndí sá òré ná sáá nduu cùndecu-n núú táxí tnùní-n, te ñⁿ-ndí cunucóo-ndí xio cùha-n te ñⁿ-ndí cunucóo-ndí xio dàtni-n —càchí-güedé xàhaⁿ-güedé xii-gá.

³⁸ Te Jèsús ní xàhaⁿ-gã xii-güedé:

—Nchòhó, ñá túú cùtnuní iní-ndó nàcuáa nduu sá xicáⁿ-ndó núú-í. ¿Te náa cundee iní-ndó dandoho ñaha ñáyiú xii-ndo dàtná dandoho ñahá-yu xii-í, te cundee tucu iní-ndó càhni ñahá-yu xii-ndo dàtná cahni ñahá-yu xii-í-ãⁿ? —càchí-gã xàhaⁿ-gã xii-güedé.

³⁹ Te ní xàhaⁿ-güedé xii-gá:

—Cundee iní-ndí yáha-ndí nchaa nàcuáa càháⁿ-n-ãⁿ —càchí-güedé xàhaⁿ-güedé xii-gá.

Te Jèsús ní xàhaⁿ-gã xii-güedé:

—Ndáá sá cùndèe iní-ndó ndòho-ndo nchaa nàcuáa ndòho-í, te cundee tucu

iní-ndó càhni ñahá-yu xii-ndo, chi yúhú cahni ñahá-yu xii-í. ⁴⁰ Dico sá dúcáⁿ cuini-ndó sã ñⁿ-ndó cùnucóo-ndo xio cuha-í te ñⁿ-ndo cùnucóo-ndo xio datni-í, te xiãⁿ chi ñá díú yúhú tàú-í cachí-í te núú sá cúú cùnucóo-ndo àdi sá vã cúú cùnucóo-ndo, chi mee Tàtà-í Dútú Ndiòxí cachí-gã te núú ná cúú ñáyiú nduu táhú cùnucóo dìñi-í dàvã-ãⁿ —càchí-gã xàhaⁿ-gã xii-güedé.

⁴¹ Te òré ní níhí ùxi-gã cue téé xica cuu ndihi-gã tnúhu nàcuáa nduu sá cuini té Jàcobó ndihi ñani-dé té Juàá, te ní cudééⁿ-güedé núú cuè téé úú-ãⁿ. ⁴² Te Jèsús ní cana-gã nchaa cue téé xica cuu ndihi-gã-ãⁿ, te ní xàhaⁿ-gã xii-güedé:

—Nchòhó xini-ndó sã cuè téé yindaha ñⁿ nacióⁿ quide-güedé sá ño cùnuu-güedé, te nchaa dava-gã cue téé cùndihi-güedé tnàhá-güedé quidé-güedé sá ño cùnuu-güedé.

⁴³ Dico nchòhó chi vá dúcáⁿ càda-ndo. Chi núú dava-ndo cuini-ndó cùnuu-ndo te xini ñuhu-xi cunu cuechi núú tnàhá-ndó te vá cádá-ndó sã cùnuu-ndo. ⁴⁴ Te núú dava-ndo cuini-ndó quène cáva-ndo, te cuu-ndo dàtná cue ñáyiú ñá túú tnàhí dàñá quee núú chíúⁿ pàtróoⁿ-xi cunu cuechi núú tnàhá-ndó.

⁴⁵ Te yúhú Téé cùu ñani tnàhá-ndó nchaa-ndo, chi ñá túú yéxi-í sá cúnú cuèchi ñáyiú núú-í, chi véxi-í sá cúnú cuèchi-í núú-yu. Te cuú-í ñuyíú-a cuèndá vãi-yu cácu nihnu núú ùhú núú ndàhú —càchí-gã xàhaⁿ-gã xii-güedé.

Jèsús quidé tātna-gá ìⁿ téé cuàá nání-dě Bartimeú
(Mt. 20:29-34; Lc. 18:35-43)

46 Te Jèsús ní quexìo-gá ñúú Jericó ndìhi cue téé xica cuu ndìhi-gá, te ní yáha-gá ndìhi-güedé ichi xití ñúú-áⁿ, te ío cuéhé ñàyiu nchìcúⁿ ñáhá xii-gá cuáháⁿ te ìⁿ xio yuhu ìchi sá ñí quee xití ñúú-áⁿ núcõo ìⁿ téé cuàá nání-dě Bartimeú, te tātá-dě nání-dě Tìmeú, te téé-áⁿ núcõo-dě yuhu ìchi-áⁿ xicáⁿ ndàhú-dě.

47 Te téé-áⁿ ñí cutnùnì iní-dě sá Jèsús téé ñúú Nazàrét ñúhú-dě ichi, te ní ngüíta-dě níhi càháⁿ-dě, te xàhaⁿ-dě xii-gá:

—jèsús, ñanì tnáhá ndìi Dàvíí, cundàhú iní ñáhá xii-í! —càchí-dě xàhaⁿ-dě xii-gá.

48 Te vài ñáyiu tènaá ñáhã-yu xii-dě, te xàhãⁿ-yu sá ná càdí-dě yuhu-dě dico uuⁿ-gá níhi ní cáháⁿ-dě xàhaⁿ-dě xii-gá:

—jèsús, ñanì tnáhá ndìi Dàvíí cundàhú iní ñáhá xii-í! —càchí-dě xàhaⁿ-dě xii-gá.

49 Te Jèsús ní ngüíñí-gá te ní xáhaⁿ-gã xii cue téé ndìhi-gá:

—Chí cuànguaca téé cuàá-ãⁿ candeca-ndo-dě quixi iha —càchí-gá xàhaⁿ-gã.

Te cue téé-áⁿ ñí xica-güedé cuànguaca-güedé téé cuàá-áⁿ, te òré ní quexìo-güedé núú-dě te ní xáhaⁿ-güedé xii-dě:

—Ndacuíñí te vá ndìhú-gá iní-n, na quihíⁿ-ó chi càna ñaha Jesús xii-n —càchí-güedé xàhaⁿ-güedé xii-dě.

50 Te téé-áⁿ ñí xócání-dě dóó ndíxí-dě, te ndìhi-ni ní

ndacuíñí-dě te ní xica-dě cuáháⁿ-dě núú Jesús. 51 Te òré ní quexìo-dě te ní xicáⁿ tnúhú-gã núú-dě, te xàhaⁿ-gã xii-dě:

—¿Ná cuíní-n càda ñaha-í xii-n-í? —càchí-gá xàhaⁿ-gã xii-dě.

Te téé cuàá-áⁿ ñí xáhaⁿ-dě xii-gá:

—Mèstrú, cuíní-í cada tātna-n núú-í cuèndá cundehe-í —càchí-dě xàhaⁿ-dě xii-gá.

52 Te Jèsús ní xáhaⁿ-gã xii-dě:

—Cuanùhú vitna, chi sa ní ndúha núú-n chi ní sándáá iní-n Yã Ndiõxí —càchí-gá xàhaⁿ-gã xii-dě.

Te òré-ni-áⁿ ñí ndúha núú-dě te nchìcúⁿ-dě Jesús cuáháⁿ.

11

Jèsús cuànguihu-gá ñúú Jerusalén

(Mt. 21:1-11; Lc. 19:28-40; Jn. 12:12-19)

1 Te Jèsús ní cuyatni-gá ndìhi cue téé xica cuu ndìhi-gá ñúú Bètaniá, ndìhi ñúú Bèttagé, te xíaⁿ cáá yùcu nani Olívú, te yatni vií-nã xíaⁿ cáá ñúú Jerusalén. Te Jèsús ní cana-gá úú-ni tnáhá cue téé xica cuu ndìhi-gá. 2 Te ní xáhaⁿ-gã xii-güedé:

—Chí cuáháⁿ ñúú cáá yàtni yacáⁿ, te òré quexìo-ndo yacáⁿ te naníhí-ndó ìⁿ búrru ndètníi-di, te vátá yõo ìⁿ-gá codo ñaha xii-di, te nandaxi-ndo-di te candeca-ndo-di quixi. 3 Te núu yoo na càcáⁿ tnúhú núú-ndó ñá cuèndá nándàxi-ndo-di, te cúñaha-ndo sã yùhú Yáá xicá

cùu ndihi-ndo xini ñuhu-í-di, te na yãha canehe chiùn-í-di te ndihi-ni natendaha-í-di, duha cùñaha-ndo —càchí-gá xãhaⁿ-gã xii-güedé.

4 Te cue téé-áⁿ ñi xica-güedé cuáháⁿ-güedé, te òré ní quexìo-güedé ñuú-áⁿ te ní naníhí-güedé ìⁿ búrru ndètníi-di ìⁿ yutnu ñihnu yatni ìⁿ yuyehe vehe caa yatni yuhu ichi, te ní ngüíta-güedé nándàxi-güedé-di.

5 Te mei òré nándàxi-güedé-di ní quexìo ñáyiú xãháⁿ-yu xii-güedé:

—¿Ná cuendá nándàxi-ndo búrru-áⁿ-i? —càchí-yu xãháⁿ-yu xii-güedé.

6 Te cue téé-áⁿ ñi xáhaⁿ-güedé xii-yu nàcuáa ní xáhaⁿ Jèsús cùñaha-güedé. Te sátá dúcáⁿ te ní dáñá-yu ndèca-güedé búrru-áⁿ cuáháⁿ núú ndécú Jèsús. 7 Te òré ní quexìo-güedé ndihi-di núú ndécú-gã, te ní sacáⁿ ndodo-güedé dóo-güedé sátá-di, ní ngódó ñàha Jèsús xii-di. 8 Te ío cuéhé ñáyiú ta sàcáⁿ-yu dóo-yu ichi cuáháⁿ-gá cuendá núú dóo-yu-áⁿ yãha-gá ndihi quiti yòdo-gá, te davá-yu xèhndé-yu ndaha yutnu ta sacáⁿ-yu cuáháⁿ.

9 Te nchaá ñáyiú yòdo nuu núú-gã ndihi nchaá ñáyiú nchìcúⁿ ndàa sátá-gã ní ngüíta-yu níhi càháⁿ-yu, te càchí-yu:

—Ío càhnu cuu Yaá-a! ¡Te Yá Ndiòxí ná chindee ñaha-gá, chi ðiu-gá cúú-gã

Yaá ní tendaha-gã véxi quide núú-gã! 10 ¡Te ðiu-ni Yaá-á cúú-gã Yaá véxi quindaha ñàha xii-o datná ní xóo cada ndíi Dàvíi! ¡Te ndéé nchaá sá ío andiu na càchí-xi sá ío càhnu cuu-gá! —duha càchí-yu.

11 Te Jèsús ní quexìo-gá ñuú Jerusalén, te cuánguihu-gá xití veñúhu càhnu sá ío cùnunu, te ní xíndéhé vãha-gá nchaá sá ndécú xití veñúhu-áⁿ. Te sátá dúcáⁿ te ní ndee-gá cuáháⁿ-gá ñuú Bètaniá ndihi ndi ùxúú cue téé xica cuu ndihi-gá chi sa ní cuaa.

Jèsús xãhaⁿ-gã xii yutnu ngüxí sá vã cúúⁿ-gã sávidí-xi (Mt. 21:18-19)

12 Te nduu tnéé-áⁿ ñi quee Jèsús ñuú Bètaniá ndihi cue téé xica cuu ndihi-gá, te ichi ñuhu-gá ní xíhí-gá docó. 13 Te xica ñi xiní-gá nútñi ìⁿ yutnu ngüxí, te ní xica-gá cuándéhé-gã nõu ndéé sávidí-xi te ñá túú ñá ndéé, chi mee-ni ndàha-xi ndeé chi ñá ðíú yóo sácundeé sávidí-xi. 14 Te Jèsús ní xáhaⁿ-gã xii yutnu ngüxí-áⁿ:

—Vitna te vá yóo ìⁿ-gá caxi sávidí-n, chi vá cúúⁿ-gã —càchí-gá xãhaⁿ-gã xii yutnu ngüxí-áⁿ.

Te cue téé xica cuu ndihi-gá ní tecú dóho-güedé nàcuáa ní xáhaⁿ-gã xii yutnu ngüxí-áⁿ.

Jèsús ñá túú tnàhá iní-gá nàcuáa quide ñáyiú xití veñúhu (Mt. 21:12-17; Lc. 19:45-48; Jn. 2:13-22)

15 Te Jèsús ní quexìo tucu-gá ndihi cue téé xica cuu ndihi-gá

ñúú Jerusàlén, te cuánguihu tucu-gá xití veñúhu càhnu sá ïo cùnuu, te xití veñúhu-áⁿ xíndecu cue ñáyiú quíde ndáhú nádìcò-yu, ndihi cue ñáyiú xísaaⁿ. Te nchaa-yu ní queñuhu ñaha Jèsús xii-yu quehé, te ní dándùá-gá mèsá cue ñáyiú dàma díhúⁿ, ndihi nchaa xilè sácõo nchihi cue ñáyiú dìco lómá xíndecu xití veñúhu-áⁿ. ¹⁶ Te ñá túú tñahí-gá ní dàña-gá yáha cue ñáyiú ndihi nchaa sá nchídõ-yu ichi xití veñúhu-áⁿ. ¹⁷ Te ní xáhaⁿ-gã xii-yu:

—Núú tütú Yã Ndiõxí càháⁿ-xí nàcuáa ní càháⁿ-gá, te ní cachí-gá: “Vehe-í cúú-xí vèhe núú tàcá ñáyiú nihíí ñuyíú càháⁿ ndihi ñahá-yu xii-í”, duha ní càháⁿ-gá càchí-xi núú tütú-gá. Dico nchòhó quidé-ndó vèhe-gá vehe ñaduhú —càchí-gá xáhaⁿ-gã xii-yu.

¹⁸ Te nchaa dútú cùnùu, ndihi nchaa cue téé dàcuaha ñaha xii-yu nchaa tñuhu ní chídó tñuní ndíi Moisés ní tecú dóho-güedé nàcuáa ní càháⁿ-gá te ní ngüíta-güedé ndúcú-güedé nàcuáa cada-güedé cahni ñaha-güedé xii-gá, chi yühú-güedé sá ïo cùnuu-gã, te ducaⁿ chi nchaa ñáyiú ío cùnúhu-yu nchaa tñuhu càháⁿ-gá. ¹⁹ Te òré sa ní cuaa cui-nã, te ní quee tucu Jèsús ndihi cue téé xica cuu ndihi-gá ñúú Jerusàlén cuáháⁿ-gá ndihi-güedé ingá xichi.

Ní yichí yutnu ngüxí
(Mt. 21:20-22)

²⁰ Te nduu tnéé nehé-ni ní yáha tucu Jèsús ndihi cue téé xica cuu ndihi-gá núú níhnú yutnu ngüxí, te ní xiní-güedé sa ní yichí nihíí ndéé yóho-xi. ²¹ Te té Pèlú ní ndacu iní-dé nàcuáa ní xáhaⁿ Jèsús xii yutnu ngüxí-áⁿ, te ní xáhaⁿ-dë xii-gá:

—Mèstrú, cundehe nã ní yichí yutnu ngüxí sá nñ xáhaⁿ-n sã vã cúúⁿ-gã sávídí-xi —càchí-dé xáhaⁿ-dë xii-gá.

²² Te Jèsús ní xáhaⁿ-gã xii-güedé:

—Quindáa ndisa iní-ndó Yã Ndiõxí. ²³ Te na càchí tñuhu ndáa-í xii-ndo sã núu nchòhó cùñaha-ndo xii tindúú-a xocuiñí-xi núú ndécú-xí, te quihíⁿ-xi quee-xi xití làmár. Te diu ducaⁿ càda-xi te núu nchòhó vá caní ñⁿ caní úú iní-ndó, te quindáa iní-ndó sã dúcáⁿ càda-xi. ²⁴ Te xíãⁿ núu càchí tñuhu-í xii-ndo sã nchaa sá ná càcáⁿ-ndó núú Yã Ndiõxí òré càháⁿ ndihi-ndo-gã, te taxi-gá te núu nchòhó sàndáa ndisa iní-ndó sã táxí-gã sá xicáⁿ-ndó núú-gã. ²⁵ Te òré càháⁿ ndihi-ndo Yã Ndiõxí te dandacu iní-ndó te núu ndècu ñáyiú ñá túú cuu váha iní ñahá xii-ndo, te cada càhnu iní-ndó-yu cuendá ducaⁿ càda càhnu iní ñahá Tátá-ndó Dütú Ndiõxí Yaá ndécú àndíu xii-ndo cuendá nchaa sá ñà túú váha quíde-ndo. ²⁶ Dico núu nchòhó vá càdá càhnu iní-ndó sã quidé ñaha tñaha ñáyiú-ndo xii-ndo, te ní Tátá-ndó Dütú Ndiõxí vá càdá

càhnu iní ñáhá-gă xii-ndo cuendá nchaa sá ñà túú vâha quide-ndo —cachí-gá xâhaⁿ-gă xii-güedé.

Jèsús ndécú ndîhi-gá tnúhu ndee iní
(Mt. 21:23-27; Lc. 20:1-8)

27 Te Jèsús ní ndexìo tucu-gá ñúú Jerusalén ndîhi cue téé xica cuu ndîhi-gá, te cuánguihu tucu-gá xití veñúhu càhnu sá ïo cùnuu ndîhi-güedé. Te xití veñúhu-áⁿ yîhí-gă ní quexìo cue dútú cúnúu ndîhi cue téé dàcuaha ñaha xii ñâyüu nchaa tnúhu ní chídó tnùní ndíi Moisés, ndîhi cue téé cùu sacuéhé nûú ñâyüu isràèl. 28 Te xâhaⁿ-güedé xii-gá:

—Cùiní-ndí cachí tnúhu-n xii-ndí nása ndùu tnúhu ndee iní ndécú ndîhi-n núu quide-n nándi sá quidé-n, ¿te yoo ducaⁿ ñí taxi tnúhu ndee iní-áⁿ xii-n-í? —càchí-güedé xâhaⁿ-güedé xii-gá.

29 Te Jèsús ní xâhaⁿ-gă xii-güedé:

—Yúhú tnàhá-í cùiní-í cécáⁿ tnúhu-í ìⁿ sá càcáⁿ tnúhu-í núú-ndó te núu na càchí tnúhu-ndo, te cachí tnúhu-í xii-ndo yòo ní taxi tnúhu ndee iní xii-í duha quide-í. 30 Te chí càchí tnúhu xii-í yoo ní táuchíúⁿ ñí dácúándüte ndíi Juáá ñâyüu, ¿Yá Ndiöxí áⁿ cuè téé ñuyüú-a ní táuchíúⁿ dùcaⁿ ní quide ndíi? Te chí càchí tnúhu —càchí-gá xâhaⁿ-gă xii-güedé.

31 Te ní ngüíta-güedé xitnàha-güedé:

—¿Nása cùñaha-o? Chi núu na cùñaha-o sá Yă Ndiöxí

ní táuchíúⁿ dùcaⁿ ní quide ndíi Juáá ñá, te quesaha-dě: “¿Ná cuendá ñá túú ní sàndáá iní-ndó tnúhu ní cáháⁿ ndíi vâiⁿ?”, quesaha-dě. 32 Te ní vâ cúú cùñaha-o sá cuè ñâyüu ñuyüú-a ní táuchíúⁿ dùcaⁿ ní quide ndíi Juáá —càchí-güedé xitnàha-güedé.

Te ducaⁿ ñí xitnàha-güedé chí ñá túú ní cùtnuní iní-güedé nása cùñaha-güedé xii-gá, chí xiyùhú-güedé cue ñâyüu chí nchaa ñâyüu-áⁿ ñí cutnùní ndáá iní-yu sá Yă Ndiöxí ní táuchíúⁿ-gă ducaⁿ ñí quide ndíi Juáá. 33 Te ní xâhaⁿ-güedé xii Jèsús:

—Ñá túú xìní-ndí yoo ní táuchíúⁿ dùcaⁿ ní dácúándüte ndíi Juáá ñâyüu —càchí-güedé xâhaⁿ-güedé xii-gá.

Te Jèsús ní xâhaⁿ-gă xii-güedé:

—Te núu ducaⁿ te ni yùhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gá xâhaⁿ-gă xii-güedé.

12

Cuendá cue téé cuihna iní-xi
(Mt. 21:33-46; Lc. 20:9-19)

1 Te Jèsús ní ngüíta-gá cání-gă ìⁿ cuendú núu ñâyüu nàcuáa tecú tnùní-yu tnúhu-gá, te xâhaⁿ-gă xií-yu:

—Ìⁿ téé ní nacúxi-dé mee-ni yòho yaha stilé núu ñúhú-dě, te ní chidoco-dě cuendá sá vâ cúú dàñú, te ní cadúha-dé núu quíhni-dě ndéhé yoho yàha stilé-áⁿ òré ná cùu, te ní cadúha-dé ìⁿ xító dùcúⁿ núu cáundòdo cue téé coto yoho yàha stilé-áⁿ.

"Te ní sáá ìṣṣṣ nduu quèè-dé quíngaca cuu xica-dě vài nduu, te ní dándõ ndaha-dě sá ñ xitu-dé-áⁿ xii ìṣṣṣ úú cue tée càháⁿ ndihi-dé cuèndá cada chiuⁿ-güedé, te ní ndatnúhu-güedé sá òré ná cúú te cuu cuèndá dava-güedé te ducaⁿ te ní quee-dé cuáháⁿ-dé. ² Te sáá ñ sáá nduu ñ cuu ndéhé yoho yàha stilé sá ñ xitu-dé-áⁿ, te ní xáhaⁿ-dě xii ìṣṣṣ tée xinu cuechi núú-dé: "Cuáháⁿ cááⁿ-n sá cúú cuèndá-í núú cuè tée ní dándõ ndàha-í nchaa yoho yàha stilé sá ñ xitu-í-áⁿ", càchí-dé xàhaⁿ-dě. Te tée xinu cuechi-áⁿ ñ xica-dé cuáháⁿ-dé. ³ Te cue tée-áⁿ ñ tni-güedé tée xinu cuechi-áⁿ, te ní caniha-güedé xii-dé, te dàtnuní ní naciúⁿ ñáhá-güedé, te ñá túú tñhí ná ní sãñaha-güedé. ⁴ Te tée cùu xítóhó yoho yàha stilé-áⁿ ñ tendaha tùcu-dé ingá tée xinu cuechi núú-dé cuáháⁿ-dé. Te òré ní quexio tée xinu cuechi-áⁿ te cue tée-áⁿ ñ sàha ñaha-güedé yúú xii-dé, te ní táhú-güedé díquí-dé, te ní xícuèhé ñáhá-güedé xii-dé. ⁵ Te tée cùu xítóhó nchaa yoho yàha stilé-áⁿ ñ tendaha tùcu-dé ingá tée xinu cuechi núú-dé cuáháⁿ-dé núú cuè tée-áⁿ, dico tée-áⁿ òré ní quexio-dé te ní sañhi ñaha-güedé xii-dé. Te tée cùu xítóhó nchaa yoho yàha stilé-áⁿ ñ tendaha-dě vài-gá cue tée xinu cuechi núú-dé cuáháⁿ ngácáⁿ-güedé sá cúú cuèndá-dé ní cùu dico diu-ni ducaⁿ ñ quide ñaha tùcu cue tée ndèè nchaa yoho yàha stilé-áⁿ xii-güedé, chi

dava-güedé ní caniha-güedé te dava-güedé ní sañhi ñaha-güedé.

⁶ "Te tée cùu xítóhó nchaa yoho yàha stilé-áⁿ ndécú ìṣṣṣdii-ná tée tendaha-dě quíhíⁿ núú cuè tée ní dándõ ndaha-dě sá ñ xitu-dé-áⁿ, te tée tendaha-dě-áⁿ cúú-dé déhe ducuⁿ-dé, te ío cùu iní ñáhá-dě. Te ní sani iní-dé: "Vàha-gá nùu tendaha-í déhe-í-a núhú-dé, chi òré quiní ñáhá-güedé xii-dé te cànehe-güedé sá yíñùhu núú-dé", duha ní sani iní-dé. Te ducaⁿ te ní xáhaⁿ-dě xii déhe-dé-áⁿ sá núhú-dé, te tée-áⁿ cuãnuhú-dé cuáháⁿ ngácáⁿ-dé sá cúú cuèndá tãtã-dě núú cuè tée-áⁿ. ⁷ Dico òré ní xiní cue tée quide chiuⁿ-áⁿ dèhe tée cùu xítóhó nchaa yoho yàha stilé-áⁿ, te ní xitnàha-güedé: "Tée-ãⁿ tée véxi nduu táhú ñuhu-a ndihi sá cáá núú-xi, dico cahni-o-dě te mee-o ndùu táhú-ó sá ndúú táhú-dě", duha ní xitnàha-güedé. ⁸ Te ní tni-güedé tée-áⁿ, te ní sañhi ñaha-güedé, te ní dáquéné-güedé yiqui cùnúú-dé ìṣṣṣ xio yuhu ñuhu núú cáá yòho yaha stilé-áⁿ —duha cuáháⁿ cuèndú ní cani Jèsús núú-yu.

⁹ Te Jèsús ní xáhaⁿ tùcu-gá xií-yu:

—¿Te nchòhó sa cùtnuní iní-ndó nàcuáa cada xítóhó ñuhu-áⁿ ãⁿ? Chi núhú-dé te cahni-dé cue tée-áⁿ te dándõ ndaha-dě ñuhu-dé xii cue tée cùtnuní iní-dé cada ndáá —càchí-gá xàhaⁿ-gá xií-yu.

¹⁰ Te xàhaⁿ tùcu-gá xií-yu:

—Te nchòhó, náa ñá túú dàcuaha-ndo núú tütú Yă Ndiõxí núú cächí-xi:

Yúú sã ní dáquée tíhú cue tée dàcaa vehe,

ní cuu-xi yúú cùnùu vitna.

11 Chi mee Yă Ndiõxí ducaⁿ ní cachí-gá cunduu, te cùu-xi ìⁿ sá ìo cùñúhu-o vitna.

Duha cächí-xi núú tütú-gá — cächí Jèsús xăhaⁿ-gă xii-yu.

12 Te cue tée ní xíndedóho năcuáa ndúu tnúhu ní cáháⁿ-gá ní cuini-güedé tñii ñaha-güedé xii-gá ní cùu, chí ní cutnùní iní-güedé sá cuendá-güedé ní cáháⁿ-gá, dico ní yùhú-güedé tñii ñaha-güedé xii-gá cuendá sá ìo vâi ñáyiu, te ná ìo ná cada ñáhá-yu xii-güedé ní sani iní-güedé, te ní xica-güedé cuáháⁿ-güedé.

Cuendá impuèstú

(Mt. 22:15-22; Lc. 20:20-26)

13 Te sátá ní xica-güedé cuáháⁿ-güedé, te ní tendaha-güedé ìⁿ úú cue tée cùu fariséú, ndihi ìⁿ úú cue tée cùndihi té Hèrodés cuáháⁿ-güedé núú ndécú Jèsús ndúcú-güedé năcuáa cada-güedé datícánuu ñaha-güedé xii-gá núú tnúhu cáháⁿ-gá. 14 Te cue tée-áⁿ ní quexìo-güedé núú Jèsús, te xăhaⁿ-güedé xii-gá:

—Mèstrú, cùtnuní iní-ndí sá ìo ndáá cáháⁿ-n, te ñá túú quide cuendá-n năcuáa cáháⁿ ñáyiu, te cuèi ndédani cää-yu ìⁿ-ni cáháⁿ-n ndihí-yu chí ñá túú quide cuendá-n cuèi ná ñáyiu cùú-yu, te cáháⁿ ndáá-n

năcuáa cáháⁿ Yă Ndiõxí cundecu-o ñúyú-a. Te cachí tnúhu xii-ndí nùu váha-ni quide-ndí sá chăhu-ndí té Cèsár tée ìo cùnuu cuendá impuèstú ãⁿ ñáhá —cächí-güedé xăhaⁿ-güedé xii-gá.

15 Dico Jèsús ní cutnùní iní-gá sá xító ndèé ñáhá-güedé xii-gá, núu ní xăhaⁿ-gă xii-güedé:

—¿Ná cuendá ducaⁿ xìto ndeé ñáhá-ndó xii-í? Chí dánèhé ñáhá xii-í ìⁿ díhúⁿ sá chăhu-ndo cuendá impuèstú te núu nása cää —cachí-gá xăhaⁿ-gă xii-güedé.

16 Te cue tée-áⁿ ní dánèhé ñáhá-güedé xii-gá ìⁿ díhúⁿ sá chăhu-güedé cuendá impuèstú. Te Jèsús ní xăhaⁿ-gă xii-güedé:

—Chí cächí tnúhu xii-í nùu yoo núu-xi ndèé ndihi yoo diu-xi ndeé —cächí-gá xăhaⁿ-gă xii-güedé.

Te ní xăhaⁿ-güedé xii-gá:

—Núú tē Cèsár ndèé ndihi diu-dé —cächí-güedé xăhaⁿ-güedé xii-gá.

17 Te Jèsús ní xăhaⁿ-gă xii-güedé:

—Te núu ducaⁿ te chí năcuáa té Cèsár sá cúú cuendá-dé, te sá cúú cuendá méé Yă Ndiõxí te xíaⁿ năcuáa-ndo-gă —cächí-gá xăhaⁿ-gă xii-güedé.

Te cue tée-áⁿ ìo ní cùñúhu-güedé sá dúcáⁿ ní cáháⁿ-gá.

Cuendá cue ñáyiu ndoto

(Mt. 22:23-33; Lc. 20:27-40)

18 Te sátá dúcáⁿ te ní quexìo ìⁿ úú cue tée cùu saducéú núú ndécú Jèsús, te cue tée-áⁿ

ñã túú sàndáá iní-güedé sá ndótó cue ñáyiú ní xíhí, te ní xáhaⁿ-güedé xii-gá:

19 —Mèstrú, ndíi Moisés càchí ndíi núú tütú ndíi ndècu vitna sá núu ìⁿ téé na cùú-dé te quendóo ñadìhí-dé, te núú ñã túú ní xõ déhe-dé ndihí ñadìhí-dé-áⁿ, te téé cùú ñaní-dé naqueheⁿ-dé ñaha ní quendóo quèé-áⁿ cuendá coo déhe-dé ndihí-aⁿ cuendá téé ní xíhí-áⁿ. 20 Te ní xíndecu úsá tnàhá cue téé mee-ni ndí ñaní-güedé. Te téé díhna ní níhí ñadìhí-dé, te ñã túú ní cùdí-dé cundecu-dé chi ní xíhí-dé, te ni ìⁿ déhe-dé ñã túú ní xõ ndihí ñadìhí-dé. 21 Te téé cùú uú ní naqueheⁿ-dé ñaha ní quendóo quèé-áⁿ, dico ní xíhí tucu-dé, te ni ìⁿ tucu déhe-dé ñã túú ní xõ ndihí ñaha-áⁿ. Te díu-ni ducaⁿ ní xíhí téé cùú uní. 22 Te ní xínu ndí úsá-güedé ní cándeca ñaha-güedé xii ñaha-áⁿ, dico ni ìⁿ-güedé ñã túú ní xõ déhe-güedé ndihí-aⁿ, te ní ndihí-güedé ní xíhí te ndéé núú ní ndihí-ná ní xíhí tnàhá ñadìhí-áⁿ. 23 Te na sàá nduu ndòto-güedé ndihí ñaha-áⁿ, ¿te ndèdacàa-güedé ñadìhí-güedé cuu-aⁿ-i? Chi ndí úsá-güedé ní cándeca ñaha-güedé xii-aⁿ —càchí-güedé xáhaⁿ-güedé xii-gá.

24 Te Jèsús ní xáhaⁿ-gã xii-güedé:

—Ní xíta nchòhó tnúhu càháⁿ-ndó, chi ñã túú xíní-ndó nàcuáa càháⁿ Yã Ndiòxí núú tütú-gá, te ní ñã túú xíní-ndó sã díú-gã ndácú-gã quidé-gã nchaandi túhú sá vãha. 25 Te na càchí

tnúhu-í xii-ndo sã òré ná sàá nduu ndòto nchaa ñáyiú ní xíhí, te dàvá-áⁿ vã yõo-gá dasaⁿ dèhe yoco-xi chi vã yõo-gá candeca tnàha, chi na ndótó-yu te cuu-ná-yu dàtná cue espíritú xínú cuèchi núú Yã Ndiòxí. 26 Te núú nchòhó cuení-ndó càháⁿ-ndó cuendá nchaa ñáyiú ndoto, te díhna-gá dacuàha-ndo nacuáa ní chídó tnùnì ndíi Moisés núú tütú ndíi ni cùú. Chi díu núú tütú ndíi càháⁿ-xi nàcuáa ní xáhaⁿ Yã Ndiòxí xii ndíi cùtnàhá ní càháⁿ ndihí ñaha-gã ìⁿ xichi núú níhnú tnùtaú nchìcúⁿ ñuhú. Te duha ní xáhaⁿ-gã xii ndíi: “Yúhú cùú-í Ndiòxí tã Àbrahám, ndihí té Isàác, ndihí té Jàcób”, duha ní xáhaⁿ Yã Ndiòxí xii ndíi càchí-xi núú tütú ndíi. 27 Te Yã Ndiòxí ñã túú cùú-gá Ndiòxí cue ñáyiú ní xíhí, chi cùú-gá Ndiòxí cue ñáyiú xíndecu vívú, núú xíãⁿ nchòhó ío xíta-ndo tnúhu càháⁿ-ndó. Te sá dúcáⁿ ní càháⁿ-gã cuendá cue téé-áⁿ, te xíãⁿ cùtnùnì sá cuèi ní xíhí-güedé sá cùú-xí tnàha ñáyiú-güedé, dico ndècu vívú-güedé sá cùú-xí-gã —càchí-gã xáhaⁿ-gã xii-güedé.

Tnúhu sá ò-gá cúnúu
(Mt. 22:34-40)

28 Te tnàhá ìⁿ téé dàcuaha ñaha xii ñáyiú nchaa tnúhu ní chídó tnùnì ndíi Moisés ndèdóho-dé nchaa tnúhu càháⁿ Jèsús ndihí cue téé cùú saducéú-áⁿ, te ndèdóho-dé sá sùúnì vãha níhí-gá tnúhu nàdanchocáva-gá. Te ní sàndehe yatni-dé núú-gã, te xáhaⁿ-dè xii-gá:

—Cachí tnúhu xii-í ndèdacàa tnúhu sá ní càháⁿ Yã Ndiòxí

io-gá cúnùu cuu díhna —
càchí-dé xáhaⁿ-dě xii-gá.

29 Te Jèsús ní xáhaⁿ-gã
xii-dé:

—Duha càháⁿ tnúhu sá
io-gá cúnùu: “Nchòhó ñáyiu
isràél io váha chí cùndèdóho
tnúhu-a. Hⁿdii díí-ni Yá
Ndiöxí ndécú, te diu-ni-gá
cúú-gã Ndiöxí-ó. 30 Te cuu
iní-ndó Dütú Ndiöxí Yaá
cúú Ndiöxí-ndó nì yuhu
ni iní-ndó, te caní iní-ndó
càda-ndo datná cuiní mée-gã,
te mee-ni tnúhu váha caní
iní-ndó cuendá cuu vii cuu
váha-ndo núú-gã, te coo
iní-ndó càda-ndo nacúaa cuu
váha iní-gá”, duha càháⁿ
tnúhu sá io-gá cúnùu. 31 Te
duha càháⁿ tucu ingá tnúhu
cùu úú sá io cùnùu: “Cuu
iní-ndó tnàha ñáyiu-ndo
dàtná cúú iní-ndó mée-ndo”,
duha càháⁿ tnúhu cùu uú-án.
Te úú duha-ni tnúhu-a cùu-xi
tnúhu sá io-gá cúnùu —
cachí-gá xáhaⁿ-gã xii-dé.

32 Te téé dàcuaha ñaha xii
ñáyiu nchaa tnúhu ní chídó
tnùní ndíi Moisés ní xáhaⁿ-dě
xii-gá:

—Mèstrú, váha-ni càháⁿ-n
chí ndáá sá Hⁿdii-ni Yá Ndiöxí
ndécú, te ñá túú-gã ndéé
ndécú ingá ndiöxí. 33 Te dàtná
ní cachí-n sã nì yuhu ni iní-ó
cùu iní-ó Yá Ndiöxí, te caní
iní-ó càda-o nacúaa cuu vii
cuu váha iní-gá te io vii io
váha cuu iní-ó dàtná cuiní
mée-gã, te coo iní-ó càda-o
nacúaa cuu váha iní-gá, te
cuu iní-ó cuè tnaha ñáyiu-o
dàtná cúú iní-ó mée-o. Te
nchaa xiãⁿ io-gá xíní ñùhu-xi
cada-o dacúxí sã cuãñaha-o
quiti cahni-güedé te cáyú-di

nduu táhú ñáhá Yá Ndiöxí,
ndíhi dàcúxí nchaa dava-gá
sá sãñaha-o ndùu táhú-gã —
càchí-dé xáhaⁿ-dě xii-gá.

34 Te sá dúcáⁿ io váha ndùu
tnúhu ní càháⁿ téé-án, núu ní
xáhaⁿ Jèsús xii-dé:

—Luha-ná cúmăní xii-n te
ndíhu ndaha ñàha Yá Ndiöxí
—càchí-gá xáhaⁿ-gã xii-dé.

Te sá dúcáⁿ ñí xáhaⁿ-gã
xii téé-án, núu vá yõo Hⁿ-gá
ní cùyii nágá tnúhu nducu
tnúhu-yu núú-gã.

Yoo cùu Xítóhó Jesucrìstú

(Mt. 22:41-46; Lc. 20:41-
44)

35 Te Jèsús yíhí-gã xiti
veñúhu càhnu sá io cùnùu
danehé-gã ñáyiu, te xáhaⁿ-gã
xii-yu:

—Cue téé dàcuaha ñaha xii
ñáyiu nchaa tnúhu ní chídó
tnùní ndíi Moisés càchí-güedé
sá Cristú Yaá tendaha Yá
Ndiöxí quixi ñuyiú-a cùu-gá
déhe ndíi Dàvíí, te ndíi-án ñí
cunaha vìhi ní xíhí ndíi. ¿Te
ná cuendá ducaⁿ càháⁿ-güedé?

36 Te mee ndíi Dàvíí-án ñí
dácáhú iní ñáhá Espíritú Yá
Ndiöxí xii ndíi nàcuáa càháⁿ
ndíi, te duha ní cachí ndíi:

Dütú Ndiöxí ní xáhaⁿ-gã xii
Yaá cúú Xítóhó-í:

“Ngóo xio cùha-í,

te yúhú cada-í te nchaa sá
cúú ùhú iní ñáhá xii-n
canehe-xi sá yíñùhu
núú-n.”

Duha ní xáhaⁿ Dütú Ndiöxí xii
Yaá cúú Xítóhó-í.

Duha ní cachí ndíi. 37 ¿Te nása
cùu Cristú déhe ndíi Dàvíí,
te mee ndíi ní cachí ndíi sá
cúú-gá Xítóhó ndíi? —càchí
Jèsús xáhaⁿ-gã xii-yu.

Te ío cuéhé ñáyiú ní xíndedóho nchaa tnúhu ní cáháⁿ-gá, te ío ní cudíí ínì-yu ní xíndedóho ñàhá-yu xii-gá.

Jèsús càháⁿ-gá cuèndá cue téé dàcuaha ñaha xii ñáyiú nchaa tnúhu ní chídó tnùnì ndíi Moisés

(Mt. 23:1-36; Lc. 11:37-54; 20:45-47)

³⁸ Te òré dánèhé ñàhá Jèsús xii cue ñáyiú, te xáhaⁿ-gá xií-yu:

—Cada cuèndá-ndó vǎ cádá-ndó dàtná quidé cué téé dàcuaha ñaha xii ñáyiú nchaa tnúhu ní chídó tnùnì ndíi Moisés, chí cue téé-áⁿ tnàhá ínì-güedé cuihnu-güedé dóó nání sǎ sácúihnu cue téé cùnuu-gá te cuínì-güedé sǎ méé-ní ndìhi tnúhu yíñùhu cáháⁿ ndìhi ñaha ñáyiú xii-güedé nchaa núú xícá cùu-güedé. ³⁹ Te nàcáxi-güedé xilé sácóo nchihì cue téé cùnuu-gá xití veñúhu sácóo nchihì-güedé. Te

ducaⁿ-ni quíde-güedé cuèi òré quíhu-güedé mèsá caxi-güedé òré ndécú-güedé ìⁿ vico, chí mee-ni núú sácóo cue téé cùnuu cuínì-güedé coo-güedé.

⁴⁰ Te quèndeé-güedé vehe nchaa ñáyiú quèé, te ío naha càháⁿ ndìhi-güedé Yǎ Ndiǒxí dándahú-güedé méé-güedé sǎ ìo quíde ndáá-güedé cuèndá sǎ cuínì-güedé cáháⁿ váha ñáyiú cuèndá-güedé. Te sǎ dúcáⁿ quíde-güedé te ío-gá ndoho-güedé núú ùhú núú ndàhú dàcúúxí dàva-gá ñáyiú —càchì-gá xáhaⁿ-gǎ xií-yu.

Díhúⁿ nduu táhú Yǎ Ndiǒxí ní dáquèe ìⁿ ñaha ndàhú ñaha quèé

(Lc. 21:1-4)

⁴¹ Te núcóo Jèsús xití veñúhu yatni núú ndécú àlcanciá te ndèhe-gá xídáquèe ñáyiú díhúⁿ xití alcanciá-áⁿ, te tnàhá cue ñáyiú cuica xídáquèe-yu vǎi díhúⁿ. ⁴² Te ní quexìo ìⁿ ñaha ndahú ñaha quèé, te ndèhe-gá ní dáquèe-aⁿ úú tnàhá díhúⁿ còbrì xití alcanciá, te díhúⁿ-ǎⁿ ìo sacú yáhu-xi. ⁴³ Te Jèsús ní cana-gá cue téé xica cuu ndìhi-gá, te ní xáhaⁿ-gǎ xii-güedé:

—Na càchì tnúhu ndáá-í xii-ndo sǎ ñàha ndahú ñaha quèé-a ío-gá nándìhi díhúⁿ nǐ dáquèe-aⁿ xití alcanciá dàcúúxí díhúⁿ nǐ dáquèe dàva-gá-yu. ⁴⁴ Chí nchaa ñáyiú-áⁿ nǐ dáquèe-yu mee-nǎ díhúⁿ sǎ nǐ quendóo-ná, dico ñaha quèé-a cuèi ndàhú-aⁿ dico ní dáquèe-aⁿ nihùí díhúⁿ sǎ cuááⁿ sǎ cǎxí-áⁿ ní cùu —cachì-gá xáhaⁿ-gǎ xii-güedé.

13

Jèsús càchì-gá sǎ ngóyó veñúhu

(Mt. 24:1-2; Lc. 21:5-6)

¹ Te òré ní ndee Jèsús xití veñúhu càhnu sǎ ìo cùnuu, te ìⁿ téé xica cuu ndìhi-gá ní xáhaⁿ-dè xii-gá:

—¡Mèstrú, cundehe nǎ ío vii ní sǎá veñúhu-aⁿ ndìhi nchaa vehe nèhe tnaha ndìhi-xi, te ío vii ndǎa nchaa yúú yíhì! —càchì-dé xáhaⁿ-dè xii-gá.

² Te Jèsús ní xáhaⁿ-gǎ xii-dé:

—Nchaa nàcuáa càa nchaa vehe sá cùññu-n-a vītna sáa nduu te vā cūndū-gā-xi dātná cáá-xí vītna, chi ní ñⁿ-gā yúú vā códó nchihī tnaha-xi, chi ndihī ngoyo —càhí-gā xāhaⁿ-gā xii-dé.

Nàcuáa cada-xi nduu ta cūyatni naa ñuyúú

(Mt. 24:3-28; Lc. 21:7-24; 17:22-24)

³ Te Jèsús ní xica-gā ndihī cue téé xica cuu ndihī-gā cuáháⁿ ndihī ñaha-gā xii-güedé yucu nāni Olívú, te yucu Olívú-áⁿ tūu ndáá núú cáá veññu cāhnu sá ïo cūnuu. Te Jèsús ní quexio-gā ndihī-güedé yucu Olívú-áⁿ, te xíaⁿ nī ngóo-gā te núú núcōo-gā-áⁿ nī sáháⁿ té Pèlú ndihī té Jàcobó ndihī té Juàá ndihī té Ndríxí, te dayuhu nī xáhaⁿ-güedé xii-gā:

⁴ —Cuñí-ndí cachí tnúhu-n nā nduu ducaⁿ cada-xi ngoyo veññu cāhnu sá ïo cūnuu, àdi nāndi cūu sá cádá-xí cuendá cutnūnī iní-ndí sá sà ta cuyatni nduu ducaⁿ cada-xi —cachí-güedé xāhaⁿ-güedé xii-gā.

⁵ Te Jèsús ní xáhaⁿ-gā xii-güedé:

—Ío quihī iní-ndó cūndecu-ndo cuendá sá vā yōo dandàhú ñáhá xii-ndo. ⁶ Chi ío cuéhé cue téé coo ñuyúú te danāni-güedé méé-güedé dātná nāni-í, te cachí-güedé: “Yúhú cū-í Crístú Yaá ní tendaha Yā Ndióxi véxi ñuyúú-a”, duha cachí-güedé. Te sá dúcáⁿ cāháⁿ-güedé te ío vai ñáyiu dandàhú-güedé.

⁷ Te òré ná nihí-ndó tnúhu sá nāá-güedé ndēni ní cuu,

te vā yúhú-ndó chi dacuití sá dúcáⁿ càda-xi, dico vátá sáá-gā nduu nāa ñuyúú òré ducaⁿ càda-xi. ⁸ Chi cue téé ñⁿ nàcióⁿ nāá-güedé ndihī cue téé ingá nàcióⁿ, te titní ñuú ngúita-güedé nāá-güedé, te titní xichi ñuyúú nihī vīhi tnáa, te titní tucu xichi ñuyúú coo tnamá, te ío-gā cuéhé sá yāha ñáyiu. Te nchaa sá dúcáⁿ càda-xi-áⁿ cúú-xí tnūndòho sá vītna vāha vāha quèsaha-xi sácúú-xí cuè ñáyiu ndècu ñuyúú-a.

⁹ 'Dico nchòhó ío quihī iní-ndó cūndecu-ndo, chi nchaa ñáyiu na cūu úhú iní ñáhá xii-ndo cuáha cuendá ñáhá-yu xii dava-ndo núú cuè téé cūchiuⁿ, te candeca ñaha-güedé xii-ndo quihíⁿ xití veññu-güedé, te yacáⁿ caniha-güedé xii-ndo. Te quihíⁿ-ndó núú cuè téé yindaha nacióⁿ àdi núú dāva-gā cue téé cūnuu sá cuendá-í, te nchòhó nihí-ndó nàcuáa cada-ndo cāháⁿ vāha-ndo cuendá-í núú-güedé. ¹⁰ Te cūmānī-gā sáa nduu nāa ñuyúú-a te sa cutēnuu tnúhu-í nī càa xico ñuyúú-a, te tnúhu-áⁿ cāháⁿ-xi nàcuáa nanihí tǎhú ñáyiu. ¹¹ Te òré ná candeca ñaha ñáyiu xii-ndo quihíⁿ núú cuè téé cūchiuⁿ cuáha cuendá ñáhá-yu, te òré vátá sáá-gā-ndó núú-güedé te vā cání iní-ndó núu nāsa cunduu tnúhu cūñaha-ndo xii-güedé. Chi òré-nā te Yá Ndióxi dacāhu iní ñáhá-gā xii-ndo nāsa cunduu tnúhu cūñaha-ndo xii-güedé, te

diu-ni tnúhu sá dácàhu iní ñáhá-gã-án cũñaha-ndo xii-güedé. Te ñá díú mèe-ndo cáháⁿ-ndó chi Espíritú Yá Ndiõxí cáháⁿ-xi yuhu-ndo. 12 Te dava cue téé cuáha cuendá-güedé ñaní-güedé núú cuè téé cùchiuⁿ cuendá cahni ñaha-güedé. Te dava cue téé cùu tátá diu-ni ducaⁿ càda-güedé cuáha cuendá-güedé déhe-güedé núú cuè téé cùchiuⁿ. Te dava cue téé cùu déhe cuu úhú iní-güedé tátá-güedé ndíhi náná-güedé, te cuáha cuendá ñáhá-güedé xii-yu núú cuè téé cùchiuⁿ cuendá cahni ñaha-güedé xii-yu. 13 Te ío cuéhé ñáyiú cuu úhú iní ñáhá-yu xii-ndo sá cuendá-í, dico nchaa nchòhó ñáyiú na càda ndee-ni iní canchicúⁿ nihnu ñaha-ni xii-í te naníhí tàhú-ndó.

14 "Te ndíi Dániél téé ní xóo cáháⁿ tnúhu Yá Ndiõxí ndéé sanaha ñí chídó tnùní ndíi núú tütú ndíi cuendá ñⁿ sá dáquèe tíhú Yá Ndiõxí cundecu ñⁿ xichi núú ñà túú tàú-xi cundecu-xi, te xiãⁿ cada-xi sá vã cündècu-gá ni ñⁿ ñáyiú xíáⁿ. Te cada cuendá váha-ndo nàcuáa ní cáháⁿ ndíi, chi nduu na quíní-ndó xiãⁿ cundecu-xi ñⁿ xichi núú ñà túú tàú-xi cundecu-xi, te dàvá-án nchaa ñáyiú xĩndecu distritú Júdeá xíní ñùhu-xi cunú-yu quíhíⁿ-yu xití yucu. 15 Te nchaa ñáyiú ndáa ndódó dìquí véhé-xí vã ndíhu-gá-yu vehé-yu quehéⁿ-yu ñⁿ ndachíuⁿ-yu canehé-yu quíhíⁿ. 16 Te nchaa ñáyiú cuáháⁿ yucu

ni vã ñùhú-gá-yu vehé-yu cúnúquehéⁿ-yu dóõ-yu. 17 ¡Te ndáhú ní cuu nchaa ñáyiú dìhí ñùhú déhe-xi, ndíhi cue ñáyiú dìhí xĩndeca déhe vitna sàdi na saá nduu dùcaⁿ cada-xi! 18 Te nchòhó ío chí càcáⁿ táhú núú Yá Ndiõxí cuendá sá vã dúcáⁿ ndòho-ndo yóó quidé vixiⁿ-xi. 19 Chi dàvá-án coo tnúndòho cahnu vihi ñuyíú, te vátá ñⁿ ndùu-gá coo tnúndòho cahnu vihi-án ndéé cúnáhá ní cadúha Yá Ndiõxí ñuyíú, chí diu-ni dàvá-án coo tnúndòho cahnu vihi-án, te ñí núú cuáháⁿ núú véxi vá cóó-gã tnúndòho-án. 20 Te Yá Ndiõxí càchí-gá sá vã ío vãi nduu coo tnúndòho cahnu vihi-án ñuyíú sá cuendá nchaa ñáyiú ní cáháⁿ-gá cundecu ndíhi-gá. Te núu vãi nduu na coo tnúndòho-án, te vá yõ cácu nihnu.

21 "Te dàvá-án cũñaha ñáyiú xii-ndo: "Chí cündèhe iha, chí iha ní quexìo Cristú Yáa ní tendaha Yá Ndiõxí véxi ñuyíú-a", duha cũñáhá-yu xii-ndo. Àdi quesahá-yu: "Chí cündèhe yacáⁿ chí yacáⁿ ndécú-gã", quesahá-yu. Te vá quĩndáá iní-ndó tnùhu càháⁿ-yu. 22 Te coo cue téé danàni-güedé méé-güedé dàtná nání-í te cachí-güedé sá cúú-güedé Yáa ní tendaha Yá Ndiõxí véxi ñuyíú-a. Te dava-güedé cachí-güedé sá cúú-güedé cue téé càháⁿ tnúhu Yá Ndiõxí dico ñá ndáa sá cúú-güedé cue téé càháⁿ tnúhu-gá, te cada-güedé titní núú sá vã yõ tnáhí ndàcu cada cuendá dandáhú-güedé ñáyiú, te caní iní-güedé

dandàhú-güedé ndéé cue ñáyiú ní cáháⁿ Yá Ndiöxí cundecu ndihi-gá. ²³ Te vitna ío váha cuáha-ndo cuendá, te quíhi iní-ndó cundecu-ndo, chí nchaa sa ní dátúha ñaha-í xii-ndo.

Nàcuáa cada-xi òré quixi tucu Tée cùu ñaní tnáhá nchàa ñáyiú

(Mt. 24:29-35,42-44; Lc. 21:25-36)

²⁴ Te ná yáha-ni coo tnúndòho cahnu vihi-áⁿ, te vá dáyèhé-gá nchícanchii te ní vá dáyèhé-gá yóó. ²⁵ Te ngoyo nchaa chódíní ndèé andiú, te quidi-xi andiú. ²⁶ Te dàvá-áⁿ quini ñáhá nchàa ñáyiú xii yúhú Tée cùu ñaní tnáhá-yu ncháa-yu quee-í andiú quixi-í ichi xití vícò, te quini-yu sá ío cahnu cuu-í, te quide-í nchaa sá vâha. ²⁷ Te tendaha-í cue espíritu xínú cuèchi núú-í quíhíⁿ-xi nadatàcá-xi nchaa ñáyiú ní cáháⁿ-í chitnahá ñáhá xii-í xíndecu ní càa xico ñuyíú.

²⁸ Te cundehe-ndo nàcuáa quide yutnu ngúxí, chí yutnu-áⁿ ndúú yùte núú dìté-xi te nàtahú ndaha-xi, te òré ducaⁿ quide-xi te càchí-ndó sã sã ní cuyatni nuu cahni. ²⁹ Te ducaⁿ sãtnahá-xi cada-xi òré ná quini-ndó cada-xi nchaa nacuéa ní cáháⁿ-í, te cutnùní iní-ndó sã sã ní cuyatni vii-nã nduu nàa ñuyíú. ³⁰ Te na càchí tnúhu ndáá-í xii-ndo sã òré vátá cùu-gá cue ñáyiú xíndecu ñuyíú-a vitna, te cada-xi nchaa nàcuáa ní cáháⁿ-í. ³¹ Te andiú ndihí ñuyíú-a chí ndihí nihnu-xi, dico tnúhu-í chí

vá ndíhí nihnu-xi chí cùu-xi tnúhu ndáá.

³² Dico ñá túú cùtnuní ná nduu quixi tucu-í, te ní ñá túú cùtnuní ná òré chí vá yóo xini, te ní cue espíritu xínú cuèchi núú Yá Ndiöxí ñá túú xini-xi ná nduu quixi-í, te ní mée yúhú tée cùu Déhe Dútú Ndiöxí ñá túú xini-í ná nduu quixi tucu-í, chí ñndi díí-ni mee Tãtã-í Dútú Ndiöxí xini-gá núu ná nduu quixi-í.

³³ Te nchòhó xini ñuhu-xi sá ío quíhi iní-ndó cundecu-ndo, te cáháⁿ ndihi-ndo Yá Ndiöxí, chí ñá túú xini-ndó nã nduu quixi tucu-í. ³⁴ Te na càchí tnúhu-í xii-ndo cuendá ñndi tée cùní quíngaca cuu xica. Te tée-áⁿ cùmání-gã quee-dé vehe-dé te ní xáhaⁿ-dẽ xii cue tée xínu cuèchi núú-dẽ sá ná cáda cuendá-güedé vehe-dé. Te ní sãñaha-dẽ xii-güedé ndí dííⁿ núú-güedẽ chiuⁿ cada-güedé. Te ní xáhaⁿ-dẽ xii tée ndèé yuyèhe sá ná cundecu túha-ni-dé yuyèhe ndéé nàsáá-dé. ³⁵ Te duha nduu tnúhu cáháⁿ-í cuendá nchòhó cundecu túha-ndo, chí ñá túú xini-ndó nã nduu te ní ñá túú xini-ndó nã òré quixi tucu yúhú Yáa cúú Xitohó-ndó, núú òré sa ní cundiquiⁿ, àdi dava niú, àdi òré sa ní cana uuⁿ líhi, àdi òré sa ta cùditó cuáháⁿ, núú xiãⁿ ío chí cùndècu túha. ³⁶ Te duha cáháⁿ-í chí na cuáháⁿ òré ñá túú nã yihí iní-ndó quèxio-í, te ñá túú ndècu túha-ndo. ³⁷ Te dàtná-ni xáhaⁿ-í xii nchòhó sá cùndècu túha-ndo, te diu-ni ducaⁿ xáhaⁿ-í xii nchaa dava-gá ñáyiú sá cùndècu túha-yu —

càchí-gá xǎhaⁿ-gǎ xii-güedé.

14

*Ndücu-güedé nàcuáa
cada-güedé cahni-güedé Jèsús
(Mt. 26:1-5; Lc. 22:1-2; Jn.
11:45-53)*

¹ Te cùmání úú-gá nduu te quesaha vico pascuá, vico xèxi ñáyiú pàá sá ña túú yìhi levadurá. Te cue dútú cùnùu, ndihi cue téé dàcuaha ñaha xii ñáyiú nchaa tnúhu ní chídó tnùnì ndíi Moisés ndúcú-güedé nàcuáa cada-güedé dandàhú-güedé Jèsús cuendá tñi ñaha-güedé xii-gá te cahni ñaha-güedé.

² Te ní xítñaha-güedé:

—Váha-gá sá vǎ tñí-ó Jèsús mei ndùu vico, chi núu ducaⁿ na càda-o te ío dusaⁿ càda ñáyiú —càchí-güedé xítñaha-güedé.

*Íñ ñadìhí chíhí-áⁿ àcítí díquí
Jèsús*

(Mt. 26:6-13; Jn. 12:1-8)

³ Te Jèsús ndécú-gǎ ñuú Bètaniá vehe íñ téé nàni Xímú, téé ní tnahá cuéhé sǎ dátèhyú nihnu-xi yiqui cùñú-ó. Te yìhi Jèsús mèsá xéxí-gǎ ní quexìo íñ ñadìhí néhé-áⁿ íñ sá ñi cuáha yúú vǎha yúú nání àlabastrú, te xítí xǎⁿ ñúhú àcítí sàháⁿ tnámí sǎ nání nǎrdú sá ío ndèyáhu, te ní táhú-áⁿ xǎⁿ te acítí ñúhú xítí-xi-áⁿ ñi sódó-aⁿ díquí Jèsús. ⁴ Te íñ úú cue téé xíndecu-áⁿ ñi cudééⁿ-güedé sá dúcáⁿ ñi quide-aⁿ, te ní xítñaha-güedé:

—Ñá túú quide váha ñaha-áⁿ dàcáⁿ quidé-áⁿ, chi íí ñi dàcuíta-aⁿ acítí váha-áⁿ. ⁵ Chi

váha-gá núu cuyáhu acítí-áⁿ sá ùní ciendú díhúⁿ denàriú, te díhúⁿ sǎ cùyáhu acítí-áⁿ cuu cuendá ñáyiú ndàhú ní cùu —cachí-güedé xítñaha-güedé.

Te ní tenáa-güedé ñaha-áⁿ sǎ dúcáⁿ ñi quide-aⁿ.

⁶ Te Jèsús ní xáhaⁿ-gǎ xii-güedé:

—Chí dáñá, vá dásatú-ndó ìní ñadìhí-a, chi sá ñi quide ñaha-aⁿ xii-í cùú-xí íñ sá vǎha. ⁷ Chi cue ñáyiú ndàhú ducaⁿ-ni cùtnahá ñáyiú-áⁿ tnuú-ndó, te nání òré càchí ìní-ndó te chindee-ndó-yu. Dico yúhú chi vá ncháá ndùu cundecu ndihi ñaha-í xii-ndo ñùyíú-a. ⁸ Te ñadìhí-a ní quide-aⁿ íñ sá vǎha ndéé není ní ndacu-aⁿ, chi sá dúhá ñi quide ñaha-aⁿ xii-í ní chihí ñaha-aⁿ àcítí, te xǎⁿ cada ìní-ndó sǎ sá quide túha-aⁿ yiqui cùñú-í cuendá quíndúxi-xi. ⁹ Te na càchí tnúhu ndáá-í xii-ndo sǎ ndèni ní cuu ñihí ñuyíú ná càháⁿ ñáyiú tnúhu-í, te càháⁿ-yu tnàhá cuendá ñadìhí-a cuendá quini nchaa ñáyiú nàcuáa ñi quide-aⁿ, te ducaⁿ vǎ nàcuánaa-yu —càchí-gá xǎhaⁿ-gǎ xii-güedé.

*Té Jüdás ndúcú-dé nàcuáa
cada-dé cuáha cuendá-dé Jèsús
núu cué téé cùu úhú ìní ñáhá
xii-gá*

(Mt. 26:14-16; Lc. 22:3-6)

¹⁰ Te té Jüdás Iscarioté ní sáháⁿ-dé ní ndatnúhu-dé ndihi cue téé cùu dútú cùnùu sá cuáha cuendá-dé Jèsús núu-güedé, te núu tnàhá té Jüdás-áⁿ cùu ùxúú tnàhá cue téé xica cuu ndihi-gá

ní cùu, ¹¹ Te òré ducaⁿ nĩ ndatnúhu-dé ndihi-güedé, te ío ní cudíí iní-güedé, te ní xáhaⁿ-güedé xii-dé sá cuãñaha-güedé díhúⁿ xii-dé. Te té Jùdás-án nĩ ngüíta-dé ndúcú-dě nàcuáa cada-dé cuáha cuendá-dé Jèsús núú-güedé.

Cùdini Jèsús ndihi cue téé xica cuu ndihi-gá

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Te ní sáá nduu nĩ que-saha víco pascuá, víco ñá túú xèxi ñáyiú pàá sá ñà túú yìhi levadurá, te diu-ni nduu-ãⁿ sáhní-güedé ìⁿ mbéé líhli xèxí-yu nduu víco pascuá-án. Te cue téé xica cuu ndihi Jèsús ní xícáⁿ tnúhú-güedé núú-gã, te xáhaⁿ-güedé xii-gá:

—Mèstrú, véxi-ndí xícáⁿ tnúhú-ndí núú-n nũu ndèé cáá vèhe cuiní-n càda túha-ndí sá cùdini-o sacuaa nduu víco pascuá —càchí-güedé xáhaⁿ-güedé xii-gá.

¹³ Te Jèsús ní xáhaⁿ-gã xii úú-ni tnàhá cue téé xica cuu ndihi-gá:

—Chí cuaháⁿ xití ñuú-ãⁿ, te yàcáⁿ naníhí-ndó ìⁿ téé tànehe yóó ndute, te téé-án cándèndaha-ndo-dě quíhíⁿ.

¹⁴ Te núu ndèdacàa vehe na ndíhu-dé te xíaⁿ quíhu-ndo. Te cúñaha-ndo xii xítóhó vehe-án: “Yáá cúú Mèstrú càchí-gá sá nũu ndèdacàa xichi xití vehe-n cuãñaha núu-n xii-gá cudini-gá ndihi cue téé xica cuu ndihi-gá sacuaa nduu pascuá”, duha cúñaha-ndo. ¹⁵ Te dătnuní danèhé ñáhá-dě xii-ndo

ìⁿ quartú cáhnú càa núú ñnu, chí vehe yòdo tnaha cuu-xi, te sa ní quide túha-dé nchaa sá nándíhi, te nchòhó dicó-nă comidá cada túha-ndo cùdini-o —cachí-gá xáhaⁿ-gã xii-güedé.

¹⁶ Te cue téé-án nĩ xica-güedé cuaháⁿ-güedé xití ñuú-án, te nchaa-ni nàcuáa ní xáhaⁿ Jèsús ní cuu. Te ní quide túha-güedé sá cùdini-güedé ndihi-gá sacuaa nduu víco pascuá-án.

¹⁷ Te sátá nĩ cundiquiⁿ te ní quexio Jèsús ndihi ndi úxúú cue téé xica cuu ndihi-gá.

¹⁸ Te cuánguihu-gá mèsá ndihi-güedé cuendá cudini ndihi ñaha-gá xii-güedé, te òré yíhí-gã mèsá ndihi-güedé, te xáhaⁿ-gã xii-güedé:

—Na càchí tnúhu ndáá-í xii-ndo sá ìⁿ nchohó cue téé xèxi ndihi ñaha xii-í cuáha cuendá ñáhá-ndó nũu cuè téé cùu úhú iní ñáhá xii-í —càchí-gá xáhaⁿ-gã xii-güedé.

¹⁹ Te sá dúcáⁿ nĩ xáhaⁿ-gã xii-güedé, te nchaa-güedé ní ngüíta-güedé cùndiyí-güedé. Te da ìⁿ da ìⁿ-güedé ní ngüíta-güedé xícáⁿ tnúhú-güedé núú-gã, te xáhaⁿ-güedé xii-gá:

—¿Ná díú yúhú ducaⁿ sàni iní-n càda-í-u? —càchí-güedé xáhaⁿ-güedé xii-gá.

²⁰ Te Jèsús ní xáhaⁿ-gã xii-güedé:

—Diu-ni ìⁿ nchòhó cue téé úxúú xícá cùu ndihi-í, téé na dàquèndaha còhó òré daquèndaha-í, téé-án cuáha cuendá ñáhá-dě xii-í núú cuè téé cùu úhú iní ñáhá. ²¹ Te yúhú Téé cùu ñani

tnáhá-ndó nchàa-ndo ñuhu ichi-í cuáháⁿ-í ndoho-í nàcuáa cáháⁿ-xi núú tütú Yã Ndiöxi. Dico ndàhú ní cuu téé ducaⁿ na cuáha cuendá ñáhá xii-í núú cuè téé cùu úhú iní ñáhá, chi váha-gá sá vã cácu téé-áⁿ cundecu-dé ní cùu, te ñá díú sã ní cacu-dé te ducaⁿ càda-dé —càchí-gá xáhaⁿ-gã xii-güedé.

22 Te nini cùdini cue téé xica cuu ndihí Jesús ní queheⁿ-gã pàá, te ní ndacáⁿ táhú-gã núú Yã Ndiöxi, te dàtnùní ní táhú cuèchi-gá, te ní ngüíta-gá dácãhñu ñaha-gã xii-güedé, te xáhaⁿ-gã:

—Chí quéhén pàá-a caxi-ndo, te cada iní-ndó sã cúú-xí dàtná yiquí cuñú-í —càchí-gá xáhaⁿ-gã xii-güedé.

23 Te ní queheⁿ-gã vãsú ñúhú ndúdí ndéhé yoho yàha stilé, te ní ndacáⁿ táhú-gã núú Yã Ndiöxi, te dàtnùní ní ngüíta-gá sãñaha-gã xii-güedé cuendá coho-güedé luha luha sá ñúhú xití-xi, te nchaa-güedé ní xihí. 24 Te ní xáhaⁿ-gã xii-güedé:

—Ndudí ndéhé yoho yàha stilé-a cada iní-ndó sã cúú-xí dàtná níñi-í sá cáti òré cahni ñaha-güedé xii-í. Te sá dúcáⁿ càti níñi-í xiáⁿ cutnùníní ndáá sá Yã Ndiöxi cada-gá ingá núú sã vãha sá cúú-xí vai ñáyiú dàtná ní cachí-gá cada-gá. 25 Te na càchí tnúhu ndáá-í xii-ndo sã vitná-nã duha xihí-í ndudí ndéhé yoho yàha stilé-a te vá cóhó-gã-í, dico na sãá nduu cundecu-í núú ndécú Yã Ndiöxi táxi tnùníní-gá, te dàvá-áⁿ cada iní-í sá dàtná sá cóhó tucu-í chi ío cudí iní-í —càchí-gá xáhaⁿ-gã xii-güedé.

Jèsús càháⁿ-gá sá tẽ Pèlú cuñaha-dẽ xii ñáyiú sá ñà túú xini ñáhá-dẽ xii-gá

(Mt. 26:30-35; Lc. 22:31-34; Jn. 13:36-38)

26 Te Jèsús ní xita-gá ihⁿ ndudú ndihí cue téé xica cuu ndihí-gá, te dàtnùní ní xica-gá cuáháⁿ-gã ndihí-güedé yucu Òlívú. 27 Te yacáⁿ ní xáhaⁿ-gã xii-güedé:

—Na càchí tnúhu-í xii-ndo sã nchaa-ndó dàña nihnu ñaha-ndo xii-í niú vitna, chi quee ndáá-xi nàcuáa cáháⁿ-xi núú tütú Yã Ndiöxi núú càchí-xi: “Yúhú cuáha-í tnúhu cahni-güedé téé cùu toli, te nchaa mbéé-dé ndihí-güedi cuténuu”, duha càchí-xi núú tütú-gá. 28 Dico na cùú-í te ndoto-í te codonúu-í núú-ndó quíhíⁿ distritú Galileá —càchí-gá xáhaⁿ-gã xii-güedé.

29 Te té Pèlú ní xáhaⁿ-dẽ xii-gá:

—Te cuèi nchaa-güedé ná dàndóo ñaha-güedé xii-n, dico yúhú chi vá dàndóo ñaha-í xii-n —càchí-dé xáhaⁿ-dẽ xii-gá.

30 Te Jèsús ní xáhaⁿ-gã xii-dé:

—Na càchí tnúhu ndáá-í xii-n sã niú vitna cumání-gã cana líhi úú xito, te úní xito cáháⁿ-n núú ñáyiú sá ñà túú xini ñáhá-n xii-í —càchí-gá xáhaⁿ-gã xii-dé.

31 Dico té Pèlú ní cáháⁿ ñíí-dé, te xáhaⁿ-dẽ xii-gá:

—Cuèi na cùu ndihí ñaha-í xii-n dico vá cáháⁿ-í núú ñáyiú sá ñà túú xini ñáhá-í xii-n —càchí-dé xáhaⁿ-dẽ xii-gá.

Te nchaa dava-gá cue téé xica cuu ndihí-gá díu-ni ducaⁿ ní xáhaⁿ-güedé xii-gá.

Jèsús càháⁿ ndihi-gá Yă Ndiöxí ìⁿ xichi núú nání Gètsemaní (Mt. 26:36-46; Lc. 22:39-46)

³² Te Jèsús cuáháⁿ-gá ndihi cue téé xica cuu ndihi-gá ìⁿ xichi núú nání Gètsemaní. Te òré ní quexio-gá ndihi-güedé xiáⁿ, te ní xáhaⁿ-gă xii-güedé:

—Chí cúnúçõo iha cun-detu-ndo na quihíⁿ-í yacáⁿ cáháⁿ ndihi-í Yă Ndiöxí — cächí-gă xăhaⁿ-gă xii-güedé.

³³ Te ndëca-gá té Pèlú, ndihi té Jàcobó, ndihi té Juàá cuáháⁿ, te ñá túú tñahí-gá cúú văha iní-gá te ní ngüita-xi súúní ndihú iní-gá. ³⁴ Te ní xáhaⁿ-gă xii cue téé úní-án:

—Súúní ndihú iní-í dàtná sá cùú-í, te chí quëndõo iha te vă cùdú-ndó — cächí-gă xăhaⁿ-gă xii-güedé.

³⁵ Te sa ñùnchií luha ní xica ndehe Jèsús núú ndécú-güedě, te ní ngáundeyi-gá ndéé ñuhu càháⁿ ndihi-gá Tătá-gă Dútú Ndiöxí sá nõu vá cündèe iní-gá tau-nihnu ñaha-gă xii-gá cuëndá nchaa năcuáa yáha-gá. ³⁶ Te òré càháⁿ ndihi Jèsús Tătá-gă Dútú Ndiöxí, te xăhaⁿ-gă:

—Yöhó tătá mée-í, nchaandi túhú sá văha ndăcu-n quide-n, te càháⁿ ndàhú-í núú-n nõu vá cündèe iní-n tãunihnu ñaha-n xii-í cuëndá sá vă ndóhò-í ná sàá òré, dico vá cadá-n năcuáa cächí iní mée-í chi cada-n năcuáa cächí mee-n — cächí-gă xăhaⁿ-gă xii Tătá-gă Dútú Ndiöxí.

³⁷ Te sátá ñí yáha ní cáháⁿ ndihi-gá Tătá-gă Dútú Ndiöxí, te cuánuhú-gá núú ñí

dándõo-gá cue téé úní-án, te xixídí-güedé òré ní nasáá-gá, te ní xáhaⁿ-gă xii té Pèlú:

—Xímú, ¿náa sama xidí-n? ¿Náa ñá cündèe tñahi núú-n vă cùdú-ni-n cuèdicó ìⁿ òré-án? —cächí-gă xăhaⁿ-gă xii-dé.

Te ní xáhaⁿ tucu-gá xii-güedé:

³⁸ —Te chí quëndõo tucu, te cuhuⁿ iní-ndó vă cùdú-ndó, te cáháⁿ ndihi-ndo Yă Ndiöxí cuëndá sá vă dăcàháⁿ ñáhá yucu ñávaha xii-ndo càda-ndo sá ñá túú tàú-ndó càda-ndo. Te na cächí tñuhu ndáá-í xii-ndo sã nchòhó cuiní-ndó càda-ndo nchaa năcuáa càháⁿ-í dicó-ni sá ñá túú ñihí ndéé-ndó — cächí-gă xăhaⁿ-gă xii-güedé.

³⁹ Te Jèsús ní xica tucu-gá cuáháⁿ-gá cáháⁿ ndihi-gá Tătá-gă Dútú Ndiöxí, te ðu-ni năcuáa ní xáhaⁿ-gă ðihna xăhaⁿ tucu-gá. ⁴⁰ Te òré ní yáha ní cáháⁿ ndihi-gá Tătá-gă Dútú Ndiöxí, te cuánuhú tucu-gá núú xĩndecu cue téé úní xicá cùu ndihi-gá-án, te xidí-ni tucu-güedé òré ní nasáá-gá, te ducaⁿ ñí quide-güedé chi súúní ñuhu saní núú-güedě, te ñá ní ñihí-güedě tñuhu cúñaha-güedě xii-gá òré ní nasáá-gá. ⁴¹ Te ní sáháⁿ tucu-gá xito cùu úní ní cáháⁿ ndihi-gá Tătá-gă Dútú Ndiöxí, te òré ní nasáá tucu-gá núú xĩndecu-güedé, te xăhaⁿ-gă xii-güedé:

—¿Te náa xidí-ni tucu-ndo?, te vitna vá cùdú-gá-ndó chi sa ní sáá òré cuáha cuëndá ñáhá-güedě xii yúhú Téé cùu

ñaní tnáhá-ndó nchàa-ndo núú cuè té ndècu ichi cuehé ichi duha. ⁴² Te vitna chí ndácõ na quihíⁿ-ó chi sa véxi téé cuáha cuendá ñáhá xii-í núú cuè téé cùu úhú iní ñáhá —càchí-gá xáhaⁿ-gá xii-güedé.

Ní tñi-güedé Jèsús ndécá ñàha-güedé xii-gá cuáhán

(Mt. 26:47-56; Lc. 22:47-53; Jn. 18:2-11)

⁴³ Te càháⁿ dúcáⁿ-ní Jèsús ní quexìo té Jùdás. Te núú tnàhá téé-án cùú ùxúú tnàhá cue téé xica cuu ndihí-gá. Te ndihí-dé vài cue téé ní quexìo, te dava-güedé xínehe-güedé machití te dava-güedé xínehe-güedé carrutí. Te cue téé-án ñí tendaha ñàha cue dútú cùnùu ndihí cue téé dàcuaha ñàha xii ñáyiú nchaa tnúhu ní chídó tnùní ndíi Moisés, ndihí cue téé cùu sacuéhé núú ñáyiú isràél. ⁴⁴ Te té Jùdás téé cuáha cuendá ñáhá xii Jèsús sa ní xítñúhu-dé cue téé-án nàcuáa cada-dé cuáha cuendá ñáhá-dé xii Jèsús núú-güedé. Te duha ní xáhaⁿ-dè xii-güedé:

—Cundehe-ndo tée na tèyuhu-í, te téé-án tñi-ndo-dé chi téé-án cùú-dé téé ndèé iní-ndó, te ío quihí iní-ndó càndeca-ndo-dé quihíⁿ —duha ní xáhaⁿ-dè xii-güedé.

⁴⁵ Te òré ní quexìo té Jùdás ndihí cue téé-án núú ndécú Jèsús, te ní xáhaⁿ-dè xii-gá:

—Mèstrú —càchí-dé xáhaⁿ-dè xii-gá.

Te ní teyuhu ñàha-dé. ⁴⁶ Te nchaa cue téé ndihí-dé-án ñí tñi-güedé Jèsús cuendá candeca ñàha-güedé xii-gá quihíⁿ. ⁴⁷ Te ñiⁿ cue téé cùndihí Jèsús ní tava-dé machití-dé,

te ní xehndé-ni-dé ñiⁿ xio lóho ñiⁿ téé xinu cuechi núú dútú cùnùu, te ní quendeé duuⁿ lóho téé-án. ⁴⁸ Te Jèsús ní xáhaⁿ-gá xii cue téé ní tñi ñàha xii-gá-án:

—Nchòhó, nèhe-ná-ndó màchití, nèhe-ná-ndó càrrutí véxi ní tñi ñàha-ndo xii-í, dàtná quidé-ndó ñiⁿ ñadúhú quidé ñàha-ndo xii-í. ⁴⁹ Te nchaa-ni nduu ní xiní-ndó ñí xíndecu-í xití veñúhu càhnu sá ío cùnùu ní xóo danèhé-í ñáyiú, te ñá túú ní tñi ñàha-ndo xii-í. Dico dàcutíí sá dúhá yáha-í cuendá quee ndáá-xi nàcuáa càháⁿ-xi núú tütú Yá Ndióxi —càchí-gá xáhaⁿ-gá xii-güedé.

⁵⁰ Te nchaa cue téé xica cuu ndihí-gá ní xinu-güedé ní dándõ ñàha-güedé xii-gá.

Ñiⁿ téé cuechi ní xinu-dé

⁵¹ Te ñiⁿ téé cuechi ndèndaha-dé Jèsús cuáhán, te lavichi-dé, ñiⁿ-ni dóo yadí yidúcúⁿ nuu-dé ñihí-dé, te ní tñi ñàha-güedé xii-dé, ⁵² dico ní ndacu-dé ní quenuñi-dé te ní dándõ-dé dóo yidúcúⁿ nuu-dé-án ñí xinu-dé.

Jèsús ndécú-gá jùndá

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Te cue téé ní tñi ñàha xii Jèsús ndécá ñàha-güedé xii-gá cuáhán núú tée cùu dútú cùnùu-gá. Te xián ñí tacá nchaa dava-gá cue téé cùu dútú cùnùu, ndihí cue téé cùu sacuéhé núú ñáyiú isràél, ndihí cue téé dàcuaha ñàha xii-yu nchaa tnúhu ní chídó tnùní ndíi Moisés cuendá cada-güedé jùndá. ⁵⁴ Te té Pèlú xica

xìca-ni nchicúⁿ ñáhá-dě xii-gá cuáháⁿ ní sáá-dé ndéé quehé vehe núú ndécú tẹe cùu dútú cùnùu-gá-áⁿ, te xiáⁿ nĩ ngóo teté-dé yuhu nùhú ndihì cue tée cùu poleciá.

55 Te cue tée cùu dútú cùnùu ndihì nchaa dava-gá cue tée xĩndecu jùndá ndúcú-güedě ñáyiú dacàa ìⁿ cuéchi díquí Jèsús cuendá ducaⁿ nĩhí-güedě nàcuáa cada-güedé cahni ñaha-güedě xii-gá, dico ñá túú ní ndàcu-güedé. 56 Te cuèi vài ñáyiú dàcaá-yu cuéchi díquí-gă dico mee-ni sã nĩ cahu iní mée-yu ní cáháⁿ-yu, chi tucu càháⁿ ìⁿ tucu càháⁿ ìⁿ-yu. 57 Te davá-yu ní ndacuñí-yu te ní ngüíta-yu dàcaá-yu ìⁿ cuéchi neñùú díquí-gă, te xăháⁿ-yu xii nchaa cue tée cùnùu:

58 —Nchúhú ní tecú dóho-ndí càchí-dé sá dąngoyo-dé veñúhu càhnu sá ìo cùnùu sá nĩ dácáá cuè tée ñuyíú-a, te dandàa tucu-dé ingá veñúhu saa, ñu-ni núú cáá tnàhí veñúhu-áⁿ te xití úní-ni nduu sa nadaxĩnu-dé, te vá cúú-gă-xi veñúhu sá nĩ dácáá cuè tée ñuyíú-a, duha càchí-dé ní tecú dóho-ndí —càchí-yu xăháⁿ-yu xii-güedé.

59 Dico ni dùcaⁿ ñá túú ní cùu ìⁿnuú-yu nchaa tnúhu ní cáháⁿ-yu.

60 Te tée cùu dútú cùnùu-gá ní ndacuñí-dé tnuú nchaa ñáyiú, te xăháⁿ-dě xii Jèsús:

—¿Ná cuendá duha ndùu tnúhu càháⁿ ñáyiú-a cuendá-n? Te cáháⁿ nùu nása ndùu tnúhu cáháⁿ-n —càchí-dé xăháⁿ-dě xii-gă, te ní

61 Dico Jèsús ñá túú tnàhí ní cãháⁿ-gă. Te tée cùu dútú cùnùu-gá-áⁿ nĩ xăháⁿ tùcu-dé xii-gă:

—Cuñí-í cachí tnúhu-n xii-ndí nùu sá díú Crìstú Déhe Yá Ndióxi Yaá ní tendaha-gă véxi ñuyíú-a cùu-n. Te ñu Yá Ndióxi cúú-gă Yaá quidé càhnu-ndí —càchí-dé xăháⁿ-dě xii-gă.

62 Te Jèsús ní xăháⁿ-gă xii-dé:

—Ñu Yaá-áⁿ cùú-í, te na càchí tnúhu-í xii-ndo sã sàa nduu te quini-ndo yùhú Tée cùu ñani tnáhá-ndó nchaa-ndo cunucóo-í xio cùha Dútú Ndióxi Yaá ndácú quide nchaandi túhú sá văha. Te davá-áⁿ quini ñáhá-ndó xii-í quee-í andi quixi-í ichi xití vícú —càchí-gă xăháⁿ-gă xii-dé.

63 Te dútú cùnùu-gá-áⁿ nĩ ndátá-dě dóó caní nìhnu-dé cuendá sá ña túú ní tnàhí iní-dé nàcuáa ní cáháⁿ Jèsús, te ní xăháⁿ-dě xii nchaa cue tée xĩndecu jùndá:

—Ñá túú-gă xini ñuhu-xi cue tée cáháⁿ nùu ndáa sá ndécuéchi-dé àdi ñá túú ndécuéchi-dé. 64 Chi sa ní xĩndedóho-o nàcuáa ndùu tnúhu ní cáháⁿ-dé ní cáháⁿ úhú-dé cuendá Yá Ndióxi, te nchaa-ndo chí càháⁿ vitna núu nása sàni iní-ndó cùnùu cuendá tée-a —càchí-dé xăháⁿ-dě xii-í-güedé.

Te nchaa-güedé ní cachí-güedé sá ná cùú-dé.

65 Te dava-güedé ní ngüíta-güedé ní tiú díí ñáhá-güedé xii-gă, te ní dádăhu-güedé núú-gă, te ní

ngüíta-güedé cániha-güedé
xii-gá, te xáhaⁿ-güedé:

—¿Cáhán ná cótó nã cúú tée
ní caniha xii-n! —cachí-güedé
xáhaⁿ-güedé xii-gá.

Te cue tée cùu poleciá ní
cani-güedé núú-gá.

*Té Pèlú cáhán-dé núú ñáyiú
sá ñà túú xini-dé Jèsús*

(Mt. 26:69-75; Lc. 22:56-
62; Jn. 18:15-18, 25-27)

66 Te ndéé xití vehe càa núú
ñinu quide-güedé jündá, chí
vehe yòdo tnaaha cuu-xi, te té
Pèlú núcõo-dé quehé vehe-án.
Te ñⁿ xichí xínú cuèchi núú
dütú cúnúu-án ñi quexiò-xi
núú núcõo té Pèlú. 67 Te òré
ní xini ñáhá-xi xii-dé núcõo
teté-dé yuhu nùhú, te ní
xíndhé ñaha váha-xi xii-dé,
te xáhaⁿ-xi:

—Yòhó tnahá-n cùu-n tée
xica cuu ndihí Jèsús tée ñuú
Nazàrét —cachí-xi xáhaⁿ-xi
xii-dé.

68 Te té Pèlú ní xáhaⁿ-dè
xii-xi:

—Yúhú ñà túú xini-í tée-án,
te ní ñà túú cùnuni iní-í
nása ndúu tnúhu cáhán-n —
cachí-dé xáhaⁿ-dè xii-xi.

Te té Pèlú ní xica-dé
cuáhán-dé ndàa nacuaa nchí
yuyèhe vehe-án, te ní cana ñⁿ
lìhi. 69 Te xichí xínú cuèchi-án
ñi xini ñáhá tùcu-xi xii-dé,
te xáhaⁿ-xi xii nchaa ñáyiú
xíndecu-án:

—Diu tée-án tnahá-dé xicá
cùu-dé ndihí tée ndèca-güedé
cuánguìhu-a —cachí-xi
xáhaⁿ-xi xii-yu.

70 Dico té Pèlú ñà túú ní
ñnuu tucu-dé sá xicá cùu-dé
ndihí Jèsús. Te tna tnaa-ni ní
cùu sá dúcán ñi xáhaⁿ xichí-án
xii-dé, te ní xáhaⁿ tùcu dava
cue ñáyiú xíndecu-án xii-dé:

—Ndáá sá tnahá-n cùu-n tée
xica cuu ndihí tée ndèca-güedé
cuánguìhu-án chí cùu-n tée
distrítú Galileá, te cáhán-n
dàtná cáhán-güedé —cachí-yu
xáhaⁿ-yu xii-dé.

71 Te té Pèlú ní xáhaⁿ-dè
xii-yu:

—Nchàcuiti Yá Ndiõxí sá
yúhú cáhán ndáá-í sá ñà túú
xini-í tée càcunehe-ndo-án —
cachí-dé xáhaⁿ-dè xii-yu.

72 Te òré-ni-án ñi cana
tucu lìhi xito cùu uú, te
òré-án ñi ndacu iní té Pèlú
nacuáa ní xáhaⁿ Jèsús xii-dé sá
cùmání-gá cana ñⁿ lìhi uú xito
te úní xito cáhán-dé núú ñáyiú
sá ñà túú xini ñáhá-dè xii-gá.
Te òré ducaⁿ ñi ndacu iní-dé
nacuáa ní xáhaⁿ Jèsús xii-dé, te
ní ndáhyú-dé ní ndixi cuèchi
iní-dé.

15

Jèsús ndécú-gá núú tẽ Pilatú
(Mt. 27:1-2, 11-14; Lc.
23:1-5; Jn. 18:28-38)

1 Te sátá ñi túndaá te cue
tée cùu dütú cúnúu, ndihí
cue tée cùu sacuéhé núú
ñáyiú isràél, ndihí cue tée
dàcuaha ñaha xii ñáyiú nchaa
tnúhu ní chídó tnùnì ndí
Moisés, ndihí nchaa dava-gá
cue tée cùnuyú ní xíndecu
jündá ní natacá-güedé, te ní
dácútú-güedé Jèsús te ndèca
ñaha-güedé xii-gá cuáhán núú
tẽ Pilatú. 2 Te té Pilatú ní
xicán tnúhú-dè núú Jèsús, te
xáhaⁿ-dè xii-gá:

—¿Ndáá sá díú-n cùu-n
tée yíndaha ñaha xii ñáyiú
isràél-án? —cachí-dé xáhaⁿ-dè
xii-gá.

Te Jèsús ní xáhaⁿ-gá xii-dé:

—Diu-í yíndaha-í-yu —
càchí-gá xăhaⁿ-gă xii-dé.

³ Te cue tée cùu dútú cúnùu dacia-güedé vâi cuéchi díquí-gă. ⁴ Te té Pilatú ní xícáⁿ tnúhú tùcu-dé núú-gă, te xăhaⁿ-dê xii-gă:

—Cáháⁿ, ná cuendá ñá cáháⁿ-n te cundehe nă ndéé duha titní cuéchi dàcaa díquí ñáhá cuè tée-a xii-n —càchí-dé xăhaⁿ-dê xii-gă.

⁵ Dico Jèsús ñá túú tnàhí ni cǎháⁿ-gá te té Pilatú ío ní cuñúhu-dé sá dúcáⁿ ñà túú tnàhí ni cǎháⁿ-gá.

Cue ñáyiú xăhăⁿ-yu xii té Pilatú sá cáhni-dê Jèsús

(Mt. 27:15-31; Lc. 23:13-25; Jn. 18:38-19:16)

⁶ Te ndi tnahá nduu vîco pascuá dácăcu té Pilatú ìⁿ tée yîhi vecaá chi ducaⁿ tnàhí quide-dé, te mee ñáyiú cáháⁿ-yu te núu ndédacàa tée yîhi vecaá-áⁿ căcu-dé, te tée-áⁿ dácăcu-dé. ⁷ Te yîhi ìⁿ tée nàni Barrabás vecaá ndihi dava-gá cue tée cundihí-dé. Te té Barrabás-áⁿ ní sanu ichi-dé ñáyiú ñúú ingá ichi, te ní ngúita-yu ndihí-dé ní cuu úhú iní-yu cue tée cùchiuⁿ, te ní sahani-dé ndiyi núu xǎⁿ ní chihí ñaha-güedê vecaá xii-dé. ⁸ Te nchaa ñáyiú ní sáháⁿ-yu núú tē Pilatú, te cáháⁿ ndàhú-yu núú-dê sá ná cádá nàhi-ni-dé dàtná quidé-dê. ⁹ Te té Pilatú ní xăhaⁿ-dê xii-yu:

—¿Cuini-ndó sǎ dácăcu-í tée yíndaha ñaha xii ñáyiú isrâél-ăⁿ? —càchí-dé xăhaⁿ-dê xii-yu.

¹⁰ Te ducaⁿ ní cáháⁿ té Pilatú, chi ní cutnuni iní-dé sá dicó sá cuèdú iní cuè dútú cúnùu núu xǎⁿ ducaⁿ ní quide-güedé ní sáha cuendá ñáhá-güedê xii Jèsús núú-dê.

¹¹ Te cue dútú cúnùu ní xăhaⁿ-güedê xii nchaa ñáyiú sá ná cǔñáhá-yu xii té Pilatú dácăcu-dé té Barrabás, te ní quidé-yu năcuáa ní xăhaⁿ-güedê. ¹² Te té Pilatú ní xícáⁿ tnúhú-dê núú-yu, te xăhaⁿ-dê xii-yu:

—¿Ná cuini-ndó cǎda-í tée cǎchí-ndó yíndaha ñaha xii ñáyiú isrâél-i? —càchí-dé xăhaⁿ-dê xii-yu.

¹³ Te nchaá-yu níhi ní cáháⁿ-yu, te xăhăⁿ-yu xii-dé:

—¿Cata caa-dé núú cùrúxí! —càchí-yu xăhăⁿ-yu xii-dé.

¹⁴ Te té Pilatú ní xăhaⁿ-dê xii-yu:

—¿Te ná cúú cuéchi ní quide-dé te núu ducaⁿ cuini-ndó cǎda-í-dé-i? —càchí-dé xăhaⁿ-dê xii-yu.

Dico nchaá-yu uuⁿ-gá níhi ní cáháⁿ-yu, te xăhăⁿ-yu xii-dé:

—¿Cata caa-dé núú cùrúxí! —càchí-yu xăhăⁿ-yu xii-dé.

¹⁵ Te té Pilatú ní quide-dé năcuáa ní xăhăⁿ-yu xii-dé cuendá sá cúdiu-dé núú-yu, te ní dácăcu-dé té Barrabás, te ní táuchíúⁿ-dê ní cani-güedé Jèsús ndihí ñî. Te sátá dúcáⁿ ní quide ñaha-güedê xii-gă, te ní táuchíúⁿ-dê candeca ñaha-güedê quihíⁿ cata caa ñaha-güedê xii-gă núú cùrúxí.

¹⁶ Te cue tée cùu sandadú ndécá ñaha-güedê xii-gă cuáháⁿ vechiúⁿ, te diu-ni xíaⁿ cúú vèhe tée cùu gobiernú. Te

xíaⁿ nǐ tacá nchaa dava-gá cue tée cùu sandadú. ¹⁷ Te xíaⁿ nǐ dácuihnú ñaha-güedé xii-gá ñⁿ dóo tǐcuèhé víhí, te ní cadúha-güedé ñⁿ coróná iñu ní chihi-güedé díquí-gá. ¹⁸ Te ní ngüíta-güedé níhi càháⁿ-güedé cúdíquí ndeé ñáhá-güedé xii-gá, te xáhaⁿ-güedé:

—¡Ío càhnu cuu yohó tée yindaha ñaha xii ñáyiú isráél!
—càchí-güedé xáhaⁿ-güedé xii-gá.

¹⁹ Te càni-güedé díquí-gá ndihi ñⁿ carrutí, te tiú díí ñáhá-güedé xii-gá, te ngüíñí xítí-güedé núú-gá quidé-güedé sá néhé-güedé sá yíñuhu núú-gá dico ña ndáa chi dícó cúdíquí ndeé ñáhá-güedé xii-gá. ²⁰ Te sátá dúcáⁿ nǐ cudíquí ndeé ñáhá-güedé xii-gá, te ní nataunuu ñaha-güedé xii-gá dóo tǐcuèhé víhí sá nǐ dácuihnú ñaha-güedé, te ní dándíúnuu ñaha-güedé xii-gá dóo méé-gá. Te dátñuní ndécá ñaha-güedé cuáháⁿ núú cáta càa ñaha-güedé xii-gá núú cùrúxí.

Sàta caa-güedé Jèsús núú cùrúxí
(Mt. 27:32-44; Lc. 23:26-43; Jn. 19:17-27)

²¹ Te ichi cuáháⁿ-güedé ndihi Jèsús ní naníhí-güedé ñⁿ tée ñúú Cirené naní-dé Xímú, te déhe-dé cúú ñⁿ tée nàni Lijandrú, ndihi ingá tée nàni Rúfú. Te té Xímú-áⁿ ñúhú-dé ichi duha cuándixi-dé ní sáháⁿ-dé yucu, te ní quide

yica-güedé ní xido-dé cùrúxí sá nchídó Jèsús.

²² Te ndèca-güedé Jèsús cuáháⁿ ñⁿ xichi núú naní Gólgotá, te tnúhu-áⁿ quée-xí: ñⁿ xichi núú naní yíqui díquí ndíyi, duha quèe-xi tnúhu-áⁿ. ²³ Te ní sáñaha-güedé xii-gá ndudí sá nǐ quée yúcu naní mirrá coho-gá ní cùu dico ñá túú ní xihí-gá. ²⁴ Te ní sata caa ñaha-güedé xii-gá núú cùrúxí. Te sátá dúcáⁿ te cue tée cùu sandadú-áⁿ nǐ xito ndeé-güedé núu ndèdacàa-güedé cuu cuendá-güedé dóo-gá.

²⁵ Te cùu-xi caá ñⁿ dátñéé òré ní sata caa ñaha-güedé xii-gá núú cùrúxí. ²⁶ Te ní taxi ndecu-güedé ñⁿ sá ndeé lètrá núú táca-gá. Te lètrá-áⁿ càháⁿ-xi ná cuendá ducaⁿ nǐ quide ñaha-güedé xii-gá. Te duha càháⁿ lètrá-áⁿ: “Tée yindaha ñaha xii ñáyiú isráél”, duha càchí-xi. ²⁷ Te tnàhá úú cue tée cùu ñadúhú ní sata caa-güedé díu-ni núú cùrúxí tucu. Te ñⁿ-dé ní sata caa-güedé xio cùha-gá, te ingá-dé ní sata caa-güedé xio dátñi-gá. ²⁸ Te ducaⁿ nǐ cuu chi ní quee ndáa-xi nàcuáa càháⁿ-xi núú tütú Yá Ndiöxí núú càchí-xi: “Ñⁿ-ni nǐ quide ñaha-güedé xii-gá ndihi cue tée ndècu cuéchi-xi”, duha càchí-xi núú tütú-gá.

²⁹ Te nchaa ñáyiú yáha yatni núú táca-gá dácuicó-yu díquí-yu te xǐcuèhé ñáhá-yu xii-gá, te xáháⁿ-yu:

—Te ná cuendá ducaⁿ càa-n tacaa-n xíaⁿ, te càchí-n sá dàngoyo-n veñúhu càhnu

sá ïo cùnūu te dandàa-n ìngá veñúhu saa, te xití úní-ni ndūu sa nadaxīnu-n cāchí-n. ³⁰ Te vītna tanūu núú cùrúxí-áⁿ dācācu-n mēe-n — cāchí-yu xāhāⁿ-yu xii-gá.

³¹ Te ñi-u-ni ducaⁿ nī quide cue tēe cūu dūtú cúnūu, ndihí cue tēe dācuaha ñaha xii ñāyiu nchaa tnúhu ní chídó tnúní ndíi Moisés, chí ní cudíquí ndeé ñáhá-güedē xii-gá, te ní xitnàha-güedē:

—Tēe-a ní ndacu-dé ní dācācu nihnu-dé ñāyiu, ¿te ná cuendá ñā ndacú-dē dācācu nihnu-dé mēe-dē-í? ³² Te núu ndáá sá díú-dē cúú-dē Cristú Yaa ní tendaha Yā Ndiōxí véxi ñuyíú-a quindaha ñaha xii ñāyiu israhél, te na cundehe-o nuu-dé núú cùrúxí, cuendá quindáá iní-ó-dē — cāchí-güedē xitnàha-güedē.

Te ndeé tnàhá cue tēe tàcaa xio xio ñiñi-gá xīcuèhé ñáhá-güedē xii-gá.

Ní xihí Jèsús

(Mt. 27:45-56; Lc. 23:44-49; Jn. 19:28-30)

³³ Te òré ní cuu cuádava ndūu, te ní cunee nihíi ñuyíú, te ducaⁿ-ni càa ní cuu ndeé caá úní sacuaa. ³⁴ Te ñi-u-ni òré caá úní sacuaa-áⁿ ñihí ní cáháⁿ Jèsús, te xāhāⁿ-gā xii Tātá-gā Dútú Ndiōxí:

—Elòí, Elòí, láma sabàctaní —cāchí-gá xāhāⁿ-gā.

Te tnúhu-áⁿ quée-xí: Ndiōxí mēe-í, Ndiōxí mēe-í, ná cuendá ní dāñá ñaha-n xii-í, duha quèe-xi tnúhu-áⁿ.

³⁵ Te dava cue tēe xīndecu yatni núú tàcāa-gā-áⁿ nī tecú dóho-güedē nācuáa ní cáháⁿ-gá, te ní xitnàha-güedē:

—Chí cündedóho chí càna-dé té Èliás —cāchí-güedē xitnàha-güedē.

³⁶ Te ñⁿ cue tēe xīndecu-áⁿ xínú-dē ní sáháⁿ ní chindóyo-dé luha cáchí xití ndudí íá, te ní chinenu-dé díquí ñⁿ yutnu càni te ní ndocani-dé chíhí-dē yuhu-gá cuendá coho-gá. Te ní xāhāⁿ cuè tēe xīndecu-áⁿ xii tēe-áⁿ:

—Cundetū tnaa na cundehe-o nacoto núu quixi té Èliás nunehe ñaha-dē xii-dé núú cùrúxí —cāchí-güedē xāhāⁿ-güedē xii-dé.

³⁷ Te Jèsús níhi ní canasaa-gá te ní xihí-ni-gá. ³⁸ Te sátá dúcáⁿ te ní ndátá dōó cúú còrtiná xití veñúhu càhnu sá ïo cùnūu ní quée dava ndáá, te ndàa núú ññu ní ngúta-xi ní ndátá. ³⁹ Te tēe cūu capitáⁿ nútñi-dé ndàa núú Jèsús, te ndèhe-dé nācuáa ní quide-gá òré ní xihí-gá, te ní cachí-dé:

—Sá ndáa ndisa sá díú tēe-a cūu-dé Déhe Yā Ndiōxí ní cūu —duha ní cachí-dé.

⁴⁰ Te xica xīnutñi ñⁿ ũú ñāyiu ñihí ndéhē-yu nchaa nācuáa ní quide ñaha-güedē xii Jèsús, te tnàhá tá Màriá Magdaléná, ndihí tá Salómé, ndihí tá Màriá ñaná tē Chèé ndihí té Jàcobó tēe cāchí-güedē cúú lìhli-gá. ⁴¹ Te cue ñāyiu ñihí-áⁿ nī xica cuú-yu ndihí Jèsús distritú Galileá ní xinu cuèchí-yu núú-gá. Te cue ñāyiu ñihí-áⁿ nchícúⁿ ñāhā-yu xii-gá ní quexìo ndeé ñuú Jerusalén ndihí dava-gá ñāyiu ñihí nchícúⁿ ñáhá xii-gá cuáháⁿ.

*Chìndúxi-güedé Jèsús***16**

(Mt. 27:57-61; Lc. 23:50-56; Jn. 19:38-42)

Ní ndoto Jèsús
(Mt. 28:1-10; Lc. 24:1-12;
Jn. 20:1-10)

42 Te cùu-xi nduu vispré nduu ndètátú ñáyi. Te nduu-ãⁿ xĩquide túha-yu sá cúú ìngá nduu nduu ndètátú-yu-áⁿ, te diu-ni nduu-ã sa ní cuaa v̄hi, 43 te ìⁿ téé n̄ani Cheé téé ñuu Arimateá ní cuyi-dě ní sáháⁿ-dé núú t̄é Pilatú, te ní xáhaⁿ-d̄é sá n̄uu vá cùndèe ìní-dé daña-d̄é chindúxi-dé yiqui cùñú Jèsús. Te t̄nàhá t̄é Chèé-áⁿ cúú-d̄é ìⁿ téé cùnuu cundihi-dé cue téé quide jundá, te t̄nàhá-dé ndétú-d̄é sáá nduu ndīhu ndaha ñaha Yá Ndióxi xii-dé ndīhi cue ñáyi. 44 Te t̄é Pilatú ío ní cuñúhu-dé sá dúcáⁿ ío ndīhi ní xihí Jèsús, te ní cana-dé téé cùu capitáⁿ ní xicáⁿ t̄núhú-d̄é núú-d̄é n̄uu ndisa sá sà ní xihí-gá. 45 Te téé cùu capitáⁿ-áⁿ ñĩ xáhaⁿ-d̄é xii t̄é Pilatú sá ndàá ní xihí Jèsús, n̄uu xĩáⁿ t̄é Pilatú-áⁿ ñĩ sáha-dé t̄núhu chindúxi t̄é Chèé-áⁿ yiqui cùñú-gá. 46 Te t̄é Chèé-áⁿ ñĩ saaⁿ-dé ìⁿ dóó v̄aha, te ní sáháⁿ-dé ní nunehe-dé yiqui cùñú Jèsús núú cùrúxí, te ní chidúcúⁿnuu-dé yiqui cùñú-gá dóó v̄aha sá ñĩ saaⁿ-dé-áⁿ, te d̄at̄n̄uní néhé-dé yiqui cùñú-gá cuáháⁿ ní chihi-dé ìⁿ yaú nchii yiqui naha cava, te ní sadí-dé yuhu yaú-áⁿ ndīhi ìⁿ yúú quéhéⁿ. 47 Te tá Màriá Magdaléná, ndīhi tá Màriá ñaná t̄é Chèé ní xini-yu núú ñĩ chihi-dé yiqui cùñú Jèsús.

1 Te sáta ñĩ cundiquⁿ nduu ndètátú ñáyi, te tá Màriá Magdaléná, ndīhi tá Salómé, ndīhi tá Màriá ñaná t̄é Jàcobó ní saaⁿ-yu acití sáháⁿ t̄námí cuendá canehé-yu quihíⁿ chihí-yu yiqui cùñú Jèsús. 2 Te ndumìngú nehé-ni òré vitna v̄aha v̄aha ní xinu coto núú nchicanhii ní quexió-yu núú nchii yaú yihí yiqui cùñú Jèsús. 3 Te ní xit̄nàhá-yu:

—Yoo cúñaha-o xòcani yúú ndèdí yuhu yaú-a, chi vá yõ t̄nàhí ndècu iha —cachí-yu xit̄nàhá-yu.

4 Te òré ní xindéhé v̄aha-yu te ní xini-yu sá yúú cáhnú ndèdí yuhu yaú-áⁿ ìⁿ xio-ná ndécú. 5 Te cuánguihú-yu xit̄i yaú-áⁿ, te ní xini-yu nùcòo ìⁿ espíritú xínú cuèchi núú Yá Ndióxi ndàa xio cuhá-yu, te càa-xi datná cáá ìⁿ téé cuechi, te nihnu-xi ìⁿ dóó cuixíⁿ dóó cání, te ní yùhú-yu òré ní xini-yu espíritú-áⁿ. 6 Te espíritú-áⁿ ñĩ xáhaⁿ-xi xii-yu:

—Vá yùhú-ndó, chi yúhú sa cùtnuní ìní-í sá nchòhó véxi-ndo n̄anducu-ndo yiqui cùñú Jèsús téé ñuu Nazàrét téé ní sahani-güedé núú cùrúxí, dico ñá túú-gã yiqui cùñú-dé ndécú iha chi sa ní ndoto-dé, te chí cùndèhe núú ñĩ sacáⁿ-güedé yiqui cùñú-dé te quini-ndó ñã ñã túú-gã-dé. 7 Te chí cuáháⁿ núú ndécú t̄é Pèlú ndīhi dava-gá cue téé ní xica cuu ndīhi-dé, te

duha cúñaha-ndo xii-güedé: “Jèsús codonù-gá núú-ndó quíhíⁿ distritú Galileá, te yacáⁿ quiní-ndó-gã dàtná ní cachí-gá xii-ndo”, duha cúñaha-ndo xii-güedé —càchí espíritú-áⁿ xãhaⁿ-xi xii-yu.

⁸ Te cue ñáyiú dìhí-áⁿ ïo ní yùhú-yu, te ní queene cunú-yu cuánuhú-yu, te quidi ñaha-ná-xi xii-yu sá ïo ní yùhú-yu, te ñá túú tnàhí ná tnúhu ni xãhãⁿ-yu xii cue ñáyiú ní naníhí-yu ichi cuendá sá ïo ní yùhú-yu.

Tá Màriá Magdalená ní xini-xi Jèsús

(Jn. 20:11-18)

⁹ Te sátá dúcãⁿ ñi ndoto Jèsús ndumíngú nehé-ni-áⁿ, te díhna nuu-gã tá Màriá Magdalená ní quee túu-gá núú-xi, te ñi tá Màriá-áⁿ cúu-xí xíchí ñi xíhi ñaha ùsá espíritú cundíhi yucu ñávãha ni cùu, te Jèsús ní queñuhu-gá nchaa espíritú-áⁿ yiqui cunú-xi. ¹⁰ Te xíchí-ãⁿ ñi sáhãⁿ-xi ní xítñúhu-xi cue téé ní xica cuu ndíhi Jèsús nãcuáa ní cuu, te xíndáhí-güedé sá ndíhú iní-güedé òré ní quexìo-xi núú ndécú-güedé. ¹¹ Te òré ní xãhaⁿ tá Màriá xii-güedé sá ñi ndoto Jèsús ndíhi sá ñi xini ñáhã-xí xii-gã, te ñá túú ní sãndáá iní-güedé.

Jèsús ní quee túu-gá núú ùú cue téé ní xica cuu ndíhi-gã
(Lc. 24:13-35)

¹² Te úú tnàhá cue téé ní xica cuu ndíhi Jèsús ñúhú-güedé ichi cuáhãⁿ-güedé yucu, te uuⁿni ní quee túu-gá núú-güedé, te

ní dácótó ñàha-xi xii-güedé sá ñà túú-gã cáá-gã dàtná cáá-gã. ¹³ Te cue téé úú-áⁿ ñi xica-güedé cuáhãⁿ-güedé ní xítñúhu-güedé nchaa dava-gá cue téé ní xica cuu ndíhi-gá sá ñi xini ñáhã-güedé xii-gã, dïco ñi-ñi ducaⁿ ñà túú ní sãndáá iní cue téé-áⁿ tnúhu ní cáháⁿ-güedé.

Jèsús xãhaⁿ-gã xii cue téé ní xica cuu ndíhi-gã nãcuáa ndüu chiuⁿ cada-güedé

(Mt. 28:16-20; Lc. 24:36-49; Jn. 20:19-23)

¹⁴ Te ndi ùxí ñiⁿ cue téé ní xica cuu ndíhi Jèsús yíhí-güedé mèsá xéxí-güedé, te ní quee túu-gá núú-güedé te ní tenãá ñáhã-gã xii-güedé cuendá sá ïo sãá iní-güedé ñá túú sãndáá iní ñáhã vãha-güedé xii-gã, chí ñá túú ní cuini-güedé quíndáá iní-güedé nãcuáa ní xãhaⁿ ñáyiú ní xini ñáhã xii-gã sátá ñi yãha ní ndoto-gã. ¹⁵ Te ní xãhaⁿ-gã xii-güedé:

—Quíhíⁿ-ndó ñíhí ñuyúú cáháⁿ-ndó núú nchãa ñáyiú tnúhu váha tnúhu sá cáháⁿ nãcuáa naníhí tàhú-yu. ¹⁶ Te nchaa ñáyiú na quíndáá iní tnúhu-áⁿ te cuanduté-yu, te naníhí tàhú-yu, dïco nchaa ñáyiú vá quíndáá iní tnúhu-áⁿ te cuíta nihnú-yu. ¹⁷ Te nchaa ñáyiú na quíndáá iní ñáhã xii-í te cadã-yu sá vã yõ tnàhí ndãcu cada, te cacunehe ñáhã-yu xii-í, te queñuhú-yu nchaa espíritú cundíhi yucu ñávãha yíhi ñaha xii ñáyiú. Te uuⁿni ndacú-yu cáháⁿ-yu ingã núú tnúhu sá

vătă dácuàha-gá-yu. ¹⁸ Te cuèi na tnĩ-yu cóo děéⁿ dico ñá túú nă cada ñaha-di xii-yu, te cuèi venènú ná cáxí-yu dico ñá túú nă tnahá-yu, te tendàhá-yu cue ñáyiú cùhú te ndúha-yu —càchí-gá xăhaⁿ-gă xii-güedé.

Jèsús cuándaa-gá andiú

(Lc. 24:50-53)

¹⁹ Te sátá ñi yáha ducaⁿ ñi xáhaⁿ Jèsús xii cue téé ní xica cuu ndihí-gá, te ní ndanchita-gá cuándaa-gá andiú te ní ngóo-gá xio cùha Dútú Ndióxi. ²⁰ Te cue téé-áⁿ ñi xica-güedé cuáháⁿ-güedé, te ní ngúita-güedé càháⁿ-güedé tnúhu Xítoho Jesucristú nchaa xichi. Te mee-gă ní chindee ñàha-gá xii-güedé ní quide-güedé nchaa sá vă yôo tnàhí ndàcu cada cuendá cutnùní iní ñáyiú sá ndàá càháⁿ-güedé tnúhu-gá. Duha ní cuu dàvá-áⁿ.

TNÚHU NÍ CHÍDÓ TNŪNÍ TĚ LŪCÁ

*Nācuáa ní ngódó tnŭní
tnúhu Yá Ndiöxí*

1 Te vâi ñáyiú chîdo tnŭní-yu nchaa nācuáa ndūu tnúhu ñihí-yu nācuáa ní cuu, te nchoo tnàhá-ó sà naha-o nācuáa ní cuu. 2 Te ñiu-ni nchaa tnúhu chîdo tnŭní-yu-áⁿ cúú-xí tnúhu ní cáháⁿ nchaa cue téé ní xini ndáá nācuáa ní cuu ndéé díhna, cue téé ní cáháⁿ tnúhu Yá Ndiöxí. 3 Te yúhú sa ní cuu nduu quide cuendá-í nchaa nācuáa ní cuu, núu xí^a ní sani iní-í tee váha-í nchaa tnúhu-a núu tütú sá cúú-xí yòhó té Těofilú chi ío váha cùu iní-í sá cúú-xí-n, 4 te tē-í cuendá cutnŭní iní-n sá sá ndáá cúú-xí nchaa sá ñi dánèhé ñàhá-güedé xii-n.

*Iⁿ espíritú xínú cuèchi núú
Yá Ndiöxí càchí-xi sá cacú iⁿ téé
cunani Juáá*

5 Te cŭtnàhá ní xindaha té Hèrodés ñáyiú distritú Jùdeá dāvá-áⁿ ñi xindecu iⁿ dŭtú ñi xínani-dě Zacàriá, te ní cundihi-dé cue dŭtú Àbiás. Te ñadihí-dé ní xínani-aⁿ Èlisabét, te ñaha-áⁿ ñi cuu-aⁿ ñani tnàhá ndi Àrón. 6 Te ndi ndúú-yu ío ní quide ndáá-yu núú Dŭtú Ndiöxí, chi ní tní-yu nchaa tnúhu ní cáháⁿ-gá. 7 Te ñá túú ñi iⁿ déhe-yu, chi ducaⁿ tǎhú tǎ Elisabét sá vǎ cóo déhe-aⁿ, te ducaⁿ ndi ndúú-yu ío ní sahnú-yu.

8 Te iⁿ nduu xínu cuechi tucu té Zacàriá ndihi nchaa cue téé cundihi-dé núú Yá Ndiöxí xití veñúhu. 9 Te dāvá-áⁿ ñi xito ndeé-güedé cuendá cutnŭní iní-güedé núu ndēdacàa-güedé quíhu núu nàá xití veñúhu-áⁿ cahmi-güedé sá sàháⁿ tnámí, te ní cutnŭní sá tē Zacàriá quíhu-dé. Te ducaⁿ ñi quide-güedé, chi ducaⁿ tnàhí ní xóo cada nchaa cue dŭtú dāvá-áⁿ. 10 Te ñini sǎhmi té Zacàriá sá sàháⁿ tnámí núu nàá, te vâi vihi ñáyiú xindecu quehé veñúhu-áⁿ cáháⁿ ndihí-yu Yá Ndiöxí. 11 Te ní xini té Zacàriá iⁿ espíritú xínú cuèchi núú Yá Ndiöxí nŭtní-xi xio cùha núu nàá núu cǎyú sá sàháⁿ tnámí-áⁿ. 12 Te òré ní xini té Zacàriá espíritú-áⁿ te ña ní cŭtnŭní iní-dé nása cada-dé chi ío ní yùhú-dé. 13 Te espíritú-áⁿ ñi xáhaⁿ-xi:

—Zacàriá, vá yùhú-n chi Yá Ndiöxí ní tedóho-gá tnúhu ní cáháⁿ-n, te vitna coo iⁿ déhe ñadihí-n tǎ Elisabét te danàni-n-dé Juáá. 14 Te ío cudí iní-n, te ducaⁿ ío vâi ñáyiú cudí iní-yu na càcu-dé. 15 Te ío cudíu-dé núú Yá Ndiöxí, te ñi vǎ cóhó-dě ndidí te ñi vǎ cóhó-dě ndudí sá ñi natíu, te sa cundecu ndihi-dé Espíritú Yá Ndiöxí òré cacu-dé. 16 Te ñiu-dé cada te ío vâi ñáyiú isràel natuhá-yu ichi Dŭtú Ndiöxí Yaá cúú Ndiöxí-ó. 17 Te té Juáá-áⁿ codonūu-dé núu-gǎ, te cundecu ndihi-dé Espíritú-gá, te taxi tnŭní-dé dàtná ní quide té Èliás. Te

nacanu ichi-dé cue tée cùu sacuéhé cuèndá cada-güedé sá vâha sá cúú-xí cuè tée cuechi, te cuèí cue tée ío sâá iní-xi, te ñiu-dé cada te tnîi-güedé tnúhu váha, tnúhu càháⁿ ñáyiú quide ndáá. Te ñuáⁿ càda-dé cada túha-dé ñáyiú cuèndá cunu cuèchí-yu núú Dütú Ndiöxí —càchí-xi xâhaⁿ-xi xii-dé.

18 Te té Zacàriá ní ndúcú tnúhu-dé núú espíritú-áⁿ, te xâhaⁿ-dê:

—¿Te nása cutnùní ndáá iní-í tnúhu càháⁿ-n-í? Chi yúhú ío ní sahnu-í ndihi ñadihí-í —càchí-dé xâhaⁿ-dê xii-xi.

19 Te espíritú-áⁿ nî xâhaⁿ-xi:

—Yúhú cúu-í espíritú nání Gàbriél, te xínu cuechi-í núú Yâ Ndiöxí, te mee-gã ní táuchíúⁿ-gã náhà-í tnúhu-gá véxi cuèndá cutnùní iní-n nâcuáa cada ñaha-gã xii-ndo.

20 Te vitna cuu ñihí-n te vá càháⁿ-gá-n ndéé ná sâá nduu càcu déhe ñadihí-n, chi ñá túú ní sândáá-ni iní-n tnúhu ní càháⁿ-í. Te dacuitíí sâá nduu càda-xi nacuáa ní càháⁿ-í-a —càchí espíritú-áⁿ xâhaⁿ-xi xii-dé.

21 Te nchaa ñáyiú xîndecu quehé ndétü-yu té Zacàriá, te xîcunúhu-yu sá ío cùyaa-dé xití veñúhu. 22 Te òré ní ndee té Zacàriá, te ñá ní cùu-gá càháⁿ ndihi ñaha-dê xii-yu, te òré-áⁿ nî cutnùní iní-yu sá nî xiní-dé ñúú espíritú xínu cuèchi núú Yâ Ndiöxí xití veñúhu. Te mee-ñá ndaha-dé ní quide-dé núu-yu chi ñá ní cùu-gá càháⁿ-dê.

23 Te ní xínu nduu nî xinú cuechi tē Zacàriá núú Yâ Ndiöxí xití veñúhu, te

cuánuhú-dé vehe-dé. 24 Te sáta dúcáⁿ nî cuu te ñadihí-dé tá Elisabét ní ngúhuⁿ déhe-aⁿ, te úhúⁿ yóó ñà túú tnáhi-gá ní quèe-aⁿ caca cuu-aⁿ, te ní cachí-aⁿ: 25 “Mee Dütú Ndiöxí duha ní cundáhú iní ñáhá-gã sá cóó ñúú déhe-í cuèndá sá vâ cúú yichí iní ñáhá ñáyiú xii-í”, duha ní cachí-aⁿ.

Íⁿ espíritú xínu cuèchi núú Yâ Ndiöxí càchí-xi sá cácu Jèsús

26-27 Te núú ñúú yóó sã nî ngúhuⁿ déhe tá Elisabét, te ní tendaha túcu Yâ Ndiöxí espíritú nání Gàbriél cuáháⁿ-xi ñúú nání Nàzarét cuáháⁿ ngoto-xi ñúú xíchí cuèchí nàni Mariá. Te ñuú-áⁿ yîndèhu-xi distritú Galiléa. Te xíchí-áⁿ sa ní cundáá tnúhu sá tnândaha-xi ndihi ñúú téé nàni Cheé ñani tnáhá ndi Dàvií. 28 Te espíritú-áⁿ nî quíhu-xi ndéé xití vehe núú ndécú tá Màriá, te ní xâhaⁿ-xi:

—¿Cóvâha-n-aⁿ! Dütú Ndiöxí ío cùu iní ñáhá-gã xii-n te ndècu ndihi ñaha-gã, te ío-gá xító ñaha-gã xii-n dàcúúxí dàva-gá ñáyiú ñihí —càchí espíritú-áⁿ xâhaⁿ-xi.

29 Dico òré ní xiní tá Màriá espíritú-áⁿ, te ní quíyúhú iní-xi sá dúcáⁿ nî càháⁿ espíritú-áⁿ. Te ní sani iní-xi: “¿Ná cuèndá duha càháⁿ-tu espíritú-a-í?”, duha ní sani iní-xi. 30 Te espíritú-áⁿ nî xâhaⁿ-xi:

—Màriá, vá yùhú-n chi ñuáⁿ nî nduu táhú-n núu Yâ Ndiöxí. 31 Te vitna ngúhuⁿ déhe-n, te na càcu-dé te danàni-n-dé Jèsús. 32 Te ío cunuu-dê, chi Dütú Ndiöxí Yáá ío cunuu cachí-gã sá

Děhe-gá cúú-dě, te diu-gá cada te cuu-dé ìⁿ tée cùnuu núú ñáyiú isràél dàtná ní quide-gá ndíi Dàvií. ³³ Te taxi tnùnì-dé ñáyiú isràél, te ducaⁿ-ni cùnuu-dé ni caa ni quihíⁿ —càchí-xi xáhaⁿ-xi.

³⁴ Te tá Màriá ní xáhaⁿ-xi xìi espíritú-áⁿ:

—¿Te nása cuu tnúhu càháⁿ-n te ñá túú yìi-í-i? —càchí-xi xáhaⁿ-xi.

³⁵ Te ní xáhaⁿ espíritú-áⁿ:

—Espíritú Yá Ndiöxí quixi cundecu ndihi-n, te ducaⁿ Yá Ndiöxí cada-gá ìⁿ sá vaha sá cúú-xí-n ná càcu déhe-n. Te Yá Ndiöxí càchí-gá sá ïo cundecu yiñuhu-dé núú-gă, chi Déhe-gá cúú-dě. ³⁶ Te tnàhá didí-n tă Elisàbét ñúhú dēhe-aⁿ cuèi ío ní sahnú-aⁿ, te diu-aⁿ càchí-yu sá vă cóó dēhe-aⁿ ni cùu, te vitna sa ní cuu íñú yóó ñúhú dēhe-aⁿ. ³⁷ Chi Yá Ndiöxí ndácú-gă quidé-gă nchaa sá vă yôo tnàhí ndàcu cada —cachí-xi xáhaⁿ-xi.

³⁸ Te tá Màriá ní xáhaⁿ-xi:

—Yúhú ná cúnú cuèchi-í núú Dútú Ndiöxí, te mee-gă ná cadá ñaha-gá xii-í nàcuáa ní cachí-n —càchí-xi xáhaⁿ-xi xìi espíritú-áⁿ.

Te sátá dúcáⁿ te espíritú-áⁿ nǐ xica-xi cuáháⁿ-xi.

Tá Màriá cuáháⁿ ngoto-xi tá Elisàbét

³⁹ Te tá Màriá ío ndíhi cuáháⁿ-xi ìⁿ ñúú cáá xití yucu distritú Jùdeá. ⁴⁰ Te ní sáá-xi vehe té Zacàriá, te cuánguihu-xi ní dándácõ vaha-xi tá Elisàbét. ⁴¹ Te òré ní tecú dóho tá Elisàbét ní cáháⁿ tá Màriá, te ní candá déhe-aⁿ xití-aⁿ, te òré-áⁿ nǐ

ngúndecu ndihi-aⁿ Espíritú Yá Ndiöxí. ⁴² Te níhi ní cáháⁿ-aⁿ, te xáhaⁿ-aⁿ xìi tá Màriá:

—Yá Ndiöxí ío xìto ñaha-gá xii-n dàcúxí dâva-gá tnàha dihí-ó, te ducaⁿ-ni xìto-gá cuèi déhe-n. ⁴³ ¿Te ná cúú yúhú núu véxi coto ñaha yòhó náná Yaá cúú Xìtohó-í-i? ⁴⁴ Chi òré-ni ní tecú dóho-í ní cáháⁿ-n te ní candá-ni déhe-í xití-í sá cùdíi ìní-dé. ⁴⁵ Te vaha táhú yòhó sá ní sàndáá ìní-n, chi dacuitíi sá cadá Dútú Ndiöxí nàcuáa ní cáháⁿ espíritú ní tendaha-gă ní quixi ní cachí tnúhu xii-n nàcuáa cada-gá —càchí-aⁿ xáhaⁿ-aⁿ xìi tá Màriá.

⁴⁶ Te ní xáhaⁿ tă Màriá:

Ío càhnu cuu Dútú Ndiöxí, ⁴⁷ ío cùdíi ìní-í chi diu-gá tau-nihnu ñaha-gă xii-í núú ùhú núú ndàhú. ⁴⁸ Chi ní ndacu ìní ñàhá-gă xii yúhú, te dicó ìⁿ xíchí xínú cuèchi núú-gă cùú-í,

te vitna te nchaandi túhú ñáyiú cachí-yu sá ïo vaha táhú-í.

⁴⁹ Te Yá Ndiöxí cándòo caa nine ìní-gá, te ío càhnu ìⁿ sá vaha ní quide-gá sá cúú-xí-í.

⁵⁰ Te cùndahú ìní-gá nchaa ñáyiú nèhe sá yíñuhu núú-gă.

Te ducaⁿ-ni cuèi ñáyiú sa ndècu ñuyú-a ndihi ñáyiú vitna véxi.

⁵¹ Chi ta quide-gá nchaa sá vă yôo tnàhí ndàcu cada véxi, te ta dándóo canúú-gă cue ñáyiú quide cahnu mee-xi.

52 Te cue ñáyu tàxi tnuní
ñá túú-gã dáñá-gã taxi
tnùní-yu,

te cue ñáyu ndàhú ní quide
nínu ñaha-gã xii-yu.

53 Te cue ñáyu ndècu ndihi
tnúndòho tnúhu ndàhú
ní quide váha ñaha-gã
xii-yu,

te cue ñáyu cuica ñà túú ñá
ní ñihí-gã-yu cundecu
ndihí-yu.

54 Te chindee-gá ñáyu israhél,
ñáyu xínu cuechi
núú-gã, te ñá túú
dàña nihnu ñaha-gã
xii-yu, chi cùndahú iní
ñáhá-gã.

55 Chi ducaⁿ ñí xáhaⁿ-gã xii
ndíi Àbrahám, ndihi cue
ñaní tnáhá ndíi.

Duha ní xáhaⁿ tá Màriá xii tá
Elisàbét.

56 Te ní xíndecu tá Màriá
dàtná úní yóó ndihi tá Elisàbét
te dātñùnì cuánuhú-xi
vehe-xi.

*Ní cacu té Juàá té
dacuàndute ñaha xii ñáyu*

57 Te ní sáá nduu ñí cacu
ñí déhe téé tá Elisàbét. 58 Te
nchaa ñáyu ndècu yatni
ndihi-aⁿ, ndihi nchaa ñaní
tnáhá-áⁿ ñí ñihí-yu tnúhu
nàcuáa ní chindee ñaha Yá
Ndiöxí xii-aⁿ. Te ío ní cudíi
iní-yu cuèndá-aⁿ. 59 Te núú
ùná nduu sá ñí cacu déhe-aⁿ,
te ní sáháⁿ ñáyu núú ndécú-áⁿ
cuèndá cuáhã-yu señá ñíi
déhe-aⁿ. Te cuini-yu cunani
dèhe-áⁿ Zacàriá dàtná nání
tátá ní cùu. 60 Te ní xáhaⁿ ñáná
dèhe-áⁿ:

—Ñáhá, chi Juàá cunani-dè
—càchí-aⁿ xáhaⁿ-aⁿ xii-yu.

61 Te ní xáhãⁿ-yu:

—¿Te ná cuèndá te ñá túú
ní ñí ñaní tnáhá-ndó dùcaⁿ
nani-i? —cachí-yu xáhãⁿ-yu.

62 Te ní quidé-yu ndàhá-yu
núú tātá dèhe-áⁿ cuèndá
cuini-yu núu nása cuini
mée-dè cunani dèhe-dé,
63 Te ní xicáⁿ-dé ñí tutú ní
chídó tnùnì-dé nàcuáa cunani
dèhe-dé, te duha ní chídó
tnùnì-dé: “Juàá cunani-dè”,
càchí-xi núú tūtú ní tee-dé-áⁿ.
Te nchaa ñáyu xíndecu-áⁿ ñí
cuñúhu-yu nàcuáa ní cuu.

64 Te òré-áⁿ ñí nacáháⁿ té
Zacàriá sá ñí cuu ñihí-dé
ní cùu, te ní ngüita-dé ní
cachí-dé sá ío càhnu cuu Yá
Ndiöxí. 65 Te nchaa ñáyu
xíndecu yatni ndihi-dé ní
cuñúhu-yu, te nchaa ñáyu
xíndecu ñihíi xití yucu distritú
Judeá ní ñihí-yu tnúhu nàcuáa
ní cuu. 66 Te nchaa ñáyu-áⁿ
íó vài ní sani iní-yu, te ní
xítñáhá-yu:

—¿Ná cúú sã cádá tée-ãⁿ
ndéé idá-gá ná cuèhnu-dé? —
càchí-yu xítñáhá-yu.

Te ducaⁿ ñí xítñáhá-yu
chi Dútú Ndiöxí ndécú ndihi
ñaha-gã xii-dé.

*Té Zacàriá càchí-dé sá ío
càhnu cuu Yá Ndiöxí*

67 Te té Zacàriá tātá tē
lìhli-áⁿ ñí ngúndecu ndihi-dé
Espiritú Yá Ndiöxí te ní
cáháⁿ-dé nchaa tnúhu sá
ñí dánèhé ñáhá-gã, te ní
cachí-dé:

68 Ío càhnu cuu Dútú Ndiöxí
nchoo ñáyu israhél,

chi ní quixi coto ñaha-gã
xii-o, te cùu-o ñáyu cùu
cuèndá-gá, chi dàcácu
nihnu ñaha-gã xii-o
vìtna.

69 Chi ní tendaha-gã ìⁿ téé véxi-dé dâcâcu nihnu ñaha-dé xii-o núú úhú núú ndàhú.

Te cùu-dé ñaní tnáhá ndí Dàvií téé ní xinu cuechi núú-gã ndéé sanaha.

70 Te ñu-ni tnúhu ní cáháⁿ Yá Ndióxi ní cáháⁿ cue téé ní quide ndáá ní xindecu núú-gã ñuyíú-a ndéé sanaha.

71 Te ní cachí-güedé sá táúniñnu ñaha-gá xii-o núú nchàa ñáyiú cùu úhú iní ñáhá, ndíhi núú nchàa ñáyiú ñá túú cùu quiní ndee ñáhá.

72 Te ní xáhaⁿ-gã sá cündàhú iní ñáhá-gã xii-o, te ducaⁿ càda-gá chi vá nâcûanaa-gá tnúhu ní cáháⁿ-gã ndíhi-güedé.

73 Te ñu ducaⁿ ndùu tnúhu ní xáhaⁿ-gã xii ndí Ábrahám sá

74 táúniñnu ñaha-gá xii-o núú nchàa ñáyiú cùu úhú iní ñáhá,

cuendá sá vã yùhú-ó cùu cuechi-o núú-gã.

75 Te cada ndáá-ó, te cundecu yiññu-o núú-gã ndí nchàa nduu cundecu-o ñuyíú-a.

Duha ní cachí té Zacàriá.

76 Te xáhaⁿ-dè xii té líhli-áⁿ:
Te yòhó té líhli, cáháⁿ ñáyiú cuendá-n sã cúú-n ìⁿ téé cáháⁿ tnúhu Dútú Ndióxi Yáá ío cùnuu,

chi quíhíⁿ-n còdonuu-n núú Yáá cúú Xítohó-ó dâtúha-n ñáyiú cuendá cundecu túha-yu òré quexìo-gá.

77 Te cùñaha-n xii ñáyiú isràél sá cuìní-gá cada càhnu iní-gá nchaa cuéchi-yu, te naníhí tàhú-yu.

78 Te ducaⁿ càda-gá chi ío cùu iní ñáhá-gã xii-o, chi ndéé andíu ñí tendaha-gã ìⁿ téé véxi

cuuⁿ-dé dandíxi túu-dé iní-ó cuendá cutnùní iní-ó nâcûáa ndùu cuendá Yá Ndióxi.

79 Te ducaⁿ dândixi túu-dé iní nchaa ñáyiú ndècu ichi cuehé ichi duha ta xíta nihnu cuáháⁿ cuendá nucúnu ichí-yu ìⁿ ichi váha,

Duha ní xáhaⁿ tẽ Zacàriá xii déhe-dé.

80 Te té líhli-áⁿ tá sàhnu-dé, te ta chindee chítúu ñaha Yá Ndióxi xii-dé cuáháⁿ, te ní xindecu-dé xití yucu ndéé ní sáá nduu ñí ngúita-dé ní cáháⁿ-dé núú cuè ñáyiú isràél tnúhu Yá Ndióxi.

2

Ní cacu Jèsús (Mt. 1:18-25)

1 Te dàvâ-áⁿ ñí táúchíúⁿ tẽ Àugustú Cèsár nucódó tnùní nchaa ñáyiú nàcióⁿ yíndàha-dé. 2 Te xéhé sã díhnanuu ñí nucódó tnùní ñáyiú, te ñu-ni dàvâ-áⁿ ñí cunuu té Cìreníú distritú Sìriá.

3 Te nchaa ñáyiú ní nataká-yu ñuú núú ñí cacú-yu cuendá nucódó tnùní-yu. 4 Núu xiáⁿ ní quee té Chèé ñuú Nazàrét ìⁿ ñuú yíndèhu distritú Galileá, te cuáháⁿ-dé ñuú Bèlén ìⁿ ñuú yíndèhu distritú Jùdeá, chi xiáⁿ ñí cuu ñuú ndí Dàvií, te ñu-ni ñaní tnáhá tẽ Chèé-áⁿ ñí cuu ndí. 5 Núu xiáⁿ

cuáháⁿ-dé ndéé ñuú Bèlén nucódó tnùnì-dé, te tnàhá tá Màriá xíchí nǐ cundáá tnúhu sá tnándaha ndìhi-dé cuáháⁿ ndìhi ñaha-dě, te sa ñùhu déhe-xi. ⁶ Te nini cùyaá-yu ñuú Bèlén-áⁿ nǐ sáá òré cacu déhe-xi. ⁷ Te nǐ cacu déhe díhna-xi, te nǐ chidúcúⁿnuu-xi dóó, te nǐ sacáⁿ ñáhá-xí ìⁿ vehe núú cúú vèhe quitì, chí ñá túú ní ñìhǐ-yu vehe coó-yu.

Cue espíritú xínú cuèchi núú Yá Ndiöxí ndìhi cue toli.

⁸ Te yatni ñuú-áⁿ xǐndecu ìⁿ úú toli ndèé-güedé mbéé-güedé ndécú-güedé majadá niú-áⁿ. ⁹ Te uuⁿni ní quexìo ìⁿ espíritú xínú cuèchi núú Yá Ndiöxí, te Yá Ndiöxí ní quide-gá ní dáyèhé-xi nǐ càndéé núú xǐndecu-güedé, te ní yùhú víhí-güedé. ¹⁰ Te ní xáhaⁿ espíritú-áⁿ:

—Vá yùhú-ndó, chí nàha-í ìⁿ tnúhu váha véxi sá cúú-xí-ndó, te ío cudí^í ìní-ndó ndìhi nchaa ñáyiú. ¹¹ Chí vitna ní cacu ìⁿ téé dàcácu ñìhnu ñaha xì-ndo núú ùhú núú ndàhú ñuú ndíj Dàvií, te téé-áⁿ cúú-dé Xítóhó Jesucristú. ¹² Te dàtná ìⁿ sèñá te naníhí-ndó tē ìhli-áⁿ yídúcúⁿ nuu-dé dóó cáá-dě ìⁿ vehe quitì —càchí-xi xáhaⁿ-xi xì-güedé.

¹³ Te òré-áⁿ nǐ quexìo cuéhé víhí espíritú véxi cuuⁿ andiú nǐ naníhí tnáhá-xí ndìhi espíritú-áⁿ, te ní ngüíta-xi ní chiñuhu-xi Yá Ndiöxí, te càchí-xi:

¹⁴ Ío càhnu cuu Yá Ndiöxí Yaá ndécú àndiú, te na cùndecu váha-ni nchaa ñáyiú cùu ìní méé-gá!

Duha càchí cue espíritú-áⁿ.

¹⁵ Te òré cuándaa cue espíritú-áⁿ andiú, te ní ngüíta cue toli-áⁿ xǐtnàha-güedé:

—Na quìhíⁿ-ó ñuú Bèlén quiní-ó nàcuáa ní cuu, chí Dútú Ndiöxí sa ní cachí tnúhu-gá —càchí-güedé xǐtnàha-güedé.

¹⁶ Te ní tni-güedé ichi súúnì ndìhi cuáháⁿ-güedé, te ní naníhí-güedé tá Màriá ndìhi té Chèé, ndìhi té ìhli-áⁿ cáá-dě xití ìⁿ vehe quitì. ¹⁷ Te òré ní xínì ñáhá-güedé te ní xáhaⁿ-güedé xii-yu nàcuáa ní xáhaⁿ espíritú-áⁿ xii-güedé cuèndá té ìhli-áⁿ. ¹⁸ Te nchaa ñáyiú ní tecú dóho-xi ní cuñúhu-yu nàcuáa ní cáháⁿ-güedé. ¹⁹ Dico tá Màriá chí ñùhu nahi-ni ìní-xi, te dicó-ni sàni ìní-xi cuèndá nchaa tnúhu-áⁿ. ²⁰ Te cue toli-áⁿ nǐ natni-güedé ichi, te ta xǐtnàha-güedé cuánuhú sá ío càhnu cuu Yá Ndiöxí cuèndá nchaa tnúhu ní xǐndedóho-güedé, ndìhi cuèndá nchaa sá nǐ xínì-güedé, chí cuèndá sá ndàá ní cuu nchaa nàcuáa ní tecú tnúhu-güedé.

Ndècá-yu Jèsús cuáháⁿ veñúhu

²¹ Te núú ùná nduu sá nǐ cacu té ìhli-áⁿ, te ní sáha-güedé sèñá ñì-dé, te ní dánání ñaha-güedé Jèsús xii-dé, diú-ni nàcuáa ní xáhaⁿ espíritú xínú cuèchi núú Yá Ndiöxí xii tá Màriá ndéé cùtnáhá vátá ngühuⁿ-gá-dé xití-xi.

²² Te sáta nǐ tnahá nduu, nduu ì-yu nàcuáa càháⁿ nchaa tnúhu ní chídó tnùnì

ndíi Moisés, te ndècá-yu té lĩhli-án cuáhán ñúú Jerusálén cuendá quee túu-dé núú Dútú Ndiõxí. ²³ Te ducaⁿ ñi quidé-yu, chi ducaⁿ càháⁿ-xi núú tütú Yá Ndiõxí sá ncháá lándú té na càcu díhna quetúu-güexi núú-gá cuendá cundecu-ná-güexi cuendá-gá. ²⁴ Te ní quidé-yu nàcuáa càháⁿ Yá Ndiõxí núú tütú-gá núú càchí-xi: “Canehe-ndo ùú lómá àdi úú cūcu quíhíⁿ nduu táhú ñáhá Yá Ndiõxí”, duha càháⁿ-gá núú tütú-gá.

²⁵ Te dàvá-án ndécú ñiⁿ téé nàni Mió ñúú Jerusálén. Te ío váha iní-dé, te chĩñuhu-dé Yá Ndiõxí, te ndètu-dé sáá nduu chĩndee ñaha Yá Ndiõxí xii ñáyiú isràél. Te ndècu ndihi té Mió-án Espíritú Yá Ndiõxí.

²⁶ Te sa ní xáhaⁿ-xi xì-dé sá vǎ cūú-ni-dé, chi dacuítí quíní-dé Crístú Yaá tendaha Yá Ndiõxí quixi ñuyíú-a. ²⁷ Te téé-án ndécá ñaha Espíritú Yá Ndiõxí xii-dé cuáhán veñúhu càhnu sá ío cūnuu. Te cuáhán-yu ndihi Jèsús veñúhu-án cuendá cadá-yu ndihi-gá nàcuáa càháⁿ tnúhu ní chídó tnùní ndíi Moisés. ²⁸ Te òré ní sáá-yu, te té Mió-án ñi nguídèhé-dé Jèsús, te ní càháⁿ-dé sá ío càhnu cuu Yá Ndiõxí, te ní xáhaⁿ-dè xii-gá:

²⁹ Yòhó Dútú Ndiõxí sa ní cuu daña-n cūú-í vitna,

chi sa ní quide-n nàcuáa ní cachí-n xì yúhú téé xìnu cuechi núú-n.

³⁰ Chi sa ní xiní núú-í Yaá dàcácu nihnu ñaha xì ñáyiú núú ùhú núú ndàhú vitna.

³¹ Te Yaá ní tendaha-n vèxi núú ndécú ncháa ñáyiú ñuyíú-a.

³² Te cūu-gá dàtná ñiⁿ ñuhú, chi dandixi túu-gá iní ñáyiú cuendá cutnùní iní-yu cuendá Yá Ndiõxí cuèi ñá díú ñáyiú isràél cūú-yu.

Te diu-gá cada, te canehe ñáyiú dava-gá ñúú sá yíñùhu núú ñáyiú isràél chi diu ñáyiú isràél cūú-yu ñáyiú cūu cuendá-n.

Duha ní xáhaⁿ tǎ Mió xii Yá Ndiõxí.

³³ Te té Chèé ndihi nǎná Jèsús ní cuñúhu-yu tnúhu ní càháⁿ té Mió cuendá-gá.

³⁴ Te dàtnùní té Mió ní xícáⁿ táhú-dé núú Yá Ndiõxí cuendá-yu, te xáhaⁿ-dè xii tá Màriá nǎná Jèsús:

—Cundedóho tnúhu na càháⁿ-í-a, té lĩhli-a ní nduu táhú-dé nacanu ichi-dé dava ñáyiú isràél ichi Yá Ndiõxí, te davá-yu vá tnĩⁿ-yu tnúhu càháⁿ-dé, te ñáyiú-án cuíta nihnú-yu, te cada-dé nàcuáa cutnùní iní ñáyiú sá Yá Ndiõxí ní tendaha ñaha-gá xii-dé, dico vá quíndáá iní-yu, chi daquèe tíhú ñáhǎ-yu xii-dé.

³⁵ Te ducaⁿ te cutnùní nàcuáa sàni iní ñiⁿ ñáyiú. Dico sá cūú-xí yòhó chi ío cada ndàhú-xi iní-n, chi súúni dàtná sá ñi nícuèhé iní-n càda-xi —cachí-dé xáhaⁿ-dè xii tá Màriá.

³⁶ Te xíaⁿ ndécú tnàhá ñiⁿ ñaha càháⁿ tnúhu Yá Ndiõxí nání-án Aná, te tǎtá-aⁿ ní xínani-dè Fànuél ñani tnáhá ndíi Àsér. Te ñaha-án sa ní sahnu vǐhi-aⁿ, te cuechi-ni-aⁿ

nĩ tnándaha-aⁿ te úsá-ni cuiá nĩ xíndecu-aⁿ ndihĩ yĩ-aⁿ,
 37 te ní quendóo quèé-aⁿ, te sa ñũhu-aⁿ cúmídícó cúmí cuiá-aⁿ. Te ñá túú ní xõo quee-aⁿ veñũhu càhnu sá ïo cùnũu, chi nduu niú ní xóo chiñũhu-aⁿ Dútú Ndiõxí, te áma ñá túú tnàhí ná ní xõo caxi-aⁿ ní xóo cáháⁿ ndihĩ-aⁿ Yá Ndiõxí. 38 Te ñũu-nĩ òré ndécũ-yu ndihĩ Jèsús ní quexìo-aⁿ núũ-yu, te ní ndacáⁿ táhú-áⁿ núũ Yá Ndiõxí cuendá sá nĩ xini-aⁿ Jèsús, te dàtnùní ní ngũíta-aⁿ càháⁿ váha-aⁿ cuendá-gá núú nchàa ñáyũu, ñáyũu ndètu quini sáa nduu dàcácu Yá Ndiõxí ñáyũu Jerusàlén núú tnũndòho tnũhu ndáhú.

Cuánuhú-yu ñũú Nazàrét

39 Te sáta nĩ quidé-yu nchaa nàcuáa càháⁿ tnũhu Yá Ndiõxí, te cuánuhú-yu ñũú Nazàrét núú ndécú tnàhí-yu, te ñũú-áⁿ yíndèhu-xi distritú Galileá. 40 Te té lĩhli nani Jèsús-áⁿ tá sàhnu-dé, te ta nihí ndéé-dé cuáháⁿ, te ducaⁿ ïo váha ta sáa sá xini tnùní-dé cuáháⁿ, chi Yá Ndiõxí ndécú ndihĩ ñaha-gá xii-dé.

Jèsús ndécú-gã veñũhu

41 Te ndi tnahá cuiá nĩ xóo quihíⁿ té Chèé ndihĩ náná Jèsús vico pàscuá ñũú Jerusàlén. 42 Te cútnahá ní chítú Jèsús úxúú cuiá-gã, te cuáháⁿ-yu ndihĩ-gá ñũú Jerusàlén vico pàscuá, chi ducaⁿ tnàhí quidé-yu. 43 Te òré ní yáha vico, te ní natnũí-yu ichi cuánuhú-yu, te ní quendóo-gá ñũú Jerusàlén, te ni náná-gã, te ni tẽ Chèé

ñá túú ní xini ní quendóo-gá. 44 Chi ní sani iní-yu sá ñũtnahá-gá tnuú nchaa ñáyũu ní sáháⁿ vico cuánuhú. Te ní xũhuⁿ-yu ñⁿ nduu ichi ta ndùcu tnũhu-yu-gá núú nchàa ñani tnáhã-yu, ndihĩ núú nchàa ñáyũu xini tnáhã ndihĩ-yu, 45 te ñá túú ní naníhí ñáhã-yu xii-gá. Núu ní nacuicó-yu cuánuhú tucú-yu ñũú Jerusàlén cuendá yacáⁿ nanducu ñahá-yu xii-gá.

46 Te núú ùní nduu sá nĩ dana núú ñáhã-yu xii-gá, te ní naníhí ñáhã-yu núcóo-gá xití veñũhu càhnu sá ïo cùnũu tnuú cue tée dàcuaha ñaha xii-yu nchaa tnũhu ní chídó tnùní ndi Moisés, te ndèdóho ñaha-gã xii-güedé, te nándi sá ndúcú tnũhu-gá núú-güedé. 47 Te nchaa cue tée xíndedóho ñaha xii-gã xicũñũhu-güedé sá ïo váha sáa sá xini tnùní-gá, te ïo váha nihí-gã tnũhu nãdanchocáva-gã. 48 Te òré ní xini ñáhã tẽ Chèé ndihĩ náná-gã xii-gá, te ïo ní cuñũhu-yu, te ní xáhaⁿ náná-gã xii-gá:

—Yòhó déhe-í, ¿ná cuendá ducaⁿ nĩ quide ñaha-n xii-ndí? Te tátá-n ndihĩ yúhú ndihú iní-ndí xicá nãnducu ñaha-ndí xii-n —càchí-xi xáhaⁿ-xi xii-gá.

49 Te ní xáhaⁿ Jèsús xii-yu:

—¿Ná cuendá nãndùcu ñaha-ndo? ¿Náa ñá túú xini-ndó sã núú chíúⁿ Tãtà-í tàù-í caca cuu-í-ãⁿ? —càchí-gã xáhaⁿ-gã xii-yu.

50 Dico mèé-yu ñá túú ní tècú tnùní-yu nàcuáa ní xáhaⁿ-gã.

⁵¹ Te sáta dúcáⁿ te cuánuhú ndihí ñáhá-yu xii-gá ñuú Nazàrét, te ío ní sándáá iní ñáhá-gá xii-yu. Te nchaa sá ñi quide-gá-áⁿ ñi xúhuⁿ nahi-ni iní ñaná-gá. ⁵² Te Jèsús ducaⁿ-ni ta sàhnu-gá cuáháⁿ, te ta sàá-gá sá xini tnùní-gá cuáháⁿ, te ducaⁿ cùdiu-gá núú Yá Ndiöxí, ndihí núú nchàa ñáiyu.

3

Té Juàá tée dàcuandute ñaha xii ñáiyu càháⁿ-dé tnúhu Yá Ndiöxí xití yucu
(Mt. 3:1-12; Mr. 1:1-8; Jn. 1:19-28)

¹ Te ní cuu sáhúⁿ cuía sá yíndàha té Tiberiú cuéhé nacióⁿ, te dàvá-áⁿ ñi cunuu té Pilatú distrítú Jùdeá, te té Hèrodés ní cunuu-dě distrítú Galileá, te ñaní-dé té Lipé ní cunuu-dě distrítú Itùreá ndihí ingá distrítú nání Tràconité, te té Lisàniás ní cunuu-dě distrítú Abiliniá. ² Te té Ánás ndihí té Caifás ní cuu-güedé dútú cúnú. Te dàvá-áⁿ ñi càháⁿ ndihí ñaha Yá Ndiöxí xii té Juàá déhe té Zacàriá xití yucu sá quihíⁿ-dé càháⁿ-dé tnúhu-gá núú ñáiyu. ³ Te té Juàá ní yáha-dé nchaa ñuú cáá yàtni yúte Jòrdán, te xáhaⁿ-dě xii nchaa ñáiyu:

—Chí dándixi túu iní sá ñà túú quide váha-ndo, te dañà-ndo nchàa ichi cuehé ichi duha ndècu-ndo, te cuandute-ndo, te ducaⁿ te cada càhnu iní Yá Ndiöxí nchaa yicá cuèchi-ndo —duha ní xáhaⁿ-dě xii-yu.

⁴ Te ducaⁿ ñi quide-dé chi ní quee ndáá-xi nàcuáa ní chídó

tnùní ndii Chàiaá téé ní xóo càháⁿ tnúhu Yá Ndiöxí ndéé sanaha núú tùtú ndii núú càhí-xi:

Tècú càháⁿ níhi ñⁿ téé yìhi xití yucu, te xáhaⁿ-dě xii ñáiyu:

“Chí dáñá nchàa ichi cuehé ichi duha ndècu-ndo, te tñi-ndo ichi váha, te ducaⁿ càda-ndo cuendá cundecu túha-ndo, chi véxi Yaá ío cúnú.

⁵ Te nchaa núú cúnú nachítú, te nchaa tindúú ndihí nchaa yucu ngoyo nihnu cuendá nduu ndáá, te nchaa ichi ñá túú cuáháⁿ ndáá nduu ndáá, te nchaa ichi ñá túú càváha nduu váha.

⁶ Te nchaa ñáiyu ñuyú-a níhí-yu tnúhu sá Yá Ndiöxí véxi-gá dàcácu nihnu ñaha-gá xii-yu núú ùhú núú ndàhú.”
Duha ní chídó tnùní ndii Chàiaá núú tùtú ndii.

⁷ Te òré ní xica ñáiyu cuáháⁿ-yu cuendá dacuandute ñaha té Juàá xii-yu, te ní xáhaⁿ-dě:

—¡Nchaa nchòhó cúu-ndó dàtná ñⁿ cóo dééⁿ chí ío cuihna iní-ndó! ¿Te nása ní cuu núu tnàhá nchòhó ndúcú-ndó nàcuáa cácu nihnu-ndo núú tnùndòho cahnu vihi sá tá cùyatni ñaha xii-ndo véxi-i?

⁸ Te chí cáda váha vitna cuendá ducaⁿ cùnuni sá ñi dáñá-ndó nchàa ichi cuehé ichi duha ndècu-ndo. Te vá càhí-ndó sá ío càhnu cuu-ndo cuendá sá cúu-ndó ñaní tnàhá ndii Abrahám, chí cuèi ndéé yúu te ndacu Yá Ndiöxí ndada-gá ñáiyu te cuú-yu ñaní tnàhá ndii Abrahám.
⁹ Te caá chí ndècu túha-xi sá quèhndé-xi nchaa yutnu

sá ñà túú cáváha sávidí-xi, chi nchaa yutnu-án tēhndé-xi te cuánguee-xi núú ñùhú càyú-xi. Te duha sātñahá-xi ndoho nchaa ñáyiú ñá túú quide váha, chi nchaa ñáyiú ducaⁿ ñà túú quide váha cúu-yu dàtná nchaa yutnu sá ñà túú cáváha sávidí-xi. — cāchí-dé xāhaⁿ-dē xii-yu.

10 Te ní xicáⁿ tnúhu-yu núú-dē, te xāhāⁿ-yu:

—¿Te nása cada-ndí váiⁿ? — cāchí-yu xāhāⁿ-yu xii-dé.

11 Te xāhaⁿ-dē:

—Te núú ndēdacāa-ndo ndecu ndihí-ndo úú dóó te cuañaha-ndo ñⁿ xii ñáyiú ñá túú ndēcu ndihí, àdi núú ndēcu ndihí-ndo sá nchító-ó te cuáha-ndō-yu na cāxí-yu — cāchí-dé xāhaⁿ-dē xii-yu.

12 Te ní quexio ñⁿ úú cue téé cuihna iní-xi quide cobrá ñáhá xii ñáyiú cuendá impuēstú cuendá cuāndute-güedé, te ní xicáⁿ tnúhu-güedé núú tē Juáá, te xāhaⁿ-güedé:

—Mēstrú, ¿te nása cada-ndí cuendá cuu váha iní Yá Ndiōxí-í? — cāchí-güedé xāhaⁿ-güedé xii-dé.

13 Te tē Juáá ní xāhaⁿ-dē:

—Vá cuidó-ndó cāda cobrá-ndó ñáyiú — cāchí-dé xāhaⁿ-dē xii-güedé.

14 Te tnàhá ñⁿ úú cue téé cúu sandadú xīndecu-án ñí xicáⁿ tnúhú-güedé núú tē Juáá, te xāhaⁿ-güedé:

—Te nchúhú ¿nása cada-ndí cuendá cuu váha iní Yá Ndiōxí-í? — cāchí-güedé xāhaⁿ-güedé xii-dé.

Te ní xāhaⁿ tē Juáá:

—Vá quéndēé-ndó sá néhé tnàha ñáyiú-ndo, te ní vā dācāa díquí-ndō-yu ñⁿ sá ñà túú ñá quidē-yu, te nduu vétú iní-ndó nācuāa ñùhu yáhu-ndo — cāchí-dé xāhaⁿ-dē xii-güedé.

15 Te nchaa ñáyiú xīndetu sá quixí Crístú sàni ñⁿ sani úú iní-yu núú sá díú Crístú Yáá tendaha Yá Ndiōxí quixi ñuyíú-a cúu te Juáá àdi ñáhá. 16 Dico té Juáá ní cāháⁿ ndodo-dé núú-yu nchaa-yu, te xāhaⁿ-dē:

—Na cāchí tnúhu ndáá-í xii-ndo sá yùhú véxi-í sá cuendá-ni dacuāndute ñaha-í xii-ndo dàtná ní cāchí Yá Ndiōxí, dico nchícúⁿ ingá téé véxi, te téé-áⁿ taxi-dé Espíritú Yá Ndiōxí cundecu ndihí-ndo, te cúu-xi datná ñⁿ ñuhú, chi ndada ndoo ndada nine-xi iní-ndó. Te téé-áⁿ ño-gá cúnúu-dé dācúxí yùhú, chi yùhú cúu-í ñⁿ téé duuⁿ duuⁿ ñá túú tàú-í nandaxi-í cuēdicó ñí chāú-dé dico quide-í chiuⁿ-dē. 17 Te téé-áⁿ

sa véxi túha-dé sá cādá dñⁿ ñaha-dé xii-o dàtná quidé ñáyiú ndàda ndoo triú, chi ñáyiú-áⁿ sa nèhe túha-ná-yu yaxíⁿ-yu òré náñani cuendá ndada ndoo-yu, te òré ndádá ndoo-yu triú-áⁿ te dàquee dñⁿ-yu mihi-xi, te tàxúha-yu mee-ñá triú-áⁿ, te mihi-xi-áⁿ sáhmi-yu. Te dàtná quidē-yu mihi triú-áⁿ ducaⁿ sātñahá-xi cada ñaha téé-áⁿ xii nchaa ñáyiú ñá túú quide váha, chi daquihíⁿ ñáhá-dē xii-yu núú ñùhú núú càyú, te ñuhú-áⁿ ñà túú tnàhí ndàhvá — cāchí-dé xāhaⁿ-dē xii-yu.

18 Te titní víhí-gã tnúhu váha ní xáhaⁿ tẽ Juáá xii-yu òré ní dásàhú ñhá-dẽ. 19 Te ní cáháⁿ-dẽ dóhò té Hèrodés cuendá sá ndécá-dẽ ìⁿ ñaha nàni Herodiás ñaha ní cãndeca ñaní-dé té Lìpé, te ní xáhaⁿ-dẽ cuendá nchaa dava-gá sá cuèhé sá dúhá quide-dé. 20 Dico té Hèrodés ñã túú ní quide cuendá-dé tnúhu ní cáháⁿ té Juáá, chi nèhé-gá tucu ní quide-dé, chi da vecaá ní chihi-dé té Juáá.

Sàndute Jesús

(Mt. 3:13-17; Mr. 1:9-11)

21 Te òré dácuañdute té Juáá nchaa ñáyiu, te tnàhá Jèsús ní dácuañdute ñaha-dé xii-gá. Te nini càháⁿ ndihi-gá Dútú Ndiõxí ní nacaáⁿ andiù, 22 te ní quee Espiritú Yã Ndiõxí véxi cuuⁿ túu-xi, te cà-xi datná cáá ìⁿ lómá, te òré-áⁿ ní tecú ní cáháⁿ Yã Ndiõxí ndéé andiù, te xáhaⁿ-gã xii Jèsús:

—Yòhó cúu-n Dèhe-í tée ío cùu iní-í, te ío cùdí iní ñáhà-í xii-n —càchí-gá xáhaⁿ-gã xii Jèsús.

Cue tée ní xíndecu díhna-gá ñuyú-a dácúúxí Xìtohó Jesu-crìstú

(Mt. 1:1-17)

23 Te ndècu Jesús dàtná ócò úxí cuíá-gã cútnàhá ní chisaha-gã chiùⁿ ní táhú Tãtá-gã Dútú Ndiõxí cada-gá. Te ní cuu-gá déhe té Chèé chi ducaⁿ sàni iní ñáyiu ñuyú-a. Te té Chèé-áⁿ ní cuu-dé déhe té Èlì, 24 te tée-áⁿ ní cuu-dé déhe té Mátát. Te té Mátát-áⁿ ní cuu-dé déhe té Lèví, te tée-áⁿ ní cuu-dé déhe té Mèlquí. Te té Mèlquí-áⁿ ní cuu-dé déhe té Jàná, te tée-áⁿ

ní cuu-dé déhe té Chèé. 25 Te té Chèé-áⁿ ní cuu-dé déhe té Matàtiás, te tée-áⁿ ní cuu-dé déhe té Àmós. Te té Àmós-áⁿ ní cuu-dé déhe té Nàhúm, te tée-áⁿ ní cuu-dé déhe té Èslí. Te té Èslí-áⁿ ní cuu-dé déhe té Nagàì, 26 te tée-áⁿ ní cuu-dé déhe té Mátát. Te té Mátát-áⁿ ní cuu-dé déhe té Matàtiás, te tée-áⁿ ní cuu-dé déhe té Semèì. Te té Semèì-áⁿ ní cuu-dé déhe té Chèé, te tée-áⁿ ní cuu-dé déhe té Jùdá. 27 Te té Jùdá-áⁿ ní cuu-dé déhe té Jòaná, te tée-áⁿ ní cuu-dé déhe té Rèsá. Te té Rèsá-áⁿ ní cuu-dé déhe té Zorobàbél, te tée-áⁿ ní cuu-dé déhe té Salàtiél. Te té Salàtiél-áⁿ ní cuu-dé déhe té Nèrì, 28 te tée-áⁿ ní cuu-dé déhe té Mèlquí. Te té Mèlquí-áⁿ ní cuu-dé déhe té Àdí, te tée-áⁿ ní cuu-dé déhe té Còsám. Te té Còsám-áⁿ ní cuu-dé déhe té Elmòdám, te tée-áⁿ ní cuu-dé déhe té Èr. 29 Te té Èr-áⁿ ní cuu-dé déhe té Jòsué, te tée-áⁿ ní cuu-dé déhe té Elièzér. Te té Elièzér-áⁿ ní cuu-dé déhe té Jòrím, te tée-áⁿ ní cuu-dé déhe té Mátát. 30 Te té Mátát-áⁿ ní cuu-dé déhe té Lèví, te tée-áⁿ ní cuu-dé déhe té Mió. Te té Mió-áⁿ ní cuu-dé déhe té Jùdá, te tée-áⁿ ní cuu-dé déhe té Chèé. Te té Chèé-áⁿ ní cuu-dé déhe té Jònán, te tée-áⁿ ní cuu-dé déhe té Eliàquím. 31 Te té Eliàquím-áⁿ ní cuu-dé déhe té Mèleá, te tée-áⁿ ní cuu-dé déhe té Mainán. Te té Mainán-áⁿ ní cuu-dé déhe té Mátatá, te tée-áⁿ ní cuu-dé déhe té Nàtán. 32 Te té Nàtán-áⁿ ní cuu-dé déhe té Dàvií, te tée-áⁿ ní cuu-dé déhe té Isàí. Te té Isàí-áⁿ ní cuu-dé déhe té Òbéd,

te téé-án nĩ cuu-dé déhe té Bòóz. Te té Bòóz-án nĩ cuu-dé déhe té Salmón, te téé-án nĩ cuu-dé déhe té Naàson. ³³ Te té Naàson-án nĩ cuu-dé déhe té Aminadáb, te téé-án nĩ cuu-dé déhe té Àram. Te té Àram-án nĩ cuu-dé déhe té Èsróm, te téé-án nĩ cuu-dé déhe té Fàrés. Te té Fàrés-án nĩ cuu-dé déhe té Jùdá, ³⁴ te téé-án nĩ cuu-dé déhe té Jàcób. Te té Jàcób-án nĩ cuu-dé déhe té Isàac, te téé-án nĩ cuu-dé déhe té Àbrahám. Te té Àbrahám-án nĩ cuu-dé déhe té Tàré, te téé-án nĩ cuu-dé déhe té Nàcór. ³⁵ Te té Nàcór-án nĩ cuu-dé déhe té Sèrúg, te téé-án nĩ cuu-dé déhe té Ragàú. Te té Ragàú-án nĩ cuu-dé déhe té Pèlég, te téé-án nĩ cuu-dé déhe té Hèbér. Te té Hèbér-án nĩ cuu-dé déhe té Salá, ³⁶ te téé-án nĩ cuu-dé déhe té Cainán. Te té Cainán-án nĩ cuu-dé déhe té Arfàxád, te téé-án nĩ cuu-dé déhe té Sèm. Te té Sèm-án nĩ cuu-dé déhe té Nòé, te téé-án nĩ cuu-dé déhe té Làméc. ³⁷ Te té Làméc-án nĩ cuu-dé déhe té Matusalén, te téé-án nĩ cuu-dé déhe té Ènóc. Te té Ènóc-án nĩ cuu-dé déhe té Jàréd, te téé-án nĩ cuu-dé déhe té Mahalàleél. Te té Mahalàleél-án nĩ cuu-dé déhe té Cainán, ³⁸ te téé-án nĩ cuu-dé déhe té Ènós. Te té Ènós-án nĩ cuu-dé déhe té Sèt, te téé-án nĩ cuu-dé déhe té Àdán. Te té Àdán-án chi mee Yă Ndiòxí ní cadúha ndaha ñaha-gá xii-dé.

4

Sácuíhná quidé yica-xi cada Jesús sá ñà túú tàú-gá cada-gá ní cuu

(Mt. 4:1-11; Mr. 1:12-13)

¹ Te Jèsús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndihi-gá Espiritú Yă Ndiòxí, te Espiritú-áⁿ ndécá ñaha-xi xii-gá cuáhán ìⁿ xití yucu.

² Te yàcán ní xíndecu-gá údico nduu, te sácuíhná nĩ cuiní-xi coto ndeé ñahá-xí xii-gá te núu ndisa sá vă cáda-gă ìⁿ sá ñà túú tàú-gá cada-gá. Te ñá túú tnàhí ná ní xèxi-gá ndi údico nduu-án, te sátá dúcán te ní xícán iní-gá caxi-gá. ³ Te sácuíhná-áⁿ nĩ xáhaⁿ-xi xii-gá:

—Te núu ndisa sá cúu-n Dêhe Yă Ndiòxí, te cúñaha xii yúú-a na nduu-xi paá — cächí-xi xăhaⁿ-xi xii-gá.

⁴ Te Jèsús ní xáhaⁿ-gă xii-xi:

—Núú tùtú Yă Ndiòxí cächí-xi: “Ná díú mée-ni paá candeca-xi iní ñáyiu, chi tnàhá nchaa tnúhu cáhán Yă Ndiòxí candeca-xi iní-yu”, duha cächí-xi núú tùtú-gá — cächí-gá xăhaⁿ-gă xii-xi.

⁵ Te dătnùní sácuíhná ndécá ñaha-xi xii-gá cuáhán ìⁿ núú tìndúú dúcán, te uuⁿni ní dánèhé núú ñahá-xí xii-gá nchaandi túhú nacióⁿ cáá ñùyúú. ⁶ Te ní xáhaⁿ-xi xii-gá:

—Yúhú cada-í, te taxi tnùní-n nchaa-ndi túhú nacióⁿ-a ndihi nchaa sá vâha ió diu-ni nchaa nacióⁿ-a, te cachí ñáyiu sá ïo cùnuu-n, chi yúhú cúú cuendá-í nchaa sá ió nchaa nacióⁿ-a, te ndédani càa ñáyiu cùu iní-í te cúñaha-í xii-yu taxi tnùní-yu. ⁷ Te núu ni yùhu ni iní-n chiñuhu ñaha-n xii-í ñă, te nchaa taxi-í cuu cuendá-n — cächí-xi xăhaⁿ-xi xii-gá.

⁸ Te Jèsús ní xáhaⁿ-gă xii-xi:

—Xocuñí yòhó sácuihná nùú ndécù-í-a, chi vá cúú càda-í nàcuáa càchí-n chi núú tütú Yá Ndiöxí càchí-xi: “Chiñuhu-ndo Dütú Ndiöxí Yaá cúú Ndiöxí-ndó, te ñⁿdí díi-ni-gã cada-ndo nchàa nacuáa càháⁿ-gá”, duha càchí-xi núú tütú-gá — càchí-gá xãhaⁿ-gã xii-xi.

⁹ Te sácuihná ndécá ñaha tucu-xi xii-gá cuáháⁿ ñuú Jerusálén, te ní xáhaⁿ-xi xii-gá cuásaá-gá díquí veñúhu càhnu sá ïo cùnuu, te ní xáhaⁿ tucu-xi:

—Te núu ndisa cùu-n Déhe Yá Ndiöxí te cuandé ndava ndéé núú ñúhú ¹⁰ cuendá quee ndáá-xi nàcuáa càháⁿ-xi núú tütú Yá Ndiöxí núú càchí-xi:

Yá Ndiöxí tendaha-gã cue espíritú xínú cuèchi núú-gã quixi-xi coto ñaha-xi xii-n.

¹¹ Te núú ndáhá-xí càundodo-n cuendá sá vá dánicuèhé yúú sãhá-n,

duha càchí-xi núú tütú-gá — càchí sácuihná xãhaⁿ-xi xii-gá.

¹² Te Jèsús ní xáhaⁿ-gã xii-xi:

—Te càchí tucu-xi núú tütú Yá Ndiöxí: “Vá caní ñí-n còto ndéé-n Dütú Ndiöxí Yaá cúú Ndiöxí-n núu ndisa sá dácácu nihnu ñaha-gã xii-n cuendá ñⁿ sá sání ñí-n càda-n sá cúú-xí mée-n”, duha càchí-xi núú tütú-gá —càchí-gá xãhaⁿ-gã xii-xi.

¹³ Te sátá dúcáⁿ te sácuihná ñà túú-gã ní cùtnuní ñí-xi nása cada-xi Jèsús, núú xãⁿ ní xica-xi cuáháⁿ-xi ní sanaa tnaa-xi.

Distritú Galileá ní chisaha Jèsús chiúⁿ ní táhú Tátá-gã Dütú Ndiöxí cada-gã

(Mt. 4:12-17; Mr. 1:14-15)

¹⁴ Te Jèsús cuáháⁿ tucu-gá distritú Galileá, dico sa ndècu ndihi-gá Espíritú Yá Ndiöxí, te ní càa xico xiáⁿ ñí ñíhí-yu tnúhu nchaa nàcuáa quide-gá. ¹⁵ Te ndi tnahá ñuú cuáháⁿ-gá ducaⁿ cuãnguïhu-gá veñúhu-yu dānehé ñáhá-gã xií-yu, te ncháá-yu càchí-yu sá ïo càhnu cuu-gá.

Jèsús ndécú-gã ñuú Nazàrét (Mt. 13:53-58; Mr. 6:1-6)

¹⁶ Te Jèsús ní sáháⁿ-gá ñuú Nazàrét ñuú núú ñí sahnu-gá. Te nduu ndètatú ñáyiu ní quíhu-gá veñúhu, chi ducaⁿ tnahí quide-gá, te ní ngúnutñi-gã dácuaá-gá tutú ndéé tnúhu Yá Ndiöxí. ¹⁷ Te ní sãñaha-güedé xii-gá tutú ndéé tnúhu ní cáháⁿ ndí Chàíá téé ní xóo cáháⁿ tnúhu Yá Ndiöxí ndéé sanaha, te òré ní nandicá-gá núú tütú-áⁿ te ní naníhí-gá núú càchí-xi:

¹⁸ Espíritú Yá Ndiöxí ndécú ndíhi ñaha-xi xii-í,

chi ní cachí-gá sá càháⁿ-í tnúhu-gá sá cúú-xí ñáyiu ndàhú,

ñáyiu vátá cündèdóho tnahí-gá.

Te véxi-í cuendá vá ndíhú-gá ñí ñáyiu ñá túú ndècu váha ñí-xi,

te cue ñáyiu sa nèhe váha ñaha-ñã yucu ñávãha dácácu nihnu-í-yu.

Te cue ñáyiu cuáá nacaáⁿ-í núú-yu,

te ñáyiu ndòho dandoho ñaha tnahã ñáyiu-xi tauni-hnu-í-yu.

19 Te cúñaha-ĩ xii ñáyiú sá sàà nduu càda Yá Ndiòxí ìⁿ sá vâha sá cúú-xĩ-yu.

Duha càchí-xi núú tütú dâcuâha-gá.

20 Te Jèsús ní nacadí-gá núú tütú-áⁿ, te ní nacuâha-gá ìⁿ téé xínu cuechi veñúhu-áⁿ, te ní ngóo-gá. Te nchaa ñáyiú yìhi veñúhu ñá núú nũ-yu ndèhe ñahá-yu xii-gá. 21 Te xâhaⁿ-gã xií-yu:

—Mei vitna ní quee ndáá-xi nâcuâa càháⁿ-xi núú tütú Yá Ndiòxí —câchí-gá xâhaⁿ-gã xií-yu.

22 Te ncháá-yu ní cáháⁿ váha-yu cuendá-gá, te ní cuñúhu-yu tnúhu váha càháⁿ-gá, te xĩtnahá-yu:

—¿Te náa ñá díú tẽe-a cùu-dé déhe té Chèé-ãⁿ? —câchí-yu xĩtnahá-yu.

23 Te Jèsús ní xâhaⁿ-gã:

—Na càchí tnúhu ndáá-í xii-ndo sã ñúhú ìní-ndó cúñaha-ndo xii-í ìⁿ tnúhu cùtexínu sá càháⁿ mée-ndó, te quesaha-ndo: “Ñátátná cada tátna mee-n”, duha quesaha-ndo. Te cúñaha tûcu-ndo xii-í: “Sa ní níhí-ndí tnúhu nâcuâa ní quide-n ñúú Capèrnaúm, te cada-n tnahá ñúú núú ñi sahnú-n”, duha quesaha-ndo —câchí-gá xâhaⁿ-gã xií-yu.

24 Te ní xâhaⁿ tûcu-gá:

—Na càchí tnúhu ndáá-í xii-ndo sã ñi ìⁿ téé càháⁿ tnúhu Yá Ndiòxí ñá túú tnahá ìní ñáhá ñáyiú ñúú-dé. 25 Te na càchí tnúhu ndáá tucu-í xii-ndo sã ïo vâi ñáyiú ðihí ñáyiú quèé ní xíndecu nâcióⁿ Isràél cùtnahá ní xíndecu té Èliás cùtnahá ñá túú ní cùuⁿ

dáú ùní cuiá dava, te dàvá-áⁿ ïo ní ndoho ñáyiú docó nitùhú nâcióⁿ. 26 Dico Yá Ndiòxí ñá túú ní tëndaha-gá té Èliás quíhíⁿ-dé vehe ndédani càa ñáyiú ðihí-áⁿ, chi vehe ìⁿ ñaha ñúú Sàreptá ní xâhaⁿ-gã ní sáháⁿ-dé, te ñúú-áⁿ cáá yàtni-xi ñúú Sìdón. 27 Te ní xíndecu tucu ìngá téé ní xóo cáháⁿ tnúhu Yá Ndiòxí ndéé sanaha, te téé-áⁿ ñi xínani-dé Èliseú, te ðiu-ni dàvá-áⁿ ñi xíndecu tucu vâi ñáyiú cùhú nâcióⁿ Isràél, ñáyiú ní tnahá cuéhé sã dátèhyú nihnu-xi yiqui cùnú-yu dico ñá túú ní ndúha-yu, chi ìⁿ ði-ni té Nàmán téé distritú Sìriá ní ndúha-dé —câchí-gá xâhaⁿ-gã xií-yu.

28 Te sá dúcáⁿ ñi cáháⁿ-gá te xiáⁿ ní cudééⁿ víhí ncháa ñáyiú yìhi veñúhu-ãⁿ núú-gã.

29 Te ní queñuhú-yu Jèsús yuhu ðèhvá tìndúú nũú cáá ñúú-yu-áⁿ cuendá yàcáⁿ dàquée-yu-gá ðèhvá ní cùu. 30 Dico Jèsús vii-ni ní quee-gá tnuú-yu cuáháⁿ-gá.

Èⁿ téé yìhi ñaha espíritú cùndìhi yucu ñávâha (Mr. 1:21-28)

31 Te Jèsús cuáháⁿ-gá ñúú Capèrnaúm, te ñúú-áⁿ yíndèhu-xi distritú Galileá. Te yàcáⁿ ndécú-gã ní tnahá nduu ndètátú ñáyiú, te ní ngúíta-gá dâcuâha-gá ñáyiú. 32 Te xicunúhu-yu nchaa nâcuâa dànehé ñáhá-gã xií-yu, chi càháⁿ-gá dàtná càháⁿ ìⁿ téé cùnuu, te cùnuu ndisa-gá.

33 Te xití veñúhu yíhi ìⁿ téé yíhi ñaha ìⁿ espíritú cúndìhi yucu ñávãha, te espíritú-áⁿ nǐ quide-xi níhi ní cáháⁿ téé-áⁿ, te xãhaⁿ-dẽ xii Jèsús:

34 —¿Te ná cuení yòhó Jèsús téé ñuú Nazàrét cada ñaha-n xii-ndí nũu véxi-n nũú ndécú-ndí-i? ¿Áⁿ véxi-n dànaa ñaha-n xii-ndí? Chi yúhú xìní ñáhà-í xii-n sã cúú-n ìⁿ téé ñá túú tñàhí cuéchi-xi chi núú Yã Ndióxí ní quee-n véxi-n ñùyíú-a —càchí-dé xãhaⁿ-dẽ xii-gá.

35 Te Jèsús ní tenàá-gá espíritú cúndìhi yucu ñávãha-áⁿ, te xãhaⁿ-gã:

—¡Cadí yuhu-n, te taquèe yiqui cuñú téé-áⁿ! —càchí-gá xãhaⁿ-gã.

Te espíritú cúndìhi yucu ñávãha-áⁿ nǐ dándùá-xi téé-áⁿ ndèé ñuhu tnuú ñáyiu xĩndecu-áⁿ, te ñá túú-gã ná ní quide ñaha-xi, te ní quee ñaha-xi xii-dé. 36 Te nchaa ñáyiu xĩndecu-áⁿ nǐ cuñúhu-yu, te ní xitnàhá-yu:

—¿Te nása nduu-tu tñúhu cáháⁿ téé-áⁿ ñá? ¡Te cáháⁿ-dé dàtná cáháⁿ ìⁿ téé tàxi tñuní víhí, chi cáháⁿ-ní-dé te nchaa espíritú cúndìhi yucu ñávãha quèe-ni-xi yiqui cuñú-yu! —càchí-yu xitnàhá-yu.

37 Te nchaa xichi ní níhí-yu tñúhu nãcuáa quide Jèsús.

Jèsús quidé tãtna-gá nãná ñadìhí té Xímú

(Mt. 8:14-15; Mr. 1:29-31)

38 Te Jèsús ní ndee-gá xití veñúhu, te cuáháⁿ-gá vehe té Xímú. Te nãná ñadìhí té Xímú-áⁿ cùhú-aⁿ

ñùhu vihi-aⁿ cahni, te ní cáháⁿ ndàhú-yu núú Jèsús cuendá-aⁿ. 39 Te Jèsús ní sáháⁿ-gá núú ndécú-áⁿ, te ní ngúnundeyi-gá te ní xãhaⁿ-gã xii cahni-áⁿ sã ná xòcuñí-xi, te ní xócuñí-ni-xi, te òré-ni-áⁿ nǐ ndúha ñaha cùhú-áⁿ te ní ndacóo-aⁿ ní xinu cuechi-aⁿ núú-güedẽ ndìhi-gá.

Jèsús quidé tãtna-gá vai ñáyiu cùhú

(Mt. 8:16-17; Mr. 1:32-34)

40 Te òré ní ngódó tñúú nchícanchii, te nchaa ñáyiu xĩndecu ndìhi ñáyiu cùhú vehe-xi ndèca ñahá-yu cuáháⁿ núú Jèsús. Te Jèsús ní sacáⁿ ndodo-gá ndaha-gá díquí ìⁿ ìⁿ ñáyiu cùhú-áⁿ, te ducaⁿ nǐ quide-gá te ní ndúha-yu. Te ndí díⁿ nũú cuèhé tñahá-yu ìⁿ ìⁿ-yu ni cùu. 41 Te tñahá dava ñáyiu cùhú-áⁿ yíhí ñaha espíritú cúndìhi yucu ñávãha xii-yu ni cùu, te òré ní quee ñaha-xi xii-yu, te xíãⁿ ní quide-xi níhi ní cáháⁿ-yu, te xãháⁿ-yu xii Jèsús:

—Yòhó cúú-n Dèhe Dútú Ndióxí —càchí-yu xãháⁿ-yu xii-gá.

Dico Jèsús níhi ní cáháⁿ-gá ní tenàá-gá nchaa espíritú cúndìhi yucu ñávãha-áⁿ, te xãhaⁿ-gã sã vã dúcáⁿ-gã cada-xi, chi sa xìní-xi sã díú-gã cúú-gã Crístú Yaa ní tendaha Yã Ndióxí véxi ñùyíú-a.

Jèsús dánèhé-gá ñáyiu distritú Galiléa

(Mr. 1:35-39)

42 Te ìⁿ nduu ní túndaá-ni ní quee Jèsús ñuú núú

ndécú-gă-án cuăháⁿ-gá ìⁿ xichi núú ñă túú ñăyiu ndècu. Te cue ñăyiu ní ngúíta-yu nànducu ñahá-yu xii-gá te ní naníhí ñáhă-yu, te cuíní-yu ngani ñahá-yu xii-gá cuendá sá ñà túú-gă ndéé quíhíⁿ-gá ní cùu. ⁴³ Dico ní xáhaⁿ-gă xii-yu:

—Dacuití quíhíⁿ-í cúñaha-í xii nchaa ñăyiu dava-gá ñuú tnúhu sá càháⁿ nàcuáa ndíhu ndaha ñàha Yá Ndióxi xii-yu, chi chiúⁿ tnahí-ăⁿ vèxi-í —càchí-gá xăhaⁿ-gă xii-yu.

⁴⁴ Te ní xica cuu Jèsús ní dánèhé-gá ñăyiu tnúhu-gá nchaa xití veñúhu ndăa distritú Galileá.

5

Jèsús ní quide-gá ní níhí-güedě chácá

(Mt. 4:18-22; Mr. 1:16-20)

¹ Te ìⁿ xito ndècu Jesús yuhu làgúná Genesàrét, te ío cuéhé ñăyiu ní sáá, te ta dàdehnde ñaha-ná-yu xii-gá cuáháⁿ sá cuíní-yu cundedóho-yu nchaa tnúhu càháⁿ-gá. ² Te Jèsús ní xiní-gá úú bàrcú cue téé tñi chácá xínutnii-xi yatni yuhu làgúná-án, te sa ní quene cue téé ñúhu xití-xi-án xínaquete-güedé ñunu-güedé.

³ Te Jèsús cuásaá-gá núú ìⁿ bàrcú-án, te bàrcú-án cúu-xí bàrcú té Xímú, te ní xáhaⁿ-gă xii té Xímú-án sá dánundehe-dé-xi luha-gá xití ndute. Te dàtnùní ní ngóo-gá núú bàrcú-án, te xíaⁿ núcôo-gá ní ngúíta-gá dánèhé-gá ñăyiu. ⁴ Te òré ní túhú ní dánèhé

ñáhá-gă xii-yu, te ní xáhaⁿ-gă xii té Xímú:

—Daquihíⁿ bàrcú-a xití làgúná mei núú cùnú-gá, te dàquée-ndo ñunu-ndo tñi-ndo chácá —càchí-gá xăhaⁿ-gă xii-dé.

⁵ Te té Xímú ní xáhaⁿ-dê:

—Mèstrú, ni niú ní quide chiúⁿ-ndí te ni ìⁿ chácá ñà túú ní níhí-ndí, dico vitna cuendá-ni sá yòhó táuchiuⁿ-n te na dàquée-ndí ñunu-ndí váⁿ —càchí-dé xăhaⁿ-dê xii-gá.

⁶ Te òré ní dáquée-güedé ñunu-güedé te súúni vâi chácá ñi níhí-güedé, te ta ndátá-nă ñunu-güedé cuáháⁿ ní cùu. ⁷ Núu ní quide-güedé ndaha-güedé núú dàva-gá cue téé cùndihí-güedé xixúhuⁿ ingá bàrcú cuendá quíhíⁿ-güedé chindee ñàha-güedé. Te cue téé-áⁿ ñi sáháⁿ-güedé ní chindee tñaha-güedé ní dáchitú-güedé ndi ndúú bàrcú mee-ni chácá, te súúni ñi cuu véé núu cuíní-na-xi quée naa-güedé ndihí bàrcú ní cùu.

⁸ Te sá dúcáⁿ cuíní-xi quée naa bàrcú ní cùu, núu té Xímú, àdi Pelú chi úú diu-dé, ní ngúíñi xití-dê núú Jèsús, te xăhaⁿ-dê:

—Xocuiñi yòhó Jèsús núú ndécú-í-a, chi yúhú cúu-í ìⁿ téé ío ndècu cuéchi-xi —càchí-dé xăhaⁿ-dê xii-gá.

⁹ Te ducaⁿ ñi càháⁿ-dé chi ní yúhú-dé, te ní cuñúhu-dé ndihí nchaa cue téé ndihí-dé-án cuendá sá ío vâi chácá ñi níhí-güedé.

¹⁰ Te tñahá té Jàcobó ndihí té Juáá cue déhe té Zebèdeú ío ní cuñúhu-güedé, te diu-ni

cue tée cùndìhi té Xímú-án cúu-güedé tñahá-güedé. Te Jèsús ní xáhaⁿ-gã xii té Xímú:

—Vá yùhú-n, chi neni vitna quíhíⁿ-n dàcaháⁿ-n ñáiyu cuèndá tuha ñahá-yu xii-í — càchí-gá xãhaⁿ-gã xii-dé.

11 Te ní quene-güedé ndihi bàrcú ndéé ñuhu yìchí yuhu làgúná-án. Te òré-án ñí dándõ-güedé nchaandi túhú sá ndécú ndihi-güedé, te ní tuha-güedé Jèsús.

Jèsús quidé tãtna-gá ìⁿ tée tñahá cuéhé sã dátèhyú nihnu-xi yiqui cùñú-ó

(Mt. 8:1-4; Mr. 1:40-45)

12 Te òré ní quexìo Jèsús ìⁿ ñuú, te ní quexìo ìⁿ tée cùhú tñahá-dé cuéhé sã dátèhyú nihnu-xi yiqui cùñú-ó, te òré ní xiní-dé Jèsús te ní sáháⁿ-dé núú ndécú-gã, te ní ngüñí xítí-dé núú-gã te ní nuu núú-dě ndàa núú ñúhú te cãháⁿ ndàhú-dé, te xãhaⁿ-dě xii-gá:

—Mèstrú, véxi-í cãháⁿ ndàhú-í núú-n ñuu vá cùndèe iní-n cada tãtna ñaha-n xii-í, chi cùtnuní iní-í sã ndácú-n —càchí-dé xãhaⁿ-dě xii-gá.

13 Te Jèsús ní dácàá-gá ndaha-gá ní tendaha ñaha-gá xii-dé, te xãhaⁿ-gã:

—Cuu cada tãtna ñaha-í xii-n, te vitna te ndúha-n —càchí-gá xãhaⁿ-gã xii-dé.

Te òré-ni ní xócuñí cuéhé tñahá-dé. 14 Te dàtnuní ní xáhaⁿ tùcu Jèsús xii-dé:

—Vá yõo ìⁿ cùñaha-n sã ñí quide tãtna ñaha-í xii-n, núú dütú-ñi cuáháⁿ cuèndá sá ná quíni ñahá-dě xii-n sã ñí ndúha-n te cuáha-n-dě sá

ndúú tãhú Yã Ndiõxí dàtná ní cachí ndí Moisés cuèndá ná quíni ñáiyu sã ndàa ní ndúha-n —càchí-gá xãhaⁿ-gã xii-dé.

15 Te ducaⁿ ta xíté nuu-gá tnúhu nchaa nãcuáa quide Jèsús, te ío cuéhé ñáiyu ní xóo tacá nchaa núú ñí xíndecu-gá cuèndá sá cuíni-yu cund-edóho-yu tnúhu cãháⁿ-gá, ndihi cuèndá sá cuíni-yu cada tãtna ñaha-gã xii-yu. 16 Dico Jèsús ní xóo quee nihni-gá tnuú-yu ní xóo quíhíⁿ-gá núú ñà túú ñáiyu ndècu ní xóo cãháⁿ ndihi-gá Yã Ndiõxí.

Jèsús quidé tãtna-gá ìⁿ tée cùhú ñã cúu-gã candá nihnu

(Mt. 9:1-8; Mr. 2:1-12)

17 Te ìⁿ nduu dànehé-gá ñáiyu, te xínucóo ìⁿ ùú cue tée cùu fariséú, ndihi cue tée dàcuaha ñaha xii ñáiyu nchaa tnúhu ní chídó tnuní ndí Moisés. Te cue tée-án ñí quee-güedé nchaa ñuú yíndèhu distritú Galileá, ndihi distritú Jüdeá, ndihi ñuú Jerusalén, te nchaa ñuú-án ñí quee-güedé cuáháⁿ-güedé núú ndécú-gã. Te Yá Ndiõxí chíndèe ñaha-gá quidé tãtna-gá ñáiyu cùhú. 18 Te ìⁿ ùú cue tée nchido-güedé ìⁿ tée cùhú ñã cúu-gã candá nihnu ñúhu-dé xító ní quexìo ndihi ñaha-güedé, te cuíni-güedé quíhu ndihi ñaha-güedé ndéé xítí vehe, sáa-güedé ndéé núú Jèsús ndihi tée cùhú-án. 19 Dico ñã túú ní ñhí-güedé ndéé ichi quíhu-güedé, chi cuèndá ío cuéhé ñáiyu ndècu, núú xíãⁿ ní sáa-güedé díquí

véhé-ǎⁿ nǐ caáⁿ-güedé te ndàa díquí véhé-ǎⁿ nǐ dáquëe-güedé tée cùhú-ǎⁿ, te ñùhu-ni-dé xító ní dáquëe ñaha-güedé tnuú ñáyiú ní sáá ndéé núú Jèsús.
 20 Te Jèsús ní cutnùní iní-gá sá nì yuhu nì iní-güedé sàndáá iní ñáhá-güedé xii-gá, núu ní xáhaⁿ-gǎ xii tée cùhú-ǎⁿ:

—Yòhó tée cùhú, sa ní quide càhnu iní-í nchaa cuëchi-n —càchí-gá xǎhaⁿ-gǎ xii-dé.

21 Te cue tée dàcuaha ñaha xii-yu nchaa tnuúhu ní chídó tnùnì ndí Moisés ndihí cue tée cùu fariséú ní sani iní-güedé: “¿Ná cúú tée-a núu càháⁿ cuèhé-dé cuèndá Yá Ndiöxí-í? Te vá yõo ñⁿ ndàcu cada cahnu iní nchaa yíca cuëchi ñáyiú, chi ñⁿdìi díi-ni Yá Ndiöxí quidé càhnu iní-gá”, duha ní sani iní-güedé.

22 Dico Jèsús sa ní cutnùní iní-gá nàcuáa sàni iní-güedé núu ní xáhaⁿ-gǎ xii-güedé:

—¿Te ná cuèndá ducaⁿ sàni iní-ndó-í? 23 Te sá dúhá nǐ xáhaⁿ-í xii tée cùhú-a sá cáda càhnu iní-í nchaa yíca cuëchi-dé, te xiǎⁿ nchòhó ñá túú cùtnuní iní-ndó núu ndáá càháⁿ-í àdi ñá ndáá. Dico núu cúu-í-dé sá ndácõo-dé, te caca-dé te cutnùní ndáá iní-ndó núu ndáá càháⁿ-í àdi ñá ndáá, chi cundehe núu-ndó nàcuáa cada-í.
 24 Te vitna na càda-í nàcuáa cutnùní iní-ndó nchaa-ndo sá yúhú Téé cùu ñani tnáhá-ndó nchaa-ndo ndecu ndihí-í tnuúhu ndee iní sá cáda càhnu iní-í nchaa cuëchi ñáyiú ñuyúú-a —càchí-gá xǎhaⁿ-gǎ xii-güedé.

Te sáta dúcáⁿ te ní xáhaⁿ-gǎ xii tée cùhú-ǎⁿ:

—Ndacóo, te ndocani-n xító ñùhu-n véxi-ǎⁿ, te núhú-n vehe-n —cachí-gá xǎhaⁿ-gǎ xii-dé.

25 Te òrè-ni-ǎⁿ nǐ ndúha téé cùhú-ǎⁿ te ní ndacóo-dé, te ní ndocani-dé xító ñùhu-dé ní quexio-ǎⁿ, te ní natni-dé ichi ta càháⁿ-dé cuánuhú sá ño càhnu cuu Yá Ndiöxí. 26 Te nchaa ñáyiú xindecu-ǎⁿ nǐ cuñúhu-yu, te tnáhá-yu ní cachí-yu sá ño càhnu cuu Yá Ndiöxí, te ducaⁿ ño ní yùhú-yu, te ní xitnàhá-yu:

—Vitna ní xiní-ó ñⁿ sá ñà túú tnáhí xiní-ó ní cùu —cachí-yu xitnàhá-yu.

*Jèsús caná-gǎ té Lèví
 (Mt. 9:9-13; Mr. 2:13-17)*

27 Te sáta dúcáⁿ nǐ cuu te ní quee Jèsús xiáⁿ, te ní xiní-gá ñⁿ téé nàni Leví núcõo-dé ñⁿ xichi quide cobrá-dé ñáyiú cuèndá impuèstú, chi cobràdór cúu-dé, te ní xáhaⁿ-gǎ xii-dé:

—Néhé chitnahá ñáhá-n xii-í —càchí-gá xǎhaⁿ-gǎ xii-dé.

28 Te té Lèví-ǎⁿ nǐ ndàcuñí-dé te ní dándõo-dé nchaa sá ndécú ndihí-dé núu núcõo-dé-ǎⁿ, te ní tuha-dé Jèsús.

29 Te sáta dúcáⁿ te té Lèví-ǎⁿ nǐ quide-dé ñⁿ vico càhnu vehe-dé sá cúu-xí Jèsús, te ní tacá vai cue téé quide chiuⁿ quide-dé, te nchaa-güedé cuànguihu-güedé mèsá ní ngóo-güedé ndihí dava-gá ñáyiú ní quexio cuèndá caxi-güedé ndihí-yu. 30 Dico cue téé cùu fariséú ndihí cue téé dàcuaha ñaha xii-yu nchaa tnuúhu ní chídó tnùnì ndí Moisés ní ngúita-güedé

xìcuèhé-güedé cue téé xìca cuu ndihi-gá, te xáhaⁿ-güedé:

—¿Ná cuendá xéxí-ndó xìhi-ndo ndihi cue téé cuihna iní-xi quide cobrá ñáhá xii ñáyiú cuendá impuéstú, ndihi nchaa dava-gá cue téé ndècu ichi cuehé ichi duha-i? — cächí-güedé xáhaⁿ-güedé.

³¹ Te Jèsús ní xáhaⁿ-gá xii-güedé:

—Nchaa ñáyiú ñá túú cùhú chi ñá túú xìni ñuhú-yu ñátátná, dico nchaa ñáyiú cùhú chi xìni ñuhu ñahá-yu.

³² Te yúhú véxi-í cáháⁿ-í ñáyiú cùtnuní iní-xi sá ndécú cuéchi-xi cuendá dàñá-yu nchaa sá cuèhé sá dúhá quidé-yu, te ñá túú véxi-í cáháⁿ-í ñáyiú cächí sá ñà túú ndècu cuéchi-xi —cächí-gá xáhaⁿ-gá xii-güedé.

Cue téé ndècu tnúhu núú Jèsús cuendá ñáyiú ñá túú tnàhí ná xéxí áma cáháⁿ ndihí-yu Yá Ndiöxi

(Mt. 9:14-17; Mr. 2:18-22)

³³ Te ní xáhaⁿ-güedé xii Jèsús:

—Te áma ñá túú tnàhí ná xéxí cuè téé xìca cuu ndihi té Juáá cáháⁿ ndihi-güedé Yá Ndiöxi, te diu-ni ducaⁿ quide cue téé xìca cuu ndihi nchúhú cue téé cùu fariséú. ¿Te ná cuendá cue téé xìca cuu ndihi-n ñá túú dùcaⁿ quide-güedé núu nchaa-ni nduu xèxi-güedé xìhi-güedé quidé-güedé-i? —cachí-güedé xáhaⁿ-güedé xii-gá.

³⁴ Te Jèsús ní xáhaⁿ-gá xii-güedé:

—Nchòhó xìní-ndó sá vǎ cúú cùñaha-o xii cue ñáyiú ñuhu vico tnándaha sá vǎ

cúú cǎxí-yu ñini ndècu ndihi ñaha téé tnándaha-áⁿ xií-yu.

³⁵ Dico sáá nduu te vǎ cùndècu ndihi ñaha-gá téé tnándaha-áⁿ xií-yu, te dàvá-áⁿ te cahni iní-yu vǎ cǎxí-yu sá ndihú iní-yu —cächí-gá xáhaⁿ-gá xii-güedé.

³⁶ Te ní cani-gá ñⁿ cuendú núú ñáyiú nàcuáa tecú tnùní-yu tnúhu-gá, te xáhaⁿ-gá:

—Vǎ yǎo ñⁿ dàndée luha dóo sáá ñⁿ dóo sa ní cuu tühú víhí, chi núu yoo ducaⁿ na càda, te dóo sáá-áⁿ nàndiyi-xi te uuⁿ-gá ndata-xi dǎo sǎ ñⁿ cuu tühú-áⁿ, te luha dóo sáá-áⁿ ñà túú nàtaú-xi ndée dóo sǎ ñⁿ cuu tühú-áⁿ. ³⁷ Te ñi vǎ yǎo ñⁿ chìhi ndidí sáá xití ñⁿ lamba sa ní cuu tühú víhí, chi núu yoo ducaⁿ na càda, te ndava lamba sa ní cuu tühú-áⁿ chi ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ.

³⁸ Núu xiáⁿ xíní ñuhu-xi quée ndidí sáá-áⁿ xití ñⁿ lamba saa cuendá ducaⁿ ñà túú ná cuu cováha-xi. ³⁹ Te ñi ñⁿ ñáyiú ñá túú tnàhí iní-yu cohó-yu ndidí sáá, te núu díhna-gá ná cohó-yu ndidí sá ñⁿ quene díhna-gá, chi cächí-yu sá xihí vǎha-gá ndidí sá ñⁿ quene díhna-gá-áⁿ dàcúxí ndidí sáá —cächí-gá xáhaⁿ-gá xií-yu.

6

Cue téé xìca cuu ndihi Jèsús sàhnú-güedé yoco triú nduu ndètatú ñáyiú

(Mt. 12:1-8; Mr. 2:23-28)

¹ Te ñⁿ nduu cùu-xi nduu ndetatú ñáyiú ñuhu Jèsús ichi ndihi cue téé xìca

cuu ndihi-gá, te ta yáha-gá ndihi-güedé ñⁿ xichi núú cáá triú, te ní ngüíta-güedé sàhnú-güedé yoco triú-áⁿ te ndihi ndaha-güedé quíⁿ-güedé quéé triú tá xèxi-güedé cuáháⁿ. ² Te ñⁿ úú cue téé cùu fariséú ní xáhaⁿ-güedé xii cue téé xica cuu ndihi-gá:

—¿Te ná cuèndá ducaⁿ quide nchohó ñⁿ sá ñà túú tàú-ó càda-o vitna cuu-xi nduu ndetatú-ó-í? —càchí-güedé xáhaⁿ-güedé.

³ Te Jèsús ní xáhaⁿ-gá xii-güedé:

—¿Te náa ñá túú dàcuaha-ndo núú tütú Yá Ndiöxí núú càháⁿ-xi nàcuáa ní quide ndí Dàví cúnàhá ní xíhí ndí docó ndihi cue téé ní xica cuu ndihi ndí-áⁿ? ⁴ Chi ní quíhu ndí vehe Yá Ndiöxí, te ní queheⁿ ndí pàá ní cuu í ndécú-áⁿ ñí dácãhñu ndí cue téé xica cuu ndihi ndí ní xèxi ndí ndihi-güedé, te ñá túú tàú ndí sá dúcáⁿ càda ndí ni cùu, chi mee-ni cuè dútú tàú-güedé caxi-güedé pàá-áⁿ ní cùu —càchí-gá xáhaⁿ-gá xii-güedé.

⁵ Te ní xáhaⁿ tùcu-gá:

—Te yúhú Téé cùu ñani tnáhá-ndó nchàa-ndo, tnáhá-í ndécú ndí-í tnúhu ndee ñí sá cùu-í nchaa ñáyiu nàcuáa cadá-yu nduu ndetatú-ó-á —càchí-gá xáhaⁿ-gá xii-güedé.

Íⁿ téé ní yíchí ñⁿ xio ndaha-xi

(Mt. 12:9-14; Mr. 3:1-6)

⁶ Te íngá nduu ñíu-ni nduu ndetatú ñáyiu cuánguihu Jèsús xití veñúhu dànehé-gá

ñáyiu. Te xíaⁿ ndécú ñⁿ téé cùhú ní yíchí nihnu ñⁿ xio ndaha cùha-dé. ⁷ Te cue téé dàcuaha ñaha xii ñáyiu nchaa tnúhu ní chídó tnúni ndí Moisés, ndihi cue téé cùu fariséú ndéhé-güedé nùu cada tátna ñaha Jèsús xii téé cùhú-áⁿ nduu ndetatú-güedé-áⁿ cuèndá níhí-güedé nàcuáa cada-güedé cacáⁿ cuèchi-güedé cuèndá-gá. ⁸ Dico Jèsús sa ní cutnùni íni-gá nàcuáa sàni íni-güedé, te ní xáhaⁿ-gá xii téé cùhú ndaha-xi-áⁿ:

—Ndàcuiñí te ngúnutñi-n cuádava tnuú-ndí-a —càchí-gá xáhaⁿ-gá xii-dé.

Te téé-áⁿ ñí ndacuiñí-dé te ní ngúnutñi-dé cuádava tnuú-güedé ndihi-gá. ⁹ Te dātnùni Jèsús ní xicáⁿ tnúhú-gá núú cuè ñáyiu xñdecu-áⁿ, te xáhaⁿ-gá xií-yu:

—Cuñí-í cachi tnúhu-ndo ñá cùú sá vāha cada-o nduu ndetatú-ó. ¿Íⁿ chiúⁿ váha àdi ñⁿ chiúⁿ cuehé, sá cadá tátna-o ñáyiu cùhú àdi sá cáhni-ó-yu? —càchí-gá xáhaⁿ-gá xií-yu.

¹⁰ Te dātnùni ní ndacoto-gá núu-yu ncháa-yu, te ní xáhaⁿ-gá xii téé cùhú ndaha-xi-áⁿ:

—Ndocani ndaha-n —càchí-gá xáhaⁿ-gá xii-dé.

Te ní ndocani-dé ndaha-dé, te òré-ni ní ndúha. ¹¹ Te cue téé xñdecu-áⁿ sùñi ñí cudééⁿ-güedé sá dúcáⁿ ñí quide tátna Jèsús téé cùhú-áⁿ, te ní ngüíta-güedé ndātnúhu-güedé nùu nása cada ñaha-güedé xii-gá.

Jèsús cǎxi-gá úxúú tnàhá cue tée dacuàha ñaha xii ñáyiú tnúhu-gá

(Mt. 10:1-4; Mr. 3:13-19)

12 Te sátá dúcáⁿ ñi cuu te ní xica Jèsús cuáháⁿ-gá xití yucu cuendá yàcáⁿ cáháⁿ ndihi-gá Tátá-gǎ Dútú Ndiöxí, te ñi niú ní cáháⁿ ndihi ñaha-gǎ. 13 Te sátá ñi túndaá, te ní cana-gá nchaa cue tée xica cuu ndihi-gá, te ní cǎxi-gá úxúú tnàhá-güedé, te cue tée-áⁿ ñi xáhaⁿ-gǎ sá díú-güedé cuu-güedé cue tée quíhíⁿ cáháⁿ tnúhu-gá núú ñáyiú. 14 Te duha xñani ndi úxúú cue tée-áⁿ. Té Xímú, àdi Pelú chi úú diu-dé, ndihi ñani-dé té Ndríxí, ndihi té Jácobó, ndihi té Juàá, ndihi té Lìpé, ndihi té Bartolómé, 15 ndihi té Mâteú, ndihi té Mǎxí, ndihi té Jácobó déhe té Àlfeú, ndihi ingá té Xímú téé ní cundihí cue téé canànistá, 16 ndihi té Jüdás ñani té Jácobó, ndihi té Jüdás Iscàrioté téé ní sáá nduu ñi sáha cuendá ñáhá xii Jèsús núú cuè téé cùu úhú iní ñáhá xii-gá, duha xñani cuè téé ní cǎxi Jèsús ní xica cuu ndihi-gá.

Jèsús dánèhé-gá cuéhé víhí ñáyiú

(Mt. 4:23-25)

17 Te Jèsús cuánuu-gá yucu núú ñi sáá-gá-áⁿ, te ní ngava-gá ñiⁿ núú ndàá ndihi cue téé xica cuu ndihi-gá, te xíaⁿ ñi ngúnutnii-gá. Te xíaⁿ ndécú dàva-gá cue téé xica cuu ndihi-gá ndihi vài ñáyiú ndètu ñahá-yu xii-gá, te ñáyiú-áⁿ véxi-yu nchaa ñuú

cáá dístiritú Jùdeá, ndihi ñuú Jerusalén, te ndècu ñáyiú véxi ndàa yuhu lamár yatni ñuú Tírú, ndihi ñuú Sìdón. Te nchaa ñáyiú-áⁿ ñi quexió-yu cuini-yu cundedóho-yu nchaa tnúhu càháⁿ Jèsús, ndihi cuendá sá cuini-yu ndúha-yu nchaa cuéhé tnàhá-yu. 18 Te tnàhá ñáyiú yihí ñaha espíritú cundihí yucu ñávàha. 19 Te ncháá-yu cuini-yu dacàá-yu ndahá-yu tendàhá-yu Jèsús ní cùu cuendá sá ñi níhí-yu tnúhu sá ndècu ndihi-gá tnúhu ndee iní quidé tǎtna-gá nchaa ñáyiú cùhú.

Cuendá ñáyiú ío váha táhú-xi (Mt. 5:1-12)

20 Te Jèsús ní ndacoto-gá núú cuè téé xica cuu ndihi-gá, te ní xáhaⁿ-gǎ:

—Váha táhú nchaa nchòhó cue ñáyiú ndàhú, chi nduu táhú-ndó cùndecu-ndo núú táxi tnùní Yǎ Ndiöxí.

21 Váha táhú nchaa nchòhó ñáyiú ío cuini cundedóho tnúhu Yá Ndiöxí chi ío vii ío váha cuu iní-ndó.

Váha táhú nchaa nchòhó ñáyiú ndàhyú sá ndihú iní-ndó, chi sáá nduu te cudíí iní-ndó ñi caa ñi quíhíⁿ.

22 Váha táhú nchaa nchòhó ñáyiú na cùu úhú iní ñáhá tnàha ñáyiú-xi, chi sáá nduu te vá dáñá-gǎ-yu quíhu-ndo vèñúhu, te cúcuéhé ñáhá-yu xii-ndo, te cachí-yu sá ñà díú ñáyiú váha cùu-ndo, te ducaⁿ càda ñahá-yu xii-ndo sǎ cuendá yúhú Téé cùu ñani tnàhá-ndó ncháa-ndo. 23 Te òré ducaⁿ na càda

ñahá-yu xii-ndo te cudíí víhí-ní ìní-ndó cùndecu-ndo, chí sáá nduu ndúu táhú-ndó sǎ ìo váha càa ndecu andíu cundecu ndíhi-ndo nduu na nasaá-ndó yàcáⁿ cundecu-ndo, chí diu-ni ducaⁿ ní xóo cada ñaha cuè ñaní tnáhǎ-yu xii cue téé ní xóo cáháⁿ tnúhu Yá Ndiöxí ní xíndecu ndéé sanaha.

24 Te ndàhú ní cuu nchaa ñáyíu cuica ñà túú sàndáá ìní ñáhá xii Yá Ndiöxí, chí vitna ìo váha ndècú-yu, dico sáá nduu te nduu ndàhú-yu.

25 Te ndàhú ní cuu tucu nchaa ñáyíu ñá túú tnàhí ná cúmǎní xii-xi vitna, chí sáá nduu quìní-yu tnúndòho tnúhu ndàhú.

Te ndàhú ní cuu nchaa ñáyíu cùdíí ìní-xi ndècu ichi cuehé ichi duha vitna, chí sáá nduu te ndáhyú-yu sá ndíhú ìní-yu.

26 Te ndàhú ní cuu nchaa ñáyíu na càháⁿ váha dava-gá ñáyíu cuèndá-xi, chí ducaⁿ ní xóo cáháⁿ váha-yu cuèndá nchaa cue téé ní xóo dandáhú ñáhá xii ñáyíu ndéé sanaha, chí ní cachí-güedé sá càháⁿ-güedé tnúhu Yá Ndiöxí te ñá ndáá —càchí-gá xáhaⁿ-gǎ xii-güedé.

Cuu ìní-ó nchàa ñáyíu cùu úhú ìní ñáhá xii-o

(Mt. 5:38-48; 7:12)

27 Te Jèsús ní xáhaⁿ-gǎ xii nchaa ñáyíu xíndecu-áⁿ:

—Nchaa nchòhó ñáyíu xíndedóho ñaha càchí tnúhu-í xii-ndo sǎ cúú ìní-ndó ñáyíu cùu úhú ìní ñáhá xii-ndo, te cada-ndo sǎ váha sá cúú-xí-yu cuèi nándí sá ná cádá ñáhá-yu xii-ndo.

28 Te cǎcáⁿ táhú-ndó núú Yá Ndiöxí cuèndá ñáyíu càháⁿ úhú ñáhá xii-ndo, ndíhi cuèndá ñáyíu tèe ñaha cuèchi neñúú xii-ndo. 29 Te núu ní canihá-yu xii-ndo ìíⁿ xito te cuìní tucú-yu canihá-yu, te dañà-ndo na cànihá-yu, àdi núu na quèndeé-yu dóó ndíxí ndòdo-ndo, ndíhi dúhnú-ndó, te dañà-ndo na cànehé-yu quíhíⁿ.

30 Te núu xicáⁿ-yu ìíⁿ sá nándíhi-yu núú-ndó te cuáñaha-ndo, àdi quendeé-yu ìíⁿ ndachíuⁿ-ndo, te vá nándàcáⁿ-ndó núú-yu. 31 Te nchaa sá váha cuìní-ndó càda tnaha ñáyíu-ndo, te cada-ndo tnàhá-ndó ndíhí-yu.

32 Chi núu nchòhó ná cùu ìní-ndó mèe-ni ñáyíu cùu ìní ñáhá xii-ndo, te vá càchí-ndó sǎ ìo váha quide-ndo, chí tnàhá nchaa ñáyíu ndècu ichi cuehé ichi duha ducaⁿ xíquidé-yu. 33 Àdi mee-ni ñáyíu quide ñaha sá váha xii-ndo quide váha-ndó-yu, te vá càchí-ndó sǎ ìo váha quide-ndo, chí tnàhá nchaa ñáyíu ndècu ichi cuehé ichi duha ducaⁿ xíquidé-yu.

34 Àdi mee-ni ñáyíu sàni ìní-ndó nàcoto ñaha xii-ndo cuáñaha-ndo ìíⁿ sá xicáⁿ-yu núú-ndó, te vá cání ìní-ndó sǎ ìo quide váha-ndo, chí tnàhá ñáyíu ndècu ichi cuehé ichi duha dàsaⁿ nuú-yu ìíⁿ sá néhé váha-yu, te ndètu cahnu-ná-yu nacoto ñaha ñáyíu ní sáha nuú-yu-áⁿ. 35 Dico nchòhó xíní ñúhu-xi cuu ìní-ndó ñáyíu cùu úhú ìní ñáhá xii-ndo, te cada-ndo sǎ váha sá cúú-xí-yu, te cuáñaha

nùu-ndo ìⁿ sá ná ndìhi-yu te núu xìcáⁿ-yu núu-ndó, te vá cùndètu-ndo nacoto ñahá-yu xii-ndo. Te ducaⁿ te ío-gá cuéhé ñihí-ndó cùndecu ndìhi-ndo, te cuu ndisa-ndo dèhe Dútú Ndiòxí, chi ío càhnu iní-gá sá cúu-xí nchàa ñáyiù ñá túú ndàcáⁿ táhú núu-gã cuendá nchaa sá vãha quìde-gá, ndìhi sá cúu-xí nchàa ñáyiù ndècu ichi cuehé ichi duha. ³⁶Te cunduu càhnu iní nchòhó tucu dàtná càhnu iní Tãtá-ó Dútú Ndiòxí.

Vá càháⁿ cuéhé-ó cuendá tñaha ñáyiù-o

(Mt. 7:1-5)

³⁷Te vá càháⁿ cuéhé-ndó cuendá sá quidé tñaha ñáyiù-ndo, te ducaⁿ te Yá Ndiòxí ñá túú nà tnúhu cùñaha-gã xii-ndo. Te vá cùñaha-ndo xì ñáyiù sá quihíⁿ-yu ìⁿ xichi núu ùhú núu ndàhú ndohó-yu cuendá nchaa sá ñà túú vãha quidé-yu, te ducaⁿ te Yá Ndiòxí vá cùñaha-gã xii-ndo sã tñahá-ndó quihíⁿ-ndó ìⁿ xichi núu ùhú núu ndàhú ndoho-ndo. Te chí cadá càhnu iní nchaa sá quidé-yu, te ducaⁿ te Yá Ndiòxí cada càhnu iní ñáhá-gã xii-ndo tucu. ³⁸Te chí cuãñaha xì ñáyiù núu ná cúu sã xíní ñùhú-yu, te dàtná chitu ìⁿ yicá súúní xidó coyo-ná, ducaⁿ tàxi Yá Ndiòxí xii-ndo. Te nãnicuáa na càda-ndo cada váha-ndo sá cúu-xí tñaha ñáyiù-ndo, te ñi-yu ducaⁿ càda ñaha Yá Ndiòxí xii-ndo —càhí Jèsús xãhaⁿ-gã xií-yu.

³⁹Te dàtnùní ní cani-gá ìⁿ cuèndú núu-yu nãcuáa

tecú tnùní-yu tnúhu-gá, te xãhaⁿ-gã:

—Ìⁿ tée cuáá chi ñá ndácú-dě cuita nehe-dé ingá tée cuáá, chi núu ducaⁿ na càda-güedé te ndi ndùú-güedé ngaunihnu-güedé déhvã. ⁴⁰Te ni ìⁿ landú yíhí scuèlá ñá túú cùnuu-gá-güexi dàcúúxí mèstrú-güexi, te ndéé núu na cùtúha váha-güexi, te dàtnùní nùtnahá-güexi tée dànehé ñáhá xì-güexi.

⁴¹Te na càhí tnúhu-í xii-ndo sã nchàa cuéchi quide ñáyiù cùu-xí datná ìⁿ mihi líhli. ¿Te ná cuendá ndéhé-ndó ìⁿ sá ñà túú vãha quide tñaha ñáyiù-ndo, te mee-ndo vïhi-gá quidé-ndó-í? Te sá dúcáⁿ quide-ndo te cada iní-ndó sã ndéhé-ndó dàtná ìⁿ mihi líhli ñùhu núu tñaha ñáyiù-ndo, te mee-ndo ñùhu ìⁿ mihi cahnu-gá núu-ndó. ⁴²Te núu na nãcanu ichi-ndo tñaha ñáyiù-ndo cuendá sá ñà túú quide váha-yu ndècú-yu te mee-ndo vïhi-gá quidé-ndó ñá, te cada iní-ndó sã xãhaⁿ-ndo xií-yu sá nãtãva-ndo mihi líhli ñùhu núu-yu, te mihi càhnu ñùhu núu méé-ndó ñà túú quide cuendá-ndó. ¿Te sá dúcáⁿ quide-ndo te ío dàndahú-ndó mèe-ndo sá quidé ndãá-ndó te ñà ndãá sá quidé ndãá-ndó! Te xìni ñùhu-xi díhna-gá dañã-ndo nchàa sá ñà túú vãha quide-ndo, te dàtnùní ducaⁿ te cutnùní váha iní-ndó nãcuáa nãcanu ichi-ndo tñaha ñáyiù-ndo.

Ndi dñⁿ núu yutnu xìní-ó nã yutnu cùu-xì cuendá sá

săvidí-xi

(Mt. 7:17-20; 12:34-35)

43 Te ñá túú ñi ìⁿ yutnu váha te quini-ó cùuⁿ sávidí sá ñà túú vâha, te ñi ìⁿ yutnu sá ñà túú vâha, te quini-ó cùuⁿ sávidí váha, chi mee-ni sávidí sá ñà túú vâha cùuⁿ. 44 Te ñdi ñiⁿ núú yutnu xini-ó ñà yutnu cùu-xi cuendá sá sávidí-xi, chi ñá túú xini-ó cùuⁿ ngúxí ìⁿ tnu ññu, te ñi ñà túú xini-ó cùuⁿ ndéhé yoho yàha stilé díquí ìⁿ yoho yàha cutexínu. 45 Te nchaa ñáyiú váha iní-xi càháⁿ-yu tñúhu váha, chi ññu-ni tñúhu váha tñáhi-áⁿ ññúhú iní-yu, te nchaa ñáyiú ñá túú vâha iní-xi càháⁿ cuéhé-yu, chi ññu-ni tñúhu cuéhé tñáhi-áⁿ ññúhú iní-yu, chi nchaa sá ññúhú iní-yu te xáⁿ càháⁿ-yu.

Ìⁿ vehe ndècu cimientú-xi ññi ìⁿ vehe ñá túú cimientú-xi
(Mt. 7:24-27)

46 Te ná cuendá càchí-ndó sá yùhú cùu-í Yaá cúú Xitohó-ndó te ñá túú quide-ndo nchaa nacuaá càháⁿ-í-i? 47 Te na càchí tñúhu-í xii-ndo cuendá ñáyiú tùha ñaha xii-í, chi ñáyiú-áⁿ sácúndedóho-yu nchaa tñúhu càháⁿ-í te tññ-yu. 48 Te ñáyiú-áⁿ cúú-yu dàtná ìⁿ téé ní dácáá ìⁿ vehe, chi téé-áⁿ ññu-gá ní xete-dé ndéé ní tñhá-dé yúú cáxíⁿ te dàtnúni ní tava-dé cimientú-xi, te òré ní cuuⁿ dáú, te ní ndee ndute ññu, te ní ndacáⁿ-xi ndéé núú cáá vèhe-áⁿ, dico ñá túú ní ndàcu-xi cuidu-xi, te ññu chi téé ní dácáá vèhe-áⁿ ní tava-dé cimientú-xi núú

yúú cáxíⁿ. Duha sãtnahá-xi cùu nchaa ñáyiú sácúndedóho tñúhu càháⁿ-í te tññ-yu. 49 Te ñáyiú sácúndedóho tñúhu càháⁿ-í te ñá túú tññ-yu, ñáyiú-áⁿ cúú-yu dàtná ìⁿ téé ní dácáá ìⁿ vehe, te ñá túú ní tava-dé cimientú-xi, te òré ní cuuⁿ dáú, te ní ndee ndute ññu, te ní ndacáⁿ-xi ndéé núú cáá vèhe-áⁿ, te íi-ni ní xido-xi vehe-áⁿ cuendá sá ñà túú ní quène cimientú-xi. Duha sãtnahá-xi cùu nchaa ñáyiú sácúndedóho tñúhu-í te ñá túú cuini-yu tññ-yu — càchí-gá xãháⁿ-gã xii-yu.

7

Jèsús quidé tãtna-gá ìⁿ téé xinu cuechi núú ìⁿ téé cùu capitáⁿ

(Mt. 8:5-13)

1 Te sátá ní yáha ní càháⁿ Jèsús ññi ñáyiú, te cuáháⁿ-gá ññu Capernaúm. 2 Te yacáⁿ ndécú ìⁿ téé cùu capitáⁿ, te cùhú ìⁿ téé xinu cuechi núú-dé téé ío-gá cúú iní-dé, te sa ndècu-ná-dé sá cùú-dé. 3 Te òré ní níhí téé cùu capitáⁿ-áⁿ tñúhu cuendá Jèsús, te ní tendaha-dé ìⁿ úú cue téé cùu sacuéhé núú ñáyiú isràél cuáháⁿ-güedé càháⁿ ndàhú-güedé núú-gã ññu vá cündèe iní-gá quíhíⁿ-gá cada tãtna-gá téé xinu cuechi núú-dé-áⁿ. 4 Te ní quexio-güedé núú ndécú Jèsús, te ní ngüita-güedé càháⁿ ndàhú víhí-güedé núú-gã, te xãháⁿ-güedé:

—Téé cùu capitáⁿ ní cachí-dé véxi-ndí ññu vá cündèe iní-n quíhíⁿ-n càda

tátna-n ìⁿ téé xìnu cuechi núú-dě chi cùhú-dé, te táu ndiṣa-n càda-n nacuáa càháⁿ capitáⁿ-áⁿ, ⁵ chi téé-áⁿ ío cùu iní ñáhá-dě xii nchaa nchúhú ñáyiu isràél te diu-dé ní táúchíúⁿ-dě ní sáá veñúhu-ndí —càchí-güedé xáhaⁿ-güedé xii-gá.

⁶ Te sátá dúcáⁿ te Jèsús ní xica-gá cuáháⁿ-gá ndihi-güedé, te òré tá cùyatni-gá vehe núú ndécú tée cùhú-áⁿ cuáháⁿ, te téé cùu capitáⁿ-áⁿ ñí xáhaⁿ-dě xii ìⁿ úú cue téé càháⁿ ndihi-dé:

—Quíhíⁿ-ndó cùñaha-ndo xii Yaá cúú Mèstrú sá càchí-í sá ñà túú nà caní iní-gá, chi ñá túú tàú-í sá quíhu-gá ndéé xití vehe-í, ⁷ chi ñí sá cùnú ndúcú mèe-í-gá ñá túú ní cùyii-í. Núu xǎⁿ cùñaha-ndo xii-gá sá ná càháⁿ-ni-gá sá ndúha téé xìnu cuechi núú-í-a te ndúha-dé. ⁸ Chi yúhú ndécú cuè téé tàxi tnuní ñáhá xii-í, te ducaⁿ yúhú tucu ndècu cue sandadú táxí tnùn-í. Te òré xáhaⁿ-í xii ìⁿ-dé quíhíⁿ-dé ìⁿ chiuⁿ te cuáháⁿ-dé, te òré xáhaⁿ-í xii ingá-dé quixi-dé te véxi-dé, te òré xáhaⁿ-í xii téé xìnu cuechi núú-í cada-dé ìⁿ chiuⁿ te quide-dé. Duha càchí-í cùñaha-ndo xii-gá —càchí-dé xáhaⁿ-dě xii cue téé càháⁿ ndihi-dé-áⁿ.

⁹ Te sátá dúcáⁿ ñí xáhaⁿ-güedé xii Jèsús, te ní cuñúhu-gá nchaa tnúhu ní cáháⁿ téé cùu capitáⁿ-áⁿ, te ní nchócótó-gá núú nchàa ñáyiu nchicúⁿ ñáhá xii-gá cuáháⁿ, te ní xáhaⁿ-gá:

—Na càchí tnúhu ndáá-í xii-ndo sá vátá quíní-gá-í ní

ìⁿ ñáyiu isràél, ñáyiu ío váha sàndáá iní-xi Yá Ndióxi dàtná sàndáá iní ñáhá tée-áⁿ xii-gá —càchí-gá xáhaⁿ-gá xii-yu.

¹⁰ Te òré ní ndexìo cue téé nèhe tnúhu-áⁿ ñí sáháⁿ núú Jèsús, te sa ní ndúha téé cùhú-áⁿ.

Jèsús dándòto-gá déhe ìⁿ ñaha quèé

¹¹ Te sátá dúcáⁿ ñí cuu te ní xica Jèsús cuáháⁿ-gá ìⁿ ñúú nání Nàín, ndihi cue téé xica cuu ndihi-gá, ndihi vài ñáyiu. ¹² Te òré ní sáá-gá yuhu ñúú-áⁿ, te ní xiní-gá nchídó-güedé ìⁿ ndíyi cuáháⁿ chindúxi ñaha-güedé, te ndíyi-áⁿ cúú dèhe ìⁿ ñaha quèé, te ìⁿ ddi ducaⁿ-ni déhe-aⁿ ndècu ní cuu te ní xihí-dé. Te ío cuéhé ñáyiu cuáháⁿ chindúxi ñaha. ¹³ Te òré ní xiní ñáhá Jèsús xii-aⁿ ndàhyú-aⁿ te ní cundàhú iní ñáhá-gá, te ní xáhaⁿ-gá:

—Vá ndàhyú-n —càchí-gá xáhaⁿ-gá xii-aⁿ.

¹⁴ Te ní dáyátní-gá càjá ñúhú ndíyi-áⁿ te ní dácàá-gá ndaha-gá te ní tendaha-gá càjá-áⁿ, te ní ngüñí cue téé nchido ñaha-áⁿ. Te ní xáhaⁿ-gá xii ndíyi-áⁿ:

—Tée cuechi, yúhú càchí-í sá ndácõo-n —càchí-gá xáhaⁿ-gá xii ndíyi-áⁿ.

¹⁵ Te téé ní xihí-áⁿ ñí nucúnucóo-dé te ní ngüíta-dé càháⁿ-dé, te Jèsús ní nacuáha cuèndá ñáhá-gá xii-dé ndaha náná-dě. ¹⁶ Te sá dúcáⁿ ñí quide Jèsús ní xiní-yu te ío ní yúhú-yu, te ní xitnàhá-yu:

—Ío càhnu cuu Yá Ndióxi chi ìⁿ téé càháⁿ tnúhu-gá

ní quexìo núú ndécú-ó —
càchí-yu xitnàhá-yu.

Te ní xitnàha tucú-yu:

—Yá Ndiöxí véxi-gá chindee
ñàha-gá xii nchaa nchoo
ñáyiú cùu cuendá-gá —
càchí-yu xitnàhá-yu.

¹⁷ Te nchaa ñuú distritú
Jùdeá, ndihi dava-gá ñuú ní
níhí-yu tnúhu nàcuáa ní quide
Jèsús.

*Cue téé ní tendaha té Juàá
cuáháⁿ núú ndécú Jèsús*

(Mt. 11:2-19)

¹⁸ Te cue téé xica
cuu ndihi té Juàá ní
xáhaⁿ-güedě xii-dé nchaa sá
ní quide-gá, núú ní cana-dé
úú tnàhá-güedé ¹⁹ cuendá
cúñaha-dě quihíⁿ-güedé
nducu tnúhu-güedé núú Jèsús,
te núú sá díú-gă cúú-gă Crístú
Yaá ní tendaha Yá Ndiöxí
véxi ñuyíú-a àdi sá cündetu
nahi-ni-güedé mei Yàá-áⁿ.
²⁰ Te òré ní quexìo cue téé ní
tendaha tē Juàá núú ndécú
Jèsús, te xăhaⁿ-güedě xii-gá:

—Té Juàá téé dàcuandute
ñaha xii ñáyiú ní tendaha
ñàha-dé xii-ndí véxi-ndí cácaⁿ
tnúhú-ndí núú-n, núú sá
díú-n cùu Crístú Yaá quixi
ñuyíú-a, àdi sá cündetu-ndí
mei Crístú càchí-dé —
càchí-güedé xăhaⁿ-güedě
xii-gá.

²¹ Te mei òré ní quexìo-güedě-áⁿ
ní quide tátna Jèsús vâi ñáyiú
cùhú, te davá-yu càhú vîhí
tnàhá-yu, te ndi dííⁿ ndi dííⁿ
núú cuèhé tnàhá-yu ìíⁿ ìíⁿ-yu,
te cue ñáyiú yîhi ñaha espíritú
cündîhi yucu ñávâha ní

queñuhu-gá espíritú-áⁿ yiqui
cùñú-yu, te ío vâi ñáyiú cuàá
ní nacaáⁿ-gá núú-yu. ²² Te
Jèsús ní xáhaⁿ-gă xii-güedé:

—Chí cuánùhú te cani-ndo
cuendú núú tē Juàá nchaa
sá ní xiní-ndó quide-í, ndihi
nchaa nàcuáa ndùu tnúhu ní
cáháⁿ-í ní xîndedóho-ndo. Te
cúñaha-ndo xii-dé sá quidé
tátna-í núú cuè ñáyiú cuáá, te
quide tátna-í cue ñáyiú yacua,
ndihi cue ñáyiú tnàhá cuéhé
sá dátèhyú nihnu-xi yiqui
cùñú-yu, ndihi cue ñáyiú
doho, nchaa ñáyiú-áⁿ quide
tátna-í te ndüha-yu, te ndéé
cue ñáyiú sa ní xîhí dándòto-í
cúñaha-ndo xii-dé, te cúñaha
tùcu-ndo xii-dé sá nděcuu-í
dánèhé-í nchaa ñáyiú ndàhú
tnúhu sá sánú ichi ñaha xii-yu
nàcuáa naníhí tàhú-yu. ²³ Te
cúñaha tùcu-ndo xii-dé sá ìo
váha táhú nchaa ñáyiú ñá túú
quide sáá iní nchaa tnúhu
cáháⁿ-í, duha cúñaha-ndo
xii-dé —càchí-gá xăhaⁿ-gă
xii-güedé.

²⁴ Te sátá ní yáha-güedé
cuánuhú-güedé, te ní ngúita
Jèsús ní cáháⁿ-gá núú ñáyiú
cuendá té Juàá, te xăhaⁿ-gă
xii-yu:

—Nchòhó ní sândéhé-ndó
ìíⁿ téé ndècu xití yucu, te
téé-áⁿ ñà túú sàni ìíⁿ sani úú
iní-dé, chí ñá túú quide-dé
dàtná quidé nchaa ité náhnú
cuáháⁿ-xi duha cuáháⁿ-xi
dàcáⁿ òré quéné tächí. ²⁵ Te
ni ñà túú ní sândéhé-ndó
ìíⁿ téé nihnu dóó vâha dóó
vii càa. Te nchòhó xiní-ndó
sá ñáyiú sàcuíhnu dóó vâha
dóó vii càa ñá túú ñá
cúmâní xii-yu, te nchaa

ñáyi-u-áⁿ ndécũ-yu vehe cue tée cùnū yĩndaha ñaha xii ñáyi-u. ²⁶ Dico nchòhó chi ní sándéhé-ndó ìⁿ tée càháⁿ tnúhu Yá Ndiòxí. Te ndáá sá díú tée càháⁿ tnúhu-gá cúú-dě dico cùnū-gá-dé dácúúxí dāva-gá cue tée càháⁿ tnúhu-gá. ²⁷ Te ñi-u cuendá té Juáá-áⁿ càháⁿ-xi núú tütú Yá Ndiòxí nācuāa ní xāhāⁿ-gǎ xii Crístú, te duha ní xāhāⁿ-gǎ:

Tendaha-ĩ ìⁿ tée càháⁿ tnúhu-í
 codonū-dé núú-n
 cuendá dātúha-dé
 ñáyi-u cuendá quĩndáá
 iní-yu tnúhu-n.

Duha ní xāhāⁿ-gǎ, te ducaⁿ ñĩ ngódó tnùnĩ núú tütú-gá. ²⁸ Te ña cāchĩ tnúhu-í xii-ndo sǎ ñi ìⁿ cue tée ñuyiú-a ñá túú cùnū-güedé dātñá cùnū té Juáá tée dācuandute ñaha xii ñáyi-u. Te nchaa ñáyi-u sa ta ndĩhu ndaha ñaha Yá Ndiòxí vitna cuáhāⁿ cùnū-gá-ñi tucú-yu dácúúxí tē Juáá cuēi cùú-yu ñáyi-u ñá túú cùnū dacúúxí dāva-gá ñáyi-u yĩndaha-gá —cāchĩ Jēsús xāhāⁿ-gǎ xií-yu.

²⁹ Te sá dúcāⁿ ñĩ càháⁿ Jēsús, núu nchaa ñáyi-u ní dācuándute té Juáá ní cāchĩ-yu sá ño vāha quide Yá Ndiòxí, te ñi-u-ñi ducaⁿ ñĩ càháⁿ cue tée cuihna iní-xi quide cobrá ñáhá xii ñáyi-u cuendá impuèstú, cue tée ní dācuándute-dé. ³⁰ Dico cue tée cùu fariséú, ndihĩ cue tée dācuaha ñaha xii ñáyi-u nchaa tnúhu ní chídó tnùnĩ ndii Moisés, cue tée ñá túú ní dācuandute té Juáá ñá túú ní tnáhá iní-güedé cada-güedé nchaa sá vāha cuiñi Yá Ndiòxí.

³¹ Te Xítohó Jesucristú ní xāhāⁿ-gǎ xií-yu:

—Na cāchĩ tnúhu-í xii-ndo nācuāa sātñahá-xi cùu ñáyi-u ndècu vitna. ³² Chi ñáyi-u-áⁿ cúú-yu dātñá cue landú sácõo núú yāhu dādiq̄i-güexi te níhi càháⁿ-güexi, te xĩtnāha-güexi: “Ní tiú-ndí yaá ndihĩ vĩlu te ñá túú ní cuiñi-ndó càta-ndo, Te ño yica iní ní xita yuhu-ndí te ñá túú ní ndāhyú-ndó”, cāchĩ-güexi xĩtnāha-güexi. Te ducaⁿ sātñahá-xi cùu ñáyi-u ndècu vitna. ³³ Te té Juáá tée ní xõo dācuandute ñaha xii ñáyi-u ño ndāhú ní xõo caxi-dé, te ñi ñá túú ní xõo coho-dé ndudí ndéhé yoho yāha stilé sá sá ní nduu-xi ndidí, te ní cāchĩ-ndó sǎ ñi xĩndecu ndihĩ-dé espíritú cündihĩ yucu ñāvāha. ³⁴ Te sātá ñi quexiõ yúhú Tée cùu ñani tnáhá-ndó nchāa-ndo, te xèxi-í xihĩ-í ndécú-í te cāchĩ-ndó sǎ cùú-í tée xèxi vihi te xihĩ vihi-í. Te cāchĩ tucu-ndo sǎ cùú-í tée xica cuu ndihĩ cue tée cuihna iní-xi quide cobrá ñáhá xii ñáyi-u cuendá impuèstú, ndihĩ nchaa dāva-gá cue tée ndècu ichi cuehé ichi duha, duha cāchĩ-ndó. ³⁵ Te ñáyi-u ní tnáhá tnúhu ndihĩ Yá Ndiòxí, ñáyi-u-áⁿ quidē-yu nācuāa cutnùnĩ sá mēé-gǎ ño ndècu ndihĩ-gá sá xini tnùnĩ-gá —cāchĩ-gá xāhāⁿ-gǎ xií-yu.

Jēsús ndécú-gǎ vehe ìⁿ tée cùu fariséú tée ñani Ximú

³⁶ Te ìⁿ tée cùu fariséú ní càháⁿ-dé Jēsús vehe-dé caxi-gá, te ño ní quexiõ-gá te cuānguihu-gá mēsá. ³⁷ Te xíáⁿ núcõo-gá ní sáá ìⁿ ñadĩhĩ

te diu-ni ñaha ñuú-án cúu-án, te ndècu-aⁿ ichi díí ìní, te sá ñí ñíhí-aⁿ tnúhu sá cuàngaxi Jèsús vehe téè cùu fariséu-án, núu nèhe-aⁿ ìⁿ yoó chitu àcití sàháⁿ tnámí. ³⁸ Te ní ngóo-aⁿ ìⁿ xio òñí Jesús, te ní ngüíta-aⁿ ndàhyú-aⁿ te ndíhi ndute núu-aⁿ ní naquette-aⁿ sàhá-gã. Te dàtnùní ní nadayìchí-aⁿ ndíhi idi díquí-aⁿ, te ní teyuhu-aⁿ sàhá-gã, te ní chihi ñaha-aⁿ àcití sàháⁿ tnámí-ãⁿ. ³⁹ Te sá dúcáⁿ ñí quide-aⁿ ní xiní téè cùu fariséu téè ní cáháⁿ ñáhá xii-gá-áⁿ núu ní sani iní-dé: “Te núu òcò ndisa téè càháⁿ tnúhu Yá Ndiòxí cúu téè-a ña, te sa cutnùní iní-dé yoo cùu ñaha tnándeé ñáhá xii-dé, àdi ná ñáyiú cùu-aⁿ, te òcò ìⁿ ñaha ndècu ichi díí ìní cúu-án”, duha ní sani iní-dé. ⁴⁰ Te Jèsús ní xáhaⁿ-gã xii-dé:

—Xímú, ndècu ìⁿ tnúhu cachí tnúhu-í xii-n —càchí-gá xáhaⁿ-gã xii-dé.

Te téè cùu fariséu-án xáhaⁿ-dè xii-gá:

—Cachí tnúhu, Mèstrú —càchí-dé xáhaⁿ-dè xii-gá.

⁴¹ Te Jèsús ní xáhaⁿ-gã:

—Ní xíndecu ìⁿ téè ní xóo dasaⁿ núu díhúⁿ, te ní xítaú úú tnàhá-güedé núu-dé. Te ìⁿ-dé ní sàha-dé úhúⁿ cièndú díhúⁿ denàriú, te ingá-dé ní sàha-dé údico úxí. ⁴² Te ñá ní ñíhí-güedé nacháhu-güedé núu-dé, te téè ní sánùu ñaha-áⁿ ñí quide càhnu iní-dé ndi ndúu-güedé. Te vitna cachí-ò tucu te núu ndéda càa-güedé cúu ìní ñáhá-gã-güedé xii-dé —càchí-gá xáhaⁿ-gã xii-dé.

⁴³ Te ní xáhaⁿ tè Xímú-án:

—Sànuu sá téè tàú vài-gá díhúⁿ ò-gá cúu ìní-dé téè ní sánùu ñaha díhúⁿ-ãⁿ —càchí-dé xáhaⁿ-dè xii-gá.

Te ní xáhaⁿ Jèsús:

—Sá ndáá càháⁿ-n —càchí-gá xáhaⁿ-gã xii-dé.

⁴⁴⁻⁴⁶ Te Jèsús ní ndacoto-gá núu ñadìhí-áⁿ, te ní xáhaⁿ-gã xii té Xímú-án:

—¿Ndèhe-n nacuéa quide ñadìhí-a ñá? Chi cuànguihu-í vehe-n, dico ñá túú ní tàxi-n ndute ndoo sàhá-í, te ní ñà túú ní tàyuhu ñaha-n, te ní ñà túú ní chihi-n acití díquí-í, dico ñadìhí-a ní naquette-aⁿ ndíhi ndute núu-aⁿ sàhá-í, te ní nadayìchí-aⁿ ndíhi idi díquí-aⁿ, te nuu núu teyuhu-aⁿ sàhá-í, te ní chihi-aⁿ acití sàháⁿ tnámí sàhá-í. ⁴⁷ Te ña càchí tnúhu-í xii-n sá ò cùu ìní ñáhá-áⁿ xii-í, te núu xíãⁿ cutnùní iní-ó sá cuéí ò vài sá cuéhé sá dúhá ñí quide-aⁿ, dico Yá Ndiòxí sa ní quide càhnu iní ñáhá-gã xii-aⁿ. Chi Yá Ndiòxí quidé càhnu iní-gá ñáyiú cuéí vài àdi sacú cuéchi-yu, te núu sacú cuéchi-yu te sacú cúu ìní ñáhá-yu xii-í —càchí-gá xáhaⁿ-gã xii-dé.

⁴⁸ Te ní xáhaⁿ-gã xii ñadìhí-áⁿ:

—Sa ní quide càhnu iní-í nchaa cuéchi-n —càchí-gá xáhaⁿ-gã xii-aⁿ.

⁴⁹ Te cue téè xínucóo ndíhi-gá xitnàha-güedé:

—¿Ná téè cùu téè-a núu nándi sá quidé-dé, te ndéé nchaa yíca cuéchi ñáyiú quide càhnu iní-dé-í? —càchí-güedé xitnàha-güedé.

50 Te Jèsús ní xáhaⁿ tùcu-gá xii ñàdìhí-áⁿ:

—Sa ní cácu nihnu-n nũú ùhú núú ndàhú vitna chi ní sándáá iní ñáhá-n xii-í, te vitna cuanùhú te ñá túú-gá ná caní iní-n —càchí-gá xáhaⁿ-gá xii-aⁿ.

8

Ñáyiú dìhí ní chindee ñàha xii Jesús

1 Te sátá dúcáⁿ nĩ cuu te Jèsús ní xica-gá cuáháⁿ-gá tít ní víhí ñúú náhnú, ndìhí ñúú líhli dānehé-gá ñáyiú nācuáa ndìhu ndaha ñàha Yá Ndiõxí xii-yu. Te cuáháⁿ ndìhí-gá ndi ùxúú tnhá cue téé xica cuu ndìhí-gá, 2 ndìhí ìⁿ úú ñáyiú dìhí ní quide tátna-gá ní xíhí ñàha espíritú cùndìhí yucu ñávãha, ndìhí ñáyiú tnhá dava-gá cuéhé ùhú ní cùu. Te xiáⁿ tnhá tucu ìⁿ ñàha nàni Mariá Magdalèná, te ñàha-áⁿ nĩ xíhí ñàha ùsá espíritú cùndìhí yucu ñávãha xii-aⁿ ni cùu, te ní quee ñàha-xi. 3 Te tnhá ìⁿ ñàha nàni Juáná ñàdìhí ìⁿ téé nàni Chúza téé ní cunuu nĩ xinu cuechi vèhe té Hèrodés, ndìhí ingá ñàha nàni Susaná nchaa ñáyiú-áⁿ nĩ chindee ñàhá-yu xii-gá ndìhí nchaa sá ndécú ndìhí-yu, te diu-ni ducaⁿ nĩ quide vài-gá tucu ñáyiú nchicúⁿ ñáhá xii-gá cuáháⁿ.

Nācuáa quide téé cuángacáⁿ triú

(Mt. 13:1-9; Mr. 4:1-9)

4 Te ío vài ñáyiú ndaa ñúú ní tacá-yu núú ndécú Jèsús,

te ní ngüíta-gá ní cani-gá ìⁿ cuèndú núú-yu cuèndá tecú tnùnì-yu tnúhu-gá, te xáhaⁿ-gá xií-yu:

5 —Ìⁿ téé cuángacáⁿ-dé triú. Te òré ní ngüíta-dé dāngoyo-dé triú-áⁿ te dava ní quene ndava ní ngava ndéé ichi, te ní xénihnu ñáyiú, te ní xiní tìlaá te ní nadatàcá-güedi.

6 Te dava ní ngava ñuhu yadi núú yíhí víhí yúú, te ní xínu-xi dico núú sàcú-ni nduu te ní yíchí-xi, chi ñá túú cõhyo yíhí.

7 Te dava ní ngava núú yúcú ndìquìⁿ tnu ìñu, te ìⁿnuu-ni nĩ xínu-xi ndìhí tnu ìñu-áⁿ, te tnu ìñu-áⁿ nĩ dánáá-xí nchàa triú sá nĩ xínu-áⁿ. 8 Dico dava triú-áⁿ nĩ ngava-xi núú ndécú ñuhu cocoⁿ, te xiáⁿ ní xínu-xi te ní sahnú-xi, te ío váha ní cuu, chi núú ìⁿ-ní triú te ní nguíhí yoco-xi ìⁿ cièndú triú-xi —càchí-gá xáhaⁿ-gá xií-yu.

Te níhí ní cáháⁿ-gá ní xáhaⁿ tùcu-gá xií-yu:

—Nchaa nchòhó ñáyiú ní xíndedóho tnúhu ní cáháⁿ-í-a, te ío váha chí cuáha cuèndá —càchí-gá xáhaⁿ-gá xií-yu.

Nācuáa quèe-xi tnúhu ní cáháⁿ Jesús

(Mt. 13:10-17; Mr. 4:10-12)

9 Te cue téé xica cuu ndìhí Jesús ní xicáⁿ tnúhú-güedé núú-gá nũu nása quèe-xi cuèndú ní cani-gá núú ñáyiú.

10 Te ní xáhaⁿ-gá xii-güedé:

—Nchòhó chi sa càchí tnúhu Yá Ndiõxí xii-ndo ìⁿ sá vátá quínì-gá-ndó, chi càchí tnúhu-gá nācuáa cada-gá ndìhu ndaha-gá ñáyiú, dico

dava-gá ñáyiú càní-í mee-ni cuendú núú-yu, chi cuéi na quíní-yu nchaa nàcuáa cuu dico nì vá cútnùní iní-yu ná cuendá ducaⁿ cùu, àdi cuéi na cùndedóho-yu dico nì vá tècú tnùní-yu —càchí-gá xáhaⁿ-gá xii-güedé.

Jèsús càháⁿ-gá nàcuáa quèe-xi tnúhu cuendá té cuángacáⁿ triú

(Mt. 13:18-23; Mr. 4:13-20)

¹¹ Te xáhaⁿ tùcu-gá xii-güedé:

—Duha quèe-xi cuendú ní cani-í núú-ndó, chi triú ní sacáⁿ tée-áⁿ cúú-xí dàtná tnúhu Yá Ndiöxí. ¹² Te triú sá ñi quene ndava ní ngava ndéé ichi-áⁿ, xáⁿ cúú-xí dàtná ñáyiú ní quée iní-xi tnúhu Yá Ndiöxí, dico sácuíhná cuáháⁿ-xi xòcani-xi tnúhu-gá iní-yu cuendá sá vǎ quíndáá iní-yu, te vá nánihí tǎhú-yu. ¹³ Te triú sá ñi ngava ñuhu yadi núú yíhí vǐhi yúú, xáⁿ cúú-xí dàtná ñáyiú ní xíndedóho tnúhu Yá Ndiöxí te díí iní ní tniⁿ-yu tnúhu-gá, dico òré ná dàcaháⁿ ñáhá yùcu ñávǎha xii-yu nándi cadá-yu, te dàña nihnú-yu tnúhu-gá chi ñá nihí ndéé-yu canchicúⁿ nihnú-yu nàcuáa càháⁿ tnúhu-gá. ¹⁴ Te triú sá ñi ngava núú yúcu ndǐquíⁿ tnu iñu-áⁿ, xáⁿ cúú-xí dàtná ñáyiú ní tecú dóho-xi tnúhu Yá Ndiöxí, dico cuéé cuéé ní nacuanaá-yu tnúhu-gá, chi cuendá mee-ni sǎ cúú-xí mèe-yu ñuhu iní-yu, ndihi cuendá sá ío sàni iní-yu cuu cuicá-yu, ndihi cuendá sá

ío cùdíí iní-yu nchaa sá ío ñuyíú-a núu xáⁿ àúⁿ nǎ cuu ní xíndedóho-yu tnúhu-gá. ¹⁵ Dico triú sá ñi ngava núú ndécú ñuhu cocoⁿ, xáⁿ cúú-xí dàtná ñáyiú váha iní-xi ní xíndedóho tnúhu Yá Ndiöxí chi ñá túú dàña nihnú-yu, te ní yùhu ní iní-yu quidé-yu nchaa nàcuáa càháⁿ tnúhu-gá.

Nàcuáa quidé-yu iti

(Mr. 4:21-25)

¹⁶ Te ñá túú ní ñⁿ ñáyiú tēñuhú-yu ñⁿ iti te dàdáhu-yu, àdi chiváha-yu ñⁿ caha càmá, chi tàxi ndecú-yu núú ññu cuendá cutnùní núú nchaa ñáyiú ndècu vehe. ¹⁷ Te ní ñⁿ tnúhu sá ñǎ tècú tnùní ñáyiú vitna vá càchí-ó sǎ vǎ tècú tnùní-yu chi dacuèi sá tècú tnùní-yu, te ní ñⁿ tnúhu sá càchí-ó cùu yuhu vitna vá cúú yùhu chi dacuⁿtií sǎ quée tǔu-xi núú ñáyiú.

¹⁸ Te chí cùndedóho váha tnúhu na càháⁿ-í-a. Nchaa ñáyiú sàndáá iní ñáhá xii Yá Ndiöxí ío-gá cuita quíndáá-gá iní ñáhǎ-yu xii-gá quíhⁿ, te nchaa ñáyiú ñá túú sàndáá iní ñáhá xii-gá uuⁿ-gá cuita cuu sàá-gá iní-yu núú-gǎ quíhⁿ —càchí-gá xáhaⁿ-gǎ xii-güedé.

Cue ñani Jèsús ndihi náná-gǎ

(Mt. 12:46-50; Mr. 3:31-35)

¹⁹ Te ní quexíio náná Jèsús ndihi cue ñani-gá vehe núú ndécú-gǎ, te ñá ndácǔ-yu cáháⁿ ndihi ñáhá-yu xii-gá chi ío cuéhé ñáyiú ndècu núú ndécú-gǎ. ²⁰ Te ñⁿ ñáyiú xíndecu-áⁿ ñi dáyǎha-yu tnúhu núú-gǎ, te xáháⁿ-yu:

—Ní quexìo náná-n ndìhi cue ñaní-n xīnutnii-yu quehé, te cuíní-yu cáháⁿ ndìhi ñáhá-yu xii-n —càchí-yu xáháⁿ-yu xii-gá.

²¹ Te ní xáhaⁿ-gá:

—Nchaa ñáiyu sàcúndedóho tnúhu Yá Ndiòxí te quidé-yu nchaa nàcuáa cáháⁿ tnúhu-gá, ñáiyu-áⁿ cúŷ-yu dàtná nǎnà-í ndìhi dàtná cue ñaní-í —càchí-gá xáhaⁿ-gá xii ñáiyu ní dáyáha tnúhu núú-gá-áⁿ.

Jèsús ngání-gǎ táchí ndìhi ndute làgúná

(Mt. 8:23-27; Mr. 4:35-41)

²² Te ìⁿ nduu ní quée Jèsús bàrcú ndìhi cue téé xìca cuu ndìhi-gá, te ní xáhaⁿ-gá:

—Chí ná quìhíⁿ-ó ndàa ingá xio yuhu làgúná —càchí-gá xáhaⁿ-gá xii-güedé.

Te cuáháⁿ-güedé ndìhi-gá. ²³ Te nini ñúhu barcú ichi cuáháⁿ-xi núú ndute ní xídí Jèsús. Te ní ngüíta-xi níhi vìhi quene táchí te ta nàdachitú-xi ndute xití bàrcú-áⁿ cuáháⁿ, te sa cuíní-nǎ-xi quée naa bàrcú-áⁿ xití ndute ni cùu. ²⁴ Te ní sáháⁿ-güedé núú cáá Jèsús xídí-gá, te ní xáhaⁿ-güedé xii-gá:

—ìMèstrú, ndìquíú ìní chi tà quée naa-o cuáháⁿ! —càchí-güedé xáhaⁿ-güedé xii-gá.

Te Jèsús ní ndìquíú ìní-gá te ní ndacóo-gá te ní tenáa-gá táchí-áⁿ ndìhi ndute làgúná-áⁿ, te ní ngüíñí-ni táchí-áⁿ te ní nucúndecu nahí-nǎ ndute làgúná-áⁿ.

²⁵ Te ní xáhaⁿ-gá xii-güedé:

—¿Náa ñá túú sàndáá ìní ñáhá ndìsa-ndo xii-í ǎⁿ? —càchí-gá xáhaⁿ-gá xii-güedé.

Te ní cuñúhu-güedé sá dúcáⁿ ñí quide-gá ní xiní-güedé, te ní yùhú-güedé, te ní xítñaha-güedé:

—¿Te ná téé cùu téé-a núu ní cáháⁿ-ni-dé te ní ngüíñí táchí te ní nucúndecu nahí-ni ndùte làgúná-a-í? —càchí-güedé xítñaha-güedé.

Tée yìhi ñaha cue espíritú cúndìhi yucu ñávǎha

(Mt. 8:28-34; Mr. 5:1-20)

²⁶ Te ní sáa-gá ndìhi-güedé yucu cue téé ñuú Gàdará, te yìhi ndáa-ni ndàa ingá xio làgúná-áⁿ cáá dìstrítú Galileá.

²⁷ Te òré ní quene Jèsús xití bàrcú te ní dáyátní ñaha ìⁿ téé ñuú-áⁿ xii-gá, te yìhi ñaha titní espíritú cúndìhi yucu ñávǎha xii-dé. Te ní cunaha ñà túú-gǎ sácúñhu-dé dóó-dě, te ni ñà túú-gǎ sácúndecu-dé vehe-dé, chi da nchaa núú yíndǔxi ndíyì quide vehe-dé. ²⁸ Te òré ní xiní-dé Jèsús te ní ngüíñí xití-dě núú-gǎ, te cue espíritú yìhí ñaha xii-dé-áⁿ ñí quide-xi níhi ní cáháⁿ-dé, te xáhaⁿ-dě xii-gá:

—¿Ná cuendá véxi-ò Jèsús Déhe Dútú Ndiòxí sàdí-n ìchi-í-í? Te cáháⁿ ndáhú-í núú-n sǎ và dándóho ñaha-n xii-í —càchí-dé xáhaⁿ-dě xii-gá.

²⁹ Te ducaⁿ ñí cáháⁿ-dé cuendá sá Jèsús ní xáhaⁿ-gá xii nchaa espíritú cúndìhi yucu ñávǎha yìhi ñaha sá ná quée ñaha-xi xii-dé. Te nchaa xíáⁿ

ní xóo dacàháⁿ-xi iní-dé nándi sá ní xóo cada-dé nũu ní xóo dacũtu ñaha-güedé cadená xii-dé cuendá sá ña túú-gã ná cada-dé, te ní xóo cundeé ñáhá-güedé, dico cuéi ducaⁿ dico ní xóo dandáva-ni-dé cadená, te cue espíritú cündihi yucu ñávãha-áⁿ ní xóo dacũnu ñaha-xi xii-dé ní xóo quíhíⁿ-dé xití yucu. ³⁰ Te Jèsús ní xicáⁿ tnúhú-gã núú-dé, te xáhaⁿ-gã:

—¿Nása nàni-n-i? —cachí-gá xáhaⁿ-gã.

Te ní xáhaⁿ-dë:

—Vài Sandadú nàni-í — cächí-dé xáhaⁿ-dë xii-gã.

Te ducaⁿ ní xáhaⁿ-dë xii-gã cuendá sá ïo cuéhé espíritú cündihi yucu ñávãha yíhi ñaha xii-dé. ³¹ Te nchaa espíritú-áⁿ ní cáháⁿ ndàhú-xi núú Jèsús sá vã téndàha ñaha-gã xii-xi quíhíⁿ-xi núú ùhú núú ndàhú. ³² Te ñu-ni yatni yucu núú ndécú Jèsús-áⁿ yíhí vài cuchí xixexi-güedi, te nchaa espíritú-áⁿ ní cáháⁿ ndàhú-xi núú-gã sá ná dàña-gã quíhu-xi yiqui cüñú nchaa cüchí-áⁿ, te Jèsús ní xáhaⁿ-gã sá cúú quíhu-xi yiqui cüñú-güedi. ³³ Te ní quee ñaha nchàa espíritú-áⁿ xii téé-áⁿ, te ní quíhu-xi nchaa cüchí-áⁿ, te cüchí-áⁿ ní xinu-güedi duha ní quee-güedi ndàa núú dèhvã yuhu làgúná-áⁿ, te ní ngaunihnu-güedi xití ndute te ní ndihi-güedi ní cáhá.

³⁴ Te òré ní xiní cue téé xito cuchí-áⁿ nàcuáa ní cuu te ní yùhú-güedé ní xinu-güedé, te ní sáháⁿ-güedé ní cani-güedé

cuendú núú cuè ñáyiú ndècu xití ñuú, ndihi núú cuè ñáyiú ndècu xití yucu. ³⁵ Te nchaa ñáyiú ní níhí tnũhu ní queé-yu cuáháⁿ ndéhë-yu nàcuáa ní cuu. Te òré ní quexiú-yu núú ndécú Jèsús, te ní xiní-yu téé ní xíhi ñaha cuè espíritú cündihi yucu ñávãha-áⁿ núcõo-dé núú sáhá Jèsús, te nihnu-ná-dé dóó-dé, te núcõo-dé dàtná ïⁿ ñáyiú váha, te ní yùhú-yu òré ní xiní ñáhã-yu xii-dé. ³⁶ Te nchaa ñáyiú ní xiní nàcuáa ní cuu ní ndúha téé yíhi ñaha cue espíritú cündihi yucu ñávãha-áⁿ ní cùu ní caní-yu cuendú núú nchàa ñáyiú ní quexiú-áⁿ nàcuáa ní cuu ní ndúha téé-áⁿ ndihi nàcuáa ní cuu cuendá nchaa cüchí-áⁿ. ³⁷ Te sá dúcáⁿ ní níhí-yu tnúhu nàcuáa ní cuu, núú nchaa ñáyiú ñuú Gàdará ío ní yùhú-yu te ní ngüíta-yu càháⁿ ndàhú-yu núú Jèsús sá ná nùhú-gã nũu ndèé ichi véxi-gã. Te sá dúcáⁿ ní cáháⁿ-yu núú cuáháⁿ-gã núú ndécú bàrcú. Te òré ndée-gã bàrcú-áⁿ nùhú-gã ³⁸ ní ngüíta téé ní xíhi ñaha cuè espíritú cündihi yucu ñávãha càháⁿ ndàhú-dé núú-gã nũu vá cündèe iní-gã quíhíⁿ ndihi ñaha-gã xii-dé, dico Jèsús ní quide ndee iní ñáhá-ni-gã xii-dé, te ní xáhaⁿ-gã:

³⁹ —Cuanùhú vehe-n, te cani-n cuendú núú nchàa ñáyiú sá ïo càhnu cuu nchaa sá váha ní quide ñaha Yã Ndiõxí xii-n —cächí-gá xáhaⁿ-gã xii-dé.

Te téé-áⁿ ñí xica-dé cuánuhú-dé te ní ngüíta-dé ní cani-dé cuèndú núú nchàa ñáyiu xĩndecu nihíi ñuú sá ío cahnú cuu nchaa sá váha ní quide ñaha Jèsús xii-dé.

Cuèndá déhe yoco tẽ Jàirú, ndihi cuèndá ìⁿ ñadìhí ní tnándeé dóó Jèsús

(Mt. 9:18-26; Mr. 5:21-43)

40 Te òré ní ndexìo Jèsús ndàa ingá xio yuhu làgúná, te ñáyiu xĩndecu xiáⁿ sa ndètu cahnu ñaha-ná-yu, te ío váha ní cáháⁿ ndihi ñáhá-yu xii-gá òré ní nasáá-gá. 41 Te ìⁿ téé tàxi tnuñi veñúhu ní quexìo-dé núú ndécú Jèsús, te téé-áⁿ nání-dẽ Jàirú, te ní ngüíñí xítí-dẽ núú-gã càháⁿ ndàhú-dé, te xáhaⁿ-dẽ xii-gá:

—Véxi-í càháⁿ ndàhú-í núú-n ñũ vá cùndèe iní-n quihíⁿ-ó vèhe-í cada tátna-n dèhe yoco-í —càchí-dé xáhaⁿ-dẽ xii-gá.

42 Te ducaⁿ ñí xáhaⁿ-dẽ chi ndècu ìⁿ dii-ní dèhe yoco-dé, te ndècu-xi datná úxúú cuíá-xi, te càhú víhí tnàhá-xi cùhú-xi te cùnì-xi cuú-xi. Te Jèsús ní xica-gá cuáháⁿ-gá ndihi téé-áⁿ, te ío vai ñáyiu nchìcúⁿ ñáhá xii-gá cuáháⁿ, te dàdehnde ñaha-ná-yu xii-gá ní cùu.

43 Te tnuú nchaa ñáyiu-áⁿ ñútnàhá ìⁿ ñaha cùhú, te ñaha-áⁿ sà ní cuu úxúú cuíá sã cùhú-aⁿ ngòyo ñaha ñíñí xii-aⁿ, te ío cuéhé dǐhúⁿ ñí cuu dādoñuhu-aⁿ chi ní nadico-aⁿ nchàa sá ndécú ndihi-aⁿ cuèndá ní níhí-aⁿ dǐhúⁿ ñí queheⁿ nchaa ñáyiu ní quide tátna ñaha xii-aⁿ, dico ní ìⁿ-yu ñá túú ní ndàcú-yu

ndúha-aⁿ. 44 Te ní sáháⁿ ndehe yatni-aⁿ ndàa sátá Jèsús, te ní tnándeé-aⁿ luha yuhu dǒó-gã te òré-ni-áⁿ ñí ndúha-aⁿ.

45 Te Jèsús ní xicáⁿ tnúhú-gã núú-yu, te xáhaⁿ-gã:

—¿Ndèdaca-a-ndo ní tnándeé ñáhá xii-í? —càchí-gá xáhaⁿ-gã xii-yu.

Te nchaá-yu ní xáhãⁿ-yu sá ñí ìⁿ-yu ñá túú ní tnándeé ñáhá xii-gá. Te té Pèlú ndihi cue téé cùndihi-dé ní xáhaⁿ-güedé xii-gá:

—Mèstrú, ndèhe-n sá vái ñáyiu nchìcúⁿ ñáhá xii-n, te xio xio dàdehnde ñahá-yu, te xicáⁿ tnúhú-gã-n yòo ní tnándeé ñáhá xii-n —cachí-güedé xáhaⁿ-güedé xii-gá.

46 Dico Jèsús ní xáhaⁿ-gã xii-yu:

—Dico diu ìⁿ-ndo ñí tnándeé ñáhá xii-í, chi ní cutnùní iní-í sá ìⁿ ñáyiu cùhú ní tnándeé ñáhá xii-í te ní ndúha-yu —càchí-gá xáhaⁿ-gã xii-yu.

47 Te sátá ñí xiní ñaha-áⁿ sã ñí cutnùní iní Jèsús sá ñí tnándeé ñáhá-áⁿ xii-gá, te yùhú yùhú-aⁿ ní sáhá-aⁿ ní ngüíñí xítí-áⁿ núú-gã, te ní nàhmá-aⁿ núú-gã, ndihi núú nchàa ñáyiu ná cuèndá ducaⁿ ñí quide-aⁿ ní tnándeé-aⁿ-gá, ndihi cuèndá sá òré-ni-áⁿ ñí ndúha-aⁿ. 48 Te Jèsús ní xáhaⁿ-gã xii-aⁿ:

—Yòhó ñaha cùhú, ní sándáá iní ñáhá-n xii-í ñũ ní ndúha-n, te cuanùhú vitna te ñá túú-gã ná cani iní-n —càchí-gá xáhaⁿ-gã xii-aⁿ.

49 Te càháⁿ dúcáⁿ-ní Jèsús ní sáá ìⁿ téé xinu cuechi vehe

té Jàirú tée tàxi tnuní veñúhu, te xáhaⁿ tée xìnu cuechi-áⁿ xii-dé:

—Sa ní xíhí déhe-n, vá chíchiuⁿ-gá-n Mèstrú — càchí-dé xáhaⁿ-dè.

⁵⁰ Te sá dúcáⁿ xáhaⁿ tée xìnu cuechi-áⁿ xii té Jàirú ní tecú dóho Jèsús, núu ní xáhaⁿ-gá xii-dé:

—Vá ndìhú iní-n, quindáá iní ñáhá-ní-n xii-í te ndúha déhe-n —càchí-gá xáhaⁿ-gá xii-dé.

⁵¹ Te òré ní sáá-gá vehe té Jàirú te ñá ní dàña-gá quíhu ñáyiú cùtexínu, núu té Pèlú-ni ndìhi té Jàcobó-ni, ndìhi té Juáá-ni, ndìhi tātá ndìhi náná-ni xíchí ñí xíhí-áⁿ cuãnguìhu ndìhi-gá xití vehe.

⁵² Te nchaa ñáyiú sa xíndecu vehe-dé-áⁿ xíndáhyú-yu sá ndìhú iní-yu cuèndá sá ñí xíhí-xi. Te Jèsús ní xáhaⁿ-gá xii-yu:

—Vá ndàhyú-ndó, chí dícó-ni xidí-xi ñá túú ní xíhí-xi —càchí-gá xáhaⁿ-gá xii-yu.

⁵³ Te ní sácú ndeé ñáhã-yu xii-gá, chí sá cúú-xí mèè-yu chí ní xíhí ndisa xíchí-áⁿ. ⁵⁴ Te Jèsús ní tñii-gá ndaha xíchí ñí xíhí-áⁿ, te níhi ní cáháⁿ-gá, te xáhaⁿ-gã:

—Xíchí cuéchí, ndacóo — càchí-gá xáhaⁿ-gã.

⁵⁵ Te xíchí-áⁿ ñí ndoto-xi, te òré-ni ní ndacóo-xi, te Jèsús ní xáhaⁿ-gã sá ná cuãñáhã-yu sá cáxí-xí. ⁵⁶ Te tātá-xi ndìhi náná-xi súúni ñí cuñúhu-yu sá dúcáⁿ ñí dándótó ñàha Jèsús xii-xi, te ní xáhaⁿ-gá xii-yu sá vã yóo ñí cuñáhã-yu sá dúcáⁿ ñí quide-gá.

9

Jèsús téndàha-gá ndi ùxúú cue tée xica cuu ndìhi-gá quíhíⁿ-güedé cáháⁿ-güedé tnúhu-gá

(Mt. 10:5-15; Mr. 6:7-13)

¹ Te Jèsús ní cana-gá ndi ùxúú cue tée xica cuu ndìhi-gá, te ní sãñaha-gã xii-güedé tnúhu ndee iní cundecu ndìhi-güedé cuèndá queñuhu-güedé nchaa espíritú cündìhi yucu ñávãha yìhi ñaha xii ñáyiú, ndìhi cuèndá sá cádá tātna-güedé nchaa ñáyiú cùhú. ² Te ní xáhaⁿ-gã xii-güedé sá quíhíⁿ-güedé danèhé-güedé ñáyiú nàcuáa cada Yá Ndiöxí ndìhu ndaha ñàha-gá xií-yu, te ducaⁿ càda tātna-güedé cue ñáyiú cùhú. ³ Te cùmání-gã caca-güedé quíhíⁿ-güedé, te ní xáhaⁿ-gã xii-güedé:

—Ñá túú tñàhí ná canehe-ndo cùu ichi-ndo, ni tātnu, ni ñunu, ni sã cáxí-ndó, ni dìhúⁿ. Te ni vã canèhe-ndo ìngá ichi dóo-ndó, chí dñu-ni dóo ñíhñú-ndó-áⁿ xiáⁿ tñàhí-ni. ⁴ Te ndèdani càa vehe na saá-ndó, te xiáⁿ cundecu-ndo ndèè ná sàá nduu ndèe-ndo. ⁵ Te núu ñá túú cuìni-yu queheⁿ cuèndá ñáhã-yu xii-ndo, te ndee-ndo ñùú-áⁿ, te naquidi-ndo ticá chùhmá ñí tñii sáhã-ndó cuèndá sá ná cùtnuní iní-yu sá ñà túú quide váha-yu — càchí-gá xáhaⁿ-gã xii-güedé.

⁶ Te sátá dúcáⁿ ñí xáhaⁿ Jèsús xii-güedé, te ní quee-güedé cuáhã-güedé nchaa ñuu dácuàha-güedé ñáyiú tnúhu Yá Ndiöxí, tnúhu

sá càháⁿ nàcuáa naníhí tãhú-yu, te ducaⁿ ta quide tátna-güedé nchaa ñáyiú cùhú cuáháⁿ.

Nàcuáa ní cuu ní xihí té Juáá tée dàcuandute ñaha xii ñáyiú

(Mt. 14:1-12; Mr. 6:14-29)

⁷ Te té Hèrodés tée cùu gobiernú ní níhí-dě tnúhu nchaa nàcuáa quide Jesús, te quíyuhú iní-dé te sàni iní-dé yoo cùu-gá. Te ducaⁿ nĩ sàni iní-dé chi dava ñáyiú cãchí-yu sá tẽ Juáá tée ní xóo dacuandute ñaha xii ñáyiú ní ndoto cùu-gá. ⁸ Te davá-yu cãchí-yu sá tẽ Èliás cúú-gã, te davá-yu cãchí-yu sá ìⁿ tée ní xóo cáháⁿ tnúhu Yá Ndiõxí ndéé sanaha vihi ní ndoto cùu-gá, cãchí-yu. ⁹ Dico té Hèrodés ní cachí-dé:

—Yúhú ní táuchíúⁿ-í ní xehndé-güedé díquí tẽ Juáá. ¿Te yoo cùu tée dii cuendú-xi nihí-a sá sũúni cuéhé nũú sã quidé-dě váiⁿ? —duha ní cachí-dé.

Te té Hèrodés ndúcú-dě nàcuáa cada-dé cuendá quini-dé Jesús.

Jèsús dácãxi-gá úhúⁿ mĩl cue tée te ðiⁿ ñáyiú ðihí ndihí landú
(Mt. 14:13-21; Mr. 6:30-44; Jn. 6:1-14)

¹⁰ Te nchaa cue tée ní táuchíúⁿ Jèsús cuáháⁿ cáháⁿ tnúhu Yá Ndiõxí núú ñáyiú ní ndexiõ-güedé núú-gã te ní ngüita-güedé nácàni tnúhu-güedé nchaa nàcuáa ní quide-güedé. Te dàtnùní ní xica-gá medli-ni-gá ndécá ñaha-gá xii-güedé cuáháⁿ ìⁿ xichi núú ñà túú ñáyiú ndècu, yatni núú cáá ñúú

Bètsaidá. ¹¹ Dico òré ní níhí ñáyiú tnúhu sá cuáháⁿ Jèsús, te nchícúⁿ-yu-gá cuáháⁿ, te òré ní quexiõ-yu núú-gã, te ní queheⁿ cuendá ñhá-gã xii-yu, te ní dánèhé ñhá-gã xii-yu nàcuáa ndihu ndaha ñaha Yá Ndiõxí xii-yu, te ní quide tátna-gá nchaa ñáyiú cùhú.

¹² Te òré sa ní cuaa te ní natacá ndi ùxúú cue tée xica cuu ndihí-gá núú-gã, te ní xáhaⁿ-güedé xii-gá:

—Sa ní cuu dandàca-n nchaa ñáyiú-a, chi sa ní cuaa, te na quihíⁿ-yu nchaa vehe càa yatni iha, ndihí nchaa xití ñuu cáá yàtni iha cuaáⁿ-yu sá cáxi-yu, te ði-u-ni yácáⁿ ndetatú-yu, chi núú ndécú-ó iha ñà túú tnahí ná ió —cãchí-güedé xáhaⁿ-güedé xii-gá.

¹³ Te Jèsús ní xáhaⁿ-gã xii-güedé:

—Mee-ndo chĩ cuãñaha sã ná càxi-yu —cãchí-gá xáhaⁿ-gã xii-güedé.

Te ní xáhaⁿ-güedé xii-gá:

—Ñà túú nãgá ndécú ndihí-ndí, chi úhúⁿ duha-ná pàá, ndihí úú-nã chácá ndécú ndihí-ndí, te ði-u-ni núú quihíⁿ-ndí cuaaⁿ-ndí sá cáxi-yu —cãchí-güedé xáhaⁿ-güedé xii-gá.

¹⁴ Te xĩnu dàtná úhúⁿ mĩl mee-ni cuè tée, te ðiⁿ ñáyiú ðihí ndihí landú. Te Jèsús ní xáhaⁿ-gã xii cue tée xica cuu ndihí-gá:

—Chí cũñaha na ngõo ndi údico úxí ndi údico úxí-yu ìⁿ ìⁿ xichi —cãchí-gá xáhaⁿ-gã xii-güedé.

15 Te ducaⁿ nĩ quide-güedé, te ní ngóo-yu nchaá-yu. 16 Te dǎtnùní ní queheⁿ-gá ndi ùhúⁿ pàá-áⁿ, ndihi ndi ndùú chácá-ǎⁿ. Te ní ndacoto-gá andiu, te ní ndacáⁿ táhú-gǎ núú Yǎ Ndiòxí, te dǎtnùní ní táhú cuèchi-gá pàá-áⁿ ndihi chácá-ǎⁿ, te ní sáha-gá nchaa cue téé xica cuu ndihi-gá ní dácǎhñu ñaha-güedé xii-yu. 17 Te nchaá-yu ní xexí-yu ní ndahá xití-yu. Te sátá nĩ túhú cóhó-yu te ní nadatàcá-güedé nchaa sá nĩ quendóo, te ní chítú ùxúú tnàhá tídihi mee-ni sá nĩ quendóo.

Té Pèlú xǎhaⁿ-dě xii Jèsús sá díú-gǎ cúú-gǎ Crístú

(Mt. 16:13-19; Mr. 8:27-29)

18 Te ñⁿ nduu ndècu mee Jesús ndihi cue téé xica cuu ndihi-gá, te càháⁿ ndihi-gá Yǎ Ndiòxí, te sátá nĩ yáha ní càháⁿ ndihi-gá Yǎ Ndiòxí, te ní xicáⁿ tnúhú-gǎ núú-güedé, te xǎhaⁿ-gǎ xii-güedé:

—¿Yoo cùu yúhú càchí ñáyiú-va? —càchí-gá xǎhaⁿ-gǎ xii-güedé.

19 Te ní xǎhaⁿ-güedé xii-gá:

—Davá-yu càchí-yu sá cúú-n ndii Juáá téé ní xóo dacuàndute ñaha xii ñáyiú, te davá-yu càchí-yu sá cúú-n tē Èliás, te davá-yu càchí-yu sá ñⁿ téé ní xóo càháⁿ tnúhu Yǎ Ndiòxí ndéé sanaha nĩ ndoto cùu-n, duha càchí-yu —càchí-güedé xǎhaⁿ-güedé xii-gá.

20 Te ní xicáⁿ tnúhú tùcu-gá núú-güedé, te xǎhaⁿ-gǎ xii-güedé:

—Te nchòhó, ¿yoo sàni iní-ndó cùu-í-í? —càchí-gá xǎhaⁿ-gǎ xii-güedé.

Te té Pèlú ní xǎhaⁿ-dě xii-gá:

—Yòhó cúú-n Crístú Déhe Dútú Ndiòxí —càchí-dé xǎhaⁿ-dě xii-gá.

Jèsús càháⁿ-gá sá càhni ñàha-güedé xii-gá

(Mt. 16:20-28; Mr. 8:30-9:1)

21 Te ní xǎhaⁿ-gǎ xii-güedé sá vǎ yòo ñⁿ cúñaha-güedé yoo cùu-gá. 22 Te ní xǎhaⁿ-gǎ xii-güedé:

—Yúhú Téé cùu ñani tnàhá-ndó nchàa-ndo ío cuéhé sǎ ndòhò-í, chi daquèe tíhú ñáhá cuè téé cùu sacuéhé núú ñáyiú isràél, ndihi cue dútú cùnù, ndihi cue téé dàcuaha ñaha xii ñáyiú nchaa tnúhu ní chídó tnùní ndii Moisés, te sáá nduu te cahni ñaha-güedé xii-í, dico nduu úní sá cúú-í te ndoto-í —càchí-gá xǎhaⁿ-gǎ xii-güedé.

23 Te dǎtnùní ní xǎhaⁿ-gǎ xii nchaa ñáyiú:

—Nchaa ñáyiú cuìní chit-nahá ñáhá xii-í, te xini ñuhu-xi vǎ cǎdá-gǎ-yu sá sání ìní mée-yu, te ñⁿ nduu ñⁿ nduu cada ndee ìní-yu cundecu túha-yu ndohó-yu cuèndá-í, te cuèi na ndòhó-yu dàtná ndoho-í. 24 Te nchaa ñáyiú cuìní sá ñà túú tnàhí ná yáha cundecu ñuyíú-a cuíta nihnú-yu. Dico nchaa ñáyiú ñà túú yùhú cuèi nándi sá ná yáha-yu cundecú-yu ñuyíú-a sá cuèndá-í, te ñáyiú-áⁿ naníhí tàhú-yu. 25 Te cuèi nchaandi túhú sá ío ñuyíú-a na ñihí ñáyiú cundecu ndihí-yu,

dico núu diu nchaa xiáⁿ ná càda cuíta nihnú-yu te ñá túú vèdana nàndíhi-xi sá dúcáⁿ ndècu ndihí-yu nchaa xiáⁿ. ²⁶ Te nchaa ñáyiú na cùcahaⁿ núu-xi cáháⁿ váha cuèndá-í ndihi cuèndá nchaa tnúhu-í, te tnàhá yúhú Tée cùu ñaní tnàhá-ndó nchàa-ndo cucahaⁿ núu-í núu-yu òré quixi tucu-í ndihi cue espíritú xínú cuèchi núu Tātà-í Dútú Ndiòxí, te mee-gá cada cutnùní iní nchaa ñáyiú sá ío càhnu cuu-í. ²⁷ Te na càchí tnúhu ndáá-í xii-ndo sá ío dava nchòhó ñáyiú ndècu iha vitna vá cùu-ni-ndo, chi cundecu-ni-ndo ndéé quini-ndó sáá nduu ndihu ndaha ñàha Yá Ndiòxí xii ñáyiú —càchí-gá xàhaⁿ-gá xii-yu.

Ní nadáma dóó Jèsús ndihi núu-gá

(Mt. 17:1-8; Mr. 9:2-8)

²⁸ Te ní cuu dàtná úná nduu sá dúcáⁿ ní cáháⁿ Jèsús, te cuásaá-gá ìⁿ yucu cáháⁿ ndihi-gá Yá Ndiòxí, te ndèca-gá té Pèlú, ndihi té Jàcobó, ndihi té Juàá cuásaá. ²⁹ Te nini càháⁿ ndihi-gá Yá Ndiòxí ní nadáma núu-gá ndihi dóó-gá, te dóó-gá-áⁿ sùúni ní nduu cuixíⁿ víhí, te súúni dàtásaⁿ-xi. ³⁰ Te òré-ni-áⁿ ní xini-güedé úú tnàhá cue tée càháⁿ ndihi-gá, te ìⁿ-dé cúu-dé té Moisés, te ingá-dé cúu-dé té Èliás, ³¹ te súúni dàtásaⁿ-xi ní càndéé núu ndécú cue tée úú-áⁿ ndihi-gá, te xindatnúhu-güedé nàcuáa ndoho Jèsús cuú-gá ñúú Jerusalén dàtná ní cachí méé-gá. ³² Te té

Pèlú ndihi úú-gá-güedé cuini víhi-güedé cúdu-güedé, dico ní sahní iní-güedé ñá túú ní xídí-güedé, te ní dánèhé núu ñàhá-xí xii-güedé sá sùúni váha càa núu ndécú Jèsús, ndihi úú cue tée càháⁿ ndihi-gá-áⁿ. ³³ Te òré sa ndùcu ndee cue tée úú-áⁿ caca-güedé núhú-güedé, te ní xàhaⁿ té Pèlú xii-gá:

—Mèstrú, ¡váha ní cuu sá ndécú-ó iha vitna! Te na dàcaa-ndí úní tnàhá vehe tnuvixiⁿ, ìⁿ cuu cuèndá-n, te ìⁿ cuu cuèndá té Moisés, te ìⁿ cuu cuèndá té Èliás —càchí-dé xàhaⁿ-dè xii-gá.

Dico té Pèlú chi ní mèe-dé ñá túú ní cutnùní iní-dé nása nduu tnúhu ní cáháⁿ-dé. ³⁴ Te nini càháⁿ-dé ní quexio ìⁿ vícò núu ndécú-güedé-áⁿ ní dádáhu ñaha-xi xii-güedé, te ní yùhú-güedé sá dúcáⁿ ní quexio vícò-áⁿ ní dádáhu ñaha-xi. ³⁵ Te xití vícò-áⁿ ní tecú ní cáháⁿ Yá Ndiòxí, te xàhaⁿ-gá xii-güedé:

—Tée-a cùu-dé Déhe-í, tée ío cùu iní-í, te tnì-ndo nchàa tnúhu càháⁿ-dé —duha ní xàhaⁿ-gá xii-güedé.

³⁶ Te sáta dúcáⁿ ní cáháⁿ Yá Ndiòxí, te ní quide cuèndá-güedé sá mèdii-ná Jèsús ndécú-gá xíáⁿ. Te vá yòo ìⁿ ní xàhaⁿ-güedé nàcuáa nduu nchaa sá ní xini-güedé-áⁿ.

Jèsús quidé tātna-gá ìⁿ tée cuechi yíhi ñaha espíritú cùndíhi yucu ñávàha

(Mt. 17:14-21; Mr. 9:14-29)

³⁷ Te ingá nduu-áⁿ cuánuu-gá yucu-áⁿ ndihi-güedé, te ío cuéhé ñáyiú cuáháⁿ tnàhá ñàhá xii-gá. ³⁸ Te ìⁿ tée ñúhu

tnahá tnuú-yu-áⁿ ñí cáháⁿ
níhi-dé, te xáhaⁿ-dê xii-gá:

—Mèstrú, ío càháⁿ ndàhú-í
núú-n nùu vá cùndèe iní-n
càda tátna-n dêhe-í, chi ìⁿdìi
duha-dé ndécú,³⁹ te yìhi ñaha
espíritú cùndìhi yucu ñávãha
xii-dé, te òré ná nàtñi ñaha-xi
xii-dé, te dàcana saa ñaha-xi,
te ndàda ruúⁿ ñáhá-xí xii-dé,
te tàva-xi tíñú yuhu-dé. Te
íó dândoho ñaha-xi xii-dé,
chi ndéé núú ñà cúú-gã,
te dàña ñaha tnaa-xi xii-dé.
⁴⁰ Te sa ní cáháⁿ ndàhú-í
núú cuè tée xica cuu ndihí-n
queñuhu-güedé-xi, dico ñá
túú ní ndàcu-güedé —càchí-dé
xáhaⁿ-dê xii-gá.

⁴¹ Te Jèsús ní xáhaⁿ-gã xii
nchaa ñáyiu:

—¡Nchaa nchòhó ñáyiu
ndècu ñuyíú-a ío sàá iní-ndó,
chi ñá túú cuiní-ndó quìndáá
iní-ndó Yã Ndiöxí! Te ní
cuu vâi nduu quide ndee
iní-í nchaa sá quidé-ndó, ¿te
ná ndéé ama vá dúcáⁿ-gã
cada-ndo-i? —càchí-gá
xáhaⁿ-gã xii-yu.

Te ní xáhaⁿ-gã xii tée cùhú
dêhe-xi-áⁿ:

—Taxi dêhe-n ìha —càchí-gá
xáhaⁿ-gã xii-dé.

⁴² Te òré cuáháⁿ tée
cuechí-ãⁿ nùú-gã, te espíritú
cùndìhi yucu ñávãha-áⁿ
ñí dándùá ñáhá-xí xii-dé,
te sàhni yìhí ñáhá tùcu-xi
xii-dé ní cùu, dico Jèsús
níhi ní cáháⁿ-gá ní tenáá-gá
espíritú-áⁿ, te ní quee ñaha-xi
xii-dé, te ní nacuéha cuendá
ñáhá-gã xii-dé tátá-dê. ⁴³ Te
ncháá-yu ní cuñuhu-yu sá

dúcáⁿ ñí cuu, te ní cachí-yu
sá ío càhnu cuu Yã Ndiöxí.

*Jèsús càháⁿ tucu-gá sá
cùú-gá*

(Mt. 17:22-23; Mr. 9:30-32)

Te nini xicúñúhu-yu nàcuáa
ní quide Jèsús, te ní xáhaⁿ-gã
xii cue tée xica cuu ndihí-gá:

⁴⁴ —Nchòhó cundedóho
váha-ndo tnùhu na càháⁿ-í-a,
te vá ná cuànaa-ndo, chi
yúhú Téee cùu ñaní tnáhá-ndó
nchàa-ndo sáá ìⁿ nduu te
cuáha cuendá ñáhá-güedé xii-í
núú cuè tée cùu úhú iní ñáhá
—càchí-gá xáhaⁿ-gã xii-güedé.

⁴⁵ Dico cue téee-áⁿ ñà túú ní
tècú tnùní-güedé nàcuáa ndùu
tnúhu ní xáhaⁿ-gã xii-güedé,
te ducaⁿ ñí yáha-güedé, chi
ducaⁿ tnàhí ní cachí-gá
sá vã tècú tnùní-güedé,
te ní yùhú-güedé cácaⁿ
tnúhú-güedé núú-gã nása
ndùu tnúhu ní xáhaⁿ-gã
xii-güedé.

*Cue téee ndùcu tnúhu núú
tnáhá nùu ndédacàa-güedé
ío-gá cùnùu*

(Mt. 18:1-5; Mr. 9:33-37)

⁴⁶ Te cue téee xica cuu
ndihí-gá ní nguíta-güedé
ndátnùhu-güedé nùu ndédacàa-güedé
ío-gá cùnùu, ⁴⁷ dico Jèsús ní
cutnùní iní-gá nàcuáa sàni
iní-güedé nùu ní cana-gá ìⁿ té
lìhli, te ní sanu tní ñaha-gã ìⁿ
xio dñi-gá. ⁴⁸ Te ní xáhaⁿ-gã
xii-güedé:

—Nchaa ñáyiu na quèheⁿ
cuendá ìⁿ té lìhli dàtná té
lìhli-a cuendá sá ñúhú iní
ñáhá-yu xii-í ñá, te cada
iní-yu sá yúhú ní queheⁿ
cuendá-yu, te nchaa ñáyiu na
quèheⁿ cuendá ñáhá xii yúhú,

te cada iní-yu sá tnàhá Tàtà-í Dútú Ndiöxí Yaá ní tendaha ñàha xii-í véxi-í ñuyíú-a ní queheⁿ cuendá-yu. Te nchaa ñáyiú ío ndàhú iní-xi mee-ni xinu cuechí-yu, ñáyiú-áⁿ ïo-gá cúnúú-yu —càchí-gá xáhaⁿ-gá xii-güedé.

Ñáyiú ñá túú cùu úhú iní ñáhá cündihí ñahá-yu xii-o
(Mr. 9:38-40)

49 Te té Juàá ñiú-ni ïⁿ téé xica cuu ndihí-gá ní xáhaⁿ-dë xii-gá:

—Mèstrú, ní xiní-ndí ïⁿ téé càcunehe ñaha-dé xii-n, te ndèñuhu-dé espíritú cündihí yucu ñávàha yìhi ñaha xii ñáyiú, te nchúhú ñá túú ní dàña-gá-ndí ducaⁿ càda-dé, chi ñá túú xica cuu ndihí ñaha-dé xii-o —càchí-dé xáhaⁿ-dë xii-gá.

50 Te Jèsús ní xáhaⁿ-gá xii-dé:

—Daña-ndo na càda nahi-dé ní cùu, chi ñáyiú ñá túú cùu úhú iní ñáhá xii-o te cündihí ñahá-yu —càchí-gá xáhaⁿ-gá xii-dé.

Jèsús càháⁿ-gá dóho té Jàcobó ndihí té Juàá

51 Te òré sa ta cùyatni ndaa Jesús andiú, te ní xica-gá cuáháⁿ-gá ñuú Jerusàlén, chi duuⁿ duuⁿ ní sani iní-gá sá quihíⁿ-gá. 52 Te ní tendaha-gá cue téé yòdo nuu cuáháⁿ, te ní quexìo-güedé ïⁿ ñuú, te ñuú-áⁿ yíndèhu-xi distritú Sàmariá, te ndùcu-güedé ïⁿ vehe cada túha-güedé òré quexìo-gá. 53 Dico ñáyiú Sàmariá ñá túú ní cuiní-yu cuáñaha nùú-yu vehe, chi

cuendá sá ñi cutnùní iní-yu sá ìchi yáha-ni-gá quihíⁿ-gá ñuú Jerusàlén. 54 Te sá dúcáⁿ ñi quidé-yu ñá túú ní cuiní-yu cuáñaha nùú-yu vehe ndetatú-gá, núu ní xáhaⁿ tè Jàcobó ndihí té Juàá cue téé xica cuu ndihí-gá xii-gá:

—Mèstrú, ¿cuiní-n càcáⁿ táhú-ó nùú Yá Ndiöxí cuendá dangáva-gá ñuhú danàa-gá ñáyiú ñuú-a dàtná ní quide té Èliás téé ní xóo cáháⁿ tnúhu Yá Ndiöxí ndéé sanaha-áⁿ? —càchí-güedé xáhaⁿ-güedé xii-gá.

55 Te Jèsús ní nchócótó-gá nùú-güedé, te níhi ní cáháⁿ-gá dóho-güedé, te xáhaⁿ-gá:

—Nchòhó, chi ñá túú vàha iní-ndó te núu ducaⁿ càháⁿ-ndó. 56 Chi yúhú Téé cùu ñaní tnáhá-ndó nchàa-ndo véxi-í sá dácäcu nihnu-í ñáyiú, te ñá díú véxi-í sá dácüita nihnu-í-yu —càchí-gá xáhaⁿ-gá xii-güedé.

Te sátá dúcáⁿ ñi xáhaⁿ-gá, te ní xica-gá cuáháⁿ-gá ndihí-güedé ingá ñuú.

Ñáyiú cuiní chitnahá ñáhá xii Jesús ní cùu

(Mt. 8:19-22)

57 Te ñùhu Jesús ìchi ndihí-güedé, te ïⁿ téé ní xáhaⁿ-dë xii-gá:

—Mèstrú, cuiní-í canchicúⁿ ñáhà-í xii-n ndèni ní cuu na quihíⁿ-n —càchí-dé xáhaⁿ-dë xii-gá.

58 Te Jèsús ní xáhaⁿ-gá xii-dé:

—Nchaa ñúcuii chi ndècu yaú cúu vèhe-güedi saquihí-güedi, te nchaa quiti ndàva caa tacá-güedi díquí

yutnu, dico yúhú Tée cùu ñani tnáhá-ndó nchàa-ndo chi ñá túu ndeé cáá vehe-í ñuyíú-a ndetatú-í —càchí-gá xáhaⁿ-gă xii-dé.

⁵⁹ Te dătnùní ní xáhaⁿ tùcu-gá xii ingá-dé:

—Yòhó taquixi chitnahá ñáhá-n xii-í —càchí-gá xáhaⁿ-gă xii-dé.

Dico téa-án ñí xáhaⁿ-dë xii-gá:

—Mèstrú, dañá na nùhú-í cundetú-í cuú tătà-í te chindúxi-í-dé, te dătnùní quixi-í chitnahá ñáhá dũcaⁿ-ná-í xii-n —càchí-dé xáhaⁿ-dë xii-gá.

⁶⁰ Te Jèsús ní xáhaⁿ-gă xii-dé:

—Daña ñáyiú ñá túú sándáá iní ñáhá xii-í ná chindúxi tnàha meé-yu, chi ñáyiú-án cùú-yu dătná ñáyiú ní xihí cuéi ndècu-ní-yu núú ñuyíú-a. Te yòhó taquixi, chi quíhíⁿ-n dānehé-n ñáyiú nācuāa cada Yá Ndiõxí ndíhu ndaha ñàha-gá xii-yu —càchí-gá xáhaⁿ-gă xii-dé.

⁶¹ Te ní xáhaⁿ tùcu ingá-dé xii-gá:

—Mèstrú, cuñí-í chitnahá ñáhà-í xii-n, dico díhna-gá dañá na nùhú-í cada ndee ñí-í nchaa ñáyiú ndècu vehe-í, te dătnùní quixi-í —càchí-dé xáhaⁿ-dë xii-gá.

⁶² Te Jèsús ní xáhaⁿ-gă:

—Nchaa ñáyiú ní sándáá iní ñáhá xii-í, te núu vá cānchícúⁿ nihnu ñáhá-yu ni yùhu ni iní-yu, te cùú-yu dătná ñíⁿ téa ní tñi ndaha làtú cutu-dé, chi téa-án núu na ndàcoto-dé ndāa sātá-dë òré xitú-dë, te vá quíhíⁿ

ndáá làtú-dé ducaⁿ sātnahá-xi cùú-yu. Te cue ñáyiú chi vá cùú ndáá-yu nācuāa ndíhu ndaha-gá dava-gá ñáyiú —càchí-gá xáhaⁿ-gă xii-dé.

10

Jèsús téndàha-gá únídico úxi cue téa quíhíⁿ cáháⁿ tnúhu-gá núú ñáyiú

¹ Te sātá dúcáⁿ ñí cuu, te ní cáxi tucu Xitohó Jesucristú únídico úxi cue téa codonù-güedé quíhíⁿ-güedé cáháⁿ-güedé tnúhu-gá nchaa ñuú, ndíhi nchaa dava-gá xichi núú quíhíⁿ-gá, te ndi ndúú ndi ndúú-güedë tendaha ñàha-gá xii-güedé quíhíⁿ-güedé. ² Te cùmání-gă caca-güedé, te ní xáhaⁿ-gă xii-güedé:

—Nchòhó xini-ndó sã òré ná sãá yóó cuu nchaa sá xitú ñáyiú, te ío vâi cuu. Te na càchí tnúhu ndáá-í xii-ndo sã dătná vâi sá xitú ñáyiú cùu, ducaⁿ ío vâi ñáyiú cùmání cundedóho tnúhu Yá Ndiõxí te ío sacú ñáyiú dācuaha ñaha xii-yu tnúhu-gá, núu xíãⁿ xini ñùhu-xi cācáⁿ-ndó núú Yá Ndiõxí cuendá sá ná dācáháⁿ-gá iní ñáyiú cáháⁿ-yu tnúhu-gá núú ñáyiú cùmání cundedóho tnúhu-gá. ³ Te nchòhó cùú-ndó dătná cue mbëé cue quiti cuáháⁿ núú yihí cuè quiti dééⁿ. Chi tendaha ñaha-í xii-ndo quíhíⁿ-ndó núú xĩndecu nchaa ñáyiú cuihna ñí-xi. ⁴ Te vá cānèhe-ndo ñunu cuhuⁿ ndachiúⁿ-ndo, ni núú cúhúⁿ díhúⁿ-ndó, te ni vâ cādá tũha-gá-ndó

chàú-ndó chi diu-ni chàú yíhi-ndó-ǎⁿ xǎⁿ-ni quihi-ndo, te vá ïo cuyaa-ndo cǎháⁿ ndihi-ndo ñǎyiu ñùhu ichi. ⁵ Te òré ná quèxio-ndo ìⁿ vehe, te duha cúñaha-ndo xii ñǎyiu dii vèhe-xi-áⁿ: “Yá Ndiöxí chindee ñàha-gá xii-ndo ïo váha cuu iní-ndó cùndecu-ndo”, duha cúñaha-ndo xii-yu. ⁶ Te núu ñáyiu-áⁿ ñí nduu táhũ-yu sá cùndecu váha iní-yu núú Yá Ndiöxí, te cuu-xi sá vǎha sá cúú-xi-yu tnúhu cúñaha-ndo-ǎⁿ, dico núu ñǎ túú ní cǎháⁿ váha ndihi ñàhá-yu xii-ndo, te cúñaha-ndo sǎ vǎ cúú-xi sǎ vǎha sá cúú-xi-yu. Dico núu ní cǎháⁿ váha ndihi ñàhá-yu xii-ndo, ⁷ te diu-ni vehe-áⁿ cada vehe tnaa-ndo, te ñǎ túú-gǎ ndéé nducu-ndo vèhe cundecu-ndo, te caxi-ndo nchàa sá ná tàxí-yu, chi nchaa cue téé quide chiuⁿ dacuití táu-güedé sá nihí-güedé sá cǎxí-güedé cuendá nchaa chiúⁿ quide-güedé. ⁸ Te núu ní sǎá-ndó ìⁿ ñúú núú ñí queheⁿ cuendá ñáhǎ-yu xii-ndo, te caxi-ndo nchàa sá ná tàxí-yu. ⁹ Te cada tátna-ndo cuè ñáyiu cùhú xǎndecu ñúú-áⁿ, te cúñaha-ndo xii-yu sá sà ní sǎá nduu ndíhu ndaha ñàha Yá Ndiöxí xii-yu. ¹⁰ Dico núu ní sǎá-ndó ìⁿ ñúú núú ñǎ túú ní queheⁿ cuendá ñáhǎ-yu xii-ndo, te tñi-ndo ìchi cuita cǎháⁿ-ndó cuǎháⁿ, te cúñaha-ndo xii-yu: ¹¹ “Ndéé tícǎ chúhmǎ ñí tñi sǎhá-ndí ñúú-ndó nàquidi-ndí, te duha quide-ndí cuendá cutnùni

iní-ndó sǎ ñǎ túú quide váha-ndo ndècu-ndo. Dico cunaha-ndo sǎ sà ní sǎá nduu ndíhu ndaha ñàha Yá Ndiöxí xii-ndo ní cùu”, duha cúñaha-ndo xii-yu. ¹² Te na cǎchí tnúhu-í xii-ndo sǎ ná sǎá nduu càda ndáá Yá Ndiöxí cuèchi nchaa ñáyiu, te ñáyiu ñúú-áⁿ ïo-gá ndohó-yu dàvá-áⁿ dàcúúxí ñáyiu ñúú Sòdomá —cǎchí-gá xáhaⁿ-gǎ xii-güedé.

Cuendá ñáyiu dava ñúú ñǎ túú sàndáá iní tnúhu Xítóhó Jesucristú

(Mt. 11:20-24)

¹³ Te Jèsús xáhaⁿ-gǎ xii ñáyiu dava ñúú ñǎ túú sàndáá iní tnúhu-gǎ:

—¡Ndàhú nchòhó cue ñáyiu ñúú Coràzín! ¡Te ndàhú nchòhó cue ñáyiu ñúú Bètsaidá! Chi núu dicó ñúú Tírú, ndihi ñúú Sídón ní quide-í nchaa sá vǎ yóo tnàhí ndàcu cada datná ní quide-í ñúú-ndó-áⁿ ñí xiní-ndó ñǎ, te sá ndéé ama-gǎ cuihnú-yu dóó ndàhú, te cunucóo-yu núú yàá cuendá sá ndíxí cuèchi iní-yu sǎ ñǎ túú quide váha-yu ní cùu. ¹⁴ Dico sǎá nduu te ío-gǎ dandòho ñaha Yá Ndiöxí xii-ndo dàcúúxí ñáyiu ñúú Tírú, ndihi ñáyiu ñúú Sídón. ¹⁵ Te nchòhó ñáyiu ñúú Capèrnaúm quide iní-ndó sǎ sǎ cuándaa-ndo àndi, dico ñáhǎ chi núú ùhú núú ndàhú cundecu-ndo — duha ní xáhaⁿ-gǎ xii nchaa ñáyiu ñúú-áⁿ.

¹⁶ Te xáhaⁿ tùcu-gǎ xii cue téé tendaha-gǎ quihíⁿ cǎháⁿ tnúhu-gǎ-áⁿ:

—Nchaa ñáyiu na cùndedóho nchaa tnúhu cáháⁿ-ndó, te cada iní-yu sá yúhú càháⁿ-í ndedóho-yu, te nchaa ñáyiu na dàquee tihú ñáhá xii-ndo, te tnàhá yúhú daquee tihú-yu, te nchaa ñáyiu ducaⁿ na dàquee tihú ñáhá xii-í, te tnàhá Tàtá-í Dútú Ndiöxí Yaa ní tendaha ñaha xii-í véxi-í ñuyú-a daquee tihú-yu — cächí-gá xáhaⁿ-gã xii-güedé.

Te ducaⁿ te ní xica-güedé cuáháⁿ-güedé.

Ní nasáá cue téé únídico úxi ní tendaha Jèsús ní sáháⁿ ní cáháⁿ tnúhu-gá núú ñáyiu

17 Te cue téé únídico úxi-áⁿ ñí nasáá-güedé te súúni cùdíí ìní-güedé, te xáhaⁿ-güedé xii Jèsús:

—Mèstrú, ndéé espíritú cùndihí yucu ñávaha sàndáá ìní ñáhá-xí xii-ndí òré cáci nèhe ñaha-ndí xii-n —cächí-güedé xáhaⁿ-güedé xii-gá.

18 Te Jèsús ní xáhaⁿ-gã:

—Ndáá cáháⁿ-ndó chí yúhú ní xini-í cùtnàhá ní xíta nihnu yucu ñávaha, chí dàtná ní ngava ìⁿ tasaⁿ ñí ngava-xi ñuyú-a. 19 Te dàtná quidé-ndó òré xènihnu-ndo ìⁿ cóó, àdi ìⁿ nchacua ducaⁿ cada-ndo daquee tihú-ndó yucu ñávaha, te ñá túú ná cada ñaha-xi xii-ndo, chí ní taxi-í tnúhu ndee ìní ndécú ndihí-ndo. 20 Dico vá cùdíí ìní-ndó cuèndá sá sàndáá ìní ñáhá cuè espíritú cùndihí yucu ñávaha xii-ndo, chí cùdíí ìní-ndó cuèndá sá sà yodo tnuní-ndó núú tütú Yá Ndiöxí

Yaa ndécú àndiu —cachí-gá xáhaⁿ-gã xii-güedé.

Jèsús cùdíí ìní-gá

(Mt. 11:25-27; 13:16-17)

21 Te òré-áⁿ súúni ñí quide díí ìní ñáhá Espíritú Yá Ndiöxí xii Jèsús, te ní xáhaⁿ-gã xii Yá Ndiöxí:

—Yöhó Tàtá-í Dútú Ndiöxí, ío chíñuhu ñaha-í xii-n chí diu-n tàxi tnuní-n àndiu ndihí ñuyú-a, te dànehé-n cuè ñáyiu nchaa tnúhu váha, te diu-ni ñáyiu-áⁿ cúú-yu ñáyiu ñá túú cùtnuní ìní-xi nchaa tnúhu cáháⁿ cue téé túha, te nchaa tnúhu cáháⁿ-n-áⁿ ñá túú ní dàtúu-n núú ñáyiu cächí sá ío túha, te ío váha sáá díquí-xi. Te ducaⁿ quide-n, chí ducaⁿ cuèni-n cùnduu —cachí-gá xáhaⁿ-gã xii Yá Ndiöxí.

22 Te xáhaⁿ tùcu-gá xii cue téé ní nasáá-áⁿ:

—Mee Tàtá-í Dútú Ndiöxí ní cachí-gá sá cùnùu-í núú nchàa-ndí túhú sá ío. Te vá yóo ìⁿ xini nàcuáa sàni ìní yúhú Déhe Dútú Ndiöxí, chí ìⁿdi díí-ni mee-gã xini-gá nàcuáa sàni ìní-í. Te ducaⁿ ìⁿdii-ni yúhú xini-í nàcuáa sàni ìní mée-gã, te nchaa ñáyiu cächí ìní-í sá quèni-yu nàcuáa sàni ìní Tàtá-í Dútú Ndiöxí te xitnúhu-í-yu, te vá yóo ìⁿ-gã xini nàcuáa sàni ìní-gá chí diu-ni ñáyiu ducaⁿ xitnúhu-í-áⁿ xini-yu —cächí-gá xáhaⁿ-gã xii-güedé.

23 Te ní nchócótó-gã núú xindecu mee-ni cuè téé xica cuu ndihí-gá, te ní xáhaⁿ-gã xii-güedé:

—Váha táhú nchòhó ndihí nchaa ñáyiu ndèhe nchaa

nacuáa quide-í vitna. ²⁴ Chi ío cuéhé cue téé ní xóo cáháⁿ tnúhu Yá Ndiöxí ndéé sanaha, ndihi cue téé ní xindaha ñaha xii ñáyiú ní cuini-güedé cundehe-güedé nchaa sá ndéhé-ndó quide-í vitna, te ñá túú ní xiní-güedé, te ní cuini-güedé cund-edóho-güedé nchaa tnúhu cáháⁿ-í ndédóho-ndo vitna, te ñá túú ní xindédóho-güedé — cächí-gá xáhaⁿ-gã xii-güedé.

Nacuáa ní quide ñⁿ téé distritú Sàmariá

²⁵ Te ñⁿ téé dàcuaha ñaha xii ñáyiú nchaa tnúhu ní chídó tnùní ndíi Moisés ní ndacuñí-dé xító ndéé-dé Jèsús nñu nása cunduu tnúhu cáháⁿ-gã, te xáhaⁿ-dë xii-gã:

—Mèstrú, ¿ná cúú sã cáda-í cuendá nduu táhú-í cundecu-í ndihí Yá Ndiöxí ni caa ni quihíⁿ-i? —cächí-dé xáhaⁿ-dë xii-gã.

²⁶ Te Jèsús ní xáhaⁿ-gã xii-dé:

—Cuini-í cachí tnúhu-n nása cáháⁿ-xi núú tütú ndíi Moisés —cächí-gã xáhaⁿ-gã xii-dé.

²⁷ Te xáhaⁿ-dë xii-gã:

—Ndi Moisés cächí ndíi núú tütú ndíi: “Cuu iní-ndó Dütú Ndiöxí Yaá cúú Ndiöxí-ndó ni yuhu ni iní-ndó, te cani iní-ndó càda-ndo datná cuini mée-gã, te mee-ni tnúhu váha cani iní-ndó nacuáa cuu vii cuu váha-ndo núú-gã, te coo iní-ndó cùu iní-ndó-gã. Te cuu iní-ndó tnàha ñáyiú-ndo dàtná cúú iní-ndó mée-ndo”, duha cächí ndíi núú tütú ndíi —cächí-dé xáhaⁿ-dë xii-gã.

²⁸ Te Jèsús ní xáhaⁿ-gã:

—Váha-ni cáháⁿ-n, te núu cada-n nacuáa cáháⁿ-n ãⁿ, te

nduu táhú-n cundecu-n ndihí Yá Ndiöxí ni caa ni quihíⁿ — cächí-gá xáhaⁿ-gã xii-dé.

²⁹ Te sá dúcáⁿ ní xáhaⁿ Jèsús xii-dé núu nducu-dé nacuáa cada-dé cácu nihnu-dé núú tnúhu ní cáháⁿ-dë, te ní xicáⁿ tnúhu-dë núú-gã, te xáhaⁿ-dë:

—¿Yoo cùu tnaha ñáyiú-í-i? —cächí-dé xáhaⁿ-dë xii-gã.

³⁰ Te Jèsús ní cani-gá ñⁿ cuendú núú-dë nacuáa tecú tnùní-dé tnúhu-gã, te xáhaⁿ-gã:

—Ñⁿ téé ní ndee-dé ñuú Jerusálén ñúhú-dë ichi cuánuu-dé cuáháⁿ-dë ñuú Jericó, te ní quee ñaduhú ichi-dé ní dúhú-güedé dóo níhnú-dë, ndihi nchaa sá néhé-dë, te ní caniha vihi-güedé, te nchìto diu-ná-dé ní dáñá ñàha-güedé te cuáháⁿ-güedé. ³¹ Te mei òré cátuu-dé-áⁿ ñúhú ñⁿ dütú ichi-áⁿ, te òré ní xiní ñáhá dütú-áⁿ xii-dé, te ñⁿ xio-ni ní xócõ ndee-dé ní yáha-dé.

³² Te ñúhu tucu ñⁿ téé cùu levitá ichi-áⁿ, te òré ní xiní-dé téé-áⁿ cátuu-dé, te diu-ni ducaⁿ ñí quide-dé ñⁿ xio-ni ní xócõ ndee-dé ní yáha-dé.

³³ Dico ñⁿ téé distritú Sàmariá ñúhú tucu-dé ichi-áⁿ te òré ní xiní-dé téé-áⁿ cátuu-dé, te ní cundáhú iní ñáhá-dë.

³⁴ Te ní sáháⁿ-dë núú cátuu téé-áⁿ, te ní quide tátna-dé nchaa núú ñí nícuéhé xii téé-áⁿ ñí chihi-dé yúcú, te ní dácútú-dë. Te dàtnúni ní dácáá ñàha-dé sátá quiti-dë, te ndèca ñàha-dé cuáháⁿ ñⁿ vehe núú sácõ cue ñáyiú sácúhuⁿ ichi, te yacáⁿ ní xito ñàha-dë. ³⁵ Te ingá nduu òré ní nucúhuⁿ téé Samaritanú-áⁿ

ichi, te ní tava-dé úú díhúⁿ denàriú, te ní sáha-dé téé cùu xítóhó vehe-án, te ní xáhaⁿ-dè: “Coto saú-n tée-a, te núu ñá ní tnàhá díhúⁿ sá ní taxi-í, te cuèi na dândoñuhu-gá-n díhúⁿ-n cuèndá-dé, te òré ná quíxi tucu-í te nacháhu-í”, duha ní xáhaⁿ tée Samaritánú-án xii téé dii vèhe xiáⁿ. ³⁶ Te vitna cáhán, te núu ndédacàa cue téé úní-án cúu-güedé téé váha cùu iní-güedé tnàha ñáyiugüedé —càchí-gá xáhaⁿ-gã xii téé dàcuaha ñaha xii-í ñáyiugüedé nchaa tnúhu ní chídó tnùní ndíi Moisés.

³⁷ Te téé-án ní xáhaⁿ-dè xii-gá:

—Tée ní cundàhú iní ñáhá xii téé ní dánícuèhé ñáhá cuè ñadúhú-án, téé-án cúu-dé téé cùu iní tnàha ñáyiugüedé —càchí-dé xáhaⁿ-dè xii-gá.

Te Jèsús ní xáhaⁿ-gã:

—Cuahán te diu-ni ducaⁿ càda-n tnahá-n —càchí-gá xáhaⁿ-gã xii-dé.

Jèsús ndécú-gã vehe tá Mårta ndíhi tá Måría

³⁸ Te Jèsús ñúhú-ni-gã ichi cuahán-gá ndíhi cue téé xica cuu ndíhi-gá, te ní sáá-gá ñúú líhli, te xiáⁿ ní quee ñúú xíchí nání Mårta ní cáhán ñáhá-xí xii-gá vehe-xi. ³⁹ Te tá Mårta ndècu ñúú cùhú-xi nàni-xi Måría, te xíchí-án ní ngóo-xi núú Jèsús ndédóho-xi nchaa tnúhu cáhán-gá. ⁴⁰ Te tá Mårta-án ndíhi vihi-ni iní-xi quíde-xi chiuⁿ-xi, te ní sáhán-xi núú Jèsús, te ní xáhaⁿ-xi:

—Mèstrú, ¿náa ñá túú tnàhí sàni iní-n sã ní dándõ ndaha ñàha cùhú-í nchaa chiúⁿ-án? Cúñaha saú ná

quíxi-xi chindee ñaha-xi —cachí-xi xáhaⁿ-xi xii-gá.

⁴¹ Dico Jèsús ní xáhaⁿ-gã:

—Yòhó Mårta, ñúhu tneñu vihi-n, te ndíhú iní-n sã ño vài chiuⁿ-n ñúhu, ⁴² dico xini ñúhu vihi-gá-xi cundedóho-n tnúhu cáhán-í, chi tá Måría-a sa ndédóho-xi tnúhu-í, te vá yõo ñúú ndacu xocàni tnúhu-í sã ní ngúndecu ndíhi-xi —càchí-gá xáhaⁿ-gã xii-xi.

11

Jèsús dánèhé-gá cue téé xica cuu ndíhi-gá nàcuáa cáhán ndíhi-güedé Yã Ndiõxí

(Mt. 6:9-15, 7:7-11)

¹ Te ñúú nduu cáhán ndíhi Jèsús Yã Ndiõxí ñúú xíchí, te sáta ní yáha ní cáhán ndíhi-gá Yã Ndiõxí, te ní xáhaⁿ ñúú téé xica cuu ndíhi-gá xii-gá:

—Mèstrú, danèhé ñáhá xii-ndí nása cáhán ndíhi-ndí Yã Ndiõxí dàtná ní quíde ndíi Juáá ní dánèhé ndíi cue téé ní xica cuu ndíhi ndíi —càchí-dé xáhaⁿ-dè xii-gá.

² Te Jèsús ní xáhaⁿ-gã:

—Òré cáhán ndíhi-ndo Yã Ndiõxí, te cachí-ndó:

Yòhó tãtá-ndí Dútú Ndiõxí Yaa ndécú àndiu,

nchaa ñáyiugüedé na cáhán-yu sá cúu-n Yáá ño yiñúhu.

Te xicáⁿ táhú-ndí núú-n sã ná sáá nduu ndíhu ndàhá-n-yu.

Te cada-n dàtná càchí iní-n ñúuyú-a dàtná quíde-n àndiu.

³ Te xicáⁿ táhú-ndí núú-n sã táxí-n sã cándèca iní-ndí ñúú nduu ñúú nduu.

4 Te cada càhnu iní-n nchàa yíca cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyiu-ndí.

Te vá dáñá-n dàcaháⁿ ñáhá yùcu ñávàha xii-ndí cada-ndí sá ñà túú vàha, chi coto ñaha-n xii-ndí cuèndá sá vâ dúcáⁿ càda ñaha-xi,

duha cáháⁿ-ndó
—càchí-gá xáhaⁿ-gã xii-güedé.

5 Te Jèsús ní xáhaⁿ tùcu-gá:

—Te núu ndèdaca nchohó ndécú ñⁿ téè tnàha tnúhu ndihi-ndo, te dava niú cuáháⁿ-ndó vèhe-dé, te òré ní quexio-ndo, te xáhaⁿ-ndo xii-dé: “Véxi-í núu vá cùndèe iní-n tàxi nuu-n úní tnàhá pàá, 6 chi ñⁿ téè xini tnàhá ndihi-í ñúhú-dé ichi ní quexio-dé vehe-í, te ñà túú tnàhí ná cuñaha-í caxi-dé”, quesaha-ndo cùñaha-ndo.

7 Te téè-án cáháⁿ-dé ndéé xití vehe-dé, te cùñaha-dé xii-ndo: “Vá dásatú nihá-n chi ndèdí yuyèhe-í, te cà-í ndihi cue landú-í, te vá cúú ndàcòo-í taxi-í sá cuiniⁿ”, quesaha-dé cùñaha-dé xii-ndo. 8 Te na càchí tnúhu-í xii-ndo sã cuèi cùu-dé téè tnàha tnúhu ndihi-ndo, dico ducaⁿ cùñaha-dé xii-ndo, dico dacuití sã ndàcòo-dé taxi-dé sá cuiniⁿ-ndó cuèndá sá vâ dásatú-gá-ndó iní-dé.

9 Te yúhú càchí-í xii-ndo sã càcáⁿ-ndó núu ná cuiniⁿ-ndó núú Yã Ndiòxí te taxi-gá. Te vá dáñá ndèé-ndó càcáⁿ-ndó núú-gã núu ná cuiniⁿ-ndó, te ducaⁿ te níhí-ndó. Te cada iní-ndó sã ní quexio-ndo

vehe ñⁿ tnaha ñáyiu-ndo te ní cáháⁿ-ndó, te ñáyiu-án ní tedóho ñàhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yã Ndiòxí tedóho ñaha-gã xii-ndo, te taxi-gá sá ná càcáⁿ-ndó núú-gã. 10 Chi nchaa ñáyiu ducaⁿ xiquide te Yã Ndiòxí tedóho ñaha-gã xii-yu níhí-yu sá cuiniⁿ-yu. Te diu-ni ducaⁿ tùcu nchaa ñáyiu na càcáⁿ núú-gã ñⁿ sá cuiniⁿ-yu, chi sãñaha-gã sá xicáⁿ-yu núú-gã. Te diu-ni ducaⁿ tùcu níhí nchaa ñáyiu ñà túú dàña ndeé xicáⁿ núú Yã Ndiòxí sá cuiniⁿ-yu, chi níhí-yu.

11 Te nchòhó cue téè cùu tátá ñà túú cùndee iní-ndó cuñaha-ndo cuè déhe-ndo ñⁿ yúú caxi-güexi òré xicáⁿ-güexi ñⁿ pàá núú-ndó càxi-güexi, te ni ñà túú cùndee iní-ndó cuñaha-ndo ñⁿ cóo caxi-güexi òré xicáⁿ-güexi ñⁿ chácá núú-ndó càxi-güexi. 12 Te ni ñà túú cùndee iní-ndó cuñaha-ndo ñⁿ nchacua caxi-güexi oré xicáⁿ-güexi ñⁿ ndíú núú-ndó càxi-güexi. 13 Te nchòhó cuèi ndèé dau sàá iní-ndó, dico sãha-ndo cuè déhe-ndo sã vãha xèxi-güexi oré xicáⁿ-güexi núú-ndó. Te núu nchòhó ducaⁿ quide-ndo, ñe uuⁿ-gá ducaⁿ quide Tátá-ndó Dütú Ndiòxí Yaá ndécú àndiu, chi taxi-gá Espiritú-gá cundecu ndihi-ndo te núu na càcáⁿ-ndó núú-gã! —càchí-gá xáhaⁿ-gã xii-güedé.

*Càchí-güedé sá ndécú ndihi
Jesús yucu ñávàha
(Mt. 12:22-30; Mr. 3:20-27)*

14 Te Jèsús ndéñuhu-gá espíritú cúndihí yucu ñávaha yihí ñaha xii ìⁿ téé ní quide ñihí-xi, te òré ní ndee ñaha espíritú-áⁿ xii téé-áⁿ, te ní nacáháⁿ-dé. Te ío ní cuñúhu ñáyiú sá dúcáⁿ ñi quide-gá.
15 Te davá-yu ní xitnàhá-yu:

—Tée-a ndéñuhu-dé nchaa espíritú cúndihí sácúlná yihí ñaha xii ñáyiú, chi diu-ni sácúlná-áⁿ chindèe ñaha-xi xii-dé, te diu-ni-xi tàxi tnuní-xi nchaa espíritú-áⁿ — càchí-yu xitnàhá-yu.

16 Te davá-yu xito ndee ñáhã-yu xii-gá, te xähãⁿ-yu sá ná cádá-gã ìⁿ sá vã yõo tnàhí ndàcu cada ñuyíú-a cundehé-yu nàcuáa cutnùní iní-yu núu ndáá sá Yã Ndiõxí ní tendaha ñaha-gá xii-gá véxi-gá ñuyíú-a. 17 Dico mee-gã sa ní cutnùní iní-gá nchaa nàcuáa sàni iní-yu, núu ní xáhaⁿ-gã xií-yu:

—Te nchòhó xìní-ndó sã nõu ìⁿ téé yìndaha ìⁿ nacióⁿ vá cúú ìⁿnuu-dé ndihí cue téé cùndihí-dé, te vá cùdì-dé cunu-dé. Te diu-ni ducaⁿ sãtnahá tucu-xi cùu cue ñáyiú xindecu ìⁿ-ni vehe, chi núu vá cúú ìⁿnuú-yu cundecú-yu, te vá cùdì-yu cundecu càhnú-yu.
18 Te ducaⁿ sãtnahá-xi cùu sácúlná, chi núu vá cúú ìⁿnuu-xi ndihí nchaa espíritú cùndihí-xi te vá cùdì-xi cundecu-xi taxi tnuní-xi. Te duha càháⁿ-í chi nchòhó càchí-ndó sã sácúlná chindèe ñaha-xi xii-í queñúhu-í nchaa espíritú cùndihí-xi yihí ñaha xii ñáyiú. 19 Te

núu yúhú quidé cuendá-ndó sã sácúlná chindèe ñaha-xi xii-í, te xini ñuhu-xi cada cuendá-ndó yõo chindee ñaha xii cue téé xica cuu ndihí-ndo queñuhu-güedé nchaa espíritú cùndihí-xi yihí ñaha xii ñáyiú. Te mee-güedé càchí-güedé sá nchòhó ñá túú càháⁿ ndáá-ndó sã dúcáⁿ càháⁿ-ndó. 20 Te ndáá sá Yã Ndiõxí chindèe ñaha-gá xii-í queñúhu-í nchaa espíritú cùndihí sácúlná yihí ñaha xii ñáyiú, te xíãⁿ cutnùní iní-ndó sã sà ní sáá nduu ndihu ndaha ñaha Yã Ndiõxí xii-ndo.

21 Te núu ìⁿ téé ío ndee, te súúní ñí cáá-dé, te ndéé-dé vehe-dé cuendá sá vã cuíta, te ní quide túha-dé titní sá dèéⁿ, te ío váha nèhe váha-dé nchaa ndachìuⁿ-dé. 22 Dico núu quexio ingá téé ío-gá ñí cáá te ndee-gã-dé, te ngüita-dé nàá-dé ndihí téé ndéé vehe-xi-áⁿ, te cada cànarí ñáhã tée-áⁿ xii téé ndéé vehe-xi-áⁿ, te quendeé-dé nchaa sá dèéⁿ cùndèe iní-dé, te taxi tnuní-na-dé nchaa xíãⁿ, ndihí nchaa sá ndécú ndihí-dé, te dàcáhñu-dé nchaa cue téé cùndihí-dé nchaa sá ná ñihí-dé.

23 Te nchaa ñáyiú ñá túú cùndihí ñaha xii-í, te cùu úhú iní ñáhã-yu, te nchaa ñáyiú ñá túú chindee ñaha xii-í, te dàquee tihũ-yu chiuⁿ quide-í.

Espíritú cùndihí yucu ñávaha sá nanchòcava xito cùu uú

(Mt. 12:43-45)

24 Te òré ná quèe ñaha ìⁿ espíritú cùndihí yucu

ñávãha xii ìⁿ ñáyiu, te cuáháⁿ-xi ndùcu-xi ìⁿ xichi núú cùndècu-xi te ñá nihí-xi, te ní sani iní-xi: “Váha-gá núhú tucu-í núú nǐ xíndecu-í”, duha ní sani iní-xi. ²⁵ Te cuánuhú-xi, te òré ní nasáá-xi, te ní xiní-xi sá cáá ìní ñáyiu-áⁿ dàtná cáá-nǎ ìⁿ vehe ní natíhú, chi ní nduu vii-ná, vá yõo-gá ndécú. ²⁶ Te sáta dúcáⁿ te ní xica-xi cuáháⁿ-xi cuándúcú-xi ùsá tnháá espíritú cùndìhi-xi sá nèhé víhí-gǎ xǐquide, te òré ní nihí-xi cue espíritú-áⁿ te ndèca ñaha-xi cuáháⁿ cuèndá ngúndecu ndìhi-xi ñáyiu-áⁿ, te ñáyiu-áⁿ uuⁿ-gá nándi yáha-yu dàcúúxí ndèè díhna —càchí-gá xáhaⁿ-gǎ xií-yu.

Cuèndá ñáyiu cùu váha ndisa iní-xi

²⁷ Te ñini càháⁿ Jèsús tnúhu-áⁿ núú ñáyiu ní cáháⁿ níhi ìⁿ ñadìhí tnuú-yu, te xáhaⁿ-aⁿ xii Jèsús:

—jSá vãha táhú ñadìhí ní dácácú ñaha xii-n, te ní dácuéhnú ñaha-aⁿ! —cachí-aⁿ xáhaⁿ-aⁿ xii-gá.

²⁸ Te Jèsús ní xáhaⁿ-gǎ:

—jVáha-gá táhú nchaa ñáyiu sàcúndedóho nchaa tnúhu càháⁿ Yá Ndiõxí te sàndáá iní-yu! —càchí-gá xáhaⁿ-gǎ xii-aⁿ.

Ñáyiu ñá túú sàndáá iní ñáhá xii Jèsús cuìní-yu cada-gá ìⁿ sá vǎ yõo tnháá ndàcu cada (Mt. 12:38-42; Mr. 8:12)

²⁹ Te ta tàcá vǎi ñáyiu te dàdehnde tnhaha-ná-yu, te ní ngúíta Jèsús xáhaⁿ-gǎ xií-yu:

—Nchòhó ñáyiu ndècu ñuyíú vitna, chi ío sáá iní-ndó,

te cuìní-ndó càda-í ìⁿ sá vǎ yõo tnháá ndàcu cada cuèndá cuìní-ndó cùtnuní iní-ndó núu ndisa sá Yá Ndiõxí ní tendaha ñaha-gá xii-í véxi-í. Dico ñá túú nǎgá cada-í quini-ndó, chi sa nihí-ndó tnúhu nàcuáa ní yáha ndíi Jónás téé ní xóo cáháⁿ tnúhu Yá Ndiõxí ndéé sanaha, te ñiu-ni ducaⁿ yáha yúhú tucu.

³⁰ Chi nchaa ñáyiu ñuú Nínivé ní cutnùní iní-yu sá Yá Ndiõxí ní tendaha ñaha-gá xii ndíi Jónás ní sáháⁿ ndíi ñuú-yu. Te ducaⁿ sǎtnahá-xi cùu yúhú Téé cùu ñaní tnháá-ndó nchaa-ndo, chi sáá nduu te cutnùní iní-ndó sǎ Yá Ndiõxí ní tendaha ñaha-gá xii-í véxi-í ñuyíú-a. ³¹ Te na sáá nduu càda ndáá Yá Ndiõxí cuéchi nchaa nchòhó ñáyiu ndècu ñuyíú-a, te dàvá-áⁿ quini-ndó ìⁿ ñadìhí ñaha ní xíndaha ìⁿ nacióⁿ cáá ndaa xio cuha núú quénè nchicanhii. Te ñaha-áⁿ ío xica nǐ xíndecu-aⁿ, te ní sáháⁿ-aⁿ ní xíndedóho-aⁿ nchaa tnúhu ní cáháⁿ ndíi Salómón, chi ndíi-áⁿ ío ní sáá sá xini tñuní ndíi. Te ñaha-áⁿ càháⁿ-aⁿ dàvá-áⁿ sá nchòhó ñáyiu ndècu vitna ñá túú ní quide ndáá-ndó.

Dico vitna íha ndècu ndíhi ñaha-ndo xii yúhú, te ñiu-í ío-gá cùnùu-í dàcúúxí ndíi Salómón. ³² Te ñiu-ni nduu càda ndáá Yá Ndiõxí cuéchi nchaa nchòhó ñáyiu ndècu ñuyíú-a vitna, dàvá-áⁿ tnháá cue ñáyiu ní xíndecu ñuú Nínivé cundecú-yu núú Yá Ndiõxí, te tnháá-yu cachí-yu sá ña túú ní quide ndáá-ndó. Chi ñáyiu ñuú Nínivé-áⁿ nǐ ndixi túu iní-yu sá ña túú

quide váha-yu ndècú-yu te ní natuhá-yu ichi Yá Ndiöxí cútñahá ní cáháⁿ ndihi ñaha ndíi Jónás tnúhu-gá xii-yu. Dico vitna iha ndècu ndihi ñaha-ndo xii yúhú téé cáháⁿ tucu tnúhu Yá Ndiöxí, te ði-u-í ío-gá cúnùu-í dàcúxí ndíi Jónás.

Núú-ó cùu-xi datná ⁱⁱ ñuhú
(Mt. 5:15; 6:22-23)

33 "Te ñá túú nì ⁱⁱ ñáyiú tènùhú ⁱⁱ òntèrná, te taxi ndecú-yu ⁱⁱ núú yídähu, àdi chiváha-yu xití ⁱⁱ tídihi, chi taxi ndecú-yu ⁱⁱ núú ññu cuèndá nchaa ñáyiú quíhu vehe cutnùnì núu-yu. 34 Te núú-ndó cùu-xi datná ⁱⁱ ñuhú, chi ⁱⁱ sá ná quìnì-ndó te ndixi túu iní-ndó ñá cúú xǎⁿ, te núu càváha núú-ndó, te ducaⁿ cùtnuní iní-ndó ñá cúú sǎ ndécú núú-ndó, áⁿ te núu cùhú, te vá cùtnùnì iní-ndó ñá cúú sǎ ndécú núú-ndó. Te sá dúcáⁿ cùhú núú-ndó te cada iní-ndó sǎ ndécú-ndó dàtná ⁱⁱ núú nées. 35 Te ío cada cuèndá-ndó vǎ cáni cuèhé iní-ndó cuèndá tnúhu Yá Ndiöxí cuèndá cutnùnì iní-ndó ñácuáa cundecu-ndo, chi núu na cáni cuèhé iní-ndó cuèndá tnúhu-gá, te cùu-ndo datná ⁱⁱ ñáyiú ñá túú cùtnuní núú-xí. 36 Te núu càndoo canine iní-ndó, te mee-nì sǎ vǎha ññu iní-ndó, te cùtnuní váha iní-ndó tnúhu ndáá dàtná cùtnùnì váha núú-ndó òré càyú ñuhú, ducaⁿ cùtnuní iní-ndó —cáchi-gá xáhaⁿ-gǎ xii-yu.

Jèsús cáháⁿ-gá cuèndá cue téé cùu fariséú ndihi cue téé

dàcuaha ñaha xii-í ñáyiú

(Mt. 23:1-36; Mr. 12:38-40; Lc. 20:45-47)

37 Te òré ní ndihi tnúhu ní cáháⁿ Jèsús, te ⁱⁱ téé cùu fariséú ní cáháⁿ ñháá-dé xii-gá vehe-dé caxi-gá, te cuánguihu-gá vehe-dé, te ní ngóo-gá mèsá. 38 Te téé cùu fariséú-áⁿ ío ní cuñúhu-dé, chi Jèsús ñá túú ní ndàha-gá ñácuáa sàni iní-güedé nduu vétú iní Yá Ndiöxí òré ní ngóo-gá caxi-gá dàtná quidé mèe-güedé. 39 Te Jèsús ní xáhaⁿ-gǎ xii-dé:

—Nchòhó cue téé cùu fariséú xìnì-ndó sǎ ío ñáyiú ñàquete sátá-ni tàsáⁿ ndihi sátá-ni còhó, te xití-xi càndehe caduha-ni. Te ducaⁿ sàtnahá-xi cùu nchòhó, chi ndaha-ni-ndo ñàquete-ndo, te iní-ndó ñá túú ndùu ndoo, te nándi dàndahú-ndó tnàha ñáyiú-ndo, te quèheⁿ-ndo sǎ ndécú ndihí-yu, te nándi-gá nchaa sǎ cuèhé sǎ dúhá ññu iní-ndó quide-ndo. 40 ¡Te nchòhó cúú-ndó cuè téé ío ñí iní-xi! ¿Te náa ñá túú cùtnuní iní-ndó sǎ Yá Ndiöxí Yáá ní cadúha yiqui cuñú-ó ði-u-ni-gá ní chihi-gá iní-ó-áⁿ? 41 Te nchaa sǎ vǎha ndècu ndihi-ndo cuáha-ndo nchàa ñáyiú xìnì ññu na cundecu ndihí-yu, te núu ducaⁿ na càda-ndo, te cuu-ndo ñáyiú sa ní nduu ndoo ní nduu nine iní-xi.

42 "¡Te ndàhú ní cuu nchaa nchòhó cue téé cùu fariséú! Chi sǎha-ndo Yá Ndiöxí núú úxí xichi yúcu nánì mèntá, ndihi yúcu rùdá, ndihi nchaa dava-gá núú yúcu quèe comidá, dico ñá túú quide

ndáá-ndó, te ni ñà túú ñùhu iní-ndó Yá Ndióxi. Dico tnúhu cáháⁿ-í-a tau-ndó cada-ndo, te ni vâ dáñá ndéé-ndó cada-ndo nchaa dava-gá sá vâha.

43 'iTe ndàhú ní cuu nchòhó cue téé cùu fariséu! Chi cuiní-ndó cùnucóo-ndo nùú sácõo cue téé ío cùnuu xití veñúhu, te cuiní-ndó mée-ni ndihí tnúhu yíñùhu cáháⁿ ndihí ñaha ñáyiú xii-ndo nchaa núú xicá cùu-ndo.

44 'iTe ndàhú ní cuu nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí nchòhó cue téé cùu fariséu chi ío dandahú-ndó mée-ndo sá quidé ndáá-ndó te ñá ndáá sá quidé ndáá-ndó! Chi cùu-ndo datná ìⁿ ñáyiú ní xihí te ní nguindüxi, te ñá túú cùtnuní-gá ndéé yindüxi-yu, te cuéi nà yáha ñáyiú dico ñá túú cùtnuní sá yindüxi ndíyi. Te ducaⁿ sãtnahá-xi cùu nchohó, chi nchaa ñáyiú ndèhe ñaha xii-ndo ñá túú cùtnuní iní-yu nchaa sá cuéhé sá dúhá sàni iní-ndó — cãchí-gá xáhaⁿ-gá xii-güedé.

45 Te ní xáhaⁿ ìⁿ téé dàcuaha ñaha xii-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcáⁿ càháⁿ-ñ te tnàhá nchúhú xicuehé-ñ ãⁿ —cãchí-dé xáhaⁿ-dé xii-gá.

46 Te Jèsús ní xáhaⁿ-gã:

—iNdàhú ní cuu tnàhá nchaa nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés! Chi quíde-ndo datná quidé ñáyiú dàcuido ìⁿ tnaha ñáyiú-xi ìⁿ sá ío véé, te mée-yu ni lùha

ñá túú cuiní-yu cuidó-yu. Te ducaⁿ sãtnahá-xi quíde nchohó chi dànehé-ndó ñáyiú nacuáa cada-yu, dico mee-ndo chi ni lùha ñá túú cuiní-ndó cada-ndo nacuáa dànehé-ndó-yu.

47 'iTe ndàhú ní cuu tucu-ndo! Chi càdúha-ndo nùú ní nguindüxi cue téé ní xóo cáháⁿ tnúhu Yá Ndióxi ndéé sanaha cuendá sá cùnaha-ndo núú yindüxi cue ndíi, te ñu-ni cue ñaní tnáhá-ndó ní sahani-güedé cue ndíi. 48 Te nchòhó sa naha-ndo nacuáa ní quíde cue ñaní tnáhá-ndó, te cãchí-ndó sã ní quíde váha-güedé sá dúcáⁿ ní sahani-güedé cue ndíi-áⁿ, te vitna càdúha-ndo nùú ní nguindüxi cue ndíi.

49 Te Yá Ndióxi ío sàá nchaa sá xiní tnùní-gá, te ní cachí-gá sá dácáháⁿ-gá iní cue téé cuendá cáháⁿ-güedé tnúhu-gá núú ñáyiú, te cada-güedé nchaa nacuáa cuiní-gá, te dava-güedé cahni ñahá-yu xii-güedé, te dava-güedé ío dandòho ñahá-yu xii-güedé duha ní cachí-gá. 50 Te nchaa ñáyiú ñuyíú vitna tnàhá-yu nacháhu-yu núú Yá Ndióxi cuendá sá ní sahani-güedé cue téé ní cáháⁿ tnúhu-gá ndéé cùtnahá ní ngáva ñuyíú.

51 Te ndéé ndíi Àbél téé ní sahani-güedé ndéé díhna nuu, ndihí ndéé ndíi Zacariá téé ní sahani-güedé ndéé núú ní ndihí-ná ndácáⁿ cuendá ñahá Yá Ndióxi núú ñáyiú ndècu ñuyíú vitna, te ñu ndíi-áⁿ ní sahani-güedé mei tnúú veñúhu càhnu sá ío cùnuu, ndihí xító

núú sácödó sã ndúú tãhú Yã Ndiõxí.

⁵² Te ndàhú ní cuu tucu nchaa nchòhó cue téè dâcuaha ñaha xii ñáyiu nchaa tnúhu ní chídó tnùnì ndíi Moisés! Chi quíde-ndo datná quíde ìⁿ téè tàxi tnuní ìⁿ vehe, chi nacadí-dé te ñá dãná-dě quihu ñáyiu te ni mèe-dé ñá túú quihu-dé. Te ducaⁿ sãtnahá-xi quíde-ndo, chi dâcuaha-ndo tnúhu Yã Ndiõxí te ñá túú cuiní-ndó quíndáá iní-ndó te ni ñá túú dânehé-ndó ñáyiu cuiní tñii tnúhu-gá nâcuáa tàú-xi cundu cuendá naníhí tãhú-yu — cãchí-gá xãhaⁿ-gã xii-dé.

⁵³ Te òré ní ndee Jèsús vehe téè cùu fariséú-áⁿ, te cue téè dâcuaha ñaha xii ñáyiu nchaa tnúhu ní chídó tnùnì ndíi Moisés, ndihi cue téè cùu fariséú ní cudééⁿ-güedé núú-gã, te ní ngüíta-güedé nãndi sã xicãⁿ tnúhú-güedé núú-gã cuendá cuiní-güedé núu vá cuíta-gã ìⁿ tnúhu cãháⁿ-gã ⁵⁴ cuendá ducaⁿ ñihí-güedé nâcuáa cada-güedé cacáⁿ cuéchi-güedé cuendá-gã.

12

Jèsús cãháⁿ-gã cuendá cue téè dândahú mée-xí

¹ Te òré-áⁿ ñi tacá tñí mĩ ñáyiu núú ndécú Jèsús, te súuní dicó ngõnchihi tnàha-ná-yu. Te ndèdóho-yu ní xãhaⁿ Jèsús xii cue téè xica cuu ndihi-gã:

—Cada cuendá-ndó vã cãnchícúⁿ nihnu-ndo nâcuáa quíde cue téè cùu fariséú, chi cue téè-áⁿ ïo

dândahú-güedé mée-güedé sã quíde ndãá-güedé dico ñá ndãá sã quíde ndãá-güedé. ² Te nchaa tnúhu sã cúu yùhu ni cuu vá cúu yùhu-gã, chi nchaa dacuítí sã quée túu-xi núú ñáyiu. ³ Chi nchaa tnúhu cãháⁿ dayuhu-ndo quée túu-xi núú chítú núú tàcá, te nchaa tnúhu cãháⁿ mée-ndó vèhe-ndo dacuítí sã ñihí ñáyiu tnúhu.

Yã Ndiõxí xíní ñùhu-xi yuhú-ó-gã

(Mt. 10:26-31)

⁴ Te nchòhó cue téè ïo váha tnàhá tnúhu ndihí-í ná cãchí tnúhu-í xii-ndo sã vã yuhú-ndó cuè ñáyiu cuèi na cãhni ñahá-yu xii-ndo, chi diu-ni yiqui cùñú-ndó ndàcú-yu cahní-yu, te ñá túú nãgã ndacú-yu cada ñahá-yu xii-ndo. ⁵ Te na cãchí tnúhu-í xii-ndo sã Yã Ndiõxí tau-ndó yuhú-ndó-gã, chi mee-gã ïo cùnuu-gã, te diu-gã quíde-gã sã vã cùndècu-gã ñáyiu ñuyíu, te daquihíⁿ ñahá-gã xii-yu núú ùhú núú ndàhú, núu xiãⁿ cãchí tnúhu-í xii-ndo sã Yãá-áⁿ tau-ndó yuhú-ndó-gã.

⁶ Te nchòhó xíní-ndó sã ndéé úhúⁿ tnàhá tãláa cùyãhu-di núú ùú díhúⁿ, dico Yã Ndiõxí ñá túú cùnaa-gã ni ìⁿ-güedi, chi nèhe cuendá ñahá-gã xii-güedi. ⁷ Te nchòhó ndéé ìⁿ ìⁿ idi díquí-ndó yindehu, núu xiãⁿ cãchí-í sã vã yuhú-ndó, chi cùnuu-gã-ndó dâcúxí tãláa cuèi vãi vihi-güedi.

Ñáyiu na dàtúu núú dâva-gã ñáyiu sã ndécú ndihí-yu Xítoho

Jesucristú

(Mt. 10:32-33; 12:32; 10:19-20)

⁸ Te na cächí tñúhu-í xii-ndo sã nõu na datúu-ndo nõú dävagã ñáyiú sã ndécú ndìhi ñaha-í xii-ndo. Te ducaⁿ te tñahá yúhú Té cùu ñaní tñahá-ndó nchàa-ndo datúu-í nõú nchàa cue espíritú xínú cuèchi nõú Yã Ndiõxí sã nchòhó ndécú ndìhi ñaha-ndo xii-í. ⁹ Dico nõu na cũñaha-ndo xii ñáyiú sã ñà túú ndècu ndìhi ñaha-ndo xii-í, te diu-ni ducaⁿ càda yúhú Té cùu ñaní tñahá-ndó nchàa-ndo, chi cũñaha-í xii cue espíritú xínú cuèchi nõú Yã Ndiõxí sã ñà túú ndècu ndìhi ñaha-í xii-ndo.

¹⁰ Te ndédani càa ñáyiú na càháⁿ cuèhé cuendá yúhú Té cùu ñaní tñahá-ndó nchàa-ndo, te cada cànu iní ñáhá Yã Ndiõxí xií-yu. Dico ñáyiú na càháⁿ cuèhé cuendá Espíritú Yã Ndiõxí, te ñáyiú-áⁿ vã cáda cànu iní ñáhá-gã xií-yu.

¹¹ Te òré ná càndeca ñaha-güedé xii-ndo quíhíⁿ veñúhu, àdi nõú cuè té cùchiuⁿ, te ni vã cání iní-ndó nõu nása cunduu tñúhu cũñaha-ndo xii-güedé, te ni vã cání iní-ndó nõu ná tñúhu nadànchocáva-ndo nõu ná tñúhu na cũñaha-güedé xii-ndo, ¹² chi òré-nã te mee Espíritú Yã Ndiõxí dacàhu iní ñáhá-xí xii-ndo tñúhu cũñaha-ndo xii-güedé — cächí-gã xáhaⁿ-gã xii-güedé.

Cuendá ñⁿ té cuica

¹³ Te ñⁿ té ñúhu tñahá tñuú ñáyiú-áⁿ ni xáhaⁿ-dè xii Jèsús:

—Mèstrú, cũñaha xii ñaní-í sã ná chídava-dé sã ñí dándõ

tátá-ndí cuu cuendá-ndí — cächí-dé xáhaⁿ-dè xii-gã.

¹⁴ Te Jèsús ní xáhaⁿ-gã xii-dé:

—¿Te ná cuendá ducaⁿ càháⁿ-n? Te ñá díú chiúⁿ-áⁿ vèxi-í cada-í, chi ñá díú tée cùchiuⁿ cuu-í —cächí-gã xáhaⁿ-gã xii-dé.

¹⁵ Te xáhaⁿ-gã xii nchaa ñáyiú xĩndecu-áⁿ:

—Nchaa nchòhó ñáyiú ndèdóho nchaa tñúhu càháⁿ-í ío váha cada cuendá-ndó, te vã cání iní-ndó nãndí nducu-ndo cùndecu ndìhi-ndo, chi cuèi vãi vihi na nihí-ndó cùndecu ndìhi-ndo, dico vã chĩndè ñaha-xi cudíi-ndo cùndecu-ndo ñuyú-a —cächí-gã xáhaⁿ-gã xií-yu.

¹⁶ Te dàtnùní ní ngüita-gã cání-gã ñⁿ cuendú nõú-yu cuendá tecú tñuní-yu tñúhu-gã, te xáhaⁿ-gã:

—Ñⁿ té cuica sũúní ñí cuu nchaa tátá ní xitu-dé nõú ñúhú-dé. ¹⁷ Te ní ngüita-dé sání iní-dé:

“¿Te nása cada-í? Te ñá túú ndèe nataxúha-í nchaa sã ñí xitu-í”, duha ní sani iní-dé. ¹⁸ Te dàtnùní ní sáha váha tucu-dé cuendá nàcuáa cada-dé, te ní cachí-dé: “Duha na cunduu, dangòyo-í yacá-í, te ndada cànu-gá-í, te xiti-xi nataxúha-í nchaandi túhú sã ñí xitu-í, ndìhi nchaa dava-gã sã ndécú ndìhi-í.

¹⁹ Te sátá dúcáⁿ, te cachí-í: Ío vãi sã ndécú ndìhi-í, te cudíi-xi cuèhé cuíá, te vitna ndetatú-í, te coho-í te caxi-í cada-í, te nãndí-gã cada-í cuendá cudíi iní-í cundecu-í, duha quesaha-í”, cächí-dé.

20 Dico Yá Ndiöxí ní xáhaⁿ-gǎ xii-dé: “Yòhó, ñá túú nàndíhi sá sání iní-n, chí yúhú càchí-í sá niú vitna cuú-n, te nchaa sá ndécú ndíhi-n ¿yoo cuu sá vǎha xii-aⁿ-i?”; càchí-gǎ xáhaⁿ-gǎ xii-dé. 21 Duha yáha nchaa ñáyiú nándi sàni iní-xi cundecu ndíhi-xi ñuyíú-a, dico ñáyiú-áⁿ ío ndáhú-yu chí ñá túú nǎ nduu táhú-yu núú Yǎ Ndiöxí cundecu ndíhi-yu –càchí Jèsús xáhaⁿ-gǎ xii-yu.

Yá Ndiöxí xító-gǎ nchaa ñáyiú sàndáá iní ñáhá xii-gǎ (Mt. 6:25-34)

22 Te ní xáhaⁿ Jèsús xii cue téé xica cuu ndíhi-gǎ:

–Te na càchí tnúhu-í xii-ndo sǎ vǎ ío caní iní-ndó núu nása cundecu-ndo, àdi nása níhí-ndó sǎ cǎxí-ndó, àdi nása níhí-ndó dǒó cuihnu-ndo. 23 Chí cùnuu-gǎ méé-ndó dàcúúxí sǎ nchító-ndó, te ducaⁿ yiqui cuñú-ndó cùnuu-gǎ-xi dàcúúxí dǒó sácuihnu-ndo. 24 Te chí cuǎha cuëndá nàcuáa quide cue tícácá, chí ni ñà túú chìhi-güedi tatá cuu itú natahu-güedi te ni ñà túú ndéé nútnǎ yacá-güedi, te níhi-güedi xèxi-güedi, chí Yá Ndiöxí xító ñàha-gǎ xii-güedi. ¿Te nchòhó cùnùu-gǎ-ndó dàcúúxí nchàa cue quiti ndava! 25 Te cuèi nándi sá sání vihi iní-ndó ndècu-ndo, dico ñá ndácú-ndó càda-ndo nacuáa cuehnu-ndo cuèdicó ìⁿ yiqui-gǎ. 26 Te núu ní sǎ lúhá xǎⁿ ñá ndácú-ndó càda-ndo, ¿te ná cuëndá ío sàni iní-ndó cuëndá nchaa sá cuíní-ndó níhí-ndó cundecu ndíhi-ndo?

27 “Te chí cǎdá cuëndá nàcuáa sàhnu ìⁿ tnu itá, chí ni ñà túú quide chiuⁿ-xi, te ni ñà túú quèheⁿ-xi idi. Te na càchí tnúhu-í xii-ndo sǎ ndíi Salòmón ío vii ní cǎa nchaa sá ní xíndecu ndíhi ndíi, dico vii-gǎ tucu cǎa nchaa itá dàcúúxí nchàa sá ní xíndecu ndíhi ndíi. 28 Te cùhú sǎ ío vitna tnaa-ni cùdíi-xi te sàhmí-yu, te cuèi ducaⁿ dico ío vii cǎdúha Yá Ndiöxí nchaa cùhú-ǎⁿ. ¿Te nchòhó ío cùnuu-ndo dàcúúxí nchàa cùhú-ǎⁿ, núu xǎⁿ ío xito ñaha-gǎ xii-ndo, te dicó yica cùu iní-ndó sàndáá iní-ndó-gǎ! 29 Te vǎ ío cǎnchicúⁿ nihnu-ndo sǎ cóhó sǎ cǎxí-ndó, te ni vǎ dándìhú-ndó iní-ndó núu nása cada-ndo níhí-ndó. 30 Chí nchaa ñáyiú ñá túú sàndáá iní ñáhá xii Yá Ndiöxí ducaⁿ mèe-ni sá cóhó sǎ cǎxí-yu xica nchicúⁿ nihnú-yu. Dico mee Tǎtá-ó Dütú Ndiöxí sa nàha-gǎ nándi cùu sá xíní ñùhu-ndo, te taxi-gǎ. 31 Te cada-ndo nchàa nacuáa cǎháⁿ Yá Ndiöxí Yaá yíndàha ñaha xii-ndo, te ducaⁿ te taxi-gǎ nchaa sá xíní ñùhu-ndo.

Cuëndá sá vǎha nduu táhú-ó núú Yá Ndiöxí (Mt. 6:19-21)

32 “Te vǎ yùhú nchòhó cue téé ndècu ndíhi-í cuèi ío sacú-ndó, chí Tǎtá-ó Dütú Ndiöxí ní cachí-gǎ sá ndúú táhú-ndó cundecu-ndo núú ndécú-gǎ taxi tnúní-ndó tnàhá-ndó. 33 Te chí dicó nchàa sá ndécú ndíhi-ndo, te chí cuǎha nchaa ñáyiú ndáhú díhúⁿ-ndó ñáyiú xìni ñuhu, te cada vǎha-ndo cundecu-ndo, te ducaⁿ te nduu táhú-ndó

să ıo-gá váha núú Yă Ndiöxí cundecu ndihi-ndo, te xiăⁿ vá cúú tühú tnàhı-gá-xi, te ni vă ndıhı nihnu-gá-xi, te ni ñadúhú vă ndácú-güedě duhu-güedě, te ni tıquidi vá queé-dı. ³⁴ Te núú xiăⁿ cúú cuendá-ndó ñá, te ñıu-ni xiăⁿ ñúhú ñı-nı, áⁿ te núú mee-ni să ndécú ñıyıú-a ndècu ndihi-ndo, te ñıu-ni nchaa xiăⁿ ñúhú ñı-ndó.

Xini ñıhu-xi quıhi ñı-ó cundecu-o

³⁵⁻³⁶ Te ıo quıhi ñı-ndó cundecu-ndo, te cada-ndo ñatná quıde ñıva cue tée xınu cuechi sacundecu túha-güedě cuıi ñanı ñı-áⁿ ndétú-güedě patróoⁿ-güedě ná ñı nasáá-dé sá cuaháⁿ-dé vıco tnandaha. Te núú niú te sa cúú cáyú-ni ñıhú-güedě sá cundetu ñıha-güedě, chi ñı ná nasáá-dé dacasaⁿ-dé yuyehı, te ndıhi-ni nacaáⁿ-güedě ndıhu-dé. ³⁷ Te váha táhú nchaa cue tée xınu cuechi-áⁿ, chi ndècu túha-ni-güedě ndétú-güedě ndée ñı nasáá patróoⁿ-güedě, te na cächı tıhı ndáá-ı xı-ndó să ñı ná nasáá patróoⁿ-güedě-áⁿ te chihi ñıha-dě mèsá xı-güedě, te ndacáⁿ ndee-dé dóo ñıhı-dě núú yıquí-dě, te ngüıta-dé canı-dé cóhó-güedě cuendá caxı-güedě. ³⁸ Te ñıu-ni ducaⁿ cãda-dé cuıi ñıva niú, ñı tacuıhndá-gá, te núú ñá túú xıdı-güedě ñı nasáá-dé, te cue tée xınu cuechi-áⁿ ıo váha tnahá-güedě. ³⁹ Te núú ñıcú ñı tée cıu xıtohó ñı vehe

xı-nı-dé ná ñı quıhu ñıadúhú vehe-dé ñı, te quıhi ñı-dé te vá cıdú-dé, te vá ñıá-đě nacaáⁿ-güedě yuyehı-dé quıhu-güedě duhu-güedě. ⁴⁰ Te nchóhó tıcu nchaa-nı ndıu quıhi ñı-ndó cundecu túha-ndo, chi na cuaháⁿ ndıu ñı túú yıhi ñı-ndó, te quıxi tıcu yıhú Tée cıu ñıanı tnahá-ndó nchaa-ndo — cächı-gá xáhaⁿ-gá xı-güedě.

Cue tée quıde ndáá ndıhi cue tée ñı túú quıde ndáá

(Mt. 24:45-51)

⁴¹ Te tée Pélú ñı xıcáⁿ tıhú-dě núú Jësús, te xáhaⁿ-đě:

—Mèstrú, ıte tıhı ñı cáhıⁿ-n-áⁿ cıu-xı mee-ni cuendá nchúhú áⁿ cuendá nchaa ñıyıu? —cächı-dé xáhaⁿ-đě xı-gá.

⁴² Te Jësús ñı xáhaⁿ-gã:

—Cáhıⁿ-ı cuendá ñıyıu quıde váha ñıatná quıde ñı tée tãxi tıhı ñıhá xı cue ñıyıu xınu cuechi ndecu vehe patróoⁿ-xı, chi tée-áⁿ ıo váha təcú tıhı-dé, te quıde-dé nchaa ñıcú cãhıⁿ patróoⁿ-đě, te ñıcaxı-dé cue ñıyıu xınu cuechi ñı tãxi-tı caxı-yı. ⁴³ Te núú ducaⁿ quıde váha tée tãxi tıhı ñıhá xı cue ñıyıu xınu cuechi-áⁿ ñı, te ıo váha tnahá-dé ñı nasáá patróoⁿ-đě ñı ndée cuaháⁿ-đé. ⁴⁴ Te na cächı tıhı ndáá-ı xı-ndó să tée quıde ndáá tãxi tıhı ñıhá xı cue ñıyıu xınu cuechi-áⁿ cıñıha-ñı patróoⁿ-đě xı-dé sá ncháandı tıhı-ñı sá ndécú ndıhi-dé quındaha-dě. ⁴⁵ Dıco núú tée tãxi tıhı ñıhá xı cue ñıyıu xınu cuechi-áⁿ ná canı

iní-dé sá cùyàa patróón-dě vá násàá ndíhi-ni-dé ñá, te ngúíta-dé cani-dé nchaa ñáyiú xínu cuechi, cuèi tée cuèi ñadíhí, te ngúíta-dé caxi-dé coho-dé, te dàxíni-dé méé-dě, ⁴⁶ te nduu ñà túú yìhi iní-dé te nasáá patróón-dě, te dandòho ñaha patróón-dě-án xii-dé, te daquihí ñáhá-dě xii-dé núú ndécú ñáyiú ñá túú ní quíde ndáá.

⁴⁷ Te dava cue tée xínu cuechi xíní-güedé nàcuáa cuíní patróón-güedě cada-güedé te ñá túú quíde-güedé, te ni ñà túú cuíní-güedé cundecu túha-güedé cundetu-güedé patróón-güedě, te nchaa cue tée ducaⁿ xíquide dandòho ñaha patróón-güedě, chi ñáni vîhi-güedé. ⁴⁸ Te dava cue tée xínu cuechi ñá túú xíní-güedé nàcuáa cuíní patróón-güedě cada-güedé, te ní quíde-güedé sá néñúú-güedé ìⁿ sá ñà túú tàú-güedé cada-güedé ñá, te cue téé-án sacú-gá dandòho ñaha patróón-güedě, chi sacú-gá ñáni-güedé. Te ñáyiú cùtnuní iní-xi nàcuáa cuíní Yá Ndiöxí cadá-yu, te ñu-ni ducaⁿ tàú-yu cadá-yu nàcuáa cuíní-gá. Te ñáyiú vai-gá tècú tnùní nàcuáa càháⁿ-gá, te ñu-ni ducaⁿ vai nchaa sá càháⁿ-gá tàú-yu cadá-yu.

Ñá túú cùu ìⁿnuu ñáyiú
(Mt. 10:34-36)

⁴⁹ Te yúhú véxi-í ñuyíú-a cuendá cutnùní iní ñáyiú nàcuáa cada ñaha Yá Ndiöxí xii-yu, jte cuíní-í sá ndíhi-ni

cada-gá nàcuáa sàni iní-gá!
⁵⁰ Te yúhú ío vai tnúhu sàni iní-í, jchi sáá nduu te ío ndoho-í, te ñu-ni xíáⁿ cuhuⁿ iní-í ndéé ná sáá nduu dùcaⁿ yáha-í! ⁵¹ Te nchòhó vá cání iní-ndó sá yúhú véxi-í ñuyíú-a te cundecu ndíhi tnàha váha-ni ñáyiú, te ñáhá chi da ngúíta-yu vá cúú ìⁿnuú-yu cundecú-yu. ⁵² Te ndéé není vitna ngúíta ñáyiú vá cúú ìⁿnuú-yu cundecú-yu, te na càda-o cuendá te núu úhúⁿ ñáyiú xíndecu ìⁿ-ni vèhe, te vá cúú ìⁿnuu-gá-yu, chi úní-yu ndatnúhu-yu te nàá-yu ndíhi úú-gá-yu, àdi ñáyiú úú-án ndatnúhu-yu te nàá-yu ndíhi ñáyiú úní-án. ⁵³ Te dava cue téé cùu tátá vá cúú ìⁿnuu-gá-güedé ndíhi déhe ducuⁿ-güedé, te ni dàva cue ñáyiú cùu náná vá cúú ìⁿnuu-gá-yu ndíhi déhe yòcò-yu, te ni sánu-yu vá cúú ìⁿnuu ndíhi-gá-yu. Te ducaⁿ càdá-yu chi davá-yu quíndáá iní ñáhă-yu xii-í, te davá-yu vá quíndáá iní ñáhă-yu — càchí-gá xáhaⁿ-gá xii-güedé.

Ñáyiú cùtnuní iní-xi nàcuáa quíde-xi ñuyíú ndíhi andíu

(Mt. 16:1-4; Mr. 8:11-13)

⁵⁴ Te Jèsús ní xáhaⁿ-gá xii nchaa ñáyiú xíndecu-án:

—Te nchòhó òré ndéhé-ndó ndànchita vícò ndàa xio quée nchíanchii, te càchí-ndó sá cúúⁿ dáu, te ñu ducaⁿ ndisa quíde-xi. ⁵⁵ Te òré ná quène táchí ndàa xio datní nacuáa quène nchíanchii, te càchí-ndó sá ío cada ihni-xi, te ñu ducaⁿ ndisa quíde-xi.

56 Te nchòhó ío váha cùtnuní iní-ndó nàcuáa quide-xi andiu ndihi ñuyíú, ¿te ná cuendá quidé-ní-ndó sã ñã tècú tnùní-ndó nàcuáa quide Yá Ndiöxí vitna? Te sá dúcáⁿ quide-ndo-áⁿ ío dándahú-ndó mée-ndo sá ío váha cùtnuní iní-ndó, chi ñã ndáá sá cùtnuní iní-ndó.

Nducu-o nàcuáa núcúndecu ndihi váha-o ñáyiu cùu úhú iní ñáhá

(Mt. 5:25-26)

57 Te nchòhó, ¿ná cuendá ñã túú dándixi túu-ndo iní-ndó càda-ndo mee-ni sá váha sá tàú-ndó càda-ndo-i? 58 Te núu ío ñⁿ-ndo ñi sacáⁿ cuéchi ñáyiu cuendá-ndó cuendá ñⁿ sá ñi quide-ndo, te cuáháⁿ-ndó ndihí-yu núu tõe cùchiuⁿ, te ñini ñùhu-ndo ndihí-yu ichi, te nducu-ndo nàcuáa cada-ndo nàcáháⁿ cáhnú iní tnáhá-ndó ndihí-yu cuendá sá vã cándèca ñaha-gá-yu quíhíⁿ núu tõe cùchiuⁿ, chi núu ducaⁿ na cadá-yu te tõe cùchiuⁿ-áⁿ nachihi ñaha-dé ndaha cue tõe cùu poleciá, te cue tõe-áⁿ chihí ñaha-güedé vecaá xii-ndo. 59 Te na cächí tnúhu-í xii-ndo sã ñuu na ngáva-ndo vecaá, te vá cãcu-ndo te núu vá náchãhu-ndo nchàa sá tàú-ndó —cächí-gá xáhaⁿ-gã xii-yu.

13

Xini ñuhu-xi natuha-o ichi Yá Ndiöxí

1 Te diu-ni òré-áⁿ ñi ngúnutnii ñⁿ úú ñáyiu núu Jèsús cáñi-yu cuendú núu-gã nàcuáa ní quide ñaha té Pilatú xii cue tõe distritú Galileá

cue tõe ní sahani quiti nduu táhú Yá Ndiöxí, te mei òré ní sahani-güedé cue quiti-áⁿ ñi táuchíúⁿ tẽ Pilatú cue sandadú-dé ní sahani-güedé cue tõe Galileá-áⁿ, te ní xica níñi-güedé núu ñúhú ndihi níñi cue quiti-áⁿ, te ní nadácánuu-xi. 2 Te Jèsús ní xáhaⁿ-gã xii-yu:

—Te núu nchòhó sání iní-ndó sã sá dúcáⁿ ñi yáha cue tõe distritú Galileá-áⁿ te cùu-güedé cue tõe ndecu vihi-gá cuéchi-xi dàcúúxí cuè tõe ñuu-güedé ñã. 3 Te na cächí tnúhu-í xii-ndo sã ñáhá. Te núu nchòhó vá ndíxí cuéchi iní-ndó cuendá nchaa sá cuéhé sá dúhá quide-ndo ndecu-ndo ña, te tnáhá nchaa nchòhó cuíta nihnu-ndo te núu vá nátnii-ndo ichi Yá Ndiöxí. 4 Te núu nchòhó sání iní-ndó sã ñáyiu sáhúⁿ úní ní xihí ní táú ñáhá vèhe ducúⁿ Silóé ío-gá ndécú cuéchi-yu dàcúúxí nchàa ñáyiu xíndecu ñuu Jerusàlén ñã, 5 te na cächí tnúhu tucu-í xii-ndo sã ñáhá. Te núu nchòhó vá ndíxí cuéchi iní-ndó cuendá nchaa sá cuéhé sá dúhá quide-ndo ndecu-ndo ña, te tnáhá nchaa nchòhó cuíta nihnu-ndo te núu vá nátnii-ndo ichi Yá Ndiöxí —cächí-gá xáhaⁿ-gã xii-yu.

Yutnu ngüxí ñã túú cùuⁿ sávidí-xi

6 Te Jèsús ní caní tucu-gá ñⁿ cuendú núu-yu nàcuáa tecú tnùní-yu tnúhu-gá, te xáhaⁿ-gã:

—Ñi tõe nùtnii ñⁿ yutnu ngüxí núu ñúhú-dé, te cuáháⁿ ndéhé-dé ñuu ní cuuⁿ

sávidí-xi ní cùu, te ní ìn ñá túú ní cùuⁿ. ⁷ Te ní xáhaⁿ téé-án xii téé ndèé ñuhu-dé: “Ñaha-n sá vitna ní cuu úní cuíá quíxí còto-í yutnu ngúxí-a te ñá túú xìní-í ní ìn sávidí-xi. Te quehndé-n vitna, chí àúⁿ nã cuu nùtní-xi quíde tneñu-xi núú ñuhu-án”, càchí-dé xáhaⁿ-dè xii téé ndèé ñuhu-dé-án. ⁸ Te téé ndèé ñuhu-án ní xáhaⁿ-dè: “Pàtróón, dañá na cuìhnu-xi cuíá vitna-ná, te na nàdatayá-í ñuhu núú sàhá-xi, te chihi-í sahán. ⁹ Te ducaⁿ te cudana cuuⁿ sávidí-xi, àdi núú ñá túú ní cùuⁿ sávidí-xi ña te téhndé-nã-xi”, càchí-dé xáhaⁿ-dè xii pàtróón-dè — càchí-gá xáhaⁿ-gã xii-yu.

Jèsús quíde tátna-gá ìn ñadìhí ní nduu cueyi sàtá-xi nduu ndètatú ñáyiu

¹⁰ Te ìn xito cùu-xi nduu ndetátú ñáyiu, te yìhi Jesús ìn veñuhu dànehé-gá ñáyiu. ¹¹ Te xíáⁿ ndécú ìn ñadìhí ní cuu sáhúⁿ úní cuíá sã cùhú-aⁿ yìhi ñaha espíritú cùndìhi yucu ñávãha xii-aⁿ, te xíáⁿ ní ndada cueyi-xi sàtá-aⁿ, te ñá dáñá-gã-xi nucúnutnii ndáá-aⁿ. ¹² Te òré ní xìní ñáhá Jèsús xii-aⁿ te ní cana ñaha-gã, te xáhaⁿ-gã:

—Yòhó ñaha cùhú, ndúha-n cuèhé tnàhá-n —càchí-gá xáhaⁿ-gã xii-aⁿ.

¹³ Te ní dácàá-gá ndaha-gá ní tendaha ñaha-gá xii-aⁿ, te òré-ni-án ñí ndúha-aⁿ te ní nucúnutnii ndáá-aⁿ, te ní ngúíta-aⁿ ní cachí-aⁿ sá ïo càhnu cuu Yá Ndiòxí. ¹⁴ Dico téé tàxi tñuní veñuhu ní cudééⁿ-dè sá dúcáⁿ ñí quíde

Jèsús ní quíde tátna-gá ñaha cùhú-án nduu ndètatú-yu, te ní xáhaⁿ-dè xii-yu:

—Ìó ìnú nduu tàú-ó càda chiúⁿ-o, te ndèdani càa nduu-án quixi-ndo cùtátna-ndo, dico ñá díú nduu cuu-xi nduu ndetátú-ó — càchí-dé xáhaⁿ-dè xii-yu.

¹⁵ Te ní xáhaⁿ Jèsús:

—Nchòhó chí ïo dàndahú-ndó mèe-ndo sá quíde ndáá-ndó dico ñá ndáá sá quíde ndáá-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó àⁿ? ¹⁶ Te ñadìhí-a cùu-aⁿ ñaní tnáhá ndii Àbrahám, te dicó-ni sá yùcu ñávãha quíde duha cùhú-aⁿ ní cuu sáhúⁿ úní cuíá, ¿te náa ñá túú xìní ñuhu-xi cùtátna-aⁿ cuèi cùu-xi nduu ndetátú-ó àⁿ? —càchí-gá xáhaⁿ-gã xii-dé.

¹⁷ Te sá dúcáⁿ ñí cáháⁿ Jèsús, núu nchaa cue téé cùu úhú iní ñáhá xii-gá ní cucahaⁿ núu-güedè, dico nchaa dava-gá ñáyiu chí xícudíi iní-yu xíndéhè-yu nchaa sá vã yòo tnàhí ndàcu cada quíde-gá.

Cuèndá ndíquíⁿ yutnu nàni mostázá

(Mt. 13:31-32; Mr. 4:30-32)

¹⁸ Te ní xáhaⁿ-gã xii-yu:

—Na càni-í ìn cuèndú núú-ndó nàcuáa tecú tñuní-ndó nàcuáa cada-xi òré ndíhu ndaha ñaha Yá Ndiòxí xii-ndo. ¹⁹ Ìn téé ní queheⁿ-dè ndíquíⁿ yutnu nàni mostázá te nèhe-dé cuáháⁿ ní sacáⁿ-dè núú ñuhú-dè te ní xínu-xi, te ní sahnu-xi ní cuu dùcúⁿ-xi, te cue quiti ndàva núú tàchí

cádũha-güedi tacá-güedi núú díté-xi —càchí-gá xáhaⁿ-gã xii-yu.

Nacuáa quide levadurá
(Mt. 13:33)

²⁰ Te ní xáhaⁿ tucu Jesús xii-yu:

—Te na cãchí tnúhu tucu-í xii-ndo nacuáa cada tucu Yá Ndiõxí òré ndíhu ndaha ñaha-gá xii-ndo. ²¹ Ìⁿ ñadihí ní queheⁿ-aⁿ levadurá ní chihí-aⁿ úní arròbá yuchi triú, te levadurá-áⁿ ñí quide-xi ní ndaa ñihí yusaⁿ-áⁿ —càchí-gá xáhaⁿ-gã xii-yu.

Yuyèhe cuiñi
(Mt. 7:13-14, 21-23)

²² Te ichi ñũhu Jesús cuáháⁿ-gá ñuú Jerusálén, te nchaa ñuú náhnú, ndihí nchaa ñuú líhli ta yãha-gá ducaⁿ ta dànehé-gá ñáyiu tnúhu-gá cuáháⁿ. ²³ Te ìⁿ ñuú-áⁿ ñí xáhaⁿ ìⁿ téé xii-gá:

—Mèstrú, cuení-í cácaⁿ tnúhu-í ìⁿ tnúhu núú-n, ¿ndáá sá ío sacú ñáyiu nãníhí tãhú-ãⁿ? —càchí-dé xáhaⁿ-dẽ xii-gá.

Te Jèsús ní xáhaⁿ-gã xii-dé ndihí nchaa ñáyiu:

²⁴ —Cada-ndo sã nãníhí tãhú-ndó, te tni-ndo ichi Yá Ndiõxí, te ichi-gá-áⁿ cúú-xí dàtná ìⁿ yuyèhe cuiñi, te cãchí tnúhu-í xii-ndo sã ío cuéhé ñáyiu cachí iní-yu quíhu-yu yuyèhe cuiñí-áⁿ dico vá ndácũ-yu. ²⁵ Te na cãni tucu-í ingá cuendú núú-ndó nacuáa tecú tnùní-ndó tnũhu cãháⁿ-í. Te òré ná ndãcuiñí téé cùu xitohó vehe, te nacadí-dé yuyèhe, te nchaa

nchòhó ñáyiu na quèndóo quehé dacãsaⁿ-ndo yuyèhe, te quesaha-ndo cũñaha-ndo xii-dé: “Tãtá, nacaáⁿ yuyèhe na quíhu-ndí”, quesaha-ndo cũñaha-ndo xii-dé. Dico téé cùu xitohó vehe-áⁿ cũñaha-dẽ xii-ndo: “Ñá túú xìní-í nchòhó ndèé ñáyiu cùu-ndo”, duha cũñaha-dẽ xii-ndo, ²⁶ Te dàtnúni ngúita nchòhó cũñaha-ndo xii-dé: “Nchúhú ní xexi ndihí ñaha-ndí, te ní xihí ndihí ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cũñaha-ndo xii-dé. ²⁷ Dico cachí tucu téé cùu xitohó vehe-áⁿ cũñaha-dẽ xii-ndo: “Sa ní cachí-í sã ñà túú xìní-í ndèé ñáyiu cùu-ndo.

Te chí xócuiñí nchòhó ñáyiu ndècu ichi cuehé ichi duha núú ndècu-í”, quesaha-dẽ cũñaha-dẽ xii-ndo. ²⁸ Te na sãá nduu dùcaⁿ cada-xi te quini-ndó tẽ Abrahám, ndihí té Isàác, ndihí té Jãcób, ndihí nchaa cue téé ní xóo cáháⁿ tnúhu Yá Ndiõxí, te nchaa cue téé-áⁿ ndécú-güedẽ núú ndécú-gã táxí tnùní-gá, te nchòhó quee tihú-ndó núú-gã sã tnũhu ñá túú ní cuini cada ndáá, te dàvá-áⁿ ndãhyú-ndó te cuu rúhñú-nã núhu-ndo sã sätú iní-ndó cuendá sã ndóhó-ndó. ²⁹ Te dàvá-áⁿ quíhu nchaa ñáyiu ndí cùmí xio ñuyú núú ndécú Yá Ndiõxí táxí tnùní-gá caxí-yu ndihí-gá, te cundecú-yu ndihí-gá. ³⁰ Te dava ñáyiu nchícúⁿ ñá túú cùnuu ndecu ichi Yá Ndiõxí vitna, ñáyiu-áⁿ sãá nduu te ío cunúú-yu. Te dava ñáyiu cùnuu ndecu ichi-gá vitna, ñáyiu-áⁿ sãá

nduu te vá ïo-gá cunúu-yu —
càchí-gá xáhaⁿ-gã xii-yu.

*Jèsús ndàhyú-gá cuèndá
ñáyiu ñúú Jerusàlén*

(Mt. 23:37-39)

³¹ Te diu-ni nduu-ãⁿ ñi
quexio ñⁿ úú cue téé cùu
fariséú núú ndécú-gã, te
xáhaⁿ-güedé xii-gá:

—Quee-n ìha quíhíⁿ-n ñúu
ndéé quíhíⁿ-n, chi téé cùu
Herodés cuíni-dé cahni
ñaha-dé xii-n —càchí-güedé
xáhaⁿ-güedé xii-gá.

³² Te Jèsús ní xáhaⁿ-gã:

—Chí cuáháⁿ te cúñaha-ndo
xii téé nèhe mañá-áⁿ sã
càchí-í sã ná cündedóho
váha-dé ñⁿ tnúhu càháⁿ-í,
chi cùmání ñⁿ úú-gá nduu
cundecu-í xocàni-í nchaa
espíritú cúndíhi yucu ñávãha
yìhi ñaha xii ñáyiu, te cada
tátna-í nchaa dava-gá ñáyiu
cùhú, te ducaⁿ te ndíhi chùuⁿ-í,
duha cúñaha-ndo xii-dé.
³³ Dico dacuítí sã cùhúⁿ-í ichi
ñⁿ úú-gá nduu, te ducaⁿ te
sáa-í núú quíhíⁿ-í, chi vá cúu
tnàhí cuú ñⁿ téé càháⁿ tnúhu
Yá Ndiòxí ñngá ñúú, chi mei
ñúú Jerusàlén cuú-güedé —
càchí-gá xáhaⁿ-gã xii-güedé.

³⁴ Te ní xáhaⁿ-gã xii ñáyiu
ñúú Jerusàlén:

—Nchòhó chi sàhni-ndo
nchaa cue téé càháⁿ tnúhu Yá
Ndiòxí, cue téé ní tendaha-gã
véxi, te mee-ni ndíhi yúu
sáhní-ndó-güedé. ¡Te títní
xito ní cuíni-í nadatácá
ñáhà-í xii-ndo dàtná nádàtacá
ñⁿ nchuxi cuè déhe-dí
sàquihí-güedi xití ndíxíⁿ-dí,
dico ñá ní cuíni-ndó, te
ducaⁿ-ni sàni iní-í ndéé vitna!
³⁵ Te chí cündedóho tucu ñngá

tnúhu na càháⁿ-í-a: Yá Ndiòxí
daña ñàha-gá xii-ndo. Te na
càchí tnúhu tucu-í xii-ndo
sã vã quíni ñáhá-gã-ndo
xii-í, dico sáa nduu te quíni
ñáhá tucu-ndo, te nduu-ãⁿ
cachí-ndó sã ïo càhnu cuu
yúhú Yaá ní tendaha Dütú
Ndiòxí véxi ñuyúú-a —càchí-gá
xáhaⁿ-gã xii-yu.

14

*Jèsús quidé tátna-gá ñⁿ téé
ñúhu cuiñu*

¹ Te duha ní cuu ñⁿ nduu,
nduu ndetátú ñáyiu chi
ñⁿ téé cùu fariséú cúnúu
ní cáháⁿ-dé Jèsús vehe-dé
caxi-gá, te cue téé ndècu
vehe-dé ndéhé-güedé ñúu
nása cada-gá. ² Te xíaⁿ ndécú
tnàhá ñⁿ téé cùhú ñúhú-dé
cuiñu. ³ Te Jèsús ní xicáⁿ
tnúhú-gã núú cuè téé dàcuaha
ñaha xii ñáyiu nchaa tnúhu ní
chídó tnùní ndíi Moisés, ndíhi
núú cuè téé cùu fariséú, te
xáhaⁿ-gã:

—¿Cuu cada tátna-o ñⁿ ñáyiu
cùhú nduu ndetátú-ó ñⁿ ñáhá?
—càchí-gá xáhaⁿ-gã xii-güedé.

⁴ Dico cue téé-áⁿ ñà túú
tnàhí ní cáháⁿ-güedé. Te
ní dácáa-gá ndaha-gá ní
tendaha-gá téé cùhú-áⁿ ñi
quide tátna ñaha-gã xii-dé, te
ní xáhaⁿ-gã sã ná ñuhú-dé
vehe-dé. ⁵ Te ní xicáⁿ
tnúhú-gã núú nchaa cue
téé-áⁿ, te xáhaⁿ-gã:

—¿Te núu nchòhó ná
ngáúñhnu ñⁿ búrru-ndo àdi
ñⁿ ndicutu-ndo déhvã, te vá
ná tàva ndíhi-ni-ndo-dí cuèi
cùu-xi nduu ndetátú-ndó-ãⁿ?
—càchí-gá xáhaⁿ-gã xii-güedé.

6 Te ñá túú ní ñihí-güedě tñuhu na danchocáva-güedé.

Ñáyiú càháⁿ-yu quíhíⁿ vico tnándaha

7 Te ndèhe Jesús nàcuáa xíquide nchaa ñáyiú ndècu vico sá sùúni ñi nacáxi-yu xilé sácõo nchihí cue tée cùnuu-gá conchihí-yu òré cuánguihú-yu mèsá caxí-yu, núu ní xáhaⁿ-gã xii-yu:

8 —Òré ná càháⁿ ñáhá ìⁿ ñáyiú xii-ndo ìⁿ vico tnándaha, te vá cóo-ndó núú xilé sácõo cue tée cùnuu-gá, chí núu ducaⁿ na càda-ndo, te cudana quexìo dava-gá ñáyiú cùnuu-gá dàcúúxí nchòhó. 9 Te ñáyiú ní càháⁿ ñáhá xii-ndo-áⁿ quixí-yu te cúñáhá-yu xii-ndo: “Chí cuãñaha xilé núcõo nchihí-ndo-áⁿ ná cõnchihí ñáyiú ní quexìo-a”, quesàhá-yu cúñáhá-yu xii-ndo. Te cuìní-ndó ñáhá cuèi cùcahaⁿ núú-ndó ndàcuñí-ndó quíhíⁿ-ndó

ngõo-ndo núú xilé xĩnutnii ndéé núú ñi ndihí-ná ndàa sáta-xi. 10 Te yúhú càchí-í sá òré ná càháⁿ ñáhã-yu xii-ndo, te ngóo-ndo núú xilé xĩnutnii ndéé núú ñi ndihí-ná ndàa sáta-xi chí cuendá òré ná quèxio ñáyiú ní càháⁿ ñáhá xii-ndo, te cúñáhá-yu xii-ndo: “Nchòhó cue ñáyiú càháⁿ ndihí-í, chí yãha núú xilé sácõo cue tée cùnuu-gá coo-ndo”, duha cúñáhá-yu xii-ndo. Te ducaⁿ te cada nínu ñaha nchaa ñáyiú yihí ndihí-ndo mesá. 11 Te nchaa ñáyiú na càda nínu mee-xi, te ñáyiú-áⁿ ñà túú cùu nínu-yu, te nchaa ñáyiú ñá túú quide

nínu mee-xi, ñáyiú-áⁿ cúú ññu-yu —càchí-gã xáhaⁿ-gã xii-yu.

12 Te dàtnùni ní xáhaⁿ-gã xii téé ní càháⁿ ñáhá xii-gá:

—Te yòhó òré cuìní-n càda-n ìⁿ vico, te vá càháⁿ-n mée-ni cue téé càháⁿ ndihí-n, ni cuè ñaní-n, ni cuè ñáyiú cùu ñaní tnáhá-n, ni cuè ñáyiú cuica ndècu yatni ndihí-n, chí ñáyiú-áⁿ ducaⁿ càdá-yu ìⁿ nduu càháⁿ ñáhã-yu xii-n te ndéyãhu-ni sá ñi quidé-n-yu.

13 Te ñáhá chí òré ná càda-n ìⁿ vico, te càháⁿ-n ñáyiú ndàhú, ndihí ñáyiú ñá cúú càca, ndihí ñáyiú yacua, ndihí ñáyiú cuàá. 14 Te núu ducaⁿ na càda-n, te cuu-xi ìⁿ sá vãha xii-n, chí ñáyiú-áⁿ vã ñihí-yu nacoto ñáhã-yu xii-n, dico na cùú-n te sáá nduu ndòto-n ndihí nchaa ñáyiú ní quide ndáá ní xĩndecu ichi Yá Ndiõxí, te dàvá-áⁿ taxi-gá sá ndúú tàhú-n —càchí-gã xáhaⁿ-gã xii-dé.

Nàcuáa xíquide ñáyiú òré càháⁿ ñáhá ìⁿ téé cada vico (Mt. 22:1-10)

15 Te sá dúcáⁿ ñi càháⁿ Jèsús ní tecú dóho cue téé yihí mesá-áⁿ, núu ní xáhaⁿ ìⁿ-dé xii-gá:

—Ío váha táhú nchaa ñáyiú na càxi nchaa sá cuãha ñaha Yá Ndiõxí nduu na sáa-yu cundecú-yu núú ndécú-gã táxi tnùni-gá —càchí-dé xáhaⁿ-dẽ xii-gá.

16 Te Jèsús ní xáhaⁿ-gã xii-dé:

—Ìⁿ téé quide-dé vico, te ní dátècú tñuhu-dé cuéhé víhí ñáyiú quíhíⁿ-yu caxí-yu.

17 Te òré sa ní cuu-ná sá cáxi-yu, te ní xáhaⁿ-dě xii téé xìnu cuechi núú-dě sá quíhíⁿ-dé cùñaha-dě quíhíⁿ-yu caxí-yu, chi sa ndècu túha nchaa sá cáxi-yu. 18 Dico nchaaⁿ-yu ní xáhãⁿ-yu xii-dé sá ná cádá càhnu iní téé càháⁿ ñáhá-ãⁿ, chi ñá túú cùyáchí-yu quíhíⁿ-yu vico-áⁿ. Te téé ní cáháⁿ ndihi téé xìnu cuechi-áⁿ dǐhna ní xáhaⁿ-dě: “Íchí ñí saaⁿ-í ìⁿ pedàsú ñuhu, te quíhíⁿ ndéhè-í tnavíí, núu xiãⁿ càháⁿ ndàhú-í núú-n sã cùñaha-n xii téé càháⁿ ñáhá-ãⁿ xii-í sá ná cádá càhnu iní-dé chi ñá túú cùyáchí-í”, càchí-dé xãhaⁿ-dě. 19 Te ingá-dé ní xáhaⁿ-dě: “Ní saaⁿ-í úhúⁿ yùndá ndicutu sa xítu, te cue quiti-áⁿ quíhíⁿ-í coto ndeé-í-güedi vitna, núu xiãⁿ càháⁿ ndàhú-í núú-n sã cùñaha-n xii téé càháⁿ ñáhá-ãⁿ xii-í sá ná cádá càhnu iní-dé chi ñá túú cùyáchí-í”, càchí-dé xãhaⁿ-dě. 20 Te ingá tucu-dé ní xáhaⁿ-dě: “Íchí ñí tnándaha-í núu xiãⁿ vá cùyáchí-í quíhíⁿ-í”, càchí-dé xãhaⁿ-dě. 21 Te òré ní nasáá téé xìnu cuechi-áⁿ, te ní nacani tnúhu-dé núú patróóⁿ-dẽ nchaa nàcuáa ní xáhãⁿ-yu. Te ní cudééⁿ tẽe cùu patróóⁿ-ãⁿ, te ní xáhaⁿ-dě xii téé xìnu cuechi núú-dẽ-áⁿ: “Yáchí cuáháⁿ nanducu-n nchaa ñáyiu ndàhú, ndihi nchaa ñáyiu ñá cúú càca, ndihi nchaa ñáyiu yacua, ndihi nchaa ñáyiu cuàá, te ndèni ní cuu na nàníhíⁿ-n-yu te candècá-n-yu quixi”, càchí-dé xãhaⁿ-dě. 22 Te sátá ñí nasáá téé xìnu cuechi-áⁿ, te ní xáhaⁿ-dě xii patróóⁿ-dẽ: “Patróóⁿ, sa ní quide-í chiùⁿ

ní táhú-n, dico ndècu-gá núú cóo-yu”, càchí-dé xãhaⁿ-dě. 23 Te téé cùu patróóⁿ-dẽ-áⁿ ñí xáhaⁿ-dě: “Cuáháⁿ tucu ndèni ní cuu te cada yica-n na quixí-yu quíhu-yu cuendá ná chítú vehe-í. 24 Te na càchí tnúhu-í xii-n sã ñí ìⁿ ñáyiu ní cáháⁿ-í dǐhna vá cúú-gã caxí-yu sá sà ní quide túha-í caxí-yu ni cùu”, cachí téé-áⁿ xãhaⁿ-dě xii téé xìnu cuechi núú-dẽ —càchí-gá xáhaⁿ-gã xii téé-áⁿ.

Ndoho-o cùndecu-o ichi Xítohó Jesucristú

(Mt. 10:37-38)

25 Te ío cuéhé ñáyiu nchícúⁿ-yu Jèsús, te ní xáhaⁿ-gã xií-yu:

26 —Te núu dava nchòhó cuìní-ndó chìtnahá ñáhá-ndó xii-í, te cuu iní ñáhá ndisa-ndo. Te cuèi na dándóo-ndo tãtá-ndó, ndihi náná-ndó, ndihi ñadihí-ndó, ndihi déhe-ndo, ndihi ñaní-ndó, ndihi cúha-ndo, te cani iní-ndó sã cuèi na cùú-ndó sã cuendá-í, te ducaⁿ te cuu ndisa-ndo cuè ñáyiu tnàhá tnúhu ndihi-í. 27 Te nchaa ñáyiu vá cànchícúⁿ nihnu ñaha xii-í cuendá sá yuhú-yu ndohó-yu dàtná ndoho-í, ñáyiu-áⁿ vã cúú-yu ñáyiu tnahá tnúhu ndihi-í. 28 Te núu ìⁿ nchòhó ná càni iní-ndó dàcaa-ndo ìⁿ vehe ducúⁿ, ¿te náa ñá díú dǐhna-gá cada cuendá-ndó núu ndèdau díhúⁿ cuu, ducaⁿ te cutnùní iní-ndó núu tnahá díhúⁿ-ndó càa vehe-áⁿ àdi ñáhá? 29 Chi núu vá dúcáⁿ càda-ndo, te na ngüita-ndo tàusaha-ndo te vá xìnu cada-ndo, te nchaa ñáyiu na cùndehe ñaha

xii-ndo, te cáháⁿ cuèhé-yu cuendá-ndo. ³⁰ Te cachí-yu: “Tée-ãⁿ ní ngüita-dé dácàa-dé ìⁿ vehe te ñá ní ndàcu-dé xínu”, cachí-yu. ³¹ Àdi te núu ìⁿ tée yìndaha ñaha xii ñáyiu cuìní-dé nàá-dé ndìhi ingá tucu tée yìndaha ñaha xii ñáyiu, ¿te náa ñá díú díhna-gá cada cuendá-dé te núu ndacu-dé ndìhi úxí mìl cue sandàdú-dé nàá-güedé, ndìhi ócò mìl cue sandàdú ingá tucu tée yìndaha ñaha xii ñáyiu cùu úhú iní tnáhá ndìhi-dé-ãⁿ? ³² Àdi te núu xito-dé sá vã ndácú-dé ñá, te òré vátá cùyàtni ñaha-gá tée cùu úhú iní tnáhá ndìhi-dé-áⁿ, te tendaha-dé ìⁿ tée quíhíⁿ-dé quíhu-dé tnúhu ndàhú núu tée-áⁿ cuendá sá vã nàá-güedé. ³³ Te duha càháⁿ-í chi núu nchòhó vá cáda ndèe iní-ndó dàña-ndo nchaa sá ndécú ndìhi-ndo cuendá chitnahá ñáhá-ndó xii-í, te vá cùu-ndó cuè ñáyiu tnàhá tnúhu ndìhi-í.

Ñí ñí nduu víxiⁿ
(Mt. 5:13; Mr. 9:50)

³⁴ Te ñí chi ío váha, dico núu na ndùu víxiⁿ-xi, ¿te nása-gá cada-o nàndìhi-o te núu ducaⁿ-i? ³⁵ Chi ñá túú-gã nàndìhi-xi nì sá dàcá ñuhu, te nì sá dàcá saháⁿ, chi cuendá-nã dǎngoyo-o. Te nchaa nchòhó ñáyiu ní xíndéohó tnúhu ní cáháⁿ-í-a xini ñuhu-xi ío váha cuáha-ndo cuendá —càchí-gá xáhaⁿ-gã xií-yu.

Cuendá ìⁿ mbéé quiti ní xíta
(Mt. 18:10-14)

¹ Te cue tée cuihna ìní-xi quide cobrá ñáhá xii ñáyiu cuendá impuèstú ndìhi cue dava-gá ñáyiu ndècu ichi cuehé ichi duha ní quexió-yu núu ndécú Jèsús cuendá cund-edóho-yu tnúhu càháⁿ-gá. ² Te ní ngüita cue tée cùu fariséú, ndìhi cue tée dàcuaha ñaha xii ñáyiu nchaa tnúhu ní chídó tnùnì ndíi Moisés xicáháⁿ cuèhé-güedé cuendá-gá, te càchí-güedé:

—Tée-a quèheⁿ cuendá-dé ñáyiu ndècu ichi cuehé ichi duha, te xèxi ndìhi ñaha-dé xii-yu —càchí-güedé xitnàha-güedé.

³ Te Jèsús ní cani-gá ìⁿ cuendú nàcuáa tecú tnùnì-güedé tnúhu-gá, te xáhaⁿ-gã xii-güedé:

⁴ —Ìⁿ tée ndècu ìⁿ ciendú mbéé-dé, te ní xíta ìⁿ-di, te nchòhó sa cùtnunì iní-ndó nàcuáa cada tée-ãⁿ, chi dándóo-dé cùmídícó sáhúⁿ cùmí-di ìⁿ yucu, te cúnúndúcú-dé quiti ní xíta xiáⁿ ndèe ndéé naníhí-dé-di. ⁵ Te òré ní naníhí-dé-di te ní dácáá-dé-di chíó-dé ní docó-dé-di sá cúdú iní-dé. ⁶ Te òré ní nasáá-dé vehe-dé, te ní dátacá-dé nchaa cue tée càháⁿ ndìhi-dé, ndìhi nchaa ñáyiu ndècu yatni ndìhi-dé, te ní xáhaⁿ-dè: “Chí ná cúdú ìní-ó vitna, chi ní naníhí-í mbéè-í quiti ní xíta ni cùu”, cachí-dé xáhaⁿ-dè xií-yu. ⁷ Te yúhú càchí-í sá ío-gá cúdú ìní Yã Ndiõxí ndìhi cue espíritú xínú cuèchi núu-gã núu ìⁿ ñáyiu ndècu ichi cuehé ichi duha na ndìxi cuèchi iní-yu

cuendá nchaa sá ñà túú vǎha quidé-yu ndécú-yu te tñí-yu ichi-gá, dàcúxí cǔmídíco sǎhúⁿ cǔmí ñǎyiu sa ní tuha ichi-gá, chi ñá túú-gǎ xíní ñùhu-xi ndixi cuéchi iní-yu chi sa ndécú-yu ichi-gá — cǎchí-gǎ xǎhaⁿ-gǎ xii-güedé.

Cuendá díhúⁿ ní xíta

⁸ Te ní cani Jèsús ingá cuendú núú-güedé, te xǎhaⁿ-gǎ:

— ñⁿ ñadihí ndécú ndihí-aⁿ úxí díhúⁿ cuixíⁿ, te ní dǎcuíta-aⁿ ñⁿ te ní teñuhú-aⁿ iti, te ní ngúíta-aⁿ nàtihu-aⁿ vehe, te súúni vǎha vǎha ní nanducu-aⁿ ndéé ní naníhí-aⁿ. ⁹ Te òré ní naníhí-aⁿ, te ní dátácá-aⁿ nchaa ñáyiu dìhí cǎháⁿ ndihí-aⁿ ndihí nchaa ñáyiu ndècu yatni ndihí-aⁿ, te ní xǎhaⁿ-aⁿ: “Chí ná cǔdíí ìní-ó vitna chi ní naníhí-í díhúⁿ-í sá ní xíta ní cùu”, cachí-aⁿ xǎhaⁿ-aⁿ xii-yu. ¹⁰ Te yúhú cǎchí-í sá dúcáⁿ ïo cǔdíí ìní nchaa espíritú xínú cuéchi núú Yǎ Ndiòxí, núú ñⁿ ñáyiu ndècu ichi cuehé ichi duha na ndixi cuéchi iní-yu cuendá nchaa sá ñà túú vǎha quidé-yu, te tñí-yu ichi-gá — cǎchí-gǎ xǎhaⁿ-gǎ xii-güedé.

Cuendá ñⁿ téé ñá túú ní quide váha

¹¹ Te ní cani tucu Jèsús ingá cuendú núú-güedé, te xǎhaⁿ-gǎ:

— ñⁿ téé ndècu úú déhe ducuⁿ-dé, ¹² te téé líhli-gá ní xǎhaⁿ-dē xii tǎtá-dē: “Táu, taxi-n tǎhú sǎ cúu cuendá-í”, cǎchí-dé xǎhaⁿ-dē. Te tǎtá-dē-áⁿ ní sǎñaha-dē

ndí dííⁿ núú-güedé sá cúu cuendá-güedé. ¹³ Te núú sàcú-ni nduu, te déhe-dé téé líhli-gá-áⁿ ní nadico-dē nchaa sá ní sǎñaha tǎtá-dē, te ní xica-dé cuáháⁿ-dé ñⁿ ñuú xícá, te yácáⁿ ní tñí-dé ñⁿ ichi cuéhé ichi duha, te ní ndihí díhúⁿ-dē ní dándóñùhu-dé ndihí cue téé cǎháⁿ ndihí-dé, ndihí nchaa ñáyiu dìhí xǎndecu ichi díí iní. ¹⁴ Te ní ndihí ndoo díhúⁿ-dē ní dándóñùhu-dé, te núú sàcú-ni nduu ní sǎá tnamá ñuú núú ndécú-dē-áⁿ, te ñá ñihí-gá-dé sá cǎxí-dé, te xihí-dé docó. ¹⁵ Núú ní xica-dé cuáháⁿ ndúcú chiuⁿ-dé núú ñⁿ téé diu-ni ñuú xiáⁿ, te téé-áⁿ ní sǎha chiuⁿ ñaha-dé ñⁿ xichi núú ñúhú-dē coto-dé cùchí. ¹⁶ Te súúni xihí-dé docó te cuíni-dé caxi-dé nchaa sá sǎha-yu cùchí-áⁿ ní cùu, dico ñá túú ní sǎñahá-yu xii-dé. ¹⁷ Te uuⁿni ní sani váha iní-dé, te ní cachí-dé: “Ío cuéhé cue téé xínu cuechi vehe tǎtá-í te ío cuéhé sǎ xéxi-güedé ndécú, te yúhú duha ndòho-í docó iha! ¹⁸ Te ndacuíñí-í te núhú-í vehe tǎtá-í, te cúñaha-í xii-dé: Táu, ñá túú ní quide váha-í núú Yǎ Ndiòxí te ní ñà túú ní quide váha-í núú-n, ¹⁹ te ñá túú-gǎ tǎu-í sá cúu-í déhe-n vitna, te cada ñaha-nǎ-n xii-í dǎtná ñⁿ téé xínu cuechi núú-n”, duha ní sani iní-dé cúñaha-dē xii tǎtá-dē. ²⁰ Te sǎtá dúcáⁿ ní sani iní-dé, te ní natnñ-dé ichi cuánuhú-dé vehe tǎtá-dé, te xica-gǎ cuánuhú-dé ní xiní ñáhá tǎtá-dē xii-dé te ní cundáhú iní ñáhá-dē. Te xínu tǎtá-dē-áⁿ ní sǎháⁿ nútnahá ñáhá-dē, te ní numi

ñaha-dě, te ío váha ní cáháⁿ ndíhi ñaha-dě. ²¹ Te ní xáhaⁿ dēhe-dé-áⁿ xii-dé: “Táu, ñá túú ní quide váha-í núú Yá Ndiõxí te ni ñà túú ní quide váha-í núú-n, te ñá túú-gă tàú-í sá cùú-í dēhe-n vitna”, cachí-dé xăhaⁿ-dě.

²² 'Dico tătá-dě-áⁿ nĩ xáhaⁿ-dě xii cue tée xinu cuechi núú-dě: “Chí quēñùhu ndíhi-ni dóó váha-gá cuáha-ndo dēhe-í-a na cuihnu-dé, ndíhi ìⁿ dehé ná quíhi díquí ndáhá-dě, ndíhi chàú váha na quíhi-dé.

²³ Te quíhíⁿ ngeheⁿ-ndo ìⁿ ndicutu numa quiti caváha-gá, te cahni-ndo-di, te na càda-o vico, te na càxi-o-di.

²⁴ Chí dēhe-í-a ní sani iní-í sá nĩ xíhí-dé ní cùu, te ñáhá chi ndècu vívú-dě, te ní sani tucu iní-í sá nĩ xíta-dé ní cùu te ní nasáá méé-dě”, cächí-dé xăhaⁿ-dě xii cue tée xinu cuechi núú-dě-áⁿ. Te ní ngúíta-güedé ní quide-güedé vico.

²⁵ Te dēhe-dé tée sàcuéhé-gă cuáháⁿ-dé yucu, te òré cuándixi-dé tá ndùu yatni-dé vehe, te ní tecú dóho-dé ío yaá cùú vico. ²⁶ Te ní cana-dé ìⁿ tée xinu cuechi, te ní xicáⁿ tnúhú-dě núú-dě ná cuendá ducaⁿ ío yaá. ²⁷ Te tée xinu cuechi-áⁿ nĩ xáhaⁿ-dě: “Ñaní-n tée cuáháⁿ ní cùu ní nasáá-dé, te tătá-n nĩ táúchíúⁿ-dě ní xíhí ìⁿ ndicutu nùma quiti caváha-gá cuendá sá nĩ nasáá váha-dé”, cächí-dé xăhaⁿ-dě.

²⁸ 'Dico ñaní-dé tée sàcuéhé-áⁿ nĩ cudééⁿ-dě, te ní cachí-dé sá vă ndíhu-dé vehe cundecu-dé vico-áⁿ ní cùu, dico ní quee tătá-güedě

ní cáháⁿ ndàhú-dé núú-dě cuendá ndíhu-dé. ²⁹ Te ní xáhaⁿ-dě xii tătá-dě: “Táu, cundedóho váha saú-n tnúhu na càháⁿ-í-a, yúhú ío cuéhé cuíá nĩ cuu xinu cuechi-í núú-n, te ni ìⁿ xito ñá túú quide sáá iní-í núú-n, te ni ìⁿ chivá líhli ñá túú tàxi-n-di caxi díí iní-í-di ndíhi cue tée cáháⁿ ndíhi-í. ³⁰ Te vitna ní nasáá dēhe-n tée ní sáháⁿ ní dándóñùhu díhúⁿ-n ndíhi nchaa ñáyiú xíndecu ichi díí iní. Te ní sahní-n ìⁿ ndicutu numa quiti caváha-gá sá cuendá-dé”, cächí-dé xăhaⁿ-dě xii tătá-dě. ³¹ Te ní xáhaⁿ tătá-dě xii-dé: “Yòhó dēhe-í ducaⁿ-ni ndècu ndíhi ñaha-n xii-í, te nchaa sá ndécú ndíhi-í cùú-xí cuendá-n. ³² Te vitna dacuití tàú-xi sá cadá-ó vico, te cudíí iní-ó, chi ñaní-n-áⁿ ní quide-í cuendá sá ní xíhí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, cächí-dé xăhaⁿ-dě xii dēhe-dé tée sàcuéhé-gă-áⁿ —duha cuáháⁿ cuendú ní cani Jèsús núú-güedě.

16

Nàcuáa ní quide ìⁿ tée tàxi tnuní ñáhá xii cue tée xinu cuechi

¹ Te Jèsús xáhaⁿ-gă xii cue tée xica cuu ndíhi-gá:

—Ní xíndecu ìⁿ tée cuica, te ducaⁿ nĩ xíndecu ìⁿ tée ní taxi tnuní ñáhá xii cue tée ní xinu cuechi núú-dě. Te tée-áⁿ nĩ xini ñáhá ñáyiú dùhu-dé díhúⁿ tée cùu patróóⁿ-dě, te cuáháⁿ-dé dándóñùhu-dé, te ní xáhăⁿ-yu xii tée cùu patróóⁿ-dě sá dúcáⁿ quide-dé.

2 Te tée cùu patróón-dě-án nĩ cana ñaha-dě xii-dé, te ní xáhaⁿ-dě: “¿Ná cuendá duha càháⁿ ñáyiú cuendá-n? Yáchí chi na tàxi cuendá-n nchàa chiuⁿ ní quide-n, chi vitna te vá táxi tnùnì-gá-n cuè tée xìnu cuechi núú-í”, càchí-dé xáhaⁿ-dě. 3 Te tée tàxi tnunì ñáhá xii cue tée xìnu cuechi-án nĩ sani iní-dé: “¿Te nása cada-í vitna na quèhndé patróón-í chiuⁿ-í? Chi ñá cùndèe-gá-í cada-í chiuⁿ vée, te cùcahaⁿ núú-í cácaⁿ ndàhú-í. 4 Dico duha cada-í cuendá queheⁿ cuendá ñáhá ñáyiú vehé-yu òré ná quèhndé duuⁿ-ná patróón-í chiuⁿ-í”, duha ní sani iní-dé. 5 Te sátá dúcáⁿ te ní cana-dé ìⁿ ìⁿ cue tée tàú núú patróón-güedè. Te tée díhna ní xícáⁿ tnúhú-dě núú-dě, te xáhaⁿ-dě: “¿Ndèé dau tàú-n núú patróón-í?”, càchí-dé xáhaⁿ-dě. 6 Te tée-án nĩ xáhaⁿ-dě: “Tàú-í ìⁿ cièndú bàrril acití”, càchí-dé xáhaⁿ-dě. Te tée tàxi tnunì ñáhá xii cue tée xìnu cuechi-án nĩ xáhaⁿ-dě: “Iha náu reciú-n-á, te ndadúha ingá sá ùdico úxí taxi-n”, càchí-dé xáhaⁿ-dě. 7 Te dàtnùnì ní xícáⁿ tnúhú tucu-dé núú ìngá-dé, te xáhaⁿ-dě: “Te yòhó, ¿ndèé dau tàú-n-í?”, càchí-dé xáhaⁿ-dě. Te tée tàú-án nĩ xáhaⁿ-dě: “Ìⁿ cièndú ngohnchi triú tàú-í”, càchí-dé xáhaⁿ-dě. Te tée tàxi tnunì ñáhá xii cue tée xìnu cuechi-án nĩ xáhaⁿ-dě: “Iha náu reciú-n-á, te cadúha ingá sá cùmídícó-nă taxi-n”, càchí-dé xáhaⁿ-dě. 8 Te tée cùu patróón-án nĩ cachí-dé sá ìo váha ñùhu díquí tée dùhu-án nàcuáa cada-dé cundecu váha-dé. Te nchaa ñáyiú

xĩndecu ichi cuèhé ichi duha, ìo-gá váha ñùhu díquí-yu nàcuáa cada-yu cundecu váha-yu ndihì nchaa ñáyiú cùndihì-yu dàcúúxí ñáyiú ndècu ichi Yá Ndiòxí.

9 Te yúhú càchí-í sá cáda-ndó sã váha ndihì nchaa sá ndécú ndihì-ndo ní cuáha ñuyiú yícá cuèchi-a, te ducaⁿ te coo cue tée ìo váha tnahá tnúhu ndihì-ndo, te òré ná ndihì nchaa sá ìo ñuyiú-a, te Yá Ndiòxí queheⁿ cuendá ñáhá-gã xii-ndo, te cundecu-ndo ndihì-gá ní caa ní quíhìⁿ.

10 Te núu ìⁿ tée quide ndáá cuèi ìⁿ chiuⁿ líhli na càda-dé, te diu-ni ducaⁿ quide ndáá-dé cuèi ìⁿ chiuⁿ cahnu na cada-dé. Dico tée ñá túú quide ndáá, chi cuèi chiuⁿ líhli àdi chiuⁿ cahnu na cada-dé dico ìⁿ-ni quide-dé. 11 Te núu nchòhó vá cáda-ndó sã váha ndihì nchaa sá ní cuáha ñuyiú yícá cuèchi-a ña, te Yá Ndiòxí vá táxi-gã sá váha ndècu ndihì-gá xii-ndo. 12 Te núu vá cáda ndáá-ndó còto-ndo nchaa sá táxi nùu tnahá ñáyiú-ndo, te vá yòo taxi sá ndúú tàhú-ndó.

13 Te ñi ìⁿ tée xìnu cuechi vá ndácú-dě cunu cuechi-dě núú úú patróón, chi tée-án cuu váha iní-dé núú ìⁿ patróón-dě te tnii-dé nchaa tnúhu càháⁿ patróón tée cùu váha iní-dé núú-xi-án. Te núú ìngá tucu patróón-dě vá cúú váha iní-dé, te ñi vã tnii-dě tnúhu càháⁿ patróón-dě-án. Te ducaⁿ sãtnahá-xi cùu nchòhó chi vá ndácú-ndó cunu cuechi-ndo núú Yá Ndiòxí te cuhuⁿ

iní-ndó nchaa sá ío ñuyíú-a
—càchí-gá xáhaⁿ-gã xii-güedé.

14 Te nchaa cue tée cùu
fariséú ío ñùhu iní-güedé
nchaa sá ío ñuyíú-a, te
xíndedóho-güedé nchaa tnúhu
càháⁿ Jèsús, te ní cáháⁿ
yíchí-güedé cuendá-gá. 15 Te
Jèsús ní xáhaⁿ-gã xii-güedé:

—Nchòhó cúú-ndó cue
tée ío váha càháⁿ núú ñáyi
cuendá-ni sá cuíní-ndó cáháⁿ
váha-yu cuendá-ndó, dico Yá
Ndiòxí xíní ndáá-gá nàcuáa
càa iní-ndó ìⁿ ìⁿ-ndo, te
nchaa sá càchí cue ñáyi
ñuyíú-a sá ío nàndíhi, Yá
Ndiòxí dáquèe tíhú-gã.

*Cuendá nchaa tnúhu ní
chídó tnùní ndíi Moisés*

16 Te nchaa tnúhu ní chídó
tnùní ndíi Moisés cúnù-xi
ní cuu, ndíhi nchaa tnúhu
ní chídó tnùní cue tée ní
xóo cáháⁿ tnúhu Yá Ndiòxí
ndéé sanaha. Dico cútnàhá
ní ngúita té Juáá tée ní xóo
dacuàndute ñaha xii ñáyi
ní cáháⁿ-dé tnúhu-í, ndéé
dává-áⁿ ñà túú-gã ní cùnuu
nchaa tnúhu ní chídó tnùní
ndíi Moisés ndíhi nchaa tnúhu
ní chídó tnùní cue tée ní
xóo cáháⁿ tnúhu Yá Ndiòxí
ndéé sanaha. Te ñu-ni ndéé
dává-áⁿ ñi quesaha ta təcú
tnùní ñáyi nàcuáa ndíhu
ndaha ñàha Yá Ndiòxí xi-yu,
te vai ñáyi ío sàni iní-yu vitna
nàcuáa cada-yu ndíhu ndaha
ñàha Yá Ndiòxí xi-yu. 17 Te
nchaa tnúhu ní chídó tnùní
ndíi Moisés ío ndáá càháⁿ-xi,
te ndíhi-gá naa andi ndíhi
ñuyíú dàcúxí sã ndíhi ìⁿ
ìⁿ tnúhu-áⁿ cada-xi nàcuáa
càháⁿ-xi.

*Jèsús càháⁿ-gá cuendá ñáyi
dàña tnaha*

(Mt. 19:1-12; Mr. 10:1-12)

18 Te núu ìⁿ tée na dàña
tnaha-dé, ndíhi ñadíhi-dé,
te tnándaha tucu-dé ndíhi
ingá-yu, te nèhé víhi quide-dé
te núu ducaⁿ na càda-dé, te
tée na tnándaha ndíhi ñaha ní
dáña yì-xi, te ñu-ni ducaⁿ
ñà túú cùu-xi sá váha te núu
ducaⁿ na càda-yu —càchí-gá
xáhaⁿ-gã xii-güedé.

*Cuendá ìⁿ tée nàni Lázaru
ndíhi cuendá ìⁿ tée cuica*

19 Te xáhaⁿ tucu-gá
xii-güedé:

—Ní xíndecu ìⁿ tée cuica,
te ní xóo cuihnu-dé mee-ni
dóo váha dóo víi càa, te
nchaa nduu súúní váha ní
xóo cada-dé vico vehe-dé.
20 Te ní xíndecu tucu ìⁿ tée
ndàhú ní xínani-dé Lázaru, te
tée-áⁿ ní cuhú-dé ní xíndeé-dé
nitùhú-dé ndíhi, te ìⁿ nduu
ìⁿ nduu ní xóo taxinucóo
ñaha-güedé xii-dé yuyèhe tée
cuica-áⁿ. 21 Te tée ndàhú-áⁿ
ní xóo cuú-dé docó, te ní
xóo cuíní-dé caxi-dé nchaa
sá ñà túú-gã ní xóo yáha
caxi tée cuica-áⁿ, te ñà túú
ní xóo níhi-dé. Te cuèi
iná ní xóo quíhíⁿ-di ní xóo
nayuu-di nchaa núu ndíhi
ndéé-dé-áⁿ. 22 Te ní sáá ìⁿ
nduu te ní xíhi tée ndàhú-áⁿ,
te cue espíritú xínú cuèchi
núu Yá Ndiòxí ndéca ñaha-xi
xii-dé cuánda núu ndécú tē
Abrahám cundecu-dé. Te ní
sáá nduu ní xíhi tée cuica-áⁿ
tnàhá-dé, te ní chindúxi
ñaha-güedé xii-dé. 23 Te ní
sáá-dé núu xíndecu nchaa
ñáyi ní xíhi ñà túú ní quide
ndáá núu Yá Ndiòxí te xíaⁿ
ío ndòho-dé ndécú-dé, te ní

ndonehe núú-dě te xica ní xini-dé té Àbrahám ndihi té Lázarú-áⁿ xíndecu-güedé. ²⁴ Te níhi ní cáháⁿ-dé, te xăhaⁿ-dě: “Yòhó tătá Àbrahám, cundàhú iní ñáhá xii-í, te cùñaha xii té Lázarú ná dândaxiⁿ-dé díquí ndáhá-dě, te na quixi-dé dandàxiⁿ-dé yàa-í, chi ío ndòho-í ñùhù-í núú ñùhú núú càyú-a”, cächí-dé xăhaⁿ-dě xii té Àbrahám. ²⁵ Dico té Àbrahám ní xăhaⁿ-dě: “Ndàhú yòhó ñanı tñáhà-í, dandàcu iní sá ío váha ní xíndecu-ñ ñùyú, te té Lázarú ío ndàhú ní ndoho-dé ní xíndecu-dé. Te vitna ní nucúndecu váha-dé iha, te yòhó ndóhó-n vitna. ²⁶ Te ñá díú-ní sá xăⁿ tucu, chi cuádava ndècu ñⁿ déhyá cúnú ñùhú ñèhu-xi núú ndécú-ó, te cuèi nchaa ñáyiú xíndecu iha na cächí iní-yu quixí-yu núú ndécú-ndó dico vá ndácú-yu, te ni nchòhó vá ndácú-ndó quixi-ndo núú ndécú-ndí”, cächí-dé xăhaⁿ-dě. ²⁷ Te ní xăhaⁿ tée cuica-ăⁿ: “Te núu ducaⁿ te cáháⁿ ndàhú-í núú yòhó tătá Àbrahám vitna sá téndàha-n té Lázarú ná quihíⁿ-dé vehe tătà-í, ²⁸ chi ndècu úhúⁿ-gá ñanı-í, te na cùñaha-dě xii-güedé sá vă cádá-güedé dàtná ní guide-í cuendá sá vă quixí-güedé tñáhá-güedé núú ndécú-í ndóhò-í-a”, cächí-dé xăhaⁿ-dě. ²⁹ Te té Àbrahám ní xăhaⁿ-dě: “Mee-güedé ndécú ndihi-güedé nchaa tñuhu ní chídó tñuní ndii Moisés, ndihi nchaa tñuhu ní chídó tñuní cue tée ní xóo cáháⁿ tñuhu Yá Ndiòxí ndéé sanaha, te nchaa tñuhu-áⁿ ná tñi-güedé nàcuáa

càháⁿ-xi”, cächí-dé xăhaⁿ-dě xii-dé. ³⁰ Te ní xăhaⁿ tucu tée cuica-ăⁿ: “Tătá Àbrahám, dico vá cádá cuendá-güedé nchaa tñuhu-áⁿ, dico núu ñⁿ ñáyiú ñá túú-gă ndécú ñùyú ñⁿ ñáyiú ndècu ndihi-n quihíⁿ-yu cáháⁿ ndihi ñáhá-yu xii-güedé nàcuáa ndùu tñuhu váha, te ndixi cuèchi iní-güedé nchaa sá ñà túú guide váha-güedé ndécú-güedé, te cada váha-güedé”, cächí-dé xăhaⁿ-dě xii-dé. ³¹ Dico té Àbrahám ní xăhaⁿ-dě: “Te núu ñá túú cuini-güedé tñi-güedé tñuhu ní cáháⁿ ndii Moisés, ndihi tñuhu ní cáháⁿ cue tée ní xóo cáháⁿ tñuhu Yá Ndiòxí ndéé sanaha ña, te ñi-ni ducaⁿ càda-güedé cuèi ñⁿ ñáyiú ní xihí ná ndòtó-yu cùñáhá-yu nàcuáa ndùu tñuhu váha, chi vá quindáa iní-güedé”, cächí té Àbrahám xăhaⁿ-dě xii tée cuica-ăⁿ — cächí Jèsús xăhaⁿ-gă xii cue tée cùu fariséu.

17

Quihi iní-ó vă cùndècu-o ichi cuehé ichi duha
(Mt. 18:6-7, 21-22; Mr. 9:42)

¹ Te Jèsús ní xăhaⁿ-gă xii cue tée xica cuu ndihi-gá:

—Dacuítí sá cóo cuè tée dacàháⁿ-güedé ñáyiú cadá-yu nándi sá cuèhé sá dúhá, jico ndàhú ní cuu cue tée ducaⁿ na dàcaháⁿ ñáhá xii-yu cadá-yu nándi sá cuèhé sá dúhá! ² Chi váha-gá sá ñu na dàcutu ndéé ñáyiú ñⁿ yúú yódó dúcúⁿ-güedé te dàquéé ñáhá-yu xii-güedé xiti

ndute làmár, te ñá díú sǎ cùndècu-güedé dacàháⁿ-güedé ñáyiú cadá-yu nándi sá cuèhé sá dúhá, cuèi ñáyiú ndàhú iní-xi dandàhú-güedé. ³ Te ío quihi iní-ndó cùndecu-ndo.

⁷ Te núu ìⁿ ñaní tnáhá-ndó quíde-dé ìⁿ sá ñà túú tàú-dé cada-dé sá cúú-xí-ndó te cáháⁿ-ndó dõho-dé, te núu ní ndixi cuéchi iní-dé sá ñà túú ní quíde váha-dé, te cada càhnu iní-ndó sá ñi quíde-dé. ⁴ Te cuèi úsá xito na càda-dé nándi sá ñà túú tàú-dé cada-dé sá cúú-xí-ndó ìⁿ nduu, te núu na quíxi-dé úsá xito núú-ndó, te cachí-dé sá vǎ dúcáⁿ-gǎ cada-dé, te xini ñuhu-xi cada cahnu iní-ndó-dě —càchí-gǎ xáhaⁿ-gǎ xii-güedé.

Ñáyiú sàndáá ndisa iní-xi

⁵ Te ní xáhaⁿ cuè téé xica cuu ndihi Jesús xii-gǎ:

—Chindee ñàha xii-ndí cuèndá ducaⁿ te quíndáá-gǎ iní-ndí sá Yǎ Ndióxi ndácú-gǎ quíde-gǎ nchaa sá vǎha —càchí-güedé xáhaⁿ-güedé xii-gǎ.

⁶ Te ní xáhaⁿ Jèsús:

—Te núu nchòhó quíndáá ndisa iní-ndó sùúni cuèdicó lùha líj dátá cuíni-ndó càa ìⁿ ndíquiⁿ yutnu nàni mostázá, te ducaⁿ te cuu cúñaha-ndo xii ìⁿ yutnu: “Quene-n ìha te quíhíⁿ-n cuìhnu-n xití làmár”, duha cúñaha-ndo. Te ducaⁿ càda-xi te núu na quíndáá ndisa iní ñáhá-ndó xii-í —càchí-gǎ xáhaⁿ-gǎ xii-güedé.

Nàcuáa tàú ìⁿ téé xinu cuechi cada-dé

⁷ Te xáhaⁿ tùcu-gǎ xii-güedé:

—Te núu ìⁿ nchòhó ndécú ìⁿ téé xinu cuechi núú-ndó, te cuáháⁿ-dé yucu cuángada chiúⁿ-dé, àdi cuáháⁿ-dé yucu coto-dé quiti, te òré ní nasáá-dé vehe sǎ ñi sáháⁿ-dé yucu, te vǎ cúñaha nchòhó cue téé cùu patróóⁿ-dě xii-dé: “Yáchí nehé caxi-n dítá”, vǎ dúhá cúñaha-ndo. ⁸ Chi nchòhó cue téé cùu patróóⁿ-dě cúñaha-ndo xii-dé: “Cundihi iní cada túha sá cúdini-í, te díhna-gǎ-í caxi-í dítá te dátñuni caxi-n”, duha cúñaha nchòhó cue téé cùu patróóⁿ xii-dé. ⁹ Te òré ná ndíhi chiúⁿ ní táhú nchòhó cue téé cùu patróóⁿ cada téé xinu cuechi núú-ndó, te ñà túú tàú-ndó ndàcáⁿ táhú-ndó núú téé xinu cuechi núú-ndó. ¹⁰ Te duha càháⁿ-í chi núu òré ná ndíhi nchaa chiuⁿ ní táhú Yǎ Ndióxi cada-ndo, te cachí-ndó: “Nchúhú cúú-ndí cue téé xinu cuechi núú Yǎ Ndióxi, dico ñà túú tàú-gǎ ndacáⁿ táhú-gǎ núú-ndí, chi mee-ni chiuⁿ ní táhú-gǎ ní quíde-ndí”, duha cachí-ndó —càchí-gǎ xáhaⁿ-gǎ xii-güedé.

Jèsús quíde tǎtna-gǎ úxí cue téé tnàhá cuéhé sǎ dátèhyú ni-hnu-xi yiqui cùñú ñáyiú

¹¹ Te ñuhu Jesús ichi cuáháⁿ-gǎ ñuú Jerusalén, te ní yáha-gǎ núú ràyá distritú Sàmariá ndihi distritú Galileá. ¹² Te ta cùyatni-gǎ ìⁿ ñuú líhli cuáháⁿ, te ní sátnahá ñáhá úxí tnàhá cue téé cùhú xii-gǎ, te tnàhá-güedé cuéhé sǎ dátèhyú nihnu-xi yiqui cùñú-ó dico xica lùha ní ngúnu tníi-güedé, ¹³ te níhi ní cáháⁿ-güedé, te xáhaⁿ-güedé xii Jèsús:

—¡Mèstrú, cundàhú iní ñáhá xii-ndí! —càchí-güedé xáhaⁿ-güedé xii-gá.

14 Te òrè ní xiní ñáhá Jèsús xii-güedé, te ní xáhaⁿ-gá:

—Chí cuáháⁿ núú dütú ná cundehe ñaha-dé xii-ndo —càchí-gá xáhaⁿ-gá xii-güedé.

Te ní xica-güedé cuáháⁿ-güedé ñáyiu yìndaha-gá —càchí-gá xáhaⁿ-gá xii-güedé.

te ichi-ni ñùhu-güedé cuáháⁿ-güedé ní ndúha-güedé cuéhé tñàhá-güedé. 15 Te nchaa-güedé ní cutnùnì iní-güedé sá ñí ndúha-güedé, dico ìⁿ-ni-dé ní nacuico-dé, te ní ngüíta-dé níhi ní cáháⁿ-dé, te ní cachí-dé sá ìo càhnu cuu Yá Ndiòxí. 16 Te ní ngüíñí xítí-dé núú Jèsús, te ní nuu núú-dé ndàa núú ñúhú ndàcáⁿ táhú-dé núú-gá. Te téé-áⁿ cúú-dé téé distritú Sàmariá. 17 Te Jèsús ní cachí-gá:

—Úxí tñàhá-güedé ní ndúha cuéhé tñàhá-güedé. ¿Te ndéé ndécú dàva-gá-güedé-i? 18 ¿Te náa ìⁿdii-ni téé ingá ñuú-a ní nacuico-dé ndàcáⁿ táhú-dé núú Yá Ndiòxí, te càchí-dé sá ìo càhnu cuu-gá ñã? —càchí-gá.

19 Te ní xáhaⁿ-gá xii téé-áⁿ:

—Ndacuiñí te núhú-n, chi sa ní ndúha-n cuéhé tñàhá-n, chi ní sándáá iní-n Yá Ndiòxí —càchí-gá xáhaⁿ-gá xii-dé.

Nàcuáa yìndaha ñaha Yá Ndiòxí

(Mt. 24:23-28, 36-41)

20 Te cue téé cùu fariséú ní xicáⁿ tnúhú-güedé núú Jèsús núu ná ama ngüíta Yá Ndiòxí ndíhu ndaha-gá ñáyiu. Te ní xáhaⁿ-gá:

—Ñá túú ñã cada-xi ñuyíú quini-ndó cuendá cutnùnì iní-ndó sá ndíhu ndaha ñaha Yá Ndiòxí xii-ndo. 21 Te ní vã yõ cachí: “Iha ndècu-gá táxí tnùnì-gá, àdi yacáⁿ ndécú-gá táxí tnùnì-gá”, chi tnuú-ndó sà ndecu-gá ndíhi nchaa ñáyiu yìndaha-gá —càchí-gá xáhaⁿ-gá xii-güedé.

22 Te ní xáhaⁿ-gá xii cue téé xica cuu ndíhi-gá:

—Te nchòhó chi sáá nduu, te cachí iní-ndó sá sùúni cuèdicó ìⁿ nduu quini ñáhá-ndó xii yúhú Téé cùu ñaní tñàhá-ndó nchàa-ndo, dico vá quini ñáhá-gá-ndó xii-í. 23 Te coo ñáyiu cúñàhá-yu xii-ndo: “Iha ndècu-gá, áⁿ yacáⁿ ndécú-gá”, quesàhá-yu cúñàhá-yu xii-ndo. Dico vá quindáá iní-ndó quíhíⁿ-ndó ndíhí-yu núú càchí-yu, te ní vã cánì iní-ndó quíhíⁿ méé-ndó. 24 Chi dàtná cuini-ndó quide-xi oré sáá ndúté àndiu, chi uuⁿi dàyehé-xi nihí ñuyíú, ducaⁿ càda-xi nduu na quixi tucu yúhú Téé cùu ñaní tñàhá-ndó nchàa-ndo, te dàvá-áⁿ quini ñáhá nchàa-ndi túhú ñáyiu xii-í. 25 Dico díhna-gá ndoho vñi-í, te daquèe tíhú ñáhá ñáyiu ñuyíú-a xii-í. 26 Te cadá-yu dàtná ní quide ñáyiu ní xíndecu cútnàhá ní xíndecu té Nòé, te diu-ni ducaⁿ sãtnahá-xi cada nchaa ñáyiu ndècu vitna ndéé sáá nduu quixi tucu yúhú Téé cùu ñaní tñàhá-ndó nchàa-ndo. 27 Chi caxi-ni-yu, coho-ni-yu, te caca cuu-ni cue téé xica ndáhú, te tñàndaha-ni-yu, chi

ducaⁿ nĩ quidé-yu dává-áⁿ ndéé ní sáá nduu cuãnguee té Nöé xití bàrcú, te ní ngúita-xi ní cuuⁿ dáú nĩ ndaa ndute ñuyíú, te nchaá-yu ní xihí ní cáhá-yu dává-áⁿ. 28 Te ñu-ni ducaⁿ nĩ quide tucu ñáyiú cútñahá ní xíndecu té Löt, chí xéxi-yu xihí-yu, te sááⁿ-yu te nãdicó-yu, te xixitú-yu nãndi sá xixitú-yu, te nchaa cue téé xídacáá-güedě vehe. 29 Te òré ní quee té Löt ñuú Sòdomá, te ní ngoyo ñuhú andiú, te dàcá yúú sũúni ñicó ní nduu ñuhú-nã-xi, te ní xihí nchaandi túhú ñáyiú ñuú-áⁿ. 30 Te ñu-ni ducaⁿ sãtnahá-xi cada ñáyiú na sáá nduu quixi tucu yúhú Téé cùu ñaní tnáhá-ndó nchàa-ndo ñuyíú-a.

31 Te núu ñⁿ ñáyiú càndodó-yu díquí véhẽ-yu nduu-ãⁿ, te nĩ vá ndihu-gá-yu quehéⁿ-yu ñⁿ ndachíúⁿ-yu canehé-yu quihíⁿ, te ñáyiú cuáháⁿ yucu, te nĩ vá nùhú-gá-yu vehé-yu. 32 Te chí dándàcu iní nãcuáa ní yáha ñadìhí té Löt. 33 Te nchaa ñáyiú cuiní dàcácu nihnu mee-xi ñuyíú-a ña, te cuíta nihnú-yu, te nchaa ñáyiú na cùú sá cuendá-í, te naníhí tàhú-yu.

34 Te na càchí tnúhu tucu-í xii-ndo sã nduu-áⁿ, te núu úú-yu càa ñⁿ núu xito, te ñⁿ-yu ndanchitá-yu ndaa-yu andiú, te ñⁿ-yu quendóo. 35 Te núu úú ñáyiú ñihí nchicõ-yu ñⁿ-ni vehe, te ñⁿ-yu ndanchitá-yu ndaa-yu andiú, te ñⁿ-yu quendóo. 36 Te núu úú cue

tée yihí-güedé yucu, te ñⁿ-dé ndànchita-dé ndaa-dé andiú, te ñⁿ-dé quendóo —càchí-gá xáhaⁿ-gã xii-güedé.

37 Te sá dúcáⁿ nĩ cáháⁿ-gá nũu ní xicáⁿ tnúhú-güedě núú-gã, te xáhaⁿ-güedě xii-gá: —Mèstrú, ¿te ndéé ducaⁿ càda-xi-i? —cachí-güedě xáhaⁿ-güedě xii-gá.

Te ní xáhaⁿ-gã:

—Te nchòhó xini-ndó sã ncháá nũu yúcu yiqui cuñú ní xihí, te yacáⁿ tàcá cue ndixíí xéxi-güedé —cachí-gá xáhaⁿ-gã xii-güedé.

18

Jèsús càháⁿ-gá cuendá ñⁿ juéxi ndihí cuendá ñⁿ ñaha quèé

1 Te Jèsús ní cani-gá ñⁿ cuendú núú-güedě cuendá sá vã ná túhú iní-güedé cáháⁿ ndihí-güedé Yã Ndiõxí nchaa-ni òré. 2 Te xáhaⁿ-gã:

—Ñⁿ ñuú ndécú ñⁿ juéxi, te nĩ ñã túú sãndáá iní-dé Yã Ndiõxí, te nĩ ñⁿ tnúhu xáhaⁿ ñáyiú ñã túú cuiní-dé cada cuendá-dé. 3 Te ñu-ni ñuú-áⁿ ndécú tucu ñⁿ ñadìhí ñaha quèé, te ní sáháⁿ-aⁿ cáháⁿ ndàhú-aⁿ núú juéxi-áⁿ cuendá cada ndaa-dé ñⁿ cuéchi. 4 Te titní xito ní cuu sáháⁿ-aⁿ cáháⁿ ndàhú-aⁿ núú-dé te ñã túú cuiní-dé cada cuendá-dé tnúhu cáháⁿ-aⁿ ni cùu, te ndéé núú ñã cuú-gã te ní sani iní-dé: “Te cuéi ñã túú sãndáá iní-í Yã Ndiõxí, te nĩ ñã túú quide cuendá-í nchaa tnúhu cáháⁿ ñáyiú cada-í, 5 dico na càda ndaa-í cuendá ñaha quèé-a ndihí ñáyiú cùu úhú iní tnáhá ndihí-aⁿ, chi

vá cùndèe-gá iní-í nuu núu quixi-aⁿ dasátú iní ñáhá xii-í”, duha ní sani iní tée cùu juéxí-áⁿ —càchí-gá xáhaⁿ-gá xii-güedé.

6 Te ní xáhaⁿ tùcu-gá xii-güedé:

—Cada cuendá-ndó nàcuáa ní sani iní juéxí tée cuihna iní-xi-áⁿ. 7 Te Yá Ndiöxí ío chindee-gá nchaa ñáyiú ní cáháⁿ-gá cundecu ndihi-gá, chi cuéi nduu cuéi niú cáháⁿ ndihi ñáhá-yu xii-gá, te vá cùyàa-gá nachinaa-gá nchaa sá quidé ñàha nchaa ñáyiú cùu úhú iní ñáhá xii-yu. 8 Te ío ndíhi ducaⁿ càda-gá. Te òré ná quixi yúhú Téee cùu ñani tnáhá-ndó nchàa-ndo, ¿te náa naníhí-gá-í ñáyiú sàndáa ndisa iní Yá Ndiöxí-áⁿ? —càchí-gá xáhaⁿ-gá xii-güedé.

Nàcuáa quide ñⁿ téee cùu fariséu ndihi ñⁿ téee cùu cobradór

9 Te Jèsús ní cáháⁿ-gá núu ñáyiú nàcuáa quide ñáyiú sàni iní sá ío quide ndáá te dàquee tíhú-yu tnàha ñáyiú-yu, te xáhaⁿ-gá xii-yu:

10 —Úú cue téee cuáháⁿ-güedé veñúhu càhnu sá ío cùnuu cáháⁿ ndihi-güedé Yá Ndiöxí, te ñⁿ-dé cúú-dé téee cùu fariséu, te ingá-dé cúú-dé téee cuihna iní-xi quide cobra ñáhá xii ñáyiú cuendá impuèstú. 11 Te téee cùu fariséu-áⁿ nútní-dé cáháⁿ ndihi-dé Yá Ndiöxí, te xáhaⁿ-dè xii-gá: “Yòhó Dútú Ndiöxí ndàcáⁿ táhú-í núú-n, chi ñà túú quide-í dàtná quidé dàva-gá-güedé, chi dùhu-güedé, cáháⁿ

ndihi-güedé ñàdihí te ñà díú ñàdihí-güedé cúú-yu, te nándi-gá nchaa sá cuéhé sá dúhá quide-güedé, te ni ñà túú quide-í dàtná quidé téee cuihna iní-xi quide cobra ñáhá xii ñáyiú cuendá impuèstú ndécú íha. 12 Chi yúhú ñà túú tnàhí ná xéxi-í úú nduu xití samàná cuendá sá cáháⁿ ndihi ñàha-í xii-n, te nchaa sá ñihí-í te càhu-í úxí xichi, te ñⁿ xichi tàxi-í xii-n”, càchí-dé xáhaⁿ-dè xii Yá Ndiöxí. 13 Dico téee cuihna iní-xi quide cobra ñáhá xii ñáyiú cuendá impuèstú-áⁿ chi xica lùha nutnì-dé, te ni lùha ñà túú cùyí-dé ndonehe núú-dé andíu cuendá sá ndíxí cuéchi iní-dé nchaa sá ñà túú vàha quide-dé, te ndèdí ndaha-dé pèchú-dé sá ndíhú iní-dé, te xáhaⁿ-dè xii Yá Ndiöxí: “Yòhó Dútú Ndiöxí cundàhú iní ñáhá xii-í, chi ío cuéhé sá ñà túú vàha quide-í núú-n!”, càchí-dé xáhaⁿ-dè xii Yá Ndiöxí. 14 Te na càchí tnúhu-í xii-ndo sá téee cuihna iní-xi quide cobra ñáhá xii ñáyiú-áⁿ ní tedóho Yá Ndiöxí nchaa tnúhu ní cáháⁿ-dé, te ní quide càhnu iní-gá nchaa sá ñà túú vàha ní quide-dé, te cuánuhú-dé vehe-dé. Te téee cùu fariséu-áⁿ ñà túú ní tedóho ñàha Yá Ndiöxí xii-dé. Chi nchaa ñáyiú na càda cahnu mee-xi ñuyúú-a te vá cúú-yu ñáyiú cùnuu, te nchaa ñáyiú ñà túú quide cahnu mee-xi, ñáyiú-áⁿ cunúú-yu —càchí Jèsús xáhaⁿ-gá xii-yu.

Jèsús quidé ù-gá landú
(Mt. 19:13-15; Mr. 10:13-16)

15 Te ññ ũ ű ñáyiú ndécá-yú landú líhli cuáháⁿ núú Jèsús chí cuíní-yú sá téndàha ñaha-gá xii-güexi, te òré ní xiní cue téé xica cuu ndihí-gá sá ndécá-yú landú-áⁿ cuáháⁿ núú-gă, te ní ngüíta-güedé ténáá ñáhá-güedé xii-yú, te xăhaⁿ-güedé sá vă dúcáⁿ cadá-yú. 16 Dico Jèsús ní cana ñaha-gă xii-güedé, te ní xăhaⁿ-gă:

—Chí dáñá ná quixi nahi landú líhli-áⁿ nũú-í-a, te vă cadí-ndó ìchi-güexi, chí dàtná cúú văha iní cue landú líhli-áⁿ ducaⁿ cúú văha iní cue ñáyiú yindaha ñaha Yá Ndiöxí. 17 Te na cächí tnúhu ndáá-í xii-ndo să nũu vă quindáá iní ñáhá-ndó dàtná quidé dăva landú líhli şandáá iní ñáhá xii-í, te vă ndihu ndaha ñaha Yá Ndiöxí xii-ndo, te vă ndúú tăhú-ndó cundecu-ndo ndihí-gá ni caa ni quihíⁿ — cächí-gá xăhaⁿ-gă xii-güedé.

Ññ téé cuica căháⁿ ndihí-dé Jèsús

(Mt. 19:16-30; Mr. 10:17-31)

18 Te ññ téé cunuú ní xicáⁿ tnúhú-dé núú Jèsús, te xăhaⁿ-dē xii-gă:

—Yöhó Mèstrú, cùu-n téé ío văha iní-xi, te cuíní-í nũu vă cündèe iní-n cächí tnúhu-n nă cúú să văha cada-í cuendá nduu tăhú-í cundecu-í ndihí Yá Ndiöxí ni caa ni quihíⁿ — cächí-dé xăhaⁿ-dē xii-gă.

19 Te Jèsús ní xăhaⁿ-gă xii-dé:

—¿Te cùtnuní iní-n năcuáa ndúu tnúhu căháⁿ-n să yühú văha iní-ăⁿ? Chí ññdii díí-ni Yá Ndiöxí văha iní-gă. 20 Te

yöhó xiní-n năcuáa ní cachí Yă Ndiöxí cada ñáyiú, te duha ní cachí-gă: “Nchöhó cue téé vă căháⁿ ndihí-ndo ñădihí te núú ñă díú ñădihí-ndó cúú-yú, te ducaⁿ-ni nchöhó cue ñáyiú ñihí tucu vă căháⁿ ndihí-ndo tēe te núú ñă díú yñ-ndo cuu-güedé, te vă cahní-ndó tnăha ñáyiú-ndo, te ni vă dúhú-ndó să ndécú ndihí-yú, te ni vă dăcàcu-ndo cuéchi neñúú sá cúú-xí tnăha ñáyiú-ndo, te canehe-ndo să yññuhu núú tătá-ndó ndihí núú năná-ndó”, duha ní cachí Yă Ndiöxí cada ñáyiú — cächí Jèsús xăhaⁿ-gă xii-dé.

21 Te téé-áⁿ nĩ xăhaⁿ-dē xii-gă:

—Nchaa xíáⁿ ní ngüíta-í quidè-í ndéé cùtnăhá cúú landú-í — cächí-dé xăhaⁿ-dē xii-gă.

22 Te Jèsús ní xăhaⁿ-gă xii-dé:

—Dico cùmání ñngá núú să cadá-n, vitna te quihíⁿ-n te dico-n nchăa sá ndécú ndihí-n, te díhúⁿ-n cuăha tăhú-n cué ñáyiú ndăhú, te ducaⁿ te nduu tăhú-n cundecu văha-n nũú ndécú Yă Ndiöxí táxi tnúní-gă, te na yăha ducaⁿ cada-n te quixi-n chìtnăhá ñáhá-n xii-í — cächí-gă xăhaⁿ-gă xii-dé.

23 Te sá dúcáⁿ nĩ xăhaⁿ Jèsús xii-dé, te ío ní cundiyí-dé, chí ío cuica-dē. 24 Te sá nĩ xiní ñáhá Jèsús xii-dé cundiyí-dé, núú ní cachí-gă:

—Ío úhú quindáá iní ñáyiú cuica Yă Ndiöxí cuendá ndihu ndaha ñaha-gă xii-yú! 25 Te yáchí-gă yăha ññ căméyu

yaú ìⁿ yiqui tìcú dàcúúxí sǎ quìndáá iní ìⁿ ñáyiu cuica Yǎ Ndiǒxí cuendá ndíhu ndaha ñàha-gǎ xii-yu —duha ní cachí-gǎ.

26 Te nchaa ñáyiu ní tecú dóho-xi tnúhu ní cáháⁿ-gǎ ní xáhǎⁿ-yu xii-gǎ:

—¿Te yoo naníhí tàhú te núu ducaⁿ vaiⁿ? —càchí-yu xáhǎⁿ-yu xii-gǎ.

27 Te Jèsús ní xáhaⁿ-gǎ xii-yu:

—Cue ñáyiu ñuyíú-a chi vá ndácū-yu ná cadá-yu nàcuáa ndíhu ndaha ñàha Yǎ Ndiǒxí xii-yu, dico mee-gǎ chi ndacu-gǎ ndíhu ndaha ñàha-gǎ xii-yu chi nchaa sá vǎha ndàcu-gǎ quidé-gǎ —càchí-gǎ xáhaⁿ-gǎ xii-yu.

28 Te té Pèlú ní xáhaⁿ-dǎ xii-gǎ:

—Nchúhú ní dándǒo-ndí nchaa sá ndécú ndíhi-ndí, te ní tuha ñaha-ndí xii-n —càchí-dé xáhaⁿ-dǎ xii-gǎ.

29 Te ní xáhaⁿ-gǎ xii ñáyiu:

—Na càchí tnúhu ndáá-í xii-ndo sǎ ncháá ñáyiu na dándóo vehe-xi, àdi tátá-xi, nǎná-xi, ñaní-xi, cúha-xi, ñadìhí-xi, déhe-xi cuendá sá cuìní-yu ndíhu ndaha ñàha Yǎ Ndiǒxí xii-yu,³⁰ te ío-gǎ cuéhé sǎ cuǎñaha-gǎ xii-yu cundecu ndíhí-yu, te ñá díú-ní xǎⁿ, chi tnàhá nduu táhǔ-yu cundecu ndíhi ñàhá-yu xii-í ní caa ní quíhíⁿ ná sàá nduu —càchí-gǎ xáhaⁿ-gǎ xii-yu.

Jèsús càháⁿ tucu-gǎ sá cáhni ñàha-güedé xii-gǎ

(Mt. 20:17-19; Mr. 10:32-34)

31 Te Jèsús ní taudíⁿ-gǎ ndi ùxúú cue téé xica cuu ndíhi-gǎ tnuú ñáyiu, te ní xáhaⁿ-gǎ xii-güedé:

—Vitna te quíhíⁿ-ó ñùú Jerusàlén, chi yàcáⁿ cada-xi nchaa nàcuáa sa ní chídó tnùnì cue téé ní xóo cáháⁿ tnúhu Yǎ Ndiǒxí ndéé sanaha nàcuáa yáha yúhú Téé cùu ñanì tnàhá-ndó nchaa-ndo.³² Chi cuáha cuendá ñàhá-güedé xii-í núú cuè téé ñá túú cùu cue téé isràél, te cudíqui ndéé ñàhá-güedé xii-í, te cúcuèhé ñàhá-güedé, te tíú díí ñàhá-güedé xii-í.³³ Te caniha-güedé ndíhi ñii, te dàtnùnì cahni ñaha-güedé xii-í, dico nduu únì sá cùú-í te ndoto-í —càchí-gǎ xáhaⁿ-gǎ xii-güedé.

34 Dico ní ìⁿ tnúhu ní cáháⁿ-gǎ ñá túú ní tècú tnùnì-güedé, chi ío yídáhu tnúhu ní cáháⁿ-gǎ ñuu xǎⁿ ní ìⁿ ñá túú ní tècú tnùnì-güedé.

Jèsús quidé tǎtna-gǎ núú ìⁿ téé cuáá ñuu Jericó

(Mt. 20:29-34; Mr. 10:46-52)

35 Te òré tá cùyatni Jèsús ñuu Jericó cuáháⁿ, te yuhu ìchi cuáháⁿ-gǎ-áⁿ núcǒo ìⁿ téé cuáá xicáⁿ ndàhú-dé.³⁶ Te òré ní tecú dóho-dé xicáháⁿ vai ñáyiu xiyáha-yu, te ní xicáⁿ tnúhú-dǎ núú ñáyiu ndècu ndíhi-dé ná cuendá ducaⁿ vai-yu yáha.³⁷ Te ní xáhǎⁿ-yu sá Jèsús téé ñuu Nazàrét ñuhú-dǎ ichi.³⁸ Te níhi ní cáháⁿ-dǎ, te xáhaⁿ-dǎ xii-gǎ:

—jèsús ñaní tnáhá ndïi Dàvií, cundàhú iní ñáhá xii-í! —càchí-dé xǎhaⁿ-dě xii-gá.

³⁹ Te ñáyiú xǐxódó núú nǔú Jèsús ní tenàá ñáhǎ-yu xii-dé, te xǎhǎⁿ-yu sá ná càdí-dé yuhu-dé dico uuⁿ-gá níhi ní cáháⁿ-dé xǎhaⁿ-dě xii-gá:

—jYòhó téé cùu ñaní tnáhá ndïi Dàvií, cundàhú iní ñáhá xii-í! —càchí-dé xǎhaⁿ-dě xii-gá.

⁴⁰ Te Jèsús ní ngüíñí-gá, te ní táuchíúⁿ-gǎ ní sǎngueheⁿ ñaha cuè téé ndihi-gá. Te òré ní quexìo-dé núú-gǎ, te ní xícáⁿ tnúhú-gǎ núú-dě, te xáhaⁿ-gǎ:

⁴¹ —¿Ná cuíní-n càda ñaha-í xii-n-í? —càchí-gá xáhaⁿ-gǎ xii-dé.

Te téé cuàá-áⁿ nǐ xáhaⁿ-dě:

—Mèstrú, cuíní-í cada tátna-n nǔú-í cuèndá cundehe-í —càchí-dé xǎhaⁿ-dě xii-gá.

⁴² Te Jèsús ní xáhaⁿ-gǎ:

—Sa ní ndúha núú-n chi ní sándáá iní-n Yǎ Ndiǒxí —càchí-gá xáhaⁿ-gǎ xii-dé.

⁴³ Te òré-ni-áⁿ nǐ ndúha núú-dě, te ní cachí-dé sá ïo càhnu cuu Yá Ndiǒxí. Te nchaá ñáyiú ní xiní nàcuáa ní cuu ní ndúha núú-dě tnàhá-yu ní cachí-yu sá ïo càhnu cuu Yá Ndiǒxí.

19

Jèsús ndihi ñⁿ téé nàni Zaqueú

¹ Te Jèsús ní sáá-gá ñuú Jericó, te ta yǎha-gá xití ñuú-áⁿ cuáháⁿ. ² Te ñuú-áⁿ ndécú ñⁿ téé cuica nàni-dé Zaqueú, te cùnuu-dé táxí tnùní-dé cue téé cundihi-dé,

cue téé cuihna iní-xi quide cobrá ñáhá xii ñáyiú cuèndá impuèstú. ³ Te téé-áⁿ cuíní-dé quíní-dé Jèsús òré-áⁿ ní cùu te ñá ní ndàcu-dé, chi ïo cuéhé ñáyiú, te ñá túú dùcúⁿ-dé.

⁴ Te xìnu-dé ní ngódó núú-dě te ní sáá-dé díquí ñⁿ yutnu sicómorú nùtníi yatni yuhu ìchi núú yǎha Jèsús cuèndá cuíní-dé quíní ñáhá-dě xii-gá.

⁵ Te òré tá yǎha Jèsús xiáⁿ, te ní ndonehe núú-gǎ díquí yutnu núú cándodo-dé-áⁿ, te ní xáhaⁿ-gǎ xii-dé:

—Zaqueú, tanùu ndihi díquí yutnu-áⁿ, chi tnavíi quexìo-í vehe-n ndètátú-í —càchí-gá xáhaⁿ-gǎ xii-dé.

⁶ Te té Zaqueú-áⁿ nǐ nuu ndihi-dé díquí yutnu-áⁿ, te ïo ní cudíi iní-dé ní queheⁿ cuèndá-dé Jèsús vehe-dé. ⁷ Te sá nǐ xiní ñáyiú ní quexìo Jesús vehe-dé, te nchaá-yu ní ngüita-yu càháⁿ cuéhé-yu cuèndá-gá, te xitnàhá-yu:

—Téé-a cuánguihu-dé vehe ñⁿ téé ndècu ìchi cuehé ìchi duha —càchí-yu xitnàhá-yu.

⁸ Te té Zaqueú-áⁿ nǐ ndacuíñí-dé tnuú-yu, te xáhaⁿ-dě xii Jèsús:

—Yòhó Mèstrú, na cuǎha-í ñáyiú ndàhú cuádava nchaá sá ndécú ndihi-í. Te núu yoo ní dándàhú-í ní dúhù-í, te codo ùní-gá tnàhá sá nǐ dúhù-í-yu nacuáñaha-í xií-yu —càchí-dé xáhaⁿ-dě xii-gá.

⁹ Te Jèsús ní xáhaⁿ-gǎ xii té Zaqueú:

—Vitna ní naníhí tàhú-n ndihi nchaá ñáyiú xìndecu

vehe-n, chi tnàhá-n cùu-n ñaní tnáhá ndĩi Àbrahám, ¹⁰ Te yúhú Tée cùu ñaní tnáhá-ndó nchàa-ndo véxi-í nándücu-í ñáyiu ní xíta nihnu cuëndá dácácu nihnu-í-yu núú ùhú núú ndàhú – cächí-gá xáhaⁿ-gã xii-dé.

Nacuáa ní quide-güedé ndihi dǐhúⁿ cuàáⁿ
(Mt. 25:14-30)

¹¹ Te nchaa ñáyiu-án ñĩ sani iní-yu sá ndihi-ni ndíhu ndaha ñaha Yá Ndiõxí xii-yu cuëndá sá ñĩ cuyatni Jèsús ñuú Jerusálén, te xíáⁿ nũu ní ngúita Jèsús ní cani-gá ñⁿ cuëndú núu-yu cuëndá tecú tnùní váha-yu tnúhu-gá. ¹² Te xáhaⁿ-gã xii-yu:

–Ní xíndecu ñⁿ tée cùu ñaní tnáhá ñáyiu cùnuu, te cuáháⁿ-dé ingá ñuú xícá cuëndá yacáⁿ cuáha ñaha-güedé chiúⁿ coo-dé, te dǎtnùní ndixi-dé quíndaha-dé titní ñuú. ¹³ Te cùmání-gã quee-dé quíhíⁿ-dé, te ní cana-dé úxí cue tée xínu cuechi núú-dé, te ní sáñaha-dé ndí dííⁿ núú-güedé ñⁿ caa ñⁿ caa dǐhúⁿ cuàáⁿ, te ní xáhaⁿ-dè: “Chí cadá ndàhú ndihi dǐhúⁿ-án ndèé ná sàá nduu nàsáá-í”, cächí-dé xáhaⁿ-dè xii-güedé. ¹⁴ Dico nchaa ñáyiu ñuú quíndaha-dé-án ñà túú tnàhá iní-yu sá quíndaha ñaha-dé, núu ní tendàhá-yu cue tée nèhe tnúhu cuáháⁿ núú cuè tée cuáñaha chiúⁿ coo-dé-án, te ní xáháⁿ-yu sá cǔñaha-güedé sá ñà túú tnàhá iní-yu sá tée-án quíndaha ñaha-dé xii-yu. ¹⁵ Dico dacuití sá

ñĩ sáha-güedé tée-án chiúⁿ coo-dé sá díú-dé quíndaha-dé ñáyiu nchaa ñuú-án, te ní nacuico-dé cuánuhú-dé ñuú-dé. Te òré ní nasáá-dé vehe-dé, te ní tendaha-dé ñⁿ tée ní sánúcana ñaha xii cue tée xínu cuechi núú-dé, cue tée ní dándõo ndaha-dé dǐhúⁿ cuëndá cacáⁿ tnúhú-dé núú-güedé ñⁿ ñⁿ-güedé núu ndèé dau ní chídó-xí dǐquí dǐhúⁿ sá ñĩ dándõo ndaha ñaha-dé-án. ¹⁶ Te tée ní ndèxio díhna xáhaⁿ-dè: “Pàtróón, ní quide-í ndáhú ndihi dǐhúⁿ-n sá ñĩ dándõo ndaha ñaha-n xii-í, te sá ñⁿ ní taxi-n te ní chídó-xí ùxí-gá tnàhá te náu-a naqueheⁿ cuëndá-n”, cächí-dé xáhaⁿ-dè. ¹⁷ Te tée cùu patróón-dè-án ñĩ xáhaⁿ-dè: “Ío váha tée xínu cuechi cuu-n chi ío váha ní quide-n, te sá ñĩ quide váha-n ndihi sacú dǐhúⁿ sá ñĩ dándõo ndaha ñaha-í xii-n, te xíáⁿ nũu yúhú cächí-í sá táxí tnùní-n ùxí ñuú vitna”, cächí-dé xáhaⁿ-dè. ¹⁸ Te ní ndèxio ingá-dé, te ní xáhaⁿ-dè: “Pàtróón, ní quide-í ndáhú ndihi dǐhúⁿ-n sá ñĩ dándõo ndaha ñaha-n xii-í, te sá ñⁿ ní taxi-n te ní chídó-xí ùhúⁿ-gá tnàhá te náu-a naqueheⁿ cuëndá-n”, cächí-dé xáhaⁿ-dè. ¹⁹ Te ní xáhaⁿ tée cùu patróón-dè-án xii-dé: “Te yòhó taxi tnùní-n ùhúⁿ ñuú”, cächí-dé xáhaⁿ-dè xii tée xínu cuechi-án. ²⁰ Te dǎtnùní ní ndèxio tucu ingá-dé, te xáhaⁿ-dè: “Pàtróón, náu dǐhúⁿ-n-á, te naqueheⁿ cuëndá-n chi ní taxúha-í ní chidúcúⁿnuu-í ñⁿ pǎnú te ñà túú ní quide-í ndáhú ndihi dǐhúⁿ-n, ²¹ chi ní yúhú ñàhá-í

xii-n, chi cùu-n ìⁿ tée díi, te nàqueheⁿ-n ìⁿ sá ñà túú ní tàxi ndecu-n, te nàtahu-n ìⁿ xichi núú ñà túú ní chìhi-n tatá”, cächí-dé xăhaⁿ-dě xii patróóⁿ-dě. ²² Te ní xăhaⁿ patróóⁿ-dě xii-dé: “Yòhó cúu-n ìⁿ tée cuihna iní-xi xinu cuechi núú-í, te òu-ni nchaa tnúhu cáháⁿ-n-ăⁿ cächí tnúni-xi năcuăa cuu ndăă cuéchi-n. Te núú sàni iní-n să cúu-í ìⁿ tée díi, te nàqueheⁿ-í ìⁿ sá ñà túú ní tàxi ndecu-í, te nàtahu-í ìⁿ xichi núú ñà túú ní chìhi-í tatá, ²³ te núú ducaⁿ ña, ¿te ná cuendá ñá túú ní cahu iní-n dăsaⁿ nuu-n díhúⁿ ñi taxi-í, te cúñaha-n chăhu-yu díquí-xi, te òré ná năsăá-í vehe-í, te sa ngódó lùha-gá díquí-xi naqueheⁿ cuendá-í ní cùu-í?”, cächí-dé xăhaⁿ-dě xii tée xinu cuechi-ăⁿ. ²⁴ Te ní xăhaⁿ tée cùu patróóⁿ-ăⁿ xii cue tée xindecu xiáⁿ: “Chí quéndèé díhúⁿ cuăáⁿ nêhé tée-a, te cuăha-ndo tée nêhe úxí tucu díhúⁿ cuăáⁿ-ăⁿ”, cächí-dé xăhaⁿ-dě xii-güedé. ²⁵ Te ní xăhaⁿ-güedé: “Patróóⁿ, dico sa nêhe-dé úxí díhúⁿ cuăáⁿ”, cächí-güedé xăhaⁿ-güedé. ²⁶ Te ní xăhaⁿ tée cùu patróóⁿ-ăⁿ: “Na cächí tnúhu-í xii-ndo să cuè ñăyiu íó xii-xi te níhi-gă-yu cundecu ndihí-yu, te cue ñăyiu sacú ndécú ndihí cuita ndihí nihnu nchaa sá ndécú ndihí-yu”, cächí tée cùu patróóⁿ-ăⁿ xăhaⁿ-dě xii-güedé. ²⁷ Te xăhaⁿ tùcu-dé xii-güedé: “Nchaa ñăyiu cùu úhú iní ñăhá xii-í ñă tnàhá iní-yu quindaha-í-yu, te chí cándecá-yu taquixi iha, te cahni-ndö-yu núu-í-a”, cächí

tée cùu patróóⁿ-ăⁿ xăhaⁿ-dě xii-güedé —duha cuáháⁿ cuendú ní cani Jèsús núú ñăyiu.

Jèsús cuànguihu-gá ñuú Jerusalén

(Mt. 21:1-11; Mr. 11:1-11; Jn. 12:12-19)

²⁸ Te sátá dúcáⁿ ñi cáháⁿ-gá, te ní nucúhuⁿ ichi-gá cuáháⁿ-gá ñuú Jerusalén. ²⁹ Te òré sa ní cuyatni-gá ñuú Bèttagé, ndihí ñuú Bètaniá te xiáⁿ cáá yùcu nani Olívú, te ní xăhaⁿ-gă xii úú cue tée xica cuu ndihí-gá:

³⁰ —Chí cuáháⁿ ñuú cáá yàtni yacáⁿ, te òré quexìo-ndo yacáⁿ, te naníhi-ndó ìⁿ búrru ndètníi-di, te vátá yóo ìⁿ-gá codo ñàha xii-di, te nandaxi-ndo-di te can-deca-ndo-di quixi. ³¹ Te núú yoo na càcáⁿ tnúhu núú-ndó ñă cuendá nándaxi-ndo-di, te cúñaha-ndo xii-yu sá yühú Yaá xicá cùu ndihí-ndo xini ñuhu-í-di —cächí-gá xăhaⁿ-gă xii-güedé.

³² Te cue tée-ăⁿ ñi xica-güedé cuáháⁿ-güedé, te nchaa-ni năcuăa ní xăhaⁿ Jèsús ducaⁿ ñi cuu, ³³ chí mei òré nándaxi-güedé búrru-ăⁿ ñi quexìo cue ñăyiu cùu xítohó-di xicáⁿ tnúhu-yu núu-güedé, te xăháⁿ-yu:

—¿Ná cuendá nándaxi-ndo búrru-ndí-í? —cächí-yu xăháⁿ-yu.

³⁴ Te ní xăhaⁿ-güedé xií-yu:

—Nà ndaxi-ndí-di chí Yaá xicá cùu ndihí-ndí xini ñuhu ñàha-gá xii-di —cächí-güedé xăhaⁿ-güedé xií-yu.

35 Te ndéca-güedé-di cuáháⁿ núú ndécú Jèsús, te òré ní quexìo-güedé ndihì-di núú ndécú-gã te ní sacáⁿ ndodo-güedé dóo-güedé sátá-di, te ní ngódó ñáhá-gã xii-di. 36 Te ío cuéhé ñáyiú ta sácáⁿ-yu dóo-yu ichi cuáháⁿ-gá cuendá núú dóo-yu-áⁿ yãha-gá ndihì quiti yòdo-gá. 37 Te ní nucuíta nuu-gá ichi tìndúú yucu Òlívú tá cùyatni-gá ñuú Jerusàlén cuáháⁿ, te nchaa ñáyiú sàndáá iní ñáhá xii-gá nchìcúⁿ ñáhã-yu te ní nguíta-yu níhi càháⁿ-yu sá cúdí iní-yu, te càchí-yu sá ío càhnu cuu Yá Ndiòxí cuendá sá ñi xiní-yu nchaa sá vã yòo tnháí ndàcu cada ní quide-gá. 38 Te càchí-yu:

—Ío càhnu cuu Yaá véxi quindaha ñaha xii-o, te diu-gá cúú-gã Yaá ní tendaha Yá Ndiòxí véxi quide núú-gã! ¡Te ío càhnu cuu mee-gá! ¡Te andiú ñà túú tnháí ná cúú! —duha càchí-yu.

39 Te ñⁿ úú cue téé cùu fariséú ñúhú tnháí tnuú ñáyiú-áⁿ ñi xáhaⁿ-güedé xii Jèsús:

—Mèstrú, cúñaha nchàa ñáyiú ndihì-n na càdí-yu yuhú-yu —càchí-güedé xãhaⁿ-güedé xii-gá.

40 Dico Jèsús ní xáhaⁿ-gã xii-güedé:

—Te na càchí tnhúhu-í xii-ndo sã núu ñáyiú-a na càdí-yu yuhú-yu ña, te nchaa yúú càháⁿ níhi-xi dàtná ñⁿ ñáyiú —càchí-gá xáhaⁿ-gã xii-güedé.

41 Te òré ní cuyatni-gá ñuú Jerusàlén te ní xiní-gá, te ní ndáhyú-gá cuendá nchaa ñáyiú dii ñuú-xi-áⁿ sã ndihú iní-gá. 42 Te ní xáhaⁿ-gã xii cue ñáyiú-áⁿ:

—Ío cuu váha iní-í te núu dicó nchòhó tecú tnhúhu-ndo vitna ñⁿ tnhúhu sá cadá váha ñaha xii-ndo, chí ña túú-gã ná cuu cundecu-ndo, te núu na tècú tnhúhu-ndo. Dico ña tècú tnhúhu-ndo, chí ío yidáhu tnhúhu-a. 43 Te sáá nduu tnhúhu-ndo tnhúhu ndáhú sá cúú-xi-ndo, te nchaa cue téé dava-gá ñuú cúú úhú iní tnháí ndihì-ndo quixi-güedé chidoco ñaha-güedé xii-ndo, te ñi càndéé núú ndécú-ndo-ãⁿ dacàa-güedé ndóho cuendá xiáⁿ quihì váha-güedé nàa ndihì ñaha-güedé xii-ndo, te vá dáñá-güedé cunu-ndo. 44 Te cahni ñaha-güedé xii-ndo, te ndihì nchaa vehe-ndo dangoyo-güedé ndéé cimiéntú-xi, chí ña túú ní cuñi-ndo nàcuáha-ndo cuendá òré ní quixi coto ñaha Yá Ndiòxí xii-ndo —duha ní xáhaⁿ-gã xii ñáyiú ñuú-áⁿ.

Jèsús ña túú tnháí iní-gá nàcuáa quidé-yu veñúhu
(Mt. 21:12-17; Mr. 11:15-19; Jn. 2:13-22)

45 Te Jèsús cuánguihu-gá xití veñúhu càhnu sá ío cunuú, te xití veñúhu-áⁿ xíndecu cue ñáyiú quide ndáhú ndihì cue ñáyiú xísaaⁿ. Te ní queñuhu ñaha Jèsús xií-yu quehé. 46 Te ní xáhaⁿ-gã xií-yu:

—Núú tütú Yá Ndiòxí càháⁿ-xi nàcuáa ní càháⁿ-gá, te duha ní cachí-gá: “Vehe-í

cúu-xí nǔú càháⁿ ndihí ñaha ñáyiú xii-í”, duha ní cáháⁿ-gá cächí-xi núú tütú-gá. Dico nchòhó quidé-ndó vèhe-gá vehe ñadúhú —cächí-gá xáhaⁿ-gá xií-yu.

47 Te Jèsús nchaa nduu dànehé-gá ñáyiú xití veñúhu, dico cue tée cùu dútú cùnùu, ndihí cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndihí cue tée cùnùu ñuú-áⁿ ndúcú-güedé nàcuáa cada-güedé cahni ñaha-güedé xii-gá. 48 Dico ñá nihí-güedé nàcuáa cada-güedé, chi cuendá nchaa ñáyiú ío cùdíí iní-yu ndèdóho-yu nchaa tnúhu càháⁿ-gá.

20

Jèsús ndécú ndihí-gá tnúhu ndee iní
(Mt. 21:23-27; Mr. 11:27-33)

1 Te ñⁿ nduu yihí Jèsús xití veñúhu càhnu sá ío cùnùu danehé-gá ñáyiú tnúhu sá càháⁿ nàcuáa naníhí tàhú-yu. Te ní quexìo cue tée cùu dútú cùnùu ndihí cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndihí cue tée cùu sacuéhé nǔú ñáyiú isràél, 2 te ní xáhaⁿ-güedé xii-gá:

—Cuìní-ndí cachí tnúhu-n xii-ndí nása ndùu tnúhu ndee iní ndécú ndihí-n núu quide-n nándi sá quidé-n. ¿Te yoo ducaⁿ ñí taxi tnúhu ndee iní-áⁿ xii-n? —cächí-güedé xáhaⁿ-güedé xii-gá.

3 Te Jèsús ní xáhaⁿ-gá:

—Yúhú tnàhá-í cuìní-í cacadⁿ tnúhu-í ñⁿ sá cacadⁿ tnúhu-í núu-ndó, te cachí tnúhu-ndo. 4 Te chí cächí tnúhu xii-í yoo ní táuchíúⁿ ñí dácuaⁿndüte ndíi Juàá ñáyiú. ¿Yá Ndiòxí áⁿ cué tée ñuyíú-a ní táuchíúⁿ dùcaⁿ ní quide ndíi? —cächí-gá xáhaⁿ-gá xii-güedé.

5 Te ní ngüíta-güedé xitnàha-güedé:

—¿Nása cúñaha-o? Chi núu nà cúñaha-o sá Yá Ndiòxí ní táuchíúⁿ dùcaⁿ ní quide ndíi Juàá ñá, te quesaha-dé: “¿Ná cuendá ñá túú ní sàndáá iní-ndó tnúhu ní cáháⁿ ndíi váiⁿ?”, quesaha-dé. 6 Àdi te núu nà cúñaha-o sá cué ñáyiú ñuyíú-a ní táuchíúⁿ dùcaⁿ ní quide ndíi ña, te nchaa ñáyiú cuáha ñàhá-yu yúú xii-o, te cahni ñàhá-yu, chi cächí-yu sá ndáá sá Yá Ndiòxí ní táuchíúⁿ-gá ní cáháⁿ ndíi Juàá tnúhu-gá núú ñáyiú —cächí-güedé xitnàha-güedé.

7 Te ní xáhaⁿ-güedé xii-gá sá ña túú xini-güedé yoo ní táuchíúⁿ dùcaⁿ ní dácuaⁿndüte ndíi Juàá ñáyiú. 8 Te ní xáhaⁿ Jèsús xii-güedé:

—Te núu ducaⁿ te ni yúhú vá cächí tnúhu-í xii-ndo yòo ní taxi tnúhu ndee iní duha quide-í —cächí-gá xáhaⁿ-gá xii-güedé.

Cuendá cue tée cuihna iní-xi
(Mt. 21:33-44; Mr. 12:1-11)

9 Te sátá dúcáⁿ te ní ngüíta Jèsús ní cani-gá ñⁿ cuendú núu ñáyiú nàcuáa tecú tnùní-yu tnúhu-gá, te xáhaⁿ-gá xií-yu:

—Ñⁿ tée ní xitu-dé mee-ñi yòho yaha stilé núu ñúhú-dé. Te ní sáá ñⁿ nduu quingaca

cuu xica-dě vâi nduu te ní dândõ ndaha-dě sá nĩ xitu-dé-án xii ñⁿ ùú cue tée càháⁿ ndihí-dé cuendá cada chiⁿ-güedé, te ní ndatnúhu-güedé sá òré ná cùu te cuu cuendá dava-güedé te ducaⁿ te ní quee-dé cuáháⁿ-dé. ¹⁰ Te sá tá nĩ sáá nduu nĩ cuu nchaa ndéhé yoho yàha stilé sá nĩ xitu-dé-án, te ní xáhaⁿ-dě xii ñⁿ tée xínu cuechi núú-dě: “Cuáháⁿ cácáⁿ-n sá cúú cuendá-í núú cue tée ní dândõ ndaha-í nchaa yoho yàha stilé sá nĩ xitu-í”, càchí-dé xáhaⁿ-dě. Te tée xínu cuechi-án nĩ xica-dé cuáháⁿ-dé, dico cue tée ndéé nchaa yoho yàha stilé-án nĩ tñi-güedé tée xínu cuechi-án te ní caniha-güedé, te ní nacuícúⁿ ñáhá-güedé xii-dé, te ñá túú tñahí ná ní sãñaha-güedé. ¹¹ Te dätñuní tée cùu xítohó nchaa yoho yàha stilé-án nĩ tendaha tùcu-dé ingá tée xínu cuechi núú-dě cuáháⁿ-dé, dico ñu-ni ducaⁿ nĩ quide ñaha-güedé xii-dé, chi ní xícuèhé ñáhá-güedé, te ní caniha-güedé te ní nacuícúⁿ ñáhá-güedé, te ñá túú tñahí ná ní sãñaha-güedé. ¹² Te tée cùu xítohó nchaa yoho yàha stilé-án nĩ tendaha tùcu-dé ingá-dé cuáháⁿ-dé, te ñu-ni ducaⁿ nĩ quide ñaha tùcu-güedé, chi ní dánícuèhé ñáhá-güedé, te ní nacuícúⁿ ñáhá-güedé.

¹³ Te tée cùu xítohó nchaa yoho yàha stilé-án nĩ sani iní-dé: “¿Nása cada-í vitna? Váha-gá tendaha-í déhe-í tée ío cùu iní-a núhú-dé, chi cud-

ana te òré quiní ñáhá-güedé xii-dé, te canehe-güedé sá yíñùhu núú-dě”, duha ní sani iní-dé. ¹⁴ Dico òré ní xiní cue tée quide chiuⁿ-án dèhe xítohó nchaa yoho yàha stilé-án, te ní xitnáha-güedé: “Tée-án tée véxi nduu táhú ñuhu-a ndihí nchaa sá cáá núú-xi, dico cahni-o-dě te mee-o ndùu tahú-ó sã ndúú táhú-dě”, càchí-güedé xitnáha-güedé. ¹⁵ Te ní queñuhu ñaha-güedé ñⁿ xio yuhu ñuhu-án, te ní sahani ñaha-güedé xii-dé — duha cuáháⁿ cuendú ní cani Jèsús núú-yu.

Te dätñuní ní xáhaⁿ tùcu-gá xií-yu:

—¿Te nchòhó sa cùtñuní iní-ndó nàcuáa cada ñaha xítohó ñuhu-án xii cue tée-án ñã? ¹⁶ Chi núhú-dé te cahni-dé cue tée-án, te dândõ ndaha-dě ñuhu-dé xii cue tée cùtñuní iní-dé cada ndáá — càchí-gá xáhaⁿ-gá xií-yu.

Te sá dúcáⁿ nĩ cáháⁿ-gá, núu ní cachí-yu:

—¡Sá vã càchí Ndiõxí sá dúcáⁿ yàha-o! —càchí-yu.

¹⁷ Te Jèsús ní ndacoto-gá núú-yu, te ní xáhaⁿ-gã:

—Chí càchí tñuhu nása quèe-xi nacúáa cáháⁿ-xi núú tütú Yã Ndiõxí, núú càchí-xi:

Yúú sã nĩ dáquéé tñhú cue tée dàcaa vehe ní saa-xi cùu-xi yúú cùnùu vitna.

Duha càchí-xi núú tütú-gá.

¹⁸ Te nchaa ñáyiú ñá túú cuíní tñi tñuhu-í, te ndohó-yu dätñá ñⁿ ñáyiú tñahnú duuⁿ òré ndúá-yu núú yúú, àdi núu na tàú ñáhá-xí te dàcachi duuⁿ ñaha-xi —cachí-gá xáhaⁿ-gã xií-yu.

Cuendá impuèstú

(Mt. 21:45-46; 22:15-22; Mr. 12:12-17)

19 Te cue tée cùu dútú cúnùu, ndihi cue tée dàcuaha ñaha xii ñáyiú nchaa tnúhu ní chidó tnùní ndíi Moisés ní cuiní-güedé tñi-güedé Jèsús òré-ni-á ní cùu, chi ní cutnùní iní-güedé sá cuendá-güedé ní cáháⁿ-gá, dico ní yùhú-güedé cuendá sá ìo vài ñáyiú.

20 Te ní ndúcú-güedé nàcuáa cada-güedé tñi ñaha-güedé xii-gá, te ní tendaha-güedé cue tée cuáháⁿ ngoto dayuhu ñaha xii-gá, te cuáháⁿ-güedé dàtná cue tée váha iní-xi, te ndùcu-güedé nàcuáa cada-güedé nùu cáháⁿ-gá ìⁿ tnúhu sá ñà túú tàú-gá cáháⁿ-gá cuendá ducaⁿ te candeca ñaha-güedé xii-gá quíhíⁿ cuáha cuendá ñáhá-güedé núú tēe cùnùu. 21 Te ní xáhaⁿ-güedé xii Jèsús:

—Mèstrú, nihí-ndí tnúhu sá dánèhé-n ñáyiú mee-ni tnúhu váha, te cuēi ndēdani càa ñáyiú ìⁿ-ni càháⁿ-n ndihí-yu, te càháⁿ ndáá-n nàcuáa càháⁿ Yá Ndiòxí cundecu-o ñùyíú-a.

22 Te cachí tnúhu xii-ndí nùu váha-ni cháhu-ndí té Cèsár tēe ìo cùnùu cuendá impuèstú áⁿ ñáhá —càchí-güedé xáhaⁿ-güedé xii-gá.

23 Dico Jèsús ní cutnùní iní-gá sá xító ndèé ñáhá-güedé xii-gá, núu ní xáhaⁿ-gá xii-güedé:

24 —Chí dánèhé ñáhá xii-í ìⁿ díhúⁿ cuixíⁿ te cachí tnúhu-ndo nùu yoo núú-xi ndèé, ndihi yoo diu-xi ndeé —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Núú tē Cèsár ndèé ndihi diu-dé —càchí-güedé xáhaⁿ-güedé xii-gá.

25 Te ní xáhaⁿ tùcu-gá xii-güedé:

—Te núu ducaⁿ te chí nàcuáha té Cèsár sá cúu cuendá-dé, te sá cúu cuendá mée Yá Ndiòxí, te xiáⁿ nacuáha-ndo-gá —càchí-gá xáhaⁿ-gá xii-güedé.

26 Te ñá ní ndàcu tnahí-güedé daticánuu ñaha-güedé xii-gá núú tnúhu càháⁿ-gá, chi òré ní cáháⁿ-gá, te da ní cuñúhu-güedé nchaa tnúhu ní cáháⁿ-gá, te váha-gá ní sadí-güedé yuhu-güedé.

Cuendá nchaa ñáyiú ndoto

(Mt. 22:23-33; Mr. 12:18-27)

27 Te sátá dúcáⁿ te ní sáá ìⁿ úú cue tēe cùu saducéú núú ndécú Jèsús. Te cue tēe-áⁿ ñà túú sàndáá iní-güedé sá ndótó cuè ñáyiú ní xihí, te ní xáhaⁿ-güedé xii-gá:

28 —Mèstrú, ndíi Moisés càchí ndíi núú tùtú ndècu vitna sá nùu ìⁿ tēe na cúu, te quendóo ñadihí-dé te ñá túú dēhe-dé ní xōo ndihi-aⁿ, te tēe cùu ñaní-dé naqueheⁿ-dé ñaha ní quendóo quèé-áⁿ cuendá coo dēhe-dé ndihi-aⁿ cuendá ñaní-dé tēe ní xihí-áⁿ.

29 Te ní xindecu úsá tñàhà cue tēe mee-ni ndí ñaní-güedé. Te tēe díhna ní níhí ñadihí-dé, dico ñá túú ní cùdíi-dé cundecu-dé chi ní xihí-dé, te ni ìⁿ dēhe-dé ñá túú ní xōo ndihi ñadihí-dé-áⁿ. 30 Te tēe cùu uú ní naqueheⁿ-dé ñaha ní quendóo quèé-áⁿ dico ní xihí tucu-dé, te ni ìⁿ tucu dēhe-dé ñá túú ní

xõo ndihi ñaha-án. ³¹ Te téé cùu uní ní naqueheⁿ tucu-dé ñaha ní quendóo quèé-án, te ñu-ni ducaⁿ ñí xíhí-dé, te ní xínu ndi ùsá-güedé ní cándeca ñaha-güedé xii ñaha-án, dico ní ñiⁿ-güedé ñá túú ní xõo déhe-güedé ndihi-aⁿ, te ní ndihi-güedé ní xíhí. ³² Te ndéé núú ñí ndihi-ná ní xíhí tñahá ñadìhí-án. ³³ Te na sàá nduu ndòto-güedé ndihi ñaha-án ¿Te ndèdaca-güedé ñadìhí-güedé cuu-aⁿ-í? Chi ndi ùsá-güedé ní cándeca ñaha-güedé xii-aⁿ —càchí-güedé xáhaⁿ-güedé xii-gá.

³⁴ Te Jèsús ní xáhaⁿ-gá xii-güedé:

—Nchaa ñáyiu ñuyíú-a tñandahá-yu. ³⁵ Dico nchaa ñáyiu ní nduu táhú ndoto díhna nuu ñáyiu-án cundecú-yu ndihi Yá Ndiõxí ní caa ní quíhíⁿ, te yàcáⁿ ñá túú-gá sá cándeca tnahá-yu. ³⁶ Te ní ñà túú-gá tñuhu xíhí, chi cuu-ná-yu dàtná cue espíritú xínu cuèchi núú Yá Ndiõxí cuendá sá ñí ndotó-yu, chi cùú-yu déhe-gá. ³⁷ Te ndéé ndíi Moisés ní chídó tñuní ndíi núú tütú ndíi sá ncháá ñáyiu ní xíhí ndotó-yu, te ñu-ni xíaⁿ càháⁿ-xi cuendá tñutáú nchicúⁿ ñuhú, te ñu-ni xíaⁿ càchí tucu-xi sá Yá Ndiõxí cúú-gá Ndiõxí ndíi Abrahám, ndíi Isàác, ndihi ndíi Jàcób. ³⁸ Te cue téé-án chi cuèi ní xíhí-güedé sá cúú-xí nchòhó, dico sá cúú-xí Yá Ndiõxí chi ndècu vívú-ni-güedé. Chi cùtñuní iní-ó sá Yá Ndiõxí cúú-gá Ndiõxí mee-ni cuè ñáyiu xíndecu vívú, te ñá túú

cùu-gá Ndiõxí cue ñáyiu ñá túú ndècu vívú. Te sá cúú-xí mèe-gá chi nchaa ñáyiu ndècu ndihi-gá ndécú vívú-yu cuèi sa ní xíhí-yu núú ñuyíú-a —càchí-gá xáhaⁿ-gá xii-güedé.

³⁹ Te ñiⁿ téé dàcuaha ñaha xii ñáyiu nchaa tñuhu ní chídó tñuní ndíi Moisés ní xáhaⁿ-dè xii Jèsús:

—Mèstrú, váha-ni càháⁿ-n —càchí-dé xáhaⁿ-dè xii-gá. ⁴⁰ Te ñá túú-gá ní cùyi-güedé cácáⁿ tñuhú-güedé ní ñiⁿ tñuhu núú-gá.

Yoo déhe-xi cùu Cristú

(Mt. 22:41-46; Mr. 12:35-37)

⁴¹ Te Jèsús ní xáhaⁿ-gá xii-güedé:

—¿Te nása càchí-tu-yu sá Crìstú Yaá tendaha Yá Ndiõxí quixi ñuyíú-a cùu-gá déhe ndíi Dàvíí? ⁴² Te mee ndíi Dàvíí-án ñí cachí ndíi núú librú Sálmú:

Dútú Ndiõxí ní xáhaⁿ-gá xii Yaá cúú Xìtohó-í:

“Ngóo xio cùha-í,

⁴³ te yuhú cada-í te nchaa sá cúú ùhú iní ñáhá xii-n canehe-xi sá yíñuhu núú-n.”

Duha ní xáhaⁿ Dútú Ndiõxí xii Yaá cúú Xìtohó-í càchí ndíi núú librú Sálmú. ⁴⁴ ¿Te nása cùu Crìstú déhe ndíi Dàvíí, te mee ndíi ní cachí ndíi sá cúú-gá Xìtohó ndíi-í? —càchí Jèsús xáhaⁿ-gá xii-güedé.

Jèsús càháⁿ-gá cuendá cue téé dàcuaha ñaha xii ñáyiu nchaa tñuhu ní chídó tñuní ndíi Moisés

(Mt. 23:1-36; Mr. 12:38-40; Lc. 11:37-54)

⁴⁵ Te òré ndátnùhu Jèsús ndihi cue téé xica cuu ndihi-gá

xĩndedóho ñaha ñáyi, te xáhaⁿ-gã xii-güedé:

46 —Cada cuendá-ndó vã cáda-ndó nàcuáa quide cue tée dàcuaha ñaha xii ñáyi nchaa tnúhu ní chídó tnùní ndí Moisés, chi tnàhá iní-güedé cuihnu-güedé dóo nání sã sácũhnu cue tée cùnũ. Te nchaa núú tàcá ñáyi cuiñí-güedé sá ndíhi tnúhu yĩñũhu cáháⁿ ndíhi ñàhá-yu xii-güedé, te nàcáxi-güedé xilé sácõo nchíhi cue tée cùnũ-gã xití veñũhu conchíhi-güedé, te ducaⁿ-ni quide-güedé cuèi òré quíhu-güedé mèsá caxi-güedé òré ndécú-güedé ìⁿ vico, chi mee-ni nũú sácõo cue tée cùnũ-gã cuiñí-güedé coo-güedé. 47 Te quèndeé-güedé vehe nchaa ñáyi dñí ñáyi quèé, te ío naha càháⁿ ndíhi-güedé Yã Ndiõxí cuendá cuiñí-güedé cáháⁿ váha-yu cuendá-güedé. Te sá dúcáⁿ quide-güedé te sáa nduu te ío-gã ndoho-güedé núú ùhú núú ndàhú dàcúxí dàva-gã ñáyi —càchí-gã xáhaⁿ-gã xii-güedé.

21

Díhúⁿ nduu táhú Yã Ndiõxí ní dáquëe ìⁿ ñaha ndàhú ñaha quèé

(Mr. 12:41-44)

1 Te Jèsús ní xiní-gã xití veñũhu xídáquëe cue tée cuica díhúⁿ nduu táhú Yã Ndiõxí xití alcanciá. 2 Te ní xiní-gã tnàhá ìⁿ ñaha ndàhú ñaha quèé ní dáquëe-aⁿ úú díhúⁿ còbrí, 3 te ní xáhaⁿ Jèsús xii cue ñáyi xĩndecu-áⁿ:

—Na càchí tnúhu ndáá-í xii-ndo sã ñaha ndahú ñaha quèe-a ío-gã nándíhi díhúⁿ ní dáquëe-aⁿ xití alcanciá nduu táhú Yã Ndiõxí dàcúxí díhúⁿ ní dáquëe dava-gã-yu. 4 Chi nchaa ñáyi-áⁿ ní dáquëe-yu mee-nã sá ní ndóo-ná, dico ñaha quèe-a cuèi ndàhú-aⁿ dico ní dáquëe-aⁿ nihí díhúⁿ sã cuááⁿ-áⁿ sã cáxí-áⁿ ní cùu —càchí-gã xáhaⁿ-gã xii-yu.

Jèsús càchí-gã sá ngóyo veñũhu

(Mt. 24:1-2; Mr. 13:1-2)

5 Te ìⁿ úú ñáyi xicáháⁿ-yu cuendá veñũhu càhnu sá ío cùnũ sá ío vii càa nchaa yúú yíhí, ndíhi cuendá nchaa sá ní sãñaha táhú ñáyi yíhi xití-xi. Te Jèsús ní xáhaⁿ-gã xii-yu:

6 —Sáa nduu te nchaa sá cúñũhu-ndo-a vã cùndũ-gã-xi dàtná cáá-xí vitna, chí ní ìⁿ-gã yúú vã códo nchíhi tnaha-gã-xi chí ndíhi ngoyo —càchí-gã xáhaⁿ-gã xii-yu.

Nàcuáa cada-xi nduu ta cùyatni naa ñuyíú

(Mt. 24:3-28; Mr. 13:3-23)

7 Te cue tée xĩndecu-áⁿ ní xicáⁿ tnúhú-güedé núú Jèsús, te xáhaⁿ-güedé xii-gã:

—Mèstrú, ¿te ná nduu dùcaⁿ cada-xi ngoyo veñũhu, àdi nándi cùu sá cáda-xí cuendá cutnùní iní-ndí sá sà ta cuyatni nduu ducaⁿ cada-xi-í? —càchí-güedé xáhaⁿ-güedé xii-gã.

8 Te Jèsús ní xáhaⁿ-gã xii-güedé:

—Ío quíhi iní-ndó cùndecu-ndo, te vá dáñá-ndó mèe-ndo dan-dahú ñàhá ñáyi xii-ndo. Chí ío cuéhé cue tée coo ñuyíú-a,

te danàni-güedé méé-güedě dàtná nàni-í te cachí-güedé: “Yúhú cù-í Crístú Yaa ní ten-daha Yá Ndiòxí véxi ñuyú-a”, duha cachí-güedé. Te cachí tucu-güedé: “Vitna sa ní sáa nduu càda-xi nchaa nacuaa ní cáháⁿ-í”, duha cachí-güedé. Dico vá quìndáá iní-ndó, te nì vá túhá-ndó-güedě. ⁹ Te òré, ná nihí-ndó tnúhu sá titní nacióⁿ xĩnàá-güedé te dava ñuú xĩnàá-güedé ndi mèe-güedé, te vá yùhú-ndó chi dacuití sã dúcáⁿ càda-xi, dico vátá sàá-gá nduu nàa ñuyú òré ducaⁿ càda-xi – cachí-gá xáhaⁿ-gã xii-güedé.

¹⁰ Te xãhaⁿ tucu-gá xii-güedé:

–Nchaa cue téé ìⁿ nacióⁿ nàá-güedé ndihi cue téé ingá nacióⁿ, te titní ñuú ngúíta-güedé nàá-güedé. ¹¹ Te titní xichi ñuyú níhi vñhi tnáa, te titní tucu xichi ñuyú coo tnamá, te titní tucu xichi ñuyú quixi cuéhé, te titní núú sã cádá-xí àndiu, te yùhú ñáyiu.

¹² Te òré cúmãní-gã cada-xi nchaa nacuaa càháⁿ-í-a, te cue téé cùu úhú iní ñáhá xii-ndo tñi ñaha-güedé, te candeca ñaha-güedě xii-ndo quíhíⁿ xití veñúhu-güedé cada ndáá-güedé cuéchi-ndo, te chihí ñaha-güedě ve-caá xii-ndo, te candeca ñaha-güedě quíhíⁿ núú cuè téé cùnuu yĩndaha nacióⁿ àdi núú dàva-gá cue téé cùnuu sã cuèndá-í. ¹³ Te òré ducaⁿ na càda ñaha-güedé xii-ndo, te òré-án tãú-xi cáháⁿ váha-ndo

cuèndá-í núú-güedě. ¹⁴ Te vá cáni iní-ndó núu nása cunduu tnúhu cúñaha-ndo xii-güedé cuèndá cácu nihnu-ndo, ¹⁵ Chi yúhú dacàhu iní ñáhá-í xii-ndo tnúhu cúñaha-ndo xii-güedé, te taxi-í sã vátá quìní tnùní-gá-ndó, te ni ìⁿ ñáyiu cùu úhú iní ñáhá xii-ndo vá nihí-gá-yu tnúhu cúñáhá-yu xii-ndo. ¹⁶ Te ndéé tãtá-ndó, ndihí ñani-ndó, ndihí cue ñáyiu cùu ñani tnáhá-ndó, ndihí cue ñáyiu càháⁿ ndihí váha-ndo cuãha cuèndá ñáhá-yu xii-ndo núú cuè téé cùchiuⁿ, te dava-ndo càhni ñaha-güedé xii-ndo. ¹⁷ Te ío cuéhé ñáyiu cuu úhú iní ñáhá-yu xii-ndo sã cuèndá-í. ¹⁸ Dico Yá Ndiòxí ío coto ñaha-gã xii-ndo chi ndéé idi díquí-ndó còto-gá. ¹⁹ Te núu na càda ndee iní-ndó càncicúⁿ nihnu ñaha-ndo xii-í, te nduu táhú-ndó cùndecu-ndo ndihí Yá Ndiòxí ni caa ni quíhíⁿ.

²⁰ Te nduu na quìní-ndó ñùhu doco sandadú ni càndéé yuhu ñuú Jerusálén, te sa cutnùní iní-ndó sã sã ní cuyatni nduu dànaa-güedé ñuú-án. ²¹ Te dàvã-án nchaa ñáyiu xĩndecu distritú Jùdeá xíní ñùhu-xi cunú-yu quíhíⁿ-yu xití yucu, te nchaa ñáyiu xĩndecu ñuú Jerusálén queé-yu xití ñuú-án, te ñáyiu ñá túú xĩndecu ñuú-án vã ndíhu-gá-yu. ²² Chi dàvã-án cuu-xi nduu tnũndòho tnúhu ndàhú, te ducaⁿ càda-xi chi ducaⁿ ndéé tñuní núú tótú Yá Ndiòxí nacuaa dandòho ñaha-gá xii-yu. ²³ Te ndàhú ní cuu nchaa ñáyiu ñíhí ñúhú

děhe-xi, ndihi nchaa ñáyi
ndèca déhe vitna sàdi na sáa
nduu dùcaⁿ cada-xi! Chi ío
cuéhé tnúndòho tnúhu ndàhú
coo núú ndécù-yu dàvá-áⁿ,
te xíáⁿ cuu-xi ìⁿ tnúndòho
tendaha Yá Ndióxi quixi sá
cúu-xí-yu. ²⁴ Te dava cue téé
cuú-güedé cahni ñaha-güedé,
te dava-güedé tñi ñaha-güedé
candeca ñaha-güedé quíhíⁿ
nchaa ñuú xícá, te cue téé
dava-gá ñuú cunuu-güedé
ñuú Jerusalén, te mee Yá
Ndióxi cachí-gá te núu ná
daha nduu cunuu-güedé
ñuú-áⁿ.

*Nàcuáa cada-xi òré quixi
tucu Téé cùu ñaní tnáhá cuè
ñáyi*

*(Mt. 24:29-35, 42-44; Mr.
13:24-37)*

²⁵ Te cada-xi ìⁿ sá
vátá quíni-gá ñáyi núú
nchíanchii, ndihi núú yóó,
ndihi núú nchàa chódíní,
te ñuyíu-a coo tnúhu ndihú
iní-xi te vá cúnùní iní-yu
nása cadá-yu cuéndá sá ío
dusaⁿ càda ndute lamár òré
candaundéé tnáhá-xi. ²⁶ Te
nchaa ñáyi cuneé-yu sá
yùhú-yu, ndihi sá ndihú
iní-yu cuéndá nchaa sá
cadá-xí ñuyíu-a, te quidi-xi
andiu. ²⁷ Te sátá dúcáⁿ
te quíni-ndó yùhú Téé cùu
ñaní tnáhá-ndó nchàa-ndo
quee-í andiu quixi-í ichi xítí
vícó, te dàvá-áⁿ quíni ñáhá
nchàa ñáyi sá ío cùnui-í te
ndàcu-í quide-í nchaa sá vaha.
²⁸ Te òré ná ngüita-xi ducaⁿ
càda-xi, te cuita cundee-gá
iní-ndó quíhíⁿ, te quíhí
iní-ndó chi sa ní cuyatni
vii-ná nduu cãcu nihnu-ndo

vã cúndècu-gá-ndó núú
ñuyíu yícá cuéchi-a —càchí-gá
xáhaⁿ-gã xii-güedé.

²⁹ Te ní cani-gá ìⁿ cuèndú
núu-güedé nàcuáa tecú tnùní
váha-güedé tnúhu-gá, te
xáhaⁿ-gã xii-güedé:

—Chí cúndèhe yutnu ngúxi
ndihi nchaa dava-gá yutnu.
³⁰ Chi nàtahú ndaha-xi, te òré
ducaⁿ quide-xi te càchí-ndó
sã sã ní cuyatni nuu cahni.
³¹ Te diu-ñi ducaⁿ sãtnahá-xi
cùu oré ná quíni-ndó càda-xi
nchaa nacuáa càháⁿ-í, te sá
dúcáⁿ te cutnùní iní-ndó sã sã
ní cuyatni nduu ndihu ndaha
ñaha Yá Ndióxi xii-ndo.

³² Te na càchí tnúhu ndáá-í
xii-ndo sã òré vátá cúu-gá cue
ñáyi xíndecu ñuyíu-a vitna,
te cada-xi nchaa nàcuáa ní
cáháⁿ-í. ³³ Te andiu ndihi
ñuyíu-a chi ndihi nihnu-xi,
dico tnúhu-í chi vá ndihí
nihnu-xi, chi cùu-xi tnúhu
ndáá.

³⁴ Te quíhí iní-ndó vã
cúndècu-ndo ichi cuéhé ichi
duha, te vá cúu-ndó ñáyi
quihu, te vá cùhúⁿ iní-ndó
mèe-ni nchaa sá ío ñuyíu-a,
chi núu ducaⁿ na càda-ndo te
nacuanaa-ndo sã sã nduu
càda-xi nacuáa ní cáháⁿ-í.
Te uuⁿi sáá nduu-áⁿ, ³⁵ te
cada-xi dàtná cuíni-ndó
quide ìⁿ trampá chi uuⁿi
ngáva-xi, te ducaⁿ càda-xi
nchaa ñáyi xíndecu ñuyíu-a,
chi uuⁿi sáá nduu-áⁿ. ³⁶ Te
nchòhó cundecu túha-ndo
te ío cáháⁿ ndihi-ndo Yá
Ndióxi cuéndá ndacu-ndo
yãha-ndo nchàa tnúndòho
quixi ñuyíu-a, te ducaⁿ te
nasáá-ndó cùndecu-ndo núú
ndécú yùhú Téé cùu ñaní

tnáhá-ndó nchàa-ndo —
cachí-gá xáhaⁿ-gã xii-güedé.

37 Te nduu ndüu ní xóo danèhé Jèsús ñáyiü tnúhu-gá xití veñúhu càhnu sá ïo cùnuu, te niú niú ní xóo quíhíⁿ ngúdú-gá xití yucu Ólívú.

38 Te nehé nehé ní xóo quíhíⁿ nchaa ñáyiü veñúhu-áⁿ ñí xóo cundedóho-yu nchaa tnúhu càháⁿ-gá.

22

Ndücu-güedé nàcuáa
cada-güedé cahni-güedé Jèsús
(Mt. 26:1-5, 14-16; Mr. 14:1-2, 10-11; Jn. 11:45-53)

1 Te sa ní cuyatni nduu tnáhá vico pàscuá, te vico-áⁿ xéxí ñáyiü pàá sá ñà túú yìhi levadurá. 2 Te cue téé cùu dútú cùnüu, ndihi cue téé dàcuaha ñaha xii ñáyiü nchaa tnúhu ní chídó tnùní ndíi Moisés ndúcú-güedé nàcuáa cada-güedé cahni-güedé Jèsús, te dicó-ni sá xiyùhú-güedé ñáyiü.

3 Te yucu ñávàha ní dácáhú ñí ñáhá-xí xii té Jüdás déhe té Iscàrioté, te núú tnáhá téé-áⁿ cúú ùxúú tnáhá cue téé xica cuu ndihi-gá ní cùu.

4 Te té Jüdás-áⁿ ñí sáháⁿ-dé ní ndatnúhu-dé ndihi cue téé cùu dútú cùnüu, ndihi cue téé tàxi tnùní ñáhá xii cue téé quide cuendá veñúhu nàcuáa cada-dé cuáha cuendá-dé Jèsús núú-güedé.

5 Te ío ní cudíi ñí-güedé, te ní xáhaⁿ-güedé xii-dé sá cuñaha-güedé díhúⁿ,

6 te ní xáhaⁿ-dē sá cúú quèheⁿ-dé díhúⁿ-áⁿ, te ní ngúíta-dé ndúcú-dē nàcuáa

cada-dé cuáha cuendá-dé Jèsús núú-güedé òré ñá túú ñáyiü.

Cùdini Jèsús ndihi cue téé
xica cuu ndihi-gá

(Mt. 26:17-29; Mr. 14:12-25; Jn. 13:21-30; 1 Co. 11:23-26)

7 Te ní sáá nduu ñí que-saha vico xexí-yu pàá sá ñà túú yìhi levadurá, te ñu-ni nduu-áⁿ sáhní-güedé ñⁿ mbéé líhli xéxí-yu. 8 Te Jèsús ní xáhaⁿ-gã xii té Pèlú ndihi té Juáá:

—Chí cuáháⁿ chi cada túha-ndo núú cùdini-o sacuaa nduu vico pascuá —càchí-gá xáhaⁿ-gã xii-güedé.

9 Te ní xícáⁿ tnúhú-güedé núú-gã, te xáhaⁿ-güedé xii-gá:

—¿Te ndéé cáá vèhe cuini-n càda túha-ndí-i? —càchí-güedé xáhaⁿ-güedé xii-gá.

10 Te ní xáhaⁿ Jèsús xii-güedé:

—Chí cùndédóho na càchí tnúhu-í xii-ndo nàcuáa cada-ndo. Òré quíhu-ndo xití ñuú núú quíhíⁿ-ndó, te naníhí-ndó ñⁿ téé tànehe ñⁿ yoó ndute, te téé-áⁿ candéndaha-ndo-dē quíhíⁿ, te núu ndédacàa vehe na ndíhu-dé te xíaⁿ quíhu-ndo.

11 Te cuñaha-ndo xii xitohó vehe-áⁿ: “Yaá cúú Mèstrú càchí-gá núu ndédacàa xichi xití vehe-n cuñaha nùu-n xii-gá cudini-gá ndihi cue téé xica cuu ndihi-gá sacuaa nduu vico pascuá”, duha cuñaha-ndo. 12 Te dātnùní danèhé ñáhá-dē xii-ndo ñⁿ cuartú càhnú càa núú ñinu, chi vehe yòdo tnaha cuu-xi,

te sa ní quide túha-dé nchaa sá ná ndìhi, te nchòhó dicó-ná sá cùdini-o cada túha-ndo — càchí-gá xáhaⁿ-gã xii-güedé.

13 Te ní xica-güedé cuáháⁿ-güedé, te nchaa-ni nàcuáa ní xáhaⁿ Jèsús xii-güedé ní cuu, chi nchaa sa ndècu túha, te ní quide túha-güedé sá cùdini-güedé ndìhi-gá sacuaa nduu vico pascuá-áⁿ.

14 Te sátá nǐ tnahá òré cudini Jesús ndìhi cue téé ní táuchíúⁿ-gã cáháⁿ tnúhu-gá núú ñàyiú, te cuánguihu ndìhi ñaha-gã xii-güedé mèsá. 15 Te xáhaⁿ-gã xii-güedé:

—¡Ducaⁿ-ni Ìo sàni iní-í sá cùdini ndìhi ñaha-í xii-ndo sàcuua nduu vico pascuá òré cùmǎní-gã sáá nduu ndòho-í te cuú-í! 16 Te na càchí tnúhu-í xii-ndo sǎ vǎ dúhá-gã caxi ndìhi ñaha-í xii-ndo ndùu vico pascuá, chi ndéé òré ná sáá nduu nàsáá-ndó núú táxí tnùnǐ Yǎ Ndiòxí cundecu-o, te dàvá-áⁿ cada iní-ndó sǎ dàtná sá cáxí tùcu-o chi Ìo váha cuu iní-ó cùndecu-o — cachí-gá xáhaⁿ-gã xii-güedé.

17 Te ní queheⁿ-gá ìiⁿ vàsú ñúhú ndùdí ndéhé yoho yàha stilé, te ní ndacáⁿ táhú-gã núú Yǎ Ndiòxí, te dàtnùnǐ ní xáhaⁿ-gã xii-güedé:

—Chí quéhéⁿ vàsú ñúhú ndùdí ndéhé yoho yàha stilé-a, te coho-ndo lùha luha nchaa-ndo. 18 Te na càchí tnúhu tucu-í xii-ndo sǎ vítná-nǎ duha xìhi ndìhi ñaha-í xii-ndo ndùdí ndéhé yoho yàha stilé-a te vá cóhó ndìhi ñaha-gá-í, dico na sáá nduu nàníhí tnáhá-ó núú ndécú Tǎtà-í Dútú Ndiòxí

táxí tnùnǐ-gá, te dàvá-áⁿ cada iní-ó sǎ dàtná sá cóhó ndìhi ñaha tucu-í xii-ndo, chi Ìo cudíí iní-ó —càchí-gá xáhaⁿ-gã xii-güedé.

19 Te sátá nǐ túhú cóhó-güedé ní cudini-güedé, te ní queheⁿ-gá pàá te ní ndacáⁿ táhú tùcu-gá núú Yǎ Ndiòxí, te dàtnùnǐ ní táhú cuèchi-gá, te ní dáçǎhñu ñaha-gã xii-güedé, te xáhaⁿ-gã:

—Pàá-a cùu-xi datná yiqui cùñú-í, chi cahni ñaha-güedé xii-í sá cuendá-ndó, te ducaⁿ-ni càxi-ndo paá-a cuendá ndacu iní ñáhá-ndó xii-í —càchí-gá xáhaⁿ-gã xii-güedé.

20 Te diu-ni ducaⁿ nǐ quide-gá ndìhi vàsú ñúhú ndùdí ndéhé yoho yàha stilé, chi ní queheⁿ-gá te òré sǎñaha-gã xii-güedé coho-güedé, te ní xáhaⁿ-gã:

—Ndudí ñúhú vàsú-a cada iní-ndó sǎ cuú-xí dàtná níñi-í sá càti òré cahni ñaha-güedé xii-í. Te sá dúcáⁿ càti níñi-í xǎⁿ cutnùnǐ ndáá sá Yǎ Ndiòxí cada-gá ingá núú sǎ vǎha sá cuú-xí-ndó.

21 'Dico vitna chi iha tnáhá téé cuáha cuendá ñáhá xii-í núú cuè téé cùu úhú iní ñáhá yìhi-dé mèsá.

22 Te yúhú Téé cùu ñani tnáhá-ndó nchàa-ndo ñuhu ichi-í cuáháⁿ-í cuú-í dàtná ní cachí Yǎ Ndiòxí. ¡Dico ndàhú ní cuu téé ducaⁿ na cuáha cuendá ñáhá xii-í núú cuè téé cùu úhú iní ñáhá! —càchí-gá xáhaⁿ-gã xii-güedé.

23 Te ní nguíta-güedé ndúcú tnúhu núú tnáhá-güedé núu ndéda càa-güedé ducaⁿ càda

cuáha cuèndá ñáhá xii-gá núu
cuè téé cùu úhú iní ñáhá.

Xĩndatnúhu-güedé ndédacàa-güedé
cunuu-gã

24 Te sátá dúcáⁿ te ní
ngüíta-güedé xĩndatnúhu-güedé
núu ndédacàa-güedé tàú-güedé
cunuu-güedé. 25 Dico Jèsús ní
xáhaⁿ-gã xii-güedé:

—Nchaa cue téé yĩndaha
ñaha xii ñáyiu ío tàxi
tnuní-güedé, te mee-güedé
cuiní-güedé sá càháⁿ váha
ñáyiu cuèndá-güedé. 26 Dico
nchòhó vá dúcáⁿ càda-ndo,
chí núu ìⁿ-ndo cunuu te
cada-ni-ndo sã ñà túú
cunuu-ndo, àdi cuu-ndo ìⁿ téé
tàxi tnuní ñáhá xii cue téé
xĩnu cuechi, te cada-ni-ndo sã
cúú-ndó ìⁿ téé xĩnu cuechi-áⁿ.
27 Te vá càchí-ó sã téé xĩnu
cuechi cunuu-gá-dé, chí téé
quíhu mèsá cúnùu-gá-dé.
Dico yúhú ndécú ndihí ñaha-í
xii-ndo dàtná ìⁿ téé xĩnu
cuechi.

28 Te nchòhó ducaⁿ-ni
ndècu ndihí ñaha-ndo xii-í,
te tàyáha ndihí ñaha-ndo
xii-í nchaa sá tàyáha-í véxi.
29 Te Tãtà-í Dútú Ndiöxí
ní càchí-gá sá táxi tnuní-í,
te yúhú càchí-í xii-ndo sã
sáá nduu te tnàhá-ndó tàxi
tnuní-ndó. 30 Te dàvá-áⁿ
caxi-o coho-o càda-o núú táxi
tnuní-í, te yacáⁿ ngüíta-ndo
càda ndáá-ndó cuèchi ndi
ùxúú xichí ñáyiu isràél —
càchí-gá xáhaⁿ-gã xii-güedé.

Jèsús càháⁿ-gá sá tẽ Pèlú
cúñaha-dẽ xii ñáyiu sã ñà túú
xiní ñáhá-dẽ xii-gá

(Mt. 26:31-35; Mr. 14:27-
31; Jn. 13:36-38)

31 Te Xítohó Jesucrístú ní
xáhaⁿ-gã xii téé Ximú:

—Yòhó Ximú, cundedóho
váha ìⁿ tnúhu na càháⁿ-í-a, chí
dàtná cuiní-n quide táchí triú
sàcáⁿ-xi duha sàcáⁿ-xi dàcáⁿ,
ducaⁿ quèsaha yucu ñáváha
cada ñaha-xi xii-ndo. Chí coto
ndeé ñáhá-xí xii-ndo te núu
ndisa sàndáá iní ñáhá-ndó
xii-í. 32 Dico yúhú xicáⁿ táhú-í
núú Yã Ndiöxí cuèndá-n,
cuèndá sá vá dàñá ndèé-n
quindáá iní ñáhá-n xii-í. Te
òré ndixi túu iní-n sã ñà túú
ní quide váha-n, te quihíⁿ-n
cuáha-n cuè téé cündihí-n
tnúhu ndee iní cuèndá can-
chicúⁿ nihnu-ni-güedé ichi
Yá Ndiöxí —càchí-gá xáhaⁿ-gã
xii-dé.

33 Te ní xáhaⁿ-dẽ xii-gá:

—Mèstrú, sa ndècu túha-í sá
quíhíⁿ ndihí ñaha-í xii-n vècaá,
àdi cuéi na cùú ndihí ñaha-í
xii-n —càchí-dé xáhaⁿ-dẽ
xii-gá.

34 Te Jèsús ní xáhaⁿ-gã:

—Pèlú, na càchí tnúhu-í
xii-n sã cùmání-gã cana ìⁿ líhi
te úní xito càháⁿ-n núú ñáyiu
sã ñà túú xiní ñáhá-n xii-í —
càchí-gá xáhaⁿ-gã xii-dé.

Sa ní cuyatni ndoho Jèsús

35 Te Jèsús ní xáhaⁿ-gã
xii-güedé:

—Te cútnàhá ní tendaha
ñaha-í xii-ndo ní sáháⁿ-ndó
chìuⁿ-í, chí ñà túú ní
cãnehe-ndo nì ìⁿ sá cùhúⁿ
dìhúⁿ-ndó, te nì ìⁿ sá cùhúⁿ
ndàchiuⁿ-ndo ñà túú ní
cãnehe-ndo. Te chí càchí
tnúhu núu íó ìⁿ sá ní cùmání
xii-ndo —càchí-gá xáhaⁿ-gã
xii-güedé.

Te ní xáhaⁿ-güedé:

—Ñáhá, chi ni ñà túú ní cùmání xii-ndí —càchí-güedé xáhaⁿ-güedé xii-gá.

³⁶ Te ní xáhaⁿ-gá:

—Te vitna núu ndècu ndihi-ndo sá sácũhuⁿ díhúⁿ-ndó, àdi sá sácũhuⁿ ndachìuⁿ-ndo te canehe-ndo. Te núu ñá túú ndècu ndihi-ndo machítí, te nadico-ndo dóó tìcachi ñihnu-ndo te cuaaⁿ-ndo. ³⁷ Te na cächí tnúhu-í xii-ndo sã dàcuítí sã yáha-í nàcuáa càháⁿ-xi núú tütú Yã Ndiöxí núú cächí-xi: “*Ëⁿ-ni ní quide ñaha-güedé xii-gá, ndihi cue téé ndècu cuéchi-xi*”, duha cächí-xi núú tütú-gá. Te ñá díú-ní xǎⁿ yáha-í chi nchaandi túhú nàcuáa càháⁿ-xi núú tütú-gá yáha-í —cächí-gá xáhaⁿ-gã xii-güedé.

³⁸ Te xáhaⁿ-güedé:

—Mèstrú, iha ndècu úú machítí —cächí-güedé xáhaⁿ-güedé xii-gá.

Te ní xáhaⁿ-gá:

—Chí návíi-ñã yuhu-ndo, vá càháⁿ-gá-ndó —cächí-gá xáhaⁿ-gã xii-güedé.

Jèsús càháⁿ ndihi-gá Yã Ndiöxí yucu Òlívú

(Mt. 26:36-46; Mr. 14:32-42)

³⁹ Te Jèsús ní quee-gá cuáháⁿ-gá yucu Òlívú, chi ducaⁿ tnàhí quide-gá. Te cue téé xica cuu ndihi-gá nchícúⁿ ñáhá-güedé xii-gá cuáháⁿ. ⁴⁰ Te òré ní quexìo-gá xiáⁿ, te ní xáhaⁿ-gã xii-güedé:

—Chí càháⁿ ndihi Yá Ndiöxí cuendá sã vã dácàháⁿ ñáhá yucu ñávãha xii-ndo càda-ndo sã ñà túú tàú-ndó càda-ndo —cachí-gá xáhaⁿ-gã xii-güedé.

⁴¹ Te sátá dúcáⁿ te ní quee díⁿ-gá tnuú-güedé cuáháⁿ-gá ñà xio, te sa ñùnchií luha ní xica ndehe-gá núú ndécú-güedé, te xiáⁿ ní ngüíñí xítí-gã càháⁿ ndihi-gá Tátá-gã Dútú Ndiöxí. ⁴² Te xáhaⁿ-gã:

—Táu, te núu dícó cachí-n te taunihnu ñaha-n xii-í cuendá sã vã ndóhò-í ná sãá òré, dico vá cáda-n nàcuáa cächí iní mée-í, chi cada-n nàcuáa cächí iní mée-n —cächí-gá xáhaⁿ-gã xii Tátá-gã Dútú Ndiöxí.

⁴³ Te sátá dúcáⁿ te ní quexìo ñà espíritú xínú cuèchi núú Yã Ndiöxí ní sãñaha-gã-xi tnúhu ndee iní xii-gá. ⁴⁴ Te òré súúní ndihú iní-gá, te uuⁿ-gá súúní ñè yuhu ní iní-gá càháⁿ ndihi-gá Dútú Ndiöxí, te tnée-gã cáá dàtná cáá ñíñí te ngóyó núú ñúhú.

⁴⁵ Te sátá ñí yáha ní càháⁿ ndihi-gá Tátá-gã Dútú Ndiöxí, te ní ndacuíñí-gá cuánuhú-gá núú ñí dándóo-gá cue téé-án, te òré ní nasáá-gá te xixídí-güedé cuendá sã ño cuéhé tnúhu sàni iní-güedé cuendá-gá. ⁴⁶ Te xáhaⁿ-gã xii-güedé:

—¿Ná cuendá xidí-ndó? Chí ndácóo, te càháⁿ ndihi-ndo Yã Ndiöxí cuendá sã vã dácàháⁿ ñáhá yucu ñávãha xii-ndo càda-ndo sã ñà túú tàú-ndó càda-ndo —cachí-gá xáhaⁿ-gã xii-güedé.

Ní tñi-güedé Jèsús ndécá ñaha-güedé cuáháⁿ

(Mt. 26:47-56; Mr. 14:43-50; Jn. 18:2-11)

47 Te càháⁿ dúcáⁿ-ní Jèsús ní quexìo vai cue téé, te ìⁿ téé xìca cuu ndìhi-gá nání Jùdás cùnù-dé yódó nù-dé núú-güedě ní quexìo ndéé núú-gă, te ní teyuhu ñàha-dé xii-gá, te núú tnàhá téé-áⁿ cúú ùxúú cue téé xìca cuu ndìhi-gá. 48 Te ní xáhaⁿ Jèsús xii-dé:

—Jùdás, ¿te yòhó cuáha cuendá ñáhá-n xii yúhú Téé cùu ñaní tnàhá-ndó nchàa-ndo núú cuè téé cùu úhú iní ñáhá xii-í càháⁿ-n nùu duha tàyuhu ñàha-n-áⁿ? — cächí-gá xáhaⁿ-gă xii-dé.

49 Te sátá ní xiní nchaa cue téé cùndìhi Jèsús nàcuáa cùu cue téé ní quexìo-áⁿ, núú ní xícáⁿ tnúhú-güedě núú-gă, te xáhaⁿ-güedě xii-gá:

—Mèstrú, ¿cùu nàá-ndí ndìhi-güedé ndìhi machìtí-a ñă? —cächí-güedé xáhaⁿ-güedě xii-gá.

50 Te ìⁿ-dé ní xehndé-ni-dé lóho xio cùha ìⁿ cue téé ní quexìo-áⁿ, te téé-áⁿ xínú cuèchi-dé núú dütú cùnù-gá, te ní quendeé duuⁿ lóho-dé. 51 Te Jèsús ní xáhaⁿ-gă xii-güedé:

—Chí dáñá-güedě, vá dúcáⁿ càda-ndo —cachí-gá xáhaⁿ-gă xii-güedé.

Te ní dácàá-gá ndaha-gá ní tendaha-gă núú ñí xindeé lóho téé-áⁿ, te ní nduu váha dàtná-ni càa. 52 Te nchaa cue téé cùu dütú cùnùu, ndìhi cue téé tàxi tnuní nchaa cue téé quide cuendá veñúhu sá ïo cùnùu, ndìhi cue téé cùu sacuéhé núú ñáyiu isràél, nchaa cue téé-áⁿ vèxi

tnì ñàha-güedě xii-gá, te ní xáhaⁿ-gă xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo núú ndécù-í, dàtná quidé-ndó ìⁿ ñadúhú quidé ñàha-ndo xii-í. 53 Te ducaⁿ-ni ñí xiní-ndó ñí xíndecu-í xití veñúhu càhnu sá ïo cùnùu ní xóo danèhé-í ñáyiu, te ní lùha ñá túú ní cùu tnándeé ñáhá-ndó xii-í òré-áⁿ, te vitna ní sáá òré ducaⁿ càda-ndo, te cada sácúíhná nàcuáa cùu iní-xi —cächí-gá xáhaⁿ-gă xii-güedé.

Té Pèlú càháⁿ-dé núú ñáyiu sá ñà túú xiní-dé Jèsús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Te ní tnì-güedé Jèsús, te ndèca ñàha-güedé xii-gá cuáháⁿ vehe téé cùu dütú cùnùu-gá, te té Pèlú xica xìca-ni nchicúⁿ ñáhá-dě xii-gá cuáháⁿ. 55 Te òré ní quexìo-güedé xíaⁿ te ní dàtnàhá-güedé ñuhú quehé vehe-áⁿ, te ni càndéé yuhu nùhú-áⁿ ñí ngóo teté-güedé, chí quide víxiⁿ-xi, te tnàhá té Pèlú ní ngóo teté ndìhi ñàha-dě xii-güedé. 56 Te xíaⁿ ndécú ìⁿ xíchí xínú cuèchi vehe-áⁿ, te òré ní xiní-xi núcóo teté tnàhá té Pèlú, te ní ndacoto-xi núú-dě, te ní xáhaⁿ-xi xii-güedé:

—Tnàhá téé-a xìca cuu ndìhi-dé téé ndèca-güedé cuánguihu-áⁿ —cächí-xi xáhaⁿ-xi xii-güedé.

57 Dico té Pèlú ñá túú ní nùnuu-dé, te xáhaⁿ-dě xii-xi:

—Yúhú ñá túú xiní-í téé-áⁿ —cächí-dé xáhaⁿ-dě xii-xi.

58 Te tna tnaa-ni ní cuu, te ní xiní ñáhá tucu ñⁿ-dé, te xáhaⁿ-dë:

—Yòhó tñàhá-n xica cuu ndihi-n téé ndëca-güedé cuánguihu-ãⁿ —càchí-dé xáhaⁿ-dë xii-dé.

Dico té Pèlú ní xáhaⁿ-dë:

—Ñáhá, ñá díú yúhú xíca cùu ndihi-í-dé —càchí-dé xáhaⁿ-dë.

59 Te sa ní cuu dàtná ñⁿ òré te càchí tucu ingá-dé:

—Ndáá sá tée-a xica cuu ndihi-dé téé ndëca-güedé cuánguihu-ãⁿ, chi tñàhá-dé cúú-dë téé distritú Galileá —càchí-dé xáhaⁿ-dë xii-güedé.

60 Te té Pèlú ní xáhaⁿ-dë xii téé-áⁿ:

—Yúhú ñá túú cùtnuní iní-í nása ndùu tñúhu càháⁿ-n —càchí-dé xáhaⁿ-dë.

Te ní vátá xínu ducaⁿ-gã tñúhu càháⁿ-dé ní cana-ni ñⁿ líhi. 61 Te Xitohó Jesucristú ní nchócótó-gã núú-dë, te òré-ni-áⁿ ñí ndacu iní-dé tñúhu ní xáhaⁿ-gã xii-dé sá cùmání-gã cana ñⁿ líhi, te úní xito cáháⁿ-dé sá ñà túú xiní ñáhá-dë xii-gá. 62 Te té Pèlú ní quee-dé tnuú-güedé cuáháⁿ-dé ñⁿ xio, te ní ndáhyú víhí-dë ní ndixi cuéchi iní-dé.

Cùdiquí ndeé-güedé Jèsús

(Mt. 26:67-68; Mr. 14:65)

63-64 Te cue téé ndëé ñáhá xii Jèsús ní cudiquí ndeé ñáhá-güedé xii-gá, te ní dádáhu-güedé núú-gã, te ní caniha-güedé xii-gá, te xáhaⁿ-güedé:

—¿Cáháⁿ ná cótó yòo ní caniha xii-n! —cachí-güedé xáhaⁿ-güedé xii-gá.

65 Te cuéhé víhí-gã tñúhu cuèhé ní xáhaⁿ-güedé xii-gá.

Jèsús ndécú-gã jùndá

(Mt. 26:59-66; Mr. 14:55-64; Jn. 18:19-24)

66 Te sátá ñí túndaá, te ní tacá cue téé cùu sacuéhé núú ñáyiú israél, ndihi cue téé cùu dútú cùnùu, ndihi cue téé dàcuaha ñaha xii-yu nchaa tñúhu ní chídó tñuní ndíi Moisés, te ndëca-güedé Jèsús cuáháⁿ núú cádá-güedé jùndá, te òré ní quexio-güedé ndihi-gá núú cádá-güedé jùndá-áⁿ, te ní xáhaⁿ-güedé xii-gá:

67 —Cuíní-ndí cachí tñúhu-n xii-ndí núu diu-n cùu-n Cristú Yaá ní tendaha Yá Ndióxi véxi ñuyú-a —càchí-güedé xáhaⁿ-güedé xii-gá.

Te ní xáhaⁿ-gã xii-güedé:

—Te núu na càchí-í sá diù-í cúú Cristú ñá, te ní vá quíndaá iní-ndó, 68 àdi te núu ñⁿ sá ná càcáⁿ tñúhu-í núú-ndó, te ní vá càchí tñúhu-ndo, te ní vá dáñá ñàha-ndo. 69 Dico vitna ní cuyatni nduu ngóo yúhú Téé cùu ñaní tñáhá-ndó nchaa-ndo xio cuha Dútú Ndióxi Yaá ío cùnùu —cachí-gá xáhaⁿ-gã xii-güedé.

70 Te dàtnuní nchaa-güedé ní xícaⁿ tñúhú-güedé núú-gã, te xáhaⁿ-güedé xii-gá:

—¿Te yòhó cúú-n Dëhe Yá Ndióxi te núu ducaⁿ vání? —càchí-güedé xáhaⁿ-güedé xii-gá.

Te ní xáhaⁿ Jèsús:

—Ndáá sá díú Dëhe-gá cúú-í dàtná càchí mée-ndó-ãⁿ —càchí-gá xáhaⁿ-gã xii-güedé.

71 Te ní xítñaha-güedé:

—Ñá túú-gã xiní ñùhu-xi cue téé cáháⁿ núu ndáá

sá ndècuéchi-dé àdi ñá túú ndècuéchi-dé chi yuhu mee-dě ní cáháⁿ-dé vitna ní xíndedóho-o —càchí-güedé xítñaha-güedé.

23

Jèsús ndécú-gă núú tẽ Pilatú
(Mt. 27:1-2, 11-14; Mr. 15:1-5; Jn. 18:28-38)

¹ Te nchaa-güedé ní ndacuñí-güedé, te ndèca-güedé Jèsús cuáháⁿ núú tẽ Pilatú, ² te núú tẽ-áⁿ ní ngüita-güedé sàcáⁿ cuéchi-güedé cuendá-gá, te xáhaⁿ-güedé:

—Ní naníhí-ndí tée-a dándahú-dé ñáyiu ñuú-ó, chi xáhaⁿ-dě xii-yu sá vã chãhu-gá-yu impuéstú xii té Cèsár tée ío cùnùu, te càchí-dé sá díú-dě cúú-dě Crístú Yaá ní tendaha Yã Ndiöxí véxi ñuyíú-a te yíndaha-dé ñáyiu càchí-dé —càchí-güedé xáhaⁿ-güedé xii-dé.

³ Te té Pilatú ní xícáⁿ tnúhu-dé núú-gă, te xáhaⁿ-dě xii-gá:

—¿Ndáá sá díú-n cùu-n tée yíndaha ñaha xii ñáyiu isràél-ãⁿ? —càchí-dé xáhaⁿ-dě xii-gá.

Te Jèsús ní xáhaⁿ-gă xii-dé:

—Díu-í yíndaha-í-yu —càchí-gá xáhaⁿ-gă xii-dé.

⁴ Te té Pilatú ní xáhaⁿ-dě xii nchaa ñáyiu, ndihí cue tée cùu dútú cùnùu:

—Yúhú cútñuní iní-í sá ñá túú ní ìⁿ cuéchi tée-a —càchí-dé xáhaⁿ-dě xii-yu.

⁵ Dico níhi-gá ní cáháⁿ-güedé, te xáhaⁿ-güedé:

—Càchí-ndí sá ío dusaⁿ xíquide ñáyiu cuendá nchaa

sá dánèhé ñáhá-dě xii-yu, te ní quesaha-dě ndéé distritú Galileá, te ní yáha-dé ñihí distritú Jùdeá dánèhé-dé ñáyiu, te vitna ní sáá-ni-tu-dé ndéé ndíha dènehé-dé-yu —càchí-güedé xáhaⁿ-güedé xii té Pilatú.

Jèsús ndécú-gă núú tẽ Hèrodés

⁶ Te sá dúcáⁿ ní tecú dóho té Pilatú ní cacu nehé-yu distritú Galileá, núu xíãⁿ ní xícáⁿ tnúhú-dě núú-yu núu tée Galileá cúú-gă. ⁷ Te ní

xáhãⁿ-yu sá díú tẽ yàcáⁿ cúú-gă, núu xíãⁿ ní na dáyáha ñaha-dě xii-gá ndaha té Hèrodés tée cùu gobiernú distritú Galileá chi nduu-ãⁿ ndécú-dě tñahá-dé ñuú Jerusalén-áⁿ. ⁸ Te òré ní xini té Hèrodés-áⁿ Jèsús te ío ní cudíí

iní-dé, chi ní cunaha dùcaⁿ-ni cuiní-dé quini ñáhá-dě xii-gá te ñá túú tñahí xini ñáhá-dě xii-gá ní cùu, chi cuendá-ni tnúhu níhi-dé cuendá-gá, te ndètu-dé sáá ìⁿ nduu quini ñáhá-dě xii-gá, te cada-gá ìⁿ sá vã yõo tñahí ndàcu cada cundehe-dé ní sani iní-dé.

⁹ Te vài sá ní xícáⁿ tnúhú-dě núú Jèsús, dico ní ìⁿ tnúhu ñá túú ní cáháⁿ-gă. ¹⁰ Te

xíãⁿ xíndecu tñahá cue tée cùu dútú cùnùu, ndihí cue tée dácuaaha ñaha xii ñáyiu nchaa tnúhu ní chídó tñuní ndíi Moisés, te cue tée-áⁿ sùúní ío iní-güedé sàcáⁿ cuéchi-güedé cuendá-gá. ¹¹ Te té Hèrodés ndihí cue tée cùu sandadú-dé ñá túú ní cùu váha iní-güedé núú Jèsús, te ní cudíquí ndéé ñáhá-güedé xii-gá, te ní dácuihnú ñaha-güedé dóo

vãha xii-gá dàtná cáá dõõ sácuihnu cue tée sàquindaha ñàha xii ñáiyu. Te dàtnùní té Hèrodés ní dánùhú ñáhá tùcu-dé xii-gá ndaha té Pilatú. 12 Te nduu-ãⁿ ñi tnahá tnúhu té Pilatú ndihi té Hèrodés, chi cùu úhú iní tnahá-güedë ní cùu.

Càchí-güedé sá cáhni-güedë Jèsús

(Mt. 27:15-26; Mr. 15:6-15; Jn. 18:39-19:16)

13 Te té Pilatú ní nadatacá-dé nchaa cue tée cùu dútú cúnùu ndihi dava-gá cue tée cùnùu, ndihi nchaa ñáiyu ñuú-áⁿ, 14 te ní xáhaⁿ-dë:

—Nchòhó ndécá-ndó tõe-a véxi ní taxi cuendá-ndó-dë iha, te càchí-ndó sã ïo dusaⁿ quide ñáiyu cuendá nchaa sá dánèhé ñáhá-dë xií-yu, te núú-ndó ndùcu tnúhu-í núú-dë nùu ná ní quide-dé. Dico yúhú cùtnùní iní-í sá ñà túú ñi ñⁿ cuéchi-dé dàtná càháⁿ-ndó-ãⁿ. 15 Te cuëj té Hèrodés diu-ni ducaⁿ càháⁿ-dé sá ñà túú cuéchi-dé nùu ní techiⁿ ñaha tucu-dé cuándixi-dé iha. Te vitna sa ní cutnùní iní-ó sã ñà túú tàú-xi cahni-o-dë chi ñà túú cuéchi ni quide-dé. 16 Te na dândoho-ni-í-dé te dàcácu-í-dé —càchí-dé xãháⁿ-dë xií-yu.

17 Te ndi tnahá nduu vico pascuá te dacuití sã dácácu té Pilatú-áⁿ ñi cue tée yíhi ve-caá, chi ducaⁿ tnahí quide-dé. 18 Dico nchaá-yu ní cuáá-yu, te xãháⁿ-yu xii-dé:

—¡Queñuhu tée ñani Jèsús-áⁿ, te cahni-n-dë! ¡Te dàcácu-n té Barrábás! —càchí-yu xãháⁿ-yu xii-dé.

19 Te té Barrábás-áⁿ ñi sanu ichi-dé ñáiyu ñuú ingá ichi, te ní ngúita-yu ndihi-dé ní cuu úhú iní-yu cue tée cùchiuⁿ, te ní sahani-dé ndíyí núu xiãⁿ ní chihí ñaha-güedë ve-caá xii-dé. 20 Te té Pilatú cuini-dé dàcácu-dé Jèsús nùu xiãⁿ càháⁿ ndihi ñaha tùcu-dé xií-yu ni cùu, 21 dico uuⁿ-gá níhi ní cuáá-yu, te ní xáháⁿ-yu xii-dé úú xito:

—¡Cata caá-dé núu cùrúxí! ¡Cata caá-dé núu cùrúxí! —càchí-yu xãháⁿ-yu xii-dé.

22 Te xito cuu úní ní xáhaⁿ té Pilatú:

—¡Te ná cúu cuéchi ní quide-dé te núu ducaⁿ cuini-ndó càda-í-dé-i? Te yúhú cùtnùní iní-í sá ñà túú cuéchi ni quide-dé nùu xiãⁿ ñà túú tàú-xi cahni-o-dë, te na dândoho-ni-í-dé te dàcácu-í-dé —càchí-dé xãháⁿ-dë xií-yu.

23 Dico níhi-ni càháⁿ-yu xãháⁿ-yu sá ná càta caa ñaha-dé xii-gá núu cùrúxí, te ñáiyu-áⁿ ndihi nchaa cue tée cùu dútú cúnùu xicáháⁿ níhi-güedë ndihí-yu ndéé ní xínu iní té Pilatú cada-dé nàcuáa càchí iní-yu. 24 Te ní xáhaⁿ-dë xií-yu sá cúu càda-dé nàcuáa xãháⁿ-yu. 25 Te ducaⁿ te ní dácácu-dé té Barrábás té ní sanu ichi ñáiyu ñuú ingá ichi, te diu-ni-dé ní sahani-dé ndíyí núu xiãⁿ ní xíhi-dé ve-caá, te dàtnùní ní táuchíuⁿ-dë cada-güedë Jèsús nàcuáa xãháⁿ-yu.

Sàta caa-güedë Jèsús núu cùrúxí

(Mt. 27:32-44; Mr. 15:21-32; Jn. 19:17-27)

26 Te ndèca-güedé Jèsús cuáháⁿ núú cáta càa ñaha-güedé xii-gá, te ichi cuáháⁿ-güedé ndihi-gá ní tñii-güedé ìⁿ téé ñúú Cirené nání-dé Xímú ñúhú-dé ichi duha cuándixi-dé ní sáháⁿ-dé yucu, te ní dácuidó ñaha-güedé xii-dé cùrúxí nchídó Jèsús, te ní ngúita nchicúⁿ-dé sátá-gă.

27 Te ío cuéhé ñáyiú nchicúⁿ ñáhá xii-gá cuáháⁿ, te vâi ñáyiú ðihí ío níhi ndàhí-yu sá ndihú iní-yu cuëndá Jèsús.

28 Te Jèsús ní nchócótó-gă núú-yu, te ní xáhaⁿ-gă:

—Nchòhó ñáyiú ðihí ñúú Jerusálén, vá ndàhyú-ndó cuëndá-í chí ndàhyú cuëndá méé-ndó ndihi cuendá déhe-ndo. 29 Chí sáá nduu quèsaha ñáyiú: “Sá vâha táhú nchaa ñáyiú ñá túú càcu déhe-xi, ndihi nchaa ñáyiú vátá quíni-gá cuhuⁿ déhe-xi, chí ní ñà túú xini-yu dacadí-yu”, duha quesàhá-yu. 30 Te dàvá-áⁿ cñhaha ñáyiú xii nchaa tindúú ndihi nchaa núú xìquí: “Chí tácuⁿ ngónchihí ñaha-ndo xì-ndí”, duha cñhàhá-yu. 31 Te núú yúhú téé quide ndáá duha quide ñaha-güedé xii-í vitna, te ndèé-gá cada-güedé nchaa ñáyiú ndècu ichi cuehé ichi duha —càchí-gá xáhaⁿ-gă xii-yu.

32 Te ndèca tucu-güedé úú tñahá cue téé ndècu ndisa cuéchi-xi cuáháⁿ cuëndá cahni ñaha-güedé xii-güedé ndihi Jèsús. 33 Te òré ní quexìo-güedé ndihi-gá ìⁿ xichi núú nání Yìquí Díquí

Ndiyi, te xíaⁿ ní sata caa ñaha-güedé xii-gá núú cùrúxí, ndihi úú cue téé ndècu ndisa cuéchi-xi-áⁿ, te ìⁿ-dé ní sata caa-güedé xio cùha-gá te ingá-dé ní sata caa-güedé xio dàtni-gá ðiu-ni núú cùrúxí tucu. 34 Te ní xáhaⁿ-gă xii Tátá-gă Dútú Ndiòxi:

—Táu, cada càhnu iní sá quidé-güedé, chí ñá túú cùtnuni iní-güedé ná cúú sá quidé-güedé —càchí-gá xáhaⁿ-gă.

Te cue téé cùu sandadú ní xito ndèé-güedé núu ndèdacàa-güedé cuu cuëndá-güedé dóó-gă. 35 Te nchaa ñáyiú xñdecu-áⁿ ndéhè-yu nàcuáa quide-güedé Jèsús, te nchaa cue téé cùnuu ní cudíquí ndeé ñáhá-güedé xii-gá, te ní xitnàha-güedé:

—Te dava ñáyiú ní ndacu-dé ní dácácu nihnu-dé, te vitna na dàcácu nihnu-dé méé-dé, te núu ndisa sá Cristú Yaa ní tendaha Yá Ndiòxí véxi ñuyíú-a cùu-dé —càchí-güedé xitnàha-güedé.

36 Te tñahá cue téé cùu sandadú ní cudíquí ndeé ñáhá-güedé xii-gá, chí ní sàndehe yatni-güedé núú tàcàa-gá sñhaha-güedé ndudí íá còho-gá ní cùu, 37 te ní xáhaⁿ-güedé xii-gá:

—Te núu yòhó cúú-n tée yìndaha ñaha xii ñáyiú is-ràél, te dàcácu nihnu mee-n —càchí-güedé xàhaⁿ-güedé xii-gá.

38 Te ní taxi ndecu-güedé ìⁿ sá ndèé lètrá ndàa díquí-gă te ndèé úní núú tñúhu, tñúhu griégú, ndihi tñúhu

lâtín, ndihí tnúhu hëbreú, te duha quèe-xi ndi nuní núú tnúhu-áⁿ “Tée-a cùu-dé téé yíndaha ñaha xii ñáyiú isràél”, duha quèe-xi.

39 Te ìⁿ téé ndècu ndisa cuèchi-xi, téé ní sata caa-güedé dìñi-gá xícuèhé ñáhá-dě xii-gá, te xáhaⁿ-dě:

—Te núu yòhó cúú-n Cristú Yaá ní tendaha Yá Ndiòxí véxi ñuyíú-a, te dàcácu nihnu mee-n, te dàcácu nihnu ñaha xii nchúhú tnàhá-ndí tucu — cächí-dé xáhaⁿ-dě xii-gá.

40 Dico ingá téé cùndihí-dé téé tàcaa ingá xio dìñi-gá ní tenàá ñáhá-dě xii-dé, te xáhaⁿ-dě:

—¿Te náa ñá túú ndàcu iní-n Yá Ndiòxí vitna duha càa-o ndoho-o ndihí téé nàni Jesús-a ñá? 41 Chi nchoo táu ndisa-o sã dúhá ndòho-o nacháhu-o cuèchi-o, dico Jesús-a chi ñá túú cuèchi-dé — cächí-dé xáhaⁿ-dě xii téé tàcaa ndihí-dé-áⁿ.

42 Te dàtnùní ní xáhaⁿ-dě xii-gá:

—Jèsús, ndacu iní ñáhá-n xii-í òré ná quixi-n taxi tnuní-n ñuyíú-a — cächí-dé xáhaⁿ-dě xii-gá.

43 Te Jèsús ní xáhaⁿ-gã:

—Na cächí tnúhu ndáá-í xii-n sã méi ndúu vitna cundecu ndihí ñaha-í xii-n núú ní nduu táhù-í cundecu-í — cächí-gá xáhaⁿ-gã xii-dé.

Ní xihí Jèsús

(Mt. 27:45-56; Mr. 15:33-41; Jn. 19:28-30)

44 Te òré ní cuu cuádaya nduu. Te ní cunee nihí ñuyíú, te ducaⁿ-ni càa ní cuu ndéé caá úní sacuaa. 45 Chi ñá túú-gã ní dàyehé nchícanhii

te ní ndátá dõó cúú còrtiná veñúhu càhnu sá ío cùnuu ní quèe dava ndáá. 46 Te nihí ní cáháⁿ Jèsús, te xáhaⁿ-gã xii Tátá-gã Dútú Ndiòxí:

—Táu, naqueheⁿ cuèndá-n espíritú-í — cächí-gá xáhaⁿ-gã xii Tátá-gã.

Te tnúhu-ná-áⁿ ní cáháⁿ-gã te ní xihí-ni-gá.

47 Te òré ní xiní téé cùu capitáⁿ sá dúcáⁿ ní cuu, te ní ndacu iní-dé Yá Ndiòxí, te ní cachí-dé:

—Sá ndáá ndisa sá tõe-a cùu-dé ìⁿ téé ío quide ndáá ndécú ñuyíú-a ní cùu — duha ní cachí-dé.

48 Te chitu ñáyiú ní tacá xiáⁿ chi cuíni-yu cundèhé-yu nása cada-güedé Jèsús. Te sátá ní yáha ní xiní-yu nàcuáa ní quide ñaha-güedé xii-gá, te ní ndihí-yu ní ndaca ta caní-yu pèchú-yu cuánuhú sá ndihú iní-yu. 49 Dico ndècu tnahá cue ñáyiú xini tnáhá ndihí Jesús, ndihí ñáyiú dìhí ní chinchícúⁿ ñáhá xii-gá ndéé distritú Galileá, te ñáyiú-áⁿ xica-ni xixínutnñi-yu xíndéhè-yu nchaa nàcuáa ní quide ñaha-güedé xii-gá.

Chìndúxi-güedé Jèsús

(Mt. 27:57-61; Mr. 15:42-47; Jn. 19:38-42)

50 Te ndècu ìⁿ téé ñuú Arimateá nání-dé Chéé, te ñuú-áⁿ yíndèhu-xi distritú Júdeá, te ío váha iní-dé te quide ndáá-dé núú Yá Ndiòxí, te tnáhá-dé cúú-dě chiuⁿ te ní xíndecu-dé jündá cue téé isràél. 51 Te ñá ní tnáhá tnahí iní-dé nàcuáa ní cáháⁿ-güedé núú jündá nàcuáa cada-güedé

Jèsús. Te téé-án ndétú-dě sáá nduu ndihu ndaha ñàha Yá Ndiöxí xii-dé ndihi ñáyiu. ⁵² Te téé-án ñí sáhán-dé núú tē Pilatú te ní xáha-dě sá núú vá cùndèe iní-dé dañá-dě chindúxi-dé yiqui cùñú Jèsús. Te té Pilatú-án ñí sáha-dé tnúhu. ⁵³ Te ní nunehe-dé yiqui cùñú-gá núú cùrúxí, te ní chidúcúⁿnuu-dé ñⁿ dóó cuixíⁿ, te ní chihi-dé ñⁿ yaú nchii yiqui naha càva, te vátá yõo ñⁿ-gá nguindúxi yaú-án.

⁵⁴ Te cùu-xi nduu vispré nduu ndètatú ñáyiu, núú xiquide túha-ná-yu sá cúú ìngá nduu.

⁵⁵ Te nchaa ñáyiu ñí ní chinchícúⁿ ñáhá xii Jèsús ndéé distritú Galileá nděndàhá-yu té Chèé ní sáhán núú nchii yaú-án, núú ní xiní-yu nàcuáa ní sacáⁿ-dè yiqui cùñú-gá xití yaú-án. ⁵⁶ Te ducaⁿ te cuánuhú-yu vehé-yu, te ní quide túha-yu acití sáhán tnámí, ndihi pomàdá, te ní ndetatú-yu ìngá nduu-án ñí quidé-yu nàcuáa càháⁿ tnúhu Yá Ndiöxí.

24

Ní ndoto Jèsús

(Mt. 28:1-10; Mr. 16:1-8; Jn. 20:1-10)

¹ Te ndumìngú nehé víhí-ní cuáhán tucu ñáyiu ñí ní nchii yaú ní chihi-güedé yiqui cùñú Jèsús, te nèhé-yu nchaa sá sáhán tnámí ñí quide túha-yu-án cuáhán, te tnàhá tucu ñⁿ ùú-gá tnàha ñí ní yu nchícúⁿ ñáhá xii-yu cuáhán.

² Te òré ní quexió-yu yuhu yaú-án te ní xiní-yu sá yúú ndèdí ñⁿ xio-ná ndécú, ³ te

ní quíhu-yu xití yaú-án, dico ñá túú-gá yiqui cùñú Jèsús yíhí. ⁴ Te ñá ní cùtnuní tnàhí iní-yu ndèé ichi cuáhán yiqui cùñú-gá, te ní xiní-yu úú espíritú xínú cuèchi núú Yá Ndiöxí xínutnii-xi ñí ní yu te xixíhnu-xi dóó chàhnchí. ⁵ Te ní yuhú-yu te ñá túú ní cùyíí-yu cundèhé-yu cue espíritú-án, te cue espíritú-án ñí xáhaⁿ-xi xii-yu:

—¿Ná cuendá nándücu-ndo Jèsús Yaá ndécú vívú núú yíndúxi ñáyiu ní xihí-i? ⁶ Te ñá túú-gá yiqui cùñú-gá ndécú ìha chi sa ní ndoto-gá, te chí dándàcu iní nàcuáa ní càháⁿ-gá cùtnàhá ní xíndecu-ndo ndihi-gá distritú Galileá, ⁷ chí ní cachí-gá sá méé-gá cúú-gá ñaní tnàhá-ndó nchàa-ndo, te dacuitíí cuàha cuendá ñáhá-güedé xii-gá núú cuè téé ndècu ichi cuehé ichi duha, te cata caa ñaha-güedé xii-gá núú cùrúxí, te núú cùrúxí-án cúú-gá dico nduu úní sá cúú-gá te ndoto-gá, duha ní cachí-gá xii-ndo.

⁸ Te òré-án ñí ndacu iní-yu tnúhu ní càháⁿ Jèsús. ⁹ Te sátá dúcáⁿ te ní naquehéⁿ-yu ichi cuánuhú-yu, te ní caní-yu cuendú núú ndí úxí ñⁿ cue téé ní táúchíúⁿ Jèsús càháⁿ tnúhu-gá, ndihi núú dàva-gá ñáyiu. ¹⁰ Te ñáyiu ducaⁿ nàha tnúhu cuánuhú núú-güedé-án cúú tã Màriá Magdalèná, ndihi tá Juáná, ndihi tá Màriá náná tē Jàcobó, ndihi dàva-gá ñáyiu ñí. ¹¹ Dico cue téé-án ñí sani iní-güedé sá dicó

cáhú iní-yu tnúhu xähäⁿ-yu xii-güedé nüu ñá túú ní sándáá iní-güedé nàcuáa ní xähäⁿ-yu.

12 Dico té Pèlú ní quee-dé xínú-dě cuáháⁿ cuándéhé-dě yaú núú ní chihi-güedé yiqui cuñú Jèsús, te ní sáá-dé te ní ngáundeyi-dé xító nihni-dé xití yaú-áⁿ te ní xiní-dé sá méé-ná dóó ní xíducúⁿ nuu-gá yúcú ñⁿ xio, te ío ní cuñúhu-dé sá dúcáⁿ ñí cuu, te ní natnñ-dé ichi cuánuhú-dé vehe núú xíndecu-güedé.

Ichi ñuú Emàús
(Mr. 16:12-13)

13 Te ñu-ni nduu-áⁿ ñúhú úú cue téé ní xica cuu ndiñi Jèsús ichi cuáháⁿ-güedé ñⁿ ñuú nání Emàús, te sàcúhuⁿ-güedé dàtná úú òré ichi ndéé ñuú Jerusalén, te ndéé ñuú Emàús.

14 Te ta ndàtnúhu-güedé cuáháⁿ nchaa nàcuáa ní cuu, 15 te ñini dùcaⁿ xícáháⁿ-güedé, te Jèsús ní natnahá ñáhá-gä xii-güedé te ndèca tnaha-gá ndiñi-güedé cuáháⁿ. 16 Te cuèi ndèhe ñaha-güedé xii-gá dico dàtná ñⁿ sá ndedí núú-güedé, chi ñá ná quini ñáhá-güedé xii-gá ní cùu. 17 Te Jèsús ní xícáⁿ tnúhú-gä núú-güedé, te xáhaⁿ-gä:

—¿Ná tnúhu xícáháⁿ-ndó ñuhu-ndo ichi núu ducaⁿ ío cùu ndiyí-ndó-í? —càchí-gá xáhaⁿ-gä xii-güedé.

18 Te ñⁿ téé nàni Cleofás ní xáhaⁿ-dè xii-gá:

—¿Te ná cuèndá nchaa ñáyiú íchí ní sáá ñuú Jerusalén xiní-yu nchaa nàcuáa ní cuu, te ñⁿ dii-ná yòhó ñá túú

xiní-ñ-í? —càchí-dé xähäⁿ-dè xii-gá.

19 Te ní xáhaⁿ-gä xii-güedé:

—¿Te ná ní cuu-í? —càchí-gá xáhaⁿ-gä xii-güedé.

Te ní xáhaⁿ-güedé xii-gá:

—Cuèndá Jèsús téé ñuú Nazàrét càháⁿ-ndí, chi téé-áⁿ cúu-dè ñⁿ téé càháⁿ tnúhu Yá Ndiòxí, te ío váha ndùu tnúhu càháⁿ-dé ní cùu, te quide-dé sá vã yõo tnàhí ndàcu cada nacuáa cudíí iní Yá Ndiòxí ndiñi ñáyiú ní cùu. 20 Te cue téé cùu dútú cùnùu, ndiñi cue téé cùnùu taxi tñuní ñáhá xii-ndí ní sáha cuèndá ñáhá-güedé xii-dé núú tẽ Pilatú te ní sata caa ñaha-güedé te núú cùrúxí-áⁿ ñí xihí-dé. 21 Dico vitna sa ní cuu úní nduu sá ñí xihí-dé, te nchúhú ní sani iní-ndí sá tẽ-áⁿ dàcácu nihnu ñaha-dè xii nchúhú ñáyiú isràél núú nchàa tnúndòho tnúhu ndàhú ndécú-ndí.

22 Dico ío cuñúhu-ndí cúu, chi ñⁿ úú ñáyiú diñí ní tuha ñaha xii-dé ndécú ndiñi-ndí ní sáháⁿ ngotó-yu ndéxuehe tàcuñhdá-gá yaú núú ñí chihi-güedé yiqui cuñú-dé, 23 te ní nasáá-yu càchí-yu xii-ndí sá ñà túú-gä yiqui cuñú-dé yihí xití yaú-áⁿ. Te ní xiní-yu espíritú xínú cuèchi núú Yá Ndiòxí, te ní xáhaⁿ-xí xii-yu sá ndécú vívú-dè. 24 Te sátá dúcáⁿ te ñⁿ úú cue téé cùndiñi-ndí ní sáháⁿ ndéhé-güedé yaú-áⁿ, te ní xiní-güedé sá ndàá cúu-xí nchàa tnúhu ní càháⁿ ñáyiú diñi-áⁿ, dico ñá túú ní xiní-güedé téé-áⁿ

—càchí-güedé xǎhaⁿ-güedě xii-gá.

²⁵ Te Jèsús ní xáhaⁿ-gǎ xii-güedé:

—Íío cùmání sǎ xini tñuní-ndó, chi ío cuèé sàndáá iní-ndó tñuhu ní cáháⁿ cue téé ní xóo cáháⁿ tñuhu Yá Ndiöxí ndéé sanaha! ²⁶ ¿Te náa ñá túú tàú-xi sá ndóhó Cristú òré cùmání-gǎ sáá nduu ndaa-gǎ andi u núú ndécú Dütú Ndiöxí cundecu-gǎ-áⁿ? —càchí-gǎ xáhaⁿ-gǎ xii-güedé.

²⁷ Te ní ngüíta-gǎ xáhaⁿ-gǎ nàcuáa quèe-xi nchaa tñuhu càháⁿ-xi núú tütú Yá Ndiöxí cuèndá-gǎ, te díhna-gǎ ní cáháⁿ-gǎ nàcuáa nduu nchaa tñuhu yòdo tñuní núú tütú ndíi Moisés, te dàtnuní ní cáháⁿ-gǎ nàcuáa nduu nchaa tñuhu yòdo tñuní núú tütú nchaa cue téé ní xóo cáháⁿ tñuhu Yá Ndiöxí ndéé sanaha.

²⁸ Te òré ní quexio-güedé yuhu ñúú núú cuáháⁿ-güedé-áⁿ, te Jèsús ní quide-ni-gǎ sá yáha-gǎ quíhⁿ-gǎ ingá xichi ní cùu. ²⁹ Dico ní cáháⁿ ndàhú-güedé núú-gǎ sá quéndöo-gǎ xíaⁿ ndetatú-gǎ ndihi-güedé, te xáhaⁿ-güedě xii-gá:

—Quendóo ndihi ñaha xii-ndí iha ndetatú-n chi sa ní cuaa, te tnavíi cundiquiⁿ —càchí-güedé xǎhaⁿ-güedě xii-gá.

Te xíaⁿ cáá ñⁿ vehe cuánguihu-güedé ndetatú-güedé ndihi-gǎ. ³⁰ Te òré sa yíhi-güedé mèsá ndihi-gǎ cùdini ndihi ñaha-güedé, te ní queheⁿ-gǎ pàá te ní ndacáⁿ táhú-gǎ núú Yá Ndiöxí, te ní táhú cuèchi-gǎ te dàtnuní ní

dácǎhñu ñaha-gǎ xii-güedé. ³¹ Te òré-áⁿ ñí naquiní ñáhá-güedě xii-gǎ ní cùu, dico uuⁿi ní ndóñhú-gǎ. ³² Te ní xítñaha-güedé:

—Te ndáá sá sùuní cùdíí iní-ó òré tá ndàtnúhu-o ndihi Jesús véxi ichi, te ta dànehé ñáhá-gǎ xii-o nchaa nacuáa quèe-xi tñuhu càháⁿ-xi núú tütú Yá Ndiöxí —càchí-güedé xítñaha-güedé.

³³ Te ñá túú-gǎ ní xíndetu-güedé chi ndihi-ni ní natñi-güedé ichi cuánuhú-güedé ñúú Jerusalén, te ní nasáá-güedé núú xíndecu ndi ùxí ñⁿ cue téé ní táuchíúⁿ Jesús cáháⁿ tñuhu-gǎ, ndihi dava-gǎ ñáyiu. ³⁴ Te cue téé xíndecu-áⁿ xáhaⁿ-güedé:

—Ndáá sá ñí ndoto Yaa cúú Mèstrú, chi ní xini ñáhá tě Ximú —càchí-güedé xáhaⁿ-güedé.

³⁵ Te cue téé ní nasáá-áⁿ ñí cani-güedé cuèndú nàcuáa ní cuu ichi, ndihi nàcuáa ní cuu ní naquiní-güedé Jesús òré ní táhú-gǎ pàá ní dácǎhñu ñaha-gǎ xii-güedé.

Jèsús ní quexio-gǎ núú xíndecu cue téé ní xica cuu ndihi-gǎ

(Mt. 28:16-20; Mr. 16:14-18; Jn. 20:19-23)

³⁶ Te càháⁿ dúcáⁿ-ní-güedé nàcuáa ní cuu ní quexio Jesús ní ngúnutñi-gǎ ndéé tnuú-güedé, te xáhaⁿ-gǎ xii-güedé:

—Yá Ndiöxí chindèe ñaha-gǎ xii-ndo ío váha cùu iní-ndó ndècu-ndo —cachí-gǎ xáhaⁿ-gǎ xii-güedé.

37 Te da ní yùhú-güedé, te ní sani iní-güedé sá dicó ñⁿ espíritú cúú sá ndéhé-güedé ní cùu. 38 Dico Jèsús ní xáhaⁿ-gã xii-güedé:

—¿Ná cuendá yùhú-ndó, te sàni ñⁿ sani úú iní-ndó-í? 39 Chí cündèhe ndaha-í ndihí sáhà-í te quiní-ndó nã diu-ni-í. Te chí téndàha ñaha xii-í te cundehe-ndo, te núu ñⁿ espíritú ndécú yìqui cuñú-xi dàtná ndécú ndihí yùhú — cächí-gá xáhaⁿ-gã xii-güedé.

40 Te sátá dúcáⁿ nĩ xáhaⁿ-gã te ní dánèhé ñáhà-gã xii-güedé ndaha-gá ndihí sáhà-gã. 41 Te ío ní cuñúhu-güedé, te ní cudíí iní-güedé sá ndécú-gã tnuú-güedé dico sàni ñⁿ sani úú iní-güedé, te ní xáhaⁿ Jèsús xii-güedé:

—¿Ndècu ndihí-ndo luha sá cáxí-ó ìha ñã? —cächí-gá xáhaⁿ-gã xii-güedé.

42 Te ní sáñaha-güedé xii-gá luha chácá nĩ chíhó, ndihí dítá ñũñú ñúhú ndùdí, 43 te ní queheⁿ-gá te ndèhe-güedé ní xexi-gá. 44 Te dàtnùní ní xáhaⁿ-gã:

—Nchaa sá nĩ yáha-í-a cùu-xi sá nĩ cachí tnúhu-í xii-ndo cüntàhá ndécú ndihí ñaha-gá-í xii-ndo, chí ní cachí-í sá dàcui^{tí} càda-xi nchaa nacúáa càháⁿ-xi núú tütú ndíi Moisés, ndihí núú tütú ndéè tnúhu ní càháⁿ cue tée ní xóo càháⁿ tnúhu Yá Ndiöxí ndéè sanaha, ndihí núú librú Sãlmú —cächí-gá xáhaⁿ-gã xii-güedé.

45 Te òré-áⁿ nĩ sáñaha-gã sá xiní tñuní-güedé, te ní tecú tñuní-güedé nchaa tnúhu

càháⁿ-xi núú tütú Yá Ndiöxí. 46 Te ní xáhaⁿ-gã xii-güedé:

—Ducaⁿ ndéè tñuní núú tütú Yá Ndiöxí sá dàcui^{tí} sá yùhú Cristú cuú-í, te nduu úní ndoto-í. 47 Te nihíi ñuyíú cüténuu tnúhu ní càháⁿ-í, dico díhna nuu-gã ñúú Jerusálén ngúíta-yu cacunehe ñáhà-yu xii-í, te càháⁿ-yu nàcuáa ní dánèhé-í-yu, te cúñáhà-yu xii cue ñáyiú sá ná dándixi túu-yu iní-yu sá ñà túú quède váha-yu, te dàñá-yu nchaa ichi cuèhé ichi duha ndécú-yu, te natnii-yu ichi Yá Ndiöxí, te ducaⁿ te cada càhnu iní-gá nchaa yícá cuèchi-yu. 48 Te vitna nchòhó cuu-ndo cuè tée càháⁿ ndáá nchaa nàcuáa ní cuu chí ní xiní núú-ndó. 49 Te yùhú tendaha-í Espíritú Yá Ndiöxí quixi cundecu ndihí-ndo, chí ducaⁿ nĩ cachí-gá. Dico chí cündècu-ni ñúú Jerusálén-áⁿ ndéè ná quèxio Espíritú Yá Ndiöxí ngúndecu ndihí-ndo cuendá chindee ñàha-xi xii-ndo cada-ndo nchaa nacúáa ní càháⁿ-í —cächí-gá xáhaⁿ-gã xii-güedé.

*Jèsús cuándaa-gá andiu
(Mr. 16:19-20)*

50 Te Jèsús ní queñuhu ñaha-gã xii-güedé ñúú Jerusálén ndécá ñàha-gá cuáhàⁿ ñúú Bètaniá, te xiáⁿ nĩ ndonehe-gá ndaha-gá núú ñnu, te ní xicáⁿ táhú ñàha-gá xii-güedé núú Yá Ndiöxí. 51 Te sátá nĩ xicáⁿ táhú ñàha-gá xii-güedé núú Yá Ndiöxí, te ní quee-gá tnuú-güedé cuándaa-gá andiu. 52 Te ní ngúíta-güedé ní cachí-güedé sá ìo càhnu

cuu Jesús, te ní natnii-güedé
ichi cuánuhú-güedé ñuú
Jerusalén, te súúní cùdíí
ìní-güedé ñúhú-güedě ichi.
53 Te nchaa nduu ní
xíndecu-güedé veñúhu càhnu
sá ïo cùnuu ní ndacáⁿ
táhú-güedě núú Yă Ndiõxí,
te ní cachí-güedé sá ïo càhnu
cuu-gá. Duha ní cuu dává-áⁿ.

TNÚHU NÍ CHÍDÓ TNÚNÍ TĒ JUÀÁ

Déhe Yá Ndiöxí ní cuu-gá ìⁿ ñáyiu

¹ Cùmání-gă ngáva ñuyíú, te sa ndècu ndihì Yá Ndiöxí Déhe-gá. Te ìⁿ-ní xīcuu-gá. Te Déhe-gá-áⁿ nǐ cuu-gá dàtná ìⁿ tnúhu, chí ní cachí tnúhu-gá nàcuáa càa Tátá-gă Dútú Ndiöxí. ² Te sa ndècu-gá ndihì Dútú Ndiöxí te ní ngáva ñuyíú. ³ Te òⁿ-ni tnúhu mee Dútú Ndiöxí ní cuu ní cadúha Déhe-gá nchaa sá íó ñuyíú. Te núu ñá túú Dèhe-gá ñá, te ñá túú nă coo ñuyíú-a ní cùu. ⁴ Te òⁿ-ni Déhe-gá quidé-gă ndécú-ó, te ní dáyèhé-gá iní-ó nàcuáa cundecu-o. ⁵ Te tnúhu-gá ní xité nuu-xi núú ndécú nchàa ñáyiu ñuhu ichi cuehé ichi duha. Te ñáyiu-áⁿ cúŷ-yu dàtná cue ñáyiu ndècu ìⁿ núú néé, te òⁿ-ní-yu cachí iní-yu xocàní-yu tnúhu-gá dico vá ndácŷ-yu.

⁶⁻⁷ Te ní xīndecu ìⁿ tée ní xīnani-dě Juàá, te tée-áⁿ nǐ táuchíúⁿ Yă Ndiöxí sá càháⁿ-dé tnúhu-gá núú ñáyiu. Te ní xáhaⁿ-dě xií-yu sá vèxi Déhe-gá ñuyíú-a, te dandìxi túu-gá iní-yu cuendá cutnùní iní-yu nàcuáa ndùu cuendá Yă Ndiöxí cuendá quíndáá iní-yu tnúhu-gá. ⁸ Te ñá díú mèe té Juàá ní dandìxi túu-dé iní-yu cuendá cutnùní iní-yu nàcuáa ndùu cuendá Yă Ndiöxí, chí cuendá-ni ní xica cuu-dé ní càháⁿ-dé sá Dèhe

Yá Ndiöxí véxi-gá dandìxi túu-gá iní-yu. ⁹ Te ndáá ndisa sá mée-gă dandìxi túu-gá iní ñáyiu ñuyíú-a cuendá cutnùní iní-yu nàcuáa ndùu cuendá Yă Ndiöxí.

¹⁰ Te ní xīndecu-gá ñuyíú-a, te ñáyiu ñuyíú-a ñá ní cùtnuní iní-yu yoo cùu-gá, te òⁿ-ni mee-gă ní cadúha-gá ñuyíú-a ní guide-gá chùⁿ ní táhú Dútú Ndiöxí. ¹¹ Te ní quixi-gá ñuyíú nǐ cadúha mee-gă, dico cue ñáyiu ñuyíú-a ñá ní cùu váha iní-yu núú-gă. ¹² Dico davá-yu ní sándáá iní ñáhă-yu xii-gá, te ní nduu táhŷ-yu ní nduu déhe ñaha Yă Ndiöxí xií-yu. ¹³ Te ñá túú ní ndùu déhe ñaha-gă xií-yu sá cúŷ-yu déhe ñáyiu ñuyíú-a, àdi sá ndécú tătă-yu, nănă-yu chí mee Yă Ndiöxí ducaⁿ nǐ cuiní-gá cunduu sá ndúú dèhe ñaha-gă xií-yu.

¹⁴ Te Déhe-gá ní quixi túu-gá ñuyíú-a, te ní cuu-gá ìⁿ yiqui cùñú ní xīndecu ndihì ñaha-gă xii nchoo cuè ñáyiu ní xica cuu túu ndihì-gá. Te ní xini-ó să ío càhnu cuu-gá cuendá sá ìⁿ dìi díi-ni-gă cúu-gă Déhe Yá Ndiöxí, te ío cùndahú iní ñáhá-gă chindèe ñaha-gá xii nchoo ñáyiu ndècu ñuyíú-a, te ío ndáá càháⁿ-gá. ¹⁵ Te duha ní càháⁿ té Juàá cuendá Déhe Yá Ndiöxí ní xáhaⁿ-dě xii ñáyiu:

—Cuendá tée iha ní càháⁿ-í ndéé càni-gá ní cachí-í sá quíxí ìⁿ tée quixi. Te tée-áⁿ cùnùu-gá-dé, chí díhna-gá-dé sa ndècu-dé dàcúxí yùhú — duha ní xáhaⁿ-dě xií-yu.

16 Te ío váha iní Yaa-án chi xito ñaha-gá xii-o nchaa-o ñⁿ nduu ñⁿ nduu. 17 Te ndí Moisés ní cachí tnúhu ndí tnúhu Yá Ndiöxí tnúhu sá sánú ìchi ñaha xii-o nacuaa cundecu-o, dico Déhe-gá Xítoho Jesucristú ní cachí-gá sá ío cùu iní ñáhá Yá Ndiöxí xii-o. Te ní cáháⁿ-gá nchaa dava-gá tnúhu ndáá. 18 Te ñá ñⁿ ñáyiú xini túu-yu Yá Ndiöxí. Dico ñⁿndí díi-ni Déhe-gá Yaa ndécú ndíhi-gá cächí tnúhu-gá nàcuáa càa-gá.

Té Juàá tée dàcuandute ñaha xii ñáyiú cáháⁿ váha-dé cuèndá Xítoho Jesucristú

(Mt. 3:11-12; Mr. 1:7-8; Lc. 3:15-17)

19 Te cue tée israèl ndécú ñúú Jerusàlén ní tendaha-güedé cue dútú ndíhi cue tée cùu levítá cuáháⁿ-güedé núú ndécú tē Juàá ndúcú tnúhu-güedé núú-dē ñúú ná tée cùu-dé. 20 Te ní cáháⁿ ndáá-dé ní xáhaⁿ-dē xii-güedé:

—Yúhú, ñá díú Crístú Yaa ní tendaha Yá Ndiöxí véxi ñuyú-a cùu-í —cächí-dé xáhaⁿ-dē.

21 Te ní xáhaⁿ tùcu-güedé:

—¿Te yoo cùu yohó váiⁿ? ¿Á yohó cùu-n tē Èliás? —cächí-güedé xáhaⁿ-güedé xii-dé.

Te ní xáhaⁿ tē Juàá:

—Yúhú, ñá díú tē Èliás cùu-í —cächí-dé xáhaⁿ-dē.

Te xáhaⁿ tùcu-güedé:

—¿Te yohó cùu-n tēe ní cachí cue tée ndéé sanaha quixi cáháⁿ tnúhu Yá Ndiöxí-áⁿ? —cächí-güedé xáhaⁿ-güedé xii-dé.

Te ní xáhaⁿ-dē:

—Ni ñà díú tēe-áⁿ cùu-í —cächí-dé xáhaⁿ-dē xii-güedé.

22 Te ní xáhaⁿ tùcu-güedé:

—¿Te ná tée cùu yohó váiⁿ?, cuèndá ducaⁿ nàcani tnúhu-ndí núú cùe tée ní tendaha ñaha xii-ndí véxi-ndí, te cáháⁿ duuⁿ-n ñúú ná tée cùu-n —cächí-güedé xáhaⁿ-güedé xii-dé.

23 Te ní xáhaⁿ tē Juàá:

—Yúhú cùu-í tée xica cáháⁿ xití yucu nàcuáa ní cáháⁿ ndí Chaiá, chi ndí-áⁿ ní cachí ndí: “Chí dáñá ìchi cuehé ìchi duha ndécú-ndo te tní-ndo ìchi váha, chi véxi Yaa ío cùnuu”, duha ní cachí ndí —cächí tē Juàá xáhaⁿ-dē xii-güedé.

24 Te cue tée ndúcu tnúhu núú tē Juàá ñúú ná tée cùu-dé, cue tée-áⁿ ní tendaha ñaha cue tée cùu fariséu xii-güedé.

25 Te ní xáhaⁿ tùcu-güedé xii tē Juàá:

—¿Ná cuèndá dàcuandute-n ñáyiú te núu ñá díú Crístú cùu-n, te ni ñà díú tē Èliás, te ni ñà díú tēe véxi cáháⁿ tnúhu Yá Ndiöxí cùu-n váiⁿ? —cächí-güedé xáhaⁿ-güedé xii-dé.

26-27 Te ní xáhaⁿ tē Juàá:

—Yúhú ní ngódó núu-í dàcuandute-í ñáyiú. Dico nchícúⁿ ñⁿ tée véxi, te tée-áⁿ cúnúu-gá-dé dàcúxí yúhú, chi yúhú cùu-í ñⁿ tée duuⁿ duuⁿ ñá túú tau nandaxi cuèdicó ñⁿ chàu-dé dico quide-í chiúⁿ-dē. Te tée-áⁿ sa ñúhu tnahá-dé tnuú-ndó dicó-ni sá ñá túú xini-ndó-dé —cächí-dé xáhaⁿ-dē.

28 Duha ní cuu ñúú Bètábará ñúú cáá ndaa ingá xio yúte

Jordán, yàcáⁿ ní xíndecu té Juàá ní dácuaⁿdùte-dé ñáyiu.

Jèsús quidé càhnu iní-gá nchaa yíca cuèchi ñáyiu

²⁹ Te nduu tněé ní xini té Juàá Jèsús véxi yatni-gá núu ndécú-dě ndihi ñáyiu. Te ní xáhaⁿ-dě xii-yu:

—Chí cùndèhe tée-ǎⁿ, chi tée-ǎⁿ cúú-dě Cristú Yaa ní tendaha Yă Ndiôxí véxi ñuyíú-a, te véxi-dé cada càhnu iní-dé nchaa yíca cuèchi ñáyiu ñuyíú. Te cùu-dé dàtná ìⁿ mběé quiti ío váha iní-xi. ³⁰ Te ñu tée-ǎⁿ ní cachí-í sá cànchícúⁿ-dé quixi. Te cùnuu-gá-dé dácúúxí yǔhú, chi díhna-gá-dé sa ndècu ní cachí-í xii-ndo. ³¹ Te ní yǔhú ñá túú xini-í-dé ní cùu, dico xica cuu-í dácuaⁿdùte-í ñáyiu cuèndá nchaa ñáyiu isràél quini ñáhă-yu xii-dé — cachí-dé xáhaⁿ-dě xii-yu.

³² Te ní xáhaⁿ tùcu-dé:

—Ní xini-í Espiritú Yă Ndiôxí ní quee-xi andiu véxi cuuⁿ-xi ngúndecu ndihi ñaha-xi xii-dé, te dàtná cáá lómá cáá Espiritú-ǎⁿ véxi cuuⁿ-xi. ³³ Te yǔhú ñá túú xini-í-dé ní cùu, dico Yă Ndiôxí Yaa ní tendaha ñaha xii-í xíca cùu-í dácuaⁿdùte-í ñáyiu, Yaa-ǎⁿ ní cachí tnúhu-gá sá tée na quini-í ngúndecu ndihi Espiritú-gá sá véxi cuuⁿ andiu, te tée-ǎⁿ taxi-dé Espiritú-gá cundecu ndihi-o. ³⁴ Te yǔhú ní xini-í-dé te xini ndáá-í sá Dèhe Dútú Ndiôxí cúú-dé. Te xíáⁿ cachí tnúhu-í xii-ndo — cachí té Juàá xáhaⁿ-dě xii-yu.

Cue tée díhna nuu xica cuu ndihi Jèsús

³⁵ Te nduu tněé-ǎⁿ ñu-ni xíáⁿ ndécú té Juàá ndihi úú cue tée xica cuu ndihi-dé. ³⁶ Te ní xini-dé Jèsús ñuhú-gă ichi, te ní xáhaⁿ-dě xii cue tée xica cuu ndihi-dé-ǎⁿ:

—Chí cùndèhe tée-ǎⁿ, chi tée-ǎⁿ cúú-dě Cristú Yaa ní tendaha Yă Ndiôxí véxi ñuyíú-a. Te cùu-dé dàtná ìⁿ mběé quiti ío váha iní-xi — cachí-dé xáhaⁿ-dě.

³⁷ Te sá dúcáⁿ ñi cáháⁿ té Juàá núú cuè tée úú ndihi-dé-ǎⁿ núu ní chinchícúⁿ-güedé Jèsús. ³⁸ Te ní nchócótó-gă ndaa sátá-gă, te ní xini-gá sá nchícúⁿ ñáhă-güedě xii-gá. Te ní xáhaⁿ-gă xii-güedé:

—¿Ná nánducu-ndo? — cachí-gá xáhaⁿ-gă xii-güedé.

Te ní xáhaⁿ-güedé:

—¿Ndéé ndécú-n, Ràbíí? —cachí-güedé xáhaⁿ-güedé xii-gá.

Te Ràbíí-ǎⁿ quée-xí Mèstrú tnúhu mee-güedě. ³⁹ Te ní xáhaⁿ Jèsús xii-güedé:

—Chí nèhé te quini-ndó — cachí-gá xáhaⁿ-gă.

Te ní xica-güedé cuáhăⁿ-güedé, te ní quexìo-güedé núú quidé vèhe-gá. Te ndècu-ni-güedé ndihi-gá ní cuaa, chi dàtná òré caa cúmí sacuaa ní sáá-güedé.

⁴⁰ Te úú cue tée-ǎⁿ ñi tnii-güedé tnúhu ní cáháⁿ té Juàá, te ní chinchícúⁿ-güedé Jèsús. Te núú úú cue tée-ǎⁿ, ìⁿ-dé nání-dě Ndríxí, te ñaní-dé cúú tē Xímú, àdi Pelú chi úú ñu-dé. ⁴¹ Te tē Ndríxí-ǎⁿ ñi nanducu-ni-dě ñaní-dé te ní xáhaⁿ-dě:

—Ní naníhí-ndí tée cùu Mesiás —cachí-dé xáhaⁿ-dě.

Te Mèsiás-án quée-xí Crìstú
tnúhu mee-güedë, Yaá ní ten-
daha Yá Ndiöxí véxi ñuyú-a.
42 Te ndëca té Ndrìxí ñaní-dé
cuáháⁿ núú ndécú Jèsús. Te
òré ní xiní ñáhá Jèsús xii té
Ximú, te ní xáhaⁿ-gã:

—Yòhó cúu-n tē Ximú déhe
té Jónás, te vitna danàni
ñaha-í Céfás xii-n —càchí-gá
xáhaⁿ-gã.

Te Céfás-ã quée-xí Pèlú
tnúhu mee-güedë.

*Jèsús ní cáháⁿ-gá té Lìpé
ndihi té Natanàél*

43 Te nduu tnée ní sani
iní-gá quihíⁿ-gá distritú
Galilea. Te ní naníhí-gã ñⁿ
tée nàni Lìpé, te ní xáhaⁿ-gã
xii-dé:

—Néhe ná quihíⁿ-ó núú
quihíⁿ-í-a —càchí-gá xáhaⁿ-gã.

44 Te té Lìpé-án cúu-dë tée
ñuú Bètsaidá. Te ñu-ni ñuú
yácáⁿ cúu ñuú té Ndrìxí ndihi
té Pèlú. 45 Te té Lìpé ní naníhí
tnáhá-dë ndihi té Natanàél, te
ní xáhaⁿ-dë:

—Ní naníhí-ndí tée dii
cuëndú-xi ní chidó tnùní ndíi
Moisés ndihi dava-gá cue
tée ní xóo cáháⁿ tnúhu Yá
Ndiöxí ndée sanaha. Te tée-án
nání-dë Jèsús déhe té Chée,
tée ñuú Nazàrét —càchí-dé
xáhaⁿ-dë.

46 Te ní xáhaⁿ tē Natanàél xii
té Lìpé:

—¿Te náa ío váha càa ñuú
Nazàrét núu da yácáⁿ quee
tée cáháⁿ tnúhu Yá Ndiöxí? —
càchí-dé xáhaⁿ-dë.

Te ní xáhaⁿ tē Lìpé:

—Néhe ná quihíⁿ-ó te
quiní-n —càchí-dé xáhaⁿ-dë.

47 Te òré ní xiní Jèsús
té Natanàél tá cùyatni-dé

cuáháⁿ, te ní cáháⁿ-gá
cuëndá-dé te ní cachí-gá:

—Tée véxi-ãⁿ cúu-dë mei
tē isràél, te ñá ñⁿ ndùu
dandahú-dé ñáyiú —càchí-gá
xáhaⁿ-gã.

48 Te ní xáhaⁿ tē Natanàél xii
Jèsús:

—¿Te nása náquiní ñáhá-n?
—càchí-dé xáhaⁿ-dë.

Te ní xáhaⁿ Jèsús:

—Yúhú sa ní xiní ñáhà-í
xii-n òré ndécú-gã-n càha
yutnu ngúxí-ãⁿ te ni tē Lìpé
vátá cáná ñaha-gá-dé xii-n
òré-án —càchí-gá xáhaⁿ-gã
xii-dé.

49 Te sá dúcáⁿ ñí cáháⁿ-gá,
núu ní xáhaⁿ tē Natanàél
xii-gá:

—Mèstrú, yòhó cúu-n Dēhe
Dútú Ndiöxí yíndàha-n ñáyiú
isràél —càchí-dé xáhaⁿ-dë
xii-gã.

50 Te Jèsús ní xáhaⁿ-gã:

—Cuëndá sá ñí xiní ñáhà-í
xii-n càha yutnu ngúxí xíãⁿ
iní ñáhá-n, dico cuéhé-gã núú
sã quíní-n —càchí-gá xáhaⁿ-gã
xii-dé.

51 Te ní xáhaⁿ tùcu-gá:

—Na càchí tnúhu ndáá-í
sá sàá nduu, te quiní-ndó
nàcaáⁿ andiú. Te quiní-ndó
cuè espíritú xínú cuèchi núú
Yá Ndiöxí sá ndàa nuu-xi
quide-xi núú cündëcu yúhú
Tée cùu ñaní tnáhá-ndó
nchàa-ndo —cachí-gá
xáhaⁿ-gã xii-güedé.

2

Vico tnãndaha ío ñuú Cànaá

1 Te nduu úní sá dúcáⁿ
ñí cuu te ní xóo ñⁿ vico
tnãndaha ñuú Cànaá, ñⁿ ñuú
yíndèhu distritú Galilea.
Te yácáⁿ ní xíndecu nãná

Jèsús. ² Te tnàhá Jèsús ndihi cue tée xica cuu ndihi-gá ní cáháⁿ-yu cuáháⁿ-gá ndihi-güedé vico-áⁿ. ³ Te òré ní ndihi vìnú, te ní xáhaⁿ náná Jèsús xii-gá:

—Ñá túú-gã vìnú ndécú ndihí-yu —càchí-aⁿ xáhaⁿ-aⁿ.

⁴ Te ní xáhaⁿ Jèsús xii-aⁿ:

—Náá, ñá túú xini ñuhu-xi da yúhú cúñaha-n cuendá vìnú-áⁿ, chi vátá tnàhá-gá òré quini-yu yoo cùu yúhú —càchí-gá xáhaⁿ-gã xii-aⁿ.

⁵ Te ní xáhaⁿ-aⁿ xii ñáyiú xinu cuechi:

—Cada-ndo nchàa nacuáa na càháⁿ Jèsús —càchí-aⁿ xáhaⁿ-aⁿ.

⁶ Te yàcáⁿ nútní ìnú quídi yúu te quée dàtná ìⁿ cièndú lítrú ndute ìⁿ ìⁿ quídi-áⁿ. Te ndute-áⁿ nándihí ñáyiú isràél ndáhã-yu te nàqueté-yu cóhõ-yu chí ducaⁿ tnàhí quidé-yu nàcuáa sàndáá iní-yu Yá Ndiõxí. ⁷ Te ní xáhaⁿ Jèsús xii nchaa cue tée xinu cuechi:

—Nadachitú-ndó ndute ndi nchaa quídi-áⁿ —càchí-gá xáhaⁿ-gã xii-güedé.

Te ní nadachitú-güedé. ⁸ Te ní xáhaⁿ-gã:

—Vitna te tava-ndo lùha, te canehe-ndo quihíⁿ cuáha-ndo tée quide vico —cachí-gá xáhaⁿ-gã xii-güedé.

Te ducaⁿ ní quide-güedé ní tava-güedé lùha nèhe-güedé cuáháⁿ ní sáha-güedé tée quide vico. ⁹ Te ní xito ndéé tée quide vico-áⁿ, te sa ní nduu-xi vìnú, te ñá túú ní xini-dé ndéé véxi-xi, dico mee cuè tée xinu

cuechi sa naha-güedé núu ní tava-güedé. Ducaⁿ te tée quide vico-áⁿ ní cana-dé tée tnándaha. ¹⁰ Te ní xáhaⁿ-dë:

—Nchaa ñáyiú quide vico queñuhú-yu díhna-gá vìnú váha. Te sa vai vìnú váha xihí-yu, te dàtnùní queñuhú-yu vìnú ndàhú. Te yòhó díhna-gá vìnú ndàhú ní ndihi-ná ní queñuhu-n vìnú váha —càchí tée quide vico-áⁿ xáhaⁿ-dë xii tée tnándaha-áⁿ.

¹¹ Te sá ní nadatiú Jesús ndute-áⁿ ní nduu-xi vìnú cúu-xí ìⁿ chiuⁿ díhna nuu sã vã yòo tnàhí ndàcu cada ní quide-gá ñuú Cànaá, ìⁿ ñuú yíndèhu distritú Galileá, te chiuⁿ ní quide-gá-áⁿ cúu-xí ìⁿ chiuⁿ cahnu vihi, núu xíãⁿ ní cutnùní iní-yu sá ìo càhnu cuu-gá, te ní sàndáá iní ñáhá nchàa cue tée xica cuu ndihi-gá.

¹² Te sátá ní yáha vico, te ní xica Jèsús ndihi náná-gã, ndihi cue ñaní-gá, ndihi nchaa cue tée xica cuu ndihi-gá cuáháⁿ-yu ñuú Capèrnaúm. Te yàcáⁿ ní xíndecú-yu ìⁿ ùú nduu ndihi-gá.

Jèsús ñá túú tnàhá iní-gá nàcuáa quide ñáyiú xití veñúhu (Mt. 21:12-13; Mr. 11:15-18; Lc. 19:45-46)

¹³ Te ta cùyatni cada ñáyiú isràél vico pàscuá, te ní xica Jèsús cuáháⁿ-gá ñuú Jerusalén. ¹⁴ Te sátá ní sáá-gá yàcáⁿ, te ní xica-gá cuáháⁿ-gá veñúhu càhnu sá ìo cùnuu, te xití veñúhu-áⁿ ní xini-gá ndécú ñáyiú dicó-yu ndicutu,

mběé ndihi lõmá, te tnàhá ñáyiú dàma díhúⁿ núcõo-yu ní xiní-gá. ¹⁵ Te ní queheⁿ-gá ìⁿ ùú yoho, te ní cáunuú tnàha-gá, te ní dáyùhu-gá ñáyiú ní queé-yu quehé veñúhu, ndihi ndicutú-yu ndihi mběé-yu. Te cue ñáyiú dàma díhúⁿ-áⁿ ní dǎngõyo-gá díhúⁿ-yu, te ní dándùá-gá mèsá-yu. ¹⁶ Te ní xáhaⁿ-gǎ xii cue ñáyiú dìco lõmá:

—¡Queñuhu-ndo nchàa quitì-a xitì veñúhu-a! ¡Vá cáda-ndó vèhe núú yǎhu núú cúú vèhe Tàtá-í Dútú Ndiõxí! —càchí-gá xáhaⁿ-gǎ xii-yu.

¹⁷ Te xáⁿ ní ndacu iní cue téé xica cuu ndihi-gá sá dúcáⁿ yòdo tnuní núú tütú-gá, te cǎchí-xi: “Ío cùyica iní-í chí ñá cuiní-yu canehe ì-yu vehe Tàtá-í”, duha cǎchí-xi núú tütú-gá.

¹⁸ Te ní xáhaⁿ cuè téé isràél xii-gá:

—¿Ná cúú sǎ vǎ yõo tnàhí ndàcu cada, cada-n cuèndá cutnùní iní-ndí sá cúú dùha taxi tnuní ñáhá-n xii-ndí-i? —càchí-güedé xáhaⁿ-güedé xii-gá.

¹⁹ Te ní xáhaⁿ Jèsús:

—Chí dǎngõyo veñúhu-a, te není xitì úní nduu te sa nadaxínu-í —càchí-gá xáhaⁿ-gǎ xii-güedé.

²⁰ Te ní xáhaⁿ tucu cue téé isràél:

—Údico ìnú cuía ñí xindecuu-güedé ní sáá veñúhu-a, te yòhó cuiní-n nadaxínu-n xitì úní-ni nduu —càchí-güedé xáhaⁿ-güedé xii-gá.

²¹ Dico sá ñí cǎháⁿ-gá chí ñá díú cuèndá veñúhu ní cǎháⁿ-gá chí cuèndá yiqui cùnú-gá ní cǎháⁿ-gá. ²² Núú sátá ní xihí-gá, te ní ndoto-gá, te òré-áⁿ ñí ndacu iní cue téé ní xica cuu ndihi-gá nàcuáa ní cǎháⁿ-gá, núú xíáⁿ ní sándáá iní-güedé tnúhu yòdo tnuní núú tütú-gá. Te ducaⁿ te ní sándáá iní-güedé tnúhu ní cǎháⁿ-gá.

Jèsús xiní-gá nàcuáa càa iní nchaa ñáyiú

²³ Te òré ndécú Jèsús vico pàscuá, te ío vǎi ñáyiú ní sándáá iní ñáhá xii-gá cuèndá ío titní sá vǎ yõo tnàhí ndàcu cada ní quide-gá ní xiní-yu.

²⁴ Dico Jèsús ñá ní cǎháⁿ-gá nchaa tnúhu ñùhu iní-gá, chí sa ní cutnùní iní-gá sá ñà túú cùu váha iní-yu. ²⁵ Te ñá túú xini ñuhu-gá ìⁿ ñáyiú cúñaha nàcuáa càa iní nchaa tnàha ñáyiú-yu, chí mee-gǎ sa nàha ndáá-gá nàcuáa càa iní-yu ncháá-yu.

3

Jèsús ndihi té Nicòdemú

¹ Ní xindecu ìⁿ téé cùu fariséú ní xínani-dé Nicòdemú, te ní cuu-dé ìⁿ téé cunuú núú ñáyiú isràél. ² Te téé-áⁿ ñí sáháⁿ-dé niú ní cǎháⁿ ndihi-dé Jèsús, te ní xáhaⁿ-dè:

—Mèstrú, yúhú ndihi dava-gá-güedé sa nàha-ndí sá Yǎ Ndiõxí ní tendaha ñàha-gá xii-n vèxi-n dǎnehé ñáhá-n xii-ndí, chí núú ñá túú Yǎ Ndiõxí ndécú ndihi-n, te vá ndácú-n càda-n nchaa sá vǎ yõo tnàhí ndàcu cada quide-n —càchí-dé xáhaⁿ-dè.

3 Te ní xáhaⁿ Jèsús:

—Na càchí tnúhu ndáá-í xii-n sã ncháá ñáyiú vá ná càcu saa tucu, te vá ndíhu ndaha ñàha Yá Ndiòxí xii-yu —càchí-gá xáhaⁿ-gã xii-dé.

4 Te ní xáhaⁿ tẽ Nicòdemú:

—¿Te nása cada ìⁿ ñáyiú sa ní y^ì te cacu-ni tucú-yu? ¿Náa ndíhu tucú-yu xití nãñá-yu te cacu tucú-yu xito cùu uú-ãⁿ? —càchí-dé xáhaⁿ-dẽ xii-gá.

5 Te ní xáhaⁿ Jèsús:

—Na càchí tnúhu ndáá-í xii-n sã ncháa ñáyiú na ndùu ndoo nduu nine iní-xi cuú-yu ñáyiú ní na càcu saa ndíhi ndute ndíhi Espíritú Yá Ndiòxí, ñáyiú-áⁿ ndíhu ndaha ñàha-gá xii-yu. 6 Te nchaá ñáyiú càcu ñuyíú-a, chi déhe ñáyiú ñuyíú-a cùú-yu. Te ñáyiú ní nduu ndoo ní nduu nine iní-xi, ñáyiú-áⁿ ní nduu táhũ-yu Espíritú Yá Ndiòxí te tàxi tñuní ñáhá-nã Espíritú-gá xii-yu. 7 Te vá cùñũhu-n tnúhu ní cáháⁿ-í-a, chi nchaá ñáyiú ní sãndáá iní ñáhá xii-í ní nduu ndoo ní nduu nine iní-yu, te ñáyiú-áⁿ cùú-yu dàtná ñáyiú ní nacacu saa. 8 Táchí nděni xíáⁿ tècú dóho-o xico-xi, dico ñá túú xini-ó ndèè ichi véxi-xi, te ni ñá túú xini-ó ndèè ichi cuáháⁿ-xi. Ducaⁿ sãtnahá-xi cùu Espíritú-gá ndécú ndíhi ñáyiú ní nduu ndoo ní nduu nine iní-xi —càchí-gá xáhaⁿ-gã xii-dé.

9 Te dàtnùní ní xicáⁿ tnúhú tucu té Nicòdemú núú-gã, te xáhaⁿ-dẽ xii-gá:

—¿Te nása ndùu tnúhu càháⁿ-n dùcaⁿ caháⁿ-n? —càchí-dé xáhaⁿ-dẽ xii-gá.

10 Te ní xáhaⁿ Jèsús:

—Yòhó cuú-n ìⁿ tée cùtnuní iní-xi, chi dàcuaha-n ñáyiú isràél, ¿te ñá tècú tñuní-n tnúhu càháⁿ-í-u? 11 Te na càchí tnúhu ndáá-í xii-n sã nchũhú càháⁿ-ndí ìⁿ sá ní tecú tñuní-ndí, te càháⁿ ndáá-ndí cuendá ìⁿ sá ní xiní-ndí. Dico nchòhó ñá tècú tñuní-ndó tnúhu càháⁿ-ndí. 12 Te ñá sãndáá iní-ndó tnúhu càháⁿ-í cuendá nchaá nàcuáa cùu ñuyíú-a, te uuⁿ-gã cada-ndo núu cáháⁿ-í cuendá nchaá nàcuáa cùu andíu.

13 'Vá yõ ìⁿ sàá andíu, te cani-xi cuendú nàcuáa càa. Chi ìⁿdii díi-ni yúhú véxi cuuⁿ-í andíu, te cùu-í ñaní tñáhá-ndó ncháa-ndo. Te diu-ni yàcáⁿ ndaa-í cundecu-í. 14 Te dàtná ní ndanehe ndíi Moisés cóo ní sata caa ndíi-di xití yucu, ducaⁿ càda ñaha-güedé cata caa ñaha-güedẽ núú cùrúxí xii yúhú Tée cùu ñaní tñáhá-ndó ncháa-ndo ìⁿ nduu, 15 te ducaⁿ yãha-í cuendá nchaá ñáyiú na quindáá iní ñáhá xii-í te nduu táhũ-yu cundecú-yu ndíhi Yá Ndiòxí ní caa ní quíhíⁿ —càchí-gá xáhaⁿ-gã xii-dé.

Yá Ndiòxí ío cùu iní-gá ñáyiú ñuyíú-a

16 Te Yá Ndiòxí ío cùu iní-gá ñáyiú ñuyíú-a. Te ìⁿdii-ni Déhe-gá ndécú, te ní tendaha ñàha-gá ní quixi-gá ñuyíú-a, te núu na quindáá iní ñáhá ñáyiú, te vá cuíta nihnú-yu, chi nduu táhũ-yu cundecú-yu ndíhi-gá ní caa ní quíhíⁿ. 17 Te Yá Ndiòxí ñá túú ní tendaha-gá

Déhe-gá quixi-gá ñuyíú-a dacuíta nihnu-gá ñáyiu, chi ní tendaha-gã Déhe-gá ní quixi-gá sá dácãcu nihnu-gá ñáyiu ñuyíú-a núú ùhú núú ndàhú.

18 Nchaa ñáyiu sàndáá iní ñáhá xii Déhe-gá, te vá cuíta nihnú-yu. Te nchaa ñáyiu ñá túú sàndáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndàhú, chi ñá túú sàndáá iní-yu Déhe Dútú Ndiöxí. 19 Chi ní quixi

Déhe-gá ñuyíú-a ní dándíxí tũu-gá iní-yu cuendá cutnùní iní-yu nàcuáa ndùu cuendá Yã Ndiöxí te tñíⁿ-yu ñⁿ ichi váha ni cùu, te ñá ní tnàhá iní-yu, chi ní cudíí-gã iní-yu nchaa sá cuèhé sá dúhá dàcúúxí sã vãha, núú xiãⁿ tá xíta nihnú-yu cuáháⁿ. 20 Te nchaa ñáyiu quide nchaa sá cuèhé sá dúhá ñã tnàhá iní-yu cutnùní iní-yu nàcuáa ndùu cuendá Yã Ndiöxí, te ñá tñíⁿ-yu tnúhu-gá cuendá yùhú-yu nduu tnùní nchaa sá quidě-yu. 21 Te nchaa ñáyiu ñùhu ichi ndáá cuení-yu cutnùní iní-yu nàcuáa ndùu cuendá Yã Ndiöxí, te cùtnuní sá chindèe ñaha-gá xii-yu, chi quide váha-yu.

Té Juàá tée dàcuandute ñaha xii ñáyiu càháⁿ váha tucu-dé cuendá Jèsús

22 Te sátá dúcáⁿ ñí cuu, te ní quee Jèsús cuáháⁿ-gá ndihí cue tée xica cuu ndihí-gá distritú Jùdeá. Te yàcáⁿ ní xindecu tnaa-gá ndihí-güedé ní xóo dacuandute-güedé

ñáyiu. 23 Te ndècu té Juàá ñⁿ xichi núú nání Ènón yatni ñuú Sàlém dàcuandute-dé ñáyiu, chi yàcáⁿ ío váha ñùhu ndute, núú xiãⁿ ní xóo quíhíⁿ ñáyiu yàcáⁿ ní xóo cuanduté-yu. 24 Duha ní cuu cùtnàhá vátá ngává-gã té Juàá vecaá.

25 Te ní cacu ñⁿ cuendú ní càháⁿ cue tée xica cuu ndihí té Juàá ndihí ñⁿ úú cue tée isráél, núú ndèdacàa sá vãha-gá cada ñáyiu cuendá nduu íi-yu. 26 Te ní sáháⁿ-güedé núú ndécú tẽ Juàá ní xáhaⁿ-güedé:

—Mèstrú, tée ní quixi núú ní xindecu-n ndàa ingá xio yúte Jòrdán, tée dii cuendú-xi ní càháⁿ-n, tée-ãⁿ dàcuandute-dé tnàhá-dé ñáyiu. Te ío vai ñáyiu ní chinchícúⁿ ñáhá xii-dé —càchí-güedé xáhaⁿ-güedé xii-dé.

27 Te ní xáhaⁿ tẽ Juàá:

—Te vá yõo ñⁿ ndàcu cada ñⁿ chiuⁿ nacuáa cuu váha iní Yã Ndiöxí, te núú ñá túú mèe-gá chindèe ñaha-gá xii-yu. 28 Te nchòhó sa naha-ndo sá yùhú ní càháⁿ ndáá-í sá ñã díú Crístú cùu-í, dico mee Yã Ndiöxí ní tendaha ñaha-gá yódó nùu-í véxi núú Yàá-áⁿ. 29 Te nchòhó xini-ndó sã ñⁿ tée tnàndaha te xíchí tnàndaha ndihí-ná-dé cùndihí-dé. Te tée ní xica ndáhú ío cùdíí ñni-dé ndèdóho-dé nchaa tnúhu càháⁿ tée tnàndaha-áⁿ. Te ducaⁿ sãtnahá-xi cùu yùhú, chi ío cùdíí ñni-í sá vái ñáyiu ta chinchícúⁿ ñáhá xii Jèsús cuáháⁿ. 30 Te uuⁿ-gá cuita cuu vai ñáyiu cutnùní iní-xi sá ío cùnuu-gá, te yùhú cuita ndóo ndee-í quíhíⁿ —càchí-dé xáhaⁿ-dẽ xii-güedé.

Crìstú véxi cuuⁿ-gá andiu

³¹ Te ìⁿdii díí-ni Crìstú Yaá véxi cuuⁿ andiu cùnuu-gá núú ñùyíú-a. Te nchaa ñáyiú ndècu ñuyíú-a cùú-yu ñáyiú ñuyíú iha, te càháⁿ-yu sá cúú-xí ñùyíú-a. Dico Crìstú Yaá véxi cuuⁿ andiu ³² càháⁿ-gá ìⁿ sá ñí xíní-gá, te càháⁿ-gá ìⁿ sá ñí tecú dóho-gá. Te ñá túú cuíní-yu quindáá iní-yu tnúhu càháⁿ-gá. ³³ Te nchaa ñáyiú tnì tnúhu càháⁿ Yaá véxi cuuⁿ andiu-áⁿ càháⁿ-yu sá tnúhu Yá Ndiòxí cúú-xí ìⁿ sá ndàá. ³⁴ Te Déhe-gá Yaá véxi cuuⁿ andiu càháⁿ-gá mee-ni tnúhu-gá. Te ñá ùhú iní-gá ní sáñaha-gã Espiritú-gá ndécú ndìhi Déhe-gá. ³⁵ Te Dútú Ndiòxí ío cùu iní-gá Déhe-gá, núu ní xáhaⁿ-gã sá mée-gã taxi tnùní-gá nchaandi túhú sá ío. ³⁶ Te nchaa ñáyiú na quindáá iní ñáhá xii Déhe-gá, ñáyiú-áⁿ cundecú-yu ndìhi-gá ni caa ni quíhíⁿ. Te nchaa ñáyiú vá quindáá iní ñáhá xii Déhe Yá Ndiòxí ío dandòho ñaha-gá xií-yu.

4

Jèsús ndìhi ìⁿ ñaha Sàmariá

¹ Te ní níhí cue tée cùu fariséú tnúhu sá vài-gá ñáyiú ta chinchícúⁿ ñáhá xii Jèsús. Te ducaⁿ vài-gá-yu ta dàcuandute-gá cuáháⁿ dàcúúxí tã Juáá. ² Te cuèi ñá díú mée-gá dácuaⁿdute ñaha-gá xií-yu, dico cue tée xica cuu ndìhi-gá dácuaⁿdute ñaha-güedé xií-yu. ³ Te ní níhí Jèsús tnúhu nàcuáa càháⁿ

cue tée cùu fariséú, núu ní ndee-gá distritú Jüdeá cuánuhú tucu-gá distritú Galileá.

⁴ Te ichi ñùhu-gá ní nayáha-gá distritú Sàmariá. ⁵ Te ní sáá-gá ìⁿ ñúú nání Sìcár te ñúú-áⁿ yíndèhu-xi distritú Sàmariá. Te xíáⁿ cáá yàtni ñuhu núú ñí sáha táhú ndìi Jàcób déhe ndii ndii Chèè. ⁶ Te yàcáⁿ cáá dòco ní cuu cuendá ndii Jàcób. Te cùu-xi datná cuádava nduu ñùhu Jèsús ichi, te ío ní xàú-gá núu ní sáá-gá yuhu dòco-áⁿ ñí ngóo-gá ndétátú-gá. ⁷⁻⁸ Te ní xica cue tée xica cuu ndìhi-gá cuáháⁿ-güedé xiti ñúú Sìcár cuánguaaⁿ-güedé sá caxí-güedé. Te yuhu dòco-áⁿ núcõo-gá ní sáá ìⁿ ñadìhí ñaha distritú Sàmariá véxi quèhmu-aⁿ ndute, te ní xáhaⁿ Jèsús:

—Taxi táhú luha ndute na còho-í —càchí-gá xáhaⁿ-gã.

⁹ Te ní xáhaⁿ ñadìhí-áⁿ:

—¿Ná cuendá da núu-í xicáⁿ-n ndute coho-n? Te yòhó cúú-n tãe isràèl, te yúhú cúú-í ñaha Sàmariá —càchí-aⁿ xáhaⁿ-aⁿ xii-gá.

Te ducaⁿ ñí xáhaⁿ-aⁿ, chi ñá túú ndècu váha ñáyiú isràèl ndìhi ñáyiú distritú Sàmariá. ¹⁰ Te ní xáhaⁿ Jèsús xii-aⁿ:

—Ñá cútnùní iní-n nã taxi Yá Ndiòxí xii-n, te ni ñá cútnùní iní-n yòo xicáⁿ ndute núu-n. Te núu dicó xini-n yòo cuu yúhú á, te da mee-n cãcáⁿ-n ndute núu-í coho-n, te yúhú taxi-í ndute cundecu ndìhi-n núú cuáháⁿ núú véxi —càchí-gá xáhaⁿ-gã.

¹¹ Te ní xáhaⁿ tùcu ñadìhí-áⁿ:

—Tátá, ñi sá quèhnu-n ndüte ñá túú nèhe-n, te doco-a cùnú víhí, te ñá túú ndèé quíngueheⁿ-n ndüte taxi-n coho-í. ¹² Ndíi Jàcób ñaní tnáhá-ndí ní xíndecu ndèé sanaha ñi cadúha ndíi doco-a ñi tóo ndute ní xihí ndíi, ndihí nchaa déhe ndíi, ndihí nchaa quití ndíi, te ní ndóo cùu cuendá-ndí. ¿Te násai, te yòhó cùnùu-gá-n dàcúúxí ndíi-ǎn? —càchí-aⁿ xǎhaⁿ-aⁿ xii-gá.

¹³ Te ní xáhaⁿ Jèsús:

—Nchaa ñáyíu xihí ndute doco-a, te vá cúú vètú dúcáⁿ iní-yu chi dayìchí ñáhá-ní tucu-xi ndute-a. ¹⁴ Dico nchaa ñáyíu na còho ndute na cuáñaha-í, te vá ííⁿ ndùu-gá dayìchí ñáhá-xí ndüte-áⁿ xii-yu, chi ndute cuáñaha-í cúú-xí ndüte váha-gá. Te dàtná quéé nihni ndute xití doco-a, nchaa-ni nduu ñuhu ñá túú yìchí, ducaⁿ sàtnahá-xi cada-xi chi candeca-xi iní-yu ni caa ni quíhíⁿ, te núu na còhó-yu ndute cuáñaha yùhú —càchí-gá xáhaⁿ-gǎ xii-aⁿ.

¹⁵ Te ní xáhaⁿ-aⁿ:

—Tátá, taxi ndute-áⁿ ná còho-í cuendá sá vǎ dáyìchí ñáhá tnáhí-gá-xi ndute. Te vá quíxí-gǎ-í quixi quéhnu-í ndute doco-a —càchí-aⁿ xǎhaⁿ-aⁿ xii-gá.

¹⁶ Te ní xáhaⁿ Jèsús:

—Cuáháⁿ cuángàna yíi-n, te quixi-ndo ìha —cachí-gá xáhaⁿ-gǎ xii-aⁿ.

¹⁷ Te ní xáhaⁿ-aⁿ:

—Ñá túú yíi-í —càchí-aⁿ xǎhaⁿ-aⁿ xii-gá.

Te ní xáhaⁿ tucu Jesús:

—Ndáá càháⁿ-n sǎ ñà túú yíi-n. ¹⁸ Dico ní cuu úhúⁿ tée càndeca-n, te tée ndèca-n vitna chi ñá díú yíi-n cuu-dé, te ndáá càháⁿ-n sǎ ñà túú yíi-n —cachí-gá xáhaⁿ-gǎ xii-aⁿ.

¹⁹ Te sá dúcáⁿ ñi xáhaⁿ-gǎ ñuu ní xáhaⁿ tucu-aⁿ:

—Tátá, yùhú sání iní-í sá yòhó cúu-n íiⁿ tée càháⁿ tnúhu Yá Ndiòxí. ²⁰ Te cue ñaní tnáhá-ndí ní xíndecu ndèé sanaha ñi xóo cada càhnú-yu Yá Ndiòxí tindúú-a, dico nchòhó ñáyíu isràél càchí-ndó sǎ ndèé ñuu Jerusàlén cada càhnu-o-gá —càchí-aⁿ xǎhaⁿ-aⁿ xii-gá.

²¹ Te ní xáhaⁿ Jèsús xii-aⁿ:

—Íiⁿ tnúhu na càháⁿ-í-a, te quindáá iní-n. Sa ta cùyatni sáá nduu sǎ ñà díú-gǎ mee-ni tindúú-a, te ni ñà díú-gǎ mee-ni ñuu Jerusàlén cada càhnu-ndo Tátá-ó Dütú Ndiòxí, chi ndèni ní cuu cada càhnu-ndo-gá. ²² Te nchòhó cue ñáyíu Sàmariá chi ñá cùtnùní iní-ndó ná cúú sǎ quidé càhnu-ndo, dico nchúhú ñáyíu isràél, chi cùtnuní iní-ndí ná cúú sǎ quidé càhnu-ndí. Chi íiⁿ tée isràél véxi-dé dàcácu nihnu-dé ñáyíu cuendá vá quíhíⁿ-yu núú ùhú núú ndàhú. ²³ Te neni vitna ngúita-yu cada càhnu ndisá-yu Tátá-ó Dütú Ndiòxí, te cadá-yu ni yùhu ni iní-yu sá cúú-xí-gǎ, chi mee-gǎ ducaⁿ cuini-gá cadá-yu cada càhnú-yu-gá. ²⁴ Te Yá Ndiòxí chi íiⁿ espíritú cúú-gǎ. Te nchaa ñáyíu na càda cahnu ñaha, te cadá-yu ni yùhu ni iní-yu sá cúú-xí-gǎ te

cadá-yu dàtná càháⁿ tnúhu-gá
—càchí-gá xáhaⁿ-gã xii-aⁿ.

25 Te ní xáhaⁿ ñàdihí-áⁿ:

—Xini-í sá quixí tée cùu
Mesiás, tée càchí-güedé nání
Cristú. Te tée-áⁿ ná sàá-dé, te
cachí tnúhu ndáá-dé nàcuáa
cuu —càchí-aⁿ xáhaⁿ-aⁿ xii-gá.

26 Te ní xáhaⁿ Jèsús:

—Diu tée-áⁿ cúu yúhú tée
ndàtnúhu ndihí-n —càchí-gá
xáhaⁿ-gã xii-aⁿ.

27 Te òré-áⁿ nǐ ndexìo
cue tée xica cuu ndihí-gá,
te ní cuñúhu-güedé sá
ndátnúhu-gá ndihí ñàdihí-áⁿ.
Dico ni ñⁿ-güedé ñá ní xicáⁿ
tnúhú-güedé núú-gã nǔu ná
cuèndú ndátnúhu-gá ndihí
ñàdihí-áⁿ.

28 Ducaⁿ te ní
dándõ ñàdihí-áⁿ yoó ndute-aⁿ
xiáⁿ, te ní xica-aⁿ cuánuhú-aⁿ
ñúu cútnúhu-aⁿ ñáyiu cuèndá
Jèsús. 29 Te ní xáhaⁿ-aⁿ:

—Chí nèhé ná quihíⁿ-ó,
chi quini-ndó nǎ cúu ñⁿ
tée núcóo yuhu dòco-áⁿ nǔu
ñá díú Cristú Yaá ní ten-
daha Yá Ndiõxí véxi ñuyíú-a
cùu-dé nǔu ní càháⁿ ndáá-dé
nàcuáa cùu ndecu-í —càchí-aⁿ
xáhaⁿ-aⁿ xii-yu.

30 Te sá nǐ níhí ñáyiu
ñúu-áⁿ tnúhu, xiáⁿ ní xicá-yu
cuáháⁿ-yu. 31 Te òré vátá
sàá-gá-yu xiáⁿ nǐ xáhaⁿ cuè
tée xica cuu ndihí-gá xii-gá:

—Mèstrú, cudèhñu na
cudèhñu-o —cachí-güedé
xáhaⁿ-güedé xii-gá.

32 Te ní xáhaⁿ-gã:

—Ndècu ñⁿ sá cáxi-í, ñⁿ sá
ñà túú xini nchòhó —càchí-gá
xáhaⁿ-gã xii-güedé.

33 Te cue tée xica cuu
ndihí-gá xitnàha-güedé:

—Váa ió ñáyiu ní quixi
nehe sá nǐ xexi-gá nǔu
duha càháⁿ-gá —càchí-güedé
xitnàha-güedé.

34 Te ní xáhaⁿ-gã:

—Dàtná cuini-ndó cùu vétú
ini-ó òré xexi-ó, ducaⁿ cùu
vétú ini-í quidè-í nchaa
nàcuáa ní càháⁿ Yá Ndiõxí
Yaá ní tendaha ñàha xii-í
véxi-í ñuyíú-a, te chiúⁿ-gá ió
cùdíí ini-í dandihí-í. 35 Te
nchòhó càchí-ndó sǎ cùmání
cùmí-gá yóó te cuu itú. Dico
yúhú càchí-í sá cundehe-ndo
ñáyiu-áⁿ, chi sa ndècu túha-yu,
dàtná cúu-nǎ itú sá sà ní
cuu-ná natahu-o cùu-yu,
chi sa ndècu túha-ná-yu
cundedóho-yu tnúhu-í. 36 Te
dàtná cúu ñáyiu natahu itú
chi sa cúhuⁿ yáhu-yu, ducaⁿ
sǎtnahá-xi cùu ñáyiu na càháⁿ
tnúhu-í, chi cuáñaha-í sá ndúú
táhü-yu na sàá nduu. Te

nchaa ñáyiu na tñè tnúhu-í
te nduu táhü-yu cundecu-í
ndihí-yu ni caa ni quihíⁿ.
Te dàtná cúu ñáyiu ní chihi
tatá-xi, ndihí ñáyiu ní natahu
itú-xi cùdíí-nǎ ini-yu. Ducaⁿ
sǎtnahá-xi cùu ñáyiu na càháⁿ
tnúhu-í. 37 Chi ndáá queé-xi
nàcuáa cuáháⁿ ñⁿ cuèndú sá
càchí-xi: “Tucu tée ní chihi
tatá, te tucu tée ní natahu”,
duha cuáháⁿ cuèndú-áⁿ. 38 Te
yúhú tendaha ñaha-í xii-ndo
quihíⁿ-ndó càháⁿ-ndó tnúhu-í
núú sá ní yáha-güedé ní
càháⁿ-güedé tnúhu-í. Te
nchòhó quihíⁿ-ndó dicó-nǎ
nduu cuèndá-ndó chiúⁿ-áⁿ —
càchí-gá xáhaⁿ-gã xii-güedé.

39 Te ió cuéhé ñáyiu ñúu-áⁿ
nǐ xindèdóho-yu cuèndú ní

cani ñadìhí-áⁿ nũ-yu sá Jèsús ní xáhaⁿ-gã nchaa nãcuáa quide-aⁿ, te xiãⁿ ío vãi-yu ní sándáá iní-yu Jèsús. ⁴⁰ Te ní quexió-yu núú ndécú-gã, te ní cáháⁿ ndàhú-yu núú-gã sá quéndõo-gá ñuú-yu, núu xiãⁿ ní xíndecu-gá ndihí-yu úú nduu. ⁴¹ Te ío cuéhé-gã-yu ní sándáá iní-yu tnúhu ní cáháⁿ méé-gã. ⁴² Te ní xáhãⁿ-yu xii ñadìhí-áⁿ:

—Vitna te ñá díú mèe-ni tnúhu ní cáháⁿ-n ní sándáá iní-ndí-gá, chi ní cáháⁿ méé-gã ní xíndedóho-ndí vitna núu ní sándáá ndisa iní-ndí sá díú-gã cúú-gã Crìstú Yaá ní tendaha Yã Ndiõxí véxi ñuyíú-a dàcácu nihnu-gá ñãyiú núú ùhú núú ndàhú —càchí-yu xáhãⁿ-yu xii-aⁿ.

Jèsús quidé tãtna-gá déhe ìⁿ tée ndéé chíúⁿ nũú gobièrnú

⁴³ Te nduu úní ní nucúhuⁿ Jèsús ichi cuáhãⁿ-gá distritú Galileá. ⁴⁴ Te cuáhãⁿ-gá yacáⁿ, chi mee-gã ní cachí-gá sá nũu ìⁿ tée na càháⁿ-dé tnúhu Yã Ndiõxí ñuú núú ní cacu-dé, te ñá túú nèhé-yu sá yíñuhu núú-dé. ⁴⁵ Te òré ní sáá-gá distritú Galileá, te ío váha ní cuu iní ñáhã-yu xii-gá, chi cuendá tnàhá-yu ní xíndecu ndihí-gá vico pascuá ñuú Jerusalén. Te yacáⁿ ní xiní-yu nchaa sá ñ quide-gá.

⁴⁶ Te ní sáhãⁿ tucu-gá ñuú Cànaá ìⁿ ñuú yíndèhu distritú Galileá, núú ñí nadatiu-gá ndute ní nduu-xi vínú. Te ñuú Capèrnaúm ndécú ìⁿ tée ndéé chíúⁿ nũú tée cùu

gobièrnú, te tée-áⁿ cùhú ìⁿ déhe-dé. ⁴⁷ Te ní níhí-dé tnúhu sá ñí ndee Jèsús distritú Júdeá ní ndexìo-gá distritú Galileá, núu ní sáhãⁿ-dé núú ndécú-gã, te ní cáháⁿ ndàhú-dé núú-gã sá quèhíⁿ-gá cada tãtna-gá déhe-dé, chi sa ndècu-na-dé sá cùú-dé. ⁴⁸ Te ní xáhaⁿ Jèsús xii-dé:

—Nchòhó, chi vá quíndáá iní ñáhã-ndó xii-í te núu vá cada-í ìⁿ sá vá yõo tnàhí ndàcu cada quini-ndó —càchí-gá xáhaⁿ-gã xii-dé.

⁴⁹ Te ní xáhaⁿ tùcu tée cùhú déhe-xi-áⁿ xii-gá:

—Tãtá, cundee ìní-n ná quèhíⁿ-ni-o càda tãtna-n dèhe-í ná cuu-dé, chi càhú víhí tnàhá-dé —càchí-dé xáhãⁿ-dè xii-gá.

⁵⁰ Te ní xáhaⁿ Jèsús:

—Cuanùhú te quini-n ná ní ndúha déhe-n —càchí-gá xáhaⁿ-gã xii-dé.

Te ní sándáá iní-dé tnúhu ní cáháⁿ Jèsús, te cuánuhú-dé. ⁵¹ Te ñuhu-dé ichi cuánuhú-dé ní sánú tnàhá ñáhã cuè tée xínu cuechí núú-dé. Te ní xáhaⁿ-güedé sá sà ta ndúha déhe-dé cuáhãⁿ.

⁵² Te ní xicáⁿ tnúhú-dé núú-güedé ná òré cúú-xi ní ngüíta-xi ta quètau cuéhé-dé. Te ní xáhaⁿ-güedé:

—Icu dàtná òré caá ìⁿ sacuaa ní nchíco-dé cahni —càchí-güedé xáhãⁿ-güedé xii-dé.

⁵³ Te tãtá tée cùhú-áⁿ ní ndacu iní-dé sá díú òré ní quètau cuéhé-dé ní cáháⁿ ndihí-dé Jèsús ní xáhaⁿ-gã sá ndúha déhe-dé. Te xiãⁿ nũu ndí nchaa tée-áⁿ vehe-dé ní sándáá iní-yu Jèsús.

54 Te sá nǐ quide-gá-áⁿ cúú ũú xito quide-gá sá vǎ yǎo tnahí ndacu cada. Te sá nǐ quide-gá xito cùu uú-áⁿ cúú-xí sǎ nǐ quide-gá cútnàhá ní ndee-gá distritú Jùdeá cuánuhú-gá distritú Galiléa.

5

Jèsús quidé tátna-gá ìⁿ téé cùhú ìⁿ xichi núú nání Bètesdá

¹ Te sátá dúcáⁿ nǐ cuu, te ní tnahá nduu nǐ quide ñáyiu isràél ìⁿ vico. Te ní sáháⁿ Jèsús ñuú Jerusàlén.

² Te ní càa xico yuhu ñuú-áⁿ ñúhú dòco, te titní yèhe-xi ndecu. Te ìⁿ yèhe-xi-áⁿ nání Yùyehe Mbéé, te yatni xiáⁿ cáá ìⁿ tanquí ndute dàna-ní-yu Bètesdá tnúhu mèe-yu tnúhu hèbreú, te yuhu tànquí-áⁿ cáá ũhúⁿ corrèdór.

³ Te xití corrèdór-áⁿ xĩndecu cuéhé ñáyiu cùhú, ñáyiu cuáá, ñáyiu yacua, ñáyiu ñá cúú-gǎ candá nihnu, ndètú-yu candá ndute-áⁿ. ⁴ Chi nihí-yu tnúhu sá ãma nihnu cùuⁿ ìⁿ espíritú xínú cuèchi núú Yǎ Ndióxi, te dàcandá-xi ndute ñúhu tanquí-áⁿ. Te ñáyiu díhna nuu nà quée xití ndute-áⁿ, te òré-ni ndúha-yu.

⁵ Te yacáⁿ ñútnàhá ìⁿ téé ní cuu ócósáhúⁿ úní cuiá sǎ cùhú-dé. ⁶ Te ní xiní Jèsús cáá-dé, te ní cutnùníní iní-gá sá nǐ cuu cuéhé cuiá cùhú-dé, te ní xáhaⁿ-gǎ:

—¿Cuíní-n ndúha-n-áⁿ? —
càchí-gá xáhaⁿ-gǎ xii-dé.

⁷ Te ní xáhaⁿ tée cùhú-áⁿ:

—Táta, vá yǎo nihí-í dàquée ñaha xii-í xití tànquí-a òré càndá ndute, chi òré cuíní-í quée-í, te ingá-ni

tucú-yu quènduú-yu núú-í cuángueé-yu —càchí-dé xáhaⁿ-dǎ xii-gá.

⁸ Te ní xáhaⁿ Jèsús:

—Ndacuíñí, te ndaca-ni-n yùu-n, te caca-n —càchí-gá xáhaⁿ-gǎ xii-dé.

⁹ Te òré-ni-áⁿ nǐ ndúha téé cùhú-áⁿ, te ní ndaca-ni-dé yuu-dé, te ní xica-dé cuáháⁿ-dé. Te nduu-áⁿ cúú-xí nduu ndetatú ñáyiu, ¹⁰ núu ní xáhaⁿ cué téé isràél xii téé ní cuhú-áⁿ:

—Vitna cùu-xi nduu ndetatú-ó núu vá cúú cuído-n yuu-n —cachí-güedé xáhaⁿ-güedé xii-dé.

¹¹ Te ní xáhaⁿ-dǎ:

—Mee tée ní quide tátna ñaha xii-í ní cachí-dé sá ndácàni-í yuu-í, te caca-í —càchí-dé xáhaⁿ-dǎ xii-güedé.

¹² Te ní xáhaⁿ-güedé:

—¿Te ná cúú tée ducaⁿ nǐ cachí sá ndácàni-n yuu-n te caca-n-í? —càchí-güedé xáhaⁿ-güedé xii-dé.

¹³ Dico téé ní cuhú-áⁿ ñà túú ní cùtnuníní iní-dé ná cúú tée ní quide tátna ñaha xii-dé, chi Jèsús òré-ni ní xica-gá cuáháⁿ-gá tnuú nchaa ñáyiu chitu xĩndecu xiáⁿ. ¹⁴ Te sátá dúcáⁿ te ní naníhí tnahá Jèsús ndihi téé ní quide tátna-gá-áⁿ xití veñúhu càhnu sá ïo cùnuu, te ní xáhaⁿ-gǎ xii-dé:

—Ní xiní-n nǎ ní ndúha-n-va. Te vitna vá cáá-gǎ-n nǎndí sá cuéhé sá dúhá, chi núu na càda-ni-n ña, te quixi ingá cuéhé, te vèhi-gá ndoho-n —càchí-gá xáhaⁿ-gǎ xii-dé.

¹⁵ Ducaⁿ te ní xica téé ní cuhú-áⁿ cuángúñaha-dé xii cue téé isràél sá Jèsús ní quide tátna ñaha-gǎ xii-dé. ¹⁶ Núu

sátá nǐ níhí cue téé israèl tnúhu, te ní cuu úhú iní-güedé Jèsús. Te ní cuiní-güedé cahni ñaha-güedě xii-gá cuendá sá dúcáⁿ nǐ quide tátna-gá nduu ndètatú-güedé. ¹⁷ Te ní xáhaⁿ Jèsús xii-güedé:

—Tàtá-í Dútú Ndiöxí quidé chiuⁿ-ni-gá nǔu xiǎⁿ quidé chiuⁿ-í tñahá-í —càchí-gá xáhaⁿ-gǎ xii-güedé.

¹⁸ Te ní cudééⁿ-güedě sá ñǎ ní cǎnehe íi-gǎ nduu ndètatú-güedé, te ní cuiní-güedé cahni ñaha-güedě, te uuⁿ-gá ní cuiní-güedé cahni ñaha-güedě xii-gá sá nǐ cachí-gá sá Tàtá-gǎ cúú Dútú Ndiöxí, chi ní sani iní-güedé sá cuiní-gá nútñahá-gá Yǎ Ndiöxí nǔu xiǎⁿ ío ní cudééⁿ-güedě.

Jèsús Déhe Yá Ndiöxí táxí tñùní-gá

¹⁹ Te ní xáhaⁿ tùcu Jesús xii-güedé:

—Na càchí tnúhu ndáá-í xii-ndo sǎ yǔhú chi ni ñⁿ sá ñǎ ndácù-í cada mee-í nǔu ñá túú mée Tàtá-í dǎnehé ñáhá-gǎ xii-í nǎcuáa cada-í, chi nchaa sá quidé Tàtá-í quidè-í tñahá-í. ²⁰ Te Tàtá-í ío cùu iní ñáhá-gǎ xii-í nǔu dǎnehé ñáhá-gǎ nchaa nǎcuáa quide-gá. Te vitna ndècu vai-gá chiuⁿ tahu-gá cada-í, chiuⁿ sá vǎtá quíní-gá-ndó càda-í nǎcuáa cuñúhu vǐhi-ndo. ²¹ Chi Tàtá-í dandòto-gá ñáyiu ní xíhí. Te yúhú cada-í te nduu tǎhú nchaa ñáyiu càchí iní-í cundecu ndihi ñáhá-yu xii-í ni caa ni quíhíⁿ. ²² Te na

sáa nduu te ñá díú Tàtá-í cada ndáá-gá cuéchi ñáyiu, chi ní cachí-gá sá yǔhú cada ndáá-í ²³ cuendá nchaa ñáyiu canehé-yu sá yíñùhu núu-í dàtná nehé-yu sá yíñùhu núu Tàtá-í Yáá ní tendaha ñaha xii-í véxi-í ñuyíú-a. Te nchaa ñáyiu ñá túú nèhe sá yíñùhu núu yǔhú, te ni nǔú Tàtá-í ñá túú nehé-yu sá yíñùhu.

²⁴ Te na càchí tnúhu ndáá-í xii-ndo sǎ nchaa ñáyiu na cùndedóho tnúhu na càháⁿ-í, te núu na quíndáá iní-yu Dútú Ndiöxí Yáá ní tendaha ñaha xii-í véxi-í ñuyíú-a ña, te vá cuíta nihnú-yu chi nduu tǎhǔ-yu cundecú-yu ndihi-gá ni caa ni quíhíⁿ. ²⁵ Te vitna na càchí tnúhu ndáá-í xii-ndo sǎ nchaa ñáyiu ndècu ichi cuehé ichi duha cùu-yu dàtná ñⁿ ñáyiu ní xíhí, te vitna ní sáa nduu cùndedóho-yu tnúhu càháⁿ yúhú Déhe Dútú Ndiöxí, te nchaa ñáyiu na quíndáá iní-xi, te naníhí tǎhú-yu. ²⁶ Te dàtná quidé mée Tàtá-í dácǎcu nihnu-gá ñáyiu, ducaⁿ nǐ cachí-gá cada-í dácǎcu nihnu-í-yu. ²⁷ Te ní cachí tucu-gá sá sáa ñⁿ nduu, te cada ndáá-í cuéchi nchaa ñáyiu ñá túú quide ndáá, chi yúhú táxí tñùní-í, te cùu-í ñaní tñáhá-ndó nchaa-ndo. ²⁸ Te ni vǎ cuñúhu-ndo tñùhu càháⁿ-í, chi sáa nduu te nchaa ñáyiu ní xíhí tecú dóho-yu tnúhu càháⁿ-í. ²⁹ Te ndoto nchaa ñáyiu ní quide váha cundecu ndihi-í-yu ni caa ni quíhíⁿ, te ndoto tñahá nchaa ñáyiu ní quide cuehé ní quide duha,

te ñáyiú-áⁿ quĩhíⁿ-yu núú ùhú núú ndàhú.

Yá Ndiõxí chĩndèe tnúhu-gá Jèsús

30 "Te yúhú, chi ni ìⁿ sá ñá ndácù-í cada mee-ĩ nũu ñá díú mèe Yá Ndiõxí táuchlúⁿ-gá nàcuáa cada-í. Te quide ndáá-í cuéchi ñáyiú nàcuáa tàxi tnuní-gá cada-í, te yúhú ñá túú quide-í sá cúú ìní mèe-í chi Tàtà-í ní táuchíúⁿ-gá nàcuáa cada-í. 31 Te núu na càháⁿ-í sá mèe-í táxi tnùn-í, te vá quindáa ìní-ndó. 32 Chi Yá Ndiõxí chĩndèe tnúhu ñaha-gá xii-í, te yúhú xìn-í sá tnúhu càháⁿ-gá cuendá-í cúú-xí ìⁿ sá ndáa. 33 Te nchòhó ní téchíúⁿ-ndó cué tée ní sáháⁿ ní ndúcú tnúhu-güedé núú tẽ Juáa nũu ná tnúhu cáháⁿ-dé cuendá-í, te tée-ãⁿ ní cáháⁿ ndáa-dé nàcuáa ndũu cuendá-í. 34 Dico yúhú, chi ñá túú xini ñuhu-í ìⁿ ñáyiú ñuyíú-a chindee tnúhu ñahá-yu xii-í, dico té Juáa ní cáháⁿ váha-dé cuendá-í, te xiãⁿ càchí tnúhu tucu-í cuendá quindáa ìní-ndó, te naníhí tàhú-ndó. 35 Te dàtná cuìní-ndó cùu ìⁿ iti ndéñuhú te dàyehé-xi, ducaⁿ sãtnhá-xi ní cuu té Juáa, chi sacú-ni nduu ío ní cudí^í ìní-ndó tnúhu ní cáháⁿ-dé. 36 Te váha-ni ní cáháⁿ té Juáa, dico yúhú chi ndècu nchaa sá tá quide-í véxi nàcuáa ní táuchíúⁿ Yá Ndiõxí cada-í, te nchaa xiãⁿ cúú-xí ìⁿ sá cútnùn-í ìní-ndó sã mèe Yá Ndiõxí ní tendaha ñaha-gá xii-í véxi-í ñuyíú-a. 37 Te ñu-ni-gá chĩndèe tnúhu ñaha-gã xii-í, dicó-ni sá mèe-ndó ñá túú cuìní-ndó càda cuendá-ndó

tnúhu càháⁿ-gá, te ni ñá túú xìn-í-ndó nàcuáa càda-gá. 38 Te ñá túú quèe ìní nchòhó tnúhu càháⁿ-gá, chi ñá túú sàndáa ìní ñahá-ndó xii yúhú Déhe-gá. 39 Te dàcuaha vihi-ndo tutú ndèe tnúhu-gá, chi sàni ìní-ndó sã xiãⁿ-ni dacuàha-ndo te naníhí tàhú-ndó. Te váha-ni quide-ndo, chi ñu tutú-ãⁿ càháⁿ-xi cuendá-í. 40 Te nchòhó ñá túú cuìní-ndó quindáa ìní ñahá-ndó xii-í cuendá naníhí tàhú-ndó.

41 "Te yúhú, ñá túú xini ñuhu-í sá cáda càhnu ñaha-ndo xii-í. 42 Dico sa xìn-í-í nàcuáa sàni ìní-ndó chi ñá túú cùu ìní-ndó Yá Ndiõxí. 43 Te yúhú véxi-í ñuyíú-a chi Tàtà-í ní tendaha ñaha-gá, te nchòhó ñá túú cuìní-ndó tnũ-ndo tnúhu càháⁿ-í, dico núu quixi ìⁿ tée cáháⁿ cuendá mèe-xí, chi quindáa ìní-ndó. 44 Te ná váha nchòhó ná tnũ-ndó tnúhu càháⁿ-í, te xio xio-ni quide cahnu tnaha-ndo, te ñá túú quide cuendá-ndó sã tnúhu váha càháⁿ Yá Ndiõxí cuu xii-ndo. 45 Te vá cán-í ìní-ndó sã yúhú ndacáⁿ cuéchi-í núú Tàtà-í nàcuáa quide-ndo, chi ndii Moisés ní chídó tnùn-í ndii núú tütú Yá Ndiõxí nàcuáa quide-ndo sá ñá túú quide váha-ndo, te mee-ndo sàni ìní-ndó sã naníhí tàhú-ndó cuendá tnúhu ní cáháⁿ ndii. 46 Chi núu nchòhó sàndáa ndisa ìní-ndó tnúhu ní cáháⁿ ndii Moisés ñá, te ducaⁿ te quindáa ìní-ndó yúhú ní cùu, chi ndii-ãⁿ ní chídó tnùn-í ndii nàcuáa cada-í ñuyíú-a vitna. 47 Te núu ñá túú sàndáa ìní-ndó tnúhu ní chídó tnùn-í ndii, te ñu-ni

ducaⁿ càda ñaha-ndo xii-í vá quindáá iní-ndó tnúhu càháⁿ-í —càchí-gá xáhaⁿ-gã xii-güedé.

6

Jèsús dácàxi-gá úhúⁿ mĩ ñáyi

(Mt. 14:13-21; Mr. 6:30-44; Lc. 9:10-17)

¹ Te sátá dúcáⁿ ñi cuu, te ní quee Jèsús cuáháⁿ-gá ingá xio yuhu làgúná Galileá, àdi Tiberiás chi úú diu-xi. ² Te ío cuéhé ñáyi nchícúⁿ ñáhá xii-gá cuáháⁿ cuendá sá ñi xiní-yu nchaa sá vã yõo tnàhí ndàcu cada ní quide-gá, chi ní quide tátna-gá nchaa ñáyi cùhú. ³ Te ní sáá Jèsús ndihi cue téé xica cuu ndihi-gá ñi núú tìndúú, te xíaⁿ ñi ngóo-gá ndihi-güedé. ⁴ Te ta cùyatni coo vico pascuá, vico quide ñáyi israhél. ⁵ Te ní xiní-gá sá ío vãi ñáyi nchícúⁿ ñáhá xii-gá cuáháⁿ, te ní xáhaⁿ-gã xii té Lìpé:

—¿Ndéé quíhíⁿ-ó quínguaaⁿ-o sã cáxi nchaa ñáyi-a? —
càchí-gá xáhaⁿ-gã xii-dé.

⁶ Te ducaⁿ ñi xáhaⁿ-gã xii-dé cuendá sá cuní-gá quini-gá nása cunduu tnúhu cáháⁿ-dé, dico mee-gã sa xiní-gá nàcuáa cada-gá. ⁷ Te ní xáhaⁿ tẽ Lìpé xii-gá:

—Te cuéi úú ciendú díhúⁿ denàriú ná dândoñuhu-o cuaaⁿ-o paá, te ñi vã tnàhá caxi-yu luha luha —càchí-dé xáhaⁿ-dẽ xii-gá.

⁸ Te té Ndríxí ingá téé xica cuu ndihi-gá, ñani té Xímú, àdi Pelú chi úú diu-dé, ní xáhaⁿ-dẽ:

⁹ —Iha ndècu ñiⁿ té líhli nèhe-dé úhúⁿ paá cebadá te úú chácá, dico ndéé tnàhá xéhé, te cuéhé víhí ñáyi —
càchí-dé xáhaⁿ-dẽ xii-gá.

¹⁰ Te ní xáhaⁿ Jèsús xii-güedé:

—Chí cñaha nà ngóo-yu nchaa-yu —càchí-gá xáhaⁿ-gã.

Te ñáyi-áⁿ ñi ngóo-yu, te càa vihi ité núú ñi ngóo-yu-áⁿ, te xínu dàtná úhúⁿ mĩ mee-ni cué téé, te ñiⁿ ñáyi ñi ndihi landú. ¹¹ Te ní queheⁿ Jèsús paá, te ní ndacáⁿ táhú-gã núú Yã Ndiõxí, te ní sãñaha-gã paá-áⁿ xii cue téé xica cuu ndihi-gá, te cue téé-áⁿ ñi dácãhñu-güedé ní xexi nchaa ñáyi xixúcu-áⁿ. Te diu-ni ducaⁿ ñi quide-gá chácá, te ní dácãhñu tucu-güedé-di ní xexi ñáyi ní ndahá xití-yu. ¹² Te òré ní túhú cóhõ-yu, te ní xáhaⁿ Jèsús xii cue téé xica cuu ndihi-gá sá ná nàqueheⁿ-güedé nchaa sá ñi quendóo cuendá sá vã quíhíⁿ-xi núú míhí.

¹³ Te cue téé-ãⁿ ní naqueheⁿ-güedé nchaa sá ñi quendóo, te ní chítú ùxúú tídihi núú ùhúⁿ-ni paá cebadá. ¹⁴ Te sá ñi xiní-yu ní nadacayá-gá sá ñi xexi-yu, xíaⁿ ní ngúita-yu ní xitnàhá-yu:

—Ndáá sá tẽe-a sa ío cuendú sá quíxí-dé ñuyiú-a cáháⁿ-dé tnúhu Yã Ndiõxí —càchí-yu xitnàhá-yu.

¹⁵ Te ní cutnùní iní Jèsús sá cádá yicá-yu can-deca ñàhá-yu xii-gá quíhíⁿ cuendá cundecu-gá quindaha ñàha-gá xií-yu ni cùu, núu xíaⁿ

ní xica tucu-gá cuáháⁿ-gá xití yucu mee ñi chícuú-gá.

Jèsús xicá-gă núú ndute

(Mt. 14:22-27; Mr. 6:45-52)

16 Te òré ní cuu ndiquiⁿ, te cuáháⁿ cue téé xica cuu ndihi-gá yuhu làgúná.

17 Te ní quée-güedé bàrcú cuáháⁿ-güedé ñuú Capèrnaúm cáá ndàa ingá xio yuhu làgúná, te sa ní cuu ndiquiⁿ, te ñà túú Jèsús quèxio quée-gá bàrcú ñúhú-güedě-áⁿ. 18 Te ní ngüita-xi quène táchí ñhi, te níhi dàcandau ndéé tnáhá ndüte lagúná-áⁿ. 19 Te sa ní cuu dàtná úhúⁿ kilómetrú cuáháⁿ-güedé, te ní xiní-güedé Jèsús tá cüyatni-gá bàrcú ñúhú-güedě véxi-gá núú nduté, te ní yùhú-güedé. 20 Te ní xáhaⁿ Jèsús xii-güedé:

—Yúhú véxi-í, vá yùhú-ndó —càchí-gá xáhaⁿ-gă xii-güedé.

21 Te ío ní cudíi ìní-güedé sá ñi quexio-gá cuánguee-gá bàrcú, te òré-ni ní quexio-güedé ndihi-gá ndéé ingá xio yuhu làgúná núú cuáháⁿ-güedé.

Ñáyiú nànducu ñaha xii Jèsús

22 Te ingá nduu-áⁿ xĩndecu-ni nchaa ñáyiú ní quendóo yuhu làgúná. Te ní quide cuèndá-yu sá ñi ñi-í bàrcú nútñi-áⁿ ní cùu ñà túú-gă, chi cue téé xica cuu ndihi Jèsús ní quée-güedé bàrcú-áⁿ cuáháⁿ-güedé. Te ní níhi-yu tnúhu sá ñà túú ní quée tnáhá Jèsús. 23 Te ñu-ndi nduu-áⁿ ñi quée ñi úú bàrcú ñuú Tiberiás ní sáa-xi yatni núú ñi xexi-yu paa sá ñi ndacáⁿ táhú Jèsús núú Yá Ndióxi. 24 Te ní xiní-yu sá

ñà túú Jèsús ndihi cue téé xica cuu ndihi-gá, núu ní quée-yu bàrcú-áⁿ cuáháⁿ-yu ñuú Capèrnaúm cuánúndúcú ñàhá-yu xii-gá.

Jèsús cúú-gă dàtná ñi sá nchító-ó

25 Te ní sáa-yu ingá xio yuhu làgúná, xiáⁿ ñi naníhi-yu Jèsús, te ní xáháⁿ-yu xii-gá:

—Mèstrú, ¿ná òré ní sáa-n ñha? —cachí-yu xáháⁿ-yu xii-gá.

26 Te ní xáhaⁿ Jèsús:

—Na càchí tnúhu ndáa-í sá nchòhó nánducu ñaha-ndo xii-í cuèndá-ñi sá ñi xexi-ndo ñi ndahá xití-ndó, dico ñà díú cuèndá sá ñi quide-í sá vã yõ tnàhí ndàcu cada nanducu ñaha-ndo. 27 Te vá cáda cuèndá-ndó sã méé-ni sã cáxi-ndó càda chiúⁿ-ndo chi xiáⁿ vá cúdíi-xi. Chi ío-gá xiní ñúhu-xi cada cuèndá-ndó tnúhu Yá Ndióxi te tñi-ndo, te naníhi táhú-ndó, Te tnúhu-áⁿ cachí tnúhu yúhú Téé cùu ñani tnáhá-ndó nchàa-ndo, te xiáⁿ candeca-xi iní-ndó ñi caa ni quíhiⁿ, chi mee Dùtú Ndióxi ní cachí-gá sá dúcáⁿ càda-í —càchí-gá xáhaⁿ-gă xii-yu.

28 Te ní xáháⁿ-yu:

—¿Nása cada-ndí cuèndá ngúmu ichi-ndí nàcuáa cùni Yá Ndióxi cunduú-i? —cachí-yu xáháⁿ-yu xii-gá.

29 Te ní xáhaⁿ Jèsús xii-yu:

—Yá Ndióxi cùni-gá sá quèndáa iní ñàhá-ndó xii yúhú, téé ní tendaha-gă véxi ñuyú-a —càchí-gá xáhaⁿ-gă xii-yu.

30 Te ní xáhaⁿ tucú-yu xii-gá:

—¿Ná cúú sǎ vǎ yǎo tñahí ndàcu cada, cada-n cùndehe-ndí cuèndá quíndáá iní ñáhá-ndí xii-n-i? ¿Àdi nágá cúú sǎ cádá-n cuèndá cutnùní iní-ndí sá ndàá càháⁿ-n-í? ³¹ Chi cue ñaní tñáhá-ó ñí xíndecu ndéé sanaha ñí xexí-yu pàá nání mànáá xití yucu dàtná yódó tñùní núú tütú Yǎ Ndiöxí núú cǎchí-xi: “Yá Ndiöxí ñí sǎñaha-gǎ sá ñí xexí-yu, te ní cuuⁿ túu-xi andiu”, duha cǎchí-xi núú tütú-gá — cǎchí-yu xǎhǎⁿ-yu xii-gá.

³² Te ní xáhaⁿ Jèsús:

—Na cǎchí tñúhu ndáá-í xii-ndo sǎ ñá díú ndíi Moisés ñí sǎñaha ndíi pàá ní cuuⁿ andiu ñí xexí-yu, chi mee Tǎtà-í ñí sǎñaha-gǎ sá ñí xexí-yu. Te sá táxi-gǎ vitna cùu-xi ³³ datná pàá véxi cuuⁿ andiu càndeca-xi iní-ndó ñí caa ñí quihíⁿ —cǎchí-gá xáhaⁿ-gǎ xii-yu.

³⁴ Te ní xáhǎⁿ-yu xii-gá:

—Tǎtà, mee-ni pàá-áⁿ taxi-n cǎxi-ndí —cǎchí-yu xǎhǎⁿ-yu xii-gá.

³⁵ Te ní xáhaⁿ Jèsús:

—Yúhú cúú-í dàtná ñí sǎ xexí-ndó càndeca-xi iní-ndó. Te duha ndùu tñúhu càháⁿ-í, chi nchaa ñáyiu na quíndáá iní ñáhá xii-í, te vá ndóhó-gǎ-yu docó te vá ndóhó-gǎ-yu ndute. ³⁶ Dícò-ñí sá nchóhó ñá túú sàndáá iní ñáhá-ndó cuéi xini ñáhá-ndó xii-í. ³⁷ Te nchaa ñáyiu na cǎchí Tǎtà-í nduu cuèndá-í nasaá-yu núu-í, te ñáyiu-áⁿ vǎ dáquèe tíhù-í-yu.

³⁸ Te ñá díú yúhú sá véxi cuuⁿ-í andiu te quíde-í nchaa

sá cúú iní mèe-í, chi véxi cuuⁿ-í sá cádá-í nchaa nàcuáa ñí táuchíúⁿ mèe Tǎtà-í Dútú Ndiöxí Yáá ñí tendaha ñàha xii-í véxi-í ñuyíú-a. ³⁹ Te cuíni-gá sá ncháá ñáyiu ñí cachí-gá nduu cuèndá-í vá dáñà-í-yu cuíta nihnú-yu, te na sàá nduu te diu-ñí-í dandòto-í-yu. ⁴⁰ Chi ducaⁿ ñí cachí Dútú Ndiöxí cunduu sá ncháá ñáyiu na tñí tñúhu càháⁿ-í, te quíndáá ndisa iní ñáhǎ-yu xii yúhú Déhe-gá, te nduu táhǎ-yu cundecú-yu ndíhí Yá Ndiöxí ñí caa ñí quihíⁿ, te yúhú dandòto-í-yu na sàá nduu —cǎchí-gá xáhaⁿ-gǎ xii-yu.

⁴¹ Te ñá ñí tñáhá iní ñáyiu isràél tñúhu ñí cáháⁿ Jèsús núu ñí ngúita-yu ñí cáháⁿ cuèhé-yu cuèndá-gá cuèndá sá ñí xáhaⁿ-gǎ sá mée-gǎ cúú-gǎ dàtná sá xexí-ó véxi cuuⁿ andiu. ⁴² Te ñí xitnàhá-yu:

—¿Náa ñá díú tée-a cùu-dé Jèsús déhe té Chèé? Nchoo xini-ó tǎtà-dě, te xini-ó nǎná-dě, ñá cachí-tu tée-a sá andiu véxi cuuⁿ-dé! — cǎchí-yu xitnàhá-yu.

⁴³ Te ní xáhaⁿ Jèsús xii-yu:

—Vá càháⁿ cuèhé-gá-ndó cuèndá-í, chí dáñá. ⁴⁴ Vá yǎo quíndáá iní ñáhá xii yúhú núu ñá túú mèe Tǎtà-í táxi cuèndá ñáhá-gǎ xii-yu. Te diu-gá ñí tendaha ñàha-gá xii-í véxi-í, te yúhú dandòto-í-yu na sàá nduu. ⁴⁵ Te núú tütú cue tée ñí xóo cáháⁿ tñúhu Yá Ndiöxí ndéé sanaha cǎchí-xi: “Yá Ndiöxí danèhé ñáhá-gǎ xii-yu tñúhu-gǎ”, duha cǎchí-xi. Te nchaa ñáyiu na cùndedóho

nchaa tnúhu càháⁿ Dútú Ndiöxí, te cutúha-yu nàcuáa càháⁿ-gá, te ñáiyu-áⁿ quìndáá iní ñáhã-yu xii yúhú.

46 Te vá yõo xini ñáhã xii Dútú Ndiöxí chi ñⁿdii-ni yúhú xini-í-gá, chi núú ndécú-gã ní quee-í véxi cuuⁿ-í —càchí-gá xáhaⁿ-gã xií-yu.

47 Te xáhaⁿ tùcu-gá:

—Na càchí tnúhu ndáá-í xii-ndo sã nchãa ñáiyu na quìndáá iní ñáhã xii-í, te naníhí tãhú-yu. 48 Te yúhú cùú-í dàtná ñⁿ sá xéxi-ndó càndeca-xi iní-ndó, te ducaⁿ sãtnahá-xi cùu-í chi yúhú cada-í te nduu tãhú-ndó cùndecu-ndo ndihí Yá Ndiöxí ni caa ni quíhíⁿ. 49 Te cue ñaní tnáhã-ó ñí xíndecu ndéé sanaha ñí xexí-yu pãá nání mànáá xití yucu, dico ní sáá nduu te dacuítí ñí xihí-yu. 50-51 Te yúhú càháⁿ-í cuendá mèe-í, chi véxi cuuⁿ-í andiu. Te cùu-í dàtná ñⁿ sá nchító-ndó, te nchaa ñáiyu na càxi te candeca-xi iní-yu ni caa ni quíhíⁿ te vá cuíta nihnu-gá-yu. Te sá táxi-í xii-ndo xíãⁿ cúu-xí yiqui cuñú-í, te cùu-xi cuendá nchaa ñáiyu nihí ñuyúu cuendá nduu tãhú-yu cundecú-yu ndihí Yá Ndiöxí ni caa ni quíhíⁿ —càchí-gá xáhaⁿ-gã xií-yu.

52 Te ní ngüíta ñáiyu isràél xitnãhá-yu:

—¿Nása cada-tu téa-a núu càchí-tu-dé sá yiqui cuñú-dé taxi-dé caxi-o-í? —càchí-yu xitnãhá-yu.

53 Te ní xáhaⁿ Jèsús:

—Na càchí tnúhu ndáá-í xii-ndo sã núu na càda iní-ndó sã dàtná sá cáxi-ndó yiqui cuñú yúhú Téa cùu ñaní tnáhã-ndó nchãa-ndo, te cada tucu iní-ndó sã dàtná sá cóhó-ndó ñíñi-í ñá, te xíãⁿ queé-xí sã quìndáá iní ñáhã-ndó ñí yuhu ñí iní-ndó te naníhí tãhú-ndó, te núu ñáhã te cuíta nihnu-ndo. 54 Nchaa ñáiyu na càda iní-xi sã dàtná sá cáxi-yu yiqui cuñú-í te cohó-yu níñi-í, ñáiyu-áⁿ naníhí tãhú-yu te yúhú dandòto-í-yu na sáá nduu. 55 Chi yiqui cuñú-í ndihí níñi-í cúu-xí mèe-í. 56 Te nchaa ñáiyu na càda iní-xi sã dàtná sá cáxi-yu yiqui cuñú-í te cohó-yu níñi-í, te ñáiyu-áⁿ ñⁿ-nã cuu-í ndihí-yu chí cundecu ndihí-í-yu. 57 Te yúhú nchító-í chí ducaⁿ nchító Tãtã-í Yáá ní tendaha ñãha xii-í véxi-í ñuyúu-a. Te diu-ni ducaⁿ nchãa ñáiyu na quìndáá iní ñáhã xii-í te cundecu ndihí-í-yu ni caa ni quíhíⁿ. 58 Te yúhú cúu-í dàtná ñⁿ sá nchító-ndó véxi cuuⁿ andiu, dico ñá díú pãá sá nání mànáá ní xèxi cue ñaní tnáhã-ó ñí xíndecu ndéé sanaha, chí ní xexí-yu pãá te dacuèi ní xihí-yu. Te nchaa ñáiyu na quìndáá iní ñáhã xii yúhú Yáá véxi cuuⁿ andiu, te cundecu ndihí-í-yu ni caa ni quíhíⁿ —càchí-gá xáhaⁿ-gã xií-yu.

59 Nchaa tnúhu-a ní càháⁿ-gá xití veñúhu ñáiyu ñúú Capèrnaúm.

Jèsús càchí tnúhu-gá nàcuáa

naníhi tàhú-ó

⁶⁰ Te sá dúcáⁿ ñí cáháⁿ-gá nũu vâi ñáyiu nchícúⁿ ñáhá xii-gá ní xitnàhá-yu:

—Vá tníí cuítì-o tnúhu cáháⁿ-dé chi ñá díú tnúhu sá cúú vâha iní-ó cáháⁿ-dé —càchí-yu xitnàhá-yu.

⁶¹ Te ní cutnùnì iní Jèsús sá ñà túú cáháⁿ váha-yu cuendá tnúhu ní cáháⁿ-gá, núu ní xáhaⁿ-gã xii-yu:

—¿Náa ñá tnàhá iní-ndó nâcuáa cáháⁿ-í-a? ⁶² Te uuⁿ-gá cada nchòhó nũu quini-ndó yũhú Tée cùu ñanì tnàhá-ndó nchàa-ndo ndaa-í núú ñí xíndecu-í díhna. ⁶³ Te espíritú ndécú ndíhi yiqui cuñú-ó, xiáⁿ ndécá ñàha-xi xii-o, te núu ñá túú xiáⁿ, te yiqui cuñú-ó ñà túú nàndíhi-xi. Dico núu nchaa tnúhu cáháⁿ-í-a quée-xi iní-ndó ñá, te quini-ndó nã xéhé candeca ñàha-xi xii-ndo núú cuáháⁿ núú vèxi. ⁶⁴ Te dava nchòhó chi ñá túú sàndáá iní-ndó —càchí-gá xáhaⁿ-gã xii-yu.

Te ducaⁿ ñí xáhaⁿ-gã chi sa nàha-gá nândi cùu ñáyiu vá quíndáá iní ñáhá xii-gá. Te ducaⁿ sà naha-gá ndédacàa tée cuáha cuendá ñáhá xii-gá núú cuè tée cùu úhú iní ñáhá. ⁶⁵ Te ní xáhaⁿ tùcu Jèsús xii-yu:

—Te duha cáháⁿ-í chi sa ní cachi tnúhu-í xii-ndo sã vã yõo ñí cuínì tní tnúhu-í te núu ñá túú Tãtà-í Dútú Ndiõxí sánú ìchi ñàha-gá xii-yu —càchí-gá xáhaⁿ-gã xii-yu.

⁶⁶ Te òré-án ïo vâi ñáyiu nchícúⁿ ñáhá xii-gá ní xócõo-yu ñá ní xica cuu-gá-yu ndíhi-gá. ⁶⁷ Te xiáⁿ ní xáhaⁿ

Jèsús xii ndi ùxúú cue tée xica cuu ndíhi-gá:

—¿Cuínì-ndó dândóo ñàha-ndo tnàhá-ndó-ãⁿ? —càchí-gá xáhaⁿ-gã xii-güedé.

⁶⁸ Te ní xáhaⁿ tẽ Xímú, àdi Pelú chi úú diu-dé:

—Mèstrú, ñá túú-gã ndèé quíhíⁿ-ndí, chi nchúhú náhá-ndí sá tnúhu mee-n cùu-xi sá vâha candeca-xi iní-ndí ñí caa ñí quíhíⁿ. ⁶⁹ Chi nchúhú sa ní sàndáá iní ñáhá-ndí xii-n chi nàha-ndí sá yòhó cúú-n Crístú Déhe Dútú Ndiõxí yaá ndécú àndiu —cachi-dé xáhaⁿ-dẽ xii-gá.

⁷⁰ Te ní xáhaⁿ Jèsús:

—Nàha-ndo sá yũhú ní cáháⁿ ñáhá-í xii ndi ùxúú-ndó xica cuu ndíhi ñàha-í xii-ndo, dico ñí-ndo quíhu ñàha yècu ñávâha xii-ndo —càchí-gá xáhaⁿ-gã xii-güedé.

⁷¹ Duha ní cáháⁿ Jèsús cuendá té Jüdás déhe té Xímú Iscarioté ñí tée ñútnahá núú ùxí ñí cue tée xica cuu ndíhi-gá, chi sa nàha-gá sá tẽ-ãⁿ cuáha cuendá ñáhá-dẽ xii-gá ñí nduu núú cuè tée cùu úhú iní ñáhá.

7

Cue ñanì Jèsús ñá túú sàndáá iní-güedé nâcuáa ndiùu tnúhu cáháⁿ-gá

¹ Te sátá dúcáⁿ ñí cuu, te ní xica cuu Jèsús distritú Galileá, te ñá ní sáháⁿ-gá distritú Jüdeá, chi yacáⁿ cuínì cue tée isrâel cahni ñàha-güedé xii-gá ní cùu. ² Te ní cuyatni nduu cadá-yu vico, vico sá dánànì-yu Vico Vehe Tnuvixiⁿ. ³ Te ní xáhaⁿ cuè ñanì Jèsús xii-gá:

—Váha-gá quíhíⁿ-n dìstrítú Jùdeá te vá cùndècu-n iha, chi yàcáⁿ cada-n nchaa sá quidé-n iha cuendá quini nchaa ñáyiú cùndíhi ñaha xii-n ndecu yacáⁿ. ⁴ Chi núu cuíní-ó quini nchaa ñáyiú ná chiúⁿ cada-o te vá cáda dáyuhu-o. Te yòhó cuéhé núú sá quidé-n, te cada-n na quini nchaa ñáyiú —càchí-güedé xáhaⁿ-güedé xii-gá.

⁵ Ducaⁿ ñí cáhánⁿ cue ñaní-gá, chi ní mèe-güedé ñá túú sàndáá iní-güedé nàcuáa ndùu tnúhu càhánⁿ-gá. ⁶ Te ní xáhaⁿ Jèsús xii-güedé:

—Vátá tnàhá-gá òré quíhíⁿ-í dico nchòhó ndédani càa oré cuu quíhíⁿ-ndó. ⁷ Chi nchaa ñáyiú ñùhu ichi cuehé ichi duha chi ñá túú cùu úhú iní ñáhã-yu xii nchòhó. Dico yúhú chi cùu úhú iní ñáhã-yu xii-í cuendá sá càhánⁿ-í sá quidé-yu nchaa sá cuehé sá dúhá. ⁸ Te chí cuahánⁿ nchòhó vico chi yúhú vá quíhíⁿ-ni-í chi vátá tnàhá-gá òré quíhíⁿ-í —càchí-gá xáhaⁿ-gã xii-güedé.

⁹ Te ducaⁿ ñí xáhaⁿ-gã te ní ndóo-gá Galileá, te cue téé-ánⁿ cuáhánⁿ-güedé.

Jèsús ndécú-gã #ⁿ vico chiñuhú-yu Yá Ndiõxí

¹⁰ Dico sátá cuáhánⁿ cue ñaní-gá, te ní xica-gá cuáhánⁿ-gá tnàhá-gá dicó-ni sá dáyuhu cuáhánⁿ-gá. ¹¹ Te ñáyiú isràél ñáyiú xĩndecu vico nànducú-yu Jèsús, te xĩtnàhá-yu:

—¿Ndéé ndécú Jèsús? —
càchí-yu xĩtnàhá-yu.

¹² Te nchaa ñáyiú xĩndecu vico xĩndatnúhu-yu cuendá-gá. Te davá-yu xĩtnàhá-yu sá ïo váha iní-gá, te davá-yu xĩtnàhá-yu sá ñà díú tèe váha cùu-gá, chi dándahú-gá ñáyiú.

¹³ Dico mee-ni xĩcáhánⁿ náhĩ-yu, chi xiyùhú-yu cue téé cùnnu núú-yu.

¹⁴ Te ta ngúhuⁿ dava vico, te cuánguihu Jèsús veñúhu càhnu sá ïo cùnnu, te ní ngúíta-gá dácuaaha-gá ñáyiú. ¹⁵ Te ñáyiú isràél ní cuñúhu vihí-yu sá ïo váha càhánⁿ-gá, te ní xĩtnàhá-yu:

—¿Ná cuendá ío váha ñùhu-tu díquí tèe-a tnúhu cáhánⁿ-dé te ñá túú ní dàcuaha-dé-í? —càchí-yu xĩtnàhá-yu.

¹⁶ Te ní xáhaⁿ Jèsús:

—Ñá díú cuendá mèe-í cúú-xí sá dánèhé ñáhã-í xii-ndo, chi cuendá Dútú Ndiõxí Yaá ní tendaha ñaha xii-í véxi-í cúú-xí. ¹⁷ Te núu ío dava-ndo ní yuhu ní iní-ndó cuíní-ndó càda-ndo nacuáa cuíní Yã Ndiõxí cunduu, te cutnùni ndáá iní-ndó sá tnúhu dàcuaha ñaha-í xii-ndo cùu-xi cuendá mèe Dútú Ndiõxí, te ñá díú cuendá mèe-í cúú-xí. ¹⁸ Te téé cuíní sá cáda càhnu ñaha ñáyiú xii-dé, téé-ánⁿ càhánⁿ-dé nàcuáa véxi iní mèe-dé. Dico yúhú cuíní-í sá cáda càhnú-yu Dútú Ndiõxí Yaá ní tendaha ñaha xii-í véxi-í ñuyúú-a, te càhánⁿ ndáá-í te ñá túú dàcuandehnde-í.

¹⁹ Te ndíi Moisés ní taxi ndíi tnúhu sá sánú ichi ñaha xii-ndo nacuáa cundecu-ndo, te ní dùcaⁿ ñá túú sàndáá iní-ndó nàcuáa

càháⁿ tnúhu-áⁿ. ¿Te ná cuèndá cuíní-ndó càhni ñaha-ndo xii-í? —càchí-gá xáhaⁿ-gã xii-yu.

20 Te ní xáháⁿ-yu xii-gá:

—Yucu ñávãha dàcoto ñaha xii-ó, chi vá yõo ñⁿ cuíní cahni ñaha xii-n —cachí-yu xãháⁿ-yu xii-gá.

21 Te ní xáhaⁿ Jèsús xii-yu:

—Sá ñí quide-í ñⁿ sá vá yõo tnàhí ndàcu cada nduu cuu-xi nduu ndetatú-ó, xiãⁿ ío ní cuñúhu ñaha-ndo xii-í. 22 Te ndíi Moisés ní cachí ndíi sá cuãha-yu sèñá ñii cue landú téé, dico ñá díú mèe ndíi ni càhu iní ndíi chi ducaⁿ tnàhí ní xóo cada cue ñani tnáhá-ó dàvá-áⁿ, núu xiãⁿ nchòhó sãha-ndo sèñá ñii landú téé cuèi cùu-xi nduu ndetatú-ó. 23 Te ducaⁿ quide-ndo cuendá sá ñà túú nã cumání-ndó núú tnúhu sá sánú ichi ñaha xii-ndo ní dándõo ndíi Moisés. ¿Te ná cuèndá cudééⁿ-ndó núú-í sá ñí quide tátna-í téé cùhú nduu ndetatú-ó-í? 24 Te váha váha cada cuèndá-ndó, te vá cuèndá-ni càháⁿ-ndó sá yúhú ndècuéchi-í chi ñá túú xini-ndó —càchí-gá xáhaⁿ-gã xii-yu.

Jèsús xáhaⁿ-gã xii-yu núú véxi-gá

25 Te dava ñáiyu ñuú Jerusalén ní ngúita-yu xitnàhá-yu:

—¿Náa ñá díú tẽe-áⁿ nándücu-güedé cahni-güedé?, 26 núu náí-dé nútni núú chítú núú tàcá-ãⁿ càháⁿ-dé, te vá yõo cùyii cúñaha xii-dé ñⁿ tnúhu. Cudana te cue téé cùchiuⁿ sandáá iní-güedé sá díú-dẽ cúú-dẽ Crìstú Yáa ní tendaha Yá Ndiõxí véxi

ñuyíú-a. 27 Dico nchoo xini-ó ndèé ichi véxi téé-ãⁿ, dico Crìstú ná quixi-gá chi vá yõo ñⁿ quini ndèé ichi quixi Yáa-áⁿ —càchí-yu xitnàhá-yu.

28 Te yìhi Jèsús xiti veñúhu càhnu sá ío cùnuu danehe-gá ñáiyu, te ní tecú dóho-gá tnúhu càháⁿ-yu. Te níhi ní càháⁿ-gá, te xáhaⁿ-gã xii-yu:

—¡Ná quini-tu nchòhó ndèé ichi véxi yúhú! Yúhú véxi-í dico ñá díú sã cúú iní mèe-í, chi Yá Ndiõxí Yáa quidé nchàa-ndi túhú sá vãha ní tendaha ñaha-gá xii-í véxi-í, te nchòhó ñá túú xini-ndó-gã.

29 Te yúhú xini-í-gá chi núú ndécú-gã ní quee-í véxi-í, te diu mee-gã ní tendaha ñaha-gá véxi-í —càchí-gá xáhaⁿ-gã xii-yu.

30 Te sá dúcáⁿ ñí càháⁿ-gá, núu cuíní-güedé tñii ñaha-güedé xii-gá quihíⁿ-gá vecaá ní cùu, dico vá yõo ñⁿ ni cùyii tñii ñaha xii-gá chi vátá sàá-gá òré tñii ñaha-güedé. 31 Dico vai-yu ní sandáá iní ñáhã-yu xii-gá, te ní xitnàhá-yu:

—¿Nágá cúú sã cadá Crìstú ná quixi-gá-í?, te téé-a ío cuéhé núú sã tá quide-dé véxi. Váa diu téé-a cùu-dé Crìstú Yáa ní tendaha Yá Ndiõxí véxi ñuyíú-a —càchí-yu xitnàhá-yu.

Cue téé cùu fariséu cuíní-güedé quihíⁿ Jèsús vecaá

32 Te ní níhi cue téé cùu fariséu tnúhu nãcuáa càháⁿ ñáiyu cuèndá Jèsús, núu ní ndatnúhu-güedé ndihi cue dútú cùnùu, te ní techiun-güedé cue téé quide

cuendá veñúhu cuáháⁿ-güedé cuátni ñaha-güedé xii-gá ní cùu. ³³ Te ní xáhaⁿ-gã xii-güedé:

—Sacú duha nduu cundecu ndihi ñaha-í xii-ndo, te núhú tucu-í núú ndécú tãtà-í Yaá ní tendaha ñaha xii-í véxi-í ñuyíú-a. ³⁴ Te cuéi na nãnducu ñaha-ndo dico vá ná ñihí ñáhá-ndó chi vá sãá-ndó núú cundècu-í —càchí-gã xáhaⁿ-gã xii-güedé.

³⁵ Te ní ngüíta ñáyiu isràèl xitnàhá-yu:

—¿Ndéé quíhíⁿ-tu téa te vá ná ñihí-ó-dé-í? ¿Àdi quíhíⁿ-dé na chitnahá-dé ñáyiu isràèl ñáyiu nchitènuu nchaa ñuú xicá cuendá danèhé-dé ñáyiu griégú? ³⁶ ¿Nása càháⁿ-tu-dé duha càháⁿ-dé: “Nanducu ñaha-ndo te vá nãnhí ñáhá-ndó chi vá sãá-ndó núú cundècu-í”, càchí-tu-dé? —càchí-yu xitnàhá-yu.

Nacuáa cada Espiritú Yã Ndiöxí iní-ó

³⁷ Te nduu ñí yáha-ná vico cùu-xi nduu cahnu vihi, te nduu-ãⁿ ñí ngúnu tñi Jèsús tnuú ñáyiu, te níhi ní cáháⁿ-gã, te xáhaⁿ-gã xii-yu:

—Núu ió dava-ndo yichí-ndó ndüte, te quixi-ndo núú-í, te coho-ndo. ³⁸ Duha càháⁿ-í chi nchaa ñáyiu na quindáá iní ñáhá xii-í, te cada-xi iní-yu dàtná ñⁿ núú xicá ndüte, nchaa-ni nduu xica ñá túú yichí, ducaⁿ cada-xi iní-yu núú cuáháⁿ núú véxi dàtná càháⁿ-xi núú tütú Yã Ndiöxí —càchí-gã xáhaⁿ-gã xii-yu.

³⁹ Te ducaⁿ ñí cáháⁿ-gã cuendá sá quixí Espiritú

Yã Ndiöxí ngündecu ndihi nchaa ñáyiu na quindáá iní ñáhá xii-gá, chi sáá nduu ndaa-gá andiu càda cahnu ñaha Tátá-gã xii-gá, te dává-áⁿ te quixi Espiritú Yã Ndiöxí cundecu ndihí-yu.

Ñá ní cùu ñⁿnuú-yu cuendá tñúhu ní cáháⁿ Jèsús

⁴⁰ Te dava ñáyiu ní xíndedóho tñúhu ní cáháⁿ Jèsús ní xitnàhá-yu:

—Ndáá sá tãe-a cùu-dé téa càchí-yu quixi cáháⁿ tñúhu Yã Ndiöxí —càchí-yu xitnàhá-yu.

⁴¹ Te dava tucú-yu xitnàhá-yu:

—Téa-a cùu-dé Crìstú Yaá ní tendaha Yã Ndiöxí véxi ñuyíú-a —càchí-yu xitnàhá-yu.

Te dava-gã tucú-yu xitnàhá-yu:

—¿Náa ndaa distritú Galileá quixi Crìstú Yaá tendaha Yã Ndiöxí quixi ñuyíú-a? ⁴² Chi núú tütú Yã Ndiöxí càchí-xi sá Crìstú Yaá tendaha Yã Ndiöxí quixi ñuyíú-a cuu-gã ñⁿ ñaní tnáhá ndíi Dàvíí, te quee-gã ñuú Belén ñuú méé ndíi Dàvíí, duha càháⁿ-xi núú tütú Yã Ndiöxí —càchí-yu xitnàhá-yu.

⁴³ Te xíãⁿ núu ñá ní cùu ñⁿnuú-yu cuendá Jèsús. ⁴⁴ Te davá-yu cuini-yu tñi-yu Jèsús quíhíⁿ-gã vecaá ní cùu, dico ni ñⁿ-yu ñá túú ní cùyí-yu tñi ñáhá-yu xii-gã.

Cue téa cùchiuⁿ ñá túú sãndáá iní-güedé Jèsús

⁴⁵ Te cue téa cuáháⁿ tñi ñaha xii Jèsús ní cùu ní ndexio-güedé núú cuè téa cùu fariséu ndihi núú cuè

dútú cúnùu. Te xǎhaⁿ cuè téé cùnuu-áⁿ:

—¿Ná cuendá ñá ní cǎndeca-ndo téé-ǎⁿ quixi? — cǎchí-güedé xǎhaⁿ-güedě.

46 Te cue téé ní sáháⁿ chiùⁿ ní xáhaⁿ-güedě:

—Ni ìⁿ téé ñá túú xìní-ndí cáháⁿ dàtná cáháⁿ téé-ǎⁿ — cǎchí-güedé xǎhaⁿ-güedě.

47 Te ní xáhaⁿ cuè téé cùu fariséu:

—¿Náa tnàhá nchòhó ní sándáá iní-ndó tnùhu ndehnde cáháⁿ téé-ǎⁿ? 48 ¿Náa ñá túú xìní-ndó sǎ nì ìⁿ cue téé tàxi tnuní nchúhú, te ní ìⁿ nchúhú cue téé cùu fariséu ñá túú sándáá iní-ndí téé-ǎⁿ ñá? 49 Nchaa ñáyiú tùha ñaha xii téé-ǎⁿ ñá túú sándáá iní-yu nàcuáa cáháⁿ tnúhu sá sánú ìchi ñaha xii-o, dico cuíta nihnú-yu sá dúcáⁿ quidé-yu —cǎchí-güedé xǎhaⁿ-güedě xii cue téé-áⁿ.

50 Te té Nicòdemú téé ní sáháⁿ niú ní ndatnúhu-dé ndihí Jèsús cúu-dě tnàhá-dé ìⁿ téé fariséu, te ní xáhaⁿ-dě xii-güedé:

51 —Tnúhu sá sánú ìchi ñaha xii-o nacuáa cundecu-o cǎchí-xi sá ndéé cundedóho-o nása cáháⁿ téé tau cuéchi cuendá cutnùní iní-ó nǎ ní quide-dé, te dàtnùní cáháⁿ-ó nùu ndisa ndècuéchi-dé àdì ñá túú ndècuéchi-dé —cǎchí-dé xǎhaⁿ-dè.

52 Te ní xáhaⁿ-güedě:

—Cùu ní cachí sá tnàhá-ò cúu-n tée distritú Galileá nùu ducaⁿ cáháⁿ-n. Dacuáha tutú yódó tnùní tnúhu Yá Ndiòxí te quiní-n nàcuáa cáháⁿ-xi sá nì ìⁿ téé véxi distritú Galileá ñá túú cáháⁿ-dé tnúhu Yá Ndiòxí —cǎchí-güedé xǎhaⁿ-güedě.

53 Ducaⁿ te ndi díⁱⁿ cuǎnuhú-güedé vehe-güedé.

8

Íⁿ ñadìhí ndécú vìhi cuéchi-xi

1 Te Jèsús cuáháⁿ-gá yucu Òlívú. 2 Te sátá nǐ túndaá nduu tnéé, te cuáháⁿ tucu-gá veñúhu cǎhnu sá ìo cùnuu. Te ìo cuéhé ñáyiú ní chítú níhnú-yu núu-gǎ, te ní ngóo-gá ní dánèhé ñáhá-gǎ xií-yu. 3 Te ní quexìo cue téé dàcuaha ñaha xií-yu nchaa tnúhu ní chídó tnùní ndí Moisés, ndihí cue téé cùu fariséu, te ndèca-güedé ìⁿ ñadìhí ní sáa, te ñaha-áⁿ nǐ xini ñáhǎ-yu cáháⁿ ndihí-aⁿ ìⁿ téé dico ñá díú yì-aⁿ cuu-dé, te ní sanutnì ñaha-güedě xii-aⁿ tnuú nchaa ñáyiú xindecu núu Jèsús. 4 Te ní xáhaⁿ-güedě xii Jèsús:

—Mèstrú, ñadìhí-a ní xini ñáhá ñáyiú xii-aⁿ cáháⁿ ndihí-aⁿ ìⁿ téé dico ñá díú yì-aⁿ cuu-dé. 5 Te tnúhu ní chídó tnùní ndí Moisés cǎchí-xi sá yúu cǎhni-o nchaa ñáyiú dìhí duha quide. Te yòhó, ¿nása cǎchí-n cùnduu-i? —cǎchí-güedé xǎhaⁿ-güedě xii-gá.

6 Duha ní cáháⁿ-güedé chi cuendá sá cuiní-güedé coto ndeé ñáhá-güedě xii-gá nùu nása cáháⁿ-gá cuendá núcóo nchihí ñaha-güedě xii-gá ní cáháⁿ-güedě. Te ní ngúnu ndeyi-gá te ní ngúita-gá téé-gǎ ndihí díquí ndáhá-gǎ lètrá núu ñúhú. 7 Te xicáⁿ tnúhú-ní tucu-güedé núu-gǎ

nũu ní ndonehe núú-gă, te ní xáhaⁿ-gă:

—Ndědani cãa nchohó te núu ñá túú nã cuèchi quide-ndo te díhna nuu-gă-ndó chí cuăha-aⁿ yúú —càchí-gă xáhaⁿ-gă xii-güedé.

⁸ Te ní ngũnu ndeyi tucu-gă téé tucu-gă lètrá núú ñũhú.

⁹ Te sá dúcáⁿ ñĩ xáhaⁿ-gă xii-güedé te ní ndixi túu iní-güedé sá ñà túú quide váha mee-güedé tnàhá-güedé, núu da ìⁿ da ìⁿ-güedé ní ndee, te díhna-gă cue téé cùu sacuéhé ñĩ ndee te ní ngũta nchicúⁿ dava-gă-güedé. Te sátá ñĩ ndihi-güedé ní ndee, te ní quendóo mee-nã Jèsús ndihi ñadìhí-áⁿ. ¹⁰ Te ní ndonehe núú Jèsús te ní xiní-gă sá ñĩ ndihi-güedé cuáháⁿ te mee-nã ñadìhí-áⁿ ñĩ ndóo-aⁿ, te ní xáhaⁿ-gă xii-aⁿ:

—¿Nděndi cuáháⁿ cue téé càchí sá ñĩ quide-n cuèchi? ¿Ni ìⁿ-güedé ñá ní cùndee tnúhu-güedé quíhíⁿ-n càstíú-va? —càchí-gă xáhaⁿ-gă xii-aⁿ.

¹¹ Te ní xáhaⁿ-aⁿ xii Jèsús:

—Ñáhá, chi ni ìⁿ-güedé ñá ní ndàcu-güedé —càchí-aⁿ xáhaⁿ-aⁿ.

Te ní xáhaⁿ Jèsús:

—Te ni yũhú vá dáquihíⁿ ñáhà-í castíú xii-n. Te vitna te núhú-n te vá cáda-gă-n nãndi sá cuéhé sá dúhá —càchí-gă xáhaⁿ-gă xii-aⁿ.

Jèsús dándixi túu-gă iní-ó

¹² Te ní cáháⁿ tucu Jèsús núú ñáyiu, te xáhaⁿ-gă xií-yu:

—Yúhú cùú-í dàtná ìⁿ ñuhú dáyèhe-í ñuyúú-a, te nchaa

ñáyiu na chìtnahá ñáhá xii-í, te vá cùndècu-gă-yu ichi cuéhé ichi duha, chi yúhú dándixi túu-í iní-yu cuendá cutnùní iní-yu nàcuáa ndùu cuendá Yã Ndiõxí, te cundecu-í ndihí-yu ni caa ni quíhíⁿ —càchí-gă xáhaⁿ-gă xií-yu.

¹³ Te ní xáhaⁿ cuè téé cùu fariséú xii-gă:

—Medi-n cáháⁿ-n sã cùú-n tēe váha, te vá yóo ìⁿ-gă chindèe tnúhu ñaha xii-n núu ná téé cùu-n, dico xiãⁿ ñá túú nãndíhi-xi —càchí-güedé xáhaⁿ-güedé xii-gă.

¹⁴ Te ní xáhaⁿ Jèsús:

—Cuèi cáháⁿ-í cuendá mēe-í dico nãndíhi tnúhu cáháⁿ-í. Chi yúhú ñaha-í ndēe ichi véxi-í, te xiní-í ndēe ichi núhú-í, dico nchòhó chi ñá túú xiní-ndó ndēe ichi véxi-í, te ni ñà túú xiní-ndó ndēe ichi quíhíⁿ-í. ¹⁵ Te nchòhó chi cuendá-ni cáháⁿ-ndó cuendá ñáyiu núu quide váha-yu àdi ñá túú quide váha-yu. Te yúhú ñá túú cáháⁿ-í cuendá ñáyiu núu quide váha-yu àdi ñá túú quide váha-yu.

¹⁶ Àdi núu cáháⁿ-í dico ìⁿ tnúhu ndáá cáháⁿ-í chi ñá díú-ni mēe-í cáháⁿ, chi tnàhá Tàtá-í Yaá ní tendaha ñaha xii-í véxi-í ñuyúú-a cáháⁿ-gă chindèe tnúhu ñaha-gă xii-í.

¹⁷ Te tnúhu sá sánú ichi ñaha xii-ndo cachí-xi sá núu na cùndecu úú cue téé cáháⁿ ndáá-güedé nàcuáa cùu ìⁿ sá cùndáá, te núu ìⁿ-ni tnúhu na cáháⁿ-güedé ndi ndúú-güedé te xiãⁿ nãndíhi-xi, duha càchí tnúhu-áⁿ. ¹⁸ Te diu-ni ducaⁿ cùu-xi yúhú chi cáháⁿ-í ìⁿ tnúhu ndáá sá cùú-xi mēe-í, te diu-ni dàtná cáháⁿ-í cáháⁿ

Tătà-í Yaá ní tendaha ñàha xii-í véxi-í ñuyíú-a —càchí-gá xáhaⁿ-gã xii-güedé.

19 Te ní xáhaⁿ-güedé xii-gá:
—¿Te ndéé ndécú Tătá-n-í?
—càchí-güedé xáhaⁿ-güedé.

Te ní xáhaⁿ Jèsús:
—Te núu dìcò xìní-ndó yòo cuu yúhú-á te ducaⁿ te quiní-ndó Tătà-í. Te ni yúhú ñá túu xìní-ndó yòo cuu-í nũu xíáⁿ ñá túu xìní-ndó Tătà-í —càchí-gá xáhaⁿ-gã xii-güedé.

20 Duha ní cáháⁿ Jèsús nini dàcuaha-gá ñáyíu xití veñúhu núu ndécú àlcanciá díhúⁿ. Te vá yòo ìⁿ ní cùyíi tñii ñaha xii-gá chi vátá sàá-gá òré tñii ñaha-güedé.

Ñáyíu ñá túu sàndáá iní ñáhá xii Jesús vá ndácú-yu quíhíⁿ-yu núu nùhú-gá cundecu-gá

21 Te ní xáhaⁿ tùcu Jesús xii-güedé:

—Yúhú nùhú-í te nanducu ñàha-ndo te vá nánihí ñáhá-ndó, te cuú-ndó nũu yíca cuèchi-ndo, chi vá ndácú-ndó sàá-ndó nũu nùhú-í cundecu-í —càchí-gá xáhaⁿ-gã xii-güedé.

22 Te ní xítñaha cue téé is-
raél:

—¿Te náa cahni-dé méé-dé nũu càchí-dé sá vã ndácú-ó sàá-ó nũu quíhíⁿ-dé-ãⁿ? —càchí-güedé xítñaha-güedé.

23 Te ní xáhaⁿ Jèsús xii-güedé:

—Nchòhó chi cue téé ñuyíú-a cùu-ndo, núu ío ñúhu iní-ndó sã ío ñuyíú-a. Te yúhú chi téé núu ñinu cùu-í nũu xíáⁿ ñá túu sã ío ñuyíú-a ñúhu iní-í. 24 Te xíáⁿ nũu càchí-í sá cuú-ndó nũu yíca cuèchi-ndo,

chi ñá cuíní-ndó quíndáá iní-ndó sã yúhú véxi cuuⁿ-í andíu, te núu xíáⁿ díu-ni núu yíca cuèchi-ndo cùu-ndó —càchí-gá xáhaⁿ-gã xii-güedé.

25 Te ní xícaⁿ tnúhú-güedé núu-gã, te xáhaⁿ-güedé:

—¿Te ná cúu yòhó nũu ducaⁿ càháⁿ-n-í? —càchí-güedé xáhaⁿ-güedé xii-gá.

Te ní xáhaⁿ-gã:

—Sa ní cachí tnúhu-í xii-ndo ndéé díhna —càchí-gá xáhaⁿ-gã xii-güedé.

26 Te xáhaⁿ tùcu-gá:

—Ndècu cuéhé tnúhu cáháⁿ-í cada ndáá-í cuèndá nchòhó. Te Tătà-í Yaá ní tendaha ñàha xii-í véxi-í ñuyíú-a càháⁿ-gá tnúhu ndáá, te tnúhu càháⁿ yúhú ñuyíú-a cùu-xi tnúhu ní cáháⁿ-gá ní xíndedóho-í —càchí-gá xáhaⁿ-gã xii-güedé.

27 Te mee-güedé ñá túu ní tècú tnùnì-güedé sá cuèndá Dútú Ndiòxí ní cáháⁿ Jèsús.

28 Te ní xáhaⁿ-gã xii-güedé:

—Òré ná catá càa ñaha-ndo xii yúhú Téé cùu ñaní tñáhá-ndó nchàa-ndo núu cùrúxí cahni ñaha-ndo, te òré-áⁿ cutnùnì iní-ndó yòo cuu-í, te ñá túu quíde-í sá cúu iní méé-í, chi yúhú càháⁿ-í nàcuáa ní dánèhé ñáhá Tătà-í 29 Yaá ní tendaha ñàha xii-í véxi-í. Te díu-gá ndécú ndíhi ñaha-gá xii-í, te ñá túu dàña nihnu ñaha-gá chi quíde-í nchaa nàcuáa cùu iní-gá —càchí-gá xáhaⁿ-gã xii-güedé.

30 Te sá dúcáⁿ ñí cáháⁿ-gá nũu ío vãi ñáyíu ní sàndáá iní ñáhá xii-gá.

Ñáyiú sàndáá iní ñáhá xii Yá Ndiöxí ndihi ñáyiú ndècu ichi cuehé ichi duha

³¹ Te ní xáhaⁿ Jèsús xii ñáyiú isràél ñáyiú ní sàndáá iní ñáhá xii-gá:

—Te núu vá dáñá ndèé-ndó cada-ndo nchaa nacuaá càháⁿ-í, te cuu ndisa-ndo cuè téé tnàhá tnúhu ndihí-í, ³² te tecú tnùní-gá-ndó tnúhu ndáá, te ducaⁿ te cácu nihnu-ndo —càchí-gá xáhaⁿ-gá xii-yu.

³³ Te ní xáháⁿ-yu:

—Nchúhú cúú-ndí cue ñaní tnáhá ndíi Àbrahám, te ni ìⁿ nduu ñá túú ndéé sácündedí nihnu-ndí ndoho tnahá-ndí núu cáchí-ò sá dácácu nihnu ñaha-n xii-ndí —càchí-yu xáháⁿ-yu xii-gá.

³⁴ Te ní xáhaⁿ Jèsús xii-yu:

—Na càchí tnúhu ndáá-í xii-ndo sá nchaa ñáyiú quide nchaa sá cuèhé sá dúhá tàxi tnuní ñáhá-ná-xi xii-yu. ³⁵ Te cue ñáyiú xinu cuechi te vá cúú ìⁿ-ná cuú-yu ndihi ñáyiú dii vèhe-xi xinu cuechí-yu, dico cue déhe ñáyiú dii vèhe-xi-án chi ìⁿ-ni cùu ndihi ñaha-güexi xii-yu. ³⁶ Te núu yúhú Yaá cúú Dèhe Yá Ndiöxí dácácu nihnu ñaha-í xii-ndo núu nchaa yíca cuèchi-ndo, te ndáá sá nchòhó cácu nihnu ndisa-ndo. ³⁷ Te yúhú sa xini-í sá nchòhó cúú-ndó ñaní tnáhá ndíi Àbrahám, te dicó-ni sá ñá tnàhá iní-ndó tnúhu càháⁿ-í núu xíáⁿ cuiní-ndó càhni ñaha-ndo. ³⁸ Te yúhú càháⁿ-í nàcuáa ní dánèhé ñáhá Tàtá-í, te nchòhó quidé-ndó nàcuáa càháⁿ tātá-ndó —càchí-gá xáhaⁿ-gá xii-yu.

³⁹ Te ní xáháⁿ-yu:

—Ndíi Àbrahám cúú tātá-ndí —càchí-yu xáháⁿ-yu xii-gá.

Te ní xáhaⁿ Jèsús:

—Núu ndisa ñaní tnáhá ndíi Àbrahám cúú-ndó, te cada-ndo nàcuáa ní xóo cada ndíi ni cùu. ⁴⁰ Te yúhú cuèi càháⁿ-í ìⁿ tnúhu ndáá nàcuáa càháⁿ Yá Ndiöxí càchí tnúhu-gá xii-í, te cuiní-ndó càhni ñaha-ndo. ¡Dico ndíi Àbrahám chi ñá túú dùcaⁿ ni quide ndíi! ⁴¹ Te nchòhó quidé-ndó nàcuáa quide tātá-ndó —càchí-gá xáhaⁿ-gá xii-yu.

Te ní xáháⁿ-yu:

—Nchúhú, ñá túú yàyacáⁿ ndécú tātá-ndí, chi ìⁿndíi Yá Ndiöxí cúú tātá-ndí —càchí-yu xáháⁿ-yu xii-gá.

⁴² Te ní xáhaⁿ Jèsús:

—Núu dicó Yá Ndiöxí ndisa cùu Tātá-ndó te cuu iní ñáhá-ndó xii-í ní cùu chi yúhú ní quee-í núú ndécú-gá véxi-í ñuyíú-a. Te ñá túú véxi-í sá cúú iní méè-í, chi mee-gá ní tendaha ñaha-gá véxi-í. ⁴³ Te ñá túú tècú tnùní-ndó tnúhu càháⁿ-í chi ñá túú tnàhá iní-ndó. ⁴⁴ Te nchòhó chi tātá-ndó cùu yucu ñávaha núu cùdíí iní-ndó quide-ndo nchaa nacuaá cùu iní-xi, chi ndéé òré ní ngáva ñuyíú ducaⁿ-ni ndècu-xi dácáháⁿ-xi iní-ndó sàhni tnaha-ndo. Te ñá ìⁿ ndùu càháⁿ-xi ìⁿ tnúhu ndáá chi ñá túú xica-xi ichi ndáá, chi mee-ni ichi tnúhu ndehnde xica-xi chi ducaⁿ iní-xi. Te ðiu-xi dácahu-xi iní-ndó dácuandehnde-ndo. ⁴⁵ Te yúhú càháⁿ-í tnúhu ndáá te ñá túú cuiní-ndó quindáá iní ñáhá-ndó. ⁴⁶ ¡Te ndèdacàa nchòhó xini-ndó sá quidè-í ìⁿ

sá cuèhé sá dúhá-í?, te yúhú ñá túú ñá quidè-í chi càháⁿ ndáá-í, ¿te ná cuendá ñá túú cuíní-ndó quíndáá iní-ndó tnúhu càháⁿ-í? ⁴⁷ Te nchaa ñáyiú ndècu ichi Yá Ndiòxí, ñáyiú-áⁿ sácúndedóho-yu nchaa tnúhu càháⁿ-gá. Te nchòhó chi ñá díú ichi Yá Ndiòxí ndécú-ndó núu ñá túú sácúndedóho-ndo tnúhu càháⁿ-gá —càchí-gá xáhaⁿ-gá xii-yu.

Dìhna-gá Cristú sa ndècu dacúúxí ndí Àbrahám

⁴⁸ Te ní xáhaⁿ ñáyiú isràél:

—Váha-ni càháⁿ-ndí sá tée samaritanú cúu-n, te yucu ñáváha ndècu ndíhi-n —cachí-yu xáhãⁿ-yu xii-gá.

⁴⁹ Te ní xáhaⁿ Jèsús:

—Yúhú, ñá túú yucu ñáváha ndècu ndíhi-í, chi Tàtá-í quidé càhnu-í, te nchòhó da cùu úhú iní ñáhá-ndó xì-í —càchí-gá xáhaⁿ-gã xii-yu.

⁵⁰ Te xáhaⁿ tùcu-gá:

—Yúhú, ñá túú càchí-í sá cádá càhnu ñaha-ndo, dico Dútú Ndiòxí cuíní-gá sá cádá càhnu ñaha-ndo xii-í. Te mee-gã càháⁿ-gá núu ndédacàa-ndo quide váha, te ndédacàa-ndo ñá túú quide váha. ⁵¹ Te na càchí tnúhu ndáá-í xii-ndo sã nchaa ñáyiú na tní tnúhu càháⁿ-í te vá cuita nihnú-yu —càchí-gá xáhaⁿ-gã xii-yu.

⁵² Te ní xáhaⁿ tùcu ñáyiú isràél:

—Vitna te ní xiní ndáá-ndí sá yucu ñáváha ndècu ndíhi-n, chi ndí Àbrahám ndíhi nchaa cue tée ní xóo càháⁿ tnúhu Yá Ndiòxí ndée sanaha ní xihí-güedé, te yòhó càchí-tu-n

sã ncháá ñáyiú na tní tnúhu càháⁿ-n te vá cùu-gá-yu. ⁵³ ¿Náa ío-gá càhnu cuu-ó dácúúxí ñaní tnáhá-ndí ndí Àbrahám-ãⁿ? Tée-áⁿ dai ní xihí-dé ndíhi cue tée ní xóo càháⁿ tnúhu Yá Ndiòxí ndée sanaha. ¿Te yòhó nágá-tu cùu-n te vá cùu-n càhaⁿ-n-i? —cachí-yu xáhãⁿ-yu.

⁵⁴ Te ní xáhaⁿ Jèsús:

—Te núu dícó mée-í quidé càhnu-í mée-í ñá, te ñá túú nandíhi sá quidè-í núu ducaⁿ. Dico Tàtá-í quidé càhnu ñaha-gá xii-í, te díu-ni Yaa-áⁿ càchí-ndó cùu Ndiòxí-ndó. ⁵⁵ Te nchòhó chi ñá túú xiní-ndó-gã. Te yúhú chi xiní-í-gá. Te núu na càchí-í sá ñá túú xiní-í-gá te dàcuandehnde-í dàtná ndehnde mée-ndo. Te yúhú chi xiní ndisa-í-gá te tní-í nchaa tnúhu càháⁿ-gá. ⁵⁶ Te ndí Àbrahám ñaní tnáhá-ndó ní xíndecu ndée sanaha ío ní cudí iní ndí sá quíní ñáhá ndí xii-í, te ní sáá nduu ní xiní ñáhá ndí xii-í núu ío ní cudí iní ndí —càchí-gá xáhaⁿ-gã xii-yu.

⁵⁷ Te ní xáhaⁿ ñáyiú isràél xii Jèsús:

—Ni vátá cùhúⁿ-gã-n ùdico úxí cuiá-n te càchí-n sã ní xiní-n ndí Àbrahám, te ní cunaha vèhi ní xihí ndí-áⁿ —cachí-yu xáhãⁿ-yu xii-gá.

⁵⁸ Te ní xáhaⁿ Jèsús:

—Te na càchí tnúhu ndáá-í xii-ndo sã cùmání-gã cundecu ndí-áⁿ ñuyíú-a te yúhú sa ndècu-gá-í —càchí-gá xáhaⁿ-gã xii-yu.

⁵⁹ Te sá dúcáⁿ ní càháⁿ-gá núu xíãⁿ ní quehéⁿ-yu yúu

cuáha ñàhá-yu xii-gá ní cùu, te ní nguiváha-gá núu-yu te ní quee-gá xití veñúhu cuáháⁿ-gá.

9

Jèsús quidé tātna-gá ìⁿ téé cuáá

¹ Te núú xicá cùu Jesús ní naníhí-gá ìⁿ téé cuáá, te sa ducaⁿ tnàhí càa núú-dě ní cacu-dé. ² Te ní xáhaⁿ cuè téé xica cuu ndíhi-gá xii-gá:

—Mèstrú, ¿ná cuendá dàcáⁿ cuáá téé-áⁿ ní cacu-dé? ¿Sá cuendá nchaa yicá cuèchi tātá-dě, áⁿ sá cuendá nchaa yicá cuèchi náná-dě, áⁿ sá cuendá nchaa yicá cuèchi mee-dě dàcáⁿ cáá-dě ní cacu-dé? —càchí-güedé xáhaⁿ-güedé xii-gá.

³ Te ní xáhaⁿ Jèsús:

—Ni ñà díú sá cuendá nchaa yicá cuèchi mee-dě, te ni ñà díú sá cuendá nchaa yicá cuèchi tātá-dě, te ni ñà díú sá cuendá nchaa yicá cuèchi náná-dě, chi mee Yá Ndiòxí ní cuiní-gá sá dúcáⁿ cùnduu-dé sáá-dé ñuyúú-a cuendá sá ñuyúú-a quini ñáyiu nása cada ñaha Yá Ndiòxí xii-dé ndúha núú-dě. ⁴ Te vitna ió-gá nduu cùyica sá cadà-í nchaa chiúⁿ ní táhú Yáá ní tendaha ñàha xii-í véxi-í ñuyúú-a, chi sáá nduu te vá ndácú-gá-í cada-í chiúⁿ-gá. ⁵ Te nini ndècu-gá-í ñuyúú-a te dándixi túu-í iní nchaa ñáyiu cuendá cutnùní iní-yu nàcuáa ndùu cuendá Yá Ndiòxí —càchí-gá xáhaⁿ-gá xii-güedé.

⁶ Te sátá dúcáⁿ ñí cáháⁿ-gá, te ní satí-gá díí-gá núú ñúhú

te ní dácá-gá luha ñuhu ní cuáha ndéhyú, te ndéhyú-áⁿ ñí dácánùu-gá ndúú xio núú tée cuáá-áⁿ. ⁷ Te ní xáhaⁿ-gá xii-dé:

—Quíhíⁿ-n nàquete-n núú-n ndúte tanquí Silòé —càchí-gá xáhaⁿ-gá xii-dé. Te Silòé-áⁿ quée-xí tnúhu mèé-yu: Téé xica chiúⁿ.

Te ní sáháⁿ téé cuáá-áⁿ ñí naquete-dé núú-dě, te òré ní ndexio-dé te sa ndèhe-dé. ⁸ Te nchaa ñáyiu ndècu yatni núú ndécú-dě ndíhi nchaa ñáyiu xini ñàhá xii-dé núú xicáⁿ ndàhú-dé ní xitnàhá-yu:

—¿Náa ñà díú tée-áⁿ ní xóo cácáⁿ ndàhú-dé? —càchí-yu xitnàhá-yu.

⁹ Te davá-yu càchí-yu sá díú-dě, te davá-yu càchí-yu sá ñà díú-dě, dico ducaⁿ càa-dé, càchí-yu xitnàhá-yu.

Dico mee-dě ní xáhaⁿ-dě xii-yu sá díú-dě.

¹⁰ Te ní xicáⁿ tnúhú-yu núú-dě, te xáháⁿ-yu:

—¿Náa ní cuu núú ní ndúha núú-n ndèhe-n vitna? —càchí-yu xáháⁿ-yu xii-dé.

¹¹ Te ní xáhaⁿ-dë:

—Téé nàni Jesús-áⁿ ní cadúha-dé luha ndéhyú te ní dácánùu-dé núú-í, te ní táuchíúⁿ-dë ní sáháⁿ-í tànquí Silòé ní naquete-í núú-í, te òré-áⁿ ñí cuu cundehe-í —càchí-dé xáhaⁿ-dë xii-yu.

¹² Te ní xicáⁿ tnúhú tùcú-yu núú-dě, te xáháⁿ-yu:

—¿Te ndèé ndécú tée-áⁿ? —càchí-yu xáháⁿ-yu xii-dé.

Te ní xáhaⁿ-dë:

—Ñá túú xini-í —càchí-dé xáhaⁿ-dë xii-yu.

Cue tée cùu fariséu ndátnúhu-güedé ndihí tée ní ndúha núu-xi

13 Te ndèca-güedé tée ní ndúha núu-xi-án cuäháⁿ núu cuè tée cùu fariséu. 14 Te cuendá sá ndúu ndetatú-yu ní cadúha Jèsús ndéhyú ní dácánù-gá núu tée-án te ní ndúha, 15 xiáⁿ núu ní xicáⁿ tnúhú cuè tée cùu fariséu núu-dě, te xáhaⁿ-güedé:

—¿Nása ní cuu ní ndúha núu-n? —càchí-güedé xáhaⁿ-güedé xii-dé.

Te ní xáhaⁿ-dě xii-güedé:

—Íⁿ tée ní dácánù-dé ndéhyú núu-í te ní sáháⁿ-í ní naquete-í, te ní cuu ndèhe-í vitna —càchí-dé xáhaⁿ-dě xii-güedé.

16 Te dava cue tée cùu fariséu ní xítnáha-güedé:

—Ñá díú Yá Ndiöxí ní tendaha ñaha-gá xii tée-áⁿ véxi-dé núu duha quide-dé nchaá sá vǎ yõo tnàhí ndàcu cada, te ñá túu sándáá iní-dé canehe íí-dě nduu ndetatú-ó —càchí-güedé xítnáha-güedé.

Te dava-güedé ní xítnáha-güedé:

—¿Nása ndacu-dé cada-dé sá vǎ yõo tnàhí ndàcu cada te núu cùu-dé tée yicá cuèchi? —càchí-güedé xítnáha-güedé.

Te ñá túu ní cùu ñⁿnuu-güedé tnúhu ní cáháⁿ-güedé. 17 Te ní xicáⁿ tnúhú tucu-güedé núu tée ní ndúha núu-xi-án, te xáhaⁿ-güedé:

—Te yòhó, ¿nása càchí-n cuendá tée ní quide tátna núu-n te ní ndúha? —càchí-güedé xáhaⁿ-güedé xii-dé.

Te ní xáhaⁿ-dě:

—Yúhú càchí-í sá ñⁿ tée cáháⁿ tnúhu Yá Ndiöxí cúu-dě —càchí-dé xáhaⁿ-dě xii-güedé.

18 Dico cue tée isràél ñá ní sándáá iní-güedé sá cuáá-dé ní cùu, chi cuendá sa ní ndúha núu-dě ní xiní ñáhá-güedé, te xiáⁿ núu ní cana-güedé tátá-dě ndihí náná-dě, 19 te ní xicáⁿ tnúhú-güedé núu-yu, te xáhaⁿ-güedé:

—¿Díu tée-a déhe-ndo tée càchí-ndó cuáá-dé ní cacu-dé-áⁿ? ¿Te nása ní cuu ní ndúha núu-dě? —càchí-güedé xáhaⁿ-güedé xii-yu.

20 Te ní xáhaⁿ tátá-dě ndihí náná-dě:

—Díu déhe-ndí cúu-dě te sa cuáá ndisa-dé ní cacu-dé, 21 dico ñá túu xiní-ndí nása ní cuu ní ndúha núu-dě, te ni ñá túu xiní-ndí yoo ní quide tátna. Chí cacáⁿ tnúhú núu méé-dě xiáⁿ núu sa sacuéhé-dě, te na cáháⁿ-dé núu nása ní cuu ní ndúha núu-dě —càchí-yu xáháⁿ-yu xii-güedé.

22 Duha ní cáháⁿ tátá-dě ndihí náná-dě ní xáháⁿ-yu xii-güedé cuendá sá yùhú-yu cue tée cùnuu núu ñáyiú isràél, chi cue tée-áⁿ sa ní ndatnúhu-güedé ní cuu ñⁿnuu-güedé sá núu ndédacàa ñáyiú na cáháⁿ sá Jèsús cúu-gǎ Crístú, Yaá ní tendaha Yá Ndiöxí véxi ñuyíú-a, te vǎ dáhá-gǎ-güedé quíhu-yu veñúhu. 23 Núu xiáⁿ ní xáhaⁿ tátá-dě ndihí náná-dě sá ná cacáⁿ tnúhú-güedé núu méé-dě chi sa sacuéhé-dě.

24 Te xiáⁿ núu ní cana tucu-güedé tée ní ndúha núu-xi-án, te ní xáhaⁿ-güedé:

—Cáháⁿ-n ñⁿ tnúhu ndáá chi Yá Ndióxi ndéhe ndi-gá nàcuáa ní cuu ní ndúha núu-n, chi nchúhú xini-ndí sá dico ñⁿ tée ndècu yíca cuèchi-xi cùu tée càchí-n ñí quide tátna núu-n —càchí-güedé xáhaⁿ-güedé xii-dé.

25 Te ní xáhaⁿ-dë:

—Yúhú, ñá túú xini-í te núu tée ndècu yíca cuèchi-xi cùu-dé àdi ñáhá. Dico-ni sá xini-í sá cuáa-í ní cùu te vitna ní cuu cundehe-í —càchí-dé xáhaⁿ-dë xii-güedé.

26 Te ní xicáⁿ tnúhú tucu-güedé núu-dë, te xáhaⁿ-güedé:

—¿Nása ní quide ñaha-dë xii-n te ní ndúha núu-n-í? —càchí-güedé xáhaⁿ-güedé xii-dé.

27 Te ní xáhaⁿ-dë:

—Yúhú sa ní cáháⁿ-í te ñá túú quide cuendá-ndó. ¿Te ná cuendá cuini-ndó càchí tnúhu-ni tucu-í? ¿Á tnàhá-ndó cuini-ndó quindáa ini-ndó tnúhu cáháⁿ-dë? —càchí-dé xáhaⁿ-dë xii-güedé.

28 Te ní cudééⁿ-güedé núu-dë, te ní xáhaⁿ-güedé xii-dé:

—Te núu yòhó cuini-n chinchícúⁿ-n tée-ãⁿ te cuáháⁿ, dico nchúhú chi çanchicúⁿ nihnu nahi-ni-ndí nàcuáa ní cáháⁿ ndíi Moisés. 29 Te nchúhú chi nàha-ndí sá Yá Ndióxi ní cáháⁿ ndíi-gá ndíi Moisés, dico tée càchí-n-ãⁿ chi ni ñá túú xini-ndí ndèé tée cùu-dé —càchí-güedé xáhaⁿ-güedé xii-dé.

30 Te ní xáhaⁿ tée ní ndúha núu-xi-áⁿ:

—¿Te náa ñá díú nchòhó càchí-ndó sá ño túha-ndo? Te

núu ducaⁿ cáháⁿ-ndó sá ñá túú xini-ndó ndèé tée cùu-dé, te díu-dé ní quide tátna-dé núu-í ní ndúha —càchí-dé xáhaⁿ-dë xii-güedé.

Te xáhaⁿ tucu-dé:

31 —Xini-ó sá Yá Ndióxi ñá túú tédòho-gá tnúhu cáháⁿ ñáyiú quide nchaa sá cuèhé sá dúhá, chi nchaa ñáyiú quide cahnu ñaha xii-gá te quidé-yu nchaa nàcuáa cùu ini-gá, te ñáyiú-áⁿ tédòho-gá tnúhu cáháⁿ-yu. 32 Te ñá ñⁿ ndùu cáháⁿ ñáyiú cuendá ñⁿ tée cada tátna núu ñⁿ ñáyiú cuáa ndèé ní cacu-xi te ndúha. 33 Te núu ñá díú mèe Yá Ndióxi ní tëndaha ñaha-gá xii tée-ãⁿ véxi-dé ñá, te vá ndácú-dé cada tátna-dé núu-í ní cùu —cachí-dé xáhaⁿ-dë xii-güedé.

34 Te ní xáhaⁿ-güedé:

—Dico yòhó ndèé yatni vai cuèchi sa ta quide-n véxi, ¿te vitna nacanú ichi ñaha-n xii-ndí cáháⁿ-n-ãⁿ? —càchí-güedé xáhaⁿ-güedé xii-dé.

Te ní queñuhu ñaha-güedé xii-dé tnuú-güedé ñá túú ní dàña-gá-güedé níhí tnàhá ndíhi ñaha-dé xii-güedé.

Ñáyiú ñá túú ndíxi túu ini cuendá nchaa sá cuèhé sá dúhá quidé-yu

35 Te ní níhí Jèsús tnúhu sá ñí queñuhu-güedé tée ní cuhú núu-xi-áⁿ tnuú-güedé cuendá sá vã tnàhá tnúhu ndíhi ñaha-gã-dé xii-güedé, te ní naníhí ñáhá-gã xii-dé te ní xáhaⁿ-gã:

—¿Sándáa ini-n Dëhe Yá Ndióxi-ãⁿ? —càchí-gá xáhaⁿ-gã.

36 Te ní xáhaⁿ tēe ní cuhú núú-xi-áⁿ:

—Mēstrú, cachí tnúhu núu ndèé ndécú tēe-áⁿ cuendá quíndáá iní-í-dé —càchí-dé xáhaⁿ-dē xii-gá.

37 Te ní xáhaⁿ Jèsús:

—Sa xìní-n-dē chi diu-dé cúu yúhú tēe ndàtnúhu ndihí-n —càchí-gá xáhaⁿ-gá xii-dé.

38 Te ní ngüñí xítí-dē núu-gá, te ní xáhaⁿ-dē:

—Xítóhó Jesucristú, sàndáá iní ñáhà-í xii-n —càchí-dé xáhaⁿ-dē xii-gá.

39 Te ní xáhaⁿ tùcu Jèsús:

—Yúhú véxi-í ñuyíú-a cada ndáá-í cuéchi ñáyiú. Te nchaa ñáyiú ñá túú quide váha cúu-yu dàtná ñⁿ ñáyiú cuàá, dico nchaa ñáyiú cùtnuní iní-xi sá ñà túú quide váha, te núu na quíndáá iní-yu tnúhu càháⁿ-í, te cada iní-ndó sá dàtná sá ñⁿ nacaáⁿ núu-yu chi tní-yu tnúhu càháⁿ-í. Te ñáyiú càchí sá quidé váha vá núu núu-yu cuéchi-yu chi quesàhá-yu sá ño ndáá quidé-yu, ñáyiú-áⁿ cúu-yu dàtná ñⁿ ñáyiú cuàá, chi vá ndíxí túu iní-yu sá ñà túú quide váha-yu ndécú-yu, te vá tní-yu tnúhu càháⁿ-í —càchí-gá xáhaⁿ-gá xii-dé.

40 Te sá dúcáⁿ ñⁿ càháⁿ-gá, núu ní càháⁿ ñⁿ úú cue tēe cùu fariséú, te xáhaⁿ-güedé:

—¿Te náa tnàhá nchúhú cuàá-ndí càháⁿ-n-áⁿ? —càchí-güedé xáhaⁿ-güedé xii-gá.

41 Te ní xáhaⁿ Jèsús:

—Te núu dicó nchòhó cuàá-ndó ñá, te vá cùndecu

cuéchi-ndo ní cùu, dico càchí-ndó sá ndéhé-ndó ñⁿ sá quidé-ndó te ñá ndáá, núu xíáⁿ ño ndècu cuéchi-ndo.

10

Jèsús càháⁿ-gá cuendá cùrrálí mbéé

1 Te na càchí tnúhu ndáá-í xii-ndo sá ñⁿ tēe ñá túú quíhu ndàa yuyehe ñⁿ cùrrálí mbéé, te cùtexínu-ni na cùidó-dé, tēe-áⁿ cúu-dē ñádúhú.

2 Dico tēe quíhu ichi yèhe cùrrálí-güedi, tēe-áⁿ cúu-dē xítóhó-güedi. 3 Te tēe ndèé yèhe cùrrálí-güedi nacaáⁿ-dé te cuánguihu xítóhó-güedi te ní càháⁿ-dé, te ní nucúhuⁿ ndudú ñáhá-güedi xii-dé. Te ní càháⁿ díú-dē-güedi te ní queñuhu-dé-güedi cùrrálí. 4 Te sáta ñⁿ quee-güedi cùrrálí, te ní ngódó núu-dē núu-güedi, te ní ngüíta nchicúⁿ ñáhá-güedi xii-dé chi ní nucúhuⁿ ndudú ñáhá-güedi. 5 Te ñá túú chinchícúⁿ-güedi ñⁿ tēe tàtú, chi núcúhuⁿ ndudú-güedi sá ñà díú xítóhó-güedi cùu-dé, núu xíáⁿ xínú-güedi núu-dē —càchí-gá xáhaⁿ-gá xii-güedé.

6 Duha ní càháⁿ Jèsús cuendá sá cuíní-gá dacuàhá-yu tnúhu-gá ní cùu, dico ñá ní tècú tnùní-yu nása ndùu tnúhu ní càháⁿ-gá.

Jèsús cúu-gá dàtná ñⁿ toli

7 Te ní xáhaⁿ tùcu Jèsús xii-güedé:

—Na càchí tnúhu ndáá-í xii-ndo sá yúhú cúu-í dàtná ñⁿ yèhe cùrrálí núu ndíhu cue mbéé. 8 Te nchaa cue tēe sa yòdo nuu-gá ní quíxi ní dándàhú-güedé ñáyiú

cùu-güedé dàtná ñádúhú dùhu-güedé cue mbéé ní cùu, dico ñá ní quide cuendá ñáhá-güedi xii-güedé, chi ní cutnùnì iní-güedi sá ñà díú xítóhó-güedi cùu-güedé. ⁹ Te yúhú cùu-í dàtná yuyèhe currálí cue mbéé. Te ducaⁿ sãtnahá-xi cùu-í chi nchaa ñáyiú na tũha ñaha xii-í te naníhí tàhú-yu. Te cùu-yu dàtná cue mbéé quitì xíquee currálí-xi cuáháⁿ-güedi núú cáá ité caxi-güedi, te dàtnùnì cuándihu-ná-güedi currálí, ducaⁿ sãtnahá-xi cùu-yu.

¹⁰ Ñádúhú òré véxi-dé chi dùhu-dé, sãhni-dé te dànaa-dé mbéé, dico yúhú chi véxi-í cuendá sã naníhí tàhú-ndó te ío cudíí iní-ndó cùnu cuechi-ndo núú Dútú Ndiõxí ni caa ni quíhíⁿ. ¹¹ Te yúhú cùu-í dàtná ñⁿ toli téé ío nèhe cuendá mbéé-xi, chi téé-áⁿ cuéi na cùu-dé sá cùu-xí mbéé-dé cuendá-ñá sá ná cãcu-güedi. ¹² Te núu ñⁿ téé na còto ñaha xii-güedi, te téé-áⁿ cuendá-ni sá ñúhú yãhu-dé xító-dé-güedi. Te núu na quíní-dé sáá ñⁿ quitì dééⁿ te dàña-dé-güedi xínu-dé, te ndíhi-güedi xité nuu ñaha quitì dééⁿ-ãⁿ, chi ñá díú mèi xítóhó-güedi cùu-dé. ¹³ Chi cuendá-ni sá ñúhú yãhu-dé xító-dé-güedi núu ñá túú ñá ndíhú iní-dé cuéi na dàndíhi ñaha quitì cuihna. ¹⁴ Te yúhú cùu-í dàtná ñⁿ téé ío váha xító mbéé-xi, chi téé-áⁿ da ñⁿ da ñⁿ-di xini-í-dé ñacuáa ndãa-di, te ducaⁿ xini ñáhá-güedi xii-dé. Te ducaⁿ sãtnahá-xi cùu yúhú ndíhi nchaa ñáyiú sãndáá iní ñáhá xii-í, chi yúhú

xini-í-yu te ducaⁿ mée-yu xini ñáhá-yu xii-í.

¹⁵ Te ñiú-ni ducaⁿ cùu-í ndíhi Tãtã-í, chi xini ñáhá-gã xii-í te xini-í-gã. Te sáá nduu cùu-í cuendá nchaa ñáyiú sãndáá iní ñáhá xii-í. ¹⁶ Te ndècu-gã ñáyiú vátá quindáá iní ñáhá-gã xii-í. Te xini ñuhu-xi cundedóho-yu tñuhu-í te quindáá iní ñáhá-yu cuendá ñⁿ-ñá ichi cuú-yu, te ducaⁿ cùndecu ñⁿ-ná téé coto ñaha xii-yu cuu-dé dàtná ñⁿ tòlí-yu, te téé coto ñaha xii-yu-áⁿ cúu yũhú.

¹⁷ Te Tãtã-í ío cudíí iní ñáhá-gã xii-í cuendá sá sáá ñⁿ nduu te cuú-í, te cuú-í chi ducaⁿ cãchí iní-í, te ñá díú sã cúu iní ñáyiú ñuyíú-a cuú-í, te cuú-í dico ndoto-í. ¹⁸ Te vá yõo ñⁿ te ndacu cahni ñaha xii-í, te núu ñá díú sã cúu iní mée-í cuú-í. Te dàtná-ni cùu iní-í sá cùu-í te ñiú-ni ducaⁿ ndòto-í chi ducaⁿ ñí cachí Tãtã-í Dútú Ndiõxí cunduu — cãchí-gã xãháⁿ-gã xii-güedé.

¹⁹ Te sá dúcãⁿ ñí cãháⁿ-gã te ñá ní cùu ñⁿnuu tucu ñáyiú isráel. ²⁰ Te davá-yu ní xitnãhá-yu:

—¿Ná cuendá sãndáá-tu iní-ndó tñuhu cãháⁿ téé-ãⁿ, te yucu ñávãha ndècu ndíhi-dé, lúcú téé-ãⁿ? —cãchí-yu xitnãhá-yu.

²¹ Te davá-yu ní xitnãhá-yu:

—¿Náa xini-ndó ñⁿ téé ndècu ndíhi yucu ñávãha duha váha cãháⁿ-dé? ¿Náa xini-ndó núu ndàcu yucu ñávãha cada tátna-xi núu ñⁿ téé cuáá te ndúha? —cãchí-yu xitnãhá-yu.

Ñáyiú isràèl dáquèè tíhũ-yu Jèsús

22 Te ndi tnahá cuía ndádá càhnú-yu vico veñúhu càhnu sá ìo cùnū ñuú Jerusàlén, te mei yóó quidé v̄xiⁿ-xi quidé-yu vico-áⁿ.

23 Te corrèdór veñúhu-áⁿ nání-xí Sàlomón, te xiáⁿ xicá cùu Jèsús.

24 Te ní chítú níhnú ñáyiú isràèl núú-gǎ, te ní xáhǎⁿ-yu:

—¿Ná ndéé òré cachí tnúhu ndáá-n, te núu sá Crístú Yáa ní tendaha Yǎ Ndiòxí véxi ñuyíú-a cùu-n, àdi ná téè cùu-n?, cáháⁿ-ni-n —càchí-yu xáhǎⁿ-yu xii-gǎ.

25 Te ní xáhaⁿ Jèsús:

—Sa ní cachí tnúhu-í te ñá sàndáá iní-ndó, te ndèhe-ndo sá vái nūú sǎ quidé-í sá ñí táuchíúⁿ Tǎtà-í cada-í, te cùu-xi ìⁿ sá cútñú ní iní-ndó ñá téè cùu-í.

26 Dico nchòhó ñá sàndáá iní-ndó, chi ñá túú cùu-ndo ñáyiú ní chitnahá ñáhá xii-í.

27 Chi nchaa ñáyiú ní chitnahá ñáhá xii-í cùu-yu dàtná cue mbéé quiti xĩndecu ndihí xitohó-xi chi nùcúhuⁿ ndudú-güedi xitohó-güedi, te ducaⁿ nàquiní ñáhá-ní xitohó-güedi xii-güedi. Ducaⁿ sǎtnahá-xi cùu nchaa ñáyiú ní chitnahá ñáhá xii-í.

28 Te yúhú cada-í te nduu táhũ-yu cundecu ndihí ñáhá-yu xii-í ni caa ni quíhíⁿ te vá ìⁿ ndùu-gá cuíta nihnú-yu, te ni vǎ yóo ìⁿ ndacu naquendeé ñáhá xii-yu ndaha-í.

29 Chi Tǎtà-í ní taxi cuèndá ñáhá-gǎ xii-yu. Te ìo cùnūu-gǎ nūu xiáⁿ vá yóo ìⁿ ndacu naquendeé ñáhá xii-yu ndaha-gǎ.

30 Yúhú ndihí Tǎtà-í Dútú Ndiòxí ìⁿ-ni

cùu-ndí —càchí-gǎ xáhaⁿ-gǎ xii-yu.

31 Te ní queheⁿ tucu ñáyiú isràèl yúú cuǎha ñáhá-yu xii-gǎ ní cùu.

32 Te ní xáhaⁿ-gǎ xii-yu:

—Ío cuéhé sǎ vǎha ní quide-í núu-ndó ñí chindee ñàha Tǎtà-í Dútú Ndiòxí, ¿Te ndédacǎa sǎ ñǎ tnahá iní-ndó nūu cuíní-ndó cuǎha ñaha-ndo yúú xii-í-í? —càchí-gǎ xáhaⁿ-gǎ xii-yu.

33 Te ní xáhaⁿ ñáyiú isràèl:

—Ñá díú cuèndá nchaa sǎ vǎha ní quide-n cuíní-ndí cuǎha ñaha-ndí yúú xii-n, chi ìⁿ dìi-ni sǎ ìo cáháⁿ úhú-n cuèndá Yǎ Ndiòxí. Te dìcò ìⁿ téè ñuyíú-a cùu-n te càchí-n sǎ cúu-n Ndiòxí —càchí-yu xáhǎⁿ-yu xii-gǎ.

34 Te ní xáhaⁿ Jèsús:

—Núú tùtú Yǎ Ndiòxí sǎ ndécú ndihí-ndo cáháⁿ-xi nàcuáa ní cáháⁿ-gǎ, te duha ní cachí-gǎ: “Nchòhó quidé-ndó nūú-í”, duha ní cachí-gǎ.

35 Te nàha-o sǎ vǎ cúú quèhndé nihnu-o tnúhu yòdo tnuní núú tùtú Yǎ Ndiòxí, chi mee-gǎ ní cachí-gǎ sǎ cádá-yu núú-gǎ, te vá càchí-ó sǎ ñǎ ndáá.

36 Te núu ducaⁿ ñí cáháⁿ-gǎ sǎ nūú-gǎ quidé nchaa ñáyiú ní sàndáá iní ñáhá xii-gǎ ñá, ¿te ná cuèndá cúdééⁿ-ndó nūú yúhú sǎ càchí-í sǎ cúu-í Déhe-gǎ? Te mee Yǎ Ndiòxí ní tendaha ñàha-gǎ xii-í véxi-í ñuyíú-a sǎ cádá-í chiuⁿ-gǎ.

37 Te núu ñá túú quide-í nàcuáa ní táuchíúⁿ Tǎtà-í cada-í ñá, te vá quíndáá iní ñáhá-ndó.

38 Te núu quide-í ñá, te cuéi

vá quíndáá iní ñáhá-ndó xii mee-í dico quíndáá iní-ndó nchàa chiuⁿ quide-í. Ducaⁿ te cutnùní ndáá iní-ndó sã Yã Ndiõxí ndécú ndihí-í te ìⁿ-ni cùu-ndí —càchí-gá xáhaⁿ-gã xii-yu.

³⁹ Te ní cuiní-güedé tñi ñaha tucu-güedé xii-gá quíhíⁿ-gá vecaá ní cùu, dico ní xinu núú ñáhá-gã xii-güedé.

⁴⁰ Te ní xica-gá cuáháⁿ-gá ndàa ingá xio yúte Jòrdán núú nĩ xóo dacuàndute ndíi Juàá ñáiyu ndéé díhna, yacáⁿ ní xíndecu-gá. ⁴¹ Te yacáⁿ ío vãi ñáiyu ní sáháⁿ ní cáháⁿ ndihí ñaha xii-gá, te ní xítñahá-yu:

—Ndíi Juàá, cuèi ñá túú ní quide ndíi sá vã yõo tñahí ndàcu cada dico ndáá ní cáháⁿ ndíi, chí dàtná-ni ní cáháⁿ ndíi quide téa-a —càchí-yu xítñahá-yu.

⁴² Te yacáⁿ ío vãi-yu ní sándáá iní ñáhá-yu xii-gá.

11

Ní xihí té Lázaru

¹ Núú Bètaniá ní xíndecu ìⁿ téa ní xínani-dé Lázaru. Te càhú víhí nĩ tñahá-dé ní cùhú-dé, te ní xíndecu ndihí-dé cue cúha-dé tá Màriá ndihí tá Màrta chí xíáⁿ ñúú-yu. ² Te tá Màriá-áⁿ cúú-xí xíchí nĩ sódó àciti sáháⁿ tñámí sáhá Jèsús, te ní nadayichí-xi sáhá-gã ndihí idi díquí-xi. Te cuendá sá cùhú cúha-yu té Lázaru, ³ núú ní tendáhá-yu ñáiyu ñaha tñuhu cuáháⁿ núú Jèsús, te xáhãⁿ-yu xii-gá:

—Mèstrú, téa ío cùu iní-n ío càhú tñahá-dé cùhú-dé —càchí-yu xáhãⁿ-yu xii-gá.

⁴ Te sá dúcáⁿ càa tñuhu ní sáá, núú ní xáhaⁿ Jèsús xii-yu:

—Dico cuéhé-ãⁿ chí vá cùú-dé sá cùú dúcáⁿ-dè, chí Yã Ndiõxí cuiní-gá sá quíni-yu nchaa sá cáda-gã cuendá chiñuhu ñáhá-yu xii-gá, te ñu-ni ducaⁿ chiñuhu ñáhá-yu xii yúhú Déhe-gá —càchí-gá xáhaⁿ-gã xii-yu.

⁵ Te cuèi ío cùu iní ñáhá Jèsús xii té Lázaru ndihí cue cúha-dé ⁶ dico òré ní níhí-gã tñuhu, te ní cuyaa-gã úú-gá nduu núú ndécú-gã. ⁷ Te ní xáhaⁿ-gã xii cue téa xica cuu ndihí-gá:

—Na quíhíⁿ tucu-o dìstritú Jùdeá —càchí-gá xáhaⁿ-gã xii-güedé.

⁸ Te ní xáhaⁿ cuè téa xica cuu ndihí-gá xii-gá:

—Mèstrú, vitna-ni cuiní cue téa isràél xíndecu yacáⁿ cuáha ñaha-güedé xii-n yúú ní cùu, ¿te cuiní-ni tucu-n quíhíⁿ-n-ú? —càchí-güedé xáhaⁿ-güedé xii-gá.

⁹ Te ní xáhaⁿ Jèsús:

—Úxúú òré cúú ìⁿ nduu, te núu nduu na càca cuu-o, te ñá túú nã candaundeé-ó chí cùtnùní núú-ó chí dìtò. ¹⁰ Dico núu níú ná càca cuu-o, te ìó ná candaundeé-ó chí vá cùtnùní núú-ó —càchí-gá xáhaⁿ-gã xii-güedé.

¹¹ Te ní xáhaⁿ Jèsús:

—Té Lázaru téa ío váha tñahá tñuhu ndihí-o nĩ xidí-dé dico quíhíⁿ-ó chí ndo-cani-o-dé —càchí-gá xáhaⁿ-gã xii-güedé.

¹² Te ní xáhaⁿ-güedé xii-gá:

—Mèstrú, te núu xidí-dé te váa sa ta ndüha-dé cuáháⁿ

—càchí-güedé xăhaⁿ-güedě xii-gá.

13 Duha ní cáháⁿ Jèsús, chi té Lăzarú sa ní xíhí-dé te cue tée xica cuu ndihí-gá ní sani iní-güedé sá nǐ xídí ndisa-dé. 14 Te Jèsús ní xáhaⁿ ndáá-gá xii-güedé:

—Sa ní xíhí té Lăzarú, 15 Váha-gá sá ñă ní sáháⁿ-í quíngoto-í-dé, chi ndècu ingá chiuⁿ cada-í quini-ndó, te quindáá iní ñáhá-gă-ndó xii-í, te vitna na quihíⁿ-ó núú ndécú yiqui cuñú ndí — càchí-gá xáhaⁿ-gă xii-güedé.

16 Te té Măxí tée xáhaⁿ-güedě cuăchí ní xáhaⁿ-dě xii dava-gă-güedé:

—Na quihíⁿ-ó nchàa-o chi yacáⁿ cuú-ó ndihí-dé — càchí-dé xáhaⁿ-dě xii-güedé.

Jèsús càháⁿ-gá sá cuěi na cuú ñáyiu dico ndotó-yu cundecú-yu ndihí-gá

17 Te òré ní sáá Jèsús ñuu Bètaniá, te ní xáhăⁿ-yu sá sà ní cuu cúmí nduu ní xíhí té Lăzarú. 18 Te ñuu-áⁿ cáá yatni-ni-gá ñuu Jerusalén, dàtná cuádava-ná òré cuhuⁿ-o ichi te saá-ó. 19 Núu xíăⁿ vâi ñáyiu isràél ní sáháⁿ-yu ní cáháⁿ ndihí-yu tá Mărta ndihí cùhú-xi tá Măriá, te ní sãñáhá-yu tnúhu ndee iní sá dúcáⁿ nǐ xíhí cùha-yu. 20 Te ní níhí tă Mărta tnúhu sá ñúhú Jèsús ichi cuáháⁿ-gá núú ndécú-yu núu ní sáháⁿ-xi ní sátnahá-xi-gá, te cùhú-xi tá Măriá ní ndóo-xi vehe. 21 Te òré ní nanihí tă Mărta Jèsús, te ní xáhaⁿ-xi xii-gá:

—Mèstrú, te núu dicó ní xindecu-n ìha te vá cuú

cùha-ndí ní cùu. 22 Te cuěi vitna te núu ná sá ná cacáⁿ-n núú Yá Ndiòxi te taxi-gá xii-n —càchí-xi xáhaⁿ-xi xii-gá.

23 Te ní xáhaⁿ Jèsús:

—Vá ndihú iní-n chi ndoto cùha-n —càchí-gá xáhaⁿ-gá xii-xi.

24 Te ní xáhaⁿ tă Mărta:

—Ndáá chi sa xini-í sá ndótó-dě ná quítnahá nduu ndòto nchaa ñáyiu ní xíhí — càchí-xi xáhaⁿ-xi xii-gá.

25 Te ní xáhaⁿ Jèsús:

—Yúhú dandòto-í-yu cuendá cundecú-yu ni caa ni quihíⁿ ná sàá nduu. Te nchaa ñáyiu na quindáá iní ñáhá xii-í, te cuěi na cuú-yu dico ndotó-yu cundecu-í ndihí-yu ni caa ni quihíⁿ. 26 Te nchaa ñáyiu ndècu vívú ñuyúú-a te núu na quindáá iní ñáhă-yu xii-í, te cundecu ndihí-í-yu ni caa ni quihíⁿ. ¿Sàndáá iní-n tnúhu-a ñă? —càchí-gá xáhaⁿ-gă xii tá Mărta.

27 Te xáhaⁿ-xi:

—Mèstrú, sàndáá iní-í, te sàndáá tucu iní-í sá díú-n cùu-n Cristú Déhe Yá Ndiòxi, Yaá ní tendaha-gă véxi ñuyúú-a —càchí-xi xáhaⁿ-xi xii-gá.

Jèsús ndàhí-gá núú ní nguindúxi té Lăzarú

28 Sátá dúcáⁿ nǐ cáháⁿ-xi te ní sáháⁿ ngana-xi cùhú-xi tá Măriá, te dayuhu nǐ xáhaⁿ-xi:

—Yacáⁿ ní quexio Mèstrú, te càna ñaha-dé xii-n —càchí-xi xáhaⁿ-xi.

29 Te sá dúcáⁿ xáhaⁿ cùhú tă Măriá sá càná ñaha Jesús xii-xi, núu ndihí-ni ní xica-xi cuáháⁿ-xi núú ndécú-gă. 30 Te

Jèsús vátá quíhu-gá xití ñúú, chi ndècu-ni-gá núú nǐ sáháⁿ tnahá ñáhá tá Mǎrta. ³¹ Te ñáyiú isràél ndécú sǎhaha tñúhu ndee ìní xii tá Màriá ndihì cùhú-xi ní sani iní-yu sá cuaháⁿ-xi núú yíndùxi cùha-xi ndáhyú-xi ní cáhǎⁿ-yu, núu nchìcúⁿ-yu-xi cuaháⁿ.

³² Te ní sáá tá Màriá núú ndécú Jèsús te ní ngüñí xití-xi núú-gǎ, te xǎhaⁿ-xi xii-gá:

—Mèstrú, te núu dícó ní xíndecu-n ìha te vá cùú cùha-ndí ní cùú —cachí-xi xǎhaⁿ-xi xii-gá.

³³ Te sá nǐ xini Jèsús ndáhyú tá Màriá ndihì ñáyiú isràél nchìcúⁿ ñáhá cuaháⁿ, xǎⁿ ío ní cuyica ìní-gá. ³⁴ Te ní xǎhaⁿ-gǎ xii-yu:

—¿Ndèé ní taxi ndecu-ndo yìqui cuñú-dé-i? —càchí-gá xǎhaⁿ-gǎ xii-yu.

Te ní xáhǎⁿ-yu:

—Mèstrú, néhé ná quihíⁿ-ó te quiní-n —càchí-yu xáhǎⁿ-yu xii-gá.

³⁵ Te ní ndáhyú-gá tnahá-gá. ³⁶ Te ní xitnàha ñáyiú isràél:

—Súúni cùu iní-dé ndíi ni cùu —cachí-yu xitnàhá-yu.

³⁷ Te davá-yu xitnàhá-yu:

—Tée-a ní quide tátna-dé núú tée cuáá te ní ndúha. ¿Te nása ní cuu núu ñá túú ní quide tátna-dé té Lǎzarú cuendá sá vǎ cùú-dé ní cùu-i? —cachí-yu xitnàhá-yu.

Jèsús dándòto-gá té Lǎzarú

³⁸ Te ío ní cuyica tùcu iní Jèsús òré ní quexìo-gá yuhu yàú núú nǐ chihi-güedé yìqui cuñú té Lǎzarú. Te yuhu

yàú-áⁿ ndèdí ìⁿ yúú. ³⁹ Te ní xǎhaⁿ Jèsús xii-yu:

—Chí xócàni yúú-ǎⁿ —càchí-gá xǎhaⁿ-gǎ xii-yu.

Te ní xǎhaⁿ tá Mǎrta cùha tée ní xihí-áⁿ:

—Mèstrú, sa tucu sáháⁿ-dé chi sa ní cuu cùmí nduu sá nǐ xihí-dé —càchí-xi xǎhaⁿ-xi xii-gá.

⁴⁰ Te ní xǎhaⁿ Jèsús:

—¿Náa ñá díú nǐ cachí-í sá núu na quíndáá iní-n, te quiní-n sǎ ío càhnu cuu Yá Ndiòxí? —càchí-gá xǎhaⁿ-gǎ xii-xi.

⁴¹ Te ní xócàni-yu yúú ndèdí yuhu yàú-áⁿ. Te ní ndacoto-gá andiu, te ní xǎhaⁿ-gǎ xii Tátá-gǎ Dútú Ndiòxí:

—Táu, ndàcáⁿ táhù-í núú-n sǎ nǐ tèdoho-n tñúhu ní cáhǎⁿ-í. ⁴² Te yúhú sa nàha-í sá nchǎá-ni òré ndèdóho ñaha-n xii-í, dico duha càhǎⁿ-í cuendá sá ná tècú dóho nchaa ñáyiú ndècu ìha cuendá quíndáá iní-yu sá díú-n nǐ tendaha ñaha-n xii-í véxi-í ñuyíú-a —càchí-gá xǎhaⁿ-gǎ xii Dútú Ndiòxí.

⁴³ Te sátá dúcáⁿ nǐ cáhǎⁿ-gá ndihì Yá Ndiòxí, te níhi ní cáhǎⁿ-gá xǎhaⁿ-gǎ xii tée ní xihí-áⁿ:

—¡Lǎzarú, tandèe xíaⁿ! —càchí-gá xǎhaⁿ-gǎ xii-dé.

⁴⁴ Te ní ndee tée ní xihí-áⁿ yàú-áⁿ, te ndùtu dóó cuñí ndàha-dé ndihì sáhá-dé, te dǎhu tucu ìⁿ dóó núú-dé. Te ní xǎhaⁿ Jèsús xii-yu:

—Chí nándàxi-dé te dañà-ndo-dé ná cacá-dé —càchí-gá xǎhaⁿ-gǎ xii-yu.

*Ndücu-güedé nàcuáa
cada-güedé cahni-güedé Jèsús*
(Mt. 26:1-5; Mr. 14:1-2; Lc.
22:1-2)

⁴⁵ Te nchaa ñáyiú nchícúⁿ ñáhá xii tá Màriá cuáháⁿ ío vai-yu ní sándáá iní-yu Jèsús sá ñi xini-yu nàcuáa ní quide-gá. ⁴⁶ Dico davá-yu ní sáháⁿ-yu núú cuè téé cùu fariséú, te ní caní-yu cuèndú núú-güedé nàcuáa ní quide Jèsús. ⁴⁷ Te cue téé cùu fariséú ndihi cue dútú cúnúú ní natacá-güedé ní xóo-güedé jundá, te ní xitnàha-güedé:

—¿Nása cada-o?, chi téé-áⁿ ío vai sá vã yõo tnàhí ndàcu cada quide-dé. ⁴⁸ Te núu na dàña ío te nchaa ñáyiú quindáá iní ñáhã-yu xii-dé, te quixi cue téé ñuú Rómá dangòyo-güedé veñúhu-o te danàa-güedé nchaa ñuú-ó — càchí-güedé xitnàha-güedé.

⁴⁹ Te ñiⁿ cue téé-áⁿ nání-dé Caifás, te cúnúu-gá-dé núú dàva-gá cue dútú cuíá-áⁿ, te ní xáhaⁿ-dë xii-güedé:

—Nchòhó ni lùha ñá túú cùtnuní iní-ndó. ⁵⁰ Te ní ñã sãha-ndo cuèndá sá vãha-gá tnahá-ó, te núu na cùú ñiⁿ-ni téé cuèndá nchaa ñáyiú isràél, te ñá díú sã dánàa ñaha-güedé xii-yu —càchí-dé xãhaⁿ-dë xii-güedé.

⁵¹ Dico té Caifás chi ñá díú sã cúú iní méé-dé ní càháⁿ-dé, chi cuèndá sá cuíá-áⁿ ñi cúnúu-dé núú cue dútú, núu xiáⁿ Yã Ndióxi ní dácáhu iní ñáhã-gã nàcuáa càháⁿ-dé sá Jèsús cuú-gá sá cúú-xi nchãa ñáyiú isràél.

⁵² Te ñá díú cuèndá mee-ni ñáyiú-áⁿ cuú-gá, chi cuú-gá

tnáhá cuèndá nchaa ñáyiú ní sándáá iní ñáhá xii-gá, ñáyiú nchiténuu nihii ñuyúú, te ñiⁿ-nã cuú-yu ndihi-gá. ⁵³ Núú ndéé nduu-áⁿ ñi ndatnúhu cue téé cúnúu núú ñáyiú isràél nàcuáa cada-güedé cahni-güedé Jèsús.

⁵⁴ Te xiáⁿ núu ñã ní xica cuu-gá Jèsús quini ñáhá ñáyiú isràél, te ní quee-gá cuáhãⁿ-gá ñuú Efraín, ñiⁿ ñuú cáá yãtni yucu, yacáⁿ ní ngüñi-gá ndihi cue téé xica cuu ndihi-gá.

⁵⁵ Te ta cùyãtni nduu cadá-yu vico pásuá. Te cuéhé ñáyiú ní queé-yu ñuú-yu cuáhãⁿ-yu ñuú Jerusalén cuèndá sá sã ndihí-yu ncháa-yu nduu íi, te tnahá nduu vico pásuá. ⁵⁶ Te yacáⁿ nándúcú-yu Jèsús ní cùu te ñá túú-gã òré-áⁿ, te ní nanihí tnahã-yu xití veñúhu, te xitnàhá-yu:

—¿Nása sãni iní-ndó-í? ¿Quixi Jèsús vico áⁿ ñáhã? — càchí-yu xitnàhá-yu.

⁵⁷ Te cue téé cùu fariséú ndihi cue dútú cúnúu sa ní xáhaⁿ-güedé xii ñáyiú sá núu ndéda-ni càa-yu xini-yu núú ndécú Jèsús te na càháⁿ-ni-yu cuèndá tñi ñaha-güedé xii-gá.

12

Fiⁿ ñadihí chíhí-áⁿ Jèsús acití
(Mt. 26:6-13; Mr. 14:3-9)

¹ Íñú-gá nduu cùmání tnahá vico pásuá, te ní sáhãⁿ Jèsús ñuú Bètaniá, ñuú té Lãzarú téé ní dándótó-gã.

² Te xiáⁿ ñi cadúha-yu sá ní cudini Jesús. Te tá Màrta ní sani-xi cóhó, te té Lãzarú

yíhí-dě mèsá ndihí Jèsús, ndihí dava-gá-güedé xéxí-güedé. ³ Te tá Màriá néhé-xí cuådava lĩtrú acití sáháⁿ tnámí sã ïo ndéyáhu, te acití-án nĩ cuáha mee-ni yücú nãrdú, te ní sódó-xi sáhá Jèsús, te ní nadayìchí-xi ndihí idi díquí-xi sáhá-gã. Te nihíi xití vehe ní xité nuu dicó acití-án. ⁴ Te té Jüdás déhe té Ximú Iscarioté diu-ni ìⁿ tée xica cuu ndihí-gá, tée cuáha cuendá ñáhá xii-gá núú cuè tée cùu úhú iní ñáhá nĩ xáhaⁿ-dè xii-gá:

⁵ —¿Ná cuendá ñã ní cùyáhu acití-a sá ùní ciendú díhúⁿ denariú cuu cuendá ñáyiu ndàhú? —càchí-dé xáhaⁿ-dè xii-gá.

⁶ Dico sá dúcáⁿ nĩ cáháⁿ té Jüdás chi ñá díú sã ndísá ñuhu iní-dé ñáyiu ndàhú chi dicó-ni ìⁿ ñádúhú cúú-dě, chi diu-dé néhé cuendá-dé díhúⁿ-güedé nchaa-güedé te ní xóo duhu ñaha-dé xii-güedé. ⁷ Te ní xáhaⁿ Jèsús:

—Daña, vá dásatú-n iní xíchí-a na tàxúha nahi-xi àcití-a, chi nãndihí ndéé òré ná nguĩndúxi-í. ⁸ Chi nchòhó chi cuhuⁿ tnahá-ni ñáyiu ndàhú tnuú-ndó, dico yúhú chi vá ncháá ndùu cundecu ndihí ñaha-í xii-ndo —càchí-gá xáhaⁿ-gã xii-dé.

Tnàhá té Lãzarú cuiní-güedé cahni ñaha-güedé xii-dé

⁹ Te vãi ñáyiu isràél ní níhí-yu tnúhu sá ndécú Jèsús ñúú Bètaniá. Te ní sáháⁿ-yu cuendá quiní-yu-gá, te quiní-yu tnàhá té Lãzarú tée ní dándótó-gã. ¹⁰ Te cue dútú cúnùu ní ndatnúhu-güedé ní

cuu ìⁿnuu-güedé cuendá sá cáhni-güedé tnàhá té Lãzarú ní cùu, ¹¹ chi diu cuendá tée-án nĩ cuu cuéhé ñáyiu isràél tá dàña nihnú-yu-güedé cuáháⁿ cuendá sá nĩ sãndáá iní-yu Jèsús.

Jèsús cuánguihu-gá ñúu Jerusalén

(Mt. 21:1-11; Mr. 11:1-11; Lc. 19:28-40)

¹² Te nduu tnéé-án vãi ñáyiu ní quexìo ñúú Jerusalén cuendá cundecu-yu vico, te ní níhí-yu tnúhu sá Jèsús sáa-gá tnàhá-gá cundecu-gá vico-án, ¹³ núú ní xehndé-yu ndaha yùtnu ñúú, te nèhé-yu ní sáháⁿ ní sátnahá ñáhã-yu xii-gá. Te níhi ní cáháⁿ-yu, te càchí-yu:

—¡Ío càhnu cuu Yá Ndiõxí! Te ducaⁿ-ni ïo càhnu cuu Yaá ní tendaha-gã véxi quindaha ñaha xii-o —duha ní cachí-yu.

¹⁴ Te Jèsús ní níhí-gã ìⁿ búrru, te yòdo-gá-di cuáháⁿ. Te ducaⁿ nĩ cuu chi ní quee ndáá-xi nãcuáa càháⁿ-xi núú tütú Yá Ndiõxí núú càchí-xi:

¹⁵ Vá yùhú nchòhó cue ñáyiu ndècu ñúú Sìón,

chi iha véxi tée yìndaha ñaha xii-ndo yodo-dé ìⁿ búrru.

Duha càchí-xi núú tütú-gá. ¹⁶ Dico cue tée xica cuu ndihí Jèsús ñã ní ndacu iní-güedé nãcuáa càháⁿ-xi núú tütú Yá Ndiõxí nãcuáa cada Jèsús. Dico sátá cuãndaa-gá andiu càda cahnu ñaha Tátá-gã xii-gá, te ní ndacu iní-güedé sá dúcáⁿ yòdo tnuní nãcuáa cada-gá, te ducaⁿ nĩ cuu.

17 Nchaa ñáyiú ní xíndecu ndihí Jèsús òré ní dándótó-gă té Lăzarú, ya yàcáⁿ ní caní-yu cuèndú núú ñáyiú nàcuáa ní quide ñaha-gă xii-dé. 18 Te vâi-yu ní sáháⁿ-yu núú ndécú Jèsús cuèndá sá ní níhí-yu tnúhu ní quide-gá sá vâ yôo tnàhí ndàcu cada. 19 Te cue téé cùu fariséú ní xítñaha-güedé:

—Ní xito-ndo nă ñá túú nàndihí sá quidé-ó-vá, chí nchaa ñáyiú ní chinchícúⁿ ñáhă-yu xii-dé —càchí-güedé xítñaha-güedé.

*Ñáyiú ñá túú cùu ñáyiú is-
raél nándúcú-yu Jèsús*

20 Te tnàhá ñáyiú ñá túú cùu ñáyiú israél ní sáháⁿ-yu vico ñuú Jerusàlén ní quide càhnú-yu Yá Ndiòxí. 21 Te ñáyiú-áⁿ ní sáháⁿ-yu núú tē Lìpé téé ñuú Betsaidá, te ñuú-áⁿ yíndèhu-xi distritú Galileá. Te ní xáhăⁿ-yu xii-dé:

—Tátá, vá cùndèe iní-n càchí tnúhu-n nùu ndèé ndécú Jèsús, chí cuíní-ndí cáháⁿ ndihí-ndí-gá —càchí-yu xáhăⁿ-yu xii-dé.

22 Te té Lìpé ní naníhí-dě té Ndrìxí te ní xáhăⁿ-dě nàcuáa càháⁿ-yu, te ndi ndùú-güedé ní sáháⁿ-güedé ní xáhăⁿ-güedé xii Jèsús nàcuáa càháⁿ-yu. 23 Te ní xáhăⁿ Jèsús xii-güedé:

—Vitna ní cuyatni òré cada càhnu ñaha Tátá-í xii-í, te quíní-yu sá ò càhnu cuu yúhú Téé cùu ñaní tnáhă-yu nchaá-yu. 24 Te na càchí tnúhu ndáá-í xii-ndo să nùu ìⁿ tatá vá ngává-xí nùú ñúhú tēhyú-xi ña, te diu-ni ducaⁿ cùnduu-xi cundecu-xi. Dico

ìⁿ tatá ná ngává nùú ñúhú xínu déhe-xi, te xiăⁿ nádàcayá tnáhá-xí, te mee-xi tēhyú-xi. 25 Te nchaa ñáyiú ò ñùhu iní-xi cundecu ñuyíú-a ñá túú ñùhu iní-yu Yá Ndiòxí, te ñáyiú-áⁿ cuíta nihnú-yu. Te nchaa ñáyiú ò ñùhu iní ñáhá xii Yá Ndiòxí, ñáyiú-áⁿ cundecú-yu ndihí-gá ni caa ni quíhíⁿ. 26 Te nchaa ñáyiú cuíní cunu cuechi nùú-í xini ñuhu-xi natuha ñahá-yu xii-í, te nduu táhú-yu cundecú-yu núú nùhú-í cundecu-í. Te nchaa ñáyiú na cunu cuechi nùú-í, te cada càhnu ñaha Tátá-í xii-yu —càchí-gá xáhăⁿ-gă xii-güedé.

*Jèsús càháⁿ-gá sá cáhni
ñaha-güedé xii-gá*

27 Te ní xáhăⁿ tucu-gá:

—Ío ndìhú iní-í. Te cùñaha-í xii Tátá-í taunihnu ñaha-gă nùu dicó sá cúú, dico vá cúú chí cuèndá tnàhí-a véxi-í —càchí-gá xáhăⁿ-gă xii-güedé.

28 Te ní xáhăⁿ-gă xii Tátá-gă Dútú Ndiòxí:

—Táu, cada nàcuáa ní sani iní-n cùnduu cuèndá sá ná cadá càhnu ñaha ñáyiú xii-n —càchí-gá xáhăⁿ-gă.

Te ducaⁿ te ní tecú ní cáháⁿ Yá Ndiòxí ndéé andiú, te càchí-gá:

—Sa ní quide-í nàcuáa cachí ñáyiú sá ò càhnu cuu-í. Te cada tucu-í cuèndá cada càhnu ñaha-gá-yu xii-í —càchí Yá Ndiòxí xáhăⁿ-gă xii Déhe-gá.

29 Te nchaa ñáyiú xíndecu ní tecú dóho-yu ní cáháⁿ-gá, dico ñá túú ní sàni iní-yu sá méé-gă ní cáháⁿ, chí

davá-yu ní xítñahá-yu sá ññhu ní cáháⁿ, te davá-yu ní xítñahá-yu sá ñⁿ espíritú xínú cuèchi núú Yá Ndiòxí ní cáháⁿ.
 30 Te ní xáhaⁿ Jèsús xii-yu:

—Ñá díú cuendá yúhú ní cáháⁿ Yá Ndiòxí, chi ní cáháⁿ-gá cuendá sá nchòhó cundedóho-ndo. 31 Te vitna ní sáá nduu càda ndáá Yá Ndiòxí cuèchi nchaa ñáyiu ñuyíú-a, te ducaⁿ te vá cúnù-gá yucu ñávaha. 32 Te na càta caa ñaha-güedé xii-í núú cùrúxí, te xiáⁿ cuú-í te níhí-yu tnúhu ní càa xico ñuyíú, te quindáá iní-yu tnúhu-í —càchí-gá xáhaⁿ-gá xii-yu.

33 Duha ní cáháⁿ-gá cuendá cutnùní iní-yu nàcuáa ndoho-gá òré cuú-gá. 34 Te ní xáháⁿ-yu xii-gá:

—Nihí-ndí tnúhu sá núú tütú yódó tnùní tnúhu Yá Ndiòxí càháⁿ-xi sá Crístú Yaa tendaha-gá quixi ñuyíú-a cundecu-gá ní caa ní quíhíⁿ. ¿Te yòhó nása càháⁿ-tu-n sá ñⁿ tée cùu ñaní tnáhá nchaa ñáyiu ñuyíú-a cahni ñaha-güedé núú cùrúxí? Te cachí tnúhu-n ná cúú tée-áⁿ —càchí-yu xáháⁿ-yu xii-gá.

35 Te ní xáhaⁿ Jèsús:

—Yúhú cúu-í dàtná ñⁿ ñuhú dáyehé ñuyíú-a, dico sacú-ni nduu ndècu ndíhi ñaha-í xii-ndo. Te caca-ndo ìchi ndáá vitna dáyehé-gá-í núú-ndó chi na cùnee te vá cùtnùní-gá núú-ndó ndéé ìchi quíhíⁿ-ndó. 36 Quindáá iní ñáhá-ndó xii-í vitna ndècu ndíhi ñaha-gá-í xii-ndo dàndixi túu-í iní-ndó, cuendá cutnùní iní-ndó nàcuáa ndùu cuendá Yá Ndiòxí, te cuu-ndo

dèhe-í —càchí-gá xáhaⁿ-gá xii-yu.

Te sátá dúcáⁿ ní cáháⁿ Jèsús, te ní quee-gá cuáháⁿ-gá ñⁿ núú vǎ ná nihí ñáhǎ-yu xii-gá.

Ñáyiu isràél ñá cuíní-yu quindáá iní-yu Jèsús

37 Te cuèi ío vǎi sá vǎ yòo tnàhí ndàcu cada ní quide Jèsús ní xiní-yu, dico ní òucaⁿ ñá túú ní sàndáá iní-yu-gá. 38 Te ducaⁿ ní quidé-yu chi dacuítí ní quee ndáá-xi nàcuáa ní chídó tnùní ndíi Chàia ndíi ní cáháⁿ tnúhu Yá Ndiòxí ndéé sanaha núú tütú-gá núú càchí-xi:

Yòhó Yaa cúú Xitohó-í, vá yòo ñⁿ sàndáá iní tnúhu càháⁿ-ndí.

Te vá yòo ñⁿ cùtnuní iní-xi sá ío càhnu cuu-n.

Duha ní chídó tnùní ndíi Chàia núú tütú-gá. 39 Te ñá ní sàndáá iní-yu chi ní quee ndáá-xi nàcuáa ní chídó tnùní tucu ndíi Chàia núú tütú Yá Ndiòxí nàcuáa càháⁿ Jèsús:

40 Mee Yá Ndiòxí ní quide-gá sá vǎ tècú tnùní-yu,

chi ní dádǎhu ndodo iní ñáhá-gá xii-yu,

chi ío sáá iní-yu núu ñá ní cuíní-gá-yu quindáá iní ñáhǎ-yu xii-gá.

Te ní vǎ túhá ñáhǎ-yu xii yúhú cuendá dacácu ni-hnu-í-yu.

41 Duha ní chídó tnùní ndíi Chàia nàcuáa càháⁿ Jèsús chi ní xiní ndíi sá ío càhnu cuu-gá.

42 Te cuèi ducaⁿ ní cuu dico titní cue tée cùnùu núú ñáyiu isràél ní sàndáá iní ñáhá-güedé xii-gá. Dico ñá túú ní xò cáháⁿ ndáá-güedé

chi ní xóo yùhú-güedé sá vǎ
dǎhá-gǎ cue tée cùu fariséu
quíhu-güedé veñúhu. ⁴³ Chi
ní xóo cudíi-gǎ iní-güedé sá
càháⁿ ñáyiú dàcúxí tñuhu
càháⁿ Yǎ Ndiöxí.

*Ñáyiú ñá túú sándáá iní
tnúhu Jèsús cuíta nihnú-yu*

⁴⁴ Jèsús níhi ní càháⁿ-gǎ, te
càchí-gǎ:

—Nchaa ñáyiú na quíndáá
iní ñáhá xii-í, te ñá díú-ní
mèe-í quíndáá iní-yu, chi
tnàhá Tǎtà-í Yaá ní tendaha
ñàha xii-í véxi-í ñuyíú-a
quíndáá iní-yu. ⁴⁵ Te ñáyiú
xini ñáhá xii yúhú xini-yu
tnàhá Tǎtà-í. ⁴⁶ Te yúhú véxi-í
dandixi túu-í iní ñáyiú ñuyíú-a
cuendá cutnùní iní-yu nàcuáa
ndúu cuendá Yǎ Ndiöxí, te
nchaa ñáyiú na quíndáá iní
ñáhá xii-í te vǎ cùndècu-gǎ-yu
ichi cuèhé ichi duha. ⁴⁷ Te
núu ió davá-yu ndèdóho-yu
nàcuáa càháⁿ-í te ñá túú
tní-yu tnúhu-í, te ñá díú
yúhú dàcuíta nihnu-í-yu,
chi ñá túú véxi-í ñuyíú-a sá
dàcuíta nihnu-í-yu, chi véxi-í
sá dácǎcu nihnu-í-yu. ⁴⁸ Te
nchaa ñáyiú na cùyíchí iní
ñáhá xii-í te ñá túú quide
cuendá-yu nàcuáa càháⁿ-í, te
ñáyiú-áⁿ ná sàá nduu te cuíta
nihnú-yu chi ñá ní tní-yu
tnúhu ní càháⁿ-í. ⁴⁹ Te yúhú
ñá túú càháⁿ-í tnúhu véxi iní
mèe-í, chi mee Tǎtà-í Yaá
ní tendaha ñàha xii-í véxi-í
ñuyíú-a ní cachí tnúhu-gǎ
nàcuáa cunduu tnúhu càháⁿ-í
danèhé-í ñáyiú. ⁵⁰ Te yúhú
xini-í sá tñuhu ní táuchíúⁿ
Tǎtà-í càháⁿ-í cúu-xí ñⁿ sá

vǎha sá cúu xii-ndo chi
nduu táhú-ndó cùndècu-ndo
ndíhi-gǎ ní caa ní quíhíⁿ, núu
xiǎⁿ càháⁿ-í nchaa nàcuáa
ní táuchíúⁿ-gǎ —càchí-gǎ
xáhaⁿ-gǎ xii-yu.

13

*Jèsús náquète-gǎ sáhá cuè
téé xica cuu ndíhi-gǎ*

¹ Te cùmání-gǎ tnahá vico
pàscuá, te Jèsús sa nàha-gǎ sá
sà ní cuyatni òré dándóo-gǎ
ñuyíú-a, te ndaa-gǎ núu
ndécú Tǎtà-gǎ. Te ió ní cuu
iní-gǎ nchaa ñáyiú ní sándáá
iní ñáhá xii-gǎ, te ní quide
ndisa-gǎ sá ní cuu iní ñáhá-gǎ
xii-yu.

²⁻⁴ Te ní quíhu yucu
ñávǎha díquí tǎ Júdás déhe
té Ximú Iscarioté, te ní sani
iní-dé nàcuáa cada-dé cuáha
cuendá-dé Jèsús núu cuè téé
cùu úhú iní ñáhá xii-gǎ. Te
Jèsús sa nàha-gǎ sá méé Yǎ
Ndiöxí Yaá cúu Tǎtà-gǎ ní
sáñaha-gǎ tnúhu ndee iní
xii-gǎ sá cadá-gǎ núu-gǎ, te
nàha-gǎ sá díú núu Tǎtà-gǎ ní
quee-gǎ véxi-gǎ ñuyíú-a. Te
sáá nduu nàsáá tucu-gǎ núu
Tǎtà-gǎ. Te cùdini Jèsús ndíhi
cue téé xica cuu ndíhi-gǎ ní
cùu, te ní ndacuíñí-gǎ yuhu
mèsá, te ní taunuu-gǎ ñⁿ dóo
níhnú-gǎ, te ní queheⁿ-gǎ
ñⁿ dóo ní dácútú-gǎ núu
yíquí-gǎ. ⁵ Te ní chihi-gǎ
ndute ñⁿ tñá, te xiǎⁿ ní
naquete-gǎ sáhá cuè téé xica
cuu ndíhi-gǎ, te ndíhi dóo
ndútú núu yíquí-gǎ-áⁿ ní
nadayichí-gǎ sáhá-güedé.

6 Te òré naquete-gá sáhá tẽ Xímú, àdi Pelú, ní cùu ní xáhaⁿ-dẽ xii-gá:

—Mèstrú, ¿te yòhó naquete-n sáhà-í-u? —càchí-dé xáhaⁿ-dẽ xii-gá.

7 Te ní xáhaⁿ Jèsús:

—Vitna ñá cùtnùní iní-n sã quidẽ-í-a dico sáá nduu te cutnùní iní-n —càchí-gá xáhaⁿ-gã xii-dé.

8 Te ní xáhaⁿ tẽ Pèlú:

—Yúhú chi vá ìíⁿ ndùu te naquete-n sáhà-í —càchí-dé xáhaⁿ-dẽ xii-gá.

Te ní xáhaⁿ Jèsús:

—Te núu vá náquète-í sáhá-n áⁿ, te vá cáda-gã-n cuendá sá ndécú ndìhi ñaha-í xii-n —càchí-gá xáhaⁿ-gã xii-dé.

9 Te ní xáhaⁿ tẽ Pèlú:

—Te núu ducaⁿ te vá mée-ní sáhà-í naquete-n, chi naquete-n tnàhá ndaha-í ndìhi díquì-í —càchí-dé xáhaⁿ-dẽ xii-gá.

10 Te ní xáhaⁿ Jèsús xii-dé:

—Tée íchí ní xichi chi xini ñuhu-xi sã sáhá-na-dẽ ndoo, te ducaⁿ te nduu ndoo-dé nihí-dé. Te nchòhó sa càndoo-ndo cuéi ñá ncháá-ndó càndoo —cachí-gá xáhaⁿ-gã xii-dé.

11 Te ducaⁿ ní cáháⁿ Jèsús chi sa nàha-gá sá ìíⁿ cuè tée-áⁿ cuáha cuendá ñáhá-güedẽ xii-gá núu cuè tée cùu úhú iní ñáhá, xiáⁿ núu ní xáhaⁿ-gã sá ñà túú càndoo-güedé nchaa-güedé.

12 Te sátá ní naquete-gá sáhá-güedé, te ní ndécúñhu-gá dóo-gã, te ní nucóo-gá yuhu mèsá, te ní xáhaⁿ-gã xii-güedé:

—¿Te ní cutnùní iní-ndó sã ní quide ñaha-í xii-ndo-ãⁿ?

13 Te nchòhó váha-ni cáháⁿ-ndó sã cùnùu-í, te dãnani ñaha tucu-ndo Mestrú xii-í, te ndáá cáháⁿ-ndó. 14 Te núu yúhú cùu-í Mèstrú, te cùu tucu-í tée cùnùu te nàquete-í sáhá-ndó, te ñu-ni ducaⁿ càda nchòhó tucu naquete sáhá tnàhá-ndó. 15 Yúhú sànu íchí ñaha-í xii-ndo nàcuáa cada-ndo. 16 Te na càchí tnúhu ndáá-í xii-ndo sã ní ìíⁿ tée xinu cuechi ñá túú cùnùu-dé dàcúxí pàtróoⁿ-dẽ, te ní ìíⁿ tée xica chiⁿ ñá túú cùnùu-dé dàcúxí tée tëndaha ñaha xii-dé cuáháⁿ-dé chiⁿ. Te ducaⁿ sàtnahá-xi cùu yúhú ndìhi nchòhó. 17 Te núu ní cutnùní iní-ndó nàcuáa ní quide ñaha-í xii-ndo ña, te ducaⁿ càda tnaha-ndo te cuu váha iní ñáhá Yã Ndióxi xii-ndo.

18 'Yúhú, ñá túú cáháⁿ-í cuendá-ndó nchàa-ndo, chi yúhú sa nàha-í nàcuáa sàni iní ìíⁿ ìíⁿ nchòhó cue tée ní nanducu ñhnu-í tnuu nchaa ñáyu ñuhu ichi cuehé ichi duha ní cachí-í chitnahá ñáhá-ndó xii-í. Chi dacuití sã quée ndáá-xi nàcuáa cáháⁿ-xi núu tütú Yã Ndióxi núu càchí-xi: “Tée xèxi ndìhi ñaha xii-í ngóo-dé cuu úhú iní ñáhá-dẽ”, duha càchí-xi núu tütú-gá. 19 Te cùmání-gã sáá nduu càda ñaha-dé sá sání ìní-dé, núu xiáⁿ càchí tnúhu-í xii-ndo nàcuáa cada-dé, chi na sáá nduu-ãⁿ te cutnùní iní-ndó sã yúhú cùu-í Crístú Yáá ní tendaha Yã Ndióxi véxi ñuyú-a. 20 Te na càchí tnúhu ndáá-í xii-ndo sã nchàa ñáyu na quèheⁿ cuendá ñáhá xii cue tée tendaha-í

cáháⁿ tnúhu-í, te cada iní-yu sá tnàhá yúhú ní queheⁿ cuendá-yu. Te nchaa ñáyiú na queheⁿ cuendá ñáhá xii-í, te cada iní-yu sá tnàhá Tàtá-í Dútú Ndiòxí Yaá ní tendaha ñàha xii-í véxi-í ñuyíú-a ní queheⁿ cuendá-yu —càchí-gá xáhaⁿ-gã xii-güedé.

Jèsús càchí-gá sá tẽ Jùdás cuàha cuendá ñáhá-dẽ xii-gá núú cuè téè cùu úhú iní ñáhá
(Mt. 26:20-25; Mr. 14:17-21; Lc. 22:21-23)

21 Te sátá dúcáⁿ ñí cáháⁿ Jèsús te ío ní ndíhú iní-gá, te ní xáhaⁿ-gã xii-güedé:

—Na càchí tnúhu ndáá-í xii-ndo sã díú-ní ìⁿ nchohó cuàha cuendá ñáhá-ndó xii-í núú cuè téè cùu úhú iní ñáhá —càchí-gá xáhaⁿ-gã xii-güedé.

22 Te ní ngüíta cue téè xica cuu ndíhi-gá ndéhé ìⁿ ndehe ìⁿ núú tnáhá-güedé, chí ñá ní cùtnuní iní-güedé ndèdacàa-güedé cuendá-güedé ní cáháⁿ-gá.

23 Te ìⁿ téè-áⁿ ío cùdíí iní ñáhá Jèsús, te ndècu yatni-dé dñi-gá cùdini-dé ndíhi-gá.

24 Te té Xímú, àdi Pelú chí úú díu-dé, ní quide-dé sèñá núú tẽ ndècu yatni dñi-gá-áⁿ sá càcáⁿ tnúhú-dé núú-gã ñuu ndèdacàa-güedé cuendá-güedé ní cáháⁿ-gá.
25 Te téè-áⁿ ní sáháⁿ ndehe yatni-gá-dé dñi Jèsús, te ní xáhaⁿ-dẽ xii-gá:

—Mèstrú, ¿ndèdacàa-ndí cuendá-ndí ní cáháⁿ-n-í? — càchí-dé xáhaⁿ-dẽ xii-gá.

26 Te ní xáhaⁿ Jèsús:

—Na chindóyo-í luha pàá, te téè na cuàha-í te téè-áⁿ cúú-dẽ —càchí-gá xáhaⁿ-gã xii-dé.

Te ní chindóyo-gá luha pàá, te ní sáha-gá té Jùdás déhe té Xímú Iscarioté. 27 Te òré ní queheⁿ-dé pàá, te ní ngündecu ndíhi ñàha dùuⁿ-ná yucu ñávàha xii-dé. Te ní xáhaⁿ Jèsús:

—Sá ñí sani iní-n càda-n te cada ndíhi-ni-n —càchí-gá xáhaⁿ-gã xii-dé.

28 Te ní ìⁿ cue téè cùdini ndíhi-gá ñá ní təcú tnùn-í-güedé nása ndùu tnúhu ní xáhaⁿ-gã xii té Jùdás.
29 Te dava-güedé ní sani iní-güedé sá sã cuendá sá ndécú ndíhi-dé sá ñúhú díhúⁿ, te vaa ío ìⁿ sá cuááⁿ-dé nandíhi-güedé vico, àdi díhúⁿ cuàha-dé ñáyiú ndàhú xáhaⁿ-gã ní cáháⁿ-güedé. 30 Te sa ní cundiquíⁿ ní queheⁿ cuendá té Jùdás pàá caxi-dé, te òré ní níhí-dẽ pàá-áⁿ te ní quee-dé cuáháⁿ-dé.

Jèsús càchí tnúhu-gá nàcuáa cada-o

31 Te sátá ñí quee té Jùdás cuáháⁿ-dé, te ní xáhaⁿ Jèsús xii dava-gá-güedé:

—Vitna te quiní-ndó ndíhi nchaa ñáyiú sá ío càhnu cuu yúhú Téè cùu ñaní tnáhá-ndó nchàa-ndo, te òré-áⁿ cutnùn-í iní-ndó sã ío càhnu cuu tucu mee Yá Ndiòxí. 32 Te núu yúhú quidé càhnu-í Yá Ndiòxí, te díu-ni ducaⁿ càda cahnu ñàha-gá xii yúhú, te ñá túú-gã titní nduu te ducaⁿ càda-gá. 33 Te nchòhó cue déhe-í na càchí tnúhu-í sá sàcú duha-ná nduu ndècu ndíhi

ñaha-í xii-ndo. Te nchòhó nanducu ñaha-ndo xii-í dico vá ná ñihí ñáhà-ndó dàtná ní xáhaⁿ-í xii ñáyiú isràél, te òu-ni ducaⁿ càháⁿ-í núú-ndó sã vã ndácú-ndó quíhíⁿ-ndó núú quíhíⁿ-í. ³⁴ Te duha sãnu ichi ñaha tucu-í xii-ndo nãcuáa cada-ndo sã cúú iní tnáhá-ndó ìⁿ ìⁿ-ndo datná yúhú cúú iní ñáhà-í xii-ndo. ³⁵ Te núu na cùu iní tnáhá-ndó ìⁿ ìⁿ-ndo ña, te ducaⁿ te cutnùní iní nchaa ñáyiú sã cúú-ndó cuè téé ní chitnahá ñáhá xii-í —càchí-gá xáhaⁿ-gã xii-güedé.

Jèsús càháⁿ-gá sã tẽ Pèlú vá nũnuu-dé sã xicá cùu ndihi ñaha-dé xii-gá

(Mt. 26:31-35; Mr. 14:27-31; Lc. 22:31-34)

³⁶ Te ní xáhaⁿ tẽ Xímú, àdi Pelú chi úú òu-dé, xii Jèsús:

—Mèstrú, ¿ndéé quíhíⁿ-n-í? —càchí-dé xáhaⁿ-dẽ xii-gá.

Te ní xáhaⁿ Jèsús:

—Vitna te vá ndácú-n cànchicúⁿ ñáhá-n quíhíⁿ núú quíhíⁿ-í, dico na sãá nduu te òai sãá-n núú cùndècu-í —càchí-gá xáhaⁿ-gã xii-dé.

³⁷ Te ní xáhaⁿ tẽ Pèlú xii-gá:

—Mèstrú, ¿te ná cuendá nũu vá ndácú-í cànchicúⁿ ñáhà-í xii-n quíhíⁿ vitna-i? Chi yúhú ñá túú tnàhí yúhú-í cuèi na cùú-í sã cuendá-n —càchí-dé xáhaⁿ-dẽ xii-gá.

³⁸ Te ní xáhaⁿ Jèsús:

—¿Te ndáá sã xèhndé iní-n sã cuèi na cùú-n cuendá-í-u? Te na càchí tnúhu ndáá-í xii-n sã cùmání-gã cana líhi, te úní xito càháⁿ-n sã ñà túú xini ñáhá-n xii-í —càchí-gá xáhaⁿ-gã xii-dé.

14

Jèsús dánèhé ñáhá-gã nãcuáa cada-o nãsáá-ó núú ndécú Yã Ndiòxí

¹ Te ní xáhaⁿ-gã xii-güedé:

—Te ñá túú nã cani iní-ndó. Quindáá iní-ndó Yã Ndiòxí, te quindáá iní-ndó yúhú. ² Chi núú ndécú Tãtà-í ío nũne núú cùndècu-o, chi núú ñáhá ñá te sa cachí tnúhu-í xii-ndo ni cùu. Te vitna na nùhú-í te cada túha-í núú cùndècu-ndo.

³ Te dàtnùní quixi tucu-í te candeca ñaha-í xii-ndo quíhíⁿ cuendá ìⁿ-ni xìchi cundecu-o. ⁴ Te sa nàha-ndo ndéé quíhíⁿ-í te sa xini-ndó ìchi —càchí-gá xáhaⁿ-gã xii-güedé.

⁵ Te ní xáhaⁿ tẽ Mǎxí xii-gá:

—Mèstrú, ñá túú xini-ndí ndéé quíhíⁿ-n te da ichi-ná quini-ndí —càchí-dé xáhaⁿ-dẽ xii-gá.

⁶ Te ní xáhaⁿ Jèsús:

—Yúhú cùú-í dàtná ìⁿ ichi te càháⁿ-í tnúhu ndáá, te yúhú cada-í te naníhí tàhú-ndó. Te ìⁿ òi dí-ni yúhú cada-í te sãá-ndó núú Yã Ndiòxí cundecu-ndo te núu na quindáá iní ñáhá-ndó xii-í.

⁷ Te núú òicó cùtnùní ndisa iní-ndó yòo cuu-í-áⁿ, ducaⁿ te cutnùní iní-ndó yòo cuu Tãtà-í ní cùu. Dico vitna dàtná sã ñi xini núú-ndó Dùtú Ndiòxí Yáá cúú Tãtà-í cada iní-ndó, chi ní xini-ndó yúhú —càchí-gá xáhaⁿ-gã xii-dé.

⁸ Te ní xáhaⁿ tẽ Lìpé xii-gá:

—Mèstrú, dánèhé ñáhá xii-ndí Dùtú Ndiòxí chi na cùu váha iní-ndí —càchí-dé xáhaⁿ-dẽ xii-gá.

⁹ Te ní xáhaⁿ Jèsús xii-dé:

—Lipé, ¿te náa ñá túú xini ñáhá-n xii-í? Te sa ní cuu vâi nduu ndecu ndihi ñaha-í xii-ndo, chi ñáyiu xini ñáhá xii-í te xini-yu tnáhá Tâtà-í. ¿Te ná cuendá yòhó càchí-n sá dánèhè ñáhà-í xii-ndo Tâtà-í? ¹⁰ ¿Náa ñá túú sàndáá iní-ndó sã yùhú ndécù-í ndihi Tâtà-í? Te mee-gã ndécú ndihi ñaha-gá xii-í. Te nchaa tnúhu càháⁿ-í núu-ndó ñá túú càháⁿ-í sã véxi iní mée-í, chi Tâtà-í Yaa ndécú ndihi ñaha xii-í chindèe ñaha-gá quidè-í chi^uⁿ-gá. ¹¹ Te quindáá iní-ndó sã yùhú ndécù-í ndihi Tâtà-í, te ducaⁿ mée-gá ndécú ndihi ñaha-gá xii-í. Te núu ñá túú sàndáá iní-ndó tnúhu càháⁿ-í-a, te dandàcu iní-ndó nchàa chi^uⁿ ta quide-í véxi, te quindáá iní ñáhá-ndó. ¹² Te na càchí tnúhu ndáá-í xii-ndo sã nchàa ñáyiu na quindáá iní ñáhá xii-í, te cadá-yu chi^uⁿ quide-í te càhnu-gá chi^uⁿ cadá-yu chi yùhú núhú-í núu ndécú Tâtà-í cundecu-í nàcuáa níhí ndéé-gã-yu cundecú-yu. ¹³ Te nchaa sá ná càcáⁿ-ndó te taxi-í te núu na quindáá iní ñáhá-ndó xii-í, te nchaa cada-í cuendá cutnùní iní ñáyiu sá ïo càhnu cuu Tâtà-í Dútú Ndiöxí. ¹⁴ Te yùhú cada-í nchaa sá cuiní-ndó càcáⁿ táhú-ndó núu-í, te núu na quindáá iní ñáhá ndisa-ndo xii-í.

Jesús càchí-gá sá téndàha-gá Espiritú Yã Ndiöxí quixi cundecu ndihi-o

¹⁵ Te núu nchòhó cúú iní ñáhá-ndó xii-í te tnúhú-ndo nchàa tnúhu càháⁿ-í. ¹⁶ Te yùhú cacáⁿ táhú-í núu Tâtà-í

sá téndàha-gá Espiritú-gá quixi cundecu ndihi-ndo cànu ichi ñaha-xi xii-ndo nacuáa cundecu-ndo, te chindee ñaha-xi xii-ndo ni caa ni quíhíⁿ. ¹⁷ Te nchaa ñáyiu ndècu ichi cuehé ichi duha ñá túú xini-yu Espiritú Yã Ndiöxí te ni vã cúú cundecu ndihí-yu. Dico nchòhó sa xini-ndó Espiritú-gá te ndècu ndihi ñaha-xi xii-ndo. Te sáá ïⁿ nduu te cunuu Espiritú-gá iní-ndó. ¹⁸ Te yùhú vã dáñá ñihnu ñaha-í xii-ndo, chi quixi tucu-í cundecu ndihi ñaha-í xii-ndo. ¹⁹ Te sácú duha-ná nduu ndècu-í te vã quini ñáhá-gã ñáyiu xii-í, dico nchòhó chi quini ñáhá-ní-ndó xii-í. Te ducaⁿ-ni cundecu-ndo ichi váha chi cundecu ndihi ñaha-í xii-ndo ni caa ni quíhíⁿ. ²⁰ Te dàvã-áⁿ cutnùní iní-ndó sã ndécù-í ndihi Tâtà-í, te ducaⁿ nchòhó cundecu ndihi ñaha-ni-ndo xii-í. ²¹ Te nchaa ñáyiu dàcuaha tnúhu-í te tnúhú-yu, ñáyiu-áⁿ quidé ndisá-yu sá cúú iní ñáhá-yu xii-í. Te ducaⁿ Tâtà-í cúú iní ñáhá-gã xií-yu, te ducaⁿ-ni yùhú cúú iní-í-yu tucu, te ducaⁿ te cùtnuní iní-yu sá ndécú ndihi-í-yu — càchí-gá xáhaⁿ-gã xii-dé.

²² Te ní cáháⁿ ïⁿ téé nàni Judás dico ñá díú tẽ Judás déhe té Xímú Iscarioté ní cáháⁿ, chi ingá té Judás ní xáhaⁿ-dẽ xii-gá:

—Mèstrú, ¿nása cada-n cuendá cutnùní iní-ndí sã cundècu ndihi ñaha-n xii-ndí, te ñáyiu ñúhu ichi cuehé ichi duha vã cundècu ndihí-n-yu-í? —càchí-dé

xáhaⁿ-dě xii-gá.

23 Te ní xáhaⁿ Jësús xii-güedé:

—Nchaa ñáyiú cùu iní ñáhá xii-í te tñiⁿ-yu tnúhu càháⁿ-í, te ñáyiú-áⁿ cúú iní ñáhá Tătà-í xii-yu, te yúhú ndihí Tătà-í ndécú-ndí ndihí-yu. 24 Te nchaa ñáyiú ñá túú cùu iní ñáhá xii-í te ñá túú tñiⁿ-yu tnúhu càháⁿ-í. Te nchaa tnúhu ní cáháⁿ-í ní xíndédóho-ndo chí Tătà-í Yaá ní tendaha ñàha xii-í véxi-í ñuyíú-a ní dácáhu iní ñáhá-gã xii-í, te ñá díú mèe-í ní càhu iní-í tnúhu cáháⁿ-í.

25 'Duha ndùu tnúhu càháⁿ-í núú-ndó vitna ndecu ndihí ñaha-gá-í xii-ndo. 26 Dico Yá Ndióxi tendaha-gã Espiritú-gá quixi-xi cada-xi núú-í taxi-xi tnúhu ndee iní xii-ndo, te ñu-xi chindee ñàha-xi xii-ndo te danèhé ñáhá-xí xii-ndo nchaa sá cúmăní quini-ndó, te ñu-ni-xi dandacu iní ñáhá-xí xii-ndo nchaa nacuaá ní cáháⁿ-í.

27 "Te yúhú chindee chituu ñaha-í xii-ndo io váha cuu iní-ndó cundecu-ndo datná yúhú io váha cùu iní-í ndécú-í, chí sa ta cùyatni nduu núhú-í. Te yúhú càhí tnúhu ndáá-í sá chíndee ñaha-í xii-ndo, te vá cadà-í datná quidé ñáyiú ñuhu ichi cuehé ichi duha. Te ni vâ ndihú iní-ndó, te ni vâ yúhú-ndó. 28 Te sa ní xíndédóho-ndo ñí cáháⁿ-í sá núhú-í, te quixi tucu-í cundecu ndihí ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tnúhu sá núhú-í núú ndécú Tătà-í, te cudí iní-ndó ní cùu,

chí io càhnu cuu-gá dàcúúxí yúhú. 29 Te sa ní cachí tnúhu-í sá núhú-í, te na sàá òré núhú-í núú ndécú Tătà-í, te quindáá iní ñáhá-ndó xii-í.

30 "Te ñá túú-gã vâi tnúhu ndatnúhu ndihí ñaha-í xii-ndo chí sa véxi yucu ñávâha sá táxi tnùní ñuyíú-a, dico vá táxi tnùní ñáhá-xí xii yúhú. 31 Te cada-í nchaa nacuaá ní táuchíúⁿ Tătà-í cuendá cutnùní iní nchaa ñáyiú ñuyíú-a sá yúhú io cùu iní-í-gá. Te vitna chí ndácuñí ná quihíⁿ-ó — càhí-gá xáhaⁿ-gã xii-güedé.

15

Cuendá yoho yàha stilé ndihí nchaa dité-xi

1 Te ní xáhaⁿ tùcu-gá xii-güedé:

—Yúhú cùu-í dàtná yoho yàha stilé, te Tătà-í cúú-gã dàtná ìⁿ téé xito yoho yaha stilé-áⁿ. 2 Te nchaa ñáyiú ní sándáá iní ñáhá xii-í cúú-yu dàtná dité nchaa yoho yàha stilé-áⁿ. Te téé xito yoho yaha stilé-áⁿ xèhndé-dé nchaa dité-xi sá ñá cuini-gá-xi cuuⁿ ndéhé-xi, te ndàda ndoo-dé nchaa dité-xi sá cúúⁿ cuendá cuuⁿ-gá. 3 Te ducaⁿ sãtnahá-xi cùu nchohó, chí sa ní xócuñí nchaa sá cuèhé sá dúhá ndècu ndihí-ndo, chí ní sándáá iní-ndó tnúhu ní cáháⁿ-í. 4 Te cuu ìⁿnuu-ndo cundecu ndihí ñaha-ndo xii-í, te núu ducaⁿ na càda-ndo, te cundecu ndihí ñaha-í xii-ndo. Chí núu ìⁿ yutnu vídí ná quèndéè dité-xi, te dité-xi sá ñí quèndéé-áⁿ vâ cúúⁿ-gã sávidí-xi chí duuⁿ duuⁿ ní xíta-xi. Ducaⁿ sãtnahá-xi cùu nchohó chí vá

ndácú-ndó càda-ndo chiuⁿ-í, te núu vá cùndècu ndihì ñaha-í xii-ndo.

⁵ 'Chì yúhú cùu-í dàtná yutnu vídí-áⁿ, te nchòhó cùu-ndó dàtná nchaa dité-xi. Te nchaa ñáyiu cùu ìⁿnuu ndihì ñaha xii-í, te ndècu ndihì-í-yu, te ndácú-yu quidé-yu chi^uⁿ-í. Te núu vá cùu ìⁿnuu ndihì ñahá-yu xii-í, te vá ndácú-yu cadá-yu chi^uⁿ-í. ⁶ Te nchaa ñáyiu vá cùu ìⁿnuu ndihì ñaha xii-í, te yáha-yu dàtná yáha ìⁿ dité yutnu vídí sá ñà túú cùuⁿ sávidí-xi, chi xèhndé-güedé yìchí-xi, te sàhmi-güedé.

⁷ 'Cuu ìⁿnuu ndihì ñaha-ndo xii-í, te vá nàcuànaa-ndo nacuáa ní cáháⁿ-í. Te núu ducaⁿ na càda-ndo, te nàni cuìní-ndó cǎcáⁿ-ndó nùu-í te taxi-í. ⁸ Te núu nchòhó ná cadá vǎha-ndo cùndecu-ndo, te ío cada cǎhnu-ndo Tàtá-í, te ducaⁿ cùtnumí sá ndísá cùu-ndo cue téé ní chitnahá ñáhá xii-í. ⁹ Te yúhú ío cùu iní ñáhà-í xii-ndo dàtná cùu iní ñáhá Yá Ndiòxí xii-í. Te cada-ni-ndo mée-ni sá vǎha cuèndá cudí^í iní ñáhá-gǎ-í xii-ndo. ¹⁰ Te núu na quìndáa iní-ndó càda-ndo nchaa nacuáa ní cáháⁿ-í, te ío cuu iní ñáhà-í xii-ndo, chi yúhú ducaⁿ ío sàndáa iní-í Tàtá-í quidé-í nchaa nàcuáa ní cáháⁿ-gá, te xiǎⁿ nùu ío cùu iní ñáhá-gá xii-í.

¹¹ 'Duha càháⁿ-í núu-ndó cuèndá cudí^í ndisa iní-ndó dàtná cudí^í iní mée-í. ¹² Te duha ndùu tnúhu càháⁿ-í cuèndá sá cùu iní tnáhá-ndó ìⁿ ìⁿ-ndo datná cùu iní ñáhà-í xii-ndo. ¹³ Te núu ní xíhó sá cùu-xí ìⁿ téé ío

váha tnáhá tnúhu ndihì-o, te xiǎⁿ cutnùnì iní ñáyiu sá ío cùu iní-ó-dě. ¹⁴ Te nchòhó cuu-ndo cuè téé ío váha tnáhá tnúhu ndihì-í te núu na càda-ndo nchaa nacuáa càháⁿ-í. ¹⁵ Te vá cǎñaha-gǎ-í xii-ndo sá cùu-ndó cuè téé xìnu cuechi núu-í, chi ni ìⁿ téé xìnu cuechi ñá túú xìní-dé ná quidé pàtróoⁿ-dè. Te yúhú cǎchí-í xii-ndo sá cùu-ndó cuè téé ío váha tnáhá tnúhu ndihì-í, chi ní cachí tnúhu-í nchaa nàcuáa ní cáháⁿ Tàtá-í. ¹⁶ Te ñá díú nchòhó ní càháⁿ ñáhá-ndó xii yúhú, chi yúhú ní cáháⁿ ñáhà-í xii-ndo. Te yúhú tauchìuⁿ-í quíhìⁿ-ndó càda-ndo nchaa nacuáa ní cáháⁿ-í, chi tnúhu-áⁿ vǎ ndihì ñìhnu-xi. Te ducaⁿ nchaa sá ná cǎcáⁿ-ndó nùu Tàtá-í Yá Ndiòxí te taxi-gá, te núu na quìndáa iní ñáhá-ndó xii-í. ¹⁷ Te yúhú càháⁿ-í dóho-ndo sá cùu iní tnáhá-ndó ìⁿ ìⁿ-ndo.

Ñáyiu ndècu ichi cuehé ichi duha cùu úhú iní-yu Jèsús ndihì nchaa ñáyiu sàndáa iní tnúhu-gá

¹⁸ 'Te nchaa ñáyiu ndècu ichi cuehé ichi duha ñá cùu quìní ñáhà-yu xii-ndo, te sa nàha-ndo sá dǐhna-gá yúhú ní ngúita-yu ducaⁿ ñà cùu quìní ñáhà-yu xii-í. ¹⁹ Te núu dǐcò tnáhá nchòhó ndécú-ndó ichi cuehé ichi duha ña, te cuu iní ñáhà-yu xii-ndo dàtná cùu iní tnáhà-yu ndi mée-yu ni cùu. Te yúhú ní nanducu ñìhnu ñaha-í xii-ndo tnùú ñáyiu ndècu ichi cuehé ichi duha, núu xiǎⁿ ío cùu úhú iní ñáhà-yu xii-ndo cuèndá sá ñà túú-gá chítnáhà-ndó-yu. ²⁰ Te dandacu iní-ndó nàcuáa

ní cáháⁿ-í sá nì ìⁿ téé xìnú cuechi ñá túú cùnúu-dé dàcúúxí patróóⁿ-dë. Te yúhú cúú úhú iní ñáhă-yu, te ði-u-ni ducaⁿ càda ñahá-yu xii nchòhó. Te núu ðicó ní tñiⁿ-yu tnúhu ní cáháⁿ-í ñá, te ði-u-ni ducaⁿ tñiⁿ-yu tnúhu cáháⁿ-ndó nũ-yu ni cùu. ²¹ Te ducaⁿ càda ñahá-yu xii-ndo sã cuendá-í, chi ñá xìní-yu Tătà-í Yaá ní tendaha ñàha xii-í véxi-í ñuyíú-a.

²² Te vaa vá cundècu cuéchi-yu ni cùu, te núu ñá túú yúhú ní cáháⁿ-í núú-yu, te vitna vá cúú tnàhí cachí-yu sá ñà túú cuéchi-yu. ²³ Chi nchaa ñáyiu cùu úhú iní ñáhá xii-í, te cùu úhú iní-yu tnàhá Tătà-í. ²⁴ Te vaa ni ìⁿ cuéchi-yu vá cundècu ni cuu, te núu ðicó ñá túú ní xìní-yu nchaa sá ñi quide-í sá vã yoo tnàhí ndàcu cada. Te cuéi ní xìní-yu dico dai cùu úhú iní ñáhă-yu xii-í ndihi Tătà-í. ²⁵ Te duha quidé-yu chi dacuítí quèe ndáá-xi nàcuáa yòdo tnuní núú tùtú Yã Ndiöxí sá dácuahá-yu, chi càchí-xi sá ñà túú ñã cuéchi-í te cuu úhú iní ñáhă-yu xii-í.

²⁶ Te Espiritú Tătà-í Dútú Ndiöxí sá ndécú nũ-gã tendaha-í quixi chindee ñàha-xi xii-ndo, te canu ichi ñàha-xi nàcuáa cundecu-ndo, te Espiritú-áⁿ cáháⁿ ndáá-xi cuendá cutnùní iní nchaa ñáyiu yoo cùu-í. ²⁷ Te nchòhó tnàhá-ndó cáháⁿ váha-ndo cuendá-í cuendá cutnùní iní-yu yoo cùu-í, chi ñàha-ndo sá ndèé òré ní ngúita-í quidé-í chiúⁿ Tătà-í ní chitnahá

ñáhá-ndó xii-í —càchí-gá xáhaⁿ-gã xii-güedé.

16

¹ Te ní xáhaⁿ tùcu-gá xii-güedé:

—Duha càháⁿ-í cuendá ná nanchòcáva iní-ndó nũhú-ndó ìchi cuehé ichi duha. ² Chi vá dáñá-gã-güedé quihu-ndo venúhu, te ni vã cúú-gã quiní ndeé ñáhá-güedé xii-ndo. Te sáá ìⁿ nduu te cahni ñàha-güedé xii-ndo, te xiãⁿ cuu cahaⁿ-güedé sá quidé-güedé chiúⁿ Yã Ndiöxí. ³ Te ducaⁿ càda-güedé chi ñá túú xìní-güedé Tătà-í, te ni ñà túú xìní ñáhá-güedé xii yúhú. ⁴ Te duha nduu tnúhu càháⁿ-í núú-ndó, chi na sáá òré te ndacu iní-ndó nchaa tnúhu sá sà ní cachí tnúhu-í xii-ndo nàcuáa cada ñàha-güedé xii-í.

Nchaa chiúⁿ quide Espiritú Yã Ndiöxí

Te ñá túú ní càchí tnúhu-í xii-ndo ndèé díhna chi ndècu ndihi ñàha-í xii-ndo. ⁵ Dico vitna sa ta cüyatni nduu nũhú-í núú ndécú Tătà-í Yaá ní tendaha ñàha xii-í véxi-í ñuyíú-a. Te ni ìⁿ nchòhó ñá túú xìcáⁿ tnúhú-ndó nũ-í nũu ndèé quihíⁿ-í. ⁶ Chi mee-ni sã ndihú iní-ndó sã ðúcáⁿ ní cáháⁿ-í. ⁷ Te na càchí tnúhu ndáá-í xii-ndo sã vãha-gá sá cúú-xí-ndó nũu nũhú-í, chi tendaha-í Espiritú Yã Ndiöxí quixi cundecu ndihi-ndo chindee ñàha-xi, chi núu vá nũhú-í te vá quixí Espiritú-gá cundecu ndihi-ndo chindee ñàha-xi xii-ndo. ⁸ Te na quixi Espiritú-gá te dandixi túu-xi

iní nchaa ñáyi ndècu ichi cuehé ichi duha sá ñà túú quide váha-yu. Te dacàhu iní ñáhá-xí sã ndécú ñⁿ ichi váha ichi ndáá. Te Espíritú-gá-áⁿ cada-xi nàcuáa cutnùní iní-yu sá Yã Ndiõxí cada ndáá-gá cuéchi-yu. ⁹ Te ducaⁿ te cutnùní iní-yu sá ndécú cuéchi-yu, chi ñã túú sãndáá iní ñáhã-yu xii-í. ¹⁰ Te ducaⁿ te cutnùní iní-yu nàcuáa ndùu cuendá ichi váha ichi ndáá, chi yúhú núhú-í núú ndécú Tãtã-í, te nchòhó vá quini ñáhá-gã-ndó. ¹¹ Te ducaⁿ te cutnùní iní-yu sá Yã Ndiõxí cada ndáá-gá cuéchi-yu, chi sa ní cáháⁿ-gá sá yúcu ñávãha sá táxí tnùnì ñuyíú-a quíhíⁿ-xi núú ùhú núú ndàhú.

¹² Te vai-gá tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndedóho-ndo nchaa vitna. ¹³ Te na quixi Espíritú Yã Ndiõxí, Espíritú càháⁿ ndáá cuiti, te Espíritú-áⁿ danèhé ñáhá-xí nchaa tnúhu váha tnúhu ndáá. Te vá dacàhu iní ñáhá-xí xii-ndo sá vèxi iní mée-xí chi dacàhu iní ñáhá-xí nchaa sá càháⁿ Yã Ndiõxí, te cachí tnúhu-xi nchaa nàcuáa cada-xi ndéé núú cuaháⁿ núú vèxi-gá. ¹⁴ Te Espíritú-gá-áⁿ cada càhnu ñaha-xi xii yúhú chi ndècu ndihi-xi tnúhu-í, te danèhé ñáhá-xí xii-ndo. ¹⁵ Te nchaa sá ndécú ndihi Tãtã-í ndécú ndihi-í tnàhá-í, núú xíãⁿ cachí-í sá Espíritú-gá danèhé ñáhá-xí nchaa tnúhu-í xii-ndo.

Nchaa ñáyi ndihú iní-xi nduu díí iní-yu na quixi tucu Jesús

¹⁶ Te ñⁿ úú-nã nduu ndècu-í te vá quini ñáhá-gã-ndó xii-í, dico núú sàcú-ni nduu te quini ñáhá tucu-ndo xii-í, te ducaⁿ chi núhú-í núú ndécú Tãtã-í —càchí-gá xáhaⁿ-gã xii-güedé.

¹⁷ Te sá ducáⁿ nĩ cáháⁿ-gá nõu ní ngüita ñⁿ úú cue tée xica cuu ndihi-gá xitnàha-güedé:

—¿Nása ndùu-tu tnúhu càháⁿ-gá sá càchí-gá sá ñⁿ úú-nã nduu ndècu-gá te vá quini-gá-ó-gã, dico núú sàcú-ni nduu te quini tucu-o-gã-í?, chi núhú-gá núú ndécú Tãtã-gã —càchí-güedé xitnàha-güedé.

¹⁸ Te xitnàha tucu-güedé:

—¿Nása cuaháⁿ-tu tnúhu-ãⁿ sá sàcú-ni nduu? Te ñã tècú tnùnì-ó nása ndùu tnúhu càháⁿ-gá —càchí-güedé xitnàha-güedé.

¹⁹ Te Jèsús ní cutnùnì iní-gá sá cuini-güedé cacáⁿ tnúhú-güedé núú-gã nása ndùu tnúhu ní cáháⁿ-gá, núú ní xáhaⁿ-gã:

—Cuendá sá nĩ cachí-í sá ñⁿ úú-nã nduu ndècu-í te vá quini ñáhá-gã-ndó xii-í, dico núú sàcú-ni nduu te quini ñáhá tucu-ndo xii-í ní cachí-í, ¿xíãⁿ ndúcú tnúhu núú tnàhá-ndó-ãⁿ? —càchí-gá xáhaⁿ-gã xii-güedé.

²⁰ Te ní xáhaⁿ tucu-gá:

—Te na càchí tnúhu ndáá-í xii-ndo sã nchòhó ndihú víhí iní-ndó te ndáhyú-ndó, dico nchaa ñáyi ndècu ichi cuehé ichi duha chi da cudíí iní-yu. Dico nchòhó ñáyi ndáhyú chi sáá nduu te nduu díí iní-ndó. ²¹ Chi dàtná

cuini-ndó cùu ìñ ñadihí ñaha ní tnahá nduu cacu déhe-xi vai sani ini-aⁿ sá quidé úhú ñáhá-xí. Dico na yáha cacu déhe-aⁿ, te ñá túú-gă ndácú ini-aⁿ sá ní quide úhú ñáhá-xí xi-aⁿ chi mee-nă sá cudiñ ini-aⁿ déhe-aⁿ.²² Ducaⁿ sâtnahá-xi cùu nchohó vitna chi ndihú ini-ndó să nùhú-í, dico quixi tucu-í quixi coto ñaha-í xii-ndo, te òré-áⁿ te cudíñ ndisa ini-ndó, te vá yôo ìñ-gă dandihú ini ñáhá xi-ndo davá-áⁿ.

²³ Te davá-áⁿ ñà túú-gă ná nducu tñuhu-ndo nñú-í. Te na cachi tñuhu ndáá-í xii-ndo sá Tătà-í taxi-gă nchaa sá ná cacáⁿ-ndó núú-gă nñu na quindáá ini ñáhá-ndó xi-í.²⁴ Te ndéé vitna vátá dúcáⁿ-gă cada-ndo cacáⁿ-ndó. Dico cacáⁿ-ndó núú-gă nñu ná cuini-ndó te taxi-gă cuendá cudíñ ndisa ini-ndó —cachi-gă xáhaⁿ-gă xii-güedé.

Xitohó Jesucristú ní cunuu tñuhu-gă núu yucu ñáváha

²⁵ Te xáhaⁿ tucu-gă xii-güedé:

—Mee-ni ní chidáhu ndodo-í tñuhu ní cáháⁿ-í núú-ndó, dico sáá nduu te vá chidáhu-gă-í tñuhu cáháⁿ-í, chi cáháⁿ ndáá-na-í cuendá Tătà-í.²⁶ Te davá-áⁿ cacáⁿ-ndó núú Tătà-í nñu ná cuini-ndó te taxi-gă, te núu na quindáá ini ñáhá-ndó xi yúhú Déhe-gă. Te ñá túú-gă xini ñuhu-xi sá yúhú cacáⁿ-í núú-gă cuendá-ndó chi cacáⁿ méé-nă-ndó.²⁷ Chi mee Tătà-í ío cùu ini ñáhá-gă xii-ndo cuendá cúú ini ñáhá-ndó xi-í, te sândáá

ini-ndó să núú-gă ní quee-í véxi-í.²⁸ Te yúhú ní quee-í núú Tătà-í véxi-í ñuyú-a, te vitna dândóo-í ñuyú-a te núhú-í núú ndécú-gă —cachi-gă xáhaⁿ-gă xii-güedé.

²⁹ Te ní xáhaⁿ cuè téé xica cuu ndihi-gă:

—Vitna chi cáháⁿ ndáá-nă-n, ñá túú-gă chidáhu-n tñuhu cáhá-n.³⁰ Te vitna ní xini-ndí sá ío váha cùtnuní ini-n ncháa nacuaa cùu, te cùtnuní ini-n ncháa nacuaa sàni ini nchaa ñáyiu. Te ñá túú xini ñuhu-xi nágá nducu tñuhu-yu núú-n chi nchaa sa ní dátúu-n nñú-yu. Te xíáⁿ nñu sândáá ini-ndí sá núú Yă Ndióxi ní quee-n véxi-n —cachi-güedé xáhaⁿ-güedé xii-gă.

³¹ Te ní xáhaⁿ Jèsús:

—¿Te vitna sândáá ini-ndó-áⁿ?³² Vitna ní sáá nduu ní sáá òré sá ncháa nchóhó cutenuu-ndo cãa ìñⁿ caa úu cuu-ndo, te dândóo mee ñaha-ndo xii-í. Dico ñá díu mée dii-í quendóo chi ndècu ndihi-í Tătà-í.³³ Duha cáháⁿ-í cuendá cuu váha ini-ndó cùndecu-ndo, chi ñuyú-a cuu úhú ini ñáhá-yu xii-ndo, dico ni vă yúhú-ndó chi yúhú sa ní dáquéé tñù-í nchaa sá cuèhé sá dúhá ío ñuyú-a —cachi-gă xáhaⁿ-gă xii-güedé.

17

Jèsús xicáⁿ táhú-gă núu Tátá-gă Dútú Ndióxi cuendá cue téé xica cuu ndihi-gă

¹ Te sátá dúcáⁿ ní cáháⁿ Jèsús te ní ndacoto-gă andiu, te ní xáhaⁿ-gă xii Tátá-gă Dútú Ndióxi:

—Táu, vitna ní sáá nduu càda cahnu ñaha-n xii-í cuendá ducaⁿ càda cahnu ñaha-í xii-n. ² Chi mee-n ní cachí-n sá táxi tnùn-í nchaa ñáyiú ñuyú-a, te dácacu nihnu-í nchaa ñáyiú ní cachí-n nàníhí tàhú. ³ Te cundecu ndíhi-ò-yu ní caa ní quíhíⁿ, chi sàndáá iní ñáhã-yu sá ñíⁿ dìi díi-ni yòhó cúu-n Ndiòxí ndisa, te ducaⁿ xini ñáhã-yu xii yúhú Jesucristú téé ní tendaha-n vëxi ñuyú-a.

⁴ Te yúhú ní chiñuhu ñaha-í xii-n ñuyú-a, te ní xínu chiúⁿ ní cachí-n càda-í. ⁵ Táu, vitna na nàsáá-í núu-n te cada cahnu ñaha-n xii-í dàtná ní xóo cada cahnu ñaha-n xii-í ndéé cútñahá vátá ngãva-gá ñuyú.

⁶ Te nchaa ñáyiú ní nanducu nihnu-n tnuú nchaa ñáyiú ndècu ichi cuehé ichi duha, ní taxi cuendá-n-yu, te ní xáhaⁿ-í xii-yu yoo cùu-n. Te cuendá-n cùu-yu, te ní taxi cuendá-n-yu, te ní sàndáá iní-yu tnúhu-n. ⁷ Te vitna ní cutnùn-í iní-yu sá ncháá tnúhu ndècu ndíhi-í díu-ni mee-n ní taxi-n. ⁸ Te ní dánèhé-í-yu nchaa tnúhu sá ní dánèhé ñáhã-n xii-í, te ní sàndáá iní-yu. Te ní cutnùn-í iní-yu sá núu-n ní quee-í véxi-í, te ní sàndáá iní-yu sá yòhó ní tendaha ñaha-n xii-í véxi-í ñuyú-a.

⁹ Te yúhú càháⁿ ndáhú-í núu-n cuendá nchaa ñáyiú ní taxi cuendá-n. Te ñá túú càháⁿ ndáhú-í núu-n cuendá ñáyiú ndècu ichi cuehé ichi duha, chi cuendá nchaa ñáyiú ní taxi cuendá-n càháⁿ-í, chi cuendá-n cùu-yu. ¹⁰ Te nchaa sá cúu cuendá-í cúu-xí

cuendá-n, te nchaa sá cúu cuendá-n cùu-xi cuendá-í tnáhá-í. Te xíquide cahnu ñahá-yu xii-í.

¹¹ Te yúhú vá cùndècu-gá-í ñuyú-a, dico mèe-yu chi cundecu-ní-yu, te yúhú ndixi-í núu ndécú-n. Táu, yòhó ío yiñuhu ndecu-n, te yúhú càháⁿ ndáhú-í núu-n sá ní yùhu ní iní-n còto-n nchaa ñáyiú ní taxi cuendá-n, ñáyiú ní sàndáá iní tnúhu-í cuendá sá ñíⁿ-ní ìchi cuú-yu cundecú-yu dàtná ñíⁿ-ní cùu nchoo. ¹² Chi òré ndécú-í ndíhi-yu ñuyú-a ní xito-í-yu nàcuáa cùu iní-n, te ní ñíⁿ-yu ñá túú ní xíta nihnu, chi ñíⁿ-ni té Jùdás ní xíta nihnu tnàhí-dé, te ducaⁿ ní cuu cuendá sá ní quee ndáá-xi nàcuáa yòdo tnuní núu tütú-n.

¹³ Te vitna sa ndixi-í núu ndécú-n, dico nini ndècu-gá-í ñuyú-a duha càháⁿ-í cuendá sá cúu ñí iní-yu dàtná cúu ñí iní mèe-í. ¹⁴ Te yúhú ní dánèhé-í-yu tnúhu-n, dico nchaa ñáyiú ndècu ichi cuehé ichi duha cùu úhú iní ñáhã-yu xii-yu cuendá sá ñá túú-gã ndécú-yu ichi cuehé ichi duha-áⁿ dàtná yúhú ñá túú ndècu-í ichi-áⁿ. ¹⁵ Te ñá túú càhí-í sá xócàn-í-yu ñuyú-a, dico càháⁿ ndáhú-í núu-n sá dácacu nihnú-n-yu núu yucu ñávãha. ¹⁶ Te yúhú ñá túú ndècu-í ichi cuehé ichi duha, te ducaⁿ mèe-yu ñá túú-gã ndécú-yu ichi cuehé ichi duha. ¹⁷ Te ío na cùndecu yihi ñuhu-gá-yu núu-n dàcuahá-yu tnúhu-n, chi cùu-xi ñíⁿ tnúhu ndáá. ¹⁸ Te

dàtná ní tendaha ñàha-n xii yúhú véxi-í tnuú nchaa ñáyiu ndècu ichi cuehé ichi duha, ducaⁿ càda-í tendaha-í-yu quíhíⁿ-yu cáháⁿ-yu tnúhu-í tnuú nchaa ñáyiu ndècu ichi cuehé ichi duha. ¹⁹ Te yúhú ndécú yíñuhu-í núú-n, te cada ñàha-n xii-í nàcuáa cùu iní-n sã cuendá-yu, te ducaⁿ te cundecu yíñuhú-yu núú-n dàcuahá-yu tnúhu-n.

²⁰ Te ñá díú cuendá mee-ni ñáyiu sa ní sándáá iní-xi cáháⁿ ndàhú-í núú-n, chi tnáhá cuendá nchaa ñáyiu na quíndáá iní ñáhá xii-í ndéé idá-gá nõu na cùndedóho-yu tnúhu cáháⁿ ñáyiu na tëndaha-í. ²¹ Te xicáⁿ táhù-í núú-n sã ncháá-yu ñⁿ-nã ichi na cùu-yu, te ñⁿ-nã cani iní ndihí ñáhá-yu xii-o dàtná cúu nchòo ñⁿ-ni cuu-o. Te ducaⁿ ñⁿ-ná cuu-o ndihí-yu cuendá sá ná quíndáá iní nchaa ñáyiu ndècu ichi cuehé ichi duha sá díú-n ñ tendaha ñàha-n xii-í véxi-í ñuyíú-a. ²² Te nchaa sá vãha ní taxi-n ndècu ndihí-í ní dãnèhé-í-yu cuendá sá ñⁿ-nã cuú-yu cundecú-yu dàtná ndécú nchòo. ²³ Te yúhú cundecu ndihí-í-yu, te yòhó cundecu ndihí ñàha-n xii yúhú cuendá ñⁿ-nã cuu ndisá-yu cundecú-yu. Te ducaⁿ te cutnùní iní nchaa ñáyiu ndècu ichi cuehé ichi duha sá díú mèe-n ní tendaha ñàha-n xii-í véxi-í ñuyíú-a, te cùu iní-n-yu dàtná cúu iní ñáhá-n xii yúhú.

²⁴ Táu, mee-n ñ taxi cuendá-n-yu, te cuíní-í sá

cúndecú-yu núú cùndecu-í cuendá quini-yu sá quidé càhnu ñàha-n xii-í chi ducaⁿ-ni cùu iní ñáhá-n xii yúhú ndéé cùtnáhá vátá ngãva-gá ñuyíú. ²⁵ Táu, yòhó ío yíñuhu ndecu-n. Te ñáyiu ndècu ichi cuehé ichi duha ñá túú xini ñáhá-yu xii-n, dico yúhú chi xini ñáhá-í xii-n, dico ñáyiu ní sándáá iní ñáhá xii-í sa xini-yu sá díú-n ñ tendaha ñàha-n xii-í véxi-í ñuyíú-a. ²⁶ Te sa xãhaⁿ-í xii-yu yoo cùu-n, te diu-ni ducaⁿ càda-í cuendá cuu iní tnáhá-yu dàtná cúu iní ñáhá-n xii-í, te ducaⁿ cùndecu-í ndihí-yu —càchí-gá xáhaⁿ-gã xii Tãtã-gã Dútú Ndiõxí.

18

Ní tñi-güedé Jèsús ndécá ñàha-güedé cuaháⁿ

(Mt. 26:47-56; Mr. 14:43-50; Lc. 22:47-53)

¹ Te sátá dúcáⁿ ñ cáháⁿ Jèsús, te ní quee-gá ndihí cue téé xica cuu ndihí-gá cuaháⁿ-güedé ndàa ingá xio yuhu yùu Cèdrón. Te yacáⁿ cáá ñⁿ lahuertá, te xití lahuertá-áⁿ cuãnguihu Jèsús ndihí cue téé xica cuu ndihí-gá. ² Te té Jüdás déhe té Xímú Iscarioté téé ní sáha cuendá ñáhá xii-gá núú cué téé cùu úhú iní ñáhá sa xini-dé lahuertá-áⁿ chi titní xito ní sáháⁿ Jèsús ndihí-güedé xián. ³ Núu ndáá ichi xián ñ sáá té Jüdás ndihí vai sandadú, ndihí cue téé quide cuendá veñúhu ní techìuⁿ ñàha cue dútú cùnuu, ndihí cue téé cùu fariséú. Te xínehe-güedé

machití ndihi ñⁿ úú-gá sá dééⁿ, te yòtnúú-güedé lintérná ndihi iti ní sáá. ⁴ Te Jèsús sa nàha-gá nchaa nàcuáa cada ñaha-güedé xii-gá nñu ní sáháⁿ tuha ñaha-gã xii-güedé, te ní xáhaⁿ-gã:

—¿Yoo nànducu-ndo? —
cachí-gá xáhaⁿ-gã xii-güedé.

⁵ Te ní xáhaⁿ-güedé:

—Jèsús téé ñuú Nazàrét nánducu-ndí —cachí-güedé xáhaⁿ-güedé xii-gá.

Te ní xáhaⁿ Jèsús:

—Yúhú ducaⁿ nàni-í, te náu-í ndécú-á te núu yúhú nánducu-ndo —cachí-gá xáhaⁿ-gã xii-güedé.

Te tnàhá té Jüdás téé ní sáha cuendá ñáhá xii-gá ndihi-güedé. ⁶ Te òré ní xáhaⁿ Jèsús sá díú-gã cúu tée nànducu-güedé, te ní nacaca dùma-güedé te ní nduá-güedé ndéé ñuhu. ⁷ Te ní xicáⁿ tnúhú tucu Jesús núú-güedé yoo nànducu-güedé. Te ní xáhaⁿ tucu-güedé sá Jèsús téé ñuú Nazàrét nánducu-güedé, ⁸ núu ní xáhaⁿ-nã Jèsús:

—Sa ní cáháⁿ-í sá díú yúhú ducaⁿ nàni-í, te núu yúhú nánducu-ndo, te dañà-ndo nchaa cue téé iha na nùhú-güedé —cachí-gá xáhaⁿ-gã xii-güedé.

⁹ Duha ní cuu chi ní quee ndáá-xi nàcuáa ní cáháⁿ méé Jèsús chi ní cachí-gá sá ncháá ñáyiú ní sáha cuendá ñáhá Yã Ndiõxí cundecu ndihi-gá vá cuíta nihnú-yu. ¹⁰ Te té Xímú, àdi Pelú chi úú dùu-dé, néhé-dé ñⁿ machití, te ní tava-dé machití-áⁿ ññi-xi te ní xehndé-dé lóho xio cùha ñⁿ téé

nàni Malcú ní quéndeé duuⁿ. Te téé-áⁿ xínú cuèchi-dé núú dùtú cúnúu-gá. ¹¹ Te ní xáhaⁿ Jèsús xii té Pèlú:

—Nataxúha machití-áⁿ núú ñúhú-xí, chi dacutíí sá ndóhò-í nàcuáa ní cachí Tãtà-í cunduu —cachí-gá xáhaⁿ-gã xii-dé.

Jèsús ndécú-gã núú dùtú cúnúu-gá

(Mt. 26:57-58; Mr. 14:53-54; Lc. 22:54)

¹² Te cue sandàdú ndihi cue téé cúnúu-gá núú-güedé, ndihi cue téé quide cuendá veñúhu ní tnñ-güedé Jèsús, te ní dácútú ñaha-güedé.

¹³ Te ndèca ñaha-güedé xii-gá cuáháⁿ núú ndécú tē Ànás, te té Ànás-áⁿ cúu-dé tãtã ñadihí té Caifás. Te té Caifás-áⁿ nñ cuu-dé dùtú cúnúu-gá cuíá-ãⁿ. ¹⁴ Te diu-ni téé-áⁿ nñ xáhaⁿ-dē xii ñáyiú isràél sá vãha-gá sá ññ-ní tēe na cúu-dé sá cuendá-yu ncháá-yu.

Té Pèlú càháⁿ-dé núú ñáyiú sá ñà túú xini-dé Jèsús

(Mt. 26:69-70; Mr. 14:66-68; Lc. 22:55-57)

¹⁵ Te té Pèlú, àdi Xímú chi úú diu-dé, ndihi ingá tucu-dé nàcuáa xica cuu ndihi-güedé Jèsús nchicúⁿ ñáhá-güedé xii-gá cuáháⁿ. Te ññ téé-áⁿ xini tnáhá-dé ndihi dùtú cúnúu-áⁿ núú nchicúⁿ-dé tnàhá-dé Jèsús cuánguihu ndéé núú cáá vèhe téé cúnúu-áⁿ. ¹⁶ Dico té Pèlú ní ndóo-dé yuyèhe ndaa quehé, núu ní ndee téé ndihi té Pèlú-áⁿ nñ cáháⁿ ndihi-dé ñaha ndéé yuyèhe, te ndèca-dé té Pèlú cuánguihu. ¹⁷ Te ní xáhaⁿ ñaha ndéé yuyèhe-áⁿ xii té Pèlú:

—¿Náa ñá díú yòhó tnàhá-n xica cuu ndihi-n té ndèca-güedé cuánguihu-a? —cachí-aⁿ xáhaⁿ-aⁿ xii-dé.

Te ní xáhaⁿ tẽ Pèlú:

—Ñáhá, ñá túú tẽ-ãⁿ xícá cùu ndihi-ú —càchí-dé xáhaⁿ-dẽ xii-aⁿ.

¹⁸ Te ío víxiⁿ quide-xi núu cue tée xínu cuechi, ndihi cue tée quide cuendá veñúhu ní dátñahá-güedé ñuhú, te xínutnii teté-güedé ndihi té Pèlú.

Dútú cúnúu nducu tnúhu-dé núu Jèsús

(Mt. 26:59-66; Mr. 14:55-64; Lc. 22:66-71)

¹⁹ Te dútú cúnúu ní xícáⁿ tnúhú-dé núu Jèsús núu nándi cùu cue tée xica cuu ndihi-gá, te nándi sá dánèhé ñáhá-gá xii-güedé. ²⁰ Te ní xáhaⁿ-gã:

—Yúhú càháⁿ ndodo-í núu nchàa ñáyiu cuẽi xití veñúhu càhnu sá ío cúnúu, te cuẽi xití nchaa dava-gá veñúhu núu tàcá nchaa ñáyiu isràél ducaⁿ-ni dànehé-í-yu, te ñá túú dàyuhu càháⁿ-í. ²¹ Núu vá càcáⁿ tnúhú-n nùu-í. Càcáⁿ tnúhú nùu nchàa ñáyiu sàcúndedóho tnúhu càháⁿ-í, te na càháⁿ-yu núu nása ndùu tnúhu càháⁿ-í chi xini-yu —càchí-gá xáhaⁿ-gã xii-dé.

²² Te sá dúcáⁿ ñi càháⁿ Jèsús núu ñiⁿ tée quide cuendá veñúhu nùtnii-dé tnàhá-dé te ní caní-dé ñiⁿ déhndé núu-gã. Te ní xáhaⁿ-dẽ:

—¿Ná cuendá ducaⁿ càháⁿ-n nùú dútú cúnúu-i? —cachí-dé xáhaⁿ-dẽ xii-gã.

²³ Te ní xáhaⁿ Jèsús xii-dé:

—Te núu nèhé ní càháⁿ-í te càháⁿ-n nása ndùu tnúhu ní càháⁿ-í, te yúhú càháⁿ váha-í

te ducaⁿ càniha-n —cachí-gá xáhaⁿ-gã xii-dé.

²⁴ Te ndùtu yoho-ni Jèsús ní dánùhú ñáhá tẽ Ànás xii-gã ndaha té Caifás dútú cúnúu-gã.

Té Pèlú càháⁿ tucu-dé núu ñáyiu sá ñá túú xini-dé Jèsús

(Mt. 26:71-75; Mr. 14:69-72; Lc. 22:58-62)

²⁵ Te té Pèlú nùtnii teté-ni-dé, te ní xáhaⁿ-güedé xii-dé:

—¿Náa ñá díú tnàhá yòhó xícá cùu ndihi té ndèca-ndí véxi-ãⁿ? —càchí-güedé xáhaⁿ-güedé xii-dé.

Te ní xáhaⁿ tẽ Pèlú:

—Ñáhá, ñá túú tẽ-áⁿ xícá cùu ndihi-ú —càchí-dé xáhaⁿ-dẽ xii-güedé.

²⁶ Te ñiⁿ ñaní tnàhá tẽ ní xehndé té Pèlú lóho-xi-áⁿ xínú cuèchi-dé tnàhá-dé núu dútú cúnúu. Te té-ãⁿ ñi xáhaⁿ-dẽ xii té Pèlú:

—¿Náa ñá díú tnàhá-n ndihi-n-dé ní xini ñáhà-í òré ní tñii-ndí-dé xití lahuertá? —càchí-dé xáhaⁿ-dẽ xii-dé.

²⁷ Te té Pèlú ní xáhaⁿ tucu-dé sá ñá díú-dẽ, te òré-áⁿ ñi cana ñiⁿ líhi.

Jèsús ndécú-gã núu tẽ Pilatú

(Mt. 27:1-2, 11-14; Mr. 15:1-5; Lc. 23:1-5)

²⁸ Te ní ndeñuhu-güedé Jèsús vehe té Caifás, te ndèca ñaha-güedé xii-gã cuáháⁿ vechiúⁿ tée cùu gobiernú. Te sa ta cùditó-ni-gã cuáháⁿ núu ñá ní cuini cue tée isràél quíhu-güedé xití vechiúⁿ tée cùu gobiernú-áⁿ. Te núu ñi quíhu-güedé vechiúⁿ-áⁿ ñá, te vá cúu-gã quíhu-güedé cudini-güedé vico pascuá

ní cùu chi ducaⁿ tnàhí quide-güedé. ²⁹ Núu té Pilatú té cùu gobiernú ní quee-dé vechiⁿ-dé ní cáháⁿ ndihí ñaha-dě xii-güedé, te ní xáhaⁿ-dě:

—¿Ná cuéchi ní quide té-e-a núu ndèca-ndo-dé véxi? — cächí-dé xáhaⁿ-dě xii-güedé.

³⁰ Te ní xáhaⁿ-güedé:

—Te núu dícó ñá túu cuéchi-dé-án te vá cándèca-ndí-dé quixi núu-n ní cùu — cächí-güedé xáhaⁿ-güedé xii-dé.

³¹ Te ní xáhaⁿ tucu té Pilatú xii-güedé:

—Chí cándèca-dé cuánùhú, te cada ndáá-ndó cuéchi-dé nàcuáa càa leí méé-ndó — cächí-dé xáhaⁿ-dě xii-güedé.

Te ní xáhaⁿ-güedé:

—Dico nchúhú ñáyiú isràél chi ñá túu dùcaⁿ taxi tnuní lèi sá cáhní-ndí — cächí-güedé xáhaⁿ-güedé xii-dé.

³² Te ducaⁿ ñí cuu chi dacuití ñí quee ndáá-xi nàcuáa ní cáháⁿ méé Jèsús cada-xi cuú-gá. ³³ Te cuándihu té Pilatú vechiⁿ-dé, te ní cana-dé Jèsús ní xicáⁿ tnúhú-dě núu-gá, te xáhaⁿ-dě:

—¿Yòhó yíndaha-n ñáyiú isràél-ǎn? — cächí-dé xáhaⁿ-dě xii-gá.

³⁴ Te ní xáhaⁿ Jèsús:

—¿Te xíǎn cáháⁿ-n sǎ vèxi iní méé-n, àdi ió ìⁿ ñáyiú ní cächí tnúhu xii-n cuèndá-í? — cächí-gá xáhaⁿ-gǎ xii-dé.

³⁵ Te ní xáhaⁿ tǎ Pilatú xii-gá:

—Ñá díú tǎe isràél cùu-í nǔu ducaⁿ cáháⁿ-n, chi cue ñaní tnáhá-n cuè tée isràél ndihí cue dútú cúnùu ní taxi cuèndá ñáhá-güedé xii-n iha. ¿Te ná ní

quide-n? — cächí-dé xáhaⁿ-dě xii-gá.

³⁶ Te ní xáhaⁿ Jèsús:

—Ñá díú tǎe ñuyíú-a cùu-í te ni ñá túu vèxi-í taxi tnuní-í ñuyíú-a, chi núu dícó iha taxi tnuní-í án te cue tée xica cuu ndihí-í nàá-güedé ndihí cue tée isràél cuèndá sá vǎ tníí ñaha-güedé xii-í ní cùu, dico ñá túu vèxi-í sá táxi tnuní-í ñuyíú-a — cächí-gá xáhaⁿ-gǎ xii-dé.

³⁷ Te ní xáhaⁿ tǎ Pilatú:

—¿Te tée yíndaha ñáyiú cùu-ó vání? — cächí-dé xáhaⁿ-dě xii-gá.

Te ní xáhaⁿ Jèsús:

—Te dàtná cächí-n-ǎn yíndaha ndisa-í ñáyiú, chi yúhú véxi-í ñuyíú-a te iha ní cacu-í te cáháⁿ-í mee-ni tnúhu ndáá. Te nchaa ñáyiú na cùdíí ìní-xi tnúhu ndáá, te tedóho-yu nchaa tnúhu cáháⁿ-í — cächí-gá xáhaⁿ-gǎ xii-dé.

³⁸ Te ní xáhaⁿ tǎ Pilatú:

—¿Te ná cúu-tu tnúhu ndáá-áiⁿ? — cächí-dé xáhaⁿ-dě xii-gá.

Cächí-güedé sá cáhní-güedé Jèsús

(Mt. 27:15-31; Mr. 15:6-20; Lc. 23:13-25)

Te sátá ñí yáha ní xicáⁿ tnúhú tǎ Pilatú núu Jèsús, te ní quee tucu-dé quehé, te xáhaⁿ-dě xii cue tée isràél:

—Ñá túu nǎ cuéchi té-e-a. ³⁹ Te váha-ni chi ducaⁿ tnàhí quide nchohó sá ndí tnahá nduu vico pascuá cuení-ndó sǎ dácacu-í ìⁿ tée yìhi vecaá. Te núu cuení-ndó te na dácacu-í tée yíndaha ñaha

xii-ndo —cachí-dé xǎhaⁿ-dě xii-güedé.

40 Te sá dúcáⁿ ní cáháⁿ-dé, núu nchaa-güedé níhi ní cáháⁿ-güedé, te xǎhaⁿ-güedé:

—¡Vá dácácu-n tǎe-áⁿ, té Barrábás dácácu-n! —càchí-güedé xǎhaⁿ-güedé xii-dé.

Te té Barrábás-áⁿ ní cuu-dé ìⁿ ñadúhú.

19

1 Te té Pilatú ní táuchíuⁿ-dē ní tñi ñaha cuè sandadú xii Jèsús, te ní caniha-güedé xii-gá ndihi ñi. 2 Te ñu-ni cue tǎe-áⁿ ní cadúha-güedé ìⁿ coróná iñu ní chihi-güedé díquí-gǎ, te ní dáquú nuu ñaha-güedé xii-gá ìⁿ dóó tícuèhé víhí. 3 Te ní sáháⁿ ndehe yatni-gá-güedé núú-gǎ, te ní xǎhaⁿ-güedé:

—¡Ío càhnu cuu yohó tǎe yindaha ñaha xii ñáyi isràél! —càchí-güedé xǎhaⁿ-güedé cúdíquí ndeé ñáhá-güedé xii-gǎ.

Te ní cani-güedé déhndé núú-gǎ.

4 Te ní quee tucu té Pilatú quehé te ní xǎhaⁿ-dē xii nchaa ñáyi xíndecu quehé:

—Te cundehe-ndo-dē ná ndeé ñuhu-í-dé iha, chi yúhú sǎhá-í cuendá sá ñà túú cuèchi-dé —càchí-dé xǎhaⁿ-dē xii-yu.

5 Te ní ndeñuhu ñaha té Pilatú xii Jèsús xii vechiⁿ-dē te ñuhu ìⁿ coroná iñu díquí-gǎ, te ñihnu-gá dóó tícuèhé víhí-áⁿ. Te ní xǎhaⁿ tǎe Pilatú xii-yu:

—¡Nái-dé-a! —càchí-dé xǎhaⁿ-dē xii-yu.

6 Te ní xiní ñáhá cuè dúú cúnúu ndihi cue tǎe quide cuendá veñuhu. Te ní cuáá-güedé, te xǎhaⁿ-güedé:

—¡Cata caa-dé! ¡Cata caa-dé núú cùrúxí! —càchí-güedé xǎhaⁿ-güedé xii-dé.

Te ní xǎhaⁿ tǎe Pilatú: —Váha-gá núu candeca mee-ndo-dē quíhíⁿ cata caa-ndo-dē núú cùrúxí, chi yúhú cùnúní iní-í sá ñà túú na cuèchi-dé —càchí-dé xǎhaⁿ-dē xii-güedé.

7 Te ní xǎhaⁿ cuè tǎe isràél: —Lèi ndécú ndihi nchúhú càchí-xi sá dàì cuú-dé, chi càchí-dé sá Dèhe Yá Ndióxi cúú-dē —càchí-güedé xǎhaⁿ-güedé xii-dé.

8 Te sá dúcáⁿ ní xǎhaⁿ-güedé xii té Pilatú, te vaa-gá ní yúhú-dé. 9 Núu cuándihu tucu-dé vechiⁿ-dé, te ní xǎhaⁿ tùcu-dé xii Jèsús:

—¿Te yòhó ndeé tǎe cùu-n-i? —cachí-dé xǎhaⁿ-dē xii-gǎ.

Dico Jèsús ñà túú ní cáháⁿ-gǎ.

10 Núu ní xǎhaⁿ tǎe Pilatú xii-gǎ:

—¿Te vá càchí tñuhu-n núu ndeé tǎe cùu-n-u? ¿Náa ñà túú xini-n sǎ yúhú táxi tñuni-í, te cuu-ni tauchiⁿ-í cata caa ñaha-güedé xii-n núú cùrúxí cuú-n, te cuu-ni dácácu ñaha-í xii-n-áⁿ? —càchí-dé xǎhaⁿ-dē xii-gǎ.

11 Te ní xǎhaⁿ Jèsús: —Yòhó ñà túú sǎ táxi tñuni ñáhá-n xii yúhú ní cùu núu ñà túú Yá Ndióxi ní cuini-gǎ sá dúcáⁿ cunduú, te tǎe ní taxi cuendá ñáhá xii-í núú-n tǎe-áⁿ ío-gǎ ndécuechi-dé dácúxí yòhó —càchí-gǎ xǎhaⁿ-gǎ xii-dé.

12 Te òré-áⁿ nǐ ngúíta té Pilatú ndúcú-dě nàcuáa cada-dé dàcácu-dé Jèsús ní cùu, dico cue tée isràél ní ngúíta-güedé ní cuáá-güedé, te xǎhaⁿ-güedé:

—Te núu na dàcácu-n tǎe-áⁿ, te ñá díú tǎe tnàhá tnúhu ndihi té Cèsár cúú-n. Chi nděda-ni cǎa tée na cǎchí sá cúú-dě tée yìndaha ñaha xii ñáyiu cùu úhú iní-dé té Cèsár. Te té Jèsús-áⁿ cǎchí-dé sá táxí tnùní-dé —cǎchí-güedé xǎhaⁿ-güedé xii-dé.

13 Te sá dúcáⁿ ní xǎhaⁿ-güedé xii té Pilatú núu ní quee-dé ndihi Jèsús cuáháⁿ ndihi ñaha-dě corrèdór núú nǐ quee mee-ni yúú váha núú ñúhú, te xiáⁿ nání-xí Gǎbatá tnúhu hǎebreú. Te xiáⁿ ndécú xilé sácóo nchihi té Pilatú xèhndé-dé cuéchi ñáyiu, núu ní nucóo-dé núú xilé-dé òré ní quexìo-dé ndihi Jèsús. 14 Te cùu-xi datná cuádava nduu, nduu vìspré vico pàscuá. Te ní xǎhaⁿ tǎ Pilatú xii ñáyiu isràél:

—¡Nái tée yìndaha ñaha xii-ndo-a! —cachí-dé xǎhaⁿ-dě xií-yu.

15 Te ní cuáá-yu, te xǎhǎⁿ-yu:

—¡Cahni-dé! ¡Cahni-dé! ¡Cata caa-dé núú cùrúxí! —cǎchí-yu xǎhǎⁿ-yu.

Te ní xǎhaⁿ tǎ Pilatú:

—¿Te yúhú cata caa-í tée yìndaha ñaha xii-ndo-u? —cachí-dé xǎhaⁿ-dě xií-yu.

Te cue dútú cúnùu ní xǎhaⁿ-güedé:

—Nchúhú ñá túú-gǎ tée yìndaha ñaha xii-ndí, chi ñndi-ni té Cèsár yìndaha

ñaha-dé xii-ndí —cǎchí-güedé xǎhaⁿ-güedé xii-dé.

16 Te té Pilatú ní xǎhaⁿ-dě ní queheⁿ cuèndá-güedé Jèsús ndécá ñaha-güedé cuáháⁿ cata caa ñaha-güedé núú cùrúxí.

Sàta caa-güedé Jèsús núú cùrúxí

(Mt. 27:32-44; Mr. 15:21-32; Lc. 23:26-43)

17 Te ní quee Jèsús nchídó-gǎ cùrúxí cuáháⁿ ñⁿ xichi núú nání Yìqui Díqui Ndiyi. Te tnúhu hǎebreú queé-xí Gǎlgotá. 18 Te yàcáⁿ ní sata caa ñaha-güedé xii-gá núú cùrúxí-áⁿ. Te xio xio diñi-gá ní sata caa-güedé úú cue tée ndècu ndisa cuéchi-xí diu-ni núú cùrúxí tucu. 19 Te ní táuchíúⁿ tǎ Pilatú ní taxi ndecu-güedé ñⁿ sá ndéè lètrá núú cùrúxí tá cǎa-gá, te duha cǎchí lètrá-áⁿ: “Jèsús tée ñuú Nazàrét, tée yìndaha ñaha xii ñáyiu isràél”, duha cǎchí-xi. 20 Te vai ñáyiu isràél ní xiní-yu nàcuáa cǎháⁿ lètrá-áⁿ, chi yatni-ni yuhu ñuú ní sata caa ñaha-güedé xii-gá núú cùrúxí. Te lètrá-áⁿ cǎháⁿ-xi tnúhu hǎebreú, te cǎháⁿ-xi tnúhu grìégú, te cǎháⁿ-xi tnúhu làtín. 21 Te ní xǎhaⁿ cuè dútú cúnùu xii té Pilatú:

—Vá táuchìuⁿ-n tee-güedé lètrá cǎháⁿ-xi “Tée yìndaha ñaha xii ñáyiu isràél” ní cùu, váha-gá tauchìuⁿ-n tee-güedé lètrá cǎháⁿ-xi “Tée cǎchí yìndaha ñaha xii ñáyiu isràél ní cùu” —cachí-güedé xǎhaⁿ-güedé xii-dé.

22 Te ní xǎhaⁿ tǎ Pilatú:

—Nàcuáa ní táuchìuⁿ-í ní tee-güedé te ducaⁿ quèndóo-xi —càchí-dé xáhaⁿ-dè xii-güedé.

23 Te sátá nǐ sata caa ñaha cuè sandadú xii Jèsús núu cùrúxí, te cúmí xichi ní quide-güedé dóó-gǎ, te ìⁿ ìⁿ xichi dóó-gǎ ní cáhñu cue sandadú-áⁿ. Te ndècu ìⁿ dóó-gǎ dóó cání ñà túú ní tícu. 24 Te cuèndá dóó-áⁿ nǐ xítñaha cue sandadú-áⁿ:

—Vá ndátá-ó dǒo-a, váha-gǎ núu na còto ndéé-ó cuèndá quini-ó ndédacàa-o cuu cuèndá-ó —càchí-güedé xítñaha-güedé.

Te ducaⁿ nǐ quide-güedé chi ní quee ndáá-xi nàcuáa càháⁿ-xi núu tütú Yǎ Ndiöxí núu càchí-xi: “Títñi xichi ní cáhñu-güedé dóo-í. Te ní xito ndéé-güedé cuèndá cutnùní iní-güedé ndédacàa-güedé níhí-güedé dóo-í”, duha càchí-xi núu tütú-gǎ. Te sá dúcáⁿ càháⁿ-xi núu tütú Yǎ Ndiöxí núu xíáⁿ ducaⁿ nǐ quide cue sandadú-áⁿ.

25 Te yatni dǐñi curúxí núu tácaà Jesús nútnǐ ñaná-gǎ, ndihí cùhú-xi, ndihí tá Màriá ñadìhí té Clèofás, ndihí tá Màriá Magdaléná. 26 Te ní xiní Jèsús ñaná-gǎ nútnǐ-aⁿ dǐñi ìⁿ té ní xica cuu ndihí-gǎ, téé ío cùu iní-gǎ, te ní xáhaⁿ-gǎ xii ñaná-gǎ:

—Nǎá, téé nùtnǐ-áⁿ nduu-dé dàtná déhe mee-n —càchí-gǎ xáhaⁿ-gǎ xii-aⁿ.

27 Te ní xáhaⁿ-gǎ xii téé ní xica cuu ndihí-gǎ-áⁿ:

—Ñaha-áⁿ nduu-aⁿ dàtná ñaná méé-n —càchí-gǎ xáhaⁿ-gǎ xii-dé.

Núu ndéé dàvá-áⁿ nǐ nduu ñaná ñáhá tèe-áⁿ xii ñaná-gǎ.

Ní xihí Jèsús

(Mt. 27:45-56; Mr. 15:33-41; Lc. 23:44-49)

28 Te ní cutnùní iní Jèsús sá nǐ ndihí chiuⁿ ní táhú Tátá-gǎ Dútú Ndiöxí ní quide-gǎ núu ní cachí-gǎ:

—Yichí-í ndute —càchí-gǎ.

Te duha ní cáháⁿ-gǎ chi ní quee ndáá-xi nàcuáa càháⁿ-xi núu tütú Yǎ Ndiöxí.

29 Te ndècu ìⁿ lítu ñùhu ndudí íá. Te sá dúcáⁿ ní cáháⁿ-gǎ sá yichí-gǎ ndute, núu xíáⁿ ní queheⁿ-güedé cáchí te ní chindóyo-güedé xití ndudí íá-áⁿ, te ní chinenú-güedé díquí ìⁿ dité yutnu nàni hisópó, te ní ndocani-güedé ní chihi-güedé yuhu-gǎ. 30 Te sátá nǐ xihí-gǎ ndudí íá-áⁿ, te càchí-gǎ:

—Vitna ní dáxínu cava-í nchaà chiuⁿ ní cachí Tátá-í cada-í —duha ní cachí-gǎ.

Te ní xócuíta dúcúⁿ-gǎ ndàa núu-gǎ, te ní xihí-ni-gǎ.

Ìⁿ sandadú ní caáⁿ-dé yiqui naha Jèsús ndihí ìⁿ pùyá yihí caá núu-xi

31 Te cuèndá sá nduu vispré vico pàscuá cúu-xí núu ñá ní cuíⁿ cue téé isràel cun-decu-ni yiqui cùñú-gǎ núu cùrúxí ndihí yiqui cùñú cue téé ní sata caa-güedé dǐñi-gǎ, chi cuèndá nduu tnéé-áⁿ cúu-xí nduu ndetatú ñáyiu, te ío quide cahnú-yu nduu-áⁿ, núu ní xáhaⁿ-güedé xii té Pilatú sá táuchiuⁿ-dé quíhíⁿ cue téé cahnú-güedé díhíⁿ Jèsús ndihí díhíⁿ cue téé tàcaa

ndihi-gá, te xocàni-güedé yiqui cùñú-gá ndihi yiqui cùñú-güedé yàcáⁿ. ³² Te sáta dúcáⁿ te ní sáháⁿ cue sandàdú ní sáhnú-güedé díhiⁿ cue téé tàcaa xio xio diñi Jesús. ³³ Te òré ní cuyatni-güedé núú-gã, te ní xiní-güedé sá sã ní xihí-gá nõu ñá ní sáhnú-güedé díhiⁿ-gá.

³⁴ Dico ìⁿ sandàdú-áⁿ ñi cúxi-dé pùyá néhé-dé ìⁿ xio yiqui naha-gã, te yìhi caá núú-xi núu ní caáⁿ-xi yiqui naha-gã ní quee ñíñi ndihi ndute cuí. ³⁵ Te yúhú té Juáá téé ní cadúha tutú-a ní xiní-í nàcuáa ní cuu ní xihí Jesús, te xiáⁿ nõu càháⁿ ndáá-í cuendá quíndáá iní-ndó. ³⁶ Te ducaⁿ ñi cuu ñá ní sáhnú-güedé díhiⁿ Jesús, chi ní quee ndáá-xi nàcuáa càháⁿ-xi núú tütú Yã Ndiõxí núú càchí-xi: “Vá càhnú-güedé ñi ìⁿ yiqui-gá”, duha càchí-xi. ³⁷ Te ducaⁿ ñi quide-güedé Jesús ní caáⁿ-güedé yiqui naha-gã, chi ingá xichi núú tütú Yã Ndiõxí càchí-xi: “Sáá nduu te quiní-güedé ìⁿ téé ní dánicuèhé-güedé”, duha càchí-xi.

Chindúxi-güedé Jesús

(Mt. 27:57-61; Mr. 15:42-47; Lc. 23:50-56)

³⁸ Te sáta dúcáⁿ ñi cuu, te té Chèé téé ñuú Arimàtea tnahá-dé ní sándáá iní-dé tñúhu Jesús dico dayuhu, chi ní xóo yúhú-dé cue téé cùnno núú ñãyiu isràél. Te téé-áⁿ ñi xáhaⁿ-dë xii té Pilatú nõu vá dáñá-dë canehe-dé yiqui cùñú Jesús quíhiⁿ chindúxi-dé, te té Pilatú

ní xáhaⁿ-dë xii-dé sá cúu cànehe-dé yiqui cùñú Jesús quíhiⁿ, núu ní sáháⁿ-dé ní nuu nehe-dé yiqui cùñú-gá núú cùrúxí nchídó-dë cuáháⁿ. ³⁹ Te té Nicòdemú téé ní sáháⁿ niú ní cáháⁿ ndihi-dé Jesús ndéé díhna, téé-áⁿ néhé-dé ócò úxí kilú yuchi ní cuáha mee-ni yúcú sã nání mirrá ndihi yúcú sã nání ãloés. Te ío váha tñami saháⁿ. ⁴⁰ Te ní naníhi tñahá-dé ndihi té Chèé, te ní chidúcúⁿ nuu-güedé yiqui cùñú Jesús mee-ni dõó vãha, te nàcuáa ta dùcuⁿ nuu-güedé yiqui cùñú-gá dóó-ãⁿ, te ducaⁿ ta chido-güedé yuchi sáháⁿ tñamí-ãⁿ núú dõó-ãⁿ chi ducaⁿ tñahí quide ñãyiu isràél òré chindúxi tnahá-yu. ⁴¹ Te yatni núú ñi sata caa-güedé Jesús caá ìⁿ lahuertá. Te xití lahuertá-áⁿ nchii ìⁿ yaú cava duha cuáháⁿ ndáá-xi, te vátá yõo ìⁿ-gá nguindúxi xiáⁿ. ⁴² Te cuendá sá ñi cuyatni tnahá nduu ndetátú ñãyiu isràél nõu xiáⁿ yaú cava nchii yatni-ni xiáⁿ ñi chihi-güedé yiqui cùñú Jesús.

20

Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

¹ Te ndumìngú tacuìhndá-gá cuáháⁿ tá Màriá Magdalèná cuáháⁿ ngoto-xi yaú núú ñi chihi-güedé yiqui cùñú Jesús, te ní sáá-xi ní xiní-xi sá ñã tütú-gã ndédi yúu yèhe yaú-áⁿ. ² Núu xinú-xi cuánuhú núú ndécú té Xímú, àdi Pelú chi úú diu-dé, ndihi ingá téé ní xica

cuu ndihi-gá téé ío cùu iní-gá,
te ní xáhaⁿ-xi xì-güedé:

—Nèhe-güedé yiqui cùñú
Jèsús cuáháⁿ, te ñá xìní-ó ndèé
ní taxi ndecu-güedé —càchí-xi
xáhaⁿ-xi xì-güedé.

³ Te ní quee té Pèlú
ndihi ingá téé-áⁿ cuáháⁿ
ndéhé-güedé yaú núú ñí
chihi-güedé yiqui cùñú-gá.

⁴ Te ndúú-güedé xínú-güedé
cuáháⁿ ní cùu, dico ingá
téé-áⁿ ñí cuu níhi-gá sáhá-dé
cuáháⁿ-dé ñúu díhna-gá-dé
ní sáá-dé yuhu yaú núú ñí
chihi-güedé yiqui cùñú Jèsús
ní cùu. ⁵ Te ní ngáundeyi-dé

xító ñihni-dé xítí yaú-áⁿ, te ní
xíní-dé mee-ná dóó vǎha sá
ñí xíducúⁿ nuu-gá yúcú, dico
ñá ní quǎhu-dé. ⁶ Te sátá ñí
sáá té Pèlú te cuánguihu-dé
xítí yaú-áⁿ, núu tnáhá-dé
ní xíní-dé nchaa dóó ñí
xíducúⁿ nuu-gá yúcú-áⁿ.

⁷ Te ní xíní-dé sá dóó ñí
xíndútú díquí-gǎ ñá túú càtuu
jundú-xi ndihi dóó ñí xíducúⁿ
nuu-gá chi ní nadúcúⁿnuu-ná
cátuu ñí xio. ⁸ Te nchícúⁿ
tucu téé ní sáá díhna-gá-áⁿ
cuánguihu xítí yaú-áⁿ, te ní
xíní-dé sá dóó-ná yúcú, te ñá
túú-gǎ yiqui cùñú Jèsús ñúu ní
sándáá iní-dé sá ñí ndoto-gá.

⁹ Chi vátá tècú tnùnì-gá-güedé
nàcuáa càháⁿ-xi núú tùtú Yǎ
Ndióxi núú càchí-xi sá Jèsús
ndoto-gá. ¹⁰ Te ní xícó ndí
ndúú cue téé ní sángoto yaú
núú ñí chihi-güedé yiqui cùñú
Jèsús ní cùu cuánuhú-güedé
vehe-güedé.

Jèsús ní naníhí tnáhá-gǎ

ndihi tá Màriá Magdaléná
(Mr. 16:9-11)

¹¹ Te ní sáá tucu tá Màriá
yuhu yaú núú ñí chihi-güedé
yiqui cùñú Jèsús te ní
ngúita-xi ndàhyú-xi, te ní
ngáundeyi-xi xito ñihni-xi xítí
yaú-áⁿ. ¹² Te xítí yaú-áⁿ ñí
xíní-xi úú espíritú xínú cuèchi
núú Yǎ Ndióxi xǐxǐhnu-xi
mee-ni dóó cuixíⁿ xǐndecu-xi
núú ñí cáa yiqui cùñú-gá.
Te ñí-xi núcóo núú ñí cáa
díquí-gǎ, te ñí-xi núcóo núú ñí
cáa sáhá-gǎ. ¹³ Te espíritú-áⁿ
ñí xáhaⁿ-xi xì tá Màriá:

—¿Ná cuendá ndàhyú-n? —
càchí-xi xáhaⁿ-xi.

Te ní xáhaⁿ tá Màriá:

—Ndàhyú-í chi nèhe-güedé
yiqui cùñú Yaá cúú Xìtohó-í
cuáháⁿ, te ñá túú xíní-í ndèé
ní taxi ndecu-güedé —càchí-xi
xáhaⁿ-xi xì cue espíritú-áⁿ.

¹⁴ Te tnúhu-ni-áⁿ ñí cáháⁿ-xi
te ní nchócótó-xí ñí xio, te ní
xíní-xi Jèsús núní-gá dico ñá
túú ní cùtnuní iní-xi sá díú
mèe-gá. ¹⁵ Te ní xáhaⁿ Jèsús
xii-xi:

—¿Ná cuendá ndàhyú-n?
¿Yoo nànducu-n? —cachí-gá
xáhaⁿ-gǎ xii-xi.

Te mee-xi ñí sani iní-xi
sá téé xito lahuertá-áⁿ cúú
téé-áⁿ, núu ní xáhaⁿ-xi:

—Táta, te núu yòhó néhé-n
yiqui cùñú Jèsús cuáháⁿ, te
cáháⁿ-n ndèé ní taxi ndecu-n
chi cuendá naqueheⁿ-í
canehe-í núhú —càchí-xi
xáhaⁿ-xi.

¹⁶ Te ní cáháⁿ díú ñàha-gá
xii-xi, te xáhaⁿ-gǎ:

—¡Màriá! —càchí-gá
xáhaⁿ-gǎ xii-xi.

Te ní ndacoto-xi núú-gǎ, te ní cáháⁿ-xi tnúhu hëbreú, te xǎhaⁿ-xi:

—¡Rabóni! —càchí-xi xǎhaⁿ-xi. Te tnúhu-án quée-xí Mèstrú.

17 Te ní xáhaⁿ Jèsús:

—Daña vá ngání ñaha-n chi vátá ndáá-gǎ-í núú ndécú Tàtá-í. Te núhú-n cùñaha-n xii cue téé ío váha ní tnahá tnúhu ndihí-í sá ndáá-í núú ndécú Tàtá-í Dútú Ndiöxí, te diu-gá cúú Tàtá-ndó nchaa-ndo, te diu-ni-gá cúú Ndiöxí-ndó —càchí-gá xáhaⁿ-gǎ xii-xi.

18 Te ní natnii tá Màriá Magdalená ichi cuánuhú-xi cùñaha-xi xii cue téé ní xica cuu ndihí-gá sá nǐ xiní-xi Jèsús, te ní xáhaⁿ-xi xii-güedé nchaa nàcuáa ní xáhaⁿ-gǎ xii-xi.

Ní quexìo Jesús núú xĩndecu cue téé ní xica cuu ndihí-gá

(Mt. 28:16-20; Mr. 16:14-18; Lc. 24:36-49)

19 Te diu-ni ndumìngú sandiquiⁿ ní natacá cue téé ní xica cuu ndihí-gá, te xĩndedí nihnu-güedé vehe sá xiyùhú-güedé cue téé cùnuu núú ñáyiú isràél. Te ní quihu Jèsús ndéé tnuú-güedé ní ngúnutnii-gá, te ní xáhaⁿ-gǎ:

—Yá Ndiöxí chĩndèe ñaha-gá xii-ndo ío váha cùu iní-ndó ndècu-ndo —cachí-gá xáhaⁿ-gǎ xii-güedé.

20 Te ní dánèhé ñáhá-gǎ ndaha-gá ndihí yiqui naha-gǎ xii-güedé. Te ío ní cudíí iní-güedé sá díú ndìsa-gá ní xiní ñáhá-güedé. 21 Te ní xáhaⁿ tucu Jèsús xii-güedé:

—Yá Ndiöxí chĩndèe ñaha-gá xii-ndo ío váha cùu iní-ndó ndècu-ndo. Te dàtná ní tendaha ñaha Tàtá-í Dútú Ndiöxí xii-í véxi-í ñuyú-a, te ducaⁿ tendaha ñaha-í xii-ndo quihíⁿ-ndó cáháⁿ-ndó tnúhu-í núú ñáyiú —càchí-gá xáhaⁿ-gǎ xii-güedé.

22 Te ní chiyóco-gǎ núú-güedé, te ní xáhaⁿ-gǎ:

—Chí ndúú tàhú Espiritú Yá Ndiöxí cundecu ndihí-ndo. 23 Te nchaa ñáyiú na quĩndáa iní-xi tnúhu-í te cùñaha-ndo xii-yu sá nǐ quide càhnu iní Yá Ndiöxí nchaa cuéchi-yu. Te nchaa ñáyiú vá quĩndáa iní tnúhu-í te cùñaha-ndo xii-yu sá vǎ cadá càhnu iní-gá cuéchi-yu —càchí-gá xáhaⁿ-gǎ xii-güedé.

Té Mǎxí càháⁿ ndihí-dé Jèsús

24 Te núú ùxúú cue téé ní xica cuu ndihí-gá, te ìⁿ-dé nání-dě Mǎxí téé ní xóo danani-güedé Cuáchí, te téé-án ñà túú-dě ndécú ndihí-güedé òré ní sáháⁿ Jèsús. 25 Te dava-gá cue téé ní xica cuu ndihí-gá ní xáhaⁿ-güedé xii-dé:

—Ní xiní-ndí Jèsús —càchí-güedé xáhaⁿ-güedé.

Te ní xáhaⁿ tè Mǎxí:

—Te vá quĩndáa iní-í, chi ndéé quĩní-í ndaha-gá núú nǐ quée nduyú, te dàquihu-í díquí ndáhà-í núú nǐ caáⁿ nduyú-án, te dàquihu ndàha-í yiqui naha-gǎ núú nǐ caáⁿ, ducaⁿ te quĩndáa iní-í —càchí-dé xáhaⁿ-dě xii-güedé.

26 Te núú ùná tucu nduu ní natacá tucu cue téé ní xica cuu ndihí Jèsús ìⁿ vehe, te

21

nduu-ǎⁿ tnàhá té Mǎxí ndécú ndìhi-güedé. Te cuèi ndèdí nihnu-güedé vehe-áⁿ, te ní quíhu Jèsús ndéé tnuú-güedé, te ní xáhaⁿ-gǎ:

—Yá Ndiöxí chindèe ñaha-gá xii-ndo ïo váha cùu iní-ndó ndècu-ndo —cachí-gá xáhaⁿ-gǎ xii-güedé.

27 Te ní xáhaⁿ-gǎ xii té Mǎxí:

—Cundehe ndàha-í te dàquíhu-n dĩquí ndáhá-n núú nǐ quée nduyú, te dàquíhu-n ndàha-n yiqui naha-í-a cuèndá quíndáá iní-n te vá cání ñⁿ cani úú iní-n —càchí-gá xáhaⁿ-gǎ xii-dé.

28 Te ní xáhaⁿ tǎ Mǎxí xii-gá:

—jYòhó cúu-n Xìtohó-í! jYòhó cúu-n Ndiöxì-í! — càchí-dé xáhaⁿ-dǎ xii-gá.

29 Te ní xáhaⁿ Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdí-gǎ iní nchaa ñáyiú ñá túú ní xiní núú ñáhá xii-í, te ní sándáá iní-yu —càchí-gá xáhaⁿ-gǎ xii-dé.

Quíndáá iní-ó tñuhu yòdo tñuní núú tütú-a

30 Te vǎi-gá sá vǎ yòo tnàhí ndàcu cada ñá túú yòdo tñuní núú tütú-a ní quide Jèsús núú cuè téé ní xica cuu ndìhi-gá. 31 Dico dava-gá ní ngódó tñuní núú tütú-a cuèndá sá quíndáá iní-ndó sǎ Jèsús cúu-gǎ Crìstú Déhe Dútú Ndiöxí, te naníhí tǎhú-ndó te núu na quíndáá iní-ndó-gǎ.

Úsá cue téé ní xica cuu ndìhi Jèsús ní xiní ñáhá-güedé xii-gá

1 Te ingá nduu tucu xíndecu cue téé ní xica cuu ndìhi Jèsús yuhu làgúná ñuú Tiberiás, te ní sáháⁿ-gá núú xíndecu-güedé-áⁿ. Te duha ní cuu ní xiní ñáhá-güedé xii-gá. 2 Te ndècu té Xímú, àdi Pelú chi úú diu-dé, ndìhi té Mǎxí téé ní xóo cùñaha-güedé Cuáchí, ndìhi té Natanàél téé ñuú Cànaá, te ñuú-áⁿ yíndèhu-xi distritú Galileá, te tnàhá ndi nduú déhe té Zebèdeú, ndìhi úú-gá tucu cue téé ní xica cuu ndìhi-gá. 3 Te ní xáhaⁿ tǎ Pelú xii-güedé:

—Quíhí-í quítñí-í chácá — càchí-dé xáhaⁿ-dǎ xii-güedé.

Te ní xáhaⁿ-güedé:

—Tnàhá nchúhú canchicúⁿ ñáhá-ndí xii-n quíhíⁿ tucu —càchí-güedé xáhaⁿ-güedé xii-dé.

Te ní xica-güedé cuáháⁿ-güedé ní sáá-güedé núú ndécú bàrcú, te ní quée-güedé xití bàrcú-áⁿ cuáháⁿ-güedé. Te niú-áⁿ ñǎ ní ñíhí tnàhí-güedé chácá. 4 Te sa ta cùditó-ñǎ cuáháⁿ ní xiní-güedé Jèsús yuhu làgúná, dico ñá ní cùtñuní iní-güedé sá díú-gǎ.

5 Te ní xáhaⁿ-gǎ xii-güedé:

—Cue téé cuechi, ¿ní níhí-ndó chácá caxi-o ñǎ? — càchí-gá xáhaⁿ-gǎ xii-güedé.

Te ní xáhaⁿ-güedé:

—Védana chácá ñà túú ní ñíhí-ndí —càchí-güedé xáhaⁿ-güedé xii-gá.

6 Te ní xáhaⁿ Jèsús:

—Chí dáquèe ñunu-ndo ndàa xio cuha barcú

chi níhí-ndó-dí —càchí-gá xáhaⁿ-gã xii-güedé.

Te ducaⁿ ñĩ quide-güedé, te òré nátava-güedé ñunu xití ndute, te ñã cündèe-gá-güedé natava-güedé cuendá sá ñĩ chítú chăcá xití-xi. ⁷ Te tée ní xica cuu ndihi-gá tée ío cùu iní-gá ní xáhaⁿ-dë xii té Pèlú:

—¡Diu Xítoho Jesucristú! —
càchí-dé xáhaⁿ-dë xii-dé.

Te sá ñĩ tecú dóho té Pèlú sá dúcáⁿ càháⁿ-dé ñũu ní ndíúnuu-dé dóó-dë, chi dóó sã yímàa-ni-dé níhnú-dë ní cùu. Ducaⁿ te ní nuu ndava-dé bàrcú ní ngauni-hnu-dé ndute, te cuáháⁿ-dé núú ndute-án ñĩ quene-dé ndéé ñũhu yìchí. ⁸ Te dava-gá cue tée ndihi té Pèlú diu-ñĩ cue tée ní xica cuu ndihi Jèsús ní quendóo-güedé dàtná ìⁿ ciendú-gá mèstrú te quene-güedé yuhu ndute. Te tañuhu-ni-güedé ñunu-güedé chitu chăcá ñĩ quene-güedé ndéé yuhu ndute. ⁹ Te òré ní quene-güedé ñũhu yìchí, te ní xiní-güedé càyú ñũhú, te núú ñũhú-án ñũhú ìⁿ chăcá ndihi ìⁿ pàá. ¹⁰ Te ní xáhaⁿ Jèsús xii-güedé:

—Quíhíⁿ ngueheⁿ-ndo ìⁿ úú chăcá quiti íchí ñĩ tñi-ndo —
càchí-gá xáhaⁿ-gã xii-güedé.

¹¹ Núu té Pèlú ní sáháⁿ-dé núú ndécú bàrcú, te ní quée-dé xití-xi ní cändeé-dé ñunu ñũhu chăcá tañũhu-dé ní quene ndéé ñũhu yìchí, te chitu chăcá náhnú, te ñũhu ìⁿ ciendú údico úxí úní-dí xití ñunu-án, te cuëi ducaⁿ vâi-dí ñũhu dico ñã ní ndätä ñunu-án. ¹² Te ní xáhaⁿ Jèsús:

—Chí nèhé cadí iní-ndó —
càchí-gá xáhaⁿ-gã xii-güedé.

Dico ní ìⁿ cue tée ní xica cuu ndihi-gá-án ñã ní xicáⁿ tnúhú-güedé núú-gã ñũu yoo cùu-gá, chi sa ní cutnùní iní-güedé sá díú Jèsús cúú-gã. ¹³ Te Jèsús ní sáháⁿ-gá ní queheⁿ-gá pàá ní sãñaha-gã xii-güedé caxi-güedé, te dàtnùní ní queheⁿ tucu-gá chăcá ñĩ sãñaha-gã xii-güedé.

¹⁴ Vitna cùu úní xito sá xiní ñáhá cue tée ní xica cuu ndihi-gá sátá ñĩ ndoto-gã.

Jèsús càháⁿ ndihi-gá té Pèlú

¹⁵ Te sátá ñĩ túhú cóhó-güedé ní sadí iní-güedé te ní xicáⁿ tnúhú Jèsús núú tẽ Xímú, àdi Pelú chi úú diu-dé, te xáhaⁿ-gã:

—Xímú, déhe té Jónás, ¿cùu iní-gá-n yùhú dàcúúxí dàva-gá cue tée-a ñã? —
càchí-gá xáhaⁿ-gã xii-dé.

Te ní xáhaⁿ tẽ Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dë xii-gã.

Te ní xáhaⁿ Jèsús:

—Te núu ducaⁿ, te dacàxi-n cue mbéé lìhli-í —càchí-gá xáhaⁿ-gã xii-dé.

Te cue mbéé-án cúú-güedí ñáyiu cùu cuendá-gã.

¹⁶ Te ní xáhaⁿ tucu-gá xii té Pèlú:

—Xímú, déhe té Jónás, ¿cùu iní ñáhá-n xii-í-u? —càchí-gá xáhaⁿ-gã xii-dé.

Te ní xáhaⁿ tucu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dë xii-gã.

Te ní xáhaⁿ-gã:

—Te núu ducaⁿ, te coto-n cuè mbéè-í —càchí-gá xáhaⁿ-gã xii-dé.

17 Te xito cùu uní ní xáhaⁿ tucu-gá xii té Pèlú:

—Xímú, déhe té Jònás, ¿cùu iní ñáhá-n-ã? —càchí-gá xáhaⁿ-gã xii-dé.

Te té Pèlú ío ní cundiyí-dé sá dúcáⁿ ní cuu úní xito xicáⁿ tnúhú-gã núú-dé núu ndisa sá cúu iní ñáhá-dé xii-gá, te ní xáhaⁿ-dè:

—Mèstrú, yòhó nchaa sa xiní-n, te sa cùtnumí iní-n sá cúu iní ñáhá-í xii-n —càchí-dé xáhaⁿ-dè xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéè-í. 18 Te na càchí tnúhu ndáá-í xii-n sá cùtnhá cuechí-gã-n ní xóo ndécuihnu mee-n dóo-n, te ní xóo quíhíⁿ-n ndèni ní xóo cachí iní-n, dico na yí-n te dacáá-n ndàha-n, te ingá tée dacuihnu ñaha xii-n dóo-n te cada yica-dé candeca ñaha-dé xii-n quíhíⁿ ñⁿ núú ñà túú tnàhá iní-n —càchí-gá xáhaⁿ-gã xii-dé.

19 Te sá dúcáⁿ ní cáháⁿ Jèsús cúu-xí sá ní dátècú tnúhu ñaha-gã xii té Pèlú nàcuáa cada-xi cuú-dé, te ducaⁿ càda cahnu-dé Yá Ndióxi, te ní xáhaⁿ-gã xii-dé:

—¿Canchicúⁿ ñáhá-n xii-í! —càchí-gá xáhaⁿ-gã xii-dé.

Té ío cùu iní-gá

20 Te ní nchócótó tē Pèlú ndàa sátá-dé, te ní xiní-dé sá nchicúⁿ ñáhá ingá tée xica cuu ndihí-gá cuáháⁿ, tée ío cùu iní-gá tée ní xínucóo diñi-gá òré ní cudini ndihí ñaha-gá

xii-güedé, te diu-ni téé-áⁿ ní xicáⁿ tnúhú-dé núú-gã dàvá-áⁿ núu ndèda càa tée cuáha cuèndá ñáhá xii-gá núú cuè tée cùu úhú iní ñáhá. 21 Te òré ní xiní té Pèlú sá nchicúⁿ ñáhá téé-áⁿ, te ní xicáⁿ tnúhú-dé núú Jèsús, te xáhaⁿ-dè:

—Mèstrú, te téé-ãⁿ, ¿ná cúu sá yáha-dé-í? —càchí-dé xáhaⁿ-dè xii-gá.

22 Te ní xáhaⁿ Jèsús:

—Te núu yúhú cuiní-í sá cùndècu-ni-dé ndéé ná quixi tucu-í ñuyú-a, ¿te yòhó ná cuèndá-n núu xicáⁿ tnúhú-n? Yòhó canchicúⁿ ñáhá-ní xii-í —càchí-gá xáhaⁿ-gã xii-dé.

23 Te ní xinu tnúhu núu nchaa ñáyiú sàndáá iní tnúhu-gá sá tē-ãⁿ vã cùú-dé. Dico Jèsús ñá túú dùcaⁿ ní xáhaⁿ-gã sá vã cùú-dé, chi ní xáhaⁿ-gã: “Núu yúhú cuiní-í sá tē-ãⁿ cundecu-ni-dé ndéé ná quixi tucu-í ñuyú-a, ¿te yòhó ná cuèndá-n?”, duha ní xáhaⁿ-gã xii té Pèlú.

24 Te diu-ni yúhú té Juáá téé ní sani iní-yu sá vã cùú càháⁿ ndáá-í nchaa nàcuáa ní cuu, te ducaⁿ ní tee-í núú tütú-a, te cùtnumí iní-ndó sá tnúhu ndáá cúu-xí.

25 Te ndècu vai-gá núú sá ní quide Jèsús. Te núu dico ní ngündee nchaandi túhú ñá, te vaa ni te ñihí ñuyú te vã tnàhá núú-xi cundecu lìbrú, te núu dico ní ngündee nchaa. Te ducaⁿ na cùnduu. Te ío chí cáda ndèe iní-nã vitna.

**NCHAA NÀCUÁA
NÍ QUIDE CUE
TÉE NÍ TÁÚCHÍÚⁿ
JÈSÚS DACUÀHA
ÑAHA XII ÑÁYIU
TNÚHU-GÁ**

Jèsús ní cachí tnúhu ndáá-gá sá quíxí Espíritú Yă Ndiöxí cundecu ndihi ñáyiu

¹ Te duha ní cáháⁿ té Lùcá ní xii-dé té Tëofilú: Yúhú sa ní chídó tnùn-í núú librú ndéé díhna nchaa sá ní quide Jèsús, ndihi nchaa sá ní dácuáhá-gă ñáyiu. Te ní chídó tnùn-í nchaa sá ní quide-gă ndéé nduu nă quesaha-gă quidé chiuⁿ-gă, ² ndihi nchaa sá ní quide-gă ndéé òré cuánda-gă andiu. Te sa ta cùyatni nduu ndaa-gă andiu, te ní ndatnúhu-gă ndihi cue téé ní cáháⁿ-gă dacuàha ñaha xii ñáyiu tnúhu-gă, te mee Espíritú Yă Ndiöxí ní chindee ñaha-xi xii-gă ní xáhaⁿ-gă nàcuáa cada-güedé. ³ Te sátá nă xihí-gă te ní ndoto-gă, te ní xindecu-gă údico nduu. Te titní xito ní sáháⁿ-gă núú nă xindecu-güedé, te ducaⁿ nă quide-gă cuëndá quini-güedé sá ndáá ní ndoto-gă, te ní xáhaⁿ-gă nàcuáa quide Yă Ndiöxí ndihu ndaha-gă ñáyiu.

⁴ Te ñⁿ nduu ndécu ndihi ñaha-gă xii-güedé, te ní xáhaⁿ-gă:

—Vá quée-ní-ndó ñúú Jerusálén, chi cundetu-ndo

quixi Espíritú Yă Ndiöxí cundecu ndihi-ndo, chi sa ní cachí tnúhu-í sá dúcáⁿ nă cáháⁿ Tátá-ó Dütú Ndiöxí Yáá ndécú andiu nacuáa cunduu. ⁵ Te ndáá sá ndii Juáá ní dácuándüte ñaha ndii xii-ndo, dico vitna ñá túú-gă cuéhé nduu, te quexio Espíritú Yă Ndiöxí cundecu ndihi-ndo — cächí-gă xáhaⁿ-gă xii-güedé.

Jèsús cuánda-gă andiu

⁶ Te òré ní xindecu-güedé ndihi Jèsús, te ní xáhaⁿ-güedé xii-gă:

—Mèstrú, cuini-ndí cachí tnúhu-n nă sa ta cùyatni nduu chindee-n ñáyiu ñúú Isràél cuëndá taxí tnùn-í tucú-yu ñúú-yu —cächí-güedé xáhaⁿ-güedé xii-gă.

⁷ Te ní xáhaⁿ Jèsús xii-güedé:

—Ñá túú xìni ñuhu-xi cunaha nchohó xíáⁿ, chi Tátá-ó Dütú Ndiöxí náhá-gă ná nduu càda-gă nchaa sá nă cáháⁿ-gă. ⁸ Te òré quexio Espíritú Yă Ndiöxí cundecu ndihi-ndo, te cuyii-ndo ní yuhu ní iní-ndó quihíⁿ-ndó cáháⁿ-ndó tnúhu-í núú ñáyiu ñúú Jerusálén ndihi núú ñáyiu distritú Jùdeá ndihi núú ñáyiu distritú Sàmariá. Te ducaⁿ-ni cáháⁿ-ndó quihíⁿ-ndó ní caxico ñuyú —cächí-gă xáhaⁿ-gă xii-güedé.

⁹ Te sátá dúcáⁿ nă cáháⁿ-gă, te ndèhe-güedé ní ndanchita-gă cuánda-gă andiu cuándihu-gă xití vícò, te ñá túú-gă ní xìni náhá-güedé xii-gă. ¹⁰ Te ndèhe vihi-güedé andiu núú ndéé quini ñáhá-güedé xii-gă yòtnúhu, te ní quexio cunu úú

cue téé ñihnu dóó cuixín núú ndécú-güedé. ¹¹ Te xáhaⁿ-güedé:

—Nchòhó cue téé Galileá, ñná cuendá ndéhé-ndó àndiu? Te dàtná-ni càa Jesús cuánda-gá andiu vitna, te ducaⁿ-ni cùnduu-gá quixi tucu-gá —càchí cue téé ñihnu dóó cuixín-án xáhaⁿ-güedé.

Cuendá sá ñà túú-gã ndii Jùdás ñuu ní nanducu-güedé té Màtiá ní nucúnutnii-dé núú ndii

¹² Te ní ndee-güedé yucu Òlívú cuánuhú-güedé ñuu Jerusalén, te ní xúhuⁿ-güedé cuèdicó cuádava òré ichi. ¹³ Te òré ní ndexio-güedé ñuu-án, te cuánda-güedé cuàrtú ndéé núú ñnu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pèlú, té Jàcobó, té Juàá, té Ndríxí, té Lìpé, té Mǎxí, té Bartolòmé, té Mâteú, té Jàcobó déhe té Àlfeú, ndihi té Xímú téé ní cundihí cue téé canànistá, ndihi té Jùdás ñaní té Jàcobó. ¹⁴ Te ní naníhí tnáhá-güedé nchaa-güedé yàcáⁿ ndihi tá Màriá náná Jesús, ndihi cue ñaní-gá ndihi dava-gá cue ñáyiú dñí. Te ñⁿ-ni ní cuú-yu ní cáháⁿ ndihí-yu Yá Ndiòxí.

¹⁵ Te ñⁿ nduu ní xíndecu dàtná ñⁿ cièndú ócò mee-ñi ñáyiú sàndáá iní tnúhu Jesús, te ní ngúnutnii té Pèlú núú-yu, te ní xáhaⁿ-dè xií-yu:

16-17 —Nchòhó cue ñáyiú ndècu ndihi-í ichi Xítóhó Jesucristú, na càni-í cuèndú núú-ndó nàcuáa ní chídó tnùní ndii Dàvií téé ní xíndecu ndéé sanaha nàcuáa ní cáháⁿ Espiritú Yá Ndiòxí cuendá té

Jùdás. Te dacuitíi dùcaⁿ ní cuu, chi tnáhá té Jùdás ní xíndecu ndihi-o, te ní xinu cuechi-o ndihi-dé núú-gã sá dñna, te ducaⁿ ñi quide-dé ní sáha cuendá-dé Jesús núú cuè téé cùu úhú iní ñáhá xii-gá. ¹⁸ Te ní cháhu ñaha-güedé xii-dé cuendá sá ñi sáha cuendá ñáhá-dé xii-gá. Te ní sáháⁿ-dé ñⁿ xichi ní sata caa-dé méé-dé, te ní ngava-dé, te ní cahndí duuⁿ xiti-dé te xíaⁿ ñi xihí-dé. Te ní naqueheⁿ-güedé dñhúⁿ sá ñi cháhu-güedé ndii, te ní nacuaaⁿ-güedé ñuhu núú ñi ngava ndii-án. ¹⁹ Te nchaa ñáyiú Jerusalén ní ñihí-yu tnúhu, te ní dánáñi-yu ñuhu-án Acèldamá. Te tnúhu mèe-yu quèe-xi: Ñuhu núú ñi sati ñíñí. ²⁰ Te duha ní cáháⁿ ndii Dàvií ní chídó tnùní ndii núú librú Sǎlmú ní dándóo ndii: “Nà ndóo nahi vèhe-dé, vá yòo ñⁿ quihíⁿ cundecu”, duha ní cáháⁿ ndii. Te ingá tucu tnúhu ní cachí ndii: “Na nanducu-güedé ingá téé nucúnutnii núú ndii”, duha ní cáháⁿ ndii Dàvií —càchí té Pèlú xáhaⁿ-dè xii-yu.

21-22 Te ní xáhaⁿ tucu-dé:

—Te ducaⁿ ñi cáháⁿ ndii Dàvií, te vitna xini ñuhu-xi nanducu-o ñⁿ téé nucúnutnii-dé núú ndii Jùdás, te xini ñuhu-xi diu-ni ñⁿ téé ní xica cuu ndihi Xítóhó Jesucristú cùtnáhá ní xica cuu-o ndihi-gá, ñⁿ téé ní xiní ndéé òré ní dácuañdute ñaha ndii Juàá xii-gá, te ndéé òré cuánda-gá andiu. Te téé nanducu-o cùndecu-dé cáháⁿ-dè nàcuáa ní cuu ní

ndoto-gá —càchí té Pèlú xăhaⁿ-dê xií-yu.

²³ Te ní cacunehe-güedé úú tñahá-güedé nūu ndēdacāa-güedé nduu táhú-güedé nucúnutnîi-güedé nūú ndîi. Te ìⁿ-dé nání-dé Chèé Barsábás, àdi Justú chi úú òu-dé, te ingá-dé nání-dé Màtiá. ²⁴ Te ní cáháⁿ ndihí-güedé Yă Ndiöxí, te xăhaⁿ-güedé xii-gá:

—Yòhó Dútú Ndiöxí xìní-n ìní nchaa ñáyiú, te mee-n ñaha-n nūu ndēda cāa nūú úú cue tée-a tñahá ìní-n ²⁵ cáháⁿ-güedé tñuhu-n nūú ñáyiú, te tée-áⁿ nucúnutnîi-dé nūú ndîi Jùdás, chi cuáháⁿ ndîi nūú ùhú nūú ndàhú nūú tàú-xi quíhíⁿ ndîi —càchí-güedé xăhaⁿ-güedé xii-gá.

²⁶ Te ní xito ndéé-güedé, te ní cutnùnì sá tēe ñani Matíá quendóo-dé ndihí úxí ìⁿ cue tēe ní táuchíúⁿ-gă dacuàha ñaha xii ñáyiú tñuhu-gá.

2

Ní quexìo Espíritú Yă Ndiöxí cundecu ndihí ñáyiú

¹ Te ní sáá nduu còo vico Pentecostés te xîndecu nchaa ñáyiú ìⁿ-ni xìchí. ² Te ní tecú dóho-yu uuⁿni ní ñihí andiu, dàtná quidé ìⁿ táchí ñihí vîhi ní quide-xi, te ducaⁿ ñí cuu ndéé xití vehe nūú ndécŭ-yu nchaa-yu. ³ Te ní xíní-yu dàtná cáá ìtá ñuhú cáá sã ndécú xití vehe, te ní xíté nuu-xi ní ngoyo ndodo-xi díquì-yu nchaa-yu. ⁴ Te ducaⁿ ñí quide-xi òré ní quexìo Espíritú Yă Ndiöxí ní

ngúndecu ndihí-yu nchaa-yu. Te ní ngúita-yu ní cáháⁿ-yu tñuhu cue ñáyiú ñá túú cùu ñáyiú isràél, te nchaa xîáⁿ ní quide Espíritú Yă Ndiöxí.

⁵ Te vai ñáyiú isràél xîndecu nchaa dava-gá ñuú ní tacá-yu ñuú Jerusalén, te ñáyiú-áⁿ ìo ndūcu ndéé-yu dācuahá-yu nchaa ndudú sá dācuàha tñahí-yu. ⁶ Te òré ní tecú dóho-yu ñihí, te ní sáháⁿ-yu ní xîndedóho-yu tñuhu càháⁿ méé-yu ìⁿ ìⁿ ñuú-yu, chi ndi dííⁿ ndi dííⁿ tñuhu càháⁿ ñáyiú ndècu-áⁿ. ⁷ Te xîáⁿ ìo ní cuñúhu ñáyiú véxi dava-gá ñuú, te ní xítñahá-yu:

—Ñáyiú ducaⁿ xícáháⁿ cúŭ-yu ñáyiú distritú Galileá. ⁸ ¿Te nása ní quidé-yu ní cutúha-yu ñacuáa càháⁿ-ó ìⁿ ìⁿ-o ndéé lihli-o? ⁹ Te ìha véxi ñáyiú dava ñacióⁿ, chi véxi ñáyiú Pàrtiá, véxi ñáyiú Mèdiá, véxi ñáyiú Èlám, véxi ñáyiú Mesopòtamiá, véxi ñáyiú Jùdeá, véxi ñáyiú Capadociá, véxi ñáyiú Pòntó, véxi ñáyiú Àsiá, ¹⁰ véxi ñáyiú Frigiá, véxi ñáyiú Pànfilíá, véxi ñáyiú Ègíptú, véxi ñáyiú Áfricá ñáyiú ndècu ndéé nūú-gă-xi ñuú Cirené. Te tñahá ñáyiú ñuú Rómá véxi, te ñáyiú-áⁿ chi ñá díú mēe-ni ñáyiú isràél cúŭ-yu nchaa-yu, dico ìⁿ-ni cùu sá dācuahá-yu. ¹¹ Te véxi ñáyiú Crètá, véxi ñáyiú Àrabiá. Te nchaa-o sa ndèdóho-o càháⁿ-yu ñacuáa cuáháⁿ tñuhu mee-o ìⁿ ìⁿ-o. Te nchaa ñáyiú xícáháⁿ tñuhu-o càháⁿ-yu cuendá nchaa sá vă yòo tñahí

ndàcu cada ní quide Yá Ndiöxí
—càchí-yu xĩtnàhá-yu.

12 Te ní cuñúhu vñhí-yu, te
ñá ná sàá iní-yu nása ní cuu,
te xĩtnàhá-yu:

—¿Nása ní cuu duha
càháⁿ-yu tnúhu-o? —càchí-yu
xĩtnàhá-yu.

13 Te davá-yu ní sácú ndeé
yíchí ñáhã-yu, te xĩtnàhá-yu:

—Xixini ñáyiú-áⁿ núu ñá
nãhá-yu tnúhu càháⁿ-yu —
càchí-yu xĩtnàhá-yu.

*Tnúhu ní xáhaⁿ tẽ Pèlú xii
cue ñáyiú*

14 Te ní ngúnutnñi té Pèlú
ndihí úxí ñⁿ cue téé ní táúchíúⁿ
Jèsús dacuàha ñaha xii ñáyiú
tnúhu-gá, te níhi ní càháⁿ-dé,
te xãháⁿ-dẽ xii-yu:

—Nchaa nchòhó ñáyiú dis-
tritú Jùdeá ndihí nchòhó ñáyiú
ñuú Jerusálén, cundedóho
váha-ndo tnúhu na càháⁿ-í-a.

15 Ná ndàá tnúhu càháⁿ-ndó,
chi ñá túú xĩni-ndí te ducaⁿ
càháⁿ-ndó, chi davitna cùu-xi
caá ñⁿ dátneé, vátá tnàhá-gá
òré coho ñáyiú ndidí. 16 Te

yúhú ná càchí tnúhu-í xii-ndo
vitna nacuáa ní xáhaⁿ Yã
Ndiöxí xii ndí Jòél téé ní xóo
càháⁿ tnúhu-gá ndeé sanaha
nacuáa cada ñaha-gã xii ñáyiú,
te ndí-áⁿ ñí chídó tnùní ndí
nacuáa ní càháⁿ-gá. 17 Te duha
ní xáhaⁿ-gã xii ndí:

Cùmání-gã sáá nduu nàa
ñuyíú, te cuãñaha-ĩ
Espiritú-í cundecu
ndihí nchaa ñáyiú na
quindáa iní ñáhã xii-í.

Te cue déhe-yu càháⁿ-yu
tnúhu-í,

te cue téé cuechi dacòto núú
ñáhã-xí xii-güedé,

te ducaⁿ-ni cuè téé ni sàhnu
càháⁿ saní-güedé,

te ñu-yu-ni cuendá nchaa sá
quidè-í ducaⁿ dácoto
núú ñáhã-xí xii-güedé.

18 Te nchaa ñáyiú xĩnu cuechi
núú-í càháⁿ-yu tnúhu-í,
te cuãñaha-ĩ Espiritú-í
cundecu ndihí-yu.

19 Te ndeé andiú, yacáⁿ vãi sá
càdã-í nacuáa cuñúhu
vñhí-yu,

te núú ñuyíú-a cada-í ñⁿ sá
vátá quini tnàhí-gá-yu,
te ngoyo níñí te ngoyo ñuhú te
quene vñhi ñúhmã.

20 Te vã dáyèhé-gá nchícanchii,
cuu nee ñuyíú te cuu ticuèhé
núú yóo dàtnã ticuèhé
níñí.

Te davá-áⁿ sáá nduu quixi Yáá
cúú Xitohó-yu,

te nduu-ãⁿ cuu-xi ñⁿ nduu
cãhnu vñhi, chi cada-gá
nchaa sá ñã túú
xini-yu, te cuñúhu
vñhí-yu.

21 Te òré xiáⁿ te nchaa ñáyiú
càháⁿ ndihí ñaha xii
Yáá cúú Xitohó-yu-áⁿ
naníhí tãhú-yu.

Duha ní xáhaⁿ Yã Ndiöxí xii
ndí Jòél ní chídó tnùní ndí.

22 Te nchòhó ñáyiú isràél,
cundedóho váha-ndo tnúhu
na càháⁿ-í-a cuendá Jèsús téé
ñuú Nazàrét. Te Jèsús ní
quide-gá chiúⁿ Yá Ndiöxí, chi
mee Yã Ndiöxí ní chindee
ñãha-gá ní quide Jèsús ná
daha núú chiúⁿ, núú xiáⁿ ní
ndacu-gá ní quide-gá nchaa
sá vã yóo tnàhí ndàcu cada, te
xiáⁿ ní cuñúhu vñhi-ndo. Te sa
nãha-ndo nacuáa ní quide-gá
cútnàhá ní xica cuu-gã ñuyíú.

23 Te ndí Jùdás ní taxi cuendá

ñáhá ndíi Jèsús xii nchòhó cue tée ní cuu úhú iní ñáhá xii-gá, te ní ndúcú-ndó cuè tée úhú iní-xi ní tñi ñaha-güedë xii-gá te ní sata caa ñaha-güedë núú cùrúxí, te núú cùrúxí-án nĩ xihí-gá. Dico sa ní cutnùní iní Yă Ndiöxí sá dúcáⁿ càda-ndo Jesús, te mee Yă Ndiöxí ní cachí-gá sá dúcáⁿ ndòho Jesús.

24 Te diu-ni mee Yă Ndiöxí ní dándótó-gă Jèsús, chi sa ní cáháⁿ-gá sá òré cuú-gá te vá cuú dúcáⁿ-gă. 25 Te ndíi Dàvíi tée ní xindaha ñaha xii cue ñaní tnáhà-ó nĩ xindecu ndée sanaha ní chídó tnùní ndíi nàcuáa ní cáháⁿ Jèsús, te duha ní cáháⁿ-gá:

Cùtnuní iní-í sá ncháá ndùu ndecu ndihí-í. Yă Ndiöxí, te ío chindee ñaha-gá xii-í,
te ñá túu tnáhí sá yùhú-í.

26 Te ío ndàcáⁿ táhù-í núú Yă Ndiöxí chi cùdii iní-í, chi sa nàha-í sá cùú-í dico ndoto-í,

27 chi vá dáñá-gă quihíⁿ dúcáⁿ àlmá-í núú ndécú ñăyiu ní xihí,

te vá dáñá-gă téhyú yiqui cùñú-í chi cùú-í Déhe-gá, te yùhú sa nàha-í sá cúú iní ñáhá-gă xii-í.

28 Te sa ní cachí tnúhu-gá nàcuáa cada-í cundecu-í ichi váha, te cuendá sá ndécú ndihí ñaha-gă xii-í núu ío cùdii iní-í.

Duha ní cáháⁿ Jèsús, te ducaⁿ nĩ chídó tnùní ndíi Dàvíi.

29 "Te nchòhó cue ñaní tnáhà-í, na càchí tnúhu ndáá-í xii-ndo cuendá ndíi Dàvíi tée ní xindecu ndée sanaha vñi,

chi ní xihí-dé, te ní chindúxi ñaha-güedë, te nàha-o tnavíi núú nĩ chindúxi ñaha-güedë.

30 Te ndíi Dàvíi ní xóo cáháⁿ ndíi tnúhu Yă Ndiöxí, te sa nàha ndíi sá Yă Ndiöxí ní cáháⁿ ndáá cuiⁿ-gá sá díú-ní ñiⁿ tnaha ndíi taxi tnùní-dé ñăyiu isràél ndée cuèe-gă dàtná ní xóo taxi tnùní mee ndíi cùtnáhá ní xindecu ndíi, te tée taxi tnùní-án cúú Crístú chi cùu-gă ñiⁿ tnàha ndíi.

31 Te sa ní cutnùní iní ndíi sá ndótó Crístú, núu xiáⁿ ní chídó tnùní ndíi sá vă dáñá Yă Ndiöxí sá quihíⁿ dúcáⁿ àlmá-gă cundecu-xi núú ndécú ñăyiu ní xihí, te vá dáñá-gă téhyú yiqui cùñú-gă.

32 "Te ndáá chi Yă Ndiöxí ní dándótó-gă Jèsús, te nchúhú ní xiní-ndí sá nĩ ndoto-gă.

33 Te ní xáhaⁿ Yă Ndiöxí xii Jèsús sá cundecu ndihí ñaha-gă, te taxi tnùní Jèsús ní caa ní quihíⁿ. Te Yă Ndiöxí ní sáñaha-gă Espíritú-gă ní ngündecu ndihí-gă nàcuáa ní xáhaⁿ-gă, te diu Jèsús ní quide-gă nchaa sá nĩ xiní-ndó vitna ndihí nchaa sá nĩ xindedóho-ndo. 34 Te ndíi Dàvíi ñá túu ní ndaa túu ndíi andíu ndihí yiqui cuñú ndíi, te òré ndécú-gă ndíi ñuyíu-a ní cachí ndíi:

Dútú Ndiöxí ní xáhaⁿ-gă xii Yáa cúú Xitohó-í:

"Ngóo xio cùha-í,

35 te yùhú cada-í te nchaa sá cúú úhú iní ñáhá xii-n canehe-xi sá yíñùhu núu-n."

Duha ní xáhaⁿ Dútú Ndiöxí xii Yáa cúú Xitohó-í càchí ndíi.

36 "Te nchòhó ñăyiu isràél cùu-ndo ndí mee-í, te cuiⁿ-í

cundedóho váha-ndo ìⁿ tnúhu na cãháⁿ-í-a. Jèsús ní sata caa-ndo-gã núú cùrúxí, dico Yá Ndiöxí ní cachí-gá sá Jèsús dacäcu nihnu-gá ñáyiú, te vá cání ìⁿ caní úú iní-ndó, chi diu-gá cúnù-gá núú nchàa ñáyiú —càchí té Pèlú xãhaⁿ-dë xii-yu.

37 Te ñáyiú ní xíndedóho tnúhu ní cãháⁿ té Pèlú ní ndixi túu iní-yu nàcuáa quidé-yu ndècú-yu, te ní xáhãⁿ-yu xii-dé ndihí dava-gá cue téé ní táuchíúⁿ Jèsús dacuàha ñaha xii-yu tnúhu-gá:

—Nchaa nchòhó cue ñani tnáhã-ndí, ¿nása cachí-ndó cùnduu, nása cada-ndí vitna? —càchí-yu xáhãⁿ-yu xii-güedé.

38 Te ní xáhãⁿ té Pèlú xii-yu:

—Daña-ndo nchàa sá cuèhé sá dúhá quide-ndo, te cada càhnu iní Yã Ndiöxí nchaa yíca cuèchi-ndo. Te cuandute-ndo cuèndá quini-yu sá ní natuha-ndo ìchi Jesús, te ducaⁿ te taxi Yá Ndiöxí Espiritú-gá cundecu ndihí-ndo, 39 chi cuìní-gá taxi-gá Espiritú-gá xii mee-ndo ndihí déhe-ndo, te cuãñaha-gã Espiritú-gá xii nchaa ñáyiú ní càa xico ñuyíú, ñáyiú cãháⁿ-gá cundecu ichi-gá ndéé idá-gá —càchí té Pèlú xãhaⁿ-dë xii-yu.

40 Te titní-gá tnúhu ní xáhãⁿ-dë nàcuáa cadá-yu, te xãhaⁿ tùcu-dé:

—Daña-ndo nchàa sá cuèhé sá dúhá quide-ndo, vá cadá-ndó sã quidé dàva-gá-yu —càchí-dé xãhaⁿ-dë.

41 Te nchaa ñáyiú ní sándáá iní-xi tnúhu ní cãháⁿ té Pèlú ní sanduté-yu, te diu-ni

nduu-ãⁿ ní cuu dàtná úní mìl ñáyiú ní sándáá iní-xi ní xíndecu ndihí ñáyiú xídacuáhã tnúhu Yá Ndiöxí. 42 Te ío ní xíndedóho-yu tnúhu ní cãháⁿ cue téé ní táuchíúⁿ Jèsús dacuàha ñaha xii-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuèndá nãhã-yu sá dúcãⁿ ní quide Jèsús cútñahã vátã cãhni ñaha-gã-güedé xii-gá, te ní xóo cãháⁿ ndihí-yu Yá Ndiöxí.

Nàcuáa ní quide nchaa ñáyiú ní sándáá iní tnúhu Jèsús ndéé díhna nuu

43 Te nchaa-yu ní cuñúhu vèhí-yu, chi cue téé ní táuchíúⁿ-gã dacuàha ñaha xii-yu tnúhu-gá ní quide-güedé titní núú sã vã yõo tnãhí ndàcu cada, te xíãⁿ ní cutnùní iní-yu sá méé Yã Ndiöxí chíndèe ñaha-gá xii-güedé. 44 Te nchaa ñáyiú sándáá iní tnúhu Jèsús cãháⁿ ndihí tnàha váha-yu, te cuèi-ni nchaa ndachíuⁿ nandíhí-yu ndècu cahnu. 45 Te ní dícõ-yu nchaa ndachíuⁿ sã ñã túú xìni ñuhú-yu, te ní níhí-yu díhúⁿ te ní sãñahã-yu xii nchaa ñáyiú ñã ñihí. 46 Te ìⁿ nduu ìⁿ nduu ní xóo quíhíⁿ ndihí tnãhá-yu veñúhu càhnu sã ío cùnnu. Te ní xexi ndihí tnãhá-yu vehé-yu. Te ío ní cudíí iní-yu chi ìⁿ-ni ní cuú-yu nchaa-yu. 47 Te ío ní ndacãⁿ táhũ-yu núú Yã Ndiöxí, te nchaa dava-gá ñáyiú ní cãháⁿ váha-yu cuèndá ñáyiú-áⁿ. Te mee Yã Ndiöxí ní quide-gá ní sándáá iní vãi-gá ñáyiú, te ní xíndecú-yu ndihí

dava-gá ñáyiú xǐdácúhá
tnǔhu-gá.

3

*Quide tátna-güedé ñⁿ téé
yacua*

¹ Te ñⁿ nduu òré caá úní
sacuaa, òré xǐcáháⁿ-yu ndihi
Yá Ndiöxí cuáháⁿ té Pèlú
ndihi té Juàá veñúhu càhnu
sá ìo cùnnuu sácúú-xí ñáyiú
isràél. ² Te ndècu ñⁿ téé
yacua, te ducaⁿ-ni càa-dé
ní cacu-dé. Te sàháⁿ ndihi
ñàhá-yu veñúhu càhnu sá
ìo cùnnuu, te sácóo-dé ñⁿ xio
yuyèhe veñúhu sá nání Yèhe
Vii Caa, chi ducaⁿ nàni-xi, te
xícáⁿ ndàhú-dé núú nchàa
ñáyiú sàháⁿ veñúhu. ³ Te ní
xiní-dé té Pèlú ndihi té Juàá
cuánguihu-güedé veñúhu, te
xícáⁿ ndàhú-dé núú-güedé.
⁴ Te ní ndacoto-güedé núú-dé,
te ní xáhaⁿ tè Pèlú xii téé
yacua-áⁿ:

—Cundehe ñàha xii-ndí —
càchí té Pèlú xáhaⁿ-dè xii-dé.

⁵ Te ní xíndéhé ñàha-dé
xii-güedé, chi ní cáháⁿ-dè sá
ìó ñⁿ sá cuñàha-güedé. ⁶ Te ní
xáhaⁿ tè Pèlú:

—Ñá túú tnàhí díhúⁿ néhè-í
dico chindee ñàha-í xii-n,
te Xítóhó Jesucristú Yaa
ní xíndecu ñuú Nazàrét,
ndacu-gá cada tátna ñàha-gá
xii-n, ndacuíñí te caca-n —
càchí-dé xáhaⁿ-dè.

⁷ Te té Pèlú ní tñii-dé
ndaha cùha téé yacua-áⁿ, te
ní ngúita-dé ndácàni ñàha-dé,
te òré xíaⁿ ñí naníhí ndéé-dé,
te ní ndúha sáhá-dé. ⁸ Te
ní ndacuíñí cunu mee-dé
te ní xica-dé, te ní cachí-dé
sá ìo càhnu cuu Yá Ndiöxí
cuèndá sá ñí ndúha-dé, te ta

sàndava-dé cuánguihu ndihi
ñàha-güedé veñúhu. ⁹ Te
nchaa ñáyiú xǐndecu-áⁿ ñí
xiní-yu sá ñí nduu váha-dé, te
ndèhé-yu ndácáⁿ táhú-dé núú
Yá Ndiöxí. ¹⁰ Te ní naquiní
ñàhá-yu xii-dé sá díú tèé xícáⁿ
ndàhú téé ní xóo cunuçóo
yuyèhe veñúhu sá nání Yèhe
Vii Caa cuu-dé, te ní cuñúhu
vìhí-yu sá ñí ndúha-dé.

*Té Pèlú ní cáháⁿ-dé
corredór sá néhé ñii ndíi
Salòmón*

¹¹ Te sátá veñúhu càa
corredór sá néhé ñii ndíi
Salòmón. Yacáⁿ ndécú tè
Pèlú ndihi té Juàá ndihi
téé ní ndúha sáhá-xi, te ñá
cuíní téé ní ndúha sáhá-xi-áⁿ
daña-dé quíhíⁿ-güedé dandöo
ñàha-güedé xii-dé. Te
chítú-yu ní quexìo coyó-yu
núú ndécú-güedé, te ní
cuñúhu vìhí-yu sá ñí ndúha
sáhá tèé cùhú-áⁿ. ¹² Te té Pèlú
ní xiní-dé ní quexìo coyó-yu,
te ní xáhaⁿ-dè xii-yu:

—Nchòhó ñáyiú isràél,
¿ná cuèndá ndéé dúcáⁿ
ndèhe ñàha-ndo xii-ndí te
cùnúhu-ndo sá ñí ndúha
téé yacua-áiⁿ? Nchòhó
cáháⁿ-ndó sá mée-ndí ní
quide tátna-ndí-dé sá ìo váha
iní-ndí, dico ñàhá chi ñá díú
mèe-ndí ní quide tátna-ndí-dé.
¹³ Chi Yá Ndiöxí ní ndadúha
ñàha-gá xii-dé, chi ñii-gá
cúú Ndiöxí ndíi Àbrahám
ndihi ndíi Isàác ndihi ndíi
Jácób, te ñii-ni cue téé-áⁿ
cúú ñàni tnàhá-ó ñí xíndecu
ndéé sanaha vìhi. Te ñii-ni
Ndiöxí-áⁿ ñí xáhaⁿ-gá xii
Déhe-gá Jèsús sá táxí tnùn-í-gá
nchaa sá ìó andíu ndihi nchaa

ñáyu ndècu ñuyíú-a, dico mee-ndo ní sáha cuèndá-ndó Jèsús núú tée cùchiuⁿ. Te té Pilatú ní cuini-dé dacăcu-dé Jèsús ní cùu, te mee-ndo ñã ní cuini-ndó. ¹⁴ Te Yá Ndiöxí ní cachí-gá sá ïo vâha iní Jèsús te ñã túú tnâhi cuéchi-gá. Te mee-ndo ñã túú ní cuini-ndó căcu-gá núu ní xâhaⁿ-ndo xii té Pilatú sá vâha-gá dacăcu-dé ïⁿ tée ndècu vihi cuéchi-xi, te vá dăcăcu-dé Jèsús. ¹⁵ Te ní xâhaⁿ-ndo sã cáhni-güedë Jèsús Yaá quidé nchîto-o ndecu-o, dico Yá Ndiöxí ní dândótó ñaha-gá, te ní xiní-ndí sá ndâá ní ndoto-gá. ¹⁶ Te nchúhú sa nâha-ndí sá díú Xitohó Jesucristú ní ndadúha-gá tée yacua, te náí-dé nútñi-a. Te ducaⁿ ñi quide-gá chi ní sândáá iní ñáhá-dë xii-gá, te vitna ní xiní-ndó sã ndâá ní ndúha-dé.

¹⁷ Te nchòhó ndihi cue tée cùnunu ní sahní-ndo Xitohó Jesucristú, chi ñã ní cùtnuní iní-ndó sã ñi quide-ndo. ¹⁸ Te cue tée ní xóo cáhánⁿ tnúhu Yá Ndiöxí ndéé sanaha ñi chídó tnùní-güedé năcuáa ní xâhaⁿ Yá Ndiöxí xii-güedé sá Cristú quixi-gá ñuyíú-a, te ndoho vihi-gá, te xiãⁿ núu ducaⁿ ñi cuu ío ní ndoho-gá. ¹⁹ Te vitna te dañá-ndo nchâa sá cuèhé sá dúhá quide-ndo. Te quindáá iní-ndó Yá Ndiöxí, te ducaⁿ te cada cãhnu iní-gá nchaa sá ñã túú vâha ní quide-ndo ñuyíú-a, te canu ichi ñaha-gã xii-ndo ïⁿ ichi vâha. ²⁰ Te ní tendaha-gã Cristú ní quixi-gá ñuyíú-a, chi mee Yá Ndiöxí ní cachí-gá sá díú Cristú taunihnu ñaha-gã xii-ndo.

²¹ Te dacuití cùndecu-gá andíu ndéé ná sâá nduu nătaxi ndecu-gá nchaa sá ndécú ñuyíú năcuáa sàni iní mée-gã. Te díu ducaⁿ ñi cáhánⁿ Yá Ndiöxí núu ducaⁿ ñi chídó tnùní cue tée ní xóo cáhánⁿ tnúhu-gá ndéé sanaha. ²² Te ndíi Moisés ní xâhaⁿ ndíi xii cue ñaní tnáhá-ó ñi xíndecu ndéé sanaha: “Yá Ndiöxí tendaha-gã ïⁿ tée quixi-dé cáhánⁿ-dé tnúhu-gá dâtná cuini-ndó ñi quide ñaha-gã xii yúhú, te tée-áⁿ cuu-dé ïⁿ ñaní tnáhá-ndó. Te cundedóho vâha-ndo nchâa tnúhu cáhánⁿ-dé. ²³ Te nchaa ñáyu vá quindáá iní tnúhu cáhánⁿ-dé, te cuíta nihnú-yu chi vá quihíⁿ-yu núú quihíⁿ ñáyu sândáá iní tnúhu Yá Ndiöxí”, duha ní xâhaⁿ ndíi Moisés xii-yu —càchí té Pèlú xâhaⁿ-dë xii-yu.

²⁴ Te ní xâhaⁿ tùcu té Pèlú xii-yu:

—Ndíi Sàmuel ndihi nchaa cue tée nchìcúⁿ-gá ní xóo cáhánⁿ tnúhu Yá Ndiöxí ndéé sanaha ñi cáhánⁿ-güedé năcuáa cada-xi vitna. ²⁵ Te Yá Ndiöxí ní cáhánⁿ-gá ndihi cue tée ní cáhánⁿ tnúhu-gá ndéé sanaha. Te ní quide ndáá-gá ndihi nchaa ñaní tnáhá-ó ñi xíndecu ndéé sanaha năcuáa cada-gá naníhí tãhú-ó. Te duha ní xâhaⁿ-gã xii ndíi Àbrahám: “Ío nduu cacu ïⁿ tnâha-n, te tée-áⁿ cada-dé te naníhí tãhú ñáyu ñuyíú-a”, duha ní xâhaⁿ-gã xii ndíi Àbrahám. ²⁶ Núu xiãⁿ ní tendaha-gã Déhe-gá ní quixi-gá núú ndécú-ndó cuèndá dañá-ndo nchâa sá cuèhé sá dúhá quide-ndo, te naníhí tãhú-ndó

—càchí té Pèlú xǎhaⁿ-dě xií-yu.

4

Té Pèlú ndihi té Juàá ndécú-güedě ndaha té cùchiuⁿ

¹ Te té Pèlú ndihi té Juàá càháⁿ dúcáⁿ-ni-güedě ndihi ñáyiú, ní quexìo cue dútú ndihi té tǎxi tñuní ñáhá xì cue té quide cuendá veñúhu càhnu sá ïo cùnuu, ndihi cue té cùu saducéú. ² Te ní cudééⁿ-güedě nchaa-güedé núú tǎ Pèlú ndihi té Juàá sá xǎhaⁿ-güedě xii ñáyiú sá ndótó ñáyiú ní xíhí dàtná ní ndoto Jèsús. ³ Te ní tñi ñaha-güedě ní chihí ñaha-güedě vecaá xii-güedé, te ñá ní quide ndáá té cùchiuⁿ cuéchi-güedé nduu-ǎⁿ chi sa ní cuaa. ⁴ Te ïo vǎi ñáyiú ní sándáá iní-yu tñúhu ní cáháⁿ-güedé, te ñáyiú-ǎⁿ ndihi ñáyiú sa ní sándáá iní-xi ndéé cǎni-gá ní xínu dàtná úhúⁿ mǐl mee-ni cuè té, te dǐiⁿ ñáyiú dǐhí ndihi landú.

⁵ Te nduu tñéé-ǎⁿ diu-ni ñúú Jerusalén-ǎⁿ ní tacá cue té yǐndaha veñúhu, ndihi cue té cùu sacuéhé núú ñáyiú isràél ndihi cue té dàcuaha ñaha xii-yu nchaa tñúhu ní chídó tñuní ndíi Moisés. ⁶ Te tñahá dútú cùnùu-gá té nàni Anás ndécú ndihi té Caifás, ndihi té Juàá, ndihi té Lìjandrú ndihi dava-gá ñani tñahá dútú cùnùu-gá-ǎⁿ ndécú. ⁷ Te ní xǎhaⁿ-güedě xii cue té xínu cuechi núú-güedě:

—Chí cuaháⁿ queñuhu-ndo tǎ Pèlú ndihi té Juàá vecaá, te na quixi-güedé iha — càchí-güedé xǎhaⁿ-güedě.

Te ní quexìo té Pèlú ndihi té Juàá núú cuè té cùnuu, te cue té cùnuu-ǎⁿ ñí xicáⁿ tñuhú-güedě núú-güedě, te xǎhaⁿ-güedě:

—¿Nása ní quide-ndo cuendá té yacua-ǎⁿ? ¿Yoo ní táuchíúⁿ dùcaⁿ cada-ndo? — càchí-güedé xǎhaⁿ-güedě.

⁸ Te ndècu ndihi té Pèlú Espiritú Yǎ Ndiǒxí, núú xǎⁿ ní xǎhaⁿ-dě xii-güedé:

—Nchòhó cue té cùchiuⁿ ndihi nchòhó cue té cùu sacuéhé núú ñáyiú isràél, ⁹ te núú cuíni-ndó quíni-ndó nǎsa ní quide-ndí ní ndúha té yacua-ǎⁿ, ¹⁰ te cund-edóho-ndo ïiⁿ tñúhu na càháⁿ-í-a. Xìni ñuhu-xi cund-edóho nchaa ñáyiú isràél cuendá quíni-yu nàcuáa ní cuu ní ndúha té-ǎⁿ. Xítohó Jesucristú Yaá ní xíndecu ñúú Nazàrét ní quide tátna-gá sáhá tǎe yacua ní ndúha, te diu-ni-gá ní sata caa-ndo núú cùrúxí te núú cùrúxí-ǎⁿ ñí xíhí-gá, te ní dándótó ñaha Yǎ Ndiǒxí xii-gá. ¹¹ Te núú tütú Yǎ Ndiǒxí càchí-xi: “Cristú cúu-gǎ dàtná ïiⁿ yúú ndécú xǐquí ïiⁿ vehe. Te yúú càchí-yu sá ñà túú nàndíhi, te diu xǎⁿ ní nàndíhi-xi ní ngúnutñi-xi xǐquí véhé”, duha càchí-xi núú tütú-gá. Te ducaⁿ sǎtnahá-xi cùu Jèsús, chi càchí-ndó sǎ ñà túú nàndíhi-gá, ¹² dico Yǎ Ndiǒxí ñà túú ndéé ní tǎxi ndecu-gá ñngá té dàcácu nihnu ñaha xii-o núú úhú núú ndàhú, chi ïiⁿdíi díi-ni Déhe-gá Xítohó Jesucristú dacácu nihnu ñaha-gá xii-o —càchí té Pèlú

xăhaⁿ-dĕ xii-güedé.

13 Te té Pèlú ndihi té Juàá ñá túú tŭha-güedé, te cùñúhu cue téé cùchiuⁿ sá İo ñí xîndáa-güedé. Te ní cutnùní iní cue téé cùchiuⁿ-án sá Jèsús ní xica cuu ndihi-güedé, núu xíăⁿ ñá túú tnàhí yùhú-güedé càháⁿ-güedé. 14 Te cuendá ndécú ndihi té Pèlú ndihi té Juàá téé ní ndúha sáhá-xi, núu xíăⁿ ñá ní ñhí cue téé cùchiuⁿ tnúhu càháⁿ-güedé. 15 Te ní xáhaⁿ-güedé xii té Pèlú ndihi té Juàá sá queé-güedé quehé cuendá ndóo mee-güedé ndatnúhu-güedé. 16 Te ní xítñaha-güedé:

—¿Nása cada-o ũú cue téé-ăⁿ?, chi nchaa ñáyiú ñúú Jerusalén năhá-yu sá ñí quide tátna-güedé ĩⁿ téé yacua, te xíăⁿ xicuñúhu vîhi ñáyiú. Te vá cúú càchí-ó sá ñă ndáá, chi vâi ñáyiú ní xiní năcuáa ní cuu. 17 Te dayùhú-ó-güedé te cùñaha-o sá vă càháⁿ-gá-güedé tnúhu Jèsús, chi núu ñáhá te quindáa-gá iní-yu — càchí-güedé xítñaha-güedé.

18 Te ní cana tucu-güedé té Pèlú ndihi té Juàá, te xăhaⁿ-güedé sá vă dăcuàha-gá-güedé ñáyiú tnúhu Jèsús. 19 Te té Pèlú ndihi té Juàá ní xáhaⁿ-güedé:

—Chí cuăha cuendá, te núu sá càchí nchòhó cada-ndí àdi sá càháⁿ Yă Ndiôxí cada-ndí. Te cada càhñu iní-ndó chi vá cúú càda-ndí sá càchí-ndó, chi cada nahi-ni-ndí sá càchí Yă Ndiôxí. 20 Chi dacuítí càháⁿ-ndí năcuáa ní càháⁿ Jèsús, te càháⁿ-ndí nchaa sá

ñí xiní-ndí ní quide-gá — càchí-güedé xăhaⁿ-güedé.

21 Te cue téé cùchiuⁿ níhi-gá ní càháⁿ-güedé xăhaⁿ-güedé sá càdá càstiú ñáhá-güedé núu vá dáñá-güedé sá dăcuàha-güedé ñáyiú. Te ducaⁿ te ní dáñá ñàha-güedé cuánuhú-güedé, chi ñá ní ñhí-güedé nása cada-güedé cada castiú ñáhá-güedé, chi nchaá-yu ndàcáⁿ táhŭ-yu núu Yă Ndiôxí sá ñí ndúha téé yacua. 22 Te téé ní quide tátna-güedé-ăⁿ ndécú-dĕ vîhi-gá údico cuíá-dĕ, te İo ní cuñúhu-yu sá ñí ndúha-dé.

Ñáyiú sândáá iní tnúhu Jèsús xícáⁿ táhŭ-yu núú-gă sá vă yùhú-yu càháⁿ-yu tnúhu-gá

23 Te ní ndee té Pèlú ndihi té Juàá cuánuhú-güedé núu ndécú cuè téé cùndihi-güedé, te ní nacani tnúhu-güedé năcuáa ní xáhaⁿ cuè dútú cùnùu ndihi cue téé cùu sacuéhé núú ñáyiú isràél. 24 Te sátá ñí xîndedóho-yu tnúhu ní càháⁿ-güedé, te ĩⁿ-ni tnúhu ní càháⁿ-yu nchaá-yu ndihi Yă Ndiôxí, te ní xáhăⁿ-yu xii-gá:

—Yòhó Dútú Ndiôxí, ní cadúha-n àndiú, ní cadúha-n ñùyíú, ní cadúha-n làmár, ní cadúha-n nchàandi túhú sá İo ñuyíú. 25 Te ndíi Dàvíí ní sândáá iní ndíi tnúhu ní càháⁿ-n, te ní chídó tnùní ndíi năcuáa ní xáhaⁿ-n căháⁿ ndíi, te dñu-ni Espiritú-n ñí chindee ñàha-xi xii ndíi ní chídó tnùní ndíi, te duha ní chídó tnùní ndíi: Ñáyiú ñá túú cùu ñáyiú is-ràél İo cùdĕŕn-yu núú Yă Ndiôxí,

te cuiní-yu nàá-yu ndihí-gá,
dico vá ndácũ-yu chi
mee-gã cúnũ-gá.

26 Te cue tée yĩndaha nacióⁿ
ndihí cue tée cùchiuⁿ
tacá-güedé nàá-güedé
ndihí Dútú Ndiõxí
ndihí Crístú Yaa ní
quixi ñuyú-a.

Duha ní chídó tñuní ndíi Dàvií
nàcuáa ndũu tñuhu ní cáháⁿ-n
—cáchi-yu xãháⁿ-yu xii Yá
Ndiõxí.

27 Te xãháⁿ tucú-yu xii-gá:

—Ndáá ní cáháⁿ ndíi Dàvií
chi ðiu-ni ñuu iha ní tacá
té Hèrodés ndihí té Põnciú
Pilátú ndihí ñayiu ñá túu cùu
ñayiu isràél ndihí ñayiu isràél
ní cáháⁿ cuèhé-yu cuèndá
Jèsús. Te Yòhó Dútú Ndiõxí,
Déhe-n cùu Jesús nõu ío váha
iní-gá, te ní sáha chiũⁿ-n-gá,
te ío úhú ní cuu iní ñáhá
ñayiu xii-gá. 28 Te ní quidé-yu
nàcuáa ní sani iní-n cáda-yu
ndéé sanaha, ndéé cútnhá
ní ngáva ñuyú. 29 Te Yòhó
Dútú Ndiõxí sa nàha-n nása
cáháⁿ cue tée cuiní cada úhú
ñáhá xii-ndí. Te quide-ndí
chiũⁿ tahu-n, te vitna chindee
ñàha-n xii-ndí cuèndá sá vã
yuhú-ndí cáháⁿ-ndí tñuhu-n.
30 Te cada tátna-n ñayiu cùhú,
te chindee ñàha-n xii-ndí, te
cada-ndí nchaa sá vã yõo
tnàhí ndàcu cada nacuáa
cuñúhu vihí-yu. Te xini-ndí
sá méé Jèsús chindee ñàha-gá
xii-ndí, chi quide-gá chiũⁿ
tahu-n —cachí-yu xãháⁿ-yu
xii Yá Ndiõxí.

31 Te sátá ñi yáha ní
cáháⁿ-yu ndihí Yá Ndiõxí, te ní
quidi-xi vehe núu xĩndecú-yu,
te òré-áⁿ ñi cutáhú tucú-yu

ncháa-yu Espíritú-gá. Te ní
cáháⁿ-yu tñuhu Yá Ndiõxí, te
ñá túu tnàhí ni yuhú-yu.

*Cuèndá nchaa ndachiuⁿ
cánehe chiũⁿ-yu*

32 Te nchaa ñayiu ní sándáá
iní tñuhu Yá Ndiõxí ñⁿ-ni
tñuhu ní cáháⁿ-yu ncháa-yu.
ñⁿ-ni tñuhu ní sani iní-yu, te
ní xóo chindee tnàhá-yu chi
ní xóo cuáha táhú tnáhã-yu
nchaa sá xíní ñuhú-yu, te
ni ñⁿ-yu ñá túu ní cáháⁿ-yu
sá ndàchiũⁿ-yu ñⁿdií-ni-yu
cùu nchaa sá ndécú ndihí-yu.

33 Te cue tée ní táuchíũⁿ Jèsús
dacuáha ñaha xií-yu tñuhu-gá
íó váha ní cáháⁿ-güedé nàcuáa
ní cuu ní ndoho Xítoho
Jesucristú. Te ío ní chindee
ñàha Yá Ndiõxí ní cáháⁿ-yu
tñuhu-gá, te ñá túu ní cáháⁿ
cuèhé dava-gá-yu cuèndá
ñayiu dàcuaha tñuhu-gá. 34 Te
ñá túu tnàhí ni cundahú-yu
díhúⁿ, chi nchaa ñayiu
ndècu ndihí ñuhu-xi, ndihí
nchaa ñayiu càa vehe-xi ní
nadico-yu, te da ñⁿ da ñⁿ
ndachíũⁿ-yu ní nadico-yu òré
xíní ñuhú-yu díhúⁿ.

35 Te
ní sãñáhã-yu xii cue tée ní
táuchíũⁿ Jèsús dacuáha ñaha
xií-yu tñuhu-gá, te cue tée-áⁿ
ñi dácãhũ-güedé nchaa
ñayiu xini ñuhu. 36 Te distritú
Chìpré ndécú ñⁿ tée nani-dé
Chéé ñani tnáhã ndíi Lèví,
te ní xóo cunu cuechi-dé
veñúhu ñayiu isràél. Te
cuèndá sá sãñaha-dé tñuhu
ndee iní xií-yu, xĩãⁿ nõu ní
dánani ñàha-güedé Vèé xii-dé.

37 Te tée-áⁿ ñi nadico-dé
luha ñuhu-dé, te nèhe-dé
díhúⁿ cuáhãⁿ núu cuè tée

ní táuchíúⁿ-gã dacuàha ñaha xií-yu tnúhu-gá.

5

Té Ananiás ndihi tá Sàfirá ñá túú ní quide ndáá-yu

¹ Te ndècu ìⁿ téé nàni Ananiás, te ñadihí-dé nání-áⁿ Sàfirá, te ñáyiú-áⁿ nǐ nadìcò-yu luha ñuhú-yu.

² Te ní taxúha-dé sacú díhúⁿ, te sacú-gá néhé-dě cuáháⁿ ní sáñaha-dě xii cue téé ní táuchíúⁿ Jèsús dacuàha ñaha xii ñáyiú tnúhu-gá, te ní dándàhú ñáhá-dě xii-güedé, chi ní xáhaⁿ-dě sá ñihí ní sáñaha-dě, te nàha ñadihí-dé sá dúcáⁿ nǐ quide-dé. ³ Te ní xáhaⁿ tǐ Pèlú xii-dé:

—Ananiás, ¿ná cuèndá ducaⁿ nǐ quide-n nǐ dáñá-n nǐ quíhu sácúlná ìní-n? Te ní dácúándèhnde-n núú Espíritú Yá Ndiöxí, te ní taxúha-n sácú díhúⁿ nǐ níhí-n cuèndá ñuhu-n. ⁴ ¿Te ñuhu-áⁿ cuèndá sá ñúhú mée-n, àdi díhúⁿ-áⁿ cuèndá sá díhúⁿ mée-n cùu-xi, te cuu-ní cada-n nàcuáa cächí ìní-n càhaⁿ-n ñá? ¿Ná cuèndá ducaⁿ nǐ quide-n? ¿Ná ní quide-xi ìní-n núu ní dácúándèhnde-n núú Yá Ndiöxí? Chi ñá díú-ní mée-ni ñáyiú ni dándahú-n — cächí té Pèlú xáhaⁿ-dě xii-dé.

⁵ Te òré ní ndihi tnúhu ní xáhaⁿ tǐ Pèlú, te uuⁿni ní nduá-dé te ní xíhí-ni-dé. Te nchaa ñáyiú ní níhí tnúhu sá nǐ xíhí-dé, te ní yùhú víhí-yu. ⁶ Te ní quixi ìⁿ úú cue téé cuechi, te ní ndanehe ñaha-güedé ní sacáⁿ ñáhá-güedé núú yuu, te ní ducuⁿ nuu ñaha-güedé yuu-áⁿ, te ní xido ñaha-güedé néhé

ñaha-güedé cuáháⁿ chindúxi ñaha-güedé xii-dé.

⁷ Te ní cuu úú uní òré, te ní quexio ñadihí téé ní xíhí-áⁿ, te vátá quini-gá-aⁿ sá nǐ xíhí yíi-aⁿ. ⁸ Te ní xáhaⁿ tǐ Pèlú xii-aⁿ:

—Cuini-í cachí tnúhu ndáá-n. ¿Ndédau ní dícó-ndó ñuhu, ní dícó-ndó nàcuáa ní cachí yíi-n áⁿ? —cächí té Pèlú xáhaⁿ-dě xii-aⁿ.

Te ní xáhaⁿ-aⁿ:

—Ndáá sá díú-ní dùcaⁿ — cachí-aⁿ xáhaⁿ-aⁿ.

⁹ Te ní xáhaⁿ tǐ Pèlú:

—¿Ná cuèndá ducaⁿ nǐ chitnàha tnúhu-ndo dùcaⁿ ní quide-ndo nǐ cuini-ndó dándahú-ndó Espíritú Yá Ndiöxí? Quini-n, chi sa cuándixi cue téé ní sáháⁿ ní chindúxi yíi-n, te yòhó tnàhá-n càndeca ñaha tucu-güedé xii-n quíhíⁿ vitna —cächí-dé xáhaⁿ-dě xii-aⁿ.

¹⁰ Te òré-áⁿ nǐ nduá-aⁿ núú tǐ Pèlú, te ní xíhí-ni-aⁿ. Te cuándihu cue téé cuechi-áⁿ xiti vehe, te ní xiní-güedé sá sá ní xíhí-aⁿ, núu ní xido ñaha tucu-güedé cuáháⁿ chindúxi-güedé-aⁿ diñi yíi-aⁿ.

¹¹ Te ní yùhú víhí ñáyiú ní sándáá ìní tnúhu Yá Ndiöxí, ndihi dava-gá ñáyiú ní níhí tnúhu nàcuáa ní cuu.

Ní quide-güedé titní núú sǎ vǎ yõ tnàhí ndàcu cada te ío ní cuñúhu ñáyiú

¹² Te cue téé ní táuchíúⁿ Jèsús dacuàha ñaha xii-yu tnúhu-gá titní víhí sǎ vǎ yõ tnàhí ndàcu cada ní quide-güedé, te ní cuñúhu víhí-yu. Te nchaa ñáyiú ní sándáá ìní-xi tnúhu Jèsús

ní xóo tacá-yu corrèdór néhé òù ndí Salòmón. 13 Te nchaa ñáyi ñá túú dàcuaha tnúhu-gá ñá ní cùyí-yu chitnahá-yu ñáyi ní sándáá iní-xi tnúhu-gá, dico nchaá-yu ní cáháⁿ váha-yu cuèndá ñáyi ní sándáá iní-xi tnúhu-gá. 14 Te vài téé,

vài ñadihí ní sándáá iní-yu tnúhu-gá. 15 Te cuèndá sá ñí níhí-yu tnúhu sá quidé tātna cue téé ní xica cuu ndihí Jèsús, núu xíáⁿ ní queñuhú-yu nchaa ñáyi cùhú ichi, te davá-yu ní quide túha-yu camá te davá-yu ní quide túha-yu yuu, núu núu nchaa xíáⁿ tá sàcáⁿ-yu cue ñáyi cùhú-ánⁿ cuáháⁿ, te xíáⁿ cáá-yu ndètú-yu, chí ní sani iní-yu sá òré yáha té Pèlú te cuèdicó cuándáhú-dě yáha ndodo ñaha-xi xí-yu te ndúha-yu. 16 Te ní quixi ñáyi ñúú yatni Jerusalén ndécá-yu ñáyi cùhú, ndihí ñáyi yíhí ñaha espíritú cùndihí yucu ñávaha ní quixi, te nchaá-yu ní ndúha.

Ío ní quide úhú-güedé té Pèlú ndihí té Juàá

17-18 Te dútú cùnù-gá ndihí cue téé cùu saducéú cue téé cùndihí-dé ní cudééⁿ-güedé sá ío chítú-yu dàcuaha tnúhu Jèsús, núu xíáⁿ ní tñi-güedé cue téé ní táuchíúⁿ Jèsús dacuàha ñaha xí-yu tnúhu-gá ní chihí ñaha-güedé vecaá. 19 Te xítí níú-ánⁿ ñí quexìo ñⁿ espíritú xínú cuèchi núú Yá Ndiòxí ní nacaáⁿ-xi yèhe

vecaá ní quee-güedé, te ní xáhaⁿ-xi xì-güedé:

20 —Quíhíⁿ-ndó veñúhu càhnu sá ío cùnùu te cùñaha-ndo xí ñáyi nàcuáa cadá-yu naníhí táhú-yu —càchí espíritú-ánⁿ xáhaⁿ-xi xì-güedé.

21 Te sá dúcáⁿ ñí xáhaⁿ-xi núu sátá ñí túndaá, te ní sáháⁿ-güedé veñúhu càhnu sá ío cùnùu sá cúu-xí ñáyi isràél ní dàcuáhá ñaha-güedé xí-yu.

Te dútú cùnù-gá ndihí cue téé cùndihí-dé ní nadatàcá tnáhá-güedé ndihí nchaa cue téé cùu sacuéhé núú ñáyi isràél ndihí cue téé cùchiuⁿ, te ní tendaha-güedé sandàdú cuáháⁿ queñuhu-güedé cue téé yíhí vecaá ní cùu. 22 Te ní quexìo-güedé yèhe vecaá, te ní xíní-güedé sá ñí ñⁿ-gá cue téé dàcuaha ñaha xí ñáyi tnúhu Jèsús ñá túú-gä-güedé yíhí. Te cuánuhú-güedé 23 ní xítñúhu-güedé cue téé cùchiuⁿ, te xáhaⁿ-güedé:

—Ní sáháⁿ-ndí ní sándéhé-ndí vecaá, te ndéé chóó-ni, te xíndecu-ni sandàdú cue téé xíndéé yèhe vecaá. Te ní nacaáⁿ-ndí vecaá, te vá yóo ñⁿ-gá yíhí —càchí-güedé xáhaⁿ-güedé.

24 Te sá dúcáⁿ ñí xáhaⁿ-güedé, te cuáháⁿ iní cue dútú cùnùu ndihí téé tãxi tñuní cue téé xíndéé veñúhu càhnu sá ío cùnùu, te ní xítñaha-güedé:

—¿Nása cada-xi vitna duha càa ní cuu ní xinu cue téé yíhí vecaá-í? —càchí-güedé xítñaha-güedé.

25 Te ní quexìo ñⁿ téé ní xáhaⁿ-dè:

—Cunedóho-ndo na càchí tnúhu-í ìⁿ tnúhu. Cue téé ní chíhí-ndo vècaá ndécú-güedé veñúhu càhnu sá ìo cùnuu dacuaha-güedé ñáiyu — càchí-dé xáhaⁿ-dë.

²⁶ Te cue téé ndèé veñúhu ndihí téé tàxi tnuní ñáhá xii-güedé cuánguaca ñaha-güedé, te ñá túú ní quide úhú ñáhá-güedé, chí ní yuhú-güedé cuáha yúú ñáhá ñáiyu dii ñúú-xi-áⁿ. ²⁷ Te ní ndexio ndihí ñaha-güedé núú cuè téé cùu sacuéhé ndihí núú cuè téé cùchiuⁿ. Te dútú cùnùu-gá ní ngüíta-dé ténáá ñáhá-dé xii-güedé, te xáhaⁿ-dë:

²⁸ —Te náa ñá díú ní cachí-ndí sá vǎ dácuaⁿha-gá-ndó ñáiyu tnúhu Jèsús te dácuaⁿha-ni-ndó-yu, te vitna nchaa ñáiyu ñúú Jerusálén ní níhí-yu tnúhu nàcuáa càháⁿ-ndó. ¿Te ná cuendá ducaⁿ quide-ndo, te càchí-ndó sǎ nchühú ndècuéchi-ndí ní sahani-ndí Jèsús-i? — càchí dútú cùnùu-gá xáhaⁿ-dë xii-güedé.

²⁹ Te té Pèlú ndihí dava-gá cue téé ní táuchíuⁿ Jèsús dacuaⁿha ñaha xii-yu ní xáhaⁿ-güedé xii cue téé cùchiuⁿ:

—Nchúhú, Yá Ndiöxí cùnùu-gá sándáá iní-ndí tnúhu càháⁿ-gá dácúúxí tnúhu càháⁿ ñáiyu. ³⁰ Te nchòhó ní sata caa-ndo Jèsús núú cùrúxí te núú cùrúxí-áⁿ ní xihí-gá, dico ní dándótó ñaha Yá Ndiöxí xii-gá. Te Yá Ndiöxí ní sándáá iní cue ñani tnáhá-ndí ní xindecu ndéé sanaha. ³¹ Te Yá Ndiöxí ní

xáhaⁿ-gǎ sá cündècu Jèsús xio cùha-gá cuendá taxi tnuní-gá te dacácu nihnu-gá ñáiyu isràél núú ùhú núú ndàhú. Te ducaⁿ-ni dacácu nihnu-gá nchaa ñáiyu na dàña nchaa sá cuèhé sá dúhá, te cada càhnu iní-gá nchaa yícá cuèchi-yu. ³² Te ní xiní-ndí nàcuáa ní quide-gá, núú xiǎⁿ cání-ndí cuendú núú nchaa ñáiyu, te Espiritú Yá Ndiöxí chindèe ñaha-xi xii-ndí càháⁿ-ndí tnúhu-gá. Te diu-ni Espiritú-gá ní sañaha-gǎ xii nchaa ñáiyu ní sándáá iní-xi tnúhu-gá —càchí té Pèlú ndihí dava-gá-güedé xáhaⁿ-güedé xii cue téé cùchiuⁿ.

³³ Te sátá dúcáⁿ ní xáhaⁿ-güedé xii cue téé cùchiuⁿ, te ní cudééⁿ-güedé, te ní ndatnúhu-güedé sá cáhni ñaha-güedé. ³⁴ Te ìⁿ téé cùu fariséu tnàha-dé cúú-dé chiúⁿ, te nani-dé Gamaliél, te cùu-dé mèstrú dácuaⁿha-dé ñáiyu nàcuáa ní chídó tnuní ndíi Moisés, te ío yiñùhu caháⁿ ndihí ñahá-yu xii-dé. Te ní ngúnutní-dé, te ní xáhaⁿ-dë sá ná quèe tnaa té Pèlú ndihí dava-gá-güedé quehé. ³⁵ Te ní xáhaⁿ-dë xii cue téé cùchiuⁿ:

—Nchòhó cue téé isràél, xini ñuhu-xi sá cání vǎha iní-ndó nǎsa cada-ndo ndihí cue téé-áⁿ. ³⁶ Chí ní cunaha ní xindecu ìⁿ téé ní xinani Tèudás, te ní cachí-dé sá cùnùu-dé, te ní cundihi-dé dàtná cúmi ciendú cue téé, te ñá ní cuini-güedé cuu ìⁿnuu-güedé ndihí cue téé cùchiuⁿ. Te ní sahani ñaha cuè téé cùchiuⁿ-áⁿ xii téé Tèudás, te ní ndihí cue téé ní xica cuu ndihí-dé ní xité nuu-güedé, te ñá túú-gǎ

ní quíde-güedé nàcuáa ní sani iní-güedé cada-güedé. ³⁷ Te sáta ní xíhí tée-án, te ní tnahá nduu núcódó tnúni ñáyi. Te dàvá-án ní xíndecu ñí tée distritú Galileá ní xínani-dé Jüdás. Te titní-güedé ní chitnahá ñhá-güedé xii-dé. Te tnahá-dé ní sahní ñaha tucu cue tée cùchiuⁿ, te nchaa cue tée ní xica cuu ndihí-dé ní xité nuu-güedé. ³⁸ Te na càchí tnúhu-í sá dañá-ndó cuè tée-án, te ní ñá túú nǎgá tnúhu cúñaha-ndo xii-güedé, chí núu chiúⁿ mee-güedé quíde-güedé te cuíta-güedé, ³⁹ dico núu chiúⁿ Yá Ndióxi quíde-güedé, te vá ndíñihu chiúⁿ quíde-güedé. Te núu quíde-güedé chiúⁿ Yá Ndióxi, te vá nàá-ndó ndihí-güedé, chí Yá Ndióxi nàá ndihí-ndo sá dúcáⁿ xiquide-ndo —càchí té Gamaliél xáhaⁿ-dē xii cue tée cùchiuⁿ.

⁴⁰ Te nchaa-güedé ní cáháⁿ sá tnúhu ndáá càháⁿ-dé. Te dàtnúni ní nacana tucu-güedé té Pélú ndihí dava-gá-güedé te ní caniha-güedé, te ní cáháⁿ níhi-güedé, te xáhaⁿ-güedé sá vá càháⁿ-gá-güedé tnúhu Jèsús, te dàtnúni ní dañá ñaha-güedé cuánuhú-güedé. ⁴¹ Te ío ní cudíí iní-güedé, chí mee Yá Ndióxi ní cachí-gá sá dúcáⁿ ndòho-güedé dacuàha-güedé ñáyi tnúhu Jèsús. ⁴² Te ñí nduu ñí nduu ní dácuahá-güedé ñáyi xití veñúhu càhnu sá ío cùnuu ndihí nchaa vehé-yu. Te ní xáhaⁿ-güedé xii-yu sá Jèsús cúu-gá Crístú Yá ní quixi ñuyíu-a.

6

Ní ndúcú-güedé úsá cue tée cundecu dacáhñu sá cáxi ñáyi

¹ Te diu-ni dàvá-án ní sándáá iní vai ñáyi tnúhu Jèsús. Te cue ñáyi griégú ní cáháⁿ cuèhé-yu cuendá ñáyi isràél, sá ñáyi dñí ñáyi quèé ñáyi càháⁿ tnúhu griégú ñá túú tnahá sá cáxi-yu, chí ñá túú sáñaha ñí nuu-güedé. ² Te cue tée úxúú ní táuchíuⁿ Jèsús dacuàha ñaha xii-yu tnúhu-gá, cue tée-án ní cana-güedé nchaa ñáyi sándáá iní tnúhu Jèsús. Te ní xáhaⁿ-güedé xii-yu:

—Nchúhú, chí vá cúu dácáhñu-ndí sá cáxi-yu, chí mee-ni tnúhu Yá Ndióxi càháⁿ-ndí. ³ Te nchòhó cue tée ndècu ndihí-ndí ichi Xítohó Jesucristú cáháⁿ ndihí-ndo úsá cue tée xíndecu iha, cue tée càháⁿ ndihí ñhá-yu mee-ni tnúhu yíñuhu, cue tée ndècu ndihí Espíritú Yá Ndióxi, mee-ni cuè tée cùtnúni váha iní-xi. Te cue tée-án cuàha-ndí-güedé chiúⁿ cada-güedé dacáhñu-güedé sá cáxi-yu. ⁴ Te nchúhú mee-ni Yá Ndióxi cáháⁿ ndihí-ndí, te mee-ni tnúhu-gá dacuàha-ndí-yu —càchí-güedé xáhaⁿ-güedé xii-yu.

⁵ Te nchaá-yu ní tní-yu tnúhu ní cáháⁿ-güedé, núu ní ndúcú-yu cue tée cada chiúⁿ-án. Te ñí-dé nání-dé Tévá, te ío váha sándáá iní-dé Yá Ndióxi, te ndècu ndihí-dé Espíritú-gá. Te duha ní xínani dàva-gá-güedé: té Lìpé, té Pròcoró, té Nicànor, té Tímón, té Pàrmenás, té Lǎxi tée

ñúú Antiòquia téé ní sándáá iní-xi sá dácuaàha ñáyiu isràél te vitna ní sándáá iní-dé tnúhu Jèsús. ⁶ Te úsá cue téé-áⁿ ñí sáháⁿ-güedé núú cuè téé úxúú ní táuchíúⁿ Jèsús dacuaàha ñaha xií-yu tnúhu-gá, te cue téé úxúú-áⁿ ñí cáháⁿ ndihí-güedé Yá Ndiòxí, te ní sacáⁿ ndodo-güedé ndaha-güedé díquí cuè téé úsá-áⁿ.

⁷ Te ñáyiu ní sándáá iní tnúhu Jèsús cuáháⁿ-yu titní xichi cáháⁿ-yu tnúhu-gá. Te vai-gá ñáyiu ta sándáá iní-yu tnúhu-gá cuáháⁿ, te ní xíndecú-yu ndihí dava-gá ñáyiu dácuaaha tnúhu-gá ñúú Jerusálén. Te titní dútú ñí sándáá iní-güedé tnúhu-gá.

Ní tñi-güedé té Těvá

⁸ Te té Těvá ní quide-dé titní núú sá vă yõ tñahí ndàcu cada, te ní cuñúhu vihí-yu sá dúcáⁿ ñí quide-dé, te ducaⁿ ñí quide-dé chi ndècu ndihí-dé Yá Ndiòxí chíndèè ñaha-gá. ⁹ Te ní xíndecu cue téé ní xóo cunu cuechi núú ñíⁿ téé tàxi tñuní, te téé tàxi tñuní-áⁿ ñă ní xõ dañá tñahí-dé quee-güedé núú chíúⁿ-dè, te ní xinu-ná-güedé. Te sátá xǎⁿ, te ní dácáá-güedé veñúhu-güedé, te veñúhu-áⁿ sáháⁿ ñáyiu ñúú Cìrené, ñáyiu ñúú Alejándriá, ñáyiu ñúú Cìlicíá, ndihí ñáyiu distrítú Àsiá. Te nchaa ñáyiu-áⁿ ñí nàa ndihí-yu té Těvá. ¹⁰ Te ñá ní ñihí-yu tnúhu cáháⁿ-yu, chi ío váha ní sáá díquí-dè nàcuáa ní xáhaⁿ-dè xií-yu, chi Espíritú Yá Ndiòxí ní chindee ñaha-xi

xii-dé. ¹¹ Te ní cháhu-yu cue téé ní dácuaándèhnde tnúhu ní cáháⁿ té Těvá núú-yu. Te ní xáhaⁿ-güedé sá cáháⁿ cuèhé-dé cuèndá ndíi Moisés ndihí cuèndá Yá Ndiòxí. ¹² Te cuèndá sá dúcáⁿ ñí dácuaándèhnde-güedé núú ní sándáá iní-yu, te ní cudéèⁿ-yu núú tē Těvá. Te ní cudééⁿ cue téé cùu sacuéhé, te tñahá cue téé dácuaaha ñaha xií-yu nchaa tnúhu ní chídó tñuní ndíi Moisés ní cudééⁿ-güedé. Te ní sáháⁿ-güedé ní tñi-güedé té Těvá ndécá ñaha-güedé cuáháⁿ núú quidé cuè téé cùchiuⁿ jundá, ndihí cue téé cùu sacuéhé. ¹³ Te ndécá-yu cue téé dácuaandèhnde cuáháⁿ núú quidé-güedé jundá, te ní quesaha-ni tucu-güedé cáháⁿ cuèhé-güedé, te xáhaⁿ-güedé:

—Tée-a mee-ni cáháⁿ cuèhé-dé cuèndá veñúhu sá ío cùnuu, veñúhu ní cuu íí, te cáháⁿ cuèhé-dé cuèndá nchaa sá ñí chídó tñuní ndíi Moisés. ¹⁴ Te ní tecú dóho-ndí cächí-dé sá Jèsús téé ñúú Nazàrét dangòyo-dé veñúhu càhnu sá ío cùnuu te vá dañá-gá-dé cada-ndí nàcuáa ní cachí ndíi Moisés cada-ndí —cächí-güedé xáhaⁿ-güedé.

¹⁵ Te nchaa cue téé ndècu jundá ní ndacoto váha-güedé núú tē Těvá. Te ní dáyèhé-xi núú-dè dàtná quidé-xí núú espíritú xínú cuèchi núú Yá Ndiòxí.

7

Té Těvá xáhaⁿ-dè sá ñà túú cuèchi-dé

¹ Te ní xáhaⁿ dútú cùnùu-gá xii-dé:

—¿Ndáá tnúhu càháⁿ-güedé cuendá-n-áⁿ? —càhí-dé xáhaⁿ-dë.

² Te té Tëvá ní xáhaⁿ-dë xii-güedé:

—Nchòhó cue ñaní tnáhà-í ndihí nchòhó cue tée cùu sacuéhé, cundedóho-ndo ìⁿ tnúhu na càháⁿ-í-a. Yá Ndiòxí ío cùnuu-gá, te ní càháⁿ ndihí-gá ndíi Àbrahám nàcióⁿ Mesopotamiá cútnàhá vátá quihíⁿ-gá ndíi cundecu ndíi ñúú Hàrán. ³ Te ní xáhaⁿ-gá xii ndíi: “Daña-n nchàa ñaní tnáhá-n, te daña-n ñúhu-n, te quihíⁿ-n ìⁿ xichi núú dánèhé ñáhà-í cundecu-n”, duha ní xáhaⁿ Yá Ndiòxí xii ndíi Àbrahám. ⁴ Te sátá dúcáⁿ ñí xáhaⁿ Yá Ndiòxí xii ndíi Àbrahám, te ní ndee ndíi ñúú Cáldeá, te cuáháⁿ ndíi cundecu ndíi ñúú Hàrán. Te sátá ñí xihí tátá ndíi, te ní xáhaⁿ Yá Ndiòxí quixi ndíi cundecu ndíi núú ndécú-ó vitna. ⁵ Te Yá Ndiòxí ñá túú ní sãñaha-gã ni lùha ñúhu cuu cuendá ndíi núú ñí xindecu ndíi. Te ní xáhaⁿ ndáá Yá Ndiòxí xii ndíi sá cuãñaha-gã ñúhu cuu cuendá ndíi, te na cùú ndíi, te ndóo ndihí nchaa ñaní tnáhá ndíi cacu túu ndéé cuèé-gá. Te ducaⁿ ñí xáhaⁿ-gã cuèi vátá cundècu-gá ni ìⁿ déhe ndíi. ⁶ Te ní xáhaⁿ tùcu Yá Ndiòxí xii ndíi Àbrahám sá díú-ní ñaní tnáhá ndíi quihíⁿ-yu núú xicá cundécú-yu cúmí cièndú cuíá, te vá dáñá-yu queé-yu núú chíúⁿ-yu, te ío dandòho ñaha-güedé núú cundécú-yu. Duha ní xáhaⁿ Yá Ndiòxí xii ndíi, te ndáá ducaⁿ ñí cuu. ⁷ Te ní xáhaⁿ tùcu Yá Ndiòxí xii ndíi

Àbrahám; “Yúhú dandòho-í nchaa ñáyíu na dandòho ñaha xii cue ñaní tnáhá-n. Te dàvá-áⁿ te ndee cue ñaní tnáhá-n núú cundécú-yu, te quixí-yu chiñuhu ñáhá-yu xii-í iha”, duha ní xáhaⁿ Yá Ndiòxí xii ndíi Àbrahám, te ndáá ducaⁿ ñí cuu. ⁸ Te Yá Ndiòxí ní quide ndáá-gá ndíi ndíi Àbrahám, te ní xáhaⁿ-gã xii ndíi sá cuãha-güedé seña ñí nchaa landú tée cuendá cunáhá-yu nàcuáa ndúu sá ñí quide ndáá-gá ndihí ndíi Àbrahám. Núu xíãⁿ núú ùná nduu sá ñí cacu té Isàác déhe ndíi Àbrahám, te ní sáha ndíi seña ñí-dé. Te díu-ni ducaⁿ ñí quide tucu té Isàác déhe-dé té Jàcób, te díu-ni ducaⁿ ñí quide té Jàcób, chi úxúú déhe-dé ní xindecu, te nchaa-güedé ducaⁿ ñí quide-dé. Te ndíi úxúú cue tée-áⁿ ñí cuu-güedé ñaní tnáhá-ó.

⁹ Te ìⁿ déhe té Jàcób ní xínani-dë Chèé. Te ñá ní cùu váha iní cue ñaní-dé núú-dë, núu ní díco ñaha-güedé ní queheⁿ ñaha cuè tée cuáháⁿ nàcióⁿ Ègiptú, te Yá Ndiòxí ñá ní dàña ñaha-gá xii-dé cuíta nihnu-dé. ¹⁰ Te ní chindee ñaha-gá xii-dé ní cacu-dé cútnàhá ní ndoho vihi-dé. Te tée yindaha Egiptú ío ní cudíi iní-dé té Chèé, te ní cutnùní iní-dé sá ío váha túha té Chèé, te ducaⁿ ñí cutnùní iní-dé, chí Yá Ndiòxí ní chindee ñaha-gá xii té Chèé. Te ní xáhaⁿ tée yindaha Egiptú xii té Chèé sá díú tã Chèé coo-dé gobièrnú Ègiptú, te taxi tnùní-dé nchaa ñáyíu xìnu cuechi núú tã yindaha Egiptú-áⁿ.

11 "Te ní quíhu tnamá nihí nacióⁿ Ègiptú ndihi nacióⁿ Cànaá, te ío ní ndohó-yu. Te nchaa ñaní tnáhá-ó nĩ xindecu ndéé sanaha ñá ní xóo níhí-gã-yu sá cáxi-yu. 12 Te ní níhí tẽ Jácób tnúhu sá ío triú Ègiptú, núu ní tendaha-dẽ cue déhe-dé ní sáháⁿ-güedé ní sânguaaⁿ-güedé triú-án, te dàvá-án nĩ sáháⁿ cue ñaní tnáhá-ó xito díhna nuu nacióⁿ Ègiptú. 13 Te xito cùu uú cuáháⁿ-güedé, te ní xáhaⁿ tẽ Chèé sá ñaní-dé cúu-güedé. Te téé yìndaha Egiptú ní cutnùní iní-dé sá díu-ní ñaní tẽ Chèé cúu-güedé. 14-15 Te ní cana té Chèé tãtã-dẽ té Jácób ndihi nchaa ñaní tnáhá-dẽ. Te cùu-xi datná únídico sáhúⁿ-yu ndèca té Jácób cuáháⁿ nacióⁿ Ègiptú núu ndécú tẽ Chèé, te xiáⁿ nĩ quexió-yu ní ngóo-yu. Te yàcãⁿ ní xihí té Jácób ndihi nchaa déhe-dé cue ñaní tnáhá-ó. 16 Te sátá nĩ cuu titní cuíá, te ní natava-güedé yiqui ndíi Jácób ndihi nchaa déhe ndíi nchido-güedé cuáháⁿ ñuú Sìquém. Te ndíi Àbrahám sa ní cuu titní-gá cuíá sã nĩ nacuaaⁿ ndíi ñuhu núu cuè déhe ndíi Hámór. Te xiáⁿ nchii yaú ní nachindúxi-güedé yiqui-án.

17 "Te cútnàhá vátã natáva-gã-güedé yiqui cue ndíi, te sa ta tnàhá yatni cada Yã Ndiõxí nàcuáa ní xáhaⁿ-gã xii ndíi Àbrahám cada-gã sá cúu-xí ñáyiu isràél ndécú Ègiptú, te ta cãyá víhí-yu cuáháⁿ. 18 Te dàvá-án chi ingá téé yìndaha nacióⁿ Ègiptú, te ñá túu-gã ní xiní-dé nása ní

xóo cada ndíi Chèé. 19 Te téé yìndaha Egiptú ñá ní quide ndáá-dé, chi ío ní dándóhó-dẽ ñaní tnáhá-ó nĩ xindecu dàvá-án. Te ní táuchíuⁿ-dẽ sá xócuíñí-yu dándóo-yu déhe yiquiⁿ cuendá ndihi-güexi cuú. 20 Te dàvá-án nĩ cacu té Moisés, te ío ní cudíi iní ñáhá Yã Ndiõxí xii-dé, Te ní xindecu ndihi ñaha nãná-dẽ ndihi tãtã-dẽ úní-ni yóo. 21 Te ndèca ñahá-yu cuáháⁿ ingá xichi, te yàcãⁿ ní dándóo ñahá-yu xii-dé, te ní naníhí ñahá déhe yoco téé yìndaha Egiptú, te ní xito-xi-dé datná xitó-xi ñⁿ déhe mee-xi nĩ xito-xi-dé ndéé ní sahnú-dé. 22 Te ní cutúha-dé nchaa sá xiní cue téé ègiptú, te ío váha ní sáá díquí-dẽ tnúhu cáháⁿ-dé ndihi nchaa sá cádá-dẽ.

23 "Te cútnàhá ndécú-dẽ údico cuíá-dẽ, te ní cachí-dé sá quíhíⁿ-dé cáháⁿ ndihi-dé cue ñaní tnáhá-dẽ ñáyiu isràél. 24 Te ní xiní-dé ní caniha ñⁿ téé ègiptú xii ñⁿ téé isràél, te ñá ní cùndee iní-dé cundehe-dẽ núu ní sáháⁿ-dé ní chindee-dẽ téé isràél, te ní sahní-dé téé ègiptú, 25 chi ní cachí Yã Ndiõxí sá díu-dẽ dacãcu-dé ñaní tnáhá-dẽ ñáyiu isràél núu cuè téé ègiptú. Te ní sani iní-dé sá cútnùní iní-yu nàcuáa ní xáhaⁿ Yã Ndiõxí xii-dé, dico ñá túu ní cutnùní iní-yu. 26 Te nduu tnèé ní xiní-dé nàá úu cue téé isràél, te ñá túu ní tnàhá iní-dé nàá-güedé núu ní xáhaⁿ-dẽ xii-güedé: "¿Ná cuendá ducaⁿ xĩnàá-ndó? ¿Náa ñá díu ndimee-ndo núu ducaⁿ xĩnàá-ndó?" Duha ní xáhaⁿ tẽ Moisés xii-güedé.

27 Te tée ndècuéchi ní sáháⁿ-dé ní chindaḥa nihnu-dé té Moisés ìⁿ xio, te ní xáhaⁿ-dè: “¿Ná cúu yòhó nõu véxi-n tàxi tñuní ñáhá-n? 28 Te tñahá-ni tucu yúhú cahni-n dàtná ní sahní-n tée ègiptú icu càhaⁿ-n á”, duha ní xáhaⁿ-dè xii té Moisés. 29 Te sá dúcáⁿ nĩ cáháⁿ tée isràél nõu ní yúhú té Moisés ní xinu-dé cuáháⁿ-dé ní sáá-dé nacióⁿ Mèdián. Yácáⁿ ní ngóo-dé, te yácáⁿ ní tnándaha-dé, te ní cacu úú déhe tée-dé.

30 “Te sátá nĩ xínu údico cuiá, te ní sáháⁿ té Moisés ìⁿ xio yucu Sinái. Te yácáⁿ ní xiní-dé ìⁿ tñutáu nchicúⁿ ñuhú, te xití itá ñuhú-án nĩ xiní-dé yíhí ìⁿ espíritú xínú cuèchi núú Yá Ndiöxí. 31 Te òré ní xiní-dé sá yíhí-xí xití itá ñuhú-án, te ní cuñuhu vñhi-dé sá nĩ xiní-dé espíritú-áⁿ xití itá ñuhú-án, te ní sándehe-gá-dé, te ní xíndéhe vñha-dé. Te ní tecú dóho-dé ní cáháⁿ Yá Ndiöxí, te xáhaⁿ-gã xii-dé: 32 “Yúhú cúu-í Ndiöxí ní cáháⁿ ndihí cue ñaní tñahá-n ndèé sanaha, ndíi Ábrahám ndihí ndíi Isaac ndihí ndíi Jácób, ndihí dava-gá cue ñaní tñahá-n. Nchaa cue ndíi-áⁿ nĩ xóo cáháⁿ ndihí-í.” Duha ní xáhaⁿ-gã xii té Moisés. Te ní quidi ñaha-xi xii té Moisés sá nĩ yúhú-dé, te ñá ní cùyi-gá-dé cundehe-dè tñutáu nchicúⁿ ñuhú-án. 33 Te Yá Ndiöxí ní xáhaⁿ-gã xii-dé: “Queñuhu chàú-n, chi núú ñuhú nĩ cuu íí nútñi-n. 34 Te yúhú ndéhè-í sá ïo ndòho nchaa ñáyiu cùu cuendá-í, ñáyiu ndècu nacióⁿ Ègiptú. Te ní tecú dóho-í sá ïo ndáhú

xícáháⁿ-yu, núu xíáⁿ véxi-í çàhí tñuhu-í sá nùhú-n nacióⁿ Ègiptú cuendá ndeñuhú-n-yu yácáⁿ.” Duha ní xáhaⁿ Yá Ndiöxí xii té Moisés.

35 “Te ñá ní sàndáá iní-yu té Moisés ndéé díhna, chi ní xáháⁿ-yu: “¿Ná cuendá véxi-n tàxi tñuní ñáhá-n xii-ndí?” Duha ní xáháⁿ-yu xii té Moisés. Te ñu-ni té Moisés ní tendaha ñàḥa Yá Ndiöxí ní sáháⁿ-dè dacacu-dé ñáyiu isràél nacióⁿ Ègiptú cuèi ñá ní sàndáá iní ñáhá-yu xii-dé. Dico ní taxi tñuní-dé-yu, chi ducaⁿ nĩ xáhaⁿ-gã òré ní xiní-dé espíritú xínú cuèchi núú-gã xití tñutáu nchicúⁿ ñuhú. 36 Te té Moisés ní ngúita-dé ní quide-dé sá vñ yóo tñahí ndàcu cada, te ní cuñuhu vñhi-yu sá dúcáⁿ nĩ quide-dé, te ducaⁿ nĩ quide-dé Ègiptú ndihí Lámár Tícuèhé. Te ní ngódó núú-dè núu-yu ní queé-yu Ègiptú cuáháⁿ-yu ìⁿ ichi xití yucu núú vñ yóo tñahí ndècu, te ní xíhi-yu údico cuiá xití yucu-án, te xíáⁿ nĩ xóo cada-dé sá vñ yóo tñahí ndàcu cada. 37 Te ñu-ni té Moisés ní xáhaⁿ-dè xii cue ñaní tñahá-dè dàvá-án: “Yá Ndiöxí cada-gá te coo ìⁿ ñaní tñahá-ndó ndéé cuéé-gá, te tée-án cáháⁿ-dè tñuhu-gá núú-ndó dàtná cuíní-ndó nĩ cachí-gá quidé yúhú, te ío xini ñuhu-xi cundédóho-ndo tñuhu cáháⁿ-dè”, duha ní xáhaⁿ tē Moisés xii-yu dàvá-án. 38 Te ñu-ni té Moisés ní xíndecu ndihí-dé ñáyiu isràél xití yucu, te ní sáá-dé yucu Sinái, te xíáⁿ nĩ quixi ìⁿ

espíritú xínú cuèchi núú Yă Ndiôxí ní cáháⁿ ndihî ñaha-xî xî-dé, te yàcáⁿ ní dâcuáhá ñaha-xî tnúhu-gá, te diu-ni tnúhu-áⁿ nî ndóo dàcuaha-o.

39 'Te cue ñani tnáhá-ó nî xíndecu ndéé sanaha ñă nî sândáá iní-yu té Moisés, te ñá ní ndêe iní ñáhă-yu xii-dé, chi ní cuiní-yu nuhú tucú-yu ñúú Ègiptú cundecú-yu. 40 Te òré ndécú tē Moisés yucu ní xáhăⁿ-yu xii ñani-dé té Àrón: "Cadúha-n ñⁿ úú ndiôxí dîhúⁿ cuááⁿ codonuu núú-ó cùhuⁿ-o ichi, chi ñá túú cùtnuní iní-ó ndèé ichi cuáháⁿ té Moisés, té yòdo nuu núú-ó ndùu ní quee-o Ègiptú", duha ní xî-yu té Àrón. 41 Te

dává-áⁿ nî cadúha-güedé ñⁿ chēhlu mee-ni dîhúⁿ cuááⁿ, te ní sahani-güedé ñⁿ úú quiti nchìto ní quide càhnu-güedé chēhlu-áⁿ. Te ío ní cudîⁿ iní-yu quiti-áⁿ, chi ní cachí-yu sá díú-ní ndiôxí cúú-dí. 42 Te sá dúcáⁿ nî quidé-yu, xiăⁿ ní dáñá ñaha Yá Ndiôxí xií-yu. Te ní dáñá-gă ní xóo cada càhnú-yu nchíanchii, ndihî yóó, ndihî nchaa chódíní. Te duha ní chídó tnùnî ñⁿ té ní xóo cáháⁿ tnúhu Yá Ndiôxí ndéé sanaha nàcuáa ní xáhaⁿ-gă xii ñáyiú dává-áⁿ:

Nchòhó ñáyiú isràél, ní cuu údico cuíá yîhî-ndó yùcu,

te ní sahani-ndo quiti-ndo ní quide càhnu ñaha-ndo xii-í cáháⁿ-ndó, dico ñáhá chi ní sahani-ndo-güèdî ní quide càhnu-ndo sá nî cadúha mee-ndo.

43 Te ní cadúha-ndo ñⁿ veñúhu lîhli,

te ní sanutñi-ndo Mòlóc sá càchí-ndó cùu ndiôxí-ndó xica nchido-ndo xití yucu,

te ní cadúha-ndo ñⁿ chódíní, te quiti-ăⁿ càchí-ndó sá cúú-dí ndiôxí Rênfán, te ndi ndùú sá nî cadúha-ndo-ăⁿ nî quide càhnu-ndo.

Te cuendá sá dúcáⁿ nî quide-ndo te yúhú queñuhu ñaha-î xii-ndo quîhîⁿ-ndó cùndecu-ndo ingá xio nacióⁿ Babiloniá.

Duha ní xáhaⁿ Yă Ndiôxí xií-yu, te ducaⁿ nî chídó tnùnî té ní xóo cáháⁿ tnúhu-gá.

44 'Te xití yucu-áⁿ nî dácáá-güedē ñⁿ veñúhu vehe dóó. Te vehe-áⁿ nî cuu-xi ñⁿ sá cùtnuní iní-yu sá Yă Ndiôxí ndécú ndihî ñaha-gá xií-yu. Te vehe-áⁿ nî dácáá-güedē nàcuáa ní xáhaⁿ Yă Ndiôxí xii té Moisés, chi ní dánèhé ñáhá-gă xii-dé nàcuáa dacàa-güedé. 45 Te sátá nî xíhí nchaa cue té-áⁿ, te ní ndóo ndihî nchaa déhe-güedé veñúhu-áⁿ. Te ní xido tucu-güedé veñúhu-güedé cuáháⁿ-güedé, te cuáháⁿ ndihî-güedé té Jòsué núú cùndécú-yu. Te sátá nî

quexió-yu, te ní dácúnŭ-yu ñáyiú dii ñùú-xi-áⁿ chi mee Yă Ndiôxí ní chindee ñaha-gá xií-yu. Te sátá nî ndihî nchaa ñáyiú ní xica nchido veñúhu dóó-ăⁿ nî xíhí, te ní ndóo ndihî dava-gá-yu. Te ducaⁿ-ni ndécú-xi ní cacu té Dàvií, té ní xíndaha ñaha xií-yu. 46 Te Yá Ndiôxí ní

cudíí víhí iní-gá té Dàvíí. Te ní xícáⁿ tnúhú-dě núú-gã nõu cuu dacàa-dé veñúhu cuu cuendá-gá, chi ìⁿ-ni Yá Ndiòxí ní xóo cada càhnu té Dàvíí ndìhi té Jàcób, ñaní tnàhá-ó nĩ xíndecu ndéé sanaha víhi-gá. ⁴⁷ Te Yá Ndiòxí ñá ní dàña-gá dacàa té Dàvíí veñúhu-gá dico déhe-dé té Salòmón, chi ní dáñá-gã ní dácáá-dě veñúhu cuu cuendá-gá ⁴⁸ cuèi ñá túú sácúndecu-gá veñúhu dàcaa cue téé ñuyíú-a, chi ndèni xíáⁿ ndécú-gã chi espíritú cúú-gã. Te duha ní chídó tnùní téé ní xóo cáháⁿ tnúhu Yá Ndiòxí ndéé sanaha nàcuáa ní cáháⁿ-gá:

⁴⁹ Yúhú táxí tnùní-í andiù ndìhi ñuyíú,

te xíáⁿ nõu nchòhó vá ndácú-ndó chìhi ñaha-ndo xití veñúhu dàtná quidè-yu sá cächí-yu cùu ndióxí-yu ní cadúha-yu.

Te ñá túú xìni ñuhu-í núú ndétatú-í,

⁵⁰ chi yúhú ní cadúha-í nchaa sá ío ñuyíú-a.

Duha ní cáháⁿ Yá Ndiòxí, te diu-ni ducaⁿ nĩ chídó tnùní téé ní xóo cáháⁿ tnúhu-gá —duha ndùu nchaa tnúhu ní xáhaⁿ té Těvá xii-güedé.

⁵¹ Te ní xáhaⁿ tùcu-dé:

—Nchòhó, ío sàá iní-ndó chi quide-ndo datná quidé ñáyiú ñá túú cùu ñáyiú isràél chi ñá túú tédóho-ndo tnúhu càháⁿ Yá Ndiòxí, chi ñá cuìní-ndó quíndáá iní-ndó tnúhu-gá, mee-ni cùu úhú iní-ndó Espíritú-gá dàtná ní xóo cada cue ñaní tnàhá-ndó nĩ xíndecu ndéé sanaha. ⁵² Chi cue téé-án ío ní xóo dandòho-güedé

nchaa cue téé ní xóo cáháⁿ tnúhu Yá Ndiòxí ndéé sanaha. Te ní sahani-güedé nchaa cue téé ní cáháⁿ sá quixí Crìstú ñuyíú-a, te Yaá-áⁿ ñà túú cuèchi-gá. Te diu-ni ducaⁿ nĩ quide-ndo Crìstú cùtnàhá ní quixi-gá ñuyíú-a, chi ní sáha cuendá-ndó-gã núú cuè téé ní cuu úhú iní ñáhá xì-gá ní sahani ñaha-güedé. ⁵³ Te ndècu ndìhi-ndo tnúhu ní chídó tnùní ndíi Moisés nàcuáa ní xáhaⁿ espíritú xínú cuèchi núú Yá Ndiòxí xii ndíi, te ni dúcáⁿ ñá túú sàndáá iní-ndó tnúhu-án nõu ní sahani-ndo Jèsús. Te diu-ni tnúhu-án ndécú ndìhi-ndo ndéé vitna —cächí té Těvá xáhaⁿ-dě xii-güedé.

Ní sahani-güedé té Těvá

⁵⁴ Te sá dúcáⁿ nĩ xáhaⁿ tẽ Těvá xii-güedé, te ní cudééⁿ víhí-güedé núú-dě, núú ní quide rúhñú-güedé núhu-güedé sá sàtú iní-güedé.

⁵⁵ Te té Těvá ndécú ndìhi-dé Espíritú Yá Ndiòxí, te ní ndacoto váha-dé andiù, te ní xiní-dé súúní dàtásaⁿ-xi núú ndécú Yá Ndiòxí, te ní xiní-dé Xítóhó Jesucristú nútníi-gá xio cùha Yá Ndiòxí. ⁵⁶ Te ní xáhaⁿ tẽ Těvá xii-güedé:

—Chí cùndèhe andiù chi yúhú ndèhè-í Xítóhó Jesucristú nútníi-gá xio cùha Yá Ndiòxí, te diu-gá cúú-gã ñaní tnàhá-ndó nchàa-ndo —cachí-dé xáhaⁿ-dě.

⁵⁷ Te ní sadí-güedé dóho-güedé cuendá sá ñá ní tnàhá iní-güedé cundédóho-güedé tnúhu càháⁿ-dè, te uuⁿi ní cuáá-güedé, te ní taxi ndaha ñaha-güedé xii-dé

58 ndécá ñaha-güedé cuáhán ndéé ñⁿ xio yuhu ñùú, te yacáⁿ ní sáñaha-güedě yúú xii-dé. Te ndècu ñⁿ tée cuechi nàni-dé Sàulú, te tée-áⁿ ñⁿ quide cuèndá-dé dóó-güedě cuèndá ní nune ndaha-güedé ní sáñaha-güedě yúú xii té Těvá. 59 Te òrè sáñaha-güedě yúú, te ní cáhán ndihí-dé Xítohó Jesucristú te xáhaⁿ-dě:

—Yòhó Xítohó Jesucristú, naqueheⁿ-n ìní-í —càchí-dé xáhaⁿ-dě xii-gá.

60 Te ní ngüíñí xítí-dě, te níhi ní cáhán-dé, te xáhaⁿ-dě:

—Yòhó Xítohó Jesucristú, vá técuèchi-n cuè tée-a sá dúhá quide ñaha-güedé xii-í —càchí-dé xáhaⁿ-dě xii-gá.

Te xíáⁿ-nă ní cáhán-dé, te ní xihí-dé.

8

Té Sàulú chíhí-dě ñáyiu sàndáá ìní-xi tnúhu Jèsús vecaá

1 Te té Sàulú ní nduu vétú ìní-dé sá ñⁿ sañi-güedé té Těvá.

Te ñⁿ nduu-áⁿ ñⁿ cuu níhi cuèndá nchaa ñáyiu sàndáá ìní-xi tnúhu Jèsús ñuú Jerusálén. Te ní ndihí-yu ní xité nuu cuáhán-yu distritú Jùdeá ndihí distritú Sàmariá. Te cue tée ní táuchíuⁿ Jèsús dácuàha ñaha xií-yu tnúhu-gá ní ndóo-güedé ñuú Jerusálén.

2 Te nchaa cue tée cáhán ndihí Yá Ndióxi ní chindúxi-güedé ndíi Těvá. Te ío ní ndáhyú ñáyiu ní sàndáá ìní tnúhu Jèsús sá ñⁿ xihí ndíi. 3 Te té Sàulú ío dàndoho-dé-yu, chi ndi vehe ndi vehe cuáhán-dé cuátní-dé cuèi tée cuèi ñadhí ndécá-dě cuáhán vecaá.

Cáhán-yu tnúhu Yá Ndióxi distritú Sàmariá

4 Te nchaa ñáyiu ní xité nuu cuáhán-yu cáhán-yu tnúhu Jèsús nchaa núú quexió-yu.

5 Te té Lìpé cuáhán-dé distritú Sàmariá cáhán-dé tnúhu Xítohó Jesucristú Yáá ní tendaha Yá Ndióxi ní quixi ñuyíú-a.

6 Te ío vâi núú sá vâ yòo tnàhí ndàcu cada ní quide-dé, te ní cuñúhu vîhí-yu, te ní xíndedóho váha-yu nchaa tnúhu ní cáhán-dé.

7 Te vâi ñáyiu yîhi ñaha espíritú cündihí yucu ñávâha ní queñuhu-dé nchaa espíritú-áⁿ yiqui cuñú-yu, te ní cana saa-xi òrè ní ndee-xi yiqui cuñú-yu cuáhán-xi, te ní ndúha-yu. Te vâi ñáyiu cùhú ñá cúú-gă candá nihnú-yu ndihí ñáyiu yacua ní quide tátna-dé, te ní ndúha-yu. 8 Te sá dúcáⁿ ñⁿ cáhán-dé tnúhu Jèsús te ní quide tátna-dé-yu, xíáⁿ ío ní cudíi ìní ñáyiu ñuú-áⁿ.

9 Te ñⁿ nduu-áⁿ ndécú ñⁿ tée nàni Xímú, te tée-áⁿ xíní-dé cada ndúu-dé, te ní cuu naha dùcaⁿ quide-dé, te ní xóo cuñúhu ñáyiu distritú Sàmariá sá dúcáⁿ quide-dé, te ní cachí-dé sá díú-ní-dě cúnúu. 10 Te nchaa ñáyiu cuèi ñáyiu cuica te cuèi ñáyiu ndàhú ío nèhé-yu sá yíñùhu núú-dě, te xítnàhá-yu:

—Tée-áⁿ ío chîndee ñaha Yá Ndióxi xii-dé ñuú vâi núú sá quidé-dě —càchí-yu xítnàhá-yu.

11 Te ní sàndáá ìní-yu nàcuáa ní xóo cada ndúu-dé, te ní xóo cuñúhu vîhí-yu, te ní

cuu naha dùcaⁿ-ni dandahú ñáhá-dě xii-yu. ¹² Te té Lìpé ní cáháⁿ-dé tnúhu Xítóhó Jesucristú, te ní xáhaⁿ-dě xii-yu sá Yă Ndiôxí cuìní-gá ndíhu ndaha ñàha-gá xii-yu.

Te cuèi tée cuèi ñadihi ní sándáá iní-yu tnúhu-gá, te ní sanduté-yu. ¹³ Te tnàhá té Xímú ní sándáá iní-dé tnúhu-gá, te ní sandute-dé, te ní xica cuu-dé ndihi té Lìpé, te ní cuñúhu-dé chi titní núú sã vã yòo tnàhí ndàcu cada ní quide té Lìpé, te ní cuñúhu vîhi nchaa ñâyiu.

¹⁴ Te dava-gá cue tée ní táuchíúⁿ Jèsús dacuàha ñaha xii ñâyiu tnúhu-gá ní níhí-güedě tnúhu sá ñâyiu distritú Sàmariá ní sándáá iní-yu tnúhu Yă Ndiôxí. Te ní tendaha-güedě té Pèlú ndihi té Juàá cuáháⁿ-güedé distritú Sàmariá. ¹⁵ Te ní quexìo-güedé, te ní cáháⁿ ndihi-güedé Yă Ndiôxí ní xicáⁿ-güedé Espiritú-gá quixi cundecu ndihí-yu. ¹⁶ Chi ni ñⁿ-yu vátá sàá-gá Espiritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé. ¹⁷ Te òré ní sacáⁿ ndodo-güedé ndaha-güedé díquǐ-yu, te ní quexìo Espiritú-gá ní ngúndecu ndihí-yu.

¹⁸ Te ní xiní té Xímú nàcuáa ní quide-güedé ní quexìo Espiritú-gá ní ngúndecu ndihí-yu, te cuìní-dé cuáñaha-dě díhúⁿ xii té Pèlú ndihi té Juàá ní cùu. ¹⁹ Te ní xáhaⁿ-dě:

—Chindee ñàha-ndo cuendá ndèda-ni cáa-yu cacáⁿ

ndodo-í ndaha-í díquǐ-yu, te níhí-yu Espiritú Yă Ndiôxí cundecu ndihí-yu —càchí-dé xáhaⁿ-dě xii-güedé.

²⁰ Te té Pèlú ní xáhaⁿ-dě xii-dé:

—Yòhó cuíta nihnu-n ndihí díhúⁿ-n, chi cuìní-n cuàaⁿ-n sá vãha quide Yă Ndiôxí.

²¹ Yòhó vá cúú càda-n chiuⁿ quide-ndí, chi ñá túú ndècu váha iní-n núú Yă Ndiôxí. ²² Te vá dúcáⁿ cáháⁿ-n, chi ío nèhé càháⁿ-n sã dúcáⁿ càháⁿ-n. Te cáháⁿ ndàhú-n núú Yă Ndiôxí sá ná cádá càhnu iní-gá tnúhu ní cáháⁿ-n.

²³ Te yúhú sa xiní-í sá ío úhú iní-n, chi mee-ni sã cuèhé sá dúhá chido nuu-n quide-n —cachí té Pèlú xáhaⁿ-dě xii té Xímú.

²⁴ Te ní xáhaⁿ tẽ Xímú xii-güedé:

—Cáháⁿ ndàhú-ndó núú Yă Ndiôxí sá ñà túú nã tnàhá-í sã dúcáⁿ ní cáháⁿ-í —càchí-dé xáhaⁿ-dě.

²⁵ Te té Pèlú ndihi té Juàá ní cáháⁿ-güedé tnúhu Yă Ndiôxí núú ñâyiu ñuú-áⁿ. Te ní xáhaⁿ-güedě nchaa nàcuáa ní quide Jèsús ní xiní-güedé òré ní xica cuu-gá ñuyíú-a. Te ní tñi-güedé ichi cuánuhú-güedé ñuú Jerusalén, te ní yáha-güedé titní ñuú yíndèhu distritú Sàmariá, te ní cáháⁿ-güedé tnúhu-gá.

Té Lìpé ndihi ñⁿ tée ñuú Etiópía

²⁶ Te ñⁿ espíritú xínú cuèchi núú Yă Ndiôxí ní quexìo-xi ñuú Jerusalén ní xáhaⁿ-xi xii té Lìpé:

—Cada túha-n chi quée nuu-n ñúú Gázá, dico mee-ni xítí yucu cuáháⁿ ichi — cächí-xi xăhaⁿ-xi xii-dé.

²⁷ Te ní xica-dé cuáháⁿ-dé, te ní natnahá-dé ìⁿ téé nacióⁿ Etiòpiá ñúhú-dě ichi. Te cùu-dé tesorèrú xínú cuèchi-dé núú ìⁿ ñadihí ñaha yindaha nacióⁿ Etiòpiá, te ñaha-áⁿ nání-áⁿ Càndacé. ²⁸ Te téé etiòpiá-áⁿ ní sáháⁿ-dé ñúú Jerusalén ní cáháⁿ ndihi-dé Yă Ndiòxí, te ñùhu-dé ichi cuánuhú-dé ñúú-dé ñúhú-dě carrètá, te dăcuaha-dé tñuhu ní chídó tñuní ndii Chàíá téé ní xóo cáháⁿ tñuhu Yă Ndiòxí ndéé sanaha. ²⁹ Te ní xáhaⁿ Espiritú Yă Ndiòxí xii té Lìpé:

—Quíhíⁿ tuha-n càrretá-ăⁿ —cächí Espiritú-gá xăhaⁿ-xi xii-dé.

³⁰ Te té Lìpé ní sátuha-dé carrètá-áⁿ, te ní tecú dóho-dé năcuáa cáháⁿ téé etiòpiá-áⁿ, téé ñùhu carrètá-áⁿ dăcuàha-dé năcuáa ní chídó tñuní ndii Chàíá. Te ní xáhaⁿ tē Lìpé xii téé etiòpiá-áⁿ:

—¿Tècú tñuní-n nchàa tñuhu dăcuaha-n-áⁿ? —cächí té Lìpé xăhaⁿ-dě xii-dé.

³¹ Te ní xáhaⁿ tē etiòpiá:

—¿Nása tecú tñuní-í te vá yôo dănehé ñáhá xii-í? Ta quèné iha coo-n chi danèhé ñáhá-n —cächí-dé xăhaⁿ-dě xii té Lìpé.

Te cuásaá té Lìpé núú carrètá ní ngóo-dé. ³² Te ndédóho-dé năcuáa dăcuaha téé etiòpiá-áⁿ năcuáa ní chídó tñuní ndii Chàíá núú tütú Yă Ndiòxí núú cächí-xi:

Dàtná quidé ìⁿ mbéé cada-dé òré can-deca ñaha-güedě

xii-dé quíhíⁿ cahni ñaha-güedě chi ñá túú nă cada-dé,

dàtná cuíní-ndó quide mbéé òré dèté-di ñá túú ndàhí-di ducaⁿ càda-dé òré cahni ñaha-güedě chi ni vă cáháⁿ-dé.

³³ Te mee-ni cùdiquí ndeé ñáhá-güedě xii-dé, te ni vă ndúcú tñuhu-güedě núú-dě ñùu ndáá ndècuèchi-dé.

Te ío cuu nduu cuihna ìni cue ñaní tñáhá-dě, chi cahni ñaha-güedě xii-dé ñuyú-a.

Duha cáháⁿ tutú ní dăcuáhá tē etiòpiá ní xindedóho té Lìpé.

³⁴ Te ní xáhaⁿ tūcu téé Etiòpiá xii té Lìpé:

—Cundee ìní-n cächí tñuhu-n yòo cacunehe téé ní cáháⁿ tñuhu Yă Ndiòxí ndéé sanaha, núu cáháⁿ-dé cuendá méé-dě àdi cáháⁿ-dé cuendá ingá ñáyiu —cächí téé etiòpiá-áⁿ xăhaⁿ-dě xii té Lìpé.

³⁵ Te té Lìpé ní cani-dé cuendú núú tē etiòpiá năcuáa ní cáháⁿ ndii Chàíá năcuáa cada Jèsús òré quixi-gá ñuyú-a. Te ní xáhaⁿ-dě năcuáa ndùu tñuhu Jèsús ndihi năcuáa ní quide-gá. ³⁶ Te ñùhu-güedě ichi cuáháⁿ-güedé ní naníhí-güedě ìⁿ xichi núú ñúhú ndùte, te ní xáhaⁿ tē etiòpiá:

—Iha ñùhu ndute, ¿te vá cúú cuàndute-í iha-ăⁿ? —cächí-dé xăhaⁿ-dě xii té Lìpé.

³⁷ Te xáhaⁿ tē Lìpé:

—Te núu sàndáá ndisa ìní-n Jèsús, te cuu cuandute-n —cächí-dé xăhaⁿ-dě.

Te ní xáhaⁿ tē etiòpiá:

—Sàndáá ndisa iní-í sá Dēhe Yá Ndiōxí cúú Xítóhó Jesucristú —càchí-dé xǎhaⁿ-dē.

³⁸ Te ní ngani-dé carrètá, te ní nuu-güedé ndi ndüü-güedé, te cuánguee-güedé xití ndute, te ní dácuañdüte ñaha té Lìpé xii-dé. ³⁹ Te òré ní nene-güedé xití ndute, te ndèca ñaha Espiritú Yá Ndiōxí xii té Lìpé cuáháⁿ. Te ñá túú ní xini téé ní sandute-áⁿ ndéé ichi cuáháⁿ té Lìpé. Te ío ní cudíí iní-dé sá ní natuha-dé ichi Yá Ndiōxí, te cuándaa-dé núú carrètá-dé cuánuhú-dé. ⁴⁰ Te ní quexìo té Lìpé ñuú Àzotó, te ndi tnahá ñuú ndi tnahá ñuú cuáháⁿ-dé càháⁿ-dé tnúhu Yá Ndiōxí, te ní yáha-dé cuáháⁿ-dé ní quexìo-dé ndéé ñuú Cèsareá.

9

Té Sàulú ní tuha-dé ichi Xítóhó Jesucristú

(Hch. 22:6-16; 26:12-18)

¹ Te té Sàulú mee-ni càháⁿ cuèhé-dé cuèndá ñáyiú ní sándáá iní tnúhu Jèsús, te cuìní-dé cahni ñaha-dé xii-yu. Te ní sáháⁿ-dé núú dùtú cúnü-gá, ² te ní xáhaⁿ-dē sá cádüha dùtú-áⁿ ìñ tutú canehe-dé quíhíⁿ cuáha-dé cue téé xindeé nchito veñúhu ñuú Dàmascú, chi cuìní-dé tñi-dé nchaa ñáyiú dàcuaha tnúhu Xítóhó Jesucristú candeca ñaha-dē quíhíⁿ ñuú Jerusàlén. ³ Te ní xica-dé cuáháⁿ-dé tá cüyatni-dé ñuú Dàmascú, te uuⁿni ní quee ñuhú andiu, te ní dáyèhé-xi ndéé núú nútñi-dé. ⁴ Te ní nduá-dé ndéé ñuhu, te ní tecú dóho-dé càháⁿ ìñ sá càháⁿ núú ñinu, te xáhaⁿ-xi xii-dé:

—Yòhó Sàulú, ¿ná cuèndá cúú úhú iní ñáhá-n xii-í te dándoho ñaha-n? —càchí sá càháⁿ-áⁿ xáhaⁿ-xi xii-dé.

⁵ Te ní xáhaⁿ-dē:

—¿Ná cúú yòhó sá càháⁿ-áⁿ-i? —càchí-dé xáhaⁿ-dē.

Te ní xáhaⁿ sá càháⁿ xii-dé:

—Yúhú cúú-í Jèsús téé cùu úhú iní-n. Te ío dándoho-n mee-n, chi dàtná quidé ndìcutu quide-n, chi quiti-áⁿ núu na cüxi-güedé-di püyá te sáha-di patadá núú-xi, te quide úhú-di mee-di. Te ducaⁿ sätnahá-xi cùu yohó chi ñá túú sàndáá iní ñáhá-n xii-í —càchí sá càháⁿ-áⁿ xáhaⁿ-xi xii-dé.

⁶ Te té Sàulú ní quidi ñaha-xi xii-dé sá ní yùhú-dé, te ní xáhaⁿ-dē:

—Xítóhó Jesucristú, ¿te ná cuìní-n càda-í-i? —càchí-dé xáhaⁿ-dē.

Te Jèsús ní xáhaⁿ-gǎ xii-dé:

—Ndacóo, te quíhíⁿ-n ñuú-áⁿ, te yàcáⁿ tecú tnúhu-n nǎ cúú sá cádá-n —càchí-gǎ xáhaⁿ-gǎ xii-dé.

⁷ Te cue téé cuáháⁿ ndihí té Sàulú ní tecú dóho-güedé càháⁿ ìñ sá càháⁿ, dico vá yòo tnàhí ni xini-güedé, te ní yùhú víhí-güedé, te ñá túú tnàhí ni càháⁿ-güedé. ⁸ Te ní ndacóo té Sàulú, te ñá ní cùu-gǎ cundehe-dē, chi ní cuaa-dé, te ní tñi-güedé ndaha-dé ndécá ñaha-güedé cuáháⁿ ñuú Dàmascú. ⁹ Te yàcáⁿ ní xindecu-dé úní nduu, te ñá ní cùu tnahí cundehe-dē, te ñá túú nǎ ní xèxi-dé, te ñá túú ní xihí-dé ndute.

¹⁰ Te ndècu téé sàndáá iní tnúhu Jèsús ñuú Dàmascú,

nání-dě Anàniás, te ní sáháⁿ
Jèsús núú sàní-dé, te ní
xáhaⁿ-gã xii-dé:

—¡Anàniás! —càchí-gá
xáhaⁿ-gã.

Te ní xáhaⁿ-dě:

—¿Yúhú càháⁿ ndihi-n-ǎⁿ?
—càchí-dé xǎhaⁿ-dě.

¹¹ Te ní xáhaⁿ-gã:

—Ndacuíñí, te quíhíⁿ-n ìⁿ
chiuⁿ ichi núú dánàni-güedé
Ichi Ndáá, te yàcáⁿ nan-
ducu-n vèhe té Jùdás, chi vèhe
té-áⁿ ndécú ìⁿ té-áⁿ tǎrsú
nání-dě Sàulú, te té-áⁿ sa
càháⁿ ndihi ñaha-dě xii-í. ¹² Te
té-áⁿ ní dácótó ñaha-xi sá ní
xini ñáhá-dě xii-n ní quexio-n
núú ndécú-dě, te ní sacáⁿ
ndodo-n ndàha-n díquí-dě,
te ducaⁿ te ní nacaáⁿ núú-dě
ní dácótó ñaha-xi xii-dé —
càchí-gá xáhaⁿ-gã.

¹³ Te té Anàniás ní xáhaⁿ-dě:

—Yòhó Xítóhó Jesucristú,
càchí tnúhu-í xii-n sǎ ní níhì-í
tnúhu nàcuáa quide-dé sǎ
ìo quide úhú-dé ñáyíu càháⁿ
ndihi-n ñúú Jerusálén. ¹⁴ Chi
nèhe-dé tutú ní sǎñaha cuè
dútú cúnúu cuendá níhí-dé
nàcuáa cada-dé tní-dé nchaa
ñáyíu sàndáá iní ñáhá xii-n —
cachí-dé xǎhaⁿ-dě xii-gã.

¹⁵ Te Jèsús ní xáhaⁿ-gã
xii-dé:

—Quíhíⁿ-n ndàtnúhu-n
ndihi-dé, chi cuíni-í cada-dé
chìuⁿ-í, quíhíⁿ-dé càháⁿ-dé
tnúhu-í núú cuè ñáyíu isràél,
ndihi núú cuè ñáyíu ñá túú
cùu ñáyíu isràél, ndihi núú
cuè té yìndaha ñaha xií-yu.

¹⁶ Te yúhú cúnaha-í xii-dé
sá ndóhó vǐhi-dé cuendá-í
—càchí-gá xáhaⁿ-gã xii té
Anàniás.

¹⁷ Te cuáháⁿ té Anàniás
vehe núú ndécú té Sàulú te
ní sacáⁿ ndodo-dé ndaha-dé
díquí té Sàulú, te ní xáhaⁿ-dě:

—Yòhó té Sàulú té ndècu
ndihi-í ichi Xítóhó Jesucristú,
diu-ni Xítóhó Jesucristú Yaá
ní càháⁿ ndihi ñaha xii-n ichi
ní tendaha ñaha-gá véxi-í
cuendá cacáⁿ tǎhù-í núú-gã
cuendá-n te ndúha núú-n,
te dàtnùní quixi Espiritú-gá
cundecu ndihi-n —càchí-dé
xǎhaⁿ-dě.

¹⁸ Te dàtná sá ní xócání-ó
ìⁿ sá ndèdí núú-dě ní quide
ñaha-xi xii-dé, te ní nacaáⁿ
núú-dě, te ní sandute-dé.
¹⁹ Te ní xexi-dé, te ní naníhí
ndéé-dě, te titní nduu ní
xíndecu ndihi-dé ñáyíu ní
sàndáá iní tnúhu-gá ñúú
Dàmascú.

*Té Sàulú dácùaha-dé ñáyíu
tnúhu Yá Ndiòxí ñúú Dàmascú*

²⁰ Te sáta ní ndúha núú-dě,
te ní sáháⁿ-dé veñúhu cuè
ñáyíu isràél ní xáhaⁿ-dě
sá Jèsús cúu-gã Déhe Yá
Ndiòxí. ²¹ Te nchaa ñáyíu ní
xíndedóho tnúhu ní càháⁿ-dé,
te ní cuñúhu vǐhí-yu, te ní
xítnàhá-yu:

—Diu té-ǎⁿ ní sahni-dé
ñáyíu ní xóo chiñúhu ñaha
xii Jesús ñúú Jerusálén. Te
ní quixi-dé iha ní cuíni-dé
tní ñaha-dě xií-yu candeca
ñaha-dě quíhíⁿ núú cuè dútú
cúnúu ní cuu —cachí-yu
xítnàhá-yu.

²² Te ìó iní-gá té Sàulú
xǎhaⁿ-dě xií-yu sá díú Jèsús
cúu-gã Cristú Yaá ní tendaha
Yá Ndiòxí ní quixi ñuyíú-a,
te xǎⁿ ñá ní níhí ñáyíu
isràél ndécú ñúú Dàmascú

tnúhu cáháⁿ-yu, te ní cuñúhu vihí-yu.

Té Sàulú ní dáxíó-dě núú ñáyiú isràél

²³ Te sátá nǐ cuu tǐtní nduu, te ní ndatnúhu cue téé isràél sá cáhni-güedě té Sàulú. ²⁴ Te té Sàulú ní níhí-dě tnúhu nàcuáa cáháⁿ-güedé cada ñaha-güedě xii-dé, te cuéi nduu cuéi niú néhé cuendá-güedé yuyèhe núú ñúdòco ndóho yuhu ñúú cuendá cuíni-güedé tñii ñaha-güedě xii-dé te cahni ñaha-güedě. ²⁵ Te ⁱⁱ niú ndécá ñaha cue téé ní sándáá iní-xi tnúhu Jèsús cuáháⁿ ndéé núú ñúdòco ndóho yuhu ñúú. Te ní sáá-güedé núú ndóho, te ní chihí ñaha-güedě xii-dé xití tídihi te ní dándèe ñaha-güedé núú ñúhú, te ní quene-dé cuáháⁿ-dé.

Te Sàulú ndécú-dě ñúú Jerusalén

²⁶ Te té Sàulú ní nasáá-dé ñúú Jerusalén, te cuíni-dé chitnahá-dé ñáyiú sándáá iní tnúhu Jèsús, te ní yùhú-yu chi ní cáháⁿ-yu sá dándàhú ñáhá-dě sá sándáá iní-dé Jèsús. ²⁷ Te té Bèé ndécá-dé té Sàulú cuáháⁿ núú ndécú cue téé ní táuchíúⁿ Jèsús dacuàha ñaha xii-yu tnúhu-gá. Te ní caní té Bèé cuendú núú-güedé nàcuáa ní cuu ní naníhí tnáhá té Sàulú ndihí Jèsús ichi, te ní cáháⁿ ndihí ñaha-gǎ xii-dé. Te ní xáhaⁿ tùcu té Bèé nàcuáa ní cáháⁿ té Sàulú tnúhu Jèsús núú ñáyiú Dàmascú, te ñá túú tnàhí ní yùhú-dé ní cáháⁿ-dé, càchí té Bèé xáhaⁿ-dě xii-güedé. ²⁸ Te ní xíndecu té Sàulú ndihí

ñáyiú xídácuáhá tnúhu-gá ñúú Jerusalén. Te ní ndicuu ndicuu-dé ní cáháⁿ-dé tnúhu Jèsús, te ñá túú tnàhí ní yùhú-dé ²⁹ ní cáháⁿ ndihí-dé ñáyiú isràél ñáyiú cáháⁿ tnúhu griégú. Te ñáyiú-áⁿ nǐ ngúita-yu ndàtnúhu-yu sá cáhni ñáhá-yu xii-dé. ³⁰ Te ñáyiú sándáá iní tnúhu-gá ní níhí-yu tnúhu nàcuáa cuíni ñáyiú cáháⁿ tnúhu griégú cada ñáhá-yu xii té Sàulú, núú ní sándeca ñáhá-yu xii-dé ñúú Cèsareá, te yàcáⁿ ní tendaha ñáhá-yu cuánuhú-dé ñúú Tàrsú.

³¹ Te sátá xǎⁿ te ní sanaá-yu ñá túú-gǎ ní xóo cada úhú-yu nchaa ñáyiú sándáá iní tnúhu Jèsús nihíi distritú Jùdeá, ndihí distritú Galileá, ndihí distritú Sàmariá. Te ní níhí nděé-yu ní quidé-yu nàcuáa ní xáhaⁿ Yǎ Ndióxi cadá-yu, te ío ní xíndecu yíñùhú-yu núú-gǎ, te Espíritú-gá ní chindee ñaha-xi xií-yu, te vài-gá ñáyiú ní sándáá iní-yu tnúhu-gá.

Té Pèlú ní quide tátna-dé té Èneás

³² Tǐtní xichi ní sáháⁿ té Pèlú ní cáháⁿ-dé tnúhu Yǎ Ndióxi. Te ⁱⁱ nduu ní sáháⁿ-dé ñúú Lídá ní cáháⁿ ndihí-dé ñáyiú sándáá iní ñáhá xii Jèsús. ³³ Te yàcáⁿ ní naníhí-dé ⁱⁱ téé nàni Èneás, te ní cuu úná cuíá cùhú-dé, te ní lùha ñá cúú-gǎ candá nihnu-dé. ³⁴ Te ní xáhaⁿ té Pèlú xii-dé:

—Èneás, Xítóhó Jesucristú cada tátna ñaha-gǎ xii-n tnàvíi. Ndacóo te ndocani-n yùu-n —cachí-dé xáhaⁿ-dě.

Te òré-ni ní ndacóo-dé.
 35 Te nchaa ñáyiú ñuú Lidá ndihí ñáyiú ñuú Sàrón ní xiní-yu sá nǐ ndúha-dé, te ní sándáá víhí iní-yu Xítóhó Jesucristú.

Ní ndoto tá Dòrcás

36 Te ñuú Jòpé ndécú ìn ñadihí sándáá iní-aⁿ tnúhu Jèsús, te nàni-aⁿ Tabitá, te tnúhu griégú xǎhǎⁿ-yu Dòrcás, te ío váha ní xóo cada-aⁿ chí ío váha iní-aⁿ, te ní xóo chindee-aⁿ ñáyiú ndàhú. 37 Te váha-ni ndècu-aⁿ ni cuu, te ní tñi ñaha cuèhé nǐ xihí-aⁿ, te ní nadacùchi ñahá-yu, te ní chihi ñahá-yu ìn cuàrtú ndécú ndéé núú nǐnu. 38 Te ñáyiú ní sándáá iní tnúhu Jèsús ñuú Jòpé ní níhí-yu tnúhu sá ndécú tè Pèlú ñuú Lidá. Te yatni-ni càa ñuú-áⁿ, te ní tendàhá-yu úú cue tée cuáháⁿ-güedé núú ndécú-dé cuèndá cúñaha-güedé candeca ñaha-güedé xii-dé quíhíⁿ núú ndécü-yu. Te ní xáhaⁿ-güedé xii té Pèlú:

—Yáchí ná quíhíⁿ-ó ñuú-ndí, chí yacáⁿ cáná ñahá-yu quíhíⁿ-n tnàvíí —càchí-güedé xǎhaⁿ-güedé xii té Pèlú.

39 Te té Pèlú ní xica-dé cuáháⁿ-dé ndihí cue tée-áⁿ ñuú Jòpé, te òré ní quexìo-güedé ndihí-dé, te cuásaá ndihí ñaha-güedé cuàrtú ndéé núú nǐnu. Te nchaa ñáyiú ñáyiú quèé ní tacá ndéé ñahá xii ndíyi-áⁿ xindáhyú-yu, te ní dánèhé ñahǎ-yu nchaa dóo nǐ cadúha ñaha ní xihí-áⁿ. Chí ní xóo cadúha-aⁿ dícúⁿ, te ní xóo cadúha-aⁿ díó òré ní

xíndecu-aⁿ ñuyíú-a, te nchaa xíǎⁿ ní dánèhé ñahǎ-yu xii té Pèlú. 40 Te té Pèlú ní xáhaⁿ-dè sá quèé-yu nchaá-yu quehé, te ní queé-yu. Te ní ngüíñí xítí-dé te ní cáháⁿ ndihí-dé Yǎ Ndiòxí, te dàtnùní ní ndacoto-dé núú cándòdo ndíyi-áⁿ, te ní xáhaⁿ-dè:

—Tàbitá, ndacóo —càchí-dé xǎhaⁿ-dè.

Te ní ndacoto-aⁿ núú tè Pèlú te ní ndacóo-aⁿ. 41 Te ní tñi-dé ndaha-aⁿ ní nacanutñi ñaha-dé. Te ní cana-dé nchaa ñáyiú ñáyiú quèé ndihí nchaa ñáyiú sándáá iní tnúhu Jèsús cuèndá quini-yu sá nǐ ndoto-aⁿ. 42 Te nchaa ñáyiú ñuú Jòpé ní níhí-yu tnúhu nàcuáa ní quide té Pèlú ní ndoto ñaha ní xihí-áⁿ, te vǎi-yu ní sándáá iní-yu Xítóhó Jesucristú. 43 Te titní nduu ní xíndecu té Pèlú vehe té Ximú tée dàcuitá ñi.

10

Té Pèlú ndihí té Còrneliú

1 Te ndècu ìn tée nàni-dé Còrneliú ñuú Cèsareá te cùu-dé capitáⁿ, te ndècu ndihí-dé ìn cièndú sandàdú. Te cue tée-áⁿ nání-güedé Sandàdú Itàlianú. 2 Te tée cùu capitáⁿ ío váha iní-dé, te mee-dé ndihí ñadihí-dé ndihí nchaa landú-dé ío nèhé-yu sá yíñùhu núú Yǎ Ndiòxí, te sáha-dé ñáyiú ndàhú ñáyiú isràèl díhúⁿ, te ío càháⁿ ndihí-dé Yǎ Ndiòxí. 3 Te ìn nduu dàtná òré caá úní sacuaa ní dácótó núú ñahá-xí xii-dé sá ni sǎháⁿ ìn espíritú xínú cuèchi núú Yǎ Ndiòxí núú-dé, te ní xáhaⁿ-xi:

—Còrneliú —càchí-xi xǎhaⁿ-xi xii-dé.

⁴ Te ní xini-dé ndi ndúú xio núú-dě espíritú-án. Te ío ní yùhú-dé. Te ní xáhaⁿ-dě:

—¿Ná chíúⁿ vèxi-n? —
càchí-dé xǎhaⁿ-dě.

Te xǎhaⁿ-xi:

—Ío càháⁿ ndihi-n Yǎ Ndiǒxí, te ñáyiú ndàhú sǎnaha-n dǐhúⁿ-n, te nchaa xǐáⁿ sa nàha-gá. ⁵ Te

vitna tendaha-n cuè téé na quihíⁿ-güedé ñúú Jòpé quíngana-güedé ìⁿ téé nàni Xímú, àdi Pelú chi úú diu-dé, te candeca ñaha-güedé quixi.

⁶ Te òré quexìo-dé te cachí tnúhu-dé nchaa dava-gá sá cuíní Yǎ Ndiǒxí cada-n. Te ndècu-dé vehe ingá tucu téé nàni Xímú téé dàcuitá ñii, te vehe téé-án cáá ìⁿ xio yuhu lamár —càchí-xi xáhaⁿ-xi xii-dé.

⁷ Te sátá cuáháⁿ espíritú-án, te té Còrneliú ní cana-dé úú tnàhá cue téé xinu cuechi núú-dě ndihi ìⁿ sandàdú xínú cuèchi tucu núú-dě, te tnàhá sandàdú-án ío càháⁿ ndihi-dé Yǎ Ndiǒxí. ⁸ Te té Còrneliú ní cani-dé cuèndú núú-güedé nàcuáa ní càháⁿ espíritú xínú cuèchi núú Yǎ Ndiǒxí. Te ní tendaha ñaha-dé xii-güedé cuáháⁿ-güedé ñúú Jòpé.

⁹ Te nduu tnèé-án ñúhú-ní-güedé ichi cuáháⁿ-güedé te cùu-xi datná òré cauxúú nduu ta cùyatni-güedé ñúú-án, te òré-án ñí sáá té Pelú díquí véhé càháⁿ ndihi-dé Yǎ Ndiǒxí. ¹⁰ Te òré-án sa xihí-dé docó cuíní-dé caxi-dé, te nini càdúha-yu sá cáxí-dé ní dácótó núú ñáhá-xí ¹¹ sá ñí xini-dé ìⁿ sá ndécú àndiú, te càa datná cáá ìⁿ dóo

cáhnú nchìcúⁿ yoho ndi cùmi xíquí-xi véxi cuuⁿ núú ñúhú.

¹² Te núú dǒó-án yódó cǒo ndihi quiti ndàva ndihi nchaa núú quiti ndèé cùmi sǎhá-xi.

¹³ Te ní tecú dóho-dé càháⁿ ìⁿ sá càháⁿ, te xáhaⁿ sá càháⁿ-án xii-dé:

—Pèlú, ndacuíñí cahni-n ndèda-ni càa quiti-a caxi-n-di —cachí sá càháⁿ-án xǎhaⁿ-xi xii-dé.

¹⁴ Te té Pèlú ní xáhaⁿ-dě:

—Vá càhni-í-di chi càchí tnúhu sá sánú ìchi ñaha xii nchúhú ñáyiú isràel sá vǎ cúú càxi-ndí nchaa quiti-a chi cuu cuèchi, te vátá cáxí-gǎ-í-di ni ìⁿ xito —cachí-dé xǎhaⁿ-dě.

¹⁵ Te ní càháⁿ tucu sá ñí càháⁿ-án, te xáhaⁿ-xi:

—Vá cúú càchí-n sǎ vǎ cúú càxi-n-di, chi mee Yǎ Ndiǒxí ní cachí-gá sá díú nchaa quiti-a cuu caxi-o vitna —cachí sá ñí càháⁿ-án xǎhaⁿ-xi xii-dé.

¹⁶ Te ducaⁿ ñí càháⁿ sá ñí càháⁿ-án ùní xito, te dàtnuní cuándaa tucu dǒó-án andiú.

¹⁷ Te té Pèlú ñá ní cùtnuní iní-dé ná cuèndá ducaⁿ ñí dácótó núú ñáhá-xí xii-dé, núú xǐáⁿ ío cuéhé ñí sani iní-dé. Te òré-án ñí quexìo cue téé ní tendaha té Còrneliú ndéé yuyèhe, chi ndi vehe ndi vehe cuáháⁿ-güedé ndúcú tnúhu-güedé ndèé cáá vèhe té Xímú téé dii vèhe-xi ndecu té Pèlú. ¹⁸ Te ní càháⁿ níhi-güedé, te xáhaⁿ-güedé:

—Ñá túú cùdana iha ndecu ìⁿ téé nànducu-ndí nání-dé Xímú, àdi Pelú chi úú diu-dé —càchí-güedé xǎhaⁿ-güedé.

¹⁹ Te té Pèlú vǎi sani iní-dé sá ñí dácótó núú ñáhá-xí

xì-dé. Te òré-áⁿ nǐ xáhaⁿ Espiritú Yá Ndiöxí xii-dé:

—Cundedóho-n ìⁿ tnúhu na càháⁿ-í-a. Ní quexìo úní cue tée nànducu ñaha xii-n. ²⁰ Yáchí, cuandèe chí quíhíⁿ-n ndíhi-güedé, te vá yùhú-n chí yùhú ní xáhaⁿ-í véxi cuaca ñaha-güedé xii-n — càchí Espiritú-gá xáhaⁿ-xi xì té Pèlú.

²¹ Te ní xica-dé cuánde-dé núu ndécú cuè tée xica nànducu ñaha xii-dé, te xáhaⁿ-dè xii-güedé:

—Yúhú cúu tée nànducu-ndo-áⁿ Náu-í-a núu ná chíúⁿ cuìní ñáhá-ndó —càchí-dé xáhaⁿ-dè xii-güedé.

²² Te xáhaⁿ-güedé:

—Tée cùu capitáⁿ tée nàni Corneliú ní tendaha ñaha-dé véxi-ndí, te tée-áⁿ ìo váha iní-dé, chí ìo sàndáá iní-dé Yá Ndiöxí, te nchaa ñáyiú isràél ìo váha càháⁿ-yu cuendá-dé. Te ìⁿ espíritú xínú cuèchi núu Yá Ndiöxí ní xáhaⁿ-xi xì-dé sá cáná ñaha-dé xii-n quíhíⁿ-n vèhe-dé dacuàha-n-dé tnúhu Yá Ndiöxí —càchí cue tée ní tendaha té Còrneliú xáhaⁿ-güedé xii té Pèlú.

²³ Te ní xáhaⁿ tē Pèlú sá quíhu-güedé vehe-dé, te candeca tnàha-güedé ndíhi-dé quíhíⁿ ndéé nduu tnéé. Te nduu tnéé-áⁿ nǐ xica-güedé ndécá tnàha-güedé ndíhi té Pèlú cuáháⁿ, te tnàhá ìⁿ ũú cue tée sàndáá iní tnúhu Jèsús ñúú Jòpé cuáháⁿ ndíhi ñaha-güedé xii-dé.

²⁴ Te ndéé ingá nduu ní quexìo-güedé ñúú Cèsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndíhi ñadìhí-dé ndíhi

nchaa landú-dé ndíhi cue tée ìo váha tnàhá tnúhu ndíhi-dé, chí ní caná ñaha-dé ní nítnáhá-yu ndíhi-dé cundetú-yu té Pèlú. ²⁵ Te sátá nǐ quèxìo té Pèlú vehe té Còrneliú, te ní quee-dé quehé, te ní ngüíñí xítí-dé núu tē Pèlú chíñúhu ñaha-dé ní cùu. ²⁶ Te té Pèlú ní xáhaⁿ-dè:

—Ndacuíñí vá ngüíñí xítí-n nùu-í chí ñá díú Ndiöxí cúu-í, dícó ìⁿ tée ñuyíu-a cùu-í — càchí té Pèlú xáhaⁿ-dè xii-dé.

²⁷ Te ta càháⁿ té Pèlú ndíhi té Còrneliú cuánguihu-güedé xítí vehe, te chitu ñáyiú xìxíhi xítí vehe. ²⁸ Te ní xáhaⁿ tē Pèlú xii-yu:

—Sa ñaha-ndo sá càchí tnúhu sá sánú ìchi ñaha xii nchúhú ñáyiú isràél sá vá cúu quíxi-ndí vehe ní ìⁿ nchohó ñáyiú ñá túu cùu ñáyiú isràél te ní vá cúu tnàhá tnúhu ndíhi ñaha-ndí xii-ndo. Dico Yá Ndiöxí ní cachí-gá sá vá cúu càháⁿ-í sá vá cúu càháⁿ ndíhi-í ñáyiú ñá túu cùu ñáyiú isràél, chí cuu cuèchi. ²⁹ Núu xíáⁿ ndíhi-ni véxi-í òré ní quexìo tnúhu sá cáná ñaha-ndo. Te cachí tnúhu-ndo ná cuendá cáná ñaha-ndo —cachí té Pèlú xáhaⁿ-dè xii-yu.

³⁰ Te té Còrneliú ní xáhaⁿ-dè:

—Ní cuu cúmí nduu, te diu-ni dàtná òré iha cùu-xi, te yùhú ndècu-í diu-ni vehe-í, te ñá túu tnàhí ná xéxi-í cáháⁿ ndíhi-í Yá Ndiöxí, te òré-áⁿ nǐ quexìo ìⁿ espíritú xínú cuèchi núu-gá níhnu-xí dǒo cuíxíⁿ dóo chàhnchí. ³¹ Te càchí-xi: “Còrneliú, ní xíndedóho Yá Ndiöxí tnúhu ní càháⁿ-n ndíhi-gá, te xíní-gá sá sáñaha-n díhúⁿ xii ñáyiú

ndàhú. ³² Te ñuú Jòpé ndécú ìíⁿ téé nàni Xímú, àdi Pelú chi úú òu-dé, te ndècu-dé vehe ìíⁿ téé nàni tucu Xímú téé dàcuitá ñíi, te càa vehe-dé ìíⁿ xio yuhu làmár, te cana-n-dě ná quìxi-dé ndatnúhu-n ndìhi-dé”, duha ní cáháⁿ espíritú xínú cuèchi núú Yá Ndiòxí. ³³ Núu xiáⁿ ndìhi-ni ní cana ñaha-í xii-n. Te táxáhu xii-n sá vèxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tnúhu Yá Ndiòxí, te cuíní-ndí cachí tnúhu-n nchàa tnúhu ní cachí Yá Ndiòxí cáháⁿ-n — cächí té Còrneliú xáhaⁿ-dě.

Té Pèlú ní ndatnúhu-dé ndìhi ñáyíu ní tacá vehe té Còrneliú

³⁴ Te té Pèlú xáhaⁿ-dě xií-yu:
—Vitna ní xiní-í sá Yá Ndiòxí càháⁿ ndìhi-gá ñáyíu cuèi ndèda-ni càa ñuú, te ìíⁿ-ni quide-gá ndìhi nchaá-yu. ³⁵ Te nchaa ñáyíu nèhe sá yíñùhu núú Yá Ndiòxí, te xíquide váha-yu, te nchaá-yu cùu váha iní ñáhá-gá xií-yu. Te ñá túú quide cuendá-gá cuèi ná ñáyíu ñuú cùu-yu. ³⁶ Te Yá Ndiòxí ní tendaha-gá Xítóhó Jesucristú ní sáháⁿ-gá ní xíndecu-gá nacióⁿ Isràél, te ní xáhaⁿ-gá xií-yu ìíⁿ tnúhu váha nàcuáa cuu váha iní-yu. Te òu-ni mee Jèsús cúnùu-gá núú ñáyíu ni càa xico ñuyíú. ³⁷ Te nàha-ndo sá dìhna-gá ndíi Juàá ní cáháⁿ ndíi tnúhu Yá Ndiòxí núú ñáyíu, te ní dácúandùte ñaha ndíi xií-yu. Te dàtnùní ní ngúita Jèsús ní cáháⁿ-gá tnúhu-gá distritú Galilea, te dàtnùní ní sáháⁿ-gá

nihi nacióⁿ Isràél ní cáháⁿ-gá tnúhu-gá núú ñáyíu. ³⁸ Te sa nàha-ndo sá Yá Ndiòxí ní sáñaha-gá Espíritú-gá xii Jèsús téé ñuú Nazàrét ndécú ndìhi-dé chíndèe ñaha-xi xii-dé. Te nàha-ndo sá ní xica cuu Jèsús ní quide tátna-gá nchaa ñáyíu yìhi ñaha espíritú cùndìhi yucu ñávàha. Te ío vài-gá sá vàha ní quide ñaha-gá xií-yu, te ducaⁿ ní quide-gá, chi Yá Ndiòxí ní chindee ñaha-gá. ³⁹ Te mee-ndí ní xiní-ndí nàcuáa ní quide Jèsús ñuú Jerusàlén ndìhi nihi nacióⁿ Isràél. Te ní sata caa ñaha-güedé xii-gá núú cùrúxí te yàcáⁿ ní xihí-gá. ⁴⁰ Te núú ùní nduú ní dándótó ñaha Yá Ndiòxí xii-gá. Te ní cuíní-gá sá cùndècu Xítóhó Jesucristú titní nduu sátá ní ndoto-gá cuendá cáháⁿ ndìhi ñaha-gá xii-ndí nchaa-ndí nàcuáa ní xica cuu-ndí ndìhi-gá. ⁴¹ Te ñá ncháá ñáyíu ni xiní ñáhá xii-gá, chi mee-ni nchùhú cue téé ní cachí-gá sá càháⁿ ndáá-ndí sá ní ndoto-gá, chi ní xíndecu ndìhi-ndí-gá, te ní xihí ní xexi-ndí ndìhi-gá, núu càháⁿ ndáá-ndí sá ní ndoto-gá. ⁴² Te ní cachí-gá sá nchùhú quíhíⁿ-ndí cùñaha-ndí xii ñáyíu sá méé Yá Ndiòxí ní táuchíúⁿ-gá sá Jèsús cada ndáá-gá cuèchi nchaa ñáyíu ndècu vívú ndìhi cuèchi nchaa ñáyíu ní xihí. Te ducaⁿ ní xáhaⁿ Yá Ndiòxí xii Jèsús, te òu-ni ducaⁿ ní cachí Jèsús cáháⁿ-ndí. ⁴³ Te cue téé ní cáháⁿ tnúhu Yá Ndiòxí ndéé

sanaha nĩ cáháⁿ-güedé sá quíxí Jèsús, te ní cachí-güedé sá ncháá ñáyiú na quíndáá iní ñáhá xii Jèsús, te cada càhnu iní-gá nchaa cuéchi-yu —càchí té Pèlú xáhaⁿ-dè xii-yu.

Ní quexìo Espíritú Yă Ndiöxí ní ngúndecu ndihí cue ñáyiú ñá túú cùu ñáyiú isràél

44 Te mei òré càháⁿ-dè ndèdóho-yu ní quexìo Espíritú Yă Ndiöxí ní ngúndecu ndihí nchaa ñáyiú-án. 45 Te cue téé isràél cuáháⁿ ndihí té Pèlú, cue téé ní sándáá iní tnúhu Jèsús ní cuñúhu vîhi-güedé sá nĩ quexìo Espíritú Yă Ndiöxí ní ngúndecu ndihí-yu, chi cuèndá sá ñà díú ñáyiú isràél cúŷ-yu núu xíáⁿ ní cuñúhu-güedé. 46 Te ní cutnùnì sá nĩ quexìo Espíritú Yă Ndiöxí ní ngúndecu ndihí-yu, chi ní ngúíta-yu càháⁿ-yu tnúhu sá dácàhu iní ñáhá Espíritú-gá, tnúhu sá ñà túú xiní-yu cáháⁿ-yu. Te ní ndacáⁿ táhŷ-yu núú Yă Ndiöxí cuèndá nchaa sá nĩ quide-gá. 47 Te dătnùnì ní xáhaⁿ tē Pèlú:

—Vitna te cuandute ñáyiú ní natuha ichi Xítohó Jesucristú chi sa ndècu ndihí-yu Espíritú Yă Ndiöxí dătná cuínì-ndó ndècu ndihí nchoo, núu xíáⁿ vá cúú càchí dava-gá ñáyiú sá vă cúú cuànduté-yu —càchí-dé xáhaⁿ-dè xii-yu.

48 Te dătnùnì ní xáhaⁿ-dè xii ñáyiú:

—Vitna te cuandute-ndo, te òré-án te cacunehe-ndo

Xítohó Jesucristú —càchí-dé xáhaⁿ-dè xii-yu.

Te dătnùnì ní cáháⁿ ndáhú-yu núú tē Pèlú cundecu ndihí ñaha-dè xii-yu ìⁿ úú nduu.

11

Té Pèlú ní cani-dé cuèndú núú ñáyiú sándáá iní tnúhu Jèsús ñuú Jerusalén

1 Te cue téé ní táúchíúⁿ Jèsús dacuàha ñaha xii ñáyiú tnúhu-gá, ndihí cue ñáyiú ní sándáá iní tnúhu-gá, ñáyiú ndècu distritú Jùdeá ní níhŷ-yu tnúhu sá ñáyiú ñá túú cùu ñáyiú isràél ní sándáá iní-yu tnúhu Yă Ndiöxí. 2 Te òré ní ndexìo té Pèlú ñuú Jerusalén, te ñáyiú isràél ñáyiú ní cachí sá cádá ncháa nacuáa ní cáháⁿ ndí Moisés ní satnuhu ñáhá-yu xii-dé. 3 Te ní xáhăⁿ-yu xii té Pèlú:

—¿Ná cuèndá ní sáháⁿ-n ndèé ndiácăⁿ ní cáháⁿ ndihí-n ñáyiú-án, te ñá túú quidè-yu dătná quidè nchòo-í? Te ní sáháⁿ-n yacáⁿ ní xexi-n ndihí-yu —càchí-yu xáhăⁿ-yu xii-dé.

4 Te té Pèlú ní cani-dé cuèndú năcuáa ní cùu núú ní sáháⁿ-dè, te xáhaⁿ-dè:

5 —Ní xíndecu-í ñuú Jòpé. Te òré càháⁿ ndihí-í Yă Ndiöxí, te ní dácótó ñàha-xi xii-í sá vèxi cuuⁿ ìⁿ dóó cahnú àndiú, te ndùtu ndi cumí xíquí-xi, te ní ngava-xi núú ndécù-í.

6 Te ní xíndéhé vâha-í, te ní xiní-í nchaa quitì yòdo núú-xi. Te ìⁿ xichi yòdo quitì cúmí sáhá-xi, te ìⁿ xichi yòdo quitì dééⁿ, te ìⁿ xichi yòdo cóó, te ìⁿ xichi yòdo quitì ndava.

7 Te ní tecú dóho-í cãháⁿ ñⁿ sã cãháⁿ, te cãchí-xi: “Pèlú, ndacuñí cahni-n ndèda-ni cãa quiti-a caxi-n-di”, cachí sã ñí cãháⁿ-áⁿ. 8 Te ní xãháⁿ-í: “Vã cãhni-í-di chi cãchí tñúhu sã sãnú ìchi ñaha xii nchúhú ñáyiu isràél sã vã cúu cãxi-ndí nchaa quiti-a”, xãháⁿ-í. 9 Te ní tecú dóho-í cãháⁿ-ni tucu núu ñnu, te cãchí sã cãháⁿ-áⁿ: “Vã cúu cãchí-n sã vã cúu cãxi-n-di, chi mee Yã Ndiöxí ní cachí-gá sã díú nchaa quiti-áⁿ cuu caxi-o”, cãchí sã cãháⁿ-áⁿ. 10 Te ducaⁿ ñí cãháⁿ sã ñí cãháⁿ-áⁿ ùní xito, te dàtnùní cuándaa dóó-ãⁿ ndihí nchaa quiti-áⁿ andiu. 11 Te òré-ni ní quexio ùní cue téee vehe núú ndécù-í. Te cue téee-áⁿ ñí tendaha ñaha ñⁿ téee ñnuú Cèsareá nándücu ñaha-güedé xii-í. 12 Te mee Espiritú Yã Ndiöxí ní cachí-xi sã quihíⁿ-í ndihí-güedé, te ní cachí-xi sã ñã túú nã cani iní-í. Te tñahá ñúú cue téee ndècu iha ní sãháⁿ ndihí ñaha-güedé xii-í, te nchaa-ndí ní sãháⁿ-ndí vehe té Còrneliú ñnuú Cèsareá. 13 Te ní cani-dé cuëndú nãcuáa ní cuu ní sãháⁿ ñⁿ espíritú xínú cuèchi núú Yã Ndiöxí vehe-dé, te ní quihu-xi ndéé xití vehe-dé, te ní xãháⁿ-xi xii-dé: “Tendaha-n cue téee na quihíⁿ-güedé ñnuú Jòpé quíngana-güedé ñⁿ téee nãni Xímú, àdi Pelú chi úú díu-dé. Te candeca ñaha-güedé quixi. 14 Te téee-áⁿ cachí tñúhu-dé nãsa cada-n nãníhí tãhú-n ndihí ñadihí-n, ndihí landú-n, ndihí nchaa ñáyiu xínu cuechi vehe-n”, duha ní xãháⁿ espíritú-áⁿ xii té Còrneliú. 15 Te òré ní

ngüíta-í cãháⁿ ndihí-í-yu ní quexio Espiritú Yã Ndiöxí ní ngündecu ndihí-yu dàtná ní quide-xi cútnãhá ní taxi Yã Ndiöxí Espiritú-gá ndéé díhna ní ngündecu ndihí nchoo. 16 Te ní ndacu iní-í nãcuáa ní cãháⁿ Xítóhó Jesucristú, te duha ní cachí-gá: “Té Juáá ní xóo dacuandute-dé ñáyiu, dico yúhú sãñaha-í Espiritú Yã Ndiöxí cundecu ndihí-yu”, duha ní cachí-gá. 17 Te Yã Ndiöxí ní sãñaha-gã Espiritú-gá cundecu ndihí ñáyiu ñã túú cúu ñáyiu isràél dàtná ní quide-gá cútnãhá ní sãndáá iní-ó tñúhu Jèsús, núu xiãⁿ vã cãchí-í sã vã cúu cada-í ñⁿ sã cuíni Yã Ndiöxí cada-í — cãchí té Pèlú xãháⁿ-dè xii-yu.

18 Te sãtã dúcãⁿ ñí xãháⁿ tẽ Pèlú, te ñã túú-gã ná tñúhu ní cãháⁿ-yu, te ío ní cudíí iní-yu nchaa nãcuáa ní quide Yã Ndiöxí, te ní xitnãhá-yu:

—Tñahá nchaa ñáyiu ñã túú cúu ñáyiu isràél naníhí tãhú-yu núu na dãñã-yu nchaa sã cuèhé sã dúhá quidé-yu, chi ducaⁿ cuíni Yã Ndiöxí cunduu —cãchí-yu xitnãhá-yu.

Ñáyiu sãndáá iní tñúhu Jèsús ñnuú Antiòquia

19 Te sãtã ñí sahani-güedé té Tèvá, te ní cuíni-güedé cada úhú-güedé nchaa ñáyiu ní sãndáá iní-xi tñúhu Jèsús, te ní xité nuú-yu ndi tñahá ñⁿ ñⁿ ñnuú. Te davá-yu cuáhãⁿ-yu ndéé distritú Fèniciá ndihí distritú Chìpré ndihí ñnuú Antiòquia. Te ní cãháⁿ-yu tñúhu Jèsús núu mee-ni ñáyiu

israél, te ñá ní xĩtnũhu-yu dava-gá-yu. ²⁰ Te dava-gá ñáiyu distritú Chìpré ndihì ñáiyu ñuú Cìrené ní sáháⁿ-yu ñuú Antiòquia. Te ñá díú mèe-ni ñáiyu israél ní cáháⁿ ndihì-yu, chi tnàhá ñáiyu ñá túú cùu ñáiyu israél ní xáháⁿ-yu tnúhu Jèsús. ²¹ Te ní chindee ñàha-gá xii ñáiyu càháⁿ tnúhu-gá, te vài-gá-yu ní sándáá iní-yu-gá chi ní tuhá-yu ichi-gá.

²² Te ñáiyu ndècu ñuú Jerusalén ñáiyu ní sándáá iní tnúhu Jèsús ní níhì-yu tnúhu nàcuáa ní cuu, núu xiáⁿ ní tendàhá-yu té Bèé cuáháⁿ-dé ñuú Antiòquia. ²³ Te òré ní quexìo té Bèé, te ní xiní-dé nàcuáa ní quide ñaha-gá xii-yu sá ní naníhì tànhú-yu, núu xiáⁿ ío ní cudíí iní-dé. Te ní dácáhú iní ñàhá-dě, te ní xáhaⁿ-dě:

—Ío nducu ndèe-ndo cada-ndo nchaa sá càchí Yá Ndiòxí cada-ndo —càchí-dé xáhaⁿ-dě xii-yu.

²⁴ Te té Bèé cúu-dě ìⁿ tée váha iní-xi, te ndècu ndihì-dé Espíritú Yá Ndiòxí, te ío sándáá iní-dé tnúhu Jèsús. Te vài vihi ñáiyu ní tuhá-yu ichi-gá.

²⁵ Te dātñuní cuáháⁿ té Bèé ñuú Tarsú cuánúndúcú-dě té Sàulú. ²⁶ Te òré ní naníhì ñàhá-dě, te ndèca ñaha-dé cuáháⁿ ñuú Antiòquia, te yàcáⁿ ní xíndecu-güedé ìⁿ cuíá ndihì ñáiyu ní sándáá iní tnúhu Jèsús, te vài-yu ní dácúáhá ñaha-güedé tnúhu-gá. Te ñuú ñuú Antiòquia ní dánání ñàhá-yu

Cristiànú xii nchaa ñáiyu sándáá iní tnúhu Jèsús.

²⁷ Te ndéé dàvá-áⁿ ní quee ìⁿ úú cue tée càháⁿ tnúhu Yá Ndiòxí ñuú Jerusalén cuáháⁿ-güedé ñuú Antiòquia.

²⁸ Te ìⁿ-dé nání-dě Àgabú, te ní chindee ñàha Espíritú Yá Ndiòxí xii-dé, te ní sáháⁿ-dé núu nchaa ñáiyu sándáá iní tnúhu-gá, te ní xáhaⁿ-dě xii-yu sá quíxí ìⁿ tnamá nihì ñuyíú. Te ducaⁿ ní cuu sátá ní ngúnutnì té Claudiú tée yìndaha cuéhé nacióⁿ. ²⁹ Núu xiáⁿ nchaa ñáiyu sándáá iní tnúhu Jèsús ñuú Antiòquia ní ndatnúhu-yu sá chindéé-yu nchaa ñáiyu sándáá iní tnúhu-gá ndécú distritú Jùdeá cuendá vá ndóhó vihì-yu docó. Te nàcuáa ní níhì-yu, te ducaⁿ ní sacáⁿ tnàhá-yu. ³⁰ Te ní tacá díhúⁿ-áⁿ, te nèhe té Bèé ndihì té Sàulú cuáháⁿ, cuáha-güedé cue tée yìndaha ñáiyu sándáá iní tnúhu-gá.

12

Sátá ní xihì té Jàcobó, te ní ngava té Pèlú vecaá

¹ Te ndéé dàvá-áⁿ ní ngúita té Hèrodés tée yìndaha ñaha xii ñáiyu israél ní quide úhú-dé ìⁿ úú ñáiyu sándáá iní tnúhu Yá Ndiòxí. ² Te ní táuchíúⁿ-dē ní tñi-güedé té Jàcobó ñanì té Juàá, te ní sahani ñaha-güedē ndihì machitì. ³ Te ío ní cudíí iní dava ñáiyu israél cuendá sá ní sahani ñaha-güedē xii té Jàcobó, núu xiáⁿ ní tendaha tucu té Hèrodés sandàdú-dé ní sáháⁿ tñi tucu-güedé té Pèlú. Te

ducaⁿ nĩ quide-dé cútnàhá ní xóo vico ní xexí-yu pàà sá ñà túú yìhi levadurá. ⁴ Te ní naníhí-güedé té Pèlú, te ní tñii ñaha-güedé ndécá ñaha-güedé cuáháⁿ vecaá. Te té Hèrodés ní táuchíúⁿ-dè cuáháⁿ sáhúⁿ ìⁿ sandàdú cùndeé-güedé té Pèlú. Te ní xáhaⁿ-dè:

—Cundeé-ndó ndì cúmí ndì cúmí-ndó tē-àⁿ —càchí-dé xáhaⁿ-dè xii-güedé.

Te té Hèrodés ní sani iní-dé queñuhu-dé té Pèlú vecaá òrè ná yáha vico cuendá cahni ñaha-güedé cáháⁿ-dè ní cùu. ⁵ Te ní xíhi-ni té Pèlú vecaá, te ní xíndeé cuaa ñaha sandadú xii-dé. Te cue ñáyiu sandáá iní tñuhu Yá Ndiöxí ío ní xicáⁿ táhũ-yu núú-gã cuendá sá ñà túú nã cada ñaha-güedé xii-dé.

Yá Ndiöxí ní dácãcu-gá té Pèlú vecaá

⁶ Ìⁿ niú-gá quihi té Pèlú vecaá ní cùu, te nduu tñéé tauchíuⁿ té Hèrodés quihíⁿ sandàdú queñuhu ñaha-güedé xii-dé vecaá cuendá quiní nchaa ñáyiu nása cada ñaha-güedé ní cùu. Te té Pèlú cáá-dè xidí-dé xití vecaá, te ndì ndúú dúcúⁿ ndáhá-dè ndútú càdená, te xio xio dñi-dé ndécú sandadú, te dava-gá sandadú xíndeé-güedé yèhe vecaá. ⁷ Te ní quexio ìⁿ espíritú xínú cuèchi núú Yá Ndiöxí xití vecaá núú cáá tē Pèlú xidí-dé, te uuⁿni ní dáyèhé-xi xití vecaá, te ní danguíhi ñaha-xi xii-dé, te xáhaⁿ-xi xii-dé:

—Yáchí, ndácóo —càchí-xi xáhaⁿ-xi xii-dé.

Te ní ndacóo-dé, te nchaa cadená ndútú dúcúⁿ ndáhá-dè ní nandáxí. ⁸ Te ní xáhaⁿ tùcu espíritú-àⁿ xii-dé:

—Yáchí, nucuíhnu dóo-n, te ndíhu-n chàu-n —càchí-xi xáhaⁿ-xi xii-dé.

Te ní ndíhu nuu-dé dóo-dè, te ní xáhaⁿ tùcu espíritú-àⁿ:

—Candixi dóo-n, te na quihíⁿ-ó —càchí-xi xáhaⁿ-xi xii-dé.

⁹ Te té Pèlú ní chinchícúⁿ-dè espíritú-àⁿ, te ñá ní cùtnuní iní-dé nũu ndáá ìⁿ espíritú xínú cuèchi núú Yá Ndiöxí ducaⁿ quide àdi ñáhá, te dàcoto ñaha-xi xii-dé ní sanj iní-dé. ¹⁰ Te ndèndaha-ni-dè espíritú-àⁿ cuáháⁿ ní yáha-dé nàcuáa xñutnñi sandadú, te ta yáha-gá-dé núú ndécú dàva-gá-güedé. Te ní sáá-dé ndéé yuyèhe núú ndèdè cáá nàcuáa ní yáha ichi sá cuáháⁿ ndéé xití ñuú, te ní nacaáⁿ méé yèhe-àⁿ, te ní quee-dé cuáháⁿ-dè ndihi espíritú-àⁿ. Te ní tnahá-dé ìⁿ tnuú, te yacáⁿ ní dándõo ñaha espíritú-àⁿ xii-dé. ¹¹ Te dàtnùnì ní nene váha sanj núú-dè, te ní cutnùnì iní-dé, te ní cachí-dé:

—Ndáá sá Yá Ndiöxí ní tendaha-gã espíritú-àⁿ ní quixi-xi ní dácãcu ñaha-xi xii-í cuendá sá và cáhni ñaha té Hèrodés. Te dava ñáyiu isràél ío ní cudíí ìni-yu cuendá sá ñi cuiní té Hèrodés cahni ñaha-dè xii-í —duha ní cachí-dé sátá ñi cutnùnì iní-dé.

¹² Te sátá ñi cutnùnì iní-dé sá ñi cácu-dé, te cuáháⁿ-dè vehe ìⁿ ñaha nani Mariá nãná tē Juáá, àdi Mácú chi úú

diu-dé, te xíaⁿ ndécú vai-yu cahaⁿ ndihí-yu Yá Ndiöxí. 13 Te té Pèlú ní quexio-dé ndéé yuyèhe ní dácásáⁿ-dè, te ní quixi ìⁿ xíchí nání Ròdé ní quixi ndehe-xi nă cúú ñăyiu dâcasaⁿ. 14 Te ní nucúhuⁿ ndudú-xi sá díú tē Pèlú, te ní cudíí víhí iní-xi, dico ñá ní nacaáⁿ-xi yuyèhe. Te ní quene cunu-xi cuaháⁿ ngúñaha-xi xií-yu sá nútñi té Pèlú yuyèhe ndaa quehé. 15 Te ñá ní sàndáá iní-yu tnúhu ní cahaⁿ-xi, te xăhăⁿ-yu xii-xi:

—¡Ná tnúhu víhi cahaⁿ-öⁿ xíchí lùcú! —càchí-yu xăhăⁿ-yu.

Te xăhaⁿ-xi să ndáá nútñi-dé, te xăhăⁿ-yu:

—Ñá díú tē Pèlú chi espíritú sá xító ñaha xii-dé cúú să cahaⁿ —càchí-yu xăhăⁿ-yu xii-xi.

16 Te òré ducaⁿ xitnàhá-yu, te té Pèlú ní dácásáⁿ tùcu-dé yuyèhe. Te ní sáháⁿ-yu ní nacaáⁿ-yu yuyèhe, te ní xiní-yu sá díú tē Pèlú, te ní cuúhu víhí-yu. 17 Te ní quide-dé ndaha-dé núŷ-yu cuendá cadí-yu yuhú-yu. Te ní ngúita-dé ní cani-dé cuendú năcuáa ní quide ñaha Yá Ndiöxí xii-dé sá ní dácăcu ñaha ìⁿ espíritú xínú cuèchi núú-gă xii-dé vecaá, te ní xáhaⁿ-dè xií-yu:

—Cúu-ndo tē Jăcobó ndihi dava-gá ñăyiu sàndáá iní tnúhu Jêsús năcuáa ní quide ñaha Yá Ndiöxí xii-í —càchí-dé xăhaⁿ-dè xií-yu.

Te sátá dúcáⁿ nǐ xáhaⁿ-dè, te ní quee-dé cuaháⁿ-dè ingá xichi.

18 Te sátá nǐ túndaá, te ní ngúita nchaa sandádú cahaⁿ ìⁿ cahaⁿ ìⁿ-güedé, te xitnàha-güedé:

—Ñá túú-gă té Pèlú yíhí vecaá, ¿te nása cada-o-i? —càchí-güedé xitnàha-güedé.

19 Te té Hèrodés ní tendaha-dè titni sandádú cuaháⁿ-güedé cuánündúcú ñaha-güedé, te ñá ní nánihí ñáhá-güedé xii-dé. Te dătnùní ní cana-dé sandádú cue téé ní xindeé ñáhá xii té Pèlú, te ní tenáá ñáhá-dè xii-güedé, te ní xáhaⁿ-dè xii dava-gá cue sandádú-dé:

—Cahni-ndo cuè téé-ăⁿ —càchí té Hèrodés xăhaⁿ-dè.

Te dătnùní ní quee té Hèrodés distritú Júdeá cuaháⁿ-dè ñuú Cèsareá, yacáⁿ ní ngúndecu-dé.

Ní xíhí té Hèrodés

20 Té Hèrodés ní cudééⁿ-dè núú ñăyiu ñuú Tirú ndihi núú ñăyiu ñuú Sidón. Te xíaⁿ ní ndatnúhu-yu ní cuu ìⁿnuu tnúhu-yu, te ní xicá-yu cuaháⁿ-yu cuaháⁿ ndatnúhu ndihi ñáhá-yu xii-dé, te ní ndatnúhu ndihí-yu té Blăstú. Te téé-áⁿ cúú-dè chiúⁿ quide-dé núú tē Hèrodés, te ní chindee tnúhu ñaha-dè xií-yu, chi ní cahaⁿ ndahú-yu núú tē Hèrodés sá vă cádá ŷhú ñáhá-dè xií-yu. Te ducaⁿ nǐ quidé-yu cuendá ñuú té Hèrodés-áⁿ queé să xéxi-yu.

21 Te ní xáhaⁿ tē Hèrodés ná nduu quíhíⁿ-yu ndatnúhu ndihi ñaha-dè xií-yu, te nduu-ăⁿ nǐ quíunuu-dé ìⁿ dóó

váha, ñⁿ sá sácũhnu tée tàxi tnuní. Te ní ngóo-dé núú xilé váha, xilé sá sácõo nchihi tée tàxi tnuní, te ní ngũita-dé ní cáháⁿ sàhú-dé dóho-yu. ²² Te uuⁿni ní cuáá-yu te càchí-yu:

— ¡Tée-a cáháⁿ-dé dico ñá díú tée ñuyíú-a cùu-dé chi ndiõxí cúú-dě! —càchí-yu xitnàhá-yu.

²³ Te ñu-ni òré-áⁿ ñí yáha ñⁿ espíritú xínú cuèchi núú Yá Ndiõxí, te ní sáñaha-xi cuèhé xii té Hèrodés. Te ducaⁿ ñí tñahá-dé chi mee-dě ñá ní xáhaⁿ-dě sá ñáyiú cùu-dé, te ní cáháⁿ-yu sá ndiõxí cúú-dě. Te nchìto-gá-dé ní sanú ñáhá tìndácú xii-dé, te dàtnùnì ní xihí-dé.

²⁴ Te ío titní xichi ní sáháⁿ ñáyiú sándáá iní tñúhu Yá Ndiõxí ní cáháⁿ-yu tñúhu-gá, te ío chitú-yu ní sándáá iní-yu tñúhu-gá.

²⁵ Te té Bèé ndihi té Sàulú ní ndihi chiúⁿ-güedé, te ní ndee-güedé ñúú Jerusàlén cuáháⁿ-güedé ndihi té Juàá, àdi Mácú chi úú ñu-dé.

13

Té Bèé ndihi té Sàulú cuáháⁿ-güedé dácuaⁿ-güedé ñáyiú tñúhu Yá Ndiõxí nchaa ñúú xicá

¹ Te ñúú Antiòquia ndécú ñⁿ úú cue tée cáháⁿ tñúhu Yá Ndiõxí núú nchàa ñáyiú ní sándáá iní-xi tñúhu-gá. Te ndècu tucu ñⁿ úú cue tée cùu mestrú dácuaⁿ ñaha-güedé xií-yu tñúhu-gá. ñⁿ-dé nání-dě Bèé, te ñⁿ-dé nání-dě Xímú, te té Xímú-áⁿ xáhaⁿ-güedé Nègrú chi tnuu-dě. Te ingá-dé nání-dě

Lùciú, te tée-áⁿ cúú-dě tée ñúú Cìrené. Te ingá-dé nání-dě Sàulú, te ingá tucu-dé nání-dě Manàén. Te té Manàén-áⁿ ndihi té Hèrodés tée cùu gobiernú Galileá ío váha ní xóo cáháⁿ ndihi tñaha-güedé cútnàhá ní cuu lìhli-güedé. ² Te ñⁿ nduu ñá túú ñá ní xèxi ñáyiú ní sándáá iní tñúhu Yá Ndiõxí cuendá mee-ni-gá ní cáháⁿ ndihí-yu, te ní xáhaⁿ Espíritú Yá Ndiõxí xií-yu:

— Tendaha-ndo tẽ Bèé ndihi té Sàulú quihíⁿ-güedé dava-gá ñúú cada-güedé chiúⁿ tahu-í, chi ducaⁿ cuiní-í cunduu —càchí Espíritú-gá xáhaⁿ-xi xií-yu.

³ Te ní cáháⁿ ndihi tucú-yu Yá Ndiõxí, te ñá túú tñahí ná ní xèxi tucú-yu, te ní sacáⁿ ndodo-güedé ndaha-güedé díquí tẽ Bèé ndihi té Sàulú. Te sátá dúcáⁿ ñí quide-güedé, te ní quide ndee iní ñáhá-yu xii-güedé.

Té Bèé ndihi té Sàulú cuáháⁿ-güedé distritú Chìpré cáháⁿ-güedé tñúhu Yá Ndiõxí

⁴ Te té Bèé ndihi té Sàulú ní quee-güedé cuáháⁿ-güedé cuendá ducaⁿ cuiní Espíritú Yá Ndiõxí cunduu sá cáca cùu-güedé dava-gá ñúú, te ní quexìo-güedé ñúú Selèuciá, te yacáⁿ ní quee-güedé bàrcú cuáháⁿ-güedé distritú Chìpré. Te ñúú-áⁿ cáá xití làmár chi ndècu ñúhu yichí xití ndute. ⁵ Te ní quexìo-güedé mei ñúú Salàminá, te ní quene-güedé bàrcú, te ní xica-güedé cuáháⁿ-güedé nchaa veñúhu ñáyiú isràél cáháⁿ-güedé tñúhu Yá Ndiõxí.

Te cuáháⁿ ndihi-güedé té Juáa cuendá chindee ñaha-dé xii-güedé. ⁶ Te ní tñii-güedé ichi cuáháⁿ-güedé ñuú Páfós cáa ndàa ingá xio Chìpré, te yàcáⁿ ní naníhí tnáhá-güedé ndihi ìⁿ tée israèl nání-dé Barjésús, te tée-áⁿ xini-dé cada ndùu-dé, te càchí-dé sá càháⁿ-dé tnúhu Yá Ndiòxí dico ñá ndáa. ⁷ Te tée-áⁿ quidé chiùⁿ-dé ndihi té Sèrgiú, àdi Páblú chi úú diù-dé, te cùu-dé gobiernú Chìpré, te ío túha-dé. Te ní cana-dé té Bèé ndihi té Sàulú, chi cuini-dé cundedóho-dé tnúhu Yá Ndiòxí. ⁸ Te tée quide nduu-áⁿ ñá ní dàña-dé cáháⁿ-güedé tnúhu-gá, chi ñá ní cuini-dé sá tée cùu gobiernú-áⁿ tuha-dé ichi Yá Ndiòxí. Te ducaⁿ nì quide té Barjésús, tée xáhaⁿ-güedé Èlimás. ⁹ Te tnàhá tucu té Sàulú ndécú úú diù-dé chi xáhaⁿ tucu-güedé Páblú, te ndècu ndihi-dé Espiritú Yá Ndiòxí. Te ní xindéhé ñii ñáhá-dé xii tée quide nduu-áⁿ. ¹⁰ Te ní xáhaⁿ-dè:

—Yòhó, chi dàtná quidé yùcu ñávaha quide-n chi mee-ni dándahú-n ñáiyu. Yòhó cúu-n dèhe sácuhlá, chi nchaa tnúhu váha cuini Yá Ndiòxí cáháⁿ-yu, te yòhó ñá dáña-n. ¹¹ Te vitna quiní-n nàcuáa cunduu, chi taxi Yá Ndiòxí ìⁿ castiú xii-n chi vá cùtnùni-gá núu-n càca cuu-n ìⁿ úú nduu — càchí-dé xáhaⁿ-dè xii tée quide nduu-áⁿ.

Te òré ducaⁿ nì xáhaⁿ tē Páblú xii-dé, te òré-ni ní cuaa-dé, te ñá túú ní cùtnuní tnàhí-gá núu-dé, te ní xóo nducu-ná-dé ñáiyu ní xóo

cuíta nehe ñaha xii-dé. ¹² Te tée cùu gobiernú ní xini-dé nàcuáa ní quide té Páblú, te ío ní cuñuhu-dé. Te ní tnàhá ini-dé tnúhu Jèsús, núu xiáⁿ ní sándáa ini-dé.

Té Páblú ndihi té Bèé ndécú-güedé ñuú Antiòquia Pìsidia

¹³ Te té Páblú ndihi dava-gá cue tée xica cuu ndihi-dé ní quee-güedé bàrcú, te ní quee-güedé ñuú Páfós cuáháⁿ-güedé ñuú Pèrgé, te ñuú-áⁿ yíndèhu-xi distritú Pànfiliá. Te té Juáa ní nacuico-dé ní dándõo ñaha-dé xii-güedé cuánuhú-dé ñuú Jerusàlén. ¹⁴ Te

dava-gá-güedé ní quee-güedé ñuú Pèrgé cuáháⁿ-güedé ñuú Antiòquia, te Pìsidia yíndàha-xi ñuú-áⁿ. Te nduu xíndetatú-yu, te ní sáháⁿ-güedé veñuhu ñáiyu israèl, te ní ngóo-güedé xití veñuhu. ¹⁵ Te cue tée ndècu veñuhu ní queheⁿ-güedé tutú yódó tnùnì nchaa tnúhu sá nì chídó tnùnì ndíi Moisés ndihi tutú yódó tnùnì nchaa tnúhu sá nì chídó tnùnì dava-gá cue tée ní xóo cáháⁿ tnúhu Yá Ndiòxí ndéé sanaha, te ní dácuáhá-güedé ní xíndedóho cue ñáiyu, te dàtnùnì cue tée yíndaha veñuhu-áⁿ nì xáhaⁿ-güedé xii té Páblú ndihi dava-gá-güedé:

—Nchòhó cue tée cùu ñaní tnáhá-ndí, te núu cuini-ndó cáháⁿ-ndó tnúhu Yá Ndiòxí, te cuu cáháⁿ-ndó tnàví cuendá cutúha-yu —càchí-güedé xáhaⁿ-güedé.

¹⁶ Te té Páblú ní ndacuíñí-dé, te ní ndacani-dé ndaha-dé

cuendá cadí-yu yuhú-yu te cundedóho-yu tnúhu cáháⁿ-dé, te ní xáhaⁿ-dě:

—Te nchòhó ñáyiú quide nchaa nacúa cáháⁿ Yá Ndiòxí ndíhi nchaa nchòhó ñáyiú isràél, cundedóho-ndo nchaa-ndo ìⁿ tnúhu na cáháⁿ-í-a. ¹⁷ Te cuèi ndéé sanduu te cuèi vitna chindee ñaha-ni Yá Ndiòxí xii nchaa ñáyiú isràél, te ní nacáxi ñaha-gã xii-yu te ní chindee ñaha-gá cuendá cáyá-yu, chi cuení-gá sá cúu vâi-yu, te ducaⁿ ñi quide-gá cútnàhá ní xíndecú-yu nàcióⁿ Ègiptú. Te dàtnùní ní dácâcu ñaha-gã xii-yu ñuú-áⁿ, chi mee-gã nchaa ndâcu-gá quidé-gã. ¹⁸ Te ní xíndecú-yu ìⁿ xichi núú ñà túú tnàhí sâcúndecu ñáyiú údico cuíá, te xiti údico cuíá-ãⁿ ñi cundee ìní-gá nchaa sá ñi quidé-yu. ¹⁹ Te Yá Ndiòxí ní chindee ñaha-gá xii ñáyiú isràél, te ní dánáã-yu úsá nàcióⁿ, chi cuendá ní cuení-gá cuu cuendá-yu ñuhú-áⁿ. ²⁰ Te dàtnùní ní cachí Yá Ndiòxí sá díú-ní cuè téé cùchiuⁿ taxi tnuní-güedé nchaa ñáyiú, te ducaⁿ ñi quide-güedé dàtná cúmí ciëndú dava cuíá. Te sáta xiãⁿ, te ní xíndecu té Sâmuel téé ní cáháⁿ tnúhu Yá Ndiòxí. ²¹ Te dàvâ-áⁿ ní cuení ñáyiú isràél sá cündècu ìⁿ téé quindaha ñaha-dé xii-yu, te Yá Ndiòxí ní cachí-gá sá tẽ Sàul quindaha-dẽ-yu, te téé-áⁿ ñi cuu-dé déhe té Cís, te té Benjamín téé ní xíndecu ndéé sanaha-gã ní cuu ñaní tnàhá-dẽ. Te té Sàul ní xíndaha-dẽ ñáyiú údico cuíá. ²² Te Yá Ndiòxí ñá ní cuení-gá

cundecu-ni-dé quindaha-dẽ ñáyiú, chi ní cuení-gá sá tẽ Dàvií ndíhu ndaha-dẽ cue ñáyiú isràél, te ní cachí-gá: “Ío váha ní tnahá ìní-í nâcuáa quide té Dàvií déhe téé Isàí, te cada-dé nchaa nâcuáa cúñaha-í xii-dé”, duha ní cachí Yá Ndiòxí —câchí té Pâblú xáhaⁿ-dẽ xii-yu.

²³ Te ní xáhaⁿ tucu té Pâblú:

—Diu-ni ñaní tnàhá tẽ Dàvií cúú Jèsús. Te Yá Ndiòxí ní tendaha-gã Jèsús ní quixi-gá ñuyíú-a cuendá nchaa ñáyiú isràél ná quindáá ìní ñáhá xii Jèsús naníhí tàhú-yu, chi ducaⁿ ñi cachí Yá Ndiòxí cunduu. ²⁴ Te cútnàhá vátá ngüíta-gá Jèsús cáháⁿ-gá tnúhu Yá Ndiòxí, te ní cáháⁿ té Juáá núú ñáyiú isràél sá xíní ñuhu-xi dañá-yu nchaa sá cuèhé sá dúhá, te cuanduté-yu. ²⁵ Te sa ta cùyatni-ni-gá cuú-dé, te ní xáhaⁿ-dẽ xii-yu: “Nchòhó câchí-ndó sã yùhú cúu-í Crìstú Yaá ndétú-ndó dico ñáhá, chi ñá díú yùhú cúu-í Crìstú, chi davitna quixi Crìstú Yaá tendaha Yá Ndiòxí quixi ñuyíú-a. Te yùhú cúu-í ìⁿ téé duuⁿ duuⁿ ñá túú tau nandaxi cuèdicó chàu-gá dico quide-í chiúⁿ-gá”, duha ní cáháⁿ te Juáá —câchí té Pâblú xáhaⁿ-dẽ xii-yu.

²⁶ Te ní xáhaⁿ tucu té Pâblú:

—Cundedóho tucu-ndo ìngá tnúhu na cáháⁿ-í. Nchòhó tnàhá-ndó cùu-ndo ñaní tnàhá ndíi Àbrahám, te xíní-ndó sã Yá Ndiòxí cúnúu-gá. Te diu-ni-gá cuení-gá sá ncháá-ndó cundedóho-ndo tnúhu-gá, chi

cùu-xi tnúhu sá càháⁿ nàcuáa naníhí tǎhú-ndó. ²⁷ Te nchaa ñáyiú ndècu ñuú Jerusalén ndihí nchaa cue tée cùnūu ñá ní cùtnuní iní-yu ndihí-güedé sá Yá Ndiöxí ní tendaha-gǎ Jèsús ní quixi-gá ñuyíú-a. Te ñá ní sǎha-yu cuendá sá díú Jèsús ní cacunehe cue tée ní cáháⁿ tnúhu Yá Ndiöxí ndéé sanaha cuéi ní dácuáhǎ-yu tnúhu-gá veñúhu-yu ndi tnahá úná nduu, nduu ndètatú-yu. Te ní cachí-yu sá ndècuéchi Jèsús, te ní xáhǎⁿ-yu sá cáhni ñaha-güedé xii-gá. Te xiǎⁿ sa ñaha cue tée ní xóo cáháⁿ tnúhu-gá ndéé sanaha sǎ dúcáⁿ cáháⁿ-yu. ²⁸ Te cuéi ñá túú ñǎ ní quide-gá te ní xáhǎⁿ-yu xii té Pilatú tée cùu gobiernú sá táuchùⁿ-dé cahni ñaha-güedé xii-gá. ²⁹ Te xiǎⁿ ñuú ní sata caa ñaha-güedé xii-gá núú cùrúxí. Te ní quide-güedé nchaa nàcuáa ní chídó tnùní cue tée ní cáháⁿ tnúhu Yá Ndiöxí ndéé sanaha. Te sátá ñi xihí-gá, te ní nunehe ñaha-güedé xii-gá núú cùrúxí, te nchido ñaha-güedé cuáhǎⁿ, te ní chihi ñaha-güedé ñⁿ xití yaú. ³⁰ Te Yá Ndiöxí ní dándótó-gǎ Jèsús. ³¹ Te titní xito ní sáhǎⁿ Jèsús núú ndécú ñáyiú ní xica cuu ndihí-gá, ñáyiú ní quee distritú Galiléa ní sáhǎⁿ-yu ndihí-gá ñuú Jerusalén. Te vitna nchaa ñáyiú-áⁿ xáhǎⁿ-yu xii dava-gá ñáyiú isràél nàcuáa ní cuu ní ndoto-gá.

³² Te nchúhú cáháⁿ-ndí nàcuáa cada-ndo naníhí tǎhú-ndó, chi Yá Ndiöxí ní xáhǎⁿ-gǎ xii cue ñani tnahá-ó

ñi xíndecu ndéé sanaha sǎ téndaha-gǎ Déhe-gá Jèsús quixi-gá ñuyíú-a. ³³ Te ní quixi-gá ní xihí-gá, te ní dándótó ñaha Yá Ndiöxí xii-gá, te núu xiǎⁿ naníhí tǎhú-ó núu na quindáa iní-ó-gǎ. Te ñⁿ tée ní cáháⁿ tnúhu Yá Ndiöxí ndéé sanaha ñi chídó tnùní-dé núú sálmú cúú úú nàcuáa ní cáháⁿ Yá Ndiöxí ní xáhǎⁿ-gǎ xii Déhe-gá, te duha ní xáhǎⁿ-gǎ: “Yòhó cúú-n Déhe-í, te vitna cutnùní iní ñáyiú sá yǎhú cúú-í Tǎtá-n”, duha ní xáhǎⁿ-gǎ xii Jèsús. Te ñi-ni ducaⁿ ñi chídó tnùní tée ní cáháⁿ tnúhu-gá ndéé sanaha. ³⁴ Te ingá xichi tucu núú tütú-gá ní chídó tnùní ñⁿ tée ní xíndecu ndéé sanaha nàcuáa ní xáhǎⁿ-gǎ xii Déhe-gá, te duha ní xáhǎⁿ-gǎ: “Mee-ni sǎ vǎha cada ñaha-í dàtná ní xii-í té Dàvíí”, duha ní xáhǎⁿ-gǎ. Te ducaⁿ ñi chídó tnùní tée ní xíndecu ndéé sanaha nàcuáa ní cáháⁿ Yá Ndiöxí, chi òré ní xihí Jèsús te ní dándótó ñaha-gá cuendá sá vǎ tíú yìqui cuñú-gá. ³⁵ Te núu xiǎⁿ duha ní chídó tnùní ñⁿ tée ní xíndecu ndéé sanaha núú librí Sálmú nàcuáa ní xáhǎⁿ-dè xii-gá: “Vá dáñá-n sǎ tíú yìqui cuñú Déhe-n chi ío vǎha quide-gá”, duha ní chídó tnùní tée ní xíndecu ndéé sanaha —càhí té Páblú xáhǎⁿ-dè xií-yu.

³⁶ Te xáhǎⁿ tùcu-dé:

—Te té Dàvíí ní quide-dé nchaa chiúⁿ ní tǎhú Yá Ndiöxí cada-dé, te dàtnùní ní xihí-dé. Te ní chindúxi ñaha-güedé xii-dé yatni nàcuáa yíndúxi cue ñani tnahá-dè ndéé sanaha-gǎ, te xiǎⁿ ñi téhyú

yiqui cùñú-dé. ³⁷ Te Jèsús chi ñá ní tēhyú yiqui cùñú-gá, chi ní dándótó ñàha Yá Ndiöxí xii-gá. ³⁸ Te cuini-í cachí tnúhu-í xii-ndo cuendá cutnùní iní-ndó nchàa-ndo sá cáda càhnu iní Yá Ndiöxí nchaa cuéchi-o, chi ní xihí Jèsús cuendá naníhí tǎhú-ó. ³⁹ Te nchaa ñáyiú na quindáá iní ñáhá xii Jesús te cada càhnu iní-gá nchaa sá ñà túú vǎha ní quidé-yu, chi núu mee-ni tnúhu ní chídó tnùní ndíi Moisés ná quindáá iní-yu te vá nánihí tǎhú-yu. ⁴⁰⁻⁴¹ Te ío coto-ndo mēe-ndo cuendá sá vǎ yǎha-ndo dàtná ní cachí Yá Ndiöxí yǎha cue ñáyiú ñá túú ní quide vǎha ní xindecu ndéé sanaha. Te nàcuáa ní cáháⁿ-gá ní chídó tnùní ñⁿ téé ní cáháⁿ tnúhu-gá ndéé sanaha, te duha ní xáhaⁿ-gǎ xií-yu dàvǎ-áⁿ:

Cundedóho nchaa nchòhó ñáyiú cuèhé yuhu-xi na cáháⁿ-í ñⁿ tnúhu te quini-ndó nǎ cuñúhu-ndo,

yúhú quidè-í vǎi núú sǎ ío vǎha vitna ndècu-ndo ñuyú-a,

te cuèi na còo ñáyiú cachí tnúhu xii-ndo nàcuáa ndúu nchaa sá vǎha-áⁿ, dico nchòhó vá quindáá iní-ndó,

te sá dúcáⁿ càda-ndo vá quindáá iní-ndó, te dàcuíta nihnu-ndo mēe-ndo.

Duha ní xáhaⁿ-gǎ xií-yu te ducaⁿ ñí chídó tnùní téé ní cáháⁿ tnúhu-gá ndéé sanaha —cáchi té Pǎblú xáhaⁿ-dē xií-yu.

⁴² Te òré ní ndee té Pǎblú veñúhu ñáyiú isràél ndihí cue téé xica cuu ndihí-dé, te ní cáháⁿ ndàhú ñáyiú yihí veñúhu núú-dē sá quihíⁿ-dé núú ùná nduu, te ñiu-ni tnúhu ní cáháⁿ-dé cáháⁿ tucu-dé òré quexìo-dé. ⁴³ Te sáta ñí túhú veñúhu-yu, te vǎi ñáyiú isràél ndihí ñáyiú ní chitnahá ñáhá xii-yu nchicúⁿ nihnu quide nacuáa quidè-yu cáháⁿ ndihí-yu Yá Ndiöxí cuáháⁿ ndihí-yu té Pǎblú ndihí té Bèé. Te ní xáhaⁿ-güedē xií-yu sá vǎ dáñá ndéé-yu canchicúⁿ nihnú-yu tnúhu sá cáháⁿ nàcuáa quide Yá Ndiöxí sá cúu-xí-yu.

⁴⁴ Te núú ùná nduu, nduu ndètatú-yu ní quexìo vai vihi ñáyiú, chi nihí ñúú ní quexìo ndedóho-yu tnúhu Yá Ndiöxí. ⁴⁵ Te cuendá sá ío vǎi ñáyiú ní quexìo, núu xiǎⁿ ní cuu cuédú iní ñáhá ñáyiú isràél xii té Pǎblú, te ní xicuèhé ñáhǎ-yu xii-dé. Te ní xáháⁿ-yu xii-dé sá dándàhú ñáhá-dē xií-yu ndihí tnúhu cáháⁿ-dé. ⁴⁶ Te té Pǎblú ndihí té Bèé ñá túú ní yúhú ñáhá-güedē xií-yu. Te ní xáhaⁿ-güedē:

—Xini ñuhu-xi díhna-gá nchòhó ñáyiú isràél cáháⁿ ndihí-ndí tnúhu Yá Ndiöxí, te mee-ndo ñǎ cuini-ndó cundedóho-ndo. Te sá dúcáⁿ quide-ndo, te vá nánihí tǎhú-ndó, te ni vǎ cáháⁿ-gá-ndí tnúhu Yá Ndiöxí núú-ndó, dico cáháⁿ-ndí núú dàva-gá ñáyiú cuèi ñá díú ñáyiú isràél cúu-yu, ⁴⁷ chi ducaⁿ ñí táuchíúⁿ Yá Ndiöxí cada-ndí. Te ní cachí-gá:

Cuini-í cundecu-ndo dàtná ìⁿ
 tée yòtnuú ñuhu cun-
 decu-ndo

cáháⁿ-ndó tnùhu-í núu
 nchàa ñáyiú ñá túú
 cùndihí-ndo ñáyiú
 ndècu nihí ñuyíú, te
 naníhí tàhú-yu,

duha ní cáháⁿ-gá —càchí
 té Páblú ndihí té Bèé
 xáhaⁿ-güedé xii-yu.

48 Te ñáyiú ñá túú cùu ñáyiú
 isràél ío ní cudíí iní-yu sá
 dúcáⁿ ñí cáháⁿ-güedé, te ní
 xítñahá-yu sá ío váha cuáháⁿ
 tnúhu Yá Ndiòxí. Te mee
 Yá Ndiòxí sa ñaha-gá nándi
 cùu ñáyiú naníhí tàhú, te
 diu-ni ñáyiú-áⁿ ñí sándáá
 iní-yu. 49 Te nchaa xichi
 xiáⁿ ñí sáháⁿ-yu ní cáháⁿ-yu
 tnúhu-gá. 50 Te cue té
 isràél ní ndatnúhu-güedé
 ndihí cue té cùnuu, ndihí
 cue ñáyiú dihí cùnùu, te
 ñáyiú dihí-áⁿ ñà túú tnàhí
 cùmání-yu veñúhu. Te ní
 xáhaⁿ-güedé sá cádá ùhú-yu té
 Páblú ndihí té Bèé, te dàtnùní
 cuícúⁿ ñáhá-yu xii-güedé, te
 ducaⁿ ñí quide-yu. 51 Te
 ní casaⁿ ñuhu té Páblú
 ndihí té Bèé sáhá-güedé ní
 naquidi-güedé ticá chúhmá ñí
 tní sáhá-güedé. Te ducaⁿ ñí
 quide-güedé cuendá cutnùní
 iní-yu sá ñà túú ní quide
 váha-yu. Te dàtnùní ní
 quee-güedé cuáháⁿ-güedé ñuú
 Ìconiú. 52 Te ñáyiú ní sándáá
 iní-xi tnúhu Jèsús ío váha ní
 cuu iní-yu cuendá sá ñí naníhí
 tàhú-yu, te ncháa-yu sa ndècu
 ndihí-yu Espíritú Yá Ndiòxí.

14

Té Páblú ndihí té Bèé
 ndécú-güedé ñuú Ìconiú

1 Te ní quexìo té Páblú
 ndihí té Bèé ñuú Ìconiú.
 Te ní sáháⁿ-güedé veñúhu
 ñáyiú isràél, te ío váha ní
 cáháⁿ-güedé tnúhu Yá Ndiòxí,
 te vai ñáyiú isràél ndihí ñáyiú
 ñá túú cùu ñáyiú isràél ní
 sándáá iní-yu tnúhu-gá. 2 Te
 dava ñáyiú isràél ñá ní sándáá
 iní-yu, te ní cáháⁿ cuèhé-yu
 cuendá té Páblú ndihí té Bèé
 cuendá sá vǎ quindáá iní
 ñáyiú ñá túú cùu ñáyiú isràél.

3 Te ní xíndecu-güedé titní
 nduu, te ñá túú tnàhí ní
 yùhú-güedé ní dácuáhá-güedé
 ñáyiú tnúhu Yá Ndiòxí. Te
 mee-gǎ ní chindee ñaha-gá
 ní quide-güedé titní núu sǎ
 vǎ yòo tnàhí ndàcu cada, te
 ío ní cuñúhu-yu. Te ducaⁿ
 ñí quide-gá cuendá cutnùní
 iní-yu sá ndáá càháⁿ-güedé
 sá méé-gǎ ío cùu iní ñáhá-gǎ
 xii-yu, te naníhí tàhú-yu núu
 na quindáá iní-yu tnúhu-gá.

4 Te ní quee dava ñáyiú ñuú
 Ìconiú, davá-yu cùndihí-yu
 ñáyiú isràél ñáyiú ñá túú
 sándáá iní tnúhu Jèsús. Te
 davá-yu cùndihí-yu cue té ní
 táuchíúⁿ Jèsús càháⁿ tnúhu-gá.

5 Te ñáyiú isràél ndihí dava-gá
 ñáyiú ñá túú sándáá iní-xi ní
 cuu ñíⁿñuú-yu ndihí cue té
 cùnuu sá cání-yu-güedé, te
 cuáha yúú ñáhá-yu xii-güedé.

6 Te té Páblú ndihí té Bèé ní
 níhí-güedé tnúhu sá cuini-yu
 canihá-yu, núu xiáⁿ dayuhu
 ñí quee-güedé cuáháⁿ-güedé
 ñuú Lìstrá ndihí ñuú Dèrbé. Te

ndi ndúú ñuú-án yíndèhu-xi Licaoniá. Te ní sáháⁿ-güedé dava-gá ñuú líhli càa yatni xián, ⁷ Te nchaá ñuú-án ní cáháⁿ-güedé tnúhu Jèsús.

Ñuú Lìstrá ní sáha yúú ñáhá-yu xii té Páblú

⁸ Te ñuú Lìstrá ndécú ìⁿ tée yacua, mee-ni nùcòo-dé chi ducaⁿ tnàhí càa-dé ní cacu-dé. ⁹ Te ndédòho-dé tnúhu càháⁿ té Páblú, te ní cutnùní iní té Páblú sá ìo sàndáá iní tée yacua-áⁿ sá Yá Ndiòxí cada tátna ñaha-gá xii-dé, núu xián ní xíndéhé ñaha váha té Páblú xii-dé. ¹⁰ Te té Páblú ní cáháⁿ níhi-dé, te ní xáhaⁿ-dè:

—Ndacuíñí cunutñí váha-n —càchí-dé xáhaⁿ-dè.

Te ní ndacuíñí cunu-dé te ní xica-ni-dé. ¹¹ Te òré ní xiní-yu sá tē Páblú ní quide tátna-dé tée yacua-áⁿ, te nchaá-yu ní cáháⁿ-yu tnúhu mèe-yu tnúhu Licàoniá. Te ní cáháⁿ níhi-yu, te xitnàhá-yu:

—Cue tée-áⁿ sànuu sá ñáyiú cùu-güedé dico ñáhá, chi ndiòxí cúu-güedé te ní quexìo-güedé ñuyíú-a —càchí-yu xitnàhá-yu.

¹² Te ní cachí-yu sá tē Bèé cúu-dè ndiòxí dánàní-yu Júpiter, te té Páblú cúu-dè ndiòxí dánàní-yu Mèrcuriú, chi cuèndá tée-áⁿ cúu-dè tée càháⁿ. ¹³ Te càa ìⁿ veñúhu yuhu ñuú-án núu quidé càhnú-yu ndiòxí sá dánàní-yu Júpiter. Te dútú yíndàha veñúhu-án ndécá-dè ìⁿ úú ndicutu cuáháⁿ quehé veñúhu, te ñuhu itá dúcúⁿ-güedi. Te cue quití-áⁿ cahni-dé cada càhnu-dé ndihí-yu té Bèé ndihí té

Páblú ní cùu, chi ducaⁿ quidé-yu quide cahnú-yu ndiòxí-yu. ¹⁴ Te té Bèé ndihí té Páblú ní níhi-güedé tnúhu nàcuáa sàni iní-yu cadá-yu, te ní ndátá-güedé dóo-güedé cuèndá cutnùní iní-yu sá ñá tnàhá iní-güedé nàcuáa sàni iní-yu cadá-yu. Te xinu-güedé cuánguihu-güedé tnuú-yu, te níhi ní cáháⁿ-güedé, te xáhaⁿ-güedé:

¹⁵ —¿Ná cuèndá ducaⁿ cuíní-ndó càda-ndo? Te ñuú-ni tnàha ñáyiú-ndo cùu-ndí, dico-ni tnúhu Yá Ndiòxí véxi-ndí dacuàha ñaha-ndí xii-ndo cuèndá sá vā cadá-gá-ndó nàcuáa quide-ndo, te quindáá iní-ndó Yá Ndiòxí, chi ìⁿ dñi-ni Yá Ndiòxí ndécú. Te ñuú-gá ní cadúha-gá andñu ndihí ñuyíú-a ndihí lámár ndihí nchaandi túhú sá ìo ñuyíú-a. ¹⁶ Te ndéé sanaha ñí dáñá Yá Ndiòxí ní quidé-yu nàcuáa cuáháⁿ iní mèe-yu. ¹⁷ Te ní xóo cada-gá sá vāha cuèndá cutnùní iní-yu sá ìo váha iní-gá. Te ñuú-gá dácuⁿ-gá dáú, te tàxi-gá sá nchító-ó chi xito-gá nchaá tatá xítú-ó, te xián cúdí iní-ó ndècu-o ñuyíú-a —càchí té Páblú ndihí té Bèé xáhaⁿ-güedé xii-yu.

¹⁸ Te cuèi ducaⁿ ñí xáhaⁿ-güedé nchaá tnúhu-án, dico ìo úhú ní sàndáá iní-yu ñá ní sàhni-yu ndicutu-áⁿ chi cuèndá ducaⁿ tnàhí quidé-yu sàhni-yu ndicutu òré quidé càhnú-yu ndiòxí-yu.

¹⁹ Te ñuú Antiòquia ndihí ñuú Ìconiú xíndecu dava ñáyiú isràél, te ní queé-yu

cuáháⁿ-yu ñuú Lìstrá núú ndécú tē Pāblú. Te xíáⁿ ñi quexió-yu te ní xáháⁿ-yu xii ñáyiú dii ñuú xíáⁿ sá cáhñi-yu té Pāblú. Te ní sáha yúú ñáhá-yu xii-dé, te ní cáhāⁿ-yu sá ñi xihí-dé, te ní tñi ñaha-güedē xii-dé, te tãñuhu ñaha-güedē xii-dé cuáháⁿ ñi xio yuhu ñuú ní sá dáquéne ñaha-güedē. ²⁰ Te ní quexio cue ñáyiú sándáá iní tñuhu Jèsús núú cātùu-dé-áⁿ, te ní nadúcúⁿ ndèè ñáhá-yu xii-dé, te nini xñutñi-yu-áⁿ ñi ndacóo-dé cuánuhú ndihi ñaha tucu-dé xií-yu xití ñuú. Te nduu tñéé-áⁿ ñi ndee-dé ndihi té Bèé cuáháⁿ-güedē ñuú Dèrbé.

²¹ Te ní cáhāⁿ-güedē tñuhu Yá Ndiöxí ñuú-áⁿ, te ío vai ñáyiú ní sándáá iní-yu tñuhu-gá. Te dātnùní ní quee-güedē cuáháⁿ tucu-güedē ñuú Lìstrá, ndihi ñuú Iconiú, ndihi ñuú Antiòquia. ²² Te ní xáhāⁿ-güedē xií-yu sá vā dáñá ñihñu-yu tñuhu Jèsús. Te sá dúcáⁿ ñi cáhāⁿ-güedē, te vñhi-gá ní cudíí iní-yu cadá-yu nācuáa cuñi Yá Ndiöxí cadá-yu, te ní xáhāⁿ-güedē:

—Dacuití cūndecu-o ñuyiú-a ndoho-o, te dātnùní ducaⁿ te nacuaca ñaha Yá Ndiöxí xii-o —cāhí-güedē xáhāⁿ-güedē xií-yu.

²³ Te ní sáhāⁿ-güedē ndi tñahá ñi ñi xichi núú ndécú ñáyiú dācuaha tñuhu Yá Ndiöxí, te ní taxi ndecu-güedē cue tēe quindaha ñaha xií-yu, te ní cáhāⁿ ndihi-güedē Yá Ndiöxí, te ñá túú tñahí ná

ní xèxi-güedē cuendá sá ñi cáhāⁿ ndihi-güedē-gá. Te ní xáhāⁿ-güedē sá Yá Ndiöxí coto ñaha-gá xií-yu chi diu-ni-gá ní sándáá iní-yu.

Té Pāblú ndihi té Bèé cuáháⁿ tucu-güedē ñuú Antiòquia Siria

²⁴⁻²⁵ Te dātnùní ní quee té Pāblú ndihi té Bèé cuáhāⁿ-güedē, ní yáha-güedē distritú Pìsidia. Te ní quexio-güedē ñuú Pèrgé, xíáⁿ ñi cáhāⁿ-güedē tñuhu Jèsús. Te ñuú-áⁿ yíndèhu-xi Panfilia. Te dātnùní cuáhāⁿ-güedē ñuú Àtalia. ²⁶ Te yacáⁿ ní quee-güedē bàrcú cuánuhú tucu-güedē ñuú Antiòquia. Te ñuú-áⁿ cúú-xí ñuú núú ñi xicáⁿ tãhñu-yu núú Yá Ndiöxí cuendá sá chindèe ñaha-gá xii-güedē chiuⁿ quide-güedē. Te cuendá sá ñi ndihi chiuⁿ-güedē nchaa ñuú núú ñi sáhāⁿ-güedē, núú xiáⁿ cuánuhú-na-güedē. ²⁷ Te ní ndexio-güedē ñuú-áⁿ, te ní cana-güedē nchaa ñáyiú sándáá iní tñuhu-gá, te ní cani-güedē cuendú núú-yu nchaa nācuáa ní cuu núú ñi sáhāⁿ-güedē, te xáhāⁿ-güedē: “Yá Ndiöxí ío ní chindee ñaha-gá xii-ndí ní cáhāⁿ-ndí tñuhu-gá núú ñi sáhāⁿ-ndí, te mee-gá ní quide sá tñahá ñáyiú ñá túú cū ñáyiú israhél ní xíndedóho-yu tñuhu-gá cuendá quíndáá iní-yu”, cāhí-güedē xáhāⁿ-güedē xií-yu. ²⁸ Te vai nduu ní xíndecu-güedē ñuú Antiòquia ndihi nchaa ñáyiú ní sándáá iní tñuhu Jèsús.

15

Ní natacá ñáyiú sàndáá iní tnúhu Jèsús ñuú Jerusàlén

¹ Te ní quee ñⁿ úú cue téé distritú Jùdeá cuáháⁿ-güedé ñuú Antiòquiá, te ní sáá-güedé, te ní xáhaⁿ-güedé xii ñáyiú sàndáá iní tnúhu Jèsús sá núu vá cuáha-güedé señá ñii nchaa cue téé dàtná ní cachí ndíi Moisés, te vá nánihí tàhú-güedé. ² Te sá dúcáⁿ ñí cáháⁿ cue téé-áⁿ, te ní ngúita té Páblú ndihí té Bèé ní tenáá-güedé cue téé-áⁿ, chí dandàhú ñáhá-güedé cuíní-güedé ní cùu. Te nchaa ñáyiú sàndáá iní tnúhu-gá ní cachí-yu sá quihíⁿ té Páblú ndihí té Bèé ndihí ñⁿ úú-gá-güedé ñuú Jerusàlén. Te yàcáⁿ cada-güedé ñⁿ jùndá ndihí mee-ní cuè téé ní táuchíúⁿ Jèsús càháⁿ tnúhu-gá, ndihí cue téé yìndaha ñáyiú sàndáá iní tnúhu-gá ñuú-áⁿ, te jùndá-áⁿ cada ndáá-güedé tnúhu ní cáháⁿ cue téé ní sáá ñuú Antiòquiá.

³ Te nchaa ñáyiú sàndáá iní tnúhu-gá ní quide ndee ìní ñáhá-yu xii-güedé, te ní tñii-güedé ichi cuáháⁿ-güedé. Te ní yáha-güedé distritú Fèniciá ndihí distritú Sàmariá, te yàcáⁿ ní caní-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiòxí, te ní cudíí víhí ìní nchaa ñáyiú ní xìndedóho-áⁿ.

⁴ Te té Páblú ndihí té Bèé ní ndexìo-güedé ñuú Jerusàlén, te ío ní cudíí ìní-yu sá ñí ndexìo váha-güedé. Te ndècu dava-gá cue téé ní táuchíúⁿ Jèsús dácuaà

ñaha xií-yu tnúhu-gá, ndihí cue téé yìndaha ñaha xií-yu, ndihí dava-gá ñáyiú sàndáá iní tnúhu-gá, te ní caní-güedé cuèndú núu-yu nàcuáa ní quide Yá Ndiòxí ní chindee ñàha-gá xii-güedé ní quide-güedé chiuⁿ-gá. ⁵ Te ndècu ñⁿ úú cue téé ní tuha ichi Yá Ndiòxí, te cue téé-áⁿ cúu-güedé cue téé farisèú, te ní ndacuñí-güedé, te ní xáhaⁿ-güedé:

—Dacuñí xìni ñuhu-xi sá cuáha-güedé señá ñii cue téé cùmání cue téé ñá túú cùu ñáyiú isràél, te cùñaha-ndo sá ná cádá-güedé nchaa nàcuáa ní chídó tñuní ndíi Moisés —cachí cue téé cùu farisèú-áⁿ xáhaⁿ-güedé xii-güedé.

⁶ Te cue téé ní táuchíúⁿ Jèsús dácuaà ñaha xii ñáyiú tnúhu-gá, ndihí cue téé yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu. ⁷ Te vài vihi tnúhu ní cáháⁿ-güedé. Te té Pèlú ní ndacuñí-dé, te ní xáhaⁿ-dè xii-güedé:

—Nchòhó cue téé ndècu ndihí-í ichi Xìtohó Jesucristú, chí cùndedóho ñⁿ tnúhu na càháⁿ-í-a. Sa nàha-ndo sá ñí cachí Yá Ndiòxí sá d'ù-í cáháⁿ-í tnúhu Jèsús núu ñáyiú ñá túú cùu ñáyiú isràél cuèndá sá quìndáá iní-yu, te naníhí tàhú-yu. ⁸ Dico Yá Ndiòxí sa nàha-gá nása càa iní ñⁿ ñⁿ ñáyiú. Te cùtñuní iní-ó sá cúu ìní ñáhá-gá xii cue ñáyiú ñá túú cùu ñáyiú isràél, chí ní sáñaha-gá Espiritú-gá ndécú

ndihí-yu dàtná cuìní-ndó nǐ taxi-gá ndécú ndihí nchoo.

⁹ Chi Yá Ndiöxí ìⁿnuu-ni cùu iní ñáhá-gǎ xii-o nchàa-o ndihí cue ñáyiu ñá túú cùu ñáyiu isràél, chi tnàhá-yu ní xócání-gǎ nchaa sá cuèhé sá dúhá nǐ xóo cadá-yu ndéé òré ní sándáá iní-yu Jèsús. ¹⁰ ¿Te

ná cuèndá nchòhó cuìní-ndó càda ñáyiu ní sándáá iní tnúhu-gá ìⁿ sá ñǎ tnàhá iní-gá sá cadǎ-yu? Te cuìní-ndó dándoho-ndó-yu. Te ni nchòo te ni cue ñaní tnàhá-ó nǐ xíndecu ndéé sanaha ñǎ ní ndàcú-yu cadá-yu nchaa xiǎⁿ.

¹¹ Te vá dúcáⁿ cǎháⁿ-ndó, chi sa nàha-ndo sá Yǎ Ndiöxí ní cundàhú iní ñáhá-gǎ xii-o, te dió ducaⁿ nǐ quide-gá sá nánihí tàhú-ó nchàa-o. Te diu-ni ducaⁿ nǐ quide-gá ñáyiu ñá túú cùu ñáyiu isràél, te ní naníhí tàhú-yu —càchí té Pèlú xǎhaⁿ-dǎ xii-güedé.

¹² Te dǎtnùní té Bèè ndihí té Pǎblú ní ngüíta-güedé ní cǎháⁿ-güedé, te ní xíndedóho-yu nchaa tnúhu ní cǎháⁿ-güedé. Te ní xáhaⁿ-güedé xii-yu nàcuáa ní chindee ñàha Yá Ndiöxí xii-güedé, te ní quide-güedé vǎi núú sǎ vǎ yóo tnàhí ndàcu cada, te ducaⁿ te ní cutnùní iní ñáyiu ñá túú cùu ñáyiu isràél sá ndàá càháⁿ-güedé.

¹³ Te òré ní ndihí cuèndú ní cǎháⁿ-güedé, te té Jàcobó ní xáhaⁿ-dǎ:

—Nchòhó cue téé ndècu ndihí-í ichi Xítóhó Jesucristú, chí cùndedóho ìⁿ tnúhu na càháⁿ-í-a. ¹⁴ Té Xímú, àdi Pelú chi úú diu-dé, ní caní-dé cuèndú nàcuáa ní quide Yá

Ndiöxí ndéé díhna ní dáquéé diⁿ-gá ñáyiu ñá túú cùu ñáyiu isràél tnuú nchaa ñáyiu ñá túú ndècu ichi-gá, cuèndá cuìní-gá chiñuhu ñáhá-yu xii-gá. ¹⁵ Te dǎtnùní ní cǎháⁿ-dé nàcuáa ní cǎháⁿ Yǎ Ndiöxí ndéé sanaha. Te duha ní chídó tnùní cue téé ní xóo cǎháⁿ tnúhu-gá ndéé sanaha nàcuáa ní cǎháⁿ-gá, te duha ní cachí-gá:

¹⁶ Dàtná cuìní-ndó cùu ìⁿ vehe ní sáá te ní ngoyo te dàndaa-güedé xito cùu uú, ducaⁿ sǎtnahá-xi cada-xi ìⁿ nduu,

chi ñaní tnàhá ndii Dàvíí ní xóo cǎháⁿ ndihí ñáhá-yu xii-í ní cùu, te ní dǎñá ndéé-yu ichi-í, te na quixi-í te natuha ñaha tùcú-yu.

¹⁷ Te ducaⁿ te vǎi ñáyiu ñá túú cùu ñáyiu isràél nandúcú-yu ichi-í te cǎháⁿ ndihí ñáhá-yu.

¹⁸ Duha ní cǎháⁿ Yǎ Ndiöxí, te ducaⁿ nǐ chídó tnùní cue téé ní xóo cǎháⁿ tnúhu-gá ndéé sanaha —càchí té Jàcobó xǎhaⁿ-dǎ xii-güedé.

¹⁹ Te xǎhaⁿ tùcu-dé:
—Yúhú càchí iní-í sǎ vǎ cúú dǎsatú-ó iní nchaa ñáyiu ta sándáá iní-xi tnúhu Yá Ndiöxí, ñáyiu ñá túú cùu ñáyiu isràél, te ìⁿ úú-ni tnúhu cúñaha-o nàcuáa cadá-yu. ²⁰ Dico

xini ñuhu-xi daquihíⁿ-ó tùtú cúñaha-o sǎ vǎ cǎxí-gǎ-yu nchaa sá nchító-ó ndùu tàhú nchaa sá càchí-yu cùu ndiöxí-yu. Te cúñaha-o sǎ vǎ càháⁿ ndihí cue téé ñadhí te núu ñá díú ñadhí-güedé cúú-yu, te ni cuè ñáyiu diⁿí

vá càháⁿ ndihí-yu téé te núu ñá díú yíi-yu cùu-güedé, te vá cáxí-yu cuñú quití cuèhné, te vá cáxí-yu ñíí. ²¹ Te ducaⁿ cũñaha-o, chi ndi tnahá ñuú núú ndécü-yu, te xĩndecu ñáyiú isràél dácuahá-yu tnúhu ní chídó tnùní ndíi Moisés, te ndi tnahá nduu ndètatú-yu dácuahá-yu tnúhu ndíi veñúhu-yu —càchí té Jácobó xáhaⁿ-dè xii-güedé.

²² Te dàtnùní cue téé ní táuchíúⁿ Jèsús dácuaá ñaha xii-yu tnúhu-gá, ndihi cue téé yĩndaha ñáyiú sàndáá iní tnúhu-gá ní cachí-güedé sá ndúcú-güedé ìⁿ úú-gá cue téé quíhíⁿ ndihi té Páblú ndihi té Bèé ñuú Antiòquia, te ñuú ni ducaⁿ ñí cáháⁿ dava-gá ñáyiú ndècu ichi-gá. Te úú cue téé ní ndúcú-güedé, ìⁿ-dé nání-dè Silás, te ìⁿ-dé nání-dè Jùdás, àdi Barsabás chi úú ñuú-dé, te cùnuu-güedé ndi ndùú-güedé. ²³ Te ní cadúha nchaa cue téé cùnuu tutú canehe-güedé quíhíⁿ, te duha càháⁿ-xi:

“Cováha díí-ndó nchaa-ndo. Nchúhú cue téé ní táuchíúⁿ Jèsús cáháⁿ-ndí tnúhu-gá, ndihi cue téé yĩndaha cue ñáyiú sàndáá iní tnúhu-gá quide ndee iní ñáhá-ndí xii nchòhó cue ñáyiú ndècu ndihi-ndí ichi-gá cuéi ñá díú ñáyiú isràél cúú-ndó. Te nchòhó ñáyiú xĩndecu ñuú Antiòquia, ndihi nchòhó ñáyiú ndècu distritú Síríá, ndihi nchòhó ñáyiú ndècu distritú Cìliciá, càchí tnúhu-ndí xii-ndo sá ²⁴ ñí níhí-ndí tnúhu sá ìⁿ úú cue téé

ndècu iha ní quixi-güedé núú ndécú-ndó, te ñá túú chiuⁿ ni tahu-ndí quixi-güedé. Te sá ìⁿ tnúhu ní cáháⁿ-güedé ní xáhaⁿ-güedé xii-ndo sá ngũndecu seña ñí-ndo, te canchicúⁿ nihnu-ndo nchaa nacuaá ní chídó tnùní ndíi Moisés, te xiáⁿ ní saní ìⁿ ní saní úú iní-ndó, chi ñá túú xini-ndó ñuú ndáá tnúhu càháⁿ-güedé àdi ñá ndáá. ²⁵ Te ní ndatnúhu-ndí nàcuáa cunduu sá téndàha-ndí úú cue téé quixi-güedé ndihi té Bèé ndihi té Páblú, cue téé ío cùu iní-ndí, te cue téé-áⁿ càháⁿ-güedé nàcuáa càháⁿ-ndí-a. ²⁶ Te ñuú-ni té Bèé ndihi té Páblú ní sáháⁿ-güedé ní cáháⁿ-güedé tnúhu Xítóhó Jesucristú nchaa xichi. Te ndi tnahá cuáháⁿ-güedé cuíni-yu cahni ñáhá-yu xii-güedé. ²⁷ Te tendaha-ndí té Jùdás ndihi té Silás quixi-güedé tnàhá-güedé cachí tnúhu váha-güedé nàcuáa cuáháⁿ tnúhu càháⁿ-ndí. ²⁸ Te ñuú-ni ducaⁿ càháⁿ-ndí càchí tnúhu-ndí nàcuáa càháⁿ Espiritú Yá Ndióxi cada-ndo, chi nchúhú vá càháⁿ-ndí sá cadá-ndó nchaa sá ñí cáháⁿ ndíi Moisés cada ñáyiú, chi ío úhú, te vá yóo ndacu cada. Te vitna na càháⁿ-ndí ìⁿ úú-ni tnúhu nàcuáa cada-ndo. ²⁹ Vá cáxí-ndó sá nchító-ó nduu táhú nchaa sá càchí ñáyiú cùu ndiόxi-yu, te vá cáxí-ndó ñíí, te vá cáxí-ndó cuñú quití cuèhné, te vá càháⁿ ndihi cue téé ñadihí te núu ñá díú ñadihí-güedé cúú-yu, te ni cué ñáyiú ñadihí

vá cãháⁿ ndihí-yu té te núu ñá díú yï-yu cùu-güedé. Te núu na càda-ndo nchaa nacuáa cãháⁿ-ndí-a, te cada váha-ndo. Te vitna ío cada ndee iní-ndó nchaa-ndo-na.” Duha ní chídó tnùní-güedé núu tütú ní tendaha-güedé cuáháⁿ.

³⁰ Te ní quide ndee iní-yu cue té quihíⁿ ñuú Antiòquiá, te ducaⁿ te ní xica-güedé cuáháⁿ-güedé. Te òré ní quexìo-güedé ñuú-áⁿ, te ní cana-güedé nchaa ñáyiu sándáa iní tnúhu Jèsús, te ní sãñaha-güedé tutú xii-yu. ³¹ Te ní dácuahã-yu tutú ní sãñaha-güedé-áⁿ, te ní cudíí víhí iní-yu chi ío váha cãháⁿ tutú-áⁿ. ³² Te té Jüdás ndihí té Silás tnàhá-güedé ní nduu táhú-güedé cãháⁿ-güedé tnúhu sá dácàhu iní ñáhá Yã Ndiöxí. Te ní xãhaⁿ-güedé vai tnúhu nãcuáa cadá-yu, te vihi-gá ní cudíí iní-yu cadá-yu nãcuáa cãháⁿ Yã Ndiöxí cadá-yu. ³³ Te ní xíndecu-güedé ìⁿ úú nduu ndihí-yu, te dãtnùní ní quide ndee iní ñáhã-yu xii-güedé cuèndá sá nùhú-güedé núu vëxi-güedé, te mee-ni té Jüdás cuánuhú-dé. ³⁴ Te té Silás ní xãhaⁿ-dë sá vã nùhú-ni-dé. ³⁵ Te té Pãblú ndihí té Bèé ní ndóo-güedé ní cãháⁿ-güedé tnúhu Yã Ndiöxí ñuú Antiòquiá, te vai-gá tucu ñáyiu Antiòquiá ní cãháⁿ-yu tnúhu-gá.

Xito cùu úu cuáháⁿ té Pãblú cãháⁿ-dé tnúhu Yã Ndiöxí núu ñáyiu

³⁶ Te sátá ñí cuu cuéhé nduu, te ní xãhaⁿ tè Pãblú xii té Bèé:

—Na quihíⁿ-ó nchaa ñuú núu ñí sãháⁿ-ó ñí cãháⁿ-ó tnúhu Yã Ndiöxí cãháⁿ ndihí-o nchaa ñáyiu ní tuha ichi-gá cuèndá quini-ó núu ndècu váha-yu —càchí-dé xãhaⁿ-dë.

³⁷ Te té Bèé ní xãhaⁿ-dë sá quihíⁿ ndihí-güedé té Juáá, àdi Mácú chi úú diu-dé. ³⁸ Dico té Pãblú ñá ní dãña-gá-dé quihíⁿ té Juáá, chi ní dándõ ñaha-dë xii-güedé cútnàhá ní xíndecu-güedé Pànfilíá, te ní nacuico-dë cuánuhú-dé, te ñá túú-gã ní sãháⁿ ndihí ñaha-dë xii-güedé. ³⁹ Xíãⁿ ní cuu ní tenáá tnáhá tè Bèé ndihí té Pãblú, te ichi càa ichi caa ní cuu-güedé. Te té Bèé ndihí té Mácú ní quée-güedé bàrcú cuáháⁿ-güedé Chìpré. ⁴⁰ Te té Pãblú ní xãhaⁿ-dë xii té Silás sá quihíⁿ ndihí ñaha-dë, te ñáyiu sándáa iní-xi tnúhu Jèsús ní cãháⁿ ndihí-yu Yã Ndiöxí sá chíndèe ñaha-gá xii-güedé. ⁴¹ Te ní xica-güedé cuáháⁿ-güedé te ní yãha-güedé nihí distritú Sìriá ndihí distritú Ciliciá. Te ní cãháⁿ-güedé tnúhu Jèsús núu nchaa ñáyiu ní sándáa iní tnúhu-gá, núu xíãⁿ ío-gá ní cudíí iní-yu cadá-yu nãcuáa cãháⁿ Yã Ndiöxí.

16

Tnàhá té Timuteú cuáháⁿ ndihí-dé té Pãblú ndihí té Silás

¹ Te té Pãblú ndihí té Silás cuáháⁿ-güedé ñuú Dèrbé ndihí ñuú Lìstrá, te ñuú Lìstrá yacáⁿ ndécú ìⁿ té nàni Timuteú. Te té-áⁿ sándáa iní-dé tnúhu

Jèsús, te tnàhá nǎná-dě sàndáá iní-aⁿ tnúhu-gá, te ñaha isràél cúú-áⁿ, te téé grìégú cúú tǎtá-dě.

² Te nchaa ñáyiú ní sàndáá iní tnúhu-gá ñáyiú ndècu ñuú Lìstrá, ndihi ñáyiú ñuú Ìconiú, nchaa ñáyiú-áⁿ cúdí iní-yu nàcuáa quìde-dé. ³ Te ní cuiní té Pǎblú sá tnàhá té Timùteú quíhíⁿ ndihi-dé dava-gá ñuú, núu xiǎⁿ díhna-gá sèñá ní sáha té Pǎblú ñí té Timùteú, chi ñá ní tnàhá iní té Pǎblú sá càháⁿ cuèhé ñáyiú isràél cuèndá té Timùteú. Te nchaa ñáyiú isràél ndécú ñuú-áⁿ xìní-yu sá tée grìégú cúú tǎtá-dě, te ñá díú tée isràél cúú-dě, te xiǎⁿ ní sáha té Pǎblú sèñá ñí té Timùteú. ⁴ Te ndi tnahá ñuú ndi tnahá ñuú cuáháⁿ-güedé càháⁿ ndihi-güedé nchaa ñáyiú ní sàndáá iní tnúhu Jèsús. Te ní xáhaⁿ-güedé nàcuáa càháⁿ tutú ní cadúha cue tée ní táuchíúⁿ Jèsús dacuàha ñaha xií-yu tnúhu-gá, ndihi cue tée yíndaha ñáyiú sàndáá iní tnúhu-gá ñuú Jerusalén. ⁵ Te cuèndá ducaⁿ ñí sáháⁿ-güedé nchaa ñuú núú ndécú ñáyiú sàndáá iní tnúhu-gá ní dáciuhá ñàha-güedé xií-yu, núu xiǎⁿ tá cùu túha-gá-yu tnúhu Yá Ndiòxí, te vài-gá-yu ní tuhá-yu ichi-gá.

Ní dácótó ñàha-xi xii té Pǎblú sá ñí xìní-dé ñí tée distritú Macèdoniá

⁶ Te ñá ní dàña Espíritú Yá Ndiòxí quíhíⁿ-güedé càháⁿ-güedé tnúhu-gá distritú Àsiá, núu ní sáháⁿ-güedé

distritú Frigíá ndihi distritú Gàlaciá càháⁿ-güedé tnúhu-gá. ⁷ Te ní sáá-güedé yuhu distritú Misiá. Te quíhíⁿ-güedé distritú Bìtiniá ní cùu, dico ñá ní dàña Espíritú Yá Ndiòxí quíhíⁿ-güedé yàcáⁿ. ⁸ Te ní yáha-güedé Misiá, te ní quexìo-güedé ñuú Tròás, te yàcáⁿ ní nanítnáhá-ndí ndihi-dé. ⁹ Te ñí níú ní dácótó-xí núú tée Pǎblú sá ñí xìní-dé ñí tée distritú Macèdoniá nùtní-dé, te ní xáhaⁿ tée-áⁿ xii té Pǎblú: “Cada ndee iní-n quíhíⁿ-n Macèdoniá chi dacuàha ñàha-n nchaa sá xìní-n”, càchí-dé xáhaⁿ-dě, ní dácótó ñàha-xi xii té Pǎblú. ¹⁰ Te cuèndá sá dúcáⁿ ní dácótó ñàha-xi xii té Pǎblú núu ní ndatnúhu-ndí quíhíⁿ-ndí Macèdoniá, chi ní cutnùní iní-ndí sá cáná ñàha Yá Ndiòxí quíhíⁿ-ndí càháⁿ-ndí tnúhu-gá núu ñáyiú yàcáⁿ.

Té Pǎblú ndihi té Silás ndécú-güedé ñuú Filipú

¹¹ Te ní quée-ndí bàrcú ñuú Tròás, te cuáháⁿ ndáá-ndí ñuú Samòtraciá, te yàcáⁿ ní quexìo-ndí, te ní yáha-ni-ndí cuáháⁿ-ndí. Te nduu tnèé ní quexìo-ndí ñuú Nèápolis. ¹² Te yàcáⁿ ní quene-ndí bàrcú, te xìca-na-ndí cuáháⁿ-ndí ñuú Filipú te ñuú-áⁿ yíndèhu-xi distritú Macèdoniá. Te yàcáⁿ ní cudí-ndí ní xíndecu tnaa-ndí. Te ñuú Filipú-áⁿ ío cùnuu-xi, chi ío chitu ñáyiú ròmá ní ngóo-yu. ¹³ Te nduu ndètátú-yu ní quée-ndí ñuú

cuáháⁿ-ndí ñⁿ xio yuhu yũte, chi yacáⁿ sáháⁿ-yu cáháⁿ ndihí-yu Yá Ndiõxí. Te òré ní quexio-ndí, te ní naníhí tnáhá-ndĩ ndihi mee-ni ñáyiú dñhí, te ní cáháⁿ-ndí tnúhu Yá Ndiõxí ní xíndedóho-yu. 14 Te ndècu ñⁿ ñaha nani Lidiá ní xíndedóho-aⁿ nàcuáa ní cáháⁿ-ndí, te ñaha ñuú Tiàtirá cúú-áⁿ, te dñco-aⁿ dóo muradú, te ío cáháⁿ ndihi-aⁿ Yá Ndiõxí. Te ñu-ni mee Yá Ndiõxí ní chindee ñaha-gá ní sándáa iní-aⁿ tnúhu ní cáháⁿ té Páblú. 15 Te ní sandute-aⁿ ndihi landú-aⁿ, ndihi nchaa ñáyiú xínu cuechi núú-aⁿ, te ní cachí-aⁿ xii-ndí:

—Te núu ní cutnùní iní-ndó sã ní sándáa ndisa iní-í tnúhu Jesús, te cundecu tnaa-ndo vèhe-í —càchí-aⁿ xii-ndí.

Te ní quide yica-aⁿ ñ xíndecu-ndí vehe-aⁿ.

16 Te ñⁿ nduu ñùhu-ndí ichi cuáháⁿ-ndí núú cáháⁿ ndihí-yu Yá Ndiõxí, te ní naníhí-ndí ñⁿ xíchí ñùhú ichi, te yìhi ñaha espíritú cùndihí yucu ñávãha xii-xi. Te xãⁿ ní quide ní cáháⁿ-xi nchaa sã vã yõo tnàhí cùtnuní iní-xi núú nchaa ñáyiú ní sãngándihí ñaha xii-xi. Te ñáyiú dii vèhe-xi xinu cuechi-xi ío vãi díhúⁿ ñí níhi-yu chi ní cháhu nchaa ñáyiú ní sãngándihí ñaha xii-xi. 17 Te xíchí-ãⁿ ñí chinchícúⁿ ñáhá-xí xii-ndí ndihi té Páblú ndëndaha ñaha-xi cuáháⁿ, te ní cáháⁿ níhi-xi xãhaⁿ-xi xii dava-gá ñáyiú:

—Cue téa-xi xínu cuechi-güedé núú Yá Ndiõxí, chi ío cãhnu cuu-gá, te cãchí

tnúhu-güedé nása cada-ndo nãníhí tãhú-ndó —cãchí-xi xãhaⁿ-xi xii-yu.

18 Te titní xito ní yãha-ndí ducaⁿ-ni ñí cáháⁿ-xi. Te ñã ní cùndee-gá iní té Páblú sã dúcáⁿ cáháⁿ-xi, núu ní nanchocuñhu-dé núú nútnñⁿ-xi, te ní xãhaⁿ-dẽ xii espíritú cùndihí yucu ñávãha yìhi ñaha xii-xi:

—Ío cãhnu cuu Xítohó Jesucristú, núu xãⁿ cãchí-í sã xócuññí-n vã quíhí-gã-n yìqui cuñú xíchí-a —cãchí-dé xãhaⁿ-dẽ.

Te òré-ni ní quee espíritú cùndihí yucu ñávãha-áⁿ yìqui cùñú-xi.

19-20 Te ñáyiú dii vèhe-xi xinu cuechi-xi-áⁿ ñí cutnùní iní-yu sã vã níhi-gá-yu díhúⁿ cuëndá tnúhu cáháⁿ-xi, núu ní tñí-yu té Páblú ndihi té Silás ndécá ñáhá-yu cuáháⁿ núú cuè téa cùchiuⁿ Romá, te xãhãⁿ-yu xii-güedé:

—Cue téa-xi cùu-güedé cue téa israhél, te ío dusaⁿ xíquide-güedé ñuú-ó. 21 Te cuñí-güedé cada-o nàcuáa quide-güedé, te vã cúú dúcáⁿ cada-o chi ñáyiú nacióⁿ Romá cúú-ó —cãchí-yu xãhãⁿ-yu xii cue téa cùchiuⁿ.

22 Te uuⁿni ní cáháⁿ nchaa-yu, te xãhãⁿ-yu sã ñã túú quide váha té Páblú ndihi té Silás. Te cue téa cùchiuⁿ ní cãndeé-güedé dóó tẽ Páblú ndihi dóó tẽ Silás ní ndátá-güedé, te ní táuchíuⁿ-güedé caniha-güedé ndihi tnudñi xii-güedé. 23 Te ní caniha-güedé, te dãtnùní ní chihí ñaha-güedé vecaá. Te ní xãhaⁿ-güedé xii téa ndënchito

vecaá sá cáda cuèdadú víhí-dě
cuèdá ná canú-güedé ve-
caá. ²⁴ Te cuèdá sá dúcáⁿ
ní cáháⁿ-güedé, núu téé
ndënchito vecaá ní dáyäha
ñaha-dě ingá cuártú ndécú
xítí vecaá, te ní chihi-dé
sáhá-güedé yaú nduhu, te ní
quide tii-dé.

²⁵ Te dava niú ní cáháⁿ
ndihi té Páblú ndihi té Silás
Yá Ndiöxi, te ní xita-güedé
ndudú ní quide cãhnu
ñaha-güedé xii-gá. Te
dava-gá cue téé yìhi vecaá
ní xindedóho-güedé nãcuáa ní
xita-güedé. ²⁶ Te uuⁿni níhi
vìhi ní tnáa ní quidi-xi ndéé
cimièntú vecaá, te ní nacaáⁿ
nchaa yèhe vecaá, te ní ndihi
cadèná ndútú cuè téé yìhi
vecaá ní nandáxi. ²⁷ Te ní
ndiquíú cúnú ìní téé ndënchito
vecaá, te ní quide cuèdá-dé
nchiì nchaa yèhe vecaá. Te ní
tava-dé machití-dé cahni-dé
mèé-dé ní cùu, chi ní cáháⁿ-dě
sá ní ndihi cue téé yìhi vecaá
ní xinu ní cùu. ²⁸ Te té Páblú
ní cáháⁿ níhi-dé, te xãháⁿ-dě
xii téé ndënchito vecaá:

—Vá dúcáⁿ càda-n cahni-n
mee-n, chi nchaa-ni-ndí yìhi
—cächí-dé xãháⁿ-dě xii téé
ndënchito vecaá.

²⁹ Te dãtnùní ní xicáⁿ téé
ndënchito vecaá ñuhú, te
xìnu-dé cuánguihu xítí vecaá
núu yìhi té Páblú ndihi té Silás,
te quidi ñaha-ná-xi xii-dé ní
quexio-dé ní ngüñí xítí-dě
núu-güedé. ³⁰ Te dãtnùní
ndéca ñaha-dé xii-güedé
ní ndee vecaá, te ní xicáⁿ
tnúhú-dě núu-güedé, te
xãháⁿ-dë:

—Nchòhó cachí tnúhu-ndo
nãsa cada-í naníhi tãhú-í —
cächí-dé xãháⁿ-dë.

³¹ Te ní xãháⁿ-güedé:

—Quindáa iní-n ndihi
ñadihi-n, ndihi landú-n, ndihi
nchaa ñáyu xìnu cuechi
núu-n tnúhu càháⁿ Xítóhó
Jesucristú, te naníhi tãhú-ndó
—cächí-güedé xãháⁿ-güedé.

³² Te ní dácuáhã ñaha-güedé
xii téé ndënchito vecaá ndihi
nchaa ñáyu ndècu vehe-dé
tnúhu Yá Ndiöxi. ³³ Te
diu-ni òré-áⁿ ní naquete-dé
sátá-güedé núu ní ñáni,
te dãtnùní ní sandute-dé
ndihí-yu. ³⁴ Te ndéca ñaha-dé
cuáhãⁿ vehe-dé ní sãñaha-dě
sá ní xexi-güedé, te ní cudíi
víhi iní téé ndënchito vecaá
ndihi nchaa-dé vehe-dé sá
ní tuhá-yu ichi Yá Ndiöxi. Te
cuándihu tucu té Páblú ndihi
té Silás vecaá.

³⁵ Te nduu tnéé ní xãháⁿ
cuè téé cùchiuⁿ xii poleciá
cuáhãⁿ-güedé cúu-güedé téé
ndënchito vecaá queñuhu-dé
úú cue téé cuánguihu ndedí
nduu ìcu núhú-güedé. ³⁶ Te téé
ndënchito vecaá ní xãháⁿ-dë
xii té Páblú ndihi té Silás:

—Cue téé cùchiuⁿ ní
cachí-güedé sá queé-ndó
núhú-ndó, chi ñá túú-gã
ná cada-güedé, chi sa ní
yáha cuèdá-ndó —cächí téé
ndënchito vecaá xãháⁿ-dë
xii-güedé.

³⁷ Te té Páblú ní xãháⁿ-dë xii
cue téé cùu poleciá:

—Téé ròmã cúu-ndí,
te vá cúu dùcaⁿ-ni cun-
duu, chi ní caniha-güedé
tnudii xii-ndí, te ní xini-yu
ncháa-yu. Te ñá túú
tnàhí ní xicáⁿ tnúhú-güedé

nũu ndáá ndècuéchi-ndí àdi ñáhá, chi cuèndá-ní ní chihi ñaha-güedë vecaá xii-ndí. Te vitna cuíní-güedé dacăcu ñaha-güedé núhú-ndí cuèndá sá vǎ yõo quini ñáhá nũhú-ndí cáháⁿ-güedë, dico vá cúú dùcaⁿ cada ñaha-güedé xii-ndí. Chí cuàháⁿ cúñaha-ndo na quixi mee-güedé queñuhu ñaha-güedë —càchí té Pǎblú xii-dé cue poleciá.

³⁸ Te cue téé cùu poleciá cuánuhú-güedé núú ndécú cuè téé cùchiuⁿ, te ní xáhaⁿ-güedë nàcuáa ní cáháⁿ té Pǎblú. Te sá dúcáⁿ ñí xáhaⁿ pòleciá sá tēe ròrmá cúú-güedë, xiǎⁿ ní yùhú-güedé. ³⁹ Te ní sáháⁿ cue téé cùchiuⁿ yehe vecaá, te ní xáhaⁿ-güedë sá cádá càhnu iní-güedé sá ñí chihi ñaha-güedë vecaá, te ní ndeñuhu ñaha-güedë vecaá. Te ní cáháⁿ ndàhú-güedé núú cuè téé ní xíhi vecaá sá ndéé-güedë ñuú-áⁿ nũhú-güedé. ⁴⁰ Te ní ndee-güedé vecaá, te cuáháⁿ-güedé vehe tá Lidíá, te ní ndatnúhu-güedé ndihi nchaa ñáyiú ní sándáá iní-xi tnúhu Jèsús, te ní xáhaⁿ-güedë xií-yu nàcuáa cadá-yu, te ío ní cudíí iní-yu, te ducaⁿ te ní xica-güedé cuáháⁿ-güedé.

17

Ío dusaⁿ quide ñáyiú ñuú Tesalónica

¹ Te ní yáha-güedé ñuú Ànfípólís ndihi ñuú Apòloniá, te ní quexiò-güedé ñuú Tesalónica, te yàcáⁿ cáá ñíⁿ

veñúhu ñáyiú isràél. ² Te ní sáháⁿ té Pǎblú veñúhu-áⁿ, chi ducaⁿ tnàhí quide-dé, te ndi tnahá nduu ndetátú-yu ní sáháⁿ-dé veñúhu-áⁿ ùní xito. Te ní ndatnúhu ndihi ñaha-dë xií-yu nàcuáa ní chídó tnúni cue téé ní xóo cáháⁿ tnúhu Yá Ndiòxí ndéé sanaha. ³ Te ní xitnúhu ñaha-dë nàcuáa ní cáháⁿ cue téé-áⁿ sǎ Crístú Yaá tendaha Yá Ndiòxí quixi ñuyíú-a ndoho vñhi-gá, te cuú-gá, te ndoto-gá, te xǎhaⁿ-dë:

—Te diu Jèsús cúú Crístú Yaá ní tendaha Yá Ndiòxí ní quixi ñuyíú-a, núu xiǎⁿ càchí tnúhu-í vitna —càchí té Pǎblú xǎhaⁿ-dë xii-yu.

⁴ Te dava ñáyiú isràél ní sándáá iní-yu tnúhu ní cáháⁿ té Pǎblú, te ní níhi tnáhǎ-yu ndihi-dé, ndihi té Silás. Te vǎi ñáyiú griègú ñáyiú càháⁿ ndihi Yá Ndiòxí ní sándáá iní-yu tnúhu Jèsús. Te ndècu titní ñáyiú dìhí ñáyiú cùnuu, te ñáyiú-áⁿ tnàhá-yu ní sándáá iní-yu tnúhu-gá. ⁵ Te dava ñáyiú isràél ñá túú ní cùu váha iní-yu núú tē Pǎblú nũu ní ndúcǔ-yu cue téé cuihna iní-xi tuhío-güedé cada chiúⁿ-güedé, chi ndi cuihnu ndi cuihnu-ni-güedé, te ncháá-yu ndihi cue téé-áⁿ ndi coyo ndi coyó-yu xícuaá-yu. Te sátá ñí tecú dóho dava-gá-yu, te ní sáháⁿ tuhá-yu, te ío ní quide dùsáⁿ-yu. Te nísáháⁿ-yu vehe té Jàsón, te ní quide yicá-yu ní quíhu-yu vehe-dé nándúcú-yu té Pǎblú ndihi té Silás cuèndá queñuhu ñàhá-yu núú nchaa ñáyiú.

6 Te ñá ní nàníhí ñáhă-yu xii-güedé, núu xíáⁿ ní tnií-yu té Jàsón ndihí ìⁿ úú-gá cue té sàndáá iní tnúhu Jèsús, te tàñuhu ñahá-yu xii-güedé cuáháⁿ núu cuè té cùchiuⁿ. Te òré ní quexió-yu núu ndécú cuè té cùchiuⁿ, te ní ngúíta-yu ní cuáá-yu, te xáhăⁿ-yu xii-güedé:

—Ní quexió cue té-ăⁿ ñuú-ó, te ío dusaⁿ quide-güedé, te ducaⁿ-ni quide-güedé nchaa ñuú núu xícaⁿ cùu-güedé. 7 Te té Jàsón-ăⁿ ní xáhaⁿ-dê sá cúu cùndecu-güedé vehe-dé, te ñá túu sàndáá iní-güedé nàcuáa càháⁿ té Cèsár té yìndaha cuéhé nàcióⁿ, te càchí-güedé sá ndécú ìngá té cùnuu-gá tucu nàni-dé Jèsús —càchí-yu xáhăⁿ-yu xii cue té cùchiuⁿ.

8 Te sátá dúcáⁿ nǐ càháⁿ-yu, te ní cudééⁿ víhí cuè té cùchiuⁿ ndihí dava-gá ñáyiu ndèdóho. 9 Te vài díhúⁿ nǐ xícaⁿ cue té cùchiuⁿ núu té Jàsón ndihí dava-gá cue té cuáháⁿ ndihí-dé cuèndá té Páblú ndihí té Silás, te núu na ndèe-güedé núhú-güedé, te nacuañaha cuè té cùchiuⁿ díhúⁿ-güedé.

Té Páblú ndihí té Silás ndécú-güedé ñuú Bèréá

10 Te òré ní cundiquíⁿ, te ní quide ndee iní ñáhă ñáyiu sàndáá iní tnúhu Jèsús xii té Páblú ndihí té Silás, te ní xica-güedé cuáháⁿ-güedé ñuú Bèréá. Te ñuú-nduu ní sáá-güedé yàcáⁿ ní sáháⁿ-güedé veñúhu ñáyiu isràél. 11 Te váha-gá iní ñáyiu ñuú Bèréá dàcúxí ñáyiu ñuú

Tesalónica, chí ío ní cudíí iní-yu ní xíndedóho-yu tnúhu Jèsús, te ìⁿ nduu ìⁿ nduu ní dácuañă-yu tnúhu ní chídó tnùní cue téé ní xóo càháⁿ tnúhu Yá Ndióxi ndéé sanaha cuèndá cuimí-yu quini-yu núu ndáá càháⁿ té Páblú ndihí té Silás. 12 Te titní ñáyiu isràél ní sàndáá iní-yu tnúhu-gá ndihí titní cue té griégú ndihí ñáyiu dihí ñáyiu cùnuu ní sàndáá iní-yu. 13 Te dava ñáyiu isràél ndécú-yu ñuú Tesalónica, te ñáyiu-áⁿ nǐ níhí-yu tnúhu sá ndécú té Páblú ndihí té Silás ñuú Bèréá càháⁿ-güedé tnúhu Yá Ndióxi, núu xíáⁿ ní sáháⁿ-yu ñuú Bèréá ní dácuañdèhndé-yu núu nchaa ñáyiu vátá dácuañha-gá. Te ñáyiu-áⁿ nǐ sàndáá iní-yu tnúhu ndehnde te ní cudééⁿ víhí-yu núu-güedé. 14 Te òré-áⁿ nǐ xáhaⁿ ñáyiu sàndáá iní tnúhu-gá xii té Páblú sá quihíⁿ-dé yuhu làmár, te ní xica-dé cuáháⁿ-dé, te té Silás ndihí té Timùteú ní quendóo-güedé ñuú Bèréá. 15 Te ìⁿ úú-güedé cuáháⁿ ndihí-güedé té Páblú, te ndèca ñaha-güedé cuáháⁿ ndéé ñuú Àtenás, te ní xáhaⁿ té Páblú xii-güedé:

—Núu na nùhú-ndó, te cúu-ndo té Silás ndihí té Timùteú ná quíxí ndíhí-ni-güedé nanítnáhă-ndí iha —càchí-dé xáhăⁿ-dê.

Te ní xica-güedé cuánuhú-güedé.

Té Páblú ndécú-dê ñuú Àtenás

16 Te ñuú Àtenás ndétú té Páblú quihíⁿ té Silás ndihí té Timùteú. Te yàcáⁿ ní xiní-dé

sá ïo cuéhé sǎ cǎchí-yu cùu ndiòxí-yu ndècu te ñá ndàá sá díú ndiòxí cúú-xí, te xǎñ ñá túú ní cùu váha iní-dé, chi ñá tnàhá iní-dé nàcuáa quidé-yu. 17 Te ní sáháⁿ-dé veñúhu ní cáháⁿ ndihí-dé ñáyíu isràél ndihí dava-gá ñáyíu cáháⁿ ndihí Yá Ndiòxí. Te ìⁿ nduu ìⁿ nduu sáháⁿ-dé xití ñúú cáháⁿ-dé tnúhu-gá ndihí nchaa ñáyíu xica cuu yacáⁿ. 18 Te cue téé cùu epicureú ndihí cue téé cùu estoicú, cue téé-áⁿ ñí ndatnúhu-güedé ndihí té Páblú, te dava-güedé xǐtnàha-güedé:

—¡Ná tnúhu vǐhi cáháⁿ téé lùcú-ǎⁿ! —cǎchí-güedé xǐtnàha-güedé.

Te dava-güedé xǐtnàha-güedé:

—Sàni iní-ndí sá cáháⁿ-dé cuèndá ndiòxí sá vǎtá quíní-gá-ó —cǎchí-güedé xǐtnàha-güedé.

Te ducaⁿ xǐtnàha-güedé, chi cáháⁿ té Páblú tnúhu Jèsús, te ní cáháⁿ-dé nàcuáa ní dándótó ñàha Yá Ndiòxí xii-gá, xǎñⁿ núu ducaⁿ xǐtnàha-güedé. 19 Te ndèca ñàha-güedé xii té Páblú cuáháⁿ ìⁿ xichi núú nání Àreópagú, te ní xáhaⁿ-güedé xii-dé:

—Cachí tnúhu ndáá-n ñása cuáháⁿ tnúhu cáháⁿ-n, chi na cùtnuní ndáá iní-ndí, 20 chi ducaⁿ-ni cáháⁿ-n tnúhu sá ñá túú sàcúndédóho-ndí, te cuíní-ndí cachí tnúhu ndáá-n ñása nduu tnúhu-áⁿ cuèndá cutnùnì váha iní-ndí —cǎchí-güedé xǎhaⁿ-güedé xii-dé.

21 Te nchaa ñáyíu ñúú Àtenás ndihí ñáyíu dava-gá ñúú, mee-ni tnúhu saa

cuíní-yu cáháⁿ-yu, nchaa sá vǎtá cúndédóho-gá-yu cuíní-yu cundedóho-yu.

22 Te té Páblú ní ngúnutnii-dé núú xǐxúcu-yu nchaaⁿ-yu, te xǎhaⁿ-dè:

—Nchòhó cue ñáyíu ñúú Àtenás, cundedóho-ndo nchaa tnúhu na cáháⁿ-í-a. Ío quide cahnu nchohó sá cǎchí-ndó cùu ndiòxí-ndó, 23 Te vitna ní quexìo-í ñúú-ndó, te ní xiní-í sá yàyacáⁿ ndécú nchaa sá cǎchí-ndó cùu ndiòxí-ndó cáháⁿ ndihí-ndo. Te ní xiní-í ìⁿ xichi núú ndèé tnuní quidé cǎhnu-ndo Yá Ndiòxí Yáá ñá túú xiní-ndó, te diu-ni ducaⁿ cáháⁿ lètrá ndèé tnuní xǎñ, te cǎchí-xi: “Iha quide cahnu-ndí Ndiòxí sá ñá túú xiní-ndí”, duha cáháⁿ lètrá-áⁿ. Te quide cahnu-ndo Yá Ndiòxí cáháⁿ-ndó, dico ñá túú xiní-ndó ñása cǎa-gá, te yúhú xiní ndáá-í nàcuáa cǎa Yá Ndiòxí, chi diu-ni Yá Ndiòxí cáháⁿ ndihí-í, te diu tnúhu-gá cáháⁿ-í vitna.

24 Te diu Yá Ndiòxí ní cadúha-gá ñuyíú-a ndihí nchaa sá ío, núu diu-gá cúú Xìtohó ñuyíú-a ndihí andiu. Te ñá túú xiní ñúhu-gá vehe dàcaa ñáyíu ñuyíú-a cundecu-gá. 25 Te ñá túú xiní ñúhu-gá ñáyíu chindee ñàhá-yu xii-gá, chi mee-gǎ quidé-gǎ nchító-ó ndècu-o te tàxi-gá yócó tǎchí-ó ndihí nchaa sá xiní ñúhu-o.

26 Te ndèé sanaha ñí cadúha-gá ìⁿdi-ni téé, te diu-ni ñíñí-dè cúú ñáyíu ndècu ñicaxico ñuyíú. Te diu-ni mee Yá Ndiòxí ní xáhaⁿ-gǎ nchaa

núú cùndècú-yu, te mee-gă ní cáháⁿ-gá ná daha cuía cudí nchaa nacióⁿ ndihí mèe-yu. ²⁷ Te cùní-gá sá ncháá ñăyiu nanducu ñàhá-yu cáháⁿ ndihí ñàhá-yu xii-gá, te mee-gă ndécú tũha-gá sá cáháⁿ ndihí ñaha-gă xii-yu ìⁿ ìⁿ-yu. ²⁸ Te ðiu-ní Yá Ndiöxí xító ñàha-gá xii-yu núú cùdí-yu ndécú-yu te càndá-yu. Te duha ní cáháⁿ ìⁿ ñaní tnàhá-ndó, téé ní cutnùnì iní-xi ní xindecu ndéé sanaha, te ní xáhaⁿ-dê xii-yu: “Nchaa-o cùu-o déhe Yá Ndiöxí”, duha ní xáhaⁿ-dê xii-yu. ²⁹ Te núú déhe Yá Ndiöxí cúú-yu nchaá-yu, te vá cúú cáháⁿ-yu sá Yá Ndiöxí cúú sã ñí cadúha-yu ndahá-yu. Te sá ñí cadúha-yu cùu ndiöxí-yu-áⁿ, dava cùu-xi ðíhúⁿ cuááⁿ, dava cùu-xi ðíhúⁿ cuixíⁿ, dava cùu-xi yúú. Te mèe-yu ní cahu iní-yu nàcuáa cunduu sá cúú ndiöxí-yu. ³⁰ Te cùtnàhá ñá túú ní cùtnunì iní-yu sá nèhé ní quidé-yu ní cadúha-yu nchaa xiáⁿ, te ñá túú ní quide cuendá Yá Ndiöxí sá ðúcáⁿ ñí quidé-yu. Te vitna càchí Yá Ndiöxí sá ðáñá ncháa ndi tũhú-yu nchaa sá cuéhé sá dúhá quidé-yu. ³¹ Te Yá Ndiöxí náhá-gă ná nduu cùndecu nchaa ñăyiu núú-gă, te mee-gă sa nàha-gá ndëndida càa ñăyiu ní quide váha, te ndëndida càa ñăyiu ñá túú ní quide váha. Te mee-gă ní xáhaⁿ-gă xii Déhe-gá Yaá nání Jèsús cúñaha-gă xii-yu núú ndëndida càa-yu ní quide váha te ndëndida càa-yu ñá túú ní quide váha. Te mee

Jèsús cáháⁿ ndáá cuiti-gá, te sa nàha-o sá ncháá xiáⁿ cada Jèsús, chí ðiu cuendá-áⁿ ñí dándótó ñàha Yá Ndiöxí xii-gá —càchí té Păblú xáhaⁿ-dê xii-yu.

³² Te òré ní cáháⁿ té Păblú sá ñí ndoto Jèsús, te dava ñăyiu ñá ní tnàhá iní-xi tnúhu ní cáháⁿ-dê ní cáháⁿ yíchí-yu. Te davá-yu ní xáháⁿ-yu xii-dé:

—Te ingá xito quixi-n, te cáháⁿ tucu-n tnúhu ní cáháⁿ-n vitna —cachí-yu xáháⁿ-yu xii-dé.

³³ Te ní xica-dé cuáháⁿ-dê. ³⁴ Te dava ñăyiu ní xindedóho tnúhu ní cáháⁿ té Păblú ní sándáá iní-yu Jèsús, te ní chindee tnúhu ñàhá-yu xii-dé. Te ìⁿ téé cùchiuⁿ Areópagú nání-dê Nixú ndihí ìⁿ ñadihí nání-áⁿ Dămarís, tnàhá-yu ní sándáá iní-yu tnúhu-gá ndihí dava-gá-yu.

18

Té Păblú ndécú-dê ñuu Còrintú

¹ Te té Păblú ní quee-dé ñuu Àtenás cuáháⁿ-dê ñuu Còrintú. ² Te yacáⁿ ní naníhí tnàhá-dê ndihí ìⁿ téé isràél nání-dê Àquilú, te téé-áⁿ cúú-dê téé distritú Pòntó, te ní xindecu-dé ndihí ñadihí-dé tá Priscilá ñuu Rómá. Te té Cèsár téé yindaha cuéhé nacióⁿ, téé nani Claudiú ní xáhaⁿ-dê sá vã cúú-gă cundecu ñăyiu isràél ñuu Rómá, te xiáⁿ ñuu ní ndee té Àquilú ndihí ñadihí-dé cuáháⁿ-yu ñuu Còrintú. Te sácú-ni nduu ní cuu sá ñí quexió-yu ñuu-áⁿ, te ní sáháⁿ té Păblú ní ndatnúhu ndihí ñaha-dê xii-yu vehé-yu. ³ Te ní xáháⁿ-yu sá cùndecu-dé

cada chiùⁿ ndihi ñahá-yu, chi ñⁿ-ni chiùⁿ quide-dé ndihí-yu, te ní xóo dacáa-yu vehe dóó. Te núu xiáⁿ ní xíndecu ndihi ñaha tē Pāblú ní quide chiùⁿ ndihi ñaha-dé xií-yu. ⁴ Te núu ùná núu ùná nduu, nduu ndètatú-yu, ní xóo quíhíⁿ-dé veñúhu ñáiyu isràél. Te ní ndatnúhu-dé ndihi ñáiyu isràél ndihi ñáiyu ñá túú cùu ñáiyu isràél, te ní xáhaⁿ-dē sá quíndáá iní-yu tnúhu Jèsús.

⁵ Te té Silás ndihi té Timùteú ní quee-güedé distritú Macèdoniá cuáháⁿ-güedé núu ndécú tē Pāblú. Te òré ní quexìo-güedé, te ní cáháⁿ-ní té Pāblú tnúhu Yá Ndiòxí núu ñáiyu isràél, te xáhaⁿ-dē xií-yu sá Jèsús cúu-gā Crístú Yaá ní tendaha Yá Ndiòxí ní quixi ñuyíu-a. ⁶ Te sá dúcáⁿ ñí cáháⁿ-dé ñúu ní nàá ndihi ñahá-yu xii-dé, te ní cáháⁿ cuèhé-yu cuendá-dé, núu xiáⁿ ní naquidi-dé dóó-dē. Te ducaⁿ ñí quide-dé cuendá sá cútnùní iní-yu sá ñá ní tnàhá iní-dé nàcuáa ní cáháⁿ-yu, te ní xáhaⁿ-dē xií-yu:

—Yúhú ñá túú cuèchi-í, te núu ní xíta nihnu-ndo, xiáⁿ quèndóo cuèchi mee-nā-ndó. Te vitna quíhíⁿ-í cáháⁿ ndihi-í ñáiyu ñá túú cùu ñáiyu isràél, te vá nándùcu-gá-í nchòhó ñáiyu isràél cáháⁿ ndihi ñaha-í xii-ndo —càchí-dé xáhaⁿ-dē xií-yu.

⁷ Te ní xica-dé cuáháⁿ-dé vehe ñⁿ tée nàni Justú, te tée-áⁿ ndécú yàtni-dé núu cáá veñúhu, te tnàhá-dé càháⁿ ndihi-dé Yá Ndiòxí. ⁸ Te té Crìspú tée yíndaha

veñúhu-áⁿ ñí sándáá iní-dé Jèsús ndihi ñadihí-dé ndihi landú-dé. Te vài ñáiyu ñuú Còrintú ní sáháⁿ-yu ní xíndedóho-yu tnúhu-gá, te ní sándáá iní ñahá-yu xii-gá, te ní sanduté-yu. ⁹ Te ñⁿ niú ní cáháⁿ saní té Pāblú sá ñí xáhaⁿ Yá Ndiòxí xii-dé:

—Cáháⁿ-ni-n tnúhu-í, te vá yùhú-n nchàa tnúhu cuèhé tnúhu duha càháⁿ ñáiyu, ¹⁰ chi yúhú chindee ñaha-í xii-n, te vá yóo ñⁿ cada úhú ñahá xii-n, te vài-gá ñáiyu ñuú-áⁿ quíndáá iní-yu tnúhu-í —càchí-gá xáhaⁿ-gā núu saní-dé.

¹¹ Te ñuú Còrintú ní xíndecu té Pāblú ñⁿ cuía dava, te mee-ni tnúhu Yá Ndiòxí ní xóo dacuàha-dé ñáiyu.

¹² Te ndècu-gá-dé ñuú-áⁿ ñí ngóo té Gàlìón chiùⁿ taxi tnuní-dé distritú Acáyá. Te dàvá-áⁿ ñí cudééⁿ ñáiyu isràél núu tē Pāblú, te ní tñi ñahá-yu xii-dé ndécá ñahá-yu cuáháⁿ núu cuè tée cùchiuⁿ. ¹³ Te ní xáháⁿ-yu xii té Gàlìón tée cùu gobiernú:

—Tée-a ní quexìo-dé ñuú-ó xica cuu-dé te cuíní-dé dandàhú ñahá-dē chitnahá-ndí-dé cada-ndí nàcuáa quide-dé quidé càhnu-dé Ndiòxí-dē, te dañá-ndí vá cádá-gā-ndí nàcuáa càháⁿ tnúhu sá sánú ìchi ñaha xii-o nàcuáa cundecu-o cuíní-dé —càchí-yu xáháⁿ-yu xii tée cùu gobiernú.

¹⁴ Te té Pāblú cuíní-dé cani-dé cuèndú ní cùu, te ní ngúíta té Gàlìón càháⁿ-dé, te xáhaⁿ-dē xií-yu:

—Nchòhó ñáyiú isràél, cundedóho-ndo tnùhu na càháⁿ-í-a. Te núu ndècu núú ìⁿ cuèchi ní quide-dé àdi ní sahani-dé ìⁿ ndíyi, te cuu cundáá-xi iha, te càháⁿ-ndó nùu nándi cùu sá nǐ quide-dé, ¹⁵ àdi dico-ni sá ìⁿ tnùhu ní càháⁿ-dé, te yáchí-gá chí cuaháⁿ yacáⁿ ndatnúhu-ndo nùú mée-ndó, chi mee-ni sǎ ñà túú quide-dé nàcuáa càháⁿ tnùhu sá sánú ìchi ñaha xii-ndo caháⁿ-ndó, te yúhú ñá túú tnàhá iní-í cada ndáá-í nchaa xǎⁿ —càchí-dé xáhaⁿ-dè.

¹⁶ Te ní cudééⁿ-dè, te ní ndèñuhu ñaha-dè xii-yu vechiúⁿ. ¹⁷ Te ñáyiú ñá túú cùu ñáyiú isràél ní tñí-yu té Sòstenés téé yíndaha veñúhu ñáyiú isràél, te ndèhe té Gàlìón téé cùu gobiernú ní canihá-yu xii-dé, dico ñá túú tnàhí ná tnùhu nǐ càháⁿ-dé taunihnu-dé téé ní caní-yu-áⁿ.

Té Pàblú cuaháⁿ tucu-dé ñuú Antiòquia, te yacáⁿ ní xica tucu-dé cuaháⁿ-dé dava-gá ñuú càháⁿ-dé tnùhu Yá Ndiòxí

¹⁸ Te titní-gá nduu ní xíndecu té Pàblú ñuú Còrintú, te ní quide ndee iní-dé nchaa ñáyiú ní sándáá iní-xi tnùhu Jèsús, te ní tñí-dé ichi cuaháⁿ-dé distritú Sìriá ndihi té Àquilú ndihi ñadìhí té Àquilú-áⁿ tǎ Priscilá, te ní quexió-yu ñuú Cèncreá. Te cùmání-gǎ tñí-yu ichi quíhíⁿ-yu ñuú Éfesú, te ní dètè díquí tǎ Pàblú, chi ducaⁿ nǐ xáhaⁿ-dè xii Yá Ndiòxí sá ndéé xínu ìⁿ chiúⁿ ní sani

iní-dé cada-dé cuendá-gá, te dǎtnùní dètè-dé. Te ní quée-yu bàrcú cuaháⁿ-yu. ¹⁹ Te ní quexió-yu ñuú Éfesú, te yacáⁿ ní xáhaⁿ tǎ Pàblú sá cùndècu té Àquilú ndihi ñadìhí-dé, te mee-dè quíhíⁿ-dé dava-gá ñuú. Te cùmání-gǎ caca-dé quíhíⁿ-dé, te ní sáháⁿ-dé veñúhu ñáyiú isràél ní ndatnúhu ndihi ñaha-dè xii-yu. ²⁰ Te ní xáháⁿ-yu sá cùndècu-dé titní nduu, te ñá ní cuìní-dé cundecu-dé. ²¹ Te ní xáhaⁿ-dè:

—Núhú-í chi dacuítí xini ñuhu-xi cundecu-í vico coo ñuú Jerusalén, te quixi tucu-í te núu Ndiòxí ná càchí-gá, te vitna chí cadá ndèe iní —càchí-dé xáhaⁿ-dè xii-yu.

Te ní quée-dé bàrcú cuaháⁿ-dé. ²² Te ní quexió-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusalén, te ní ndexió-dé, te ní dándácõ váha-dé ñáyiú ndècu ichi Yá Ndiòxí, te dǎtnùní ní xica-dé cuaháⁿ-dé ñuú Antiòquia. ²³ Te yacáⁿ ní xíndecu-dé titní nduu, te dǎtnùní ní tñí-dé ichi cuaháⁿ-dé. Te ní sáháⁿ-dé nihí distritú Gàlaciá ndihi distritú Frigiá. Te ndi tnàhá ñuú ní sáháⁿ-dé ní càháⁿ-dé ndihi ñáyiú sándáá iní tnùhu Yá Ndiòxí, te ní ndúcú ndéé-gǎ-yu ní quidé-yu nchaa nàcuáa ní xáhaⁿ-dè cadá-yu.

Té Àpolós càháⁿ-dé tnùhu Yá Ndiòxí ñuú Éfesú

²⁴ Te dàvá-áⁿ nǐ quexió ìⁿ téé isràél ñuú Éfesú, te nàni-dé Àpolós, te cùu-dé téé

ñuú Alejandriá, te ío váha túha-dé tnúhu Yá Ndiöxí, te ío váha ñuhu díquí-dě nàcuáa cáháⁿ-dé, ²⁵ chi sa xini-dé nàcuáa ní xóo cáháⁿ ndí Juáa cútnàhá ní xóo dacuàndute ndí ñáyi. Te ío ní cudí iní-dé ní cáháⁿ-dé nchaa nàcuáa ní cuu cuendá Jèsús, dico vátá dacuàha-gá-dé nchaa tnúhu ní cáháⁿ méé Jèsús. ²⁶ Te ní sáháⁿ-dé veñúhu ñáyi isràél, te yacáⁿ ní cáháⁿ-dé ni yùhu ni iní-dé. Te ndècu té Àquilú ndihi ñadìhí-dé tá Priscilá ndèdóho-yu tnúhu ní cáháⁿ-dé, te ní xáhãⁿ-yu sá quihíⁿ-dé vehé-yu, te ní sáháⁿ-dé, te ní xitnúhu ñàhá-yu xii-dé dava-gá tnúhu Yá Ndiöxí sá ñà túú xini-dé. ²⁷ Te ní cachí té Àpolós sá quihíⁿ-dé distritú Acáyá, núu xiãⁿ ní cadúha ñáyi ñuú Éfesú ñⁿ tutú canehe-dé quihíⁿ ndaha ñáyi sàndáá iní tnúhu-gá xindecu Acáyá. Te xáhãⁿ-yu núu tütú-yu: “Cáháⁿ váha-ndo ndihi té Àpolós núu ní quexìo-dé”, cächí-yu xáhãⁿ-yu núu tütú-yu. Te ní xica-dé cuáháⁿ-dé, te ní quexìo-dé Acáyá. Te nchaa ñáyi sàndáá iní tnúhu-gá yacáⁿ, diu-ni mee Yá Ndiöxí ní chindee ñàha-gá ní sàndáá iní ñàhá-yu xii-gá. Te té Àpolós ío váha ní cáháⁿ-dé tnúhu Yá Ndiöxí núu-yu, te xiãⁿ ío ní ndúcú ndéé-gá-yu ní quidé-yu chiúⁿ-gá. ²⁸ Te té Àpolós ní ndatnúhu-dé ndihi ñáyi isràél, te ní xindedóho dava-gá-yu. Te ío váha ní cani-dé cuendú nchaa

nàcuáa ní xóo cáháⁿ cue téé ndéé sanaha sá quixí Crístú ñuyíu-a. Te ní cáháⁿ ndáá-dé ní xáhaⁿ-dè sá díu-ní Jèsús cúu-gã Crístú Yaá ní tendaha Yá Ndiöxí ní quixi ñuyíu-a. Te ñáyi isràél xíndatnúhu-yu sá ñã ndáá nàcuáa cáháⁿ-dé, dico ñá ní ñihí-yu tnúhu cúñàhá-yu xii-dé, chi ío váha ñuhu díquí-dě tnúhu cáháⁿ-dé.

19

Té Páblú ndécú-dě ñuú Éfesú

¹ Te cútnàhá ndécú-gã té Àpolós ñuú Còrintú, te ní xica té Páblú cuáháⁿ-dé tá yàha-dé mee-ni xití yucu cuáháⁿ, te ní sáá-dé ndéé ñuú Éfesú. Te ñuú-áⁿ ni naníhí tnàhá-dé ndihi cue téé sàndáá iní tnúhu Jèsús. ² Te ní xicáⁿ tnúhú-dé núu-güedè, te xáhaⁿ-dè:

—¿Sa ní quexìo Espiritú Yá Ndiöxí ní ngúndecu ndihi-ndo ndéé òré ní sàndáá iní-ndó Jèsús-ãⁿ? —cächí-dé xáhaⁿ-dè xii-güedè.

Te ní xáhaⁿ-güedè:

—Ñá túú xini-ndí sá ío Espiritú Yá Ndiöxí — cächí-güedè xáhaⁿ-güedè xii-dé.

³ Te ní xáhaⁿ tùcu-dé:

—¿Nása ní cáháⁿ téé ní dacuàndute ñaha xii-ndo-í? — cachí-dé xáhaⁿ-dè xii-güedè.

Te ní xáhaⁿ-güedè:

—Ní cáháⁿ-dé nàcuáa ní xóo cáháⁿ ndí Juáa — cächí-güedè xáhaⁿ-güedè xii-dé.

⁴ Te ní xáhaⁿ tè Páblú:

—Ndí Juáa ní dacuàndute ñaha ndí xii ñáyi, chi ní cuiní-yu sá dáñã-yu nchaa

sá cuèhé sá dúhá quidé-yu. Te ní xáhaⁿ ndií xii-yu: “Quindáá iní-ndó tnúhu Jèsús chi dacuítí quixi-gá ìⁿ nduu”, duha ní xáhaⁿ ndií Juàá xii-yu —càchí té Páblú xáhaⁿ-dè xii-güedé.

⁵ Te sá dúcáⁿ ní cáháⁿ té Páblú xáhaⁿ-dè xii-güedé, núu xiáⁿ ní sandute-güedé nàcuáa ní dándöo tnúhu Jèsús. ⁶ Te ní sacáⁿ ndodo té Páblú ndahá-dé díquí-güedé, te òré-ni ní quexìo Espíritú Yá Ndiöxí ní ngúndecu ndií-güedé, te ní ngüíta-güedé ní cáháⁿ-güedé tnúhu sá dácàhu iní ñáhá Espíritú-gá, tnúhu sá ñà túú xini-güedé cáháⁿ-güedé, te ní cáháⁿ-güedé tnúhu Yá Ndiöxí nàcuáa ní dácáhú iní ñáhá Espíritú-gá xii-güedé. ⁷ Te cùu datná úxúú tnàhá-güedé.

⁸ Te té Páblú ní sáháⁿ-dè veñúhu ñáyíu isràél ní cáháⁿ ndií-dé-yu, te úní yóó ní xínu ní xica cuu-dé veñúhu-yu. Te ío váha ñúhu díquí-dé tnúhu cáháⁿ-dè, núu xiáⁿ ní cuyí-dé ní cáháⁿ-dè, te ní xáhaⁿ-dè sá quindáá iní-yu tnúhu Jèsús, te ducaⁿ te ndíhu ndaha ñàha Yá Ndiöxí xii-yu. ⁹ Te davá-yu ío sàá iní-yu ñá ní cuíní-yu quindáá iní-yu, te ío ní cáháⁿ cuèhé-yu cuèndá Jèsús xití veñúhu núu dàva-gá-yu. Te té Páblú ní ndee-dé veñúhu cuáháⁿ-dè ndií ñáyíu sàndáá iní tnúhu Jèsús. Te ìⁿ nduu ìⁿ nduu ní sáháⁿ-dè scuèlá té Tiranú ní dácúáhá ñàha-dé xii-yu. ¹⁰ Te úú cuíá ducaⁿ ní sáháⁿ-dè scuèlá ní dácúáhá-dè ñáyíu. Te nchaa ñáyíu isràél ñáyíu ndècu nihíí distrítú Àsiá

ndií nchaa ñáyíu ñá túú cùu ñáyíu isràél ní xindedóho-yu tnúhu Jèsús. ¹¹ Te té Páblú ío ní chindee ñàha Yá Ndiöxí xii-dé ní quide-dé vai núú sã vã yöo tnàhí ndàcu cada. ¹² Te pàñú díquí-dé ndií dóo cándèé núu yíquí-dé ní xicáⁿ-yu nèhé-yu ní sáháⁿ núú ndécú ñáyíu cùhú, te xiáⁿ ní tñi ñáyíu cùhú ndií ñáyíu yìhi ñaha espíritú cùndií yucu ñávàha, te ní ndúha-yu.

¹³ Te ñúú Isràél véxi cue téé tatna xica cuu-güedé quidé tátna-güedé ñáyíu yìhi ñaha espíritú cùndií yucu ñávàha. Te ní ngüíta-güedé ní cacu nèhe-güedé Jèsús cuèndá quee espíritú-án yíqui cùñú-yu, te ní xáhaⁿ-güedé:

—Xocuiñí-n, chi càchí Jèsús sá vã cùndècu ndií-gá-n tée-a. Te diu-ni Jèsús cacú nèhe té Páblú òré càháⁿ-dè tnúhu-gá —càchí-güedé xáhaⁿ-güedé xii espíritú-án.

¹⁴ Te úsá tnàhá-güedé ducaⁿ ní xóo cada-güedé. Te tátá-güedé ní xínani-dé Èsevá, te tée-án ní cuu-dé dútú cùnùu. ¹⁵ Te sá dúcáⁿ ní cáháⁿ-güedé, te ní xáhaⁿ espíritú cùndií yucu ñávàha-án xii-güedé:

—¿Te ná cúú nchòhó nùu dayùhú ñáhá-ndó? Te xini-í Jèsús, te xini-í yoo cùu té Páblú, te nchòhó ñá túú xini ñáhà-í xii-ndo —càchí espíritú-án xáhaⁿ-xi xii-güedé.

¹⁶ Te tée yìhi ñaha espíritú cùndií yucu ñávàha-án ní ndanchita-dé ní tñi-dé cue téé quide tátna-án, te ní

ndihi dóo-güedě ní ndátá-dě, te ní dānicuèhé ñáhá-dě xii-güedé, te ní xinu-güedé cuáháⁿ-güedé. ¹⁷ Te nchaa ñáyiú israél ndécú ñúú Éfesú ndihi dava-gá ñáyiú ndècu diu-ni ñúú-áⁿ ní níhi-yu tnúhu nàcuáa ní cuu, te ío ní yuhú-yu, te vai-yu ní cachí sá ío càhnu cuu Xítóhó Jesucristú.

¹⁸ Te dava ñáyiú ní sándáa iní-xi tnúhu Jèsús ní sáháⁿ-yu núú ndécú tē Pāblú, ndihi núú ndécú nchàa ñáyiú ní sándáa iní tnúhu-gá ní náhmá-yu nàcuáa ní xóo cadá-yu. ¹⁹ Te titní ñáyiú ni xóo cada ndùu nehé-yu tutú-yu ní sáháⁿ núú ndécú nchàa ñáyiú sándáa iní-xi tnúhu-gá, te yàcáⁿ ní ndada cuendá-yu sá ío yahu ní sáha-yu tutú-yu, chi ndéé údico úxí mīl dīhúⁿ cuixíⁿ ní sáha-yu núú ncháá. Te ncháa-yu ní sahmí-yu tutú-yu. ²⁰ Te sátá ní cáyú nchaa tutú-áⁿ, te vai-gá ñáyiú ní tuhá-yu ichi Yá Ndiöxí, te ní sáha-yu cuendá sá ío xini ñuhu tnúhu Yá Ndiöxí.

²¹ Te ní cachí té Pāblú sá quíhíⁿ-dé distritú Macèdoniá ndihi distritú Acáyá, te dātnúni núhú-dé ñúú Jerusalén, te ducaⁿ te dātnúni quíhíⁿ-dé ñúú Rómá. ²² Te ndècu ndihi-dé té Timùteú ndihi té Èrastú cue tée chindee ñaha xii-dé. Te té Pāblú ní xáhaⁿ-dē xii-güedé sá códo nùu-güedé quíhíⁿ Macèdoniá, te ní xica-güedé cuáháⁿ-güedé, te mee-dě ní quendóo-dé.

Ñáyiú Éfesú ío dusaⁿ

quidé-yu ñúú-yu

²³ Te dāvá-áⁿ ío ní cudéⁿ-yu núú nchàa ñáyiú ní tuha ichi Yá Ndiöxí. ²⁴ Te ìⁿ tée ñúú Éfesú nāni-dě Demètriú. Te tée-áⁿ ní xóo canehe chiúⁿ-dé mee-ni dīhúⁿ cuixíⁿ ní xóo cadúha-dé veñúhu líhli, dātná cuini-ndó càa veñúhu Diáná sá cúu ndiöxí-yu. Te vai dīhúⁿ ní xóo níhi-dě ndihi cue tée ní xóo cada chiúⁿ ndihi-dé. ²⁵ Te ní cana-dé cue tée quide chiúⁿ ndihi-dé, ndihi nchaa cue tée quide chiúⁿ ndihi dīhúⁿ cuixíⁿ, te ní xáhaⁿ-dē xii-güedé:

—Nàha-ndo sá ío váha níhi-ó dīhúⁿ cuendá chiúⁿ quide-o. ²⁶ Te nàha-ndo sá càchí té Pāblú sá ñà díú ndiöxí cúu sá ní cadúha ñáyiú ñuyíú-a. Te ducaⁿ càháⁿ-dé ñúú-ó, te ducaⁿ-ni càháⁿ-dé níhi distritú Àsiá, te ío-gá vai ñáyiú sándáa iní tnúhu càháⁿ-dé. ²⁷ Te ío úhú nùu na cuíta chiúⁿ quide-o, vá yóo-gá cuaaⁿ sá cadúha-o. Te ngúita-yu cáháⁿ-yu sá veñúhu Diáná ñá túú càváha, te vá cadá càhnu-gá-yu sándú-ó. Te nàha-ndo sá ío càhnu cuu Dianá, chi nchaa ñáyiú distritú Àsiá quidé càhnu ñahá-yu ndihi ñáyiú xindecu ni càa xico ñuyíú —càchí té Demètriú xáhaⁿ-dē xii-güedé.

²⁸ Te sá dúcáⁿ ní cáháⁿ té Demètriú, xíáⁿ ní cudéⁿ-güedé núú tē Pāblú, te uuⁿni ní cuáá-güedé te càchí-güedé:

—Ío càhnu cuu Dianá sándú ñáyiú Éfesú! —càchí-güedé.

²⁹ Te nchaa ñáyiú ñúú Éfesú ndi coyo ndi coyo-yu xicáháⁿ-yu. Te tnàhá úú

cue téé distritú Macèdoniá xicá cùu-güedé ndihí té Păblú, ìⁿ-dé nání-dě Găyú, te ìⁿ-dé nání-dě Aristarcú. Te ní tnî-güedé úú cue téé-án, te cuánguihu coyo ndihí ñaha-güedě vehe núú quidé-güedě jündá. ³⁰ Te té Păblú cuiní-dé quihu-dé tnàhá-dé vehe-án cáhán ndihí ñaha-dě ní cùu, te ñá ní dàña cue téé ní sándáá iní tnúhu-gá. ³¹ Te ìⁿ úú cue téé cùnuu distritú Àsiá ní cáhán váha-güedé cuendá té Păblú, te ní xáhaⁿ-güedě xii ìⁿ téé xinu cuechi núú-güedě ní sáhán-dé ní xáhaⁿ-dě xii té Păblú sá vă quihu-dé vehe núú quidé-güedě jündá. ³² Te uuⁿi ní cuáá-yu nchaá-yu, te ñá ìⁿ-ní tnúhu ni cáhán-yu, chi ndi díⁿ tnúhu ní cáhán-yu ìⁿ ìⁿ-yu. Te chitu-gă ñáyiú ñá ní cùtnuní iní-yu ná cuendá ní dátacá ñáhá-güedě xití vehe-án, chi ñá ìⁿ-ní tnúhu ni cáhán-yu. ³³ Te davá-yu ní cáhán-yu sá cuéchi té Lijandrú cúú-xí, chi ní xáhaⁿ ñáyiú isràél xii-dé sá cáhán-dé yuhú-yu chindee tnúhu ñaha-dě xii-yu. Te ní quide-dé ndaha-dé núú-yu sá cündedóho-yu tnúhu cáhán-dé chindee tnúhu ñaha-dě xii-yu yòtnúhu. ³⁴ Te ní cutnùní iní-yu sá tée isràél cúú-dě, te uuⁿi ní cuáá tucú-yu, ñá ní dàñá-yu cáhán-dé, te cächí-yu:

—¡Ío cùnuu Dianá sàndú ñuú Éfesú! —cächí-yu. Te dàtná úú òré ìⁿ-ni tnúhu ní cáhán-yu.

³⁵ Te téé cùu secre-

tariú-ni-gá ní cáhán-dé, te dàtnuní cuèé cuèé ní sadí-yu yuhú-yu. Te ní xáhaⁿ-dě xii-yu:

—Nchaa-ndo cündedóho-ndo ìⁿ tnúhu na cáhán-í-a. Ío cùnuu Dianá, te nchaandi túhú ñáyiú sa nàhá-yu sá ncháá-ó ío nèhe cuendá-ó veñúhu-ăⁿ. Te nàhá-yu sá nehé cuendá-ó sàndú-án, chi véxi cuuⁿ-gá andiu. ³⁶ Te vá yóo ìⁿ cächí sá ñă ndáá. Te coto-ndo mée-ndo, te vá cuidó-ndó càda-ndo, te vá cuidó-ndó cáhán-ndó. ³⁷ Te ná cuendá ndécá-ndó cuè téé-án véxi, te ñá túú ñă ní quide-güedé, te ñá túú ñă ní dùhu-güedé veñúhu, te ñá túú cáhán cuèhé-güedé cuendá Dianá. ³⁸ Te núu ío yoo nàá ndihí ñaha xii té Demètriú ndihí cue téé quide chiunⁿ ndihí-dé, te quihíⁿ-güedé cacán cuéchi-güedé núú cuè téé cùchiunⁿ. Te cue téé cùchiunⁿ na cundoho-güedé núu quehndé-güedé cuéchi-yu àdi ñáhá. ³⁹ Adi ío-gá ná cuendú ñúhú ìní-ndó, te cáhán-ndó òré ná cóo jündá. ⁴⁰ Te ío úhú núu na nihí téé tàxi tnuní ñáhá xii-o tnúhu sá dúhá ío quide dusaⁿ-o, te cachí-dé sá ndècuéchi-o chi ñá túú sándáá iní-ó-dě quesaha-dě. Te ñá túú tnàhí ndùu váha-xi sá dúhá càda-o ni cuu, te vitna duha ní quide-o, te ñá cùtnuní iní-ó năsa cùñaha-o xii téé tàxi tnuní ñáhá xii-o núu na càna ñaha-dé —cächí téé cùu secretariú xáhaⁿ-dě xii-yu.

⁴¹ Te ní xáhaⁿ-dě sá nùhú-yu te ní ndihí-yu cuánuhú.

20

Té Páblú cuáháⁿ-dé distritú Macèdoniá ndihi distritú Grèciá

¹ Te òré ñá túú-gã ní quide dusáⁿ-yu, te ní cana ñaha të Páblú xii nchaa ñáyiú sàndáá iní tnúhu Jèsús ní cáháⁿ-dé dóho-yu nàcuáa cadá-yu. Te ní quide ndee iní ñáhá-dě xii-yu, te ní tñi-dé ichi cuáháⁿ-dé distritú Macèdoniá. ² Te tayáha-dé cuáháⁿ ìⁿ ìⁿ ñúú yíndèhu Macedoniá. Te càháⁿ-dé dóho nchaa ñáyiú sàndáá iní tnúhu Jèsús nàcuáa cadá-yu, te ní cudí iní-yu cadá-yu nàcuáa càháⁿ Yã Ndiõxí cadá-yu sá dúcáⁿ ñí cáháⁿ-dé dóho-yu. Té ní quexio-dé distritú Grèciá. ³ Te xíaⁿ ñí xíndecu-dé úní yóó. Te xíaⁿ quèe-dé bàrcú quihíⁿ-dé distritú Siriá ní cùu, te ní níhí-dě tnúhu sá ndétú ñaha ìⁿ úú cue tée isràél cahni ñaha-güedě xii-dé ní cùu, núu xíaⁿ ní tñi-dé ichi cuáháⁿ-dé ní yáha-dé ichi distritú Macèdoniá. ⁴ Te cuáháⁿ ndihi-dé té Sopàtér tée ñúú Bèrea, ndihi té Arìstarcú, ndihi ìⁿ tée nàni Segundú. Te ndi ndúú cue tée-áⁿ cúú-güedě cue tée ñúú Tesalónica. Te tnàhá té Gãyú tée ñúú Dèrbé, ndihi té Timùteú cuáháⁿ ndihi-dé, te tnàhá té Tiquicú ndihi té Trõfimú cuáháⁿ ndihi-dé, te úú cue tée-áⁿ cúú-güedě cue tée distritú Àsiá. Te nchaa cue tée-áⁿ cuáháⁿ ndihi-güedě té Páblú. ⁵⁻⁶ Te ní quexio-güedě ñúú Filipú, te yàcáⁿ ní naníhí ñáhá-güedě xii-ndí. Te té Páblú ní tendaha-dě cue tée

ndihi-dé cuáháⁿ-güedě ñúú Tròás, te ní xáhaⁿ-dě sá díú-ní yàcáⁿ cundetú ñaha-güedě xii-ndí. Te ní ndóo-í ndihi-dé, te ní xíndecu-ndí vico xèxi-yu pàá sá ñà túú yíhi levadurá. Te sátá ñí yáha vico, te ní quèe-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexio-ndí ñúú-áⁿ. Te yàcáⁿ ní naníhí tnàhá-ndí ndihi cue tée yòdo nuu cuáháⁿ ní xíndecu-ndí úsá nduu.

Té Páblú cuáháⁿ ngándihi-dé ñáyiú ñúú Tròás

⁷ Te ìⁿ nduu ndumìngú ní naníhí tnàhá-ndí ndihi nchaa ñáyiú ní sàndáá iní-xi tnúhu Jèsús ní xexi-ndí pàá ndihí-yu. Te ducaⁿ ñí quide-ndí, chi ní cachí Jèsús sá dúcáⁿ càda-o cuendá sá vã nàcuànaa-o sá ñí xihí-gá cuendá naníhí tàhú-ó. Te té Páblú ní ngüita-dé càháⁿ-dé tnúhu-gá, te càháⁿ-dé ní cuu dava niú, chi cuendá ná tñndaá ingá nduu-áⁿ, te caca-dé quihíⁿ-dé ingá xichi. ⁸ Te ndècú-yu vehe yòdo tnaha, te yíhí-yu ndéé cuártú cúú úní núú ñinu, te càyú víhi ñùhú xití cuártú-áⁿ. ⁹ Te ìⁿ tée sa ta cùu sacuéhé luha nàni-dé Eùticú núcõo-dé yèhe ventaná, cuìní-dé cúdú-dé, chi ní cunaha víhi caháⁿ té Páblú, te ní tñi ñaha sàni xii-dé ní xidí-dé, te ní ngava-dé ndéé ñuhu. Te ní nuú-yu núú ñúhú cuendá ndacani ñáhá-yu, te sa ní xihí-dé, chi ío dùcúⁿ ní ngava-dé. ¹⁰ Te tnàhá té Páblú

nchìcúⁿ-dé ní nuu. Te ní quexìo cunu-dé núú cátùu téé ní xíhí-án, te ní numi ñaha-ni-dě, te ní xáhaⁿ-dě xii-yu:

—Vá ndìhú iní-ndó, chi ní ndoto-dé —càchí-dé xáhaⁿ-dě xii-yu.

11 Te dǎtnùní cuánda ndihí ñaha tùcu-dé xii-yu cuàrtú núú yíhí-yu ni cùu, te yàcáⁿ ní xexi ndihí ñaha-dě xii-yu, dǎtnùní ní ngüíta-dé vài-gá tnúhu ní cáháⁿ-dé, te càháⁿ-ni-dé ní túndaá, te dǎtnùní ní xica-dé cuáháⁿ-dé. 12 Te téé ní ngava-án ní sánúndeca ñàhá-yu xii-dé ndéé vehe-dé, te ío ní cudíí iní-yu sá ní ndoto-dé.

Ní quee-güedé ñuú Tròás cuáháⁿ-güedé ñuú Miletú

13 Te té Pǎblú ní cachí-dé sá quihíⁿ-ndí ndihí bàrcú ndéé ñuú Àsón, te mee-dě caca saha-dě, te yàcáⁿ naníhí tnáhá-ndí ndihí-dé te quée-dé bàrcú, te ní quée-ndí bàrcú cuáháⁿ-ndí. 14 Te ní naníhí tnáhá-ndí ndihí-dé ñuú Àsón, te yàcáⁿ ní quée-dé bàrcú tnàhá-dé cuáháⁿ-ndí ñuú Mitilené. 15 Te ní quexìo-ndí ndéé ingá nduu yatni ñuú Quíú, te ndéé nduu tnéé ní quexìo-ndí ñuú Sámú te yàcáⁿ ní yáha-ndí, te ní quexìo-ndí ñuú Trògiliú. Te ndéé nduu ìdá ní quexìo-ndí ñuú Miletú. 16 Te té Pǎblú ñá ní cuìní-dé yáha-ndí ñuú Éfesú, chi ñá túú ní tnàhá iní-dé cuyaa-dě ichi, chi ío ndíhi iní-dé cuèndá cuìní-dé quini-dé núu vá

ndácú-dě ndexìo-dé ñuú Jerusalén cundecu-dé vico Pentecòstés.

Té Pǎblú càháⁿ ndihí-dé cue téé yìndaha ñaha xii ñáyiu sàndáá iní tnúhu Jèsús ñuú Éfesú

17 Te órè ndécú tǎ Pǎblú ñuú Miletú, te ní cana-dé cue téé yìndaha ñaha xii ñáyiu sàndáá iní tnúhu Jèsús ñuú Éfesú sá quihíⁿ-güedé núú ndécú-dě. 18 Te sátá ní quexìo-güedé, te ní xáhaⁿ-dě xii-güedé:

—Nàha-ndo nacuáa ní quide-í ndéé cùtnàhá ní quexìo-í distrítú Àsiá. 19 Chi ní quide-í nàcuáa ní cáháⁿ Yá Ndiòxí cada-í, ñá túú ní tühío-í, te ñá túú ní quide cahnu-í mèè-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá tìtní xito ní cuini ñáyiu isràél cahni ñàhá-yu xii-í ní cùu, te ío ní ndoho-í ní cácu-í. 20 Te sa nàha-ndo sá ncháándí túhú sa ní cachí tnúhu-í nàcuáa cada-ndo cuèndá sá chindèe ñaha Yá Ndiòxí xii-ndo. Te ní cáháⁿ-í tnúhu-gá núú-ndó ncháa-ndo, te diu-ni ducaⁿ ní quixi-í ndí tnàhá vehe-ndo ní cáháⁿ-í tnúhu-gá núú-ndó. 21 Te ní xáhaⁿ-í xii ñáyiu isràél ndihí ñáyiu ñá túú cùu ñáyiu isràél sá dáñá-yu nchaa sá cuèhé sá dúhá quidé-yu te quíndáá iní-yu tnúhu Xítóhó Jesucristú. 22 Te dacuití quihíⁿ-í ñuú Jerusalén, chi Espiritú Yá Ndiòxí ní cachí-xi sá dáí quihíⁿ-í, te ñá túú xini-í nándí cada ñaha-güedé xii-í

yacáⁿ te núu na quèxio-í. ²³ Te ñⁿ ñⁿ ñúú núú sàháⁿ-í cächí tnúhu Espíritú-gá sá chíhí ñàha-güedé vecaá, te cada úhú ñàhá-güedé. ²⁴ Dico ñá túú tnàhí ná cuu cuèi na càhni ñàha-güedé xii-í, dico cuìní-í sá ñí iní dandìhí-í nchaa sá ñí cachí Xitohó Jesucristú cada-í. Te ní cachí Yá Ndiöxí sá càháⁿ-í núú ñáyiú sá ïo cùu iní ñàhá-gã xii-yu, te naníhí tàhú-yu núu na quindáá iní-yu tnúhu-gá.

²⁵ Te sa ní cachí tnúhu-í xii-ndo nchàa-ndo sá núu na quindáá iní-ndó Yá Ndiöxí, te ndíhu ndaha ñàha-gá xii-ndo. Te na cächí tnúhu-í sá ñí ñⁿ nduu-gá vá quini ñàhá-ndó xii-í ñuyú-a. ²⁶⁻²⁷ Te yúhú ñá túú cuèchi-í núu ïo ñáyiú vá naníhí tàhú, chi sa ní cachí tnúhu-í nchaa sá ñí càháⁿ mée Yá Ndiöxí cada-ndo. ²⁸ Te coto-ndo mée-ndo, te coto-ndo tnàhá ñáyiú sàndáá iní tnúhu-gá, chi Espíritú-gá ní cachí-xi sá cùnùu-ndo núu-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xito-ndó-yu ducaⁿ càda-ndo cuendá, chi ñàha-ndo sá Jèsús ní satí ñíhí-gã, te ní xihí-gá cuendá naníhí tàhú-ó ndihí-yu. ²⁹ Te yúhú sa cùnuni iní-í sá òré ñá túú-gã-í ndécú, te quixi ñáyiú dandàhú ñàhá xii-ndo cuendá ñàha-ndo tnúhu Yá Ndiöxí, te cada ñàhá-yu xii-ndo dàtná quidé ñàhá òré tní-dí mbéé. ³⁰ Te ñⁿ ñⁿ ñúú cue téé ndècu ndihí-ndo, cue téé-án dacuàndehnde-güedé,

te cudana davá-yu quindáá iní-yu chítnhá ñàhá-yu xii-güedé. ³¹ Te xíáⁿ núu cächí tnúhu-í sá ïo quihí iní-ndó cùndecu-ndo ndihí nchaa ñáyiú sàndáá iní tnúhu-gá. Te ñàha-ndo sá yúhú ní xíndecu-í úní cuía ñí càháⁿ-í tnúhu Jèsús núú ñáyiú cuèi nduu cuèi niú. Te áma ní xóo ndáhyú-í, chi ñá ní cuini-yu quindáá iní-yu nchaa-yu tnúhu ní càháⁿ-í —cächí té Páblú xàhaⁿ-dè xii-güedé.

³² Te xàhaⁿ tùcu-dé:

—Nchòhó cue téé ndècu ndihí-í ichi Xitohó Jesucristú, ïo cuini-í sá mée Yá Ndiöxí chindee ñàha-gá xii-ndo. Te mee-gã ní càháⁿ-gá sá ïo cùdí iní ñàhá-gã xii-ndo. Te naníhí tàhú-ndó ndihí nchaa ñáyiú cùu cuendá-gá, te chindee ñàha-gá xii-ndo cuendá cada-ndo nchàa sá càháⁿ-gá. ³³ Te òré ní xíndecu ndihí ñàha-í xii-ndo, te ní ñíhúⁿ ñí dõó ñà túú ní cùdí iní-í. ³⁴ Te mee-ndo sà ñàha-ndo sá yúhú ní quide chiúⁿ-í, te ní ñíhí-í nchaa sá ñí nandíhí-í ndihí cue téé xica cuu ndihí-í. ³⁵ Te sa ní xini-ndó ñàcuáa ní quide-í ní quide chiúⁿ-í, te ñⁿ ñⁿ ñúú ñá ñàcuáa ní quide-í ní quide chiúⁿ-ndo cuendá chindee-ndo nchàa ñáyiú ndàhú, chi sa ñàha-ndo ñàcuáa ní cachí Xitohó Jesucristú, te duha ní cachí-gá: “Cùdí-gã iní-ó cuàha-o ñáyiú ndàhú sá xini ñíhú-yu dàcúxí sã táxi-yu xii mee-o”, duha ní cachí-gá —cächí té Páblú xàhaⁿ-dè xii-güedé.

³⁶ Te sátá dúcáⁿ ñí càháⁿ-dè, te ní ngüíñí xití-dè ndihí dava-gá-güedé, te ní càháⁿ

ndihi-dé Yă Ndiöxí. ³⁷ Te sátá nĩ tũhú tnũhu ní cáháⁿ-dé ndihi Yă Ndiöxí, te ní ndáhyú víhí-güedě sá quihíⁿ-dé, te ní numi ñaha-güedě, te ní teyuhu ñaha-güedě. ³⁸ Te ní ndihú víhí iní-güedé, chi ní xáhaⁿ tẽ Păblú sá nĩ ñⁿ nduu-gá vâ nánihí tnáhá-güedě cáháⁿ ndihi tnàha-güedé. Te cuáháⁿ ndihi ñaha-güedě xii-dé núú ndécú bàrcú.

21

Té Păblú cuáháⁿ-dé ñuú Jerusàlén

¹ Te ní quide ndee iní-ndí nchaa cue tée cùnũu. Te ní quee-ndí bàrcú cuáháⁿ ndáá ichi-ndí ñuú Cõs. Te nduu tněé ní sáháⁿ-ndí ñuú Ròdás, te ní yáha-ndí cuáháⁿ-ndí ñuú Pàtará. ² Te yàcáⁿ ní naníhí-ndí ñⁿ bàrcú ñũhú ichi-xi quihíⁿ-xi distrítú Fèniciá, xiãⁿ ní quee-ndí cuáháⁿ-ndí. ³ Te ichi cuáháⁿ-ndí ní xiní-ndí distrítú Chìpré cáá cuădava xití làmár, te ní yáha-ndí, te ní quendóo ñuú-áⁿ xio dàtni-ndí. Te cuáháⁿ-ndí ñuú Tìrú ñⁿ ñuú yíndèhu distrítú Sìriá cuèndá yàcáⁿ tava-güedé nchaa sá nchídó bàrcú. ⁴ Te yàcáⁿ ní naníhí tnáhá-ndí ndihi ñáyũ ní sándáá iní tnũhu Jèsús, te ní xíndecu-ndí úsá nduu ndihí-yu. Te ní xáhãⁿ-yu sá vâ quihíⁿ té Păblú ñuú Jerusàlén, chi Espiritú Yă Ndiöxí ní xáhaⁿ-xi xii-yu sá ndóhó víhi-dé nõu na quihíⁿ-dé.

⁵ Te sátá nĩ yáha nduu úsá, te ní quee-ndí cuáháⁿ-ndí yuhu làmár. Te ní quee nchaa ñáyũ ní sándáá iní tnũhu-gá, tée, ñadihí, nchaa landú, nchaá-yu ní sándeca ñáhá-yu yuhu làmár, te òré ní quexiò-ndí, te ní ngüíñí xití-ndí ní cáháⁿ ndihi-ndí Yă Ndiöxí. ⁶ Te ní quide ndee iní tnáhá-ndí ndihí-yu, te dàtnùní ní quee-ndí bàrcú, te ní naquehèⁿ-yu ichi cuánuhú-yu vehé-yu.

⁷ Te ní xica bàrcú ñũhú-ndí ní quee-xi ñuú Tìrú cuáháⁿ-ndí ndihi-xi ñuú Tolèmaidá. Te xiáⁿ nĩ sáá-xi te ní quene-ndí, te ní sáháⁿ-ndí ní cáháⁿ ndihi-ndí nchaa ñáyũ sándáá iní-xi tnũhu Jèsús, te ní xíndecu-ndí ndihí-yu ñⁿ nduu. ⁸ Te nduu tněé ní ndee tucu-ndí bàrcú cuáháⁿ-ndí ñuú Cèsareá, te yàcáⁿ ní quene tucu-ndí bàrcú, te cuáháⁿ-ndí vehe té Lìpé cundecu-ndí ndihi-dé. Te tée-áⁿ nĩ xóo cada chiũⁿ ndihi-dé inũ-gá cue tée ní chindee ñaha xii ñáyũ sándáá iní tnũhu-gá ñuú Jerusàlén ní xóo cuáñaha-güedě sá nĩ xóo caxí-yu. Te dàtnùní mee-nă tnũhu Yă Ndiöxí càháⁿ-dé xicá cùu-dé. ⁹ Te té Lìpé-áⁿ ndècu cúmí dèhe dèhí-dé, te ni ñⁿ-yu vátá ndúcú ñaha-gá tée xií-yu, te nchaá-yu càháⁿ-yu tnũhu Yă Ndiöxí tnũhu sá dácàhu iní ñáhá mèe-gá. ¹⁰ Te xiáⁿ nĩ cuu titní nduu ndècu-ndí, te ní quexiò ñⁿ tée nani Agabú ñuú-áⁿ, véxi-dé distrítú Jùdeá,

te tée-ánⁿ tnàhá-dé càháⁿ-dé tnúhu Yá Ndiöxí. ¹¹ Te ní níhí-dě tnúhu núú ndécú-ndí núú ní quixi-dé ní càháⁿ ndihi ñaha-dě xii-ndí. Te ní xicáⁿ-dé cínchú té Páblú, te ní ngóo-dé, te ní nguíta-dé ní dácútú-dé sáhá-dě ndihi ndaha-dé, te ní cachí-dé xii-ndí:

—Espiritú Yá Ndiöxí ní cachí-xi sá tée dii cínchú-xi-a tñi ñaha cuè tée israél ñuú Jerusalén, te duha dacutu ñaha-güedé xii-dé, te cuáha cuendá ñáhá-güedé xii-dé núú cuè tée ñuú Rómá. Duha ní càháⁿ Espiritú-gá —càchí té Àgabú.

¹² Te sá dúcáⁿ ní càháⁿ-dé, te ní xáhaⁿ-ndí nchaa-ndí sá vǎ quihíⁿ té Páblú ñuú Jerusalén.

¹³ Te té Páblú ní cachí-dé:

—¿Ná cuendá ndéé dúcáⁿ ndàhyú-ndó dándihú iní ñáhá-ndó xii-í-í? Te ñá túú ná cuu cuéi na dacutu ñaha-güedé, àdi cuéi na càhni ñaha-güedé xii-í cuendá sá càháⁿ ndihi-í Jèsús, chi sa ndècu túha-í sá cùú-í —càchí-dé.

¹⁴ Te ñá túú ní sándáá iní-dé sá dúcáⁿ xáhaⁿ-ndí, núú xǎⁿ ñá túú-gǎ ná ní xáhaⁿ-ndí xii-dé sá vǎ quihíⁿ-dé, te ní xítnàha-ndí:

—Mee-ni-gǎ Yá Ndiöxí ná cùnaha-gá nása sàni iní-gá cada-gá —xítnàha-na-ndí.

¹⁵ Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñuú Jerusalén.

¹⁶ Te cuáháⁿ ndihi-ndí ñⁿ úú cue tée Cèsareá, cue tée ní sándáá iní tnúhu Jèsús. Te ndèca ñaha-güedé xii-ndí cuáháⁿ vehe té Mnàson, te

tée-ánⁿ cúú-dě tée distritú Chìpré, te ndècu-dé ñuú Jerusalén, te sa ní cuu vǎi nduu ní sándáá iní-dé tnúhu-gá, te vehe tée-ánⁿ ní xíndecu-ndí.

Té Páblú ndátnúhu-dé ndihi té Jàcobó

¹⁷ Te òré ní quexìo-ndí ñuú Jerusalén, te nchaa ñáyiu ní sándáá iní tnúhu Jèsús ní quixí-yu ní dándácóo váha ñáhá-yu, chi ní cudíí víhí iní-yu sá ní quexìo-ndí. ¹⁸ Te nduu tnéé cuáháⁿ ndihi-ndí té Páblú cuendá càháⁿ ndihi-ndí té Jàcobó, te òré ní quexìo-ndí núú ndécú-dě, te ndècu ndihi-dé nchaa cue tée yíndaha ñaha xii ñáyiu sándáá iní tnúhu Jèsús. ¹⁹ Te té Páblú ní dándácóo váha ñaha-dě xii-güedé, te ní xáhaⁿ-dè nàcuáa ní quide Yá Ndiöxí ní chindee ñaha-gá xii-dé ní càháⁿ-dé tnúhu-gá núú ñáyiu ñá túú cùu ñáyiu israél. ²⁰ Te sátá ní yáha ní càháⁿ-dé, te ní ndácáⁿ táhǔ-yu núú Yá Ndiöxí cuendá nchaa sá ní quide-gá. Te dǎtnùní ní xáhaⁿ-güedé xii té Páblú:

—Yóhó sa nàha-n sá ní cuu titní mǐl ñáyiu israél ní sándáá iní-yu tnúhu Jèsús, te càchí-yu sá ïo xìni ñuhu-xi cadá-yu nchaa nàcuáa càháⁿ tnúhu sá ní chídó tnùnì ndíi Moisés. ²¹ Te ní níhí-yu tnúhu sá dácuaàha-n ñáyiu israél ñáyiu ndècu ñuú xicá cuendá sá vǎ cadá-gǎ-yu nàcuáa ní cachí ndíi Moisés cadá-yu. Te xáhaⁿ-n xii-yu sá vǎ cuáha-gá-yu seña ñi landú-yu, te vá cadá-gǎ-yu

dàtná ní xóo cada ñáyiú ndéé sanaha, duha dàcuaha-n ñáyiú ní níhí-yu tnúhu. ²² Te na níhí-yu tnúhu sá ndécú-n ìha, te tnàvíí ngúíta-yu cáháⁿ cuèhé-yu cuèndá-n. ²³ Te na càchí tnúhu-ndí nàcuáa cada-n. Ndècu cúmí cue téé vátá cádá-gã-güedé nàcuáa ní cáháⁿ mée-güedé sá cádá-güedé cuèndá nduu vétú iní Yá Ndiöxí. ²⁴ Te quíhíⁿ-n ndìhí-güedé te cada-n nchàa nacuáa ní xóo cada ñáyiú ndéé sanaha cuèndá nduu vétú iní Yá Ndiöxí. Te tava-n díhúⁿ cuu núú-güedé cháhu-güedé veñúhu, te ducaⁿ te dàtnúní ndacu dèté díquí-güedé. Nchaa xiáⁿ cada-n, te quiní ñáyiú sá ñà ndàá tnúhu càháⁿ nchaa ñáyiú càháⁿ cuèhé cuèndá-n. Te na cùtnuní iní-yu sá tnàhá-n quìde-n nchaa nacuáa ní chídó tnùní ndíi Moisés cadá-yu. ²⁵ Te sa ní quìde ndáá-ndí cuèndá nchaa ñáyiú ñuu xícá, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáyiú-áⁿ sã vã cáxí-yu nchaa sá nchító-ó ndùu táhú nchaa sá càchí-yu cùu ndióxí ní cadúha cue ñáyiú ñuyíú-a. Te ní xáhaⁿ-ndí sá vã cáxí-yu níñí, te vã cáxí-yu cuñú nchaa quiti cuèhné. Te vã càháⁿ ndìhí cue téé ñadìhí te núu ñá díú ñadìhí-güedé cúú-yu, te ní cue ñáyiú dìhí vã càháⁿ ndìhí-yu téé te núu ñá díú yíí-yu cùu-güedé. Duha ní tee-ndí núu tutú cuáháⁿ —

càchí-güedé xáhaⁿ-güedé xii té Páblú.

Ní tñii-güedé té Páblú xiti veñúhu ñáyiú isràèl

²⁶ Te nduu tnéé cuáháⁿ té Páblú ndìhí cúmí cue téé veñúhu càhnu sá ìo cùnuu núú ñáyiú isràèl cada-güedé nàcuáa ní xóo cada ñáyiú ndéé sanaha cuèndá nduu vétú iní Yá Ndiöxí. Te ní quíhu-dé veñúhu càhnu sá ìo cùnuu-áⁿ ñí xáhaⁿ-dè ná daha-gá nduu cùmání dandìhí-güedé nàcuáa ní xóo cada ñáyiú ndéé sanaha, te dàtnúní cànehe-güedé sá ndúú táhú Yá Ndiöxí quíhíⁿ veñúhu.

²⁷ Te cùmání-gã cuu úsá nduu sá ñí sáháⁿ-güedé veñúhu càhnu sá ìo cùnuu, te sa ndècu tucu té Páblú veñúhu. Te cue téé isràèl véxi distrítú Àsiá ní xiní-güedé té Páblú yíhí-dé veñúhu, te ní tñii ñaha-güedé xii-dé, te ìo ní cáháⁿ cuèhé-güedé cuèndá-dé núú dàva-gá ñáyiú yíhí veñúhu cuèndá sá cúdèèⁿ-yu núú tè Páblú. ²⁸ Te níhí ní cáháⁿ-güedé, te xáhaⁿ-güedé xii-yu:

—¡Nchòhó ñáyiú isràèl, yáchí-ndó chì cuánùndaha ñaha-ndo! Chì téé-a yayàcáⁿ cuáháⁿ-dé càháⁿ-dé sá ñà túú nàndìhí-o, te càháⁿ-dé sá vã cádá-ó nchàa nacuáa càháⁿ tnúhu sá ñí chídó tnùní ndíi Moisés, te càchí-dé sá ñà túú nàndìhí veñúhu-a. Te ñá díú-ní xiáⁿ chì sa ní quíhu-dé veñúhu-a ndìhí cue téé ñá túú cùu ñáyiú isràèl, te sá dúcáⁿ ñí quìde-dé, te ñá túú-gã ní cànehe íí-dé xiti

veñúhu. Te veñúhu-a cùu-xi vehe Yá Ndiõxi —càchí-güedé xãhaⁿ-güedé xii-yu.

²⁹ Te ducaⁿ nĩ cáháⁿ-güedé chi ní sani iní-güedé sá nĩ quíhu ndihi-dé té Trõfimú veñúhu-güedé, chi ní xiní-güedé xícá cùu ndihi ñaha-dé xití ñuú. Te téé-áⁿ cúu-dě téé ñuú Éfesú, te ñá díú tõe isràél cúu-dě.

³⁰ Te chitu ñãyiu ñuú-áⁿ nĩ tacá-yu ní tñí-yu té Pãblú táñùhu ñahá-yu ní ndee veñúhu càhnu sá ïo cùnuu, te òré-ni ní nacadí-güedé yèhe veñúhu-áⁿ. ³¹ Te sa cahní-yu té Pãblú ní cùu, te ní sáháⁿ ìⁿ ùú-güedé núú ndécú tõe cùu capitáⁿ cùnù-gá, te ní xáhaⁿ-güedé xii-dé sá ncháá ñãyiu ñuú Jerusàlén xĩnáá-yu. ³² Te òré-áⁿ cuáháⁿ téé cùu capitáⁿ cùnù-gá ndihi dava-gá cue téé nchicúⁿ-gá ndihi sandàdú-dé. Te òré ní xiní-yu ní quexìo coyo-güedé núú xixúcu-yu, te ní yùhú-yu ñá túú-gã ní càní-yu té Pãblú. ³³ Te téé cùu capitáⁿ ní sátuha-dé té Pãblú, te ní xáhaⁿ-dě xii cue sandàdú-dé sá tñí ñàha-güedé dacùtu ñaha-güedé úú cadená. Te dãtnùní ní xícáⁿ tñuhú-dě núú-yu, te xãhaⁿ-dě:

—¿Ná cúú tõe-a? ¿Ná ní quide-dé? —càchí-dé xãhaⁿ-dě xii-yu.

³⁴ Te téé cùu capitáⁿ-áⁿ ñã ní cùnùnĩ iní-dé núu ná cúú sã nĩ quide té Pãblú, chi uuⁿi ní cuáá-yu. Te tucu càháⁿ ìⁿ, tucu càháⁿ ìⁿ-yu, núu xíaⁿ ní xáhaⁿ-dě cue sandàdú-dé sá cándeca

ñaha-güedé xii-dé quíhíⁿ cuártel núú ndécú-güedé. ³⁵⁻³⁶ Te nchicúⁿ ñãhã-yu cuáháⁿ ní quexìo ndéé nàcuáa càa nchio cùnĩ-yu cahni ñàhá-yu xii-dé ní cùu. Te níhi ní cáháⁿ-yu xãhãⁿ-yu sá cáhni ñàha-güedé, te xíaⁿ ní ndacani ñaha-güedé ndécá ñàha-güedé cuásaá nchio-ãⁿ.

Té Pãblú xãhaⁿ-dě xii-güedé sá ñà túú cuèchi-dé

³⁷ Te cuánguihu-güedé cuártel ndihi té Pãblú ní cùu, te ní xáhaⁿ-dě xii téé cùu capitáⁿ cùnù-gá:

—Càháⁿ ndàhú-í núú-n cùndetu-n na cúñaha-ì ìⁿ ùú tñuhu xii-yu —càchí-dé xãhaⁿ-dě.

Te téé tàxi tñuní-áⁿ nĩ xáhaⁿ-dě:

—¿Náa tñahá yòhó càháⁿ-n tñuhu grìégú? ³⁸ Te ní cáhãⁿ-í sá tõe ègìptú cúu-n, chi diu-n nĩ ndúcú-n cuè téé ní nàá ndihi téé cùchiuⁿ Cesár ní cáhãⁿ-í, chi diu ìⁿ téé yacáⁿ ní ndúcú-dě cúmí mĩl cue téé ní sahani ndíyi. Te ndèca tñaha-güedé ní sáháⁿ xití yucu ní xíhi váha-güedé —càchí-dé xãhaⁿ-dě xii té Pãblú.

³⁹ Te té Pãblú ní xáhaⁿ-dě:

—Ñá díú tõe ègìptú cúu-í, chi téé isràél cúu-í, chi diu-ni téé isràél cúú tãtà-í, te dìcò-ni sá nĩ cacu-í ñuú Tarsú ñuú cáhnú, te ñuú-áⁿ yíndèhu-xi dístritú Cilicia. Te cùnĩ-í cada ndee ìni-n dãña-n na caháⁿ ndihi-í-yu —càchí-dé xãhaⁿ-dě.

⁴⁰ Te ní xáhaⁿ tõe cùu capitáⁿ cùnù-gá sá cúú cáháⁿ té Pãblú, núu ní ngúnutñí-dé núú nchio, te ní quide-dé

ndaha-dé sá cündedóho-yu. Te ní sadí-yu yuhú-yu, te ní cáháⁿ-dé tnúhu ñáyiú isràél, te xáhaⁿ-dë xii-yu:

22

¹ —Chí cádá càhnu iní nchòhó cue téé sa cuéhé ndihí nchòhó cue téé cuechi, na càháⁿ-í ìⁿ tnúhu cund-edóho-ndo sá ñà túú cuéchi-í, chí ñà túú nã ní quide-í, te ní ñà túú nã tnúhu càháⁿ-í — càchí-dé xáhaⁿ-dë xii-güedé.

² Te cuendá sá dúcáⁿ ñí cáháⁿ-dé tnúhu mèe-yu núu tnàvíí-nã ní sadí-yu yuhú-yu ní xíndedóho-yu ní cáháⁿ-dé, te xáhaⁿ-dë:

³ —Yúhú cùu-í téé isràél, te ní cacu-í ñuú Tàrsú, te ñuú-áⁿ yíndèhu-xi Ciliciá. Te davitna líhli-í cútnàhá ní quexìo-í ñuú Jerusàlén ní dácuahá ñaha té Gamaliél. Te ní dácuahá-í nchaa tnúhu ní chídó tnùnì nchaa cue téé ndéé sanaha nàcuáa cada ñáyiú. Te yúhú ní cahu iní-í ní quide-í tìtní núu chiuⁿ nacuáa cuu váha iní Yá Ndiòxí ní cáháⁿ-í, te ñuú-í ducaⁿ quide nchohó tucu. ⁴ Te ní sánú ndúcù-í nchaa ñáyiú sándáá iní-xi tnúhu Jèsús, cuéi téé, cuéi ñáyiú ñíhí ní dácútù-í-yu, te ní chihi-í-yu vecaá, te ní níhì-í tnúhu ndee ìní sá cáhni-ndí-yu. ⁵ Te dútú cúnú-gá ndihí cue téé cúnúu núu-ndó ñaha-güedé sá ndáá càháⁿ-í chí mee-güedé ní taxi-güedé tutú cuáñaha-í xii ñáyiú isràél ñáyiú ndècu ñuú Dàmascú cuendá cutnùnì iní-yu ná chíuⁿ cuáháⁿ-í ní cùu. Te ñùhu-í ichi cuáháⁿ-í ñuú-áⁿ cuánúndúcù-í ñáyiú

ní sándáá iní-xi tnúhu Jèsús cuendá dacùtu-í-yu te can-deca-í-yu ndixi, te iha cada úhú ñáhá-güedé xii-yu ní cùu.

Té Páblú xáhaⁿ-dë xii ñáyiú nàcuáa ní cuu ní tuha-dé ichi Jèsús

(Hch. 9:1-19; 26:12-18)

⁶ "Te ta cùyatni-í ñuú Dàmascú cuáháⁿ-í, te cùu-xi datná òré cauxúu nduu, te uuⁿ ní quee ñuhú andiu, te ní dáyèhé-xi ndéé núu nútní-í. ⁷ Te ní quide nee-xi núu-í, xíáⁿ ní nduá-í ndéé ñuhú. Te ní tecú dóho-í càháⁿ ìⁿ sá cáháⁿ andiu, te càchí-xi: "Yòhó té Sàulú, ¿ná cuendá cúu úhú iní ñáhá-n dándoho ñaha-n xii-í?", càchí sá càháⁿ-áⁿ. ⁸ Te ní xáhaⁿ-í: "¿Ná cúu yòhó sá càháⁿ-áⁿ?", xáhaⁿ-í. Te ní cáháⁿ tucu ingá xito te càchí-xi: "Yúhú cùu-í Jèsús téé ní xíndecu ñuú Nazàrét, te ducaⁿ ño dándoho ñaha-n xii-í", càchí sá càháⁿ-áⁿ. Te xíáⁿ ní cutnùnì iní-í sá díú Jèsús càháⁿ. ⁹ Te nchaa cue téé ndihí-í ní xiní-güedé ní dáyèhé ñuhú, te ní yùhú-güedé, dico ñà túú ní tècú dóho-güedé òré ní cáháⁿ-gá. ¹⁰ Te ní xáhaⁿ-í xii-gá: "Yòhó Xítohó Jesu-crístú, ¿ná cuínì-n càda-í?", xáhaⁿ-í xii-gá. Te ní cachí-gá: "Ndacóo, te quíhíⁿ-n ñuú Dàmascú, yacáⁿ tecú tnúhu-n nchaa nacuáa cuínì Yá Ndiòxí cada-n", càchí-gá —càchí té Páblú xáhaⁿ-dë xii-yu.

¹¹ Te ní xáhaⁿ tucu té Páblú:

—Te cuendá sá ñí dácuaá ñaha ñuhú xii-í núu ní tñí cue téé ndihí-í ndaha-í ndéca

ñàha-güedé cuáháⁿ ndéé ñuú Dàmascú.

12 "Te yàcáⁿ ndécú ñⁿ téé nàni Ananiás, te ío vài sá ñí chídó tñuní ndíi Moisés cadá-yu quide-dé. Te nchaa ñáiyu ñuú Dàmascú ío váha càháⁿ ndihí ñàhá-yu xii-dé. 13 Te ní quexìo-dé núú ndécù-í, te ní cachí-dé: "Yòhó té Sàulú, téé ndècu ndihí-í ichi Xítóhó Jesucristú, ndúha núú-n", càchí-dé. Te òré-ní ní nacaáⁿ núú-í te ní xiní-í-dé. 14 Te dātnuní ní cachí-dé: "Yá Ndiöxí ní cáháⁿ ndihí-gá ñani tñáhá-ó ñí xíndecu ndéé sanaha. Te ñuú-gá ní cáxi ñaha-gá xii-n cuèndá quiní-n nchàa sá váha cuiní-gá cada-n. Te quiní-n Jèsús Yaá ñá túú cuèchi-xi, te ñuú-ní mee-gá cáháⁿ ndihí ñaha-gá xii-n. 15 Te cáháⁿ-n tñuhu Jèsús núú nchàa ñáiyu, te cáháⁿ-n nchàa sá ñí xiní-n ndihí nchaa sá ñí xíndedóho-n. 16 Tñavíí, te quíhíⁿ-n cuàndute-n, te cáháⁿ ndihí-n Yá Ndiöxí cuèndá cada càhnu iní-gá nchaa sá cuèhé sá dúhá ñí quide-n", duha ní cachí té Ananiás xii-í —càchí té Páblú xáhaⁿ-dè xii-yu.

Té Páblú ní cani-dé cuèndú nàcuáa ní xáhaⁿ Jèsús cada-dé quíhíⁿ-dè ñuú núú xíndecu ñáiyu ñá túú cùu ñáiyu isràél

17 Te ní xáhaⁿ tucu té Páblú: —Te ní ndee-í cuàndixi-í ñuú Jerusalén. Te ní sáháⁿ-í veñúhu càhnu sá ío cùnunu ní cáháⁿ ndihí-í Yá Ndiöxí, te ní dácótó núú ñàhá-xí sá méé Jèsús ní xiní-í xití veñúhu, 18 te ní cachí-gá: "Yáchí, quee-n

ñuú Jerusalén, chi ñáiyu-a vá quíndáá iní-yu nàcuáa ní cachí-í cúñaha-n xii-yu cuèndá-í", duha ní cachí-gá xii-í. 19 Te ní xáhaⁿ-í xii-gá: "Yòhó Xítóhó Jesucristú, sa xini-n sá ncháá ñáiyu nàhá-yu sá ñí sáháⁿ-í ndi tñáhá ñⁿ ndi tñáhá ñⁿ veñúhu nànducu-í ñáiyu sàndáá iní tñuhu-n, te ní tñi-í-yu, ní chihi-í-yu vecaá, te ní táuchíuⁿ-í ní caniha-güedè xii-yu. 20 Te cútnáhá ní sahani-güedé ndíi Tévá téé ní xóo cáháⁿ tñuhu-n, te tñáhá-í ndécú òré-áⁿ te ní xíndeé-í dóo cue téé ní sahani ñaha xii ndíi. Te yúhú ní cáháⁿ-í sá ñí quide váha-güedé sá dúcáⁿ ñí quide-güedé", duha ní xáhaⁿ-í xii-gá. 21 Te ní cachí tñuhu-gá xii-í: "Cuáháⁿ chi cuiní-í quíhíⁿ-n nchàa ñuú xicá núú xíndecu cue ñáiyu ñá túú cùu ñáiyu isràél cáháⁿ-n tñuhu-í", càchí-gá —càchí té Páblú xáhaⁿ-dè xii-yu.

Te Páblú ndihí téé tàxi tñuni ñàhá xii cue sandadú

22 Te sá dúcáⁿ ñí cáháⁿ-dè, te ñá ní tñáhá-gá iní-yu cund-edóho-yu tñuhu càháⁿ-dè. Te ñⁿ-ní ñí cuú-yu ncháá-yu, te ní cuáá-yu, te xáháⁿ-yu:

—¡Chí cáhni-dè! ¡Ñá ñíú sá cùndècu-dé ñuyú-a! — càchí-yu xáháⁿ-yu.

23 Te mei òré ducaⁿ ñí cáháⁿ-yu, te ní ndátá-yu dóo-yu, te ní dáquénè-yu núú ñinu sá sàtú iní-yu. Te ní quèhnu-yu ñuhu, te ní dácácòyó-yu núú ñinu sá ío sàtú iní-yu. 24 Te téé cùu

capitáⁿ cúnù-gá ní xáhaⁿ-dě xii cue sandàdú-dé:

—Chí dítá-dě ná quǐhu-dé ndéé xití vehe, te cani-ndo-dě ñii, chí na quène yuhu-dé ná tnúhu ní cáháⁿ-dé nǔu ndéé dúcáⁿ cùdèèⁿ-yu núú-dě — càchí-dé xáhaⁿ-dě xii-güedé.

²⁵ Te sátá ñí dácútú ñàha-güedé xii té Páblú sá cáni ñàha-güedé ní cùu, te ní xáhaⁿ-dě xii té cùu capitáⁿ ndécú-ǎⁿ:

—Te na càchí tnúhu-í sá vǎ cúú cànha-güedé ñii, chí té rómá cúú-í, te vátá quini ndáá-gá-ndó nǔu ndècuéchi-í àdi ñáhá —càchí-dé xáhaⁿ-dě xii té cùu capitáⁿ.

²⁶ Te sá dúcáⁿ ñí cáháⁿ-dé, te ní sáháⁿ té cùu capitáⁿ núú tée cùnùu-gá, te ní xáhaⁿ-dě:

—Vá cúú càn-o té-ǎⁿ, chí té rómá cúú-dě —càchí-dé xáhaⁿ-dě.

²⁷ Te ní sáháⁿ té cùu capitáⁿ cúnùu-gá ndéé núú tē Páblú, te ní xáhaⁿ-dě:

—Cáháⁿ ndáá-n nǔu ndisa té rómá cúú-n —càchí-dé xáhaⁿ-dě.

Te ní xáhaⁿ tē Páblú:

—Ndáá sá tē rómá cúú-í —càchí té Páblú xáhaⁿ-dě xii té cùnùu-áⁿ.

²⁸ Te ní xáhaⁿ tē cùnùu-áⁿ:

—Yúhú tnàhá-í cúú-í tē rómá, chí vǎi díhúⁿ ñí cháhu-í —càchí-dé xáhaⁿ-dě.

Te té Páblú ní xáhaⁿ-dě:

—Tnàhá-í cúú-í tē yàcáⁿ tucu, chí tǎtá-í cúú-dě tē rómá —càchí té Páblú xáhaⁿ-dě xii té cùu capitáⁿ cúnùu-gá.

²⁹ Te uuⁿni ní nacaca sata cuè tē cuáháⁿ caniha xii-dé ní cùu. Te ní yúhú tē tàxi tnuní sá dúcáⁿ ñí xáhaⁿ tē Páblú sá tē rómá cúú-dě, chí ní xáhaⁿ-dě ní dácútú

ñàha-güedé xii-dé, núu xíǎⁿ ní yùhu-dé.

Té Páblú ní cáháⁿ ndihi-dé cue tē cùnùu oré ní quide-güedé jündá

³⁰ Te tē tàxi tnuní sandàdú ñá ní xini-dé ná cuéchi ní dácáá ñǎyiu israél díquí tē Páblú, núu xíǎⁿ nduu tnéé ní cana-dé cue dútú cúnùu, ndihi cue tē cùchiuⁿ, ndihi cue tē cùu sacuéhé, te ní xáhaⁿ-dě sá cádá-güedé jündá cuendá nducu tnúhu-güedé núú tē Páblú ná cuéchi ní dácáá-yu díquí-dě. Te ní xáhaⁿ-dě xii cue sandàdú sá nándaxi ñàha-güedé cadená ndútú-dě, te candeca ñàha-güedé quíhíⁿ núú cádá-güedé jündá. Te ní sáháⁿ-güedé ní nandaxi ñàha-güedé xii-dé ndécá ñàha-güedé cuáháⁿ jündá, te ní quexiò-güedé, te ní ngúnutni-dé núú cuè tē cùchiuⁿ.

23

¹ Te yàcáⁿ ní xindéhé vǎha tē Páblú núú nchàa-güedé, te ní xáhaⁿ-dě:

—Cada cǎhnu iní nchòhó cue tē cùchiuⁿ, te ducaⁿ nchòhó cue tē cùu sacuéhé, véxi-í cǎchí tnúhu-í sá ñá túú cuéchi-í, chí mee Yǎ Ndiòxí náhá-gǎ nása ndècu-í ñuyíú-a, te ñá túú cùcahaⁿ núú-í núú-gǎ —càchí té Páblú xáhaⁿ-dě xii-güedé.

² Te té Anàniás tē cùu dútú cúnùu-gá ní xáhaⁿ-dě xii cue tē nùtní yatni díñi tē Páblú sá cáni-güedé déhndé yuhu-dé.

³ Te té Páblú ní xáhaⁿ-dě xii dútú-ǎⁿ:

—Yòhó, chi úhú tnàhí iní-n, chi ní ndúcú-n tée ní caniha xii-í, te ñá túú cuèchi-í, dico quini-n ná cada ñaha Yá Ndiòxí xii-n. Te yòhó ní cana ñaha-n ndùcu tnúhu-n nùu quide-í nchaa nàcuáa cáháⁿ tnúhu sá ní chídó tnùní ndíi Moisés cada-o. Te mee-n ní ndúcú-n tée ní caniha, te ñá túú dùcaⁿ ní cáháⁿ ndíi cada-o —càchí té Páblú xáhaⁿ-dè xii dútú cúnùu-gá-áⁿ.

⁴ Te cue tée xñnutnìi ñiñi té Páblú ní xáhaⁿ-güedè xii-dé:

—Nèhé ní quide-n chi ní xícuèhé-n dútú cúnùu-gá tée xñnu cuèchi núú Yá Ndiòxí —càchí-güedè xáhaⁿ-güedè xii té Páblú.

⁵ Te té Páblú ní xáhaⁿ-dè xii-güedè:

—Cada càhnu iní-ndó chi ñá túú xini-í sá dútú cúnùu-gá cúu-dè, chi núú tùtú Yá Ndiòxí càchí-xi sá vâ cúú cáháⁿ cuèhé-ó cuendá ñiñi tée cùnùu ñuú-ó yòtnúhu. Te yúhú ñá túú xini-í sá tée cùnùu cuu-dé nùu ní sácóo-í ní cáháⁿ-í —càchí té Páblú xáhaⁿ-dè xii-güedè.

⁶ Te òré-áⁿ ní cutnùnì iní té Páblú sá dává-güedè cúnðhi-güedè cue tée cùu saducéú, te dava-güedè cúnðhi-güedè cue tée cùu fariséú, te níhi ní cáháⁿ-dè ní xáhaⁿ-dè xii-güedè:

—Yúhú cúu-í tée fariséú, te tnàhá tãtà-í ndíhi xii-í cúu-güedè cue tée fariséú tucu. Te tnàhá yúhú sàndáá iní-í sá ndótó nchàa ñáyui ní xihí, te núu xiáⁿ cuini-ndó ndùcu tnúhu-ndo nùu-í cáná ñaha-ndo —cachí-dé xáhaⁿ-dè xii-güedè.

⁷ Te sá dúcáⁿ ní cáháⁿ-dè xiáⁿ ní nàá ndíhi tnàha cue tée cùu fariséú ndíhi cue tée cùu saducéú, chi ñá ñiñi-ni tnúhu ní cáháⁿ-güedè, chi ní ndi queheⁿ ndi queheⁿ-güedè sá ní cáháⁿ-güedè. ⁸ Te cue tée cùu saducéú càchí-güedè sá vâ ndótó cuè ñáyui ní xihí, te cue tée cùu fariséú càchí-güedè sá ndótó-yu. Te cue tée cùu saducéú càchí-güedè sá ñá túú espíritú xínú cuèchi núú Yá Ndiòxí, te cue tée cùu fariséú càchí-güedè sá ío espíritú xínú cuèchi núu-gã. ⁹ Te ta cùdèéⁿ-güedè cuáháⁿ, te níhi-gá cúú ñini-güedè cáháⁿ-güedè, te ñiñi ùú cue tée cùu fariséú cue tée dàcuaha ñaha xii ñáyui nchaa tnúhu ní chídó tnùnì ndíi Moisés ní cáháⁿ níhi-güedè, te xáhaⁿ-güedè:

—Ñá túú cuèchi-dé, te cu-dana te ní cáháⁿ ndíhi-dé ñiñi espíritú xínú cuèchi núú Yá Ndiòxí te vâ ngõo vâ cúú vâha iní-ó nùu-gã —càchí cue tée cùu fariséú xáhaⁿ-güedè xii-güedè.

¹⁰ Te cuendá sá ño xinaá-güedè, xiáⁿ ní yúhú tée cùu capitáⁿ cúnùu-gá sá cáhni-güedè té Páblú, núu xiáⁿ ní xáhaⁿ-dè sá quihíⁿ-güedè cúnúcuaca ñaha-güedè can-deca ñaha-güedè núhú cuàrtél.

¹¹ Te ndéé niú cúú ùú ní quexio Xitohó Jesucristú núu ndécú té Páblú, te ní xáhaⁿ-gã:

—Ñíi cunduu-n, vâ yúhú-n, chi nàcuáa ní cáháⁿ-n ní cacunehe ñaha-n xii-í iha, te ñu-ni ducaⁿ cáháⁿ-n càcunehe

ñaha-n xii-í quíhíⁿ-n ñùú Rómá —càchí-gá xáhaⁿ-gă xii-dé.

Cahni-güedé té Păblú ní cùu

12-13 Te nduu tñéé ní natacá vîhi-gá údico cue téé isràél ní ndatnúhu-güedé sá cahní-güedé té Păblú, te ní xîtnàha-güedé:

—Ni dítá vă caxí-ó te ni ndùte vâ cóhó-ó ndéé ndacu-o cahní-o té Păblú, te dătnúni caxi-o dítá, te coho-o ndùte, chi sa ní sani iní-ó să cádá-ó, te cuu cuéchi xii-o núu vâ cádá-ó —càchí-güedé xîtnàha-güedé.

14 Te ní sáháⁿ-güedé núú ndécú ncháa dútú cúnùu ndihí ncháa cue téé cùu sacuéhé, te ní xáhaⁿ-güedé:

—Ní cachí-ndí sá ni dítá vă caxí-ndí ndéé núu ní ndacu-ndí ní sahní-ndí té Păblú, chi sa ní sani iní-ndí sá cádá-ndí, te cuu cuéchi núu vâ cádá-ndí.

15 Te duha cada-ndo ndihí dava-gá cue téé cùnùu, chi cúnàha-ndo xii téé cùu capitáⁿ cúnùu-gá: “Quixi ndihí-n tē Păblú núú ndécú-ndí cuendá ndatnúhu ndihí-ndí-dé, chi cuini-ndí nducu tñuhu váha-gá-ndí ná cúú să ní quide-dé”, duha cúnàha-ndo xii téé tàxi tñuní sandádú. Te ducaⁿ-ni cúnàha-ndo dândahú-ndó-güedé cuendá quixi ndihí-güedé té Păblú, te nchúhú sa cundetú-ndí-güedé ichi, chi quini té Păblú ná cahni-ndí-dé —càchí-güedé xáhaⁿ-güedé xii cue téé cùchiuⁿ.

16 Te déhe cúha té Păblú ní níhí-dé tñuhu năcuáa

cada-güedé ditó-dé. Te ní sáháⁿ-dé cuartél, te ní xáhaⁿ-dē xii ditó-dé năcuáa cáháⁿ-güedé cada ñaha-güedé. 17 Te ní cana té Păblú ñⁿ téé cùu capitáⁿ, te ní xáhaⁿ-dē:

—Vă cündèe iní-n, quíhíⁿ ndihí-n tēe-a na cáháⁿ ndihí-dé téé cùnùu-gá, chi ndècu ñⁿ cuendú cúnàha-dé cuini-í —càchí té Păblú xáhaⁿ-dē xii téé cùu capitáⁿ.

18 Te dătnúni ní xica téé cùu capitáⁿ ndécá-dé dăxíⁿ tē Păblú cuáháⁿ núú ndécú téé cùnùu-gá, te òrè ní quexiö-güedé núú-dé, te ní xáhaⁿ tēé cùu capitáⁿ xii-dé:

—Té Păblú téé yîhi vecaá ní cana ñaha-dē xii-í, te ní cachí-dé véxi-í ndihí tēe-a cuendá cachí tñuhu-dé ñⁿ cuendú cuini-dé —càchí-dé xáhaⁿ-dē xii téé cùnùu-gá.

19 Te téé cùnùu-áⁿ ní tñi-dé ndaha dăxíⁿ tē Păblú, te tãnehe ñaha-dé cuáháⁿ ñⁿ xio, te ní xícáⁿ tñuhú-dé núú-dé, te xáhaⁿ-dē:

—¿Ná cuendú cuini-n cáháⁿ-n? —càchí-dé xáhaⁿ-dē xii dăxíⁿ tē Păblú.

20 Te ní xáhaⁿ-dē xii téé cùnùu-áⁿ:

—Cue téé isràél ní ndatnúhu ndáá-güedé sá quixí-güedé tñéé cáháⁿ ndàhú-güedé núú-n cãndeca-n té Păblú quíhíⁿ jundá, te yácáⁿ cãcáⁿ tñuhú ndáá-güedé núú-dé ná cúú să ní quide-dé, càchí-güedé xîtnàha-güedé.

21 Te vâ quindáá iní-n chi dicó dandáhú ñáhá-güedé, chi vîhi-gá údico-güedé ndatnúhu-güedé cundedí-güedé ichi cahni ñaha-güedé. Te xîtnàha-güedé sá ni

dítá vǎ cǎxí-güedě, te ni ndüte vá cóhó-güedě ndéé nũ ní ndacu-güedé ní sahní ñaha-güedě, te dǎtnùnǐ caxi-güedé dítá, te coho-güedé ndute, chí sa ní sani iní-güedé sá cádá-güedě, te cuu cuéchi núu vá cádá-güedě, cǎchí-güedé xǐtnàha-güedé. Te cundecu túha-ná-güedé cundetu ñaha-güedě tneé, te núu na quíndáá iní-n cǎndeca-n-dé quíhíⁿ jùndá —cǎchí-dé xǎhaⁿ-dě xii téé cùnũ-áⁿ.

22 Te téé cùnũ-áⁿ ñǐ xǎhaⁿ-dě:

—Cuanùhú, te vá yõo tnàhí cúñaha-n sǎ ñǐ quixi-n ñǐ cachí tnúhu-n nǎcuáa cǎháⁿ-güedé cada-güedé té Pǎblú —cǎchí-dé xǎhaⁿ-dě.

Ndèca-güedé té Pǎblú cuáháⁿ núú tǎ Juéllí téé cùu gobiernú

23 Te téé cùnũ-gá ní cana-dé úú cue téé cùu capitáⁿ, te xǎhaⁿ-dě:

—Tava-ndo úú cièndú sandádú cue téé xǐca saha, ndihí únídico úxí sandádú cue téé yòdo cuayú, ndihí úú cièndú sandádú mee-ni cuè téé xǐnehe lànzá. Te cada túha-ndo chí caça-ndo òré caá ñⁿ niú quíhíⁿ-ndó ñũú Cèsareá ndihí té Pǎblú. 24 Te nducu-ndo cuèdicó ñⁿ úú cuayú codo-dě ndihí cue téé ndéé ñáhá xii-dé. Te cada cuèdádú-ndó-dě ichi, te candeca-ndo-dě quíhíⁿ quíndeca-ndo-dě núú téé cùu gobiernú —cǎchí téé cùnũ-áⁿ xǎhaⁿ-dě xii cue téé cùu capitáⁿ.

25 Te téé cùnũ-áⁿ ñǐ cadúha-dé tutú cuèndá quíhíⁿ ndaha té Juéllí téé cùu gobiernú. Te duha ní chídó tnùnǐ-dé núú tutú cuáháⁿ:

26 “Cóvaha díi-n, tǎtá gobernádór. Ío cada cǎhnu iní, yúhú nǎni-í Claudiú Lisiás. Yúhú ní tendaha-í ñⁿ tutú véxi ndaha-n cuèndá quíhíⁿ tnùnǐ-n nǎcuáa ní cuu iha. 27 Cue téé israhél ní tñi-güedé ñⁿ téé nǎni Pǎblú cuíni-güedé cahni ñaha-güedé ní cùu, te ní níhí-í tnúhu sá tǎe rómá cúú-dě nũú ní sáháⁿ-í ndihí sandádú-í ní dǎcǎcu-ndí-dé. 28 Te ní cuíni-í quíni-í ná cuèndá téé ñaha-güedé cuéchi xii-dé, núu xǎⁿ ndécà-í-dé ní sáháⁿ núú ñǐ quide cue téé cùchiuⁿ israhél jùndá. 29 Te yàcáⁿ ní níhí-í tnúhu sá ñà túú nǎ cuéchi ní quide-dé, chí cuèndá-ni sá ní níhí-güedé tnúhu sá ñà túú sàndáá iní-dé cada-dé nchaa sá ní xóo cada ñáyiu ní xíndecu ndéé sanaha nchícúⁿ nihnu-güedé quide-güedé, xǎⁿ ní cudééⁿ-güedé núú-dě.

Te ñá túú cuéchi cǎhnu ní quide-dé nũu quíhíⁿ-dé vecaá àdi cahni-í-dé. 30 Te ní níhí-í tnúhu sá cuè téé israhél ndúcú-güedé nǎcuáa cada-güedé cahni ñaha-güedé xii-dé, xǎⁿ ní xǎhaⁿ-í xii sandádú-í sá cǎndeca ñaha-güedé quixi xǎⁿ. Te ní xǎhaⁿ-í xii cue téé tǎe ñaha cuéchi sá quíxí-güedé ndéé xǎⁿ cǎháⁿ-güedé nũu ná cuéchi ní quide-dé. Te cada cǎhnu iní-n chí duha-ni ndùu tnúhu cǎháⁿ-í, te cundee iní-n quèheⁿ cuèndá-n-dě”, duha ní chídó tnùnǐ téé ní cadúha tutú cuáháⁿ ndaha té Juéllí.

31 Te cue sandàdú ní quide-güedé nàcuáa ní xáhaⁿ tée tàxi tnuní ñáhá xì-güedé chi ní xica-güedé ndìhi té Pàblú òré caá ìíⁿ niú, te diu-ni niú-áⁿ ñí quexìo-güedé ñuú Antìpatrís. 32 Te sàtá ñí túndaá, te ní nacuico cuè tée xínehe lánzá ndìhi dava-gá sandàdú xícá sàha cuánuhú-güedé cuàrtél, te mee-ná sandàdú cue tée yòdo cuayú cuáháⁿ ndìhi té Pàblú. 33 Te òré ní quexìo-güedé ñuú Cèsareá, te ní sàha-güedé tée cùu gobiernú tutú néhé-güedé cuáháⁿ. Te ní queheⁿ cuendá-dé té Pàblú. 34 Te sàtá ñí dácuáhá tée cùu gobiernú-áⁿ tutú-áⁿ te ní xícáⁿ tnúhú-dé núu tē Pàblú, te xáhaⁿ-dē:

—¿Ndéé tée cùu-n? —
cachí-dé xáhaⁿ-dē.

Te ní xáhaⁿ tē Pàblú:

—Tée Cìlicia cùu-í —càchí-dé xáhaⁿ-dē.

35 Te ní xáhaⁿ tē cùu gobiernú-áⁿ:

—Òré quexìo cue tée tē ñaha cuéchi xii-n, te cáháⁿ-n nása ní cuu, chi níhì-í nàcuáa cada ndáá-í cuendá-n —càchí-dé xáhaⁿ-dē xii té Pàblú.

Te ní xáhaⁿ-dē xii sandàdú sá cùndéé-güedé té Pàblú vehe càhnu té Hèrodés.

24

Té Pàblú xáhaⁿ-dē xii té Juélí sá ñà túú cuéchi-dé

1 Te sàtá ñí cuu úhúⁿ nduu, te té Anàniás dútú cùnù-gá cuáháⁿ-dé ñuú Cèsareá ndìhi cue tée cùu sacuéhé ndìhi ìíⁿ tée nàni Tértulú tē càháⁿ yuhu-güedé. Te cuáháⁿ-güedé núu tē cùu gobiernú cuáháⁿ dácuándèhnde-güedé núu-dē

sá ndècuéchi té Pàblú. 2 Te ní sànguaca-güedé té Pàblú. Te òré ní quexìo-dé núu-güedé, te ní ngüíta té Tértulú xáhaⁿ-dē xii té Juélí nàcuáa càa cuéchi tē-güedé té Pàblú:

—Ío càhnu cada iní tātá gobernádór. Duha nduu chiuⁿ ndéé iní ñáhá-ndí xii-n vèxi-ndí, núu nása cachí-n cùnduu. Táxáhu xii-n, chi ío váha ndècu nchaa ñáyiú, te ñá túú nàa-yu chi ío váha quide-n. 3 Te ío cùdíí iní-yu chi nchaa-ni nduu xíndecu váha-yu ncháá-yu, te ío táxáhu Ndiòxí xii-n sá dúcáⁿ quide-n. 4 Te cada càhnu iní, cuiní-í ndatnúhu-o ìíⁿ úú-ni cuendú cuendá sá vā cùyàa-o dacuíta-í chiuⁿ-n.

5 Te ìíⁿ tēé iha ío dàsatú iní ñáhá-dē, chi ndēni ní cuu cuáháⁿ-dé ndátnúhu-dé ndìhi ñáyiú israél dánàá-dé-yu. Te nèhé quidé-dē chi cuáháⁿ-dé dácáháⁿ-dé nchaa ñáyiú cuendá quíndáá iní-yu tnúhu tēé ní xíndecu ñuú Nazàrét. 6 Chi ducaⁿ càháⁿ cue tēé iha sá ñí sáháⁿ-dé veñúhu càhnu sá ío cùnuu, te cuiní-dé daquèe tíhú-dé veñúhu cuendá cuiní-dé xocàni-dé sá íí ndécú, núu xiáⁿ ní tñii ñaha-güedé ndécá ñàha-güedé cuáháⁿ núu cuè tēé cùchiuⁿ cuendá cácaⁿ tnúhú-güedé núu-dē núu ná cuendá ducaⁿ cuiní-dé cada-dé, chi ducaⁿ càa leí ndécú ndìhi-güedé sá cáda ndáá-güedé núu ná ìíⁿ sá cúu. 7 Te té Lìsiú tēé cùu capitáⁿ cùnù-gá ní quexìo-dé ndìhi sandàdú, te ní dácúnú-güedé nchaa cue tēé nùtníi ndìhi té Pàblú, te

dătnùnî ní tnî ñaha-güedě xii-dé ndécá ñaha-güedě cuáháⁿ. ⁸ Te sátá xiáⁿ, te ní xáhaⁿ-dě sá quíxí-güedě ndéé ndíha cundáá cuéchi-dé. Te yòhó cundee ìní-n càcáⁿ tnúhú-n núú-dě, te núu ndáá ducaⁿ ñi quide-dé àdi ñáhá — càchí té Těrtulú xáhaⁿ-dě xii té Juélí tée cùu gobiernú.

⁹ Te dava-gá cue tée isràél xīnutnī xiáⁿ ñi cáháⁿ-güedě sá ndáá càháⁿ té Těrtulú. ¹⁰ Te tée cùu gobiernú ñi quide-dé ndaha-dé núú tē Păblú cuendá cáháⁿ-dē, te tē Păblú ñi xáhaⁿ-dē:

—Yòhó sa ní cuu titnī cuíá ndécú-n ìha xehndé-n cuéchi nchaa ñáyiu xīnāá, núu xiáⁿ ío cùdí ìní-í sá ndíha téhndé cuéchi tē ñaha-güedě xii-í. Te cundee ìní-n cùndedóho-n na càni-í cuendú nācuāa ní cuu. ¹¹ Te nducu tnúhu-n te quini-n nā càháⁿ ndáá-í, chí sa ní cuu úxúu nduu sá ñi sáháⁿ-í veñúhu cāhnu sá ío cūnuu ñúú Jerusálén ní cáháⁿ ndíhi-í Yá Ndióxi. ¹² Te ni ñà túú ní nàá-í ndíhi ñáyiu xití veñúhu, te ñá túú ní xáhaⁿ-í nàá-yu ni ñi xichi, te ni ñi veñúhu lihli ní sáháⁿ-í ñá túú nā ní xáhaⁿ-í cadá-yu. ¹³ Te ni ñà túú quēñuhu-güedě cue tē cáháⁿ ndáá te núu ndáá ducaⁿ ñi quide-í. ¹⁴ Te yúhú càháⁿ ndáá-í sá càháⁿ ndíhi-í Yá Ndióxi, chí ñi Yá Ndióxi ní xóo cáháⁿ ndíhi ñáyiu ndéé sanaha, núu xiáⁿ ní tuha-í ichi-gá. Te cue tē-a càchí-güedě sá ñà díú ñi ichi váha ni tuha-í. Te yúhú sàndáá ìní-í nchaa sá ñi chídó tnùnî ndíi Moisés ndíhi dava-gá cue tē ní

xóo cáháⁿ tnúhu Yá Ndióxi ndéé sanaha. ¹⁵ Te sàndáá tucu ìní-í sá ndótó nchaa ñáyiu ní xihí, cuéi ñáyiu váha ìní-xi, te cuéi ñáyiu úhú ìní-xi, dico ndotó-yu. Te ducaⁿ ñi xóo quindáá ìní nchaa ñáyiu ní xīndecu ndéé sanaha. ¹⁶ Te yúhú ío ndūcu ndee-í quidè-í nchaa sá càháⁿ Yá Ndióxi cuendá sá vā cúu càháⁿ núú-í núú-gā ndíhi núú ñáyiu ñuyíú-a.

¹⁷ Te sa ní cuu titnī cuíá sá ñà túú-gā sáháⁿ-í ñúú Jerusálén, te ní sáháⁿ tucu-í nehè-í díhúⁿ ñi taxi ñáyiu ñuú xicá cuendá cuñaha-í xii ñáyiu ñúú Jerusálén. Te ní ndúcú-í sá cuāha táhú-í Yá Ndióxi. ¹⁸ Te ní xīndecu-í veñúhu cāhnu sá ío cūnuu ní quide-í nchaa nācuāa ní xóo cada ñáyiu ní xīndecu ndéé sanaha cuendá nduu vétú ìní Yá Ndióxi. Te ñá túú chitú-yu ni sáháⁿ, te ni ñà túú nā ní cùu, te ní naníhi ñáhá ñi úú cue tē isràél xii-í, cue tē véxi distritú Àsiá. ¹⁹ Te quixi mee-güedě ìha cáháⁿ-güedě, te núu sá ndáá ní xini-güedě sá yúhú ndècuéchi-í ní cùu, ²⁰ àdi ñáhá. Dico cachí tnúhu cue tē-án nāsa ní cuu órē ní xīndecu-í jūndá-güedě núu ndècuéchi-í àdi ñá túú ndècuéchi-í. ²¹ Dico ñá túú cuéchi-í chí ñi ñi tnúhu ni cáháⁿ-í ní xáhaⁿ-í xii-güedě sá sàndáá ìní-í sá ndótó nchaa ñáyiu ní xihí, te ñi núu xiáⁿ càchí-güedě sá ndècuéchi-í —càchí té Păblú xáhaⁿ-dē xii té Juélí.

²² Te té Juélí sa xini váha-dé nācuāa cuáháⁿ tnúhu Jēsús, núu xiáⁿ ñá ní cuini-gá-dé

ndatnúhu-dé ndihi té Páblú, te ní xáhaⁿ-dě:

—Sa ní cuu, cundetu-n na quèxio té Lisiú tée cùu capitáⁿ cúnù-gá, te òré-áⁿ cundáá cuèndá-n —càchí té Juéli xáhaⁿ-dě.

²³ Te ní xáhaⁿ-dě xii tée cùu capitáⁿ:

—Cundeé-n tē Páblú-áⁿ, te núu nása càchí-dé cada-n, te daña-n na càháⁿ ndihi-dé cue tée xíní tnáhá ndihi-dé núu cuañaha-güedē nchaa sá xíní ñùhu-dé àdi nása cada-güedē —càchí té Juéli xáhaⁿ-dě xii tée cùu capitáⁿ.

²⁴ Te ní cuu titní nduu, te ní sáháⁿ té Juéli vechiúⁿ ndihi ñadihí-dé, te ñaha-áⁿ nání-áⁿ Drùsilá, te ñaha isràél cúú-áⁿ. Te ní xáhaⁿ-dě sá quíngueñuhu-güedé té Páblú, te òré ní quexio-dé vechiúⁿ, te ní cáháⁿ-dé núu-yu nchaá-yu sá quíndáá iní-yu tnúhu Xítóhó Jesucrístú. ²⁵ Te ní xáhaⁿ-dě:

—Mee-ni sã vãha cada-ndo. Te coto-ndo mēe-ndo, te vá cadá-ndó ni ñⁿ sá cuèhé sá dúhá, chi ñⁿ nduu cáháⁿ Yã Ndiõxí ndēdacàa ñáyiu váha iní-xi, te ndēdacàa ñáyiu úhú iní-xi —càchí té Páblú xáhaⁿ-dě.

Te sá dúcáⁿ ñí xáhaⁿ-dě, te ní yuhú té Juéli, te ní xáhaⁿ-dě:

—Vá càháⁿ-gá-ó tnáví, cuaháⁿ, te òré cüyächí-í, te cana ñaha-í xii-n —càchí-dé xáhaⁿ-dě.

²⁶ Te té Juéli ní quide-dé cuèndá sá cuañaha tē Páblú díhúⁿ te vá ndihu-gá-dé vecaá ní cùu, núu xíãⁿ titní xito ní cana-dé té Páblú vechiúⁿ ní ndatnúhu ndihi tnáha-güedé,

dico ñá túú ní chãhu-dé. ²⁷ Te úú cuiá ducaⁿ ñí quide-güedé, te dàtnùní ní xínu té Juéli chiúⁿ-dé, te ní ngúnutñí té Pòrsiú Fèstú. Te òré ní xínu té Juéli chiúⁿ-dé, te ní dándõ-dé té Páblú yihí-ni-dē vecaá. Te ducaⁿ ñí quide-dé cuèndá ní cuiní-dé cudü-dé núu cuè tē isràél.

25

Té Páblú càháⁿ ndihi-dé té Fèstú

¹ Te ní cuu úní nduu sá ñí quexio té Fèstú ñúú Cèsareá ní queheⁿ-dé chiúⁿ, te ní quee-dé cuaháⁿ-dé ñúú Jerusalén. ² Te yacáⁿ ní nanihí tnáhá-dē ndihi nchaa dútú cúnùu ndihi nchaa cue tēe tàxi tnuní ñáhá xii ñáyiu isràél, te xáhaⁿ-güedē xii té Fèstú sá ndáá ndècuéchi té Páblú. ³ Te ní cáháⁿ ndáhú-güedé núú-dé sá téndàha-dé sandadú-dé quíngueñuhu ñaha-güedē vecaá xii-dé ndéé ñúú Cèsareá te candeca ñaha-güedē quihíⁿ. Te ducaⁿ ñí cáháⁿ-güedé, chi ní ndatnúhu-güedé sá cáhni ñaha-güedé xii té Páblú ichi ni cùu. ⁴ Te té Fèstú ní xáhaⁿ-dě:

—Vá cúú quixi-dé ndéé ndíha. Na cundetu-dé ñúú Cèsareá chi sacú-ni nduu cuyaa-í iha te dàtnùní núhú-í yacáⁿ. ⁵ Te yáchí-gá quihíⁿ ndihi-í cue tēe cúnuu-gá, te yacáⁿ cuu cáháⁿ-ndó núu ndáá ndècuéchi-dé àdi cáháⁿ mée-dé núu ndáá ndècuéchi-dé àdi ñáhá, te cutnùní iní-ndó —càchí-dé xáhaⁿ-dě.

⁶ Te ní xíndecu té Fèstú úná úxí nduu ñúú Jerusalén, te dàtnùní cuánuhú-dé

ñuú Cèsareá. Te nduu tnéé cuáháⁿ-dé vechi^uⁿ, te òré ní quexio-dé, te ní xáhaⁿ-dè xii cue sandádú xínú cuèchi sá quihíⁿ-güedé queñuhu-güedé té Páblú vecaá te candeca ñaha-güedé quihíⁿ vechi^uⁿ. ⁷ Te òré ní quexio té Páblú vechi^uⁿ, te sa ndècu cue tée isràél cue téé ní quee ñuú Jerusàlén, te cuánguihu-güedé ndéé diñi té Páblú ní ngúnutñi-güedé, te xáhaⁿ-güedé xii cue téé cùchiuⁿ sá ndècuéchi vihi-dé, dico ñá túú ní cùndee tnúhu-güedé. ⁸ Te té Páblú ní xáhaⁿ-dè xii té Fèstú:

—Ñá túú ndècuéchi-í, ñá túú nã ní quide-í, chi ñá túú tnàhá iní-í cada-í ñⁿ sá cächí lèi sá vã cúú cada-ò. Te ni xiti veñúhu càhnu sá ïo cùnuu ñá túú nã quide-í, te ni té Cèsár téé yìndaha cuéhé nacióⁿ ñá túú càháⁿ cuéhé-í cuendá-dé — cächí té Páblú xáhaⁿ-dè xii-dé.

⁹ Te té Fèstú ní cuini-dé cada-dé nàcuáa cudíu-dé núú cuè téé isràél ní cùu, núu xíáⁿ ní xáhaⁿ-dè xii té Páblú:

—¿Cundee iní-n quihíⁿ-n ñuú Jerusàlén-ãⁿ? Te yacáⁿ cundáá cuéchi sá sáá díquí-n —cächí té Fèstú xáhaⁿ-dè xii té Páblú.

¹⁰ Te xáhaⁿ tẽ Páblú:

—Diu-ni ñⁿ vechi^uⁿ téé cùchiuⁿ Cèsár ndècú-í iha, te diu-ni iha cada ndáá-n nũ cuini-n ní cùu. ¿Te ná cuendá candeca ñaha-n quihíⁿ ingá xichi? Yòhó tnàhá-n xini-n sã ñá túú nã quide-í ñayiu isràél. ¹¹ Chi núu dicó yúhú ní quide-í ñⁿ cuéchi càhnu, te ñá túú nã cada-xi cuèi na càhni ñaha-ndo xii-í ní

cùu. Te sa ní cutnùní iní-n sã ñã ndáá, chi mee-ni tnúhu ndehnde xicáháⁿ-güedé, te ñá túú nduu váha-xi ducaⁿ cada-n cúñaha-n sã quihíⁿ-í ndihi-güedé ingá xichi. Te xíáⁿ cuini-í quihíⁿ-í núú tẽ Cèsár téé yìndaha cuéhé nacióⁿ, te yacáⁿ cáháⁿ méé-dè nũ ndáá ndècuéchi-í —cächí té Páblú xáhaⁿ-dè xii té Fèstú.

¹² Te ní ndatnúhu té Fèstú ndihi cue téé chindee tnúhu ñaha xii-dé, te dátñuní ní xáhaⁿ-dè xii té Páblú:

—Te sa ní cáháⁿ-n sã quihíⁿ-n quítnahá-n tẽ Cèsár te diu-ni quihíⁿ-n, te quini-n nãsa cáháⁿ téé-ãⁿ yacáⁿ — cächí-dé xáhaⁿ-dè xii té Páblú.

Té Páblú càháⁿ ndihi-dé té Ágripá téé yìndaha nacióⁿ Isràél

¹³ Te sátá ñi cuu cuéhé nduu, te ní quee té Ágripá téé yìndaha nacióⁿ Isràél cuáháⁿ-dé ñuú Cèsareá ndihi ñadihí-dé, te ñaha-án nání-án Berènicé te òré ní quexio-yu, te ní cáháⁿ ndihí-yu té Fèstú.

¹⁴ Te sátá ñi cuu titní nduu, te ní cáháⁿ té Fèstú cuendá té Páblú ní xii-dé té Ágripá:

—Ndècu ñⁿ téé ní dándõo té Juéli vecaá nání-dè Páblú.

¹⁵ Te cútnahá ní sáháⁿ-í ñuú Jerusàlén ní nanítnáhá-í ndihi cue dútú cùnũu ndihi cue téé cùu sacuéhé nũ ñayiu isràél. Te ní dácáá díquí-güedé té Páblú cuéchi, te ní cachí-güedé sá táuchiuⁿ-í cahni ñaha-güedé xii-dé ní cùu. ¹⁶ Te ní xáhaⁿ-í xii-güedé sá vã cúú, chi ñá túú dùcaⁿ quide nchúhú cue téé rómá cùtexínu cada

castiú-ndí ñáyi, chi díhna-gá ndúcú tnúhu-ndí núú ñáyi saá cuéchi díquí-xi cuèndá quini-ndí núu nása cáháⁿ méë-yu ndihi ñáyi sàcáⁿ cuéchi cuèndá-yu, te òré-áⁿ cútnùní iní-ndí núu ndáá ndècuéchi-yu àdi ñáhá, te ducaⁿ te ñihí-ndí nàcuáa quide ndáá-ndí cuèndá-yu, duha ní xáhaⁿ-í xii-güedé —càchí té Fèstú xáhaⁿ-dë xii té Àgripá.

17 Te ní xáhaⁿ tùcu té Fèstú:

—Te sátá ñí quexìo-güedé ndéé ndíha, te nduu tnéé ní sáháⁿ-ni-ndí vechiùⁿ. Te ní xáhaⁿ-í sá quíngueñuhu-güedé té Páblú candeca ñaha-güedé quixi, te òré ní quexìo-dé,¹⁸ te ní ngúita-güedé xáhaⁿ-güedé sá ndècuéchi-dé. Te ní sani iní-í sá íñⁿ cuéchi càhnu tee ñaha-güedé dico ñáhá, chi dìcò-ni sá íñⁿ tnúhu ní cáháⁿ-dé, xiáⁿ ducaⁿ ñí quide-güedé.¹⁹ Te ní tenáá ñáhá-güedé xii-dé, chi càchí-güedé sá ñà túú càháⁿ váha-dé cuèndá ndiòxi-güedé. Te tnàhá-ni cuèndá íñⁿ téé nàni Jesús càháⁿ-dé, chi càchí-dé sá ñí xihí téé-áⁿ te ní ndoto-dé càchí-dé xáhaⁿ-dë xii-güedé, càchí-güedé.²⁰ Te ñá ní cùtnuní iní-í nása cùñaha-í xii-güedé cuèndá téhndé cuéchi-dé. Te xiáⁿ ní xicáⁿ tnúhu-í núú tē Páblú núu cundee iní-dé quíhíⁿ-dé ñúú Jerusalén, te ndéé ndiáçáⁿ cada ndáá-ndí cuèndá-dé, te núu ndáá ndècuéchi-dé nàcuáa càháⁿ-güedé àdi ñáhá ní cùu.²¹ Te dātnùní té Páblú ní cachí-dé sá cundècu tnaa-dé vecaá te

dātnùní quíhíⁿ-dé núú tē Cèsár, te téé-áⁿ cada ndáá-dé cuèndá-dé. Te cuèndá sá dúcáⁿ ñí cáháⁿ té Páblú, xiáⁿ núu ní xáhaⁿ-í sá cundèé ñáhá cuè sandadú xii-dé, ñini na còto-í nása cada-í quíhíⁿ-dé núú tē Cèsár, duha ní xáhaⁿ-í xii-güedé —càchí té Fèstú xáhaⁿ-dë xii té Àgripá.

22 Te té Àgripá ní xáhaⁿ-dë xii té Fèstú:

—Te tnàhá yúhú ío cudíí iní-í cundedóho-í tnúhu càháⁿ-dé —càchí-dé xáhaⁿ-dë.

Te ní xáhaⁿ tē Fèstú:

—Tneé cana-í-dé te cundedóho-n nása cáháⁿ-dé —càchí-dé xáhaⁿ-dë.

23 Te nduu tnéé ní quexìo té Àgripá ndihi ñadihí-dé tá Berenicé vechiùⁿ, te ío ní quide càhnu ñaha-güedé xií-yu. Te cuánguñhú-yu vechiùⁿ ndihi cue téé cùu capitáⁿ cùnùu-gá ndihi cue téé cùnùu ñúú Cèsareá. Te té Fèstú ní xáhaⁿ-dë sá quíngueñuhu-güedé té Páblú vecaá, te òré ní quexìo-dé,²⁴ te ní xáhaⁿ tē Fèstú xii té Àgripá ndihi nchaa ñáyi xíndecu-áⁿ:

—Chí cundèhe téé iha chi téé-a càchí cue téé isràel sá ndècuéchi-dé, te cùtnàhá ní xíndecu-í ñúú Jerusalén ní cachí-güedé sá ndáá ndècuéchi-dé, te diu-ni ducaⁿ càháⁿ-güedé iha. Te nchaa-güedé ní cuáá-güedé te càchí-güedé sá táuchìuⁿ-í cahni ñaha-güedé xii-dé ní cùu.²⁵ Te sátá ñí ndihi cuèndú ní cáháⁿ-güedé, te ní cutnùní iní-í sá ñà túú ñí íñⁿ cuéchi càhnu ní quide-dé, núu ñà túú ní tàuchiuⁿ-í cahni ñaha-güedé

xii-dé. Te mee-dě ní cachí-dé sá quihíⁿ-dé núú tē Cēsár tée yìndaha cuéhé nacióⁿ, te ní xáhaⁿ-í sá cúú quihíⁿ-dé. ²⁶ Te ñá túú ní xìní váha-í nása ní quide-dé, núú xiáⁿ ñá ní ñihí-í nàcuáa cadúha-í tutú quihíⁿ ndaha té Cēsár, te xiáⁿ ní cana-í-dé véxi-dé iha cuendá nchaa-ndo cáháⁿ ndihi-ndo-dě. Te ducaⁿ canuu cadíhna-gá yòhó tātá Àgripá cácaⁿ tnúhú-n núú-dě núú nása cáháⁿ-dé, te òrè-áⁿ cutnùní iní-í nása cada-í cadúha-í tutú quihíⁿ ndaha té Cēsár. ²⁷ Chi sàni iní-í sá ñá túú ndùu váha-xi sá quihíⁿ ìⁿ tée tàú cuéchi te núú vá códó tnùní núú ìⁿ tutú nàcuáa càa cuéchi tàú-dé —càchí té Fèstú xáhaⁿ-dě xii-güedé.

26

Te Păblú cáháⁿ ndihi-dé té Àgripá

¹ Te dătnùní ní xáhaⁿ tē Àgripá tée yìndaha nacióⁿ Isràèl xii té Păblú:

—Te vitna cáháⁿ-n núú nása ní cuu cuendá-n —càchí-dé xáhaⁿ-dě.

Te té Păblú ní nda-caní-dé ndaha-dé sá cùndedóho-güedé, te ní xáhaⁿ-dě xii té Àgripá tée yìndaha nacióⁿ Isràèl:

²⁻³ —Tātá Àgripá, ío cùdíí iní-í sá ñí naníhí tnáhá-ó vitna, chi yòhó ío váha xìní-n nchàa nacuáa quide ñáyiú isràèl quidé cahnú-yu Yá Ndióxi, te ío váha xìní-n nchàa tnúhu xitnáhá-yu. Te vitna cundee ìní-n cùndedóho-n ìⁿ úú tnúhu na cáháⁿ-í. Na càchí tnúhu-í

sá ñă ndàá ní quide-í nchaa sá cáháⁿ cue tée isràèl.

Té Păblú cáháⁿ-dé nàcuáa ní quide-dé cùtnáhá vátá túhá-gă-dé ichi Yá Ndióxi

⁴ Te sa nàha nchaa cue tée cùnuu núú ñáyiú isràèl nàcuáa ní quide-í ñuú-í ndihi ñuú Jerusalén cùtnáhá ní cuu landú-í. ⁵ Te mee-güedé náhá-güedé sá ndèè lìhli-í ní chitnahá-í cue tée cùu fariséú. Te núú cuìní-güedé cáháⁿ-güedé sá tée fariséú cùú-í àdi ñáhá dico nchaa-güedé sa nàha-güedé sá cuè tée-áⁿ ñí chitnahá-í. Te cue tée cùu fariséú-áⁿ ío cuìní-güedé cada-güedé nchaa nàcuáa nchìcúⁿ nihnu ñáyiú quidé-yu. Te yúhú nchaa sá nchìcúⁿ nihnú-yu quidé-yu-áⁿ ñí quide-í. ⁶ Te vitna ndècu-í iha, te cáháⁿ-n núú váha-ni quide-í àdi ñáhá, chi cue tée-áⁿ tée ñàha-güedé cuéchi xii-í cuendá sá sàndáá iní-í sá ndótó nchàa ñáyiú ní xihí. Te ñu-ni ducaⁿ ñí xáhaⁿ Yá Ndióxi xii nchaa ñani tnáhá-ó ñí xindecu ndéé sanaha. ⁷ Te nchaa ñáyiú-áⁿ xìndetú-yu nduu ndòto ñáyiú ní xihí ní cùu. Te ñu-ni ducaⁿ ndètu nchaa ñani tnáhá-ó ndècu ñuyíú-a ndéé vitna, te xiáⁿ núú cuèi nduu cuèi niú cáháⁿ ndihí-yu Yá Ndióxi. Te sá sàndáá iní-í núú xiáⁿ ní cáháⁿ-í, te tée ñàha cue tée isràèl cuéchi xii-í. ⁸ ¿Te ná cuendá nchòhó cue tée isràèl ñá túú cuìní-ndó quindáá iní-ndó sã dándòto Yá Ndióxi nchaa ñáyiú ní xihí? —càchí té Păblú xáhaⁿ-dě.

Té Păblú caní-dě cuendú sá ñí xóo chihi-dé ñáyiú sàndáá iní

tnúhu Jèsús vecaá

⁹ Te ní xáhaⁿ tùcu té Pàblú:

—Ndéé dàvá-áⁿ nǐ quide úhú-í ñáyiú sàndáá iní-xi tnúhu Jèsús Yaá ní quee ñuú Nazàrét, te ní cáhàⁿ-í sá vǎha-ni ní quide-í sá dúcáⁿ nǐ quide-í. ¹⁰ Te ñuú ducaⁿ nǐ quide-í ñuú Jerusàlén. Te cue dútú cúnùu ní taxi-güedé ñⁿ tutú cuèndá tñi-í ñáyiú ní sàndáá iní tnúhu Jèsús, te vǎi-yu ní chihi-í vecaá. Te òré ní cáhàⁿ-güedé sá cǎhni-güedé ñáyiú-áⁿ, te tñàhá-í ní cáhàⁿ-í sá cúu cǎhni ñaha-güedé xii-yu. ¹¹ Te titní xito ní sáhàⁿ-í nchaa veñúhu ñáyiú isràél, te ní cani-í-yu te ní xáhaⁿ-í sá dáñǎ-yu ichi Jèsús. Te cuèndá ío ní cudéèⁿ-í núú-yu, xiǎⁿ ní sáhàⁿ-í nchaa ñuú xicá nǐ sánúndúcù-í dava-gá ñáyiú sàndáá iní tnúhu-gá cuèndá dandòho ñaha-güedé xii-yu.

Té Pàblú cáhàⁿ tucu-dé nása ní cuu ní tuha-dé ichi Yá Ndiöxí (Hch. 9:1-19; 22:6-16)

¹² Te cuèndá xiǎⁿ ní xica tucu-í cuáhàⁿ-í ñuú Dàmascú, néhè-í tutú ní taxi cue dútú cúnùu cuáhàⁿ, cuèndá sá ndácù-í tñi-í nchaa ñáyiú sàndáá iní tnúhu Jèsús ní cùu. ¹³ Te òré caúxúu nduu ñùhu-í ichi cuáhàⁿ-í, te uuⁿni ní quee ñuhú andiú nǐ dáyèhé-xi ndéé núu nútni-í ndihi cue té ndèca tñaha ndihi-í, te níhi-gá ní dáyèhé-xi dàcúxí nchǎcanchii. ¹⁴ Te nchaa-ndí ní nduá-ndí ndéé ñuhu, te ní tecú dóho-í cáhàⁿ ñⁿ sá cáhàⁿ tnúhu ñáyiú isràél, te cǎchí-xi: “Yòhó Sàulú, ¿Ná cuèndá cúu úhú iní ñáhà-n

xii-í dándòho ñaha-n? Te ío dándòho-n mee-n, chi dàtná cuini-n quide ndicutu quide-n chi quiti-áⁿ òré cùxi-güedé-di pùya te sǎha-di patadá núu-xi, te sá dúcáⁿ quide-di te quide úhú-di mee-di. Te ducaⁿ sǎtnahá-xi cùu yohó chi ñá túu sàndáá iní ñáhà-n xii-í”, cǎchí sá ní cáhàⁿ-áⁿ. ¹⁵ Te ní xáhaⁿ-í: “¿Ná cúu yòhó sá ní cáhàⁿ-áiⁿ?” xǎha-í. Te cǎchí sá cáhàⁿ-áⁿ: “Yúhú cúu-í Jèsús Yaá cúu úhú iní-n”, duha ní cǎchí sá cáhàⁿ-áⁿ. Te xiǎⁿ ní cutnùni iní-í sá Jèsús cáhàⁿ. ¹⁶ Te ní cǎchí-gá: “Ndacuíñi-n chi yúhú cáhàⁿ-í chi cuini-í quihíⁿ-n càda-n chiuⁿ-í, chi quihíⁿ-n cáhàⁿ-n núu ñáyiú nàcuáa ní cuu ní xiní ñáhà-n xii-í vitna, te quixi tucu-í cáhàⁿ ndihi ñaha-í xii-n, te cùñaha-n xii-yu nàcuáa cáhàⁿ-í. ¹⁷ Chi cuini-í quihíⁿ-n cáhàⁿ-n tñuhu-í núu ñáyiú isràél ndihi núu ñáyiú ñá túu cùu ñáyiú isràél, te coto ñaha-í xii-ñ cuèndá vá cǎhni ñáhà-yu xii-n. ¹⁸ Te cuini-í quihíⁿ-n cùñaha-n xii-yu sá dáñǎ-yu nchaa ichi cuèhé ichi duha ndécú-yu, te tuhá-yu ichi váha cuèndá vá quindáá iní-yu cadá-yu sá cáhàⁿ yucu ñávǎha, te quindáá iní-yu cadá-yu nchaa nàcuáa cáhàⁿ Yá Ndiöxí. Te núu na quindáá iní-yu tnúhu cáhàⁿ-í, te cada cǎhnu iní-í nchaa cuéchi-yu, te naníhi tǎhú-yu ndihi dava-gá ñáyiú sa ní xócuñi nchaa sá cuèhé sá dúhá nǐ xíndecu iní-yu”, duha ní cǎchí-gá xii-í —cǎchí té Pàblú xǎhaⁿ-dè xii té Àgripá

tée yíndaha nacióⁿ Isràél.

Té Păblú quidé-dě nchaa năcuăa ní xăhaⁿ Jêsús cada-dě

¹⁹ Te ní xăhaⁿ tucu té Păblú xii té Āgripá:

—Ñă túú dăña ndeé-í quidé-í nchaa năcuăa ní cáháⁿ Jêsús òré ní cáháⁿ-gá andiu. ²⁰ Te díhna-gá ñáyiu ñúú Dămascú ní cáháⁿ-í tñúhu-gá nũ-yu, te ní xăhaⁿ-í xii-yu sá dăñă-yu

nchaa sá cuèhé sá dúhá quidé-yu, te cáháⁿ ndihí-yu Yă Ndiôxí, te cadă-yu mee-ni să văha cuendá cutnùní iní

dava-gá-yu sá ní dăñă-yu nchaa sá ñă túú văha ní xóo cadă-yu. Te ducaⁿ-ni nì xăhaⁿ-í xii ñáyiu ñúú

Jerusalén ndihí ñáyiu nihí năcióⁿ Isràél ndihí nchaa ñáyiu ñă túú cùu ñáyiu isràél.

²¹ Te cuendá sá dúcáⁿ ñí cáháⁿ-í nũu ní tñi ñaha cuè téé isràél xii-í cútñahá ní sáháⁿ-í veñúhu căhnu sá ïo cùnuu căhni ñaha-güedé ní cùu.

²² Te diu-ni mee Yă Ndiôxí ní chindee ñăha-gá xii-í nũu ndècu-í iha tñavíí cáháⁿ-í tñúhu-gá, te mee-ni tñúhu-gá cáháⁿ ndihí-í nchaa-yu, cuèi ñáyiu cuica, te cuèi ñáyiu ndàhú.

Te ndíi Moisés ndihí dava-gá cue téé ní xóo cáháⁿ tñúhu Yă Ndiôxí ndéé sanaha ñí cáháⁿ-güedé năcuăa cada-xi vitna, te diu-ni ducaⁿ cáháⁿ-í nchaa-ni nduu. ²³ Te cue téé-ăⁿ ní cachí-güedé sá Cristú

Yaă tendaha Yă Ndiôxí quixi ñuyíú-a ndoho tnahá-gá, te cuú-gá, te dătnùní ndoto-gá. Te ducaⁿ căda-xi nchaa ñáyiu ní xihí ndotó-yu nũu na sàa nduu chi ducaⁿ căda-xi ní cachí mée Yă Ndiôxí. Te

cuendá sá dúcáⁿ ñí ndoto-gá, xiăⁿ cútñùní sá cúú năníhí tăhú ñáyiu, cuèi ñáyiu isràél, te cuèi ñáyiu ñă túú cùu ñáyiu isràél. Te dătnă-ni ndùu tñúhu ní cáháⁿ cue téé ní xóo cáháⁿ tñúhu-gá ndéé sanaha-ăⁿ, te diu-ni ducaⁿ cáháⁿ yúhú tucu —căchí té Păblú xăhaⁿ-dě.

Té Păblú xăhaⁿ-dě xii té Āgripá sá quindăá iní-dé tñúhu Jêsús

²⁴ Te sá dúcáⁿ ñí cáháⁿ té Păblú, te ní cáháⁿ níhi té Fèstú, te xăhaⁿ-dě:

—Păblú, jío lùcú cáháⁿ-n! Cuendá ïo vâi ní dăcuăháⁿ-n, nũu xiăⁿ ndádá lùcú ñăháⁿ-xi xii-n —cachí-dé xăhaⁿ-dě.

²⁵ Te ní xăhaⁿ tē Păblú:

—Ñăhá, vá dúcáⁿ cáháⁿ-n chi ñă díú să lùcú-í duha cáháⁿ-í, chi tñúhu ndăá cáháⁿ-í. ²⁶ Te té Āgripá-a

sa năha-dé ndihí nchaa ñáyiu isràél năcuăa ní cuu, chi sa ní níhí-dě tñúhu ndihí dava-gá-yu năcuăa ní cáháⁿ-í, nũu xiăⁿ cùyi-í cáháⁿ ndihí-í-dé —căchí-dé xăhaⁿ-dě xii té Fèstú.

²⁷ Te ní xăhaⁿ-dě xii té Āgripá:

—Yúhú sa xini-í sá sândăá iní-n tñúhu ní chídó tñùní cue téé ní xóo cáháⁿ tñúhu Yă Ndiôxí ndéé sanaha —căchí-dé xăhaⁿ-dě.

²⁸ Te ní xăhaⁿ tē Āgripá:

—¿Quide-n cuendá sá ĩⁿ ũú tñúhu ní cáháⁿ-n te quindăá iní-í tñúhu Jêsús cáháⁿ-n-ăⁿ? —căchí-dé xăhaⁿ-dě.

²⁹ Te ní xăhaⁿ tucu té Păblú:

—Cuèi vitna te cuèi ndéé cuèé-gá dico cuini-í sá dăcutíí să quindăá iní-n tñúhu Jêsús.

Te ñu-ni ñucaⁿ xicáⁿ táhù-í nùú Yá Ndiõxí sá ncháá ñáyi ndècu ndihí-o iha quindáá iní-yu tnúhu-gá ñátná cuíní-n ní quide yúhú, ñucaⁿ càdá-yu. Dìcò-ni sá nùu vá quihíⁿ-ni-yu vecaá ñátná cuíní-n ndòho yúhú —càchí-dé xáhaⁿ-dë xii té Àgripá.

³⁰ Te sáta ñucáⁿ ní cáháⁿ-dë, te ní ngúnutnii té Àgripá té yíndaha nacióⁿ Isràél, ndihí té Fèstú té cùu gobiernú, ndihí tá Berènicé ndihí ñava-gá ñáyi xìnucóo yatni. ³¹ Te ní tnahá-yu ndèca tnahá-yu cuáháⁿ ñⁿ xio. Te ní xitnàhá-yu:

—Tée-ãⁿ ñá túú ñá cuéchi ní quide-dé nùu chihi ñaha-güedë vecaá àdi cahni ñaha-güedë —càchí-yu xitnàhá-yu.

³² Te té Àgripá ní xáhaⁿ-dë xii té Fèstú:

—Cuéchi mee-dë chi ní cachí-dé sá quítnahá-dé té Cèsár, xíãⁿ nùu ndíhu tucu-dé vecaá, te nùu ñá túú ñucaⁿ ní cáháⁿ-dë, te cácu-dé ní cùu —cachí-dé xáhaⁿ-dë xii té Fèstú.

27

Té Păblú cuáháⁿ-dë ñuú Ròmá

¹⁻² Te ní ndatnúhu-güedé sá quihíⁿ té Păblú ndihí bàrcú nacióⁿ Itàliá, te tnahá yúhú quihíⁿ-í ndihí-dé. Te tnahá ñⁿ té nani Aristarcú cuíní-dé quihíⁿ ndihí-ndí-dé, te cùu-dé té ñuú Tesalónicá, te ñuú-áⁿ yíndèhu-xi distritú Macèdoniá. Te ní sáha cuèndá-güedé té Păblú ndihí ñⁿ ùú-gá cue té xixíhi

vecaá ní queheⁿ cuèndá ñáhá té Jülüú té cùu capitáⁿ, té yíndaha nchaa sandadú nání Àugustú, te ní quée-ndí nchaa-ndí bàrcú ñuú Adràmitiú. Te ní xica bàrcú-áⁿ cuáháⁿ-ndí ndihí-xi te cuita yáha-ndí ñⁿ ùú ñuú yíndèhu distritú Àsiá quihíⁿ.

³ Te nduu tnée ní quexiò-ndí ñuú Sìdón. Te ío váha ní quide té Jülüú, chi ní ñáñá-dë ní quene té Păblú ní sáháⁿ-dë ní cáháⁿ ndihí-dé cue té ío váha tnahá tnúhu ndihí-dé nùu cudana cundáhu iní ñáhá-güedë cuáñaha-güedë nchaa sá xíní ñuúhu-dé. ⁴ Te ñátnúni ní ndée tucu-dé bàrcú cuáháⁿ-ndí. Te ío níhi táchí te ñá ní ñáña-xi caca ndáá bàrcú, te ní sáháⁿ bàrcú ndée yatni yuhu distritú Chìpré, te distritú-áⁿ cáá cuádava xití làmár, te xíãⁿ ñá túú cuéhé táchí ní yáha-ndí. ⁵ Te ta yáha-ndí cuáháⁿ, te ní yáha-ndí ñⁿ xio yuhu distritú Cìliciá ndihí yuhu distritú Pànfiliá, te ní sáá-ndí ndée ñuú Mírá ñⁿ ñuú yíndèhu distritú Lìciá.

⁶ Te ní quene té cùu capitáⁿ cuándúcú-dë ingá bàrcú, te ní níhí-dë ñⁿ bàrcú té ñuú Alejándriá, ñúhú ìchi-xi quihíⁿ-xi nacióⁿ Itàliá. Te ní ndicuaca ñaha-dë xii-ndí cuáháⁿ-ndí ní quée-ndí bàrcú-áⁿ, te ní xica-xi cuáháⁿ-xi. ⁷ Te ío cuée cuáháⁿ bàrcú-áⁿ, cuéhé nduu ní xúhuⁿ-xi ichi, te yica-ni ní quexiò-ndí yuhu ñuú Nìdú, te ñá ní ñáña-gá táchí quihíⁿ ndáá bàrcú nùu ní

xícó ndùú-xi. Te ní yáha-ndí ìⁿ xio yuhu distritú Crètá núú ñà túú quène vihi táchí, te òⁿ ni cuádava tucu làmár cáá distritú-án. Te ní yáha-ndí yuhu ñùú Sàlmón, te òⁿ ni Crètá yíndàha-xi ñúú-án.
 8 Te ní yáha-ndí cuáhán-ndí mee-nă núú ràyá distritú Crètá, te ío ní ndoho-ndí ní sáá-ndí ìⁿ xichi núú nání Puértú Váha, yatni vii-ni-gá ñúú Làseá.

9 Te ní cuyaa vihi-ndí ichi, ducaⁿ-ni cùu-ndí ní tnahá yóó cúúⁿ dǎú táchí, te ío úhú yáha bàrcú ñúu na quíhíⁿ-ni-xi. 10 Te ní xáhaⁿ tē Páblú xii-güedé:

—Nchaa-ndo cùndedóho-ndo tnúhu na càháⁿ-í-a. Ío úhú núú na càda yica-o quíhíⁿ-ó ndíhí barcú chí cuíta càrgá te cuíta bàrcú, te cuu-ni iní-xi tnahá-ni mee-o cùú-ó chí cáhá-ó ñúu na ngáumihnu-o xití ndute —càchí-dé xáhaⁿ-dē xii-güedé.

11 Te tée cùu capitán ñá ní sàndáá iní-dé tnúhu ní cáháⁿ tē Páblú. Dico tnúhu ní cáháⁿ tē dàcaca barcú ndíhí xítóhó-xi chí ní sàndáá iní-dé. 12 Te ñá ní tnahá iní-güedé Puértú Váha cuendá sá ñí tnahá yóó cúúⁿ dǎú táchí, te ñá túú dǎhu váha táchí xián, núu vâi-güedé ní cuiní-güedé yáha-güedé quíhíⁿ-güedé sáá-güedé ndée ñúú Fènicé ní cùu. Te yàcáⁿ cundecu-güedé yóó cúúⁿ dǎú táchí cuéi ñá túú càváha vihi, chí nchí nàcuáa yáha bàrcú, te yàcáⁿ quíhu táchí, dico dǎhu-gá. Núu xián ndée

ndiácăⁿ nátàcá bàrcú yóó cúúⁿ dǎú táchí, te òⁿ ni Crètá yíndàha-xi ñúú-án.

Nitùhú làmár cúúⁿ dǎú táchí
 13 Te duha ní quene nuu luha táchí, xián ní sani iní-güedé sá ndácú-güedé quíhíⁿ-güedé, núu ní natava-güedé cáá ndètní ndée bàrcú, te ní xica-xi cuáhán-xi ní yáha-ndí yatni vii yuhu distritú Crètá. 14 Te tnaa-ni ní cuu sá ñí xica bàrcú, te duha ní cunuu dǎú táchí ìⁿ xio yuhu ñùú-án 15 te nchita ichi cuáhán bàrcú. Te ñá ní ndacu-gá-xi quíhíⁿ ndáá-xi nàcuáa cuáhán-xi ní cùu, núu ní dáñá-ndí cuáhán méé-nă bàrcú. 16 Te ní yáha-ndí ìⁿ ñúú nání Cláudá, te ñúú-án cáá cuádava xití làmár. Te ìⁿ xio yuhu ñùú núú ñà túú quène vihi táchí ñí yáha-ndí, te bàrcú líhli sá nchícúⁿ sátá bàrcú cáhnú, chí ní ndacu-ndí ní taxúha-ndí xití bàrcú cáhnú. 17 Te sátá ñí ndacu-ndí ní taxúha-ndí bàrcú líhli, te ní ducuⁿ nuu-güedé yoho bàrcú cáhnú. Te ío ní yùhú-güedé sá yáha bàrcú ndée núú ñúhú cùchí yuhu ñùú Sírté, núu xián ní ndíhí dóó nchítá díquí bàrcú ní nuu nehe-güedé, chí dóó-án ío níhí chindaha táchí, núu xián cuáhán bàrcú ìⁿ xio. Te ní dáñá-güedé ñá túú-gǎ ní dàcaca-güedé, núu cuáhán méé-nă-xi ta chindaha táchí cuáhán. 18 Te ío níhí dǎú táchí, te ñá ní cuiní tnahí-xi yáha. Te nduu úú sá dúcáⁿ ñà túú-gǎ ní dàcaca-güedé bàrcú te ní ngúíta-güedé ní

dángöyo-güedé sá nchídó-xí cuendá cuíní-güedé nduu ñamá-xí. ¹⁹ Te nduu úní ní dǎngoyo-güedé nchaa ndachìuⁿ cánehe chìuⁿ-güedé xití bàrcú. ²⁰ Te cuéhé nduu ñá túú ní xíní-ndí ní chòdí ní nchìcanchii, chí ío níhi ní cuuⁿ dáú táchí, núu ní cáháⁿ-ndí sá vǎ cácu-ndí, chí ndihí-ndí cáhá ní cáháⁿ-ndí.

²¹ Te ní cuu titní nduu ñá túú-gǎ xéxí-ndí, núu xǎⁿ ní ngúnutní té Pǎblú núú-güedé, te xǎhaⁿ-dǎ:

—Quindáá iní-ndó tnǎhu ní cáháⁿ-í, te cundecu nahi-o Crétá ní cùu. Te núu ní tnǎndo tnúhu-í, te vǎ dǎcuíta-o càrgá ndihí dava-gǎ ndàchiuⁿ ni cuu. ²² Te vǎ yùhú-ndó chí vǎ cùú ní ñⁿ-ndo dico bàrcú chí cuíta. ²³ Te nǎha-ndo sá yùhú cáháⁿ ndihí-í Yǎ Ndiǒxí te guíde-í nǎcuáa cáháⁿ-gǎ. Te ñⁿ-ni mee-gǎ ní techìuⁿ-gǎ ñⁿ espíritú xínú cuèchi núú-gǎ ní quixi, ²⁴ te ní cachí-xi xii-í: “Vǎ yùhú-n chí vǎ cùú-n, dico dacuítí quíhíⁿ-n cáháⁿ ndihí-n tǎ Cèsár. Te ní ñⁿ té ndihí-n vǎ cùú, chí ío cùdí iní ñáhá Yǎ Ndiǒxí xii-n”, duha ní cáháⁿ espíritú xínú cuèchi núú-gǎ ní cachí tnúhu-xi xii-í. ²⁵ Núu xǎⁿ càchí tnúhu-í sá vǎ yùhú-ndó, chí sa cùtnuní iní-í sá cádá Yǎ Ndiǒxí nǎcuáa ní cáháⁿ espíritú xínú cuèchi núú-gǎ. ²⁶ Te mee táchí chin-daha-xi bàrcú daquíhíⁿ-xi ndéé yuhu ndute —cachí té Pǎblú xǎhaⁿ-dǎ xii-güedé.

²⁷ Te sa ní cuu sáhúⁿ nduu sáhúⁿ niú sá ní ngúíta-xi

cùuⁿ dáú táchí, te ñá túú-gǎ dǎcaca-güedé bàrcú, chí mee-nǎ táchí tá chìndaha-xi bàrcú cuáháⁿ núu ndute lámár Àdríá. Te sátá ní cuu dava niú, te ní guíde cuendá cue té dǎcaca bàrcú sá tá cùyatni-güedé ñuhu yìchí. ²⁸ Te ní chicuáhá-güedé ná daha-gǎ mètrú néhé-xí sǎ cùnú xití ndute cuendá cutnùní iní-güedé sá tá cùyatni-xi ndéé yuhu lámár, te nèhe-xi ócò sáhúⁿ ñⁿ-ni-gǎ mètrú. Te ní xica tucu bàrcú luha-gǎ, te dǎtnuní ní chicuáhá tucu-güedé, te xíaⁿ néhé-xí ócò úsá-ni-gǎ mètrú. ²⁹ Te ní yùhú-güedé sá candaundeé-xi cava, te ní queheⁿ-güedé cúmí caá náhnú sǎ nchìcúⁿ yoho, te ní dáquée-güedé xití ndute ndǎa sátá bàrcú, te dǎtnuní ní ngúíñí-xi ñá ní xìca-gǎ-xi, te ní cuíní-güedé sá òré-ni túndaá ní cùu. ³⁰ Te cue té dǎcaca bàrcú ní natava-güedé bàrcú líhli dǎndée-güedé núu ndute ní cùu, te ní cachí-güedé sá quíhíⁿ-güedé ndǎa núu bàrcú dàquée-güedé úú-gǎ caá cuendá cuita candeé-xi bàrcú cáhnú cuendá sá vǎ cáca-xí. Te cuíní-güedé dandáhú-güedé dava-gǎ nchúhú cue té ñuhu ndihí-güedé bàrcú, chí ní ndatnúhu-güedé sá cùnú-güedé ní cùu. ³¹ Te té Pǎblú ní xǎhaⁿ-dǎ xii té cùu capitáⁿ ndihí dava-gǎ sandàdú:

—Te núu na dǎndóo ñaha cue té dǎcaca bàrcú cunu-güedé, te vǎ cácu-o —càchí-dé xǎhaⁿ-dǎ.

³² Te sá dúcáⁿ ñí xáhaⁿ-dě nũu ní sáháⁿ sandádúⁿ xehndé-güedé yoho nchicúⁿ bàrcú lìhli dǎngáúñihnu-güedé xití ndute cuáháⁿ-xi.

³³ Te váha váha-ni ta tũndaá cuáháⁿ, te ní xáhaⁿ tē Pǎblú:

—Sa ní cuu sáhúⁿ nduu ñá túú tñahí xèxi-ndo sá ndihú iní-ndó. ³⁴ Te vitna yáchí-ndó, chí caxi-ndo cuendá naníhí ndéé-ndó, te vá yuhú-ndó chí ñá túú ñá tñahá ni ñⁿ-ndo — cachí-dé xáhaⁿ-dě xii-güedé.

³⁵ Te sátá dúcáⁿ ñí cáháⁿ-dé, te ní queheⁿ-dé ñⁿ pǎá, te ní ndacáⁿ táhú-dě núú Yǎ Ndióxi, te núú-güedé nchaa-güedé ducaⁿ ñí quide-dé, te dǎtnùní ní táhú-dě luha ní xexi-dé. ³⁶ Te ducaⁿ te dǎtnùní ní cuyi-güedé ní xexi-güedé nchaa-güedé. ³⁷ Te úú

çiendú únídico sáhúⁿ ñⁿ-ndí ñúhú bàrcú núú tñahá té Pǎblú, te nchaa-ndí ní xexi ndihí-ndí-dé. ³⁸ Te ní xexi-ndí ní ndahá xití-ndí. Te dǎtnùní ní ngúita-güedé ní tava-güedé nchaa ngohnchi triú ní dǎngoyo-güedé xití ndute cuendá nduu ñamá-gá bàrcú.

Ní dáhu bàrcú xití lámár

³⁹ Te sátá ñí tũndaá, te ñá ní cùtnuní-gá iní-güedé ndéé cúú-xí núú ñí sáá-güedé, te ní xiní-güedé ñⁿ xichi núú ñí xícó ndúú luha yuhu lámár, te vai vihi cúchí dǎndáá-xí yuhu ndute, te xíaⁿ ñá túú dǎcandá víhí tǎchí ndute. Te ní ndatnúhu-güedé sá ndácú-güedé dacaca-güedé bàrcú quihíⁿ-xi ndéé núú ñúhú cùchí. ⁴⁰ Te xíaⁿ núu ní sáháⁿ-güedé ní xehndé-güedé

nchaa yoho nchicúⁿ caá tǎcandéè bàrcú ní ndóo xití lámár, te ní nadatáyá-güedé vítú sǎ dácúico-xi bàrcú, te ní nacata caa-güedé ñⁿ dóo ñíquí bàrcú, te ta chìndaha tǎchí cuáháⁿ yuhu lámár tá cùyatni-xi ñuhu yichí cuáháⁿ. ⁴¹ Te ndécu ñⁿ xichi ní natacá víhí cùchí xití ndute, te xíaⁿ ñí nguíndüxi nihnu bàrcú-güedé, te ní cuti-ñi-xi xití cúchí, te ñá ní ñíhí-gǎ-güedé nàcuáa cada-güedé nene-xi. Te ío níhi ní dǎcandá tǎchí ndute, te ní chúcu ndéé-xi ndàa sátá bàrcú, te ní ndihí ní táhú-xí. ⁴² Te cue sandádú ní xitnàha-güedé sá cáhni-güedé nchaa cue téé ní xíhi vecaá cuendá sá vǎ quihíⁿ-güedé núú ndute te cunu-güedé. ⁴³ Te téé cùu capitáⁿ ñá ní dàña-dé cahni-güedé cue téé ní xíhi vecaá, chí ñá ní cùndee iní-dé cahni-güedé tñahá té Pǎblú. Te ní xáhaⁿ-dě xii-güedé sá cué téé xícuu cada quihíⁿ núú ndute te na yǎha-güedé ndute quene-güedé yuhu lámár. ⁴⁴ Te dava cue téé ñá cúú cada, ní xáhaⁿ-dě nanducu-güedé vítú ñí àdi vítú ñí táhú sǎ ñí xíhi bàrcú, te núú xíaⁿ caundodo-güedé yáha-güedé ndute quene-güedé ndéé yuhu lámár. Núu duha ní cuu ní cácu-ndí nchaa-ndí.

28

Té Pǎblú ndécú-dě ñuu Mǎltá cáá cuádava lámár

¹ Te sátá ñí cácu-ndí ní nene-ndí ñuhu yìchí, te ní níhí-ndí tñúhu nàcuáa

nàni ñuú núú ñí sáá-ndí, te ñuú-án nání-xí Máltá, te càa-xi cuádava làmár. ² Te ío quide víxiⁿ-xi cuendá ío cùuⁿ dáú. Te ñáyiú ñuú-án ñí cundàhú iní ñáhã-yu xii-ndí, ní dátñahá-yu ñuhú te ní cana ñahá-yu ní sáháⁿ-ndí ní nacuídí-ndí. ³ Te té Páblú dátacá-dé nducú, te tñahá-ñi ñí cóó dèéⁿ ñí tñi nihnu-dé-di, te òré cuáháⁿ ndaha-dé chucu-dé núú ñuhú, te ní ñáni-di cahni, te ní ndee-di xití nducú ní sándú-di ndaha-dé, te ní xexihaⁿ-di xii-dé. ⁴ Te nchaa ñáyiú ndéhé-yu sá tácãndé-di ndaha-dé, te ní ngúita-yu ní xitñahá-yu:

—Váa ndíyi ní sañni té-a, te ñá ní xihí-dé làmár, te dacuití sá cùú-dé vitna, chi sa ñaha Yá Ndiõxí ná ní quide-dé ñuyíú-a —càchí-yu xitñahá-yu.

⁵ Te té Páblú ní quidi-dé ndaha-dé ní ngaunihnu-di núú ñuhú, te ñá túú tñahí ná ní cùu núú ñí xexi-di. ⁶ Te ñáyiú ñuú-án xindéhé-yu núú daquihíⁿ-xi chuhúⁿ àdi nduá-dé cuú-dé. Te naha ñí xindéhé ñahá-yu núu nása cada ñaha-xi xii-dé, te ñá túú tñahí ná ní quide ñaha-xi, te ní xitñahá-yu:

—Váa ndiõxí cúú tée-a núú dácáⁿ ñá túú tñahí ná ní quide-xi ndaha-dé núú ñí xexi cóó —càchí-yu xitñahá-yu.

⁷ Te yatni núú dúcáⁿ ñí xexihaⁿ cóó-ãⁿ cáá ñuhu xitu téa nàni Publiú, te téa-án táxi tñuní-dé ñihí ñuú cáá cuádava xití làmár núú ndécú-ndí nduu-ãⁿ. Te ío váha

iní-dé chi ní cana ñaha-dé ní sáháⁿ-ndí ní xindecu-ndí úní nduu vehe-dé. ⁸ Te tátá tẽ Publiú-án cáá-dé cùhú-dé ñuhú-dé cahni, te tñahá-dé daxi. Te té Páblú ní sáháⁿ-dé núú cáá-dé, te ní cáháⁿ ndihí-dé Yá Ndiõxí, te ní sacáⁿ ndodo-dé ndaha-dé díquí tée cùhú-án, te ducaⁿ-ni ñí quide-dé, te ní ndúha téa cùhú-án. ⁹ Te sátá dúcáⁿ ñí quide té Páblú, te ní quixi nchaa ñáyiú cùhú núú ndécú-ndí, te ní quide tátña ñaha tẽ Páblú xii-yu te ní ndúha-yu. ¹⁰ Te òré ndécú-ndí xián, te vãi sá ñí taxi táhú-güedé, te òré ní xica-ndí ní taxi tucu-güedé nchaa sá xíní ñuhu-ndí ichi.

Té Páblú ní quexiò-dé ñuú Rómá

¹¹ Te yacáⁿ ní xindecu-ndí úní yóó, te sa ndècu ñí barcú téa ñuú Alejandriá òré ní quexiò-ndí, te ní xindecu-xi ñihí yóó cúúⁿ dáú táchí. Te núú-xi càndodo sandú sá dánàni-güedé Cástór ndihí sándú sá dánàni-güedé Pólux, te xití bàrcú-án ñí quée-ndí cuáháⁿ-ndí. ¹² Te ní quexiò-ndí ñuú Siràcusá, te yacáⁿ ní xindecu-ndí úní nduu. ¹³ Te ní xica tucu bàrcú cuáháⁿ-xi, te ní quexiò-ndí ñuú Règiú. Te nduu tñé duha ní quene nuu táchí. Te ní xica bàrcú cuáháⁿ-xi, te ndéé nduu úú ní quexiò-ndí ñuú Pùteolí. ¹⁴ Te yacáⁿ ní naníhí tñahá-ndí ndihí ñáyiú sándáá iní tñuhu Jèsús, te ní cachí-yu sá cùndècu-ndí úná

nduu, núu xíáⁿ ní xíndecu-ndí úná nduu ndihí-yu. Te ní xica tucu bàrcú cuáháⁿ-xi, te ní quexìo-ndí ñuú Ròmá. ¹⁵ Te ñáyiu ròmá ñáyiu sàndáá iní tnúhu Jèsús, ní níhí-yu tnúhu sá cuáháⁿ-ndí, te ní quixí-yu ní quixi tnahá ñáhã-yu ichi. Te davá-yu ní naníhí-ndí ñuú Fòrú Àpiú, te davá-yu ní naníhí-ndí ñuú Úní Tàbernás. Te òrè ní xiní té Pàblú nchaa ñáyiu véxi tnahá ñáhá xì-ndí, te ndee ndèe ní cuu iní-dé, te ní ndacáⁿ táhú-dě núú Yá Ndiòxí sá dúcáⁿ nĩ quidé-yu. ¹⁶ Te sátá nĩ quexìo-ndí ñuú Ròmá, te cue tée cùchiuⁿ ní xáhaⁿ-güedě xii té Pàblú sá cùndècu diⁱⁿ-dé, te ní xíndeé ñáhá cuàa sandadú xii-dé.

Té Pàblú càháⁿ-dé tnúhu Yá Ndiòxí ñuú Ròmá

¹⁷ Nduu úní sá nĩ quexìo té Pàblú, te ní cana-dé cue tée cùnuu núu ñáyiu isràél ndécú ñuú Ròmá, te ní sáháⁿ-güedě núu ndécú-dě, te ní xáhaⁿ-dě:

—Nchòhó cue tée isràél, càchí tnúhu-í sá ñã túú nã ní quide-í ní ñⁿ ñáyiu cútnáhá ní xíndecu-í ñuú Jerusalén. Te ñã túú ní càháⁿ cuèhé-í sá quidé-yu nchaa nàcuáa ní xóo cada cue ñaní tnáhá-ó nĩ xíndecu ndéé sanaha, te ñã túú nã ní quide-í te ní tnⁱⁱ ñaha-güedě ní sáha cuèndá ñáhá-güedě xii-í núu cuè tée ròmá, cue tée ndècu yacáⁿ. ¹⁸ Te cue tée-áⁿ nĩ ndúcú tnúhu-güedě núu ndáá ndècuéchi-í, te ní cutnùní iní-güedé sá ñã túú nã ní quide-í, te xíáⁿ cuìní-güedé queñuhu ñaha-güedě xii-í

vecaá ní cùu. ¹⁹ Te diu-ni cue tée isràél ñã ní dàña-güedé cácu-í, chi cuìní-güedé sá cáhni ñàha cue tée ròmá, cue tée xíndecu yacáⁿ xii-í ní cùu, te xíáⁿ núu ní xáhaⁿ-í sá quixì-í càháⁿ ndihí-í té Cèsár cuèndá iha cada ndáá mée-dé cuèndá-í, te vá yòo ñⁿ tee-í cuéchi. ²⁰ Núu xíáⁿ ní cana ñaha-í xii-ndo cuèndá cunaha-ndo nàcuáa ní cuu. Te ní xáhaⁿ-í sá sàndáá iní-í sá ndótó ñáyiu ní xihí, te diu-ni ducaⁿ càháⁿ dava-gá ñáyiu isràél, te sá dúcáⁿ nĩ càháⁿ-í, te ní chihi ñaha-güedé vecaá, te xíndeé ñáhá-güedě ndéé vitna —càchí té Pàblú xáhaⁿ-dě xii-güedé.

²¹ Te ní xáhaⁿ-güedě xii-dé:

—Ñã túú tnàhí tutú ní tèndaha cue tée distritú Jùdeá quixi cuèndá-n. Te ni cuè tée isràél ñã túú ní quixi-güedé càháⁿ cuèhé-güedé cuèndá-n.

²² Te cuìní-ndí cundedóho-ndí nása cunduu tnúhu càháⁿ-n, chi sa ní níhí-ndí tnúhu sá ncháá xichí ío xicáháⁿ cuèhé-yu cuèndá nchaa ñáyiu sàndáá iní tnúhu Jèsús —càchí-güedé xáhaⁿ-güedě xii té Pàblú.

²³ Te ní xáhaⁿ-güedě nduu cùyáchí-güedé te quixi-güedé cundedóho-güedé dava-gá cuèndú càháⁿ té Pàblú. Te ní tnahá nduu ní ndatnúhu-güedé quíhíⁿ-güedé núu quidé vèhe-dé, te vãi-yu ní sáháⁿ-yu ní xíndedóho-yu tnúhu ní càháⁿ-dé, te nchàca nchaa ní càháⁿ ndihí-dé-yu. Te ní xáhaⁿ-dě xii-yu sá ndíi Moisés ndihí dava-gá cue tée ní xóo càháⁿ tnúhu Yá Ndiòxí ndéé sanaha nĩ chídó

tnùnì-güedé núú tütú-güedé
 sá díú-gã tendaha-gã Crìstú
 quixi-gã ñuyíú-a. Te ní chídó
 tnùnì-güedé nchaa nàcuáa
 cada-gá, te díu-ni nàcuáa
 càháⁿ tutú-güedé cada Crìstú,
 te ducaⁿ ñi quide-gá cútnàhá
 ní xica cuu-gá ñuyíú-a, núu
 xiáⁿ ní cutnùnì sá díú Jèsús
 cúú-gã Crìstú Yaa ní tendaha
 Yã Ndiöxí ní quixi ñuyíú-a. Te
 núu quindáá iní-yu, te ndíhu
 ndaha ñàha Yá Ndiöxí xií-yu.
 24 Te davá-yu ní sándáá
 iní-yu tnúhu ní cáháⁿ-dé, te
 davá-yu ñá túú ní sándáá
 iní-yu. 25 Te cuendá sá ñã ñiⁿ-ní
 tnúhu ni cáháⁿ-yu, núu xiáⁿ
 cuiní-yu núhú-yu ni cùu. Te
 ní xáhaⁿ tẽ Pãblú sá cündetu
 tnaá-yu cáháⁿ-dé ingá tnúhu,
 te xãhaⁿ-dẽ:

—Ní xáhaⁿ Espíritú Yã
 Ndiöxí xii ndíi Chàíá nàcuáa
 cáháⁿ ndíi núú nchaa ñani
 tnàhá-ó ñi xíndecu ndéé
 sanaha. Te ní cáháⁿ
 Espíritú-gá ñi sá ndáá ní
 xáhaⁿ-xi xii ndíi, te duha ní
 xáhaⁿ-xi:

26 Quíhíⁿ-n te cúñaha-n xii
 ñáyiu:

Nchòhó mee-ni cündedóho-ndo
 tnúhu cáháⁿ Yã Ndiöxí,
 dico ni vã tècú
 tnùnì-ndó.

Te cada-gá titní núú sã vã
 yõ tnàhí ndàcu cada,
 dico ni vã cútnùnì
 iní-ndó nàcuáa ndùu sá
 cádá-gã,

27 chi cuendá sá ïo sàá iní-ndó,
 xiáⁿ ducaⁿ ñà túú sãha-ndo
 cuendá nása cuáháⁿ
 tnúhu cáháⁿ-gá,

chi ñá cuiní-ndó cündedóho-ndo,
 te ni ñã sándáá iní-ndó.

Te ni ñã cuiní-ndó dàña-ndo
 nchaa sá cuèhé sá dúhá
 quide-ndo

cuendá xocàni-gá nchaa xiáⁿ
 iní-ndó,

duha cúñaha-n xií-yu.

Càchí Espíritú-gá xãhaⁿ-xi xii
 ndíi. 28 Te na càchí tnúhu-í sá
 quíhíⁿ cue tée càháⁿ tnúhu Yá
 Ndiöxí cáháⁿ-güedé tnúhu-gá
 núu ñáyiu ñá túú cùu ñáyiu
 isràél, chi ñáyiu isràél ñá
 túú cuiní-yu cündedóho-yu.
 Dico ñáyiu ñá túú cùu ñáyiu
 isràél chi cùdíi iní-yu cünd-
 edóho-yu, núu xiáⁿ naníhí
 tãhú-yu —càchí té Pãblú
 xãhaⁿ-dẽ xií-yu.

29 Te sátá ñi ndíhi cuendú
 ní xáhaⁿ-dẽ, te ní ndeé-yu
 cuánuhú-yu ta ndàtnúhu-yu
 cuáháⁿ.

30 Te úú cuiá ñi xínu ní
 xíndecu té Pãblú ñiⁿ vehe ní
 cháhu-dé. Te ní xóo cáháⁿ
 váha-dé ndíhi nchaa ñáyiu ní
 xóo quíhíⁿ vehe-dé. 31 Te
 ní xáhaⁿ-dẽ sá ndíhu ndaha
 ñàha Yã Ndiöxí xií-yu núu
 quindáá iní-yu tnúhu-gá, te
 vá yõ ñiⁿ ni sàdí yuhu-dé.
 Te mee-ni tnúhu Xítóhó Jesu-
 crìstú ní cáháⁿ-dé núú-yu.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ RÒMÁ

Té Păblú cadúha-dé tutú quihiⁿ ndaha ñáyiú xĩndecu ichi Xítohó Jesucristú ndécú ñuú Ròmá

¹ Yúhú té Păblú xínú cuèchi-í núú Xítohó Jesucristú, chi mee Yă Ndiöxí ní cachí-gá sá cùu-í ìⁿ téé cáháⁿ tnúhu-gá núú ñáyiú, te tnúhu-gá cúu-xí tnúhu sá cáháⁿ năcuáa naníhí táhú-ó, núú ðiu-gá ní tendaha ñaha-gá xii-í xicá cùu-í cáháⁿ-í tnúhu-gá.

² Te ndéé sanaha ñí cachí Yă Ndiöxí sá dàcuítíi sáa nduu ngũndecu ndihí ñáyiú tnúhu-gá. Te ducaⁿ ñí xáhaⁿ-gá xii cue téé ní cáháⁿ tnúhu-gá dāvá-áⁿ ñí chídó tnùní-güedé núú tütú-gá.

³ Te tnúhu-gá sá cáháⁿ-í-a cáháⁿ-xi ðiu-ni cuendá Xítohó Jesucristú Yaá cúu Déhe-gá. Te Déhe-gá-áⁿ cúu-gă ìⁿ ñáyiú, te cùu-gá ñaní tnáhá ndii Dàvií. ⁴ Te cùu-gá Yaá ñá túú tnàhí cuèchi-xi. Te ní xíhí-gá te ní ndoto-gá, te xíãⁿ cútnùní iní-ó sá cúu-gă Déhe Yă Ndiöxí, te ío cahnú cuu-gá.

⁵ Te ðiu-ni Xítohó Jesucristú ní quide-gá ní nduu táhú-í núú Yă Ndiöxí sá cáháⁿ-í tnúhu-gá núú cuè ñáyiú ñuyíú-a cuendá quíndáá iní-yu tnúhu-gá te canchicúⁿ nihnú-yu cadá-yu nchaá năcuáa cáháⁿ-xi, te

ducaⁿ ío cuu cahnú-gá. ⁶ Te tnáhá nchòhó cúu-ndó ñáyiú sa nchícúⁿ nihnu quide-ndo nchaá năcuáa cáháⁿ tnúhu-áⁿ, chi ní cachí Yă Ndiöxí sá nchòhó tnáhá tnúhu-ndo ndihí Xítohó Jesucristú. ⁷ Te nchòhó ñáyiú xĩndecu ñuú Ròmá, ñáyiú ío cùu iní ñáhá Yă Ndiöxí, cadúha-í tutú-a daquixi-í ndaha-ndo. Te ðiu-ni nchòhó cúu-ndó cuè ñáyiú ní cachí Yă Ndiöxí cada ndáá cundecu-ndo núu-gă. Te xicáⁿ táhú-í núú Tátá-ó Dütú Ndiöxí ndihí núú Xítohó Jesucristú sá ío na chĩndee chitúu ñaha-gă xii-ndo, te ducaⁿ ndi nduú-gá ná cada te ío váha cuu iní-ndó cundecu-ndo.

Té Păblú cuiní-dé quihiⁿ ngoto-dé cue ñáyiú xĩndecu ichi Xítohó Jesucristú ndécú ñuú Ròmá

⁸ Te díhna nuu-gă cächí tnúhu-í xii-ndo sã ío ndăcáⁿ táhú-í núú Yă Ndiöxí cuendá sá ío sândáá iní-ndó-gă, te nchaá ñáyiú ñihí-yu tnúhu sá dúcáⁿ quide-ndo. Te Xítohó Jesucristú dáyăha-gá nchaá tnúhu cáháⁿ-í núú Yă Ndiöxí. ⁹ Te ndi tnáhá òré cáháⁿ ndihí-í Yă Ndiöxí ducaⁿ-ni xicáⁿ táhú-í núu-gă cuendá-ndó, te mee-gă náhá-gă sá cáháⁿ ndáá-í, te ðiu-ni núu-gă xínú cuèchi-í ñi yùhu ñi iní-í, chi cáháⁿ-í năcuáa ní quide Déhe-gá Xítohó Jesucristú cuendá naníhí táhú-ó. ¹⁰ Te xicáⁿ táhú-í núú Yă Ndiöxí sá núu mee-gă ná cächí te sáá ìⁿ nduu quixi coto ñaha-í xii-ndo. ¹¹ Chi ío cuiní-í cundecu ndihí ñaha-í xii-ndo

dànehé ñàhà-í ìⁿ ùú tnúhu nàcuáa ío-gá chindee ñàha Espíritú Yá Ndiòxí xii-ndo, te ducaⁿ ío-gá cuíta nducu ndèe-ndo cada-ndo nchaa nacuáa cuíní-gá. ¹² Te ío chí ná cuáha tnàha-o tnúhu ndee ìní cundecu-o ìchi-gá, chí nchòhó ndihi yúhú ío sàndáá ìní-ó-gá.

¹³ Te nchòhó ñáyíu ndècu ndihi-í ìchi Xítóhó Jesucristú na càchí tnúhu-í xii-ndo sá dúcáⁿ-ní ío sàni ìní-í quixi coto ñàha-í xii-ndo. Te cuíní-í sá òré quixi coto ñàha-í xii-ndo, te v́a cuíta chiúⁿ quixi-í dàtná quidè-í òré sãngoto-ínchaa ñáyíu dava-gá ñúú ñá túú xíta chiúⁿ-í chí ío váha sáhúuⁿ-yu tnúhu càháⁿ-í, dico ñá ndácù-í quixi-í quixi coto ñàha-í xii-ndo. ¹⁴ Te yúhú yídiquí-í càháⁿ-í tnúhu Xítóhó Jesucristú núú nchàa ñáyíu càháⁿ tnúhu griégú, ndihi núú nchàa ñáyíu càháⁿ dava-gá núú tnúhu, ndihi núú nchàa ñáyíu túha, ndihi núú nchàa ñáyíu ñá túú túha. ¹⁵ Te cuëndá sá dúhá yídiquí-í càháⁿ-í tnúhu-gá, xiáⁿ ío cuíní-í danèhé ñàhà-í xii nchaa nchòhó ñáyíu ñúú Rómá nàcuáa ndùu tnúhu sá càháⁿ nàcuáa naníhí tàhú-ó.

Ío cùnūu tnúhu Xítóhó Jesucristú

¹⁶ Te yúhú ñá túú tnàhí cùcahaⁿ núú-í càháⁿ-í tnúhu Xítóhó Jesucristú, chí cùu-xi tnúhu ío cùnūu, chí Yá Ndiòxí ní cachí-gá sá ncháá ñáyíu na quíndáá ìní-xi tnúhu-áⁿ te naníhí tàhú-yu. Te ní cachí-gá sá dǐhnānuu-gá ñáyíu isràél ngúndecu ndihí-yu tnúhu-áⁿ

te dàtnùní ngúndecu ndihí ñáyíu ñá túú cùu ñáyíu isràél. ¹⁷ Te tnúhu-áⁿ dánèhé ñàhà-xí xii-o sá cúdiu-o núú Yá Ndiòxí te núu mee-ni sá quíndáá ìní-ó-gá dàtná càháⁿ-xi núú tütú-gá núú càchí-xi: “Nchaa ñáyíu sàndáá ìní ñàhà xii Yá Ndiòxí cúdiú-yu núú-gá, te ndècu ndihí ñàhá-yu xii-gá”, duha càchí-xi núú tütú-gá.

Nchaa ñáyíu ndècu ñuyíú ndècuéchi-yu

¹⁸ Te ndéé andiu tèndaha Yá Ndiòxí sá uhú quixi sá cúu-xi nchàa ñáyíu ñá túú quide ndáá núú-gá, ñáyíu quide nchaa sá cuèhé sá dúhá. Te cuëndá nchaa sá quidè-yu-áⁿ xiáⁿ ñá túú cuíní-yu tnúu-yu tnúhu ndáá tnúhu Yá Ndiòxí cuëndá cuu-xi ìⁿ sá v́aha sá cúu-xi-yu. ¹⁹ Te cuèi ducaⁿ quidè-yu dico cùtnuní ndáá ìní-yu nàcuáa ndùu sá sání ìní Yá Ndiòxí ndihí nàcuáa ndùu sá quidè-gá dàtná cùtnuní ìní nchaa dava-gá-yu, chí diu-gá dánèhé ñàhà-gá xií-yu. ²⁰ Te ni v́a ndácú-ó quíni núú-ó nãsa càa-gá, te ni v́a ndácú-ó quíni-ó nãsa càa ìní-gá, te ni v́a ndácú-ó quíni-ó nãsa quide-gá táxi tnúni-gá nchaa nduu nchaa quíú. Te cuèi ducaⁿ dico ndéé cùtnàhá ní ngáva ñuyíú nǐ ngúita nchaa ñáyíu tècú tnúni váha-yu nàcuáa ndùu sá sání ìní-gá ndihí nàcuáa ndùu sá quidè-gá te ducaⁿ tècú tnúni-yu cuëndá nchaa sá nǐ cadúha-gá ndèhè-yu ío ñuyíú-a, núu xiáⁿ v́a càchí-yu sá ñá túú cuèchi-yu.

21 Te cuèi ducaⁿ ñi cutnùni iní-yu cuèndá Yá Ndiòxí dico ñá túú cuìní-yu canehé-yu sá yíñuhu núú-gã nàcuáa tàù-xi cunduu. Te ñi ñà túú cuìní-yu ndacáⁿ táhũ-yu núú-gã cuèndá nchaa sá vãha quide ñaha-gá xií-yu, chi mee-ni nchàa sá ñà túú vèdana nàndíhi ñuhu iní-yu. Te quidé-yu dàtná quidé ìⁿ ñáyiu ñá túú ndècu ndihi nchaa sá xìní tnùní-xi. Te uuⁿ-gá uuⁿ-gá tá quidé-yu cuáháⁿ. 22 Te càchí-yu sá cúú-yu ñáyiu ío vãha sàá sá xìní tnùní-xi dico ñá ndàá, chi cúú-yu ñáyiu ío ñi dǐquí-xi. 23 Te ñá túú cuìní-yu cáháⁿ-yu sá ío càhnu cuu Yá Ndiòxí Yáá ndécú nchàa nduu nchaa quiú, chi da nchaa sá ñi cadúha mèe-yu quide cahnú-yu. Te ní cadúha-yu nchaa sá nahá ñáyiu ñá túú cùdíi ndècu ñuyíú-a. Te ní cadúha-yu sá nahá quiú ndàva, ndihi sá nahá quiú sàcuíta ñuhu mee-xi, ndihi sá nahá nchaa dava-gá quiú, nchaa xiáⁿ quidé càhnú-yu.

24 Te xiáⁿ ñuhu ní dáñá Yá Ndiòxí quidé-yu nchaa sá cuèhé sá dúhá sàni iní-yu. Te xiáⁿ ío quide ndihi tnahá-yu sá cuèhé sá dúhá sàcúú-xí yiqui cuñú-yu. 25 Te ducaⁿ quidé-yu chi ñá túú sàndáá iní-yu tnúhu ndàá tnúhu Yá Ndiòxí. Te mee-ni tnúhu ndehnde sàndáá iní-yu, te nèhé-yu sá yíñuhu núú dàva sá ñi cadúha-gá ío ñuyíú-a ndihi dava sá ndèe andiu te quide cahnú-yu, te ñá túú càchí-yu sá mèe-gã ío càhnu

cuu-gá, dico mee-gã xíní ñuhu-xi cáháⁿ-yu sá ío càhnu cuu-gá ñi caa ñi quihíⁿ. Te ndàá ndisa sá ío càhnu cuu-gá.

26 Te sá dúcáⁿ ñà túú quide váha-yu núu xiáⁿ ní dáñá-nã Yá Ndiòxí quidé-yu nchaa sá cuèhé sá dúhá sàni iní mèe-yu. Te dava ñáyiu dǐhí càháⁿ ndihi tnahá-yu ñi mèe dǐhí-yu te ñá túú quidé-yu nàcuáa ní nduu táhũ-yu cadá-yu. 27 Te ñi ducaⁿ xíquide dava cue téé chi sàni cuehé sání dùha iní-güedé sá cúú-xí yiqui cuñú-güedé ñi mèe tnahá téé-güedé, chi càháⁿ ndihi tnahá ñi mee-güedé te ñá túú quide-güedé nàcuáa ní nduu táhũ-güedé cada-güedé, te sá dúcáⁿ quide-güedé te ñá túú tnahí cùu váha iní-güedé ndécú-güedé, te ducaⁿ tnahí tàù-xi ndoho-güedé cundecu-güedé.

28 Te ñá túú tnahí ñuhu iní-yu Yá Ndiòxí núu xiáⁿ duuⁿ duuⁿ ní dáñá ñihu ñaha-gá xií-yu sàni cuehé sání dùha iní-yu, te quidé-yu nchaa sá ñà túú tàù-yu cadá-yu. 29 Te nchaa núú sã cuèhé sá dúhá cùnuu quidé-yu. Te cue téé càháⁿ ndihi-güedé ñáyiu dǐhí te ñá díú ñàdǐhí-güedé cúú-yu. Te ñi ducaⁿ xíquide cue ñáyiu dǐhí chi càháⁿ ndihí-yu cue téé te ñá díú yǐ-yu cùu-güedé. Te mee-ni sã ñà túú vãha quidé-yu sá cúú-xí tnahá ñáyíú-yu, te xihó-yu cundecu ndihí-yu sá ndécú ndihi dava-gá tnahá ñáyíú-yu, te ío sàni cuehé

sání dùha iní-yu sá cúu-xí
 tnàha ñáyíu-yu, te ío cuédú
 ínì-yu, te sàhni tnahá-yu,
 te ío plètú-yu, te dándahú
 tnáhã-yu, te cùu úhú iní-yu
 cue tnàha ñáyíu-yu, te ío yiti
 yùhú-yu. ³⁰ Te càháⁿ cuèhé-yu
 cuèndá nchaa dava-gá tnàha
 ñáyíu-yu, te cùu úhú iní-yu
 Yá Ndiõxí, te xio xio cuínì-yu
 cunuu tnúhu-yu, te mee-ni
 sàni iní-yu sá ïo váha cun-
 duú-yu, te ío quíde cahnú-yu
 mèé-yu, te ío sàni iní-yu sá
 cádá ùhú-yu tnàha ñáyíu-yu,
 te ñá túú sàndáá iní-yu ni
 tãtã-yu ni nãñã-yu. ³¹ Te ñá
 túú tècú tnùnì-yu sá vãha,
 te ñá túú quidé-yu ìⁿ sá
 càháⁿ-yu, te ñá túú cùu iní-yu
 nì ñáyíu cùu ndì meé-yu, te
 ni dàva-gá tnàha ñáyíu-yu, te
 ñá túú quíde cahnu iní-yu ìⁿ
 sá cúmãní núú tnáhã-yu, te ni
 ñà túú cùndahú iní-yu tnàha
 ñáyíu-yu. ³² Te Yá Ndiõxí
 ní cachí-gá sá ncháá ñáyíu
 ducaⁿ xíquide quíhìⁿ-yu núú
 ùhú núú ndàhú. Te xìnì-yu sá
 Yá Ndiõxí daquìhìⁿ ñáhã-gã
 xii-yu núú ùhú núú ndàhú sá
 dúcãⁿ quidé-yu, dico uuⁿ-gá
 quidè-yu chi váha-gá cúu
 iní-yu cue ñáyíu quíde datná
 quidé mèé-yu.

2

*Yá Ndiõxí cada ndáá-gá
 cuèchi nchaa ñáyíu ndècu ñuyíú*

¹ Te nchòhó ñáyíu càchí
 sá ïo ndècu cuèchi dava-gá
 ñáyíu tnàhá-ndó ïo ndècu
 cuèchi-ndo cuèi nágá ñáyíu
 cùu-ndo, chi tnàhá-ndó
 quíde-ni-ndo nchaa nacuaá

quíde dava-gá ñáyíu
 càchí-ndó ndècu cuèchi-xi,
 te sá dúcãⁿ càháⁿ-ndó sá
 ndècú cuèchi ñáyíu-áⁿ te
 dàcaa-ndo cuèchi díquí-ndó
 chi tnàhá-ndó quíde-ndo
 datná quidè-yu. ² Te nchoo
 xìnì-ó sá Yá Ndiõxí ío váha
 cùtnunì iní-gá nàcuáa cada
 ndáá-gá cuèchi ìⁿ ìⁿ nchoo
 ñáyíu ndècu ñuyíú-a, chi
 daquìhìⁿ-gá nchaa ñáyíu
 quíde nacuaá ní càháⁿ-í
 núú ùhú núú ndàhú. ³ Te
 nchòhó ñáyíu ìⁿ-ni quíde
 ndìhi ñáyíu càchí mèé-ndó
 sá ndècú cuèchi-xi dacuítí sá
 ná chãhu-ndo núú Yá Ndiõxí
 sá dúcãⁿ quíde-ndo. ⁴ Te ñá
 túú cùu váha iní-ndó sá Yá
 Ndiõxí cùndahú iní ñáhã-gã
 xii-ndo, te ni ñà túú cùu váha
 iní-ndó sá ïo cuínì-gá cada
 cahnu iní-gá nchaa sá ñà
 túú váha quíde-ndo, te ni ñà
 túú quíde cuèndá-ndó sá Yá
 Ndiõxí quidé váha ñaha-gã
 xii-ndo cuèndá cuínì-gá sá
 nchòhó ndixi túu iní-ndó
 sá ñà túú quíde váha-ndo
 ndècu-ndo. ⁵ Te nchòhó
 cúu-ndó ñáyíu ío sàá iní-xi,
 chi ñá túú cuínì-ndó ndixi
 túu iní-ndó sá ñà túú quíde
 váha-ndo ndècu-ndo, te xiãⁿ
 núú ío-gá tá cùu vai tnúndòho
 sá cúu-xí-ndó. Te na sàá
 nduu tnúhu ndòho tnúhu
 ndàhú te ío ndòho-ndo, chi
 Yá Ndiõxí cada ndáá-gá
 nàcuáa ndùu cuèchi-ndo,
⁶ Te dàvã-áⁿ cada ndáá Yá
 Ndiõxí nchaa nàcuáa ndùu
 nchaa sá nì quíde ìⁿ ìⁿ ñáyíu
 ndècu ñuyíú-a. ⁷ Te nchaa
 ñáyíu nchìcúⁿ nihnu-ni quíde
 mee-ni sá váha, ñáyíu-áⁿ nduu
 táhũ-yu cundecú-yu ndìhi

Yá Ndiõxí nì caa nì quíhíⁿ, te ducaⁿ quide váha-yu chi cuíní-yu sá Yá Ndiõxí cuu váha iní ñáhá-gã xii-yu, te cuíní tucú-yu nduu táhũ-yu núú ïo váha càa ndecu Yá Ndiõxí cundecú-yu nì caa nì quíhíⁿ. ⁸ Te ío cùdééⁿ-gã núú nchàa ñáyiú ñùhu iní mee-nì sá cúú-xí mèe-xi, te ñá túú sàndáá iní-yu tnúhu ndáá chi mee-nì sá cuèhé sá dúhá quidé-yu. ⁹ Te nchaa ñáyiú ducaⁿ xíquide ío ndíhú iní-yu. Te díhna-gá ñáyiú isràél ngúíta-xi ndohó-yu, te dàtnùnì ngúíta-xi ndoho nchaa ñáyiú ñá túú cùu ñáyiú isràél. ¹⁰ Te nchaa ñáyiú ní quide váha, te Yá Ndiõxí cada-gá te ngúndecú-yu núú ïo váha càa ndecu-gá, te cachí-gá sá nì quide váha-yu, te ío váha cuu iní-yu cundecú-yu. Te díhna-gá ñáyiú isràél ñáyiú ní quide váha ducaⁿ càda ñaha-gá xii-yu, te dàtnùnì ducaⁿ càda ñaha-gá xii ñáyiú ñá túú cùu ñáyiú isràél ñáyiú ní quide váha.

¹¹ Te ñá túú quide cuendá-gá cuèi náí ñáyiú cúú-yu. ¹² Te nchaa ñáyiú ndècu ndíhí nchaa tnúhu ní chídó tnùnì ndíi Moisés, Yá Ndiõxí cada ndáá-gá cuèchi-yu nàcuáa càháⁿ nchaa tnúhu-áⁿ. Te nchaa ñáyiú ñá túú ndècu ndíhí tnúhu ní chídó tnùnì ndíi-áⁿ, Yá Ndiõxí vá cáda ndáá-gá cuèchi-yu nàcuáa càháⁿ nchaa tnúhu-áⁿ. Dico nchaa ñáyiú quide nándi sá cuèhé sá dúhá dàcutíí cuíta nihnú-yu cuèi ndècu ndíhí-yu tnúhu ní chídó tnùnì

ndíi Moisés àdi ñá túú ndècu ndíhí-yu. ¹³ Te nchaa ñáyiú dícó-nì sàcúndedóho nchaa tnúhu ní càháⁿ ndíi Moisés te ñá túú tníi-yu, ñáyiú-áⁿ ñà túú cùdúú-yu núú Yá Ndiõxí, dico nchaa ñáyiú tníi nchaa tnúhu ní càháⁿ ndíi, ñáyiú-áⁿ càchí Yá Ndiõxí sá cúdúú-yu núú-gã, chi ñá túú-gã cuèchi-yu ndècu núú-gã. ¹⁴ Te nchaa ñáyiú ñá túú ndècu ndíhí tnúhu ní chídó tnùnì ndíi Moisés, te núú quidé-yu nchaa nàcuáa ní càháⁿ ndíi te cùu-xi ìⁿ sá sání tnàhí iní mèe-yu cadá-yu, te sá sání iní-yu-áⁿ cúú-xí ìⁿ tnúhu váha sá sánú ìchi ñaha xii-yu nàcuáa cada váha-yu cundecú-yu. ¹⁵ Te sá dúcáⁿ quidé-yu xíãⁿ cùtnùnì sá sání iní-yu dàtná càháⁿ tnúhu ní chídó tnùnì ndíi Moisés cada ñáyiú isràél, te ío váha cùtnunì iní-yu nchaa nàcuáa quidé-yu chi ndíxi túu iní-yu òré ñá túú quide váha-yu. ¹⁶ Te sáá nduu te Yá Ndiõxí cúñaha-gã xii Xítóhó Jesucristú cada ndáá-gá nchaa cuèchi ñáyiú, nchaa sá sání iní mèe-yu ndùu yuhu, te cada-gá dàtná càháⁿ tnúhu sá sánú ìchi ñaha xii-o nàcuáa naníhí tãhú-ó, tnúhu sá dánèhé ñáhà-í xii-ndo.

Cuendá ñáyiú isràél ndíhí cuendá nchaa tnúhu ní chídó tnùnì ndíi Moisés

¹⁷ Te nchòhó ñáyiú isràél nchaa-ndo cùu-ndo ndí mee-í, te càchí-ndó sá nchícúⁿ nihnu-ndo quide-ndo nchaa tnúhu ní càháⁿ ndíi Moisés núú xíãⁿ ndécú vãha-ndo, te càchí-ndó sá ïo càhnu cuu-ndo sá ndécú ndíhí-ndo Yá Ndiõxí. ¹⁸ Te cùtnunì iní-ndó nchàa

nacuáa cuení Yă Ndiöxí cada-ndo, te sá dúcáⁿ nchicúⁿ nihnu-ndo quide-ndo nacuáa cáháⁿ tnúhu-áⁿ xiăⁿ cùtnùní iní-ndó nchaa sá ïo-gá váha xìní ñuhu-xi cada-ndo. ¹⁹ Te cächí-ndó sá ïo váha xìní-ndó cànuiichi-ndo nchaa ñáyiu ñá túú cùtnuní iní-xi, te cächí tucu-ndo sá ïo váha xìní-ndó nà canu ichi-ndo nchaa ñáyiu ndècu ichi cuehé ichi duha. ²⁰ Te sànu ichi-ndo nchaa ñáyiu ío ñi ñíquí-xi, ndihí nchaa ñáyiu vitna ta tècú tnùní nchaa sá váha, te ducaⁿ quide-ndo chi ndècu ndihí-ndo nchaa tnúhu ní chídó tnùní ndíi Moisés, te tnúhu-áⁿ cúú-xí tnúhu ndáá, chi sànu ichi ñaha-xi xii-ndo nacuáa cada-ndo. ²¹ Te nchòhó dàcuaha-ndo ñáyiu nàcuáa cadá-yu, te mee-ndo ñá túú dàcuaha-ndo cada-ndo nchaa nacuáa tàú-xi cunduu, te xăhaⁿ-ndo xii-yu sá vă cúú dùhú-yu te mee-ndo dùhu-ndo. ²² Te dàcuaha-ndó-yu sá cuè téé vá cúú cáháⁿ ndihí-güedé ñáyiu dìhí te núu ñá díú ñàdihí-güedé cúú-yu, te ducaⁿ-ni cuè ñáyiu dìhí, vá cúú cáháⁿ ndihí-yu téé te núu ñá díú yï-yu cùu-güedé. Te nchaa sá xăhaⁿ-ndo vă cúú càda ñáyiu te mee-ndo quide-ni-ndo, te xăhaⁿ-ndo xii-yu sá vă cánèhé-yu sá yíñùhu núú nchaa sá cächí-yu cùu ndióxí-yu, te mee-ndo nèhé-gá quidé-ndó, chi dùhu-ndo nchaa sá ndécú venúhu. ²³ Te cächí-ndó sá ïo cùnuu nchaa tnúhu ní chídó tnùní ndíi Moisés, te ñá túú quide-ndo nchaa

nacuáa ní cáháⁿ ndíi, te sá dúcáⁿ quide-ndo-áⁿ te dàquee tíhú-ndó Yă Ndiöxí. ²⁴ Te quèe ndáá-xi nàcuáa cáháⁿ-xi núú tùtú Yă Ndiöxí nàcuáa quide-ndo-áⁿ núú cächí-xi sá ncháá ñáyiu ñá túú cùu ñáyiu isràél cáháⁿ cuèhé-yu cuèndá Yă Ndiöxí sá cuèndá-ndó.

²⁵ Te nchòhó ñáyiu isràél nchaa-ndo cùu-ndo ndi mee-í, te tnàhá-ndó ndècu ndihí-ndo señá ñi-ndo, te váha-ni sá dúcáⁿ te núu quide-ndo nchaa nacuáa ní cáháⁿ ndíi Moisés. Dico núu ñá túú quide-ndo nchaa nacuáa ní cáháⁿ ndíi ña, te ñá túú nàndihí-xi sá cúú-ndó ñáyiu isràél cuèi ndècu señá ñi-ndo. ²⁶ Te nchaa ñáyiu ñá túú ndècu ndihí señá ñi-xi, te núu quidé-yu nchaa nàcuáa ní cáháⁿ ndíi Moisés, te cúú-yu dàtná cue ñáyiu ndècu ndihí señá ñi-xi, chi quidé-yu nchaa nàcuáa ní cáháⁿ ndíi. ²⁷ Te ñáyiu ñá túú ndècu ndihí señá ñi-xi, te núu na cadá-yu nchaa nàcuáa ní cáháⁿ ndíi Moisés, te ñáyiu-áⁿ cachí-yu sá ñá túú quide ndáá nchaa nchòhó ñáyiu ndècu ndihí señá ñi-xi, chi ndècu ndihí-ndo nchaa tnúhu ní chídó tnùní ndíi te ñá túú quide-ndo nacuáa cáháⁿ tnúhu-áⁿ. ²⁸ Te nchòhó ñáyiu isràél, ñáyiu nchicúⁿ nihnu-ni quide nchaa nacuáa ta quide tnahi-ndo véxi, ñá túú quide-ndo sá cúú-ndó ñáyiu isràél, te mee-ndo ndècu señá ñi-ndo dico ñá túú quide-ndo nacuáa tàú-xi cada nchaa ñáyiu ndècu señá ñi-xi, te mee-ni sèñá-áⁿ sàha-ndo ñi-ndo te ñá túú

quide-ndo nacuaa cuini Yá Ndiöxí cada-ndo. ²⁹ Te nchaa ñáyiú sàndáá ndisa iní-xi Yá Ndiöxí, ñáyiú-áⁿ cúu ndisá-yu ñáyiú isràél, te sa ní nduu ndoo ní nduu nine iní-yu chi Espiritú Yá Ndiöxí ducaⁿ ñí quide-xi, dico ñá díú sá sáha-yu sèñá ñíí-yu dàtná ní cachí ndí Moisés. Te ñáyiú-áⁿ cúu vâha iní ñáhá Yá Ndiöxí xii-yu cuéi ñá túú càháⁿ vâha tnâha ñáyiú-yu cuendá-yu.

3

¹ Te sá dúhá càháⁿ-í te ió dava ñáyiú quesàhá-yu sá ñíⁿ-ní cùu ñáyiú ñá túú cùu ñáyiú isràél ndihí nchoo ñáyiú isràél, te quesaha tùcú-yu sá ñíⁿ-ní quide tucu-xi cuéi na cuâha àdi vá cuâha sèñá ñíí-yu. ² Dico yúhú càchí-í sá ncháá ñáyiú isràél ío-gá cúnúu-yu, chi ío titní núú sá vâha ní quide ñaha Yá Ndiöxí xii-yu, chi ní sáñaha-gã tnúhu-gá ndécú ndihí-yu. ³ Te davá-yu ñá túú cuini-yu cada ndáá-yu, dico ñá díú sá xãⁿ te cùyica iní Yá Ndiöxí ñá túú quide ndáá-gá. ⁴ Dico ñáhá chi xini ñúhu-xi sá ncháá ñáyiú cada cuendá-yu sá Yá Ndiöxí cúu-gã Yaá quidé ndáá cuiti, te cuéi ncháá-yu na càchí-yu sá ñá túú quide ndáá-gá, dico mee-gã chi quide ndáá-ni-gá. Te núú tùtú-gá càháⁿ-xi nâcuáa ní xáhaⁿ ñíⁿ téé ní xíndecu ndéé sanaha xì-gá, te duha ní xáhaⁿ-dê;

Yohó Dútú Ndiöxí, cùtnuní iní ñáyiú sá ío ndáá càháⁿ-n,

te cúnúu nahi-ni tnúhu-n cuéi òré càchí ñáyiú sá ñá túú càháⁿ ndáá-n.

Duha ní xáhaⁿ téé ndéé sanaha-ãⁿ xii-gá càchí-xi núú tùtú-gá.

⁵ Te cuendá nchaa sá cuèhé sá dúhá quide ñáyiú, xiãⁿ cùtnuní iní-yu sá Yá Ndiöxí cúu-gã Yaá ío vâha quide ndáá, chi mee-gã ñá túú dùcaⁿ quide-gá. Te cuéi ducaⁿ dico vá cáni iní-yu sá Yá Ndiöxí ñá túú quide ndáá-gá sá dándòho ñaha-gá xii-yu na sàá nduu, te núu ducaⁿ na càni iní-yu, te sàni iní-yu dàtná sání iní cue ñáyiú ñá túú ndècu ichi-gá. ⁶ Te vá dúcáⁿ càni iní-yu, chi núu Yá Ndiöxí ñá túú quide ndáá-gá ñá, te vá cúu càda ndáá-gá nchaa cuéchi cue ñáyiú ñuyúú-a te núu ducaⁿ.

⁷ Te núu yúhú ná càni iní-í càháⁿ-í ñíⁿ tnúhu ndehnde, te sá tnúhu-áⁿ te caní tucu iní-í sá quidé càhnu-gá-í tnúhu ndáá tnúhu Yá Ndiöxí, te sá dúcáⁿ ná càháⁿ-í te caní tucu iní-í sá vá cúu càháⁿ Yá Ndiöxí sá ndécú cuéchi-í. ⁸ Te núu na càni tucu iní-í sá vâha-gá cada-í nchaa sá cuèhé sá dúhá cuendá Yá Ndiöxí cada-gá sá vâha, dico ñá ndáá. Te ío ñáyiú càháⁿ cuèhé cuendá-í te càchí-yu sá díú-ní dùcaⁿ dacuaha-í ñáyiú dico ñá ndáá sá dúcáⁿ dànehé-í-yu, te ñáyiú-áⁿ nacháhu-yu tnúhu càháⁿ-yu, chi ducaⁿ tàú-xi cunduu.

Nchaa ñáyiú ñuyúú-a ndècuéchi-yu

⁹ Te vitna càchí dava ñáyiú sá ío-gá cúnúu nchoo cue ñáyiú isràél dàcúúxí dâva-gá

ñáyiú, dico yúhú càchí-í sá ñáhá, te sa ní cachí tnúhu ndáá-í xii-ndo sã nchàa ñáyiú ndècuéchi-yu cuéi ñáyiú isràél te cuéi ñáyiú ñá túú cùu ñáyiú isràél. ¹⁰ Te núú tùtú Yã Ndiöxí càchí-xi:

Vá yõo ìⁿ quide ndáá,

¹¹ te ni vá yõo ìⁿ tècú tnùnì tnúhu váha,

te ni vá yõo ìⁿ nànducu nihnu Yá Ndiöxí.

¹² Chi nchaá-yu ñá túú nchìcúⁿ nihnú-yu ichi váha, te nchaá-yu cùú-yu ñáyiú xĩndecu neñúú sá cúú-xí Yã Ndiöxí.

Te ni ìⁿ-yu ñá túú quidé-yu ìⁿ sá vãha.

¹³ Te cada iní-ndó sã yúhũ-yu cùu-xi datná cúú ìⁿ yaú núú yĩndũxi ndíyi núú ïo ndehe sàháⁿ,

te ducaⁿ sãtnahá-xi cùu yuhú-yu, chi ïo càháⁿ cuèhé-yu, te mee-ni dandahú-yu nchaa tnàha ñáyiú-yu.

Te cada iní-ndó sã vènenú cóo yíhí yùhú-yu chi mee-ni càháⁿ úhú-yu cuèndá tnàha ñáyiú-yu.

¹⁴ Te ïo iní-yu càháⁿ úhú tnáhã-yu.

¹⁵ Te àúⁿ nã cuu àúⁿ nã xĩãⁿ xĩsahni tnàhá-yu.

¹⁶ Te nchaa núú xicá cùú-yu quide úhú iní-yu nchaa tnàha ñáyiú-yu nàcuáa ndihú iní ñáyiú-áⁿ.

¹⁷ Te ñá túú cuiní-yu cundecu ndihí tnàha váha-yu.

¹⁸ Te ñá túú sàni iní-yu canehé-yu sá yĩñùhu núú Yã Ndiöxí.

Duha quidé-yu càchí-xi núú tùtú-gá.

¹⁹ Te cùtnunì iní-ó sã nchàa tnúhu ní chídó tnùnì ndíi Moisés cúú-xí cuèndá nchaa ñáyiú nchìcúⁿ nihnu nchaa tnúhu-áⁿ. Te tnúhu-áⁿ cúú-xí cuèndá sá vã yõo tnàhí cachí sá ñà túú cuéchi-xi, te ducaⁿ te nchaandi túhú ñáyiú cutnùnì iní-yu sá ná chãhu-yu nchaa sá quidẽ-yu núú Yã Ndiöxí.

²⁰ Te ducaⁿ càda-xi chi ni ìⁿ ñáyiú vá càchí-ó sã vã cùndècu cuéchi-yu núú Yã Ndiöxí cuèndá-ni sá nchìcúⁿ nihnú-yu nchaa tnúhu sá nĩ chídó tnùnì ndíi Moisés, te tnúhu-áⁿ càchí tnúhu-xi cuèndá-ni sá cùtnunì iní-ó sã ndécú-ó ìchi cuehé ichi duha.

Te núu na quèndáá iní-ó Xĩtohó Jesucristú te naníhí tàhú-ó

²¹ Te vitna ní cutnùnì iní-ó sã ñà díú sã càdá-ó nchàa nacuáa ní càháⁿ ndíi Moisés cudiu-o núú Yã Ndiöxí, chi mee-gã quidé cudiu-o núú-gã. Te núú tùtú ndíi Moisés ndihí núú tùtú cue téé ní xóo càháⁿ tnúhu Yã Ndiöxí ndéé sanaha càháⁿ-xi nàcuáa cada ñaha-gã xii-o vitna.

²² Te ducaⁿ cudiu-o núú Yã Ndiöxí te núu na quèndáá iní-ó Xĩtohó Jesucristú. Te diu-ni ducaⁿ cudiu nchaa ñáyiú ñuyiú te núu na quèndáá iní ñáhã-yu xii-gá, chi ìⁿ-ni cùu-o nchaa-o sá cúú-xí Yã Ndiöxí. ²³ Chi nchaá-yu

ndècu cuéchi-yu, chi ñá ìⁿ-yu quidé-yu nàcuáa càháⁿ Yã Ndiöxí sá cúú-yu ñáyiú quide váha. ²⁴ Dico Yã Ndiöxí ïo váha iní-gá chi ní quide ñaha-gã xii-o ìⁿ sá vãha, chi dícó-ni

ducaⁿ ñi quide-gá nàcuáa vá cùndècu-gá cuéchi-o nùú-gã, chi Xítohó Jesucristú ní sati ñíñi-gã te ní xíhí-gá, te ducaⁿ ñi yáha-gá cuendá sá vá cùndècu-gá cuéchi-o. ²⁵ Te Yá Ndiöxí ní taxi ndecu-gá Xítohó Jesucristú núú ñáyiu ñuyíú-a, te ní xíhí-gá sá cuendá nchaa yíca cuéchi-yu, te ducaⁿ ñi cuu cuendá sá ncháá ñáyiu na quindáá iní ñáhá xii-gá te vá nácháhu-yu cuéchi-yu núú Yá Ndiöxí. Te Yá Ndiöxí ní quide ndee iní-gá nchaa sá cuéhé sá dúhá ñi quide cue ñáyiu ní xíndecu ndéé sanaha. Te xiáⁿ ní xíhí Xítohó Jesucristú cuendá cutnùní iní-ó sã Yá Ndiöxí cúú-gã Yáa ío váha quide ndáá cuéi ducaⁿ ñi quide ndee iní-gá nchaa sá ñi quide cue ñáyiu-áⁿ. ²⁶ Núu xiáⁿ vitna ní cutnùní ndisa iní-ó sã quidé ndáá-gá, te quide-gá sá cué ñáyiu vá cùndècu-gá cuéchi-yu núú-gã, te núu na quindáá iní-yu Xítohó Jesucristú.

²⁷ Te vitna vá càchí-ó sã ío càhnu cuu-o cuendá sá ñà túú-gã cuéchi-o ndècu núú Yá Ndiöxí, te ducaⁿ ñà túú-gã cuéchi-o ndècu núú-gã cuendá sá sàndáá iní-ó Xítohó Jesucristú, te ñà díú sã cuendá nchaa tnúhu ní càháⁿ ndí Moisés. ²⁸ Te cùtnuní iní-ó sã ndèda-ni càa ñáyiu vá cùndècu-gá cuéchi-yu núú Yá Ndiöxí te núu na quindáá iní-yu Xítohó Jesucristú cuéi ní quidé-yu nchaa nàcuáa ní càháⁿ ndí Moisés àdi ñà túú ní quidé-yu.

²⁹ Te cùtnuní iní-ó sã Yá Ndiöxí cúú-gã Ndiöxí

nchaandi túhú ñáyiu, te ñà díú mèe-ni Ndiöxí ñáyiu isràél cúú-gã. ³⁰ Te ñⁿdi díí-gã cúú-gã Ndiöxí, te nchaa ñáyiu sàndáá iní ñáhá xii Xítohó Jesucristú te vá cùndècu-gá cuéchi-yu núú Yá Ndiöxí cuéi cúú-yu ñáyiu isràél àdi ñà túú cúú-yu. ³¹ Te ñà díú sã sàndáá iní-ó Xítohó Jesucristú te cachí-ó sã ñà túú nàndíhi nchaa tnúhu sá sánú ichi ñaha xii-o nacuéa cada-o, te ñáhá chi sá dúhá sàndáá iní-ó-gã te xiáⁿ nchicúⁿ nihnu-o quide-o nacuéa càháⁿ tnúhu-áⁿ.

4

Cuendá ndí Abrahám

¹ Te vitna na càchí tnúhu-í xii-ndo cuendá ndí Abrahám téé ní cuu ñani tnáhá-ó ñi xíndecu ndéé sanaha. ² Te ndí-áⁿ ñà túú ní xíndecu cuéchi ndí núú Yá Ndiöxí, dico ñà díú cuendá ñⁿ chiuⁿ ní quide ndí ducaⁿ ñà túú ní xíndecu cuéchi ndí núú-gã. Chi núu cuendá ñⁿ chiuⁿ ní quide ndí ducaⁿ ñà túú ní xíndecu cuéchi ndí núú Yá Ndiöxí ñà, te cada càhnu ndí mee ndí ni cúu, dico ñà díú núú Yá Ndiöxí cada càhnu ndí mee ndí te núu ducaⁿ ní quide ndí. ³ Te chí dándacu iní nàcuáa càháⁿ-xi núú tùtú Yá Ndiöxí núú càchí-xi: “Té Abrahám ní sàndáá iní-dé Yá Ndiöxí, te xiáⁿ ní cachí-gá sá cúdiu-dé núú-gã”, duha càchí-xi núú tùtú-gá. ⁴ Te sá cúhúⁿ yáhu ñⁿ téé quide chiuⁿ, te vá càchí-ó sã xiáⁿ cúú-xí ñⁿ táhú sã cúú-xí-dé chi yáhu tnàhí-dé cúú-xí. ⁵ Te vá yòo ñⁿ ndacu cada ñⁿ chiuⁿ nacuéa cudíu-xi núú Yá Ndiöxí. Te ñà

túu nǎ chiúⁿ xini ñuhu-xi cada ñáyu te cudiú-yu núu-gǎ, chi xini ñuhu-ni-xi sá quíndáá-ni iní-yu-gá. Te diu-gá càchí-gá sá ñáyu ndècu ichi cuehé ichi duha vá cúndècu-gá cuéchi-yu núu-gǎ, te núu na quíndáá iní ñáhǎ-yu xii-gá. ⁶ Te diu-ni ducaⁿ ñí cáháⁿ ndíi Dàvií, chi ní cachí ndíi sá ìo váha táhú nchaa ñáyu ní cachí Yǎ Ndiöxí cudiú núu-gǎ, dico ñá díú cuèndá ñíⁿ chiúⁿ quidé-yu cudiú-yu núu-gǎ. ⁷ Te duha ní cachí ndíi:

Váha táhú nchaa ñáyu quíde cahnu iní Yǎ Ndiöxí nchaa cuéchi-xi, te ñá túu-gǎ quidé cuèndá-gá nchaa sá cuèhé sá dúhá ní quidé-yu.

⁸ Váha táhú-yu chi Yǎ Ndiöxí càchí-gá sá ñá túu-gǎ cuéchi-yu.

Duha ní cachí ndíi Dàvií.

⁹ Te ñá díú mèe-ni ñáyu ngúndecu seña ñíⁿ-xi ducaⁿ váha táhú-yu, chi tnáhá ñáyu ñá túu ngúndecu seña ñíⁿ-xi ducaⁿ váha táhú-yu. Te sa nàha-o sá Yǎ Ndiöxí ní cachí-gá sá cúdiu ndíi Àbrahám núu-gǎ cuèndá sá ní sándáá iní ñáhá ndíi xii-gá. ¹⁰ Te cunaha-ndo sá dǐhna-gá ní cachí Yǎ Ndiöxí sá cúdiu ndíi Àbrahám núu-gǎ te dàtnúⁿí ngúndecu seña ñíⁿ ndíi. ¹¹ Te ní ngúndecu seña ñíⁿ ndíi cuèndá xiǎⁿ cuu-xi ñíⁿ seña sá cúdiu ndíi núu Yǎ Ndiöxí. Te ndéé cúnáhá vátá ngúndecu-gá seña ñíⁿ ndíi, te sa cúdiu ndíi núu-gǎ chi ní sándáá iní ñáhá ndíi xii-gá. Te sá dúcáⁿ ñá túu ndècu seña

ñíⁿ ndíi cúnáhá ní sándáá iní ndíi Yǎ Ndiöxí xiǎⁿ ní cuu ndíi dàtná ñíⁿ dǐhí dütú nchaa ñáyu sándáá iní ñáhá xii-gá, ñáyu ñá túu ní ngúndecu seña ñíⁿ-xi, te cudiú-yu núu-gǎ. ¹² Te ndíi Àbrahám ní cuu tucu ndíi dàtná ñíⁿ dǐhí dütú nchaa ñáyu ní ngúndecu seña ñíⁿ-xi, dico ñá díú cuèndá-ni sá ní ngúndecu seña ñíⁿ-yu cùu ndíi dǐhí dütü-yu, chi cuèndá sá sándáá iní-yu Yǎ Ndiöxí nchícúⁿ nihnú-yu nàcuáa ní quide ndíi ní sándáá iní ñáhá ndíi xii-gá ndéé cúnáhá vátá ngúndecu-gá seña ñíⁿ ndíi.

Yǎ Ndiöxí cada-gá nchaa nàcuáa ní cachí-gá te núu na quíndáá iní-ó-gǎ

¹³ Te Yǎ Ndiöxí ní xáhaⁿ-gǎ xii ndíi Àbrahám sá ndúú táhú ndíi cunuu ndíi ñuyíú, ndíhi cue déhe ndíi, ndíhi nchaa dava-gá cue ñaní tnáhá ndíi vitna cacu túu. Te ducaⁿ ñí xáhaⁿ Yǎ Ndiöxí xii ndíi ndíhi cue ñaní tnáhá ndíi, chi ní sándáá iní ñáhá ndíi xii-gá núu xiǎⁿ ní cudiú ndíi núu-gǎ. Te ducaⁿ ñí xáhaⁿ-gǎ xii ndíi dico ñá díú cuèndá sá ní quide ndíi nàcuáa ní xáhaⁿ Yǎ Ndiöxí xii ndíi Moisés cada ñáyu ndéé cuéé-gá. ¹⁴ Te núu mee-ni ñáyu nchícúⁿ nihnu quide nacuáa ní cáháⁿ ndíi Moisés ní ndúu táhú-yu cunúu-yu ñuyíú-a ní cùu ña, te ñá túu xini ñuhu-xi quíndáá iní-ó Yǎ Ndiöxí, te ñá túu nàndíhi tnúhu ní xáhaⁿ Yǎ Ndiöxí xii ndíi Àbrahám ní cùu te núu ducaⁿ. ¹⁵ Te núu ñíⁿ ñáyu ñá túu quíde nacuáa cáháⁿ

tnúhu sá sánú ìchi ñaha xii-o nacuáa cada-o te nacháhu-yu sá dúcáⁿ quidé-yu. Te núu ñá túú tnúhu sá sánú ìchi ñaha-xi xii-o nacuáa cada-o ní cùu ña, te ñá túú cuèchi-o ní cùu.

16 Te ducaⁿ ñí xáhaⁿ Yă Ndiöxí xii ndíi Àbrahám nàcuáa cada-gá, chi cuendá sá ní sándáá iní ñáhá ndíi xii-gá. Te ducaⁿ ñí quide-gá chi ío váha iní-gá, dico ñá díú sá ìⁿ chiuⁿ ní quide ndíi ducaⁿ ñí xáhaⁿ-gă. Te sá dúcáⁿ ñí cuu te cùu-xi ìⁿ tnúhu ndáá sá cúu-xí nchaa ñaní tnáhá ndíi, ñáyiu sándáá iní ñáhá xii-gá dàtná ní sándáá iní ñáhá mée ndíi xii-gá, te ñá díú mée-ní cuendá nchaa ñaní tnáhá ndíi nchìcúⁿ nihnu nchaa nàcuáa ní cáháⁿ ndíi Moisés, chi ndíi Àbrahám-áⁿ ñí cuu ndíi dàtná ìⁿ díhí dütú cue ñáyiu sándáá iní ñáhá xii Yă Ndiöxí. 17 Te núu tütú Yă Ndiöxí càháⁿ-xi nàcuáa ní xáhaⁿ-gă xii ndíi, te duha ní xáhaⁿ-gă: “Yòhó té Àbrahám ní quide ñaha-ì xii-n dàtná ìⁿ díhí dütú cue ñáyiu xĩndecu nihíi ñuyíú.” Duha ní xáhaⁿ Yă Ndiöxí xii ndíi, cächí-xi núu tütú-gá. Te Yă Ndiöxí náhá ndáá-gá sá cadá-xí nàcuáa ní xáhaⁿ-gă xii ndíi Àbrahám, te ñu-ni-gá cúu Yáá ní sándáá iní ndíi, te ñu-ni-gá dándòto-gá ñáyiu ní xíhí, te ñu-ni-gá quidé tá ngũndecu nchaa sá vătă cùndècu-gá ñuyíú-a.

18 Te Yă Ndiöxí ní xáhaⁿ-gă xii ndíi Àbrahám sá ío cuéhé ðehe ndíi coo, te ío ní sándáá iní ndíi nàcuáa ní xáhaⁿ-gă dico ñá túú ní cùtnuní iní ndíi nása cada-gá, chi ío ní

sahnu ndíi. Te cuendá sá dúcáⁿ ío ní sándáá iní ndíi tnúhu ní xáhaⁿ-gă núu xiáⁿ ní cuu ndíi díhí dütú vâi ñáyiu xĩndecu nihíi ñuyíú. 19 Te ndíi Àbrahám ñuhu ndíi ìⁿ ciendú cuíá cùtnàhá ducaⁿ ñí xáhaⁿ Yă Ndiöxí xii ndíi, te ní cùtnuní iní ndíi sá ñà túú tàhú ndíi sá cóo ðehe ndíi ndíi ñadìhí ndíi ndíi Sără, chi ndíi ndùú-yu sa ní sahnu vîhí-yu, te cuèi ducaⁿ dico ní sándáá-ní iní ndíi nàcuáa ní xáhaⁿ Yă Ndiöxí. 20 Te ñá túú ní sàni ìⁿ sani úú iní ndíi nàcuáa ní xáhaⁿ Yă Ndiöxí cada-gá sá cúu-xí ndíi, chi da uuⁿ-gă váha ní sándáá iní ndíi nàcuáa ní xáhaⁿ-gă, te ní cachí ndíi sá ío càhnu cuu-gá. 21 Te ní cùtnuní ndáá iní ndíi sá Yă Ndiöxí ndácú-gă quidé-gă nchaa sá càháⁿ-gă. 22 Te sá ní sándáá iní ndíi nàcuáa ní cáháⁿ Yă Ndiöxí, núu xiáⁿ ní cachí-gá sá cúu ndíi ìⁿ téé ñá túú cuèchi-xi núú-gă.

23 Te ní ngódó tnùní núu tütú Yă Ndiöxí cuendá ndíi Àbrahám sá ñí cachí-gá sá ñà túú cuèchi ndíi núú-gă, te ñá díú-ní cuendá mée ndíi ní ngódó tnùní núu tütú-gá. 24 Chi tnàhá cuendá-ó nchaa-o ní ngódó tnùní núu tütú-gá. Te cächí-gá sá ñà túú cuèchi-o núú-gă chi sándáá iní-ó-gă, te ñu-gá cúu-gă Yáá ní dándótó ñaha xii Xítóhó Jesucristú Yáá cúu Xítóhó-ó.

25 Te Yă Ndiöxí ní cachí-gá sá díú Xítóhó Jesucristú cuú-gá cuendá nacháhu-gá nchaa cuèchi-o. Te ní xíhí-gá te ní ndoto-gá cuendá nchaa-o vâ cùndècu-gá cuèchi-o núú Yă

Ndiöxí te núu na quíndáá iní-ó-gă.

5

Ío váha tnàhá ñáyiu càchí Yă Ndiöxí sá ñà túú cuéchi-xi

¹ Te vitna, ñá túú-gă cuéchi-o ndècu núú Yă Ndiöxí chi sàndáá iní-ó Xítóhó Jesucristú, te ío váha ndècu ndíhi-o Yă Ndiöxí vitna sá cuendá Xítóhó Jesucristú. ² Te cuendá sá ni sàndáá iní-ó Xítóhó Jesucristú xiăⁿ diu-gá ní quide ní ngúndecu váha-o núú Yă Ndiöxí, te ducaⁿ-ni cùndecu-o, te ío cùdíí iní-ó chi ndècu ndíhi-o tnúhu ndee iní sá sáa nduu ngúndecu-o núú ío váha càa ndecu Yă Ndiöxí.

³ Te ñá díú-ní sá cuendá sá ndúú tǎhú-ó cùndecu-o núú ndécú-gă cùdíí iní-ó, chi cùdíí iní-ó ndòho-o cuendá-gă, chi cùtnuní iní-ó sá núu na ndòho-o cuendá-gă te cunduu càhnu-gá iní-ó, ⁴ te núu cùu-o ñáyiu ta quide cahnu-gá iní-xi te cùtnuní sá cúú-ó ñáyiu quide váha, te núu cùu-o ñáyiu quide váha te uuⁿ-gá tá ngúndecu ndíhi-o tnúhu ndee iní cuáháⁿ sá cádá váha ñaha Yă Ndiöxí xii-o. ⁵ Te núu ducaⁿ te vá ñá ndùu ndixi cuéchi iní-ó sá ndécú ndíhi-o tnúhu ndee iní ngúndecu váha-o. Te Espíritú sá ñí taxi Yă Ndiöxí ndécú ndíhi-o xiăⁿ quidé-xí cùtnuní iní-ó sá ío cùu iní ñáhá Yă Ndiöxí xii-o.

⁶ Te nchoo ñà túú vèdana ná ní ndàcu-o cada-o cuendá dácácu nihnu-o mée-o, dico Xítóhó Jesucristú ní xihí-gá cuendá-ó, ndíhi cuendá nchaa dava-gă ñáyiu ñá túú tnàhá

tnúhu ndíhi Yă Ndiöxí, te ní xihí-gá mei ndùu taú-xi cuú-gă. ⁷ Te cudana-ni núu xihí ñá ñáyiu sá cuendá ñá ñáyiu quide ndáá, te áma xihí tucu ñáⁿ-yu sá cuendá ñáyiu quide váha tnàha ñáyiu-xi. ⁸ Te Yă Ndiöxí ní quide-gá sá nchóó cùtnuní iní-ó sá ío cùu iní ñáhá-gă xii-o, chi cùtnàhá ndécú-ó ìchi cuehé ìchi duha te ní tendaha-gă Xítóhó Jesucristú ní quixi-gá ñuyíú-a ní xihí-gá cuendá-ó. ⁹ Te sá cuendá sá ñí xihí Xítóhó Jesucristú xiăⁿ ñá túú-gă cuéchi-o ndècu núú Yă Ndiöxí, te vitna ní cùtnuní ndáá iní-ó sá vá dáquihíⁿ ñáhá-gă Yă Ndiöxí xii-o núú ùhú núú ndàhú sá cuendá Xítóhó Jesucristú. ¹⁰ Te cùtnàhá ñá túú tnàhá tnúhu-o ndíhi Yă Ndiöxí ní cùu ní xihí Xítóhó Jesucristú Yaá cúú Dèhe-gá cuendá cuu váha iní ñáhá-gă xii-o, te ducaⁿ te nduu tǎhú-ó cùndecu-o ndíhi-gá ni caa ni quihíⁿ cuendá sá ñí ndoto Xítóhó Jesucristú. ¹¹ Te ndètu-o sáá nduu ngúndecu-o ndíhi-gá ni caa ni quihíⁿ, te ñá díú-ní xiăⁿ quidé-ó chi tnàhá cùdíí iní-ó Yă Ndiöxí, chi Xítóhó Jesucristú ní quide-gá ducaⁿ cùdíí iní-ó-gă, te diu-ni Xítóhó Jesucristú ní quide-gá ní nucúndecu váha-o ndíhi Yă Ndiöxí.

Nàcuáa ní quide ndíi Ádán ndíhi nàcuáa ní quide Xítóhó Jesucristú

¹² Te ndíi Ádán ñá túú ní quide ndáá ndíi núú Yă Ndiöxí núu xiăⁿ ní ngúndecu nchaa sá cuehé sá

dúhá ñùyíú-a, te sá cuèndá nchaa sá cuèhé sá dúhá quide ñáyíu xiáⁿ xihí-yu, te nchaá-yu xihí-yu chi nchaá-yu quidé-yu nchaa sá cuèhé sá dúhá. ¹³ Te sa quide-gá-yu nchaa sá cuèhé sá dúhá te dātnuní ní ngúndecu nchaa tnúhu sá ní chídó tnùní ndí Moisés nācuáa ní xáhaⁿ Yá Ndióxi cada ñáyíu, te nchoo cùtnuní iní-ó sá núu ñá túú tnúhu sá sánú ichi ñaha xii-o nācuáa cada-o, te ñá túú cuéchi-o sánuu. ¹⁴ Te ndéé cùtnhá ní xindecu ndí Àdán ní quesaha-xi xihí ñáyíu, te ducaⁿ-ni xihí-yu ndéé ní sáa nduu ní xindecu ndí Moisés. Te ducaⁿ ní xihí-yu chi ní quidé-yu nchaa sá cuèhé sá dúhá cuéi ñá túú ní quidé-yu nācuáa ní quide ndí Àdán, chi ndí-áⁿ ñà túú ní sàndáa iní ndí nācuáa ní xáhaⁿ Yá Ndióxi cada ndí. Te ndí Àdán ní cuu ndí ìⁿ téè cùu cahnu ní xindecu ñuyíú-a, te sá tá dúcáⁿ te ní quixi Xítohó Jesucristú te Yáa-áⁿ ìo-gá càhnu cuu-gá.

¹⁵ Te sá ní quide ndí Àdán te vá càchí-ó sá ìⁿ-ní cùu-xi ndíhi sá ní cachí Yá Ndióxi nduu táhú-ó vitna. Te sá ñà túú ní quide ndáa ndí xiáⁿ nchaa ñáyíu xihí-yu, dico Yá Ndióxi ío váha iní-gá chi ío váha ní quide-gá sá cúu-xi nchaa nchoo ñáyíu ndècu ñuyíú-a, chi dìcò ducaⁿ ní cachí-gá sá nánihí tàhú-ó, te ìⁿ-ni téè tnàhá-dé ío váha ní quide-dé sá cúu-xí-ó, te téè-áⁿ cúu-dé Xítohó Jesucristú. ¹⁶ Te sá ní quide ìⁿ-ni ndí Àdán ñá túú ìⁿ-ni cuu-xi ndíhi sá ní quide Yá Ndióxi sá

cúu-xí-ó, chi ndí-áⁿ ñà túú ní quide ndáa ndí núu-gá. Te sá dúcáⁿ ní quide ndí te xiáⁿ ní cuu-xi cuéchi díhna nuu ní quide ndí, núu xiáⁿ ní cachí Yá Ndióxi sá cuè ñáyíu quíhíⁿ-yu núu ùhú núu ndáhú nacháhu-yu nchaa sá cuèhé sá dúhá quidé-yu. Dico mee-gá ní quide sá cuè ñáyíu naníhí tàhú-yu dìcò-ni ducaⁿ, te ducaⁿ te vá cùndècu-gá cuéchi-yu núu-gá cuéi ío vai cuéchi-yu. ¹⁷ Te sá dúcáⁿ ñà túú ní quide ndáa ìⁿ-ni ndí Àdán-áⁿ núu Yá Ndióxi, xiáⁿ ní quide-xi xihí nchaa ñáyíu. Te sá cuèndá sá ní quide ìⁿ-ni Xítohó Jesucristú xiáⁿ ío váha ní quide ñaha Yá Ndióxi xii ñáyíu, chi dìcò-ni ducaⁿ ní nduu táhú-yu cùdíu-yu núu-gá. Te nchaa ñáyíu ducaⁿ cùdíu núu-gá nduu táhú-yu cunúu-yu ndíhi Xítohó Jesucristú cuèndá sá ní quide-gá sá vāha sá cúu-xí-yu.

¹⁸ Te sá dúcáⁿ ní quide ndí Àdán ñá túú ní quide ndí nācuáa ní xáhaⁿ Yá Ndióxi xii ndí ìⁿ xito, núu xiáⁿ ní cachí-gá sá ncháa ñáyíu tàu-yu nacháhu-yu nchaa cuéchi-yu, dico Xítohó Jesucristú ní quide-gá ìⁿ sá vāha cuèndá nchaa ñáyíu vá cùndècu-gá cuéchi-yu núu Yá Ndióxi te núu na quèndáa iní ñáhā-yu xii-gá, te ducaⁿ te cundecú-yu ndíhi-gá ni caa ni quíhíⁿ. ¹⁹ Te sá ñà túú ní sàndáa iní ìⁿ-ni ndí Àdán nācuáa ní xáhaⁿ Yá Ndióxi xii ndí, xiáⁿ ní ngúinchicúⁿ nihnu nchaa

ñáyiú quidé-yu nchaa sá cuèhé sá dúhá. Te ducaⁿ ìⁿdii-ni Xítóhó Jesucristú ní quide-gá nàcuáa ní xáhaⁿ Yă Ndiôxí cuendá sá Yă Ndiôxí cachí-gá sá cúdiú-yu núú-gă.

20 Te Yă Ndiôxí ní xáhaⁿ-gă xii ndíi Moisés nàcuáa cada ñáyiú, te sá cuendá tnúhu-áⁿ uuⁿ-gá ní nguíta nchaa ñáyiú quidé-yu nchaa sá cuèhé sá dúhá, te Yă Ndiôxí uuⁿ-gá cundàhú iní ñáhá-gă xii-yu tucu. 21 Te sá cuendá nchaa cuéchi ñáyiú xiáⁿ xihí-yu, dico Yă Ndiôxí ío váha iní-gá chi diu-gá ní cachí-gá sá ncháá ñáyiú na tnàhá tnúhu ndihi ñaha xì-gá cudíú-yu núú-gă, te cundecú-yu ndihi-gá ni caa ni quíhíⁿ, te ducaⁿ chi Xítóhó Jesucristú ní quide-gá sá váha sá cúú-xí-yu.

6

Ñáyiú ñá túú-gă ndécú ichi cuehé ichi duha ndècú-yu cuendá Xítóhó Jesucristú

1 Te sá dúcáⁿ quide Yă Ndiôxí, te vá cání iní-ó cànchicúⁿ nihnu-ni-o ìchi cuehé ichi duha, chi ñá díú să cànchicúⁿ nihnu-o ìchi-áⁿ te ngóo càní iní-ó să ïo-gă cundàhú iní ñáhá-gă xii-o. 2 Te vá cúú cànchicúⁿ nihnu-o ìchi cuehé ichi duha, chi nchoo cùu-o datná cue ñáyiú sa ní xihí, núu xiáⁿ vá cúú-gă canchicúⁿ nihnu-o ìchi-áⁿ. 3 Te şa nàha-o sá cuendá sá ñi sandute-o quèe-xi sá tnàhá tnúhu-o ndihi Xítóhó Jesucristú. Te sá ñi sandute-o quèe tucu-xi sá cúú-ó datná ñáyiú ní xihí

ndihi-gă. 4 Te ñá díú-ní să ñi xihí-ó ndihi-gă chi quèe tucu-xi sá ñi nguindúxi-o ndihi-gă te ní ndoto-o datná ní ndoto mee-gă ní dándótó ñàha Dútú Ndiôxí Yaá ío càhnu cuu, te ducaⁿ ñi cuu cuendá sá vă cundècu-gă-ó datná ní xíndecu-o.

5 Te núu ìⁿ-ni cùu-o ndihi Xítóhó Jesucristú cuendá sá cúú-ó datná ñáyiú ní xihí ndihi-gă, te ndáá sá cúú-ó datná ñáyiú ní ndoto ní ngúndecu váha datná ní ndoto mee-gă ní nucúndecu váha-gă. 6 Te nchoo nàha-o sá cúú-ó ñáyiú ío ndècu cuéchi-xi ni cùu, dico sátá ñi cuu-o datná ñáyiú ní xihí datná ní xihí Xítóhó Jesucristú núú cùrúxí, te ndéé dàvá-áⁿ ñi dáñá-ó nchaa ichi cuehé ichi duha ndècu-o ni cuu, te ñá túú-gă cúnúu sá cuèhé sá dúhá iní-ó. 7 Chi nchaa ñáyiú ní xihí ñá túú-gă ndécú-yu ichi cuehé ichi duha. 8 Te núu cùu-o datná ñáyiú ní xihí datná ní xihí Xítóhó Jesucristú ñá, te cùnuni ndáá iní-ó sá cundècu-o ndihi-gă ni caa ni quíhíⁿ. 9 Te sa nàha-o sá Xítóhó Jesucristú ní xihí-gă te ní ndoto-gă te vá ìⁿ ndùu ìⁿ quíú-gă te cuú-gă, chi ñá túú năgá sá cadá cùú-gă. 10 Te Xítóhó Jesucristú ní xihí-gă ìⁿ xito-ni sá cuendá nchaa cuéchi nchoo ñáyiú ñuyúú, te vá ìⁿ ndùu-gă cuú-gă, te ndècu-ni-gă sá cúú-xí Yă Ndiôxí. 11 Núu xiáⁿ nchòhó cada iní-ndó să datná sá ñi xihí-ndó vă cundècu-gă-ndó sá cúú-xí ìchi cuehé ichi duha, chi ndècu-ná-ndó să

cúu-xí Yá Ndiǒxí, chi ní tnahá tnúhu-ndo ndíhi Xítohó Jesucristú Yaá cúu Xítohó-ó.

12 Te núu xiáⁿ vá dáñá-gã-ndó cùnūu ni ñⁿ sá cuèhé sá dúhá iní-ndó cuèdá sá vá cáda-gã-ndó ni ñⁿ sá cuèhé sá dúhá sàni iní-ndó. 13 Te vá dáñá-ndó tàxi tnuní ñáhá ni ñⁿ sá cuèhé sá dúhá-ãⁿ xii-ndo cuèdá sá vá cáda-gã-ndó, te chí dáñá ná tàxi tnuní ñáhá Yá Ndiǒxí xii-ndo, te chí dáñá ná chindee ñaha-gá cada-ndo mée-ni sá vâha, te ducaⁿ te cada iní-ndó sã cúu-ndó dàtná ñáyiū ní xíhí te ní ndoto ndècu. 14 Te ducaⁿ càda-ndo chi vá ndácú-gã ni ñⁿ sá cuèhé sá dúhá tàxi tnuní ñáhá-xí xii-ndo, chi Yá Ndiǒxí cundàhú iní ñáhá-gã chindèe ñaha-gá xii-ndo. Te ducaⁿ chi ñá túú-gã cúnūu nchaa tnúhu sá ñí chídó tnùní ndíi Moisés cada ñáyiū.

Ñáyiū nchícúⁿ nihnu sá vâha

15 Te ñá díú sã cundàhú iní ñáhá Yá Ndiǒxí xii-ó chindee ñaha-gá ndíhi sá ñà túú-gã cúnūu nchaa tnúhu ní chídó tnùní ndíi Moisés, te cachí-ó sã cúu-ní cundecu-o ichi cuehé ichi duha. 16 Te nchoo xini-ó sã núu na cuãha-o tnúhu cunu cuechi-o núú ñⁿ ñáyiū cuení cunu cuechi-o núú-xi, te cùu-ná-ó ñáyiū xinu cuechi núú-yu te quide-o nchaa chiuⁿ tahú-yu. Te ducaⁿ sãtnahá-xi cùu nchaa ñáyiū quide nchaa sá cuèhé sá dúhá chi tàxi tnuní ñáhá-nã-xi xií-yu, te ñiū nchaa xiáⁿ dácuíta nihnu ñaha-xi xií-yu, te ñiū-ni ducaⁿ sãtnahá-xi cùu nchaa ñáyiū

sàndáá iní ñáhá xii Yá Ndiǒxí chi tàxi tnuní ñáhá-gã xií-yu, te quide-yu nchaa sá vâha nacuáa cuení méé-gã cadá-yu. 17 Te nchòhó ducaⁿ ñí xóo cada-ndo nchaa sá cuèhé sá dúhá ní cùu, dico tàxâhu xii Yá Ndiǒxí chi vitna ni yùhu ni iní-ndó quide-ndo nchaa nacuáa càháⁿ tnúhu-gá sá ñí ngúndecu ndíhi-ndo. 18 Te vitna ñá túú-gã táxi tnùní ñáhá ni ñⁿ sá cuèhé sá dúhá xii-ndo, te quide-ná-ndó nchaa sá vâha tàuchiūⁿ Yá Ndiǒxí cada-ndo. 19 Te duha càháⁿ-í cuèdá cue ñáyiū xinu cuechi cuèdá sá nchòhó tecú tnùní-ndó nacuáa ndūu tnúhu càháⁿ-í. Te nchòhó ní dáñá-ndó ñí taxi tnùní ñáhá nchaa sá cuèhé sá dúhá xii-ndo, te ñá túú ní quide-ndo nacuáa ní cáháⁿ Yá Ndiǒxí cada-ndo chi da vîhi-gá ní quide-ndo, te ñiū-ni ducaⁿ chí dáñá ná tàxi tnuní ñáhá Yá Ndiǒxí xii-ndo vitna cuèdá cada-ndo mée-ni sá vâha nacuáa cuení méé-gã cada-ndo, te ducaⁿ te cuu-ndo ñáyiū quide ndáá cundecu núú-gã.

20 Te nchoo cūtnáhá ní xóo cada-o nchaa sá cuèhé sá dúhá ñá túú ní xóo cada-o ni ñⁿ sá vâha cuení Yá Ndiǒxí cada-o. 21 Te dicó sácáⁿ-núú sãñaha nchaa sá cuèhé sá dúhá-ãⁿ te núu na càda-o, te ni ñⁿ sá vâha vá nihí-ó te núu na càda-o nchaa xiáⁿ, te ñiū nchaa xiáⁿ dácuíta nihnu ñaha-xi xii-ó. 22 Te vitna ñá túú-gã cúu-ó ñáyiū ndècu ichi cuehé ichi duha, chi cùu-ná-ó ñáyiū quide nchaa nacuáa càháⁿ Yá Ndiǒxí. Te sá dúhá quide-o cuu ndisa-xi ñⁿ sá vâha sá cúu-xí-ó, te cùu-o

ñáyiú quide ndáá ndécú-ó nũú-gã vitna, te sáá nduu cùndecu-o ndihi-gá ni caa ni quíhíⁿ. ²³ Te nchaa sá cuèhé sá dúhá dícó dácuíta nihnu ñaha-xi xii-o, dico Yá Ndiõxí ní quide-gá sá dícó-ni ducaⁿ ndùu táhú-ó cùndecu-o ndihi-gá ni caa ni quíhíⁿ, chi ní tnahá tnúhu-o ndihi Xítóhó Jesucristú Yaá cúú Xítóhó-ó.

7

Cuèndá ñáyiú tnãndaha

¹ Te nchaa nchòhó ñáyiú ndècu ndihi-í ichi Xítóhó Jesucristú sa ñaha-ndo nacuaá càháⁿ tnúhu sá dánèhé ñáhá xii-o nacuaá cada-o cùndecu-o, chi tnúhu-áⁿ càháⁿ-xi dóho nchaa ñáyiú xĩndecu vívú ñuyíú-a. ² Te nchaa ñáyiú ñáyiú sa ndècu yíi-xi, te ñáyiú tnúhu-áⁿ dánèhé ñáhá-xí xii-yu sá vã dáñã-yu yíi-yu, dico núu na cúú yíi-yu te ñá túú-gã ná càháⁿ tnúhu-áⁿ cuèndá-yu. ³ Dico núu vátá cúú-gá yíi-yu te ñá túú ndùu váha-xi naquehéⁿ-yu ingá téé, dico núu na cúú yíi-yu te quendóo mèé-yu, te ñá túú ñágá càháⁿ tnúhu sá dánèhé ñáhá xii-yu ñacuáa cadá-yu te ducaⁿ te cuu naquehéⁿ-yu ingá téé, te ñá túú cùu-xi ñⁿ cuéchi.

⁴ Te nchòhó cue ñáyiú ndècu ndihi-í ichi Xítóhó Jesucristú cúú-ndó dàtná ñáyiú ní xihí dàtná ní xihí-gá. Te xiãⁿ ñá túú-gã táxi tnùnì ñáhá nchàa tnúhu ní chídó tnùnì ndíi Moisés xii-ndo. Te ducaⁿ ní cuu cuèndá nchòhó ngúndecu-ndo ndihi Xítóhó

Jesucristú Yaá ní xihí ní cùu te ní ndoto-gá. Te ducaⁿ ní cuu cuèndá nchaa nchoo ñáyiú ndècu ichi-gá cada-o nchàa nacuaá càháⁿ Yã Ndiõxí. ⁵ Te nchoo ní xĩndecu-o ichi cuehé ichi duha, te tnúhu sá sánú ichi ñaha xii-o nacuaá cada-o cùndecu-o cachi-xi sá ñá túú vãha cundecu-o ichi-áⁿ, te nchoo dà uuⁿ-gá ní quide-o nchàa sá cuèhé sá dúhá sã dúcáⁿ càháⁿ tnúhu-áⁿ, te sá dúcáⁿ ní quide-o te ta xita nihnu-o cuãháⁿ ní cùu. ⁶ Te vitna cada iní-ó sã cúú-ó dàtná ñáyiú ní xihí sã cúú-xi tnúhu sá dánèhé ñáhá xii-o nacuaá cada-o cùndecu-o, chi ñá túú-gã cùnùu-xi, te vitna mee-ñã Espiritú Yã Ndiõxí chíndèe ñaha-xi xii-o xinu cuechi-o núú-gã, te ñá díú cuèndá nchaa tnúhu sá ní ngúndee ndéé díhna cada ñáyiú xinu cuechi-o núú-gã vitna.

Nchaa sá cuèhé sá dúhá ñúhu iní-í

⁷ Te cuéi duha càháⁿ-í dico vá cúú tnàhí càháⁿ-ó sã tnúhu sá sánú ichi ñaha xii-o nacuaá cada-o cùndecu-o ñá díú tnúhu váha cùu-xi. Te yúhú ñá túú cùtnuní iní-í ná cúú nchàa sá cuèhé sá dúhá ní cùu te núu ñá túú tnúhu-áⁿ ní cachi tnúhu-xi xii-í, te ni ñá túú cùtnuní tucu iní-í núu váha àdi ñá túú vãha sá nchídó iní-í sá ndécú ndihi tnahá ñáyiú-o ni cùu te núu ñá túú tnúhu-áⁿ ní cachi-xi sá vã cúú cùu iní-í sá ndécú ndihi-yu. ⁸ Te tnúhu-áⁿ ní dánèhé ñáhá-xí xii-í sá vã cúú càda-í ni ñⁿ sá cuèhé sá dúhá, dico sá cuèndá tnúhu-áⁿ uuⁿ-gá ducaⁿ ní sani iní-í ní quide-í. Te núu ñá

túu tnũhu sá sánú ìchi ñaha xii-o nacuáa cada-o cùndecu-o ña, te ñá túu cùtnuní iní-í sá quidé-í nándi sá cuèhé sá dúhá ní cùu. ⁹ Te cùtnàhá vátá ñihí-gá-í tnúhu-áⁿ te ñá túu tnàhí ná sání iní-í ndécù-í ní cùu, dico sátá ñi ñihí-í tnúhu-áⁿ te ñi cùtnuní iní-í sá ndécú cuèchi-í, te ta xíta ñihnu-í cuáháⁿ ní cùu. ¹⁰ Te núu ní quide-í nchaa nacuáa càháⁿ tnúhu-áⁿ te sa ndée ama-gá naníhí tàhú-í ní cùu, dico ñá túu ní quide-í núu ní cùtnuní iní-í sá tá xíta ñihnu-í cuáháⁿ ní cùu. ¹¹ Te sá xii tnúhu-áⁿ xiáⁿ uuⁿ-gá ní cunuu nchaa sá cuèhé sá dúhá ní dándahú ñáhá-xí xii-í te ní quide-í, te ta dàcuíta ñihnu ñaha-xi xii-í cuáháⁿ ní cùu.

¹² Te tnúhu sá sánú ìchi ñaha xii-o nacuáa cada-o cùndecu-o cuu-xi tnúhu ío yíñùhu ní taxi Yá Ndiõxí, te ñⁿ ñⁿ tnúhu-áⁿ cúu-xí mèe-ni tnúhu váha, te ñi ñⁿ tnúhu cuèhé tnúhu duha ñá túu ñùhu tnàhá. ¹³ Te vá cúu càchí-í sá tnúhu váha-áⁿ ní quide-xi ta xíta ñihnu-í cuáháⁿ ní cùu, chi nchaa sá cuèhé sá dúhá ní quide-í, xiáⁿ tá dàcuíta ñihnu ñaha-xi xii-í cuáháⁿ ní cùu, te sá cuèdá tnúhu váha-áⁿ ní cùtnuní iní-í sá quidé-í nchaa sá cuèhé sá dúhá, te xiáⁿ tá xíta ñihnu-í cuáháⁿ ní cùu. Te sá cuèdá nchaa nacuáa càháⁿ tnúhu sá sánú ìchi ñaha xii-o nacuáa cada-o cùndecu-o ní cùtnuní iní-í sá xidó ndécú cuèchi-í ní cùu.

¹⁴ Te tnúhu-áⁿ ní taxi Espiritú Yá Ndiõxí ndécú ñihí-o cachí tnúhu-xi nacuáa cada váha-o. Te nchoo cùu-o mee-ni ñáiyu yíca cuèchi, te tàxi tnuní ñáhá nchaa sá cuèhé sá dúhá xii-o ní

cùu. ¹⁵ Dico nchoo tnàhá iní-ó càda-o nchaa sá vâha dico ñá túu quide-o, te da nchaa sá ñá túu tnàhá iní-ó càda-o quide-o, te ñá túu cùtnuní iní-ó ná cuèdá ducaⁿ quide-o. ¹⁶ Te sá dúcáⁿ quide-o nchaa sá ñá túu tnàhá iní-ó, te xiáⁿ ndíxí tũu iní-ó sá tnúhu sá dúcáⁿ sãnu ìchi ñaha xii-o nacuáa cada-o cùndecu-o cuu-xi tnúhu ío váha. ¹⁷ Te cùtnuní iní-ó sá nchaa sá cuèhé sá dúhá ñùhu iní-ó, xiáⁿ quidé-xí ducaⁿ quide-o sá ñá túu vâha, te ñá díú sá cáhú ñi méé-ó dùcaⁿ quide-o. ¹⁸ Te cùu-o cue ñáiyu sãni cuèhé sání dùha iní-xi, te cuèní-ó càda-o nchaa sá vâha dico ñá túu ñihí ndée-ó càda-o. ¹⁹ Te cuèní-ó càda-o nchaa sá vâha dico ñá ndácú-ó, te ñá túu cuèní-ó càda-o datná quidé nchaa ñáiyu ndècu ìchi cuèhé ìchi duha, chi ñáiyu-áⁿ mee-ni nchaa sá cuèhé sá dúhá quidé-yu, dico díu-ni nchaa xiáⁿ quidé-ó tnàhá-ó. ²⁰ Te sá dúcáⁿ quide-o nchaa sá ñá túu tnàhá iní-ó càda-o te ñá díú mèe-o ducaⁿ çahu iní-ó quide-o, chi nchaa sá cuèhé sá dúhá ñùhu iní-ó xiáⁿ quidé-xí dùcaⁿ quide-o.

²¹ Te ducaⁿ tnàhí yáha-o òré cuèní-ó càda-o sá vâha, chi da mee-ni nchaa sá cuèhé sá dúhá quide-o. ²² Te ío cùdí ñi-ó càda-o nchaa nacuáa càháⁿ Yá Ndiõxí, ²³ te dicó-ni sá ncháá sá cuèhé sá dúhá ñùhu iní-ó, xiáⁿ quidé-xí ngàni ñaha-xi xii-o ñá túu quide-o sá vâha sãni iní-ó càda-o, te ducaⁿ yáha-o chi nchaa sá cuèhé sá dúhá-áⁿ cùnùu-xi taxi tnuní ñáhá-xí xii-o.

²⁴ ;Te ndàhú ní cuu nchoo!

Chi vá yõo ìⁿ ni ndàcu cada nacuáa vá táxí tnùnì ñáhá-gã nchaa sá cuèhé sá dúhá xii-o sá tá dàcuíta nihnu ñaha xii-o cuáháⁿ ní cùu. ²⁵ Te táxãhu xii Yá Ndiõxí sá Xítóhó Jesucristú ní quide-gá cuendá sá vã táxí tnùnì ñáhá-gã ni ìⁿ sá cuèhé sá dúhá xii-o, sá tá dàcuíta nihnu ñaha xii-o cuáháⁿ ní cùu. Te mee-o sãni iní-ó càda-o nchaa nacuáa càháⁿ Yã Ndiõxí, dico núu nchaa sá cuèhé sá dúhá ná cùnnu-xi taxi tnuní ñáhá-xí xii-o, te diu-ni nchaa xiãⁿ cada-o.

8

Ñáyiu quide nchaa nacuáa càháⁿ Espíritú Yã Ndiõxí

¹ Te vitna nchaa nchoo ñáyiu tnàhá tnúhu ndihi Xítóhó Jesucristú vá cuíta nihnu-gá-ó, chi ñá túú-gã ndécú-ó ichi cuehé ichi duha, chi mee-nã nchaa nãcuáa càháⁿ Espíritú Yã Ndiõxí quidé-ó. ² Te Espíritú Yã Ndiõxí-áⁿ táxí tnùnì ñáhá-xí xii-o, te ducaⁿ chi ndècu ndihi-o Xítóhó Jesucristú, te sá dúcáⁿ taxi tnuní ñáhá Espíritú-gá xii-o núu xiãⁿ ñá túú-gã táxí tnùnì ñáhá ni ìⁿ-gá sá cuèhé sá dúhá xii-o, te ducaⁿ quide Espíritú-gá cuendá sá vã cuíta nihnu-o, te diu-ni Espíritú-gá quidé-xí cuendá sá nchóó ndùu táhú-ó cùndecu-o ndihi-gá ni caa ni quíhíⁿ. ³ Te nchoo ñã ní ndàcu-o cada-o nchaa nacuáa càháⁿ tnúhu sá sánú ichi ñaha xii-o nacuáa cada-o cùndecu-o, núu xiãⁿ tnúhu-áⁿ ñã túú ní nihí ndéé-xí càda-xí cuendá sá nchóó vã cuíta nihnu-o. Dico Yã Ndiõxí ní tendaha-gã Déhe

mee-gã ní quixi ñuyíú-a, te Yaá-áⁿ cúú-gã ìⁿ ñáyiu, te càa-gá dàtná cáá ñáyiu ndècu cuéchi-xi xíndecu ñuyíú-a, te sá cuendá nchaa cuéchi nchaa nchoo ñáyiu xíndecu ñuyíú-a ní quixi-gá, te ndéé dàvã-áⁿ nì quide-gá cuendá sá vã táxí tnùnì ñáhá-gã ni ìⁿ sá cuèhé sá dúhá xii-o. ⁴ Te ducaⁿ nì quide-gá cuendá nchoo nchicúⁿ nihnu-o quide-o nacuáa càháⁿ tnúhu sá sánú ichi ñaha xii-o nacuáa cada-o, chi ñá túú-gã cùnùu ni ìⁿ sá cuèhé sá dúhá iní-ó, chi Espíritú Yã Ndiõxí-nã táxí tnùnì ñáhá-xí xii-o.

⁵ Te nchaa ñáyiu cùnnuu nchaa sá cuèhé sá dúhá iní-xi mee-ni xiãⁿ ñúhú iní-yu te quidé-yu. Dico nchoo ñáyiu quide nchaa nacuáa cùnì Espíritú Yã Ndiõxí ñúhú iní-ó mée-ni nacuáa càháⁿ Espíritú-gá-áⁿ te quide-o. ⁶ Te núu mee-ni nchaa sá cuèhé sá dúhá cùnnuu iní-ó, te cuíta nihnu-o, dico núu mee-ni nchaa tnúhu càháⁿ Espíritú Yã Ndiõxí cùnùu iní-ó, te ío váha cuu iní-ó cùndecu-o ndihi-gá ni caa ni quíhíⁿ. ⁷ Te nchaa ñáyiu ñúhu iní mee-ni sã cuèhé sá dúhá cùu úhú iní-yu Yã Ndiõxí, te ñá túú cùnì-yu cadá-yu nãcuáa càháⁿ-gã, te ni ñã ndácũ-yu cadá-yu. ⁸ Te nchaa ñáyiu ducaⁿ cùnnuu nchaa sá cuèhé sá dúhá iní-xi-áⁿ ñã túú cùdũ-yu núu Yã Ndiõxí.

⁹ Te nchóhó chi ñã túú-gã cùnùu sá cuèhé sá dúhá iní-ndó, chi mee-nã nãcuáa càháⁿ Espíritú Yã Ndiõxí quidé-ndó, te

ducaⁿ quide-ndo chi ndècu ndihì-ndo Espiritú-gá, te diu-ni Espiritú-gá-áⁿ ñi tendaha Xítóhó Jesucristú véxi ndècu ndihì-o, te nchaa ñáyiu ñá túú ndècu ndihì Espiritú sá ñi tendaha Xítóhó Jesucristú véxi ndècu ndihì-o ñá túú ndècu ndihì ñahá-yu xii-gá. ¹⁰ Te núu ndècu ndihì-ndo Xítóhó Jesucristú, te cuèi na cùu yiqui cùñú-ndó sã cuendá nchaa sá cuèhé sá dúhá ió ñuyíú-a, dico iní-ndó chi cundecu ndihì-xi Yá Ndiöxí chi ñá túú-gã cuèchi-ndo ndècu núú-gã. ¹¹ Te núu ndècu ndihì-ndo Espiritú Yá Ndiöxí Yaá ní dándótó ñàha xii Xítóhó Jesucristú, te diu-ni-gá cada te ndoto yiqui cùñú-ndó sã tá xíta nihnu cuáháⁿ núu na cùú-xi, te ducaⁿ chi ndècu ndihì-ndo Espiritú-gá.

¹² Te nchòhó ñáyiu ndècu ndihì-í ichi Xítóhó Jesucristú, ñá túú-gã tàú-ndó cùnuu ni ìⁿ sá cuèhé sá dúhá iní-ndó nàcuáa vá cùndecu-gá-ndó ichi cuèhé ichi duha. ¹³ Chi núu na cùnuu sá cuèhé sá dúhá iní-ndó te cuíta nihnu-ndo, chi quíhíⁿ-ndó núú ùhú núú ndàhú. Dico núu daña-ndo mée-ndo chindee ñaha Espiritú Yá Ndiöxí xii-ndo cuèndá sá vã cùnùu-gá sá cuèhé sá dúhá iní-ndó ñá, te nduu táhú-ndó cùndecu-ndo ndihì-gá ni caa ni quíhíⁿ te núu ducaⁿ na càda-ndo.

¹⁴ Chi nchaa ñáyiu quide nchaa nacuáa sànu ichi ñaha Espiritú Yá Ndiöxí cùú-yu déhe-gá. ¹⁵ Te Espiritú sá ñi taxi Yá Ndiöxí ndécú ndihì-o ñá túú quide-xi sá nchóó yùhú-ó cùnu cuechi-o núú-gã,

chi Espiritú-áⁿ quidé-xí sã nchóó cùu-o déhe-gá, te diu-ni Espiritú-áⁿ quidé xãhaⁿ-o xii Yá Ndiöxí: “¡Yòhó Dútú Ndiöxí cùú-n Tátá mée-ndí!”, duha xãhaⁿ-o xii-gá. ¹⁶ Te diu-ni Espiritú-gá-áⁿ tnàhá tnúhu-xi ndihì iní-ó, te càháⁿ ndáá-xi sá nchóó cùu-o déhe-gá. ¹⁷ Te sá dúcáⁿ cùu-o déhe Yá Ndiöxí xiãⁿ ní cachí-gá sá tnàhá-ó ndùu táhú-ó sã ñi nduu táhú Xítóhó Jesucristú, te ducaⁿ ndùu táhú-ó te núu na càda ndee iní-ó ndòho-o datná ní ndoho Xítóhó Jesucristú, te núu ducaⁿ te ió cuu càhnu-o ndihì-gá ni caa ni quíhíⁿ.

¹⁸ Te yúhú càchí-í sá ñá túú nã cada-xi cuèi ndòho-o cuendá-gá ndécú-ó ñuyíú-a, chi ió váha càa núú ndúú táhú-ó cùndecu-o na saá nduu. ¹⁹ Te nchaandi túhú sá ñi cadúha Yá Ndiöxí ní taxi ndecu-gá ñuyíú-a ndètu cahnu-ná-xi saá nduu càchí-gá sá ió càhnu cuu nchaa déhe-gá. ²⁰ Te nchaa sá ñi cadúha Yá Ndiöxí ní taxi ndecu-gá ñuyíú-a ní saá nduu ñá túú-gã cùú-xí sã vãha sá cùú-xí-gã. Te ñá díú mée sá ñi taxi ndecu Yá Ndiöxí ñuyíú-a ducaⁿ ni sàni iní-xi cunduu, chi mee-gã ducaⁿ tnàhí ní cachí-gá cunduu sá saá nduu vã cùú-xí sã vãha sá cùú-xí-gã, dico saá tucu nduu te nchaa xiãⁿ cuu tucu-xi sá vãha sá cùú-xí-gã. ²¹ Te nchaa sá ñi taxi ndecu-gá ñuyíú-a vá cùndùu-gá-xi dàtná cáá-xí vitna te ni vã dánàa-gá, chi nduu saa-xi te ngùndecu váha-xi dàtná ngùndecu váha nchaa cue déhe-gá. ²² Te nàha-o sá ncháandì túhú sá

nchító nĩ cadúha Yá Ndiöxí ndécú ñuyíú-a ndòho-xi vitna datná ndóhó ìⁿ ñadihí sa ní tnahá òré cacu déhe-xi. ²³ Te ñá díú-ní nchàa sá dúcáⁿ nĩ cadúha-gá-áⁿ ducaⁿ ndòho-xi, chi tnahá nchoo dùcaⁿ ndoho-o ndecu-o ñuyíú-a tucu, te nchoo sà ní nduu táhú-ó Espíritú Yá Ndiöxí Espíritú sá nĩ cachí méé-gă nduu táhú-ó dñhanuu. Te ío ndòho tnahá-ó ndècu-o ñuyíú-a te ndètu cahnu-ná-ó sáá nduu ndàda saa-gá yiqui cùñú-ó, te cáháⁿ-gá sá cúú-ó dèhe-gá. ²⁴ Te Yá Ndiöxí ní quide-gá ní naníhí táhú-ó nũu xiáⁿ ní ngúndecu ndihí-o tñuhu ndee iní ndétú-ó sáá nduu càda-gá nàcuáa ní cachí-gá, te núu sa ndècu ndihí-o sá ndúú táhú-ó te vá cúú cáháⁿ-ó sá cùndètu-o sá ndúú táhú-ó chi sa ndècu ndihí-o. ²⁵ Dico sá ndétú-ó ndùu táhú-ó cùu-xi sá vátá cùndècu ndihí-gá-ó, te xini ñuhu-ni-xi cada ndee-ni iní-ó cùndetu-o ndéé sáá nduu ndùu táhú-ó sá dúcáⁿ nĩ cachí Yá Ndiöxí nduu táhú-ó.

²⁶ Te Espíritú-gá chindee ñaha-xi xii-o nacuáa níhí ndéé-ó cùndecu-o, te nchoo ñà túú xini-ó cáháⁿ ndihí-o Yá Ndiöxí nàcuáa tãu-xi cunduu dico Espíritú-gá cáháⁿ ndàhú-xi núú-gă cuèndá-ó cuèi òré ñá níhí-ó tñuhu cáháⁿ-ó cuèndá nchaa sá ìo cuìní-ó cãcáⁿ-ó nũú-gă. ²⁷ Te Yá Ndiöxí sa naha ndáá-gá nchaa nàcuáa sàni iní-ó, te ducaⁿ sà naha ndáá-gá nchaa nàcuáa sàni iní Espíritú-gá. Te Espíritú-gá cáháⁿ ndàhú-xi núú-gă cuèndá nchoo ñayiu yindahá-gá, te cáháⁿ ndàhú-xi

núú-gă nàcuáa cuìní méé-gă cunduu.

Nchaa sá ná càda ñaha ñáyiu te vá ndácú-yu nà-datùhú-yu iní-ó chi ndacu nahi-ni-o yãha-o nchàa sá ná cádá ñahá-yu

²⁸ Te sa naha-o sá Yá Ndiöxí quidé-gă sá ncháá sã yãha-o ndècu-o ñuyíú-a cùu-xi sá vãha sá cúú-xi nchòo cue ñáyiu cùu iní ñáhá xii-gá, chi cùu-o ñáyiu ní cáháⁿ-gá cundecu ndihí-gá dàtná ní cachí iní méé-gă. ²⁹ Te ndéé cùtnàhá vátá ngãva-gá ñuyíú, te Yá Ndiöxí sa naha-gá nándi cùu ñáyiu cundecu ndihí-gá, te diu-ni ndéé dàvã-áⁿ ní cachí-gá sá ñayiu-áⁿ cunduu váha iní-yu dàtná váha iní Déhe mee-gă, te ducaⁿ nĩ cachí-gá cuèndá sá Déhe mee-gă-áⁿ cunuu-gă núú nchàa ñáyiu cundecu ndihí-gá. ³⁰ Te nchaa ñáyiu ducaⁿ nĩ cachí-gá cundecu ndihí-gá ndéé cùtnàhá vátá ngãva-gá ñuyíú cáháⁿ ñáhá-gă xii-yu vitna, te nchaa ñáyiu ducaⁿ cáháⁿ-gá cächí-gá sá ñà túú-gă cuèchi-yu ndècu núú-gă, te diu-ni ñayiu-áⁿ cachí-gá sá ìo cãhnu cuú-yu.

³¹ Te vitna ní cutnùní iní-ó, te ñá túú nãgá cani iní-ó, chi Yá Ndiöxí ndécú ndihí ñaha-gá xii-o, te vá yòo ìⁿ-gá ndacu quehndé nihnu cuèndá sá vã chindèe ñaha-gá xii-o. ³² Te Yá Ndiöxí ñá túú ní cùdí iní-gá Déhe-gá sá cùú-gă cuèndá nchaa nchoo ñayiu xĩndecu ñuyíú-a, te sá dúcáⁿ ndéé Déhe-gá ñá túú ní cùdí iní-gá xiáⁿ cùtnùní iní-ó sá

táxí-gă nchaandi túhú sá xíní ñùhu-o. ³³ Te vá yõo ñⁿ ndacu cacáⁿ cuéchi núú Yă Ndiõxí cuendá nchaa ñâyiu ní cachí-gá cundecu ndihi-gá te núu ná cúú cuéchi-yu ndècu. Chi mee-gă cächí-gá sá ñà túú ndècu cuéchi-yu núú-gă. ³⁴ Te vá yõo ñⁿ ndacu daquihíⁿ ñáhá xii-o núú ùhú núú ndàhú, chí Xítohó Jesucristú ní xihí-gá te ní ndoto-gá, te cuándaa-gá núú ndécú Dütú Ndiõxí núcõo-gá xio cùha-gá, te ducaⁿ ño cùnnu-gá, te yacáⁿ càháⁿ ndàhú-gá núú Dütú Ndiõxí cuendá-ó. ³⁵ Te vá yõo ñⁿ ndacu cada ñaha xii-o ñⁿ sá ñà túú vâha cuendá sá vâ cúú ñí ñáhá-gă Xítohó Jesucristú xii-o, te ni tnúndòho tnúhu ndàhú, te ni sá ndihú iní-ó ñă cútñuní iní-ó năsa cada-o căcu nihnu-o ñⁿ sá ná yâha-o, te ni nchâa sá cadá ñaha ñâyiu sá cuendá-gă, te cuéi-ni sá vâ nihí-ó sá cõhó sá caxí-ó, te cuéi-ni sá vâ nihí-ó dõó cuihnu-o, te cuéi ndècu-ná-ó sá yâha-o ñⁿ sá yâha-o, te cuéi sa ndècu-ná-ó sá cahní ñáhá-yu, dico Xítohó Jesucristú vá dáñá ndéé-gá sá cúú ñí ñáhá-gă xii-o. ³⁶ Te quee ndáá-xi năcuáa ní cáháⁿ ñⁿ tée ní xóo cáháⁿ tnúhu Yă Ndiõxí ndéé sanaha ñí ngódó tnùní núú tütú-gá núú cächí-xi:

Yòhó Dütú Ndiõxí nchaa-ni nduu nchaa-ni òré cùní ñâyiu cahni ñáhá-yu xii-ndí sá cuendá-n,

te cächí-yu sá cúú-ndí dàtná cue mbéé cue quiti sa ndècu túha-ná

cahní-yu.

Duha ní cachí tée ní xóo cáháⁿ tnúhu-gá-áⁿ, te ducaⁿ ñí ngódó tnùní núú tütú-gá. ³⁷ Te cuéi ducaⁿ năndi sá ná càda ñáhá-yu xii-o, dico vá ndácú-yu nadatùhú-yu iní-ó chí ndacu nahí-ni-o yâha-o nchâa sá dúcáⁿ ná càda ñáhá-yu xii-o, te ducaⁿ chí Xítohó Jesucristú Yaá ño cùu iní ñáhá xii-o ndecu ndihi ñaha-gă chindèe ñaha-gă. ³⁸⁻³⁹ Te yúhú cútñuní ndáá iní-í sá ñí ñⁿ sá ño ñuyú-a vá ndácú-xí càda-xi cuendá sá vâ cúú ñí ñáhá-gă Yă Ndiõxí xii-o, te ni sá cúú-ó, te ni sá cundècu-o ñuyú-a, te ni ñⁿ espíritú sá ño cùnnu cundihí yucu ñávâha te ni ñⁿ dava-gá cue espíritú cundihí-xi vá ndácú-xí càda-xi cuendá sá vâ cúú ñí ñáhá Yă Ndiõxí xii-o. Te ni sá cúú ñuyú-a vitna, te ni sá cúú ndéé cuéé-gă, te ni ñⁿ sá ndécú àndi, te ni ñⁿ sá ndécú ñuyú-a, te ni ñⁿ sá ñí cadúha mee Yă Ndiõxí, ni ñⁿ xiáⁿ vá ndácú-xí càda-xi cuendá sá vâ cúú ñí ñáhá-gă xii-o chí ndècu ndihi-o Xítohó Jesucristú Yaá cúú Xítohó-ó.

9

Yă Ndiõxí ní cachí-gá sá ñâyiu israhél cuú-yu ñâyiu canchicúⁿ nihnu ñaha xii-gă

¹ Te yúhú càháⁿ ndáá-í chí cùu-í ñⁿ tée ndècu ndihi Xítohó Jesucristú, te ndècu ndihi-í Espíritú Yă Ndiõxí nũ xiáⁿ cútñuní iní-í sá càháⁿ ndáá-í. ² Te nchaa-ni nduu nchaa-ni òré ño ndihú iní-í, te ducaⁿ-ni ño quide úhú-xi iní-í ³ sá cuendá nchaa ñâyiu

cùu ndi mee-í. Te núu dícó cúú-xí ìⁿ sá chíndèe ñaha xii-yu nucúndecu váha-yu núu Yá Ndióxi ñá, te dañá-í mée-í dàcuíta nihnu ñaha Xítóhó Jesucristú núu dícó sá cúú. ⁴ Te nchaá ñáyiú cùu ndi mee-í-áⁿ cúú-yu ñáyiú isràél, te Yá Ndióxi ní cachí-gá sá cúú-yu déhe-gá, te ní quide-gá nàcuáa ní cutnùní iní-yu sá ìo càhnu cuu-gá, te ní cáháⁿ ndáá-gá núú-yu nàcuáa cada ñaha-gã xii-yu, te ní xáhaⁿ-gã xii ndí Moisés ní chídó tñuní ndí nàcuáa cadá-yu cundecú-yu. Te ní xáhaⁿ-gã xii-yu nàcuáa cadá-yu cada càhnu ñahá-yu xii-gá, te ní xáhaⁿ tucu-gá xii-yu nchaá nàcuáa cada-gá ndéé cuéé-gá. ⁵ Te nchaá ñáyiú-áⁿ cúú-yu ñaní tñáhá ncháa cue téé ní cunuu nì xíndecu ndéé sanaha, te diu-ni ñaní tñáhá-yu cùu Xítóhó Jesucristú Yaá ní tendaha Dütú Ndióxi ní quixi ñuyíú-a, te tñáhá-gá cúú-gã Ndióxi te ío cunuu-gá, te nchaá nduu nchaá quíú ìo càhnu cuu-gá. Te ducaⁿ na cunduu.

⁶ Te vá càchí-ó sã Yá Ndióxi ñá túú ní quide-gã nchaá nàcuáa ní cachí-gá cada-gá cuèndá sá ñà túú sàndáá iní ñáhá dàva ñáyiú isràél xii-gá. Te sá dúcáⁿ xíquide davá-yu te ñá túú quidé-yu nàcuáa tàú-xi cadá-yu sá cúú-yu ñáyiú isràél. Te ñáyiú ducaⁿ xíquide-áⁿ cúú-yu ñáyiú ñá túú cùu cuèndá ñáhá Yá Ndióxi. ⁷ Te cuéi nchaá-yu cúú-yu ñaní tñáhá ndí Àbrahám dícó ñá túú quidé-yu nchaá nàcuáa tàú-xi cunduu cadá-yu sá

cúú-yu ñaní tñáhá ndí. Te Yá Ndióxi ní xáhaⁿ-gã xii ndí Àbrahám: “Nchaá cue ñaní tñáhá tẽ Isàác téé cùu déhe ducuⁿ-n, mee-ni cuè ñáyiú-áⁿ cuu ñaní tñáhá-n”, duha ní xáhaⁿ-gã xii ndí Àbrahám. ⁸ Te xíãⁿ cutnùní iní-ó sã ñã ncháá ñáyiú cùu ñaní tñáhá ndí Àbrahám cúú-yu ñáyiú cùu cuèndá Yá Ndióxi, chí mee-ni ñáyiú sàndáá iní nàcuáa ní cáháⁿ-gá cada-gá, ñáyiú-áⁿ cúú cuèndá-gá. ⁹ Te duha ndúu tñúhu ní xáhaⁿ Yá Ndióxi xii ndí Àbrahám: “Sáá nduu te yúhú cada-í te coo ìⁿ déhe-n ndíhi ñadíhí-n tã Sãrá”, duha ní xáhaⁿ-gã xii ndí.

¹⁰ Te ñá díú-ni xíãⁿ ní quide Yá Ndióxi, chí tñáhá ní ndatnúhu-gá ndíhi ndí Rêbecá cútnáhá vitna ñùhu úú déhe ndí ndíhi ndí Isàác téé ní cuu ñaní tñáhá-ó ní xíndecu ndéé sanaha. ¹¹⁻¹³ Te cútnáhá vitna ñùhu-gá déhe ndí Rêbecá, cútnáhá vátá cadá-gã-güexi ni ìⁿ sá cuèhé sá dúhá, te ni ìⁿ sá vãha, ní xáhaⁿ Yá Ndióxi xii ndí: “Déhe-n tẽe díhna na càcu te téé-áⁿ tñi-dé nchaá tñúhu cáháⁿ déhe-n tẽe cùu úú ná càcu”, duha ní xáhaⁿ-gã xii ndí Rêbecá. Te ní quee ndáá-xi nàcuáa ní cáháⁿ Yá Ndióxi núú tütú-gá núú càchí-xi: “Té Jàcób ní cuu váha iní-í núú-dẽ, te té Esàú ñá túú ní cùu váha iní-í núú-dẽ”, duha càchí-gá núú tütú-gá. Te ducaⁿ nì cuu chí ducaⁿ nì cachí mée-gã cunduu sá càháⁿ-gá nchaá ñáyiú cuìní mée-gã, te ñá díú cuèndá ìⁿ chiúⁿ quidé-yu càháⁿ ñáhá-gã

xií-yu.

14 Te vá cúú tnàhí cáháⁿ-ó sã Yã Ndiõxí ñá túú quide váha-gá sá dúcáⁿ quide-gá chi mee-gã ío ndáá quidé-gã! 15 Te mee-gã ní xáhaⁿ-gã xii ndíi Moisés: “Cundàhú iní-í chindee-í mee-ni cuè ñáyiu cãchí iní-í”, duha ní xáhaⁿ-gã xii ndíi. 16 Te xiãⁿ cútnùní iní-ó sã cundàhú iní-gá ñáyiu chi ducaⁿ cuíní mée-gã cunduu, dico ñá túú cundahú iní ñáhá-gã xií-yu cuendá sá dúcáⁿ cuíní-yu cada-gá, te ni ñà túú cundahú iní ñáhá-gã xií-yu cuendá sá ío ndùcu ndeé-yu quidé-yu ìⁿ sá quidé-yu. 17 Te núú tütú Yã Ndiõxí càháⁿ-xi nàcuáa ní xáhaⁿ-gã xii téé ní cuu Faràón téé ní xíndaha nàcióⁿ Ègiptú, te duha ní xáhaⁿ-gã: “Yúhú ní quide-í yíndàha-n ñáyiu cuendá cada-í titní núú sã cáda-í núú-n cuendá cutnùní iní-n sã ío càhnu cuu-í, te ducaⁿ nchàa ñáyiu ñuyíú cutnùní iní-yu sá yúhú cuú-í Ndiõxí”, duha ní xáhaⁿ-gã xii téé ní cuu Faràón. 18 Te xiãⁿ cútnùní iní-ó sã Yã Ndiõxí cundàhú iní-gá mee-ni cuè ñáyiu cãchí iní mée-gã, te ducaⁿ ndàda díi-gá iní nchaa ñáyiu cãchí iní mée-gã ducaⁿ càda-gã.

19 Te sá dúhá càháⁿ-í te dava-ndo quèsaha-ndo: “Nã cuendá Yã Ndiõxí dácàa-gá cuéchi díquí ñáyiu núu ni ìⁿ-yu ñá ndácũ-yu quehndé nihnú-yu cuendá sá vã cáda Yã Ndiõxí nàcuáa cuíní-gá”, quesaha-ndo. 20 Te chí cuáha cuendá sá dicó ñáyiu

ñuyíú-a cùu-ndo te ñá túú ndùu váha-xi sá nchòhó cáháⁿ-ndó ìⁿ tnúhu sá ñà túú ndùu váha sá cúú-xi Yã Ndiõxí. Te duha na càháⁿ-í núú-ndó nàcuáa tecú tnùní-gá-ndó nàcuáa ndùu tnúhu càháⁿ-í. Te ñá túú xini-ó sã ìⁿ quídi ñuhu cúñaha-xi xii ñáyiu ní cadúha ñaha xii-xi: “Nã cuendá duha ní cadúha ñaha-n xii-í”, cúñaha-xi. 21 Chi ñáyiu càdúha nchaa quídi-áⁿ cuu-ni cadúha-yu ndíhi ñuhu cuèi nása na cunduu quídi cadúha-yu canehe chiúⁿ-yu, chi ìⁿ-ni ñùhu cadúha-yu quídi cánehe chiúⁿ-yu ndi tnahá nduu sácóo-yu vico ndíhi quídi sá cánehe chiúⁿ-yu nduu cùtexínu.

22 Te dũu-ni ducaⁿ quide Yã Ndiõxí, chi cuíní-gá dandòho-gá ñáyiu ñá túú quide nchaa nacuáa nduu vétú iní-gá, te cada-gá nàcuáa cutnùní iní-yu sá ío càhnu cuu-gá. Te sa ndècu túha-ná-yu sá quíhíⁿ-yu núú ùhú núú ndàhú, te cuèi ducaⁿ dico ío ta quide cahnu iní-gá cuáháⁿ. 23 Te ducaⁿ quide-gá cuendá cutnùní iní nchaa ñáyiu ñuyíú sã ío váha quide-gá sá cúú-xi nchàa nchoo ñáyiu cundahú iní-gá, chi ní cachí-gá sá nchóó cuè ñáyiu cundahú iní-gá nduu táhú-ó cundecu-o ndíhi-gá núú ío váha càa ndecu-gá. 24 Te dava nchoo ñáyiu ní cáháⁿ Yã Ndiõxí cúú-ó ñáyiu isràél, te dava-o cùu-o ñáyiu ñá túú cùu ñáyiu isràél. 25 Te ní quee ndáá-xi nàcuáa ní xáhaⁿ Yã Ndiõxí xii ndíi Òseás

tée ní xóo cáháⁿ tnúhu-gá ndéé sanaha nĩ chídó tnùnĩ ndíi núú tütú-gá núú cächí-xi:

Ñáyiú ñá túú cùu cuendá-í ní cùu te nduu cuendá-í-yu,

te diu-ni ñáyiú-áⁿ ñà túú cùu váha iní-í núú-yu ni cùu, dico vitna cùu váha iní-í núú-yu.

²⁶ Te diu-ni ñuú núú dúcáⁿ nĩ cachí-í sá ñà túú ñáyiú cùu cuendá-í diu-ni ñuú-áⁿ coo ñáyiú cuu déhe yúhú Dútú Ndiöxí Yaá ndécú tũu andiú.

Duha ní xáhaⁿ Yá Ndiöxí xii ndíi Óseás ní chídó tnùnĩ ndíi núú tütú-gá. ²⁷ Te

ndíi Chàia tée ní xóo cáháⁿ tucu tnúhu Yá Ndiöxí ndéé sanaha nĩ cáháⁿ ndíi cuendá ñáyiú israél, te duha ní cachí ndíi: “Cuèi cuéhé víhí ñáyiú israél dàtná cuéhé ñuhu cúchí lámár dico sacú-ni-yu vá quíní-yu tnúndòho tnúhu ndàhú. ²⁸ Te Yá Ndiöxí ío ndíhi cada-gá nchaa nàcuáa cáháⁿ-gá ñuyú”, duha ní cachí ndíi. ²⁹ Te ní cáháⁿ tucu ndíi nàcuáa cada-xi ndéé cuéé-gá, te ní cachí ndíi:

Yá Ndiöxí Yaá táxí tnùnĩ nchaandi túhú sá ío andiú ndíhi ñuyú ñà túú ní dànaa-gá nchaa ñáyiú israél, chí núu ni ndíhi-yu danàa ñaha-gá,

te nchoo cùu-o datná ní cuu nchaa ñáyiú ní xindecu ñuú Sòdomá ndíhi nchaa ñáyiú ní xindecu ñuú Gòmorrá, te ndíhi-o nàa datná ní naa nchaa ñáyiú-áⁿ ní cùu.

Duha ní cachí ndíi.

Ñáyiú israél ñá túú sàndáá iní-yu tnúhu Xítoho Jesucristú

³⁰ Te sá cuendá xíãⁿ nũu vitna cächí tnúhu-í xii-ndo sá cuè ñáyiú ñà túú cùu ñáyiú israél ñá túú ní nànducu niñnú-yu nàcuáa cadá-yu cudiú-yu núú Yá Ndiöxí, dico vitna cudiú-yu núú-gá chí ní sàndáá iní-yu Xítoho Jesucristú. ³¹ Te ñáyiú israél nchícúⁿ niñnú-yu tnúhu sá dánèhé ñáhá xii-yu nàcuáa cadá-yu cudiú-yu núú Yá Ndiöxí dico ñá túú cudiú-yu núú-gá chí ñà ndácũ-yu cadá-yu nchaa nàcuáa cáháⁿ-xi. ³² Te ducaⁿ ñà túú cudiú-yu núú Yá Ndiöxí chí ñá túú sàndáá iní-yu Xítoho Jesucristú, te sàni iní-yu sá sá cuendá mee-ni nchaa sá quidé mèe-yu cudiú-yu núú-gá, te sá dúcáⁿ quidé-yu te cùu-yu dàtná ìⁿ ñáyiú nguñenu ìⁿ yúú te nduá-yu. Te ducaⁿ sàtnahá-xi cùu-yu chí ñá túú cùu váha iní-yu núú Xítoho Jesucristú. ³³ Te quèe ndáá-xi nàcuáa ní cáháⁿ Yá Ndiöxí ìⁿ xichi núú tütú-gá núú cächí-xi:

Yúhú táxí ndècu-í ìⁿ tée ñuú Sìón, te cuu-dé dàtná ìⁿ yúú, te yúú-ãⁿ nguñenu ñáyiú te nduá-yu,

te nchaa ñáyiú na quíndáá iní ñáhá xii-dé, te vá ndíxí cuèchi iní-yu sá dúcáⁿ nĩ sàndáá iní ñáhã-yu xii-dé.

Duha cächí-gá núú tütú-gá.

10

1 Te nchòhó ñáyiú ndècu ndihí-í ichi Xítohó Jesucristú càchí tnúhu-í xii-ndo sã cãháⁿ ndihí-í Yã Ndiöxí cuendá ñáyiú isràél, chí ío cuiní-í sã nánihí tàhú-yu. 2 Te na càháⁿ ndáá-í cuendá-yu sã ïo ndücu ndeé-yu xínu cuechí-yu núú Yã Ndiöxí, te dicó-ni sã ñà túú quidé-yu nàcuáa cuiní méé-gã cadá-yu. 3 Chi ñá túú quide cuendá-yu nàcuáa cuiní Yã Ndiöxí cada ñaha-gã xii-yu nàcuáa cudíú-yu núú-gã, te quide-ní-yu nàcuáa sàni iní méé-yu cudíú-yu núú-gã te ñá túú cuiní-yu tñí-yu tnúhu càháⁿ-gã nàcuáa cudíú-yu núú-gã. 4 Te Xítohó Jesucristú ní quide-gã cuendá sã vã cúnüu-gã nchaa tnúhu ní chídó tnùní ndíi Moisés, te nchaa ñáyiú na quindáá iní ñáhá xii-gã te ñu-gã cada te cudíú-yu núú Yã Ndiöxí.

5 Te ndíi Moisés càháⁿ ndíi núú tütú ndíi cuendá ñáyiú cuiní cudíu núú Yã Ndiöxí cuendá sã nchícúⁿ nihnú-yu nchaa nàcuáa ní càháⁿ ndíi. Te ní cachí ndíi sã ncháá ñáyiú na càda nchaa nacuáa ní xáhaⁿ Yã Ndiöxí xii ndíi ní chídó tnùní ndíi te naníhí tàhú-yu, te núu dicó ndacú-yu cadá-yu nchaa nàcuáa ní càháⁿ ndíi. 6 Dico vitna núu na quindáá iní-ó Xítohó Jesucristú, te cudíu-o núú Yã Ndiöxí. Te duha càchí tnúhu ní chídó tnùní ndíi núú tütú-gã: “Vã cání iní-ndó sã xíni ñùhu-xi cada-ndo ñⁿ sã vã yoo tñahí ndàcu cada sã cáá tñu-ndo àndiu te cúñaha-ndo

xii Cristú cuuⁿ-ndo ndíhí-gã núú ñùyíú-a. 7 Te ni vã cání tucu iní-ndó sã quihíⁿ túu-ndo núú xíndecu nchaa ñáyiú ní xihí te cada-ndo sã Cristú ndoto-gã”, duha càchí tnúhu-áⁿ sã vã dúcáⁿ càni iní-ó. 8 Te càchí tucu tnúhu-áⁿ: “Tnúhu Yã Ndiöxí sã ndécú ndíhí ñaha-xi xii-ndo chí sàni iní-ndó cuendá tnúhu-áⁿ te càháⁿ-ndó”, duha càchí tnúhu-áⁿ. Te tnúhu sã ndécú ndíhí-ndo-áⁿ cúú-xí tnúhu càháⁿ-ndí núú ñáyiú, te xini ñuhu-xi sã quindáá iní-yu tnúhu-áⁿ. 9 Te núu na nñuu-ndo càháⁿ-ndó sã Xítohó Jesucristú cúú-gã Xítohó-ndó, te quindáá iní-ndó nì yuhu ni iní-ndó sã Yã Ndiöxí ní dándótó-gã Xítohó Jesucristú, te naníhí tàhú-ndó te núu ducaⁿ na càda-ndo. 10 Te nchaa ñáyiú ducaⁿ sàndáá iní te càháⁿ-yu sã Xítohó Jesucristú cúú-gã Xítohó-yu, ñáyiú-áⁿ cudíú-yu núú Yã Ndiöxí te naníhí tàhú-yu.

11 Te núú tütú Yã Ndiöxí càchí-xi sã nì ñⁿ ñáyiú sàndáá iní ñáhá xii Xítohó Jesucristú vã ndíxí cuèchi iní-yu sã dúcáⁿ sàndáá iní ñáhá-yu xii-gã. 12 Te sã cúú-xí Xítohó Jesucristú chí ñⁿ-ni cùu ñáyiú isràél ndíhí ñáyiú ñá túú cùu ñáyiú isràél, chí ñu-gã cúú-gã Yaá cúnüu taxi tñuní-gã nchaa ñáyiú, te ío váha quide-gã sã cúú-xí nchaa ñáyiú càháⁿ ndíhí ñaha xii-gã. 13 Te quèe ndáá-xi nàcuáa càháⁿ-xi núú tütú Yã Ndiöxí núú càchí-xi: “Nchaa ñáyiú na càháⁿ ndàhú núú

Xítohó Jesucristú sá dácäcu nihnu ñaha-gã xií-yu, te ñáyi-u-án naníhí tãhú-yu”, duha cãchí-xi núú tütú-gá. 14 Te ñáyi-u-án vã nihí-yu nãcuáa cáháⁿ ndãhú-yu núú-gã te núú ñá túú sãndáá iní ñáhã-yu xii-gá, te ni vã nihí-yu nãcuáa cadã-yu quindáá iní ñáhã-yu xii-gá te núú vátã cündedóho-gã-yu tnúhu-gá, te ni vã nihí-yu tnúhu-gá te núú vá yõo quíhíⁿ cútnuhu ñaha xií-yu. 15 Te ni vã yõo quíhíⁿ ducaⁿ cútnuhu ñaha xií-yu tnúhu-gá te núú Yã Ndiõxí vá téndãha-gã ñáyi-u quíhíⁿ cútnuhu ñaha xií-yu. Te núú tütú Yã Ndiõxí cãchí-xi: “Ío vii ío váha cùu iní-ó vëxi ñáyi-u dãnehé ñáhã xií-o nãcuáa ndùu tnúhu sá cãháⁿ nãcuáa naníhí tãhú-ó”, duha cãháⁿ-xi núú tütú-gá.

16 Te ñã nchãã-yu cuení-yu quindáá iní-yu tnúhu-án. Te ní quee ndáá-xi nãcuáa ní xáhaⁿ ndíi Chàíá xii Yã Ndiõxí te duha ní xáhaⁿ ndíi xii-gá: “Yòhó Dútú Ndiõxí na nãcani tnúhu-í núú-n sã ío sacú-ni ñáyi-u sãndáá iní-yu tnúhu cãháⁿ-ndí”, duha ní xáhaⁿ ndíi xii-gá. 17 Te xini ñuhu-xi sá dñha-gã cundedóho-yu tnúhu-án cuendã ducaⁿ te quindáá iní-yu, te tnúhu-án cúu-xí tnúhu Xítohó Jesucristú.

18 Te vá cúu cãháⁿ-ó sã ñã túú ní nihí ñáyi-u isrãél tnúhu-gá, chi nchãã-yu ní nihí-yu tnúhu-gá, chi núú tütú Yã Ndiõxí cãchí-xi: Cue tée ní cãháⁿ tnúhu Yã Ndiõxí ní cãháⁿ-güedé tnúhu-gá núú ñáyi-u,

te tnúhu-án ní xité nuu-xi nihí ñuyíú.

Duha cãchí-xi núú tütú-gá. 19 Te ni vã cãháⁿ-ó sã ñáyi-u isrãél ñã túú ní cùu tnuní iní-yu nãcuáa ndùu tnúhu-gá chi ní tecú tnùní-yu. Te ndéé sanaha ñí chídó tnùní ndíi Moisés nãcuáa ní xáhaⁿ Yã Ndiõxí xii ñáyi-u isrãél, te duha ní xáhaⁿ-gã xií-yu:

Yúhú cada váha-í nchãã ñáyi-u ñã túú cùu ñáyi-u isrãél, ñáyi-u ñã túú cùtnuní iní-xi nãcuáa cada váha cundecu núú-í, te nchòhó cudééⁿ-ndó núú-yu te cuu cuédú iní-ndõ-yu.

Duha ní xáhaⁿ Yã Ndiõxí xií-yu te ducaⁿ ñí chídó tnùní ndíi Moisés. 20 Te ndíi Chàíá ñã túú tñhí ni yùhú ndíi ní quide ndíi núú Yã Ndiõxí ní cãháⁿ ndíi tnúhu-gá, te ní cachí ndíi:

Ñáyi-u ñã túú nãnducu ñaha xii-í ní cùu ní naníhí ñáhã-yu xii-í,

te ni ñã túú ndùcu tnúhu ñáhã-yu xii-í ní cùu te ní xini ñáhã-yu.

Duha ní cachí ndíi Chàíá ní cãháⁿ ndíi tnúhu Yã Ndiõxí. 21 Te ní quide tucu ndíi núú Yã Ndiõxí ní cãháⁿ ndíi tnúhu-gá cuendã ñáyi-u isrãél, te ní cachí ndíi: “Nchãã-ni nduu yíhí-í cãháⁿ-í ñáyi-u isrãél te ñã túú cuení-yu quindáá iní-yu chi ío sãá iní-yu”, duha ní cachí ndíi Chàíá ní cãháⁿ ndíi tnúhu Yã Ndiõxí.

11

Cuendã ñáyi-u isrãél ñáyi-u naníhí tãhú

1 Te cuëi ducaⁿ dico vá cáháⁿ-ó sã Yã Ndiöxí dáquèe tíhú-gã ñáyiú isràél chi ðiú-ni ñáyiú-áⁿ cúú cuendá-gá, chi yúhú tnàhá-í cúú-í mei tõe isràél, te ñaní tnàhá-í ní cuu ndíi Ábrahám tée ní xíndecu ndéé sanaha víhi-gá, te ðiú-ni ñaní tnàhá-í ní cuu tucu ndíi Benjamín. 2 Te ndéé sanaha ðucaⁿ ní cachí Yã Ndiöxí sá nchühú ñáyiú isràél cúú-ndí ñáyiú cùu cuendá-gá, te ñá túú dàquee tíhú ñáhá-gã xii-ndí, te nchòhó sa xíní-ndó nàcuáa cáháⁿ-xí núú tùtú Yã Ndiöxí núú cächí-xí nàcuáa ní quide té Èliás ní ndacáⁿ cuéchi-dé núú-gã cuendá ñáyiú isràél. 3 Te duha ní xáhaⁿ-dẽ xii-gá: “Yòhó Dútú Ndiöxí, ná nàcani tnúhu-í núú-n sã ñí sahní-yu cue tée cáháⁿ tnúhu-n, te ní dátanú-yu núú xihí quití ndùu táhú-n, te yúhú-nã ní cácu-í ndécù-í dico nànducu ñahá-yu chi tnàhá-í cuíní-yu cahni ñàhá-yu xii-í”, duha ní xáhaⁿ-dẽ xii Yã Ndiöxí. 4 Te Yã Ndiöxí ní xáhaⁿ-gã xii-dé: “Sa ní dáquèé ðiú-í úsá mĩl cue tée cùu cuendá-í, te ñá túú nèhe-güedé sá yíñùhu núú Bàál sá cächí-yu cùu ndiöxí-yu te ñá ndáá sá ndiöxí cúú-xí”, duha ní xáhaⁿ-gã xii té Èliás. 5 Te ducaⁿ sãtnahá-xí cùu vitna chi xíndecu ñáyiú ní cáháⁿ-gá ní chìtnahá ñáhá xii-gá, te ducaⁿ ñí quide-gá chi ní cundàhú iní ñáhá-gã xii-yu. 6 Te ducaⁿ ñí cáháⁿ ñáhá-gã xii-yu sá cundàhú iní ñáhá-gã, te ñá díú cuendá ðiúⁿ chùúⁿ quidé-yu

ducaⁿ ñí cáháⁿ ñáhá-gã xii-yu, chi núú ðicó cuendá ðiúⁿ chùúⁿ quidé-yu ducaⁿ ñí cáháⁿ ñáhá-gã xii-yu ña, te ñá díú-gã sá cúú iní mée-gã ducaⁿ ñí cáháⁿ ñáhá-gã xii-yu te núú ducaⁿ.

7 Te na cächí tnúhu-í xii-ndo nàcuáa cùu vitna sá ñáyiú isràél cuíní-yu cudíú-yu núú Yã Ndiöxí dico ñá ndácü-yu, dico dava ñáyiú ní cáháⁿ-gá ñáyiú-áⁿ cudíú-yu núú-gã, te ñáyiú ducaⁿ ñá túú cudíú núú-gã-áⁿ ïo ní cuu sáá iní-yu núú-gã. 8 Te ní quee ndáá-xí nàcuáa cáháⁿ-xí núú tùtú Yã Ndiöxí núú cächí-xí: “Yã Ndiöxí ní cachí-gá sá cúú-yu ñáyiú ïo ñí ðíquí-xí, chi cuëi ndèhé-yu nàcuáa cáháⁿ tnúhu-gá dico ñá cútnùní iní-yu nàcuáa cáháⁿ-xí, te cuëi ndédòho-yu dico ñá túú quèe díquí-yu, te ducaⁿ-ni quidé-yu ndéé vitna”, duha cächí-xí núú tùtú-gá. 9 Te ndíi Dàvíí ní cachí ndíi:

Ñáyiú ïo váha ndècu te cudíí iní-yu quidé-yu vico, dico yáha-yu dátaná yáha ðiúⁿ quití ngáva trampá àdi ðiúⁿ quití ñá cútnùní iní-xí quèe xití ñunu, chi cuíta nihnú-yu te nacháhu-yu nchaa sá quidè-yu.

10 Te cúú-yu ñáyiú ñá túú vèdana tècú tnùní, te cùu tucú-yu dátaná ðiúⁿ ñáyiú ïo ndòho nchido ðiúⁿ sá vèe.

Duha ní cachí ndíi Dàvíí.

Ñáyiú ñá túú cùu ñáyiú isràél naníhí táhú-yu

11 Te cuèi ducaⁿ dico vá cächí-ó sã sã dúcáⁿ ñã túú ní quide ndáa ñáyiú isràél te ní xíta nihnu duúⁿ-yu, te ñáhá chí sã dúcáⁿ ní quidé-yu te ní ngúndecu ndihí dava-gá ñáyiú tnúhu sã càháⁿ nàcuáa naníhí tàhú-yu, te ñáyiú isràél quiní-yu nàcuáa naníhí tàhú ñáyiú ñã túú cùu ñáyiú isràél, te tnàhá-yu cudíí iní-yu naníhí tàhú-yu. 12 Te sã dúcáⁿ ní quide sãá iní-yu ñã túú ní quide ndáa-yu núú Yã Ndiöxí, te xĩáⁿ ní cuu-xi ñã sã vãha sã cúu-xí ñáyiú nihíí ñuyíú, dico sãá nduu te cada ñáyiú isràél nchaa nàcuáa càháⁿ Yã Ndiöxí, te dàvá-áⁿ ïo-gá váha cuu xii nchaa ñáyiú nihíí ñuyíú.

13 Te nchòhó ñáyiú ñã túú cùu ñáyiú isràél cächí tnúhu-í xii-ndo sã Yã Ndiöxí ní cachí-gá sã càháⁿ-í tnúhu-gá núu-ndó, te yúhú cächí-í sã ïo càhnu cuu chiuⁿ quide-í. 14 Te duha càháⁿ-í cuendá sã nũu cudana ió dava ñáyiú cùu ndi mee-í cudíí iní-yu cada váha ñaha Yã Ndiöxí xii-yu dàtná quidé vãha ñaha-gã xii-ndo, te naníhí tàhú-yu. 15 Te sã cuendá sã ní quee tíhú ñáyiú isràél ní nacáháⁿ cáhnú iní tnàhá ñáyiú nihíí ñuyíú ndihí Yã Ndiöxí, dico na sãá nduu núcúndecu váha ñáyiú isràél ndihí Yã Ndiöxí, te ïo-gá váha tnàhá ñáyiú nihíí ñuyíú, te ñáyiú-áⁿ cada iní-ó sã cúu-yu dàtná ñáyiú ní xihí, dico dàvá-áⁿ cada tucu iní-ó sã cúu-yu dàtná ñáyiú ní ndoto chí núcúndecu váha-yu ndihí-gá. 16 Te núu sã lúhá-ní

ñã túú yusaⁿ càváha te diu-ni ducaⁿ càváha nihíí. Te núu càváha yóho ñã yutnu te diu-ni ducaⁿ càváha-xi nihíí-xi. Te diu-ni ducaⁿ sãtnahá-xi cùu ñáyiú isràél, chí ñani tnàhá-yu ní xíndecu ndéé sanaha ní cuu-yu ñáyiú ní cuu cuendá ñáhá Yã Ndiöxí, te diu-ni ducaⁿ cùu cuendá ñáhá-gã xii mèe-yu ndéé vitna.

17 Te ió ñã yutnu váha nani olívú, te dava dité yutnu-áⁿ ní téhndé te ní nucódó dité yutnu òlívú cùtexínu, te mee-nã yutnu òlívú váha-áⁿ ïo váha quide-xi nchito dité yutnu òlívú cùtexínu-áⁿ. Te dité nchaa yutnu òlívú váha-áⁿ cúu-xí dàtná ñáyiú isràél, te nchaa dité-xi sã ní téhndé-áⁿ cúu-xí diu-ni ñáyiú isràél ñáyiú ñã túú tnàhá tnúhu ndihí Yã Ndiöxí. Te dité yutnu òlívú cùtexínu sã ní nucódó tnàhá-áⁿ cúu-xí dàtná ñáyiú ñã túú cùu ñáyiú isràél tnàhá tnúhu ndihí Yã Ndiöxí. 18 Te vá caní iní-ndó sã sã dúcáⁿ ndéu váha-ndo ndihí Yã Ndiöxí te ïo cùnuu-ndo dacúúxí ñáyiú isràél, te vá dúcáⁿ caní iní-ndó chí sã cuendá nchaa ñani tnàhá ñáyiú isràél ní xíndecu ndéé sanaha ducaⁿ ndéu váha-ndo ndihí Yã Ndiöxí vitna, te ñã díú sã cuendá nchòhó ndécú ndihí váha ñáyiú-áⁿ Yã Ndiöxí vitna.

19 Te cudana sàni iní-ndó te cächí-ndó sã ñáyiú isràél ní quee tíhú-yu cuendá sã nchòhó nucuíñi-ndó nũu-yu núcúndecu váha-ndo ndihí Yã Ndiöxí. 20 Te ndáá sã ní quee tíhú-yu chí ñã túú ní sãndáá iní ñáhá-yu

xii-gá, te nchòhó ío váha cùu ndecu-ndo ndihi-gá chi ní sándáá iní-ndó-gă, dico vá càchí-ndó sã ïo càhnu cuu-ndo, te ío váha chí cuăha cuendá nàcuăa cundecu-ndo. ²¹ Te cue ñáyiú isrâél cúu-yu ñáyiú cùu cuendá-gá ní cùu te ní dáquéé tihú ñáhá-gă xii-yu cuendá sá ñà túú ní sándáá iní ñáhă-yu xii-gá, te tnáhá nchòhó daquèe tihú ñáhá-gă xii-ndo te núu na càda-ndo datná ní quide ñáyiú-án. ²² Te chí cadá cuendá sá Yă Ndiöxí ío váha iní-gá, dico cùdéé-ñă núú nchàa ñáyiú ñá túú sándáá iní ñáhá xii-gá, dico sá cúú-xí nchòhó cue ñáyiú sándáá iní ñáhá xii-gá chí ío váha iní-gá. Te ducaⁿ-ni cùnduu váha iní-gá sá cúú-xí-ndó te núu vá dáñá ndéé-ndó càda-ndo nacuăa càháⁿ-gá cuendá sá ïo váha iní-gá, te núu ñáhá te tnáhá nchòhó quee tihú-ndó dàtná ní quee tihú ñáyiú isrâél, ñáyiú ñá túú ní sándáá iní ñáhá xii-gá. ²³ Dico núu ñáyiú isrâél ñáyiú ní dáquéé tihú ñáhá Yă Ndiöxí quíndáá iní ñáhă-yu xii-gá te nduu cuendá ñáhá tùcu-gá xii-yu, te ñáyiú-án cúu-yu dàtná dava dité yutnu òlívú sá ñí téhndé te ní nucódó tnáhá tùcu. Te ducaⁿ sãtnahá-xi cúu-yu te núu na quíndáá iní ñáhă-yu xii-gá. ²⁴ Te nchòhó cúú-ndó dàtná nchaa dité yutnu òlívú cùtexínu, chí ñá díú ñáyiú isrâél cúú-ndó, te dité nchaa yutnu òlívú cùtexínu-án ñí nucódó-xi núú dité yutnu

òlívú váha-án. Te yáchí-gá nucúndecu váha ñáyiú isrâél ndihi Yă Ndiöxí, chí cùu-yu dàtná nchaa dité yutnu òlívú váha sá ñí téhndé te ní nucódó tnáhá tùcu. Te ducaⁿ sãtnahá-xi cúu-yu te núu na quíndáá iní ñáhă-yu xii-gá.

Sáá nduu te naníhí tàhú ñáyiú isrâél

²⁵ Te nchòhó ñáyiú ndècu ndihi-í ichi Xítóhó Jesucristú, na càchí tnúhu-í xii-ndo ñíⁿ tnúhu nduu yuhu ní cuu, cuendá sá vã cáni iní-ndó sã ïo-gá váha sàá díquí-ndó dàcúúxí ñáyiú isrâél, chí dava ñáyiú isrâél cúú sàá iní-yu núú Yă Ndiöxí ñini na ndihi ñáyiú ní cachí Yă Ndiöxí ngúndecu váha ndihi ñáhá-yu xii-gá, ñáyiú ñá túú cùu ñáyiú isrâél. ²⁶ Te nduu na ndihi ñáyiú-án ngúndecu váha-yu ndihi Yă Ndiöxí, te dàvã-án naníhí tàhú ñáyiú isrâél chí quee ndáá-xi nàcuăa càháⁿ Yă Ndiöxí núú tütú-gá núú càchí-xi:

Ndàa ñuú Sìón quixi Yaá cada naníhí tàhú nchaa ñáyiú,

te díu-ni Yaá-án cada-gá cuendá sá dáñá nchàa ñáyiú isrâél ichi cuèhé ichi duha.

²⁷ Te yúhú cada càhnu iní-í nchaa cuéchi ñáyiú isrâél, chí cada-í dàtná ní cachí-í ndéé sanaha.

Duha càchí Yă Ndiöxí núú tütú-gá.

²⁸ Te sá cuendá tnúhu sá càháⁿ nàcuăa naníhí tàhú-ó xiãⁿ cúú úhú iní ñáyiú isrâél Yă Ndiöxí, te sá dúcãⁿ quidé-yu xiãⁿ nchòhó ní

níhí-ndó tnũhu sá cãháⁿ nãcuáa naníhí tãhú-ndó. Te ní cachi Yã Ndiõxí sã ñãyiú isrãél cuu cuendá-gá, te cùu iní ñáhá-ní-gã xií-yu, te ducaⁿ quide-gá chi ducaⁿ nĩ xãháⁿ-gã xii cue ñaní tnãhã-yu ní xĩndecu ndéé sanaha. ²⁹ Te Yã Ndiõxí ñã túú ndũu úhú iní-gã ìⁿ sã táxí-gã, te ni ñã túú ndìxi cuéchi iní-gá sã cãháⁿ ñáhá-gã xii-o. ³⁰ Te nchòhó chi ñã túú sãndáá iní-ndó Yã Ndiõxí ní cùu, dico vitna nini ñã túú sãndáá iní ñáhá ñãyiú isrãél xii-gá, te ní cundãhú iní ñáhá-gã ní dácãcu nihnu ñaha-gã xii-ndo núú ùhú núú ndàhú. ³¹ Te vitna quidé-yu dàtná ní xóo cada nchòhó cútñahá ñã túú ní xóo quindáá iní-ndó-gã. Dico sáá nduu te natuha ñáhá-yu xii-gá te dácãcu nihnu ñaha-gã xií-yu sã cundãhú iní ñáhá-gã dàtná ní quide ñaha-gã xii nchòhó. ³² Te Yã Ndiõxí ní dáñá-gã sã dúcãⁿ cùnduu saá iní nchaa ñãyiú cuendá cuiní-gá cundãhú iní ñáhá-gã xií-yu.

³³ Te súúní vãha quide ñaha Yã Ndiõxí xii-o, te ío vãha xìní-gá nchaa cuéi sã ío andiú te cuéi sã ío ñuyíú-a, te ducaⁿ ïo vãha saá nchaa sã xìní tnùní-gã. Te ñã ndácú-ó cùtnuní iní-ó nã cúú nchaa sã sání iní-gá cada-gá, te ni ñã ndácú-ó cùtnuní iní-ó nãcuáa ndũu cuendá nchaa sã quidé-gã. ³⁴ Te núú tütú-gá cãchí-xi: “Vã yõo ìⁿ cùtnuní iní-xi nãcuáa sãni iní Yã Ndiõxí, te ni vã yõo ìⁿ ndãcu dacahu iní ñáhá xii-gã nãcuáa cáháⁿ-gã. ³⁵ Te Yã Ndiõxí ñã túú quide yica iní-gá cada-gã

sã vãha sã cúú-xí ñãyiú cuendá ìⁿ sã sãñáhá-yu xii-gá chi ñã túú dùcaⁿ quide-gã”, duha cãchí-xi núú tütú-gã. ³⁶ Te ducaⁿ chi mee Yã Ndiõxí ní taxi ndecu-gá nchaandi tühú sã ío ñuyíú, te diu-ni mee-gã táxi tnùní-gã nchaa sã ní taxi ndecu-gá, te nchaa cùu-xi cuendá-gã. Te vitna chí ná cãchí-ó sã ïo cãhnu cuu-gá ni caa ni quíhíⁿ. Te ducaⁿ na cùnduu.

12

Cada-o nãcuáa nduu vétú iní Yã Ndiõxí

¹ Te vitna nchòhó ñãyiú ndècu ndihí-í ichi Xítohó Jesucristú cãchí tnũhu-í xii-ndo sã Yã Ndiõxí cundãhú iní ñáhá-gã xii-o chĩndee ñaha-gã, núú xĩãⁿ cãháⁿ ndãhú-í núú-ndó sã dáñá-ndó mèe-ndo núú ndáhá-gã, te cada iní-ndó sã cúú-ndó dàtná ìⁿ tãhú sã nchító-ó ní nduu tãhú-gã. Te cuu-ndo ñãyiú vãha ñãyiú cada nchaa nãcuáa nduu vétú iní Yã Ndiõxí chi ducaⁿ tãu-ndó càda-ndo sã cúú-xí-gã. ² Te vá cãchìcúⁿ nihnu-gã-ndó càda-ndo datná xĩquide nchaa ñãyiú ndècu ichi cuehé ichi duha ndècu ñuyíú-a, te vá cúhúⁿ-gã iní-ndó ichi cuehé ichi duha-áⁿ, chi mee-nã sã vãha cuhuⁿ iní-ndó, te ducaⁿ te cutnùní iní-ndó nchaa nãcuáa cuiní Yã Ndiõxí cada-ndo, te nchaa sã cuiní-gá cada-ndo cùu-xi mee-ni sã vãha, sã ïo vãha ndũu vétú iní-gã, te cùu-xi nchaa sã xìní ñũhu-xi cada-ndo núú-gã.

³ Te sá cuendá chiùn ní cundáhú iní ñáhá Yá Ndiöxí ní taxi-gá xii-í xiáⁿ núu na cáháⁿ-í dóho-ndo vitna: Vá cání iní-ndó ìⁿ sá ña túú tau-ndó càní iní-ndó te cucahaⁿ-ndo sá ìo cànhu cuu-ndo. Te nchòhó ní sándáá iní-ndó Yá Ndiöxí núu chindee ñaha-gá xii-ndo, te vitna chí cuãha cuendá núu ná daha núú chiùn-gá ndacu-ndo càda-ndo. ⁴ Te nchoo tìtní xichi cùu yiqui cuñú-ó, te ndí dííⁿ ndí dííⁿ chiùn quide-xi ìⁿ ìⁿ-xi. ⁵ Te ducaⁿ sãtnahá tucu-xi cùu nchoo ñáyíu ndècu ndihi Xítohó Jesucristú chí cuèi ná daha tnáhá-ó dico ìⁿ-ni cùu-o ndihi-gá, te ducaⁿ mèe-o tucu ìⁿ-ni cùu-o.

⁶ Te mee Yá Ndiöxí ní cundáhú iní ñáhá-gá xii-o ní taxi-gá chiùn tau-ó càda-o ìⁿ ìⁿ-o te chindee ñaha-gá xii-o, te xini ñuhu-xi cada-o nacuaa ndùu chiùn ní taxi-gá cada-o. Te núu ní nduu táhú-ó núú-gá sá cáháⁿ-ó tnùhu sá dácàhu iní ñáhá mèe-gá xii-o te cáháⁿ-ó nacuaa sándáá iní-ó chindee ñaha-gá xii-o, ⁷ àdi ní nduu táhú-ó núú-gá sá ìo váha chindee-o tnàha ñáyíu-o te ðíu-ni ducaⁿ càda-o, àdi ní nduu táhú-ó dànehé-ó ñáyíu tnùhu-gá te ðíu-ni ducaⁿ càda-o, ⁸ àdi ní nduu táhú-ó núú-gá sá dácáháⁿ-ó ñáyíu canchicúⁿ nihnú-yu ichi-gá te ðíu-ni ducaⁿ càda-o, àdi ní nduu táhú-ó núú-gá sá cuãñaha-o xii tnaha ñáyíu-o sá ñihí-ó ndècu ndihi-o te ðíu-ni ducaⁿ càda-o, dico ni yùhu ni iní-ó cuãñaha-o xii-yu, àdi ní nduu táhú-ó núú-gá taxi tnùní-ó te ðíu-ni ducaⁿ càda-o, te ni yùhu ni iní-ó càda-o,

àdi ní nduu táhú-ó núú-gá chindee-o cuè ñáyíu ndècu ndihi tnùndòho tnùhu ndàhú te ðíu-ni ducaⁿ càda-o, te ìo cudíí iní-ó càda-o chiùn-áⁿ.

Nchaa nacuaa tau-xi cada nchaa ñáyíu ndècu ichi Xítohó Jesucristú

⁹ Te cuu iní tnáhá ndisa-ndo ìⁿ ìⁿ-ndo, te dañà-ndo nchaa sá cuèhé sá dúhá te cada-ndo mèe-ni sá váha. ¹⁰ Te ìo cuu iní tnáhá-ndó, te cada-ndo cuendá sá ìⁿ-ní ñáyíu cùu-ndo, te ìⁿ ìⁿ-ndo càní-gá iní-ndó cànehe yíñuhu núú tnáhá-ndó.

¹¹ Te nducu ndèe-ndo cada-ndo nchaa chiùn tahu Xítohó Jesucristú vá tühío-ndo, te cada-ndo ni yuhu ni iní-ndó sá cúú-xi-gá.

¹² Te ìo cudíí iní-ndó cùndecu-ndo chí ní ngùndecu ndihi-ndo tnùhu ndee iní sá cùndècu ndihi-ndo Xítohó Jesucristú, te cada cànhu iní-ndó cuèi nándi na càda ñaha ñáyíu xii-ndo sá cuendá-gá, te vá dañá ndèe-ndó cáháⁿ ndihi-ndo Yá Ndiöxí.

¹³ Te chindee tnàha-ndo te núu ìo dava nchòhó ñáyíu ndècu ichi-gá ìo ìⁿ sá cúmání xii-ndo, te ìo váha cuu iní-ndó còto-ndo ñáyíu véxi vehe-ndo.

¹⁴ Te cacaⁿ táhú-ndó núú Yá Ndiöxí cuendá nchaa ñáyíu nándi quide ñaha xii-ndo, te cacaⁿ táhú-ndó núú-gá sá ná chindee ñaha-gá xii-yu te ñá díú dà cacaⁿ táhú-ndó núú-gá sá ná dàcuíta nihnu ñaha-gá xii-yu.

¹⁵ Te núu ìo ñáyíu cùdíí iní-xi te cudíí iní-ndó ndihí-yu, te

núu ío ñáyiú ndìhú iní-xi te ndìhú iní-ndó ndìhí-yu.

16 Te cuu ìⁿnuu-ndo cùndecu-ndo, te vá cádá càhnu-ndo mee-ndo, te tnahá tnúhu-ndo ndìhí nchaa ñáyiú ndàhú iní-xi, te vá cání iní-ndó sã ìo-gá túha-ndo.

17 Te vá nánchòcáva-ndo nàchinaa-ndo ìⁿ sá quidé ñàha ñáyiú xii-ndo, te ío nducu ndèe-ndo cada-ndo mee-ni sá vãha nàcuáa cuu váha iní ñáyiú. 18 Te ío nducu ndèe-ndo cada-ndo sá ndácú-ndó cùndecu váha-ndo ndìhí nchaa ñáyiú. 19 Te nchòhó ñáyiú ío cùu iní-í, vá cání iní-ndó nàchinaa-ndo ìⁿ sá cádá ñàha ñáyiú xii-ndo, chi cundetú-ndo sã mée Yã Ndiòxí ná nàchinaa-gá sá quidé ñàhá-yu xii-ndo, chi quee ndáá-xi nàcuáa càháⁿ Yã Ndiòxí núu tütú-gá núu càchí-xi: “Yúhú dandòho-í-yu chi nachinaa-í nchaa sá quidé-yu”, duha càchí-gá núu tütú-gá. 20 Te xìni ñuhu tucu-xi cada-ndo nàcuáa càháⁿ tucu-xi ingá xichi núu tütú-gá núu càchí-xi: “Te núu ñáyiú cùu úhú iní ñàhá xì-ndo ñá túú sã cóhó sã cáxí-yu te cuáñaha-ndo xii-yu, te núu ducaⁿ na càda-ndo te ío cucahaⁿ núú-yu”, duha càchí-xi núu tütú-gá. 21 Te núu ío ìⁿ sá quidé ñàha tnaha ñáyiú-ndo xì-ndo te vá nánchòcáva-ndo nàchinaa-ndo sá quidé ñàhá-yu xii-ndo, chi cada-ndo sã vãha sá cúú-xi-yu, te ducaⁿ te vá cádá-ndó sã ñà túú tàú-ndó càda-ndo núu Yã Ndiòxí dàtná quidé-yu.

13

1 Te nchaa ñáyiú tàú-yu quindáá iní-yu nchaa cue téé cùchiuⁿ, chi Yã Ndiòxí ní cachí-gá sá cùndecu téé cùchiuⁿ ñuyíú-a, núu xiãⁿ xĩndecu-güedé vitna. 2 Te nchaa ñáyiú ñá túú sàndáá iní ñàhá xì cue téé cùchiuⁿ ñá túú tnàhá iní Yã Ndiòxí sá dúcáⁿ quidé-yu, chi mee-gã ní cachí-gá sá cùndecu-güedé. Te nchaa ñáyiú ducaⁿ ñà túú sàndáá iní ñàhá xì cue téé cùchiuⁿ nacháhu-yu sá dúcáⁿ quidé-yu. 3 Te nchaa ñáyiú quide váha ñá túú yùhú-yu cue téé cùchiuⁿ chi quide váha-yu, dico nchaa ñáyiú ñá túú quide váha chi xiyùhú-yu cue téé cùchiuⁿ. Te vitna núu nchòhó cuíní-ndó sã vá yùhú-ndó cuè téé cùchiuⁿ te chí cádá vãha, te ducaⁿ te càháⁿ váha-güedé cuendá-ndó. 4 Te Yã Ndiòxí ducaⁿ ñí cachí-gá cundecu-güedé cuendá cada-güedé sã ñà túú nã cuu cundecu-ndo, te núu ñá túú quide váha-ndo ndècu-ndo te quiyùhú iní-ndó núú-güedé, chi ñá túú àúⁿ nã cuu ndècu ndìhí-güedé tnúhu ndee iní dandòho-güedé nchaa ñáyiú ñá túú quide váha, chi Yã Ndiòxí ducaⁿ ñí cachí-gá cundecu-güedé sá dúcáⁿ càda-güedé dandòho-güedé nchaa ñáyiú ñá túú quide váha. 5 Núu xiãⁿ ío xìni ñuhu-xi sá quindáá iní-ndó nchaa cue téé cùchiuⁿ, te ñá díú sã yùhú-ndó dandòho ñaha-güedé xii-ndo, chi cada-ndo sã cútnùní iní-ndó sã cúú-xí ìⁿ sá vãha. 6 Chi

díu cuèndá xǎⁿ sàcáⁿ-ndó díhúⁿ núú cuè téé cùchiuⁿ, te ducaⁿ chí Yá Ndióxi ducaⁿ ní cachí-gá cundecu-güedé te díu-ná chiúⁿ ndeé-güedé ñúhú iní-güedé.

7 Te nacháhu-ndo nchàa sá tàú-ndó núú nchàa ñáyiú tàú-ndó núú-xi, te cuèi díhúⁿ tàú-ndó cuèndá ñuhu-ndo núú cuè téé cùchiuⁿ àdi nágá díhúⁿ tàú-ndó núú-güedé te nacháhu-ndo núú-güedé. Te ío-gá canehe-ndo sǎ yíñùhu núú nchàa ñáyiú cùnuu, te cáháⁿ váha-ndo ndìhí-yu. 8 Te vá dácuidó-ndó ndùu nacháhu-ndo sǎ tàú-ndó núú tnàha ñáyiú-ndo, te cuu iní tnáhá-ndó ìⁿ ìⁿ-ndo. Te núu ducaⁿ quide-ndo ndecu-ndo ña, te quide-ndo nchaa nacuaá càháⁿ tnúhu sá sánú ìchi ñaha xii-o nacuaá cada-o cùndecu-o. 9 Te duha ndùu tnúhu càháⁿ Yá Ndióxi cuèndá nchaa sá vǎ cúú càda-o: “Nchaa nchòhó cue téé vá càháⁿ ndihí-ndo ñáyiú dìhí te núu ñá díú ñàdihí-ndó cúú-yu, te ducaⁿ-ni nchàa nchohó cue ñáyiú dìhí tucu vá càháⁿ ndihí-ndo téé te núu ñá díú yì-ndo cuu-güedé, te vá cáhni-ndó tnàha ñáyiú-ndo, te vá dúhú-ndó sǎ ndécú ndìhí-yu, te vá dácàcu-ndo cuèchi neñúú, te vá xíhó-ndó sǎ ndécú ndihí tnaha ñáyiú-ndo”, nchaa xéhé càchí Yá Ndióxi sá vǎ cúú càda-o. Te tnúhu-a quide-o ndihí nchaa dava-gá tnúhu sá sánú ìchi ñaha xii-o nacuaá cada-o cùndecu-o, te núu quide-o ingá tnúhu sá càchí-xi: “Cuu iní-ndó nchàa tnaha ñáyiú-ndo dàtná cúú

iní-ndó mèe-ndo”, duha càháⁿ tnúhu-áⁿ. Te nchaa dava-gá quidé-ó te núu quide-o nacuaá càháⁿ tnúhu-a. 10 Te nchaa ñáyiú cùu iní tnàha ñáyiú-xi te ñá túú quide úhú iní-yu tnàha ñáyiú-yu, te núu ducaⁿ cùu iní-yu tnàha ñáyiú-yu te quidé-yu nàcuáa càháⁿ tnúhu sá sánú ìchi ñaha xii-o nacuaá cada-o cùndecu-o.

11 Te ducaⁿ xìni ñuhu-xi cada-ndo chí sa ní cutnúmí iní-ndó nàcuáa ta xica nduu cuáháⁿ ñuyíú-a, te ní sáá nduu sá ío xìni ñuhu-xi ndixi túu iní-ó càda-o nchaa nacuaá càháⁿ Yá Ndióxi, chí vitna sa ní cuyatni-gá nduu nàcuaca ñaha Xítohó Jesucristú xii-o dàcúúxí ndèé cùtnáhá ní sándáá iní-ó tnúhu-gá. 12 Te cada iní-ndó sǎ dàtná ìⁿ niú sá sǎ ta cuyatni túndaá, ducaⁿ sǎtnahá-xi cùu ñuyíú yǐcá cuèchi-a chí sa ta cuyatni nduu quixi tucu Xítohó Jesucristú, te núu xǎⁿ xíní ñuhu-xi dañ-a-o nchaa sá cuèhé sá dúhá te cada-o mèe-ni sá vǎha, te ducaⁿ te ni ìⁿ sá cuèhé sá dúhá vǎ cùnùu-xi taxi tnuní ñáhá-xí xii-o, te ducaⁿ te vá cúú-gǎ-ó dàtná ñáyiú ndècu núú néé chí cuu-ná-ó dàtná ñáyiú ndècu núú ditó. 13 Te cada-o nchàa nacuaá tàú-xi cunduu cundecu-o dàtná tàú-xi cada ñáyiú ndècu ìchi Xítohó Jesucristú, te vá quìhíⁿ-ó víco cuehé víco duha, te vá cúú-ó ñáyiú quihu, te ni vǎ càháⁿ ndihí-o ñáyiú dìhí te núu ñá díú ñàdihí-ó cúú-yu, te ducaⁿ-ni cuè ñáyiú dìhí tucu vá càháⁿ ndihí-yu téé te núu ñá díú yì-yu cùu-güedé,

te ni vǎ cǔndècu-o ichi dǐí ínǐ, te ni vǎ nàá-ó ndìhǐ tnahà ñáyiú-o, te ni vǎ cúú-ó ñáyiú cuédú ínǐ. ¹⁴ Te vitna nchòhó dañà-ndo mèe-ndo sá Xítòhó Jesucristú ná chìndee ñaha-gá xii-ndo càda váha-ndo cùndecu-ndo datná quidé mèe-gá ndécú-gǎ, te vǎ cánǐ-gǎ ínǐ-ndó càda-ndo datná ní xóo cada-ndo cùtnáhá ní cunuú ncháa sá cuéhé sá dúhá ínǐ-ndó.

14

Vá cuátnùhu tnahà-o nacuáa ndècu-o ichi Xítòhó Jesucristú

¹ Te núu ìⁿ ñáyiú ndècu ichi Xítòhó Jesucristú ñá túú təcú tnùnǐ váha-yu nàcuáa cuínǐ Yǎ Ndiòxǐ cadá-yu, te queheⁿ cuèndá-ni-ndó-yu te vǎ ténàa tnáhá-ndó ndìhǐ-yu. ² Chi ìó ñáyiú sàni ínǐ sá cúú vǎha ínǐ Yǎ Ndiòxǐ sá cúú càxǐ-yu nání nìhǐ-yu, te dava ñáyiú ñá túú cùtnunǐ váha ínǐ-yu nàcuáa càháⁿ Yǎ Ndiòxǐ te mee-ni yǔcú xéxǐ-yu. ³ Te ñáyiú xèxi ncháa núú sǎ nìhǐ-yu te vǎ dáquèe tìhǔ-yu ñáyiú ñá túú xèxi, te ducaⁿ-ni ñáyiú ducaⁿ ñà túú xèxi-áⁿ vǎ cuátnùhú-yu ncháa ñáyiú ducaⁿ xèxi ncháa núú sǎ nìhǐ-xi-áⁿ, chi tnáhá ñáyiú ducaⁿ xèxi ncháa núú sǎ nìhǐ-xi-áⁿ quéhéⁿ cuèndá ñáhá Yǎ Ndiòxǐ xii-yu. ⁴ Te ñá túú ndècu ndìhǐ-o tnùhu ndee ínǐ cuatnúhu-o ñáyiú xìnu cuechi, chi mee ñáyiú cùu patròðⁿ-yu tàú-yu càháⁿ-yu te núu cùndáá ñáyiú xìnu cuechi núú-yu àdi ñá túú cùndáá-yu. Te ducaⁿ sǎtnahá-xi cùu ñáyiú

xìnu cuechi núú Yǎ Ndiòxǐ, chi mee-gǎ càháⁿ-gǎ te núu nása quidé-yu, te diu-ni mee-gǎ cada te cùndáá-yu cùndecú-yu núú-gǎ.

⁵ Te na càchǐ tnùhu tucu-í xii-ndo sǎ ìó ñáyiú càchǐ sá ìó dava nduu ìo càhnu cuu-xi, te ìó tucu dava ñáyiú càchǐ-yu sá ìⁿ-ni cuu-xi ncháa-ni nduu, te xìni ñuhu-xi sá cùtnunǐ ndáá ínǐ-yu sá ndáá cúú-xí nàcuáa càháⁿ-yu ìⁿ ìⁿ-yu. ⁶ Te ñáyiú cànehe ìí dava nduu quidé-yu sá nèhè-yu sá yǐñùhu núú Yǎ Ndiòxǐ, te ñáyiú càchǐ sá ìⁿ-ní cùu-xi ncháa-ni nduu quidé-yu sá nèhè-yu sá yǐñùhu núú Yǎ Ndiòxǐ tnáhá-yu. Te diu-ni ducaⁿ sǎtnahá-xi cùu ncháa ñáyiú xèxi ncháa nání nìhǐ-yu, chí quidé-yu sá nèhè-yu sá yǐñùhu núú Yǎ Ndiòxǐ, chí ndàcáⁿ táhǔ-yu núú-gǎ cuèndá ncháa sá nìhǐ-yu. Te diu-ni ducaⁿ sǎtnahá-xi cùu ncháa ñáyiú ñá túú xèxi ncháa núú sǎ nchító-ó chí quidé-yu sá nèhè-yu sá yǐñùhu núú Yǎ Ndiòxǐ, te ndàcáⁿ táhǔ-yu núú-gǎ cuèndá ncháa sá nìhǐ-yu.

⁷ Te nchoo cuèi vitna ndècu vívú-ó àdi cuèi na cùú-ó dico ñá díú cuèndá mée-ó cùú-ó. ⁸ Chi vitna ndècu vívú-ó te ndècu-o sá cúú-xí Xítòhó Jesucristú àdi cuèi na cùú-ó dico cuú-ó diu-ni sá cúú-xí-gǎ, núu xǐáⁿ cuèi vitna ndècu vívú-ó àdi cuèi na cùú-ó dico diu-ni Xítòhó Jesucristú cúú cuèndá ñáhá-gǎ xii-o. ⁹ Chi Xítòhó Jesucristú ní xíhǐ-gǎ te ní ndoto-gǎ, te vitna

cùu-gá Xítohó nchaa ñáiyu, cuëi ñáiyu xĩndecu vǐvú te cuëi ñáiyu ní xíhí.

¹⁰ Te nchòhó, ñá túú ndùu váha-xi cuatnuhu tnàha-ndo nacuáa ndècu-ndo ichi Xítohó Jesucristú, te ni ñà túú ndùu váha-xi daquèe tǐhú tnáhá-ndó, chi nchaa-o sǎá nduu cùndecu-o núú Xítohó Jesucristú, te mee-gǎ cachí-gǎ te núu ní quide ndáá-ó àdi ñá túú ní quide ndáá-ó. ¹¹ Te Yá Ndiòxí cǎchí-gǎ núú tǔtú-gǎ:

Yúhú Yǎ Ndiòxí ndècù-í cǎchí tnúhu ndáá-í xii-ndo sǎ nchàa ñáiyu nguǐñí xitǐ-yu núu-í,

te nchaa-yu cǎháⁿ-yu sǎ yǔhú cùu-í Ndiòxí.

Duha cǎchí Yǎ Ndiòxí núú tǔtú-gǎ. ¹² Núu xiǎⁿ nchaa-o ndǐ díⁿ nàcani tnúhu-o núú Yǎ Ndiòxí nchaa sǎ ní quide-o.

Vá dácuíta nihnu tnàha-o

¹³ Núu xiǎⁿ vá cuatnuhu tnaha-gǎ-ndó, te cada yica-ndo càda-ndo mee-ni sǎ vǎha, te vá cadá-ndó ñⁿ sǎ ñà túú tau-ndó càda-ndo cuendá sǎ vǎ cuíta nihnu dava ñáiyu ndècu ndihí-ndo ichi Xítohó Jesucristú. ¹⁴ Te yúhú ndécú ndihí-í Xítohó Jesucristú te cùtnuní ndáá iní-í sǎ ncháá núú sǎ cúú cǎxi-o cuu-ni caxi-o te vá cúú cuéchi. Te ñáiyu sàni iní sǎ vǎ cúú cǎxi-yu te núu na cǎxi-yu te cuu cuéchi xii-yu. ¹⁵ Te nchòhó, te núu cuendá sǎ xéxi-ndó nchàa núú sǎ cúú cǎxi-ndo, cuendá xiǎⁿ ñá túú-gǎ cúú vǎha iní nchaa ñáiyu ndècu ndihí-ndo ichi Xítohó Jesucristú, te ñá túú-gǎ quidé-ndó sǎ cúú iní

ndisa-ndó-yu te núu ducaⁿ na càda-ndo, te núu ñⁿ sǎ sání iní-ndó cǎxi-ndo te cùtnuní iní-ndó sǎ xiǎⁿ cada-xi cuíta nihnu ñáiyu ndècu ndihí-ndo ichi Xítohó Jesucristú te vá cǎxi-ndó xiǎⁿ te núu ducaⁿ, chi Xítohó Jesucristú ní xíhí-gǎ cuendá-yu. ¹⁶ Te núu ñⁿ sǎ quidé-ndó sàni iní-ndó sǎ cúú-xí ñⁿ sǎ vǎha, te ñáiyu cǎchí-yu sǎ ñà túú vǎha te vá cadá-ndó cuendá sǎ vǎ cǎháⁿ cuéhé-yu cuendá-ndó. ¹⁷ Te sǎ yǐndàha ñaha Yá Ndiòxí xii-o xiǎⁿ ïo xini ñuhu-xi cada ndáá-ó cùndecu-o, te cundecu váha ndihí tnàha-o, te cudí^í iní-ó cùndecu-o chi Espiritú-gǎ ndécú ndihí ñaha-xi xii-o, te nchaa xéhé ïo-gǎ cúnùu dacúxí sǎ cóhó sǎ cǎxi-ó. ¹⁸ Te nchaa ñáiyu ducaⁿ quide nchaa sǎ ïo-gǎ xíní ñuhu-xi, xinu cuechí-yu núú Xítohó Jesucristú, te sǎ dúcáⁿ quidé-yu te ndùu vétú iní Yǎ Ndiòxí, te cùdiú-yu núú ñáiyu.

¹⁹ Te nchoo chǐ ná ndùcu-o nacuáa cada-o cùndecu ndihí váha tnàha-o, te nducu tǔcu-o nacuáa cada-o chĩndee tnúhu tnàha-o nacuáa cuíta cundáa-gǎ-ó núú Xítohó Jesucristú quíhíⁿ. ²⁰ Te ñá díú sǎ cuendá ñⁿ núú sǎ xéxi-ó, te dàquee tǐhú-ó sǎ vǎha ní quide ñaha Yǎ Ndiòxí xii tnàha ñáiyu-o. Te na cǎchí tnúhu ndáá-í xii-ndo sǎ ncháá-ní núú sǎ cúú cǎxi-o, te dícò-ni sǎ ñà túú ndùu váha-xi núú sǎ cuendá-ni sǎ cǎxi-ó ñⁿ núú sǎ cúú cǎxi-o cuíta nihnu ñⁿ tnàha ñáiyu-o. ²¹ Te váha-gǎ sǎ vǎ cǎxi-ó cùñú te vá cóhó ndidí, te ni ñà túú nǎgǎ cada-o

te núu xito-o sá xiǎⁿ cada te ngúíta tnàha ñáyi-u-o càdá-yu sá ñà túú vâha, àdi xito-o sá xiǎⁿ cada te ngúíta-yu cani ìⁿ cani úú iní-yu cundecú-yu ichi Xítohó Jesucristú, te vá cundáá-gá-yu núú-gǎ te núu ducaⁿ ña càda-o. ²² Te núu ìⁿ sá vâha sàni iní-ó càda-o, te vá dátú-u-o núú ñáyi-u chi mee-ni núú Yǎ Ndiòxí dátú-u-o. Te nchoo cù-u-o ñáyi-u ío váha táhú-xi te núu cùtnuní ndáá iní-ó sá quidé ndáá-ó núu nándi cùu sá quidé-ó, te cùtnuní iní-ó sá ñà díú ìⁿ cuéchi cùu-xi sá quidé-ó. ²³ Te núu nchoo sàni iní-ó sá quidé vâha-o àdi ñà túú quide váha-o òré xéxi-ó ìⁿ núú sá xéxi-ó, te cuu cuéchi xii-o te núu ducaⁿ na càda-o. Te ducaⁿ cùu cuéchi xii-o chi ñà túú ìⁿ-ni sá sání iní-ó, chi nchaa núú sá quidé-ó sàni ìⁿ sani úú iní-ó núu váha-ni àdi ñà túú váha-ni, te cuu cuéchi xii-o sá dúcáⁿ quide-o.

15

Cada-o sǎ vâha sá cúu-xi tnàha ñáyi-u-o

¹ Te nchoo ñáyi-u ío váha sàndáá iní ñáhá xii Xítohó Jesucristú, xini ñuhu-xi cuañaha-o tnùhu ndee iní xii ñáyi-u ñà túú ñihí ndéé cundecu ichi-gá, te vá cádá-ó mèe-ni sá cúu-xi mèe-o. ² Te cada-o sǎ vâha nàcuáa cuu váha iní tnàha ñáyi-u-o cuèndá cuu-xi sá vâha sá cúu-xi-yu, te ducaⁿ cùita níhí ndéé-gǎ-yu quindáá iní-yu Xítohó Jesucristú. ³ Te Xítohó Jesucristú ñà túú ní quide-gá mee-ni sá cúu vâha iní mèe-gǎ, te ní quee ndáá-xi

nàcuáa càháⁿ-xi núu tùtú Yǎ Ndiòxí nàcuáa ní xáhaⁿ Xítohó Jesucristú xii-gá, te cǎchí-xi: “Nchaa ñáyi-u cùu úhú iní ñáhá xii-n ní xícuèhé ní xíduha ñáhá-yu xii-í”, duha càháⁿ-xi núu tùtú Yǎ Ndiòxí nàcuáa ní xáhaⁿ Xítohó Jesucristú xii-gá. ⁴ Te ndéé sanaha ñi ngúndeé nchaa tnùhu Yá Ndiòxí núu tùtú-gá, te ducaⁿ ñi ngúndeé cuèndá dacuàha-o, te tnùhu-áⁿ dánèhé ñáhá-xi cùnduu cahnu iní-ó cuéi nándi nà yáha-o cundecu-o ichi-gá, te sá xii tnùhu-áⁿ te vá ndihú-gá iní-ó cundecu-o, te díu-ni sá xii tnùhu-áⁿ cundecu ndihi-o tnùhu ndee iní. ⁵ Te Yá Ndiòxí quidé-gǎ ndécú ndihi-o tnùhu càhnu iní, te díu-ni-gá quidé-gǎ ñà túú ndihú iní-ó ndècu-o. Te xicáⁿ táhú-í núú-gǎ sá díú-gǎ ná cádá te cuu ìⁿ-nuu-ndo cundecu-ndo datná ní quide mee Xítohó Jesucristú cùtnàhá ní xíndecu-gá ñuyíú-a. ⁶ Te ducaⁿ nchàa-ndo cuu ìⁿ-nuu-ndo, te daníhí tnáhá-ndó yòcò táchí-ndó te cachí-ndó sǎ ío càhnu cuu Yá Ndiòxí Yáá cúu Tǎtá Xítohó Jesucristú.

*Ñáyi-u ñà túú cùu ñáyi-u is-
raèl ní ñihí-yu tnùhu Xítohó Je-
sucristú*

⁷ Te núu xíǎⁿ chí quéhéⁿ cuèndá tnáhá datná ní quide Xítohó Jesucristú ní queheⁿ cuèndá ñáhá-gǎ xii-o, te núu ducaⁿ na càda-ndo te ío cuu càhnu Yá Ndiòxí. ⁸ Te na cǎchí tnùhu-í xii-ndo sǎ Xítohó Jesucristú ní quixi-gá ní quide-gá sá vâha sá cúu-xi ñáyi-u israèl, te sá dúcáⁿ ñi quide-gá xíǎⁿ cùtnuní ndáá

iní-ó sǎ Yǎ Ndiǒxí quidé-gǎ
 ñⁿ sá cǎháⁿ-gǎ, chí Xítohó
 Jesucristú ní quide-gǎ nchaa
 nǎcuáa ní xáhaⁿ Yǎ Ndiǒxí xii
 cue ñaní tnáhá-ó nǐ xíndecu
 ndéé sanaha. ⁹ Te ducaⁿ nǐ
 quide Xítohó Jesucristú sǎ
 váha sá cúu-xí ñǎyiu isráél
 cuéndá nchaa ñáyiu ñá túú
 cùu ñáyiu isráél cachí-yu sǎ ïo
 cǎhnu cuu Yá Ndiǒxí, te ducaⁿ
 quèsahá-yu chí ïo cùndahú
 iní ñáhá-gǎ chíndèe ñaha-gǎ
 xii-yu, te quee ndáá-xi nǎcuáa
 cǎháⁿ-xi núú tütú Yǎ Ndiǒxí
 núú cǎchí-xi:

Yúhú cachí-í sǎ ïo cǎhnu cuu-n
 núú nchaa ñáyiu ñá túú
 cùu ñáyiu isráél,

te cata-í ndudú chiñuhu
 ñaha-í xii-n.

Duha cǎchí-xi núú tütú-gǎ
¹⁰ Te cǎchí tucu-xi núú
 tütú-gǎ:

Te nchòhó ñáyiu ñá túú cùu
 ñáyiu isráél ïo chí cúdíi
 iní ndihí ñáyiu isráél
 ñáyiu ndècu ndihí-í.

Duha cǎchí-xi núú tütú-gǎ.
¹¹ Te cǎchí tucu-xi ingá xichi
 núú tütú-gǎ:

Nchaa nchòhó ñáyiu ñá túú
 cùu ñáyiu isráél chí
 cǎháⁿ sǎ ïo cǎhnu cuu
 Yá Ndiǒxí,

te nchaa ñáyiu na cǎháⁿ-yu sǎ
 ïo cǎhnu cuu-gǎ.

Duha cǎchí-xi núú tütú-gǎ.
¹² Te ndí Chàíá cǎchí tucu ndí
 núú tütú Yǎ Ndiǒxí:

Coo ñⁿ ñaní tnáhá ndí Isàí
 tée ní xíndecu ndéé
 sanaha,

te tée-áⁿ taxi tnùní-dé cue
 ñáyiu ñá túú cùu ñáyiu
 isráél,

te ñáyiu-áⁿ cundee cùu cahnu
 iní ñáhá-yu xii-dé.

Duha ní cǎháⁿ ndí Chàíá
 cǎchí-xi núú tütú-gǎ.

¹³ Te xicáⁿ tǎhù-í núú Yǎ
 Ndiǒxí Yaá ní taxi tnúhu
 ndee iní ndécú ndihí-o sǎ
 méé-gǎ ná cǎda ïo cudíi
 iní-ndó cùndecu-ndo, te ducaⁿ
 ïo váha cundecu iní-ndó
 núú-gǎ chí sàndáá iní-ndó-gǎ,
 te ducaⁿ Espíritú-gǎ ná cǎda te
 uuⁿ-gǎ uuⁿ-gǎ cuita ngúndecu
 ndihí-ndo tnúhu ndee iní
 quíhíⁿ sǎ cǎdá váha ñaha-gǎ
 xii-ndo.

¹⁴ Te nchòhó ñáyiu ndècu
 ndihí-í ichi Xítohó Jesucristú
 cùtnuní ndáá iní-í sǎ nchòhó
 ïo váha iní-ndó, te ducaⁿ ïo
 váha cùtnuní iní-ndó nchaa
 tnúhu váha, te ducaⁿ ïo
 dásahú tnáhá-ndó nǎcuáa
 cundecu-ndo. ¹⁵ Te dava
 tnúhu ní chídó tnùní-í núú
 tütú-a cùu-xi tnúhu sǎ ïo
 cǎháⁿ-í dóho-ndo, te ducaⁿ
 nǐ tee-í cuéndá sǎ nchòhó
 dandacu iní-ndó tnúhu-áⁿ,
 te ní tee-í chí Yá Ndiǒxí
 ní cundahú iní ñáhá-gǎ
 xii-í ní taxi-gǎ chiúⁿ quide-í

¹⁶ xínú cuèchi-í núú Xítohó
 Jesucristú cǎháⁿ-í tnúhu-gǎ
 núú ñáyiu ñá túú cùu ñáyiu
 isráél. Te tnúhu-áⁿ cúu-xí
 tnúhu sǎ sánú ichi ñaha xii-o
 nacúáa naníhí tǎhú-ó, te
 ducaⁿ dǎnehé-í ñáyiu ñá
 túú cùu ñáyiu isráél tnúhu
 Yá Ndiǒxí cuéndá cuú-yu
 dàtná ñⁿ sǎ ndúú tǎhú-gǎ, te
 Espíritú-gǎ quidé-xí cúu-yu
 ñáyiu cùdiu núú-gǎ, te cùu
 váha iní ñáhá-gǎ xii-yu.

¹⁷ Te ïo váha cùu iní-í
 cuéndá nchaa chiúⁿ quide-í
 sǎ cúu-xí Yǎ Ndiǒxí, chí
 Xítohó Jesucristú ndécú ndihí
 ñaha-gǎ xii-í. ¹⁸ Te mee-ni

nàcuáa quide Xítohó Jesucristú chindèe ñaha-gá xii-í xiáⁿ-ni càháⁿ-í, te sá dúcáⁿ quide-gá xiáⁿ ní sándáá iní cue ñáyu ñá túú cùu ñáyu isràél tnúhu-gá. Te ducaⁿ chi ní chindee ñaha-gá xii-í ní càháⁿ-í tnúhu-gá te ducaⁿ-ni ní chindee ñaha-gá xii-í ní quide-í titní núú sá ní quide-í núu-yu ní xiní-yu. ¹⁹ Te Espíritú Yá Ndióxi ní quide-xi ní quide-í titní núú sá vǎ yǒ tnàhí ndàcu cada ní xiní-yu te ío ní cuñúhu-yu. Te nchaa ñúú ní sáháⁿ-í ní càháⁿ-í tnúhu Xítohó Jesucristú núú ñáyu cuèi ndéé ñúú Jerusalén, te cuèi ndéé distritú Ilíricú, núu nchaa ñúú-áⁿ ní sáháⁿ-í ní càháⁿ-í núu-yu tnúhu sá càháⁿ nàcuáa naníhí tǎhú-ó. ²⁰ Te ducaⁿ ío ndècu ndee-í càháⁿ-í tnúhu sá càháⁿ nàcuáa naníhí tǎhú-ó núú vǎtá nihí-gá-yu tnúhu cuendá Xítohó Jesucristú, te ducaⁿ quide-í chi ñá túú cuini-í quihíⁿ-í càháⁿ-í tnúhu-gá núú sá xindecu ñáyu càháⁿ tnúhu-gá. ²¹ Te quide-í nàcuáa càháⁿ-xi núú tütú Yá Ndióxi núú cǎchí-xi: Ñáyu vǎtá nihí-gá tnúhu cuendá Yaá quixi ñuyú te nihí-yu, te ducaⁿ tècú tnùní-yu tnúhu-gá. Duha cǎchí-xi núú tütú-gá.

Té Pǎblú cuini-dé quihíⁿ-dé ñúú Rómá

²² Te sá dúcáⁿ càháⁿ-í tnúhu-gá núu xiáⁿ ñá túú ní ndàcu-í quixi-í quixi coto ñaha-í xii-ndo cuèi ducaⁿ-ni sàni iní-í quixi coto ñaha-í. ²³ Te ní cuu titní cuía ducaⁿ-ni

sàni iní-í quixi coto ñaha-í xii-ndo, te vitna ní ndihi-í nchaa iha ní càháⁿ-í tnúhu Xítohó Jesucristú núu nchaa ñáyu. ²⁴ Núu xiáⁿ sání iní-í sá ndùu na quihíⁿ-í nàcióⁿ Èspañá te yáha càháⁿ-í quini-í nása ndècu-ndo, te dǎvǎ-áⁿ ío cudíí iní-ó cùndecu tnaa-o, te ducaⁿ te òré nucúhuⁿ tucu-í ichi te cada ndee iní-ndó chindee ñaha-ndo xii-í. ²⁵ Te vitna quihíⁿ-í ñúú Jerusalén quinehe-í sá ndúú tǎhú ñáyu ndècu ichi Xítohó Jesucristú xindecu yàcáⁿ. ²⁶ Te ñáyu xindecu ichi Xítohó Jesucristú ndécú distritú Macèdoniá, ndihi distritú Acǎyá ní cuu ñúú-yu ní sacáⁿ tnǎhǎ-yu sá ndúú tǎhú ñáyu ndàhú xindecu ichi-gá ndécú ñúú Jerusalén. ²⁷ Te ducaⁿ tnàhí ní cudíí iní-yu cadá-yu, te ducaⁿ tnàhí tàú-yu cadá-yu chindèe-yu ñáyu xindecu ñúú Jerusalén. Te ñáyu Macèdoniá ndihi ñáyu Acǎyá-áⁿ ñà túú cùu-yu ñáyu isràél. Te ñáyu xindecu ñúú Jerusalén cùu-yu mee-ni ñáyu isràél, te ducaⁿ tàú-yu cadá-yu chi sá cuendá ñáyu isràél-áⁿ ní nihí-yu tnúhu sá càháⁿ nàcuáa naníhí tǎhú-yu, núu xiáⁿ tàú-yu chindee ñahá-yu ndihi nchaa sá nihí-yu. ²⁸ Te sátá ná yáha quinguáha cuendá-í-yu sá ndúú tǎhú-yu, te ducaⁿ te dǎtnùní quee-í quihíⁿ-í nàcióⁿ Èspañá, te ichi yáha-í yáha càháⁿ-í núú ndécú-ndó. ²⁹ Te cùtnuní ndáá iní-í sá òré ná quèxio-í núú ndécú-ndó, te

Xítohó Jesucristú ío chindee ñàha-gá xii-í cáháⁿ-í tnúhu-gá núu-ndó nàcuáa ío váha cundecu-ndo ìchi-gá.

³⁰ Te nchòhó ñáyiu ndècu ndihí-í ichi Xítohó Jesucristú càháⁿ ndàhú-í núu-ndó sã ìo chindee ñàha-ndo xii-í cáháⁿ ndihí-o Yã Ndiõxí cuendá-í, te ducaⁿ càda-ndo chi ndècu ndihí-ndo Xítohó Jesucristú. Te Espiritú Yã Ndiõxí quidé-xí cùu iní tnáhá-ó ìⁿ ìⁿ-o. ³¹ Te ío chí cãcãⁿ táhú núu Yã Ndiõxí sã ná còto ñàha-gá xii-í, te ñá túu nã cada ñàha nchàa ñáyiu ñá túu sàndáá iní ñáhá xii-gá xĩndecu distritú Jùdeá. Te cãcãⁿ táhú tùcu-ndo núu-gã sã ncháá sã cànèhe-í quihíⁿ nduu táhú ñáyiu ndècu ichi-gá ndécú ñúu Jerusàlén ío váha cuu iní-yu queheⁿ cuendá-yu. ³² Te ducaⁿ càda-ndo cuendá sã núu Yã Ndiõxí ná cãchí-gá te ío cudíí ìní-í òré quexìo-í núu ndécú-ndó, te ío váha cuu iní-í cundecu ndihí ñàha tnàì xii-ndo. ³³ Te vitna xicãⁿ táhù-í núu Yã Ndiõxí Yá quidé ío váha cùu iní-ó ndècu-o sã ná chĩndee chitúu ñàha-gã xii-ndo nchàa-ndo. Te ducaⁿ na cùnduu.

16

Té Pãblú quidé ndèe iní-dé ñáyiu ndècu ñúu Ròmá

¹ Te yúhú tendaha-ĩ tá Fèbè quixi-xi núu ndécú-ndó, te tnàhá-xi ndècu-xi ichi Xítohó Jesucristú, te quide-xi chiuⁿ Yã Ndiõxí sã cúu-xí ñáyiu ndècu ichi Xítohó Jesucristú xĩndecu ñúu Cèncreá. ² Te cuiní-í sã ío váha cuu iní-ndó quèheⁿ cuendá-ndó-xí, chí

ndècu ndihí-xi Xítohó Jesucristú, te cada-ndo nàcuáa tàu-xi cunduu dàtná tàu-xi cada ñáyiu ndècu ichi-gá, te ío chindee-ndo-xi te núu ná cúu sã xíní ñùhu-xi, chí tnàhá-xi ío chĩndee-xi cue ñáyiu ndècu ichi Xítohó Jesucristú, te tnàhá yúhú ducaⁿ ío chĩndee-xi.

³ Te cúñaha-ndo ío na càda ndee iní té Àquilú ndihí ñadìhí-dé tá Priscilá, chí ñáyiu-áⁿ ñí quide chiuⁿ-í ndihí-yu ní quide-ndí chiuⁿ Xítohó Jesucristú. ⁴ Chi mèe-yu ní cácu cuú-yu sã cuendá sã ñí dácãcu ñáhá-yu xii-í sã ñí yáha-í, núu xiãⁿ ío ndàcãⁿ táhù-í núu-yu, te ñá díu-ní yúhú ducaⁿ ío ndàcãⁿ táhù-í núu-yu chí tnàhá nchaa ñáyiu ñá túu cùu ñáyiu isràél xĩndecu ichi-gá xĩndecu nchaa xichí ducaⁿ ío ndàcãⁿ táhù-yu núu tẽ Àquilú ndihí núu ñadìhí-dé tá Priscilá. ⁵ Te cúñaha tùcu-ndo sã ío na càda ndee iní nchaa ñáyiu xĩndecu ichi Xítohó Jesucristú tàcá vehe té Àquilú ndihí tá Priscilá dácuahá-yu tnúhu-gá, te cúñaha tùcu-ndo sã ío na càda ndee iní té Epènetú chí tnàhá-dé ío ñùhu iní-í-dé, chí tée-áⁿ cúu-dẽ tée díhna nuu ñí sàndáá iní tnúhu Xítohó Jesucristú distritú Acãyá. ⁶ Te cúñaha tùcu-ndo sã ío na càda ndee iní tá Mariá xichí ndécú ndihí-ndo, xichí ío ndècu ndee xinu cuechi núu Xítohó Jesucristú. ⁷ Te cúñaha tùcu-ndo sã ío na càda ndee iní cue tée cùu ndi mee-í té Andrónicú ndihí té Jùniás, chí tnàhá-güedé ní xihí ndihí

ñaha-güedë xii-í vecaá, te ío cùdiu-güedé núú nchaa cue téé ní táuchíúⁿ Jèsús cáháⁿ tnúhu-gá. Te díhna-gá-güedé ní sándáá iní-güedé tnúhu Xítohó Jesucrístú dàcúúxí yùhú.

8 Te cúñaha-ndo sã ná càda ndee iní té Àmpliás chi tnàhá-dé ío ñùhu iní-í-dé, te ndècu-dé tnàhá-dé ichi Xítohó Jesucrístú. 9 Te cúñaha tùcu-ndo xii té Bãnú téé cùndihi ñaha xii-o quide-o chiuⁿ Xítohó Jesucrístú sá ná càda ndee iní-dé, te cúñaha tùcu-ndo xii té Èstaquís sá ná càda ndee iní-dé chi tnàhá-dé ío ñùhu iní-í-dé. 10 Te cúñaha tùcu-ndo xii té Àpelés sá ío na càda ndee iní-dé, chi téé-áⁿ ío váha cùndáá-dé núú Xítohó Jesucrístú, te cúñaha tùcu-ndo xii ñáyíu xíndecu vehe té Arístóbulú sá ío na càda ndee iní-yu. 11 Te cúñaha-ndo xii té Heròdiòn téé cù ndí mee-í sá ío na càda ndee iní-dé, te cúñaha-ndo xii ñáyíu ndècu ichi Xítohó Jesucrístú xíndecu vehe té Nàrcisú sá ío na càda ndee iní-yu. 12 Te cúñaha-ndo xii tnàhá tá Trifená ndihi tá Trifosá sá ío na càda ndee iní-yu, chi tnàhá-yu quidé-yu chiúⁿ Xítohó Jesucrístú. Te tnàhá tá Përsidá xíchí ndécú ndihi-o ichi Xítohó Jesucrístú cúñaha-ndo xii-xi sá ío na càda ndee iní-xi, chi tnàhá-xi ío ndècu ndee-xi quide-xi chiuⁿ Xítohó Jesucrístú. 13 Te cúñaha-ndo tnàhá té Rűfú téé ío váha sándáá iní tnúhu Xítohó Jesucrístú sá ío na càda ndee iní-dé ndihi nãná-dé, chi ñaha-áⁿ quidé ímí-í sá cúú-áⁿ dàtná nãná-í. 14 Te

cúñaha-ndo sã ío na càda ndee iní té Asíncritú, ndihi té Flègonté, ndihi té Hèrmás, ndihi té Pàtrobás, ndihi té Hèrmés, ndihi nchaa dava-gá cue ñáyíu ndècu ndihi-o ichi Xítohó Jesucrístú xíndecu ndihi-güedé. 15 Te cúñaha tùcu-ndo sá ío na càda ndee iní té Filológó, ndihi tá Jüliá, ndihi té Nèréú, ndihi cúha té Nèréú, ndihi tá Òлимпás, ndihi nchaa dava-gá ñáyíu sándáá iní tnúhu Xítohó Jesucrístú xíndecu ndihí-yu.

16 Te ío yíñùhu cada ndee iní tnàhá-ndó ìⁿ ìⁿ-ndo. Te nchaa ñáyíu tàcá nchaa iha dàcuaha tnúhu Xítohó Jesucrístú quidé ndèe iní ñáhã-yu xii-ndo.

17 Te nchòhó ñáyíu ndècu ndihí-í ichi Xítohó Jesucrístú càháⁿ-í dóho-ndo sã cadá cuëndá-ndó núu ío ñáyíu quide nacuaá vá cúú ìⁿnuu-ndo cundecu-ndo, chi ñáyíu-áⁿ sánú ichi ñahá-yu ìⁿ ichi ñá túú vãha, chi ñá túú ìⁿ-ni cuu-xi tnúhu càháⁿ-yu ndihi tnúhu sá ní níhí-ndó ndècu ndihí-ndo, te ñáyíu ducaⁿ xíquide vá nihí tnàhá-gã-ndó ndihí-yu. 18 Chi ñáyíu-áⁿ ñà túú quidé-yu chiúⁿ sá cúú-xí Xítohó Jesucrístú, chi mee-ni sã cúú-xí mée-yu quidé-yu, te mee-ni nchaa tnúhu sá ío vii ío váha cuáháⁿ càháⁿ-yu òré cuáháⁿ-yu dandahú-yu nchaa ñáyíu ío yáchí sándáá iní-xi ìⁿ tnúhu. 19 Te nchaa ñáyíu nihí-yu tnúhu sá nchòhó sándáá iní-ndó tnúhu Xítohó Jesucrístú, núu xíãⁿ ío cùdíí

iní-í. Te cùníní-í sá nchòhó ío váha cutnùní iní-ndó nàcuáa cada-ndo mée-ní sá váha, te vá cání iní-ndó càda-ndo datná xíquide nchaa ñáyiú ndècu ichi cuehé ichi duha.
 20 Te Yá Ndiòxí Yáá quidé ío váha cùu iní-ó ndècu-o ío ndìhi cada-gá cuendá sá sàcùlhná ñà túú-gã ná cada ñaha-xi xii-ndo, te xicáⁿ táhù-í núú Xítohó Jesucristú sá ío na chindee chitúu ñaha-gã xii-ndo.

21 Te té Timùteú tée quide ndìhi-í chùuⁿ Xítohó Jesucristú iha quide ndee iní ñáhá-dě xii-ndo, te tnàhá té Lùciú, ndìhi té Jàsón, ndìhi té Sosipàtér cue tée cùu ndi mee-í quidé ndèe iní ñáhá-güedě xii-ndo.

22 Te tnàhá yúhú té Tèrciú tée càdúha tutú-a cuendá té Páblú quidé ndèe iní ñáhá-í xii-ndo, chi ñⁿ-ni cùu-o ndìhi Xítohó Jesucristú.

23 Te tnàhá té Gãyú tée dii vèhe-xi ndecu-í quidé ndèe iní ñáhá-dě xii-ndo, te dju-dé ní taxi nùu-dé vèhe tàcá ñáyiú dàcuahá-yu tnúhu Xítohó Jesucristú. Te tnàhá té Èrastú tée yìndaha díhúⁿ ñùú quidé ndèe iní ñáhá-dě xii-ndo, te tnàhá té Cuártú tée ndècu ndìhi-o ichi Xítohó Jesucristú quidé ndèe iní ñáhá-dě xii-ndo.

24 Te xicáⁿ táhù-í núú Xítohó Jesucristú sá ío na chindee chitúu ñaha-gã xii-ndo nchàa-ndo. Te ducaⁿ na cùnduu.

Cáháⁿ-ó sã ío càhnu cuu Yá Ndiòxí

25 Te vitna chí ná càchí-ó sã ío càhnu cuu Yá Ndiòxí,

chi mee-gã cada te ío-gã cuita níhí ndéé-gã-ndó cùndecu-ndo ichi Xítohó Jesucristú datná càchí tnúhu sá càhánⁿ nàcuáa naníhí tàhù-ó, tnúhu sá dánèhé-í ñáyiú cuendá Xítohó Jesucristú, te nchaa tnúhu-a ñⁿ-ni cùu-xi ndìhi nchaa tnúhu sá ní cachí Yá Ndiòxí cuu yuhu ndéé cùtnàhá ní ngáva ñuyúú, te vitna ní quee túu-xi, 26 chi mee Yá Ndiòxí ní dátúu-gá núú-ó vitna, te càhán-ndí nàcuáa ní chídó tnùní cue tée ní xóo càhánⁿ tnúhu Yá Ndiòxí ndéé sanaha. Te ducaⁿ tnúhu sá ndúú yuhu ní cuu ta xité nuu-xi níhí ñuyúú cuáhánⁿ, chi ducaⁿ ní cachí Yá Ndiòxí Yáá ndécú nchàa nduu nchaa quíú cunduu cuendá sá quìndáá iní ñáhá ñáyiú xii-gá, te tníⁿ-yu nchaa tnúhu càhán-gá.

27 ¡Te ñⁿdii-ni Yá Ndiòxí cúú-gã Yáá ío sàá sá xìní tnùní-xi! ¡Te nchaa-o chí ná càchí-ó sã ío càhnu cuu-gá, chi ndècu ndìhi-o Xítohó Jesucristú, te ducaⁿ-ni càda-o ní caa ní quíhíⁿ! Te ducaⁿ na cùnduu. Te ío chí cádá ndèe iní-nã vitna.

TUTÚ DÍHNA NUU NĪ CADÚHA TÉ PĀBLÚ QUIHĪⁿ NDAHA ÑÁYIU ÑUÚ CÒRINTÚ

*Té Păblú cādŭha-dé tutú
quíhĭⁿ ndaha ñáyiu xĩndecu ichi
Xítohó Jesucristú ndécú ñúú
Còrintú*

1 Yúhú té Păblú ní cáháⁿ ñáhá Yá Ndióxi xii-í cuendá sá cáháⁿ-í tnúhu Xítohó Jesucristú núú ñáyiu, chi ducaⁿ ñi cachí Yá Ndióxi cunduu. Te cādúha-í tutú-a ndihi té Sostenés té ndécú ndihi-o ichi Xítohó Jesucristú 2 cuendá daquixi-í ndaha nchòhó ñáyiu xĩndecu ichi Yá Ndióxi ndécú ñúú Còrintú, chi nchòhó cúu-ndó ñáyiu cùu cuendá Yá Ndióxi cuendá sá ndécú ndihi-ndo Xítohó Jesucristú. Te ñu-ndó cùu-ndo ñáyiu ní cáháⁿ ñáhá Yá Ndióxi cuendá cundecu yĩñuhu-ndo núú-gă, ndihi nchaa dava-gă ñáyiu ndècu nchaa xichi, ñáyiu cächí sá ío cahnú cuu Xítohó Jesucristú. Te Yaá-án cúu-gă Xítohó-yu, te ñu-ni-gă cúu-gă Xítohó nchoo tucu. 3 Te xicáⁿ táhù-í núú Tátá-ó Dütú Ndióxi ndihi núú Xítohó Jesucristú sá ndi nduú-gă ío na chĩndee chitúu ñaha-gă xii-ndo, te ío váha cuu iní-ndó cundecu-ndo.

*Yá Ndióxi ío chĩndee ñaha-gă
xii-o cuendá sá ndécú-ó ndihi
Xítohó Jesucristú*

4 Te ducaⁿ-ni ío ndácáⁿ táhù-í núú Yá Ndióxi cuendá-ndó, chi mee-gă ío chĩndee chitúu ñaha-gă xii-ndo sá cuendá Xítohó Jesucristú. 5 Te cuendá sá ndécú-ndó ndihi Xítohó Jesucristú, núú xiáⁿ Yá Ndióxi ío chĩndee ñaha-gă xii-ndo sá dıquí-ndó năcuáa cáháⁿ-ndó, ndihi năcuáa cùtnuní iní-ndó, 6 chi tnúhu sá ni ñihí-ndó cuendá Xítohó Jesucristú ní quée-xi iní-ndó. 7 Te xiáⁿ núu nchaa sá váha ñá túu tnáhı cümání xii-ndo chi Yá Ndióxi ío chĩndee ñaha-gă. Te ducaⁿ quide-gă ñini nchòhó ni yùhu ni iní-ndó ndètu-ndo sáá nduu quixi tucu Xítohó Jesucristú. 8 Te Yá Ndióxi ducaⁿ-ni ío chĩndee ñaha-gă xii-ndo cuendá sá vă yòo teñaha cuèchi nduu na quixi tucu Xítohó Jesucristú. 9 Te nchaa sá cáháⁿ Yá Ndióxi dacutí quide-gă, te ñu-gă cúu-gă Yaá ní cáháⁿ ñáhá xii-ndo cuendá cuu ñnuu-ndo ndihi Déhe-gă Xítohó Jesucristú Yaá cúu Xítohó-ó.

*Ñá túu cùu ñnuu ñáyiu
ndècu ichi Xítohó Jesucristú*

10 Te nchòhó ñáyiu ndècu ndihi-í ichi Xítohó Jesucristú cáháⁿ-í dóho-ndo sá vă ndi dııⁿ cànı iní-ndó, te ío cuu ñnuu-ndo cundecu-ndo, te ñni cànı iní-ndó, te ñni cãda-ndo chi ducaⁿ cuını-gă cunduu. 11 Te ñaha cáháⁿ-í dóho nchòhó ñáyiu ndècu ndihi-í ichi Xítohó Jesucristú, chi cue ñáyiu vehe té Clóe ní cachí tnúhu-yu xii-í sá ñá túu cùu ñnuu-ndo ndecu-ndo. 12 Te

duha ndũu tnũhu ní níhì-í nàcuáa cùu ndecu-ndo, chi dava-ndo càchì-ndó: “Yúhú cùu-í cuendá té Páblú.” Te dava-ndo càchì-ndó: “Yúhú cùu-í cuendá té Apolós.” Te dava-ndo càchì-ndó: “Yúhú cùu-í cuendá té Pelú.” Te dava tuçu-ndo càchì-ndó: “Yúhú cùu-í cuendá Xítohó Jesucristú”, duha càchì-ndó. ¹³ Te vá dúcáⁿ cãháⁿ-ndó chi ñá túú nã daha Xítohó Jesucristú ndécú chi ñⁿdii-ni-gá. Te ñá díú yũhú té Páblú ní xĩhì-í núú cùrúxí sá cuendá-ndó, te ni ñá túú ní sãndute-ndo cuendá sá yũhú cuu cuendá ñáhà-í xii-ndo. ¹⁴ Te táxãhu xii Yá Ndiõxí chi ñá díú nchãa-ndo ni dacuandute-í, chi té Crìspú-ni ndihì té Gãyú-ni ní dácúandute-í-güedé. ¹⁵ Te xĩãⁿ nõu vá cùú tnàhì cãháⁿ-ndó sã ñí sandute-ndo sã cùú cuendá ñáhà-í xii-ndo. ¹⁶ Te ní ndacu tucu iní-í sá tnàhá tucu ñáyiu cùu ndi mee té Èstefánás ní dácúandute-í, te diu-ná ñáyiu-áⁿ te sãnuu sá ñá túú-gã nágá ñáyiu ni dácúandute-í. ¹⁷ Te Xítohó Jesucristú ñá túú ní tendaha ñaha-gá xii-í sá dácúandute-í ñáyiu, chi ní tendaha ñaha-gá xii-í sá cãháⁿ-í tnũhu-gá nõu-yu, tnũhu sá cãháⁿ nàcuáa naníhì tãhú-ó. Te ñá túú cãháⁿ-í dàtná cãháⁿ ñáyiu túha. Te ducaⁿ quide-í cuendá sá nchòhó quíndáá váha iní-ndó tnũhu sá cãháⁿ nàcuáa ní xĩhì Xítohó Jesucristú núú cùrúxí. Chi núu na cãháⁿ-í dàtná cãháⁿ ñáyiu túha te nchòhó vá quíndáá iní-ndó tnũhu-áⁿ nàcuáa tàù-xi cunduu.

Sá cuendá Xítohó Jesucristú

cútnuní iní-ó sã ïo cãhnu cuu Yá Ndiõxí

¹⁸ Te nchaa ñáyiu ta xĩta nihnu cuáháⁿ càchì-yu sá ñà túú nãndĩhì tnũhu sá cãháⁿ nàcuáa ní xĩhì Xítohó Jesucristú núú cùrúxí, dico sá cùú-xí nchòo ñáyiu sa ní naníhì tãhú, chi tnũhu-áⁿ cùú-xí ñⁿ tnũhu sá ní taxi Yá Ndiõxí ndécú ndihì-o cuendá ndacu-gá cada-gá nchaa nàcuáa cuiní-gá iní-ó, ¹⁹ te quèe ndáá-xi nàcuáa cãháⁿ-gá núú tütú-gá núú càchì-xi:

Yúhú cada-í te nchaa ñáyiu túha vá nãndĩhì-gá nchaa sá xini tnuní-yu,

te nchaa ñáyiu ío váha sàà díquí-xi vá nãndĩhì-gá nchaa nàcuáa sãni iní-yu.

Duha càchì Yá Ndiõxí núú tütú-gá.

²⁰ Te xĩãⁿ cútnuní iní-ó sã nchãá ñáyiu sãni iní-xi sá ïo túha ndècu ñuyúú-a, ndihì nchaa cue tée dácuaaha ñaha xii-yu nchaa tnũhu ní chídó tnuní ndii Moisés, ndihì nchaa ñáyiu ío váha sàà díquí-xi cãháⁿ cuendá nchaa sá ío ñuyúú-a, te nchaa ñáyiu-áⁿ càchì Yá Ndiõxí sá ñà túú nãndĩhì nchaa sá xini tnuní-yu sá cùú-xí-gã. ²¹ Te Yá Ndiõxí ío váha cútnuní iní-gá nàcuáa quide-gá, chi ñá túú dàña-gá cundecu ndihì ñahá-yu xii-gá sá cuendá nchaa sá ñí sáá díquí mée-yu, te ducaⁿ quide-gá chi cuiní-gá sá cundèdóho-yu tnũhu sá sãni iní-yu ñá túú nãndĩhì. Te sá cuendá tnũhu-áⁿ te naníhì

tàhú-yu te núu na quindáá iní ñáhã-yu xii-gá.

22 Te cue ñáyiú isràél cuiní-yu quini-yu sá vã yõo tnàhí ndàcu cada, te cue ñáyiú griégú nchicúⁿ nihnú-yu nchaa sá dácua^ha ñáyiú ío túha. 23 Dico nchoo yìhi-o cáháⁿ-ó núú ñáyiú sá Xítóhó Jesucristú ní xihí-gá núú cùrúxí. Te cue ñáyiú isràél ñá túú tnàhí tnàhá iní-yu cundedóho-yu tnúhu-áⁿ. Te cue ñáyiú ñá túú cùu ñáyiú isràél càchí-yu sá ñà túú vèdana nàndíhi tnúhu-áⁿ. 24 Dico sá cúú-xí nchaa ñáyiú ní cáháⁿ ñáhá Yã Ndiõxí chi cuèi cùú-yu ñáyiú isràél àdi ñá túú cùú-yu, dico ñáyiú-áⁿ càchí-yu sá sã cuendá Xítóhó Jesucristú cutnùní iní-yu sá ío càhnu cuu Yã Ndiõxí te ndècu ndihi-gá nchaa sá xìní tnùní-gá. 25 Te sá quidé Yã Ndiõxí càchí ñáyiú ñuyúú-a sá ñà túú nàndíhi, dico xíãⁿ ío-gá nàndíhi dácúúxí sã sání iní méè-yu. Te sá ní xihí Xítóhó Jesucristú núú cùrúxí, xíãⁿ càchí ñáyiú sá ñà túú ní nihí ndéé Yã Ndiõxí cada-gá sá ní sani iní-gá cada-gá. Dico sá dúcáⁿ ní quide Yã Ndiõxí, xíãⁿ cúú-xí sã ío-gá ní nihí ndéé-gã ní quide-gá ñⁿ sá ní sani iní-gá dácúúxí sã sání iní méé ñáyiú ñuyúú-a. 26 Te nchòhó ñáyiú ndècu ndihi-íichi Xítóhó Jesucristú, chí dándàcu iní nàcuáa ndècu-ndo cútnàhá ní cáháⁿ ñáhá Yã Ndiõxí xii-ndo, chí sacú-ni-ndo túha dácúúxí ñáyiú ñá túú ndècu ichi-gá. Te ducaⁿ sàcú-ni-ndo tàxi tnùní-ndó, te diu-ni

ducaⁿ sàcú-ndó nèhe ñáyiú sá yíñuhu núú-ndó. 27 Te ñáyiú ñá túú ndècu ichi Yã Ndiõxí càchí-yu sá ñà túú tnàhí túha dava-gá tnàha ñáyiú-yu, dico dava ñáyiú ñá túú túha-áⁿ cáháⁿ ñáhá Yã Ndiõxí xii-yu cundecú-yu ichi-gá, te cundecu ndihi ñaha-gã xii-yu, te ducaⁿ dándóo canúú-yu nchaa ñáyiú càchí sá ío túha. Te cáháⁿ tucu-gá ñáyiú càchí dava-gá ñáyiú sá ñà túú tnàhí tàú cunuu cundecú-yu ichi-gá, te ducaⁿ cundecu ndihi ñaha-gá xii-yu, te dándóo canúú-yu nchaa ñáyiú càchí sá táxi tnùní. 28 Te ducaⁿ Yã Ndiõxí cáháⁿ-gá ñáyiú ñá túú tnàhí cunuu cundecu ndihi-gá, ndihi ñáyiú quèe tíhú núú dava-gá tnàha ñáyiú-xi, ndihi ñáyiú càchí-yu sá ñà túú vèdana nàndíhi, nchaa ñáyiú-áⁿ cáháⁿ-gá cundecu ndihi-gá, te ducaⁿ quide-gá cuendá dándóo canúú-yu nchaa ñáyiú càchí sá ío cunuu. 29 Te núu xíãⁿ ní ñⁿ ñáyiú vã cúú càchí-yu sá ío càhnu cuú-yu núú Yã Ndiõxí. 30 Dico nchòhó chí mee Yã Ndiõxí ní quide-gá ndécú-ndó ndihi Xítóhó Jesucristú, te Xítóhó Jesucristú ní quide-gá ní cutnùní iní-ó sã Yã Ndiõxí cúú-gã Yaá ndécú ndihi nchaa sá xìní tnùní-gá. Te diu-ni Xítóhó Jesucristú ní quide-gá cuendá sá nchóó vã cundècu-gá cuèchi-o núú Yã Ndiõxí, te ducaⁿ cundecu yíñuhu-o núú-gã, te nduu táhú-ó cundecu-o ndihi-gá ní caa ní quihíⁿ. 31 Te sá dúcáⁿ

quide-gá nõu xĩⁿ xĩnĩ ñũhu-xi cada-o nacuáa càháⁿ-xi núu tütú Yá Ndiõxĩ núu cächĩ-xi: “Vá cächĩ-ndó sá mée-ndó ïo càhnu cuu-ndo, chi cächĩ-ndó sá Yáa cúu Xĩtoho-ndó ïo càhnu cuu-gá”, duha cächĩ-xi núu tütú-gá.

2

Tnúhu sá càháⁿ nàcuáa ní cuu ní xĩhĩ Xĩtoho Jesucristú núu cùrúxĩ

¹ Te nchòhó ñáyiú ndècu ndihĩ-í ichi Xĩtoho Jesucristú sa nàha-ndo sá cùtnàhá ní quixi-í ní càháⁿ-í tnúhu Yá Ndiõxĩ núu-ndó, te ñá túú ní càháⁿ-í dàtná càháⁿ ìⁿ ñáyiú ío váha sàa díquí-xi, àdi datná càháⁿ ìⁿ ñáyiú ío túha. ² Chi cùtnàhá ní xĩndecu ndihĩ ñaha-ĩ xii-ndo chi ní sani iní-í sá mée-ní cuendá Xĩtoho Jesucristú càháⁿ-í núu-ndó ndihĩ nacuáa ní cuu ní xĩhĩ-gá, te diu ducaⁿ ñĩ quide-í. ³ Te cùtnàhá ní quexio-í núu ndécú-ndó te ni ñá cùtnunĩ iní-í nása cada-í ní cùu, te ío ní quiyùhú iní-í ní càháⁿ-í tnúhu-gá núu-ndó. ⁴ Te cùtnàhá ní càháⁿ-í nàcuáa ndùu tnúhu Xĩtoho Jesucristú núu-ndó, te nàha-ndo sá Espiritú Yá Ndiõxĩ ní chindee ñàha-xi xii-í ní càháⁿ-í tnúhu-gá núu-ndó, te tnúhu-áⁿ ñĩ quée-xi iní-ndó. Te ñá túú ní càháⁿ-í ìⁿ tnúhu càhnu núu-ndó tnúhu sá càháⁿ cue ñáyiú ío váha sàa díquí-xi. ⁵ Te ducaⁿ ñĩ cuu cuendá sá nchòhó quíndáa iní-ndó tnúhu Yá Ndiõxĩ chi ní quide-gá sá váha sá cúu-xi iní-ndó, te ñá díú sá cuendá tnúhu sá càháⁿ ñáyiú cächĩ

sá ïo túha ducaⁿ ñĩ sándáa iní-ndó tnúhu-gá.

Espiritú Yá Ndiõxĩ quidé-xi cùtnunĩ iní-ó nàcuáa sani iní-gá

⁶ Te nchoo càháⁿ-ó tnúhu càhnu núu ñáyiú sa ní nihĩ ndée ndècu ichi Xĩtoho Jesucristú. Te tnúhu-áⁿ ñá túú càháⁿ ñáyiú ñá túú ndècu ichi-gá, te ni cuè téé yìndaha ñaha xii-yu ñá túú càháⁿ-güedé tnúhu-áⁿ chi cue téé-áⁿ naa-güedé. ⁷ Te tnúhu càhnu-áⁿ cúu-xi tnúhu Yá Ndiõxĩ, te mee-gá ní cächĩ-gá ndée cùtnàhá vátá ngáva-gá ñuyíú sá ncháa ñáyiú na quíndáa iní tnúhu-áⁿ te nduu táhũ-yu cundecú-yu ndihĩ-gá núu ío váha càa ndecu-gá ni caa ni quíhĩ. Te tnúhu-áⁿ ndúú yùhu-xi ni cuu. ⁸ Te ni ìⁿ cue téé yìndaha cue ñáyiú ñuyíú-a ñá túú tècú tnùnĩ-güedé tnúhu-áⁿ, chi núu dicó tècú tnùnĩ-güedé tnúhu-áⁿ te vá catá càa-güedé Xĩtoho Jesucristú núu cùrúxĩ cahni ñaha-güedé xii-gá ní cùu. Te diu-ni Yaá-áⁿ ïo càhnu cuu-gá. ⁹ Dico ducaⁿ ñĩ cuu chi ní quee ndáa-xi nàcuáa càháⁿ-xi núu tütú Yá Ndiõxĩ núu cächĩ-xi:

Yá Ndiõxĩ sa ní sani iní-gá nchaa nàcuáa cada-gá sá cúu-xi cuendá nchaa ñáyiú cùu iní ñáha xii-gá.

Te sá ñĩ sani iní-gá cada-gá cúu-xi sá vátá quíni-gá ñáyiú te ni vátá cùndedóho-gá-yu,

te ni ñá túú tnàhĩ cùtnunĩ iní-yu nása cada-gá.

Duha càchí-xi núú tütú-gá.
 10 Te mee Yă Ndiöxí ní cachí-gá sá Espíritú-gá cada-xi te nchoo cùtnuní iní-ó nchàa nacuáa sàni iní-gá cada-gá, núu xiăⁿ ducaⁿ tècú tnùní-ó vitna, chi Espíritú-gá xini-xi nchaandi túhú nacuáa sàni iní-gá cada-gá.

11 Te ñá ìⁿ ñáyiú xini ndáá-yu nacuáa sàni iní ingá ñáyiú, chi mee ñáyiú-áⁿ xini ndáá-yu nchaa nacuáa sàni iní-yu. Te ducaⁿ sãtnahá-xi cùu Yá Ndiöxí chi medì-ni Espíritú-gá xini-xi nchaa nacuáa sàni iní-gá. 12 Te nchoo chi Yá Ndiöxí ní taxi-gá Espíritú-gá ndécú ndìhi-o, te ñá díú ñùyíú-a ducaⁿ ni quèe espíritú ní ngúndecu ndìhi-o. Te ducaⁿ ní taxi-gá Espíritú-gá ndécú ndìhi-o cuendá ducaⁿ cùtnuní iní-ó nacuáa ndùu nchaa sá vâha sá dicó ducaⁿ ní taxi-gá ndécú ndìhi-o. 13 Te cuendá nchaa sá vâha-áⁿ càháⁿ-ndí, te càháⁿ-ndí nacuáa dàcahu iní ñáhá Espíritú Yă Ndiöxí xii-ndí, te ñá túú càháⁿ-ndí nacuáa càhu iní ñáyiú ñùyíú-a càháⁿ-yu, te diu-ni nchaa tnúhu dàcahu iní ñáhá Espíritú-gá xii-ndí càháⁿ-ndí, diu-ni nchaa xiăⁿ dánèhé-ndí nchaa ñáyiú ndècu ndìhi tucu Espíritú-gá.

14 Te ñáyiú ñá túú ndècu ndìhi Espíritú Yă Ndiöxí ñá túú tnàhá iní-yu nacuáa ndùu tnúhu dàtecú tnúhu ñaha Espíritú-gá xii-yu, te ni ñà túú tècú tnùní-yu, te càchí-yu sá ñà túú nàndíhi-xi. Te ducaⁿ chi mee-ni nchaa

ñáyiú ndècu ndìhi Espíritú-gá tècú tnùní-yu nacuáa ndùu tnúhu-áⁿ. 15 Te cue ñáyiú ducaⁿ ndècu ndìhi Espíritú Yă Ndiöxí cùtnuní ndáá iní-yu ná cúú nchàa sá vâha, te vá yôo ìⁿ xini nchaa nacuáa sàni iní-yu. 16 Te núú tütú Yă Ndiöxí càchí-xi: “Vá yôo ìⁿ xini nacuáa sàni iní Yă Ndiöxí, núu xiăⁿ vá yôo ìⁿ ndacu ná danèhé ñáhá xii-gá”, duha càchí-xi núú tütú-gá. Te nchoo chi ìⁿ-ni sàni iní-ó ndìhi Xítóhó Jesucrístú.

3

Cue tée xíquide chiúⁿ Yá Ndiöxí

1 Te nchòhó ñáyiú ndècu ndìhi-í ichi Xítóhó Jesucrístú càchí tnúhu-í xii-ndo sã ñă ní ñìhi-í nacuáa cada-í càháⁿ-í tnúhu-gá núú-ndó dàtná càháⁿ-í núú nchàa ñáyiú quide nchaa nacuáa càháⁿ Espíritú Yă Ndiöxí, chi ní càháⁿ-í núú-ndó dàtná càháⁿ-í núú nchàa ñáyiú cùnuu nchaa sá cuèhé sá dúhá iní-xi, te ní quide ñaha-í xii-ndo dàtná cue ñáyiú íchí ñí sándáá iní tnúhu Xítóhó Jesucrístú, núu xiăⁿ ducaⁿ ñí càháⁿ-í núú-ndó. 2 Te ní quide ñaha-í xii-ndo dàtná ìⁿ déhe yiquiⁿ vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ìⁿ sá ñà túú tnàhí úhú tecú tnùní-ndó, te ñá túú ní dànèhé ñáhà-í xii-ndo ìⁿ sá xitò-í sá vâ tècú tnùní-ndó. Te quide cuendá-í sá díú-ní dùcaⁿ vá tècú tnùní-ndó ndèé vitna te núu na dànèhé ñáhà-í

xii-ndo nchàa dava-gá tnúhu. ³ Te ducaⁿ chi quide-ni-ndo nacuáa sàni iní méé-ndó, chi ndècu-ni-ndo ichi cuédú ínì, te nàa ndihì tnàha-ni-ndo, te ñá túú tnàhì cùu ìⁿnuu-ndo ndecu-ndo. Te xiáⁿ cùtnùnì sá méé-nì nchàa nacuáa sàni iní méé-ndó quide-ndo, te xiquide-ndo dàtná quidé nchàa ñáiyu ñá túú ndècu ichi Xítohó Jesucristú. ⁴ Te dava-ndo cächí-ndó: “Yúhú cùu-í cuendá té Páblú.” Te dava-ndo cächí-ndó: “Yúhú cùu-í cuendá té Àpolós”, duha cächí-ndó. Te sá dúcáⁿ cáháⁿ-ndó xiáⁿ cùtnùnì sá quidé-ni-ndó mèe-nì nchaa nacuáa sàni iní méé-ndó.

⁵ Te yúhú té Páblú cächí tnúhu-í xii-ndo sã ñá túú cùnuu-í, te ní té Àpolós ñá túú cùnuu-dé chi dicó cue tée xínu cüechi núú Yá Ndiöxí cùu-ndí, te ní cáháⁿ-ndí tnúhu-gá núú-ndó, núu xiáⁿ ní sándáá iní-ndó. Te ndí díⁿ ndí díⁿ ndùu chiuⁿ ní táhú Yá Ndiöxí cada-ndí. ⁶ Te yúhú cùu-í dàtná ìⁿ tée chihì tatá chi dàcaháⁿ ñáhà-í xii-ndo túha-ndo ichi Yá Ndiöxí. Te té Àpolós cùu-dé dàtná ìⁿ tée nàcuhñu chi tée-án ndécú-dé dánèhé ñáhá-dé xii-ndo tnúhu-gá. Te Yá Ndiöxí cùu-gã Yaá quidé sàhnu tatá ní chihì-í-án, te duha cáháⁿ-í chi diu-gá quidé-gã tá nihí ndéé-ndó ndècu-ndo ichi-gá. ⁷ Te núu xiáⁿ ní tée chihì tatá te ní tée nàcuhñu ñá túú cùnuu-güedé, dico Yá Ndiöxí ío cùnuu-gá chi diu-gá quidé-gã xínu tatá-án te sàhnu-xi. ⁸ Te ìⁿ-ni cùu tée chihì tatá ndihì tée nàcuhñu. Te ducaⁿ sãtnahá-xi cùu

nchúhú cue tée xiquide chiuⁿ Yá Ndiöxí, te nàcuáa ndùu chiuⁿ ní quide-ndí te ducaⁿ cùnduu táhú taxi Yá Ndiöxí nduu táhú-ndí. ⁹ Te nchòhó cùu-ndó dàtná ìⁿ xichi núú ní quée tatá, te nchúhú cùu ìⁿnuu-ndí quidé chiuⁿ-ndí xiáⁿ. Te ducaⁿ sãtnahá-xi cùu-ndo chi cùu cuendá ñáhá Yá Ndiöxí xii-ndo, te nchúhú cùu ìⁿnuu-ndí quidé-ndí chiuⁿ-gá.

Te cùu tucu-ndo datná ìⁿ vehe sá vítná sáá, te ducaⁿ sãtnahá-xi cùu-ndo chi Yá Ndiöxí quidé-gã tá sàhnu nihnu-ndo ichi-gá cuáháⁿ. ¹⁰ Te yúhú cùu-í dàtná ìⁿ tée cùnuu dacao vehe te ní tava-í cimièntú-xi, te díⁿ cue tée véxi dàcaa-güedé ndóho, te ìⁿ ìⁿ cue tée-án ío xini ñuhu-xi cada cuendá-güedé nàcuáa dacaa-güedé. Núu ducaⁿ sãtnahá-xi cùu yúhú chi Yá Ndiöxí ní taxi-gá chiuⁿ quide-í te chindee ñaha-gá, chi díhna-gá-í ní quixi-í ní cáháⁿ-í tnúhu Xítohó Jesucristú núu-ndó, te díⁿ cue tée véxi dàcuaha ñaha-ná xii-ndo tnúhu-gá, te ìⁿ ìⁿ cue tée-án ío xini ñuhu-xi cada cuendá-güedé nàcuáa dacuaha ñaha-güedé xii-ndo tnúhu-gá. ¹¹ Te cimièntú vehe-án cada iní-ó sã cùu-xí mèe Xítohó Jesucristú, te ducaⁿ chi yúhú ní dánèhé ñáhà-í xii-ndo ní ngündecu ndihì-ndo Xítohó Jesucristú, te vá yõo-gá cundecu ndihì-ndo chi ìⁿndí díí-ni-gã ndécú. ¹² Te dava cue tée dàcaa-güedé vehe váha te chihì-güedé díhúⁿ

cuàán, ndihi díhúⁿ cuixíⁿ, ndihi yúú sǎ ìo vii càa. Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixiⁿ. ¹³ Te sáá nduu te nchaa vehe-áⁿ càyú-xi, te vehe vítú-áⁿ ndihi vehe ité-áⁿ ndihi vehe tnuvixiⁿ-áⁿ ndoo ndoo càyú, te nchaa vehe váha-áⁿ vǎ càyú-xi cuèi na yǎha ñuhú. Te nchaa cue téé ní dácáá vèhe váha-áⁿ cada iní-ó sǎ cúú-güedé ñáyiú ío váha quide chiuⁿ Yá Ndiöxí. Te nchaa cue téé ní dácáá vèhe vítú, ndihi cue téé ní dácáá vèhe ité, ndihi cue téé ní dácáá vèhe tnuvixiⁿ cada iní-ó sǎ cúú-güedé ñáyiú ñá túú cuìní cada chiúⁿ Yá Ndiöxí nàcuáa tàú-xi cunduu. Te sáá nduu te cutnùní nàcuáa ndùu chiuⁿ ní quide ìⁿ ìⁿ ñáyiú, chi Yá Ndiöxí cáháⁿ-gá nàcuáa ndùu chiuⁿ ní quide ìⁿ ìⁿ ñáyiú ní quide chiúⁿ-gá. ¹⁴ Te cue ñáyiú ío váha xǐquide chiúⁿ Yá Ndiöxí te cùdí chiúⁿ quidé-yu, te ñáyiú-áⁿ níhi-yu sǎ ndúú tǎhú-yu. ¹⁵ Te cue ñáyiú ñá túú quide chiuⁿ Yá Ndiöxí nàcuáa tàú-xi cunduu, te vǎ cùdí chiúⁿ ní quidé-yu chi cuíta te ndóo-ná-yu duha, dico mèé-yu chi naníhí tǎhú-yu.

¹⁶ Te yúhú càháⁿ-í dóho-ndo dándacu-í iní-ndó sǎ cúú-ndó dàtná vehe Yá Ndiöxí, chi Espiritú-gá ndécú ndihi ñaha-xi xii-ndo. ¹⁷ Te núu yoo na dànaa ñaha xii nchóhó ñáyiú cùu veñúhu-gá, te Yá Ndiöxí danàa ñaha-gá xii ñáyiú-áⁿ, te ducaⁿ càda-gá chi nchóhó cúú-ndó ñáyiú cùu

cuendá-gá.

¹⁸ Te vǎ dándàhú-ndó mèe-ndo sǎ ìo túha-ndo. Te núu ío dava-ndo sàni iní-ndó sǎ túha-ndo dàtná sání iní cue ñáyiú ñá túú ndècu ichi Yá Ndiöxí, te cada-ndo sǎ cúú-ndó dàtná ñáyiú ñá túú tnàhí túha, te ducaⁿ te cuu ndisa-ndo ñáyiú túha sǎ cúú-xí Yǎ Ndiöxí. ¹⁹ Te nchaa sǎ xíní tnùní nchaa ñáyiú càchí sǎ ìo túha ñá túú ndècu ichi Yá Ndiöxí ñá túú nàndíhi-xi sǎ cúú-xí-gǎ. Te càchí-xi núú tütú-gá: “Nchaa ñáyiú càchí sǎ ìo túha te Yá Ndiöxí dandõo canúú ñáhá-gǎ xii-yu núú nchàa sǎ quidé-yu”, duha càchí-xi núú tütú-gá. ²⁰ Te càchí tucu-xi ingá xichi: “Yá Ndiöxí cùtnùní iní-gá nchaa nàcuáa sàni iní ñáyiú càchí sǎ ìo túha. Te nchaa nàcuáa sàni iní-yu-áⁿ càchí-gá sǎ ñá túú vèdana nàndíhi-xi”, duha càchí-xi núú tütú-gá. ²¹ Núu xǎⁿ càháⁿ-í dóho-ndo sǎ vǎ càchí-ndó sǎ nchúhú cue téé dānehé ñáhá xii-ndo tnúhu-gá ío càhnu cuu-ndí. Te nchaa sǎ ío ñuyúú-a cùu-xi sǎ váha sǎ cúú-xí-ndó. ²² Te cuèi yúhú ndihi té Àpolós ndihi té Pèlú ndécú-ndí sǎ cúú-xí-ndó, te cuèi nchaa sǎ ío ñuyúú-a te cuèi nchaa nduu ndècu-ndo te cuèi sǎ cùú-ndó dico nchaa cùu-xi sǎ váha sǎ cúú-xí-ndó. Te cuèi nchaa sǎ ndécú tnáví, te cuèi nchaa sǎ cóó ndèé cuèé-gá nchaa cùu-xi sǎ váha sǎ cúú-xí-ndó. ²³ Te mee-ndo ndècu-ndo sǎ cúú-xí Xitohó Jesucristú, te mee Xitohó Jesucristú ndécú-gǎ sǎ cúú-xí Yá Ndiöxí.

4

Nàcuáa ndüu chiuⁿ quide cue téé ní táuchúúⁿ Xítohó Jesucristú cáháⁿ tnúhu-gá

¹ Te cada cuendá-ndó sã nchũhú dicó-ni cue téé xinu cuechi núú Xítohó Jesucristú cúu-ndĩ, te chiuⁿ-án nĩ taxi Yá Ndiõxí quidé-ndĩ cáháⁿ-ndĩ tnúhu sá nĩ cachí-gá yíyùhu ni cuu. ² Te xini ñuhu-xi sá ncháá ñáyiú ducaⁿ nĩ sãñaha Yá Ndiõxí chiuⁿ quidé-yu cada ndáá-yu cadá-yu chiuⁿ-án. ³ Te yúhú ñá túú quide cuendá-í nüu nása ndüu tnúhu cáháⁿ-ndó cuendá-í nüu cùu-í téé váha àdi ñá túú cùu-í. Te ñu-ni ducaⁿ ñá túú quide cuendá-í nüu nása-gá cáháⁿ nchaa dava-gá ñáyiú cuendá-í. Te ni mèe-í ñá túú cáháⁿ-í nüu cùu-í téé váha àdi ñá túú cùu-í. ⁴ Te sãnuu iní-í sá ñá túú nã cúmãni-í núú Yá Ndiõxí, dico ñá díú sã xĩãⁿ te cachí-í sá ñá túú cuèchi-í ndécú nüu-gá, chi mee-gá nãhá ndáá-gá te núu nása quide-í ndécú-í. ⁵ Te nchòhó vá cáháⁿ-gá-ndó sã ñá túú cundáá ñáyiú núú Yá Ndiõxí, chi vátá sãá-gá nduu cundáá cuèchi-yu. Te na sãá nduu quixi tucu Xítohó Jesucristú te dàvá-án datúu-gá nchaa sá quidẽ-yu, nchaa sá ñá túú xini-ó quidé-yu vitna, te ducaⁿ datúu-gá nchaa nàcuáa sãni iní-yu. Te Yá Ndiõxí cáháⁿ váha-gá cuendá nchaa ñáyiú ní quide váha.

⁶ Te nchòhó ñáyiú ndècu ndihi-í ichi Xítohó Jesucristú, càcunehe-í té Àpolós ndihi yúhú núu-ndó dānehé ñáhà-í xii-ndo nàcuáa cada-ndo

cuendá ducaⁿ cùu-xi ñⁿ sá váha sá cúu-xi-ndó, ndihi cuendá sá nchòhó canchicúⁿ nihnu-ndo càda-ndo mee-ni nchaa nàcuáa yòdo tnuní núú tütú Yá Ndiõxí. Te ducaⁿ te vá càchí-ndó sã ñⁿ téé cáháⁿ tnúhu Yá Ndiõxí ío-gá càhnu cuu-dé dàcúúxí ñngá-dé. ⁷ Te nchòhó vá càchí-ndó sã ío-gá cùnùu-ndo dàcúúxí dàva-gá ñáyiú chi Yá Ndiõxí ní quide-gá ní ngúndecu ndihi-ndo nchaa sá xini tnùn-ndó. Te mee-gá ducaⁿ nĩ quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá mée-ndó nĩ quide-ndo dùcaⁿ ní ngúndecu ndihi-ndo nchaa sá xini tnùn-ndó.

⁸ Te nchòhó quidé-ndó sã ñá túú tnàhí-gá ná cúmãni-ndó nüú Yá Ndiõxí, te quide-ndo sá ni nihí-ndó nchaa sá cuini-ndó nüu-gá ndécú ndihi-ndo, te sãnuu sá cúu-nã-ndó datná cue téé yindaha ñáyiú, te nchúhú ñá túú cùu ñⁿnuu ndihi ñaha-ndí xii-ndo quindaha ndihi ñaha-ndí xii-ndo ñáyiú, ¿te váha-ni te núu dicó ndisa sá yindaha-ndo ñáyiú chi tnàhá nchúhú ní tnàhá ndihi ñaha-ndí xii-ndo quindaha-ó-yu te núu dicó cúu-xi ñⁿ sá ndáá dico ñáhá! ⁹ Te yúhú quidé cuendá-í sã nchũhú cue téé ní táuchúúⁿ Xítohó Jesucristú cáháⁿ tnúhu-gá núú ñáyiú ní cachí Yá Ndiõxí sá cúu-ndĩ cue téé ñá túú nãndihi sá cúu-xi dàva-gá ñáyiú. Te ní cachí tucu-gá sá cúu-ndĩ datná cue

ñáiyu sa ní tnahá òré cuú-xi quíhíⁿ nacháhu cuéchi-xi, te nchaa ñáiyu cùñúhu ñáhá-yu xii-ndí sá dúcáⁿ ndòho-ndí, te tnahá nchaa espíritú cùñúhu ñaha-xi xii-ndí. ¹⁰ Te cuendá sá xínú cuéchi-ndí núú Xítóhó Jesucristú, xíáⁿ cúu-ndí dàtná cue téé ñá túú vèdana nàndíhi sá cúu-xi ñáiyu. Te nchòhó quidé-ndó sá cúu-ndó ñáiyu ío túha ndècu ndíhi Xítóhó Jesucristú. Te ñáiyu càchí-yu sá nchùhú cúu-ndí cue téé ñá túú ndàcu cada ìⁿ sá cáda sá cúu-xi Yá Ndiòxí. Te nchòhó quidé-ndó sá cúu-ndó ñáiyu ío váha ndàcu quide ìⁿ sá sání iní-ndó sá cúu-xi-gã. Te cue ñáiyu dàquee tihú ñáhã-yu xii-ndí, te nchòhó néhë-yu sá yíñúhu núu-ndó. ¹¹ Te nchùhú chi nchaa-ni nduu ío ndòho-ndí, chi xihí-ndí docó, yíchí-ndí ndute, te ñá túú dõó-ndí, te nchaa ñáiyu quide úhú ñáhã-yu xii-ndí, te ni vèhe-ndí ñá túú ndèé cáá cùndècu-ndí. ¹² Te ío ndòho-ndí quidé chiuⁿ-ndí nihí-ndí sá xexí-ndí. Te cue ñáiyu xicuehé ñáhã-yu xii-ndí dico xicáⁿ táhú-ndí núú Yá Ndiòxí cuendá-yu, te ñá cúu tnahí quiní ndeé ñáhã-yu xii-ndí dico quide cahnu iní-ndí nchaa sá quidé ñáhã-yu. ¹³ Te mee-ni tnúhu cuèhé tnúhu duha càháⁿ-yu cuendá-ndí dico sàcahnu iní-ndí te dàsahú-ndí-yu mee-ni tnúhu váha. Te càchí-yu sá cúu-ndí dàtná ìⁿ sá ñà túú-gã vèdana nàndíhi, te nchaa-ni nduu ducaⁿ

càháⁿ-yu xáhãⁿ-yu xii-ndí.

¹⁴ Te yúhú duha càháⁿ-í núú tütú-a dàsahú ñáhà-í xii-ndo, dico ñá díú tnúhu sá cúu càháⁿ núu-ndó càháⁿ-í. Te duha càháⁿ-í dóho-ndo chi quide iní-í sá sùúni dàtná déhe mee-í cúu-ndó chi ío cùu iní ñáhà-í xii-ndo. ¹⁵ Te nchaa-o ndècu-o ichi Xítóhó Jesucristú vitna, dico yúhú cúu-í téé díhna nuu nì dánèhé ñáhã xii-ndo nacuaá nduu tnúhu sá càháⁿ nacuaá nanihí tahú-ó, núu xíáⁿ cúu-í dàtná tãtã-ndó. Te cuèi vãi vihi cue téé na quixi-güedé danèhé ñáhã-güedé xii-ndo tnúhu-gá dico ìⁿ ñá-ni yúhú cúu-í téé díhna nuu-gã ní dánèhé ñáhã xii-ndo tnúhu-gá. ¹⁶ Núu xíáⁿ càháⁿ-í dóho-ndo sã cáncñícúⁿ nihnu-ndo càda-ndo nchaa nacuaá quide-í.

¹⁷ Te xíáⁿ núu sa ní tendaha-í té Timùteú véxi coto ñaha-dé xii-ndo, te téé-áⁿ ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucristú, te téé-áⁿ cachí tnúhu-dé xii-ndo nchaa nacuaá quide-í ndécù-í ichi-gá. Te ñá-ni nacuaá na càchí tnúhu-dé-áⁿ ñá-ni ducaⁿ quide-í nchaa xichi núu tàcã ñáiyu dàcuaha tnúhu Xítóhó Jesucristú. ¹⁸ Te dava nchòhó ío quide cahnu-ndo mee-ndo chi sání iní-ndó sã vã quixí-gã-í quixi coto ñaha-í xii-ndo. ¹⁹ Dico núu mee Yá Ndiòxí ná càchí-gã te ío ndíhi quixi coto ñaha-í xii-ndo, te dàvã-áⁿ quiní-í te núu nása quide nchaa ñáiyu ducaⁿ ío xiquide cahnu mee-xi-áⁿ ndécù-yu ichi Xítóhó Jesucristú. Te vá cáda

cuëndá-í tnúhu càháⁿ-yu chi chiùⁿ quidé-yu cada cuëndá-í. 20 Te vitna yìndaha ñaha Yá Ndiòxí xii-o, te chindee ñaha-gá xii-o quide-o nchaa sá vâha sâni iní-ó quide-o te ñá díú mèe-ni sá càháⁿ-ó. 21 Te ío chí cání iní núu ndédacâa sá vâha-gá cada-í òré ná quéxio-í núú ndécú-ndó, núu sá ténàá ñáhà-í xii-ndo àdi sá càháⁿ ndihí ñaha-í xii-ndo ndihí tnúhu vii tnúhu vâha nâcuâa cutnùní iní-ndó sá cúú iní ñáhà-í xii-ndo.

5

Íⁿ cuéchi càhnu vihi

1 Te yúhú sa ní níhí ndáá-í tnúhu nâcuâa cùu ndecu-ndo, chi ìⁿ téé ndècu ndihí-ndo ndeca-dé nâná chàhá-dé. Te xíáⁿ cúú-xí ìⁿ cuéchi càhnu vihi, chi ndéé nchaa ñâyiu ñá túú ndècu ichi Yá Ndiòxí càchí-yu sá vâ cúú tnàhí ducaⁿ càda-o. 2 ¡Te nchòhó ío quide cahnu-ni-ndo mee-ndo xíndecu-ndo! ¡Te tàú-ndó sá cùndiyí-ndó ndixi cuéchi iní-ndó sá dúcáⁿ cùu ndecu-ndo ni cuu! Te téé ducaⁿ quide-áⁿ xíní ñùhu-xi sá vâ dáñá-gã-ndó nìhí tnáhá ndihí ñaha-dé xii-ndo ni cùu dico ñá túú dùcaⁿ quide-ndo. 3 Te yúhú ñá túú ndècu ndihí ñaha-í xii-ndo dico datná tnúhu sá ndécú ndihí ñaha-í xii-ndo chí ducaⁿ-ni ío ñùhu iní ñáhà-í xii-ndo. Te yúhú càchí-í sá nâcháhu téé-áⁿ cuéchi-dé sá dúcáⁿ quide-dé, te díu-ni ducaⁿ càháⁿ-í núú-ndó te núu dicó ndécú ndihí ñaha-í xii-ndo. 4 Te òré nátacá-ndó càháⁿ ndihí-ndo Yá Ndiòxí te díu-ni Xítohó Jesucristú ñá túú

dàña ndéé-gá chíndèe ñaha-gá xii-ndo, te òré-áⁿ cada-ndo nâcuâa cuíní Xítohó Jesucristú cada-ndo, te cada iní-ndó sá tnáhá-í ndécú ndihí ñaha-í xii-ndo. 5 Chí tàú-xi sá téé ducaⁿ quide-áⁿ daquèe tíhú-ndó-dé, te ducaⁿ te sâcuíhná dandòho ñaha-xi xii-dé cuéi na cùú-dé, dico na sáá nduu te nduu táhú-dé cundecu-dé ndihí Xítohó Jesucristú.

6 Te nchòhó ñá túú ndùu vâha-xi sá càchí-ndó sá ío càhnu cuu-ndo. Te xíní-ndó sá cuéi luha-ni levadurá ná quíhu yuchi cuáha pàá dándâa-xi cuéi luha-ni nâ quíhu te ñihí-ni yuchi sàháⁿ ndoho-xi. Te ducaⁿ sãtnahá-xi cùu nchohó chí núu ndècu ndihí-ndo ìⁿ ñâyiu quide sá ñá túú vâha te nchaa-ndo ñá túú-gã cúú vâha iní-ndó ndècu-ndo. 7 Te xíní ñuhu-xi sá cáda-ndó datná quidé cué ñâyiu quide vico pascuá, chí ñá túú chihí-yu levadurá yuchi cuáha pàá xéxi-yu nduu quidé-yu vico-áⁿ. Te sá quíhu pàá-áⁿ cada iní-ó sá cúú-xí nchâa sá cuèhé sá dúhá ní xóo cada-ndo, Te vâ cáda-gã-ndó ní ìⁿ sá cuèhé sá dúhá, te ducaⁿ te cuu-ndo ñâyiu vâha chí sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pâscuá cue quiti-áⁿ cada iní-ó sá cúú-güèdi datná Xítohó Jesucristú nâcuâa ní xihí-gá núú cùrúxí. 8 Te núu xíáⁿ xíní ñùhu-xi sá vâ cáda-gã-ndó ní ìⁿ sá cuèhé sá dúhá sá ní xóo cada-ndo, te ní vâ cúhú-gã iní-ndó te ní vâ cáda-gã-ndó, te ní yùhu ní

iní-ná-ndó càda-ndo mee-ni sá vâha.

9 Te tutú sá sà ní dáquixì-í ndaha-ndo nĩ cachí-í sá vâ nihí tnáhá-ndó ndìhi cue ñáyi ndècu ichi díí ínì. 10 Te sá dúcáⁿ càháⁿ-í núú tûtú ní dáquixì-í ndaha-ndo te vâ cání ínì-ndó sá yǔhú càchí-í sá vâ cúú-gǎ tnahá tnúhu-ndo ndìhi cue ñáyi ndècu ichi cuehé ichi duha, ndìhi ñáyi ndècu ichi díí ínì, ndìhi ñáyi xihò nchaa sá íò ñuyú, ndìhi ñáyi dùhu sá ndécú ndìhi tnaha ñáyi-xi, ndìhi ñáyi quide cahnu sá càchí-yu cù ndiòxí te ñá ndàá sá ndiòxí cúú-xí chi dícó cue téé ñuyú-a ní cadúha nchaa xiǎⁿ, chi núu ducaⁿ na càda-ndo vâ tnáhá tnúhu-gá-ndó ndìhí-yu te xìni ñuhu-xi sá vâ cùndècu-gá-ndó núú ndécú-yu. 11 Te ñá túú dùcaⁿ quee-xi nacuáa càháⁿ-í núú tûtú-í, chi yúhú càchí-í sá vâ cúú tnáhá tnúhu-ndo ndìhi ñáyi càchí sá ndécú ichi Xítóhó Jesucristú te ñá ndàá sá ndécú-yu ichi-gá. Te núu cúú-yu ñáyi ndècu ichi díí ínì, àdi cúú-yu ñáyi xihò nchaa sá íò ñuyú-a, àdi cúú-yu ñáyi quide cahnu nchaa sá càchí-yu cù ndiòxí te ñá ndàá chi dícó cue téé ñuyú-a ní cadúha nchaa xiǎⁿ, àdi cúú-yu ñáyi yiti yùhu-xi, àdi cúú-yu ñáyi quihu, àdi cúú-yu ñáyi dùhu sá ndécú ndìhi tnaha ñáyi-xi, te nchaa ñáyi ducaⁿ càchí sá ndécú ichi-gá te ñá ndàá te ducaⁿ xiquidé-yu, te ni vâ cúú nihí tnáhá-ndó ndìhí-yu caxi-ndo

ndìhí-yu. 12-13 Te ñá díú yǔhú cúú-í téé càháⁿ cuendá nchaa ñáyi ñá túú ndècu ichi Xítóhó Jesucristú núu quide ndáá-yu àdi ñá túú quide ndáá-yu ndécú-yu, chi mee Yǎ Ndiòxí càháⁿ-gá te núu nása quidé-yu ndécú-yu. Dico nchòhó chi tau-ndó càda cuendá-ndó núu nása quide cue ñáyi ndècu ndìhi-ndo ichi Xítóhó Jesucristú. Núu xiǎⁿ xini ñuhu-xi daquee tihú-ndó téé ducaⁿ ñá túú quide vâha ndècu ndìhi-ndo-áⁿ, te vâ dáñá-gǎ-ndó nihí tnáhá ndìhi ñaha-dé xii-ndo.

6

Nacuáa tau-xi cada ñáyi ndècu ichi Xítóhó Jesucristú te núu ñá túú ndècu ndìhi vâha tnáhá-yu

1 Te dava nchòhó òré ñá túú ndècu ndìhi vâha tnaha-ndo te cùyii-ndo cuháⁿ-ndó núu cuè téé cùchiuⁿ ñá túú ndècu ichi Xítóhó Jesucristú sàcáⁿ cuèchi-ndo, te ñá túú dùcaⁿ tau-xi cada-ndo chi núu cuè téé ndècu ichi-gá ducaⁿ tau-ndó quihíⁿ-ndó càcáⁿ cuèchi-ndo. 2 Te nchòhó sa naha-ndo sá ncháá ñáyi cù cuendá Yǎ Ndiòxí sáá nduu càháⁿ-yu te núu ní quide ndáá nchaa dava-gá ñáyi àdi ñá túú ní quide ndáá-yu, te nchòhó tnáhá-ndó cù-ndo ñáyi ducaⁿ càháⁿ, te núu ducaⁿ te cutnùní ínì-ndó sá ndácú-ndó càda ndáá-ndó nchaa cuèchi sá ñá túú ùhú cundáá vitna ndècu-ndo ñuyú-a. 3 Te nchòhó sa naha-ndo sá ncháá ndéé cue espíritu xínú cuèchi núu Yǎ Ndiòxí sáá nduu

cáháⁿ-ó te núu nása quide-xi ndecu-xi. ¡Núu xiáⁿ cútnùní iní-ó sã úuⁿ-gã ndacu-o càda ndáá-ó nchaa cuéchi sá ió ñuyú-a! ⁴ Te núu ió dava-ndo ió nása cùu ndecu-ndo te xináa-ndó, te vá quihíⁿ-ndó càcáⁿ cuéchi-ndo núu cuè téé ndèhe-ndo sá ñã túú ndècu-güedé ichi Yá Ndiöxí, dico nchòhó chi da núu cuè téé-áⁿ cuáháⁿ-ndó sàcáⁿ cuéchi-ndo. ⁵ Te duha càháⁿ-í cuendá cuahaⁿ núu-ndó chi ñã túú quide váha-ndo sã dúcáⁿ quide-ndo. ¿Te náa dicó-nã ñã túú tnàhí ìⁿ téé cùtnuní iní-xi nàcuáa cada ndáa cuéchi-ndo ndècu ndihí-ndo ichi Xítohó Jesucristú-ãⁿ? ⁶ Te nchòhó, ñã túú quide váha-ndo, chi dava-ndo cuáháⁿ-ndó núu cuè téé ñã túú ndècu ichi Xítohó Jesucristú sàcáⁿ cuéchi-ndo cuendá dava-gá cue ñáyiú ndècu ndihí-ndo ichi-gá.

⁷ Te ñã túú quide váha-ndo sã dúcáⁿ nàá ndihí tnàha-ndo te cuáháⁿ-ndó sàcáⁿ cuéchi-ndo, te váha-gá sá cádá càhnu iní-ndó cuéi nándi na càda ñaha tnaha ñáyiú-ndo xii-ndo cuéi dùhú-yu sá ndécú ndihí-ndo dico cada càhnu-ni iní-ndó. ⁸ Dico nchòhó chi ñã túú quide càhnu iní-ndó chi da uuⁿ-gá ñã túú quide váha-ndo sàcúú-xí tnàha ñáyiú-ndo, chi cùu úhú iní-ndó-yu, te dùhu-ndó-yu, te ndéé méé-ndó nàcuáa ndècu-ndo ichi Xítohó Jesucristú ducaⁿ quide tnaha-ndo.

⁹ Te nchòhó sa nàha-ndo sá ncháá ñáyiú ndècu ichi cuehé ichi duha vá ndúú tãhü-yu cundecú-yu núu ndécú Yá

Ndiöxí táxí tnùní-gá, núu xiáⁿ vá cání ìní-ndó sã ñáyiú-áⁿ nduu tãhü-yu cundecú-yu ndihí-gá. Te ni cuè ñáyiú ndècu ichi díí ìní, te ni cuè ñáyiú quide càhnu nchaa sá càchí-yu cùu ndiöxí te ñã ndáa chi dicó cue téé ñuyú-a ní cadúha nchaa xiáⁿ, te ni cuè téé càháⁿ ndihí ñadìhí te ñã díú ñadìhí-güedé cúu-yu, te ni cuè ñáyiú dìhí càháⁿ ndihí téé te ñã díú yíⁿ-yu cùu-güedé, te ni cuè téé càháⁿ ndihí tnàha téé-xi, ¹⁰ te ni cuè ñáyiú dùhu, te ni cuè ñáyiú xìho sá ndécú ndihí tnaha ñáyiú-xi, te ni cuè ñáyiú quihu, te ni cuè ñáyiú càháⁿ úhú, te ni cuè ñáyiú dánícuèhé tnàha ñáyiú-xi te dùhu ñahá-yu, te ni ìⁿ cue ñáyiú duha xiquide vá ndúú tãhü-yu cundecú-yu núu ndécú Yá Ndiöxí táxí tnùní-gá. ¹¹ Te dava nchòhó ducaⁿ ní xóo cada-ndo ni cùu, te vitna ní cuu-ndo ñáyiú sa ní nduu ndoo ní nduu nine iní-xi, te ní cuu-ndo ñáyiú cùu cuendá Yá Ndiöxí, te ní cuu tucu-ndo ñáyiú ñã túú-gã cuéchi-xi ndècu núu-gã. Te ducaⁿ ní quide ñaha Yá Ndiöxí xii-ndo sã váha sá cuendá Xítohó Jesucristú, te ní ngúndecu ndihí-ndo Espíritú Yá Ndiöxí.

Nàcuáa ndiúu cuendá yiqui cùñú-ó

¹² Te càchí ñáyiú sá ncháá sã sání ìní-ó cuu cada-o, te ndáa càháⁿ-yu dicó-ni sá ñã ncháá cùu-xi sá váha sá cúú-xí-ó. Te núu cuiní nchaa sá sání ìní-ó-áⁿ taxí tnùní ñahá-xí te vá cádá-ó. ¹³ Te nchòhó sa xíní-ndó sá ncháá

să xéxí-ó cuănguee-xi xití-ó, te xití-ó nĩ cuáha tnàhí-xi sá cùhúⁿ nchàa sá caxí-ó, dico xití-ó ndihí nchaa sá xéxí-ó chi naa-xi. Te Xítohó Jesucristú néhé cuendá-gá yiqui cùñú-ó, te ducaⁿ yiqui cùñú-ó cùu-xi cuendá-gá, te ñá túú ní cuáha yiqui cùñú-ó sá cùndècu-xi ichi díí ìní. ¹⁴ Te dàtná ní quide Yá Ndiöxí ní dándótó-gá Xítohó Jesucristú ducaⁿ càda ñaha-gá xii nchoo tùcu chi dandòto ñaha-gá xii-o nũu na cùú-ó, chi ndàcu-gá quidé-gá nchaa sá vaha.

¹⁵ Te nchòhó sa nàha-ndo sá yiqui cùñú-ó cùu-xi cuendá Xítohó Jesucristú chi ìⁿ-ni cùu-o ndihí-gá, núu xíáⁿ ñá túú tnàhí ndùu váha-xi cáháⁿ ndihí-o ñáyiú ndècu ichi díí ìní, chi yiqui cùñú-ó cùu-xi cuendá Xítohó Jesucristú, te núu ducaⁿ na càda-o te cada ìní-ó sá cuendá-nã ñáyiú-áⁿ cúu yiqui cùñú-ó, núu xíáⁿ ñá túú tnàhí ndùu váha-xi ducaⁿ càda-o. ¹⁶ Te sa xíní-ndó sá nũu ìⁿ téé na càháⁿ ndihí-dé ìⁿ ñadìhí ndécú ichi díí ìní te cada ìní-ó sá ìⁿ-nã yiqui cùñú cúú-yu. Te ducaⁿ càháⁿ-xi núu tütú Yá Ndiöxí núu càchí-xi: “Ìⁿ téé na càháⁿ ndihí-dé ìⁿ ñadìhí te ìⁿ-nã yiqui cùñú cúú-yu”, duha càchí-xi. ¹⁷ Te ducaⁿ sãtnahá-xi cùu nchaa ñáyiú tnàhá tnúhu ndihí Xítohó Jesucristú, chi ìⁿ-nã cúú-yu ndihí-gá.

¹⁸ Te núu xíáⁿ càháⁿ-í dóho-ndo sá vã cùndècu-ndo ichi díí ìní, chi núu ducaⁿ na càda-ndo te ñá túú tnàhí sá vaha cùu-xi sá cúú-xí yiqui cùñú-ndó chi ío dàcuíta

nihnu-xi yiqui cùñú-ndó. Te nchaa dava-gá sá cuèhé sá dúhá ñà túú quide-xi yiqui cùñú-ndó dàtná quidé xíáⁿ. ¹⁹ Te nchòhó sa cùnuni ìní-ndó sá yiqui cùñú-ndó cùu-xi dàtná ìⁿ vehe núu ndécú Espiritú Yá Ndiöxí. Te ducaⁿ sãtnahá-xi cùu yiqui cùñú-ndó chi ndècu-ndo ndihí Espiritú-gá. Te mee-gã ní taxi-gá Espiritú-gá ndécú ndihí-ndo, te ñá díú mèe-ndo cuu cuendá-ndó mèe-ndo chi Yá Ndiöxí cúú cuendá ñáhá-gã xii-ndo. ²⁰ Te ducaⁿ cùu-ndo ñáyiú cùu cuendá Yá Ndiöxí chi Xítohó Jesucristú ní nacháhu-gá nchaa yíca cuèchi-ndo. Te núu xíáⁿ xíní ñùhu-xi sá ñihí ní ndúú-ndó càda-ndo nacuaá cuu càhnu Yá Ndiöxí, te ducaⁿ tàú-xi cada-ndo chi espíritú-ndó ndihí yiqui cùñú-ndó cùu-xi cuendá-gá.

7

Sáhú sã cúú-xí ñáyiú ní tnándaha

¹ Te ní quexìo tutú sá nĩ dáquixí-ndó ndàha-í, te vitna na càchí tnúhu-í xii-ndo cuendá tnúhu càháⁿ-ndó núu tütú-ndó. Te váha cada-xi te núu vá cándèca téé ñadìhí, te ducaⁿ-ni vaha cada-xi te núu ñáyiú dìhí vá cándècá-yu téé. ² Te dìcò-ni sá nũu ducaⁿ na càda-ndo te dava-ndo càni ìní-ndó cùndecu-ndo ichi díí ìní. Núu xíáⁿ xíní ñùhu-xi sá ncháá cuè téé ndi dííⁿ cùndecu ñadìhí-güedé, te ducaⁿ-ni tùcu nchaa cue ñáyiú dìhí ndi dííⁿ cùndecu yíí-yu. ³ Te càchí tnúhu-í xii-ndo sá ncháá cuè téé vá cúú

càchí-güedé sá vǎ cúú cǎháⁿ ndihí-güedé ñadihí-güedé, te ñu-ni ducaⁿ cuè ñáiyu ñihí tucu, vǎ cúú càchí-yu sá vǎ cúú cǎháⁿ ndihí-yu yí-yu. ⁴ Te nchaa cue ñáiyu ñihí chi ñá díú mèe-ní-yu cùu cuendá-yu yiqui cùnù-yu chi tnàhá cúú cuendá yí-yu, te ducaⁿ-ni nchaa cue té tucu chi ñá díú-ní mèe-güedé cúú cuendá-güedé yiqui cùnù-güedé chi tnàhá cúú cuendá cue ñadihí-güedé. ⁵ Te cue té vǎ cúú càchí-güedé sá vǎ cúú cǎháⁿ ndihí-güedé ñadihí-güedé. Te ni cuè ñáiyu ñihí vǎ cúú càchí-yu sá vǎ cúú cǎháⁿ ndihí-yu yí-yu. Àdi te núu ní ndatnúhu-yu sá vǎ dúcáⁿ càdá-yu ñⁿ úú nduu cuendá sá cuení-yu ío cǎháⁿ ndihí-yu Yá Ndióxi, dico nà yáha núu ná daha nduu ducaⁿ ñi ndatnúhu-yu sá vǎ dúcáⁿ càdá-yu te naníhi tnáhá tucú-yu, chi núu ñáhá te cudana te vǎ cuacàhnu iní-yu te sácuihná dacàháⁿ ñáhá-xí xii-yu cadá-yu sá ña túú tàú-yu cadá-yu.

⁶ Te tnúhu càháⁿ-í-a quèe-xi sá tée ndihí ñadihí cuu candeca tnàhá-yu dico ñá túú quide yica-í sá dúcáⁿ càdá-yu. ⁷ Te yúhú sání iní-í sá nñu dícó sá cúú te nchaa-ndo cundecu-ndo datná ndécú-í, dico ñáhá chi mee Yá Ndióxi ní cachí-gá nàcuáa nduu táhú-ó ñⁿ ñⁿ-o cundecu-o, chi dava-o ñi cutáhú-ó nñú-gǎ sá cundècu ñadihí-ó te dava-o ñáhá. ⁸ Te càchí tnúhu-í xii

nchòhó cue té vátá ñihí-gǎ ñadihí-xi sá vǎha-gǎ sá nñu vǎ cundècu ñadihí-ndó datná yúhú. Te ducaⁿ-ni nchòhó cue ñáiyu ñihí ñáiyu vátá ñihí-gǎ yí-xi sá vǎha-gǎ sá nñu vǎ cundècu yí-ndo. Te ñu-ni duha càháⁿ-í sá cúú-xí nchaa nchòhó ñáiyu ñihí ní quendóo quèe sá vǎha-gǎ sá nñu vǎ cándeca-gǎ-ndó tée. ⁹ Te càchí tnúhu-í xii nchaa-ndo sǎ nñu xito-ndo sá vǎ cundèe iní-ndó cundecu mee-ndo te vǎha-gǎ sá nñu tnándaha-ndo, te ñá díú sǎ mée-ní cànì cuehé canì duha iní-ndó cundecu-ndo.

¹⁰ Te nchaa nchòhó ñáiyu sa ní tnándaha càháⁿ-í dóho-ndo, te ñá díú mèe-í duha càhu iní-í càháⁿ-í dóho-ndo chi Xitohó Jesucristú ducaⁿ dàcahu iní ñáhá-gǎ xii-í, chi mee-gǎ cuení-gǎ cada-ndo nàcuáa na càháⁿ-í-a. Te nchaa nchòhó cue ñáiyu ñihí càháⁿ-í dóho-ndo sǎ vǎ dáñá-ndó yí-ndo. ¹¹ Te núu ío dava-ndo sǎ ní dáñá-ndó yí-ndo, te xini ñuhu-xi sá vǎ cándeca-gǎ-ndó tée, chi cundecu mee-ñá-ndó àdi núu ñáhá te naqueheⁿ tucu-ndo tée ní cuu yí-ndo. Te nchaa nchòhó cue té ndècu ñadihí-xi càháⁿ-í dóho-ndo sǎ vǎ dáñá-ndó ñáiyu cùu ñadihí-ndó.

¹² Te tnúhu na càháⁿ-í-a cùu-xi sá ñi sani iní mée-í te ñá díú tnúhu sá ñi cachí Xitohó Jesucristú càháⁿ-í cúú-xí. Te núu dava nchòhó cue té ndècu ichi Xitohó Jesucristú ndécá-ndó ñáiyu ñihí ñáiyu ñá túú ndècu ichi-gǎ, te vǎ dáñá-ndó-yu

xìni ñuhu-xi sá cùndècu-ni-o datná ndécú-ó cùtnàhá ní cáháⁿ ñáhá Yá Ndiòxí xii-o ñi ngúndecu-o ìchi-gá. ²¹ Te núu cùu-ndo ñáyiú ñá túú tnàhí dàñá quee núú chíúⁿ pàtróóⁿ-xi cùtnàhá ní cáháⁿ ñáhá Yá Ndiòxí xii-ndo, te ñá túú ñá cani iní-ndó, dico núu dàña ñaha patróóⁿ-ndó quèe-ndo núú chíúⁿ-ndó te váha-ni quee-ndo núú chíúⁿ-ndó. ²² Te sátá ñi cáháⁿ ñáhá Xítóhó Jesucristú xii nchòhó ñáyiú ducaⁿ ñà túú tnàhí dàñá quee núú chíúⁿ pàtróóⁿ-xi-áⁿ, te ní cuu-ndo datná ñáyiú dàñá quèé núú chíúⁿ pàtróóⁿ-xi sá cúu-xí-gã, te ducaⁿ chi ñá túú-gã ndécú-ndó ìchi cuehé ichi duha. Te nchòhó ñáyiú dàñá quèé núú chíúⁿ pàtróóⁿ-xi cùu-ndo datná ñáyiú ñá túú tnàhí dàñá quee núú chíúⁿ pàtróóⁿ-xi sá cúu-xí Xítóhó Jesucristú, te ducaⁿ chi xìnu cuechi-ná-ndó núú-gã. ²³ Te Yá Ndiòxí ní nduu cuèndá ñáhá-gã xii-o chi Xítóhó Jesucristú ní nacháhu-gá nchaa yíca cuèchi-o sã ndécú núú Yá Ndiòxí ní cùu, te vá dàñá-ndó sã tnàha ñáyiú-ndo nàdatuhú iní ñáhã-yu xii-ndo vã cúnú cuèchi-ndo núú Xítóhó Jesucristú nàcuáa tàù-xi cunduu. ²⁴ Te núu xiãⁿ càchí tnúhu-í xii nchaa nchòhó ñáyiú ndècu ndihí-í ichi Xítóhó Jesucristú sá cùndècu-ni-ndo datná-ni ndècu-ndo ndéé cùtnàhá ní cáháⁿ ñáhá-gã xii-ndo, te diu-ni ducaⁿ cùndecu-ndo ichi-gá.

²⁵ Te càchí tnúhu tucu-í xii-ndo sã Xítóhó Jesucristú

ñá túú càchí tnúhu-gá xii-í núu nása cáháⁿ-í cuèndá nchaa ñáyiú vátá tnàndaha-gá. Te duha sàni iní-í cáháⁿ-í cuèndá-yu, te nchòhó cuu quíndáá iní-ndó tnúhu cáháⁿ-í chi Xítóhó Jesucristú chindèe chitúu ñaha-gã xii-í. ²⁶ Te yúhú càchí-í sá sã cuèndá nchaa tnúndòho tnúhu ndàhú ió ñuyíú-a vitna, te váha-gá sá ncháá ñáyiú te núu nása xíndecú-yu te ducaⁿ-ni na cùndecú-yu. ²⁷ Te nchaa cue téé ndècu ñadihí-xi te ducaⁿ-ni na cùndecu-güedé ndihí-yu, te nchaa cue téé ñá túú ñadihí-xi te ducaⁿ-ni na cùnduu-güedé vá ndúcú-güedé ñadihí-güedé. ²⁸ Dico nchaa cue téé na ndècu ñadihí-xi te ñá díú ñⁿ cuèchi cùu-xi sá dúcáⁿ ná ndècu-güedé ñadihí-güedé, te diu-ni ducaⁿ cùu tucu cue ñáyiú dihí te núu na ñihí-yu yí-yu chi ñá díú ñⁿ cuèchi cùu-xi sá dúcáⁿ ñihí-yu yí-yu. Te núu cue téé na ñihí-güedé ñadihí-güedé te nándi ndohó-yu cùndecú-yu ñuyíú-a, te núu xiãⁿ duha cáháⁿ-í cuèndá sá vã ndúcú-güedé ñadihí-güedé cuèndá sá vã ndóhõ-yu.

²⁹ Te nchaa nchòhó ñáyiú ndècu ndihí-í ichi Xítóhó Jesucristú na càchí tnúhu-í xii-ndo sã ñá túú-gã vai nduu cumání te quixi tucu Xítóhó Jesucristú, núu xiãⁿ xíní ñuhu-xi sá ndèé vitna ngúita nchaa cue téé ndècu ñadihí-xi cada-güedé chiúⁿ Xítóhó Jesucristú, te cada-güedé datná sá ñà túú ñadihí-güedé.

30 Te nchaa ñáyi ndihú iní-xi te na càda-ní-yu sá ñà túú ndihú iní-yu cadá-yu chiùn Yá Ndiöxí. Te nchaa ñáyi cùdí iní-xi te na càda-ní-yu sá ñà túú cùdí iní-yu cadá-yu chiùn-gá, te nchaa ñáyi ndècu ndihí nándi sá ndécú ndihí te na càda-ní-yu sá ñà túú nã ndécú ndihí-yu cadá-yu chiùn-gá. 31 Te

nchaa ñáyi nèhe chiùn nchaa sá ío ñuyíú-a te na càda-ní-yu cuèndá sá ñà túú nã néhé chiùn-yu cadá-yu chiùn Yá Ndiöxí, chi nchaa sá ío ñuyíú-a sa ñuhu-xi ichi cuáháⁿ-xi núú ndihí ñihnu-xi.

32 Te cùní-í sá vã cùhúⁿ iní-ndó nándi sá ío ñuyíú-a, te ni ñà túú tnhí ná caní iní-ndó cùndecu-ndo, chi nchaa cue té ndècu ichi Xítohó Jesucristú xíndecu mee ío ñuhu iní-güedé cada-güedé chiùn-gá nacuáa cudiù-güedé núú-gá. 33 Te nchaa cue té sa ndècu ñadihí-xi cue té ndècu ichi-gá ñuhu iní-güedé nacuáa cada-güedé cùndecu-güedé ñuyíú-a cuèndá ducaⁿ cudiù-güedé núú ñadihí-güedé. 34 Te diu-ni

ducaⁿ cùu tucu cue ñáyi dñí chi ñà túú ñⁿ-ni cuu ñáyi sa ndècu yí-xi ndihí ñáyi vátá cùndecu-gá yí-xi, chi ñáyi ndècu ichi Xítohó Jesucristú ñà túú ndèca té ío ñuhu iní-yu cadá-yu chiùn-gá nacuáa ñihí ní ndúú-yu cùndecu yíñuhú-yu núú Yá Ndiöxí, dico cue ñáyi dñí ndéca tée ndècu ichi-gá ío ñuhu iní-yu nacuáa

cundecú-yu ñuyíú-a cuèndá cudiù-yu núú yí-yu.

35 Te duha càháⁿ-í cuèndá cúú-xí ñⁿ sá vaha xii-ndo, te cudiù núú tnhá-ndó, te cuu-ndo ñáyi cada ndáá núú Xítohó Jesucristú, te mee-ni-gã cuhuⁿ iní-ndó. Te ñá díú sá dúhá càháⁿ-í te quide yica-í sá cadá-ndó nacuáa càháⁿ-í.

36 Te núu ío dava-ndo sàni iní-ndó sá ñà túú ndùu vaha-xi sá ío cuu sacuéhé dèhe yoco-ndo cùndecú-yu ña, te núu sàni iní-ndó sá vaha-gá candecá-yu té te cada-ndo nacuáa sàni iní-ndó, chi ñá díú ñⁿ cuéchi cùu-xi.

37 Te núu dava-ndo ndècu dèhe yoco-ndo, te vá yõ ñⁿ cada yica ñaha xii-ndo sá cándecá-yu té. Te núu mee-ndo sàni vaha iní-ndó nacuáa cada-ndo, te núu vá dásáⁿ-ndó dèhe yoco-ndo càndeca ñaha té te quide vaha-ndo sá dúcáⁿ quide-ndo.

38 Te nchaa ñáyi dàsaⁿ dèhe yoco-xi càndeca ñaha té te vaha-ni quidé-yu, te nchaa ñáyi ñà túú dàsaⁿ dèhe yoco-xi càndeca ñaha té te vaha-gá tucu quidé-yu sá dúcáⁿ quidé-yu.

39 Te nchaa ñáyi dñí ndécú yí-xi xini ñuhu-xi sá cùndecu-ní-yu ndihí yí-yu ñini ndècu vívú-güedé chi ducaⁿ càháⁿ tñuhu sá dñèhé ñáhá xii-o nacuáa cada-o cùndecu-o, dico núu na cùú-güedé te cuu naquehéⁿ-yu ingá té candecá-yu dicó-ni sá diu-ni té ndècu ichi Xítohó Jesu-

crístú. ⁴⁰ Te yúhú sání iní-í sá ìo-gá váha cundecú-yu te núu vá nánducú-yu ingá tée candecá-yu, te duha càháⁿ-í chi Espíritú Yá Ndiòxí ducaⁿ dàcahu iní ñáhá-xí xì-í càháⁿ-í.

8

Cuèndá nchaa sá nchító-ó sãñaha ñãyiú ndùu táhú nchaa sá càchí-yu cùu ndiòxí

¹ Te vitna na càháⁿ-í cuèndá nchaa sá nchító-ó sãñaha ñãyiú ndùu táhú nchaa sá càchí-yu cùu ndiòxí te ñá ndàá chi dicó ndaha cue tee ñuyíú-a ní cuáha nchaa xiãⁿ. Te nchoo sa cùtnuní váha iní-ó cuèndá nchaa xiãⁿ, dicó-ni sá cuèndá nchaa sá cùtnuní váha iní-ó xiãⁿ quidé càhnu-o mee-o, dico núu cùu iní-ó tnàha ñãyiú-o te canu ichi-ò-yu ichi váha. ² Te núu dava-ndo sàni iní-ndó sã túha-ndo dico cùu-ndo ñãyiú vátá cútúha-gá nàcuáa tàù-xi cunduu. ³ Te núu nchòhó cúú iní-ndó Yá Ndiòxí te mee-gã càháⁿ-gá sá cúu-ndó ñãyiú cùu cuendá-gá.

⁴ Te vitna na càchí tnúhu-í xii-ndo nàcuáa ndùu cuendá nchaa sá nchító-ó sãñaha ñãyiú ndùu táhú nchaa sá càchí-yu cùu ndiòxí te ñá ndàá chi dicó ndaha cue tée ñuyíú-a ní cuáha nchaa xiãⁿ. Te nchoo cùtnuní iní-ó sã ncháá sá càchí ñãyiú cùu ndiòxí cadúha-yu ñuyíú-a ñá túú cùu-xi ndiòxí, chi ñ^{ndii} díi-ni Yá Ndiòxí ndécú. ⁵ Te cue ñãyiú ñuyíú-a càchí-yu sá cuèi andiú te cuèi ñuyíú-a ndècu titní ndiòxí. Te ndáá sá ndèni ní cuu ndècu espíritú

sá càchí ñãyiú cùu ndiòxí te ñá ndàá sá ndiòxí cúu-xí, te nchaa xiãⁿ táxi tnùnì ñáhá-xí xii-yu. ⁶ Te nchoo cùtnuní ndáá iní-ó sã ñ^{ndii} díi-ni Yá Ndiòxí ndécú te diu-gá cúu-gã Tátá-ó, te nchoo cùu-o ñãyiú cùu cuendá-gá. Te diu-ni mee-gã ní táúchiúⁿ-gã ní cuáha nchaa sá iò ñuyíú-a, te cùtnuní tucu iní-ó sã ñ^{ndii} díi-ni Xitohó Jesucristú ndécú, te Yaa-áⁿ ñí quide-gá nchaa chiúⁿ ní táhú Dütú Ndiòxí ní cadúha-gá nchaandi túhú sá iò ñuyíú. Te diu-ni mee Xitohó Jesucristú quidé ndècu-o ichi-gá vitna.

⁷ Te ñá ncháá nchòhó ñãyiú ndècu ichi Xitohó Jesucristú cùtnuní iní-ndó nàcuáa ndùu tnúhu càháⁿ-í. Chi sa ní cáaⁿ-ndo quide cahnu-ndo nchaa sá càchí-yu cùu ndiòxí ní cùu. Te cuèndá xiãⁿ nùu nàqueheⁿ-ni-ndo nchaa sá nchító-ó ndùu táhú nchaa sá càchí-yu cùu ndiòxí-áⁿ xéxí-ndó, te sàni-ni iní-ndó sã quidé càhnu-ndo nchaa sá càchí-yu cùu ndiòxí-áⁿ te ñá ndàá sá ndiòxí cúu-xí. Te núu sàni iní-ndó sã ñá túú váha caxi-ndo sã dúcáⁿ ndùu táhú-xi-áⁿ te xéxi-ndo te xiãⁿ ñá túú cùu váha iní-ndó cuèndá sá dúcáⁿ quide-ndo. ⁸ Te ñá díú ncháa sá xéxí-ó quide-xi cudiú-o núú Yá Ndiòxí, chi ñⁿ-ni quide-xi cuèi na càxi-o àdi vá cáxí-ó chi ni ñⁿ sá cáxí-ó vã chindèe ñaha-xi cudiú-o núú Yá Ndiòxí. Te cuèi vá cáxí-ó dico ñá díú xiãⁿ cada sá vã cúdiú-o núú-gã. ⁹ Te cuu-ni caxi-ndo ncháa nání nihí-ndó. Te dicó-ni sá càda

cuendá-ndó sã ñà díú cuendá sã xéxi-ndó-ãⁿ cuíta nihnu dava ñáyiú ndècu ndihí-ndo ichi Xítohó Jesucristú cadá-yu nándi sã cadá-yu nàcuáa vá cúú vãha iní Yã Ndiõxí chi ñáyiú-ãⁿ ñà túú cùtnuní iní-yu. ¹⁰ Te nchòhó ñáyiú xiní vãha cuendá nchaa sã càchí-yu cùu ndiõxí, te núu na quihíⁿ-ndó núú ndécú nchaa xiãⁿ te ngóo-ndo càxi-ndo nchaa sã ñi cutáhú-xi, te quiní ñáyiú ndècu ndihí-ndo ichi Xítohó Jesucristú, ñáyiú vátá cùtnuní-gá iní-xi nàcuáa ndùu cuendá nchaa sã dúcáⁿ càchí-yu cùu ndiõxí-ãⁿ, te cuèi sàni iní-yu sã ñà túú quide váha-ndo sã dúcáⁿ quide-ndo te cudana te cada yicá-yu caxí-yu tnàhá-yu nchaa sã dúcáⁿ ñi nduu táhú nchaa sã càchí-yu cùu ndiõxí-ãⁿ te ñà ndáá sã ndiõxí cúú-xí. ¹¹ Te núu ducaⁿ cùtnuní iní-ndó nàcuáa ndùu cuendá nchaa xiãⁿ te ducaⁿ quide-ndo, te sã dúcáⁿ quide-ndo-ãⁿ te dàcuíta nihnu-ndo dàva-gá ñáyiú ndècu ndihí-ndo ichi Xítohó Jesucristú, ñáyiú vátá cùtnuní-gá iní-xi nàcuáa ndùu cuendá nchaa xiãⁿ, te díu cuendá tnàhá ñáyiú-ãⁿ ñi xihí Xítohó Jesucristú. ¹² Te sã dúcáⁿ quide-ndo-ãⁿ cúú-xí ñi cuèchi núú Xítohó Jesucristú, chi quide-ndo nacuáa xínu iní-yu cadá-yu ñi sã sání iní-yu ñà túú vãha, núu xiãⁿ ñà túú quide váha-ndo sã cúú-xí-yu. ¹³ Te núu yúhú cùtnuní iní-í sã sã cuendá ñi sã càxi-í te ngóo ñi ñáyiú ndècu ndihí-í ichi Xítohó Jesucristú cadá-yu ñi sã vá cúú vãha

iní Yã Ndiõxí, te váha-gá sã vá càxi-gá-í xiãⁿ cuendá sã vá cadá-yu ñi sã vá cúú vãha iní-gá.

9

Nchaa sã cúú cada cue téé ní táuchíúⁿ Xítohó Jesucristú cáháⁿ tnúhu-gá

¹ Te yúhú chi cuu cada-í nchaa sã sání iní-í, chi tnàhá-í ní táuchíúⁿ Xítohó Jesucristú cáháⁿ-í tnúhu-gá núú ñáyiú. Te yúhú ní xiní núú-í Xítohó Jesucristú Yaá cúú Xítohó-ó te nchòhó cúú-ndó ñáyiú ní sándáá iní tnúhu-gá sã cáháⁿ-í te ducaⁿ chi ndècu ndihí-í-gá. ² Te ió dava ñáyiú ñà túú sándáá iní-yu sã Xítohó Jesucristú ní táuchíúⁿ-gã cáháⁿ-í tnúhu-gá, dico nchòhó chi cùtnuní ndáá iní-ndó sã díú-gã ní tendaha ñàha-gá xii-í xicá cùu-í cáháⁿ-í tnúhu-gá, te ducaⁿ chi yúhú ní cáháⁿ-í tnúhu-gá núú-ndó te ní sándáá iní-ndó-gã te xiãⁿ cùtnuní sã díú-gã ní tendaha ñàha-gá xii-í xicá cùu-í cáháⁿ-í tnúhu-gá núú ñáyiú.

³ Te duha ndùu tnúhu cáháⁿ-í cuendá cundedóho nchaa ñáyiú sàtnuhu ñaha xii-í. ⁴ Chi yúhú cuu-ni caxi-í nchaa núú sã cúú càxi-o na taxi ñáyiú. ⁵ Te cuu-ni cundecu ñadìhí-í te caca ndeca-í-yu nchaa núú xicá cùu-í cáháⁿ-í tnúhu Yá Ndiõxí dàtná quidé dàva-gá cue téé cáháⁿ tnúhu-gá, ndihí cue téé cùu ñani Xítohó Jesucristú, ndihí té Pèlú. ⁶ Te tnàhá yúhú ndihí té Bèé cuu dañá-ndí chiúⁿ quide-ndí te cada-ndí

dàtná xĩquide dava-gá-güedé cãháⁿ-güedé tnúhu Xítohó Jesucristú. ⁷ Te nchoo xini-ó sã ncháá cuè sandadú dacuitíi sã ñúhú yãhu-güedé xínú cuèchi-güedé, te ñá túú dicó ducaⁿ xinu cuechi-güedé. Te ducaⁿ sãtnahá-xi cùu tucu ñáyiu xitu ìⁿ sá xítú chi dacuitíi nihí-yu ìⁿ sá xítú-yu xexí-yu, te ñá díú dicó ducaⁿ xítú-yu. Te ducaⁿ cùu tucu cue téé cùu toli chi quìhni-güedé dícu quiti xito-güedé xihí-güedé te ñá túú dicó ducaⁿ xito-güedé-di. ⁸ Te vá cání ìní-ndó sã sã dúhá cãháⁿ-í te cãhu iní mée-í duha cãháⁿ-í, chi tnúhu cãháⁿ-í-a ìⁿ-ni quèe-xi ndihi tnúhu ní cãháⁿ ndíi Moisés. ⁹ Chi ndíi-áⁿ ñi chídó tnùní ndíi núú tütú ndíi ñacuáa ní xãháⁿ Yã Ndiõxí xii ndíi, te cãchí-xi: “Vã chíhí-ndó ñunu yuhu ndicutu oré dãnchihí-di triú”, duha cãchí-xi núú tütú ndíi. Te ñá díú sã dúcãⁿ ñi cãháⁿ Yã Ndiõxí te cãháⁿ-gá mee-ni cuendá ndicutu-áⁿ. ¹⁰ Chi ní cãháⁿ-gá cuendá nchoo cuè ñáyiu ndècu ichi-gá, te ndáá sã díú cuendá-ó dùcãⁿ ní cãháⁿ-gá. Te nchaá cue téé xitu chihi tatá sãni iní-güedé sã díú tatá chíhí-güedé-áⁿ cuu sã cáxí-güedé, te ñu-ni ducaⁿ cùu tucu cue téé xĩcani triú chi cãni-güedé cuendá quee caxi-güedé. ¹¹ Te ducaⁿ sãtnahá-xi cùu nchúhú cue téé cãháⁿ tnúhu Xítohó Jesucristú, chi dãnehé ñãhá-ndíi xii-ndo cuendá nchaá sã vãha quide ñaha Yã Ndiõxí xii-o, núú xãⁿ dai tàú-xi sã nchòhó chindee ñaha-ndo xii-ndíi ñuu ná cúú

sã xini ñùhu-ndíi. ¹² Te núú dava cue téé cãháⁿ tnúhu Yã Ndiõxí chindee-ndo-güedé, te uuⁿ-gá ducaⁿ tàú-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tàú ndisa-ndo sã chindee ñaha-ndo xii-ndíi dico ñá túú dùcãⁿ cãháⁿ-ndíi núú-ndó càda-ndo, te quide cãhu iní-ndíi cuèi nãndi sã tá yãha-ndíi véxi. Te ducaⁿ quide-ndíi cuendá sã ñá túú ñã cani iní ñáyiu cuendá-ndíi te ducaⁿ cuita cutènuu-gá tnúhu sã cãháⁿ ñacuáa naníhí tàhú-ó quíhíⁿ. ¹³ Te nchòhó xini-ndó sã ncháá cuè téé xinu cuechi veñúhu ñu-ni xíaⁿ nihí-güedé xexí-güedé, te ñu-ni cue téé-áⁿ xínú cuèchi-güedé núú xihí quiti ndùu tàhú Yã Ndiõxí, te ñu-ni xíaⁿ nihí tucu-güedé sã xexí-güedé. ¹⁴ Te ñu-ni ducaⁿ sãtnahá-xi cùu nchúhú cue téé cãháⁿ tnúhu sã cãháⁿ ñacuáa naníhí tàhú-ó, chi Xítohó Jesucristú ní cachí-gá sã díú-ní cuendá chiúⁿ quide-ndíi nihí-ndíi caxi-ndíi. ¹⁵ Te ñá ìⁿ ndùu cãháⁿ-í núú-ndó càda-ndo ñacuáa tàú-xi cunduu sã cúú-xi-í, te vá cání ìní-ndó sã sã dúhá cãháⁿ-í te ìⁿ sã xicãⁿ-í núú-ndó. ¡Chi cuèi na cùú-í sã ndòhò-í te ñá díú sã cãháⁿ ñáyiu sã sã cuendá sã cãháⁿ-í tnúhu Xítohó Jesucristú nihí-í xexí-í!

¹⁶ Te yúhú ñá túú quide cãhnú-í mée-í sã cãháⁿ-í tnúhu sã cãháⁿ ñacuáa naníhí tàhú-ó, chi tàú tnãhá-í sã cáda-í chi ducaⁿ ñi cachí Yã Ndiõxí cada-í. ¡Te ndàhú ní cuu yúhú te núú vá cãháⁿ-í

tnúhu-áⁿ! ¹⁷ Te ñá túú càháⁿ-í tnúhu-gá sá cúú iní mée-í chi mee-gã ní táuchíúⁿ-gã càháⁿ-í tnúhu-gá. Te núu càháⁿ-í tnúhu-gá sá cúú iní mée-í te tàú-í níhì-í sá ndúú tãhù-í ní cùu. ¹⁸ Dico sá sã ní nduu tãhù-í cúú-xí sã ío cùdíí iní-í sá dícó ducaⁿ càháⁿ-í tnúhu sá càháⁿ nàcuáa naníhí tãhù-ó. Te cuèi tàú-í queheⁿ-í sá táxí-ndó ndúu tãhù-í sá cuèndá sá càháⁿ-í tnúhu Xítohó Jesucristú, dico ñá túú dùcaⁿ quide-í. ¹⁹ Te sá dúcáⁿ dícó ducaⁿ càháⁿ-í tnúhu sá càháⁿ nàcuáa naníhí tãhù-ó, xiãⁿ ni ìⁿ ñáyíu ñuyíú-a vá cúú càchí-yu sá táxí tnùnì ñãhã-yu xii-í, te cuèi ducaⁿ dico mee-í ní saní iní-í sá cúú-í dàtná ìⁿ tée xínu cuechí núú nchaa ñáyíu cuèndá ducaⁿ cuíta cuu vai-yu tuhá-yu ichi Xítohó Jesucristú quíhíⁿ. ²⁰ Te òré ñúhú tnàhí tnuú cue ñáyíu isràél te quide-í sá ìⁿ-ní cùu-í ndihí-yu cuèi ñá túú nchìcúⁿ nihnu-í tnúhu ní càháⁿ ndíi Moisés, te ducaⁿ quide-í cuèndá sá ñáyíu-án quíndáá iní-yu tnúhu càháⁿ-í te tuhá-yu ichi Xítohó Jesucristú. ²¹ Te òré ñúhú tnàhí tnuú nchaa ñáyíu ñá túú nchìcúⁿ nihnu tnúhu ní càháⁿ ndíi Moisés, te quide-ni-í sá quidè-í dàtná quidé mée-yu cuèndá quíndáá iní-yu tnúhu càháⁿ-í, te tuhá-yu ichi Xítohó Jesucristú. Te cuèi ducaⁿ quide-í dico ñá túú dàña ndeé-í quidè-í nchaa nàcuáa cuíní Yã Ndióxi cada-o, te ducaⁿ chi nchìcúⁿ nihnu-í quidè-í nchaa nàcuáa càháⁿ Xítohó Jesucristú. ²² Te òré ndécù-í ndihí nchaa ñáyíu

ñá túú cùtnuní váha iní-xi nàcuáa cundecu ichi Xítohó Jesucristú, te tnàhá-í quidè-í dàtná quidè-yu cuèndá sá ná tédóho-yu nchaa tnúhu càháⁿ-í te ducaⁿ cùtnuní-gá iní-yu nàcuáa cundecú-yu ichi-gá. Te nchaandi túhú ñáyíu quide-í sá ìⁿ-ni cuu-í ndihí-yu cuèndá ducaⁿ níhì-í nàcuáa cada-í te cund-edóho-yu tnúhu càháⁿ-í te tníⁿ-yu ichi Xítohó Jesucristú te naníhí tãhù-yu. ²³ Te duha quide-í cuèndá sá cuíta quíndáá iní-yu tnúhu sá càháⁿ nàcuáa naníhí tãhù-ó quíhíⁿ, te ducaⁿ te tnàhá yúhú ío váha cundecu-í dàtná càháⁿ tnúhu-áⁿ.

²⁴ Te nchòhó sa xíní-ndó sã nchaa cuè tée xínu quíhu màrcúhyú nchaa-güedé xínú-güedé, dico ìⁿ-ni-dé cúú tée ndàcu ngodó núú te tée-áⁿ cúú tée nihí sá ndúú tãhù-xi, te ducaⁿ xini ñuhu-xi cada nchohó tucu chi cada-ndo nchaa nàcuáa cuíní Yã Ndióxi cada-ndo cuèndá ducaⁿ níhì-ndó sã ndúú tãhù-ndó. ²⁵ Te nchaa cue tée xíní dadiqui te váha váha quide cuèndá-güedé núu ná cúú sã cáda tneñu te xòcani-güedé cuèndá sá ñã díú xiãⁿ cada te cuíta-güedé òré dadiqui-güedé. Te ducaⁿ quide-güedé cuèndá cuíní-güedé níhì-güedé sá ndúú tãhù-güedé, te sá ndúú tãhù-güedé-áⁿ cúú-xí ìⁿ sá ndihí nihnu ñuyíú-a. Dico nchoo nducu ndee-o quide-o nàcuáa níhì-ó sã ndúú tãhù-ó, te xiãⁿ cudíi-xi cundecu

ndihi-o nì caa ni quíhíⁿ. ²⁶ Te yúhú quidè-í dàtná quidé cue téé xìnu, chi cue téé-áⁿ xìní-güedé núú quéxìo-güedé, te quide tucu-í dàtná xíquide cue téé sa ní cutúha nàá, te ñá túú quide-í dàtná quidé cue téé vitna dâcuaha naá. Te ducaⁿ chi yúhú quidè-í nchaa nâcuáa cuíní Yă Ndiöxí cunduu. ²⁷ Te yúhú ñá túú dàña-í taxi tnùní ñáhá nì ìⁿ sá cuèhé sá dúhá xii-í chi yòtnii-í mée-í. Te ducaⁿ quide-í chi yúhú càháⁿ-í tnúhu Xítóhó Jesucristú núú ñáyiu, te cuíní-í sá vă cuíta sá ñí cachí Yă Ndiöxí nduu táhù-í.

10

Cuëndá nchaa sá ñí cadúha cue téé ñuyú-a quide cahnu ñáyiu

¹ Te nchòhó ñáyiu ndècu ndihi-í ichi Xítóhó Jesucristú na càhí tnúhu-í xii-ndo cuëndá nchaa ñaní tnáhá-ndí ñáyiu isràél ní xindecu ndéé sanaha, chi vitna tnàhá nchòhó cúú-ndó dàtná cue ñaní tnáhá nchaa ñáyiu-áⁿ chi ndècu-ndo ichi-gá. Te nchaa ñáyiu-áⁿ ñí taxi ndecu Yă Ndiöxí ìⁿ vícò ñí dánèhé ñáhá-xí xii-yu ichi quíhíⁿ-yu, te ní quée dava ndute lâmár nání Măr Tícuèhé te nchaá-yu ní yáha-yu. ² Te sá dúcáⁿ ñí cuu te nchaá-yu ìⁿ-ná ní cuú-yu ndihi ndíi Moisés, te ní xíhi ndaha ñàha ndíi xii-yu. ³ Te nchaá-yu ní xexí-yu sá ñí sáñaha Yă Ndiöxí xii-yu. ⁴ Te ducaⁿ nchaa tucú-yu ní xihí-yu ndute sá ñí sáñaha-gă xii-yu, ndute sá ñí quée yiqui nàha cava. Te cava-áⁿ cada

iní-ó să cúú-xí dàtná Xítóhó Jesucristú te ducaⁿ chi ndihi ñaha-gă xii-yu ichi cuáháⁿ-yu dâvá-áⁿ. ⁵ Dico ío vâi-yu ñá túú ní quidé-yu nâcuáa càháⁿ Yă Ndiöxí, te xíáⁿ ñá túú ní cùu vâha iní ñáhá-gă xii-yu. Te sá dúcáⁿ ñí quidé-yu núu xíáⁿ òré ñúhù-yu ichi cuáháⁿ-yu xití yucu ío vâi-yu ní xíhí.

⁶ Te ducaⁿ ñí cuu cuëndá nchoo vă cãchícúⁿ nihnu-o càda-o nacuáa ní quidé-yu, chi ñáyiu-áⁿ mee-ni nchaa sá cuèhé sá dúhá ñí sani iní-yu ní quidé-yu. Te nchoo xini ñuhu-xi sá vă dúcáⁿ càda-o. ⁷ Te yúhú càháⁿ-í dóho-ndo să vă quindáá iní-ndó te ni vă cãdá càhnu-ndo ni ìⁿ sá càhí-yu cùu ndiöxí ní cadúha cue téé ñuyú-a dàtná ní quide cue ñaní tnáhá-ndí ní xindecu ndéé sanaha. Chi ñáyiu-áⁿ ñí quidé-yu dàtná càháⁿ-xi núú tütú Yă Ndiöxí núú càhí-xi; “Nchaa ñáyiu ní xexí-yu ní xihí-yu ní quidé-yu vico, ní quide càhnú-yu sá càhí-yu cùu ndiöxí ní cadúha-yu te ñá ndáá sá ndiöxí cúú-xí”, duha càhí-xi núú tütú-gá. ⁸ Te ni vă cündècu-ndo ichi dîí iní dàtná ní quide dava ñáyiu-áⁿ, chi sá dúcáⁿ ñí quidé-yu te ní xíhí ócò úní mîl-yu ìⁿ-ni nduu. ⁹ Te vă cání iní-ndó să sá càhnú iní Yă Ndiöxí te nândi sá cuèhé sá dúhá càda-ndo cuëndá cuíní-ndó quíní-ndó nûu nása cada ñaha-gă xii-ndo, chi ñáyiu ní xindecu ndéé sanaha-áⁿ ducaⁿ ñí xóo cadá-yu, te ní xihí-yu ní xexihaⁿ cõó. ¹⁰ Te ni vă càháⁿ cuèhé-ndó cuëndá Yă Ndiöxí, chi dava ñáyiu ní

xíndecu ndéé sanaha-ǎn ducaⁿ nǐ quidé-yu ní cáháⁿ cuèhé-yu cuèndá-gá te ní quixi espíritú xínú cuèchi núú-gǎ ní sahni ñaha-xi xii-yu.

11 Te ducaⁿ nǐ cuu te ducaⁿ nǐ ngúndéé núú tütú Yǎ Ndiöxí cuèndá dacuàha-o vitna ta cuyatni nduu naa ñuyíu-a. Te nchaa tnúhu sá nǐ ngódó tnùn-íⁿ càháⁿ dóho ñaha-xi xii-o cuendá sá vǎ cáda-ó dàtná ní quide ñáyi-u-áⁿ.

12 Te xiǎⁿ nǔu nchaa nchòhó ñáyi-u sàni iní sá ïo váha cùndáá ndécú ìchi Xítóhó Jesucristú cada cuèndá-ndó sǎ dúcáⁿ-ní cùndáá-ndó núú-gǎ, te vǎ dáná cuèndá-ndó cáda-ndo sá ñá túú cùu váha iní Yǎ Ndiöxí. 13 Te ñu-ni dàtná quidé sàcúíhná dácàháⁿ-xi iní nchaa dava-gá ñáyi-u nándi quidé-yu, te ñu-ni ducaⁿ quide ñaha-xi xii-ndo. Dico mee Yǎ Ndiöxí cúu-gǎ Yaá quidé ndáá chi quide-gá nchaa sá càháⁿ-gá, te ñá dáñá-gǎ sá sùúni cuídó sàcúíhná coto ndeé ñáhá-xí xii-ndo, chi není-ni nàcuáa cùndee iní-ndó dàña-gá ducaⁿ quide ñaha-xi xii-ndo. Te ñu-ni-gá chindee ñaha-gá xii-ndo cùndee iní-ndó vǎ cáda-ndó cuèi nándi sá ná dàcahu iní ñáhá-xí xii-ndo.

14 Te xiǎⁿ nǔu càháⁿ-í dóho nchòhó ñáyi-u ío cùu iní-í sá vǎ quíndáá iní-ndó nǐ ñⁿ sá càchí-yu cùu ndióxí te ñá ndáá chi dicó ndaha cue téé ñuyíu-a ní cuáha nchaa xiǎⁿ, te ni vǎ cáda càhnu-ndo. 15 Te duha càháⁿ-í chi cùu-ndo ñáyi-u tècú tnùn-í, te mee-ndo ïo váha cuáha-ndo cuèndá te núu váha-ni càháⁿ-í àdi ñá túú váha-ni. 16 Te

nchoo ndacáⁿ táhú-ó nǔú Yǎ Ndiöxí cuèndá ndudí ndéhé yoho yàha stilé sá xihí-ó, te sá dúcáⁿ xihí-ó ndudí ndéhé yoho yàha stilé-áⁿ, te xiǎⁿ ndácú iní-ó sǎ ñⁿ-ní cùu-o ndihí Xítóhó Jesucristú cuèndá sá nǐ sati níñí-gǎ ní xihí-gá núú cùrúxí, te ñu-ni ducaⁿ sǎtnahá tucu-xi cùu paá sá xéxi-ó òré xihí-ó ndudí ndéhé yoho yàha stilé-áⁿ, chi sá dúcáⁿ xéxi-o paá-áⁿ xiǎⁿ ndácú iní-ó sǎ ñⁿ-ní cùu-o ndihí Xítóhó Jesucristú sá cuèndá yiqui cùñú-gá. 17 Te cuèi vǎi vihi-o dico ñⁿ-ndii-ni paá xéxi-ó, te sá dúcáⁿ ñⁿ-ndii-ni paá xéxi-ó xiǎⁿ ndácú iní-ó sǎ ñⁿ-ní cùu-o ndihí Xítóhó Jesucristú.

18 Te cada cuèndá-ndó nàcuáa quide ñáyi-u israhél, chi ñáyi-u-áⁿ xéxi-yu sá ndúú táhú Yǎ Ndiöxí. Te sá dúcáⁿ quidé-yu-áⁿ cùtnùn-í iní-ó sǎ tnàhá tnúhu-yu ndihí-gá. 19 Te vǎ cǎni iní-ndó sǎ sǎ dúhá càháⁿ-í te cachi-ndó sǎ cùnuu nchaa sá càchí-yu cùu ndióxí ní cadúha cue téé ñuyíu-a chi ñá túú nǎ cúu nǐ ñⁿ nchaa xiǎⁿ. Te ñu-ni ducaⁿ cùu tucu nchaa sá sǎñaha ñáyi-u ndúu táhú-xi chi ñá túú cùnuu-xi, chi ñⁿ-ni cùu-xi ndihí nchaa dava-gá sá xéxi-ó. 20 Te yúhú càchí-í sá sǎ dúcáⁿ quide nchaa ñáyi-u ñá túú tnàhá tnúhu ndihí Yǎ Ndiöxí, te dicó nchaa espíritú cùndihí yucu ñávàha sǎñahá-yu sá ndúú táhú-xi sá dúcáⁿ quidé-yu. Te ñá díú Yǎ Ndiöxí sǎñahá-yu sá ndúú táhú-gǎ. Te yúhú cùiní-í sá vǎ tnàhá tnúhu-ndo ndihí cue espíritú cùndihí

yucu ñávãha. ²¹ Te ducaⁿ chi vá cúú tnàhá tnúhu-o ndìhi cue espíritú cúndìhi yucu ñávãha te tnahá tnúhu-o ndìhi Xítohó Jesucristú, te ñá túú ndùu váha-xi ngóo càxi-o coho-o sá ndúú táhú cue espíritú cúndìhi yucu ñávãha-áⁿ, te ngóo càda-o nacuaá ní dándõo tnúhu Xítohó Jesucristú coho-o ndùdí ndéhé yoho yàha stilé, te caxi-o pàá cada-o sã ndácú ìní-ó sã ñí xíhí-gá núú cùrúxí. ²² Te vá cání ìní-ó dùcaⁿ cada-o cuendá sá vã cúdéeⁿ Yã Ndióxi, chi ñá túú ñã càhnu cuu-o núu cada-o ñãni véxi ìní mée-ó, chi mee-gã ío càhnu cuu-gã.

Cada-o nchàa nacuaá cuu càhnu Yã Ndióxi

²³ Te ndáá sá ncháá sã cuìní-ó càda-o te cuu cada-o dico ñá ncháá cùu-xí sá váha sá cúú-xí-ó, te ni ñã ncháá-xí chindee ñaha-xi nacuaá ñíhí ndéé-gã-ó cùndecu-o ichi Xítohó Jesucristú. ²⁴ Te xìni ñuhu-xi sá cáda-ó sã váha sá cúú-xí tnàha ñáyiu-o te ñá díú mèe-ni sá cúú-xí mèe-o cada-o.

²⁵ Te nchòhó cuu caxi-ndo nchàa cuñú sá cùyãhu cuñú sá xìní caxi-ndo, te vá ndúcú tnúhu-ndo te núu cùu-xí cuñú sá ñí nduu táhú sã càchí-yu cùu ndióxí. Te ñá túú ñã cani ìní-ndó càxi-ndo, ²⁶ chi ñuyíú-a ndìhi nchaa sá ío cúú-xí cuendá Yã Ndióxi.

²⁷ Te núu ìⁿ ñáyiu ñá túú ndècu ichi Xítohó Jesucristú càháⁿ ñãhã-yu xii-ndo quíhíⁿ-ndó càxi-ndo dítá vehé-yu, te núu sàni ìní-ndó sã quíhíⁿ-ndó te cuu

quíhíⁿ-ndó te caxi-ndo cuèi nái cùu sá táxí-yu dico vá càcáⁿ tnúhú-ndó nũu-yu núu ndèe ní ñíhí-yu, te ducaⁿ te cuu váha ìní-ndó càxi-ndo. ²⁸ Te núu ìⁿ ñáyiu càchí-yu sá xĩãⁿ cúú-xí sã ñí nduu táhú sã càchí-yu cùu ndióxí te vá cáxí-ndó cuendá sá ñáyiu ducaⁿ càháⁿ-áⁿ cuu váha ìní-yu te ñá túú tnàhí ná cani ìní-yu. ²⁹ Te yúhú càháⁿ-í cuendá nàcuáa sàni ìní mée ñáyiu ducaⁿ càháⁿ-áⁿ te ñá díú sã nàcuáa sàni ìní mée-ndó quide-ndo.

Te dava-ndo càchí-ndó: “Cuu-ni cada-o nchàa nacuaá sàni ìní mée-ó cuèi dava-gã ñáyiu sàni ìní-yu sá ñá túú ndùu váha-xi sá dúcáⁿ càda-o”, duha càchí-ndó.

³⁰ Te càchí tucu-ndo: “Ñá túú tàú-xí càháⁿ cuèhé ñáyiu cuendá-ó sã cuendá nchaa sá xéxí-ó chi ndacáⁿ táhú-ó nũú Yã Ndióxi òrè xéxí-ó”, duha càchí-ndó. ³¹ Te cuèi nándi sá xìní caxi-ndo ñíhí-ndó xèxi-ndo àdi quide-ndo, te cada-ndo nàcuáa càháⁿ váha ñáyiu cuendá Yã Ndióxi.

³² Te vá cáda-ndó sã ñá túú tàú-ndó càda-ndo cuendá sá vã cáda ñáyiu ìⁿ sã ñá túú cùu váha ìní Yã Ndióxi. Te ni sã cúú-xí cuè ñáyiu isràél, te ni sã cúú-xí cuè ñáyiu ñá túú cùu ñáyiu isràél, te ni sã cúú-xí cuè ñáyiu ndècu ichi-gá vá dúcáⁿ càda-ndo sá cúú-xí-yu.

³³ Te yúhú ío ndùcu ndee-í quidè-í nàcuáa cudíu-í núu nchàa ñáyiu, te quide-í sá váha sá cúú-xí-yu, te ñá túú quide-í mee-ni sã cúú-xí mèe-í. Te ducaⁿ quide-í cuendá quindáá ìní-yu tnúhu Xítohó Jesucristú

te naníhí tàhú-yu.

11

¹ Te chí cànchìcúⁿ nihnu cada-ndo nchàa nacuáa quide-ínchìcúⁿ nihnu-ínchaa nàcuáa quide Xítohó Jesucristú.

Nàcuáa tàú-xi cada nchaa ñáyiú dìhí núú tàcá-yu dàcuahá-yu tnúhu Yá Ndióxi

² Te nchòhó ñáyiú ndècu ndihí-í ichi Xítohó Jesucristú càchí tnúhu-í xii-ndo sã ïo cùdìí iní-í, chí ndàcu iní ñáhá-ndó xii-í, te quide-ndo nchaa nacuáa ní dánèhé ñáhà-í xii-ndo. ³ Te cuiní-í sá nchòhó cutnùnì iní-ndó sã ñⁿdii-ni Yá Ndióxi cúú-gã Yaá cúnùu taxi tnùnì ñáhá xii Xítohó Jesucristú, te ducaⁿ Xítohó Jesucristú ñⁿdii-ni-gá cúnùu taxi tnùnì-gá nchaa cue téé, te nchaa cue téé diu-ni mee-güedé cúnùu-güedé táxì tnùnì-güedé ñadihí-güedé.

⁴ Te núu nchoo cuè téé na dàdàhu-o díquì-ó òré càháⁿ-ó núú ñáyiú tnúhu sá dácàhu iní ñáhá Yá Ndióxi xii-o àdi oré càháⁿ ndihí-o-gã, te ñⁿsácáⁿnúú cúú-xí te núu ducaⁿ na càda-o dadàhu-o díquì-ó.

⁵ Dico núu ñáyiú dìhí vá dádàhu-yu díquì-yu òré càháⁿ ndihí-yu Yá Ndióxi, àdi oré càháⁿ-yu tnúhu sá dácàhu iní ñáhá-gã xií-yu núú tnàhá ñáyiú-yu, te sácáⁿnúú cúú-xí te núu vá dádàhu-yu díquì-yu, chí ñⁿ-ni cùu-xi te núu na dèté ndí-yu díquì-yu. ⁶ Te núu ñá túú cuiní cue ñáyiú dìhí dàdàhu-yu díquì-yu te

váha-gá sá ná dèté ndí-yu díquì-yu. Te núu cùcahaⁿ núu-yu sá dèté díquì-yu te váha-gá sá ná dàdàhu-yu díquì-yu. ⁷ Te nchoo cuè téé vá cúú dàdàhu-o díquì-ó òré càháⁿ ndihí-o Yá Ndióxi ní òré càháⁿ-ó tnúhu sá dácàhu iní ñáhá-gã xii-o núú ñáyiú chí díhna-gá-ó ñí cadúha ñaha Yá Ndióxi xii-o, te ní taxi ndecu-gá nchaa sá xìnì tnùnì-ó dàtná ndécú nchàa sá xìnì tnùnì mée-gã. Te ducaⁿ ñí quide-gá chí cuiní-gá sá nchóó càda-o nacuáa càháⁿ nchaa dava-gá ñáyiú sá ïo càhnu cuu-gá, te cue ñáyiú dìhí quidè-yu nàcuáa cunuu nchòo cue téé. ⁸ Te Yá Ndióxi ní cadúha-gá téé, dico ñá díú yìquì naha ñadihí ní quenehe-gá ní cadúha-gá téé chí yìquì naha téé ní quenehe-gá ní cadúha-gá ñadihí. ⁹ Te sá cuèndá téé ducaⁿ ñí cadúha-gá ñadihí-áⁿ te ñá díú sã cuèndá ñadihí ní cadúha-gá téé. ¹⁰ Núu xiãⁿ tàú-xi sá ncháá ñáyiú dìhí dàdàhu-yu díquì-yu cuèndá ducaⁿ cùtnunì sá ñà túú cunuú-yu dàtná cúnùu nchoo cue téé. Te ducaⁿ xìnì ñuhu-xi cadá-yu sá cuèndá nchaa espíritú xínú cuèchi núú Yá Ndióxi. ¹¹ Te vitna nchoo ñáyiú ndècu ichi Xítohó Jesucristú, vá càchí-ó sã cuè téé ñá túú xìnì ñuhu-güedé cue ñáyiú dìhí chindee ñàhá-yu, te ní vã càchí-ó sã cuè ñáyiú dìhí ñá túú xìnì ñuhú-yu cue téé chindee ñàha-güedé xií-yu. ¹² Te ñⁿ yìquì naha

tée ní queñuhu Yá Ndiõxí ní cadúha-gá ñadihí, dico vitna chi ñáyiu dihí dácàcú-yu tée. Te tée, ñadihí ní cadúha Yá Ndiõxí, te diu-ni ducaⁿ ñi cadúha-gá nchaa dava-gá sá íó.

¹³ Te mee-ndo càda cuendá-ndó te núu ndùu váha-xi sá vâ dádáhu cue ñáyiu dihí díquí-yu òré càháⁿ ndihí-yu Yá Ndiõxí àdi ñáhá.

¹⁴ Te nchaa ñáyiu càháⁿ-yu sá ñà túú ndùu váha-xi sá cue tée cunduu nàni idi díquí-güedë, chi ñⁿ sácáⁿ-núú cúú-xí càchí-yu. ¹⁵ Te nchaa ñáyiu dihí ñáyiu nàni idi díquí-xi càchí ñáyiu sá ñⁿ sá vâha cùu-xi sá cúú-xí-yu sá dúcáⁿ nàni idi díquí-yu. Te ducaⁿ chi Yá Ndiõxí ní cachí-gá sá dúcáⁿ cunduú-yu cuendá quidáhu-xi díquí-yu.

¹⁶ Te núu íó ñáyiu cuimí dacàá cuendú cuendá sá ñi càháⁿ-í-a, te na cùnahá-yu sá ncháá nchùhú cue tée càháⁿ tnúhu Xítohó Jesucristú diu-ni ducaⁿ sàni iní-ndí cada nchaa ñáyiu dihí. Te diu-ni ducaⁿ sàni iní nchaa ñáyiu ndècu ichi-gá.

Cuendá ñáyiu ñá túú quide datná ní quide Xítohó Jesucristú cútnàhá ní cudini-gá ndihí cue tée ní xica cuu ndihí-gá

¹⁷ Te nchòhó ñá túú quide váha-ndo ndècu-ndo núu xiãⁿ duha na càháⁿ-í dóho-ndo, chi nchòhó òré tàcá-ndó ñá túú quide váha-ndo chi ñá túú chindee tnaha-ndo cada-ndo sá vâha, chi da nàdatuhú iní tnáhá-ndó nàcuáa ndècu-ndo. ¹⁸ Te díhna-gá na càchí tnúhu-í

xii-ndo sá ñihí-í tnúhu sá òré tàcá-ndó quide-ndo nacuáa ní càháⁿ Xítohó Jesucristú, te ñá túú cùu ñⁿnuu-ndo òré ducaⁿ quide-ndo nacuáa ní càháⁿ-gá. Te dava sá càháⁿ ñáyiu sàndáá iní-í te dava ñáhá. ¹⁹ Te ndáá sá dúcáⁿ tnàhí cada-xi vá cúú ñⁿnuu-ndo cuendá ducaⁿ cùtnuní núu ndèdacàa-ndo sàndáá ndisa iní-ndó tnúhu Xítohó Jesucristú te ndèdacàa-ndo ñáhá! ²⁰ Te ndi tnahá òré tàcá-ndó quide-ndo datná ní quide Xítohó Jesucristú cútnàhá ní cudini-gá ndihí cue tée ní xica cuu ndihí-gá, te ñá túú quide-ndo nacuáa tàú-xi cunduu chi cùtexínu-ni quide-ndo. ²¹ Chi òré tàcá-ndó quide-ndo nacuáa ní cachí Xítohó Jesucristú, te dava-ndo ngòdó núú-ndó díhna-gá-ndó xèxi-ndo sá néhé-ndó te ñá túú sá cùndètu tnaha-ndo, te ñá túú càháⁿ tnáhá-ndó núu xiãⁿ dava-ndo ñà túú xèxi-ndo ndahá xití-ndó, te dava-ndo xidó-ndó quide-ndo chi xini-ndo.

²² Te vá dúcáⁿ càda-ndo chi càa vehe-ndo núú dúcáⁿ càxi-ndo coho-ndo cada-ndo ndéé ndahá xití-ndó, chi sá dúcáⁿ quide-ndo te dàquee tíhú-ndó nchàa dava-gá ñáyiu ndècu ndihí-ndo ichi Yá Ndiõxí, te dândó canúú-ndó nchàa ñáyiu ndàhú sá dúcáⁿ quide-ndo. Te núu xiãⁿ vá cúú càchí-í sá cúú-ndó ñáyiu quide váha chi ñá túú quide váha-ndo sá dúcáⁿ quide-ndo ndècu-ndo!

Xítohó Jesucristú ní dándõ tnúhu-gá sá cóhó-ó ndúdi

ndéhé yoho yàha stilé te caxi-o pàá cuèndá ndacu iní-ó sã ní xihí-gá

(Mt. 26:26-29; Mr. 14:22-25; Lc. 22:14-20)

²³ Te dàtná-ni ní dánèhé ñáhá Xítohó Jesucristú xii-í te ñu-ducaⁿ ní dánèhé ñáhá-í xii-ndo, chi ñu-ni níu cútñàhá ní sáha cuèndá ñáhá ndi Jùdás Iscarioté xii-gá núu cuè téé cùu úhú iní ñáhá ní queheⁿ-gá pàá, ²⁴ te ní ndacáⁿ táhú-gá núu Yã Ndiöxí, te ní táhú cuèchi-gá, te ní xáhaⁿ-gá xii cue téé xica cuu ndihi-gá: “Chí quéhéⁿ pàá-a caxi-ndo te cada iní-ndó sã cúu-xí dàtná yiqui cùñú-í, chi yúhú cuú-í sácuèndá-ndó. Te ducaⁿ-ni cada-ndo cundecu-ndo cuèndá ndacu iní ñáhá-ndó xii-í”, cächí-gá xáhaⁿ-gá xii-güedé. ²⁵ Te sátá ní yáha ní xexi-güedé pàá sã ní sãñaha-gá, te ní queheⁿ-gá tásáⁿ ñúhú ndudí ndéhé yoho yàha stilé, te ní ndacáⁿ táhú tucu-gá núu Yã Ndiöxí. Te ní xáhaⁿ-gá xii cue téé xica cuu ndihi-gá: “Chí cóhó ndudí ndéhé yoho yàha stilé-a, te cada iní-ndó sã cúu-xí dàtná ñiñi-í, te cuèndá ñiñi-í sã cáti òré cuú-í cutnùni ndáá sã Yã Ndiöxí cada-gá ingá núu sã váha sã cúu-xí ñäyiu. Te ndi tnahá òré coho-ndo ndudí ndéhé yoho yàha stilé-án te ndacu iní ñáhá-ndó xii-í, te ducaⁿ-ni cada-ndo cundecu-ndo”, cachí-gá xáhaⁿ-gá xii-güedé. ²⁶ Te ndi tnahá òré xéxi-ndó pàá te xihí-ndo ndudí ndéhé yoho yàha stilé, te xíáⁿ dátüu-ndo núu ñäyiu sã Xítohó Jesucristú ní xihí-gá cuèndá-yu, te ducaⁿ-ni

cada-ndo cundecu-ndo ndéé ná sãá nduu quixi tucu Xítohó Jesucristú.

Nàcuáa cada-o òré caxi-o pàá ndihi òré coho-o ndudí ndéhé yoho yàha stilé dàtná ní cachí Xítohó Jesucristú

²⁷ Te dava-ndo ñà túú quide-ndo nacuéa cuèni Yã Ndiöxí cada-ndo òré xéxi-ndó pàá ndihi òré xihí-ndó ndudí ndéhé yoho yàha stilé, te sã dúcáⁿ quide-ndo-án te cucuéchi xii-ndo chi ñà túú nèhe-ndo sã yíñuhu sã cúu-xí yiqui cuñú Xítohó Jesucristú, te ní ñà túú nèhe-ndo sã yíñuhu sã cúu-xí ñiñi-gá. ²⁸ Te ío váha cada cuèndá-ndó te núu ndècu váha iní-ndó núu Xítohó Jesucristú òré cúmání-gá caxi-ndo pàá ndihi òré cúmání-gá coho-ndo ndudí ndéhé yoho yàha stilé. Te núu ndècu váha iní-ndó núu-gá te caxi-ndo te coho-ndo. ²⁹ Te dava nchòhó ñà túú sàni váha iní-ndó cuèndá yiqui cuñú Xítohó Jesucristú te xéxi-ndo pàá te xihí-ndo ndudí ndéhé yoho yàha stilé, te nacháhu-ndo sã dúcáⁿ ñà túú sàni váha iní-ndó. ³⁰ Te ñu sã dúcáⁿ quide-ndo núu xíáⁿ vai-ndo cuhú, te ío ndàhú ndécú-ndó, te dava ñäyiu ndècu ndihi-ndo sa ní xihí-yu. ³¹ Dico núu ío váha sáha-o cuèndá nàcuáa ndècu-o núu Yã Ndiöxí, te vá dúcáⁿ dándoho ñaha-gá xii-o. ³² Te òré ndéhé Yã Ndiöxí sã ñà túú quide ndáá-ó ndècu-o te dándoho ñaha-gá xii-o. Te ducaⁿ quide-gá cuèndá sã vá cuíta nihnu-o, chi núu ñáhá te cuíta nihnu-o ndihi nchaa

ñáiyu ndècu ichi cuehé ichi duha.

³³ Te núu xiǎⁿ càháⁿ-í dóho nchaa nchòhó ñáiyu ndècu ndihí-í ichi Xítohó Jesucristú sá òré tacá-ndo càda-ndo nacuáa ní quide Xítohó Jesucristú cútñahá ní cudini-gá ndihí cue téé ní xica cuu ndihí-gá, te cundetu tnàha-ndo nduu nchaa-ndo te dātñuní ducaⁿ càda-ndo. ³⁴ Te núu dava-ndo xihí-ndó dòcò te caxi duuⁿ-ndo vèhe-ndo te dātñuní nataká-ndó, cuendá òré nataká-ndó te vá cadá-ndó ìⁿ sá ñà túú tǎu-ndó càda-ndo cuendá sá vǎ dándòho ñaha Yá Ndiòxí xii-ndo. Te òré quixi coto ñaha-í xii-ndo te dàvá-áⁿ cachí tnúhu-í xii-ndo nchaa dava-gá sá cúmǎní.

12

Nàcuáa chindee ñaha Espiritú Yá Ndiòxí cada-o ìⁿ ìⁿ-o

¹ Te nchòhó ñáiyu ndècu ndihí-í ichi Xítohó Jesucristú cuini-í cachí tnúhu-í xii-ndo nàcuáa chindee ñaha Espiritú Yá Ndiòxí xii-o ìⁿ ìⁿ-o cuendá cutñuní iní-ndó.

² Te nchòhó sá ñaha-ndo sá cútñahá vátá cundècu-gá-ndó ichi Xítohó Jesucristú ní xóo dandàhú ñáhá yùcu ñávàha xii-ndo, te ní xóo quíndáá iní-ndó nchaa sá ñí cadúha cue ñáiyu ñuyú-a nchaa sá cǎchí-yu cùu ndióxí te ñà ndáá sá ndiòxí cúú-xí, te nchaa xiǎⁿ ñá túú càháⁿ-xi. ³ Te cuini-í sá nchòhó cutñuní iní-ndó sá Espiritú Yá Ndiòxí ñá túú chindee-xi ni ìⁿ ñáiyu cuendá sá càháⁿ úhú-yu Xítohó Jesucristú. Te ni ìⁿ

ñáiyu ñá túú càhu iní-yu càháⁿ-yu sá Xítohó Jesucristú cúú-gǎ Xítohó-yu te núu ñá túú Espiritú Yá Ndiòxí dácàhu iní ñáhá-xí xii-yu.

⁴ Te ndi dǐíⁿ ndi dǐíⁿ ndùu chiuⁿ ní cachí Espiritú Yá Ndiòxí cada-o, te ðiu-ni ìⁿ ði-ⁿ Espiritú-gá ndécú.

⁵ Te ndi dǐíⁿ ndùu chiuⁿ quide-o xinu cuechi-o núú ìⁿ ði-ⁿ Xítohó Jesucristú. ⁶ Te

ndi dǐíⁿ ndi dǐíⁿ chindee ñaha Yá Ndiòxí xii-o nàcuáa cada-o chiuⁿ-gá, te ðiu-ni ìⁿ ði-gá ndécú chindee-gá nchaa ñáiyu. ⁷ Te Espiritú Yá Ndiòxí

quidé-xí sǎ nchóó càda-o sá vǎha, te ducaⁿ chindee-o cue ñáiyu ndècu ndihí-o ichi Xítohó Jesucristú. ⁸ Te dava-o

ñí nduu táhú-ó núú Yá Ndiòxí sá Espiritú-gá cada te ndacu-o

cǎháⁿ-ó tnúhu sá ìo càhnu cuu ðiu-ni tnúhu mee Yá Ndiòxí, te dava tucu-o ñí nduu táhú-ó cutñuní iní-ó nàcuáa càháⁿ tnúhu-gá te càháⁿ-ó nàcuáa

cuini Espiritú-gá. ⁹ Te dava tucu-o ñí nduu táhú-ó sǎ ìo quíndáá iní-ó Xítohó Jesucristú cuendá cada-gá ìⁿ sá

cuini-ó, te ducaⁿ chi Espiritú Yá Ndiòxí chindee ñaha-xi xii-o. Te dava tucu-o ñí nduu táhú-ó sǎ cǎcǎⁿ táhú-ni-ó núú Xítohó Jesucristú cuendá

ñáiyu cùhú te ndúha-yu. ¹⁰ Te dava tucu-o ñí nduu táhú-ó sǎ ndácú-ó càda-o nchaa sá vǎ yóo tnàhí ndàcu cada, te dava tucu-o ñí nduu táhú-ó núú

Yá Ndiòxí sá càháⁿ-ó tnúhu sá dácàhu iní ñáhá-gǎ xii-o, te dava tucu-o ñí nduu táhú-ó sǎ cutñuní iní-ó núu ðiu Espiritú Yá Ndiòxí chindee ñaha-xi xii ñáiyu òré càháⁿ-yu tnúhu-gá

àdi cue espíritú cùndìhi yucu ñávãha. Te dava tucu-o ñ nduu táhú-ó cãháⁿ-ó tnũhu sá dácãhu iní ñáhã Espíritú Yã Ndiõxí xii-o tnũhu sá ñà túú xiní-ó, te dava tucu-o ñ nduu táhú-ó cãháⁿ-ó nãcuáa quèe-xi nchaa tnũhu-áⁿ. ¹¹ Te ñⁿdìi díi-ni Espíritú Yã Ndiõxí ducaⁿ chìndee ñaha-xi, te ñⁿu-ni Espíritú-gã dácãhũ ñaha-xi xii-o ñⁿdìiⁿ núú chiuⁿ sá cuiní méé-xí càda-o.

Nchaa-o ñⁿ-ni cuu-o ndihi Xítohó Jesucristú

¹² Te nchoo ñãyiu ndècu ñuyíú-a titní xichi cùu yiqui cuñú-ó dico ñⁿ-ni cùu-xi, te ñⁿu-ni ducaⁿ sãtnahá-xi cùu-o vitna ndecu-o ichi Xítohó Jesucristú chi ñⁿ-ni cùu-o ndihi-gã. ¹³ Te dava-o cùu-o ñáyiu isràél, te dava-o ñà túú cùu-o ñáyiu isràél, te dava-o cùu-o ñáyiu ñà túú tnàhí ðãñá quee núú chíúⁿ pãtróóⁿ-xi, te dava-o cùu-o ñáyiu ðãñá quèé núú chíúⁿ pãtróóⁿ-xi. Te mee Espíritú Yã Ndiõxí ní quide-xi sá ncháá-ó ñⁿ-ná cúú-ó ndècu-o ndihi Xítohó Jesucristú. Te Yã Ndiõxí ní cachí-gã sá ncháá-ó cùndecu ndihi-o Espíritú-gã.

¹⁴ Te nchòhò xiní-ndó sã titní xichi cùu yiqui cuñú-ó te ñà díú ñⁿ-ni xichi cuu-xi. ¹⁵ Te cuèi sáhã-ó ndihi ndaha-o ñà túú ñⁿ-ni cuu-xi dico vá cúú cachí-ó sã sáhã-ó ñà túú cùu-xi yiqui cuñú-ó. ¹⁶ Te cuèi lóho-o ndihi tinuu-o ñà túú ñⁿ-ni cuu-xi dico vá càchí-ó sã lóho-o ñà túú cùu-xi yiqui cuñú-ó. ¹⁷ Te núu ñihí ní ndúú yiqui cuñú-ó ní xìndee mee-ni tinuu-o, te

ñà túú ndèe cundee lóho-o cùndedóho ní cùu te núu ducaⁿ, àdi núu ñihí yiqui cùñú-ó ní xìndee mee-ni lóho-o te ñà túú ndèe cundee dítní-ó ní cùu te núu ducaⁿ. ¹⁸ Dico mee Yã Ndiõxí ní taxi ndecu-gã ñⁿ ñⁿ xichi yiqui cùñú-ó nãcuáa ní cachí iní méé-gã. ¹⁹ Te núu ñⁿ-ni sã ní xìndecu ñihí yiqui cùñú-ó, te vá cùnduu-xi nãcuáa tàú-xi cunduu ní cùu te núu ducaⁿ. ²⁰ Dico titní xichi cùu yiqui cuñú-ó, te ñⁿ-ni cùu-xi ñihí-xi.

²¹ Te sa naha-o sá vã cúú càchí-ó sã tinuu-o ñà túú xini ñuhu-xi ndaha-o, àdi díquí-ó ñà túú xini ñuhu-xi sáhã-ó. ²² Te nchoo sã naha-o sá dává xichi yiqui cuñú-ó sã càchí-ó sã ñà túú cùnuu ío-gã xiní ñuhu-xi. ²³ Te dava xichi yiqui cuñú-ó sã ñà túú quide cuendá cávíhí-ó nchaa xiãⁿ sá quidáhu dóó sãcuñhu-o, te dava xichi yiqui cuñú-ó ñà cúú cùtúu chi dacuítí sã quidáhu. ²⁴ Te nchaa xichi yiqui cuñú-ó sã cúú cùtúu ñà túú xini ñuhu-xi quidáhu. Te Yã Ndiõxí ní taxi ndecu-gã nchaa xichi yiqui cuñú-ó nãcuáa tàú-xi cunduu. Te ní cachí-gã sá dává-gã xichi yiqui cuñú-ó núú vã cúú cùtúu quidáhu. ²⁵ Te ducaⁿ ñi quide-gã cuendá sã ñⁿ-ní cùu yiqui cuñú-ó. Te ducaⁿ ndi tnahá ñⁿ ñⁿ xichi yiqui cuñú-ó chìndee tnahã-xi. Te ducaⁿ sãtnahá-xi cùu nchoo vitna ndecu-o ichi Xítohó Jesucristú chi chìndee tnahã-o. ²⁶ Te núu ñⁿ xichi yiqui cuñú-ó ná tnàhúhú te ñihí-ó quide úhú-xi, te núu ñⁿ xichi yiqui

cũnú-ó ïo váha ndècu-xi te ducaⁿ ñihí yiqui cũnú-ó cúu váha-xi. Te ducaⁿ sãtnahá-xi cùu-o vitna ndecu-o ichi Xítohó Jesucristú.

27 Te nchoo ndècu ndihí-o Xítohó Jesucristú, te cùu-o datná yiqui cũnú-gá te ìⁿ ìⁿ-o cùu-o datná ìⁿ ìⁿ xichi yiqui cũnú-gá. 28 Te ducaⁿ sãtnahá-xi cùu-o chi Yá Ndiõxí ní taxi-gá ndí díⁱⁿ ndí díⁱⁿ chiuⁿ quide-o sá cúu-xí nchàa ñáyiu ndècu ichi-gá. Te díhna-gá cue tée caca cuu cáháⁿ tnúhu-gá núú ñáyiu ní taxi ndecu-gá, te dãtnùní ní taxi ndecu-gá cue tée cáháⁿ tnúhu-gá nãcuáa dàcahu iní ñáhá mèe-gá, te dãtnùní ní taxi ndecu-gá cue tée dãnehé ñáhá xii ñáyiu tnúhu-gá núú tàcá-yu, te dãtnùní ní taxi ndecu-gá cue tée ndàcu quide sá vã yõo tnàhí ndàcu cada. Te ní taxi ndecu tucu-gá cue tée xicáⁿ táhú-ní núú Xítohó Jesucristú cuëndá ñáyiu cùhú te ndúha-yu. Te ní taxi ndecu tucu-gá cue tée chindee cue ñáyiu ndècu ichi-gá. Te ní taxi ndecu tucu-gá cue tée yindaha ñaha xii ñáyiu ndècu ichi-gá, te ní taxi ndecu tucu-gá cue tée càháⁿ tnúhu sá dácàhu iní ñáhá Espíritú-gá tnúhu sá ñà túú xìní-güedé. 29 Te ñá ncháá-ó cùu-o cue tée ní táuchíúⁿ Xítohó Jesucristú cáháⁿ tnúhu-gá núú ñáyiu, te ñá ncháá-ó cùu-o cue tée càháⁿ tnúhu sá dácàhu iní ñáhá Yá Ndiõxí xii-o. Te ñá ncháá-ó cùu-o cue tée dàcuaha ñaha xii-yu. Te ñá ncháá-ó cùu-o cue tée quide sá vã yõo tnàhí ndàcu cada. 30 Te

ñá ncháá-ó cùu-o cue tée dicó-ní cácáⁿ táhú núú Xítohó Jesucristú cuëndá ñáyiu cùhú te ndúha-yu. Te ñá ncháá-ó cùu-o cue tée càháⁿ tnúhu sá dácàhu iní ñaha Espíritú Yá Ndiõxí tnúhu sá ñà túú xìní-ó, te ñá ncháá-ó cùu-o cue tée cùtnuní iní-xi cáháⁿ nãcuáa ndùu tnúhu-án. 31 Te ïo nducu ndèe-ndo cada-ndo nãcuáa nduu táhú-ndó núú Yá Ndiõxí nchaa sá ïo-gá cúnùu cada-ndo. Te vitna na dãnehé ñáhá tucu-í xii-ndo nãcuáa cada-ndo, dico sá dãnehé ñáhà-í-a ïo-gá cúnùu-xi.

13

Cuu iní-ó tnàha ñáyiu-o

1 Te núu nchoo xìní-ó cáháⁿ-ó tnúhu sá ïo vii ïo váha cuáháⁿ càháⁿ ñáyiu ñuyíú-a, àdi xìní-ó cáháⁿ-ó tnúhu sá ïo vii ïo váha cuáháⁿ càháⁿ cue espíritú xínú cuèchi núú Yá Ndiõxí, te núu xìní-ó cáháⁿ-ó nchàa tnúhu-án te ñá túú cùu iní-ó cuè tnaha ñáyiu-o ña, te ñá túú nãndíhi-xi sá xìní-ó cáháⁿ-ó tnúhu-án te cùu-o datná dava caá sá ïo dusaⁿ quide. 2 Te núu cùu-o ñáyiu cáháⁿ tnúhu sá dácàhu iní ñáhá Yá Ndiõxí, àdi cuu-o ñáyiu cùtnuní iní-xi nãcuáa cuáháⁿ nchaa tnúhu ndùu yuhu ní cuu, àdi cuu-o ñáyiu ïo váha cùtnuní iní-xi nchaa nãcuáa quide Yá Ndiõxí, àdi cuu-o ñáyiu ïo váha sãndáá iní ñáhá xii Yá Ndiõxí nãcuáa ndacu-o cùu-o ìⁿ yucu xocuiñí-xi núú ndécú-xí, te núu nchaa xíⁿ xìní-ó càda-o te ñá túú cùu iní-ó cuè tnaha ñáyiu-o ña, te ñá túú vèdana nãndíhi-xi te núu vá cúu iní-ó tnàha ñáyiu-o cuèi na càda-o

nchaa xiáⁿ. ³ Te cuéi nchaa sá ndécú ndihi-o na dacáhñu-o, te cuéi na cuãha cuendá-ó mée-o cáyú-ó sá cúú-xí Yá Ndiöxí, dico ñá túú vèdana chindee ñaha-xi xii-o sá dúcáⁿ càda-o te núu ñá túú cùu ini-ó cuè tnaha ñáyiú-o.

⁴ Dico núu cùu ini-ó cuè tnaha ñáyiú-o, te cahnú ini-ó, te quide váha-o, te ñá túú cùu-o ñáyiú cuédú ini, te ni ñá túú càháⁿ-ó nõu cùu cahnu-o, te ni ñá túú sàni ini-ó càda cahnu-o mee-o, ⁵ te ni ñá túú ññhu cuehé ini-ó, te ni ñá túú ndùcu-o mee-ni sá cúú-xí mée-o, te ni ñá túú-gã cúdeéⁿ-ó cuendá ïⁿ sá cúú, te ni ñá túú-gã sácũhuⁿ ini-ó sã quidé ñaha tnaha ñáyiú-o xii-o. ⁶ Te ni ñá túú-gã cúdíi ini-ó nchaa sá ñá túú vãha quide ñáyiú, chi mee-nã cuendá nchaa sá vãha cùdíi ini-ó. ⁷ Te nchaa sá yãha-o sàcahnu ini-ó, te sàni váha ini-ó cuendá nchaa ñáyiú, te sàni ini-ó sã díú-ni nchaa sá vãha cuu xii nchaa tnaha ñáyiú-o ndeé cuée-gã, te ío quide cahnu ini-ó cuéi nándi sá yãha-o, te nchaa xiáⁿ quidé-ó te núu cùu ini-ó cuè tnaha ñáyiú-o.

⁸ Te ni caa ni quíhⁱⁿ duha-ni cuu ini-ó cuè tnaha ñáyiú-o. Dico sáá nduu te vá cóo-gã ñáyiú cáháⁿ tnúhu sá dácàhu ini ñáhá Yá Ndiöxí, te ni vã cóo-gã ñáyiú cáháⁿ tnúhu sá dácàhu ini ñáhá Espíritú Yá Ndiöxí tnúhu sá ñá túú xini-yu, te ni vã cóo-gã ñáyiú túha dàtná túha ñáyiú vitna.

⁹ Te vitna ñá túú cùtnuní ini-ó nchaa nacuaá sàni ini Yá Ndiöxí chi sacú-ni cùtnuní

ini-ó, te ducaⁿ sàcú-ni càháⁿ-ó nàcuáa nduu tnúhu-gã, dico càháⁿ-ó tnúhu-gã nàcuáa dàcahu ini ñáhá-gã xii-o. ¹⁰ Te na sáá nduu càda Yá Ndiöxí nchaa nàcuáa tàú-xi cunduu, te dàvá-án te nchaa sá cãchí-gã ñá túú ndècu-xi nacuaá tàú-xi cunduu vá dúcáⁿ-gã cundecu-xi.

¹¹ Te yúhú cùtnàhá ní cuu landú-í ní xóo cada-í sá cùu-í landú, ní xóo cáháⁿ-í, ní xóo cani ini-í, te ní xóo tecú tnùn-í dàtná quidé cuè landú xĩndecu vitna, dico sátá ñi cuu-í ïⁿ tée cùu sacuéhé te ñá túú-gã quidé-í dàtná ní xóo cada-í cùtnàhá ní cuu landú-í.

¹² Te ducaⁿ sãtnahá-xi cùu-o vitna ndecu-o ichi Xitohó Jesucristú, chi ñá túú cùtnuní váha ini-ó nàcuáa cùu cuendá Yá Ndiöxí, te cùu-o datná ñáyiú ndèhe ïⁿ núú yütátá sã ñá túú tũu váha núú-xi, te ducaⁿ sãtnahá-xi cùu-o chi ñá túú cùtnuní váha ini-ó nãsa cùu cuendá-gã, dico sáá nduu quini núú-ó-gã. Te nchoo sàcú-ni cùtnuní ini-ó nàcuáa nduu-gã vitna dico na sáá nduu te quini ndáá-ó nàcuáa càa nacuaá nduu-gã dàtná xini ñáhá mée-gã xii-o.

¹³ Te ni caa ni quíhⁱⁿ ducaⁿ-ni quindáá ini-ó Yá Ndiöxí, te ducaⁿ-ni cùndecu ndihi-o tnúhu ndee ini cundecu-o ndihi-gã, te ducaⁿ-ni ío cuu ini-ó-gã ndihi tnaha ñáyiú-o. Te sá cúú ini-ó Yá Ndiöxí ndihi sá cúú ini-ó tnaha ñáyiú-o xiáⁿ ío-gã cùnùu-xi dacúúxi dàva-gã.

14

Ñáyiú càháⁿ tnúhu sá

dácàhu iní ñáhá Espíritú Yă Ndiôxí

1 Te vá dáñá ndèé-ndó cùu iní-ndó tnàha ñáyiu-ndo, te cuhuⁿ iní-ndó sã ndùu táhú-ndó nũú Yă Ndiôxí titní núú chiúⁿ cada-ndo nacuaáa chindee ñàha Espíritú-gá xii-ndo, te ío cuhuⁿ iní-ndó sã ndúú táhú-ndó cãháⁿ-ndó tnúhu sã dácàhu iní ñáhá Yă Ndiôxí xii-ndo. ² Te cue ñáyiu cãháⁿ tnúhu sã dácàhu iní ñáhá Espíritú Yă Ndiôxí tnúhu sã ñà túú xini-yu, te tnúhu cãháⁿ-yu-áⁿ cúú-xí sã cúú-xí Yă Ndiôxí te ñà díú sã cúú-xí ñáyiu chi ñà túú tècú tnùní-yu, te mee Espíritú Yă Ndiôxí quidé-xí dùcaⁿ caháⁿ-yu tnúhu yiyuhu. ³ Te cue ñáyiu ní nduu táhú nũú Yă Ndiôxí cãháⁿ tnúhu sã dácàhu iní ñáhá-gã xii-yu, te ñáyiu-áⁿ dácãháⁿ-yu ñáyiu nacuaáa cuita níhí ndéé-gã-yu cundecú-yu ichi-gá, te ducaⁿ cuañáhá-yu tnúhu ndee iní xii-yu òré ndihú iní-yu. ⁴ Te ñáyiu cãháⁿ tnúhu sã dácàhu iní ñáhá Espíritú Yă Ndiôxí xii-yu tnúhu sã ñà túú xini-yu-áⁿ, ñáyiu-áⁿ mee-ni-yu nihí ndéé-yu ndècú-yu ichi-gá. Dico ñáyiu cãháⁿ tnúhu sã dácàhu iní ñáhá-gã xii-yu, cãháⁿ-yu tnúhu-áⁿ nacuaáa níhí ndéé dâva-gã ñáyiu nchìcúⁿ nihnu ichi-gá.

⁵ Te yúhú ío cudíí iní-í te núu nchaa-ndo cãháⁿ-ndó tnúhu sã dácàhu iní ñáhá Espíritú Yă Ndiôxí xii-ndo tnúhu sã ñà túú xini-ndó. Dico ío-gá cudíí iní-í te núu nchaa-ndo cãháⁿ-ndó tnúhu sã dácàhu iní

ñáhá-gã, chi ío-gá xini ñùhu-xi sã cãháⁿ-ndó tnúhu-áⁿ dácúúxí sã cãháⁿ-ndó tnúhu sã dácàhu iní ñáhá Espíritú-gá cãháⁿ-ndó tnúhu sã ñà túú xini-ndó. Dico ìⁿ-ni nũtnahá-xi quide-ndo te núu nchòhó ñáyiu cãháⁿ tnúhu sã dácàhu iní ñáhá Espíritú-gá cãháⁿ-ndó nacuaáa quèe-xi tnúhu-áⁿ. Te ducaⁿ te nchaa ñáyiu ndècu ichi Yă Ndiôxí cuita níhí ndéé-gã-yu quihíⁿ cundecú-yu ichi-gá. ⁶ Te núu yúhú quexio-í núú ndécú nchòhó ñáyiu ndècu ndihi-í ichi Xitohó Jesucristú, te ngúíta-í cãháⁿ-í mee-ni tnúhu sã dácàhu iní ñáhá Espíritú Yă Ndiôxí xii-í tnúhu sã ñà túú xini-í, te ñà túú nã sã vãha cuu-xi sã cúú-xi-ndó. Dico cuu-xi sã vãha xii-ndo te núu na cãháⁿ-í núú-ndó nchãa tnúhu sã dánèhé ñáhá Yă Ndiôxí xii-í tnúhu sã vátá dâcuãha-gã-í, ndihi nchaa tnúhu sã sã xini-í, ndihi nchaa tnúhu sã dácàhu iní ñáhá-gã xii-í cãháⁿ-í, ndihi nchaa dava-gã tnúhu-gã.

⁷ Te na càda-o cuendá sã núu ìⁿ tée tiú-dé vîlu àdi cani-dé àrpá te núu ñà túú sãhnú-dé ndihi-xi ìⁿ yaá, te ñà cútñuní iní-ó nã yaá cani-dé àdi ná yaá tiú-dé te núu ducaⁿ na càda-dé. ⁸ Te ñu-ni ducaⁿ sãtnahá-xi cùu tucu tée cùu sandadú tiú cútú, chi núu vá tiú vãha-dé nacuaáa tàú-xi cunduu òré quihíⁿ-güedé nàá-güedé, te vá ngündecu túha dava-gã cue sandadú te núu ducaⁿ na càda-dé vá tiú vãha-dé. ⁹ Te ducaⁿ sãtnahá-xi cùu nchòhó te núu vá cãháⁿ-ndó ìⁿ tnúhu

nàcuáa tàú-xi cunduu núu ñáyiú te vá tècú tnùní-yu tnúhu càháⁿ-ndó. ¡Chi áúⁿ nã cuu càháⁿ-ndó te núu ducaⁿ na càda-ndo! ¹⁰ Te ío titní núu tnúhu ío ñuyíú, te ìⁿ ìⁿ núu tnúhu-áⁿ cùtnùní iní ñáyiú nàcuáa quèe-xi. ¹¹ Te núu nchoo ñã tècú tnùní-ó ìⁿ tnúhu càháⁿ ìⁿ ñáyiú, te quède-ó-yu ñáyiú ñúú xícá chi ñá túú càháⁿ-yu tnúhu càháⁿ-ó, te ñiu-ni ducaⁿ quède ñahá-yu xii nchoo tùcu. ¹² Te xíãⁿ núu càchí tnúhu-í xii nchaa nchòhó ñáyiú ío cuíní nduu táhú núú Yã Ndiòxí sá Espíritú-gá chindee ñaha-xi xii-ndo cada-ndo ná daha núú chiúⁿ, te ío nducu ndèe-ndo cada-ndo chiúⁿ sá ñí nduu táhú-ndó nàcuáa cuita níhí ndéé-gã ñáyiú ndècu ichi-gá quíhíⁿ.

¹³ Te núu càháⁿ-ndó tnúhu sá ñã túú xìní-ndó, tnúhu sá dácàhu iní ñahá Espíritú Yã Ndiòxí xii-ndo, te xini ñuhu-xi sá càcáⁿ táhú-ndó núú Yã Ndiòxí cuendá sá ná chindee ñaha-gá xii-ndo càháⁿ-ndó núú ñáyiú núu nása quèe-xi tnúhu-áⁿ. ¹⁴ Chi núu nchoo na càháⁿ ndihí-o Yã Ndiòxí ndihí tnúhu sá ñã túú xìní-ó, te ñí yùhu ñí iní-ó càháⁿ ndihí-o-gã ñicó-ñí sá ñã tècú tnùní-ó nàcuáa ndùu tnúhu càháⁿ-ó. ¹⁵ Te xíãⁿ núu xini ñuhu-xi càháⁿ ndihí-o Yã Ndiòxí ñí yùhu ñí iní-ó nàcuáa chindee ñaha Espíritú-gá xii-o te càháⁿ-ó nàcuáa tecú tnùní-ó, te ñiu-ni ducaⁿ càda-o oré xítá yùhu-o chiñuhu-o Yã Ndiòxí, chi ñí yùhu ñí iní-ó dùcaⁿ cada-o nàcuáa chindee ñaha Espíritú-gá xii-o, te cùtnuní iní-ó nàcuáa cuáháⁿ nchaa tnúhu càháⁿ-ó xita-o.

¹⁶ Chi núu nchoo na ndàcáⁿ táhú-ó núú Yã Ndiòxí ndihí mee-ñí tnúhu sá ñã túú xìní-ó tnúhu sá dácàhu iní ñahá Espíritú-gá xii-o, te ñáyiú ñã túú ní ndùu táhú càháⁿ tnúhu càháⁿ-ó ndèdóho ñahá-yu xii-o, te ñáyiú-áⁿ vã ndácú-yu càháⁿ-yu tnúhu càháⁿ-ó ndàcáⁿ táhú-ó ndihí-yu núu Yã Ndiòxí chi ñã túú tècú tnùní-yu tnúhu càháⁿ-ó. ¹⁷ Te váha-ni quède-o sá dúcáⁿ càháⁿ-ó ndàcáⁿ táhú-ó núú Yã Ndiòxí, te ñicó-ñí sá tnúhu-áⁿ ñã túú chindee-xi ñáyiú nàcuáa cuita níhí ndéé-gã-yu cundecú-yu ichi-gá. ¹⁸ Te yúhú ío ndàcáⁿ táhú-í núú Yã Ndiòxí chi càháⁿ-í tnúhu sá ñã túú xìní-í tnúhu sá dácàhu iní ñahá Espíritú-gá xii-í, te càháⁿ-gá-í dácúúxí nchaa nchohó. ¹⁹ Te oré tàcá ñáyiú ndècu ichi Yã Ndiòxí dácuahá-yu tnúhu-gá, te càháⁿ-í tnúhu-gá núú-yu sá sá ní cùtnùní iní mee-í nàcuáa ducaⁿ cùtnuní iní-yu nàcuáa ndùu tnúhu càháⁿ-í. Te tnàhá-gá iní-í càháⁿ-í úhúⁿ-ñí tnúhu-áⁿ núú-yu dácúúxí sã càháⁿ-í úxí míl tnúhu sá ñã túú xìní-í, tnúhu sá dácàhu iní ñahá Espíritú Yã Ndiòxí xii-í càháⁿ-í.

²⁰ Te nchòhó ñáyiú ndècu ndihí-í ichi Xítohó Jesucristú, vá caní iní-ndó dàtná sání iní cue landú, chi caní iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú lihli vá cùndècu-ndo ichi cuehé ichi duha, chi cue landú-áⁿ ñã túú ndècu-güexi ichi-áⁿ. ²¹ Te núú tùtú Yã Ndiòxí càháⁿ-xi nàcuáa ní càháⁿ-gá, te càchí-xi: “Cue tée ñúú

xícá cãháⁿ ndi dííⁿ nũú tnũhu quíhíⁿ-güedé cãháⁿ-güedé tnũhu-í nũú ñãyiú isrãél cada-güedé núù-í, te cuèi ducaⁿ dico vá quindáá iní-yu tnũhu-í", duha ní cachí Yã Ndiõxí te ducaⁿ nĩ ngúndeé núú tütú-gá. ²² Te tnũhu sá dácàhu iní ñáhá Espíritú Yã Ndiõxí xii-o tnũhu sá ñà túú xíní-ó, xiãⁿ cúú-xí cuendá sá cútnùní iní cue ñãyiú ñá túú sàndáá iní tnũhu Yã Ndiõxí sá ñà túú cùu váha iní ñáhá-gã xií-yu. Dico sá cúú-xí cue ñãyiú sàndáá iní tnũhu-gá ñá túú nã quidé-xí sã cúú-xí-yu. Te tnũhu sá dácàhu iní ñáhá Yã Ndiõxí xii-o, xiãⁿ cúú-xí cuendá sá cútnùní iní cue ñãyiú sàndáá iní tnũhu-gá sá ndécú ndíhi ñaha-gá xií-yu, dico ñá túú dùcaⁿ sani iní cue ñãyiú ñá túú sàndáá iní tnũhu-gá. ²³ Te núú ní tacá nchaa nchòhó ñãyiú ndècu ichi Yã Ndiõxí, te nchaa-ndo nĩ ngüíta-ndo cãháⁿ-ndó tnũhu sá dácàhu iní ñáhá Espíritú Yã Ndiõxí xii-ndo tnũhu sá ñà túú xíní-ndó, te mei òré-án quexìo cue ñãyiú ñá túú sàndáá iní tnũhu-gá, ndíhi cue ñãyiú vátá quimí dana-gá tnũhu-gá núú ndécú-ndó, te ñãyiú-án quesàhá-yu sá lúcú-ndó te núú ducaⁿ cãháⁿ-ndó tnũhu sá dácàhu iní ñáhá Espíritú-gá xii-ndo òré quexìó-yu. ²⁴ Dico núú nchaa-ndo cãháⁿ-ndó tnũhu sá dácàhu iní ñáhá Yã Ndiõxí xii-ndo, te mei òré-án quexìo cue ñãyiú ducaⁿ ñà túú sàndáá iní-xi tnũhu-gá, ndíhi cue ñãyiú ducaⁿ ñà túú xíní dana tnũhu-gá-án,

te ñãyiú-án cutnùní iní-yu sá ndécú cuèchi-yu núú-gã, te ngüíta-yu cuáha-yu cuendá sá ñà túú quide váha-yu ndécú-yu cuendá sá cãháⁿ-ndó tnũhu-gá ndèdòho-yu. ²⁵ Te nchaa sá cuèhé sá dúhá nĩ quidé-yu sàni iní-yu yìyuhu ndacu iní-yu, te ngüíta-yu náhmá-yu nchaa sá ñà túú váha ní quidé-yu núú Yã Ndiõxí, te cachí-yu sá ìo cãhnu cuu-gá, te cachí tucú-yu sá ndàá ndécú ndíhi-ndo-gá.

Cada-o nãcuáa tàú-xi cundu

²⁶ Te vitna nchòhó ñãyiú ndècu ndíhi-í ichi Xítohó Jesucristú xini ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yã Ndiõxí, te dava-ndo dàsahú-ndó ñãyiú tnũhu-gá, te dava-ndo cãháⁿ-ndó nãcuáa dàquixi túu Yã Ndiõxí iní-ndó, te dava-ndo cãháⁿ-ndó tnũhu sá dácàhu iní ñáhá Espíritú Yã Ndiõxí xii-ndo tnũhu sá ñà túú xíní-ndó, te dava-ndo cãháⁿ-ndó nãcuáa quèe-xi tnũhu-án. Te nchaa sá quidé-ndó ná cùu-xi nacuáa chindee-xi ñãyiú nãcuáa cuita níhí ndéé-gã-yu cundécú-yu ichi-gá. ²⁷ Te òré cãháⁿ-ndó tnũhu sá dácàhu iní ñáhá Espíritú Yã Ndiõxí xii-ndo tnũhu sá ñà túú xíní-ndó, te úú-ni-ndo àdi úní-ni tnàhá-ndó cãháⁿ-ndó tnũhu-án te vá úú^{ní} cãháⁿ-ndó chi ndéé ndíhi ìíⁿ-ndo te dàtnùní ngüíta ingá-ndó cãháⁿ-ndó. Te xini ñuhu-xi sá ìíⁿ ñãyiú

cáháⁿ-yu nàcuáa quèe-xi tnúhu cáháⁿ-ndó-ǎⁿ.²⁸ Te núu ñá túú ñáiyu təcú tnùní nàcuáa quèe-xi tnúhu cáháⁿ-ndó-ǎⁿ, te núu méé núú ñⁿ-ní-ndó cáháⁿ-ndó tnúhu-áⁿ cáháⁿ ndihí-ndo Yá Ndiöxí te vá cáháⁿ-ndó núú ñáiyu.²⁹ Te òré cáháⁿ-ndó tnúhu sá dácàhu iní ñáhá Yá Ndiöxí xii-ndo te úú-ni-ndo àdi úní-ni tucu-ndo cáháⁿ, te dava-gá-ndó cùndedóho-ndo tnúhu-áⁿ te cáháⁿ-ndó núu váha-ni cáháⁿ-güedé àdi ñá túú váha-ni.³⁰ Te núu ñⁿ-ndo ní dácáhú iní ñáhá Yá Ndiöxí xii-ndo ñⁿ tnúhu cáháⁿ-ndó, te núu ñⁿ-ndo sá cáháⁿ-ndó te ngüíñí-ndó te quíhu tucu ingá-ndó cáháⁿ-ndó nàcuáa ní dácáhú iní ñáhá Yá Ndiöxí xii-ndo.³¹ Te nchaa nchòhó ñáiyu ní nduu táhú cáháⁿ tnúhu sá dácàhu iní ñáhá Yá Ndiöxí, te vá úú-ni cáháⁿ-ndó chi díhna-gá ñⁿ-ndo cáháⁿ te dǎtnùní cáháⁿ tucu ingá-ndó. Te ducaⁿ càda-ndo cuendá nchaa-ndo təcú tnùní-ndó nàcuáa ndùu tnúhu cáháⁿ ñⁿ ñⁿ-ndo, te ducaⁿ te cudíí-gǎ iní-ndó cànchicúⁿ nihnu-ndo ichi-gá.³² Te nchaa ñáiyu cáháⁿ tnúhu Yá Ndiöxí sa nàha-ná méé-yu nàcuáa quidé-yu cáháⁿ-yu tnúhu-gá nàcuáa ñá túú quíde cutexínu-yu.³³ Te Yá Ndiöxí cúu-gǎ Yaá quidé ío váha cùu ñⁿ-nuu-ndo ndecu-ndo, te ñá túú dàticá nuu ñaha-gǎ xii-ndo.

Te na cächí tnúhu-í xii-ndo nàcuáa cáháⁿ-í nchaa núu tàcá cue ñáiyu ndècu ndihí-o ichi Xítohó Jesucristú.³⁴ Te yúhú cächí-í sá vá cúu cáháⁿ cue ñáiyu dìhí òré tàcá-ndó

dàcuaha-ndo tnúhu-gá, chi ñá túú dùcaⁿ cuiní-gá cadá-yu, te quíndáá-ni iní-yu cadá-yu nàcuáa tàú-xi cunduu.³⁵ Te núu ñⁿ sá cuiní-yu nducu tnúhu-yu te ndéé òré nasáá-yu vehé-yu te nducu tnúhu-yu núu yíí-yu, chi ñá túú ndùu váha-xi sá cáháⁿ-yu núu tàcá nchaa ñáiyu dàcuáha ndihí-yu tnúhu-gá.

³⁶ Te chí dándàcu iní sá ñà díú nchòhó cúu-ndó ñáiyu ní ngündecu ndihí tnúhu Yá Ndiöxí díhna nuu nàcuáa datəcú tnúhu-ndo dàva-gá ñáiyu, te ní ñà díú mèe-ni nchòhó sa ní ngündecu ndihí-ndo tnúhu Yá Ndiöxí vitna, núu xíáⁿ vá cächí-ndó sá ío cùnuu-ndo,³⁷ Te núu dava nchòhó sání iní-ndó sá cáháⁿ-ndó nàcuáa dácàhu iní ñáhá Yá Ndiöxí xii-ndo àdi sání iní-ndó sá quidé-ndó nàcuáa chindee ñaha Espíritú-gá xii-ndo, te cuáha váha-ndo cuendá sá ncháá tnúhu cáháⁿ-í-a cùu-xi tnúhu sá ní cächí tnúhu mee Xítohó Jesucristú cada-o.³⁸ Te ndèda-ni càa ñáiyu ndècu ndihí-ndo te núu ñá túú sàndáá iní-yu tnúhu cáháⁿ-í, te vá cadá cuendá-ndó tnúhu cáháⁿ-yu.

³⁹ Te vitna nchòhó ñáiyu ndècu ndihí-í ichi Xítohó Jesucristú, ío caní iní-ndó cáháⁿ-ndó tnúhu sá dácàhu iní ñáhá Yá Ndiöxí núu ñáiyu, te dañá-ndo na cáháⁿ cue ñáiyu ní nduu táhú núu Yá Ndiöxí sá cáháⁿ-yu tnúhu sá dácàhu iní ñáhá Espíritú-gá xii-yu tnúhu sá ñà túú xini-yu.⁴⁰ Te cada-ndo nchaa nàcuáa tàú-xi cunduu nàcuáa ñá túú

nã cuu cundecu-ndo.

15

Ní ndoto Xítoho Jesucristú

1 Te vitna nchòhó ñáyiu ndècu ndihí-í ichi Xítoho Jesucristú cuiní-í sá dándàcu iní-ndó nàcuáa ní dánèhé ñáhà-í xii-ndo tnũhu sá càháⁿ nàcuáa naníhí tãhú-ó, chi ñiu tnũhu-áⁿ nĩ sándáá iní-ndó te nchìcúⁿ nihnu-ndo. ² Te sá xii tnũhu-áⁿ nihnú-ndó ichi cuáháⁿ-ndó núú ndúú tãhú-ndó cundecu-ndo ndihí Yá Ndiõxí ni caa ni quíhíⁿ, te ducaⁿ ndúu tãhú-ndó núú cundècu-ndo ni caa ni quíhíⁿ ndihí Yá Ndiõxí te núu nchìcúⁿ nihnu-ndo nàcuáa ní dánèhé ñáhà-í xii-ndo, te núu ñá túú nchìcúⁿ nihnu-ndo te ñá túú ní sándáá iní-ndó nàcuáa táu-xi cunduu.

³ Te yúhú sa ní cachí tnũhu-í xii-ndo ñⁿ tnũhu sá ïo cùnuu ní nihí-í, chi ní cachí tnũhu-í xii-ndo sã Xítoho Jesucristú ní xihí-gá cuendá nchaa yíca cuèchi-o, te ducaⁿ nĩ cuu chi ducaⁿ càháⁿ-xi núú tùtú Yá Ndiõxí sá dúcáⁿ yãha-gá. ⁴ Te ní chindúxi ñaha-güedë xii-gá te nduu úní ní dándótó ñaha Yá Ndiõxí xii-gá, te ducaⁿ nĩ cuu chi ducaⁿ càháⁿ-xi núú tùtú Yá Ndiõxí. ⁵ Te sátá nĩ ndoto-gá te ní quee túu-gá núú tẽ Pèlú, te dãtnùní ní quee túu-gá núú dãva-gá cue téé ní táuchíúⁿ-gã càháⁿ tnũhu-gá. ⁶ Te sátá dúcáⁿ te dãtnùní ní quee túu-gá núú ùhúⁿ ciendú cue ñáyiu ndècu ichi-gá, te vai-yu xĩndecu-ní-yu vitna chi sacú-ni-yu ní xihí. ⁷ Te dãtnùní ní quee túu-gá núú tẽ Jãcobó, te sátá dúcáⁿ te

dãtnùní ní quee túu-gá núú nchaa cue téé ní táuchíúⁿ-gã càháⁿ tnũhu-gá.

⁸ Te ndéé núú nĩ ndihí-ná te ní quee túu-gá núú mée-í, te òré ní quee túu-gá núú-í te cùu-í dãtná ñⁿ déhe yiquíⁿ vátá sãá-gá nduu càcu chi cùu-í ñⁿ téé ñá túú sàni váha iní-xi cuendá-gá ní cùu. ⁹ Te yúhú ñá túú cùnuu-í dãtná cùnùu cue téé ní táuchíúⁿ Xítoho Jesucristú càháⁿ tnũhu-gá. Te cùu-í ñⁿ téé ní táuchíúⁿ-gã càháⁿ tnũhu-gá, cuèi ñá túú táu-í sá càháⁿ-í tnũhu-gá, chi ní xóo cuu úhú iní-í cue ñáyiu ndècu ichi Yá Ndiõxí. ¹⁰ Dico Yá Ndiõxí ío váha iní-gá chi ní quide ñaha-gã xii-í ñⁿ téé váha, chi ñá túú-gã quidè-í dãtná ní xóo cada-í. Te ío cundahú iní ñáhá-gã chĩndèe ñaha-gã xii-í dico ñá túú àúⁿ nã cuu chĩndee ñaha-gá, chi ío-gá vai chiuⁿ-gá ní cuu sa ta quide-í cuáháⁿ dàcúúxí dãva-gá cue téé ní táuchíúⁿ-gã càháⁿ tnũhu-gá te ñá díú mée-í ducaⁿ quide-í chi mee Yá Ndiõxí ío cundahú iní ñáhá-gã chĩndèe ñaha-gã xii-í quidè-í chiúⁿ-gá. ¹¹ Te ñá túú nã cada-xi cuèi dãva-gã-güedë sa ní cuu vai-gá chiúⁿ-gá quidè-güedë àdi yúhú, chi ñⁿ-ni tnũhu càháⁿ-ndí te tnũhu-áⁿ cúú tnũhu ní sándáá iní-ndó.

Cue ñáyiu ní xihí ndoto-yu

¹² Te nchúhú cue téé càháⁿ tnũhu Xítoho Jesucristú càháⁿ-ndí sá nĩ xihí-gá te ní ndoto-gá, ¿te ná cuendá dãva nchòhó càchí-ndó sã vã ndótó cuè ñáyiu ní xihí? ¹³ Te núu

ducaⁿ sàni iní-ndó sã vã ndótó cuè ñáyiu ní xihí te ni Xítohó Jesucristú ñá túú ní ndòto-gá te núu ducaⁿ. ¹⁴ Te núu dícó Xítohó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñá túú nàndíhi-xi te núu ducaⁿ, te àúⁿ nã cuu sàndáá iní-ndó-gã te núu ducaⁿ.

¹⁵ Te núu dícó cúu-xí ìⁿ sá ndáá tnúhu sàni iní dava-ndo ña, te dàcuandehnde-ndí sá càháⁿ-ndí tnúhu Yá Ndiòxí núu-ndó te núu ducaⁿ, te ñá túú càháⁿ ndáá-ndí núu-ndó sã Yá Ndiòxí ní dándótó-gã Xítohó Jesucristú, te núu ndáá nàcuáa sàni iní dava-ndo sã vã ndótó cuè ñáyiu ní xihí, dico ñá ndáá nàcuáa sàni iní-ndó. ¹⁶ Te núu vã ndótó cuè ñáyiu ní xihí te ni Xítohó Jesucristú ñá túú ní ndòto-gá.

¹⁷ Te núu Xítohó Jesucristú ñá túú ní ndòto-gá ñá, te àúⁿ nã cuu sàndáá iní-ndó-gã te núu ducaⁿ, te ndècu-ni cuèchi-ndo núu Yá Ndiòxí te núu ducaⁿ. ¹⁸ Te núu ndáá nàcuáa sàni iní-ndó ñá te cue ñáyiu ní sàndáá iní ñáhá xii Xítohó Jesucristú ñáyiu ní xihí ní xíta nihnú-yu te núu ducaⁿ. ¹⁹ Te núu nchoo ndècu ndihi-o tnúhu ndee iní núu Xítohó Jesucristú cuèndá-ni sá cùndècu-o ñuyíú-a ña, te cùu-o ñáyiu ío-gá duuⁿ duuⁿ ndàhú sá cúu-xí dàva-gá ñáyiu te núu ducaⁿ.

²⁰ Dico ndáá sá Xítohó Jesucristú ní xihí-gá te ní ndoto-gá núu xíⁿ cùtnùní iní dava-o sã ndótó cuè ñáyiu ní xihí ñáyiu ní sàndáá iní tnúhu-gá. ²¹ Te sá cuèchi ìⁿdi-ni téé ní xíndecu ñuyíú-a

xíⁿ xihí ñáyiu, te sá cuèndá ìⁿdi-ni tucu íngá téé te ndoto cue ñáyiu ní xihí. ²² Te nchaa ñáyiu xihí-yu sá cuèchi ìⁿ téé, te téé-áⁿ cúu-dě ndí Ádán téé díhna nuu ní cuu ñani tnáhá cuè ñáyiu ñuyíú. Te diu-ni ducaⁿ sã cuèndá ìⁿdi-ni téé te ndoto cue ñáyiu ní xihí, te téé-áⁿ cúu-dě Xítohó Jesucristú chi nchaa ñáyiu ndècu ndihi-gá ndotó-yu. ²³ Te díhna-gá Xítohó Jesucristú ní ndoto-gá xíⁿ cùtnùní iní dava-o sã ndùu na quixi tucu-gá ñuyíú-a te dàvã-áⁿ ndoto nchaa ñáyiu ní xihí ñáyiu ní sàndáá iní tnúhu-gá.

²⁴ Te dãtnùní ducaⁿ te sáá nduu nãa nchaa sá ío ñuyíú, te Xítohó Jesucristú danãa-gá nchaa ndi túhú sá cùnùu ío ñuyíú-a, chi danãa-gá nchaa ñáyiu ío cùnùu, ndihi yucu ñãvãha, ndihi nchaa espíritú xínú cuèchi núu-xi. Te ducaⁿ te cùñaha-gã xii Tãtã-ó Dütú Ndiòxí taxi tnùní-gá. ²⁵ Chi Xítohó Jesucristú dacuítí taxi tnuní-gá ndéé ná sàá nduu dànaa-gá nchaa sá cúu ùhú iní ñáhá xii-gá. ²⁶ Te ndéé núu ní ndihi-ná te danãa-gá sá quidé xihí ñáyiu. ²⁷ Te ducaⁿ chi càháⁿ-xí núu tütú Yá Ndiòxí sá mée-gã ní nachihi-gá nchaa sá ío ndaha Xítohó Jesucristú cuèndá sá mée Xítohó Jesucristú taxi tnuní-gá, te vã yõ ìⁿ taxi tnuní ñáhá xii Yá Ndiòxí, chi mee Yá Ndiòxí cúu-gá Yaá ní nachihi-gá nchaa sá ío ndaha Xítohó Jesucristú. ²⁸ Te díhna-gá ní xáhaⁿ Yá Ndiòxí xii Xítohó Jesucristú Yaá cúu Dèhe-gá sá quíndãha-gá nchaa sá ío,

te òré ná quìndaha Xítóhó Jesucristú nchaa sá íó, te cúñaha-gã xii Yá Ndiõxí taxi tnùnì ñáhá-gã xii-gá, te ducaⁿ te mee-nã Yã Ndiõxí taxi tnùnì-gá nchaandi túhú sá íó.

²⁹ Te núu ñá túú ndáá càháⁿ-í, ¿te ná cuèndá dava ñáyiú sànduté-yu cuèndá ñáyiú ní xíhí nõu ñá túú ndáá sá ndótó ñáyiú ní xíhí?

³⁰ Te nchúhú ducaⁿ-ni sàni iní ñáyiú cahni ñáhá-yu xii-ndí, te núu vá ndótó ñáyiú ní xíhí te àúⁿ nã cuu ducaⁿ quide cahnu iní-ndí ducaⁿ cuìní-yu cahni ñáhá-yu xii-ndí te núu ducaⁿ. ³¹ Te nchòhó ñáyiú ndècu ndìhi-í ichi Xítóhó Jesucristú ío váha sàni iní-í cuèndá-ndó, chi ndècu-o ichi-gá. Te na cãchí tnúhu ndáá-í xii-ndo sã ìⁿ nduu ìⁿ nduu ndeé iní ñáhá ñáyiú cahni ñáhá-yu xii-í.

³² Te núu dìcò ndáá sá vã ndótó ñáyiú ní xíhí dàtná cãchí dava ñáyiú, te àúⁿ nã cuu ní xíndecu-í ñuú Éfesú ní cuu úhú iní ñáhá ñáyiú xii-í te núu ducaⁿ, chi ñáyiú-án ñí quidé-yu dàtná quidé ìⁿ quiti dééⁿ sã cúú-xi-í. Te núu ndáá sá vã ndótó ñáyiú ní xíhí ñá, te váha-gá nõu cachí-ó dàtná cãchí ñáyiú: “Vitna na còho-o te na cãxi-o chi tneé idá cuú-ó”, duha cãchí-yu.

³³ Te vá dáñá-ndó mèe-ndo dandahú ñáhá ñáyiú ndècu ichi cuehé ichi duha xii-ndo, te ngüíta-ndo càni iní-ndó dàtná sání iní-yu. Chi quèe ndáá-xi nãcuáa càháⁿ tucu dava-gá ñáyiú, chi cãchí-yu sá nõu ñáyiú quide váha na nihí tnáhã-yu ndìhi ñáyiú ndècu

ichi cuehé ichi duha, te ngüíta ñáyiú quide váha-áⁿ cadá-yu tnáhá-yu nchaa sá cuèhé sá dúhá dàtná quidé ñáyiú-áⁿ.

³⁴ Te ío váha cuáha-ndo cuèndá nãcuáa cundecu-ndo, te vá cadá-gã-ndó dàtná quidé cuè ñáyiú ndècu ichi cuehé ichi duha. Te dava-ndo quide-ndo datná quidé cuè ñáyiú ndècu ichi cuehé ichi duha chi ñá túú sàndáá iní-ndó Yã Ndiõxí. Te duha càháⁿ-í cuèndá sá cúcàhaⁿ nõú-ndó cuèndá nchaa sá ñà túú váha quide-ndo.

Nãcuáa ndoto ñáyiú ní xíhí

³⁵ Te cudana dava-ndo ndècu tnúhu-ndo nõu nása ndoto ñáyiú ní xíhí, te nása cunduu yiqui cuñú-yu òré ndotó-yu. ³⁶ Te nchòhó ñáyiú ducaⁿ càháⁿ cúú-ndó ñáyiú ñá túú tnáhí cùnuni iní-xi, te duha na càháⁿ-í nãcuáa tecú tnùnì-ndó. Te núu ìⁿ tatá ná chíhí-ó te tèhyú mée-xí te xínu déhe-xi. ³⁷ Dico ñá díú sã sá ní xínu ta sàhnu cuáháⁿ ní cùxi-o, te diu-ni ducaⁿ quide-o cuéi triú ndìhi nchaa dava-gá tatá xítú-ó.

³⁸ Te Yá Ndiõxí quidé-gã sácũnduu tatá xínu-áⁿ dàtná cuìní mée-gã cunduu. Te ndèda-ni càa tatá te diu-ni-gá quidé-gã sácũnduu-xi nãcuáa tàú-xi cunduu. ³⁹ Te ndi díⁿ ndáa nchaa yiqui cuñú, chi tucu càa yiqui cuñú nchoo cuè ñáyiú, te tucu càa yiqui cuñú nchaa quiti xica nõú ñúhú, te tucu càa yiqui cuñú nchaa quiti ndáva, te tucu càa yiqui cuñú nchaa chácá. ⁴⁰ Te ducaⁿ ñà túú ìⁿ-ni caa nchaa yiqui cuñú sá íó andiú ndìhi

nchaa yiqui cuñú ñáyiú ió ñuyiú-a, te ducaⁿ ñà túú ìⁿ-ni ndáa vii nchaa sá ió andiú ndihi ñuyiú-a. ⁴¹ Te ducaⁿ cùu tucu-xi nchíanchijì chì tucu dàyehé-xi, te tucu dàyehé yóó, te tucu dàyehé nchaa chódíní, te ducaⁿ ñà túú ìⁿ-ni dayehé nchaa chódíní. ⁴² Te ducaⁿ sátnahá-xi cùu ñáyiú ní xihí te ndoto, chì tucu càa yiqui cuñú-yu sá nguindüxi te tucu cunduu yiqui cùñú-yu òré ndotó-yu, te yiqui cùñú sá ndótó ndihí-yu-áⁿ vǎ ndihí nihnu-gá-xi. ⁴³ Te yiqui cùñú ñáyiú xihí ñà túú nándihí-xi, dico yiqui cùñú sá ndótó ndihí-yu te ió váha cunduu. Te nchaa yiqui cùñú ñáyiú xihí ñà túú tnáhí-gá ndee-xi, dico yiqui cùñú ndoto ndihí-yu xiáⁿ ió cunduu ndee-xi. ⁴⁴ Te yiqui cùñú nchaa ñáyiú xihí cúú-xí cuendá ñuyiú-a, dico yiqui cùñú sá ndótó ndihí-yu xiáⁿ cundecu-ná-xi cuendá Espíritú Yǎ Ndiöxí. Te dàtná ió yiqui cùñú sá cúú-xí cuendá ñuyiú-a, te ducaⁿ ió yiqui cùñú sá cúú-xí cuendá mee-nǎ Espíritú Yǎ Ndiöxí.

⁴⁵ Te núú tütú Yǎ Ndiöxí càchí-xi: “Ndií Àdán ndíí ní xíndecu ndéé díhna ní chihí Yǎ Ndiöxí iní ndíí”, duha càchí-xi núú tütú-gá. Te ingá tucu téé cùu-dé dàtná ndíí Àdán te téé-áⁿ cúú-dě Xítohó Jesucristú, te Yaá-áⁿ quidé-gǎ sá mée-ná Espíritú Yǎ Ndiöxí quidé-xí ndècu-o ichi-gá vitna. ⁴⁶ Te díhna-gá yiqui cùñú cuendá ñuyiú-a

ní ngúndecu, te dàtnùní ngúndecu yiqui cùñú cundecu ndihí mee-nǎ Espíritú Yǎ Ndiöxí. ⁴⁷ Te téé díhna nuu nǎ xíndecu ñuyiú-a chì ñuhu ní cadúha ñaha Yǎ Ndiöxí xii-dé, te téé-áⁿ cúú-dě ndíí Àdán, te ingá tucu téé ní cuuⁿ-dé andiú te téé-áⁿ cúú-dě Xítohó Jesucristú. ⁴⁸ Te nchaa ñáyiú càa yiqui cuñú-yu dàtná cáá yiqui cuñú téé Àdán téé ducaⁿ ní cuáha ñuhu-áⁿ, te nchaa ñáyiú ní nduu táhú cundecu ndihí téé ducaⁿ vèxi cuuⁿ andiú-áⁿ, ñáyiú-áⁿ nduu yiqui cùñú-yu dàtná cáá yiqui cuñú ní nduu táhú-dě ndécú ndihí-dé vitna, te téé-áⁿ cúú-dě Xítohó Jesucristú. ⁴⁹ Te nchaa ñáyiú ñuyiú-a càa-yu dàtná-ni càa datná-ni ndùu téé ducaⁿ ní cuáha ñuhu-áⁿ. Te nchaa nchoo ñáyiú ní nduu táhú cundecu ndihí téé ducaⁿ vèxi cuuⁿ andiú-áⁿ nduu-o dàtná-ni càa datná-ni ndùu téé-áⁿ tucu.

⁵⁰ Te nchòhó ñáyiú ndècu ndihí-í ichi Xítohó Jesucristú càchí tnúhu-í xii-ndo sǎ ncháá nàcuáa càa yiqui cuñú ñáyiú xíndecu vitna vá sáa-xi cundecu-xi núú ndécú Yǎ Ndiöxí táxí tnùní-gá, chì ñuyiú-a ndihí nihnu-xi. Dico sá táu-xi sáá núú ndécú-gǎ táxí tnùní-gá xini ñuhu-xi cuu-xi sá cúdii cundecu. ⁵¹ Te na càchí tnúhu-í xii-ndo ìⁿ tnúhu sá yiyùhu ni cuu: Dava-o cúú-ó te dava-o cùndecu-ni-o, dico nchaa-o nàdáma yiqui cuñú-ó. ⁵² Te uuⁿi ducaⁿ nàdáma yiqui cuñú-ó òré cáháⁿ ìⁿ cútú, te cútú-áⁿ cáháⁿ-xí òré sa ta cùyatni naa ñuyiú. Te òré cáháⁿ cútú-áⁿ

te ndoto nchaa ñáyiú ní xihí ñáyiú ní xíndecu ichi Xítohó Jesucristú, te ducaⁿ te vá ñⁿ ndùu ñⁿ quíú-gã cuú-yu. Te nchaa ñáyiú ndècu vívú te nàdama yiqui cuñú-yu tnahá-yu. ⁵³ Te nchaa yiqui cuñú ndécú ndìhi nchaa ñáyiú ndècu ñuyíú-a vitna ñá túú cùdí-xi chi xihí-xi, dico yiqui cuñú nduu táhú nchoo ñáyiú ndècu ichi Xítohó Jesucristú chi cudí-xi ni caa ni quíhíⁿ chi vá cuú-gá-xi. ⁵⁴ Te òré ná ndùu táhú-ó yiqui cuñú sá dúcáⁿ cùdí ni caa ni quíhíⁿ-án, te vá cùndècu ndìhi-gá-ó yiqui cuñú sá ñá túú cùdí. Te dàvá-án te quee ndáá-xi nàcuáa càháⁿ-xi núú tütú Yá Ndiöxí núú càchí-xi: “Vitna ñá túú-gã xihí ñáyiú chi mee-nã Yá Ndiöxí cùnùu-gá táxí tñuní ñhá-gã xii-yu. ⁵⁵ Te ñá túú tnahí-gá ná ndoho ñáyiú sá cuendá tñuhu xihí, chi vá cóo-gã tñuhu xihí”, duha càchí-xi núú tütú Yá Ndiöxí. ⁵⁶ Te cue ñáyiú ndècu ndìhi-yu tñuhu sá sánú ichi ñaha xii-yu nàcuáa cadá-yu cundecú-yu dico uuⁿ-gá quídè-yu nchaa sá cuèhé sá dúhá. Te sá cuendá nchaa sá cuèhé sá dúhá quidé-yu-án, te xíáⁿ ní ngúndecu tñuhu xihí dándòho ñaha-xi xii-yu. ⁵⁷ Dico táxáhu xii Yá Ndiöxí chi ní taxi-gá tñuhu ndee iní ndécú ndìhi-o sá sàá nduu te vá quíni-gá-ó tñuhu xihí, te ducaⁿ chi ndècu ndìhi-o Xítohó Jesucristú.

⁵⁸ Te xíáⁿ nñu càháⁿ-í dóho nchòhó cue ñáyiú ndècu ndìhi-í ichi Xítohó Jesucristú

chi ío cùu iní ñáhà-í xii-ndo, te càháⁿ-í dóho-ndo sã cáncícúⁿ nihnu-ni-ndo ichi Xítohó Jesucristú cuèi nándi na càda ñaha ñáyiú xii-ndo sá cuendá-gá, te ío nducu ndèe-ni-ndo cada-ndo chiuⁿ-gá, chi sa ñaha-ndo sá ncháá chiuⁿ quide-o cuendá-gá ñá túú àúⁿ nã cuu quide-o.

16

Nàcuáa sàcáⁿ tnahá ñáyiú díhúⁿ

¹ Te na càchí tñuhu-í xii-ndo cuendá díhúⁿ sã sàcáⁿ tnahá-ndó sã cuú-xi ñáyiú ñuú Jerusalén, chi diu-ni duha ní dánèhé-í cue ñáyiú xíndecu ichi Xítohó Jesucristú ndécú ñⁿ ñⁿ xichi distritú Galaciá. ² Te duha cada-ndo ndì tnahá nduu ndumíngú, te ñⁿ ñⁿ-ndo dàquee dñⁿ-ndo sacú díhúⁿ nàcuáa chíndee ñaha Yá Ndiöxí xii-ndo ñihí-ndó cuendá òré quexìo-í te sa cundecu túha díhúⁿ-án. ³ Te òré quexìo-í te mee-ndo cãxi-ndö-yu núu ndèdacàa-yu sàni iní-ndó càda ndáá canehe díhúⁿ-án quíhíⁿ ndaha ñáyiú xíndecu ichi Xítohó Jesucristú ndécú ñuú Jerusalén. Te cadúha-í ñⁿ úú tutú canehé-yu quíhíⁿ cuendá cutnùní iní ñáyiú ñuú Jerusalén nàcuáa ndùu chiuⁿ cuáháⁿ-yu. ⁴ Te núu xini ñuhu-xi sá quíhíⁿ-í te candeca-í-yu quíhíⁿ.

Té Páblú sání iní-dé quíngoto-dé cue ñáyiú ndècu ichi Xítohó Jesucristú

⁵ Te yúhú sání iní-í yáha-í ñⁿ úú ñuú cáá distritú Macèdoniá, te dàtñuní ducaⁿ

te sáa-í núú ndécú-ndó.
 6 Te òré quexìo-í te cudana cundecu ndihì ñaha-í xii-ndo vài nduu, àdi cudana te cundecu ndihì ñaha-í xii-ndo ndèé yáha nchaa yóo quidé vixiⁿ-xi. Te sátá dúcáⁿ te cada ndee iní-ndó chindee ñaha-ndo xii-í òré nucúhuⁿ ichi-í te núú ndèé ichi na quihíⁿ-í. 7 Te duha càháⁿ-í chi núú Yá Ndiòxí ná càchí-gá te cundecu ndihì ñaha tñaa-í xii-ndo òré quexìo-í te ñá díú dicó-ni ichi yáha-í. 8 Te cundecu-ni-í ñúú Éfesú-a ndèé tnahá vico Pentecòstés. 9 Te ducaⁿ chi iha ío tédóho ñáyiu tnúhu Xítohó Jesucristú sá càháⁿ-í núú-yu. Núú xiáⁿ ío váha quèe cuendá cada-í chiuⁿ-gá cuèi ío vài ñáyiu ñá túú tnahá iní-yu sá càháⁿ-í tnúhu-gá.

10 Te núú na quixi coto ñaha té Timùteú xii-ndo, te ío váha cuu iní-ndó càháⁿ ndihì-ndo-dé cuendá ducaⁿ ñá túú nà caní iní-dé cundecu ndihì ñaha-dé xii-ndo, chi tnahá-dé cúú-dé téé quide chiuⁿ Xítohó Jesucristú dàtná quidè-í. 11 Te cuiní-í sá nì ìⁿ-ndo vá caní cuèhé iní-ndó cuendá-dé, te chindee-ndo-dé nàcuáa cuu váha iní-dé òré quixi-dé quixi coto ñaha-dé xii-í, chi yúhú ndihì dava-gá ñáyiu ndècu ichi Xítohó Jesucristú ndétú-ndí-dé quexìo-dé.

12 Te ío ní càháⁿ ndàhú-í núú tē Apolós téé ndècu ndihì-o ichi Xítohó Jesucristú cuendá quixi-dé ndihì dava-gá cue téé ndècu ndihì-o ichi-gá quixi coto ñaha-güedé xii-ndo dico ñá túú ní

cuiní-dé quixi-dé vitna, dico quixi-dé ndèé cuèé-gá.

Tnúhu ndèé núú nǐ ndihì-ná
 13 Te ío quihì iní-ndó cundecu-ndo ichi Xítohó Jesucristú, te vá dáña ndèé-ndó quindáá iní-ndó-gá, te ío yii cunduu iní-ndó cundecu-ndo ichi-gá, te ío nducu ndèe-ndo canchicúⁿ nihnu-ndo ichi-gá. 14 Te ío váha cuu iní tnahá-ndó, te ducaⁿ ío váha cada tñaha-ndo te núú nándi cùu sá váha sàni iní-ndó cada-ndo.

15 Te nchòhó ñáyiu ndècu ndihì-í ichi Xítohó Jesucristú sa ñaha-ndo sá dñhanuu cuè ñáyiu cùu ndi mee té Èstefanás ndécú distritú Acáyá ní sándáá iní-yu tnúhu Xítohó Jesucristú. Te vitna ñá túú dàña ndeé-yu quidé-yu sá váha sá cúú-xí dáva-gá ñáyiu sándáá iní tnúhu-gá. 16 Te càháⁿ ndàhú-í núú-ndó sá quindáá iní-ndó nchaa ñáyiu ducaⁿ xíquide, ndihì nchaa dava-gá ñáyiu ío ndècu ndee quide chiuⁿ ndihì-ndo cuendá Xítohó Jesucristú. 17 Te ío cùdíí iní-í sá nǐ quexìo té Èstefanás, ndihì té Fortunatú, ndihì té Acàcú, chi cue téé-áⁿ nǐ quide-güedé núú-ndó nǐ quide-güedé nchaa sá ñá túú ndàcu-ndo cada-ndo cuendá-í ní cùu. 18 Te ío tàxi-güedé tnúhu ndee iní xii-í, te diu-ni ducaⁿ tàxi-güedé tnúhu ndee iní xii nchòhó tucu, te núú xiáⁿ xíní ñùhu-xi sá cánèhe-ndo sá yíñùhu núú nchaa cue téé duha xíquide váha.

19 Te nchaa ñáyiu xñdecu ichi Xítohó Jesucristú ndécú

dìstritú Àsiá quìde ndee iní ñáhã-yu xii-ndo, te ío cada ndee iní-ndó càchí té Àquilú ndihí ñadìhí-dé tá Priscilá, te ducaⁿ quìde ndee iní ñáhá tucu nchaa ñáyiú tàcá dácuàha tnúhu Yá Ndiõxí vehé-yu xii nchaa nchòhó ñáyiú ndècu ichi-gá. ²⁰ Te cada ndee iní tucu-ndo càchí cue dava-gá ñáyiú ndècu ndihí-o ichi Xítohó Jesucristú. Te ni yùhu ni iní-ndó càda ndee iní tnáhá-ndó ìⁿ ìⁿ-ndo.

²¹ Te vitna ndaha mee yùhú té Páblú tèè-í tnúhu-a quìde ndee iní ñáhà-í xii-ndo.

²² Te ñáyiú ñá túú cùu váha iní-xi núú Xítohó Jesucristú te na cuíta nihnú-yu. Te vitna nchaa-o chí ná càchí-ó sã Xítohó Jesucristú quixi tucu-gá.

²³ Te xicáⁿ táhù-í núú Xítohó Jesucristú sá ná chìndee chitúu ñaha-gã xii-ndo. ²⁴ Te ío cùu iní ñáhà-í xii-ndo nàcuáa ndècu-o ichi Xítohó Jesucristú, te ducaⁿ na cùnduu, te ío chí cáda ndèe iní-ñá vitna.

TUTÚ CÚÚ ÛÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ CÒRINTÚ

Té Pāblú cādúha-dé tutú quihiⁿ ndaha ñáyiu xĩndecu ichi Xítohó Jesucristú ndécú ñuú Còrintú

¹ Yúhú té Pāblú cāhán-í tnúhu Xítohó Jesucristú chí ducaⁿ ñí cachí Yă Ndiõxí cunduu. Te cādúha-í tutú-a ndihi té Timùteú téé ndècu ndihi-o ichi-gá cuendá daquixi-í ndaha nchòhó ñáyiu xĩndecu ichi Yă Ndiõxí ndécú ñuú Còrintú, te tutú-a cuu-xi tnàhá cuendá nchaa ñáyiu cùu cuendá Yă Ndiõxí xĩndecu nchaa ñuú yĩndèhu distritú Acáyá. ² Te xicáⁿ tǎhù-í núú Tǎtá-ó Dútú Ndiõxí ndihi núú Xítohó Jesucristú sá ïo na chĩndee chitúu ñaha-gă xii-ndo, te ñiu-ni ndi ndúú-gá ná càda te ïo váha cuu iní-ndó cundecu-ndo.

Té Pāblú cāhán-dé nchaa nàcuáa ndòho-dé

³ Te chí ná cǎchí-ó sǎ ïo váha iní Dútú Ndiõxí Yaá cúú Tǎtá Xítohó Jesucristú, te ñiu-ni Dútú Ndiõxí cúú-gă Yaá ïo cundahú iní ñáhá xii-o, te ñiu-ni-gá cúú-gă Yaá táxi tnúhu ndee iní. ⁴ Te cuèi nándi ndòho-o ndecu-o dico ñiu-ni Dútú Ndiõxí táxi-gă tnúhu ndee iní xii-o, te ducaⁿ quide-gá cuendá sá nchóo cuǎñaha-o tnúhu ndee iní xii nchaa ñáyiu nándi ndòho

ndecu, te ñiu-ni nchaa tnúhu ndee iní táxi-gă xii-o ñiu-ni nchaa tnúhu ndee iní-áⁿ cuǎñaha-o xii-yu. ⁵ Te Xítohó Jesucristú ïo ní ndoho-gá, te ducaⁿ nchòo tucu ïo ndòho-o, te ducaⁿ ïo vǎi tnúhu ndee iní ñihí-ó ndècu ndihi-o chí ndècu-o ndihi Xítohó Jesucristú. ⁶ Te nchúhú nándi ndòho-ndí ndécú-ndí cuendá sá nchòhó ñihí-ndó tnúhu ndee iní cundecu ndihi-ndo te naníhí tǎhú-ndó. Te Yă Ndiõxí táxi-gă tnúhu ndee iní xii-ndí, te ducaⁿ quide-gá cuendá sá nchòhó tnàhá-ndó ñihí-ndó tnúhu ndee iní-áⁿ te naníhí tǎhú-ndó, te ducaⁿ càda ndee cada cahnu iní-ndó ndòho-ndo datná ndóhó nchúhú. ⁷ Te nchúhú ïo váha sǎni ndáa iní-ndí cuendá-ndó chí ndòho-ndo datná ndóhó-ndí, te ducaⁿ tǎxi Yă Ndiõxí tnúhu ndee iní xii-ndo datná táxi-gă xii-ndí.

⁸ Te nchòhó ñáyiu ndècu ndihi-ndí ichi Xítohó Jesucristú cuiní-ndí cachí tnúhu-ndí xii-ndo nàcuáa ní yáha-ndí cútnàhá ní xĩndecu-ndí distritú Àsiá chí dǎvá-áⁿ ïo ní ndoho-ndí, te luha-ná te vá cúndèe iní-ndí yáha-ndí nchaa tnúndòho-áⁿ ní cùu chí ní xehndé iní-ndí sá vǎ cǎcu-ndí. ⁹ Chí ní sǎni iní-ndí sá ndíyi-ná cuu-ndí ní cùu, te ducaⁿ ñí yáha-ndí cuendá sá ïo-gá quĩndáa iní-ndí Yă Ndiõxí sá díú-gă taunihnu ñaha-gă xii-ndí, te ñá díú mèe-ndí taunihnu-ndí méé-ndí, te ñiu-gá cúú-gă Yaá dándòto cuèi ñáyiu sa ní xíhí. ¹⁰ Te ñiu-ni-gá ní

taunihnu ñaha-gã ñã túú ní sàhni ñaha ñáyiu xii-ndí, te diu-ni-gá táúnihnu ñaha-gá xii-ndí cuëi vitna, te cùtnuní ndáá iní-ndí sá díú-ní-gã taunihnu ñaha-gã xii-ndí núú cuàháⁿ núú vëxi te vá cáhni ñaha ñáyiu. ¹¹ Te nchòhò tnhá-ndó chindee ñaha-ndo xii-ndí chi càháⁿ ndihí-ndo Yã Ndiòxi cuendá-ndí, te ío vai ñáyiu càháⁿ ndihí ñahá-yu xii-gá cuendá-ndí, te ducaⁿ ío vai ñáyiu ndàcáⁿ táhũ-yu núú-gã cuendá nchaa sá vaha quide ñaha-gá xii-ndí.

Té Páblú càháⁿ-dé ná cuendá ñã túú ní nayáha-dé ñuú Còrintú

¹² Te ío váha cùu iní-ndí chi cùtnuní iní-ndí sá cúú-ndí cue téé cùu ndáá dàtná cuiní Yã Ndiòxi cunduu ndècu-ndí ñuyíú-a, te diu-ni ducaⁿ quide-ndí sá cúú-xí-ndó chi mee-gã cùndàhú iní ñahá-gã xii-ndí chindèe ñaha-gá, te ñã túú quide-ndí dàtná sání iní cue ñáyiu ñuyíú-a. ¹³⁻¹⁴ Nchaa nacuáa ndúu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñã túú úhú tecú tnùní-ndó. Te nchòhò sa cùtnuní luha iní-ndó nacuáa quide-ndí ndécú-ndí, te cuiní-ndí sá ío-gá váha tecú tnùní-ndó cuendá sá òré ná quixi tucu Xítohó Jesucristú, te dàvá-áⁿ ío cada nínu ñaha-ndo xii-ndí dàtná cada nínu ñaha-ndí xii-ndo. ¹⁵ Te cuendá xiáⁿ núú ní sani iní-í yáha cáháⁿ-í úú xito núú ndécú-ndó cuendá ío

cudíí iní-ndó. ¹⁶ Chi ní sani iní-í sá òré quíhíⁿ-í distritú Macèdoniá te yáha cáháⁿ-í núú ndécú-ndó, te òré ndixi tucu-í te nayáha cáháⁿ tucu-í, te òré nayáha cáháⁿ-í te taxi-ndo sã cúú ichi-í cuendá quíhíⁿ-í distritú Jùdeá, duha ní sani iní-í ní cùu. ¹⁷ Te sá dúcáⁿ ñã túú ní quixi coto ñaha-í xii-ndo te cudana sàni iní-ndó sã yúhú ñã túú ní sãha váha-í cuendá nacuáa ní sani iní-í cada-í, àdi cudana ñáyiu ndècu ichi cuehé ichi duha, chi cue ñáyiu-áⁿ tnaa càchí-yu sá cúú cadá-yu ¹⁸ sá sání iní-yu cadá-yu te tnaa càchí-yu sá ñhã. ¹⁸ Dico Yã Ndiòxi Yaá ío váha quide ndáa ñaha ndáa ñahá càxi-gá sá nchùhú ñã túú dàma-ndí sá càháⁿ-ndí. ¹⁹ Te yúhú ndihí té Silvanú ndihí té Timùteú dánèhé ñahá-ndí xii-ndo cuendá Xítohó Jesucristú Yaá cúú Dèhe Yã Ndiòxi, te Xítohó Jesucristú cúú-gã Yaá ñã túú dàma-gá tnúhu càháⁿ-gá, chi cùu-gá Yaá càháⁿ mee-ni tnúhu ndáa tnúhu cuiti. ²⁰ Te diu-ni Xítohó Jesucristú cúú-gã Yaá quidé nchaa nacuáa ní cachí Yã Ndiòxi. Te sá cuendá sá dúcáⁿ quide Xítohó Jesucristú xiáⁿ càchí-ó sã ío cãhnu cuu Yã Ndiòxi. Te nchaa-o na càchí-ó sã díú-ní dùcaⁿ na cada-gá. ²¹ Te mee Yã Ndiòxi quidé-gã ndécú-ní-ó ichi Xítohó Jesucristú. Te diu-ni mee-gã ní cáháⁿ ñahá-gã xii-o cuendá cunu cuechi-o núú-gã. ²² Te Yã Ndiòxi ní quide-gá sá nchóó cùu-o ñáyiu cùu cuendá-gá, te ní taxi-gá Espíritú-gá ní

ngúndecu ndihi-o cuèndá cutnùní iní-ó sã ndáá cada ñaha-gã xii-o nãcuáa ní cachí-gá cada-gá.

²³ Te Yá Ndiöxí náhá-gã sá yùhú càháⁿ ndáá-í ná cuèndá vátá quíxí-gã-í quixi coto ñaha-í xii-ndo, te vátá quíxí-gã-í chi ñá túú cuíní-í dandihú-í iní-ndó. ²⁴ Te nchúhú ñá túú tàú-ndí cada yica ñaha-ndí xii-ndo nãcuáa quíndáá iní-ndó Yã Ndiöxí, chi sa sàndáá váha iní-ndó-gã, chi nchúhú cuíní-ndí chindee tnùhu ñaha-ndí xii-ndo nãcuáa ío-gá cudíí iní-ndó cùndecu-ndo.

2

¹ Te ní sani ndáá iní-í sá vã quíxí ndìhi-ni-í quixi coto ñaha-í xii-ndo cuèndá sá vã dándihú-í iní-ndó. ² Te nchòhó cúú-ndó ñãyiu tàxi tnùhu ndee iní xii-í cudíí iní-í ndécù-í, te xiãⁿ nũu ñá túú cuíní-í dandihú-í iní-ndó, chi núu ducaⁿ na càda-í te vá cùndècu váha-gá iní-ndó nãcuáa taxi-ndo tnùhu ndee iní xii-í. ³ Te xiãⁿ nũu ní tendaha-í tutú véxi ndaha-ndo cuèndá sá òré quixi coto ñaha-í xii-ndo, te ðává-áⁿ quíní-í sá quidé-ndó nãcuáa cudíí iní-í te ñá díú dà dandihú-ndó iní-í òré quexio-í, chi nchòhó tàú-ndó càda-ndo sá yùhú cudíí iní-í. Te cùtnuní ndáá iní-í sá nũu yúhú cudíí iní-í te tnàhá nchòhó cudíí iní-ndó cuèndá sá dúcáⁿ cudíí iní-í. ⁴ Te ndàhyú-í sá ndìhú iní-í òré ní cadúha-í tutú ní dáquixí-í ndaha-ndo, chi ío cuéhé sã

sání iní-í, te ñá túú ní dàquixí-í tutú-áⁿ ndaha-ndo cuèndá sá dándihú iní ñáhà-í xii-ndo, chi ní dáquixí-í cuèndá sá nchòhó cutnùní iní-ndó sã ïo cùu iní ñáhà-í xii-ndo.

Nãcuáa tàú ñãyiu ñuú Còrintú cadá-yu cuèndá ìⁿ ñãyiu ñá túú quide ndáá

⁵ Te na càchí tnùhu-í xii-ndo cuèndá ìⁿ téé ní quide ìⁿ sá ñà túú tàú-dé cada-dé ndécú ndìhi-ndo, te ní quide ndàhú-xi luha iní-í cuèndá sá nĩ quide-dé-áⁿ dico nchòhó tnàhá-ndó nĩ dándihú-dé luha iní-ndó, te duha càchí-í sá lúhá-ní nĩ dándihú-dé iní-ndó cuèndá sá vã cuidò-gá-í ná tnùhu càháⁿ-í. ⁶ Te nãcuáa ní ndatnúhu-ndo nĩ quide ndáá-ndó cuèchi téé-áⁿ te sa ndói-gá cuu nãcuáa ní quide-ndo-dé. ⁷ Te vitna tàú-ndó càda cahnu iní-ndó sã nĩ quide-dé, te cuáñaha-ndo tnùhu ndee iní xii-dé chi núu ñáhá te vá nihí ndéé-gã-dé cada-dé sá váha cuèndá sá ndìhú iní-dé. ⁸ Te xiãⁿ nũu càháⁿ ndàhú-í núú-ndó sã cadá tùcu-ndo sá cúú iní-ndó-dé. ⁹ Te ðiu-ni cuèndá iha càháⁿ-í ìⁿ núú tùtú sá sã ní dáquixí-í ndaha-ndo, te ducaⁿ nĩ quide-í xító ndèé ñáhà-í xii-ndo nũu ndisa cuíní-ndó càda-ndo nchaa nacuáa càháⁿ-í. ¹⁰ Te ndèda-ni càa ñãyiu na càda cahnu iní-ndó ìⁿ sá quidè-yu, te tnàhá yúhú cada cahnu iní-í sá quidè-yu tucu. Te núu ìò ìⁿ sá xíní ñùhu-xi cada cahnu iní-í te quide cahnu iní-í, te mee Xìtohó Jesucristú náhá-gã sá dúcáⁿ quide-í, te ducaⁿ quide-í cuèndá sá nchòhó cuu-xi sá

vãha xii-ndo. ¹¹ Te ducaⁿ te sácuihná vã nihí-xi ná cada ñaha-xi xii-o, chi nchoo sã xiní-ó nãcuáa quide-xi.

Té Pãblú ndihú iní-dé ndécú-dé ñuu Tróás

¹² Te ní xica-í cuáháⁿ-í ñuu Tróás cuendá yacáⁿ cáháⁿ-í tnúhu sá cáháⁿ nãcuáa naníhí tãhú-ó tnúhu Xítoho Jesucristú, te órè ní quexio-í te ní nihí-í ìⁿ ichi càhnu cáháⁿ-í tnúhu-gá. ¹³ Dico ñá túú ní cùu váha iní-í chi ñá túú ní naníhí-í té Titú tée ndècu ndihí-o ichi Xítoho Jesucristú, núu xiáⁿ ní quide ndee iní tnáhà-í ndihí cue ñáyiú ñuu-áⁿ, te ní xica-í cuáháⁿ-í distritú Macèdoniá.

Dàquetihú-ó yucu ñávãha chi ndècu ndihí-o Xítoho Jesucristú

¹⁴ Te táxãhu xii Yá Ndióxi chi ducaⁿ-ni sãnu ichi ñaha-gá xii-ndí nãcuáa cunuu-ndí núu yucu ñávãha chi ndècu ndihí-ndí Xítoho Jesucristú, te mee Yá Ndióxi sãchìuⁿ ñaha-gá xii-ndí cáháⁿ-ndí tnúhu-gá. Te cada iní-ó sã tnúhu-gá-áⁿ cúu-xí dàtná ìⁿ yúcú sã ïo váha sãháⁿ te ta xítenuu dicó-xi ndèni ní cuu cuáháⁿ. Te ducaⁿ sãtnahá-xi cùu tnúhu-gá chi nchúhú quidé-ndí nãcuáa ta xítenuu ndèni ní cuu cuáháⁿ. ¹⁵ Te cùu-ndí dàtná dicó ìⁿ yúcú sã ïo váha sãháⁿ, te nãcani cuendá Xítoho Jesucristú núu Yá Ndióxi, te dicó yúcú-ãⁿ nchítá cuèi núu xíndecu cue ñáyiú sa ní naníhí tãhú, te cuèi núu xíndecu cue ñáyiú ta xíta nihnu cuáháⁿ. ¹⁶ Te sá cúu-xí cuè ñáyiú ta xíta nihnu cuáháⁿ-áⁿ, dicó yúcú-ãⁿ

cúu-xí dàtná ìⁿ sá sãhní ñãha xii-yu, dico sá cúu-xí cuè ñáyiú sa ní naníhí tãhú, dicó yúcú-ãⁿ cúu-xí dàtná ìⁿ sá ndécá iní-yu, ducaⁿ sãtnahá-xi cùu nchúhú. Te vitna chí cuãha cuendá núu ná cúu ñáyiú sãni iní-ndó ndàcu cada nãcuáa nduu tnúhu cáháⁿ-í-a. ¹⁷ Chi nchúhú cáháⁿ-ndí tnúhu Yá Ndióxi dico ñá túú ndãhú quidé-ndí ndihí tnúhu-gá dàtná xíquide dava-gá-güedé, chi quide ndáá-ndí cáháⁿ-ndí tnúhu-gá, te mee-gã ní cachí-gá sá dúcáⁿ càda-ndí te ndèhe-gá sã nchúhú quidé-ndí nãcuáa ní cachí-gá, chi ndècu ndihí-ndí Xítoho Jesucristú.

3

Cuendá ingá núu sã vãha ní cachí Yá Ndióxi cada-gá ñáyiú

¹ Te cuèi duha cáháⁿ-ndí núu-ndó dico ñá túú xiní ñuhu-xi sá cũñaha-ndí xii-ndo sã cúu-ndí cue tée quide váha, te ni ñã túú xiní ñuhu-xi cacanehe-ndí ìⁿ tutú núu cáháⁿ-xi sá cúu-ndí cue tée váha danèhé ñáhá xii-ndo datná xíquide dava-gá-güedé, te ni ñã túú xiní ñuhu-xi sã nchòhó taxi-ndo ìⁿ tutú núu cáháⁿ-ndó sã nchúhú cúu-ndí cue tée quide váha. ² Te ñá túú xiní ñuhu-xi ducaⁿ cada-ndí. Te cùtnuní ndáá iní-ndí sã nchòhó cúu-ndó dàtná ìⁿ tutú sã ïo váha cáháⁿ cuendá-ndí. Te ducaⁿ sãtnahá-xi cùu-ndo chi nchaa ñáyiú nihí-yu tnúhu nãcuáa quide-ndo ndècu-ndo, te xiáⁿ cùtnuní iní-yu sã nchúhú cúu-ndí cue tée quide váha. ³ Te nchòhó cúu-ndó

cuendá Xítohá Jesucristú, te cùu-ndo datná tutú-gá te tutú-áⁿ ní táúchíuⁿ-gã xii-ndí ní cadúha-ndí, te mee-ni ndíhi Espíritú Yá Ndiöxí ní ngúndeé tnúhu-áⁿ te ñá díú ndíhi tindá ní ngúndeé. Te ñá díú ìⁿ núú yúú ní ngúndeé chi iní-ndó cùu-xi núú dúcáⁿ ní ngúndeé tnúhu-áⁿ te ducaⁿ sãtnahá-xi cùu-ndo.

4 Te duha cãháⁿ-ndí chi cùtnuní ndáá iní-ndí sá Yá Ndiöxí quidé vãha ñaha-gã xii-ndí, chi ndècu ndíhi-ndí Xítohá Jesucristú. 5 Te nchúhú chi ndàcu-ndí quidé-ndí sá vãha dico ñá díú mèe-ndí ducaⁿ ndàcu-ndí quidé-ndí, chi mee Yá Ndiöxí chindèe ñaha-gã xii-ndí núu ndàcu-ndí quidé-ndí sá vãha. 6 Te mee Yá Ndiöxí ní quide-gá sá nchúhú ndacu-ndí cunu cuechi-ndí núú-gã cãháⁿ-ndí núú ñáyiu cuendá ingá núú sã vãha ní cachí-gá cada ñaha-gã xií-yu. Te sá vãha ní cachí-gá cada ñaha-gã xií-yu-áⁿ ñà túú ìⁿ-ni cuu-xi ndíhi nchaa tnúhu sá ní xáhaⁿ-gã xii ndí Moisés ní chídó tnùní ndí, te ducaⁿ chi espíritú Yá Ndiöxí néhé chiuⁿ-xi nchaa tnúhu sá cãháⁿ cuendá nchaa sã vãha-áⁿ. Te nchaa tnúhu ní chídó tnùní ndí Moisés, dándixi túu-xi iní nchaa ñáyiu ndècu ndíhi tnúhu-áⁿ sã cuíta nihnú-yu cuendá nchaa cuéchi-yu, dico cue ñáyiu ndècu ndíhi Espíritú Yá Ndiöxí ñáyiu-áⁿ ndécú ndíhi-yu tnúhu ndee iní sá cãcu nihnú-yu.

7 Te tnúhu sá ní cãháⁿ Yá Ndiöxí ndéé díhna nãcuáa

cada ñáyiu ní ngúndeé-xi ìⁿ núú yúú quèhéⁿ. Te òré ní dátúu ndí Moisés nãcuáa cãháⁿ tnúhu sá ní cãháⁿ Yá Ndiöxí ndéé núú yúú-áⁿ núú cué ñáyiu isràél, te súuní ní tãsaⁿ núú ndí te ñá túú-gã ní cùu cundehé-yu núú ndí, te ducaⁿ-gã ducaⁿ-gã quidé-xi dátãsaⁿ-xi núú ndí ni cùu ñá túú-gã ducaⁿ ni quide-xi. Te tnúhu ndéé núú yúú-áⁿ dándixi túu-xi iní cue ñáyiu sá cuíta nihnú-yu sá cuendá nchaa cuéchi-yu, te ío vãha ní quide-xi cùtnahá ní ngúndecu ndíhi cue ñáyiu isràél tnúhu-áⁿ. 8 Te sá dúcáⁿ ní quide-xi xiáⁿ cùtnuní sá tnúhu cãháⁿ Espíritú Yá Ndiöxí vitna uuⁿ-gã ducaⁿ ïo-gã vãha quide-xi. 9 Te núu ducaⁿ ïo vãha ní quide-xi cùtnahá ní ngúndecu ndíhi cue ñáyiu isràél tnúhu sá dándixi túu iní-yu sá cuíta nihnú-yu sá cuendá nchaa cuéchi-yu, te uuⁿ-gã ducaⁿ vãha quide-xi vitna ní ngúndecu ndíhi-o tnúhu sá cãháⁿ nãcuáa quide Yá Ndiöxí cuendá sã vã cùndècu-gã cuéchi ñáyiu núú-gã. 10 Te vá cãchí-ó sã cùtnahá ní ngúndecu ndíhi cue ñáyiu isràél tnúhu ndéé núú yúú-áⁿ ïo-gã vãha ní quide-xi, te ñáhá chi uuⁿ-gã vãha quide-xi vitna cuendá tnúhu sá cãháⁿ nãcuáa quide Yá Ndiöxí. 11 Te núu ducaⁿ ïo vãha ní quide-xi cùtnahá ní ngúndecu ndíhi ñáyiu isràél tnúhu sá ñà túú ní cùdí, te uuⁿ-gã ducaⁿ ïo vãha quide-xi vitna ní ngúndecu ndíhi-o tnúhu sá vã ndíhi nihnú

tnahí-gá.

12 Te cùtnuní iní-ndí sá vǎ ndíhí nihnu sá dúcáⁿ ío váha quíde-xi, núu xǎⁿ ío vii ío váha cùu iní-ndí càháⁿ-ndí tnúhu sá nǐ ngúndecu ndíhi-o.

13 Te ñá túú quíde-ndí dàtná ní xóo cada ndíi Moisés, chi ndíi-áⁿ nǐ xóo dàdáhu ndíi núú ndíi òré dátǎsaⁿ-xi núú ndíi cuèndá sá vǎ quíni cue ñáyiú isràél òré ñá túú-gǎ dátǎsaⁿ-xi núú ndíi. 14 Te cue ñáyiú isràél ñá túú ní tècú tnùní váha-yu nàcuáa ní xóo danèhé ñáhá ndíi Moisés xii-yu, te cuèi ndéé vitna ñá túú tècú tnùní-yu òré dácuahá-yu tnúhu sá nǐ cáháⁿ Yǎ Ndiǒxí ndéé díhna nàcuáa cada-gá, te cada iní-ó sǎ dàtná sá nǐ xídáhu núú ndíi Moisés yídáhu núú-yu cuèndá sá vǎ cùtnùní núú-yu cundèhé-yu te tecú tnùní-yu, dico núu tnahá tnúhu-yu ndíhi Xítohó Jesucristú te tecú tnùní-yu.

15 Te cuèi ndéé vitna òré dácuahá-yu nchaa tnúhu sá nǐ chídó tnùní ndíi Moisés nchaa núú tütú ndíi, te cada iní-ó sǎ dàtná sá nǐ xídáhu núú ndíi yídáhu núú-yu chi ñá túú tècú tnùní-yu. 16 Dico cue ñáyiú na tùha ñaha xii Xítohó Jesucristú te tècú tnùní-yu tnúhu-gá.

17 Te Xítohó Jesucristú ìⁿ-ni cùu-gá ndíhi Espíritú Yǎ Ndiǒxí, te nchaa ñáyiú ndècu ndíhi Espíritú-gá ñá túú-gǎ táxí tnùní ñáhá nǐ ìⁿ sá ñà túú váha xii-yu. 18 Te dàtná cúú ìⁿ yutátá sǎ dánèhé núú ñáhá-xí xii ñáyiú ìⁿ sá váha, ducaⁿ sǎtnahá-xí cùu-o chi quíde-o nacuáa cáháⁿ ñáyiú sá ío càhnu cuu Xítohó

Jesucristú, te ducaⁿ ùuⁿ-gá uuⁿ-gá tá cundáá-ó ndècu-o ichi-gá dàtná quíde mèe-gá quíde ndáá-gá. Te Espíritú-gá quíde-xí dùcaⁿ ta cundáá-ó nùú-gǎ cuáháⁿ.

4

1 Te mee Yǎ Ndiǒxí ní cundáhú iní ñáhá-gǎ xii-ndí ní taxi-gá chiuⁿ quíde-ndí càháⁿ-ndí tnúhu-gá, núu xǎⁿ ñá túú tnàhí nàtúhú iní-ndí càháⁿ-ndí tnúhu-gá.

2 Te nchúhú dàquee tihú-ndí nchaandi túhú sá ñà túú váha quíde dayuhu ñáyiú, chi nchaa xǎⁿ cúú-xí ìⁿ sácáⁿ-nùú sǎ cúú-xí-yu, te nchúhú ñá túú sàni iní-ndí dandáhú-ndí ñáyiú te ni ñá túú sàni iní-ndí dama-ndí nàcuáa càháⁿ tnúhu Yǎ Ndiǒxí, chi càháⁿ ndáá-ndí nàcuáa tàú-xí cáháⁿ-ndí, te mee Yǎ Ndiǒxí náhá-gǎ nàcuáa ndùu tnúhu càháⁿ-ndí núú ñáyiú, te ñáyiú-áⁿ cùtnùní iní-yu sá nchúhú càháⁿ váha-ndí. 3 Te cue ñáyiú ñá túú tècú tnùní nàcuáa ndùu tnúhu sá càháⁿ nàcuáa naníhí tàhú-ó càháⁿ-ndí núú-yu, ñáyiú-áⁿ cúú-yu ñáyiú ta xíta nihnu cuáháⁿ.

4 Te cue ñáyiú-áⁿ cúú-yu ñáyiú ío sàá iní-xi chi ñá túú cuíni-yu quíndáá iní-yu tnúhu Xítohó Jesucristú, te xǎⁿ nùu sácúíhná cúnùu-xí núú-yu te nihí-xi nàcuáa quíde-xi dadáhu ndodo iní ñáhá-xí xii-yu cuèndá sá vǎ tècú tnùní-yu tnúhu sá càháⁿ nàcuáa naníhí tàhú-yu, te tnúhu-áⁿ cúú-xí tnúhu sǎ ío váha chi càháⁿ-xi sá ío

càhnu cuu Xítohó Jesucristú, te cùu-gá dàtná mée Tātá-gă Dútú Ndiöxí. ⁵ Te nchúhú ñá túú càháⁿ-ndí cuendá sá cúu-xí mèe-ndí núú-ndó chi càháⁿ-ndí cuendá Xítohó Jesucristú, te cächí-ndí xii-ndo sã díú-gă cúu-gă Yaá ío cùnuu, te cächí-ndí xii-ndo sã mée-ndí cúu-ndí dícó-ni cue tée xínu cuechi sá cúu-xí-ndó, te ducaⁿ quide-ndí nàcuáa cuu vii cuu váha iní Xítohó Jesucristú. ⁶ Te Yá Ndiöxí Yaá ní dáyèhé ndéé cútñahá nee ñuyúú ní cùu, Yaá-áⁿ nĩ cachí-gá sá Xítohó Jesucristú cada-gá nàcuáa tecú tnùní-ó sã ío càhnu cuu mee Yá Ndiöxí. Te sá dúcáⁿ nĩ quide-gá te cada iní-ó sã dàtná tnúhu sá nĩ dáyèhé-gá iní-ó.

Ío quindáá iní-ó Yá Ndiöxí

⁷ Te nchúhú ndécú ndìhi-ndí tnúhu Xítohó Jesucristú, te tnúhu-gá cúu-xí dàtná ìⁿ sá ío váha ñùhu ìⁿ xití quídi ñuhu, te nchúhú cúu-ndí dàtná quídi-áⁿ. Te ducaⁿ sãtnahá-xi cùu-ndí chi tnúhu-gá ío càhnu cuu-xi te mee-ndí ñáhá, te ducaⁿ cùu nàcuáa cutnùní sá mée Yá Ndiöxí quidé-gă nchaa sá váha te ñá díú mèe-ndí. ⁸ Te cuèi ío ndòho-ndí ndécú-ndí dico ñihí-ndí nàcuáa quide-ndí tá yáha-ndí nchaa tnúndòho-áⁿ cuáháⁿ, cuèi áma sa ndètu vii-nã quehdé iní-ndí sá vã ndácú-ndí yáha-ndí nchaa tnúndòho-áⁿ, dico ndàcu-ndí yáha-ndí. ⁹ Te cuèi nànducu ñaha ñáyiu cuíní-yu ná cada

ñahá-yu xii-ndí dico ñá túú dàña ñaha Yá Ndiöxí xii-ndí, te cuèi cànihá-yu xii-ndí dico càcu-ndí ñá túú sàhni ñahá-yu. ¹⁰ Te ndèni ní cuu cuáháⁿ-ndí xicá cùu-ndí, te càcu càcu cahni ñahá-yu xii-ndí dàtná ní quidé-yu Xítohó Jesucristú, te ducaⁿ yáha-ndí cuendá cutnùní sá ndécú túu Xítohó Jesucristú andíu te chĩndee ñaha-gá xii-ndí. ¹¹ Te nchúhú ñini ndècu-ndí ñuyúú-a te nchaa-ni nduu càcu càcu cahni ñaha ñáyiu xii-ndí sá cuendá Xítohó Jesucristú, te ducaⁿ yáha-ndí ndécú-ndí cuendá cutnùní sá Xítohó Jesucristú ndécú ndìhi ñaha-gá xii-ndí cuèi vá cúdii yiqui cùñú-ndí cundecu-xi. ¹² Te sá dúcáⁿ càcu càcu cahni ñaha ñáyiu xii-ndí xiãⁿ nchòhó uuⁿ-gá tá ñihí ndéé-ndó cuáháⁿ ndécú-ndó ìchi Xítohó Jesucristú.

¹³ Te ìⁿ tée ní xĩndecu ndéé sanaha nĩ chídó tnùní-dé núú tütú Yá Ndiöxí núú cächí-xi: “Yúhú ní sándáá iní-í Yá Ndiöxí ñuu xiãⁿ ní càháⁿ-í”, duha ní cachí tée-áⁿ. Te dàtná-ni ní sani iní tée-áⁿ nĩ càháⁿ-dé te diu-ni ducaⁿ sàni iní nchúhú tucu núu xiãⁿ cächí-ndí: “Sándáá iní-ndí Yá Ndiöxí ñuu xiãⁿ càháⁿ-ndí”, duha cächí-ndí. ¹⁴ Te cùtnuní iní-ndí sá ñuu na cùu-ndí te Yá Ndiöxí dandòto ñaha-gá xii-ndí dàtná ní dándótó-gă Xítohó Jesucristú, te tnàhá nchòhó ducaⁿ càda ñaha-gá xii-ndo, te dàvã-áⁿ candeca ñaha-gá xii-o quíhíⁿ

nucúndecu-o núú-gă. ¹⁵ Te nchúhú nándi cùu sá tá yăha-ndí véxi cuendá nchòhó ngúndecu váha-ndo, te ducaⁿ cùta cáyá-gă ñáyiu ngúndecu váha sá xíí Yă Ndiôxí, te diu-ni ducaⁿ cùta cuu vai-gă ñáyiu ndacáⁿ táhũ-yu núú-gă te cachí-yu sá ïo cãhnu cuu-gă.

¹⁶ Te xíăⁿ núu nchúhú ñá túú tnàhí nàtúhú iní-ndí ndécú-ndí ichi Xítohó Jesu-crístú, te cuèi yiqui cùñú-ndí tá xàú-xi cuáháⁿ dico iní-ndí chi uuⁿ-gă uuⁿ-gă tá nihí ndéé-xí cuáháⁿ. ¹⁷ Te nchaa sá ndóhó-ndí ñuyíú-a ñá túú càchí-ndí sá cúú-xí ìⁿ tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te Yă Ndiôxí ïo váha cada ñaha-gă xii-ndí nduu na sáa-ndí núú ndécú-gă, te diu-ni ducaⁿ càda ñaha-gă xii-ndí ni caa ni quíhíⁿ. ¹⁸ Te nchúhú ñá túú nchícúⁿ nihnu-ndí sá tũu ndèhe-ndí ïó ñuyíú-a, chi nchícúⁿ nihnu-ndí sá vătá quíní-gă-ndí ndécú àndiu, te ducaⁿ quide-ndí chi nchaa sá tũu ndèhe-ndí ïó ñuyíú-a vá cúdĩ-xi cundecu-xi, te nchaa sá ñà túú tũu ndècu andiu xíăⁿ cudíi-xi cundecu-xi ni caa ni quíhíⁿ.

5

¹ Te yiqui cùñú-ó cùu-xi datná ìⁿ vehe, te vehe-áⁿ ñà túú cúdĩ-xi, te ducaⁿ sãtnahá-xi cùu yiqui cùñú-ó chi vá cúdĩ-xi, te na sáa nduu vă cùndècu-gă-ó ndihí yiqui

cùñú-ó, te Yă Ndiôxí taxi-gă ìⁿ yiqui cùñú sáa sã cúú-xí-ó, te xíăⁿ cúú-xí dàtná ìⁿ vehe sá ñà túú ní càdúha cue ñáyiu ñuyíú-a, chi mee Yă Ndiôxí ní cadúha-gă vehe-áⁿ te vehe-áⁿ cudíi-xi cundecu-xi ni caa ni quíhíⁿ andiu. Te ducaⁿ sãtnahá-xi cùu yiqui cùñú sá táxí Yă Ndiôxí xii-o chi cudíi-xi cundecu-xi ni caa ni quíhíⁿ. ² Te nchúhú ndècu ndihí-gă-ndí yiqui cùñú-ndí sá ndécú ndihí-ndí vitna te sama cuíní-ndí sá ïo ndihí taxi Yă Ndiôxí yiqui cùñú sáa cùndecu ndihí-ndí. ³ Chi mee-gă vá dáñá-gă sá dúcáⁿ-ní cùnduu-ndí cundecu-ndí, chi dai taxi-gă yiqui cùñú sáa-áⁿ xii-ndí. ⁴ Te nini ndècu-ndí ndihí yiqui cùñú-ndí vitna ïo sàni iní-ndí te ndihú iní-ndí, dico ñá díú sã dúhá quide-ndí te ñá túú-gă tnàhá iní-ndí cundecu-ndí ndihí yiqui cùñú-ndí, chi cuíní-ndí sá Yă Ndiôxí ïo ndihí taxi-gă yiqui cùñú sáa nduu táhú-ndí, chi xíăⁿ cudíi-xi ni caa ni quíhíⁿ te yiqui cùñú-ndí sá tá ndihí nihnu cuáháⁿ-a vá cúdĩ-xi cundecu-xi. ⁵ Te ducaⁿ tnàhí ní cachí Yă Ndiôxí cunduu sá dúcáⁿ nduu táhú-ó yiqui cùñú sáa-áⁿ, te ní taxi-gă Espíritú-gă ní ngúndecu ndihí-o cuendá cutnùní iní-ó sã ndàá taxi-gă yiqui cùñú sáa-áⁿ nduu táhú-ó.

⁶ Te xíăⁿ núu nchúhú nihí ndéé-ndí ndécú-ndí, te cùtnuní iní-ndí sá nini ndècu-ndí ndihí yiqui

cùnú-ndí sá ndécú ndìhi-ndí vitna te vátá sàá-gá-ndí cundecu-ndí mei nùú ndécú Xítohó Jesucristú. ⁷ Te ducaⁿ cùtnuní iní-ndí chi sàndáá iní-ndí Yá Ndióxi ndécú-ndí ñuyíu-a cuèi ñá túú xìní-ndí-gá. ⁸ Te ío váha cùu iní-ndí ndécú-ndí, te sàni iní-ndí sá vâha-gá sá nùu vá cùndècu-gá-ndí ndìhi yiqui cùnú-ndí sá ndécú ndìhi-ndí vitna. Te ducaⁿ sàni iní-ndí chi váha-gá cundecu-ndí mei nùú ndécú Xítohó Jesucristú. ⁹ Te ío ndùcu ndee-ndí quidé-ndí nàcuáa cuu víi cuu váha iní Xítohó Jesucristú vitna ndècu-ndí ñuyíu-a, te ðiu-ni ducaⁿ càda-ndí cuèi òré vá cùndècu-gá-ndí. ¹⁰ Te dacuitíi sã ncháá-ó cùndecu-o núú Xítohó Jesucristú ìⁿ nduu, te ðavá-áⁿ mee-gã cáháⁿ-gá te núu nása ndùu chiuⁿ ní quide-o ìⁿ ìⁿ-o, núu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxi-gã nduu táhú-ó.

Nàcuáa ní cuu ní ngúndecu váha-o ndìhi Yá Ndióxi

¹¹ Te nchúhú quíyùhú iní-ndí nàcuáa cada Xítohó Jesucristú, núu xíáⁿ càháⁿ-ndí tnúhu-gá núú ñáyiú cuendá xínu iní-yu tuha ñàhá-yu xii-gá. Te mee Yá Ndióxi sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùní iní-ndó nàcuáa quide-ndí ndécú-ndí.

¹² Te sá dúhá càháⁿ-ndí te vá caní iní-ndó sá nchúhú càháⁿ váha-ndí cuendá-ndí nàcuáa nchòhó cuu váha iní ñàhá-gã-ndó xii-ndí te ñàhá, chi duha càháⁿ-ndí cuendá sá nchòhó níhí-ndó tnúhu cáháⁿ váha-gã-ndó cuendá-ndí núú ñáyiú. Te ducaⁿ ñíhí-ndó tnúhu cùñaha-ndo xii cue ñáyiú quide nínu mee-xi, chí cue ñáyiú-áⁿ ñá túú quide cuendá-yu nása ndècu iní-yu. ¹³ Te núu nchòhó sání iní-ndó sá lúcú-ndí cuendá nàcuáa quide-ndí ndécú-ndí te cùu-xi cuendá Yá Ndióxi, àdi núu sàni iní-ndó sá ñá túú lúcú-ndí cuendá nàcuáa quide-ndí ndécú-ndí te cùu-xi sá vâha sá cúu-xí-ndó. ¹⁴ Te quide-ndí nàcuáa cuìní Xítohó Jesucristú chi cùtnuní iní-ndí sá ío cùu iní-gá nchaa ñáyiú, te ducaⁿ xìní ndáá-ndí sá ní xíhí-gá cuendá ncháá-yu, te xíáⁿ nùu cada iní-ó sá ðàtná tnúhu sá ncháá ñáyiú ní xíhí-yu ndìhi-gá. ¹⁵ Te ducaⁿ ní xíhí Xítohó Jesucristú cuendá nchaa ñáyiú chí cuìní-gá sá ncháá-yu cundecu-yu cadá-yu nàcuáa cuìní méé-gã te vá cadá-yu nàcuáa cuìní méé-yu, chí mee-gã ní xíhí-gá te ní ndoto-gá cuendá cuu-xi sá vâha sá cúu-xí-yu. ¹⁶ Te xíáⁿ nùu nchúhú ñá túú-gã ná sání iní-ndí cuendá tnàha ñáyiú-ndí nùu nàndìhi-yu àdi ñá túú nàndìhi-yu ðàtná ní xóo caní iní-ndí cútnàhá ní xíndecu-ndí ichi cuèhé ichi duha, te ðavá-áⁿ ní xóo caní iní-ndí cuendá Xítohó

Jesucristú dàtná sání iní cue ñáyi ndècu ichi cuehé ichi duha vitna. ¹⁷ Te nchaa nchoo ñáyi ní tnahá tnúhu ndihí Xítoho Jesucristú ní nduu-o dàtná ìⁿ ñáyi saa, te ducaⁿ chi ñá túú-gã quidé-ó dàtná ní xóo cada-o cùtnàhá ní xíndecu-o ichi cuehé ichi duha, chi ní ngúta-o quide-o mee-ná sá vaha te nchaa xiáⁿ cúú-xí sá sáá sã cúú-xí-ó chi vátá quíní-gá-ó càda-o.

¹⁸ Te ducaⁿ quide-o ndecu-o chi mee Yã Ndiöxí quidé-gã sá dúcáⁿ càda-o cundecu-o. Te Xítoho Jesucristú ní quide-gá ní ngúndecu váha-o ndihí Yã Ndiöxí vitna, te ducaⁿ chi mee Yã Ndiöxí ducaⁿ tnàhí ní cachí-gá cunduu, te ñu-ní mee Yã Ndiöxí ní taxi-gá chiúⁿ quide-ndí càháⁿ-ndí tnúhu-gá nàcuáa ngúndecu váha cue ñáyi ndihí-gá. ¹⁹ Te ducaⁿ chi mee-gã ní cachí-gá sá Xítoho Jesucristú cada-gá nàcuáa nucúndecu váha nchaa nchoo cue ñáyi ndècu ñuyú-a ndihí Yã Ndiöxí. Te nchaa ñáyi ní tuha ñaha xii-gá ñá túú-gã sání iní-gá sá ñáyi-áⁿ nacháhu-yu cuéchi-yu núú-gã. Te mee Yã Ndiöxí ní taxi-gá chiúⁿ quide-ndí càháⁿ-ndí tnúhu-gá núú ñáyi nàcuáa ngúndecu ndihí ñaha váha-yu xii-gá. ²⁰ Te Xítoho Jesucristú ní cachí-gá sá nchúhú cáháⁿ-ndí tnúhu-gá núú nchaa ñáyi, te sá dúhá quide-ndí càháⁿ-ndí tnúhu-gá te quide-ndí núú Yã Ndiöxí càháⁿ-ndí yuhu-gá, te xiáⁿ nùu càháⁿ ndàhú-ndí núú-ndó sã tnàhá tnúhu-ndo

ndihí Yã Ndiöxí cuendá cundecu váha-ndo ndihí-gá, te duha càháⁿ-ndí chi ducaⁿ càchí Xítoho Jesucristú cada-ndí. ²¹ Te Xítoho Jesucristú cúú-gã Yaá ñá túú tnàhí cuéchi-xi, dico Yã Ndiöxí ní quide ñaha-gã xii-gá dàtná ìⁿ ñáyi ndècu cuéchi-xi, te ducaⁿ chi Xítoho Jesucristú ní xido-gá cuéchi nchaa nchoo ñáyi ñuyú-a, te ducaⁿ ní xido Xítoho Jesucristú nchaa cuéchi-o cuendá sá nùu na tnàhá tnúhu-o ndihí-gá te cudíu-o núú Yã Ndiöxí, te ducaⁿ ní cuu chi mee Yã Ndiöxí ducaⁿ ní cachí-gá cunduu.

6

¹ Te nchoo ìⁿ-ni cùu-o quide chiúⁿ-o cuendá Yã Ndiöxí nùu xiáⁿ càháⁿ ndàhú-ndí núú-ndó sã vã dicó-ni ducaⁿ cùndedóho-ndo tnúhu Yã Ndiöxí, chi cada-ndo nàcuáa na chindee ñaha-ni-gá. ² Chi mee-gã càchí-gá ìⁿ xichi núú tütú-gá núú càchí-xi:

Sáá nduu te cundàhú iní ñáhà-í xii-ndo chindee ñaha-í cuendá naníhí tãhú-ndó,

te ní sáá nduu tàú-xi sá cundàhú iní ñáhà-í xii-ndo chindee ñaha-í cuendá naníhí tãhú-ndó, núú xiáⁿ ní xíndedóho-í tnúhu ní cáháⁿ-ndó te ní chindee ñaha-í xii-ndo nàcuáa naníhí tãhú-ndó.

Duha càchí-gá núú tütú-gá. Te vitna cùu-xi nduu cundàhú iní ñáhà Yã Ndiöxí chindee ñaha-gá, te cùu-xi nduu naníhí tãhú-ó.

3 Te nchúhú ñá túú quíde-ndí ìíⁿ sá ñà túú tàù-ndí cada-ndí sá cúú-xí ñáyiú, chi cuíní-ndí sá vǎ càháⁿ cuèhé-yu cuèndá chiùⁿ quíde-ndí. 4 Te nchaa sá quíde-ndí cúú-xí nàcuáa cutnùní iní cue ñáyiú sá nchùhú xínú cuèchi-ndí núú Yá Ndiòxí, te ío quíde cahnu iní-ndí cuèndá nchaa sá ndóhó-ndí, chi nándí quíde ñaha ñáyiú xii-ndí, te ducaⁿ-ni ta quíde cahnu iní-ndí cuèi nándí-gá nchaa sá tá yǎha-ndí véxi. 5 Te duha ta yǎha-ndí véxi, núú cánìha ñáyiú xii-ndí, núú chíhí ñàhá-yu vecaá, núú cuáá ndeé ñàhá ñáyiú xii-ndí xícuèhé ñàhá-yu, te ío ndòho-ndí quíde-ndí chiùⁿ Yá Ndiòxí, te áma xidí-ndí te áma ñá túú xidí-ndí, te áma nihí-ndí sá xéxí-ndí te áma ñá túú nihí-ndí. 6 Te quíde ndáá-ndí ndécú-ndí, te cùtnuní váha iní-ndí nàcuáa càháⁿ tnúhu Yá Ndiòxí, te quíde cahnu iní-ndí cuèi nándí quíde ñaha ñáyiú xii-ndí, te cùndahú iní-ndí tnàha ñáyiú-ndí, te quíde-ndí nchaa sá váha nàcuáa chindee ñaha Espíritú Yá Ndiòxí xii-ndí, te ío ndisa iní-ndí cúú ìní-ndí cue tnàha ñáyiú-ndí. 7 Te dànehé-ndí ñáyiú mee-ni tnúhu ndáá, te nchaa chiùⁿ quíde-ndí te quíde-ndí nàcuáa chindee ñaha Yá Ndiòxí xii-ndí, te cuèndá sá quíde ndáá-ndí ndécú-ndí nùu xǎⁿ nihí ndeé-ndí dáquèe tíhú-ndí

nchaa sá cuèhé sá dúhá. 8 Te dava ñáyiú quíde nínu ñàhá-yu xii-ndí, te davá-yu tnúhu cuèhé tnúhu duha càháⁿ-yu xǎháⁿ-yu xii-ndí, te davá-yu xícáháⁿ váha-yu cuèndá-ndí te davá-yu xícáháⁿ cuèhé-yu, te davá-yu càchí-yu sá dándàhú-ndí ñáyiú dico ñá ndáá chi càháⁿ ndáá-ndí. 9 Te davá-yu càchí-yu sá ñà túú xìní-yu ná ñáyiú cùu-ndí, te davá-yu càchí-yu sá xìní-yu yoo cùu-ndí, te davá-yu cuíní-yu cahni ñàhá-yu xii-ndí dico vátá cáhní ñàha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiòxí, te cuèi ndòho-ndí dico ñá túú cùu-xi sá cùú-ndí. 10 Te cuèi ndìhú iní-ndí dico ñá túú dàña ndeé-ndí sá cúdí ìní-ndí, te cùu-ndí cue téé ndàhú dico sànu ichi-ndí vǎi ñáyiú ichi Yá Ndiòxí cuèndá ngúndecu váha-yu sá cuèndá-gá, te cuèi ñá túú nǎ ndécú ndìhi-ndí dico ñá túú nǎ cúmǎní xii-ndí.

11 Te nchòhó ñáyiú ndècu ndìhi-í ichi Xítohó Jesucristú ndécú ñyú Còrintú ío cùu iní ñàhá-ndí xii-ndo, te ni yùhu ni iní-ndí càháⁿ-ndí nchaa tnúhu càháⁿ-ndí sá cúú-xí-ndó. 12 Te nchúhú chi ni yùhu ni iní-ndí cúú ìní ñàhá-ndí xii-ndo, dico nchòhó chi ñá túú dùcaⁿ quíde-ndo sá cúú-xí-ndí. 13 Te yúhú càháⁿ ndàhú-í núú-ndó dàtná quíde ìíⁿ téé cùu tátá òré càháⁿ ndìhi-dé cue déhe-dé sá ni yuhu ni iní-ndó cùu iní ñàhá-ndó xii-ndí dàtná quíde

mèe-ndí cúú ìní ñáhá-ndí
xii-ndo.

*Nchoo cùu-o datná ìⁿ vehe
Yá Ndiòxí*

14 Te cue ñáyiú ñá túú sàndáá ìní tnúhu Xítohó Jesucristú, te vá cúú ìⁿnuu-ndo ndihí-yu cada-ndo dàtná xíquidé-yu, chi ðìⁿ cuu nchaa sá vǎha te ðìⁿ cuu nchaa sá cuèhé sá dúhá, te ñúmí nchĩçanchii ndihí niú chi ñá túú ìⁿ-ni cuu-xi. Te ducaⁿ sǎtnahá-xi cùu nchaa sá vǎha ndihí nchaa sá cuèhé sá dúhá chi ñá túú ìⁿ-ni cuu-xi. 15 Te ðìu-ni ducaⁿ ñà túú ìⁿ-ni cuu Xítohó Jesucristú ndihí sácuíhná, te ðìu-ni ducaⁿ ñǎ túú ìⁿ-ni cuu ñáyiú sàndáá ìní ñáhá xii Xítohó Jesucristú ndihí ñáyiú ñá túú sàndáá ìní ñáhá xii-gá. 16 Te ðìu-ni ducaⁿ sǎtnahá tucu-xi cùu vehe Yá Ndiòxí ndihí nchaa sá cǎchí ñáyiú cùu ndiòxí ní cadúha cue téé ñuyíú-a, chi vá cúú quíhi ni ìⁿ xíáⁿ xití vehe-gá. Te nchoo cùu-o datná vehe Yá Ndiòxí Yáá ndécú tũu andiú, chi mee-gǎ cǎchí-gá núú tütú-gá núú cǎchí-xi:

Yúhú vá cúmǎní cundecu-í
ndihí-yu nděni ní cuu
na cùndecú-yu,

te ðìu-ni yúhú cuu-í
Ndiòxí-yu,

te mèé-yu cuú-yu ñáyiú cùu
cuendá-í.

Duha cǎchí-gá núú tütú-gá.
17 Te xíáⁿ nũu cǎchí tucu-gá
ingá xichi núú tütú-gá núú
cǎchí-xi:

Chí tá quèe tnuú nchaa ñáyiú
ñá túú sàndáá ìní ñáhá
xii-í,

te vá cǎní ìní-ndó cǎda-ndo ni
ìⁿ sá cuèhé sá dúhá,

te ducaⁿ te queheⁿ cuendá
ñáhà-í xii-ndo,

18 te yúhú cuu-í Tǎtá-ndó,

te nchòhó cuu-ndo cuè déhe
ducuⁿ-í, ndihí cue déhe
yoco-í,

duha cǎháⁿ yúhú Yáá ío cǎhnu
cuu.

Duha cǎchí-gá núú tütú-gá.

7

1 Te sá dúcáⁿ ío váha cǎháⁿ
Yá Ndiòxí sá cúú-xi-ó nũu xíáⁿ
cǎháⁿ-í dóho nchòhó ñáyiú
íó cùu ìní-í sá dùuⁿ duuⁿ
daña-o nchaa sá cuèhé sá
dúhá, chi nchaa xíáⁿ ñá túú
cùu-xi sá vǎha sá cúú-xi ìní-ó
ndihí yiquí cuñú-ó, te cada-o
nǎcuáa tǎu-xi cunduu nǎcuáa
cundáá-ó nũu Yá Ndiòxí, te
cada-o sǎ néhé-ó sǎ yíñũhu
núú-gǎ.

*Cue ñáyiú ñuú Còrintú quidé
vǎha-yu*

2 Te ni yùhu ni ìní-ndó
chì cúú ìní ñáhá xii-ndí, chi
nchúhú vá yõo ìⁿ quíde úhú
ìní-ndí, te ni vǎ yõo ìⁿ dàcuíta
nihnu-ndí, te ni vǎ yõo ìⁿ
dàndahú-ndí. 3 Te sá dúhá
cǎháⁿ-í te vá cǎní ìní-ndó sǎ ìⁿ
cuéchi dàcaa-í ðiquí-ndó, chi
dàtná sa ní cǎchí-í xii-ndo sǎ
yúhú ío cùu ìní ñáhà-í xii-ndo,
te cuèi vitna ndècu-gá-ó
ñuyíú-a àdi cuéi na cùú-ó dico
ðìu-ni ducaⁿ cùu ìní ñáhà-í
xii-ndo. 4 Te yúhú ío váha sǎni
ìní-í cuendá-ndó, te ducaⁿ ío
váha cǎháⁿ-í cuendá-ndó, te
íó ndècu ndihí-í tnúhu ndee
ìní cuendá-ndó, te ío cùdíí
ìní-í sá cuendá-ndó cuèi nándi

ndòho-í ndihi dava-gá-güedé ndécú-ndí.

⁵ Te nchúhú cútnàhá ní sáháⁿ-ndí distritú Macèdoniá, te ñá túú tnàhí ni ndètátú-ndí cuendá nchaa sá nĩ yáhandi chi ío ní ndoho-ndí cuendá nchaa sá nĩ quidé-yu, chi ío ní cuándeé ñáhã-yu xii-ndí, te ío ní sani iní-ndí nũu nása-gá yáha-ndí ní cùu. ⁶ Dico Yá Ndiòxí ní taxi-gá tnúhu ndee iní xii-ndí òré ní quexio té Titú núú ndécú-ndí, te diu-ni Yaá-áⁿ cúú-gã Yaá sãñaha-gã tnúhu ndee iní xii cue ñáyiú ndìhú iní-xi. ⁷ Te ducaⁿ nĩ taxi Yá Ndiòxí tnúhu ndee iní xii-ndí cuendá sá nĩ quexio té Titú núú ndécú-ndí, te ñá díú-ní sã cuendá ní quexio-dé chi ní níhí tucu-ndí tnúhu ndee iní cuendá ní caní-dé cuendú núú-ndí sá nchòhó ní sãñaha-ndo tnúhu ndee iní xii-dé, te ní cachí tnúhu-dé xii-ndí sá nchòhó ío cuení-ndó cáháⁿ ndihi ñaha-ndo xii-ndí, te ní cachí tnúhu tucu-dé xii-ndí sá nchòhó ío ndìhú iní-ndó cuendá nàcuáa cùu ndecu-ndo ni cuu, ndihi cuendá sá ío sàni iní-ndó cuendá-í, te sá dúcáⁿ ndùu cuendú ní caní-dé núú-ndí nũu xiãⁿ ío ní cudíí iní-í.

⁸ Te nchòhó ní ndìhú iní-ndó cuendá tnúhu cáháⁿ-í núú tutú sá ní dáquixí-í ndaha-ndo, te òré ní níhí-í tnúhu sá ndìhú iní-ndó te tnaa-ni ní ndixi cuéchi iní-í sá dúcáⁿ nĩ quide-í te dãtnùní ñá túú-gã ní ndixi cuéchi iní-í.

⁹ Te vitna ní ndìhú iní-ndó, te xiãⁿ ní quide-xi ní ndixi cuéchi iní-ndó sã ñà túú quide

váha-ndo ndècu-ndo ni cuu, te ní cudíí iní-í dico ñá díú cuendá sá ni ndìhú iní-ndó nĩ cudíí iní-í chi cuendá sá nĩ ndixi cuéchi iní-ndó, te ní ndìhú iní-ndó nàcuáa ní cuu váha iní Yá Ndiòxí, te xiãⁿ nũu ní cuu-xi ìⁿ sá váha sá cúú-xí-ndó cuendá tnúhu ní cáháⁿ-í te ñá túú ní cùu-xi ìⁿ sá cuéhé sá cúú-xí-ndó.

¹⁰ Te nchoo nũu na ndìhú iní-ó nàcuáa cuu váha iní Yá Ndiòxí, te ndixi cuéchi iní-ó te núu ñá túú quide váha-o ndècu-o, te sá dúcáⁿ quide-o te nàníhí tàhú-ó, te vá ndìhú iní-ó sã dúcáⁿ nĩ quide-o, te dava ñáyiú xindecu ichi cuéhé ichi duha ndìhú iní-yu dico ñá túú ndixi cuéchi iní-yu cuendá nchaa sá ñà túú váha quidé-yu, te sá dúcáⁿ quidé-yu te cuíta nihnú-yu. ¹¹ Te sá dúcáⁿ ní

ndìhú iní-ndó nàcuáa ní cuu váha iní Yá Ndiòxí, te xiãⁿ nũu ndècu ndee-ndo quide-ndo nchaa nacuáa tàú-xi cundu, te vitna ní yùhu ní iní-ndó cáháⁿ-ndó sã quidé váha-ndo, te ío cùdèéⁿ-ndó núú méé-ndó sã ñà túú quide váha-ndo ndècu-ndo ni cuu, te yùhú-ndó ndècu-ndo cuendá sá ñà túú quide váha-ndo ni cùu, te ío ní xúhuⁿ iní ñáhá-ndó xì-í, te ní ndúcú ndéé-ndó nĩ quide ndáá-ndó cuendá té ndècuéchi ndècu ndihi-ndo, te sá dúcáⁿ nĩ quide-ndo te xiãⁿ ní cutnùní sá méé-ndó ñà túú cuéchi-ndo. ¹² Te ní cadúha-í tutú ní dáquixí-í ndaha-ndo, te ní quide-ndo nàcuáa ní cáháⁿ-í, te sá dúcáⁿ nĩ quide-ndo xiãⁿ ní cutnùní

iní-ndó sã ïo cùu iní ñáhá-ndó xii-í. Te Yá Ndiõxí ñáhá-gã sã díú cuendá xiãⁿ ní dáquíxì-í tutú ndaha-ndo, te ñá díú-ní cuendá sã sání iní-í cuendá téé ndècuéchi ndècu ndihi-ndo, te ni ñà díú-ní cuendá ñáyiú ní dándihú téé ndècuéchi-áⁿ iní-xi ní càdúha-í tutú ní dáquíxì-í ndaha-ndo. ¹³ Te cuendá sã quidé vãha-ndo ndècu-ndo xiãⁿ cúu-xí tnúhu ndee iní ndécú ndihi-ndí.

Dico ñá díú-ní xiãⁿ chi tnàhá ío cùdíí iní-ndí cuendá sã ïo cùdíí iní té Títú, te ducaⁿ cùdíí iní-dé chi nchòhó ní sãñaha-ndo tnúhu ndee iní xii-dé. ¹⁴ Te yúhú ñá túú cùcahaⁿ núu-í sã ñi cãháⁿ váha-í cuendá-ndó núú tẽ Títú cùtnàhá vátá quíxí-gã-dé núú ndécú-ndó, chi ní cutnúni iní-dé sã ndáá cãháⁿ váha-í nàcuáa quide-ndo datná cúu-xí sã ndáá nchaa tnúhu dàcuaha ñaha-í xii-ndo. ¹⁵ Te vitna ío-gá váha cùu iní té Títú cuendá-ndó, chi ndàcu iní-dé sã ncháá-ndó ïo váha ní tnii-ndo nchaa tnúhu ní cãháⁿ-dé núú-ndó, te ndàcu tucu iní-dé sã ñi queheⁿ cuendá váha-ndo-dẽ, te ní dátũu-ndo núú-dẽ sã ïo ní quiyùhú iní-ndó sã vã ndácú-ndó càda-ndo nchaa nacuáa tàú-xi cunduu. ¹⁶ Te ío cùdíí iní-í cuendá-ndó chi cùtnuní ndáá iní-í sã ñà túú dàña ndeé-ndó quide-ndo nchaa nacuáa tàú-xi cunduu.

8

Ío váha cuu iní-ó chindee tnaha-o

¹ Te nchòhó ñáyiú ndècu ndihi-ndí ichi Xítohó Jesu cristú càchí tnúhu-ndí xii-ndo

nàcuáa quide ñaha Yá Ndiõxí xii cue ñáyiú xĩndecu ichi-gá ndécú d̀stítú Macèdoniá, chi ío chindee ñaha-gá xií-yu cuendá sã quidé vãha-yu ndécú-yu. ² Te cuèi ndòho vihí-yu ndécú-yu dico ío-ni cùdíí iní-yu, te cuendá xiãⁿ núu ñi yùhu ñi iní-yu ní sacáⁿ tnáhã-yu díhúⁿ sã cúu-xí tnàha ñáyiú-yu, te ñá túú tnàhí ñi xĩnduu díi-yu cuèi ío ndàhú-yu. ³ Te ñá díú-ní nàcuáa ní sani iní-yu ndacú-yu cacáⁿ tnáhã-yu, chi ní quide yica iní-yu ní sacáⁿ tnáhã-gã-yu, te yúhú càchí tnúhu ndáá-í xii-ndo sã ñi yuhu ñi iní-yu ducaⁿ ñi quidé-yu. ⁴ Te ío ní cãháⁿ ndàhú-yu núú-ndí cuendá sã cuãha-ndí tnúhu sã tnàhá-yu chindèé-yu dava-gá cue ñáyiú cùu cuendá Yá Ndiõxí. ⁵ Te ñá díú-ní nàcuáa ní sani iní-ndí ní quidé-yu, chi ní xídó-gã-yu ní quide váha-yu, te ducaⁿ chi mèé-yu ní sani iní-yu sã càdã-yu nchaa nàcuáa cuini Yá Ndiõxí, te dàtnuní ducaⁿ te ní cachí-yu sã cúu càdã-yu nchaa nàcuáa na cũñaha-ndí xií-yu. Te ducaⁿ ñi quidé-yu chi ducaⁿ ñi cuini mée Yá Ndiõxí cunduu. ⁶ Te sã dúcãⁿ ñi quide ñáyiú-áⁿ núu xiãⁿ cãháⁿ ndàhú-ndí núú tẽ Títú sã quíxí tucu-dé núú ndécú-ndó cuendá dàxínu cava-dé chiúⁿ sã ñi ngũita-dé quidé-dẽ dátacá-dé díhúⁿ sã ñi ngũita-ndo sàcãⁿ tnáhã-ndó, te ducaⁿ quide-ndo chi cùndahú iní-ndó tnàha ñáyiú-ndo. ⁷ Te nchòhó cúu-ndó ñáyiú

ío ngòdónúú quide nchaa sá vâha, te ío vâha sàndáá iní-ndó Xítóhó Jesucristú, te ío vâha cùtnuní iní-ndó nâcuáa càháⁿ tnúhu-gá, te ío vâha dàcuaha-ndo ñáyiú tnúhu-gá, te ío ndücu ndee-ndo quide-ndo mee-ni sá vâha, te ducaⁿ ío cùu iní ñáhá-ndó xii-ndí, te sá dúcáⁿ quide-ndo núu xiáⁿ càháⁿ ndáhú-í núú-ndó sá ngòdó núú-gá-ndó càda-ndo sá cúú-xí tnàha ñáyiú-ndo.

8 Dico yúhú ñá túú tàuchiuⁿ-í sá dúcáⁿ càda-ndo, chi cuendá-ni sá càchí tnúhu-í xii-ndo nâcuáa quide dava-gá cue ñáyiú ndècu ichi Xítóhó Jesucristú, chi cue ñáyiú-áⁿ ni yùhu ni iní-yu quidé-yu sá vâha sá cúú-xí tnàha ñáyiú-yu, te càchí tnúhu-í xii-ndo nâcuáa quidé-yu cuendá cutnùní núu nâsa cada-ndo núu ndisa sá cúú iní-ndó cuè tnàha ñáyiú-ndo.

9 Te nchòhó sa xìní-ndó sá Xítóhó Jesucristú ío cùndahú iní ñáhá-gá xii-o, te ío vâha ndècu-gá ní cùu te ní quixi-gá ñuyíú-a ní quide vâha ñaha-gá xii-o, te ñuyíú-a ñá túú ní xíndecu vâha-gá, te ducaⁿ ní quixi-gá ñuyíú-a cuèi ñá túú ní xíndecu vâha-gá cuendá sá nchóó ngündecu vâha-o núú ndécú-gá.

10 Te na càchí tnúhu-í xii-ndo nâcuáa sàni iní-í. Chìuⁿ sá ni yuhu ni iní-ndó ní ngüíta-ndo quide-ndo cuíá ni yâha chi cùu-xi sá vâha sá cúú-xí-ndó núu na dàxínu cava-ndo.

11 Te dàtná-ni ni yùhu ni iní-ndó ní tausaha-ndo chìuⁿ-áⁿ te ducaⁿ-ni ni yuhu ni

iní-ndó dàxínu cava-ndo, te cacáⁿ tnáhá-ndó sá ndécú ndíhi-ndo nacuáa xito mee-ndo ndacu-ndo. 12 Te núu nchòhó ni yùhu ni iní-ndó càcáⁿ tnáhá-ndó sá xító mèe-ndo ndacu-ndo ña, te cùu vâha iní Yă Ndiöxí, chi mee-gă sa nâha-gá nâsa ndècu-o te ndüu vétú-ni iní-gá.

13 Te sá dúhá ndüu tnúhu càháⁿ-í te vá cání iní-ndó sá yúhú cuíní-í sá nchòhó ndoho-ndo cùndecu-ndo te dava-gá-yu ngündecu vâha-yu sá cuendá-ndó. 14 Te vitna ndècu ndee iní-ndó nâcuáa ndacu-ndo chindee-ndo cue ñáyiú xini ñuhu, te nduu ñá túú ndècu ndee iní-ndó te cue ñáyiú-áⁿ chindee ñáhá-yu xii-ndo te núu ndècu ndee iní-yu, te ducaⁿ te ni nchòhó ñá túú nă cumání xii-ndo te ni cuè ñáyiú-áⁿ ñá túú nă cumání xii-yu. 15 Te ducaⁿ te quee ndáá-xi nâcuáa càháⁿ-xi núú tütú Yă Ndiöxí núú càchí-xi: “Cue ñáyiú ío vai sá ni níhí ñá túú ní cùu sobrá xii-yu, te cue ñáyiú sacú ní níhí ñá túú ní cùmání xii-yu”, duha càchí-xi núú tütú-gá.

Té Titú ndihi cue té cùndíhi-dé

16 Te ndàcáⁿ táhù-í núú Yă Ndiöxí chi mee-gá ní quide sá tè Titú ío ñuhu iní ñáhá-dé xii-ndo dàtná ñúhú iní ñáhá-í xii-ndo. 17 Te yúhú ní xáhaⁿ-í xii-dé sá quíxí còto ñaha-dé xii-ndo te ní sâha-dé tnúhu, te ñá díú mèe-ni sá dúcáⁿ ní xáhaⁿ-í xii-dé quixi coto ñaha-dé xii-ndo, chi mee-dé cúdíí tnàhí iní-dé quixi coto ñaha-dé xii-ndo.

18 Te tendaha-ndĩ ñⁿ tée ndècu ndihi-o ichi Xítohó Jesucristú quixi-dé ndihi té Títú, te tée quixi ndihi té Títú-áⁿ cúú-dé ñⁿ tée ío váha càháⁿ cue ñáyiú xĩndecu ichi Xítohó Jesucristú cuendá-dé cuendá sá ío váha quide-dé chiúⁿ Xítohó Jesucristú càháⁿ-dé tnúhu-gá tnúhu sá càháⁿ nàcuáa naníhí tãhú-ó. 19 Te cue ñáyiú xĩndecu ichi Xítohó Jesucristú ñá díú-ní sã càháⁿ váha-yu cuendá-dé, chi tnàhá ní cáxi ñàhá-yu xii-dé cuendá sá cáca cùu ndihi ñaha-dé xii-ndí chindee ñaha-dé tacá sá cúú-xí ñáyiú ndáhú, te quide-ndí chiúⁿ-a cuendá ío cuu càhnu Yá Ndiõxí, te cue ñáyiú cutnùní iní-yu sá nchòhó ni yùhu ni iní-ndó quide-ndo nchaa sá vãha sá cúú-xí cuè tnaha ñáyiú-ndo. 20 Te cuiní-ndí sá vã càháⁿ cuèhé ñáyiú cuendá nàcuáa quide-ndí ndihi sá ngãutnàha sá cúú-xí cuè tnaha ñáyiú-o, te ío vãi cuu-xi. 21 Chi ndècu ndee-ndí quide-ndí nàcuáa cáháⁿ váha Xítohó Jesucristú cuendá-ndí, te quide tucu-ndí nàcuáa cáháⁿ váha ñáyiú sá quidé vãha-ndí.

22 Te tendaha tucu-ndí ingá tucu tée ndècu ndihi-o ichi Xítohó Jesucristú quixi-dé ndihi cue tée úú quixi coto ñaha xii-ndo, te tée quixi ndihi-güedé-áⁿ ñí cuu vãi xito quide-dé nàcuáa cutnùní iní-ndí sá ío ndècu ndee-dé quidé-dé sá vãha, te vitna ío-gá cuiní-dé cada-dé sá vãha vitna quixi-dé núú

ndécú-ndó, chi cùtnuní ndáá iní-dé sá cúú-ndó cuè ñáyiú quide váha. 23 Te càchí tnúhu-í xii-ndo sã tẽ Títú cúú-dé ñⁿ tée cùndihi-í quidé-ndí chiúⁿ Xítohó Jesucristú, te tnàhá-dé cúú-dé ñⁿ tée xĩnu cuechi núú-ndó càháⁿ-dé tnúhu-gá. Te càchí tnúhu tucu-í xii-ndo cuendá cue tée úú quixi ndihi-dé, chi cue tée-áⁿ cúú-güedé cue tée tendaha cuè ñáyiú xĩndecu ichi Xítohó Jesucristú quixi coto ñaha xii-ndo. Te cue tée-áⁿ quidé-güedé nàcuáa cachí ñáyiú sá ío càhnu cuu Xítohó Jesucristú. 24 Te chí cáda sã cúú iní ndisa-ndo-güedé cuendá ducaⁿ na cùtnuní iní nchaa dava-gá ñáyiú xĩndecu ichi Xítohó Jesucristú sá ndàá ndisa ducaⁿ quide-ndo, te ducaⁿ cùtnuní iní-yu sá ndàá ndisa quide váha-ndo dàtná càháⁿ-ndí cuendá-ndó sã quidé vãha-ndo.

9

Cuendá sá ngãutnàha sá cúú-xí cuè ñáyiú xĩndecu ichi Xítohó Jesucristú

1 Te cuendá sá ngãutnàha sá cúú-xí cuè ñáyiú ndècu ichi Xítohó Jesucristú ñá túú-gã xíní ñùhu-xi cachí tnúhu-í xii-ndo núú tütú-a nàcuáa cada-ndo, 2 chi sá cùtnuní iní-í sá ío cuiní-ndó chindee-ndó-yu. Te ducaⁿ-ni ío váha càháⁿ-í cuendá-ndó núú ñáyiú xĩndecu ichi Xítohó Jesucristú ndécú dìstrítú Macèdoniá, te xãhaⁿ-í xii-yu sá nchòhó ñáyiú xĩndecu ichi Xítohó Jesucristú ndécú dìstrítú Acãyá sa ní cuu ñⁿ

cuía ducaⁿ cuiní-ndó càcáⁿ tnáhá-ndó sá cúú-xí cuè ñáyiú ndàhú ndécú ìchi-gá. Te vâi cue ñáyiú distritú Macèdoniá cuiní-yu cacáⁿ tnáhã-yu sá cúú-xí cuè ñáyiú ndàhú ndécú ìchi Xítohó Jesucristú cuendá sá ñí níhĩ-yu tnúhu sá nchòhó ío cuiní-ndó dùcaⁿ cada-ndo. ³ Te cuendá sá sání iní-ndó càda-ndo xiãⁿ tendaha-í cue téé ndècu ndihí-o ìchi Xítohó Jesucristú quixi-güedé núú ndécú-ndó cuendá dätúha ñaha-güedé xii-ndo, cuendá sá vã quée ndèhnde-í núú ñáyiú sá ñí cáháⁿ váha-í cuendá-ndó, te ducaⁿ cündecu túha ndisa-ndo dätná sa ñí cáháⁿ-í núú-yu. ⁴ Chi na cuáháⁿ ndèé quixi-í ndihí ìⁿ úú cue ñáyiú distritú Macèdoniá núú ndécú-ndó te quini-yu sá ñà túú ndècu túha-ndo, te cuahaⁿ núú-í núú-yu sá ñí cáháⁿ váha-í cuendá-ndó te núú ñà túú ndècu túha-ndo, te tnáhá-ndó cùcahaⁿ núú-ndó. ⁵ Te xiãⁿ núú ní sani iní-í sá vãha-gá codonùu cue téé ndècu ndihí-o ìchi Xítohó Jesucristú quixi coto ñaha-güedé xii-ndo cuendá chindee ñàha-güedé tacá sá ñí sani iní-ndó càcáⁿ tnáhá-ndó cuendá sá cündècu túha-xi, te cuu-xí dätná ìⁿ táhú sã ñí quene cuu iní mée-ndó càcáⁿ tnáhá-ndó sá cúú-xí cuè tnaha ñáyiú-ndo. Te ducaⁿ te vã yõo cani iní-xi quesàhá-yu sá nchùhú ní quide yica-ndĩ ducaⁿ ñí sacáⁿ tnáhá-ndó.

⁶ Te nchòhó sa xini-ndó sã ñáyiú na chihí vai tatá te vâi niñí-yu cùu, te cue ñáyiú na chihí sacú tatá te sacú niñí-yu

cùu. Ducaⁿ sãtnahá-xi cùu ñáyiú sàcáⁿ tnáhá sá cúú-xí tnàha ñáyiú-yu. ⁷ Te ìⁿ ìⁿ-ndo càcáⁿ tnáhá-ndó nàcuáa quène cuu iní mée-ndó, te ío váha cuu iní-ndó dùcaⁿ cada-ndo te vã càdã-ndó cuendá-ni sá quidé yica ñaha ñáyiú xii-ndo, chi Yá Ndiõxí cúú vãha iní-gá núú nchàa ñáyiú cùdí^ì iní sàcáⁿ tnáhá sá cúú-xí cuè tnaha ñáyiú-xi. ⁸ Te Yá Ndiõxí ndacu-gá chindee ñàha-gá xii-ndo nàcuáa cundecu váha-ndo, chi diu-gá cada te níhí-ndó nchàa núú sã xini ñùhu-ndo cundecu ndihí-ndo, te ñà túú tnáhí-gá ná cumání xii-ndo, te mee-gã chindee ñàha-gá xii-ndo níhí-ndó ío vâi cundecu ndihí-ndo cuendá ducaⁿ chindee-ndo cue tnaha ñáyiú-ndo. ⁹ Te núú tütú Yá Ndiõxí càchí-xi ìⁿ xichí:

Ìⁿ ñáyiú ío vâi sá ñí sãñahá-yu xii ñáyiú ndàhú,

te sá ñí quide ñáyiú-án ñí cuu-xi sá vãha sá vã yõo cùnaa.

Duha càchí-xi núú tütú-gá. ¹⁰ Te mee Yã Ndiõxí táxi-gã nchaa sá cúú tàtã nchaa nchòhó ñáyiú xitu nãndí sá xítú cuendá cuu sá cúú nchìto-ndo, te diu-gá cada te ío vâi sá nihí-ndó cündecu ndihí-ndo, te ducaⁿ ío-gá vâi sá vãha cada-ndo sã cúú-xí cuè tnaha ñáyiú-ndo. ¹¹ Te Yá Ndiõxí taxi-gá vâi núú sã cündècu ndihí-ndo cuendá ducaⁿ ñí yuhu ñí iní-ndó vâi cuãñaha-ndo sã cúú-xí tnàha ñáyiú-ndo. Te cuendá nchaa sá sàcáⁿ tnáhá-ndó quèheⁿ cuendá-ndí cuu xii

tnàha ñáyi-ndo, te cue ñáyi-áⁿ ío ndacáⁿ táhũ-yu núú Yă Ndiöxí cuendá sá dúcáⁿ sàcáⁿ tnáhá-ndó sá cúú-xí-yu. ¹² Te sá dúcáⁿ quide-ndo sacáⁿ tnáhá-ndó sá cúú-xí cue ñáyi-ndo cuendá Yă Ndiöxí, te ñáyi-áⁿ ñà túú-gă ná cumání xii-yu, te ío ndacáⁿ táhũ-yu núú Yă Ndiöxí sá dúcáⁿ quide-ndo. ¹³ Te ñáyi-áⁿ cutnùní iní-yu sá nchòhó quidé-ndó sá sàndáá ndisa iní-ndó tnũhu Xítóhó Jesucristú, te cuendá xiáⁿ te ñáyi-áⁿ chiñùhú-yu Yă Ndiöxí, te cuendá sá dúcáⁿ nì yuhu ni iní-ndó sàcáⁿ tnáhá-ndó sá cúú-xí-yu ndihí sá cúú-xí nchàa dava-gá ñáyi-ndo, te cachí-yu sá ío càhnu cuu Yă Ndiöxí. ¹⁴ Te ñáyi-áⁿ cáháⁿ ndihí-yu Yă Ndiöxí cuendá-ndó, te ío cuu váha iní ñáhá-yu xii-ndo cuendá sá Yă Ndiöxí chíndèe ñaha-gá xii-ndo quide-ndo sá váha sá cúú-xí-yu ndihí dava-gá ñáyi-ndo. ¹⁵ Te ío ndacáⁿ táhú-ó núú Yă Ndiöxí cuendá sá nì taxi-gá sá ío váha ndècu ndihí-o, te ni ñà cùnùní iní-ó nàsa cundu-ndo tnũhu cáháⁿ-ó cuendá sá váha ní taxi-gá.

10

Té Păblú ndécú ndihí-dé tnũhu ndee iní sá cáháⁿ-dé tnũhu Xítóhó Jesucristú

¹ Te Xítóhó Jesucristú ío càhnu iní-gá, te cùndahú iní ñáhá-gă xii-o chindee ñaha-gá, núú xiáⁿ yúhú té Păblú ducaⁿ quide-í cáháⁿ ndàhú-í núú-ndó nàcuáa cada-ndo. Te dava-ndo càchí-ndó sá yúhú ío ndàhú iní-í òré ndécú

ndihí ñaha-í xii-ndo, te òré ñà túú ndècu ndihí ñaha-í xii-ndo te ío ñà cáà-í. ² Te cáháⁿ ndàhú-í núú-ndó sá cáda-ndó nàcuáa vá cáháⁿ ñà-í núú-ndó òré quixi-í quixi coto ñaha-í xii-ndo. Te cuiní-í sá ndihí tnũhu ñà iní-xi cáháⁿ ndihí-í cue ñáyi-ndo càchí sá ñà-ni cuu-í ndihí cue ñáyi-ndo ñà túú sàndáá iní tnũhu Xítóhó Jesucristú. ³ Te nchúhú cuu-ndí cue tée ñuyú-a, dico ndècu ndee-ndí quidé-ndí nàcuáa ndacu-ndí dáquèe tíhú-ndí nchaa sá cuèhé sá dúhá, dico ñà díú mèe-ndí ducaⁿ ndacu-ndí quidé-ndí, ⁴ te ni ñà sá ío ñuyú-a ñà túú chindee ñaha-xi, chi mee Yă Ndiöxí chíndèe ñaha-gá xii-ndí dáquèe tíhú duu-ndí nchaa núú sá cuèhé sá dúhá. ⁵ Te xiáⁿ núú ñà-ndí tnũhu cáháⁿ-ndí sàdí-ndí yuhu cue ñáyi-ndo cáháⁿ tnũhu sá ñà túú cuu váha iní Yă Ndiöxí, ñáyi-ndo xiquide nínu mee-xi càchí sá ñà túú nàndihí tnũhu-gá. Te quide-ndí sá ñáyi-áⁿ quindáá iní-yu tnũhu Xítóhó Jesucristú. ⁶ Te nchúhú sa ndècu túha-ndí sá dáquètíhú-ndí cue ñáyi-ndo ñà túú cuiní cada nàcuáa cuiní Xítóhó Jesucristú, dico díhna-gá xini ñàhú-xi sá nchàá nchòhó ñáyi-ndo cuiní cada nàcuáa cuiní-gá cundáá-ndó.

⁷ Te nchòhó nàcuáa ndècu sá ndéhé-ndó te ducaⁿ sàni iní-ndó, dico vá dúcáⁿ càni iní-ndó cuendá-ndí. Chi núú cùnùní ndáá iní-ndó sá cúú-ndó cuendá Xítóhó Jesucristú, te díu-ni ducaⁿ táu-ndó

càni iní-ndó cuendá-ndí tucu. ⁸ Te Xítohó Jesucristú ní taxi-gá tnúhu ndee iní ndécú ndíhi-ndí sá dánèhé ñáhá-ndí xii-ndo nàcuáa cuita cuehnu nihnu-ndo ìchi-gá quíhíⁿ, te ñá díú sã dánèhé ñáhá-ndí xii-ndo nàcuáa cuita nihnu-ndo, te cuéi na chido-gá-í cáháⁿ-í cada nínu-í mée-í cuendá tnúhu ndee iní ní taxi Xítohó Jesucristú ndécú ndíhi-ndí, dico vá cúcàhàⁿ núu-í chi càháⁿ ndáá-í. ⁹ Te ñá túú cuení-í sá nchòhó caní iní-ndó sã yúhú dáyùhú ñáhà-í xii-ndo nàcuáa ndùu tnúhu càháⁿ-í núú tütú-í. ¹⁰ Te dava-ndo càchí-ndó sã ténàá ñáhà-í xii-ndo núú tütú-í, te mee-ni tnúhu càhnu sá ïo cùnuu cuu-xi, te càchí tucu-ndo sã òré ndécú ndíhi ñaha-í xii-ndo te ñá túú cà-í sá cúú-í ìⁿ tée cùu váha cùu dico iní-ndó, te càchí tucu-ndo sã ñá túú tnàhá iní-ndó nàcuáa quide-í òré dàcuàha ñaha-í xii-ndo. ¹¹ Te nchòhó ñáyiú ducaⁿ càháⁿ cada cuendá váha-ndo sã dàtná-ni càháⁿ-ndí núú tütú-ndí òdu-ni ducaⁿ quide-ndí òré ndécú ndíhi ñaha-ndí xii-ndo.

¹² Te nchúhú, vá cúú tnàhí càháⁿ-ndí sá ìⁿ-ni cuu-ndí ndíhi cue ñáyiú càháⁿ váha cuendá mée-xí, chi ñáyiú-áⁿ sání iní-yu ná cúú sã váha te quidé-yu te xíãⁿ càchí-yu sá ïo váha quidé-yu, te càchí-yu sá quidé váha-gá-yu dàcúúxí tnàha ñáyiú-yu, te sá dúcáⁿ càháⁿ-yu te quidé-yu dàtná quidé cue ñáyiú ñá túú tnàhí cùtnuní iní-xi. ¹³ Te dico nchúhú ñá túú xidó-ndí cáháⁿ

váha-ndí cuendá-ndí, chi càháⁿ váha-ndí cuendá-ndí dico nàcuáa ndùu chiuⁿ ní taxi Yá Ndiõxí càháⁿ-ndí, chi mee-gã ní cachí-gá ndèé neni sáá-ndí cáháⁿ-ndí tnúhu-gá, te ní sáá-ndí ndèé ñuú-ndó càháⁿ-ndí tnúhu-gá. ¹⁴ Te vitna ndècu ndíhi-ndí tnúhu ndee iní sá tnàhá nchòhó cuu cáháⁿ ndíhi ñaha-ndí xii-ndo, chi díhna-gá nchúhú ní quixi-ndí ní cáháⁿ-ndí tnúhu Xítohó Jesucristú ñuú-ndó, tnúhu sá càháⁿ nàcuáa naníhí tàhú-ó. ¹⁵ Te nchúhú ñá túú quide cahnu-ndí mée-ndí cuendá chiuⁿ quide dava-gá-güedé quesaha-ndí sá chíúⁿ mée-ndí cúú-xí. Te cuení-ndí sá nchòhó cuita quindáá-gá iní-ndó Xítohó Jesucristú, te ducaⁿ te níhí-gã-ndí nàcuáa cada-ndí chiúⁿ-gá nchaa dava-gá xichi núú ní cachí-gá cada-ndí chiúⁿ-gá. ¹⁶ Chi càháⁿ-ndí tnúhu-gá tnúhu sá càháⁿ nàcuáa naníhí tàhú-ó, te yáha-gá-ndí ñuú-ndó quíhíⁿ-ndí nchaa dava-gá xichi càháⁿ-ndí, te vá cádá càhnu-ndí mée-ndí cuendá chiúⁿ sá sã ní quide dava-gá-güedé.

¹⁷ Te cue ñáyiú cuení cada càhnu mee-xi te vá dúcáⁿ càdá-yu, chi mee Xítohó Jesucristú ná càda cahnú-yu-gá. ¹⁸ Te nchaa ñáyiú na càháⁿ váha Xítohó Jesucristú cuendá-yu, ñáyiú-áⁿ cúdíú-yu núú-gã, te ñá túú cúdíú-yu núú-gã cuendá sá càháⁿ váha-yu cuendá

mée-yu.

11

*Cuèndá té Páblú ndihi
cuèndá cue téé cächí sá cáháⁿ
tnúhu Yá Ndiöxí te ñá ndàá*

¹ Te cuèní-í sá nchòhó cada ndee iní-ndó cùndedóho-ndo tnúhu na cáháⁿ-í, chí cáháⁿ-í dàtná cáháⁿ cue ñáyiú ñá túú cùtnuní iní-xi, te cuèi nása-gá ná cùnduu tnúhu cáháⁿ-í dico chí cadá ndèe iní cùndedóho-ndo. ² Chi yúhú ío ñúhu iní ñáhà-í xii-ndo dàtná ñúhú iní ñáhá mée Yá Ndiöxí xii-o, te ní cáháⁿ-í tnúhu Xítohó Jesucristú núú-ndó nùú xíáⁿ ní tnahá tnúhu-ndo ndihi-gá vitna, te sá dúcáⁿ ñí quide-í te cada iní-ndó sá yúhú cúú-í dàtná ìⁿ téé xica ndáhú te nchòhó cúú-ndó dàtná ìⁿ xíchí cuéchi, te Xítohó Jesucristú cúú-gá dàtná ìⁿ téé trándaha ndihi xíchí cuéchi-áⁿ. Te ducaⁿ càda iní-ndó chí na sàá nduu te yúhú na càni cuendá ñáhà-í xii-ndo nùú Xítohó Jesucristú, te cuu-ndo ñáyiú vá cùndècu tnahí-gá cuéchi-xi. ³ Te yúhú-í sá sàcúíhná dandàhú ñáhá-xí xii-ndo vá cání-gá iní-ndó càncicúⁿ nihnu-ndo ñí yuhu ñí iní-ndó ichi Xítohó Jesucristú dàtná nchicúⁿ nihnu-ndo vitna. Te yúhú-í ná yáha-ndo dàtná ní yáha tá Èvá, chí sàcúíhná ñí nduu-xi cóó ñí dándàhú ñáhá-xí xii-xi, chí sàcúíhná-áⁿ ío váha ñí xito-xi nàcuáa ní quide-xi ní dándàhú-xi tá Èvá-áⁿ.

⁴ Te nchòhó, quidé ndèe iní-ndó sàcùndedóho-ndo nchàa tnúhu cáháⁿ cue téé cáháⁿ ingá núú tnúhu cuèndá Jèsús tnúhu

sá ñá túú dànehé ñáhá-ndí xii-ndo, te quide ndee tucu iní-ndó ndèdóho-ndo dànehé ñáhá-güedé xii-ndo cuèndá ingá espíritú, te ñá díú cuèndá Espíritú Yá Ndiöxí sá ñí ngúndecu ndihi-ndo dànehé ñáhá-güedé xii-ndo, te quide ndee tucu iní-ndó ndèdóho-ndo dànehé ñáhá-güedé xii-ndo ingá núú tnúhu sá cächí-güedé cáháⁿ nàcuáa naníhí tàhú-ndó, te ñá díú nàcuáa ndùu tnúhu sá ñí sàndáá iní-ndó cuèndá naníhí tàhú-ndó cáháⁿ-güedé.

⁵ Te cue téé ducaⁿ cáháⁿ-áⁿ cächí-güedé sá Yá Ndiöxí ní tendaha ñàha-gá xii-güedé xicá cùu-güedé cáháⁿ-güedé tnúhu-gá te ío cùnuu-güedé, dico ñá ndàá sá cáháⁿ-güedé tnúhu-gá. Te yúhú cùtnuní iní-í sá cuè téé-áⁿ ñá túú cùnuu-güedé dàtná cùnùu yúhú. ⁶ Te cuèi ñá túú cáháⁿ-í dàtná cáháⁿ cue téé ío váha sàá díquí-xi dico ío váha cùtnuní iní-í cuèndá nchaa sá dácuaáha-í, te yúhú sa quide-í nàcuáa cutnùní iní-ndó sá ío váha cùtnuní iní-í nàcuáa ndùu nchaa tnúhu cáháⁿ-í.

⁷ Te cudana te sàni iní-ndó sá yúhú ñá túú ní quide váha-í sá ñí quide-í mée-í dàtná ìⁿ téé ío ndàhú iní-xi, chí ñá túú ní xicáⁿ-í yáhu-í núú-ndó cuèndá sá ñí cáháⁿ-í tnúhu Yá Ndiöxí tnúhu sá cáháⁿ nàcuáa naníhí tàhú-ó nùú-ndó. ⁸ Te ní queheⁿ-í díhúⁿ ñí taxi dava-gá cue ñáyiú ndècu ichi Xítohó Jesucristú, te díhúⁿ-áⁿ ñí dándóñúhu-í ní saaⁿ-í nchaa sá ñí xini ñúhu-í cùtnàhá ní cáháⁿ-í tnúhu Xítohó Jesucristú núú-ndó.

⁹ Te cútñahá ní xíndecu ndihi ñaha-í xii-ndo te áma ní xóo cumáni sá xíní ñuhu-í, te ñá túú nã ní xícáⁿ-í núú ni ñⁿ-ndo. Chi cue ñáyiú xíndecu ichi Xítohó Jesucristú ndécú dístítú Macèdoniá ní quixí-yu ní taxí-yu sá cúmání xii-í, te ñá túú tñahí ni dásatú iní ñáhà-í xii-ndo cãcãⁿ-í núú-ndó nũu ná cúú sã xíní ñuhu-í, te ñu-ni ducaⁿ càda-í.

¹⁰ Te ñu-ni duha cáháⁿ váha-í cuèndá-í te ni ñⁿ cue ñáyiú dístítú Acãyá vá nihí-yu tñuhu cúñahá-yu xii-í cuèndá cadí-yu yuhu-í. Te mee Xítohó Jesucristú nánhá-gã sá ndàá càháⁿ-í dàtná càháⁿ ndàá mée-gã. ¹¹ Te cudana te sàni iní-ndó sã sã dúhá càháⁿ-í te ñá túú cùu iní ñáhà-í xii-ndo, dico ñáhá chi mee Yã Ndiöxí nánhá-gã sá yúhú ío cùu iní ñáhà-í xii-ndo.

¹² Te nàcuáa-ni ta quide-í véxi te ñu-ni ducaⁿ càda-í cuèndá sá cuè téé cuíní cada nínu mee-xi càchí sá ñⁿ-ni cuu ndihi ñaha-güedé xii-í vá nihí-güedé tñuhu cáháⁿ-güedé cachí-güedé sá ñⁿ-ni chiuⁿ quide ndihi ñaha-güedé xii-í. ¹³ Te cue téé-áⁿ càchí-güedé sá Yã Ndiöxí ní tendaha ñaha-gá xii-güedé xícá cùu-güedé càháⁿ-güedé tñuhu-gá dico ñá ndàá, chi mee-ni dándahú-güedé ñáyiú ndihi tñuhu càháⁿ-güedé, te quide-güedé dàtná quidé cuè téé càháⁿ tñuhu Xítohó Jesucristú dico ñá ndàá sá cúú-güedé cue téé càháⁿ tñuhu-gá. ¹⁴ Te vá cúññhu-o sã dúcáⁿ quide cue téé-áⁿ, chi mee sàcuíhná quidé-xí sã cúú-xí dàtná ñⁿ espíritu

xínú cuèchi núú ío váha càa ndecu Yã Ndiöxí dico ñá ndàá sá xínú cuèchi-xi xiáⁿ. ¹⁵ Te xiáⁿ vá cúññhu-o sã cuè téé xínu cuèchi núú-xi quide-güedé sá cúú-güedé cue téé quide váha chi ñá ndàá sá quidé váha-güedé chi dándahú-güedé ñáyiú. Te nàcuáa ndùu nchaa sá quidé-güedé te ducaⁿ nàcháhu-güedé núú Yã Ndiöxí.

Té Pãblú ío ndòho-dé cuèndá sá cúú-dé téé càháⁿ tñuhu Xítohó Jesucristú

¹⁶ Te yúhú càháⁿ tucu-í dóho-ndo sã vá cání iní-ndó sã yúhú cúú-í ñⁿ téé càháⁿ lúcú càháⁿ duha, te núu dava-ndo dùcaⁿ sani iní-ndó dico chí cada ndèe iní cundedóho-ndo tñuhu na càháⁿ-í cuèndá ducaⁿ tñahá-í cada nínu-í mée-í. ¹⁷ Te vitna na càháⁿ-í dàtná càháⁿ ñⁿ téé ñá túú cùtnuní iní-xi, chi tñuhu càháⁿ-í ñá túú ñⁿ-ni cuu-xi ndihi tñuhu Xítohó Jesucristú, chi vitna càháⁿ-í nàcuáa cada nínu-í mée-í. ¹⁸ Te ío cuéhé ñáyiú quide nínu mee-xi cuèndá nchaa sá ío ñuyú-a te xiáⁿ nũu tñahá-í cuíní-í cada nínu-í mée-í. ¹⁹ Chi cùtnuní sá nchòhó quidé ndèe iní-ndó sàcúndedóho-ndo nchaa tñuhu càháⁿ cue téé càháⁿ lúcú càháⁿ duha, te ducaⁿ quide ndee iní-ndó sàcúndedóho-ndo tñuhu càháⁿ-güedé chi càchí-ndó sã ío túha-ndo. ²⁰ Te nchòhó, quide ndee iní-ndó tñi-ndo nchaa tñuhu càháⁿ cue téé quide yica ñaha xii-ndo sá cúnú cuèchi-ndo núú-güedé, te xícáⁿ-güedé nándi sá xícáⁿ-güedé núú-ndó, te tàxi

tnuní ñáhá-güedě xii-ndo, te quide-güedé sá ïo cùnuu-güedé ndécú ndìhi ñaha-güedé xii-ndo, te càniha-güedé xii-ndo, te cuèi nchaa xiãⁿ quidé ñaha-güedé xii-ndo dico quide ndee-ni iní-ndó. 21 Te nchòhó càchí-ndó sá cúu-ndí cue téé ñá túú ní cùyii cada nándi sá cádá, te ndáá chi ñá túú ìⁿ-ni cuu-ndí ndìhi cue téé ducaⁿ xiquide.

Dico núu cue téé-áⁿ cùyii-güedé quidé nínu-güedé méé-güedé, te tnàhá-í cùyii-í ducaⁿ càda-í. Te sá dúhá càháⁿ-í te càháⁿ-í dàtná ìⁿ téé ñá túú cùtnuní iní-xi. 22 Te núu quide cahnu-güedé méé-güedé cuèndá sá càháⁿ-güedé tnúhu hèbreú, te yúhú tucu ñu-ni téé càháⁿ tnúhu hèbreú cúu-í, àdi quide cahnu-güedé méé-güedé cuèndá sá cúu-güedé cue téé isràél, te yúhú tucu tnàhá-í cúu-í téé isràél, àdi quide cahnu-güedé méé-güedé cuèndá sá cúu-güedé ñani tnàhá ndii Àbrahám, te tnàhá yúhú cúu-í ñani tnàhá ndii Àbrahám tucu. 23 Àdi quide cahnu-güedé méé-güedé cuèndá sá sání ìni-güedé sá díú núú Xitohó Jesucristú xínú cuèchi-güedé, dico yúhú ïo-gá xínú cuèchi ndisa-í núu-gã. Te sá dúhá quide cahnu-í méé-í te càháⁿ-í dàtná ìⁿ téé ñá túú cùtnuní iní-xi, te yúhú cúu-í ìⁿ téé ïo-gá quidé chiⁿ-gá dàcúúxí cuè téé-áⁿ, te vai xito ní cuu càniha ñáyiú xii-í, te vai xito ní cuu chihi ñahá-yu vecaá xii-í, te vai xito ní cuu cãcu cãcu cahni ñaha

ñáyiú xii-í. 24 Te cue ñáyiú isràél ní canihá-yu xii-í úhúⁿ xito, te ndi tnahá ìⁿ ìⁿ xito ní canihá-yu ní dáquëe-yu ócó sáhúⁿ cúmí ñii sàtà-í. 25 Te úní xito ní caniha tucu ñáyiú xii-í ndìhi carrutí, te ìⁿ xito ní sáha yúú ñahã-yu xii-í, te ní cuu úní xito quëe naa bàrcú xití ndute òré sácùhuⁿ-í, te ìⁿ xito ïo ní ndoho-í ní xíndecu-í ìⁿ nduu ìⁿ niú núú ndute làmár. 26 Te ïo titní xichi ní cuu xica cuu-í, te dava xichi ní cãcu cuido ñaha ndute ñuhu xii-í, te dava xichi ní cãcu duhu ñadúhú nchaa ndachiuⁿ-í, te dava xichi ní cãcu cada ñaha cuè ñáyiú cùu ndi mee-í ìⁿ sá cádá ñahá-yu xii-í, te ñu-ni ducaⁿ ñi cãcu cada ñaha tucu cue ñáyiú ñá túú cùu ndi mee-í ìⁿ sá cádá ñahá-yu xii-í ní cùu, te cuèi xití ñuú te cuèi xití yucu cãcu cãcu cada ñaha ñáyiú xii-í ìⁿ sá cádá ñahá-yu, te ñu-ni ducaⁿ cãcu cãcu quini-í tnúndòho oré ñúhù-í bàrcú cuáháⁿ núú ndute làmár. Te cue ñáyiú càchí sá ndécú ìchi Xitohó Jesucristú te ñá ndáá cãcu cãcu cada ñahá-yu xii-í ìⁿ sá cádá ñahá-yu. 27 Te ïo ndòho-í cuèndá chiⁿ quide-í chi ïo xàú-í, te ní cuu vai xito ñá túú xidí-í, te titní xito ní cuu xihí víhì-í docó, te titní xito ní cuu yìchí-í ndute, te titní xito ní cuu ñá túú tnàhí ná xéxì-í cuèndá chiⁿ quide-í, te titní xito ní cuu ndòho-í sá vïxiⁿ, te titní xito ní cuu ñá túú nihí-í dóó cuhnu-í.

28 Te ñá díú-ní xiãⁿ chi ìⁿ nduu ìⁿ nduu ïo sání iní-í cuèndá nchaa ñáyiú

ndècu ichi Xítohó Jesucristú xĩndecu nchaa xichi. ²⁹ Te ndéda-ni càa ñáiyu ñá túú nihí ndéé cùndecu ichi Xítohó Jesucristú, te ïo cùndahú iní-í chi sànuu sá tnàhá-í ñá túú nihí ndéè-í cundecu-í ichi-gá sá dúcáⁿ quidé-yu. Te núu ìⁿ ñáiyu quidé-yu sá ìⁿ nchohó ñáiyu ndècu ichi Xítohó Jesucristú quidé-ndó ìⁿ sá ñá túú tàù-ndó càda-ndo te vâ cúú vâha iní-í chi cudèèⁿ-í. ³⁰ Te núu xini ñuhu-xi sá cáda cànu-í mée-í, te cuu ducaⁿ càda-í te cáháⁿ-í mee-ni cuendá nchaa sá quidé nàcuáa ñá túú nihí ndéé yiqui cuñú-í. ³¹ Te Dútú Ndiöxí Yaa cúú Tátá Xítohó Jesucristú náhá-gã sá yúhú càháⁿ ndáá-í núú-ndó, te diu-gá tàù-gá cachí-ó sã ïo cànu cuu-gá ni caa ni quíhíⁿ. ³² Te cùtnàhá ní xĩndecu-í ñuú Dàmascú te tée cùu gobiernú tée cùndihi tée yĩndaha ñáiyu nàni Aretás ní taxĩ ndecu-dé cue tée ní xĩndedí yuyèhe sá ñúhú dòco ñuú cuendá òré quee-í te tñi ñaha-güedé xii-í ní cùu. ³³ Dico yúhú ní queè-í ìⁿ xití tídihi, te cue ñáiyu cùndihi ñaha xii-í ní queñuhu ñàhá-yu ndàa ventaná nchĩ yiqui naha sã ñúhú dòco ñuú-án, te ducaⁿ te ní cácu-í ñá túú ní ndàcu-güedé tñi ñaha-güedé xii-í.

12

Té Pãblú càháⁿ-dé sã ïo vii càa sã ñĩ dánèhé núú ñàhá Xítohó Jesucristú xii-dé

¹ Te ñá túú ndéè nándihí-xi sá càháⁿ váha-o cuendá mée-ó, dico vitna xini

ñuhu-xi ducaⁿ cada-í chi cáháⁿ-í nàcuáa ní quide ñaha Xítohó Jesucristú xii-í, chi ní quide-gá sã ñĩ cutnùní iní-í nàcuáa ndùu tnúhu-gã, te vai núú sã ñĩ dánèhé núú ñàhá-gã xii-í. ² Te yúhú xini-í ìⁿ téé sàndáá iní ñàhá xii Xítohó Jesucristú, te sa ní cuu úxícúmi cuíá sã tée-án ñĩ sáá-dé ndéé andiu cùu uní, te ñá túú xini-í te núú ndihi yiqui cuñú-dé ní sáá-dé àdi ñàhá, chi ìⁿ dii díi-ni Yá Ndiöxí náhá-gã te núú nása càa-dé ní sáá-dé. ³ Te yúhú càháⁿ ndáá-í cuendá téé-án, dico dàtná ní cachí-í sã ñá túú xini-í te núú ndihi yiqui cuñú-dé ní sáá-dé andiu àdi ñàhá, chi mee Yá Ndiöxí náhá-gã te núú nása càa-dé ní sáá-dé. ⁴ Te téé-án ñĩ sáá-dé ìⁿ xichi núú ïo váha càa andiu, te yacáⁿ ní xĩndedóho-dé tnúhu mee-ni sã cúú-xi cuendá mée-dé, te tnúhu-án vã cúú tnàhí cáháⁿ-dé núú ñi ìⁿ ñáiyu. ⁵ Te yúhú quidé ñĩnu-í téé-án, dico mee-ĩ ñá túú càháⁿ váha-í cuendá-í cuendá cada ñĩnu-í mée-í, chi càháⁿ-ni mee-ni cuendá nchaa sã quidé nàcuáa ñá túú nihí ndéé yiqui cuñú-í. ⁶ Te núú dicó yúhú cuini-í te cuu cáháⁿ váha-í cuendá-í cuendá cada ñĩnu-í mée-í, te núú ducaⁿ na càháⁿ-í te ñá túú cùu-xi ìⁿ tnúhu neñúú cáháⁿ-í, chi cùu-xi ìⁿ sã càháⁿ ndáá-í te núú na càháⁿ-í. Dico vá dúcáⁿ càda-í chi cuini-í sã nchòhó cada cuendá-ndó nàcuáa ndùu tnúhu càháⁿ-í ndihi nàcuáa quide-í, te ducaⁿ mée-ndo cáháⁿ-ndó te núú ná téé cùu-í, te ñá díú sã yúhú cáháⁿ váha-í cuendá mée-í cuendá nchòhó cachí-ndó sã ïo cùnuu-í.

⁷ Te sá nǐ dánèhé núú ñáhá Xítóhó Jesucristú xii-í cúú-xí sǎ xidó ío váha, te cuendá sǎ vǎ cádá cǎhnu-í mée-í núu xǎⁿ Xítóhó Jesucristú ní quide-gá duha ndòho yiqui cuñú-í vitna. Te sá dúcáⁿ quide ñaha-gá xii-í te xǎⁿ sácuilhná nǐ níhí-xi ichi cǎhnu dandoho ñaha-xi xii-í. ⁸ Te ní cuu úní xito cǎháⁿ ndàhú-í núú Xítóhó Jesucristú sǎ ná cádá-gǎ nàcuáa vá ndóhó-gǎ yiqui cuñú-í. ⁹ Dico mee-gǎ cǎchí-gá xii-í: “Yúhú ío cùndahú iní ñáhà-í xii-n chindee ñaha-í, te ñá túú nǎ cúmǎní xii-n, te cùtnuní sǎ ïo-gá chindèe-í cue ñáyiu ñá túú nihí ndéé cùndecu”, duha ní cachí-gá xii-í. Te xǎⁿ núu yúhú ío cùdíí iní-í sǎ ñà túú nihí ndéè-í ndécù-í, chi diu cuendá xǎⁿ Xítóhó Jesucristú ñá túú dàña nihnu ñaha-gá xii-í chindèe ñaha-gá. ¹⁰ Te xǎⁿ núu cùdíí iní-í sǎ dúhá ñǎ túú nihí ndéè-í ndécù-í, te cùdíí tucu iní-í cuendá nchaa tnúhu cuèhé tnúhu duha cǎháⁿ ñáyiu cuendá-í, te cùdíí iní-í cuendá nchaa sǎ ndóhò-í, te cùdíí tucu iní-í cuendá sǎ quidé ñaha ñáyiu xii-í, te cùdíí tucu iní-í cuendá nchaa dava-gá sǎ ndóhò-í cuendá Xítóhó Jesucristú. Te òrè ñá túú nihí ndéè-í te Xítóhó Jesucristú chindèe ñaha-gá xii-í nihí ndéè-í.

Té Pǎblú ío sàni iní-dé cuendá cue ñáyiu xǎndecu ichi Xítóhó Jesucristú ndécú ñúu Còrintú

¹¹ Te cùu-í dàtná ïⁿ tée ñá túú cùtnuní iní-xi sǎ dúhá cǎháⁿ váha-í cuendá-í, te

ducaⁿ quide-í chi mee-ndo quide-ndo sǎ dúcáⁿ cǎháⁿ-í, dico mee-ndo tàú-ndó cǎháⁿ váha-ndo cuendá-í ní cùu. Te dava cue tée ío quide cǎhnu-güedé mée-güedé, te cǎchí-güedé sǎ Xítóhó Jesucristú ní táuchíuⁿ-gǎ sǎ cǎháⁿ-güedé tnúhu-gá, dico yúhú cùnùu-gá-í dàcúúxí cue tée-áⁿ cuèi ñá túú vèdana ná cùu-í ndécù-í ñuyúu-a. ¹² Te cùtnàhǎ ní xǎndecu ndihí ñaha-í xii-ndo ío ní quide cǎhnu iní-í nǎndí sǎ ní yáha-í ní quide-í chiúⁿ Xítóhó Jesucristú sǎ cúú-xi-ndó. Te ní chindee ñaha-gá xii-í ní quide-í titní núu sǎ vǎ yǒo tnàhí ndàcu cada te ní cuñúhu-ndo, te sǎ dúcáⁿ nǐ chindee ñaha-gá xii-í ní cutnùní iní-ndó sǎ yúhú cúú ndisa-í ïⁿ tée ní cachí Xítóhó Jesucristú sǎ cǎháⁿ-í tnúhu-gá. ¹³ Te yúhú ïⁿ-ni quide ndihí ñaha-í xii-ndo ndihí nchaa dava-gá cue ñáyiu ndècu ichi Xítóhó Jesucristú, te dicó-ni sǎ yúhú ñá túú ní cuiní-í taxi-ndo sǎ xíní ñùhu-í dàtná ní quide-í dava-gá-yu. Te núu ñá túú ní quide váha-í sǎ dúcáⁿ nǐ quide-í ñá túú ní cuiní-í chindee ñaha-ndo te chí cádá cǎhnu iní ñáhá xii-í.

¹⁴ Te vitna sa ndècu túha-í sǎ quixí-í núú ndécù-ndó, te sǎ quixí còto ñaha tucu-í xii-ndo cùu-xi xito cuu úní sǎ quixí-í, te cuiní-í sǎ vǎ dándihú-ndó iní-ndó ndùcu-ndo sǎ táxi-ndó cùu xii-í, chi ñá díú xǎⁿ ndéé iní-í chi mee-ndo ndéé iní-í quixí-í. Te duha cǎháⁿ-í chi nchòhó xíní-ndó sǎ cue tée cùu tátá sǎñaha-güedé

sá cúu-xí cuè déhe-güedé te ñá díú cuè déhe-güedé sãñaha-güedé sá cúu-xí mée-güedé. ¹⁵ Te yúhú ío váha cùu iní-í dandòñuhu-í sá ndécú ndìhi-í nàcuáa ndacu-í chindee ñaha-í xii-ndo cùndecu váha-ndo sã cúu-xí Yã Ndióxi chí ío cùdí iní-í, te cuèi na cùu-í sá cuendá-ndó, chí ío cùu iní ñáhà-í xii-ndo, te sá dúcáⁿ cùu iní ñáhà-í xii-ndo, te sãnuu sá nchòhó ñá túú cùu iní ñáhà cavihi-ndo xii-í.

¹⁶ Te ñaha-ndo sá ñà túú ní dandihú-í iní-ndó nã taxi-ndo cùu xii-í, dico dava-ndo cächí-ndó sã ío váha ní xito-í nàcuáa ní quide-í nàcuáa ní dándàhú ñáhà-í xii-ndo. ¹⁷ Te chí cãháⁿ te núu yúhú ní dándàhú ñáhà-í xii-ndo ndìhi cue téé ní tendaha-í ní quixi coto ñaha xii-ndo. ¹⁸ Te ní cãháⁿ ndàhú-í núú tẽ Titú ndìhi núú ìngá tucu téé ndècu ndìhi-o ichi Xítohó Jesucristú ní quixi coto ñaha-güedé xii-ndo. Te nchòhó cùtnùní iní-ndó sã tẽ Titú ñá túú ní dándàhú ñáhà-dé xii-ndo, te ducaⁿ chí ìⁿ-ni sãni iní-ndí te ìⁿ-ni quide-ndí.

¹⁹ Te cudana te sãni iní-ndó sã sã dúhá cãháⁿ-ndí te tàunihnu-ndí mée-ndí, dico ñá díú dùcaⁿ quee-xi tnúhu cãháⁿ-ndí, chí cãháⁿ-ndí nàcuáa tàú-xi cãháⁿ-ndí chí ndècu ndìhi-ndí Xítohó Jesucristú, te mee Yã Ndióxi náhá ndãá-gá nàcuáa ndùu tnúhu cãháⁿ-ndí, te nchaa sã cãháⁿ-ndí cúu-xí cuendá nchòhó cue ñáyiú ío cùu iní-ndí, te cãháⁿ-ndí nàcuáa cundecu váha-ndo ichi Xítohó

Jesucristú. ²⁰ Te ío sãni iní-í cuendá-ndó chí na cuáháⁿ te òré quixi-í quixi coto ñaha-í xii-ndo, te ñá túú quide-ndo nacuáa cuu váha iní-í, te sá dúcáⁿ te yúhú cãháⁿ-í nàcuáa vá cúu vãha iní-ndó, te ducaⁿ ío sãni iní-í cuendá-ndó chí na cuáháⁿ òré quexio-í te nãà-ndó, àdi ndecu-ndo ichi cuédú iní, àdi cudééⁿ núú tnáhà-ndó, àdi ñá túú cùu ìⁿnuu-ndo ndecu-ndo, àdi cãháⁿ cuèhé-ndó cuendá tnàha ñáyiú-ndo núú chítú núú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo.

²¹ Te ío sãni iní-í cuendá-ndó chí na cuáháⁿ òré quixi-í, te Yã Ndióxi cada-gá te cucahaⁿ núu-í sá cuendá-ndó, te ío ndìhú iní-í cuendá-ndó te núu vátá dáñá-gã-ndó nchaa sá cuèhé sá dúhá ñí ngúita-ndo quide-ndo ndéé sanduu, te vài-ndo ní ngúita-ndo dùcaⁿ quide-ndo, chí ndècu-ndo ichi díí ìní te nãndi-gá nchaa sá cuèhé sá dúhá quide-ndo, te ducaⁿ ío ndìhú iní-í te núu vátá dáñá-gã-ndó nchaa xíãⁿ.

13

Tnúhu ndéé núú ñí ndìhi-ná

¹ Te sá quixi-í vitna núú ndécú-ndó cùu-xi xito cuu úní sá quixi coto ñaha-í xii-ndo. Te cächí tnúhu-í xii-ndo sã òré cundáá cuèchi-ndo te canehe núú úú àdi úní ñáyiú cãháⁿ ndáá nàcuáa ndùu cuèchi-ndo. ² Te yúhú sa ní cãháⁿ-í dóho-ndo cùtnáhá ní quixi-í ní quixi coto ñaha-í xii-ndo xito cuu úú, te ìⁿ-ni ducaⁿ cãháⁿ tucu-í dóho-ndo

vitna vátá quíxí tùcu-gá-í quixi coto ñaha-í xii-ndo. Te nchòhó ñáyiú ní cunduu ñí ngúíta quide nchaa sá cuèhé sá dúhá, tenàá ñáhà-í xii-ndo òré quexì-í te núu vátá dáñá-gã-ndó nchàa sá cuèhé sá dúhá quide-ndo te tnàhá nchaa dava-gã-ndó tènàá ñáhà-í xii-ndo. ³ Te nchòhó cuìní-ndó quìní-ndó núu ndáá sá quidè-í núú Xítohó Jesucristú càháⁿ-í yuhu-gá, dico dàvá-áⁿ cutnùnì ndáá iní-ndó. Te Xítohó Jesucristú quidé-gã nàcuáa cutnùnì iní-ndó sã ïo càhnu cuu-gá te ñá túú quide-gá dàtná quidé ìⁿ ñáyiú ñá túú ñihí ndéé cùndecu. ⁴ Te Xítohó Jesucristú ní ndoho-gá dàtná ìⁿ ñáyiú ñá túú ñihí ndéé cùndecu, chi ní sahani ñaha-güedë xii-gá núú cùrúxí dico mee Yã Ndiöxí ní quide-gá ní ñihí ndéé Xítohó Jesucristú ní ndoto-gá ndécú-gã vitna, te tnàhá nchúhú tucu ducaⁿ yãha-ndí ñá túú ñihí ndéé-ndí cundecu-ndí, dico mee Yã Ndiöxí chindèe ñaha-gá xii-ndí ñihí ndéé-ndí ndécú-ndí cuendá sá ndécú ndíhi-ndí Xítohó Jesucristú, te xiáⁿ núu ndàcu-ndí quidé-ndí nàcuáa tàú-xi cunduu sá cúu-xí-ndó.

⁵ Te chí cádá cuendá váha te núu ndisa sá sàndáá iní-ndó tnúhu Xítohó Jesucristú, te núu ndáá sá ndécú-ndó ichi-gá te cùtnunì iní-ndó sã ndécú-ndó ndíhi-gá. ⁶ Te cuìní-ndí sá nchòhó cutnùnì ndáá iní-ndó sã nchúhú ndécú ndíhi ndisa-ndí Xítohó Jesucristú. ⁷ Te nchúhú

càháⁿ ndíhi-ndí Yã Ndiöxí cuendá-ndó cuendá sá vã cádá-ndó ñí ìⁿ sá cuèhé sá dúhá, te vã cánì iní-ndó sã sà dúcáⁿ càháⁿ ndíhi-ndí-gá cuendá-ndó, te cuìní-ndí sá nchòhó cutnùnì iní-ndó sã nchúhú ïo ndècu yiñuhu-ndí núú-gã, te ñáhá chi càháⁿ ndíhi-ndí-gá cuendá-ndó chi cuìní-ndí sá nchòhó cada váha-ndo cùndecu-ndo cuéi sàni iní-ndó sã nchúhú cúu-ndí cue tée ñá túú ndècu yiñuhu núú-gã. ⁸ Te nchúhú mee-ni càháⁿ váha-ndí cuendá tnúhu ndáá tnúhu Yã Ndiöxí, te ñá túú càháⁿ-ndí ìⁿ tnúhu sá ñá túú tàú-xi càháⁿ-ndí cuendá tnúhu-áⁿ. ⁹ Te cùdí iní-ndí sá ñá túú-gã xínì ñuhu-xi cada-ndí nàcuáa ñihí ndéé-ndí tenàá ñáhá-ndí xii-ndo càháⁿ-ndí dóho-ndo, chi nchòhó sa ní ñihí ndéé-ndó ndècu-ndo ichi-gá. Te nchúhú càháⁿ ndíhi-ndí Yã Ndiöxí cuendá-ndó cuendá sá nchòhó cundáá-ndó cùndecu-ndo ñá túú-gã ná cumánì-ndó núú-gã. ¹⁰ Te xiáⁿ núu duha ndùu nchaa tnúhu tée-í núú tütú-a daquixi-í ndaha-ndo vitna ñá túú ndècu ndíhi ñaha-í xii-ndo, cuendá sá òré ná cùndecu ndíhi ñaha-í xii-ndo te vã ïo ñihí càháⁿ-í dóho-ndo nàcuáa ndùu tnúhu ndee ìní ní taxi Xítohó Jesucristú ndécú ndíhi-í, chi ní taxi-gá tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuendá sá cánùlchi ñaha-í xii-ndo cuíta nihnu-ndo.

¹¹ Te vitna nchaa nchòhó ñáyiú ndècu ndíhi-ndí ichi

Xítóhó Jesucrístú ío quíde ndee iní ñáhá-ndĩ xii-ndo, te ío chí ndúcú nàcuáa cada-ndo cundáá-ndó nũú Yă Ndiõxí cuendá sá ñà túú tnàhí-gá ná cùmání-ndó nũú-gă, te ndee ndèe cada iní-ndó cundecu-ndo, te chí cúú ìⁿnuu cundecu ndihí tnaha, te ducaⁿ te Yă Ndiõxí cundecu ndihí ñaha-gă xii-ndo chí ío cùu iní ñáhá-gă xii-o, te diu-gá quídé-gă ío váha cùu iní-ó ndècu-o. ¹² Te ndihí tnúhu yiñùhu chí cádá ndèe iní tnáhá. ¹³ Te nchaa ñáyiú cùu cuendá Yă Ndiõxí ndécú ìha quíde ndee iní ñáhá-yu xii-ndo.

¹⁴ Te xìcáⁿ táhú-ndĩ núú Xítóhó Jesucrístú sá ìo na chìndee chitúu ñaha-gă xii-ndo. Te mee Yă Ndiõxí ná cádá-gă nàcuáa cutnùní iní-ndó sã ìo cùu iní ñáhá-gă xii-ndo, te Espíritú-gá cundee cùu cahnu iní-ndó cundecu-ndo. Te ducaⁿ na cunduú. Te ío chí cádá ndèe iní-nã vitna.

TUTÚ NÍ CADÚHA TÉ PÄBLÚ QUIHⁿ NDAHA ÑÁYIU DISTRITÚ GÁLACIÁ

*Té Päblú cádüha-dé tutú
quíhⁿ ndaha nchaa ñáyi
sàndáá iní ñáhá xì Xítóhó Je-
sucristú ndécú dīstritú Gálaciá*

¹ Te yúhú té Päblú ní ten-
daha ñaha Xítóhó Jesucristú,
ndíhi Dútú Ndiöxí véxi-í
cáháⁿ-í tnúhu-gá. Te ðiu Yá
Ndiöxí ní dándótó-gã Xítóhó
Jesucristú Yaá ní xíhí ní
cúu. Te cächí tnúhu-í xii-ndo
sã ñà ðíú ñáyi ñuyíú-a ni
tëndaha ñaha xii-í véxi-í, te
ni Yá Ndiöxí te ni Xítóhó
Jesucristú ñà túú ní xãhaⁿ-gã
xii ìⁿ ñáyi quixí-yu cachí
tnúhu-yu nãcuáa cada-í. ² Te
yúhú té Päblú cádüha-í tutú-a
ndíhi nchaa dava-gá ñáyi
ndècu ichi Yá Ndiöxí ndécú
ndíhi-í iha cuèndá daquixi-í
ndaha nchòhó ñáyi sàndáá
iní ñáhá xì Xítóhó Jesucristú
ndécú dīstritú Gálaciá. ³ Te
xicáⁿ táhù-í núú Dútú Ndiöxí,
ndíhi núú Xítóhó Jesucristú sã
ío na chĩndee chitúu ñaha-gá
xii-ndo, te ducaⁿ ndĩ nduú-gá
ná cádá te ío váha cuu iní-ndó
cũndecu-ndo. ⁴ Te Xítóhó Je-
sucristú ní xíhí-gá sã cuèndá
nchaa cuèchi nchoo cuè ñáyi
ndècu ñuyíú-a. Te ducaⁿ ñĩ
quide-gá, chi cuiní-gá sã vã
cũndècu-o ichi cuehé ichi
duha. Te ducaⁿ ñĩ cuu, chi
Dútú Ndiöxí ducaⁿ ñĩ cuiní-gá

cunduu. ⁵ Te ío chí ná ndácáⁿ
táhú-ó núú Yá Ndiöxí cuèndá
sã ío càhnu cuu-gá, te ðiu-ni
ducaⁿ càda-o ni caa ni quíhⁿ!
Te ducaⁿ na cunduu.

*Mee-ni tnúhu Xítóhó Jesu-
cristú cúu-xi tnúhu sã cãháⁿ
nãcuáa naníhí táhú-ó*

⁶ Te ío cũnúhu-í cúu chi
ío ndíhi ní dáñá-ndó ichi Yá
Ndiöxí. Te Yaá-áⁿ ñĩ cãháⁿ
ñáhá-gã xii-ndo, chi Xítóhó
Jesucristú ío ní cundáhú
iní ñáhá-gã ní quide váha
ñaha-gã xii-ndo, te vitna
dãcuaha tucu-ndo ingá tnúhu,
te cächí-ndó sã xĩãⁿ dãcãcu
nihnu ñaha-xi xii-ndo núú
ùhú núú ndáhú. ⁷ Dico
ñáhá, chi ñà túú-gã tnúhu
sã dãcãcu nihnu ñaha xii-o
núú ùhú núú ndáhú. Te
dicó-ni sã ío ñáyi véxi dàticá
nuu ñahá-yu xii-ndo dãnèhé
ñáhã-yu tnúhu sã dãcuíta ni-
hnu ñaha xii-ndo, chi tnúhu-áⁿ
ñà túú cùu-xi tnúhu Xítóhó
Jesucristú. ⁸ Te yúhú cãháⁿ-í
tnúhu Xítóhó Jesucristú, dico
núú ío ñáyi véxi dãnèhé ñáhá
xii-ndo ingá tnúhu sã ñà túú
ní dãnèhé ñáhà-í xii-ndo, te
nchòhó cachí-ndó sã ñáyi-áⁿ
nacháhu-yu núú Yá Ndiöxí
sã dúcáⁿ quidè-yu. Te cuèi
yúhú, te núu na dàma-í tnúhu
danèhé ñáhà-í xii-ndo, te
ðiu-ni ducaⁿ cãháⁿ-ndó sã
náchãhu-í núú-gã te núu
ducaⁿ na càda-í. Àdi te
núu ìⁿ espíritú xínú cuèchi
núú-gã véxi-xi cãháⁿ-xi ingá
tnúhu sã ñà túú ní dãnèhé
ñáhà-í xii-ndo nãcuáa naníhí
táhú-ndó ñà, te ðiu-ni ducaⁿ
cãháⁿ-ndó sã náchãhu-xi núú
Yá Ndiöxí te núu ducaⁿ na
càda-xi. ⁹ Te ðiu-ni duha sa ní
dãnèhé ñáhà-í xii-ndo sã núu

véxi ñáyiú dānehé ñáhá ìngá tñúhu sá ñà túú ní dānehé ñáhà-í xii-ndo nācuáa naníhí tǎhú-ndó ñá, te cachí-ndó sá ñáyiú-án nacháhu-yu núú Yá Ndiǒxí sá dúcáⁿ quidé-yu, duha ní cachí-í xii-ndo.

¹⁰ Te duha ndùu tñúhu càháⁿ-í chi nchòhó sa xini-ndó sá yǔhú cuiní-í sá Yá Ndiǒxí càháⁿ-gá sá quidé vǎha-í ndécù-í, te ñá díú sá ñáyiú ñuyíú-a cachí-yu sá quidé vǎha-í, àdi sá ìo cùdíi ìní-yu nchaa nācuáa quide-í ndécù-í. Te núu na càni iní-í cudíu-í núú ñáyiú ñuyíú-a, te ñá túú cùu-í tée xinu cuechi núú Xitohó Jesucristú te núu ducaⁿ na càda-í.

Nācuáa ní cuu ní ngúita té Pǎblú càháⁿ-dé tñúhu Yá Ndiǒxí
¹¹⁻¹² Te nchòhó ñáyiú ndècu ndihí-í ichi Xitohó Jesucristú càhí tñúhu-í xii-ndo sá tñúhu sá dānehé ñáhà-í xii-ndo nācuáa naníhí tǎhú-ndó cùu-xi tñúhu sá ní cachí tñúhu mee Xitohó Jesucristú xii-í, te ñá díú ìⁿ ñáyiú ñuyíú-a ní càhu iní-yu tñúhu-án, àdi danehé ñáhà-yu xii-í, chi mee Xitohó Jesucristú ní dānehé ñáhá-gǎ.

¹³ Te nchòhó sa nihí-ndó tñúhu nācuáa ní xóo cada-í cùtnàhá nchicúⁿ nihnu-í nchaa nācuáa dàcuaha ñáyiú cùu ndi mee-í ñáyiú isràèl ní cùu. Te dàvá-án ìo ní xóo cuu úhú iní-í nchaa ñáyiú ndècu ichi Yá Ndiǒxí, te nāndi sá ní xóo cada-í-yu, te ní cuiní-í danàa-í-yu ní cùu. ¹⁴ Te yúhú ío-gá ní xóo quene cáva-í ní xóo dacuàha-í nchaa sá dacuàha ñáyiú cùu ndi mee-í dácúxí ñáyiú ìⁿ-ni cuà-í ndihí-yu ní cùu, te ío-gá ní xóo

cuiní-í cada ndáa-í canchicúⁿ nihnu-í nchaa nācuáa ní dānehé ñáhá cùe ñani tñáhà-í ní xindecu ndéé sanaha ní cùu. ¹⁵ Te ndéé cùtnàhá vátá cǎcú-gǎ-í Yá Ndiǒxí sa nēhe vǎha ñaha-gǎ xii-í cuendá sá càháⁿ-í tñúhu-gǎ, núu xiǎⁿ ní càháⁿ ñáhá-gǎ xii-í quide-í chiuⁿ-gá vitna, te sá dúcáⁿ ní quide-gá te ío vǎha ní quide ñaha-gǎ xii-í. ¹⁶ Te òré ní càháⁿ ñáhá Yá Ndiǒxí xii-í te ní cachí tñúhu-gǎ cuendá Déhe-gǎ Xitohó Jesucristú. Te ducaⁿ ní quide Yá Ndiǒxí cuendá sá cuiní-gǎ sá cǔñaha-í xii ñáyiú ñá túú cùu ñáyiú isràèl cuendá Yaá cúu Déhe-gǎ. Te cùtnàhá ní càháⁿ ñáhá Yá Ndiǒxí xii-í, te vǎ yòo ìⁿ dìi núu-xi ní ndècu tñúhu-í nācuáa cada-í. ¹⁷ Te ní ñà túú ní sáháⁿ-í ñuú Jerusálén nducu tñúhu-í núú cùe tée díhna nuu ní tendaha Xitohó Jesucristú càháⁿ tñúhu-gǎ núu nása cada-í, chi ndihí-ni ní sáháⁿ-í distritú Àrabíá ní xindecu tnaa-í te dātnùní cuánuhú tucu-í ñuú Dāmascú.

¹⁸ Te núu ùní cuíá sǎ ní càháⁿ ñáhá Yá Ndiǒxí xii-í, te ní sáháⁿ tucu-í ñuú Jerusálén ní càháⁿ ndihí-í té Pèlú, te ní xindecu-í ndihí-dé sáhúⁿ nduu. ¹⁹ Te tñáhá té Jàcobó ñani Xitohó Jesucristú ní càháⁿ ndihí-í. Te ñá túú ní xini-í dava-gǎ cue tée ní tendaha Xitohó Jesucristú càháⁿ tñúhu-gǎ. ²⁰ Te Yá Ndiǒxí ndéhé ndìi ndehe caxi-gǎ sá ncháá tñúhu tē-í núu tütú-a sá cúu-xi-ndó cùu-xi ìⁿ sá ndáa.

²¹ Te sátá ní sáháⁿ-í ñuú Jerusálén, te dātnùní ní sáháⁿ-í distritú Siríá, ndihí

distritú Ciliciá. ²² Te nchaa ñáyu xíndecu ichi Xítoho Jesucristú ndécú distritú Júdeá ñá túú xini ñáhã-yu xii-í ní cùu. ²³ Dico ní xóo níhi-yu tnúhu nchaa nacuáa ní xóo cada-í, te ní cachí-yu: “Tée cùu úhú iní ñáhã xii nchaa nchoo ñáyu ndècu ichi Xítoho Jesucristú càháⁿ-dé tnúhu-gá núú ñáyu cuendá quíndáá iní ñáhã-yu xii-gã, te diu-dé nándi sá quidé ñaha-dé, te cuini-dé danàa ñaha-dé cuendá sá và cóo-gã ñáyu quíndáá iní ñáhã xii-gã ní cùu”, duha ní cachí-yu cuendá-í. ²⁴ Te ní ngüita-yu ní cachí-yu sá ïo càhnu cuu Yá Ndiöxí cuendá sá ñã túú-gã quidé-í dàtná ní xóo cada-í.

2

Té Páblú ní níhi tnáhã-dé ndihi dava-gã cue tée càháⁿ tnúhu Yá Ndiöxí

¹ Te ní nútahá úxicúmí cujá sã ñi sáhãⁿ-í ñuú Jerusalén ní càháⁿ ndihi-í té Pèlú, te dàtnúni ndécã-í té Bèè ní sáhãⁿ, te tnáhã té Títú ní sáhãⁿ ndihi-ndí-dé. ² Te ní sáhãⁿ-í chi mee Yã Ndiöxí ní cachí-gã sá quihíⁿ-í. Te yacáⁿ ní tacá mee-ni cùe tée cùnuu. Te ní xáhaⁿ-í xii-güedé nacuáa ndùu tnúhu dانهé-í ñáyu ñã túú cùu ñáyu isràél cuendá naníhi tãhú-yu. Te ducaⁿ ñi quide-í cuendá cuini-í quini-güedé nacuáa ndùu chiuⁿ quide-í, chi nacuahãⁿ cachí-güedé sá ñã túú nandíhi-xi. ³ Te té Títú tée ndècu ndihi-í chi ñã díú tée isràél cúú-dé, dico ñã túú ní quide yica-güedé

cuáha-güedé sèñã ñii-dé. ⁴ Te ñáyu càchí sá ndécú ichi Xítoho Jesucristú te ñã ndàá sá ndécú-yu ichi-gã, ñáyu-áⁿ ñi chitnahã ñáhã-yu xii-ndí cuendá cuini-yu quini-yu nása quide-ndí ndécú-ndí ichi Xítoho Jesucristú. Te ducaⁿ ñi quide-yu cuendá sá nchúhú sa ní cácu nihnu-ndí ñã túú-gã quidé-ndí nchaa nacuáa ní càháⁿ ndii Moisés. Te cuini-yu sá núcuíta saa tucu-ndí cada-ndí nchaa nacuáa ní càháⁿ ndii nucúndecu-ndí dàtná ní xíndecu-ndí cùtnáhã vátã cácu nihnu-gã-ndí núú tnúhu-áⁿ ni cùu. ⁵ Te nchúhú ñã túú tnàhí ñi dàña-ndí méé-ndí dandàhú ñáhã-yu xii-ndí. Te ducaⁿ ñi quide-ndí, chi cuini-ndí sá ñã túú ñãgã tnúhu dácánuu ndihi tnúhu sá càháⁿ nacuáa naníhi tãhú-ó ndècu ndihi-ndo.

⁶ Te ñi ñiⁿ tnúhu sá vátã quini-gã-í ñã túú ní càchí tnúhu cue tée cùnuu núú ñáyu cada-í. Dico yúhú chi ñã túú ní quide cuendá-í núu cùnuu-güedé àdi ñã túú cùnuu-güedé, chi núú Yã Ndiöxí ñiⁿ-ni cùu-o nchaa-o. ⁷ Te ní cutnúni iní-güedé sá Yã Ndiöxí ní cachí-gã xii-í sá càháⁿ-í tnúhu-gã núú ñáyu ñã túú cùu ñáyu isràél dàtná ní quide-gã té Pèlú ní xáhaⁿ-gã càháⁿ-dé tnúhu-gã núú ñáyu isràél. ⁸ Te ducaⁿ ñi cutnúni iní-güedé, chi diu-ni Yá Ndiöxí Yáá chindèe ñaha xii té Pèlú càháⁿ-dé tnúhu-gã núú ñáyu isràél, diu-ni Yáá-áⁿ chindèe ñaha-gã xii-í càháⁿ-í tnúhu-gã núú ñáyu ñã túú cùu ñáyu isràél.

9 Te té Jàcobó, ndihi té Pèlú, ndihi té Juàá, cue tée ío cùnuu-gá ní cutnùní iní-güedé sá Yá Ndiöxí ío chìndee ñaha-gá xii-í quidè-í chùuⁿ-gá. Te ío váha ní cáháⁿ ndihi ñaha-güedě xii-í, ndihi té Bèé, te ní cuu ìⁿnuu-ndí sá nchùhú quíhíⁿ-ndí cáháⁿ-ndí tnúhu Yá Ndiöxí núú nchàa ñáyíu ñá túú cùu ñáyíu isràél, te mee-güedě cáháⁿ-güedé tnúhu-gá núú ñáyíu isràél. 10 Te ìⁿ-ni tnúhu ní cáháⁿ-güedé dóho-ndí te ní cachí-güedé xii-ndí sá chíndèe-ndí cue ñáyíu ndàhú, te sa ducaⁿ tnàhí sàni iní-ndí cada-ndí.

Té Păblú càháⁿ-dé dóho té Pèlú ñuu Antiòquiá

11 Te cùtnàhá ní sáháⁿ té Pèlú ñuu Antiòquiá yácáⁿ ní cáháⁿ-í dóho-dé, chi quide-dé ìⁿ sá ñà túú tàú-dé cada-dé ní cùu. 12 Te quide váha-dé ní cùu chi xèxi-dé ndihi ñáyíu ñá túú cùu ñáyíu isràél, dico òré ní sáá ìⁿ ùú ñáyíu cùndihi té Jàcobó, te òré-áⁿ ñà túú-gă ní cuìní-dé caxi-dé ndihi ñáyíu-áⁿ. Te ducaⁿ ñí quide-dé chi ní yùhú-dé cue ñáyíu nchìcúⁿ nihnu quide nchaa nacúáa ní cáháⁿ ndíi Moisés sá vă cáháⁿ váha-yu cuèndá-dé. 13 Te tnàhá dava-gá ñáyíu isràél xìndecu ichi Yá Ndiöxí ñá túú quide váha-yu, chi quidè-yu dàtná quidè tē Pèlú ní cùu, te ndéé tnàhá té Bèé ní nguíta-dé ducaⁿ quide-dé ní cùu. 14 Te òré ní xiní-í sá ñà túú quide-güedé ndihí-yu nacúáa cáháⁿ tnúhu Yá Ndiöxí,

te núú nchàa ñáyíu ndècu ichi Yá Ndiöxí ní xáhaⁿ-í xii té Pèlú: “Yòhó cúú-n tēe isràél, te ñá túú quide-n nchaa nacúáa quide ñáyíu isràél, chi quide-ni-n datná quidè nchàa ñáyíu ñá túú cùu ñáyíu isràél. Te núu ducaⁿ quide-n, ¿te ná cuèndá dánèhé-n ñáyíu ñá túú cùu ñáyíu isràél sá cadă-yu nchaa nacúáa quide ñáyíu isràél?”, duha ní xáhaⁿ-í xii té Pèlú.

Ìⁿ-ni nànhí tàhú-ó ndihi ñáyíu isràél nùu na quìndáá iní-ó Xítóhó Jesucristú ndihí-yu

15 Te yúhú ndihi té Pèlú cúú-ndí ñaní tnàhá ñáyíu isràél, te ñá túú ndècu-ndí ichi cuèhé ichi duha dàtná ndécú nchàa ñáyíu ñá túú cùu ñáyíu isràél. 16 Te xiní-ó sá vă cùndècu-gá cuéchi-o nùú Yá Ndiöxí te núu na quìndáá iní-ó Xítóhó Jesucristú, te ñá díú sá cànchícúⁿ nihnu-o càda-o nchaa nacúáa ní cáháⁿ ndíi Moisés. Te tnàhá dava nchùhú ñáyíu isràél sàndáá iní-ndí Xítóhó Jesucristú, te xíáⁿ cùtnùní iní-ndí sá ñà túú-gă cuéchi-ndí ndécú nùú-gă, dico ñá díú sá ñí cànchícúⁿ nihnu-ndí ní quide-ndí nacúáa ní cáháⁿ ndíi Moisés, chi cuèndá sá sàndáá iní-ndí Xítóhó Jesucristú. Te vá yòo ìⁿ cachí-ó sá ñà túú ndècu cuéchi-xi núú Yá Ndiöxí cuèndá sá nchìcúⁿ nihnú-yu nchaa nacúáa ní cáháⁿ ndíi Moisés.

17 Te núu cuìní-ó sá vă cùndècu cuéchi-o nùú Yá Ndiöxí cuèndá sá sàndáá iní-ó Xítóhó Jesucristú, te

xíǎⁿ cútnùní iní-ó sǎ ñà túú quide váha-o. ¡Te vá cúú tnàhí cani iní-ó sǎ Xítohó Jesucristú dánèhé ñáhá-gǎ xii-o sǎ vǎ cáda váha-o cùndecu-o! ¹⁸ Te yúhú càchí-í sǎ vǎ cǎnchícúⁿ nihnu-gá-ó nchàa nacuaá ní cáháⁿ ndíi Moisés, dico núu vitna càchí-í sǎ xíní ñùhu-xi cada-o nchaa nacuaá ní cáháⁿ ndíi ña, te ñá túú quide váha-í núú Yǎ Ndiòxí te núu ducaⁿ na càda-í. ¹⁹ Te yúhú duuⁿ duuⁿ ní cutnùní iní-í sǎ vǎ ndácù-í cada-í nchaa nacuaá ní cáháⁿ ndíi Moisés núu xíǎⁿ ní dǎñá-í ñá túú-gǎ nchícúⁿ nihnu-í nchaa nacuaá ní cáháⁿ ndíi cuèndá sǎ cuìní-í cundecu-í sǎ cúú-xí Yǎ Ndiòxí. ²⁰ Te Xítohó Jesucristú ní xíhí-gǎ cuèndá-í, dico dàtná tnúhu sǎ tnàhá-í ní xíhí ndìhi-gǎ, chi ñá cúú-gǎ cada-í nchaa nacuaá sàni iní mée-í, chi Xítohó Jesucristú-nǎ ndécú ndìhi ñaha-gǎ xii-í táxí tnùnì ñáhá-gǎ. Te vitna ndècu-í ñuyú-a, te ío sándáá iní-í Xítohó Jesucristú Déhe Yǎ Ndiòxí, te chindee ñaha-gǎ xii-í. Te diu-ni Xítohó Jesucristú ío cùu iní ñáhá-gǎ xii-í núu ní xíhí-gǎ núú cùrúxí sǎ cuèndá-í. ²¹ Te vitna ñá túú dàquee tíhù-í sǎ váha ní quide ñaha Yǎ Ndiòxí xii-í, chi núu ni ndàcu-o vá cùndècu cuéchi-o núú Yǎ Ndiòxí cuèndá sǎ nchícúⁿ nihnu-o quide-o nchaa nacuaá ní cáháⁿ ndíi Moisés ní cùu ña, te àuⁿ nǎ cuu ní xíhí Xítohó Jesucristú ní cùu te núu ducaⁿ.

3

Vá dáñá ndèé-ó quìndáá iní-ó tnúhu Xítohó Jesucristú

¹ Te nchòhó ñáyiú distritú Gàlaciá, ñáyiú sa xǎndecu ichi Xítohó Jesucristú, ¿ná cuèndá ío ñí iní-ndó ñá cuìní-ndó tni-ndo nchaa tnúhu càháⁿ-gǎ?, ¿te yoo ní dádǎhu ndodo iní ñáhá xii-ndo núu ducaⁿ quide-ndo? Te nàha-ndo sǎ ío váha ní dánèhé ñáhá-ndí xii-ndo nacuaá ní cuu ní xíhí Xítohó Jesucristú. ² Te vitna cáháⁿ-ndó núu sǎ nchícúⁿ nihnu-ndo nchaa nacuaá ní cáháⁿ ndíi Moisés ní níhí-ndó Espíritú Yǎ Ndiòxí ndécú ndìhi-ndo, àdi sǎ ní sándáá iní-ndó tnúhu Xítohó Jesucristú sǎ ní dánèhé ñáhá-ndí xii-ndo ní níhí-ndó Espíritú-gǎ ndécú ndìhi-ndo. ³ Te nchòhó ío ní díqui-ndó chi Espíritú Yǎ Ndiòxí tá quide váha ñaha-xi xii-ndo cuáháⁿ ní cùu. ¿Te nǎa vitna mee-nǎ-ndó cuìní-ndó càda-ndo nacuaá ta quide ñaha Espíritú-gǎ cuáháⁿ xii-ndo ní cùu-áⁿ? ⁴ Te sàni ñⁿ sàni úú iní-í cuèndá-ndó sǎ àuⁿ nǎ cuu nǎndí yáha-ndo ndècu-ndo ichi Yǎ Ndiòxí. ⁵ Te xíní-ndó sǎ Yǎ Ndiòxí ní taxi-gǎ Espíritú-gǎ ní ngúndecu ndìhi-ndo, te ní quide-gǎ sǎ vǎ yòo tnàhí ndàcu cada núú-ndó ní xíní-ndó. Te ducaⁿ ní quide-gǎ, chi ní sándáá iní-ndó-gǎ, dico ñá díú cuèndá nchaa nacuaá ní cachí ndíi Moisés cada ñáyiú ducaⁿ ní quide-gǎ.

⁶ Te ndíi Àbráhám ducaⁿ ío ní sándáá iní ndíi Yǎ Ndiòxí, núu xíǎⁿ ní cachí-gǎ sǎ ní cudíu ndíi núú-gǎ sǎ dúcáⁿ ní quide ndíi. ⁷ Te càchí tnúhu ndáá-í

xii-ndo sã ncháá ñáyiú sàndáá iní ñáhá xii Yá Ndiõxí dàtná ní sándáá iní ñáhá ndii Àbrahám xii-gá, ñáyiú-ánⁿ ìⁿ-ni cùú-yu ndihì ndii núú-gã. ⁸ Te núú tütú Yã Ndiõxí ní ngódó tnùnì tnúhu váha, tnúhu sá ñí xáhaⁿ Yã Ndiõxí xii ndii Àbrahám, te duha ní xáhaⁿ-gã xii ndii: “Nchaa ñáyiú nihii ñuyúú cada váha-í-yu sá cuendá-n”, duha ní xáhaⁿ-gã xii ndii. Te sá dúcáⁿ ñí ngódó tnùnì núú tütú Yã Ndiõxí ndéé dàvá-ánⁿ, te xiãⁿ cùtnùnì sá sàá nduu, te cue ñáyiú ñá túú cùú ñáyiú isràél vá cùndècu-gá cuéchi-yu núú-gã te núú na quindáá iní ñáhã-yu xii-gá. ⁹ Te xiãⁿ núú nchaa ñáyiú sàndáá iní ñáhá xii Yá Ndiõxí cada váha ñaha-gã xii-yu dàtná ní quide váha-gá ndii Àbrahám, chi ndii-ánⁿ ducaⁿ ñí sándáá iní ñáhá ndii xii-gá.

¹⁰ Te nchaa ñáyiú cuinì cada nchaa nàcuáa ní cáháⁿ ndii Moisés cuendá sá cuinì-yu sá vã cùndècu-gá cuéchi-yu núú Yã Ndiõxí, ñáyiú-ánⁿ dañá nihnu ñaha-gá xii-yu, chi vá ndácü-yu cadá-yu nàcuáa sàni iní-yu, te ducaⁿ càda-gá chi quèe ndáá-xi nàcuáa càháⁿ-xi núú tütú-gá núú càchí-xi sá ncháá ñáyiú ñá túú quide nchaandi túhú nàcuáa ní cáháⁿ ndii Moisés te dañá nihnu ñaha-gá xii-yu. ¹¹ Te núú na cànchicúⁿ nihnu-ni-o càda-o nàcuáa ní cáháⁿ ndii Moisés, te ñá túú vèdana chìndee ñaha-xi xii-o nàcuáa vá cùndècu-gá cuéchi-o núú Yã Ndiõxí. Te ndáá chi núú tütú-gá càchí-xi sá ncháá ñáyiú sàndáá iní ñáhá xii-gá,

ñáyiú ñá túú-gã cuéchi-xi ndècu ío váha ndècú-yu núú-gã. ¹² Te núú dícó ío ñáyiú quide nchaandi túhú nàcuáa ní cáháⁿ ndii Moisés ñá, te ñá túú xìni ñuhu-xi quindáá iní-yu tnúhu Xítóhó Jesucristú, chi núú tütú Yã Ndiõxí càchí-xi sá núú dícó ío ñáyiú ndacu cada nchaa nàcuáa ní cáháⁿ ndii Moisés ñá, te cundecu váha-yu núú Yã Ndiõxí.

¹³ Te tnúhu ní chídó tnùnì ndii Moisés càchí-xi sá ío ndècu cuéchi-o núú Yã Ndiõxí cuendá sá ñã ndácú-ó càda-o nchaa nàcuáa ní cáháⁿ ndii, te cuendá xiãⁿ tá dañá nihnu ñaha-gá xii-o cuãháⁿ. Dico Xítóhó Jesucristú ní xido-gá nchaa cuéchi-o cuendá sá vã dañá nihnu ñaha-gá Yã Ndiõxí xii-o. Te càchí-xi núú tütú Yã Ndiõxí: “Èⁿ téee na càta caa-güedé èⁿ yutnu, te téee-ánⁿ cùú-dé téee dañá nihnu ñaha Yã Ndiõxí”, duha càchí-xi núú tütú-gá. ¹⁴ Te ducaⁿ ñí yáha Xítóhó Jesucristú, chi cuinì Yã Ndiõxí sá ndúu táhú nchaa ñáyiú ñá túú cùú ñáyiú isràél cundecu váha-yu dàtná ní nduu táhú ndii Àbrahám ndècú váha ndii. Te ducaⁿ ñí yáha-gá cuendá nchaa nchoo ñáyiú sàndáá iní ñáhá xii-gá ngúndecu ndihì-o Espiritú Yã Ndiõxí sá ñí cachí mée-gã taxi-gá.

Nàcuáa ní cachí Yã Ndiõxí cada-gá

¹⁵ Te nchòhó cue ñáyiú ndècu ndihì-í ichi Yã Ndiõxí na càchí tnúhu-í xii-ndo nàcuáa quide cue ñáyiú ñuyúú-a cuendá tecú tnùnì-gá-ndó nàcuáa quide

Yá Ndiöxí. Chi ñáyiú-áⁿ òré cuíní-yu cadá-yu ìⁿ sá cadá-yu, te díhna-gá ndátnùhu-yu te òré cúú ìⁿnuú-yu, te sáha firmá-yu ìⁿ tutú te tutú-áⁿ vǎ yǒo ìⁿ ndacu cáháⁿ sá vǎ nándíhi-gá-xi, te ni vǎ yǒo-gá ndacu nágá tnúhu chido tnùní núú-xí. ¹⁶ Te ducaⁿ nǐ quide Yá Ndiöxí ndíhi ndíi Àbrahám, chi ní xáhaⁿ-gǎ xii ndíi nàcuáa cada-gá, te tnúhu-áⁿ cúú-xí cuendá méé ndíi ndíhi cuendá ìⁿ ñaní tnáhá ndíi cundecu ñuyíú-a ndéé cuèé-gá. Te núú tütú-gá càchí-xi sá tnúhu-áⁿ cúú-xí cuendá ìⁿ-ni ñaní tnáhá ndíi te ñá díú cuendá nchaá-yu. Te ñaní tnáhá ndíi téé cùu cuendá tnúhu-áⁿ cúú Xítohó Jesucristú. ¹⁷ Te na càchí tnúhu-í xii-ndo sǎ Yá Ndiöxí ní quide ndáá duuⁿ-gá ndíhi ndíi Àbrahám nàcuáa cada-gá. Te sa ní cuu cúmí ciendú ócò úxí cuíá sǎ dúcáⁿ nǐ xáhaⁿ Yá Ndiöxí xii ndíi Àbrahám, te dátnùní ní xáhaⁿ-gǎ xii ndíi Moisés chido tnùní ndíi nàcuáa cada ñáyiú, te nchaa tnúhu ní chídó tnùní ndíi Moisés ñá túú dàquee tíhú-xi tnúhu sá nǐ xáhaⁿ Yá Ndiöxí xii ndíi Àbrahám nàcuáa cada-gá. ¹⁸ Te núú dícó cuendá nchaa tnúhu sá nǐ chídó tnùní ndíi Moisés ní naníhí tàhú-ó ñá, te ñá túú-gǎ xíní ñúhu-xi cada cuendá-ó tnúhu ní xáhaⁿ Yá Ndiöxí xii ndíi Àbrahám cada-gá ní cùu te núu ducaⁿ. Te ndíi-áⁿ nǐ naníhí tàhú ndíi chi ducaⁿ nǐ cachí Yá Ndiöxí cada ñaha-gǎ xii ndíi.

¹⁹ Te nchaa tnúhu ní cáháⁿ ndíi Moisés ní ngódó núú-xí

nchícúⁿ nihnu ñáyiú cuendá ducaⁿ cùtnuní iní-yu sá ndécú cuèchi-yu, te nchícúⁿ nihnu-ní-yu ndéé ní sáá nduu nǐ quexílo Yaá cúú ñàní tnáhá ndíi Àbrahám, chi Yaá-áⁿ ducaⁿ nǐ xáhaⁿ Yá Ndiöxí quixi-gá cada váha-gá nchaa ñáyiú. Te nchaa tnúhu ní chídó tnùní ndíi Moisés, chi Yá Ndiöxí ní tendaha-gǎ cue espíritú xínú cuèchi núú-gǎ ní sáháⁿ-xi ní xítnùhu ñaha-xi xii ndíi nàcuáa danèhé ndíi ñáyiú. ²⁰ Te Yá Ndiöxí ñá túú ní cáháⁿ-gá núú méé ñáyiú, chi ndíi Moisés ní cáháⁿ ndíi yuhu-gá núú-yu, dico cùtnáhá ní cáháⁿ ndíhi-gá ndíi Àbrahám chi núú méé núú ìⁿ ndíi ndíhi-gá ní xáhaⁿ-gǎ xii ndíi nàcuáa cada-gá.

Nàcuáa ndíu nchaa tnúhu ní chídó tnùní ndíi Moisés

²¹ Te nchaa nàcuáa ní chídó tnùní ndíi Moisés, ndíhi nchaa nàcuáa ní xáhaⁿ Yá Ndiöxí xii ndíi Àbrahám cada-gá, ñá túú dàquee tíhú tnáhá-xí. Te núu dícó naníhí tàhú ñáyiú nchícúⁿ nihnu nchaa nàcuáa ní cáháⁿ ndíi Moisés ñá te cudíú-yu núú-gǎ cuendá-ni sá nchícúⁿ nihnú-yu nchaa nàcuáa ní cáháⁿ ndíi ni cùu. ²² Te núú tütú Yá Ndiöxí càchí-xi: “Nchaa nchòhó ñáyiú ndéu ñuyíú ndécú cuèchi-ndo”, duha càchí-xi. Te ducaⁿ cáháⁿ-xi cuendá quíndáá iní-ó Xítohó Jesucristú, te naníhí tàhú-ó chi ducaⁿ nǐ cachí Yá Ndiöxí cada-gá.

²³ Te cùtnáhá vátá cùndècu ndíhi-gǎ-ó tnúhu Xítohó Jesucristú, te nchícúⁿ nihnu-o nchàa nàcuáa ní cáháⁿ ndíi

Moisés, te ní cutnùní iní-ó sã ìo ndècu cuéchi-o ní cùu. Te ducaⁿ-ni nchicúⁿ nihnu-o ndèé ní sáá nduu ní quexìo Xítohó Jesucristú ñuyíú-a, te ní sándáá iní-ó-gã. ²⁴ Te nchaa tnúhu sá ní chídó tnùní ndíi Moisés ní sanu ichi ñaha-xi xii-o nacuaá cada-o cùndecu-o, te ducaⁿ-ni sanu ichi ñaha-xi xii-o ndéé ní sáá nduu ní quexìo Xítohó Jesucristú ñuyíú-a. Te ducaⁿ ní cuu cuendá quíndáá iní-ó-gã, te vá cùndècu-gá cuéchi-o núú Yã Ndiòxí. ²⁵ Te vitna ní ngúndecu ndihí-o tnúhu Xítohó Jesucristú, te ñá túú-gã xíní ñuhu-xi canu ichi ñaha nchaa tnúhu ní chídó tnùní ndíi Moisés.

²⁶ Te vitna tnàhá nchaa nchòhó cúú-ndó dèhe Yã Ndiòxí, chi ní sándáá iní-ndó Xítohó Jesucristú. ²⁷ Te nchòhó ní sandute-ndo dàtná càchí-gá, te ndècu-ndo ndihí-gá, te quide-ndo nchaa nacuaá ní cáháⁿ-gá ndécú-ndó, te ìo ndècu yíñuhu-ndo núú Yã Ndiòxí dàtná ndécú yíñuhu mee Xítohó Jesucristú. ²⁸ Te vitna ìⁿ-ni cùu-o nchaa-o ndecu-o ndihí Xítohó Jesucristú cuèi cùu-o ñáyiu isràèl àdi ñá túú cùu-o, te cuèi cùu-o ñáyiu ñá túú tnàhí dàñá quee núú chíúⁿ pàtróóⁿ-xi àdi cuu-o ñáyiu dàñá queé núú chíúⁿ pàtróóⁿ-xi, te cuèi téé te cuèi ñadìhí ìⁿ-ni cùu-o nchaa-o ndecu-o ndihí Xítohó Jesucristú. ²⁹ Te nchòhó ndécú ndihí-ndo Xítohó Jesucristú, te cùu-ndo dàtná cue ñani tnàhá ndíi Àbrahám, chi ní nduu táhú-ndó cùndecu

váha-ndo núú Yã Ndiòxí dàtná ní nduu táhú ndíi-áⁿ ndécú váha ndíi núú-gã, te ducaⁿ chi mee-gã ducaⁿ ní cachí-gá cunduu.

4

¹ Te nchòhó xíní-ndó sã ìⁿ té líhli chi vátá nãgá cuãñaha tãtã-dè cuu cuendá-dé chi líhli-dé, te ìⁿ-ni cùu-dé ndihí téé xínu cuechi, dico na sáá nduu cuèhnu-dé, te nduu táhú-dè nchaa sá ndécú ndihí tãtã-dè. ² Te xító-yu té líhli-áⁿ sáhnú-dè ndéé sáá nduu ní cachí tãtã-dè sã cuãñaha-dè sá ndúú táhú-dè. ³ Te ducaⁿ sãtnahá-xi cùu nchoo, chi nchicúⁿ nihnu-o nchaa nacuaá ní cáháⁿ cue téé ní xíndecu ndéé sanaha ní cùu. ⁴ Te ní sáá nduu ní quide Yã Ndiòxí dàtná ní cachí-gá, te ní tendaha-gã Déhe-gá Xítohó Jesucristú ní quixi-gá ñuyíú-a, ní dácácú ñaha ìⁿ ñadìhí te ní cuu-gá ñáyiu, te ní quide-gá nchaa nacuaá ní cáháⁿ ndíi Moisés. ⁵ Te ducaⁿ ní tendaha Yã Ndiòxí Déhe-gá cuendá sá vá cãchicúⁿ nihnu-gá-ó nchaa nacuaá ní chídó tnùní ndíi Moisés cuendá ducaⁿ te cuu-o dèhe Yã Ndiòxí.

⁶ Te Yã Ndiòxí ní taxi-gá Espiritú Déhe-gá Xítohó Jesucristú ndécú ndihí-ndo chi cùu-ndo dèhe-gá, te Espiritú-áⁿ chindèe ñaha-xi xii-ndo te càchí-ndó: “Yòhó Dútú Ndiòxí cúú-n Tãtã mée-ndí”, duha càchí-ndó. ⁷ Te xíãⁿ cùtnùní iní-ndó sã cúú-ndó dèhe Yã Ndiòxí vitna, te ñá túú-gã cúú-ndó dàtná cue ñáyiu ñá túú tnàhí dàñá quee núú chíúⁿ pàtróóⁿ-xi.

Te sá dúcáⁿ cùu-ndo déhe-gá, te Xítohó Jesucristú taxi-gá nchaa sá vǎha ní cachí Yǎ Ndiǒxí nduu táhú-ndó.

Té Pǎblú ío sàni iní-dé cuèndá nchaa ñáyiú ndècu ichi Xítohó Jesucristú

⁸Te cútnàhá vátá quíndáá-gá iní-ndó tnúhu Yá Ndiǒxí ní xínu cuechi-ndo núú nchaa sá cǎchí-yu cùu ndiǒxí te ñá ndáá sá ndiǒxí cúú-xí. ⁹Te vitna nchòhó cǎháⁿ ndihí-ndo Yá Ndiǒxí, te mee-gǎ xíní ñáhá-gǎ xii-ndo, te ñá túú ndùu vǎha-xi nanchòcáva iní-ndó cǎda tucu-ndo nacuáa ní xóo cada-ndo díhna, chi nchaa xǎⁿ ñá túú vǎdana nàndihí-xi. ¹⁰Te nchòhó cǎnehe íí-ni-ndo ndùu cachí-ndó íí, te díu-ni ducaⁿ quide-ndo dava yoó ndihí dava cuíá, te ndi tnahá nduu sàcòo vícò díu-ni ducaⁿ quide-ndo cǎnehe íí-ndó ndùu-án. ¹¹Te ío sàni iní-í cuèndá-ndó, chi na cuáháⁿ àúⁿ nǎ cuu ní dánèhe ñáhà-í xii-ndo tnúhu Yá Ndiǒxí.

¹²Te cǎháⁿ ndàhú-í núú nchòhó ñáyiú ndècu ndihí-í ichi Xítohó Jesucristú sá cǎdá-ndó dàtná quidè-í ñá túú nchicúⁿ nihnu-í nchaa tnúhu ní cǎháⁿ ndíi Moisés, chi yúhú quidè-í vitna dàtná ní quide nchòhó ñá túú ní cǎnchicúⁿ nihnu-ndo nàcuáa ní cǎháⁿ ndíi. Te cútnàhá ní xíndecu ndihí ñaha-í xii-ndo ní quide vǎha ñaha-ndo xii-í. ¹³Te sa nàha-ndo sá cútnàhá ní cǎháⁿ-í tnúhu Xítohó Jesucristú núú-ndó ndéé díhna ní cuhú-í, núú xǎⁿ ní xíndecu ndihí ñaha-í xii-ndo ní cǎháⁿ-í tnúhu-gá núú-ndó. ¹⁴Te cuéhé sǎ ñí tnahá-í-án cúú-xí ìⁿ cuéhé sǎ

vǎ yǎo tnàhí cundee iní-xi cundecu ndihí ñaha xii-í ní cùu, dico nchòhó chi ío vǎha ní cǎháⁿ ndihí ñaha-ndo xii-í, te ñá túú ní sàni cuéhé ní sàni duha iní-ndó cuèndá-í, te ní cǎháⁿ ndihí ñaha-ndo xii-í dàtná tnúhu sá yúhú cúú-í ìⁿ espíritú xínú cuèchi núú Yá Ndiǒxí àdi datná méé Xítohó Jesucristú. ¹⁵¿Te ná ní tnahá-ndó núu ñá túú-gǎ sání vǎha iní-ndó cuèndá-í dàtná ní xóo cada-ndo ndéé díhna ío vǎha ní xóo caní iní-ndó cuèndá-í? Te na cǎchí tnúhu ndáá-í xii-ndo sǎ ío ní cuu iní ñáhá-ndó xii-í cútnàhá ní xíndecu ndihí ñaha-í xii-ndo, te nándi sá ndécú ndihí-ndo taxi-ndo xii-í ní cùu, te núu dicó sá cúú te ndéé tìnuu-ndo tava-ndo te taxi-ndo xii-í ní cùu. ¹⁶¿Te nǎa cùu úhú iní ñáhá-ndó xii-í vitna cuèndá sá cǎháⁿ-í tnúhu ndáá tnúhu Yá Ndiǒxí núú-ndó-án?

¹⁷Te ío ñáyiú ío vǎha cǎháⁿ ndihí ñaha xii-ndo, dico ñáyiú-án ñúhú cuéhé iní-yu, chi cuíní-yu sá vǎ cúú-gǎ cǎháⁿ ndihí tñaha-o, chi mee-nǎ-yu cundecu ndihí-ndo cuíní-yu. ¹⁸Te vǎha quide ñáyiú cǎháⁿ ndihí ñaha xii-ndo ndihí tnúhu yíñuhu, te núu cuíní-yu cǎdá-yu ìⁿ sá vǎha sá cúú-xí-ndó. Te ducaⁿ-ni na cǎdá-yu cuéi òré ñá túú ndècu ndihí ñaha-í xii-ndo. ¹⁹Te nchòhó ñáyiú ní sanu ichi-í ichi Xítohó Jesucristú cǎchí tnúhu-í xii-ndo sǎ quidè-xí iní-í dàtná quidè-xí iní ìⁿ ñadihí ñaha sa ní tnahá òré cacu déhe-xi, te ducaⁿ quide-xi iní-í, chi ío vǎi sani iní-í cuèndá-ndó dàtná ní xóo cada-í ndéé díhna, te ducaⁿ-ni cǎdá-í ndéé ná sǎa

nduu càda-ndo nchaa nacuáa càháⁿ Xítohó Jesucristú. ²⁰ ¡Te ío váha cada-xi te núu dícó tnavíi sa ndècu ndihí ñaha-í xii-ndo cuendá càháⁿ-í núu-ndó nàcuáa cada-ndo, te ñá cútnùní iní-í nása cada-í cuendá-ndó!

Cuendá ndíi Àgár ndihí ndíi Sără

²¹ Te nchòhó ñáyiú cùnì canchicúⁿ nihnu nchaa tnúhu ní càháⁿ ndíi Moisés, ¿náa ñá túú tècú tnùnì-ndó nàcuáa càháⁿ-xi tnúhu ní chídó tnùnì ndíi? ²² Chi càchí tnúhu ní chídó tnùnì ndíi-áⁿ sá ndíi Àbrahám ní xíndecu úú déhe ducuⁿ ndíi, te ìⁿ-dé ní cuu déhe ndíi ndihí ñadhíí méé ndíi ndíi Sără, te ingá-dé ní cuu-dé déhe ndíi ndihí ìⁿ ndíi ní xinu cuechi nũ-yu ní xínani Àgár. ²³ Te sá dúcáⁿ ñí cacu déhe ndíi Sără, chi mee Yá Ndiòxí ní cundàhú iní ñáhá-gá xii-aⁿ, chi ducaⁿ ñí cachí-gá cada-gá. Dico ndíi ní xinu cuechi-áⁿ chi ducaⁿ tnàhí ní nduu táhú ndíi-áⁿ sá cóo dèhe ndíi. ²⁴ Te na càchí tnúhu-í xii-ndo ñá cúú sá nánèhé ndíi ndúú cue ndíi dñí-áⁿ. Te úú xito ní càháⁿ Yá Ndiòxí nàcuáa cada-gá, te ìⁿ ndíi-áⁿ nánèhé ndíi nàcuáa ní càháⁿ Yá Ndiòxí xito díhna nuu, te ingá tucu ndíi-áⁿ nánèhé ndíi nàcuáa ní càháⁿ tucu-gá xito cùu uú. Te ndíi Àgár-áⁿ nánèhé ndíi nàcuáa ní xáhaⁿ Yá Ndiòxí xii ndíi Moisés yucu Sinài cada ñáyiú, te nchaa ñáyiú nchicúⁿ nihnu nchaa tnúhu-áⁿ cúú-yu dàtná déhe ndíi Àgár téé ní xinu cuechi, chi téé-áⁿ ñà túú tnàhí ní dàñá-dé quee-dé núú chíúⁿ pàtróóⁿ-dè, te

ducaⁿ sãtnahá-xi cùu-yu chi nchicúⁿ nihnú-yu nchaa nàcuáa ní xáhaⁿ Yá Ndiòxí xii ndíi Moisés. ²⁵ Te tnúhu Àgár queé-xi: Yucu Sinài, te yucu-áⁿ yíndèhu-xi nacióⁿ Àrabiá. Te ndíi Àgár-áⁿ nánèhé tucu ndíi cue ñáyiú ndècu ñuu Jerusàlén, chi ñáyiú-áⁿ ndécú-ñí-yu dàtná ní xíndecu ndíi Àgár ndihí déhe ndíi, chi cue ndíi-áⁿ ñí cuu cue ndíi ñáyiú ñá túú tnàhí ní dàñá quee núú chíúⁿ pàtróóⁿ-xi, te ducaⁿ sãtnahá-xi cùu ñáyiú-áⁿ chi nchicúⁿ nihnu-ní-yu nchaa nàcuáa ní càháⁿ ndíi Moisés. ²⁶ Dico nchoo ñí nduu táhú-ó cùndecu-o ñuu Jerusàlén sáá núú ndécú Yá Ndiòxí, te vitna chi ñá túú-gá nchicúⁿ nihnu-o nchàa nàcuáa ní càháⁿ ndíi Moisés. ²⁷ Te duha càháⁿ-í, chi núú tùtú Yá Ndiòxí càchí-xi:

Yòhó ñaha ní nduu táhú vã cóo dèhe-xi ñí cùu, vitna cana saa-n sá cúdíi iní-n cuèi vátá quíní-gá-n nása càcu ìⁿ landú.

Te cuèi ní cuu táhú-n sã vã cóo dèhe-n ñí cùu dico ío-gá titní déhe-n cóo dacúxí xíchí ñí cuu táhú tnàhí sá cóo dèhe-xi.

Duha càchí-xi núú tùtú-gá. ²⁸ Te nchoo cuè ñáyiú ndècu ichi Xítohó Jesucristú vitna cùu-o datná ndíi Isáac, chi ndíi-áⁿ ñí cacu ndíi, chi mee Yá Ndiòxí ní cachí-gá sá cacú ndíi. Te ducaⁿ sãtnahá-xi cùu nchoo chi ní nduu-o dèhe-gá vitna chi ducaⁿ ñí cachí tucu-gá cunduu. ²⁹ Te déhe ndíi Àgár ní nduu táhú tnàhí

ndíi sá cácu ndíi ñuyíú-a, te ndíi-áⁿ ñi cuu úhú iní ndíi ndíi Isàác, te ndíi Isàác-áⁿ chi Espíritú Yá Ndiòxí ní quide ní cacu ndíi. Te ducaⁿ sãtnahá-xi cùu vitna, chi nchaa nchoo ñáyiu ndècu ndihí Espíritú Yá Ndiòxí cúu úhú iní ñáhá ñáyiu xii-o. ³⁰ Te núu tütú Yá Ndiòxí cãchi-xi: “Chí nãcuícúⁿ xíchí xínú cuèchi ndihí déhe-xi na nuhú-yu, chi déhe xíchí xínú cuèchi-áⁿ ñã túú nã níhí-dé nduu táhú-dé, chi mee-ni déhe ñaha ndècu vehe-xi nduu táhú-dé sá cuãñaha tãtã-dé”, duha cãchí-xi núu tütú-gã. ³¹ Te nchoo cuè ñáyiu ndècu ichi Xítohó Jesucristú ñã tütú-gã cúu-ó dàtná cúu déhe ndíi ní xinu cuechi-ãⁿ, chi ní cuu-o vitna datná cúu ndíi ní nduu táhú nchaa sá ñi sãñaha tãtã-xi-áⁿ. Te ducaⁿ ñi cuu, chi Yá Ndiòxí ní dácãcu ñaha-gã xii-o cuendá sá vã cãchicúⁿ nihnu-gã-ó nchaa nacuaá ní cáháⁿ ndíi Moisés.

5

Canchicúⁿ nihnu-ni-o ichi Xítohó Jesucristú

¹ Te Xítohó Jesucristú ní quide-gã nacuaá vã cáni iní-ó sã nánihí táhú-ó te núu na cãchicúⁿ nihnu-o nacuaá ní cáháⁿ ndíi Moisés, te ñiu-ni ducaⁿ cãni iní-ó cundecu-o te vã ngõ cãni iní-ó sã nánihí táhú-ó te núu na cãchicúⁿ nihnu-o càda-o nacuaá ní cáháⁿ ndíi, chi núu ducaⁿ na càda-o te ío dandòho-o mee-o datná ní xóo ndoho-o cùnàhá vátã cundècu-gã-ó ichi-a.

² Te yúhú té Pãblú cuiní-í sá cundedòho-ndo ñi tñúhu na càháⁿ-í-a. Te núu nchòhó cuãha-ndo seña ñi-ndo cuendá sá sãndáá iní-ndó

nacuáa ní cachí ndíi Moisés cada-ndo, te núu ducaⁿ na càda-ndo ña, te àúⁿ nã cuu ndècu-ndo ichi Xítohó Jesucristú te núu ducaⁿ. ³ Te dàtná ní cachí-í xii-ndo, te ñiu-ni ducaⁿ càháⁿ tucu-í vitna sá núu ndèda-ni càa ñiⁿ téa na cuãha-dé seña ñi-dé, te xini ñuhu-xi sá dácuití tãú-dé cada-dé nchaa nacuaá ní cáháⁿ ndíi Moisés. ⁴ Te nchaa nchòhó ñáyiu sãni iní sá ñã tütú-gã cuèchi-xi ndècu núu Yá Ndiòxí cuendá sá nchicúⁿ nihnu-ndo nchaa nacuaá ní cáháⁿ ndíi Moisés, ñã tütú-gã ndécú-ndó ndihí Xítohó Jesucristú, te ni Yá Ndiòxí ñã tütú-gã cundàhú iní ñáhá-gã xii-ndo càda váha ñaha-gã. ⁵ Dico nchaa nchoo ñáyiu sãndáá iní ñáhá xii-gã cùñu-o núu-gã, chi chindee ñaha Espíritú-gã xii-o, te ndètu cahnu-ná-ó sãá nduu cùñaha núu Yá Ndiòxí xii-o sã cùñu-o núu-gã. ⁶ Te nchoo cuè ñáyiu ndècu ndihí Xítohó Jesucristú ñi-ni quide-xi cuéi na cuãha-o seña ñi-o àdi vã cuãha-o, chi ñã tütú chindee ñaha-xi xii-o nacuaá cundecu váha-o ndihí-gã. Te ñiⁿ dií-ni sá xini ñuhu-xi quindáá iní-ó Xítohó Jesucristú, te núu ducaⁿ na càda-o te cuu iní-ó cuè tñaha ñáyiu-o.

⁷ Te nchòhó ío váha quide-ndo ndècu-ndo ichi Yá Ndiòxí ní cùu, te vitna cùñúhu-í sá ñã tütú-gã sãndáá váha iní-ndó tñúhu-gã, te ducaⁿ quide-ndo chi ndècu ñáyiu sãnu ichi ñaha xii-ndo ingá ichi. ⁸ Te ñã díú Yá Ndiòxí Yaá ní cáháⁿ ñáhá xii-ndo ducaⁿ ni cachí-gã

cada-ndo sã vã quindáá-gá iní-ndó tnũhu-gá. ⁹ Te nchòhó xìní-ndó sã nõu luha levadurá ná quĩhu yuchi te dāndaa-xi. Ducaⁿ sãtnahá-xi cùu ñáyiu dāndahú ñáhá xii-ndo, chi cuiní-yu dācuĩta nihnu ñáhá-yu xii-ndo nchàa-ndo. ¹⁰ Te yúhú cútnùní ndáá iní-í sá Xítohó Jesucristú chindee ñàha-gá xii-ndo cuendá sá ñã túú ñágá tnúhu quindáá iní-ndó, dico nchaa ñáyiu ducaⁿ dāndahú ñáhá xii-ndo nacháhu-yu núu Yã Ndiõxí nchaa sá quidẽ-yu cuẽi náí-gá ñáyiu cùú-yu.

¹¹ Te cāchí tnúhu-í xii nchòhó ñáyiu ndècu ndihí-í ichi Yã Ndiõxí sá nõu dicó dānehé-ni-í ñáyiu sá cuãha-yu señá ñĩ-yu dātná ní cachí ndíi Moisés ñã, te vá yõo cuu úhú iní ñáhá xii-í ní cùu, te ni vã túu úhú iní-yu cuendá sá ñĩ xihí Xítohó Jesucristú núu cùrúxí ní cùu. ¹² Te nchaa ñáyiu dāsátú iní ñáhá xii-ndo sã cuãha-ndo señá ñĩ-ndo, te váha-gá sá ná cādã-yu mée-yu ìⁿ tnúndòho, te ñã díú sã dúcãⁿ cànuichi ñáhá-yu xii-ndo cùndecu-ndo.

¹³ Te nchòhó ñáyiu ndècu ndihí-í ichi Xítohó Jesucristú ñu-gá ní taunihnu ñàha-gã xii-ndo cuendá sá vã cānchicúⁿ nihnu-gá-ndó nchàa nacuáa ní cāháⁿ ndíi Moisés, dico vá cānì iní-ndó sã sã dúcãⁿ ñĩ taunihnu ñàha-gã xii-ndo, te cuu-ni cada-ndo ñāndi sá cuèhé sá dúhá vèxi iní-ndó, dico cuu iní tnáhá-ndó ìⁿ ìⁿ-ndo te chindee tnàha-ndo. ¹⁴ Chi ducaⁿ cāháⁿ Yã Ndiõxí sá

cúu iní-ó cuè tnaha ñáyiu dātná cúu iní-ó mēe-o. Te núu ducaⁿ na cāda-o, te quide-o nchaa nacuáa tãú-xi cada-o dātná cāháⁿ nchaa tnúhu ní chidó tnùnì ndíi Moisés. ¹⁵ Te núu nchòhó cúu úhú iní tnáhá-ndó ndècu-ndo, te ñã túú quide váha-ndo te núu ducaⁿ quide-ndo, dico yúhú cāchí-í sá vã dúcãⁿ-gã cada-ndo cùndecu-ndo cuendá sá vã dācuĩta nihnu tnàha-ndo.

Nācuáa sàni iní ñáyiu ndècu ichi cuehé ichi ñuha ndihí nācuáa sàni iní ñáyiu ndècu ndihí Espiritú Yã Ndiõxí

¹⁶ Te na cāchí tnúhu-í xii-ndo sã cādã-ndó nchàa nacuáa cuiní mée Espiritú Yã Ndiõxí cada-ndo, te ducaⁿ te vá cānì-gã iní-ndó cāda-ndo nāndi nchaa sá cuèhé sá dúhá sàni iní mēe-ndó. ¹⁷ Chi nchaa xiãⁿ ñã túú tnáhá tnúhu-xi ndihí Espiritú Yã Ndiõxí. Te ñu-ni ducaⁿ quide Espiritú Yã Ndiõxí, chi ñã túú tnáhá iní-xi nchaa sá cuèhé sá dúhá sàni iní-ndó. Te sã dúcãⁿ ñã túú tnáhá tnúhu tnàha-xi xiãⁿ ñã túú ñihí ndéé-ndó cāda-ndo ìⁿ sá vãha sàni iní-ndó cāda-ndo. ¹⁸ Te núu quide-ndo nchaa nacuáa sànu ichi ñàha Espiritú Yã Ndiõxí, te ñã túú-gã táxi tnùnì ñáhá nchàa tnúhu ní chidó tnùnì ndíi Moisés xii-ndo.

¹⁹ Te nchaa ñáyiu xìnì-yu nchaa nācuáa quide ñáyiu quide cuehé quidé ñuha. Te ñuha quidé-yu: Cue tée cāháⁿ ndihí-güedé ñáyiu ñihí te ñã díú ñāñihí-güedé cúú-yu, te ñu-ni ducaⁿ xiquide cue ñáyiu ñihí, te nāndi-gã nchaa sá cuèhé sá dúhá cuãháⁿ

véxi-yu quidé-yu. ²⁰ Te quide cahnú-yu nchaa sá cächí-yu cùu ndiöxí te ñá ndàá sá ndiöxí cúu-xí, te quide nduu tnahá-yu, te cùu úhú iní tnáhã-yu, te nàá-yu, te cùu cuiñú tnáhã-yu, te ío yáchí cúdeñⁿ-yu, te ndúcú-yu mee-ni sã cúu-xí mèe-yu, te ñá túú cùu ñⁿnuú-yu cundecú-yu, te quide díⁿ tnahá-yu. ²¹ Te cùu cuedú iní-yu nchaa sá ndécú ndìhi dava-gá-yu, te sàhni tnahá-yu, te ío quihú-yu, te ndì cuu ndì cuú-yu quidé-yu nchaa sá cuèhé sá dúhá, te nándi-gá nchaa sá cuèhé sá dúhá quidé-yu. Te sa cächí tnúhu-í xii-ndo sã ncháá ñáiyu ducaⁿ xiquide vá ndúú tãhú-yu cundecú-yu núu ndécú Yã Ndiöxí táxí tnùní-gá.

²² Dico Espíritú Yã Ndiöxí chindèe ñaha-xi xii-o cuu iní tnáhá-ó, te cùdí iní-ó ndècu-o, te ío váha cùu iní-ó, te càhnu iní-ó, te váha iní-ó, te cùndahú iní tnáhá-ó, te quide ndáá-ó ndècu-o. ²³ Te ndàhú iní-ó, te quide-o nchaa nacuaá tàú-ó càda-o, te nchaa xiãⁿ chindèe ñaha Espíritú Yã Ndiöxí quidé-ó, te núu ducaⁿ quide-o, te vá yõ ñⁿ-gá cáháⁿ sá ñà túú quide váha-o ndècu-o. ²⁴ Te nchoo cuè ñáiyu ndècu ndìhi Xítóhó Jesucristú, sa naha-o sá ñí xihí-gá núu cùrúxí sá cuendá-ó, núu xiãⁿ ñⁿ duuⁿ ní dáñá-ó ncháa ichi cuèhé ichi duha, te ñá túú-gã táxí tnùní ñáhá ñí ñⁿ sá cuèhé sá dúhá sã ñí xóo caní iní-ó ní cùu. ²⁵ Te vitna ní ngúndecu ndìhi-o Espíritú Yã

Ndiöxí chindèe ñaha-xi, te xìni ñuhu-xi sá cádá-ó nàcuáa sànu ichi ñaha Espíritú-gá cada-o.

²⁶ Te vá cádá càhnu-o mee-o, te vá ndúcú-ó plètú, te ni vã cúu cuedú iní-ó sã ndécú ndìhi tnahã ñáiyu-o.

6

Chindee tnàha-o ñⁿ ñⁿ-o

¹ Te nchòhó ñáiyu ndècu ndìhi-í ichi Xítóhó Jesucristú cächí tnúhu-í xii-ndo sã ñúu ñⁿ ñáiyu ndècu ndìhi-ndo ichi-gá ní quidé-yu ñⁿ sá ñà túú tàú-yu cáda-yu núu-gã, te nchòhó ñáiyu quide váha ndècu ndìhi Espíritú Yã Ndiöxí cáháⁿ-ndó dõho cue ñáiyu ducaⁿ xiquide-áⁿ cuendá nucúnu ichí-yu, te vii vii cáháⁿ ndìhi-ndõ-yu, te ío coto-ndo mèe-ndo cuendá sá vã cádá-ndó ñⁿ sá ñà túú tàú-ndó càda-ndo núu-gã.

² Te ío chindee tnàha-ndo, te cuáha tnàha-ndo tnúhu ndee iní cundecu-ndo cuendá nchaa sá yàha-ndo. Te núu ducaⁿ na càda-ndo, te quide-ndo nchaa nacuaá ní cáháⁿ Xítóhó Jesucristú cada-o.

³ Te núu ío ñⁿ-ndo cächí-ndó sã ío váha quide-ndo ndecu-ndo ichi Yã Ndiöxí te ñá ndàá ñá, te dicó dándahú-ndó mèe-ndo sá dúcáⁿ quide-ndo. ⁴ Te ndì díⁿ ndì díⁿ càda cuendá-ndó ñúu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudí iní-ndó sã cúu-xí mèe-ndo, te vá caní iní-ndó sã quide váha-gá-ndó dàcúúxí dàva-gá-yu. ⁵ Chi

tàù-ó sǎ ndí dííⁿ ndí dííⁿ càda cuendá-ó nàcuáa ndècu-o.

⁶ Te nchaa nchòhó ñáyiù dàcuaha tnúhu Yá Ndiòxí chindee-ndo cuè téè dàcuaha ñaha xii-ndo tnúhu-gá cuañaha-ndo nǎndi sá xíní ñùhu-güedé.

⁷ Te vá dándàhú-ndó mèe-ndo cundecu-ndo, chi vá cúú cùdiquí ndeé-ó Yá Ndiòxí, chi nchòhó xíní-ndó sǎ nùu na càda váha-o cundecu-o, te cùu-xi ñⁿ sá vǎha sá cúú-xí-ó, dico núu vá cáda váha-o ña, te ío ndoho-o te núu ducaⁿ na càda-o. ⁸ Te núu quide-o nchaa sá cuèhé sá dúhá sàni iní-ó, te diu-ni xíáⁿ dàcuíta nihnu ñaha-xi xii-o, dico núu quide-o nchaa nacuáa sànu ichi ñaha Espíritú Yá Ndiòxí xii-o, te cundecu ndihi-o Yá Ndiòxí ni caa ni quíhíⁿ.

⁹ Te xíní ñùhu-xi vá dáñá ndeé-ó càda váha-o cundecu-o, te ducaⁿ te sáá nduu càda váha ñaha Yá Ndiòxí xii-o, te núu vá ná tǔhú iní-ó càda váha-o cundecu-o. ¹⁰ Te cada-o sǎ vǎha sá cúú-xí nchàa tnaha ñáyiù-o vitna ndecu-o ñuyúí-a, te ío-gá tàù-ó chindee-o cue ñáyiù ndècu ndihi-o ichi Xítohó Jesucristú.

Tnúhu ndeé núú ñí ndihi-ná

¹¹ Te cundehe-ndo sǎ ndǎa ndǎa lètrá tèè-í núú tǔtú-a sá cúú-xí-ndó. ¹² Te nchaa ñáyiù quide yicá sá cuǎha-ndo seña ñí-ndo dàtná ní cachí ndíi Moisés, ñáyiù-áⁿ cúú-yu ñáyiù cuíní cudíu núú tnàha ñáyiù-xi. Te ducaⁿ quidé-yu cuendá sá vǎ ndóhó-yu cuendá nchaa tnúhu sá dánèhé ñáhá sǎ ñí xíhí Xítohó Jesucristú núú cùrúxí. ¹³ Te

ni ñáyiù sa ní ngúndecu ndihi seña ñí-xi ñá túú quidé-yu nchaa nàcuáa ní cáháⁿ ndíi Moisés, dico mèe-yu cuíní-yu sá cuǎha-ndo seña ñí-ndo. Te ducaⁿ quidé-yu chi quide cahnú-yu mèe-yu núú nchàa dava-gá ñáyiù. ¹⁴ Te yúhú chi ñá túú quide cahnu-í mèe-í cuendá nchaa sá quidé-í, chi mee-ni sǎ ío cùu váha iní-í sá Xítohó Jesucristú ní xíhí-gá núú cùrúxí cuendá-ó. Te diu cuendá sá ñí xíhí-gá ñá túú-gǎ ndécù-í ichi cuèhé ichi duha, te ni ñá túú-gǎ táxí tnúní ñáhá ñí ñⁿ sá cuèhé sá dúhá xii-í. ¹⁵ Te ñá túú ná chindee ñaha-xi xii-o cuéi na cuǎha-o seña ñí-ó àdi vá cuǎha-o, chi ndècu ndihi-o Xítohó Jesucristú, te ní nduu-o dàtná ñⁿ ñáyiù saa, te xíáⁿ cúú-xí sǎ ío-gá xíní ñùhu-xi. ¹⁶ Te xicáⁿ táhù-í núú Yá Ndiòxí sá ncháá nchòhó ñáyiù quide nchaa nacuáa cáháⁿ-í-a cundecu nahi-ndo, nchòhó ñáyiù cùu cuendá Yá Ndiòxí dàtná ñáyiù israhél chi ñáyiù-áⁿ ñí cachí-gá sá cúú cuendá-gá. Te mee-gǎ ío cundàhú iní ñáhá-gǎ xii-ndo chindee ñaha-gá.

¹⁷ Te není vitna cuíní-í sá vǎ yóo ñⁿ-gá chidácá nihnu ñaha xii-í cuendá chiuⁿ quide-í, chi yayàcáⁿ sa ní nduu tǐlòhó ñí-í cuendá sá ndóhó-í cuendá Xítohó Jesucristú.

¹⁸ Te nchòhó ñáyiù ndècu ndihi-í ichi Xítohó Jesucristú xicáⁿ táhù-í núú-gǎ sá ío na chindee ñaha-gá xii-ndo nchàa-ndo. Te ducaⁿ na cùnduu. Te ío chí cáda ndèe iní-nǎ vitna.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ ÉFESÚ

*Té Päblú cadúha-dé tutú
quíhiⁿ ndaha ñáyiú xĩndecu ichi
Xítohó Jesucristú ndécú ñuú
Éfesú*

¹ Yúhú té Päblú ní tendaha ñaha Yá Ndióxi càháⁿ-í tnúhu Xítohó Jesucristú núú ñáyiú, chi ducaⁿ ñi cachí Yá Ndióxi cunduu, te vitna cadúha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndióxi xĩndecu ñuú Éfesú, te diu-ni nchòhó cúu-ndó ñáyiú sàndáá iní ñáhá xii Xítohó Jesucristú.

² Te xicáⁿ táhù-í núú Dütú Ndióxi Yaá cúu Tátá-ó, ndihi núú Xítohó Jesucristú sá ná chĩndee chitúu ñaha-gá xii-ndo, te ducaⁿ ndi nduú-gá ná cadá te ío váha cuu iní-ndó cùndecu-ndo.

Espíritú Yá Ndióxi chĩndèe ñaha-xi xii-o chi ndècu ndihi-o Xítohó Jesucristú

³ Te cachí-ó sá ío càhnu cuu Yá Ndióxi Yaá cúu Tátá Xítohó Jesucristú, te ndéé andiú quide Yá Ndióxi nchaa sá váha sá cúu-xi-ó cuendá sá ndécú ndihi-o Espíritú-gá, te ducaⁿ quide-gá chi ndècu ndihi-o Xítohó Jesucristú. ⁴ Te ndéé cùtnàhá vátá ngáva-gá ñuyúú ñi cachí Yá Ndióxi sá nchóó cùu-o ñáyiú cùu cuendá-gá, te ducaⁿ ñi cachí-gá sá cuendá Xítohó Jesucristú cuendá sá

nchóó cùu-o ñáyiú ñá túú tnàhí ná cumání cundecu núú-gá, te ducaⁿ te vá cùndècu cuèchi-o. ⁵ Te Yá Ndióxi ío cùu iní ñáhá-gá xii-o núu xiáⁿ ducaⁿ ñi cachí-gá ndéé cùtnàhá vátá ngáva-gá ñuyúú sá nchóó nduú-o déhe-gá. Te sá cuendá nchaa sá cadá Xítohó Jesucristú sá cúu-xi-ó, xiáⁿ ducaⁿ ñi cachí Yá Ndióxi, te ducaⁿ ñi cachí-gá chi ducaⁿ tnàhí ní sani iní-gá cunduu. ⁶ Te xiáⁿ núu xini ñuhu-xi sá nchóó càchí-ó sá ío càhnu cuu Yá Ndióxi, chi ío cùndahú iní ñáhá-gá chĩndèe ñaha-gá xii-o. Te ducaⁿ quide-gá chi ndècu ndihi-o Xítohó Jesucristú Yaá ío cùu iní-gá. ⁷ Te Yá Ndióxi ío cùu iní ñáhá-gá xii-o núu xiáⁿ Xítohó Jesucristú ní sati níñi-gá te ní xihí-gá cuendá dacacu nihnu ñaha-gá xii-o núu ùhú núu ndàhú, te ducaⁿ càda cahnu iní-gá nchaa yicá cuèchi-o. ⁸ Te Yá Ndióxi ío cùndahú iní ñáhá-gá chĩndèe ñaha-gá xii-o, nàcuáa ngùndecu ndihi-o nchàa sá xini tnùnì-ó te ducaⁿ te cuu-o ñáyiú tècú tnùnì. ⁹ Te Yá Ndióxi ní dánèhé ñáhá-gá xii-o nchàa sá ndúú yùhu, nchaa sá ñi sani iní-gá cada-gá. Te ducaⁿ ñi quide-gá chi ducaⁿ ñi sani iní-gá cunduu. ¹⁰ Te sá ñi sani iní-gá cada-gá te dacutíí sá cadá-gá ná sàá nduu, te na sàá nduu-áⁿ te mee-gá cada sá Xítohó Jesucristú quindaha-gá nchaa sá ío andiú, ndihi nchaa sá ío ñuyúú-a.

¹¹ Te nchoo ñi nduu táhú-ó ñi nduu-o ñáyiú cùu cuendá

Yă Ndiöxí chi ndècu ndihi-o Xítohó Jesucristú. Te ducaⁿ ní cuu chi ducaⁿ tnàhí ní sani iní Yă Ndiöxí cunduu. Te nchaandi túhú sá quidé-gă, quide-gă năcuăa sàni iní mée-gă cunduu. ¹² Te ducaⁿ ní cuu cuendá sá nchũhú ñáyiú díhna nuu ní sándáá iní tnúhu Xítohó Jesucristú cáháⁿ-ndí sá ío cànhu cuu mee Yă Ndiöxí cuendá nchaa sá vâha quide-gă. ¹³ Te nchòhó tucu cùtnàhá ní xíndedóho-ndo tnúhu ndáá tnúhu sá cáháⁿ năcuăa naníhí tãhú-ó ní cuu ìⁿnuu-ndo ndihi Xítohó Jesucristú chi ní sándáá iní-ndó-gă. Te xiãⁿ cùtnùní sá nchòhó ní nduu-ndo ñáyiú cùu cuendá Yă Ndiöxí, chi ní ngúndecu ndihi-ndo Espíritú-gă sá ní cachí-gă taxi-gă. ¹⁴ Te sá ndécú ndihi-o Espíritú Yă Ndiöxí xiãⁿ cùtnùní sá ndáá nduu tãhú-ó cùndecu-o ndihi-gă ná sáá nduu năcuaca ñaha-gă xii nchaa nchoo ñáyiú cùu cuendá-gă, te sá dúcáⁿ càda-gă nũu xiãⁿ tãu-ó càchí-ó sá ío cànhu cuu-gă.

Té Păblú xicáⁿ tãhú-dě núú Yă Ndiöxí cuendá cue ñáyiú ndècu ichi-gă

¹⁵ Te yúhú nihí-í tnúhu sá nchòhó ío vâha sándáá iní-ndó Xítohó Jesucristú, te nchaa ñáyiú cùu cuendá Yă Ndiöxí ío cùu iní-ndó-yu. ¹⁶ Te xiãⁿ nũu ñá túú dàña ndeé-í ndacáⁿ tãhú-í núú-gă cuendá-ndó, te ío xicáⁿ tãhú-í ¹⁷ núú Yă Ndiöxí Yaá cúú Tãtá Xítohó Jesucristú cuendá-ndó. Te ðiú-ni Yă Ndiöxí cúú-gă Yaá ío cànhu cuu. Te xicáⁿ tãhú-í núú Yă

Ndiöxí sá mée-gă ná cáda sá Espíritú-gă chindee ñàha-xi xii-ndo cuendá cuu-ndo ñáyiú təcú tnùní, te na càda-xi sá cùtnùní iní-ndó năcuăa sàni iní Yă Ndiöxí. ¹⁸ Te ducaⁿ xicáⁿ tãhú-í núú Yă Ndiöxí cuendá-ndó, cuendá sá nchòhó tecú tnùní-ndó năcuăa ndùu tnúhu ndee iní ní taxi-gă ní ngúndecu ndihi-ndo cùtnàhá ní cáháⁿ ñàhá-gă xii-ndo. Te ducaⁿ cùtnùní tucu iní-ndó sá ncháá sá ní cachí-gă taxi-gă nduu tãhú nchoo cuè ñáyiú cùu cuendá-gă cúú-xí mèe cuií-ni sá ío-gă vâha. ¹⁹ Te cùtnùní tucu iní-ndó sá Yă Ndiöxí ío cànhu cuu-gă quide-gă nchaa núú sá vâha sá cúú-xí nchòo ñáyiú sándáá iní ñàhá xii-gă, chi quide-gă sá vâ yòo tnàhí ndàcu cada sá cúú-xí-ó dàtná ní quide-gă ²⁰ ní dándótó-gă Xítohó Jesucristú cùtnàhá ní xihí-gă. Te ní taxinucóo-gă Xítohó Jesucristú xio cùha-gă táxí tnùní-gă. ²¹ Te Xítohó Jesucristú ío-gă cùnùu-gă dàcúúxí nchaa núú cuè espíritú, ndihi dàcúúxí nchaa cue tée yíndaha ñáyiú, ndihi dàcúúxí nchaa dava-gă cue tée cùnùu. Te cuèi vitna te cuèi ndeé núú cuaháⁿ núú vèxi ducaⁿ-ni ío cùnùu-gă taxi tnùní-gă. ²² Te mee Yă Ndiöxí ní quide-gă sá Xítohó Jesucristú taxi tnùní-gă nchaandi túhú sá ío, te ðiú-ni mee Yă Ndiöxí ní cachí-gă sá ncháá ñáyiú cùu cuendá-gă quíndaha ñàha Xítohó Jesucristú. ²³ Te cada iní-ó sá ncháá ñáyiú cùu cuendá Yă Ndiöxí cúú-yu yiqui cùñú Xítohó Jesucristú, chi ìⁿ-ni

cùu-yu ndihi-gá, te mee-gã táxí tnùnì-gá nchaandi túhú sá íó.

2

Yá Ndiöxí ío cùndahú iní ñáhá-gã xii-o núu xiãⁿ ní dácácu nihnu ñaha-gã

1 Te nchòhó cúu-ndó dàtná ñáyiu ní xíhí cuendá nchaa sá cuèhé sá dúhá quide-ndo ni cuu, dico vitna cada iní-ndó sã dàtná ní ndoto-ndo chi ní nduu táhú-ndó cùndecu-ndo ndihi Yá Ndiöxí ni caa ni quíhíⁿ.

2 Te ducaⁿ nĩ xíndecu-ndo ìchi cuehé ìchi duha, chi ní cáncicúⁿ nihnu-ndo nchàa sá cuèhé sá dúhá ío ñuyíú-a, te ní xóo cada-ndo nchàa nacuáa càháⁿ sácúíhná, te ñiu-ni sácúíhná-ãⁿ táxí tnùnì-xi nchaa dava-gã espíritú cùndìhi-xi, te ñiu-ni-xi ndècu ndihi-xi nchaa ñáyiu ñá túú cuiní tñi tnúhu càháⁿ Yá Ndiöxí, te dàcaháⁿ ñáhá-xi xii-yu cuendá cundecu-ni-yu ìchi cuehé ìchi duha. 3 Te nchaa-o dùcaⁿ ní xóo cada-o dàtná quidé cuè ñáyiu-áⁿ, chi ní xóo cada-o nchàa sá cuèhé sá dúhá nĩ xóo cani iní-ó, te nándi-gã nchaa sá cuèhé sá dúhá nĩ xóo cahu iní-ó nĩ xóo cada-o, núu xiãⁿ tàú-ó sã dándòho ñaha Yá Ndiöxí xii-o ni cùu datná tàú-xi dandòho-gã nchaa ñáyiu ducaⁿ ndècu ìchi cuehé ìchi duha-áⁿ. 4 Te Yá Ndiöxí ío cùu iní ñáhá-gã xii-o núu xiãⁿ ní cundahú iní ñáhá-gã xii-o 5 cuèi cùu-o datná ñáyiu ní xíhí sá cuendá nchaa sá cuèhé sá dúhá quide-o ni cuu. Te ducaⁿ nĩ quide-gã ní cundahú iní ñáhá-gã xii-o

cuendá cundecu-o ndihi Xítohó Jesucristú vitna, te cuu ñⁿnuu-o ndihi-gã. Te sá cuendá-ni sá cùndahú iní ñáhá Yá Ndiöxí xii-o xiãⁿ ní quide-gã nacuáa nchoo naníhí tàhú-ó. 6 Te cada iní-ó sã dàtná ní quide Yá Ndiöxí cùtnáhá ní dándótó-gã Xítohó Jesucristú cùtnáhá ní xíhí-gã ducaⁿ nĩ quide ñaha-gã xii-o chi ndècu-o ndihi-gã vitna. Te Xítohó Jesucristú sa ndècu-gã andíu núu ndécú Yá Ndiöxí. Te cada iní-ó sã Yá Ndiöxí sa ní quide-gã sá nchóo ní ngúndecu túu-o ndihi Xítohó Jesucristú, chi ío váha ndècu-o vitna. 7 Te Yá Ndiöxí quidé vãha ñaha-gã xii-o vitna cuendá sá ná sãa nduu, te ñiu-ni mee-gã cada te cutnùnì iní nchaa ñáyiu sá ío cùu iní ñáhá-gã xii-o, te ducaⁿ ío chindee chitúu ñaha-gã xii-o cuendá sá ndécú ndihi-o Xítohó Jesucristú. 8 Te Yá Ndiöxí ío cùndahú iní ñáhá-gã xii-ndo núu xiãⁿ ní quide-gã sá nchòhó naníhí tàhú-ndó, Te ducaⁿ nĩ quide-gã chi ní sándáá iní-ndó-gã. Te ñá ñá sã cuendá ñⁿ chiuⁿ ni quide-ndo ducaⁿ ní naníhí tàhú-ndó, chi mee Yá Ndiöxí ní cuiní-gã sá dícó-ni ducaⁿ naníhí tàhú-ndó. 9 Te mee Yá Ndiöxí ní cachí-gã sá ñà ñá sã cuendá ñⁿ chiuⁿ quide-o naníhí tàhú-ó, te ducaⁿ nĩ cachí-gã cuendá sá vã cáda càhñu-o mee-o. 10 Te Yá Ndiöxí ní quide ñaha-gã xii-o dàtná ñⁿ ñáyiu saa cuendá sá nĩ tnahá tnúhu-o ndihi Xítohó Jesucristú, te ducaⁿ nĩ quide-gã cuendá sá cáda-ó

mèe-ni sá vǎha. Te Yá Ndiöxí ducaⁿ tnàhí ní sani iní-gá cunduu sá nchóó cùu-o ñáyiü cada mee-ni sǎ vǎha.

Xítohó Jesucristú quidé-gǎ ío váha cùu iní-ó ndècu-o

11 Te nchòhó chí dándàcu iní nàcuáa ní xíndecu-ndo ní cùu, chí ñá túú cùu-ndo ñáyiü isràél, te ní ñà túú quíde-ndo datná quidé ñáyiü-án, chí ñáyiü-án sǎha-yu seña ñí-yu, te dàquee tihũ-yu nchaa ñáyiü ñá túú ndècu seña ñí-xi. 12 Te chí dándàcu iní nàcuáa ní xíndecu-ndo, chí dàvá-án ñà túú ní xíndecu-ndo ndihí Xítohó Jesucristú, te ní ñà túú ní xǒo cuu tnahá tnúhu-ndo ndihí ñáyiü isràél, te ní ñà túú ní xìní tnùní-ndó nàcuáa ndùu tnúhu sá ní cáháⁿ ndáá Yá Ndiöxí nàcuáa cada váha-gá ñáyiü, te ní ñà túú ní cùu-ndo ñáyiü quindaha-gǎ, te ní ñà túú ní xǒo níhí-ndó tnúhu ndee iní sá cùndecu-ndo ndihí-gá. 13 Te cuéi ní cuu-ndo ñáyiü ñá túú tnàhá tnúhu ndihí Yá Ndiöxí ní cùu, dico vitna ní tnahá tnúhu-ndo ndihí-gá chí cùu ñí-nuu-ndo ndihí Xítohó Jesucristú, cuendá sá ní sati níñí-gǎ te ní xíhí-gá te xǎⁿ ducaⁿ tnàhá tnúhu-ndo ndihí Yá Ndiöxí vitna. 14 Te Xítohó Jesucristú ní quíde-gá sá nchóó ío váha cuu iní-ó cùndecu-o, te diu-ní-gá ní quíde cuendá sá vǎ dáquèe tihú ñáhá ñáyiü isràél xii ñáyiü ñá túú cùu ñáyiü isràél, te ducaⁿ ñí-ná cuú-yu cundecú-yu. 15 Te sá ní xíhí Xítohó Jesucristú, xǎⁿ ñá túú-gǎ cùnùu nchaa tnúhu

sá sánú ìchi ñaha xii ñáyiü nàcuáa cadá-yu cundecú-yu ní cùu. Te ducaⁿ ní xíhí Xítohó Jesucristú cuendá sá cuè ñáyiü isràél ndihí cue ñáyiü ñá túú cùu ñáyiü isràél ñí-ná cuú-yu cundecú-yu ichi-gá, te ducaⁿ te vǎ dáquèe tihú tnàhá-gǎ-yu, te ío váha cundecu ndihí tnàhá-yu. 16 Te ducaⁿ ní quíde Xítohó Jesucristú ní xíhí-gá núú cùrúxí cuendá sá cuè ñáyiü cùu ñáyiü isràél ndihí cue ñáyiü ñá túú cùu ñáyiü isràél vǎ dáquèe tihú tnàhá-gǎ-yu. Te ducaⁿ ní xíhí-gá cuendá ñí-ná cuú-yu tnahá tnúhu-yu ndihí Yá Ndiöxí nàcuáa cuu váha iní ñáhá-gǎ xii-yu.

17 Te cuéi cùu-ndo ñáyiü ñá túú tnàhí xìní ndáá cuendá Yá Ndiöxí ní cùu, dico Xítohó Jesucristú ní quixí-gá ñuyú-a ní cáháⁿ-gá tnúhu váha nàcuáa ío váha cuu iní-ndó cùndecu-ndo ndihí Yá Ndiöxí. Te diu-ni ducaⁿ ní quíde-gá sá cúu-xí nchaa ñáyiü sa xìní cuendá Yá Ndiöxí, diu-ni ñáyiü isràél. 18 Te cuéi cùu-o ñáyiü isràél àdi ñá túú cùu-o dico diu-ni mee Xítohó Jesucristú ní quíde-gá sá ncháá-ó tnàhá tnúhu-o ndihí Dútú Ndiöxí Yaá cúu Tátá-ó. Te ducaⁿ ní tnahá tnúhu-o ndihí Yá Ndiöxí chí ní ngùndecu ndihí-o Espíritú-gá. 19 Te nchòhó ñáyiü ñá túú cùu ñáyiü isràél ní cuu-ndo ñáyiü ñá túú tnàhá tnúhu ndihí Yá Ndiöxí ní cùu, dico vitna chí ñí-ná ní cuu-ndo ndihí nchaa dáva-gá ñáyiü cùu cuendá-gá chí cùu-ndo déhe-gá. 20 Te cada iní-ó sǎ cuè téé ní

táuchíuⁿ Xítohó Jesucristú cáháⁿ tnúhu-gá, ndihi cue téé ní xóo cáháⁿ tnúhu Yá Ndiöxí ndéé sanaha cùu-güedé dàtná cimientú ìⁿ vehe, te nchòhó cúu-ndó dàtná ndóho sá sàà vehe-áⁿ, te cada tucu iní-ó sá Xítohó Jesucristú cúu-gä ìⁿ yúú cúnüu cuu cimientú vehe-áⁿ. ²¹ Te ducaⁿ ìo váha cùu ìⁿnuu nchaa ndóho-áⁿ ndihi yúú cúnüu-áⁿ, te ducaⁿ tucu ìo váha ta quëe tnàha nchaa ndóho-áⁿ cuäsaá. Te xiäⁿ cada iní-ó sá cúu-xí vehe Yá Ndiöxí, vehe sá ìo ní cuu íí. Te ducaⁿ sätnahá-xi cùu nchaa ñáyiü ndëcu ichi Xítohó Jesucristú chi ní tnahá tnúhu-yu ndihi-gá, te ìⁿ nduu ìⁿ nduu ta cùu vii cuu váha-gä-yu núú Yá Ndiöxí cuáháⁿ. ²² Te tnàhá nchòhó ducaⁿ sätnahá-xi cùu-ndó chi ní ngündecu ndihi-ndo Xítohó Jesucristú, te ducaⁿ ta cùu vii cuu váha tucu-ndo núú Yá Ndiöxí cuáháⁿ, te cùu-ndo datná vehe Yá Ndiöxí chi ndëcu ndihi-ndo Espíritú-gá.

3

Té Păblú yíhí díquí-dě cáháⁿ-dé tnúhu Xítohó Jesucristú núú ñáyiü ñá túú cùu ñáyiü isràél

¹ Te yúhú té Păblú yíhí-í ve-caá sá cuëndá sá càháⁿ-í tnúhu Xítohó Jesucristú núú nchòhó ñáyiü ñá túú cùu ñáyiü isràél, núú xiäⁿ dïu cuëndá-gá duha yíhí-í ve-caá vitna. ² Te nchòhó sa nàha-ndo sá Yá Ndiöxí ní cundàhú iní ñáhá-gä xii-í, te ní cachí-gá sá yúhú quihi díquí-í cáháⁿ-í tnúhu Xítohó Jesucristú núú-ndó, te

cuëndá sá càháⁿ-í tnúhu-gá núú-ndó te cuu-xi sá vâha sá cúu-xí-ndó. ³ Te yúhú sa ní cachí tnúhu-í xii-ndo lûha nacuaa ndüu tnúhu ndüu yuhu ní cuu, sá ní cachí tnúhu Yá Ndiöxí xii-í. ⁴ Te òré dàcuaha-ndo tnúhu ndüu yuhu-áⁿ ní cùu te quini-ndó sá yúhú tècú tnüni-í nàcuáa ndüu tnúhu-áⁿ, te tnúhu-áⁿ càháⁿ-xi cuëndá Xítohó Jesucristú. ⁵ Te tnúhu-áⁿ cúu-xí tnúhu sá vâ yôo tnàhí xini ní cùu, dico cue téé ní táuchíuⁿ Xítohó Jesucristú cáháⁿ tnúhu-gá, ndihi cue téé càháⁿ nàcuáa dàcahu iní ñáhá Yá Ndiöxí ní níhí-güedé tnúhu ndüu yuhu-áⁿ, chi Espíritú Yá Ndiöxí ní xáhaⁿ-xi xii-güedé. ⁶ Te duha càháⁿ tnúhu ndüu yuhu-áⁿ ní cùu: “Cuëi ñáyiü ñá túú cùu ñáyiü isràél te cuëi ñáyiü cùu ñáyiü isràél dico ìⁿ-ni ndüu táhü-yu sá vâha núú Yá Ndiöxí, te núu na quindáá iní-yu tnúhu sá càháⁿ nàcuáa naníhí tàhü-yu, te ìⁿ-nä cúu-yu cundecú-yu, te ducaⁿ ìⁿ-ni cada váha ñaha Yá Ndiöxí xií-yu te núu na cündecu ndihí-yu Xítohó Jesucristú”, duha ndüu tnúhu ndüu yuhu-áⁿ ní cùu.

⁷ Te Yá Ndiöxí ní cundàhú iní ñáhá-gä xii-í ní taxi-gá chiüⁿ quide-í càháⁿ-í tnúhu-gá, te mee-gä quidé-gä sá yúhú ndacu-í cáháⁿ-í tnúhu-gá. ⁸ Te nchaa ñáyiü cùu cuendá Yá Ndiöxí cúu-yu ñáyiü ìo-gá cúnüu cadá-yu chiüⁿ-gá dàcúxí yúhú, te cuëi ducaⁿ dico Yá Ndiöxí ní cundàhú iní ñáhá-gä xii-í ní taxi-gá chiüⁿ quide-í càháⁿ-í

tnúhu-gá núú cuè ñáyiú ñá túú cùu ñáyiú isràél. Te tnúhu-gá-áⁿ càháⁿ-xi sá sũúni ïo váha cada ñaha Xítóhó Jesucristú xii-o. ⁹Te ducaⁿ ñí cachí Yá Ndiõxí sá càháⁿ-í tnúhu-gá cuendá danèhé-í nchaa ñáyiú. Te sá dánèhé-í-yu-áⁿ cúu-xí tnúhu ndùu yuhu sá ñí sani iní-gá ndéé sanaha nàcuáa cada váha-gá cue ñáyiú. Te ndéé dàvá-áⁿ ñí quesaha ndùu yuhu tnúhu-áⁿ ní cùu. Te ñiu-ni-gá cúu-gã Yaá ní cadúha nchaandi túhú sá ïó. ¹⁰Te ducaⁿ ndùu yuhu tnúhu-áⁿ ní cùu cuendá sá ncháá espíritú cùnùu ndecu andiu quiní-xi vitna nàcuáa quide nchaa ñáyiú ní tuha ñaha xii Yá Ndiõxí cuendá ducaⁿ cùtnuní iní-xi sá ïo váha cùtnuní iní-gá nàcuáa cada-gá. ¹¹Te Yá Ndiõxí ní sani iní-gá ndéé sanaha nàcuáa ní cuiní-gá cada Xítóhó Jesucristú, te ní sáá nduu ñí quide Xítóhó Jesucristú nàcuáa ní cuiní Yá Ndiõxí cada-gá. ¹²Te vitna cùyii-o cáháⁿ ndihi-o Yá Ndiõxí cuendá sá ndécú ndihi-o Xítóhó Jesucristú, te sàndáá iní-ó-gã. ¹³Te núu xiáⁿ càháⁿ-í dóho-ndo sá cuèi duha ndòho-í vitna dico vá ná túhú iní-ndó càncicúⁿ nihnu-ndo ìchi Xítóhó Jesucristú. Te sá dúhá ndòho-í te cùu-xi sá váha sá cúu-xí-ndó, chi cuu-ndo ñáyiú cùu cahnu núú Yá Ndiõxí.

Xítóhó Jesucristú ïo cùu iní ñáhá-gã xii-o

¹⁴Te sá cuendá nchaa sá ñí sani iní Dútú Ndiõxí quidé-gã xiáⁿ yúhú ngüñí

xíti-í núú-gã càháⁿ ndihi-í-gá, te ñiu-ni-gá cúu Yáá cúu Tátá Xítóhó Jesucristú. ¹⁵Te mee Yá Ndiõxí ní cachí-gá sá ncháá espíritú ndécú andiu cunduu-xi datná ní cachí mée-gã cunduu-xi. Te ní cachí tucu-gá sá nchóo cùu-o ñáyiú, te cunduu-o datná cuiní mée-gã cunduu-o. ¹⁶Te xicáⁿ táhú-í núú Dútú Ndiõxí sá Espíritú-gá ná cada nàcuáa cuita níhi ndéé-gã-ndó quíhíⁿ cundecu-ndo ìchi-gá, te ducaⁿ xicáⁿ táhú-í núú-gã cada Espíritú-gá chi ïo càhnu cuu-gá. ¹⁷Te xicáⁿ táhú tucu-í núú Yá Ndiõxí sá Xítóhó Jesucristú ná cundecu ndihi ñaha-ni-gá xii-ndo chi sàndáá iní-ndó-gã, te ducaⁿ te vá dáñá ndéé-ndó ïo cuu iní tnáhá-ndó. ¹⁸Te xicáⁿ táhú tucu-í núú Yá Ndiõxí cuendá-ndó ndihi cuendá dáva-gá ñáyiú cùu cuendá-gá, cuendá sá cùtnuní iní-ndó sá sũúni cùu iní ñáhá Xítóhó Jesucristú xii-o. ¹⁹Te duha xicáⁿ táhú-í núú Yá Ndiõxí chi cuiní-í sá ncháá-ndó tēcú tnùn-ndó sá ïo cùu iní ñáhá Xítóhó Jesucristú xii-o cuèi vá ndácú càva-o quiní-ó nàcuáa cùu iní ñáhá-gã xii-o. Te xicáⁿ táhú tucu-í núú Yá Ndiõxí sá ïo na cundecu ndihi ñaha-gá xii-ndo, te ducaⁿ càncicúⁿ nihnu-ndo càda-ndo nchaa nàcuáa quide mee-gá.

²⁰Te Yá Ndiõxí ïo-gá vai sá ndácú-gã táxi-gã dàcúxí sá xicáⁿ-ó núú-gã, te cuèi ndéé nchaa sá ñá túú sàni iní-ó ñíhi-ó te tàxi-gá, te ducaⁿ chi mee-gã ndécú ndihi ñaha-gá xii-o, te ndàcu-gá quidé-gã nándi sá váha sá cúu-xí-ó.

21 Te vitna nchaa nchoo ñáyiú ndècu ichi Xítohó Jesucristú chí ná càchí-ó sã ïo càhnu cuu Yá Ndióxi, te ducaⁿ-ni cáháⁿ-ó sã ïo càhnu cuu-gá ní caa ni quíhíⁿ chi ndècu ndihi-o Xítohó Jesucristú. Te ducaⁿ na cùnduu.

4

Espíritú Yá Ndióxi quidé-xi cùu ìⁿnuu-o ndecu-o

1 Te yúhú té Páblú yíhí-í vecaá sá cuendá Xítohó Jesucristú, te cáháⁿ ndáhú-í núú-ndó sã cáda váha-ndo cùndecu-ndo datná tãú-xi cada cue ñáyiú ní cáháⁿ Yá Ndióxi cundecu ndihi-gá. Te nchòhó tnàhá-ndó cùu-ndo ñáyiú ní cáháⁿ ñáhá Yá Ndióxi cundecu ndihi-gá. 2 Te vá cáda càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnàhá-ndó nàcuáa ducaⁿ cùndee iní-ndó núu ná cúú sã cúmání núú tnàhá-ndó. 3 Te ïo nducu ndèe-ndo cuu ìⁿnuu-ndo cundecu-ndo, chi Espíritú Yá Ndióxi chindee ñàha-xi xii-ndo, te ducaⁿ ïo váha cuu iní-ndó cùndecu-ndo chí cùu ìⁿnuu-ndo. 4 Te nchoo ñáyiú ndècu ichi Xítohó Jesucristú ìⁿ-ni cùu-o, te ducaⁿ ìⁿ-ni Espíritú Yá Ndióxi ndécú, te diu-ni ducaⁿ ìⁿ-ni tnúhu ndee iní ní ngùndecu ndihi-o cùtnàhá ní cáháⁿ ñáhá Yá Ndióxi xii-o. 5 Te ìⁿ-ni Xítohó Jesucristú ndécú tàxi tnuní ñáhá-gã xii-o, te ìⁿ-ni cùu-o sandáá iní-ó tnúhu-gá, te ìⁿ-ni ní sandute-o. 6 Te ìⁿ-ni Dütú Ndióxi cúú Yáa cúú Tãtã-ó nchãa-o, te diu-gá cùnúu-gá yíndàha ñàha-gá

xii-o nchãa-o. Te Yá Ndióxi dácáháⁿ-gá iní-ó quíde-o chiuⁿ-gá, te ducaⁿ ndècu ndihi ñàha-gá xii-o nchãa-o.

7 Te nchoo ndì dííⁿ ndì dííⁿ chindee ñàha Yá Ndióxi xii-o quíde-o nacúaa ndùu chiuⁿ ní cachí Xítohó Jesucristú cada-o. 8 Te quèe ndáá-xi nàcuáa cáháⁿ-xi núú tütú Yá Ndióxi núú càchí-xi:

Xítohó Jesucristú cuándaa-gá andiú te ïo cùnuu-gá, chi nchaa cue espíritú cúú ùhú iní ñáhá xii-gá ñá túú ní ndàcu-xi naa ndihi ñàha-xi xii-gá, te mee-gã ní cachí-gá nàcuáa ndùu chiuⁿ nduu táhú ìⁿ ìⁿ ñáyiú cadá-yu.

Duha càchí-xi núú tütú-gá.

9 Te sá dúcáⁿ cáháⁿ-xi sá cuándaa-gá andiú xiáⁿ cùtnuní iní-ó sã ní cuuⁿ-gá ñuyíú-a. 10 Te Xítohó Jesucristú ní cuuⁿ-gá ñuyíú-a, te diu-ni-gá cuándaa-gá andiú cuendá ïo cunuu-gã taxi tnuní-gá nchaandi túhú sá ïó. 11 Te ní dácãhñu-gá cue tée xínu cuechi núú-gã ìⁿ ìⁿ núú chiuⁿ cada-güedé. Te ní cachí-gá sá dàva-güedé cáháⁿ-güedé tnúhu-gá, te dàva-güedé ní cachí-gá sá cáháⁿ-güedé nàcuáa dàcahu iní ñáhá Yá Ndióxi xii-güedé. Te dàva-güedé ní cachí-gá sá cúú-güedé cue tée datécú tnúhu cue ñáyiú nàcuáa cadá-yu naníhí tàhú-yu. Te dàva-güedé ní cachí-gá sá cúú-güedé cue tée quindaha ñàha xii ñáyiú dacuàha ñàha-güedé xii-yu tnúhu-gá. 12 Te ducaⁿ ní cachí-gá cada cue téé-áⁿ

cuendá canu ichi-güedé cue ñáyiú cùu cuendá Yá Ndiöxí cuendá ducaⁿ ñáyiú-áⁿ ñihí-yu nàcuáa cadá-yu chiúⁿ-gá, te ducaⁿ cuita ñihí ndéé-gá-yu cundecú-yu ichi Xítoho Jesucristú. ¹³ Te ducaⁿ ñi cachí Xítoho Jesucristú cunduu ndéé sáá nduu cùu ñⁿnuu-o quindáá iní-ó tnúhu-gá, te ducaⁿ cùu ñⁿnuu-o tecú tnúni-ó nàcuáa nduu cuendá-gá chi diu-gá cúu-gá Déhe Yá Ndiöxí, te cuu-o ñáyiú ío quide ndáá dàtná quidé mèe Xítoho Jesucristú. Te ducaⁿ te ñá túú tnáhi-gá ná cùmání-ó núú Yá Ndiöxí. ¹⁴ Te ducaⁿ te vá cúu-gá-ó dàtná cue landú vátá cútnúni váha-gá iní-xi, te ni vá cadá-gá-ó dàtná quidé ndúte lamár, chi ndute-áⁿ òré quéné táchi te cuáháⁿ-xi duha cuáháⁿ-xi dàcáⁿ, te ducaⁿ chi vá quindáá-gá iní-ó tnúhu càháⁿ nchaa ñáyiú dandahú ñáhá xii-o, chi ñáyiú-áⁿ ío váha xitó-yu nàcuáa dandahú ñáhá-yu xii-o chi càchi-yu sá càháⁿ-yu tnúhu Yá Ndiöxí dico ñá ndáá. ¹⁵ Te nchoo ío cuu iní tnáhá-ó, te vá dándahú tnáhá-ó, chi càháⁿ-ó mèe-ni sá ndáá. Te xini ñuhu-xi sá ñⁿ nduu ñⁿ nduu cuita cada ndáá-gá-ó quihíⁿ dàtná quidé ndáá méé-gá, te diu-ni-gá cúu-gá Yaá cúnúu cuu díhna tàxi tnuní ñáhá-gá xii-o. ¹⁶ Te diu-ni Xítoho Jesucristú quidé ñaha-gá xii nchaa nchoo ñáyiú ndecu ichi-gá dàtná yiqui cùñú méé-gá, chi ñⁿ yiqui cùñú ío váha ní quée tnàha ñⁿ ñⁿ

xichi, te ducaⁿ yíhi túchi yiqui cùñú-áⁿ yótní-xi nchaa nacuáa ní quée tnàha. Te ducaⁿ sãtnahá-xi cùu nchoo chi ñⁿ-ni cùu-o ndecu-o ichi Xítoho Jesucristú táxi tnúni ñáhá-gá xii-o. Te núu nchoo quide-o nchaa nacuáa tàú-xi cunduu te cùu iní tnáhá-ó, te ducaⁿ ta ñihí ndéé-gá-ó cuáháⁿ ndécú-ó ichi-gá.

Vá cadá-gá-ó dàtná ní xóo cada-o cùtnhá ní xíndecu-o ichi cuehé ichi duha

¹⁷ Te vitna yúhú càháⁿ-í dóho-ndo quide-í núú Xítoho Jesucristú sá vá cundecu-gá-ndó dàtná xíndecu ñáyiú ñá túú sándáá iní ñáhá xii Yá Ndiöxí, chi nchaa ñáyiú-áⁿ ñà túú vèdana nándíhi nchaa sá sání iní-yu. ¹⁸ Te ni ñà túú vèdana cùtnuní iní-yu nàcuáa nduu tnúhu ndáá tnúhu Yá Ndiöxí. Te ñáyiú-áⁿ ñà túú nduu táhú-yu cundecú-yu nàcuáa cuení Yá Ndiöxí, chi ñá túú vèdana tècú tnúni-yu te ducaⁿ chi ío sáá iní-yu. ¹⁹ Te ñá túú tnáhi-gá ná sání iní-yu ndécú-yu ichi cuehé ichi duha, te ío cùdíí iní-yu ndécú-yu ichi díí iní, te ñá díú-ni xíáⁿ chi nándi-gá nchaa sá cuehé sá dúhá quidé-yu ndécú-yu. ²⁰ Dico tnúhu Xítoho Jesucristú sá ñi sándáá iní-ndó chi ñá túú ducaⁿ sanu ichi ñaha-xi xii-ndo cada-ndo. ²¹ Te nchòhó ní cutnúni iní-ndó nàcuáa nduu cuendá Xítoho Jesucristú, te dàcuaha-ndo tnúhu ndáá diu-ni tnúhu-gá nàcuáa ndecu-ndo ichi-gá. ²² Te vitna vá cáni-gá iní-ndó càda-ndo datná ní

xóo cada-ndo cǔtnàhá ní xíndecu-ndo ichi cuehé ichi duha, chi núu nchaa-ni sá cuèhé sá dúhá-ǎⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuïta nihnu ñaha-xi xii-ndo quíhíⁿ, chi núu nchaa-ni sá cuèhé sá dúhá-ǎⁿ ná cùhuⁿ-ni iní-ndó te dàticá nuu ñaha-xi xii-ndo. ²³ Te nchòhó, xini ñuhu-xi sá vǎ dúcǎⁿ-gǎ caní iní-ndó càda-ndo te tǎu-ndó ndùu-ndo datná ìⁿ ñáyiu ní cacu túu saa. ²⁴ Te nduu iní-ndó dàtná cuení mée Yǎ Ndiòxí cunduu, chi nduu-xi nàcuáa càa iní mée-gǎ, te ducaⁿ te cuu-ndo ñáyiu ío váha cada ndáá, te cuu ndisa-ndo ñáyiu ñǎ túu tnàhí ná cumání cundecu núu-gǎ.

²⁵ Te cuendá xíǎⁿ nǔu càháⁿ-í dóho-ndo sǎ nchòhó vǎ dǎcuàndehnde-gǎ-ndó dàtná ní xóo cada-ndo, te mee-nǎ sá ndáá càháⁿ ndihi tnàha-ndo, chi ìⁿ-ni cùu-o ndecu-o ichi Xítóhó Jesucristú.

²⁶ Te núu cùdéeⁿ-ndó te cada cuendá-ndó sǎ vǎ cǎdá-ndó ìⁿ cuèchi sá dúcǎⁿ cùdéeⁿ-ndó, te vǎ dúcǎⁿ-ní cùhuⁿ iní-ndó tnǔhu sǎtú iní-ǎⁿ. ²⁷ Te vǎ dǎñǎ-ndó mée-ndo dandahú ñáhǎ sǎcúíhnǎ xii-ndo.

²⁸ Te núu dava-ndo cùu-ndo ñadúhú te vǎ dúcǎⁿ-gǎ cada-ndo, chi nducu-nǎ-ndó ìⁿ chiuⁿ váha cada-ndo nàcuáa ducaⁿ ñihí-ndó sǎ chíndée-ndo cue ñáyiu ndàhú ñáyiu ñǎ túu nǎ ndécú ndìhi.

²⁹ Te vǎ càháⁿ-gǎ-ndó nì ìⁿ tnúhu cuèhé, chi mee-nǎ tnúhu vii tnúhu váha càháⁿ-ndó nàcuáa ducaⁿ ngǔnu ichi cue ñáyiu ndédóho

ñaha xii-ndo, te núu ducaⁿ na càda-ndo te cuu-xi sǎ váha sǎ cúu-xí ñáyiu ducaⁿ ndédóho ñaha xii-ndo-ǎⁿ. ³⁰ Te vǎ cǎdá-gǎ-ndó nì ìⁿ sǎ ñǎ túu tǎu-ndó càda-ndo cuendá sǎ vǎ dándihú-ndó iní Espíritú Yǎ Ndiòxí, chi diu Espíritú-gǎ ndécú ndìhi-ndo, te xíǎⁿ cǔtnúni iní-ndó sǎ sǎá nduu nàcuaca ñaha-gǎ xii-ndo cùndecu-ndo ndìhi-gǎ nì caa nì quíhíⁿ.

³¹ Te vǎ dǎsátú-gǎ-ndó iní tnàha ñáyiu-ndo, te nì vǎ cúhúⁿ iní-ndó tnǔhu sǎtú iní, te nì vǎ cùdéeⁿ-gǎ-ndó, te cuèi núu chítú nǔú tǎcǎ vǎ càháⁿ cana-ndo cùcuèhé-ndó tnàha ñáyiu-ndo, te nì vǎ cuátñuhu-ndo tnàha ñáyiu-ndo, te nì vǎ cǎní cuèhé caní duha iní-ndó cuendá tnàha ñáyiu-ndo. ³² Te cundàhú iní tnáhǎ-ndó, te cada tnàha-ndo sǎ váha, te cada càhnu iní tnáhǎ-ndó nǔu ná cúu sǎ cúmǎní nǔú tnáhǎ-ndó dàtná ní quide Yǎ Ndiòxí ní quide càhnu iní-gǎ nchaa yícǎ cuèchi-ndo sǎ cuendá Xítóhó Jesucristú.

5

Nàcuáa tǎu-xi cundecu nchaa ñáyiu cùu déhe Yǎ Ndiòxí

¹ Te nchòhó cúu-ndó ñáyiu ío cùu iní ñáhǎ Yǎ Ndiòxí, te diu déhe-gǎ cúu-ndó nǔu xíǎⁿ xíní ñuhu-xi canchicúⁿ nihnu-ndo càda-ndo datná quidé mée-gǎ. ² Te ío cuu iní tnáhǎ-ndó cùndecu-ndo datná cúu iní ñáhǎ Xítóhó Jesucristú xii-ndo, chi diu-gǎ ní cachí-gǎ sǎ cùu-gǎ cuendá nchaa cuèchi-o te ní xíhí-gǎ, te sǎ dúcǎⁿ nì xíhí-gǎ te ní

cuu-gá dàtná ìⁿ táhú sǎ cúu-xí Yǎ Ndiǒxí, te ío váha ní cuu iní Yǎ Ndiǒxí sǎ dúcáⁿ nǐ quide-gá.

³ Te sǎ cuendá sǎ nchòhó cúu-ndó ñǎyiu cùu cuendá Yǎ Ndiǒxí nǔu xǎⁿ nchaa nchòhó cue tée vá càháⁿ ndihi-ndo ñǎyiu dìhí te núu ñá díú ñàdihí-ndó cùu-yu, te ducaⁿ-nǐ nchàa nchohó cue ñáyiu dìhí tucu vá càháⁿ ndihi-ndo cuè tée te núu ñá díú yǐ-ndo cuu-güedé, te ni vǎ cání tnahí iní-ndó cùndecu-ndo ichi díí iní, te ni vǎ xíhó-ndó nǐ ìⁿ sǎ ndécú ndihi tnaha ñáyiu-ndo, te nǐ ìⁿ nchaa xǎⁿ vá cání iní-ndó càda-ndo, te ni vǎ cǎcú nèhe-ndo. ⁴ Te ni vǎ càháⁿ-ndó ìⁿ tnúhu sǎ ni vǎ cúu cùndedóho ñáyiu, te ni vǎ càháⁿ-ndó ìⁿ tnúhu cùtèxínu, te ni dàva-gá nchaa tnúhu sǎ ñà túú vèdana nàndíhi vá càháⁿ-ndó, chi nchaa tnúhu-áⁿ ñà túú tàu-xí càháⁿ-ndó, te xini ñuhu-xí sǎ váha-gá sǎ ndàcáⁿ táhú-ndó nǔú Yǎ Ndiǒxí cuendá nchaa sǎ váha quide-gá. ⁵ Te nchòhó sa xini ndáá-ndó sǎ ncháá cuè tée càháⁿ ndihi ñáyiu dìhí te ñá díú ñàdihí-güedé cúu-yu, ndihi cue ñáyiu dìhí càháⁿ ndihi cue tée te ñá díú yǐ-yu cùu-güedé, nchaa ñáyiu-áⁿ vǎ ndúú tǎhǔ-yu cundecú-yu núú ndécú Yǎ Ndiǒxí ndihi Xítóhó Jesucristú táxí tnùnǐ-gá. Te ni cuè ñáyiu xindecu ichi díí iní, te ni cuè ñáyiu xìho nchaa sǎ ndécú ndihi tnaha ñáyiu-xi vá ndúú tǎhǔ-yu cundecú-yu ndihi-gá núú ndécú-gǎ táxí

tnùnǐ-gá. Te tnúhu sǎ càchí-ó xìho-o nchaa sǎ ndécú ndihi tnaha ñáyiu-o, ìⁿ-nǐ cùu-xi ndihi tnúhu sǎ càchí ñáyiu quide cahnú-yu nchaa sǎ càchí-yu cùu ndiǒxí te ñá ndáá sǎ ndiǒxí cúu-xí. ⁶ Te vá quindáá iní-ndó nǐ ìⁿ tnúhu sǎ ñà túú nàndíhi càháⁿ ñáyiu, chi ñáyiu-áⁿ ío dandòho ñaha Yǎ Ndiǒxí xii-yu cuendá nchaa sǎ cuèhé sǎ dúhá quidé-yu chi ñá túú sàndáá iní ñáhǎ-yu xii-gá. ⁷ Núu xǎⁿ càháⁿ-í dóho-ndo sǎ vǎ nihí tnáhá-ndó ndihi cue ñáyiu-áⁿ.

⁸ Te nchòhó ní cuu-ndo dàtná cue ñáyiu ní xindecu núú néé chi ní xindecu-ndo ichi cuehé ichi duha, dico vitna ní ngúndecu-ndo ichi Xítóhó Jesucristú, te ñá túú-gǎ ndécú-ndó nǔú néé dàtná ní xindecu-ndo nǐ cùu. Te vitna cada-ndo nchàa nacuáa tàu-xi cunduu chi ndècu-ndo ichi-gá. ⁹ Te sǎ cuendá sǎ ndécú-ndó ichi-gá nǔu xǎⁿ cúu-ndó ñáyiu váha, te quide ndáá-ndó ndècu-ndo, te ñá túú dàcuandehnde-ndo chi càháⁿ-ndó mèe-ni sǎ ndáá. ¹⁰ Te ío váha cada cuendá-ndó nchàa sǎ cúu váha iní Xítóhó Jesucristú, te xǎⁿ cada-ndo. ¹¹ Te vá cǎnchícúⁿ nihnu-ndo tnahá-ndó càda-ndo datná quidé cuè ñáyiu ndècu ichi cuehé ichi duha, chi nchòhó tàu-ndó càháⁿ-ndó dǒho nchaa ñáyiu ducaⁿ ndècu ichi cuehé ichi duha-áⁿ cuendá nchaa sǎ quidé-yu. ¹² Te cucahaⁿ núú-ndó vǎ càháⁿ-ndó cuendá nǐ ìⁿ sǎ cuèhé sǎ dúhá quide dayuhu nchaa ñáyiu-áⁿ. ¹³ Dico òrè dándixi túu tnúhu Yǎ Ndiǒxí iní-yu nàcuáa quidé-yu te

cùtnuní iní-yu sá ñǎ túú quíde váha-yu, te ducaⁿ ndìxi cuéchi iní-yu cuendá nchaa sá cuéhé sá dúhá quidé-yu. ¹⁴ Te núú tütú Yá Ndiöxí càchí-xi:

Nchòhó cúú-ndó dàtná ñáyiú xidí, te vitna ndiquíú iní-ndó,

te cùu tucu-ndo datná ñáyiú ní xihí, te vitna ndoto-ndo,

te Xítohó Jesucristú chindee ñàha-gá xii-ndo nàcuáa vá cùndècu-gá-ndó ichi cuehé ichi duha.

Duha càháⁿ-xi núú tütú-gá.

¹⁵ Te ío váha cada cuendá-ndó nàcuáa cada-ndo cùndècu-ndo, te vá cáda-ndó dàtná xiquide cue ñáyiú ñá túú tècú tnùní, chi cada-ndo dàtná xiquide ñáyiú ío váha sáa díquí-xi. ¹⁶ Te ìⁿ nduu ìⁿ nduu cani iní-ndó càda-ndo nchaa nacuáa tàú-xi cunduu, chi vitna ío cùnuu nchaa sá cuéhé sá dúhá. ¹⁷ Te cuu-ndo ñáyiú tècú tnùní cuendá ducaⁿ cùtnuní iní-ndó nàcuáa cuíní Yá Ndiöxí cada-ndo, te vá cáda-ndó dàtná xiquide cue ñáyiú ñá túú tnàhí cùtnuní iní-xi nàcuáa cuíní Yá Ndiöxí cada-yu. ¹⁸ Te vá cúú-ndó ñáyiú quihu chi núu ducaⁿ na càda-ndo te dàcuíta nihnu-ndo mèe-ndo, te dañà-ndo mèe-ndo sá Espíritú Yá Ndiöxí ná tàxi tnuní ñáhà-xi xii-ndo. ¹⁹ Te cáháⁿ-ndó nàcuáa-ni cuáháⁿ ndudú sá ní xóo cata nchaa cue ñáyiú ndéé sanaha ní xóo chiñuhu-yu Yá Ndiöxí.

Te cáháⁿ-ndó nàcuáa cuáháⁿ ndudú sá chiñuhu-ndo Yá Ndiöxí, te cata-ndo. Te cuéi nchaa dava-gá ndudú ñi-ni ducaⁿ cãháⁿ-ndó te cata-ndo.

Te ni yùhu ni iní-ndó càta-ndo nchaa ndudú-áⁿ chiñuhu-ndo Yá Ndiöxí. ²⁰ Te vá dañá ndéé-ndó ndàcáⁿ tãhú-ndó núú Tãtá-ó Dütú Ndiöxí cuéi ndècu váha-ndo àdi ñá túú ndècu váha-ndo. Te ducaⁿ càda-ndo chi ndècu ndihí-ndo Xítohó Jesucristú.

Tàú-xi sá quíndáá iní tnáhá cué ñáyiú ndècu ichi Xítohó Jesucristú

²¹ Te nchòhó ñáyiú ndècu ichi Xítohó Jesucristú tàú-xi sá quíndáá iní tnáhá-ndó, te ducaⁿ càda-ndo chi nèhe-ndo sá yíñuhu núú Yá Ndiöxí.

²² Te nchaa nchòhó ñáyiú dìhí ndécú yì-xi, xìni ñuhu-xi sá quíndáá iní-ndó yì-ndo datná sàndáá iní-ndó Xítohó Jesucristú. ²³ Chi yì-ndo tàxi tnuní ñáhà-güedé xii-ndo dàtná quidé Xítohó Jesucristú táxi tnùní ñáhà-gã xii nchoo cué ñáyiú ndècu ichi-gá. Te ñi-gá cúú-gã Yaá ní dácãcu nihnu ñaha xì-o núú ùhú núú ndàhú, te cùu-o datná yiqui cùnú-gá. ²⁴ Te dàtná quidé nchò ñáyiú ndècu ichi Xítohó Jesucristú sàndáá iní-ó tnì-o nchaa tnúhu càháⁿ-gá, ducaⁿ tàú-xi cada nchaa nchòhó ñáyiú dìhí quíndáá iní-ndó tnì-ndo nchaa tnúhu càháⁿ yì-ndo.

²⁵ Te tnàhá nchaa nchòhó cue téé tucu tàú-xi sá ío cuu iní-ndó ñàdihí-ndó dàtná quidé Xítohó Jesucristú cúú iní ñáhà-gã xii nchaa nchoo ñáyiú ndècu ichi-gá, chi mee-gã ní xihí-gá sá cuendá-ó sã cúú iní ñáhà-gã xii-o. ²⁶ Te ducaⁿ ní quíde-gá cuendá sá

ncháá ñáyi vitna ngúndecu ichi-gá cuu yíñùhú-yu núú Yá Ndiòxí, te ducaⁿ ndàda ndoo ndada nine-gá iní-yu sá cuèndá sá quíndáá iní-yu tnúhu Yá Ndiòxí, te cuanduté-yu. ²⁷ Te ducaⁿ ñáyi quide-gá cuèndá sá ncháá ñáyi na ngúndecu ichi-gá ío váha cundecú-yu núú-gă, te ducaⁿ vă cúndècu-gá ni ñⁿ cuéchi-yu núú-gă, te ni ñⁿ-gá sá ñà túú-gă ná cumáni-yu núú-gă chi ío cundecu yíñùhú-yu. ²⁸ Te sá dúcáⁿ quide Xítohó Jesucristú sá cúú-xí cuè ñáyi ndècu ichi-gá, xíⁿ tàú-xi sá nchòhó cue téé xíndecu ñadihí-xi cuu iní-ndó ñadihí-ndó, te coto-ndó-yu dàtná xító-ndó yiqui cuñú méé-ndó, te cada iní-ndó sá ncháá cuè téé ío cùu iní ñadihí-xi cùu iní-güedé méé-güedé chi ñⁿ-ná cúú-yu. ²⁹ Te nchoo sà naha-o sá ñⁿ ñáyi ñá túú dàquee tíhú-yu yiqui cùñú-yu, chi da uuⁿ-gá chíndèé-yu te xító-yu. Te diu-ni ducaⁿ quide Xítohó Jesucristú ndihi nchaa ñáyi ndècu ichi-gá, ³⁰ chi cùu-o datná yiqui cùñú méé-gă, te ducaⁿ chi ñⁿ-ni cùu-o ndihi-gă. ³¹ Te tnúhu Yá Ndiòxí càchí-xi: “Sá cuèndá xíⁿ nũ nchaa cue téé na ñihí ñadihí-xi te diñⁿ-ná cada-güedé tâtá-güedé ndihi náná-güedé, te ñadihí-nă-güedé cuu cuu ndihi-güedé, te ducaⁿ ñⁿ-ná cuu-güedé ndihí-yu”, duha càchí-xi. ³² Te tnúhu-a cùu-xi ñⁿ tnúhu càhnu vihi, te ducaⁿ sá tnàhá-xi cùu Xítohó

Jesucristú ndihi cue ñáyi ndècu ichi-gá. ³³ Te càháⁿ-ni tucu-í dóho nchaa nchòhó cue téé xíndecu ñadihí-xi sá ío cuu iní-ndó ñadihí-ndó te coto-ndó-yu dàtná xító-ndó mèe-ndo, te ducaⁿ-ni nchaa nchòhó ñáyi dihí tucu canehe-ndo sá yíñùhu núú yí-ndo.

6

¹ Te nchaa nchòhó cue landú, quíndáá iní-ndó tâtá-ndó ndihi náná-ndó chi ducaⁿ cuini Yá Ndiòxí cundu, te diu ducaⁿ tnàhí tàú-xi cada-ndo. ² Te Yá Ndiòxí ní cachí-gá sá cânèhe-ndo sá yíñùhu núú tâtá-ndó ndihi núú náná-ndó. Te tnúhu-áⁿ cúú-xí tnúhu cùnuu ní càháⁿ-gá cada cue ñáyi cuèndá cada váha ñaha-gă xi-yu. ³ Te ní cachí-gá sá nũ ducaⁿ na càda-ndo te ío váha cundecu-ndo, te ducaⁿ ío naha cùdí-ndo cundecu-ndo ñuyíú-a.

⁴ Te nchaa nchòhó cue téé cùu tâtá, vá dásatú-ndó iní cue déhe-ndo chi canu ichi-ndo-güexi nacuáa tàú-xi cundu, te dacuáha-ndo-güexi nchaa tnúhu váha nacuáa cuini Yá Ndiòxí cundu.

⁵ Te nchaa nchòhó cue ñáyi xínu cuechi, quíndáá iní-ndó cuè ñáyi dii chiúⁿ-xi quide-ndo, te canehe-ndo sá yíñùhu nũ-yu, te ío váha cuu iní-ndó càda-ndo chiúⁿ-yu, te ducaⁿ ñⁿ yuhu ni iní-ndó càda-ndo. Te cada iní-ndó sá dàtná tnúhu sá chiúⁿ Xítohó Jesucristú quidé-ndó. ⁶ Te dava ñáyi

xìnu cuechi, mee-ni òré ndéhé ñáiyu dii chiùⁿ-xi quidé-yu ío ndùcu ndeé-yu quide chiuⁿ váha-yu cuendá cuiní-yu cudiù-yu. Dico nchòhó vá dúcáⁿ càda-ndo, chi cuèi ndècu ñáiyu dii chiùⁿ-xi quide-ndo àdi ñá túŷ-yu dico cada chiuⁿ váha-ni-ndo, te cada iní-ndó sá dàtná tnúhu sá chiúⁿ Xítohó Jesucristú quidé-ndó, te cada-ndo ñi yuhu ñi iní-ndó nàcuáa cuiní Yá Ndióxi cunduu. ⁷ Te ío váha cuu iní-ndó càda-ndo chiuⁿ-áⁿ, chi cada iní-ndó sá dàtná tnúhu sá chiúⁿ Xítohó Jesucristú quidé-ndó te ñá díu chiùⁿ cue ñáiyu ñuyú-a. ⁸ Te nchòhó sa cùnuni iní-ndó sá nàcuáa ndùu chiuⁿ váha ní quide-ndo ñiⁿ ñiⁿ-ndo, te ducaⁿ cunduu sá táxi Xítohó Jesucristú nduu táhú-ndó cuèi cùu-ndo ñáiyu dañá quéé núú chiúⁿ pàtróoⁿ-xi àdi cuu-ndo ñáiyu ñá túú tnàhí dañá quee núú chiúⁿ pàtróoⁿ-xi.

⁹ Te nchaa nchòhó ñáiyu xíndecu ndihi ñáiyu xìnu cuechi, tnàhá-ndó tàú-ndó càda váha-ndo sá cúú-xí cue ñáiyu xìnu cuechi núú-ndó, te vá cùndùu nínu iní-ndó núú-yu, te chí cuáha cuendá sá díu-ní Xítohó Jesucristú Yaá ndécú àndiu taxi tnuní ñáhá-gá xii-ndo ndihí-yu, te sá cúú-xí mèe-gá chi ñiⁿ-ni cùu-ndo núú-gá, te ñiⁿ-ni càda ñaha-gá xii-ndo.

Yá Ndióxi chíndè-gá cue ñáiyu ndècu ichi-gá cuendá sá vǎ ndácú sàcuíhná nàá ndihi ñaha-xi xii-yu

¹⁰ Te vitna nchaa nchòhó ñáiyu ndècu ndihi-í ichi Xítohó Jesucristú càchí tnúhu-í xii-ndo sá ío nducu-ndo nàcuáa càda-ndo níhí ndéé-ndó cùu ñiⁿnuu-ndo ndihi Xítohó Jesucristú, chi mee-gǎ ío càhnu cuu-gá, te chindee ñaha-gá xii-ndo. ¹¹ Te diu-ni nchaa sá ñi nduu táhú-ndó núú Yá Ndióxi diu-ni nchaa xíáⁿ cuhuⁿ iní-ndó, chi xíáⁿ chindee ñaha-xi xii-ndo níhí ndéé-ndó cùndecu-ndo cuendá sá vǎ dándàhú ñáhá sàcuíhná xii-ndo. ¹² Chi nchoo ñá díu cue ñáiyu ñuyú-a nàá ndihi-o, chi ndihi cue espíritú cùndihi yucu ñávǎha, te diu-ni nchaa espíritú-áⁿ cùnùu-xi cuèi núú ñiⁿnu quide-xi nchaa sá cuèhé sá dúhá, te diu-ni-xi cùnùu-xi ñuyú-a sànu ichi-xi cue ñáiyu quidé-yu nchaa sá cuèhé sá dúhá. ¹³ Te ío cuhuⁿ iní-ndó nchaa sá ñi nduu táhú-ndó núú Yá Ndióxi cuendá ducaⁿ níhí ndéé-ndó cùndecu-ndo, te vá ndácú yùcu ñávǎha ná cada ñaha-xi xii-ndo oré cuiní-xi coto ndeé ñáhá-xí. Te sátá ná dàquee tíhú-ndó yùcu ñávǎha te ñiⁿ-ni cunduu-ndo cùndecu-ndo ichi Yá Ndióxi. ¹⁴ Te ducaⁿ cùndecu-ni-ndo ichi Yá Ndióxi càda-ndo dàtná xiquide cue sandádú, chi cue téé-áⁿ ío ñiⁿ xíndáa-güedé. Te cáháⁿ-ndó mèe-ni tnúhu ndáá tnúhu Yá Ndióxi, te cuu-ndo dàtná cue sandádú cue téé ndàda tíi xití-xi òré quíhíⁿ-güedé nàá-güedé. Te ducaⁿ sàtnahá-xi cuu-ndo te núu na càháⁿ-ndó mèe-ni tnúhu ndáá tnúhu Yá Ndióxi. Te cada ndáá-ndó cùndecu-ndo ichi-gá, te cuu-ndo dàtná

cue sandàdú cue téé xǐxǐhnu sá yídǎhu ñaha xǐ-güedé òré nàá-güedé cuendá sá vǎ nǐcuèhé-güedé. Te ducaⁿ sǎtnahá-xi cuu-ndo te núu na càda ndáá-ndó cùndecu-ndo ichi-gá. ¹⁵ Te cundecu túha-ndo cǎháⁿ-ndó tnǔhu Xítohó Jesucristú, tnǔhu sá cǎháⁿ nàcuáa cuu váha iní ñǎyiu cundecú-yu, te cuu-ndo dàtná cue sandàdú cue téé ndǐhu zapátú-xi quǐhǐⁿ-güedé nàá-güedé. Te ducaⁿ sǎtnahá-xi cuu-ndo te núu na cùndecu túha-ndo cǎháⁿ-ndó tnǔhu Xítohó Jesucristú núu ñǎyiu. ¹⁶ Te cǎchǐ tnúhu tucu-í xii-ndo sǎ ò quindáá iní-ndó Yǎ Ndiǒxí cuendá sá vǎ ndácú sàcúhná nǎ cada ñaha-xi xii-ndo, te ducaⁿ te cuu-ndo dàtná cue sandàdú cue téé xǐnehe vítú chǐnèe-güedé sáquǐdáhu ñaha-xi xǐ-güedé cuendá sá vǎ cuicúⁿ-güedé sá nchicúⁿ ñuhú téé ñaha cue téé nàá ndǐhi-güedé. Te ducaⁿ sǎtnahá-xi cuu-ndo te núu na quindáá iní-ndó Yǎ Ndiǒxí. ¹⁷ Te ò cuhuⁿ iní-ndó sǎ nǐ naníhǐ tǎhú-ndó, te cuu-ndo dàtná cue sandàdú cue téé ñǔhu mbelú cáxǐⁿ. Te ducaⁿ sǎtnahá-xi cuu-ndo te núu na cùhuⁿ iní-ndó sǎ nǐ naníhǐ tǎhú-ndó. Te ò cuhuⁿ iní-ndó tnǔhu Yǎ Ndiǒxí, chǐ tnúhu-án nǐ taxi Espíritú-gá ndécú ndǐhi-ndo chindee ñaha-xi xii-ndo, te cuu-ndo dàtná cue sandàdú cue téé xǐnehe machítǐ cuáháⁿ-güedé nàá-güedé. Te ducaⁿ sǎtnahá-xi cuu-ndo te núu na cùhuⁿ iní-ndó tnǔhu Yǎ Ndiǒxí. ¹⁸ Te vǎ dáñǎ ndèé-ndó cǎháⁿ ndǐhi-ndo Yǎ Ndiǒxí nàcuáa chindee

ñaha Espíritú-gá xii-ndo, te cǎcáⁿ tǎhú-ndó nǔú-gǎ nǔú ná cuiní-ndó, te ò cundecu túha-ndo cǎháⁿ ndǐhi-ndo-gǎ, te vǎ nǎtùhú iní-ndó cǎcáⁿ tǎhú-ndó nǔú-gǎ cuendá nchaa dava-gá cue ñǎyiu cùu cuendá-gá. ¹⁹ Te tnàhá cuendá-í cǎcáⁿ tǎhú-ndó nǔú Yǎ Ndiǒxí cuendá sá ná chǐndee ñaha-gá xii-í nǐhǐ-í tnúhu cǎháⁿ-í òré cǎháⁿ-í tnǔhu-gá, te ducaⁿ vǎ yùhú-í cǎháⁿ-í nàcuáa ndùu tnúhu sá cǎháⁿ nàcuáa naníhǐ tǎhú-ó nǔú ñǎyiu tnúhu sá vǎtǎ cùndédóho-gá-yu. ²⁰ Te Yǎ Ndiǒxí nǐ cachǐ-gá sá yùhú cuu-í ñⁿ téé cada-í nǔú-gǎ cǎháⁿ-í tnúhu-gá núu ñǎyiu, te ñiu cuendá tnúhu-án yǐhǐ-í vecaá vǐtna. Te ò cǎcáⁿ tǎhú-ndó nǔú Yǎ Ndiǒxí cuendá-í cuendá sá yùhú cuyǐ-í nǐ yùhu nǐ iní-í cǎháⁿ-í tnúhu-gá núu ñǎyiu nàcuáa tǎu-xi cunduu.

Tnúhu ndéé núu nǐ ndǐhi-ná

²¹ Te té Tǐquicú téé ò cùu iní-í ndécú ndǐhi-o ichi Xítohó Jesucristú cúu-dé ñⁿ téé ò váha quǐde ndáá xǐnú cuèchi-dé núu Xítohó Jesucristú, téé-án cachǐ tnúhu-dé xii-ndo nàcuáa cùu ndecu-í ndǐhi nchaa nàcuáa quǐde-í cuendá ducaⁿ cùtnunǐ iní-ndó. ²² Te cuendá xǐǎⁿ nǔú cuiní-í tendaha-í-dé quixi-dé núu ndécú-ndó cuendá cachǐ tnúhu-dé xii-ndo nchaa nàcuáa cùu ndecu-ndǐ iha, te ducaⁿ tǎxi-gá-dé tnúhu ndee iní cundecu ndǐhi-ndo.

²³ Te xǐcáⁿ tǎhú-í núu Tǎtá-ó Dǔtú Ndiǒxí ndǐhi núu Xítohó Jesucristú sá ncháá nchòhó ñǎyiu ndècu ndǐhi-í ichi-gá sá

dìu-gá ná cádá te ío váha cuu
iní-ndó cùndecu-ndo, te ducaⁿ
ío cuu iní tnáhá-ndó, te ío
quindáá iní-ndó-gă. ²⁴ Te
nchòhó ío cùu iní-ndó Xìtohó
Jesucristú, te ñá túú dàña
ndeé-ndó cùu iní-ndó-gă. Te
mee Yă Ndiõxí ío na chìndee
chítúu ñaha-gă xii-ndo. Te
ducaⁿ na cùnduu. Te ío chí
cá dá ndèe iní-nă vitna.

TUTÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ FÌLIPÚ

Té Pāblú cadúha-dé tutú quihiⁿ ndaha ñáyiú quide ndáá xĩndecu ichi Xítohó Jesucristú ndécú ñuú Filipú

1 Yúhú té Pāblú ndihi té Timùteú cúú-ndí cue téé xĩnu cuechi núú Xítohó Jesucristú, te tëndaha-ndí tutú-a véxi ndaha nchòhó cue téé yĩndaha nchaa ñáyiú ndècu ichi Xítohó Jesucristú, ndihi cue téé chĩndee ñaha xii-ndo, ndihi nchaa dava-gá ñáyiú xĩquide ndáá ndécú ìchi-gá ñuú Filipú. 2 Te xicáⁿ táhù-í núú Tātá-ó Dütú Ndiõxí ndihi núú Xítohó Jesucristú sá ná chĩndee chitúu ñaha-gá xii-ndo, te ducaⁿ ndí nduú-gá ná cadá te ío váha cuu iní-ndó cùndecu-ndo.

Té Pāblú càháⁿ ndihi-dé Yă Ndiõxí cuendá nchaa ñáyiú ndècu ichi-gá

3 Te ndi tnahá òré ndácú iní ñáhà-í xii-ndo, te ndácáⁿ táhù-í núú Tātá-ó Dütú Ndiõxí sá ndécú-ndó ìchi-gá. 4 Te ndi tnahá òré ducaⁿ quide-í te ío cùdíí iní-í càháⁿ ndihi-í-gá cuendá-ndó. 5 Chi ndéé cùtnhá ní sándáá iní-ndó-gá ní ngũita-ndo tnahá-ndó quide váha-ndo ndècu-ndo cuendá sá quĩndáá iní ñáyiú tnúhu Xítohó Jesucristú. 6 Te yúhú sàni ndáá iní-í sá Yă Ndiõxí

Yaá ní quesaha chĩndee ñaha xii-ndo quide váha-ndo ndècu-ndo, te ñu-ni-gá chĩndee ñaha-gá xii-ndo càda váha-ndo cùndecu-ndo ndéé ná sáá nduu quixi tucu Xítohó Jesucristú. 7 Te ducaⁿ tnahí tàú-xi cani iní-í sá cúú-xi-ndó, chi ío cùu iní ñáhà-í xii-ndo. Te tnahá-ndó ío chĩndee chitúu ñaha Yă Ndiõxí xii-ndo ndècu-ndo, te ñu-ni ducaⁿ chĩndee ñaha-gá xii-ndo tnahá-ndó cuéi vitna yihí-í vecaá, te ñu-ni ducaⁿ chĩndee ñaha-gá xii-í cuéi òré cuáháⁿ-í núú cué ñáyiú ñá túú tnahá iní tnúhu-gá, chi nihí-í tnúhu nàdanchocáva-í ñuu ná tnúhu càháⁿ-yu cuendá-gá, te nchaa ñáyiú xáhaⁿ-í xii-yu sá tnúhu-gá cúú-xi tnúhu ndáá cuiti. 8 Te mee Yă Ndiõxí náhá ndáá-gá sá yúhú ío cùu iní ñáhà-í xii-ndo dàtná cúú iní ñáhá mée Xítohó Jesucristú xii-o. 9 Te xicáⁿ táhù-í núú Yă Ndiõxí sá ñú-gá ná chĩndee ñaha-gá xii-ndo te uuⁿ-gá cuita cuu iní tnahá-gá-ndó quĩhíⁿ, te ducaⁿ ío váha cuita cutnùní iní-ndó nchaa nacuaá sàni iní-gá cada-ndo, te ducaⁿ ío váha cuita cutnùní tucu iní-ndó nacuáa cundecu-ndo. 10 Te ducaⁿ cutnùní tucu iní-ndó nchaa sá ío-gá váha xini ñuhu-xi cada-ndo, te ducaⁿ te cuu-ndo ñáyiú cada mee-ni sá váha, te ducaⁿ ñà túú tnahí ná cùmání-ndó ñuú Yă Ndiõxí ndéé ná sáá nduu quixi tucu Xítohó Jesucristú. 11 Te ñu-ni Xítohó Jesucristú chĩndee ñaha-gá xii-ndo càda-ni-ndo nchaa núú sá váha nacuaá cuini Yă Ndiõxí. Te sá ñucáⁿ ná càda-ndo te ío

cada càhnu-ndo-gá, te nchaa dava-gá ñáyiú cáháⁿ váha-yu cuèndá-gá.

Xítohó Jesucristú ío cùnuu-gá ndécú ndìhi-gá té Pǎblú

¹² Te nchaa nchòhó ñáyiú ndècu ndìhi-í ichi Xítohó Jesucristú na càchí tnúhu-í xii-ndo sǎ úúⁿ-gǎ tá xíté nuu tnúhu-gá vitna yìhi-í vecaá. ¹³ Te nchaa cue tée cùu sandadú xindecu vechiúⁿ núú ndécú tée cùnuu xiní-güedé sǎ sǎ cuèndá sǎ càháⁿ-í tnúhu Xítohó Jesucristú duha yìhi-í vecaá, te diu-ni ducaⁿ sǎ xiní nchaa dava-gá ñáyiú sǎ sǎ càháⁿ-í tnúhu-gá duha yìhi-í vecaá. ¹⁴ Te cuèndá sǎ dúhá yìhi-í vecaá xiǎⁿ ío-gá vǎi ñáyiú ndècu ichi Yá Ndiòxí ta cùtnuní-gá iní-yu sǎ cúú-gǎ ìⁿ Yaá ío quide ndáá, te uuⁿ-gá tá cùyì-yu càháⁿ-yu tnúhu-gá, te ñá túú tnàhí-gá yùhú-yu càháⁿ-yu.

¹⁵ Te na càchí-í tnúhu ndáá-í xii-ndo sǎ dǎva ñáyiú càháⁿ-yu tnúhu Xítohó Jesucristú cuèndá-ni sǎ cúú cuèdú iní ñáhǎ-yu xii-í sǎ ío chindee ñaha-gá xii-í càháⁿ-í tnúhu-gá. Te ducaⁿ quidé-yu chí cuiní-yu nàá ndìhi ñáhǎ-yu xii-í, dico davá-yu chí ío váha sàni iní-yu càháⁿ-yu tnúhu-gá. ¹⁶⁻¹⁷ Te ñáyiú-áⁿ càháⁿ-yu tnúhu-gá chí cùu iní ñáhǎ-yu xii-í, te sa nàhá-yu sǎ sǎ cuèndá sǎ càháⁿ váha-í cuèndá tnúhu-gá núú ñáyiú ñá túú tnàhá iní tnúhu-gá, cuèndá xiǎⁿ yìhi-í vecaá. Te dava-gá-yu càháⁿ-yu tnúhu Xítohó Jesucristú cuèndá-ni

sǎ cuiní-yu cuu sǎ vǎha xii mèe-yu, te ñá díú sǎ càháⁿ-yu cuèndá sǎ sání vǎha iní-yu. Te ducaⁿ quidé-yu chí cuèndá cuiní-yu sǎ nǎndi-gá cada ñaha-güedé xii-í. ¹⁸ Dico ío cùdíí iní-í sǎ càháⁿ-yu tnúhu Xítohó Jesucristú cuèi cùu váha iní-yu àdi ñá túú cùu váha iní-yu càháⁿ-yu.

Te diu-ni ducaⁿ cùdíí iní-í núú cuaháⁿ núú vèxi. ¹⁹ Te cùtnuní iní-í sǎ sǎ cuèndá nchaa sǎ quidé ñaha-güedé xii-í, cuèndá xiǎⁿ cada váha ñaha Yá Ndiòxí xii-í, chí nchòhó ío càháⁿ ndìhi-ndo-gǎ cuèndá-í, te Espiritú ní taxi Xítohó Jesucristú ndécú ndìhi-o ío chindee ñaha-xi xii-í. ²⁰ Te cuiní-í sǎ ñá túú tnàhí ná cumáni-í núú Yá Ndiòxí cuèndá sǎ vǎ cúú càháⁿ núú-í, te cùtnuní iní-í sǎ díú-gǎ chindee ñaha-gá xii-í. Te cuiní tucu-í sǎ ío cuyì-í càháⁿ-í tnúhu-gá vitna dàtná tá quide-í véxi, te ducaⁿ ío cada nínu-í Xítohó Jesucristú cuèi vitna nini ndècu-í ñuyíú-a te cuèi na cùú-í ducaⁿ-ni càda nínu-í-gá. ²¹ Te nini ndècu-í ñuyíú-a te Xítohó Jesucristú ío cùnuu-gá ndécú ndìhi ñaha-gá xii-í, te na sàá nduu cùú-í te ío-gá váha tnahá-í chí nucúndecu-í ndìhi-gá. ²² Te núu na cùndecu-gá-í ñuyíú-a te cada-gá-í chiúⁿ sǎ cúú-xí Yá Ndiòxí, te ñá cùtnuní iní-í nása cada-í núu sǎ cùndecu-í àdi sǎ cùú-í. ²³ Te ío vǎi saní iní-í te cuiní-í cuú-í chí ío-gá váha cundecu-í núú ndécú Xítohó Jesucristú. ²⁴ Dico sǎ cúú-xí nchòhó chí ío xini ñuhu-xi

cundecu-í. ²⁵ Te cùtnuní ndáá iní-í sá ìⁿ tnúhu ndáá càháⁿ-í, te cùtnuní tucu iní-í sá cùndècu-ni-í cundecu ndìhi ñaha-í xii-ndo nchàa-ndo cuendá chindee ñaha-í xii-ndo cuíta quindáá-gá iní-ndó Xítohó Jesucristú quíhíⁿ, te ducaⁿ ìo cudíí iní-ndó cùndecu-ndo. ²⁶ Te ducaⁿ te uuⁿ-gá cachí-ndó sá ìo càhnu cuu Xítohó Jesucristú cuendá sá ñí dáçacu ñaha-gá xii-í ndécú ndìhi ñaha-í xii-ndo.

²⁷ Te xini ñuhu-xi cada-ndo nchaa nacuaá càháⁿ tnúhu Xítohó Jesucristú. Te núu ní ndacu-í véxi coto ñaha-í xii-ndo, te dàvá-áⁿ quini ndáá-í sá ndécú-ni-ndó ìchi Xítohó Jesucristú. Dico núu ñá túú ní ndacu-í quixi coto ñaha-í xii-ndo ña, te diu-ni níhí-í tnúhu sá ndécú-ni-ndó ìchi-gá, te níhí tucu-í tnúhu sá ìⁿ-ní cùu-ndo ndecu-ndo, te níhí tucu-í tnúhu sá ìⁿnuu nducu ndee-ndo caháⁿ-ndó tnúhu Yá Ndióxi núú ñáyiu, tnúhu sá sàndáá iní-ndó. ²⁸ Te ñá túú yuhú-ndó nchàa sá quidé ñaha ñáyiu cùu úhú iní ñahá xii-ndo, te sá dúcáⁿ quide-ndo ñá túú yuhú-ndó nchàa sá quidé ñahá-yu xii-ndo, te ndìxi túu iní-yu sá nchòhó ndécú-ndó ìⁿ ichi núú nánihí tàhú-ndó, te ñáyiu-áⁿ cuíta nihnú-yu, chi ducaⁿ ñí cachí Yá Ndióxi cunduu. ²⁹ Te mee Yá Ndióxi ní taxi-gá tnúhu ndee iní sá quindáá iní-ó Xítohó Jesucristú, te ñá díú-ní sá quindáá iní-ó-gá chi tnàhá ndoho-o cuendá-gá. ³⁰ Te tnàhá nchòhó ndóhó-ndó

cuendá-gá vitna, te nchòhó ní xiní núu-ndó nàcuáa ní ndoho-í, te vitna nihí-ndó tnúhu nchaa nàcuáa ndòho tucu-í.

2

Xítohó Jesucristú ñá túú ní quide nínu-gá méé-gá dico Yá Ndióxi ní quide nínu ñaha xii-gá

¹ Te Xítohó Jesucristú dáçahu iní ñahá-gá xii-ndo nàcuáa cundecu-ndo, te cùu iní ñahá-gá xii-ndo nàcuáa cuu váha iní-ndó cùndecu-ndo, te ndècu ndìhi-ndo Espiritú Yá Ndióxi, te ìo cùndahú iní tnàhá-ndó. ² Te xíáⁿ núu càháⁿ-í dóho-ndo sá ìo cuu ìⁿnuu-ni-ndo cùndecu-ndo nacuaá ìo-gá cudíí iní-í, te ìⁿ-ni cùu iní tnàhá-ndó, te ìⁿ-ni càni iní-ndó, te ìⁿ-ni càda-ndo. ³ Te vá cáda nínu-ndo mèe-ndo nducu-ndo mee-ni sá cúu-xí mèe-ndo, chi cunduu ndàhú iní-ndó, te cani iní-ndó sá tnàha ñáyiu-ndo ìo-gá cùnùu-yu dàcúxí mèe-ndo. ⁴ Te ni vǎ cáni iní-ndó nducu-ndo mee-ni sá váha sá cúu-xí mèe-ndo, chi nducu-ndo sá cúu-xí tnàhá cuendá tnàha ñáyiu-ndo.

⁵ Te ìo váha cani iní-ndó nàcuáa cundecu-ndo dàtná quidé mèe Xítohó Jesucristú. ⁶ Te ìⁿ-ni cùu Xítohó Jesucristú ndìhi Yá Ndióxi. Te cuéi ducaⁿ dico mee Xítohó Jesucristú ní sani iní-gá sá ñà túú cùyica cundecu-gá taxi tnùní-gá ndìhi Yá Ndióxi. ⁷ Te ní dáñá-gá sá cùnùu-gá andiù te ní quixi-gá ñuyíu-a ní cuu-gá ìⁿ ñáyiu, te ní quide-gá dàtná quidé ìⁿ téé

xìnu cuechi. ⁸ Te ní cuu-gá ìⁿ tée dàtná ndáa cue tée xíndecu ñuyíú-a, te ní cuu-gá ìⁿ tée ío ndàhú iní-xi chí ñá túú ní quide nínu-gá mée-gã, te ní sándáá iní-gá ní quide-gá nchaa nàcuáa ní xáhaⁿ Yá Ndiöxí xii-gá cútnàhá ní quixi-gá ñuyíú-a. Te sá dúcáⁿ nì sándáá iní-gá xíãⁿ ní xíhí-gá núú cùrúxí. ⁹ Te xíãⁿ ío ní quide nínu ñaha Yá Ndiöxí xii Xítóhó Jesucristú cuendá ío cunuu-gã. Te ní xáhaⁿ Yá Ndiöxí xii Xítóhó Jesucristú sá cúu-gã Xítóhó nchaa ñáyiu ndècu ñuyíú-a. ¹⁰ Te ducaⁿ nì quide Yá Ndiöxí cuendá nchaa Espiritú ndécú àndiu, ndihi nchaa ñáyiu ndècu ñuyíú-a, ndihi nchaa ñáyiu ní xíhí ngüíñí xítí-yu ndihi nchaa espíritú-áⁿ te cachí-yu ndihi-xi sá ío càhnu cuu Xítóhó Jesucristú. ¹¹ Te nchaá-yu cachí-yu sá Xítóhó Jesucristú cúu-gã Yaá táxí tnùnì. Te sá dúcáⁿ càdá-yu, te quide cahnú-yu Dútú Ndiöxí.

Ñáyiu ndècu ichi Xítóhó Jesucristú cúu-yu dàtná ìⁿ ñuhú

¹² Te xíãⁿ nõu nchaa nchòhó ñáyiu ío cùu iní-í cuiní-í sá quíndáá iní ñáhá-ndó xì-í dàtná ní quide-ndo cùtnàhá ní xíndecu ndihi ñaha-í xii-ndo, chí dàvá-áⁿ ñá túú tnàhí ni dàña ndéé-ndó nì sándáá iní ñáhá-ndó xii-í. Te cuiní-í sá úúⁿ-gã quíndáá iní ñáhá-ndó xì-í vitna ñá túú ndècu ndihi ñaha-í xii-ndo. Te ío nducu ndèe-ndo cada-ndo nchaa nàcuáa tàú-xi cundu ndéé ná sáá nduu nduu táhú-ndó cùndecu-ndo ndihi Xítóhó Jesucristú, te

íó canehe-ndo sã yíñùhu núú-gã. ¹³ Te Yá Ndiöxí ío váha dàcahu iní ñáhá-gã xii-ndo càda-ndo nchaa nacuáa cuiní mée-gã, te ñu-ni mee-gã chíndèe ñaha-gã xii-ndo dùcaⁿ quide-ndo.

¹⁴ Te vá cání iní-ndó nã tnúhu cáháⁿ-ndó cuendá ñáyiu, te ni ñá túú nãndi tnúhu cútnàha-ndo ndihí-yu, ¹⁵ te ducaⁿ te cuu-ndo ñáyiu ñá túú cuèchi-xi núú Yá Ndiöxí. Te nchòhó ñáyiu cùu déhe Yá Ndiöxí, ñá túú tnàhí-gá ná cumání-ndó nõú-gã nini ndècu-ndo tnuú nchaa ñáyiu ndècu ichi cuehé ichi duha ñuyíú-a, ñáyiu cuihna iní-xi. Te cuu-ndo dàtná chódíní sã dáyèhé niú nee, ¹⁶ te ducaⁿ chí dàcuaha-ndo ñáyiu tnúhu Yá Ndiöxí tnúhu sá càháⁿ nàcuáa naníhí tàhú-yu. Te núu ducaⁿ-ni na càda-ndo te òré ná sáá nduu càda ndáá Xítóhó Jesucristú nchaa yíca cuèchi ñáyiu, te dàvá-áⁿ vã cúu càhaⁿ nõú-í, chí ñá túú diò ducaⁿ ni sàhni iní-í cada-í nchaa chiúⁿ ní tàhú-gã. ¹⁷ Te nchòhó ío váha quide-ndo ndecu-ndo ichi Yá Ndiöxí chí sándáá iní-ndó-gã, te yúhú cahni ñaha-güedé xii-í cuendá nchaa sá vãha quide-ó. Te xíãⁿ ío cùdí iní-í te cùdí tuçu iní-í dàtná cùdí iní-ndó cuendá nchaa sá vãha quide-ndo. ¹⁸ Te ñu-ni ducaⁿ ío chí cùdí iní dàtná cùdí iní mée-í cuendá nchaa sá yãha-í ndécú-í.

Té Timùteú ndihi té Epafrodítú

¹⁹ Te núu Xítóhó Jesucristú ná càchí-gá te ndihi-ni ten-

daha-ĩ té Timùteú quixi-dé quixi coto ñaha-dě xii-ndo nàcuáa cudíi iní-ndó. Te òré ndixi-dé canaha-dě tnúhu ndixi núu nása cùu ndecu-ndo, te tnàhá yúhú ío cudíi iní-í tucu. ²⁰ Te núu ncháa cuè téé ndècu ndihi-í te ìndi-ni té Timùteú-a cùu-dé téé ío váha sàni iní-xi dàtná sání iní-í, chi diu tnàhí-ni-dé ío sàni iní-dé núu nása ndècu-ndo. ²¹ Chi dava-gá-güedé mee-ni sá cùú-xí mèe-güedé ío sàni iní-güedé, te ñá túú sàni iní-güedé cada-güedé chiùⁿ tahu Xítohó Jesucristú. ²² Te nchòhó sa xini-ndó sã tẽ Timùteú-a cùu-dé ìⁿ téé quide váha chi nándi sá tá yáha-dé véxi te quide ndee iní-dé. Te cùu-dé dàtná ìⁿ déhe-í ndécú ndihi ñaha-dé xii-í xínú cuèchi-ndí núú Xítohó Jesucristú càháⁿ-ndí tnúhu-gá núú ñáyiu. ²³ Te òré ná cùtnuní núu nása cada ñaha-güedé xii-í te ndihi-ni tendaha-ĩ-dé quixi coto ñaha-dě xii-ndo. ²⁴ Te sàni iní-í sá Xítohó Jesucristú cada-gá te tnàhá mée-í ío ndihi quixi coto ñaha-ĩ xii-ndo.

²⁵ Te tnàhá sání iní-í sá ío xini ñuhu-xi tendaha-í té Epafròditú téé ndècu ndihi-o ichi Xítohó Jesucristú ndixi coto ñaha-dě xii-ndo, chi tnàhá-dé quidé-dě chiùⁿ-gá te quide ndee iní-dé tnàhá-dé nándi yáha-dé sá cuendá-gá, te diu mee-ndo ñi tendaha-ndo-dě véxi-dé cuendá coto ñaha-dě xii-í. ²⁶ Te ducaⁿ cuini-í tendaha-ĩ-dé ndixi-dé chi mee-dě ío sàni iní-dé ndixi càháⁿ ndihi ñaha-dě xii-ndo, te ío ndihú iní-dé sá

ni ñhí-ndó tnúhu sá cùhú-dé ní cùu. ²⁷ Te ndáá sá ñi cùhú-dé chi luha ndiquiⁿ-ná cuú-dé ní cùu, dico Yá Ndiòxí ní cundàhú iní ñáhá-gã xii-dé ní quide tátna ñaha-gã te ní ndúha-dé. Te ñá díú-ní mèe-dé ducaⁿ ñi cundahú iní ñáhá-gã xii-dé chi tnàhá yúhú ío ní cundàhú iní ñáhá-gã xii-í, chi núu ni xihí-dé te ío-gá ndihú iní-í ní cùu. ²⁸ Te xiáⁿ ío ndihi cuini-í tendaha-ĩ-dé ndixi-dé cuendá òré nasáá-dé núú-ndó te ío cudíi iní-ndó, te ducaⁿ yúhú ñá túú-gá ná cani iní-í. ²⁹ Te òré nasáá-dé te ío cudíi iní-ndó nàqueheⁿ cuendá-ndó-dě, te ducaⁿ ío ndacáⁿ táhú-ndó núú Xítohó Jesucristú cuendá-dé. Te ío canehe-ndo sã yíñuhu núu ncháa cue téé quide datná quidé-dě. ³⁰ Chi téé-a sa luha ndiquiⁿ-ná cuú-dé ní cùu sá xínú cuèchi-dé núú Xítohó Jesucristú, te ní sani iní-dé sá ñá túú ñá cada-xi cuèi na cùú-dé ní quide-dé nchaa chiùⁿ sá cùmání cada-ndo cuendá-í ní cùu.

3

Ñáyiu cundáá núú Yá Ndiòxí

¹ Te vitna nchaa nchòhó ñáyiu ndècu ndihi-í ichi Xítohó Jesucristú càháⁿ ndàhú-í núú-ndó sã ío cudíi iní-ndó sã yíndàha ñaha-gá xii-ndo. Te yúhú ñá túú cùu dusaⁿ-í tee tucu-í nchaa tnúhu sá sá ní dánèhé ñáhá-í xii-ndo, chi cùu-xi tnúhu sá ío chindee ñaha-xi xii-ndo. ² Te ío quihí iní-ndó vã cádá cuendá-ndó ñi ìⁿ tnúhu càháⁿ cue téé ío cuihna iní-xi ñá túú tnàhí

cuiní cada sá vǎha, chi cue tée-án néhé-güedě iní iná chi cǎchí-güedé sá ncháá cuè tée xini ñuhu-xi cuáha-güedé seǎná ñii-güedé cuendá ducaⁿ cùdiu-güedé núú Yǎ Ndiǒxí. ³ Dico nchoo chi cùdiu-o núú Yǎ Ndiǒxí cuèi dava-o sà ní ngúndecu seǎná ñii-o te dava-o ñháá, chi Espíritú-gá chindèe ñaha-xi xii-o quide-o nchaa nacuaá tau-xi cunduu cuendá cuu cǎhnu-gá. Te ío cùdíí iní-ó cǎchí-ó sǎ ío cǎhnu cuu Xítóhó Jesucristú, te ñá túú sàni iní-ó sǎ sǎ cuendá nchaa sá vǎha quide-o cùdiu-o núú Yǎ Ndiǒxí. ⁴ Te núú dicó cuendá nchaa sá vǎha quide-o cùdiu-o núú Yǎ Ndiǒxí, te yúhú sa ama-gá cùdiu-í núú-gǎ cuendá nchaa sá ñi quide-í ní cùu te núú dicó ducaⁿ. Te ío cue tée cǎchí-güedé sá cùdiu-güedé núú Yǎ Ndiǒxí cuendá nchaa sá vǎha quide-güedé. Te yúhú uuⁿ-gá ducaⁿ cǎháⁿ-í núú dicó sá cúú chi yúhú ní xídó-gǎ-í ní quide-í dàcúúxí dàva-gǎ-güedé. ⁵ Te núú ùná-ni nduu sá ñi cacu-í te ní sáha-güedé seǎná ñii-í, te yúhú cúú-í tée isráél, te mei ñàni tǎhá ndii Benjamín tée ní xíndecu ndéé sanaha cùu-í. Te cǎháⁿ-í tǎhú hēbreú tǎhú cǎháⁿ tǎtà-í ndiihí nǎnà-í, te ní cundiihí-í nchaa cue tée cùu fariséú, te ní cǎnchicúⁿ nihnu-í nchaa nǎcuáa ní cǎháⁿ ndii Moisés dàtná xǐquide mee-güedé. ⁶ Te yúhú ní sani iní-í sá ñiⁿ ichi ndáá ndécù-í ní cùu, te ío ní cuiní-í cunu cuechi-í núú Yǎ Ndiǒxí, núú xiǎⁿ nǎndi sá ñi quide-í nchaa ñáyi

ndècu ichi Xítóhó Jesucristú, te vá yǒo ñiⁿ ní xóo cúñaha ñiⁿ tǎhú xii-í cǎchí-yu sá ñà túú quide-í nǎcuáa ní cǎháⁿ ndii Moisés ní cùu. ⁷ Te nchaa sá sání iní-í sá ío nǎndiihí nchicúⁿ nihnu-í ní cùu, ní cutnùní iní-í sá ñà túú tǎhí chindèe ñaha-xi nacuaá cundáá-í núú Yǎ Ndiǒxí, núú xiǎⁿ duuⁿ duuⁿ ní xehndé iní-í sá vǎ chindèe ñaha-xi cuendá sá ñi cuiní-í cundecu ndiihí-í Xítóhó Jesucristú. ⁸ Te nchaa sá cǎchí ñáyi chindèe ñaha cundáá-ó núú Yǎ Ndiǒxí ní cutnùní iní-í sá ñà túú chindèe ñaha-xi. Te yúhú ní cutnùní iní-í sá ío-gǎ vǎha tǎhá tǎhú-o ndiihí Xítóhó Jesucristú. Te nchaa sá sání iní-í chindèe ñaha xii-í ní cùu, ñá túú-gǎ sǎndáá iní-í sá chindèe ñaha-xi vitna chi ní cutnùní iní-í sá ñà túú nǎndiihí-xi. Te ducaⁿ quide-í ñá túú-gǎ sǎndáá iní-í nchaa xiǎⁿ sá chindèe ñaha-xi, chi cuiní-í sá úúⁿ-gǎ cuita tǎhá tǎhú-í ndiihí Xítóhó Jesucristú quíhíⁿ, ⁹ te cuu ñiⁿnuu-í ndiihí-gǎ, te ducaⁿ-ni cundáá-í núú Yǎ Ndiǒxí dàtná cundáá-í vitna, dico ñá díú cuendá sá nchicúⁿ nihnu-í nǎcuáa ní cǎháⁿ ndii Moisés ní cùu, chi cuendá sá sǎndáá iní-í Xítóhó Jesucristú. Te Yǎ Ndiǒxí ní quide-gǎ cundáá-í núú-gǎ, te ducaⁿ chi ní sǎndáá iní-í Xítóhó Jesucristú. ¹⁰ Te cuiní-í cutnùní iní-í nchaa nǎcuáa sàni iní Xítóhó Jesucristú, te cuiní-í sá ío chindèe ñaha-gǎ, te diu-ni-gǎ cúú-gǎ Yaá ní xihí te ní ndoto-gǎ, te ducaⁿ cuiní-í cada-gǎ cuendá cada-í nchaa nǎcuáa cuiní-gǎ. Te cuiní-í tǎhá-í ndoho-í

dàtná ní ndoho-gá. Te yúhú cuìní-í sá vǎ cǎdà-í ní ìḡⁿ sá ñà túú tǎhá iní Yǎ Ndiǒxí, chí diu cuèndá-áⁿ ñí xíhí Xítóhó Jesucristú. ¹¹ Te cuìní-í sá Yǎ Ndiǒxí cachí-gá te tǎhá-í ndoto na sǎá nduu ndòto nchaa ñáyiu sa ní xíhí ní xíndecu ichi-gá.

Cada-o nchaa nacuaá tǎu-xi cunduu cuèndá níhí-ó sǎ ndúú tǎhú-ó

¹² Te cùmání-gǎ cada-í nchaa nàcuáa cǎháⁿ-í-a, te cumání-gǎ cada-í nchaa nàcuáa cǎháⁿ Yǎ Ndiǒxí cuèndá sá ñà túú-gǎ ná cumání-í núú-gǎ. Te ío ndùcu ndee-í nchícúⁿ nihnu-í quidè-í nàcuáa ducaⁿ ñà túú-gǎ ná cumání-í núú-gǎ, chí diu cuèndá-áⁿ ñí cǎháⁿ ñáhá Xítóhó Jesucristú xii-í. ¹³ Te nchaa nchòhó ñáyiu ndècu ndihí-í ichi Xítóhó Jesucristú cǎchí tǎnúhu-í xii-ndo sǎ cùtnuní ndáá iní-í sá vítná cùmání-gǎ cada-í nchaa nàcuáa ñá túú-gǎ ná cumání-í núú-gǎ. Te ní níhí-í ìḡⁿ sá ìo xìni ñuhu-xi cada-í te xiǎⁿ quidè-í, te ñá túú-gǎ quidé cuèndá-í nchaa sá ñí xóo cada-í, te ío ndùcu ndee-í quidè-í nchaa nàcuáa cǎháⁿ Yǎ Ndiǒxí. ¹⁴ Te ndùcu ndee vihi-í nchícúⁿ nihnu-í quidè-í nchaa nàcuáa cǎháⁿ-gǎ, te diu-ni ducaⁿ cǎdà-í ndéé ná sǎá nduu sǎá-í núú ndécú-gǎ taxi-gǎ sá ndúú tǎhú-í. Te ducaⁿ tǎhá sa ní cǎháⁿ ñáhá-gǎ xii-o cùndecu-o ndihí-gǎ, te ducaⁿ ñí cǎháⁿ ñáhá-gǎ xii-o sǎ cuèndá Xítóhó Jesucristú chí tǎhá tǎnúhu-o ndihí-gǎ.

¹⁵ Te nchaa nchòhó ñáyiu quide váha ndècu ichi Yǎ Ndiǒxí xìni ñuhu-xi cani iní-ndo dàtná sání iní-í-a, àdi núu dava-ndo ñà túú sǎni iní-ndo dàtná sání iní-í-a, dico mee Yǎ Ndiǒxí dandixi túu-gá iní-ndo te cutnùni iní-ndo nàcuáa cada-ndo. ¹⁶ Te xìni ñuhu-ni-xi cada-o nchaa nacuaá ta quide-o véxi.

¹⁷ Te nchaa nchòhó ñáyiu ndècu ndihí-í ichi Xítóhó Jesucristú cǎháⁿ-í dóho-ndo sǎ cǎnchícúⁿ nihnu-ndo cǎdà-ndo datná quidè-í. Te cundehe-ndo nàcuáa quide nchaa ñáyiu sa nchícúⁿ nihnu nchaa nàcuáa dǎnehé ñáhà-í xii-ndo cuèndá ducaⁿ cǎdà-ndo tǎhá-ndo. ¹⁸ Te sa ní cuu vǎi xito cachí tǎnúhu-í xii-ndo sǎ ío ñáyiu ñá túú tǎhá cùu váha iní-xi sá ñí xíhí Xítóhó Jesucristú núú cùrúxí cuèndá sá nánihí tǎhú-ó. Te ndihí ndute núú-í dǎndacu iní ñáhà-í xii-ndo cuèndá-yu. ¹⁹ Te sǎá nduu te nchaa ñáyiu ducaⁿ xiquide-áⁿ cuíta nihnú-yu, chí mee-ni nchaa sá cuèhé sá dúhá ñuhu iní-yu te diu-ni nchaa xiǎⁿ cúnúu quidé-yu, te cucahaⁿ núú-yu cuèndá nchaa sá quidè-yu núu dícó sá cúú, dico ñáhá chí da quide cahnú-yu mèe-yu cuèndá nchaa xiǎⁿ. Te mee-ni nchaa sá ío ñuyú-a ñuhu iní-yu. ²⁰ Dico nchoo chí andiu ndècu núú cúú ñúú-ó, te ndètu cahnu-o sǎá nduu quixi tucu Xítóhó Jesucristú nacuaa ñaha-gǎ xii-o. Te diu-ni-gǎ cúú-gǎ Yaá ní dǎcǎcu nihnu ñaha xii-o núú ùhú núú ndáhú. ²¹ Te yiqui cúnú-ó chí vá cúdǐ-xi cundecu-xi dàtná

cáa-xí vitna, dico mee Xítoho Jesucristú nadama-gá yiqui cùnú-ó te ndada-gá dàtná ní nduu yiqui cùnú méé-gă cùtnàhá ní ndoto-gá. Te ducaⁿ càda-gá chi ndàcu-gá quidé-gă nchaa sá vâha càchí iní-gá, te ducaⁿ tàxi tnuní-gá nchaandi túhú sá ió.

4

Ío cudíí iní-ó sã ndécú-ó ichi Xítoho Jesucristú

1 Te nchaa nchòhó ñáyiú ío cùu iní-í ndécú ndihí-í ichi Xítoho Jesucristú ío cùní-í cáháⁿ ndihí ñaha-í xii-ndo. Te ío cudíí iní-í cuendá nchaa sá vâha quide-ndo chi ñá túú ní xíta chiúⁿ Yá Ndiöxí ní quide-í sá cúú-xí-ndó, te diu-ni nchòhó ñáyiú ío cùu iní-í càháⁿ-í dóho-ndo sã cãncíjúⁿ nihnu-ni-ndo ichi Xítoho Jesucristú.

2 Te yòhó tá Vòdiá ndihí yòhó tá Sîntiqué càháⁿ ndàhú-í núú-ndó sã cúú ñⁿnuu-ndo cundecu-ndo ichi Xítoho Jesucristú. 3 Te yòhó té cùndihí-í quide ndáá quidé nchaa chiúⁿ quide-í, càháⁿ ndàhú-í núú-n sã chindèe tnúhu-n úú ñáyiú dihí-áⁿ cuendá sá ná cùu ñⁿnuú-yu cundecú-yu, chi cùtnàhá ní xíndecu ndihí ñàhá-yu xii-í ío ní chindèe ñàhá-yu xii-í, ndihí té Clémenté, ndihí nchaa dava-gá-yu ní quide-ndí chiúⁿ Xítoho Jesucristú, te nchaa ñáyiú-áⁿ sa yòdo tnuní-yu núú tûtú Yá Ndiöxí sá ndúú tãhú-yu cundecú-yu ndihí-gá ni caa ni quíhíⁿ.

4 Te nchaa-ni nduu ío cudíí iní-ndó sã ndécú-ndó ichi

Xítoho Jesucristú. ;Te càháⁿ-ni tucu-í dóho-ndo sã cudíí ndisa iní-ndó! 5 Te ío vâha cuu iní-ndó càháⁿ ndihí-ndo ñáyiú cuendá ná cùtnuní iní-yu sá cúú-ndó ñáyiú vâha iní-xi, chi sa ta cùyatni nduu quixi tucu Xítoho Jesucristú.

6 Te ñá túú tnàhí ná cani iní-ndó te núu nãsa cùu ndecu-ndo, chi càháⁿ ndihí-ndo Yá Ndiöxí cuendá sá ná chindèe ñaha-gá xii-ndo. Te ío ndacáⁿ táhú-ndó núú-gă. 7 Te núu ducaⁿ na càda-ndo te Yá Ndiöxí cada-gá te ío vâha cuu iní-ndó cùndecu-ndo. Te nchoo ñáyiú ñá túú cùtnuní iní-ó nãsa quide-gá ndée ducaⁿ ío vâha cùu iní-ó, te ducaⁿ ío vâha cùu iní-ó chi cùu ñⁿnuu-o ndihí Xítoho Jesucristú.

Mee-ni sã vâha cuhuⁿ iní-ó

8 Te càháⁿ ndàhú tucu-í núú nchaa nchohó ñáyiú ndecu ndihí-í ichi Xítoho Jesucristú sá méé-ní sã vâha cuhuⁿ iní-ndó. Te xini ñuhu-xi cuhuⁿ iní-ndó mée-ni nchaa tnúhu ndáá, ndihí nchaa tnúhu yíñùhu, ndihí nchaa tnúhu sá ío cudíí iní-ó, ndihí nchaa tnúhu sá ío vii ío vâha cuáháⁿ, ndihí nchaa tnúhu sá ñá túú ñùhu tnahá tnúhu cuèhé, ndihí nchaa tnúhu sá cãchí ñáyiú vâha, ndihí nchaa dava-gá tnúhu sá sání iní méé-ndó sã ío vâha te diu-ni nchaa xiãⁿ cuhuⁿ iní-ndó.

9 Te cùtnàhá ní xíndecu ndihí ñaha-í xii-ndo ní dánèhè ñàhá-í nãcuáa cada-ndo te ní sãndáá iní-ndó. Te xiãⁿ càháⁿ-í dóho-ndo sã vã dáñá ndée-ndó càda-ndo, te diu-ni ducaⁿ vã dáñá ndée-ndó càda-ndo nchaa nacúaa ní quide-í ní xiní-ndó. Te núu

ducaⁿ na càda-ndo te Yá Ndiöxí Yaa quidé ïo váha cùu iní-ó ndècu-o cundecu ndihi ñaha-gá xii-ndo.

Ñáyiú ñuú Filipú ndécú ichi Xítohó Jesucrístú sãñahá-yu sá ndúú tãhú tẽ Pãblú

¹⁰ Te cùdíí vîhí ìní-í ndàcáⁿ tãhù-í núú Xítohó Jesucrístú sá ñí ndacu iní ñáhá-ndó xii-í, dico ñã díú sã ñà túú ñùhu iní ñáhá-ndó xii-í chi dìcò sã ñã nihí-ndó nàcuáa cada-ndo chindee ñaha-ndo xii-í ní cùu.

¹¹ Te ñã díú sã dúhá càháⁿ-í te caní iní-ndó sã càchí tnúhu-í xii-ndo sã ïó ìⁿ sá cùmãní xii-í, chi yúhú cùu váha-ni iní-í nùu ïó xii-í àdi ñã túú ïó.

¹² Te xini-í cunduu ndáhú-í, te xini-í cunduu cuica-í, te xini-í caxi-í ndahá xití-í, te xini-í cuú-í docó, te xini-í nàcuáa quide-xi oré ñã túú vèdana ná ndécú ndihi-o, te xini-í nàcuáa quide-xi oré xidó ndécú ndihi-o. Te ducaⁿ ñí cutúha-í quidè-í cuendá nchaa nàcuáa ta yãha-í véxi.

¹³ Te nchaa ndàcu-í quidè-í chi Xítohó Jesucrístú chindèe ñaha-gá xii-í. ¹⁴ Te nchòhó ïo váha ní quide-ndo ñí cundáhú iní ñáhá-ndó xii-í ní chindee ñaha-ndo vitna ndecu ndihi-í tnúndòho.

¹⁵ Te nchòhó cue ñáyiú ñuú Filipú sa nàha-ndo nacuáa ní cuu cùtnahá ní ngüita-í càháⁿ-í tnúhu Xítohó Jesucrístú distritú Macèdoniá, te cùtnahá ní ndee-í distritú-áⁿ te ñuú tnàhí-ni nchòhó ní taxi-ndo sã ndúú tãhù-í, te nchaa ñáyiú ndècu ichi Xítohó Jesucrístú dava-gá xichi ñã túú tnàhí ni chindee ñahá-yu xii-í. ¹⁶ Te cuèi cùtnahá

ní xíndecu-í ñuú Tesalónica titní xito ní tendaha-ndo sã ndúú tãhù-í sã ñí cutnùní iní mée-ndó ñí xini ñùhu-í. ¹⁷ Te vá caní ìní-ndó sã sã dúhá càháⁿ-í te cuini-í nãndi-gá taxi tãhù-ndó, te duha càháⁿ-í chi Yá Ndiöxí ïo-gá vai sã váha cada ñaha-gã xii-ndo sã dúcáⁿ quide-ndo. ¹⁸ Te ní xidó vai nchaa sá xini ñùhu-í ndécú ndihi-í vitna, te ducaⁿ ïo vai sã ndécú ndihi-í ní cuu chi ní tendaha tùcu-ndo sã ndúú tãhù-í véxi ndihi té Epafrodítú. Te tãhù-a cùu-xi datná ìⁿ tãhù sã ñí sãha-ndo mée Yá Ndiöxí, te cùu vii cuu váha iní-gá sã dúcáⁿ ñí quide-ndo. ¹⁹ Te núu ná cúú sã xini ñùhu-ndo, te mee Yá Ndiöxí ïo vai taxi-gá chi ïo vai sã ndécú ndihi-gá, te ducaⁿ càda-gá chi ndècu ndihi-o Xítohó Jesucrístú. ²⁰ Te vitna nchaa-o chĩ ná càchí-ó sã ïo càhnu cuu Tãtá-ó Dütú Ndiöxí ñí caa ñí quihíⁿ. Te ducaⁿ na cùnduu.

Tnúhu ndée núú ñí ndihi-ná

²¹ Te cùñaha-ndo sã ïo na càda ndee iní nchaa ñáyiú ndècu ichi Xítohó Jesucrístú, ñáyiú cùu cuendá Yá Ndiöxí. Te tnàhá nchaa ñáyiú xíndecu ichi Xítohó Jesucrístú ndécú ndihi-í quidé ndèe iní ñáhã-yu xii-ndo. ²² Te nchaa ñáyiú cùu cuendá Yá Ndiöxí xínú cuèchi vehe té Cèsár tée yíndaha cuéhé nacióⁿ quidé ndèe iní ñáhã-yu xii-ndo, ndihi nchaa dava-gá ñáyiú cùu cuendá-gá.

²³ Te Xítohó Jesucrístú ïo na chindee chitúu ñaha-gã xii-ndo nchaa-ndo. Te ducaⁿ

na cùnduu. Te ío chí cádá ndèè
iní-nǎ vitna.

TUTÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ CÒLOSÁ

Té Pāblú cadúha-dé tutú quihiⁿ ndaha ñáyiu xĩndecu ichi Xítoho Jesucristú ndécú ñuú Còlosá

¹ Yúhú té Pāblú ní tendaha ñaha Yá Ndióxi càháⁿ-í tnúhu Xítoho Jesucristú núú ñáyiu chi ducaⁿ cuini méé Yá Ndióxi cunduu, te cadúha-í tutú-a ndihi té Timúteú ² cuendá daquixi-í ndaha nchòhò ñáyiu ñuú Còlosá, ñáyiu cùu cuendá Yá Ndióxi, ñáyiu quide ndáá ndécú ichi Xítoho Jesucristú, te xicáⁿ táhù-í núú Tātá-ó Dütú Ndióxi sá io na chindee chitúu ñaha-gá xii-ndo, te ducaⁿ ndi nduú-gá ná cadá te io váha cuu iní-ndó cundecu-ndo.

Té Pāblú càháⁿ ndihi-dé Yá Ndióxi cuendá ñáyiu sàndáá iní ñáhá xii Xítoho Jesucristú

³ Te ducaⁿ-ni càháⁿ ndihi-ndí Yá Ndióxi Yaá cúu Tātá Xítoho Jesucristú ndacáⁿ táhù-ndí núú-gá cuendá nchaa nacuáa quide-ndo ndecu-ndo, ⁴ chi nihí-ndí tnúhu sá io sàndáá iní-ndó Xítoho Jesucristú, te ducaⁿ io cùu iní-ndó nchaa ñáyiu cùu cuendá Yá Ndióxi. ⁵ Te ducaⁿ quide-ndo chi sàndáá iní-ndó sá ndúú táhù-ndó cundecu-ndo núú ndécú Xítoho Jesucristú, te tnúhu-áⁿ ní nihí-ndó cùtnàhá ní xĩndedóho-ndo tnúhu ndáá

tnúhu Xítoho Jesucristú. ⁶ Te tnúhu Xítoho Jesucristú tá xitè nuu-xi nihí ñuyú cuáháⁿ. Te vai ñáyiu ta sàndáá iní-yu cuáháⁿ, te ta quidé-yu mee-ni sá váha cuáháⁿ ndécú-yu ichi-gá. Te nchòhò chi ndéé cùtnàhá ní tecú dóho-ndo tnúhu-gá ní quesaha-xi ta cùu vai ñáyiu ñuú-ndó tá quide ndáá-yu núú-gá cuáháⁿ. Te dàvá-áⁿ ní cutnùní ndáá ndisa iní-ndó sá Yá Ndióxi io chindee chitúu ñaha-gá xii-ndo. ⁷ Te ducaⁿ ní dánèhé ñáhá tè Èpafrás téé io cùu iní-ndí, chi tnàhá-dé io quide ndáá-dé xínú cuèchi-dé núú Xítoho Jesucristú quidé-dé núú-ndí dácuaⁿ ñaha-dé xii-ndo tnúhu-gá. ⁸ Te cachi tnúhu-dé xii-ndí sá io cùu iní ñáhá-ndó xii-ndí, te ducaⁿ quide-ndo chi Espiritú Yá Ndióxi chindèe ñaha-xi xii-ndo.

⁹ Te ndéé cùtnàhá ní nihí-ndí tnúhu nacuáa quide-ndo ndecu-ndo ndéé dàvá-áⁿ ní ngúita-ndí ñá túú dàña ndee-ndí xicáⁿ táhù-ndí núú Yá Ndióxi cuendá-ndó sá Espiritú-gá ná tàxi-xi nchaa-gá sá cúmání quini tnùní-ndó, te ducaⁿ te cutnùní váha-gá iní-ndó nacuáa cuini Yá Ndióxi cada-ndo. ¹⁰ Te sá dúcáⁿ te ndacu-ndo cada-ndo mee-ni sá váha dàtná cuini Xítoho Jesucristú cada nchaa ñáyiu ndècu ichi-gá. Te ducaⁿ io nduu vétú iní-gá te núu na cada-ndo nchaa núú sá váha. Te ducaⁿ io-gá cuita cutnùní iní-ndó nchaa nacuáa cuini Yá Ndióxi cada-ndo. ¹¹ Te mee-gá cúu-gá Yaá io cùnuu, te diu-gá io chindee ñaha-gá

xii-ndo, te cudíí iní-ndó cuéi nándi na càda ñaha ñayiu xii-ndo sã cuendá-gá, te ducaⁿ ïo cunduu càhnu iní-ndó. ¹² Te ndacáⁿ táhú-ó núú Dütú Ndiöxí chi ní quide túha ñaha-gã xii-o cuendá nduu táhú-ó cundecu-o ndihi nchaa dava-gá ñayiu yindaha-gá xindecu núú cándòo canine ñá túú tnàhí-gá ní ìⁿ cuéchi ïó. ¹³ Te ñu-gá ní quide ní dáñá-ó nchàa ichi cuehé ichi duha núú táxí tnùnì yucu ñävãha, te ní nachihi ñaha-gã xii-o ndàha Déhe-gá Yaá ïo cùu iní-gá. ¹⁴ Te Déhe-gá ní xihí-gá cuendá sá nchóó càcu nihnu-o núú ùhú núú ndàhú, te ní quide càhnu iní-gá nchaa sá cuéhé sá dúhá nì quide-o.

Ñayiu cùu ìⁿnuu ndihi Yá Ndiöxí cuendá sá nì xihí Xitohó Jesucristú

¹⁵ Te Yá Ndiöxí cúú-gã Yaá vá cúú quínì-ó dico Xitohó Jesucristú chi ní quixi túu-gá ñuyíú-a, te ní quide-gá nchaa nàcuáa sàni iní-gá. Te dàtná-ni sàni iní-gá te ducaⁿ sàni iní Yá Ndiöxí, te Yaá-áⁿ ducaⁿ-ni ndècu-gá ndéé cùtnàhá vátá ngãva-gá ñuyíú. ¹⁶ Te Xitohó Jesucristú ní quide-gá núú Yá Ndiöxí ní cadúha-gá nchaa sá ïó andiù ndihi nchaa sá ïó ñuyíú-a, te ní cadúha-gá nchaa sá cúú quínì núú-ó cundehe-o, ndihi nchaa sá vã quínì tnàhí-o, ndihi nchaa espíritú cùnùu vihi xinu cuechi núú Yá Ndiöxí, ndihi nchaa dava-gá espíritú xínú cuéchi. Te nchaa ní cadúha Xitohó Jesucristú chi ducaⁿ

nì cachí Yá Ndiöxí cunduu. Te ducaⁿ nì cachí Yá Ndiöxí cunduu cuendá nchaa cuu-xi mee-ni sã vãha sá cúú-xi Xitohó Jesucristú. ¹⁷ Te Xitohó Jesucristú ducaⁿ-ni ndècu-gá ndéé cùtnàhá vátá ngãva-gá ñuyíú-a, te ñu núú ndàhá-gá cándòo ñuyíú-a, ndihi andiù, ndihi nchaandi túhú sá ïó. ¹⁸ Te ñu Xitohó Jesucristú cùnùu-gá yindàha ñaha-gá xii nchaa nchoo ñayiu ndècu ichi-gá, te ñu-gá quidé-gã ndécú vãha-o núú-gã. Te núú ncháá ñayiu ndoto ñu-gá cúú-gã Yaá ïo càhnu cuu sa ní ndoto, te sá dúcáⁿ nì ndoto-gá te xiãⁿ cúú-gã Yaá ïo tàxi tnunì nchaandi túhú sá ïó ñuyíú-a ndihi andiù. ¹⁹ Te ducaⁿ ïo cùnùu-gá táxí tnùnì-gá chi ndáá sá ìⁿ-ni cuu-gá ndihi Yá Ndiöxí. ²⁰ Te Xitohó Jesucristú ní xihí-gá núú cùrúxí, chi ducaⁿ nì cuínì Yá Ndiöxí cunduu cuendá sá vã yòo ìⁿ-gá cuu ùhú iní ñáhá xì-gá cuéi ñayiu xindecu ñuyíú-a, te cuéi cue espíritú ndécú àndiù.

²¹ Te nchòhó cùtnàhá vátá cùndècu-gá-ndó ichi Xitohó Jesucristú ñá túú tnàhí ni xòo cáháⁿ ndihi-ndo-gã, chi mee-ni nì xòo cuu ùhú iní-ndó-gã, te mee-ni nchàa sá cuéhé sá dúhá nì xòo cunuu nì xòo cada-ndo ni cùu, dico Xitohó Jesucristú ní quide-gá ní tnàhá tnùhu-ndo ndihi Yá Ndiöxí vitna. ²² Chi ñu cuendá-áⁿ nì xihí Xitohó Jesucristú núú cùrúxí cuendá sá nchóó ndùu ndoo nduù nine iní-ó ngùndecu-o núú Yá Ndiöxí, te ducaⁿ te ñá túú tnàhí-gá ná cumánì-ó núú-gã,

te vá yõo ìⁿ-gá cachí sá nchóo ndècu cuéchi-o. ²³ Te núu vá dáñá ndèé-ndó quindáá iní-ndó Xítóhó Jesucristú, te cundecu-ni-ndo ìchi-gá, te vá cání iní-ndó dàña-ndo tnúhu ndee iní ní taxi-gá ndécú ndìhi-o. Te nchaa tnúhu-gá-áⁿ tá xité nuu-xi nihíi ñuyíú cuáháⁿ, te diu-ni tnúhu-áⁿ cáháⁿ yúhú té Páblú dánèhé-í ñáiyu.

Té Páblú yíhi díquí-dé cáháⁿ-dé tnúhu Xítóhó Jesucristú núú ñáiyu ndècu ichi-gá

²⁴ Te vitna ío cùdíí iní-í ndóhò-í cuendá-ndó, chí Xítóhó Jesucristú ío ní ndoho-gá cuendá-ó, te tnàhá yúhú ndóhò-í cuendá nchaa ñáiyu ndècu ichi-gá, dico vitna cùmání-gã ndoho-í cuendá-yu. ²⁵ Te Yá Ndiõxí ní cachí-gá sá yúhú quíhi díquí ñáhà-í xii nchaa nchòhó ñáiyu ndècu ichi-gá cuendá danèhé ñáhá vâha-í xii-ndo tnúhu-gá cuendá cuu-xi sá vâha sá cúu-xí-ndó. ²⁶ Te nchaa tnúhu sá dánèhé ñáhà-í xii-ndo ña túú ní tècú dóho nchaa ñáiyu ní xindecu ndéé sanaha, te mee-gã ní cuiní-gá sá ncháá nchòo ñáiyu yindaha-gá vitna cundecu ndìhi-o tnúhu-áⁿ. ²⁷ Te mee-gã ní cachí-gá sá dátúu-gá nchaa tnúhu sá ío vii ío váha cuáháⁿ núú nchaa ñáiyu yindaha-gá. Te tnúhu-áⁿ cúu-xí cuendá tnàhá nchaa nchòhó ñáiyu ña túú cùu ñáiyu isràél. Te tnúhu-áⁿ dánèhé ñáhá-xí xii-ndo sá Xítóhó Jesucristú ndécú ndìhi ñaha-gá xii-ndo. Te cuendá xíáⁿ ní ngúndecu ndìhi-ndo

tnúhu ndee iní cundecu-ndo ndìhi-gá ní caa ní quíhíⁿ.

²⁸ Te nchúhú mee-ni cuendá Xítóhó Jesucristú cáháⁿ váha-ndí, te dàsahú-ndí ñáiyu nàcuáa cadá-yu. Te váha vihi danèhé-ndí nchaa ñáiyu nàcuáa tecú tnùní-yu tnúhu-gá, te ducaⁿ dānehé-ndí-yu nàcuáa cundáá-yu núú Yá Ndiõxí, te ducaⁿ chí tnàhá tnúhu-yu ndìhi Xítóhó Jesucristú. ²⁹ Te cuendá xíáⁿ ío ndècu ndee-í quídè-í chiuⁿ Xítóhó Jesucristú, te mee-gã ío chindee ñaha-gá xii-í núu xíáⁿ ndácù-í quídè-í chiuⁿ-gá.

2

¹ Te cuiní-í sá nchòhó cutnùní iní-ndó sã ío sàni iní-í cuendá-ndó, ndìhi cuendá nchaa ñáiyu ndècu ñuu Laodiceá, ñáiyu xindecu ichi Xítóhó Jesucristú. Te ducaⁿ-ni ío sàni iní-í cuendá nchaa ñáiyu vátá quini ñáhá-gã xii-í. ² Te cuiní-í sá nchòhó ndìhi nchaa ñáiyu-áⁿ ío nducu ndèe-ndo canchicúⁿ nihnu-ndo ìchi Xítóhó Jesucristú, te ío cuu iní tnàhá-ndó, te ducaⁿ cùu ìⁿnuu-ndo cundecu-ndo. Te cuiní-í sá nchòhó ndìhi dava-gá ñáiyu-áⁿ ío váha sáá sá xini tnùní-ndó cuendá tecú tnùní-ndó nchaa nacuáa nduu cuendá Xítóhó Jesucristú chí ío nduu yuhu ni cuu, dico vitna ní dátúu-gá núú-ó. ³ Te Xítóhó Jesucristú néhé vâha-gá nchaa tnúhu sá ío xini ñuhu-xi tecú tnùní-ó. ⁴ Te duha cáháⁿ-í chí cuiní-í sá vã quindáá iní-ndó ní ìⁿ tnúhu cáháⁿ nchaa ñáiyu cuiní

dandàhú ñáhá xii-ndo cuéi ío váha càháⁿ-yu. ⁵ Te cuéi ñá túú ndècu ndihí ñaha-í xii-ndo dico ducaⁿ-ni ío ñuhu iní ñáhà-í, te ío cùdíí iní-í chi nihí-í tnúhu sá ío cùu ìⁿnuu-ndo ndecu-ndo, te ñá túú dàña ndeé-ndó sàndáá iní-ndó Xítohó Jesucristú.

⁶ Te dàtná-ni ní sàndáá iní-ndó Xítohó Jesucristú, te ducaⁿ-ni quìndáá iní-ndó-gã canchicúⁿ nihnu-ndo ìchi-gã. ⁷ Te ni yùhu ni iní-ndó cànchicúⁿ nihnu-ndo ìchi-gã, te ducaⁿ cuíta cutnuni-gã iní-ndó nchàa nacuáa càháⁿ-gã quihíⁿ. Te vá dáña ndeé tnàhí-ndo quìndáá iní-ndó nchàa tnúhu sá ñí dánèhé ñáhá cué téé càháⁿ tnúhu-gã xii-ndo. Te xini ñuhu-xi ndacáⁿ táhú vihi-ndo núú Yá Ndióxi cuèndá nchaa tnúhu-áⁿ.

Ñáyiú ío váha tnàhá tnúhu ndihí Xítohó Jesucristú

⁸ Te ío quihí iní-ndó cùndecu-ndo chi xica cuu ñáyiú cuìní dandàhú ñáhá xii-ndo, te ñáyiú-áⁿ càháⁿ-yu mee-ni nchàa tnúhu ní cahu iní nchaa cue téé ñuyúú-a, te nchaa tnúhu-áⁿ ñá túú vèdana nàndíhi-xi. Te ducaⁿ quidè-yu chi nchicúⁿ nihnu-ní-yu nchaa nàcuáa ní xóo cada ñáyiú ní xindecu ndeé sanaha. Te càháⁿ-yu nàcuáa sàni iní yucu ñávàha, te ñá túú càháⁿ-yu nàcuáa cuìní méé Xítohó Jesucristú.

⁹ Te Xítohó Jesucristú cúú-gã ìⁿ ñáyiú dico ìⁿ-ni cùu-gã ndihí Dútú Ndióxi. ¹⁰ Te nchòhó chi ñá túú tnàhí-gã ná cùmání-ndó

núú-gã chi ndècu ndihí-ndo Xítohó Jesucristú. Te ío cùnuu-gã te tàxi tnuni-gã nchaa núú cué espíritú cùnùu. ¹¹ Te mee-gã ní ndada ndoo ní ndada nine-gã iní-ndó chi ní ngúndecu ndihí-ndo-gã te ducaⁿ ñà túú-gã ndécú-ndó ìchi cuehé ichi duha, te cada iní-ndó sã ñí ngúndecu ndihí-ndo ìⁿ seña, chi ní ndada ndoo ní ndada nine-gã iní-ndó, dico ñá díú ìⁿ-ni cuu-xi ndihí seña sá sãha cue téé isràèl ñii-güedé. ¹² Te nchòhó sa ní sandute-ndo te cada iní-ndó sã dàtná tnúhu sá ñí xihí-ndó ndihí Xítohó Jesucristú, te ní nguindüxi-ndo ndihí-gã, te ní ndoto-ndo ndihí-gã, te ducaⁿ càda iní-ndó chi ñá túú-gã ndécú-ndó ìchi cuehé ichi duha. Te ducaⁿ chi sàndáá iní-ndó nchàa nacuáa quide Yá Ndióxi, te diu-gã ní dándótó-gã Xítohó Jesucristú. ¹³ Te nchòhó cútnàhá ndécú-ndó ìchi cuehé ichi duha cùu-ndo datná ñáyiú ní xihí, chi ñá túú tnàhá tnúhu-ndo ndihí Yá Ndióxi ní cùu, te ni ñá díú ñáyiú isràèl cúú-ndó. Te Yá Ndióxi ní cachí-gã sá nchóó ío váha tnàhá tnúhu-o ndihí Xítohó Jesucristú vitna. Te ducaⁿ ñí quide-gã chi sa ní quide càhnu iní-gã nchaa sá cuèhé sá dúhá ñí xóo cada-o. ¹⁴ Te vitna duuⁿ duuⁿ ñá túú-gã cuéchi-o ndècu núú-gã. Te nchoo ñà túú cuìní-ó càda-o nacuáa càháⁿ-gã, te cuèndá xiáⁿ ío ndècuéchi-o, te vài nacháhu-o núú-gã ní cùu. Te vitna ñá túú-gã ni ìⁿ

cuèchi-o ndècu núú-gă, chi diu cuendá-án nǐ xíhí Xítohó Jesucristú núú cùrúxí. ¹⁵ Te sá dúcáⁿ nǐ xíhí Xítohó Jesucristú núú cùrúxí, te duuⁿ duuⁿ ní dáquéé tihú-gă sácuihná ndihi nchaa espíritú cúndihí-xi, te ní quendóo canúú-xi, te mee-gă ío cùnuu-gă táxí tnùní-gă.

Nanducu nihnu-o mee-ni sá vaha cächí Xítohó Jesucristú

¹⁶ Te núú dava ñáyiú xícuehé ñáhă-yu xii-ndo cuendá sá ñà túú xèxi-ndo xihí-ndo datná quidé mée-yu te vá cádá cuendá-ndó, te ní vǎ cádá cuendá-ndó te núú xícuehé ñáhă-yu xii-ndo cuendá sá ñà túú cǎnehe íí-ndó víco quide meé-yu núú cuiá núú cuiá, ndihí víco quidé-yu ndi tnahá yóó, ndihí cuendá sá ñà túú cǎnehe íí-ndó ndùu ndetatú-yu. ¹⁷ Te nàcuáa quidé-yu ndi tnahá òré quidé-yu nchaa víco-án, ndihí nàcuáa quidé-yu ndi tnahá nchaa nduu cǎnehe íí-yu-án, te cada iní-ó sǎ sá quidé-yu-án dánèhé núú ñáhă-xí nàcuáa cada Xítohó Jesucristú núú cuáhán núú vèxi. ¹⁸ Te vá quíndáá iní-ndó nì ñⁿ tnúhu cǎhán ñáyiú cächí sá cuíta nihnu-ndo cuendá sá ñă túú tnì-ndo tnúhu cǎhán-yu, chi cächí-yu sá ío xìni ñuhu-xi cada cahnu-o nchaa cue espíritú xínú cuèchi núú Yǎ Ndióxi, te ní yùhu ní iní-ó cǎnehe-o sá yíñùhu núú-xi. Te ñáyiú-án cächí-yu sá ndáá cǎhán-yu chi dácoto ñaha saní-yu nàcuáa cǎhán-yu, te

íó quide cahnú-yu mée-yu cuendá nchaa sá sání iní mée-yu quidé-yu, te ñă túú vèdana nàndihí nchaa sá quidé-yu. ¹⁹ Te nchaa ñáyiú ducaⁿ xíquide-án ñà túú tnáhá tnúhu-yu ndihí Xítohó Jesucristú. Te mee-gă cúú-gă Yá cùnùu taxi tnuní ñáhă-gă xii nchaa nchoo ñáyiú ndècu ichi-gă, te chindee ñaha-gă xii-o ndècu-o ichi-gă, te mee-gă quidé-gă cúú ñⁿnuu-o ndecu-o, te ta quide-o nchaa nacuáa cuíní Yǎ Ndióxi cuáhán.

²⁰ Te nchòhó cúú-ndó dàtná ñáyiú ní xíhí ndihí Xítohó Jesucristú cuendá sá vǎ cǎnchícúⁿ nihnu-gá-ndó nàcuáa cǎhán ñáyiú ñă túú ndècu ichi-gă. Te núú ducaⁿ ña, ¿te ná cuendá tnì-ní-ndó tnúhu cǎhán ñáyiú-án te quide-ni-ndo datná quidé-yu? ²¹ Chi ñáyiú-án cächí-yu sá ío sá ní vǎ cúú tèe ndaha-o, te dava ní vǎ cúú cǎxi-o, te dava ní vǎ cúú tnì-o. ²² Te nchaa xǎⁿ, núú néhé chùuⁿ-ni-o ndihí nihnu-xi. Te nchaa sá dúcáⁿ cǎhán-yu-án cúú-xí mée-ni sá ní cahú iní mée nchaa ñáyiú ñuyíú-a nàcuáa cadá-yu cundecú-yu. ²³ Te nchaa tnúhu cǎhán-yu-án sánùu sá cúú-xí ñⁿ tnúhu cǎhán ñⁿ téé ío váha sàá díquí-xi, chi cächí-yu sá cádá cǎhnu-o Yá Ndióxi nàcuáa vèxi iní mée-ó, te cunduu ndàhú iní-ó dico ñă túú dǎnehé ñáhă-yu nàcuáa tàú-xi cunduu. Te cächí tucú-yu sá cádá úhú-ó mée-o, chi ducaⁿ cuíní Yǎ Ndióxi cada-o cächí-yu. Te nchaa xǎⁿ ñă túú vèdana chindee ñaha-xi xii-o cuendá sá vǎ táxí

tnùní ñáhá nì ìⁿ sá cuèhé sá dúhá sàni iní-ó.

3

1 Te nchòhó cada iní-ndó sá ñí xíhí-ndó ndìhì Xítóhó Jesucristú te ní ndoto-ndo ndìhì-gá, núu xǎⁿ tàú-ndó càda-ndo nchaa sá vǎha dàtná cuìní mée-gǎ chi mee-gǎ núcòo-gǎ xío cùha Dútú Ndiòxí chi tnhá-gá ío cùnuu-gá. 2 Te ío cuhuⁿ iní-ndó nchàa sá vǎha cǎchí Xítóhó Jesucristú nduu táhú-ndó cùndecu ndìhì-ndo, te vá cùhúⁿ iní-ndó mée-ní nchaa sá ío ñuyú-a. 3 Te ducaⁿ càda-ndo chi cùu-ndo datná ñáyíu ní xíhí ndìhì Xítóhó Jesucristú, chi ñá túú-gǎ ndécú-ndó ìchi cuehé ichi duha. Te Yá Ndiòxí néhé cuendá ñáhá-gǎ xii-ndo chi tnhá tnúhu-ndo ndìhì Xítóhó Jesucristú. 4 Te Xítóhó Jesucristú cúú-gǎ Yaá ndécú ndìhì ñaha xii-o vitna, te sáá nduu quèe túu ndìhì ñaha-gǎ xii-o àndíu, te tnhá-ó ío cunuu-o ndìhì-gá.

Duuⁿ duuⁿ dañ-a-o nchàa sá cuèhé sá dúhá ñúhu iní-ó te cada-o mée-ní sá vǎha

5 Te duuⁿ duuⁿ dañ-a-ndo nchàa sá cuèhé sá dúhá ñúhu iní-ndó. Te nchaa nchòhó cue téé vá càháⁿ ndìhì-ndo ñáyíu òhí te núu ñá díú ñàdìhí-ndó cùú-yu, te ducaⁿ-ní nchàa nchòhó cue ñáyíu òhí tucu vá càháⁿ ndìhì-ndo cuè téé te núu ñá díú yì-ndo cuu-güedé, te nchaa-ndo vǎ cǎní-gǎ iní-ndó càda-ndo ni ìⁿ sá cuèhé sá dúhá ndìhì tnhá ñáyíu-ndo. Te vá cǎní cuèhé caní duha-gǎ iní-ndó sá

cúú-xí-ndó ndìhí-yu, te vá cǎní-gǎ iní-ndó nì ìⁿ sá cuèhé sá dúhá, te ni vǎ xíhó-ndó ìⁿ sá ndécú ndìhì tnhá ñáyíu-ndo, chi núu ducaⁿ na càda-ndo xiho-ndo sá ndécú ndìhí-yu te ìⁿ-ní cùu-ndo ndìhì ñáyíu chìnúhu nchaa sá cǎchí-yu cùu ndióxí te ñá ndáá sá ndiòxí cúú nchàa xǎⁿ. 6 Te nchaa ñáyíu ducaⁿ xǐquide ío dandòho ñaha Yá Ndiòxí xii-yu na sáá nduu tnúndòho tnúhu ndàhú, chi ñá túú sàndáá iní ñáhǎ-yu xii-gá. 7 Te nchòhó cùtnhá ní xíndecu-ndo ìchi cuehé ichi duha, te tnhá-ndó ñí xóo cada-ndo dàtná quidé nchàa ñáyíu-áⁿ. 8 Te vitna duuⁿ duuⁿ dañ-a-ndo nchàa sá ná cǎchí tnúhu-í-a: Vá cùdéeⁿ-gǎ-ndó, te ni vǎ cùndùu líhli-gá iní-ndó, te ni vǎ cúú ùhú-gá iní-ndó tnhá ñáyíu-ndo, te ni vǎ cùcuèhé-gǎ-ndó-yu, te ni ìⁿ-gá tnúhu cuèhé vá càháⁿ-ndó. 9 Te ni vǎ dácùandehnde-gǎ-ndó, chi nchòhó sa ní dáñá-ndó nchàa ichi cuehé ichi duha, te ñá túú-gǎ sǎní cuèhé sǎní duha iní-ndó ñá cada-ndo vitna dàtná ní xóo cada-ndo. 10 Te vitna nchòhó ní nduu-ndo ñáyíu vǎha, te uuⁿ-gǎ tá cùtnuní iní-ndó nchàa nacúáa cuìní Yá Ndiòxí cada-ndo, te ducaⁿ ta ndùcu ndee-ndo quide-ndo mee-ní sá vǎha dàtná quidé mée-gá. 11 Te vitna ní ngúndecu ndìhì-ndo Xítóhó Jesucristú, te vá cǎdá cuendá-gǎ-ndó núu cùu-ndo ñáyíu isràél àdi ñá túú cùu-ndo, te ni vǎ cǎdá cuendá-ndó núu cùu-ndo ñáyíu ní ngúndecu sèñá ñì-xi

àdi ñáhá, te ni vǎ cáda cuendá-ndó nǔu cùu-ndo ñáyiú véxi ñúú xícá, te ni vǎ cáda cuendá-ndó nǔu cùu-ndo ñáyiú cùu neñúú, te ni vǎ cáda cuendá-ndó nǔu cùu-ndo ñáyiú ñá túú tnàhí dàñá quee núú chíúⁿ pàtróⁿ-xi, te ni vǎ cáda cuendá-ndó nǔu cùu-ndo ñáyiú dàñá queé núú chíúⁿ pàtróⁿ-xi, chi Xítóhó Jesucristú cúnúu-gá ndécú ndìhi ñaha-gá xii-o nchaa-o.

12 Te Yá Ndiöxí ní dáqueé ðìⁿ ñaha-gá xii-ndo cuendá cundecu-ndo ndìhi-gá, te vitna cùu-ndo ñáyiú quide ndáá ndécú ichi-gá. Te mee-gǎ ío cùu iní ñáhá-gǎ xii-ndo nǔu xiǎⁿ tàú-ndó cundahú iní tnáhá-ndó, te ío váha cuu iní-ndó chindee tnaha-ndo, te cuu-ndo ñáyiú ndàhú iní-xi, te ío vii ío váha cuu iní-ndó cundecu ndìhi tnaha-ndo, te ío càhnu cunduu iní-ndó cuendá nchaa sá quidé ñaha ñáyiú xii-ndo.

13 Te ducaⁿ cànehe-ndo tnúhu càhnu iní núú ndì mèe-ndo nacuaá ndècu-ndo ichi-gá, te cada càhnu tucu iní-ndó nǔu ná cúú sǎ cúmǎní nǔú tnáhá-ndó. Te dàtná ní quide càhnu iní Xítóhó Jesucristú nchaa sá ñà túú vǎha ní xóo cada-ndo ducaⁿ càda-ndo cada càhnu iní-ndó nchaa sá cúmǎní nǔú tnáhá-ndó ndècu-ndo. 14 Te xìni ñuhu vihi-xi sá ío cuu iní tnáhá-ndó cundecu-ndo, chi núu ducaⁿ na càda-ndo, te quide-ndo nchaa dava-gá sá càháⁿ-í, te ñá túú tnàhí-gá ná cúmǎní-ndó. 15 Te dañá-ndo sǎ Yá Ndiöxí ná chindee ñaha-gá nacuaá ío váha

cuu iní-ndó cundecu-ndo, chi ðiu cuendá-áⁿ ní cáháⁿ ñáhá Yá Ndiöxí xii-ndo cuendá cuu ñⁿnuu-ndo ndìhi nchaa dava-gá ñáyiú ndècu ichi-gá, te ducaⁿ-ni ío ndacáⁿ táhú-ndó nǔú-gǎ.

16 Te ío cuhuⁿ iní-ndó tnúhu Xítóhó Jesucristú, te ío váha cuáha-ndo cuendá nacuaá càháⁿ tnúhu-gá te ducaⁿ dǎnehé tnáhá-ndó. Te ío cáháⁿ dóho tnàha-ndo nacuaá cada-ndo càncicúⁿ nihnu-ndo càda-ndo nchaa nacuaá càháⁿ tnúhu-gá, te cata-ndo ndùdú ndèé núú tütú Yá Ndiöxí, ndìhi nchaa dava-gá ndudú sá xìni mée-ndó xita-ndo te nchaa xiǎⁿ cata-ndo chìñuhu-ndo Yá Ndiöxí. Te òré xitá-ndó te ni yúhu ni iní-ndó ndàcáⁿ táhú-ndó nǔú-gǎ. 17 Te cuhuⁿ iní-ndó Xítóhó Jesucristú òré sání iní-ndó càda-ndo ñⁿ chiuⁿ àdi ná tnúhu cùnì-ndó càháⁿ-ndó, te ðiu-ni-gá cuhuⁿ iní-ndó. Te xìni ñuhu-xi ndacáⁿ táhú-ndó nǔú Yá Ndiöxí, te ðiu-ni Xítóhó Jesucristú chindee ñaha-gá xii-ndo ndàcáⁿ táhú-ndó nǔú Tǎtá-ó Dütú Ndiöxí.

Nacuáa tàú ñáyiú ndècu ichi Xítóhó Jesucristú cada-yu sá cúu-xi ndì mee-yu

18 Te nchaa nchòhó ñáyiú ðìhí ñáyiú ndècu yì-xi quindáá iní-ndó yì-ndo, chi ducaⁿ tàú-xi cada nchaa ñáyiú ðìhí ndécú ichi Xítóhó Jesucristú. 19 Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cùcuèhé-ndó-yu. 20 Te nchaa nchòhó ñáyiú ndècu tátá-xi ndìhi ñáná-xi quindáá

iní-ndõ-yu, chi núu ducaⁿ na càda-ndo te ndùu vétú iní Yã Ndiõxí. ²¹ Te nchaa nchòhó ñáiyu cùu tátá ndihi nãná vá dásátú-ndó iní cue déhe-ndo, chi núu ducaⁿ na càda-ndo te ni vã quíxí-gã iní-güexi cada-güexi sá vãha. ²² Te nchaa nchòhó ñáiyu xínu cuechi quindáá iní-ndó nchàa ñáiyu cùu patróoⁿ-ndó, te ni yùhu ni iní-ndó càda-ndo nchaa chiuⁿ tahú-yu cuèi òré ndécũ-yu àdi oré ñá túũ-yu, te ñá díú òré-ni ndèhé-yu cada-ndo cuèndá-ni sá cuiní-ndó cùdiu-ndo núũ-yu, chi cada-ndo sã néhé-ndó sã yíñùhu núú Xìtohó Jesucristú. ²³ Te nchaa chiùⁿ sani iní-ndó càda-ndo te cada-ndo ni yuhu ni iní-ndó, te sá dúcáⁿ càda-ndo-áⁿ te cada-ndo cuèndá sá xínú cuèchi-ndo núú Xìtohó Jesucristú te ñá díú núú ñáiyu ñuyíú-a xínu cuechi-ndo. ²⁴ Te nchòhó sa nàha-ndo sá Xìtohó Jesucristú taxi-gá sá ndúú tãhú-ndó te núu ducaⁿ na càda-ndo, chi cùu-ndo ñáiyu xínu cuechi núú-gã. ²⁵ Te nchaa ñáiyu quide nchaa sá cuèhé sá dúhá nàcháhu-yu núú Yã Ndiõxí cuèndá nchaa sá quidẽ-yu, te mee-gã vá cáda cuèndá-gã cuèi náí ñáiyu cùú-yu, chi nchaá-yu nacháhu-yu nchaa sá ñà túú vãha quidé-yu núú-gã.

4

¹ Te nchaa nchòhó ñáiyu cùu patróoⁿ cuu-ndo ñáiyu váha, te cada-ndo nchàa nacuaá tàú-xi cunduu ndihi nchaa ñáiyu xínu cuechi

núú-ndó, te cunaha-ndo sã àndiu ndecu Yaá cúú Xìtohó-ndó tàxi tnuní ñãhá-gã xii-ndo.

² Te nchaa nchòhó ñáiyu ndècu ichi Xìtohó Jesucristú, vá dáñá ndèé-ndó cãháⁿ ndihi-ndo Yã Ndiõxí, te ío cuhuⁿ iní-ndó-gã òré càháⁿ ndihi-ndo-gã, te òré-áⁿ ío ndacáⁿ tãhú-ndó núú-gã.

³ Te cacáⁿ tãhú-ndó tnàhá cuèndá-ndí núú-gã cuèndá sá díú-gã ná cáda te ndacu-ndí cãháⁿ-ndí tnúhu-gá núú nchàa dava-gá ñáiyu, te ducaⁿ cãháⁿ-ndí tnúhu Xìtohó Jesucristú sá ñá túú ní xíndecu ndihi nchaa ñáiyu ní xíndecu ndéé sanaha, te diu cuèndá tnúhu-áⁿ yíhí-í vecaá vitna.

⁴ Te cãháⁿ ndihi-ndo Yã Ndiõxí cuèndá cãháⁿ-í nàcuáa tàú-xi cunduu te tecú tnuní-yu.

⁵ Te cada-ndo nchàa nacuaá tàú-xi cunduu sá cúú-xí nchàa ñáiyu ñá túú ndècu ichi-gá, te ducaⁿ-ni ío nducu ndèe-ndo cada-ndo nchaa nacuaá tàú-xi cunduu. ⁶ Te cada cuèndá-ndó sã ío vii ío váha cunduu tnúhu cãháⁿ ndihi-ndó-yu, te cãháⁿ-ndó ñⁿ tnúhu nàcuáa cuu váha iní-yu, te ío váha cundehe-ndo nàcuáa cunduu tnúhu cúñaha-ndo xii ñⁿ ñⁿ-yu.

Tnúhu ndéé núú ñí ndihi-ná

⁷ Te té Tìquicú téé ío cùu iní-ó ndècu ndihi-o ichi Xìtohó Jesucristú, téé-áⁿ cachí tnúhu-dé nchaa nàcuáa cùu ndecu-í. Te tnàhá-dé xínú cuèchi-dé núú Xìtohó Jesucristú te ío váha quide ndáá-dé. ⁸ Te tendaha-í-dé quixí-dé cachí tnúhu-dé nchaa nàcuáa cùu ndecu-ndí

iha, te taxi-dé tnúhu ndee iní cundecu ndihí-ndo. ⁹ Te tnàhá tucu té Onésimú téé ío cùu iní-ó ndècu ndihí-o ichi Xítohó Jesucristú quixi ndihí-dé, te diu-ni téé ñúú-ndó cùu-dé te tnàhá-dé ío váha quíde ndáá-dé. Te ndi ndúú-güedé cachí tnúhu-güedé nchaa nàcuáa cùu iha.

¹⁰ Te té Arístarcú téé yìhi ndihí-í vecaá quíde ndèe iní ñáhá-dě xii-ndo ndihí té Mácú ñaní primú té Bée. Te sa nàha-ndo nchaa nacuáa ní cáháⁿ-í cada-ndo quèheⁿ cuendá-ndó té Mácú, te núu na quixi-dé quixi coto ñaha-dě xii-ndo, te ío váha cuu iní-ndó quèheⁿ cuendá-ndó-dě. ¹¹ Te tnàhá téé nani Jesús, àdi Bustú chi úú diu-dé, quíde ndèe iní ñáhá-dě xii-ndo. Te cue téé-a cùu-güedé cue téé isràél ní chitnahá ñáhá-güedě xii-í cáháⁿ-ndí núú ñáyiú nàcuáa ndíhu ndaha ñaha Yá Ndiöxí xii-yu, te ni ñⁿ-gá ñáyiú isràél ñá túú quíde datná quíde-güedě. Te ío váha tàxi-güedé tnúhu ndee iní xii-í. ¹² Te tnàhá téé ñúú-ndó té Épafrás quíde ndèe iní ñáhá-dě xii-ndo, te cùu-dé tnàhá-dé téé xinu cuechi núú Xítohó Jesucristú. Te ducaⁿ-ni nì yuhu ni iní-dé xicáⁿ táhú-dě núú Yá Ndiöxí cuendá-ndó cuendá sá cànchicúⁿ nihnu-ni-ndo ichi-gá, te ducaⁿ te ío váha tecú tnùní-ndó nchaa nacuáa cùní Yá Ndiöxí cada-ndo, te diu-ni ducaⁿ cànchicúⁿ nihnu-ndo cada-ndo. ¹³ Te yúhú cächí tnúhu ndáá-í xii-ndo sá sùúní

sàni iní-dé sá méé-ní sá váha cuu xii-ndo cundecu-ndo ndihí nchaa ñáyiú xíndecu ichi Xítohó Jesucristú ndécú ñúú Laodiceá, ndihí nchaa ñáyiú xíndecu tucu ichi-gá ndécú ñúú Hièrápolis. ¹⁴ Te tnàhá té Lùcá téé xini nchaa núú yúcú sá quíde tátna quíde ndee iní ñáhá-dě xii-ndo téé ío cùu iní-ó, te tnàhá tucu té Dëmás quíde ndèe iní ñáhá-dě xii-ndo.

¹⁵ Te cùñaha-ndo na càda ndee iní nchaa ñáyiú ndècu ndihí-o ichi Xítohó Jesucristú ndécú ñúú Laodiceá, ndihí tá Mĩnfás, ndihí nchaa ñáyiú ndècu ichi-gá tàcá vehe-xi dàcuahá-yu tnúhu-gá. ¹⁶ Te tutú cádüha-í-a tendaha-í quixi ndaha-ndo, te òré ná ndíhí dàcuaha-ndo te tendaha-ndo quíhíⁿ ndaha ñáyiú xíndecu ichi-gá ndécú ñúú Laodiceá cuendá dacuàhá-yu tnàhá-yu. Te diu-ni ducaⁿ dàcuaha-ndo tutú tendaha-í quíhíⁿ ndaha ñáyiú ñúú Laodiceá òré ná dándixí-yu ndaha-ndo. ¹⁷ Te na cächí tnúhu-í xii-ndo nàcuáa cùñaha-ndo xii té Àrquipú, te duha cùñaha-ndo xii-dé: “Yá Ndiöxí ní taxi-gá chiúⁿ quíde-n, te ío váha cada cuendá-n càda-n nchaa nacuáa ní cachí-gá”, duha cùñaha-ndo xii-dé.

¹⁸ Te yúhú té Páblú ndihí ndaha mee-í tée-í ñⁿ úú tnúhu-a quíde ndee iní ñáhá-í xii-ndo, te cunaha-ndo sá yúhú yíhí-í vecaá. Te Yá Ndiöxí ío na chindee chitúu ñaha-gá xii-ndo. Te ducaⁿ na cùndüu. Te ío chí cádá ndèe iní-ná vitna.

**TUTÚ DÍHNA NUU
NĪ CADÚHA TÉ
PĀBLÚ QUIHĪⁿ
NDAHA ÑÁYIU
ÑUÚ TESÀLÓNICÁ**

Té Pāblú ndihi cue té cùndihi-dé cadúha-güedé tutú quihĪⁿ ndaha ñáyiu xĭndecu ichi Xítohó Jesucristú ndécú ñuú Tesalónica

¹ Yúhú té Pāblú cadúha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiu ndècu ndihi-ndí ichi Xítohó Jesucristú ndécú ñuú Tesalónica, chi cùu ñⁿnuu-ndo ndihi Tátá-ó Dütú Ndiöxí, ndihi Xítohó Jesucristú. Te xicáⁿ táhú-í núú Dütú Ndiöxí, ndihi núú Xítohó Jesucristú sá ïo na chindee chitúu ñaha-gă xii-ndo, te ducaⁿ ndĭ nduú-gă ná càda te ïo váha cuu iní-ndó cùndecu-ndo.

Ñáyiu ñuú Tesalónica ïo váha sàndáá iní-yu Yá Ndiöxí

² Te ndi tnahá òré càháⁿ ndihi-ndí Yá Ndiöxí ndàcáⁿ táhú-ndĭ núú-gă sá ïo quide váha-ndo ndècu-ndo, te ducaⁿ xicáⁿ táhú-ndĭ núú-gă sá ná còto ñaha-gă xii-ndo. ³ Te ïo ndàcáⁿ táhú-ndĭ núú Tátá-ó Dütú Ndiöxí sá ñi yuhu ñi iní-ndó sàndáá iní-ndó-gă, te xĭnu cuechi-ndo núú-gă, te cùu iní tnahá-ndó nàcuáa ndècu-ndo ichi-gă ñuú xĭáⁿ ïo xìto tnahá-ndo. Te cùtnuní ndáá iní-ndó să quixí tucu

Xítohó Jesucristú ñuú xĭáⁿ ñá túú dàña ndeé-ndó ndètu-ndo-gă. ⁴ Te nchòhó ñáyiu ndècu ndihi-ndí ichi Xítohó Jesucristú sa nàha-ndí sá Yá Ndiöxí ïo cùu iní ñáhá-gă xii-ndo, te diu-gă ní cáháⁿ ñáhá-gă xii-ndo cuendá cundecu-ndo ichi-gă. ⁵ Te cùtnahá ní dánèhé ñáhá-ndĭ xii-ndo tnùhu-gă, chi ñá diú să cùú ñi méé-ndĭ ducaⁿ ñi dānehé ñáhá-ndĭ xii-ndo, chi mee Espiritú Yá Ndiöxí ní chindee ñàha-xi ní cáháⁿ-ndĭ ñi yuhu ñi iní-ndĭ tnùhu-gă núú-ndó. Te nàha-ndo sá cùtnahá ní xĭndecu ndihi ñaha-ndĭ xii-ndo ñi quide-ndĭ nàcuáa càháⁿ Yá Ndiöxí cuendá sá cùú-xí să váha sá cùú-xí-ndó.

⁶ Te nchòhó nchicúⁿ ñi hnu-ndo quide-ndo vitna datná quidé-ndĭ, chi quide váha-ndo dàtná quidé mèe Xítohó Jesucristú, te díi ñi ní tñi-ndo ìchi-gă cuēi ní ndoho ní tnahá-ndó, chi mee Espiritú-gă ní chindee ñàha-xi xii-ndo. ⁷ Te sá dúcáⁿ quide váha-ndo ñuú Yá Ndiöxí, xĭáⁿ yĭnchĭcúⁿ ñi hnu ñáyiu distritú Macèdoniá, ndihi ñáyiu distritú Acáyá xĭquide váha-yu tnahá-yu, ñáyiu xĭndecu ichi-gă. ⁸ Te diu-ndo ñi sanu ichi-ndo ñáyiu distritú Macèdoniá, ndihi ñáyiu distritú Acáyá, te ñá diú-ñi ñáyiu nchaa ñuú-áⁿ chi nchaa ñáyiu dava-gă ñuú ñihí-yu tnùhu sá ïo sàndáá iní-ndó Yá Ndiöxí. Te ñá túú-gă ná tnùhu cáháⁿ-ndĭ cuendá-ndó,

chi nchaá-yu sa nihí-yu tnúhu sá ïo váha quide-ndo ndecu-ndo. ⁹ Te mée-yu xicáháⁿ váha-yu cuendá-ndó sá ïo váha ní queheⁿ cuendá ñáhá-ndó xii-ndí cútnàhá ní quixi-ndí díhna nuu. Te ní dáñá-ndó nchàa sá cächí-ndó cùu ndiöxí-ndó chi ñá díú ndiöxí cúú-xí, te ní tñii-ndo ichi Yá Ndiöxí Yaá ndécú tũu andiu chi diu-gá cúú-gã Ndiöxí ndisa, te xinu cuechi-ndo núú-gã vitna, ¹⁰ te ndètu-ndo quixi tucu Xítohó Jesucristú Déhe Yá Ndiöxí Yaá ndécú àndiu, chi diu-ni-gá ní quixi-gá ñuyíú-a ní xihí-gá, te ní ndoto-gá ní dándótó ñaha Yá Ndiöxí xii-gá. Te diu-ni Xítohó Jesucristú dácäcu nihnu ñaha-gã xii-o núú ùhú núú ndàhú, chi sàndáá iní-ó-gã.

2

Nàcuáa ndiùu chiùⁿ ní quide té Pãblú ñuú Tesalónicá

¹ Te nchòhó ñáyiù ndècu ndihi-ndí ichi Xítohó Jesucristú ñaha-ndo sá ñà díú àúⁿ nã cuu ní quixi coto ñaha-ndí xii-ndo, chi ní sàndáá iní-ndó tnúhu Yá Ndiöxí. ² Te ñaha-ndo sá cùtnàhá ní xindecu-ndí ñuú Filipú ïo ní xúhuⁿ tnúhu cuèhé tnúhu duha núú-ndí, te ní caniha-güedë xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cáháⁿ-ndí tnúhu Yá Ndiöxí núú-ndó, chi mee-gã ní chindee ñaha-gá xii-ndí cuëi ïo chitu ñáyiù ní

cuu úhú iní ñáhá xii-ndí. ³ Te ñá túú ní dandahú ñáhá-ndí xii-ndo chi mee-ni tnúhu ndáá ní cáháⁿ-ndí núú-ndó, te ní ñà túú ní ñiiⁿ tnúhu cuèhé ñúhú iní-ndí ní cáháⁿ-ndí tnúhu-gá núú-ndó chi sa ní nduu ndoo ní nduu nine iní-ndí. ⁴ Te mee Yá Ndiöxí ní cachí-gá sá cáháⁿ-ndí tnúhu-gá, te cáháⁿ-ndí nàcuáa cùu iní mée-gã, chi sa ñaha-gá nàcuáa càa iní-ndí, te ñá túú cáháⁿ-ndí nàcuáa cùu iní ñáyiù. ⁵ Te ñaha-ndo sá ñà díú ñiiⁿ tnúhu cudíi iní-ndó cùndecu-ndo ichi ñuyíú ní cáháⁿ-ndí núú-ndó cuendá taxi-ndo díhúⁿ. Te Yá Ndiöxí sa ñaha-gá sá cáháⁿ ndáá-ndí. ⁶ Te ñá ñiiⁿ ndùu ni quide-ndí ñiiⁿ sá cádá-ndí cuendá-ni sá cádá càhnu ñaha-ndo xii-ndí, àdi cada cahnu ñaha dava-gã ñáyiù, te cuëi tàù ndisa-ndí sá cádá càhnu ñaha-ndo xii-ndí ní cùu, chi chiùⁿ Xítohó Jesucristú quidé-ndí, te dicó-ni sá nchùhú ñá túú ní cuini-ndí sá dúcáⁿ càda-ndo. ⁷ Te ïo vii ïo váha ní cáháⁿ-ndí núú-ndó, dàtná quidé ñiiⁿ ñaha cuu náná vii vii cáháⁿ ndihi cue déhe-aⁿ dácuehnu ñaha-aⁿ xii-güexi. ⁸ Te ducaⁿ ïo cùu iní ñáhá-ndí xii-ndo, dico ñá díú-ní sá ní cáháⁿ-ndí tnúhu Yá Ndiöxí núú-ndó, chi ndéé iní-ndí taxi-ndí ní dácótó ñaha-xi, te núu dicó ní cùu-xi sá cúú, cuendá sá ïo cùu iní ñáhá-ndí xii-ndo. ⁹ Te nchòhó ñáyiù ndècu ndihi-ndí ichi Xítohó Jesucristú ñaha-ndo sá ïo ní quide chiùⁿ-ndí cuendá ní

níhí-ndí sá nǐ xexi-ndí. Te cuèi nduu cuèi niú ní quide chiuⁿ-ndí ní níhí-ndí sá nǐ xexi-ndí ní cáháⁿ-ndí tnúhu Yá Ndiòxí núú-ndó cuendá sá ñà túú ní cuini-ndí chichiuⁿ ñaha-ndí xii-ndo.

10 Te nchòhó ñáyiú sàndáá iní tnúhu Yá Ndiòxí xini ndáá-ndó sá cúú-ndí cue téé váha te ducaⁿ sá naha Yá Ndiòxí tucu, te ní xica-ndí ichi ndáá òré ní cáháⁿ-ndí tnúhu-gá núú-ndó te ñiú-ni ducaⁿ quide-ndí vitna. Te vá yòo ìⁿ cáháⁿ sá ñà túú quide ndáá-ndí ndécú-ndí.

11 Te ñaha tucu-ndo sá nǐ dácáháⁿ ñáhá-ndí xii-ndo, te ní taxi-ndí tnúhu ndee iní xii-ndo nchàa-ndo, te dàtná quidé ìⁿ tátá ndihi cue déhe-dé ní quide-ndí.

12 Te ní cachí-ndí xii-ndo sá cádá ndáá-ndó cùndecu-ndo nacuaá tàú-xi cada nchaa ñáyiú tnàhá tnúhu ndihi Yá Ndiòxí, chi mee-gá ní cáháⁿ ñáhá-gá xii-o cuendá nduu táhú-ó cùndecu-o ndihi-gá núú ò váha càa ndecu-gá táxi tnùnì-gá.

13 Te xiáⁿ ò ndàcáⁿ táhú-ndí núú Yá Ndiòxí sá nchòhó òré ní tedòho-ndo tnúhu-gá ní cáháⁿ-ndí, te ní sàndáá iní-ndó chi ní cutnùnì iní-ndó sá díú tnúhu Yá Ndiòxí cúú-xí, te ñà díú tnúhu ñáyiú ñuyíú-a cùu-xi. Te ndáá sá cúú-xí ìⁿ sá ò váha sá cúú-xí nchòo cue ñáyiú ní sàndáá iní tnúhu-gá.

14 Te nchòhó ñáyiú ndècu ndihi-í ichi Xítóhó Jesucristú, ò ní ndoho ní tnàhá-ndó sá nǐ quide ñaha ñáyiú ñuú-ndó. Te nchòhó ní ndoho-ndo dàtná

ní ndoho nchaa ñáyiú tàcá dácuaá tnúhu Xítóhó Jesucristú ndécú distritú Jùdeá, chi tnàhá-yu ò ní dándóhó ñaha ñáyiú ñuú-yu. 15 Te ñiú-ni ñáyiú distritú Jùdeá-áⁿ nǐ sahní-yu cue téé ní xóo cáháⁿ tnúhu Yá Ndiòxí ndéé sanaha. Te ñiú-ni ñani tnàhá-yu cùu cue ñáyiú ní sahní ñaha xii Xítóhó Jesucristú, te sátá xiáⁿ te ní nguíta-yu ní cuu úhú iní ñáhá-yu xii-ndí, núu xiáⁿ ñà túú tnàhá iní Yá Ndiòxí nchaa sá quidé-yu, te ndéé nchaa dava-gá ñani tnàhá-yu cùu úhú iní-yu. 16 Te ò chidácá nihnu ñáhá-yu xii-ndí òré cáháⁿ-ndí tnúhu Yá Ndiòxí núú ñáyiú ñà túú cùu ñáyiú isràél, te ducaⁿ quide ñáyiú-áⁿ cuendá cuini-yu sá vǎ cáháⁿ-ndí tnúhu-gá, sá cádá cuendá naníhí tàhú ñáyiú ñà túú cùu ñáyiú isràél-áⁿ, te sá dúcáⁿ quidé-yu te ò ta cùu vai-gá cuèchi-yu cuáháⁿ. Te Yá Ndiòxí ò cùdééⁿ-gá núú-yu, te tendaha-gá ìⁿ tnúndòho quixi sá cúú-xí-yu te ò ndohó-yu.

Té Pǎblú cuini-dé quingoto-dé ñáyiú xñdecu ichi Xítóhó Jesucristú ndécú ñuú Tesalónicá

17 Te nchòhó ñáyiú ndècu ndihi-ndí ichi Xítóhó Jesucristú ní quee-ndí núú-ndó, te cuèi ní cuxica-ndí dico ducaⁿ-ni ñuhu iní ñáhá-ndí xii-ndo, te ò ñuhu iní-ndí sá quixí còto ñaha tucu-ndí xii-ndo. 18 Te yúhú té Pǎblú ducaⁿ-ni ñuhu iní-í sá cuèdicó mée-í quixi-í, quixi coto ñaha-í xii-ndo, dico yucu

ñávãha chidácá nihnu ñaha-xi xii-í. ¹⁹ Te nchoo ñáyi ndècu ichi Xítohó Jesucristú ndètu-ni-gá-ó quèxio-gá candeca ñaha-gã xii-o ndãa andiu cundecu-o ndihi-gá. Te cùdíí víhí ìní-ndí sá cuendá-gá chi ní chindee ñaha-gá ní sanu ichi ñaha-ndí xii-ndo ìchi-gá, te ío vãi ñáyi cáháⁿ váha-yu cuendá-ndí ná sáá nduu quixi tucu-gá. ²⁰ Te ducaⁿ ío vãi ñáyi cáháⁿ váha-yu cuendá-ndí cuendá sá ní sanu ichi ñaha-ndí xii-ndo ìchi-gá, te quide váha-ndo. Te xíãⁿ ío cùdíí ìní-ndí.

3

¹⁻² Te sa ní cunduu ñá túu-gã cáháⁿ ndihi tnãha-o, núu xíãⁿ ñá ní cùndee-gá ìní-ndí ní tendaha-ndí té Timùteú ní quixi coto ñaha-dẽ xii-ndo, te nchúhú ní quendóo-ndí ñúú Àtenás, chi tnãhá-dé xínú cuèchi-dé núú Yã Ndiõxí, ndihi núú Xítohó Jesucristú cáháⁿ-dé tnúhu-gá núú ñáyi. Te ní quixi-dé ní taxi-dé tnúhu ndee ìní xii-ndo cuendá sá ío quindáá-ni ìní-ndó Xítohó Jesucristú, te canchicúⁿ nihnu-ni-ndo ñi yuhu ñi ìní-ndó ìchi-gá. ³ Te vá nátúhú ìní-ndó canchicúⁿ nihnu-ndo ìchi-gá sá dúhá cùu úhú ìní ñáhá ñáyi xii-o, te nchòhó sa nãha-ndo sá dácuitíí sã ndóhó víhi-o cuendá-gá. ⁴ Te ndéé cùtnãhá ndécú ndihi ñaha-gá-ndí xii-ndo ñi cachí tnúhu ndáá-ndí sá ío ndoho-o, te ducaⁿ ndisa quide-xi. ⁵ Te xíãⁿ núu ñá ní cùu váha-gá

ìní-í chi cuendá ñá túu-gã ní ñhì-í tnúhu nãcuáa cùu ndecu-ndo núu ní tendaha-í té Timùteú ní quixi-dé ní ndúcú tnúhu-dé núu-ndó núu ndècu-ni-ndo ichi Xítohó Jesucristú, chi ní sani ìⁿ ní sani úu ìní-í sá cúu-xí-ndó, chi ná ndéé chidácá nihnu ñaha yùcu ñávãha xii-ndo te cuíta chiúⁿ ní quide-ndí sá cúu-xí-ndó ñi cáháⁿ-í.

⁶ Te ñáhá, chi ní ndexio té Timùteú sá ñi quixi-dé ñúú-ndó, te nãha-dé tnúhu ní nasáá sá ñi yuhu ñi ìní-ni-ndo sãndáá ìní-ndó Yã Ndiõxí, te cùu ìní-ndó cuè tnaha ñáyi-ndo. Te càchí-dé sá ío ñúhu ìní ñáhá-ndó xii-ndí, te ío cuìní-ndó cáháⁿ ndihi ñaha-ndo, te diu-ni ducaⁿ ío cuìní nchúhú cáháⁿ ndihi ñaha-ndí xii-ndo tucu. ⁷ Te ío ndòho-ndí chi ío cùu úhú ìní ñáhá ñáyi xii-ndí, dico sá ñi níhí-ndí tnúhu sá nchòhó ñáyi ndècu ndihi-ndí ichi Xítohó Jesucristú ñá túu dãña ndéé-ndó sãndáá ìní-ndó Yã Ndiõxí, te xíãⁿ cúu-xí ìⁿ tnúhu cáhnu ìní ní níhí-ndí chi ní naníhí ndéé-ndí. ⁸ Te ní nduu vétú ìní-ndí sá ñi níhí-ndí tnúhu ndècu-ni-ndo ìchi-gá. ⁹ Te òrè cáháⁿ ndihi-ndí Yã Ndiõxí, te ío ndácáⁿ táhú-ndí núu-gã cuendá sá ñá túu dãña nihnu-ndo ìchi-gá, núu xíãⁿ ío cùdíí ìní-ndí. ¹⁰ Te cuèi nduu cuèi niú xicáⁿ táhú-ndí núu Yã Ndiõxí sá mée-gã ná càda te sáá ìⁿ nduu naníhí tnãhá-ó cuendá danèhé ñáhá váha-gá-ndí tnúhu-gá sá cúmãní-gã xii-ndo.

¹¹ Te mee Tãtá-ó Dütú Ndiõxí, ndihi Xítohó Je-

sucristú chindee ñaha-gá xii-ndí te quixi-ndí quixi coto ñaha-ndí xii-ndo. ¹² Te mee Xítoho Jesucristú ná chindee ñaha-gá xii-ndo, te ío-gá cuita cuu iní tnáhá-gá-ndó nàcuáa ndècu-ndo ichi-gá ndihi nchaa dava-gá ñáyiú dàtná cúú iní ñáhá-ndí xii-ndo. ¹³ Te xicán táhú tùcu-ndí núú Tátá-ó Dútú Ndiöxí sá ñi yuhu ñi iní-ndó cànchicúⁿ nihnu-ni-ndo ichi-gá, te ducaⁿ te cundáá-ndó núú-gă, te ñá túú-gă ná cumání-ndó òré ná sáá nduu quixi tucu Xítoho Jesucristú ndihi nchaa ñáyiú sa ndècu ndihi-gá.

4

Nàcuáa cuiní Yă Ndiöxí cada-o

¹ Te nchòhó ñáyiú ndècu ndihi-í ichi Xítoho Jesucristú càháⁿ ndàhú-í núú-ndó sá cundèdòho-ndo na càháⁿ-í nàcuáa ndùu tnúhu càháⁿ Xítoho Jesucristú, chi mee-gă cuiní-gá sá cadá-ndó nàcuáa ní dánèhé ñáhá-ndí xii-ndo cuèndá cuu vâha iní Yă Ndiöxí núú-ndó, te ducaⁿ-ni càda-ndo ndéé núú cuàháⁿ núú vëxi.

² Te nchòhó sa nàha-ndo nacuáa ní càháⁿ-ndí núú-ndó, chi ní càháⁿ-ndí nàcuáa ní táuchíúⁿ Xítoho Jesucristú te ní cachí-gá sá ³ Yă Ndiöxí cuiní-gá sá cadá ndáá-ó cundecu-o ichi-gá. Te nchoo cuè téé vá càháⁿ ndihi-o ñáyiú dihí te núú ñá díú ñàdihí-ó cúú-yu, te ñi cuè ñáyiú dihí vá càháⁿ ndihi-yu téé núú ñá díú yí-yu cùu-güedé.

⁴ Te núú xíⁿ nchaa nchòhó

tnàha, téé-í ndi dííⁿ cundecu ñadihí-ndó, te diu-ni ducaⁿ nchòhó cue ñáyiú dihí tucu ndi dííⁿ cundecu yí-ndo, te mee-ni tnúhu yíñùhu càháⁿ ndihi tnàha-ndo. ⁵ Te vá cání cuèhé caní duha iní-ndó dàtná quidé cuè ñáyiú ñá túú sàndáá iní tnúhu Yă Ndiöxí. ⁶ Te ñi ñⁿ-ndo vá cání iní-ndó dândahú-ndó tnàha téé-ndo càháⁿ ndihi-ndo ñàdihí-güedé. Te ducaⁿ-ni nchòhó cue ñáyiú dihí tucu vá cání iní-ndó dândahú-ndó tnàha dihí-ndó càháⁿ ndihi-ndo yí-yu. Chi núú ducaⁿ na càda-ndo, te Yă Ndiöxí ío dandòho ñaha-gá xii-ndo dàtná ní cachí-ndí ndéé díhna. ⁷ Chi Yă Ndiöxí ní càháⁿ ñáhá-gá xii-o cuèndá sá cadá-ó mèe-ni sá vâha, te ñá díú sá cuèhé sá dúhá. ⁸ Te nchaa ñáyiú na càda sáá iní-xi tnúhu càháⁿ-ndí, te quide sáá iní-yu núú Yă Ndiöxí, chi ñá díú tnúhu téé ñuyíú-a cùu-xi, chi tnúhu Yă Ndiöxí, Yaá ní taxi Espiritú-gá ndécú ndihi-o cuu-xi.

⁹ Te nchòhó ñáyiú ndècu ndihi-í ichi Xítoho Jesucristú, ñá túú-gă xíní ñùhu-xi cachí tnúhu-í xii-ndo sá cúú iní tnáhá-ndó, chi Yă Ndiöxí sa ní dánèhé ñáhá-gá xii-ndo nàcuáa cuu iní tnáhá-ndó, ndihi nàcuáa cuu iní-ndó dàva-gá tnàha ñáyiú-ndo.

¹⁰ Te ducaⁿ xíquide-ndo ndihi nchaa ñáyiú ndècu ndihi-ndo ichi Xítoho Jesucristú ndécú dístítú Macèdoniá. Te càháⁿ ndàhú-ndí núú-ndó sá cadá ndáá-gá-ndó, te cuita cuu iní-gá-ndó cuè

tnaha ñáyiú-ndo quíhíⁿ. ¹¹ Te cada ndee iní-ndó cùndecu ñucaxi iní-ndó, te cuhuⁿ iní-ndó chìuⁿ mee-ndo, te xiáⁿ cada-ndo dàtná ní dánèhé ñáhá-ndí xii-ndo. ¹² Te ducaⁿ te tnàhá nchaa ñáyiú ñá túú sàndáá iní tnúhu Yá Ndiöxí cáháⁿ váha-yu cuendá-ndó, te ducaⁿ te ñá túú tnàhí-gá ná cùmání xii-ndo.

Nàcuáa cada-xi òré quixi tucu Xítóhó Jesucristú

¹³ Te vitna na càchí tnúhu-ndí xii nchòhó ñáyiú ndècu ndihí-ndí ichi Xítóhó Jesucristú cuendá nchaa ñáyiú sa ní xihí, ñáyiú ní sàndáá iní tnúhu Yá Ndiöxí cuendá sá vâ ndihú iní-ndó cuendá-yu dàtná xíquide nchaa ñáyiú ñá túú yihí iní-xi sá quixí tucu Xítóhó Jesucristú ñuyíú-a. ¹⁴ Te nchoo sàndáá iní-ó sã ní xihí Xítóhó Jesucristú te ní ndoto-gá ní dándótó ñàha Yá Ndiöxí, te sàndáá tucu iní-ó sã dàtná ní dándótó Yá Ndiöxí Xítóhó Jesucristú, ducaⁿ dándoto-gá nchaa ñáyiú ní xihí ñáyiú ní sàndáá iní ñáhá xì-gá.

¹⁵ Te na càchí tnúhu tucu-ndí ingá tnúhu nàcuáa ní cáháⁿ Xítóhó Jesucristú, chi ní cachí-gá sá ná sàá nduu quixi tucu-gá te nchaa ñáyiú sàndáá iní tnúhu-gá ndécú vîvú ñuyíú-a vá códó nùú-yu núú ñáyiú ní xihí ndaa andiú, chi jùndú candeca ñaha-gã xii-yu ndaa. ¹⁶ Chi Xítóhó Jesucristú quee túu-gá andiú, te cana-gá nchaa ñáyiú ní sàndáá iní tnúhu-gá, te òré-áⁿ Yá Ndiöxí cada-gá te òré-áⁿ,

cáháⁿ ìⁿ cútú te òré-ni-áⁿ ndoto nchaa ñáyiú ní xihí, ñáyiú ní sàndáá iní tnúhu-gá. ¹⁷ Te dàtnúni nchaa nchoo ñáyiú xíndecu vîvú ñuyíú-a naníhí tnàhá-ó ndihí-yu, te ndanchita-o ndihu-o xití vícò naníhí tnàhá-ó ndihí Xítóhó Jesucristú, te candeca ñaha-gã xii-o ndàa andiú cundecu ndihí-o-gá ni caa ni quíhíⁿ. ¹⁸ Núu xiáⁿ chí cuãha tnàha tnúhu ndee iní, te vá ndihú iní-ndó chi naníhí tàhú-ndó nùú-gã.

5

¹ Te nchòhó ñáyiú ndècu ndihí-í ichi Xítóhó Jesucristú ñá túú-gã xíní ñùhu-xi sá càchí tnúhu-í xii-ndo sã quixí tucu-gá, te ni ñá túú-gã xíní ñùhu-xi sá càchí tnúhu-í xii-ndo nãsa cada-xi òré quixi-gá. ² Chi nchòhó sa nàha ndáá-ndó sã Xítóhó Jesucristú quixi-gá nduu ñá túú yihí iní-ó, chi dàtná quidé ìⁿ ñadúhú cada-gá òré quixi-gá, chi nduu ñá túú nã yihí iní-ó quixi tucu-gá. ³ Te sáá nduu te cachí nchaa ñáyiú ndècu ichi cuehé ichi duha: “Vitna ío váha cùu iní-ó ndècu-o, te ñá túú-gã ná cùmání xii-o”, duha quesàhá-yu. Te ñáyiú-áⁿ òré ñá túú nã yihí iní-yu, te quèxio tnúndòho tnúhu ndàhú sá cúú-xi-yu. Chi cada-xi dàtná quidé-xi ìⁿ ñáyiú òhí ní tnàhá òré cacu déhe-xi, chi na iní-yu ní dátñuhú ñáhá-xi te vá cãcu-yu núú tnúndòhó-yu, te ducaⁿ sã tnàhá-xi yáha nchaa ñáyiú ñá túú ndècu ichi-gá, chi na iní-yu quexio

tnúndòho sá cúu-xǐ-yu te vá cǎcu-yu núu tnúndòho-án.⁴ Te nchòhó ñáyiú ndècu ndihi-í ichi Xítóhó Jesucristú, ñá túú-gǎ ndécú-ndó ichi cuehé ichi duha, núu xǎn sa yǐhi-ná iní-ndó ndùu quixi-gǎ te vá yǎha-ndo dàtná yáha nchaa ñáyiú ñá túú ndècu ichi-gǎ, chi ñáyiú-án ñà túú nǎ yǐhí iní-yu sá quixí-gǎ. Te na iní-yu quexìo-gǎ dàtná quidé ñàdúhú na iní-ó quǐhu-güedé vehe-o dùhu-güedé ducaⁿ càda-gǎ òré quixi-gǎ.⁵ Te nchoo ñà túú-gǎ ndécú-ó ichi cuehé ichi duha, te ichi-án cúu-xí dàtná ìⁿ ichi nee ndècu-o ni cuu, te vitna sa ní ngúndecu-o ìchi váha, te ducaⁿ chi Yá Ndiòxí ní dándíxí túu-gǎ iní-ó cuendá cutnùní iní-ó nàcuáa ndùu cuendá-gǎ.⁶ Te xini ñuhu-xi dandixi túu-o iní-ó, te cada váha-o cùndecu-o ichi-gǎ, te vá cadá-ó dàtná quidé nchaa ñáyiú ñá túú sàndáá iní ñáhá xii-gǎ, chi ñáyiú-án ñà túú-gǎ quidé cuendá-yu te núu quide váha-yu àdi ñá túú quide váha-yu ndécú-yu.⁷ Te nchaa ñáyiú quide cuehé quidé dùha cuú-yu dàtná ìⁿ ñáyiú xidí àdi xini, chi ñá túú quide cuendá-yu nàcuáa cadá-yu ìⁿ sá váha dàtná cuiní Yá Ndiòxí.⁸ Te nchòhó ñáyiú sa ní cutnùní iní-xi nàcuáa ndùu ichi váha, dandixi túu-ndo iní-ndó cùndecu-ndo, te quindáá ndisa iní-ndó Yá Ndiòxí, te cuu iní-ndó cue tnaha ñáyiú-ndo te ducaⁿ te vá táxí tnùní ñáhá nì ìⁿ sá cuehé sá dúhá xii-ndo. Te ío cuhuⁿ iní-ndó sá cùndecu-ndo

ndihi-gǎ ni caa ni quǐhíⁿ.⁹ Chi Yá Ndiòxí ní cachí-gǎ sá vǎ quǐhíⁿ-ó núu ùhú núu ndàhú, chi mee-gǎ nacuaca ñaha-gǎ xii-o cùndecu-o ndihi-gǎ, chi ní sàndáá iní-ó Xítóhó Jesucristú.¹⁰ Te mee Xítóhó Jesucristú ní xǐhí-gǎ sá cuendá nchaa yícá cuechi-o, te ní ndoto-gǎ cuendá nduu táhú-ó cùndecu-o ndihi-gǎ andiú na sàà nduu cueí sa ní xǐhí-ó, àdi vátá cùu-gǎ-ó.¹¹ Núu xǎn chí cuáha tnaha tnúhu ndee iní, te chindee tnaha-ndo cùndecu-ndo ichi-gǎ dàtná tá quide-ndo véxi.

Té Pǎblú dáquini sàhú-dé ñáyiú ndècu ichi Xítóhó Jesucristú

¹² Te nchòhó ñáyiú ndècu ndihi-ndí ichi Xítóhó Jesucristú, càháⁿ ndàhú-ndí núu-ndó sǎ cànèhe-ndo sá yǐñùhu núu cue té cùnno xinu cuechi núu Yá Ndiòxí, cue té dānehé ñáhá xii-ndo nàcuáa cùndecu-ndo ìchi-gǎ.¹³ Te càháⁿ váha-ndo ndihi-güedé, te cuu iní-ndó-güedé, chi naha-ndo sá chíuⁿ Yá Ndiòxí quidé-güedé. Te cùndecu ndihi váha tnaha-ndo nchaa-ndo.

¹⁴ Te càháⁿ ndàhú tucu-ndí núu-ndó sǎ càháⁿ-ndó dōho nchaa ñáyiú ñá túú cuiní cada chiúⁿ, te ducaⁿ cuáñaha-ndo tnúhu ndee iní xii nchaa ñáyiú quǐyuhu iní-xi canchicúⁿ nihnu ichi-gǎ, te chindee tucu-ndo nchaa ñáyiú vátá ngũnu ichi váha-gǎ, te cùnduu càhnu iní-ndó nũ-yu ncháá-yu.

15 Te cada ndee iní-ndó te núu ndècu tñaha ñáyi-ndo cùu úhú iní ñáhã-yu xii-ndo, te vá tñahá-ni-ndo cùu úhú iní-ndó-yu. Te mee-ni sã váha cada-ndo sã cúu-xí nchàa tñaha ñáyi-ndo.

16 Te nchaa nduu ío cudíí iní-ndó cùndecu-ndo. 17 Te ìíⁿ nduu ìíⁿ nduu cáháⁿ ndihí-ndo Yã Ndiöxí. 18 Te ndacáⁿ táhú-ndó núú-gã te núu nándi cùu sã yãha-ndo ndècu-ndo, chi ducaⁿ cuíní-gá cada-o, te diu ducaⁿ nduu tnúhu càháⁿ Xítohó Jesucrístú.

19 Te vá quèhndé nihnu-ndo chiúⁿ quidé Espíritú Yã Ndiöxí iní-ndó. 20 Te vá cãdá sãá iní-ndó núú cuè téé càháⁿ tnúhu Yã Ndiöxí nàcuáa dàcahu iní ñáhã-gã xii-güedé. 21 Te cada cuendá váha-ndo nàcuáa càháⁿ-güedé, te tñi-ndo nchàa tnúhu váha càháⁿ-güedé. 22 Te dañ-ndo nchàa ichi cuehé ichi duha.

23 Te mee Yã Ndiöxí quidé-gã ío váha cùu iní-ó ndècu-o ichi-gá. Te xicáⁿ táhù-í núú-gã sã ná càda íí ñáhã-gã xii-ndo, te na còto ñaha-gá xii-ndo ndihí iní-ndó cuendá sã vã cãdá-gã-ndó nì ìíⁿ sã cuèhé sã dúhá, te diu-ni ducaⁿ na càda-gá sã cúu-xí-ndó ndéé ná sãá nduu quixi tucu Xítohó Jesucrístú ñuyú-a. 24 Chi Yã Ndiöxí Yaá ní cáháⁿ ñáhã xii-o cada-gá nàcuáa ní cáháⁿ-gá, te chindee ñaha-gá xii-ndo.

Té Pãblú quidé ndèe iní-dé ñáyi xñdecu ichi Xítohó Jesucrístú ndécú ñúú Tesalónica

25 Te nchòhó ñáyi ndècu ndihí-í ichi Xítohó Jesucrístú,

cácáⁿ táhú-ndó núú Yã Ndiöxí sã ná chindee ñaha-gá xii-ndí.

26 Te cúñaha-ndo xii nchaa ñáyi ndècu ndihí-o ichi Xítohó Jesucrístú sã nì yuhu nì iní-ndí quidé ndèe iní ñáhã-ndí xii-ndo ndihí-yu.

27 Te vitna mee Yã Ndiöxí ndéhé-gã sã càháⁿ ndáhú-í núú-ndó sã dácuàha-ndo tutú-a núu nchàa ñáyi ndècu ndihí-o ichi-gá.

28 Te Xítohó Jesucrístú ío na chindee chitúu ñaha-gã xii-ndo núú cuáhãⁿ núú vëxi, Te ducaⁿ na cùnduu. Te ío chí cãdá ndèe iní-nã vitna.

TUTÚ CÚÚ ÒÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ TESÀLÓNICÁ

Té Pāblú ndihi cue té cundhi-dé cadúha-güedé tutú quihiⁿ ndaha ñáiyiu xñdecu ichi Xítohó Jesucristú ndécú ñúú Tesalónicá

¹ Yúhú té Pāblú cadúha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáiyiu ndècu ndihi-ndí ichi Xítohó Jesucristú ndécú ñúú Tesalónicá, chi tnàhá tnúhu-ndo ndihi Tátá-ó Dütú Ndiöxí, ndihi Xítohó Jesucristú. ² Te xicáⁿ táhú-ndí núú Dütú Ndiöxí, ndihi núú Xítohó Jesucristú sá ná chñdee chitúu ñaha-gá xii-ndo, te ducaⁿ ndí nduú-gá ná cáda te ío váha cuu iní-ndó cñdecu-ndo.

Yá Ndiöxí cada ndáá-gá cuèchi nchaa ñáiyiu ndècu ichi cuhé ichi duha na sáa nduu quixi tucu Xítohó Jesucristú

³ Te nchòhó ñáiyiu ndècu ndihi-ndí ichi Xítohó Jesucristú, càhí tnúhu-í xii-ndo sá cúnàha-ndo sá ñà túú dàña ndee-ndí ndàcáⁿ táhú-ndí núú Yá Ndiöxí cuendá-ndó, chi dacuítí ducáⁿ taú-xi cunduu chi ío-gá tá sàndáá iní-ndó-gá cuáháⁿ, te ducaⁿ ùuⁿ-gá tá cùu iní tnàhá-ndó nàcuáa ndècu-ndo ichi Yá Ndiöxí. ⁴ Núu xiáⁿ nchúhú ío

váha càháⁿ-ndí cuendá-ndó núu nchaa ñáiyiu sàndáá iní tnúhu Yá Ndiöxí nchaa núu tàcá-yu dācuahá-yu tnúhu-gá, chi ío sàndáá iní-ndó-gá, te ñá túú dàña ndeé-ndó nchicúⁿ nihnu-ndo ichi-gá, te quide cahnu-ni iní-ndó cuèi nándi sá yáha-ndo ndècu-ndo ichi-gá. ⁵ Te sá ducáⁿ quide váha-ndo ndècu-ndo xiáⁿ cùtnùni nàcuáa cada ñaha Yá Ndiöxí xii-ndo na sáa nduu, chi nduu táhú-ndó cñdecu-ndo núú táxi tnùni-gá, te ducaⁿ càda-gá chi cùu-gá Yaá quidé ndáá cuiti. Te vitna ndòho-ndo nacuáa ndihu ndaha-gá dava-gá ñáiyiu.

⁶ Te Yá Ndiöxí ío váha ndáá quidé-gá, chi mee-gá nachinaa-gá nchaa sá quidé ñaha ñáiyiu cùu úhú iní ñáhá xii-ndo, ⁷ te nchoo ñáiyiu ndòho cuendá Xítohó Jesucristú nucñdecu váha-o na sáa nduu núu túu-gá andiu, te tnàhá cue espíritú xínú cuèchi núú Yá Ndiöxí cuuⁿ ndihi-gá, te cue espíritú-áⁿ quidé-xi nchaa núu chiúⁿ tahu-gá. Te òré nuu túu-gá andiu ndihi cue espíritú-áⁿ, te ío dàtásaⁿ-xi andiu. ⁸ Te dandòho-gá nchaa ñáiyiu ñá túú tnàhá tnúhu ndihi Yá Ndiöxí, ñáiyiu ñá túú sàndáá iní tnúhu Xítohó Jesucristú tnúhu sá càháⁿ nàcuáa naníhí táhú-yu. ⁹ Te nchaa ñáiyiu-áⁿ ïo dandòho ñaha-gá xií-yu, chi ndohó-yu ni caa ni quihiⁿ, te vá cñdecú-yu núú ïo váha càa ndecu-gá táxi tnùni-gá. ¹⁰ Te ducaⁿ càda ñaha-gá xií-yu na sáa nduu, te dàvá-áⁿ ïo

cada càhnu ñaha nchaa ñáyiú sàndáá iní ñáhá xii-gá. Te tnàhá nchaa nchòhó ñáyiú ní sàndáá iní tnúhu ní cáhán-ndí ducaⁿ càda-ndo, te nchaa-o ïo cuñúhu-o-gǎ dàvá-áⁿ.

¹¹ Te cuèndá xíǎⁿ nùu ïo xicáⁿ táhú-ndí nùú Dütú Ndiöxí sá ná chindee ñaha-gá xii-ndo cùndecu váha-ndo ìchi-gá dàtná cuini méé-gǎ cundecu nchaa ñáyiú ní cáhán-gá cundecu ndihi-gá. Te xicáⁿ táhú tucu-ndí nùú-gǎ sá ïo na chindee ñaha-gá xii-ndo càda-ndo nchaa sá vǎha sàni iní-ndó, ndihi cuèndá chiuⁿ quide-ndo cuèndá-gǎ, te ducaⁿ chi sàndáá iní-ndó-gǎ. ¹² Te nùu ducaⁿ na càda-ndo, te cáhán váha ñáyiú cuèndá Xítóhó Jesucristú, te tnàhá-ni nchòhó cáhán váha-yu cuèndá-ndó, chi mee Yǎ Ndiöxí ndihi Xítóhó Jesucristú cúndáhú iní ñáhá-gǎ chindèe ñaha-gá xii-ndo.

2

Té quixi dandáhú ñáyiú

¹ Te nchòhó ñáyiú ndècu ndihi-ndí ìchi Xítóhó Jesucristú càchí tnúhu-ndí xii-ndo nàcuáa cada-xi nduu na quixí tucu-gǎ, chi quixi-gǎ nacuaca ñaha-gǎ xii-o, nùu xíǎⁿ cáhán-ndí dóho-ndo. ² Te ñá díú sǎ ñⁿ tnúhu tecú dóho-ndo te ngüíta-ndo càni ñⁿ caní úú iní-ndó, te ní vǎ yùhú-ndó te nùu véxi ñⁿ téé càchí-dé sá cáhán-dé tnúhu Yǎ Ndiöxí, te càchí-dé sá sà véxi Xítóhó Jesucristú, te vá quèndáá iní-ndó tnúhu cáhán-dé chi ñá ndáá, àdi

véxi ñⁿ téé nèhe ñⁿ tutú nùú-ndó te càchí-dé sá yùhú ní tendaha-í véxi, te nùú tutú-áⁿ cáhán-xi sá sà véxi Xítóhó Jesucristú, te diu-ni vá quèndáá iní-ndó nàcuáa cáhán-xi, te ndèda-ni càa ñáyiú cáhán-yu dàvá-áⁿ sǎ sà véxi-gǎ dico vá quèndáá tnàhí iní-ndó. ³ Nùu xíǎⁿ dátúha ñaha-í xii-ndo cuèndá sá vǎ dáñá tnàhí-ndo mèe-ndo dandáhú ñáhá ñáyiú. Chi cùmání-gǎ sáá nduu quixi tucu Xítóhó Jesucristú, te ngüíta nchaa ñáyiú cuu úhú iní-yu Yǎ Ndiöxí, te dàvá-áⁿ quini-yu ñⁿ téé xidó quidé nchàa sá cuèhé sá dúhá, te téé-áⁿ quíhíⁿ-dé nùú ùhú nùú ndàhú ní caa ní quíhíⁿ. ⁴ Te diu-ni téé-áⁿ vǎ ndèe iní-dé nchaa sá càchí ñáyiú cùu ndiöxí-yu ndihi nchaa dava-gǎ sá quidé càhnú-yu, te cachí-dé sá ïo cùnuu-dé, te quíhu-dé ndéé xiti veñúhu nùú ndécú cuè ñáyiú chihnuhu ñaha xii Yǎ Ndiöxí coo-dé, te cúñaha-dé xii-yu sá cúú-dé Yǎ Ndiöxí.

⁵ Te dandàcu iní-ndó chi nchaa tnúhu-a sa ní cachí tnúhu-í xii-ndo cùtnàhá ní xindecu ndihi ñaha-í. ⁶ Te nchòhó sa cùtnuní iní-ndó nǎ cúú sǎ ngání ñaha xii téé-áⁿ nùu ñá túú-dé vitna, dico na sáá nduu tàú-xi quee-dé caca cuu-dé te dàvá-áⁿ quini ñáhá nchàa ñáyiú. ⁷ Te ïo titní nùú sǎ cuèhé sá dúhá quide yucu ñávǎha dicó-ni sá vǎtá quini-gǎ ñáyiú, dico ndècu ñⁿ sá ñǎ dáñá càda-xi nchaandi túhú nàcuáa càchí iní-xi, dico sáá nduu xòcuñí sá ñǎ dáñá-áⁿ te dàvá-áⁿ

cada-xi nchaa nàcuáa càchí iní-xi. ⁸ Te sáá nduu quíní-yu téé quide nchaa sá cuèhé sá dúhá-ǎⁿ ñuyíú-a. Te òré ná quíxi túu Xítóhó Jesucristú, te mee-ni sǎ dátǎsaⁿ-xi, ndihi yócó yuhu-gá cuú téé-ǎⁿ. ⁹ Te sácúíhná tendaha-xi téé-ǎⁿ quixi-dé, te cuǎñaha-xi tnúhu ndee iní cada-dé nándí sá cáda-dé. Te cada-dé sá ñà túú tnàhí ndàcu ni ìⁿ ñáyiu ñuyíú-a cada-yu, dico mee-ni dándahú ñáhá-dé xii-yu caca cuu-dé. ¹⁰ Te nchaa núú sá cuèhé sá dúhá càda-dé dandáhú-dé nchaa ñáyiu sa ñùhu ichi cuáháⁿ núú ùhú núú ndàhú, chi ñà túú ní cuíní-yu quíndáá iní-yu tnúhu ndáá tnúhu Yá Ndióxi cuéndá naníhí tǎhú-yu. ¹¹ Te sá dúcáⁿ ñà túú ní cuíní-yu quíndáá iní-yu tnúhu ndáá, núú xǎⁿ daña Yǎ Ndióxi dacáháⁿ yucu ñáváha iní-yu quíndáá iní-yu nchaa tnúhu ndehnde ¹² cuéndá cuíta nihnú-yu, te ducaⁿ yǎha-yu chi ñà túú sándáá iní-yu tnúhu ndáá càháⁿ Yǎ Ndióxi, chi mee-ni nchàa sá cuèhé sá dúhá cùdíí iní-yu quidé-yu, te cuíta nihnú-yu chi ducaⁿ ñí cachí Yǎ Ndióxi cunduu.

Ñáyiu ní cachí Yǎ Ndióxi naníhí tǎhú

¹³ Te nchòhó ñáyiu ndècu ndihi-ndí ichi Xítóhó Jesucristú, ñáyiu ío cùu iní-gá càchí tnúhu-ndí xii-ndo sǎ ñà túú daña ndee-ndí ndàcáⁿ tǎhú-ndí núú Yǎ Ndióxi cuéndá-ndó, chi ducaⁿ tǎu-xi cunduu, chi Yá Ndióxi ní cachí-gá ndéé cùtnáhá vátá ngáva-gá ñuyíú sǎ naníhí

tǎhú-ndó, te diu Espíritú-gá dacáháⁿ-xi iní-ndó ndècu yíñuhu-ndo núú-gǎ, te sándáá iní-ndó tnúhu ndáá càháⁿ-gá núú xǎⁿ ní naníhí tǎhú-ndó. ¹⁴ Chi cuéndá tnàhí-a ní càháⁿ ñáhá Yǎ Ndióxi xii-ndo, te ducaⁿ ñí naníhí tǎhú-ndó chi ní sándáá iní-ndó tnúhu Xítóhó Jesucristú ní càháⁿ-ndí núú-ndó, te sáá nduu te cundecu-ndo tnàhá-ndó núú ío váha cǎa ní nduu tǎhú Xítóhó Jesucristú ndécú-gǎ.

¹⁵ Núú xǎⁿ nchòhó ñáyiu ndècu ndihi-ndí ichi Xítóhó Jesucristú ío càháⁿ-ndí dóho-ndo sǎ vǎ dáña nihnu-ndo ichi-gǎ, te ni vǎ nácuaⁿnaa-ndo nchaa tnúhu ní càháⁿ-ndí núú-ndó cùtnáhá ní xíndecu ndihi ñaha-ndí xii-ndo, te diu-ni ducaⁿ càda-ndo nchaa tnúhu tendaha-ndí véxi. ¹⁶⁻¹⁷ Te xícáⁿ tǎhú-ndí núú-gǎ sǎ ná dàcaháⁿ-gǎ iní-ndó cundecu-ni-ndo ichi-gǎ, te ducaⁿ ío na chíndee ñaha-gǎ xii-ndo càháⁿ-ndó mée-ni tnúhu váha, te cada váha-ndo cundecu-ndo nacúáa cuu váha iní-gǎ, chi mee Dütú Ndióxi ío cùu iní ñáhá-gǎ xii-o, te diu-gǎ ní taxi-gǎ tnúhu ndee iní cundecu ndihi-o ní caa ní quíhíⁿ, te ní cachí tnúhu tucu-gǎ ingá tnúhu váha sǎ cùndètu-o Xítóhó Jesucristú.

3

Cáháⁿ ndihi-ndo Yǎ Ndióxi cuéndá-ndí

¹ Te nchòhó ñáyiu ndècu ndihi-ndí ichi Xítóhó Jesucristú, ndéé núú ndíhí-ñǎ càchí tnúhu-í xii-ndo sǎ càháⁿ ndihi-ndo Yǎ Ndióxi

cuèndá-ndí cuèndá sá ná chindee ñaha-gá xii-ndí, te ducaⁿ ndíhi-ni cuténuu tnúhu Xítohó Jesucristú nchaa xichi, te cudíí iní-yu tnúhu-gá dàtná quidé nchòhó. ² Te cáháⁿ ndíhi tucu-ndo Yá Ndiöxí cuèndá sá ná còto ñaha-gá xii-ndí, te ñá túú nã cada ñaha ñáyiú cuihna iní-xi ndècu ichi cuehé ichi duha xii-ndí, chi ñá ncháá-yu sàndáá iní-yu tnúhu-gá. ³ Dico Xítohó Jesucristú quidé-gã nchaa sá càháⁿ-gá, te ñu-gá cada te nchòhó cundecu-ni-ndo ìchi-gá, te coto ñaha-gã xii-ndo cuèndá sá ñà túú nã cada ñaha yùcu ñávãha. ⁴ Te Xítohó Jesucristú quidé-gã cútñuní iní-ndí sá nchòhó quidé-ndó nchàa nacuaá ní dánèhé ñáhá-ndí xii-ndo, te ñu-ni ducaⁿ càda-ndo cundecu-ndo. ⁵ Te xicáⁿ táhú-ndí núú Yá Ndiöxí sá ná chindee ñaha-gá xii-ndo cùu iní-ndó-gã, te ñu-ni-gá ná chindee ñaha-gá xii-ndo cùnduu cahnu iní-ndó, chi Xítohó Jesucristú ducaⁿ ño càhnu iní-gá.

Tàú-ó càda chiúⁿ-o

⁶ Te nchòhó ñáyiú ndècu ndíhi-í ichi Xítohó Jesucristú, càháⁿ-í dóho-ndo sã mee-gã cuini-gá sá vã ñíhi tnáhá-gã-ndó ndíhi ndéda-ni càa ñáyiú càchí sá sàndáá iní tnúhu-gá, ñáyiú ñá túú cuini cada chiúⁿ, chi ñáyiú ducaⁿ xíquide ñá túú cuini-yu tní-yu tnúhu sá ñí dánèhé ñáhá-ndí xii-ndo. ⁷ Te nchòhó sa xini-ndó nacuaá

cada-ndo cùndecu-ndo canchicúⁿ ñihnu-ndo nacuaá quide-ndí. Te cútñhá ní xíndecu ndíhi ñaha-ndí xii-ndo chi ní ñíⁿ nduu ñá túú ní tühío-ndí. ⁸ Te ní ñà túú dícó ducaⁿ ní quèheⁿ-ndí sá ndécú ndíhi ñáyiú caxi-ndí àdi canehe-ndí, chi cuéi nduu cuéi niú ío ní quide chiúⁿ-ndí ní ñíhi-ndí díhúⁿ ñí saaⁿ-ndí nchaa sá ñí nàndíhi-ndí cuèndá sá ñà túú ní cuini-ndí chichiuⁿ ñaha-ndí xii-ndo. ⁹ Te cuéi tàú ndisa-ndí cachí tnúhu-ndí xii-ndo sã chindèe ñaha-ndo xii-ndí ní cùu, dico ní quide chiúⁿ-ndí cuèndá ní cuini-ndí danèhé ñáhá-ndí xii-ndo nacuaá càda-ndo cùndecu-ndo. ¹⁰ Te cútñhá ní xíndecu ndíhi ñaha-ndí xii-ndo ñí cachí-ndí sá ncháá ñáyiú ñá túú cuini cada chiúⁿ te vã cuãha-ndö-yu sá cáxi-yu. ¹¹ Te vitna ñíhi-ndí tnúhu sá ío dava nchòhó ñá túú tnàhí quide chiúⁿ-ndo, chi àúⁿ nã cuu ndí cuu ndí cuu-ni-ndo núú ndécú dàva-gá tnàha ñáyiú-ndo. ¹² Te yúhú càháⁿ-í dóho nchaa nchòhó ñáyiú ducaⁿ ñà túú cuini cada chiúⁿ sá càdá chiúⁿ-ndo cuendá ñíhi-ndó nchàa sá cóhó sã cáxi-ndó, te duha càháⁿ-í dóho-ndo, chi ducaⁿ cuini Xítohó Jesucristú Yaá táxi tnùní ñáhá xii-o cada-ndo, te òré cada chiúⁿ-ndo te vã ño cada dusaⁿ-ndo.

¹³ Te nchòhó ñáyiú ndècu ndíhi-í ichi Xítohó Jesucristú, vã dáñá ndèé-ndó càda-ndo mee-ni sá vãha. ¹⁴ Te núu ñíⁿ ñáyiú ndècu ndíhi-ndo ñá túú cuini-yu

tní-yu tnúhu càháⁿ-ndí núú
 tütú-a, te cundehe-ni-ndo
 nũu nděda càá-yu, te vá
 nihí tnáhá-gă-ndó ndihí-yu
 cuëndá sá ná cùcahaⁿ núũ-yu,
 15 dico vá cúú ũhú iní-ndõ-yu,
 chi cáháⁿ-ndó dõho-yu
 cada-ndo sã ndécú-ndó ìchi
 Xítóhó Jesucristú ndihí-yu.

Tnúhu ndéé núú nĩ ndihí-ná

16 Te mee Xítóhó Jesucristú
 ío váha cùu iní-gá ndécú-gă, te
 xicáⁿ táhù-í núú-gă sá mée-gă
 ná cádá te ío váha cuu iní-ndó
 tnáhá-ndó cùndecu-ndo cuéi
 nása-gá ná cùndecu-ndo. Te
 mee-gă ná cùndecu ndihí
 ñaha-gá xii-ndo nchàa-ndo.

17 Te vitna yúhú té Păblú
 tée-í tnúhu-a quide ndee iní
 ñáhà-í xii-ndo, te ñiu-ni duha
 càa nchaa letrá-í nchaa núú
 tütú cáđũha-í. 18 Te xicáⁿ
 táhù-í núú Xítóhó Jesucristú
 sá ïo na chìndee chitúu
 ñaha-gă xii-ndo nchàa-ndo.
 Te ducaⁿ na cùnduu. Te ío chí
 cádá ndèe iní-nã vitna.

TUTÚ DÍHNA NUU NĪ CADÚHA TÉ PĀBLÚ QUIHĪⁿ NDAHA TÉ TIMŪTEÚ

*Té Pāblú cadúha-dé tutú
quíhĪⁿ ndaha té Timùteú*

¹ Yúhú té Pāblú ní tendaha ñaha Yá Ndiõxí cāháⁿ-í tnúhu Xítohó Jesucristú núú ñáyiú chi ducaⁿ nĭ cachí Yá Ndiõxí cunduu, te ñu-gá cúú-gă Yaá ní dácăcu nihnu ñaha xii-o núú ùhú núú ndáhú. Te tnàhá Xítohó Jesucristú ducaⁿ nĭ cachí-gá sá cāháⁿ-í tnúhu-gá, te ñu-gá ní taxi-gá tnúhu ndee iní xii-o sã cùndecu-o ndihĭ-gá nĭ caa nĭ quíhĪⁿ.

² Te yòhó té Timùteú cúú-n ĩⁿ tée ní sanu ichi ndisa-í ichi Xítohó Jesucristú chi ío váha ní sándáá iní-n-gă. Te càdúha-í ĩⁿ tutú daquixi-í ndaha-n. Te xicáⁿ táhù-í núú Tātá-ó Dütú Ndiõxí ndihĭ núú Xítohó Jesucristú sá ío na chindee chítúú ñaha-gă xii-n, te ducaⁿ ndĭ nduú-gá ná cádá te ío váha cuu iní-n cùndecu-n.

*Cuendá nchaa ñáyiú
dàndahú tnàha ñáyiú-xi*

³ Te nàha-n nacuáa ní cāháⁿ-í cùtnàhá ní quee-í ñuú Éfesú véxi-í distritú Macèdoniá, chi ní cachí-í sá quéndõo-n ñuú-áⁿ cāháⁿ-n dõho nchaa ñáyiú dàndahú ñáhá cāchí sá cāháⁿ tnúhu Yá Ndiõxí te ñá ndáá sá cāháⁿ-yu tnúhu-gá, te ñu-ni ducaⁿ cāháⁿ-í vitna

cada-n cùndecu-n. ⁴ Te cúñaha-n xii-yu sá vã cádá cuendá-yu nchaa cuendú nihĭ-yu năcuáa ní xóo cada ñáyiú ní xindecu ndéé sanaha, te nchaa cuendú-áⁿ dĭcó chináá ñáhá-xí chi ñá túú vėdana nândihĭ-xi, te ni ñá túú chindee ñaha-xi cada-o nacuáa cuiní Yá Ndiõxí, chi mee-ni sã quindáá iní-ó-gă quidé-xí quide-o nchaa nacuáa cuiní-gă.

⁵ Te duha cāháⁿ-í cúñaha-n xii-yu cuendá sá ná cùu iní-yu tnàha ñáyiú-yu, te xini ñuhu-xi nduu ndoo nduu nine iní-yu, te cunduu váha iní-yu, te quindáá iní-yu Yá Ndiõxí, te vá cání ĩⁿ cani úú iní-yu, te núu ducaⁿ na càdá-yu te cuu iní ndisá-yu nchaa tnàha ñáyiú-yu. ⁶ Chi dava ñáyiú ñá túú-gă quidě-yu nchaa năcuáa cāháⁿ-í-a, chi mee-nă nchaa cuendá sá ñá túú vėdana nândihĭ xicāháⁿ-yu. ⁷ Te cuiní-yu cāháⁿ-yu nchaa tnúhu ní cāháⁿ ndĭ Moisés dĭco ñá ndácú-yu, chi cuéi ni yùhu nĭ iní-yu cāháⁿ-yu dĭco ñá tècú tnùnĭ-yu năcuáa ní cāháⁿ ndĭi, te ni tnúhu cāháⁿ mée-yu ñá cùtnùnĭ iní-yu năcuáa ndu-xi.

⁸ Te sa nàha-o sá ncháá tnúhu ní cāháⁿ ndĭ Moisés váha, te núu na tècú tnùnĭ-ó nă cuendá ducaⁿ nĭ ngúndecu nchaa tnúhu-áⁿ. ⁹ Te cùtnunĭ iní-ó sá ñá ñá dĭú sã cúú-xí nchaa ñáyiú quide váha ndècu ñuyúú-a ni ngúndecu nchaa tnúhu-áⁿ, chi ní ngúndecu-xi sá cúú-xí nchaa ñáyiú ñá túú quide váha, ndihĭ cuendá nchaa ñáyiú ío sáá iní-xi,

ndihi cuendá nchaa ñáyiú quíde cuehé quíde dúha, ndihi cuendá nchaa ñáyiú ío ndècu cuéchi-xi, ndihi cuendá nchaa ñáyiú ñá túú nèhe védana sá yíñùhu núú Yá Ndiöxí, ndihi cuendá nchaa ñáyiú ñá túú càháⁿ váha cuendá ichi Yá Ndiöxí, ndihi cuendá nchaa ñáyiú sàhni tátá-xi ndihi náná-xi, ndihi cuendá nchaa dava-gá ñáyiú sàhni tnaha, ¹⁰ ndihi cuendá nchaa cue téé càháⁿ ndihi ñáyiú dihi te ñá díú ñàdihí-güedé cúú-yu, ndihi cuendá tucu nchaa ñáyiú dihi càháⁿ ndihi cue téé te ñá díú yí-yu cùu-güedé, ndihi cuendá nchaa cue téé càháⁿ ndihi tnaha ndi mee téé-xi, ndihi cuendá nchaa ñáyiú chiváha tnaha ñáyiú-xi cuendá sá cuini-yu níhi-yu díhúⁿ, ndihi cuendá nchaa ñáyiú ndehnde, ndihi cuendá nchaa ñáyiú càcunehe ndéé Yá Ndiöxí cuendá cuini-yu cutnùní iní tnaha ñáyiú-yu sá càháⁿ ndáá-yu, te ñá ndáá sá càháⁿ ndáá-yu, ndihi cuendá nchaa ñáyiú quíde nchaa dava-gá sá ñà túú tàuchiúⁿ Yá Ndiöxí cadá-yu. Cuendá nchaa ñáyiú ducaⁿ xíquide ní ngúndecu nchaa tnúhu-áⁿ. ¹¹ Te nchaa tnúhu-áⁿ ìⁿ-ní cùu-xi ndihi nchaa tnúhu sá ní cachí Yá Ndiöxí càháⁿ-í, te tnúhu-áⁿ cúú-xí tnúhu váha vili, chi mee-gá ío váha iní-gá.

Té Páblú ndàcáⁿ táhú-dé núú Yá Ndiöxí sá ní cundàhú iní ñáhá-gá xii-dé

¹² Te Xitohó Jesucristú ní cutnùní iní-gá sá cadá ndáá-í cada-í nchaa chiúⁿ tahu-gá.

Te ndàcáⁿ táhú-í núú-gá sá ní taxi-gá chiúⁿ-gá quíde-í, te ío chindee ñaha-gá xii-í. ¹³ Te ní taxi-gá chiúⁿ-gá quíde-í cuéi ní xóo càháⁿ cuéhé-í cuendá-gá, te cuéi ní xóo cúú cuéhé cúú duha-í nchaa ñáyiú ndècu ichi-gá, te cuéi nándi-gá sá ní xóo cada-í-yu dico ní cundàhú iní ñáhá Yá Ndiöxí xii-í, chi vátá quíndáá-gá iní-í Xitohó Jesucristú cútnàhá ducaⁿ ní xóo cada-í, te ní ñá cutnùní iní-í nchaa sá quíde-í ní cùu, te cuéi ducaⁿ ní xóo cada-í, ¹⁴ dico Yá Ndiöxí ío ní cundàhú iní ñáhá-gá xii-í te chindee ñaha-gá. Te mee Xitohó Jesucristú chindèe ñaha-gá xii-í sàndáá iní-í-gá, te cùu iní-í nchaa tnaha ñáyiú-í.

¹⁵ Te nihí-ó tnúhu sá Xitohó Jesucristú ní quixí-gá ñuyíú-a cuendá sá dácacu nihnu-gá nchaa ñáyiú ndècu ichi cuehé ichi duha. Te tnúhu-áⁿ cúú-xí ìⁿ tnúhu ndáá, te xini ñuhu-xi quíndáá iní nchaa nchoo ñáyiú ndècu ñuyíú-a. Te yúhú cúú-í téé ío-gá ndécú cuéchi-xi núú Yá Ndiöxí ní cùu. ¹⁶ Te Yá Ndiöxí ní cundàhú iní ñáhá-gá ní dácacu nihnu ñaha-gá xii yúhú téé xidó ndécú cuéchi-xi ní cùu, cuendá cutnùní iní nchaa ñáyiú sá Xitohó Jesucristú ío càhnu iní-gá. Te sá dúcáⁿ ní quíde ñaha-gá xii-í, te xiáⁿ cutnùní iní-yu sá núu na quíndáá iní ñáhá-yu xii-gá te cundecú-yu ndihi-gá ní caa ní quíhíⁿ. ¹⁷ Te nchaa-o chí ná càchí-ó sá ío càhnu cuu Yá Ndiöxí, te canehe-o sá yíñùhu núú-gá ní caa ní quíhíⁿ, chi

mee-gã cúú-gã Yaá táxí tnùni nchaa nduu nchaa quiú. Te cùu-gá ìⁿ Yaá ñá túú xìní núú-ó, te ìndi díi-ni-gã ío ndècu ndihi-gá nchaa sá xìní tnùní-gá.

18 Te yòhó té Timùteú té cùu datná ìⁿ déhe mee-ì sa nàha-n nacuaá ní cáháⁿ dava-gá cue téé cáháⁿ tnúhu Yá Ndiöxí cuendá-n, te ñi-ni ducaⁿ cáháⁿ-ú tucu, te cada-n ncháa nacuaá cáháⁿ tnúhu-áⁿ chí ñi nchaa tnúhu-áⁿ canu ichi ñaha-xi xii-n cada-n nchaa nacuaá cuiní Yá Ndiöxí. 19 Te ío quindáá iní-n Xítohó Jesucristú, te cada váha-n cundecu-n nacuaá cundecu váha iní-n, chí dava ñáyiú ñá túú-gã ducaⁿ quidé-yu núu xíáⁿ ñá túú-gã sándáá iní-yu nàcuáa cáháⁿ tnúhu-gá. 20 Te ñi-ni ducaⁿ ñi quide té Himèneú ndihi té Lijandrú ní dáñá ndèe-güedé ñá túú-gã sándáá iní-güedé nàcuáa cáháⁿ tnúhu Xítohó Jesucristú, te ní xáhaⁿ-ì xii-güedé sá ná cundoho-ná-güedé ñu nása cada ñaha sàcuíhná xii-güedé, te ducaⁿ ñi xáhaⁿ-ì cuendá sá vã cáháⁿ cuèhé-gá-güedé cuendá Yá Ndiöxí.

2

Nàcuáa cáháⁿ ndihi-o Yá Ndiöxí

1 Te na cächí tnúhu-í xii-n ncháa nacuaá cada-n. Te díhna-gá cächí tnúhu-í sá cáháⁿ ndihi-n Yá Ndiöxí cuendá nchaa ñáyiú te núu nása cùu xindecú-yu, te cacaⁿ táhú-n núú-gã cuendá-yu, te ducaⁿ ío ndacaⁿ táhú-n núú-gã cuendá nchaa sá váha quide ñaha-gá xii-yu. 2 Te

ducaⁿ cáháⁿ ndihi-n Yá Ndiöxí cuendá nchaa cue téé cùnuu ndihi cuendá nchaa dava-gá cue téé cùchiuⁿ cuendá cada váha-güedé, te ducaⁿ nchò ñá túú ñá cuu cundecu-o, te ñá túú tnàhí ná cani iní-ó cundecu-o, te ío cundecu yíñùhu-o núú Yá Ndiöxí, te cada-o ncháa nacuaá tàú-xi cunduu. 3 Te núu ducaⁿ na cada-o cáháⁿ ndihi-o Yá Ndiöxí cuendá nchaa ñáyiú te quide váha-o, te nduu vétú iní Yá Ndiöxí Yaá ní dácäcu nihnu ñaha xii-o núú ùhú núú ndàhú. 4 Te mee-gã cuiní-gá sá ncháa ñáyiú tecú tnùní-yu nchaa tnúhu cáháⁿ-gá, chí cuiní-gá sá nánihí tàhú-yu. 5 Te ìⁿ-ni Dútú Ndiöxí ndécú, te ìⁿ-ni Xítohó Jesucristú, te medii-ni Xítohó Jesucristú quidé-gã tnàhá tnúhu-o ndihi Yá Ndiöxí. 6 Te Xítohó Jesucristú ní dáñá-gã mée-gã ní sahani ñaha-güedé xii-gá cuendá sá cuiní-gá sá cäcu nihnu nchaa ñáyiú ndècu ñuyíú núú ùhú núú ndàhú. Te Yá Ndiöxí cuiní-gá sá ncháa ñáyiú ñuyíú ndécú vitna níhí-yu tnúhu nàcuáa ní cuu ní xíhí Xítohó Jesucristú. 7 Te Yá Ndiöxí ní cachí-gá sá cáháⁿ-í tnúhu-áⁿ ndèni ní cuu núú xindecu ñáyiú ñá túú cùu ñáyiú isràél, te mee-ni tnúhu ndáá dánèhé-í-yu nàcuáa quindáá iní ñáhã-yu xii-gá, te yúhú cáháⁿ ndáá-í sá Yá Ndiöxí ní cachí-gá sá cáháⁿ-í tnúhu-gá chí ndècu ndihi-í Xítohó Jesucristú, te ñá túú dándahú ñáhà-í xii-n.

8 Te yúhú cuiní-í sá ncháa xìchí cáháⁿ ndihi cue téé Yá Ndiöxí, te na cunduu ndoo

cunduu nine iní-güedé òré ndonehe-güedé ndaha-güedé cáháⁿ ndihí ñaha-güedé xii-gá, chi vá cúú cùdééⁿ-güedé cuëndá nchaa sá quidé ñàha ñáyiú xii-güedé, te ni vǎ cání iní-güedé cúcuèhé tnáhá-güedé ndihí-yu. ⁹ Te càchí tnúhu-í xii-n sǎ ncháá ñáyiú dìhí ná cùnduu dío-yu nàcuáa tàú-xi cunduu, te vá cùnduu cuehé cunduu duha dàtná cáá dío nchaa ñáyiú ndècu ichi cuehé ichi duha, te na ndàdá-yu díquǐ-yu nàcuáa tàú-xi cunduu, te vá ndá dá cuèhé ndada duhá-yu, te vá cání iní-yu cunduu vií-yu ndihí sá ïo ndèyáhu, te ni vǎ cání iní-yu cuihnú-yu dóó sǎ ïo ndèyáhu. ¹⁰ Te mee-ni sǎ vǎha cadá-yu, chi ducaⁿ tàú-xi cada nchaa ñáyiú dìhí ndécú ichi Yá Ndiòxí. ¹¹ Te òré tàcá-yu núú dácuahá-yu tnúhu Yá Ndiòxí, te cue ñáyiú dìhí-áⁿ na nàhi dacuahá-yu tnúhu-gá, te cadá-yu nchaa nàcuáa càháⁿ cue téè dàcuaha ñaha xii-yu tnúhu-gá. ¹² Te yúhú càchí-í sǎ vǎ cúú dàcuaha ñáyiú dìhí cue téè, te ni vǎ cúú tàxi tnuní ñáhǎ-yu xii-güedé chi cunduu tnàví-ni yuhú-yu cundedóho-yu. ¹³ Te ducaⁿ xini ñuhu-xi cadá-yu, chi Yá Ndiòxí ní cadúha-gá díhna-gá té Àdán te dàtnùnì ní cadúha-gá tá Èvá. ¹⁴ Te ñá díú mèè té Àdán ní dándahú ñáhá sàcuíhná xii-dé, chi tá Èvá ní dándahú-xi, te ñá túú ní quide váha-xi núú Yá Ndiòxí sǎ dúcáⁿ nǐ sándáá iní-xi tnúhu ní cáháⁿ sàcuíhná-ǎⁿ.

¹⁵ Dico ñáyiú dìhí ní nduu táhǔ-yu sǎ cóó dèhe-yu, te naníhí tàhú-yu te núu vá dáñá ndèé-yu canchicúⁿ nihnú-yu ichi Yá Ndiòxí, te cundecu yiñùhú-yu núú-gǎ, te cuu iní-yu nchaa tnàha ñáyiú-yu, te cadá-yu nchaa nàcuáa tàú-xi cunduu cundecú-yu.

3

Nàcuáa tàú cue téè yìndaha ñaha xii ñáyiú ndècu ichi Yá Ndiòxí cada-güedé

¹ Te ïo ñⁿ tnúhu càháⁿ ñáyiú sǎ núu ñⁿ téè cuínì quindaha ñàha xii ñáyiú ndècu ichi Yá Ndiòxí, te ñⁿ sǎ vǎha cuínì-dé cada-dé càchí-yu, te ndáá quée-xí tnúhu càháⁿ-yu. ² Te yúhú càchí-í sǎ cuè téè ducaⁿ na quindaha ñaha xii ñáyiú te xini ñuhu-xi cuu-güedé cue téè quide ndáá cuëndá sǎ vǎ càháⁿ ñáyiú cuëndá-güedé sǎ ñà túú quide ndáá-güedé. Te na cùu-güedé cue téè ndèca ñⁿ caa-ni ñadihí, te na cùu-güedé cue téè ñá túú quide cutexínu ndècu, te na cùu-güedé cue téè quide nchaa nàcuáa tàú-xi cunduu, te na cùu-güedé cue téè sǎñaha núu vehe ndetatú nchaa ñáyiú ñùhu ichi, te na cùu-güedé cue téè dànehé ñáhá vǎha xii ñáyiú tnúhu Yá Ndiòxí. ³ Te vá cúú-güedé cue téè quihu, te ni vǎ cúú-güedé cue téè ndècu pletú, te ni vǎ cúú-güedé cue téè dìcò-ni ducaⁿ nihí díhúⁿ, te ni vǎ cúú-güedé cue téè sàni iní nàá, te ni vǎ cúú-güedé cue téè ñùhu iní mee-ni díhúⁿ. Chi na cùu-güedé cue téè

váha iní-xi te cunduu càhnu iní-güedé. ⁴ Te na cùu-güedé cue téé ío váha sànu ichi ñadihí-xi ndihí landú-xi, te na cùu-güedé cue téé quide nacuáa sàndáá iní ñáhá landú-xi cuendá canehé-güexi sá yíñuhu núú-güedé. ⁵ Chi núu cùu-güedé cue téé ñá ndácú cànuichi ñadihí-xi ndihí landú-xi, te vá ndácú-güedé quindaha-güedé cue ñáyiu ndècu ichi Yá Ndiöxí. ⁶ Te vá cúú-güedé cue téé íchí ni sàndáá iní-xi tnúhu Yá Ndiöxí, chi na cuáháⁿ te cada nínu-güedé méé-güedé te cuíta nihnu-güedé dàtná ní xíta nihnu sácuihná. ⁷ Te xini ñuhu-xi cuu-güedé cue téé càháⁿ váha ñáyiu cuendá-xi, cuéi ñá díú ñáyiu ndècu ichi Yá Ndiöxí cuendá sá vǎ cuátnuhu ñaha ñáyiu xii-güedé, chi núu ñáhá te cudana te sácuihná quesaha-xi tàxi tnuní ñáhá-xi xii-güedé.

Cue téé chindee ñaha xii cue téé yindaha ñaha xii ñáyiu ndècu ichi Yá Ndiöxí

⁸ Te tnàhá cue téé chindee ñaha xii cue téé yindaha ñaha xii ñáyiu ndècu ichi Yá Ndiöxí xini ñuhu-xi cuu-güedé cue téé quide nchaa nacuáa tàú-xi cunduu, te vá cúú-güedé cue téé càchí sá càháⁿ ndáá te ñá ndáá, te ni vǎ cúú-güedé cue téé quihu, te ni vǎ cúú-güedé cue téé sàni iní-xi dicó-ni ducaⁿ níhí dihúⁿ. ⁹ Te xini ñuhu-xi cuu-güedé cue téé ñá túú dàña ndeé sàndáá iní tnúhu Yá Ndiöxí, te na cùu-güedé cue téé ío váha cùu iní-xi cuendá nchaa sá váha quide-güedé. ¹⁰ Te

xini ñuhu-xi coto ndeé ñáhá xii-güedé te núu cùu-güedé cue téé quide váha, te núu cùu-güedé cue téé quide váha ña te cuu chindee-güedé cue téé yindaha ñaha xii ñáyiu ndècu ichi Yá Ndiöxí. ¹¹ Te tnàhá tucu nchaa ñáyiu dihí ná càdá-yu nchaa nacuáa tàú-xi cunduu, te vá cùnduu yiti yuhú-yu, te ni vǎ cúú-yu ñáyiu quide cutexínu ndècu, te na cùú-yu ñáyiu ío váha quide ndáá. ¹² Te nchaa cue téé chindee ñaha xii cue téé yindaha ñaha xii ñáyiu ndècu ichi Yá Ndiöxí, xini ñuhu-xi cuu-güedé cue téé ndècu ñⁿ caa-ni ñadihí-xi, te na cùu-güedé cue téé sànu ichi váha ñadihí-xi ndihí landú-xi. ¹³ Te núu na cada ndáá-güedé chindee-güedé cue téé yindaha ñaha xii ñáyiu ndècu ichi Yá Ndiöxí, te canehé-yu sá yíñuhu núú-güedé, te ducaⁿ te vá cúú càháⁿ núú-güedé càháⁿ-güedé núú ñáyiu tnúhu Xitohó Jesu-ristú sá sàndáá iní-güedé.

Ío càhnu cuu tnúhu càháⁿ Yá Ndiöxí

¹⁴ Te cuení-í ndihí-ni quixi coto ñaha-í xii-n dico díhna-gá cádúha-í tutú-a daquixi-í ndaha-n ¹⁵ chi na cuáháⁿ cuyaa-í. Te xíaⁿ núu càdúha-í tutú-a daquixi-í ndaha-n cuendá cutnùní iní-n nǎsa cada-n cùndecu-n ndihí nchaa ñáyiu ndècu ichi Yá Ndiöxí. Te ñáyiu-áⁿ cúú-yu dàtná ñⁿ vehe cùu cuendá Yá Ndiöxí Yaá ndécú nchaa nduu nchaa quíú, chi ndècu ndihí ñaha-gá xií-yu, te cùú-yu ñáyiu càháⁿ

váha cuendá tnúhu-gá. ¹⁶ Te cùtnuni ndáá iní-ó sã ïo càhnu cuu tnúhu càháⁿ Xítohó Jesucristú, tnúhu sá càháⁿ nàcuáa ndùu ichi ndecu-o, te duha càháⁿ tnúhu-áⁿ:

Te ní quixi Yá cúu Ndiöxí ñuyíu-a ní cuu-gá ìⁿ ñáyiu,

te Espíritú Yã Ndiöxí ní cáháⁿ ndáá-xi sá cúu-gã ìⁿ Yaá ío váha quide ndáá,

te cue espíritú xínú cuèchi núú Yã Ndiöxí ní xiní ndáá-xi nchaa nàcuáa ní quide Yaá ní quixi ñuyíu-a.

Te ní xité nuu tnúhu-gá ñihí ñuyíu-a,

te ndèni ní cuu ní ngüta-yu sãndáá iní ñáhã-yu xii-gá,

te mee-gã cuándaa-gá andiu. Duha càchí tnúhu-áⁿ.

4

Ñáyiu dañã ñihnu vá quindáa-gá iní-yu Yá Ndiöxí

¹ Te Espíritú Yã Ndiöxí càháⁿ ndáá-xi sá sãá nduu dañã ñihnu dava ñáyiu ndècu ichi-gá vá quindáá iní ñáhã-gã-yu xii-gá, te ducaⁿ chi cue espíritú cùndìhi yucu ñávãha dandahú ñáhã-xí xii-yu, te mee-nã nchaa tnúhu càháⁿ nchaa ñáyiu cùndìhi nchaa espíritú-áⁿ cuhuⁿ iní-yu. ² Te nchaa ñáyiu ducaⁿ cùndìhi cue espíritú cùndìhi yucu ñávãha-áⁿ cúu-yu ñáyiu ío dandahú méé-xí chi càchí-yu sá càháⁿ ndáá-yu te ñá ndáá, te ñá túú tnáhí-gá ná quidé-xí iní-yu cuendá nchaa sá cuèhé sá

dúhá quidé-yu. ³ Te ñáyiu-áⁿ quesàhá-yu sá vã cúu càndeca tnaha ñáyiu, te ni vã cúu càxí-yu dava núú sã xíní-yu caxí-yu, dico Yá Ndiöxí ní cadúha-gá nchaa sá nchító-ó cuendá caxi-o, te cuiní-gá sá ncháá nchòo ñáyiu sãndáá iní tnúhu-gá ndacáⁿ táhú-ó núú-gã òré caxi-o. ⁴ Te nchaa sá ñi cadúha Yá Ndiöxí cúu-xí sã vãha te vá dáquèe tihú-ó, te xini ñuhu-xi ndacáⁿ táhú-ó núú-gã cuendá nchaa xíãⁿ. ⁵ Te Yá Ndiöxí càchí-gá sá méé-gã quidé-gã cúu-xí sã vãha sá cúu-xí-ó te núu na ndàcáⁿ táhú-ó núú-gã.

Tée quide ndáá xínú cuèchi núú Xítohó Jesucristú

⁶ Te núu na dàcuaha-n ñáyiu ndècu ndìhi-o ichi Xítohó Jesucristú nchaa nàcuáa càháⁿ-í-a ña, te cuu-n ìⁿ téé quide ndáá xínú cuèchi núú-gã, te nducu ndèe-ni-n dacuaha-n tnúhu Yá Ndiöxí sá sãndáá iní-n, te canchicúⁿ ñihnu-ni-n càda-n nchaa nacuáa càháⁿ-gá, te núu ducaⁿ nà cada-n, te níhí ndéé-n cùndecu-n ichi-gá. ⁷ Te vá cádá cuendá-n nchaa cuendú cuèhé cuendú duha càháⁿ ñáyiu, ndìhi nchaa dava-gá cuendú sá ñà túú nandìhi cuendá sá ñà túú nã cumání-n cùndecu-n núú Yá Ndiöxí. ⁸ Te núu ìⁿ chiuⁿ cada-o te nacaá luha yiqui-o te nandìhi-xi luha, dico ío-gá nandìhi-xi te núu cada-o sã cùndècu yíñuhu-o núú Yã Ndiöxí. Te núu ducaⁿ na càda-o te cùu-xi ìⁿ sá vãha sá cúu-xí-ó vitna, te ni caa ñi quihíⁿ ducaⁿ cùu-xi ìⁿ sá vãha sá

cúu-xí-ó. ⁹ Te xini ñuhu-xi sá ncháá-ndó quindáá iní-ndó ncháa tnúhu càháⁿ-í-a chi cùu-xi tnúhu ndáá. ¹⁰ Te vitna ío nducu ndee-o quide-o chiúⁿ Yá Ndióxi Yáá ndécú ncháa nduu ncháa quiú te quide ndee iní-ó cuendá ncháa sá quidé ñaha ñáyiú xii-o, chi sàndáá iní-ó sá díú-gă chindèe ñaha-gá xii-o. Te ncháa ñáyiú cundahú iní ñáhá-gă te chindèe ñaha-gá xii-yu, dico ñáyiú sàndáá iní ñáhá xii-gá ío-gá cùnùú-yu chindèe ñaha-gá xii-yu, chi dàcácu nihnu ñaha-gă núú ùhú núú ndàhú.

¹¹ Te ncháa tnúhu-áⁿ cñaha-n xii-yu, te cáháⁿ-n dōho-yu sá ná càdá-yu ncháa nàcuáa càháⁿ-xi. ¹² Te ío cada váha-n cūndecu-n cuendá sá vǎ yōo daquèe tihú ñáhá xii-n cuendá sá cúu-n tēe cuechi, te ío váha cada-n ncháa sá tǎu-n càda-n cuendá ducaⁿ cānchicúⁿ nihnu ncháa ñáyiú ndècu ichi Yá Ndióxi, te vii vii cáháⁿ ndihí-n-yu, te cuu iní-n-yu, te ío quindáá iní-n Yá Ndióxi, te mee-ni sǎ vǎha caní iní-n, te ducaⁿ càda-n cuendá canchicúⁿ nihnú-yu. ¹³ Te nini cūyaa-í quixi-í, te ío nducu ndèe-n cáháⁿ ndodo-n tnúhu Yá Ndióxi núú-yu, te dacuàhá-n-yu nàcuáa càháⁿ tnúhu-gá, te cáháⁿ-n dōho-yu nàcuáa cuu vii cuu váha iní-yu cūndecú-yu ichi Yá Ndióxi. ¹⁴ Te vǎ dáñá ndèe-n càda-n nàcuáa ndúu tǎhú ní taxi Yá Ndióxi ní ngūndecu ndihí-n cūtnàhá ní sacáⁿ ndodo cue tēe yindaha ñaha xii ñáyiú ndècu ichi Yá Ndióxi ndaha-güedé díquí-n, te ní

cachí tnúhu-güedé sá dúcáⁿ ní cuiní Yá Ndióxi cunduu.

¹⁵ Te ni yùhu ni iní-n càda-n ncháa nacuáa càháⁿ-í-a cuendá sá ná quini ñáyiú sá ío-gá váha ta quide-n cuáháⁿ. ¹⁶ Te ío váha cundehe-n ncháa nacuáa quide-n, ndihí ncháa nàcuáa dānehé-n-yu, te vǎ dáñá ndèe-n dùcaⁿ cada-n. Te núu ducaⁿ na càda-n te nduu tǎhú-n cūndecu váha-n núú Yá Ndióxi ni caa ni quihíⁿ ndihí ncháa ñáyiú na tédóho ncháa tnúhu càháⁿ-n.

5

Nàcuáa tàú-xi cada-o cūndecu-o ndihí ñáyiú sàndáá iní tnúhu Yá Ndióxi

¹ Te vǎ ténáa-n ncháa cue tēe cūu sacuéhé chi vii vii cáháⁿ-n dōho-güedé, te cada iní-n sǎ dàtná tǎtá-n cūu-güedé, te diu-ni ducaⁿ vii vii cáháⁿ-n dōho ncháa cue tēe cuechi, te cada iní-n sǎ dàtná cue ñani-n cūu-güedé. ² Te diu-ni ducaⁿ vii vii cáháⁿ tucu-n dōho ncháa ñáyiú dihi ñáyiú cūu sacuéhé, te cada iní-n sǎ dàtná nǎná-n cūú-yu, te diu-ni ducaⁿ vii vii cáháⁿ tucu-n dōho ncháa ñáyiú dihi ñáyiú cuechi, te cada iní-n sǎ dàtná cue cúha-n cūú-yu, te ío cuu váha iní-n òré ducaⁿ cáháⁿ-n dōho ncháa ñáyiú cuechi-áⁿ.

³ Te canehe-n sǎ yíñùhu núú ñáyiú dihi ní quendóo quèé, te chindèe-n-yu núu ndàhú-yu. ⁴ Te núu ñⁿ ñaha quèé ndécú cuè déhe-aⁿ àdi cue déhe ñani-aⁿ, te ío xini ñuhu-xi cada-güexi ncháa nacuáa tàú-xi cūnduu núú-aⁿ chi ducaⁿ cuini

Yă Ndiõxí cada-güexi. Te núu ducaⁿ na càda-güexi te nànchocáva-güexi quìde-güexi sá vâha sá cúú-xí ñăyiu ní dâcuéhnú ñàha xii-güexi. Te núu ducaⁿ na càda-güexi te quìde váha-güexi te ío nduu vétú iní Yă Ndiõxí. ⁵ Te ñăyiu quèé ñăyiu ndàhú ndécú ìchi Yá Ndiõxí sàndáá iní-yu sá díú-gă chindèe ñaha-gá xii-yu, te cuèi nduu cuèi niú ñá túú dàña ndeé-yu càháⁿ ndihì ñàhá-yu xii-gá. ⁶ Te nchaa ñăyiu quèé cùdí iní quidé nchàa sá cuèhé sá dúhá cùú-yu dàtná ñăyiu ní xihí cuèi ndècu vívũ-yu. ⁷ Te cúñaha-n xii nchaa ñăyiu sá ná cáda-yu nchaa tnúhu càháⁿ-í-a cuèndá sá ñà túú nâ cumáni-yu cundecú-yu, te ducaⁿ vâ yõ cáháⁿ cuèhé cuèndá-yu. ⁸ Te ío xini ñuhu-xi chindeé-yu cue tnàha ñăyiu-yu, dico ío-gá xini ñuhu-xi chindeé-yu cue ñăyiu cùu ndi meé-yu ndècu ndihí-yu, te núu vá dúcáⁿ càdá-yu te ñá túú-gă sàndáá iní-yu cadá-yu nàcuáa càháⁿ Yă Ndiõxí. Te sá dúcáⁿ ná càdá-yu te vihi-gá quidè-yu dâcúúxí ñăyiu ndècu ìchi cuehé ìchi duha.

⁹ Te chido tnùnì-n mèe-ni ñăyiu quèé ñăyiu sa ndècu únídico cuíá-xi àdi vihi-gá cuèndá ñăyiu-áⁿ cadá-yu nchaa nàcuáa cuíní Yă Ndiõxí núu nchàa ñăyiu ndècu ìchi-gá, te ñăyiu-áⁿ xini ñuhu-xi cuú-yu mee-ni ñăyiu ní quide ndáá ní xindecu ndihì yii-xi. ¹⁰ Te na cùú-yu ñăyiu quèé quidé vâha cùdiu núu

nchàa ñăyiu, te na cùú-yu ñăyiu quèé xini canu ìchi váha cue landú-xi, te na cùú-yu ñăyiu sãñaha nùu vehe ndetatú cue ñăyiu ñùhu ìchi, te na cùú-yu ñăyiu ndècu túha quide nani chiúⁿ cuendá cue ñăyiu ndècu ìchi Yá Ndiõxí, te na cùú-yu ñăyiu chindee nchaa ñăyiu ndècu ndihì tnúndòho tnúhu ndàhú, te na cùú-yu ñăyiu ñá túú dàña ndeé quidé nchàa núu sã vâha.

¹¹ Te vá chidó tnùnì-n ñăyiu quèé ñăyiu ñá túú ndècu únídico cuíá-xi cada chiúⁿ Yá Ndiõxí, chi núu cuechi-gă-yu ña, te vá cùndáá-yu cadá-yu chiúⁿ-gá, chi quesàhá-yu natnándaha tucú-yu. ¹² Te sá cuèndá xiãⁿ te nacháhu-yu núu Yă Ndiõxí, chi vá cáda-gă-yu nàcuáa ní cuu tnúhu cadá-yu ni cùu. ¹³ Te nguíta-yu cani iní-yu quíhíⁿ-yu ndi vehe ndi vehe caca nihní-yu, te nchaa ñăyiu ducaⁿ quìde ío cùu cuhndú-yu, te cùyiti yuhú-yu, te ndèni ní cuu cuáháⁿ-yu chinee díquíⁿ-yu vehe tnàha ñăyiu-yu ndèhé-yu núu nása ndécú-yu, te ñá túú tàú-yu ducaⁿ càdá-yu, te càháⁿ-yu mee-ni tnúhu sá ñà túú nàndíhi. ¹⁴ Núu xiãⁿ cuíní-í sá ncháá ñăyiu quèé ñăyiu cuechi na nàtnándaha tucú-yu cuèndá cuú-yu náná, te ducaⁿ càdá-yu nchaa sá xini ñuhu-xi cadá-yu vehé-yu, te núu ducaⁿ na càdá-yu, te nchaa ñăyiu cùu úhú iní ñàhá xii-o vá nihí-gá-yu tnúhu cáháⁿ cuèhé-yu cuèndá tnúhu Yá

Ndiöxí. ¹⁵ Te dava ñáyiú quèé ndécú ìchi Yá Ndiöxí ní cùu ní dǎñǎ-yu te ní tñí-yu tnúhu càháⁿ sácúíhná.

¹⁶ Te núu dava ñáyiú ndècu ìchi Yá Ndiöxí ndécú ndìhí-yu ìⁿ ñaha quèé cúú ndì meé-yu ña, te tàú-yu chindee ñàhá-yu xii-aⁿ cuèndá sá vǎ ïo chi chiúⁿ-aⁿ nchaa ñáyiú ndècu ìchi Yá Ndiöxí, te ducaⁿ te nchaa ñáyiú ndècu ìchi-gá-áⁿ nìhí ndéé-gǎ-yu chindéé-yu dava-gá ñáyiú quèé ñá túú vèdana ndècu ndìhi.

¹⁷ Te nchaa cue téé ïo váha quède yíndaha ñaha xii ñáyiú ndècu ìchi Yá Ndiöxí ïo xìni ñuhu-xi canehé sá yíhí ñuhu núú-güedé, te chindee ñaha xii-güedé. Te uuⁿ-gá tàú ñáyiú ducaⁿ càdá-yu sá cúú-xí nchàa cue téé ni yùhu ni iní càháⁿ tnúhu-gá. ¹⁸ Te núú tùtú Yǎ Ndiöxí càchí-xi: “Vá chíhí-ndó ñunu yuhu ndicutu oré dǎnchíhí-dí tríú”, duha càchí-xi. Te càchí tucu-xi ìngá xichi: “Ìⁿ téé quède chiuⁿ dacuití tàú-xi sá cúhúⁿ yǎhu-dé”, duha càchí-xi núú tùtú-gá.

¹⁹ Te núú ïo ñáyiú véxi sàcáⁿ cuèchi núú-n cuèndá ìⁿ téé yíndaha ñaha xii ñáyiú ndècu ìchi Yá Ndiöxí ñá, te cada cuèndá-n tnúhu càháⁿ-yu te núú véxi-yu ndìhi úú àdi úní ñáyiú càháⁿ ndáá nàcuáa ní cuu, áⁿ núú ñáhá te vǎ càdá cuèndá-n tnúhu càháⁿ-yu. ²⁰ Te núú cue téé yíndaha ñaha xii ñáyiú-áⁿ ndécú cuèchi-güedé, te cáháⁿ-n dǒho-güedé núú nchàa ñáyiú ndècu ìchi-gá cuèndá sá dává-gǎ-yu vǎ

cúyíⁿ-yu ducaⁿ càdá-yu. ²¹ Te Yá Ndiöxí ndìhi Xítohó Jesucristú náhá-gǎ ndìhi cue espíritú xínú cuèchi núú-gǎ sá yǎhú càháⁿ-í dǒho-n sǎ càdá-n nchàa nacuáa càháⁿ-í-a, te ìⁿ-ní càháⁿ ndìhi-n cuè téé xìni tnáhá ndìhi-n, ndìhi cue téé ñá túú xìni tnáhá ndìhi-n. ²² Te vǎ ïo cundihí iní-n tàxi ndecu-n ìⁿ téé quíndaha ñaha xii ñáyiú, chi díhna-gá cada cuèndá-n te núú cùu-dé ìⁿ téé quède ndáá, chi núú cuèndá-ni na tàxi ndecu-n-dé te vǎ càdá ndáá-dé, te yòhó ndaa díquí-n cuèndá nchaa sá cuèhé sá dúhá càda-dé, te ïo coto-n mèe-n vǎ càdá-n nì ìⁿ sá cuèhé sá dúhá.

²³ Te ducaⁿ ïo mee-ni cùhú xiti-n te vǎ cóhó-n mèe-ni ndute, chi tnáhá luha vinú ndéhé yoho yàha stilé coho-n cuèndá cada tátna-xi.

²⁴ Te dava ñáyiú cùtnuní nchaa sá cuèhé sá dúhá quède-yu, te cùtnuní tucu sá náchǎhu-yu na sàá nduu, te dava tucu-yu chi ñá túú cùtnuní nchaa sá cuèhé sá dúhá quède-yu, dico na sàá nduu cùndáá cuèchi-yu te dàvá-áⁿ cutnùnì. ²⁵ Te ducaⁿ sǎtnahá-xi cùu nchaa sá vǎha quède dává-yu chi cùtnuní, te cuèi ñá túú cùtnuní òré-ni dico dacuití sǎ sàá nduu cùtnuní.

6

¹ Te nchaa ñáyiú ndècu tnuú quède chiúⁿ ndìhi ìⁿ patróóⁿ xìni ñuhu-xi ïo canehé-yu sá yíñuhu núú-dé cuèndá sá vǎ càháⁿ cuèhé ñáyiú cuèndá Yǎ Ndiöxí, te ni vǎ càháⁿ cuèhé-yu cuèndá tnúhu-gá.

2 Te núu pàtróonⁿ cue ñáyi u xinu cuechi-án sàndáá iní-dé Yá Ndiöxí, te ñá díú sá dúcáⁿ sàndáá iní-dé Yá Ndiöxí te vá cánèhé-yu sá yíñuhu núu-dě, chi uuⁿ-gá tau-yu cada váha-yu cunu cuèchí-yu núu-dě, te ducaⁿ na càdá-yu chi xinu cuechí-yu núu tē sàndáá iní ndihí-yu tnúhu Yá Ndiöxí. Te vá dáñá ndèé-n dānehé-n-yu nchaa nācuáa càháⁿ-í-a, te cúñaha-n xii-yu sá ná càdá-yu.

Nduu vétú iní-ó cùndecu-o

3 Te ió cue tēe ñá túu tñi-güedé nācuáa càháⁿ tnúhu Xítohó Jesucristú, te cue tēe-án cāchí-güedé sá càháⁿ ndáá-güedé dico ñá ndáá, chi ñá túu càháⁿ-güedé nācuáa cuáháⁿ tnúhu-gá. Te nchaa tnúhu Xítohó Jesucristú cúu-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gá. 4 Te nchaa cue tēe ducaⁿ xiquide quide cahnu-güedé mēe-güedé dico ñá túu vèdana xini-güedé, te cue tēe-án ñá túu ndècu váha iní-güedé chi nāndi tnúhu sá ñá túu nāndihí cuiní-güedé cútnaha-güedé. Te ngüita-güedé cúu cuèdú iní tnáhá-güedé, te nā ndihí tnáhá-güedé, te xicuèhé tnáhá-güedé, te ñá túu-gá cúu váha iní núu tnáhá-güedé. 5 Te cue tēe-án mee-ni nāá-güedé chi ñá túu sàni váha iní-güedé, te ni ñá túu xini-güedé nācuáa cuáháⁿ tnúhu ndáá tnúhu Yá Ndiöxí, te cāchí-güedé sá ió váha cundecu-güedé ichi-gá chi sàni iní-güedé sá ió vai díhúⁿ nñhí-güedé cundecu

ndihí-güedé. Te yúhú càháⁿ-í dóho-n sá vā ñihí tnáhá-n ndihí nchaa cue tēe ducaⁿ xiquide. 6 Te ndáá sá ichi Yá Ndiöxí cúu-xí ñiⁿ ichi sá ió váha cundecu-o, dico xini ñuhu-xi nduu vétú iní-ó nācuáa ndècu-o ñuyíú-a. 7 Te nchoo cuè ñáyi u chi ñá túu vèdana nēhe-o ní quexio ñuyíú-a, te díu-ni ducaⁿ ñá túu vèdana canehe-o quñiⁿ òré ná cúu-ó. 8 Te ió xini ñuhu-xi nduu vétú iní-ó te núu ndècu-ni sá cūnchito-o ndihí dóo cuihnu-o. 9 Te ió ñáyi u ió cuiní-yu cuu cuicá-yu, te ñáyi u-án dācāhu iní ñáhá yūcu ñávāha xii-yu cadá-yu nāndi sá cuèhé sá dúhá, te nāndi-gá nchaa sá cuèhé sá dúhá cāhu iní-yu quidé-yu, te nchaa sá quidé-yu-án ñá túu vèdana nāndihí-xi chi uuⁿ-gá ndádá ndāhú ñáhá-xí xii-yu, te dācuíta niñnu ñaha-xi. 10 Chi nchaa ñáyi u ñuhu iní mee-ni díhúⁿ, te xíáⁿ quidé-xí ngüita-yu sàni iní-yu cadá-yu nāndi sá cuèhé sá dúhá. Te ió ñáyi u ndècu ichi Yá Ndiöxí te sá tnúhu ducaⁿ ñuhu iní mee-ni díhúⁿ ní dáñá-yu ñá túu-gá sàndáá iní ñáhā-yu xii-gá, te vitna ñá túu tnāhí-gá ndécú váha iní-yu.

Cahni iní-ó càda-o nchaa nācuáa càháⁿ Yá Ndiöxí chi sàndáá iní-ó-gá

11 Te yòhó tēe quide chiuⁿ Yá Ndiöxí xini ñuhu-xi vá cadá-n dātná quidé nchaa ñáyi u ní cāchí-í sá ñá túu quide ndáá, te vá dáñá ndèé-n càda ndáá-n cùndecu-n, te cada-n nācuáa nduu vétú iní Yá Ndiöxí, te ió quindáá

iní-n-gǎ, te cuu iní-n nchàa tnaha ñáyi-u-n, te cada càhnu iní-n nchàa sá ná yǎha-n cùndecu-n ichi-gá, te cunduu ndàhú iní-n. ¹² Te cahni iní-n càda-n nchaa nacuáa cuiní Yá Ndiöxí chi sàndáá iní-n-gǎ, te ío cuhuⁿ iní-n sá cùndecu-n ndihí Yá Ndiöxí ni caa ni quíhíⁿ, chi diu cuendá tnàhí-áⁿ ni cáhánⁿ ñáhá-gǎ xii-n, te ní cáhánⁿ ndáá-n núú vǎi ñáyi-u sá ío váha sàndáá iní-n-gǎ. ¹³ Te Yá Ndiöxí Yaá quidé nchìto nchaandi túhú sá ío ñuyúú nàha-gá sá càhán-í dóho-n vītna, te diu-ni ducaⁿ nàha tucu Xítohó Jesucristú Yaá ní cáhánⁿ tnúhu ndáá núú tē Pilatú ¹⁴ sá quindáá iní-n càda-n nchaa nacuáa càhánⁿ Yá Ndiöxí, te nchaa tnúhu càhán-gá cada-n nàcuáa vá dáquèe tihú ñáhá ñáyi-u xii-n, te ducaⁿ-ni càda-n ndéé ná sáá nduu quixi tucu Xítohó Jesucristú. ¹⁵ Te quixi tucu-gá chi ducaⁿ ní cachí Yá Ndiöxí cunduu, te mee Yá Ndiöxí náhá-gǎ ná nduu quixi tucu Xítohó Jesucristú. Te Yá Ndiöxí ío váha cùu iní-gá te ìⁿdì díí-ni-gǎ ío-gá cùnùu-gá dàcúúxí cuè téé tàxi tnuní ìⁿ ìⁿ nàcióⁿ ndihí nchaa dava-gá cue téé cùnùu, chi tàxi tnuní ñáhá-gǎ xii-güedé, te nchaa ñáyi-u ndècu ñuyúú-a tàxi tnuní-gá. ¹⁶ Te diu-gá cúú-gǎ Yaá ndécú nchàa nduu nchaa quíú, te ío càhnu cuu-gá chi dàtná dáyehé nchícanhii dáyehé-xi núú ndécú-gǎ, te vá yōo ìⁿ cùyìi dayatni núú ndécú-gǎ, te ni ñǎ túú ni ìⁿ ñáyi-u xìní ñáhá xii-gá te ni vá ndácù-yu quini ñáhǎ-yu

xii-gá. Te ío na cànehe nchaa ñáyi-u sá yíñùhu núú-gǎ ni caa ni quíhíⁿ, te ducaⁿ ío na tàxi tnuní-gá ni caa ni quíhíⁿ. Te ducaⁿ na cùnduu.

¹⁷ Te cáhánⁿ-n dóho nchaa ñáyi-u cuica ndècu ndihí nchaa sá ío ñuyúú-a cuendá sá vǎ cáda càhnú-yu mée-yu, te duuⁿ duuⁿ vá cùndéé iní-yu ni ìⁿ sá ndécú ndihí-yu chi vá cúdǐ-xi, te cáhánⁿ-n dóho-yu sá ná cùndéé iní-yu Yá Ndiöxí chi diu-gá cúú-gǎ Yaá ndécú nchàa nduu nchaa quíú, te chitu núú ndáhá tàxi-gá nchaa sá xíní ñùhu-o, chi cuiní-gá sá ío cuu váha iní-ó cùndecu-o. ¹⁸ Te cáhánⁿ tucu-n dóho-yu sá ná càdá-yu mee-ni sǎ váha, te cuendá nchaa sá váha cadá-yu-áⁿ te cuú-yu ìⁿ ñáyi-u cuica sǎ cúú-xí Yá Ndiöxí, te na cùndecu túha-yu chindéé-yu cue ñáyi-u ndàhú cuañáhá-yu sá xíní ñùhú-yu. ¹⁹ Te núu ducaⁿ na càdá-yu te Yá Ndiöxí cuañaha-gǎ sá ndúú tǎhǔ-yu na sáá nduu, te ngùndecu váha-yu ndihí-gá ni caa ni quíhíⁿ.

Tnúhu ndéé núú ní ndihí-ná

²⁰ Te yòhó té Timùteú càhán-í dóho-n sǎ ío cada cuendá-n vǎ dáma tnúhu ní taxi Yá Ndiöxí danèhé-n ñáyi-u, te vá cáda cuendá-n nchàa cuendú cuèhé cuendú duha ío ñuyúú-a chi ñǎ túú nàndíhí-xi, te ni vǎ cáda cuendá-n nchàa tnúhu xitnàha ñáyi-u càchí sá xicá nàha tnúhu cue téé túha chi ñǎ díú ìⁿ tnúhu ndáá cúú-xí. ²¹ Te ío ñáyi-u ñǎ túú-gǎ sàndáá iní-yu tnúhu Yá Ndiöxí, chi ní quide

cuendá-yu nchaa tnúhu xìca
naha ñáyi-áⁿ.

Te Yá Ndiǒxí ná chìndee
chítúu ñaha-gǎ xii-n. Te ducaⁿ
na cùnduu. Te ío cada ndee
ìní-nǎ vitna.

TUTÚ CÚÚ ÛÚ NÍ CADÚHA TÉ PĀBLÚ QUIHIⁿ NDAHA TÉ TIMŪTEÚ

*Té Pāblú cáduha-dé tutú
quíhiⁿ ndaha té Timūteú*

¹ Yúhú té Pāblú ní tendaha ñaha Yá Ndióxi cáháⁿ-í tnúhu Xítohó Jesucristú núú ñáyiú, chi ducaⁿ ní cachí Yá Ndióxi cunduu. Te cáháⁿ-í dàtná ní cachí Yá Ndióxi sá ncháá nchòo ñáyiú ndècu ndihi Xítohó Jesucristú naníhí tǎhú-ó. ² Te yúhú té Pāblú cáduha-í tutú-a daquixi-í ndaha yòhó té Timūteú chi ío cùu iní ñàhà-í xii-n, te diu-í ní sanu ichi ñaha-í xii-n ichi Xítohó Jesucristú, te xicáⁿ tǎhú-í núú Dütú Ndióxi ndihi núú Xítohó Jesucristú sá ío na chindee chitúu ñaha-gǎ xii-n, te cundǎhú iní ñàhà-gǎ, te ducaⁿ ndì nduú-gǎ ná cádá te ío váha cuu iní-n cùndecu-n.

*Cáháⁿ váha-o cuendá Xítohó
Jesucristú*

³ Te cuéi nduu cuéi niú ducaⁿ-ni cáháⁿ ndihi-í Yá Ndióxi cuendá-n, te ndacáⁿ tǎhú-í núú-gǎ, te xìnu cuechi-í núú-gǎ dàtná ní quide cue ñani tǎhà-í ní xindecu ndéé sanduu, te cùtnuní iní-í sá quidé ndáá-í núú-gǎ dàtná ní xóo cada-güedé. ⁴ Te ío sàni iní-í naníhí tǎhà-ó cuendá ío cudíi iní-í, chi ndàcu iní-í sá ío ní ndáhyú-n sǎ ndihú iní-n cùtnàhá ní quide ndee iní-í

tnàhá-ó. ⁵ Te nàha-í sá sàndáá ndisa iní-n Yá Ndióxi dàtná ní ngúita díhna-gǎ xitná-n tǎ Lòidá ndihi ñàná-n tǎ Eùnicé quidé-yu, te cùtnuní ndáá iní-í sá díú tǎhà-n ío váha sàndáá iní-n-gǎ.

⁶ Te xiǎⁿ dándàcu iní ñàhà-í xii-n cuendá sá ío-gǎ nducu ndèe-n cada-n chiuⁿ ní nduu tǎhú-n núú Yá Ndióxi cada-n, chi ní taxi-gǎ tnúhu ndee iní ní ngúndecu ndihi-n cùtnàhá ní sacáⁿ ndodo-í ndaha-í díquí-n sǎ díú chiuⁿ-gǎ cada-n. ⁷ Te Espíritú sá ní taxi Yá Ndióxi ndécú ndihi-o ñá túú cùu-xi ñⁿ Espíritú sá cádá nàcuáa yùhú-ó, chi cùu-xi ñⁿ Espíritú sá táxi tnúhu ndee iní cada-o chiuⁿ-gǎ, te diu-xi quide cuu iní tǎhà-ó ñⁿ ñⁿ-o, te diu-ni tucu-xi quide cùtnuní iní-ó nàcuáa cada-o cùndecu-o. ⁸ Te xiǎⁿ núú vá cúcàháⁿ núú-n cáháⁿ váha-n cuendá Xítohó Jesucristú, te nì vǎ cúcàháⁿ núú-n sǎ dúhá yìhi-í vecaá sá cuendá-gǎ, te xini ñuhu-xi sá tǎhà-n ndòho-n sá cuendá tnúhu-gǎ, te cundee iní-n ndòho-n, chi Yá Ndióxi chindee ñaha-gǎ xii-n. ⁹ Te Yá Ndióxi ní dácàcu nihnu ñaha-gǎ xii-o núú ùhú núú ndàhú, te ní cachí-gǎ sá cádá-ó nchàa nacuáa cuení méé-gǎ cunduu, te ducaⁿ ní quide-gǎ chi ducaⁿ ní sani iní méé-gǎ cunduu sá cádá váha ñaha-gǎ xii-o, te ñá díú sǎ ío váha quide-o ndecu-o ducaⁿ ni quide-gǎ. Te ndéé cùtnàhá vátá ngáva-gǎ ñuyíú ní cachí-gǎ sá cádá váha ñaha-gǎ xii nchaa nchoo ñáyiú ní ngúndecu ndihi Xítohó

Jesucristú vitna. ¹⁰ Te vitna cùtnuní iní-ó sã ïo váha quide ñaha-gá xii-o, chi ní quixi Xítoho Jesucristú ñuyíu-a ní dácacu nihnu ñaha-gã xii-o núú ùhú núú ndàhú, te Yaá-án ñi quide-gá cuendá sá vã cùú-gá-ó cùú dúcáⁿ-ó, chi ní cachí-gá sá cùndècu-o ñi caa ñi quíhíⁿ te núu na quindáá iní-ó tnúhu-gá.

¹¹ Te ní cachí-gá sá càháⁿ-í tnúhu-gá núú ñáyiú ñá túú cùu ñáyiú isràel te dacuàha váha-í-yu tnúhu-gá, te cuèi ndèni ní cuu ndècú-yu te quíhíⁿ-í càháⁿ-í tnúhu-gá núú-yu chi ducaⁿ ñi cachí-gá cunduu. ¹² Te cuendá xiáⁿ nándi sá ndóhò-í vitna cuendá-gá, dico ñá túú cùcahaⁿ núú-í chi cùtnuní váha iní-í nàcuáa sàni iní Xítoho Jesucristú Yaá sàndáá iní-í, te yúhú ní dáñà-í mée-í núú ndáhá-gã, te cùtnuní ndáá iní-í sá cóto ñaha-gá xii-í ndéé ná sàá nduu nàcuaca ñaha-gá.

¹³ Te vá dáñá ndèé-n càda-n nchaa nacuáa càháⁿ tnúhu váha ní dánèhé ñáhà-í xii-n, te ío quindáá iní-n Yã Ndióxi, te nchaa-o nàcuáa ndècu-o ndihí Xítoho Jesucristú ío cuu iní tnáhá-ó ñiⁿ ñiⁿ-o. ¹⁴ Te cada cuendá váha-n sã vã dáma tnúhu Yá Ndióxi sá ñi taxi-gá ndécú ndihí-n, te Espíritú-gá sá ñi taxi-gá ndécú ndihí-o chindee ñaha-xi xii-n.

¹⁵ Te yòhó sa xini-n sã nchàa ñáyiú ndècu distritú Àsiá, ñáyiú ní sàndáá iní tnúhu Xítoho Jesucristú ní dáñá ñáhá-yu xii-í, te tnáhá té Fígeló ndihí té Hèrmógenés

ní dáñá ñàha-güedé xii-í. ¹⁶ Te xicáⁿ táhù-í núú Xítoho Jesucristú sá ná chindee-gá cue ñáyiú cùu ndi mee té Onèsíforó, chi diu-dé ío vai xito ní quixi-dé ní quide cuendá ñáhá-dè xii-í, te ní taxi-dé tnúhu ndee iní, te ñá túú ní cùcahaⁿ núú-dè sá yíhí-í vecaá. ¹⁷ Te cùtnáhá ní xíndecu-dé ñuú Ròmá ducaⁿ-ni ñi xóo nanducu ñàha-dé xii-í ndèé ndéé naníhí ñáhá-dè. ¹⁸ Te xicáⁿ táhú tùcu-í núú Xítoho Jesucristú sá ná cùndahú iní ñáhá-gá xii-dé nduu na sàá cundáá cuèchi nchaa ñáyiú. Te yòhó sa xini ndáá-n sã ío ní chindee ñàha-dé xii-o cùtnáhá ní xíndecu-o ñuú Éfesú.

2

Tée quide ndáá xínú cuèchi núú Xítoho Jesucristú

¹ Te yòhó téé cùu datná ñiⁿ déhe mee-í ío nducu ndèe-n cada-n nacuáa níhí ndéé-gá-n cùndecu-n ichi Xítoho Jesucristú chi diu-gá chindee ñàha-gá xii-n. ² Te nchaa tnúhu sá ñi dánèhé ñáhà-í xii-n ndihí nchaa dava-gá ñáyiú, xiáⁿ danèhé-n dàva-gá cue téé quide ndáá cuendá danèhé-güedé dava-gá ñáyiú.

³ Te cahni iní-n ndòho-n cunu cuechi-n núú Xítoho Jesucristú datná cuini-n ndòho ñiⁿ sandadú sàhni iní-dé xínú cuèchi-dé. ⁴ Chi ñi ñiⁿ sandadú ñá túú nãgá sání iní-dé cada-dé òré xínú cuèchi-dé cuendá cudíu-dé núú tée taxi tnuní ñáhá. ⁵ Te diu-ni ducaⁿ sãtnáhá-xi cùu tucu ñiⁿ téé dàdiqui, chi núu

vá dádiq̄ui-dé nàcuáa tàú-xi cunduu te vá nihí-dé sá ndúú tǎhú-dě. ⁶ Te núu ìⁿ téé x̄inu cuechi ío ndúcu ndee-dé quidé chiùⁿ-dé chíhí-dě tatá, te diu-dé tàú-dé díhna-gá-dé níhí-dě sá cúhúⁿ yǎhu-dé. ⁷ Te cani iní-n nchaa tnúhu cǎháⁿ-í-a, te Xítóhó Jesucristú chindee ñaha-gá xii-n te tecú tnùní-n nchaa.

⁸ Te ndacu iní-n sǎ Xítóhó Jesucristú ní cuu-gá ñani tnáhá ndi Dáví, te ní xihí-gá te ní ndoto-gá, te diu ducaⁿ ndúu tnúhu dǎnehé-í ñáyu.

⁹ Te ío dǎndoho ñaha ñáyu xii-í cuendá sá cǎháⁿ-í tnúhu-gá, te quide ñahá-yu xii-í dátǎn quidě-yu ìⁿ téé ní quide ìⁿ cuéchi cǎhnu, chi ní chihi ñáhá-yu vecaá xii-í, dico tnúhu Yá Ndiǒxí chi vá ndácú-yu nganí-yu. ¹⁰ Te xǎⁿ núu cuěi nǎndi cùu nchaa sá quidé ñahá-yu xii-í, dico quide cǎhnu iní-í cuendá sá nánihí tǎhú tnáhá nchaa dava-gá ñáyu cuíni Yá Ndiǒxí cundecu ndihi-gá, chi nchaa ñáyu na tnáhá tnúhu ndihi Xítóhó Jesucristú nduu tǎhú-yu cundecú-yu ndihi-gá núú ío váha cǎa ndecu-gá ni caa ni quíhíⁿ.

¹¹ Te xéhé cúú-xí ìⁿ tnúhu ndáá cuíti:

Nchoo cùu-o datná ñáyu ní xihí ndihi Xítóhó Jesucristú chi ñá túú-gǎ ndécú-ó ìchi cuehé ìchi duha,

te xǎⁿ núu cuěi na sǎá nduu cúú-ó ñùyíú-a, dico diu-ni cundecu-o ndihi-gá.

¹² Te núu na cùndee iní-ó ndòho-o nǎndi sá

ndóhó-ó sǎ cuendá-gá, te sǎá nduu te cunuu-o ndihi-gá.

Te núu na cǎháⁿ-ó sǎ ñá túú xini-ó-gǎ, te diu-ni ducaⁿ cǎñaha-gǎ xii-o sǎ ñá túú xini ñáhá-gǎ ná sǎá nduu cǎda ndáá-gá cuéchi nchaa ñáyu.

¹³ Te núu nchoo ñá túú quide ndáá-ó ndecu-o núú-gǎ ñá, dico mee-gǎ chi ío ndáá quidé-gǎ, chi Yá Ndiǒxí nchaa sá sání iní-gá quidé-gǎ.

Tée quide nacuáa ndúu vétú iní Yá Ndiǒxí

¹⁴ Te dǎndacu iní-n nchaa ñáyu ndecu ndihi-o ìchi Xítóhó Jesucristú nchaa tnúhu cǎháⁿ-í-a, te cúñaha-n xii-yu sá Xítóhó Jesucristú cuíni-gá sá ñá túú-gǎ nǎndi tnúhu cútnáhá-yu, chi nchaa tnúhu cǎháⁿ-yu-áⁿ dácuíta nihnu-xi ñáyu ndèdóho ñaha xii-yu, chi ñá túú vǎdana nǎndihi nchaa tnúhu-áⁿ.

¹⁵ Te ío nducu ndèe-n cada ndáá-n cùndecu-n núú Yá Ndiǒxí, te cada-n chiùⁿ-gá nàcuáa nduu vétú iní-gá, te cǎháⁿ ndáá-n tnúhu-gá, cuendá sá vǎ cúcàhⁿ núú-n núú-gǎ.

¹⁶ Te vá cǎdá cuendá-n nchaa tnúhu sá ñá túú vǎdana nǎndihi cǎháⁿ ñáyu cuendá Yá Ndiǒxí, chi nchaa ñáyu cǎháⁿ tnúhu-áⁿ ndihi nchaa ñáyu sǎcùndedóho ñaha xii-yu uuⁿ-gá quidě-yu nchaa sá cuéhé sá dúhá.

¹⁷ Te nchaa tnúhu-áⁿ cùténuu-xi dátǎn quidé ìⁿ cuéhé sǎ ñani ñaha xii ñáyu xité nuu-xi nihí yiqui cúñú-yu. Te

tnàhá té Himènéú ndihí té Fìletú càháⁿ-güedé tnúhu-áⁿ quidé-güedé dàtná quidé ñáiyu-áⁿ. ¹⁸ Te cue téé-áⁿ ñà túú-gã càháⁿ ndáá-güedé dàtná càháⁿ tnúhu Yá Ndiõxí, chi càchí-güedé sá ncháá nchò ñáiyu ndècu ichi Yá Ndiõxí cúú-ó dàtná cue ñáiyu sa ní ndoto, dico na cùú ndisa-o te vá ndótó-gã-ó càchí-güedé. Te dava ñáiyu ní dǎñá-yu sá sàndáá iní-yu tnúhu Yá Ndiõxí sá dúcáⁿ càháⁿ-güedé. ¹⁹ Te cuéi ducaⁿ quide davá-yu, dico Yá Ndiõxí ní taxi ndecu-gá cue ñáiyu ni yùhu ni iní ndécú ichi-gá, te cùtnuní sá ndécú ndihí ñaha-gá xii-yu, chi ìⁿ xichi núú tütú-gá càchí-xi sá méé-gã xini-gá cue ñáiyu cùu cuendá-gá. Te ingá tucu xichi núú tütú-gá càchí-xi sá ncháá ñáiyu sàndáá iní ñáhá xii Xítóhó Jesucristú xini ñùhu-xi sá vǎ cùndècu-gá-yu ichi cuèhé ichi duha.

²⁰ Te ñáiyu cuica chi ndècu ndihí-yu vehé-yu cóhó sǎ ñi cuáha mee-ni dǐhúⁿ cuááⁿ, ndihí cóhó sǎ ñi cuáha mee-ni dǐhúⁿ cuixiⁿ, te nchaa cóhó-ǎⁿ cúú-xi dàtná cue ñáiyu ñá túú nǎ cúmǎní núú Yá Ndiõxí. Te ndècu ndihí tucú-yu cóhó sǎ ñi cuáha mee-ni ñùhu, ndihí cóhó sǎ ñi cuáha mee-ni yùtnu, te nchaa cóhó-ǎⁿ cúú-xi dàtná cue ñáiyu ñá túú quide ndáá núú Yá Ndiõxí. ²¹ Te nchaa ñáiyu ío ndècu yiñuhu núú Yá Ndiõxí cúú-yu ñáiyu ñá túú ñihí tnáhá ndihí cue ñáiyu ñá túú quide ndáá núú-gã, te cue ñáiyu ndècu

yiñuhu núú-gã-áⁿ ñà túú tnàhí quée cáva-yu quidé-yu nchaa chiúⁿ tahu-gá.

²² Te ío cada cuendá-n vǎ cáda-n nàcuáa quide cue téé cuechi ndècu ichi cuehé ichi duha, te cada-n nàcuáa cundáá-n cùndecu-n ichi Yá Ndiõxí, te quindáá iní-n-gã, te cuu iní-n ncháa ñaha ñáiyu-n, te cundecu nahi-n, chi ducaⁿ tàú-xi cada-n ndihí nchaa dava-gá ñáiyu sa ní nduu ndoo ní nduu nine iní-xi ñáiyu càháⁿ ndihí ñaha xii Yá Ndiõxí. ²³ Te vá cáda cuendá-n ñi ìⁿ tnúhu xitnàha ñáiyu chi ñá túú vèdana nàndíhi-xi, chi núu na càda cuendá-ó te dicó dánáá ñáhá-xi. ²⁴ Chi nchaa cue téé xinu cuechi núú Yá Ndiõxí xini ñùhu-xi càháⁿ vǎha-güedé ndihí nchaa ñáiyu, te danèhé ñáhá vǎha-güedé tnúhu-gá, te cunduu càhnu iní-güedé te vá nǎá-güedé. ²⁵ Te vii vii càháⁿ-güedé dóho nchaa ñáiyu sǎá iní-xi, ñáiyu ñá túú tnàhá iní tnúhu ndáá tnúhu Yá Ndiõxí, te ducaⁿ te cudana Yá Ndiõxí cada-gá te ndixi túu iní-yu sá ñà túú quide vǎha-yu ndécú-yu te quindáá iní-yu tnúhu-gá. ²⁶ Te ducaⁿ te cùtnuní iní-yu sá sàcuíhná cùnùu-xi taxi tñuní ñáhá-xi xii-yu, chi dàcahu iní ñáhá-xi xii-yu quidé-yu nchaa nàcuáa cùu iní-xi ni cùu.

3

Nàcuáa cada ñáiyu òré sa ta cùyatni sǎá nduu quixi tucu Xítóhó Jesucristú

¹ Te càchí tnúhu-í xii-n cuendá cunaha-n nàcuáa cada-xi òré sa ta cùyatni

sáa nduu quixi tucu Xítoho Jesucristú, chi dává-án ïo cada úhú-xi. ² Chi ngúita ñáyiú cuhuⁿ iní-yu mee-ni sá cúú-xí meé-yu, te cuhuⁿ iní-yu mee-ni díhúⁿ, te ío cada càhnú-yu meé-yu, te cunduu yíchí iní-yu, te cáháⁿ cuèhé-yu cuèndá Yá Ndiöxí, te vá quíndáá-gá iní-yu ni tātá-yu ni nānā-yu, te ni vā ndàcáⁿ táhú núú tnáhā-yu cuèndá nchaa sá vāha cada tnàhá-yu, te cadá-yu mee-ni sá ñà túú tnàhá iní Yá Ndiöxí. ³ Te vá cúú iní tnáhā ndí meé-yu, te nāá-yu te vá cuánāá-yu, te tee tnàhá-yu cuéchi neñúú, te vá cuánāá-yu cadá-yu nchaa sá cuèhé sá dúhá sàni iní-yu, te ío cunduu cuihna iní-yu, te vá tnàhá iní-yu nchaa sá vāha. ⁴ Te dayuhu cuāha cuèndá tnáhā-yu núú cuè téé cùchiuⁿ, te ío cunduu yíi iní-yu cadá-yu nāndí sá ñà túú vāha, te ío cada nínu-yu meé-yu, te mee-ni nchāa sá cúdíⁿ iní-yu cadá-yu, te vá cúdíⁿ iní-yu nanducu nihnú-yu Yá Ndiöxí. ⁵ Te quesāhá-yu sá tnàhá-yu ndécú-yu ichi Yá Ndiöxí dico vá cadā-yu nchaa nācuāa càháⁿ-gá.

Te yúhú càchí tnúhu-í xii-n sá vā nihí tnáhā-n ndíhi nchaa ñáyiú ducaⁿ quíde. ⁶ Te dava ñáyiú-án quíhíⁿ-yu dava vehe núú xíndecu ñáyiú, te ngúita-yu dandāhú-yu ñáyiú díhí ñà túú xíní dana cuèndá Yá Ndiöxí, te ñáyiú díhí-án cúú-yu ñáyiú ndècu vihi cuéchi-xi, chi ío cùdíⁿ iní-yu

quidé-yu nchaa nāni sá cuèhé sá dúhá sàni iní-yu. ⁷ Te cuèi ío dàcuahā-yu, dico ñà túú cùtnuní iní-yu nāsa cuáhāⁿ tnúhu ndāá tnúhu Yá Ndiöxí. ⁸ Te ñáyiú ducaⁿ dāndahú ñáhā xii cue ñáyiú díhí-án ñà túú càháⁿ vāha-yu cuèndá tnúhu Yá Ndiöxí, chi quidé-yu dàtná ní quíde ndíi Jānēs ndíhi ndíi Jāmbrés chi cue ndíi-án ñà túú ní cùu vāha iní cue ndíi núú ndíi Moisés cuèndá tnúhu ní cáháⁿ ndíi. Te ñáyiú-án cúú-yu ñáyiú sàni iní mee nìne-ni nchaa sá cuèhé sá dúhá, te cuèi càchí-yu sá sàndāá iní-yu Yá Ndiöxí dico ñà ndāá sá sàndāá iní ñáhā-yu xii-gá. ⁹ Dico vá ndácú-gā-yu dandāhú-yu vāi ñáyiú, chi nchaa ñáyiú cutnùní iní-yu sá ïo nīi díquí-yu, te ñà túú càháⁿ ndāá-yu dàtná ní quíde cue téé úú ñà túú ní tnàhá iní tnúhu ní cáháⁿ ndíi Moisés.

Té Pāblú dāsāhú-dé té Timúteú

¹⁰ Te yòhó quidé-n nchāa nacuāa ní dānèhé ñáhā-í xii-n, te ní xíní-n nchāa nacuāa quíde-í ndécú-í, te cùtnuní iní-n nācuāa sàni iní-í ndécú-í ñuyú-a, te xíní-n sá ïo sàndāá iní-í Yá Ndiöxí, te ío càhnu iní-í, te cùu iní-í nchaa ñáyiú, te xíní tucu-n sá ïo quíde cahnu iní-í cuèi nāndí sá yāha-í ndécú-í dico ñà túú dàña ndeé-í ichi-gá. ¹¹ Te ío vāi sá quíde ñāha ñáyiú xii-í dāndòho ñāhá-yu sá ndécú-í ichi Xítoho Jesucristú, te sa nāha tucu-n datná ní quíde ñāhá-yu xii-í cútnāhá ní xíndecu-í ñuú Antiòquiá, ndíhi ñuú Iconiú, ndíhi ñuú

Lìstrá, chi ío ní dándóhó ñàhá-yu xii-í sá cuendá-gá. Dico Xítohó Jesucrìstú ío ní xito ñaha-gã xii-í te ní chindee ñaha-gá cuèi nándi cùu sá ñi yáha-í. ¹² Te na càchí tnúhu ndáá-í xii-n sã ïo vãi sá ñà túu vãha cada ñaha ñãyiu xii nchaa ñãyiu cuìní sá ñà túu ñã cumání nũú Yã Ndiõxí cuendá sá ndécú ndihí-yu Xítohó Jesucrìstú. ¹³ Dico dava ñãyiu càchí-yu sá càháⁿ-yu tnúhu Yá Ndiõxí te ñá ndáá sá càháⁿ-yu tnúhu-gá, ñãyiu-áⁿ uuⁿ-gá cuita cada-gá-yu nchaa sá cuèhé sá dúhá quíhíⁿ, te ducaⁿ-ni ïo dandáhú tnáhã-yu.

¹⁴ Te yòhó chi ío váha ní sándáá iní-n tnúhu Yá Ndiõxí sá dacuàha-n, te vitna càháⁿ-í dóho-n sã vã dáñã ndèé-n quìndáá iní-n tnúhu-áⁿ, te yòhó sa ñaha-n ná cúú ñãyiu ní dánèhé ñàhá xii-n tnúhu-gá. ¹⁵ Te yòhó chi ndéé cútñahá cúú làndú-n ní ngúita-n dacuaha-n tnúhu ndéé núú tùtú Yã Ndiõxí, te ñiu-ni nchaa tnúhu-gá canu ichi ñaha-xi xii-n te naníhí tãhú-n, chi sándáá iní-n Xítohó Jesucrìstú. ¹⁶ Te nchaa cue téé ní tee tnúhu Yá Ndiõxí, chi ñiu-ni mee-gã ní dácáhú iní ñàhá-gã xii-güedé ñacuáa tee-güedé, te tnúhu-gá ío váha dacuàha-o nchaa dava-gã ñãyiu, te càháⁿ-xi dóho-o sã vã cùndecu-gá-ó ìchi cuehé ichi duha, te núu ñá túú quìde ndáá-ó ndècu-o te ñàcanu ichi ñaha-xi, te dãnèhé ñàhá-xi ñacuáa cada-o cùndáá-ó nũú Yã Ndiõxí. ¹⁷ Te ñiu-ni tnúhu-gá dátũha ñaha

vãha-xi xii nchoo cuè ñãyiu ndècu ndihí-gá cuendá cada-o nchaa núú sã vãha.

4

¹ Te Xítohó Jesucrìstú quixi-gá taxi tnùní-gá ñuyíú-a, te cada ndáá-gá cuèchi nchaa ñãyiu sa ní xíhí, ndihí cuèchi nchaa ñãyiu xĩndecu vívú. Te mee-gã ndihí Yá Ndiõxí ñàhá-gã sá ïo càháⁿ-í dóho-n vitna ² sá ïo dacuàha-n ñãyiu tnúhu-gá, te vá dáñã ndèé-n dacuahá-n-yu ndèda-ni càa oré cuèi ñá túú cuìní-yu cundedóho-yu, te nchaa ñãyiu ñá túú cuìní cada ndáá cúñaha ndáá-n nchaa ñacuáa quìdé-yu. Te cúñaha tùcu-n xii-yu sá vã dúcáⁿ-gã cadá-yu, te càháⁿ-n dóho-yu cuendá cada ndáá-yu cundecú-yu. Te ío cunduu càhnu iní-n òré càháⁿ-n dóho-yu, te ío dacuahá-n-yu tnúhu-gá. ³ Chi sáá nduu te vá càchí-gá-yu cundedóho-yu nchaa tnúhu sá sánú ìchi ñaha cundecu váha-o núú Yã Ndiõxí, chi mee-ñã nchaa sá cúdí ìní méé-yu cundedóho-yu, te ndúcú-yu cue téé danèhé ñàhá xii-yu nchaa tnúhu cùu iní-yu-áⁿ. ⁴ Te vá cadá cuendá tnàhí-gá-yu tnúhu ndáá tnúhu Yá Ndiõxí, chi mee-ñã tnúhu sá ñà túú nàndíhí cada cuendá-yu. ⁵ Dico yòhó ío quíhi iní-n cùndecu-n, te cahni iní-n cuèi nándi na ndòho-n, te dacuàha-ni-n ñãyiu tnúhu Yá Ndiõxí, ñãyiu vátá quìndáá iní ñàhá-gã xii-gá, te cada-ni-n nchaa chiuⁿ ní tãhú-gã cada-n.

⁶ Te yúhú sa ñùhu ichi-ná-í quíhíⁿ-í núú ndécú Yă Ndiöxí cundecu-í, chi sa ní cuyatni cahni ñaha-güedě xii-í cuendá sá xínú cuèchi-í núú-gă. ⁷ Te ní quide-í nchaa chiúⁿ ní táhú Yă Ndiöxí cada-í te vitna ní xínu cava nchaa chiúⁿ ní táhú-gă-áⁿ ñi quide-í, te ñá túú ní dàña ndeé-í ní sándáá iní-í-gă, te ducaⁿ-ni sándáá iní-í-gă ndeé vitna. ⁸ Te vitna sa ndècu túha-ná sá ndúú táhù-í cuendá sá quidé ndáá-í núú Yă Ndiöxí, te Xítohó Jesucristú taxi-gă táhú-ăⁿ nduu táhù-í ná sáá nduu, chi cùu-gă ìⁿ Yaá quidé ndáá cuiti, te ñá díú-ní yúhú taxi-gă táhú-ăⁿ cuu cuendá-í, chi tnàhá nchaa ñáyiú ndètu cahnu-ná sáá nduu quixi tucu-gă ñuyíú-a cuáñaha-gă táhú-ăⁿ nduu táhú-yu.

Chiúⁿ tahu té Păblú cada té Timùteú

⁹ Te cuiní-í sá ìo ndìhi quixi-n quixi coto ñaha-n xii-í. ¹⁰ Chi té Dēmás ñá túú-gă quidé cuendá ñáhá-dě xii-í, chi mee-nă nchaa sá ìo ñuyíú-a ìo cùdii iní-dé. Te ní dándöo ñaha-dě cuáháⁿ-dé ñuú Tesalónica, te té Crèsenté cuáháⁿ-dé cundecu-dé distritú Gálaciá, te té Títú cuáháⁿ-dé cundecu-dé distritú Dálmaciá. ¹¹ Te ìⁿndi-ná té Lúca ndécú ndìhi ñaha-dé xii-í, te cúñaha-n xii-í té Măcú quixi-n ndìhi-dé, chi téé-áⁿ ndacu-dé cada-dé ìⁿchiúⁿ-í. ¹² Te té Tiquicú ní tendaha-í-dé cuáháⁿ-dé ñuú Éfesú. ¹³ Te òré quixi-n te yáha-n vèhe té Càrpú cáá ñuú Tróás canehe-n ìⁿ dóó tícachi

ní dándöo-í vehe-dé quixi, ndìhi nchaa librú-í, te tnàhá nchaa dava-gă tutú-í ndécú vèhe-dé canehe-n quixi chi xíăⁿ ìo-gă xíní ñùhu-í. ¹⁴ Te té Lijandrú téé cùu rerú ìo vài sá ñà túú văha ní cuu quide ñaha-dé xii-í, dico mee Yă Ndiöxí náhá-gă nása cada ñaha-gă xii-dé cuendá sá dúcáⁿ quide-dé. ¹⁵ Te vá ñihí tnáhá-n ndìhi-dé chi ìo càháⁿ cuèhé-dé cuendá nchaa tnúhu càháⁿ-ó.

¹⁶ Te cútnàhá ndécá ñaha-güedě xii-í ní sáháⁿ núú cuè téé cùchiúⁿ xito díhna nuu, chi mee diⁿ ní sáháⁿ te ñá túú ní sáháⁿ ni ìⁿ cue téé cùndìhi-í, chi nchaa-güedě ní dándöo ñaha-güedě xii-í, te yúhú xìcáⁿ táhù-í núú Yă Ndiöxí sá vă cádá cuendá-gă sá dúcáⁿ ñi quide-güedé. ¹⁷ Dico Xítohó Jesucristú ní chindee ñaha-gă xii-í, chi ní taxi-gă tnúhu ndee ìní ní càháⁿ-í tnúhu-gă năcuáa taú-xi cunduu núú cuè téé-áⁿ ndìhi núú nchaa ñáyiú, dico ñá díú ñáyiú isrâél cùu-yu, te diu-gă ní dácăcu nihnu ñaha-gă xii-í ñá túú ní sàhni ñaha-güedé. ¹⁸ Te mee Xítohó Jesucristú coto ñaha-gă xii-í te ñá túú nă cuu cuèi nândi sá ná cádá ñaha ñáyiú xii-í te diu-ni-gă coto ñaha-gă xii-í ndeé ná sáá nduu sáá-í andiú núú ndécú-gă táxi tnùnigă. Te nchaa-o chí ná càchí-ó sá ìo càhnu cuu-gă ni caa ni quíhíⁿ. Te ducaⁿ na cùnduu.

Tnúhu ndeé núú ñi ndìhi-ná

¹⁹ Te ìo cúñaha-n na càda ndee ìní tá Priscá, ndìhi té Àquilú, ndìhi cue ñáyiú cùu ndi mee té Onèsiforó. ²⁰ Te

té Èrastú ní quendóo-dé ñuú Còrintú, te té Trõfimú ní dándõo-í-dé ñuú Miletú chi cùhú-dé. ²¹Te ío cundihí iní-n quìxi-n oré vátá sàá-gá yóó quidé v̄xiⁿ-xi. Te ío cada ndee iní-n càchí té Èúbulú, ndihí té Pùdenté, ndihí té Línú, ndihí tá Clàudiá, ndihí nchaa dava-gá ñáyu sàndáá iní tnúhu Xítóhó Jesucrístú.

²²Te xìcáⁿ táhù-í núú Xítóhó Jesucrístú sá ná cùndecu ndihí ñaha-gá xii-n ndihí nchaa dava-gá-yu. Te ducaⁿ ïo na chìndee chitúu ñaha-gã xii-ndo nchàa-ndo. Te ducaⁿ na cùnduu. Te ío chí cádá ndèe iní-nã vitna.

TUTÚ NÍ CADÚHA TÉ PÄBLÚ QUIHIⁿ NDAHA TÉ TÌTÚ

*Té Păblú cādŭha-dé tutú
quíhíⁿ ndaha té Títú*

¹ Yúhú té Păblú xínú cuèchi-í núú Yă Ndiöxí, te ðiu-gá ní tendaha ñaha-gá xii-í cāháⁿ-í tnúhu Xítóhó Jesucristú núú ñāyiu cuendá quíndáá iní nchaa ñāyiu ní cachí Yă Ndiöxí naníhí tǎhú, ndihí cuendá sá təcú tnùní váha-yu tnúhu-gá, te ñāyiu na quíndáá iní tnúhu-gá cada ndáá-yu cundecú-yu ichi-gá. ² Te yúhú dácuàha-í-yu tnúhu-gá cuendá cundecu ndihí-yu tnúhu ndee iní sá cundècu ndihí-yu Yă Ndiöxí ni caa ni quíhíⁿ, chi ndéé cúnàhá vátá ngáva-gá ñuyú-a ní cachí-gá sá cundècu ndihí ñaha-gá xii-yu, te ñá túú dāndahú ñáhá-gă, chi quide-gá ñⁿ sá cāháⁿ-gá. ³ Te ní sáá nduu nǐ cachí-gá sá nihí-yu tnúhu nācuáa cuáháⁿ tnúhu-gá, te ðiu-ni tnúhu-áⁿ nǐ cachí Yă Ndiöxí Yaá dácăcu nihnu ñaha xii-o núú ùhú núú ndàhú sá dăcuàha-í ñāyiu. ⁴ Te tutú-a cādúha-í cuendá daquixi-í ndaha yòhó té Títú, téé ní sanu ichi ndisa-í ichi Xítóhó Jesucristú, chi ñⁿ-ni tnúhu sàndáá iní-ó. Te xicáⁿ tǎhù-í núú Tǎtá-ó Dǔtú Ndiöxí sá ïo na chindee chitúu ñaha-gă xii-n, te ðiu-ni-gá ná càda te ïo váha cuu iní-n cundecu-n. Te xicáⁿ tǎhú tucu-í núú

Xítóhó Jesucristú Yaá dácăcu nihnu ñaha xii-o núú ùhú núú ndàhú sá dǐú-ní ðucaⁿ na cada ñaha-gá xii-n.

*Chiuⁿ quide té Títú ðistrítú
Crětá*

⁵ Te yúhú ní dándöo ñaha-í xii-n ðistrítú Crětá, chi cuíní-í cada-n nchàa chiuⁿ cumání, te cuíní-í taxi ndecu-n cuè téé quíndaha ñaha xii cue ñāyiu sàndáá iní tnúhu Yă Ndiöxí xíndecu ñⁿ ñⁿ ñuú yíndèhu ðistrítú-áⁿ, te cada-n nācuáa ní cachí-í cada-n. ⁶ Te cue téé cada chiúⁿ-áⁿ xíní ñūhu-xi cuu-güedé mee-ni cuè téé ïo váha quide ndáá nācuáa vá yōo cāháⁿ dóho-güedé, te na cū-güedé cue téé ndècu ñⁿ dii-ni ñadihí-xi. Te ðucaⁿ nchàa landú-güedé ná cū-güexi landú sàndáá iní ñáhá xii Yă Ndiöxí cuendá sá vǎ yōo cuatnuñaha xii-güexi quesahá-yu sá ïo sáá iní-güexi te quide-güexi nándi sá ñā túú tǎu-güexi cada-güexi. ⁷ Chi xini ñūhu-xi sá ncháá cuè téé quíndaha ñaha xii ñāyiu sàndáá iní tnúhu Yă Ndiöxí ïo cundecu yíñūhu-güedé, chi ðucaⁿ tǎu-xi cada nchaa cue téé quide chiuⁿ Yă Ndiöxí, te xini ñūhu tucu-xi sá vǎ cúu-güedé cue téé ñā iní-xi, te nǐ vǎ cúu-güedé cue téé líhli iní-xi, te nǐ vǎ cúu-güedé cue téé quihu, te nǐ vǎ cúu-güedé cue téé plètú, te nǐ vǎ cúu-güedé cue téé ðicó-ni ðucaⁿ nǐhí ðihúⁿ. ⁸ Te xini ñūhu-xi cuu-güedé cue téé sǎñaha nuu vehe ndetatú cue ñāyiu ñūhu ichi, cue téé quide váha sá cúu-xí tnaha ñāyiu-xi, cue téé ïo váha

cùtnuní iní-xi nàcuáa cada cundecu ñuyíú-a, cue téé quide ndáá xĩndecu, cue téé quide nchaa nacuáa ndùu vétú iní Yá Ndiöxí, cue téé xito mee-xi ñá túú quide cutexínu. ⁹ Te na cùu-güedé cue téé ío váha sàndáá iní tnúhu váha tnúhu Yá Ndiöxí sá ñí dánèhé ñáhà-í xii-ndo cuendá ducaⁿ te cue téé-áⁿ ndacu-güedé cáháⁿ-güedé dóho ñáyiú cuendá cádá-yu nchaa nàcuáa cáháⁿ Yá Ndiöxí, te níhí-güedé tnúhu cáháⁿ váha-güedé núu nchàa ñáyiú dàquee tíhú tnúhu Yá Ndiöxí, te mee-ni cuè téé ducaⁿ quide váha taxi ndecu-n quìndaha-güedé ñáyiú sàndáá iní tnúhu-gá.

¹⁰ Te na càchí tnúhu-í xii-n sá vái ñáyiú sáá iní-xi ío, te cáháⁿ-yu mee-ni tnúhu sá ñà túú nàndíhi, te dándahú-yu tnàhá ñáyiú-yu, te ñáyiú isràél ío-gá vài-yu ducaⁿ xĩquide. ¹¹ Te nchaa ñáyiú ducaⁿ xĩquide xìni ñuhu-xi nducu-o tnúhu cúñaha-o xii-yu cuendá cadí-yu yuhú-yu, chi dánhé-yu dava-gá ñáyiú ìⁿ sá ñà túú tàù-yu dacuàhá-yu, te ducaⁿ quidé-yu cuendá-ni sá níhí-yu díhúⁿ, te ío títní xichi ní cuu dándahú-yu nchaa ñáyiú xĩndecu ìⁿ-ni vèhe.

¹² Te ní cachí ìⁿ téé ío váha sáá díquí-xi ndècu mei ñuú distritú Crètá sá ncháá ñáyiú ñuú-dé-áⁿ ío ndèhdé-yu, te ío cuihna iní-yu, te ío vài xexí-yu, te cùhndú-yu. ¹³ Te ndáá ní cáháⁿ-dé chi ducaⁿ quidé-yu, te xíáⁿ ío cáháⁿ-n dõho-yu cuendá sá ná quìndáá váha iní-yu tnúhu Yá

Ndiöxí. ¹⁴ Te cúñaha-n xii-yu sá vã cádá cuendá-yu nchaa tnúhu ndehnde càháⁿ ñáyiú isràél, te ni vã cádá cuendá-yu nchaa tnúhu càháⁿ ñáyiú ñá túú cuìní quìndáá iní tnúhu Yá Ndiöxí.

¹⁵ Te nchaa sá ñí cadúha Yá Ndiöxí ío ñuyíú-a cùu-xi mee nine-ni sá váha sá cúú-xí nchàa ñáyiú sa ní nduu ndoo ní nduu nine iní-xi ndècu ichi Yá Ndiöxí. Dico nchaa sá ñí cadúha-gá ñá túú cùu-xi sá váha sá cúú-xí nchàa ñáyiú ndècu ichi cuehé ichi duha, chi ñá túú sàndáá iní-yu tnúhu-gá, chi mee-ni sá cuèhé sá dúhá ñùhu iní-yu, te ñá túú quide cuendá-yu núu quide váha-yu àdi ñá túú quide váha-yu ndècú-yu. ¹⁶ Te càchí-yu sá sàndáá iní-yu Yá Ndiöxí, dico nchaa sá quidè-yu-áⁿ càchí tnùní-xi sá ñá ndáá. Te Yá Ndiöxí chi duuⁿ duuⁿ ñá túú tnàhá iní-gá nchaa nàcuáa quidé-yu, chi ío sáá iní-yu, te ñá túú quidé-yu ni ìⁿ sá váha.

2

Tnúhu váha tnúhu Yá Ndiöxí

¹ Te yohó òré dánèhé-n ñáyiú, te danèhé-n-yu mee-ni nàcuáa cáháⁿ tnúhu váha tnúhu Yá Ndiöxí. ² Te nchaa cue téé cùu sacuéhé ná càda cuendá-güedé vá cádá cùtexínu-güedé cundecu-güedé, te na cùndecu yiñuhu-güedé, te na cuãha váha-güedé cuendá nàcuáa cada-güedé cundecu-güedé, te na quìndáá váha iní-güedé Yá Ndiöxí, te na cùu iní-güedé tnàha ñáyiú-güedé, te na

cundu cahnu iní-güedé cuèi nándi sá ná yáha-güedé. ³ Te vitna cáháⁿ tucu-í sá cúu-xí nchàa ñáyiú dìhí ñáyiú cùu sacuéhé sã ná cùndecu yíñuhú-yu, te vá cúu-yu ñáyiú yiti yùhu-xi, te ni vã cúu-yu ñáyiú quihu, te na dànehé-yu nchaa dava-gá ñáyiú cada váha-yu. ⁴ Te na dàsahú-yu nchaa ñáyiú dìhí ñáyiú cuechi cuèndá ná cùu iní-yu yí-yu, ndihi cue landú-yu, ⁵ ndihi cuèndá sá ná càni váha iní-yu nàcuáa cundecú-yu, ndihi cuèndá sá vã cáni iní-yu cadá-yu ni ìⁿ sá cuèhé sá dúhá, ndihi cuèndá sá ná cadá-yu nchaa chiúⁿ ñuhu vehé-yu, ndihi cuèndá sá cadá váha-yu nchaa tnàha ñáyiú-yu, ndihi cuèndá sá ná cadá-yu nchaa nàcuáa cáháⁿ yí-yu, te ducaⁿ xini ñuhu-xi cadá-yu cuèndá sá vã yõ cáháⁿ cuèhé cuèndá tnúhu Yá Ndiõxí. Duha cúñaha-n xii cue ñáyiú dìhí ñáyiú cùu sacuéhé cuèndá ducaⁿ dàsahú-yu nchaa ñáyiú dìhí ñáyiú cuechi.

⁶ Te yòhó cáháⁿ-n dõho nchaa cue téé cuechi cuèndá sá ná càni váha iní-güedé nàcuáa cundecu-güedé, ⁷ te cada-n mèe-ni sá vãha cuèndá ducaⁿ cànchicúⁿ ni-hnu-güedé cada-güedé, te òré danèhé-n-güedé te ío váha cuu iní-n dànehé-n-güedé, te ndihi tnúhu yíñuhu cáháⁿ ndihi-n-güedé. ⁸ Te cáháⁿ-n mèe-ni tnúhu váha, te ducaⁿ te vá yõ ìⁿ cáháⁿ cuèhé cuèndá tnúhu cáháⁿ-n, te nchaa ñáyiú cùu ùhú iní ñáhá xii-o cucahaⁿ núu-yu, te vá nihí-yu tnúhu

cáháⁿ cuèhé-yu cuèndá-ó.

⁹ Te ío cáháⁿ-n dõho nchaa cue téé xinu cuechi sá ná quìndáá iní-güedé cada-güedé nchaa chiúⁿ tahu patróoⁿ-güedé nàcuáa cudíu-güedé núu cuè téé-áⁿ, te vá cáháⁿ sáá iní-güedé. ¹⁰ Te vá cáni iní-güedé duhu-güedé, te cada ndáá-güedé cuèndá sá ñã túú nã cani iní ñáhá cuè patróoⁿ-güedé, te ducaⁿ te cutnùni iní ñáyiú sá tnúhu Yá Ndiõxí ío váha dànehé ñáhá-xí nàcuáa cada-o cùndecu-o, te diu-gá cúu-gã Yaá dácãcu nihnu ñaha xii-o núu ùhú núu ndáhú.

¹¹ Te nchoo ñi cutnùni iní-ó sá Yá Ndiõxí ío cùndahú iní-gá nchaa nchoo ñáyiú ndecu ñuyíú-a, te ní taxi-gá tnúhu ndee iní sá nánihí tàhú nchaandi túhú ñáyiú te núu na quìndáá iní ñáhá-yu xii-gá. ¹² Te ní cachí-gá sá dáñá-ó nchàa ichi cuehé ichi duha chi ñã tnáhá iní-gá cundecu-o ìchi-áⁿ, te vá ío cuhuⁿ iní-ó nchàa sá ío ñuyíú-a, te ní cachí tucu-gá sá ío cani iní-ó nàcuáa cundecu-o vitna ndecu-o ñuyíú-a te cada ndáá-ó cùndecu-o cuèndá nduu vétú iní-gá. ¹³ Te cundetu-o sáá nduu càhnu vihi, nduu quèxi tucu Xítóhó Jesucristú Yaá cúu Ndiõxí-ó, te diu-gá ní dácãcu nihnu ñaha-gã xii-o núu ùhú núu ndáhú. Te nduu-ãⁿ ío cudíí iní-ó. ¹⁴ Te mee-gã ní xihí-gá chi ducaⁿ ñi cuini-gá cundu, te ducaⁿ ñi quide-gá cuèndá nchoo vã cùndecu-gá-ó ìchi cuehé ichi duha, te nduu ndoo nduu nine iní-ó, te ducaⁿ te cuu-o cuè ñáyiú

quindaha-gã, te ni yùhu ni iní-ó cada-o mee-ni sá vãha.

¹⁵ Te nchaa tnúhu-áⁿ danèhé-n-yu te cúñaha-n xii-yu nàcuáa cadá-yu, te cáháⁿ-n dôho-yu te núu ñá túú quide ndáá-yu. Te cada-n sã cúú-n ñⁿ tée xínu cuechi núú Yã Ndiõxí, te vá dáñá-n mèe-n daquee tihú ñáhá ñãyiú xii-n.

3

Nchaa sá tau ñãyiú ndècu ichi Yã Ndiõxí cadá-yu

¹ Te cúñaha-n xii-yu sá ná quindáá iní-yu cadá-yu nchaa nàcuáa cáháⁿ nchaa cue tée cùchiuⁿ, te tau-yu chindee ñáhá-yu xii-güedé nchaa chiúⁿ váha quide-güedé.

² Te vá cáháⁿ cuèhé-yu cuendá ñãyiú, te vá cündùu pletú-yu, te na cùú-yu ñãyiú ndàhú iní-xi, te na cündahú iní-yu nchaa tnàha ñãyiú-yu.

³ Te tnàhá-ó ñi xóo cada-o dàtná quidé ñãyiú-áⁿ vitna, chi ío ni ñi ñi quí-ó chi ñá tècú tnùní-ó nàcuáa cáháⁿ tnúhu Yã Ndiõxí ní cùu, te ío ní xíndu sàá iní-ó núú-gã, te ní xíndecu-o ñⁿ ichi sá ñá túú tau-ó cündecu-o ni cuu, te nãndi sá cuèhé sá dúhá ío ñuyiú-a ní xóo cudíí iní-ó ñi xóo cada-o chi ní xóo taxi tnùní ñáhá-xí xii-o, te ní xóo cada cuèhé ní xóo cada duha-o ni cùu, te ní xíndecu-o ñi cuedú iní, te cuendá nchaa sá ñi xóo cada-o-ãⁿ xiãⁿ ío ní xóo cuu úhú iní ñáhá ñãyiú xii-o, te ducaⁿ-ni nchòo tucu ní xóo cuu úhú iní-õ-yu.

⁴ Te Yã Ndiõxí Yaá ní dácãcu nihnu ñaha xii-o núú úhú núú ndàhú ní dándíxí tũ-gã iní-ó

nàcuáa cutnùní iní-ó sã ío váha iní-gã, te cùu iní ñáhá-gã xii nchaa nchoo ñãyiú ndècu ñuyiú-a. ⁵ Te Yã Ndiõxí ní dácãcu nihnu ñaha-gã xii-o núú úhú núú ndàhú, dico ñá díú cuendá ñⁿ sá vãha quide-o ndecu-o ñuyiú-a ducaⁿ ñi quide-gã, chi mee-gã ducaⁿ tnàhí ní cundàhú iní ñáhá-gã xii-o. Te ní nduu ndoo ní nduu nine iní-ó, te ní cuu-o dàtná ñⁿ ñãyiú saa, chi Espiritú Yã Ndiõxí ducaⁿ ñi quide ñaha-xi xii-o.

⁶ Te Espiritú-gã ní taxi-gã ni yùhu ni iní-gã ndécú ndíhi-o, te ducaⁿ ñi quide-gã chi ní sándáá iní-ó Xítoho Jesucristú Yaá ní dácãcu nihnu ñaha xii-o núú úhú núú ndàhú. ⁷ Te ío cündahú iní ñáhá-gã xii-o núu sa ní quide ndáá-gã cuéchi-o te ní cuu-o dèhe-gã, núu xiãⁿ vitna ndètu-ná-ó sãá nduu ndùu táhú-ó cündecu-o ndíhi-gã ni caa ni quíhíⁿ.

⁸ Te tnúhu ní cáháⁿ-í-a cùu-xi tnúhu ndáá cuítì, te cuíní-í sá ñi yuhu ni iní-n cáháⁿ-n tnúhu-gã núú-yu cuendá sá ncháá ñãyiú sándáá iní ñáhá xii Yã Ndiõxí nducu ndèe-yu cadá-yu mee-ni sã vãha, te tnúhu-áⁿ cúú-xí mèe-ni tnúhu váha, te ío váha sá cúú-xí-yu. ⁹ Te vá cadá cuendá-n nchàa tnúhu sá ñá túú nãndíhi xítnàha ñãyiú, te vá cadá cuendá-n ñãyiú nãndi cáháⁿ cuendá nchaa sá ñi xóo cada cue ñãyiú ní xíndecu ndéé sanaha, te vá cadá cuendá-n nchàa tnúhu xítnàha ñãyiú xícuèhé tnàhá cuendá tnúhu ní chídó tnùní ndíi Moisés, chi nchaa tnúhu

xítñàhá-yu-áⁿ ñà túú tnàhí nandíhi-xi, te dàcuíta ñaha-xi xii-o.

¹⁰ Te núu ió ñáyiú ní ngúíta-yu nándi tnúhu càháⁿ-yu cuèndá sá vǎ cúú ìⁿnuu cue ñáyiú ndècu ichi Yá Ndiöxí ñá, te ñáyiú-áⁿ cǎháⁿ sàhú-n dǒho-yu ìⁿ úú xito, te núu vá tnǐⁿ-yu tnúhu càháⁿ-n ñá, te vá ñihí tnáhá-gǎ-n ndíhí-yu. ¹¹ Te ducaⁿ càda-n, chi ñáyiú-áⁿ duuⁿ duuⁿ ñá túú-gǎ cuìní-yu cadá-yu sá vǎha, chi mee-nǎ sá cuèhé sá dúhá tnàhá iní-yu cadá-yu, te cùtnuní iní méé-yu sá ñà túú quíde ndáá-yu, te sáá nduu te nacháhu-yu nchaa sá quídě-yu.

Nàcuáa cada té Títú

¹² Te cuìní-í tendaha-í té Àrtemás quixi-dé núú ndécú-n àdi té Tiquicú, te òré ná quèxio ndéda-ni càa ìⁿ cue téa-núú ndécú-n, te ío nducu ndèe-n quíhíⁿ-n ñùú Nicópolis núú quíhíⁿ-í cundecu-í, chi yàcáⁿ cuìní-í quíhíⁿ-í cundecu-í yóó quídé vǐxiⁿ-xi. ¹³ Te ío cuáñaha-n nchàa sá xíní ñùhu té Zénás téa ío váha xíní nchaa nàcuáa càháⁿ lèi, ndíhi té Àpolós cuèndá sá ñà túú nǎ cumání xii-güedé ichi. ¹⁴ Te cuìní-í sá ncháá ñáyiú ndècu ndíhi-o ichi Yá Ndiöxí cada váha-yu, te cuáñahá-yu ìⁿ sá xíní ñùhu ñáyiú, te ío váha chiuⁿ cadá-yu te núu ducaⁿ na càdá-yu.

Tnúhu ndéé núú ñí ndíhi-ná

¹⁵ Te vitna ío cada ndee ìní-n cǎchí nchaa ñáyiú ndècu ndíhi-í iha, te cúñaha-n sǎ

ío na càda ndee iní nchaa ñáyiú cùu iní ñáhá xii-o, ñáyiú sàndáá iní ñáhá xii Yá Ndiöxí. Te Yá Ndiöxí ío na chindee chitúu ñaha-gǎ xii-ndo nchàa-ndo, Te ducaⁿ na cùnduu. Te ío chí càdá ndèe iní-nǎ vitna.

TUTÚ NÍ CADÚHA TÉ PÄBLÚ QUIHIⁿ NDAHA TÉ FILÈMÓN

*Té Păblú cádŭha-dé tutú
quíhiⁿ ndaha té Filèmon*

1 Te yúhú té Păblú téé yìhi vecaá sá cuendá Xítohó Jesucristú cádŭha-í ìⁿ tutú ndihì té Timùteú cuendá daquixi-í ndaha yòhó té Filèmon, te ío cùu iní ñáhà-í xii-n chi tnàhá-n quide-n chiuⁿ Yá Ndiöxí. Te tutú-a tëndaha-í quixi ndaha-n ² ndihì ndaha ñaha nàni Apiá ñaha ndècu ndihì-o ichi Xítohó Jesucristú, ndihì ndaha té Àrquipú, chi tnàhá-dé quidé-dě chiuⁿ Yá Ndiöxí, ndihì ndaha nchaa ñáyiú tàcá vehe-n dàcuahá-yu tnúhu-gá. ³ Te xicáⁿ táhù-í núú Tátá-ó Dütú Ndiöxí ndihì núú Xítohó Jesucristú sá ìo na chindee chitúu ñaha-gă xii-ndo, te ducaⁿ ndì nduú-gá ná cádá te ío váha cuu iní-ndó cundecu-ndo.

*Té Filèmon ío sàndáá iní-dé
Xítohó Jesucristú te cùu iní-dé
tnàha ñáyiú-dé*

4 Te ndì tnahá òré càháⁿ ndihì-í Yá Ndiöxí cuendá-n ndàcáⁿ táhù-í núú-gă. ⁵ Chi ñihí-í tnúhu sá ìo sàndáá iní-n Xítohó Jesucristú, te cùu iní-n cuè ñáyiú ndècu ichi-gá. ⁶ Te xicáⁿ táhù-í núú Yá Ndiöxí sá dàtná-ni sàndáá iní-n-gă ducaⁿ-ni dānehé-n ñáyiú cuendá ducaⁿ ngũnu ichí-yu tnàhá-yu, te cutnùnì

iní-yu nàcuáa ndùu nchaa sá váha tàxi Xítohó Jesucristú xii-o, te tnàhá-yu nduu táhŭ-yu nchaa sá váha-áⁿ. ⁷ Te yòhó té Filèmon cúú-n tée ndècu ndihì-í ichi Xítohó Jesucristú càchí tnúhu-í xii-n sã ìo cùdí iní-í cuendá sá ìo váha quide-n ndecu-n, chi cùu iní-n nchàa ñáyiú ndècu ichi Yá Ndiöxí, te uuⁿ-gá ñihí ndèé-í sá dúcáⁿ quide-n, te diu-n ìo sáhă-n-yu tnúhu ndee iní ndécú ndihì-yu.

*Té Păblú chíndèe tnúhu-dé té
Ònésimú*

⁸ Te yúhú té Păblú ní taxi Xítohó Jesucristú tnúhu ndee iní ndécú ndihì-í sá táxí tnùnì ñáhà-í xii-n te tahu-í chiuⁿ cada-n, dico vá táxí tnùnì ñáhà-í xii-n, ⁹ chi váha-gá sá càháⁿ ndàhú-í núú-n sã cádá-n nchàa nacuáa càháⁿ-í chi ío cùu iní ñáhà-í xii-n. Chi yúhú sa ta yì-í cuáháⁿ, te yìhi-í vecaá cuendá sá càháⁿ-í tnúhu Xítohó Jesucristú. ¹⁰ Te càháⁿ ndàhú-í núú-n sã ñà túú nă canì iní-n cuendá té Ònésimú, chi ní cuu-dé vitna dàtná ìⁿ déhe-í, chi ní sàndáá iní-dé tnúhu Yá Ndiöxí ní xáhaⁿ-í xii-dé vitna yìhi-í vecaá.

¹¹ Te nàha-n sá cŭtnàhá ní xindecu ndihì-n-dě ñà túú ní quide ndáá-dé, dico vitna ío váha quide-dé ndécú ndihì-í-dé, te diu-ni ducaⁿ càda-dé òré cundecu ndihì tucu-n-dě. ¹² Te vitna tendaha-í-dé ndixi-dé cundecu tucu-n ndihì-dé, te òré queheⁿ cuendá-n-dě, te cada iní-n sã yùhú ní queheⁿ cuendá-n. ¹³ Te vitna yìhi-í vecaá sá

cuendá tnúhu Xítohó Jesucristú, te cuení-í ngani-í-dé cunu cuechi-dé núú-í cuendá cada-dé núú-n ní cùu. ¹⁴ Dico ñá túú ní ngani-í-dé, chí vátá ndátnúhu ndihí ñaha-gã-í xii-n núu nása cachí-n cùnduu. Te ñá cùndèe iní-í cada yica-í cada-n ñⁿ sá vâha sá cúú-xì-í, chí cuení-í sá méé-n càni iní-n núu cuu àdi sá vâ cúú. ¹⁵ Te ní cuuduu ní quee té Ònésimú vehe-n, te cudana te mee Yã Ndióxi ducaⁿ ní cachí-gá cunduu cuendá dacuàha-dé cada váha-dé. Te ndixi tucu-dé cundecu ndihí ducaⁿ-ná-n-dé. ¹⁶ Te vá cúú-gã-dé dàtná ñⁿ téé xínu cuechi chí ní cuu-dé dàtná ñⁿ ñaní-ó chí ní sándáá iní-dé Yã Ndióxi, te yúhú ío cùu iní-í-dé, dico yòhó uuⁿ-gá cuu iní-n-dé, chí cùu-dé ñⁿ tnàha ñáyi-u-o, te ndècu-dé ichi Yã Ndióxi.

¹⁷ Te ñⁿ-ni cùu-o ndecu-o ichi Yã Ndióxi núu xiãⁿ càháⁿ ndàhú-í núú-n sã quéhéⁿ cuendá-n-dé dàtná quéhéⁿ cuendá-n yúhú òré quéxió-í vehe-n. ¹⁸ Te núu ìó ñⁿ sá ní cumání-dé núú-n ñá túú ní quide ndáá-dé cútnàhá ní xindecu-n ndihí-dé, àdi ío ñⁿ sá tàú-dé te vá ndàcáⁿ cuendá-n núú-dé, chí yúhú ndacáⁿ cuendá-n núú-í. ¹⁹ Te ndaha mee yúhú té Páblú cádũha-í tutú-a càchí tnúhu-í xii-n sã ná cháhu-í nchaá sã ní quide-dé. Dico dandacu saú iní-n sã yúhú ní sanu ichi ñaha-í xii-n ìchi Xítohó Jesucristú. ²⁰ Dico yòhó té ndècu ndihí-í ichi Xítohó Jesucristú cada ndee iní-n càda-n tnúhu ndàhú càháⁿ-í núú-n chí ndècu-o ichi-gá. Te

ducaⁿ càda-n nacuáa cuu-xi dàtná ñⁿ tnúhu ndee iní sá cúú-xì-í, chí ndi ndúú-ó ndècu-o ichi-gá.

²¹ Te cùtnuní iní-í sá cádá-n nchàa nacuáa càháⁿ-í, te cùtnuní tucu iní-í sá ío-gá vâi sá vâha cada-n dàcúúxi tnúhu ndàhú càháⁿ-í núú-n, núu xiãⁿ tëndaha-í tutú-a véxi ndaha-n. ²² Te vitna cuení-í cada túha-n ñⁿ vehe cundecu-í, chí sàni iní-í sá quíxi còto ñaha-í xii-ndo, te ndètu-í sáá nduu-ãⁿ chí nchòhó xicáⁿ táhú-ndó núú Yã Ndióxi cuendá-í.

Tnúhu ndéé núú ní ndihí-ná

²³ Te ío cada ndee iní-n càchí té Épafrás téé yihí ndihí-í vecaá sá cuendá tnúhu Xítohó Jesucristú. ²⁴ Te ío cada ndee iní tucu-n càchí té Măcú, ndihí té Arístarcú, ndihí té Dêmás, ndihí té Lúca, chí tnàhá cue téé-ãⁿ quide-güedé chiúⁿ Xítohó Jesucristú.

²⁵ Te Xítohó Jesucristú ío na chindee chitúu ñaha-gã xii-ndo nchàa-ndo, Te ducaⁿ na cùnduu. Te ío chí cádá ndee iní-ná vitna.

TUTÚ QUIHIⁿ NDAHÁ CUE ÑÁYIU HÈBREÚ

Dútú Ndiõxí ní cachí-gá sá Dèhe-gá cada núú-gã

¹ Te ndéé sanaha, Yá Ndiõxí ní xáhaⁿ-gã xii cue téé ní cachí iní méé-gã cada núú-gã cáháⁿ-güedé tnúhu-gá núú nchàa ñani tnáhá-ó ní xíndecu ndéé dàvá-áⁿ te ñu ducaⁿ ñi quide-güedé. Te titní xito ducaⁿ ñi xáhaⁿ-gã xii-güedé ní cáháⁿ-güedé tnúhu-gá. Te ndi dñⁿ ndi dñⁿ ñi xitnùhu ñaha-gã xii-güedé nàcuáa cáháⁿ-güedé tnúhu-gá núú-yu. ² Te sátá ñi cuu vai nduu ta yáha cuáháⁿ, te ní sáá nduu ñi cachí Yá Ndiõxí sá Dèhe-gá cada núú-gã cáháⁿ tnúhu-gá núú-ó. Te ñu-ni mee-gã ní táuchíúⁿ ñi cadúha Dèhe-gá ñuyíú ndihi nchaa sá íó, te ní cachí-gá sá ncháá cùu-xi cuendá Dèhe-gá. ³ Te Dèhe Yá Ndiõxí ío càhnu cuu-gá dàtná càhnu cuu mee-gá, te dàtná-ni sàni iní méé-gã ñu-ni ducaⁿ sàni iní Dèhe-gá chi tnáhá-gá cúu-gã Ndiõxí, te sá cuendá tnúhu càháⁿ Dèhe-gá xíáⁿ ndécú-ní nchàa sá íó ñuyíú, te ducaⁿ chi ío càhnu cuu Dèhe-gá, te ñu-ni Dèhe-gá ní quide nàcuáa vá cùndecu-gá cuèchi-o. Te sátá dúcáⁿ te ní ngóo-gá xio cùha Tátá-gã Dútú Ndiõxí Yáá ío cùnnu ndecu andíu.

Dèhe Dútú Ndiõxí ío-gá cùnnu-gá dàcúúxí cuè espíritú xínú cuèchi núú-gã

⁴ Te Dèhe Yá Ndiõxí ío-gá cùnnu-gá dàcúúxí cuè espíritú xínú cuèchi núú-gã, te ducaⁿ chi ní nduu táhú-gã núú Tátá-gã Dútú Ndiõxí sá ío-gá cunuu-gã dàcúúxí cuè espíritú-áⁿ. ⁵ Chi Yá Ndiõxí ñá túú ní xáhaⁿ-gã xii ní ñⁿ cue espíritú xínú cuèchi núú-gã dàtná ní xáhaⁿ-gã xii Dèhe-gá, te duha ní xáhaⁿ-gã:

Yòhó cúu-n Dèhe mee-í, te ducaⁿ-ni cùndecu-n núú ndécú-í.

Duha ní xáhaⁿ-gã. Te ní cachí tucu Yá Ndiõxí:

Yúhú cúu-í Tátá Yàá-áⁿ, te mee-gã cúu-gã Dèhe-í.

Duha ní cachí-gá. ⁶ Te cútnahá ní tendaha-gã Dèhe-gá Yáá ío cùnnu ní quixi-gá ñuyíú-a, te ní cachí-gá:

Tàú-xi sá ncháá cuè espíritú xínú cuèchi núú-í chiñuhu-xi Dèhe-í.

Duha ní cachí-gá. ⁷ Te Yá Ndiõxí ní cáháⁿ-gá cuendá cue espíritú xínú cuèchi núú-gã, te ní cachí-gá:

Yúhú quidè-í sá ncháá cuè espíritú xínú cuèchi núú-í cúu-xí dàtná táchí,

te ñu-ni cue espíritú-áⁿ quidè-í sá cúu-xí dàtná itá ñuhú.

Duha càchí-gá. ⁸ Dico Dèhe-gá chi ñá túú ñucaⁿ ni xáhaⁿ-gã, chi duha ní xáhaⁿ-gã:

Yòhó tnáhá-n cùu-ñ Ndiõxí dàtná cúu yúhú Yáá cúu Tátá-n,

te ducaⁿ-ni tàxi tnuní-n nì caa
ni quíhíⁿ,

te ío váha ndáá quidé-n tàxi
tnuní-n.

9 Te dàquee tihú-n nchàa sá
cuèhé sá dúhá, te cùu
iní-n nchàa sá vâha,

núu xiáⁿ yúhú Yaá cúu Tátá-n
ní quide-í sá ío-gá vii
ío-gá váha cuu iní-n,

dàcúúxí nchàa dâva-gá ñáyi
ndècu ndihí-n.

Duha ní xâhaⁿ-gã xii Déhe-gá.

10 Te ní xâhaⁿ tùcu Yá Ndiõxí
xii Déhe-gá:

Yòhó cúu-n Yàá ío cùnuu,
chi ndéé cútnàhá ñá
túú vèdana ná ío te ní
cadúha-n ñùyíú ndihí
andíu.

11 Te andíu ndihí ñùyíú chi
naa-xi, dico yòhó chi
cundecu-ni-n nì caa ni
quíhíⁿ.

Te andíu ndihí ñùyíú chi
ndihí-xi dàtná ndihí ñⁿ
dóó,

12 te dàtná cuiní-n quide
ñáyi ndihí ñⁿ dóó òré
ndàcáⁿ tnáhnũ-yu tàxi
ndecú-yu ñⁿ xio, ducaⁿ
càda-n ñùyíú ndihí
andíu,

te dàtná nádâma dóó ñáyi
ducaⁿ càda tucu-n
ñùyíú ndihí andíu.

Te yòhó dàtná-ni càa-n
ndecu-n vitna ducaⁿ-ni
cùnduu-n cundecu-n nì
caa ni quíhíⁿ, chi vá yíi
tnàhí-n.

Duha ní xâhaⁿ Yá Ndiõxí xii
Déhe-gá. 13 Te Yá Ndiõxí ñá
túú ní xâhaⁿ-gã xii ni ñⁿ cue
espíritú xínú cuèchi núú-gã
dàtná ní xâhaⁿ-gã xii Déhe-gá,
te duha ní xâhaⁿ tùcu-gá:

Ngóo xio cùha-í taxi tnuní-n,
te yúhú cada-í te nchaa sá
cúu ùhú iní ñáhá xii-n
canehe-xi sá yíñuhu
núú-n.

Duha ní xâhaⁿ-gã xii Déhe-gá.

14 Te nchaa espíritú xínú
cuèchi núú Yá Ndiõxí
mee-ni chiúⁿ-gá quidé-xí, chi
tèndaha-gá cue espíritú-áⁿ
cuãháⁿ-xi nchaa núú ndécú
cuè ñáyi ní nduu táhú
cundecu ndihí-gá chindee
ñàha-xi xií-yu.

2

*Vá dáñá ndèé-ó tnúhu sá
càháⁿ nàcuáa naníhí tàhú-ó*

1 Te sá cuendá sá ío cùnuu
Xítóhó Jesucristú, núu xiáⁿ ío
xini ñuhu-xi cada cuendá-ó
nchàa tnúhu càháⁿ-gá sá sá
ní xíndedóho-o cuendá sá
vã dáñá nihnu-o. 2 Te cue
espíritú xínú cuèchi núú Yá
Ndiõxí ní càháⁿ-xi tnúhu-gá
ndéé sanaha, te tnúhu ní
càháⁿ cue espíritú-áⁿ cúu-xí
sã ndàá cuíti. Te nchaa
ñáyi ñá túú ní cuiní tñi
nchaa tnúhu ní càháⁿ cue
espíritú-áⁿ, te ní ñá túú
ní cuiní-yu cundedóho-yu,
nchaa ñáyi-áⁿ nì nacháhu-yu
nàcuáa ndùu nchaa cuèchi ní
quidé-yu ñⁿ ñⁿ-yu. 3 Te sá
dúcáⁿ nì yáha cue ñáyi-áⁿ,
xiáⁿ cútnuní ndáá iní-ó sã
vã cãcu nihnu-o te núu na
dãña nihnu-o tnúhu sá càháⁿ
nàcuáa naníhí tàhú-ó, tnúhu
sá ío cùnuu, chi nacháhu-o
te núu ducaⁿ na càda-o. Te
díhna-gá Xítóhó Jesucristú ní
càháⁿ-gá tnúhu-áⁿ te nchaa
ñáyi ní xíndedóho nchaa
nàcuáa ndùu tnúhu-áⁿ nì
càháⁿ ndáá-yu tnúhu-áⁿ

núú-ó. ⁴ Te tnàhá Yá Ndiöxí cùndìhi-gá nchaa ñáyiú-áⁿ quidé-gá nàcuáa cutnùnì iní-ó sã tnùhu-áⁿ cúú-xí tnùhu ndáá, chi quide-gá titní núú sã vã yõ tnàhí ndàcu cada te ío cùnùhu-o. Te Espiritú Yá Ndiöxí quidé-xí nàcuáa nduu táhú-ó ndì d^híⁿ núú chiúⁿ cada-o nàcuáa cùnì mée-gã. Te sã dúcáⁿ quide Yá Ndiöxí nchaa xíãⁿ, xíãⁿ cùtnùnì iní-ó sã tnàhá-gá càháⁿ-gá sã tnùhu-áⁿ cúú-xí tnùhu ndáá.

Xítohó Jesucristú ní xínduu yiqui cùnù-gá dàtná cáá yiqui cuñú nchoo cuè ñáyiú ñuyúú-a

⁵ Te Yá Ndiöxí vá táxí ndècu-gá cue espíritú xínú cuèchi núú-gã taxi tnùnì-xi ñuyúú sáá sã vátá quení-gá-ó, te dⁱu cuendá xíãⁿ càháⁿ-í. ⁶ Te núú tütú Yá Ndiöxí càchí-xi: Yòhó Dútú Ndiöxí ñá túú nã cúú cuè ñáyiú ñuyúú núu ndacu iní-n-yu, àdi chindeé-n-yu.

⁷ Te yòhó ní cachí-n sã nchàa ñáyiú ñuyúú-a vá cùnùú-yu dàtná cùnùu cue espíritú xínú cuèchi núú-n,

dico ní cachí-n sã sàá nduu te ío cùnùú-yu tnàhá-yu, te mee-n càháⁿ-n sã ío càhnu cuú-yu,

te ní cachí tucu-n sã táxí tnùnì-yu nchaa sã ñí cadúha-n.

⁸ Te ducaⁿ nchãandi túhú sã ío quindàhá-yu.

Duha càchí-xi núú tütú-gá. Te sã dúcáⁿ ñí cachí Yá Ndiöxí sã quindàha ñáyiú ñuyúú nchaa sã ío, xíãⁿ cùtnùnì sã nchãandi túhú sã ío taxi tnùnì-yu,

dico vátá sàá-gá nduu dùcaⁿ quini-ó càda-xi. ⁹ Te nchoo sa nàha-o sã tnáá-ní ñí quide Yá Ndiöxí cuendá sã vã cùnùu Xítohó Jesucristú dàtná cùnùu cue espíritú xínú cuèchi núú-gã. Te ducaⁿ ñí quide Yá Ndiöxí chi ní cundàhú iní-gá nchaa ñáyiú ñuyúú-a, chi ní cachí-gá sã Dèhe-gá cuú cuendá nchaa-yu, te Xítohó Jesucristú ío ní ndoho-gá òré ní xihí-gá, núu xíãⁿ ní nduu táhú-gã cùnùu vihi-gá vitna. Te mee Yá Ndiöxí càchí-gá sã ío càhnu cuu Dèhe-gá.

¹⁰ Te Yá Ndiöxí ní cadúha-gá nchaandi túhú sã ío nàcuáa ní cachí iní mée-gã, te sã dúcáⁿ ñí quide-gá núu xíãⁿ váha-ni sã ñí cachí-gá sã Xítohó Jesucristú nãndi ndoho-gá te cuú-gá cuendá ducaⁿ ñà túú tnàhí-gá ná cùmání-gã núú Yá Ndiöxí. Te sã dúcáⁿ ñí cuu núu xíãⁿ ní níhí Yá Ndiöxí nàcuáa cada-gá càndeca-gá nchaa ñáyiú cùu dèhe-gá quihíⁿ núú ío váha càa cundecú-yu ndìhi-gá ñí caa ñí quihíⁿ. Te Xítohó Jesucristú cúú-gã Yaá ní quide nàcuáa nduu táhú cue ñáyiú cundecú-yu ndìhi Yá Ndiöxí. ¹¹ Te Xítohó Jesucristú cúú-gã Yaá quidé ndècu yíñuhu ñáyiú núú Yá Ndiöxí ñáyiú sàndáá iní ñáhá xii-gá, te Xítohó Jesucristú ndìhi cue ñáyiú-áⁿ ñí-ni Yàá cúú Tãtã-yu ndìhi-gá, núu xíãⁿ Xítohó Jesucristú Yaá cúú Dèhe Dútú Ndiöxí ñá túú cùcahaⁿ núú-gã càháⁿ-gá sã ñàní-gá ndìhi cùha-gá cúú nchàa ñáyiú-áⁿ. ¹² Te quèe ndáá-xi nàcuáa càháⁿ-xi núú

tùtú Yă Ndiöxí núú cächí-xi năcuáa ní xáhaⁿ Xítohó Jesucristú xii Tătá-gă Dútú Ndiöxí, te duha ní xáhaⁿ-gă:

Cáháⁿ vâha-í cuendá-n nũu nchâa cue tée cùu datná ñani-í ndihí núú nchâa cue ñáyiú dihí cúu datná cúha-í,

te cata-í ndudú chiñuhu ñaha-í xii-n núú tàcá-yu.

Duha yòdo tnuní núú tùtú-gă năcuáa ní xáhaⁿ Dêhe-gă xii-gă. ¹³ Te ingá tucu xichi núú tùtú Yă Ndiöxí cáháⁿ-xi năcuáa ní cáháⁿ Xítohó Jesucristú cuendá-gă, te duha ní cachí-gă:

Yúhú nchaa-ni nduu quindáa iní-í Tătá-í Dútú Ndiöxí.

Duha cächí-xi núú tùtú Yă Ndiöxí năcuáa ní cáháⁿ Xítohó Jesucristú. Te ingá tucu xichi núú tùtú Yă Ndiöxí cáháⁿ-xi năcuáa ní cáháⁿ tucu Xítohó Jesucristú, te duha ní cachí-gă:

Iha ndècu ndihí-í nchaa ñáyiú cùu déhe Tătá-í Dútú Ndiöxí, te diu-ni ñáyiú-án ní taxi cuendá Tătá-í cuu cuendá-í.

Duha cächí-xi núú tùtú-gă năcuáa ní cáháⁿ Xítohó Jesucristú.

¹⁴ Te sá cuendá nchaa ñáyiú cùu déhe Yă Ndiöxí cúu-yu yiqui cùñú, núú xiăⁿ ducaⁿ tnáhá Xítohó Jesucristú ní cuu-gă yiqui cùñú, te ducaⁿ ní cuu-gă yiqui cùñú cuendá cuú-gă, te sá dúcáⁿ cùu-gă te ndacu-gă daquèe tíhú-gă sácuihná, te diu sácuihná-ăⁿ quidé-xí xihí ñáyiú. ¹⁵ Te ducaⁿ ní quide-gă cuendá

sá cuè ñáyiú ñuyíú-a vá yùhú-gă-yu sá cùu-yu, chi nchaa-ni nduu yùhú-yu sá cùu-yu. ¹⁶ Te na cächí tnúhu ndáá-í sá Xítohó Jesucristú ní quixi-gă cuendá chindee-gă cue ñáyiú cùu ñani tnáhá ndií Abrahám, te ñá díú cuendá sá chindèe-gă cue espíritú xínú cuèchi núú Yă Ndiöxí. ¹⁷ Te cuendá xiăⁿ núu dai ní xini ñuhu-xi sá cúu-gă ñáyiú cuendá yăha-gă nándi sá yăha-gă datná yăha cue ñáyiú cùu ndi mee-gă cuendá ducaⁿ cùu-gă dútú ïo cùnuu te cuu ndáá-gă núú Yă Ndiöxí, te cundáhú iní-gă nchaa ñáyiú te cuú-gă cuendá sá vá cùndècu-gă cuèchi-yu núú Yă Ndiöxí. ¹⁸ Te mei òré ndóhó Xítohó Jesucristú ní xito ndée ñáhá sàcuihná xii-gă te núu ndisa sá vă cáda-gă ni ìⁿ sá ñà túú tàú-gă cada-gă, te sá dúcáⁿ ní ndoho-gă xiăⁿ núu ndácú-gă chindèe-gă nchaa ñáyiú ducaⁿ yăha.

3

Xítohó Jesucristú ïo-gă cùnùu-gă dàcúuxí ndií Moisés

¹ Te nchòhó cúu-ndó ñáyiú ndècu ndihí-í ichi Xítohó Jesucristú ñáyiú cùu cuendá Yă Ndiöxí, te tnáhá-ndó cùu-ndo ñáyiú ní cáháⁿ ñáhá-gă cuendá cundecu-ndo ndihí-gă. Te yúhú cächí tnúhu-í xii-ndo sã ïo váha cada cuendá-ndó năcuáa nduu cuendá Xítohó Jesucristú, chi diu-gă cúu-gă Yaá ní tendaha ñaha Dútú Ndiöxí ní quixi-gă ñuyíú-a, te diu-gă cúu-gă Dútú ïo cùnuu chi quide-gă núú Yă

Ndiöxí. Te ñiu-ni cuendá Xítohó Jesucristú cãháⁿ tnúhu sá ni sãndáá iní-ó. ² Te mee Yã Ndiöxí ní sãha chiúⁿ-gã Xítohó Jesucristú, te ío ndáá quidé-gã chiúⁿ-áⁿ sã cúu-xí Yã Ndiöxí, te ñiu-ni ducaⁿ ñi quide ndíi Moisés ní quide ndíi chiúⁿ ní tãhú Yã Ndiöxí, te ío ndáá ní quide ndíi chiúⁿ-gã sã cúu-xí nchãa ñáyiú cùu cuendá-gã, te cue ñáyiú-áⁿ cúu-yu dàtná vehe mee-gã. ³ Te ñiⁿ tée ñácaá ñiⁿ vehe váha ío cãhnu-gã cúu-dé dàcúúxí vèhe ñácaá-dé. Te ducaⁿ sãtnahá-xi cùu Xítohó Jesucristú chi ío-gã cãhnu cuu-gã dàcúúxí ndíi Moisés. ⁴ Te nchoo sã naha-o sã ncháá vèhe dacuití ndècu cue tée ní dácáá, dico sa naha tucu-o sã Yã Ndiöxí quidé-gã ndécú nchãa sã ío ñuyíú-a. ⁵ Te ndíi Moisés-áⁿ ío ndáá ní quide ndíi chiúⁿ ní tãhú Yã Ndiöxí ní quide ndíi sã cúu-xí nchãa ñáyiú cùu cuendá-gã. Te sã dúcáⁿ ñi quide ndíi xiãⁿ ní cuu ndíi ñiⁿ tée ní xinu cuechi núú Yã Ndiöxí. Te ní xáhaⁿ ndíi xii nchãa ñáyiú cùu cuendá-gã nãcuáa cãháⁿ-gã ndéé cuéé-gã. ⁶ Dico Xítohó Jesucristú cúu-gã Déhe mee Yã Ndiöxí, te cùu-gã Yaá ío quide ndáá yíndãha-gã nchãa ñáyiú cùu cuendá Yã Ndiöxí. Te tnãhá-ó cùu-o ñáyiú cùu cuendá-gã, te ñiu-ni ducaⁿ cùu cuendá ñãhá-gã xii-o te núu na cãnchicúⁿ nihnu-ni-o cãni ndáá iní-ó cuendá-gã ndéé ná sãá nduu ngũndecu-o ndíhi-gã.

Cue ñáyiú cùu cuendá Yã Ndiöxí ío váha cùu iní-yu

ndécú-yu ndíhi-gã

⁷ Te núu tütú Yã Ndiöxí yódó tnúni nãcuáa ní cãháⁿ Espíritú-gã, te duha ní cachí-xi:

Te núu nchòhó ndèdòho-ndo nchãa tnúhu cãháⁿ Yã Ndiöxí vitna,

⁸ te vá cùnduu sáa iní-ndó dàtná ní xínduu sáa iní ñáyiú ní dáquée tãhú tnúhu Yã Ndiöxí, ñáyiú ní xíndecu xití yucu,

chi ñáyiú-áⁿ ñi xito ndéé-yu Yã Ndiöxí núu nása cada ñãha-gã xii-yu.

Duha ní cachí Espíritú-gã. ⁹ Te cãchí tucu Espíritú Yã Ndiöxí nãcuáa ní cãháⁿ méé-gã, te duha ní cachí-gã:

Xití yucu ní xito ndéé ñãhá cué ñãni tnãhá-ndó ñi xíndecu ndéé sanaha xii-í,

te ducaⁿ ñi quide ñãhá-yu cuéi ní xiní-yu nchãa sã ñi quide-í ndi ùdico cuía ñi xíndecú-yu xití yucu-áⁿ.

¹⁰ Te sã dúcáⁿ ñi quidé-yu núu xiãⁿ ní cudéèⁿ-í núu-yu, núu xiãⁿ ní cãháⁿ-í cuendá-yu, te ní cachí-í:

“Ñáyiú-a quide-ní-yu nchãa sã ñã túú tàú-yu cadá-yu te ni ñã túú cuini-yu cadá-yu nchãa nãcuáa sãni iní-í, te ni ñã túú cuini-yu cadá-yu nãcuáa cãháⁿ-í”,

duha ní cãháⁿ-í cuendá-yu.

¹¹ Te xiãⁿ núu ní cudéèⁿ-í núu-yu te ní xáhaⁿ ndáá-í xii-yu sã vã ndúú tãhú-yu cundecu váha-yu núu ndécú-í.

Duha ní cachí Yă Ndiôxí cächí Espiritú-gá.

¹² Te nchòhó ñáyiu ndècu ndihí-í ichi Xítóhó Jesucristú, cáhán-í dóho-ndo sã ïo cada cuëndá-ndó vã cãní cuèhé iní-ndó te ngóo-ndo vã quëndáá-gá iní-ndó Yă Ndiôxí te dañá-ndo ìchi-gá, te ñiu-gá cúú-gã Yaá ndécú nchàa nduu nchaa quiú. ¹³ Te ìⁿ nduu ìⁿ nduu ío chí cuãha tnàha tnúhu ndee iní cundecu-ndo niní ndecu-ndo ñuyíú-a cuëndá sá vã xínu iní-ndó càda-ndo nándi sá cuèhé sá dúhá, te ducaⁿ te vã cúú sàá iní-ndó núú Yă Ndiôxí. ¹⁴ Te vã dãná ndèé-ó cãni ndáá iní-ó nàcuáa cada ñaha Yă Ndiôxí xii-o, te dàtná-ni ní sani iní-ó ndèé cùtnàhá ní tuha-o ìchi Yă Ndiôxí, te ñiu-ni ducaⁿ cãni iní-ó ndèé ná sàá nduu vã cùndecu-gá-ó ñuyíú-a, te núu ducaⁿ na càda-o te cùu ìⁿnuu-o ndihí Xítóhó Jesucristú.

¹⁵ Te duha cáhán-xi ìⁿ xichi núú tütú Yă Ndiôxí:

Te núu nchòhó ndèdóho-ndo nàcuáa cáhán Yă Ndiôxí vitna,

te vã cùndùu sáá iní-ndó dàtná ní xínduu sàá iní cue ñáyiu ní dáquéé tìhú tnúhu-gá ndéé sanaha.

Duha cächí-xi núú tütú-gá.

¹⁶ Te cue ñáyiu ducaⁿ ní xínduu sàá iní-xi cùú-yu ñáyiu ní ndeñuhu ndí Moisés nacióⁿ Ègiptú, te ñáyiu-án ñí xíndedóho-yu tnúhu ní cáhán Yă Ndiôxí te ní quide sàá iní-yu ní dáquéé tìhú-yu tnúhu-gá. ¹⁷ Te ndi ùdico cuiá ñí xúhuⁿ-yu ichi ío ní cùdééⁿ Yă Ndiôxí núú-yu

cuëndá sá ñí quidé-yu nándi nchaa sá cuèhé sá dúhá, te ñáyiu-án ñí xíhí-yu xití yucu.

¹⁸ Te nchaa ñáyiu-án ñà túú ní cuíní-yu tníⁿ-yu tnúhu ní cáhán Yă Ndiôxí núu xíáⁿ ní cáhán ndáá-gá sá vã ndúú tãhú-yu cundecú-yu núú ïo váha càa ndecu-gá. ¹⁹ Te xíáⁿ núu nchoo cùtnuní iní-ó sã nchàa ñáyiu-án ñà túú ní ndùu tãhú-yu cundecu váha-yu núú ndécú-gã, chi ñá túú ní sàndáá iní-yu tnúhu ní cáhán-gá.

4

¹ Te vitna ndècu ndihí-gá-ó tnúhu Yă Ndiôxí tnúhu sá dãnèhé ñáhá xii-o sá cúú cùndecu váha-o núú ndécú-gã, te tàú-xi quiyùhú iní-ó chi na cuáhán te vã ndúú tãhú-ó cùndecu váha-o núú ndécú-gã.

² Te tnàhá nchoo ñí ngúndecu ndihí-o tnúhu sá cáhán nàcuáa naníhí tãhú-ó dàtná ní xíndecu ndihí cue ñáyiu ndéé sanaha, dico ñáyiu-án chi ñá túú vèdana ni nàndíhi-xi cuèi ní xíndedóho-yu tnúhu-án chi ñá túú ní sàndáá iní ñãhã-yu xii-gá. ³ Dico nchoo cùu-o ñáyiu ní sàndáá iní tnúhu Yă Ndiôxí, núu xíáⁿ nduu tãhú-ó cùndecu váha-o núú ndécú-gã, te ní quee ndáá-xi nàcuáa cáhán-gá núú tütú-gá núú cächí-xi:

Yúhú ní cudéèⁿ-í núú-yu, te ní cáhán ndáá-í sá vã ndúú tãhú-yu cundecu váha-yu núú ndécú-í.

Duha ní cachí-gá. Te cuu nduu tãhú-yu cundecu váha-yu núú ndécú Yă Ndiôxí ní cùu, chi sa ní xínu cava

nchaa chiùⁿ ní quide-gá sá
nĩ cadúha-gá ñuyíú. ⁴ Te
núú tütú Yá Ndiöxí càháⁿ-xi
nàcuáa ní quide-gá nduu úsá,
te duha càchí-xi:

Yá Ndiöxí ní quide chiùⁿ-gá
ĩnú nduu ní quide-gá
nchaa chiùⁿ-gá te ní
ndetatú-gá nduu úsá.

Duha càchí-xi núú tütú-gá.
⁵ Te càchí tucu-xi núú tütú
Yá Ndiöxí nàcuáa ní càháⁿ-gá
cuendá cue ñáyiú ndéé
sanaha, te duha ní cachí-gá:

Cue ñáyiú-a vá ndúú tãhũ-yu
cundecu váha-yu núú
ndécú-í ndétátú-í.

Duha ní cachí-gá. ⁶ Te
ñáyiú ní xíndedóho tnúhu
sá càháⁿ nàcuáa naníhí
táhú-ó ndéé sanaha, ñá túú
ní ndùu tãhũ-yu cundecu
váha-yu núú ndécú Yá Ndiöxí
ndétátú-gá, te ducaⁿ chi ñá
túú ní sàndáá iní ñáhã-yu
xii-gá, dico ió-gá ñáyiú nduu
táhú cundecu váha núú
ndécú-gá ndétátú-gá. ⁷ Te
ní xica cuéhé nduu sá dúcáⁿ
ñá túú ní sàndáá iní ñáhã
ñáyiú-áⁿ xii-gá, te dãtnùní
ní càháⁿ ndíi Dãvií yuhu-gá
nàcuáa cada-gá vitna, te
diu-ni nàcuáa sa yòdo tnuní
diu-ni ducaⁿ chido tnuní
tucu-í nàcuáa ní càháⁿ ndíi
yuhu-gá, te duha ní cachí-gá:

Te núu nchòhó ndèdóho-ndo
tnúhu càháⁿ-í te vá
cádá sáa iní-ndó.

Duha ní cachí-gá. ⁸ Te
ndíi Jòsué ní sanu ichi ndíi
ñáyiú núú quihíⁿ-yu cundecu
váha-yu, dico ñá díú cuendá
xiãⁿ ní càháⁿ Yá Ndiöxí,
chi cuendá nàcuáa cada-gá
vitna ní càháⁿ-gá. ⁹ Núu

xiãⁿ sáá nduu ndùu tãhú
nchaa ñáyiú cùu cuendá Yá
Ndiöxí ngúndecu váha-yu núú
ndécú-gã ndétátú-gá. ¹⁰ Te
nchaa ñáyiú ducaⁿ na ndùu
táhú cundecu váha núú ndécú
Yá Ndiöxí ndétátú-gá, te
tnáhã-yu ndetatú-yu cuendá
nchaa sá vãha ní quidé-yu
dãtná ndétátú méé-gã. ¹¹ Te
xini ñuhu-xi sá nchóó ïo
nducu ndèe-o nducu-o
nacuáa cada-o cuendá nduu
táhú-ó ngúndecu váha-o núú
ndécú Yá Ndiöxí ndétátú-gá,
chi na cuáhãⁿ dava-ndo
cãda-ndo datná ní quide
cue ñáyiú ñá túú ní sàndáá
iní ñáhã xii-gá, te vá ndúú
tãhú-ndó cundecu váha-ndo
núú ndécú-gã te núu ducaⁿ
na cãda-ndo.

¹² Te tnúhu Yá Ndiöxí cúu-xí
dãtná ìⁿ sá nchító-ó chi
quide-xi nãndi sá quidé-xí,
te cùu-xi datná ìⁿ sá dèéⁿ
víhí-gã dácúúxí ìⁿ yuchí sá
ndéé úú xio núú-xi. Te ducaⁿ
sãtnahã-xi cùu tnúhu-gá chi
quée-xi iní-ó, te dãndixi túu-xi
nchaandi túhú sá sání iní-ó
te núu quide váha-o àdi ñá
túú quide váha-o ndècu-o.

¹³ Te ni ìⁿ sá nĩ cadúha
Yá Ndiöxí vá cání iní-ó sá
ndácú-xí nguivãha-xi núú-gã,
chi nchaandi túhú sá sání
iní-ó ndècu túu-xi núú-gã,
te diu núú Yáá-áⁿ na cãni
cuendá-ó nchãa sá quidé-ó.

*Xítóhó Jesucristú cúu-gã
Dútú ïo cùnuu*

¹⁴ Te Xítóhó Jesucristú
cúu-gã Dútú ïo cùnuu
ndecu ndihí-o, te diu-gá
cúu-gã Déhe Dútú Ndiöxí, te
Yáá-áⁿ cuãndaa-gá andiú ní
nucúndecu-gá núú Yá Ndiöxí,

núu xiǎⁿ tàù-xi sá cánc^hicúⁿ
 nihnu-ni-o quíndáá iní-ó-gǎ.
 15 Te mee Yáá-áⁿ ío cùn^uu-gá
 cúu-gǎ dútú-ó ndècu ndi^hi-o,
 te ío na cùndahú iní ñáhá-gǎ
 xii-o cuèndá sá ñǎ nihí
 ndéé-ó cùndecu-o. Te ducaⁿ
 càda-gá chi ní yáha-gá dàtná
 yáha mee-o, chi nchaa sá
 ñí yáha-gá-áⁿ ñí cuu-xi sá
 cáda-gǎ nándi nchaa sá cuèhé
 sá dúhá ní cùu dico ñí ìⁿ
 ñá túú ní quíde-gá. 16 Núu
 xiǎⁿ tàù-ó sǎ nchóó ñí yuhu
 ñí iní-ó cáháⁿ ndi^hi-o Yá
 Ndiòxí Yáá ío cùndahú iní
 ñáhá xii-o chindee ñaha-gá,
 te ducaⁿ càda-o te cundahú
 iní ñáhá-gǎ chindee ñaha-gá
 xii-o ndèda-ni càa oré xini
 ñuhu-o-gá.

5

1 Te nchaa cue dútú cùn^uu
 núu ñáyi^u isràél diu-ni
 ñáyi^u cùu-güedé, te ducaⁿ
 ñí ngúndecu-güedé cuèndá
 cada-güedé chi^u sá cúu-xí
 Yá Ndiòxí cuèndá-yu, chi
 diu cue téé-áⁿ ñí xóo nacani
 cuèndá-güedé núu-gǎ quiti
 ní xóo cahni-güedé ní xóo
 nduu táhú-gǎ, te ducaⁿ ñí xóo
 cada-güedé cuèndá sá cáda
 càhnu iní Yá Ndiòxí cuéchi-yu,
 te ducaⁿ ñí xóo nacani cuèndá
 tucu-güedé núu-gǎ nchaa
 dava-gá sá ñí xóo níhí-güedé
 ní xóo nduu táhú-gǎ. 2 Te
 nchaa cue dútú-ǎⁿ ñí xóo
 cundee iní-güedé nchaa sá
 ñí xóo cada nchaa ñáyi^u ñá
 túú ní quíde ndáá ñáyi^u ñá
 túú cùtnuní iní-xi, te ducaⁿ
 ñí xóo cada cue dútú-ǎⁿ
 chi tnáhá-güedé ñá túú ní
 xóo níhí ndéé-güedé cun-
 decu-güedé cuèndá nchaa

sá ñí xóo yáha-güedé. 3 Te
 sá cuèndá sá dúcáⁿ ñà túú
 ní xóo níhí ndéé-güedé núu
 xiǎⁿ dai ní xini ñuhu-xi sá
 tnáhá-güedé cuáha-güedé
 Yá Ndiòxí sá ndúú táhú-gǎ
 cuèndá méé-güedé dàtná
 quíde-güedé cuèndá ñáyi^u.

4 Te ñí ìⁿ téé vá ndácú-dé
 cuu-dé dútú cùn^uu cuèndá-ñí
 sá càchí iní méé-dé te núu
 ñá díú mée Yá Ndiòxí ducaⁿ
 cuini-gá sá cúu-dé dútú
 cùn^uu datná ní quíde-gá
 ndíi Àrón. 5 Te cuéi Xítohó
 Jesucristú chi ñá díú mée-gá
 ní quíde-gá méé-gǎ ìⁿ dútú
 cùn^uu nacuaa cada nínu-gá
 méé-gǎ, chi mee Tátá-gǎ Dútú
 Ndiòxí ducaⁿ ñí cachí-gá sá
 cúu-gǎ Dútú cùn^uu, te ducaⁿ
 chi Yá Ndiòxí ní xáhaⁿ-gǎ:

Yòhó cúu-n Dèhe-í,
 te cuini-í sá dúhá-ñí
 cùndecu-n núu ndécù-í.
 Duha ní xáhaⁿ-gǎ xii Xítohó
 Jesucristú. 6 Te núu tütú Yá
 Ndiòxí yódó tnùnⁱ nàcuáa ní
 xáhaⁿ tucu-gá xii Xítohó Jesu-
 crístú, te duha ní xáhaⁿ-gǎ:

Yòhó cúu-n dütú cundecu ñí
 caa ñí quíhíⁿ,
 te cùu-n datná ní cuu ndíi
 Melquisèdec.

Duha ní xáhaⁿ-gǎ xii Xítohó
 Jesucristú. 7 Te cùtnáhá
 ní xíndecu Xítohó Jesucristú
 ñuyíú-a te níhí ní xóo cáháⁿ
 ndi^hi-gá Yá Ndiòxí te ní xóo
 cáháⁿ ndàhú-gá núu-gǎ, te
 ní xóo ndáhyú-gá òré ducaⁿ
 ñí xóo cáháⁿ ndi^hi-gá Yá
 Ndiòxí, te ducaⁿ ñí quíde-gá
 chi nàha-gá sá Yá Ndiòxí
 cúu-gǎ Yáá ndacu dàcácu
 nihnu ñaha xii-gá cuèndá sá
 vǎ cúu dúcáⁿ-gǎ. Te Yá Ndiòxí

ní xíndedóho-gá nchaa tnúhu ní cáháⁿ Xítohó Jesucristú cuendá sá ñi quide-gá nchaa nàcuáa ní xáhaⁿ Yá Ndiöxí cada-gá. ⁸ Te sá cuendá nchaa sá ñi ndoho Xítohó Jesucristú xíáⁿ ní cutnùnì inì-gá cada-gá nchaa dava-gá sá vâha nàcuáa cuinì mée Yá Ndiöxí cada-gá. Te ducaⁿ ñi cuu cuèi cùu-gá Déhe Yá Ndiöxí. ⁹ Te sá dúcáⁿ ñi quide-gá nchaa nàcuáa cuinì mée Yá Ndiöxí, xíáⁿ nûu vitna cùu-gá Yaá dácäcu nihnu nchaa ñáyiu sàndáá inì ñáhá xii-gá núú ùhú núú ndàhú. ¹⁰ Te mee Yá Ndiöxí ní cachí-gá sá Xítohó Jesucristú cúu-gá dútú cúnúu datná ní cunuu ndíi Melquisèdec cùtnàhá ní cuu ndíi dútú ñuyíú-a.

Cuendá ñáyiu cuinì dañu nihnu ichi Yá Ndiöxí

¹¹ Te vai-gá tnúhu ndècu cáháⁿ-í nàcuáa ndúu cuendá Xítohó Jesucristú, ndihi ndíi Melquisèdec, te dicó-ni sá nchòhó ío cuèé tècú tnùnì-ndó, te yúhú ío ùhú ñihí-í nàcuáa cáháⁿ-í nàcuáa tecú tnùnì-ndó.

¹² Te nchòhó sa ní cuu cuèhé nduu ndècu-ndo ichi Xítohó Jesucristú, te tau-ndó dànehé-ndó cuè ñáyiu ndècu ichi-gá tnúhu-gá nûu dicó sá cúu, dico xini ñuhu-ni-xi sá cùndècu ñáyiu danèhé ñáhá tnúhu-gá xii-ndo, tnúhu sá ñi dácúáhá-ndó ndéé díhna sá ñà túú ùhú tecú tnùnì-ndó. Te sá dúcáⁿ quide-ndo núu xíáⁿ cúu-ndó datná cue landú vitna sàdi camá, landú vátá cúu-gá caxi ditá. ¹³ Chi nchaa ñáyiu cùu datná landú vitna sàdi, ñáyiu-áⁿ cúu nèñuú-yu

ñà túú cùtnunì inì-yu nàcuáa cáháⁿ tnúhu sá cáháⁿ nàcuáa cada ndáá-yu cundecú-yu. ¹⁴ Te nchaa sá vátá cúu-gá caxi cue landú yíquíⁿ xíáⁿ cúu-xí cuendá cue ñáyiu sacuéhé, te xíáⁿ cúu-xí datná tnúhu sá dácúàha ñáyiu sa ní níhí ndéé ndècu ichi-gá, ñáyiu sa ní cutnùnì vâha inì-xi nándi cùu nchaa sá cuèhé sá dúhá, ndihi nándi cùu nchaa sá vâha.

6

¹ Te xíáⁿ nûu vitna xini ñuhu-xi dacuaha-o dava-gá tnúhu Yá Ndiöxí cuendá ducaⁿ te cuu-o ñáyiu tècú tnùnì nchaa tnúhu-gá. Te xini ñuhu-xi sá ncháá tnúhu Xítohó Jesucristú sá ñi dácúáhá-ó ndéé díhna vá dácúàha-gá-ó datná ní dácúáhá-ó chi sa tècú tnùnì-ó. Te ñà túú-gá xini ñuhu-xi dacuaha-o datná ní dácúáhá-ó ndéé díhna nàcuáa cada-o ndixi cuèchi inì-ó cuendá nchaa sá cuèhé sá dúhá quide-o, sá tá dácúíta nihnu ñaha xii-o cuáháⁿ ní cùu. Te ducaⁿ vá dácúàha-gá tucu-o datná ní dácúáhá-ó ndéé díhna nàcuáa cada-o quindáá inì-ó Yá Ndiöxí, ² ndihi cuendá nàcuáa ní dácúáhá-ó nàcuáa cuandute-o, ndihi cuendá nàcuáa cada-o càcáⁿ ndodo-o ndàha-o díquí ñáyiu ní sàndáá inì ñáhá xii-gá. Te ducaⁿ ñà túú-gá xini ñuhu tucu-xi dacuaha-o datná ní dácúáhá-ó ndéé díhna cuendá nàcuáa ndote cue ñáyiu ní xihí, ndihi cuendá nàcuáa ní dácúáhá-ó sá Yá Ndiöxí daquíhíⁿ-gá ñáyiu núú ùhú núú ndàhú ni caa ni quíhíⁿ. ³ Te núu Yá Ndiöxí ná cachí-gá,

te cuita dacuàha-gá-ó nchàa dava-gá tnúhu sá cúmăni quihíⁿ.

⁴ Te cue ñáyiú sa təcú tnùnı́ tnúhu Yá Ndiöxı́, ñáyiú sa xını́ nchaa nàcuáa ndùu nchaa sá vâha quide ñaha Yá Ndiöxı́ xii-o ndihı́-yu, ñáyiú sa chindee ñaha Espiritú Yă Ndiöxı́, ⁵ ñáyiú sa cùtnunı́ inı́-xı́ sá ıo vâha tnúhu Yá Ndiöxı́, ñáyiú sa xını́ nàcuáa ta quide Yá Ndiöxı́ véxi nchaa sá vâ yoo tnàhı́ ndàcu cada, ⁶ te núu ñáyiú-áⁿ ná ngũita tucú-yu daquèe tı́hú duúⁿ-yu tnúhu Yá Ndiöxı́, te vâ ndácú-gă-ó nà canu ichi-ó-yu nàcuáa ndixi cuéchi inı́-yu te núu ducaⁿ na càdá-yu, te sá dúcáⁿ ná càdá-yu te tnàhá-yu cùu-yu dàtná cue tée ní sahnı́ ñaha xı́ Xıtohó Jesucristú Déhe Yá Ndiöxı́ núu cùrúxı́. Te sá dúcáⁿ ná càdá-yu te ngóo dava-gá ñáyiú cáháⁿ cuèhé-yu cuèndá Xıtohó Jesucristú. ⁷ Te nchaa ñáyiú cùu-yu dàtná ñuhu, chi ñuhu-áⁿ ndı́ tnahá òré cúúⁿ dàú te xıhi-xı́ ndute, te dava ñuhu vâha cùu sá xıtú ñáyiú, te sá cúu núu ñuhu-áⁿ ıo nàndı́hi-xı́, te mee Yă Ndiöxı́ quidé-gă cúu sá vâha núu ñúhú-ăⁿ. ⁸ Dico núu da iñu na ndaa núu ñuhu-áⁿ te ñá túu vèdana nàndı́hi-xı́ te núu ducaⁿ, te Yá Ndiöxı́ vâ cúu vâha inı́-gá cuèndá ñuhu-áⁿ sá dúcáⁿ dà iñu ndaa núu-xı́, te iñu-áⁿ ndı́hi-xı́ cáyú. Te ducaⁿ sãtnahá-xı́ cùu ñáyiú dàquee tı́hú tnúhu Yá Ndiöxı́ chi ñá túu cùu vâha inı́-gá núu-yu.

Nı́hı́-ó sã ndétú-ó ndı́u tãhú-ó

⁹ Te cuéi duha càháⁿ-ı́ dico nchòhó cue ñáyiú ıo cùu inı́-ı́, chi cùtnunı́ ndáá inı́-ı́ sá vâ càdá-ndó dàtná xıquide dava-gá ñáyiú, te mee-nı́ sã vâha cuu xii-ndo chi cùu-ndo ñáyiú sa ní nanı́hı́ tãhú. ¹⁰ Te ducaⁿ chi Yá Ndiöxı́ cúu-gă Yaá ıo vâha quide ndáá, te vâ dáná ndòdo inı́-gá nchaa sá vâha quide-ndo, te ní vâ dáná ndòdo inı́-gá nàcuáa quide-ndo cuu inı́-ndó-gă, te sá dúcáⁿ quide-ndo cuu inı́-ndó-gă xıáⁿ chındèe-ndo cue ñáyiú ndècu ndı́hi-ndo ichi Xıtohó Jesucristú, te ducaⁿ-nı́ ta quide-ndo véxi ndéé vitna. ¹¹ Te cuını́-ı́ sá ııⁿ ııⁿ-ndo nducu ndee-ndo cada-ndo nàcuáa cuını́ Yă Ndiöxı́ dàtná tá quide-ndo véxi, te diu-nı́ ducaⁿ càda-ndo ndéé ná sãá nduu ndùu tãhú-ndó cùndecu-ndo ndı́hi-gá núu ndécú-gă, te ducaⁿ te nı́hı́-ndó nchãandı́ tı́hú sá ndétú-ndó ndùu tãhú-ndó cùndecu ndı́hi-ndo ní caa ní quihı́ⁿ. ¹² Te yúhú cuını́-ı́ sá nchòhó vâ tı́hı́o-ndo càda-ndo nchaa nàcuáa cuını́ Yă Ndiöxı́, te cada-ndo dàtná quidé ñáyiú sãndáá inı́ tnúhu-gá, ñáyiú càhnı́u inı́-xı́. Te sá dúcáⁿ quidé-yu xıáⁿ nı́hı́-yu nchaa sá ní cachı́ Yă Ndiöxı́ nduu tãhú-yu.

¹³ Te cùtnahá ní xáhaⁿ Yă Ndiöxı́ xii ndı́ı́ Ábrahãm nàcuáa cada-gá, te ní ca-cunehe-gá méé-gă nàcuáa cutnùnı́ inı́ ndı́ı́ sá ndáá cada-gá nàcuáa ní xáhaⁿ-gă xii ndı́ı́, te vâ yoo ııⁿ ní càcunehe-gá cuèndá sá quındáá inı́ ndı́ı́ tnúhu

ní cáháⁿ-gá. Te ducaⁿ nĩ quide-gá chi ìⁿdìi díi-ni mee-gá ío cùnuu-gá. ¹⁴ Te duha ní xáhaⁿ-gá xii ndíi Àbrahám; “Yòhó té Àbrahám na cächí tñuhu ndáá-í xii-n sã ío chindee ñàha-í xii-n, te cáyá cuéhé víhí ñàni tñhá-n”, duha ní xáhaⁿ-gá xii ndíi. ¹⁵ Te ndíi Àbrahám ío ní quide ndee ìní ndíi ní xíndetu ndíi, te ducaⁿ te Yá Ndiöxí ní quide-gá nàcuáa ní xáhaⁿ-gá cada-gá sá cúu-xí ndíi. ¹⁶ Te núu ìⁿ ñáyiu càháⁿ ìⁿ tñuhu ndáá cuiti te càcu nehé-yu Yá Ndiöxí cuendá quíndáa ìní tñaha ñáyíu-yu tñuhu càháⁿ-yu, te òré ducaⁿ na càháⁿ-yu te ñã túú-gã sã dácáa ñáyiu càháⁿ ndihí-yu cuendú. ¹⁷ Te ducaⁿ nĩ quide Yá Ndiöxí ní cáháⁿ ndáá-gá sã cádá-gã nàcuáa ní cachí-gá, te ducaⁿ nĩ cáháⁿ-gá cuendá nchaa ñáyiu ní cachí-gá nduu táhú sã cádá-gã nàcuáa cutnùnì ìní-yu sã quidé-gã ìⁿ sã càháⁿ-gá, te ní ñà túú nàdáma-gá ìⁿ sã càháⁿ-gá. ¹⁸ Te nchoo nĩ natuha-o Yá Ndiöxí cuendá dácácu nihnu ñaha-gã xii-o núú ùhú núú ndàhú, te ní níhí-ó tñuhu ndee ìní ndécú ndihí-o cuendá sã vã dáña ndèé-ó cùndetu-o sáa nduu ndùu táhú-ó cùndecu-o ndihí-gá. Te ducaⁿ nĩ níhí-ó tñuhu ndee ìní chi Yá Ndiöxí ní cáháⁿ ndáá-gá sã cádá-gã nàcuáa ní cachí-gá, te ñã túú dándahú ñáhá-gã, te ní ñà túú nàdáma-gá ìⁿ sã ní cachí-gá cada-gá. ¹⁹ Te tñuhu ndee ìní ndécú ndihí-o xíãⁿ quidé-xí cùtnunì ndáá ìní-ó sã

ndúú táhú-ó cùndecu-o ndihí Yá Ndiöxí núú ndécú-gã, te ducaⁿ cùtnunì ndáa ndisa ìní-ó sã cuendá Xítóhó Jesucristú Yáa ndécú núú Yá Ndiöxí. ²⁰ Te ducaⁿ nĩ nucùndecu Xítóhó Jesucristú núú Yá Ndiöxí cuendá ducaⁿ cànchicúⁿ nihnu-o càda-o, te ducaⁿ nĩ nucùndecu-gá núú Yá Ndiöxí chi cùu-gá dútú cùnùu datná ní cunuu ndíi Melquisèdec ñuyíu-a, te ducaⁿ-ni cùu-gá dútú cùnùu ni caa ni quíhíⁿ.

7

Xítóhó Jesucristú cúu-gã dútú datná ní cuu ndíi Melquisèdec

¹ Te ndíi Melquisèdec ní xíndaha ndíi cue ñáyiu ñúú Sàlém, te ní cuu ndíi dútú nĩ xinu cuechi ndíi núú Dútú Ndiöxí Yáa ío cùnuu. Te ndíi Melquisèdec-áⁿ ní xícáⁿ táhú ndíi núú Yá Ndiöxí cuendá ndíi Àbrahám cùtnàhá ní sáháⁿ ndíi Àbrahám-áⁿ nĩ nàá ndíi ndihí cue dava-gá cue téé yíndaha ñáyiu. Te cue téé-áⁿ ñà túú ní ndàcu-güedé nàá-güedé ndihí ndíi Àbrahám-áⁿ chi ní xíta-güedé. ² Te nchaa sã ní níhí ndíi Àbrahám-áⁿ núú ní nàá ndíi, te ní quide ndíi úxí xichi te ìⁿ xichi núú ùxí-áⁿ ní sãñaha ndíi xii ndíi Melquisèdec. Te ñuu ndíi Melquisèdec-áⁿ quée-xí: Téé ío váha quide ndáá yíndaha ñaha xii ñáyiu, duha quèe-xi. Te ní xóo danàni ñahá-yu xii ndíi Téé yíndaha ñúú Sàlém, duha ní xóo danàni ñahá-yu. Te tñuhu Sàlém-áⁿ quée-xí:

Ñuú ndécú nàhi, duha quèe-xi tnúhu-án. Núu xiáⁿ quée tucu-xi nacuaa nàni ndíi Téeyindaha ñuú ndécú nàhi, duha quèe tucu-xi diu ndíi. ³Te ñá túú tnúhu núu yoo cùu tátá ndíi ndihí náná ndíi, te ni ñà túú tnúhu núu yoo cùu xíi ndíi ndihí xítná ndíi, te ni ñà túú tnúhu núu nándi cùu ñáiyu ní cuu ñaní tnáhá ndíi ní xíndecu ndée sanaha-gã, te ni ñà túú tnúhu núu ná ama ní cacu ndíi, te ni ñà túú tnúhu núu ná ama ní xíhí ndíi. Te ndíi-án ducaⁿ-ni ní cuu ndíi dútú ní xíndecu ndíi, te ducaⁿ sãtnahá-xi cùu Xítohó Jesucristú déhe Yá Ndiõxí chi cuu-gá dútú ni caa ni quihíⁿ.

⁴ Te vitna chí cuãha váha cuendá sá ndíi Melquisèdec ní cuu ndíi ñⁿ téé ío ní cuu càhnu ní xíndecu ñuyíú-a, chi ndíi Àbrahám téé ní cuu ñaní tnáhá-ó ní xíndecu ndée sanaha ní quide ndíi úxí xichi nchaa sá ní níhí ndíi núú ní nàá ndíi. Te ñⁿ xichi núú ùxí-án ní sãñaha ndíi xii ndíi Melquisèdec. ⁵ Te ndíi Moisés ní chídó tnùní ndíi nàcuáa cada nchaa dútú, cue téé ní cuu ñaní tnáhá ndíi Lèví sá cuè téé-án queheⁿ-güedé ñⁿ xichi núú ùxí xichi sá níhí cue ñáiyu isràél ñáiyu cùu ñaní tnáhá-güedé cuu cuendá-güedé. Te ducaⁿ quide-güedé cuèi ñaní tnáhá-güedé ndihí-yu ní cuu ndíi Àbrahám. ⁶ Te cuèi ñá díú ñaní tnáhá ndíi Melquisèdec cúu ndíi Àbrahám dico ní queheⁿ ndíi Melquisèdec-án ñⁿ xichi núú ùxí xichi nchaa sá ní níhí ndíi Àbrahám. Te ndíi Melquisèdec-án ní xícáⁿ táhú

ndíi núú Yá Ndiõxí cuendá ndíi Àbrahám. Te diu-ni ndíi Àbrahám-án ní xáhaⁿ Yá Ndiõxí xii ndíi sá cáda váha ñaha-gã xii ndíi. ⁷ Te sa cùtnuní iní-ó sá núu ñⁿ téé na cacáⁿ táhú-dé núú Yá Ndiõxí cuendá ñⁿ ñáiyu, te téé-án cúnùu-gá-dé. ⁸ Te cue dútú ñáiyu isràél quèheⁿ-güedé ñⁿ xichi núú ùxí xichi nchaa sá níhí-yu cùu cuendá-güedé, te cue téé-án cuú-güedé. Te núú tütú Yá Ndiõxí càchí-xi sá ndíi Melquisèdec ndécú-ní ndíi, te ducaⁿ càháⁿ-xi chí ñá túú tnúhu sá ní xíhí ndíi. ⁹⁻¹⁰ Te sá dúcáⁿ ní sãñaha ndíi Àbrahám sá ní nduu táhú ndíi Melquisèdec, te xiáⁿ cada iní-ó sá sá ndecu ndihí ndíi Àbrahám cue ñaní tnáhá ndíi Lèví cue téé cùu dútú, cue téé quèheⁿ ñⁿ xichi núú ùxí xichi nchaa sá níhí ñáiyu isràél cuèi vátá cacú-gã-güedé. Te cada iní-ó sá tnáhá-güedé ní sáha-güedé ndíi Melquisèdec ñⁿ xichi núú ùxí xichi nchaa sá ní níhí ndíi Àbrahám núú ní nàá ndíi. Te ducaⁿ càda iní-ó chí cue téé-án cuú-güedé ñaní tnáhá ndíi Àbrahám cuèi vátá cacú-gã-güedé dàvá-án.

¹¹ Te sá cuendá cue dútú cue téé cùu ñaní tnáhá ndíi Lèví ní ngúndecu ndihí cue ñáiyu isràél tnúhu sá sánú ìchi ñaha xií-yu nàcuáa cada-yu cundecú-yu. Te ñaní tnáhá ndíi Àron cúu cuè dútú-ãⁿ. Te núu dicó cue dútú-ãⁿ ní ndàcu-güedé cada-güedé nàcuáa cudíu ñáiyu isràél núú Yá Ndiõxí, te ñá túú-gã xíní ñùhu-xi ngúndecu ingá dútú dàtná ndíi Melquisèdec ní cùu. Te dútú-ãⁿ ñà túú ní

cùu-dé dàtná ní cuu cue ñaní tnáhá ndii Àrón. ¹² Te núú cuè dútú cue téé cùu ñaní tnáhá ndii Lèví-áⁿ ní ngúndecu ingá dútú. Te sá dúcáⁿ ní ngúndecu ingá dútú xiáⁿ dacuítí ní xini ñuhu-xi sá dăma năcuăa ndùu tnúhu sá sánú ichi ñaha xii-yu năcuăa cadă-yu cundecú-yu. ¹³⁻¹⁴ Te ñu-ni cuendá dútú-ăⁿ sa nihí-ó tnúhu, te dútú-ăⁿ cúú Xítohó Jesucristú, te ñá díú ñaní tnáhá ndii Àrón cúú-gă chi ñaní tnáhá ndii Júdă cúú-gă. Te nchaa-o tà xini ndăá-ó să ñaní tnáhá ndii Júdă cúú-gă, te ndii Moisés ñá túú tnáhí ná ní cachí ndii cuendá cue ñaní tnáhá ndii Júdă sá cúú-güedé dútú, chi ni ñⁿ-güedé ñá túú ní cùu-güedé dútú ní cùu.

¹⁵ Te vitna cùnuni ndăá iní-ó năcuăa ní cuu, chi Xítohó Jesucristú cúú-gă ingá dútú dàtná ní cuu ndii Melquisèdec. ¹⁶ Te ñá díú cuendá tnúhu sá sánú ichi ñaha xii ñăyiu năcuăa cadă-yu cundecú-yu ducaⁿ ni cùu-gă dútú, chi ní cuu-gă dútú cuendá sá cúú-gă Yaá cundecu ni caa ni quíhíⁿ chi vá ñⁿ ndùu te ndihi nihnu-gă. ¹⁷ Te duha ní xăhaⁿ Yă Ndiôxi xii-gă:

Yòhó cúú-n dütú dàtná ní cuu ndii Melquisèdec,
te cundecu-n nchăa nduu nchaa quíú.

Duha ní xăhaⁿ Yă Ndiôxi xii-gă. ¹⁸ Te xiáⁿ nùu nchaa tnúhu ndéé díhna, tnúhu sá ní xindecu ndihi cue dútú ñà túú-gă cùnùu-xi vitna chi ñá túú-gă xini ñuhu-xi te ni ñà túú nă chindèe ñaha-xi. ¹⁹ Te ñu-ni tnúhu-áⁿ

cúú-xi tnúhu sá ní chídó tnùni ndii Moisés canu ichi ñaha xii ñăyiu năcuăa cadă-yu cundecú-yu. Te tnúhu-áⁿ ñà túú vèdana ni quide-xi năcuăa chindee-xi ñăyiu cudúu-yu núú Yă Ndiôxi. Dico vitna ní ngúndecu ndihi-o tnúhu ndee iní sá ño-gă váha dăcúúxi tnúhu ndéé díhna, chi ndecu ndihi-o Xítohó Jesucristú Yaá cúú dütú-ó. Te Yaá-áⁿ quidé-gă tnáhá tnúhu-o ndihi Yă Ndiôxi vitna.

²⁰ Te Yă Ndiôxi ní cáháⁿ ndăá cuiti-gă sá Xítohó Jesucristú cuu-gă dútú. ²¹ Dico ñá túú dùcaⁿ ní cáháⁿ-gă cuendá cue ñaní tnáhá ndii Lèví cue téé ní cuu dútú, cuèi mei òré ní chisaha-güedé ní cuu-güedé dútú. Te cùtnáhá ní chisaha Xítohó Jesucristú cúú-gă dútú, te Yă Ndiôxi ní xăhaⁿ ndăá cuiti-gă xii-gă, te duha ní xăhaⁿ-gă:

Yúhú Dütú Ndiôxi càháⁿ ndăá cuiti-í te vá dămà-í tnúhu càháⁿ-í:
“Yòhó cúú-n dütú dàtná ndii Melquisèdec,

te cundecu-n ni caa ni quíhíⁿ.”
Duha ní xăhaⁿ Yă Ndiôxi xii Xítohó Jesucristú. ²² Te Xítohó Jesucristú quidé-gă năcuăa cùtnùni ndăá iní-ó să Yă Ndiôxi cada-gă ingá núú să váha sá cúú-xi-ó dàtná ní cachí-gă, te xiáⁿ cúú-xi să ño-gă váha dăcúúxi tnúhu ní cáháⁿ-gă ndéé díhna. ²³ Te ño cuéhé cue ñaní tnáhá ndii Lèví ní cuu-güedé dútú, te ducaⁿ cuendá sá ñà túú ní cùdíi-güedé cundecu-güedé chi ní ndihi-güedé ní xihí. ²⁴ Dico Xítohó Jesucristú chi vá cùú-gă, chi cundecu-gă

ni caa ni quíhíⁿ nõu xiǎⁿ diu-ni-gá cuu-gá dútú, te vá yõo ìⁿ-gá cuu dútú cada núu-gã. ²⁵ Te núu xiǎⁿ Xítohó Jesucristú dácäcu nihnu ñaha-gã xii nchoo ñäyiu núu ùhú núu ndàhú, nchoo ñäyiu sàndáá iní ñáhá xii-gá, te diu-ni nchoo cùu-o ñäyiu tnàhá tnúhu ndíhi Yá Ndiõxí, te vá ìⁿ ndùu-gá te cuíta nihnu-o. Te ducaⁿ chi Xítohó Jesucristú ñá túú xòcuiñí-gá núu Yá Ndiõxí càháⁿ ndàhú-gá cuendá-ó.

²⁶ Te Xítohó Jesucristú cúu-gã Yaá cúu dútú cúnùu xini ñuhu-o cundecu ndíhi-o, te diu-gá cúu-gã Yaá chindèe chitúu ñaha xii-o, te cùu-gá Yaá ío quide ndáá núu Yá Ndiõxí, te cùu-gá Yaá cándòo canine chi ñá túú tnàhí cuèchi-gá. Te ñá túú tnàhí quide-gá dàtná quidé nchàa cue ñäyiu ndècu ichi cuehé ichi duha, te cùu-gá Yaá ní nucúndecu andiu nõú ndécú Yá Ndiõxí te yacáⁿ táxi tnùnigá. ²⁷ Te ñá túú quide-gá dàtná ní quide cue dútú ní cunuu ní xíndecu, chi cue dútú-ãⁿ ìⁿ nduu ìⁿ nduu ní xóo cahni-güedé quiti ní xóo nduu táhú Yá Ndiõxí, te díhna-gá cuendá nchaa cuèchi mee-güedé ducaⁿ ní xóo cada-güedé te dàtnùní ducaⁿ ní xóo cada tucu-güedé cuendá nchaa cuèchi ñäyiu. Dico Xítohó Jesucristú chi ìⁿ xito-ni ní xíhí-gá sá cúu-xí nchàa ñäyiu chi ducaⁿ ní sani iní-gá, te vá ìⁿ ndùu-gá ducaⁿ càda tucu-gá. ²⁸ Te sá cuendá nchaa tnúhu ní chídó tnùní

ndíi Moisés xiǎⁿ ní xíndecu cue tée ní cuu dútú cúnùu, te cue tée-ãⁿ ñí cuu-güedé cue tée yíca cuèchi-xi. Te sátá dúcãⁿ ní chídó tnùní ndíi Moisés nàcuáa cada ñäyiu, te ní xica cuéhe víhí ndùu te dàtnùní ní cáháⁿ ndáá cuiti Yá Ndiõxí sá Dèhe-gá cuu-gá dútú cúnùu. Te Yaá cúu Dèhe-gá-ãⁿ ñí quide-gá nchaa nàcuáa tàú-xi cunduu, te diu-ni ducaⁿ càda-gá ni caa ni quíhíⁿ.

8

Xítohó Jesucristú cúu-gã dútú cúnùu

¹ Te Xítohó Jesucristú Yaá cúu dútú cúnùu ndecu ndíhi-o cuándaa-gá andiu, te ní ngóo-gá xio cùha Dútú Ndiõxí Yaá ío cúnuu, te tnàhá-gá cúnùu-gá. Te diu cuendá-a cùu-xi sá ìo-gá cúnùu ta cáháⁿ-ndí véxi. ² Te núu ndécú Yá Ndiõxí cúu-xí nõú ìí víhí. Te cada iní-ó sá cúu-xí ìⁿ vehe te xiǎⁿ ndécú Xítohó Jesucristú cúu-gã dútú, te vehe-ãⁿ ñí dácáá mèe Yá Ndiõxí te ñá díú cuè tée ñuyíú-a. ³ Te sá cuendá nchaa tnúhu ní chídó tnùní ndíi Moisés xiǎⁿ ní xíndecu cue dútú cúnùu cuendá sá cáhni-güedé quiti nduu táhú Yá Ndiõxí, te nacani cuendá-güedé núu-gã nchaa dava-gá sá nihí-güedé nduu táhú-gã. Te xiǎⁿ nõu dai ní xini ñuhu-xi sá tnàhá Xítohó Jesucristú cuañaha-gã ìⁿ sá ndúú táhú Yá Ndiõxí, te táhú-ãⁿ cúu-xí mèe-gá chi ní xíhí-gá ní cuu-gá dàtná ìⁿ táhú sá cúu-xí Yá Ndiõxí. ⁴ Te núu ni xíndecu-ni

Xítohó Jesucristú ñuyú-a te vá cúu-gã dútú ní cùu, chi sa ndècu cue dútú sãñaha nchaa sã ndúu táhú Yã Ndiõxí òdàtná càháⁿ nchaa tnúhu ní chídó tnùní ndí Moisés. ⁵ Te nchaa sã quidé cuè dútú ñáyiú isràél nùtnahá-xi luha nchaa sã quidé Xítohó Jesucristú Yaá cúu dútú cùnùu ndecu andiú. Te quèe ndáá-xi nàcuáa ní xáhaⁿ Yã Ndiõxí xii ndí Moisés cùnàhá tá cùyatni ngúita ndí dacàa ndí vehe-gã, te duha ní xáhaⁿ-gã: “Ío váha cada cuèndá-ñ nàcuáa dacàa-ñ vehe-í òdàtná cáa sã ñí dánèhé ñáhà-í xii-n xítí yucu”, duha ní xáhaⁿ-gã xii ndí. ⁶ Dico vitna chi Xítohó Jesucristú cúu-gã dútú cùnùu, te ío-gã càhnu nduu chiuⁿ quide-gã dàcúúxí cuè dútú cue ñáyiú isràél. Te ðiú Xítohó Jesucristú cúu-gã Yaá quidé tnàhá tnúhu-o ndíhi Yã Ndiõxí, te ducaⁿ chi Yã Ndiõxí ío-gã váha ndùu tnúhu ní càháⁿ-gã xito cùu uú dàcúúxí tnúhu ní càháⁿ-gã ndéé díhna, te ducaⁿ ío váha ndùu tnúhu ní càháⁿ-gã xito cùu uú chi ní cachí-gã sã ìngá núú sã ío-gã váha cada ñaha-gã xii-o vitna.

⁷ Te núu nàcuáa ní cachí Yã Ndiõxí cada ñaha-gã xii-o ndéé díhna ni quide-xi nchaa nàcuáa tàú-xi cunduu nàcuáa nduu táhú-ó cundecu váha-o núu-gã ñá, te ñá túú xini ñuhu-xi càháⁿ tucu-gã sã cáda-gã ìngá núú sã váha sã cúu-xí-ó vitna ni cuu. ⁸ Te Yã Ndiõxí ñá túú ní cùu váha iní-gã núú ñáyiú isràél núu xíáⁿ ní càháⁿ-gã cuèndá-yu, te duha ní cachí-gã:

Yúhú cùu-í Dútú Ndiõxí, te

duha ndùu tnúhu na càháⁿ-í: Sáa nduu te cada-í ìngá núú sã váha sã cúu-xí cuè ñani tnàhá ñáyiú isràél, ndíhi cue ñani tnàhá ndí Jùdá ðiú-ni ñáyiú isràél.

⁹ Te tnúhu sã càháⁿ-í-a ñá túú ñⁿ-ni cuu-xi ndíhi tnúhu sã ñí xáhaⁿ-í xii cue ñáyiú ní cuu ñani tnàhá-yu ní xíndecu ndéé sanaha càda-í-yu, te ðiú-ni dàvá-áⁿ ñí quide yica-í ní ndeñuhu-í-yu nàcióⁿ Ègipútú,

te ñá túú ní cuèni-yu tní-yu tnúhu ní xáhaⁿ-í xii-yu cuèndá ducaⁿ càda váha-í-yu,

te xíáⁿ núu ní dáñá ñihnu-í-yu ñá túú-gã ní quide cuèndá-í-yu.

¹⁰ Te na sàá nduu te duha ndùu tucu ìngá núú sã váha cada-í cue ñáyiú isràél.

Te yúhú cada-í nàcuáa cutnùní váha iní-yu nàcuáa cuèni-í cadá-yu,

te ducaⁿ ñí yuhu ni iní-yu cadá-yu.

Te yúhú Yã Ndiõxí quindaha-í-yu, te mèe-yu cuú-yu ñáyiú cùu cuèndá-í.

¹¹ Te dàvá-áⁿ chi ni ñáyiú cùu ndí meé-yu,

te ni cuè dava-gã ñáyiú vá cùtnúhu tnàhá-yu sã nátùha ñahá-yu xii-í,

chi dàvá-áⁿ nchaa ñáyiú cundecu ndíhi ñahá-yu xii-í,

cuèi ñáyiú cùnmu te cuèi ñáyiú ñá túú cùnmu.

12 Te dàvá-án cada càhnu iní-í nchaa sá cuèhé sá dúhá quidé-yu,

te vá ñí ndùu-gá ndacu iní-í nchaa sá quidé-yu.

Duha ní cachí Yá Ndiöxí cuendá ñáyiú israhél. 13 Te sá dúcán ñí cáháⁿ Yá Ndiöxí sá cáda-gã ingá núú sã vãha sá cúu-xí ñáyiú xiãⁿ cùtnùní sá tñuhu sá ñí cáháⁿ-gá díhna ñá túu-gã xíní ñuhu-xi. Te cada iní-ó sã tñuhu-án cúu-xí ñí sá ñí cunaha ndècu te ñá túu-gã nándíhi-xi te cuíta-ná-xi, ducaⁿ sãtnahá-xi cùu tñuhu sá ñí cáháⁿ-gá ndéé díhna.

9

Cuendá vehe Yá Ndiöxí

1 Te tñuhu sá ñí cáháⁿ Yá Ndiöxí ndéé díhna cùu-xi cuendá nàcuáa cada ñáyiú israhél chiñuhu ñahá-yu xii-gã, ndihi cuendá vehe-gã caa ñuyiú-a. 2 Te ñáyiú israhél ní dácáã-yu vehe Yá Ndiöxí, te vehe-án ñí cuu-xi vehe dóó te ní xúhuⁿ nehu xití-xi. Te cuártú díhna ní xínani-xi cuártú ní cuu íí, te xiãⁿ ñí xíndecu ñí sá ndéé dité-xi sá ñí cándodó ñí caa candíl núú dité-xi, te ní xínutñí ñí mèsá ní xóo códó pàá ní xóo nduu táhú Yá Ndiöxí. 3 Te cuártú cúu úú ní xínani-xi cuártú ní cuu íí víhí-gã. 4 Te xití cuártú-án ñí xínutñí ñí sá ñí cuáha mee-ni díhúⁿ cuáán te núú xiãⁿ ní xóo cahmi-güedé dúsa sá sàháⁿ tnámí. Te diu-ni xiãⁿ ñí xíndecu tucu ñí cãjá ní cuu mee-ni díhúⁿ cuáán te xití cãjá-án ñí xúhuⁿ ñí lítu ní cuáha mee-ni díhúⁿ cuáán, te xití lítu-án ñí xúhuⁿ mànáá sá ñí xóo caxí-yu

dává-án. Te diu-ni xití cãjá-án ñí xúhuⁿ tñudí ndíi Àrón sá ñí saa itá-xi, ndihi yúú sá ñí xíndéé tñuhu ní cáháⁿ Yá Ndiöxí nàcuáa cada ñáyiú. Te duha ní xínani cãjá-án: Cãjá sá ñúhú tñuhu ní cáháⁿ Yá Ndiöxí sá cúu-xí ñáyiú, duha ní xínani-xi. 5 Te núú cãjá-án ñí cándodó úú tñahá sá ñí cadúha-yu, te xiãⁿ cáá-xí dàtná cáá espíritú xínú cuèchi núú Yá Ndiöxí. Te cuendá úú xiãⁿ ní cutnùní iní-yu sá ío càhnu cuu Yá Ndiöxí, te sá ñí cadúha-yu-án ndéé ndíxíⁿ-xi, te ndíxíⁿ-xi-án dãhu-xi xio xio núú quidé càhnu iní Yá Ndiöxí nchaa yíca cuèchi ñáyiú, dico vá cúu-gã cáháⁿ-í cuendá nchaa dava-gã xiãⁿ vitna.

6 Te nchaa xiãⁿ ní xíndecu xití vehe Yá Ndiöxí, te cue dútú ñí xóo quíhu-güedé ñí nduu ñí nduu xití cuártú díhna ní xóo cada-güedé nàcuáa tàu-güedé cada-güedé sá cúu-xí Yá Ndiöxí. 7 Te cuártú cúu úú-án chi mee-ni dútú cúnúu ní xóo quíhu-dé ñí xito-ni ndi tñahá cuíá. Te ndi tñahá óre ducaⁿ ñí xóo quíhu dútú cúnúu-án te ní xóo canehe-dé níñí ñí xóo quíhu ní xóo nduu táhú Yá Ndiöxí. Te ducaⁿ ñí xóo cada dútú-án cuendá sá Yá Ndiöxí cada càhnu iní-gã nchaa yíca cuèchi mee-dé, ndihi nchaa yíca cuèchi ñáyiú. 8 Te sá dúcán mée-ni dútú cúnúu ní xóo quíhu-dé xití cuártú ní cuu íí-gã-án, xiãⁿ Espíritú Yá Ndiöxí quidé-xí cùtnuní iní-ó sã ñini ducaⁿ ní xíndecu vehe-án ñí xóo cáda-yu nàcuáa ní xóo cùñaha

Yă Ndiöxí cadá-yu. Te xiăⁿ cútnùní sá vătá sàà-gá nduu cǎháⁿ ndihí-yu Yă Ndiöxí nàcuáa tàú-xi cunduu. ⁹ Te sá dúcáⁿ nǐ xindecu vehe-áⁿ, ndihí sá dúcáⁿ nǐ xóo cada nchaa cue dútú-ăⁿ, xiăⁿ cútnùní iní-ó nàcuáa quide Yă Ndiöxí vitna, chi nchaa quiti ní xóo cahni cue dútú-ăⁿ nǐ xóo nduu táhú Yă Ndiöxí, ndihí nchaa dava-gá sá nǐ xóo nduu táhú-gă ñá túú ní quide-xi nacuáa nduu ndoo nduu nine iní cue ñáyiu nàcuáa cutnùní iní-yu sá ñà túú-gă cuéchi-yu ndècu núú Yă Ndiöxí. ¹⁰ Te sá dúcáⁿ nǐ xóo cada nchaa dútú-ăⁿ nǐ níhí tnáhá-xí ndihí nchaa tnúhu sá dánèhé ñáhá xii ñáyiu ná cúú sǎ cǎxí-yu ndihí ná cúú sǎ cúú còhó-yu ndihí nàcuáa ndàhá-yu. Te tnúhu-áⁿ nǐ cuu-xi mee-ni sǎ nǐ sanu ichi ñaha xii-yu nàcuáa cundecú-yu ñuyúú-a. Te tnúhu-áⁿ nǐ nándihí-xi ndéé ní sáá nduu nǐ nadama Yă Ndiöxí tnúhu-áⁿ cuèndá sá vǎ dúcáⁿ-gă cadá-yu cundecú-yu.

¹¹ Te Xítóhó Jesucristú ní quixi-gá ñuyúú-a, te diu-gá cúú-gă Yaá cúú dútú cúnùu, te xiăⁿ nǔu quide-gá nchaa sá vǎha sá cúú-xí-ó. Te vitna ní nucúndecu-gá núú ío vii ío váha càa, te núú ndécú-gă-áⁿ ñà túú cùu-xi ìⁿ vehe sá nǐ dácáá cuè téé ñuyúú-a. ¹² Te cada iní-ó sǎ Xítóhó Jesucristú cuánguihu-gá xiti cuártú núú nǐ cuu íi víhí dàtná ní xóo cada dútú cúnùu ní xindecu ndéé sanaha, chi ní nucúndecu-gá núú ndécú Yă Ndiöxí. Dico ñá túú ní

quide-gá dàtná ní xóo cada dútú cúnùu ní xindecu ndéé sanaha, chi dútú-ăⁿ òré ní xóo quihu-dé xiti cuártú ní cuu íi-gă-áⁿ, te ní xóo canehe-dé níñí chívá ndihí níñí chèhlu ní xóo quihu. Dico Xítóhó Jesucristú chi níñí mée-gă ní sati ní xihí-gá núú cùrúxí, te xiăⁿ duuⁿ duuⁿ cuáháⁿ-gá ní nucúndecu-gá núú ndécú Yă Ndiöxí. Te sá dúcáⁿ nǐ quide-gá xiăⁿ ní naníhí tàhú-ó. ¹³ Te nchaa ñáyiu ní xóo cada nàcuáa vá cúú-gă-yu ñáyiu ní cuu íi, ñáyiu-áⁿ nǐ xóo códó ñáhá cuè dútú níñí ndicutu, ndihí níñí chívá, ndihí yáá cùnú chèhlu quiti sàhni-güedé cuèndá nduu íi tucú-yu. ¹⁴ ¡Dico níñí Xítóhó Jesucristú chi ío-gá nándihí-xi sá cúú-xí nchò ñáyiu xindecu vitna! Te cuèndá níñí-gă-áⁿ, chi Espíritú Yă Ndiöxí sá ndécú nchaa nduu nchaa quíú nǐ cuu ìⁿnuu-xi ndihí Xítóhó Jesucristú sá cúú cùú-gá cuèndá cuu-gá dàtná ìⁿ táhú sǎ cúú-xí Yă Ndiöxí cuèi cùu-gá Yaá ñá túú tnàhí cuéchi-xi, te ní sati níñí-gă te ní xihí-gá. Te cuèndá xiăⁿ ní cutnùní iní-ó sǎ Yă Ndiöxí ní quide cǎhnu iní-gá nchaa sá ñà túú vǎha ní quide-o, te ní nduu ndoo ní nduu nine iní-ó. Te ducaⁿ nǐ nduu ndoo ní nduu nine iní-ó cuèndá sá ndácú-ó cùnu cuechi-o núú Yă Ndiöxí Yaá ndécú nchaa nduu nchaa quíú.

¹⁵ Te Xítóhó Jesucristú ní quide ndáá-gá núú Yă Ndiöxí cuèndá cue ñáyiu ndècu ñuyúú-a. Te cuèndá

xíãⁿ Yã Ndiõxí cada-gá ingá núú sã vãha sá cúú-xí-yu dàtná ní cachí-gá, te ducaⁿ càda-gá sá cuèndá nchaa ñáyiu ní cáháⁿ-gá cundecu ndihi-gá, chi ñáyiu-áⁿ nduu táhũ-yu cundecu ndihi vãha ñàhá-yu xii-gá ni caa ni quíhíⁿ chi ducaⁿ ñí cachí-gá, te ducaⁿ chi Xítohó Jesucristú ní xíhí-gá núú cùrúxí cuèndá sá Yã Ndiõxí cada càhnu iní-gá nchaa yícá cuèchi-yu, nchaa cuèchi sá ñí quidé-yu cùtnàhá ní cunuu tnúhu sá ñí cáháⁿ-gá díhna. ¹⁶ Te nchoo xini-ó sã nõu ñⁿ téé na càdúha ñⁿ tutú nàcuáa cada ñáyiu dàcáhũ-yu nchaa sá ndécú ndihi-dé, te tutú-áⁿ xini ñũhu-xi ndéé ná yãha nduu cùú-dé. ¹⁷ Te ñá túú tàú-xi cada ñáyiu nàcuáa càháⁿ-xi núú tütú-áⁿ nini ndècu téé ní cadúha, dico sátá ná yãha cuú-dé te cadá-yu nàcuáa càháⁿ-xi. ¹⁸ Te cuèi tnúhu ní cáháⁿ Yã Ndiõxí ndéé díhna nàcuáa cada vãha-gá ñáyiu, te ñiu-ni ndihi ñíñí ñí cundáá-xi chi ní sahní-güedé quiti te ní sati ñíñí-güedi. ¹⁹ Te ndii Moisés ní cáháⁿ ndodo ndii núú nchaa ñáyiu nàcuáa ní cachí Yã Ndiõxí cadá-yu, te nàcuáa-ni nduu tnúhu ní chídó tnùní ndii núú tütú ndii ní cáháⁿ ndii, te ní dácá ndii ndute ñíñí chèhlu ndihi ñíñí chivá líhli, te ní queheⁿ ndii ñⁿ dité yutnu nani hisópó ndihi luha idi ticuèhé, te ní chindóyo ndii ñíñí-ãⁿ. Te ní sódó ndii núú tütú ndèé tnúhu Yã Ndiõxí sá ñí chídó tnùní ndii-áⁿ, te tnàhá cue ñáyiu xíndecu-áⁿ ñí chúcú ndii.

²⁰ Te ní xáhaⁿ ndii Moisés xii-yu: “Cuèndá ñíñí-a ní cundáá sá Yã Ndiõxí cada ñaha-gã xii-ndo sã vãha chi ducaⁿ ñí cachí-gá cada-gá sá cúú-xí-ndó”, duha ní xáhaⁿ ndii xii-yu. ²¹ Te ñiu-ni ducaⁿ ñí quide tucu ndii ní chúcú ndii ñíñí vehe-gá ndihi nchaa sá nándíhi-güedé òré chíñũhu-güedé Yã Ndiõxí ndécú xiti vehe-gá-áⁿ. ²² Te tnúhu ní chídó tnùní ndii Moisés càhí-xi sá méé-ní ñíñí chucu-güedé nchaa sá cànehe chiũⁿ-güedé òré chíñũhu-güedé Yã Ndiõxí, te sacú-nã te ndihi ndoo nchaa xíãⁿ chucu-güedé ñíñí ni cùu. Te dacuítí ñí xini ñũhu-xi sá cáti ñíñí cuèndá ducaⁿ càda cahnu iní Yã Ndiõxí nchaa yícá cuèchi ñáyiu.

Xítohó Jesucristú ní xíhí-gá núú cùrúxí cuèndá sá vã cùndecu-gá cuèchi-o núú Yã Ndiõxí

²³ Te sá cuèndá sá ñí xíhí Xítohó Jesucristú núú cùrúxí, xíãⁿ ñá túú-gã cuèchi-o ndècu núú Yã Ndiõxí. Te cuèndá nchaa sá ñí xíhí xiti vehe-gá sá ñí dácáá ñáyiu isràél xíãⁿ cùtnùní iní-ó nàcuáa quide-xi núú ndécú-gã. Te dacuítí ñí xini ñũhu-xi sã cáhni-güedé cue quiti ní cachí Yã Ndiõxí cuèndá nduu íi nchaa sá ñí xíhí xiti vehe-gá-áⁿ. Te cuèi ducaⁿ ñí sahní-güedé cue quiti-áⁿ dico ñá túú ní quide-xi nàcuáa ngúndecu vãha-o nõú Yã Ndiõxí. Dico Xítohó Jesucristú ní xíhí-gá, te sá ñí xíhí-gá xíãⁿ ní quide-gá nàcuáa ngúndecu vãha-o nõú

Yă Ndiöxí. ²⁴ Te Xítohó Jesucristú cuándaa-gá andiu núú ndécú Yă Ndiöxí càháⁿ ndàhú-gá cuendá-ó, te Xítohó Jesucristú chi ñá díú ìⁿ vehe ní dácáá cuè téé ñuyíú-a cuànguihu-gá. Te vehe Yá Ndiöxí sá nǐ dácáá cuè ñáyiu isràél ñuyíú-a ndéé sanaha, ndihi nchaa nàcuáa ní xóo cada-güedé xití vehe-gá-áⁿ xiáⁿ cútnùnǐ iní-ó nàcuáa quide-xi núú ndécú-gá. ²⁵ Te dútu cúnùu núú ñáyiu isràél ní xóo quíhu-dé núú cuiá núú cuiá xití cuàrtú ní cuu íí vǐhí-gá-áⁿ, te ní xóo canehe-dé níñǐ nǐ xóo quíhu xití cuàrtú-áⁿ dico ñá díú níñǐ mée-dé. Dico Xítohó Jesucristú chi ñá túú ducaⁿ ni quide-gá chi ìⁿ xito-ni ní sati níñǐ-gá te ní xíhí-gá. ²⁶ Chi núu ni xíhí-gá nuu núu te ndéé cútnàhá ní ngáva ñuyíú ducaⁿ ngüita-gá cada-gá ní cùu, te vitna ta ndihi nduu cuáháⁿ ní quixi-gá ñuyíú-a ní xíhí-gá ìⁿ xito-ni cuendá cuu-gá dàtná ìⁿ táhú sá cúu-xí Yă Ndiöxí, te ducaⁿ nǐ quide-gá cuendá sá vǎ cündècu-gá cuéchi ñáyiu núú Yă Ndiöxí. ²⁷ Te nchoo cuè ñáyiu ñuyíú-a chi ìⁿ xito-ni cuú-ó te dàtnùnǐ ducaⁿ te cada ndáá Yă Ndiöxí cuéchi-o. ²⁸ Te ducaⁿ sàtnahá-xi cùu Xítohó Jesucristú chi ìⁿ xito-ni ní xíhí-gá cuendá sá vǎ cündècu-gá cuéchi ñáyiu núú Yă Ndiöxí, te ducaⁿ nǐ cuu ní xíhí-gá chi mee-gá ducaⁿ nǐ cachí-gá cunduu. Te quixi tucu Xítohó Jesucristú ñuyíú-a dico ñá díú-gá sá cáda-gá

cuendá sá vǎ cündècu-gá cuéchi ñáyiu núú Yă Ndiöxí, chi quixi-gá nacuaca-gá nchaa ñáyiu ndètu ñaha xii-gá cuendá cundecú-yu ndihi-gá ni caa ni quíhíⁿ.

10

¹ Te nchaa tnúhu ní xáhaⁿ ndíi Moisés xii ñáyiu isràél cadá-yu, nchaa tnúhu-áⁿ nǐ quide-xi ní cutnùnǐ luha iní-yu nàcuáa cada Yá Ndiöxí cada váha ñaha-gá xii-o vitna. Dico ñá díú mèi nacuáa ní xáhaⁿ ndíi Moisés xii ñáyiu quide Yá Ndiöxí vitna chi dǎma quide-gá. Te nchaa tnúhu ní cáháⁿ ndíi Moisés ñá túú ní ndàcu-xi cada-xi nacuáa cundáá nchaa ñáyiu tǎha ñaha xii Yá Ndiöxí cuèi ní xóo cahni-güedé quiti ní xóo nduu táhú-gá núú cuiá núú cuiá. ² Te núu dicó sá nǐ xóo cahni-güedé quiti ní xóo nduu táhú Yă Ndiöxí ní quide-xi nacuáa nduu ndoo nduu nine iní cue ñáyiu, te vá cáhni-gá-güedé cue quiti-áⁿ nduu táhú-gá ní cùu, te ducaⁿ te cutnùnǐ iní-yu sá ñà túú-gá cuéchi-yu ndècu núú Yă Ndiöxí ní cùu. ³ Te sá dúcáⁿ nǐ xóo cahni-güedé quiti ní xóo nduu táhú Yă Ndiöxí núú cuiá núú cuiá, xiáⁿ ní xóo ndacu iní cue ñáyiu nchaa sá cuéhé sá dúhá nǐ xóo cadá-yu. ⁴ Te ducaⁿ chi níñǐ ndicutu-áⁿ ndihi níñǐ chivá-áⁿ ñà túú ní xóo ndacu-xi cada-xi nàcuáa vǎ cündècu cuéchi-yu núú Yă Ndiöxí.

⁵ Te xiáⁿ núu cútnàhá ní quexio Xítohó Jesucristú ñuyíú-a ní xáhaⁿ-gá xii Yá Ndiöxí:

Yòhó Tǎtà-í, ñá túú ndùu vétú váha iní-n sǎ sǎhni-güedé quiti ndùu tǎhú-n,

te ni ñá túú ndùu vétú váha tucu iní-n cuendá nchaa dava-gá sǎ táxi-güedé ndúú tǎhú-n,

núu xiǎⁿ ní quide túha-n yiqui cuñú-í cuendá yúhú cuú-í te nduu tǎhú ñáhá-n xii-í.

6 Te ni ñà túú ndùu vétú váha iní-n cuendá quiti sǎhmi-güedé ndúú tǎhú-n te ni ñà túú ndùu vétú váha iní-n cuendá nchaa dava-gá sǎ táxi-güedé ndúú tǎhú-n cuendá sǎ vǎ cündècu-gá cuéchi ñáyiu núú-n.

7 Núu xiǎⁿ yúhú ní cachí-í xii yòhó Tǎtà-í Dútú Ndiöxí sǎ yúhú véxi-í ñuyúú-a cada-í nchaa sǎ cuení-n cada-í dàtná yódó tnùní cuendá-í núú tütú-n.

Duha ní xáhaⁿ Xítóhó Jesucristú xii Tǎtà-gǎ Dútú Ndiöxí.

8 Te Xítóhó Jesucristú díhna-gá ní xii-gá Yǎ Ndiöxí Yaá cúú Tǎtà-gǎ: “Yòhó Tǎtà-í ñá túú ndùu vétú váha iní-n cuendá quiti sǎhni-güedé ndúú tǎhú-n, ndihi cuendá quiti sǎhmi-güedé ndúú tǎhú tucu-n cuendá sǎ vǎ cündècu-gá cuéchi ñáyiu núú-n, ndihi cuendá nchaa dava-gá tǎhú sǎ táxi-güedé xii-n ñà túú ndùu vétú váha iní-n cuendá nchaa xiǎⁿ”, duha ní xáhaⁿ Xítóhó Jesucristú xii Tǎtà-gǎ Dútú Ndiöxí. Te ducaⁿ ñí xáhaⁿ-gǎ cuéi núú

tütú ndii Moisés yódó tnùní sǎ dúcáⁿ càda-güedé. 9 Te sátá dúcáⁿ te ní xáhaⁿ tucu-gá xii Tǎtà-gǎ Dútú Ndiöxí: “Yòhó Tǎtà-í Dútú Ndiöxí, mee-í véxi-í ñuyúú-a cuendá cada-í nchaa nàcuáa cuení-n”, duha ní xáhaⁿ-gǎ xii Tǎtà-gǎ. Te sátá dúcáⁿ ñí cáháⁿ Xítóhó Jesucristú xiǎⁿ ní cutnùní sǎ ñà túú-gǎ xini ñuhu-xi ducaⁿ cada-güedé cahni-güedé nchaa quiti-áⁿ, te ducaⁿ chi mee Xítóhó Jesucristú ní xihí-gá ní cuu-gá dàtná ñⁿ tǎhú sǎ cúú-xi Yǎ Ndiöxí, te ducaⁿ ñí cuu chi ducaⁿ tnàhí ní cachí Yǎ Ndiöxí cunduu. 10 Te Xítóhó Jesucristú ní quide-gá nàcuáa ní cuení Yǎ Ndiöxí cada-gá, chi ní xihí-gá núú cùrúxí chi ducaⁿ ñí cuení mée-gǎ cunduu, te ñⁿ xito-ni ní xihí-gá sǎ cuendá nchaa ñáyiu, te cuendá xiǎⁿ núu ndècu yiñuhu-o núú-gǎ vitna.

11 Te cue dútú ñáyiu isràél chi ñⁿ nduu ñⁿ nduu ní xóo cahni-güedé quiti ní xóo nduu tǎhú-gǎ, te ñá túú ní dàma-güedé nàcuáa ní xóo cada-güedé. Te nchaa sǎ ñí xóo cada-güedé-áⁿ ñà túú ní quide-xi nàcuáa vá cündècu-gá cuéchi ñáyiu núú Yǎ Ndiöxí. 12 Dico Xítóhó Jesucristú ní cachí-gá sǎ cúú cuú-gá, te ní xihí-gá núú cùrúxí cuendá nchaa yicá cuéchi nchaa nchoo ñáyiu ndècu ñuyúú-a. Te sátá dúcáⁿ te dàtnùní ní ngóo-gá xio cùha Dútú Ndiöxí táxi tnùní-gá, te vá ñⁿ ndùu ñⁿ quiú-gǎ te cuú-gá. 13 Te diu-ni xiǎⁿ cundecu-gá cundetu-gá ndéé

sáa nduu cànehe nchaa sá cúú ùhú iní ñáhá xì-gá sá yíñùhu núú-gã. ¹⁴ Te cuendá sá ñí xihí Xítohó Jesucristú ìⁿ xito-ni xíãⁿ ní cuu-gá dàtná ìⁿ táhú sã cúú-xí Yã Ndiöxí, xíãⁿ ní quide-xi sá ncháá ñáyiú cùu cuendá-gá ñá túú-gã ná cumání-yu núú-gã ni caa ni quíhíⁿ. ¹⁵ Te mee Espiritú Yã Ndiöxí càháⁿ ndáá-xi nàcuáa ní cáháⁿ-gá cuendá-ó, te duha ní cáháⁿ-gá:

¹⁶ Sáa nduu te cada-í nchaa ñáyiú nàcuáa na càháⁿ-í-a, te cada-í nàcuáa cutnùnì iní-yu tnúhu sá dánèhé-í-yu tnúhu sá cánùchi ñaha xii-yu nàcuáa cada-yu cundecú-yu,

te cada tucu-í sá tñí-yu nchaa tnúhu-áⁿ. Duha ní cachí-gá. ¹⁷ Te ní cachí tucu-gá:

Te vá ìⁿ ndùu ìⁿ quíú-gã ndacu iní-í sá quidé sáa iní-yu tnúhu-í,

te ni vã ìⁿ ndùu ìⁿ quíú-gã te ndacu iní-í nchaa sá cuèhé sá dúhá quidé-yu.

Duha ní cáháⁿ Yã Ndiöxí càchì Espiritú-gá. ¹⁸ Te sá dúcáⁿ quide cahnu iní Yã Ndiöxí nchaa cuèchi-o, núu xíãⁿ ñá túú-gã xini ñùhu-xi cuú quiti nduu táhú-gã cuendá nchaa sá cuèhé sá dúhá quide-o.

Tàú-ó sã tnàhá tnúhu-o ndìhi Yã Ndiöxí

¹⁹ Te cue dútú ñí xóo cunuu núú ñáyiú isràèl cue téé-áⁿ ñí xóo quíhu-güedé xití cuartú ní cuu íí víhí-gã.

Dico nchoo cuè ñáyiú ndècu ichi Xítohó Jesucristú vitna tàú-ó sã ñí yuhu ni iní-ó tnàhá tnúhu-o ndìhi Yã Ndiöxí. Te cuu tnàhá tnúhu-o ndìhi-gá chi Xítohó Jesucristú ní sati ñíñí-gã te ní xihí-gá núú cùrúxí. ²⁰ Te cada iní-ó sã dõó sã ñí xíndedí nàcuáa ní xóo quíhu-güedé xití cuartú ní cuu íí víhí-gã-áⁿ ñí xócuñí, te ducaⁿ cada iní-ó chi Xítohó Jesucristú ní xihí-gá cuendá nchoo ñíhí-ó nàcuáa cada-o ngündecu váha-o sã cúú-xí-gã.

²¹ Te diu-gá cúú-gã Yaá cúú dútú-ó, te diu-gá cúú-gã Dútú cùnùu ndecu-gá núú ndécú Yã Ndiöxí. ²² Núu xíãⁿ xini ñùhu-xi sá ío tnàhá tnúhu-o ndìhi Yã Ndiöxí, te vá cáni ìⁿ cani úú iní-ó, te ío váha quíndáa iní-ó-gã chi diu-gá ní ndada ndoo ní ndada nine-gá iní-ó cuendá nchoo cutnuni iní-ó sã ñà túú-gã cuèchi-o ndècu núú-gã. Te ní sandute-o cuendá sá dúcáⁿ ñí nduu ndoo ní nduu nine iní-ó. ²³ Te nchoo càháⁿ ndáá-ó sã ndécú ndìhi-o tnúhu ndee iní sá ndúú táhú-ó cündecu ndìhi-o Yã Ndiöxí,

te xini ñùhu-xi sá vã dáña ndèé-ó càncicúⁿ nihnu-o tnúhu ndee iní-áⁿ chi Yã Ndiöxí cada-gá nàcuáa ní cachí-gá sá cúú-xí-ó. ²⁴ Te xini ñùhu-xi cuhuⁿ iní tnàhá-ó te chindee tnàha-o nàcuáa ducaⁿ cùu iní tnàhá-gã-ó,

te cada-o mèe-ni sá váha. ²⁵ Te nchoo vã dáña ndèé-ó nàtacá-ó núú dácuàha-o tnúhu Yã Ndiöxí, te vá cáda-ó dàtná xiquide davá-yu ñá túú-gã cuíni-yu quixí-yu núú dácuàha-o tnúhu-gã. Chi xini

ñuhu-xi sá cuãha tnàha-o
tnúhu ndee iní canchicúⁿ
nihnu-o ichi-gá, te uuⁿ-gá
ducaⁿ tàú-xi cada-o vitna
ta cuyatni nduu quixi tucu
Xítohó Jesucristú ñuyíú-a.

26 Te cue ñáyiú sa ní tecú
tnùní nàcuáa càháⁿ tnúhu Yá
Ndióxi te núu na ngüita-yu
ñucúuⁿ cadá-yu nándi sá
cuèhé sá dúhá, te àuⁿ nã
cuu ní xihí Xítohó Jesucristú
cuendá-yu, te ni vã yõo ñⁿ-gá
cuú cuendá sá vã cundècu-gá
cuèchi-yu núu Yá Ndióxi.
27 Te núu ducaⁿ na cadá-yu
nándi sá cuèhé sá dúhá, te ío
quiyùhú iní-yu nàcuáa cada
ñaha Yá Ndióxi xii-yu. Chi
nchaa ñáyiú cùu úhú iní ñáhá
xii-gá daquihíⁿ ñáhá-gã xii-yu
núu ñùhú núu càyú núu
ïo ndohó-yu. 28 Te nchaa
ñáyiú ní xóo daquèe tihú
tnúhu ní cáháⁿ ndíi Moisés,
te núu ndècu úú àdi úní
ñáyiú càháⁿ ndáá sá dúcáⁿ
ní dáquée tihú-yu tnúhu ní
cáháⁿ ndíi, te vã yõo nì xóo
cundàhú iní ñáhá xii nchaa
ñáyiú ducaⁿ nì xóo cada chi
ní xóo cahni ñaha-güedé.
29 Te núu ducaⁿ nì ndoho cue
ñáyiú ducaⁿ nì dáquée tihú
tnúhu ní cáháⁿ ndíi Moisés-áⁿ,
te uuⁿ-gá ndoho cue ñáyiú
dàquee tihú ñáhá xii Xítohó
Jesucristú Yaá cúú Dèhe Yá
Ndióxi ñu-ni ñáyiú càchí sá
ñà túú nàndihí níñí-gã. Te
níñí-gã-áⁿ nì sati, te ní xihí-gá,
te ducaⁿ nì cuu cuendá cada
Yá Ndióxi ingá núu sã vãha
sá cúú-xí nchõo ñáyiú ndècu
ñuyíú-a dàtná ní cachí-gá
cada-gá. Te ñu-ni cuendá

níñí-gã-áⁿ nì nduu ndoo ní
nduu nine iní cue ñáyiú-áⁿ ní
cùu, te ñu-ni ñáyiú-áⁿ càháⁿ
úhú-yu Espiritú Yá Ndióxi
sá chindèe chitúu ñaha xii-o.
30 Te nchoo sà naha-o sá
Yá Ndióxi càchí-gá ñⁿ xichi
núu tütú-gá: “Yúhú cada-í
te nacháhu ñáyiú nchaa sá
quidè-yu, te duha càháⁿ-í chi
nachinaa-í cuendá nchaa sá
quidè-yu-áⁿ”, duha càchí-gá.
Te sa nãha tucu-o nacuáa
càháⁿ-xi núu tütú-gá núu
càchí-xi: “Yá Ndióxi cada
ndáá-gá cuendá nchaa sá
quidè ñáyiú cùu cuendá-gá”,
duha càchí-xi núu tütú-gá.
31 Te ío ndàhú ndoho cue
ñáyiú na dàndoho ñaha Yá
Ndióxi, te ñu-ni cúú-gã Yaá
cúnúu nchaa nduu nchaa
quíú!

32 Te chí dándàcu iní nàcuáa
ní quide-ndo cùtnàhá vitna
cuu saa ní tecú tnùní-ndó
tnúhu Yá Ndióxi, chi dàvã-áⁿ
nì quide càhnu iní-ndó
cuèi nándi sá nì yáha-ndo
cuendá-gá. 33 Te dava-ndo
nì quide úhú ñáhá ñáyiú
xii-ndo núu chítu núu tàcá,
te nándi tnúhu cuèhé tnúhu
duha ní xáhãⁿ-yu xii-ndo. Te
dava-ndo nì cuyi-ni-ndo nì
xíndecu ndihí tnàha-ndo cuèi
nándi ní ndoho dava-gá-ndó.
34 Te ní cundàhú iní-ndó
cuè ñáyiú yihí vecaá, te
cuèi ní quendeé ñáyiú sá
ndécú ndihí-ndo dico ñã
túú ní ndihú iní-ndó chi ní
cudíi-ni iní-ndó. Te ducaⁿ nì
quide-ndo chi sa nãha-ndo sá
ndúú tãhú-ndó sã ïo-gá vãha,
te xíãⁿ cundecu ndihí-ndo
nì caa nì quihíⁿ. 35 Te xíãⁿ

vá dáñá ndéé-ndó quíndáá iní-ndó nàcuáa ní cachí Yá Ndiòxí cada ñaha-gã xii-ndo, chi sáa nduu te ío váha cada ñaha-gã xii-ndo. ³⁶ Te nchòhó xíní ñùhu-xi ío cada ndee iní-ndó càda-ndo nchaa nacuáa càháⁿ Yá Ndiòxí, te ducaⁿ te nduu táhú-ndó sã ní cachí-gã nduu táhú-ndó cùndecu ndìhi-ndo ni caa ni quíhíⁿ. ³⁷ Te Yá Ndiòxí càchí-gã núú tütú-gá:

Ta cùyatni vii-nã nduu quìxi
Yáa quixi ñuyíú-a, te vá
cúyaa-gá.

³⁸ Te nchaa ñáyiu cùndáá
núú-í ñá túú dàña
ndeé-yu sàndáá iní
ñáhã-yu xii-í,

te cuèndá xíáⁿ cundecu-ní-yu
ichi-í,

dico núu na dàñá-yu ichi-í
te vá cúú vãha iní-í
núú-yu.

Duha càchí Yá Ndiòxí núú
tütú-gá.

³⁹ Dico nchoo chi ñá túú
cùu-o ñáyiu ducaⁿ xíquide
dàñá-ó ìchi Yá Ndiòxí, chi
cùu-o ñáyiu nchìcúⁿ nihnu-ni
sàndáá iní-ó-gã, te sá dúcáⁿ
te nduu táhú-ó cùndecu-o
ndìhi-gá ni caa ni quíhíⁿ, te ñá
túú cùu-o ñáyiu dàña nihnu
ichi-gá te xíta nihnú-yu.

11

*Ñáyiu sàndáá iní ñáhá xii Yá
Ndiòxí*

¹ Te núu sàndáá ndisa iní-ó
Yá Ndiòxí te ducaⁿ cùtnuní
ndáá iní-ó sã nihí-ó sã cuíní-ó
núú-gã. Te núu sàndáá
iní-ó-gã te ducaⁿ cùtnuní ndáá
tucu iní-ó sã càháⁿ ndáá-gã
cuèndá nchaa sá ñà túú
xíní-ó. ² Te ducaⁿ ní quide

ñáyiu ní xíndecu ndéé sanaha
íó ní sàndáá iní-yu Yá Ndiòxí
te xíáⁿ núu ío váha ní cuu iní
ñáhá-gã xii-yu.

³ Te núu nchoo sàndáá
ndisa iní-ó Yá Ndiòxí te
cùtnuní ndáá iní-ó sã sã
cuèndá tnúhu ní càháⁿ-gã ní
cuáha andíu ndìhi ñuyíú-a.
Te cùtnuní iní-ó sã ñà díú sã
cuèndá ìⁿ sá túu ndèhe-o ío
ñuyíú-a ní cuáha andíu ndìhi
ñuyíú-a.

⁴ Te ndíi Àbél ío ní sàndáá iní
ndíi Yá Ndiòxí núu xíáⁿ ío-gã
ní cuu iní-gã sá ní sáñaha ndíi
ní nduu táhú-gã dàcúxí sã
ní sáñaha ndíi Càin xii-gã ní
nduu táhú-gã. Te ndíi Àbél-áⁿ
ní cutnùní iní ndíi sá ní cudíu
ndíi núú Yá Ndiòxí cuèndá
sá ní queheⁿ cuèndá-gã
sá ní sáñaha ndíi ní nduu
táhú-gã. Te cuéi ñá túú-gã
ndíi ndècu ñuyíú-a dico yòdo
tnuní sá ní sàndáá iní ndíi Yá
Ndiòxí cuèndá ducaⁿ càda-o
canchicúⁿ nihnu-o.

⁵ Te té Ènóc téé ní xíndecu
ndéé sanaha ñà túú ní xíhí-dé
chi ní nacuaca ñaha túú Yá
Ndiòxí xii-dé cuèndá sá ní
sàndáá iní ñáhá-dé xii-gã.
Te vá yòo ni nànihí ñáhá
xii-dé chi mee-gã ní nacuaca
ñaha-gã xii-dé. Te núú
tütú Yá Ndiòxí càchí-xi sã
cùtnàhá vátá nàcuaca ñaha-gã
xii té Ènóc, te ní quide-dé
mee-ni nàcuáa ní cuu váha
iní ñáhá-gã xii-dé. ⁶ Te nchaa
ñáyiu ñá túú sàndáá iní ñáhá
xii Yá Ndiòxí ñá ndácü-yu
cadá-yu nàcuáa cudíu-yu
núú-gã, chi nchaa ñáyiu
cuíní tuha ñaha xii-gã xíní
ñùhu-xi sá quíndáá iní-yu sá

ndécú-gã, te quindáá iní-yu sá nõu na nãnducu nihnu ñahá-yu xii-gã te cuãñaha-gã xii-yu sá ndúú tãhũ-yu.

⁷ Te Yã Ndiõxí ní dátũha-gã ndíi Nõé nchaa nãcuáa cada-gã. Te ní quide ndíi nchaa nãcuáa ní xáhaⁿ Yã Ndiõxí cada ndíi, te ní cadúha ndíi ñⁿ bãrcú cuendá xití bãrcú-áⁿ queé ndíi ndíi nchaa ñáyiú vehe ndíi cuendá cácu nihnú-yu. Te ducaⁿ ñ quide ndíi chi ní sãndáá iní ndíi Yã Ndiõxí. Te sá dúcáⁿ ñ sãndáá iní ndíi-áⁿ Yã Ndiõxí xiãⁿ ní cutnùní sã ncháá ñáyiú ío ndècu cuéhi-yu, chi ñá túú ní cãnchicúⁿ nihnú-yu cadá-yu nãcuáa ní quide ndíi. Te sá dúcáⁿ ñ quide ndíi ní sãndáá iní ndíi Yã Ndiõxí xiãⁿ ío ní cundáá ndíi núú-gã.

⁸ Te Yã Ndiõxí ní xáhaⁿ-gã xii ndíi Àbrahám sá queé ndíi ñuú núú ndécú ndíi quíhíⁿ ndíi ñngá xichi cundecu ndíi. Te ní quide ndíi nãcuáa ní xáhaⁿ Yã Ndiõxí chi ní quee ndíi cuáháⁿ ndíi núú cuãñaha Yã Ndiõxí cundecu ndíi. Te òré ní quee ndíi núú ndécú ndíi te ñá túú ní cutnùní iní ndíi ndéé cúú nõú cuaháⁿ ndíi cundecu ndíi. Te ducaⁿ ñ quide ndíi chi ní sãndáá iní ndíi Yã Ndiõxí. ⁹ Te sá dúcáⁿ ñ sãndáá iní ndíi Yã Ndiõxí nõu xiãⁿ ní xíndecu ndíi núú ñ sãñaha-gã cundecu ndíi, te cuéi ducaⁿ dico ñá túú ní quide ñuú ndíi xiãⁿ. Te ní xóo cundecu ndíi vehe cùtexínu vehe dóó. Te ñuú-ñ ducaⁿ ñ quide ndíi Isàác ndíi ndíi Jàcób chi tñahá cue ndíi-áⁿ ñ cachí Yã Ndiõxí sá ndúú tãhú cue ndíi xiãⁿ cundecu cue ndíi. ¹⁰ Te ducaⁿ ñ

quide ndíi Àbrahám chi ní xíndetu ndíi ndéé ní sáá nduu ndúu tãhú ndíi cundecu ndíi núú ndécú Yã Ndiõxí. Te núú ndécú-gã-áⁿ cúú-xí ñuú ní cadúha mee-gã, te ñuú-áⁿ cudíi-xi ñ caa ñ quíhíⁿ.

¹¹ Te ndíi Sãrá, sa ní xídó cuíá ndíi sá cóo dèhe ndíi chi sa ní sahnu vèhi ndíi, dico Yã Ndiõxí ní quide-gã te ní xóo ñⁿ dèhe ndíi. Te ducaⁿ chi ní sãndáá iní ndíi Yã Ndiõxí te ní cutnùní ndáá iní ndíi sá cadá-gã nãcuáa ní xáhaⁿ-gã xii ndíi. ¹² Te cuéi ío ní sahnu ndíi Àbrahám ndíi ñadíhí ndíi, ndíi Sãrá dico dacuítí ñ nduu tãhũ-yu ní xóo ñⁿ dèhe-yu. Te xiãⁿ nõu ío cuéhé ndíi quíⁿ yãvá ndíi Àbrahám ní cáyá dàtná cuéhé chòdíní ndéé andíu, ndíi dàtná cuéhé ñuhu cúchí lámár, chi ñí vã yóo ñⁿ ndacu cahu ñaha xii-yu sá cuéhè-yu.

¹³ Te cue ndíi-áⁿ ducaⁿ-ñ ñ sãndáá iní cue ndíi Yã Ndiõxí ndéé ní sáá nduu ñí xíhí cue ndíi. Te cue ndíi-áⁿ ñá túú ní ndúu tãhú cue ndíi quini cue ndíi nchaa nãcuáa ní cachí Yã Ndiõxí cada-gã, dico ní cutnùní ndáá iní cue ndíi-áⁿ nãcuáa cada-gã núú cuaháⁿ núú vèxi. Te ío ní cudíi ñí cue ndíi, te ní cachí cue ndíi sá dicó-ñí ichi yáha cue ndíi ñuyíú-a, chi ñá díú ñuyíú-a cundecu ducaⁿ cuè ndíi. ¹⁴ Te sá dúcáⁿ ndúu tñuhu ní cáháⁿ cue ndíi-áⁿ, xiãⁿ ní cutnùní sá cuini cue ndíi ñngá xichi núú cundècu cue ndíi. ¹⁵ Te ñí ñá díú ñuú núú ñí quee cue ndíi ñí cuini cue ndíi núhú cue ndíi. Chi núu ducaⁿ ñ sãni iní cue ndíi te núhú cue ndíi ñí cùu. ¹⁶ Dico ñáhá chi cuini cue ndíi quíhíⁿ cue

ndíi ìⁿ xichi núú vǎha-gá cáa cùndecu cue ndíi. Te núú dúcáⁿ ìo-gá váha càa-áⁿ cúú-xí ñúú núú ndécú Yǎ Ndiòxí, te sá dúcáⁿ ñi sani iní cue ndíi xiǎⁿ núú ìo váha cùu iní Yǎ Ndiòxí càchí-gá sá ñà túú cùcahaⁿ núú-gǎ cúú-gǎ Ndiòxí cue ndíi-áⁿ, te cùtnuní iní-ó sǎ ndáá sá dúcáⁿ càháⁿ-gá chi ní quide túha-gá ìⁿ xichi núú cùndecu cue ndíi-áⁿ.

17 Te ndíi Àbrahám ní xíndecu ìⁿndíi-ní déhe ndíi ndíhi ñadíhi ndíi, te cùtnàhá ní xito ndéé ñáhá Yǎ Ndiòxí xii ndíi ní xícáⁿ-gá déhe ndíi, ndíi Isàác cuèndá nduu táhú ñáhá-gǎ xii ndíi. Te ní xáhaⁿ ndíi sá cúú ndùu táhú-gǎ déhe ndíi, te ducaⁿ ñi quide ndíi chi ní sándáá iní ñáhá ndíi xii-gá. Te sa ndècu túha ndíi sá cuǎñaha ndíi déhe ndíi xii-gá cuèi mee Yǎ Ndiòxí ní xáhaⁿ ndáá-gá xii ndíi 18 sá sǎ cuèndá ndíi Isàác te ngúndecu cue ñaní tnáhá ndíi. 19 Te ducaⁿ ñi quide ndíi Àbrahám, chi ní cutnùní ndáá iní ndíi sá Yǎ Ndiòxí ndácú-gǎ dándoto-gá cuèi ñáyiu sa ní xihí. Te sá dúcáⁿ ñi xáhaⁿ ndíi xii Yǎ Ndiòxí sá cúú ndùu táhú-gǎ déhe ndíi, te xiǎⁿ cada iní-ó sǎ sà ní xihí ndíi Isàác te ní ndoto tucu ndíi ní nucúndecu ndíi ndíhi tǎtá ndíi, ndíi Àbrahám.

20 Te ndíi Isàác ní xícáⁿ táhú ndíi núú Yǎ Ndiòxí cuèndá sá cáda vǎha-gá cue déhe ndíi, ndíi Jàcób ndíhi ndíi Esàú núú cuaháⁿ núú vèxi. Te ducaⁿ ñi quide ndíi chi ní sándáá iní ndíi Yǎ Ndiòxí. 21 Te sa ta cùyatni-ná nduu cùú ndíi Jàcób, te ní xícáⁿ táhú ndíi núú Yǎ Ndiòxí cuèndá cue déhe

ñaní ndíi déhe ndíi Chèé. Te yituu-ná ndíi tatnu ndíi ní chiñuhu ndíi Yǎ Ndiòxí. Te ducaⁿ ñi quide ndíi chi ní sándáá iní ñáhá ndíi xii-gá. 22 Te cùtnàhá sa ta cùyatni vii-nǎ nduu cùú ndíi Chèé, te ní cachí ndíi sá cuè ñáyiu isràél sáá nduu quèé-yu núú xíndecu-yu-áⁿ. Te ní cáháⁿ tucu ndíi nàcuáa cadá-yu yiqui cùñú ndíi na sáá nduu quèé-yu núú ndécú-yu-áⁿ. Te ducaⁿ ñi quide ndíi chi ní sándáá iní ndíi Yǎ Ndiòxí.

23 Te cùtnàhá ní cacu ndíi Moisés te ní chiváha ñaha nǎná ndíi ndíhi tǎtá ndíi úní yóo. Te ducaⁿ ñi quide cue ndíi-áⁿ chi ní sándáá iní cue ndíi Yǎ Ndiòxí. Te ní quide cuèndá cue ndíi-áⁿ sǎ ìo váha càa ndíi Moisés déhe cue ndíi, te ñà túú ní yuhú cue ndíi nàcuáa ní cáháⁿ téé cùu Faraón sá cáhni-dé cue landú. 24 Te sátá ñi sahnu ndíi Moisés te duuⁿ duuⁿ ní cachí ndíi sá vǎ càháⁿ ñáyiu sá déhe yoco téé cùu Faraón cúú nǎná ndíi. Te ducaⁿ ñi quide ndíi chi ní sándáá iní ndíi Yǎ Ndiòxí. 25 Te ducaⁿ ñi quide tucu ndíi chi ní tnahá-gá iní ndíi ndoho ndíi ndíhi nchaa ñáyiu cùu cuèndá Yǎ Ndiòxí dàcúxí sǎ cúdǎ ìní ndíi cundecu tnaa ndíi ichi cuèhé ichi duha. 26 Chi ní sani iní ndíi sá vǎha-gá ndoho ndíi cúcuèhé ñáhá cuè ñáyiu xii ndíi sá cuèndá Yaá quixi ñuyíú-a dàcúxí sǎ cùndècu ndíhi ndíi nchaa sá ìo Ègiptú. Te ducaⁿ ñi quide ndíi chi ní xúhuⁿ iní ndíi sá Yǎ Ndiòxí cuǎñaha-gǎ sá ndúú táhú ndíi. 27 Te ndíi Moisés ní quee ndíi

nàcióⁿ Ègiptú te ñá túú ní quide cuendá ndíi sá ïo cùdéeⁿ tée cùu Faraón núú ndíi. Te ducaⁿ ñi quide ndíi chi ní sándáá iní ndíi Yá Ndiöxí. Te ní quide cãhnu iní ndíi cuendá nchaa sá ñi yáha ndíi, te ní quide iní ndíi sá Yá Ndiöxí ndécú ndíi ñaha túu-gá xii ndíi cuèi ñá túú ní xìní núú ñáhá ndíi xii-gá. Te ducaⁿ ñi sani iní ndíi chi Yá Ndiöxí ndécú ndíi ñaha-gá xii ndíi.

28 Te ndíi Moisés cúú ndíi tée ní tausaha ñi quide vico pãscuá ndíi cue ñáyiu isràél, te dàvá-áⁿ ñi táúchíúⁿ ndíi ní sahní-yu mbéé te ñíí quiti-áⁿ ñi dácánúu-yu yuyèhé-yu. Te ducaⁿ ñi quide ndíi chi ní sándáá iní ndíi Yá Ndiöxí. Te ducaⁿ ñi quide tucu ndíi cuendá sá espíritú sá ñi tendaha Yá Ndiöxí cahni-xi mee-ni dèhe tée dèhe díhna cue ñáyiu Ègiptú, te vá cãhni-xí ñi ïⁿ dèhe cue ñáyiu isràél. 29 Te ndute làmár sá nání Măr Tícuèhé ní quée dava-xi ní natúu ñuhu yìchí ní níhí ñi yáha cue ñáyiu isràél. Te ducaⁿ ñi cuu chi ní sándáá iní-yu Yá Ndiöxí. Te cue tée Ègiptú tnahá-güedé nchicúⁿ-güedé cuáháⁿ dico ñá túú ní ndàcu-güedé yáha-güedé chi ní ndíi-güedé ní cãhá.

30 Te cue ñáyiu isràél ní dúcúⁿ ndèé-yu úsá nduu ñuu Jericó te ní ngoyo nchaa sá ñúdòco. Te ducaⁿ ñi cuu chi ní sándáá iní-yu Yá Ndiöxí. 31 Te ïⁿ ñaha ní xíndecu ichi díí iní ní xínani-aⁿ Ràháb, ñaha-áⁿ ñà túú ní xíhí-aⁿ dàtná ní xíhí nchaa ñáyiu ïo ní cuu sáá

iní-xi núú Yá Ndiöxí, chi ní cuu váha iní-aⁿ núú cuè tée ní tendaha cuè ñáyiu isràél ní sãngoto dayuhu ñuu-aⁿ. Te ducaⁿ ñi quide-aⁿ chi ní sándáá iní-aⁿ Yá Ndiöxí.

32 Te núu dicó sá cúú te cãháⁿ-í cuendá ndíi Gedéon, ndíi cuendá ndíi Bàrác, ndíi cuendá ndíi Sànsón, ndíi cuendá ndíi Jèfté, ndíi cuendá ndíi Dàvíi, ndíi cuendá ndíi Sàmuel, ndíi cuendá nchaa cue tée ní xóo cãháⁿ tnúhu Yá Ndiöxí ndéé sanaha, te nchaa cuendá cue tée-áⁿ cãháⁿ-í te núu dicó cùyáchí-í dico ñá túú cùyáchí-í. 33 Te nchaa cue ndíi-áⁿ ni sándáá iní cue ndíi Yá Ndiöxí núu xíáⁿ ní xóo ndacu cue ndíi ní xóo nàá cue ndíi ndíi nchaa ñáyiu dava-gá ñuu. Te nchaa ñáyiu-áⁿ ñà túú ní xóo ndacú-yu nàá-yu ndíi cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yá Ndiöxí xii cue ndíi dàtná ní cachí-gá cada ñaha-gá xii cue ndíi. Te cuèi nchaa cue quiti dééⁿ ñà túú ní ndàcu-güedé ná cada ñaha-güedé xii cue ndíi. 34 Te ní xóo ndacu cue ndíi ní xóo ndahvá cue ndíi ñuhú sá vã yóo tnahí ndacu ndahvá, te ní cácu cue ndíi vá yóo ni ndàcu cahni ñaha xii cue ndíi. Te cue ndíi-áⁿ ñà túú ñíhí ndéé cuè ndíi ni cùu, dico ní níhí ndéé cuè ndíi chi Yá Ndiöxí ní chindee ñaha-gá xii cue ndíi, te nchaa ndíi-áⁿ ïo ní níhí ndéé cuè ndíi ní nàá cue ndíi ndíi nchaa ñáyiu ní cuu úhú iní ñáhá xii cue ndíi, te nchaa ñáyiu ducaⁿ ñi xóo nàá ndíi cue ndíi-áⁿ ñà túú ní xóo ndacú-yu nàá

ndihí ñàhá-yu xii cue ndíi chi ní xóo cunú-yu. Te ducaⁿ nĩ cuu chi ní sándáá iní cue ndíi Yá Ndiöxí. ³⁵ Te dava ñáyiú ðihí ní nduu táhũ-yu ní ndoto cue ñáyiú ní xíndecu ndihí-yu ní nucúndecu ndihí ñaha tucú-yu.

Te dava ñáyiú ío ní dándóhó ñaha tñaha ñáyiú-yu te ní xihí-yu, dico ñá túú ní ðáñá-yu ichi váha nàcuáa cácu nihnú-yu núú tñaha ñáyiú-yu, te ducaⁿ chi ní cuiní-yu sá ndótõ-yu ndéé cuèé-gá nàcuáa ngúndecu váha-yu núú ndécú Yá Ndiöxí. ³⁶ Te dava cue ndíi ío ní ndoho cue ndíi chi ío ní cudíquí ndéé ñáhá ñáyiú xii cue ndíi, te ní canihá-yu xii cue ndíi, te dava cue ndíi ní dácútú ñàhá-yu, te ní chihí ñàhá-yu xii cue ndíi veçaá. ³⁷ Te dava cue ndíi ní sahní ñàhá-yu ndihí yúú. Te dava cue ndíi ní chidava ndáá ñáhã-yu ní xehndé ñáhã-yu ndihí sierrá. Te dava cue ndíi ní xito ndéé ñáhã-yu te núu ndisa sá sándáá iní cue ndíi Yá Ndiöxí, te dava cue ndíi ní sahní ñàhá-yu ndihí machití. Te mee-ni ñi mbéé ndihí ñi chivá, ní xóo çuú dóó cue ndíi. Te mee-ni ñi cue quiti-áⁿ nĩ xóo cuu dóó cue ndíi cuèi ndèni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandihú-yu iní cue ndíi, te nándi sá nĩ xóo cada ñàhá-yu xii cue ndíi ní xóo dandòho ñàhá-yu. ³⁸ Te cue ndíi-áⁿ ío-gá ní xínduu váha iní cue ndíi ðacúúxí nchàa dava-gá ñáyiú. Te nchaa cue ndíi-áⁿ

nĩ xica cuu cue ndíi cuèi nchaa núú ñà túú vã yõo tñahí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndèni ní cuu nchíi yaú ní xóo cundecu cue ndíi. ³⁹ Te ío ní cudíu cue ndíi núú Yá Ndiöxí cuendá sá ní sándáá iní ñáhá cuè ndíi xii-gá. Te cuèi ducaⁿ nĩ quide cue ndíi dico ñá túú ní xini cue ndíi nchaa sá nĩ cachí Yá Ndiöxí cada-gá. ⁴⁰ Te ducaⁿ nĩ cuu chi ñⁿ sá ío-gá váha ní cachí Yá Ndiöxí cada-gá. Te sá dúcáⁿ ío-gá váha ní cachí-gá cada-gá cúu-xí cuendá nchoo ndihí cuendá cue ndíi-áⁿ cuendá sá ñà díú mèe-ni cue ndíi-áⁿ cundáá cue ndíi núú-gã, chi tñahá nchoo cundáá-ó núú-gã.

12

Ío cuhuⁿ iní-ó Xitohó Jesucristú

¹ Te cue ñáyiú ní xíndecu ndéé sanaha nĩ quidé-yu nàcuáa ní cutnùní sá nĩ sándáá iní-yu Yá Ndiöxí. Te cada iní-ó sã ncháá ñáyiú-áⁿ xíndéhé ñàhá-yu xii-o vitna. Núu xiãⁿ xini ñùhu-xi sá vã cáda-ó ní ñⁿ sá cuèhé sá dúhá chi ðiu nchaa xiãⁿ quidé-xí ñà túú cundáá-ó núú Yá Ndiöxí. Te vã cáda cuendá-ó nchàa sá quidé tñèñu iní-ó nàcuáa ndacu-o càda-o nchaa nacuéa càháⁿ-gá. Te ío càhnu cunduu iní-ó cànchicúⁿ nihnu-o càda-o nchaa nacuéa ní cachí-gá cada-o cundecu-o ñuyíú-a. ² Te ío cuhuⁿ iní-ó Xitohó Jesucristú, chi ðiu-gá ní quide ní sándáá iní-ó Yá Ndiöxí, te ðiu-ni

ducaⁿ quide-gá cuëi vitna te cuëi ndéé núu cuaháⁿ núu véxi ðiu-ni ducaⁿ càda-gá sá quindáá iní-ó Yá Ndiöxí. Te Xítóhó Jesucristú ío ní quide ndee iní-gá ní ndoho-gá te ní xihí-gá núu cùrúxí, te ñá túú ní quide cuendá-gá cuëi ìⁿ sácáⁿnúú cúú-xí sá dúcáⁿ ñí ndoho-gá. Te ducaⁿ ñí quide-gá chi sa ñaha-gá sá ná yáha sá dúcáⁿ ndòho-gá te ío cudíí iní-gá. Te vitna núcóo-gá xio cùha núu núcóo Yá Ndiöxí te tàxi tnuní-gá.

³ Te xini ñuhu-xi sá ío cada cuendá-ndó ñacuáa ní quide Xítóhó Jesucristú chi Yaá-áⁿ ío ní quide càhnu iní-gá nchaa sá ñí ndoho-gá ní quide ñaha nchaa ñáyiu ndècu ichi cuehé ichi duha xii-gá. Te ducaⁿ càda cuendá-ndó ñacuáa ní quide-gá cuendá sá vã túu dusaⁿ-ndo, te ni vã nátùhú iní-ndó càda-ndo nchaa ñacuáa càháⁿ-gá. ⁴ Te nchòhó dáquèe tihú-ndó nchaa sá cuèhé sá dúhá dico vátá cáhni ñaha-gá-yu xii-ndo sá dúcáⁿ quide-ndo. ⁵ Te ndacu iní-ndó ñacuáa càháⁿ Tátá-ó Dütú Ndiöxí dásàhú ñáhá-gá xii nchoo cuè ñáyiu cùu déhe-gá. Te duha càchí-gá núu tütú-gá: Nchòhó cue déhe mee-í, vã cáni iní-ndó sá àúⁿ ñá cuu dándoho ñaha-í xii-ndo,

te ni vã nátùhú iní-ndó òré càháⁿ-í dóho-ndo ñacuáa cada-ndo cùndecu-ndo.

⁶ Chi mee-í dándòho-í nchaa ñáyiu cùu iní-í cuendá sá cùndáá-yu núu-í, te quide úhú-í-yu, te ðiu-ní-yu cúú-yu ñáyiu càchí-í

cúú dèhe-í.

Duha càchí-gá núu tütú-gá. ⁷ Te ío cada ndee iní-ndó sá dúcáⁿ dándoho ñaha Yá Ndiöxí xii-ndo, chi quide-gá sá cúú-gá Tátá-ó. Te ñá túú ní ìⁿ tée cùu tátá te cachí-ó sá ñá túú sànu ichi-dé cue déhe-dé ñacuáa tàú-xi cunduu. ⁸ Te núu Yá Ndiöxí ñá túú dándoho ñaha-gá xii-ndo dàtná dándòho-gá cue ñáyiu càchí-gá cúú déhe-gá, te ñá díú dèhe mee-gá cúú-ndó te núu ducaⁿ, chi cùu-ndo datná cue ñáyiu ñá túú cùtnuní yoo cùu tátá-xi. ⁹ Te nchoo sá ñaha-o sá cùtnàhá ní cuu landú-ó ñí sanu ichi ñaha tátá-ó ñacuáa tàú-xi cunduu, te ducaⁿ ñí xóo canehe-o sá yíñùhu núu-güedè te ðiu-ni ducaⁿ nèhe-o sá yíñùhu núu-güedè vitna. Te núu ducaⁿ ñí sándáá iní-ó tátá-ó, te ío-gá xini ñuhu-xi quindáá iní-ó Tátá-ó Dütú Ndiöxí cuendá ducaⁿ nduu táhú-ó cùndecu-o ndihi-gá ni caa ni quíhíⁿ, chi ðiu-gá cúú-gá Yaá ní chihi iní-ó. ¹⁰ Te cùtnàhá ní cuu landú-ó, ñá túú tìtí nduu ni càniha tátá-ó ñí sanu ichi ñaha-güedè xii-o ñacuáa ní cuu iní mee-güedè. Te Yá Ndiöxí ducaⁿ dándoho ñaha-gá xii-o sànu ichi ñaha-gá cuendá cúú-xí sá vãha sá cúú-xí-ó, te ducaⁿ quide-gá cuendá nchoo càda ndáá-ó dàtná quidé mee-gá. ¹¹ Te òré véxi ìⁿ tnúndòho sá cúú-xí-ó te ñá túú cudíí iní-ó chi dándihú iní ñáhá-xi xii-o. Te nchaa ñáyiu ngúnu ichi sá cuendá nchaa tnúndòho-áⁿ te ngüíta-yu quide ndáá-yu, te ío váha cùu iní-yu ndécú-yu.

Vá dáquèe tihú-ó tnũhu Yá Ndiõxí

12 Te núu xiãⁿ ío chí ndúcú ndèe-gá canchicúⁿ nihnu-ndo ichi Xítohó Jesu-ristú, te vá dícó yica cùu iní-ndó cànchicúⁿ nihnu-ndo ichi-gá. 13 Te cada váha-ndo cùndecu-ndo ichi-gá cuèndá nchaa ñáyiú sàni ìⁿ sàni úú iní-xi níhí ndéë-yu cundecú-yu ichi-gá te vá ná tũhú iní-yu canchicúⁿ nihnú-yu.

14 Te nducu-ndo nàcuáa cada-ndo cùndecu váha-ndo ndìhi cue tnaha ñáyiú-ndo, te ío cada váha-ndo cùndecu-ndo nacuáa cundáa-ndó núú Yá Ndiõxí chí núu vá dúcáⁿ càda-ndo te vá ndúú táhú-ndó cùndecu-ndo ndìhi-gá. 15 Te ío váha cada cuèndá-ndó nàcuáa cada-ndo cùndecu-ndo, chí núu ñáhá te vá chindèe ñaha-gá Yá Ndiõxí xii-ndo. Te ío váha cada cuèndá tucu-ndo nàcuáa cundecu-ndo vã cáni cuèhé iní-ndó cuèndá Yá Ndiõxí, chí núu ducaⁿ na càda-ndo te dava-gá ñáyiú ndècu ndìhi-ndo ichi-gá tnàhá-yu ngũita-yu ducaⁿ càdá-yu, te vá cùndècu váha-gá-ndó ndìhí-yu ichi-gá. 16 Te cada cuèndá tucu-ndo sã vã cùndècu-ndo ichi dîi iní, te ni vã dáquèe tihú-ndó ni ìⁿ sá cúú cuèndá Yá Ndiõxí dàtná ní quide ndii Esàú, chí sá cuãñaha tãtá ndii-áⁿ nduu táhú ndii ni cùu ní dama ndii ìⁿ cóhó comidá. 17 Te nchòhó sa nàha-ndo sá cùtnàhá ní cuiní ndii Esàú cácaⁿ táhú tãtá ndii núú Yá Ndiõxí cuèndá nchaa sá ndúú táhú ndii ni cùu, te ñá túú ní xicáⁿ tàhú tãtá ndii núú Yá Ndiõxí nàcuáa cuiní méé ndii ni cùu. Te ní ndáhyú víhí ndii,

te cuèi ducaⁿ ní quide ndii dico ñá túú ní ndàcu-gá ndii nàníhí ndii táhú sã ní dama ndii comidá.

18 Te cue ñáyiú isràèl ní sàtuhá-yu ìⁿ yucu núú càyú ñuhú, te nchòhó ñá túú ndèe ducaⁿ sàháⁿ tuha-ndo ìⁿ yucu núú càyú ñuhú dàtná ní quide cue ñáyiú-áⁿ. Te cùtnàhá ducaⁿ ní sàtuhá-yu yucu-áⁿ te ní cunee víhi nihii yucu-áⁿ, te ní quene táchí níhi. 19 Te ní tecú dóho-yu ní cáháⁿ ìⁿ cútú, te ní tecú tucu dóho-yu ní cáháⁿ Yá Ndiõxí ní cáháⁿ ndìhi ñaha-gá xii-yu. Te nchaa ñáyiú ní tecú dóho-xi ní cáháⁿ-gá te ní cuiní-yu sá vã càháⁿ-gá. 20 Te ducaⁿ ní quidé-yu chí ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuèi ìⁿ quiⁿti nà yáha xití yucu-a, te cahni-ndo-di ndìhi yúú àdi ndìhi ìⁿ yutnu puyá”, duha ní cachí-gá. 21 Te sá dúcáⁿ ní quide-xi ní xiní-yu xiãⁿ ío ní dáyùhú ñáhá-xi xii-yu. Te tnàhá té Moisés ní yùhú-dé, te ní cachí-dé: “Quidi ñaha-xi xii-í sá yùhú-í”, duha ní cachí-dé.

22 Te nchòhó, ñá túú quide-ndo datná ní quide cue ñáyiú-áⁿ ní sàháⁿ tuhá-yu yucu-áⁿ, dico cada iní-ndó sã sá ní tuha-ndo yùcu Sión sá ndécú núú ndécú Yá Ndiõxí, ndìhi ñuú-gá ñuú Jerusalén sá cáá àndiú te diu-gá cúú-gã Yaá ndécú nchaa nduu nchaa quiú. Te diu-ni xiãⁿ xindecu cuèhé víhí cuè espíritú xinú cuèchi núú-gã 23 chíñũhu ñaha-xi

xii-gá. Te nchòhó cúú-ndó cuè ñáiyu cùu cuendá Yá Ndiòxí, te ní tnahá tnúhu-ndo ndìhi nchaa dava-gá ñáiyu cùu cuendá-gá, ñáiyu yòdo tnuní núú tütú-gá ndécú àndiu, te diu-ni ñáiyu-áⁿ cuañaha-gã xií-yu sá ndúú tãhũ-yu. Te nchòhó ní tuha-ndo Yá Ndiòxí Yaá cada ndáá yíca cuèchi nchaa ñáiyu. Te cada iní-ndó sã ní tnahá tnúhu-ndo ndìhi cue ñáiyu ní quide ndáá ní xíndecu ichi Yá Ndiòxí ñuyíú-a. Te ñáiyu-áⁿ ñà túú tnahí-gá ná cúmãñi-yu vitna ndécú-yu núú-gã. ²⁴ Te ní tnahá tnúhu-ndo ndìhi Xítohó Jesucristú Yaá ní quide nàcuáa cada Yá Ndiòxí ingá núú sã vãha sá cúú-xí nchaa nchoo ñáiyu ndècu ñuyíú-a, chi ní sati níñi-gã te ní xíhí-gá núú cùrúxí. Te níñi Xítohó Jesucristú ñà túú ñⁿ-ni cuu-xi ndìhi níñi ndií Àbél, chi diu cuendá níñi-gã-áⁿ ní quide càhnu iní Yá Ndiòxí nchaa cuèchi-o. ²⁵ Núú xíãⁿ ío cada cuendá-ndó vã dáquèe tihú-ndó tnũhu càháⁿ Yá Ndiòxí, chi nchaa ñáiyu ní xíndecu ndéé sanaha dùcaⁿ ní quidé-yu ní dáquèé tihũ-yu tnúhu ní cáháⁿ-gá ñuyíú-a sá cúú-xí-yu. Te ñà túú ní cãcu-yu chi ní nacháhu-yu sá dúcáⁿ ní quidé-yu. Te uuⁿ-gá tucu nchoo chi vã cãcu-o te núú ducaⁿ na dàquee tihú-ó tnũhu càháⁿ Yá Ndiòxí ndéé andiu sã cúú-xí-ó. ²⁶ Te cùtnahá ní cáháⁿ Yá Ndiòxí ndéé sanaha te ní quidi-xi ñuyíú. Te vitna càchí-gá: “Yúhú quidi tucu-í ingá xito

ñuyíú, te ñà díú mèe-ni ñuyíú ducaⁿ quidi-í chi tnahá andiu quidi-í”, càchí-gá. ²⁷ Te sá dúcáⁿ càháⁿ-gá sá ingá xito tucu ducaⁿ càda-gá xíãⁿ cùtnuní sá ncháandi túhú sá túu ndèhe-o danaa-gá. Te nchaa sá ñà túú ndéé túu quini-ó ñuyíú-a xíãⁿ vã quidi-xí te ni vã náá-xí. ²⁸ Te núú ní cachí Yá Ndiòxí nduu tãhú-ó cùndecu-o chi mee-gá táxí tnuní-gá xíãⁿ, te ni vã quidi-xí te ni vã náá-xí. Te xíãⁿ ío xíñi ñũhu-xi ndacáⁿ tãhú-ó núú-gã, te yíñũhu yíñũhu cunu cuechi-o núú-gã nàcuáa cuu vãha iní-gá, te ducaⁿ cùhuⁿ iní-ó sã ío càhnu cuu-gá. ²⁹ Te Tãtá-ó Dütú Ndiòxí cúú-gã dàtná ñⁿ ñuhú chi danàa-gá nchaa sá ñà túú quide nacuáa cuu vãha iní-gá.

13

Nàcuáa tàú-xi cada-o cuendá cuu vãha iní Yá Ndiòxí

¹ Te nchaa nchòhó ñáiyu ndècu ichi Xítohó Jesucristú, vã dáñá ndéé-ndó cùu iní tnahá-ndó nàcuáa ndècu-ndo ichi-gá. ² Te cunaha-ndo sã núu ío ñáiyu ñũhu ichi ní quexió-yu vehe-ndo te cuañaha-ndo vèhe nde-tatú-yu, te cuañaha-ndo sã cáxi-yu. Chi davá-yu ndéé espíritú xínú cuèchi núú Yá Ndiòxí ní sáháⁿ vehé-yu ní queheⁿ cuendá-yu te ñà túú ní cùtnuní iní-yu sá díú espíritú xínú cuèchi núú-gã cúú-xí.

³ Te ndacu tucu iní-ndó cuè ñáiyu xìxíhi vecaá, te cada iní-ndó sã tnahá-ndó yìhi-ndo vecaá ndihí-yu. Te ndacu

tucu iní-ndó nchaa ñáyiú ío ndòho, te cada iní-ndó sã tnàhá-ndó ndòho-ndo ndihí-yu.

4 Te nchaa ñáyiú na càchí-yu sã ìⁿ sã vãha cùu-xi sã ìⁿ tée ndihí ìⁿ ñadihí ná nihí tnàhá-yu candeca tnàhá-yu. Te nchòhó cue tée vá cání iní-ndó cãháⁿ ndihí-ndo ñadihí te núu ñá díú ñadihí-ndó cùú-yu. Te ducaⁿ-ni nchòhó cue ñáyiú dihí tucu vá cání iní-ndó cãháⁿ ndihí-ndo tée te núu ñá díú yì-ndo cuu-güedé, chi Yá Ndiòxí dandòho-gá nchaa ñáyiú ndècu ichi díí iní.

5 Te vá cùhúⁿ iní-ndó mèe-ni díhúⁿ. Te núu nándi cùu nchaa sã ndécú ndihí-ndo te diu-ni nchaa xiãⁿ sa nduu vétú iní-ndó, chi Yá Ndiòxí ní cachí-gá: “Ni ìⁿ nduu vá dáñá nihnu ñaha-í xii-ndo, chi nchaa-ni nduu chindee ñaha-í”, duha ní cachí-gá.

6 Te xiãⁿ núu nchoo nì yuhu ní iní-ó cãháⁿ-ó ìⁿ ìⁿ-o, te cachí-ó:

Yá Ndiòxí cúú-gã Yaá chindèe ñaha xii-í,

núu xiãⁿ ñá túú yuhú-í cuèi nándi càháⁿ ñáyiú cada ñàhá-yu xii-í.

Duha cachí-ó.

7 Chí ndácú iní cue tée ní sanu ichi ñaha xii-ndo ichi Xítohó Jesucristú cue tée ní cãháⁿ tnúhu Yá Ndiòxí núú-ndó, te ío váha chí nãcuãha cuendá nãcuãa ní quide nchaa cue tée-áⁿ nì xíndecu-güedé ndéé ní sáa nduu ní xihí-güedé. Te ío quindáá iní-ndó Yá Ndiòxí dàtná ní xóo cada cue tée-áⁿ.

8 Te dàtná-ni ní quide Xítohó Jesucristú ndéé sanaha diu-ni ducaⁿ quide-gá vitna, te diu-ni ducaⁿ càda-gá ndéé núú cuaháⁿ núú vèxi. 9 Te vá dáñá-ndó mèe-ndo dandahú ñáhá ñáyiú dacaháⁿ ñáhá xii-ndo natuha-ndo ingá ichi, ñáyiú dānehé tnàha ñáyiú-xi nándi sã ní cutúha-yu, te nchaa xiãⁿ ñá túú ìⁿ-ni caháⁿ-xi ndihí tnúhu sã ndécú ndihí-ndo. Te Yá Ndiòxí chindèe ñaha-gá xii-o nãcuãa nihí ndéé-ó cūndecu-o ichi-gá, te ducaⁿ te cuu-xi sã vãha sã cúú-xí-ó, te ñá díú cuendá ìⁿ sã xéxi-ó nihí ndéé-ó ndècu-o ichi-gá. Te dava ñáyiú càchí-yu sã dává núú comidá cuu caxi-o te dava ñáhá nãcuãa nihí ndéé-ó cūndecu-o ichi-gá, dico ñá ndàá sã sã dúcáⁿ vá caxí-ó nchaa núú comidá nihí ndéé-ó cūndecu-o ichi-gá.

10 Chi Xítohó Jesucristú ní xihí-gá cuendá-ó núú cùrúxí, te nchaa ñáyiú nchicúⁿ nihnu-ni quide nchaa nãcuãa ní quide nchaa dútú nì xinu cuechi núú Yá Ndiòxí ndéé sanaha, ñáyiú-áⁿ vá cúú tnàhá tnúhu-yu ndihí Xítohó Jesucristú Yaá ní xihí núú cùrúxí sã dúcáⁿ quidé-yu. 11 Chi dútú cūnū-gá ní xíndecu ndihí cue ñáyiú israhél, tée-áⁿ nì xóo canehé-dé níñí nchaa quiti ní xóo cahni-dé ní xóo quihu ndéé xití cuartú ní cuu í-gã. Te ducaⁿ nì xóo cada dútú-áⁿ cuendá cada cànhu iní Yá Ndiòxí nchaa yicá cuèchi ñáyiú, te cuñú nchaa quiti-áⁿ nì xóo cahmi-güedé ìⁿ xio yuhu ñúú. 12 Te ducaⁿ nì yáha

Xítohó Jesucristú chi ndée ìⁿ xio yuhu ñúú ní sahní ñaha-güedë xii-gá. Te cuendá níñí-gã sá ñí sati núú cùrúxí núú ñí xihí-gá, ní nduu ndoo ní nduu nine iní cue ñáyiú sàndáá iní ñáhá xii-gá. ¹³ Te vitna chí ná tùha-o Xítohó Jesucristú te cada ndee ìní-ó ndòho-o datná ní ndoho-gá. ¹⁴ Te ñuyíú-a ni ìⁿ xichi ñá túú ndèé cáá ìⁿ ñúú cudí ni caa ni quíhíⁿ cuendá cundecu-o, dico ducaⁿ-ni ñùhu iní-ó ìⁿ xichi núú ndúú tãhú-ó cundecu-o ni caa ni quíhíⁿ.

¹⁵ Te núú xíãⁿ xíní ñùhu-xi sá vã dáñá ndéé-ó chíñuhu-o Dútú Ndiöxí chi Xítohó Jesucristú ní quide-gá nàcuáa ndacu-o tnàhá tnúhu-o ndíhi Yá Ndiöxí, te òré càháⁿ ndíhi-o-gã te nuu núú ndacáⁿ tãhú-ó nùú-gã. Te nchaa tnúhu càháⁿ-ó òré càháⁿ ndíhi-o-gã cúú-xi dàtná ìⁿ tãhú sã cúú-xi-gã. ¹⁶ Te vã dáñá ndéé-ndó càda-ndo mee-ni sá vãha cundecu-ndo, te ducaⁿ chindee tnaha-ndo ìⁿ ìⁿ-ndo ndíhi sá ndécú ndíhi-ndo. Te núú ducaⁿ na càda-ndo te caní iní-ndó sã cúú-xi dàtná ìⁿ tãhú sã ìo vãha cùu iní Yá Ndiöxí.

¹⁷ Te quindáá iní-ndó càda-ndo nchaa nacuáa càháⁿ cue tée yíndaha ñaha xii-ndo nacuáa ndècu-ndo ichi Xítohó Jesucristú, chi ñiu cue tée-áⁿ quidé cuendá ñáhá-güedë xii-ndo nàcuáa cundecu vãha-ndo nùú-gã. Te sáá nduu nàcani tnúhu-güedé núú-gã nùu ní quide vãha-güedé àdi ñá túú ní quide vãha-güedé ní xíndecu

ndíhi ñaha-güedë xii-ndo. Te núú ducaⁿ na càda-ndo quindáá iní-ndó-güedë te cudí iní-güedé cundecu ndíhi ñaha-güedë xii-ndo, te vã ndíhú iní-güedé. Te núú vã dúcáⁿ càda-ndo te vã cúú-xí sã vãha xii-ndo nchaa sã quidé-güedë sã cúú-xi-ndó.

¹⁸ Te càháⁿ ndàhú-í núú-ndó sã càháⁿ ndíhi-ndo Yá Ndiöxí cuendá-ndí. Te nchúhú cùtnùní ndáá iní-ndí sã ñà túú nã cùmání-ndí núú Yá Ndiöxí, te ducaⁿ chi ndùcu-ndí nàcuáa quide-ndí cundáá-ndí núú-gã. ¹⁹ Te càháⁿ ndàhú tucu-í núú-ndó sã ìo càcáⁿ tãhú-ndó núú Yá Ndiöxí cuendá sã mée-gã ná cáda te ìo ndíhi quixi coto ñaha tucu-í xii-ndo.

Tnúhu ndéé núú ñí ndíhi-ná

²⁰ Te Yá Ndiöxí Yaá quidé cùu vãha iní-ó ndècu-o, Yaá-áⁿ ñí dándótó-gã Xítohó Jesucristú. Te Xítohó Jesucristú-áⁿ cúú-gã dàtná ìⁿ toli ìo-gã quéné cãva xito mbéé. Te ducaⁿ sãtnahá-xi cùu-gã cuendá sá ñí sati níñí-gã te ní xihí-gá, te ducaⁿ ñí cuu cuendá sá ñí quide ndáá-gá ndíhi Yá Ndiöxí sã cáda-gã ingá núú sã vãha sã cúú-xí nchòo cue ñáyiú ndècu ñuyíú-a. Te nàcuáa ní quide ndáá-gá ndíhi Yá Ndiöxí te ñiu-ni ducaⁿ càda-xi núú cuaháⁿ núú vëxi. ²¹ Te xìcáⁿ tãhú-í núú Yá Ndiöxí sã mée-gã ná chindee ñaha-gã xii-ndo cuendá cada-ndo mée-ni sá vãha nàcuáa cùní mée-gã, te mee-gã ná cáda ñaha-gã xii-o nchaa sã vãha sã sání iní-gã. Te ñiu-ni ducaⁿ

na tàuchiuⁿ-gá cada Xítohó Jesucristú sá cúú-xí-ó, duha xìcáⁿ táhù-í núú-gă. Te vitna nchaa-o chĩ ná cãhí-ó sã ïo cãhnu cuu Xítohó Jesucristú ni caa ni quihíⁿ. Te ducaⁿ na cùnduu.

²² Te cãháⁿ ndàhú-í núú nchòhó ñáyiu ndècu ndihí-í ichi Xítohó Jesucristú sá cáda cãhnu iní-ndó nãcuáa ndùu nchaa tnúhu cãháⁿ-í dásàhú ñãhà-í xii-ndo, chi ñã túú vãi tnúhu chido tnuní-í núú tütú-a sá cúú-xí-ndó.

²³ Te cãhí tnúhu-í xii-ndo sã tẽ Timùteú tée ndècu ndihí-o ichi Xítohó Jesucristú ní cácu-dé ñã túú-gă yihí-dě vecaá. Te núu na quèxio ndíhi-dé núú ndécù-í te quixi-í ndihí-dé núú ndécú-ndó quixi coto ñaha-ndí.

²⁴ Te cùñaha-ndo sã ïo na càda ndee iní nchaa cue tée yìndaha ñaha xii-ndo nacuáa ndècu-ndo ichi Yá Ndiõxí. Te ducaⁿ cùñaha tùcu-ndo xii nchaa dava-gá ñáyiu cùu cuendá-gá sã ïo na càda ndee iní-yu. Te cue ñáyiu nàcióⁿ Itàliá ñáyiu ndècu ndihí-o ichi-gá cãhí-yu sã ïo cada ndee iní-ndó. ²⁵ Te Yá Ndiõxí ïo na chìndee chitúu ñaha-gă xii-ndo nchàa-ndo. Te ducaⁿ na cùnduu. Te ïo chí cáda ndèe iní-nã vitna.

TUTÚ NÍ CADÚHA TÉ SÀNTIAÚ

*Té Sàntiaú cadúha-dé tutú
quíhíⁿ ndaha ñáyiú isràél
nchítè nuu nihí ñuyúú*

1 Yúhú té Sàntiaú xínú
cuèchi-í núú Yá Ndiòxí ndihí
núú Xítóhó Jesucristú, te tèe-í
tnúhu-a quìde ndee iní ñáhà-í
xii nchòhó ñáyiú isràél nchítè
nuu nihí ñuyúú-a.

*Yá Ndiòxí táxi-gã sá xini
tnùní-ó*

2 Te nchòhó ñáyiú ndècu
ndihí-í ichi Xítóhó Jesucristú,
ío cudíí iní-ndó cùndecu-ndo
cuèi náii cùu sá ùhú véxi
cuèndá-ndó, ³ chi ducaⁿ te
cutnùní iní-ndó sã sàndáá
ndisa iní-ndó-gã, te cunduu
càhnu iní-ndó cuèi náii ná
yáha-ndo. ⁴ Te cunduu
càhnu-ni iní-ndó te ducaⁿ
te cuu-ndo ñáyiú váha, te
cundáá-ndó núú Yá Ndiòxí,
te ducaⁿ te ñá túú-gã ná
cumání-ndó núú-gã.

5 Te núu cùmání sã xini
tnùní-ó, te cãcáⁿ-ó núú Yá
Ndiòxí te mee-gã taxi-gã, chi
ío váha iní-gã, te ñá túú cùnini
iní-gã núú-ó. ⁶ Te ni yùhu
ni iní-ó cãcáⁿ-ó núú-gã, te
quindáá ndisa iní-ó sã táxi-gã
sá cúmání quini tnùní-ó, te
vá cání ñⁿ caní úú iní-ó.
Chi nchaa ñáyiú sàni ñⁿ
sani úú iní-xi cùu-yu dàtná
ndute làmár cuáháⁿ-xi duha
cuáháⁿ-xi dàcáⁿ nàa-xi òré
quéné tãchí. ⁷ Te nchaa ñáyiú
ducaⁿ sàni iní-xi, te vá cání
iní-yu sá nihí-yu sá xicáⁿ-yu
núú-gã. ⁸ Chi nchaa ñáyiú sàni

ñⁿ sani úú iní-xi ñá cùtnùní
iní-yu ndèdacàa sá sání iní-yu
cadá-yu.

⁹ Te nchaa ñáyiú ndàhú
ñáyiú ndècu ichi-gã, xini
ñuhu-xi ñá túú-gã ná caní
iní-yu, mee-nã cudíí iní-yu,
chi Yá Ndiòxí chindèe ñaha-gã
xií-yu. ¹⁰ Te nchaa ñáyiú
cuica xini ñuhu-xi cundecu
váha iní-yu núú Yá Ndiòxí
cuèi náii ná yáha-yu. Chi
ñáyiú-áⁿ cùu-yu dàtná itá
nchaa cùhú sã ñá túú cudíí
naha. ¹¹ Chi òré ní cuu
nihí cahni nchícanhii, te ní
dádíí-ni-xi nchaa cùhú cuíí-ãⁿ
te ní cóyo-ni nchaa itá-xi, te
ñá túú-gã cáá vìi. Te ducaⁿ
sãtnahá-xi cùu ñáyiú cuica chi
núú chíúⁿ-ni-yu xihí-yu.

*Nchaa ñáyiú quìde cahnu
iní-xi nchaa sá yáha-yu*

¹² Te váha táhú nchaa ñáyiú
quìde cahnu-ni iní-xi cuèi
nándi sá yáha-yu ndècú-yu
ichi Yá Ndiòxí, chi òré ná
ndíhí nchaa xiáⁿ yáha-yu, te
cuáñaha Yá Ndiòxí ñⁿ coróná
váha vìhi cundecu ndihí-yu,
te ndáá chi ducaⁿ càháⁿ Yá
Ndiòxí sá táxi-gã xii nchaa
nchoo ñáyiú ñuhu iní ñáhá
xi-gã. ¹³ Te nchaa ñáyiú sàni
iní-xi cada nándi sá cuèhé
sá dúhá, te vá cání iní-yu sá
Yá Ndiòxí táuchìuⁿ-gã ducaⁿ
cadá-yu, chi Yá Ndiòxí ñá
quíú te caní iní-gã cada-gã ñⁿ
sá cuèhé sá dúhá, te ni ñá túú
tàuchìuⁿ-gã sá dúcáⁿ cadá-yu.
¹⁴ Te cuíni-yu cadá-yu nchaa
sá cuèhé sá dúhá chi ducaⁿ
véxi iní-yu. ¹⁵ Te nchaa ñáyiú
ío ñuhu iní nchaa sá cuèhé sá

dúhá te quidé-yu, te núu na càda-ní-yu te cuíta nihnú-yu.

16 Te nchòhò ñáiyu ío cùu iní-í ndécú ndìhi-í ichi Xítohó Jesucristú, vá dáñá-ndó mèe-ndo dandahú ñáhá ñáiyu xii-ndo. 17 Chi nchaa sá váha véxi-xi núú Yá Ndiöxí Yaá ndécú àndiu, chi ñiu mee-gã ní cadúha-gá andiu ndìhi nchaa chódíní, ndìhi yóó, ndìhi nchíanchii. Te Yá Ndiöxí ñá túú ndì queheⁿ ndì queheⁿ-gá sá cání ìní-gá, te ní ñà túú cùu-gá dàtná ìⁿ cuándahú cuäháⁿ-xi duha cuáháⁿ-xi dàcáⁿ, chi ìⁿ-ní sá sání ìní-gá. 18 Te Yá Ndiöxí ní cuini-gá sá cúú-ó dèhe-gá, te ndáá sá cúú-ó dèhe-gá chi sàndáá iní-ó tñùhu-gá. Te nchoo ñáiyu sàndáá iní-xi tñùhu-gá cúnùu-gá-ó chi ní nduu-o dèhe-gá.

Ichi ndáá cuiti

19 Te nchòhò ñáiyu ío cùu iní-í ndécú ndìhi-í ichi Xítohó Jesucristú, cundedóho-ndo ìⁿ tñùhu na càháⁿ-í-a. Te cuini-í sá cùndecu túha-ndo cùndedóho-ndo tñùhu Yá Ndiöxí, te caní váha iní-ndó nàcuáa càháⁿ-ndó, te cundu cuàhnu iní-ndó te vá cùdèéⁿ-ndó. 20 Chi núu na cùdèéⁿ-ó te ñá túú quide váha-o núú Yá Ndiöxí. 21 Te daña-ndo nchaa sá cuèhé sá dúhá ío ñuyíú-a. Te quindáá iní-ndó tñùhu Yá Ndiöxí ndécú ndìhi-ndo, te vá cùndùu sáá iní-ndó, te ducaⁿ te naníhí tàhú-ndó.

22 Te quindáá iní-ndó tñùhu-gá te vá cuèndá-ni cundedóho-ndo, chi núu na cùndedóho-ndo te vá

tñí-ndó ñá, te dìcò-ni dandahú-ndó mèe-ndo te vá naníhí tàhú-ndó. 23 Chi nchaa ñáiyu dìcò-ni sàcùndedóho tñùhu-gá te ñá túú sàndáá iní-yu, ñáiyu-áⁿ cúú-yu dàtná ìⁿ ñáiyu sàcùndéhé-ni núú-xi núú yùtátá. 24 Chi nini ndèhé-yu ní xiní-yu núú-yu, te ní xócání-yu te ní nacua-naa-ní-yu nàcuáa càa núú-yu. Te ducaⁿ sàtnahá-xi cùu ñáiyu sàcùndedóho tñùhu Yá Ndiöxí, te ñá túú tñí-yu. 25 Te nchaa ñáiyu dàcuaha ndisa tñùhu ní dándóo Yá Ndiöxí nihnu-ní-yu ichi-gá, chi ñá díú ìⁿ sá vèe cùu-xi. Te ñáiyu-áⁿ ñà túú dìcò-ni sàcùndedóho-yu chi quide ndáá-yu núú-gã, te cùdíí iní-yu xíndecú-yu.

26 Te nchaa ñáiyu càchí sá ndécú ichi ndáá te cùtexínu-ni càháⁿ-yu, te xíáⁿ dìcò-ni dandahú-yu mèe-yu sá ndécú-yu ichi ndáá. 27 Te núu ndècu-o ichi ndáá cuiti ichi Dútú Ndiöxí, te chindee-o nchaa ñáiyu ní ndóo ndàhú, ndìhi ñáiyu quèé ndécú ndìhi tñùndòho tñùhu ndàhú, te vá càdá-ó nàndi sá cuèhé sá dúhá ío ñuyíú-a.

2

Ìⁿnuu-ni cùu iní-ó nchaa tñaha ñáiyu-o

1 Te nchòhò ñáiyu ndècu ndìhi-í ichi Xítohó Jesucristú Yaá cúnùu, ìⁿnuu-ni càháⁿ ndìhi váha-ndo nchaa tñaha ñáiyu-ndo. 2 Te núu núú nàtàcá-ndó chiñuhu-ndo Yá Ndiöxí ní sáá ìⁿ téé ío váha càa dóó nihnú-dè, te ní sáá tucu ìⁿ téé nihnu dóó ndàhú, 3 te núu téé nihnu dóó váha-ni-áⁿ

néhé-ndó sǎ yíñùhu núú-dě, te taxinucóo-ndo-dě ìñ núú xilé váha, te tée ndàhú-án daxòcòo-ndo-dě ìñ xio àdi canucòo-ndo-dě núú ñùhú, ⁴ te núú ducaⁿ na càda-ndo te ñá túú quide váha-ndo. Chi ìñ-ni-dé cúú ìní-ndó, te ìñ-dé ñá túú cùu ìní-ndó.

⁵ Te nchòhó ñáyiu ío cùu ìní-í ndécú ndìhi-í ichi Xítóhó Jesucristú, chí cùndèdóho tucu tnúhu na càháⁿ-í-a. Yá Ndiòxí càháⁿ-gá vài ñáyiu ndàhú cuendá tnahá tnúhu ndìhi ñáhá-yu xii-gá, te ndècu váha-gá-yu dàcúúxí ñáyiu cuica ñáyiu ñá túú sàndáá ìní tnúhu-gá, chí ní cachí-gá sá ncháá ñáyiu na cùu ìní ñáhá xii-gá nduu táhù-yu cundecú-yu ndìhi-gá ní caa ní quíhíⁿ. ⁶ Te nchòhó, ñá túú nèhe-ndo sá yíñùhu núú ñáyiu ndàhú, chí núú ñáyiu cuica-ni nèhe-ndo sá yíñùhu. ¿Te náa ñá cùtnùní ìní-ndó sǎ ñáyiu cuica dándoho ñaha-gá-yu xii-ndo, te cǎndeca ñáhá-yu sàháⁿ núú cuè téé cùchiuⁿ-án? ⁷ Te diu-ní-yu ío càháⁿ cuèhé-yu cuendá Xítóhó Jesucristú, te nchòhó sa ní nduu-ndo dèhe-gá.

⁸ Te ìñ ndudú cùnùu-gá ní càháⁿ Yá Ndiòxí ní ngódó tnùnì núú tütú-gá càchí-xi sá cúú ìní-ó tnàha ñáyiu-o dàtná cúú ìní-ó mèe-o. Te núú ducaⁿ na càda-o te quide váha-o. ⁹ Dico núú ñá túú cùu ìní ìñnuu-o cuè tnaha ñáyiu-o, te cuu cuèchi xii-o chí ñá túú quide-o nacuaá càháⁿ Yá Ndiòxí. ¹⁰ Te núú ìñ ñáyiu ndàunihnu ìñ sá càháⁿ Yá Ndiòxí, te dava-ni

quidé-yu ña, te ñáyiu-án ñà túú quidé-yu nacuaá càháⁿ ndudú Yá Ndiòxí. ¹¹ Te Yá Ndiòxí ní cachí-gá sá téé ndècu ñadihí-xi vá càháⁿ ndìhi-dé ìngá ñadihí. Te diu-ni-gá ní cachí-gá sá vǎ càhñí-ó tnàha ñáyiu-o. Te cuèi ñá túú càháⁿ ndìhi-o ìngá ñadihí, te núú sàhni-o tnaha ñáyiu-o te ñá túú quide-o nacuaá càháⁿ ndudú Yá Ndiòxí. ¹² Te nchoo xini ñuhu-xi càháⁿ-ó tnúhu váha te cada ndáá-ó, chí ñá díú ìñ sá vèe cùu-xi sá ní cachí Yá Ndiòxí cada-o. Te mee-gǎ ní cachí-gá sá cáda ndáá-gá cuèchi-o na sàá nduu. ¹³ Te nchaa ñáyiu ñá túú cùndahú ìní tnàha ñáyiu-xi, te vá cùndàhú ìní ñáhá-gǎ xii-yu na sàá nduu càda ndáá-gá cuèchi-yu. Te nchaa ñáyiu cùndahú ìní tnàha ñáyiu-xi te Yá Ndiòxí cùndahú ìní ñáhá-gǎ xii-yu na sàá nduu-ǎⁿ.

Quindáá ìní-ó Yá Ndiòxí te cada váha-o

¹⁴ Te nchòhó ñáyiu ndècu ndìhi-í ichi Xítóhó Jesucristú, te núú càchí-ó sǎ sàndáá ìní-ó Yá Ndiòxí te ñá túú quide-o sá váha, te ñá túú ndèé nándìhi-xi, chí vá nánihí tǎhú-ó te núú ducaⁿ na càda-o. ¹⁵ Te núú ndèhe-o ìñ tnaha ñáyiu-o ñà túú dǎo-yu àdi ñá túú sǎ cùchitò-yu, ¹⁶ te xǎhaⁿ-o: “Núhú-n te nducu-n dǎo cuihnu-n te nducu-n sǎ cǎxí-n”, xǎhaⁿ-o, te ñá túú nǎ sǎñaha-o, te sá dúcáⁿ quide-o te ñá túú quide váha-o. ¹⁷ Te núú càchí-ó sǎ sàndáá ìní-ó Yá

Ndiõxí te ñá túú quide váha-o ndècu-o, te vèdana nàndìhi-xi.

18 Te ío ñáiyu càchí-yu sá sàndáá iní-yu Yá Ndiõxí, te ío ñáiyu càchí-yu sá mée-ní sá vâha quidé-yu. Te yúhú càchí-í sá núu ñá túú quide-o sá vâha, te ñá túú sàndáá iní-ó Yá Ndiõxí. Te nchoo quide-o sá vâha núu xiãⁿ cútnùní iní-ó sá sàndáá iní-ó-gã. 19 Te

íó ñáiyu càchí sá ñⁿdii-ni Yá Ndiõxí ndécú, te vâha-ni càháⁿ-yu. Te tnàhá yucu ñávâha ndihi nchaa espíritú cúndìhi-xi xiní-xi sá ndécú ñⁿdii-ni Yá Ndiõxí, te yùhú-xi dico ñá túú tnì-xi tnúhu-gã.

20 Te ío ñi ñíquí-ó te núu na càchí-ó sá sàndáá iní-ó Yá Ndiõxí, te vá cádá-ó sá vâha. 21 Te ñaní tnàhá-ó ndíi Abrahám téé ní xindecu ndéé sanaha ñi ngúndecu váha ndíi núu Yá Ndiõxí, chi ní xito ndéé ñáhá-gã xii ndíi núu ndisa sá cáhni ndíi déhe ndíi té Isàác nduu táhú-gã ní cùu, te dàvá-áⁿ ñi cutnùní iní-gã sá ïo sàndáá iní ñáhá ndíi xii-gã, núu ñá ní dàña-gã cahni ndíi déhe ndíi. 22 Te nàha-o sá ndíi Abrahám ñá díú-ní sá mée-ní sá ñi sàndáá iní ñáhá ndíi xii-gã, chi ní tnì ndíi tnúhu-gã. 23 Te ducaⁿ ñi quee ndáá-xi nàcuáa càháⁿ-xi núu tûtú Yá Ndiõxí núu càchí-xi:

“Ndíi Abrahám ní sàndáá iní ndíi ní quide ndíi nchaa nàcuáa ní xáhaⁿ Yá Ndiõxí, te ní ngúndecu váha ndíi núu-gã, te ní cachí-gã sá cúu ndíi ñⁿ téé ío vâha tnàhá tnúhu ndihi-gã”, duha càchí-xi núu tûtú-gã.

24 Te xiãⁿ cútnùní iní-ó sá

ñá díú mèe-ni sá quindáá iní-ó Yá Ndiõxí, chi núu na càda-o nacuáa cuu váha iní-gã te ngúndecu váha-o núu-gã 25 dàtná ní quide-gã tá Ràháb ñⁿ ñadìhí ní xindecu ndéé sanaha, chi xíchí-ãⁿ ñi xindecu-xi ichi díi iní, dico ní tuha-xi ichi Yá Ndiõxí te ní ngúndecu váha-xi núu-gã, chi ní chindee-xi cuè téé israhél cue téé ní xica chiun-gã, te ní sanu ichi ñaha-xi xii-güedé ñⁿ ichi núu vâ nánihí ñáhá cuè téé cùu úhú iní ñáhá xii-güedé.

26 Te nchaa ñáiyu càchí sá sàndáá iní Yá Ndiõxí, te ñá túú quidé-yu nàcuáa càháⁿ-gã ñáiyu-áⁿ cúu-yu dàtná ñⁿ ñáiyu ní xihí. Chi ñá túú-gã ndíxi tũu iní-yu nchaa sá cuèhé sá dúhá quidé-yu. Duha sãtnahá-xi cùu nchaa ñáiyu ñá túú cùní tnì tnúhu càháⁿ Yá Ndiõxí.

3

Nàcuáa quide yaa-o

1 Te nchòhó ñáiyu ndècu ndihi-í ichi Xítohó Jesucristú, vá ncháá-ndó càni iní-ndó cùu-ndo mestrú dacuàha-ndo ñáiyu tnúhu Yá Ndiõxí chi íi cáá-xi. Chi na quítnahá nduu nàcuáha-o cuendá núu-gã, te núu ñá túú ní quide ndáá-ó ñá, te vá cúu vâha iní-gã núu-ó. 2 Te nchaa-o ïo cuèhé sá ñá túú vâha quide-o. Te nchaa ñáiyu ñá túú càháⁿ tnúhu cuèhé tnúhu duha cùu-yu ñáiyu ñá túú nã cúmãní chi ío ndáá quidè-yu. Te xiní-yu cotnì-yu mèe-yu, te quide váha-yu núu Yá Ndiõxí. 3 Te dàtná cuíni-ndó cùu ñⁿ quiti te núu

na chihí-o frenú yuhu-di, te cotnii-o-di te ngúnu ichi-di, te ducaⁿ sãtnahá-xi cùu ñáyiú sácótnii mee-xi, chi ñá túú càháⁿ-yu tnúhu cuèhé tnúhu duha. ⁴ Te dàtná cuiní-ndó cùu barcú cuèi ñàhnu vihi-xi, dico òré quéné ñhi táchí te tündaha-xi ñⁿ xio, dico téé dàcaca ndacu-dé dáquihíⁿ-dé-xi ndihi ñⁿ yutnu sá dánàni-güedé tímú ndàa núú càchí iní-dé quihíⁿ-xi. ⁵ Te ducaⁿ cùu tucu yaa-o chi ío líhli-xi dico ío cuéhé tnúhu càháⁿ-ó ndihi-xi. Te ducaⁿ-ni sãtnahá-xi cùu tucu sá lúhá ñúhú chi sãhmi-xi ñⁿ yucu. ⁶ Te ñhi-ni ducaⁿ sãtnahá-xi cùu yaa-o chi ío cuéhé tnúhu cuèhé tnúhu duha càháⁿ-ó ndihi-xi, te dàcuíta ñhnu ñaha-xi xii-o. Te ío cuéhé cuèchi quide-o ndihi-xi cuendá sá ñuyíú-a ñúhu tnahá ñúhú tñi yucu ñávãha dàticá ñhnu ñaha-xi. ⁷ Te ndacu-o càda masú-ó nchàa núú quiti ío ñuyíú cuèi quiti dééⁿ quiti xica núú ñúhú, te cuèi quiti ndàva, te cuèi cóo, te cuèi quiti ñúhu xití ndute lámár, chi ducaⁿ quide dava cue téé ñuyíú-a. ⁸ Dico yaa-o chi vá yóo ñⁿ ndacu cada masú ñáhá xii-xi nacuaá càháⁿ-ó mée-ni tnúhu váha ndihi-xi, chi mee-ni tnúhu cuèhé tnúhu duha cunu-gá càháⁿ-ó ndihi-xi. Te cùu-xi datná ñⁿ venènu chi dàti-u-xi iní-ó. ⁹ Te ñhi-ni ndihi yaa-o quide cahnu-o Dútú Ndióxi Yáa cúú Tãtá-ó, te ñhi-ni ndihi yaa-o caháⁿ úhú-ó cuè tnahá ñáyiú-o. Te xini ñuhu-xi vá dúcáⁿ càda-o, chi mee-gã ní

chihí-gá sá xini tnúni-ó ndihi iní-ó, dàtná cáa mée-gã ñúhú iní-gá. ¹⁰ Te ñhi-ni yuhu-o quèe tnúhu váha càháⁿ-ó, te ñhi-ni yuhu-o quèe tnúhu cuèhé tnúhu duha. Te nchòhó ñáyiú ndècu ndihi-í ichi Xitohó Jesucristú cunaha-ndo sã ñá túú ndùu váha-xi ducaⁿ càda-o. ¹¹ Te ñá túú xini-ndó sã ñⁿ núú quée ñhni ndute, te quèe ndute váha te quèe ndute úá-ãⁿ. ¹² Te nchòhó ñáyiú ndècu ndihi-í ichi Xitohó Jesucristú, te ñá túú xini-ndó sã ñⁿ yutnu ngúxí, te cùuⁿ aceitúná, àdi xini-ndó sã ñⁿ yoho yaha stilé te cùuⁿ ngúxí. Te ducaⁿ cuèi ñⁿ núú quée ñhni ndute, vá cúú quèe ndute váha te quee ndute úhá. Te ducaⁿ sãtnahá-xi cùu yuhu-o chi vá cúú càháⁿ-ó tnúhu váha te càháⁿ-ó tnúhu cuèhé tnúhu duha.

Nchaa sã vãha xini tnúni-ó taxi Yá Ndióxi

¹³ Te núú ndècu ñáyiú túha tnuú-ndó ñáyiú cutnuni iní-xi, te xini ñuhu-xi mee-ni sã vãha cadá-yu, ducaⁿ te cutnuni iní-ó sã túha ndisá-yu, te vá cadá càhnú-yu mée-yu. ¹⁴ Te núú nchoo cuèdú iní-ó te cuiní-ó cunu-o núú tnahá ñáyiú-o, te vá càchí-ó sã túha-o, chi ñá túú quide ndáá-ó te núú ducaⁿ na càda-o. ¹⁵ Chi ñá díú xãⁿ ní dãnehé ñáhá Yá Ndióxi, chi ñuyíú iha ní cacu ñhnu-xi cuendá sá yucu ñávãha dàcahu iní ñáhá-xí. ¹⁶ Te núú ndécú ñáyiú cuèdú iní ñáyiú cuiní cunu, te yacáⁿ mee-ni ndáhú nãá xĩndecú-yu, te ñá túú quide váha-yu, chi

mee-ni nchàa sá cuèhé sá dúhá quidé-yu. ¹⁷ Te núu ní taxi Yá Ndiöxí sá xini tnùní-ó, te cada váha-o, te cáháⁿ ndihi váha-o nchàa tnaha ñáyi-u-o, te tñi-o tnùhu váha càháⁿ-yu, te cundàhú iní-ó-güë-yu te chindee-ö-yu, te vá cáni ñⁿ cani úú iní-ó, te ío conduu ndáá iní-ó. ¹⁸ Te núu cuiní-ó ñà túú nã cuu cundecu-o ñùyú-a, te cada váha-o sã cúu-xí tnàha ñáyi-u-o cuendá sá ñà túú nã cuu cundecu-o ndihí-yu. Te ducaⁿ te nguínchicúⁿ dava-gá tnàha ñáyi-u-o càda váha-yu.

4

Vá cúu cundecu-o ichi Yá Ndiöxí te cada-o nãndi sá cuèhé sá dúhá

¹ ¿Te xini-ndó nã cuendá nàá ñáyi-u te xisahni tnàhá-yu-ãⁿ? Te nàá-yu sá tnùhu cuédú iní, chi diu-ni xíãⁿ ñúhú iní-yu, te ñà túú ndècu váha iní-yu. ² Chi cuiní-yu cundecu ndihí-yu ñⁿ sá ñà túú ndècu ndihí-yu, te ñà túú nihí-yu núu xíãⁿ xícuu cuédú iní tnáhã-yu, te xícuèhé tnáhã-yu, te càni tnahá-yu, te xisahni tnàhá-yu. Te ñà túú nihí-yu sá cuiní-yu chi ñà túú xicáⁿ-yu núu Yá Ndiöxí. ³ Te cuëi xicáⁿ-yu ñⁿ sá cuiní-yu núu-gã te ñà túú sãñaha-gã, chi ñà túú xicáⁿ-yu ñⁿ sá cúu xii-yu sá váha, chi ñⁿ sá ná ndihi-yu núu cáda-yu nchaa sá cuèhé sá dúhá xicáⁿ-yu, núu xíãⁿ ñà nihí-yu. ⁴ Te nchaa ñáyi-u ducaⁿ xíquide ío cùu sáá iní-yu núu Yá Ndiöxí. Te nàha-ndo

sá ncháá ñáyi-u cùdíí iní-xi cundecu ichi cuèhé ichi duha cùu úhú iní-yu Yá Ndiöxí, chi vá cúu cundecu-o ichi cuehé ichi duha, te cundecu-o ìchi-gá. ⁵ Te ñà túú dió ducaⁿ càháⁿ-xi núu tütú Yá Ndiöxí núu càchí-xi: “Yá Ndiöxí ní taxi-gá Espiritú-gá ndécú ndihi-o. Te Espiritú-gá-áⁿ cuiní-xi sá méé-ní-gã cuhuⁿ iní-ó”, duha càchí-xi núu tütú-gá. ⁶ Te Yá Ndiöxí ío chindee ñaha-gá cuendá cada ndáá-ó núu-gã dàtná càchí tucu-xi núu tütú-gá núu càchí-xi: “Yá Ndiöxí ñà túú cùu váha iní-gá núu nchàa ñáyi-u quide cahnu mee-xi, dico chindee-gá cue ñáyi-u ndàhú iní-xi”, duha càháⁿ-xi núu tütú-gá. ⁷ Te cada-ndo nàcuáa càháⁿ Yá Ndiöxí. Te vá cáda-ndó nàcuáa cuiní yucu ñávaha, ducaⁿ te xóo cóo ndéé ñáhá-xí xii-ndo. ⁸ Te tñi-ndo tnùhu càháⁿ Yá Ndiöxí te cundecu ndihi ñaha-gã xii-ndo. Te nchaa nchòhó ñáyi-u ndècu ichi cuehé ichi duha dañ-a-ndo ìchi-áⁿ te cada váha-ndo. Te nchaa nchòhó ñáyi-u sàni iní cunu cuechi núu Yá Ndiöxí te quide-ni-ndo nchaa sá cuèhé sá dúhá, te ñà túú quide váha-ndo núu ducaⁿ, chi xini ñuhu-xi sá càcáⁿ-ndó núu Yá Ndiöxí sá ná ndádá ndòo ndada nine-gá iní-ndó. ⁹ Te ndixi cuëchi iní-ndó nchàa sá quidé-ndó ndéé ndáhyú ndisa-ndo sã ndihú iní-ndó, te ñà díú dà cudíí iní-ndó. ¹⁰ Te náhmá-ndó núu Yá Ndiöxí nchaa sá ní quide-ndo, te nguñdecu váha-ndo núu-gã.

*Vá càháⁿ-ó nchàa sá quidé
tnàha ñáyiu-o*

11 Te nchòhó ñáyiu ndècu ndìhi-í ichi Xítohó Jesucristú, vá cuátnùhu tnaha-ndo, chí nchaa ñáyiu sätnuhu tnaha òicó-ni ndàa nuú-yu ndèhe tnahá-yu, te ñá túú càháⁿ váha-yu cuendá tnúhu Yá Ndiöxí sá sánú ichi ñaha xii-yu nàcuáa cundecú-yu, chí dàquee tíhũ-yu tnúhu-án. Te núu càchí-ndó sã ñà túú càháⁿ váha tnúhu Yá Ndiöxí, te xiáⁿ quéé-xí sã ñà túú sàndáá iní-ndó tnũhu càháⁿ-gá, te cuíní-ndó cùnuu tnúhu-ndo núú tnũhu-gá. 12 Te mee Yá Ndiöxí ní cachí-gá nàcuáa cada-o, te òiu-ni mee-gã càháⁿ-gá te núu ní quide váha-o, àdi ñá túú ní quide váha-o. Te òiu-ni mee-gã dàcácu nihnu ñaha-gã xii-o núú ùhú núú ndàhú, te òiu-ni-gá daquihíⁿ ñáhá-gã xii-o núú ùhú núú ndàhú-án te núu vá cádá váha-o. Te nchoo ñà túú nã cúú-ó, te núu mee-ni nchàa sá quidé tnàha ñáyiu-o cundehe-o.

*Ñá túú cùtnuní iní-ó nãsa
túndaá-ó ñngá nduu*

13 Te òava nchòhó càchí-ndó sã vitná àdi tneé quihíⁿ-ndó ìⁿ ñuú, te yacáⁿ cundecu-ndo ìⁿ cuíá cada-ndo ìⁿ ndáhú te nihí-ndó òihúⁿ. 14 Te ní ñã xini-ndó nã cúú sã yãha-ndo vitna àdi tneé. Te nchoo cùu-o datná ìⁿ vícó núhú, chí vícó-ãⁿ tnávíí ndéhé-ó te tna tnaa-gá sa ní ndóñhú-xí. Ducaⁿ sätnahá-xi cùu nchoo chí ìⁿ úú nduu duha vèxi-o ñuyú-a te ndoñuhu-o. 15 Te

núu sàndáá iní-ó Yá Ndiöxí te òuha càháⁿ-ó; “Te núu Ndiöxí ná càchí-gá sã cùndecu tnaa-o ñuyú-a te cada chiúⁿ-o”, òuha cachí-ó. 16 Dico mee-ndo chí ío ñã iní-ndó cuíní-ndó cùnuu tnúhu-ndo núú Yá Ndiöxí, te ñá túú nduu váha-xi sá òucáⁿ quide-ndo. 17 Te núu xini-ó càda-o sã váha te ñá túú quide-o, te cùu-xi ìⁿ cuéchi núú-gá.

5

*Tnúhu sá dátũha ñaha xii
nchaa ñáyiu cuica ñà túú
sàndáá iní tnúhu Yá Ndiöxí*

1 Te nchòhó ñáyiu cuica ñáyiu cuihna iní-xi cundedóho-ndo tnũhu na càháⁿ-í-a. Vitna ngũita-ndo ndĩhú iní-ndó, te ndáhyú víhí-ndó, chí quixi ìⁿ tnúndòho cuendá-ndó te ndoho víhi-ndo. 2 Te nchaa sá ndécú ndìhi-ndo ndìhi cuita tiu quihíⁿ, te quee tíquidi dóó-ndó, 3 te òihúⁿ-ndó caxi cudi ñũhu. Te xiáⁿ cuita naquiní ndeé-ndó tnúndòho sã ñà túú quide váha-ndo. Te ndìhi-ndo ndìhi òihúⁿ-ndó sã ní taxúha-ndo, chí vitna sa ta cùyatni sáá nduu ndìhi ñuyú-a. 4 Te nchaa cue téé ní quide chiúⁿ núú chíúⁿ-ndó ní ndatnúhu-ndo ndìhi-güedé nàcuáa cháhu-ndo-güedé ní cùu, te ñá túú ní cháhu-ndo-güedé nàcuáa ní xáhaⁿ-ndo xii-güedé, núu xiáⁿ ío ndècuéchi-ndo. Te Yá Ndiöxí Yaá ndécú àndiu ní tecú òóho-gá nàcuáa càháⁿ-güedé sá ní dándáhú-ndó-güedé. 5 Te nchòhó ñáyiu cuica, sá ndécú

váha-ni-ndo cùndee iní-ndó, núu quide-ni-ndo nchaa sá vëxi iní-ndó. Te cùu-ndo datná ìⁿ quiti nùcúhnu mee-ni xèxi-dì, te sàá nduu sàhni-güedé-di. Te ducaⁿ sàtnahá-xi cùu nchohó chi ndècu váha-ndo vïtna, te sàá ìⁿ nduu nàcháhu-ndo nchàa sá quidé-ndó núú Yá Ndiöxí te núu vá quindáá iní-ndó-gã. ⁶ Te quide úhú iní-ndó sàhni-ndo cue ñáyiú quide ndáá núú Yá Ndiöxí, te ñá túú nã quidé-yu.

Cunduu càhnu iní-ó te cáháⁿ ndìhi-o Yá Ndiöxí

⁷ Te nchòhó ñáyiú ndècu ndìhi-í ichi Xítóhó Jesucristú, cada ndee-ni iní-ndó cùndetu-ndo ndéé ná quixi tucu-gá ñuyíú-a, te cada-ndo dàtná quidé nchàa ñáyiú chìhi tatá chi sàcùndetú-yu ndéé cúúⁿ dáu te chìhí-yu. Te cùndee-ni iní-yu sàcùndetú-yu ndéé cúúⁿ-gã dáu te cùu itú-yu, te ndùdí iní-yu. ⁸ Te ducaⁿ càda nchohó tucu cada ndee iní-ndó cùndetu-ndo, chi sa ta cùyatni nduu quixi tucu Xítóhó Jesucristú. ⁹ Te duha ndùu tnúhu càháⁿ-í núú nchòhó ñáyiú ndècu ndìhi-í ichi Xítóhó Jesucristú, vá ndàcáⁿ cuéchi núú tnáhá-ndó te núu nása cùu ndecu-ndo, chi ñá cuéhé-gá nduu cùmání te quixi Crístú nacuaca ñaha-gã xii-o cùndecu-o núú Yá Ndiöxí, te mee-gã cada ndáá-gã cuéchi-o. ¹⁰ Te nchòhó ñáyiú ndècu ndìhi-í ichi Xítóhó Jesucristú, ndacu iní-ndó nàcuáa ní quide nchaa cue téé ní xóo cáháⁿ tnúhu Yá Ndiöxí ndéé sanaha

sá ìo càhnu ní xínuu iní-güedé cuéi nándi ní ndoho-güedé. ¹¹ Te cùtnuní iní-ó sã cúú-ó ñáyiú ìo váha táhú-xi te núu na càda cahnu iní-ó nchàa sá ná yáha-o cuendá Yá Ndiöxí. Te nàha-ndo sá ndíi Jób ducaⁿ nã quide ndíi, chi nándi sá nã yáha ndíi te ní quide càhnu iní ndíi. Te sátá nã yáha ní ndoho ndíi, te ìo cuéhé sã nã sáñaha Yá Ndiöxí xii ndíi. Chi ìo váha iní-gá te ìo cùndahú iní-gá nchaa ñáyiú ìo càhnu iní-xi.

¹² Te nchòhó ñáyiú ndècu ndìhi-í ichi Xítóhó Jesucristú, chí cùndèdóho tucu tnúhu na càháⁿ-í-a, chí ìo xini ñuhu-xi. Vá cáci nèhe-ndo Yá Ndiöxí òré cuiní-ndó sã cùtnuní iní ñáyiú sá ndáa cada-ndo ìⁿ sá càháⁿ-ndó. Te nì vá cáci nèhe-ndo sá càchí-yu cùu ndiöxí càdùha cue téé ñuyíú-a. Te núu ìⁿ sá xicáⁿ tnàha ñáyiú-ndo núú-ndó te cúñaha-ni-ndo te núu cuu àdi sá vã cúú. Te vá cáci nèhe-ndo Yá Ndiöxí, ducaⁿ te vá dándòho ñaha-gã xii-ndo.

¹³ Te núu ndòho-ndo te cáháⁿ ndìhi-ndo Yá Ndiöxí, àdi te núu ndècu váha-ndo te cudí iní-ndó te chiñuhu-ndo-gã, ¹⁴ àdi núu cùhú-ndó te cana-ndo cué téé yindaha ñaha xii-ndo nacuáa ndècu-ndo ichi Yá Ndiöxí cuendá tee-güedé acití díqui-ndó, te cáciⁿ táhú-güedé núú-gã cuendá-ndó dàtná ní cachí mée-gã cunduu. ¹⁵ Te núu quindáá ndisa iní-ndó sã ndùha-ndo, te ndùha-ndo chi Yá Ndiöxí cada tátna ñaha-gã xii-ndo, àdi núu ní quide-ndo

ĩⁿ sá ñà túú tàú-ndó càda-ndo núú-gã te cada càhnu iní-gá cuéchi-ndo. ¹⁶ Te xini ñũhu-xi cútñũhu tnàha-ndo oré ñá túú cundáa-ndó núú Yá Ndiõxí cuèndá chindee tnũhu tnàha-ndo cáháⁿ ndihí-ndo-gã te xocàni-gá cuéhé-ndó, te cada càhnu iní-gá nchaa sá ñà túú vãha ní quide-ndo te núu cundecu váha iní-ndó. Te nchaa ñáyiu ndècu váha iní-xi núú Yá Ndiõxí na càcáⁿ-yu ìⁿ sá cuìní-yu núú-gã te nihí-yu, chi sàá tnũhu-yu núú-gã. ¹⁷ Te té Èliás, téé ní xíndecu ndéé sanaha ñí cáa-dé dàtná cáá nchòò. Te ní cáháⁿ ndihí-dé Yá Ndiõxí ñi yũhu ñi iní-dé ní xáhaⁿ-dè xii-gá sá vã dácùuⁿ-gá dáú, te ní tñi-gá tnũhu ní cáháⁿ-dè, te ñá ní dàcuuⁿ-gá dáú ùní cuía dava. ¹⁸ Te dătnùní ducaⁿ te ní cáháⁿ ndihí tucu té Èliás-áⁿ Yá Ndiõxí sá dácùuⁿ-gá dáú te ní cuuⁿ, te ní cuu tucu nchaa sá ñí xitu-güedé.

¹⁹ Te nchòhó ñáyiu ndècu ndihí-í ichi Xítóhó Jesu-crístú, te núu dava-ndo sà ndecu-ndo ichi Yá Ndiõxí ní cùu te ní dáñá-ndó, te ndècu tucu dava-ndo ñadaxĩnu iní tnáhá-ndó nùcúndecu tucu-ndo ichi-gá, ²⁰ te núu ducaⁿ na càda-ndo te dácácu nihnu tnàha-ndo núú ùhú núú ndàhú, te mee Yá Ndiõxí cada càhnu iní ñáhá-gã xii-ndo cuèi ío cuéhé cuéchi ní quide-ndo.

TUTÚ DÍHNA NUU NĪ CADŪHA TĒ PĒLÚ

Té Pèlú cādūha-dé tutú sá cúu-xí cuè ñáyiú sàndáá iní ñáhá xì Yá Ndiõxí

¹ Yúhú té Pèlú ní tendaha ñaha Xítohó Jesucristú xíca cùu-í càháⁿ-í tnúhu-gá, te cādúha-í tutú-a sá cúu-xí nchòhó ñáyiú xínchíté nuu ndècu distritú Pòntó, ndihi distritú Gálaciá, ndihi distritú Capadociá, ndihi distritú Àsiá, ndihi distritú Bìtiniá. ² Chi Dútú Ndiõxí ní cachí-gá sá cúu-ndó dēhe-gá ndéé cútñahá vátá ngáva-gá ñuyú, te Espiritú-gá ní quide-xi ndècu yiñuhu-ndo núú-gã vitna. Te ní cachí-gá sá cúu-ndó dēhe-gá cuendá tñi-ndo nchàa tnúhu càháⁿ Xítohó Jesucristú, ndihi cuendá nduu ndoo nduu nine iní-ndó, chi ñiú cuendá-áⁿ nĩ xíhí Xítohó Jesucristú. Te xícaⁿ táhù-í núú Yá Ndiõxí sá ïo na chindee chítúu ñaha-gã xii-ndo cuèi vitna te cuèi núú cuaháⁿ núú vèxi, te ñiú-ni-gá ná cáda te ïo váha cuu iní-ndó cundecu-ndo.

Tnúhu ndee iní sá ndécú ndihi ñáyiú sàndáá iní ñáhá xì Yá Ndiõxí

³ Te vitna chí ná càchí-ó sã ïo càhnu cuu Yá Ndiõxí Yaá cúu Tãtá Xítohó Jesucristú, chi ñiú-gá ïo ní cundàhú iní ñáhá-gã xii-o núu xíãⁿ ní quide-gá sá nchóó nĩ nduu-o dàtná ñⁿ ñáyiú saa vitna. Te ducaⁿ nĩ quide ñaha-gã xii-o

cuendá sá Xítohó Jesucristú ní xíhí-gá te ní ndoto-gá. Te cuendá sá nĩ nduu-o dàtná ñⁿ ñáyiú saa, xíãⁿ ní ngúndecu ndihi-o tnúhu ndee iní ⁴ sá cundècu ndihi-o-gá ni caa ni quíhíⁿ, chi ducaⁿ nĩ cachí-gá cunduu. Te yàcáⁿ vá quini-gá-ó nĩ ñⁿ sá cuèhé sá dúhá, te ïo cudíí iní-ó cundecu-o ndihi-gá ni caa ni quíhíⁿ. ⁵ Te sá sàndáá iní-ó Yá Ndiõxí, núu xíãⁿ coto ñaha-gã xii-o ndéé ná sàá nduu nàqueheⁿ cuendá ñáhá-gã chi ïo càhnu cuu-gá.

⁶ Te xíãⁿ ïo cudíí iní-ndó ndècu-ndo, te cuèi nándi ndòho-ndo ndecu-ndo dico sacú-ni nduu ducaⁿ ndòho-ndo. ⁷ Te òré ná cáda càhnu iní-ndó yãha-ndo nchàa sá ná càda ñaha ñáyiú xii-ndo, te ducaⁿ te cutnùní sàndáá ndisa iní-ndó Yá Ndiõxí, te sá dúcáⁿ sàndáá iní-ndó Yá Ndiõxí ïo-gá váha dàcúúxí díhúⁿ cuàáⁿ chi xíãⁿ ñá túú cudíi-xi. Te cuèi ducaⁿ dico xito ndéé náhí-ní-güedé núu ndisa cùu-xi díhúⁿ cuàáⁿ. Te ducaⁿ sãtnahá-xi cùu nchohó cuendá nchaa sá ndóhó-ndó, te na sàá nduu quixi tucu Xítohó Jesucristú te cúñaha-gã xii-ndo: “Ío váha ní quide-ndo, te vitna ïo càhnu cuu-ndo, te tàú-ndó núcundecu váha-ndo”, duha cúñaha-gã xii-ndo.

⁸ Te vitna ïo cùu iní-ndó Xítohó Jesucristú cuèi vátá quini-gá-ndó-gã, te ducaⁿ ïo sàndáá iní-ndó-gã, te ïo cudíí iní-ndó te súúní nĩ ñá cútñùní iní-ndó nãsa cunduu tnúhu càháⁿ-ndó sã dúcáⁿ ïo cudíí iní-ndó ⁹ cuendá sá

nĩ naníhí tǎhú-ndó, chi ní sándáá iní-ndó-gǎ.

10 Te cue tée ní xóo cáhán tnúhu Yá Ndiöxí ndéé sanaha nĩ cachí-güedé nàcuáa cada-gá cundàhú iní ñáhá-gǎ xii-o vitna. Te cue tée-ánⁿ ío váha ní dácúáhá-güedé nàcuáa cada Yá Ndiöxí dácácu nihnu ñaha-gǎ xii-o vitna. 11 Te Espíritú Xítohó Jesucristú ní ngúndecu ndihí cue tée-ánⁿ nĩ xáhaⁿ-xi xii-güedé nàcuáa ndoho-gǎ, te ní xáhaⁿ tucu-xi xii-güedé sá sǎtá ná yǎha ndoho-gǎ te ío cunuu-gǎ ndihí Yá Ndiöxí. Te ío ní saní iní-güedé nũu ná nduu sǎá ducaⁿ càda-xi, ndihí nchaa nándi-gǎ cúú sǎ cáda-xí. 12 Te Yá Ndiöxí ní xáhaⁿ-gǎ xii-güedé sá ncháá tñuhu váha cáhán-güedé vá cúú-xí cuendá méé-güedé, chi cuendá nchoo cué ñáyiu ndècu ñuyíú-a vitna cùu-xi. Te ñiu-ní tnúhu-ánⁿ cúú tñuhu cáhán nchúhú cue tée cáhán tnúhu Yá Ndiöxí núú-ndó. Te Espíritú sá nĩ taxi Yá Ndiöxí ndécú ndihí-o chindee ñaha-xi xii-ndí cáhán-ndí tnúhu-gǎ. Te cue espíritú xínú cuèchi núú Yá Ndiöxí ío cuíní-xi quíní ndáá-xi nchaa nàcuáa cuáhánⁿ tnúhu-ánⁿ.

Yá Ndiöxí cachí-gá sá cáda-ó mèe-ni sá váha

13 Te sá dúcánⁿ ío váha ní quide ñaha Yá Ndiöxí xii-ndo xǎnⁿ xíní ñùhu-xi ío váha cuáha-ndo cuendá nàcuáa cundecu-ndo te vá cání iní-ndó càda-ndo ni ñⁿ sá cuèhé sá dúhá, te ío quíndáá iní-ndó sǎ Yá Ndiöxí cada váha ñaha-gǎ nduu na quixi tucu Xítohó Jesucristú. 14 Te

íó tñⁿ-ndo ncháa tnúhu cáhánⁿ Yá Ndiöxí, te vá cúhúⁿ-gǎ iní-ndó nándi sá cuèhé sá dúhá sǎ ní xúhuⁿ iní-ndó cǔtnáhá vátá cundecu-gá-ndó ìchi-gǎ te ni vǎ cáda-ndó. 15 Te cada-ndo mèe-ni sá váha cundecu-ndo dàtná quidé mèe Yá Ndiöxí Yáá ní cáhánⁿ ñáhá xii-o cundecu-o ndihí-gǎ. 16 Te cachí-gǎ núú tütú-gǎ: “Cada-ndo mèe-ni sá váha cundecu-ndo, chi ducaⁿ quide yúhú”, duha cachí-gǎ núú tütú-gǎ.

17 Te Yá Ndiöxí cada ndáá-gǎ cuèchi nchaa ñáyiu, te vá cáda cuendá-gǎ cuèi náí ñáyiu cùú-yu, te nchòhó cachí-ndó sǎ ñíú Tǎtá-ndó cùu-gǎ te ndáá, núú xǎnⁿ xíní ñùhu-xi canehe-ndo sá yíñùhu núú-gǎ ndi ncháa nduu cundecu-ndo ñuyíú-a.

18 Te ñiu-gǎ ní dácácu nihnu ñaha-gǎ xii-ndo ñⁿ ìchi sá ñà túú nándihí ní sanu ìchi ñaha cué ñaní tñáhá-ndó nĩ xíndecu ndéé sanaha ni cùu, te nchòhó sa náha-ndo sá sǎ dúcánⁿ nĩ quide ñaha Yá Ndiöxí ní dácácu nihnu ñaha-gǎ xii-ndo ìchi-ánⁿ ñà túú ní chǎhu-gǎ ni ñⁿ díhúⁿ cuáánⁿ, te ni ñⁿ díhúⁿ cuixínⁿ sá ndíhí nihnu ñuyíú-a cuendá-ndó.

19 Chi Xítohó Jesucristú ní quixi-gǎ ní sati níñí-gǎ, te ní xíhí-gǎ núú cùrúxí cuendá sá nchóó naníhí tǎhú-ó, te cùu-gǎ dàtná ñⁿ mbéé quiti ío váha iní-xi, quiti cándoo canine. 20 Te ducaⁿ nĩ ndoho Xítohó Jesucristú, chi ducaⁿ tñáhí ndéé tñuní ndoho-gǎ ndéé cǔtnáhá vátá ngǎva-gǎ ñuyíú. Te ducaⁿ nĩ yáha-gǎ

cútnàhá ní quixi-gá òré vitna cùmání sǎá nduu nàa ñuyíú-a cuèndá nchoo cùu-xi sá vǎha xii-o vitna. ²¹ Te nchòhó sa ñihí-ndó tnúhu nàcuáa ní yáha Xítóhó Jesucristú cútnàhá ní quixi-gá ñuyíú-a, núu xiǎⁿ sàndáá iní-ndó Yá Ndiǒxí. Te Yá Ndiǒxí ní dándótó-gǎ Xítóhó Jesucristú, te sátá ní dándótó ñàha-gá te ní cachí-gá sá ïo càhnu cuu Xítóhó Jesucristú. Te sá dúcáⁿ ní cuu, xiǎⁿ ïo sàndáá iní-ndó Yá Ndiǒxí, te ní taxi-gá tnúhu ndee ìní ndécú ndìhi-ndo sá sǎá nduu cùndecu-ndo ndìhi-gá ni caa ni quíhíⁿ.

²² Te Espíritú Yá Ndiǒxí ní quide-xi te ní sàndáá iní-ndó tnúhu-gá, te xiǎⁿ ní nduu ndoo ní nduu nine iní-ndó, te cùu iní tnáhá ndìsa-ndo nàcuáa ndècu-ndo ìchi Yá Ndiǒxí, te xini ñuhu ndisa-xi sá ïo ní yùhu ní iní-ndó cùu iní tnáhá-ndo ìhíⁿ ìhíⁿ-ndo. ²³ Te nchòhó ní nduu-ndo dàtná ìhíⁿ ñáyiu saa sá cuèndá tnúhu Yá Ndiǒxí, te tnúhu-áⁿ candeca-xi iní-ndó ní caa ni quíhíⁿ, te vá ìhíⁿ ndùu ndìhi nihnu-xi, te ñá díú cuèndá ñáyiu ñuyíú-a ní ndùu-ndo ìhíⁿ ñáyiu saa chí cuèndá tnúhu-gá. ²⁴ Chi núu tütú Yá Ndiǒxí càchí-xi:

Nchaa ñáyiu ndècu ñuyíú-a cùu-yu dàtná cùhú, chí cùhú-ǎⁿ tnaa-ni cùdí-xi te xihí-xi, ducaⁿ sǎtnahá-xi cùu-yu.

Te nchaa sá ndécú ndìhí-yu cùu-xi datná ìhíⁿ itá cùhú-ǎⁿ, chí itá-áⁿ tnaa-ni tucu cùdí-xi te ndàhvá-xi, ducaⁿ

sǎtnahá-xi cùu nchaa sá ndécú ndìhí-yu.

²⁵ Dico tnúhu Yá Ndiǒxí chí vá náá tnáhí-xi, chí duha-ni ndècu-xi, te ñu-ni duha cùndecu-xi ni caa ni quíhíⁿ.

Duha càchí-xi núu tütú-gá. Te ñu tnúhu-áⁿ ní dánèhé ñáhá nchùhú cue téè càháⁿ tnúhu Yá Ndiǒxí xii-ndo.

2

¹ Te xiǎⁿ xini ñuhu-xi dañà-ndo nchaa núu sǎ cuèhé sá dúhá, te dañà-ndo ìchi tnúhu ndehnde, te dañà-ndo vǎ dándàhú-gá-ndó mèe-ndo sá quidé vǎha-ndo, te dañà-ndo ìchi cuedú ìní, te dañà-ndo nchaa tnúhu yiti. ² Te cada-ndo cuèndá sá cúu-ndó dàtná cue landú yíquíⁿ vitna sadi camá, chí landú-áⁿ mee-ni sàdi-güexi te sàhnu-güexi. Te cada iní-ndó sǎ dúcáⁿ càda-ndo chí xini ñuhu-xi sá ïo cuhúⁿ iní-ndó dàcuaha-ndo tnúhu Yá Ndiǒxí, chí xiǎⁿ cúu-xi mèe-ni tnúhu váha, te ducaⁿ te cuita cuehnu nihnu-ndo ìchi-gá quíhíⁿ ndéé ná sǎá nduu cùndecu-ndo núu ndécú-gǎ. ³ Te ducaⁿ xini ñuhu-xi cada-ndo, chí nchòhó sa ní cùtnùní ndisa iní-ndó sǎ Yá Ndiǒxí ïo váha iní-gá.

Xítóhó Jesucristú cúu-gǎ dàtná ìhíⁿ yúú

⁴ Te ïo nanducu nihnu-ni-ndo Xítóhó Jesucristú Yáá quidé nàcuáa naníhí tǎhú-ó. Te ñu-gá ní cuu-gá dàtná ìhíⁿ yúú sǎ ñà túú nàndìhi sá cúu-xi ñáyiu ñuyíú-a, chí ní dáquéé tìhú ñáhà-yu xii-gá. Dico Yá Ndiǒxí ní cachí-gá sá Xítóhó Jesucristú

cúu-gǎ dàtná ìⁿ yúú sǎ
 ò-gá váha, chi ío cùnuu-gá.

⁵ Te nchòhó sa ní naníhí
 tǎhú-ndó, te ío-gá chí nándücu
 nihnu Yá Ndiòxí cuèndá cuu
 ìⁿnuu-ndo cùndecu-ndo ndíhí
 Espiritú-gá. Te núu ducaⁿ na
 càda-ndo te cuu-ndo dàtná
 yúú váha dàcaa-güedé dava
 vehe, te cuu tucu-ndo dàtná
 cue dútú ní xinu cuechi
 núú Yá Ndiòxí ndéé sanaha,
 nàcuáá ñá túú nǎ cumání-ndó
 núú-gǎ, chí nchaa cue téé-áⁿ
 ní xóo cuáha ñaha-güedé sǎ ní
 xóo nduu tǎhú-gǎ. Te nchòhó
 vitna tàú-ndó càda-ndo
 nchaa nacuáa càháⁿ-gá, te
 nduu vétú iní-gá. Te ducaⁿ
 càda-ndo chí ndècu-ndo ndíhí
 Xítóhó Jesucristú. ⁶ Te Yá
 Ndiòxí càchí-gá núú tütú-gá:

Yúhú taxi ndecu-í ìⁿ Yaá ñuú
 Sión,

te cuu-gá dàtná ìⁿ yúú váha
 sǎ sánútní-güedé xíquí
 cimièntú ìⁿ vehe, chí
 yúhú ní cachí-í sǎ
 Yáá-áⁿ ò cunuu-gǎ.

Te nchaa ñáyiú quíndáá iní
 ñáhá xì-gá vá ìⁿ ndùu
 ndixi cuéchi iní-yu
 sǎ dúcáⁿ sàndáá iní
 ñáhá-yu xì-gá.

Duha càchí-gá núú tütú-gá.

⁷ Te nchòhó ñáyiú sàndáá iní
 ñáhá xì Xítóhó Jesucristú ío
 cùu iní-ndó-gǎ, te nchaa ñáyiú
 ñá túú sàndáá iní ñáhá xì-gá
 quídé-yu dàtná càháⁿ-xí núú
 tütú Yá Ndiòxí núú càchí-xí:

Yúú sǎ ní dáquéé tǐhú cue téé
 dàcaa vehe, xǎⁿ cúu-xí
 yúú sǎ ò-gá nándíhí
 vitna.

Duha càchí-xí núú tütú-gá.
 Te yúú-áⁿ cada iní-ó sǎ

cúu-xí Xítóhó Jesucristú, chí
 ní dáquéé tǐhú ñáhá-güedé
 xii-gá. ⁸ Te càchí tucu-xí ingá
 xichi núú tütú Yá Ndiòxí:

Yúú-áⁿ nguñenu ñáyiú te
 ndúá-yu.

Duha càchí-xí núú tütú-gá. Te
 tnúhu-áⁿ quéé-xí sǎ ò quide
 sǎá iní ñáyiú núú-gǎ, chí ñá
 túú cuíní-yu tní-yu tnúhu
 càháⁿ-gá, te ducaⁿ tnàhí ndéé
 tnuní sǎ ncháá ñáyiú ñá túú
 cuíní tní tnúhu càháⁿ-gá, te ío
 cùu sǎá iní-yu núú-gǎ.

Ñáyiú ndècu ndíhí Yá Ndiòxí

⁹ Te nchoo cùu-ò ñáyiú sa
 ní dáquéé dèⁿ ñaha Yá Ndiòxí
 xii-ò cuèndá cundecu-ò
 ndíhí-gá, te cùu-ò dútú xínú
 cuèchi-ò núú-gǎ, te mee-gǎ
 cúu-gǎ Yaá ío cùnuu, te cùu-ò
 ñáyiú quide ndáá xñndecu
 ichi-gá te cùu tucu-ò ñáyiú
 yìndaha-gá. Te ducaⁿ ní
 quide ñaha-gǎ xii-ò cuèndá
 sǎ cùñaha-ò xii nchaa ñáyiú
 sǎ ò càhnu cuu-gá, te ío vài
 núú sǎ váha quide-gá, te
 dèu-gá ní quide ní dáñá-ó
 ncháa ichi cuehé ichi duha
 ndècu-ò ní cuu, te ní sanu
 ichi ñaha-gǎ xii-ò ìⁿ ichi váha,
 te vitna cùnúní iní-ó sǎ ò
 càhnu cuu-gá. ¹⁰ Te nchoo
 cùu-ò ñáyiú ñá túú ndècu
 ndíhí Yá Ndiòxí ní cùu, dico
 vitna ní ngúndecu ndíhí-ò-gǎ,
 te dàvá-áⁿ vǎtá sǎá-gá nduu
 càda váha ñaha-gǎ xii-ò, dico
 vitna sa ní sǎá nduu quide
 váha ñaha-gǎ xii-ò, chí ío
 cùndahú iní ñáhá-gǎ.

*Cada váha-ò cùndecu-ò
 cunu cuechi-ò núú Yá Ndiòxí*

11 Te nchòhó ío cùu iní ñáhà-í xii-ndo, te cächí tnùhu-í xii-ndo sã nchóó cùu-o datná cue ñáyiú ndècu tnaduha ìⁿ ñuú, te ducaⁿ sãtnahá-xi cùu-o chi tnaa-ni ndècu-o ñuyíú-a, te sáá nduu ndùu táhú-ó cùndecu-o núú ndécú Yã Ndiõxí táxí tnùní-gá, te xíãⁿ cãháⁿ ndàhú-í núú-ndó sã vã cádá-ndó ñi ìⁿ sã cuèhé sã dúhá sãni iní-ndó, chi nchaa xíãⁿ ñã túú cùu-xi sã vãha sã cúú-xi-ndó. 12 Te cada vãha-ndo cùndecu-ndo núú nchãa ñáyiú ñã túú ndècu ichi Yã Ndiõxí, te cuèi na cãháⁿ ñáyiú sã nchòhó nchìcúⁿ nihnu-ndo ichi cuehé ichi duha, dico quiní-yu nchaa sã vãha quide-ndo, dico na sãá nduu dândixi túu Yã Ndiõxí iní-yu sã ñã túú quide vãha-yu ndécú-yu, te dàvá-áⁿ cachí-yu sã quidé vãha-ndo ndècu-ndo, te cada cãhnú-yu Yã Ndiõxí.

13 Te Xítohó Jesucrístú cuiní-gá sã nchòhó ío quindáá iní-ndó nchãa cue tée cùchiuⁿ taxi tnuní ñáhá xii-ndo, te ducaⁿ-ni quindáá iní-ndó cuèi mee tée cùnuu vihi-gá yíndaha ñaha xii ñáyiú. 14 Te ducaⁿ-ni quindáá iní-ndó nchãa dava-gá cue tée cùnuu, chi Yã Ndiõxí ducaⁿ ñi cachí-gá cunduu sã cuè tée-áⁿ cada ndáá-güedé nchaa cuèchi ñáyiú quide cuehé quidé dùha ndecu, te cãháⁿ vãha-güedé cuëndá nchaa ñáyiú xíquide vãha ndècu. 15 Te Yã Ndiõxí cuiní-gá sã cádá vãha-ndo cùndecu-ndo cuendá nchaa ñáyiú ío ñi dǐquí-xi cãháⁿ cuèhé cuëndá-ndó sã ndécú-ndó ichi Yã Ndiõxí vá ñihí-gá-yu tnùhu

cãháⁿ-yu.

16 Te nchòhó, Yã Ndiõxí ní quide-gá sã cúú-ndó ñáyiú cuu cada nãcuáa véxi iní méé-xí, dico ñã díú sã dúcáⁿ ñi quide ñaha-gã xii-ndo, te ngóo-ndo cãni iní-ndó càda-ndo nãndi sã cuèhé sã dúhá, chi cada-ndo sã cúú-ndó ñáyiú xinu cuechi núú Yã Ndiõxí. 17 Te canehe-ndo sã yíñuhu núú nchãa ñáyiú, ndihi núú tée cùnuu vihi yíndaha ñaha xii-yu, te cuu iní tnáhá ñi mee-ndo nacuáa ndècu-ndo ichi Yã Ndiõxí, te ío canehe-ndo sã yíñuhu núú-gã.

Nchaa nãcuáa ndoho-o cùndecu-o ichi Xítohó Jesucrístú

18 Te nchaa nchòhó ñáyiú xinu cuechi canehe-ndo sã yíñuhu núú cuè patróoⁿ-ndó, te quindáá iní-ndó càda-ndo nchaa chiuⁿ tahu-güedé. Te ìⁿ-ni càda-ndo núú cuè tée vãha iní-xi, ndihi núú cuè tée ío cuihna iní-xi. 19 Te núú nchòhó ná càda ndee iní-ndó ndòho-ndo nchaa sã ñã túú tãú-ndó ndòho-ndo cuendá sã cuiní-ndó cùndáá-ndó núú Yã Ndiõxí ñã, te ío nduu vétú iní-gá. 20 Te núú nchòhó ní quide-ndo ìⁿ cuèchi, te sãhni iní-ndó dândoho ñaha ñáyiú xii-ndo, ¿te ná sã vãha cùu xíãⁿ-i? Dico núú nchòhó ná cádá ndee iní-ndó ndòho-ndo nchaa sã cádá ñaha ñáyiú xii-ndo sã cuëndá sã quidé-ndó sã vãha ñã, te núú ducaⁿ na càda-ndo te cùu-xi ìⁿ sã vãha núú Yã Ndiõxí. 21 Te Yã Ndiõxí ní cachí-gá sã cádá ndee iní-ó ndòho-o nãndi ndoho-o sã

cuendá sá quidé-ó sã vãha, chi ío ní ndoho Xítóhó Jesucristú cuendá-ó, te ducaⁿ tàú-ó cànchicúⁿ nihnu-o càda ndee iní-ó ndòho-o nándi ndoho-o, chi ducaⁿ nĩ quide-gá. ²² Te mee-gã ñá túú quide-gá ni ìⁿ sá cuèhé sá dúhá, te ni ìⁿ tnúhu ndehnde ñà túú càháⁿ-gá. ²³ Te òré ní xóo cúcuèhé ñáhá-güedé xii-gá, te ñá túú ní xóo danchòcáva-gá tnúhu cuèhé, te òré ní xóo dandòho ñaha-güedé xii-gá, te ñá túú ní xãhaⁿ-gã xii-güedé sá ío ná cada ñaha-gã, chi núú ndáhá Yã Ndiòxí ní xóo nachihí-gá mée-gã, ndihí nchaa sá sání iní-güedé cada ñaha-güedé xii-gá. Te Yã Ndiòxí cúú-gã Yaá ío váha cada ndáá cuéchi nchaa ñáyiú na sáá nduu. ²⁴ Te Xítóhó Jesucristú cúú-gã Yaá ní xihí núú cùrúxí cuendá nchaa cuéchi nchoo ñáyiú ndècu ñuyíú-a. Te ducaⁿ nĩ xihí-gá cuendá nchoo dùuⁿ duuⁿ dañá-o nchaa ichi cuehé ichi duha, te cada ndáá-ó cùndecu-o ichi-gá. Te ní dánícuèhé ñáhá-güedé xii-gá, te sá dúcáⁿ nĩ ndoho-gá xíãⁿ ní ngúndecu váha nchoo vitna. ²⁵ Te nchoo cùu-o datná cue mbéé cue quití ní xíta ní cùu, dico vitna ní tuha-o Xítóhó Jesucristú, te Yaá-ánⁿ cúú-gã dàtná ìⁿ toli xito ñaha-gá xii-o vitna cuendá sá vã cuíta nihnu-o.

3

Nàcuáa tàú ñáyiú tnãndaha cadá-yu cundecú-yu

¹ Te nchaa nchòhó ñáyiú dìhí ní tnandaha ío quindáá

iní-ndó yìⁿ-ndo cuendá sá nõu ñá túú sãndáá iní-güedé tnúhu Yã Ndiòxí te quindáá iní-güedé cuendá sá ndéhé-güedé quidé ndáá-ndó ndècu-ndo, te ni ñà túú xìni ñuhu-xi cáháⁿ-ndó tnúhu-gá núú-güedé. ² Chi ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yìⁿñuhu núú Yã Ndiòxí. ³ Te vá cání iní-ndó mée-ni cunduu vii-ndo, te ndada-ndo ðiquí-ndó nàcuáa tàú-xi cunduu, te vá cání iní-ndó nándi canehe-ndo, te ni vá cání iní-ndó cuìhnu-ndo mee-ni dóó vãha sá ío vii ndáa. ⁴ Chi iní-ndó xìni ñuhu-xi cunduu vii cunduu váha-xi núú Yã Ndiòxí cuèi vitna te cuèi núú cuáháⁿ núú vèxi, te cuu-ndo ñáyiú ío càhnu iní-xi, te núú ducaⁿ na càda-ndo te ío cuu váha iní Yã Ndiòxí. ⁵ Te ducaⁿ ío vii ío váha ní xínduu iní nchaa ñáyiú dìhí ní xíndecu ndéé sanaha, te ñáyiú-ánⁿ ío ní sãndáá iní-yu Yã Ndiòxí te ní cudíú-yu núú-gã, te ní tníⁿ-yu nchaa tnúhu ní cáháⁿ yìⁿ-yu. ⁶ Te ducaⁿ nĩ xóo cada ndíi Sãrá ní xóo quindáá iní ndíi yìⁿ ndíi, ndíi Àbrahám, te ní cánehe ndíi dìhí-ánⁿ sã yìⁿñuhu núú yìⁿ ndíi. Te núú nchòhó quidé vãha-ndo ndècu-ndo te ñá túú yùhú-ndó nã cada ñaha tnàha ñáyiú-ndo xìi-ndo, te núú ducaⁿ quide váha-ndo ndècu-ndo te quide-ndo datná ní quide ndíi Sãrá.

⁷ Te nchòhó cue téé ndècu ñadihí-xi ío váha cuáha-ndo cuendá nàcuáa cundecu váha-ndo ndíhí-yu, te ío

vii cáháⁿ ndihí-ndõ-yu, chi ñáyiú-áⁿ ï-gã-yu dàcúúxí nchòo cue téé, te ducaⁿ càda-ndo chi ndi ndùú-ndó ndùu tãhú-ndó cundecu-ndo ndihí Yã Ndiõxí, te núu ducaⁿ na càda-ndo te òré cáháⁿ ndihí-ndo Yã Ndiõxí te tedóho ñaha-gã xii-ndo.

Ñáyiú quíde sá vãha ndòhó-yu

⁸ Te càchí tnúhu tucu-í xii-ndo sã ío cuu ïⁿnuu-ndo cundecu-ndo, te cundãhú iní tnáhã-ndó ïⁿ ïⁿ-ndo, te cuu iní tnáhã tùcu-ndo nacuaá ndècu-ndo ichi Yã Ndiõxí, te cuu-ndo ñáyiú ndãhú iní-xi.

⁹ Te núu ïⁿ sã ñà túú vãha quíde ñaha ñáyiú xii-ndo, te ñã díú-ní dùcaⁿ nanchocáva-ndo càda-ndó-yu, àdi xícuèhé ñáhã-yu xii-ndo, te vá ná dãnchocáva-ndo diu-ni tnúhu cuèhé, chi cácaⁿ tãhú-ndó núú Yã Ndiõxí cuèndã sã ná cáda vãha ñaha-gã xii-yu, te ducaⁿ càda-ndo chi Yã Ndiõxí ní cáháⁿ ñáhã-gã xii-ndo cuèndã sã cáda vãha ñaha-gã xii-ndo tnáhã-ndó. ¹⁰ Te núú tùtú Yã Ndiõxí càchí-xi:

Nchaa ñáyiú cuení cundecu váha ndi nchãa nduu nini cundecú-yu ñuyú-a,

xìni ñuhu-xi sã vã càháⁿ-yu tnúhu cùtexínu, te ni vã dácuañdehndé-yu.

¹¹ Te xìni ñuhu-xi duuⁿ duuⁿ dañá-yu nchaa ichi cuèhé ichi duha, te cadá-yu mee-ni sã vãha,

te ío ndúcú-yu nãcuáa cadá-yu cundecu váha-yu ndihí tnãha ñáyiú-yu te diu-ni

ducaⁿ cãnchicúⁿ ni-hnú-yu cadá-yu.

¹² Te Yã Ndiõxí xító-gã nchaa ñáyiú quíde ndáá núú-gã

te tedóho-gã nchaa tnúhu càháⁿ-yu,

dico nchaa ñáyiú ñã túú cuení cada ndáá, ñáyiú-áⁿ ñà túú cùu vãha iní-gã núú-yu.

Duha càchí-xi núú tùtú-gã.

¹³ Te vá yõ níhí ndéé càda ñaha xii-o ïⁿ sã ñà túú vãha te núu mee-ni sã vãha na càda-o cundecu-o. ¹⁴ Àdi núu ná cúú sã ná cáda ñaha ñáyiú xii-o sã cuèndã sã quíde vãha-o ndècu-o ña, te sã dúcaⁿ ná cáda ñáhã-yu xii-o cùu-xi ïⁿ sã vãha sã cúú-xí-ó núú Yã Ndiõxí. Te ña càchí tnúhu-í xii-ndo sã vá yùhú-ndõ-yu, te ni vã cúndiyí-ndó cuèndã nchaa sã ná càda ñáhã-yu xii-ndo. ¹⁵ Te nèhe-ndo sã yíñuhu núú Xítóhó Jesucristú.

Te ío cundecu túha-ndo dãnehé-ndó ñáyiú véxi ndùcu tnúhu núú-ndó nãcuáa ndùu tnúhu ndee iní ní taxi Xítóhó Jesucristú ndécú ndihí-ndo, te cuu vii cuu váha iní-ndó cáháⁿ ndihí-ndõ-yu, te cáháⁿ-ndó núú-yu mee-ni tnúhu yíñuhu nacuaá cùu váha iní Yã Ndiõxí. ¹⁶ Te ío cada vãha-ndo cundecu-ndo cuèndã sã vã cúndiyí-ndó, te núu ducaⁿ na càda-ndo, te nchaa ñáyiú xícuèhé ñáhã xii-ndo cuèndã sã quíde vãha-ndo ndècu-ndo ichi Xítóhó Jesucristú quendóo canúú-yu ndihí nchaa tnúhu càháⁿ-yu, chi nchòhó quíde vãha-ndo ndècu-ndo. ¹⁷ Te

váha-gá sá ndóhó-ó cuèndá sá quidé-ó sã vãha te núu mee Yã Ndiöxí ducaⁿ cuìní-gá cunduu, te ñá díú sã ndóhó-ó cuèndá sá ñà túú quide-o sã vãha.

18 Te Xítohó Jesucristú ní xíhí-gá sá cuèndá nchaa cuéchi nchaa nchoo ñãyiu ndècu ñuyíú-a, te ìⁿ xito-ni ducaⁿ ñí xíhí-gá te ducaⁿ te vá cùú tnahí-gá, te mee-gã cúú-gã Yaá ñá túú tnahí cuéchi-xi, te ducaⁿ ñí ndoho-gá cuèndá nchaa cuéchi ñãyiu ndècu ñuyíú-a ñãyiu ñá túú cuìní cada ndáá núú Yã Ndiöxí, te ducaⁿ ñí cuu cuèndá sá núcündecu váha-yu núú Yã Ndiöxí te núu na quíndáá iní ñáhã-yu xii-gá. Te mee-gã ní xíhí-gá dico Espíritú-gá chi ní xíndecu-ni-xi, ¹⁹ te Espíritú-gá ní sáháⁿ-xi ní cáháⁿ-xi tnúhu Yã Ndiöxí núú nchaa espíritú ñãyiu ndècu núú ùhú núú ndàhú. ²⁰ Te ñãyiu-áⁿ cúú ñãyiu ní xíndecu ndéé sanaha cùtnahá ní xíndecu ndíí Nöé, chi ñãyiu-áⁿ ìo ní quide sàá iní-yu núú Yã Ndiöxí. Te Yã Ndiöxí ìo váha iní-gá, chi ní dácácá-gã nduu ñí xíndecuu ndíí Nöé ní cadúha ndíí bàrcú cuèndá ndétú-gã ndixi cuéchi iní-yu sá ñà túú quide váha-yu ndécú-yu ni cùu. Te dàvá-áⁿ ñí ndaa ndute ñuyíú te ní cácu úná duha ná tnahá ñãyiu, chi ní quée-yu xití bàrcú-áⁿ, te ñá túú ní cãhá-yu. ²¹ Te sá dúcáⁿ ñí cácu ñãyiu úná-áⁿ ñà túú ní cãhá-yu ndute ní ndaa ñuyíú dàvá-áⁿ. Te xiãⁿ quée-xí sã cuándute ñãyiu

vitna, te naníhí tàhú-yu te núu na quíndáá iní-yu tnúhu ndáá tnúhu Yã Ndiöxí. Te ñá díú sã cuándute-o te nduu ndoo nduu nine yiqui cùñú-ó te naníhí tàhú-ó, chi xini ñuhy-xi náhmá-ó nùú Yã Ndiöxí nchaa yicá cuéchi-o, te nduu ndoo nduu nine iní-ó, te ducaⁿ te naníhí tàhú-ó, chi Xítohó Jesucristú ní xíhí-gá cuèndá-ó te ní ndoto-gá. ²² Te Yaá-áⁿ cuándaa-gá andiu, te ní ngóo-gá xio cùha Yã Ndiöxí, te tàxi tnuní-gá nchaa espíritú cúnùu ndihí nchaa dava-gá cue espíritú xínú cuéchi.

4

Cada-o nàcuáa cuìní mée Yã Ndiöxí

¹ Te Xítohó Jesucristú ní ndoho-gá cùtnahá ní xíndecu-gá ñuyíú-a, te vitna nchòhó cundecu túha-ndo ndòho-ndo cuèndá-gá, chi nchaa ñãyiu ndòho nándi sá ndóhó cuèndá-gá dàñá-yu nchaa sá cuèhé sá dúhá. ² Te ducaⁿ ñà túú-gã ndécú-yu ichi cuèhé ichi duha, chi mee-nã nàcuáa càháⁿ Yã Ndiöxí quidé-yu ndécú-yu ñuyíú-a. ³ Te nchòhó sa nàha-ndo sá ìo cuèhé nùú sã cuèhé sá dúhá ñí xóo cada-o cùtnahá vátá cùndecu-gá-ó ìchi Yã Ndiöxí, chi ní xóo cada-o nchaa sá cuèhé sá dúhá cùdíí iní nchaa ñãyiu ñá túú sàndáá iní tnúhu-gá, te dàvá-áⁿ ñí xóo cada-o nchaa núú sã cuèhé sá dúhá, te ní xóo caní cuèhé ní xóo caní duha iní-ó, te ní cuu-o cue ñãyiu quihu, te ní xóo cundecu-o vico núú ñí xóo cada-o nchaa sá ñà túú vãha,

te ní xóo níhí tnáhá-ó ndìhi nchaa tnaha quihu-o, te ní xóo chiñuhu-o nchaa sá cächí-yu cùu ndiöxí te ñà ndàá sá ndiöxí cúu nchàa xiãⁿ, te nándi-gá nchaa sá cuèhé sá dúhá ní xóo cada-o dàvá-áⁿ.
 4 Te ñáyi-u-áⁿ cùñuhu-yu vitna sá ñà túú-gã nihí tnáhá-ó ndìhí-yu cada-o nchàa sá cuèhé sá dúhá quidè-yu, te xiãⁿ càháⁿ cuèhé-yu cuèndá-ó vitna. 5 Dico sáá nduu te ñáyi-u-áⁿ nãhmá-yu nchaa sá quidè-yu núú Xítohó Jesucristú, chi diu-gá sa ndècu túha-gá sá cáda ndáá-gá cuéchi nchaa ñáyi-u sa ní xíhí, ndìhi cuéchi nchaa ñáyi-u xíndecu vívú. 6 Te cue ñáyi-u sa ní xíhí ní xíndedóho tnúhu Xítohó Jesucristú, te cuèi ní xíhí-yu dàtná xíhí dava-gá ñáyi-u, dico espíritú-yu chi ní nduu táhú-xi ndècu váha-xi dàtná ndécú Yá Ndiöxí.

7 Te vitna ta cùyatni danaa Yá Ndiöxí ñuyíú-a núu xiãⁿ ío váha cuáha-ndo cuèndá nàcuáa cundecu-ndo, te càháⁿ ndìhi-ndo-gã. 8 Te xini ñuhu-xi sá ío cuu iní tnáhá-ndó ñⁿ ñⁿ-ndo, chi núu ducaⁿ na cùu iní tnáhá-ndó ñⁿ ñⁿ-ndo, te vá cáni-gã iní-ndó càda cuèndá-ndó nchàa sá ñà túú váha quidè ñaha ñáyi-u xii-ndo, 9 te nchòhó ñáyi-u xíndecu vehe-xi cuáha nùu-ndo vehe xii cue ñáyi-u ñuhu ichi na ndetatú-yu, te ío váha cuu iní-ndó ducaⁿ cada-ndo. 10 Te Yá Ndiöxí ní taxi-gá ndí díⁿ núu táhú ndécú ndìhi-ndo ñⁿ ñⁿ-ndo, te nàcuáa ndùu táhú ní nduu táhú-ndó ñⁿ ñⁿ-ndo te ducaⁿ

chíndee tnaha-ndo, te vá dáña ndèe-ndó càda-ndo nchaa nacuáa tàuchiuⁿ Yá Ndiöxí cada-ndo, te chíndee ñàha-gá xii-ndo. 11 Te dava nchòhó ñáyi-u càháⁿ tnúhu Yá Ndiöxí núu ñáyi-u, xini ñuhu-xi càháⁿ-ndó nàcuáa ndùu tnúhu-gá núu-yu, te dava nchòhó ñáyi-u quidè nchaa núu chiúⁿ chíndee tnaha ñáyi-u-xi, xini ñuhu-xi cada-ndo sá Yá Ndiöxí chíndee ñaha-gá xii-ndo, te ducaⁿ càda-ndo nchaa núu sá váha, chi Xítohó Jesucristú tnáhá-gá chíndee ñaha-gá xii-ndo, te ducaⁿ ío cuu càhnu Yá Ndiöxí. Te vitna táu-ó càháⁿ-ó sá ío càhnu cuu Xítohó Jesucristú, chi diu-gá cùnùu-gá nchaa nduu nchaa quíú, te ducaⁿ na cùnduu.

Ndoho tnáhá-ó cùndecu-o ichi Xítohó Jesucristú

12 Te nchòhó ñáyi-u ío cùu iní-í, vá cùñuhu-ndo sá ío ndòho-ndo ndecu-ndo ichi Xítohó Jesucristú, chi sá dúcáⁿ ndòho-ndo-áⁿ cùtnùní ndisa sá sàndáá iní-ndó-gã, te vá cáni iní-ndó nã cuèndá ducaⁿ ndòho-ndo. 13 Chi da cudí^í iní-ndó te núu ndòho-ndo datná ní ndoho Xítohó Jesucristú, te ducaⁿ sùñí cùdí^í iní-ndó òré ná quíxi tucu-gá ñuyíú-a te dàvá-áⁿ quini-ndó sá ío càhnu cuu-gá. 14 Te núu xícuèhé ñáhá ñáyi-u ndècu ichi cuehé ichi duha xii-ndo cuèndá sá ndécú-ndó ichi Xítohó Jesucristú, te xiãⁿ cúu-xi ñⁿ sá váha sá cúu-xi-ndó núu-gã, te ducaⁿ chi Espíritú Yá Ndiöxí sá ío cùnùu ndecu ndìhi ñaha-xi xii-ndo, te

nchaa ñáyi ndècu ichi cuehé ichi duha-ãⁿ càháⁿ cuèhé-yu cuèndá Xítoho Jesucristú, dico nchòhó càchí-ndó sã ïo càhnu cuu-gá. ¹⁵⁻¹⁶ Te núu nchòhó dándòho ñaha ñáyi xii-ndo sã cuèndá sá ndécú-ndó ichi Xítoho Jesucristú ñá, te vá cúu càháⁿ núu-ndó, chi ndacáⁿ táhú-ndó núu Yã Ndiõxí cuèndá sá ndécú-ndó ichi-gá. Te cuèi ndòho-ndo ndecu-ndo, dico ñá túu cùu-ndo ñáyi sàhni ndíyi te ni ñà túu cùu-ndo ñáyi dùhu, te ni ñà túu cùu-ndo ñáyi quide cuehé quidé dùha, te ni ñà túu cùu-ndo ñáyi chindee tnúhu tnàha ñáyi-xi ìⁿ sá ñà túu tàú-ndó càda-ndo.

¹⁷ Te vitna sa quèsaha Yã Ndiõxí cada ndáá-gá nchaa sá quidé nchò ñáyi ndècu ndihi-gá, te núu ducaⁿ te ndèé-gá cada-gá nchaa ñáyi ñá túu sàndáá iní ñáhá xii-gá òré ná sáá nduu dùcaⁿ cada ñaha-gá xii-yu. ¹⁸ Te nchòhó xini-ndó sã ñáyi quide váha ndècu ichi Xítoho Jesucristú ndòho tnahá-yu ndécú-yu, dico sáá nduu te nduu táhú-yu cundecú-yu ndihi-gá. Te núu ducaⁿ ndòho nchaa ñáyi quide váha ña, çte nása-gá yáha nchaa ñáyi ndècu ichi cuehé ichi duha na sáá nduu càda ndáá Yã Ndiõxí cuèchi-yu-ì? ¹⁹ Te nchaa nchòhó ñáyi ndòho nacuaá cuiní Yã Ndiõxí xini ñuhu-xi sá vã dáñá ndèé-ndó càda váha-ndo cundecu-ndo, te ïo quindáá iní-ndó sã xító ñàha-gá xii-ndo. Te ñu-gá cúu-gá Yáá ní cadúha ñaha xii-o, te quide-gá ìⁿ sá

càháⁿ-gá.

5

Nacuáa tàú-xi cada ñáyi ndècu ichi Xítoho Jesucristú

¹ Te yúhú càháⁿ-í dóho nchaa nchòhó cue téé yindaha nchaa dava-gá ñáyi ndècu ichi Xítoho Jesucristú, chi tnàhá yúhú yindaha-í ñáyi ndècu ichi-gá, te sàndáá iní-í tnúhu-gá, te ní xini-í nchaa nacuaá ní ndòho-gá, te sáá nduu te tnàhá-í cunuu-ì ndihi-gá. ² Te ïo canehe cuèndá-ndó nchaa ñáyi ndècu ichi Yã Ndiõxí yindaha-ndo te cada-ndo dàtná quidé cuè toli, chi cue téé-áⁿ ïo váha xito-güedé mbéé-güedé. Te canehe cuèndá-ndò-yu sá cúu iní méé-ndó te ñá díú sã ïó ìⁿ ñáyi cada yica ñaha xii-ndo, te ni ñà díú sã cuiní-ndó cùhuⁿ yáhu-ndo, chi ni yúhu ni iní-ndó còto-ndó-yu, chi ducaⁿ cuiní Yã Ndiõxí cunduu. ³ Te vá cadá-ndó sã ïo cunuu-ndo núu-yu, chi cada-ndo mèe-ni sá váha cuèndá ducaⁿ càncicúⁿ ni-hnú-yu cadá-yu tnàhá-yu. ⁴ Te òré ná quíxí tùcu Xítoho Jesucristú Yáá néhé cuèndá ñáhá xii-o nchaa-o ñuyúú-a, te taxi-gá sá ïo váha nduu táhú-ó, te cunuu-o ndihi-gá ni caa ni quíhíⁿ.

⁵ Te nchòhó ñáyi ndècu ichi Xítoho Jesucristú càháⁿ-í dóho-ndo sã ïo quindáá iní-ndó cuè téé yindaha ñaha xii-ndo nacuaá ndècu-ndo ichi-gá, te nchaa-ndo tàú-ndó quindáá iní tnàhá-ndó ìⁿ

ñⁿ-ndo, chi núú tütú Yă Ndiöxí cächí-xi ñⁿ xichi:

Nchaa ñáyu quide cahnu mee-xi ñá túú cùu váha iní Yă Ndiöxí núú-yu,

dico nchaa ñáyu ndàhú iní-xi te chindee ñaha-gá xii-yu.

Duha cächí-xi núú tütú-gá.

⁶ Te dañá-ndo mēe-ndo núú ndáhá Yă Ndiöxí, chi mee-gá ío cūnuu-gá. Te núu ducaⁿ

na càda-ndo, te sáá nduu te cada nínu ñaha-gá xii-ndo.

⁷ Te nchaa sá yăha-ndo ndècu-ndo te nachihi-ndo ndàha Yă Ndiöxí, chi mee-gá xító ñaha-gá xii-ndo.

⁸ Te ío váha cuáha-ndo cuendá cundecu-ndo, te quihí iní-ndó chi sácuihná xicá cūu-xi cuiní-xi dacuíta nihnu ñaha-xi xii-o, chi ío cūu úhú iní ñáhá-xí, te cūu-xi datná ñⁿ quití dééⁿ xicá ndùcu sá caxí-xí. ⁹ Te ío quindáá iní-ndó Xítohó Jesucristú, te vá dañá-ndó mēe-ndo dandahú ñáhá sácuihná xii-ndo càda-ndo nacuíta cuiní-xi, chi nàha-ndo sá ncháá ñáyu ndècu ichi Xítohó Jesucristú xindecu nihí ñuyú ndóhō-yu datná ndóhó nchòo ndecu-o ichi-gá. ¹⁰ Dico sacú-ni nduu duha cundoho-o te dātnùní ñá túú-gá ná cumání-ó cūndecu-o núú Yă Ndiöxí, te dāvá-án vā cání ñⁿ caní úú iní-ó cūndecu-o ichi-gá. Te ío-gá ngūndecu ndihí-o tñhu ndee iní cada-o nchàa nacuíta cāháⁿ-gá, te ducaⁿ càda-o chí mee Yă Ndiöxí ío chindee ñaha-gá xii-o, te diu-ni Yaá-áⁿ ío cūu iní ñáhá-gá xii-o, chi ní cāháⁿ ñáhá-gá xii-o cūndecu-o núú ío váha càa ndecu-gá

cundecu-o ñí caa ní quihíⁿ, te ducaⁿ ñí quide-gá chi ní sándáá iní-ó Xítohó Jesucristú.

¹¹ Te ío ndacáⁿ táhú-ó núú Yă Ndiöxí chi ío cāhnu cuu-gá, te cūnuu-gá nchaa nduu nchaa quíú. Te ducaⁿ na cūnduu.

Tnúhu ndéé núú ní ndihí-ná

¹² Te té Silvanú xini-í sá cúu-dē ñⁿ téé quide ndáá ndécú ichi Xítohó Jesucristú, te diu-dé ní cāháⁿ ndàhú-í núú-dē ní tee-dé ñⁿ úú tñhu sá ní xāhaⁿ-í xii-dé núú tütú-a cuendá daquixi-í ndaha-ndo, te núú tütú-a cächí tñhu ndáá-í xii-ndo sã Yă Ndiöxí ío cūu iní ñáhá-gá, te chindee ñaha-gá xii-ndo ndècu-ndo, te cächí tñhu tucu-í xii-ndo sã ío quindáá iní-ndó sã ndáá ducaⁿ quide ñaha-gá xii-ndo.

¹³ Te cue ñáyu ndècu ñuu Babiloniá, ñáyu ndècu ichi Yă Ndiöxí, diu-ni ñáyu ní cachí Yă Ndiöxí sá nánihí tàhú datná cúu nchòhó, ío quide ndee iní ñáhã-yu xii-ndo, te tñhá té Mácú téé cūu datná ñⁿ déhe-í quidé ndèe iní ñáhá-dē xii-ndo. ¹⁴ Te ndihí tñhu yññhu cada ndee iní tñáhá-ndó ñⁿ ñⁿ-ndo, te xicáⁿ táhú-í núú Yă Ndiöxí sá ío na cūndecu nahí nchaa nchohó ñáyu ndècu ndihí Xítohó Jesucristú. Te ducaⁿ na cūnduu. Te ío chí cáda ndèe iní-nã vitna.

TUTÚ CÚÚ ÛÚ NÍ CADÚHA TÉ PÈLÚ

Té Pèlú cádũha-dé tutú quíhíⁿ ndaha ñáyiu sàndáá iní tnúhu Yá Ndiõxí

¹ Yúhú té Xímú, àdi Pelú chi úú òú-í, xínú cuèchi núú Xítóhó Jesucristú, chi mee-gã ní tendaha ñaha-gã xii-í xicá cùu-í càháⁿ-í tnúhu-gã. Te càdúha-í tutú-a sá cúú-xí nchàa nchóhó ñáyiu sàndáá iní ñáhá xii-gã dàtná sàndáá iní-ndí-gã, te ducaⁿ chi Tátá-ó Dütú Ndiõxí ní dácàháⁿ-gã iní-ó ní sàndáá iní-ó-gã, chi cùu-gã Yaá ío váha quide ndáá ndíhi Xítóhó Jesucristú Yaá dácãcu nihnu ñaha xii-o núú ùhú núú ndàhú. ² Te xicáⁿ táhù-í núú Yá Ndiõxí sá ùuⁿ-gã uuⁿ-gã ná cuita chindee chitúu ñaha-gã xii-ndo quíhíⁿ, te ducaⁿ ío váha cuu iní-ndó cùndecu-ndo, te ducaⁿ càda-gã chi ta cùtnuní-gã iní-ndó nàcuáa ndùu cuendá-gã, te ducaⁿ ta cùtnuní tucu iní-ndó nchàa nacuáa ndùu cuendá Xítóhó Jesucristú Yaá cúú Xítóhó-ó.

Nàcuáa quide ñáyiu ndècu ichi Xítóhó Jesucristú

³ Te Yá Ndiõxí ío càhnu cuu-gã chi chindee ñaha-gã xii-o quide ndáá-ó ndècu-o datná cuíní mée-gã, te ducaⁿ chi cùtnuní iní-ó nàcuáa sàni iní Xítóhó Jesucristú Yaá ní càháⁿ ñáhá xii-o. Te òré ní càháⁿ ñáhá-gã xii-o te ní cutnùní iní-ó sã ío càhnu cuu-gã te ío váha quide-gã.

⁴ Te ducaⁿ ní cutnùní tucu iní-ó nàcuáa ní càháⁿ-gã cada ñaha-gã xii-o, te tnúhu ní càháⁿ-gã-áⁿ ío càhnu cuu-xi te ío váha, te nchoo ní sàndáá iní-ó tnúhu-áⁿ núu xíáⁿ ñá túú-gã ndécú-ó ichi cuehé ichi duha te ní ñá túú-gã sání iní-ó càda-o nándi sá cuèhé sá dühá, te ní cuu vii ní cuu váha iní-ó vitna. ⁵ Te sá dúcáⁿ quide-gã te xíáⁿ ío nducu ndè-ndo cada-ndo nchaa nacuáa càháⁿ-í-a, te nchóhó sàndáá iní-ndó-gã dico ñá díú mèe-ni xíáⁿ chi tnàhá xíní ñùhu-xi cada ndáá-ndó cùndecu-ndo, Te núu quide ndáá-ndó ndècu-ndo te xini ñùhu-xi tecú tnùní-ndó tnúhu-gã. ⁶ Te núu tècú tnùní-ndó te cùu-ndo ñáyiu xíní cotnii mee-xi, te núu cùu-ndo ñáyiu sàcáo tñii mee-xi te xini ñùhu-xi cunduu cahnu iní-ndó cuèi nándi sá ná yàha-ndo cùndecu-ndo, te núu càhnu iní-ndó te xini ñùhu-xi cada ndáá-ndó cùndecu-ndo datná cuíní mée Yá Ndiõxí cada-ndo. ⁷ Te núu quide ndáá-ndó ndècu-ndo, te xini ñùhu-xi ío cuu iní tnáhá ndì mee-ndo nacuáa ndècu-ndo ichi-gã, te núu cùu iní tnáhá ndì mee-ndo te xini ñùhu-xi cuu iní-ndó nchàa dava-gã tnàha ñáyiu-ndo.

⁸ Te núu sa ducaⁿ quide-ndo ndecu-ndo te uuⁿ-gã cuita ducaⁿ càda-ndo quíhíⁿ núu cuàháⁿ núú vèxi, te núu ducaⁿ quide-ndo te cùu-ndo cue ñáyiu ñá túú dàna iní-xi xĩndecu, te cuita cutnùní-gã iní-ndó nchàa nacuáa sàni iní Xítóhó Jesucristú quíhíⁿ. ⁹ Te nchaa ñáyiu ñá túú cuíní ducaⁿ càda cuú-yu ñáyiu ñá túú tnàhí ndìxi túu iní-xi sá

Yã Ndiõxí sa ní ndada ndoo ní ndada nine-gá iní-yu cuendá nchaa sá cuéhé sá dúhá ní xóo cada-yu, te ñáyi-u-áⁿ cúu-yu dàtná ñⁿ ñáyi-u cuáá àdi datná ñⁿ ñáyi-u ñá túú cùtnuní váha núú-xi, te ducaⁿ sãtnahá-xi cúu-yu cuendá sá dúcáⁿ quidé-yu. ¹⁰ Te xiãⁿ núu yúhú càháⁿ-í dóho nchaa nchòhó ñáyi-u ndècu ichi Xítóhó Jesucristú, te ío nducu ndèe-ndo cada váha-ndo cùndecu-ndo cuendá cutnùnì ndáá iní-ndó sã Yã Ndiõxí ní càháⁿ ñáhá-gã xii-ndo, te ducaⁿ ñí quide-gá chi ducaⁿ ñí cachí-gá cada-gá. Te vá ñⁿ ndùu cani iní-ndó dàña-ndo ichi-gá, te núu vá dàña ndéé-ndó càda-ndo nchaa nacuaá càháⁿ-í-a. ¹¹ Te núu ducaⁿ na càda-ndo cundecu-ndo, te ío víi ío váha cada Yã Ndiõxí queheⁿ cuendá ñáhá-gã xii-ndo òré ná sàá-ndó núú ndécú Xítóhó Jesucristú táxi tnùnì-gá nchaa nduu nchaa quíú, te diu-ni Yaá-ãⁿ cúú Xítóhó-ó te ní dácãcu nihnu ñaha-gã xii-o núú ùhú núú ndàhú.

¹² Te ducaⁿ-ni quíhi-í dandãcu iní ñáhà-í xii-ndo nchàa tnúhu càháⁿ-í-a cuèi sa xìnì-ndó tnúhu-áⁿ, te cuèi sàndáá váha iní-ndó nchàa tnúhu ndáá dácuaaha-ndo. ¹³ Te yúhú quidé cuendá-í sã ò tãú-xi càháⁿ-í dóho-ndo ñìni ndecu-í ñuyíú-a cuendá sã vã nacuaana-ndo nacuaá cada-ndo cùndecu-ndo. ¹⁴ Chi Xítóhó Jesucristú ní cachí-gá sã ñà túú-gã vai nduu cundecu-í ñuyíú-a te cuú-í. ¹⁵ Te ío nducu ndèe-í nducu-í nacuaá cada-í cuendá quendóo ndihi-ndo

nchàa tnúhu càháⁿ-í-a, te cuèi na yãha cuú-í dico vá nacuaana-ndo cada-ndo nchaa nacuaá càháⁿ tnúhu sã dánhé ñáhà-í xii-ndo vitna.

Cue téé ní xìnì núú sã ò càhnu cuu Xítóhó Jesucristú

¹⁶ Te sa ní dánhé ñáhà-ndí xii-ndo sã ò càhnu cuu Xítóhó Jesucristú. Te ní cachí tnúhu tucu-ndí nacuaá cada-gá òré quixi tucu-gá, te tnúhu-áⁿ cúú-xí tnúhu ndáá cuítì te ñá díú tnúhu sá ñí sani iní cue ñáyi-u ñuyíú-a cùu-xi, chi nchúhú ní xìnì núú-ndí nacuaá ní quide-xi cùtnahá ní cutnùnì iní-ndí sã ò càhnu cuu Xítóhó Jesucristú. ¹⁷ Chi dàvá-áⁿ ò váha ní quide Tãtá-ó Dútú Ndiõxí ní quide càhnu-gá Xítóhó Jesucristú, te diu-ni dàvá-áⁿ ñí càháⁿ Dútú Ndiõxí ndéé andi-u ñí xáhaⁿ-gã xii Xítóhó Jesucristú: “Yòhó cúú-n Dèhe-í téé ío cùu iní-í, te ío cùdí ñí ñáhà-í xii-n”, duha ní xáhaⁿ Yã Ndiõxí xii Xítóhó Jesucristú. ¹⁸ Te nchúhú ní tecú dóho-ndí ní càháⁿ Yã Ndiõxí ndéé andi-u cùtnahá ducaⁿ ñí xáhaⁿ-gã xii Xítóhó Jesucristú, chi tnahá-ndí ndécú-ndí ndihi-gá yucu núú dúcáⁿ ñí quide càhnu ñaha Yã Ndiõxí xii-gá. ¹⁹ Te ndècu ndihi-o nchaa tnúhu ní càháⁿ cue téé ní xóo càháⁿ tnúhu Yã Ndiõxí ndéé sanaha te nchaa tnúhu-áⁿ càháⁿ-xi nchaa nacuaá cada-xi vitna, te cùtnuní iní-ó sã tnúhu ndáá cúú-xí, te xìnì ñuhu-xi cada cuendá váha-ndo nchàa nacuaá càháⁿ tnúhu-áⁿ, chi tnúhu-áⁿ cúú-xí dàtná ñⁿ ñuhú dáyèhé-xi ndéé òré véxi túndaá quéné chòdínì

cáhnú dâyehé-di. Te ducaⁿ sâtnahá-xi cùu tnúhu-áⁿ chi quide-xi nacuáa cutnùní iní-ó cuendá Xítohó Jesucristú. ²⁰ Te xini ñuhu-xi sá ïo-gá cada cuendá-ndó sã ñà túú ñáyiú tecú tnùní ni ñⁿ tnúhu sá ñi chídó tnùní cue téé ní cáháⁿ tnúhu Yá Ndiöxí ndéé sanaha, te núu Yá Ndiöxí vá cádá-gã nacuáa cutnùní iní-yu nacuáa cáháⁿ nchaa tnúhu-áⁿ. ²¹ Te cue téé-áⁿ ïo ní xíndecu yiñuhu-güedé núú Yá Ndiöxí, te nchaa tnúhu sá ñi cáháⁿ-güedé-áⁿ ñà túú cùu-xi tnúhu sá ñi cahu iní méé-güedé, chi Espiritú Yá Ndiöxí ní dácáhu iní ñáhá-xí xì-güedé nacuáa cunduu tnúhu cáháⁿ-güedé.

2

Cue téé cächí sá cáháⁿ tnúhu Yá Ndiöxí te ñá ndáá

¹ Te ndéé sanduu chi ní xíndecu cue téé ní xóo dandáhú ñáhá xì ñáyiú israhél cächí sá cáháⁿ tnúhu Yá Ndiöxí te ñá ndáá sá cáháⁿ-güedé tnúhu-gá, te ñi-yu ducaⁿ tucu cundecu cue téé dandáhú ñáhá xì-ndo vitna, chi cachí-güedé sá cáháⁿ-güedé tnúhu Yá Ndiöxí te ñá ndáá. Te cue téé-áⁿ ïo yidáhu cáháⁿ-güedé, te nchaa tnúhu cáháⁿ-güedé-áⁿ dacuïta nihnu ñaha-xi xì-ndo te núu na tédóho-ndo, chi cue téé-áⁿ vã ñunuu-güedé sá Xítohó Jesucristú ní xihí-gá cuendá-güedé. Te sá dúcáⁿ càda-güedé ïo-gá ndíhi dacuïta nihnu-güedé méé-güedé. ² Te vai ñáyiú xínu iní-yu cadá-yu nándi sá cuéhé sá dúhá cuendá sá dúcáⁿ càda cue

tée-áⁿ, te cuendá xíãⁿ ngóo ñáyiú cáháⁿ úhú-yu cuendá ichi Yá Ndiöxí. ³ Te mee-ni tnúhu sá ñi cahu iní cue ñáyiú ñuyíú-a danèhé ñáhá-güedé xii-ndo, te quesaha-güedé sá cúu-xí tnúhu ndáá te ñá ndáá cuendá-ni sá cuãñaha-ndo ñíhúⁿ xii-güedé, chi ñi-yu-xi xìãⁿ tnàhí cuhuⁿ iní-güedé, dico Yá Ndiöxí sa ní cunaha ndéu túha-gá cuendá cada ndáá-gá cuéchi-güedé, te na sáá nduu te cuïta nihnu duuⁿ-güedé, chi Yá Ndiöxí vá nacuãnaa-gá ñⁿ sá ñi cachí-gá cada-gá.

⁴ Te Yá Ndiöxí ñá túú ní quide cahnu iní-gá sá ñi quide cue espíritu ñá túú ní cuini cada ndáá xínú cuéchi núu-gã ní cùu, chi ní dáquihíⁿ ñáhá-gã xii-xi ñⁿ xichi núu ïo ndóho-xi ndecu-xi, te xíaⁿ cundéí nihnu-xi ndéé sáá nduu cuïta nihnu duuⁿ-ná-xi. ⁵ Te Yá Ndiöxí ñá túú ní quide cahnu tucu iní-gá nchaa sá ñi quide ñáyiú ñuyíú ñíhna, chi dàvá-áⁿ ñi dándáá-gã ndute ñuyíú ñi cáhá nchaa ñáyiú ndéu ichi cuehé ichi duha te ñⁿ ñi-ni té Nöé ndíhi úsá-gá tucu cue ñáyiú cùu ndi mee-dé ní dácácu nihnu-gá. Te té Nöé-ãⁿ cúu-dé téé ní cáháⁿ dóho-yu nacuáa cada váha-yu cundecú-yu ni cùu te ñá túú ní cuini-yu. ⁶ Te Yá Ndiöxí ní dängává-gã ñuhú ní dánáá-gã ñáyiú ñuú Sodomá ndíhi ñáyiú ñuú Gómorrá te mee-ñá yáá ñi nduu ñuú-áⁿ. Te sá dúcáⁿ ñi cuu xíãⁿ cútnùní iní-ó nacuáa cada ñaha Yá Ndiöxí xii nchaa ñáyiú ñá túú quide váha. ⁷ Dico té Löt téé ní quide ndáá ní xíndecu ñⁿ

ñuú-án dává-án chi ní dácăcu nihnu ñaha-gă xii-dé. Te nchaa ñăyiu ñuú núú nĩ xindecu-dé-án io ní xinduu cuihna iní-yu, te mee-ni ichi díí iní ní xindecú-yu, te sá dúcáⁿ nĩ xóo cadă-yu xiăⁿ io ní ndihú iní té Löt. ⁸ Te ïⁿ nduu ïⁿ nduu ní xóo cada ndăhú-xi iní té Löt-án cuendă nchaa tnúhu cuéhé tnúhu duha ní xóo cáháⁿ-yu ní xóo cundedóho-dé, ndihi cuendă nchaa sá cuéhé sá dúhá nĩ xóo cadă-yu ní xóo quini-dé, te mee-dé ní cuu-dé ïⁿ téé ní xinduu vii ní xinduu váha iní-xi núú Yă Ndiöxí. ⁹ Te sá dúcáⁿ nĩ yáha té Nöé ndihi té Löt, xiăⁿ cútnùni iní-ó să Yă Ndiöxí io chindee-gă cue ñăyiu quide ndăá ndécú ichi-gă cuendă sá vă cadă-yu nândi sá cuéhé sá dúhá cuéi nândi na ndòhó-yu cundecú-yu. Te Yă Ndiöxí cächí-gă sá ncháá ñăyiu ndècu ichi cuéhé ichi duha sa ndècu túha-yu sá quihíⁿ-yu núú ùhú núú ndăhú nduu nà yáha cundăá cuéchi-yu.

¹⁰ Te uuⁿ-gă cada ñaha Yă Ndiöxí xii nchaa cue téé ndècu ichi díí iní, te dàquee tíhú-güedé nchaa tnúhu sá sánú ichi ñaha xii-o nacuăa cada-o cundecu-o, te cùu-güedé cue téé ñí iní-xi, te yí iní-güedé, te ñá túú yùhú-güedé cáháⁿ úhú-güedé cuendă nchaa espíritú cùnù. ¹¹ Te cue espíritú xínú cuéchi núú Yă Ndiöxí io cùnuu-xi dacúúxi cué téé-án, dico ñá túú cùyí-xi cáháⁿ-xi dàtná cáháⁿ cue téé-án òré ndăcáⁿ cuéchi-xi núú Yă Ndiöxí cuendă nchaa sá quidé cue espíritú cündihí yucu ñávăha.

¹² Te nchaa cue téé dandăhú ñáhá xii-ndo-án cúú-güedé dàtná cue quiti, chi cue quiti-án ñă túú ndècu sá xini tnùni-güedi, chi cue quiti-án nĩ cacu-güedi sá tníí-ó-güedi te cahni-o-güedi. Te ducaⁿ sătnahá-xi cùu nchaa cue téé-án, chi căháⁿ cuéhé-güedé cuendă ndédani căa espíritú cuéi ñá túú xini-güedé ná espíritú cúú-xi, te diu-ni mee-güedé dăcuíta nihnu-güedé mée-güedé sá dúcáⁿ quide-güedé, ¹³ te sáá nduu te nachăhu-güedé nchaa sá quidé-güedé-án, te cuéi nduu cuéi njú cúdí iní-güedé quidé-güedé nchaa núú să cuéhé sá dúhá sàni iní-güedé. Te òré nătacă-ndó căda-ndo ïⁿ vico chiñuhu-ndo Yă Ndiöxí te chitnahá ñáhá-güedé xii-ndo, te cada dusaⁿ-güedé sá cúdí iní-güedé sá dandăhú ñáhá-güedé xii-ndo, te dicó sácáⁿ-núú cuăha ñaha-güedé xii-ndo dùcaⁿ na cada-güedé.

¹⁴ Te nchaa cue téé-án òré xini-güedé ïⁿ ñăyiu dihi te ndihí-ni sàni iní-güedé cáháⁿ ndihi ñaha-güedé xii-yu, te ñá túú ndùu vétú iní-güedé cuendă nchaa sá cuéhé sá dúhá quide-güedé chi uuⁿ-gă uuⁿ-gă sáni iní-güedé cada-güedé. Te cuáháⁿ-güedé dandăhú-güedé nchaa ñăyiu ñá túú nihí ndéé căda ndăá cuendă canchicúⁿ nihnú-yu nchaa tnúhu căháⁿ-güedé. Te mee-ni nchăa sá ndécú ndihi tnaha ñăyiu-güedé cúú iní-güedé, te cue téé-án cúú-güedé cue téé duuⁿ duuⁿ sa ní xíta nihnu núú Yă

Ndiõxí. ¹⁵ Chi cùu-güedé cue téé vá cání-gã iní-xi cada ndáá, te nchìcúⁿ ni-hnu-ná-güedé quidé-güedé nàcuáa ní xóo cada ndíi Balaám déhe ndíi Beór, chi ndíi Balaám-áⁿ ní xóo tnahá iní ndíi cada ndíi chiúⁿ cuehé nàcuáa ní xóo níhí ndíi díhúⁿ. ¹⁶ Te Yá Ndiõxí ní quide-gá ní cáháⁿ búrru ndíi ní tenáá ñáhá-dí xii ndíi cuendá sá vá cáda ndíi ñⁿ cuèchi sàni iní ndíi cada ndíi ní cùu. Te sá dúcáⁿ ní cuu xiáⁿ ní nguítuu ndíi ñá túú ní quide ndíi ñⁿ sá ñà túú nàndíhi sàni iní ndíi ní cùu.

¹⁷ Te nchaa cue téé ducaⁿ xiquide cùu-güedé dàtná ñⁿ doco yichí, te cùu tucu-güedé dàtná ñⁿ vícò sá xídó tächí te ñá túú dǎú nchídó-xí, te sa ndècu túha ñⁿ xichi núú ïo nee quíhíⁿ-güedé cundecu-güedé ní caa ní quíhíⁿ. ¹⁸ Te cue téé-áⁿ càháⁿ-güedé dàtná càháⁿ ñⁿ téé ïo cùu cahnu dico ñá túú védana nàndíhi nchaa tnúhu càháⁿ-güedé, te cue téé-áⁿ dándàhú-güedé nchaa ñáyiu íchí ní dáñá ichi cuehé ichi duha, te xǎhaⁿ-güedé xií-yu sá cúú-ní càdá-yu nchaa sá cuèhé sá dúhá quide nchaa ñáyiu ndècu ichi díí ìní, ¹⁹ te xǎhaⁿ tùcu-güedé sá cúú-ní càdá-yu nání véxi iní-yu cuèi sá vǎha te cuèi sá cuèhé, dico mee-güedé chi mee-ni sá cuèhé sá dúhá cùnuu quide-güedé. Te nchaa ñáyiu ñá ndácú dàña nándi sá cuèhé sá dúhá cùu-yu dàtná ñⁿ ñáyiu xìnu cuechi ñá túú tnàhí dàñá quee núú chíúⁿ pàtróóⁿ-xi. Te ducaⁿ sǎtnahá-xi cùu-yu chi

ñá ndácú-yu dàñá-yu nándi sá cuèhé sá dúhá quidé-yu. ²⁰ Te núu ñáyiu sa ní dáñá nchàa ichi cuehé ichi duha cuendá sá ní cutnùnì iní-yu nàcuáa ndùu tnúhu Xítóhó Jesucristú, Yaá ní dácacu nihnu ñaha xii-o núú ùhú núú ndàhú ná nànchocáva iní-yu cundecu tucú-yu ichi cuèhé ichi duha, te mee-nǎ sá cuèhé sá dúhá tàxi tnuní ñáhá-xí xii-yu, te núu ducaⁿ te vǎa-gá tucu cadá-yu dàcúúxí dàtná ní xóo cadá-yu cùtnàhá vátá cùtnùnì-gá iní-yu nàcuáa ndùu tnúhu-gá. ²¹ Te váha-gá sá vá ngǔnu ichí-yu ichi ndáá ní cùu te ñá díú sǎ sá ní ngǔnu ichí-yu te ní dáñá-yu nchaa tnúhu-gá sá sá ní níhí-yu ndècu ndíhí-yu sànu ichi ñaha-xi nacuáa cundecú-yu ní cùu. ²² Te ñáyiu ducaⁿ xiquide quèe ndáá-xi nàcuáa cuáháⁿ ñⁿ cuendú sá càchí-xi: “Iná ní nacaxi-dí sá ní ndusaⁿ-dí, te cùchi quiti íchí ní xichi ndute càndoo cuáháⁿ-ni tucu-dí cuchi ñuhu-dí núú ndèhyú”, duha cuáháⁿ cuendú-áⁿ.

3

Xítóhó Jesucristú quixi tucu-gá

¹ Te nchaa nchòhó ñáyiu ïo cùu iní-í cùtnuní iní-í sá ïo váha sàni iní-ndó, te xéhe cúú-xí tütú cúú úú càdúha-í sá cúú-xí-ndó, te ñⁿ-ni càháⁿ-í dándacu iní ñáhà-í xii-ndo nchàa tnúhu sá sá ní xíndedóho-ndo. ² Chi cuínì-í sá vá nàcuànaa-ndo nchaa tnúhu ní cáháⁿ nchaa cue téé ní xóo cáháⁿ tnúhu Yá Ndiõxí ndéé sanaha, te ní vá nàcuànaa-ndo nchaa

tnúhu ní cáháⁿ cue téé ní cáháⁿ tnúhu Xítóhó Jesucristú Yáá ní dácácu nihnu ñaha xii-o núú úhú núú ndáhú, chí diu nchaa tnúhu-áⁿ sánú ichi ñaha-xi xii-o nacuáa cada-o cùndecu-o.

3 Te ío-gá xíní ñùhu-xi cutnuni ínì-ndó nàcuáa cada-xi òrè vátá sàá-gá nduu quixi tucu Xítóhó Jesucristú ñuyíu-a, te cächí tnúhu-í xii-ndo sã cùndecu ñáyiu cuhuⁿ ínì mee-ni nchaa sá cuèhé sá dúhá te mee-ni xiãⁿ cadá-yu, te cáháⁿ cuèhé cáháⁿ duhá-yu cuendá tnúhu Yá Ndióxi. 4 Te cachí-yu: “Ñá ndàá sá quíxi Xítóhó Jesucristú ñuyíu-a, chí núu quixi-gá te sá ndéé ama-gá sa ní quexìo-gá ní cùu. Te dàtná-ni quide-xi vitna diu-ni duha ní quesaha-xi quide-xi ndéé cùtnàhá ní ngáva ñuyíu, te diu-ni duha quide-xi ndéé cùtnàhá ní xíndecu cue ñaní tnáhá-ó ndéé sanaha, te diu-ni duha quide-xi ndéé ní sáá nduu ní xíhí-güedé, te diu-ni duha quide-xi ndéé vitna”, duha cáháⁿ-yu. 5 Te ñucùuⁿ cadá-yu vá cadá cuendá-yu sá Yá Ndióxi ní cáháⁿ-gá te ní ngúndecu andiu ndíhi ñuyíu-a, te diu-gá ní quide ní quene ñuhu yìchí xití ndute ní ngúndecu-xi ñⁿ xio. 6 Te ñⁿ xito ní dándáá Yá Ndióxi ndute ñuyíu-a ní dánáá-gã nchaa sá ío. 7 Te Yá Ndióxi ní cachí-gá sá cùndecu-ni ñuyíu-a ndíhi andiu ndéé ná sáá nduu càda-gá nchaa nàcuáa ní cáháⁿ-gá sá cúu-xí nchaa ñáyiu ndècu ichi cuèhé ichi

duha, te dàvá-áⁿ danàa-gá nchaa ñáyiu-áⁿ chí cáyú andiu ndíhi ñuyíu-a.

8 Te nchaa nchòhó ñáyiu ío cùu ínì-í, ío cuhuⁿ ínì-ndó tnúhu na càháⁿ-í-a, chí Yá Ndióxi ñá túú sàni ínì-gá dàtná sánì ímì méé-ó, te ñⁿ nduu cùu-xi datná úxí ciendú cuíá, te úxí ciendú cuíá-ãⁿ cúu-xí dàtná ñⁿ nduu sá cúu-xí-gá. 9 Te Yá Ndióxi ñá túú dàna ndodo ínì-gá vá cadá-gã ñⁿ sá càháⁿ-gá dàtná cächí cue ñáyiu sá dáná ndòdo ínì-gá cada-gá ñⁿ sá càháⁿ-gá, chí ñucùuⁿ tnahí dàcaca-gá nduu cuendá sá ío cùndahú ínì ñáhá-gã xii-o, te cuìní-gá sá ncháá ñáyiu ndixi túu ínì-yu sá ñà túú quide váha-yu ndècú-yu te tuhá-yu ichi-gá, te ducaⁿ quide-gá chí cuìní-gá sá vã cuíta nihnu ni ñⁿ-yu.

10 Te dàtná quidé cuè ñadúhú quíhu-güedé ñⁿ vehe dùhu-güedé òrè ñá túú yìhi ínì xítóhó vehe-áⁿ, te ducaⁿ càda Xítóhó Jesucristú chí nduu ñà túú yìhi ínì ñáyiu ñuyíu-a quixi tucu-gá, te dàvá-áⁿ cada-xi andiu dàtná quidé-xí òrè níhi vìhi caháⁿ ñúhu, te diu-ni òrè-áⁿ ndoñuhu àndiu, te cáyú nchaa chódínì, te cáyú tucu tnàhá ñuyíu-a ndíhi nchaa sá ío.

11 Te vitna nchòhó sa xínì-ndó sã náá ñuyíu-a te xiãⁿ ío xìni ñuhu-xi cada váha-ndo cùndecu-ndo, te cada-ndo nàcuáa cuìní méé Yá Ndióxi cunduu. 12 Te ío nducu ndèe-ndo ducaⁿ cada-ndo cuendá ducaⁿ ndíhi-ni sáá nduu càda-gá

nchaa nàcuáa càháⁿ-gá, te ducaⁿ nchòhó cundecu túha-ndo sáá nduu-áⁿ. Te ñiu-ni nduu-áⁿ ndoñuhu àndiu chi cáyú-xi, te ñiu-ni ducaⁿ ndoñuhu tucu nchaa chódíní chi ndihi-di cáyú. ¹³ Te nchoo ndètu-o sáá nduu cundecu-o ñⁿ ñuyíú sáá, te quini-ó ñⁿ andiu saa datná ní cachí Yă Ndiöxí, te yacáⁿ chi mee-nă cue ñáyiú quide váha cundecu.

¹⁴ Te nchòhó ñáyiú ío cùu iní-í, ñini ndètu-ndo sáá nduu dùcaⁿ cada-xi ío nducu ndèe-ndo cada-ndo mee-ni sá váha cundecu-ndo ìchi Yă Ndiöxí, te cundecu nahi-ndo, te cada-ndo nchàa nacuáa vá cundècu cuéchi-ndo núu-gă. ¹⁵ Te ío cada cuendá-ndó sá dácaca-gá nduu dùcaⁿ cada-gă chi cuini-gá sá ncháá ñáyiú naníhí tãhú-yu. Te té Păblú téé ío cùu iní-ó ndècu ndihi-o ìchi Xítóhó Jesucristú ñiu-ni nàcuáa càháⁿ-í-a ñiu-ni ducaⁿ ñi tee-dé ñⁿ núú tütú ní dáquixí-dé ndaha-ndo, te ní tee-dé nàcuáa ní dácáhú iní ñáhá Yă Ndiöxí xii-dé. ¹⁶ Te ñiu-ni ducaⁿ càháⁿ-dé nchaa dava-gá núú tütú cãdũha-dé, te dava tnúhu càháⁿ-dé ío úhú tecú tnùní-ó, núú xiăⁿ ñáyiú ñá túú cùtnuní váha iní-xi, ñáyiú ío yáchí sãndáá iní-xi ñⁿ tnúhu, ñáyiú-áⁿ tècú tnùní dátñi-yu nchaa tnúhu ní chídó tnùní-dé, ndihi nchaa dava-gá tnúhu yòdo tnuní núú tütú Yă Ndiöxí, te sá dúcáⁿ quidé-yu te dacuïta nihnú-yu mée-yu.

¹⁷ Te nchòhó ñáyiú ío cùu iní-í, sa cùtnuní iní-ndó nàcuáa quide dava ñáyiú, núú xiăⁿ ío xìni ñuhu-xi quihi

iní-ndó cundecu-ndo cuendá ducaⁿ cundecu-ni-ndo ìchi-gá, te vá dáñá-ndó mée-ndo dandahú ñáhá nchàa cue téé ndècu ìchi cuehé ìchi duha, chi cue téé-áⁿ ñà túú sàni váha iní-güedé cuendá tnúhu Yă Ndiöxí. Te núu na dáña-ndo mee-ndo dandahú ñáhá-güedé xii-ndo te vá cundècu váha-gá-ndó ìchi-gá dátná ndécú-ndó vitna. ¹⁸ Te nchòhó uuⁿ-gá uuⁿ-gá cuita cutnùní-gá iní-ndó quihiⁿ nchaa nàcuáa ta chindee ñaha Xítóhó Jesucristú xii-ndo cuáháⁿ. Te ducaⁿ ío-gá cuita cutnùní iní-ndó nchàa nacuáa sàni iní-gá, te ñiu-gá cúú-gă Yaá ní dácăcu nihnu ñaha xii-o núú úhú núú ndáhú. Te chí ná càchí-ó sá ío càhnu cuu-gá cuéi vitna té cuéi ndée núú cuáháⁿ núú vëxi. Te ducaⁿ na cunduu. Te ío chí cãdá ndèe iní-nă vitna.

TUTÚ DÍHNA NÍ CADÚHA TÉ JUÀÁ

Tnúhu sá cãháⁿ nãcuáa naníhi tãhú-ó

1 Te yúhú té Juàá cãchí tnúhu-í xii-ndo cuendá Crìstú Yáá cãháⁿ nãcuáa cundecu ndíhi-o Yã Ndiõxí. Te Crìstú-áⁿ sa ndècu-gã ndéé cútnàhá ní ngáva ñuyúú. Te yúhú ní xiní núù-í ndíhi cue téé ní xica cuu ndíhi-í nãcuáa càa nãcuáa ndùu-gã. Te ní xíndedóho-ndí tnúhu ní cãháⁿ-gã, te ní tendaha-ndí-gã te ní cutnùní ndáá iní-ndí sá ìⁿ yiqui cuñú cúu-gã. 2 Te ní quixi túu-gã ñuyúú-a, te ní xiní-ndí-gã, te xiãⁿ cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gã ndíhi Tãtã-gã Dútú Ndiõxí ní cùu, te ní quixi-gã ñuyúú-a ní xíndecu-ndí ndíhi-gã. Te ní cachí tnúhu-gã xii-ndí sá ndúú tãhú-ó cùndecu ndíhi-o Yã Ndiõxí ní caa ní quíhíⁿ te núu na quíndáá iní-ó-gã. 3 Te xiãⁿ dátúu-ndí núu-ndó nchàa sá ní xiní-ndí, ndíhi nchaa sá ní xíndedóho-ndí cuendá cuu ìⁿnuu-o nchàa-o datná nchúhú cúu ìⁿnuu-ndí ndíhi Tãtã-ó Dútú Ndiõxí, ndíhi Déhe-gã Xítohó Jesucristú. 4 Te xiãⁿ núu tèè-í nchaa tnúhu-a cuendá cudíí iní-ó nchàa-o.

Yã Ndiõxí cúu-gã dàtná ìⁿ ñuhú

5 Te nchaa tnúhu ní dánèhé ñáhá Xítohó Jesucristú xii-ndí, xiãⁿ dánèhé ñáhà-í xii-ndo. Te ní cachí-gã sá Yã Ndiõxí cúu-gã dàtná ìⁿ ñuhú dáyèhé-gã iní-ó, te ducaⁿ sãtnahá-xi cùu-gã chi ío váha quíde-gã, te ñá túú quíde-gã ní ìⁿ sá cuèhé sá dúhá. 6 Te núu cãchí-ó sã ndécú-ó ìchi Yã Ndiõxí, te quíde-ni-o nchaa sá cuèhé sá dúhá, te dàcuandehnde-o te ñá túú quíde ndáá-ó núu-gã. 7 Te núu na càda váha-o dàtná quíde mèe-gã, te cuu ìⁿnuu-o nchàa-o. Te ndada ndoo ndada nine-gã iní-ó, chi cada càhnu iní-gã nchaa sá cuèhé sá dúhá quíde-o, chi ñu cuendá-áⁿ ní xíhí Déhe-gã Xítohó Jesucristú núu cùrúxí.

8 Te núu cãchí-ó sã ñà túú quíde-o ní ìⁿ sá cuèhé sá dúhá, te dàndahú-ó mèe-o, te ñá túú quíde ndáá-ó núu Yã Ndiõxí. 9 Te núu na nãhmá-ó nchàa yíca cuèchi-o núu-gã, te mee-gã cada càhnu iní-gã, te ndada ndoo-gã iní-ó, cuendá cada ndáá-ó cùndecu-o ìchi-gã, chi mee-gã ío váha quíde-gã te ío ndáá quíde-gã, ducaⁿ ní cãháⁿ-gã te ducaⁿ quíde-gã. 10 Te núu na cãchí-ó sã ñà túú quíde-o ní ìⁿ sá cuèhé sá dúhá, te quíde-o Yã Ndiõxí ìⁿ ñándéhdé, dico ñá túú ndèhnde-gã. Te ñá túú ndècu tnúhu-gã iní-ó te núu ducaⁿ na càda-o.

2

Xítohó Jesucristú cãháⁿ ndãhú-gã cuendá-ó

1 Te nchòhó ñáyiu cùu datná déhe-í, chido tnuní-í

nchaa tnúhu-a cuendá sá vǎ cáda-ndó nǐ ìⁿ sá cuèhé sá dúhá. Dico núu ìⁿ-ndo quide-ni-ndo nándi sá cuèhé sá dúhá, te ndècu ìⁿ Yaa càháⁿ ndàhú cuendá-ó núú Yǎ Ndiòxí. Te Yaa-áⁿ cúu-gǎ Xítóhó Jesucristú Yaa quidé ndáá. ²Te ní xíhí-gá sá cuendá nchaa yíca cuèchi-o cuendá ngúndecu váha-o núú-gǎ te núu na quíndáá iní-ó-gǎ.

Te ñá díu-ní sǎ cuendá yíca cuèchi nchoo nǐ xíhí-gá, chi tnàhá cuendá nchaa yíca cuèchi ñáyiu ni càa xico ñuyú.

³Te núu cada-o nchaa nacuaa càháⁿ Yǎ Ndiòxí, te cutnùní iní-ó sǎ ndécú-ó ìchi-gá. ⁴Te núu càchí-ó sǎ ndécú-ó ìchi-gá te ñá túú quide-o nacuaa càháⁿ-gá, te dàcuandehnde-o, te ñá túú quide ndáá-ó núú-gǎ. ⁵Te núu sàndáá ndisa iní-ó tnúhu-gá, te quide-o nchaa nacuaa càháⁿ-gá, te ducaⁿ te cùu iní ndisa-o-gǎ, te cùtnuní ndáá iní-ó sǎ ndécú-ó ìchi-gá. ⁶Te núu càchí-ó sǎ ndécú-ó ìchi Yǎ Ndiòxí, te xini ñuhu-xi cada ndáá-ó cùndecu-o ñuyú-a dàtná ní quide ndáá Xítóhó Jesucristú cùtnàhá ní xíndecu-gá ñuyú-a.

Ndudú sáá

⁷Te nchòhó ñáyiu ndècu ndihi-í ichi Xítóhó Jesucristú, ñá túú chido tnuní-í ìⁿ tnúhu saa sá cúu-xí-ndó, chi díu-ni tnúhu sá nǐ ngúndecu ndihi-ndo ndéé díhna, tnúhu ní xíndedóho-ndo ndéé cùtnàhá ní sàndáá iní-ndó-gǎ, xǎⁿ chídó tnùní-í.

⁸Te tnúhu-a cùu-xi datná ìⁿ tnúhu saa tèe-í dándacu iní ñáhà-í xii-ndo nàcuáa

ní quide Xítóhó Jesucristú cùtnàhá ní quixi-gá ñuyú-a ní quide váha-gá, te tnàhá nchòhó ní tnii-ndo tnúhu-gá te quide váha-ndo tnàhá-ndó. Te vitna ìⁿ nduu ìⁿ nduu ta cùu vai ñáyiu ta dàña nchaa sá cuèhé sá dúhá cuàháⁿ, chi Xítóhó Jesucristú tá dándixi túu-gá iní-yu cuendá cutnùní iní-yu nàcuáa ndùu cuendá Yǎ Ndiòxí.

⁹Te núu càchí-ó sǎ quidé vǎha-o, te cùu úhú iní-ó tnàhá ñáyiu-o, te xǎⁿ ñá túú quide ndáá-ó, chi ndècu-ni-o ichi cuehé ichi duha sá dúcáⁿ quide-o. ¹⁰Te núu na cùu iní-ó tnàhá ñáyiu-o dàtná cúu iní ñáhá mèe Yǎ Ndiòxí xii-o ña, te quide ndáá-ó núú-gǎ, te vá cánùichi-o tnaha ñáyiu-o ìⁿ ichi cuehé ichi duha. ¹¹Te núu cùu úhú iní-ó tnàhá ñáyiu-o, te ñá túú quide váha-o núú Yǎ Ndiòxí, chi ndècu-ni-o ichi cuehé ichi duha, te ñá túú cùtnuní iní-ó sǎ quidé-ó. Chi cùu-o datná ìⁿ téé ndècu núu néé chi ñá cùtnùní núu-dé ndéé ichi quíhíⁿ-dé. Ducaⁿ sǎtnahá-xi cùu nchoo chi ñá cùtnùní iní-ó ndéé ichi quíhíⁿ-ó te núu ducaⁿ na càda-o cuu úhú iní-ó tnàhá ñáyiu-o.

¹²Te nchòhó ñáyiu cùu datná déhe-í, yúhú chídó tnùní-í tnúhu-a ìⁿ núú tütú càchí tnúhu-í xii-ndo sǎ nǐ quide càhnu iní Yǎ Ndiòxí nchaa cuèchi-ndo, chi díu cuendá-áⁿ nǐ xíhí Xítóhó Jesucristú. ¹³Te nchòhó ñáyiu sacuéhé, yúhú tèe-í tnúhu-a sá cúu-xí-ndó chi càháⁿ ndihi-ndo Jesús, te Yaa-áⁿ sa ndècu-gá ndéé cùtnàhá ní

ngáva ñuyíú. Te nchòhó ñáyiú nchicúⁿ-gá téé tùcu-í tnúhu-a sá cúú-xí-ndó chi ñá túú sàndáá iní-ndó tnúhu càháⁿ yucu ñávaha.

Te nchaa nchòhó ñáyiú cùu datná déhe-í, tèe tucu-í tnúhu-a sá cúú-xí-ndó, chi sa càháⁿ ndihí-ndo Tātá-ó Dütú Ndiöxí. ¹⁴ Te nchòhó ñáyiú ni sàhmu, yúhú chídó tnùn-í tnúhu-a ñⁿ núú tütú chi càháⁿ ndihí-ndo Jèsús, te Yaá-áⁿ sa ndècu-gá ndéé cútnàhá ní ngáva ñuyíú. Te nchòhó ñáyiú nchicúⁿ-gá, yúhú chídó tnùn-í tnúhu-a chi ío nihí ndéé-ndó ndècu-ndo, chi tnè-ndo tnúhu càháⁿ Yă Ndiöxí. Te ñá túú sàndáá iní-ndó tnúhu càháⁿ yucu ñávaha.

¹⁵ Te vá cúhúⁿ iní-ndó ni ñⁿ sá cuèhé sá dúhá íó ñuyíú-a, te ni vǎ cání iní-ndó càda-ndo. Chi núu na cùhuⁿ iní-ó nchàa sá cuèhé sá dúhá íó ñuyíú-a ña, te ñá túú Tātá-ó Dütú Ndiöxí ñúhú iní-ó te núu ducaⁿ na càni iní-ó. ¹⁶ Te nchaa ñáyiú ñuyíú-a quidé-yu nchaa sá cuèhé sá dúhá, chi ñu nchaa xíáⁿ cúđí iní-yu cadá-yu. Te nchaa sá cuèhé sá dúhá sàni iní-yu, ndihí nchaa sá xini-yu quidé-yu. Te xiquide nínu-yu mèé-yu cuèndá nchaa sá ndécú ndihí-yu. Te nchaa sá ñà túú vǎha ní cacu nihnu-xi ñuyíú-a. ¹⁷ Te nchaa sá ñà túú vǎha íó ñuyíú-a, ndihí nchaa sá sání cuèhé sání ñu iní-yu cuita ndihí nihnu-xi quíhíⁿ. Te nchaa ñáyiú tnè tnúhu càháⁿ Yă Ndiöxí cundecú-yu ndihí-gá ni caa ni quíhíⁿ.

Tnúhu ndáá tnúhu Yá Ndiöxí ndihí tnúhu ndehnde

¹⁸ Te nchòhó ñáyiú cùu datná déhe-í, sa nihí-ndó tnúhu sá quíxí ñⁿ téé cunuu-gǎ-dé cuu úhú iní-dé Crístú. Te sa xĩndecu-gá ñáyiú cùu úhú iní ñáhá xii-gá, núu xíáⁿ cútnùn-í iní-ó sǎ sǎ ta cuyatni nduu naa ñuyíú-a. ¹⁹ Te ñáyiú-áⁿ ni xĩndecu ndihí ñáhá-yu xii-o, te ní queé-yu cuáháⁿ-yu chi ñá túú ní cùu ñⁿnuu-o ndihí-yu. Chi núu ñicó ní cùu ñⁿnuu-o ndihí-yu te cundecu ndihí ñáhá-yu xii-o ni cùu. Te duha ní cuu cuèndá cutnùn-í ndáá iní-ó nchàa-o sá ñà túú cùu ñⁿnuu-o ndihí-yu, chi ñá túú sàndáá iní-yu Yá Ndiöxí.

²⁰ Te Xítohó Jesucristú ní taxi-gá Espíritú Yă Ndiöxí ndécú ndihí-o, núu xíáⁿ tècú tnùn-í-ó tnúhu-gá. ²¹ Te cuèndá sá xini-ndó tnúhu ndáá tnúhu Yá Ndiöxí núu xíáⁿ téé-í tnúhu-a, te ñá díú ñⁿ sá ñà cútnùn-í iní-ndó cùu-xi. Te sa nàha-ndo sá ni ñⁿ tnúhu ndehnde ñà túú ñutnahá-xi núú tnúhu Yá Ndiöxí, chi mee ñè-ni tnúhu ndáá cúú-xí.

²² Te nchaa ñáyiú càchí sá ñà díú Jèsús cúú Crístú Yaá ní tendaha Yă Ndiöxí ní quixi ñuyíú-a dàcuandehndé-yu, te cùu úhú iní-yu Jèsús. Te ñu-ni-yu càchí-yu sá ñà díú Dèhe Yá Ndiöxí cúú Jèsús, te sá dúcáⁿ quidé-yu te cùu úhú iní-yu Yá Ndiöxí ndihí Dèhe-gá Jèsús. ²³ Te nchaa ñáyiú ñá túú sàndáá iní sá Dèhe Yá Ndiöxí cúú Jèsús, ñáyiú-áⁿ ñà túú ndécú-yu ichi Tātá-ó Dütú Ndiöxí. Te nchaa

ñáyiú càháⁿ sá Dēhe Yá Ndiöxí cúú Jèsús, ñáyiú-án ndécũ-yu ichi Tātá-ó Dütú Ndiöxí.

²⁴ Te nchaa tnúhu Yá Ndiöxí ní tecú dóho-ndo ndéé díhna, tnúhu-án cuhuⁿ iní-ndó. Te núu nchaa tnúhu-án ná cùhuⁿ-ni iní-ndó, te cundecu ndihí-ndo Yá Ndiöxí ndihí Déhe-gá cuèi vá cündecu túu-ndo ndihí-gá ñuyíú-a.

²⁵ Te Jèsús ní cachí-gá sá ndúú tǎhú-ó cündecu ndihí-o-gá ni caa ni quíhíⁿ andiú.

²⁶ Te cuendá nchaa ñáyiú dándahú ñáhá xii-ndo ní chídó tnúni-í tnúhu-a, ²⁷ dico nchòhó chi ndècu ndihí-ndo Espiritú Yá Ndiöxí sá ní taxi Xítohó Jesucristú. Núu xiǎⁿ ñá túú xini ñuhu-ndo ñáyiú danèhé ñáhá xii-ndo, chi mee Espiritú-gá dánèhé ñáhá-xí nchàa sá vǎha. Te nchaa sá dánèhé ñáhá-xí xii-ndo cuu-xi sá ndáá, te ñá díú ìⁿ tnúhu ndehnde. Te vitna chí cǎnchícúⁿ nihnu-ni ichi Yá Ndiöxí dátǎná ní sanu ichi ñaha mée Espiritú-gá xii-ndo.

²⁸ Te nchòhó ñáyiú cùu datná déhe-í, chí cǎnchícúⁿ nihnu-ni ichi Xítohó Jesucristú, chi cuendá òré ná quíxí tucu-gá ñuyíú-a te vá yùhú-ndó te nì vá cúú càhaⁿ núú-ndó núú-gǎ.

²⁹ Te nchòhó sa nàha-ndo sá mée-gǎ quidé ndáá-gá, te sa xini-ndó sǎ ncháá ñáyiú quide ndáá cúú-yu déhe Yá Ndiöxí.

3

Ñáyiú cùu déhe Yá Ndiöxí

¹ Te chí cuǎha cuendá sá ìo cùu iní ñáhá Tātá-ó Dütú Ndiöxí xii-o cuendá sá cúú-ó déhe-gá, chi ducaⁿ nǐ

cachí-gá, te déhe ndisa-gá cúú-ó. Te núu xiǎⁿ ñáyiú ndècu ichi cuehé ichi duha ñá cúú quini ñáhá-yu xii-o, chi ñá túú xini-yu nàcuáa ndùu cuendá Yá Ndiöxí. ² Te nchòhó ñáyiú ìo cùu iní-í, vitna cùu-o déhe Yá Ndiöxí, te vátá cùtnuní vǎha-gá iní-ó nǎsa cunduu-o ndéé núú cuáháⁿ núú vèxi. Dico sa cùtnuní iní-ó sǎ òré ná quíxí tucu Xítohó Jesucristú te nduu-o dátǎná cáá mée-gá, chi quini-ó-gǎ nàcuáa-ni càa nacuáa-ni ndùu-gá. ³ Te nchaa ñáyiú sa ndètu ñaha xii-gá sa ta ngündecu túha-yu cuáháⁿ, chi ta ndùu ndoo nduu nine iní-yu cuáháⁿ dátǎná cáá ndòo caa nine mee-gá.

⁴ Te nchaa ñáyiú quide nándi sá cuèhé sá dúhá ñá túú quide vǎha-yu núú Yá Ndiöxí, chí ní cachí-gá sá vǎ dúcáⁿ càda-o. ⁵ Te sa nàha-ndo sá ní quíxí túu Xítohó Jesucristú ñuyíú-a cuendá cada càhnu iní-gá nchaa sá cuèhé sá dúhá quide-o, chi mee-gǎ ñá túú quide-gá ni ìⁿ sá cuèhé sá dúhá. ⁶ Te nchaa ñáyiú ndècu ichi Yá Ndiöxí ñá túú ñùhú-yu ichi cuèhé ichi duha. Te nchaa ñáyiú ñùhu ichi cuehé ichi duha ñá túú xini-yu nàcuáa ndùu cuendá Xítohó Jesucristú te nì ñá túú xini-yu nása càa-gá. ⁷ Te nchòhó ñáyiú cùu datná déhe-í, vá dáǎná-ndó mée-ndo dándahú ñáhá ñáyiú ndècu ichi cuehé ichi duha, chi càhí-yu sá cúú cündecu-o ichi Yá Ndiöxí te cada-o nándi sá cuèhé sá dúhá dico ñá ndáá. Te nchaa ñáyiú

quide váha quide ndáá-yu dàtná quidé mèe Jesús. ⁸ Te nchaa ñáiyu ndècu ichi cuehé ichi duha ndècu ndihí-yu yucu ñávàha, chi ducaⁿ quide mee-xi ndéé cùtnàhá vátá ngáva-gá ñuyúú. Te xiáⁿ ní quixi Jesús Déhe Yá Ndiöxí ní dáquée tíhú-gă nchaa sá quidé yùcu ñávàha.

⁹ Te nchaa ñáiyu ní natuha ichi Yá Ndiöxí ní nduú-yu déhe-gá, te ñá túú-gă quidě-yu nándi sá cuèhé sá dúhá chi ní ndada ndoo ní ndada nine-gá iní-yu. Núu xiáⁿ ñá túú-gă quidě-yu nándi sá cuèhé sá dúhá, chi ní ngúndecu ndihi ñaha-gă xii-yu. ¹⁰ Te cùtnuní iní-ó nándi cùu ñáiyu cùu déhe Yá Ndiöxí, te cùtnuní iní-ó nándi cùu ñáiyu cùu déhe yucu ñávàha. Te nchaa ñáiyu ñá túú quide ndáá, te cùu úhú iní-yu tnàha ñáiyú-yu, te ñáiyu-áⁿ ñà díú dèhe Yá Ndiöxí cùú-yu.

Cuu iní tnáhá-ó ìⁿ ìⁿ-o

¹¹ Te ndéé òré ní natuha-o ichi Yá Ndiöxí ní tecú dóho-o sá cùú iní-ó tnàha ñáiyu-o. ¹² Te vá cùndùu úhú iní-ó dàtná ní quide ndíi Càin, chi ndíi-áⁿ ñí xíndecu ndíi ndihi yucu ñávàha núu xiáⁿ ní sahni ndíi ñaní ndíi. Te ducaⁿ ñí quide ndíi chi ní xíndecu ndíi ichi cuèhé ichi duha, te ñaní ndíi ní xíndecu-dé ichi váha.

¹³ Te nchòhó ñáiyu ndècu ndihi-í ichi Xítóhó Jesucristú, vá cádá cuèndá-ndó sá cùú úhú iní ñáhá nchaa ñáiyu ndècu ichi cuehé ichi duha xii-ndo. ¹⁴ Te cunaha-ndo na càhí tnúhu-í xii-ndo sá núu na cùu iní-ó tnàha

ñáiyu-o, te cùtnuní iní-ó sá sá ní dáñá-ó ichi sá tá dàcuíta nihnu ñaha xii-o cuáháⁿ ní cùu, te vitna ní tñi-o ichi váha. Te nchaa ñáiyu ñá túú cùu iní tnàha ñáiyu-xi ñùhu-ní-yu ichi cuáháⁿ-yu núú úhú núú ndàhú. ¹⁵ Te nchaa ñáiyu ñá cùú quini ndéé tnàha ñáiyu-xi cùú-yu dàtná ìⁿ ñáiyu sàhni ndíyi. Te nchòhó sa nàha-ndo sá ní ìⁿ ñáiyu sàhni ndíyi ñá túú ndècu ndihí-yu tnúhu ndee iní sá nánihí tãhú-yu. ¹⁶ Te Xítóhó Jesucristú ní xihí-gá cuèndá nchaa yicá cuèchi-o, núu xiáⁿ cùtnuní iní-ó sá ìo cùu iní ñáhá-gă xii-o. Te xiáⁿ cùtnuní iní-ó nàcuáa cada-o cùu iní-ó tnàha ñáiyu-o, te cuèi na cùú-ó cuèndá sá cùú-xí ìⁿ-yu, cuèndá-ñá sá ná dàcácu nihnu-ò-yu núú tnündòho ndecú-yu. ¹⁷ Te núu ndècu ndihi-o sá cóhó sá caxí-ó ndihi nchaa sá nándihi-o, te ndècu ñáiyu ndàhú ñá túú vèdana ná ndécú ndihi, te ñá túú chindee-ó-yu, te ñá túú cùu iní-ó Yá Ndiöxí te núu ducaⁿ na càda-o. ¹⁸ Te nchòhó ñáiyu cùu datná déhe-í vá cuèndá-ni cùnàha cáháⁿ-ndó sá cùú iní tnáhá-ndó, chi cuu iní tnáhá ndisa-ndo te coto tnàha-ndo.

Vá yùhú-ó núú Yá Ndiöxí

¹⁹ Te núu ducaⁿ na càda-o, te cutnuní iní-ó sá ndécú-ó ichi ndáá ichi Yá Ndiöxí, te ñá túú-gă ná quihí iní-ó núú-gă. ²⁰ Te núu ndíhú iní-ó cuèndá ìⁿ sá ñí quide-o, te sa nàha Yá Ndiöxí te núu ní quide váha-o àdi ní quide cuèhé-ó, chi sa nàha ndáá-gá nàcuáa càa iní-ó. ²¹ Te nchòhó

ñáyiú ío cùu iní-í, na càchí tnúhu-í xii-ndo, te núu ñá túú nã sání iní-ó te ñá túú nã quidé-ó, te vá yùhú-ó núú Yã Ndiõxí. ²² Te nchaa sã vãha na càcáⁿ-ó núú Yã Ndiõxí, te mee-gã taxi-gã chi tnì-o tnúhu càháⁿ-gã, te quide-o nchaa nacuaa cùu iní-gã. ²³ Te ní cachí Yã Ndiõxí sã quindáá iní-ó Dêhe-gã Xitohó Jesucristú, te cuu iní-ó tnàha ñáyiú-o dàtná ní cachí-gã. ²⁴ Te nchaa ñáyiú tnì tnúhu-gã ndécũ-yu ichi-gã, te ndècu ndihí ñaha-gã xii-yu. Te cùtnuní iní-ó sã ndécú-ó ndihí-gã chi ní taxi-gã Espiritú-gã ndécú ndihí-o.

4

Ñáyiú ndècu ndihí Espiritú Yã Ndiõxí ndihí ñáyiú cùu úhú iní ñáhá xii Xitohó Jesucristú

¹ Te nchòhó ñáyiú ío cùu iní-í, vá cùtexínu quindáá iní-ndó tnúhu càháⁿ nchaa ñáyiú càchí sã ndécú ndihí Espiritú Yã Ndiõxí. Chi díhna-gã cada cuendá váha-ndo te núu càháⁿ ndáá-yu nacuaa càháⁿ tnúhu Yã Ndiõxí, chi ío vai ñáyiú ñuyíú-a cachí-yu sã càháⁿ-yu tnúhu-gã dico ñá ndáá. ² Te duha cutnùní iní-ó nãndi cùu ñáyiú ndècu ndihí Espiritú Yã Ndiõxí. Nchaa ñáyiú càháⁿ ndáá sã Xitohó Jesucristú ní quixi-gã ñuyíú-a te ní cuu-gã ìⁿ yiqui cùñú, ñáyiú-áⁿ cúú-yu ñáyiú cùu cuendá Yã Ndiõxí. ³ Te nchaa ñáyiú ñá túú càháⁿ nacuaa càa Jesús cùtnáhá

ní quixi-gã ñuyíú-a ñáyiú-áⁿ dándahú ñáhã-yu, chi ñá túú cùu-yu ñáyiú cùu cuendá Yã Ndiõxí. Te ñu-ní-yu cùu úhú iní-yu Jèsús. Te nchòhó sa nàha-ndo sã cùndècu ñáyiú cuu úhú iní ñáhá xii-gã, dico yúhú càchí tnúhu-í xii-ndo sã sã ndecú-yu.

⁴ Te nchòhó ñáyiú cùu datná déhe-í, ndècu ndihí-ndo Yã Ndiõxí, te ñá dáñá-ndó dándahú ñáhá nchaa ñáyiú càchí sã càháⁿ tnúhu-gã te ñá ndáá. Te ñá túú sàndáá iní-ndó chi Yã Ndiõxí Yá ndécú ndihí-ndo taxi tnuní víhí-gã dàcúúxí yùcu ñávãha ndècu ndihí nchaa ñáyiú ñùhu ichi cuehé ichi duha. ⁵ Te nchaa ñáyiú dándahú ñáhá sã càháⁿ tnúhu Yã Ndiõxí ndécú-yu ichi cuèhé ichi duha, te mee-ni cuendá nchaa sã ío ñuyíú-a càháⁿ-yu. Te tédóho ñaha nchaa dava-gã ñáyiú ndècu ñu-ni ichi cuehé ichi duha. ⁶ Te nchoo cùu-o ñáyiú cùu cuendá Yã Ndiõxí. Te nchaa ñáyiú xñdecu ichi-gã tnì-yu tnúhu càháⁿ-ó, te nchaa ñáyiú ñá túú ndècu ichi-gã ñá túú tnì-yu tnúhu càháⁿ-ó. Te duha te cùtnuní iní-ó nãndi cùu ñáyiú càháⁿ ndáá, te cùtnuní tucu iní-ó nãndi cùu ñáyiú dándahú ñáhá.

Cuu iní-ó tnàha ñáyiú-o dàtná cúú iní ñáhá mèe Yã Ndiõxí xii-o

⁷ Te nchòhó ñáyiú ío cùu iní-í, xini ñuhu-xi cuu iní tnáhá-ó dàtná cúú iní ñáhá mèe Yã Ndiõxí xii-o, chi mee-gã táxi-gã sã xini tnùní-ó cuendá cuu iní-ó tnàha

ñáyi-u-o. Te nchaa ñáyi-u cùu iní tnàha ñáyi-u-xi cùu-yu déhe Yá Ndiöxí, te cùtnuní ndáá iní-yu sá ndécú ndìhi ñaha-gá xii-yu. ⁸ Te nchaa ñáyi-u ñá túu cùu iní tnàha ñáyi-u-xi ñá túu ndècu ndìhi-yu Yá Ndiöxí. Te nchaa ñáyi-u ndècu ndìhi Yá Ndiöxí, ñáyi-u-án sãñaha-gã sá xìní tnùní-yu cuèndá cuu iní-yu tnàha ñáyiú-yu. ⁹ Te cùtnuní iní-ó sã cúu iní ñáhá Yá Ndiöxí xii-o nchàa-o, chi ní tendaha-gã ìndìi díi-ni Déhe-gá Xítohó Jesucristú ní quixi-gá ñuyíú-a cuèndá sá díú-gã cada te naníhí tàhú-ó, te núu na quíndáá iní-ó tnùhu-gá. ¹⁰ Te ío cùu iní ñáhá Yá Ndiöxí xii-o nchàa-o. Te ñá díú sã méé-ó cùu iní-ó-gã, chi díhna-gá méé-gã sa cùu iní ñáhá tnàhí-gá xii-o, núu xíáⁿ ní tendaha-gã Déhe-gá ní quixi-gá ñuyíú-a ní xíhí-gá sá cuèndá nchaa yíca cuèchi-o.

¹¹ Te nchòhó ñáyi-u ío cùu iní-í, xìní ñuhu-xi cuu iní tnáhá-ó, chi mee Yá Ndiöxí ío cùu iní ñáhá-gã xii-o. ¹² Te ni ìⁿ nchoo ñáyi-u ndècu ñuyíú-a ñá túu xìní-ó nàcuáa càa Yá Ndiöxí, dico nchoo ñáyi-u ní tuha ichi-gá chi cùtnuní iní-ó sã ndécú ndìhi ñaha-gá xii-o. Núu xíáⁿ cúu iní tnáhá-ó ìⁿ ìⁿ-o, te cùtnuní iní-ó sã cúu iní ndisa-o-gã. ¹³ Te cùtnuní iní-ó sã ndécú-ó ìchi-gá, te ndècu ndìhi ñaha-gá xii-o, chi ní taxi-gá Espiritú-gá ndécú ndìhi-o. ¹⁴ Te yúhú ndìhi dava-gá cue téé ní xica cuu ndìhi-gá càháⁿ-ndí sá nĩ xìní-ndí Jèsús Déhe Yá

Ndiöxí ní quixi-gá ñuyíú-a, chi Tátá-ó Dütú Ndiöxí ní tendaha ñàha xii-gá ní quixi-gá cuèndá dàcácu nihnu-gá nchaa nchoo ñáyi-u ndècu ñuyíú-a núu ùhú núu ndàhú. ¹⁵ Te nchaa ñáyi-u càháⁿ ni yùhu ni iní-xi sá Déhe Yá Ndiöxí cúu Jèsús, ñáyi-u-ánⁿ ndécú-yu ichi-gá te ndècu ndìhi ñaha-gá xii-yu.

¹⁶ Te sàndáá iní-ó nì yuhu ni iní-ó sã Yá Ndiöxí cúu iní ñáhá-gã xii-o, chi ducaⁿ iní-gá. Te nchaa ñáyi-u cùu iní ñáhá xii Yá Ndiöxí ndécú ndìhi ñaha-gá xii-yu. ¹⁷ Te núu ndisa cùu iní-ó Yá Ndiöxí te vá yùhú-ó òré ná sàá nduu tàudìⁿ ñaha-gá xii-o tnùú nchaa ñáyi-u ndècu ichi cuehé ichi duha, chi quide ndáá-ó ndècu-o núu-gã ñuyíú-a dàtná ní quide mee Jèsús. ¹⁸ Chi nchaa ñáyi-u cùu iní ñáhá xii Yá Ndiöxí ñá túu-gã yùhú-yu, te núu cùu iní ndisá-yu-gá. Te núu yùhú-yu te xíáⁿ sa ndòhó-yu, chi ñùhú-yu ichi cuáháⁿ-yu núu ùhú núu ndàhú, chi nchaa ñáyi-u yùhú ñá túu cùu iní ndisá-yu Yá Ndiöxí.

¹⁹ Te cuu iní-ó Yá Ndiöxí, chi mee-gã ndéé cùtnàhá vátá quíndáá-gá iní-ó tnùhu-gá sa cùu iní ñáhá-gã xii-o. ²⁰ Te nchaa ñáyi-u càchí sá cúu iní-yu Yá Ndiöxí, te cùu ùhú iní-yu tnàha ñáyiú-yu, ñáyi-u-ánⁿ dácuaⁿndehndé-yu. Te núu ñá túu cùu iní-yu tnàha ñáyiú-yu ndècu ñuyíú-a ña, te uuⁿ-gá quídè-yu Yá Ndiöxí Yaá ñá túu xìní núu-yu. ²¹ Te càchí-gá núu tnùhu-gá sá

ñáiyu na cùu iní ñáhá xì Yá Ndiöxí, te ducaⁿ-ni cùu iní-yu tñaha ñáiyú-yu.

5

Nchaa ñáiyu ní ndacu ní dáñá ichi cuehé ichi duha

¹ Te nchaa ñáiyu sàndáá iní sá Jèsús cúú-gã Crìstú Yaa ní quixi ñuyúú-a, ñáiyu-áⁿ cúú-yu déhe Yá Ndiöxí. Te cùu iní-yu Tátá-ó Dütú Ndiöxí, te cùu iní-yu Déhe-gá. ² Te núu cùu iní-ó Yá Ndiöxí te quide-o nacuaa càháⁿ-gá, te cùtnuní iní-ó sã cúú iní tñahá ndisa-o nacuaa ndècu-o ichi-gá. ³ Te núu cùu iní-ó Yá Ndiöxí te tñi-o tñuhu càháⁿ-gá, chi cùtnuní iní-ó sã ñà díú ñⁿ sá ùhú cúú-xí dàtná càchí ñáiyu. ⁴ Te nchaa nchoo ñáiyu cùu déhe-gá sa ní dáñá-ó ichi cuehé ichi duha, chi ní sàndáá iní-ó Jèsús núu xiáⁿ ní ndacu-o ní dáñá-ó ichi-áⁿ. ⁵ Te nchaa ñáiyu sàndáá iní sá Déhe Yá Ndiöxí cúú Jèsús ní ndacú-yu ní queé-yu ichi cuèhé ichi duha.

Nacuáa ní cáháⁿ Yá Ndiöxí cuèndá Jèsús

⁶ Te Xítoho Jesucristú ní quixi-gá ñuyúú-a, te ní sandute-gá. Te ñá díú-ní xiáⁿ, chi ní xihí-gá sá cuèndá nchaa yíca cuèchi-o. Te Espiritú Yá Ndiöxí càháⁿ-xi mee-ni sã ndáá, chi càháⁿ Espiritú-gá-áⁿ sá Jèsús cúú-gã Crìstú Yaa ní quixi ñuyúú-a. ⁷ Te úní testiú ndécú àndiú, Tátá-ó Dütú Ndiöxí, ndihi Déhe-gá Xítoho Jesucristú, ndihi Espiritú-gá. Te ñⁿ-ni tñuhu càháⁿ ndi nùní testiú-áⁿ. ⁸ Te ducaⁿ

cùu-xi ñuyúú-a tucu, chi càháⁿ Espiritú Yá Ndiöxí sá Jèsús cúú-gã Crìstú. Te ní sandute-gá, te ní xihí-gá sá cuèndá nchaa yíca cuèchi-o. Te xiáⁿ cùtnuní ndáá iní-ó sã díú Jèsús cúú-gã Crìstú. ⁹ Te núu tñi-o tñuhu váha càháⁿ ñáiyu, te váha-gá tñi-o tñuhu càháⁿ Yá Ndiöxí, chi càháⁿ ndáá-gá sá Déhe-gá cúú Jèsús. ¹⁰ Te nchaa ñáiyu sàndáá iní sá Jèsús cúú-gã Déhe Yá Ndiöxí, ñáiyu-áⁿ cùtnuní iní-yu sá cúú-xí ñⁿ sá ndáá. Te nchaa ñáiyu ñá túú sàndáá iní tñuhu càháⁿ Yá Ndiöxí quidé-yu-gá ñⁿ ñándéhné, dico ñá túú ndèhné-gá, chi mée-yu ñá túú sàndáá iní-yu sá Déhe-gá cúú Jèsús dàtná càchí mée-gá. ¹¹ Te Yá Ndiöxí càchí tñuhu ndáá-gá sá cùndècu-o ndihi-gá ni caa ni quíhíⁿ. Te duha càháⁿ-gá chi sàndáá iní-ó Déhe-gá. ¹² Te nchaa ñáiyu na quíndáá iní ñáhá xì Déhe-gá cundecú-yu ndihi-gá ni caa ni quíhíⁿ. Te nchaa ñáiyu ñá túú sàndáá iní ñáhá xì Déhe-gá vá cùndécú-yu ndihí-gá.

Sáhu ndèé núu ní ndihi-ná

¹³ Te cuèndá sá sàndáá iní-ndó Déhe Yá Ndiöxí núu xiáⁿ chídó tñuní-í tñuhu-a cuèndá cutnùní iní-ndó sã cùndècu ndihi-o-gá ni caa ni quíhíⁿ.

¹⁴ Te ñá túú tñuhu yùhú càháⁿ ndihi-o Yá Ndiöxí, chi tedóho ñaha-gá xii-o núu ñⁿ-ná sá ná càcáⁿ-ó núú-gá dàtná cuíni mée-gá. ¹⁵ Te cùtnuní iní-ó sã táxí-gá sá

xicáⁿ-ó nǔú-gǎ, chi nàha-o sá tédóho ñaha-gǎ xii-o nǔu na càcáⁿ-ó nàcuáa cùu iní-gá.

¹⁶ Te núu xini-ó ñáyiú ndècu ichi Yá Ndiǒxí te quidé-yu sá ñà túú vǎha núú-gǎ, te ndèhe-o sá ñà túú ní xíta nihnu duúⁿ-yu, te cǎháⁿ ndihí-o Yǎ Ndiǒxí cuèndá-yu, te dácácu nihnu ñaha-gǎ xií-yu te núu na núcúnu ichi váha-yu. Chi íó ñáyiú xidó quidé nǎndi sá ñà túú vǎha te xíta nihnu duúⁿ-yu, te vá cǎháⁿ ndihí-gá-ó Yǎ Ndiǒxí cuèndá-yu. ¹⁷ Te nchaá sá cuèhé sá dúhá cùu-xi yicá cuèchi, dico ñá ncháá-xí cùu-xi sá dácuíta nihnu ñaha dùuⁿ.

¹⁸ Te nàha-o sá nchóó ñáyiú cùu déhe Yá Ndiǒxí ñà túú-gǎ sání iní-ó càda-o nándi sá cuèhé sá dúhá. Te ducaⁿ chi mee Jèsús déhe Yá Ndiǒxí xitó ñaha-gá xii-o, núu xíǎⁿ ñá ndácú-gǎ yucu ñávǎha dàxínu iní ñáhá-xí xii-o cada-o sá ñà túú vǎha.

¹⁹ Te nchoo nàha-o sá ndécú ndihí-o Yá Ndiǒxí. Te nchaá ñáyiú ndècu ichi cuehé ichi duha tàxi tnuni ñáhá-nǎ yucu ñávǎha xií-yu.

²⁰ Te nàha tucu-o sá ñùyíú-a ní quixi Jèsús Déhe Yá Ndiǒxí ní taxi-gá sá xini tnùn-ó cuèndá cutnùn iní-ó sǎ mée-gǎ cúú-gǎ Ndiǒxí-ó. Te ndècu ndihí-o mee-gá ndihí Déhe-gá Jèsús, te ìⁿdi díí-ni mee-gǎ cúú-gǎ Yǎ Ndiǒxí, te ndècu dava-gá sá nácuàca ñaha-gá xii-o cùndecu-o ndihí-gá ni caa ni quíhíⁿ. ²¹ Te nchòhó ñáyiú cùu datná déhe-í, vá quìndáá

iní-ndó nchàa sá cǎchí-yu cùu ndiǒxí, chi dìcò ndaha cue téé ñuyíú-a ní cuáha nchaá xíǎⁿ. Te ducaⁿ na cùnduu. Te ío chí cǎdá ndèe iní-nǎ vitna.

TUTÚ CÚÚ ÛÚ NÍ CADÚHA TÉ JUÁÁ

Tnúhu Yá Ndiöxí ndihi nàcuáa cuu iní tnàhá-ó

¹ Te yúhú té Juáá té yìndaha ñaha xii ñáyiú sàndáá iní tnúhu Jèsús, tèe-í tnúhu-a ìⁿ núú tütú daquixi-í ndaha yòhó ñaha ní cáháⁿ ñáhá Yá Ndiöxí, te nchaa tnúhu-a cùu-xi tnahá cuendá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiöxí. Te ñá díú-ní mèe-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú iní ñáhà-ndí xii-ndo. ² Te cùu iní ñáhà-ndí xii-ndo chi ndècu ndihi-ndo tnúhu ndáá tnúhu Yá Ndiöxí, te ducaⁿ-ní cùndecu-o ndihi tnúhu-áⁿ ni caa ni quíhíⁿ. ³ Te xìcáⁿ tãhù-í núú Tátá-ó Dütú Ndiöxí, ndihi núú Dèhe-gá Xítohó Jesucristú sá ná chíndèe ñaha-gá xii-ndo, te coto ñaha-gã te ío váha cuu iní-ndó cùndecu-ndo. Te duha xìcáⁿ tãhù-í núú-gã chi ndècu ndihi-o tnúhu ndáá tnúhu Yá Ndiöxí, te cùu iní-ó-gã.

⁴ Te ío cùdíí iní-í, chi ní naníhí-í ìⁿ ùú déhe-n, te quidé-yu nàcuáa sànu ichi ñaha tnúhu ndáá dàtná ní táuchíúⁿ mèe Tátá-ó Dütú Ndiöxí. ⁵ Te vitna yòhó ñaha ní cáháⁿ ñáhá Yá Ndiöxí, cächí tnúhu-í xii-n sã xíní ñúhu-xi cuu iní-ó tnàha ñáyiú-o. Te ñá díú ìⁿ tnúhu saa cùu-xi, chi díu-ni tnúhu sá ñí ngúndecu ndihi-o ndèe cùtnáhá ní tuha-o ichi Yá Ndiöxí. ⁶ Te núu

cùu iní-ó Yá Ndiöxí, te cùu iní-ó tnàha ñáyiú-o dàtná ní cachí méé-gã, te tñi-o nchaa tnúhu càháⁿ-gã. Te ní cachí-gá sá cúú iní-ó-gã, te cuu iní-ó tnàha ñáyiú-o. Te tnúhu-a ní tecú dóho-o ndèe cùtnáhá ní tuha-o ichi-gã.

Cue tée dándahú tnàha ñáyiú-xi

⁷ Te ío vài ñáyiú dándahú ñáhá xica cuú-yu ñuyíú-a, te cächí-yu sá ñã ndáá sá Xítohó Jesucristú ní cuu-gá ìⁿ ñáyiú ndisa. Te nchaa ñáyiú duha càháⁿ dácuandehndé-yu, te cùu úhú iní-yu Jèsús. ⁸ Te quíhi iní-ndó sã vã dándahú ñáhá ñáyiú-áⁿ xii-ndo cuendá sã vã cuíta chiúⁿ Yá Ndiöxí ní quide-o. Te òré ná quíxí tucu Jesús ñuyíú-a te taxi-gá nchaa sã vãha cùu iní méé-gã cundecu ndihi-o.

⁹ Te nchaa ñáyiú dàña tnúhu Xítohó Jesucristú, te nàtníí-yu ingá ichi, ñáyiú-áⁿ ñà túú ndècu ndihí-yu Yá Ndiöxí. Te nchaa ñáyiú ñà túú dàña tnúhu Xítohó Jesucristú ndècu ndihí-yu Yá Ndiöxí ndihi Déhe-gá Xítohó Jesucristú. ¹⁰ Te núu véxi ñáyiú núú ndécú-ndó cächí-yu sá càháⁿ-yu tnúhu Yá Ndiöxí te ñá ndáá, te vá cuãha-ndo tnúhu danèhé ñáhã-yu xii-ndo, te ní vã cuãha-ndõ-yu tnúhu ndee iní cuendá chiúⁿ quidé-yu. ¹¹ Chi núu na càháⁿ ndihi váha-ndõ-yu, te dàtná tnúhu sá chíndèe-ndó-yu quidé-yu nchaa sá cuèhé sá dúhá.

Tnúhu ndéé núú ñí ndihi-ná

¹² Te ío vâi-gá tnúhu cuèní-í cachí tnúhu-í xii-ndo, dico vá téé-gă-í chi cuèní-í quixi-í núú ndécú-ndó ndàtnúhu-o cuèndá cudíí víhí ìní-ó nchàa-o.

¹³ Te nchaa cue déhe cùhú-n, ñáyiú ní cáháⁿ ñáhá Yă Ndiöxí quidé ndèe iní ñáhă-yu xii-n.

TUTÚ CÚÚ ÒNÍ NÍ CADÚHA TÉ JUÁÁ

Càháⁿ váha-yu cuèndá té Gǎyú

1 Te yúhú té Juáá téé yíndaha ñaha xii ñáiyu sàndáá iní tnúhu Jèsús, chìdo tñuní-í tnúhu-a ñⁿ núú tütú sá cúú-xí yòhó té Gǎyú téé ío cùu iní-í, chi ndècu ndihí-n tnúhu ndáá tnúhu Yá Ndiòxí.

2 Te yòhó téé ío cùu iní-í, xícáⁿ táhù-í núú Yá Ndiòxí sá cùndècu váha-n ñá túú ñá cumání xii-n, te vá cùhú-n, chi sa ñaha-í sá ndécú váha-n núú Yá Ndiòxí. 3 Te ío ní cudíí iní-í òré ní sáá ñáiyu ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá ñu-ni tnúhu-gá te tñi-n nchaa nacuaá càháⁿ tnúhu-áⁿ. 4 Te ío cùdíí iní-í ní níhí-í tnúhu sá ncháá-ní ñáiyu ní sanu ichi-í ichi Yá Ndiòxí ndécú-ñi-yu ichi-gá, te quíde-ní-yu nchaa nàcuáa càháⁿ-gá.

5 Te yòhó téé ío cùu iní-í, ío váha quíde-n núú Yá Ndiòxí, chi chindee-n nchaa ñáiyu véxi dava-gá ñuú xícá, ñáiyu sàndáá iní tnúhu Yá Ndiòxí. 6 Te nchaa ñáiyu-áⁿ càháⁿ-yu núú tàcá ñáiyu càháⁿ ndihí Yá Ndiòxí iha sá ío cùu iní-n ncháa tñaha ñáiyu-n dàtná càháⁿ Yá Ndiòxí. Te yúhú càháⁿ ndáhú-í núú-n sá cáda ndè-ni iní-n chindee-n nchaa ñáiyu-áⁿ nchaa sá xíní ñuhú-yu ichi. Te núu ducaⁿ na càda-n te quíde-n nacuaá cùu iní Yá Ndiòxí, te xínu

cuechi-n tñahá-n núú-gá. 7 Chi nchaa ñáiyu-áⁿ ní tñi-yu ichi cuáháⁿ-yu càháⁿ-yu tnúhu Jèsús. Te ñá túú tñi-yu ní ñⁿ sá sáñaha ñáiyu ñá túú ndècu ichi Yá Ndiòxí. 8 Te núu xíáⁿ nchoo xini ñuhu-xi chindee-o nchaa ñáiyu xínu cuechi núú-gá ñáiyu càháⁿ tnúhu-gá, te ducaⁿ te cutnùni iní-ó sá tñahá-ó xínu cuechi-o ndihí-yu núú-gá.

Ñá túú quíde váha té Diótrefés

9 Te yúhú ní tendaha-í tutú cuáháⁿ núú tàcá ñáiyu chihuhú-yu Yá Ndiòxí, dico ñⁿ téé ndècu-áⁿ nání-dé Diótrefés, te ñá sàndáá iní-dé nchaa tnúhu càháⁿ-í, chi cuini-dé cunuu-dé núú-yu. 10 Te òré quixi-í te cada ndáá-ó ncháa tnúhu cuèhé tnúhu duha càháⁿ-dé cuèndá-í. Te ñá diú-ní xíáⁿ quíde-dé, chi nchaa ñáiyu véxi ingá ñuú càháⁿ tnúhu Yá Ndiòxí ñá túú càháⁿ ñáhá-dé vehe-dé, te ní ñá dáñá-dé càháⁿ ndihí ñaha dàva-gá ñáiyu xii-yu. Te nchaa ñáiyu cuini càháⁿ ndihí ñaha xii-yu, te quèñuhu ñaha duuⁿ-ni-dé ñá dáñá-gá-dé níhí tñahá-yu ndihí nchaa ñáiyu tàcá dácuàha tnúhu Yá Ndiòxí.

11 Te yòhó téé ío cùu iní-í, vá cùndècu-n ichi cuehé ichi duha dàtná quíde ncháa dava-gá ñáiyu, cada-n mée-ni sá váha. Chi nchaa ñáiyu quíde váha ndécú-yu ichi Yá Ndiòxí. Te nchaa ñáiyu quíde nchaa sá cuèhé sá dúhá ñá túú ndécú-yu ichi Yá Ndiòxí.

*Nchaa ñáyiú cáháⁿ váha-yu
cuèndá té Demètriú*

¹² Te nchaa ñáyiú cáháⁿ
váha-yu cuèndá té Demètriú,
chi quide ndáá-dé dàtná
cáháⁿ Yă Ndiǒxí. Te tnáhá
yúhú cáháⁿ-í cuèndá-dé sá
ío váha quide-dé, te nchòhó
sa nàha-ndo sá yúhú cáháⁿ
ndáá-í.

Tnúhu ndéé núú nǐ ndìhì-ná

¹³ Te vâi-gá tnúhu cuìní-í
cachí tnúhu-í xii-n ni cùu, dico
ñá ní tè-gá-í, ¹⁴ chi cuìní-í
quixi ndìhì-í, te cáháⁿ-ó núú
núú-ó.

¹⁵ Te ío cada ndee ìní, te
xìcáⁿ táhù-í núú Yă Ndiǒxí
sá ná cùndecu váha-n ñà
túú nă cuu cundecu-n. Te
nchaa cue ñáyiú xìní tnáhá
ndìhì-o ndecu iha quide ndee
ìní ñáhă-yu xii-n. Te yòhó
cúñaha-n nchàa ñáyiú xìní
tnáhá ndìhì-í ndécú xǎⁿ ná
càda ndee ìní-yu. Te ío cada
ndee ìní-nă vitna.

TUTÚ NÍ CADÚHA TÉ JUDÁS

Té Jùdás càdũha-dé tutú quíhíⁿ ndaha ñáyiú ní cachí Yă Ndiõxí nduu cuendá-gá

1 Yúhú té Jùdás ñaní té Jàcobó xínú cuèchi-í núú Xítóhó Jesucristú, te càdũha-í tutú-a sá cúú-xí nchòhó ñáyiú ní cachí Yă Ndiõxí Yaá cúú Tātá-ó ndùu cuendá-gá, ñáyiú ío cùu iní-gá. Te dàtná-ni xìto ñaha-gá xii-ndo vitna ñu-ni ducaⁿ còto ñaha-gá xii-ndo ndèé ná sàá nduu quíxi tucu Xítóhó Jesucristú ñuyíú-a. ² Te xìcáⁿ táhù-í núú Yă Ndiõxí sá ío-gá ná chindee chitúu ñaha-gă xii-ndo, te na cùtnuní-gá iní-ndó sã ío cùu iní ñáhá-gă xii-ndo, te ducaⁿ ío váha cuu iní-ndó cùndecu-ndo.

Ñáyiú ñá túú càháⁿ tnúhu ndáá tnúhu Yă Ndiõxí (2 Pedro 2:1-17)

³ Te nchòhó ñáyiú ío cùu iní-í, ducaⁿ-ni ío sàni iní-í càdũha-í ñáⁿ tutú sá cúú-xí-ndó cuendá danèhé ñáhà-í xii-ndo nàcuáa ní cuu ní naníhí táhù-ó dico ñá túú càdũha-í, dico vitna quide cuendá-í sá xíní ñùhu-gá-xi càháⁿ-í núú tütú-í sá nchòhó ío cundehe-ndo tnúhu càháⁿ-ndó ndíhi ñáyiú, te càháⁿ-ndó nàcuáa ndùu tnúhu sàndáá iní mée-ndó, chi ñu-ni tnúhu-áⁿ nĩ càháⁿ Yă Ndiõxí sá cúú-xí nchàa ñáyiú ndècu ichi-gá. Te vitna ñá túú-gá ná tnúhu càháⁿ-gá sá cúú-xí-yu, chi

sa ní càháⁿ duuⁿ-gá. ⁴ Te duha càháⁿ-í núú tütú-a sá cúú-xí-ndó, chi ñíhí-í tnúhu sá xìcá cùu ñáyiú chitnahá ñáhá xii-ndo, te ni ñà túú xíní-ndó nã ñáyiú cùú-yu, te ñáyiú-áⁿ cúú-yu ñáyiú cùu úhú iní ñáhá xii Yă Ndiõxí. Te ñáⁿ xìchi núú tütú Yă Ndiõxí càchí-xi sá ñáyiú-áⁿ quíhíⁿ-yu núú ùhú núú ndàhú, te ñu-ni ñáyiú-áⁿ càchí-yu sá ío váha iní Yă Ndiõxí nũu xíáⁿ cuu-ni cadá-yu nchaa sá cuèhé sá dúhá. Te dàquee tíhũ-yu Yă Ndiõxí Yaá ío cùnuu, ndíhi Xítóhó Jesucristú.

⁵ Te nchòhó sa xíní váha-ndo nàcuáa ní quide Yă Ndiõxí ndéé sanaha dico dandacu iní ñáhà-í xii-ndo, chi dàvá-áⁿ nĩ queñuhu-gá ñáyiú isràèl nàcióⁿ Ègiptú, te dava ñáyiú-áⁿ ñà túú ní sàndáá iní ñáhã-yu xii-gá te ní dánáá ñàha-gá xii-yu. ⁶ Te nchaa espíritú ñá túú ní cùní cada ndáá cunu cuechi nũú Yă Ndiõxí ní quee-xi núú ndécú-xí, te mee-gă ní sadí nihnu ñaha-gă xii-xi ñáⁿ xìchi núú néé te vá cãcu-xi, chi sáá nduu te nayáha-xi cundecu-xi núú ùhú núú ndàhú ni caa ni quíhíⁿ. ⁷ Te dandacu iní ñáhá tucu-í xii-ndo nàcuáa ní yáha ñáyiú ñuú Sòdomá, ndíhi ñáyiú ñuú Gòmorrá, ndíhi nchaa ñáyiú ñuú ní cáa yatni xíáⁿ, chi tnàhá-yu ñá túú ní quide váha-yu dàtná ní quide nchaa cue espíritú-áⁿ. Chi cue téé ní xóo càháⁿ ndíhi tnàha ndí mee-güedé, te ñu-ni ducaⁿ ní xóo cada cue ñáyiú ñíhí tucu. Te sá dúcáⁿ nĩ quidé-yu núú

ní dǎngóyó Yǎ Ndiǒxí ñuhú ñúú-yu ní dánáá ñàha-gá xii-yu. Te xiǎⁿ cùtnùní iní-ó sǎ nchàa ñáyiu ñǎ túú cuìní cada váha núú-gǎ quíhíⁿ-yu núú ùhú núú ndàhú ñi caa ñi quíhíⁿ.

8 Te òu-ni ducaⁿ quide ñáyiu chitnahá ñáhá xii-ndo cuìní-yu dandàhú ñáhǎ-yu, chi càchí-yu sǎ dácòto ñaha saní-yu nàcuáa cadá-yu, núú xiǎⁿ nándi nchaa sǎ cuèhé sǎ dúhá quidé-yu sǎ cúú-xí yiqui cuñú-yu, te dàquee tíhǔ-yu nchaa nàcuáa càháⁿ Yǎ Ndiǒxí cada-o, te càháⁿ úhú-yu cuendá nchaa espíritú cùnùu. 9 Te mee espíritú cùnùu-gǎ xínú cuèchi núú Yǎ Ndiǒxí nání Miguél ní nàá-xi ndíhi sácuíhná cuendá yiqui cùñú ndíi Moisés. Te espíritú-án ñà túú ní cùyí-xi càháⁿ úhú-xi sácuíhná-ǎⁿ, chi ní xáhaⁿ-ni-xi: “Mee Yǎ Ndiǒxí nánhá-gǎ te núú nása cada ñaha-gǎ xii-n”, duha ní xáhaⁿ-xi. 10 Te nchaa ñáyiu ducaⁿ dandahú ñáhá xii-ndo-án càháⁿ cuèhé-yu cuendá nchaa sǎ vǎtá cùtnùní-gǎ iní-yu nása ndùu, te quidé-yu dàtná quidé cuè quiti chi cue quiti-án quidé-güedi nání véxi iní-güedi, te ñi ñà túú cùtnùní iní-güedi nchaa sǎ quidé-güedi. Te ducaⁿ sǎ tnahá-xi cùú-yu, chi nchaa sǎ cuèhé sǎ dúhá véxi iní-yu quidé-yu, te sǎ dúcáⁿ quidé-yu xiǎⁿ tá xíta nihnú-yu cuáháⁿ.

11 Te ndàhú ní cuú-yu chi ío ndohó-yu!, chi quidé-yu

dàtná ní quide ndíi Cǎin. Te nándi sǎ quidé-yu cuendá sǎ cuìní-yu díhúⁿ dàtná ní xóo cada ndíi Bàlaám. Te ío cùu sǎá iní-yu núú Yǎ Ndiǒxí dàtná ní xóo cada ndíi Còré, núú xiǎⁿ tá xíta nihnú-yu cuáháⁿ. 12 Te dicó sácáⁿ-núú sǎha ñáhá-yu xii-ndo òré nǎtácá-ndó quide-ndo vico chiñuhu-ndo Yǎ Ndiǒxí. Te òré xéxí ndíhi ñáhá-yu xii-ndo te mee-ni sǎ cúú-xí mèe-yu quide cuendá-yu, te ñà túú nèhé-yu sǎ yíñuhu núú Yǎ Ndiǒxí. Te cùú-yu dàtná ñⁿ vícò sǎ cuáháⁿ-xi duha cuáháⁿ-xi dàcáⁿ te ñà túú dǎú nchídó-xí, ducaⁿ sǎ tnahá-xi cùú-yu. Te cùu tucú-yu dàtná ñⁿ yutnu vídí sǎ ñà túú tnahí cùuⁿ sávídí-xi, te nchaa yutnu ducaⁿ ñà túú cùuⁿ sávídí-xi te tñuhu-güedé ndéé yóho-xi te xihí duuⁿ-xi. Te ducaⁿ sǎtnahá-xi cùú-yu, chi ñà túú quide váha-yu. 13 Te cùu tucú-yu dàtná ndute lámár, chi ndute-án òré càndá-xi te quecòo tíñú-xi ñⁿ xio. Te cùu tucú-yu dàtná ñⁿ chódíní cuáháⁿ-di duha cuáháⁿ-di dàcáⁿ. Te ducaⁿ sǎtnahá-xi cùú-yu, chi ñà túú cuìní-yu cada váha-yu. Te ñáyiu-án daquihíⁿ ñáhá Yǎ Ndiǒxí xii-yu ñⁿ xichi núú néé núú sǎ ndecu túha cundecú-yu ñi caa ñi quíhíⁿ.

14 Te ndíquíⁿ yǎvá ndíi Àdán téé cùu usá ní xínani Ènóc ní dácáhú iní ñáhá Yǎ Ndiǒxí xii-dé ní càháⁿ-dé òu-ni cuendá nchaa ñáyiu-án. Te ní cachí-dé: “Na càchí tñuhu-í xii-ndo sǎ Yǎ Ndiǒxí quixi-gǎ ndíhi cuèhé víhí espíritú

xínú cuèchi núú-gă. ¹⁵ Te dâvâ-án cada ndâá-gă cuèchi nchaa ñáyiú te daquihíⁿ-gă nchaa ñáyiú ndècu ichi cuehé ichi duha núú ùhú núú ndâhú, te ducaⁿ càda ñaha-gă xií-yu, chi mee-ni sã cuèhé sã dúhá quidè-yu, te cãháⁿ ùhú ñáhã-yu xii-gă”, duha ní cachí te Ènóc. ¹⁶ Te ñáyiú-án ïo yica ìní-yu chi ñã túú ndùu vétú ìní-yu nàcuáa ndècú-yu ñuyiú-a, te sàtnuhú-yu tnàha ñáyiú-yu te mee-ni sã cuèhé sã dúhá sàni ìní-yu quidè-yu, te quide cahnú-yu mèe-yu, te mee-ni cãháⁿ váha-yu núú tnàha ñáyiú-yu cuendá cuìní-yu sã cáda vâha ñaha ñáyiú-án xií-yu.

Té Jùdás cãháⁿ-dé dóho ñáyiú ndècu ichi Yá Ndiõxí

¹⁷ Te nchòhó ñáyiú ïo cùu ìní-í, cãháⁿ ndâhú-í núú-ndó sã ïo cuhuⁿ ìní-ndó tnúhu sã sã ní dânehé ñáhã cuè téé ní tendaha Xítohó Jesucristú cãháⁿ tnúhu-gă núú ñáyiú. ¹⁸ Te sa nàha-ndo sã ñí cachí-güedé sã cùmání-gă quixi tucu Xítohó Jesucristú ñuyiú-a, te coo ñáyiú cãháⁿ cuèhé cãháⁿ duha cuendá tnúhu-gă. Te ñáyiú-án cadá-yu mee-ni sã cuèhé sã dúhá vèxi ìní méé-yu. ¹⁹ Te ñáyiú-án cúú-yu ñáyiú cãháⁿ nândi tnúhu sã ñã túú nândihí cuendá sã vã cúú ìⁿnuu-ndo cundecu-ndo, te mee-ni sã cuèhé sã dúhá ñùhu ìní-yu, te ñã túú ndècu ndihí-yu Espiritú Yá Ndiõxí.

²⁰ Te nchòhó ñáyiú ïo cùu ìní-í, ïo dacuàha-ndo tnúhu Yá Ndiõxí sã ñí sândáá

ìní-ndó cuendá ducaⁿ cuita cuehnu nihnu-ndo ichi-gă quihíⁿ, te cãháⁿ ndihí-ndo Yá Ndiõxí nàcuáa dàcahu ìní ñáhã Espiritú-gă xii-ndo. ²¹ Te ïo coto-ndo mèe-ndo cundecu-ndo cuendá cuu váha ìní ñáhã Yá Ndiõxí xii-ndo, te cundetú-ndo sàá nduu quixi Xítohó Jesucristú ñuyiú-a nacuaca ñaha-gă xii-ndo cundecu-ndo ndihí-gă ní caa ní quihíⁿ, chi Yaá-án ïo cundahú ìní ñáhã-gă xii-o.

²² Te ñáyiú sàni ìⁿ sani úú ìní-xi cúñaha-ndo xii-yu nàcuáa cadá-yu cundecú-yu ichi Yá Ndiõxí. ²³ Te nchaa ñáyiú ta xíta nihnu ñùhu ichi cuáhãⁿ núú ùhú núú ndâhú, ïo cundihí ìní-ndó cùñaha-ndo xií-yu tnúhu Yá Ndiõxí cuendá sã ná cãcu nihnú-yu, te cundâhú ìní-ndó-yu, te quihí ìní-ndó vã cáda-ndó tnáhã-ndó nàcuáa quidè-yu, chi daquèe tíhú-ndó nchãa sã cuèhé sã dúhá quidè-yu-án.

Nàcuáa ndacáⁿ táhú-ó núú Yá Ndiõxí

²⁴ Te Yá Ndiõxí chindee ñaha-gă xii-ndo cuendá sã vã cundècu-ndo ichi cuehé ichi duha, te cunduu ndoo cunduu nine ìní-ndó càndeca ñaha-gă xii-ndo quihíⁿ cundecu-ndo núú ïo váha càa ndecu-gă, te ïo cudíⁿ ìní-ndó. ²⁵ Te Yá Ndiõxí ïo ndècu ndihí-gă nchaa sã ximí tnùnì-gă te ñu-gă ní dácãcu nihnu ñaha-gă xii-o núú ùhú núú ndâhú, te ducaⁿ ñí quide ñaha-gă xii-o chi ndècu ndihí-o Xítohó Jesucristú. Te ïo ndacáⁿ táhú-ó núú Yá Ndiõxí, chi ïo cãhnu cuu-gă

ndécú-gă táxí tnùní-gá, te
 súúní vǎha iní-gá, te ndàcu-gá
 quidé-gă nchaá sá vǎha, te
 ducaⁿ-ni ǐo cǎhnu cuu-gá ndéé
 cútnàhá vátá ngǎva-gá ñuyíú,
 te ducaⁿ-ni ǐo cǎhnu cuu-gá
 ndéé vitna, te diu-ni ducaⁿ ǐo
 cǎhnu cuu-gá ni caa ni quíhíⁿ,
 duha xìni ñuhu-xi ndacáⁿ
 táhú-ó nǔú-gă. Te ducaⁿ na
 cùnduy. Te ǐo chí cádá ndèe
 iní-nǎ vitna.

NCHAA SÁ NĪ XINÍ TÉ JUÁÁ NDIHI NCHAA SÁ NĪ TECÚ DÓHO-DE

Xítohó Jesucristú xáhaⁿ-gǎ xii té Juáá nchaa nàcuáa cada-xi ñuyú

¹ Te Yá Ndiöxí ní xáhaⁿ-gǎ xii Xítohó Jesucristú nchaa sá tá cùyatni vii-nǎ cada-xi ñuyú-a cuèndá sá cǔñaha-gǎ xii cue tée xínu cuechi núú-gǎ, te Xítohó Jesucristú ní tendaha-gǎ ^ñ espíritú xínú cuèchi núú-gǎ ní quixi-xi ní cachí tnúhu-xi nchaa tnúhu-áⁿ xii yúhú té Juáá té xínu cuechi núú-gǎ, te nchaa tnúhu-áⁿ ndèé núú tütú-a. ² Te yúhú cǎchí tnúhu ndáá-í xii-ndo nàcuáa ní cǎháⁿ Yá Ndiöxí, te cǎháⁿ ndáá tucu-í cuèndá Xítohó Jesucristú, ndihi cuèndá nchaa sá nĪ xiní-í.

³ Te váha táhú ñáyiú dàcuaha nchaa tnúhu ndèé núú tütú-a, te váha tucu táhú ñáyiú ndédóho, te váha tucu táhú nchaa ñáyiú tnĪ nacuáa cǎháⁿ-xi, chí sa ta cùyatni vii-nǎ nduu cǎda-xi nchaa nacuáa cǎháⁿ-xi.

Té Juáá cǎdũha-dé tutú quíhíⁿ ndaha ndi ùsá xichi cue ñáyiú ndècu ichi Yá Ndiöxí

⁴ Te yúhú té Juáá cǎdũha-í tutú daquixi-í ndi ùsá xichi núú ndécú nchòhó ñáyiú ndècu ichi Yá Ndiöxí ndécú òstrítú Àsiá. Te mee-gǎ ná chĭndee chitúu ñaha-gǎ

xii-ndo, te ío váha cuu iní-ndó cùndecu-ndo. Te cuèi ndéé sanaha ðiu-ni-gǎ ndécú, te ðiu-ni-gǎ ndécú cuèi vitna, te ducaⁿ-ni cùndecu-gǎ cuèi ndéé núú cuáháⁿ núú vèxi, te ðiu-ni ducaⁿ ío na chĭndee chitúu ñaha ndĪ usá cue espíritú ndécú núú-gǎ xii-ndo, te ío váha cuu iní-ndó cùndecu-ndo. ⁵ Te ðiu-ni ducaⁿ na cǎda tucu Xítohó Jesucristú, te ðiu-gǎ cúú-gǎ Yáá cǎháⁿ ndáá, te ðiu-ni-gǎ ní xíhí-gǎ te díhna-gǎ ní ndoto, te dàtnùní ndéé cuèé-gǎ te ndoto cue ñáyiú ní xíhí, te ðiu-ni-gǎ táxí tnùnĪ-gǎ nchaa cue tée yĭndaha ñaha xii ñáyiú ndècu ñuyú-a. Te ío cùu iní ñáhá-gǎ xii-o, te mee-gǎ ní sati níñĪ-gǎ te ní xíhí-gǎ núú cùrúxí sá cuèndá nchaa sá cuèhé sá dũhá quide-o, te ní ndada ndoo ní ndada nine-gǎ iní-ó, ⁶ te vitna ní quide ñaha-gǎ xii-o dàtná cue tée yĭndaha ñáyiú, te ní quide ñaha tucu-gǎ xii-o dàtná cue dútú xínú cuèchi-o núú Tátá-gǎ Dútú Ndiöxí. Te vitna nchaa-o chí ná cǎchí-ó sǎ ío cǎhnu cuu Xítohó Jesucristú, te ío cùnuu-gǎ, te ducaⁿ-ni na cùnuu-gǎ ni caa ni quíhíⁿ. Te ducaⁿ na cùnduu.

⁷ ;Te cundehe-ndo àndiu! Chi ichi xití vícò quixi Xítohó Jesucristú, te nchaa ñáyiú ndècu ñuyú-a quini ñáhǎ-yu xii-gǎ, te tnàhá nchaa ñáyiú ^ñ-ni cùu ndihi ñáyiú ní dánĭcuèhé ñáhá xii-gǎ quini ñáhǎ-yu, te nchaa ñáyiú xĭndecu nihií ñuyú, ñáyiú ñá túú cùu váha iní ñáhá

xì-gá ndihú iní-yu òré quini ñáhã-yu xii-gá, te ndáá sá dúcáⁿ càda-xi.

8 Te Yá Ndiöxí càchí-gá: “Yúhú ío cùnuu-í chi ñiu-í sa ndècu ndéé cùtnàhá ní ngáva ñuyíú, te ñiu-ni-í cundecu ndéé ná sàá nduu nàa-xi ndihí nchaa sá íó, chi yúhú cundecu-í ni caa ni quíhíⁿ”, duha càchí Yá Ndiöxí Yaá ndácú quide nchaandi túhú sá vãha. Chi ñiu-ni-gá sa ndècu ndéé cùtnàhá ní ngáva ñuyíú, te ñiu-ni-gá ndécú-gã vitna, te ducaⁿ-ni cùndecu-gá ni caa ni quíhíⁿ.

Té Juàá ní xini-dé Xítóhó Jesucristú Yaá ío cùnuu

9 Te yúhú té Juàá té ndècu ndihí-ndo ichi Xítóhó Jesucristú, tnàhá-í ndóhò-í cuendá-gá dàtná ndóhó-ndó, te tnàhá-í nduu táhù-í cundecu ndihí ñaha-í xii-ndo núú ndécú Yá Ndiöxí táxí tnùn-í-gá. Te ío quide cahnu iní-ó cuéi nándi yáha-o ndècu-o sá cuendá Xítóhó Jesucristú. Te yúhú ní ngava-í vecaá ñúú nání Pãtmós, te ñúú-áⁿ cáá xití ndute lámár. Te ducaⁿ ní cuu cuendá sá càháⁿ-í tnúhu Yá Ndiöxí, te càháⁿ váha-í cuendá Xítóhó Jesucristú. 10 Te ñúú nduu ndumíngú nduu nàtacá-ó chĩñuhu-o Yá Ndiöxí ní quide ñaha Espiritú-gá xii-í nàcuáa càchí iní-xi, te ní tecú dóho-í níhi ní cáháⁿ ñúú sá ní cáháⁿ ndàa sàtà-í te dàtná níhi càháⁿ ñúú cútú ducaⁿ níhi ní cáháⁿ-xi. 11 Te càchí sá càháⁿ-áⁿ:

—Yúhú sa ndècu-í ndéé cùtnàhá ní ngáva ñuyíú, te ñiu-ni-í cundecu-í ndéé ná sàá nduu nàa-xi ndihí nchaa

sá íó, te chido tnùn-í ñúú nútú sá ná dànehé núú ñáhà-í xii-n, te daquihíⁿ-n nútú-áⁿ ndi úsá xichi núú xĩndecu cue ñáyiu ndècu ichi Yá Ndiöxí xĩndecu distritú Àsiá, ndaha ñáyiu ñúú Èfesú, ndaha ñáyiu ñúú Èsmirná, ndaha ñáyiu ñúú Pèrgamú, ndaha ñáyiu ñúú Tiàtirá, ndaha ñáyiu ñúú Sãrdís, ndaha ñáyiu ñúú Filadelfiá, ndaha ñáyiu ñúú Laodiceá, nchaa ñáyiu ñúú-áⁿ daquihíⁿ-n nútú-áⁿ ndahá-yu —càchí sá càháⁿ-áⁿ.

12 Te ní nchócuñhu-í ndéhè-í núu ná cúú sã càháⁿ-áⁿ, te ní xini-í xĩnutnĩ úsá tnàhá sá ní cuáha mee-ni ñhúⁿ cuàáⁿ sá ndéé dité-xi, te núú dité-xi-áⁿ yĩndòdo ñúú caa candíl. 13 Te cuádava tnuú nchaa xiáⁿ ní xini-í nùtnĩ Yaá cáá dàtná cáá nchàa nchoo ñáyiu ndècu ñuyíú-a, te ñhnu-gá ñúú dóó cání càa-xi ndéé núú sàhá-gá, te yidúcúⁿnduu ñúú sìrchú ní cuáha mee-ni ñhúⁿ cuàáⁿ pèchú-gá.

14 Te idi díquí-gã cuixíⁿ quiyí dàtná cuixíⁿ idi dava mbéé, àdi yúhá sã quée òré quidé vixiⁿ-xi, te tinuu-gá quidé-xí dàtná quidé-xí òré sàá itá ñuhú. 15 Te sàhá-gã súúni dàtásaⁿ-xi dàtná dàtásaⁿ sá nání bròncé òré càyú-xi ducaⁿ dàtásaⁿ-xi sàhá-gã, te dónaha tnúhu càháⁿ-gá quidé-xí dàtná quidé-xí dõndaha titní víhi yũte. 16 Te xio ndaha cùha-gá núndàha-gá úsá tnàhá chódíní, te mei yùhu-gá quéné ñúú yuchí cáhnú ndéé úú xio núú-xi, te núú-gã quidé-xí dàtná quidé-xí núú

nchĩcanchii òré súúní ngòyo cahni.

¹⁷ Te sá dúcáⁿ càa Yaá-áⁿ nĩ xini-í nũu xiáⁿ ní yùhú-í ní nduá-í núú-gã, te ní cuu-í dàtná ìⁿ tée ní xihí sá dúcáⁿ ìo ní yùhú-í, dico mee-gã ní sacáⁿ ndodo-gá ndaha cùha-gá núu yiqui cùñú-í, te ní cachí-gá:

—Vá yùhú-n, chi ñiu-ni yùhú sa ndècu-í ndéé cútnàhá ní ngáva ñuyúu, te ñiu-ni yùhú cundecu-í ndéé ná sàá nduu nàa-xi ndihí nchaa sá ìo, ¹⁸ Te yùhú cùu-í Yaá ní xihí te ní ndoto-í, te vitna ndècu vívù-í, te ducaⁿ-ni cùndecu-í ni caa ni quíhíⁿ. Te yùhú cùnùu-í núú nchàa ñáyiu ní xihí te ñiu-ni-í cùnùu-í núú ndécũ-yu. ¹⁹ Te chido tnùnín nchàa sá nĩ xini-n-áⁿ ìⁿ núú tütú, ndihí nchaa nàcuáa cùu vitna, ndihí nchaa sá cãdá-xí ndéé núú cuaháⁿ núú véxi-gá. ²⁰ Te na cachí tnúhu-í xii-n nàcuáa quèe-xi ndi usá chódíní nĩ xini-n yòtni-í xio ndaha cùha-í, ndihí nàcuáa quèe-xi ndi usá sá nĩ cuáha mee-ni ñihúⁿ cuáaⁿ, sá ndèé dité-xi te yìndodo ìⁿ caa candíl núú dité-xi-áⁿ. Te ndi usá chódíní-áⁿ, xiáⁿ cùu-xí sá cútnùní iní-ó sá ndécú ùsá cue tée xinu cuechi núú Yá Ndiöxí, te ndi usá cue tée-áⁿ ndécú-güedě ndi usá xichi núú ndécú ñáyiu ndècu ichi Yá Ndiöxí. Te cuendá ndi usá sá ndèé dité-xi-áⁿ, xiáⁿ cùu-xí sã cútnùní iní-ó sã ndécú ùsá xichi ñáyiu ndècu ichi Yá Ndiöxí —duha càchí Yaá càháⁿ-áⁿ.

2

Tnúhu sá cùu-xí ñáyiu xĩndecu ichi Yá Ndiöxí ndécú ñuú Éfesú

¹ Te ní cachí tucu Yaá càháⁿ-áⁿ xii-í sá chídó tnùnín nchaa tnúhu sá vitná càháⁿ-gá ìⁿ núú tütú, te tendaha-í quíhíⁿ ndaha tée xinu cuechi núú Yá Ndiöxí ndécú ñuú Éfesú sá cùu-xí cuè ñáyiu xĩndecu ichi-gá ndécú ñuú-áⁿ, te duha ní cachí-gá: “Yùhú cùu-í Yaá núndàha úsá chódíní xio ndaha cùha-í, te xica cuu-í núú ndécú ndi usá sá nĩ cuáha mee-ni ñihúⁿ cuáaⁿ, sá ndèé dité-xi te yìndodo ìⁿ caa candíl núú dité-xi. ² Te yùhú xini-í nchaa nàcuáa quide nchóhó ñáyiu xĩndecu ichi Yá Ndiöxí ndécú ñuú Éfesú, te xini-í sá ìo ndècu ndee-ndo quide chiuⁿ-ndo cuendá-gá, te ìo quide cahnu iní-ndó ndècu-ndo quide-ndo chiuⁿ-gá. Te xini-í sá ñà túú tnàhí tnàhá iní-ndó nàcuáa quide nchaa ñáyiu ndècu ichi cuehé ichi duha. Te xini-í tucu-í sá xitó ndèé-ndó cuè tée càchí sá nĩ tendaha-í véxi càháⁿ tnúhu-í te ñà ndàá sá càháⁿ-güedé tnúhu-í, te ducaⁿ te cùtnuní iní-ndó sã ñã ndàá sá càháⁿ-güedé tnúhu-í. ³ Te xini-í tucu-í sá ìo ndòho-ndo quide-ndo chiuⁿ cuendá-í, te ducaⁿ ìo quide cahnu iní-ndó cuèi nándi yãha-ndo, te ñã túú cùu dusaⁿ-ndo quide-ndo chiuⁿ-áⁿ. ⁴ Dico ñã túú cùu váha iní-í chi nchóhó ñã túú-gã quidé-ndó dàtná ní xóo cada-ndo cùtnàhá vitna cùu vi-ni ní sándáa iní ñáhá-ndó xii-í, chi vitna ñã túú-gã cùu iní ñáhá vihi-ndo datná ní xóo cada-ndo dàvá-áⁿ. ⁵ Te chí dándacu

iní nàcuáa ní xóo cada-ndo cùtnàhá vitna cùu saa ní sándáa ini ñáhá-ndó xii-í, te ndixi cuéchi iní-ndó sã ñà túú-gã quidé vãha-ndo ndècu-ndo vitna, te nucuíta saa tùcu-ndo cada-ndo datná ní xóo cada-ndo ndéé díhna. Te nchòhó cada iní-ndó sã ndécú ndihí-ndo ìⁿ sã ñí cuáha mee-ni díhúⁿ cuàáⁿ, sã ndéé dité-xi te yìndodo ìⁿ caa candíl núú dité-xi. Te núu vá ndíxí cuéchi iní-ndó nàcuáa quide-ndo ndecu-ndo ña, te quixi-í xocàni-í xíáⁿ, te ducaⁿ sãtnahá-xi cada ñaha-í xii-ndo te núu vá ndíxí cuéchi iní-ndó nàcuáa quide-ndo ndecu-ndo, te ducaⁿ te vá yóo-gã nàtacá chiñuhu ñaha xii-í ñuú-ndó. ⁶ Dico quide váha-ndo ìⁿ xichi chi dàquee tihú-ndó nchaa sã quidé cuè ñáyiu cùu nicolaitás, te yúhú tnàhá-í dáquèe tihú-í nchaa sã quidé ñáyiu-ánⁿ. ⁷ Te nchòhó cada cuendá váha-ndo nàcuáa xãhaⁿ-í xii Espiritú Yã Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi. Te duha ndùu tnúhu xãhaⁿ-í xii Espiritú-gá xãhaⁿ-xi xii-yu: Cúñaha-n xii nchaa ñáyiu sã nõu na càda ndee iní-yu yáha-yu nándi sã ná yãha-yu sã cuendá-í, te yúhú cada-í te nduu táhũ-yu cundecu váha-yu núú ndécú Yã Ndiõxí, duha xãhaⁿ-í xii Espiritú-gá cùu-xi ñáyiu”, duha càchí Yaa càháⁿ-ánⁿ. Te nchaa tnúhu-ánⁿ ñí chídó tnùn-í sã cùú-xí ñáyiu xĩndecu ichi Yá Ndiõxí ndécú ñuú Éfesú.

Tnúhu sã cùú-xí ñáyiu xĩndecu ichi Yá Ndiõxí ndécú

ñuú Èsmirná

⁸ Te ní cachí tucu Yaa càháⁿ-ánⁿ xii-í sã chídó tnùn-í nchaa tnúhu sã vitná càháⁿ-gã ìⁿ núú tütú, te tendaha-í quíhíⁿ ndaha tée xìnu cuechi núú Yã Ndiõxí ndécú ñuú Èsmirná sã cùú-xí cuè ñáyiu xĩndecu ichi-gá ndécú ñuú-ánⁿ, te duha càchí-gá: “Yúhú ndécú-í ndéé cùtnàhá ní ngáva ñuyiú, te ñiu-ni-í cundecu-í ndéé ná sã nduu nãa-xi ndihí nchaa sã ió, te ñiu-ni-í ní xihí te ní ndoto-í ndécú-í vitna. ⁹ Te yúhú xini-í nchaa nàcuáa quide nchòhó ñáyiu ndècu ichi Yá Ndiõxí ndécú ñuú Èsmirná. Te xini-í sã ño ndòho-ndo ndecu-ndo sã cuendá-í, te xini tucu-í sã ño ndáhú-ndó dico cùu-ndo ñáyiu xĩndecu váha núú Yã Ndiõxí. Te xini tucu-í sã ño càháⁿ cuèhé ñáyiu isràél cuendá-ndó, dico ñá túú quidé-yu nàcuáa tàú-yu cadá-yu sã cùú-yu ñáyiu isràél, chi cùú-yu ñáyiu xìnu cuechi mee-ni núú sãcuíhná. ¹⁰ Dico nchòhó vá yùhú-ndó cuèi nándi cùu nchaa sã ná ndòho-ndo cuendá-í, chi sãcuíhná cada-xi te ngava dava-ndo vècaá, te ducaⁿ càda-xi chi cuini-xi coto ndéé ñáhá-xí xii-ndo núu ndisa sã vá ná tühú iní-ndó sã nchicúⁿ nihnu-ndo ichi Yá Ndiõxí. Te ndòho-ndo ùxí nduu dico vá dáñá ndéé-ndó cànchicúⁿ nihnu-ni-ndo ichi-gá cuèi na cùú-ndó sã cuendá-gá, te yúhú cada-í te nduu táhũ-ndó cundecu-ndo ndihí-gá ñí caa ñí quíhíⁿ. ¹¹ Te nchaa nchòhó cada cuendá váha-ndo nàcuáa xãhaⁿ-í xii Espiritú Yã Ndiõxí xãhaⁿ-xi xii cue ñáyiu ndècu

ichi-gá xĩndecu nchaa xichi, te duha ndũu tnũhu xãhaⁿ-ĩ xii Espiritũ-gá xãhaⁿ-xi xii-yu: Cũñaha-n xii nchaa ñáyiũ sá nõu na cũndee iní-yu yáha-yu nãndi sá ná yãha-yu sá cuendá-í te vá cuĩta nihnũ-yu na sãã nduu cuĩta nihnu nchaa dava-gá ñáyiũ, duha xãhaⁿ-ĩ xii Espiritũ-gá cúu-xi ñáyiũ”, duha ní cachí Yaa càháⁿ-áⁿ. Te nchaa tnũhu-áⁿ nĩ chidó tnũní-í sá cúu-xi ñáyiũ xĩndecu ichi Yá Ndiõxí ndécú ñũú Èsmirnã.

Tnũhu sá cúu-xi ñáyiũ xĩndecu ichi Yá Ndiõxí ndécú ñũú Pẽrgamũ

12 Te ní cachí tucu Yaa càháⁿ-áⁿ xii-í sá chidó tnũní-í nchaa tnũhu sá vítã cáháⁿ-gá ìⁿ núú tũtũ, te tendaha-ĩ quĩhĩⁿ ndaha tée xĩnu cuechi núú Yã Ndiõxí ndécú ñũú Pẽrgamũ sá cúu-xi cuè ñáyiũ xĩndecu ichi-gá ndécú ñũú-áⁿ, te duha càchĩ-gá: “Yúhú cúu-í Yaa néhé ìⁿ yuchí cáni te ndèé úú xio núú-xi. 13 Te yúhú xĩní-í nchaa ñacuãa quide nchohó cue ñáyiũ xĩndecu ichi Yá Ndiõxí ndécú ñũú Pẽrgamũ, te xĩní tucu-í sá ndécú-ndó nõú ïo cũnuu yucu ñãvãha, te ñã túú dãña ndeé-ndó nchĩcũⁿ nihnu-ndo ìchi-í, te ducaⁿ ïo sãndãá iní ñãhá-nĩ-ndó xii-í, te diu-ni ducaⁿ nĩ quide-ndo cũtnãhá ní sahani-güedé té Antipãs núú ndécú-ndó diu-ni núú dúcãⁿ ïo cũnuu yucu ñãvãha. Te ndĩ-áⁿ nĩ quide ndãá ndĩ ní xĩndecu ndĩ ichi-í chi ní cáháⁿ vãha ndĩ cuendá-í. 14 Dico ñã túú cùu vãha iní-í cuendá ìⁿ úú sá quidé-ndó, chi ndècu

ndĩhi-ndo ñáyiũ nchĩcũⁿ nihnu-ni nchaa ñacuãa ní cáháⁿ ndĩ Bãlaám. Chi ndĩ-áⁿ ñã túú ní quide vãha ndĩ chi ní dácãhũ iní ndĩ ingá tée ní xĩnani Bãlãc ñacuãa cada-dé canu ichi-dé cue ñáyiũ israël ingá ichi sá ñã túú vãha, chi ní xãhaⁿ tẽ Bãlãc-áⁿ xii-yu sá cáxi-yu nchaa sã ndúú tãhũ nchaa sã nĩ cadũha cue tée ñuyiũ-a dãnani ñáyiũ ndiõxí te ñã ndãá sã ndiõxí cúu-xi, te ní dácãhũ iní ñãhá-dẽ xii-yu sá cundècũ-yu ichi dĩĩ iní. 15 Te ndècu ndĩhi tucu-ndo ñáyiũ nchĩcũⁿ nihnu sá dãcuãha cue ñáyiũ cùu nicolaitãs. Te nchaa sã dãcuãha ñáyiũ-áⁿ dãquè tihũ-í, 16 te nchòhó chí dãndixi cuèchi iní sã ñã túú quide vãha-ndo ndècu-ndo, chi nõu ñãhá te quixi-í nãã-í ndĩhi cue ñáyiũ-áⁿ ndĩhi yuchí cáni sã quèné yũhu-í. 17 Te nchaa nchòhó cada cuendá vãha-ndo ñacuãa xãhaⁿ-ĩ xii Espiritũ Yã Ndiõxí xãhaⁿ-xi xii cue ñáyiũ ndècu ichi-gá xĩndecu nchaa xichi. Te duha ndũu tnũhu xãhaⁿ-ĩ xii Espiritũ-gá xãhaⁿ-xi xii-yu: Cũñaha-n xii nchaa ñáyiũ sá nõu na càda ndee iní-yu yáha-yu nãndi sá ná yãha-yu sá cuendá-í, te yúhú cuãñaha-ĩ sã ndúú yũhu xii-yu caxi-yu ìⁿ sã vãtã quĩní-gã-yu caxi-yu. Te xĩãⁿ cúu-xi mãnãá sã nĩ xóo caxi cue ñáyiũ ní xĩndecu ndèé sanaha, te cuãñaha tũcu-í ìⁿ caa yũú cuixĩⁿ xii-yu, te núú yũũ-ãⁿ cundèé ìⁿ diu saa. Te diu-áⁿ vã yõo tãhĩ xĩní chi ìⁿ dii dĩ-ĩ ñáyiũ na quèheⁿ cuendá diu-áⁿ quĩní-yu, duha xãhaⁿ-ĩ

xii Espiritú-gá cúu-xi ñáyiú”, duha cächí Yaa cäháⁿ-áⁿ. Te nchaa tnúhu-áⁿ ñi chídó tnùní-í sá cúu-xi ñáyiú xĩndecu ichi Yá Ndiöxí ndécú ñúú Pèrgamú.

Tnúhu sá cúu-xi cuè ñáyiú xĩndecu ichi Yá Ndiöxí ndécú ñúú Tiàtirá

18 Te ní cachí tucu Yaa cäháⁿ-áⁿ xii-í sá chídó tnùní-í nchaa tnúhu sá vitná cäháⁿ-gá ñⁿ núú tütú, te tendaha-í quíhíⁿ ndaha tēe xĩnu cuechi núú Yá Ndiöxí ndécú ñúú Tiàtirá sá cúu-xi cuè ñáyiú xĩndecu ichi-gá ndécú ñúú-áⁿ, te duha cächí-gá: “Yúhú cúu-í Déhe Yá Ndiöxí, te càa tinuu-í dàtná cáá itá ñuhú, te sáhà-í cáá dàtná cáá sã nání bròncé òré ñuhú-xi núú ñuhú càyú-xi. 19 Te yúhú xini-í nchaa nàcuáa quide nchóhó ñáyiú xĩndecu ichi Yá Ndiöxí ndécú ñúú Tiàtirá. Te xini tucu-í sá ïo cùu iní-ndó Yá Ndiöxí te sàndáá iní-ndó-gã. Te xini tucu-í nàcuáa ndùu chiuⁿ quide-ndo sá cúu-xi-gã. Te xini tucu-í sá ïo quide cahnu iní-ndó cuèi nándi cùu sá yãha-ndo ndècu-ndo. Te xini tucu-í sá ïo-gá ndúcú ndèe-ndo quide váha-ndo vitna dacúxí cùtnahá vitna cùu saa ní sàndáá iní-ndó Yá Ndiöxí. 20 Dico ñá túú cùu váha iní-í cuèndá ñⁿ sá quidé-ndó, chi ñá túú tnàhí ná sání iní-ndó ndècu ndihí-ni-ndo ñáyiú nchicúⁿ nihnu nchaa nàcuáa dānehé ñáhá ñaha nani Jezabél. Te ñaha-áⁿ cächí-aⁿ sá cäháⁿ-aⁿ tnúhu Yá Ndiöxí dico ñá ndáá sá cäháⁿ-aⁿ tnúhu-gá, te cuáháⁿ-aⁿ dāndahú-aⁿ nchaa ñáyiú xĩnu cuechi núu-í ndihí

nchaa sá dānehé ñáhá-áⁿ cuèndá cundecú-yu ichi díí ìní, te caxí-yu nchaa sá ndúú tãhú nchaa sá ñi cadúha cue tēe ñuyú-a dānani ñáyiú ndiöxí te ñá ndáá sá ndiöxí cúu nchaa xĩáⁿ. 21 Te ní cuu vãi nduu ta dacaca-í ndécú-áⁿ cuèndá ndixi cuèchi iní-aⁿ sá ñá túú quide váha-aⁿ ndècu-aⁿ, te cuèi ducaⁿ quide-í dico ñá túú cuñí-aⁿ dañá-aⁿ ñi ñⁿ sá cuèhé sá dúhá quide-aⁿ. 22 Te vitna yúhú ïo dandòho-í-aⁿ chi tñi ñaha cuèhé xii-aⁿ, te diu-ni ducaⁿ ïo dandòho-í nchaa ñáyiú quide datná quidé-áⁿ te núu vá ndixí cuèchi iní-yu sá ñá túú quide váha-yu ndécú-yu, te dañá-yu nchaa sá cuèhé sá dúhá quidé-yu. 23 Te nchaa ñáyiú cùndihí ñaha xii ñaha-áⁿ cahni-í-yu, te ducaⁿ te nchòhó ndihí dava-gá nchaa ñáyiú xĩndecu ichi Yá Ndiöxí ndécú nchaa xichí cutnuni iní-ndó ndihí-yu sá yúhú cúu-í Yaa xini ndáá nchaa nàcuáa sání iní ñáyiú, ndihí nchaa nàcuáa quide-xi iní-yu. Te nchòhó nàcuáa ndùu sá quidé-ndó ñⁿ ñⁿ-ndo te ducaⁿ cùnduu sá táxi-í nduu tãhú-ndó. 24 Te dava nchòhó ñáyiú ndècu ñúú Tiàtirá, ñáyiú ñá túú nchicúⁿ nihnu nàcuáa dānehé ñáhá ñaha nani Jezabél-áⁿ ñá túú xini-ndó ñá cúú sã cächí ñáyiú ndùu yuhu dacahu iní ñáhá yùcu ñávãha. Te nchòhó, ñá túú ñágá cachí tnúhu-í xii-ndo càda-ndo 25 diu-ná sá ïo nducu ndèe-ndo cada-ndo nchaa nàcuáa cäháⁿ tnúhu sá ndécú ndihí-ndo, te ducaⁿ-ni càda-ndo ndéé òré quixi tucu-í. 26 Te nchaa nchòhó

ñáyiú na càda ndee iní yáha nándi sá ná yáha sá cuendá-í, te núu na càda-ni-ndo nchaa nacuaá cuini-í cada-ndo ndée nduu vǎ cùndecu-gá-ndó ñuyiú-a, te yúhú taxi-í tnúhu ndee iní xii-ndo sǎ táxi tnúni-ndó nchaa ñáyiú ñuyiú 27 dàtná ní quide mee Tǎtǎ-í Dútú Ndiöxí ní taxi-gá tnúhu ndee iní ndécú ndihi-í, te ducaⁿ càda ñaha-í xii-ndo táxi-í tnúhu ndee iní xii-ndo cuendá ío taxi tnúni-ndó, te cada iní-ndó sǎ cáda-ndó cuè ñáyiú dàtná quidé-xí ñⁿ quidi òré tǎhú-xi cǎchi duuⁿ-xi, te ducaⁿ chi nchòhó cada-ndo sǎ ncháá ñáyiú ñá túú quide váha cuíta nihnú-yu. 28 Te cada iní-ndó sǎ dàtná dáyèhé chódíní quiti quène oré sa ta tǔndaá-nǎ cuáháⁿ ducaⁿ càda-xi oré ná sǎá nduu ngúita-xi cada váha-xi, te ducaⁿ chi yúhú cada-í nàcuáa nduu táhú-ndó cùndecu ndihi ñaha-ndo xii-í núú ío váha càa ndecu-í. 29 Te nchaa nchòhó cada cuendá váha-ndo nàcuáa xǎhaⁿ-í xii Espiritú Yǎ Ndiöxí xǎhaⁿ-xi xii cue ñáyiú ndècu ichi-gá xǎndecu nchaa xichi”, duha cǎchí Yaa cǎháⁿ-án. Te nchaa tnúhu-án ñi chídó tnúni-í sá cúu-xí ñáyiú xǎndecu ichi Yǎ Ndiöxí ndécú ñúú Tiàtirá.

3

Tnúhu sá cúu-xí ñáyiú xǎndecu ichi Yǎ Ndiöxí ndécú ñúú Sǎrdís

1 Te ní cǎchí tucu Yaa cǎháⁿ-án xii-í sá chídó tnúni-í nchaa tnúhu sá vitná cǎháⁿ-gǎ ñⁿ núú tütú, te tendaha-í quihíⁿ ndaha téé xínu cuechi núú Yǎ Ndiöxí ndécú ñúú

Sǎrdís sá cúu-xí cuè ñáyiú xǎndecu ichi-gá ndécú ñúú-án te duha cǎchí-gá: “Yúhú cúu-í Yaa ndécú ndihi ndi usá espíritú cúu cuendá Yǎ Ndiöxí, te diu-ni-í cúu-í Yaa ndécú ndihi ndi usá chódíní. Te yúhú xini-í nchaa nàcuáa quide nchohó ñáyiú xǎndecu ichi Yǎ Ndiöxí ndécú ñúú Sǎrdís, te xini-í sá cúu-ndó dàtná ñáyiú ní xihí cuèi cǎchí ñáyiú sá ñǎhá. 2 Te chí cuǎha cuendá nàcuáa quide-ndo ndecu-ndo vitna, te nducu ndèe-ndo cada-ndo ñⁿ úu-gá nchaa sá vǎha nchicúⁿ nihnu-ndo vitna, chí sa ndètu vii-nǎ dañá-ndo nchaa-ndi túhú sá vǎha quide-ndo ni cuu, te quide cuendá-í sá ñà túú quide-ndo nchaa nacuaá cuini Yǎ Ndiöxí cada-ndo. 3 Te chí dándàcu iní nàcuáa cǎháⁿ tnúhu sá ñi xǎndéohó-ndo cǔtnàhá ní tuha-ndo ichi Yǎ Ndiöxí, te canchicúⁿ nihnu-ndo càda-ndo nacuaá cǎháⁿ tnúhu-án, te ndixi cuèchi iní-ndó sǎ ñà túú quide váha-ndo ndècu-ndo, te núu yá nàcuǎha-ndo cuendá nàcuáa quide-ndo ndecu-ndo ña, te cada-í dàtná quidé ñàdúhú, chí òré ñá túú ñá yihí iní-ndó quèxio-í núú ndécú-ndó. 4 Dico ndècu ndihi-ndo ñⁿ úu ñáyiú càndoo caa nine iní-xi, chí ñáyiú-án ñi nduu táhú-yu cuihnú-yu dóo cuixíⁿ cuendá cundecu ndihi-í-yu, te ducaⁿ chí cùdiú-yu núu-í. 5 Te nchaa ñáyiú na càda ndee iní-xi yáha nándi sá ná yáha sá cuendá-í, te ñáyiú-án nduu táhú-yu cuihnú-yu dóo cuixíⁿ, te vá náquète-í diú-yu núú tütú

núu yódó tnùní cue ñáyiú ní nduu táhú cundecu ndihí-í ní caa ní quíhíⁿ, te cúñaha-í xii Tātà-í Dútú Ndiòxí ndihí cue espíritu xínú cuèchi núu-í sá ñáyiú-án cúu-yu ñáyiú cùu cuendá-í. ⁶ Te nchaa nchòhó cada cuendá váha-ndo nàcuáa xáhaⁿ-í xii Espiritú Yá Ndiòxí xáhaⁿ-xi xii cue ñáyiú ndècu ichi-gá xíndecu nchaa xichi”, duha càchí Yaá càháⁿ-án. Te nchaa tnúhu-án ní chídó tnùní-í sá cúu-xí ñáyiú xíndecu ichi Yá Ndiòxí ndécú ñùú Sárdís.

Tnúhu sá cúu-xí cue ñáyiú xíndecu ichi Yá Ndiòxí ndécú ñùú Filadelfiá

⁷ Te ní cachí tucu Yaá càháⁿ-án xii-í sá chídó tnùní-í nchaa tnúhu sá vítná càháⁿ-gá ìⁿ núu tütú, te tendaha-í quíhíⁿ ndaha téé xínu cuechi núu Yá Ndiòxí ndécú ñùú Filadelfiá sá cúu-xí cue ñáyiú xíndecu ichi-gá ndécú ñùú-án, te duha càchí-gá: “Yúhú cúu-í Yaá ío váha quide ndáá te ñá túu tnàhí cuèchi-í. Te díhna-gá ndíi Dávíí ní taxi tnùní ndíi ñáyiú, te vítna yúhú táxi tnùní-í-yu, te yúhú càháⁿ-í te núu ndëndida càa ñáyiú ndíhu ndaha-í te ndëndida càa ñáyiú vá ndíhu ndaha-í. ⁸ Te yúhú xíní-í nchaa nàcuáa quide nchóhó ñáyiú xíndecu ichi Yá Ndiòxí ndécú ñùú Filadelfiá, te yúhú ní quide-í nàcuáa ní níhí-ndó ìⁿ ichi cahnu quide-ndo chiúⁿ-í, te vá yóo ìⁿ cada nàcuáa vá níhí-gá-ndó nàcuáa cada-ndo chiúⁿ-í. Te cuèi ñá túu ío níhí ndéé-ndó cundecu-ndo ichi Yá Ndiòxí dico tní-ndo nchaa tnúhu càháⁿ-í, te ní

ìⁿ xito ñá túu càháⁿ-ndó sá ñá túu ndècu ndihí ñaha-ndo xii-í. ⁹ Te nchaa ñáyiú quide nchaa nacuáa cuíní yucu ñávàha, ñáyiú-án cúu-yu ñáyiú isràél, te cuèi cúu-yu ñáyiú isràél dico ñá túu quidé-yu nàcuáa tàu-yu cada-yu, te yúhú cada-í sá ncháá ñáyiú-án canehé-yu sá yíñùhu núu-ndó, te cutnùní iní-yu sá yúhú ío cùu iní ñáhà-í xii-ndo. ¹⁰ Te ío quide ndee-ni iní-ndó nchícúⁿ nihnu-ndo quide-ndo nchaa nacuáa ní càháⁿ-í, te xíáⁿ coto ñaha-í xii-ndo ñá túu ná tnahá-ndó ndùu na quixi nchaa tnúndòho tnúhu ndàhú ñuyíú-a. Te òrè quexìo nchaa tnúndòho-án ñuyíú-a te dàvá-án cutnùní nàcuáa ndùu sá quidé ìⁿ ìⁿ ñáyiú. ¹¹ Te ío ndíhí quixi tucu-í. Te vá dáñá ndéé-ndó càda-ndo nchaa sá váha nchícúⁿ nihnu-ndo quide-ndo cuendá sá vâ cuíta sá ní cachí Yá Ndiòxí nduu táhú-ndó. ¹² Te nchaa nchòhó ñáyiú na càda ndee iní yáha nándi sá ná yáha sá cuendá-í, te yúhú cada-í sá nchòhó ío cuu càhnu-ndo cundecu-ndo núu ndécú Tātà-í Dútú Ndiòxí, te vá ìⁿ ndùu-gá xocuíñí-ndó núu ndécú-gá. Te cada iní-ndó sá dàtná sá chídó tnùní-í diu Tātà-í Dútú Ndiòxí ñí-ndo chi ducaⁿ-ni cundecu-ndo ndihí-gá, te cada tucu iní-ndó sá dàtná sá chídó tnùní-í nàcuáa nàni ñuú-gá ñí-ndo, chi diu ñuú-gá-án cundecu-ndo, te ñuú-án nání-xí Jèrusalén Sáá, duha nàni ñuú-gá. Te ñuú-án quee-xi andíu núu ndécú Yá Ndiòxí Yaá cúu Tātà-í quée-xi

ñuyíú. Te cada tucu iní-ndó sã dàtná sá chídó tnùnì-í ñiú mee-í ñi-ndo, te xiãⁿ cúú-xí ñiⁿ ñiú saa, te ducaⁿ càda iní-ndó chi cundecu ndihi ñaha-ndo xii-í. ¹³ Te nchaa nchòhó càda cuendá váha-ndo nàcuáa xãhaⁿ-í xii Espiritú Yã Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ni chídó tnùnì-í sá cúú-xí ñáyiu xĩndecu ichi Yã Ndiõxí ndécú ñúú Filadelfiá.

Tnúhu sá cúú-xí ñáyiu xĩndecu ichi Yã Ndiõxí ndécú ñúú Laodiceá

¹⁴ Te càchí tucu Yaá càháⁿ-áⁿ xii-í sá chídó tnùnì-í nchaa tnúhu sá vítná càháⁿ-gá ñiⁿ núú tútú, te tendaha-í quíhíⁿ ndaha téé xĩnu cuechi núú Yã Ndiõxí ndécú ñúú Laodiceá sá cúú-xí cue ñáyiu xĩndecu ichi-gá ndécú ñúú-áⁿ, te duha càchí-gá: “Yúhú cúú-í Yaá quidé núú Yã Ndiõxí, te cùu-í Yaá quidé ndáá chi càháⁿ ndáá cuiti-í nàcuáa càháⁿ Yã Ndiõxí. Te yúhú cúú-í Yaá ní quide ní ngũndecu nchaa sá ñi cadúha Yã Ndiõxí. ¹⁵ Te yúhú xĩnì-í nchaa nàcuáa quide nchohó ñáyiu xĩndecu ichi Yã Ndiõxí ndécú ñúú Laodiceá, te xĩnì-í sá ñã túú cuinì-ndó cànchicúⁿ niñnu-ndo nchaa nàcuáa càháⁿ-í, te ni ñã túú cuinì-ndó dàña duuⁿ-ndo. Te váha-gá sá dúúⁿ dùuⁿ cada-ndo nchaa nàcuáa càháⁿ-í àdi núú ñáhá te duuⁿ duuⁿ dañá-ndo. ¹⁶ Te sá dúcáⁿ quide-ndo ñã túú cuinì-ndó dùuⁿ duuⁿ-ni cada-ndo nàcuáa càháⁿ-í, te ni ñã túú cuinì-ndó dùuⁿ duuⁿ-ni dañá-ndo te sáá nduu vã

cúndèe-gá iní-í cuendá nchaa sá quidé-ndó-ãⁿ, te daquèe tíhú ñãhà-í xii-ndo. ¹⁷ Te càchí-ndó sã cuicá-ndó, te ío váha ta yãha-ndo nchaa nduu cuáháⁿ, te ñã túú tnàhí ná cúmãní xii-ndo, te ñã túú cùtnunì iní-ndó sã cúú-ndó dàtná cue ñáyiu ío ndàhú yãha, te cùu-ndo datná ñáyiu ndàhú, ñáyiu ío cùndahú iní ñáhá tnàha ñáyiu-xi, te cùu-ndo datná cue ñáyiu cuáá, te cùu tucu-ndo datná cue ñáyiu ndàhú ñã túú tnàhí dóó-xi. ¹⁸ Te na càchí tnúhu-í xii-ndo sã cadá-ndó dàtná xĩquide cue ñáyiu sãaⁿ ñiⁿ sá ñi cuáha mee-ni ñiⁿ cuááⁿ sá ío váha càa, te ducaⁿ quidé-yu te ío-gá cúú cuicá-yu. Te cada tucu-ndo dàtná xĩquide cue ñáyiu sãaⁿ dóó cuixiⁿ sácũñnu-yu cuendá sá vã cúú-yu dàtná ñáyiu ndàhú ñã túú dóó-xi, te cada tucu-ndo dàtná quidé cue ñáyiu sãaⁿ yúcú quèe núú-xi nàcuáa cutnùnì váha núú-yu, te duha càháⁿ-í xãhaⁿ-í xii-ndo chi cuinì-í sá nàtuha ñaha-ndo xii-í, te ío váha cundecu-ndo sã cúú-xí Yã Ndiõxí. ¹⁹ Te càháⁿ-í dóho nchaa ñáyiu cùu iní-í òré ñã túú quide ndáá-yu, te dàndoho-í-yu, núu xiãⁿ cuinì-í sá nchòhó ndixi cuechi iní-ndó sã ñã túú quide váha-ndo ndècu-ndo. ²⁰ Te na càchí tnúhu-í xii-ndo sã yúhú cúú-í dàtná ñiⁿ téé nùtniⁿ yuyèhe ndaa quehé te càháⁿ-í ñáyiu yìhi xití vehe, te núu na càda cuendá-yu sá càháⁿ-í te nacaáⁿ-yu yuyèhe te quíhu-í xití vehe cudini-í ndihi-yu, te duha càháⁿ-í chi cuinì-í

cundecu ndihi ñaha-ĩ xii-ndo. ²¹ Te nchaa nchòhó ñáyiú na càda ndee iní-xi yáha nándi sá ná yáha sá cuendá-í, te yúhú taxi-í xii-ndo ñⁿ xichi núú ndécù-í cundecu-ndo te cunuu-ndo tnàhá-ndó dàtná cùnùu-í, chi yúhú ducaⁿ ñi quide ndee iní-í ní yáha-í nándi sá ñi yáha-í te vitna ní nduu táhù-í ndécù-í núú ndécú Tàtá-í Dútú Ndiòxi cùnùu-í. ²² Te nchaa nchòhó cada cuendá váha-ndo nàcuáa càháⁿ Espiritú Yá Ndiòxi xáhaⁿ-xi xii cue ñáyiú ndècu ichi-gá xĩndecu nchaa xichi”, duha càchí Yaa càháⁿ-áⁿ. Te nchaa tnúhu-áⁿ ñi chídó tnùn-í sá cúu-xí ñáyiú xĩndecu ichi Yá Ndiòxi ndécú ñùú Laodiceá.

4

Nàcuáa chĩñuhu ñáyiú Yá Ndiòxi andiú

¹ Te sátá ñi yáha ducaⁿ ñi cuu te ní xiní-í nchii andiú, te ní càháⁿ tucu Yaa ní càháⁿ ndihi ñaha xii-í díhna, te Yaa-áⁿ ñi càháⁿ níhi-gá dàtná càháⁿ níhi ñⁿ cútú, te ñi cachí-gá xii-í:

—Taquène iha te na dànehé ñáhà-í xii-ñ nchàa nacuáa cada-xi ndéé núú cuaháⁿ núú vèxi —càchí-gá.

² Te òré-ñi-áⁿ ñi quide ñaha tucu Espiritú Yá Ndiòxi xii-í nàcuáa càchí iní-xi, te diu-ñi òré-áⁿ ñi xiní-í nútñi ñⁿ xilé váha andiú te càa datná cáá xilé sácòo nchihí cue ñáyiú ío cùnùu, te núú xilé váha-áⁿ núúcuó Yaa táxi tnùn. ³ Te Yaa-áⁿ cáá-gá dàtná cáá yúú chàhnchí yúú váha sá nání jàspé, te càa tucu-gá dàtná cáá yúú váha sá nání còrnalíná,

te ñùhu doco ñaha ñⁿ cóo yáhnchí xii-gá, te tásaⁿ-di dàtná tásaⁿ ñⁿ yúú váha sá nání èsmeraldá. ⁴ Te ní xiní tucu-í nútñi ócò cúmí xilé váha ñi càndéé núú núúcuó-gá, te núú xilé-áⁿ xĩnucóo ócò cúmí cue tée cùu sacuéhé te xixĩhnu-güedé mee-ñi dõó cuixín, te ñⁿ caa coróná sá ñi cuáha mee-ñi díhúⁿ cuááⁿ xixúhuⁿ díqui-güedé. ⁵ Te núú núúcuó Yaa táxi tnùn-áⁿ sàá ndúté, te càháⁿ ñùhu te xica chihí-xi dónaha, te càyú úsá ití núú núúcuó-gá, te sá úsá ití-áⁿ xĩáⁿ cútñùn-í sá ndécú úsá espíritú cúu cuendá-gá. ⁶ Te ndècu ñⁿ sá ndécú ndàa núú-gá te xĩáⁿ cáá dàtná cáá lámár, te dàtná cáá vidriú cáá ñihí.

Te ñi càndéé diñi Yaa núúcuó-áⁿ xĩnutñi cúmí quiti te titní víhí tinuu-güedi ndéé ndàa sátá-güedi ndihi ndàa núú-güedi. ⁷ Te quiti díhna nuu càa-di datná cáá ndicaha, te quiti cùu uú cáá-dí dàtná cáá ndicutu, te quiti cùu uní nehé-dí núú tée, te quiti cùu cumí cáá-dí dàtná cáá yàcolo oré cuaháⁿ-di núú tàchí. ⁸ Te ndi cùmí quiti-áⁿ ndéé íñú ndixín-güedi ñⁿ ñⁿ-güedi, te ñihí xití ndixín-güedi ndihi ndàa sátá ndixín-güedi ndéé tinuu-güedi, te nduu niú chĩñùhu-güedi Yá Ndiòxi, te xáhaⁿ-güedi xii-gá:

Yòhó Dútú Ndiòxi ducaⁿ-ni ta quide ndáá-ñ vèxi, te ducaⁿ-ni quide ndáá-ñ cuéi vitna, te diu-ñi ducaⁿ càa ndáá-ñ núú cuaháⁿ núú vèxi,

te cùu-n Yaá quidé nchàa-ndi
túhú sá vǎha,

te ñi-ni-n sà ndecu-n ndéé
cútnàhá ní cuáha ñuyú,

te ñi-ni-n ndècu-n cuéi vitna,
te ñi-ni-n cùndecu-n
cuéi ndéé núú cuàháⁿ
núú vèxi.

Duha xǎhaⁿ cué quiti-án xii
Yaá núcõo núú xilé váha-án
chíñuhu ñaha-güedi.

9 Te cue quiti-án ïo ndàcáⁿ
táhu-güedi núú Yáá núcõo
núú xilé váha-án cuendá
nchaa sá quidé-gǎ. Te Yaá-án
cúú-gǎ Yaá ndécú nchàa
nduu nchaa quíú. Te cue
quiti-án càchí-güedi sá ïo
càhnu cuu-gǎ te nèhe-güedi
sá yíñuhu núú-gǎ. Te ndi
tnahá òré ducaⁿ càháⁿ-güedi,
10 te ndi òcõ cùmí cue
téé cùu sacuéhé xñucõo-án
ngüíñi xiti-güedé núú Yáá
núcõo-án, chí ñi-ni-gǎ cúú-gǎ
Yaá ndécú nchàa nduu nchaa
quíú te chíñuhu ñaha-güedé
xii-gǎ, te tàva-güedé coróná
ñúhú díquí-güedé te tàxi
ndecu-güedé núú-gǎ, te
xǎhaⁿ-güedé xii-gǎ:

11 Yòhó cúú-n Dütú Ndiõxí
Yaá cúú cuendá ñáhá
xii-ndí,

te ïo càhnu cuu-n, te ïo váha
quide-n,

te nèhe-ndí sá yíñuhu núú-n,
chí ducaⁿ tàú-xi
cada-ndí,

chí yòhó cúú-n Yáá ní cadúha
nchaandi túhú sá ïó,

te ducaⁿ ñi ngúndecu nchaa
xǎⁿ chí mee-n dùcaⁿ ní
sani iní-n càda-n.

5

*Cuendá Yaá cáá dàtná
cáá ñⁿ mbéé quiti ní
dánicuéhé-güedé ndihi cuendá
ñⁿ tutú*

1 Te ní xiní tucu-í sá
Yáá núcõo núú xilé váha-án
núndàha-gǎ ñⁿ tutú ní
nacaúnuu xio ndaha cùha-gǎ,
te ndèè lètrá ndàa sátá-xi
ndihi ndàa xití-xi, te úsá tnàhá
tutú líhli ñuhu seyú ndèé sátá
tutú-án cuendá sá vǎ dáñá-xí
nàcaá. 2 Te ní xiní-í ñⁿ espíritú
xínú cuèchi núú Yǎ Ndiõxí, te
ndee víhi-xi te níhi càháⁿ-xi,
te càchí-xi:

—¿Yoo tàú-xi xocàni nchaa
tutú líhli ñuhu seyú ndèé sátá
tutú-a te nadacáá-xi? —càchí
espíritú-án.

3 Dico ni àndiu, te ni
núú ñùyú-a, te ni ndàa
xití ñuhu ñá túú ñⁿ ñáyiu
tàú-xi nadacáá tutú-án te
cundèhé-yu. 4 Te yúhú ní
ngüíta-í ndàhyú víhi-í cuendá
sá ñà túú ñⁿ ñáyiu tàú-xi
nadacáá tutú-án cundèhé-yu.
5 Te ñⁿ cue téé cùu sacuéhé
xñucõo xǎⁿ ní cachí-güedé
xii-í:

—Vá ndàhyú-gá-n, te cada
cuendá-n chí Yaá ïo cùnnuu
cuu ndi mee cue ñáyiu cùu
ñani tnàhá ndíi Jùdá, ñi-ni
Yaá cúú ñani tnàhá ndíi Dávií,
Yaá-án cúú-gǎ Yaá ní ndacu
ní yáha nchaa nándi sá ñi
yáha, núu xǎⁿ ñi-ni-gǎ tàú-gǎ
xocàni-gǎ nchaa tutú líhli
ñuhu seyú ndèé sátá tutú-án
te nadacáá-gǎ —duha càchí
téé cùu sacuéhé-án.

6 Te tnuú ndi òcõ cùmí cue
téé cùu sacuéhé xñucõo-án,
ndihi tnuú ndi cùmí quiti
xñutñi-án, ndihi núú núcõo

Yaá táxí tnùní-áⁿ nǐ xiní-í núní^ñ ñⁿ Yaá cáá dàtná cáá ñⁿ mbéé quití ní dánícuèhé-güedé te ní xíhí-di ní cùu te ní ndoto-di, te ndèé úsá ndíqui-di, te ndèé úsá tinùu-di, te sá úsá tinùu-di-áⁿ cútñuní sá ndécú úsá espíritú cúu cuèndá Yá Ndiòxí, ducaⁿ càa Yaá-áⁿ nǐ xiní-í. Te cue espíritú-áⁿ nǐ tendaha-gǎ xicá cùu-xi ní caa xico ñuyíú. ⁷ Te Yaá cáá dàtná cáá ñⁿ mbéé quití ní dánícuèhé-güedé-áⁿ nǐ sáháⁿ-gá núú Yáá núcõ núú xilé váha-áⁿ. ⁸ Te òré ní queheⁿ-gá tutú-áⁿ te ndí cùmí quití xñutnǐ xíaⁿ nǐ ngüíñí xítí-güedi núú-gǎ, te ducaⁿ nǐ ngüíñí xítí tucu ndí ócó cùmí cue téé cùu sacuéhé xñucóo-áⁿ, te ndí dííⁿ núú-güedé xñehe-güedé yaá sá nání àrpá, te xñehe tucu-güedé ndí dííⁿ núú-güedé ñⁿ caa tǐcùú ní cuáha mee-ní díhúⁿ cuááⁿ, te chitu dǔsa sá sáháⁿ tnámí. Te ñúhmá dǔsa sá sáháⁿ tnámí-áⁿ cúú-xí dàtná nchaa tnúhu càháⁿ nchaa ñáyiú ndècu ichi Yá Ndiòxí òré càháⁿ ndihí ñàhá-yu xii-gá. ⁹ Te xíta-güedé ñⁿ ndudú sáá ndihí cue quití-áⁿ chíñuhu ñaha-güedé xii-gá, te càchí-güedé ndihí cue quití-áⁿ:

Yòhó tàú-n quèheⁿ-n tutú-a te xocàni-n nchaa tutú líhli ñùhu seyú ndèé sátá-xi,

chi yòhó ní sati níñí-n te ní xíhí-n,

te cuèndá xiáⁿ ní nduu cuèndá Yá Ndiòxí cue ñáyiú ñⁿ ñⁿ nàcióⁿ, ndihí ñáyiú xñdecu ñⁿ ñⁿ ñuú, ndihí

ñáyiú càháⁿ ndí dííⁿ ndí dííⁿ núú tnùhu, ndihí ñáyiú xñdecu ñⁿ ñⁿ xi-chí.

¹⁰ Te ní quidé-n-yu dàtná cue téé yìndaha ñáyiú, te ní quide tucú-n-yu dàtná cue dútú sǎ cúú-xí Yá Ndiòxí.

Te sáá nduu te taxi tnùní-yu ñuyíú-a.

Duha càháⁿ cue téé-áⁿ ndihí cue quití-áⁿ chíñuhu-güedé ndihí-güedi Yaá-áⁿ.

¹¹ Te sátá dúcáⁿ te ní tecú dóho-í ní càháⁿ cuéhé víhí espíritú xínú cuèchi ní candéé núú núcõ Yaá táxí tnùní-áⁿ, ndihí núú xñutnǐ ndí cùmí cue quití-áⁿ, ndihí núú xñucóo cue téé cùu sacuéhé-áⁿ, te ní xiní-í sá sùúni cuéhé víhí espíritú-áⁿ xñdecu xíaⁿ, ¹² te níhi ní càháⁿ cue espíritú-áⁿ, te càchí-xi:

Yòhó Yaá cáá dàtná cáá ñⁿ mbéé quití ní dánícuèhé-güedé te ní xíhí ní cùu te ní ndoto, te yòhó ío càhnu cuu-n, te ndècu ndihí-n nchaandi túhú,

te ío ndècu ndihí-n sá xini tnùní-n,

te ndàcu-n quide-n nchaa sá cuíní-n,

te nèhe-ndí sá yíñuhu núú-n, te ío váha quide-n,

te chíñuhu ñaha-ndí xii-n, chi ducaⁿ tàú-ndí cada-ndí chí ío càhnu cuu-n.

Duha càchí nchaa cue espíritú-áⁿ xáhaⁿ-xi xii-gá chíñuhu ñaha-xi.

¹³ Te ní tecú dóho-í ní càháⁿ nchaandi túhú sá ní cadúha Yá Ndiòxí ndécú àndíu, ndihí nchaa sá ndécú ñuyíú, ndihí

nchaa sá ndécú xítí ñuhu,
ndihi nchaa sá ñúhú xítí
ndute lámár, te xícachí-xi:

Yòhó Yaa núcõ núú xilé váha,
ndihi yòhó Yaa cáá
dàtná cáá ìⁿ mbéé quiti
ní dánicuehé-güedé táxí
tnùní-ndó, te nèhe-ndí
sá yíñuhu núú-ndó,

te ducaⁿ ïo ndàcáⁿ táhú-ndí
núú-ndó, chí ío
váha quide-ndo te ío
cùnuu-ndo,

te ñu-ni duha cáháⁿ váha-ndí
cuendá-ndó ní caa ní
quíhíⁿ.

Duha cächí nchaa sá ñí
cadúha Yá Ndióxi.

¹⁴ Te ndi cùmí cue quiti
xínutní-áⁿ cächí-güedi:

—¡Ducaⁿ na cùnduu! —
cachí-güedi.

Te ndi òcò cùmí cue téee cùu
sacuéhé xíndecu-áⁿ ñí ngüíñí
xítí-güedé chíñuhu-güedé Yaa
ndécú nchàa nduu nchaa
quíú.

6

*Cuendá úsá tutú líhli ñuhu
seyú*

¹ Te sátá dúcáⁿ te ní xiní-í
sá Yaa cáá dàtná cáá ìⁿ mbéé
quití ní dánicuehé-güedé-áⁿ ñí
xócání-gã ìⁿ tutú líhli ñuhu
seyú ndéé sátá tutú sá ñí
nadúcúⁿ nuu-áⁿ, te ní tecú
dóho-í ní cáháⁿ ìⁿ quití cùmí
xínutní-áⁿ, te níhi ní cáháⁿ-dì
dàtná càháⁿ ñuhu, te cächí-dì:

—¡Taquixi cundehe-n! —
cachí-dì.

² Te òré-ni-áⁿ ñí xiní-í ìⁿ
cuàyú cuixíⁿ yódó ñaha ìⁿ
sá yódó ñaha xii-dì, te sá
yódó ñaha xii-dì-áⁿ néhé-xí

ìⁿ arcú sá cúú tnúxií-xi, te
ní nduu táhú-xi ìⁿ coróná,
te ní ndacu-xi ní cunu-xi te
ducaⁿ-ní ta cunu-xi cuáháⁿ.

³ Te òré ní xócání-gã tutú
líhli cùu uú ñúhú sèyú ndéé
sátá tutú sá ñí nadúcúⁿ
nuu-áⁿ, te ní tecú dóho-í ní
cáháⁿ tucu ingá quití cùu uú
xínutní-áⁿ, te cächí-dì:

—¡Taquixi cundehe-n! —
cachí-dì.

⁴ Te òré-ni-áⁿ ñí xiní tucu-í
ìⁿ cuàyú tícuèhé ní quee-dì
cuáháⁿ-dì, te yòdo ñaha ìⁿ
sá yódó ñaha xii-dì, te sá
yódó ñaha xii-dì-áⁿ ñí níhí-xi
tnúhu ndee ìní sá dáticánuu-xi
ñáyiú vá cùndecu ndihi tñaha
váha-gá-yu, te ngüíta ñáyiú
cahni tñahá-yu, te ní nduu
táhú-xi ìⁿ yuchí cáhnú vñhi.

⁵ Te òré ní xócání tucu
Yaa-áⁿ ingá tutú líhli cùu uní
ñúhú sèyú ndéé sátá tutú sá
ñí nadúcúⁿ nuu-áⁿ, te ní tecú
dóho-í ní cáháⁿ quití cùu uní
xínutní xíáⁿ, te cächí-dì:

—¡Taquixi cundehe-n! —
cachí-dì.

Te òré-ni-áⁿ ñí xiní tucu-í
ìⁿ cuàyú tnuú te yòdo ñaha
tucu ìⁿ sá yódó ñaha xii-dì,
te sá yódó ñaha-áⁿ núndaha-xi
úú yaxiⁿ libre. ⁶ Te ní tecú
dóho-í ní cáháⁿ ìⁿ sá ñí cáháⁿ
tnuú cue quití xínutní-áⁿ, te
cächí-xi:

—Ìⁿ cuàrtú-nã triú níhí-ndó
sã ìⁿ díhúⁿ denariú, te uní
cuàrtú-nã cebàdá níhí-ndó sã
ìⁿ tucu díhúⁿ denariú, dico
acítí ndihi ndudí ndéhé yoho
yàha stilé chí vá ndíhí nihnu —
duha cächí sá càháⁿ-áⁿ.

⁷ Te òré ní xócání tucu
Yaa-áⁿ tutú líhli cùu cùmí
ñúhú sèyú ndéé sátá tutú sá

nĩ nadúcúⁿ nuu-áⁿ, te ní tecú tucu dóho-í ní cáháⁿ tucu ingá quití cùu cumí xĩnutnĩ-áⁿ, te càchí-dì:

—¡Taquixi cundehe-n! — cachí-dì.

⁸ Te òré-ni-áⁿ nĩ xiní tucu-í ìⁿ cuáyú yàhá, te yòdo ñaha tucu ìⁿ sá yódó ñaha xii-dì, te sá yódó ñaha xii-dì-áⁿ nání-xí Sã xihí, te xiãⁿ sáhní-xí ñáyiu, te sá tá tá xiãⁿ nchícúⁿ sá nèhé núú ndécú ñáyiu ní xihí. Te cúmí xichi cùu ñuyíú, te sá sáhní ñaha xii ñáyiu-áⁿ nĩ níhí-xi tnúhu ndee ìní danàa-xi ñáyiu ìⁿ xichi ñuyíú, te davá-yu cahni ñaha-xi ndihí yuchí, te cada-xi sá cóo tnámá te cuú-yu, te cada tucu-xi sá cóo cuèhé cahni-xi ñáyiu, te diu-ni tucu-xi cada sá ncháá quití dééⁿ cahni-dì ñáyiu.

⁹ Te òré ní xócání tucu Yaá-áⁿ tutú lĩhli cùu uhúⁿ ñúhú sèyú ndée sá tá tütú sá nĩ nadúcúⁿ nuu-áⁿ, te òré-áⁿ nĩ xiní-í nũtnĩ ìⁿ núú sácòdó sã ndúú tãhú Yã Ndiõxí, te ndàa caha xiãⁿ ní xiní-í xĩndecu nchaa àlmá ñáyiu ní sahní-güedé núú ñuyíú sã cuendá tnúhu Yá Ndiõxí, ndihí sá cuendá sá nĩ cáháⁿ váha-yu cuendá-gá. ¹⁰ Te nchaa àlmá-áⁿ nĩhí xicáháⁿ-xi, te xãhaⁿ-xi xii Yá Ndiõxí:

—Yòhó Dútú Ndiõxí cúu-n Yaá ñá túú tnàhí cuéchi-xi, te ñá túú tnàhí quée cáva-n quide-n ìⁿ sá cáháⁿ-n. ¿Te ná ndée ama dandòho-n ñáyiu ndècu ñuyíú nachinaa-n cuendá sá nĩ quide ñahá-yu xii-ndí-í? —càchí cue àlmá-áⁿ xãhaⁿ-xi xii-gá.

¹¹ Te sá tá dúcáⁿ te nchaa cue àlmá ñáyiu-áⁿ nĩ níhí-xi dóo cuixíⁿ ní quée cuĩhnu-xi, te ní xĩtnúhu ñaha xii-xi sá ná ndètatú-xi te cundetú tnaa-xi ndée ná xĩnu cava cuú ñáyiu nàcuáa ndèé tnuní dàtná ní xihí cue ñáyiu dii àlmá-xi cùu-xi. Te ñáyiu sa ní xihí-áⁿ ìⁿ-ni cùu-yu ndihí ñáyiu vitna cuú-áⁿ chi mee-ni chiuⁿ Xítóhó Jesucristú quidè-yu, te diu-ni ichi-gá ndécú-yu.

¹² Te òré ní xócání tucu Yaá-áⁿ tutú lĩhli cùu iñú ñúhú sèyú ndée sá tá tütú sá nĩ nadúcúⁿ nuu-áⁿ, te ní xiní-í súní nĩhí ní quidi-xi ñuyíú, te ní cutnuu nĩhí núú nchícanhii dàtná ìⁿ dóo tnúú, te ní cuu tìcuèhé nĩhí nĩhí núú yóo. ¹³ Te ní xiní-í ní ngoyo chódíní ñuyíú-a dàtná ngóyó ngúxí yihí òré quéné tãchí nĩhí. ¹⁴ Te ní xiní-í ní nadúcúⁿ nuu andiu dàtná nádúcúⁿ nuu ìⁿ tutú te ní ndóñúhú-xi, te nchaa tĩndúú nĩ xica ndehe-xi núú ndécú-xi, te ducaⁿ nĩ xica ndehe tucu nchaa tĩndúú yìchí ndécú xití ndute lámár. ¹⁵ Te nchaa cue tée yĩndaha ñáyiu ní nguivãha-güedé, ndihí nchaa dava-gá cue tée ío tàxi tnuní, ndihí nchaa ñáyiu cuica, ndihí nchaa cue tée tàxi tnuní sandádú, ndihí cue sandádú cue tée ío váha sàá díquí-xi nàcuáa cada-güedé nàa-güedé, ndihí nchaa ñáyiu ñá túú tnàhí dàñá quée núú chíúⁿ patróoⁿ-xi, ndihí nchaa ñáyiu dàñá quée núú chíuⁿ patróoⁿ-xi. Te dava ñáyiu-áⁿ nĩ nguivãha-yu xití yaú, te davá-yu ní nguivãha-yu

nchaa tnuú cava. ¹⁶ Te xáháⁿ-yu nchaa tindúú ndihi nchaa cava:

—Chí táciuⁿ chiváha ñaha-ndo xii-ndí cuendá sá vǎ quíní ñáhá Yáá ío tàxi tnuú núcõo núú xilé váha, ndihi cuendá sá vǎ dándòho ñaha Yáá cáá dàtná cáá ñⁿ mbéé quití ní dánicuèhé-güedé, chí Yáá-áⁿ ío cùdééⁿ-gǎ núú-ndí —duha càchí nchaa ñáyi-áⁿ xáháⁿ-yu xii nchaa tindúú-ǎⁿ ndihi nchaa cava-áⁿ.

¹⁷ Te vitna ní sǎa nduu ío cùu cahnu nduu tnúndòho tnúhu ndáhú, te vǎ yõo ñⁿ cundee ìní-xi yáha nchaa tnúndòho-a.

7

Ñáyi isràél ñáyi naníhi tǎhú

¹ Te sátá xǎⁿ te ní xiní-í cùmí tnáhá espíritú xínú cuèchi núú Yǎ Ndiõxí xĩnutnĩ-xi ndi cùmí xio ñuyíú, te cue espíritú-áⁿ ní ngani-xi táchí cuendá sá vǎ cuícó-gǎ-xi ni lámár, te ni díquí yutnu, te ni ñⁿ xichi ñuyíú vǎ cuícó-gǎ-xi. ² Te cue espíritú-áⁿ ndécú ndihí-xi tnúhu ndee ìní danàa-xi sá ío lámár ndihí sá ío ñuhu yichí, te ní xiní tucu-í ingá espíritú xínú cuèchi núú Yǎ Ndiõxí ní quee nchita-xi ndàa nacuáa quène nchícanhii, te nùndaha-xi seyú Yǎ Ndiõxí Yáá ndécú nchaa nduu nchaa quíú, te níhi ní cáháⁿ-xi xáháⁿ-xi xii ndi cumí cue espíritú-áⁿ:

³ —Vǎ dánàa-ndo sá ío lámár, te ni vǎ dánàa-ndo yutnu, te ni ñⁿ sá ío ñuyíú vǎ dánàa-ndo, chí cundet-ndo

ndéé ná tàxi ndecu-ndí ñⁿ seña tneé nchaa ñáyi xĩnu cuechi núú Tǎtá-ó Dútú Ndiõxí —duha càchí espíritú-áⁿ xáháⁿ-xi xii ndi cumí espíritú xĩnutnĩ ndi cùmí xichi ñuyíú.

⁴ Te ní tecú dóho-í ní cáháⁿ ñⁿ sá ní cáháⁿ, te ní cachí-xi sá núú ndí ùxúú xichi cue ñáyi isràél te ní xĩnu ñⁿ ciendú údico cùmí mĩl-yu ní ngúndecu seña tneé-yu. ⁵ Te núú ñⁿ ciendú údico cùmí mĩl ñáyi-áⁿ, te ní xĩnu ùxúú mĩl cue ñaní tnáhá ndíi Jüdá ní ngúndecu seña tneé-yu, te ùxúú mĩl cue ñaní tnáhá ndíi Rùbén, te ùxúú mĩl cue ñaní tnáhá ndíi Gǎd, ⁶ te ùxúú mĩl cue ñaní tnáhá ndíi Àser, te ùxúú mĩl cue ñaní tnáhá ndíi Neftálí, te ùxúú mĩl cue ñaní tnáhá ndíi Manàsés, ⁷ te ùxúú mĩl cue ñaní tnáhá ndíi Míò, te ùxúú mĩl cue ñaní tnáhá ndíi Lèví, te ùxúú mĩl cue ñaní tnáhá ndíi Isàcár, ⁸ te ùxúú mĩl cue ñaní tnáhá ndíi Zabùlón, te ùxúú mĩl cue ñaní tnáhá ndíi Chèé, te ùxúú mĩl cue ñaní tnáhá ndíi Benjàmín, nchaandi túhú ñáyi-áⁿ ní ngúndecu seña tneé-yu.

Cuéhé víhi ñáyi nihnu dóo cuixíⁿ

⁹ Te sátá xǎⁿ te ní xiní-í cuéhé víhi ñáyi, ñáyi ñⁿ ñⁿ nacióⁿ, ndihí ñáyi ñⁿ ñⁿ ñuú, ndihí ñáyi càháⁿ ndi dííⁿ ndi dííⁿ núú tnúhu, ndihí ñáyi ní xĩndecu ñⁿ ñⁿ xichi, te nchaa ñáyi-áⁿ xĩnutnĩ-yu ndàa núú Yáá táxi tnúni núcõo núú xilé váha, ndihí núú Yáá cáá dàtná cáá ñⁿ mbéé quití ní dánicuèhé-güedé, te vǎ yõo ñⁿ ndàcu cahu ñaha xií-yu chí

cuéhé víhī-yu, te nchaá-yu
xǐxǐhnu-yu mee-ni dóo cuixíⁿ,
te nùndahá-yu nchaá-yu ìⁿ
caa ndàha yutnu ñúú. ¹⁰ Te
nchaá-yu níhi xǐcáháⁿ-yu, te
càchí-yu:

Yaá táxí tnùní núcõo núú xilé
váha cùu-gá Ndiõxí-ó,

te ñiu-gá ndihi Yaá cáá dàtná
cáá ìⁿ mbéé quiti ní
dánicuèhé-güedé ní
dácãcu nihnu ñaha-gã
xii-o núú ùhú núú
ndàhú.

Duha càchí nchaa ñáyiú-áⁿ.
¹¹ Te nchaa espíritú xínú
cuèchi núú Yã Ndiõxí ní
nadúcúⁿndèé-xi xǐnutnǐ-xi
ní cãndéé núú núcõo Yaá
núcõo núú xilé váha, ndihi
núú xǐnucóo cue téé cùu
sacuéhé, ndihi cue ndi cùmí
quiti xǐnutnǐ-áⁿ, te nchaa-xi
ní ngüñí xítí-xí te ní ngúnu
ndeyi-xi núú Yáá núcõo núú
xilé váha-áⁿ, te nchaa-xi ní
ngüíta-xi chĩñuhu ñaha-xi
xii-gá, ¹² te càchí-xi:

Na càháⁿ ndáá-ndí núú yòhó
Tãtã-ndǐ Dútú Ndiõxí
sá ío càhnu cuu-n, te
ndàcu-n quide-n nchaa
sá vãha cuñí-n, te ío
váha quide-n, te ndècu
ndihi-n nchaa sá xini
tnùní-n,

te chĩñuhu ñaha-ndí xii-n, te
ducaⁿ ndàcáⁿ táhú-ndǐ
núú-n cuëndá nchaa sá
quidé-n, te nèhe-ndí sá
yĩñuhu núú-n,

te tnúhu càháⁿ-ndí-a cùu-xi
tnúhu ndáá, te ñiu-ni
duha càháⁿ-ndí ndéé
núú cuáháⁿ núú véxi.

Duha càchí nchaa cue
espíritú-áⁿ xãhaⁿ-xi xii Yaá
núcõo núú xilé váha-áⁿ.

¹³ Te ìⁿ cué téé cùu sacuéhé
xǐndecu-áⁿ ní xicáⁿ tnúhú-dé
núú-í, te càchí-dé:

—¿Yóndi cùu ñáyiú dàcáⁿ
xǐxǐhnu dóo cuixíⁿ-ãⁿ, te
ndèé véxi-yu núú dàcáⁿ
xĩndáã-yu-í? —càchí-dé.

¹⁴ Te yúhú ní xãhaⁿ-í:

—Tãtã, ñã túú xini-í, dico
mee-n xini-n —duha ní
xãhaⁿ-í xii-dé.

Te dàtnùní ní cachí
tnúhu-dé xii-í ná cúú ñáyiú-áⁿ,
te càchí-dé:

—Nchaa ñáyiú-a cùu-yu
ñáyiú ní quee núú ío víhí
tnúhu ndòho tnúhu ndàhú sá
vã cùndèe ini-ó te véxi-yu iha,
te cùu-yu ñáyiú sa ní nduu
ndoo ní nduu nine ini-xi
cuëndá sá ñi sati ñĩñí Yáá
cáá dàtná cáá ìⁿ mbéé quiti
ní dánicuèhé-güedé, cuëndá
xiãⁿ vitna ní ndihí-yu ní
nduu cuixíⁿ dóo xǐxǐhnu-yu.

¹⁵ Te núú xiãⁿ vitna ní nduu
táhũ-yu ndècú-yu núú ndècú
Yã Ndiõxí Yaá táxí tnùní
núcõo núú xilé váha, te cuéi
nduu cuéi niú xínú cuèchí-yu
núú-gã vitna, te ñiu-gá xító
ñàha-gá xii-yu. ¹⁶ Te vitna ní
sáá-yu núú-gã cundecú-yu
te vá ndóhó-gã-yu docó, te
ni vã quini-gã-yu ndohó-yu
yíchí-yu ndute, te ni vã
quini-gã-yu ndohó-yu cahni
nchíanchii, te ñã túú-gã ná
cahni ndohó-yu. ¹⁷ Te ducaⁿ
chi Yaá cáá dàtná cáá ìⁿ mbéé
quiti ní dánicuèhé-güedé
ndècú-gã núú nùtnǐ xilé váha
núcõo Yã Ndiõxí Yaá táxí
tnùní, Yaá-áⁿ coto ñaha-gã

xií-yu dàtná quidé ìⁿ toli oré xító-dě mběé-dě, te candeca ñaha-gã xií-yu quíhíⁿ núú tǒ ndute, te ndute-áⁿ cúú-xí ndùte candeca iní-yu, te Yá Ndiǒxí cada-gá sá vã quíní-gá-yu tnúhu ndàhyú — duha ní cachí tnúhu téè cùu sacuéhé-áⁿ xií-í.

8

Cuèndá tícùú sá nǐ cuáha mee-ni dǐhúⁿ cuàáⁿ

¹ Te sáta dúcáⁿ te Yaá cáá dàtná cáá ìⁿ mbéé quiti ní dánícuèhé-güedé ní xócání-gã tutú líhli cùu usá ñúhú sèyú ndéé sáta tutú sá nǐ nadúcúⁿnuu-áⁿ, te òré-áⁿ nǐ cunahi sùúní nàvíí-ná ní cuu andiú dàtná cuádava òré. ² Te ní xiní-í úsá tnàhá espíritú xínú cuèchi núú Yá Ndiǒxí xǐnutnǐ-xi núú núcǒo-gá, te ní níhí-xi ìⁿ caa cǔtú xǐnehe-xi. ³ Te dàtnùní ní xiní tucu-í ìngá espíritú xínú cuèchi núú-gã ní quexìo-xi nehe-xi ìⁿ tícùú ní cuáha mee-ni dǐhúⁿ cuàáⁿ te ñùhu vai dúsa sá sàháⁿ tnámí, te ní ngúnutnǐ espíritú-áⁿ núú ndécú sã nǐ cuáha mee-ni dǐhúⁿ cuàáⁿ núú sácǒdó sã ndúú tǎhú Yá Ndiǒxí, te xǐáⁿ nútñǐ-xi ndàa núú-gã, te dúsa sá sàháⁿ tnámí-áⁿ cahmi espíritú-áⁿ núú sácǒdó sã ndúú tǎhú-gã-áⁿ cuèndá ñúhmá dǔsa-áⁿ cundìhi-xi nchaa tnúhu càháⁿ ñáyíu càháⁿ ndìhi ñaha xii-gá, nchaa ñáyíu cùu cuèndá-gá. ⁴ Te nùndaha espíritú-áⁿ tícùú ñúhú dǔsa sá sàháⁿ tnámí càyú, te quène ñúhmá nútñǐ-xi núú Yá Ndiǒxí, te ñúhmá-áⁿ cundìhi-xi nchaa

tnúhu càháⁿ ñáyíu càháⁿ ndìhi ñaha xii-gá, nchaa ñáyíu cùu cuèndá-gá. ⁵ Te ní queheⁿ espíritú-áⁿ tícùú te ní dáchitú-xi ñuhú yódó núú sácǒdó sã ndúú tǎhú Yá Ndiǒxí, te ní xítenuu-xi ñuyíú, te òré ducaⁿ nǐ quide-xi te ní cáháⁿ víhí ñùhu, te ío dusaⁿ nǐ quide-xi ñuyíú, te ní sáá nduté, te níhi víhi ní tnáa.

Ndi úsá espíritú ní tíú-xi ìⁿ caa cǔtú xǐnehe-xi

⁶ Te ndi úsá cue espíritú xǐnehe ìⁿ caa cǔtú-áⁿ nǐ ngúndecu túha-xi cuèndá tíú-xi.

⁷ Te espíritú díhna nuu nǐ tíú-xi cútú néhé-xí, te ñuyíú-a ní ngoyo ñíñi dácánuu-xi ndìhi ñuhú ndìhi níñí, te luha-ná te cuu dava ñuyíú nǐ càyú, te luha-ná te cuu dava tucu nchaa yutnu ío ñuyíú nǐ càyú, te luha-ná te cuu dava tucu nchaa cùhú ío ñuyíú nǐ càyú.

⁸ Te espíritú cúú úú ní tíú-xi cútú néhé-xí, te dàtná cáá ìⁿ tǐndúú cáá ìⁿ sá nǐ ngava xítí làmár te nchícúⁿ ñuhú, te luha-ná te cuu dava ndute làmár-áⁿ nǐ nduu-xi níñí. ⁹ Te luha-ná te cuu dava nchaa quiti xǐxúhuⁿ xítí làmár-áⁿ nǐ xíhí-güedi, te luha-ná te cuu dava nchaa bàrcú ní quée naa-xi xítí ndute.

¹⁰ Te espíritú cúú ùní ní tíú-xi cútú néhé-xí, te ní ngava ìⁿ chódíní cáhnú ndéé andiú ñuyíú te nchícúⁿ ñuhú-di, te ñuhú-áⁿ cáá dàtná cáá ñùhú iti. Te luha-ná te cuu dava nchaa yúte ní ngava chódíní-áⁿ, te luha-ná

te cuu dava tucu nchaa núú quènihni ndute ní ngava-di.

11 Te chódíní-ǎⁿ nání-dí: Yücü Üá. Te ndute xica nchaa yúte-áⁿ ndihi nchaa ndute quènihni-áⁿ ní cuu úá-xi dàtná yúcú ùá, te ío cuéhé ñáyiú ní xihí sá dúcáⁿ ní cuu úá ndute-áⁿ.

12 Te espíritú cúú cùmi ní dácàháⁿ-xi cútú néhé-xí, te luha-ná te cuu dava nchíanchii ñá túú ní dàyehé-xi, te ducaⁿ lùha-ná tucu cuu dava yóo ñà túú ní dàyehé-di, te ducaⁿ lùha-ná te cuu dava tucu nchaa chódíní ñà túú ní dàyehé-güedi, te luha-ná te cuu dava nduu ñà túú ní dàyehé nchíanchii, te ducaⁿ lùha-ná te cuu dava niú ñà túú ní dàyehé yóo ndihi nchaa chódíní.

13 Te sátá dúcáⁿ te ní xiní-í xícó ìⁿ espíritú xínú cuèchi núú Yǎ Ndióxi núú tàchí, te ní tecú dóho-í níhi càháⁿ-xi, te càchí-xi:

—Ío ndàhú ndoho nchaa ñáyiú xíndecu ñuyíú òré ná dàcaháⁿ úní-gá cue espíritú cùmání cútú xínehe-xi, chí sa xíndecu túha-ná-xi sá dácàháⁿ-xi!— duha càchí espíritú-áⁿ.

9

1 Te espíritú cúú ùhúⁿ ní tiú-xi cútú néhé-xí, te òré-áⁿ ní xiní-í ní quee ìⁿ espíritú andiú te càa-xi datná cáá ìⁿ chódíní, te ní ngava-xi ñuyíú, te ní níhí-xi ìⁿ ndacaá néhé-xí cuèndá nacaáⁿ-xi yuyèhe yaú cùnú víhí. 2 Te ní nacaáⁿ-xi yaú-áⁿ te ní ngüita-xi ní quene ñúhmá dàtná quéné ñúhmá ìⁿ xítnú cáhnú vîhi, te ní quene táchí ní xítenuu-xi

ñúhmá-ǎⁿ te ní sadí-xi núú nchíanchii, te ní cunee ñuyíú. 3 Te xití ñúhmá-ǎⁿ

ní quene tíca làngóstá, te ní xítenuu-di ñuyíú, te dééⁿ-güedi dàtná dééⁿ nchacua. 4 Te

ní ngündecu ndihi-güedi tnúhu ndee ìní cuèndá sá dándòho-güedi mee-ni ñáyiú ñà túú ndèe seña Yǎ Ndióxi tneé-xi, te ñà túú ñà cada-di nchaa yutnu ndihi nchaa cùhú. 5 Te ñà túú tnúhu

ndee ìní ndécú ndihi-güedi sá cáhní-güedi ñáyiú, chí mee-ni sá dándòho ñaha-güedi xií-yu úhúⁿ yóo. Te òré

ní ngüita-güedi dándòho ñaha-güedi xií-yu te tàhú tnúhú núú dáquèe-güedi iñu-güedi dàtná quidé-xí núú dáquèe nchacua iñu-güedi.

6 Te ñáyiú-áⁿ xicáⁿ táhü-yu sá ndihi cuú-yu cuèndá sá ío ndòhó-yu dàquèe ñaha nchàa quiti-áⁿ iñu-di xií-yu te ñà cuíní-xi cuú-yu, te ìⁿ nduu ìⁿ nduu sàni ìní-yu cuú-yu te ñà túú cuíní-xi cuú-yu chí ñà túú tnúhu xihí sá cúú-xí-yu.

7 Te nchaa tíca làngóstá-áⁿ xíndaa-güedi dàtná ndaa nchaa cuàyú cue téé cuáháⁿ nàá, te díquí-güedi ñúhu ìⁿ sá cáá dàtná cáá còroná ní cuáha mee-ni díhúⁿ cuàáⁿ, te núú-güedi càa datná cáá núú cuè téé. 8 Te idi díquí-güedi

càa datná cáá idi díquí ñáyiú dihí, te núhu-güedi càa datná cáá núhu ndicaha. 9 Te yidúcúⁿnuu-güedi ìⁿ

sá cáá dàtná cáá càá, te ndíxíⁿ-güedi quide-xi datná quidé-xí núú vèxi cuéhé

víhí càrretá sá táñùhu cuayú
 cuáháⁿ-güedé ndihi-güedi
 núú nää-güedé. 10 Te
 ndéé iñu núú lùhmá-güedi
 dàtná ndéé iñu núú lùhmá
 nchacua, te iñu núú
 lùhmá-güedi-áⁿ dáquée-güedi
 ñáyu dándoho ñaha-güedi
 xí-yu, te ducaⁿ-ni càda-güedi
 dándoho ñaha-güedi xí-yu
 ndéé xínu úhúⁿ yóó. 11 Te
 nchaa tíca làngóstá-áⁿ táxi
 tnùní ñáhá espíritú sá táxi
 tnùní yaú cúnú víhí, te
 espíritú-áⁿ nání-xí Àbadón
 tnúhu hèbreú, te tnúhu griégú
 nání-xí Àpolión, te ndi ndúú
 tnúhu-áⁿ queé-xí: Sá dánàa
 ñáyu.

12 Te tnúndòho-a cuu-xi
 tnúndòho díhna nuu, te vitna
 cùmání úú-gá.

13 Te espíritú cúú iñú ní
 tiú-xi cútú néhé-xí. Te núú
 Yá Ndióxi nútñi ñⁿ sá ñi
 cuáha mee-ni díhúⁿ cuááⁿ núú
 sácódó sá ndúú tãhú-gá, te ndi
 cùmí xiquí-xi xíndecu ñⁿ caa
 ndiqui, te ní tecú dóho-í ní
 cáháⁿ ñⁿ sá ñi cáháⁿ nihnu ndi
 cùmí ndiqui-áⁿ. 14 Te sá càháⁿ
 nihnu ndiqui-áⁿ xãhaⁿ-xi xì
 espíritú cúú iñú sá ñi tiú
 cútú-ãⁿ:

—Cuáháⁿ nandaxi-n ndi
 cumí espíritú ndútú ndècu
 yúte càhnu nani Eúfratés —
 càhí sá càháⁿ-áⁿ xãhaⁿ-xi xì
 espíritú-áⁿ.

15 Te sátá dúcáⁿ te ní
 nandáxi ndi cùmí cue
 espíritú-áⁿ cuendá cahni-xi
 cuéhé víhí ñáyu, te sa yatni
 dàtná cuádava ñáyu xíndecu
 ñuyú cahni-xi, te ducaⁿ
 chi sa ndècu túha tnàhí
 cue espíritú-áⁿ ndétú-xí sáa

òré, àdi nduu, àdi yóó, àdi
 cuiá ducaⁿ càda-xi cahni-xi
 ñáyu. 16 Te ní xiní-í nchaa
 cue sandàdú cündihi-xi
 xixódó-güedé cuayú, te ní
 níhí-í tnúhu sá xínu úú cièndú
 millón-güedé.

17 Te duha xíndáa cue
 cuayú-áⁿ ndihi cue téé yòdo
 ñaha-áⁿ ñi xiní-í: Te cue téé-áⁿ
 yídúcúⁿ nuu ñⁿ sá yídúcúⁿ nuu
 pèchú-güedé, te luha ticuèhé
 te luha cui datná cui andiu,
 te luha cuááⁿ, te nchaa
 cuayú-áⁿ cáá díqui-güedi
 dàtná cáá díqui ndicaha, te
 yuhu-güedi quène ñuhú ndihi
 ñúhmá, ndihi àzufré nchícúⁿ
 ñuhú. 18 Te ío cuéhé ñáyu
 ñuyú ñi xíhí chi luha-ná te
 cudavá-yu ní xíhí sá cuendá
 ñuhú-áⁿ ndihi ñúhmá-ãⁿ ndihi
 àzufré-áⁿ. 19 Te ndihi núú
 lùhmá-güedi ndihi yuhu-güedi
 dándoho-güedi ñáyu, te núú
 lùhmá-güedi nèhe-xi díqui
 còó, te diu-ni dàtná cáá còó
 cáá ñihí lùhmá-güedi.

20 Te nchaa dava-gá ñáyu
 ní cácu ñá túú ñi xíhí núú
 nchaa tnúndòho-áⁿ ñà túú ní
 cuíni-yu dañá-yu ichi cuéhé
 ichi duha ndécú-yu, chi quide
 cahnu-ni-yu nchaa espíritú
 cündihi yucu ñávaha, ndihi
 nchaa sá càhí-yu cùu ndióxi
 ní cadúha cue téé ñuyú-a,
 te dava xíáⁿ ní cuáha mee-ni
 díhúⁿ cuááⁿ, te dava ní cuáha
 mee-ni díhúⁿ cuíxíⁿ, te dava
 ní cuáha sá nání bróncé, te
 dava ní cuáha mee-ni yúú, te
 dava ní cuáha mee-ni yùtnu,
 te nchaa xíáⁿ ñà túú cùtnuní
 núú-xi, te ní ñà túú tècú
 dóho-xi, te ní ñà ndácú-xí
 càca-xi. 21 Te ní sá sáhní

tnàhá-yu, te ni sã sáhní ndùu
tnahá-yu, te ni sã ndécũ-yu
ichi díí ìní, te ni sà dúhú
ndàchiuⁿ tnahá-yu ñá túú ní
cuíní-yu dàñá-yu.

10

*Ìn espíritú xínú cuèchi núú
Yã Ndiõxí néhé-xí ìn librú*

¹ Te sátá dúcáⁿ te ní xíní
tucu-í ìn espíritú cúnúu xínu
cuechi núú Yã Ndiõxí ní
quee-xi andiu, te yíhi-xi
xití vícò cuãguee-xi ñuyúú
te ndàa díquí-xi ndècu ìn
cóó yáhnchí, te núú-xi súúní
chàhnchí dàtná chàhnchí
núú nchicanchii, te ndi ndùú
díhiⁿ-xi càa datná cáá itá
ñuhu. ² Te nùndaha-xi ìn
librú líhli ní nandicá, te
sáhá cùha-xi ní sani-xi núú
ndute làmár, te sáhá dàtni-xi
ní sani-xi núú ñuhu yìchí.

³ Te espíritú-áⁿ ñíhi vihi
ní cáháⁿ-xi, te ní quide-xi
dàtná quidé ìn ndicaha oré
cánasàa-di, te òré ducaⁿ ñíhi
vihi ní cáháⁿ-xi te úsá xito ní
cáháⁿ ñuhu. ⁴ Te sátá ñí yáha
ní cáháⁿ ñuhu-áⁿ úsá xito,
te chido tñuní-í ìn núú tütú
nàcuáa ní cáháⁿ-xi ní cùu, te
mei òré-áⁿ ñí tecú dóho-í ní
cáháⁿ ìn sá ñí cáháⁿ andiu te
càchí-xi:

—Vá chidó tñuní-n nàcuáa
ní cáháⁿ ñuhu-áⁿ, ìní méé-ní-n
ná cùhuⁿ —duha càchí sá ñí
cáháⁿ-áⁿ.

⁵ Te espíritú sá nútñí ìn xio
sáhá-xi núú ndute làmár-áⁿ
ndíhi ingá xio sáhá-xi núú
ñuhu yìchí-áⁿ ñí xíní-í ní
ndonehe-xi ndaha cùha-xi,
⁶ te càchí-xi:

—Yá Ndiõxí Yaá ndécú
nchàa nduu nchaa quíú Yaá

ní cadúha ñuyúú, ndíhi andiu,
ndíhi làmár, ndíhi nchaa sá
iò, Yaá-áⁿ náhá ndáá-gá sá
yùhú càháⁿ ndáá-í, te vá cùyàa
vihi ⁷ te cada-xi nchaa nàcuáa
ndùu tñuhu ndùu yuhu ní
cáháⁿ-gá, tñuhu ní xáhaⁿ-gã
xii cue téé ní xínu cuechi
núú-gã, cue téé ní xóo cáháⁿ
tñuhu-gá ndéé sanaha, chi
òré ná tìú espíritú cúú úsá
cútú néhé-xí, te òré-áⁿ cada-xi
nchaa nàcuáa ndùu tñuhu
ndùu yuhu sá ñí xáhaⁿ-gã xii
nchaa cue téé-áⁿ —duha càchí
espíritú-áⁿ.

⁸ Te sátá dúcáⁿ te ní tecú
tucu dóho-í ní cáháⁿ tucu sá
ñí cáháⁿ andiu-áⁿ, te càchí-xi
xii-í:

—Cuaháⁿ te queheⁿ-n librú
líhli sá ñí nandicá nùndaha
espíritú-áⁿ, espíritú sá nútñí
ìn xio sáhá-xi núú ndute
làmár, te ìn xio sáhá-xi núú
ñuhu yìchí —duha càchí sá ñí
cáháⁿ-áⁿ.

⁹ Te yúhú ní sáháⁿ-í núú
ndécú espíritú-áⁿ xicáⁿ-í librú
líhli nèhe-xi-áⁿ, te ní cachí-xi:

—Iha te caxi-n, te cuvídí
yuhu-n dàtná cuvídí òré
xíhí-n ndudí ñúñú, dico xití-n
chi cada úá-xi —càchí-xi.

¹⁰ Te ní queheⁿ-í librú líhli
nùndaha espíritú-áⁿ ñí xexi-í,
te yuhu-í ní quide vídí-xi
dàtná vídí ndudí ñúñú, dico
sátá ñí ngava-xi xití-í te ní
quide úá-xi. ¹¹ Te ní cachí
tucu espíritú-áⁿ xii-í:

—Dacuití cáháⁿ tucu-n
nàcuáa càchí Yã Ndiõxí
cuèndá ñáyíu titní víhí nàción,
ndíhi cuèndá ñáyíu titní víhí
ñùú, ndíhi cuèndá ñáyíu càháⁿ
ndí dííⁿ ndí dííⁿ núú tñuhu,

ndihi cuendá cue tée yíndaha ñáyiu.

11

Cuendá úú cue tée cáháⁿ nàcuáa cächí Yă Ndiöxí

¹ Te ní níhí-í ñⁿ tnuyoo nàcuáa chicùhá-í ñⁿ sá chícùhá-í, te ní cáháⁿ ñⁿ sá ní cáháⁿ, te cächí-xi:

—Ndacuíñí te chicùhá-n vehe Yă Ndiöxí, te chicùhá tucu-n núú sácödó sã ndúú tãhú-gã, te cahu-n nã daha tñàhá ñáyiu chiñuhu ñaha xii-gã xíndecu. ² Dico

vá chícùhá-n ndàa quehé vehe-gá, chi xíaⁿ ñí nduu cuendá cue ñáyiu ñá túú cùu ñáyiu isràél, te ñáyiu-áⁿ nduu nuu-nã-yu núú ñí cuu ñúú-gá, te cadá-yu dàtná cächí iní méě-yu, te údico úú yóo ducaⁿ cadá-yu. ³ Te yúhú tendaha-í úú tñàhá cue tée cáháⁿ yuhu-í nàcuáa cächí Yă Ndiöxí, te úxúú ciendúú únídico nduu ducaⁿ cáháⁿ-güedé yuhu-í cada-güedé núù-í, te cuihnu-güedé dóó tnúú sã sácuihnu cue ñáyiu ndihú iní-xi —duha cächí sá cáháⁿ-áⁿ.

⁴ Te ndi ndúú cue tée-áⁿ cúú-güedé dàtná úú yutnu òlívú sá xínutñí núú Yă Ndiöxí, ndihi dàtná úú sá ndéé dité-xi, sá yíndòdo ñⁿ caa candíl núú dité-xi ndècu tucu núú-gã, te diu-gã cúú-gã Yaá yíndaha ñuyúú. ⁵ Te

ñáyiu na càni iní-xi ná cada ñaha xì-güedé te yuhu-güedé quene ñuhú cahmi ñaha-xi xì-yu, te ducaⁿ càda-güedé cahni-güedé nchaa ñáyiu na cùu úhú iní ñáhá xì-güedé.

⁶ Te ndi ndúú-güedé ndécú ndihi-güedé tnúhu ndee iní cada-güedé sá vã cúúⁿ dàú, te ducaⁿ càda-güedé nini cáháⁿ-güedé nàcuáa cächí Yă Ndiöxí, te ndacu-güedé nadatiù-güedé ndute nduu-xi níñí, te ndacu-güedé dandòho-güedé nchaa ñáyiu titní núú tnúhu ndòho, te ducaⁿ càda-güedé ná daha xito cächí iní méé-güedé.

⁷ Te nà yáha sá cáháⁿ-güedé nàcuáa ní cächí Yă Ndiöxí, te dàvá-áⁿ quene ñⁿ quiti dééⁿ yàú cùnú víhí sã ïo nèhé cáá, te quiti-áⁿ ngüíta-di nàá-di ndihi ndi ndúú cue tée-áⁿ te cahni ñaha-di xì-güedé.

⁸ Te yiqui cùñú cue tée-áⁿ cautùu-xi ñⁿ tnuú ñúú cáhnú núú ní sahní-güedé Xítohó Jesucristú núú cùrúxí, te diu Yaá-áⁿ cúú Xítohó-ó ndihi-güedé, te cächí ñáyiu sá ñúú-áⁿ cúú-xí dàtná ñúú Sòdomá ndihi nacióⁿ Ègiptú.

⁹ Te úní nduu dava cautùu yiqui cùñú-güedé xíaⁿ, te ñáyiu nchaa nacióⁿ, ndihi ñáyiu nchaa ñúú, ndihi ñáyiu cáháⁿ ndí dííⁿ ndí dííⁿ núú tnúhu, ndihi ñáyiu xíndecu nchaa xichi quini-yu yiqui cùñú-güedé, te vá dáñã-yu nguíndüxi. ¹⁰ Te nchaa

ñáyiu-áⁿ nduu vétú iní-yu sá dúcáⁿ cùú cue tée cáháⁿ nàcuáa cächí Yă Ndiöxí-áⁿ, te ïo cudíí ìní-yu, te nándi sá cuãha táhú tñáhã-yu sá cúdíí ìní-yu sá dúcáⁿ ñí xihí-güedé, te ducaⁿ chi diu-güedé ní quide ïo ní ndohó-yu. ¹¹ Te sátá ná yáhá úní nduu dava sá

dúcáⁿ cùú-güedé te Yá Ndiöxí dandòto ñaha-gá xii-güedé, te ndacóo-güedé, te nchaa ñáyiú na quíní sá ndótó-güedé te yùhú víhí-yu. ¹² Te ndi ndùú cue téé-áⁿ tecú dóho-güedé cáháⁿ ìⁿ sá cáháⁿ ndéé andiú, te cúñaha-xi xii-güedé:

—Chí táquène iha —duha cúñaha sá cáháⁿ-áⁿ xii-güedé.

Te cue téé-áⁿ quíhu-güedé ìⁿ xití vícò caa-güedé andiú, te nchaa ñáyiú cùú úhú iní ñáhá xii-güedé quíní ñáhá-yu xii-güedé caa-güedé andiú. ¹³ Te òré-áⁿ ñíhi víhi tnáa ñuyíú, te úxí xichí cùú-xi ñúú núú cùndecu-güedé-áⁿ te ìⁿ xichí ñúú-áⁿ naa, te cuú úsá míl ñáyiú, te nchaa dava-gá ñáyiú cácu vá cùú yùhú víhí-yu, te cachí-yu sá ìo càhnu cuu Yá Ndiöxí Yaa ndécú andiú.

¹⁴ Te tnúndòho-a cuu-xi tnúndòho cuu úú yáha, te vitna sa ndètu víi-ná tucu sáá tnúndòho cuu uní.

Espiritú cùú ùsá tíú-xi cútú néhé-xí

¹⁵ Te espíritu cùú ùsá ní tíú-xi cútú néhé-xí, te òré-áⁿ ñí tecú ñíhi ní cáháⁿ titní sá ñí cáháⁿ andiú, te càchí-xi:

Nchaa sá cùú cuèndá nchaa ñáyiú ñuyíú táxí tnùní-yu ní cùú ní nduu cuèndá Tátá-ó Dútú Ndiöxí táxí tnùní-gá,

Te tnàhá Yaa ní tendaha-gá ní sáháⁿ ñuyíú táxí tnùní-gá nchaa xíáⁿ, te diu-gá taxi tnùní-gá ní caa ní quíhíⁿ.

Duha ní cáháⁿ nchaa sá ñí cáháⁿ-áⁿ. ¹⁶ Te ndi òcò

cúmí cue téé sacuéhé xñucóo núú xilé váha ní ngüíñí xítí-güedé núú Yá Ndiöxí, te ní nuu núú-güedé ndàa núú ñúhú te ní ngüíta-güedé chíñùhu ñaha-güedé xii-gá, ¹⁷ te càchí-güedé:

Ìo ndacáⁿ táhú-ndí núú yòhó Dútú Ndiöxí,

Yaa ndacú quide nchaandi túhú sá váha,

te diu-ni-n ndècu-n ndéé cùtnàhá ní ngáva ñuyíú, te diu-ni-n ndècu-n vitna, te diu-ni-n cùndecu-n ndéé núú cuaháⁿ núú vèxi,

te ìo càhnu cuu-n te ní ngüíta-n ìo-gá táxí tnùní-n.

¹⁸ Te nchaa ñáyiú xñdecu ñuyíú xícudéⁿ-yu núú-n,

te vitna ní sáá nduu dàndohó-n-yu chí ñá túú cùú váha iní-n núú-yu,

te cada ndáá-n cuèchi nchaa ñáyiú sa ní xíhí,

te ní sáá tucu nduu cuañaha-n sá ndúú táhú nchaa ñáyiú ní xinu cuechi núú-n ñí cáháⁿ-yu tnúhu-n, ndíhi nchaa dava-gá ñáyiú cùú cuendá-n, chí ñáyiú-áⁿ néhè-yu sá yíñùhu núú-n,

te cuèi ñáyiú cùnuu ndíhi ñáyiú ñá túú cùnuu cuañaha-n sá ndúú táhú-yu,

te ní sáá tucu nduu dànaa-n nchaa ñáyiú sàhni tnaha ñáyiú-xi.

Duha càchí ndi òcò cúmí cue téé sacuéhé-áⁿ xáhaⁿ-güedé xii Yá Ndiöxí.

19 Te ní xiní-í ní nacaáⁿ yuyèhe vehe Yá Ndiöxí andiü, te xití vehe-gá-áⁿ nĩ xiní-í ndécú cajú ñúhú sã yódó tnùnì nàcuáa ní cundáa cada-gá sá cúú-xí ñäyiu, te òré-áⁿ nĩ xiní-í ní sáá nduté, te ní cáháⁿ ñúhu te ío dusaⁿ nĩ quide-xi, te níhi vñhi ní tnáa, te súúni càhnu dáú ññí nĩ cuuⁿ.

12

Cuèndá ñⁿ ñadìhí ndihì cuèndá ñⁿ quiti dééⁿ nánì dràgón

1 Te ío vñhi ní quide-xi ñⁿ sá nĩ quide-xi andiü, te ní xiní-í ñⁿ ñadìhí te dóó níhnú-áⁿ quide-xi datná quidé-xí nũú nchĩcanchii, te ndàa núú sàhá-aⁿ quide-xi datná quidé-xí nũú yóó, te ñúhu ñⁿ coroná díquí-aⁿ te ndèé úxúú chódínì. 2 Te ñúhu déhe-aⁿ te càna saa-aⁿ sá quidé úhú ñáhá-xí xì-aⁿ chi sa ndètu vií-nã cacu déhe-aⁿ. 3 Te dàtnùnì ní quide tucu-xí sá nĩ quide-xi andiü, te ní xiní-í ñⁿ quiti càhnu quiti ticuehé, quiti dééⁿ nánì dràgón, te ndèé úsá díquí-di ndihì úxí ndiqui-di, te ñⁿ caa coróná ñúhú ñⁿ caa díquí-di-áⁿ. 4 Te quiti-áⁿ luha-ná te cuu dava nchaa chódínì dängöyo-di ñuyú ndihì lúhmá-di, te quiti-áⁿ nì ngúnu tnñ-di núú ñaha ndètu vií-nã cacu déhe-xi-áⁿ cuèndá caxi-di déhe-aⁿ òré cacu nì cùu. 5 Te ñaha-áⁿ nĩ cacu déhe-aⁿ te tée cùu-dé, te té lñhì-áⁿ ío cunuü-dé taxi tnùnì-dé nchaa ñäyiu ñuyú, te mee Yá Ndiöxí ní nacuaca ñaha-gã xii té lñhì-áⁿ cuèndá cundecu ndihì ñaha-dé xii-gá núú ndécú-gã

táxi tnùnì-gá. 6 Te ñadìhí-áⁿ nĩ xinü-aⁿ cuáhá-aⁿ xití yucu núú nĩ quide túha Yá Ndiöxí cundecu-aⁿ cuèndá xiáⁿ nñhí-aⁿ caxi-aⁿ, te ducaⁿ nñhí-aⁿ sá caxí-áⁿ úxúú cièndú únídico nduu chi ducaⁿ nduu cundecu-aⁿ xiáⁿ.

7 Te sátá dúcáⁿ te andiü nĩ xiní-í espíritú cúnüu xinü cuechi núú Yá Ndiöxí nánì Mìguél, ndihì nchaa dava-gá espíritú cundìhì-xi, te nchaa espíritú-áⁿ nàa-xi ndihì quiti dééⁿ nánì dràgón ndihì nchaa espíritú cundìhì-di. 8 Te quiti-áⁿ ñà túú ní ndàcu-di ndihì nchaa espíritú cundìhì-di, te ñà túú ní nñhí-gã-di núú cundècu-di andiü ndihì nchaa espíritú cundìhì-di-áⁿ. 9 Te cue espíritú xínú cuèchi núú Yá Ndiöxí-áⁿ nĩ dängává-xí quiti dééⁿ nánì dràgón-áⁿ ndihì nchaa espíritú cundìhì-di ñuyú, te quiti-áⁿ cúú-dí mèi sácúhná àdi sá càchí-ó cùu yucu ñávaha, te diu xiáⁿ ní dándàhú-xi ñäyiu nñhì ñuyú, te diu-ni xiáⁿ ní nduu-xi cóó nĩ dándàhú-xi ñäyiu ndéé sanaha.

10 Te ní tecú dóho-í níhi ní cáháⁿ tucu ñⁿ sá nĩ cáháⁿ andiü, te càchí-xi:

—Vitña te Yá Ndiöxí ní quide-gá ní ngündecu ñäyiu ndihì-gá, te ío càhnu cuu-gá, te ío tàxi tnùnì-gá, te tnáhá Crìstú Yaá ní tendaha Yá Ndiöxí ní quixi ñuyú-a ío tàxi tnùnì-gá, te ducaⁿ chi sa ní xócúñí sácúhná sã súúni nùnüu sacáⁿ cuèchi núú Tãtá-ó Dütú Ndiöxí cuèndá nchaa ñäyiu ndècu

ndihi-o ichi-gá, te nduu niú ducaⁿ sàcáⁿ cuéchi-xi núú-gă cuendá-yu ni cùu. ¹¹ Dico ní ndacú-yu ní cunúu-yu núú sàcuíhná sã dúcáⁿ sàcáⁿ cuéchi cuendá-yu-áⁿ ní cùu, te ducaⁿ nĩ cunúu-yu sá cuendá Yaá cáá datná cáá ìⁿ mbéé quiti ní dancuèhé-güedé, chi Yaá-áⁿ nĩ sati níñi-gă te ní xihí-gá sá cuendá-yu, te ducaⁿ nĩ cunuu tucú-yu sá cuendá sá sandáá iní ñáhă-yu xii Yaá-áⁿ, te ñá túú ní yuhú-yu cuú-yu sá cuendá-gá. ¹² Te vitna ío chí cúdí ìní nchaa nchòhó espíritu xínú cuéchi núú Yă Ndiöxí, ndihi nchaa nchòhó ñáyiú ndècu andiú, dico ìndàhú ní cuu nchaa ñáyiú xĩndecu nihí ñuyú! Chi súúni cùdééⁿ sàcuíhná nĩ ngava-xi te nándi cada ñaha-xi xii-yu, te ducaⁿ chi cùnuni iní-xi sá sàcú duha-ná nduu cudí-xi cundecu-xi — duha càchí sá nĩ càháⁿ andiú.

¹³ Te sátá nĩ quee quiti dééⁿ nání dràgón-áⁿ andiú nĩ ngava-di ñuyú quiti cùu mei sàcuíhná-áⁿ, te quiti-áⁿ nĩ chinchícúⁿ-di ñadihí ñaha ní cacu déhe téé-xi-áⁿ. ¹⁴ Te ñadihí-áⁿ nĩ nduu táhú-aⁿ ní quene úú ndíxi-aⁿ, te càa datná cáá ndíxiⁿ ìⁿ yacòlo cahnu vihi cuendá ndava-aⁿ núhú-aⁿ yucu núú nĩ cachí Yă Ndiöxí cundecu-aⁿ, te yàcáⁿ cundecu-aⁿ úní cuía daya cuendá sá vă nihí ñáhă quiti dééⁿ quiti nani dràgón-áⁿ te xiáⁿ nihí-aⁿ sá cáxi-áⁿ, te quiti-áⁿ cúú tucu-di datná ìⁿ cóo dééⁿ. ¹⁵ Te quiti-áⁿ nĩ quene cuéhé ndute yuhu-di, te ndute ní quene yuhu-di-áⁿ

nĩ cuu-xi ìⁿ yúte, te ducaⁿ nĩ quide-di cuendá ndute-áⁿ cuido-xi ñadihí-áⁿ ní cùu. ¹⁶ Te ñuhu yichí ní chindee-xi ñadihí-áⁿ, chi ní ndátá te ní quée naa-ni ndute ní quene yuhu quiti-áⁿ. ¹⁷ Te sá dúcáⁿ nĩ quide-xi xiáⁿ ní cudééⁿ víhí quiti-áⁿ núú ñadihí-áⁿ, te ní xica-di cuáháⁿ-di núú xĩndecu nchaa dava-gá cue déhe ñadihí-áⁿ cuendá nàá ndihi ñaha-di, te ñáyiú-áⁿ cúu-yu ñáyiú tñi nchaa tnúhu càháⁿ Yă Ndiöxí, te nchicúⁿ nihnú-yu nchaa tnúhu sá càháⁿ váha cuendá Xitohó Jesucristú.

13

Cuendá úú quiti

¹ Te yuhú ní ngunu tñi-í yuhu làmár, te ní xiní-í ní quene ìⁿ quiti te ndèé úsá díquí-di te úxí ndiqui-di, te núú ìⁿ ìⁿ ndiqui-di-áⁿ ndécú ìⁿ caa coroná. Te ìⁿ ìⁿ díquí-di-áⁿ ndèé tnúhu sá càháⁿ úhú-xi cuendá Yă Ndiöxí. ² Te quiti-áⁿ cáá-dí datná cáá cuíñí, te sáhă-di càa datná cáá sáhă öso, te yuhu-di càa datná cáá yuhu ndicaha. Te quiti dééⁿ nání dràgón ní sáñaha-di tnúhu ndee ìní xii quiti-áⁿ cuendá taxi tñini víhí-dí, te dràgón-áⁿ nĩ sáñaha-di núú ndécú-dí taxi tñini-di xii quiti ní quene xití làmár-áⁿ, te ducaⁿ nĩ quide-di cuendá sá nihí ndèé quiti-áⁿ cunuu-di. ³ Te ìⁿ díquí quiti ní quene xití làmár-áⁿ càhú víhí càa ní nícuèhé, te sa ndètu

vii-nã cuú-di sànuu dico ní ndúha-di, te nihí ñuyíú ní níhí ñáiyu tnúhu sá dúcáⁿ ní cuu, te ío ní cuñúhu-yu te ní tuhá-yu quiti-áⁿ. ⁴ Te nchaa ñáiyu-áⁿ ní cachí-yu sá ío càhnu cuu quiti déeⁿ quiti nàni dragón-áⁿ cuendá sá ní sãñaha-di tnúhu ndee ìní sá táxí tnùní quiti ní quene xití làmár-áⁿ, te ní ngúíta-yu ní chiñuhú-yu quiti ní quene xití làmár-áⁿ, te càchí-yu:

—Vá yõ ìⁿ nũtnahá ñáhá xii quiti-a, te ní vã yõ ìⁿ ndacu nàá ndihí ñaha xii-di — cachí-yu.

⁵ Te ní níhí-di tnúhu ndee ìní sá càháⁿ úhú-di Yá Ndiõxí, te cada càhnu-di mee-di, te údico úú yóó ducaⁿ ní níhí-di tnúhu ndee ìní-áⁿ cunuu-di. ⁶ Te ducaⁿ ní quide-di ní càháⁿ úhú-di Yá Ndiõxí ndihí cuendá nchaa sá quidé-gã, te ñu-ni ducaⁿ ní càháⁿ úhú-di núú ndécú-gã, te ní càháⁿ úhú tucu-di nchaa ñáiyu ndècu ndihí-gá andiu. ⁷ Te ducaⁿ ní níhí-di tnúhu ndee ìní sá nàá-di ndihí nchaa ñáiyu cùu cuendá Yá Ndiõxí, te ducaⁿ nàá ndihí ñaha-di xii-yu ndéé òré vá ndácú-gã-yu nàá ndihí ñáhá-yu xii-di, te tnàhá ní ngúndecu ndihí-di tnúhu ndee ìní sá táxí tnùní-di ñáiyu nchaa nacióⁿ, ndihí ñáiyu nchaa ñuú, ndihí nchaa ñáiyu càháⁿ ndí dííⁿ ndí dííⁿ núú tnúhu, ndihí ñáiyu xíndecu nchaa xichi. ⁸ Te cue ñáiyu nihí ñuyíú ní cachí-yu sá ío càhnu cuu quiti-áⁿ, te ñáiyu-áⁿ cúú-yu ñáiyu ñá túú yòdo tnuní núú tütú Yáá

cáá dàtná cáá ìⁿ mbéé quiti ní dãnícuhé-güedé Yáá ní xihí ní cùu te ní ndoto. Te ndéé cùtnahá ní ngáva ñuyíú sa yòdo tnuní ñáiyu nanihí tàhú, dico ñáiyu càchí sá ío càhnu cuu quiti-áⁿ ñà túú yòdo tnuní-yu núú tütú-gá.

⁹ Te nchaa nchòhó ñáiyu xíndedóho chí cùndedóho váha nchaa nàcuáa cuáháⁿ tnúhu-áⁿ. ¹⁰ Te nchaa ñáiyu na chìhi tnaha ñáiyu-xi vecaá te sáá nduu te quihíⁿ-yu tnàhá-yu vecaá, te nchaa ñáiyu sàhni tnaha ñáiyu-xi ndihí yuchí te ñu-ni ndihí yuchí cuú-yu tnàhá-yu, te xiãⁿ núú ío xini ñuhu-xi sá ncháá ñáiyu cùu cuendá Yá Ndiõxí cunduu càhnu ìní-yu, te quindáá ìní ñáhã-yu xii-gá.

¹¹ Te ní xiní tucu-í ingá quiti ní quene-di núú ñuhu yìchí, te ndéé úú ndiqui-di te càa datná cáá ndiqui canerú, te càháⁿ-di dàtná càháⁿ quiti déeⁿ nání dragón. ¹² Te dàtná ndécú ndihí quiti ní quene xití làmár-áⁿ tnúhu ndee ìní sá táxí tnùní-di ducaⁿ ndècu ndihí quiti ní quene ñuhu yìchí-áⁿ tnúhu ndee ìní taxi tnùní-di cada-di núú quiti ní quene xití làmár-áⁿ, te quiti ní quene ñuhu yìchí-áⁿ ní quide yica-di sã ncháá ñáiyu xíndecu nihí ñuyíú chiñuhú-yu quiti ní quene xití làmár-áⁿ, quiti càhú víhí ní tnahá ní nícuèhé te ní ndúha-di. ¹³ Te quiti ní quene xití ñuhu yìchí-áⁿ ní quide-di titní núú sã vã yõ tnàhí ndacu cada, te nchaa ñáiyu ní xiní-yu sá

ndèé andiü nĩ dǎngóyó-dí ñùhú ñuyíú. ¹⁴ Te sá dúcáⁿ nĩ ngúndecu ndihí-di tnúhu ndee ìní ní quide-di nchaa xǎⁿ ní quide-di núú quiti ní quene xití làmár-áⁿ, te sá dúcáⁿ nĩ quide-di te xǎⁿ ní dándàhú-di nchaa ñáyíu xǎndecu nihí ñuyíú, te ní xáhaⁿ-di xii-yu sá ndúcũ-yu ìⁿ sá cádũha-yu nàcuáa-ni càa nacuáa-ni ndùu quiti ní quene xití làmár-áⁿ, quiti càhú víhí nĩ tnahá ní nícuèhé díquí-xi-áⁿ nĩ quée machití te ñá túú ní xǎhí-di chí ní xǎndecu-ni-di. ¹⁵ Te quiti ní quene xití ñuhu yìchí ní ngúndecu ndihí tucu-di tnúhu ndee ìní sá chíhí-dí ìní sá nĩ cadúha-yu-áⁿ, sá nĩ natavá-yu dàtná cáá quiti ní quene xití làmár-áⁿ, te ducaⁿ nĩ quide quiti-áⁿ cuèndá cáháⁿ sá nĩ cadúha-yu-áⁿ, te xǎⁿ cada-xi cuú nchaa ñáyíu ñá túú ní cuìní chiñuhu ñaha xii-di. ¹⁶ Te quiti ní quene xití ñuhu-áⁿ quidé-dí sǎ ncháá ñáyíu ngúndéé ìⁿ tnuní ndaha cùhá-yu àdi tneé-yu, te ducaⁿ nĩ quide-di cuèi ñáyíu cùnuu te cuèi ñáyíu ñá túú cùnuu, te cuèi ñáyíu cuica te cuèi ñáyíu ndàhú, te cuèi ñáyíu ñá túú dàñá quee núú chíúⁿ pàtróóⁿ-xi, te cuèi nchaa ñáyíu dàñá quée núú chíúⁿ pàtróóⁿ-xi ncháá-yu ducaⁿ nĩ ngúndéé tnuní ñíi-yu. ¹⁷ Te ní quide-di sá ncháá ñáyíu ñá túú ndèé tnuní ñíi-xi vá cúú cuàáⁿ-yu sá càchí ìní-yu te ní vǎ cúú dicó-yu ìⁿ sá cuìní-yu dicó-yu, te tnuní-áⁿ cúú-xí dìu quiti ní quene

xití làmár-áⁿ àdi númerú-di. ¹⁸ Te xini ñuhu-xi sá ncháá ñáyíu ío váha cùtnuní ìní-xi ío váha cuáha-yu cuèndá nàcuáa quèe-xi númerú quiti-áⁿ, te númerú-áⁿ cúú-xí ìñú cièndú únídico ìñú, te cùu-xi cuèndá ìⁿ ñáyíu ñuyíú.

14

Cuèndá ìⁿ cièndú údico cúmí mǐl ñáyíu

¹ Te sáta dúcáⁿ te ní xiní-í Yáá cáá dàtná cáá ìⁿ mbéé quiti ní dánicuèhé-güedé nútníi-gá ìⁿ yucu ñúú nání Sión ndécú àndiü, te nutníi-gá ndihí ìⁿ cièndú údico cúmí mǐl ñáyíu, te tneé-yu ndèé diu-gá ndihí dìu tátá-gǎ Dútú Ndiòxi. ² Te ní tecú dóho-í ní quide-xi andiü dàtná quidé-xí núú xicá cuèhé víhí ndùte, te quide tucu-xi datná quidé-xí òré níhi víhi caháⁿ ñúhu, te quide tucu-xi datná quidé-xí òré cuèhé víhí ñáyíu càní-yu àrpá. ³ Te ní tecú dóho-í xǎxita yuhu sǎ xítá yùhu núú Yáá núcõo núú xilé váha, ndihí núú ndi cùmí cue quiti xǎnutníi-áⁿ, ndihí núú ncháa cue téé cùu sacuéhé xǎnucóo-áⁿ, te xǎxita-xi ìⁿ ndudú sáá. Te mee-ni cuè ñáyíu ìⁿ cièndú údico cúmí mǐl-áⁿ quée díquí-yu ndudú-áⁿ, te ñáyíu-áⁿ cúú-yu ñáyíu ní dácǎcu nihnu ñaha Yáá cáá dàtná cáá ìⁿ mbéé quiti ní dánicuèhé-güedé núú ñáyíu ndècu ichi cuehé ichi duha xǎndecu ñuyíú, te vá yõo ìⁿ-gá quée díquí-xi ndudú sáá-áⁿ chí mee-ni ñáyíu ní cácu nihnu-áⁿ quée díquí-yu. ⁴ Te

ñáyiú ní cácu nihnu-áⁿ cúú-yu ñáyiú ñá túú ní xĩndecu ichi díí ínì, te cúú-yu ñáyiú càndoo canine iní-xi, te ndèni ní cuu cuáháⁿ Yaá cáá dàtná cáá ìⁿ mbéé quiti ní nícuèhé-áⁿ, te ducaⁿ-ni ndèndaha ñàhá-yu xii-gá cuáháⁿ, te ñáyiú-áⁿ nĩ cácu nihnú-yu núú nchàa ñáyiú ñuyíú, ñáyiú ndècu ichi cuèhé ichi duha, te ñáyiú ní cácu nihnu-áⁿ cúú-yu ñáyiú díhna nuu nĩ nduu táhú Yá Ndiöxí cuu cuèndá-gá ndihi Yaá cáá dàtná cáá ìⁿ mbéé quiti ní dánìcuèhé-güedé. ⁵ Te cúú-yu ñáyiú ñá túú càháⁿ ni ìⁿ tnúhu ndehnde, te càndoo canine iní-yu ndècú-yu núú núcõo Yá Ndiöxí táxi tnùnì-gá.

Cuèndá únì cue espíritú xínú cuèchi núú Yá Ndiöxí

⁶ Te sátá dúcáⁿ te ní xiní-í ìⁿ espíritú xínú cuèchi núú Yá Ndiöxí xícó-xí cuädava andiu, te ndècu ndihi-xi tnúhu sá càháⁿ nàcuáa naníhí tàhú-ó, tnúhu sá ñà túú tnàhí ndihi nihnu te tnúhu-áⁿ danèhé espíritú-aⁿ nchaa ñáyiú ndècu ñuyíú, ñáyiú nchaa nàcióⁿ, ndihi ñáyiú nchaa ñuú, ndihi nchaa ñáyiú càháⁿ ndí dííⁿ ndí dííⁿ núú tnúhu, ndihi ñáyiú xĩndecu nchaa xichi. ⁷ Te níhi ní càháⁿ-xi te càchí-xi:

—Nchaa nchòhó ñáyiú ndècu ñuyíú canehe-ndo sã yĩñùhu núú Yá Ndiöxí, te cachí-ndó sã ìo càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gã chi diu-gá ní cadúha-gá andiu, ndihi ñuhu yìchí, ndihi làmár, ndihi

nchaa ndóhoyo —duha càchí espíritú-áⁿ.

⁸ Te nchìcúⁿ tucu ingá espíritú xínú cuèchi núú Yá Ndiöxí, te càchí-xi:

—Vitna ní naa ñuú Babiloniá ñuú ìo cùnunu, te ducaⁿ nĩ naa chi cue ñáyiú ñuú-áⁿ nĩ quidé-yu ní xíta nihnu nchaa ñáyiú nihí ñuyíú, chi ní sanu ichi ñàhá-yu ichi cuèhé ichi duha —duha càchí espíritú-áⁿ.

⁹ Te nchìcúⁿ tucu ingá espíritú xínú cuèchi núú Yá Ndiöxí te níhi càháⁿ-xi, te càchí-xi:

—Nchaa ñáyiú chiñuhu ñaha xii quiti ní quene xití làmár, ndihi sá nĩ natava ñàhá-yu nàcuáa càa-di-áⁿ, ñáyiú ní dáñá mèe-xi ní ngúndéé tnunì ndahá-yu àdi tneé-yu, ¹⁰ ñáyiú-áⁿ sũúnì dándoho ñaha Yá Ndiöxí xii-yu chi ìo cùdèéⁿ-gã, te ducaⁿ ìo dándoho ñaha-gá xii-yu chi daquihíⁿ ñàhá-gã xii-yu núú ñùhú núú ñùhú àzufré càyú-xi, te núú cuè espíritú xínú cuèchi núú-gã ducaⁿ dándoho ñaha-gá xii-yu, ndihi núú Yá cáá dàtná cáá ìⁿ mbéé quiti ní dánìcuèhé-güedé. ¹¹ Te ni caa ni quihíⁿ quene ñùhmá núú dúcáⁿ cùndecú-yu ndohó-yu-áⁿ, te cuèi nduu cuèi niú ducaⁿ ndòhó-yu. Te ducaⁿ ndòho nchaa ñáyiú chiñuhu ñaha xii quiti ní quene xití làmár, ndihi sá nĩ natava ñàhá-yu nàcuáa càa-di-áⁿ, te diu-ni ñáyiú-áⁿ cúú-yu ñáyiú ní ngúndéé

tnuní ndaha-xi àdi tneé-xi — duha càchí espíritú-áⁿ.

12 Te xíáⁿ xíní ñùhu-xi sá ncháá ñáyiú cùu cuendá Yá Ndiöxí cunduu càhnu iní-yu, chi diu-ní-yu cùu-yu ñáyiú tñè nchaa tnúhu càháⁿ-gá, te ni yùhu ni iní-yu sàndáá iní-yu Xítohó Jesucristú.

13 Te sátá dúcáⁿ te ní tecú dóho-í ní càháⁿ ìⁿ sá ní càháⁿ andiú, te càchí-xi:

—Chido tnùnì-n ìⁿ núú tùtù nàcuáa na càháⁿ-í-a. “Není vitna ío váha táhú nchaa ñáyiú sàndáá iní tnúhu Xítohó Jesucristú te xihí-yu” —duha càchí sá ní càháⁿ-áⁿ.

Te Espíritú Yá Ndiöxí ní càháⁿ-xi, te càchí-xi:

—Ndáá, chi ndetatú-yu chi ñá túú-gã nágá chiúⁿ ndohó-yu cadá-yu, te Yá Ndiöxí sa nàha-gá nchaa nàcuáa ndùu chiúⁿ ní quidé-yu —duha càchí Espíritú-gá.

Nchaa sá cúú núú ñúhú

14 Te sátá dúcáⁿ te dàtnùnì ní xíní-í ìⁿ vícò cuixíⁿ, te núú vícò-áⁿ ní xíní-í núcòo ìⁿ Yaá, te càa-gá dàtná cáá ìⁿ téé ñuyíú, te díquí-gã ñúhú ìⁿ coroná ní cuáha mee-ni dǐhúⁿ cuááⁿ, te nùndaha-gá ìⁿ yuchí ndíquí te súúnì dǐéⁿ. 15 Te ní xíní-í ìⁿ espíritú xínú cuèchi núú Yá Ndiöxí ní quee-xi xití vehe-gá, te níhi ní càháⁿ-xi xáhaⁿ-xi xì Yaá núcòo núú vícò-áⁿ:

—Sa ní cuu nàquehndé-n ncháa sá ní cuu ñuyíú ndíhi yuchí ndíquí-n, chi sa ní cuu nucóo tnàha-xi —duha càchí espíritú-áⁿ xáhaⁿ-xi xì Yaá-áⁿ.

16 Te Yaá núcòo núú vícò-áⁿ ní dáyáha ndodo-gá yuchí ndíquí-gã núú ñuyíú ní nataxi tnàha-gá nchaa sá ní cuu.

17 Te ní xíní tucu-í ingá espíritú xínú cuèchi núú Yá Ndiöxí ní quee-xi xití vehe-gá sá cáá àndiú, te nùndaha-xi tnahá-xi ìⁿ yuchí ndíquí dǐéⁿ. 18 Te ní xíní tucu-í ní quee tucu ingá espíritú xínú cuèchi núú Yá Ndiöxí núú nùtnǐ núú sácódó sǎ ndúú táhú-gã, te ndècu ndíhi-xi tnúhu ndee iní táxí tnùnì-xi ñuhú, te espíritú-áⁿ níhi ní càháⁿ-xi xáhaⁿ-xi xì espíritú néhé yùchí ndíquí dǐéⁿ-áⁿ:

—Ngúíta naquehndé-n ndíhi yuchí ndíquí-n ndéhé yoho yàha stilé sá ío ñuyíú chi sa ní cuu nàtehndé —duha càchí espíritú-áⁿ xáhaⁿ-xi xì espíritú néhé yùchí ndíquí-áⁿ.

19 Te espíritú néhé yùchí ndíquí-áⁿ ní dáyáha ndodo-xi yuchí ndíquí-xi núú ñuyíú ní nàquehndé-xi nchaa ndéhé yoho yàha stilé, te ní chihi-xi ìⁿ xichi núú ní chihi-xi cuendá xíáⁿ quihni-xi quee ndudí-xi, te sá dúcáⁿ ní quide-xi xíáⁿ cùtnùnì iní-ó sǎ ío cùdéeⁿ Yá Ndiöxí núú ñáyiú ñuyíú. 20 Te ndéhé yoho yàha stilé-áⁿ ní quihni-xi ìⁿ xio yuhu ñúú, te ndudí ndéhé yoho yàha stilé-áⁿ ní nduu-xi níñí te ní quee-xi núú quíhni ñihnu espíritú-áⁿ. Te únì ciendú mìl mètrú ní xica níñí-áⁿ, te dàtná ìⁿ mètrú dava ní sáá cuehnu níñí-áⁿ ní xica-xi.

15

Úsá tnúndòho

1 Te ío vìhi ní guide-xi ìn sá nǐ guide-xi andiú te ní cuñúhu vìhi-í, te ní xiní-í úsá tnàhá espíritú xínú cuèchi núú Yǎ Ndiǒxí, te ìn ìn cue espíritú-án ndécú ndìhi-xi tnúhu ndee ìní dandòho-xi ñáyíu ñuyíú, te nà yáha nchaa tnúndòho-án, te vǎ cúděe-gǎ Yǎ Ndiǒxí núú-yu dándoho ñaha-gǎ xií-yu.

2 Te ní xiní-í ìn làmár te ndute làmár-án cáá dàtná cáá vìdriú, te dácánuu-xi ndìhi ñuhú, te yuhu làmár-án xǐnutnǐ nchaa ñáyíu ní ndacu ní dáquéé tǐhú ñáhá xìi quiti ní queene xití làmár-án, te ducaⁿ nǐ ndacú-yu ní dáquéé tǐhú-yu sá nǐ natava ñáhá-yu nàcuáa càa-di-án, te ducaⁿ nǐ ndacu tucú-yu ní dáquéé tǐhú tucú-yu númerú-di sá cúú dàtná diu-di, te nchaa ñáyíu-án nǐ nduu táhú-yu núú Yǎ Ndiǒxí àrpá xǐnehé-yu cuèndá caní-yu. 3 Te xǐxitá-yu ndudú sá nǐ xita ndíi Moisés ndíi ní xinu cuechi núú Yǎ Ndiǒxí ndéé sanaha, te xita tucú-yu ndudú Yaá cáá dàtná cáá ìn mbéé quiti ní dánicuèhé-güedé, te càchí-yu:

Yòhó Dútú Ndiǒxí ío càhnu cuu-n, chí quide-n nchaa sá vǎ yòo tnàhi ndàcu cada,

te cùu-n Yaá ndácú quide nchaandi túhú sá vǎha, te ío ndáá quidé-n te ío ndáá càhá-n, te yìndaha-n nchaa ñáyíu nihíi ñuyíú.

4 Te nchaa ñáyíu nèhé-yu sá yíñùhu núú-n,

te nchaá-yu càchí-yu sá ìo càhnu cuu-n,

chí ìndìi díi-ni yòhó cúú-n Yàá ío vǎha quide ndáá,

te nchaa ñáyíu nihíi ñuyíú natacá-yu chíñuhu ñàhá-yu xii-n,

te ducaⁿ càdá-yu chí ndèhé-yu nchaa sá vǎha quide-n.

Duha càchí ñáyíu-án xǐxitá-yu.

5 Te sátá dúcán te ní xiní-í ní nacaán yuyèhe vehe Yǎ Ndiǒxí andiú, te xití vehe-gá-án ndécú sǎ ndèé tnúhu-gá. 6 Te xití vehe-gá-án nǐ quee úsá tnàhá espíritú xínú cuèchi núú-gǎ, te ìn ìn-xi ndècu ndìhi-xi tnúhu ndee ìní dandòho-xi ñáyíu,

te xǐxǐhnu-xi mee-ni dǒó vǎha, te súúní vǎha càndoo, te chàhnhí, te yidúcúⁿnuu cínchú ní cuáha mee-ni dǐhúⁿ cuáán pèchú ndi úsá cue espíritú-án. 7 Te ìn quiti cúmí xǐnutnǐ núú núnǐ xilé vǎha ní sǎñaha-di ìn caa sá nàhá tícúú ní cuáha mee-ni dǐhúⁿ cuáán xii ìn ìn espíritú-án, te xití nchaa tícúú-án ñuhú ìn sǎ ñuhú te xián cútùníní sá Yǎ Ndiǒxí dandòho-gǎ ñáyíu ñuyíú, te diu-gǎ cúú-gǎ Yàá ndécú nchaa nduu nchaa quíú. 8 Te xití vehe-gá-án nǐ chítú ñǐhmá, te ducaⁿ nǐ quide-gǎ cuèndá cutnùníní ìní ñáyíu sá ìo càhnu cuu-gǎ táxí tnùníní-gǎ, te vǎ yòo ìn cuu quíhu xití vehe-gá-án ndèé ndìhi ndi úsá tnúndòho cada ndi úsá cue espíritú-án ñuyíú.

16

Tnündòho cada-xi ñuyúú

1 Te sátá dúcáⁿ te ní tecú dóho-í níhi ní cáháⁿ ìⁿ sá ní cáháⁿ xítí vehe Yá Ndiöxí, te xáhaⁿ-xi xii ndi usá cue espíritú-áⁿ:

—Chí cuaháⁿ coyo-ndo sã ñúhú xítí nchaa tícúú néhé-ndó-áⁿ núú ñuyúú, chí sá ñúhú-áⁿ cúú-xí tnündòho tendaha Yá Ndiöxí sá cúú-xí nchaa ñáyiú ñuyúú —duha càchí sá càháⁿ-áⁿ.

2 Te espíritú díhna ní sáháⁿ-xi ní coyo-xi sá ñúhú xítí tícúú néhé-xí-áⁿ ñuyúú, te nchaa ñáyiú ñuhu tnuní quití ní quene xítí làmár ñáyiú ní chiñuhu sá ñi natava ñahá-yu xii-di, nchaa ñáyiú-áⁿ ñi quené-yu ndíhyi tēhyú te súúni dāndoho ñaha-xi xii-yu.

3 Te espíritú cúú úú ní coyo-xi sá ñúhú xítí tícúú néhé-xí núú làmár, te ndute làmár-áⁿ ñi nduu-xi níñi te càa-xi datná cáá níñi ñáyiú sa ní xíhí, te nchaa quití ñuhu xítí làmár-áⁿ ñi xíhí-güedi.

4 Te espíritú cúú ùní ní coyo-xi sá ñúhú xítí tícúú néhé-xí nchaa yúte ndíhi nchaa núú quénihni ndute, te ndute nchaa yúte-áⁿ ndíhi nchaa ndute quénihni-áⁿ ñi nduu-xi níñi. 5 Te sátá dúcáⁿ te ní tecú dóho-í ní cáháⁿ ìⁿ espíritú xínú cuèchi núú Yá Ndiöxí, espíritú yíndaha ndute, te xáhaⁿ-xi xii Yá Ndiöxí:

—Yòhó Dútú Ndiöxí cúú-n Yáá quidé ndáá cuítí núu duha quide-n tendaha-n tnündòho-a, te ñi-ni-n cùu-n

Yaá ndécú ndèé cúnahá ní ngáva ñuyúú, te ñi-ni-n cùu-n Yáá ndécú vitna te ñá túú tnàhí cuèchi-n. 6 Chí cue ñáyiú ñuyúú ñi dácácã-yu níñi nchaa ñáyiú ní cáháⁿ tnúhu-n ndíhi nchaa dava-gá ñáyiú cùu cuendá-n, te ní sahní-yu nchaa ñáyiú-áⁿ, te vitna ní dátíú-n ndùte ní nduu-xi níñi te ducaⁿ-ni càa ndute-áⁿ xíhí-yu, te ducaⁿ tàú-xi ndohó-yu cuendá sá ñi sahní-yu cue ñáyiú cùu cuendá-n —duha càchí espíritú-áⁿ xáhaⁿ-xi xii-gá.

7 Te ní tecú tucu dóho-í ní cáháⁿ ìⁿ sá ñi cáháⁿ núú nútñi núú sácódó sá ndúú táhú Yá Ndiöxí, te xáhaⁿ-xi xii-gá:

—Ndáá sá yòhó Dútú Ndiöxí Yaá ndácú quide nchaandi túhú sá vãha dāndoho-n ñáyiú nācuāa tàú-xi cunduu —duha càchí sá càháⁿ-áⁿ xáhaⁿ-xi xii-gá.

8 Te espíritú cúú cùmí ní coyo-xi sá ñúhú xítí tícúú néhé-xí núú nchicanhii cuendá nchicanhii-áⁿ cahmi-xi nchaa ñáyiú ñuyúú.

9 Te ncháa-yu ní ndoho vñi-yu ní cáyú-yu, te cuèi ducaⁿ ñi ndohó-yu dico ñá túú ní cuíní-yu ndixi cuèchi iní-yu cuendá nchaa sá ña túú vãha quidé-yu, te ñi ña túú ní càchí-yu sá ño càhnu cuu Yá Ndiöxí chí da ní cáháⁿ úhú-yu cuendá-gá, te ñi-gá cúú-gã Yaá ducaⁿ ñi tendaha tnündòho-áⁿ sã cúú-xi-yu.

10 Te espíritú cúú ùhúⁿ ní coyo-xi sá ñúhú xítí tícúú néhé-xí núú ndécú quití ní quene xítí làmár-áⁿ táxí tnùní-di, te nchaa núú táxí

tnùní-dì ní cuu nee, te nchaa ñáyiú ñuyíú ndéé yàá-ná-yu nàcaxi nihnú-yu sá ndóhǒ-yu. 11 Dico ni dùcaⁿ ñá túú ní cuíní-yu dàñá-yu ni ìⁿ sá cuèhé sá dúhá quidé-yu, chi da ní cáháⁿ úhú-yu cuèndá Yá Ndiǒxí Yaá ndécú àndiú sá cuèndá sá dándòho ñaha ndíhyi tèhyú ndèè-yu-áⁿ ndihi nchaa dava-gá sá yáha-yu.

12 Te espíritú cúú ìñú ní coyo-xi sá ñúhú xítí tícùú néhé-xí xítí yúte càhnu nani Eúfratés, te ndute yúte-áⁿ ñí yíchí cuèndá yáha cue téé yìndaha ñáyiú xíndecu ndàa xio nacuaá quène nchíanchii.

13 Te ní xiní-í ní quee ìⁿ espíritú cúndìhi yucu ñávàha yuhu quiti dééⁿ nání dràgón, te ní xiní tucu-í ní quee tucu ingá espíritú cúndìhi yucu ñávàha yuhu quiti ní quene xítí làmár, te ní xiní tucu-í ní quee tucu ingá espíritú cúndìhi yucu ñávàha yuhu téé dándahú ñáyiú càchí sá càháⁿ tnúhu Yá Ndiǒxí te ñá ndàá, te ndi nùní espíritú-áⁿ xíndáa-xi dàtná cáá làhvá. 14 Te ndi nùní espíritú-áⁿ quidé-xí sá vǎ yǒo tnàhí ndàcu cada, te xíca datacá-xi nchaa cue téé yìndaha ñaha xii ñáyiú xíndecu nihí ñuyíú cuèndá nàá-güedé mei nduu cachí Yá Ndiǒxí coo tnúndòho cahnu vihi-gá, te diu mee Yá Ndiǒxí cúú-gǎ Yaá ío càhnu cuu. 15 Te Yaá cúú Xítohó-ó ñí cachí-gá: “Cunaha-ndo chi nduu ñà túú yìhi iní-ndó quixi-í núú ndécú-ndó, te cada-í dàtná quidé ñadúhú. Te váha táhú

nchaa nchòhó ñáyiú xíndecu túha, chi cùu-ndo datná cue ñáyiú xíndecu túha xíxíhnu-ni dóó-xi cuèndá sá vǎ cúcàhaⁿ núú-yu dàtná cúcàhaⁿ núú cuè ñáyiú ñá túú nihnu dóó-xi, te duha càháⁿ-í cuèndá sá nchòhó cundecu túha-ndo òrè quexio-í”, duha càchí-gá. 16 Te ndi nùní cue espíritú cúndìhi yucu ñávàha-áⁿ ñí dátacá-xi nchaa cue téé yìndaha ñaha xii ñáyiú, te ní taxi ndecu ñaha-xi ìⁿ xichi núú nání Àrmagedón, duha nani xíáⁿ tnúhu hèbreú.

17 Te espíritú cúú ùsá ní coyo-xi sá ñúhú xítí tícùú néhé-xí núú tàchí, te ní tecú dóho-í níhi ní cáháⁿ Yaá núcǒo núú xilé váha xítí vehe-gá, te càchí-gá:

—Xéhé-ñǎ cúmǎní te xínu cava nchaa tnúndòho tnúhu ndàhú —duha càchí-gá.

18 Te sátá dúcáⁿ te ní sáá ndúté te ní cáháⁿ ñúhu, te súúní dùsaⁿ ní quide-xi, te níhi vihi ní tnáa ñuyíú, te ndéé cútnàhá ní ngúndecu ñáyiú ñuyíú te vátá ìⁿ xito-gá níhi tnáa dàtná ní quide-xi.

19 Te ñuú càhnú ío cùnnu nani Babiloniá ní quee dava-xi ní cuu-xi úní xichi, te nchaa ñuú cáá ñíhi ñuyíú ñí ngoyo nchaa vehe, chi Yá Ndiǒxí ní ndacu iní-gá nchaa sá cuèhé sá dúhá quide nchaa ñáyiú ñuú Babiloniá-áⁿ, te ducaⁿ ñí quide ñaha-gǎ xií-yu chi ío cùdééⁿ-gǎ núú-yu. 20 Te nchaa tìndúú ñí ndóñúhú-xí cuèi nchaa tìndúú ñuhu yìchí ndécú xítí làmár. 21 Te ní xiní-í ní cuuⁿ ñíhi nàhnu vihi ní ngaundodo-xi cue

ñáyu ñuyú, te nchaa ñiñi-án vëe-xi dàtná údico kílú, te cue ñáyu ñuyú ñi cáháⁿ úhú-yu cuendá Yá Ndiöxí sá dúcáⁿ ñi dácúúⁿ-gá ñiñi ñàhnu vihi-án, chi ní cuu-xi ñiⁿ tnúndòho cahnu vihi sá cúu-xi-yu.

17

Ñadìhí ndécú ichi díí ìní

¹ Te núú úsá espíritú néhé tícúú-án, te ñiⁿ-xi ní quixi-xi núú ndécú-í, te càchí-xi xii-í:

—Néhe ná quihíⁿ-ó dànehé ñáhà-í xii-n nchaa tnúndòho sá ndóhó ñadìhí ñaha ndècu ichi díí ìní, te ñaha-án cúnúu-aⁿ nucóo-aⁿ núú ñúhú vihi ndute. ² Te ñaha-án ndécú díí ìní-aⁿ ndihí nchaa cue téé yindaha ñaha xii ñáyu xíndecu ñihí ñuyú, te nchaa dava-gá ñáyu ñuyú ío ìní-yu nchicúⁿ ñihnú-yu quidé-yu nchaa ñacuáa quide ñaha-án —duha càchí espíritú-án.

³ Te òré ducaⁿ quide ñaha Espíritú Yá Ndiöxí xii-í ñacuáa càchí ìní-xi, te ñiⁿ espíritú xínú cuèchi núú-gá ndécá ñaha-xi xii-í cuáháⁿ ñiⁿ xití yucu, te xití yucu-án ñi xini-í ñiⁿ ñadìhí yódó-án ñiⁿ quiti ticuehé, te ndéé úsá díquí-dí te úxí ndiqui-dí, te ñihí-dí ndéé tnuní-dí mee-ni tnúhu sá cáháⁿ úhú cuendá Yá Ndiöxí.

⁴ Te ñadìhí-án ñihnú-án dóo muradú ndihí dóo tícuèhé, te mee-ni sá ñi cuáha díhúⁿ cuááⁿ, ndihí yúú vaha sá nání pèrlá, ndihí nchaa dava-gá núú yúú vaha, mee-ni nchaa xíáⁿ ní cuáha sá yíhí lõho-aⁿ, ndihí sá ñúhú dúcúⁿ-aⁿ, ndihí sá ñúhú dúcúⁿ ndáhá-án, te

núndaha-aⁿ ñiⁿ tícúú ní cuáha mee-ni díhúⁿ cuááⁿ te ñúhu mee-ni sá cuèhé sá dúhá, te xíáⁿ cúnúni ìní-ó sá cúu-án ñiⁿ ñadìhí ñaha ndècu ichi cuèhé ichi duha. ⁵ Te tneé-aⁿ ndéé tnuní ñiⁿ tnúhu, te càchí-xi: “Ñúú Babiloniá ñuú ío cúnúu, cada ìní-ndó sá cúu-xi mèi ñadìhí-a, te díu ñadìhí-a cùu-aⁿ ñaha sanu ichi ñaha xii nchaa ñáyu díhí ñáyu ndècu ichi díí ìní, te nándi-gá nchaa sá cuèhé sá dúhá sanu ichi-aⁿ nchaa ñáyu cada-yu”, duha cáháⁿ tnúhu ndéé tnuní tneé ñadìhí-án. Te vá yóo tècú tnuní ná cuendá ducaⁿ cáháⁿ tnúhu-án. ⁶ Te ní cutnùnì ìní-í sá díú ñaha-án ñi dácáca-án ñiñi ñáyu cùu cuendá Yá Ndiöxí ní sahani ñaha-aⁿ xii-yu, te ñáyu ní xihí-án cúu-yu ñáyu ní cáháⁿ váha cuendá Xítóhó Jesucristú, te sá dúcáⁿ ñi quide-aⁿ te ní nduu-aⁿ dàtná ñiⁿ ñáyu quihu. Te ío ní cuñúhu-í sá dúcáⁿ ñi cuu ní xini-í. ⁷ Te sátá dúcáⁿ te espíritú xínú cuèchi núú Yá Ndiöxí-án càchí tucu-xi xii-í:

—Vá ndéé dúcáⁿ cùñúhu-n, chi vitna na càchí tnúhu-í xii-n ñacuáa quèe-xi cuendá quiti ndéé úsá díquí-xi ndihí úxí ndiqui-xi-án, ndihí ñacuáa quèe-xi cuendá ñadìhí ñaha yòdo ñaha xii-dí-án. ⁸ Te quiti ní xini-n-án cúu-dí ñiⁿ quiti sa ní xíndecu te vitna ñá túu-gá-dí ndècu, te sáá nduu te quene-dí yaú cúnú vihí sá ío nèhé cáá, te dàtnùnì sáá nduu te quihíⁿ-dí núú ùhú núú ndáhú ñi caa ñi quihíⁿ, te cue ñáyu xíndecu ñuyú cuñúhu vihí-yu quiti-án chi cùu-dí ñiⁿ

quiti sa ní xíndecu ni cùu te sáá nduu cùndecu tucu-di, te ñáiyu ducaⁿ cùñúhu ñaha xii-di-áⁿ ñà túú yòdo tnuní-yu núú tütú núú yódó tnùní cue ñáiyu naníhí tàhú, chi ndéé cùtnàhá vátá ngáva-gá ñuyú ducaⁿ sa yòdo tnuní cue ñáiyu naníhí tàhú.

⁹ Te nchaa ñáiyu tècú tnùní xini ñuhu-xi caní váha iní-yu cuèndá tnúhu-a. Te ndi úsá díquí quiti-áⁿ cada iní-ó sá cúú-xí úsá tìndúú núú núcõõ ñadihí-áⁿ. ¹⁰ Te ndi úsá díquí quiti-áⁿ cada iní-ó sá cúú-xí úsá tnàhá cue téé yíndaha ñaha xii ñáiyu, te úhúⁿ cue téé-áⁿ ñà túú-gã cùnùu-güedé vitna, te ìⁿ téé-áⁿ cùnùu-dé vitna te ìngá-dé vátá sáá-gá nduu cùnùu-dé, te na sáá nduu dùcaⁿ cunuu-dé te sacú-ni nduu cunuu-dé. ¹¹ Te quiti ní xíndecu ni cùu te ñà túú-gã-di ndècu vitna, cùu-di datná téé cùu uná yíndaha ñaha xii ñáiyu, te ìⁿ-ni cùu-di ndihi cue téé úsá yíndaha ñáiyu-áⁿ, te quiti-áⁿ sáá nduu cuíta nihnu-di quíhíⁿ-di núú ùhú núú ndàhú ni caa ni quíhíⁿ.

¹² Te ndi ùxí ndiqui quiti-áⁿ cada iní-n sá cúú-xí ùxí tnàhá cue téé quíndaha ñaha xii ñáiyu, dico vátá sáá-gá nduu cùnùu-güedé quíndaha ñaha-güedé xii-yu. Te cue téé-áⁿ ñíhí-güedé tnúhu ndee ìní taxi tnùní-güedé ndihi quiti-áⁿ, dico tnaa-ni taxi tnùní-güedé ndihi quiti-áⁿ. ¹³ Te ndi ùxí cue téé-áⁿ cuu ìⁿnuu-güedé taxi tnùní-güedé, te chindee-güedé

quiti-áⁿ cuèndá cuu ìⁿnuu-güedé ndihi-di cuèndá taxi tnùní-gã-di.

¹⁴ Te cue téé-áⁿ nàá-güedé ndihi Yaá cáá dàtná cáá ìⁿ mbéé quiti ní dánicuehé-güedé dico vá ndácú-güedé nàá-güedé ndihi-gã chi cuíta-güedé. Te ñu-gã cúú-gã Yaá ío cùnùu taxi tnuní cuèi nchaa téé yíndaha ñaha xii ñáiyu, te ducaⁿ-ni tàxi tnuní-gã cuèi nchaa dava-gã-yu. Te mee Yã Ndiõxí ní cachí-gã nándi cùu nchaa ñáiyu cundecu ndihi Yaá cáá dàtná cáá ìⁿ mbéé quiti ní dánicuehé-güedé-áⁿ, te ñu-ni ñáiyu-áⁿ cúú-yu ñáiyu ní cáháⁿ-gã te cùu-yu ñáiyu quide ndáá ndécú ìchi-gã —duha càchí espíritú xínú cuèchi núú-gã.

¹⁵ Te ní cachí tucu espíritú-áⁿ xii-í:

—Ndute ñuhu núú núcõõ ñadihí ñaha ndècu ìchi díí ìní-áⁿ, ndute-áⁿ cada iní-n sá cúú-xí ñáiyu nchaa nàciónⁿ, ndihi ñáiyu nchaa ñuú, ndihi ñáiyu xíndecu nchaa xichi, ndihi ñáiyu càháⁿ ndí dííⁿ ndí dííⁿ núú tnúhu. ¹⁶ Te dàtná ní cachí-í sá ndi uxí ndiqui quiti ní xini-n-áⁿ cúú-xí ùxí tnàhá cue téé quíndaha ñaha xii ñáiyu, te cue téé-áⁿ cuu úhú iní-güedé ñadihí ñaha ndècu ìchi díí ìní-áⁿ, te ni vã cádá cuèndá ñáhã-gã-güedé xii-aⁿ, te ndada ndàhú ñáhã-güedé, te dacàchi ñaha-güedé xii-aⁿ, te cahmi ñaha-güedé. ¹⁷ Te mee Yã Ndiõxí ducaⁿ dàcaháⁿ-gã ìní cue téé-áⁿ cuèndá cada-güedé

nàcuáa cuíní mée-gǎ, te xiǎⁿ nũu cuu ìⁿnuu-güedě cuendá cùñaha-güedě xii quití-áⁿ cada-di núú-güedě taxi tnùní-di, te ducaⁿ-ni càda-di núú-güedě taxi tnùní-di ndéé ná sáá nduu càda Yá Ndiöxí nàcuáa ní cachí-gá. ¹⁸ Te ñadihí ñaha ní xiní-n-ǎⁿ cada iní-n sǎ cúú-áⁿ ñúú cǎhnú ñúú ío cùnūu, te ñúú-áⁿ ndécú tée ío-gá cùnūu taxi tnuní nchaa cue tée yíndaha ñaha xii ñáyiu xíndecu ñuyúú —duha ní cachí espíritú xínú cuèchi núú Yá Ndiöxí xii-í.

18

Ní naa ñúú Babiloniá

¹ Te ducaⁿ te dátñuní ní xiní tucu-í íngá espíritú xínú cuèchi núú Yá Ndiöxí, te ndéé andiu nì dátǎsaⁿ-xi te ní dáyèhé-xi ñuyúú, te espíritú-áⁿ ío cùnūu-xi. ² Te níhi ní cáháⁿ-xi, te càchí-xi:

—Ní sáá nduu nàa ñúú cǎhnú ñúú cùnūu nani Babiloniá, te xiáⁿ-nǎ natacá nchaa núú espíritú cùndihí yucu ñávǎha cundecu-xi, te vá quée-gǎ-xi xiáⁿ, te diu-ni xiáⁿ natacá nchaa quití ndáva núú tàchí nchaa quití ndehe quide, quití ñá túú tnàhá iní ñáyiu te xiáⁿ-nǎ cundecu-güedi. ³ Te ducaⁿ chi ñáyiu ñúú-áⁿ sánú ìchí-yu nchaa ñáyiu nihí ñuyúú ichi cuèhé ichi duha, te ducaⁿ-ni xínchícúⁿ nihnu nchaa ñáyiu ñuyúú xíquidé-yu, te nchaa cue tée cùnūu yíndaha ñaha xii ñáyiu, cue tée-áⁿ cúú ìⁿnuu-güedé ndihí nchaa ñáyiu ñúú-áⁿ quidé-güedě ndihí-yu nándi sá cuèhé sá

dúhá. Te nchaa ñáyiu dícó nándi sá dícó quèheⁿ ñáyiu ñúú-áⁿ ío cùu cuicá-yu, te ducaⁿ quèheⁿ nchaa ñáyiu ñúú Babiloniá-áⁿ nchaa sá dícó ñáyiu-áⁿ cuendá xiǎⁿ cǎnehé-yu ndécú-yu ichi cuèhé ichi duha —duha càchí espíritú-áⁿ.

⁴ Te sátá dúcáⁿ te ní tecú dóho-í ní cáháⁿ ìⁿ sá ní cáháⁿ andiu, te càchí-xi:

—Nchaa nchòhó ñáyiu cùu cuendá-í quee-ndo ñúú Babiloniá cuendá sá vǎ cùndecu-ndo tnàhá-ndó ichi cuèhé ichi duha dàtná ndécú ñáyiu ñúú-áⁿ, te ducaⁿ te vá quíní-ndó tnündòho tnúhu ndàhú sá quíxí cùu xii ñáyiu-áⁿ. ⁵ Chi ío cuèhé cuèchi-yu ní cuu ndècu núú Yá Ndiöxí, te mee-gǎ nàhá-gǎ nàcuáa nduu nchaa sá quidě-yu. ⁶ Te nchòhó ñáyiu cùu cuendá-í, chí nánchòcáva dandòho-ndo ñáyiu-áⁿ dàtná quidé mèe-yu dándohó-yu cue ñáyiu, te úú xito nanchòcáva-ndo dándohó-ndó-yu, te ducaⁿ càda-ndo cuendá ío-gá ndohó-yu. ⁷ Te ío quide cahnú-yu mèe-yu, te ío cùdíí iní-yu quidé-yu nchaa núú sǎ cuèhé sá dúhá, te sá dúcáⁿ xidó-yu quidé-yu nchaa sá cuèhé sá dúhá nũu xiáⁿ nchòhó ío dandòho-ndó-yu, te ducaⁿ chi ñáyiu ñúú-áⁿ sání iní-yu, te càchí-yu: “Nchúhú cúú-ndí dàtná ìⁿ ñadihí ñá túú quée, ñaha ío cùnūu yíndaha ñaha xii ñáyiu. Te ducaⁿ sǎtnàhá-xi cùu-ndí chi nchaa-ni nduu ío váha cùu iní-ndí ndécú-ndí, te ní

vã sàá ìⁿ nduu te ndìhú iní-ndí”, duha càchí ñáyiú ñúú-án. ⁸ Te sá cuèndá nchaa sá quidě-yu-án nùú xǎⁿ ìⁿ-ni ndùu sáá tnúndòho sá cúú-xí-yu, te ío ndohó-yu chí ñúú-yu coo tnamá, te coo cuéhé cahni ñaha-xi xii-yu, te ío ndìhú iní-yu, te cáyú ñúú-yu, te ducaⁿ ndòhó-yu chí Dútú Ndiòxí ío cùnuu-gá, te diu-gá ducaⁿ dándoho ñaha-gá xii-yu —duha càchí sá ní cáháⁿ àndiu-án.

⁹ Te nchaa cue téé cùnuu yindaha ñaha xii ñáyiú ío ndáhyú-güedé sá ndìhú iní-güedé òré ná quìní-güedé quene ñúhmá cáyú ñúú cue ñáyiú Babiloniá, chí diu cue téé-án cúú-güedé cue téé cùu ìⁿnuu ndìhí-yu quide-güedé nchaa núú sá cuéhé sá dúhá ndìhí-yu, te ducaⁿ chí ío tnàhá iní-güedé cundecu-güedé ndìhí-yu ichi díí iní. ¹⁰ Te cue téé-án xica-nǎ cundecu-güedé cundehe-güedé nàcuáa ndoho nchaa ñáyiú ñúú-án sá yùhú-güedé nchaa tnúndòho-án, te cachí-güedé:

—¡Ndàhú nchòhó ñáyiú ñúú cáhnú ñúú cùnùu nani Babiloniá! Chí uuⁿni ní sáá nchaa tnúndòho tnúhu ndàhú sá cúú-xí-ndó —duha cachí-güedé.

¹¹ Te nchaa ñáyiú dìco nchaa sá nándìhí ñáyiú ñúú Babiloniá tnàhá-yu ío ndáhyú-yu sá ndìhú iní-yu chí vá yòo-gá cuaaⁿ nchaa sá dícò-yu. ¹² Te dícò-yu nchaa sá ní cuáha mee-ni díhúⁿ cuááⁿ, ndìhí nchaa sá ní cuáha mee-ni díhúⁿ cuixíⁿ,

te dìco tucú-yu sá ní cuáha mee-ni yúú vãha yúú nání pèrlá, ndìhí nchaa dava-gá sá ní cuáha dava-gá yúú vãha, te dícò-yu tnàhá dóó sèdá, ndìhí ingá núú dǒó vãha sá nání línú, ndìhí dóó muràdú, ndìhí dóó tícuéhé te mee-ni dǒó vãha cùu-xi, te dìco tucú-yu tnàhá yutnu sá sàháⁿ tnámí, te dìco tucú-yu sá ní cuáha sá nání màrfil, te dìco tucú-yu sá ní cuáha mee-ni yutnu vãha sá ío ndèyáhu, te dìco tucú-yu sá ní cuáha mee-ni càá, ndìhí sá ní cuáha mee-ni sǎ nání bròncé, ndìhí sá ní cuáha mee-ni yúú vãha yúú nání màrmól. ¹³ Te dìco tucú-yu canèlá, ndìhí yúcu sǎ sàháⁿ tnámí, ndìhí dúsa sá sàháⁿ tnámí, ndìhí yúcu sǎ nání mǐrrá, te dìco tucú-yu ingá núú dǔsa sá sàháⁿ tnámí nàni olivánú, te dìco tucú-yu ndudí ndéhé yoho yàha stilé, ndìhí acití yutnu nàni olívú, ndìhí yuchi triú vãha, te dìco tucú-yu nchaa dava-gá núú triú, te dícò-yu tnàhá mbéé, ndìhí cuàyú, ndìhí nchaa dava-gá quiti tatá, te dìco tucú-yu tnàhá carrètá, te dìco tucú-yu tnàhá ñáyiú xìnu cuechi, ñáyiú ñá túú tnàhí dàñá quee núú chíúⁿ pàtróoⁿ-xi. ¹⁴ Te nchaa ñáyiú dìco-án cǔñàhá-yu xii ñáyiú ñúú Babiloniá:

—¡Nchaa sá ío cùdíí iní-ndó cùndecu ndìhí-ndo ní cuu vá ndácú-gǎ-ndó nǐhí-ndó vǐtna, te nchaa sá sání iní-ndó sǎ ío vãha càa ndecu ndìhí-ndo ndìhí nchaa dava-gá sá ndécú ndìhí-ndo ní ndìhí nihnu-xi

vitna, te ni ìⁿ nduu-gá vá nihí-ndó ni ìⁿ xiáⁿ cundecu ndihí-ndo! —duha cúñaha ñáiyu-áⁿ xií-yu.

15 Te nchaa ñáiyu ní cuu cuica ñí xóo dico náandi nchaa sá ñí xóo dico ñí queheⁿ cue ñáiyu ñuú Babiloniá, nchaa ñáiyu-áⁿ xica-nă cundecú-yu cundehé-yu sá yùhú-yu cuendá nchaa tnúndòho sá yáha cue ñáiyu ñuú-áⁿ, te ío ndáhyú-yu sá ndihú iní-yu sá dúcáⁿ ndòho ñáiyu-áⁿ. 16 Te cúñaha tucú-yu:

—¡Ndáhú nchòhó ñáiyu xíndecu ñuú cáhnú ñuú nání Babiloniá! Chì nchòhó cùú-ndó dàtná ìⁿ ñadihí ñaha ñihnu dóo vâha dóo murádú, ndihí dóo tícuèhé, te mee-ni sá ñí cuáha díhúⁿ cuàáⁿ, ndihí mee-ni sá ñí cuáha yúú vâha yúú nání pèrlá, ndihí sá ñí cuáha dava-gá yúú vâha sá ío vii ndăa mee-ni nchaa xiáⁿ ní cuáha sá yíhí lóho-aⁿ, ndihí sá ñúhú dúcúⁿ-aⁿ, ndihí sá ñúhú dúcúⁿ ndáhá-áⁿ. 17 ¡Te uuⁿni ní ndihí ñihnu nchaandi túhú sá ndécú ndihí ñadihí-áⁿ, te ducaⁿ sátnahá-xi cùu nchohó ní cùu! —duha cúñahá-yu xii cue ñáiyu ñuú Babiloniá.

Te nchaa cue tée dàcaca barcú ndihí nchaa cue tée tàxi tnuní bàrcú-áⁿ, ndihí nchaa ñáiyu ñuhu xití bàrcú-áⁿ, ndihí nchaa dava-gá cue tée náandi chiúⁿ quide ndecu lamár, nchaa ñáiyu-áⁿ xica cundecú-yu 18 te quiní-yu òré quene ñúhmá càyú ñuú cue ñáiyu Babiloniá, te níhi cáháⁿ-yu, te cachí-yu:

—Ni ìⁿ ñuú ñá túú

nútnahá-xi ñuú Babiloniá — duha cáháⁿ-yu.

19 Te nchaa ñáiyu-áⁿ chidó-yu ñuhu díqui-yu, te ngúíta-yu ndáhí-yu sá ndihú iní-yu, te níhi cáháⁿ-yu, te cachí tucú-yu:

—¡Ndáhú nchòhó ñáiyu xíndecu ñuú cáhnú ñuú nání Babiloniá! Chì ío cuica-ndo ní cùu, te diu-ndo ñí quide ní cuu cuica nchaa ñáiyu ndècu ndihí barcú, te vitna uuⁿni ní naa-ndo ndihí ñuú-ndó — duha cachí-yu.

20 Te nchaa nchòhó ñáiyu ndècu andíu ío chí cúdǐ iní sá dúcáⁿ dàndòho Yá Ndióxí nchaa ñáiyu ñuú Babiloniá-áⁿ, te diu-ni ducaⁿ chí cúdǐ iní nchaa nchòhó cue tée ní cachí Xitohó Jesucristú cáháⁿ tnúhu-gá, te diu-ni ducaⁿ chí cúdǐ iní nchaa nchòhó cue tée cáháⁿ tnúhu Yá Ndióxí nàcuáa dàcahu iní ñáhá-gă xii-ndo, te diu-ni ducaⁿ chí cúdǐ iní nchaa dava-gá nchòhó ñáiyu cùu cuendá-gá cuendá sá dúcáⁿ dàndòho-gá nchaa ñáiyu ñuú-áⁿ. Te ducaⁿ càda ñaha-gá xii cue ñáiyu-áⁿ cuendá nchaa sá quidé ñahá-yu xii-ndo.

21 Te sátá dúcáⁿ te ní xiní-í ìⁿ espíritú xínú cuèchi núú Yá Ndióxí, te espíritú-áⁿ ío ndee-xi te ní queheⁿ-xi ìⁿ yúú cáhnú dàtná cáhnu yódó te ní dáquëe-xi xití ndute làmár, te càchí-xi:

—Dàtná ní quide-í ní dáquëe-í yúú xití ndute ducaⁿ càda-xi ñuú cáhnú ñuú Babiloniá, chí ñáiyu ñuú-áⁿ ío ndihí naá-yu ndihí ñuú-yu, te

vá ñáá ndùu ñáá quíú-gă quini ñáhá ñááiu xii-yu. ²² Te ni ñáá-gá ñááiu càni arpá, te ni ñáá-gá ñááiu tiú vîlu, te ni ñáá-gá ñááiu tiú cútú, te ni ñáá-gá yaá vá cóo ñúú-áá, te ni ñáá-gá cue ñááiu xini cada ñáá núú chiu vá cóo-gă, te ni vă yôo-gá canehe chiu yúú cúú yôdó mulinú. ²³ Te ni ñáá-gá ñááiu vá cundecu ñúú-áá, te ni ñáá nduu-gá vá cóo vico tnándaha, te ñááiu ñúú-áá ñááiu quide ndáhú cúú-yu ñááiu ío-gá cuicá-yu dàcúúxí ñááiu quide ndáhú xindecu niñi ñááiu, dico ncháá-yu naá-yu chi quide nduu-yu te ío dándahú-yu cue ñááiu ñááiu sá dúcáá quidé-yu.

²⁴ Te ñáá-ni ñúú-áá ní dácáá-yu niñi cue téé ní cáháá tnúhu Yá Ndióxi, te ñáá-ni duca ní quidé-yu ncháa dava-gá cue ñááiu cùu cuendá-gá, te ñáá-ni-yu quide xísahni tnáha ñááiu ñááiu — duha càchí espíritu-áá.

19

¹ Te sáá dúcáá te ní tecú dóho-í ní cáháá cuéhé víhi ñááiu andiu, te càchí-yu:

Ío càhnu cuu Yá Ndióxi!, chi ñáá-gá cúú-gă Yaá ní dácáá niñu ñáá xii-o núú ùhú núú ndáhú, te ío cùnuu-gá, te mee-ni sá văha quide-gá,

² te mee-gă ío váha ndáá quidé-gă quidé ndáá-gá cuéchi ncháa ñááiu,

chi ñáá-gá ní dáquihí-gá ñááhi ñáá ndecu ichi

díi ñáá núú ùhú núú ndáhú,

chi ñáá-ni ní sanu ichi-áá ñááiu ñááiu ichi cuéhé ichi duha,

te duca ní dáquihí ñáhá-gă xii-áá núú ùhú núú ndáhú chi náchinaa-gá sá ní sahani-áá cue ñááiu ní xinu cuechi núú-gă.

Duha càchí-yu.

³ Te càchí tucú-yu:

—Ío càhnu cuu Yá Ndióxi!, chi ncháa nduu ncháa quíú duca-ni quène ñáá má núú ñáá ñáá-áá càyú-áá — duha càchí-yu.

⁴ Te ndi ócú cúmí cue téé cùu sacuéhé xindecu-áá ní ngüñi xiti-güedé núú Yá Ndióxi núú núcôo-gá táxi tnúni-gá, te tnáha cue quiti cúmí xitnutni-áá ní ngüñi xiti-güedé núú-gă, te cue téé-áá càchí-güedé ndihi cue quiti-áá:

—Sá ndáá sá ío càhnu cuu Yá Ndióxi — duha càchí-güedé ndihi cue quiti-áá.

⁵ Te sáá dúcáá te ní tecú dóho-í ní cáháá ñáá sá ní cáháá mei núú nütñi xilé váha núcôo Yá Ndióxi, te càchí sá cáháá-áá:

Ncháa nchòhó ñááiu xinu cuechi núú Yá Ndióxi, ñáá-ni nchòhó ñááiu nèhe sá yíñu nuú-gă, cáháá-ndó sá ío càhnu cuu-gá cuéi cùnuu-ndo àdi ñáá túú cùnuu-ndo.

Duha càchí sá cáháá-áá.

Íi vico cùu datná vico tnándaha

⁶ Te sáá dúcáá te ní tecú dóho-í ní cáháá cuéhé víhi ñááiu andiu, te óré duca ní cáháá-yu te ní quide-xi dátá

quidé-xí nõú xicá cuèhé víhi ndùte, te ní quide tucu-xi dàtná quidé-xí òré càháⁿ níhi víhi ñúhu, te cächí-yu:

¡Ío càhnu cuu Dútú Ndiõxí Yaá cúú Tàtá-ó! Te ío cùnuu-gá táxi tnùnì-gá, te quide-gá nchaandi túhú sá vâha.

7 Te ío chí ná cùdíí Ìní-ó, te chí ná cächí-ó sã ío càhnu cuu Yá Ndiõxí,

chi vitna ní sáá nduu càda Yaá cáá dàtná cáá ìⁿ mbéé quiti ní dánicuehé-güedé ìⁿ vico, te cùu-xi datná vico tnãndaha.

Te nchaa ñáyiú cùu cuendá-gá sa ní ndihí-yu sa ndècu túha-yu cundecú-yu vico-áⁿ, te cada iní-ó sã ñáyiú-áⁿ cúú-yu dàtná ìⁿ ñadìhí xíchí tnãndaha ndihí-gá,

8 te ñáyiú-áⁿ ñí nduu táhú-yu cuihnú-yu dóó vâha dóó chàhnchí sá ío vâha càndoo.

Duha cächí-yu.

Te sá dúcáⁿ ñí nduu táhú ñáyiú cùu cuendá Yá Ndiõxí dóó vâha ñihnú-yu, xiãⁿ cútnùnì iní-ó sã cúú-yu ñáyiú quide ndáá núú-gã.

9 Te ìⁿ espíritú xínú cuèchi núú Yá Ndiõxí ní cachí tnúhu-xi xii-í, te cächí-xi:

—Chido tnùnì-n ìⁿ núú tütú nàcuáa na càháⁿ-í-a: “Vâha táhú nchaa ñáyiú ní càháⁿ ñáhá Yá cáá dàtná cáá ìⁿ mbéé quiti ní dánicuehé-güedé cundecú-yu vico, te vico-áⁿ cúú-xí dàtná vico tnãndaha cada-gá”, te duha chido tnùnì-n chí tnúhu-a cùu-xi tnúhu ndáá

tnúhu Yá Ndiõxí —duha cächí espíritú-áⁿ.

10 Te ní ngüíñí xítì-í núú espíritú-áⁿ cuendá chiñuhu-í-xi ní cùu, te ní cachí-xi:

—Vá dúcáⁿ càda-n, chi tnàhá-í dícó xínú cuèchi-í núú Yá Ndiõxí dàtná quidé-n xínu cuechi-n núú-gã ndihi nchaa dava-gá ñáyiú ndècu ndihi-n ichi-gá, ñáyiú nchìcúⁿ nihnu quide ní yuhu ní iní nchaa nàcuáa càháⁿ Xítóhó Jesucristú, te núu xiãⁿ cächí-í sá vã dúcáⁿ càda-n, chi mee Yá Ndiõxí chiñuhu-n —duha cächí espíritú-áⁿ.

Te nchaa cue téé càháⁿ tnúhu Yá Ndiõxí càháⁿ-güedé nàcuáa ndùu tnúhu càháⁿ Xítóhó Jesucristú.

Cuendá Yaá yódó ìⁿ cuayú cuixíⁿ

11 Te ní xini-í nchíí andiu, te ní xini-í ní quee ìⁿ Yaá yódó-gã ìⁿ cuayú cuixíⁿ. Te Yaá-áⁿ nání-gã Yaá quidé ndáá cuiti, duha nani-gá. Te quide-gá nchaa sá càháⁿ-gá, te ío vâha quide ndáá-gá cuèchi nchaa ñáyiú, te nchaa ñáyiú nàá ndihi ñaha xì-gá ío vâha xìní-gá nàcuáa cada ñaha-gã xií-yu chí ío ndáá quidé-gã.

12 Te tinùu-gá dáyèhé-xi dàtná dáyèhé ñuhú, te titní coróná ñuhú díquí-gã, te nèhe-gá ìⁿ sá ndèé diú-gá, te vá yóo ìⁿ cùtnuní iní-xi nása cuáháⁿ tnúhu-áⁿ, chí ìⁿdií díí-ni mee-gã náhá-gã nàcuáa càháⁿ-xi.

13 Te Yaá-áⁿ ñihnú-gã ìⁿ dóó ní cuu mee-ni ñíñí, te Yaá-áⁿ cächí tnúhu-gá nchaa nàcuáa

sàni iní Yă Ndiõxí, núu xiǎⁿ nání-gă Tnúhu Yá Ndiõxí. 14 Te sátá-gă nchìcúⁿ nchaa espíritú xínú cuèchi núú Yă Ndiõxí, te cue espíritú-áⁿ cúu-xí dàtná sandàdú, te xìxihnu-xi dóó cuìxíⁿ dóó vǎha sá cándòo, te xìxódó-xi cuàyú cuìxíⁿ. 15 Te yuhu Yaá yódónùu-áⁿ quéné ìⁿ yuchí cáhnú, te ndihì yuchí-áⁿ dānícuehé-gá nchaa ñáyiu xĩndecu ñuyíú, te ío dandòho ñaha-gá xii-yu, te dàtná quídé tée quihni ndéhé yoho yàha stilé ducaⁿ sǎtnahá-xi cada ñaha-gá xii-yu, chí ío dandòho ñaha-gá xii-yu cuèndá sá ío cùdéeⁿ-gă. Te mee-gă ío cùnnuu-gá táxi tnùnì-gá, te quíde-gá nchaandi túhú sá vǎha. 16 Te sátá dǒó níhnú Yáa-áⁿ ndihì núú tìcácaⁿ-gă yódó tnùnì nàcuáa nàni-gá, te duha càháⁿ-xi: “Tée ío cùnnuu taxi tnunì ñáhá xii nchaa cue tée yĩndaha ñaha xii ñáyiu ndihì nchaa dava-gá ñáyiu”, duha ndèé tnunì sátá dǒó-gă-áⁿ ndihì tìcácaⁿ-gă-áⁿ.

17 Te dǎtnùnì ní xiní-í ìⁿ espíritú xínú cuèchi núú Yă Ndiõxí nútñì-xi núú nchìcanchii, te níhi ní cáháⁿ-xi, te xǎhaⁿ-xi xii nchaa quiti ndava núú tàchí:

—Nchaa nchòhó quiti ndàva, chí táquixi chí caxi-ndo nchàa sá ñí quide túha Yá Ndiõxí, 18 chí caxi-ndo cùñú nchaa cue tée yĩndaha ñaha xii ñáyiu, ndihì cuñú nchaa cue tée tàxi tnunì ñáhá xii cue sandadú, ndihì cuñú nchaa cue tée ío ñí xĩndáa, ndihì cuñú nchaa cuàyú,

ndihì cuñú nchaa cue tée ní xódó ñaha xii-güedi, ndihì cuñú nchaa dava-gá ñáyiu, ñáyiu ñá túú tnàhí ni dàñá quee núú chíúⁿ pàtróóⁿ-xi, ndihì cuñú nchaa ñáyiu ní dàñá ñí quee núú chíúⁿ pàtróóⁿ-xi, ndihì cuñú nchaa ñáyiu cùnnuu, ndihì cuñú nchaa ñáyiu ñá túú cùnnuu, te nchaa cuñú-áⁿ caxi-ndo — càchí espíritú-áⁿ xǎhaⁿ-xi xii nchaa quiti-áⁿ.

19 Te sátá dúcáⁿ te ní xiní tucu-í quiti ní quene xití làmár, ndihì nchaa cue tée yĩndaha ñaha xii ñáyiu, ndihì nchaa cue tée cùu sandadú-güedé ní naníhí tnáhá-güedé ndihì quiti-áⁿ cuèndá cuu ìⁿnuu-güedé ndihì-di nàa-güedé ndihì Yaá yódó cuàyú-áⁿ, ndihì nchaa cue espíritú cúu sàndadú ndihì-gá. 20 Te cue espíritú cúu sàndadú ndihì Yaá-áⁿ ñí tñì-xi quiti-áⁿ, ndihì tée ío dāndahú ñáhá xii ñáyiu càchí sá càháⁿ tnúhu Yá Ndiõxí te ñá ndàá sá càháⁿ-dé tnúhu-gá, te diu-ni tée-áⁿ ñí quide-dé titní núú sǎ vǎ yǒo tnàhí ndàcu cada núú quiti-áⁿ. Te sátá dúcáⁿ ñí quide tée-áⁿ xiǎⁿ ní dāndahú-dé ñáyiu ní sándáa iní-yu ní quée-yu tnunì quiti-áⁿ, te ní chiñùhú-yu sá ñí dāndácú ñáhá-yu xii-di, te cue espíritú-áⁿ ñí dáquée-xi quiti-áⁿ núú ñùhú núú ñùhú àzufré càyú-xi, ndihì tée ducaⁿ dāndahú ñáhá xii ñáyiu-áⁿ, te xiáⁿ cuhuⁿ tée-áⁿ ndihì quiti-áⁿ, te ío ndoho-dé ndihì-di. 21 Te ndihì yuchí cáhnú sǎ quéné yùhu Yaá

yódó cuàyú-áⁿ nǐ sahani-gá nchaa dava-gá cue téé cùndihì quiti-áⁿ, te nchaa cue quiti ndàva ní chítú xítí-güedi ní xexi-güedi cuñú nchaa cue téé-áⁿ.

20

Úxí cièndú cuía

¹ Te sátá dúcáⁿ te ní xiní-í ìⁿ espíritú xínu cuèchi núú Yă Ndiöxí ní quee-xi andü, te nùndaha-xi ndacaá nacaáⁿ-xi yèhe ìⁿ yaú cùnú víhí nùú cùndècu sácúíhná, te nùndaha tucu-xi ìⁿ cadená cáhnú.

² Te espíritú-áⁿ nǐ tñⁿ-xi quiti dééⁿ nání dràgón, te ñiⁿ-ni quiti-áⁿ cúú-dí mèi yucu ñávàha sá nání sácúíhná, te ñiⁿ xiáⁿ ní nduu-xi cóo ndéé sanaha. Te espíritú-áⁿ nǐ dácútú ñàha-xi xii-di, te ducaⁿ-ni cùndutu-di ndéé xínu úxí cièndú cuía. ³ Te sátá nǐ dácútú ñàha espíritú-áⁿ xii-di te ní dáquèe ñàha-xi xii-di yaú-áⁿ chí ñiⁿ yaú-áⁿ tàú-di quée-di cundecu-di. Te ní nacadí-xi yuyèhe yaú-áⁿ, te ní tee-xi sèyú yuyèhe-áⁿ cuèndá sá và quéné-gã-di dandàhú-di cue ñáyü ñuyú, te xiáⁿ cundedí nihnu-di ndéé xínu úxí cièndú cuía. Te sátá ná yàha úxí cièndú cuía-áⁿ te nandáxi-di te quene-di yaú núú ñuhú-dí-áⁿ caca cuu tnaa-di ìⁿ úú nduu.

⁴ Te dàtnùní ní xiní-í xñutnñi titnì xilé váha, te xiáⁿ xñucóo nchaa ñáyü ní ngúndecu ndihì tñúhu ndee ñní cada ndáá cuèchi nchaa ñáyü, te ní xiní-í xñndecu tñàhá cue ñáyü ní xehndé-güedé dúcúⁿ-xi

cuèndá sá nǐ cáháⁿ-yu tñúhu Yă Ndiöxí, ndihì cuèndá sá nǐ cáháⁿ váha-yu cuèndá Xítóhó Jesucristú. Te ñiⁿ-ni ñáyü-áⁿ cúú-yu ñáyü ñá túú ní chññuhú-yu quiti ní quene xítí làmár-áⁿ, te ní ñà túú ní chññuhú-yu sá nǐ dándácú ñáyü ní natava ñàhá-yu xii-di, te ní ñà túú ní dàñá-yu mèe-yu quée-yu tñuní quiti-áⁿ chí ní tñéé-yu te ní ndàhá-yu ñá túú ní dàñá-yu quée tñuní-di. Te ní xiní-í ní ndoto cue ñáyü-áⁿ cuèndá tñàhá-yu cunúú-yu taxi tñuní-yu ndihì Xítóhó Jesucristú úxí cièndú cuía.

⁵ Te dava ñáyü ní xihí ñá túú ní ndotó-yu, chí ndéé yàha úxí cièndú cuía te dàtnùní ndotó-yu. Te ñáyü ní xiní-í ní ndoto-áⁿ cúú-yu ñáyü ní ndoto díhna nuu. ⁶ Te ío váha ní tñàhá nchaa ñáyü ní nduu táhú nǐ ndoto díhna nuu!, chí cue ñáyü-áⁿ ño cùdñú-yu núú Yă Ndiöxí, te nchaa ñáyü-áⁿ vǎ quihíⁿ-yu núú ùhú núú ndàhú, te ñáyü-áⁿ cúú-yu dútú ndécü-yu núú Yă Ndiöxí ndihì núú Xítóhó Jesucristú, te ñáyü-áⁿ cunúú-yu dàtná cunúú Xítóhó Jesucristú, te cunuu ndihì ñàhá-yu xii-gá úxí cièndú cuía.

⁷ Te sátá ná yàha úxí cièndú cuía-áⁿ te sácúíhná quee-xi núú yñndedí nihnu-xi-áⁿ, ⁸ te ngüíta tucu-xi dandàhú-xi nchaa ñáyü xñndecu nihñi ñuyú, te cuèi ñáyü ñuu Gög, te cuèi ñáyü ñuu Mägóg ducaⁿ quihíⁿ-xi dandàhú ñàhá-xi xii-yu, te datácá-xi nchaa

ñáyiú cuendá nàá-yu, te cuéhé víhĩ-yu dàtná cuéhé ñuhu cúchí làmár. ⁹ Te nchaa ñáyiú-án tñĩ-yu ichi quíhĩⁿ-yu ìⁿ ichi sá cuàháⁿ núú cáá ìⁿ yodo cahnu vihi, te sáá-yu núú xĩndecu ñáyiú cùu cuendá Yă Ndiõxí, te ñáyiú-án chidòcò-yu cue ñáyiú cùu cuendá-gá-án ndihĩ ñuú-yu, te ñuú-án ïo cùu iní-gá, dico mee Yă Ndiõxí dangòyo-gá ñuhú cahmĩ-gá nchaa ñáyiú ducaⁿ chidoco ñaha xii ñáyiú cùu cuendá-gá-án, te nchaa ñáyiú-án cuú. ¹⁰ Te sácuihná sã dúcáⁿ dándahú ñáhá xii ñáyiú chidoco ñàha xii ñáyiú cùu cuendá Yă Ndiõxí-án dàquée ñaha-gã xii-xi núú ñùhú núú ñùhú àzufré càyú-xi, te ñuú-ni xíaⁿ sa ñùhu quiti ní quene xití làmár, ndihĩ téé ní dándahú ñáyiú ní xáhaⁿ-dẽ xii-yu sá càháⁿ-dẽ tnúhu Yă Ndiõxí te ñá ndáá sá càháⁿ-dẽ tnúhu-gá, te xíaⁿ cuhuⁿ-xi ndoho-xi ni caa ni quíhĩⁿ ndihĩ quiti ní quene xití làmár, ndihĩ téé càchí sá càháⁿ tnúhu Yă Ndiõxí te ñá ndáá sá càháⁿ-dẽ tnúhu-gá.

Cùndáá cuéchi ñáyiú

¹¹ Te ní xiní-í nútnĩ ìⁿ xilé váha xilé cuixíⁿ, te núú xilé-án núcõo ìⁿ Yaá. Te ndehe Yaá-án nì ndóñuhú àndiu ndihĩ ñuyíú-a, te ducaⁿ nì ndóñuhú-xi chi vá cùndècu-gá-xi. ¹² Te sáta dúcáⁿ te ní xiní-í nchaa ñáyiú ní xihí ní cùu, ñáyiú cùnuu ndihĩ ñáyiú ñá túú cùnuu xĩnutnĩ-yu núú Yáá núcõo núú xilé váha-án, te Yaá-án cúú-gã Yă Ndiõxí,

te òré-án nĩ nandicá nchaa tutú núú yódó tnùnĩ nchaa nàcuáa ndùu sá nĩ quide ìⁿ ìⁿ ñáyiú-án, te ní nandicá tucu ingá tutú núú yódó tnùnĩ nchaa ñáyiú ní naníhĩ tàhú, te nchaa ñáyiú ní xihí ní cùu xĩnutnĩ-yu núú Yă Ndiõxí cundáá cuéchi-yu, te nchaa nàcuáa ndùu nchaa cuéchi-yu yòdo tnùnĩ núú nchaa tutú-án ducaⁿ cùndáá. ¹³ Te nchaa ñáyiú ní xihí xití ndute làmár, ndihĩ nchaa ñáyiú ní xihí núú ñuhu yìchí nchaa ñáyiú-án cundáá cuéchi-yu nàcuáa ní quidé-yu ìⁿ ìⁿ-yu. ¹⁴ Te vitna te vá cùú-gá ñáyiú chi ñá túú-gã tnúhu xihí, te nchaa ñáyiú ñùhu núú ñùhú núú càyú ñáyiú-án cúú-yu ñáyiú ní xíta nihnu ni caa ni quíhĩⁿ. ¹⁵ Te ducaⁿ chi nchaa ñáyiú ñá túú yòdo tnùnĩ núú túú núú yódó tnùnĩ nchaa ñáyiú naníhĩ tàhú ní dáquée ñaha Yă Ndiõxí xii-yu núú ñùhú núú càyú.

21

Andiu sàa ndihĩ ñuyíú sáa

¹ Te sáta dúcáⁿ te ní xiní-í andiu sàa ndihĩ ñuyíú sáa, te andiu sã ndécú ñhna ndihĩ ñuyíú sã ndécú ñhna ní ndóñuhú-xi, te tnàhá làmár ní ndóñuhú-xi. ² Te yúhú té Juáá ní xiní-í ñuú Jerusàlén sáa nĩ quee-xi núú ndécú Yă Ndiõxí, te ñuú-án cúú-xi ñuú mée-gã, te ïo vii càa chi càa datná cáá ìⁿ ñadihĩ xichí tnàndaha. ³ Te ní tecú dóho-í nihĩ ní càháⁿ ìⁿ sá nĩ càháⁿ andiu, te càchí-xi:

—Chí cùndèdóho ìⁿ tnúhu na càháⁿ-í-a: Yă Ndiõxí ndécú

ndìhi-gá cue ñáyiú vitna, te ducaⁿ-ñá cundecu ndìhi ñaha-gã xii-yu, te diú-yu cùu-yu ñáyiú cùu cuendá-gá, te vá ñáⁿ ndùu ñáⁿ quíú-gã te dañá ñaha-gá xii-yu. ⁴ Te mee Yá Ndiõxí cada-gá sá ñà túú tnàhí-gá ná caní iní-yu cundecú-yu, te ni vã quíní-gá-yu tnúhu xihí, te ni vã quíní-gá-yu tnúhu ndàhyú, te ni vã quíní-gá-yu tnúhu ndìhú iní-xi, te ni vã quíní-gá-yu tnúhu cùhú, chi nchaa sá ñí xiní-yu ñuyúú díhna vá quíní-gá-yu vitna — duha càchí sá ñí cáháⁿ-áⁿ.

⁵ Te Yaá núcõo núú xilè váha-áⁿ ñí cachí tnúhu-gá xii-í, te càchí-gá:

—Yúhú quidè-í nàcuáa nduu saa nchàa sá cundècu vitna. Te vitna chido tnùní-n ñáⁿ núú tùtú nchaa tnúhu sá ñí cáháⁿ-í-a, chi nchaa tnúhu-a cùu-xi tnúhu ndáá cuiti — duha càchí-gá.

⁶ Te dàtnùní ní cachí tnúhu tucu-gá xii-í:

—Sa ní xínu cava nchaa chiúⁿ ní sani iní-í cada-í, te diu-ni yúhú cùu-í Yaá sa ndècu ndéé cùtnàhá ní ngáva ñuyúú, te diu-ni-í cundecu-í ni caa ñí quíhíⁿ. Te nchaa ñáyiú cuíní tuha ñaha xii-í te cada iní-yu sá dàtná ndute cùu-xi sá cuãñaha tãhù-í xii-yu candeca-xi iní-yu ñí caa ñí quíhíⁿ.

⁷ Te nchaa ñáyiú na cùndee iní yáha nándi sá ná yáha-yu sá cuendá-í, te ñáyiú-áⁿ nduu tãhù-yu cundecu váha-yu, te yúhú cuu-í Ndiõxí-yu, te ducaⁿ mèe-yu cuú-yu déhe-í.

⁸ Te nchaa ñáyiú na yúhú

ndoho cuendá-í quíhíⁿ-yu núú ñùhú núú càyú ndìhi ñáyiú ñá túú sàndáá iní ñáhá xii-í, ndìhi ñáyiú quide nándi nchaa sá cuèhé sá dúhá, ndìhi ñáyiú sàhni tnaha, ndìhi ñáyiú ndècu ichi díí ñí, ndìhi ñáyiú quide nduu, ndìhi ñáyiú chihnuhu nchaa sá càchí-yu cùu ndiõxí ní cadúha cue téé ñuyúú-a, ndìhi ñáyiú dàcuandehnde, nchaa ñáyiú ducaⁿ xíquide-áⁿ cuíta nihnú-yu chi quíhíⁿ-yu núú ñùhú núú ñùhú àzufré càyú-xi —duha ní cáháⁿ Yá Ndiõxí ní cachí tnúhu-gá xii-í.

Ñuu Jerusàlén sáá

⁹ Te núú ùsá espíritú xínehe tícùú ñùhú tnúhu ndòho, te ñáⁿ-xi ní quixi-xi te càchí-xi:

—Taqùixi, te na dànehé ñáhà-í xii-n nchàa ñáyiú cùu cuendá Yaá cáá dàtná cáá ñáⁿ mbéé quiti ní dánicuèhé-güedé, ñáyiú-áⁿ cada iní-n sá cùu-yu dàtná ñáⁿ xíchí cuéchí vitna tnándaha, te ducaⁿ càda iní-n sá cùu-yu chi cundecu-yu ndìhi-gá —duha ní cachí tnúhu espíritú-áⁿ xii-í.

¹⁰ Te òré quidé ñaha espíritú Yá Ndiõxí xii-í nàcuáa càchí iní-xi, te espíritú néhé tícùú-áⁿ ndécá ñaha-xi xii-í cuásaá ñáⁿ tìndúú dùcúⁿ, te xíaⁿ ñí dánèhé núú ñáhá-xi xii-í ñuu Jerusàlén te ñuu-áⁿ ñí quee-xi núú ndécú Yá Ndiõxí, te ñuu-áⁿ cùu-xi ñuu mèe-gã. ¹¹ Te ñuu-áⁿ ño càhnu cuu-xi chi ducaⁿ ño càhnu cuu mee-gá, te dátásaⁿ-xi dàtná dátásaⁿ yúú váha sá nání jãspé

yúú cáá dàtná cáá vìdriú sá tũu ingá xio ndàa sátá-xi. ¹² Te ni càndéé yuhu ñùú-áⁿ sũúni dùcúⁿ nchaa sá ñúhú dòco, te nchií úxúú yuyèhe-xi, te ndi tnahá ñⁿ ñⁿ yuyèhe-áⁿ xĩndecu ñⁿ caa espíritú xínú cuèchi núú Yá Ndiõxí. Te ndi tnahá ñⁿ ñⁿ yuyèhe-áⁿ yódó tñuni ñiú ñⁿ caa xichi cue ñáyiú isràél. ¹³ Te úni yuyèhe-xi nchií ndàa xio nacuáa quène nchíanchii, te úni tucu yuyèhe-xi nchií ndàa nacuáa quée nchíanchii, te úni tucu yuyèhe-xi nchií ndàa xio cuha nacuáa quène nchíanchii, te úni tucu yuyèhe-xi nchií ndàa xio datni nacuáa quène tucu nchíanchii. ¹⁴ Te sá ñúhú dòco-áⁿ chi úxúú tnahá yúú cúú cìmentú-xi, te ndi tnahá ñⁿ ñⁿ yúú-áⁿ ndèé ñⁿ caa ñiú cue téé ní cáháⁿ tñuhu Yaá cáá dàtná cáá ñⁿ mbéé quiti ní dánicuehé-güedé, te ñiú mee-gã ní táuchíúⁿ-gã ní cáháⁿ-güedé tñuhu-gá.

¹⁵ Te espíritú sá càháⁿ ndihi ñaha xì-í-áⁿ néhé-xí ñⁿ sá cání ní cuáha mee-ni ñiúⁿ cuááⁿ, te ndihi xĩáⁿ chicùhá-xi ñuú-áⁿ, ndihi sá ñúhú dòco ñuú-áⁿ, ndihi nchaa yuyèhe-xi. ¹⁶ Te ñuú-áⁿ ñⁿ-ni nèhe-xi cuendá quèhéⁿ-xi ndihi cuendá càni-xi, te espíritú-áⁿ ní chicùhá-xi ndihi sá néhé-xí-áⁿ ñuú-áⁿ, te nèhe-xi ócú úú cièndú mĩ mètrú sá cání te ñiú-ni ducaⁿ nèhe-xi cuendá quèhéⁿ-xi, te ñiú-ni ducaⁿ nèhe-xi sá dùcúⁿ nchaa vehe càa ñuú-áⁿ. ¹⁷ Te dàtnùní ní chicùhá-xi sá ñúhú dòco ñuú-áⁿ, te xĩáⁿ néhé-xí ùnídico cúmí mètrú sá dùcúⁿ, te ní

chicùhá-xi dàtná chicùhá cue ñáyiú ñuyúú-a.

¹⁸ Te sá ñúhú dòco-áⁿ ní cuáha mee-ni yúú vaha yúú sá nání jãspé, te ñiú ñuú-áⁿ cúú-xí mèe-ni ñiúⁿ cuááⁿ, te càa datná cáá vìdriú sá ño vaha càndoo te tũu ndàa ingá xio. ¹⁹ Te ndi úxúú yúú cúú cìmentú sá ñúhú dòco-áⁿ ndèé ndí ñiúⁿ núú yúú vii càa sátá-xi, te yúú ñiúⁿ ndèé mee-ni yúú vaha sá nání jãspé sátá-xi, te yúú cúú ùú ndèé tucu ingá núú yúú vaha sá nání zàfirú sátá-xi, te yúú cúú ùní ndèé tucu ingá núú yúú vaha sá nání ägatá sátá-xi, te yúú cúú cùmí ndèé ingá núú yúú vaha sá nání èsmeraldá sátá-xi. ²⁰ Te yúú cúú ùhúⁿ ndèé tucu ingá núú yúú vaha sá nání ònicé sátá-xi, te yúú cúú ñúú ndèé tucu ingá núú yúú vaha sá nání còrnalíná sátá-xi, te yúú cúú ùsá ndèé tucu ingá núú yúú vaha sá nání crìsolítú sátá-xi, te yúú cúú ùná ndèé tucu ingá núú yúú vaha sá nání bèrilú sátá-xi, te yúú cúú ñⁿ ndèé tucu ingá núú yúú vaha sá nání tòpacíú sátá-xi, te yúú cúú ùxí ndèé tucu ingá núú yúú vaha sá nání crìsopásá sátá-xi, te yúú cúú ùxí ñⁿ ndèé tucu ingá núú yúú vaha sá nání jàcintú sátá-xi, te yúú cúú ùxúú ndèé tucu ingá núú yúú vaha sá nání àmatístá sátá-xi. ²¹ Te ndi úxúú yuyèhe sá ñúhú dòco-áⁿ cúú-xí mèe-ni yúú vaha sá nání pèrlá, te nduú ñiú yúú cúú ñⁿ ñⁿ yuyèhe-áⁿ. Te tnuú cáhnú ndècu xití ñuú-áⁿ

cúu-xí mèe-ni díhúⁿ cuááⁿ, te cãa-xi datná cáá vîdriú sá tũ ndaa ingá xio.

²² Te ní xiní-í sá ñà túú vèhe núú chíñũhu ñáyiu Dútú Ndiõxí cáá ñúú-áⁿ, chi mee-nã Dútú Ndiõxí Yáá quidé nchàa-ndi túhú sá vãha ndècu ñúú-áⁿ, ndihí Yáá cáá dàtná cáá ñⁿ mbéé quiti ní dánicuèhé-güedé. ²³ Te ñúú-áⁿ ñà túú-gã xíní ñũhu-xi nchíanchii dayèhé-xi, te ni yóó ñà túú-gã xíní ñũhu-xi, chi mee-nã Yã Ndiõxí dáýèhé-gá ñúú-áⁿ ndihí Yáá cáá dàtná cáá ñⁿ mbéé quiti ní dánicuèhé-güedé. ²⁴ Te cue ñáyiu nchaa ñúú cáá ñùyú, ñáyiu ní naníhí tàhú xIndecu ñúú-áⁿ dáýèhé-gá núũ-yu, te nchaa cue téé yindaha ñaha xii-yu nèhe-güedé sá yíñũhu sá cúu-xí ñúú-áⁿ, te quide cahnu ñaha-güedé xii-gá. ²⁵ Te yuyèhe ñúú-áⁿ ñà túú tnàhí nàndedí, te ñúú-áⁿ ñà túú tnàhí cùndiquíⁿ. ²⁶ Te nchaa ñáyiu nèhé-yu sá yíñũhu sá cúu-xí ñúú-áⁿ te quide cahnú-yu Yá Ndiõxí. ²⁷ Te ñúú-áⁿ vã cúu cùndecu ni ñⁿ ñáyiu ndècu ichi cuehé ichi duha, te ni ñⁿ ñáyiu ndehnde, te ni ñⁿ ñáyiu quide sá ñà túú cùu vãha iní Yã Ndiõxí vã cúu cùndecú-yu ñúú-áⁿ, chi mee-ni ñáyiu naníhí tàhú ñáyiu yòdo tnuní núú tütú Yáá cáá dàtná cáá ñⁿ mbéé quiti ní dánicuèhé-güedé, mee-ni ñáyiu-áⁿ cundecú-yu ñúú-áⁿ.

22

¹ Te sátá dúcáⁿ te diu-ni espíritú-áⁿ ní dánèhé núú

ñáhá-xí xì-í yúte núú ñúhú ndúte candoo canine, te ndute-áⁿ candeca-xi iní ñáyiu ni caa ni quíhíⁿ, te ndute-áⁿ quée-xí mèi núú núcõo Yá Ndiõxí ndihí Yáá cáá dàtná cáá ñⁿ mbéé quiti ní dánicuèhé-güedé. ² Te cuádava tnuú cáhnú yãha xití ñúú-áⁿ cáá yúte-áⁿ, te xio xio yuhu yúte-áⁿ níhnú yùtnu cuuⁿ sávídí-xi, te sávídí nchaa yutnu-áⁿ cúu tucu-xi sá cándèca iní ñáyiu ni caa ni quíhíⁿ, te nchaa yutnu-áⁿ cúuⁿ sávídí-xi úxúú xito ñⁿ cuiá chi ndi tnahá yóó cúuⁿ sávídí-xi, te nchaa ndaha-xi cùu-xi tátna sá cúu-xí nchaa ñáyiu. ³ Te vã yóó ñⁿ-gá cada ñⁿ sá ñà túú cùu vãha iní Yã Ndiõxí ñúú-áⁿ. Chi ñúú-áⁿ núcõo mee Yã Ndiõxí ndihí Yáá cáá dàtná cáá ñⁿ mbéé quiti ní dánicuèhé-güedé xítaxi tnuní-gá, te nchaa ñáyiu xínu cuechi núú-gã cada cahnu ñahá-yu xii-gá. ⁴ Te nchaa ñáyiu-áⁿ cundehe núũ-yu Dútú Ndiõxí, te tneé-yu cundeé diu-gá. ⁵ Te ñúú-áⁿ vã quíní-gá-yu niú, te ni vã cánèhe chiuⁿ-gá-yu ñuhú cutnùní núũ-yu, te ni nchíanchii ñá túú-gã xíní ñũhu-xi dayèhé ñúú-áⁿ chi mee Dútú Ndiõxí dáýèhé-gá, te ni caa ni quíhíⁿ cunúu-yu cundecú-yu ñúú-áⁿ.

Sa ta cùyatni nduu quixi tucu Xítóhó Jesucristú

⁶ Te sátá dúcáⁿ te ní cachí tnúhu espíritú xínu cuèchi núú Yã Ndiõxí-áⁿ xii-í:

—Nchaandi túhú tnúhu-a cùu-xi mee-ni tnúhu ndáá

cuíti. Te Yá Ndiöxí Yáá dácàhu iní nchaa cue téé cãháⁿ tnúhu-gá nàcuáa cãháⁿ-güedé ní tendaha-gã ìⁿ espíritú xínú cuèchi núú-gã ní quixi-xi ní dánèhé-xi nchaa ñáyiu xínu cuechi núú-gã nchaa nàcuáa cada-gá, te vá cùyàa-gá ducaⁿ càda-gá —duha càchí espíritú-áⁿ.

7 Te ní cãháⁿ Xítóhó Jesu-crístú, te càchí-gá:

—Ío ndìhi quixi tucu-í!

’íTe ío váha tnahá nchaa ñáyiu tnì nchaa tnúhu cãháⁿ Yá Ndiöxí yódó tnùní núú tütú-a! —duha càchí-gá.

8 Te yúhú té Juáá ní tecú dóho-í nchaa nàcuáa ní ngódó tnùní núú tütú-a, te ní xiní núú-í nchaa nàcuáa cada-xi ndéé cuéé-gá. Te sátá dúcáⁿ nì cuu te ní ngüíñí xítí-í núú espíritú sá nì dánèhé núú ñáhá nchaa xíãⁿ cuendá chĩñuhu-í-xi ní cùu. 9 Te ní cachí-xi:

—Vá dúcáⁿ càda-n, chi yúhú dicó xínú cuèchi-í núú Yá Ndiöxí dátáa cúu yòhó ndìhi nchaa dava-gá ñáyiu ndècu ndìhi-n ichi-gá cãháⁿ-ndó tnúhu-gá, ndìhi nchaa ñáyiu tnì nchaa tnúhu ndéé núú tütú-a, te xíãⁿ càchí-í sá vá dúcáⁿ càda-n, chi mee Yá Ndiöxí ducaⁿ chĩñuhu-n-gá —càchí espíritú-áⁿ xii-í.

10 Te ní cachí tnúhu tucu-xi xii-í, te càchí-xi:

—Vá chídãhu-n nì ìⁿ tnúhu Yá Ndiöxí ndéé núú tütú-a, chi sa ní cuyatni cada-xi nchaa nàcuáa ndéé tnuní. 11 Te dañá sã ncháá ñáyiu ndècu ichi cuehé ichi duha na cùndecu-ní-yu ichi-áⁿ,

te ducaⁿ-ni dàña-n nchaa ñáyiu quide nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sãni iní-yu, te nchaa ñáyiu quide váha te ducaⁿ-ni na càda váha-yu cundecú-yu, te nchaa ñáyiu quide nchaa nacuáa cùu váha iní Yá Ndiöxí te ñu-ni ducaⁿ na càdá-yu cundecú-yu —duha càchí espíritú-áⁿ.

12 Te ní cachí Xítóhó Jesu-crístú:

—Cundedóho-n tnúhu na cãháⁿ-í-a. Ío ndìhi quixi tucu-í, te canehe-í nchaa sá ndúú tãhú ñáyiu quixi, te nàcuáa ndùu chiuⁿ ní quidé-yu ìⁿ ìⁿ-yu te ducaⁿ cùnduu sá cuãñaha-í nduu tãhú-yu. 13 Te yúhú cúu-í Yáá sa ndècu ndéé cùtnahá ní ngáva ñuyú, te ñu-ni-í cundecu-í ni caa ni quíhíⁿ —duha càchí-gá.

14 Te váha tãhú nchaa ñáyiu sa ní nduu ndoo ní nduú nine iní-xi, chi ñáyiu-áⁿ nì nduu tãhú-yu quíhu-yu xítí ñuú-áⁿ, te caxí-yu sávidí yutnu nùtní-áⁿ te xíãⁿ candeca-xi iní-yu ni caa ni quíhíⁿ. 15 Te ñuú-áⁿ vá cúu quíhu ni ìⁿ ñáyiu ndècu ichi cuehé ichi duha, ni cuè ñáyiu quide nduu, te ni cuè ñáyiu ndècu ichi díí iní, te ni cuè ñáyiu sãhni tnaha ñáyiu-xi, te ni cuè ñáyiu chĩñuhu nchaa sá nì cadúha cue téé ñuyú-a càchí-yu cùu ndiöxí, te ni cuè ñáyiu tnahá iní dacuãndehnde, te ni ìⁿ ñáyiu ducaⁿ xíquide vá ndúú tãhú-yu quíhu-yu xítí ñuú-áⁿ.

16 Te ní cáháⁿ tucu Xítóhó Jesucrístú, te cächí-gá:

—Yúhú Xítóhó Jesucrístú ní tendaha-í espíritú xínú cuèchi núù-í cuendá cachí tnúhu-xi xii-n nàcuáa ndùu tnúhu cúñaha-n xii nchaa ñáyiú ndècu ndihí-n ichi-í dácuaàhà tnúhu-í ìⁿ ìⁿ ñuú. Te yúhú cúù-í mei ñàni tnáhá ndii Dàvíí, te cada iní-n sá cúù-í dàtná ìⁿ chódíní quiti quène datneé —duha cächí-gá.

17 Te nchaa ñáyiú cùu cuendá Xítóhó Jesucrístú Yaá cáá dàtná cáá ìⁿ mbéé quiti ní dánícuèhé-güedé, diu-ni ñáyiú-áⁿ cúù-yu ñáyiú cada iní-ó sá cúù-yu ìⁿ ñadìhí xíchí tnándaha ndihí ñaha xii-gá, te ñáyiú-áⁿ ìⁿ-ni càháⁿ-yu ndihí Espíritú Yá Ndiöxí, te xäháⁿ-yu ndihí Espíritú-gá xii nchaa dava-gá ñáyiú:

—Chí táquìxi —cachí-yu xäháⁿ-yu ndihí Espíritú Yá Ndiöxí.

Te nchaa ñáyiú ducaⁿ ndèdóho tnúhu-áⁿ vitna, te xini ñuhu-xi ducaⁿ cáháⁿ-yu tnáhá-yu cúñáhá-yu xii nchaa dava-gá ñáyiú-áⁿ, te nchaa ñáyiú cuini tuha ichi-gá te na quixí-yu, te dicó

ducaⁿ cùu táhü-yu sá cándèca iní-yu ni caa ni quíhíⁿ.

18 Te nchaa nchòhó ñáyiú ndèdóho nchaa nàcuáa càháⁿ tnúhu Yá Ndiöxí ndéé núú tütú-a càháⁿ-í dóho-ndo. Te núu ìⁿ ñáyiú na còdo-gá tnúhu chido tnùní-yu núú tütú-a, te Yá Ndiöxí ío dandòho ñaha-gá xii-yu chi yáha-yu nchaa tnúndòho yodo tnuní núú tütú-a te núu ducaⁿ na cádá-yu. 19 Te núu ìⁿ ñáyiú na chidáhu dava tnúhu Yá Ndiöxí ndéé núú tütú-a te ñáyiú-áⁿ vǎ ndúú táhü-yu cundecú-yu ñuú-gá, te ni vǎ ndúú táhü-yu sá cándèca iní-yu ni caa ni quíhíⁿ dàtná yódó tnùní núú tütú-a.

20 Te Xítóhó Jesucrístú Yaá càháⁿ sá ncháá tnúhu-a cùu-xi tnúhu ndáá ní cáháⁿ-gá ní tecú dóho-í, te cächí-gá:

—Ndáá sá ío ndihí quixi tucu-í —duha cächí-gá.

Te yúhú ní xáhaⁿ-í xii-gá:

—Ducaⁿ na cùnduu, taquìxi yohó Xítóhó Jesucrístú —duha ní xáhaⁿ-í xii-gá.

21 Te Xítóhó Jesucrístú ío na chindee chitúu ñaha-gǎ xii-ndo ncháa-ndo. Te ducaⁿ na cùnduu. Te ío chí cádá ndèe iní-nǎ vitna.